


णमोऽस्तु णं समणस्स भगवओ णायपुत्त-महावीरस्स

चरिमतिथयर-पंचमगणहर-सुहम्मायरियविरहम्

सुत्तागमे

तथ णं

एक्कारसंगसंजुओ पढमो अ



Philchandra's Mahārāj

Vol-I

5360

JP r 2

Phu

Puppha bhikkhu

पुष्पभिक्षुणा संपादितो

जइणथाणग'रेल्वेरोड'गुरुगामछावणीपुव्वपंचालत्यसिरिपुत्तागमपगास-
गसमिइमंतिणा 'बाबू रामलाल जैन' इच्चणेण पगासमाणीओ व ।
वीरसंवच्छरं २४७९ } विक्रमवरिसं २००९ { काइहुइं १९५३
पढमा आविती } पईणं सहस्सं { सुहं २५

MUNSHI RAM MANOHAR LAL

SANSKRIT & HINDI BOOKSELLERS

21, BAKHSHI, DELHI

प्रकाशक-बाबू रामलाल जैन नायब तहसीलदार
मंत्री-श्रीसूत्रागमप्रकाशकसमिति
जैनस्थानक, रेल्वे रोड, गुडगाँव-छावनी
(पूर्वपंजाब)

CEN LIBRARY, NEW DELHI.
Acc. No. 5360...
Date. 31/12/56.
Call No. JPr 2/Phu.

सर्वाधिकार समिति द्वारा सुरक्षित

मुद्रक—

लक्ष्मीबाई नारायण चौधरी, निर्णयसागर प्रेस,
२६१२८ कोलमाट स्ट्रीट, मुंबई नं. २

समप्पणं

किवाणु मम मणस्स चवल्या नट्ठा, जेसिमुवप्सेण मज्झंतकुरणे संतिसंचारो

ओ, जाणमब्भुअचरित्तजोगेण संपदाइगयावंधणुमूलणनिच्छयं पत्तो, जेसिं

बोहवयणेहिं भखंडभत्तसुहसम्पो ल्हो, जेसिमसरनणुगाहुं वच्छुच्छा-

हदाणेण मंह छेहणकलाए पडंती जांवा, जेसि णं धारणाविवहारिणिसारं

पयासणमिणं वट्टए, तेसिमज्झप्पसत्थाणुराइअप्पडिअद्विअरिअ-

वइ निक्कामपरोवयारिसंतमुदभब्बुद्धारगमहारिसिपवरयचिरपय-

विभूसियणायपुत्तमहावीरजइणसंघाणुयाइगयसगापरम-

पुज १०८ तिरिजइणमुणिफकीरचंदमहारायाणं

पुणीयसमरणे हिययविसुद्धभत्तिपुब्बर्ग एक्का-

रसंगसंजुयमेयं सुत्तागमपढम-

अंसं समप्पिणोमि ।

पुप्फमिक्खु

Mrs. M. S. Ravi Manohar Lal, Delhi

जमोऽत्यु णं समणस्स भगवओ णायपुत्त-महावीरस्स

कृतज्ञताप्रकाश

जिसप्रकार स्थापत्यकलाकोविद अपनी मस्तिष्क शक्तिका उपयोग करके मालिकके आदेश-निर्देशमें तत्पर होकर एक सुंदर प्रासादका निर्माण करता है उसी भाँति मेरे अन्तेवासी प्रशिष्य आयुष्मान् 'जिणचंदभिक्षू' ने अपनी विनयता, मृदुता, भक्ति-वैयावृत्त्य-सेवातत्परता, दक्षता और प्राकृतविज्ञानकलामर्मज्ञता आदि सद्भावनाओंमें तन्मय होकर 'सुत्तागमे' के प्रकाशन संबंधी कार्य तथा प्रूफसंशोधनादिकी सेवाका सहयोग देकर ज्ञातपुत्र महावीर भगवान्की शासनसेवा, और जिनवाणीकी भक्तितत्परता द्वारा खूब ही साथ दिया है। भला इस कीमती सेवा के मृदु संस्मरणोंको कैसे भुलाया जासकता है। मैं इस मूल्यवान् सेवाकी बड़ी कदर करता हूँ। आखिर मनुष्य दो प्रकारके ही तो होते हैं एक उपकार करनेवाला और दूसरा उपकारज्ञ !

पुष्पभिक्षू

प्रकाशकीय

१. आजके इस वैज्ञानिक युगमें जहां मनुष्यने विज्ञानके द्वारा नई २ व्यवहारो-
पयोगी वस्तुओंका आविष्कार किया है वहां महान् से महान् संहारक अणुबम
जैसे शस्त्रोंका भी । यह सब किसलिए ? मेरी सत्ता समस्त संसार पर छा जाए,
मैं ही सबका प्रभु हो जाऊँ, एक ओर तो शस्त्रोंकी होड़में एक देश दूसरे देशसे
आगे निकल जाना चाहता है तब दूसरी ओर आधुनिक जनता का अधिक भाग,
युद्धको न चाहकर शांतिकी झंझना करता है परन्तु शांति शस्त्रोंके बलबूते पर
किए गए युद्धोंसे नहीं मिल सकती शांतिका वास तो आध्यात्मिकतामें है भौतिक-
तामें नहीं और ज्ञातपुत्र महावीर भगवान्के द्वारा प्रतिपादित आगम
आध्यात्मिकतासे भरपूर हैं, उस आध्यात्मिकताके प्रसारके लिए ज्ञातपुत्र महावीर
जैनसंघानुयायी उग्रविहारी जैन मुनि १०८ श्रीफूलचंद्रजी महाराज की विशुद्ध
प्रेरणासे समितिने आगमोंके प्रकाशनका कार्य अपने हाथमें लिया है जिसका
प्रथम फल आपके सन्मुख है । ३२ सूत्रोंको 'सुत्तागम' के रूपमें एक ही
जिल्दमें देनेकी उत्कट इच्छा होते हुए भी ग्रंथराजका देह-सूत्र बढ़ जानेसे
११ अंगोंका प्रथम अंश अलग बनाना पड़ा । इसके प्रकाशनमें जिन २ महानु-
भावोंने प्रत्यक्ष या परोक्ष रूपमें किसी भी प्रकारकी जिनवाणीकी सेवा की है
उनका हम हार्दिक आभार मानते हैं, साथ ही सूत्रोंके निकले हुए अलग २
प्रकाशनों पर जिन २ मुनिवरोंने अपनी २ शुभ सम्मतिएँ भिजवाई हैं हम उनके
अनुग्रहीत हैं और सहधर्मी महानुभावोंसे निवेदन है कि वे इस पवित्र कार्यमें
सहयोग देकर हमारे उत्साह को बढ़ाएँ ।

हम हैं जिनवाणीके सेवाकांक्षी,

प्रधान—मास्टर दुर्गाप्रसाद जैन B. A. B. T.

मंत्री—बाबू रामलाल जैन नायब तहसीलदार

सुत्तागमे पर लोकमत

(नं. १) “श्रीपुष्पभिक्षु द्वारा सम्पादित ‘आचारांग’ का मैंने भली भाँति अवलोकन किया है, धर्मोपदेष्टाजीका यह प्रयास प्रशंसनीय है, संपादन बहुत ही सुंदर बना है, विशेषतः स्वाध्यायप्रेमियोंके लिए इस शैलीसे अन्य सूत्रोंका भी संपादन हो। मुद्रणकलाकी दृष्टिसे भी रमणीय रहा है, आगमप्रेमी सज्जनगण इस प्रयासमें अधिकसे अधिक सहयोग देकर जिनवाणीका प्रचार करेंगे।”

पूज्य श्रीपृथिवीचंद्रजी महाराज, आगरा (लोहामंडी)

(नं. २) “श्रीधर्मोपदेष्टाजी द्वारा संपादित ‘आचारांगसूत्र’ मैंने ध्यानपूर्वक देखा है, संपादनकी शैली सुंदर और युगानुकूल है, स्वाध्यायप्रेमियोंके लिए और साधु-साध्वियोंके लिए यह संस्करण बहुत ही उपयुक्त सिद्ध होगा। मुद्रणकलाकी दृष्टिसे भी प्रस्तुत ग्रंथ बड़ा रमणीय दीख पड़ता है, शुद्धिपर काफी ध्यान रक्खा गया है, आचारांग का प्रस्तुत संस्करण समाजमें अधिकाधिक स्थान ग्रहण करे, यही हार्दिक अभिलाषा है, पुस्तक मुझे पसंद है।”

कविरत्न, उपाध्याय श्रीअमरचंद्रजी महाराज, जैनमुनि कुंदनभवन व्यावर

(नं. ३) “यह लघुपुस्तिका लघु होते हुए भी परमोपयोगी है, नित्यपाठ करनेवालोंके लिए यह नित्यकी सहायिका है, इसका प्रकाशन भी बहुत सुंदर हुआ है। इस प्रेमोपहारके लिए जैनमुनि पं. श्रीहेमचंद्रजी महाराजने आपका और पायपुत्तमहावीरजइणसंघाणुआई लहुअम पुष्पभिक्षु का शतशः धन्यवाद किया है और हार्दिक कृतज्ञता प्रगट की है, तथा मुनिश्रीको सन्नेह सुखसाता पूछी है।”

समाना मंडी पटियाला (पंजाब)

भगवानदास ब्रजलाल जैन बजाज

(नं. ४) “मैंने श्रद्धेय मुनि श्रीफूलचंद्रजी महाराज द्वारा संपादित आचारांगसूत्रके प्रथमश्रुतस्कंध के मूल संस्करण को देखा, इसे पढ़कर मैं अत्यधिक आनंदित हुआ, इस प्रकार के सुंदर प्रकाशन के लिए मुनिश्री धन्यवाद के पात्र हैं।”

श्रीमान् श्रद्धेय प्रवर्तक स्वामीजी श्री श्री हजारीमलजी म. जैन स्थानक

(नं. ५) “जैनधर्मोपदेष्टा उग्रविहारी पं. मुनिश्री फूलचंद्रजी महाराज से संपादित होकर प्रकाशित मूल आचारांग सूत्रके प्रथम श्रुतस्कंधको देखकर मुझे बहुतही हर्ष हुआ, इस संस्करणके मूलपाठ बहुत शुद्ध हैं, अपने परिश्रममें मुनिश्री बहुत सफल बने हैं।”

जैन न्याय साहित्यतीर्थ तर्कमनीषी पं. मुनिश्री मिश्रीमलजी
म. (मधुकर) प्रेषक धूलचंदजी महता व्यावर

(नं. ६) “सुत्तागमे (आयारे) पुस्तक पहुंच गई, यह उनकी बहुत कृपा है; उनको महाराज साहिब कोटि कोटि धन्यवाद करते हैं और अर्ज करते हैं कि और कोई पुस्तक अगर आपने छपवाई हो तो कृपा करके भेजें।”

गणावच्छेदक मुनिश्री रघुवरदयालजी महाराज
प्रेषक तेलूराम जैन रईसेआज़म, जालंधर-छावनी (पू. पंजाब)

(नं. ७) “आचारांग सूत्र” जैसी पूर्ण बत्तीसी सूत्ररूपसे निकले, स्वाध्याय करनेवालोंके लिए बड़ी उच्चकोटीकी वस्तु होगी, ऐसा श्रीमुनि हीरालालजी म. ने फर्माया है।”

लालभवन जयपुर

(नं. ८) “तमारा तरफथी सुत्तागमे ए नामनुं पवित्र आगम आचारांगजी नो प्रथम भाग मूलपाठे सम्पादक भिक्खु फूलचंदजी महाराज! सदरहु पुस्तक तमोए रवाना करेल ते अमोने गई काले मल्यो छे अने ते महाराज श्रीशामजीस्वामी ने आपेल छे, पुस्तकनी शुद्धि अने व्यवस्थित जोई महाराजश्री एण खुशी थया छे।”

शा. मोहनलाल रतनजी कच्छ मांडवी

(नं. ९) जैन जगतके सुप्रसिद्ध पर्यटक एवं जैन धर्मोपदेष्टा श्री पुष्पभिक्षु द्वारा संपादित सूत्रकृतांगसूत्रका मूलसंस्करण देखकर महती प्रसन्नता हुई। मूलपाठका शुद्धरूप उत्तम संपादन और नयनाभिराम प्रकाशन, वस्तुतः आजके युगमें सर्वतोभावेन आदरणीय है।

स्वाध्याय प्रेमी विद्वानोंके लिए यह प्रयत्न बहुत ही स्तुत्य प्रयत्न है। इस दिशामें श्रीपुष्पभिक्षुका यह सत्प्रयास चिरस्मरणीय रहेगा। मूल आगमों के प्रकाशनकी उनकी योजनाकी मैं हृदयसे सफलता चाहता हूँ। सर्वसाधारण जनताके लिए बड़े काम की वस्तु है।

शंकरलाल वाटिका

१६ मई १९५१

ब्यावर

मुनि 'अमर'

(नोट) आपका पूरा नाम जगद्विख्यात कविरत्न, उपाध्याय, मुनि श्री १०८ श्री अमरचंद्रजी महाराज है।

(नं. १०) श्रीमान् श्रद्धेय मुनिश्री हजारीमलजी महाराज तथा पंडित मुनिश्री मिश्रीमलजी (मधुकर) महाराज की सम्मति

“आचारांग” की तरह ‘सूत्रकृतांग’ का प्रकाशन भी बहुत सुंदर हुआ है। स्वाध्याय रसिकोंके लिए यह प्रकाशन बहुत उपयोगी सिद्ध होगा।

जैनधर्मोपदेष्टा उग्रविहारी पंडित मुनिश्री फूलचंद (पुष्पभिक्षु) का आगम-साहित्यकी दिशामें यह सत्प्रयत्न हृदयसे अभिनंदनीय है। आशा है जैनसमाज मुनिश्री की इस विराट् आगमसंपादन योजनाका उदार हृदयसे स्वागत करेगा। हम मुनिश्रीके इस स्तुत्य प्रयासकी हार्दिक सफलता चाहते हैं।

प्रेषक श्रीधूलचंदजी महता ब्यावर

(नं. ११) “मैंने पंडितरत्न, मधुर व्याख्याता उग्रविहारी अनथक प्रचारक जैन धर्मोपदेष्टा मुनिश्रीफूलचंद्रजी महाराज द्वारा संपादित सूत्रकृतांग सूत्र सुतागमरूप पुस्तकाकार देखा। संपादकने इसमें पाठोंकी शुद्धि, उपकरणमें हलका तथा मुद्रणकलाकी दृष्टिसे सुंदर व्यवस्थित छपाई आदिका विशेष ध्यान रक्खा

है, अतः स्वाध्याय प्रेमियोंके लिए विशेष उपयोगी है । संपादक शतशः धन्य-
वादके पात्र हैं, क्योंकि सुत्तागम प्रकाशनरूप जिनवाणीकी अनथक रूपसे आप
उपासना कर रहे हैं । मुझे यह भी आशा है कि आगे इसी प्रकार निर्विघ्नतया
सेवा करते रहेंगे ।”

मुनि प्रेमचंद, मानसा (E. P.)

(नं. १२) “श्रीयुत पंडितरत्न, सुत्तागम संपादक, जैनधर्मोपदेष्टा, ‘पुष्प-
भिक्षु’ द्वारा संपादित **ठाणांग** सूत्र देखा, जिसमें पाठशुद्धि, भारमें हलका
और सुंदर छपाई आदिका ध्यान संपादकका खूब रहा है । इस नई शैलीके
प्रकाशनको देखकर प्रत्येक व्यक्ति यह खुले दिलसे कह सकता है कि गागरमें
सागरकी उक्ति साफ चरितार्थ है । मुझे पूरा संतोष तब ही होगा जब पूर्ण
आगम बत्तीसी सुत्तागमरूपेण प्रकाशित होगी । संपादक और सहायक शतशः
धन्यवादाई हैं ।”

निवेदक मुनि प्रेमचंद मानसा (E. P.)

(नं. १३) श्रीमान् पूज्यवर जैनधर्मोपदेष्टा वीरशासन प्रभाकर विद्यावारिधि,
धर्मेनायक, पुष्पभिक्षू सादर स्नेहसुधासिक्त अनेक वंदन ! और आँगलभाषा
विशारद सुमित भिक्षुको सुखशान्ति वृच्छा । आपश्री का सुत्तागमे सूत्रोंके मूल-
पाठका संपादनका सुंदर कार्य जैन समाज पर, विशेषकर मुनि और साध्वीवर्ग पर
महान उपकारी है । आपने समाजके लिए यह अपूर्व अवसर दिया है । आपका यह
मंगलकार्य महान स्तुत्य है । मेरी चिरकालीन अभिलाषा साकार हो उठी । क्योंकि
मेरी यह प्रबल इच्छा थी कि जिस प्रकार चार वेद हैं इसी प्रकार हमारे ३२
सूत्रोंका चार भागोंमें प्रकाशन हो । पहला मूलपाठके रूपमें, दूसरा शब्दार्थके
रूपमें, तीसरा भावार्थके रूपमें और चौथा संस्कृतच्छाया तथा नई टीकाओंके
रूपमें । मूलपाठ सुंदर अक्षरोंमें पुस्तकाकार हो । जैसे कुरान बाइबल ग्रंथसाहब
आदि पाए जाते हैं । इसके उपरांत अंग्रेजी, जापानी, चीनी और फ्रेंच आदि
पाश्चात्यभाषाओंमें भी अनुवाद हों । आपने तो मेरी सैकड़ों मीलकी दूर रही
भावनाको जानकर यह मंगलकार्य बंबई नगरमें रह कर आरंभ किया है, मुझे तो
ठीक यही भास हो उठा है । ठीक भी है क्योंकि मनको मनसे राहत होती है ।

हे ज्योतिर्धर ! वैसे तो आपके जीवनका प्रत्येक अमूल्य क्षण प्राणीमात्रके हित
और जैनसमाजके उत्थानमें व्यतीत हुआ है । आपने भगवान् ज्ञातपुत्र महावीर
प्रभुकी पवित्र वाणीको भारतवर्षके कोने कोनेमें पहुंचाकर सभ्य जनसमाज को
सुनाया है । अपनी मधुर और ओजस्वी वाणी द्वारा पत्थर दिलोंको दयाके

पानीसे पिघला दिया है। कितने ही पशुओंकी बलिवेदीके अड्डोंको उखाड़ फेंका है। हजारों मूक प्राणिओंके प्राणोंको मौतके घाट उतरनेसे बचाया है। धन्य है आपके विश्व वत्सल जीवन को, इस क्रूर हिंसाकी भयावह अंधियारी निशामें आप जैसे भिक्खु ही दयाके प्रकाशमान उड्डुपति हैं तथा लाइट ऑफ मिनार हैं। आपने अहिंसाके ऊंचे ध्वजको फहराया है यानी देशके बड़े बड़े नगरोंमें दयाधर्मके झंडेको हाथमें लेकर भ्रमण किया है। जैसे कश्मीर, कराची, कलकत्ता, झरिया, कानपुर आदि २ और अबकी बार विभवपूर्ण और सौंदर्य-सम्पन्न कुबेरनगरीके समान बंबई नगरमें जैनधर्मकी विजयपताका लहरा रहे हैं।

इतनी दूर जाकर वीरशासनकी सेवा करना अपनी उपमा आपही है। अस्तु !

मेरी तो शासनदेवसे यही प्रार्थना है कि आप दीर्घायु हों ! और आपने जो जैनागम प्रचारका शुभसंकल्प किया है इस भगीरथ कार्यमें आपको महान सफलता मिले और तीर्थंकर पदके भागी बनें। यद्यपि आपके पावन दर्शनका अवसर मुझे नहीं मिला तब क्या मैं यह आशा कर सकता हूं कि चतुर्मासके बाद इधर पधार कर दर्शनाभिलाषा पूरी करेंगे ? क्योंकि आपके मनोहर और क्रांतिकारी उपदेश सुनने को दिल बहुत चाहता है और जो २ सूत्र प्रकाशित हों उन्हें भिजवानेकी कृपा करें आपकी बड़ी महरबानी होगी। भूलके लिए क्षमा !

प्रेषक
सेक्रेटरी S. S. जैन सभा }
मूनक (पेप्सू)

आपका प्यारा दास
मुनि भागचंद

(नं. १४) श्री १००८ श्री गणावच्छेदक श्रीरघुवरदयालजी महाराज के पास अपना भेजा हुआ सूत्रकृतांग सूत्र मिला। “संपादन” सुंदर है। धर्मोपदेष्टा श्रीमूलचंदजी महाराजके परिश्रमका यह फल है। आपकी परिश्रमशीलताको देखकर कौनसा मानव है जो आपकी स्तुति न करे। आप जैन साहित्यका कार्य करके अपने जीवनका चरमलक्ष्य पूरा करेंगे। जिसके लिए आपने कदम उठाया है। महाराज श्री आपको धन्यवाद देते हैं।

निवेदक

५-१०-५१ लाला अछरूमल जैन रईसेआज़म

चौक कसेरान

पटियाला (E. P.)

(नं. १५) ता. २०-९-५१ श्रीमान् बाबू रामलालजी साहब !

जय जिनेंद्र ! आपका इरसाल करदह श्री आचारांग सूत्र तथा सूत्रकृताङ्ग सूत्र मोसूल हुए। मुलाहिजा श्री १००८ श्रीबहुसूत्री पंडितरत्न श्रीमुनि नरपतरायजी महाराजने अत्यन्त प्रसन्नता प्रगट की। नीज मुनि श्री फूल-चंद्रजीके इस प्रयासकी अति प्रशंसा करते हैं और फर्माते हैं कि यह कार्य जो उन्होंने आरंभ किया है भगवान् उनको सफलता दे।

संघ सेवक

मदनलाल जैन

फर्म-वंसीलाल बनारसीदास जैन
होशियारपुर E. P.

(नं. १६) मेवाड़भूषण पूज्य श्री १००८ श्रीमोतीलालजी महाराज फर्माते हैं कि “आपकी तरफसे ‘सुत्तागमे’ सूर्यगडे नामकी किताब मिली। पूज्यश्रीके नज़र(मेंट)करदी गई। पूज्यश्रीने फर्माया है कि पुस्तक बड़ी ही सराहनीय है। आपने बड़े परिश्रमके साथ आगमोद्धार करना आरंभ किया है। आपको हार्दिक धन्यवाद है।”

कालूराम हरकलाल जैन
कपासन (मेवाड़)

(नं. १७) “आपका भिजवाया हुआ (ठाणांग-समवायांग-मूल सूत्र दो प्रतिएँ) बुक-पोष्ट लाला परसराम जैन खत्री द्वारा हमें प्राप्त हुआ है। एतदर्थ समहान धन्यवाद ! ये महान् अनमोल रत्न भिजवाकर हमें कृतार्थ किया है और भविष्यके लिए आशा करते हैं कि इसी प्रकार अन्य अनमोल रत्न भी भिजवाकर अनुग्रहीत करते रहेंगे। पुस्तककी छपाई-शुद्धता-सुंदरता-लघुता-आकार-प्रकार सब कुछ वैसा ही है जैसा मैं चाहता था, मानो मेरे विचारोंको समझकर ही आपने प्रकाशित करानेका प्रयत्न किया हो। यह संस्करण स्वाध्यायपरायण लघुविहारी मुनिराजोंके लिए परमोपयोगी है।”

रोपड़ १-९-१९५२ }

भवदीय
मुनि फूलचंद्र (श्रमण)

(नं. १८) “श्रद्धेय धर्मोपदेष्टाजी जो आगमोंका संशोधित मूलपाठ प्रकाशित करवा रहे हैं इसकी परमावश्यकता थी, इस दिशाकी ओर बहुत कम विद्वान

મુનિઓના ધ્યાન ગયા હૈં. આ ભગીરથ કાર્યકે લિએ શ્રીધર્મોપદેષ્ટાજીના જૈનસમાજ સદૈવ હી આભારી રહેગા ।”

કવિરાજ શ્રીચંદનમુનિ,
મુ० ગીદહબહા મંડી E. P.

(નં. ૧૯)...શ્રી ૧૦૦૮ શ્રીરઘુવરદયાલજી મ૦ ઠા० ૬ સુખશાંતિસે વિરાજમાન હૈં, આપકે મેજે દો સૂત્ર પ્રાપ્ત હુએ, વે અતિ સુંદર છપાઈ સફાઈ કાગજાદિ સબ દ્રષ્ટિસે વિદ્વાનોંકે લિએ મહતોપયોગી હૈં । આપકા કાર્ય કેવલ પ્રશંસાકે યોગ્ય હી નહીં બલકિ આદર્શ ઔર આચરણકે યોગ્ય હૈં ઔર નિઃશુલ્ક મિજવાકર તો અપને સમાજ પર અપની અતિ ઉદારતાના પરિચય દિયા હૈં અતઃ. આકે લિએ કોટિ ૨ ધન્યવાદ !

તા. ૧-૧-૫૨ } મંત્રી S. S. જૈનસભા.
માલેરકોટલા. E. P.

(નં. ૨૦) શ્રી આંબાજી સ્વામીએ આપને બહુમાનથી વંદના કરી સુખ-શાંતા પુછાવેલ છે. આપે ભગવતી સહિત સાત સૂત્રો છુટક છુટક કરી મોકલ્યા તે સાતે પુષ્પો મળ્યા છે. તે સહર્ષ સ્વીકારી લીધા છે । તમો શાસ્ત્રોદ્ધારનું કામ કરી જૈનસમાજની સેવા બજાવી રહ્યા છો. તે ઘણું ઇચ્છવા યોગ્ય કામ છે. તમોએ તથા ત્યાંની સમિતિના કાર્યકર્તાઓએ સૂત્રાનુવાદ ગુજરાતી અને હિંદી તથા કાવ્યોમાં બનાવવાની ભાવના પ્રદર્શિત કીધી છે એ અતિસુખ છે.

પોરબંદર તા० ૧૦-૧-૧૯૫૨.

(નં. ૨૧) તમારા તરફ થી માગધીભાષામાં આપના શાસ્ત્રની પુસ્તિકાઓ મોકલી તે મળી છે. ‘સુત્તાગમે’ તેની બે જુદી ૨ મળી છે. આપ આ જ્ઞાનોદ્ધારક શાસ્ત્રોદ્ધારને માટે કાર્ય કરો છો તે માટે એમના મંત્રીશ્રીને શ્રેયસ્કર ધન્યવાદ છે. એ પ્રકાશન જગત્પયોગી છે. એ આપની પરોપકારી ભાવનાને ધન્યવાદ ઘટે છે.

પોરબંદર તા. ૩૧-૮-૫૨

મુનિશ્રી આંબાજી સ્વામી

(नं. २२) जैन मुनि श्रीश्री हजारीमलजी महाराज व पं. मुनिश्री मिश्रीमलजी (मधुकर) महाराज की सम्मति

“स्थानांगसूत्रके दोनों अंश और समवायांगसूत्र हमने पढ़े। आचारांग और सूत्रकृतांगकी तरह ये प्रकाशन भी बहुत सुंदर निकले हैं। इन आगमोंके सम्पादनमें जैनधर्मोपदेष्टा उग्रविहारी मंत्री मुनि श्रीफूलचंद्रजी महाराजने जो परिश्रम उठाया है वह अत्यन्त प्रशंसाके योग्य है। स्वाध्यायप्रेमियोंके लिए मुनिश्रीका यह प्रयास बहुत सफल सिद्ध हो रहा है।

भावना तो यह है कि आगेके प्रकाशनभी बहुत शीघ्र हमारे हाथोंमें आजाएँ।”
 प्रेषक—गजमल विरधीचंद तातेड़ मु० पो० विजयनगर (अजमेर)

(नं. २३) मुनि श्रीफूलचंद्रजी म. द्वारा संपादित ‘सुत्तागम’ अंतर्गत आचारांग-सूत्रकृतांग-ठाणायंग और समवायांग पुस्तक नंग ४ मेंट मिलीं। ‘सुत्तागमे’ की उपरोक्त पुस्तकें स्वाध्याय योग्य होनेसे स्वाध्याय करके अतिप्रमोद प्राप्त हुआ है। जिज्ञासु और स्वाध्याय करनेवालों के लिए यह बहुत उपयोगी साधन है। विजय-ढायरी पढ़नेसे मालूम हुआ है कि ‘सुत्तागमप्रकाशकसमिति’ (गुडगाँव पंजाब)ने आगमप्रचारविषयक योजना विशाल रक्खी है। यदि सुत्तागमकी तरह सौ १०० भाषाओंमें श्रीश्रमण भगवान महावीरस्वामी द्वारा निर्दिष्ट जगज्जंतुकल्याणक अनेकान्त स्याद्वादगर्भित जैनसिद्धान्त का प्रतिदेश प्रतिप्रान्त और प्रतिघरमें प्रचार हो तो इसके सिवाय दूसरा पुण्यकार्य क्या हो सकता है। यह धर्मप्रचारकी सर्वोपरि योजना है, यह कहते हुए हमें हर्ष होता है। जैनसमाजके श्रीमान् विद्वानोंका और श्रीमान् लक्ष्मीनंदनोंका इसमें पूरा साथ हो तो कार्य जल्दी सुचारुरूपसे हो सकता है अतः दोनों उदार बनें।

जामजोधपुर ता. ३१-८-५२ शुभेच्छुक जैन भिक्षु गन्बुलालजी म०

(नं. २४) आपकी ओरसे सूत्रोंका बुकपोस्ट मिला, मेवाड़ भूषण. चतुर्मास-विहारमंत्री श्री १००८ मोतीलालजी म. की सेवामें प्रस्तुत किया. उत्तरमें फर्माया है कि आपको हार्दिक धन्यवाद है, आप बड़े परिश्रमपूर्वक शास्त्रोद्धार कर रहे हैं आपका शास्त्रोद्धार सराहनीय है। ऐसा परिश्रम करके

शास्त्रोद्धार करनेवाले विरले मुनि हैं। आपको जितनी उपमा दी जायँ थोड़ी हैं। आपश्री चतुर्विध संघके लिए बड़ा ही सराहनीय कार्य कर रहे हो। ऐसा कार्य करने ही से समाजमें ज्ञानप्रचार व शास्त्रोद्धार हो सकता है, थोड़ेसेमें बहुत समझें। श्रीमान्-श्रावक संघका पैसा भी सदुपयोगमें लग रहा है। श्रावकसंघको चाहिए कि ऐसे कार्यमें कंजूसी न करते हुए द्रव्यका इसके प्रचारमें सदुपयोग करें जिसमें सबका कल्याण समाया हुआ है।

ता० ३१-७-१९५२

आपका भँवरलाल जैन, खमनौर

(नोट) इनके अतिरिक्त और बहुतसी सम्मतिएँ ग्रंथ बढ़नेके भयसे नहीं दे रहे। आपने इन पृष्ठपटोंपर अंकित सम्मतिओंसे यह तो जान ही लिया होगा कि ये प्रकाशन कैसे हैं। वैसे तो सब संप्रदायोंके मुनिओं और महासतिओंकी ओरसे सूत्रोंकी मांगें धड़ाधड़ आती रहती हैं, अर्थात् सूत्रोंका प्रचार आशासे अधिक हो रहा है। इसी प्रकार ३२ आगमोंकी यथासमय मुनिओं और महासतिओंके करकमलोंमें पहुँचाकर समिति अपना ध्येय पूरा करनेका प्रयत्न करेगी। समिति यही चाहती है कि हमारे मुनिगण प्रकाण्ड विद्वान् बन कर जिनशासनका उत्थान करें।

मंत्री

सूयणा

इकारसंगाइमिमाइमम्ह धम्मंगुरूण गरिमजियमेरूण साहुकुलचूलामणीण अहिल-
 सगुणखणीण चत्तअदत्तकलत्तपुत्तमित्ताण पसंतचित्ताण अग्गिक्ख उग्गतवतेयदित्ताण
 पोम्मं व अलित्ताण पागयजणमुच्छाविहाणनियानविसयगामविरयाण पंचविहायार-
 निरइयारचरणनिरयाण भवोयहितारणतरंडाण अण्णाणतमोहपयंडमायंडाण मोहेभ-
 निवारणवरंडाण पासंडिमाणसेलमद्दणवज्जदंडाण वाउरिव अपडिबद्धाण तवसिरिस-
 मिद्धाण सम्मअवगयजिणमयसम्मयसुहुमयरवियारसयलभवसिद्धियलोयहिययंगमाण
 सुसंजयपंचपमियतरलयरकरणतुरंगमाण दुज्जयअणंगमायंगभंगसारंगपुंगवसरिच्छाण
 अक्खुवं सुयणंबुद्धबोहणअण्णाणमोहतिमिरभरहरणधम्मज्जोयकरणिकत्तल्लिच्छाण दुह-
 तरुउम्मूलणेक्खवरपवणाण चरित्तणाणदंसणफललुद्धमुणिदसउणमेरुवणाण सारयस-
 लिलं व सुद्धमाणाण पाविंधणोहहुयासणाण संसारणवमज्जंतजीवमणतारणसमत्थवो-
 हित्थाण अदिक्ख धीरिमापडिहत्थाण जिणपवयणगयणनिसायराण मेराणाणचरणाइ-
 निम्मलगुणरयणरयणायराण नियसुद्धुवएस देसणाणिण्णासियभव्वजन्तुजायजीवियभू-
 यसम्मदंसणासाणपच्चलसिच्छादंसणुग्गगरलाण दुज्जणदुव्वयणपवणवाए वि अतर-
 लाण विसयसुहनिप्पिवासाण मुक्कणिहवासपासाण दूरपरिचत्तविइगिच्छाअरइरइमीइ-
 हासाण मित्तसत्तुजणजुम्मसमाणमणोविलासाण नवविहवंभचेरुत्तिसम्मसंरक्खणेक्कप-
 रायणाण दुक्कम्मदइच्चनिवहविद्धंसणनारायणाण **सुत्तत्थविसारयाण** जिणधम्म-
 पसारयाण मरालुव्व परगुणखीरगहणदोसंबुविवज्जणवियक्खणाण कयलक्कायर-
 क्खणाण खं व अणप्पकुवियप्पसंकप्पसुणाण खंतिमुत्तिअज्जवमद्वलाघवाइपुणाण
 धरामंडलव्व सव्वसहाण भवदुक्खायवसंतत्तपंथिसंतिदायगदहाण चंदणवर्णं व
 सुसीयलाण जसच्छाइयधरणीयलाण कंदप्पदप्पदलणिक्कमल्लाण नीसल्लाण नियनिरुव-
 मवयणकलारंजियसयललोगाण सव्वहा निम्ममयाए निरासीकयसोगाण आइच्चुव्व
 तेयसा फुरंताण धम्मुव्व मुत्तिमंताण जियतिजयदप्पकंदप्पमत्तगयवियडुक्कंभयड-
 दलणसीहाण निरीहाण जिणगणहरसमणुच्चिण्णसम्ममग्गाणुयाईण निहिलागमपार-
 याईण परजियपियहियमियकुडभासीण सयलगुणरासीण माणावमाणपसंसणिंदण-
 लाहालाहसुद्धुहसमाणमणसाण अंसुमालिक्ख फेडियदुम्मइतमसाण संतिमुत्तीण
 सियकितीण जीवुव्व अप्पडिहयगईण जिणपवयणाणुसारमईण अमयनिग्गमुव्व
 सोमसहावाण महापहावाण पंचाणणुव्व दुप्पधंसणिज्जाण सयलजणाभिगमणिज्जाण
 सासणपभावगाण जीवे सम्मग्गे ठावगाण जम्मजरमरणक्कल्लोललोलजलपडलपुण्ण-

विविहमहायंकसमुल्लसंतललक्षणकचक्रअणवरयविसप्पिरोगसोगमयराइभीमभवण-
 वाउ भव्वे धम्मदोणीतारणसमद्वुकुसलकणधाराण धीरधुरधवलुव्व उव्वहिय-
 दुव्वहपंचमहव्वयगुरुभाराण उदहिविव गहीराण मोहमल्लिकवीराण पावदावगिग-
 नीराण दुरियरयसमीराण जिणधम्मरहसुसारहीण धम्मकहीण तिगुत्तिवग्गवसीक-
 यदुट्टमणस्साण अवगयदुग्गमसिद्धंतरहस्साण अपसत्थासवदारनिरोगाण बहुभव-
 जणसमाजबोहगाण जिईदियाण धम्मपियाण पंचविहसज्झायविहिविहाणविहावण-
 सावहाणाण अहिलजगज्जंतुजायवियरंतअभयदाणाण भवजलहिवुडुंतजंतुसंतरण-
 अणहवरजाणाण भवभयचारयबंधणविच्छेयनिमित्तसत्ताणाण समतिणमणिहेडु-
 कंचणाण छड्डियमयतण्हावंचणाण अण्णाणतिमिरावरियअन्तरणयणजणताविइण-
 तदुग्घाडणारिहतव्विमलयाहेउपरमणाणंजणाण संखुव्व निरंजणाण कम्ममहीरुहकु-
 मइलउप्पाडणगईदाण परतिथियमियमईदाण कासकुसुमालिनिम्मलजसभरपरिभरिय-
 भुवणयलाण दारिदुमदवानलाण सोमुव्व सोम्मयागुणगरिट्ठाण सव्वसाहुजणपगिट्ठाण
 सीहुव्व असंखोहाण आहिवाहिउवाहिकसायगिगउलहवणमेहसंदोहाण वज्जियलोह-
 नियडिमयकोहाण पणट्टसंपदायपक्खवायमोहाण अण्णाणंधयारावडियदावियमुत्ति-
 मग्गाण गयसग्गाण किं बहुणा सव्वसाहुगुणोवमाजुत्ताण ससहरुव्व विबुहजणम-
 णचओरामंदार्णददायगभव्वहिययकेरववियासगनियसियसुजसजुण्हाधवलियदियंतर-
 अण्णउत्थियचक्रविहडणपयडमहप्पपावकलंकवंकत्तणमुत्ताण अजपरमपुज्जाण वंदणि-
 जाण ४ सिरि १०८ सिरिफकीरचंदमहारायाण धारणाववहाराणु-
 सारं वट्टंति जइ मे पयासेण कस्स वि किंचि वि लाहो होहिइ तो सपयत्तसाहल्लं
 मणिस्सं, दिट्ठिमुद्गणक्खरजोजगदोसा कहिंपि कावि असुद्धी होउ सोहिजउ, पेसि-
 जउ ससम्मई, इमाण सज्झायं कट्ठु बुहा निराबाहं सुहं पाउणंतु ति ।

गुरुपयंबुसहदुरेहो-पुष्पभिक्षू

सूचना

यह प्रकाशन मेरे धर्मगुरु धर्माचार्य साधुकुलशिरोमणि १०८ श्रीफकीर-
 चंद्रजीमहाराज (स्वर्गीय) के धारणाव्यवहारानुसार है, यदि कोई दृष्टि-
 मुद्रणादि दोष हो तो स्वाध्याय प्रेमी सज्जन सुधारकर पढ़ें । यदि इस प्रयत्नसे
 मुमुक्षुओंको ज्ञानसाधनाका लाभ मिला तो परिश्रम सफल समझकर सन्तोष
 होगा । इन अंगसूत्रोंका अहर्निश स्वाध्याय करते हुए वे निराबाध सुख प्राप्त करें ।
 मुनिगण अपनी सम्मति समितिको भेजें ।

गुरुचरणचंचरीक

पुष्पभिक्षू

प्रस्तावना

इस अनादि अनंत संसारमें आत्माने अनन्त बार जन्म मरण किए हैं परन्तु अपने स्वरूपको भूलकर विभाव-परपरिणतिमें रच पचकर कर्मवश होकर अनन्त-अनन्त दुःख सहन करता रहा है। यद्यपि सुखको पानेके लिए अनेक प्रकारके पापड़ बेल्ता है लेकिन अबतक उसे वह सच्चा और टिकाऊ सुख नहीं मिल सका है कि जिसके द्वारा संसृतिके सब दुःखोंसे नितान्त छुटकारा पालेता, परन्तु धर्म पुरुषार्थके बिना वह सुख कहाँ? **‘धर्मात्सुखं’** धर्मसे सुख मिलता है, सुखके पानेमें धर्म कारणभूत है, तब कारणके बिना कार्य कैसे संपन्न हो सकता है। साथ ही यह भी स्मरण रहे कि धर्मपुरुषार्थ ही मोक्षका वास्तविक मार्ग है जिसके मुख्य तीन प्रकार सर्वज्ञों द्वारा प्रतिपादित हैं, वे हैं सम्यग्ज्ञान, सम्यग्दर्शन और सम्यक्चरित्र। शरीर और मनके दुःखोंसे छुटकारा दिलाने वाला यही रत्नत्रय समर्थ साधन है। इस रत्नत्रयमें ‘पदमं नाणं तओ दया’ के अनुसार सम्यग्ज्ञानकी प्रधानता है। मोहरूपी महा अंधकारके समूहको नष्ट करनेमें ज्ञान सूर्यके समान है। इष्ट वस्तुको प्राप्त करानेमें ज्ञान कल्पवृक्ष है। दुर्जय कर्मरूपी हाथीको पछाड़नेमें ज्ञान सिंह जैसा है। ज्ञानके अभावमें मुँहपर दो आंखें होनेपर भी वह अन्धके सदृश है। ज्ञानके भी पांच प्रकार हैं जिनमें ‘श्रुतज्ञान’ बड़े ही महत्वकी वस्तु और परोपकारी है। केवली भगवान्का केवलज्ञान उनके स्वयंके लिए लाभदायक है औरोंके लिए नहीं वे भी श्रुतज्ञानके द्वारा ही जगतके असंख्य भव्य-जीवोंको प्रतिबोध देकर महान् उपकार करते हैं। लेकिन श्रुतज्ञानकी भी दो विधियाँ हैं जिन्हें सम्यक्श्रुत और मिथ्याश्रुत कहते हैं। सम्यक्श्रुतके भी अनेक भेद हैं जिनमें वर्तमान समयमें केवल ३२ आगम ही उपलब्ध हैं और जो १४ पूर्वीय श्रुतज्ञान महान् समुद्रके समान था उसका काल दोषसे इस समय विच्छेद हो चुका है। यह हमारे मंदभाग्य ही का कारण है, तो भी ये वर्तमानिक आगम आजके सत्साहित्यके मूल स्रोतके समान हैं। इन्हीं स्रोतों द्वारा हमारा साहित्य अमर विभूति प्राप्त है। साहित्य वह वस्तु है जो प्रत्येक धर्म और राष्ट्रका प्राणभूत होता है। जिसका अपना निजीसाहित्य न हो वह धर्म मृतकके समान है।

जैनसाहित्यमें आगमोंका स्थान—यों तो जैनसाहित्य अन्य साहित्योंकी अपेक्षा अत्यन्त विशाल है। कोई ऐसा विषय नहीं है जिसपर जैनसाहित्यको की लेखनी न उठी हो, परन्तु उसमें भी आगमोंका स्थान सर्वोच्च है। या यों कहिए

कि ये आगमसूत्र जैनसाहित्यके लिए प्राणभूत हैं। इन आगमों का सहारा लेकर बड़े २ विद्वानोंने नाना प्रकारकी उत्तमोत्तम रचनाएँ की हैं। इससे यह पाया पड़ता है कि ये हमारे पवित्र आगम जिनशासनरूपी कल्पवृक्षके दृढ़तम मूल हैं।

आगम रचयिता—जिस समय तीर्थंकर भगवान् चारों तीर्थोंकी स्थापना करते हैं उस समय द्वादशांगीके बीजभूत महत्त्वपूर्ण तीन वचनोंका प्रकाश गण-धरोंके सन्मुख करते हैं, उस उत्पाद व्यय और ध्रौव्यरूप त्रिपदीके द्वारा गण-धरदेव द्वादशांगीकी रचना करते हैं * वर्तमानसमयमें जो ३२ आगम उपलब्ध हैं वे सब ज्ञातपुत्र महावीर भगवान्के सदुपदेशोंसे भरपूर होनेके कारण हमारे लिए अक्षय कोषके समान हैं।

वर्तमान आगमोंका इतिहास—भगवान् महावीर प्रभुके निर्वाणसे ९८० वर्ष तक उस समयके साधु साध्वियों सम्पूर्ण सिद्धान्त-आगमोंको अपनी तीक्ष्ण-बुद्धिके कारण कण्ठस्थ रखते रहे। वे दिन रातमें १२ घण्टे तक उनका स्वाध्यायके रूपमें परावर्तन किया करते थे † इसके पश्चात् कालदोषसे स्मरणशक्तिमें कमी आ जानेके कारण जहाँ तहाँ स्खलना पड़ने लगी। कहा जाता है कि उस समयके विद्यमान आचार्य देवर्द्धिगणि क्षमा-श्रमणने इस कमीको महसूस किया 'जिन-शासनकी रक्षा प्रत्येक प्रकारसे करनी चाहिए और शासनकी रक्षा सिद्धान्तकी रक्षा करनेसे ही हो सकती है, इस उद्देश्यसे उन्होंने आगामी भव्यलोकोंके उपकारके लिए वीरसंवत् ९८० विक्रमसंवत् ५११, तदनुसार ई. सन् ४५४ में वल्लभी नगरीमें तत्कालीन समस्त जैनमुनियोंको एकत्रित किया ‡ जिसे जितना याद था सुना और फिर उस महान् ज्ञानको यथाक्रम पुस्तकारूढ़ किया। उस सम्मेलनके बाद मूलरूपसे गणधर भाषित होनेपर भी सब आगमोंके संकलयिता देवर्द्धिगणि क्षमाश्रमण ही समझे जाने लगे, उदाहरणके लिए श्रीभगवतीसूत्र श्रीसुधर्मचार्य प्रणीत है और प्रज्ञापनासूत्र भगवान् महावीर प्रभुके निर्वाणके ३३५ वर्ष बाद श्रीश्यामाचार्य द्वारा संकलित किया गया पर भगवती में कई स्थलोंपर 'जहा पणवणा' ऐसा पाठ

* अर्थ सासङ्ग अरिहा, सुतं गंधंति गणहरा निउणं। † पडिक्कमामि चउकालं सज्झा-यस्स अकरणयाए; अथ च उत्तराध्ययने समाचारी नाम षड्विंशतितमे अध्ययने प्रथमा समाचारी स्वाध्यायरूपी स्थापिता येन ज्ञानस्य विसरणं न भवेत्। ‡ इतना और सरण रहे कि इससे पहले पाटलीपुत्र का सम्मेलन और नागार्जुनक्षमाश्रमणके तत्त्वावधानमें माथुरीवाचना हो चुकी थी। देखो 'आगमोंकी भाषा' का प्रकरण।

मिलता है। इसी भांति और अंगोंमें भी उपांगोंकी साक्षियां पाई जाती हैं, अर्थात् अमुक उपांगोंसे समझ लेना चाहिए। इससे यह स्वयंसिद्ध है कि देवर्द्धिगणि क्षमाश्रमण वर्तमान आगमोंके संकलयिता थे, उन्होंने लिपिबद्ध करते समय पाठोंमें साम्य देखकर समयका अपव्यय न हो इसलिए ऐसा किया। आगमोंको पुस्तकारूढ़ करके उन्होंने जैन समाज पर जो महान् उपकार किया है उसे कभी भी नहीं भुलाया जा सकता।

एक आगमका उसी आगममें निर्देश—आगमोंमें प्रस्तुत आगमका प्रस्तुत आगममें भी निर्देश पाया जाता है, जैसे समवायांगसूत्रमें १२ अंगोंके वर्णन में समवायांगका भी वर्णन है, यही क्रम और आगमोंमें भी मिलता है, इसका कारण आगमोंकी प्राचीन शैली है, यही प्राचीन प्रवृत्ति वेदोंमें भी पाई जाती है। जैसे “सुपुणोंऽसि गरुत्मौ स्त्रिवृत्ते शिरौ गायत्रं चक्षुर्वृहद्रथन्तरे पृक्षौ स्तोमं आत्मा छन्दाश्चक्षुःश्रुति यजूंषि नाम।”

जैनसाहित्यपर नई २ आपत्तियाँ—जिसकालमें बौद्धों और जैनोंके साथ हिंदुओंका महान् संघर्ष था उस समय धर्मके नाम पर बड़े से बड़े अत्याचार हुए, उस अंधड़में साहित्यको भी भारी धक्का लगा, फिर भी जैनसमाजका शुभ उदय समझें या आगमोंका माहात्म्य। जिससे आगम बाल २ बच्चे और सुरक्षित रहे। परन्तु बड़ों पर आपत्तियाँ आया ही करती हैं। इसके अनन्तर चैत्यवासियोंका युग आया, उन्होंने चैत्यवादका जोर शोरसे आंदोलन किया और अपनी मान्यताको मजबूत करनेके लिए नई २ बातें घड़नी शुरू कीं, जैसे कि अंगूठे जितनी प्रतिमा बनवा देनेसे स्वर्गकी प्राप्ति होती है, जो पशु मंदिरकी ईंटें ढोते हैं वे भी देवलोक जाते हैं, आदि २। वे यहां तक ही नहीं रुके बल्के उन्होंने आगमोंमें भी अनेक बनावटी पाठ घुसेड़ दिए। जिस प्रकार रामायणमें क्षेपकोंकी भरमार है उसी प्रकार आगमोंमें भी। इसके बाद युगने करवट बदली और उसी कटाकटीके समय धर्मप्राण लोकाशाह जैसे क्रान्तिकारी पुरुष प्रगत हुए। उन्होंने जनताको सन्मार्ग सुझाया और उसपर चलनेकी प्रेरणा दी। चैत्यवासियोंने तो उनको अनेक कष्ट दिए पर वे कहां टससे मस होनेवाले थे। ‘**धम्मो मंगलमुक्किट्ठं०**’ गाथा पढ़कर और चैत्यवासियोंमें आचार विचार संबंधी शिथिलता देखकर उन्होंने वह आवाज उठाई कि जिससे लोगोंमें क्रांति और जागृति उत्पन्न हुई तथा लवजी धर्मशी धर्मदासजी जीवराजजी जैसे भव्य-भावुकोंने धर्मकी वास्तविकताको अपनाया और उसके स्वरूपका प्रचार आरंभ

किया । परिणाम स्वरूप आज भी उनकी प्रेरणाओंको जीवित रखनेवालोंकी संख्या ५ लाखसे कहीं अधिक पाई जाती है । लोकाशाह सहित इन चारों महापुरुषोंने चैत्यवासी मान्य अन्य आगमोंमें परस्पर विरोध एवं मन घड़न्त बातें देखकर ३२ आगमोंको ही मान्य किया ।

आगमोंकी भाषा—समवायांग सूत्र तथा औपपातिकसूत्रमें क्रमशः पाठ आते हैं “भगवं च णं अद्धमागहीए भासाए धम्ममाइक्खइ” “तए णं समणे भगवं महावीरे कूणियस्स रण्णो भिंसिसारपुत्तस्स”..... अद्धमागहाए भासाए भासइ । “सा वि य णं अद्धमागहा भासा तेसि सत्वेसिं आरियमणारियाणं अप्पणो सभासाए परिणामेणं परिणमइ” अर्थात् ज्ञातपुत्र-महावीर भगवान् अर्धमागधी भाषामें उपदेश करते थे और वह भाषा सब जीवोंकी अपनी २ भाषामें परिणत होती थी । उनके पांचवें गणधर श्रीगुधर्मा स्वामीने द्वादशांगीकी रचना भी अर्धमागधीमें ही की । दिगंबरोंके मतसे ये १२ अंग विच्छिन्न हो चुके हैं परन्तु अपने मतानुसार जैसा कि पहले लिखा जा चुका है देवर्द्धिगणि क्षमाश्रमणने आगमोंको लिपिबद्ध किया । इतने समयके बाद लिखे जानेपर भी भाषाकी प्राचीनतामें कमी नहीं आई । क्योंकि सैकड़ों वर्षोंतक जैसे ब्राह्मणोंने मुखपाठके द्वारा वेदोंकी रक्षा की उसी प्रकार जैन मुनिओंने भी लगभग १००० वर्ष पर्यन्त शिष्य परम्परासे इन पवित्र आगमोंको स्मृतिपथमें रक्खा । दूसरा कारण यह है कि जैन धर्ममें शुद्धपाठोच्चारण पर खूब जोर दिया गया है, और ‘हीणक्खरं’ आदि अतिचार बताए गए हैं । फिर भी बारीकीसे देखनेपर यह अवश्य मानना पड़ेगा कि चाहे जैसे भाषामें परिवर्तन ज़रूर हुआ है । इसका होना असंभव भी नहीं कहा जा सकता, क्योंकि आगम वेदोंकी भान्ति शब्द-प्रधान न होकर अर्थ-प्रधान हैं । ये सूत्र उस समयकी जनसाधारणकी कथ्यभाषामें निर्मित हुए और समयानुसार बोलियों (लोकभाषामें) होनेवाले परिवर्तनका प्रभाव लोगोंके समझानेके लिए आगमोंपर भी होना आश्चर्यजनक नहीं । इसका एक मुख्यकारण यह भी है कि ज्ञातपुत्र-महावीर भगवान् के मोक्ष जानेके लगभग २०० वर्ष पीछे, ई. स. पू. ३१० चंद्रगुप्तके समयमें मगधमें १२ वर्षका भयानक अकाल पड़नेके कारण मुनिओंको संयम निभानेके लिए दक्षिण देशमें जाना पड़ा और परावर्तन

१ देखो ‘एनुअल रिपोर्ट ऑफ एशियाटिक सोसायटी बेंगल’ १८५८ डॉ. हॉर्नेली का लेख ।

न कर सकनेके कारण उन्हें भूल से गए। उसके बाद पाटलीपुत्रमें संघ एकत्र हुआ और जिसे जितना याद था सुनकर ११ अंगोंका संकलन किया गया। अर्धमागधीमें मगधके आसपासके प्रदेशोंकी भाषाओंकी अपेक्षा ब्रह्म महाराष्ट्रकी भाषाका जो अधिक साम्य देखा जाता है उसका कारण भी यही है। इतिहास द्वारा यह भी सिद्ध है कि पुराने समयमें जैनधर्मका दक्षिणमें भली भांति प्रचार हुआ था, तब यह अनुमान असंगत नहीं हो सकता कि दुर्भिक्षकालमें मुनिवर्ग दक्षिणमें न गया हो, तद्देशीय भाषाज्ञानके बिना प्रचार सम्यक्तया नहीं हो सकता, अतः उसका प्रभाव कंठस्थ आगमोंकी भाषा पर भी पड़ा, इसके द्वारा प्रभावित बहुतसे मुनि पूर्वोक्त सम्मेलनमें पधारे, इसलिए अंगोंके संकलनमें भी इसका थोड़ा बहुत असर पड़ा। उससे लगभग ८०० वर्ष बाद थोड़े २ अंतरसे मथुरा और वल्लभीमें आगमोंको पुस्तकारूढ़ करनेके लिए साधुसम्मेलन हुए, जिनमें सब प्रान्तोंसे मुनि आए, जिनके मुखस्थ सूत्रोंपर तत्तत्प्रदेशोंमें बहुत समय तक विचरनेसे उस देशकी भाषा, उच्चारण आर व्याकरणका कुछ न कुछ प्रभाव अंकित था। यही कारण है कि अंगोंमें एक ही अंगके भिन्न २ भागोंमें और कहीं २ एक ही वाक्यमें भाषाभेद दृष्टिगोचर होता है। इस प्रकार भाषापरिवर्तनके बहुतसे कारणोंके उपस्थित होनेपर भी पाटलीपुत्रके सम्मेलनके बाद बिल्कुल अथवा अधिक परिवर्तन न होकर मात्र थोड़ा बहुत भाषा-भेद ही हुआ और अर्धमागधीके सैंकड़ों प्राचीन रूप अपने स्वरूपमें सुरक्षित रह सके, इसका श्रेय अशुद्ध उच्चारणके लिए पापबंधके धार्मिक नियमको है जो कि सम्मेलनके पीछे और भी मजबूत किया गया। वर्तमान आगमोंमें कहीं २ जो पाठ-भेद मिलते हैं उनका कारण उपरोक्त वाचनाएँ हैं। समवायंग औपपातिक वैयाख्या-प्रज्ञप्ति और प्रज्ञापनासूत्र तथा बँहुतसे प्राचीन ग्रंथोंमें जिसे अर्धमागधी कहा

१ देखो स्वविरावलिचरित्र सर्ग ९ श्लो. ५५ से ५८ तक। २ देवा णं भंते ! कयराए भासाए भासंति ? कयरा वा भासा भासिज्जमाणी विसिस्सति ? गोयमा ! देवा णं अद्ध-मागहाए भासाए भासंति, सा वि य णं अद्धमागहा भासा भासिज्जमाणी विसिस्सति । ३ से किं तं भासारिया ? भासारिया जे णं अद्धमागहाए भासाए भासंति । ४ ! आरिस-वयणे सिद्धं, देवाणं अद्धमागहा वाणी । (काव्यालंकारकी नमिसाधु कृत टीका २, १२) !! सर्वाधर्मागधीं सर्वभाषासु परिणामिणीम् । सर्वपां सर्वतो वाचं, सार्वशीं प्रणिदध्महे ॥ (वाग्भट्टकाव्यानुशासन पृ० २) !!! अकृत्रिमस्वादुपदां, परमार्थाभिधायिनीम् । सर्व-भाषापरिणतां, जैनीं वाचमुपासहे ॥ (स्वोपज्ञ काव्यानुशासन, हेमचंद्राचार्य)

गया । स्थानींगसूत्र तथा अनुयोगद्वारमें जिसे 'इसिभासिया' कहा गया है और इसीके आधारपर हेमचंद्राचार्य आदिने इसका नाम 'आर्ष' रक्खा अर्थात् अर्धमागधी ऋषिभाषिता और आर्ष तीनों एक ही बात हैं । पहला नाम उत्पत्ति स्थान तथा अन्य उस भाषाको सर्वप्रथम साहित्यमें स्थान दायकोंसे संबंधित हैं । हेमचंद्राचार्यने अपने बनाए हुए प्राकृत व्याकरणमें आर्षके जो लक्षण तथा उदाहरण बताए हैं उनसे और 'अत एत् सौ पुंसि मागध्यां' (हे.प्रा.४-२८७) इस सूत्रकी व्याख्यामें जो "यदपि पोरौणमद्धमागहभासानिययं हचइ सुत्तं" इत्यादिना आर्षस्यार्धमागधभाषानियतत्वमाम्नायि वृद्धैस्तदपि प्रायोऽस्यैव विधानात् न वक्ष्यमाणलक्षणस्य" ऐसा कहकर उसके अनन्तर जो 'कयरे आगच्छइ' 'से तारिसे जिइंदि' के उदाहरण दिए हैं उनसे उक्त बात भली भांति सिद्ध हो जाती है, डॉक्टर हर्मन जेकोबीने जैनागमोंकी भाषाको प्राचीन महाराष्ट्री कहकर 'जैन महाराष्ट्री' नाम दिया है । जिसका डॉ. पिशालने अपने विख्यात प्राकृत व्याकरणमें खंडन करके सप्रमाण सिद्ध किया है कि अर्धमागधीमें बहुलतासे ऐसी अनेक विशेषताएँ हैं जो महाराष्ट्री आदि किसी प्राकृतमें ढूँढ़नेसे भी नहीं मिलतीं । इसलिए उपरोक्त नाम नहीं दिया जा सकता । नाटकोंमें जो अर्धमागधी पाई जाती है उसमें और सूत्रोंकी अर्धमागधीमें समानताकी अपेक्षा अत्यधिक भेद है । भरत मार्कण्डेय और क्रमवीधरने अर्धमागधीके भिन्न २ लक्षण बताए हैं, लेकिन वे केवल नाटकीय अर्धमागधीके लिए हैं । हेमचंद्राचार्यने अपने व्याकरणमें अर्धमागधीको 'आर्ष प्राकृत' और अर्वाचीन रूपको महाराष्ट्री माना है । इससे यह सिद्ध होता है कि महाराष्ट्रीसे अर्धमागधी बहुत प्राचीन है । अथवा यों कहिए कि अर्धमागधी ही महाराष्ट्रीका मूल है ।

१ सकृता पागता चैव, दुहा भणितीओ आहिया । सरमंडलमि गिज्जंते, पसत्था इसिभासिता । २ सकाया पायया चैव, भणिईओ होति दोण्णि वा । सरमंडलमि गिज्जंते, पसत्था इसिभासिया ॥ ३ देखो हेमचंद्राचार्यका प्राकृतव्याकरण सूत्र १-३ । आर्षो-त्थमार्षतुल्यं च द्विविधं प्राकृतं विदुः । (काव्यादर्श टीका १-३३ में प्रेमचंद्र तर्कवागीशद्वारा उद्धृत पद्यांश) ॥ ४ डॉ. हॉर्नलीने चंड कृत प्राकृत लक्षणके इंट्रोडक्शन पृ. १८-१९ में हेमाचार्यके मतमें पोरण आर्ष प्राकृतका नाम लिखा परंतु वह बिल्कुल गलत है, कारण यह सूत्रका विशेषण है भाषाका नहीं । ५ इंट्रोडक्शन डू प्राकृत लक्षण ऑफ चंड पृ. १९ डॉ. हॉर्नली ।

अर्धमागधीकी संगत व्युत्पत्ति—बहुतसे लोग इसकी व्युत्पत्ति ‘अर्धमागध्याः’ करते हैं अर्थात् जिसका आधा अंश मागधी भाषा हो वह अर्धमागधी है, क्योंकि नाटकीय अर्धमागधीमें मागधीके लक्षण बहुलतासे पाए जाते हैं इसलिए वह अर्धमागधी है और जैनसूत्रोंमें मागधीके लक्षण बहुत कम मिलते हैं इसलिए वह अर्धमागधी नहीं। परन्तु उनकी यह व्युत्पत्ति भ्रमात्मक एवं असंगत है। इसकी वास्तविक व्युत्पत्ति है ‘अर्धमगधस्येयं’ अर्थात् मगधदेशके अर्धांशकी जो भाषा हो वह भाषा अर्धमागधी है। इसकी उत्पत्ति पश्चिम मगध अथवा मगध और शूरसेनका मध्यप्रदेश (अयोध्या) होनेपर भी इसमें मागधी और शूरसेनीके इतने लक्षण नहीं दिखते जितने महाराष्ट्रीके। इसका कारण पहले लिखा जा चुका है, दुष्काल और मुनिओंका दक्षिण गमन एवं तद्देशीय भाषाका प्रभाव।

अर्धमागधी और महाराष्ट्रीमें भेद—(१) अर्धमागधीमें दो स्वरोंके मध्यवर्ती असंयुक्त ‘क’ के स्थानमें प्रायः सर्वत्र ‘ग’ और बहुतसी जगह ‘त’ और ‘य’ होता है। जैसे—लोक=लोग, आकाश=आगास आदि। ‘त’ सामाङ्क=सामातित इत्यादि। ‘य’ शोक=सोय, कायिक=काइय आदि।

(२) दो स्वरोंके बीचका असंयुक्त ‘ग’ प्रायः कायम रहता है, जैसे भगवन्=भगवं, आनुगामिक=आणुगामिय वगैरह। ‘त’ अतिग=अतित, ‘य’ सागर=सायर आदि।

(३) दो स्वरोंके बीचके असंयुक्त ‘च’ और ‘ज’ के स्थानमें ‘त’ और ‘य’ दोनों होते हैं। जैसे रुचि=रुति, वचस्=वति, लोच=लोय आदि। ‘ज’ के स्थानमें ‘त’ जैसे ओजस्=ओत, राजेश्वर=रातीसर इत्यादि। ‘ज’ के स्थानमें ‘य’ आत्मज=अत्तय, कामध्वजा=कामज्झया आदि।

(४) दो स्वरोंका मध्यवर्ती ‘त’ प्रायः कायम रहता है और कहीं २ ‘य’ भी होता है, जैसे कि जाति=जाति; ‘य’ करतल=करयल प्रभृति।

(५) स्वरोंके बीचमें स्थित ‘द’ का ‘द’ और ‘त’ ही अधिकांश देखा जाता है, कहीं २ ‘य’ भी होता है, जैसे—प्रदिशः=पदिसो, भेद=भेद आदि। ‘त’ यदि=जति, मृषावाद=सुसावात आदि। ‘य’ चतुष्पद=चउप्पय, पाद=पाय आदि।

(६) दो स्वरोंके मध्यमें स्थित ‘प’ के स्थानमें प्रायः सर्वत्र ‘व’ ही होता है जैसे—अध्युपपन्न=अज्झोववन्न, आधिपत्य=आहेवच्च वगैरह।

(७) स्वरोंका मध्यवर्ती ‘य’ प्रायः कायम रहता है जैसे—निरय=निरय, इन्द्रिय=इंदिय आदि। अनेक स्थानोंमें इसके स्थानपर ‘त’ भी देखा जाता है, जैसे—पर्याय=परियात इत्यादि।

(८) दो खरोंके बीचके 'व' के स्थानमें 'व' 'त' और 'य' होते हैं, जैसे गौरव=गारव; 'त' कवि=कति; 'य' परिवर्तना=परियट्टणा इत्यादि ।

(९) महाराष्ट्रीमें खरोंके मध्यवर्ती असंयुक्त 'क-ग-च-ज-त-द-प-य-व' का प्रायः सर्वत्र लोप होता है और कई व्याकरणोंके अनुसार इनके स्थानमें कोई अन्य वर्ण नहीं होता । हेमचंद्राचार्यके प्राकृतव्याकरणानुसार उक्त लुप्तव्यंजनोके दोनों ओर 'अ' या 'आ' होनेपर उनके स्थानमें 'य' होता है, किन्तु जैन अर्धमागधीमें जैसा कि ऊपरके नियमोंसे घटित है, प्रायः उनके स्थानमें अन्य व्यंजन होते हैं, और कहीं २ तो वही कायम रहता है । कहीं २ दोनों बातें न होकर महाराष्ट्रीकी तरह लोप भी होता है परन्तु वहीं जहां उक्त व्यंजनोंके बाद अवर्णसे भिन्न कोई स्वर हो । जैसे-आतुर=आउर, लोकः=लोओ प्रभृति ।

(१०) शब्दके आदि मध्य और संयोगमें सर्वत्र 'ण' की तरह 'न' भी होता है । जैसे-ज्ञातपुत्र=नायपुत्त; अनल=अनल; अन्योन्य=अन्नमन्न; सर्वज्ञ=सव्वज्जु इत्यादि ।

(११) एव से पूर्वके 'अम्' के स्थानमें 'आम्' होता है, जैसे यामेव=जामेव; क्षिप्रमेव=खिप्पामेव; एवमेव=एवामेव वगैरह ।

(१२) दीर्घ स्वरके बादके 'इति वा' के स्थानमें 'ति वा' और 'इ वा' होता है, जैसे-इन्द्रमह इति वा=इंदमहे ति वा-इंदमहे इ वा इत्यादि ।

(१३) 'यथा' और 'यावत्' शब्दके 'य' का लोप और 'ज' दोनों ही देखे जाते हैं जैसे-यथाख्यात=अहक्खाय; यथानामक=जहानामए; यावत्कथा=आव-कहा; यावज्जीव=जावज्जीव ।

वर्णागम—अर्धमागधीमें गद्यमें भी अनेक जगह पर समासके उत्तर शब्दके पहले 'म्' का आगम होता है, जैसे-अजहन्नमणुकोस, अदुक्खमसुहा, गोणमाइ, गिरयंगामी, सामाइयमाइयाई, उड्डंगारव आदि । महाराष्ट्रीमें पद्यमें ही पादपूर्तिके लिए कहीं २ 'म्' का आगम देखा जाता है गद्यमें नहीं ।

शब्दभेद—(१) अर्धमागधीमें ऐसे बहुतसे शब्द हैं जिनका प्रयोग महाराष्ट्रीमें प्रायः उपलब्ध नहीं होता, जैसे-अज्झत्थिय, अज्झोववन्न, अणुवीति, आघवणा, आघवेत्तग, आणापाणु, आवीकम्म, कण्हुइ, केमहालए, दुख्ख, पच्चत्थि-मिळ, पाउकुव्वं, पुरत्थिमिळ, पोरेवच्च, महतिमहालिया, वक्क, विउस इत्यादि ।

(२) ऐसे शब्द भी प्रचुर संख्यामें पाए जाते हैं जिनके रूप अर्धमागधी और महाराष्ट्रीमें भिन्न २ प्रकारके होते हैं । जैसे कि-

अर्धमागधी	महाराष्ट्री	अर्धमागधी	महाराष्ट्री
अभियागम	अब्भाअम	नितिय	णिच्च
आउंछण	आउंचण	निएय	णिअअ
आहरण	उआहरण	पडुप्पन्न	पच्चुप्पन्न
उप्पि	उवरिं-अवरिं	पच्छेकम्म	पच्छाकम्म
किया	किरिआ	पाय (पात्र)	पत्त
कीस-केस	केरिस	पुढो (पृथक्)	पुहं-पिहं
केवच्चिर	किअच्चिर	पुरेकम्म	पुराकम्म
गेहि	गिद्धि	पुव्वि	पुव्वं
चियत्त	चइअ	माय (मात्र)	मत्त-मेत्त
छच्च	छक्क	माहण	बम्हण
जाया	जत्ता	मिलक्खु-मेच्छ	मिलिच्छ
णिगण-णिगिण(नग्न)	णग्ग	वग्गू	वाआ
णिगिणिण (नाभ्य)	णग्गत्तण	वाहणा (उपानह)	उवाणआ
तच्च (तृतीय)	तइअ	सहेज्ज	सहाअ
तच्च (तथ्य)	तच्छ	सीआण-सुसाण	मसाण
तेगिच्छा	विइच्छा	सुमिण	सिमिण
दुवालसंग	बारसंग	सुहम-सुहुम	सण्ह
दोच्च	दुइअ	सोहि	सुद्धि

और दुवालस, तेरस, अउणवीसइ, बत्तीस, पणतीस, इगयाल, तेयालीस, पणयाल, अढयाल, एगट्टि, बावट्टि, तेवट्टि, छावट्टि, अडसट्टि, अउणत्तरि, बाव-त्तरि, पण्णत्तरि, सत्तहत्तरि, तेयासी, छलसीइ, बाणउइ प्रभृति संख्या शब्दोंके रूप जैसे अर्धमागधीमें पाए जाते हैं वैसे महाराष्ट्रीमें नहीं ।

नामविभक्ति-(१) अर्धमागधीमें पुलिग अकारांत शब्दके प्रथमाके एकवचनमें प्रायः सर्वत्र 'ए' और क्वचित् 'ओ' होता है जब कि महाराष्ट्रीमें केवल 'ओ' ही होता है ।

(२) सप्तमीका एक वचन 'स्सि' होता है किन्तु महाराष्ट्रीमें 'म्मि' ।

(३) चतुर्थीके एकवचनमें 'आए' या 'आते' होता है, जैसे-अट्टाए, गम-णाए, देवाए, सवणयाए, अहिताते इत्यादि । महाराष्ट्रीमें ऐसा नहीं ।

(४) अनेक शब्दोंके तृतीयाके एकवचनमें 'सा' होता है, जैसे-मणसा,

वयसा, कायसा, जोगसा, बलसा, चक्खुसा । महाराष्ट्रीमें अनुक्रमसे इनके स्थानमें मणेण, वएण, काएण, जोगेण, बलेण, चक्खुणा होते हैं ।

(५) 'कम्म' और 'धम्म' शब्दके तृतीयाके एकवचनमें 'कम्मुणा' और 'धम्मुणा' होता है, जिसका अनुकरण पाली भाषा भी करती है, जबकि महाराष्ट्रीमें 'कम्मेण' और 'धम्मेण' होता है ।

(६) अर्धमागधीमें 'तत्' शब्दके पंचमीके बहुवचनमें 'तेब्भो' रूप भी देखा जाता है, जब कि महाराष्ट्रीमें इसका 'अदर्शनं लोपः' है ।

(७) 'युष्मत्' शब्दका षष्ठीका एकवचन 'तव' और 'अस्मत्' का षष्ठीका बहुवचन 'अस्माकम्' जिसका अनुकरण संस्कृतभाषा भी करती है, अर्धमागधीमें है महाराष्ट्रीमें नहीं ।

आख्यात-विभक्ति—अर्धमागधीमें भूतकालके बहुवचनमें 'इसु' प्रत्ययका प्रयोग होता है, जैसे 'आभासिसु' 'गच्छिसु' 'पुच्छिसु' आदि । महाराष्ट्रीमें यह प्रयोग लुप्त है ।

धातुरूप—अर्धमागधीमें अकासी-अब्बवी-आइक्खइ-आधं-आहंसु-कुब्बइ-घेच्छिइ-तिउट्ठइ-तिउट्ठिजा-तिवायए-दुरुहइ-पडिसंधयाति-पहारेत्था-भूया-भुवि-विगिं-चए-समुच्छिहिति-सारयती-हुत्था-होक्खती-होत्था-प्रमृति प्रभूत प्रयोगोंमें धातुकी प्रकृति प्रत्यय अथवा दोनों जिस आकारमें पाए जाते हैं महाराष्ट्रीमें वे अलग २ प्रकारके देखे जाते हैं ।

धातुप्रत्यय—अर्धमागधीमें 'त्वा' प्रत्यय के रूप अनेक तरहके होते हैं ।

(१) (अ) टु; जैसे-अवहट्टु, कट्टु, साहट्टु आदि ।

(आ) इत्ता, एत्ता, इत्ताणं और एत्तार्ण; यथा-चइत्ता, पासित्ता, विउट्ठित्ता, करेत्ता, पासित्ताणं, करेत्ताणं इत्यादि ।

(इ) इत्तु; जैसे-जाणित्तु, दुरुहित्तु, वधित्तु वगैरह ।

(ई) च्चा; यथा-किच्चा, चेच्चा, णच्चा, भोच्चा, सोच्चा प्रभृति ।

(उ) इया; जैसे-दुरुहिया, परिजाणिया आदि ।

इनके अतिरिक्त अणुवीति, निसम्म, विउक्कम्म, लडुं, लडूण, समिच्च, संखाए, दिस्सा आदि प्रयोगोंमें 'त्वा' के रूप भिन्न २ प्रकारके पाए जाते हैं ।

(२) 'तुम्' प्रत्ययके स्थानमें 'इत्तए' या 'इत्तते' प्रायः देखा जाता है । जैसे-करित्तए, गच्छित्तए, विहरित्तए, संभुजित्तए, उवसामित्तते आदि ।

(३) ऋकारांत धातुके 'त' प्रत्ययके स्थानमें 'ड' होता है, जैसे-कड, मड, अभिहड, वावड, संवुड, वियड, वित्थड प्रभृति ।

तद्धित

(१) अर्धमागधीमें 'तर' प्रत्ययका 'तराय' रूप होता है, जैसे-अणिद्वतराय, अप्पतराय, बहुतराय, कंततराय इत्यादि ।

(२) आउसो, आउसंतो, गोमी, वुत्तिमं, भगवंतो, पुरत्थिम, पच्चत्थिम, ओयंसि, दोसिणो, पोरेवच्च आदि प्रयोगोंमें 'मतुप्' और अन्य तद्धित प्रत्ययोंके जैसे रूप जैन अर्धमागधीमें देखे जाते हैं महाराष्ट्रीमें वे भिन्न प्रकारके होते हैं ।

महाराष्ट्री और अर्धमागधीमें इनके अतिरिक्त बहुतसे सूक्ष्म भेद हैं जिनका उल्लेख लेखका देहसूत्र बढनेके भयसे नहीं किया ।

आगमोद्धार

जैसाकि हम ऊपर आगमोंके इतिहास प्रकरणमें लिख चुके हैं स्थानकवासी समाजमें उत्तरोत्तर वृद्धि होती चली गई, अतः ज्ञानमें वृद्धि होनी ही थी । सबसे पहले श्रीधर्मशी स्वामीने मूलसूत्रोंपर 'टब्बे' लिखे, जो कि साधारण अभ्यासीके लिए अत्यंत उपयोगी हैं । क्या ही अच्छा होता यदि उन्हें प्रकाशित किया जाता । इसके बाद पूज्य श्रीअमोलक ऋषिजी म० ने बत्तीसों सूत्रोंका अनुवाद किया । जिसका प्रकाशन हज़ारों रुपया व्यय करके श्रीमान् राजा बहादुर शेठ दानवीर सुखदेवसहाय ज्वालाप्रसाद जौहरीने किया, इसके लिए वे अधिकाधिक धन्यवादके पात्र हैं । लेकिन पाठोंकी अशुद्धि, कागज़की खराबी और मिश्रित हिन्दी होनेके कारण समाजको इतना लाभ न मिल सका जितना मिलना चाहिए था । इसके अनन्तर जैनाचार्य पूज्य श्रीआत्मारामजी महाराज और पूज्य श्री-हस्तीमलजी म० ने भी कई सूत्रोंके अनुवाद किए और घासीलालमुनि भी कर रहे हैं ।

इसके अतिरिक्त रायबहादुर धनपतिसिंह (मकसूदाबादवाले) और आगमोदय-समिति आदिने भी आगमोंका प्रकाशन किया है पर वे भी अशुद्धियोंसे खाली नहीं । कई प्राध्यापकों ने भी इंग्लिश अनुवाद सहित कुछ सूत्र प्रकाशित किए, परंतु अतिसंक्षिप्त और महाराष्ट्री प्रधान होनेके कारण स्वाध्यायी के लिए अधिक उपयोगी नहीं ।

सूत्रागमप्रकाशकसमिति

वैदिक प्रेस अजमेरकी छपी हुई चारों मूल वेदोंकी पुस्तक एक किसानने गुरु महाराजकी सेवामें पेश की और पूछा कि आपके आगम भी एक जिल्दमें मिल

सकते हैं, गुरु महाराज क्या उत्तर देते ? अतः उन्होंने गुड़गाँव स्थानकवासी जैन संघको प्रेरणा दी और श्रीसूत्रागमप्रकाशकसमितिकी स्थापना हुई । जिसका विस्तृत वर्णन 'विजय डायरी', 'मोहन डायरी', 'सामायिकसूत्र' हिन्दी 'शान्ति प्रकाश' और 'नेमराजुल बारहमासा' गुजरातीमें पढ़ सकते हैं । विस्तारभयसे उसका उल्लेख यहाँ नहीं किया गया । **सूत्रागमप्रकाशकसमितिका पहला ध्येय** ३२ आगमोंको आगमत्रयकी पद्धतिसे प्रकाशित करना है ।

मूलसूत्रोंका प्रकाशन

मूलसूत्रोंका प्रकाशन छुटक २ कई संस्थाओंने किया है परन्तु पूरे सूत्र किसीने अब तक मूल रूपमें प्रकाशित नहीं किए । आज तक उत्तराध्ययन-दशवैकालिक-सुखविपाक-नंदी बहुतसे और स्युगडांग-आचारांग-अनुयोगद्वार न्यून संख्यामें मूलरूपमें छपे हैं । परन्तु अनुक्रमसे सबके सब आगम नहीं । सूत्रागमप्रकाशक-समितिकी योजना बत्तीसों सूत्रोंको 'सूत्रागमे' के रूपमें एकही पुस्तकमें प्रकाशित करनेकी थी, परन्तु ग्रन्थकी देहयष्टी बहुत बढ़ जानेसे वैसा न हो सका । इसलिए ११ अंगोंका प्रथम खंड बनाना पड़ा जिसमें लगभग १४०० पृष्ठोंमें ३५००० श्लोक हैं यह जानकर किसे प्रसन्नता न होगी ।

आगमोंमें ११ अंगोंका महत्व—यों तो सारे ही आगम अत्यन्त उप-योगी और ज्ञानके अगाध समुद्र रूप हैं, परन्तु उनमें भी ११ अंगोंका अनोखा स्थान है । **आचारांगमें** साधु-साध्वियोंके आचार, भगवान् महावीरकी परिषद्-सहिष्णुता, एषणा, पांच महाव्रतोंकी २५ भावना आदिका वर्णन है । जो 'आचारः प्रथमो धर्मः' की उक्तिको चरितार्थ करता है । **सूत्रकृतांगमें** अन्यमतोंका दिग्दर्शन, उनका खंडन और स्वसमयका मंडन किया गया है । **स्थानांगसूत्रमें** १ से लेकर १० पर्यंत संख्याकी वस्तुओंका वर्णन है । विशेष नौवें ठाणेमें श्रेणिक राजाके आगामी भव पर प्रकाश डाला है । **समवायांगसूत्रमें** १ से लगाकर कोडाकोडी संख्यातकके विषय वर्णित हैं । इसके अतिरिक्त द्वादशांगी स्वरूप भूत-भविष्यत्-वर्तमान त्रिषष्टिशलाका पुरुषोंके माता पिताओंके नाम एवं उनके नाम, पूर्वभव और आगामी भवके नामोंका वर्णन है । ठाणांग और समवायांगकी यही विशेषता है कि कोई भी विषय इनसे अछूता नहीं । **भगवतीमें** भगवान् गौतम द्वारा पूछे गए ३६००० प्रश्नोंके उत्तर हैं । इसके अंतर्गत रोहा अणगार, स्कंदक, तामली तापस, शिवराजर्षि, महाबल, ऋषभदत्त-देवानंदा, जमालि, गांगेय अणगार, अतिमुक्तकुमारश्रमण, गोशालक, उदायन, मृगावती, जयंती

श्राविका, सोमिल ब्राह्मण आदिके चरित्र भी हैं। ज्ञाताधर्मकथांगमें प्रथम-श्रुतस्कंधमें १९ कथाएं उपनय सहित हैं। जो कि रोचक होनेके साथ २ बोधप्रद भी हैं, मेघकुमारकी यावत् कंडरीक-पुंडरीककी। दूसरे श्रुतस्कंधमें शिथिलाचार द्वारा होनेवाले दोषोंका दिग्दर्शन करानेवाली कथाएँ हैं। उपासकदशांगमें ज्ञातपुत्र महावीर भगवान् के १० मुख्य श्रावकोंका वर्णन है। उनमें भी आनंद और कामदेव का मुख्य स्थान है। अंतकृद्दशांगमें उन ९० महापुरुषोंका चरित्र है जिन्होंने कर्मोंका निकंदन करके मोक्ष प्राप्त किया है। इसमें गजसुकुमाल, पद्मावती राणी, अर्जुन माली, अयवन्ताकुमारकी कथाएँ विशेष उल्लेखनीय हैं। अनुत्तरोपपातिकसूत्रमें अनुत्तरविमानमें उत्पन्न होनेवाले महापुरुषोंका वर्णन है। जिसमें महातपोधन धन्ना अणगार का वर्णन मुख्य है। प्रश्न-व्याकरणमें आस्रवद्वारमें हिंसा-असत्य-स्तेय-अब्रह्म और परिग्रह इन पांचोंका स्वरूप समझाया है। इनके कर्ताओं और इनके फलका वर्णन भी है। संवरद्वारमें अहिंसा-सत्य-अचौर्य-ब्रह्मचर्य-अपरिग्रह, उनका फल और साथ ही उनकी भावनाएँ वर्णित हैं। विपाकसूत्रके प्रथम श्रुतस्कंधमें १० जीवोंका वर्णन है। जिन्होंने असीम पाप करके महान् कष्ट उठाए, मृगापुत्रका यावत् अंजूका। दूसरे श्रुतस्कंधमें उन १० जीवोंका वर्णन है जिन्होंने सुपात्र दान देकर सुख प्राप्त किया। सुबाहुकुमारका यावत् वरदत्तकुमारका।

इन ११ अंगोंमें धर्मकथानुयोग (प्रथमानुयोग) गणितानुयोग, द्रव्यानुयोग और चरणकरणानुयोगके प्रायः सभी विषय वर्णित हैं। इनका अध्ययन-चिन्तन-मनन करके अनेक भव्य आत्माओंने उत्तरोत्तर संसारका अन्त करके मुक्तिको पाया है। इनकी अधिक महत्ता बताना सूर्यको दीपक दिखानेके समान है। ये सुभाषितोंके महाभंडार हैं।

प्रस्तुत प्रकाशनकी विशेषता-(१) पाठशुद्धिका पूरा २ ख्याल रक्खा गया है।

(२) इसके संपादनमें शुद्ध प्रतियोंका उपयोग किया है।

(३) संक्षिप्त अर्धमागधी व्याकरण भी दिया गया है ताकि समझनेमें सरलता हो सके।

(४) पाठान्तर नवीन पद्धतिसे दिए हैं।

कार्यविवरण-इसका आरंभ पूना चातुर्मासमें हुआ। वहां केवल आचा-

रांग का प्रथम श्रुतस्कंध ही अलग रूपमें प्रगट हो सका जो कि बहुतसे साधु-साध्वियोंके करकमलोंमें पहुँचाया गया। इसके अनन्तर गुरुदेव घोड़नदी अहमदनगर आदि क्षेत्रोंमें विचरते हुए नासिक पधारे। वहाँ तक केवल स्थानांगसूत्र तक छप सका। तदनन्तर घाटकोपर चातुर्मासमें समवायांग और भगवतीसूत्र तैयार हुए। पूर्वोक्त सूत्र भी कई साधु-साध्वियोंके पास पहुँचाए गए। शुद्धपाठका निर्णय करनेमें काफी से ज़्यादा परिश्रम उठाना पड़ा है। इसके बाद सादड़ी सम्मेलनमें जाना पड़ा। अतः लगभग पांच मास तक कार्य बंद रहा। **दौंडायचा** चतुर्मासमें फिर कार्य आरंभ हुआ। जहाँ से लगभग १००० सूत्र साधु-साध्वियोंके हाथोंमें पहुँचाए गए। शनैः २ कार्य चलता रहा और **सिरपुर** में ११ अंगोंके कार्यकी पूर्णाहुति हुई।

स्पष्टीकरण—(१) जिनका ११ अंगोंमें वर्णन है उन्होंने भी ११ अंगोंका अध्ययन किया, इसका कारण यह कि इनके प्रणेता श्रीगुधर्मा स्वामी हैं। भगवान् महावीरके पश्चात् वे ही पट्टपर आए, और शासनकी बागडोर संभाली। जैसे अनुत्तरोपपातिकसूत्रमें धन्ना अणगारका वर्णन है। कई प्रतियोंके आरंभमें पाठ मिलता है...**सेणिओ राया**...लेकिन श्रेणिक तो पहले ही मर चुके थे। अतः वह पाठ अशुद्ध है ऐसा जानना चाहिए।

(२) शब्दकोष गाथाबद्ध सानुवाद तैयार किया जा रहा है, अतः शब्दकोष नहीं दिया गया।

(३) अन्य उपयुक्त विषय जो कि ग्रंथके देहसूत्र बढ़ जानेके कारण नहीं दिए जा सके, वे अन्य पुस्तकमें दिए जायेंगे।

जिणचंदभिक्षु

शांतिभवन
अंबरनाथ C. R.

ता० ७-२-१९५३

(६) ध्य-क्ष-क्ष्म-छ-त्स-त्स्य-ध्य-प्स-च्छ-श्च-स्त-के स्थानमें 'च्छ' होता है । जैसे-दक्ष=दच्छ; लक्ष्मी=लच्छी; कृच्छ्र=किच्छ; वत्सल=वच्छल; मत्स्य=मच्छ; नेपथ्य=नेवच्छ; अप्सरा=अच्छरा; मूर्च्छा=मुच्छा; पश्चात्=पच्छा; विस्तीर्ण=विच्छिन्न ।

(७) ज्य-ज्र-ज्व-य-द्र-ब्ज-य्य-र्य-र्ज-ज्य-के स्थानमें 'ज' होता है, जैसे-विभाज्य=विभज; वज्र=वज; प्रज्वलित=पज्जलिय; अनवय=अणवज; विद्वान्=विज्ज; अब्ज=अज; शय्या=सिजा; आर्या=अजा; तर्जनी=तज्जणी; वर्ज्य=वज ।

(८) ध्य-ध्व-ह्य-के स्थानमें 'ज्झ' होता है, जैसे-उपाध्याय=उवज्झाय; बुध्वा=बुज्झा; ग्राह्य=गेज्झ ।

(९) त-त्त-र्त-के स्थानमें 'ट्ट' होता है । जैसे-वर्ती=वट्टी; पत्तन=पट्टण; नर्तक=नट्टग ।

(१०) ष्ट-ष्ठ-र्थ-के स्थानमें 'ट्ठ' होता है, जैसे-संतुष्ट=संतुट्ठ; निष्ठुर=निट्ठुर; समर्थ=समट्ठ । त-र्द-के स्थानमें 'ड्ड' होता है, जैसे-गर्ता=गड्डा; विच्छर्द=विच्छड्ड । ळ्य-द्ध-र्थ-के स्थानमें 'ड्ड' होता है, जैसे-धनाढ्य=धणड्ड; वृद्धि=वुड्धि; वर्धमान=वड्डमाण ।

(११) ज्ञ-ग्य-न्य-न्व-म-र्ण-के स्थानमें 'ण्ण' होता है, जैसे-विज्ञान=विज्ञाण; हिरण्य=हिरण्ण; धन्य=धण्ण; अन्वर्थ=अण्णत्थ; निम्न=निण्ण; सुवर्ण=सुवण्ण ।

(१२) क्षण-श्च-ष्ण-क्ष-क्ष-के स्थानमें 'ण्ह' होता है, जैसे-श्लक्ष्ण=सण्ह; प्रश्न=पण्ह; पृष्णि=पण्हि; स्नान=ण्हाण; पूर्वाह्न=पुव्वण्ह; वह्नि=वण्हि ।

(१३) क-त्त-त्त-त्र-त्व-त-र्त-के स्थानमें 'त्त' होता है, जैसे-भुक्त=भुत्त; प्रयत्न=पयत्त; आत्मा=अत्ता; पत्र=पत्त; तत्त्व=तत्त; प्राप्त=पत्त; कर्ता=कत्ता ।

(१४) कथ-त्र-र्थ-स्त-स्थ-के स्थानमें 'त्थ' होता है, जैसे-सिक्थ=सित्थ; तत्र=तत्थ; समर्थ=समत्थ; विस्तार=वित्थार; इन्द्रप्रस्थ=इंदपत्थ । द्र-द्र-ब्द-र्द-के स्थानमें 'ड्ड' होता है । जैसे-समुद्र=समुड्ड; प्रद्वेष=पड्डेस; शब्द=सड्ड; कर्दम=कड्डम । गध-ध्व-ब्ध-र्ध-के स्थानमें 'द्ध' होता है, जैसे-दुग्ध=दुड्ड; अध्वन्=अद्ध; लब्धि=लड्डि; वर्धमान=वड्डमाण ।

(१५) क्म-त्प-त्स-प्य-प्र-प्ल-र्प-ल्प-के स्थानमें 'प्प' होता है, जैसे-रुक्मिणी=रुप्पिणी; उत्पल=उप्पल; परमात्मन्=परमप्प; क्षिप्र=खिप्प; विप्लव=विप्पव; सर्प=सप्प; जल्प=जप्प; कल्प=कप्प । त्फ-ष्प-ष्फ-स्प-स्फ-के स्थानमें 'प्फ' होता है, जैसे-उत्फुल्ल=उप्फुल्ल; पुष्प=पुप्फ; निष्फल=निप्फल; बृहस्पति=बिहप्फडि; प्रस्फो-

टित=पण्डित; द्व-र्ब-त्र-के स्थानमें 'ब्ब' होता है, जैसे-उद्धोषित=उब्बोहिय; निर्बल=निब्बल; अब्रह्म=अब्बंभ। र्भ-द्र-भ्य-भ्र-र्भ-व्ह-इनके स्थानमें 'ब्भ' होता है, ईषप्रगभार=ईसिपब्भार; सद्भूत=सब्भूय; अभ्यास=अब्भास; शुभ्र=सुब्भ; अर्भक=अब्भग; विव्हल=विब्भल।

(१६) र्मन्म-भ्य-र्म-ल्म-श्म-र्म्य-के स्थानमें 'म्म' होता है, जैसे-युग्म=जुम्म; मन्मथ=वम्मह; साम्य=सम्म; धर्म=धम्म; गुल्म=गुम्म; पद्म=पोम्म; हर्म्य=हम्म। क्षम-श्म-ष्म-स्म-ह्य-के स्थानमें 'म्ह' होता है, जैसे-पक्षमन्=पम्ह; कुश्मान=कुम्हाण; ग्रीष्म=गिम्ह; विस्मय=विम्हय; ब्रह्मा=बम्हा; विशेष=ब्राह्मण=बम्हण, बंभण।

(१७) र्य-र्ल-ल्य-ल्व-के स्थानमें 'ल्ल' होता है, जैसे-पर्यस्त=पल्लथ; निर्लज्ज=निल्लज; कल्याण=कल्लण; पल्वल=पल्लल; 'ह्ल' को 'ल्ह' आह्लाद=आल्हाय। द्व-र्व-व्य-त्र-के स्थानमें 'व्व' होता है, जैसे-उद्वेग=उव्वेग; उर्वी=उव्वी; काव्य=कव्व; प्रव्रज्या=पव्वज्जा।

(१८) षे-श्म-श्य-श्च-ष्य-स्य-स्त्र-स्व-के स्थानमें 'स्स' होता है, जैसे-वर्ष=वस्स; रश्मि=रस्सि; लेख्या=लेस्सा; विश्राम=विस्साम; ईश्वर=इस्सर; दूष्य=दुस्स; तस्य=तस्स; सहस्र=सहस्स; ओजस्विन्=ओयस्सि।

असंयुक्त व्यंजनोमें परिवर्तन

(१) क-ग-च-ज-त-द-प-य-व=लृक् और ण-न-के लिए देखो अर्धमागधी और महाराष्ट्रीमें भेद (१) से (१०) तक।

(२) ख-घ-थ-ध-भ-के स्थानमें 'ह' होता है, जैसे-सुख=सुह; मेघ=मेह; रथ=रह; बधिर=बहिर; सफल=सहल; सभा=सहा।

(३) ट-ठ-ड-के स्थानमें ढ-ढ-ल होते हैं जैसे-भट=भड; शठ=सड; गुड=गुल।

(४) आदि के 'य' को 'ज' होता है और उपसर्ग के पीछे 'य' आनेपर कहीं २ 'ज' होता है, जैसे-यम=जम; संयोग=संजोग।

(५) कहीं २ 'र' को 'ल' होता है, जैसे-दरिद्र=दलिद्।

(६) 'श' और 'ष' के स्थानमें 'स' होता है जैसे-विशेष=विसेस।

(७) अनुस्वारके पीछे 'ह' आवे तो उसे 'घ' विकल्पसे होता है, जैसे-संहारः=संघारो, संहारो।

शेष-(१) आदि के क्ष-स्क-त्य-द्य-ध्य-ध्व-स्त-स्थ-स्प और 'ज्ञ' के स्थानमें ख-छ-झ, ख, च, ज, झ, थ, ठ-थ, फ और ण-न होते हैं, जैसे-क्षयः=खओ, क्षीर=छीर, क्षर=झर; स्कन्ध=खंध; त्यागः=चाओ; द्युति=दुडि; ध्यान=झाण; ध्वजः=झओ; स्तुति=थुडि;

स्थान-ठाण; स्थावर=थावर; स्पर्श=फास; ज्ञान=णाण-नाण; आदिके 'क' आदि के स्थानमें 'क' आदि होते हैं जैसे-कम=कम; प्रसित=गसिय; घ्राण=घाण; द्रह=दह; प्रहार=पहार; भ्रम=भम; म्रक्षण=मक्खण; व्रण=वण; श्रम=सम; हास=हास; त्रस=तस ।

(२) उष्ट्र, इष्टा, संदष्ट के 'ष्ट्र' और 'ष्ट' को 'ट्ट' न होकर 'ट्' होता है, 'समस्त' और 'स्तंब' के 'स्त' को 'त्थ' और 'थ' नहीं होता, समस्त=समत्त; स्तंब=तंब । 'ष्प' और 'स्प' को कहीं २ 'फ' नहीं होता । जैसे-निष्प्रभ=निप्पह; परस्पर=परोप्पर । 'झा' को 'प्प' होता है, जैसे-कुञ्जाल=कुप्पल । 'ज्ञ' के 'ज' का लोप भी विकल्पसे होता है, मनोज्ञ=मणोज्ञ-मणोण्ण ।

(३) द्विशक्तिको पाए हुए खख-छछ-ठ्ठ-थथ-फफ-धध-झझ-ड्ड-धध-भभ-के स्थानमें अनुक्रमसे कख-च्छ-ठ्ठ-थथ-फफ-गघ-जझ-ड्ड-धध-वभ होते हैं ।

(४) शब्दवर्ती 'र्य' का 'रिय' और 'र्ह' का 'रिह' होता है, इसी प्रकार श्री-ही-कृत्स्न-क्रिया इन शब्दोंमें संयुक्त अन्त्याक्षरके पूर्व 'इ' होता है, जैसे-भार्या=भारिया, गर्हा=गरिहा; श्री:=सिरी; ही:=हिरी; कृत्स्न=कसिण; क्रिया=किरिया ।

(५) संयुक्त 'ल'के पहले 'इ' होता है, जैसे-क्लेश=किलेस; श्लोक=सिलोग ।

(६) 'र्श' अथवा 'र्ष' को 'रिस' विकल्पसे होता है, और 'तप्त' 'वज्र' शब्दमें भी संयुक्त अन्त्याक्षरके पहले 'इ' का आगम विकल्पसे होता है, जैसे-दर्शन=दरिसण-दंसण; वर्षा=वरिसा-वासा; तप्त=तवियं-तत्तं; वज्र=वड्ढं-वज्जं ।

(७) स्याद् भव्य और चौर्य तथा उसके समान शब्दोंके संयुक्त व्यंजनोंके अन्त्याक्षरके पूर्व 'इ' होता है, जैसे-स्यात्=सिया; भव्य:=भविओ; सूर्य:=सुरिओ ।

(८) जिनके अन्तमें 'वी' संयुक्त व्यंजन हो ऐसे स्त्रीलिंग नामोंमें उससे पूर्व 'उ' होता है, जैसे-तन्वी=तणुवी; पृथ्वी=पुहुवी ।

(९) जिस अव्ययके अन्तमें 'त्र' हो उसके स्थानमें हि-हृ-त्थ होता है जैसे-तत्र=तहि-तह-तत्थ ।

(१०) यन्-वन्-श्च-ष-स ये श-ष-स-के साथ पहले या पीछे जुड़े हुए हों तो नियमानुसार लोप होनेपर श-ष-स-को द्वित्व नहीं होता, परन्तु उसके पूर्वका स्वर प्रायः दीर्घ होता है, जैसे-पश्यति=पासइ; वर्षः=वासो; कस्यचित्=कासइ आदि ।

(११) अव्ययोंमें तथा 'उत्खात' आदि शब्दोंमें और 'घञ्' प्रत्ययके निमित्तसे वृद्धि पाए हुए 'आ' को 'अ' होता है, जैसे-यथा=जह-जहा । उत्खातं=उक्खयं-उक्खायं । प्रवाहः=पवहो-पवाहो आदि ।

(१२) 'उत्साह' और 'उत्सज' को छोड़कर जिन शब्दोंमें 'त्स' और 'च्छ' हो तो उनके पूर्वके 'उ' को 'ऊ' होता है, जैसे-उत्सुकः=ऊसुओ; उच्छ्वास=ऊसास ।

(१३) 'दृश' के 'दृ' को 'रि' होता है एवं ऋण-ऋजु-ऋषभ-ऋतु-ऋषि इनमें 'ऋ' को 'रि' विकल्पसे होता है, जैसे-सदृश=सरिस; सदृक्ष=सरिच्छ; ऋण=रिण-अण; ऋजु=रिजु-उज्जु; ऋषभ=रिसह-उसह; ऋतु=रिउ-उउ; ऋषि=रिसि-इसि ।

(१४) संख्यावाचक शब्दोंमें असंयुक्त 'द' को 'र' होता है और दश-पाषाण शब्दमें श-षको 'ह' विकल्पसे होता है, जैसे-एकादश=एयारह-एगारस; दश=दह-दस; पाषाण=पाहाण-पासाण ।

(१५) शब्दके अन्त्य व्यंजनका लोप होता है । सामासिक शब्दोंमें प्रयोगके अनुसार (नित्य अथवा विकल्पसे) लोप होता है, जैसे-तावत्=ताव; सज्जन=सज्जन-सजण ।

(१६) स्त्रीलिंगी शब्दोंके अन्त्य व्यंजनके स्थानमें 'आ' अथवा 'या' होता है जैसे-सरित्=सरिआ-सरिया; अपवाद—विद्युत्=विज्जु; क्षुब्=क्षुहा; दिक्=दिसा; अप्सरस्=अच्छरसा-अच्छरा; प्रावृष्=पाउस्; ककुब्=कउहा । व्यंजनान्त स्त्रीलिंगमें अन्त्य 'र्' को 'रा' होता है, जैसे-धुर=धुरा । शरद् आदि शब्दोंमें अन्त्य व्यंजनको 'अ' होता है जैसे-शरद्=सरओ; भिषक्=भिसओ विशेष—आयुष्=आउसो-आउ; धनुष्=धणुह-धणू ।

(१७) दीर्घ स्वर और अनुस्वारके पीछे शेष व्यंजन और आदेशभूत व्यंजनको द्वित्व नहीं होता, एवं र-ह-को भी द्वित्व नहीं होता, जैसे—स्पर्श=फास; सन्ध्या=संझा; ब्रह्मचर्य=बंभचेर; कार्षापण=काहावण । समासमें द्वित्व विकल्प से होता है, जैसे-देवस्तुति=देवत्थुइ-देवथुइ ।

(१८) संयुक्त व्यंजनके अन्तमें म-न-य-ल-व-ब-र हो तो उसका और संयुक्त व्यंजनका पहला व्यंजन ल-व-ब-र हो तो लोप होता है । जहां दोनोंका लोप होता हो वहां प्रयोगानुसार दो में से एक का लोप होता है, जैसे-स्मर=सर; श्याम=साम; र्लक्ष्ण=सण्ह-लण्ह आदि ।

संधि स्वरसंधि

(१) अर्धमागधीमें यदि एक ही पदमें दो स्वर साथमें आवें तो संधि नहीं होती, जैसे-कुणइ, करेइत्था, जिणाओ। अपवाद रूपसे कहीं २ एक पदमें भी संधि होती है, जैसे-होहिइ=होही, बिइओ=बीओ। भिन्न २ दो पदोंके स्वरोंकी संधि संस्कृतके समान विकल्पसे होती है और ये दोनों पद सामासिक होने चाहिएँ, जैसे-मगह+अहिवो=मगहाहिवो; सुर+ईसो=सुरेसो इत्यादि। कहीं २ असामासिक दो पदोंमें भी संधि होती है, जैसे-तत्थ+आगओ=तत्थागओ।

(२) समासमें ह्रस्व स्वरको दीर्घ और दीर्घको ह्रस्व प्रयोगानुसार होता है, जैसे-सत्त+वीसा=सत्तावीसा; नई+कूलं=नइकूलं।

(३) ई-ई अथवा उ-ऊ के पीछे विजातीय स्वर आवे तो संधि नहीं होती, इसी प्रकार ए और ओ के बाद कोई भी स्वर हो तो संधि नहीं होती, जैसे-वंदामि अज्वइरं=वंदामि अज्वइरं; नई एत्थ=, माऊ एइ=, वणे अडइ=, अहो अच्छरियं=,।

(४) स्वर परे हो तो पहले स्वरका प्रयोगानुसार प्रायः लोप होता है, जैसे-नीसास+ऊसासा=नीसासूसासा।

(५) 'ल्यट्' आदि सर्वनाम तथा अव्ययके पीछे आए हुए 'ल्यट्' आदि सर्वनाम अथवा अव्ययके प्रथम स्वरका प्रायः लोप होता है, जैसे-अम्हे+एत्थ=अम्हेत्थ; को+इमो=कोमो; जइ+अहं=जइहं।

(६) 'इ' आदि पुरुषबोधक प्रत्ययके पीछे स्वर आवे तो संधि नहीं होती, जैसे-होइ+इह=होइ इह।

(७) व्यंजन सहित स्वरमें से व्यंजनका लोप होने पर शेष स्वरकी पूर्वके स्वरके साथ संधि नहीं होती, जैसे-पयावई=पयावई। कहीं २ संधि भी देखी जाती है जैसे-कुंभआरो=कुंभारो।

व्यंजनसंधि

(१) अकारसे परे विसर्ग होनेपर पूर्वके स्वर सहित ओ होता है, जैसे-अग्रतः=अग्रओ; इसी प्रकार तस् प्रत्ययके स्थानमें त्तो, दो विकल्पसे होते हैं, जैसे-ततः=तओ, ततो, तदो इत्यादि।

(२) पदान्त 'म्' के पूर्वके अक्षरके ऊपर अनुस्वार होता है, यदि 'म्' के

पीछे स्वर हो तो अनुस्वार विकल्पसे होता है, जब अनुस्वार न हो तो 'म्' में पिछला स्वर मिल जाता है। जैसे-जिनम्=जिणं; उसभम् अजियं=उसभं अजियं, उसभमजियं; कहीं २ अन्त्य व्यंजनको भी अनुस्वार हो जाता है, जैसे-साक्षात्=सक्खं; यत्=जं; तत्=तं; सम्यक्=सम्मं।

(३) शब्दवर्ती 'ङ्-ञ्-ण्-न्' को अनुस्वार होता है, जैसे-पराङ्मुख=परंमुह; काञ्चनम्=कंचणं; उत्कण्ठा=उक्कंठा; वन्ध्या=वंझा।

(४) अनुस्वारको सवर्गा व्यंजन परे हो तो अनुनासिक विकल्पसे होता है, जैसे-गङ्गा, गंगा; लञ्छणं, लंछणं; कण्टए, कंटए; आणन्दे, आणंदे; चम्पा-चंपा।

(५) वक्रादि शब्दोंमें पहले दूसरे या तीसरे स्वर पर प्रयोगानुसार अनुस्वार होता है, जैसे-वक्रम्=वंकं; मनस्वी=मणंसी; उपरि=उवरिं।

(६) जहां खरादि पदोंकी द्विरुक्ति हो वहां विकल्पसे 'म्' का आगम होता है, जैसे-एक+एक=एकमेक, एकेक।

(७) कई शब्दोंमें प्रयोगानुसार अनुस्वार का लोप होता है, जैसे-त्रिंशत्=तीसा; सिंह=सीह।

अव्ययसंधि

(१) अपि (अवि) अव्यय किसी भी पदके परे हो तो उसके आदिके 'अ' का लोप विकल्पसे होता है, जैसे-तं+अपि=तंपि-तमवि; केण+अवि=केणवि, केणावि।

(२) पदान्तमें स्वरसे परे 'इति' के स्थानमें 'ति' होता है, यदि पदान्तमें स्वर न हो तो 'ति' होता है; जैसे-तहा+इति=तहत्ति; जुत्तं+इति=जुत्तंति।

कारक

(१) अर्धमागधीमें द्विवचन नहीं होता बल्के उसके स्थानमें बहुवचन का ही प्रयोग होता है, जैसे-हस्तौ=हत्था।

(२) चतुर्था विभक्ति के स्थानमें षष्ठीका प्रयोग होता है, जैसे-नमोऽर्हद्भ्यः=णमो अरिहंताणं।

(३) एक विभक्तिके स्थानमें अन्य विभक्तिका प्रयोग भी देखा जाता है, जैसे-तृतीयाके स्थानमें छट्ठी-तैरेतदनाचीर्णं=तेसि एयमणाइणं; सप्तमीके स्थानमें छट्ठी-दानेषु श्रेष्ठं=दाणाण सेट्ठं; सप्तमीके स्थानमें तृतीया-तस्मिन् काले तस्मिन् समये=तेणं कालेणं तेणं समएणं इत्यादि।

शब्दोंके रूप

अकारान्त पुल्लिंग

वद्धमाण

एकवचन	बहुवचन
पठमा-वद्धमाणे, वद्धमाणो	वद्धमाणा
विइया-वद्धमाणं	वद्धमाणे, वद्धमाणा
तइया-वद्धमाणेण, वद्धमाणेणं	वद्धमाणेहि, वद्धमाणेहिं-हिं
चउत्थी-वद्धमाणस्स, वद्धमाणाए-ते	वद्धमाणाण, वद्धमाणाणं
पंचमी-वद्धमाणा, वद्धमाणत्तो, वद्ध- माणाओ-तो-उ-तु-हि-हितो	वद्धमाणत्तो, वद्धमाणाओ-तो-उ-तु-हि- हितो-सुंतो, वद्धमाणेहि-हितो-सुंतो
छट्ठी-वद्धमाणस्स	वद्धमाणाण, वद्धमाणाणं
सत्तमी-वद्धमाणे, वद्धमाणंसि, वद्ध- माणम्मि	वद्धमाणेसु, वद्धमाणेसुं
संबोहण-वद्धमाणे, वद्धमाणो, वद्ध- माण, वद्धमाणा	वद्धमाणा

अकारान्त नपुंसक-लिंग

जल

प०-जलं	जलाणि, जलाई-ईं-इ
वि०-,,	,, ,, ,, ,,

तृतीयासे सप्तमी तक 'वद्धमाण' की तरह जानें।

सं०-जल (प्रथमाके अनुसार)

(नोट) पुल्लिंगके प्रथमाके एक वचन 'वद्धमाणे' की तरह नपुंसक-लिंगमें भी 'णयरे' 'उज्जाणे' आदि प्रथमाके एकवचनके रूप अर्द्धमागधीमें पाए जाते हैं।

इकारान्त पुल्लिङ्ग

मुणि

प०-मुणी	मुणओ-उ, मुणिणो, मुणी
बि०-मुणि	मुणिणो, मुणी
त०-मुणिणा	मुणीहि-हिं-हिं
च०-मुणिणो, मुणिस्स	मुणीण, मुणीणं
पं०-मुणित्तो, मुणीओ-उ-हिंतो, मुणिणो	मुणित्तो, मुणीओ-उ-हिंतो-सुंतो
छ०-मुणिणो, मुणिस्स	मुणीण, मुणीणं
स०-मुणिसि, मुणिम्मि	मुणीसु, मुणीसुं
सं०-मुणी, मुणि	(प्रथमाके अनुसार)

उकारान्त पुल्लिङ्ग

साहु

प०-साहु	साहवो, साहवे, साहओ-उ, साहु,
बि०-साहुं	साहुणो
	साहुणो, साहु, साहवे

इससे आगेके रूप इकारान्त 'मुणि' शब्दके समान जानने चाहिए ।

इकारान्त नपुंसक-लिङ्ग

दहि

प०-दहिं	दहीणि, दहीई-ईं
बि०-,,	,, ,, "

तृतीयासे सप्तमी तकके रूप 'मुणि' के समान समझें ।

सं०-दहि	(प्रथमाके अनुसार)
---------	---------------------

उकारान्त नपुंसक-लिङ्ग

महु

प०-महुं	महूणि-ई-ईं
बि०-,,	,, ,, "

तृतीयासे सप्तमी तक 'साहु' शब्दके समान जानें ।

सं०-महु	(प्रथमाके अनुसार)
---------	---------------------

ऋकारान्त पुल्लिङ्ग

पियर=पिउ (पितृ)

प०-पिया, पियरो

पियओ, पियवो, पियउ, पिऊ, पियरा,
पिउणो

बि०-पियरं

पियरे, पियरा, पिउणो, पिऊ

तृतीयासे सप्तमी तक 'साहु' शब्दके समान जानें । 'पियर' के रूप 'वद्धमाण' के समान होते हैं ।

विशेष-ठठी विभक्तिके एकवचनमें 'पिउए' भी होता है ।

सं०-हे पिय ! पियर, पियरो | (प्रथमाके अनुसार)

(नोट) पितृ आदि शब्द विशेष्यवाची हैं, विशेष्यवाचक शब्दके अन्त्य 'ऋ' के स्थानमें 'उ' और 'अर' होता है, जैसे-पितृ=पिउ, पियर; जामातृ=जामाउ, जामायर । दातृ आदि शब्द विशेषण-वाचक हैं, इनके स्थानमें 'उ' और 'आर' होता है, जैसे-दातृ=दाउ, दायार; कर्तृ=कर्तु, कतार ।

व्यंजनान्तनाम

(१) जिन नामोंके अंतमें मत्-वत् और अत् हो उनके अंतके अत्के स्थानमें अन्तका प्रयोग होता है और उनके रूप अकारान्त 'वद्धमाण' के समान चलते हैं । जैसे-भगवत्=भगवंत; भवत्=भवंत; धीमत्=धीमंत । भगवत् शब्दका प्रथमाका एकवचन 'भगवं' होता है जो कि शौरसेनीके समान है ।

(२) जिन नामोंके अन्तमें 'अन्' है उन नामोंके अन्तके 'अन्' को 'आण' विकल्पसे होता है और उसके रूप अकारान्त पुल्लिङ्गके समान होते हैं । यथा-राजन्=रायाण, राय; आत्मन्=अप्पाण, अप्प ।

'अन्' अंत वाले शब्दोंके और भी रूप होते हैं जो नीचे दिए जाते हैं ।

अप्पा-अप्पाण

प०-अप्पा, अप्पो, अप्पाणो	अप्पा, अप्पाणा, अप्पाणो
बि०-अप्पं, अप्पाणं, अप्पिणं	अप्पे, अप्पा, अप्पाणे, अप्पाणा-णो
त०-अप्पेण-णं, अप्पाणेण-णं, अप्पणा	अप्पेहि-हिं-हिं, अप्पाणेहि-हिं-हिं
च०-अप्पस्स, अप्पाणस्स, अप्पणो	अप्पाण-णं, अप्पाणाण-णं, अप्पिणं
पं०-अप्पत्तो, अप्पाओ-उ-हि-हितो, अप्पा, अप्पाणो, अप्पाणत्तो, अप्पाणाओ-उ-हि-हितो, अप्पाणा	अप्पत्तो, अप्पाओ-उ-हि-हितो-सुंतो, अप्पेहि-हितो-सुंतो, अप्पाणत्तो, अप्पा- णाओ-उ-हि-हितो-सुंतो, अप्पाणेहि-हितो- सुंतो
छ०-अप्पस्स, अप्पाणस्स, अप्पणो	अप्पाण-णं, अप्पाणाण-णं, अप्पिणं
स०-अप्पे, अप्पम्मि, अप्पाणे, अप्पा- णम्मि	अप्पेसु-सुं, अप्पाणेसु-सुं
सं०-हे अप्प, अप्पो, अप्पा, अप्पाण, अप्पाणो, हे अप्पाणा	अप्पा, अप्पाणा, अप्पाणो

इस प्रकार 'अन्' अंत सब नामोंके रूप जानना ।

विशेषः—'राय=रायण' शब्दके रूपोंमें जो विशेषता है वह इस प्रकार है (१) णो, णा, म्मि ये तीन प्रत्यय लगाते समय पूर्वके 'य' को विकल्पसे 'इ' होता है, जैसे—राइणो, रायणो; राइणा, रायणा; राइम्मि, रायम्मि ।

(२) द्वितीयाके एकवचन और छट्टीके बहुवचनमें प्रत्यय सहित 'राय' शब्दके 'य' को 'इणं' आदेश विकल्पसे होता है । जैसे—द्वि. ए. राइणं अथवा रायं, छ. व. राइणं अथवा रायणं ।

(३) तृतीया पंचमी और छट्टीके एकवचनमें णा, णो प्रत्ययके पहले 'राय' शब्दके 'आय' को 'अण' विकल्पसे होता है

तृ. ए.	रण्णा	अथवा	राइणा,	रायणा
पं. ए.	रण्णो	अथवा	राइणो,	रायाणो
छ. ए.	रण्णो	अथवा	राइणो,	रायणो

(४) तृतीया, चतुर्थी, पंचमी, षष्ठी और सप्तमीके बहुवचनमें प्रत्ययोंसे पहले 'राय' शब्दके 'य' को विकल्पसे 'ई' होता है

तृ. व.	राईहि	अथवा	राएहि	
च. छ. व.	राईणं	अथवा	राइणं,	रायाणं
पं. व.	राईओ, राईसुंतो	अथवा	रायाओ,	रायासुंतो
स. व.	राईसुं	अथवा	राएसुं	

आकारान्त स्त्रीलिंग

कहा

प०-कहा	कहाओ, कहाउ, कहा
वीया-कहं	” ” ”
त०-कहाय, कहाइ, कहा(ते)ए	कहाहि, कहाहिं, कहाहिँ
च० छ०-,, ” ”	कहाण, कहाणं
पं०-कहाय, कहाइ, कहाए, कहत्तो, कहाओ-उ-हितो	कहत्तो, कहाओ-उ-हितो-सुंतो
स०-कहाय, कहाइ, कहाए	कहासु-सुं
सं०-कहे, कहा	(प्रथमाके अनुसार)

इकारान्त स्त्रीलिंग

मई

प०-मई	मईओ, मईउ, मई
वी०-मई	” ” ”
त०-मईय, मईइ, मईए	मईहि-हिं-हिँ
च० छ०-,, ” ”	मईण, मईणं
पं०-,, ” ”, मइत्तो, मईओ-उ-हितो	मइत्तो, मईओ-उ-हितो-सुंतो
स०-मईय, मईइ, मईए	मईसु, मईसुं
सं०-मइ, मई	(प्रथमाके अनुसार)

दीर्घ ईकारान्त ह्रस्व उकारान्त और दीर्घ ऊकारान्तके रूप भी 'मई'के समान जानें ।

ऋकारान्त स्त्रीलिंग

'मातृ' शब्दके स्थानमें 'माया' और 'मायरा' प्रयुक्त होते हैं, इसके सब रूप 'कहा' के समान हैं । केवल संबोधन प्रथमाकी तरह ही होता है ।

सर्वनाम

अकारान्त पुल्लिङ्ग सर्वनामके रूप 'वद्धमाण' शब्दकी तरह जानें, विशेषता निम्नलिखित है ।

सव्व

प०-...

सव्वे

च० छ०-...

सव्वेसि

पं०-सव्वम्हा

स०-सव्वत्थ, सव्वस्सि, सव्वहिं,

सव्वम्मि

(नोट) 'एय' और 'इम' को 'हिं' प्रत्यय नहीं लगता।

आकारान्त स्त्रीलिंग सर्वनाम के रूप 'कहा' की तरह होते हैं। विशेष छट्टीके बहुवचनमें 'सिं' प्रत्यय होता है।

आकारान्त नपुंसकलिंगके रूप 'जल' के समान जाते हैं।

तुम्ह-अम्ह के उपयोगी रूप

तुम्ह

पं०-तं, तुं, तुमं

तुम्हे, तुम्मे, तुज्जे, मे

बी०-तं, तुं, तुमं

,, ,, ,, ,, वो

त०-तए, तुमए, तुमे

तुम्मेहिं, तुम्हेहिं, मे

च० छ०-ते, तुह, तुज्झ

तुम्माण, तुम्हाण, मे, वो

पं०-तुमत्तो, तुमाओ

तुम्हत्तो, तुम्हाओ, तुम्भत्तो, तुम्भाओ

स०-तुमए, तए, तइ

तुम्मेसु, तुम्हेसु-सुं

अम्ह

प०-हं, अहं, अहयं

अम्हे, मो, वयं

बी०-मं, ममं

अम्हे, णे

त०-मइ, मए

अम्हेहिं, णे

च० छ०-मे, मम, मज्झ, मह, मज्झं

अम्हं, अम्हाणं, णे, णो

पं०-ममत्तो, ममाओ

अम्हत्तो, अम्हाओ

स०-मइ, मज्झे, ममंसि, ममिह

अम्हेसु

संख्यावाचक शब्द

एक-एक-इक शब्दके रूप तीनों लिंगोंमें प्रयुक्त होते हैं, उनके रूप 'सव्व' के समान जानना।

‘दो’ से ‘अट्ठारह’ तकके रूप बहुवचनमें प्रयुक्त होते हैं और तीनों लिंगोंमें समान रहते हैं। ‘अट्ठारह’ तकके संख्यावाचक शब्दोंके छट्ठीके बहुवचनमें ‘ण्ह’ और ‘ण्ह’ प्रत्यय लगता है।

दु-दो-वे

प० बी०-दुवे, दोष्णि, दुष्णि, वेष्णि, विष्णि, दो, वे

त०-दोहि-हिं-हिं, वेहि-हिं-हिं

च० छ०-दोण्ह, दोण्हं, दुण्ह, दुण्हं, वेण्ह, वेण्हं, विण्ह, विण्हं

पं०-दुत्तो, दोओ-उ-हिंतो-सुंतो, वित्तो, वेओ-उ-हिंतो-सुंतो

स०-दोसु-सुं, वेसु-सुं

ति

प० बी०-तिष्णि

च० छ०-तिण्ह, तिण्हं

शेष रूप ‘मुणि’ शब्दके बहुवचनानुसार जानें।

चउ

प० बी०-चत्तारो, चउरो, चत्तारि

त०-चउहि-हिं-हिं, चऊहि-हिं-हिं

च० छ०-चउण्ह, चउण्हं

शेष ‘साहु’ के बहुवचनानुसार जानें।

पंच

प० बी०-पंच

त०-पंचहि-हिं-हिं

च० छ०-पंचण्ह, पंचण्हं

शेष ‘वद्धमाण’ के बहुवचनानुसार।

क्रियापद

जैसे संस्कृतमें दश गण और उनमें परस्मैपदी, आत्मनेपदी, उभयपदी धातु और उनके भिन्न २ प्रत्यय होते हैं, वैसे अर्धमागधीमें नहीं। अर्धमागधीमें वर्तमानकाल, भूतकाल (ह्यस्तन परोक्ष. अद्यतन भूतके स्थानमें) आज्ञार्थ, विध्यर्थ, भविष्यकाल (श्वस्तन भविष्य और सामान्य भविष्यके स्थानमें) और क्रियाति-प्रत्यर्थ इतने कालोंका प्रयोग होता है।

स्वरान्त और व्यंजनान्त धातुमें भेद

व्यंजनान्त धातुके अन्तमें 'अ' अवश्य लगता है और स्वरान्त धातुके विकल्पसे ।

वर्तमान काल

हस्

एकवचन

प्र० पु०-हसइ, हसेइ, हसए

म० पु०-हससि, हसेसि, हससे

उ० पु०-हसामि, हसमि, हसेमि

(नोट) उत्तम पुरुषके बहुवचनमें 'मो-मु-म' ये तीन प्रत्यय लगते हैं यहाँ केवल 'मो' के रूप दिए हैं 'मु' और 'म' के रूप भी इसी प्रकार जानलें ।

बहुवचन

हसन्ति, हसन्ते, हसिरे,

हसंति, हसंते, हसेइरे,

हसिति, हसिते, हसइरे

हसह, हसित्था, हसेह, हसेइत्था, हस-

इत्था, हसेत्था

हसिमो, हसामो, हसमो, हसेमो

सर्ववचन सर्वपुरुष

हसेज, हसेज्जा, हसिज, हसिज्जा

'अस्' धातुके रूप

प्र० पु०-अत्थि

म० पु०-सि

उ० पु०-मि, अंसि

सन्ति

ह

मो

स्वरान्तधातु 'हो'

जब उपरोक्त नियमानुसार 'अ' लगता है तो इसके रूप 'हस्' की तरह होते हैं जैसे—होअइ, होअसि, होअमि इत्यादि ।

जब 'अ' नहीं लगता तो इसके रूप इस प्रकार होते हैं ।

प्र० पु०-होइ

म० पु०-होसि

उ० पु०-होमि

होंति, हुंति, होंते, होइरे

होह, होइत्था

होमो, होमु, होम

विशेष—खरान्त धातुओंमें 'दा' धातुको पुरुषबोधक प्रत्यय लगाते समय अन्य 'आ' को कहीं २ 'ए' होता है, जैसे-देइ, देंति, दिन्ति, देसि, देमि, देमु इत्यादि ।

भूतकाल

व्यंजनान्त धातुओंके सर्ववचन और सर्वपुरुषमें 'ईअ' प्रत्यय लगता है, जैसे-वस्+ईअ=वसीअ ।

खरान्त धातुओंको 'सी' 'ही' 'हीअ' प्रत्यय लगते हैं, जैसे-कासी-काही-काहीअ ।

अस्

सर्ववचन सर्वपुरुष—आसि, अहेसि

परिवर्तनसे होनेवाले रूप—अवोच, अभू, आसी, आसिमो-मु, अदक्खु, अकासि ।

(२) सर्ववचन और सर्वपुरुषमें धातुको 'त्था' और 'ईसु' प्रत्यय होता है, जैसे-होत्था, पलाइत्था । 'ईसु' प्रत्ययके लिए देखो आख्यात-विभक्ति प्रकरण ।

विशेष-(१) कहीं २ 'ईसु' को गुण भी होता है, जैसे—परिकहेसु ।

(२) धातुके पूर्व कहीं २ 'अ' का आगम भी होता है, जैसे—अकहिंसु ।

भविष्यकाल

हस्

प्र० पु०—हसिहिइ-हिए-स्सइ-स्सए

हसेहिइ-,,-,,-,,

म० पु०—हसिहिसि-हिसे-स्ससि-स्ससे-

हसेहिसि-,,-,,-,,

उत्तम पु०—हसिस्सं-स्सामि-हामि-हिमि

हसेस्सं-स्सामि-हामि-हिमि

हसिहिंति-ते--हिरे

हसेहिंति-,,-,,

हसिस्संति-ते, हसेस्संति-ते

हसिहिइ-स्सह-हित्था

हसेहिइ-,,-,,

हसिस्सामो-मु-म-हामो-मु-म-हिमो-मु-म-

हिस्सा-हित्था

हसेस्सामो-मु-म-हामो-मु-म-हिमो-मु-म-

हिस्सा-हित्था

सर्वपुरुष-सर्ववचन-हसेज-जा, हसिज-जा

हो

उपरोक्त नियमानुसार 'हो' और 'होअ' दोनोंको हस्के समान प्रत्यय लगाएँ।

विशेष—कर धातुको भविष्यकालमें 'का' आदेश विकल्पसे होता है, और उत्तम पुरुषके एक वचनमें 'काहं' विकल्पसे होता है। ऐसे ही 'दा' धातुके विषयमें भी जानें।

आज्ञार्थ और विध्यर्थ

हस्

प्र० पु०—हसउ, हसेउ, हसए, हसे	हसंतु, हसेंतु, हसिंतु
म० पु०—हसहि, हससु, हसिजसु-जहि- जे-जसि-जासि-जाहि, हसेहि- सु-जसु-जहि-जे-जसि-जासि- जाहि, हस, हसे, हसाहि	हसह, हसेह, हसिजाह, हसेजाह
उ० पु०—हससु, हसामु, हसिमु, हसेमु	हसमो, हसामो, हसिमो, हसेमो
सर्वपुरुष-सर्ववचन—हसेज-जा, हसिज-जा	

हो

(१) 'होअ' में हस्के समान प्रत्यय जुड़ते हैं।

(२) केवल 'हो' के रूप नीचे लिखे अनुसार हैं।

प्र०पु०—होउ	होंतु
म०पु०—होसु, होहि	होह
उ०पु०—होमु	होमो

क्रियातिपत्यर्थ

'क्रियातिपत्यर्थ' क्रियाकी निष्फलताका सूचक है जैसे—'ऐसा हुआ होता तो ऐसा होता' पर पहला कार्य न होने से दूसरा कार्य भी न बना।

प्रत्यय—विशेष्य के लिंगानुसार प्रथमा के एकवचन और बहुवचनके उस २ लिंगके प्रत्यय, 'न्त' लगाकर तैयार किए गए प्रत्यय और सर्ववचन सर्वपुरुषमें जज-जा प्रत्यय लगानेसे क्रियातिपत्यर्थके रूप होते हैं।

पुल्लिंग-हस्-हसन्ते, हसन्तो
हो-होन्ते, हुन्ते, होंतो,
हुंतो

हसन्ता
होन्ता, हुन्ता

स्त्रीलिंग-हस्-हसन्ती, हसन्ता
हो-होन्ती, हुन्ती, होंता,
हुन्ता

‘ओ’ और जोड़ देनेसे बहुवचनके रूप
बन जाते हैं ।

नपुंसकलिंग-हस्-हसंतं
हो-होन्तं, हुन्तं

हसन्ताई
होन्ताई, हुंताई

‘होअ’ अंगके रूप

पुल्लिंग
होअन्तो {होअन्ता

स्त्रीलिंग
होअन्ती {होअन्ता

नपुंसकलिंग
होअन्तं {होअन्ताई

सर्ववचन सर्वपुरुष

हस्-हसेज, हसेज्जा

हो-होज, होज्जा, होएज, होएज्जा

कर्मणि

जो धातु सकर्मक हो उसका कर्मणि प्रयोग होता है, कर्तामें तृतीया विभक्ति और कर्ममें प्रथमा विभक्ति होती है तथा कर्मके आधार पर क्रियापद होता है जैसे-बालो पुत्थयं पढइ—बालेण पुत्थयं पढिज्जइ इत्यादि । भाव प्रयोगमें कर्ताके स्थानमें तृतीया विभक्तिका प्रयोग होता है और कर्म न होनेके कारण क्रियापद प्रथम पुरुषके एकवचनमें प्रयुक्त होता है, जैसे-सो गच्छइ—तेण गम्मइ आदि ।

धातुसे कर्म और भावमें रूप बनानेके लिए ‘ईअ’ अथवा ‘इज्ज’ प्रत्यय प्रयुक्त होता है, इसके बाद काल के पुरुषबोधक प्रत्यय लगते हैं ।

भविष्यकाल क्रियातिपत्यर्थ आदिके रूप भाव और कर्ममें कर्ताके समान होते हैं ।

कर्म और भावमें प्रयुक्त होनेवाले कुछ धातु

कर्तरि

कर्मणि

वय्

वुच

सुण्

सुव्व

हण्

हम्म

उह्

उज्झ

भण्

भण्ण

लह्

लब्भ

हर

हीर

कर

कीर

जाण्

नज्ज

पासू

दीस

इत्यादि विकल्पसे

आदि नित्य

कृदन्त

वर्तमानकृदन्त

हसन्त, हसेन्त, हसमाण, हसेमाण (पुल्लिगके रूप वद्धमाणके समान और नपुंसकलिङ्गके रूप जलके समान होते हैं)

स्त्रीलिङ्ग-हसन्ती, हसन्ता, हसेन्ती, हसेंता, हसमाणी-माणा, हसेमाणी-माणा (आकारान्त कहाके समान और ईकारान्त मइ के समान)

हो

पुल्लिङ्ग-होन्त, हुन्त, होमाण, होअन्त, होएन्त, होअमाण, होएमाण (पुल्लिङ्ग वद्धमाणकी तरह नपुंसकलिङ्ग जलकी तरह)

स्त्रीलिङ्ग-होन्ती, हुन्ती, होन्ता, हुन्ता, होमाणी-माणा-ई-अई-एई-अन्ती-अन्ता-एन्ती-एन्ता-अमाणी-एमाणी-अमाणा-एमाणा (आकारान्त कहाकी भांति और ईकारान्त मइकी भांति)

धातुके कर्मणि अङ्गको ये ही प्रत्यय लगानेसे कर्मणि वर्तमान कृदन्त होता है।

विध्यर्थ कृदन्त

धातुके अङ्गको तव्व-यव्व-अणीअ और अणिज्ज प्रत्यय लगानेसे विध्यर्थ कर्मणि कृदन्त होता है, यदि 'तव्व' और 'यव्व' प्रत्यय लगाते समय पूर्वमें 'अ' हो तो उसे 'इ' अथवा 'ए' होता है, जैसे—झाइतव्वं-झाएतव्वं-झाइयव्वं-झाएयव्वं-झाअणीअं-झाअणिज्जं इत्यादि।

भूत-कृदन्त

धातुको 'य' अथवा 'त' प्रत्यय लगानेसे कर्मणि भूत कृदन्त होता है। प्रत्यय लगाते समय 'अ' को 'इ' होता है और यह कृदन्त विशेषण होता है। तथा स्त्रीलिंग करना हो तो 'आ' लगानेसे वैसा हो जाता है। जैसे-हसियं-हसितं, हसिए-ते, हसिओ-तो, हसिया-ता, हू+अ=हूअ-हूइअ-हूइत, हू=हूअ, हूत।

हेत्वर्थ कृदन्त

धातुके अंगको उं-तुं-तुं-इत्तए प्रत्यय लगानेसे हेत्वर्थ कृदन्त होता है, पूर्वमें यदि 'अ' हो तो उसे 'इ' अथवा 'ए' होता है, जैसे-हसिउं, हसेउं, हसितुं, हसेतुं, हसितुं, हसेतुं। 'इत्तए' के लिए देखो धातु-प्रत्यय नियम नं० २।

संबंधक भूत कृदन्त

धातुके अंगको तुं-उं-य-तूण-ऊण-तुआण-तूणं-ऊणं-तुआणं-उआणं-उआण प्रत्यय लगानेसे संबंधक भूत कृदन्त होता है तथा पूर्वके 'अ' को 'इ' अथवा 'ए' होता है। जैसे-हसितुं-उं-य-तूण-ऊण-तुआण-तूणं-ऊणं-तुआणं-उआणं-उआण, हसेतुं-उं-तूण-यावत् उआण। विशेषताके लिए देखो धातु-प्रत्यय नियम नं० १।

समास

संस्कृतके समान अर्धमागधीमें भी सात समास होते हैं।

गाहा-दंदे य बहुव्रीही, कम्मधारयए दिगुयए चेव।

तप्पुसिसे अव्वईभावे, एगसेसे य सत्तमे ॥ १ ॥ (अनुयोगद्वारसूत्र)

विशेषता यह है कि संस्कृतके स्थानमें अर्धमागधी शब्दोंका प्रयोग होता है।

सुत्ताणुक्रमणिया

सुत्तणामं	पिटुसंखा
आयारे	१
सूयगडं	१०१
ठाणे	१८३
समवाए	३१६
भगवई-विवाहपण्णत्ती	३८४
णायाधम्मकहाओ	९४१
उवासगदसाओ	११२७
अंतगडदसाओ	११६१
अणुत्तरोववाइयदसाओ	११९१
पण्हावागरणं	११९९
विवागसुयं	१२४१

णमोऽत्थु णं समणस्स भगवओ णायपुत्त-महावीरस्स

सुत्तागमे

तत्थ णं

आयारे

सुयं मे आउसं ! तेणं भगवया एवमक्खायं ॥ १ ॥ इह-मेगेसिं णो सण्णा भवइ, तंजहा-पुरत्थिमाओ वा दिसाओ आगओ अहमंसि ? दाहिणाओ वा दिसाओ आगओ अहमंसि, पच्चत्थिमाओ वा दिसाओ आगओ अहमंसि, उत्तराओ वा दिसाओ आगओ अहमंसि, उट्ठाओ वा दिसाओ आगओ अहमंसि ? अहो दिसाओ वा आगओ अहमंसि ? अण्णयरीओ वा दिसाओ अणुदिसाओ वा आगओ अहमंसि ? एवमेगेसिं णो णायं भवइ. अत्थि मे आया उववाइए, णत्थि मे आया उववाइए के अहं आसि ? के वा इओ चुओ इह पेच्चा भविस्सामि ? ॥ २ ॥ से जं पुण जाणेज्जा सहसंमइयाए परवागरणेणं. अण्णेसिं अंतिए वा सोच्चा. तंजहा— पुरत्थिमाओ वा दिसाओ आगओ अहमंसि. जाव अण्णयरीओ दिसाओ अणुदिसाओ वा आगओ अहमंसि. एवमेगेसिं जं णायं भवइ. अत्थि मे आया उववाइए, जो इमाओ-दिसाओ अणुदिसाओ वा अणुसंचरइ सोहं, सव्वाओ दिसाओ-अणुदिसाओ जो आगओ अणुसंचरइ, सोहं । से आयावाई, लोयावाई, कम्मावाई, किरियावाई ॥ ३ ॥ अकरिस्सं चाहं कारवेसुं चड्हं करओ यावि समणुत्ते भविस्सामि; एयावंति सव्वावंति लोगंसि कम्मसमारंभा परिजाणियव्वा भवंति ॥ ४ ॥ अपरिण्णायकम्मे खलु अयं पुरिसे, जो इमाओ दिसाओ अणुदिसाओ अणुसंचरइ, सव्वाओ दिसाओ सव्वाओ अणुदिसाओ साहेइ, अणेगरूवाओ जोणीओ संघेइ, विरूवरूवे फासे पडिसंवेदेइ ॥ ५ ॥ तत्थ खलु भगवया परिण्णा पवेइया ॥ ६ ॥ इमस्स चेव जीवियस्स परिचंदणमाणणपूयणाए, जाईमरणमोयणाए, दुक्खपडिवायहेउं ॥ ७ ॥ एयावंति सव्वावंति लोगंसि कम्मसमारंभा परिजाणियव्वा भवंति ॥ ८ ॥ जरसेते लोगंसि कम्मसमारंभा परिण्णाया भवंति से हु मुणी परिण्णायकम्मे त्ति बेमि ॥ ९ ॥ पढमो उइसो ॥

अट्ठे लोए परिजुण्णे दुस्संबोहे अविजाणए अस्सि लोए पव्वहिए तत्थ तत्थ पुढो णास आतुरा अस्सि परितावेंति ॥ १० ॥ संति पाणा पुढोसिया, लज्जमाणा पुढो

पास ॥ ११ ॥ अणगारा मोत्ति एगे पवयमाणा; जमिणं विरुवरुवेहिं सत्थेहिं पुढ-
 विकम्मसमारंभेण पुढविसत्थं समारंभमाणे अणेगरुवे पाणे विहिंसइ ॥ १२ ॥ तत्थ
 खलु भगवया परिण्णा पवेइआ । इमस्स चेव जीवियस्स परिवंदण-माणण-पूयणाए,
 जाइमरणमोयणाए, दुक्खपडिघायहेउं, से सयमेव पुढविसत्थं समारंभइ, अण्णेहिं
 वा पुढविसत्थं समारंभावेइ । अण्णेवा पुढविसत्थं समारंभंते समणुजाणइ । तं से
 अहियाए, तं से अबोहिए ॥ १३ ॥ से तं संबुज्झमाणे आयाणीयं समुट्ठाय सोच्चा
 खलु भगवओ, अणगाराणं अंतिए; इहमेगेसिं णातं भवति-एस खलु, गंथे एस खलु
 मोहे, एस खलु मारे, एस खलु णरए । इच्चत्थं गट्ठिए लोए जमिणं विरुवरुवेहिं
 सत्थेहिं पुढविकम्मसमारंभेण पुढविसत्थं समारंभमाणे अण्णे अणेगरुवे पाणे
 विहिंसइ ॥ १४ ॥ से बेमि-अप्पेगे अंधमब्भे, अप्पेगे अंधमच्छे; अप्पेगे पाय-
 मब्भे, अप्पेगे पायमच्छे, अप्पेगे गुप्फमब्भे, २ अप्पेगे जंधमब्भे, २ अप्पेगे
 जाणुमब्भे २ अप्पेगे ऊरुमब्भे, २ अप्पेगे कडिमब्भे, २ अप्पेगे णाभिमब्भे,
 २ अप्पेगे उयरमब्भे, २ अप्पेगे पासमब्भे, २ अप्पेगे पिट्ठिमब्भे, २ अप्पेगे
 उरमब्भे, २ अप्पेगे हिययमब्भे, २ अप्पेगे थणमब्भे, २ अप्पेगे खंधमब्भे,
 २ अप्पेगे बाहुमब्भे, २ अप्पेगे हत्थमब्भे, २ अप्पेगे अंगुलिमब्भे, २ अप्पेगे
 णहमब्भे, २ अप्पेगे गीवमब्भे, २ अप्पेगे हणुमब्भे, २ अप्पेगे होठुमब्भे,
 २ अप्पेगे दंतमब्भे, २ अप्पेगे जिब्भमब्भे, २ अप्पेगे तालुमब्भे, २ अप्पेगे
 गलमब्भे, २ अप्पेगे गंडमब्भे, २ अप्पेगे कण्णमब्भे, २ अप्पेगे णासमब्भे,
 २ अप्पेगे अच्छिमब्भे, २ अप्पेगे भसुहमब्भे, २ अप्पेगे णिडालमब्भे, २ अप्पेगे
 सीसमब्भे, २ अप्पेगे संपमारए, अप्पेगे उद्वए ॥ १५ ॥ इत्थं सत्थं समारंभमा-
 णस्स इच्चेते आरंभा अपरिण्णाता भवंति । एत्थ सत्थं असमारंभमाणस्स इच्चेते
 आरंभा परिण्णाता भवंति ॥ १६ ॥ तं परिण्णाय मेहावी नेव सयं पुढवि सत्थं
 समारंभेज्जा, णेवण्णेहिं पुढविसत्थं समारंभावेज्जा, णेवण्णे पुढविसत्थं समारंभंते
 समणुजाणेज्जा । जस्सेते पुढविकम्मसमारंभा परिण्णाता भवंति से हु मुणी परि-
 ण्णातकम्मेति बेमि ॥ १७ ॥ **बीयो उद्देसो ॥**

से बेमि, जहावि अणगारे उज्जुकडे, णियायपडिघण्णे अमायं कुव्वमाणे विया-
 हिते, जाए सद्धाए णिवखंतो तमेवअणुपालिया वियहित्तु विसोत्तियं- ॥ १८ ॥
 पणया वीरा महावीहिं, लोगं च आणाए अभिसमेच्चा अकुओभयं ॥ १९ ॥ से
 बेमि णेव सयं लोगं अब्भाइक्खज्जा, णेव अत्ताणं अब्भाइक्खज्जा । जे लोयं
 अब्भाइक्खइ, से अत्ताणं अब्भाइक्खइ, जे अत्ताणं अब्भाइक्खइ, से लोयं अब्भा-

इक्खइ ॥ २० ॥ लज्जमाणा पुढो, पास, अणगारा मो त्ति एगे पवयमाणा; जमिणं विरुवरुवेहिं सत्थेहिं उदयकम्मसमारंभेणं उदयसत्थं समारंभमाणे अणेगरुवे पाणे विहिंसइ ॥ २१ ॥ तत्थ खलु भगवया परिण्णा पवेइया, इमस्स चैव जीवियस्स परिवंदण, माणण, पूयणाए जाइमरणमोयणाए, दुक्खपडिघायहेउं, से सयमेव उदयसत्थं समारभति, अण्णेहिं वा उदयसत्थं समारंभावेति, अन्ने उदयसत्थं समारंभंते समणुजाणति, तं से अहियाए, तं से अबोहीए ॥ २२ ॥ से तं संबुज्झमाणे आयाणीयं समुट्ठाय सोच्चा खलु भगवओ अणगाराणं अंतिए इहमेगेसिं णायं भवति, एस खलु गंथे, एस खलु मोहे, एस खलु मारे, एस खलु णरए । इच्चत्थं गट्ठिए लोए जमिणं विरुवरुवेहिं सत्थेहिं उदयकम्मसमारंभेणं उदयसत्थं समारंभमाणे अण्णे अणेगरुवे पाणे विहिंसइ ॥ २३ ॥ से बेमि, संति पाणा उदयनिस्सिया जीवा अणेगे, इह च खलु भो ! अणगाराणं उदयजीवा वियाहिया । सत्थं चेत्थं अणुवीइ पासा । पुढो सत्थं पवेदितं ॥ २४ ॥ अदुवा अदिन्नादाणं ॥ २५ ॥ कप्पइ णे कप्पइ णे पाउं, अदुवा विभूसाए, पुढो सत्थेहिं विउट्ठंति एत्थंवि तेसिं णो णिकरणाए ॥ २६ ॥ एत्थ सत्थं समारभमाणस्स इच्चेते आरंभा अपरिण्णाया भवंति । एत्थ सत्थं असमारंभमाणस्स इच्चेते आरंभा परिण्णाया भवंति । तं परिण्णाय मेहावी णेव सयं उदयसत्थं समारंभेज्जा, णेवन्नेहिं उदयसत्थं समारंभावेज्जा उदयसत्थं समारंभंतेऽवि अण्णे ण समणुजाणेज्जा, जस्सेते उदयसत्थसमारंभा परिण्णाया भवंति से हु मुणी परिण्णातकम्मे त्ति बेमि ॥ २७ ॥ **तइओइसो ॥**

से बेमि णेव सयं लोयं अब्भाइक्खेज्जा, णेव अत्ताणं अब्भाइक्खेज्जा, जे लोणं अब्भाइक्खति, से अत्ताणं अब्भाइक्खति, जे अत्ताणं अब्भाइक्खति, से लोणं अब्भाइक्खति ॥ २८ ॥ जे दीहलोगसत्थस्स खेयन्ने, से असत्थस्स खेयन्ने; जे असत्थस्स खेयन्ने, से दीहलोगसत्थस्स खेयन्ने ॥ २९ ॥ वीरेहिं एयं अभिभूय दिट्ठं, संजतेहिं सया जत्तेहिं सया अप्पमत्तेहिं ॥ ३० ॥ जे पमत्ते गुणट्ठीए, से हु दंडे त्ति पवुच्चति । तं परिण्णाय मेहावी इयाणिं णो जमहं पुव्वमकासी पमादेणं ॥ ३१ ॥ लज्जमाणा पुढो पास-अणगारा मोत्ति एगे पवयमाणा जमिणं विरुवरुवेहिं सत्थेहिं अगणिकम्मसमारंभेणं अगणिसत्थं समारंभमाणे, अण्णे अणेगरुवे पाणे विहिंसति ॥ ३२ ॥ तत्थ खलु भगवया परिण्णा पवेदिया, इमस्स चैव जीवियस्स परिवंदण-माणणपूयणाए, जाइमरणमोयणाए, दुक्खपडिघायहेउं, से सयमेव अगणिसत्थं समारंभति, अण्णेहिं वा अगणिसत्थं समारंभावेइ अण्णेवा अगणिसत्थं समारंभमाणे समणुजाणति । तं से अहियाए तं से अबोहिए ॥ ३३ ॥ से तं संबुज्झमाणे आया-

णीयं समुठ्ठाय सोच्चा भगवओ अणगाराणं इहमेगेसिं णायं भवति-एस खलु गंधे एस खलु मोहे एस खलु मारे एस खलु णरए । इच्चत्थं गट्ठिए लोए जमिणं विरुवरुवेहिं सत्थेहिं अगणिकम्मसमारंभमाणे अण्णे अणेगरुवे पाणे विहिंसति ॥ ३४ ॥ से बेमि, संति पाणा, पुढविणस्सिया, तणणस्सिया, पत्तणस्सिया, कट्ठणस्सिया, गोमयणस्सिया, कयवरणस्सिया; सन्ति संपातिमा पाणा, आहच्च संपयंति । अगणिं च खलु पुठ्ठा, एगे संधायमावज्जंति । जे तत्थ संधायमावज्जंति, ते तत्थ परियावज्जंति, जे तत्थ परियावज्जंति ते तत्थ उद्दायंति ॥ ३५ ॥ एत्थ सत्थं असमारंभमाणस्स इच्चेते आरंभा परिण्णाया भवंति ॥ ३६ ॥ तं परिण्णाय मेहावी नेव सयं अगणिसत्थं समारंभेज्जा, नेवच्चेहिं अगणिसत्थं समारंभावेज्जा, अगणिसत्थं समारंभमाणे अच्चे न समणुजाणेज्जा । जस्सेते अगणिकम्मसमारंभा परिण्णाया भवंति, से हु मुणी परिण्णायकम्मे त्ति बेमि ॥ ३७ ॥ चउत्थोद्देसो ॥

तं णो करिस्सामि समुठ्ठाए मत्ता मतिमं, अभयं विदिता, तं जे णो करए, एसोवरए, एत्थोवरए, एस अणगारे त्ति पवुच्चइ ॥ ३८ ॥ जे गुणेसे आवट्टे जे आवट्टे से गुणे ॥ ३९ ॥ उड्डं-अहं-तिरियं-पाईणं पासमाणे रुवाई पासइ, सुणमाणे सद्दाइ सुणइ, उड्डं-अहं-तिरियं पाईणं मुच्छमाणे रुवेसु मुच्छति, सद्देसु यावि एस लोणे वियाहिए । एत्थ अगुते अणाणाए पुणो पुणो गुणासाते वंक्समायारे पमत्तेऽगारमावसे ॥ ४० ॥ लज्जमाणा पुढो पास, अणगारा मोत्ति एगे पवदमाणा; जमिणं विरुवरुवेहिं सत्थेहिं वणस्सइकम्मसमारंभेणं वणस्सइसत्थं समारंभमाणा अण्णे अणेगरुवे पाणे विहिंसति ॥ ४१ ॥ तत्थ खलु भगवया परिण्णा पवेदिता । इमस्स चेव जीवियस्स परिवंदण, माणण, पूयणाए, जातिमरण मोयणाए दुक्खपडिघायहेउं से सयमेव वणस्सइसत्थं समारंभइ, अण्णेहिं वा वणस्सइसत्थं समारंभावेइ, अण्णे वा वणस्सइसत्थं समारंभमाणे समणुजाणइ, तं से अहियाए, तं से अबोहीए ॥ ४२ ॥ से तं संबुज्जमाणे आयाणीयं समुठ्ठाए सोच्चा भगवओ, अणगाराणं वा अंतिए इह मेगेसिं णायं भवति-एस खलु गंधे एस खलु मोहे एस खलु मारे एस खलु णरए । इच्चत्थं गट्ठिए लोए; जमिणं विरुवरुवेहिं सत्थेहिं वणस्सइकम्मसमारंभेणं वणस्सइसत्थं समारंभमाणे अच्चे अणेगरुवे पाणे विहिंसति ॥ ४३ ॥ से बेमि, -इमंपि जाइधम्मयं, एयंपि जाइधम्मयं, इमंपि बुद्धिधम्मयं एयंपि बुद्धिधम्मयं; इमंपि चित्तमंतयं एयंपि चित्तमंतयं; इमंपि छिन्नं मिलाति, एयंपि छिन्नं मिलाति; इमंपि आहारगं, एयंपि आहारगं; इमंपि अणिच्चयं, एयंपि अणिच्चयं; इमंपि असासयं, एयंपि असासयं; इमंपि चओवचइयं, एयंपि चओवचइयं; इमंपि विपरिणामधम्मयं, एयंपि

विपरिणामधम्मयं ॥ ४४ ॥ एत्थ सत्थं समारंभमाणस्स इच्चेते आरंभा अपरिण्णाता भवन्ति । एत्थ सत्थं असमारंभमाणस्स इच्चेते आरंभा परिण्णाया भवन्ति । तं परिण्णाय मेहावी नेव सयं वणस्सइसत्थं समारंभेज्जा, नेवण्णेहिं वणस्सइसत्थं समारंभावेज्जा, नेवण्णे वणस्सइसत्थं समारंभते समणुजाणेज्जा, जस्सेते वणस्सइसत्थसमारंभा परिण्णाया भवन्ति से हु मुणी परिण्णायकम्मे ति बेमि ॥ ४५ ॥ **पंचमोद्देशो ॥**

से बेमि, संतिमे तसा पाणा, तंजहा-अंडया, पोयया, जराउया, रसया, संसेयया, संमुच्छिमा, उब्भियया, उववातिया, एस संसारेति पवुच्चति, मंदस्स अविद्याणतो ॥ ४६ ॥ णिज्झाइत्ता पडिलेहिता पत्तेयं परिणिव्वाणं सव्वेसिं पाणाणं, सव्वेसिं भूयाणं, सव्वेसिं जीवाणं, सव्वेसिं सत्ताणं, असातं अपरिणिव्वाणं, महब्भयं दुक्खं ति बेमि ॥ ४७ ॥ तसंति पाणा पदिसोदिसासुय । तत्थ तत्थ पुढो पास आउरा परितावेंति । संति पाणा पुढोसिता ॥ ४८ ॥ लज्जमाणा पुढो पास अणगारा मोत्ति एगे पवयमाणा जमिणं विरुवरुवेहिं सत्थेहिं तसकायसमारंभेणं तसकायसत्थं समारंभमाणे अण्णे अणेगरुवे पाणे विहिंसइ ॥ ४९ ॥ तत्थ खलु भगवया परिण्णा पवेदिता । इमस्स चेव जीवियस्स परिवंदण, माणण, पूयणाए, जाइमरणमोयणाए, दुक्खपडिघायहेउं, से सयमेव तसकायसत्थं समारंभति, अण्णेहिं वा तसकायसत्थं समारंभावेइ, अण्णे वा तसकायसत्थं समारंभमाणे समणुजाणति; तं से अहियाए, तं से अबोहीए ॥ ५० ॥ से तं संबुज्जमाणे आयाणीयं समुट्ठाय सोच्चा भगवओ, अणगाराणं अंतिए इहमेगेसिंणायं भवइ-एस खलु गंथे, एस खलु मोहे, एस खलु मारे, एस खलु णरए । इच्चत्थं गट्ठिए लोए; जमिणं विरुवरुवेहिं सत्थेहिं तसकायसमारंभेणं तसकायसत्थं समारंभमाणे अण्णे अणेगरुवे पाणे विहिंसति ॥ ५१ ॥ से बेमि-अप्पेगे अच्छाए वहंति, अप्पेगे अजिणाए वहंति, अप्पेगे मंसाए वहंति, अप्पेगे सोणिताए वहंति, अप्पेगे हिययाए वहंति, एवंपित्ताए वसाए-पिच्छाए-पुच्छाए-बालाए-विसाणाए-दंताए-दाढाए-णहाए-ण्हाण्णीए-अट्ठीए-अट्ठीमिंजाए-अट्ठाए-अणट्ठाए-अप्पेगे हिंसिं सु मेत्ति वा वहंति, अप्पेगे हिंसंति मेत्ति वा वहंति, अप्पेगे हिंसिस्संति मेत्ति वा वहंति ॥ ५२ ॥ एत्थ सत्थं समारंभमाणस्स इच्चेते आरंभा अपरिण्णाया भवन्ति एत्थ सत्थं असमारंभमाणस्स इच्चेते आरंभा परिण्णाया भवन्ति ॥ ५३ ॥ तं परिण्णाय मेहावी नेवसयं तसकायसत्थं समारंभेज्जा, नेवण्णेहिं तसकायसत्थं समारंभावेज्जा, नेवण्णे तसकायसत्थं समारंभते समणुजाणेज्जा, जस्सेते तसकायसत्थसमारंभा परिण्णाया भवन्ति, से हु मुणी परिण्णायकम्मे ति बेमि ॥ ५४ ॥ **इइ छट्ठोद्देशो ॥**

पट्ट एजस्स दुगंछणाए, आयंकदंसी अहियंति नच्चा । जे अज्झत्थं जाणइ, से बहिया जाणइ, जे बहिया जाणइ, से अज्झत्थं जाणइ । एयं तुलमन्नेसिं । इह संतिगया दविया णावकंखंति जीविउं ॥ ५५ ॥ लज्जमाणा पुढो, पास, अणगारा मोत्ति एगे पवयमाणा; जमिणं विरुवरुवेहिं सत्थेहिं, वाउक्कम्मसमारंभेणं वाउसत्थं समारंभमाणे अण्णे अणे-गरुवे पाणे विहिंसइ ॥ ५६ ॥ तत्थ खलु भगवया परिण्णा पवेइया, इमस्स चेव जीवियस्स परिवंदण, माणण, पय्णणाए, जाइमरणमोयणाए दुक्खपडिघायहेउं, से सयमेव वाउसत्थं समारंभति, अच्चेहिं वा वाउसत्थं समारंभावेति, अच्चे वा वाउसत्थं समारंभंते समणुजाणति, तं से अहियाए तं से अबोहीए ॥ ५७ ॥ से तं संबुज्झमाणे आयाणीयं समुट्ठाए सोच्चा भगवओ अणगाराणं अंतिए इहमेगेसिं णायं भवति-एस खलु गंधे, एस खलु मोहे, एस खलु मारे, एस खलु णरए । इच्चत्थं गट्ठिए लोए, जमिणं विरुवरुवेहिं सत्थेहिं वाउक्कम्मसमारंभेणं वाउसत्थं समारंभमाणे अच्चे अणेग-रुवे पाणे विहिंसति ॥ ५८ ॥ से बेमि, संति संपाइमा पाणा, आहच्च संपयंति य फरिसं च खलु पुट्ठा एगे संचायमावज्जंति । जे तत्थ संचायमावज्जंति, ते तत्थ परि-यावज्जंति, जे तत्थ परियावज्जंति, ते तत्थ उद्दायंति ॥ ५९ ॥ एत्थ सत्थं समारंभ-माणस्स इच्चेते आरंभा अपरिण्णाया भवंति । एत्थ सत्थं असमारंभमाणस्स इच्चेते आरंभा परिण्णाया भवंति ॥ ६० ॥ तं परिण्णाय मेहावी णेव सयं वाउसत्थं समारंभेज्जा, णेवच्चेहिं वाउसत्थं समारंभावेज्जा, णेवच्चे वाउसत्थं समारंभंते समणु-जाणेज्जा । जस्सेते वाउसत्थसमारंभा परिण्णाया भवंति से हु मुणी परिण्णायकम्मे त्ति बेमि ॥ ६१ ॥ एत्थं पि जाणे उवादीयमाणा जे आचार्ये न रमंति, आरंभमाणा विणयं वयंति, छंदोवणीया, अज्झोववण्णा, आरंभसत्ता पकरंति संगं ॥ ६२ ॥ से वसुमं सव्वसमण्णागयपण्णाणेणं अप्पाणेणं अकरणिज्जं पावकम्मं णो अच्चेसिं ॥ ६३ ॥ तं परिण्णाय मेहावी णेव सयं छज्जीवणिकायसत्थं समारंभेज्जा, णेवच्चेहिं छज्जीवणि-कायसत्थं समारंभावेज्जा, णेवच्चे छज्जीवणिकायसत्थं समारंभंते समणुजाणेज्जा । जस्सेते छज्जीवणिकायसत्थसमारंभा परिण्णाया भवंति, से हु मुणी परिण्णायक-म्मेत्ति बेमि ॥ ६४ ॥ **सत्तमोद्देशो ॥**

॥ सत्थपरिण्णा णाम पढमज्झयणं समत्तं ॥

जे गुणे से मूलट्ठाणे, जे मूलट्ठाणे से गुणे, इति से गुणट्ठी महत्ता परियावेणं पुणो पुणो वसे पमत्ते, तंजहा-माया मे, पिया मे, भाया मे, भइणी मे, भज्जा मे, पुत्ता मे, धूया मे, णुत्ता मे, सहि-सयण-संगंथ-संथुया मे, विविक्तुवगरण-परिवट्ठण-भोयण-

च्छायणं मे, इच्छत्थं गट्ठिए लोए वसे पमत्ते ॥ ६५ ॥ अहोय राओ परियप्पमाणे,
कालाकालसमुट्ठाई, संजोगट्ठी, अट्ठालोमी, आलुं पे, सहसाकारे, विणिविट्ठचित्ते
एत्थ सत्थे पुणो पुणो ॥ ६६ ॥ अप्पं च खलु आउयं इहमेगेसिं माणवाणं; तं जहा सो-
यपरिण्णाणेहिं, परिहायमाणेहिं, चक्खुपरिण्णाणेहिं परिहायमाणेहिं, घाणपरिण्णाणेहिं
परिहायमाणेहिं, रसणापरिण्णाणेहिं परिहायमाणेहिं, फासपरिण्णाणेहिं परिहायमा-
णेहिं, अभिक्कंतं च खलु वयं संपेहाए तओ से एगया मूढभावं जणयति ॥ ६७ ॥
जेहिं वा सद्धिं संवसति, तेविणं एगया णियगा पुब्बिं परिव्वयंति । सो वि ते णियगे
पच्छा परिवएज्जा, णालं ते तव ताणाए वा, सरणाए वा । तुमं पि तेसिं नालं
ताणाए वा, सरणाए वा । से ण हासाए, ण किड्ढाए, ण रतीए, ण विभूसाए, ॥ ६८ ॥
इच्चैवं समुट्ठिए अहोविहारए अंतरं च खलु इमं संपेहाए धीरो मुहुत्तमवि णो पमा-
यए । वओ अच्चेइ जोव्वणं च ॥ ६९ ॥ इह जीविए जे पमत्ता । से हंता, छेत्ता,
भेत्ता, लुं पित्ता, विलुं पित्ता, उद्वित्ता, उत्तासइत्ता, अकडं करिस्सामिति मण-
माणे ॥ ७० ॥ जेहिं वा सद्धिं संवसति ते वा णं एगया णियगा तं पुब्बिं पोसेंति,
सो वा ते नियगे पच्छा पोसिज्जा । णालं ते तव ताणाए वा, सरणाए वा । तुमं पि
तेसिं णालं ताणाए वा सरणाए वा ॥ ७१ ॥ उवाइयसेसेण वा संणिहिसंणियओ-कि-
ज्जति, इहमेगेसिं असंजतारं भोयणाए । तओ से एगया रोगसमुप्पाया समुप्प-
ज्जंति ॥ ७२ ॥ जेहिं वा सद्धिं संवसति ते वा णं एगया णियगा तं पुब्बिं परिहरंति,
सो वा ते णियगे पच्छा परिहरिज्जा । णालं ते तव ताणाए वा सरणाए वा तुमं पि
तेसिं नालं ताणाए वा सरणाए वा ॥ ७३ ॥ एवं जाणिन्तु दुक्खं पत्तेयं सायं, अणभि-
क्कंतं च खलु वयं संपेहाए खणं जाणाहिं पंडिए ॥ ७४ ॥ जाव सोयपरिण्णाणा
अपरिहीणा, जाव गेत्तपरिण्णाणा अपरिहीणा, जाव घाणपरिण्णाणा अपरिहीणा, जाव
जीहपरिण्णाणा अपरिहीणा, जाव फासपरिण्णाणा अपरिहीणा, इच्चेतेहिं विरुक्खवेहिं
पन्नाणेहिं अपरिहीणेहिं आयुठ्ठं सम्मं समणुवासिज्जासिति बेमि ॥ ७५ ॥ **पढमो-
देसो समत्तो ॥**

अरइं आउट्टे से मेहावी; खणंसि मुक्के ॥ ७६ ॥ अणाणाय पुट्ठावि एगे णियट्ठंति
मंदा मोहेण पाउडा ॥ ७७ ॥ “अपरिग्गहा भविस्सामो” समुट्ठाय लद्धे कामे
अभिगाहंति, अणाणाए मुणिणो, पडिलेहंति, एत्थं मोहे पुणो पुणो सण्णा, णो हव्वाए
णो, पाराए ॥ ७८ ॥ विमुत्ता हु ते जणा, जे जणा पारगामिणो लोभं अलोमेण
दुगंलमाणे लद्धे कामे णाभिगाहइ, विणावि लोभं निक्खम्म एस अकम्मं जाणति
पासति । पडिलेहाए णावकंखति, एस अणगारित्तिपवुच्चति ॥ ७९ ॥ अहोयराओ

परितप्पमाणे कालाकालसमुद्वाइ, संजोगट्ठी, अट्टालोभी, आलुंपे, सहसाकारे, विणि-
विट्ठचित्ते एत्थ, सत्थे पुणो पुणो ॥ ८० ॥ से आयबले, से णाइबले, से सयणबले,
से मित्तबले, से पिच्चबले, से देवबले, से रायबले, से चोरबले, से अतिहिबले, से
किविणबले, से समणबले, इच्चेतेहिं विरुवरुवेहिं कज्जेहिं दंडसमायाणं संपेहाए भया
कज्जति । पावमुक्खत्ति मण्णमाणे अदुवा आसंसाए ॥ ८१ ॥ तं परिण्णाय मेहावी,
णेव सयं एएहिं कज्जेहिं दंडं समारंभिजा, णेवणं एएहिं कज्जेहिं दंडं समारंभाविजा,
एएहिं कज्जेहिं दंडं समारंभंतेवि अण्णे णो समणुजाणिजा ॥ ८२ ॥ एस मग्गे
आयरिएहिं पवेदिए, जहेत्थ कुसले णोवलंप्पिजासि-त्ति बेमि ॥ ८३ ॥ **वीओ-
देसो समत्तो ॥**

से असइं उच्चागोए, असइं णीयागोए । णो हीणे, णो अइरित्ते, णोऽपीहए, इय
संखाय को गोयावादी, को माणावादी, कंसि वा एगे गिज्झा ॥ ८४ ॥ तम्हा पंडिए
णो हरिसे, णो कुपे, भूएहिं जाण पडिलेह सातं, समित्ते एयाणुपस्सी, तंजहा-
अंधत्तं, बहिरत्तं, मूयत्तं, काणत्तं, कुंटत्तं, खुज्जत्तं, वडभत्तं, सामत्तं, सबलत्तं, सहप-
माणं, अणेगरूवाओ जोणीओ, संघायति, विरुवरुवे फासे परिसंवेदेइ ॥ ८५ ॥
से अबुज्झमाणे हतोवहते जाइमरणमणुपरियट्ठमाणे ॥ ८६ ॥ जीवियं पुढो पियं
इहमेगेसिं माणवाणं खित्तवत्थुममायमाणं ॥ ८७ ॥ आरत्तं विरत्तं मणिकुंडलं, सह
हिरण्णेण इत्थियाओ परिगिज्झति तत्थेव रत्ता ॥ ८८ ॥ “ण इत्थ तवो वा, दमो
वा, णियमो वा, दिस्सति,” संपुणं बाले जीविउकामे लालप्पमाणे मूढे विप्परियास-
मुवेति ॥ ८९ ॥ इणमेव णावकंखंति, जे जणा धुवचारिणो; जातीमरणं परिञ्चाय,
चरे संक्रमणे दढे ॥ ९० ॥ णत्थि कालस्स णागमो ॥ ९१ ॥ सव्वे पाणा पिया-
उया, सुहसाया, दुक्खपडिकूला, अप्पियवहा, पियजीविणो, जीविउकामा, ॥ ९२ ॥
सव्वेसिं जीवियं पियं ॥ ९३ ॥ तं परिगिज्झ दुपर्यं चउप्पर्यं अभिजुंजिया णं,
संसिंचियाणं, ति विधेण जावि से तत्थ मत्ता भवइ अप्पा वा बहुगा वा से तत्थ
गञ्झिए चिट्ठइ, भोयणाए ॥ ९४ ॥ तओ से एगया विविहं परिसिट्ठं संभूर्यं महोवगरणं
भवति । तंपि से एगया दायाया वा विभयंति, अदत्तहारो वा से अवहरति, रायाणो
वा से विट्ठंप्ति, णस्सति वा से, विणस्सति वा से, अगारदाहेण वा से डज्झइ ॥ ९५ ॥
इय से परस्सट्ठाए कूराइं कम्माइं बाले पकुव्वमाणे तेण दुक्खेण संमूढे विप्परिया-
समुवेति ॥ ९६ ॥ मुणिणा हु एयं पवेइयं ॥ ९७ ॥ अणोहंतरा एते, णय ओहं
तरित्ताए, अतीरंगमा एते, णयतीरं गमित्ताए । अपारंगमा एते णय पारं गमि-
त्ताए ॥ ९८ ॥ आयाणिजं च आयाय, तंमि ठाणे ण चिट्ठइ । वितहं पप्पऽखेयन्ने

तंमि ठाणंमि चिट्ठइ ॥ ९९ ॥ उद्देसो पासगस्स णत्थि ॥ १०० ॥ बाले पुण णिहे कामसमणुण्णे असमितदुक्खे दुक्खी दुक्खाणमेव आवट्ठं अणुपरियट्ठइ ति बेमि ॥ १०१ ॥
तइओद्देसो समत्तो ॥

ततो से एगया रोगसमुप्पाया समुप्पज्जंति ॥ १०२ ॥ जेहिं वा साद्धिं संवसति, ते वा णं एगया णियया पुब्बिं परिवयंति । सो वा ते णियगे पच्छा परिवइज्जा, णालं ते तव ताणाए वा, सरणाए वा, तुमं पि तेसिं णालं ताणाए वा सरणाए वा ॥ १०३ ॥ जाणित्तु दुक्खं पत्तेयं सायं ॥ १०४ ॥ भोगा मेव अणुसोयंति—इहमेगेसिं माणवाणं, तिविहेण, जावि से तत्थ मत्ता भवइ, अप्पा वा, बहुगा वा, से तत्थ गट्ठिणं चिट्ठति, भोयणाए ॥ १०५ ॥ ततो से एगया विपरिसिट्ठं संभूयं महोवगरणं भवति, तंमि से एगया दायाया विभयंति, अदत्तहारो वा से हरति, रायाणो वा से विळुं पति, णस्सइ वा से, विणस्सइ वा से, अगारडाहेण वा से उज्झइ ॥ १०६ ॥ इय, से बाले परस्स अट्ठाए कूराणि कम्माणि पकुव्वमाणे तेण दुक्खेण मूढे विप्परियासमुवेत्ति ॥ १०७ ॥ आसं च छंदं च विगिंच धीरे ॥ १०८ ॥ तुमं चेव तं सल्लमाहट्ठु ॥ १०९ ॥ जेणसिया तेण णो सिया ॥ ११० ॥ इणमेव णाव-बुज्जंति, जे जणा मोहपाउडा ॥ १११ ॥ श्रीलोएपव्वहिए ते भो वयंति “एयाइं आयतणाइं” ॥ ११२ ॥ से दुक्खाए-मोहाए-माराए-णरगाए-णरगतिरि-क्खाए ॥ ११३ ॥ सततं मूढे धम्मं णाभिजाणाति ॥ ११४ ॥ उदाहु वीरे, अप्प-मादो महामोहे ॥ ११५ ॥ अलं कुसलस्स पमादेणं, संति मरणं संपेहाए, मेउरधम्मं संपेहाए ॥ ११६ ॥ णालं पास अलं ते एएहिं, एयं पस्स, मुणी ? महब्भयं ॥ ११७ ॥ णातिवाइज्ज कंचणं ॥ ११८ ॥ एस वीरे पसंसिए—जे ण णिविज्जति आदाणाए ॥ ११९ ॥ “ण मे देति” ण कुप्पिज्जा, थोवं लद्धुं ण खिसए, पडिसेहियो परिण-मिज्जा, पडिलाभिओ परिणमेज्जा ॥ १२० ॥ एयं मोणं समणुवासिज्जासित्ति बेमि ॥ १२१ ॥ **चउत्थोद्देसो समत्तो ॥**

जमिणं विरुवरुवेहिं सत्थेहिं लोगस्स कम्मसमारंभा कज्जंति, तंजहा—अप्पणो से पुत्ताणं, धूयाणं, सुण्हाणं, णातीणं, धातीणं, राईणं, दासाणं, दासीणं, कम्मकराणं, कम्मकरीणं, आएसाए, पुढोपेहणाए, सामासाए, पायरासाए, संणिहि—संनिचओ कज्जई, इह मेगेसिं माणवाणं भोयणाए ॥ १२२ ॥ समुट्ठिते अणगारे आरिए आरि-यदंसी, आरियपण्णे, अयंसंधित्ति, अदक्खु, से णादिए, णादिआवए, णादियंतं समणुजाणइ ॥ १२३ ॥ सव्वामगंधं परिण्णाय णिरामगंधो परिव्वए ॥ १२४ ॥ अदिस्समाणे कयविक्कएसु; से ण किणे, ण किणावए, किणंतं ण समणुजाणइ ॥ १२५ ॥

से भिक्खु कालण्णे-बालण्णे-मायण्णे-खेयण्णे-खणयण्णे-विणयण्णे-ससमयण्णे-परसम-
 यण्णे-भावण्णे-परिगगहं अममायमाणे, कालाणुद्वाइ, अपडिन्ने दुहओ छेत्ता,
 नियाइ ॥ १२६ ॥ वत्थं-पडिगगहं-कंबलं-पायपुच्छं-उग्गाहं च कडासणं, एतेसु
 चेव जाणिज्जा ॥ १२७ ॥ लद्धे आहारे, अणगारो मायं जाणिज्जा, से जहेयं भगवया
 पवेइयं ॥ १२८ ॥ लाभुत्ति ण मज्जिज्जा, अलाभुत्ति ण सोइज्जा, बहुंपि लद्धं ण
 णिहे, परिगगहाओ अप्पाणं अवसक्किज्जा, अण्णहा णं पासए परिहरिज्जा ॥ १२९ ॥
 एस मग्गे आयरिएहिं पवेदिते, जहित्थ कुसले णोवलिंप्पिज्जासित्ति बेमि ॥ १३० ॥
 कामा दुरतिकमा, जीवियं दुप्पडिवूहणं, कामकामी खलु अयं पुरिसे, से सोयति,
 जूरति, तिप्पति, पिड्डति, परितप्पति ॥ १३१ ॥ आययचक्खु लोगविपासी लोगस्स
 अहो भागं जाणति, उड्डं भागं जाणति, तिरियंभागं जाणति ॥ १३२ ॥ गद्धिए
 लोए अणुपरियट्टमाणे, संधिं विदिता इह मच्चिएहिं, एस वीरे पसंसिए जे बद्धे
 पडिमोयए ॥ १३३ ॥ जहा अंतो तहा बाहिं जहा बाहिं तहा अंतो ॥ १३४ ॥
 अंतो पृतिदेहंतराणि पासति पुढोवि सवंताइं पंडिए पडिलेहाए ॥ १३५ ॥ से मइमं
 परिणाय माय हु लालं पच्चासी, मा तेसु तिरिच्छमप्पाणमावायए ॥ १३६ ॥ कासं-
 कासे खलु अयं पुरिसे, बहुमाइ, कडेण मूढे, पुणो तं करेइ लोभं, वेरं वड्ढेति
 अप्पणो ॥ १३७ ॥ जमिणं परिकहिज्जइ इमस्स चेव पडिवूहणयाए अमराय महा-
 सद्धी अट्टमेतं तु पेहाए ॥ १३८ ॥ अपरिन्नाय कंदति, से तं जाणह जमहं बेमि
 ॥ १३९ ॥ ते इच्छं पंडिते पवयमाणे, से हंता, छित्ता भित्ता, लुंपइत्ता, विळुंपइत्ता
 उद्वइत्ता, अकडं करिस्सामित्ति मण्णमाणे, जस्सवि य णं करेइ, अलं बालस्स
 संगेण, जे वा से कारइ बाले, ण एवं अणगारस्स जायतित्ति बेमि ॥ १४० ॥
पंचमोद्देशो समत्तो ॥

से तं संवुज्जमाणे आयाणीयं समुट्ठाय तम्हा पावकम्मं णेव कुज्जा, ण कार-
 वेज्जा ॥ १४१ ॥ सिया तत्थएगयरं विप्परामुसति, छमु अण्णयरंमि, कप्पति ॥ १४२ ॥
 सुहट्ठी लालप्पमाणो सएण दुक्खेण मूढे विप्परियासमुवेति । सएण विप्पमाएण पुढो
 वयं पकुव्वति, जं सि मे पाणा पव्वहिया, पडिलेहाए णो णिकरणयाए एस परिण्णा
 पवुच्चति, कम्मोवसंती ॥ १४३ ॥ जे ममाइयमतिं जहाति, से चयइ ममाइयं से हु
 दिट्ठपहे सुणी जस्स, णत्थि ममाइतं ॥ १४४ ॥ तं परिणाय मेहावी विदिता लोगं
 वंता लोगसण्णं से मतिमं परिकमिज्जासित्ति बेमि ॥ १४५ ॥ णारतिं सहते वीरे,
 वीरे णो सहते रतिं । जम्हा अविमणे वीरे, तम्हा वीरे ण रज्जति ॥ १४६ ॥ सदे
 फासे अहियासमाणे, णिव्विद णंदिं इह जीवियस्स ॥ १४७ ॥ सुणी मोणं समायाय,

धुणे कम्मसररीरंगं; पंतं ल्हं च सेवंति, वीरा संमत्तदंसिणो ॥ १४८ ॥ एस ओधंतरे मुणी, तिन्ने मुत्ते, विरते विद्याहितेत्ति बेमि ॥ १४९ ॥ दुक्खसुमुणी अणाणाए० तुच्छए गिलाइ वत्ताए ॥ १५० ॥ एस वीरे पसंसिए, अच्चेइ लोयसंजोयं, ॥ १५१ ॥ एस णाए पवुच्चइ, जं दुक्खं पवेदितं इह माणवाणं, तस्स दुक्खस्स कुसला परिण्ण-मुदाहरंति ॥ १५२ ॥ इति कम्मं परिण्णाय सव्वसो ॥ १५३ ॥ जे अणन्नदंसी से अण्णारामे, जे अण्णारामे से अण्णदंसी ॥ १५४ ॥ जहा पुण्णस्स कत्थति तहा तुच्छस्स कत्थति, जहा तुच्छस्स कत्थति तहा पुण्णस्स कत्थति ॥ १५५ ॥ अविय ह्णो अणातियमाणे । एत्थं पि जाण, सेयंति णत्थि ॥ १५६ ॥ केयं पुरिसे कंच णए ? एस वीरे पसंसिए, जे बद्धे पडिमोयए, उद्धं अहं तिरियं दिसासु ॥ १५७ ॥ से सव्वतो सव्वपरिण्णाचारि ण लिप्पति छणपएण, वीरे ॥ १५८ ॥ से, मेहावी अणुग्वायणखेयन्ने जे य वंधपमुक्खमन्नेसी ॥ १५९ ॥ कुसले पुण णो बद्धे, णो मुक्के ॥ १६० ॥ से जं च आरमे जं च णारमे । अणारद्धं च ण आरमे ॥ १६१ ॥ छणं छणं परिण्णाय लोगसन्नं च सव्वसो ॥ १६२ ॥ उद्देसो पासगस्स णत्थि ॥ १६३ ॥ बाले पुणे णिहे कामसमण्णे असमियदुक्खे दुक्खी दुक्खाणमेव आवट्ठं अणुपरियट्ठति बेमि ॥ १६४ ॥ छट्ठोद्देसो समत्तो ॥

लोगविजय णाम वीअमज्झयणं समत्तं ॥

सुत्ता अमुणी मुणिणो सया जागरंति ॥ १६५ ॥ लोयंसि जाण अहियाय दुक्खं ॥ १६६ ॥ समयं लोगस्स जाणित्ता, इत्थ सत्थोवरए ॥ १६७ ॥ जस्सिमे सद्दा य-रूवाय-गंधा य-रसा य-फासा य-अहिसमन्नागया भवंति, से आयवं-णाणवं-वेयवं-धम्मवं-वंभव- पन्नाणेहिं परियाणइ लोयं, मुणीति वुच्चे धम्मविउ, उज्जू आव-ट्ठसोए संगमभिजाणति, सीउसिणच्चाइ, से निगंथे, अरइरइसहे फरुसयं णो वेदेति, जागरे-वेरोवरए-धीरे एवं दुक्खा पमुच्चति ॥ १६८ ॥ जरामच्चुवसोवणीए णरे सययं मूढे धम्मं णाभिजाणाति ॥ १६९ ॥ पासिय आउरपाणे, अप्पमत्तो परिव्वए ॥ १७० ॥ मंता य, मइमं-पास ॥ १७१ ॥ आरंभजं दुक्खमिगंति णच्चा, माइ पमाइ पुण-एइ गब्भं, उवेहमाणो सद्दुरुवेसु उज्जू, माराभिसंकी मरणा पमुच्चति ॥ १७२ ॥ अप्पमत्तो कामेहिं, उवरतो पावकम्मोहिं, वीरे आयगुत्ते खेयन्ने ॥ १७३ ॥ जे पज्जवजायस-त्थस्स खेयन्ने, से असत्थस्स खेयन्ने; जे असत्थस्स खेयन्ने, से पज्जवजाय सत्थस्स खेयन्ने ॥ १७४ ॥ अकम्मस्स ववहारो न विज्जइ, कम्मणा उवाही जायइ ॥ १७५ ॥ कम्मं च पडिलेहाए, कम्ममूलं च जं छणं ॥ १७६ ॥ पडिलेहिय, सव्वं समायाय

दोहिं अंतेहिं अदिस्समाणे ॥ १७७ ॥ तं परिण्णाय मेहावी विदिता लोगं, वंता लोगसजं से मइमं परक्कमिज्जासित्ति बेमि ॥ १७८ ॥ **पढमोद्देसो समत्तो ॥**

जातिं च वुड्ढिं च इहज्ज पासे, भूतेहिं जाणे पडिलेह सातं । तम्हाऽतिविज्जो परमंति णच्चा, संमत्तदंसी ण करेति पावं ॥ १७९ ॥ उम्मुं च पासं इह मच्चिएहिं, आरंभजीवी उभयाणुपस्सी । कामेसु गिद्धा णिचयं करेंति । संसिच्चमाणा पुणरिति गब्भं ॥ १८० ॥ अवि से हासमासज्ज, हंता णंदीति मच्चति । अलं बालस्स संगेणं वेरं वड्ढेति अप्पणो ॥ १८१ ॥ तम्हा-तिविज्जो परमंति णच्चा, आर्यकदंसी ण करेति पावं ॥ १८२ ॥ अगं च मूलं च विगिंच धीरे, पल्लिच्छदिया णं णिक्कम्मदंसी ॥ १८३ ॥ एस मरणा पमुच्चति, से हु दिठ्ठभए मुणी, लोयंसी परमदंसी विवित्तजीवी उवसंते समिते सहिते सयाजए कालकंखी परिव्वए ॥ १८४ ॥ बहुं च खलु पावकम्मं पगडं, सच्चमि धिइं कुव्वहा, एत्थोवरए मेहावी सव्वं पावकम्मं झोसति ॥ १८५ ॥ अणेगचित्ते खलु अयं पुरिसे, से केयणं अरिहए पूरिण्णए से अन्नवहाए, अण्णपरियावा ए अण्णप्परिगहाए, जणवयवहाए, जणवयपरियावाए, जणवयपरिगहाए ॥ १८६ ॥ आसेविता एतमठ्ठं इच्चेवेगे समुट्ठिया, तम्हा तं विइयं नो सेवे णिस्सारं पासिय णाणी ॥ १८७ ॥ उववायं चवणं णच्चा, अण्णणं चर माहणे ॥ १८८ ॥ से ण छणे- ण छणावए, छणंतं णाणुजाणइ ॥ १८९ ॥ णिव्विद णंदिं अरते पयासु, अणोमदंसी णिसच्चे पावेहिं कम्महेहिं ॥ १९० ॥ कोहाइमाणं हणिया य वीरे, लोभस्स पासे णिरयं महंतं । तम्हाय वीरे विरते वहाओ, छिदिज्ज सोयं लहुभूयगामी ॥ १९१ ॥ गंथं परिजाय इहज्ज वीरे, सोयं परिण्णाय चरिज्ज दंते । उम्मज्ज लहुं इह माणवेहिं, णो पाणिणं पाणे समारभिज्जासि-त्ति बेमि ॥ १९२ ॥ **वीओद्देसो समत्तो ॥**

संधिं लोगस्स जाणित्ता ॥ १९३ ॥ आययो बहिया पास, तम्हा ण हंताण- विघायये ॥ १९४ ॥ जमिणं अन्नमन्नवित्तिगिच्छाए पडिलेहाए ण करेइ पावं कम्मं, किं तत्थ मुणी कारणं सिया? समयं तत्थुवेहाए अप्पाणं विप्पसायए ॥ १९५ ॥ अण्णणपरमं नाणी, णो पमाए कयाइवि । आयगुत्ते सया धीरे, जायामायाइ जावए ॥ १९६ ॥ विरागं रूवेहिं गच्छिज्जा महता खुड्डएहिं य ॥ १९७ ॥ आगतिं गतिं परिण्णाय दोहिं अंतेहिं अदिस्समाणेहिं से ण छिज्जइ, ण भिज्जइ, ण डज्जइ, ण हम्मइ कंचणं सव्वलोए ॥ १९८ ॥ अवरेण पुव्विं ण सरंति एगे, किमस्सतीतं किंवाऽऽगमिस्सं । भासंति एगे इह माणवाओ, जमस्सतीतं तं आगमिस्सं ॥ १९९ ॥ णातीतमठ्ठं णय आगमिस्सं, अठ्ठं निअच्छंति तहागया उ; विधूतकप्पे एताणुपस्सी, णिज्जोसइत्ता खवगे महेसी ॥ २०० ॥ का अरइ! के आणंदे? एत्थं पि अगगहे

चरे । सव्वं हासं परिच्चज्ज, आलीणगुत्तो परिव्वए ॥ २०१ ॥ **पुरिसा, तुममेव तुमं मित्तं, किं बहिया मित्तमिच्छसि** ॥ २०२ ॥ जं जाणिज्जा उच्चालइयं तं जाणिज्जा दूरालइयं, जं जाणिज्जा दूरालइयं तं जाणेज्जा उच्चालइयं ॥ २०३ ॥ पुरिसा ! अत्ताणमेवं अभिणिगिज्झ एवं दुक्खा पमुच्चसि ॥ २०४ ॥ पुरिसा ! सच्चमेव समभिजाणाहि, सच्चस्साणाए से उवट्ठिए मेहावी मारं तरति, सहिओ धम्ममायाय सेयं समणुपस्सति ॥ २०५ ॥ दुहओ, जीवियस्स परिवंदणमाणणपूयणाए, जंसि एगे पमायंति ॥ २०६ ॥ सहिओ दुक्खमत्ताए पुट्ठो णो झंझाए; पासिमं दविए लोए लोयालोयपवंचाओ मुच्चइति बेमि ॥ २०७ ॥ **तइओइसो समत्तो** ॥

से वंता कोहं च, माणं च, मायं च, लोभं च, एयं पासगस्स दंसणं, उवरयसत्थस्स पलियंतकरस्स आयाणं सगडब्भि ॥ २०८ ॥ **जे एगं जाणइ से सव्वं जाणइ, जे सव्वं जाणइ से एगं जाणइ** ॥ २०९ ॥ **सव्वतो पमत्तस्स भयं, सव्वतो अप्पमत्तस्स णत्थि भयं** ॥ २१० ॥ जे एगं णामे से बहुं णामे, जे बहुं णामे से एगं णामे ॥ २११ ॥ दुक्खं लोयस्स जाणित्ता, वंता लोगस्स संजोगं, जंति वीरा महाजाणं, परेण परं जंति, नावकंखंति जीवियं ॥ २१२ ॥ एगं विगिंचमाणे पुढो विगिंचइ पुढो विगिंचमाणे एगं विगिंचइ ॥ २१३ ॥ सङ्की आणाए मेहावी ॥ २१४ ॥ लोगं च आणाए अभिसमेच्च अकुओभयं ॥ २१५ ॥ अत्थि सत्थं परेण परं, णत्थि असत्थं परेण परं ॥ २१६ ॥ जे कोहदंसी से माणदंसी, जे माणदंसी से मायादंसी, जे मायादंसी से लोभदंसी, जे लोभदंसी से पिज्जदंसी, जे पिज्जदंसी से दोसदंसी, जे दोसदंसी से मोहदंसी, जे मोहदंसी से गब्भदंसी, जे गब्भदंसी से जम्मदंसी, जे जम्मदंसी से मारदंसी, जे मारदंसी से णरयदंसी, जे णरयदंसी से तिरियदंसी, जे तिरियदंसी से दुक्खदंसी ॥ २१७ ॥ से मेहावी अभिनिवट्ठिज्जा, कोहं च-माणं च-मायं च-लोहं च-पिज्जं च-दोसं च-मोहं च-गब्भं च-जम्मं च-मरणं च-णरणं च-तिरियं च-दुक्खं च-एयं पासगस्स दंसणं उवरयसत्थस्स पलियंतकरस्स ॥ २१८ ॥ आयाणं णिसिद्धा सगडब्भि ॥ २१९ ॥ किमत्थि ओवाहि पासगस्स ? ण विज्जइ ? णत्थित्ति, बेमि ॥ २२० ॥ **चउत्थोइसो समत्तो** ॥

सीयोसणीयं तइयज्झयणं समत्तं

से बेमि—जेय अईया, जेय पडुप्पञ्चा, जेय आगमिस्सा-अरहंता भगवंतो ते सव्वे, एव-माइक्खंति-एवं भासंति-एवं पण्णवित्ति, एवं पळुवित्ति—सव्वे पाणा, सव्वे भूया, सव्वे जीवा, सव्वे सत्ता, ण हंतव्वा, ण अजावेयव्वा, ण परिधितव्वा, ण

परितावेयव्वा, ण उद्वेयव्वा, ॥ २२१ ॥ एस धम्मे सुद्धे, णिइए-सासए-समिच्च लोयं
 खेयच्चेहिं पवेइए, तंजहा-उट्ठिएसु वा, अणुट्ठिएसु वा, उवट्ठिय-अणुवट्ठिएसु वा, उव-
 रयदंडेसु वा, अणुवरयदंडेसु वा, सोवहिएसु वा, अणोवहिएसु वा, संजोगरएसु वा,
 असंजोगरएसु वा ॥ २२२ ॥ तच्चं चेयं तहा चेयं अस्सिं चेयं पवुच्चइ ॥ २२३ ॥
 तं आइत्तु ण णिहे ण णिक्खिवे, जाणित्तु धम्मं जहा तहा ॥ २२४ ॥ दिट्ठेहिं णिवेयं
 गच्छिज्जा ॥ २२५ ॥ णो लोगस्सेसणं चरे ॥ २२६ ॥ जस्स णत्थि इमा जाई अज्ञा
 तस्स कओ सिया ! ॥ २२७ ॥ दिट्ठं सुयं मयं विच्चायं, जमेयं परिकहिज्जइ ॥ २२८ ॥
 समेमाणा पलेमाणा पुणो पुणो जातिं पक्कपंति ॥ २२९ ॥ अहोय राओय जयमाणे
 धीरे सया आगयपन्नाणे, पमत्ते बहिया पास अप्पमत्ते सया परिकमिज्जासित्ति
 वेमि ॥ २३० ॥ पढमोहेसो समत्तो ॥

जे आसवा ते परिस्सवा, जे परिस्सवा ते आसवा ॥ २३१ ॥ जे अणासवा
 ते अपरिस्सवा, जे अपरिस्सवा ते अणासवा ॥ २३२ ॥ एए पए संबुज्जमाणे लोयं
 च आणाए अभिसमिच्चा पुढो पवेइयं ॥ २३३ ॥ आघाइ णाणी इह माणवाणं
 संसारपडिवन्नाणं संबुज्जमाणाणं विच्चाणपत्ताणं, अट्ठावि संता अदुवा पमत्ता, अहा
 सच्च मिणंति-वेमि ॥ २३४ ॥ नाणागमो मच्चुमुहस्स अत्थि । इच्छापणीया वंका-
 णिकेया कालगहीआ णिचयणिविट्ठा पुढो पुढो जाई पक्कपयंति, ॥ २३५ ॥ इह-
 मेगेसिं तत्थ तत्थ संथवो भवति । अहोववाइए फासे पडिसंवेयंति ॥ २३६ ॥ चिट्ठं
 कूरेहिं कम्मेहिं, चिट्ठं परिचिट्ठति; अचिट्ठं कूरेहिं कम्मेहिं णो चिट्ठं परिचिट्ठति ॥ २३७ ॥
 एगे वयंति अदुवावि णाणी, णाणी वयंति अदुवावि एगे ॥ २३८ ॥ आवंती केयावंती
 लोयंसि समणा य माहणाय पुढो विवायं वदंति, “से दिट्ठं च णे, सुयं च णे, मयं च
 णे, विण्णायं च णे, उट्ठं अहं तिरियं दिसासु सव्वतो सुपडिलेहिं च णे सव्वे पाणा,
 सव्वे भूया, सव्वे जीवा, सव्वे सत्ता-हंतव्वा-अज्जावेयव्वा-परिघेतव्वा-परियावेयव्वा-
 उद्वेयव्वा । एत्थं पि जाणह, णत्थित्थ दोसो ।” अणारियवयणमेयं ॥ २३९ ॥ तत्थ
 जे ते आरिया, ते एवं वयासी—“से दुदिट्ठं च मे, दुस्सुयं च मे, दुम्मयं च मे,
 दुव्विच्चायं च मे, उट्ठं, अहं, तिरियं दिसासु सव्वतो दुप्पडिलेहिं च मे; जं णं तुब्भे
 एवमाइक्खह, एवं भासह, एवं परूवेह-एवं पन्नवेह-सव्वे पाणा-सव्वे भूया-सव्वे जीवा-
 सव्वे सत्ता, हंतव्वा, अज्जावेयव्वा, परिघेतव्वा-परियावेयव्वा-उद्वेयव्वा-एत्थवि
 जाणह नत्थित्थ दोसो ।” अणारियवयणमेयं ॥ २४० ॥ वयं पुण एवमाइक्खामो,
 एवं भासामो, एवं परूवेमो, एवं पन्नवेमो, “सव्वे पाणा, सव्वे भूया, सव्वे जीवा,
 सव्वे सत्ता, ण हंतव्वा, ण अज्जावेतव्वा, ण परिघेतव्वा, ण परियावेयव्वा, ण उद्वे-

वेयव्वा, एत्थवि जाणह, णत्थित्थ दोसो ।” आरियवयणमेयं ॥ २४१ ॥ पुव्वं
निकायसमयं, पत्तेयं पत्तेयं पुच्छिस्सामो, हं भो पवादिया, किं मे सायं दुक्खं उदाहु
असायं ? समिया पडिवन्ने यावि एवं बूया,—सव्वेसिं पाणाणं, सव्वेसिं भूयाणं,
सव्वेसिं जीवाणं, सव्वेसिं सत्ताणं, असायं, अपरिणिव्वाणं महब्भयं दुक्खं ति
बेमि ॥ २४२ ॥ **वीओदेसो समत्तो ॥**

उवेहि णं बहिया य लोयं, से सव्वलोयंमि जे केइ विबू ॥ २४३ ॥ अणुवीइ
पास, णिक्खित्तदंडा जे केइ सत्ता पलियं चयंति, णरे मुयच्चा धम्मविदुत्ति अंजू ;
आरंभजं दुक्खमिणंति णच्चा, एवमाहु संमत्तदंसिणो ॥ २४४ ॥ ते सव्वे पावाइया
दुक्खस्स कुसला परिणमुदाहरंति, इति कम्मं परिचयाय सव्वसो ॥ २४५ ॥ इह
आणाकंखी पंडिए अणिहे, एगमप्पाणं संपेहाए धुणे सरीरं ॥ २४६ ॥ कसेहि
अप्पाणं, जरेहि अप्पाणं ॥ २४७ ॥ जहा जुच्चाइं कट्ठाइं हव्ववाहो पमत्थति, एवं
अत्तसमाहिए अणिहे ॥ २४८ ॥ विगिंन्व कोहं अविकंपमाणे, इमं णिरुद्धाउयं संपेहाए
॥ २४९ ॥ दुक्खं च जाण अदुवागमेस्सं, पुढो फासाइं च फासे, लोयं च पास, विक्कं-
दमाणं ॥ २५० ॥ जे णिव्वुडा, पावेहिं कम्महेहिं अणियाणा ते वियाहिया ॥ २५१ ॥
तम्हाऽतिविजो णो पडिंसंजलिज्जासिति बेमि ॥ २५२ ॥ **तइओदेसो समत्तो ॥**

आवीलए पवीलए निप्पीलए, जहिता पुव्वसंजोगं हिच्चा उवसमं ॥ २५३ ॥
तम्हा अविमणे वीरे, सारए समिए सहिते सया जए ॥ २५४ ॥ दुरणुचरो मग्गो
वीराणं अणियट्ठगामीणं ॥ २५५ ॥ विगिंन्व मंससोणियं, एस पुरिसे दवीए वीरे
आयाणिजे वियाहिए, जे धुणाइ समुस्सयं वसित्ता बंभचेरंमि ॥ २५६ ॥ णित्तेहिं
पल्लिखेहिं आयाणसोयगट्ठिए बाले, अव्वोच्छिन्नबंधणे अणभिकंतसंजोए । तमंसि
अविजाणओ आणाए लंभो णत्थि-त्ति बेमि ॥ २५७ ॥ जस्स नत्थि पुरा पच्छा,
मज्जे तस्स कुओ सिया ? ॥ २५८ ॥ से हु पन्नाणमंते बुद्धे आरंभोवरए, सम्ममेयंति
पासह, जेण बंधं वहं धोरं परितार्वं च दासुणं ॥ २५९ ॥ पल्लिखिदिय बाहिरणं
च सोयं, णिक्कम्मदंसी इह मच्चिएहिं ॥ २६० ॥ कम्मणं सफलं दट्ठूण तओ णिज्जइ
पुव्ववी ॥ २६१ ॥ जे खलु भो ! वीरा ते समिता सहिता सयाजता संघडदंसिणो
आतोवरया अहातहं लोगमुवेहमाणा पाईणं पडीणं दाहीणं उदीणं इति सबंसि परि-
चिट्ठिंसु ॥ २६२ ॥ साहिस्सामो णाणं वीराणं समियाणं सहियाणं, सयाजताणं
संघडदंसिणं आतोवरयाणं अहातहं लोगंसमुवेहमाणाणं किमत्थि उवाधी ? पासगस्स
ण विज्जति णत्थिति बेमि ॥ २६३ ॥ **चउत्थोदेसो समत्तो ॥**

सम्मत्तं णाम चउत्थमज्झयणं समत्तं

आवंती केयावंती लोयंसि विप्परासुसंति अट्टाए अणट्टाए वा । एएसु चेव विप्परासुसंति, गुरु से कामा, तओ से मारंते, जओ से मारंते, तओ से दूरे, नेव से अंतो नेव से दूरे ॥ २६४ ॥ से पासति फुसियमिव कुसग्गे पणुञ्जं णिवइतं वाते-रितं, एवं बालस्स जीवियं मंदस्स अविजाणओ ॥ २६५ ॥ कूराइं कम्माइं बाले पकुव्वमाणे तेण दुक्खेण मूढे विपरियासमुवेति, मोहेण गब्भं मरणाइ एति, एत्थ मोहे पुणो पुणो ॥ २६६ ॥ संसयं परियाणतो संसारे परिण्णाते भवति, संसयं अपरिजाणओ संसारे अपरिण्णाते भवति ॥ २६७ ॥ जे छेए से सागारियं ण सेवइ ॥ २६८ ॥ कट्ठु एवं अविजाणओ वितिया मंदस्स बालया ॥ २६९ ॥ लढ्ढा हुरत्था पडिलेहाए आगमिता आणविज्जा अणासेवणयत्ति बेमि ॥ २७० ॥ पासह एगे रूवेसु गिद्धे परिणिज्जमाणे, इत्थं फासे पुणो पुणो, आवंती केयावंती लोयंसि आरंभजीवी ॥ २७१ ॥ एएसु चेव आरंभजीवी, इत्थं वि बाले परिपञ्चमाणे रमति पावेहिं कम्मेहिं असरणे सरणंति मण्णमाणे ॥ २७२ ॥ एहमेगेसि एगचरिया भवति, से बहुकोहे, बहुमाणे-बहुमाए-बहुलोहे-बहुरए-बहुनडे-बहुसडे-बहुसंकप्पे, आसवसत्ती पल्लिउच्छजे उट्ठियवायं पवयमाणे “मा मे केइ अदक्खु” अण्णाणपमायदोसेणं, सययं मूढे धम्मं णाभिजाणाइ ॥ २७३ ॥ अट्ठा पया माणव? कम्मकोविया जे अणुवरया अविजाए पल्लिमुक्खमाहु आवट्टमेव अणुपरियट्ठंति बेमि ॥ २७४ ॥

पढमोद्देशो समत्तो ॥

आवंती केयावंती लोए अणारंभजीविणो तेसु ॥ २७५ ॥ एत्थोवरए तं झोसमाणे “अयं संधीति” अदक्खु, जे इमस्स विग्गहस्स अयं खणेत्ति अन्नेसी ॥ २७६ ॥ एस मग्गे आरिएहिं पवेदिते, उट्ठिए णो पमायए, जाणि तु दुक्खं पत्तेयं सायं ॥ २७७ ॥ पुढो छंदा इह माणवा, पुढो दुक्खं पवेदितं, से अविहिंसमाणे अणवयमाणे, पुढो फासे विप्पणुजए । एस समिया परियाए वियाहिते ॥ २७८ ॥ जे असत्ता पावेहिं कम्मेहिं उदाहु ते आयंका फुसंति इति उदाहु धीरे ते फासे पुढो अहियासइ ॥ २७९ ॥ से पुव्वं पेयं, पच्छापेयं भिउरधम्मं विद्धंसणधम्मं-अधुवं अणितियं असासयं चयावचइयं विप्परिण्णामधम्मं, पासह एयं रूवसंधिं ॥ २८० ॥ ससुप्पेहमाणस्स इक्कायणरयस्स इह विप्पसुक्कस्स णत्थि मग्गे विरयस्सत्ति बेमि ॥ २८१ ॥ आवंती केयावंती लोगंसि परिग्गहावंती, -से अपयं वा, बहुयं वा, अणुं वा, थूलं वा, चित्तमंतं वा, अचित्तमंतं वा, एतेसु चेव परिग्गहावंती ॥ २८२ ॥ एवमेवेगेसि महब्भयं भवति, लोगवितं च णं उवेहाए ॥ २८३ ॥ एए संगे अविजाणतो से सुपडिबद्धं सूवणीयंति णच्चा, पुरिसा! परमचक्खु विप्पक्कमा, एतेसु

चेव बंभचेरं ति बेमि ॥ २८४ ॥ से सुयं च मे, अज्झत्थयं च मे, बंधपमुक्खो अज्झत्थेव ॥ २८५ ॥ इत्थ विरते अणगारे वीहरायं तितिक्खए ॥ २८६ ॥ पमत्ते बहिया पास, अप्पमत्तो परिक्खए ॥ २८७ ॥ एयं मोणं सम्मं अणुवासिज्जासिति बेमि ॥ २८८ ॥ **बीयोहेसो समत्तो ॥**

आवंती के यावंती लोयंसि अपरिग्गहावंती एएसु चेव अपरिग्गहावंती सुच्चा वई मेहावी, पंडियाण णिसामिया ॥ २८९ ॥ समियाए धम्मो आरिएहिं पवेदिते जहित्थ मए संधी झोसिए एवमण्णत्थ संधी दुज्झोसए भवति, तम्हा बेमि णो णिह्णिज्ज वीरियं ॥ २९० ॥ जे पुव्वुट्ठाई णो पच्छाणिवाई, जे पुव्वुट्ठाई पच्छाणिवाई, जे णो पुव्वुट्ठाई णो पच्छाणिवाई, सेऽवि तारिसिए सिया, जे परिणाय लौगमण्णेसरयंति, एयं णियाय मुणिणा पवेदितं ॥ २९१ ॥ इह आणाकंखी पंडिए अणिहे, पुव्वावररायं जयमाणे सया सीलं सुपेहाए ॥ २९२ ॥ सुणिया भवे अकामे अङ्गं ॥ २९३ ॥ इमेण चेव जुज्झाहि, किं ते जुज्झेण वज्जओ? जुद्धारिहं खलु दुल्लहं ॥ २९४ ॥ जहित्थ कुसलेहिं परिन्नाविवेगे भासिए, चुए हु बाले गम्भाइसु रज्जइ ॥ २९५ ॥ अस्सि चेयं पव्वुच्चति, ख्वंसि वा छणंसि वा ॥ २९६ ॥ से हु एगे संविद्धपहे मुणी, अण्णहा लोगमुवेहमाणे ॥ २९७ ॥ इति कम्मं परिणाय सव्वसो से ण हिंसति संजमति णो पगम्भति, उवेहमाणो पत्तेयं सायं ॥ २९८ ॥ वन्नाएसी णारभे कंचणं सव्वलोए, एगप्पमुहे विदिसप्पइन्ने निव्विन्नचारी अरए पयासु ॥ २९९ ॥ से वसुमं सव्वसमन्नागयपन्नाणेणं अप्पाणेणं अकरणिजं पावकम्मं तं णो अन्नेसी ॥ ३०० ॥ जं सम्मं ति पासहा तं मोणं ति पासहा, जं मोणं ति पासहा तं सम्मं ति पासहा ॥ ३०१ ॥ ण इमं सक्कं सिढिलेहिं अदिजमाणेहिं गुणासाएहिं वंक्समायारेहिं पमत्तेहिं गारमावसंतेहिं ॥ ३०२ ॥ मुणी मोणं समायाए, धुणे कम्मसरिरगं, पंतं ल्हं सेवंति, वीरा संमत्तदंसिणे ॥ एस ओहं तरे मुणी, तिण्णे मुत्ते विरए वियाहिएत्ति बेमि ॥ ३०३ ॥ **तइओहेसो समत्तो ॥**

गामाणुगामं दूइज्जमाणस्स दुज्जातं दुप्परकृतं भवति अवियत्तस्स भिक्खुणो ॥ ३०४ ॥ वयसावि एगे बुइया कुप्पंति माणवा, उन्नयमाणे य णरे महता मोहेण मुज्झति, संबाहा बहवे भुज्जो २ दुरतिक्रमा अजाणतो, अपासतो, एयं ते मा होउ, एयं कुसलस्स दंसणं ॥ ३०५ ॥ तदिट्ठीए तम्मुत्तीए तप्पुरक्कारे तत्सन्नी तच्चिवेसणे जयं विहारी चित्तिणिवाती पंथणिज्झाती पलिबाहिरे, पासिय पाणे गच्छिज्जा ॥ से अभिक्कममाणे पडिक्कममाणे संकुच्चमाणे पसारेमाणे विणिवट्टमाणे संपल्लिमज्जमाणे ॥ ३०६ ॥ एगया गुणसमियस्स रीयतो कायसंकासं समणुच्चिन्ना एगतिया पाणा २ सुत्ता०

उदायन्ति; इहलोगवेयणविज्जावडियं, जं आउट्टिकयं कम्मं तं परिन्नाय विवेगमेति,
 एवं से अप्पमाएणं विवेगं किट्ठति पुव्ववी ॥ ३०७ ॥ से पभूयदंसी पभूयपरिन्नाणे
 उवसंते समिए सहिते सयाजए, दट्ठुं विप्पडिवेदेति अप्पाणं, “किमेस जगो करि-
 स्सति ! एस से परमारामो जाओ लोगंमि इत्थीओ”, मुणिणा हु एतं पवेदितं
 ॥ ३०८ ॥ उव्वाहिज्जमाणे गामधम्मोहिं अवि णिब्बलासए, अवि ओमोयरियं कुज्जा,
 अवि उट्ठं ठाणं ठाइज्जा, अवि गामाणुगामं दूइज्जिज्जा, अवि आहारं चुच्छिदिज्जा,
 अवि चए इत्थिसु मणं ॥ ३०९ ॥ पुव्वं दंडा पच्छा फासा, पुव्वं फासा पच्छा
 दंडा, इच्चेते कलहासंगकरा भवंति । पडिलेहाए आगमिन्ता आणविज्जा अणासेवणाए
 त्ति बेमि ॥ ३१० ॥ से णो काहिए, णो पासणिए, णो मामए, णो कयकिरिए,
 वइयुत्ते, अज्झप्पसंयुडे, परिवज्जइ सदा पावं, एयं मोणं समणुवासिज्जासि-त्ति
 बेमि ॥ ३११ ॥ **चउत्थोद्देसो समत्तो ॥**

से बेमि—तंजहा, अवि हरए पडिपुत्ते समंसि भोमे चिट्ठइ उवसंतरए सारक्ख-
 माणे, से चिट्ठति सोयमज्जगए, से पास, सव्वतो गुत्ते, पास, लोए महेसिणो, जे य
 पन्नाणमंता पबुद्धा आरंभोवरया सम्ममेयंति पासह, कालस्स कंखाए परिववयंति
 त्ति बेमि ॥ ३१२ ॥ वितिगिच्छसमावज्जेणं अप्पाणेणं णो लभति समाधिं ॥ ३१३ ॥
 सिया वेगे अणुगच्छंति, असिया वेगे अणुगच्छंति, अणुगच्छमाणेहिं अणुगच्छ-
 माणे क्हं ण णिब्बिजे, तमेव सच्चं णीसकं जं जिणेहिं पवेइयं ॥ ३१४ ॥ सट्ठिस्स
 णं समणुन्नस्स संपव्वयमाणस्स समियंति मण्णमाणस्स एगया समिया होति, समियंति
 मण्णमाणस्स एगया असमिया होति, असमयंति मण्णमाणस्स एगया समिया होति,
 असमियंति मण्णमाणस्स एगया असमिया होति ॥ ३१५ ॥ समियंति मण्णमाणस्स
 समिया वा, असमिया वा, समिया होति उवेहाए ॥ ३१६ ॥ असमियंति मण्णमाणस्स
 समिया वा, असमिया वा, असमिया होति उवेहाए ॥ ३१७ ॥ उवेहमाणो अणुवेहमाणं
 बूया—“उवेहाहि समियाए इच्चेवं तत्थ संधी झोसितो भवति” ॥ ३१८ ॥ से
 उट्ठियस्स ठियस्स गतिं समणुपासह, एत्थवि बालभावे अप्पाणं णो उवदंसेज्जा
 ॥ ३१९ ॥ तुमंसि नाम सच्चेव, जं हंतव्वंति मन्नसि, तुमंसि नाम सच्चेव, जं अज्जा-
 वेयव्वंति मन्नसि, तुमंसि नाम सच्चेव, जं परितावेयव्वंति मन्नसि, एवं जं परिचित्तव्वंति
 मन्नसि, जं उद्वेयव्वंति मन्नसि । अंजू चेयपडिबुद्धजीवी तम्हा ण हंता, ण विधायए;
 अणुसंवेयणमप्पाणेणं जं हंतव्वं णाभिपत्थए ॥ ३२० ॥ जे आया से विन्नाया, जे
 विन्नाया से आया, जेण विजाणति से आया, तं पडुच्च परिसंखाए, एस आयावादी
 समियाए परियाए वियाहितेत्ति बेमि ॥ ३२१ ॥ **पंचमोद्देसो समत्तो ॥**

अणाणाए एगे सोवट्ठाणा आणाए एगे निरुवट्ठाणा एतं ते मा होउ, एयं कुस-
लस्स दंसणं ॥ ३२२ ॥ तद्धिट्ठीए तम्मुत्तीए तप्पुरक्कारे तस्सण्णी तण्णिवेसणे,
अभिभूय अदक्खू, अणभिभूते पभू निरालंबणयाए; जे महं अबहिमणे ॥ ३२३ ॥
पवाएणं पवायं जाणिज्जा, सहसम्मइयाए, परवागरणेणं अन्नेसिं वा अंतिए सोच्चा ॥ ३२४ ॥
णिट्ठेसं णातिवट्ठेज्जा मेहावी सुपडिलेहिया सव्वतो सव्वप्पणा सम्ममेव समभिण्णाय
॥ ३२५ ॥ इह आरामं परिण्णाय अल्लीणगुत्तो आरामो परिव्वए, णिट्ठियट्ठी वीरे
आगमेण सदा परिक्रमेज्जासि त्ति बेमि ॥ ३२६ ॥ उट्ठुं सोता, अहे सोता, तिरियं सोता
वियाहिया; एते सोया वियक्खाया, जेहिं संगंति पासहा ॥ ३२७ ॥ आवट्ठं तु
उवेहाए, एतय विरमिज्ज पुव्ववी ॥ ३२८ ॥ विणइत्तु सोयं णिक्खम्म एसमहं अकम्मा
जाणति, पासति, पडिलेहाए णावकंखति, इह आगतिं गतिं परिण्णाय अच्चेइ जाति-
मरणस्स वट्ठमगं विक्खायरए ॥ ३२९ ॥ सव्वे सरा णियट्ठंति, तक्का जत्थ ण
विज्जइ, मई तत्थ ण गाहिता, ओए अप्पतिट्ठाणस्स खेयन्ने ॥ ३३० ॥ से ण दीहे
ण हस्से ण वट्ठे ण तंसे ण चउरंसे ण परिमंडले, न किण्हे, न णीले, ण लोहिए, ण
हालिहे ण सुक्किले ण सुरहिगंधे ण दुरहिगंधे ण तित्ते ण कडुए, ण कसाए ण अंबिले ण
महुरे ण कक्खडे ण मउए ण गरुए ण लहुए ण सीए ण उण्हे ण णिद्धे ण लुक्खे ण
काळु ण रुहे ण संगे ण इत्थी ण पुरिसे ण अन्नहा परिण्णे, सण्णे ॥ ३३१ ॥ उवमा
ण विज्जए, अरूवी सत्ता, अपयस्स पयं णत्थि ॥ ३३२ ॥ से ण सदे ण रुवे ण गंधे-
ण रसे ण फासे इच्चेवति बेमि ॥ ३३३ ॥ **छट्ठोद्देशो समत्तो ॥**

॥ लोकसारणाम पंचमज्झयणं समत्तं ॥

ओबुज्झमाणे इह माणवेसु आघाड से णरे, जस्सिमाओ जाइओ सव्वओ सुप-
डिलेहियाओ भवंति, आघाड से णाणमणेसिं ॥ ३३४ ॥ से किट्ठति तेसिं समु-
ट्ठियाणं णिक्खित्तदंडाणं समाहियाणं पन्नाणमंताणं इह सुत्तिमगं, एवं एगे महावीरा
विप्परिक्रमंति, पासह एगे अविसीयमाणे अणत्तपन्ने ॥ ३३५ ॥ से बेमि से जहावि
कुम्मे हरए विणिविट्ठचित्ते पच्छन्नपलासे उम्मगं से णो लहइ ॥ ३३६ ॥ भंजगा
इव सज्जिवेसं णो चयंति, एवं एगे अणेगरुवेहिं कुलेहिं जाया, रुवेहिं सत्ता, कलुणं
थणंति, णियाणओ ते ण लभंति मुक्खं ॥ ३३७ ॥ अह पास तेहिं कुलेहिं आयत्ताए
जाया ॥ ३३८ ॥ गंडी अदुवा कुट्ठी, रायंसी अवमारियं । काणियं झिमियं चेव,
कुणियं खुज्जियं तथा ॥ उअरिं पास मूयं च, सूणिअं च गिलासिणि, वेवइ पीडसय्थि
च, सिलिवयं महुमेहणिं सोलस एते रोगा, अक्खाया अण्णुव्वसो, अह णं कुंसंति

आयंका, फासाय असमंजसा ॥ मरणं तेसिं संपेहाए, उववायं चवणं णच्चा; परियाणं च संपेहाए, तं सुणेह जहा तहा ॥ ३३९ ॥ संति पाणा अंधा तमंसि वियाहिया; तामेव सइं असइं अइ अच्च उच्चावयफासे पडिसंवेदंति, बुद्धेहिं एवं पवेदितं ॥ ३४० ॥ संति पाणा वासगा, रसगा उदए उदएचरा आगासगामिणो पाणा पाणे किलेसंति ॥ ३४१ ॥ पास लोए महब्भयं ॥ ३४२ ॥ बहुदुक्खाहु जंतवो ॥ ३४३ ॥ सत्ता कामेसु माणवा, अबल्लेण वहं गच्छंति सरीरेणं पभंगुरेण ॥ ३४४ ॥ अट्टे से बहुदुक्खे, इति बाले पकुव्वइ; एते रोगा बहु णच्चा, आउरा परितावए ॥ ३४५ ॥ णालं पास, अलं तवेएहिं । एयं पास मुणी ! महब्भयं, णातिवाएज्ज कंचणं ॥ ३४६ ॥ आयाणं भो ! सुस्स ! भो धूयवादं पवेदइस्सामि इह खलु अत्तताए तेहिं तेहिं कुलेहिं अभिसेएण, अभिसंभूता, अभिसंजाता, अभिणिव्वुडा, अभिसंउड्ढा, अविसंउड्ढा अभिणिक्कंता अणुपुव्वेणं महामुणी ॥ ३४७ ॥ तं परिक्कमंतं परिदेवमाणा मा चयाहि इति ते वदंति; “छंदोवणीया अज्झोववच्चा,” अकंदकारी जणगा ख्वंति । अतारिसे मुणी णो ओहंतरए, जणगा जेण विप्पजडा ॥ ३४८ ॥ सरणं तत्थ णो समेति क्हं नु णाम से तत्थ रमति ? एवं णाणं सया समणुवासिज्जासिन्ति बेमि ॥ ३४९ ॥ **पढमोद्देसो समत्तो ॥**

आतुरं लोयमायाए चइत्ता पुव्वसंजोगं, हिच्चा उवसमं, वसित्ता वंभचेरंमि, वसु वा अणुवसु वा जाणित्तु धम्मं अहा तहा, अहेगे तमचाइ कुसीला, वत्थं पडिगगहं कंबलं पायपुंछणं विउसिज्जा, अणुपुव्वेण अणहियासेमाणा परीसहे दुरहियासए, कामे ममायमाणस्स, इयाणिं मुहुत्तेण वा अपरिमाणाए मेए, एवं से अंतराएहिं कामेहिं आकेवल्लिएहिं अवइच्चाचेए ॥ ३५० ॥ अहेगे धम्ममादाय आयाणप्पभिइसु पणिहिए चरे अप्पलीयमाणे दढे ॥ ३५१ ॥ सव्वं गिद्धिं परिण्णाय एस पणए महामुणी ॥ ३५२ ॥ अइअच्च सव्वतो संगं “णमहं अत्थित्ति इति एगोहमंसि” जयमाणे एत्थ विरते, अणगारे, सव्वओ मुंडे, रीयंते, जे अचेले परिवुत्तिए संचिकखति ओमोयरियाए ॥ ३५३ ॥ से आकुट्ठो वा, हए वा, लुंच्चिए वा, पल्लियं पकत्थ, अदुवा पकत्थ, अतहेहिं सद्दफासेहिं, इति संखाए एगतरे अन्नयरे अभिन्नाय तित्तिक्खमाणे परिव्वए, जे य हिरी जे य अहिरीमाणा, चिच्चा सव्वं विसोत्तियं संफासे फासे समियदंसणे ॥ ३५४ ॥ एते भो णगिणा वुत्ता, जे लोगंसि अणागमणधम्मिणे, ॥ ३५५ ॥ “आणाए मामगं धम्मं” एस उत्तरवादे इह माणवाणं वियाहिते ॥ ३५६ ॥ एत्थोवरए तं झोसमाणे, आयाणिज्जं परिण्णाय परियाएणं विगिंचइ ॥ ३५७ ॥ इह मेगेसिं एगचरिया होति, तत्थियरा इयरेहिं कुलेहिं सुद्धेसणाए सव्वेसणाए से मेहावी परिव्वए, सुब्भि अदुवा दुब्भि अदुवा तत्थ मेरवा पाणापाणे किलेसंति ते फासे पुट्ठो धीरो अहियासेज्जासिति बेमि ॥ ३५८ ॥ **वीओद्देसो समत्तो ॥**

एयं खु मुणी आयाणं सया सुअक्खायधम्ममे विधूतकप्पे णिज्झोसइत्ता ॥ ३५९ ॥
 जे अचेले परिखुसिए तस्स णं भिक्खुस्स णो एवं भवइ परिजुण्णे मे वत्थे वत्थं जाइ-
 स्सामि, सुत्तं जाइस्सामि, सुइं जाइस्सामि, संधिस्सामि, सीविस्सामि, उक्कसिस्सामि
 वोक्कसिस्सामि, परिहिस्सामि पाउणिस्सामि ॥ ३६० ॥ अदुवा तत्थ पक्कमंतं भुज्जो
 अचेलं तणफासा फुसंति, तेउफासा सीयफासा फुसंति, दंसमसगफासा फुसंति,
 एगयरे अन्नयरे विरुवरुवे फासे अहियासेति, अचेले लाघवं आगममाणे, तवेसे
 अभिसमण्णाए भवति ॥ ३६१ ॥ जहेयं भगवता पवेदितं तमेव अभिसमेच्चा
 सव्वतो सव्वत्ताए समत्तमेव समभिजाणिज्जा एवं तेसिं महावीराणं चिरराइं पुच्चाइं
 वासाणि रीयमाणानं दवियाणं पास, अहियासियं ॥ ३६२ ॥ आगयपच्चाणानं किसा
 बाहवो भवंति, पयणुए मंससोणिए, विस्सेणिं कट्ठु परिण्णाए, एस तिन्ने मुत्ते विरए
 वियाहिएति बेमि ॥ ३६३ ॥ विरयं भिक्खुं रीयंतं चिररातोसियं अरती तत्थ किं
 विहारए ॥ ३६४ ॥ संधे माणे समुट्ठिए, जहासे दीवे असंदीणे ॥ ३६५ ॥ एवं से धम्ममे
 आयरियपदेसिए ॥ ३६६ ॥ ते अणवक्कंखमाणा, पाणे अणतिवातेमाणा जइया मेहाविणो
 पंडिया ॥ ३६७ ॥ एवं तेसिं भगवओ अणुट्ठाणो जहा से दियापोए एवं ते सिस्सा
 दिया य राओ य अणुपुव्वेण वाइय ति बेमि ॥ ३६८ ॥ **तइओइसो समत्तो ॥**

एवं ते सिस्सा दिया य राओ य अणुपुव्वेण वाइया तेहिं महावीरेहिं पण्णाण-
 मंतेहिं तेसिमंतिए पण्णाणमुवलब्भ हिच्चा उवसमं फारुसियं समादियंति ॥ ३६९ ॥
 वसित्ता बंभचेरंसि आणं तं णो ति मण्णमाणा ॥ ३७० ॥ अग्घायं तु सोच्चा णिसम्म
 “समणुच्चा जीविस्सामो” एगे णिक्खमंते असंभवेत्ता विडज्झमाणा कामेहिं गिद्धा
 अज्झोववण्णा समाहिमाघायमजोसयंता सत्थारमेव फरुसं वदंति ॥ ३७१ ॥
 सीलमंता उवसंता संखाए रीयमाणा “असीला” अणुवयमाणस्स वितिया मंदस्स
 बालया ॥ ३७२ ॥ णियट्ठमाणा वेगे आयारगोयरमाइक्खंति ॥ ३७३ ॥ णाणभट्ठा
 दंसणल्लसिणो णममाणा एगे जीवितं विप्परिणामंति ॥ ३७४ ॥ पुट्ठावेगे णियट्ठंति
 जीवियस्सेव कारणा, णिक्खंतंति तेसिं दुन्निक्खंतं भवति ॥ ३७५ ॥ बालवयणिज्जा
 हु ते नरा पुणो पुणो जातिं पक्कपंति अहे संभवता विद्यायमाणा अहमंसि ति
 विउक्कसे उदासीणे फरुसं वदंति, पलियं पकत्थे अदुवा पकत्थे अतहेहिं तं मेहावी
 जाणिज्जा धम्मं ॥ ३७६ ॥ अहम्मट्ठी तुमंसि णामवाले, आरंभट्ठी अणुवयमाणे
 “हणपाणे” घायमाणे, हणओयावि समणुजाणमाणे “घोरे धम्ममे उदीरिए” उवेहइ
 णं आणाणाए एस विसण्णे वियदे वियाहिते ति बेमि ॥ ३७७ ॥ किमणेणं भो
 जणेण करिस्सामि ति मण्णमाणा एवं एगे वइत्ता, मातरं पितरं हिच्चा, णातओ य

परिगगहं, वीरायमाणा समुठाए, अविहिंसा सुव्वया दंता, पस्स दीणे उप्पइए पडिव-
यमाणे ॥ ३७८ ॥ वसट्ठा कायरा य जणा लूसगा भवंति ॥ ३७९ ॥ अहमेगेसिं
सिलोए पावए भवइ, से समणो भवित्ता विव्वंतेर ॥ ३८० ॥ पासहेगे सम-
न्नागएहिं सह असमण्णागए, णममाणेहिं अणममाणे विरतेहिं अविरते दविएहिं अद-
विए ॥ ३८१ ॥ अभिसमेच्चा पंडिए मेहावी णिठियट्ठे वीरे आगमेणं सया परक्क-
मेज्जासि ति बेमि ॥ ३८२ ॥ **चउत्थोइसो समत्तो ॥**

से गिहेसु वा, गिहंतरेसु वा, गामेसु वा, गामंतरेसु वा, नगरेसु वा, नगरंतरेसु
वा, जणवएसु वा, जणवयंतरेसु वा, गामजणवयंतरे वा गामणयरंतरे वा,
नगरजणवयंतरे वा, संतेगतिया जणा लूसगा भवंति, अदुवा फासा फुसंति, ते
फासे पुट्ठो धीरो अहियासए ओए समियदंसणे ॥ ३८३ ॥ दयं लोगस्स, जाणिता
पादीणं पडीणं, दाहीणं उदीणं, आइक्खे, विभये, किट्ठे, पुव्ववी ॥ ३८४ ॥
से उट्ठिएसु वा, अणुट्ठिएसु वा सुस्ससमाणेसु पवेदए, संतिं, विरतिं, उवसमं, णिव्वाणं
सोयं अज्जवियं मइवियं लाघवियं अणइवत्तियं ॥ ३८५ ॥ सव्वेसिं पाणाणं सव्वेसिं
भूयाणं सव्वेसिं जीवाणं सव्वेसिं सत्ताणं अणुवीइ भिक्खु धम्ममाइक्खेज्जा ॥ ३८६ ॥
अणुवीइ भिक्खु धम्ममाइक्खमाणे णो अत्ताणं आसाइज्जा, णो परं आसाइज्जा, णो
अन्नाइ पाणाइ भूयाइ जीवाइ सत्ताइ आसाएज्जा ॥ ३८७ ॥ से अणासादए अणासा-
दमाणे वज्झमाणणं पाणाणं भूयाणं जीवाणं सत्ताणं, जहा से दीवे असंदीणे एवं से
भवति सरणं महासुणी ॥ ३८८ ॥ एवं से उट्ठिए ठियप्पा अणिहे अचले चले
अबहिंसेस्से परिव्वए ॥ ३८९ ॥ संखाय पेसलं धम्मं, दिठ्ठिं परिणिव्वुडे ॥ ३९० ॥
तम्हा संगं ति पासह, गंधेहिं गढिया णरा विसण्णा कामकंता, तम्हा ल्ह्हाओ णो
परिवित्तसेज्जा ॥ ३९१ ॥ जस्सिमे आरंभा सव्वतो सव्वप्पयाए सुपरिण्णाया भवंति
तेसिंमे लूसिणो णो परिवित्तसंति से वंता कोहं च माणं च मायं च लोभं च, एस
तुट्ठे वियाहिते ति बेमि ॥ ३९२ ॥ कायस्स वियाघाए संगमसीसे वियाहिए, से
हु पारंगमे सुणी, अविहम्ममाणे फलगावयट्ठि कालोवणीते कंखेज्जकालं जाव सरीर
भेउत्ति बेमि ॥ ३९३ ॥ **पंचमोइसो समत्तो ॥**

॥ धूताक्खं छट्ठमज्झयणं समत्तं ॥

महापरिण्णा णामं सत्तमज्झयणं वोच्छिण्णं

से बेमि समणुन्नस्स वा असमणुन्नस्स वा असणं वा, पाणं वा, खाइमं वा, साइमं
वा, वत्थं वा, पडिगगहं वा, कंबलं वा, पायपुच्छणं वा णो पाएज्जा, णो णिमंतिज्जा

णो कुज्जा वेयावडियं परं आढायमाणेति वेमि ॥ ३९४ ॥ धुर्यं चेतं जाणेज्जा असणं वा जाव पायपुंछणं वा, लभिया णो लभिया, भुंजिया णो भुंजिया पंथं विउत्ता विउकम्म विभतं धम्मं जोसेमाणे समेमाणे चलेमाणे पाएज्जा वा णिमंतेज्जा वा कुज्जा वेयावडियं परं अणाढायमाणेति वेमि ॥ ३९५ ॥ इहमेगेसिं आयार-
गोयरे णो सुणिस्संते भवति, ते इह आरंभट्ठी अणुवयमाणा “हण पाणा” घायमाणा हणतो यावि समणुजाणमाणा अदुवा अदिन्नमाययंति, अदुवा वायाओ विउज्जंति; तंजहा-अत्थि लोए णत्थि लोए धुवे लोए अधुवे लोए सादिए लोए अणादिए लोए सपज्जवसिते लोए अपज्जवसिते लोए सुकडेति वा दुक्कडेति वा कल्लणेति वा पावेति वा साहुति वा असाहुति वा सिद्धीति वा, असिद्धीति वा, णिरएत्ति वा अणिरएत्ति वा ॥ ३९६ ॥ जमिणं विप्पडिवण्णा “मामगं धम्मं” पन्नवेमाणा, इत्थवि जाणह अकम्हा । एवं तेसिं णो सुअक्खाए सुपन्नते धम्मो भवति, से जहेयं भगवया पवेदितं आसुपण्णेण जाणया पासया, अदुवा गुत्ती वओगोयरस्स ति वेमि ॥ ३९७ ॥ सव्वत्थ संमयं पावं, तमेव उवाइकम्म, एस महं विवेगे वियाहिते ॥ ३९८ ॥ गामे अदुवा रणे, णेव गामे णेव रणे, धम्ममायाणह पवेदितं माहणेण मईमया ॥ ३९९ ॥ जामा तिणिण उदाहिया, जेसु इमे आयरिया संबुज्झमाणा समुट्ठिया ॥ ४०० ॥ जे णिव्वुया पावेहिं कम्मेहिं अणियाणा ते वियाहिया ॥ ४०१ ॥ उट्ठं अहे तिरियं दिसासु सव्वतो सव्वावंति च णं पाडियक्कं जीवेहिं कम्मसमारंभे णं ॥ ४०२ ॥ तं परिणाय मेहावी णेव सयं एतेहिं कायेहिं दंडं समारंभेज्जा, णेवण्णे एतेहिं कायेहिं दंडं समारंभावेज्जा, नेवन्ने एएहिं काएहिं दंडं समारंभंतेवि समणुजाणेज्जा ॥ ४०३ ॥ जेयन्ने एतेहिं काएहिं दंडं समारंभंते तिसिपि वयं लज्जामो ॥ ४०४ ॥ तं परिणाय मेहावी तं वा दंडं अणं वा णो दंडेमि, दंडं समारंभिज्जासि ति वेमि ॥ ४०५ ॥ **पढमोद्देशो समत्तो ॥**

से भिक्खु परक्कमेज्ज वा, चिट्ठेज्ज वा, णिसीएज्ज वा, तुयट्ठेज्ज वा, सुसाणंसि वा, सुत्तागारंसि वा, गिरिगुहंसि वा, रुक्खमूलंसि वा, कुंभाराययणंसि वा, हुरत्था वा, कहिं चि विहरमाणं तं भिक्खुं उवसंकमिस्तु गाहावती बूया आउसंतो समणा । अहं खलु तव अट्ठाए असणं वा, पाणं वा, खाइमं वा, साइमं वा, वत्थं वा, पडिग्गहं वा, कंबलं वा, पायपुंछणं वा, पाणाइं, भूयाइं, जीवाइं, सत्ताइं, समारब्भ समुद्दिस्स कीयं, पामिच्चं, अच्छिज्जं, अणिसट्ठं, अभिहडं आहट्ठु चेतोमि, आवसहं वा समुस्सि-
णोमि, से भुंजह, वसह ॥ ४०६ ॥ आउसंतो समणा ! भिक्खु तं गाहावतिं समणसे सवयसं संपडियाइक्खे आउसंतो गाहावति ! णो खलु ते वयणं आढामि, णो खलु ते वयणं परिजाणामि, जो तुमं मम अट्ठाए असणं वा (४) वत्थं वा (४) पाणाइं

वा (४) जाव समारब्भ समुद्दिस्स कीयं पामिच्चं, अच्छिज्जं, अणिसट्ठं, अभिहट्ठं आहट्ठु चेएसि, आवसहं वा समुस्सिणासि, से विरतो आउसो ! गाहावती ! एयस्स अकरणयाए ॥ ४०७ ॥ से भिक्खुं परिकमेज वा जाव हुरत्था वा कहिंचि विहर-माणं तं भिक्खुं उवसंकमित्तु गाहावइ आयगयाए पेहाए असणं वा (४) वत्थं वा (४) पाणाइं (४) जाव आहट्ठु चेएति आवसहं वा समुस्सिणाति भिक्खुं परिघासिउं, तं च भिक्खु जाणेज्जा सह संमइयाए परवागरणेणं अण्णेसिं वा सोच्चा “अयं खलु गाहावइ ! मम अट्ठाए असणं वा (४) वत्थं वा (४) पाणाइं वा (४) समारब्भ जाव चेएति आवसहं वा समुस्सिणाति” तं च भिक्खु संपडिलेहाए आगमेत्ता आणवेज्जा अण्णसेवणाए त्ति वेमि ॥ ४०८ ॥ भिक्खुं च खलु पुट्ठा वा अपुट्ठा वा जे इमे आहच गंथा फुसंति से हंता “हणह खणह छिंदह दहह पयह आलुं पह विलुं पह सहसा कारेह विप्परासुसह” ते फासे पुट्ठो धीरो. अहियासए अदुवा आयारगोयरमाइक्खे तक्कियाणमणेत्तिसं, अदुवा वइगुत्तिए गोयरस्स अण्णुप्पवेण सम्मं पडिलेहाए आयगुत्ते जिणेहिं एयं पवेदितं ॥ ४०९ ॥ से समण्णे असमण्णस्स असणं वा (४) वत्थं वा (४) नोपाएज्जा, नोनिमंतेज्जा, नो कुज्जा वेयावडियं परं आढायमाणेत्ति वेमि ॥ ४१० ॥ धम्ममायाणह पवेइयं माहणेण मतिमया समण्णे समण्णस्स असणं वा, (४) वत्थं वा (४) पाएज्जा णिमंतेज्जा कुज्जा वेयावडियं परं आढायमाणेत्ति वेमि ॥ ४११ ॥ **बीओइसो समत्तो ॥**

मज्झिमेणं वयसावि एगे संबुज्झमाणा समुट्ठिता ॥ ४१२ ॥ सोच्चा मेहावी वयणं पंडियारणं निसामित्ता ॥ ४१३ ॥ समियाए धम्मे आरिएहिं पवेदिते ॥ ४१४ ॥ ते अणवकंखमाणा अणतिवाएमाणा अपरिग्गहमाणा णो परिग्गहावंति सव्वावंति च णं लोणंसि । णिहाय दंडं पाणेहिं पावं कम्मं अकुव्वमाणे एस महं अगंथे वियाहिए, ओए जुतिमस्स खेयन्ने उववार्यं चवणं च णच्चा ॥ ४१५ ॥ आहारोवचया देहा, परिसह पभंगुरा । पासहेगे सव्विदिएहिं परिगिलायमाणेहिं ॥ ४१६ ॥ ओए दयं दयइ ॥ ४१७ ॥ जे संनिहाणसत्थस्स खेयन्ने से भिक्खु कालण्णे बलण्णे मायण्णे खणण्णे विणयण्णे समयण्णे परिग्गहं अममायमाणे कालेणुट्ठाइ अपडिजे दुहओ छेत्ता णियाति ॥ ४१८ ॥ तं भिक्खुं सीयफासपरिवेवमाणगायं उवसंकमित्तु गाहावइ वूया, “आउसंतो समणा, णो खलु ते गामधम्मा उव्वाहंति” आउसंतो गाहावइ ! णो खलु मम गामधम्मा उव्वाहंति सीयफासं च णो खलु अहं संचाएमि अहियासित्तए । णो खलु मे कप्पति अगणिक्कायं उज्जालेत्तए पज्जालेत्तए वा कायं आयावेत्तए पयावेत्तए वा, अण्णेसिं वा वयणाओ ॥ ४१९ ॥ सिया से एवं वदंतस्स परो अगणिक्कायं

उज्जालेत्ता पज्जालेत्ता कायं आयावेज्जा वा पयावेज्जा वा, तं च भिक्खु पडिलेहाए आगमेत्ता आणविज्जा, अणासेवणाए त्ति वेमि ॥४२०॥ तइओद्देसो समत्तो ॥

जे भिक्खु तित्थेहिं परिउसिते पायचउत्थेहिं तस्स णं णो एवं भवति “चउत्थं वत्थं जाइस्सामि” से अहेसणिज्जाइं वत्थाइं जाएज्जा, अहापरिगगहियाइं वत्थाइं धारेज्जा, णो धोविज्जा णो रएज्जा णो धोयरत्ताइं वत्थाइं धारेज्जा, अपलिओवमाणे, गामंतरेसु, ओमचेलिए, एयं खु वत्थधारिस्स सामग्गियं ॥ ४२१ ॥ अह पुण एवं जाणेज्जा; उवातिक्कंते खलु हेमंते, गिम्हे पडिक्खे अहापरिजुच्चाइं वत्थाइं परिट्ठविज्जा, अदुवा संत्तरतरे, अदुवा ओमचेले, अदुवा एगसाडे, अदुवा अचेले, लाघवियं आगममाणे, तवे से अभिसमन्नागए भवति । जमेयं भगवया पवेदितं तमेव अभिसमेच्चा, सव्वतो सव्वत्ताए समत्तमेव समभिजाणिया ॥ ४२२ ॥ जस्स णं भिक्खुस्स एवं भवति, पुट्ठो खलु अहमंसि, नालमहमंसि सीयफासं अहियासित्ताए, से वल्लमं सव्वसमण्णा-गयपन्नाणेणं अप्पाणेणं केइ अकरणयाए आउट्ठे, तवस्सिणो हु तं सेयं जमेगे विह-माइए, तत्थवि तस्स कालपरियाए, से वि तत्थ विअंतिकारए, इच्चेतं विमोहायतणं हियंखुहंखमणिस्सेयसं आणुगामियं त्ति वेमि ॥४२३॥ चउत्थोद्देसो समत्तो ॥

से भिक्खु दोहिं वत्थेहिं परिउसिते, पायतइएहिं, तस्स णं णो एवं भवति, तइयं वत्थं जाइस्सामि, से अहेसणिज्जाइं वत्थाइं जाएज्जा, जाव एवं खलु तस्स भिक्खुस्स सामग्गियं ॥ ४२४ ॥ अह पुण एवं जाणेज्जा, उवाइक्कंते खलु हेमंते, गिम्हे पडिक्खे, अहा परिजुण्णाइं वत्थाइं परिट्ठवेज्जा २ अदुवा संत्तरतरे, अदुवा ओमचेले, अदुवा एगसाडे, अदुवा अचेले, लाघवियं आगममाणे, तवे से अभिसमण्णागए भवति, जहेयं भगवता पवेदितं तमेव अभिसमेच्चा सव्वतो सव्वत्ताए सम्मत्तमेव समभिजाणिया ॥ ४२५ ॥ जस्सणं भिक्खुस्स एवं भवति, पुट्ठो अबलो अहमंसि, नालमहमंसि गिहंतरसंक्रमणं भिक्खायरियं गमणाए, से चेवं वदंतस्स परो अभिहडं असणं वा (४) आहट्ठु दलएज्जा से पुव्वामेव आलोएज्जा आउसंतो गाहावती णो खलु मे कप्पइ अभिहडं असणं वा (४) भोत्ताए वा, पायए वा, अन्ने वा एय-प्पगारे ॥ ४२६ ॥ जस्सणं भिक्खुस्स अयं पगप्पे; अहं च खलु पडिण्णत्तो अप-डिन्नत्तेहिं, गिलाणे अगिलाणेहिं, अभिक्खं साहम्मिएहिं, कीरमाणं वेयावडियं साइ-जिस्सामि । अहं वा वि खलु अपडिन्नत्तो पडिण्णत्तस्स अगिलाणे गिलाणस्स, अभिक्खं साहम्मिअस्स कुज्जा वेयावडिअं करणाए ॥ ४२७ ॥ आहट्ठु परिणं अणुक्खिस्सामि, आहडं च सात्तिजिस्सामि, (१) आहट्ठु परिणं आणक्खिस्सामि, आहडं च णो सात्तिजिस्सामि (२) आहट्ठु परिणं, णो आणक्खिस्सामि, आहडं

च सातिजिस्सामि (३) आहट्टु परिणं णो आणक्खेस्सामि, आहडं च णो साति-
जिस्सामि (४) एवं से अहाकिट्ठियमेव, धम्मं समहिजाणमाणे संते विरते
सुसमाहितत्थेसे तत्थवि तस्स कालपरियाए, से तत्थ विअंतिकारए, इच्चंतं विमोहायतणं
हितं सुहं खमं गिस्सेसं आणुगामियं ति बेमि ॥ ४२८ ॥ **पंचमोद्देशो समत्तो ॥**

जे भिक्खु एगेण वत्थेण परिवुसिते पायवितिण्ण, तस्सणं णो एवं भवइ, “वितियं
वत्थं जाइस्सामि” से अहेसणिज्जं वत्थं जाएज्जा, अहापरिग्गहियं वा वत्थं धारेज्जा,
जाव गिम्हे पडिवण्णे अहा परिजुञ्जं वत्थं परिठ्वेज्जा २ अदुवा एग साडे अदुवा
अचेले लाघवियं आगममाणे, जाव सम्मतमेव समभिजाणिया, जस्स णं भिक्खुस्स
एवं भवइ एगे अहमंसि न मे अत्थि कोइ न याहमवि कस्स वि, एवं से एगाणि-
मेव अप्पाणं समभिजाणिज्जा लाघवियं आगममाणे तवे से अभिसमन्नागए भवइ
जाव समभिजाणिया ॥ ४२९ ॥ से भिक्खु वा भिक्खुणी वा असणं वा (४)
आहारेमाणे णो वामाओ हणुयाओ दाहिणं हणुयं संचारेज्जा आसाएमाणे, दाहिणाओ
वा हणुयाओ वामं हणुयं णो संचारेज्जा आसाएमाणे, से अणासायमाणे लाघवियं
आगममाणे, तवेसे अभिसमन्नागए भवइ । जहेयं भगवता पवेइयं तमेव अभिसमेच्चा
सव्वतो सव्वत्ताए सम्मतमेव समभिजाणिया ॥ ४३० ॥ जस्सणं भिक्खुस्स एवं
भवति, से गिलामि च खलु अहं इमंमि समए णो संचाएमि इमं सरीरगं अणुपुव्वेण
परिवहित्तए, से अणुपुव्वेण आहारं संवट्टेज्जा, आहारं अणुपुव्वेण संवट्टिता, कसाए
पयणुए किच्चा, समाहियच्चे फलगावयट्ठी उट्ठाय भिक्खु अभिनिव्वुडच्चे अणुपविसित्ता
गामं वा, णगरं वा, खेडं वा, कव्वडं वा, मंडवं वा, पट्टणं वा, दोगमुहं वा, आगरं वा,
आसमं वा, संणिवेसं वा, णिगमं वा, रायहाणिं वा, तणाई जाएज्जा, तणाई जाइत्ता
से तमायाए एगंतमवक्कमिज्जा, एगंतमवक्कमित्ता, अप्पंडे-अप्पपाणे-अप्पबीए-अप्पह-
रिए-अप्पोसे-अप्पोदए-अप्पुत्तिंग-पणय-दग-मट्ठियमकडासंताणए पडिलेहिय २ पम-
जिय २ तणाई संथरेज्जा, तणाई संथरेत्ता एत्थवि समए इत्तरियं कुज्जा ॥ ४३१ ॥
तं सच्चं सच्चवादी ओए तिण्णे, छिण्णकहं कहे, आतीतट्ठे अणातीते चिच्चाण भिउरं
कार्यं संविद्वय विरुवरुवे परिसहोवसग्गे अस्सि विसंभणयाए मेरवमणुचिण्णे, तत्थवि
तस्स कालपरियाए, जाव आणुगामियं ति बेमि ॥ ४३२ ॥ **छट्ठोद्देशो समत्तो ॥**

जे भिक्खु अचेले परिवुसिते, तस्स णं एवं भवति, चाएमि अहं तणकासं
अहियासित्तए, सीयकासं अहियासित्तए, तेउकासं अहियासित्तए, दंसमसगकासं
अहियासित्तए, एगतरे अन्नतरे विरुवरुवे फासे अहियासित्तए हिरिपडिच्छादर्णं चइइ

णो संचाएमि अहियासित्तए, एवं से कप्पति कडिबंघणं धारित्तए ॥ ४३३ ॥ अदुवा तत्थ परक्कमंतं भुज्जो अचेलं तणफासा पुसंति, सीयफासा पुसंति, तेउफासा पुसंति, दसमसगफासा पुसंति, एगयरे अन्नयरे विरूवरूवे फासे अहियासेति अचेले लाघवियं आगममाणे, जाव समभिजाणिया ॥ ४३४ ॥ जस्सणं भिक्खुस्स एवं भवति; अहं च खलु अच्चेसिं भिक्खूणं असणं वा (४) आहट्ठु दलइस्सामि, आहडं च सातिजिस्सामि [१] जस्सणं भिक्खुस्स एवं भवति, अहं च खलु अच्चेसिं भिक्खूणं असणं वा (४) आहट्ठु दलइस्सामि आहडं च णो सातिजिस्सामि (२) जस्सणं भिक्खुस्स एवं भवति; अहं च खलु असणं वा (४) आहट्ठु नो दलइस्सामि आहडं च सातिजिस्सामि (३) जस्सणं भिक्खुस्स एवं भवति अहं च खलु अण्णेसिं भिक्खूणं असणं वा (४) आहट्ठु नो दलइस्सामि आहडं च णो सातिजिस्सामि ॥ ४ ॥ अहं च खलु तेण अहाइरित्तेणं अहेसणिज्जेण अहापरिग्गहिणं असणेणं वा (४) अभिकंख साहम्मियस्स कुज्जा वेयावडियं करणाए, अहं वावि तेण अहातिरित्तेणं अहेसणिज्जेणं अहापरिग्गहिणं असणेणं वा (४) अभिकंख साहम्मिएहिं कीरमाणं वेयावडियं सातिजिस्सामि लाघवियं आगममाणे जाव सम्मतमेव समभिजाणिया ॥ ४३५ ॥ जस्सणं भिक्खुस्स एवं भवति से गिलामि खलु अहं इमम्मि समये इमं सरीरं अणुपुव्वेणं परिवहित्तए, से अणुपुव्वेणं आहारं संवट्टेज्जा, संवट्टइत्ता कसाए पयणूए किच्चा समाहिअच्चे फलगावयट्ठी उट्ठाय भिक्खू अभिणिव्वुडच्चे, अणुपविसित्ता गामं वा जाव रायहाणिं वा तणाई जाएज्जा, तणाई जाएत्ता, से तमायाए एगंतमवक्कमेज्जा, अप्पंडे जाव तणाई संथरेज्जा, इत्थवि समए कार्यं च, जोगं च, इरियं च, पच्चक्खाएज्जा ॥ ४३६ ॥ तं सच्चं सच्चावादीओए तिच्चे छिन्नकहंकहे आतीतट्ठे अणातीते चेच्चाण भिउरं कार्यं संविट्ठुणिय विरूवरूवे परिसहोवसग्गे अस्सिं विसंभणाए मेरवमणुच्चिन्ने तत्थवि तस्सकालपरियाए से तत्थ विअंतिकारए इच्चेयं विमोहायतणं हियं खुहं खमं णिस्सेयसं आणुगामियं त्ति बेमि ॥ ४३७ ॥ **सत्तमोद्देसो समत्तो ॥**

अणुपुव्वेण विमोहाइं, जाइं धीरा समासज्ज; वसुमंतो मइमंतो, सव्वं णच्चा अणेल्लिस्सं ॥ १ ॥ ४३८ ॥ दुविहंपि विदिताणं, जिणा धम्मस्स पारगा; अणुपुव्वीइ संखाए, कम्मणाउ तिउट्ठति ॥ २ ॥ ४३९ ॥ कसाए पयणू किच्चा, अप्पाहारो तित्तिक्खए; अह भिक्खु गिलाएज्जा, आहारस्सेव अंतियं ॥ ३ ॥ ४४० ॥ जीवियं णाभिकंखेज्जा, मरणं णोवि पत्थए; दुहतोवि ण सज्जेज्जा, जीविते मरणे तद्वा ॥ ४ ॥ मज्झत्थो णिज्जरापेही, समा-

हिमणुपालए; अंतो बहिं विउस्सिज्ज, अज्झत्थं सुद्धमैसए ॥५॥४४१॥ जं किंचुवक्कमं
जाणे, आउक्खेमस्स अप्पणो; तस्सेव अंतरद्धाए, खिप्पं सिक्खेज्ज पंडिए
॥६॥४४२॥ गामे वा अदुवा रण्णे, थंडिलं पडिलेहिया; अप्पपाणं तु विज्ञाय, तणाई
संथरे मुणी ॥७॥४४३॥ अणाहारो तुअट्टेज्जा, पुट्ठो तत्थ हियासए; णातिवेलं उवचरे,
माणस्सेहिं विपुठ्ठवं ॥८॥४४४॥ संसप्पगा य जे पाणा, जे उ उद्धमहाचरा; भुंजंति
मंससोणिंतं, ण छणे ण पमज्जए ॥ ९ ॥ ४४५ ॥ पाणा देहं विहिंसंति, ठाणाओ
ण वि उब्भमे; आसवेहिं विवित्तेहिं, तिप्पमाणोऽहियासए ॥ १० ॥ गंधेहिं विवित्तेहिं,
आउकालस्स पारए ॥४४६॥ पग्गहियतरगं चेयं, दवियस्स वियाणतो ॥११॥४४७॥
अयं से अवरे धम्मे, णायपुत्तेण साहिए; आयवज्जं पडीयारं, विज्जहिज्जा तिहा
तिहा ॥ १२ ॥ ४४८ ॥ हरिएसु ण णिवज्जेज्जा, थंडिलं मुणिआ सए; विउस्सिज्ज
अणाहारो, पुट्ठो तत्थ हियासए ॥ १३ ॥ ४४९ ॥ इंदिएहिं गिलायंते, समियं
आहरे मुणी; तहावि से अगारिहे, अचले जे समाहिंए ॥ १४ ॥ ४५० ॥ अभिक्कमे
पडिक्कमे, संकुचए पसारए; कायसाहारणट्ठाए, इत्थं वा वि अचेयणे ॥१५॥४५१॥
परिक्कमे परिकिलंते, अदुवा चिट्ठे अहायते; ठाणेण परिकिलंते, णिसिइज्जाय अंतसो
॥ १६ ॥ ४५२ ॥ आसीणे गेलिसं मरणं, इंदियाणि समीरए; कोलावासं समासज्ज,
वितहं पादुरेसए ॥ १७ ॥ ४५३ ॥ जओ वज्जं समुप्पज्जे, ण तत्थ अवलंबए;
ततो उक्कसे अप्पाणं, सव्वे फासे अहियासए ॥ १८ ॥ ४५४ ॥ अयं चायततरे
सिया, जो एवं अणुपालए; सव्वगायणिरोधेवि, ठाणातो णवि उब्भमे ॥१९॥४५५॥
अयं से उत्तमे धम्मे, पुव्वट्ठाणस्स पग्गहे; अचिरं पडिलेहिता, विहरे चिट्ठ माहणो
॥ २० ॥ ४५६ ॥ अचित्तं तु समासज्ज, ठावए तत्थ अप्पगं; वोसिरे सव्वसो
कायं, ण मे देहे परीसहा ॥ २१ ॥ ४५७ ॥ जावजीवं परीसहा, उवसग्गा इति
संख्या; संवुडे देहमेयाए, इति पण्णे हियासए ॥२२॥४५८॥ मेउरेसु न रज्जेज्जा,
कामेसु बहुतरेसु वि; इच्छा लोभं ण सेवेज्जा, धुवं वज्जं सपेहिया ॥ २३ ॥ ४५९ ॥
सासएहिं णिमंतेज्जा, दिव्वमायं ण सइहे; तं पडिवुज्ज माहणे, सव्वं नूसं विधूणिया
॥ २४ ॥ ४६० ॥ सव्वट्ठेहिं अमुच्छिए, आउकालस्स पारए; तितिक्खं परमं
णच्चा, विमोहन्नतरं हितं ति बेमि ॥ २५ ॥ ४६१ ॥ अट्ठमोहेसो समत्तो ॥

॥ विमोक्खणाममट्ठमज्झयणं समत्तं ॥

अहासुयं वदिस्सामि, जहा से समणे भगवं उट्ठाय; संखाय तंसि हेमंते, अहुणा पव्वइए रीयत्था ॥ ४६२ ॥ णो चेविमेण वत्थेण, पिहिस्सामि तंसि हेमंते; से पारए आवकहाए, एवं खु अणुधम्मियं तस्स ॥ ४६३ ॥ चत्तारि साहिंए मासे, बहवे पाणजाइया आगम्म; अभिरुज्झकायं विहरिंसु, आरुहियाणं तत्थ हिंसिंसु ॥ ४६४ ॥ संवच्छरं साहियं मासं, जं ण रिक्कासि वत्थगं भगवं; अचेलए ततो चाई, तं बोसिरिज वत्थमणगारे ॥ ४६५ ॥ अदु पोरिसिं तिरियंभित्तिं, चक्खुमासज्ज अंतसो ज्ञायति; अह चक्खुभीया संहिया, ते हंता बहवे कंदिंसु ॥ ४६६ ॥ सयणेहिं वितिमिस्सेहिं, इत्थीओ तत्थसे परिणाय; सागारियं ण सेवेइ, य इति से सयं पवेसिया ज्ञाति ॥ ४६७ ॥ जे केइ इमे अगारत्था, मीसीभावं पहाय ते ज्ञाति; पुट्ठो वि णाभिभासिंसु, गच्छति णाइवत्तइ अंजू ॥ ४६८ ॥ णो सुगरमेतमेगेसिं, णाभिभासे अभिवायमाणे; हयपुव्वो तत्थ दंडेहिं, लूसियपुव्वो अप्पपुच्चेहिं ॥ ४६९ ॥ फरसाई दुत्तितिवखाई, अतिअच्च सुणी परक्कममाणे; आघायणट्ठगीताई, दंडजुज्झाई मुट्ठिजुज्झाई ॥ ४७० ॥ गढिए मिहो कहासु, समयंमि **णायसुए** विसोगे अदक्खू; एताई सो उरालाई, गच्छइ णायपुत्ते असरणए ॥ ४७१ ॥ अविसाहिंए दुवे वासे, सीतोदं अभोच्चा णिक्खंते; एगत्तगए पिहियच्चे, से अहिंजायदंसणे संते ॥ ४७२ ॥ पुढविं च आउक्कायं, तेउक्कायं च वाउक्कायं च; पणगाई बीयहरियाई, तसक्कायं च सव्वसो णच्चा “एयाई संति” पडिलेहे, चित्तमंताई से अभिजाय; परिवज्जिय विहरित्था, इति संखाय से महावीरे ॥ ४७३ ॥ अदु थावरा तसत्ताए, तसजीवाय थावरत्ताए; अदुवा सव्व-जोणीया, सत्ता कम्मणा कप्पिया पुढो बाला ॥ ४७४ ॥ भगवं च एवमच्चेसिं, सोवहिंए हु लुप्पती बाले; कम्मं च सव्वसो णच्चा, तं पडियाइक्खे पावगं भगवं ॥ ४७५ ॥ दुविहं समिच्च मेहावी, किरियमक्खायमणेल्लिंसं णाणी; आयाण-सोयमतिवायसोयं जोगं च सव्वसोणच्चा ॥ ४७६ ॥ अइवत्तियं अणाउट्ठिं, सयमच्चेसिं अकरणयाए; जस्सित्थिओ परिणयाया, सव्वकम्मावहाउसे अदक्खू ॥ ४७७ ॥ अहाकडं न से सेवे, सव्वसो कम्मणा बंधं अदक्खू; जं किंचि पावगं भगवं, तं अक्कुव्वं वियडं भुंजित्था ॥ ४७८ ॥ णो सेवती य परवत्थं, परपाएवि से ण भुंजित्था; परिवज्जियाण ओमाणं, गच्छति संखडिं असरणयाए ॥ ४७९ ॥ मायच्चे असण-पाणस्स, णाणुगिद्धे रसेसु अपडिण्णे; अच्छिपि णो पमज्जिज्जा, णोवि य कंदूयये सुणी गायं ॥ ४८० ॥ अप्पं तिरियं पेहाए, अप्पं पिट्ठओ व पेहाए; अप्पं वुड्ढए पडिभाणी, पंथपेही चरे जयमाणे ॥ ४८१ ॥ सिसिरंसि अद्धपडिवच्चे, तं बोसिज्ज वत्थमणगारे; पसारित्तु बाट्ठं परक्कमे, णो अवलंबिया ण खंधंमि ॥ ४८२ ॥ एस

विही अणुक्कंतो, माहणेण मइमया; बहुसो अप्पडिन्नेण, भगवया एवं रियंति त्ति बेमि ॥ ४८३ ॥ पढमोद्देशो समत्तो ॥

चरियासणाई सेज्जाओ, एगतियाओ जाओ बुइयाओ; आइक्खताई सयणास-
णाई, जाई सेवित्था से महावीरो ॥ ४८४ ॥ आवेसणसभापवासु, पणियसालासु,
एगदा वासो; अदुवा पलियट्ठाणेसु, पलालपुंजेसु एगदा वासो ॥ ४८५ ॥ आगंतारे
आरामागारे तह य णगरे वि एगदा वासो; सुसाणे सुण्णागारे वा, रुक्खमूले वि
एगदा वासो ॥ ४८६ ॥ एतेहिं मुणी सयणेहिं, समणे आसी पत्तेरसवासे; राई
दिवं पि जयमाणे, अप्पमत्ते समाहि ए ज्ञाति ॥ ४८७ ॥ णिंदपि णो पगामाए,
सेवइ य भगवं उट्ठाए; जग्गावती य अप्पाणं, ईसिं साति य अपडिन्ने ॥ ४८८ ॥
संबुज्जमाणे पुणरवि, आसिंसु भगवं उट्ठाए; णिक्खम्म एगया राओ, बहिं चंक्रमित्ता
मुहुत्तागं ॥ ४८९ ॥ सयणेहिं तत्थुवसग्गा, भीमा आसी अणेगरूवाय; संसप्पगाय
जे पाणा, अदुवा जे पक्खिणो उवचरंति ॥ ४९० ॥ अदुवा कुचरा उवचरंति,
गामरक्खाय सत्तिहत्थाय; अदुगामिया उवसग्गा इत्थी एगतिया पुरिसा य
॥ ४९१ ॥ इहलोइयाई परलोइयाई, भीमाई अणेगरूवाई; अवि सुब्बिदु-
ब्बिभगंधाई, सद्दाई अणेगरूवाई अहियासए सया समिए, फासाई विरूवरूवाई
॥ ४९२ ॥ अरई रई अभिभूय, रीयई माहणे अवहुवाई ॥ ४९३ ॥ स जणेहिं
तत्थ पुच्छिसु, एगचरा वि एगदा राओ; अव्वाहिए कसाइत्था, पेहमाणे समाहिं
अपडिन्ने ॥ ४९४ ॥ अयमंतरंसि को एत्थ, अहमंसिति भिक्ख आहट्ठु; अयमुत्तमे
से धम्मे तुसिणीए सक्काइए ज्ञाति ॥ ४९५ ॥ जंसिप्पेगे पवेयंति, सिसिरे मारुए
पवायंतं; तंसिप्पेगे अणगारा, हिमवाए णिवायमेसंति ॥ संघाडिओ पवेसिस्सामो,
एहा य समादहमाणा, पिहिया वा सक्खामो, अतिदुक्खे हिमगसंफासा ॥ तंसि
भगवं अपडिन्ने, अहे वियडे अहियासए दविए; णिक्खम्म एगदा राओ, ठाइए
भगवं समियाए ॥ ४९६ ॥ एस विही अणुक्कंतो माहणेण मइमया; बहुसो अपडि-
न्नेण, भगवया एवं रियंति त्ति बेमि ॥ ४९७ ॥ वित्तिओद्देशो समत्तो ॥

तणफासे, सीयफासे, तेउफासे य, दंसमसगे य; अहियासए सया समिए, फासाई
विरूवरूवाई ॥ ४९८ ॥ अह दुच्चरलाडमचारी, वज्जभूमिं च सुब्बभूमिं च; पंतं
सेज्जं सेविंसु, आसणगाई चेव पंताई ॥ ४९९ ॥ लाढेसु तस्सुवसग्गा, बहवे जाणवया
ल्लसिंसु; अह ल्हहदेसिए भत्ते, कुकुरा तत्थ हिंसिंसु णिवर्तिसु ॥ ५०० ॥ अप्पे जणे
णिवारेइ, ल्लसणए सुणए डसमाणे; ल्लुल्लुकारंति आहंसु 'समणं कुकुरा डसंतु' त्ति
॥ ५०१ ॥ एल्लिक्खए जणा भुज्जो, बहवे वज्जभूमिं फरूसासी; ल्हट्ठिं गहाय णालीयं,

समणा तत्थ य विहरिंसु ॥ ५०२ ॥ एवं पि तत्थ विहरंता, पुट्ठपुव्वा अहेसि
 सुणएहिं; संलुं चमाणा सुणएहिं, दुच्चरगाणि तत्थ लाढेहिं ॥ निधाय दंडं पाणेहिं, तं
 कायं वोसिज्जमणगारे ॥ अह गामकंटए भगवं, ते अहियासए अभिसमेच्चा ॥ ५०२ ॥
 णागो संगामसीसे वा, पारए तत्थ से महावीरे ॥ ५०३ ॥ एवं पि तत्थ लाढेहिं,
 अलद्धपुव्वो वि एगदा गामे उवसंकमंतमपडिच्चं, गामंतियंमि अप्पत्तं; पडिणिक्ख-
 मित्तु ल्हसिंसु, एतातो परं पळेहिं ॥ ५०४ ॥ हयपुव्वो तत्थ दंडेण, अदुवा
 मुट्ठिणा, अदु कुंताइफळेणं; अदु लेलुणा क्वाळेणं, हंता हंता बहवे कंदिंसु ॥ ५०५ ॥
 मंसाणि छिन्नपुव्वाइ, उट्ठंभिया एगया कायं; परीसहाइ लुंचिंसु, अहवा पंशुणा
 उवकरिंसु ॥ उच्चालइय णिहणिंसु, अदुवा आसणाओ खलईंसु; वोसट्ठकाये पणयासी,
 दुक्खसहे भगवं अपडिच्चे ॥ ५०६ ॥ सूरुो संगामसीसे वा, संवुडे तत्थ से महा-
 वीरे; पडिसेवमाणे फल्साइ, अचले भगवं रीइत्था ॥ ५०७ ॥ एस विही अणुक्कंतो,
 माहणेण मईमया; बहुसो अपडिच्चेणं, भगवया एवं रीयंति, ति बेमि ॥ ५०८ ॥
तइओहेसो समत्तो ॥

ओमोदरियं चाएति, अपुट्ठेवि भगवं रोगेहिं; पुट्ठो वा से अपुट्ठो वा, णो से साति-
 ज्जति तेइच्छं ॥ ५०९ ॥ संसोहणं च वमणं च, गायब्भंगणं च सिणाणं च; संबा
 हणं ण से कप्पे, दंतपक्खालणं परिण्णाए ॥ ५१० ॥ विरए य गामधम्मोहिं, रीयति
 माहणो अबहुवाइ ॥ ५११ ॥ सिसिरंमि एगदा भगवं, छायाए झाई आसीया ॥
 आयावई य गिम्हाणं, अच्छति उक्कुडुए अभित्तावे ॥ ५१२ ॥ अदु जावइत्थ
 ल्हहेणं, ओयणमंथुकुम्मासेणं ॥ एयाणि तिज्जि पडिसेवे, अट्ठमासे य जावयं भगवं
 ॥ ५१३ ॥ अवि इत्थ एगया भगवं, अद्धमासं अदुवा मासंपि ॥ अविसाहिए
 दुवे मासे, छप्पिमासे अदुवा विहरित्था ॥ रायोवरायं अपडिच्चे, अन्नगिलायमेगया
 भुंजे; छट्ठेण एगया भुंजे, अदुवा अट्ठमेणं दसमेणं; दुवालसमेण एगया भुंजे, पेह-
 माणे समाहिं अपडिच्चे ॥ ५१४ ॥ णच्चा णं से महावीरे, णोवि य पावणं सयमकासी ॥
 अच्चेहिं वा ण कारित्था, कीरंतंपि णाणुजाणित्था ॥ ५१५ ॥ गामं पविस्स णयरं
 वा, घासमेसे कळं परट्ठाए; सुविसुद्धमेसिया भगवं, आयतजोगयाए सेवित्था
 ॥ ५१६ ॥ अदु वायसा दिगिच्छित्ता, जे अच्चे रसेसिणो सत्ता; घासेसणाए चिट्ठंति,
 सययं णिवत्ति ए य पेहाए ॥ ५१७ ॥ अदु माहणं व समणं वा, गामपिंडोलं च
 अतिहिं वा; सोवागं मूसियारं वा कुकुरं वा विट्ठितं पुरतो ॥ वित्तिच्छेदं वज्जंतो,
 तेसिमप्पत्तिर्यं परिहरंतो; मंदं परक्कमे भगवं, अहिंसमाणो घासमेसित्था ॥ ५१८ ॥
 अविसूइयं वा सुक्कं वा, सीयपिंडं पुराणकुम्मासं; अदु बुक्कसं पुलागं वा, लद्धे पिंडे

अलङ्घ्ये दविण् ॥ ५१९ ॥ अवि ज्ञाति से महावीरे, आसणत्थे अकुल्लुए ज्ञाणं;
 उद्धमहेयं तिरियं च, पेहमाणे समाहिमपडिजे ॥ ५२० ॥ अकसायी विगय-
 गेही य, सद्धवेसु अमुच्छिण् ज्ञाति; छउमत्थो वि परक्कममाणो, ण पमायं सईपि
 कुव्वित्था ॥ ५२१ ॥ सयमेव अभिसमागम्म, आयतजोगमायसोहीए । अभिणिव्वुडे
 अमाइल्ले आवकहं भगवं समिआसी ॥ एस विधी अणुक्कंतो माहणेण मईमया; बहुसो
 अपडिजेणं भगवया एवं रीयंति त्ति बेमि ॥ ५२२ ॥ चउत्थोदेसो समत्तो ॥

॥ उवहाणसुयं नवमज्झयणं समत्तं ॥

॥ बंभचेरणाम पढमे सुयकखंधे संपुण्णे ॥

णमो त्थु णं समणस्स भगवओ णायपुत्त-महावीरस्स

विइये सुयक्खंधे

से भिक्खू वा, भिक्खुणी वा, गाहावइकुलं पिंडवायपडियाए अणुपविट्ठे समाणे, से जं पुणजाणेज्जा असणं वा पाणं वा खाइमं वा साइमं वा पाणेहिं वा पणएहिं वा बीएहिं वा, हरिएहिं वा, संसत्तं उम्मिरस्सं सीओदएण वा ओसित्तं, रयसा वा परिघा-सियं, तहप्पगारं असणं वा पाणं वा खाइमं वा साइमं वा, परहत्थंसि वा परपायंसि वा, अफासुयं अणेसणिज्जंति मण्णमाणे लामेवि संते णो पडिगाहेज्जा ॥ ५२३ ॥ से य आहच्च पडिग्गहिए सिया से तं आयाय एगंतमवक्कमेज्जा, एगंतमवक्कमिता अहे आरामंसि वा अहे उवस्सयंसि वा, अप्पंडे-अप्पपाणे-अप्पबीए, अप्पहरिए, अप्पोसे, अप्पोदए, अप्पुत्तिग-पणग-दग-मट्ठियमक्कडासंताणए विगिंचिय विगिंचिय उम्मीसं विसोहिय विसोहिय तओ संजयामेव भुंजिज्ज वा, पीइज्ज वा, जं च णो संचाइज्जा भोत्तए वा पायए वा, से तमायाय एगंतमवक्कमिज्जा, एगंतमवक्कमिता, अहे ज्झामथंडिलंसि वा, किट्टरासिसि वा, तुसरासिसि वा, सुक्कगोमयरासिसि वा अण्ण-यरंसि वा तहप्पगारंसि थंडिलंसि पडिछेहिय २ पमज्जिय २ तओ संजयामेव परि-ट्ठुविज्जा ॥ ५२४ ॥ से भिक्खू वा, भिक्खुणी वा, गाहावइकुलं पिंडवायपडियाए अणुपविट्ठे समाणे, से जाओ पुण ओसहीओ जाणेज्जा कसिणाओ सासिआओ अवि-दलकडाओ अतिरिच्छछिन्नाओ, अव्वोच्छिन्नाओ तरुणियं वा छिवाडिं अणभिकंत-भज्जियं पेहाए, अफासुयं अणेसणिज्जंति मण्णमाणे लामे संते णो पडिगाहेज्जा ॥ ५२५ ॥ से भिक्खू वा, भिक्खुणी वा, जाव. पविट्ठे समाणे से जाओ पुण ओसहीओ जाणेज्जा, अकसिणाओ असासियाओ, विदलकडाओ, तिरिच्छछिन्नाओ, वोच्छिण्णाओ, तरुणिअं वा छिवाडिं अभिकंतं भज्जियं पेहाए फासुयं एसणिज्जंति मण्णमाणे लामे संते पडिगाहेज्जा ॥ ५२६ ॥ से भिक्खू वा भिक्खुणी वा जाव पविट्ठे समाणे से जं पुण जाणेज्जा, पिहुयं वा बहुरयं वा, भुज्जियं वा, मंथुं वा, चाउलं वा, चाउलपलंबं वा, सइं संभज्जियं, अफासुयं अणेसणिज्जं मण्णमाणे लामे संते णो पडिगाहेज्जा ॥ ५२७ ॥ से भिक्खू वा, भिक्खुणी वा, जाव पविट्ठे समाणे से जं पुण जाणेज्जा, पिहुयं वा जाव चाउलपलंबं वा असइं भज्जियं दुक्खुत्तो वा भज्जियं तिवक्खुत्तो वा भज्जियं फासुयं एसणिज्जं जाव लामे संते पडिगाहेज्जा ॥ ५२८ ॥ से भिक्खू वा भिक्खुणी वा, गाहावइकुलं जाव पविसिउकामे णो अज्जउत्थिएण वा गारत्थिएण वा परिहारिओ वा अपरिहारिणं सद्धिं ॥ गाहावइकुलं पिंडवायपडियाए ३ सुत्ता०

पविसिज्ज वा णिक्खमिज्ज वा ॥५२९॥ से भिक्खू वा भिक्खुणी वा, बहिया वियारभूमिं वा, विहारभूमिं वा, णिक्खममाणे पविसमाणे वा, णो अण्णउत्थिएण वा गारत्थिएण वा परिहारिओ वा अपरिहारिएण सद्धिं बहिया वियारभूमिं वा विहारभूमिं वा णिक्खमिज्ज वा पविसिज्ज वा ॥५३०॥ से भिक्खू वा भिक्खुणी वा जाव पविट्ठे समाणे से णो अण्णउत्थिअस्स वा गारत्थियस्स वा परिहारिओ वा अपरिहारिअस्स वा असणं पाणं खाइमं साइमं वा देज्जा अणुपदेज्जा वा ॥ ५३१ ॥ से भिक्खू वा भिक्खुणी वा गामाणुगामं दूइज्जमाणे णो अण्णउत्थिएण वा गारत्थिएण वा, परिहारिओ अपरिहारिएण वा, सद्धिं गामाणुगामं दूइज्जिज्जा ॥ ५३२ ॥ से भिक्खू वा भिक्खुणी वा जाव पविट्ठे समाणे से जं पुण जाणिज्जा, असणं वा (४) अस्संपडियाए एणं साहम्मियं समुद्दिस्स पाणाइं, भूयाइं जीवाइं, सत्ताइं समारब्भ समुद्दिस्स कीयं पामिच्चं अच्छिज्जं अणिसट्ठं अभिहडं आहट्टु चेएइ तं तहप्पगारं असणं वा (४) पुरिसंतरकडं अपुरिसंतरकडं वा बहिया णीहडं वा अणीहडं वा अत्तट्ठियं वा अणत्तट्ठियं वा, परिभुत्तं वा अपरिभुत्तं वा आसेवियं वा अणासेवियं वा अफासुयं जाव णो पडिगाहिज्जा ॥ ५३३ ॥ एवं बहवे साहम्मिया, एगा साहम्मिणी, बहवे साहम्मिणीओ समुद्दिस्स चत्तारि आलावगा भाणियव्वा ॥ ५३४ ॥ से भिक्खू वा (२) गाहावइकुलं जाव पविट्ठे समाणे से जं पुण जाणिज्जा, असणं वा (४) बहवे समणमाहणअतिहिक्खिवणवणीमए पगणिय पगणिय समुद्दिस्स पाणाइं वा ४ जाव समारब्भ आसेवियं वा अफासुयं अणेसणिज्जंति मण्णमाणे लाभे संते जाव णो पडिगाहिज्जा ॥ ५३५ ॥ से भिक्खू वा (२) गाहावइकुलं जाव पविट्ठे समाणे से जं पुण जाणेज्जा, असणं वा (४) बहवे समणमाहणअतिहिक्खिवणवणीमए समुद्दिस्स पाणाइं (४) आहट्टु चेएइ, तं तहप्पगारं असणं वा (४) अपुरिसंतरकडं अबहिया णीहडं अणत्तट्ठियं अपरिभुत्तं अणासेवितं अफासुयं अणेसणिज्जं जाव णो पडिगाहिज्जा ॥ ५३६ ॥ अह पुण एवं जाणिज्जा पुरिसंतरकडं बहिया णीहडं अत्तट्ठियं परिभुत्तं आसेवियं फासुयं एसणिज्जं जाव पडिगाहिज्जा ॥ ५३७ ॥ से भिक्खू वा (२) गाहावइकुलं पिंडवायपडियाए पविसित्तु कामे से जाइं पुण कुलाइं जाणिज्जा, इमेसु खलु कुलेसु णितिए पिंडे दिज्जइ, णितिए अग्गपिंडे दिज्जइ, णितिए भाए दिज्जइ, अवट्ठभाए दिज्जइ, तहप्पगाराइं कुलाइं णितियाइं णितिओमाणाइं, णो भत्ताए वा णो पाणाए वा पविसिज्ज वा णिक्खमिज्ज वा ॥ ५३८ ॥ एयं खलु तस्स भिक्खुस्स वा भिक्खुणीए वा सामग्गियं जं सव्वट्ठेहिं समिए सहिए सयाजए त्ति वेमि ॥ ५३९ ॥ पढमोइसो समत्तो ॥

से भिक्खु वा भिक्खुणी वा गाहावइकुलं पिंडवायपडियाए अणुपविट्ठे समाणे से जं पुण जाणेजा, असणं वा (४) अट्ठमिपोसहिएसु वा, अट्ठमासिएसु वा, मासिएसु वा, दोमासिएसु वा, तिमासिएसु वा, चाउमासिएसु वा, पंचमासिएसु वा, छमासिएसु वा, उऊसु वा, उऊसंधीसु वा, उउपरियट्ठेसु वा, बहवे समणमाहणअतिहिकिवणवणीमणे एगाओ उक्खाओ परिएसिज्जमाणे पेहाए, दोहिं उक्खाहिं परिएसिज्जमाणे पेहाए, तिहिं उक्खाहिं परिएसिज्जमाणे पेहाए, चउहिं उक्खाहिं परिएसिज्जमाणे पेहाए, कुंमीमुहाओ वा कलोवाइओ वा, संणिहिंसंणिचयाओ वा परिएसिज्जमाणे पेहाए तहप्पगारं असणं (४) अपुरिसंतरकडं जाव अणासेवियं अफासुयं अणेसणिज्जं णो पडिगाहिज्जा ॥ ५४० ॥ अह पुण एवं जाणिज्जा पुरिसंतरकडं जाव आसेवियं फासुयं जाव पडिगाहिज्जा ॥ ५४१ ॥ से भिक्खु वा (२) जाव पविट्ठे समाणे जाई पुण कुलाई जाणिज्जा; तंजहा-उग्गकुलाणि वा भोगकुलाणि वा, राइणकुलाणि वा, खत्तियकुलाणि वा, इक्खागकुलाणि वा, हरिवंसकुलाणि वा, एसियकुलाणि वा, वेसियकुलाणि वा, गंडागकुलाणि वा, कोट्टागकुलाणि वा, गामरक्खकुलाणि वा, वोक्कसालियकुलाणि वा, अण्णयरेसु वा तहप्पगारेसु कुलेसु अट्ठुण्हिएसु अगरहिएसु वा, असणं वा (४) फासुयं एसणिज्जं जाव पडिगाहिज्जा ॥ ५४२ ॥ से भिक्खु वा (२) गाहावइकुलं पिंडवायपडियाए अणुपविट्ठे समाणे से जं पुण जाणेजा असणं वा (४) समवाएसु वा, पिंडणियरेसु वा, इंदमहेसु वा, खंदमहेसु वा, रुंदमहेसु वा, मुणंदमहेसु वा, भूयमहेसु वा, जक्खमहेसु वा, णागमहेसु वा, थूभमहेसु वा, रक्खमहेसु वा, गिरिमहेसु वा, दरिमहेसु वा, अगडमहेसु वा, तडागमहेसु वा, दहमहेसु वा, णईमहेसु वा, सरमहेसु वा, सागरमहेसु वा, आगरमहेसु वा, अण्णयरेसु वा तहप्पगारेसु विरुवरुवेसु महामहेसु वट्टमाणेसु, बहवे समणमाहणअतिहिकिवणवणीमए एगाओ उक्खाओ परिएसिज्जमाणे पेहाए, दोहिं जाव संणिहिंसंणिचयाओ वा परिएसिज्जमाणे पेहाए तहप्पगारं असणं वा (४) अपुरिसंतरकडं जाव णो पडिगाहिज्जा ॥ ५४३ ॥ अह पुण एवं जाणिज्जा, दिणं जं तेसिं दायव्वं, अह तत्थ भुंजमाणे पेहाए गाहावइभारियं वा, गाहावइभणिणि वा, गाहावइपुत्तं वा, गाहावइधूयं वा, सुण्हं वा, धाई वा, दासं वा, दासिं वा, कम्मकरं वा, कम्मकरिं वा, से पुव्वामेव आलोएज्जा, आउसि ति वा भगिणिंति वा, दाहिसि मे इत्तो अन्नयरं भोयणजायं ? से सेवं वयंतस्स परो असणं वा (४) आहट्टु दलएज्जा तहप्पगारं असणं वा (४) सयं वा पुण जाएज्जा, परो वा से देज्जा, फासुयं जाव पडिगाहिज्जा ॥ ५४४ ॥ से भिक्खु वा (२) परं अट्ठजोयणमेराए

संखडिं णच्चा संखडिपडियाए णो अभिसंधारेज्जा गमणाए ॥ ५४५ ॥ से भिक्खु वा (२) पाईणं संखडिं णच्चा पडीणं गच्छे अणाढायमाणे पडीणं संखडिं णच्चा पाईणं गच्छे अणाढायमाणे दाहिणं संखडिं णच्चा उदीणं गच्छे अणाढायमाणे, उदीणं संखडिं णच्चा दाहिणं गच्छे अणाढायमाणे ॥ ५४६ ॥ जत्थेव सा संखडी सिया, तंजहा गामंसि वा, णगरंसि वा, खेडंसि वा, कव्वडंसि वा, मंडवंसि वा, पट्टगंसि वा, आगरंसि वा, दोणमुहंसि वा, णिगमंसि वा, आसमंसि वा, रायहाणिसि वा, जाव संणिवेसंसि वा, संखडिं संखडिपडियाए णो अभिसंधारेज्जा गमणाए, केवली बूया 'आयाणमेयं' ॥ ५४७ ॥ संखडिं संखडिपडियाए अभिसंधारेमाणे आहाकम्मियं वा उद्देसियं, मीस-जायं वा, कीयगडं वा पामिच्चं वा, अच्छेज्जं वा, अणिसट्ठं वा, अभिहडं वा, आहट्टु दिज्जमाणं भुंजिज्जा, असंजए भिक्खुपडियाए, खुड्डियदुवारियाओ महल्लियदुवारियाओ कुज्जा, महल्लियदुवारियाओ खुड्डियदुवारियाओ कुज्जा, समाओ सिज्जाओ विसमाओ कुज्जा, विसमाओ सिज्जाओ समाओ कुज्जा, पवायाओ सिज्जाओ णिवायाओ कुज्जा, णिवायाओ सिज्जाओ पवायाओ कुज्जा, अंतो वा, बहिं वा उवस्सयस्स हरियाणि छिंदिय २ दालिय २ संथारणं संथारिज्जा एस बिलुंगयामो सिज्जाए तम्हा से संजए णियंठे अण्णयरं वा तहप्पगारं पुरे संखडिं वा पच्छासंखडिं वा संखडिं संखडिपडियाए णो अभिसंधारिज्ज गमणाए ॥ ५४८ ॥ एयं खलु तस्स भिक्खुस्स भिक्खुणीए वा साम-गियं जं सव्वठेहिं समिए सहिए सयाजए त्ति वेमि ॥ ५४९ ॥ **वीओदेसो समत्तो ॥**

से एगया अण्णतरं संखडिं आसित्ता पिबित्ता छट्ठेज्ज वा वमेज्ज वा, भुत्ते वा से णो सम्मं परिणमिज्जा अण्णतरे वा से दुक्खे रोयातंके समुपज्जिज्जा, केवली बूया आयाणमेयं ॥ ५५० ॥ इह खलु भिक्खु गाहावइहिं वा, गाहावइणीहिं वा, परिवा-यएहिं वा, परिवाइयाहिं वा, एगज्जं सद्धिं सौंडं पाडं भो वतिमिस्सं हुरत्था वा, उवस्सयं पडिलेहेमाणे णो लमिज्जा, तमेव उवस्सयं संमिस्सिभावमावज्जिज्जा अण्ण-मणे वा से मत्ते विप्परियासियभूए इत्थिविग्गहे वा किलीबे वा तं भिक्खुं उवसंक्र-मित्तु बूया 'आउसंतो समणा अहे आरामंसि वा, अहे उवस्सयंसि वा, राओ वा, वियाले वा, गामधम्मणियंतियं कट्टु, रहस्सियंमेहुणधम्मपरियारणाए आउट्टामो' तं चेवेगइओ साइज्जिज्जा, अकरणिज्जं चेयं संखाए । एते आयतणाणि संति संचिज्जमाणा पच्चवाया भवंति, तम्हा से संजए णियंठे तहप्पगारं पुरेसंखडिं वा पच्छासंखडिं वा संखडिं संखडिसंपडियाए णो अभिसंधारिज्जा गमणाए ॥ ५५१ ॥ से भिक्खु वा (२) अन्नयरिं संखडिं वा सोच्चा णिसम्म संपरिहावइ उस्सुयभूयेण अप्पाणेणं 'धुवा संखडी' णो संचाएइ, तत्थ इयरेयरेहिं कुलेहिं सामुदाणियं एसियं वैसियं पिंडवायं पडिगा-

हिता आहारं आहारेत्तए, माइद्वाणं संफासे णो एवं करिज्जा, से तत्थ कालेण अणुप-
 विसित्ता तथेयेरयेरेहिं कुलेहिं सामुदाणियं एसियं वेसियं पिंडवायं पडिगाहिता आहारं
 आहारिज्जा ॥ ५५२ ॥ से भिक्खू वा (२) से जं पुण जाणेज्जा गामं वा जाव
 रायहाणि वा, इमंसि खलु गामंसि वा जाव रायहाणिंसि वा संखडि सिया तंपि य
 गामं वा जाव रायहाणिं वा संखडिं संखडिपडियाए णो अभिसंधारेज्जा गमणाए,
 केवली बूया आयाणमेयं ॥ ५५३ ॥ आइण्णा अवमा णं संखडिं अणुपविस्समाणस्स
 पाएण वा पाए अकंतपुव्वे भवइ, हत्थेण वा हत्थे संचालियपुव्वे भवइ, पाएण वा
 पाए आवडियपुव्वे भवइ, सीसेण वा सीसे संघट्टियपुव्वे भवइ, काएण वा काए
 संखोभियपुव्वे भवइ, दंडेण वा मुट्ठिणा वा लेलुणा वा कवालेण वा अभिहयपुव्वे वा
 भवइ, सीओदएण वा उस्सित्तपुव्वे भवइ, रयसा वा परिघासियपुव्वे भवइ, अणेस-
 णिज्जेण वा परिमुत्तपुव्वे भवइ, अण्णेसिं वा दिज्जमाणे पडिगाहियपुव्वे भवइ, तम्हा
 से संजए णिग्गंये तहप्पगारं आइण्णाऽवमा णं संखडिं संखडिपडियाए नो अभिसं-
 धारिज्जा गमणाए ॥ ५५४ ॥ से भिक्खू वा (२) गाहावइकुलं पिंडवायपडियाए
 पविट्ठे समाणे से जं पुण जाणेज्जा, असणं वा (४) एसणिज्जं सिया अणेसणिज्जं सिया
 वित्तिगिच्छसमावण्णेणं अप्पाण्णेणं असमाहडाए केस्साए तहप्पगारं असणं वा (४)
 लामे संते णो पडिगाहिज्जा ॥ ५५५ ॥ से भिक्खू वा (२) गाहावइकुलं पविसिज्जु
 कामे सव्वं भंडगमायाय गाहावइकुलं पिंडवायपडियाए पविसिज्ज वा णिक्खमिज्ज
 वा ॥ ५५६ ॥ से भिक्खू वा (२) बहिया वियारभूमिं वा विहारभूमिं वा णिक्ख-
 ममाणे पविसमाणे वा सव्वं भंडगमायाए बहिया वियारभूमिं वा विहारभूमिं वा
 णिक्खमिज्ज वा पविसिज्ज वा ॥ ५५७ ॥ से भिक्खू वा (२) गामाणुगामं दूइज्ज-
 माणे सव्वं भंडगमायाए गामाणुगामं दूइज्जिज्जा ॥ ५५८ ॥ से भिक्खू वा (२)
 अह पुण एवं जाणिज्जा तिव्वदेसियं वासं वासेमाणं पेहाए, तिव्वदेसियं महियं
 संणिचयमाणं पेहाए महावाएण वा रयं समुद्धयं पेहाए तिरिच्छसंपाइमा वा तसा
 पाणा संथडा सन्निचयमाणा पेहाए, से एवं णच्चा णो सव्वं भंडगमायाय गाहावइ-
 कुलं पिंडवायपडियाए पविसिज्ज वा णिक्खमिज्ज वा बहिया वियारभूमिं वा विहार-
 भूमिं वा पविसिज्ज वा णिक्खमिज्ज वा गामाणुगामं दूइज्जिज्जा ॥ ५५९ ॥ से भिक्खू
 वा (२) से जाई पुण कुलाई जाणिज्जा, तंजहा-खत्तियाण वा, राईण वा, कुराईण
 वा, रायपेसियाण वा, रायवंसट्ठियाण वा अंतो वा बहिं वा संणिविट्ठाय वा, गच्छंताण
 वा णिमंतेमाण्ण वा अणिमंतेमाण्ण वा असणं वा (४) लामे संते णो पडिगा-
 हिज्जा ति वेमि ॥ ५६० ॥ तइओदेसो समत्तो ॥

से भिक्खु वा (२) जाव पविट्ठे समाणे से जं पुण जाणेज्जा, आहेणं वा पहेणं वा, हिंगोलं वा, संमेलं वा हीरमाणं संपेहाए अंतरा से मग्गा बहुपाणा, बहुबीया, बहुहरिया, बहुओसा, बहुउदया, बहुउत्तिंगपणगदगमट्टियमक्कडासंताणगा, बहवे तत्थ समणमाहणअतिहिक्खिणवणीमगा उवागता उवागमिस्संति तत्थाइण्णाविती णो पण्णस्सणि क्खमणपवेसाए, णो वायणपुच्छणपरियट्ठणाणुपेहधम्ममाणुओगचिंताए, सेवं णच्चा तहप्पगारं पुरेसंखडिं वा पच्छासंखडिं वा संखडिं संखडिपडियाए णो अभि-संधारेज्जा गमणाए ॥ ५६१ ॥ से भिक्खु वा (२) गाहावइकुलं पिंडवायपडियाए पविट्ठे समाणे से जं पुण जाणेज्जा, आहेणं वा जाव संमेलं वा हीरमाणं पेहाए, अंतरा से मग्गा अप्पंडा जाव अप्पसंताणगा णो जत्थ बहवे समणमाहणा जाव उवागमिस्संति, अप्पाइण्णाविती पण्णस्स गिक्खमणपवेसाए पण्णस्स वायणपुच्छणपरियट्ठणाणुपेह-धम्ममाणुओगचिंताए सेवं णच्चा तहप्पगारं पुरेसंखडिं वा पच्छासंखडिं वा संखडि-पडियाए अभिसंधारेज्ज गमणाए ॥ ५६२ ॥ से भिक्खु वा (२) गाहावइकुलं जाव पविसिउकामे जं पुण जाणेज्जा, खीरिणियाओ गावीओ खीरिज्जमाणीओ पेहाए असणं वा (४) उवसंखडिज्जमाणं पेहाए पुरा अप्पज्जुहिए सेवं णच्चा णो गाहाव-इकुलं पिंडवायपडियाए गिक्खमिज्ज वा पविसिज्ज वा से तमायाए एणंतमवक्कमिज्जा, अणावायमसंलोए चिट्ठिज्जा, अह पुण एवं जाणेज्जा खीरिणीओ गावीओ खीरियाओ पेहाए, असणं वा (४) उवक्खडियं पेहाए पुराए जूहिए से एवं णच्चा तओ संजयामेव गाहावइकुलं पिंडवायपडियाए पविसिज्जवा गिक्खमिज्ज वा ॥ ५६३ ॥ भिक्खागणामेगे एवमाहंसु समाणा वा वसमाणा वा गामाणुगामं दूइज्जमाणे 'खुट्ठाए खलु अयं गामे संगिरुद्धाए णो महालए से हंता, भयंतारो बाहिरगाणि गामाणि भिक्खायरियाए वय्ह ॥ ५६४ ॥ संति तत्थेगइयस्स भिक्खुस्स पुरे संथुया वा पच्छासंथुया वा परिवसंति, तंजहा-गाहावइ वा, गाहावइणीओ वा, गाहावइपुत्ता वा, गाहावइधूयओ वा, गाहावइसुण्हाओ वा, धाईओ वा, दासा वा, दासीओ वा, कम्मकरा वा, कम्मकरीओ वा, तहप्पगाराइं कुलाइं पुरे संथुयाणि वा पच्छासंथु-याणि वा, पुव्वामेव भिक्खायरियाए अणुपविसिस्सामि अविय इत्थ लभिस्सामि, पिंडं वा लोयं वा, असणं वा, पाणं वा, खीरं वा, दधि वा, घयं वा, गुलं वा, तेळं वा, सक्कुलिं, फाणियं वा, पूयं वा, सिहरिणिं वा, तं पुव्वामेव भुच्चा पिच्चा पडिग्गहं संलिहिय संमज्जिय तओ पच्छा भिक्खुहिं सद्धिं गाहावइकुलं पिंडवायपडियाए पविसिस्सामि गिक्खमिस्सामि वा, माइट्ठणं संपासे, तं णो एवं करेज्जा, से तत्थ भिक्खुहिं सद्धिं कालेण अणुपविसित्ता, तत्थियरेयरेहिं कुलेहिं सामुदाणियं एसियं

वेसियं पिंडवायं पडिगाहिता आहारं आहारिज्जा ॥ ५६६ ॥ एयं खलु तस्स भिक्खुस्स वा भिक्खुणीए वा सामग्गियं ॥ ५६६ ॥ **चउत्थोद्देशो समत्तो ॥**

से भिक्खू वा (२) जाव पविट्ठे समाणे से जं पुण जाणिज्जा, अग्गपिंडं उक्खिप्पमाणं पेहाए, अग्गपिंडं णिक्खिप्पमाणं पेहाए अग्गपिंडं हीरमाणं पेहाए, अग्गपिंडं परिभाइज्जमाणं पेहाए, परिभुंजमाणं पेहाए, अग्गपिंडं परिट्ठविज्जमाणं पेहाए, पुरा असिणाइ वा, अवहाराइ वा पुरा जत्थे समणमाहणअतिहिक्किवण-चणीमगा खद्धं खद्धं उवसंक्रमंति, से हंता अहमवि खद्धं २ उवसंक्रमामि, माइठ्ठाणं संक्रासे णो एवं करिज्जा ॥ ५६७ ॥ से भिक्खू वा, (२) जाव पविट्ठे समाणे अंतरा से वप्पाणि वा, फलिहाणि वा, पागाराणि वा, तोरणाणि वा, अग्गलाणि वा, अग्गलपासगाणि वा सइ परक्कमे संजयामेव परक्कमिज्जा, णो उज्जुयं गच्छिज्जा, केवली बूया आयाणमेयं ॥ ५६८ ॥ से तत्थ परक्कममाणे पयल्लिज वा, पक्खल्लेज वा पवडिज वा, से तत्थ पयल्लेमाणे वा पक्खल्लेजमाणे पवडमाणे वा, तत्थ से काये उच्चारण वा पासवणेण वा खेलेण वा सिंघाणेण वा, वंतेण वा पित्तं वा, पूएण वा, सुक्केण वा, सोणिएण वा, उवलित्ते सिया, तहप्पगारं कायं णो अणंतरहि-याए पुढवीए णो ससिणिद्धाए पुढवीए, णो ससरक्खाए पुढवीए, णो चित्तमंताए सिलाए, णो चित्तमंताए लेल्लए, कोलावासंसि वा, दारुए जीवपइट्ठिए सअंढे सपाणे जाव ससंताणए, णो आमजिज्ज वा पमजिज्ज वा, संलिहिज्ज वा, विलिहिज्ज वा, उव्वलिज्ज वा, उवट्ठिज्ज वा, आयाविज्ज वा, पयाविज्ज वा, से पुव्वामेव अप्पसरक्खं तणं वा, पत्तं वा, कट्ठं वा, सक्करं वा, जाइज्जा, जाइत्ता सेतमायाय एगंतमवक्कमिज्जा, २ अहे ज्ञामथंढिलंसि वा, जाव अण्णयरंसि वा, तहप्पगारंसि पडिलेहिय २ पमजिय २ तओ संजयामेव आमजिज्ज वा जाव पयाविज्ज वा ॥ ५६९ ॥ से भिक्खू वा (२) जाव पविट्ठे समाणे से जं पुण जाणेज्जा गोगं वियालं पडिपहे पेहाए, महिसं वियालं पडिपहे पेहाए एवं मणुस्सं आसं हत्थि सीहं वग्गं विगं दीवियं अच्छं तरच्छं परिसरं सियालं विरालं सुणयं कोलसुणयं कोकंतिर्यं चित्ताचेल्लरयं वियालं पडिपहे पेहाए सइपरक्कमे संजयामेव परक्कमेज्जा णो उज्जुयं गच्छेज्जा ॥ ५७० ॥ से भिक्खू वा (२) जाव समाणे अंतरा से ओवाओ वा, खानू वा, कंटए वा, घसी वा, भिल्लगा वा, विसमे वा, विज्जले वा, परियावज्जिज्जा, सति परक्कमे संजयामेव परक्कमेज्जा णो उज्जुयं गच्छिज्जा ॥ ५७१ ॥ से भिक्खू वा (२) गाहावइकुलस्स तुवास्स बाहं कंटकवोदियाए परिपिहियं पेहाए तेसिं पुव्वामेव उग्गहं अण्णुज्जवियं अपडिलेहिय अपमजिय णो अवंगुणिज्ज वा, पविसिज्ज वा णिक्खमिज्ज वा, तेसिं पुव्वामेव

उगगहं अणुजविय पडिलेहिय २ पमजिय २ तओ संजयामेव अवंगुणिज्ज वा पविसेज्ज वा णिक्खमेज्ज वा ॥ ५७२ ॥ से भिक्खू वा (२) जाव समाणे से जं पुण जाणेज्जा, समणं वा, माहणं वा, गामपिंडोलगं वा, अतिहिं वा, पुव्वपविट्ठं पेहाए णो तेसिं संलोए सपडिदुवारे चिट्ठेज्जा, केवली बूया आयाणमेयं ॥ ५७३ ॥ पुरा पेहाए तस्सट्ठाए परो असणं वा, (४) आहट्ठु दलएज्जा अह भिक्खूणं पुव्वोवदिट्ठा एस पइत्ता एस हेऊ, एस उवएसो, जं णो तेसिं संलोए सपडिदुवारे चिट्ठेज्जा से तमायाए एगंतमवक्कमिज्जा अणावायमसंलोए चिट्ठेज्जा ॥ ५७४ ॥ से परो अणावायमसंलोए चिट्ठमाणस्स असणं वा (४) आहट्ठु दलएज्जा से य वदेज्जा “आउसंतो समणा इमे भे असणे वा (४) सव्वजणाए निसिट्ठे, तं भुंजह च णं परिभाएह च णं” तं चेगइओ पडिगाहेत्ता तुसिणीओ उवेहेज्जा, अवियाइ एयं मममेव सिया एवं माइट्ठाणं संफासे, णो एवं करेज्जा, से तमायाए तत्थ गच्छेज्जा (२) से पुव्वामेव आलोएज्जा, “आउसंतो समणा, इमे भे असणं वा (४) सव्व जणाए णिसिट्ठे तं भुंजह च णं परिभाएह च णं” सेवं वदंतं परो वएज्जा “आउसंतो समणा, तुमं चेव णं परिभाएहि, से तत्थ परिभाएमाणे णो अप्पणो खदं २ डायं २ ऊसढं २ रसियं २ मणुजं २ णिदं २ लुक्खं २ से तत्थ अमुच्छिए अगिद्धे अगडिए अणज्जोववण्णे, बहुसममेव, परिभाएज्जा ॥ ५७५ ॥ से णं परिभाएमाणं परो वएज्जा “आउसंतो समणा मा णं तुमं परिभाएहि सव्वे वेगतिया ठिया उ भोक्खामो वा पाहामो वा” से तत्थ भुंजमाणे णो अप्पणा खदं २ जाव लुक्खं २ से तत्थ अमुच्छिए (४) बहुसममेव भुंजिज्ज वा पीइज्ज वा ॥ ५७६ ॥ से भिक्खू वा (२) जाव समाणे से जं पुण जाणिज्जा, समणं वा, माहणं वा, गामपिंडोलगं वा, अतिहिं वा, पुव्वपविट्ठं पेहाए णो ते उवाइक्कम पविसेज्ज वा ओभासेज्ज वा से तमायाय एगंतमवक्कमेज्जा अणावायमसंलोए चिट्ठिज्जा, अह पुण एवं जाणिज्जा, पडिसेहिए वा दिन्ने वा तओ तंमि णियत्तिए संजयामेव पविसिज्ज वा ओभासिज्ज वा ॥ ५७७ ॥ एयं खलु तस्स भिक्खुस्स भिक्खुणीए वा सामगियं ॥ ५७८ ॥ पंचमोद्देशो समत्तो ॥

से भिक्खू वा (२) जाव समाणे से जं पुण जाणेज्जा, रसेसिणो बहवे पाणा चासेसणाए संथडे सणिवइए पेहाए तंजहा-कुक्कुडजाइयं वा, सूयरजाइयं वा अगगपिंडसि वा वायसा संथडा सणिवइया पेहाए सइ परक्कमे संजयामेव परक्कमेज्जा नो उज्जुयं गच्छिज्जा ॥ ५७९ ॥ से भिक्खू वा (२) जाव पविट्ठे समाणे नो गाहावइकुलस्स दुवारसाहं अवलंबिय २ चिट्ठेज्जा, नो गाहावइकुलस्स दगच्छइणमत्ताए

चिठ्ठिजा, नो गाहावडकुलस्स चंदणिउयए चिठ्ठेजा, णो० सिणाणस्स वा वच्चस्स वा संलोए सपडिदुवारै चिठ्ठिजा णो गाहावडकुलस्स आलोयं वा थिगगलं वा संधिं वा दगभवणं वा बाहाउ पगिज्झिय २ अंगुलियाए वा उद्दिसिय २ उण्णमिय २ अवचमिय २ णिज्झाडिजा, णो गाहावडं अंगुलियाए उद्दिसिय २ जाडिजा, णो गाहावडं अंगुलियाए चालिय २ जाएजा, णो गाहावडं अंगुलियाए तज्जिय २ जाएजा, णो गाहावडं अंगुलियाए उक्खुलंपिय २ जाएजा, णो गाहावडं वंदिय २ जाएजा, णो वयणं फरुसं वडिजा ॥ ५८० ॥ अह तत्थ कंचि भुंजमाणं पेहाए, तंजहा-गाहावडं वा जाव कम्मकरिं वा से पुव्वामेव आलोडिजा, “आउसो त्ति वा, भइणि त्ति वा दाहिसि मे एत्तो अन्नयरं भोयणजायं” से एवं वयंतस्स परो हत्थं वा सत्तं वा दक्खिं वा भायणं वा सीओदगवियडेण वा, उस्सिणोदगवियडेण वा, उच्छोलेज्ज वा, पडोएज्ज वा, से पुव्वामेव आलोएजा “आउसो त्ति, वा भइणित्ति वा, मा एयं तुमं हत्थं वा, सत्तं वा, दक्खिं वा, भायणं वा, सीओदगवियडेण वा उस्सिणोदगवियडेण वा, उच्छोलेहि वा पडोवेहि वा, अभिकखसि मे दाउं एमेव दलयाहि” से सेवं वयंतस्स परो हत्थं वा (४) सीओदगवियडेण वा २ उच्छोलेत्ता पडोइत्ता आहट्टु दलएजा तहप्पगारेण पुरे कम्मकएणं हत्थेण वा (४) असणं वा (४) अफासुयं अणेसणिज्जं जाव णो पडिगाहिजा, अह पुण एवं जाणिजा णो पुरेकम्मएणं उदउल्लेणं तहप्पगारेणं वा ससिणिद्धेण वा हत्थेण वा (४) असणं वा (४) अफासुयं जाव णो पडिगाहिजा अह पुण एवं जाणेजा णो उदउल्लेण ससिणिद्धेणं सेसं तं चेव, एवं ससरक्खे, मट्ठिया, ऊसे हरियाले, हिंणुलए, मणोसिल्ला, अंजणे, लोणे, गेस्य, वन्निय, सेठिय, सोरठिय पिट्ठ कुक्कस उक्कुट्ठ संसट्ठेणं ॥ ५८१ ॥ अह पुण एवं जाणिजा, णो असंसट्ठे, संसट्ठे तहप्पगारेण संसट्ठेण हत्थेण वा (४) असणं वा (४) फासुयं जाव पडिगाहिजा ॥ ५८२ ॥ से भिक्खू वा (२) से जं पुण जाणेजा पिहुयं वा बहुरयं वा जाव चाउलपलंबं वा, असंजए भिक्खुपडियाए चित्तमंताए सिल्लाए जाव मक्कडासंताणाए कुट्टिसु वा, कुट्टित्ति वा, कुट्टिस्संति वा, उप्पगिंसु वा (३) तहप्पगारं पिहुयं वा, जाव चाउलपलंबं वा, अफासुयं जाव णो पडिगाहिजा ॥ ५८३ ॥ से भिक्खू वा (२) जाव समाणे से जं पुण जाणिजा बिलं वा लोणं उब्बिमयं वा लोणं असंजए भिक्खुपडियाए चित्तमंताए सिल्लाए जाव संताणाए भिंदिसु वा, भिंदति वा, भिंदिस्संति वा, रुक्खिसु वा (३) बिलं वा लोणं उब्बिमयं वा लोणं अफासुयं जाव णो पडिगाहिजा ॥ ५८४ ॥ से भिक्खू वा जाव समाणे से जं पुण जाणेजा असणं वा (४) अगणिणिक्खित्तं तहप्पगारं

असणं वा (४) अफासुयं लामे संते णो पडिगाहिज्जा, केवली बूया, “आयाण-
मेयं” असंजए भिक्खुपडियाए उस्सिचमाणे वा, निस्सिचमाणे वा, आमजमाणे
वा, पमजमाणे वा, ओयारेमाणे वा, उव्वत्तमाणे वा, अगणिजीवे हिंसिज्जा, अह
भिक्खूणं पुव्वोवदिट्ठा एस पइण्णा, एस हेऊ, एस कारणे, एसुवएसे, जं तहप्पगारं
असणं वा, (४) अगणिणिक्खित्तं अफासुयं अणेसणिज्जं लामे संते णो पडिगाहिज्जा
॥ ५८५ ॥ एवं खलु तस्स भिक्खुस्स वा भिक्खुणीए वा सामग्गियं ॥ ५८६ ॥

छट्ठोद्देसो समत्तो ॥

से भिक्खू वा (२) जाव समाणे से जं पुण जाणेज्जा असणं वा (४) खंधंति
वा थंभंति वा, मंचंति वा, मालंति वा, पासायंति वा, हम्मियतलंति वा, अन्नय-
रंति वा, तहप्पगारंति अंतलिक्खजायंति उवगिक्खित्ते सिया, तहप्पगारं मालोहडं
असणं वा (४) जाव अफासुयं णो पडिगाहिज्जा, केवली बूया “आयाणमेयं”
असंजए भिक्खुपडियाए पीढं वा फलगं वा, गिस्सेणिं वा, उदूहलं वा, आहट्टु
उस्सविथ दुरुहेज्जा, से तत्थ दुरुहमाणे, पयलेज्जा वा पवडेज्जा वा, से तत्थ पयले-
माणे वा पवडेमाणे वा, हत्थं वा, पायं वा, बाहुं वा, ऊरुं वा, उदरं वा, सीसं वा,
अण्णयरं वा कायंसि इंदियजायं लसिज्ज वा, पाणाणि वा, भूयाणि वा, जीवाणि
वा, सत्ताणि वा, अभिहणिज्ज वा, वित्तासिज्ज वा, लेसिज्ज वा, संघसिज्ज वा, संघ-
ट्टिज्ज वा, परियाविज्ज वा, किलामिज्ज वा, ठाणाओ ठाणं संकामिज्ज वा, तं तहप्प-
गारं मालोहडं असणं वा, (४) लामे संते णो पडिगाहिज्जा ॥ ५८७ ॥ से भिक्खू
वा, (२) जाव समाणे से जं पुण जाणेज्जा, असणं वा (४) कुट्टियाओ वा
कोलेज्जाओ वा, असंजए भिक्खुपडियाए, उक्कुज्जिय अवउज्जिय ओहरिय, आहट्टु,
दलइज्जा, तहप्पगारं असणं वा, (४) मालोहडंति णच्चा लामे संते णो पडिगा-
हिज्जा ॥ ५८८ ॥ से भिक्खू वा (२) जाव समाणे से जं पुण जाणेज्जा असणं
वा (४) मट्ठियाओलित्तं तहप्पगारं असणं वा (४) जाव लामे संते णो पडिगा-
हिज्जा । केवली बूया ‘आयाण, मेयं’ असंजए भिक्खुपडियाए मट्ठिओलित्तं असणं
वा (४) उब्भिदमाणे पुढवीकायं समारंभिज्जा, तहा तेऊ-वाऊ-वणस्सइ-तस कायं
समारंभिज्जा पुणरवि ओलिपमाणे पच्छाकम्मं करिज्जा । अह भिक्खूणं पुव्वोवदिट्ठा
जाव जं तहप्पगारं मट्ठिओलित्तं असणं वा, (४) लामे संते णो पडिगाहिज्जा
॥ ५८९ ॥ से भिक्खू वा (२) जाव पविट्ठे समाणे से जं पुण जाणेज्जा असणं
वा (४) पुढविकायपइट्ठियं तहप्पगारं असणं वा (४) अफासुयं जाव णो पडि-
गाहिज्जा ॥ ५९० ॥ से भिक्खू वा भिक्खुणी वा से जं पुण जाणिज्जा, असणं वा

(४) आउकायपइठियं चेव एवं अगणिकायपइठियं लामे संते णो पडिगाहिज्जा, 'केवलीबूया' "आयाणमेयं" असंजए भिक्खुपडियाए अगणिं उस्सकिय २ गिस-
 क्रिय २ ओहरिय २ आहङ्ग, दलएज्जा अह भिक्खूणं पुव्वोवदिट्ठा जाव णो पडिगा-
 हिज्जा ॥ ५९१ ॥ से भिक्खू वा (२) जाव पविट्ठे समाणे से जं पुण जाणिज्जा,
 असणं वा (४) अञ्चुसिणं असंजए भिक्खुपडियाए, सुप्पेण वा, विहुयणेण वा,
 तालियंटेण वा, पत्तेण वा, साहाए वा, साहाभंगेण वा, पिहुणेण वा, पिहुणहत्थेण
 वा, चेलेण वा, चेलकलेण वा, हत्थेण वा, मुहेण वा, फुमिज्ज वा, वीएज्ज वा,
 से पुव्वामेव आलोएज्जा "आउसो त्ति वा, भणिणि त्ति वा, मा एयं तुमं, असणं
 वा, (४) अञ्चुसिणं सुप्पेण वा जाव फुमाहि वा, वीयाहि वा, अभिक्खसि मे दाउं
 एमेव दलयाहि" से सेवं वयंतस्स परो सुप्पेण वा जाव वीइत्ता आहङ्ग दलएज्जा,
 तहप्पगारं असणं वा (४) अफासुयं जाव णो पडिगाहिज्जा ॥ ५९२ ॥ से भिक्खू
 वा (२) जाव समाणे से जं पुण जाणेज्जा, असणं वा (४) वणस्सइकायपइठियं
 तहप्पगारं असणं वा (४) वणस्सइकायपइठियं अफासुयं अणेसणिज्जं लामे संते
 णो पडिगाहिज्जा, एवं तसकाएवि ॥ ५९३ ॥ से भिक्खू वा (२) जाव पविट्ठे
 समाणे से जं पुण पाणगजायं जाणेज्जा, तंजहा-उस्सेइमं वा, संसेइमं वा, चाउलोदगं
 वा, अण्णयरं वा तहप्पगारं पाणगजायं, अहुणाधोयं, अणबिलं, अवोक्कंतं, अपरिणयं
 अविद्धत्थं, अफासुयं, अणेसणिज्जं, मण्णमाणे णो पडिगाहिज्जा ॥ ५९४ ॥ अह पुण
 एवं जाणिज्जा, चिराधोयं, अंबिलं, वुक्कंतं, परिणयं, विद्धत्थं, फासुयं जाव पडिगा-
 हिज्जा ॥ ५९५ ॥ से भिक्खू वा, (२) जाव पविट्ठे समाणे से जं पुण पाणगजायं
 जाणेज्जा, तंजहा-तिलोदगं वा, तुसोदगं वा, जवोदगं वा, आयामं वा, सोवीरं वा,
 सुद्धवियडं वा, अण्णयरं वा तहप्पगारं पाणगजायं पुव्वामेव आलोएज्जा "आउसो
 त्ति वा, भणिणित्ति वा, दाहिसि मे एत्तो अन्नयरं पाणगजायं ?" से सेवं वयंतं परो
 वएज्जा "आउसंतो समणा, तुमं चेवेदं पाणगजायं पडिगगहेण वा उस्सिन्धियाणं २
 ओयत्तिियाणं गिण्हाहि" तहप्पगारं पाणगजायं सयं वा गिण्हिज्जा, परो वा से दिज्जा,
 फासुयं लामे संते पडिगाहिज्जा ॥ ५९६ ॥ से भिक्खू वा (२) से जं पुण पाणगं
 जाणेज्जा अणंतरहियाए पुढवीए जाव संताणए ओहङ्ग निक्खित्ते सिया असंजए
 भिक्खुपडियाए, उदउल्लेण वा, ससिणिद्धेण वा, सकसाएण वा, मत्तेण वा सीओद-
 एण वा, संभोएत्ता आहङ्ग दलएज्जा तहप्पगारं पाणगजायं अफासुयं लामे संते णो
 पडिगाहिज्जा ॥ ५९७ ॥ एयं खलु तस्स भिक्खुस्स भिक्खुणीए वा सामग्गियं
 ॥ ५९८ ॥ सत्तमोइसो समत्तो ॥

से भिक्खु वा (२) जाव पविट्ठे समाणे से जं पुण पाणगजायं जाणिज्जा, तंजहा-अंबपाणगं वा, अंबाडगपाणगं वा, कविट्ठपाणगं वा, माउलिगपाणगं वा, मुहियापाणगं वा, दाडिमपाणगं वा, खजूरपाणगं वा, णालिएरपाणगं वा, करीर-पाणगं वा, कोलपाणगं वा, आमलगपाणगं वा, चिंचापाणगं वा, अण्णयरं वा तहप्पगारं पाणगजायं सकण्णयं सब्बीयगं असंजए भिक्खुपडियाए छब्बेण वा दूसेण वा, बालगेण वा, आवीलियाण वा, पवीलियाण परिसाइयाण आहट्टु दलएज्जा, तहप्पगारं पाणगजायं अफासुयं लाभे संते णो पडिगाहिज्जा ॥ ५९९ ॥ से भिक्खु वा (२) जाव पविट्ठे समाणे, से आगंतारेसु वा, आरामागारेसु वा, गाहावड्कुलेसु वा, परियावसहेसु वा, अन्नगंधाणि वा, पाणगंधाणि वा, सुरभिगंधाणि वा, अगघाय २ से तत्थ आसायवडियाए मुच्छिए, गिद्धे, गडिए, अज्झोववचे 'अहो गंधो २' णो गंधमाघाइज्जा ॥ ६०० ॥ से भिक्खु वा (२) जाव समाणे, से जं पुण जाणेज्जा, सालुयं वा, विरालियं वा, सासवणालियं वा, अण्णतरं वा तहप्पगारं आमगं असत्थपरिणयं अफासुयं जाव णो पडिगाहिज्जा ॥ ६०१ ॥ से भिक्खु वा (२) जाव पविट्ठे समाणे से जं पुण जाणेज्जा, पिप्पलिं वा, पिप्पलि-चुण्णं वा, मिरियं वा, मिरियचुण्णं वा, सिंगबेरं वा, सिंगबेरचुण्णं वा, अण्णतरं वा तहप्पगारं आमगं असत्थपरिणयं अफासुयं जाव णो पडिगाहिज्जा ॥ ६०२ ॥ से भिक्खु वा (२) जाव पविट्ठे समाणे से जं पुण जाणेज्जा, पलंबजायं तंजहा-अंबपलंबं वा, अंबाडगपलंबं वा, तालपलंबं वा, झिज्झिरिपलंबं वा, सुरभिपलंबं वा, सल्लपलंबं वा, अन्नयरं वा तहप्पगारं पलंबजायं आमगं असत्थपरिणयं अफासुयं अणेसणिज्जं जाव लाभे संते णो पडिगाहिज्जा ॥ ६०३ ॥ से भिक्खु वा (२) जाव पविट्ठे समाणे से जं पुण पवालजायं जाणिज्जा, तंजहा-आसोत्थपवालं वा, णग्गोह-पवालं वा, पिलुंखुपवालं वा, णीपूरपवालं वा, सल्लपवालं वा, अन्नयरं तहप्पगारं पवालजायं आमगं असत्थपरिणयं अफासुयं अणेसणिज्जं जाव णो पडिगाहिज्जा ॥ ६०४ ॥ से भिक्खु वा (२) जाव समाणे से जं पुण सरडुयजायं जाणिज्जा, तंजहा-अंबसरडुयं वा, कविट्ठसरडुयं वा, दाडिमसरडुयं वा, विहसरडुयं वा, अण्ण-यरं वा तहप्पगारं सरडुयजायं आमं असत्थपरिणयं अफासुयं णो पडिगाहिज्जा ॥ ६०५ ॥ से भिक्खु वा (२) जाव पविट्ठे समाणे, से जं पुण मंथुजायं जाणिज्जा, तंजहा-उंबरमंथुं वा, णग्गोहमंथुं वा, पिलुंखुमंथुं वा, आसोत्थमंथुं वा, अण्णयरं वा तहप्पगारं मंथुजायं आमयं दुक्कं साण्णीयं अफासुयं णो पडिगा-हिज्जा ॥ ६०६ ॥ से भिक्खु वा (२) जाव समाणे से जं पुण जाणिज्जा, आमडागं

वा, पूइपिण्णागं वा, सप्पि वा, पेज्जं वा, लेज्जं वा, खाइमं वा, साइमं वा, पुराणं
 एत्थ पाणा, अणुप्पसूया, एत्थ पाणा संवुद्धा, एत्थ पाणा जाया, एत्थ पाणा अवुक्कंता,
 एत्थ पाणा अपरिणया, एत्थ पाणा अविद्धत्था, णो पडिगाहिज्जा ॥ ६०७ ॥ से भिक्खू
 वा, (२) जाव समाणे से जं पुण जाणिज्जा, उच्छुमेरगं वा अंककरेल्लयं वा, कसेरुगं
 वा, सिग्घाडगं वा, पूतिआलुगं वा, अन्नयरं वा तहप्पगारं आमगं असत्थपरिणयं
 जाव णो पडिगाहिज्जा ॥ ६०८ ॥ से भिक्खू वा (२) से जं पुण जाणिज्जा, उप्पलं
 वा, उप्पल नालं वा, भिसं वा, भिसमुणालं वा, पोक्खलं वा, पोक्खलविभंगं वा,
 अण्णतरं वा तहप्पगारं, जाव णो पडिगाहिज्जा ॥ ६०९ ॥ से भिक्खू वा, (२) जाव
 समाणे, से जं पुण जाणिज्जा, अग्गवीयाणि वा, मूलवीयाणि वा, खंधवीयाणि वा,
 पोरवीयाणि वा, अग्गजायाणि वा, मूलजायाणि वा, खंधजायाणि वा, पोरजायाणि
 वा, णण्णत्थ तक्कलिमत्थएण वा, तक्कलिसीसेण वा, णालिएरमत्थएण वा, खज्जरमत्थ-
 एण वा, तालमत्थएण वा, अन्नयरं वा तहप्पगारं आमं असत्थपरिणयं जाव णो पडि-
 गाहिज्जा ॥ ६१० ॥ से भिक्खू वा (२) जाव समाणे से जं पुण जाणिज्जा, उच्छुं
 वा, काणगं, अंगारियं संमिरसं, विगदूसियं, वेत्तगं वा, कंदलीऊसयं वा, अण्णयरं
 वा, तहप्पगारं आमं असत्थ परिणयं जाव णो पडिगाहिज्जा ॥ ६११ ॥ से भिक्खू
 वा (२) जाव समाणे से जं पुण जाणिज्जा, लसुणं वा, लसुणपत्तं वा, लसुणनालं
 वा, लसुणकंदं वा, लसुणचोयं वा, अण्णयरं वा तहप्पगारं कंदजायं णो पडिगा-
 हिज्जा ॥ ६१२ ॥ से भिक्खू वा (२) जाव समाणे से जं पुण जाणिज्जा, अंच्छिअं
 वा, कुंभिपक्कं, तिंदुगं वा, टिंबरुयं वा, विल्लयं वा, पलगं वा, कासवणालियं वा, अण्ण-
 तरं वा आमं असत्थपरिणयं जाव णो पडिगाहिज्जा ॥ ६१३ ॥ से भिक्खू वा, (२)
 जाव समाणे से जं पुण जाणिज्जा, कणं वा कणकुंडगं वा, कणपूयलियं वा, चाउलं
 वा, चाउलपिट्ठं वा, तिलं वा, तिलपिट्ठं वा, तिलपप्पडगं वा, अन्नतरं वा, तहप्प-
 गारं आमं असत्थपरिणयं जाव लाभे संते णो पडिगाहिज्जा ॥ ६१४ ॥ एस खलु
 तस्स भिक्खुस्स भिक्खुणीए वा सामग्गियं ॥ ६१५ ॥ **अट्ठमोद्देशो समत्तो ॥**

इह खलु पाईणं वा, पडीणं वा, दाहिणं वा, उदीणं वा, संतेगइया सद्धा भवन्ति,
 गाहावइ वा जाव कम्मकरी वा; तेसिं च णं एवं वुत्तपुव्वं भवइ जे इमे भवन्ति
 संमणा, भगवन्तो, सीलमंता, वयमंता, गुणमंता, संजया, संवुद्धा, बंभचारी, उवरया
 मेहुणाओ धम्माओ, णो खलु एएसिं कप्पइ आहाकम्मिए असणं वा (४) भोइत्तए
 वा पाइत्तए वा; से जं पुण इमं अहं अप्पणो अट्ठाए णिविद्वियं, तज्जहा असणं वा
 (४) सव्वमैयं समणाणं णिसिरामो, अवियाई वयं पक्ख्खा अप्पणो अट्ठाए असणं

वा (४) चेइस्सामो एयप्पगारं णिग्घोसं सोच्चा णिसम्म तहप्पगारं असणं वा (४) अफासुयं अणेसणिज्जं लाभे संते णो पडिगाहिज्जा ॥ ६१६ ॥ से भिक्खू वा (२) जाव समाणे वसमाणे वा गामाणुगामं दूइज्जमाणे से जं पुण जाणिज्जा, गामं वा जाव रायहाणिं वा, इमंसि खलु गामंसि वा जाव रायहाणिसि वा संतेगइयस्स भिक्खुस्स पुरे संथुया वा पच्छासंथुया वा परिवसंति, तंजहा-गाहावइ वा जाव कम्मकरी वा तहप्पगाराइं कुलाइं णो पुव्वामेव भत्ताए वा पाणाए वा णिक्खमेज्ज वा पविसेज्ज वा, केवली बूया, 'आयाणमेयं' । पुरा पेहाए तस्स परो अट्ठाए असणं वा (४) उवकरेज्ज वा, उवक्खडेज्ज वा, अह भिक्खूणं पुव्वोवदिट्ठा (४) जं णो तहप्पगाराइं कुलाइं पुव्वामेव भत्ताए वा पाणाए वा पविसेज्ज वा णिक्खमेज्ज वा । से तमायाय एगंतमवक्कमिज्जा अणावायमसंलोए चिट्ठेज्जा, से तत्थ कालेणं अणुपविसिज्जा (२) तत्थियरेयरेहिं कुलेहिं सामुदाणियं एसियं वेसियं पिंडवायं एसित्ता आहारं आहारिज्जा ॥ ६१७ ॥ सिया से परो कालेण अणुपविट्ठस्स आहाकम्मियं असणं वा (४) उवकरेज्ज वा उवक्खडेज्ज वा, तं चेगइओ त्सणीओ उवेहेज्जा, 'आहडमेव पच्चाइक्खिस्सामि' माइट्ठाणं संफासे, णो एवं करेज्जा, से पुव्वामेव आलोएज्जा 'आउसो त्ति वा भगिणि त्ति वा, णो खलु मे कप्पइ आहाकम्मियं असणं वा (४) भोत्तए वा पायए वा । मा उवकरेहि, मा उवक्खडेहि, से सेवं वयंतस्स परो आहाकम्मियं असणं वा (४) उवक्खडावित्ता आहडु दलएज्जा, तहप्पगारं असणं वा (४) अफासुयं लाभे संते णो पडिगाहिज्जा ॥ ६१८ ॥ से भिक्खू वा (२) जाव समाणे से जं पुण जाणिज्जा, असणं वा ४ आएसए उवक्खडिज्जमाणं पेहाए णो खदं २ उवसंकमित्तु ओभासेज्जा णत्तथ गिलाणणीसाए ॥ ६१९ ॥ से भिक्खू वा जाव समाणे अण्णतरं भोयणजायं पडिगाहित्ता सुब्भिं सुब्भिं भोच्चा दुब्भिं दुब्भिं परिट्ठवेइ, माइट्ठाणं संफासे, णो एवं करेज्जा, सुब्भिं वा दुब्भिं वा सव्वं भुंजे न छड्ढए ॥ ६२० ॥ से भिक्खू वा (२) जाव समाणे अण्णतरं वा पाणयजायं पडिगाहित्ता पुप्फं २ आसाइत्ता कसायं २ परिट्ठवेइ, माइट्ठाणं संफासे णो एवं करिज्जा, पुप्फं पुप्फेति वा कसायं कसाएत्ति वा सव्वमेयं भुंजिज्जा णो किंचिवि परिट्ठवेज्जा ॥ ६२१ ॥ से भिक्खू वा (२) बहुपरियावण्णं भोयणजायं पडिगाहित्ता बहवे साहम्मिया तत्थ वसंति संभोइया, समणुण्णा अपरिहारिया, अदूरगया तेसिं अणालोइया अणामंतिय परिट्ठवेइ, माइट्ठाणं संफासे णो एवं करेज्जा से तमादाय तत्थ गच्छेज्जा (२) से पुव्वामेव आलोएज्जा, "आउसंतो समणा इमे मे असणं वा (४) बहुपरियावण्णे, तं भुंजह च णं" से सेवं वयंतं परो वएज्जा "आउसंतो समणा आहारमेयं असणं वा

(४) जावइयं (२) परिसडइ तावइयं (२) भोक्खामो वा, पाहामो वा, सव्वमेयं परिसडइ, सव्वमेयं भोक्खामो वा” २ ॥ ६२२ ॥ से भिक्खू वा (२) से जं पुण जाणिज्जा, असणं वा, पाणं वा, खाइमं वा, साइमं वा, परं समुद्दिस्स बहिया णीहडं तं परेहिं असमणुजायं अणिसिट्ठं अफासुयं जाव णो पडिगाहिज्जा, तं परेहिं समणुजायं सणिसिट्ठं फासुयं लाभे संते जाव पडिगाहिज्जा ॥ ६२३ ॥ एस खलु तस्स भिक्खुस्स भिक्खुणीए वा सामग्गियं ॥ ६२४ ॥ **नवमोद्देशो समत्तो ॥**
 १ से एगइओ साहारणं वा पिंडवायं पडिगाहिज्जा, ते साहम्मिए अणापुच्छिता जस्स जस्स इच्छइ तस्स तस्स खद्धं खद्धं दलयइ, माइट्ठणं संफासे णो एवं करेज्जा, से तमायाए तत्थ गच्छेज्जा (२) पुव्वामेव आलोएज्जा “आउसंतो समणा, संति मम पुरे संथुया वा पच्छासंथुया वा, तंजहा-आयरिए वा, उवज्झाए वा, पवित्ती वा, थेरे वा, गणी वा, गणहरे वा, गणावच्छेइए वा, अवियाइं एएसिं खद्धं खद्धं दाहामि” से सेवं वयंतं परो वएज्जा, कामं खलु आउसो अहापज्जतं णिसिराहि जावइयं २ परो वयइ तावइयं २ णिसिरेज्जा, सव्वमेयं परो वयइ सव्वमेयं णिसिरेज्जा ॥ ६२५ ॥ से एगइओ मणुजं भोयणजायं पडिगाहिज्जा पंतेण भोयणेण पल्लिच्छाएति “मामेयं दाइयं संतं, दड्डुगं सयमायए, आयरिए वा जाव गणावच्छेइए वा, णो खलु मे कस्सवि किंचि दायव्वं सिया” माइट्ठणं संफासे णो एवं करेज्जा, से तमायाए तत्थ गच्छेज्जा, (२) पुव्वामेव उत्ताणए हत्थे पडिग्गहं कट्ठु “इमं खलु इमं खलु ति” आलोएज्जा, णो किंचिवि णिगूहेज्जा ॥ ६२६ ॥ से एगइओ अण्णतरं भोयणजायं पडिगाहिज्जा, भइयं भइयं भोच्चा, विवज्जं विरसमाहरइ, माइट्ठणं संफासे, णो एवं करेज्जा ॥ ६२७ ॥ से भिक्खू वा, (२) से जं पुण जाणिज्जा, अंतरुच्छियं वा, उच्छुगंडियं वा, उच्छुचोयगं वा, उच्छुमेरगं वा, उच्छुसालगं वा, उच्छुडालगं वा, सिंबलिं वा, सिंबलथालगं वा, अस्सिं खलु पडिग्गहियंसि अप्पे सिया भोयणजाए, बहुउज्झियधम्मिए, तहप्पगारं अंतरुच्छियं जाव सिंबली थालगं वा अफासुयं जाव णो पडिगाहिज्जा ॥ ६२८ ॥ से भिक्खू वा (२) से जं पुण जाणिज्जा, बहुवीयगं-बहुकंटगं-फलं अस्सिं खलु पडिगाहियंसि अप्पेसिया भोयणजाए बहुउज्झियधम्मिए-तहप्पगारं बहुवीयगं बहुकंटगं फलं लाभे संते जाव णो पडिगाहिज्जा ॥ ६२९ ॥ से भिक्खू वा (२) जाव समाणे, सिया णं परो बहुवीयएण, बहुकंटगेण फलेण उवणिमंतेज्जा “आउसंतो समणा अभिक्खसि! बहुवीयअं-बहुकंटगं फलं पडिगाहिज्जा?” एयप्पगारं णिग्घोसं सोच्चा णिसम्म से पुव्वामेव आलोएज्जा “आउसो ति वा भइणिति वा, णो खलु मे कप्पइ से बहुकंटयं बहु-

बीयअं फलं पडिगाहितए, अभिकखसि मे दाउं, जावइयं तावइयं फलस्स सार-
भागं दलयाहि, मा य बीयाइं “से सेवं वयंतस्स परो अभिहट्ठु अंतो पडिग्गह-
गंसि बहुबीयअं २ फलं परिभाएत्ता णिहट्ठु दलएज्जा, तहप्पगारं पडिग्गहगं
परहत्थंसि वा परपायंसि वा अफासुयं अणेसणिज्जं लामे संते णो पडिगाहिज्जा, से
आहच्च पडिगाहिए सिया तं णो हिं ति वएज्जा, णो अणहिंति वएज्जा, से तमायाए
एगंतमवक्कमेज्जा (२) अहे आरामंसि वा, अहे उवस्सयंसि वा, अप्पंडए जाव
अप्पसंताणए, फलस्स सारभागं भुच्चा बीयाइं कंटए गहाय से तमायाए
एगंतमवक्कमिज्जा, अहे ज्झामथंढिलंसि वा, जाव पमज्जिय २ परिट्ठविज्जा ॥ ६३० ॥
से भिक्खु वा (२) जाव समाणे सिया परो अभिहट्ठु अंतो पडिग्गहए बिलं वा
लोगं, उब्भियं वा लोगं, परिभाएत्ता णीहट्ठु दलएज्जा, तहप्पगारं पडिग्गहगं परह-
त्थंसि वा, परपायंसि वा अफासुयं जाव णो पडिगाहिज्जा से आहच्च पडिग्गाहिए
सिया तं च णाइदूरगए जाणिज्जा, से तमायाए तत्थ गच्छिज्जा (२) पुन्वामेव
आलोएज्जा “आउसो ति वा, भइणि ति वा, इमं ते किं जाणया दिन्नं उदाहु
अजाणया ? सो य भणेज्जा, णो खलु मे जाणया दिन्नं अजाणया दिन्नं, कामं खलु
आउसो इदाणि णिसिरामि तं भुंजह च णं परिभाएह च णं, तं परेहिं समणुज्जायं
समणुसिट्ठं तओ संजयामेव, भुंजेज्ज वा पीएज्ज वा, जं च णो संचाएत्ति भोत्तए वा
पायए वा साहम्मिया तत्थ वसंति संभोइया समणुज्जा अपरिहारिया अदूरगया
तेसिं अणुपयायव्वं, सिया णो जत्थ साहम्मिया जहेव बहुपरियावन्ने कीरति तहेव
कायव्वं सिया ॥ ६३१ ॥ एस खलु तस्स भिक्खुस्स भिक्खुणीए वा सामग्गियं
॥ ६३२ ॥ **दसमोइसो समत्तो ॥**

भिक्खागा णामेगे एवमाहंसु समाणे वा वसमाणे वा गामाणुगामं वा दूइज्जमाणे
मणुणं भोयणजायं लभित्ता “से य भिक्खु गिलाइं से हंदह णं तस्साहरह से य
भिक्खु णो भुंजिज्जा आहरिज्जा तुमं चेव णं भुंजिज्जासि” से एगइओ भोक्खामिति
कट्ठु पल्लिउंचिय २ आलोएज्जा, तंजहा-इमे पिंडे इमे लोए इमे तित्तए इमे कडुए
इमे कसाए इमे अंबिले इमे महुरे णो खलु एत्तो किंचि गिलाणस्स सयइत्ति
माइट्ठाणं संफासे, णो एवं करेज्जा, तहेव तं आलोएज्जा, जहेव तं गिलाणस्स
सयइत्ति, तंजहा-तित्थं तित्तएत्ति वा, कडुयं कडुएत्ति वा, कसायं कसाएत्ति वा,
अंबिलं अंबिलेत्ति वा, महुरं महुरेत्ति वा ॥ ६३३ ॥ भिक्खागा णामेगे एवमाहंसु,
समाणे वा वसमाणे वा, गामाणुगामं दूइज्जमाणे मणुणं भोयणजायं लभित्ता से
भिक्खु गिलाइ से हंदह णं तस्साहरह सेय भिक्खु णो भुंजिज्जा, आहरेज्जा, से णं

णो खलु मे अंतराए आहरिस्सामि इच्चेयाइं आयतणाइं उवाइक्कम्म ॥ ६३४ ॥ अह
 भिक्खू जाणिज्जा सत्त पिंडेसणाओ सत्त पाणेसणाओ तत्थ खलु इमा पढमा पिंडेसणा
 असंसट्ठे हत्थे असंसट्ठे मत्ते, तहप्पगारेण असंसट्ठेण हत्थेण वा मत्तेण वा, असणं
 वा पाणं वा खाइमं वा साइमं वा सयं वा णं जाएज्जा, परो वा से दिज्जा, फासुयं
 जाव पडिगाहिज्जा, इति पढमा पिंडेसणा ॥ ६३५ ॥ अहावरा दोच्चा
 पिंडेसणा, संसट्ठे हत्थे संसट्ठे मत्तए तहेव दोच्चा पिंडेसणा इति दोच्चा पिंडे-
 सणा ॥ ६३६ ॥ अहावरा तच्चा पिंडेसणा, इह खलु पाईणं वा ४ संतेगइया
 सद्धा भवंति गाहावइ वा जाव कम्मकरी वा, तेसिं च णं अण्णतरेसु विरुक्खुवेसु
 भायणजाएसु उवणिक्खित्तपुण्वे सिया तंजहा थालंसि वा, पिठरंसि वा सरगंसि वा,
 परगंसि वा, वरगंसि वा, अह पुण एवं जाणिज्जा, असंसट्ठे हत्थे संसट्ठे मत्ते, संसट्ठे
 हत्थे असंसट्ठे मत्ते से य पडिग्गहधारी सिया पाणिपडिग्गहिए वा, से पुव्वामेव
 आलोएज्जा “आउसोत्ति वा, भगिणि ति वा, एएणं तुमं असंसट्ठेण हत्थेण संसट्ठेण
 मत्तेण संसट्ठेण वा हत्थेण असंसट्ठेण मत्तेण अरंसि पडिग्गहगंसि वा पाणिंसि वा
 णिहट्ठ उच्चित्तु दलयाहि” तहप्पगारं भोयणजायं सयं वा णं जाएज्जा, परो वा से
 देज्जा, फासुयं जाव पडिगाहिज्जा, तच्चा पिंडेसणा ॥ ६३७ ॥ अहावरा चउत्था
 पिंडेसणा ॥ से भिक्खू वा, (२) से जं पुण जाणिज्जा, पिहुअं वा, जाव चाउ-
 लपलंबं वा, अरंसि खलु पडिग्गहियंसि अप्पे पच्छाक्कमे अप्पे पज्जवाए, तहप्प-
 गारं पिहुयं वा जाव चाउलपलंबं वा सयं वा जाएज्जा जाव पडिगाहिज्जा । इति
 चउत्था पिंडेसणा ॥ ६३८ ॥ अहावरा पंचमा पिंडेसणा से भिक्खू वा
 भिक्खुणी वा, जाव समाणे, उग्गहितमेव भोयणजायं जाणिज्जा, तंजहा-सरावंसि
 वा, डिडिमंसि वा, कोसगंसि वा, अह पुण एवं जाणिज्जा बहुपरियावन्ने पाणीसु
 उदगलेवे तहप्पगारं असणं वा (४) सयं वा णं जाएज्जा, जाव पडिगाहिज्जा ॥
 पंचमा पिंडेसणा ॥ ६३९ ॥ अहावरा छट्ठा पिंडेसणा, से भिक्खू वा (२)
 पग्गहियमेव भोयणजायं जाणिज्जा, जं च सयट्ठाए पग्गहियं जं च परट्ठाए पग्गहियं
 तं पायपरियावन्नं तं पाणिपरियावणं फासुयं जाव पडिगाहिज्जा, छट्ठा पिंडेसणा
 ॥ ६४० ॥ अहावरा सत्तमा पिंडेसणा, से भिक्खू वा (२) जाव समाणे बहु
 उज्झियधम्मियं भोयणजायं जाणिज्जा, जं चउत्ते बहवे दुपय-चउप्पय-समण-माहण-
 अतिहि-किवण-वणीमगा णावकंखंति तहप्पगारं उज्झियधम्मियं भोयणजायं सयं वा
 णं जाएज्जा परो वा से दिज्जा जाव फासुयं पडिगाहिज्जा ॥ सत्तमा पिंडेसणा ॥
 इच्चेयाओ सत्त पिंडेसणाओ ॥ ६४१ ॥ अहावराओ सत्त पाणेसणाओ, तत्थ
 ४ सुत्ता०

खलु इमा पढमा पाणेसणा, असंसट्ठे हत्थे २ तं चेव भाणियव्वं, णवरं चउत्थाए
 णाणत्तं, से भिक्खू वा (२) जाव समाणे से जं पुण पाणगजायं जाणिज्जा, तंजहा-
 तिखोदगं वा, तुसोदगं वा, जवोदगं वा, आयामं वा, सोवीरं वा, सुद्धवियडं वा,
 अस्सि खलु पडिग्गाहियंसि अप्पे पच्छाकम्मे, तहेव पडिग्गाहिज्जा ॥ ६४२ ॥
 इच्चेयासिं सत्तण्हं पिंडेसणाणं सत्तण्हं पाणेसणाणं अण्णतरं पडिमं पडिवज्जमाणे णो एवं
 वएज्जा “मिच्छापडिवज्जमाणे खलु एते भयंतारो अहमेगे सम्मं पडिवज्जे, जे एते भयं-
 तारो एयाओ पडिमाओ पडिवज्जित्ताणं विहरंति, जो य अहमंसि एयं पडिमं पडिव-
 ज्जित्ताणं विहरामि सव्वेऽवि ते उ जिणाणाए उवट्ठिया अन्नोन्नसमाहीए एवं च णं
 विहरंति ॥ ६४३ ॥ एयं खलु तस्स भिक्खुस्स भिक्खुणीए वा सामग्गियं ॥ ६४४ ॥
**पिंडेसणा णामज्झयणस्स एगारसमोद्देशो, विइयसुयक्खंधस्स पिंडे-
 सणा णामं पढमज्झयणं समत्तं ॥**

से भिक्खू वा (२) अभिकंखेज्जा, उवस्सयं एसित्तए, से अणुपविसे गामं वा
 जाव रायहाणि वा ॥ ६४५ ॥ से जं पुण उवस्सयं जाणिज्जा, सअंडं जाव ससं-
 ताणयं तहप्पगारे उवस्सए णो ठाणं वा सेज्जं वा निसीहियं वा चेतेज्जा ॥ ६४६ ॥
 से भिक्खू वा (२) से जं पुण उवस्सयं जाणिज्जा, अप्पंडं अप्पपाणं जाव अप्प-
 संताणयं तहप्पगारे उवस्सए पडिलेहिता पमज्जित्ता, तओ संजयामेव ठाणं वा सेज्जं
 वा निसीहियं वा चेतेज्जा ॥ ६४७ ॥ से जं पुण उवस्सयं जाणिज्जा अस्सिपडियाए
 एगं साहम्मियं समुद्दिस्स पाणाई भूयाई जीवाई सत्ताई समारब्भ समुद्दिस्स कीयं
 पामिच्चं अच्छज्जं अणिसट्ठं अभिहणं आहट्ठुं चेएति तहप्पगारे उवस्सए पुरिसंत-
 रगडे वा अपुरिसंतरगडे वा जाव अणासेविते वा णो ठाणं वा सेज्जं वा निसीहियं
 वा चेतेज्जा । एवं बहवे साहम्मिया एगा साहम्मिणी बहवे साहम्मिणीओ ॥ ६४८ ॥
 से भिक्खू वा (२) से जं पुण उवस्सयं जाणिज्जा असंजए भिक्खुपडियाए बहवे
 समणमाहणअतिहिक्खिवणणीमए पगणिय २ समुद्दिस्स पाणाई भूयाई जीवाई
 सत्ताई जाव चेएइ तहप्पगारे उवस्सए अपुरिसंतरगडे जाव अणासेविए णो ठाणं
 वा सेज्जं वा निसीहियं वा चेतेज्जा, अह पुण एवं जाणिज्जा पुरिसंतरगडे जाव आसे-
 विए पडिलेहिता पमज्जित्ता तओ संजयामेव ठाणं वा सेज्जं वा निसीहियं वा चेतेज्जा
 ॥ ६४९ ॥ से भिक्खू वा (२) से जं पुण उवस्सयं जाणिज्जा, असंजए भिक्खु-
 पडियाए कडिए वा, उक्कंभिए वा, छन्ने वा, लिप्ते वा, घट्ठे वा, मट्ठे वा, संमट्ठे वा,
 संपधूमिए वा, तहप्पगारे उवस्सए अपुरिसंतरगडे जाव अणासेविए, णो ठाणं वा,
 सेज्जं वा, निसीहियं वा, चेतेज्जा, अह पुण एवं जाणिज्जा पुरिसंतरगडे जाव आसे-

विए, पडिलेहिता पमजिता, तओ संजयामेव जाव चेतेजा ॥ ६५० ॥ से भिक्खु वा (२) से जं पुण उवस्सयं जाणिजा, असंजए भिक्खुपडियाए खुड्डियाओ दुवारियाओ महल्लिआओ कुज्जा, जहा पिडेसणाए जाव संथारगं संथारिजा, बहिया वा णिण्णक्खु तहप्पगारे उवस्सए अपुरिसंतरगडे जाव अणासेविते णो ठाणं वा, सेज्जं वा निसीहियं वा चेतेजा, अह पुण एवं जाणिजा पुरिसंतरगडे जाव आसेविए पडिलेहिता पमजिता तओ संजयामेव जाव चेतेजा ॥ ६५१ ॥ से भिक्खु वा (२) से जं पुण उवस्सयं जाणिजा, असंजए भिक्खुपडियाए उदगप्पस्याणि वा, कंदाणि वा, मूलाणि वा, पत्ताणि वा, पुप्फाणि वा, फलाणि वा, बीयाणि वा, हरियाणि वा, ठाणाओ ठाणं साहरति, बहिया वा णिण्णक्खु तहप्पगारे उवस्सए अपुरिसंतरगडे जाव णो ठाणं वा सेज्जं वा निसीहियं वा चेतेजा । अह पुण एवं जाणिजा, पुरिसंतरगडे जाव चेतेजा ॥ ६५२ ॥ से भिक्खु वा, भिक्खुणी वा, से जं पुण जाणिजा, असंजए भिक्खुपडियाए पीढं वा फलगं वा णिस्सेणिं वा उद्धलं वा ठाणाओ ठाणं साहरइ बहिया वा णिण्णक्खु, तहप्पगारे उवस्सए अपुरिसंतरगडे जाव णो ठाणं वा सेज्जं वा निसीहियं वा चेतेजा, अह पुण एवं जाणिजा पुरिसंतरगडे जाव चेतेजा ॥ ६५३ ॥ से भिक्खु वा (२) से जं पुण उवस्सयं जाणिजा, तंजहा खंभंसि वा मंचंसि वा मालंसि वा पासायंसि वा हम्मियतलंसि वा अन्नतरंसि वा तहप्पगारंसि अंतलिक्खजायंसि, णणत्थ आगाढाणागाढेहिं कारणेहिं, ठाणं वा सेज्जं वा निसीहियं वा णो चेतेजा ॥ ६५४ ॥ से आह्व चेति ते सिया णो तत्थ सीओदगवियडेण वा, उसिणोदगवियडेण वा, हत्थाणि वा, पादाणि वा, अच्छीणि वा, दंताणि वा, मुहं वा, उच्छोलेज्ज वा प्होएज्ज वा, णो तत्थ ऊसढं पगरेजा, तंजहा-उच्चारं वा, पासवणं वा, खेलं वा, सिंघाणं वा, वंतं वा, पित्तं वा, पूयं वा, सोणियं वा, अन्नयरं वा सरीरावयवं केवली बूया “आयाण मेयं” से तत्थ ऊसढं पगरेमाणे पयलेज्ज वा, पवडेज्ज वा, से तत्थ पयलेमाणे पवडेमाणे वा हत्थं वा, जाव सीसं वा अन्नतरं वा कायंसि इंदियजालं लूसेजा पाणाणि वा ४ अभिहणेज्ज वा जाव ववरोवेज्ज वा, अह भिक्खूणं पुब्बोवदिट्ठा एस पइन्ना जाव जं तहप्पगारे उवस्सए अंतलिक्खजाए णो ठाणं वा सेज्जं वा निसीहियं वा चेतेजा ॥ ६५५ ॥ से भिक्खु वा (२) से जं पुण उवस्सयं जाणिजा सइत्थियं सखुडं सपसुभत्तपाणं तहप्पगारे सागारिए उवस्सए णो ठाणं वा सेज्जं वा निसीहियं वा चेतेजा, आयाणमेयं भिक्खुस्स गाहावइकुलेण सद्धि संवसमानस्स अलसए वा, विसूइया वा छड्डी वा उव्वाहिजा अन्नतरे वा से दुक्खे रोगायंके समुप्पजेजा असं-

जए कल्लणपडियाए तं भिक्खुस्स गातं तेहेण वा, घएण वा, उव्वट्टणेण वा अब्भं-
गेज्ज मक्खिखज्ज वा, सिणाणेण वा, कक्केण वा, लोहेण वा, वण्णेण वा चुन्नेण वा,
पउमेण वा, आधंसेज्ज वा, पधंसेज्ज वा, उव्वलेज्ज वा, उव्वट्टेज्ज वा सीओदगविय-
डेण वा, उसिणोदगवियडेण वा, उच्छोलेज्ज वा, पच्छोलेज्ज वा, पहाएज्ज वा, सिणा-
विज्ज वा, सिंचिज्ज वा, दासणा वा दासपरिणामं कट्ठु, अगणिकायं उज्जालेज्ज वा,
पज्जालिज्ज वा, उज्जालित्ता २ कायं आयावेज्ज वा पयावेज्ज वा अह भिक्खूणं पुव्वो-
वदिट्ठा एस पइत्ता जं तहप्पगारे सागारिए उवस्सए णो ठाणं वा सेज्जं वा निसी-
हियं वा चेतेज्जा ॥ ६५६ ॥ आयाणमेयं भिक्खुस्स सागारिए उवस्सए वसमा-
णस्स इह खलु गाहावइ वा जाव कम्मकरी वा अन्नमन्नं अक्कोसंति वा, पवंति वा
रुंभंति वा उद्द्विंति वा अह भिक्खूणं उच्चावयं मणं णियंछेज्जा एते खलु अन्नमन्नं
उक्कोसंतु वा मा वा उक्कोसंतु जाव मा वा उद्द्विंतु । अह भिक्खूणं पुव्वोवदिट्ठा
एस पइत्ता जाव जं तहप्पगारे सागारिए उवस्सए णो ठाणं वा सेज्जं वा
निसीहियं वा चेतेज्जा ॥ ६५७ ॥ आयाणमेयं भिक्खुस्स गाहावइहिं सद्धिं
संवसमाणस्स इह खलु गाहावइ अप्पणो सअट्ठाए अगणिकायं उज्जालेज्ज वा, पज्जा-
लेज्ज वा विज्झावेज्ज वा, अह भिक्खू उच्चावयं मणं णियंछेज्जा, एते खलु अगणि-
कायं उज्जालेत्तु वा जाव मा वा विज्झावेत्तु अह भिक्खूणं पुव्वोवदिट्ठा जाव जं
तहप्पगारे उवस्सए नो ठाणं वा सेज्जं वा, निसीहियं वा चेतेज्जा ॥ ६५८ ॥ आया-
णमेयं भिक्खुस्स गाहावइहिं सद्धिं संवसमाणस्स इह खलु गाहावइस्स कुंडले वा,
गुणे वा, मणी वा, मोत्तिए वा, हिरण्णे वा, सुवण्णे वा, कडगाणि वा, तुडियाणि वा,
तिसरगाणि वा, पालंबाणि वा, हारे वा, अद्धहारे वा, एगावली वा, मुत्तावली वा,
कणगावली वा, रयणावली वा, तरुणियं वा कुमारिं अलंकियविभूसियं पेहाए,
अह भिक्खू उच्चावयं मणं, णियंछेज्जा, “एरिसिया वा सा णो वा एरिसिया” इति वा
णं बूया, इति वा णं मणं साएज्जा, अह भिक्खूणं पुव्वोवदिट्ठा ४ जाव जं तहप्पगारे
उवस्सए णो ठाणं वा जाव चेतेज्जा ॥ ६५९ ॥ आयाणमेयं भिक्खुस्स गाहाव-
इहिं सद्धिं संवसमाणस्स इह खलु गाहावइणीओ वा, गाहावइधूयाओ वा, गाहावइ-
सुण्हाओ वा, गाहावइधाईओ वा, गाहावइदासीओ वा, गाहावइकम्मकरीओ वा,
तासिं च णं एवं वुत्तपुव्वं भवइ, “जे इमे भवंति समणा भगवंतो जाव उवरया
मेहुणधम्माओ णो खलु एतेसिं कप्पइ मेहुणधम्मं परियारणाए आउट्ठित्तए, जा य
खलु एएहिं सद्धिं मेहुणधम्मं परियारणाए आउट्ठाविज्जा पुत्तं खलु सा लमेज्जा,
ओयस्सिं तेयस्सिं वच्चस्सिं जसस्सिं संपराइयं आलोयणदरिसिणिज्जं,” एयप्पगारं

णिसघोसं सोच्चा णिसम्म तासिं च णं अण्णयरी सद्धी तं तवस्सिं भिक्खुं मेहुण-
धम्मपरियारणाए आउट्टवेज्जा, अह भिक्खूणं पुव्वोवदिट्ठा जाव जं तहप्पगारे
सागारिए उवस्सए णो ठाणं वा सेज्जं वा णिसीहियं वा चेतेज्जा ॥ ६६० ॥ एयं
खलु तस्स भिक्खुस्स भिक्खुणीए वा सामग्गियं ॥ ६६१ ॥ **सेज्जाज्झयणस्स
पढमोद्देशो समत्तो ॥**

गाहावइ णामेगे सुइसमायारा भवन्ति से भिक्खू य असिणाणाए से तग्गंथे दुग्गंथे
पडिकूले पडिलोमे यावि भवइ, जं पुव्वकम्मं तं पच्छाकम्मं, जं पच्छाकम्मं तं
पुव्वकम्मं तं भिक्खुपडियाए वट्टमाणे करेज्जा वा नो करेज्जा वा अह भिक्खूणं
पुव्वोवदिट्ठा जाव जं तहप्पगारे उवस्सए णो ठाणं वा जाव चेतेज्जा ॥ ६६२ ॥
आयाणमेयं भिक्खुस्स गाहावइहिं सद्धिं संवसमाणस्स इह खलु गाहावइस्स
अप्पणो सअट्ठाए विरुवरुवे भोयणजाए उवक्खडिए सिया अह पच्छा भिक्खुपडियाए
असणं वा (४) उवक्खडेज्ज वा उवकरेज्ज वा तं च भिक्खू अभिक्खेज्जा भोत्तए वा
पायए वा वियट्ठितए वा अह भिक्खूणं पुव्वोवदिट्ठा जाव जं नो तहप्पगारे
उवस्सए ठाणं चेतेज्जा ॥ ६६३ ॥ आयाणमेयं भिक्खुस्स गाहावइणा सद्धिं संवस-
माणस्स इह खलु गाहावइस्स अप्पणो सयट्ठाए विरुवरुवाई दारुयाइं भिन्नपुव्वाई
भवन्ति, अह पच्छा भिक्खुपडियाए विरुवरुवाई दारुयाइं भिदेज्ज वा, किणेज्ज वा
पामिच्चेज्ज वा, दारुणा वा दारुपरिणामं कट्ठु अगणिकायं उज्जालेज्ज वा, पज्जालेज्ज वा,
तत्थ भिक्खू अभिक्खेज्ज वा आतावेत्तए वा, पयावेत्तए वा, वियट्ठितए वा,
अह भिक्खूणं पुव्वोवदिट्ठा जाव जं तहप्पगारे उवस्सए णो ठाणं चेतेज्जा
॥ ६६४ ॥ से भिक्खू वा (२) उच्चारपासवणेणं उव्वाहिज्जमाणे राओ वा विआले
वा, गाहावइकुलस्स दुवारवाहं अवंगुणेज्जा तेणे य तस्संधिचारी अणुपविसेज्जा,
तस्स भिक्खुस्स णो कप्पइ एवं वदित्तए “अयं तेणे पविसइ वा णो वा पविसइ,
उवळ्ळियइ वा णो वा उवळ्ळियइ, आवयति वा णो वा आवयति, वदति वा णो वा
वदति, तेण हडं अण्णेण हडं, तस्स हडं अण्णस्स हडं, अयं तेणे अयं उवयरए,
अयं हंता, अयं एत्थमकासी,” तं तवस्सिं भिक्खुं अतेणं तेणं ति संकइ, अह
भिक्खूणं पुव्वोवदिट्ठा जाव णो चेतेज्जा ॥ ६६५ ॥ से भिक्खू वा (२) से जं पुण
उवस्सयं जाणिज्जा तणपुंजेसु पलालपुंजेसु वा, सअंढे जाव ससंताणाए तहप्प-
गारे उवस्सए णो ठाणं वा सेज्जं वा णिसीहियं वा चेएज्जा ॥ ६६६ ॥ से भिक्खू
वा (२) से जं पुण उवस्सयं जाणिज्जा, तणपुंजेसु वा, पलालपुंजेसु वा अण्णं
जाव चेएज्जा ॥ ६६७ ॥ से आगंतारेसु वा, आरामागारेसु वा, गाहावइकुलेसु वा

परियावसहेसु वा अभिक्खणं अभिक्खणं साहम्मिएहिं ओवयमाणेहिं णो ओवएज्जा ॥ ६६८ ॥ से आगंतारेसु वा जाव परियावसहेसु वा, जे भयंतारो उडुबद्धियं वासा-
वासियं वा कप्पं उवातिणिता तत्थेव भुज्जो भुज्जो संवसंति, अयमाउसो कालाङ्कत-
किरिया भवइ ॥ ६६९ ॥ से आगंतारेसु वा जाव परियावसहेसु वा, जे भयंतारो
उडुबद्धियं वा, वासावासियं वा, कप्पं उवातिणाविता तं दुगुणा दुगुणेण अपरिहरिता
तत्थेव भुज्जो भुज्जो संवसंति, अयमाउसो इत्तरा उवट्ठाणकिरिया यावि भवइ ॥ ६७० ॥
इह खलु पाईणं वा पडीणं वा दाहिणं वा उदीणं वा संतेगइया सट्ठा भवंति
तंजहा गाहावइ वा जाव कम्मकरीओ वा तेसिं च णं आयारगोयरे णो सुणिसंते
भवइ तं सइहमाणेहिं, तं पत्तियमाणेहिं, तं रोयमाणेहिं बहवे समणमाहणअतिहि-
किवणवणीमए समुद्दिस्स तत्थ तत्थ अगारीहिं अगाराइं चेतिआइं भवंति, तंजहा-
आएसणाणि वा आयतणाणि वा देवकुलाणि वा सहाओ वा पवाणि वा पणिय-
गिहाणि वा पणियसालाओ वा जाणगिहाणि वा जाणसालाओ वा सुहाकम्मंताणि
वा दब्भकम्मंताणि वा बद्धकम्मंताणि वा, वक्कयकम्मंताणि वा, वणकम्मंताणि वा
इंगालकम्मंताणि वा कट्ठकम्मंताणि वा सुसाणकम्मंताणि वा संति कम्मंताणि वा
सुण्णागरकम्मंताणि वा गिरिकम्मंताणि वा कंदराकम्मंताणि वा सेलोवट्ठाणकम्मंताणि
वा भवणगिहाणि वा जे भयंतारो तहप्पगाराइं आएसणाणि वा जाव भवणगिहाणि
वा तेहिं ओवयमाणेहिं ओवयंति, अयमाउसो अभिक्कंतकिरिया या वि भवइ ॥ ६७१ ॥
इह खलु पाईणं वा पडीणं वा दाहिणं वा उदीणं वा संतेगइया सट्ठा भवंति जाव
तं रोयमाणेहिं बहवे समण जाव वणीमए समुद्दिस्स, तत्थ २ अगारीहिं अगाराइं
चेतिआइं भवंति, तंजहा-आएसणाणि वा जाव भवणगिहाणि वा जे भयंतारो
तहप्पगाराइं आएसणाणि वा जाव भवणगिहाणि वा तेहिं अणोवयमाणेहिं
ओवयंति अयमाउसो ! अणभिक्कंतकिरिया या वि भवति ॥ ६७२ ॥ इह खलु पाईणं वा
पडीणं वा दाहिणं वा उदीणं वा संतेगइया सट्ठा भवंति, तंजहा-गाहावइ वा जाव
कम्मकरी वा, तेसिं च णं एवं वुत्तपुव्वं भवइ, “जे इमे भवंति समणा भगवंतो
सीलमंता जाव उवरया सेहुणधम्माओ, णो खलु एसिं भयंताराणं कप्पइ
आहाकम्मिए उवस्सए वत्थए, से जाणि इमाणि अम्हं अप्पणो सअट्ठाए
चेतिताइं भवंति, तंजहा आएसणाणि वा, जाव भवणगिहाणि वा, सव्वाणि ताणि
समणाणं णिसिरामो अवियाइं वयं पच्छा अप्पणो सअट्ठाए चेतिस्सामो तंजहा-
आएसणाणि वा जाव भवणगिहाणि वा, एयप्पगारं णिग्घोसं सोच्चा णिसम्म जे
भयंतारो तहप्पगाराइं आएसणाणि वा जाव भवणगिहाणि वा उवागच्छंति उवा-

गच्छिता इयराइयरेहिं पाहुडेहिं वट्ठति अयमाउसो वज्जकिरिया या वि भवइ ॥ ६७३ ॥
 इह खलु पाईणं वा पडीणं वा दाहीणं वा उदीणं वा संतेगइया सद्धा भवन्ति तेसिं
 च णं आयारगोयरे णो सुणिस्संते भवइ, जाव तं रोयमाणेहिं बहवे समण जाव
 वणीमए पगणिय २ समुद्दिस्स तत्थ २ अगारीहिं अगाराइं चेतिताइं भवन्ति तंजहा-
 आएसणाणि वा जाव भवणगिहाणि वा जे भयंतारो तहप्पगाराइं आएसणाणि
 वा जाव भवणगिहाणि वा उवागच्छन्ति, इयराइयरेहिं पाहुडेहिं वट्ठति अयमाउसो
 महावज्जकिरिया या वि भवइ ॥ ६७४ ॥ इह खलु पाईणं वा पडीणं दाहीणं वा उदीणं
 वा संतेगइया सद्धा भवन्ति जाव तं रोयमाणेहिं बहवे समण० जाव समुद्दिस्स तत्थ
 तत्थ अगारीहिं अगाराइं चेतिताइं भवन्ति-तंजहा आएसणाणि वा जाव भवण-
 गिहाणि वा जे भयंतारो तहप्पगाराइं आएसणाणि वा जाव भवणगिहाणि वा
 उवागच्छन्ति इयराइयरेहिं पाहुडेहिं वट्ठति, अयमाउसो सावज्जकिरिया या वि भवइ
 ॥ ६७५ ॥ इह खलु पाईणं वा जाव उदीणं वा संतेगइया सद्धा भवन्ति तंजहा-
 गाहावइ वा जाव कम्मकरी वा तेसिं च णं आयारगोयरे णो सुणिस्संते भवइ जाव
 तं रोयमाणेहिं एक्कं समणजायं समुद्दिस्स तत्थ तत्थ अगारीहिं अगाराइं चेतिताइं
 भवन्ति, तंजहा आएसणाणि वा जाव भवणगिहाणि वा, महया पुढवीकायसमारंभेणं
 एवं महया आउ-तेउ-वाउ-वणस्सइ-तसकायसमारंभेणं महया संरंभेणं महया आरं-
 भेणं महया विरुवरुवेहिं पावकम्मेहिं तंजहा छायणओ, लेवणओ, संथारदुवारपिह-
 णओ, सीतोदए वा, परिठुवियपुव्वे भवइ, अगणिकाए वा उज्जालियपुव्वे भवइ, जे
 भयंतारो तहप्पगाराइं आएसणाणि वा जाव भवणगिहाणि वा उवागच्छन्ति इय-
 राइयरेहिं पाहुडेहिं वट्ठति दुपक्खं ते कम्मं सेवन्ति अयमाउसो महासावज्जकिरिया या
 वि भवइ ॥ ६७६ ॥ इह खलु पाईणं वा जाव तं रोयमाणेहिं अप्पणो सअट्ठाए
 तत्थ २ अगारीहिं जाव भवणगिहाणि वा, महया पुढवीकायसमारंभेणं जाव अग-
 णिकाए वा उज्जालियपुव्वे भवइ जे भयंतारो तहप्पगाराइं आएसणाणि वा जाव
 भवणगिहाणि वा उवागच्छन्ति इयराइयरेहिं पाहुडेहिं वट्ठति एगपक्खं ते कम्मं सेवन्ति
 अयमाउसो अप्पसावज्जा किरिया या वि भवइ ॥ ६७७ ॥ एस खलु तस्स भिक्खुस्स
 भिक्खुणीए वा सामगियं ॥ ६७८ ॥ **सेज्जाज्झयणस्स बीओदेसो समत्तो ॥**

“से य णो सुलभे फासए उंछे अहेसणिजे णो य खलु सुद्धे इमेहिं पाहुडेहिं,
 तंजहा-छायणओ, लेवणओ संथारदुवारपिहणओ पिंडवाएसणाओ से य भिक्ख
 चरियारए ठाणरए निसीहियारए सेज्जासंथारपिंडवाएसणारए” संति भिक्खुणो एव
 भक्खाइणो उज्जुया णियागपडिक्खा अमायं कुव्वमाणा वियाहिया ॥ ६७९ ॥ संते-

गइआ पाहुडिया उक्खित्तपुव्वा भवइ एवं णिक्खित्तपुव्वा भवइ परिभाइयपुव्वा भवइ परिभुत्तपुव्वा भवइ परिठवियपुव्वा भवइ एवं वियागरेमाणे समियाए वियागरेति ? हंता भवइ ॥ ६८० ॥ से भिक्खू वा (२) से जं पुण उवस्सयं जाणिज्जा खुड्डियाओ खुड्डुवारियाओ नीयाओ संनिरुद्धाओ भवन्ति, तहप्पगारे उवस्सए राओ वा विआले वा णिक्खममाणे वा पविसमाणे वा पुरा हत्थेण वा पच्छा पाएण वा तओ संजयामेव णिक्खमेज्ज वा पविसेज्ज वा, केवली बूया, 'आयाणमेयं' जे तत्थ समणण वा माहणण वा छत्तए वा मत्तए वा दंडए वा लट्ठिआ वा भिसिया वा नालिया वा चेले वा चिलिमिली वा चम्मए वा चम्मकोसए वा चम्मछेदणए वा दुब्बद्धे दुण्णिक्खित्ते अणिकंपे चलाचले भिक्खू य राओ वा वियाले वा णिक्खममाणे वा पविसमाणे वा पयलिज्ज वा पवडेज्ज वा, से तत्थ पयलेमाणे वा पवडेमाणे वा, हत्थं वा पायं वा जाव इंदियजायं वा ल्हेसज्ज वा, पाणाणि जाव सत्ताणि वा, अभिहेणज्ज वा जाव ववरोवेज्ज वा, अह भिक्खूणं पुव्वोवदिट्ठा जाव जं तहप्पगारे उवस्सए पुरा हत्थेणं पच्छा पाएणं तओ संजयामेव णिक्खमेज्ज वा पविसेज्ज वा ॥ ६८१ ॥ से आगंतारेसु वा अणुवीइ उवस्सयं जाएज्जा, जे तत्थ ईसरे जे तत्थ समहिट्ठाए, ते उवस्सयं अणुण्णवेज्जा, कामं खलु आउसो अहालंदं अहापरिण्णातं वसिस्सामो जाव आउसंतो जाव आउसंतस्स उवस्सए जाव साहम्मियाए तओ उवस्सयं णिण्हिस्सामो तेण परं विहरिस्सामो ॥ ६८२ ॥ से भिक्खू वा (२) जस्सुवस्सए संवसिज्जा तस्स णामगोयं पुव्वामेव जाणिज्जा तओ पच्छा तस्स गिहे णिमंतेमाणस्स अणिमंतेमाणस्स वा असणं वा (४) अफासुयं जाव णो पडिग्गाहिज्जा ॥ ६८३ ॥ से भिक्खू वा (२) से जं पुण उवस्सयं जाणिज्जा ससागारियं सागणियं सउदयं णो पण्णस्स निक्खमणपवेसणाए, णो पण्णस्स वायण जाव चिंताए, तहप्पगारे उवस्सए णो ठाणं वा सेज्जं वा निसीहियं वा चेतेज्जा ॥ ६८४ ॥ से भिक्खू वा (२) से जं पुण उवस्सयं जाणिज्जा गाहावइकुलस्स मज्झं मज्झेणं गंतुं पंथए पएपएपडिबद्धं णो पण्णस्स निक्खमण जाव चिंताए तहप्पगारे उवस्सए णो ठाणं वा सेज्जं वा णिसीहियं वा चेतेज्जा ॥ ६८५ ॥ से भिक्खू वा (२) से जं पुण उवस्सयं जाणिज्जा इह खलु गाहावइ वा जाव कम्मकरीओ वा अण्णमण्णमक्कोसंति वा जाव उइवेति वा णो पण्णस्स जाव चिंताए सेवं णच्चा तहप्पगारे उवस्सए णो ठाणं वा जाव चेतेज्जा ॥ ६८६ ॥ से भिक्खू वा (२) से जं पुण उवस्सयं जाणिज्जा इह खलु गाहावइ वा जाव कम्मकरीओ वा अण्णमण्णस्स गायं तेळेण वा घएण वा अब्भंगेति वा

मक्खंति वा णो पण्णस्स जाव चिंताए, तहप्पगारे उवस्सए णो ठाणं वा जाव
चेतेज्जा ॥ ६८७ ॥ से भिक्खू वा (२) से जं पुण उवस्सयं जाणिज्जा, इह खलु
गाहावइ वा जाव कम्मकरीओ वा, अण्णमण्णस्स गायं सिणाणेण वा कक्केण वा
लोहेण वा वण्णेण वा चुण्णेण वा पउमेण वा, आधंसंति वा पधंसंति वा उव्वलंति
वा उव्वह्मिंति वा णो पण्णस्स णिक्खमण जाव चिंताए तहप्पगारे **उवस्सए** णो
ठाणं वा जाव चेतेज्जा ॥ ६८८ ॥ से भिक्खू वा (२) से जं पुण उवस्सयं
जाणिज्जा इह खलु गाहावइ वा जाव कम्मकरीओ वा अण्णमण्णस्स गायं सीओद-
गवियडेण वा उसिणोद्गवियडेण वा, उच्छोलंति वा पधोवेंति वा सिंचंति वा
सिणावेंति वा णो पण्णस्स जाव णो ठाणं वा जाव चेतेज्जा ॥ ६८९ ॥ से भिक्खू
वा (२) से जं पुण **उवस्सयं** जाणिज्जा, इह खलु गाहावइ वा जाव कम्मकरीओ
वा णिणिणा ठिआ णिणिणा उल्लीणा मेहुणधम्मं विण्णवेंति रहस्सियं वा मंतं मंतेंति
णो पण्णस्स जाव णो ठाणं वा जाव चेतेज्जा ॥ ६९० ॥ से भिक्खू वा (२) से
जं पुण **उवस्सयं** जाणिज्जा आइण्णसंलिक्खं णो पण्णस्स जाव चिंताए जाव णो
ठाणं वा सेज्जं वा निसीहियं वा चेतेज्जा ॥ ६९१ ॥ से भिक्खू वा (२) अभिक्क-
खेज्जा संधारं एसित्तए ॥ ६९२ ॥ से जं पुण संधारयं जाणिज्जा सअंडं जाव ससं-
ताणगं तहप्पगारं संधारगं लाभे संते णो पडिगाहिज्जा ॥ ६९३ ॥ से भिक्खू वा
(२) से जं पुण संधारयं जाणिज्जा अप्पंडं जाव संताणगं गळ्ळयं तहप्पगारं लाभे
संते णो पडिगाहिज्जा ॥ ६९४ ॥ से भिक्खू वा (२) से जं पुण संधारगं
जाणिज्जा, अप्पंडं जाव संताणगं लहुयं अपाडिहारियं तहप्पगारं सेज्जा संधारयं
लाभे संते णो पडिगाहिज्जा ॥ ६९५ ॥ से भिक्खू वा (२) से जं पुण संधारगं
जाणिज्जा, अप्पंडं जाव संताणगं लहुयं पाडिहारियं णो अहाबद्धं तहप्पगारं लाभे
संते णो पडिगाहिज्जा ॥ ६९६ ॥ से भिक्खू वा (२) से जं पुण संधारयं
जाणिज्जा अप्पंडं जाव संताणगं लहुयं पाडिहारियं अहाबद्धं तहप्पगारं संधारयं
जाव लाभे संते पडिगाहिज्जा ॥ ६९७ ॥ इच्चेयाइं आयतणाइं उवाइक्कम्म अह
भिक्खू जाणिज्जा इमाहिं चउहिं पडिमाहिं संधारगं एसित्तए तत्थ खलु इमा पढमा
पडिमा;—से भिक्खू वा (२) उद्दिसिय उद्दिसिय संधारगं जाएज्जा, तंजहा—इक्कंडं
वा कढिणं वा जंतुयं वा परगं वा मोरगं वा तणं वा सोरगं वा कुसं वा कुच्चगं वा
पव्वगं वा पिप्पलगं वा पलालगं वा से पुव्वामेव आलोएज्जा आउसो ति वा
अणिणी ति वा दाहिसि मे एत्तो अण्णयरं संधारगं ? तहप्पगारं सयं वा णं जाएज्जा
परो वा से देज्जा फासुयं एसणिज्जं लाभे संते पडिगाहिज्जा **पढमा पडिमा**

॥ ६९८ ॥ अहावरा दोच्चा पडिमा, से भिक्खू वा (२) पेहाए संथारगं जाएज्जा तंजहा-गाहावई वा जाव कम्मकरिं वा पुच्चामेव आलोएज्जा आउसो ति वा भगिणि ति वा दाहिसि मे एतो अण्णयरं संथारगं ?” तहप्पगारं संथारगं सयं वा णं जाएज्जा परो वा से देज्जा फासुयं एसणिजं जाव पडिगाहिज्जा दोच्चा पडिमा ॥ ६९९ ॥ अहावरा तच्चा पडिमा, से भिक्खू वा (२) जस्सुव-स्सए संवसेज्जा जे तत्थ अहासमण्णागए तंजहा-इक्कडेइ वा जाव पलालेइवा तस्स लामे संवसेज्जा तस्स अलामे उकुडुए वा निसजिए वा विहरेज्जा तच्चा पडिमा ॥ ७०० ॥ अहावरा चउत्था पडिमा, से भिक्खू वा (२) अहा संथडमेव संथारगं जाइज्जा तंजहा-पुढविसिलं कट्टसिलं वा, अहा संथडमेव तस्स लामे संते संवसेज्जा, अलामे उकुडुए वा निसजिए वा विहरेज्जा, चउत्था पडिमा, ॥ ७०१ ॥ इच्चेयाणं चउण्हं पडिमाणं अण्णयरं पडिमं पडिवज्जमाणे तं चेव जाव अन्नोन्नसमा-हीए एवं चणं विहरंति ॥ ७०२ ॥ से भिक्खू वा (२) अभिकंखेज्जा संथारं पच्च-प्पिणित्तए से जं पुण संथारगं जाणिज्जा सअंडं जाव संताणगं तहप्पगारं संथारगं णो पच्चप्पिणिज्जा ॥ ७०३ ॥ से भिक्खू वा (२) अभिकंखेज्जा संथारगं पच्चप्पि-णित्तए, से जं पुण संथारगं जाणिज्जा अप्पंडं जाव संताणगं तहप्पगारं संथारगं पडिलेहिय २ पमज्जिय २ आयाविय २ विधूणिय २ तओ संजयामेव पच्चप्पिणेज्जा ॥ ७०४ ॥ से भिक्खू वा (२) समाणे वा वसमाणे वा गामाणुगामं दूइज्जमाणे पुव्वामेव णं पण्णस्स उच्चारपासवणभूमिं पडिलेहिज्जा केवली बूया ‘आयाणमेयं’ अपडिलेहियाए उच्चारपासवणभूमिं भिक्खू वा भिक्खुणी वा राओ वा वियाले वा उच्चारपासवणं परिठुवेमाणे, पयलेज्ज वा पवडेज्ज वा से तत्थ पयलेमाणे पवडमाणे वा हत्थं वा पायं वा जाव लूसिज्जा पांणाणि वा ४ जाव ववरोवेज्जा, अह भिक्खूणं पुव्वोवदिट्ठा जाव जं पुव्वामेव पण्णस्स उच्चारपासवणभूमिं पडिलेहेज्जा ॥ ७०५ ॥ से भिक्खू वा (२) अभिकंखेज्जा सेज्जासंथारगभूमिं पडिलेहित्तए णणत्थ आय-रिएण वा उवज्जाएण वा जाव गणावच्छेएण वा बालेण वा बुद्धेण वा सेहेण वा गिलाणेण वा आएसेण वा अंतेण वा मज्झेण वा समेण वा विसमेण वा पवाएण वा णिवाएण वा तओ संजयामेव पडिलेहिय २ पमज्जिय २ तओ संजयामेव बहु-फासुयं सिज्जासंथारगं संथरिज्जा ॥ ७०६ ॥ से भिक्खू वा (२) बहुफासुयं सेज्जा-संथारगं संथरित्ता अभिकंखेज्जा, बहुफासुए सेज्जासंथारए दुरुहित्तए ॥ ७०७ ॥ से भिक्खू वा (२) बहुफासुए सेज्जासंथारए दुरुहमाणे से पुव्वामेव ससीसोवरियं कायं पाए य पमज्जिय २ तओ संजयामेव बहुफासुए सिज्जासंथारगे दुरुहिता तओ संज-

यामेव बहुफासुए सेज्जासंथारए सएज्जा ॥ ७०८ ॥ से भिक्खू वा (२) बहुफासुए सेज्जा संथारए सयमाणे णो अण्णमण्णस्स हत्थेण हत्थं पाएण पायं काएण कायं, आसाएज्जा, से अणासायमाणे तओ संजयामेव बहुफासुए सेज्जासंथारए सएज्जा ॥ ७०९ ॥ से भिक्खू वा (२) उस्सासमाणे वा णीसासमाणे वा कासमाणे वा छीयमाणे वा जंभायमाणे वा उड्डुए वा वायणिसग्गे वा करेमाणे पुव्वामेव आसयं वा पोसयं वा पाणिणा परिपिहिता तओ संजयामेव ऊससेज्ज वा जाव वायणिसग्गं वा करेज्जा, ॥ ७१० ॥ से भिक्खू वा (२) समावेगया सेज्जा भवेज्जा, विसमा वेगया सेज्जा भवेज्जा, पवाता वेगया सेज्जा भवेज्जा, णिवाता वेगया सेज्जा भवेज्जा, ससरक्खा वेगया सेज्जा भवेज्जा, अप्पससरक्खा वेगया सेज्जा भवेज्जा, सद्दंसमसगा वेगया सेज्जा भवेज्जा, अप्पदंसमसगा वेगया सेज्जा भवेज्जा, सपरिसाडा वेगया सेज्जा भवेज्जा, अपरिसाडा वेगया सेज्जा भवेज्जा, सउवसग्गा वेगया सेज्जा भवेज्जा, णिरुवसग्गा वेगया सेज्जा भवेज्जा, तहप्पगाराहिं सेज्जाहिं संविज्जमाणाहिं पग्गहिततरागं विहारं विहरेज्जा, णो किंचिवि गिलाएज्जा ॥ ७११ ॥ एस खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिए सया जएज्जासि त्ति वेमि ॥ ७१२ ॥ **सेज्जाज्झयणस्स तइओदेसो समत्तो ॥**

॥ सेज्जाणामविइयमज्झयणं समत्तं ॥

“अब्भुवगए खलु वासावासे अभिपवुठ्ठे बहवे पाणा अभिसंभूया, बहवे बीया-अहुणुब्भिन्ना, अंतरा से मग्गा, बहुपाणा बहुबीया, जाव संताणगा, अणभिकंता पंथा णो विण्णाया मग्गा” सेवं णच्चा णो गामाणुगामं दूइजेज्जा, तओ संजयामेव वासावासं उवळ्ळिएज्जा ॥ ७१३ ॥ से भिक्खू वा (२) से जं पुण जाणिज्जा गामं वा जाव रायहाणि वा, इमंसि खलु गामंसि रायहाणिसि वा णो महती विहारभूमी णो महती विचारभूमी, णो सुलभे पीढफलगसेज्जासंथारए णो सुलभे फासुए उच्छे अहेसणिजे बहवे जत्थ समणमाहुणअतिहिकिवणवणीमगा उवागया उवागामिस्संति य अच्चाइण्णा वित्ती णो पण्णस्स निक्खमणपवेसाए जाव धम्माणुओगचिताए सेवं णच्चा तहप्पगारं गामं वा णगरं वा जाव रायहाणि वा णो वासावासं उवळ्ळिएज्जा ॥ ७१४ ॥ से भिक्खू वा (२) से जं पुण जाणिज्जा गामं वा जाव रायहाणि वा, इमंसि खलु गामंसि वा रायहाणिसि वा महती विहारभूमी महती विचारभूमी सुलभे जत्थ पीढफलगसेज्जासंथारए सुलभे फासुए उच्छे अहेसणिजे णो जत्थ बहवे समण

जाव उवागया उवागमिस्संति य अप्पाइण्णा वित्ती जाव रायहारिणिसि वा तओ संज-
 यामेव वासावासं उवळ्ळिएज्जा ॥ ७१५ ॥ अह पुण एवं जाणिज्जा चत्तारि मासा
 वासावासाणं वीइक्कंता हेमंताण य पंचदसरायकप्पे परिवुसिए अंतरा से मग्गा
 बहुपाणा जाव संताणगा णो जत्थ बहवे समण जाव उवागया उवागमिस्संति य
 सेवं णच्चा णो गामाणुगामं दूइज्जेज्जा ॥ ७१६ ॥ अह पुण एवं जाणिज्जा चत्तारि मासा
 वासा वासाणं वीइक्कंता हेमंताण य पंच दस रायकप्पे परिवुसिए, अंतरा से मग्गा
 अप्पंडा जाव असंताणगा बहवे जत्थ समण जाव उवागमिस्संति य सेवं णच्चा तओ
 संजयामेव गामाणुगामं दूइज्जेज्जा ॥ ७१७ ॥ से भिक्खू वा (२) गामाणुगामं
 दूइज्जमाणे पुरओ जुगमायं पेहमाणे दट्ठूण तसे पाणे उद्धट्ठु पायं रीएज्जा साहट्ठु
 पायं रीएज्जा उक्खिप्पपायं रीएज्जा तिरिच्छं वा कट्ठु पायं रीएज्जा सति परक्कमे संज-
 तामेव परिक्कमेज्जा णो उज्जुयं गच्छेज्जा, तओ संजयामेव गामाणुगामं दूइज्जेज्जा
 ॥ ७१८ ॥ से भिक्खू वा (२) गामाणुगामं दूइज्जमाणे अंतरा से पाणाणि वा
 वीयाणि वा हरियाणि वा उदए वा मट्ठिया वा अविद्धत्थे सह परक्कमे जाव णो उज्जुयं
 गच्छेज्जा, तओ संजयामेव गामाणुगामं दूइज्जेज्जा ॥ ७१९ ॥ से भिक्खू वा (२)
 गामाणुगामं दूइज्जमाणे अंतरा से विरुवरूवाणि पंचंतिकाणि दस्सुगायतणाणि मिल-
 क्खणि अणायरियाणि दुस्सन्नप्पाणि दुप्पणवणिजाणि अकालपडिबोहीणि अकाल-
 परिभोइणि सति लाढे विहाराए संथरमाणेहिं जाणवएहिं णो विहारवत्तियाए पव-
 ज्जेज्जा गमणाए केवली बूया 'आयाणमेयं' ते णं बाला "अयं तेणे अयं उवचरए
 अयं तओ आगए" ति कट्ठु तं भिक्खुं अक्कोसेज्ज वा जाव उद्वेज्ज वा वत्थं पडि-
 ग्गहं कंबलं पायपुंछणं अच्छिदेज्ज वा अभिदेज्ज वा अवहरिज्ज वा, परिट्ठविज्ज वा,
 अह भिक्खूणं पुव्वोवदिट्ठा पइण्णा जाव जं णो तहप्पगाराणि विरुवरूवाणि पंचंति-
 याणि दस्सुगायतणाणि जाव विहारवत्तियाए णो पवज्जेज्जा गमणाए, तओ संजयामेव
 गामाणुगामं दूइज्जेज्जा ॥ ७२० ॥ से भिक्खू वा (२) गामाणुगामं दूइज्जमाणे
 अंतरा से अरायाणि वा, गणरायाणि वा, जुवरायाणि वा, दोरजाणि वा, वेरजाणि
 वा, विरुद्धरजाणि वा, सह लाढे विहाराए संथरमाणेहिं जणवएहिं णो विहारवत्तियाए
 पवज्जेज्जगमणाए, केवली बूया 'आयाणमेयं' ते णं बाला "अयं तेणे" तं चैव जाव
 णो विहारवत्तियाए पवज्जेज्ज गमणाए तओ संजयामेव गामाणुगामं दूइज्जेज्जा ॥ ७२१ ॥
 से भिक्खू वा (२) गामाणुगामं दूइज्जमाणे अंतरा से विहं सिया से जं पुण विहं
 जाणिज्जा, एगाहेण वा, दुयाहेण वा, तियाहेण वा, चउयाहेण वा, पंचाहेण वा,
 पाउणिज्ज वा, नो पाउणिज्ज वा, तहप्पगारं विहं अणेगाहगमणिज्जं सति लाढे जाव

णो विहारवत्तिआए पवज्जेज गमणाए, केवली बूया 'आयाणमेयं' अंतरा से वासे
 सिया, पाणेषु वा, पणएसु वा, बीएसु वा, हरिएसु वा, उदएसु वा, मट्ठियाए वा,
 अविट्ठयाए, अह भिक्खूणं पुव्वोवदिट्ठा जाव जं तहप्पगारं अणेगाहगमणिजं जाव
 णो गमणाए, तओ संजयामेव गामाणुगामं दूइज्जेजा गमणाए ॥ ७२२ ॥ से भिक्खू
 वा (२) गामाणुगामं दूइज्जमाणे अंतरा से णावा संतारिमे उदए सिया, से जं
 पुण णावं जाणिजा, असंजए भिक्खुपडियाए किणेज्ज वा, पामिच्चेज्ज वा, णावाए
 वा णावं परिणामं कट्ठ, थलाओ वा णावं जलंसि ओगाहेज्जा, जलाओ वा णावं
 थलंसि उक्कसेज्जा, पुण्णं वा णावं उस्सिच्चेज्जा, सण्णं वा णावं उप्पीलावेज्जा, तह-
 प्पगारं णावं उड्डुगामिणिं वा, अहेगामिणिं वा, तिरियगामिणिं वा, परं जोयणमेराए
 अद्धजोयणमेराए अप्पतरो वा, भुज्जतरो वा, णो दुरुहेज्ज गमणाए ॥ ७२३ ॥ से
 भिक्खू वा (२) पुव्वामेव तिरिच्छसंपातिमं णावं जाणिजा जाणित्ता से तमायाए
 एगंतमवक्कमिजा, भंडगं पडिलेहिजा, पडिलेहिता एगओ भोयणभंडगं करेज्जा २
 ससीसोवरियं कायं पाए य पमज्जेज्जा पमज्जित्ता सागारियभत्तं पच्चक्खाएज्जा पच्च-
 क्खाइत्ता एगं पायं जले किच्चा एगं पायं थले किच्चा तओ संजयामेव णावं दुरुहेज्जा
 ॥ ७२४ ॥ से भिक्खू वा (२) णावं दुरुहमाणे णो णावाए पुरओ दुरुहेज्जा, णो
 णावाए अग्गओ दुरुहेज्जा, णो णावाए मज्झतो दुरुहेज्जा, णो बाहाओ पगिज्झिय पगि-
 जिझय अंगुलिए उवदंसिय २ ओणमिय २ उण्णमिय २ णिज्झाएज्जा ॥ ७२५ ॥ से णं
 परो णावागतो णावागयं वएज्जा "आउसंतो समणा ! एयं ता तुमं णावं उक्कसाहि
 वा वोक्कसाहि वा खिवाहि वा रज्जूए वा गहाय आकसाहि" णो से तं परिणं परि-
 जाणेज्जा तुसिणीओ उवेहेज्जा ॥ ७२६ ॥ से णं परो णावागओ णावागयं वएज्जा
 "आउसंतो समणा णो संचाएसि णावं उक्कसित्तए वा वोक्कसित्तए वा खिवित्तए वा
 रज्जुयाए वा गहाय आकसित्तए आहर एतं णावाए रज्जुयं सयं चेव णं वयं णावं
 उक्कसिस्सामो वा जाव रज्जूए वा गहाय आकसिस्सामो" णो से तं परिणं परिजा-
 नेज्जा तुसिणीओ उवेहेज्जा ॥ ७२७ ॥ से णं परो णावागओ णावागयं वएज्जा
 आउसंतो समणा एयं ता तुमं णावं आलित्तेण वा, पीढेण वा वंसेण वा वलएण वा
 अवलएण वा बाहेहि णो से तं परिणं परिजाणिजा तुसिणीओ उवेहेज्जा ॥ ७२८ ॥
 से णं परो णावागओ णावागयं वदेज्जा "आउसंतो समणा एयं ता तुमं णावाए
 उदयं हत्थेण वा पाएण वा मत्तेण वा पडिग्गहेण वा णावा उस्सिच्चणेण वा उस्सि-
 चाहि" णो से तं परिणं परिजाणिजा तुसिणीओ उवेहेज्जा ॥ ७२९ ॥ से णं परो
 णावागओ णावागयं वएज्जा, आउसंतो समणा एतं तो तुमं णावाए उत्तिगं हत्थेण

वा पाएण वा बाहुणा वा उरुणा वा उदरेण वा सीसेण वा काएण वा नावा उस्सि-
चणेण चेलेण वा मट्टियाए वा कुसपत्तएण वा कुरुविदेण वा पिहेहि” णो से तं
परिणं परिजाणिज्जा ॥ ७३० ॥ से भिक्खु वा (२) नावाए उत्तिगेण उदयं आस-
वमाणं पेहाए उवस्वरिं णावं कज्जलावेमाणिं पेहाए णो परं उवसंकमिन्तु एवं बूया,
“आउसंतो गाहावइ एयं ते नावाए उदयं उत्तिगेण आसवति, उवस्वरिं वा नावा
कज्जलावेति” एतप्पगारं मणं वा वायं वा णो पुरओ कट्ठु विहरेज्जा, अप्पुस्सुए
अवहिद्धेस्से एगंतगएणं अप्पाणं विउसेज्ज समाहीए, तओ संजयामेव नावासंतारिमे
उदए अहारियं रीएज्जा ॥ ७३१ ॥ एयं खलु तस्स भिक्खुस्स भिक्खुणीए वा
सामग्गियं जं सव्वट्ठेहिं सहिए सदा जएज्जासि ति वेमि ॥ ७३२ ॥ **इरिया-
ज्जयणे पढमोद्देसो समत्तो ॥**

से णं परो नावागओ नावागयं वदेज्जा, “आउसंतो समणा एयं ता तुमं छत्तगं
वा जाव चम्मछेयणगं वा गिण्हाहि, एयाणि तुमं विरुवरूपाणि सत्थजायाणि
धारेहि, एयं ता तुमं दारगं वा, पजेहि” णो से तं परिणं परिजाणिज्जा, तुसिणीओ
उवेहेज्जा ॥ ७३३ ॥ से णं परो नावागए नावागयं वदेज्जा एसणं समणे नावाए
भंडभारिए भवइ से णं बाहाए गहाय नावाओ उदगंसि पक्खिववह” एतप्पगारं
णिग्घोसं सोच्चा णिसम्म से य चीवरधारी सिया खिप्पामेव चीवराणि उव्वेड्ढिज्ज वा
णिव्वेड्ढिज्ज वा उप्फेसं वा करिज्जा ॥ ७३४ ॥ अह पुण एवं जाणिज्जा अभिक्कंत-
कूरकम्मा खलु बाला बाहाहिं गहाय नावाओ उदगंसि पक्खिविज्जा से पुव्वामेव
वएज्जा ‘आउसंतो! गाहावइ! मा मेत्तो बाहाए गहाय नावाओ उदगंसि पक्खिववह
सयं चेव णं अहं नावातो उदगंसि ओगाहिस्सामि,’ से णेवं वयंतं परो सहसा बलसा
बाहाहिं गहाय उदगंसि पक्खिविज्जा तं णो सुमणे सिया णो दुम्मणे सिया णो उच्चा-
वयं मणं णियंछिज्जा, णो तेसिं बालाणं धातए वहाए समुट्ठिज्जा, अप्पुस्सुए जाव
समाहिए तओ संजयामेव उदगंसि पविज्जा ॥ ७३५ ॥ से भिक्खु वा (२) उद-
गंसि पवमाणे णो हत्थेण हत्थं पाएण पायं काएण कायं आसाएज्जा, से अणासाय-
णाए अणासायमाणे तओ संजयामेव उदगंसि पविज्जा ॥ ७३६ ॥ से भिक्खु वा
(२) उदगंसि पवमाणे णो उम्मुग्गणिम्मुग्गियं करिज्जा, मामेयं उदगं कण्णेसु वा
अच्छीसु वा णक्कंसि वा मुहंसि वा परियावज्जिज्जा, तओ संजयामेव उदगंसि पविज्जा
॥ ७३७ ॥ से भिक्खु वा (२) उदगंसि पवमाणे दोब्बलियं पाउणिज्जा खिप्पामेव
उवहिं विगिंचिज्ज वा विसोहिज्ज वा, णो चेव णं सातिज्जिज्जा अह पुण एवं जाणिज्जा
पारए सिया उदगाओ तीरं पाउणित्तए तओ संजयामेव उदउल्लेण वा ससिणिद्धेण

वा काएण उदगतीरे चिट्ठिज्जा ॥ ७३८ ॥ से भिक्खू वा (२) उदउल्लं वा ससि-
 णिद्धं वा कार्यं णो आमज्जिज्ज वा पमज्जिज्ज वा संलिहिज्ज वा णिल्लिहिज्ज वा उव्व-
 लिज्ज वा उव्वट्ठिज्ज वा, आयाविज्ज पयाविज्ज वा, अह पु० विगओदओ मे काए
 छिन्नसिणेहे काए त० आ० पयाविज्ज वा० तओ संजयामेव गामाणुगामं दूइजेज्जा
 ॥ ७३९ ॥ से भिक्खू वा (२) गामाणुगामं दूइज्जमाणे णो परेहिं सद्धिं परिज-
 विय परिजविय गामाणुगामं दूइज्जिज्जा, तओ संजयामेव गामाणुगामं दूइज्जिज्जा
 ॥ ७४० ॥ से भिक्खू वा (२) गामाणुगामं दूइज्जमाणे अंतरा से जंघासंतारिमे
 उदए सिया से पुव्वामेव ससीसोवरियं कार्यं पादे य पमज्जेज्जा से पुव्वामेव पम-
 ज्जित्ता एणं पायं जले किच्चा एणं पायं थले किच्चा तओ संजयामेव जंघासंतारिमे
 उदए अहारियं रीएज्जा ॥ ७४१ ॥ से भिक्खू वा (२) जंघासंतारिमे उदगे अहा-
 रियं रीयमाणे णो हत्थेण वा हत्थं पाएण वा पायं काएण वा कार्यं आसाएज्जा, से
 अणासायए अणासायमाणे तओ संजयामेव जंघासंतारिमे उदए अहारियं रीएज्जा
 ॥ ७४२ ॥ से भिक्खू वा (२) जंघासंतारिमे उदए अहारियं रीयमाणे णो साया-
 वडियाए णो परिदाहवडियाए महइ महालयंसि उदगंसि कार्यं विउसिज्जा, तओ
 संजयामेव जंघासंतारिमे उदए अहारियं रीएज्जा, अह पुण एवं जाणिज्जा पारए
 सिया उदगाओ तीरं पाउणित्तए तओ संजयामेव उदउल्लेण वा ससिणिद्धेण वा
 काएण उदगतीरे चिट्ठेज्जा ॥ ७४३ ॥ से भिक्खू वा (२) उदउल्लं वा कार्यं ससि-
 णिद्धं वा कार्यं णो आमज्जेज्ज वा पमज्जेज्ज वा, अह पुण एवं जाणिज्जा विगतोदए मे
 काए छिण्णसिणेहे तहप्पगारं कार्यं आमज्जेज्ज वा जाव पयावेज्ज वा, तओ संजया-
 मेव गामाणुगामं दूइजेज्जा ॥ ७४४ ॥ से भिक्खू वा (२) गामाणुगामं दूइज्जमाणे
 णो मट्ठियामएहिं पाएहिं हरियाणि छिंदिय २ विकुज्जिय २ विफालिय २ उम्मग्गेणं
 हरियवहाए गच्छेज्जा “जहेयं पाएहिं मट्ठियं खिप्पामेव हरियाणि अवहरंतु” माइट्ठाणं
 संकासे णो एवं करेज्जा से पुव्वामेव अप्पहरियं मग्गं पडिल्लेहेज्जा, तओ संजयामेव
 गामाणुगामं दूइजेज्जा ॥ ७४५ ॥ से भिक्खू वा (२) गामाणुगामं दूइज्जमाणे
 अंतरा से वप्पाणि वा, फलिहाणि वा, पागाराणि वा, तोरणाणि वा, अग्गलाणि वा,
 अग्गलपासगाणि वा, गड्ढाओ वा, दरीओ वा, सइ परक्कमे संजयामेव परक्कमेज्जा,
 णो उज्जुयं गच्छेज्जा, केवली बूया ‘आयाणमेयं’ से तत्थ परक्कममाणे पयलेज्ज वा
 पवडेज्ज वा ॥ ७४६ ॥ से तत्थ पयलमाणे वा, पवडेमाणे वा, रुक्खाणि वा,
 गुच्छाणि वा, गुम्माणि वा, लयाओ वा, वल्लीओ वा, तणाणि वा, गहणाणि वा,
 हरियाणि वा, अवलंबिय २ उत्तरेज्जा, जे तत्थ पाडिपहिया उवागच्छंति, ते पाणी

जाएज्जा, तओ संजयामेव अवलंबिय २ उत्तरेज्जा, तओ गामाणुगामं दूइजेज्जा ॥ ७४७ ॥ से भिक्खु वा (२) गामाणुगामं दूइज्जमाणे अंतरा से जवसाणि वा, सगडाणि वा, रहाणि वा, सचक्काणि वा, परचक्काणि वा, से णं वा विह्वल्लवं संणि-
रुद्धं पेहाए सइ परक्कमे संजयामेव णो उज्जुयं गच्छेज्जा ॥ ७४८ ॥ से णं परो सेणा-
गओ वएज्जा, आउसंतो एसणं समणे सेणाए अभिनिवारियं करेइ, से णं बाहाए
गहाय आगसह सेणं परो बाहाहिं गहाय आगसेज्जा, तं णो सुमणे सिया जाव
समाहीए तओ संजयामेव गामाणुगामं दूइजेज्जा ॥ ७४९ ॥ से भिक्खु वा (२)
अंतरा से पाडिपहिया उवागच्छेज्जा तेणं पाडिपहिया एवं वदेज्जा आउसंतो समणा
केवइए एस गामे वा रायहाणी वा केवइया एत्थ आसा हत्थी गामपिंडोलगा
मणुस्सा परिवसेति ? से बहुभत्ते बहुउदए बहुजणे बहुजवसे से अप्पुदए अप्पभत्ते
अप्पजणे अप्पजवसे, एयप्पगाराणि पसिणाणि पुट्ठो वा अपुट्ठो वा णो आइक्खेज्जा,
एतप्पगाराणि पसिणाणि णो पुच्छेज्जा ॥ ७५० ॥ एयं खलु तस्स भिक्खुस्स भिक्खु-
णीए वा सामग्गियं ॥ ७५१ ॥ इरियाज्झयणे वीओदेसो समत्तो ॥

से भिक्खु वा (२) गामाणुगामं दूइज्जमाणे अंतरा से वप्पाणि वा, फलिहाणि
वा, पागाराणि वा, जाव दरीओ वा, कूडागाराणि वा, पासादाणि वा, णूमगिहाणि
वा, सक्खगिहाणि वा, पव्वगिहाणि वा, आएसणाणि वा, जाव भवणगिहाणि वा,
णो बाहाओ पगिज्झिय २ अंगुलियाए उहिसिय २ ओ०२ उण्णमिय २ णिज्झाएज्जा,
तओ संजयामेव गामाणुगामं दूइजेज्जा ॥ ७५२ ॥ से भिक्खु वा (२) गामाणुगामं
दूइज्जमाणे अंतरा से कच्छाणि वा, दवियाणि वा, णूमाणि वा, वलयाणि वा, गह-
णाणि वा, गहणविदुग्गाणि वा, वणाणि वा, वणपव्वयाणि वा, पव्वतविदुग्गाणि वा,
पव्वतगिहाणि वा, अगडाणि वा, तलागाणि वा, दहाणि वा, णदीओ वा, वावीओ
वा, पुक्खरणीओ वा, दीहिंयाओ वा, गुंजालियाओ वा, सराणि वा, सरपंतियाणि
वा, सरसरपंतियाणि वा, णो बाहाओ पगिज्झिय जाव णिज्झाएज्जा, केवली बूया
'आयाण-मेयं' जे तत्थ मिगा वा, पसू वा, पक्खी वा, सिरीसिवा वा, सीहा वा,
जलचरा वा, थलचरा वा, खहचरा वा, सत्ता ते उत्तसेज वा, वित्तसेज वा, वाडं
वा सरणं वा कंखेज्जा, "चारित्ति मे अयं समणे" अह भिक्खुणं पुव्वोवदिट्ठा एस
पइण्णा जं णो बाहाओ पगिज्झिय २ जाव णिज्झाएज्जा, तओ संजयामेव आयरिय
उवज्झाएहिं सद्धिं गामाणुगामं दूइजेज्जा ॥ ७५३ ॥ से भिक्खु वा (२) आयरि-
यउवज्झाएहिं सद्धिं गामाणुगामं दूइज्जमाणे, णो आयरियउवज्झायस्स हत्थेण वा
हत्थं जाव अणासायमाणे तओ संजयामेव आयरियउवज्झाएहिं सद्धिं जाव दूइ-

जिज्जा ॥ ७५४ ॥ से भिक्खू वा (२) आयरियउवज्झाएहिं सद्धिं दूइज्जमाणे अंतरा से पाडिपहिया उवागच्छेज्जा, ते णं पाडिपहिया से एवं वएज्जा “आउसंतो समणा के तुब्भे ? कओ वा एह ? कहिं वा गच्छिहिह” जे तत्थ आयरियउवज्झाए से भासेज्ज वा, वियागरेज्ज वा, आयरियोवज्झायस्स भासमाणस्स वा वियागरे-माणस्स वा णो अंतराभासं करेज्जा, तओ संजयामेव अहारातिणिए वा० दूइजेज्जा ॥ ७५५ ॥ से भिक्खू वा (२) अहारातिणियं गामाणुगामं दूइज्जमाणे णो अहारा-तिणियस्स हत्थेण हत्थं जाव अणासायमाणे तओ संजयामेव अहारातिणियं गामा-णुगामं दूइज्जिज्जा ॥ ७५६ ॥ से भिक्खू वा (२) अहारातिणियं दूइज्जमाणे अंतरा से पाडिपहिया उवागच्छेज्जा, ते णं पाडिपहिया एवं वदेज्जा, आउसंतो समणा के तुब्भे ? कओ वा एह ? कहिं वा गच्छिहिह ? जे तत्थ सव्वरातिणिए से भासेज्ज वा वागरेज्ज वा अहारातिणियस्स भासमाणस्स वियागरेमाणस्स वा णो अंतराभासं भासेज्जा, तओ संजयामेव अहाराइणियाए गामाणुगामं दूइज्जिज्जा ॥ ७५७ ॥ से भिक्खू वा (२) गामाणुगामं दूइज्जमाणे अंतरा से पाडिपहिया आगच्छेज्जा, ते णं पाडिपहिया एवं वदेज्जा “आउसंतो समणा ! अवियाइं एत्तो पडिपहे पासह तंजहा-मणुस्सं वा गोणं वा महिसं वा पसुं वा पर्क्खि वा, सिरीसिवं वा जलयरं वा से आइक्खह दंसेह” तं णो आइक्खेज्जा णो दंसेज्जा णो तेसिं तं परिणं परिजाणिज्जा, तुसिणीओ उवेहेज्जा, जाणं वा, णो जाणंति वएज्जा, तओ संजयामेव गामा-णुगामं दूइजेज्जा ॥ ७५८ ॥ से भिक्खू वा (२) गामाणुगामं दूइज्जमाणे अंतरा से पाडिपहिया आगच्छेज्जा ते णं पाडिपहिया एवं वएज्जा “आउसंतो समणा अवियाइं एत्तो पडिपहे पासह उदगपसूयाणि कंदाणि वा मूलाणि वा तयाणि वा पत्ताणि वा पुप्फाणि वा फलाणि वा बीयाणि वा हरियाणि वा उदगं वा सणिहियं अगणिं वा सणिक्खित्तं, सेसं तं चेव से आइक्खह, जाव दूइजेज्जा ॥ ७५९ ॥ से भिक्खू वा (२) गामाणुगामं दूइज्जमाणे अंतरा से पाडिपहिया उवागच्छेज्जा ते णं पाडिपहिया एवं वएज्जा, आउसंतो समणा अवियाइं एत्तो पडिपहे पासह, जवसाणि वा, जाव से णं वा, विरुवरूवं सणिविट्ठं, से आइक्खह जाव दूइज्जिज्जा ॥ ७६० ॥ से भिक्खू वा (२) गामाणुगामं दूइज्जमाणे अंतरा से पाडिपहिया जाव “आउसंतो समणा ! केवइए एत्तो गामे वा जाव रायहाणी वा से आइक्खह जाव दूइज्जिज्जा ॥ ७६१ ॥ से भिक्खू वा (२) गामाणुगामं दूइज्जमाणे अंतरा से पाडिपहिया जाव “आउसंतो समणा केवइए एत्तो गामस्स णगरस्स वा जाव राय-हाणीए वा मग्गे, से आइक्खह तहेव जाव दूइज्जिज्जा ॥ ७६२ ॥ से भिक्खू वा

(२) गामाणुगामं दूइज्जमाणे अंतरा से गोणं वियालं पडिपहे पेहाए जाव चित्तवि-
 ल्लडं वियालं पडिपहे पेहाए गो तेसिं भीओ उम्मग्गेणं गच्छेज्जा, गो मग्गाओ उम्मग्गं
 संकमिज्जा, गो गहणं वा वणं वा दुग्गं वा अणुपविसेज्जा, गो हक्खंसि दुरुहेज्जा, गो
 महइमहालयंसि उदयंसि कायं विउसेज्जा, गो वाडं वा सरणं वा सेणं वा सत्थं वा
 कंखेज्जा, अप्पुस्सुए जाव समाहीए तओ संजयामेव गामाणुगामं दूइज्जिज्जा ॥ ७६३ ॥
 से भिक्खू वा (२) गामाणुगामं दूइज्जमाणे अंतरा से विहं सिया से जं पुण विहं
 जाणिज्जा, इमंसि खलु विहंसि बहवे आमोसगा उवगरणपडियाए संपिडिया गच्छेज्जा,
 गो तेसिं भीओ उम्मग्गेणं गच्छेज्जा, जाव समाहीए तओ संजयामेव गामाणुगामं
 दूइज्जिज्जा ॥ ७६४ ॥ से भिक्खू वा (२) गामाणुगामं दूइज्जमाणे अंतरा से आमो-
 सगा संपिडिया गच्छेज्जा ते णं आमोसगा एवं वदेज्जा, आउसंतो समणा, आहर
 एयं वत्थं वा पायं वा कंबलं वा पायपुच्छं वा देहिं णिक्खिवाहि, तं गो देज्जा
 णिक्खिवेज्जा, गो वंदिय २ जाएज्जा, गो अंजलिं कट्ठु जाएज्जा, गो कलुणपडियाए
 जाएज्जा, धम्मियाए जाएज्जा, तुसिणीयभावेण वा उवेहिज्जा, ते णं आमोसगा 'सयं
 करणिज्जं' ति कट्ठु, अक्कोसंति वा जाव उवह्वंति वा वत्थं वा पायं वा कंबलं वा
 पायपुच्छं अच्छिदेज्ज वा, जाव परिठ्वेज्ज वा, तं णं गो गामसंसारियं कुज्जा, गो
 रायसंसारियं कुज्जा, गो परं उवसंकमिस्तु बूया, आउसंतो गाहावइ एए खलु मे
 आमोसगा उवगरणपडियाए सयं करणिज्जं ति कट्ठु अक्कोसंति वा जाव परिठ्वेति
 वा, एयप्पगारं मणं वा वयणं वा गो पुरओ कट्ठु विहरेज्जा, अप्पुस्सुए जाव समाहीए
 तओ संजयामेव गामाणुगामं दूइजेज्जा ॥ ७६५ ॥ एयं खलु तस्स भिक्खुस्स
 भिक्खुणीए वा सामग्गियं, जं सव्वट्ठेहिं सहिए सया जएजासि ति वेमि ॥ ७६६ ॥
 इरियाज्झयणस्स तइओइसो समत्तो ॥ तइयं इरियाज्झयणं समत्तं ॥

से भिक्खू वा (२) इमाइं वयायाराइं सोच्चा णिसम्म इमाइं अणायाराइं
 अणायरियपुव्वाइं जाणिज्जा, जे कोहा वा माणा वा मायाए वा लोहा वा वायं विउजंति,
 जाणओ वा फरुसं वयंति, अजाणओ वा फरुसं वयंति, सव्वमेयं सावज्जं वजेज्जा,
 विवेगमायाए ॥ ७६७ ॥ धुवं चेयं जाणिज्जा, अधुवं चेयं जाणिज्जा, असणं वा (४)
 लभिय गो लभिय, भुंजिय गो भुंजिय, अदुवा आगए गो आगए, अदुवा एइ
 गो एइ, अदुवा एहिति गो एहिति, एत्थवि आगए गो आगए, एत्थवि एइ गो एइ,
 एत्थवि एहिति गो एहिति ॥ ७६८ ॥ अणुवीइ णिट्ठाभासी, समियाए संजए भासं
 भासेज्जा, तंजहा-एगवयणं, दुवयणं, बहुवयणं, इत्थिवयणं, पुरिसवयणं, णपुंसगवयणं,

अज्झत्थवयणं, उवणीयवयणं, अवणीयवयणं, उवणीयावणीयवयणं, अवणीयोवणी-
यवयणं, तीयवयणं, पडुप्पन्नवयणं, अणागयवयणं, पच्चक्खवयणं, परोक्खवयणं
॥ ७६९ ॥ से एगवयणं वदिस्सामीति एगवयणं वएजा, जाव परोक्खवयणं वडि-
स्सामीति परोक्खवयणं वएजा, इत्थी वेस पुरिसो वेस, णुपुंसं वेस, एवं वा चेयं,
अण्णं वा चेयं, अणुवीइ णिट्ठाभासी, समियाए संजए भासं भासिज्जा, इच्चेयाई
आयतणाई उवातिकम्म ॥ ७७० ॥ अह भिक्खू जाणिज्जा चत्तारि भासज्जायाई,
तंजहा-सच्चमेगं पढमं भासजायं, बीयं मोसं, तइयं सच्चामोसं, जं णेव सच्चं णेव
मोसं नेव सच्चामोसं “असच्चामोसं” णाम तं चउत्थं भासजातं ॥ ७७१ ॥ से वेमि
जे अतीता जे य पडुप्पन्ना जे य अणागया अरहंता भगवंतो सव्वे ते एयाणि
चेव चत्तारि भासांजायाई भासिंसु वा भासंति वा भासिस्संति वा, पण्णविंसु वा,
पण्णवेति वा, पण्णविस्संति वा, सव्वाइ च णं एयाई अचित्ताणि वण्णमंताणि गंध-
मंताणि रसमंताणि फासमंताणि चओवचइयाई विपरिणामधम्ममाई भवंतीति सम-
क्खायाई ॥ ७७२ ॥ से भिक्खू वा (२) पुब्बि भासा अभासा भासमाणा भासा
भासा, भासासमयविइक्कंता च णं भासिया भासा अभासा ॥ ७७३ ॥ से भिक्खू वा (२)
जाय भासा सच्चा, जाय भासा मोसा, जाय भासा सच्चामोसा, जाय भासा असच्चा-
मोसा, तहप्पगारं भासं सावज्जं सकिरियं कक्कसं कडुयं निट्ठुरं फरुसं अण्हयकरिं
छेयणमेयणकरिं परितावणकरिं उद्वकरिं भूतोवघाइयं अभिक्खं भासं णो भासेज्जा
॥ ७७४ ॥ से भिक्खू वा (२) जा य भासा सच्चा सुहुमा जाय भासा असच्चा-
मोसा तहप्पगारं भासं असावज्जं अकिरियं जाव अभूतोवघाइयं अभिक्खं भासं
भासेज्जा, अदुवा य पुमं आमंतेमाणे आमंतिते वा अपडिस्सुणेमाणं णो एवं वएजा,
होले ति वा गोले ति वा वसुले ति वा कुपक्खे ति वा घडदासे ति वा साणे ति
वा तेणे ति वा चारिए ति वा माई ति वा मुसावाई ति वा एयाई तुमं ते जणगा
वा, एतप्पगारं भासं सावज्जं सकिरियं जाव अभिक्खं नो भासेज्जा ॥ ७७५ ॥ से
भिक्खू वा (२) पुमं आमंतेमाणे आमंतिए वा अपडिस्सुणेमाणे एवं वएजा, अमुगे
ति वा आउसोत्ति वा आउसंतोत्ति वा सावगे ति वा उपासगेति वा धम्मिएति वा
धम्मपियेति वा एयप्पगारं भासं असावज्जं जाव अभूतोवघाइयं अभिक्खं भासेज्जा
॥ ७७६ ॥ से भिक्खू वा (२) इत्थि आमंतेमाणे आमंतिए य अपडिस्सुणेमाणं
नो एवं वएजा, होली इ वा गोली इ वा इत्थीगमेगं णेतव्वं ॥ ७७७ ॥ से भिक्खू
वा (२) इत्थियं आमंतेमाणे आमंतिए य अपडिस्सुणेमाणं एवं वएजा, आउसिं
ति वा भणिणि ति वा भगवइ ति वा साविगे ति वा उवासिए ति वा धम्मिए ति

वा धम्मपियेति वा एतप्पगारं भासं असावज्जं जाव अभिक्खं भासेज्जा ॥ ७७८ ॥
 से भिक्खू वा (२) णो एवं वएज्जा, णभोदेवेति वा गज्जेदेवेति वा विज्जुदेवे ति
 वा पवुठ्ठदेवेति वा निवुठ्ठदेवेति वा पडउ वा वासं मा वा पडउ णिप्फज्जउ वा
 सस्सं मा वा णिप्फज्जउ विभाउ वा रयणी मा वा विभाउ उदेउ वा सूरिए मा वा
 उदेउ सो वा राया जयउ मा वा जयउ णो एतप्पगारं भासं भासिज्जा, पण्णवं
 ॥ ७७९ ॥ से भिक्खू वा (२) अंतल्लिक्खेति वा गुज्झाणुचरिएति वा संमुच्छिए
 वा णिवइए वा पओवएज्जा वा वुठ्ठबलाहगेति वा ॥ ७८० ॥ एयं खलु तस्स भिक्खुस्स
 भिक्खुणीए वा सामगियं जं सव्वट्ठेहिं समिए सहिए सया जएज्जासि ति वेमि
 ॥ ७८१ ॥ भासाज्झयणस्स पढमोदेसो समत्तो ॥

से भिक्खू वा (२) जहा वेगइयाइं रुवाईं पासेज्जा तहावि ताइं णो एवं वएज्जा,
 तंजहा-गंडी गंडीति वा, कुट्ठी कुट्ठीति वा, जाव महुमेहुणीति वा, हत्थच्छिन्नं
 हत्थच्छिन्नेति वा, एवं पादणक्कण्णउठ्ठच्छिण्णेति वा । जे या वण्णे तहप्पगारा
 एयप्पगाराहिं भासाहिं बुइया बुइया कुप्पंति माणवा, तेयावि तहप्पगाराहिं भासाहिं
 अभिक्खं णो भासेज्जा ॥ ७८२ ॥ से भिक्खू वा (२) जहा वेगइयाइं रुवाईं
 पासिज्जा तहावि ताइं एवं वएज्जा तंजहा-ओयंसी ओयंसीति वा, तेयंसी तेयंसी ति
 वा, वच्चंसी वच्चंसीति वा, जसंसी जसंसीति वा, अभिरुवं अभिरुवेति वा पडिरुवं
 पडिरुवेति वा, पासाइयं पासाइयंति वा दरिसणिज्जं दरिसणीएति वा, जेया वण्णे
 तहप्पगारा एयप्पगाराहिं भासाहिं बुइया बुइया णो कुप्पंति माणवा, तेयावि तहप्प-
 गारा एयप्पगाराहिं भासाहिं अभिक्खं भासिज्जा । तहप्पगारं भासं असावज्जं जाव
 भासेज्जा ॥ ७८३ ॥ से भिक्खू वा (२) जहा वेगइयाइं रुवाईं पासेज्जा तंजहा-
 वप्पाणि वा जाव भवणगिहाणि वा, तहावि ताइं णो एवं वएज्जा, तंजहा-सुकडे इ
 वा सुठ्ठुकडे इ वा साहुकडे इ वा कल्लाणे इ वा करणिजे इ वा एयप्पगारं
 भासं सावज्जं जाव णो भासेज्जा ॥ ७८४ ॥ से भिक्खू वा (२) जहा वेगइयाइं
 रुवाईं पासेज्जा, तंजहा-वप्पाणि वा जाव भवणगिहाणि वा तहावि ताइं एवं
 वएज्जा, तंजहा-आरंभकडेइ वा सावज्जकडे इ वा पयत्तकडे इ वा पासाइयं
 पासाइएति वा दरिसणीयं दरिसणीएति वा अभिरुवं अभिरुवेति वा पडिरुवं
 पडिरुवेति वा एयप्पगारं भासं असावज्जं जाव भासेज्जा ॥ ७८५ ॥ से भिक्खू वा
 (२) असणं वा (४) उवक्खडियं पेहाए तहाविहं तं णो एवं वएज्जा, तंजहा-सुकडेति
 वा सुठ्ठुकडे इ वा साहुकडे इ वा कल्लाणे इ वा करणिजे इ वा एयप्पगारं भासं सावज्जं
 जाव णो भासेज्जा ॥ ७८६ ॥ से भिक्खू वा (२) असणं वा (४) उवक्खडियं

पेहाए एवं वएज्जा, तंजहा-आरंभकडे ति वा सावज्जकडे ति वा पयत्तकडेति वा भइयं भइए ति वा ऊसढं ऊसढे ति वा रसियं रसिए ति वा मणुणं मणुणे ति वा एयप्पगारं भासं असावज्जं जाव भासेज्जा ॥ ७८७ ॥ से भिक्खू वा (२) मणुस्सं वा गोणं वा महिसं वा मिगं वा पसुं वा पक्खि वा सरीसिवं वा जलयरं वा से तं परिवूढकायं पेहाए णो एवं वएज्जा थूलेइ वा पमेइलेइ वा वट्टेइ वा वज्जेइ वा पाइसेइ वा एयप्पगारं भासं सावज्जं जाव णो भासिज्जा ॥ ७८८ ॥ से भिक्खू वा (२) मणुस्सं जाव जलयरं वा से तं परिवूढकायं पेहाए एवं वएज्जा, परिवूढकाएति वा, उवचियकाए ति वा थिरसंघयणेति वा उवचियमंस-सोणिएति वा बहुपडिपुण्णइदिएति वा एयप्पगारं भासं असावज्जं जाव भासिज्जा ॥ ७८९ ॥ से भिक्खू वा (२) विरूवरूवाओ गाओ पेहाए णो एवं वएज्जा, तंजहा-गाओ दोज्जाओ ति वा दम्मेति वा गोरहति वा वाहिमति वा रहजोग्गति वा एयप्पगारं भासं सावज्जं जाव णो भासिज्जा ॥ ७९० ॥ से भिक्खू वा (२) विरूवरूवाओ गाओ पेहाए एवं वएज्जा तंजहा-जुवंगवेति वा धेणु ति वा रसवइ ति वा हस्सेइ वा महल्लएइ वा महव्वएइ वा संवहणि ति वा एयप्पगारं भासं असावज्जं जाव अभिक्खं भासिज्जा ॥ ७९१ ॥ से भिक्खू वा (२) तहेव गंतुमुज्जाणाइं पव्वयाइं वणाणि वा ख्ख्वा महल्ला पेहाए णो एवं वएज्जा, तंजहा-पासायजोग्गा ति वा तोरणजोग्गाति वा गिहजोग्गाइ वा फलिहजोग्गाइ वा अग्गल-नावा-उदगदोणि-पीढ-चंगबेर-णंगल-कुलिय-जंतलठ्ठी-णाभि-गंडी-आसण-सयण-जाण-उवस्सय-जोग्गाइ वा, एयप्पगारं भासं सावज्जं जाव णो भासिज्जा ॥ ७९२ ॥ से भिक्खू वा (२) तहेव गंतुमुज्जाणाइं पव्व-याणि वणाणि य ख्ख्वा महल्ला पेहाए एवं वएज्जा, तंजहा-जातिमंताइ वा वीहवट्ठाइ वा महालयाइ वा पयायसालाइ वा विडिमसालाइ वा पासाइयाइ वा जाव पडिरूवाइ वा एयप्पगारं भासं असावज्जं जाव अभिक्खं भासिज्जा ॥ ७९३ ॥ से भिक्खू वा (२) बहुसंभूया वणफला पेहाए तहावि ते णो एवं वएज्जा तंजहा-पक्का ति वा पायक्खज्जाइ वा वेलोइयाति वा टालाइ वा वेहियाइ वा एयप्पगारं भासं सावज्जं जाव णो भासिज्जा ॥ ७९४ ॥ से भिक्खू वा (२) बहुसंभूयाफला अंबा पेहाए एवं वएज्जा, तंजहा-असंथडाइ वा बहुणिवट्ठिमफलाइ वा बहुसंभूयाइ वा भूयूरुविति वा एयप्पगारं भासं असावज्जं जाव भासेज्जा ॥ ७९५ ॥ से भिक्खू वा (२) बहुसंभूयाओ ओसहीओ पेहाए तहावि ताओ णो एवं वएज्जा, तंजहा-पक्काइ वा नीलियाइ वा छवीइ वा

लाइमा इ वा भजिमा इ वा बहुखज्जा इ वा एयप्पगारं भासं सावज्जं जाव णो भासेज्जा ॥ ७९६ ॥ से भिक्खु वा (२) बहुसंभूयाओ ओसहीओ पेहाए तहावि एवं वएज्जा, तंजहा-रूढा इ वा बहुसंभूया इ वा थिरा इ वा ऊसडा इ वा गब्भिया इ वा पसूया इ वा ससारा इ वा एयप्पगारं असावज्जं जाव भासेज्जा ॥ ७९७ ॥ से भिक्खु वा (२) जहा वेगइयाईं सदाईं सुणेज्जा, तहावि एयाईं णो एवं वएज्जा, तंजहा-सुसदे इ वा दुसदे इ वा एयप्पगारं सावज्जं जाव णो भासेज्जा, तहावि ताईं एवं वएज्जा, तंजहा-सुसदे सुसदे ति वा दुसदे दुसदे ति वा एयप्पगारं असावज्जं जाव भासेज्जा ॥ ७९८ ॥ एवं रूवाईं कण्हे ति वा ५ गंधाईं सुब्भिमगंधे ति वा २ रसाईं तित्ताणि वा ५ फासाईं कक्खडाणि वा ८ ॥ ७९९ ॥ से भिक्खु वा (२) वंता कोहं च मार्गं च मायं च लोभं च अणुवीइ णिट्ठाभासी णिसम्म भासी अतुरियभासी विवेगभासी समियाए संजए भासं भासेज्जा ॥ ८०० ॥ एयं खलु तस्स भिक्खुस्स भिक्खुणीए वा सामगियं ॥ ८०१ ॥ भासाज्झयणे वीथोहेसो समत्तो ॥ चउत्थं भासाज्झयणं समत्तं ॥

से भिक्खु वा (२) अभिकंखेज्जा वत्थं एसित्तए, से जं पुण वत्थं जाणिज्जा, तंजहा-जंगियं-साणयं-पोत्तयं-खोमियं वा तूलकडं वा तहप्पगारं वत्थं ॥ ८०२ ॥ जे णिगंधे तरुणे जुगवं बलवं अप्पायंके थिरसंघयणे से एगं वत्थं धारेज्जा णो वित्थियं, जा णिगंधी सा चत्तारि संघाडीओ धारेज्जा, एगं दुहत्थवित्थारं, दो तिहत्थ-वित्थाराओ, एगं चउहत्थवित्थारं, एएहिं वत्थेहिं असंघिज्जमाणेहिं अह पच्छा एगमेगं संसीविज्जा ॥ ८०३ ॥ से भिक्खु वा (२) परं अद्धजोयणमेराए वत्थपडियाए नो अभिसंधारेज्जा गमणाए ॥ ८०४ ॥ से भिक्खु वा (२) से जं पुण वत्थं जाणिज्जा अस्सिंपडियाए एगं साहम्मियं समुद्दिस्स पाणाईं (जहा पिंडेसणाए) ॥ ८०५ ॥ एवं बहवे साहम्मिया, एगं साहम्मिणिं, बहवे साहम्मिणीओ, बहवे समणमाहणा, तहेव पुरिसंतरकडं (जहा पिंडेसणाए) ॥ ८०६ ॥ से भिक्खु वा (२) से जं पुण वत्थं जाणिज्जा, असंजए भिक्खुपडियाए कीयं वा धोयं रत्तं वा घट्टं वा मट्ठं वा संसट्ठं वा संपधूमियं वा तहप्पगारं वत्थं अपुरिसंतरकडं जाव णो पडिगाहेज्जा, अह पुण एवं जाणिज्जा पुरिसंतरकडं जाव पडिगाहेज्जा ॥ ८०७ ॥ से भिक्खु वा (२) से जाईं पुण वत्थाईं जाणिज्जा, विरुवरूवाईं महद्धणमोल्लाईं तंजहा-आ-जिणाणि वा, सहिणाणि वा, सहिणकल्लाणाणि वा, आयाणि वा, कायकाणि वा, खोमियाणि वा, दुगुल्लाणि वा, पट्टाणि वा, मलयाणि वा, पनुण्णाणि वा, अंसुयाणि

वा, चीणसुयाणि वा, देसरागाणि वा, अमिलाणि वा, गज्जफलाणि वा, फालियाणि वा, कोयवाणि वा, कंबलगाणि वा, पावरणाणि वा, अण्णयराणि वा तहप्पगाराई वत्थाई महद्धणमोल्लाई लामे संते णो पडिगाहिज्जा ॥ ८०८ ॥ से भिक्खू वा (२) से जाई पुण आईणपाउरणाणि वत्थाणि जाणिज्जा, तंजहा-उद्दाणि वा पेसाणि वा, पेसलाणि वा किण्हमिगाईणगाणि वा णीलमिगाईणगाणि वा गोरमिगाईणगाणि वा कणगाणि वा कणगकंताणि वा कणगपट्टाणि वा कणगखइयाणि वा कणगफुसियाणि वा वग्घाणि वा विवग्घाणि वा आभरणाणि वा आभरणविच्चित्ताणि वा अण्णयराणि वा तहप्पगाराणि आईणपाउरणाणि वत्थाणि लामे संते णो पडिगाहिज्जा ॥ ८०९ ॥ इच्चेइयाई आयतणाई उवाइक्कम्म अह भिक्खू जाणिज्जा, चउहिं पडिमाहिं वत्थं एसित्तए ॥ ८१० ॥ तत्थ खलु इमा पढमा पडिमा, से भिक्खू वा (२) उद्दिसिय २ वत्थं जाएज्जा, तंजहा-जंणियं वा साणयं वा पोत्तयं वा खोमियं वा तूलकडं वा तहप्पगारं वत्थं सयं वा णं जाएज्जा परो वा णं देज्जा, फासुयं एसणीयं लामे संते पडिगाहिज्जा, **पढमा पडिमा** ॥ ८११ ॥ **अहावरा दोच्चा पडिमा** ॥ से भिक्खू वा (२) पेहाए २ जाएज्जा, तंजहा-गाहावई वा जाव कम्मकरी वा, से पुव्वामेव आलोएज्जा, आउसो ति वा भणिण ति वा, दाहिसि मे एत्तो अण्णतरं वत्थं? तहप्पगारं वत्थं सयं वा णं जाएज्जा, परो वा से देज्जा, जाव फासुयं एसणीयं लामे संते पडिगाहिज्जा ॥ **दोच्चा पडिमा**, ॥ ८१२ ॥ **अहावरा तच्चा पडिमा** ॥ से भिक्खू वा (२) से जं पुण वत्थं जाणिज्जा तंजहा-अंतरिज्जगं वा उत्तरिज्जगं वा तहप्पगारं वत्थं सयं वा णं जाएज्जा जाव पडिगाहिज्जा ॥ **तच्चा पडिमा** ॥ ८१३ ॥ **अहावरा चउत्था पडिमा** ॥ से भिक्खू वा (२) उज्जिञ्जयधम्मियं वत्थं जाएज्जा, जं चउणे बहवे समणमाहणअतिहिक्किवणवणीमगा णावकंखंति, तहप्पगारं उज्जिञ्जयधम्मियं वत्थं सयं वा णं जाएज्जा परो वा से देज्जा फासुयं जाव पडिगाहेज्जा, **चउत्था पडिमा** ॥ ८१४ ॥ इच्चेयाणं चउण्हं पडिमाणं जहा पिंडेसणाए ॥ ८१५ ॥ सिया णं एयाए एसणाए एसमाणं परो वएज्जा आउसंतो समणा एजाहि तुमं मासेण वा दसराएण वा पंचराएण वा सुए वा सुयतरे वा तो ते वयं आउसो अण्णयरं वत्थं दाहामो ।” तहप्पगारं णिग्घोसं सोच्चा णिसम्म से पुव्वामेव आलोएज्जा आउसो ति वा भणिण ति वा णो खलु मे कप्पइ एयप्पगारे संगारे वयणे पडिउणेत्तए अभिक्कंखसि मे दाउं इयाणिमेव दलयाहि, से णेवं वयंतं परो वएज्जा आउसंतो समणा अणुगच्छाहि तो ते वयं अण्णतरं वत्थं दाहामो से पुव्वामेव आलोएज्जा

आउसो त्ति वा भइणि त्ति वा णो खलु मे कप्पइ एयप्पगारे संगारवयणे पडिसु-
 नेत्तए, अभिकंखसि मे दाउं इयाणिमेव दलयाहि ।” से सेवं वयंतं परो णेया
 वदेज्जा “आउसो त्ति वा भइणि त्ति वा आहरेयं वत्थं समणस्स दाहामो अवियाई
 वयं पच्छावि अप्पणो सयट्ठाए पाणाई भूयाई जीवाई सत्ताई समारब्भ समुद्दिस्स
 जाव चेइस्सामो” एयप्पगारं णिग्घोसं सोच्चा णिसम्म तहप्पगारं वत्थं अफासुयं
 जाव णो पडिगाहेज्जा ॥ ८१६ ॥ सिया णं परो णेया वएज्जा “आउसो त्ति वा
 भइणि त्ति वा आहरेयं वत्थं सिणाणेण वा ४ जाव आरंभसित्ता वा पवंसित्ता वा
 समणस्स णं दाहामो” एयप्पगारं णिग्घोसं सोच्चा णिसम्म से पुव्वामेव आलो-
 एज्जा, आउसो त्ति वा भइणि त्ति वा मा एयं तुमं वत्थं सिणाणेण वा जाव पवंसाहि
 वा अभिकंखसि मे दाउं, एमेव दलयाहि” से सेवं वयंतस्स परो सिणाणेण वा जाव
 पवंसित्ता दलएज्जा, तहप्पगारं वत्थं अफासुयं जाव णो पडिगाहेज्जा ॥ ८१७ ॥ से
 णं परो णेया वएज्जा, “आउसो त्ति वा भइणि त्ति वा आहर एयं वत्थं सीओदग-
 वियडेण वा उसिणोदगवियडेण वा उच्छोलेत्ता वा पधोवेत्ता वा समणस्स दाहामो
 एयप्पगारं णिग्घोसं सोच्चा णिसम्म से पुव्वामेव आलोएज्जा आउसो त्ति वा भइणि
 त्ति वा मा एयं तुमं वत्थं सीओदगवियडेण वा उसिणोदगवियडेण वा उच्छोलेहि
 वा पधोवेहि वा अभिकंखसि सेसं तहेव जाव णो पडिगाहेज्जा ॥ ८१८ ॥ से णं
 परो णेया वएज्जा “आउसो त्ति वा भइणि त्ति वा आहरेयं वत्थं कंदाणि वा जाव
 हरियाणि वा विसोहिता समणस्स दाहामो” एयप्पगारं णिग्घोसं सोच्चा णिसम्म
 जाव “भइणि त्ति वा मा एयाणि तुमं कंदाणि वा जाव विसोहेहि णो खलु मे
 कप्पइ एयप्पगारे वत्थे पडिगाहिताए” से सेवं वयंतस्स परो कंदाणि वा जाव
 विसोहिता दलएज्जा तहप्पगारं वत्थं अफासुयं णो पडिगाहेज्जा ॥ ८१९ ॥ सिया
 से परो णेया वत्थं णिसिरेज्जा से पुव्वामेव आलोएज्जा “आउसो त्ति वा भइणि त्ति
 वा तुमं चेवणं संतियं वत्थं अंतोअंतेणं पडिलेहिज्जिस्सामि” केवली बूया आयाणमेयं
 वत्थंतेण बद्धे सिया कुंडले वा गुणे वा हिरण्णे वा सुवण्णे वा मणी वा जाव
 रयणावली वा पाणे वा बीए वा हरिए वा अह भिक्खूणं पुव्वोवदिट्ठा जाव जं
 पुव्वामेव वत्थं अंतोअंतेणं पडिलेहिज्जा ॥ ८२० ॥ से भिक्खू वा (२) से जं
 पुण वत्थं जाणिज्जा सअंडं जाव संताणगं तहप्पगारं वत्थं अफासुयं जाव णो पडि-
 गाहेज्जा ॥ ८२१ ॥ से भिक्खू वा (२) से जं पुण वत्थं जाणिज्जा अप्पंडं जाव
 अप्पसंताणगं अणलं अथिरं अधुवं अधारणिज्जं रोहज्जंतं ण रोच्चइ तहप्पगारं वत्थं
 अफासुयं जाव णो पडिगाहेज्जा ॥ ५२२ ॥ से भिक्खू वा (२) से जं पुण वत्थं

जाणिज्जा, अप्पंडं जाव संताणगं अलं थिरं धुवं धारणिज्जं रोइज्जंतं रुच्चइ तहप्पगारं
 वत्थं फासुयं जाव पडिग्गाहेज्जा ॥ णो णवए मे वत्थे ति कट्ठु णो बहुदेसिएण
 सिणाणेण वा जाव पधंसेज्जा ॥ ८२३ ॥ पुण णो णवए मे वत्थे ति कट्ठु णो बहुदे-
 सिएण सीतोदगवियडेण वा जाव पढोवेज्जा ॥ ८२४ ॥ पुण दुब्बिभगंधे मे वत्थे
 ति कट्ठु णो बहुदेसिएण सिणाणेण वा तहेव सीओदगवियडेण वा उसिणोदगवियडेण
 वा (आलावओ) ॥ ८२५ ॥ पुण अभिकंखेज्ज वत्थं आयावेत्तए वा पयावेत्तए वा
 तहप्पगारं वत्थं णो अणंतरहियाए जाव पुढवीए णो ससिणद्धाए जाव संताणाए
 आयावेज्ज वा पयावेज्ज वा ॥ ८२६ ॥ पुण अभिकंखेज्जा वत्थं आयावेत्तए वा
 पयावेत्तए वा तहप्पगारं वत्थं थूणंसि वा गिहेलुगंसि वा उसुयालंसि वा कामजलंसि
 वा अण्णयरे वा तहप्पगारे अंतलिकखजाए दुब्बद्धे दुब्बिक्खित्ते अणिकंपे चलाचले
 णो आयावेज्ज वा पयावेज्ज वा ॥ ८२७ ॥ पुण अभिकंखेज्जा वत्थं आयावेत्तए
 पयावेत्तए वा तहप्पगारं वत्थं कुडियंसि भित्तिसि सिलंसि वा लेलुंसि वा अण्णतरे
 वा तहप्पगारे अंतलिकखजाए जाव णो आयावेज्ज वा पयावेज्ज वा ॥ ८२८ ॥
 पुण अभिकंखेज्जा वत्थं आयावेत्तए पयावेत्तए वा तहप्पगारे वत्थे खंधंसि वा मंचसि-
 मालंसि-पासायंसि-हम्मियतलंसि वा अण्णयरे वा तहप्पगारे अंतलिकखजाए जाव
 णो आयावेज्ज वा पयावेज्ज वा ॥ ८२९ ॥ से तमादाय एगंतमवक्कमेज्जा अहे
 ज्झामथंडिलंसि वा जाव अण्णयरंसि वा तहप्पगारंसि थंडिलंसि पडिहेहियं २ पम-
 जियं २ तओ संजयामेव वत्थं आयावेज्ज वा पयावेज्ज वा ॥ ८३० ॥ एयं खलु
 तस्स भिक्खुस्स भिक्खुणीए वा सामगियं सया जइज्जासि ति बेमि ॥ ८३१ ॥
वत्थेसणाज्झयणे पढमोहेसो समत्तो ॥

से भिक्खु वा भिक्खुणी वा, अहेसणिज्जाइं वत्थाइं जाएज्जा, अहापरिग्गहियाइं
 वत्थाइं धारेज्जा, णो धोएज्जा, णो रएज्जा, णो धोयरत्ताइं वत्थाइं धारेज्जा अपलि-
 उंचमाणे गामंतरेसु ओमचेलिए, एयं खलु वत्थधारिस्स सामगियं ॥ ८३२ ॥ से
 भिक्खु वा (२) गाहावइ कुलं पिंडवायपडियाए पविसिउकामे सव्वं चीवरमायाए
 गाहावइकुलं पिंडवायपडियाए णिक्खमेज्ज वा पविसेज्ज वा, एवं बहिया विचारभूमिं
 विहारभूमिं वा गामाणुगामं दूइजेज्जा । अह पुण एवं जाणिज्जा तिक्कदेसियं वा
 वासं वासमाणं पेहाए जहा पिंडेसणाए णवरं सव्वं चीवरमायाए ॥ ८३३ ॥ से
 एगइओ मुहुत्तगं २ पाडिहारियं बीयं वत्थं जाएज्जा, जाव एगाहेण वा दुयाहेण वा
 तिया-चउ-पंचाहेण वा विप्पवसियं २ उवागच्छेज्जा, तहप्पगारं वत्थं णो अप्पणा
 गिण्हेज्जा, णो अण्णमण्णस्स देज्जा, णो पामिच्चं कुज्जा, णो वत्थेण वत्थपरिणामं

करेज्जा, णो परं उवसंक्रमित्ता एवं वएज्जा “आउसंतो समणा अभिकंखसि वत्थं धारेत्तए परिहरित्तए वा” थिरं वा णं संतं णो पळिच्छिदिय २ परिट्ठवेज्जा, तहप्पगारं ससंथितं वत्थं तस्स चेव णिसिरेज्जा, णो अत्ताणं साइजेज्जा ॥ ८३४ ॥ से एगइओ तहप्पगारं णिग्घोसं सोच्चा णिसम्म जे भयंतारो तहप्पगाराणि वत्थाणि ससंधियाणि मुहुत्तगं २ जाइत्ता जाव एगाहेण वा जाव पंचाहेण वा विप्पवसिय विप्पवसिय उवागच्छंति, तहप्पगाराणि वत्थाणि णो अप्पणा गिण्हंति. नो अण्णमण्णस्स दळयंति अणुवयंति, तं चेव जाव णो साइज्जंति बहुवयणेण भाणियक्वं ॥ ८३५ ॥ से हंता “अहमवि मुहुतं पाडिहारियं वत्थं जाइत्ता जाव एगाहेण वा जाव पंचाहेण वा विप्पवसिय २ उवागच्छिस्सामि, अवियाइं एयं ममेव सिया” माइट्ठाणं संकासे णो एवं करिज्जा ॥ ८३६ ॥ पुण णो वण्णमंताइं वत्थाइं विवण्णाइं करेज्जा, णो विवण्णाइं वण्णमंताइं करेज्जा, “अन्नं वा वत्थं लभिस्सामि त्ति” कट्ठु नो अण्णमण्णस्स दिज्जा, णो पामिच्चं कुज्जा, णो वत्थेण वत्थपरिणामं कुज्जा, णो परं उवसंक्रमित्तु एवं वएज्जा, “आउसंतो समणा अभिकंखसि मे वत्थं धारित्तए वा परिहरित्तए वा” थिरं वा णं संतं णो पळिच्छिदिय २ परिट्ठविज्जा, जहा मेयं वत्थं पावगं परो मन्नइ, परं च णं अदत्तहारिं पडिपहे पेहाए तस्स वत्थस्स णिदाणाए णो तेसिं भीओ उम्मग्गेणं गच्छेज्जा । जाव अप्पुस्सुए तओ संजयामेव गामाणुगामं दूइज्जिज्जा ॥ ८३७ ॥ से भिक्खू वा (२) गामाणुगामं दूइज्जमाणे अंतरा से विहं सिया से जं पुण विहं जाणिज्जा, इमंसि खलु विहंसि बहवे आमोसगा वत्थपडियाए संपिडिया गच्छेज्जा णो तेसिं भीओ उम्मग्गेणं गच्छेज्जा, जाव गामाणुगामं दूइजेज्जा ॥ ८३८ ॥ पुण गामाणुगामं दूइज्जमाणे अंतरा से आमोसगा पडियागच्छेज्जा, ते णं आमोसगा एवं वएज्जा “आउसंतो समणा आहरेयं वत्थं देहि निक्खिवाहि” जहा इरियाए णाणत्तं वत्थपडियाए ॥ ८३९ ॥ एयं खलु तस्स भिक्खुस्स भिक्खुणीए वा सामग्गियं ॥ ८४० ॥ वत्थेसणाज्झयणे बीओइेसो ॥ पंचमं वत्थेसणाज्झयणं समत्तं ॥

से भिक्खू वा (२) अभिकंखिज्जा पायं एसित्तए, से जं पुण पायं जाणिज्जा तंजहा अलाउयपायं वा दारुपायं मट्ठियापायं वा तहप्पगारं पायं जे णिमग्गे तस्से जाव थिरसंघयणे से एणं पायं धारेज्जा णो बीयं ॥ ८४१ ॥ पुण परं अद्वजोयणमेराए पायपडियाए णो अभिसंधारेज्जा गमणाए ॥ ८४२ ॥ से जं पुण पायं जाणिज्जा अस्सिपडियाए एणं साहम्मियं समुद्दिस्स पाणाइं ४ जहा पिंडेसणाए चत्तारि

आलावगा, पंचमे बहवे समणमाहणा पगणिय २ तहेव ॥ ८४३ ॥ पुण असंजए भिक्खुपडियाए बहवे समणमाहणा (वत्थेसणाऽऽलावओ) ॥ ८४४ ॥ से भिक्खु वा (२) से जाई पुण पादाई जाणिज्जा विरुवरुवाई महद्धणमुल्लाई तंजहा-अयपादाणि वा तउ० तंबपादाणि वा सीसग-हिरण-सुवण-रीरिय-हारपुड-पायाणि वा मणि-काय-कंस-संख-सिंग-दंत-चेल-सेल-पायाणि वा चम्मपायाणि वा अण्णयराणि वा तहप्पगाराई विरुवरुवाई महद्धणमुल्लाई पायाई अफासुयाई जाव णो पडिग्गा-हेज्जा ॥ ८४५ ॥ से भिक्खु वा (२) से जाई पुण पायाई जाणिज्जा, विरुवरुवाई महद्धणबंधणाई तं० अयबंधणाणि वा जाव चम्मबंधणाणि वा अन्नयराई तहप्पगाराई महद्धणबंधणाई अफासुयाई जाव णो पडिग्गाहेज्जा, इच्चेइयाई आयतणाई उवातिकम्म ॥ ८४६ ॥ अह भिक्खु जाणिज्जा चउहिं पडिमाहिं पायं एसित्तए, तत्थ खल्ल इमा पढमा पडिमा से भिक्खु वा (२) उद्दिसिय २ पायं जाएज्जा, तंजहा-अलाउयपायं वा दारुपायं वा मट्टियापायं वा तहप्पगारं पायं सयं वा णं जाएज्जा, जाव पडिगाहिज्जा ॥ **पढमा-पडिमा** ॥ ८४७ ॥ **अहावरा दोच्चा पडिमा**, से भिक्खु वा (२) पेहाए पायं जाएज्जा, तंजहा-गाहावई वा जाव कम्मकरिं वा से पुव्वामेव आलोएज्जा, “आउसो त्ति वा भइणि त्ति वा दाहिंसि मे एत्तो अण्णयरं पायं, तंजहा-अलाउयपायं वा” जाव तहप्पगारं पायं सयं वा णं जाएज्जा, परो वा से देज्जा जाव पडिगाहेज्जा ॥ **दोच्चा पडिमा** ॥ ८४८ ॥ **अहावरा तच्चा पडिमा** ॥ से भिक्खु वा (२) से जं पुण पायं जाणिज्जा, संगतियं वा वेजइयंतियं वा तहप्पगारं पायं सयं वा जाव पडिगाहिज्जा ॥ **तच्चा पडिमा** ॥ ८४९ ॥ **अहावरा चउत्था पडिमा** ॥ से भिक्खु वा (२) उज्झियधम्मियं पायं जाएज्जा, जं चउत्थे बहवे समणमाहणा जाव वणीमगा णावकं खंति, तहप्पगारं पायं सयं वा णं जाव पडिगाहिज्जा, **चउत्था पडिमा** ॥ ८५० ॥ इच्चेयाणं चउत्थं पडिमाणं अण्णयरं पडिमं (जहा पिंडेसणाए) ॥ ८५१ ॥ से णं एताए एसणाए एसमाणं पासित्ता परो वएज्जा, “आउसंतो समणा एज्जासि तुमं मासेण वा जाव” **जहा वत्थेसणाए** ॥ ८५२ ॥ से णं परो नेया वएज्जा, आउसो त्ति वा भइणि त्ति वा आहरेयं पायं तेल्लेण वा घएण वा अब्भंगेत्ता वा तहेव सिणाणाइ तहेव सीओदगकंदाई तहेव ॥ ८५३ ॥ से णं परो नेया वएज्जा, “आउसंतो समणा मुहुत्तगं २ अच्छाहि जाव ताव अम्हे असणं वा उवकरेंसु उव-क्खडेंसु वा, तो ते वयं आउसो सपाणं सभोयणं पडिग्गहगं दाहामो, तुच्छए पडिग्गहए दिण्णे समणस्स णो सुट्ठु साहु भवइ” से पुव्वामेव आलोएज्जा आउसो

त्ति वा भइणि त्ति वा, णो खलु मे कप्पइ आहाकम्मिए असणे वा पाणे वा खाइमे वा साइमे वा भोत्तए वा पायए वा मा उवकरेहि मा उवक्खडेहि, अभिक्खसि मे दाउं एमेव दलयाहि से सेवं वयंतस्स परो असणं वा जाव उवकरित्ता उवक्खडित्ता, सपाणगं सभोयणं पडिग्गहगं दलएज्जा तहप्पगारं पडिग्गहं अफासुयं जाव णो पडिगाहेज्जा ॥ ८५४ ॥ सिया से परो उवणेत्ता पडिग्गहं णिसिरेज्जा से पुव्वामेव आलोएज्जा आउसो त्ति वा भइणि त्ति वा तुमं चेव णं संतियं पडिग्गहगं अंतोअंतेणं पडिलेहिस्सामि ॥ ८५५ ॥ केवली बूया 'आयाणमेयं' अंतो पडिग्गहंसि पाणाणि वा बीयाणि वा हरियाणि वा जाव अह भिक्खूणं एस पइण्णा जं पुव्वामेव पडिग्गहगं अंतोअंतेणं पडिलेहिज्जा ॥ ८५६ ॥ सअंडाईं सव्वे आलावगा भाणियव्वा जहा वत्थेसणाए, णाणत्तं तेत्थेण वा घएण वा सिणाणाइ जाव अण्णयरंसि वा तहप्पगारंसि थंडिलंसि पडिलेहिय २ पमज्जिय २ तओ संजयामेव आमज्जिजा ॥ ८५७ ॥ एयं खलु तस्स भिक्खुस्स भिक्खुणीए वा सामग्गियं जं सव्वट्ठेहिं सहिएहिं सया जएज्जासि त्ति वेमि ॥ ८५८ ॥ पत्तेसणाज्झयणे पढमोद्देसो समत्तो ॥

से भिक्खू वा (२) गाहावइकुलं पिंडवायपडियाए पविट्ठे समाणे, पुव्वामेव पेहाए पडिग्गहगं अवहट्ठु पाणे पमज्जिय रयं ततो संजयामेव गाहावइकुलं पिंडवाय पडियाए णिक्खमेज्ज वा पविसेज्ज वा ॥ ८५९ ॥ केवली बूया 'आयाणमेयं' अंतो पडिग्गहगंसि पाणे वा बीए वा रए वा परियावज्जेज्जा अह भिक्खूणं पुव्वोवदिट्ठा एस पइण्णा जं पुव्वामेव पेहाए पडिग्गहं अवहट्ठु पाणे पमज्जिय रयं तओ संजयामेव गाहावइकुलं पिंडवायपडियाए पविसेज्ज वा णिक्खमेज्ज वा ॥ ८६० ॥ से भिक्खू वा (२) गाहावइ० जाव० समाणे सिया से परो आहट्ठु अंतो पडिग्गहगंसि सीओदगं परिभाएत्ता णीहट्ठु दलएज्जा तहप्पगारं पडिग्गहं परहत्थंसि वा परपायंसि वा अफासुयं जाव णो पडिग्गहज्जे ॥ ८६१ ॥ सेय आहच्च पडिग्गहिए सिया से खिप्पामेव उदगंसि साहरिज्जा, से पडिग्गहमायाए पाणं परिट्ठवेज्जा, ससणिद्धाए वा भूमीए णियमिज्जा ॥ ८६२ ॥ से भिक्खू वा (२) उदउल्लं वा ससिणिद्धं वा पडिग्गहं णो आमज्जिज्ज वा जाव पयावेज्ज वा ॥ ८६३ ॥ अह पुण एवं जाणिज्जा-विगओदए मे पडिग्गहए छिण्णसिणेहे तहप्पगारं पडिग्गहं तओ संजयामेव आमज्जिज्ज वा जाव पयाविज्ज वा ॥ ८६४ ॥ से भिक्खू वा (२) गाहावइकुलं वा० पविसिउकामे से पडिग्गहमायाए गाहा० पिंडवायपडियाए पविसिज्ज वा णिक्खमिज्ज वा एवं बहिया विचारभूमि वा विहारभूमि वा गामाणुगामं द्दुज्जिज्जा ॥ ८६५ ॥ तिक्वदेसियाए जहा बिइयाए वत्थेसणाए णवरं एत्थ पडिग्गहे ॥ ८६६ ॥

एयं खलु तस्स भिक्खुस्स भिक्खुणीए वा सामगियं जं सव्वट्ठेहिं सहिए सया
जएजासि ति बेसि ॥ ८६७ ॥ पत्तेसणाज्झयणे वीओहेसो समत्तो ॥
छट्ठं पत्तेसणाज्झयणं समत्तं ॥

समणे भविस्सामि अणगारे अकिंचणे अपुत्ते अपसू परदत्तभोई पावं कम्मं
णो करिस्सामि ति समुट्ठाए सव्वं भंते अदिण्णादाणं पच्चक्खामि ॥ ८६८ ॥
से अणुपविसित्ता गामं वा जाव० णेव सयं अदिन्नं गिण्हिज्जा, णेवण्णेणं अदिण्णं
गिण्हावेज्जा, णेवण्णेणं अदिण्णं गिण्हंतं समणुजाणेज्जा । जेहिवि सद्धिं संपव्वइए
तेसिं पुव्वामेव उग्गहं अणुणविय अपडिलेहिय अपमज्जिय णो गिण्हेज्ज वा
पगिण्हेज्ज वा तेसिं पुव्वामेव उग्गहं जाइज्जा अणुणविय पडिलेहिय पमज्जिय
तओ सं० उगिण्हिज्ज वा पगिण्हिज्ज वा ॥ ८६९ ॥ से आगंतारेसु वा (४)
अणुवीइ उग्गहं जाएज्जा, जे तत्थ ईसरे जे तत्थ समहिट्ठाए ते उग्गहं अणु-
णवेज्जा कामं खलु आउसो अहालंदं अहापरिण्णातं वसामो जाव आउसंतस्स
उग्गहे जाव साहम्मिया एइ ताव उग्गहं गिण्हिस्सामो तेण परं विहरिस्सामो
॥ ८७० ॥ से किं पुण तत्थोग्गहंसि एवोग्गहियंसि ? जे तत्थ साहम्मिया
संभोइया समणुण्णा उवागच्छेज्जा, जे तेण सयमेसित्तए असणे वा (४) तेण
ते साहम्मिया संभोइया समणुण्णा उवणिमंतेज्जा, णो चेव णं परवडियाए उगि-
ज्झिय २ उवणिमंतेज्जा ॥ ८७१ ॥ से आगंतारेसु वा (४) जाव से किं पुण
तत्थोग्गहंसि एवोग्गहियंसि, जे तत्थ साहम्मिया अण्णसंभोइया समणुण्णा उवाग-
च्छेज्जा जे तेणं सयमेसित्तए पीढे वा फलए वा सेज्जासंथारए वा, तेण ते साह-
म्मिए अण्णसंभोइए समणुजे उवणिमंतेज्जा णो चेव णं परवडियाए उगिज्झिय २
उवणिमंतेज्जा ॥ ८७२ ॥ से आगंतारेसु वा (४) जाव से किं पुण तत्थोग्गहंसि
एवोग्गहियंसि जे तत्थ गाहावईण वा गाहावइपुत्ताण वा सई वा पिप्पलए वा कण्ण-
सोहणए वा णहच्छेयणए वा अप्पणो तं एगस्स अट्ठाए पाडिहारियं जाइत्ता णो
अण्णमण्णस्स देज्ज वा अणुपदेज्ज वा सयं करणिज्जं ति कट्ठु से तमादाए तत्थ
गच्छेज्जा गच्छित्ता पुव्वामेव उत्ताणए हत्थे ति कट्ठु भूमीए वा ठवेत्ता 'इमं खलु
इमं खलु' ति आलोएज्जा, णो चेव णं सयं पाणिणा परपाणिंसि पच्चप्पिणेज्जा
॥ ८७३ ॥ से भिक्खु वा (२) से जं पुण उग्गहं जाणिज्जा अणंतरहियाए पुढवीए
ससणिद्धाए पुढवीए जाव संताणाए तहप्पगारं उग्गहं णो उगिण्हेज्ज वा पगिण्हेज्ज
वा ॥ ८७४ ॥ से भिक्खु वा (२) से जं पुण उग्गहं जाणिज्जा थूणंसि वा (४)
तहप्पगारे अंतलिकखजाए दुब्बद्धे जाव णो उग्गहं उगिण्हेज्ज वा पगिण्हेज्ज वा

॥ ८७५ ॥ से भिक्खू वा (२) से जं पुण उग्गहं जाणिज्जा कुलियंसि वा जाव णो उगिण्हेज्ज वा (२) ॥ ८७६ ॥ से भिक्खू वा (२) खंधंसि वा अण्णयरे वा तहप्पगारे जाव णो उगिण्हेज्ज वा (२) ॥ ८७७ ॥ से जं पुण उग्गहं जाणिज्जा ससागारियं सागणियं सउदयं सइत्थि सखुडं सपसुं सभत्तपागं णो पण्णस्स णिक्खम-
णपवेसे जाव धम्माणोओगचिताए सेवं णच्चा तहप्पगारे उवस्सए ससागारिए जाव सखुड-पसु-भत्तपाणे णो उग्गहं उगिण्हेज्जा वा २ ॥ ८७८ ॥ से भिक्खू वा (२) से जं पुण उग्गहं जाणिज्जा गाहावइकुलस्स मज्झमज्झेणं गंतुं पंथे पडिबद्धं वा णो पण्णस्स जाव से एवं णच्चा तहप्पगारे उवस्सए णो उग्गहं उगिण्हेज्ज वा २ ॥ ८७९ ॥ से भिक्खू वा (२) से जं पुण उग्गहं जाणिज्जा, इह खलु गाहावइ वा जाव कम्मकरीओ वा अण्णमण्णं अक्कोसंति वा तहेव तेह्णसिणाण-सीओदगवि-
यडणिगिणाइ य जहा सिज्जाए आलावगा णवरं उग्गहवत्तवया ॥ ८८० ॥ से भिक्खू वा (२) से जं पुण उग्गहं जाणिज्जा आइण्णसंलिक्खे णो पण्णस्स जाव चिताए, तहप्पगारे उवस्सए णो उग्गहं उगिण्हेज्ज वा २ ॥ ८८१ ॥ एयं खलु तस्स भिक्खुस्स २ सामगियं ॥ ८८२ ॥ उग्गहपडिमाज्झयणे पढमोदेसो ॥

से आगतारेसु वा (४) अणुवीइ उग्गहं जाएज्जा, जे तत्थ ईसरे समहिट्ठाए ते उग्गहं अणुणविज्जा कामं खलु आउसो अहालदं अहा परिणायं वसामो जाव आउसो, आउसंतस्स उग्गहे जाव साहम्मियाए ताव उग्गहं उगिण्हेज्जसामो तेण परं विहरिस्सामो ॥ ८८३ ॥ से किं पुण तत्थ उग्गहंसि एवोग्गहियंसि ? जे तत्थ समणाण वा माहणाण वा दंडए वा छत्तए वा जाव चम्मछेदणए वा तं णो अंतो-
हिंतो बाहिं णीणेज्जा, बहियाओ वा णो अंतो पवेसेज्जा, णो सुत्तं वा णं पडिबोहेज्जा, णो तेसिं किंचिवि अप्पत्तियं पडिणीयं करेज्जा ॥ ८८४ ॥ से भिक्खू वा (२) अभिक्खेज्जा अंबवणं उवागच्छित्तए जे तत्थ ईसरे जे तत्थ समहिट्ठाए ते उग्गहं अणुजाणावेज्जा, कामं खलु जाव विहरिस्सामो ॥ ८८५ ॥ से किं पुण तत्थोग्ग-
हंसि एवोग्गहियंसि अह भिक्खु इच्छेज्जा अंबं भोत्तए वा से जं पुण अंबं जाणिज्जा सअंडं जाव ससंताणं तहप्पगारं अंबं अफासुयं जाव णो पडिगाहिज्जा, ॥ ८८६ ॥ से भिक्खू वा (२) से जं पुण अंबं जाणिज्जा, अप्पंडं जाव अप्पसंताणगं अति-
रिच्छछिन्नं अवोच्छिन्नं अफासुयं जाव णो पडिगाहिज्जा ॥ ८८७ ॥ से भिक्खू वा (२) से जं पुण अंबं जाणिज्जा, अप्पंडं जाव संताणगं तिरिच्छछिण्णं वोच्छिन्नं फासुयं जाव पडिगाहिज्जा ॥ ८८८ ॥ से भिक्खू वा (२) अभिक्खेज्जा अंबभि-
त्तगं वा अंबपेसियं वा अंबचोयगं वा अंबसालगं वा अंबडालगं वा

भोत्तए वा पायए वा से जं पुण जाणिज्जा, अंबभित्तगं वा जाव अंबडालगं वा सअंडं जाव संताणगं अफासुयं जाव णो पडिग्गाहिज्जा ॥ ८८९ ॥ से भिक्खू वा (२) से जं पुण जाणिज्जा, अंबभित्तगं वा जाव, अप्पंडं जाव संताणगं अतिरिच्छच्छिन्नं वा अवोच्छिन्नं वा अफासुयं जाव णो पडिग्गाहिज्जा ॥ ८९० ॥ से भिक्खू वा (२) से जं पुण जाणिज्जा अंबभित्तगं वा जाव, अप्पंडं जाव संताणगं तिरिच्छच्छिन्नं वोच्छिन्नं फासुयं जाव पडिग्गाहिज्जा ॥ ८९१ ॥ से भिक्खू वा (२) अभिकंखेज्जा उच्छुवणं उवागच्छित्तए जे तत्थ ईसरे जाव उग्गहंसि ॥ ८९२ ॥ अहं भिक्खू इच्छेज्जा उच्छुं भोत्तए वा पायए वा से जं उच्छुं जाणिज्जा, सअंडं जाव णो पडिग्गाहिज्जा ॥ अतिरिच्छच्छिन्नं तहेव, तिरिच्छच्छिन्ने वि तहेव ॥ ८९३ ॥ से भिक्खू वा (२) से जं पुण अभिकंखेज्जा अंतरुच्छुयं उच्छु-गंडियं वा उच्छुचोयगं वा उच्छुसालगं वा उच्छुडालगं वा सअंडं जाव णो पडिग्गाहिज्जा ॥ ८९४ ॥ से भिक्खू वा (२) से जं पुण जाणिज्जा, अंतरुच्छुयं वा जाव डालगं वा सअंडं जाव णो पडिग्गाहिज्जा ॥ ८९५ ॥ से भिक्खू वा (२) से जं पुण जाणिज्जा अंतरुच्छुयं वा जाव डालगं वा अप्पंडं जाव णो पडिग्गाहिज्जा, अतिरिच्छच्छिन्नं तहेव ॥ ८९६ ॥ तिरिच्छच्छिन्नं तहेव पडिग्गाहिज्जा ॥ ८९७ ॥ से भिक्खू वा (२) आगंतारेसु वा (४) जाव उग्गहियंसि जे तत्थ, गाहावईण वा गाहावइपुत्ताण वा इच्चेयाई आयतणाई उवाइकम्म ॥ ८९८ ॥ अहं भिक्खू जाणिज्जा इमाहिं सत्ताहिं पडिमाहिं उग्गहं उग्गिहित्तए ॥ ८९९ ॥

पडिमा पडिमा, से आगंतारेसु वा (४) अणुवीइ उग्गहं जाएज्जा जाव० विहरिस्सामो ॥ ९०० ॥ **दोच्चा पडिमा**, जस्सणं भिक्खुस्स एवं भवइ “अहं च खलु अण्णेसिं भिक्खूणं अट्ठाए उग्गहं उग्गिहिस्सामि, अण्णेसिं भिक्खूणं उग्गहिए उग्गहे उवलिस्सामि, ॥ ९०१ ॥ **तच्चा पडिमा**, जस्सणं भिक्खुस्स एवं भवइ “अहं च खलु अण्णेसिं भिक्खूणं अट्ठाए उग्गहं उग्गिहिस्सामि, अण्णेसिं च उग्गहिए उग्गहे णो उवलिस्सामि ॥ ९०२ ॥ **चउत्था पडिमा**, जस्सणं भिक्खुस्स एवं भवइ “अहं च खलु अण्णेसिं भिक्खूणं अट्ठाए उग्गहं णो उग्गिहिस्सामि अण्णेसिं च उग्गहे उग्गहिए उवलिस्सामि ॥ ९०३ ॥ **पंचमा पडिमा**, जस्सणं भिक्खुस्स एवं भवइ, अहं च खलु अप्पणो अट्ठाए उग्गहं उग्गिहिस्सामि, णो दोण्हं, णो तिण्हं, णो चउण्हं, णो पंचण्हं, ॥ ९०४ ॥ **छट्ठा पडिमा**, जस्सेव उग्गहे उवलि-एज्जा, जे तत्थ अहा समण्णागए, तंजहा-इक्कडे जाव पलाढे वा तस्स लोभे संवसेज्जा, तस्स अलाभे उक्कुडुए वा णेसज्जिए वा विहरेज्जा ॥ ९०५ ॥ **सत्तमा**

पडिमा, से भिक्खू वा, अहासंथडमेव उग्गहं जाएज्जा, तंजहा-पुढविसिलं वा, कट्टसिलं वा, अहासंथडमेव तस्स लाभे संवसेज्जा, तस्स अलाभे उकुडुओ वा णेसज्जिओ वा, विहरेज्जा ॥ ९०६ ॥ इच्चेसिं सत्तण्हं पडिमाणं अण्णयरं, जहा पिडे-सणाए ॥ ९०७ ॥ सुयं मे आउसं तेणं भगवया एवमक्खायं इह खलु थेरेहिं भगवंतेहिं पंचविहे उग्गहे पण्णत्ते, तंजहा-देविदोगगहे, रायोगगहे, गाहावइउग्गहे, सागारियउग्गहे, साहम्मियउग्गहे ॥ ९०८ ॥ एवं खलु तस्स भिक्खुस्स २ सामग्गियं ॥ ९०९ ॥ **उग्गहपडिमाज्झयणे वीओदेसो समत्तो ॥ सत्तमं उग्गहपडिमाज्झयणं समत्तं, पढमा चूडा समत्ता ॥**

से भिक्खू वा (२) अभिक्खेज्जा ठाणं ठाइत्तए से अणुपविसिज्जा, गामं वा, नगरं वा, जाव सण्णिवेसं वा, से अणुपविसित्ता, गामं वा जाव सण्णिवेसं वा, से जं पुण ठाणं जाणिज्जा, सअंडं जाव समक्कडासंताणयं तं तहप्पगारं ठाणं अफासुयं अणेसणिज्जं लाभे संते णो पडिगाहिज्जा, एवं सेज्जागमेण णेयव्वं, जाव उदयपसूया-इंति ॥ ९१० ॥ इच्चेयाइं आयतणाइं उवातिकम्म अह भिक्खू इच्छेज्जा, चउहिं पडिमाहिं ठाणं ठाइत्तए ॥ ९११ ॥ **पढमा पडिमा**-अचित्तं खलु उवसज्जेज्जा अवलंबेज्जा काएण विपरिकम्मादि सवियारं ठाणं ठाइस्सामि ॥” ॥ ९१२ ॥ **दोच्चा पडिमा**-अचित्तं खलु उवसज्जेज्जा अवलंबेज्जा काएण विपरिकम्माइ णो सवियारं ठाणं ठाइस्सामि ॥ ९१३ ॥ **तच्चा पडिमा**-अचित्तं खलु उवसज्जेज्जा अवलंबेज्जा णो काएण, विपरिकम्माइं णो सवियारं ठाणं ठाइस्सामि ति ॥ ९१४ ॥ **चउत्था पडिमा**-अचित्तं खलु उवसज्जेज्जा, णो अवलंबेज्जा काएण, णो विपरिकम्माइं णो सवियारं ठाणं ठाइस्सामि ति वोसठ्ठकाए वोसठ्ठकेसमंसुलोमणहे सणिरुद्धं वा ठाणं ठाइस्सामि ति ॥ ९१५ ॥ इच्चेयासिं चउण्हं पडिमाणं जाव पग्गहियतरायं विहरेज्जा, णो तत्थ किंचिवि वएज्जा ॥ ९१६ ॥ एयं खलु तस्स भिक्खुस्स २ वा सामग्गियं जाव जएज्जासि ति बेमि ॥ ९१७ ॥ **ठाणसत्तिकयं अट्टमं अज्झयणं समत्तं, पढमं सत्तिकयं समत्तं ॥**

से भिक्खू वा (२) अभिक्खेज्जा णिसीहियं फासुयं गमणाए से पुण णिसीहियं जाणिज्जा, सअंडं सपाणं जाव मक्कडासंताणयं तहप्पगारं णिसीहियं अणेसणिज्जं लाभे संते णो चेतिस्सामि ॥ ९१८ ॥ से भिक्खू वा (२) अभिक्खेज्जा णिसीहियं गमणाए से जं पुण णिसीहियं जाणिज्जा अप्पंडं अप्पपाणं जाव मक्कडासंताणयं तहप्पगारं णिसीहियं फासुयं एसणिज्जं लाभे संते चेतिस्सामि एवं सेज्जागमेणं

णैयव्वं जाव उदगप्पसूयाई ॥ ९१९ ॥ जे तत्थ दुवग्गा जाव पंचवग्गा वा अभिसंधारेंति णिसीहियं गमणाए ते णो अण्णमण्णस्स कायं आलिंगेज वा विलिंगेज वा चुबेज वा दंतेहिं णहेहिं वा अच्छिदेज वा वुच्छिदेज वा ॥ ९२० ॥ एयं खलु तस्स भिक्खुस्स (२) वा सामग्गियं जं सव्वट्ठेहिं सहिए समिए सया जएज्जा सेयमिणं मण्णिज्जासि ति वेमि ॥ ९२१ ॥ **णवमं णिसीहियाज्झयणं समत्तं, णिसीहियासत्तिकयं समत्तं वीयं ॥**

से भिक्खू वा (२) उच्चारपासवणकिरियाए उब्बाहिज्जमाणे सयस्स पायपुंछ-
णस्स असईए तओ पच्छा साहम्मियं जाएज्जा ॥ ९२२ ॥ से भिक्खू वा (२)
से जं पुण थंडिलं जाणिज्जा सअंडं सपाणं जाव मक्कडासंताणयं तहप्पगारंसि
थंडिलंसि णो उच्चारपासवणं वोसिरेज्जा ॥ ९२३ ॥ से भिक्खू वा (२) से जं पुण
थंडिलं जाणिज्जा, अप्पपाणं अप्पवीयं जाव मक्कडासंताणयं तहप्पगारंसि थंडिलंसि
उच्चारपासवणं वोसिरेज्जा ॥ ९२४ ॥ से भिक्खू वा (२) से जं पुण थंडिलं
जाणिज्जा, अरंसिपडियाए एणं साहम्मियं समुद्दिस्स अरंसिपडियाए बहवे साह-
म्मिया समुद्दिस्स अरंसिपडियाए एणं साहम्मिणिं समुद्दिस्स अरंसि पडियाए बहवे
साहम्मिणीओ समुद्दिस्स अस्सि० बहवे समणमाहणवणीमया पगणिय पगणिय
समुद्दिस्स पाणाई (४) जाव उद्देसियं चेतेति, तहप्पगारं थंडिलं पुरिसंतरकडं
जाव बहिया णीहडं वा अनीहडं वा अण्णयरंसि वा तहप्पगारंसि थंडिलंसि णो
उच्चारपासवणं वोसिरेज्जा ॥ ९२५ ॥ से भिक्खू वा (२) से जं पुण थंडिलं
जाणिज्जा, बहवे समणमाहणकिवणवणीमगअतिही समुद्दिस्स पाणाई (४) जाव
उद्देसियं चेतेति, तहप्पगारं थंडिलं अपुरिसंतरकडं जाव बहिया अणीहडं वा
अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९२६ ॥
अह पुण एवं जाणिज्जा, पुरिसंतरकडं जाव बहिया णीहडं वा अण्णयरंसि तहप्प-
गारंसि थंडिलंसि उच्चारपासवणं वोसिरेज्जा ॥ ९२७ ॥ से भिक्खू वा (२) से
जं पुण थंडिलं जाणिज्जा, अरंसिपडियाए कयं वा कारियं वा पामिच्चियं वा छण्णं
वा घट्ठं वा मट्ठं वा लित्तं वा संपधूमियं वा अण्णयरंसि तहप्पगारंसि थंडिलंसि णो
उच्चारपासवणं वोसिरेज्जा ॥ ९२८ ॥ से भिक्खू वा (२) से जं पुण थंडिलं
जाणिज्जा, इह खलु गाहावइ वा गाहावइपुत्ता वा कंदाणि वा मूलाणि वा जाव
हरियाणि वा अंतराओ वा बाहिं णीहरंति बहियाओ वा अंतो साहरंति अण्णयरंसि
वा तहप्पगारंसि थंडिलंसि णो उच्चारपासवणं वोसिरेज्जा ॥ ९२९ ॥ से भिक्खू वा
(२) से जं पुण थंडिलं जाणिज्जा, खंधंसि वा पीडंसि वा मंचंसि वा मारुंसि वा

अट्टंसि वा पासायंसि वा अण्णयरंसि वा थंडिलंसि णो उच्चारपासवणं वोसिरेज्जा ॥ ९३० ॥ से भिक्खू वा (२) से जं पुण थंडिलं जाणिज्जा, अणंतरहियाए पुढवीए ससिणिद्वाए पुढवीए ससरक्खाए पुढवीए मट्टियामक्कडाए चित्तमंताए सिलाए चित्तमंताए लेलुयाए कोलावासंसि वा दास्यंसि वा जीवपइट्ठियंसि वा जाव मक्कडासंताणयंसि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३१ ॥ से भिक्खू वा (२) से जं पुण थंडिलं जाणिज्जा, इह खलु गाहावइ वा गाहावइ पुत्ता वा कंदाणि वा जाव बीयाणि वा परिसाडेंसु वा परिसाडिंति वा परिसाडिस्संति वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३२ ॥ से भिक्खू वा (२) से जं पुण थंडिलं जाणिज्जा, इह खलु गाहावइ वा गाहावइपुत्ता वा सालीणि वा वीहीणि वा मुग्गाणि वा मासाणि वा कुलत्थाणि वा जवाणि वा जवजवाणि वा पतिरिंसु वा पतिरिंति वा पतिरिस्संति वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३३ ॥ से भिक्खू वा (२) से जं पुण थंडिलं जाणिज्जा, आमोयाणि वा घासाणि वा भिलुयाणि वा विज्जलयाणि वा खाणुयाणि वा कडयाणि वा पगडाणि वा दरीणि वा पदुग्गाणि वा समाणि वा विसमाणि वा अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३४ ॥ से भिक्खू वा (२) से जं पुण थंडिलं जाणिज्जा, माणुसरंधणाणि वा, महिसकरणाणि वा, वसभकरणाणि वा, अस्सकरणाणि वा, कुक्कुडकरणाणि वा, मक्कडकरणाणि वा लावयकरणाणि वा, वट्टयकरणाणि वा, तित्तिरकरणाणि वा, कवोयकरणाणि वा, कर्पिजलकरणाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३५ ॥ से भिक्खू वा (२) से जं पुण थंडिलं जाणिज्जा, वेहाणसट्ठाणेषु वा, गिद्धपिट्ठाणेषु वा, तरुपडण्ठाणेषु वा, मेरुपडण्ठाणेषु वा, विसभक्खणयट्ठाणेषु वा, अगणिपडण्ठाणेषु वा अण्णयरंसि वा तहप्पगारंसि णो उच्चारपासवणं वोसिरेज्जा ॥ ९३६ ॥ से भिक्खू वा (२) से जं पुण थंडिलं जाणिज्जा, आरामाणि वा, उज्जाणाणि वा, वणाणि वा वणसंडाणि वा, देवकुलाणि वा, सभाणि वा, पवाणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३७ ॥ से भिक्खू वा (२) से जं पुण थंडिलं जाणिज्जा, अट्टालयाणि वा, चरियाणि वा, दाराणि वा, गोपुराणि वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेज्जा ॥ ९३८ ॥ से भिक्खू वा (२) से जं पुण थंडिलं जाणिज्जा, तिगाणि वा, चउक्काणि वा, चच्चराणि वा, चउमुहाणि वा, अण्णयरंसि वा तहप्पगारंसि थंडिलंसि णो उच्चारपासवणं

वोसिरेजा ॥ ९३९ ॥ से भिक्खू वा (२) से जं पुण थंडिलं जाणिज्जा, इंगार-
डाहेसु वा, खारडाहेसु वा, मडयडाहेसु वा, मडयथूभियासु वा, अण्णयरंसि वा
तहप्पगारंसि थंडिलंसि णो उच्चारपासवणं वोसिरेजा ॥ ९४० ॥ से भिक्खू वा
(२) से जं पुण थंडिलं जाणिज्जा णदियाययणेसु वा, पंकाययणेसु वा, ओघाय-
यणेसु वा, सेयणवहंसि वा, अण्णयरंसि वा तहप्पगारंसि थंडिलंसि णो उच्चारपा-
सवणं वोसिरेजा ॥ ९४१ ॥ से भिक्खू वा (२) से जं पुण थंडिलं जाणिज्जा,
णवियासु वा मट्टियखाणियासु णवियासु गोप्पहिलियासु वा, गवाणीसु वा, खाणीसु
वा, अण्णयरंसि वा तहप्पगारंसि थंडिलंसि णो उच्चारपासवणं वोसिरेजा ॥ ९४२ ॥
से भिक्खू वा (२) से जं पुण थंडिलं जाणिज्जा, डागवच्चंसि वा, सागवच्चंसि वा,
मूलगवच्चंसि वा, हत्थंकरवच्चंसि वा, अण्णयरंसि वा तहप्पगारंसि थंडिलंसि णो
उच्चारपासवणं वोसिरेजा ॥ ९४३ ॥ से भिक्खू वा (२) से जं पुण थंडिलं
जाणिज्जा, असणवणंसि वा, सणवणंसि वा, धायइवणंसि वा, कैयइवणंसि वा,
अंबवणंसि वा, असोगवणंसि वा, णागवणंसि वा, पुण्णागवणंसि वा, चुल्लगवणंसि
वा, अण्णयरेसु वा तहप्पगारेसु वा पत्तोवेएसु वा, पुप्फोवेएसु वा, फलोवेएसु वा,
बीओवेएसु वा, हरिओवेएसु वा णो उच्चारपासवणं वोसिरेजा ॥ ९४४ ॥ से
भिक्खू वा (२) सयपाययं वा परपाययं वा गहाय सेतमायाए एगंतमवक्कमेज्जा,
अणावार्यंसि असंलोइयंसि अप्पपाणंसि जाव मक्कडासंताणयंसि अहारामंसि वा
उवस्सयंसि तओ संजयामेव उच्चारपासवणं वोसिरेजा, उच्चारपासवणं वोसिरित्ता
सेतमायाए एगंतमवक्कमे अणाबाहंसि जाव मक्कडासंताणयंसि अहारामंसि वा,
ज्झामथंडिलंसि वा, अण्णयरंसि वा तहप्पगारंसि थंडिलंसि अचित्तंसि तओ संजया-
मेव उच्चारपासवणं परिट्ठवेज्जा ॥ ९४५ ॥ एयं खलु तस्स भिक्खुस्स २ वा साम-
ग्गियं जाव जएज्जासि तिबेमि ॥ ९४६ ॥ उच्चारपासवणसत्तिकयं दसम-
मज्झयणं समत्तं ॥ सत्तिकयं समत्तं तइयं ॥

से भिक्खू वा (२) मुइंसद्दाणि वा, नंदीसद्दाणि वा, झल्लरीसद्दाणि वा,
अण्णयराणि वा तहप्पगाराणि विरुवरूवाणि वितताइं सद्दाइं कण्णसोयणपडियाए
णो अभिसंधारेज्जा गमणाए ॥ ९४७ ॥ से भिक्खू वा (२) अहावेगइयाइं सद्दाइं
सुणेइं तंजहा-वीणासद्दाणि वा, विपंचीसद्दाणि वा, पिप्पीसगसद्दाणि वा, तूणयसद्दाणि
वा, वणयसद्दाणि वा, तुंबवीणियसद्दाणि वा, ढंकुणसद्दाणि वा अण्णयराइं वा
तहप्पगाराइं विरुवरूवाणि सद्दाणि वितताइं कण्णसोयणपडियाए णो अभिसंधारेज्जा
गमणाए ॥ ९४८ ॥ से भिक्खू वा (२) अहावेगइयाइं सद्दाइं सुणेति तंजहा-

तालसद्दाणि वा, कंसतालसद्दाणि वा, लत्तियसद्दाणि वा, गोहियसद्दाणि वा, किरिकिरियसद्दाणि वा अण्णयराणि वा तहप्पगाराई विरूवरूवाई तालसद्दाई कण्ण-सोयपडियाए णो अभिसंधारेज्जा गमणाए ॥ ९४९ ॥ से भिक्खू वा (२) अहा-वेगइयाई सद्दाई सुणेति तंजहा-संखसद्दाणि वा, वेणुसद्दाणि वा, वंससद्दाणि वा, खरमुहीसद्दाणि वा, पिरिपिरियसद्दाणि वा अण्णयराई वा तहप्पगाराई विरूवरूवाई सद्दाई झुसिराई कण्णसोयपडियाए णो अभिसंधारेज्जा गमणाए ॥ ९५० ॥ से भिक्खू वा (२) अहावेगइयाई सद्दाई सुणेति तंजहा-वप्पाणि वा, फलिहाणि वा, जाव सराणि वा, सागराणि वा सरपंतियाणि वा, सरसरपंतियाणि वा, अण्णयराई तहप्पगाराई विरूवरूवाई सद्दाई कण्णसोयपडियाए णो अभिसंधारेज्जा गमणाए ॥ ९५१ ॥ से भिक्खू वा (२) अहावेगइयाई सद्दाई सुणेति तंजहा-कच्छाणि वा, णूमाणि वा, गह्णाणि वा, वणाणि वा, वणदुग्गाणि वा, पव्वयाणि वा, पव्वय-दुग्गाणि वा, अण्णयराई वा तहप्पगाराई विरूवरूवाई सद्दाई कण्णसोयपडियाए णो अभिसंधारेज्जा गमणाए ॥ ९५२ ॥ से भिक्खू वा (२) अहावेगइयाई सद्दाई सुणेति तंजहा-गामाणि वा, णगराणि वा, णिगमाणि वा, रायहाणि आसमपट्टणसंनि-वेसाणि वा, अण्णयराई तहप्पगाराई सद्दाई णो अभिसंधारेज्जा गमणाए ॥ ९५३ ॥ से भिक्खू वा (२) अहावेगइयाई सद्दाई सुणेति तंजहा-आरामाणि वा, उज्जाणाणि वा, वणाणि वा, वणसंडाणि वा, देवकुलाणि वा सभाणि वा, पवाणि वा, अण्णयराई वा तहप्पगाराई सद्दाई णो अभिसंधारेज्जा गमणाए ॥ ९५४ ॥ से भिक्खू वा (२) अहावेगइयाई सद्दाई सुणेति तंजहा-अट्ठाणि वा, अट्ठालयाणि वा, चरियाणि वा, दाराणि वा, गोपुराणि वा, अण्णयराई वा तहप्पगाराई सद्दाई णो अभि-संधारेज्जा गमणाए ॥ ९५५ ॥ से भिक्खू वा (२) अहावेगइयाई सद्दाई सुणेति तंजहा-तियाणि वा, चउक्काणि वा, चच्चराणि वा, चउम्मुहाणि वा, अण्णयराई वा तहप्पगाराई सद्दाई णो अभिसंधारेज्जा गमणाए ॥ ९५६ ॥ से भिक्खू वा (२) अहावेगइयाई सद्दाई सुणेति तंजहा-महिसट्ठाणकरणाणि वा, वसभट्ठाणकरणाणि वा, अस्सट्ठाणकरणाणि वा, हत्थिट्ठाणकरणाणि वा जाव कर्विजलट्ठाणकरणाणि वा, अण्णयराई वा तहप्पगाराई सद्दाई णो अभिसंधारेज्जा गमणाए ॥ ९५७ ॥ से भिक्खू वा (२) अहावेगइयाई सद्दाई सुणेति तंजहा-महिसजुद्धाणि वा, वसभजुद्धाणि वा, अस्सजुद्धाणि वा, हत्थिजुद्धाणि वा जाव कर्विजलजुद्धाणि वा, अण्णयराई वा तहप्पगाराई णो अभिसंधारेज्जा गमणाए ॥ ९५८ ॥ से भिक्खू वा (२) अहा-वेगइयाई सद्दाई सुणेति तंजहा-जूहियट्ठाणाणि वा, हयजूहियट्ठाणाणि अण्णयराई

तहप्पगाराई णो अभिसंधारेज्ज गमणाए ॥ ९५९ ॥ से भिक्खू वा (२) जाव सुणेति तंजहा-अक्खाइयठ्ठाणाणि वा, माणुम्माणियठ्ठाणाणि वा, महयाऽऽहयणट्ठगीयवाइय-
तंतितलतालतुडियपडुप्पवाइयठ्ठाणाणि वा, अण्णयराई वा तहप्पगाराई णो अभिसं-
धारेज्ज गमणाए ॥ ९६० ॥ से भिक्खू वा (२) जाव सुणेति तंजहा-कलहाणि वा,
डिबाणि वा, डमराणि वा, दोरज्जाणि वा, वेररज्जाणि वा विरुद्धरज्जाणि वा, अण्णय-
राई वा तहप्पगाराई सद्दाई णो अभिसंधारेज्ज गमणाए ॥ ९६१ ॥ से भिक्खू वा (२)
जाव सद्दाई सुणेइ खुड्डियं दारियं परिभुत्तमंडियालंकियनिवुज्झमाणि पेहाए एगं पुरिसं
वा वहाए णीणिज्जमाणं पेहाए अण्णयराई वा तहप्पगाराई णो अभिसंधारेज्ज गमणाए
॥ ९६२ ॥ से भिक्खू वा (२) अण्णयराई विरुवरुवाई महासवाई एवं जाणिज्जा
तंजहा बहुसगडाणि वा, बहुरहाणि वा, बहुमिलक्खूणि वा, बहुपच्चंताणि वा, अण्ण-
यराई वा तहप्पगाराई विरुवरुवाई महासवाई कण्णसोयपडियाए णो अभिसंधारेज्ज
गमणाए ॥ ९६३ ॥ से भिक्खू वा (२) विरुवरुवाई महुस्सवाई एवं जाणिज्जा
तंजहा-इत्थीणि वा, पुरिसाणि वा, थेराणि वा, डहराणि वा, मज्झिमाणि वा, आभ-
रणविभूसियाणि वा, गायंताणि वायंताणि वा, णच्चंताणि वा, हसंताणि वा, रमंताणि
वा, मोहंताणि वा, विउलं असणपाणखाइमसाइमं परिभुजंताणि वा, परिभाइंताणि
वा, विच्छड्डियमाणाणि वा, विगोवयमाणाणि वा, अण्णयराई वा तहप्पगाराई विरु-
वरुवाई महुस्सवाई कण्णसोयपडियाए णो अभिसंधारेज्ज गमणाए ॥ ९६४ ॥ से
भिक्खू वा (२) णो इहलोइएहिं सद्देहिं णो परलोइएहिं सद्देहिं, णो सुएहिं सद्देहिं,
णो असुएहिं सद्देहिं, णो दिट्ठेहिं सद्देहिं णो अदिट्ठेहिं सद्देहिं, णो कंतेहिं सद्देहिं सज्जिजा,
णो रज्जेजा, णो गिज्जेजा, णो मुज्जेजा, णो अज्जोववजेजा ॥ ९६५ ॥ एवं खलु
तस्स भिक्खुस्स २ वा सामगियं जाव जएज्जासि ति बेमि ॥ ९६६ ॥ **सद्दस-**
त्तिकयं एयारहममज्झयणं समत्तं सद्दसत्तिकयं चउत्थं ॥

से भिक्खू वा (२) अहावेगइयाई रूवाई पासइ तंजहा-गंथिमाणि वा, वेदिमाणि
वा, पूरिमाणि वा, संघाइमाणि वा, कट्ठकम्माणि वा, पोत्थकम्माणि वा, चित्तक-
म्माणि वा, मणिकम्माणि वा, दंतकम्माणि वा, पत्तच्छेज्जकम्माणि वा, विविहाणि
वा वेदिमाई जाव अण्णयराई वा तहप्पगाराई विरुवरुवाई चक्खुदंसणपडियाए णो
अभिसंधारेज्ज गमणाए ॥ ९६७ ॥ एवं णायव्वं जहा सद्दपडियाए सव्वा वाइत्तवज्जा
रुवपडियाएवि ॥ ९६८ ॥ **रुवसत्तिकयं दुवालसममज्झयणं समत्तं रुव-**
सत्तिकयं पंचमं ॥

परकिरियं अज्झत्थियं संसेसियं णो तं सायए णो तं णियमे ॥ ९६९ ॥ सिया

से परो पाए आमजिज्ज वा पमजिज्ज वा णो तं सायए णो तं णियमे सिया से परो पादाई संवाहेज्ज वा पल्लिमहिज्ज वा णो तं सायए णो तं णियमे सिया से परो पायाई फुसेज्ज वा रएज्ज वा णो तं सायए णो तं णियमे सिया से परो पादाई तेल्लेण वा घएण वा मक्खेज्ज वा अब्भिंगिज्ज वा णो तं सायए णो तं नियमे, सिया से परो पादाई लोहेण वा कक्केण वा चुण्णेण वा वण्णेण वा उल्लोहिज्ज वा उव्वलिज्ज वा णो तं सायए णो तं नियमे, सिया से परो पादाई सीओदगवियडेण वा उसिणोदगवियडेण वा उच्छोलेज्ज वा पधोएज्ज वा णो तं सायए णो तं णियमे, सिया से परो पादाई अण्णयरेण विलेवणजाएण आलिपेज्ज वा विलिपेज्ज वा णो तं सायए णो तं नियमे, सिया से परो पादाई अण्णयरेण धूवणजाएण धूवेज्ज वा पधूवेज्ज वा णो तं सायए णो तं णियमे, सिया से परो पादाओ खाणुं वा कंटयं वा णीहरेज्ज वा विसोहेज्ज वा णो तं सायए णो तं णियमे । सिया से परो पादाओ पूयं वा सोणियं वा णीहरेज्ज वा विसोहेज्ज वा णो तं सायए णो तं णियमे ॥ ९७० ॥ सिया से परो कार्यं आमजेज्ज वा पमजेज्ज वा णो तं सायए णो तं णियमे, सिया से परो कार्यं लोहेण वा संवाहिज्ज वा पल्लिमहिज्ज वा णो तं सायए णो तं णियमे, सिया से परो कार्यं तेल्लेण वा घएण वा मक्खेज्ज वा अब्भंगेज्ज वा णो तं सायए णो तं णियमे, सिया से परो कार्यं लोहेण वा कक्केण वा चुण्णेण वा वण्णेण वा उल्लोहिज्ज वा उव्वलिज्ज वा णो तं सायए णो तं णियमे सिया से परो कार्यं सीओदगवियडेण वा उसिणोदगवियडेण वा उच्छोलेज्ज वा पधोएज्ज वा णो तं सायए णो तं णियमे, सिया से परो कार्यं अण्णयरेण विलेवणजाएण आलिपेज्ज वा, विलिपेज्ज वा, णो तं सायए, णो तं णियमे । सिया से परो कार्यं अण्णयरेण धूवणजाएण धूवेज्ज वा, पधूवेज्ज वा, णो तं सायए णो तं णियमे ॥ ९७१ ॥ सिया से परो कार्यंसि वणं आमजेज्ज वा पमजेज्ज वा णो तं सायए णो तं नियमे, सिया से परो कार्यंसि वणं संवाहेज्ज वा पल्लिमहेज्ज वा णो तं सायए णो तं नियमे, सिया से परो कार्यंसि वणं तेल्लेण वा घएण वा मक्खेज्ज वा अब्भंगिज्ज वा, णो तं सायए णो तं नियमे । सिया से परो कार्यंसि वणं लोहेण वा कक्केण वा चुण्णेण वा वण्णेण वा उल्लोहिज्ज वा उव्वलेज्ज वा णो तं सायए णो तं नियमे, सिया से परो कार्यंसि वणं सीओदगवियडेण वा उसिणोदगवियडेण वा उच्छोलेज्ज वा पधोवेज्ज वा णो तं सायए णो तं नियमे ॥ ९७२ ॥ से सिया परो कार्यंसि वणं अन्नयरेण विलेवणजाएण आलिपेज्ज वा विलिपेज्ज वा नो तं २। सिया से परो कार्यंसि वणं अन्नयरेण धूवणजाएण धूवेज्ज वा प० नो तं ० २। सिया से परो कार्यंसि

वणं अन्नयरेणं सत्थजाएणं अच्छिदिज्ज वा विच्छिदिज्ज वा प० नो तं० २। सिया से परो कार्यंसि वणं अन्न० सत्थजाएणं अच्छिदिता वा विच्छिदिता वा पूयं वा सोणियं वा नीहरिज्ज वा वि० नो तं० २। सिया से परो कार्यंसि गंडं वा, अरइं वा, पुलइयं वा, भगंदलं वा, आमजेज्ज वा, पमजेज्ज वा, णो तं सायए णो तं नियमे । सिया से परो कार्यंसि गंडं वा, अरइयं वा, पुलइयं वा, भगंदलं वा, संवाहेज्ज वा पल्लिमेज्ज वा, णो तं सायए णो तं नियमे, सिया से परो कार्यंसि गंडं वा जाव भगंदलं वा, तेळेण वा घएण वा मक्खेज्ज वा अम्भिगेज्ज वा णो तं सायए णो तं नियमे । सिया से कार्यंसि गंडं वा जाव भगंदलं वा, लोहेण वा कळेण वा चुजेण वा, वण्णेण वा उल्लोहिज्ज वा, उव्वलेज्ज वा, णो तं सायए णो तं नियमे । सिया से परो कार्यंसि गंडं वा भगंदलं वा, सीओदगवियडेण वा, उसिणोदगवियडेण वा, उच्छोलेज्ज वा, पधोवेज्ज वा, णो तं सायए, णो तं नियमे, सिया से परो कार्यंसि गंडं वा जाव भगंदलं वा अण्णयरेणं सत्थजाएणं अच्छिदेज्ज विच्छिदेज्ज वा, सिया से परो अण्णयरेणं सत्थजाएणं अच्छिदिता वा २ पूयं वा सोणियं वा णीहरेज्ज वा णो तं सायए णो तं नियमे ॥९७३॥ सिया से परो कायाओ सेयं वा जल्लं वा णीहरेज्ज वा विसोहेज्ज वा णो तं सायए णो तं नियमे ॥९७४॥ सिया से परो अच्छिमलं, कण्णमलं वा, दंतमलं वा णहमलं वा, णीहरिज्ज वा विसोहिज्ज वा णो तं सायए णो तं नियमे ॥९७५॥ सिया से परो दीहाइं वालाइं, दीहाइं रोमाइं, बीहाइं भमुहाइं, बीहाइं कक्ख-रोमाइं, बीहाइं बत्थिरोमाइं, कप्पेज्ज वा संठवेज्ज वा णो तं सायए णो तं नियमे ॥९७६॥ सिया से परो सीसाओ लिक्खं वा जूयं वा णीहरेज्ज वा विसोहेज्ज वा णो तं सायए णो तं नियमे ॥ ९७७ ॥ सिया से परो अंकंसि पलियंकंसि वा तुयट्ठावित्ता पादाइं आमज्जिज्ज वा पमज्जिज्ज वा एवं हिट्ठिमो गमो पायादि भाणियव्वो, सिया से परो अंकंसि वा पलियंकंसि वा तुयट्ठावित्ता, हांरं वा अद्धहारं वा उरत्थं वा, गेवेयं वा, मउडं वा, पालंबं वा सुवण्णसुतं वा, आविहिज्ज वा, पिणहिज्ज वा णो तं सायए णो तं नियमे ॥ ९७८ ॥ सिया से परो आरामंसि वा, उज्जाणंसि वा, णीहरित्ता वा पविसित्ता वा पायाइं आमजेज्ज वा पमजेज्ज वा, णो तं सायए णो तं नियमे ॥ ९७९ ॥ एवं णेयव्वा अण्णमण्णकिरियावि ॥ ९८० ॥ सिया से परो सुदेणं वइवलेणं तेइच्छं आउट्ठे सिया से परो असुदेणं वतिबलेणं तेइच्छं आउट्ठे, सिया से परो गिलाणस्स सच्चित्ताणि कंदाणि वा मूलाणि वा तयाणि वा हरियाणि वा खणित्तु वा कट्ठित्तु वा कट्ठावित्तु वा तेइच्छं आउट्ठाविज्जा णो तं सायए णो तं नियमे ॥ ९८१ ॥ कट्ठवेयणा पाणभूयजीवसत्ता वेयणं वेइति ॥ ९८२ ॥

एयं खलु तस्स भिक्खुस्स २ सामगियं जं सव्वट्ठेहिं सहिते समिते सदा जए सेयमिणं मण्णेज्जासि त्ति बेमि ॥ ९८३ ॥ **परकिरियासत्तिकयं समत्तं छट्ठं, तेरहममज्झयणं समत्तं ॥**

से भिक्खू वा (२) अण्णमण्णकिरियं अज्झत्थियं संसेइयं णो तं सायए णो तं नियमे ॥ ९८४ ॥ सिया से अण्णमण्णं पाए आमजेज्ज वा पमजेज्ज वा णो तं सायए णो तं नियमे ॥ ९८५ ॥ सेसं तं चेव ॥ ९८६ ॥ एयं खलु तस्स भिक्खुस्स २ वा सामगियं ॥ ९८७ ॥ **अनुन्नकिरिया सत्तिकयं समत्तं सत्तमं, चउइसममज्झयणं समत्तं, वीया चूडा समत्ता ॥**

तेणं कालेणं तेणं समएणं समणे भगवं महावीरे पंचहत्युत्तरे यावि होत्था, तंजहा-हत्युत्तराहिं चुए चइत्ता गब्भं वक्कंते, हत्युत्तराहिं गब्भाओ गब्भं साहरिए, हत्युत्तराहिं जाए, हत्युत्तराहिं मुंढे भवित्ता आगाराओ अणगारियं पव्वइए, हत्युत्तराहिं कसिणे पडिपुण्णे अव्वाघाए निरावरणे अणंते अणुत्तरे केवलवरनानंदसणे समुप्पण्णे, साइणा परिनिव्वुए भगवं ॥ ९८८ ॥ समणे भगवं महावीरे, इमाए ओसप्पिणीए सुसमसुसमाए समाए विइक्कंताए, सुसमाए समाए वीतिक्कंताए, सुसमसुसमाए समाए वीतिक्कंताए, दुसमसुसमाए समाए बहुवीतिक्कंताए, पण्हत्तरीए वासेहिं मासेहिं य अद्धणवयसेसेहिं, जे से गिम्हाणं चउत्थे मासे अट्टमे पक्खे, आसाढसुद्धे, तस्सणं आसाढसुद्धस्स छट्ठीपक्खेणं हत्युत्तराहिं नक्खत्तेणं जोगमुवागएणं, महाविजयसिद्धत्थपुप्फुत्तरपवरपुंडरीयदिसासोवत्थियवद्धमाणाओ महाविमाणाओ वीसंसागरोवमाइं आउयं पालइत्ता, आउक्खएणं, भवक्खएणं ठिइक्खएणं चुए चइत्ता इह खलु जंबुदीवे दीवे, भारहे वासे, दाहिणद्धभरहे दाहिणमाहणकुंडपुरसंनिवेसंमि उसभदत्तस्स माहणस्स कोडालसगोत्तस्स देवाणंदाए माहणीए जालंधरस्स गुत्ताए सीहुब्भवभूएणं अप्पाणेणं कुच्छिसि गब्भं वक्कंते, समणे भगवं महावीरे तिन्नाणोवगए यावि होत्था, चइस्सामित्ति जाणइ चुएमित्ति जाणइ, चयमाणे न जाणेइ, सुहुमे णं से काले पक्कत्ते । तओ णं समणे भगवं महावीरे **हियाणुकंपए** णं देवेणं जीयमेयं त्ति कट्ठु जे से वासाणं तच्चे मासे पंचमे पक्खे आसोयबहुले तस्स णं आसोयबहुलस्स तेरसीपक्खेणं हत्युत्तराहिं नक्खत्तेणं जोगमुवागएणं बासीहिं राइंदिएहिं विइक्कंतेहिं तेसीइमस्स राइंदियस्स परियाए वट्टमाणे दाहिणमाहणकुंडपुरसंनिवेसाओ उत्तरखत्तियकुंडपुरसंनिवेसंमि णायानं खत्तियाणं सिद्धत्थस्स खत्तियस्स कासवणुत्तस्स तिसलाए खत्तियाणीए वासिठ्ठसणुत्ताए असुभाणं पुगगलाणं अवहारं करित्ता, सुभाणं पुगगलाणं पक्खेवं करित्ता कुच्छिसि **गब्भं साहरइ**, जेविय से

तिसलाए खत्तियाणीए कुच्छिसि गब्भे तंपि य दाहिणमाहणकुंडपुरसंनिवेशंसि
 उस...को...देवा...जालंधरायणगुत्ताए कुच्छिसि गब्भं साहरइ ॥ ९८९ ॥ समणे
 भगवं महावीरे तिण्णाणोवगए यावि होत्था, साहरिजिस्सामिति जाणइ, साहरिज-
 माणे न जाणइ साहरिएमिति जाणइ समणाउसो । ॥ ९९० ॥ तेणं कालेणं तेणं
 समणं तिसलाए खत्तियाणीए अह अण्णया कयाइ णवहं मासाणं बहुपडिपुण्णाणं
 अद्धमाणं राइंदियाणं वीतिकंताणं जे से गिम्हाणं पढमे मासे दोच्चे पक्खे चित्तसुद्धे
 तस्सणं चित्तसुद्धस्स तेरसीपक्खेणं, हत्थुत्तराहिं जोगमुवागएणं समणं भगवं महावीरे
 आरोगमारोगं पसूया ॥ ९९१ ॥ जं णं राइं तिसला खत्तियाणी समणं भगवं महावीरे
 आरोयारोयं पसूया, तं णं राइं भवणवइवाणमंतरजोइसियविमाणवासिदेवेहि य देवी-
 हि य उचयंतेहि य उप्पयंतेहि य एगे महं दिव्वे देवुज्जोए देवसण्णिवाते देवकहकहे
 उप्पिजलगभूए यावि होत्था ॥ ९९२ ॥ जं णं रयणिं तिसला खत्तियाणी समणं
 भगवं महावीरे आरोयारोयं पसूया तं णं रयणिं बहवे देवा य देवीओ य एणं महं
 अमयवासं च, गंधवासं च, चुण्णवासं च, पुप्फवासं च, हिरण्णवासं च, रयणवासं
 च वासिंसु ॥ ९९३ ॥ जं णं रयणिं तिसला खत्तियाणी समणं भगवं महावीरे
 आरोयारोयं पसूया, तं णं रयणिं भवणवइवाणमंतरजोइसियविमाणवासिणो देवा य
 देवीओ य समणस्स भगवओ महावीरस्स सूइकम्माइं तिथयराभिसेयं च करिंसु
 ॥ ९९४ ॥ जओ णं पभिइ भगवं महावीरे तिसलाए खत्तियाणीए कुच्छिसि गब्भं
 आगए ततो णं पभिइ तं कुलं विपुलेणं हिरण्णेणं सुवण्णेणं धणेणं धण्णेणं माणिक्केणं
 मोत्तिएणं संखसिलप्पवालेणं अईव २ परिवट्ठइ, ततो णं समणस्स भगवओ महावीरस्स
 अम्मापियरो एयमट्ठं जाणिता णिव्वत्तदसाहंसि वोक्कंतंसि सुचिभूर्यसि विपुलं
 असणपाणखाइमसाइमं उवक्खडावेंति उवक्खडावेत्ता भित्तणातिसयणसंबंधिवग्गं
 उवणिमंतेंति उवणिमंतैत्ता बहवे समणमाहणकिवणवणिमगाहिं भिच्छुंडगपंडरगातीण
 विच्छड्डेंति विग्गोवेंति विस्सारेंति दातारेसु णं दाणं पज्जभाइति, विच्छड्डिता विग्गो
 वित्ता विस्साणिता दायारेसु णं दाणं पज्जभाइत्ता भित्तणाइसयणसंबंधिवग्गं भुंजावेंति
 भुंजावेत्ता भित्तणाइसयणसंबंधिवग्गेण इमेयारूवं णामधेज्जं कारवेंति, जओ णं पभिइ
 इमे कुमारे तिसलाए खत्तियाणीए कुच्छिसि गब्भे आगए, तओणं पभिइ इमं कुलं,
 विउलेणं हिरण्णेणं सुवण्णेणं धणेणं धण्णेणं माणिक्केणं मोत्तिएणं संखसिलप्पवालेणं
 अईव २ परिवट्ठइ तं होउ णं कुमारं “वद्धमाणे” ॥ ९९५ ॥ तओ णं समणे भगवं
 महावीरे पंचधातिपरिवुडे तंजहा-खीरधाईए-मज्जणधाईए-मंडावणधाईए-खेत्तावण-
 धाईए-अंकधाईए अंकाओ अंकं साहरिज्जमाणे रम्मे मणिकोट्टिमतले गिरिकंदरस-

मल्लीणे विव चंपयपायवे अहाणुपुव्वीए संबुद्ध ॥ ९९६ ॥ तओ णं समणे भगवं
महावीरे विण्णायपरिणये विणियत्तबालभावे अणुस्सुयाई उरालाई माणुस्सगाई
पंचलक्खणाई कामभोगाई सहफरिसरसरुवगंधाई परियारेमाणे एवं च णं विहरइ
॥ ९९७ ॥ समणे भगवं महावीरे कासवगोत्ते तस्सणं इमे तिण्णि णाम धेज्जा
एवमाहिज्जंति, अम्मापिउसंतिए “वद्धमाणे,” सहसम्मइए “समणे” भीमभयभेरवं
उरालं अचेलयं परिसहं सहइ त्ति कट्ठु देवेहिं से णामं कयं “समणे भगवं महावीरे”
॥ ९९८ ॥ समणस्स णं भगवओ महावीरस्स पिआ कासवगोत्तेणं तस्स णं तिण्णि
णामधेज्जा एवमाहिज्जंति, तंजहा-सिद्धत्थे त्ति वा, सेज्जंसेत्ति वा, जसंसे त्ति वा
॥ ९९९ ॥ समणस्स भगवओ महावीरस्स अम्मा वासिठुसगोत्ता तीसेणं तिण्णि
णामधेज्जा, एवमाहिज्जंति तंजहा-तिसला इ वा, विदेहदिण्णा इ वा, पियकारिणी
इ वा ॥ १००० ॥ समणस्स णं भगवओ महावीरस्स पित्तियए “सुपासे” कासव-
गोत्तेणं, समणस्स णं भगवओ महावीरस्स जेठ्ठे भाया णंदिवद्धणे कासवगोत्तेणं,
समणस्स णं भगवओ महावीरस्स जेठ्ठा भइणी सुदंसणा कासवगोत्तेणं, समणस्स
णं भगवओ महावीरस्स भज्जा जसोया गोत्तेणं कोडिण्णा, समणस्स भगवओ
महावीरस्स धूया कासवगोत्तेणं, तीसेणं दो णाम धेज्जा, एवमाहिज्जंति, तंजहा-
अणोज्जा इ वा, पियदंसणा इ वा, समणस्स णं भगवओ महावीरस्स णत्तुई
कोसियगोत्तेणं तीसेणं दो णामधेज्जा, एव माहिज्जंति, तंजहा-सेसवई इ वा, जसवती
इ वा ॥ १००१ ॥ समणस्स णं भगवओ महावीरस्स अम्मापियरो पासावच्चिज्जा,
समणोवासगा यावि होत्था, ते णं बहूई वासाई समणोवासगपरियागं पालइत्ता,
छण्हं जीवनिकायाणं संरक्खणनिमित्तं आलोइत्ता निंदित्ता गरहित्ता पडिक्कमित्ता
अहारिहं उत्तरगुणपायच्छित्तं पडिबज्जित्ता कुससंथारं दुरुहित्ता, भत्तं पच्चक्खाइत्ति,
भत्तं पच्चक्खाइत्ता अपच्छिमाए मारणंतियाए संलेहणाए छुसियसरीरा कालमासे
कालं किच्चा तं सरीरं विप्पजहित्ता अन्नुए कप्पए देवत्ताए उववण्णा, तओणं आउ-
क्खएणं भवक्खएणं ठिइक्खएणं चुए चइत्ता महाविदेहवासे चरिमेणं ऊसासेणं
सिज्जिस्संति, बुज्जिस्संति, मुच्चिस्संति, परिणिव्वाइस्संति, सव्वदुक्खाणमंतं करि-
स्संति ॥ १००२ ॥ तेणं कालेणं तेणं समएणं समणे भगवं महावीरे **णाए**
णायपुत्ते णायकुलणिव्वत्ते विदेहे विदेहदिण्णे विदेहजच्चे विदेहसूमाले तीसं
वासाई विदेहंसित्ति कट्ठु अगारमज्जे वसित्ता अम्मापिउहिं कालगएहिं देवलोमणु-
पत्तेहिं समत्तपइण्णे चिच्चा हिरण्णं, चिच्चा सुवण्णं, चिच्चा बलं, चिच्चा वाहणं चिच्चा
धणधण्णकणयरयणसंतसारसावइज्जं, विच्छइत्ता, विगोवित्ता, विस्साणित्ता, दायारेछ

दाणं दाइत्ता परिभाइत्ता, संवच्छरं दलइत्ता, जे से हेमंताणं पढमे मासे पढमे पक्खे, मग्गसिरबहुले, तस्सणं मग्गसिरबहुलस्स दसमीपक्खेणं हत्थुत्तराहिं णक्खत्तेणं जोगमुवागएणं अभिणिक्खमणाभिप्पाए यावि होत्था ॥ १००३ ॥ संवच्छरेण होहिंति अभिणिक्खमणं तु जिणवरिंदाणं, तो अत्थि संपदाणं, पव्वत्तइं पुव्वसूराओ ॥ १००४ ॥ एगा हिरण्णकोडी, अट्ठेव अणूणया सयसहस्सा, सूरौदयमाइयं दिज्जइ जा पायरासोत्ति ॥ १००५ ॥ तिण्णेव य कोडिसया अट्ठासीइं च होति कोडीओ, असिइं च सयसहस्सा, एवं संवच्छरे दिण्णं ॥ १००६ ॥ वेसमणकुंडलधरा, देवा लोगंतिया महिद्धिया । बोहिंति य तित्थयरं, पण्णरससु कम्मभूमिसु ॥ १००७ ॥ बंभमि य कर्पमि य बोद्धव्वा कण्हराइणो मज्झे; लोगंतिया विमाणा, अट्ठसुवत्था असंखेजा ॥ १००८ ॥ एते देवणिक्काया, भगवं बोहिंति जिणवरं वीरं, सव्वजगज्जीवहियं, अरहं तित्थं पव्वत्तेहि ॥ १००९ ॥ तओ णं समणस्स भगवओ महावीरस्स अभिणिक्खमणाभिप्पायं जाणेत्ता भवणवइवाणमंतरजोइसियविमाणवासिणो देवा य देवीओ य सएहिं सएहिं रुवेहिं, सएहिं सएहिं णेवत्येहिं, सएहिं सएहिं चिंधेहिं, सव्विद्धीए, सव्वजुइए, सव्वबलसमुदएणं, सयाइं सयाइं जाणविमाणाइं दुरुहंति सयाइं २ जाणविमाणाइं दुरुहिता, अहा बादराइं पोगगलाइं परिसाडेंति परिसाडित्ता, अहासुहुमाइं पोगगलाइं परियाइंति परियाइत्ता, उड्डं उप्पयंति उप्पइत्ता, ताए उक्किट्ठाए सिग्घाए चवलाए तुरियाए दिव्वाए देवगईए अहेणं उवयमाणा २ तिरिएणं असंखेजाइं दीवसमुदाइं वीतिकममाणा २ जेणेव जंबुइवे दीवे तेणेव उवागच्छंति उवागच्छित्ता, जेणेव उत्तरखत्तियकुंडपुरसंणिवेसे तेणेव उवागच्छित्ता, तस्स उत्तरपुरत्थिमे दिसिभाए तेणेव झत्तिवेणेण उवट्ठिया ॥ १०१० ॥ तओ णं सक्के देविंदे देवराया सणियं सणियं जाणविमाणं ठवेति ठवेत्ता, सणियं २ जाणविमाणाओ पच्चोत्तरति, पच्चोत्तरित्ता एगंतमवक्कमेति एगंतमवक्कमेत्ता, महया वेउव्विएणं समुग्घाएणं समोहणति, महया वेउव्विएणं समुग्घाएणं समोहणित्ता, एगं महं णाणामणिकणगरयणभत्तिचित्तं सुभं चारुकंतरूवं देवच्छंदयं विउव्वति, तस्सणं देवच्छंदयस्स बहुमज्झदेसभाए एगं महं सपायपीढं सीहासणं णाणामणिकणयरयणभत्तिचित्तं सुभं चारुकंतरूवं विउव्वइ विउव्वित्ता, जेणेव समणे भगवं महावीरे तेणेव उवागच्छति उवागच्छित्ता समणं भगवं महावीरं तिकखुत्तो आयाहिणं पयाहिणं करेइ, समणं भगवं महावीरं वंदति णमंसति, वंदित्ता णमंसित्ता समणं भगवं महावीरं गहाय जेणेव देवच्छंदए तेणेव उवागच्छति उवागच्छित्ता, सणियं २ पुरत्थाभिमुहे सीहासणे णिसीयावेइ णिसीयावेत्ता सयपागसहस्सपागेहिं तेत्तेहिं अब्भंगेति

अब्भंगेत्ता गंधकासाइएहिं उल्लोखेति उल्लोलित्ता, सुद्धोदएणं मज्जावेइ मज्जावित्ता, जस्स णं मुल्लं सयसहस्सेणं तिपडोलतित्तिएणं साहिएणं सीएणं गोसीसरत्तचंदणेणं अणुलिंपति अणुलिंपित्ता ईसिंणिस्सासवातवोज्झं वरणगरपट्टणुगयं कुसलणरपसंसितं अस्सलालापेलवं छेयायरियकणगखचियंतकम्मं हंसलक्खणं, पट्टजुयलं णियंसवेइ, णियंसवात्तेता हारं अद्धहारं उरत्थं नेवत्थं एगावलिं पालंबसुत्तं पट्टमउडरयणमालाओ आविधावेति आविधावेत्ता गंठिमवेढिमपूरिमसंधाइमेणं मल्लेणं कप्पस्खलमिव समलं-
 करेति २ दोच्चंपि महया वेउव्वियसमुग्घाएणं समोहणइ, समोहणित्ता एणं महं चंद-
 प्पमं सिवियं सहस्सवाहिणिं विउव्वइ तंजहा-ईहामियउसभतुरगणरमकरविहगवा-
 णरकुंजररुसरभचमरसदूलसीहवणलयपउमलयभत्तिचित्तलयविचित्तविज्जाहमिहुण-
 जुयलजंतजोगजुत्तं, अचीसहस्समालिणीयं सुणिरुवियं मिसिमिसितरुवगसहस्सकलियं,
 ईसिंभिसमाणं भिब्भिसमाणं चक्खुल्लोयणलेसं, मुत्ताहलमुत्तजालंतरोपियंतवणीय-
 पवरलंबूसगपलंबंतमुत्तदामं, हारद्धहारभूसणसमोणयं अहियपिच्छणिज्जं पउमलयभ-
 त्तिचित्तं, असोककुंदणाणालयभत्तिचित्तं विरइयं सुभं चारुक्तंरुवं णाणामणिपंचवण्ण-
 घंटापडायपरिमंडियग्गसिहरं पासादीयं दरिसणीयं सुरुवं ॥ १०११ ॥ सीया उवणीया
 जिणवरस्स जरमरणविप्पमुक्कस्स; ओसत्तमल्लदामा, जलथलयदिव्वकुसुमेहिं ॥ १ ॥
 सिवियाइ मज्झयारे, दिव्वं वररयणरुवचिंचइयं; सीहासणं महरिहं सपादपीढं जिण-
 वरस्स ॥ २ ॥ आलइयमालमउडो भासुरबौदी वराभरणधारी; खोमियवत्थणि-
 यत्थो, जस्स य मोल्लं सयसहस्सं ॥ ३ ॥ छट्ठेण उ भत्तेणं अज्झवसाणेण सोहणेण
 जिणो, लेसाहि विसुज्झंतो, आरुहइ उत्तमं सीयं ॥ ४ ॥ सीहासणे णिविट्ठो सक्की-
 साणा य दोहिं पासेहिं, वीर्यंति चामराहिं मणिरयणविचित्तदंडाहिं ॥ ५ ॥ पुव्वि
 उक्खित्ता माणुसेहिं साहट्ठरोमपुलएहिं, पच्छा वहंति देवा, सुरअसुरगरुलणार्गिदा
 ॥ ६ ॥ पुरओ सुरा वहंती असुरा पुण दाहिणंमि पासंमि । अवरे वहंति गरुला,
 णागा पुण उत्तरे पासे ॥ ७ ॥ वणसंडं व कुसुमियं, पउमसरो वा जहा सरयकाले;
 सोहइ कुसुमभरेणं, इय गगणयलं सुरगणेहिं ॥ ८ ॥ सिद्धत्थवणं व जहा, कणिया-
 रवणं व चंपयवणं वा, सोहइ कुसुमभरेणं, इय गगणयलं सुरगणेहिं ॥ ९ ॥
 वरपडहभेरिज्झल्लरिसंखसयसहस्सिएहिं तूरेहिं । गगणतले धरणितले तूरणिणाओ
 परमरम्मो ॥ १० ॥ ततविततं घणडुसिरं आउज्जं चउविहं बहुविहीयं; वायंति तत्थ
 देवा, बहुहिं आणट्ठगसएहिं ॥ ११ ॥ १०१२ ॥ तेणं कालेणं तेणं समएणं जे से
 हेमंताणं पढमे मासे पढमे पक्खे, मग्गसिरबहुले, तस्सणं मग्गसिरबहुलस्स दस-
 मीपक्खेणं, सुव्वएणं दिवसेणं, विजएणं मुहुत्तेणं, हत्थुत्तराणक्खत्तेणं जोगोववाएणं

पाईणगामिणीए छायाए बिइयाए पोरिसीए छठ्ठेणं भत्तेणं अपाणएणं, एगसाडगमा-
याए, चंदप्पहाए सिवियाए सहस्सवाहिणीए सदेवमणुयासुराएपरिसाए समणिज्जमाणे
२ उत्तरखत्तियकुंडपुरसंणिवेसस्स मज्झिमज्झेणं णिगच्छित्ता जेणेव णायसंडे उज्जाणे
तेणेव उवागच्छइ, उवागच्छित्ता ईसिरयणिप्पमाणं अच्छोप्पेणं भूमिभागेणं सणियं
२ चंदप्पभं सिवियं सहस्सवाहिणिं ठवेइ ठवेत्ता सणियं २ चंदप्पभाओ सिवियाओ
सहस्सवाहिणीओ पच्चोयरइ, पच्चोयरित्ता सणियं २ पुरत्थाभिमुहे सीहासणे णिसीयेइ,
आभरणालंकारं ओमुयइ, तओणं वैसमणे देवे जलुव्वायपडिओ समणस्स भगवओ
महावीरस्स हंसलक्खणेणं पडेणं आभरणालंकारं पडिच्छइ; तओ णं समणे भगवं
महावीरे दाहिणेणं दाहिणं वामेणं वामं पंचमुट्ठियं लोयं करेइ, तओ णं सक्के देविंदे
देवराया समणस्स भगवओ महावीरस्स जलुव्वायपडिए वयरामयेणं थालेणं केसाइं
पडिच्छइ, पडिच्छित्ता “अणुजाणेसि भंते” ति कट्ठु खीरोयसायरं साहरइ, तओ णं
समणे भगवं महावीरे दाहिणेणं दाहिणं वामेणं वामं पंचमुट्ठियं लोयं करेत्ता सिद्धाणं
णमोक्कारं करेइ करेत्ता, “सव्वं मे अकरणिज्जं पावकम्मं” ति कट्ठु सामाइयं
चरितं पडिवज्जइ, सामाइयं चरितं पडिवज्जित्ता देवपरिसं मणुयपरिसं च आलिकख-
वित्तभूयमिव ठुवेइ ॥ १०१३ ॥ दिव्वो मणुस्सघोसो, तुरियणिणाओ य सक्कवय-
णेण, खिप्पामेव णिलुको, जाहे पडिवज्जइ चरितं ॥ १ ॥ पडिवज्जित्तु चरितं अहो-
णिसिं सव्वपाणभूतहितं; साहट्ठु लोमपुलया, सव्वे देवा निसामिति २ ॥ १०१४ ॥
तओ णं समणस्स भगवओ महावीरस्स सामाइयं खाओवसमियं चरितं पडिवज्जस्स
मणपज्जवणाणे णामं णाणे समुप्पन्ने, अट्ठाइजेहिं दीवेहिं दोहिं य समुदेहिं सण्णीणं
पंचेदियाणं पज्जत्ताणं वियत्तमणसाणं मणोगयाइं भावाइं जाणेइ ॥ १०१५ ॥ तओ णं
समणे भगवं महावीरे पव्वइते समाणे मित्तणातिसयणसंबंधिवग्गं पडिविसज्जेति,
पडिविसज्जित्ता इमं एयारुवं अभिग्गहं अभिगिण्हइ, “बारसवासाइं वोसट्ठकाए चत्त-
देहे जे केइ उवसग्ग समुप्पज्जंति, तंजहा-दिव्वा वा, माणुस्सा वा, तेरिच्छिया
वा, ते सव्वे उवसग्गे समुप्पण्णे समाणे सम्मं सहिस्सामि, खमिस्सामि अहिया-
सइस्सामि” ॥ १०१६ ॥ तओ णं समणे भगवं महावीरे इमेयारुवं अभिग्गहं अभि-
गिण्हित्ता वोसट्ठकाए चत्तदेहे दिवसे मुहुत्तसेसे कुमारगामं समणुपत्ते ॥ १०१७ ॥
तओ णं समणे भगवं महावीरे वोसट्ठचत्तदेहे अणुत्तरेणं आलएणं, अणुत्तरेणं विहा-
रेणं, एवं संजमेणं, पग्गहेणं, संवरेणं तवेणं, बंभचेरवासेणं, खंतीए, मोतीए, तुट्ठीए,
समितीए, गुतीए, ठाणेणं, कम्मेणं, सुचरियफलणिव्वानुमुत्तिमगेणं, अप्पाणं भावे-
माणे विहरइ ॥ १०१८ ॥ एवं वा विहरमाणस्स जे केइ उवसग्गा समुपज्जंति दिव्वा

वा माणुस्सा वा तेरिच्छिया वा ते सव्वे उवसग्गे समुप्पन्ने समाणे अणाउले अव्व-
 हिए अदीणमाणसे तिविहमणवयणकाययुत्ते सम्मं सहइ खमइ तितिकखइ अहियासेइ
 ॥ १०१९ ॥ तओ णं समणस्स भगवओ महावीरस्स एएणं विहारेणं विहरमाणस्स
 बारसवासा विइक्कंता, तेरसमस्स वासस्स परियाए वट्टमाणस्स जे से गिम्हाणं दोच्चे
 मासे चउत्थे पक्खे वइसाहसुद्धे, तस्सणं वइसाहसुद्धस्स दसमीपक्खेणं सुव्वएणं
 दिवसेणं विजएणं मुहुत्तेणं हत्थुत्तराहिं णक्खत्तेणं जोगोवगतएणं पाईणगामिणीए छायाए
 वियत्ताए पोरिसीए जंभियगामस्स णगरस्स बहिया णईए उज्जुवालियाए उत्तरे
 कूले, सामागस्स गाहावइस्स कट्टकरणंसि वेयावत्तस्स चेइयस्स उत्तरपुरत्थिमे
 दिसीभाए सालक्खस्स अदूरसामंते उक्कुड्डयस्स गोदोहियाए आयावणाए आयावे-
 माणस्स छट्ठेणं भत्तेणं अपाणएणं उट्ठंजाणुअहोसिरस्स धम्मज्झाणकोट्टोवगयस्स
 सुक्कज्झाणंतरियाए वट्टमाणस्स निव्वाणे, कसिणे, पडिपुण्णे, अव्वाहए, णिरावरणे,
 अणंते, अणुत्तरे, केवलवरणाणदंसणे समुप्पण्णे ॥ १०२० ॥ से भयवं अरहा
 जिणे जाए, केवली सव्वणू सव्वभावदरिसी, सदेवमणुयासुरस्स लोयस्स पज्जाए
 जाणइ, तंजहा-आगतिं गतिं ठितिं चवणं, उववायं भुत्तं पीयं कडं पडिसेवियं
 आवीकम्मं रहोकम्मं लवियं कहियं मणोमाणसियं सव्वलोए सव्वजीवाणं, सव्व-
 भावाइं जाणमाणे पासमाणे एवं च णं विहरइ ॥ १०२१ ॥ जणं दिवसं समणस्स
 भगवओ महावीरस्स णिव्वाणे कसिणे जाव समुप्पण्णे, तणं दिवसं भवणवइवाण-
 मंतरजोइसियविमाणवासिदेवेहिं य देवीहिं य उव्वयंतेहिं य जाव उप्पिजलग-
 भूए यावि होत्था ॥ १०२२ ॥ तओ णं समणे भगवं महावीरे उप्पण्णवरणाणदंसणधरे
 अप्पाणं च लोगं च अभिसमिक्ख पुवं देवाणं धम्ममाइक्खति तओ पच्छा
 मणुस्साणं ॥ १०२३ ॥ तओ णं समणे भगवं महावीरे उप्पण्णणाणदंसणधरे गोय-
 माईणं समणाणं णिगंग्थाणं पंच महव्वयाइं सभावणाइं छजीवनिकायाइं आइक्खइ,
 भासइ, पखवेइ, तंजहा-पुढविकाए जाव तसकाए ॥ १०२४ ॥ पढमं भंते ! महव्वयं
 पच्चक्खामि, सव्वं पाणाइवायं से सुहुमं वा बायरं वा तसं वा थावरं वा णेव
 सयं पाणाइवायं करेज्जा ३ जावजीवाए तिविहं तिविहेणं मणसा वयसा कायसा,
 तस्स भंते ! पडिक्कमामि निंदामि गरिहामि अप्पाणं वोसिरामि ॥ १०२५ ॥
 तस्सिमाओ पंच भावणाओ भवंति ॥ १०२६ ॥ तत्थिमा पढमा भावणा,
 इरियासमिए से णिगंग्थे, णो अणइरियासमिए त्ति, केवली बूया अणइरियासमिए से
 णिगंग्थे, पाणाइं ४ अभिहणेज्ज वा, वत्तेज्ज वा, परियावेज्ज वा, लेसेज्ज वा, उह्वेज्ज
 वा, इरियासमिए से णिगंग्थे, णो अणइरियासमिए त्ति पढमा भावणा ॥ १०२७ ॥

अहावरा दोच्चा भावणा, मणं परिजाणाइ से णिग्गंथे, जे य मणे पावए सावज्ज सकिरिए अण्हयकरे छेयकरे भेयकरे अधिकरणिए पाउसिए, परिताविए पाणाइवाइए, भूओवघाइए तहप्पगारं मणं णो पधारेज्जा, मणं परिजाणाति से णिग्गंथे जे य मणे अपावए ति दोच्चा भावणा ॥ १०२८ ॥ अहावरा तच्चा भावणा ॥ वई परिजाणाइ से णिग्गंथे जा य वई पाविया सावज्जा सकिरिया जाव भूओवघाइया तहप्पगारं वई णो उच्चारिज्जा, जे वई परिजाणाइ से णिग्गंथे जाय वई अपाविय ति तच्चा भावणा ॥ १०२९ ॥ अहावरा चउत्था भावणा, आयाण-भंडमत्तणिकखेवणासमिए से णिग्गंथे, णो अणायाणभंडमत्तणिकखेवणासमिए णिग्गंथे केवली बूया, आयाणभंडमत्तणिकखेवणाअसमिए णिग्गंथे पाणाइंभूयाइंजीवाइं सत्ताइं अभिहणेज वा जाव उद्देवज वा, तम्हा आयाणभंडमत्तणिकखेवणासमिए से णिग्गंथे णो आयाणभंडमत्तणिकखेवणाअसमिए ति चउत्था भावणा ॥ १०३० ॥ अहावरा पंचमा भावणा, आलोइयपाणभोयणभोई से णिग्गंथे, णो अणालोइयपाणभोयणभोई, केवली बूया, अणालोइयपाणभोयणभोई से णिग्गंथे पाणाइं वा ४ अभिहणेज वा जाव उद्देवज वा, तम्हा आलोइयपाणभोयणभोई से णिग्गंथे, णो अणालोइयपाणभोयणभोइ ति पंचमा भावणा ॥ १०३१ ॥ एतावता पढमे महव्वए सम्मं काएण फासिए पालिए तीरिए किट्टिए अवट्टिए आणाए आराहिए यावि भवइ ॥ १०३२ ॥ पढमे भंते ! महव्वए पाणाइवायाओ वेरमणं ॥ १०३३ ॥ अहावरं दोच्चं महव्वयं पच्चक्खामि सव्वं मुसावायं वइदोसं से कोहा वा, लोहा वा, भया वा, हासा वा, णेव सयं मुसं भासेज्जा, णेवच्चेणं मुसं भासावेज्जा, अण्णं पि मुसं भासंतं ण समणुजाणेज्जा, ति विहं ति विहेणं मणसा वायसा कायसा तस्स भंते पडिक्कामि जाव वोसिरामि ॥ १०३४ ॥ तस्सिमाओ पंच भावणाओ भवन्ति ॥ १०३५ ॥ तथिमा पढमा भावणा, अणुवीइभासी से णिग्गंथे, णो अणणुवीइभासी; केवली बूया, अणणुवीइभासी से णिग्गंथे समावज्जिज मोसं वयणाए, अणुवीइभासी से णिग्गंथे, णो अणणुवीइभासि ति पढमा भावणा ॥ १०३६ ॥ अहावरा दोच्चा भावणा, कोहं परिजाणाइ से णिग्गंथे, णो कोहणे सिया, केवली बूया, कोहपत्ते कोहत्तं समावदेज्जा मोसं वयणाए, कोहं परिजाणाइ से णिग्गंथे, णय कोहणे सियत्ति दोच्चा भावणा ॥ १०३७ ॥ अहावरा तच्चा भावणा, लोभं परिजाणाइ से णिग्गंथे, णो य लोभणए सिया, केवली बूया, लोभपत्ते लोभी समावदेज्जा मोसं वयणाए, लोभं परिजाणाइ से णिग्गंथे, णो य लोभणए सियत्ति तच्चा भावणा ॥ १०३८ ॥ अहावरा चउत्था भावणा,

भयं परिजाणाइ से णिग्गंथे, णो भयभीरुए सिया; केवली बूया, भयप्पत्ते भीरु समावदेज्जा मोसं वयणाए, भयं परिजाणइ से णिग्गंथे, णो भयभीरुए सिय ति चउत्था भावणा ॥ १०३९ ॥ **अहावरा पंचमा भावणा**, हासं परिजाणइ से णिग्गंथे, णो य हासणए सिया, केवली बूया, हासप्पत्ते हासी समावदेज्जा मोसं वयणाए, हासं परिजाणइ से णिग्गंथे, णो य हासणए सिय ति पंचमा भावणा ॥ १०४० ॥ एतावता दोच्चे महव्वए सम्मं काएण फासिए जाव आणाए आराहिए या वि भवति ॥ **दोच्चे भंते महव्वए०** ॥ १०४१ ॥ **अहावरं तच्चं भंते ! महव्वयं** पच्चक्खामि सव्वं अदिण्णादाणं; से गामे वा, णगरे वा, अरण्णे वा, अप्पं वा, बहुं वा, अणुं वा, थूलं वा, चित्तमंतं वा, अचित्तमंतं वा, णेव सयं अदिण्णं गिण्हिज्जा, णेवण्णेहिं अदिण्णं गेण्हावेज्जा अण्णपि अदिण्णं गिण्हंतं न समणुजाणिजा जावजीवाए जाव वोसिरामि ॥ १०४२ ॥ तस्सिमाओ **पंचभावणाओ** भवंति तत्थिमा **पढमा भावणा**, अणुवीइ मिउग्गहं जाई से णिग्गंथे णो अणणुवीइमिउग्गहं जाई से णिग्गंथे केवली बूया अणणुवीइमिओग्गहं जाई से णिग्गंथे अदिण्णं गिण्हेज्जा अणुवीइमिउग्गहं जाई से णिग्गंथे णो अणणुवीइमिओग्गहंजाइ ति पढमा भावणा ॥ १०४३ ॥ **अहावरा दोच्चा भावणा**, अणुण्णवियपाणभोयणभोई से णिग्गंथे णो अणणुण्णवियपाणभोयणभोई, केवली बूया, अणणुण्णवियपाणभोयणभोई से णिग्गंथे अदिण्णं भुंजेज्जा, तम्हा अणुण्णवियपाणभोयणभोई से णिग्गंथे, णो अणणुण्णवियपाणभोयणभोइ ति दोच्चा भावणा ॥ १०४४ ॥ **अहावरा तच्चा भावणा**, णिग्गंथे णं उग्गहंसि उग्गहियंसि एतावताव उग्गहणसीलए सिया, केवली बूया, णिग्गंथेणं उग्गहंसि अणुग्गहियंसि एतावताव अणोग्गहणसीले अदिण्णं गिण्हेज्जा णिग्गंथेणं उग्गहंसि उग्गहियंसि एतावताव उग्गहणसीलए सियति तच्चा भावणा ॥ १०४५ ॥ **अहावरा चउत्था भावणा**, णिग्गंथेणं उग्गहंसि उग्गहियंसि अभिक्खणं २ उग्गहणसीलए सिया, केवली बूया, णिग्गंथेणं उग्गहंसि उग्गहियंसि अभिक्खणं २ अणोग्गहणसीले अदिण्णं गिण्हेज्जा णिग्गंथे उग्गहंसि उग्गहियंसि अभिक्खणं २ उग्गहणसीलए सिय ति चउत्था भावणा ॥ १०४६ ॥ **अहावरा पंचमा भावणा**, अणुवीइमितोग्गहजाई से णिग्गंथे साहम्मिएसु णो अणणुवीइमिउग्गहजाई, केवली बूया, अणणुवीइमिउग्गहजाई से णिग्गंथे साहम्मिएसु अदिण्णं उगिण्हेज्जा, अणुवीइमिओग्गहजाई से णिग्गंथे साहम्मिएसु णो अणणुवीइमिओग्गहजाई इइ पंचमा भावणा ॥ १०४७ ॥ एतावताव तच्चे महव्वए सम्मं जाव आणाए आराहिए यावि भवइ, तच्चं भंते मह-

व्वयं ॥ १०४८ ॥ अहावरं चउत्थं महव्वयं पच्चक्खामि सव्वं मेहुणं, से दिव्वं वा, माणुसं वा, तिरिक्खजोणियं वा, णेव सयं मेहुणं गच्छेज्जा तं चेव अदिण्णा-
दाणवत्तव्वया भाणियव्वा, जाव वोसिरामि ॥ १०४९ ॥ तस्सिमाओ पंच भाव-
णाओ भवंति ॥ १०५० ॥ तत्थिमा पढमा भावणा, णो णिग्गंथे अभिक्खणं
२ इत्थीणं कहं कहइत्तए सिया, केवली बूया, णिग्गंथेणं अभिक्खणं २ इत्थीणं
कहं कहेमाणे संतिमेदा संतिविभंगा संतिकेवलीपण्णत्ताओ धम्माओ भंसेज्जा, णो
णिग्गंथेणं अभिक्खणं २ इत्थीणं कहं कहइत्तए सिय त्ति पढमा भावणा ॥ १०५१ ॥
अहावरा दोच्चा भावणा, णो णिग्गंथे इत्थीणं मणोहराई २ इंदियाई आलोए-
त्तए णिज्झाइत्तए सिया, केवली बूया, णिग्गंथे णं इत्थीणं मणोहराई २ इंदियाई
आलोएमाणे णिज्झाएमाणे संतिमेया संतिविभंगा जाव धम्माओ भंसेज्जा, णो
णिग्गंथे इत्थीणं मणोहराई २ इंदियाई आलोएत्तए णिज्झाइत्तए सिय त्ति दोच्चा
भावणा ॥ १०५२ ॥ अहावरा तच्चा भावणा, णो णिग्गंथे इत्थीणं पुव्वरयाई
पुव्वकीलियाई सरित्तए सिया, केवली बूया, णिग्गंथे णं इत्थीणं पुव्वरयाई पुव्वकी-
लियाई सरमाणे संतिमेया जाव भंसेज्जा, णो णिग्गंथे इत्थीणं पुव्वरयाई पुव्वकी-
लियाई सरित्तए सिय त्ति तच्चा भावणा ॥ १०५३ ॥ अहावरा चउत्था भावणा,
णाइमत्तपाणभोयणभोई से णिग्गंथे णो पणीयरसभोयणभोई, केवली बूया, अइम-
त्तपाणभोयणभोई से णिग्गंथे पणीयरसभोयणभोई थ संतिमेदा जाव भंसेज्जा,
णोऽतिमत्तपाणभोयणभोई से णिग्गंथे, णो पणीयरसभोयणभोई त्ति चउत्था
भावणा, ॥ १०५४ ॥ अहावरा पंचमा भावणा, णो णिग्गंथे इत्थीपसुपंड-
गसंसत्ताई सयणासणाई सेवित्तए सिया, केवली बूया, णिग्गंथेणं इत्थीपसुपंडग-
संसत्ताई सयणासणाई सेवेमाणे संतिमेया जाव भंसेज्जा, णो णिग्गंथे इत्थीपसुपंडग-
संसत्ताई सयणासणाई सेवित्तए सियत्ति पंचमा भावणा ॥ १०५५ ॥ एतावताव चउत्थे
महव्वए सम्मं काएण फासिए जाव आराहिए था वि भवइ, चउत्थं भंते ! महव्वयं ०
॥ १०५६ ॥ अहावरं पंचमं भंते ! महव्वयं सव्वं परिग्गहं पच्चक्खामि, से अप्पं वा, बहुं
वा, अणुं वा, थूळं वा, चित्तमंतं वा, अचित्तमंतं वा, णेव सयं परिग्गहं गिण्हेज्जा,
णोवण्णेहिं परिग्गहं गिण्हविज्जा, अण्णंपि परिग्गहं गिण्हंतं ण समणुज्जाणिज्जा, जाव
वोसिरामि ॥ १०५७ ॥ तस्सिमाओ पंच भावणाओ भवंति ॥ तत्थिमा पढमा
भावणा, सोयओणं जीवे मणुण्णामणुण्णाई सइई सुणैइ, मणुण्णामणुण्णेहिं सइई णो
सजेज्जा, णो रजेज्जा, णो गिउझैज्जा, णो मुज्झैज्जा, णो अज्झोववजेज्जा, णो
विणिग्गयामावजेज्जा, केवली बूया, णिग्गंथेणं मणुण्णामणुण्णेहिं सइई संज्जमाणे

जाव विणिग्घायमावज्जमाणे संतिभेया संतिविभंगा संतिकेवलपणत्ताओ धम्माओ भंसेज्जा ॥ १०५८ ॥ ण सक्का ण सोउं सद्दा, सोयविसयमागता; रागदोसा उ जे तत्थ ते भिक्खू परिवज्जए ॥ १०५९ ॥ सोयओ जीवो मणुण्णामणुण्णाइं सद्दाइं सुणेइ० ॥ १०६० ॥ अहावरा **दोच्चा भावणा**, चक्खूओ जीवो मणुण्णामणुण्णाइं रुवाई पासइ, मणुण्णामणुण्णेहिं रुवेहिं णो सज्जेज्जा, णो रज्जेज्जा, जाव णो विणिग्घायमावज्जेज्जा, केवली बूया, मणुण्णामणुण्णेहिं रुवेहिं सज्जमाणे रज्जमाणे जाव विणिग्घायमावज्जमाणे संतिभेया संतिविभंगा जाव भंसेज्जा ॥ १०६१ ॥ ण सक्का रुवमदद्धं चक्खुविसयमागयं, रागदोसा उ जे तत्थ, ते भिक्खू परिवज्जए ॥ १०६२ ॥ चक्खूओ जीवो मणुण्णामणुण्णाइं रुवाई पासइ ॥ १०६३ ॥ अहावरा **तच्चा भावणा**, घाणओ जीवो मणुण्णामणुण्णाइं गंधाईं अग्घायइ, मणुण्णामणुण्णेहिं गंधेहिं णो सज्जेज्जा, णो रज्जेज्जा, जाव णो विणिग्घायमावज्जेज्जा, केवली बूया, मणुण्णामणुण्णेहिं गंधेहिं सज्जमाणे रज्जमाणे जाव विणिग्घायमावज्जमाणे संतिभेदा संतिविभंगा जाव भंसेज्जा ॥ १०६४ ॥ णो सक्का गंधमग्घाउं णासाविसयमागयं, रागदोसा उ जे तत्थ ते भिक्खू परिवज्जए ॥ १०६५ ॥ घाणओ जीवो मणुण्णामणुण्णाइं गंधाईं अग्घायइ० ॥ १०६६ ॥ अहावरा **चउत्था भावणा**, जिब्भाओ जीवो मणुण्णामणुण्णाइं रसाईं अस्सादेइ, मणुण्णामणुण्णेहिं रसेहिं णो रज्जेज्जा, जाव णो विणिग्घायमावज्जेज्जा, केवली बूया, णिग्गंधे णं मणुण्णामणुण्णेहिं रसेहिं सज्जमाणे जाव विणिग्घायमावज्जमाणे संतिभेदा जाव भंसेज्जा ॥ १०६७ ॥ णो सक्का रसमस्साउं, जीहाविसयमागयं; रागदोसा उ जे तत्थ, ते भिक्खू परिवज्जए ॥ १०६८ ॥ जीहाओ जीवो मणुण्णामणुण्णाइं रसाईं अस्सादेइ० ॥ १०६९ ॥ अहावरा **पंचमा भावणा**, फासओ जीवो मणुण्णामणुण्णाइं फासाईं पडिसंवेदेइ, मणुण्णामणुण्णेहिं फासेहिं णो सज्जेज्जा, णो रज्जेज्जा, णो गिज्जेज्जा, णो मुज्जेज्जा, णो अज्झोववज्जेज्जा, णो विणिग्घायमावज्जेज्जा, केवली बूया, णिग्गंधे णं मणुण्णामणुण्णेहिं फासेहिं सज्जमाणे जाव विणिग्घायमावज्जमाणे, संतिभेदा संतिविभंगा, संतिकेवलपणत्ताओ धम्माओ भंसेज्जा ॥ १०७० ॥ णो सक्का फासमवेदेउं फासविसयमागयं; रागदोसा उ जे तत्थ, ते भिक्खू परिवज्जए ॥ १०७१ ॥ फासओ मणुण्णामणुण्णाइं फासाईं पडिसंवेदेइ० ॥ १०७२ ॥ एतावताव पंचमे महव्वए सम्मं काएण फासिएपालिएतीरिएकिट्टिए अहिट्टिए आणाए आराहिए यावि भवइ, पंचमं भंते ! महव्वयं ॥ १०७३ ॥ इच्चेएहिं पंचमहव्वएहिं पणवीसाहिं य भावणाहिं संपण्णे अणगारे अहासुयं अहाकप्पं अहामगं सम्मं काएण फासित्ता,

पालिता, तीरिता, किट्टिता, आणाए आराहिए यावि भवइ ॥१०७४॥ भावणा-
ज्झयणं पणरहमं समत्तं इय तइथा चूला समत्ता ॥

अणिच्चमावासमुवेति जंतुणो, पलोयए सुच्चमिदं अणुत्तरं; विऊसिरे विञ्जु अगार-
बंधणं, अमीरु आरंभपरिग्गहं चए ॥ १०७५ ॥ तहागअं भिक्खुमणंतसंजयं,
अणेलिसं विञ्जु चरंतमेसणं; तुदंति वायाहिं अभिहवं णरा, सरेहिं संगामगयं व
कुंजरं ॥ १०७६ ॥ तहप्पगारेहिं जणेहिं हीलिए, ससइफासा फरुसा उईरिया;
तितिवक्खए णाणि अदुट्ठचेयसा, गिरिव्व वाएण ण संपवेयए ॥१०७७॥ उवेहमाणे
कुसलेहिं संवसे, अकंतदुक्खी तसथावरा दुही; अल्लसए सव्वसहे महामुणी, तहा हि
से सुस्समणे समाहिए ॥ १०७८ ॥ विऊ णए धम्मपयं अणुत्तरं, विणीयतण्हस्स
मुणिस्स ज्ञायओ; समाहियस्सऽग्गिसिहा व तेयसा, तवो य पण्णा य जसो य
वड्ढइ ॥ १०७९ ॥ दिसोदिसिंऽणंतजिणेण ताइणा, महव्वया खेमपदा पवेदिता;
महागुरु णिस्सयरा उदीरिया, तमेव तेऊत्तिदिसं पगासया ॥ १०८० ॥ सिएहिं
भिक्खू असिए परिव्वए, असज्जमित्थीसु चएज्ज पूअणं; अणिस्सिओ लोगमिणं तहा
परं, णमिज्जइ कामगुणेहिं पंडिए ॥ १०८१ ॥ तहा विमुक्कस्स परिण्णचारिणो
धिईमओ दुक्खखमस्स भिक्खुणो; विमुज्झई जंति मलं पुरेकडं, समीरियं रुप्पमलं
व जोइणा ॥ १०८२ ॥ से हु प्परिण्णा समयमि वट्ठइ, गिराससे उवरय मेहुणा
चरे; भुजंगमे जुणतयं जहा जहे, विमुच्चइ से दुहसेज माहणे ॥ १०८३ ॥ जमाहु
ओहं सलिलं अपारगं, महासमुहं व भुयाहिं दुत्तरं; अहे य णं परिजाणाहि पंडिए, से
हु मुणी अंतकडे ति वुच्चइ ॥ १०८४ ॥ जहा हि बद्धं इह माणवेहिं, जहा य तेसिं
तु विमोक्ख आहिओ; अहा तहा बंधविमोक्ख जे विऊ, से हु मुणी अंतकडे ति
वुच्चइ ॥ १०८५ ॥ इमंमि लोए परए य दोसुवि, ण विज्जइ बंधणं जस्स किंचिवि;
से हु गिरालंबणमप्पइठिए, कलंकली भावपहं विमुच्चइ ति बेमि ॥ १०८६ ॥
सोलहमं विमुत्तिज्झयणं समत्तं ॥ सदाचारणाम बीओ सुयक्खंधो
संपुण्णो, चउत्था चूडा समत्ता ॥

इइ आयारे



णमो त्थु णं समणस्स भगवओ णायपुत्त महावीरस्स

सूयगडं

पढमे सुयक्खंधे

समयज्झयणे पढमे

बुज्झिज्ज त्ति तिउट्ठिज्जा बन्धणं परिजाणिया । किमाह बन्धणं वीरो किं वा जाणं
 तिउट्ठइ ॥ १ ॥ १ ॥ चित्तमन्तमचित्तं वा परिगिज्ज किं सामवि । अन्नं वा अणुजा-
 णाइ एवं दुक्खा न मुच्चई ॥ २ ॥ २ ॥ सयं तिवायए पाणे अदुवड्धेहि घायए ।
 हणन्तं वाऽणुजाणाइ वेरं वड्ढेइ अप्पणो ॥ ३ ॥ ३ ॥ जस्सि कुले समुप्पन्ने जेहिं वा
 संवसे नरे । ममाइ लुप्पई बाले अन्ने अन्नेहि मुच्छिइ ॥ ४ ॥ ४ ॥ वित्तं सोयरिया
 चेव सव्वमेयं न ताणइ । संखाएँ जीवियं चेवं कम्मुणा उ तिउट्ठइ ॥ ५ ॥ ५ ॥ एए
 गन्थे विउक्कम्म एगे समणमाहणा । अयाणन्ता विउस्सिता सत्ता कामेहि माणवा
 ॥ ६ ॥ ६ ॥ सन्ति पच्च महब्भूया इहमेगेसिमाहिया । पुढवी आउ तेऊ वा वाउ
 आगासपच्चमा ॥ ७ ॥ ७ ॥ एए पच्च महब्भूया तेब्भो एगे त्ति आहिया । अह
 तेसिं विणासेणं विणासो होइ देहिणो ॥ ८ ॥ ८ ॥ जहा य पुढवीथूमे एगे नाणाहि
 बीसइ । एवं भो कसिणे लोए विन्नू नाणाहि बीसइ ॥ ९ ॥ ९ ॥ एवमेगे त्ति जम्पन्ति
 मन्दा आरम्भनिस्सिया । एगे किच्चा सयं पावं तिब्बं दुक्खं नियच्छइ ॥ १० ॥ १० ॥
 पत्तैयं कसिणे आया जे बाला जे य पण्डिया । सन्ति पिच्चा न ते सन्ति नत्थि
 सत्तोववाइया ॥ ११ ॥ ११ ॥ नत्थि पुण्णे व पावे वा नत्थि लोए इओवरे । सरी-
 रस्स विणासेणं विणासो होइ देहिणो ॥ १२ ॥ १२ ॥ कुव्वं च कारयं चेव सव्वं
 कुव्वं न विज्जई । एवं अकारओ अप्पा एवं ते उ पगम्भिया ॥ १३ ॥ १३ ॥ जे ते
 उ वाइणो एवं लोए तेसिं कओ सिया । तमाओ ते तमं जन्ति मन्दा आरम्भनि-
 स्सिया ॥ १४ ॥ १४ ॥ सन्ति पच्च महब्भूया इहमेगेसिमाहिया । आयछट्ठा पुणो
 आहु आया लोगे य सासए ॥ १५ ॥ १५ ॥ दुहओ न विणस्सन्ति नो य उप्पज्जए
 असं । सव्वे वि सव्वहा भावा नियत्तीभावमागया ॥ १६ ॥ १६ ॥ पच्च खन्धे
 वयन्तेगे बाला उ खणजोइणो । अओ अप्पओ नेवाहु हेउयं च अहेउयं ॥ १७ ॥ १७ ॥
 पुढवी आउ तेऊ य तहा वाऊ य एगओ । चत्तारि धाउणो ख्वं एवमाहंस आवरे
 ॥ १८ ॥ १८ ॥ अगारमावसन्ता वि अरण्या वा वि पव्वया । इयं दरिसणमावसा
 सव्वदुक्खा विमुच्चई ॥ १९ ॥ १९ ॥ ते नावि संधिं नच्चा णं न ते मम्मविउ जणा !

७अ सुत्ता०

जे ते उ वाइणो एवं न ते ओहंतराऽऽहिया ॥ २० ॥ २० ॥ ते नावि संधिं नच्चा णं
 न ते धम्मविऊ जणा । जे ते उ वाइणो एवं न ते संसारपारगा ॥ २१ ॥ २१ ॥
 ते नावि संधिं नच्चा णं न ते धम्मविऊ जणा । जे ते उ वाइणो एवं न ते गम्भस्स
 पारगा ॥ २२ ॥ २२ ॥ ते नावि संधिं नच्चा णं न ते धम्मविऊ जणा । जे ते उ
 वाइणो एवं न ते जम्मस्स पारगा ॥ २३ ॥ २३ ॥ ते नावि संधिं नच्चा णं न ते
 धम्मविऊ जणा । जे ते उ वाइणो एवं न ते दुक्खस्स पारगा ॥ २४ ॥ २४ ॥ ते
 नावि संधिं नच्चा णं न ते धम्मविऊ जणा । जे ते उ वाइणो एवं न ते मारस्स
 पारगा ॥ २५ ॥ २५ ॥ नाणाविहाइं दुक्खाइं अणुहोन्ति पुणो पुणो । संसारचक्क-
 वालम्मि मच्चुवाहिजराकुले ॥ २६ ॥ २६ ॥ उच्चावयाणि गच्छन्ता गम्भमेस्सन्ति
 णन्तसो । नायपुत्ते महावीरे एवमाह जिणुत्तमे ॥ २७ ॥ २७ ॥ त्ति बेमि ॥
समयज्झयणे पढमुद्देसो ॥

आघायं पुण एगेसिं उववन्ना पुढो जिया । वेदयन्ति सुहं दुक्खं अदु वा लुप्पन्ति
 ठाणओ ॥ १ ॥ २८ ॥ न तं सयं कडं दुक्खं कओ अन्नकडं च णं । सुहं वा जइ
 वा दुक्खं सेहियं वा असेहियं ॥ २ ॥ २९ ॥ सयं कडं न अन्नेहिं वेदयन्ति पुढो
 जिया । संगइयं तं तहा तेसिं इहमेगेसिमाहियं ॥ ३ ॥ ३० ॥ एवमेयाणि जम्पन्ता
 बाला पण्डियमाणिणो । निययानिययं सन्तं अयाणन्ता अबुद्धिया ॥ ४ ॥ ३१ ॥
 एवमेगे उ पासत्था ते भुज्जो विप्पगम्भिया । एवं उवद्धिया सन्ता न ते दुक्ख-
 विमोक्खगा ॥ ५ ॥ ३२ ॥ जविणो मिगा जहा सन्ता परियाणेण वज्जिया ।
 असक्कियाइं सक्कन्ति सक्कियाइं असक्किणो ॥ ६ ॥ ३३ ॥ परियाणियाणि सक्कन्ता
 पासियाणि असक्किणो । अन्नाणभयसंविग्गा संपलन्ति तहिं तहिं ॥ ७ ॥ ३४ ॥
 अह तं पवेज्ज बज्झं अहे बज्झस्स वा वए । मुच्चेज्ज पयपासाओ तं तु मन्दे न
 देहइं ॥ ८ ॥ ३५ ॥ अहियप्पाहियपन्नाणे विसमन्तेणुवागए । स बद्धे पयपासेणं
 तत्थ घायं नियच्छइ ॥ ९ ॥ ३६ ॥ एवं तु समणा एगे मिच्छदिट्ठी अणारिया ।
 असक्कियाइं सक्कन्ति सक्कियाइं असक्किणो ॥ १० ॥ ३७ ॥ धम्मपन्नवणा जा सा
 तं तु सक्कन्ति मूढगा । आरम्भाइं न सक्कन्ति अवियत्ता अकोविया ॥ ११ ॥ ३८ ॥
 सव्वप्पगं विउक्कस्सं सव्वं नूमं विहूणिया । अप्पत्तियं अकम्मसे एयमट्ठं मिगे चुए
 ॥ १२ ॥ ३९ ॥ जे एयं नाभिजाणन्ति मिच्छदिट्ठी अणारिया । मिगा वा पास-
 बद्धा ते घायमेस्सन्ति णन्तसो ॥ १३ ॥ ४० ॥ माहणा समणा एगे सव्वे नाणं
 सयं वए । सव्वलोगे वि जे पाणा न ते जाणन्ति किंचण ॥ १४ ॥ ४१ ॥ मिलक्ख
 अमिलक्खस्स जहा वुत्ताणुभासए । न हेउं से वियाणाइ भासियं तऽणुभासए ॥ १५ ॥

॥ ४२ ॥ एवमज्ञाणिया नाणं वयन्ता वि सयं सयं । निच्छयत्थं ण जाणन्ति
मिलक्खु व्व अबोहिया ॥ १६ ॥ ४३ ॥ अज्ञाणियाणं वीमंसा अज्ञाणे न नियच्छइ ।
अप्पणो य परं नालं कुतो अज्ञाणुसासिउं ॥ १७ ॥ ४४ ॥ वणे मूढे जहा जन्तू
मूढे नेयाणुगामिए । दो वि एए अकोविया तिव्वं सोयं नियच्छइ ॥ १८ ॥ ४५ ॥
अन्धो अन्धं प्हं नेन्तो दूरमद्धानुगच्छइ । आवज्जे उप्पहं जन्तू अदु वा पन्थाणु-
गामिए ॥ १९ ॥ ४६ ॥ एवमेगे नियागट्ठी धम्ममाराहगा वयं । अदु वा अहम्म-
मावज्जे न ते सव्वज्जुयं वए ॥ २० ॥ ४७ ॥ एवमेगे वियक्काहिं नो अजं पज्जु-
वासिया । अप्पणो य वियक्काहिं अयमज्जु हि दुम्मई ॥ २१ ॥ ४८ ॥ एवं तक्काइ
साहेन्ता धम्माधम्मे अकोविया । दुक्खं ते नाइतुट्ठेन्ति सउणी पज्जरं जहा ॥ २२ ॥
॥ ४९ ॥ सयं सयं पसंसन्ता गरहन्ता परं वयं । जे उ तत्थ विउस्सन्ति संसारं ते
विउस्सिया ॥ २३ ॥ ५० ॥ अहावरं पुरक्खायं किरियावाइदरिसणं । कम्मचिन्ता-
पणट्ठाणं संसारस्स पवट्ठणं ॥ २४ ॥ ५१ ॥ जाणं काएणऽणाउट्ठी अबुहो जं च
हिंसइ । पुट्ठो संवेयइ परं अवियत्तं खु सावज्जं ॥ २५ ॥ ५२ ॥ सन्तिमे तउ
आयाणा जेहिं कीरइ पावगं । अभिकम्मा य पेसा य मणसा अणुजाणिया
॥ २६ ॥ ५३ ॥ एए उ तउ आयाणा जेहिं कीरइ पावगं । एवं भावविसोहीए
निव्वाणमभिगच्छइ ॥ २७ ॥ ५४ ॥ पुत्तं पिया समारब्भ आहारेज्ज असंजए ।
भुज्जमाणो य मेहावी कम्मुणा नोवलिप्पई ॥ २८ ॥ ५५ ॥ मणसा जे
पउस्सन्ति चित्तं तेसिं न विज्जइ । अणवज्जमतहं तेसिं न ते संवुडचारिणो ॥ २९ ॥
॥ ५६ ॥ इच्चेयाहि य दिट्ठीहिं सायागारवनिस्सिया । सरणं ति मज्जमाणा सेवन्ती
पावगं जणा ॥ ३० ॥ ५७ ॥ जहा अस्साविणिं नावं जाइअन्धो दुरुहिया । इच्छई
पारमागन्तुं अन्तरा य विसीयई ॥ ३१ ॥ ५८ ॥ एवं तु समणा एगे मिच्छदिट्ठी
अणारिया । संसारपारक्खी ते संसारं अणुपरियट्ठन्ति ॥ ३२ ॥ ५९ ॥ ति बेमि ॥
समयज्झयणे विइयुदेसो ॥

जं किंचि उ पइकळं सट्ठीमागन्तुमीहियं । सहस्सन्तरियं भुजे दुपक्खं चेव
सेवई ॥ १ ॥ ६० ॥ तमेव अवियाणन्ता विसमंसि अकोविया । मच्छा वेसालिया
चेव उदगस्सभियागमे ॥ २ ॥ ६१ ॥ उदगस्स पहावेणं सुक्कं सिग्घं तमेन्ति उ ।
दक्केहि य कक्केहि य आमिसत्थेहि ते दुही ॥ ३ ॥ ६२ ॥ एवं तु समणा एगे
वट्ठमाणुहेसिणो । मच्छा वेसालिया चेव घायमेस्सन्ति णन्तसो ॥ ४ ॥ ६३ ॥
इणमच्चं तु अज्ञाणं इहमेगेसिमाहियं । देवउत्ते अयं लोए बम्भउत्ते इ आवरे ॥ ५ ॥
॥ ६४ ॥ ईसरेण कडे लोए पहाणाइ तहावरे । जीवाजीवसमाउत्ते सुहदुक्खसम-

न्निए ॥ ६ ॥ ६५ ॥ सयंभुणा कडे लोए इइ वुत्तं महेसिणा । मारेण संथुया माया
 तेण लोए असासए ॥ ७ ॥ ६६ ॥ माहणा समणा एगे आह अण्डकडे जए ।
 असो तत्तमकासी य अयाणन्ता मुसं वए ॥ ८ ॥ ६७ ॥ सएहिं परियाएहिं लोगं
 बूया कडे ति य । तत्तं ते न वियाणन्ति न विणासी कयाइ वि ॥ ९ ॥ ६८ ॥
 अमणुजसमुप्पायं दुक्खमेव वियाणिया । समुप्पायमयाणन्ता क्हं नायन्ति संवरं
 ॥ १० ॥ ६९ ॥ सुद्धे अपावए आया इहमेगेसिमाहियं । पुणो किट्ठापदोसेणं सो
 तत्थ अवरज्जई ॥ ११ ॥ ७० ॥ इह संवुडे मुणी जाए पच्छा होइ अपावए ।
 वियडम्बु जहा भुज्जो नीरयं सरयं तथा ॥ १२ ॥ ७१ ॥ एयाणुवीइ मेहावी बम्भ-
 चेरेण ते वसे । पुढो पावाउया सव्वे अक्खायारो सयं सयं ॥ १३ ॥ ७२ ॥ सए
 सए उवट्ठाणे सिद्धिमेव न अन्नहा । अहे इहेव वसवती सव्वकामसमप्पिए ॥ १४ ॥
 ॥ ७३ ॥ सिद्धा य ते अरोगे य इहमेगेसिमाहियं । सिद्धिमेव पुरो काउं सासए
 गढिया नरा ॥ १५ ॥ ७४ ॥ असंवुडा अणाईयं भमिहिनति पुणो पुणो । कप्प-
 कालमुवज्जन्ति ठाणा आसुरकिव्विसिय ॥ १६ ॥ ७५ ॥ ति बेमि ॥ समय-
 ज्झयणे तइयुदेसो ॥

एए जिया भो न सरणं बाला पण्डियमाणिणो । हिच्चा णं पुव्वसंजोयं सिया
 किच्चोवएसगा ॥ १ ॥ ७६ ॥ तं च भिक्खु परिचाय वियं तेसु न मुच्छए । अणु-
 क्कस्से अप्पलीणे मज्झेण मुणि जावए ॥ २ ॥ ७७ ॥ सपरिग्गहा य सारम्भा
 इहमेगेसिमाहियं । अपरिग्गहा अणारम्भा भिक्खु ताणं परिव्वए ॥ ३ ॥ ७८ ॥
 कडेसु घासमेसेज्जा विरु दत्तेसणं चरे । अगिद्धो विप्पमुक्को य ओमाणं परिव्वज्जए
 ॥ ४ ॥ ७९ ॥ लोगवायं निसामेज्जा इहमेगेसिमाहियं । विवरीयपन्नसंभूयं अन्नउत्तं
 तयाणुयं ॥ ५ ॥ ८० ॥ अणन्ते निइए लोए सासए न विणस्सई । अन्तवं निइए
 लोए इइ धीरोऽतिपासई ॥ ६ ॥ ८१ ॥ अपरिमाणं वियाणाइ इहमेगेसिमाहियं ।
 सव्वत्थ सपरिमाणं इइ धीरोऽतिपासई ॥ ७ ॥ ८२ ॥ जे केइ तसा पाणा चिट्ठन्ति
 अदु थावरा । परियाए अत्थि से अज्जु जेण ते तसथावरा ॥ ८ ॥ ८३ ॥ उरालं
 जगओ जोगं विवजासं पलेन्ति य । सव्वे अक्कन्तदुक्खा य अजो सव्वे अहिसिया
 ॥ ९ ॥ ८४ ॥ एयं खु नाणिणो सारं जं न हिंसइ किंचण । अहिंसासमयं चेव
 एयावन्तं वियाणिया ॥ १० ॥ ८५ ॥ वुसिए य विगयगेही आयाणं सम्म रक्खए ।
 चरियासणसेज्जासु भत्तपाणे य अन्तसो ॥ ११ ॥ ८६ ॥ एएहिं तिहि ठाणेहिं संजए
 सययं मुणी । उक्कसं जलणं नूमं मज्झत्थं च विगिञ्चए ॥ १२ ॥ ८७ ॥ समिए उ
 सया साहू पच्चसंवरसंवुडे । सिएहिं असिए भिक्खु आमोक्खाए परिव्वएजासि
 ॥ १३ ॥ ८८ ॥ ति बेमि ॥ समयज्झयणं पढमं ॥

वेयालियज्झयणे विइए

संबुज्झह किं न बुज्झह संबोही खलु पेच्च दुल्लहा । नो द्ववणमन्ति राइयो नो सुलभं पुणरावि जीवियं ॥ १ ॥ ८९ ॥ डहरा बुद्धा य पासह गब्भत्था वि चयन्ति माणवा । सेणे जह वट्ठयं हरे एवं आउखयम्मि तुट्ठई ॥ २ ॥ ९० ॥ मायाहिं पियाहिं लुप्पई नो सुलहा सुगई य पेच्चओ । एयाइ भयाइ पेहिया आरम्भा विरमेज्ज सुव्वए ॥ ३ ॥ ९१ ॥ जमिणं जगई पुढो जगा कम्मेहिं लुप्पन्ति पाणिणो । सयमेव कडेहि गाहई नो तस्स मुच्चेज्जऽपुट्ठयं ॥ ४ ॥ ९२ ॥ देवा गन्धव्वरक्खसा असुरा भूमिचरा सरीसिवा । राया नरसेट्ठिमाहणा ठाणा ते वि चयन्ति दुक्खिया ॥ ५ ॥ ९३ ॥ कामेहिं य संथवेहिं गिद्धा कम्मसहा कालेण जन्तवो । ताले जह बन्धणञ्चुए एवं आउखयम्मि तुट्ठई ॥ ६ ॥ ९४ ॥ जे यावि बहुस्सुए सिया धम्मिय माहण भिक्खुए सिया । अभिन्नमकडेहि मुच्छिए तिव्वं ते कम्मेहिं किच्चई ॥ ७ ॥ ९५ ॥ अह पास विवेगमुट्ठिए अवित्तिणे इह भासई धुवं । नाहिसि आरं कओ परं वेहासे कम्मेहिं किच्चई ॥ ८ ॥ ९६ ॥ जइ वि य नगिणे किसे चरे जइ वि य भुज्जिय मासमन्तसो । जे इह मायाहिं मिज्जई आगन्ता गम्भाय णन्तसो ॥ ९ ॥ ९७ ॥ पुरिसोरम पावकम्मुणा पलियन्तं मणुयाण जीवियं । सन्ना इह काममुच्छिया मोहं जन्ति नरा असंवुडा ॥ १० ॥ ९८ ॥ जययं विहराहिं जोगवं अणुपाणा पन्था दुत्तरा । अणुसासणमेव पक्कमे वीरेहिं सम्मं पवेइयं ॥ ११ ॥ ९९ ॥ विरया वीरा समुट्ठिया कोहकायरियाइपीसणा । पाणे न हणन्ति सव्वसो पावाओ विरयाऽभिनिव्वुडा ॥ १२ ॥ १०० ॥ न वि ता अहमेव लुप्पए लुप्पन्ती लोगंसि पाणिणो । एवं सहिएहि पासए अणिहे से पुट्ठेऽहियासए ॥ १३ ॥ १०१ ॥ धुणिया कुलियं व लेव्वं किसए देहमणासणाइहिं । अविहिंसामेव पव्वए अणुधम्मो मुणिणा पवेइयो ॥ १४ ॥ १०२ ॥ सउणी जह पंसुगुण्डिया विहुणिय धंसयई सियं रयं । एवं दविओवहाणवं कम्मं खवइ तवस्सि माहणे ॥ १५ ॥ १०३ ॥ उट्ठियमणगरमैसणं समणं ठाणठियं तवस्सिणं । डहरा बुद्धा य पत्थए अवि सुस्से न य तं लमेज्ज नो ॥ १६ ॥ १०४ ॥ जइ कालुणियाणि कासिया जइ रोयन्ति य पुत्तकारणा । दवियं भिक्खुं समुट्ठियं नो लब्भन्ति न संठवित्तए ॥ १७ ॥ १०५ ॥ जइ वि य कामेहिं लाविया जइ नेज्जाहिं ण बन्धिउं घरं । जइ जीविय नावक्कए नो लब्भन्ति न संठवित्तए ॥ १८ ॥ १०६ ॥ सेहन्ति य णं ममाइणो माय पिया य सुया य भारिया । पोसाहिं ण पासओ तुमं लोग परं पि जहासि पोसणो ॥ १९ ॥ १०७ ॥ अन्ने अन्नेहिं मुच्छिया मोहं जन्ति नरा असंवुडा । विसमं विसमेहिं गाहिया ते

पावेहि पुणो पगब्भिया ॥ २० ॥ १०८ ॥ तम्हा दवि इक्ख पण्डिए पावाओ
विरएऽभिनिव्वुडे । पणए वीरं महाविहिं सिद्धिपहं नेयाउयं धुवं ॥ २१ ॥ १०९ ॥
वेयालियमग्गमागओ मणवयसा काएण निव्वुडो । चित्ता वित्तं च नायओ आरम्भं
च सुसंवुडं चरे ॥ २२ ॥ ११० ॥ त्ति वेमि वेयालियज्झयणे पढमुद्देसो ॥

तयसं व जहाइ से रयं इइ संखाय मुणी न मज्जई । गोयन्नतरेण माहणे
अहसेयकरी अत्तेसि इंखिणी ॥ १ ॥ १११ ॥ जो परिभवई परं जणं संसारे परि-
वत्तई महं । अदु इंखिणिया उ पाविया इइ संखाय मुणी न मज्जई ॥ २ ॥ ११२ ॥
जे यावि अणायगे सिया जे वि य पेसगपेसगे सिया । जे मोणपयं उवट्टिए नो
लज्जे समयं सया चरे ॥ ३ ॥ ११३ ॥ सम अन्नयरम्मि संजमे संसुद्धे समणे
परिव्वए । जे आवकहा समाहिए दविए कालमकासि पण्डिए ॥ ४ ॥ ११४ ॥
दूरं अणुपस्सिया मुणी तीयं धम्ममणागयं तहा । पुट्ठे फस्सेहि माहणे अवि हण्णू
समयम्मि रीयइ ॥ ५ ॥ ११५ ॥ पन्नसमत्ते सया जए समताधम्ममुदाहरे मुणी ।
सुहुमे उ सया अल्लसए नो कुज्झे नो माणि माहणे ॥ ६ ॥ ११६ ॥ बहुजणन-
मणम्मि संवुडो सव्वट्टेहि नरे अणिस्सिए । हरए व सया अणाविले धम्मं पादुर-
कासि कासवं ॥ ७ ॥ ११७ ॥ बहवे पाणा पुडो सिया पत्तेयं समयं समीहिया ।
जे मोणपयं उवट्टिए विरइं तत्थ अकासि पण्डिए ॥ ८ ॥ ११८ ॥ धम्मस्स य
पारगे मुणी आरम्भस्स य अन्तए ठिए । सोयन्ति य णं ममाइणो नो लब्भन्ति
नियं परिगहं ॥ ९ ॥ ११९ ॥ इहलोगदुहावहं विऊ परलोगे य दुहं दुहावहं ।
विद्धंसणधम्ममेव तं इइ विज्जं को गारमावसे ॥ १० ॥ १२० ॥ महयं पल्लिगोव
जाणिया जा वि य वंदणपूयणा इहं । सुहुमे सल्ले दुरुद्धरे विउमंता पयहिज्ज संथवं
॥ ११ ॥ १२१ ॥ एगे चर ठाणमासणे सयणे एग समाहिए सिया । भिक्खु
उवहाणवीरिए वइयुत्ते अज्झत्तसंवुडो ॥ १२ ॥ १२२ ॥ नो पीहे न यावपंगुणे दारं
सुन्नघरस्स संजए । पुट्ठे न उदाहरे वयं न समुच्छे नो संथरे तणं ॥ १३ ॥ १२३ ॥
जत्थत्थमिए अणाउले समविसमाई मुणी हियासए । चरगा अदु वा वि भेरवा अदु
वा तत्थ सरीसिवा सिया ॥ १४ ॥ १२४ ॥ तिरिया मणुया य दिव्वगा उवसग्गा
तिविहा हियासिया । लोमादीयं न हारिसे सुन्नागारगओ महामुणी ॥ १५ ॥ १२५ ॥
नो अभिक्खेज्ज जीवियं नो वि य पूयणपत्थए सिया । अब्भत्थमुवेन्ति भेरवा
सुन्नागारगयस्स भिक्खुणो ॥ १६ ॥ १२६ ॥ उवणीयतरस्स ताइणो भयमाणस्स
विविक्कमासणं । सामाइयमाहु तस्स जं जो अप्पाण भए न दंसए ॥ १७ ॥ १२७ ॥
उसिणोदगतत्तभोइणो धम्मठियस्स मुणिस्स हीमतो । संसग्गे असाहु राइहिं

असमाही उ तहागयस्स वि ॥ १८ ॥ १२८ ॥ अहिगरणकडस्स भिक्खुणो
 वयमाणस्स पसज्ज दासणं । अट्ठे परिहायई बहू अहिगरणं न करेज्ज पण्डिण
 ॥ १९ ॥ १२९ ॥ सीओदग पडि दुगुंछिणो अपडिज्जस्स ल्वावसप्पिणो । सामाइ-
 यमाहु तस्स जं जो गिहिमतोऽसणं न भुज्जई ॥ २० ॥ १३० ॥ न य संखयमाहु
 जीवियं तह वि य बालजणो पगब्भई । बाले पावेहि मिज्जई इइ संखाय मुणी न
 मज्जई ॥ २१ ॥ १३१ ॥ छंदेण पळे इमा पया बहुमाया मोहेण पावुडा । वियडेण
 पळेन्ति माहणे सीउण्हं वयसा हियासए ॥ २२ ॥ १३२ ॥ कुजए अपराजिए जहा
 अक्खेहिं कुसळेहि दीवयं । कडमेव गहाय नो कलिं नो तीयं नो चेव दावरं
 ॥ २३ ॥ १३३ ॥ एवं लोगम्मि ताइणा बुइए जे धम्मो अणुत्तरे । तं गिण्ह हियं
 ति उत्तमं कडमिव सेसऽवहाय पण्डिण ॥ २४ ॥ १३४ ॥ उत्तर मणुयाण आहिया
 गामधम्म इइ मे अणुस्सुयं । जंसी विरया समुट्ठिया कासवस्स अणुधम्मचारिणो
 ॥ २५ ॥ १३५ ॥ जे एय चरन्ति आहियं नाएणं महया महेसिणा । ते उट्ठिय ते
 समुट्ठिया अब्बोन्नं सारेन्ति धम्मओ ॥ २६ ॥ १३६ ॥ मा पेह पुरा पणामए
 अभिकखे उवहिं धुणित्तए । जे दूमण तेहि नो नया ते जाणन्ति समाहिमाहियं
 ॥ २७ ॥ १३७ ॥ नो काहिऐं होज्ज संजए पासणिए न य संपसारए । नच्चा धम्मं
 अणुत्तरं कयकिरिए न यावि मामए ॥ २८ ॥ १३८ ॥ छन्नं च पसंस नो करे न
 य उक्कोस पगास माहणे । तेसिं सुविवेगमाहिए पणया जेहि सुजोसियं धुयं ॥ २९ ॥
 ॥ १३९ ॥ अनिहे सहिए सुसंवुडे धम्मट्ठी उवहाणवीरिए । विहरेज्ज समाहिइंदिए
 अत्तहियं खु दुहेण लब्भइ ॥ ३० ॥ १४० ॥ न हि नूण पुरा अणुस्सुयं अदु वा
 तं तह नो समुट्ठियं । मुणिणा सामाइ आहियं नाएणं जगसव्वदंसिणा ॥ ३१ ॥ १४१ ॥
 एवं मत्ता महन्तरं धम्ममिणं सहिया बहू जणा । गुरुणो छंदाणवत्तगा विरया तिण्ण
 महोषमाहियं ॥ ३२ ॥ १४२ ॥ ति बेमि ॥ **वेयालियज्झयणम्मि बिइयुहेसो ॥**
 संवुडकम्मस्स भिक्खुणो जं दुक्खं पुट्ठं अबोहिए । तं संजमओऽवचिज्जई मरणं
 हेच्च वयन्ति पण्डिया ॥ १ ॥ १४३ ॥ जे विन्नवणाहिजोसिया संतिण्णेहि समं वियाहिया ।
 तम्हा उट्ठं ति पासहा अदक्खु कामाईं रोगवं ॥ २ ॥ १४४ ॥ अमगं वणिएहि
 आहियं धारेन्ती राइणिया इहं । एवं परमा महव्वया अक्खाया उ सराइभोयणा
 ॥ ३ ॥ १४५ ॥ जे इह सायाणुगा नरा अज्झोववच्चा कामेहि मुच्छिया । किवणेण
 समं पगब्भिया न वि जाणन्ति समाहिमाहियं ॥ ४ ॥ १४६ ॥ वाहेण जहा व
 विच्छए अबले होइ गवं पचोइए । से अन्तसो अप्पथामए नाइवहे अबले विसीयइ
 ॥ ५ ॥ १४७ ॥ एवं कामेसणं विरु अज्ज सुए पयहेज्ज संथवं । कामी कामे न

कामए लद्धे वा वि अलद्ध कण्हुई ॥ ६ ॥ १४८ ॥ मां पच्छ असाहुया भवे अचेही
 अणुसास अप्पगं । अहियं च असाहु सोयई से थणई परिदेवई बहुं ॥ ७ ॥ १४९ ॥
 इह जीवियमेव पासहा तरुणे वा ससयस्स तुट्ठई । इत्तरवासे य बुज्झह गिद्ध नरा
 कामेसु मुच्छिया ॥ ८ ॥ १५० ॥ जे इह आरम्भनिस्सिया आयदण्ड एगन्तल्लसगा ।
 गन्ता ते पावलोगयं चिररायं आसुरियं दिसं ॥ ९ ॥ १५१ ॥ न य संखयमाहु
 जीवियं तह वि य बालजणो पगम्भई ॥ पच्चुप्पन्नेण कारियं को दट्ठुं परलोगमागए
 ॥ १० ॥ १५२ ॥ अदक्खुव दक्खुवाहियं तं सद्दहसु अदक्खुदंसणा । हंदि हु
 सुनिरुद्धदंसणे मोहणिण कडेण कम्मुणा ॥ ११ ॥ १५३ ॥ दुक्खी मोहे पुणो पुणो
 निव्विन्देज्ज सिलोगपूयणं । एवं सहिए हिपासए आयतुलं पाणेहि संजए ॥ १२ ॥
 ॥ १५४ ॥ गारं पि य आवसे नरे अणुपुव्वं पाणेहि संजए । समया सव्वत्थ सुव्वए
 देवानं गच्छे सलोगयं ॥ १३ ॥ १५५ ॥ सोच्चा भगवाणुसासणं सच्चे तत्थ करेज्जु-
 वक्कमं । सव्वत्थ विणीयमच्छरे उच्चं भिक्खु विसुद्धमाहरे ॥ १४ ॥ १५६ ॥ सव्वं
 नच्चा अहिट्ठए धम्मट्ठी उवहाणवीरिए । गुत्ते जुत्ते सया जए आयपरे परमायतट्ठिए
 ॥ १५ ॥ १५७ ॥ वित्तं पसवो य नाइओ तं बाले सरणं ति मन्नई । एए मम तेसु
 वी अहं नो ताणं सरणं न विज्जई ॥ १६ ॥ १५८ ॥ अब्भागमियम्मि वा दुहे
 अहवा उक्कमिए भवन्तिए । एगस्स गई य आगई विदुमन्ता सरणं न मन्नई
 ॥ १७ ॥ १५९ ॥ सव्वे सयकम्मकप्पिया अवियत्तेणे दुहेण पाणिणो । हिण्डन्ति
 भयाउला सढा जाइजरामरणेहिऽभिहुया ॥ १८ ॥ १६० ॥ इणमेव खणं वियाणिया
 नो सुलभं बोहिं च आहियं । एवं सहिए हिपासए आह जिणे इणमेव सेसगा
 ॥ १९ ॥ १६१ ॥ अभविंसु पुरा वि भिक्खुवो आएसा वि भवन्ति सुव्वया ।
 एयाई गुणाई आहु ते कासवस्स अणुधम्मचारिणो ॥ २० ॥ १६२ ॥ तिविहेण वि
 पाण मा हणे आयहिए अणियाण संवुडे । एवं सिद्धा अणन्तसो संपइ जे य
 अणागयावरे ॥ २१ ॥ १६३ ॥ एवं से उदाहु अणुत्तरनाणी अणुत्तरदंसी अणुत्तर-
 नाणदंसणधरे । अरहा नायपुत्ते भगवं वेसालिए वियाहिए ॥ २२ ॥ १६४ ॥ त्ति
 बेमि ॥ वेयालियज्झयणं विइयं ॥

उवसग्गज्झयणे तइए

सूरं मन्नइ अप्पाणं जाव जेयं न पस्सई । जुज्झन्तं दडधम्मार्णं सिंसुपालो व
 महारहं ॥ १ ॥ १६५ ॥ पयाया सूर रणसीसे संगामम्मि उवट्ठिए । माया पुत्तं

न जाणाइ जेएण परिविच्छए ॥ २ ॥ १६६ ॥ एवं सेहे वि अप्पुठ्ठे भिक्खायरिया-
अकोविए । सूरं मन्नइ अप्पाणं जाव ल्हं न सेवए ॥ ३ ॥ १६७ ॥ जया हेमन्त-
मासम्मि सीयं फुसइ सव्वगं । तत्थ मन्दा विसीयन्ति रज्जहीणा व खत्तिया ॥ ४ ॥
॥ १६८ ॥ पुट्ठे गिम्हाहितावेणं विमणे सुपिवासिए । तत्थ मन्दा विसीयन्ति मच्छा
अप्पोदए जहा ॥ ५ ॥ १६९ ॥ सया दत्तेसणा दुक्खा जायणा दुप्पणोल्लिया ।
कम्मत्ता दुब्भगा चेव इच्चाहंसु पुढोज्जणा ॥ ६ ॥ १७० ॥ एए सहे अचायन्ता गामेसु
नगरेसु वा । तत्थ मन्दा विसीयन्ति संगामम्मि व भीरया ॥ ७ ॥ १७१ ॥ अप्पेगे
खुहियं भिक्खुं सुणी ढंसइ लसए । तत्थ मन्दा विसीयन्ति तेउपुट्ठा व पाणिणो
॥ ८ ॥ १७२ ॥ अप्पेगे पडिभासन्ति पडिपन्थियमागया । पडियारगया एए जे
एए एवजीविणो ॥ ९ ॥ १७३ ॥ अप्पेगे वइ जुञ्जन्ति नगिणा पिण्डोलगाहमा ।
मुण्डा कण्हविणट्ठ्ठा उज्जळा असमाहिया ॥ १० ॥ १७४ ॥ एवं विप्पडिवहेगे
अप्पणा उ अजाणया । तमाओ ते तमं जन्ति मन्दा मोहेण पावुडा ॥ ११ ॥ १७५ ॥
पुट्ठो य दंसमसगेहिं तणफासमचाइया । न मे दिट्ठे परे लोए जइ परं मरणं सिया
॥ १२ ॥ १७६ ॥ संतत्ता केसलोएणं बम्मचेरपराइया । तत्थ मन्दा विसीयन्ति
मच्छा विट्ठा व केयणे ॥ १३ ॥ १७७ ॥ आयदण्डसमायारे मिच्छासंठियभावणा ।
हरिसप्पओसमावन्ना केई लसन्तिऽनारिया ॥ १४ ॥ १७८ ॥ अप्पेगे पलियन्तेसिं
चारो चोरो त्ति सुव्वयं । बन्धन्ति भिक्खुयं बाला कसायवयणेहि य ॥ १५ ॥ १७९ ॥
तत्थ दण्णेण संवीते मुट्ठिणा अदु फलेण वा । नाईणं सरई बाले इत्थी वा कुट्ठगा-
मिणी ॥ १६ ॥ १८० ॥ एए भो कसिणा फासा फरसा दुरहियासया । हत्थी वा
सरसंवित्ता कीवावस गया गिहं ॥ १७ ॥ १८१ ॥ ति बेमि ॥ उवसग्गज्झयणे
पढमुहेसे ॥

अहिमे सुहुमा संगा भिक्खुणं जे दुरुत्तरा । जत्थ एगे विसीयन्ति न चयन्ति
जवित्तए ॥ १ ॥ १८२ ॥ अप्पेगे नायओ दिस्स रोयन्ति परिवारिया । पोस जे
ताय पुट्ठो सि कस्स ताय जहासि जे ॥ २ ॥ १८३ ॥ पिया ते थैरओ ताय ससा
ते खुट्ठिया इमा । भायरो ते सगा ताय सोयरा किं जहासि जे ॥ ३ ॥ १८४ ॥
मायरं पियरं पोस एवं लोगो भविस्सइ । एवं खु लोइयं ताय जे पालेन्ति य मायरं
॥ ४ ॥ १८५ ॥ उत्तरा महुल्लावा पुत्ता ते ताय खुट्ठया । सारिया ते न्वा ताय
मा सा अन्नं जणं गमे ॥ ५ ॥ १८६ ॥ एहि ताय घरं जामो मा य कम्मे सहा
वयं । बिइयं पि ताय पासामो जामु ताव सयं गिहं ॥ ६ ॥ १८७ ॥ गम्मु ताय पुणो
गच्छे न तेणा समणो सिया । अकामगं परिक्कम्मं को ते वारिउमरिहइ ॥ ७ ॥ १८८ ॥

जं किंचि अणगं ताय तं पि सव्वं समीकयं । हिरण्णं ववहाराइ तं पि दाहामु ते वयं
 ॥८॥१८९॥ इच्चैव णं सुसेहन्ति कालुणीयसमुट्ठिया । विबद्धो नाइसंगेहिं तओऽगारं
 पहावइ ॥ ९ ॥ १९० ॥ जहा रुक्खं वणे जायं मालुया पडिबन्धइ । एवं णं पडि-
 बन्धन्ति नाइओ असमाहिणा ॥ १० ॥ १९१ ॥ विबद्धो नाइसंगेहिं हत्थी वा वि
 नवग्गहे । पिट्ठओ परिसप्पन्ति सुय गो व्व अदूरए ॥ ११ ॥ १९२ ॥ एए संग्गा
 मणूसाणं पायाला व अतारिमा । कीवा जत्थ य किस्सन्ति नाइसंगेहिं मुच्छिया
 ॥ १२ ॥ १९३ ॥ तं च भिक्खु परित्राय सव्वे संग्गा महासवा । जीवियं नावकं-
 खिज्जा सोच्चा धम्ममणुत्तरं ॥ १३ ॥ १९४ ॥ अहिमे सन्ति आवट्ठा कासवेणं
 पवेइया । बुद्धा जत्थावसप्पन्ति सीयन्ति अबुहा जहिं ॥ १४ ॥ १९५ ॥ रायाणो
 रायऽमच्चा य माहणा अदु व खत्तिया । निमन्तयन्ति भोगेहिं भिक्खुयं साहुजीविणं
 ॥ १५ ॥ १९६ ॥ हत्थस्सरहजाणेहिं विहारगमणेहि य । भुज्ज भोगे इमे सग्घे
 महरीसी पूजयासु तं ॥ १६ ॥ १९७ ॥ वत्थगन्धमलंकारं इत्थीओ सयणाणि य ।
 भुज्जाहिमाइं भोगाई आउसो पूजयासु तं ॥ १७ ॥ १९८ ॥ जो तुमे नियमो विण्णो
 भिक्खु भावम्मि सुव्वया । अगारमावसन्तस्स सव्वो संविजए तहा ॥ १८॥१९९॥
 चिरं दूइज्जमाणस्स दोसो दाणिं कुओ तव । इच्चैव णं निमन्तेन्ति नीवारेण व सूयरं
 ॥ १९ ॥ २०० ॥ चोइया भिक्खचरियाए अचयन्ता जवित्तए । तत्थ मन्दा
 विसीयन्ति उज्जाणंसि व दुब्बला ॥ २० ॥ २०१ ॥ अचयन्ता व ल्हेणं उवहाणेण
 तज्जिया । तत्थ मन्दा विसीयन्ति उज्जाणंसि जरग्गवा ॥ २१ ॥ २०२ ॥ एवं
 निमन्तणं लद्धं मुच्छिया गिद्ध इत्थिसु । अज्झोववच्चा कामेहिं चोइज्जन्ता गया गिहं
 ॥ २२ ॥ २०३ ॥ ति नेमि ॥ **उवसग्गज्झयणे विइयुद्देसे ॥**

जहा संगामकालम्मि पिट्ठओ भीरु वेहइ । वलयं गहणं नूमं को जाणइ पराजयं
 ॥ १ ॥ २०४ ॥ मुहुत्ताणं मुहुत्तस्स मुहुत्तो होइ तारिसो । पराजियाऽवसप्पामो
 इइ भीरु उवेहइ ॥ २ ॥ २०५ ॥ एवं उ समणा एगे अबलं नच्चाण अप्पणं ।
 अणागयं भयं दिस्स अवकप्पन्तिमं सुयं ॥ ३ ॥ २०६ ॥ को जाणइ विरुवायं
 इत्थीओ उदगाउ वा । चोइज्जन्ता पवक्खामो न नो अत्थि पक्कपियं ॥ ४ ॥ २०७ ॥
 इच्चैव पडिलेहन्ति वलया पडिलेहिणो । वितिगिच्छसमावच्चा पन्थानं च अकोविया
 ॥ ५ ॥ २०८ ॥ जे उ संगामकालम्मि नाया सूरपुरंगमा । नो ते पिट्ठमुवेहन्ति
 किं परं मरणं सिया ॥ ६ ॥ २०९ ॥ एवं समुट्ठिए भिक्खु वोसिज्जा गारबन्धणं ।
 आरम्भं तिरियं कट्ठु अत्तताए परिव्वए ॥ ७ ॥ २१० ॥ तमेगे परिभासन्ति
 भिक्खुयं साहुजीविणं । जे एवं परिभासन्ति अन्तए ते समाहिए ॥ ८ ॥ २११ ॥

संबद्धसमकप्पा उ अन्नमन्नेसु मुच्छिया । पिण्डवार्यं गिलाणस्स जं सारेह दलाह य
 ॥ ९ ॥ २१२ ॥ एवं तुब्भे सरागत्था अन्नमन्नमणुव्वसा । नट्टसप्पहसब्भावा
 संसारस्स अपारगा ॥ १० ॥ २१३ ॥ अह ते परिभासेज्जा भिक्खु मोक्ख-
 विसारए । एवं तुब्भे पभासन्ता दुपक्खं चेव सेवह ॥ ११ ॥ २१४ ॥ तुब्भे
 भुज्जह पाएसु गिलाणो अभिहडम्मि य । तं च बीओदगं भोच्चा तमुद्दिस्सादि जं
 कडं ॥ १२ ॥ २१५ ॥ लित्ता तिच्चाभितावेणं उज्झिया असमाहिया । नाइक्खड्डयं
 सेयं अरुयस्सावरज्जई ॥ १३ ॥ २१६ ॥ तत्तेण अणुसिद्धा ते अपडिन्नेण
 जाणया । न एस नियए मग्गे असमिक्खा वई किई ॥ १४ ॥ २१७ ॥ एरिसा
 जा वई एसा अग्गवेणु व्व करिसिया । गिहिणो अभिहडं सेयं भुज्जिं न उ भिक्खुणं
 ॥ १५ ॥ २१८ ॥ धम्मपन्नवणा जा सा सारम्भा न विसोहिया । न उ एयाहि
 दिट्ठीहिं पुव्वमासिं पगप्पियं ॥ १६ ॥ २१९ ॥ सव्वाहिं अणुजुत्तीहिं अचयन्ता
 जवित्तए । तओ वार्यं निराकिच्चा ते भुज्जो वि पगम्भिया ॥ १७ ॥ २२० ॥ राग-
 दोसाभिभूयप्पा मिच्छतेण अभिहुया । आउस्से सरणं जन्ति टंकगा इव पव्वयं
 ॥ १८ ॥ २२१ ॥ बहुगुणप्पगप्पाई कुज्जा अत्तसमाहिए । जेणन्ने न विरुज्जेज्जा
 तेण तं तं समायरे ॥ १९ ॥ २२२ ॥ इमं च धम्ममायाय कासवेण पवेइयं । कुज्जा
 भिक्खू गिलाणस्स अगिलाए समाहिए ॥ २० ॥ २२३ ॥ संखाय पेसलं धम्मं
 दिट्ठिमं परिनिव्वुडे । उवसग्गे नियामित्ता आमोक्खाए परिव्वएजासि ॥ २१ ॥ २२४ ॥
 ति बेमि ॥ उवसग्गज्झयणे तइयुद्देस्से ॥

आहंसु महापुरिसा पुर्व्वं तत्ततवोधणा । उदएण सिद्धिमावन्ना तत्थ मन्दो
 विसीयइ ॥ १ ॥ २२५ ॥ अमुज्जिया नमी विदेही रामणुत्ते य भुज्जिया । बाहुए उदगं
 भोच्चा तद्दा नारायणे रिसी ॥ २ ॥ २२६ ॥ आसिले देविले चेव दीवायण महारिसी ।
 पारासरे दगं भोच्चा बीयाणि हरियाणि य ॥ ३ ॥ २२७ ॥ एए पुव्वं महापुरिसा
 आहिया इह संमया । भोच्चा बीयोदगं सिद्धा इइ मेयमणुस्सयं ॥ ४ ॥ २२८ ॥ तत्थ
 मन्दा विसीयन्ति बाहच्छिन्ना व गद्भा । पिट्ठओ परिसप्पन्ति पिट्ठसप्पी य संभमे
 ॥ ५ ॥ २२९ ॥ इहमेगे उ भासन्ति सायं साएण विज्जई । जे तत्थ आरियं मग्गं
 परमं च समाहियं ॥ ६ ॥ २३० ॥ मा एयं अवमन्नन्ता अप्पेणं लुम्पहा बहु ।
 एयस्स उ अमोक्खाए अयोहारि व्व जूरह ॥ ७ ॥ २३१ ॥ पाणाइवाए वट्ठन्ता
 मुसावाए असंजया । अदिच्चादाणे वट्ठन्ता मेहुणे य परिगग्गे ॥ ८ ॥ २३२ ॥
 एवमेगे उ पासत्था पन्नवन्ति अणारिया । इत्थीवसं गया बाला जिणसासणपरमुहा
 ॥ ९ ॥ २३३ ॥ जहा गण्डं पिलागं वा परिपीलेज्ज मुहुत्तां । एवं विज्जवणित्थीह

दोसो तत्थ कओ सिया ॥ १० ॥ २३४ ॥ जहा मन्धादणे नाम थिमियं भुज्जई दगं । एवं विज्जवणित्थीसु दोसो तत्थ कओ सिया ॥ ११ ॥ २३५ ॥ जहा विहंगमा पिक्का थिमियं भुज्जई दगं । एवं विज्जवणित्थीसु दोसो तत्थ कओ सिया ॥ १२ ॥ २३६ ॥ एवमेगे उ पासत्था मिच्छदिट्ठी अणारिया । अज्झोववन्ना कामेहिं पूयणा इव तरुणए ॥ १३ ॥ २३७ ॥ अणागयमपस्सन्ता पच्छप्पन्नगवैसगा । ते पच्छा परितप्पंति खीणे आउम्मि जोव्वणे ॥ १४ ॥ २३८ ॥ जेहिं काले परिक्रन्तं न पच्छा परितप्पए । ते धीरा बंधणुम्मक्का नावकं वन्ति जीवियं ॥ १५ ॥ २३९ ॥ जहा नई वेयरणी दुत्तरा इह संमया । एवं लोगंसि नारीओ दुत्तरा अमईमया ॥ १६ ॥ २४० ॥ जेहिं नारीण संजोगा पूयणा पिट्ठओ कया । सव्वमेयं निराकिच्चा ते ठिया सुसमाहिए ॥ १७ ॥ २४१ ॥ एए ओवं तरिस्सन्ति समुदं ववहारिणो । जत्थ पाणा विसज्जासि किच्चन्ती सयकम्मुणा ॥ १८ ॥ २४२ ॥ तं च भिक्खु परिज्जाय सुव्वए समिए चरे । मुसावायं च वज्जिज्जा अदिज्जादाणं च वोसिरे ॥ १९ ॥ २४३ ॥ उद्धमहे तिरियं वा जे केई तसथावरा । सव्वत्थ विरइं कुज्जा सन्ति निव्वाणमाहियं ॥ २० ॥ २४४ ॥ इमं च धम्ममायाय कासवेण पवेइयं । कुज्जा भिक्खु गिलाणस्स अगिलाए समाहिए ॥ २१ ॥ २४५ ॥ संखाय पेसलं धम्मं दिट्ठिमं परिनिव्वुडे । उवसग्गे नियमित्ता आमोक्खाए परिव्वएज्जासि ॥ २२ ॥ २४६ ॥ ति बेमि ॥ उवसग्गज्झयणं तइयं ॥

इत्थिपरिब्रज्जयणे चउत्थे

जे मायरं च पियरं च विप्पज्जहाय पुव्वसंजोगं । एगे सहिए चरिस्सामि आरयमेहुणो विवित्तेसु ॥ १ ॥ २४७ ॥ सुहुमेणं तं परिकम्म छन्नपएण इत्थिओ मन्दा । उव्वायं पि ताउ जाणंसु जहा छिस्सन्ति भिक्खुणो एगे ॥ २ ॥ २४८ ॥ पासे भिसं निसीयन्ति अभिक्खणं पोसवत्थं परिहन्ति । कार्यं अहे वि दंसन्ति बाहू उद्धट्ठ कक्खमणुव्वए ॥ ३ ॥ २४९ ॥ सयणासणेहिं जोगेहिं इत्थियो एगया निमन्तेन्ति । एयाणि चेव से जाणे पासाणि विरुवरूवाणि ॥ ४ ॥ २५० ॥ नो तासु चक्खु संधेज्जा नो वि य साहसं समभिजाणे । नो सहियं पि विहरेज्जा एवमप्पा सुरक्खिओ होइ ॥ ५ ॥ २५१ ॥ आमन्तिय उस्सविआ भिक्खुं आयसा निमन्तेन्ति । एयाणि चेव से जाणे सद्दाणि विरुवरूवाणि ॥ ६ ॥ २५२ ॥ मणबन्धणेहिं गेगेहिं कल्लणविणीय-मुवगसित्ताणं । अदु मज्जुलाई भासन्ति आणवयन्ति भिन्नकद्दाहिं ॥ ७ ॥ २५३ ॥

सीहं जहा व कुणिमेणं निब्भयमेगचरं ति पासेणं । एवित्थियाउ बन्धन्ति संवुडं
 एगइयमणगारं ॥ ८ ॥ २५४ ॥ अह तत्थ पुणो नमयन्ती रहकारो व नेमि आणपु-
 व्वीए । बद्धो मिए व पासेणं फन्दन्ते वि न मुच्चए ताहे ॥ ९ ॥ २५५ ॥ अह
 सेऽणुतप्पई पच्छा भोच्चा पायसं व विसमिस्सं । एवं विवेगमायाय संवासो न वि
 कप्पए दविए ॥ १० ॥ २५६ ॥ तम्हा उ वज्जए इत्थी विसलित्तं व कण्ठगं नच्चा ।
 ओए कुलाणि वसवत्ती आघाए न से वि निगन्थे ॥ ११ ॥ २५७ ॥ जे एयं उच्छं
 अणुगिद्धा अन्नयरा होन्ति कुसीलाणं । सुतवस्सिए वि से भिक्खु नो विहरे सह णमि-
 त्थीसु ॥ १२ ॥ २५८ ॥ अवि धूयराहि सुण्हाहिं धाईहिं अदुव दासीहिं । महईहिं वा
 कुमारीहिं संथवं से न कुज्जा अणगारे ॥ १३ ॥ २५९ ॥ अदु नाइणं च सुहीणं वा
 अप्पियं दद्दु एगया होइ । गिद्धा सत्ता कामेहिं रक्खणपोसणे मणुस्सोऽसि ॥ १४ ॥
 ॥ २६० ॥ समणं पि दद्दुदासीणं तत्थ वि ताव एगे कुप्पन्ति । अदु वा भोयणेहिं
 नत्थेहिं इत्थीदोसं संकिणो होन्ति ॥ १५ ॥ २६१ ॥ कुव्वन्ति संथवं ताहिं पब्भट्ठा
 समाहिजोगेहिं । तम्हा समणा न समेन्ति आयहियाए संनिसेज्जाओ ॥ १६ ॥ २६२ ॥
 बहवे गिहाइं अवहद्दु मिस्सीभावं पत्थुया य एगे । धुवमगमेव पवयन्ति वायावीरियं
 कुसीलाणं ॥ १७ ॥ २६३ ॥ सुद्धं रवइ परिसाए अह रहस्सम्मि दुक्कडं करेन्ति ।
 जाणन्ति य णं तहाविऊ माइल्ले महासडेऽयं ति ॥ १८ ॥ २६४ ॥ सयं दुक्कडं च
 न वयइ आइडो वि पक्कथइ बाले । वेयाणुवीइ मा कासी चोइज्जन्तो गिलाइ से
 भुज्जो ॥ १९ ॥ २६५ ॥ ओसिया वि इत्थिपोसेसु पुरिसा इत्थिवेयखेयन्ना । पन्नास-
 मज्जिया वेगे नारीणं वसं उवकसन्ति ॥ २० ॥ २६६ ॥ अवि हत्थपायछेयाए अदु वा
 वद्धमंसउक्कन्ते । अवि तेयसाभितावणाणि तच्छिय खारसिंचणाइं य ॥ २१ ॥ २६७ ॥
 अदु कण्णनासछेयं कण्ठछेयणं तिइक्खन्ती । इइ एत्थ पावसंतता न वेन्ति पुणो
 न काहिनति ॥ २२ ॥ २६८ ॥ सुयमेयमेवमेगेसिं इत्थीवेय ति हु सुयक्खायं । एयं
 पि ता वइत्ताणं अदु वा कम्मुणा अवकरेन्ति ॥ २३ ॥ २६९ ॥ अन्नं मणेण
 चित्तेन्ति वाया अन्नं च कम्मुणा अन्नं । तम्हा न सइहे भिक्खु बहुमायाओ इत्थिओ
 नच्चा ॥ २४ ॥ २७० ॥ जुवई समणं बूया विचित्तलंकारवत्थणाणि परिहिता ।
 विरया चरिस्सहं स्वक्खं धम्ममाइक्ख णे भयन्तारो ॥ २५ ॥ २७१ ॥ अदु सावि-
 यापवाएणं अहमंसि साहम्मिणी य समणाणं । जउकुम्मे जहा उवज्जोई संवासे विऊ
 विसीएज्जा ॥ २६ ॥ २७२ ॥ जउकुम्मे जोइउवगूढे आशुभित्तो नासमुवयाइ ।
 एवित्थियाहि अणगारा संवासेण नासमुवयन्ति ॥ २७ ॥ २७३ ॥ कुव्वन्ति पावणं
 कम्मं पुट्ठा वेगेवमाहिंसु । नो हं करेमि पावं ति अंकेसाइणी ममेस ति ॥ २८ ॥ २७४ ॥

बालस्स मन्दयं बीयं जं च कडं अवजाणइ भुज्जो । दुगुणं करेइ से पावं पूयणकामो
 विसन्नेसी ॥ २९ ॥ २७५ ॥ संलोकणिज्जमणगारं आयगयं निमन्तणेणाहंसु । वत्थं
 च ताइ पायं वा अन्नं पाणं पडिग्गाहे ॥ ३० ॥ २७६ ॥ नीवारमेवं बुज्जेज्जा नो
 इच्छे अगारमागन्तुं । बद्धे विसयपासेहिं मोहमावज्जइ पुणो मन्दे ॥ ३१ ॥ २७७ ॥
 ति वेमि ॥ इत्थिपरिन्नज्झयणे पढमुदेसे ॥

ओए सया न रजेज्जा भोगकामी पुणो विरजेज्जा । भोगे समणाण सुणेह जह
 भुज्जन्ति भिक्खुणो एगे ॥ १ ॥ २७८ ॥ अह तं तु मेयमावन्नं मुच्छिद्यं भिक्खुं
 काममइवट्ठं । पलिभिन्दिया णं तो पच्छा पादुद्धट्ठु मुद्धि प्हणन्ति ॥ २ ॥ २७९ ॥
 जइ केसिया णं मए भिक्खु नो विहरे सह णमित्थीए । केसाणवि हं लुच्चिस्सं नन्नत्थ
 मए चरेज्जासि ॥ ३ ॥ २८० ॥ अह णं से होइ उवल्लो तो पेसन्ति तहाभूएहिं ।
 अलाउच्छेयं पेहेहि वग्गुफलाइं आहराहि ति ॥ ४ ॥ २८१ ॥ दाहणि सागपागाए
 पज्जोओ वा भविस्सई राओ । पायाणि य मे रयावेहि एहि ता मे पिट्ठओमहे ॥ ५ ॥
 ॥ २८२ ॥ वत्थाणि य मे पडिलेहेहि अन्नं पाणं च आहराहि ति । गन्धं च
 रओहरणं च कासवर्गं च मे समणुजाणाहि ॥ ६ ॥ २८३ ॥ अदु अज्जणिं अलंकारं
 कुक्कययं मे पयच्छाहि । लोद्धं च लोद्धकुसुमं च वेणुपलासियं च गुलियं च ॥ ७ ॥
 ॥ २८४ ॥ कुट्ठं तगरं च अग्रहं संपिट्ठं सम्मं उसिरेणं । तेल्लं मुहभिंजाए वेणुफलाइं
 संनिहाणाए ॥ ८ ॥ २८५ ॥ नन्दीचुण्णगाइं पाहराहि छत्तोवाणहं च जाणाहि ।
 सत्थं च सूवच्छेज्जाए आणीलं च वत्थयं रयावेहि ॥ ९ ॥ २८६ ॥ सुफणिं च
 सागपागाए आमलगाइं दगाहरणं च । तिलगकरणिमज्जनसलागं धिसु मे विट्ठणयं
 विजाणेहि ॥ १० ॥ २८७ ॥ संडासगं च फणिहं च सीहलिपासगं च आणाहि ।
 आदंसगं च पयच्छाहि दन्तपक्खालं पवेसाहि ॥ ११ ॥ २८८ ॥ पूगफलं तंबोळयं सूइ
 सुत्तगं च जाणाहि । कोसं च मोयमेहाए सुप्पुक्खलं च खारगालं च ॥ १२ ॥
 ॥ २८९ ॥ चन्दालं च करगं च वच्चघरं च आउसो खणाहि । सरपाययं च
 जायाए गोरहगं च सामणेराए ॥ १३ ॥ २९० ॥ घडिगं च सडिण्डिमयं च चेल-
 गोलं कुमारभूयाए । वासं समभिआवणं आवसहं च जाण भत्तं च ॥ १४ ॥ २९१ ॥
 आसन्दियं च नवसुत्तं पाउल्लाइं संकमट्ठाए । अदु पुत्तदोहलट्ठाए आणप्पा हवन्ति
 दासा वा ॥ १५ ॥ २९२ ॥ जाए फले समुप्पन्ने गेण्हसु वा णं अहवा जहाहि ।
 अह पुत्तपोसिणो एगे भारवहा हवन्ति उट्ठा वा ॥ १६ ॥ २९३ ॥ राओ वि
 उट्ठिया सन्ता दारगं च संठवन्ति धाई वा । सुहिरामणा वि ते सन्ता वत्थधोवा
 हवन्ति हंसा वा ॥ १७ ॥ २९४ ॥ एवं बहुहिं कयपुव्वं भोगत्थाए जेऽभियावन्ना ।

दासे मिए व पेसे व पसुभूए वा से न वा केई ॥ १८ ॥ २९५ ॥ एवं खु तासु
विन्नपं संथवं संवासं च वजेज्जा । तज्जातिया इमे कामा वज्जकरा य एवमक्खाए
॥ १९ ॥ २९६ ॥ एयं भयं न सेयाए इइ से अप्पणं निरुम्भित्ता । नो इत्थि नो
पसुं भिक्खु नो सयं पाणिणा निलिजेज्जा ॥ २० ॥ २९७ ॥ सुविमुद्वलेसे मेहावी
परकिरियं च वज्जए नाणी । मणसा वयसा काएणं सब्बफाससहे अणगारे ॥ २१ ॥
॥ २९८ ॥ इच्चेवमाहु से वीरे धुरए धुयमोहे से भिक्खु । तम्हा अज्जत्तविसुद्धे
सुविमुक्के आमोक्खाए परिव्वएज्जासि ॥ २२ ॥ २९९ ॥ त्ति वेमि ॥ इत्थिपरि-
न्नज्झयणं चउत्थं ॥

निरयविभत्तियज्झयणे पञ्चमे

पुच्छिस्सहं केवलियं महेसिं कहं भितावा नरगा पुरत्था । अजाणओ मे मुणि
बूहि जाणं कहिं नु बाला नरगं उवेन्ति ॥ १ ॥ ३०० ॥ एवं मए पुट्ठे महाणुभावे
इणमोऽब्बवी कासवे आसुपप्पे । पवेयइस्सं दुहमट्ठुगं आईणियं दुक्कडिणं पुरत्था
॥ २ ॥ ३०१ ॥ जे केइ बाला इह जीवियट्ठी पावाई कम्माईं करेन्ति रूढा । ते
घोररुवे तमिसन्धयारे तिब्बाभितावे नरगे पडन्ति ॥ ३ ॥ ३०२ ॥ तिब्बं तसे
पाणिणो थावरे य जे हिंसई आयसुहं पडुच्चा । जे लूसए होइ अदत्तहारी न सिक्खई
सेयवियस्स किञ्चि ॥ ४ ॥ ३०३ ॥ पागब्भि पाणे बहुणं तिवाई अनिव्वुए घायमु-
वेइ बाले । निहो निसं गच्छइ अन्तकाले अहोसिरं कट्ठु उवेइ दुगं ॥ ५ ॥ ३०४ ॥
हण छिन्दह भिन्दह णं दहेति सइ सुणेन्ता परधम्मियाणं । ते नारगाओ भयभिन्न-
सच्चा कंखन्ति कं नाम दिसं वयामो ॥ ६ ॥ ३०५ ॥ इज्जालरासिं जलियं सजोई
तत्तोवमं भूमिमणुक्कमन्ता । ते डज्झमाणा कलुणं थणन्ति अरहस्सरा तत्थ चिरट्ठि-
ईया ॥ ७ ॥ ३०६ ॥ जइ ते सुया वेयरणी भिदुग्गा निसिओ जहा खुर इव
तिक्खसोया । तरन्ति ते वेयरणिं भिदुगं उखुचोइया सत्तिस्स हम्ममाणा ॥ ८ ॥
॥ ३०७ ॥ कीलेहि विज्जन्ति असाहुक्कमा नावं उवेन्ते सइविप्पहूणा । अन्ने उ
सूलाहि तिसूलियाहिं वीहाहि विदूण अहे करेन्ति ॥ ९ ॥ ३०८ ॥ केसिं च
बन्धित्तु गले सिलाओ उदगंसि बोलेन्ति महालयंसि । कलंबुयावालयमुम्मुरे य
लोलन्ति पचन्ति य तत्थ अन्ने ॥ १० ॥ ३०९ ॥ आसूरियं नाम महाभितावं
अन्धंतमं दुप्पतरं महन्तं । उड्ढं अहे यं तिरियं दिसासु समाहिओ जत्थगणी झियाइ
॥ ११ ॥ ३१० ॥ जंसी गुहाए जलणेऽतिउट्ठे अविजाणओ डज्झइ लुत्तपन्नो । सया
य कलुणं पुण धम्मठाणं गाढोवणीयं अइदुक्खधम्मं ॥ १२ ॥ ३११ ॥ चत्तारि

अगणीओ समारभेत्ता जहिं कूरकम्मा भितयेन्ति बालं । ते तत्थ चिट्ठन्तभितप्प-
 माणा मच्छा व जीवन्तो व जोइपत्ता ॥ १३ ॥ ३१२ ॥ संतच्छणं नाम महाभितावं
 ते नारगा जत्थ असाहुकम्मा । हत्थेहि पाएहि य बन्धिऊणं फलणं व तच्छन्ति
 कुहाडहत्था ॥ १४ ॥ ३१३ ॥ रुहारे पुणो वच्चसमुस्सियंगे भिञ्चुत्तमंगे परिवत्तयन्ता ।
 पयन्ति णं नेरइए फुरन्ते सजीवमच्छे व अयोक्खे ॥ १५ ॥ ३१४ ॥ नो चेव ते
 तत्थ मसीभवन्ति न मिज्जई तिक्खभिवेयणाए । तमाणुभागं अणुवैययन्ता दुक्खन्ति
 दुक्खी इह दुक्खेणं ॥ १६ ॥ ३१५ ॥ तहिं च ते लोलणसंपगाढे गाढं सुत्तं
 अगणिं वयन्ति । न तत्थ सायं लहई भिदुग्गे अरहियाभितावा तह वी तवेन्ति
 ॥ १७ ॥ ३१६ ॥ से सुचई नगरवहे व सहे दुहोवणीयाणि पयाणि तत्थ ।
 उदिण्णकम्मा उदिण्णकम्मा पुणो पुणो ते सरहं दुहेन्ति ॥ १८ ॥ ३१७ ॥ पाणेहि
 णं पाव विजोयन्ति तं भे पक्खामि जहातहेणं । दण्डेहि तत्था सरयन्ति बाला
 सव्वेहि दण्डेहि पुराकएहिं ॥ १९ ॥ ३१८ ॥ ते हम्ममाणा नरगे पडन्ति पुण्णे
 दुल्लवस्स महाभितावे । ते तत्थ चिट्ठन्ति दुल्लवभक्खी तुट्ठन्ति कम्मोवगया किमीहिं
 ॥ २० ॥ ३१९ ॥ सया कसिणं पुण घम्मठाणं गाढोवणीयं अइदुक्खधम्मं । अन्दुसु
 पक्खिप्प विहत्तु देहं वेहेण सीसं सेऽभितावयन्ति ॥ २१ ॥ ३२० ॥ छिन्दन्ति
 बालस्स खुरेण नक्कं ओट्टे वि छिन्दन्ति दुवे वि कण्णे । जिब्भं विणिक्कस्स विहत्थि-
 मेत्तं तिक्खाहि सलाहि भितावयन्ति ॥ २२ ॥ ३२१ ॥ ते तिप्पमाणा तलसंपुडं व
 राइंदियं तत्थ थणन्ति बाला । गलन्ति ते सोणियपूयसं पज्जोइया खारपइदियंगा
 ॥ २३ ॥ ३२२ ॥ जइ ते सुया लोहियपूयपाई बालागणी तेअगुणा परेणं । कुम्भी
 महन्ताहियपोरुसीया समूसिया लोहियपूयपुण्णा ॥ २४ ॥ ३२३ ॥ पक्खिप्प तासुं
 पययन्ति बाले अट्टस्सरे ते कल्लणं रसन्ते । तण्हाइया ते तउत्तम्बतत्तं पज्जिजमाण-
 द्ययं रसन्ति ॥ २५ ॥ ३२४ ॥ अप्पेण अप्पं इह वच्चइत्ता भवाहमे पुव्वसए
 सहस्से । चिट्ठन्ति तत्था बहुकूरकम्मा जहा कडं कम्म तहासि भारे ॥ २६ ॥ ३२५ ॥
 समज्जिणित्ता कल्लसं अणज्जा इट्ठेहि कन्तेहि य विप्पहूणा । ते दुब्बिगन्धे कसिणे य
 फासे कम्मोवगा कुणिमे आवसन्ति ॥ २७ ॥ ३२६ ॥ ति वेमि निरयविभत्तिय-
 ज्ञयणे पढमुहेसे ॥

आहारं सासयदुक्खधम्मं तं भे पक्खामि जहातहेणं । बाला जहा दुक्ख-
 कम्मकारी वेयन्ति कम्माइं पुरेकडाइं ॥ १ ॥ ३२७ ॥ हत्थेहि पाएहि य बन्धिऊणं
 उयरं विकत्तन्ति खुरासिएहिं । गिण्हित्तु बालस्स विहत्तु देहं वडं थिरं पिट्ठउ
 उद्धरन्ति ॥ २ ॥ ३२८ ॥ बाट्ट पक्कन्ति य मूलओ से थूलं वियासं मुहे आड-

हन्ति । रहंसि जुत्तं सरयन्ति बालं आरुस्स विज्झन्ति तुदेण पिट्ठे ॥ ३ ॥ ३२९ ॥
 अयं व तत्तं जलियं सजोइ तऊवमं भूमिमणुक्कमन्ता । ते डज्झमाणा कलुणं थणन्ति
 उसुचोइया तत्तजुगेसु जुत्ता ॥ ४ ॥ ३३० ॥ बाला बला भूमिमणुक्कमन्ता पविजलं
 लोहपहं च तत्तं । जंसी भिदुगंसि पवज्जमाणा पेसे व दण्डेहि पुरा करेन्ति ॥ ५ ॥
 ॥ ३३१ ॥ ते संपगाढंसि पवज्जमाणा सिलाहि हम्मन्ति निपातिणीहिं । संतावणी
 नाम चिरट्ठिइया संतप्पई जत्थ असाहुक्कम्मा ॥ ६ ॥ ३३२ ॥ कन्दुसु पक्खिप्प
 पयन्ति बालं तओ वि दङ्का पुण उप्पयन्ति । ते उड्ढकाएहि पक्खज्जमाणा अवरेहि
 खज्जन्ति सणप्फएहिं ॥ ७ ॥ ३३३ ॥ समूसियं नाम विधूमठाणं जं सोयतत्ता
 कलुणं थणन्ति । अहोसिरं कट्ठु विगत्तिऊणं अयं व सत्थेहि समोसवेन्ति ॥ ८ ॥
 ॥ ३३४ ॥ समूसिया तत्थ विसूणियंग्गा पक्खीहिं खज्जन्ति अयोमुहेहिं । संजीवणी
 नाम चिरट्ठिइया जंसी पया हम्मइ पावचेया ॥ ९ ॥ ३३५ ॥ तिक्खाहि सूलोहिं
 निवाययन्ति वसोगयं सावययं व लद्धं । ते सूलविद्धा कलुणं थणन्ति एगन्तदुक्खं
 दुहओ गिलाणा ॥ १० ॥ ३३६ ॥ सया जलं नाम निहं महन्तं जंसी जलन्तो
 अगणी अकट्ठो । चिट्ठन्ति बद्धा बहुकूरक्कम्मा अरहस्सरा केइ चिरट्ठिइया ॥ ११ ॥
 ॥ ३३७ ॥ विया महन्तीउ समारभित्ता छुब्भन्ति ते तं कलुणं रसन्ति । आवट्ठई
 तत्थ असाहुक्कम्मा सप्पी जहा पडियं जोइमज्जे ॥ १२ ॥ ३३८ ॥ सया कसिणं
 पुण घम्मठाणं गाढोवणीयं अइदुक्खधम्मं । हत्थेहि पाएहि य बन्धिऊणं सत्तु-
 व्वदण्डेहि समारभन्ति ॥ १३ ॥ ३३९ ॥ भजन्ति बालस्स वहेण पुट्ठी सीसं पि
 भिन्दन्ति अयोवणेहिं । ते भिन्नदेहा फलणं व तच्छा तत्ताहि आराहि नियोजयन्ति
 ॥ १४ ॥ ३४० ॥ अभिजुंजिया रद्ध असाहुक्कम्मा उसुचोइया हत्थिवहं वहन्ति ।
 एगं दुरुहित्तु दुवे तओ वा आरुस्स विज्झन्ति ककाणओ से ॥ १५ ॥ ३४१ ॥ बाला
 बला भूमिमणुक्कमन्ता पविजलं कण्टइलं महन्तं । विवद्धतप्पेहि विवण्णचित्ते समी-
 रिया कोट्टबलं करेन्ति ॥ १६ ॥ ३४२ ॥ वेयालिए नाम महाभितावे एगायए
 पव्वयमन्तलिवखे । हम्मन्ति तत्था बहुकूरक्कम्मा परं सहस्साण सुहुत्ताणं ॥ १७ ॥
 ॥ ३४३ ॥ संबाहिया दुक्कडिणो थणन्ति अहो य राओ परितप्पमाणा । एगन्तकूडे
 नरगे महन्ते कूडेण तत्था विसमे हया उ ॥ १८ ॥ ३४४ ॥ भज्जन्ति णं पुव्वमरी
 सरोसं समुग्गरे ते मुसले गहेउं । ते भिन्नदेहा रुहिरं वमन्ता ओमुद्धगा घरणितले
 पडन्ति ॥ १९ ॥ ३४५ ॥ अणासिया नाम महासियाला पागब्भिणो तत्थ
 सयावकोवा । खज्जन्ति तत्था बहुकूरक्कम्मा अदूरगा संखलियाहिं बद्धा ॥ २० ॥
 ॥ ३४६ ॥ सयाजला नाम नई भिदुग्गा पविजलं लोहविलीणत्तत्ता । जंसी भिदु-

मंसि पवज्जमाणा एगायताणुक्कमणं करेन्ति ॥ २१ ॥ ३४७ ॥ एयाइँ फासाइँ
 फुसन्ति बालं निरन्तरं तत्थ चिरट्ठिइयं । न हम्ममाणस्स उ होइ ताणं एगो सयं
 पच्चणुहोइ दुक्खं ॥ २२ ॥ ३४८ ॥ जं जारिसं पुव्वमकासि कम्मं तमेव आगच्छइ
 संपराए । एगन्तदुक्खं भवमज्जणित्ता वेयन्ति दुक्खी तमणन्तदुक्खं ॥ २३ ॥
 ॥ ३४९ ॥ एयाणि सोच्चा नरगाणि धीरे न हिंसए किंचण सव्वलोए । एगन्तदिट्ठी
 अपरिगहे उ बुज्झिज्ज लोगस्स वसं न गच्छे ॥ २४ ॥ ३५० ॥ एवं तिरिक्खे
 मणुयामरेसुं चउरन्तणन्तं तयणुव्विवागं । स सव्वमेयं इइ वेयइत्ता कंखेज्ज कालं
 सुयमायरेज्ज ॥ २५ ॥ ३५१ ॥ ति बेमि ॥ निरयविभत्तियज्झयणं पञ्चमं ॥

सिरिवीरत्थुइयज्झयणे छट्ठे

पुच्छिस्सु णं समणा माहणा य अगारिणो या परतिथिया य । से केइ नेगंतहियं
 धम्ममाहु अणेल्सं साहुसमिक्खयाए ॥ १ ॥ ३५२ ॥ कहं च नाणं कह दंसणं से
 सीलं कहं नायसुयस्स आसि । जाणासि णं भिक्खु जहातहेणं अहासुयं वूहि जहा
 निसन्तं ॥ २ ॥ ३५३ ॥ खेयन्नए से कुसलासुपन्ने अणन्तनाणी य अणन्तदंसी ।
 जसंसिणो चक्खुपहे ठियस्स जाणाहि धम्मं च धिइं च पेहि ॥ ३ ॥ ३५४ ॥
 उड्डं अहे यं तिरियं दिसासु तसा य जे थावर जे य पाणा । से निच्चनिच्चेहि समिक्ख
 पन्ने दीवे व धम्मं समियं उदाहु ॥ ४ ॥ ३५५ ॥ से सव्वदंसी अभिभूयनाणी
 निरामगन्धे धिइमं ठियप्पा । अणुत्तरे सव्वजगंसि विज्जं गन्था अईए अमए अणाऊ
 ॥ ५ ॥ ३५६ ॥ से भूइपन्ने अणिअचारी ओहंतरे धीरे अणन्तचक्खु । अणुत्तरं
 तप्पइ सूरिए वा वइरोयणिन्दे व तमं पगासे ॥ ६ ॥ ३५७ ॥ अणुत्तरं धम्मसिणं
 जिणाणं नेया मुणी कासव आसुपन्ने । इन्दे व देवाण महाणुभावे सहस्सणेया दिवि
 णं विसिट्ठे ॥ ७ ॥ ३५८ ॥ से पन्नया अक्खयसागरे वा महोदही वा वि अणन्त-
 पारे । अणाविले वा अकसाइ मुक्के सक्के व देवाहिवई जुईमं ॥ ८ ॥ ३५९ ॥ से
 वीरिएणं पडिपुण्णवीरिए सुदंसणे वा नगसव्वसेट्ठे । सुरालए वा सि मुदागरे से
 विरायए नेगणुगोवनेए ॥ ९ ॥ ३६० ॥ सयं सहस्साण उ जोयणाणं तिकण्डगे
 पण्डगवेजयन्ते । से जोयणे नवनवते सहस्से उदुस्सियो हेट्ठ सहस्समेगं ॥ १० ॥
 ॥ ३६१ ॥ पुट्ठे नमे चिट्ठइ भूमिवट्ठिए जं सूरिया अणुपरिवट्ठयन्ति । से हेमवणो
 बहुनन्दणे य जंसी रईं वेययई महिन्दा ॥ ११ ॥ ३६२ ॥ से पव्वए सइमहप्पगासे
 विरायई कञ्चणमट्ठवणो । अणुत्तरे गिरिसु य पव्वदुग्गे गिरीवरे से जलिए व भोमे

॥ १२ ॥ ३६३ ॥ महीइ मज्झम्मि ठिए नगिन्दे पञ्चायए सूरियसुद्धलेसे । एवं
 सिरीए उ स भूरिवण्णे मणोरमे जोयइ अच्चिमाली ॥ १३ ॥ ३६४ ॥ सुदंसणस्सेव
 जसो गिरिस्स पवुचई महओ पव्वयस्स । एओवमे ससणे नायपुत्ते जाईजसोदंसण-
 नाणसीले ॥ १४ ॥ ३६५ ॥ गिरीवरे वा निसहाययाणं रुयए व सेट्ठे वलयाययाणं ।
 तओवमे से जगभूइपत्ते मुणीण मज्झे तमुदाहु पत्ते ॥ १५ ॥ ३६६ ॥ अणुत्तरं
 धम्ममुद्दरइत्ता अणुत्तरं ज्ञाणवरं झियाइ । सुसुक्कसुक्कं अपगण्डसुक्कं संखिन्दुएगन्तव-
 दायसुक्कं ॥ १६ ॥ ३६७ ॥ अणुत्तरगं परमं महेसी असेसकम्मं स विसोहइत्ता ।
 सिद्धिं गए साइमणन्तपत्ते नाणेण सीलेण य दंसणेण ॥ १७ ॥ ३६८ ॥ स्वप्पेसु
 णाए जह सामली वा जस्सि रई वेययई सुवण्णा । वणेषु वा नन्दणमाहु सेट्ठं नाणेण
 सीलेण य भूइपत्ते ॥ १८ ॥ ३६९ ॥ थणियं व सद्धान अणुत्तरे उ चन्दो व ताराण
 महाणभावे । गन्धेसु वा चन्दणमाहु सेट्ठं एवं मुणीणं अपडिन्नमाहु ॥ १९ ॥ ३७० ॥
 जहा सयंभू उदहीण सेट्ठे नागेषु वा धरणिन्दमाहु सेट्ठं । खोओदए वा रस वेजयन्ते
 तवोवहाणे मुणि वेजयन्ते ॥ २० ॥ ३७१ ॥ हत्थीसु एरावणमाहु नाए सीहो मिगाणं
 सलिलाण गज्जा । पक्खीसु वा गरुळे वेणुदेवो निव्वाणवादीणिह नायपुत्ते ॥ २१ ॥
 ॥ ३७२ ॥ जोहेसु नाए जह वीससेणे पुप्फेसु वा जह अरविन्दमाहु । खत्तीण सेट्ठे
 जह दन्तवक्के इसीण सेट्ठे तह वद्धमाणे ॥ २२ ॥ ३७३ ॥ दाणाण सेट्ठं अभयप्प-
 याणं सच्चेषु वा अणवर्जं वयन्ति । तवेषु वा उत्तमं बम्भचेरं लोगुत्तमे ससणे नाय-
 पुत्ते ॥ २३ ॥ ३७४ ॥ ठिईण सेट्ठा लवसत्तमा वा सभा सुहम्मा व सभाण सेट्ठा ।
 निव्वाणसेट्ठा जह सव्वधम्मा न नायपुत्ता परमत्थि नाणी ॥ २४ ॥ ३७५ ॥
 पुढोवमे धुणइ विगयगेही न संनिहिं कुव्वइ आसुपत्ते । तरिउं समुई व महाभवोधं
 अभयंकरे वीर अणन्तचक्खु ॥ २५ ॥ ३७६ ॥ कोहं च माणं च तहेव मायं लोभं
 चउत्थं अज्झत्तदोसा । एयाणि वन्ता अरहा महेसी न कुव्वई पाव न कारवेइ
 ॥ २६ ॥ ३७७ ॥ किरियाकिरियं वेणइयाणुवायं अच्चाणियाणं पडियच्च ठाणं । से
 सव्ववायं इइ वेयइत्ता उवट्ठिए संजमदीहरायं ॥ २७ ॥ ३७८ ॥ से वारिया इत्थि
 सराइभत्तं उवहाणवं दुक्खखयट्ठयाए । लोगं विदिता आरं परं च सव्वं पभू वारिय
 सव्ववारं ॥ २८ ॥ ३७९ ॥ सोच्चा य धम्मं अरहन्तभासियं समारिहियं अट्ठपदोव-
 सुद्धं । तं सद्दहाणा य जणा अणाऊ इन्दा व देवाहि व आगमिस्सन्ति ॥ २९ ॥ ३८० ॥
 ति वेमि ॥ सिरिवीरत्थुइज्झयणं छट्ठं ॥

कुसीलपरिभासियज्झयणे सत्तमे

पुढवी य आऊ अगणी य वाऊ तण रुक्ख बीया य तसा य पाणा । जे अण्डया जे य जराउ पाणा संसेयया जे रसयाभिहाणा ॥ १ ॥ ३८१ ॥ एयाई कायाई पवेइयाई एएसु जाणे पडिलेह सायं । एएण काएण य आयदण्डे एएसु या विप्परियासुवेन्ति ॥ २ ॥ ३८२ ॥ जाईपहं अणुपरिवट्टमाणे तसथावरेहिं विणिघायमेइ । से जाइ जाई बहुकूरकम्मे जं कुव्वई मिजइ तेण बाळे ॥ ३ ॥ ३८३ ॥ अस्सि च लोए अदु वा परत्था सयग्गसो वा तह अन्नहा वा । संसारमावन्न परं परं ते बन्धन्ति वेयन्ति य दुच्चियाणि ॥ ४ ॥ ३८४ ॥ जे मायं वा पियं च हिच्चा समणव्वए अगणिं समारभिज्जा । अहाहु से लोए कुसीलधम्मे भूयाई जे हिंसइ आयसाए ॥ ५ ॥ ३८५ ॥ उज्जालओ पाण निवायएज्जा निव्वावओ अगणिं निवायवेज्जा । तम्हा उ मेहावि समिक्ख धम्मं न पण्डिए अगणिं समारभिज्जा ॥ ६ ॥ ३८६ ॥ पुढवी वि जीवा आऊ वि जीवा पाणा य संपाइम संपयन्ति । संसेयया कट्टसमस्सिया य एए दहे अगणिं समारभन्ते ॥ ७ ॥ ३८७ ॥ हरियाणि भूयाणि विलम्बगाणि आहार देहा य पुढो सियाइ । जे छिन्दई आयसुहं पडुच्च पागब्भि पाणे बहुणं तिवाई ॥ ८ ॥ ३८८ ॥ जाई च बुद्धिं च विणासयन्ते बीयाइ अस्संजय आयदण्डे । अहाहु से लोए अणजधम्मे बीयाइ से हिंसइ आयसाए ॥ ९ ॥ ३८९ ॥ गम्भाइ मिज्जन्ति बुयाबुयाणा नरा परे पञ्चसिहा कुमारा । जुवाणगा मज्झिम धेरगा य चयन्ति ते आउखए पलीणा ॥ १० ॥ ३९० ॥ संबुज्झहा जन्तवो माणुसत्तं दट्ठुं भयं बालिसेणं अलम्भो । एगन्तदुक्खे जरिए व लोए सक्कमुणा विप्परियासुवेइ ॥ ११ ॥ ३९१ ॥ इहेग मूढा पवयन्ति मोक्खं आहारसंपज्जनवज्जणेणं । एगे य सीओदगसेवणेणं हुएण एगे पवयन्ति मोक्खं ॥ १२ ॥ ३९२ ॥ पाओसिणाणाइसु नत्थि मोक्खो खारस्स लोणस्स अणासणेणं । ते मज्जमंसं लसुणं च भोच्चा अन्नत्थ वासं परिकप्पयन्ति ॥ १३ ॥ ३९३ ॥ उदगेण जे सिद्धिमुदाहरन्ति सायं च पायं उदगं फुसन्ता । उदगस्स फासेण सिया य सिद्धी सिज्झिसु पाणा बहवे दगंसि ॥ १४ ॥ ३९४ ॥ मच्छा य कुम्मा य सिरीसिवा य मग्गू य उट्ठा दगरक्खसा य । अट्ठणमेयं कुसला वयन्ति उदगेण जे सिद्धिमुदाहरन्ति ॥ १५ ॥ ३९५ ॥ उदगं जई कम्ममलं हरेजा एवं सुहं इच्छामित्तमेव । अन्धं व नेयारमणुस्सरित्ता पाणाणि चेवं विणिहन्ति मन्दा ॥ १६ ॥ ३९६ ॥ पावाइ कम्माइ पकुव्वओ हि सिओदगं ऊ जइ तं हरेजा । सिज्झिसु एगे दगसत्तघाई मुसं वथन्ते जलसिद्धिमाहु ॥ १७ ॥ ३९७ ॥ हुएण जे सिद्धिमुदाहरन्ति सायं च पायं अगणिं फुसन्ता । एवं सिया

सिद्धि हवेज्ज तम्हा अगणिं फुसन्ताण कुकम्मिणं पि ॥ १८ ॥ ३९८ ॥ अपरिक्ख
 दिट्ठं न हु एव सिद्धी एहिन्ति ते घायमवुज्झमाणा । भूएहि जाणं पडिलेह सायं
 विज्जं गहायं तसथावरेहिं ॥ १९ ॥ ३९९ ॥ थणन्ति लुप्पन्ति तसन्ति कम्मी पुढो
 जगा परिसंखाय भिक्खु । तम्हा विऊ विरओ आयुतो दट्ठुं तसे या पडिसंहरेज्जा
 ॥ २० ॥ ४०० ॥ जे धम्मलद्धं विणिहाय भुज्जे वियडेण साहट्ठु य जे सिणाई । जे
 धोवई लूसयई व वत्थं अहाहु ते नागणियस्स दूरे ॥ २१ ॥ ४०१ ॥ कम्मं परिज्जाय
 दगंसि धीरे वियडेण जीवेज्ज य आदिमोक्खं । से वीयकन्दाइ अभुज्जमाणे विरए
 सिणाणाइसु इत्थियासु ॥ २२ ॥ ४०२ ॥ जे मायरं च पियरं च हिच्चा गारं तथा
 पुत्तपसुं धणं च । कुलाई जे धावइ साउगाई अहाहु से सामणियस्स दूरे ॥ २३ ॥
 ४०३ ॥ कुलाई जे धावइ साउगाई आघाइ धम्मं उयरानुगिद्धे । अहाहु से
 आयरियाण सयंसे जे लावएज्जा असणस्स हेऊ ॥ २४ ॥ ४०४ ॥ निक्खम्म दीणे
 परभोयणम्मि मुहुमङ्गलीए उयरानुगिद्धे । नीवारगिद्धे व महावराहे अदूरए एहिइ
 घायमेव ॥ २५ ॥ ४०५ ॥ अन्नस्स पाणस्सिहलोइयस्स अणुप्पियं भासइ सेवमाणे ।
 पासत्थयं चेव कुसीलयं च निस्सारए होइ जहा पुलाए ॥ २६ ॥ ४०६ ॥ अन्नाय-
 पिण्डेण हियासएज्जा नो पूयणं तवसा आवहेज्जा । सदेहि रुवेहि असज्जमाणं सव्वेहि
 कामेहि विणीय गेहिं ॥ २७ ॥ ४०७ ॥ सव्वाई संगाई अइच्च धीरे सव्वाई
 दुक्खाई तितिकखमाणे । अखिले अगिद्धे अणिएयचारी अभयंकरे भिक्खु अणा-
 विलप्पा ॥ २८ ॥ ४०८ ॥ भारस्स जाआ मुणि भुज्जएज्जा कंखेज्ज पावस्स विवेग
 भिक्खु । दुक्खेण पुट्ठे धुयमाइएज्जा संगामसीसे व परं दमेज्जा ॥ २९ ॥ ४०९ ॥
 अवि हम्ममाणे फलगावतट्ठी समागमं कंखइ अन्तगरस्स । निधूय कम्मं न पवञ्चुवेइ
 अक्खक्खए वा सगडं ति बेमि ॥ ३० ॥ ४१० ॥ कुसीलपरिभासियज्जयणं
 सत्तमं ॥

वीरियज्जयणे अट्टमे

दुहा वेयं सुयक्खायं वीरियं ति पवुच्चई । किं तु वीरस्स वीरत्तं क्हं चेयं पवुच्चई
 ॥ १ ॥ ४११ ॥ कम्ममेगे पवेदेन्ति अकम्मं वा वि सुववया । एएहिं दोहि ठाणेहिं
 जेहिं दीसन्ति मच्चिया ॥ २ ॥ ४१२ ॥ पमायं कम्ममाहंसु अप्पमायं तहावरं ।
 तब्भावादेसओ वा वि बालं पण्डियमेव वा ॥ ३ ॥ ४१३ ॥ सत्थमेगे तु सिक्खन्ता
 अइवायाय पाणिणं । एगे मन्ते अहिज्जन्ति पाणभूयविहेडिणो ॥ ४ ॥ ४१४ ॥
 मायिणो कट्ठु माया य कामभोगे समारभे । हन्ता छेत्ता पगब्भित्ता आयसायाण-

गामिणो ॥ ५ ॥ ४१५ ॥ मणसा वयसा चेव कायसा चेव अन्तसो । आरओ परओ
 वा वि दुहा वि य असंजया ॥ ६ ॥ ४१६ ॥ वेराई कुवई वेरी तओ वेरेहि रजई ।
 पावोवगा य आरम्भा दुक्खफासा य अन्तसो ॥ ७ ॥ ४१७ ॥ संपरायं नियच्छन्ति
 अत्तदुक्कडकारिणो । रागदोसस्सिसया बाला पावं कुव्वन्ति ते बहुं ॥ ८ ॥ ४१८ ॥ एवं
 सकम्मविरियं बालाणं तु पवेइयं । इत्तो अकम्मविरियं पण्डियाणं सुणेह मे ॥ ९ ॥
 ॥ ४१९ ॥ दविए बन्धणुम्मुक्के सव्वओ छिन्नबन्धणे । पणोल्ल पावगं कम्मं सल्लं
 कंतइ अन्तसो ॥ १० ॥ ४२० ॥ नेयाउयं सुयक्खायं उवायाय समीहए । भुज्जो
 भुज्जो दुहावासं असुहत्तं तहा तहा ॥ ११ ॥ ४२१ ॥ ठाणीं विविहठाणाणि चइ-
 स्सन्ति न संसओ । अणियए अयं वासे नायएहि सुहीहि य ॥ १२ ॥ ४२२ ॥
 एवमायाय मेहावी अप्पणो गिद्धिमुद्धरे । आरियं उवसंपजे सव्वधम्ममकोवियं
 ॥ १३ ॥ ४२३ ॥ सहसंसमइए नच्चा धम्मसारं सुणेत्तु वा । समुवट्ठिए उ अणगारे
 पच्चक्खायपावए ॥ १४ ॥ ४२४ ॥ जं किंचुवक्कमं जाणे आउक्खेमस्स अप्पणो ।
 तस्सेव अन्तरा खिप्पं सिक्खं सिक्खेज्ज पण्डिए ॥ १५ ॥ ४२५ ॥ जहा कुम्मे
 सअज्जाई सए देहे समाहरे । एवं पावाई मेहावी अज्झप्पणे समाहरे ॥ १६ ॥
 ॥ ४२६ ॥ साहरे हत्थपाए य मणं पखिन्दियाणि य । पावगं च परीणमं भासा-
 दोसं च तारिसं ॥ १७ ॥ ४२७ ॥ अणु माणं च मायं च तं परिज्ञाय पण्डिए ।
 सायागारवणिहुए उवसन्ते निहे चरे ॥ १८ ॥ ४२८ ॥ पाणे य नाइवाएज्जा
 अदिअं पि य नायए । साइयं न मुसं बूया एस धम्मे वुसीमओ ॥ १९ ॥ ४२९ ॥
 अइक्कम्मन्ति वायाए मणसा वि न पत्थए । सव्वओ संवुडे दन्ते आयाणं सुसमाहरे
 ॥ २० ॥ ४३० ॥ कडं च कज्जमाणं च आगमिस्सं च पावगं । सव्वं तं नाणु-
 जाणन्ति आयगुत्ता जिइन्दिया ॥ २१ ॥ ४३१ ॥ जे याऽबुद्धा महाभागा वीरा
 असमत्तदंसिणो । असुद्धं तेसिं परक्कन्तं सफलं होइ सव्वसो ॥ २२ ॥ ४३२ ॥ जे
 य बुद्धा महाभागा वीरा सम्मत्तदंसिणो । सुद्धं तेसिं परक्कन्तं अफलं होइ सव्वसो
 ॥ २३ ॥ ४३३ ॥ तेसिं पि न तवो सुद्धो निक्खन्ता जे महाकुला । जं नेवच्चे
 वियाणन्ति न सिलोगं पवेज्जए ॥ २४ ॥ ४३४ ॥ अप्पपिण्डासि पाणासि अप्पं
 भासेज्ज सुव्वए । खन्ते भिनिव्वुडे दन्ते वीयगिद्धी सया जए ॥ २५ ॥ ४३५ ॥
 ज्ञाणजोगं समाहट्ठु कार्यं विउसेज्ज सव्वसो । तित्तिक्खं परमं नच्चा आमोक्खाए
 परिव्वएज्जासि ॥ २६ ॥ ४३६ ॥ त्ति वेमि ॥ वीरियज्झयणं अट्ठमं ॥

धम्मज्झयणे नवमे

१ कयरे धम्मे अक्खाए माहणेण मईमया । अञ्जु धम्मं जहातच्चं जिणाणं तं
 सुणेह मे ॥ १ ॥ ४३७ ॥ माहणा खत्तिया वेस्सा चण्डाला अदु बोक्कसा । एसिया
 वेसिया सुद्धा जे य आरम्भनिसिया ॥ २ ॥ ४३८ ॥ परिग्गहनिविट्ठाणं पावं
 तेसिं पवच्चुई । आरम्भसंभिया कामा न ते दुक्खविमोयगा ॥ ३ ॥ ४३९ ॥
 आघायकिच्चमाहेउं नाइओ विसएसिणो । अन्ने हरन्ति तं वित्तं कम्मी कम्मेहि
 किच्चई ॥ ४ ॥ ४४० ॥ माया पिया ण्हुसा भाया भज्जा पुत्ता य ओरसा । नालं
 ते तव ताणाय लुप्पन्तस्स सकम्मुणा ॥ ५ ॥ ४४१ ॥ एयमट्ठं सपेहाए परमट्ठा-
 ण्णामियं । निम्मसो निरहंकारो चरे भिक्खु जिणाहियं ॥ ६ ॥ ४४२ ॥ चित्ता
 वित्तं च पुत्ते य नाइओ य परिग्गहं । चित्ता णं अन्तगं सोयं निरवेक्खो परिव्वए
 ॥ ७ ॥ ४४३ ॥ पुढवी अगणी वाऊ तणरुक्ख सबीयगा । अण्डया पोयजराऊ
 रससंसेयज्झमिया ॥ ८ ॥ ४४४ ॥ एएहिं छहिं काएहिं तं विज्जं परिजाणिया ।
 मणसा कायवक्केणं नारम्मी न परिग्गही ॥ ९ ॥ ४४५ ॥ मुसावायं बहिद्धं च
 उग्गहं च अजाइया । सत्थादाणाइ लोगंसि तं विज्जं परिजाणिया ॥ १० ॥ ४४६ ॥
 पलिउच्चणं च भयणं च थण्डिल्लुस्सयणाणि य । धूणादाणाइ लोगंसि तं विज्जं
 परिजाणिया ॥ ११ ॥ ४४७ ॥ धोयणं रयणं चेव बत्थीकम्मं विरेयणं । वमणञ्ज-
 णपलीमंथं तं विज्जं परिजाणिया ॥ १२ ॥ ४४८ ॥ गन्धमल्लसिणाणं च दन्त-
 पक्खालणं तहा । परिग्गहित्थिकम्मं च तं विज्जं परिजाणिया ॥ १३ ॥ ४४९ ॥
 उद्देसियं कीयगडं पामिच्चं चेव आहडं । पूयं अणेसणिज्जं च तं विज्जं परिजाणिया
 ॥ १४ ॥ ४५० ॥ आसूणिमक्खिरागं च गिद्धुवघायकम्मगं । उच्छोलणं च कक्कं
 च तं विज्जं परिजाणिया ॥ १५ ॥ ४५१ ॥ संपसारी कयकिरिए सपिणाययणाणि
 य । सागारियं च पिण्डं च तं विज्जं परिजाणिया ॥ १६ ॥ ४५२ ॥ अट्ठावयं न
 सिक्खिज्जा वेहाइयं च नो वए । हत्थकम्मं विवायं च तं विज्जं परिजाणिया
 ॥ १७ ॥ ४५३ ॥ पाणहाओ य छतं च नालीयं वालवीयणं । परकिरियं अन्नमन्नं
 च तं विज्जं परिजाणिया ॥ १८ ॥ ४५४ ॥ उच्चारं पासवणं हरिएसु न करे मुणी ।
 वियडेण वा वि साहट्ठु नावमजे कयाइ वि ॥ १९ ॥ ४५५ ॥ परमत्ते अन्नपाणं न
 मुजेज्ज कयाइ वि । परवत्थं अचेलो वि तं विज्जं परिजाणिया ॥ २० ॥ ४५६ ॥
 आसन्दी पलियेक्के य निसिज्जं च गिहन्तरे । संपुच्छणं सरणं वा तं विज्जं परिजा-
 णिया ॥ २१ ॥ ४५७ ॥ जसं कित्तिं सिलोगं च जा य वन्दणपूयणा । सव्वलो-
 यंसि जे कामा तं विज्जं परिजाणिया ॥ २२ ॥ ४५८ ॥ जेणेहं निव्वहे भिक्खु

अन्नपाणं तद्वाविहं । अणुप्पयाणमन्नेसिं तं विज्जं परिजाणिया ॥ २३ ॥ ४५९ ॥
 एवं उदाहु निग्गन्थे महावीरे महामुणी । अणन्तनाणदंसी से धम्मं, देसितवं सुयं
 ॥ २४ ॥ ४६० ॥ भासमाणो न भासेज्जा नेव वम्फेज्ज मम्मयं । माइट्ठणं विव-
 ज्जेज्जा अणुन्नितिय वियागरे ॥ २५ ॥ ४६१ ॥ तत्थिमा तइया भासा जं वइत्ता-
 णुत्तप्पइ । जं छन्नं तं न वत्तव्वं एसा आणा नियण्ठिया ॥ २६ ॥ ४६२ ॥
 होलावायं सहीवायं गोयावायं च नो वए । तुमं तुमं ति अमणुन्नं सव्वसो तं न
 वत्तए ॥ २७ ॥ ४६३ ॥ अकुसीले सया भिक्खू नेव संसग्गियं भए । सुहरूवा
 तत्थुवस्सग्गा पड्डिबुज्जेज्ज ते विऊ ॥ २८ ॥ ४६४ ॥ नन्नत्थ अन्तराएणं परगेहे
 न निसीयए । गामकुमारियं किंहुं नाइवेलं हसे मुणी ॥ २९ ॥ ४६५ ॥ अणुस्सुओ
 उरालेसु जयमाणो परिव्वए । चरियाए अप्पमतो पुट्ठो तत्थ हियासए ॥ ३० ॥
 ॥ ४६६ ॥ हम्ममाणो न कुप्पेज्ज वुच्चमाणो न संजले । सुमणे अहियासेज्जा न य
 कोलाहलं करे ॥ ३१ ॥ ४६७ ॥ लद्धे कामे न पत्थेज्जा विवेगे एवमाहिंए ।
 आयरियाइं सिक्खेज्जा गुरुणं अन्तिए सया ॥ ३२ ॥ ४६८ ॥ सुस्ससमाणो उवा-
 सेज्जा सुप्पन्नं सुतवस्सियं । वीरा जे अत्तपन्नेसी धिइमन्ता जिइन्दिया ॥ ३३ ॥
 ॥ ४६९ ॥ गिहे दीवमपासन्ता पुरिसादाणिया नरा । ते वीरा बन्धणुम्मुक्का
 नावकंखन्ति जीवियं ॥ ३४ ॥ ४७० ॥ अगिद्धे सइफासेसु आरम्भेसु अनिस्सिए ।
 सव्वं तं समयतीयं जमेयं लवियं बहु ॥ ३५ ॥ ४७१ ॥ अइमाणं च मायं च तं
 परिज्जाय पण्डिए । गारवाणि य सव्वाणि निव्वाणं संघए सुणि ॥ ३६ ॥ ४७२ ॥
 त्ति वेमि ॥ धम्मज्झयणं नवमं ॥

समाहियज्झयणे दसमे

आद्यं मईमं अणुवीइ धम्मं अञ्जु समाहिं तमिमं सुणेह । अपडिन्न भिक्खू उ
 समाहिपत्ते अणियाण भूएसु परिव्वएज्जा ॥ १ ॥ ४७३ ॥ उद्धं अहे यं तिरियं
 दिसासु तसा य जे थावर जे य पाणा । हत्थेहि पाएहि य संजमित्ता अदिन्नमन्नेसु
 य नो गहेज्जा ॥ २ ॥ ४७४ ॥ सुयक्खायधम्मे वित्तिगिच्छतिण्णे लाढे चरे आय-
 तुले पयासु । आयं न कुज्जा इह जीवियट्ठी चयं न कुज्जा सुतवस्सि भिक्खू ॥ ३ ॥
 ॥ ४७५ ॥ सव्विन्दियाभिनिव्वुडे पयासु चरे मुणी सव्वउ विप्पमुक्के । पासाहिं
 पाणे य पुढो वि सत्ते दुक्खेण अट्ठे परितप्पमाणे ॥ ४ ॥ ४७६ ॥ एसु बाले य
 पकुव्वमाणे आवट्ठई कम्मसु पावएसु । अइवायओ कीरइ पावकम्मं निउज्जमाणे उ
 करेइ कम्मं ॥ ५ ॥ ४७७ ॥ आदीणवित्ती व करेइ पावं मन्ता उ एगन्तसमाहि-
 माहु । बुढे समाहीय रए विवेगे पाणाइवाया विरए ठियप्पा ॥ ६ ॥ ४७८ ॥

सर्वं जगं तू समयाणुपेही पियमप्पियं कस्स वि नो करेज्जा । उट्ठाय दीणो य पुणो विसण्णो संपूयणं चेव सिलोयकामी ॥ ७ ॥ ४७९ ॥ आहाकडं चेव निकाममीणे नियामचारी य विसण्णमेसी । इत्थीसु सत्ते य पुढो य बाले परिग्गहं चेव पकुव्वमाणे ॥ ८ ॥ ४८० ॥ वेराणुगिद्धे निचयं करेइ इओ चुए से इहमट्ठुग्गं । तम्हा उ मेहावि समिक्ख धम्मं चरे मुणि सव्वउ विप्पमुक्के ॥ ९ ॥ ४८१ ॥ आयं न कुज्जा इह जीवियट्ठी असज्जमाणो य परिव्वएज्जा । निसम्मभासी य विणीय गिद्धि हिंसजियं वा न कहं करेज्जा ॥ १० ॥ ४८२ ॥ आहाकडं वा न निकामएज्जा निकामयन्ते य न संथवेज्जा । धुणे उरालं अणुवेहमाणे चिच्चा न सोयं अणवेक्खमाणो ॥ ११ ॥ ४८३ ॥ एगत्तमेयं अभिपत्थएज्जा एवं पमोक्खो न मुसं ति पासं । एसप्पमोक्खो अमुसे वरे वि अकोहणे सच्चरए तवस्सी ॥ १२ ॥ ४८४ ॥ इत्थीसु या आरय मेहुणाओ परिग्गहं चेव अकुव्वमाणे । उच्चावएसु विसएसु ताई निस्संसयं भिक्खु समाहिपत्ते ॥ १३ ॥ ४८५ ॥ अरइं रइं च अभिभूय भिक्खु तणाइकासं तह सीयकासं । उण्हं च दंसं चऽहियासएज्जा सुब्बि व दुब्बि व तितिक्खएज्जा ॥ १४ ॥ ४८६ ॥ गुत्तो वईए य समाहिपत्तो लेसं समाहट्ठु परिव्वएज्जा । गिहं न छाए न वि छायएज्जा संमिस्सभावं पयहे पयासु ॥ १५ ॥ ४८७ ॥ जे केइ लोगम्मि उ अकिरियआया अन्नेण पुट्ठा धुयमादिसन्ति । आरम्भसत्ता गढिया य लोए धम्मं न जाणन्ति विमोक्खहेउं ॥ १६ ॥ ४८८ ॥ पुढो य छन्दा इह माणवा उ किरियाकिरीयं च पुढो य बायं । जायस्स बालस्स पकुव्व देहं पवट्ठई वैरमसंजयस्स ॥ १७ ॥ ४८९ ॥ आउक्खयं चेव अबुज्झमाणे ममाइ से साहसकारि मन्दे । अहो य राओ परितप्पमाणे अट्ठेसु मूढे अजरामरे व्व ॥ १८ ॥ ४९० ॥ जहाहि वित्तं पसवो य सर्व्वं जे बन्धवा जे य पिया य मिता । लालप्पई से वि य एइ मोहं अन्ने जणा तंसि हरन्ति वित्तं ॥ १९ ॥ ४९१ ॥ सीहं जहा खुड्डमिगा चरन्ता दूरे चरन्ति परिसंकमाणा । एवं तु मेहावि समिक्ख धम्मं दूरेण पावं परिव्वज्जएज्जा ॥ २० ॥ ४९२ ॥ संबुज्झमाणे उ नरे मईमं पावाउ अप्पाण निवट्ठएज्जा । हिंसप्पसयाई दुहाई मत्ता वेराणुबन्धीणि महब्भयाणि ॥ २१ ॥ ४९३ ॥ मुसं न बूया मुणि अत्तगामी निव्वाणमेयं कसिणं समाहिं । सयं न कुज्जा न य कारवेज्जा करन्तमन्नं पि य नाणुजाणे ॥ २२ ॥ ४९४ ॥ सुद्धे सिया जाएं न दूसएज्जा अमुच्छिणं न य अज्झोववन्ने । धिइमं विमुक्के न य पूयणट्ठी न सिलोयगामी य परिव्वएज्जा ॥ २३ ॥ ४९५ ॥ निक्खम्म गेहाउ निरावकंखी कायं विउस्सेज्ज नियाणछिजे । नो जीवियं नो मरणाभिकंखी चरेज्ज भिक्खु वलया विमुक्के ॥ २४ ॥ ४९६ ॥ ति बेमि ॥ समाहियज्झयणं दस्समं ॥

मग्गज्झयणे एयारहमे

कयरे मग्गे अक्खाए माहणेणं मईमया । जं मग्गं उज्जु पावित्ता ओहं तरइ
 दुत्तरं ॥ १ ॥ ४९७ ॥ जं मग्गं गुत्तरं सुद्धं सव्वदुक्खविमोक्खणं । जाणासि णं
 जहा भिक्खू तं णो बूहि महामुणी ॥ २ ॥ ४९८ ॥ जइ णो केइ पुच्छिज्जा देवा
 अदुव माणुसा । तेसिं तु कयरं मग्गं आइक्खेज्ज कहाहि णो ॥ ३ ॥ ४९९ ॥ जइ
 वो केइ पुच्छिज्जा देवा अदुव माणुसा । तेसिमं पडिसाहेज्जा मग्गसारं सुणेह मे
 ॥ ४ ॥ ५०० ॥ अणुपुव्वेण महाघोरं कासवेण पवेइयं । जमायाय इओ पुव्वं समुद्धं
 ववहारिणे ॥ ५ ॥ ५०१ ॥ अतरिंसु तरन्तेगे तरिस्सन्ति अणागया । तं सोच्चा
 पडिवक्खामि जन्तवो तं सुणेह मे ॥ ६ ॥ ५०२ ॥ पुढवीजीवा पुढो सत्ता आउ-
 जीवा तहागणी । वाउजीवा पुढो सत्ता तणक्ख्वा सबीयगा ॥ ७ ॥ ५०३ ॥
 अहावरा तसा पाणा एवं छक्काय आहिया । एयावए जीवकाए नावरे कोइ विज्जई
 ॥ ८ ॥ ५०४ ॥ सव्वार्हिं अणुजुत्तीहिं मइमं पडिलेहिया । सव्वे अक्कन्तदुक्खा य
 अओ सव्वे न हिंसया ॥ ९ ॥ ५०५ ॥ एयं खु नाणिणो सारं जं न हिंसइ कंचण ।
 अहिंसा समयं चेव एयावन्तं वियाणिया ॥ १० ॥ ५०६ ॥ उद्धं अहे य तिरियं जे
 केइ तसथावरा । सव्वत्थ विरइं विज्जा सन्ति निव्वाणमाहिं ॥ ११ ॥ ५०७ ॥
 पभू दोसे निराकिच्चा न विरुज्झेज्ज केण वि । मणसा वयसा चेव कायसा चेव
 अन्तसो ॥ १२ ॥ ५०८ ॥ संवुडे से महापन्ने धीरे दत्तेसणं चरे । एसणासमिए
 निच्चं वज्जयन्ते अणेसणं ॥ १३ ॥ ५०९ ॥ भूयाइं च समारम्भ तमुद्दिस्सा य जं
 कडं । तारिंसं तु न गिणहेज्जा अन्नपाणं सुसंजए ॥ १४ ॥ ५१० ॥ पूईकम्मं न
 सेवेज्जा एस धम्मे वुसीमओ । जं किंचि अभिकंखेज्जा सव्वसो तं न कप्पए ॥ १५ ॥
 ॥ ५११ ॥ हणन्तं नाणुजाणेज्जा आयगुत्ते जिइन्दिए । ठाणाइं सन्ति सङ्कीणं गामेसु
 नगरेसु वा ॥ १६ ॥ ५१२ ॥ तहा गिरं समारब्भ अत्थि पुण्णं ति नो वए ।
 अहवा नत्थि पुण्णं ति एवमेयं महब्भयं ॥ १७ ॥ ५१३ ॥ दाणट्ठया य जे पाणा
 हम्मन्ति तसथावरा । तेसिं सारक्खणट्ठाए तम्हा अत्थि ति नो वए ॥ १८ ॥ ५१४ ॥
 जेसिं तं उवकप्पन्ति अन्नपाणं तहाविहं । तेसिं लाभन्तरायं ति तम्हा नत्थि ति नो
 वए ॥ १९ ॥ ५१५ ॥ जे य दाणं पसंसन्ति वहमिच्छन्ति पाणिणं । जे य णं
 पडिसेहन्ति वित्तिच्छेयं करन्ति ते ॥ २० ॥ ५१६ ॥ दुहओ वि ते न भासन्ति
 अत्थि वा नत्थि वा पुणो । आयं रयस्स हेच्चा णं निव्वाणं पाउणन्ति ते ॥ २१ ॥
 ॥ ५१७ ॥ निव्वाणं परमं बुद्धा नक्खत्ताण व चन्दिमा । तम्हा सया जए दन्ते
 निव्वाणं संघए मुणी ॥ २२ ॥ ५१८ ॥ वुज्झमाणाण पाणाणं किच्चन्ताण सक्कमुणा ।

आधाइ साहु तं बीवं पइट्टेसा पवुच्चई ॥ २३ ॥ ५१९ ॥ आयगुत्ते सया दन्ते
 छिन्नसोए अणासवे । जे धम्मं सुद्धमक्खाइ पडिपुण्णमणोलिंसं ॥ २४ ॥ ५२० ॥
 तमेव अवियाणन्ता अबुद्धा बुद्धमाणिणो । बुद्धा मो त्ति य मन्नन्ता अन्त एए समा-
 हिए ॥ २५ ॥ ५२१ ॥ ते य बीयोदगं चेव तसुद्धिस्सा य जं कडं । भोच्चा ज्ञाणं
 झियायन्ति अखेयन्नासमाहिया ॥ २६ ॥ ५२२ ॥ जहा ढंका य कंका य कुल्ला
 मग्गुका सिही । मच्छेसणं झियायन्ति ज्ञाणं ते कल्लुसाधमं ॥ २७ ॥ ५२३ ॥ एवं
 तु समणा एगे मिच्छदिट्ठी अणारिया । विसएसणं झियायन्ति कंका वा कल्लुसाहमा
 ॥ २८ ॥ ५२४ ॥ सुद्धं मग्गं विराहिता इहमेगे उ दुम्मई । उम्मग्गगया दुक्खं
 घायमेसन्ति तं तहा ॥ २९ ॥ ५२५ ॥ जहा आसाविणिं नावं जाइअन्धो दुरुहिया ।
 इच्छई पारमागन्तुं अन्तरा य विसीयइ ॥ ३० ॥ ५२६ ॥ एवं तु समणा एगे
 मिच्छदिट्ठी अणारिया । सोयं कसिणमावन्ना आगन्तारो महब्भयं ॥ ३१ ॥ ५२७ ॥
 इमं च धम्ममायाय कासवेण पवेइयं । तरे सोयं महाघोरं अत्तत्ताए परिव्वए
 ॥ ३२ ॥ ५२८ ॥ विरए गामधम्मेहिं जे केइ जगई जगा । तेसिं अत्तुवमायाए
 थामं कुव्वं परिव्वए ॥ ३३ ॥ ५२९ ॥ अइमाणं च मायं च तं परिच्चाय पण्डिए ।
 सव्वमेयं निराकिच्चा निव्वाणं संघए मुणी ॥ ३४ ॥ ५३० ॥ संघए साहुधम्मं
 च पावधम्मं निराकरे । उवहाणवीरिए भिक्खू कोहं माणं न पत्थए ॥ ३५ ॥ ५३१ ॥
 जे य बुद्धा अतिकन्ता जे य बुद्धा अणागया । सन्ति तेसिं पइट्ठाणं भूयाणं जगई
 जहा ॥ ३६ ॥ ५३२ ॥ अह णं वयमावन्नं फासा उच्चावया फुसे । न तेसु विणि-
 हण्णेज्जा वाएण व महागिरी ॥ ३७ ॥ ५३३ ॥ संवुडे से महापत्ते धीरे दत्तेसणं
 चरे । निव्वुडे कालमाकंखी एवं केवल्लिणो मयं ॥ ३८ ॥ ५३४ ॥ ति वेमि ॥
 मग्गज्झयणं एयारहमं ॥

समोसरणज्झयणे बारहमे

चत्तारि समोसरणाणिमाणि पावाडुया जाई पुढो वयन्ति । किरियं अकिरियं
 विणयं ति तइयं अच्चाणमाहंसु चउत्थमेव ॥ १ ॥ ५३५ ॥ अच्चाणिया ता कुसला
 वि सन्ता असंथुया नो वितिगिच्छतिण्णा । अकोविया आहु अकोवियेहिं अणाणु-
 वीइत्तु सुसं वयन्ति ॥ २ ॥ ५३६ ॥ सच्चं असच्चं इति चिन्तयन्ता असाहु साहु
 त्ति उदाहरन्ता । जेमे जणा वेणइया अणेगे पुट्ठा वि भावं विणइंसु नाम ॥ ३ ॥
 ५३७ ॥ अणोवसंखा इइ ते उदाहु अट्टे स ओभासइ अम्ह एवं । लवावसंकी

य अणागएहिं नो किरियमाहंसु अकिरियवाई ॥ ४ ॥ ५३८ ॥ संमिस्सभावं च
 गिरा गहीए से मुम्मुइ होइ अणाणुवाई । इमं दुपक्खं इममेगपक्खं आहंसु
 छलाययणं च कम्मं ॥ ५ ॥ ५३९ ॥ ते एवमक्खन्ति अबुज्झमाणा विरुवल्वाणि
 अकिरियवाई । जे मायइत्ता बहवे मणूसा भमन्ति संसारमणोवदरगं ॥ ६ ॥
 ॥ ५४० ॥ नाइच्चो उदेइ न अत्यमेइ न चन्दिमा वज्झइ हायई वा । सल्लिला न
 सन्दन्ति न वन्ति वाया वज्झो नियओ कसिणे हु लोए ॥ ७ ॥ ५४१ ॥ जहा हि
 अन्ये सह जोइणा वि रुवाई नो पस्सइ हीणनेत्ते । सन्तं पि ते एवमकिरियवाई
 किरियं न पस्सन्ति निरुद्धपत्ता ॥ ८ ॥ ५४२ ॥ संवच्छरं सुविणं लक्खणं च
 निमित्तदेहं च उप्पाइयं च । अट्ठमेयं बहवे अहिता लोगंसि जाणन्ति अणागयाई
 ॥ ९ ॥ ५४३ ॥ केई निमित्ता तहिया भवन्ति केसिंचि तं विप्पडिण्णं नाणं । ते
 विज्जभावं अणहिज्जमाणा आहंसु विज्जा परिमोक्खमेव ॥ १० ॥ ५४४ ॥ ते एवम-
 क्खन्ति समिच्च लोगं तहा तहा समणा माहणा य । सयंकडं नन्नकडं च दुक्खं
 आहंसु विज्जाचरणं पमोक्खं ॥ ११ ॥ ५४५ ॥ ते चक्खु लोगंसिह नायगा उ
 मग्गाणुसासन्ति हियं पयाणं । तहा तहा सासयमाहु लोए जंसी पया माणव संप-
 गाढा ॥ १२ ॥ ५४६ ॥ जे रक्खसा वा जमलोइया वा जे वा सुरा गंधव्वा य
 काया । आगासगामी य पुढोसिया जे पुणो पुणो विप्परियासुवेन्ति ॥ १३ ॥
 ॥ ५४७ ॥ जमाहु ओहं सलिलं अपारगं जाणाहि णं भवगहणं दुमोक्खं । जंसी
 विसण्णा विसयङ्गणाहिं दुहओ वि लोयं अणुसंचरन्ति ॥ १४ ॥ ५४८ ॥ न
 कम्मणा कम्म खवेन्ति बाला अकम्मणा कम्म खवेन्ति धीरा । मेहाविणो लोभ-
 भयावईया संतोसिणो नो पकरेन्ति पावं ॥ १५ ॥ ५४९ ॥ ते तीयउप्पन्नमणा-
 गयाई लोगस्स जाणन्ति तहागयाई । नेयारो अब्बेसि अणजनेया बुद्धा हु ते अन्त-
 कडा भवन्ति ॥ १६ ॥ ५५० ॥ ते नेव कुव्वन्ति न कारवेन्ति भूयाहिसंकाइ
 दुगुज्झमाणा । सया जया विप्पणमन्ति धीरा विण्णत्ति धीरा य हवन्ति एगे
 ॥ १७ ॥ ५५१ ॥ डहरे य पाणे खुट्ठे य पाणे ते अत्तओ पासइ सव्वलोए ।
 उव्वेहई लोगमिणं महन्तं बुद्धेपमत्तेसु परिव्वएज्जा ॥ १८ ॥ ५५२ ॥ जे आयओ
 परओ वा वि नच्चा अलमप्पणो होन्ति अलं परेसिं । तं जोइभूयं च सयावसेज्जा
 जे पाउकुज्जा अणुवीइ धम्मं ॥ १९ ॥ ५५३ ॥ अत्ताण जो जाणइ जो य लोगं
 गइं च जो जाणइ नागइं च । जो सासयं जाण असासयं च जाइं च मरणं च
 जणोववायं ॥ २० ॥ ५५४ ॥ अहो वि सत्ताण विउट्ठणं च जो आसवं जाणइ
 संवरं च । दुक्खं च जो जाणइ निज्जरं च सो भासिउमरिहइ किरियवायं ॥ २१ ॥

॥ ५५५ ॥ सदेसु रुवेसु असज्जमाणे गन्धेसु रसेसु अदुस्समाणे । नो जीवियं नो मरणाहिंस्खी आयाणयुते वलया विमुक्के ॥ २२ ॥ ५५६ ॥ त्ति वेमि ॥ समो-सरणज्झयणं बारहमं ॥

आहतहीयज्झयणे तेरहमे

आहतहीयं तु पवेयइस्सं नाणप्पकारं पुरिसस्स जायं । सओ य धम्मं असओ असीलं सन्ति असन्ति करिस्सामि पाउं ॥ १ ॥ ५५७ ॥ अहो य राओ य ससुट्ठिएहिं तहागएहिं पडिलब्भ धम्मं । समाहिमाघायमजोसयन्ता सत्थारमेवं फरुसं वयन्ति ॥ २ ॥ ५५८ ॥ विसोहियं ते अणुकाहयन्ते जे आयाभावेण विया-गरेज्जा । अट्ठाणिए होइ बहुगुणाणं जे नाणसंकाइ मुसं वएज्जा ॥ ३ ॥ ५५९ ॥ जे यावि पुट्ठा पल्लिउच्चयन्ति आयाणमट्ठं खलु वच्चइत्ता । असाहुणो ते इह साहु-माणी मायणिण एस्सन्ति अणन्तघायं ॥ ४ ॥ ५६० ॥ जे कोहणे होइ जयट्ठभासी विओसियं जे उ उरीरएज्जा । अन्ये व से दण्डपहं गहाय अविओसिए धासइ पावक्कमी ॥ ५ ॥ ५६१ ॥ जे विग्गहीए अच्चायभासी न से समे होइ अज्झञ्च-पत्ते । ओवायकारी य हिरीमणे य एगन्तदिट्ठी य अमाइरुवे ॥ ६ ॥ ५६२ ॥ से पेसले सुहुमे पुरिसजाए जच्चलिए चेव सुउज्जुयारे । बहुं पि अणुसासिएं जे तहच्चा समे हु से होइ अज्झञ्चपत्ते ॥ ७ ॥ ५६३ ॥ जे यावि अप्पं वसुमं ति मत्ता संखाय वायं अपरिक्ख कुज्जा । तवेण बाहं सहिउ त्ति मत्ता अन्नं जणं पस्सइ बिम्बभूर्यं ॥ ८ ॥ ५६४ ॥ एगन्तकूडेण उ से पळेइ न विज्जई भोगपयंसि गोत्ते । जे माणणट्ठेण विउक्कसेज्जा वसुमच्चतरेण अबुज्जमाणे ॥ ९ ॥ ५६५ ॥ जे माहणे खत्तियजायए वा तहुग्गपुत्ते तह लेच्छई वा । जे पव्वईए परदत्तभोई गोत्ते न जे थब्बइ माणबदे ॥ १० ॥ ५६६ ॥ न तस्स जाई व कुलं व ताणं नच्चत्थ विज्जा-च्चरणं सुचिणं । निक्खम्म से सेवइऽगारिकम्मं न से पारए होइ विमोयणाए ॥ ११ ॥ ५६७ ॥ निक्किंचणे भिक्खु सुद्धहजीवी जे गारवं होइ सिलोगकामी । आजीवमेयं तु अबुज्जमाणो पुणो पुणो विप्परियासुवेन्ति ॥ १२ ॥ ५६८ ॥ जे भासवं भिक्खु सुसाहुवाई पडिहाणवं होइ विसारए य । आगाढपणे सुविभावियप्पा अन्नं जणं पच्चया परिहवेज्जा ॥ १३ ॥ ५६९ ॥ एवं न से होइ समाहिपत्ते जे पच्चवं भिक्खु विउक्कसेज्जा । अहवा वि जे लाहमयावलिते अन्नं जणं खिसइ माल-पणे ॥ १४ ॥ ५७० ॥ पक्कामयं चेव तवोमयं च निक्कामए गोयमयं च भिक्खु ।

आजीवगं चैव चउत्थमाहु से पण्डि ए उत्तमपोगले से ॥ १५ ॥ ५७१ ॥ मयाहँ
 एयाहँ विगिञ्च धीरा न ताणि सेवन्ति सुधीरधम्मा । ते सव्वगोत्तावगया महेसी
 उच्चं अगोतं च गतिं वयन्ति ॥ १६ ॥ ५७२ ॥ भिक्खु सुयवे तह दिट्ठधम्मो
 गामं च नगरं च अणुप्पविस्सा । से एसणं जाणमणेसणं च अन्नस्स पाणस्स
 अणाणुनिद्धे ॥ १७ ॥ ५७३ ॥ अरहं रहं च अभिभूय भिक्खु बहूजणे वा तह
 एगचारी । एगन्तमोणेण वियागरेज्जा एगस्स जन्तो गइरागई य ॥ १८ ॥
 ॥ ५७४ ॥ सयं समेच्चा अदुवा वि सोच्चा भासेज्ज धम्मं हिययं पयाणं । जे गर-
 हिया सणियाणप्पओगा न ताणि सेवन्ति सुधीरधम्मा ॥ १९ ॥ ५७५ ॥ केसिंचि
 तक्काइ अबुज्झ भावं खुइं पि गच्छेज्ज असहहाणे । आउस्स कालाइयारं वघाए
 लद्धाणुमाणे य परेसु अट्ठे ॥ २० ॥ ५७६ ॥ कम्मं च छन्दं च विगिञ्च धीरे
 विणइज्ज ऊ सव्वउ आयभावं । रुवेहिं लुप्पन्ति भयावहेहिं विज्जं गहाया तसथाव-
 रेहिं ॥ २१ ॥ ५७७ ॥ न पूयणं चैव सिलोयकामी पियमप्पियं कस्सइ नो
 करेज्जा । सव्वे अणट्ठे परिवज्जयन्ते अणाउले या अकसाइ भिक्खु ॥ २२ ॥
 ॥ ५७८ ॥ आहतहीयं समुपेहमाणे सव्वेहिं पाणेहिं निहाय दण्डं । नो जीवियं
 नो मरणाहिकंखी परिव्वएज्जा वलया विमुक्के ॥ २३ ॥ ५७९ ॥ त्ति वेमि ॥
 आहत्तहीयज्झयणं तेरहमं ॥

गन्थज्झयणे चोदहमे

गन्थं विहाय इह सिक्खमाणो उट्ठाय सुवम्भचेरं वसेज्जा । ओवायकारी विणयं
 सुसिक्खे जे छेय से विप्पमायं न कुज्जा ॥ १ ॥ ५८० ॥ जहा दियापोयमपत्तजायं
 सावासगा पविउं मन्नमाणं । तमचाइयं तरुणमपत्तजायं ढंकाइ अव्वत्तगमं हरेज्जा
 ॥ २ ॥ ५८१ ॥ एवं तु सेहं पि अपुट्ठधम्मं निस्सारियं वुत्तिमं मन्नमाणा । दियस्स
 छांयं व अपत्तजायं हरिंसु ण पावधम्मा अणेगे ॥ ३ ॥ ५८२ ॥ ओसाणमिच्छे
 मणुए समाहिं अणोसिए णन्तकरिं ति नच्चा । ओभासमाणे दवियस्स वित्तं न निक्खे
 बहिया आसुपन्नो ॥ ४ ॥ ५८३ ॥ जे ठाणओ य सयणासणे य परक्कमे यावि
 सुसाहुजुत्ते । समिईसु गुत्तीसु य आयपक्खे वियागारिं ते य पुढो वएज्जा ॥ ५ ॥ ५८४ ॥
 सद्दाणि सोच्चा अदु भेरवाणि अणासवे तेसु परिव्वएज्जा । निर्दं च भिक्खु न पमाय
 कुज्जा कहं कहं वा वितिगिच्छतिण्णे ॥ ६ ॥ ५८५ ॥ डहरेण वुट्ठेणऽणुसासिए उ
 राइणि एणावि समव्वएणं । सम्मं तयं थिरओ नाभिगच्छे निज्जन्तए वावि अपारए
 से ॥ ७ ॥ ५८६ ॥ विउट्ठिएणं समयाणुसिट्ठे डहरेण वुट्ठेण उ चोइए य । अञ्चुट्ठि-

याए षडदासिए वा अगारिणं वा समयाणुसिट्ठे ॥ ८ ॥ ५८७ ॥ न तेसु कुज्जे न
य पव्वहेज्जा न यावि किंची फरुसं वएज्जा । तहा करिस्सं ति पडिस्सुणेज्जा सेयं खु
मेयं न पमाय कुज्जा ॥ ९ ॥ ५८८ ॥ वणंसि मूढस्स जहा अमूढा मग्गाणुसासन्ति
हियं पयाणं । तेणेव मज्झं इणमेव सेयं जं मे बुहा समणुसासयन्ति ॥ १० ॥ ५८९ ॥
अह तेण मूढेण अमूढगस्स कायव्व पूया सविसेसजुत्ता । एओवमं तत्थ
उदाहु वीरे अणुगम्म अत्थं उवणेइ सम्मं ॥ ११ ॥ ५९० ॥ नेया जहा अन्ध-
कारंसि राओ मग्गं न जाणाइ अपस्समाणे । से सूरियस्स अब्भुग्गमेणं मग्गं
वियाणाइ पगासियंसि ॥ १२ ॥ ५९१ ॥ एवं तु सेहे वि अपुट्ठधम्ममे धम्मं न
जाणाइ अबुज्झमाणे । से कोविए जिणवयणेण पच्छा सूरौदए पासइ चक्खुणेव
॥ १३ ॥ ५९२ ॥ उट्ठं अहे यं तिरियं दिसासु तसा य जे थावर जे य पाणा ।
सया जए तेसु परिव्वएज्जा मणप्पओसं अविकम्पमाणे ॥ १४ ॥ ५९३ ॥ कालेण
पुच्छे समियं पयासु आइक्खमाणो दवियस्स वित्तं । तं सोयकारी य पुढो पवेसे
संखा इमं केवलियं समाहिं ॥ १५ ॥ ५९४ ॥ अस्सि सुट्ठिच्चा तिविहेण तायी
एसु या सन्ति निरोहमाहु । ते एवमक्खन्ति तिलोगदंसी न भुज्जमेयन्ति पमाय-
संगं ॥ १६ ॥ ५९५ ॥ निसम्म से भिक्खु समीहियट्ठं पडिभागवं होइ विसारए य ।
आयाणअट्ठी वोदाणमोणं उवेच्च सुद्धेण उवेइ मोक्खं ॥ १७ ॥ ५९६ ॥ संखाइ
धम्मं च वियागरन्ति बुद्धा हु ते अन्तकरा भवन्ति । ते पारगा दोण्ह वि मोयणाए
संसोवियं पण्हमुदाहरन्ति ॥ १८ ॥ ५९७ ॥ नो छायए नो वि य लसएज्जा माणं
न सेवेज्ज पगासणं च । न यावि पन्ने परिहास कुज्जा न याऽऽसियावाय वियागरेज्जा
॥ १९ ॥ ५९८ ॥ भूयाभिसंकाइ दुगुच्छमाणे न निव्वहे मन्तपएण गोयं । न
किंचिमिच्छे मणुए पयासुं असाहुधम्माणि न संवएज्जा ॥ २० ॥ ५९९ ॥ हासं पि
नो संधइ पावधम्ममे ओए तहीयं फरुसं वियाणे । नो तुच्छए नो य विकंथइज्जा
अणाहले या अकसाइ भिक्खु ॥ २१ ॥ ६०० ॥ संकेज्ज याऽऽसंकियभाव भिक्खु
विभज्जवायं च वियागरेज्जा । भासादुयं धम्मसमुट्ठिएहिं वियागरेज्जा समयासुपन्ने
॥ २२ ॥ ६०१ ॥ अणुगच्छमाणे वितहं विजाणे तहा तहा साहु अक्कसेणं । न
कत्थइ भास विहिंसइज्जा निरुद्धं वावि न वीहइज्जा ॥ २३ ॥ ६०२ ॥ समालवेज्जा
पडिपुण्णभासी निसामिया समियाअट्ठदंसी । आणाइ सुदं वयणं भिउजे अभिसंधए
पावविवेग भिक्खु ॥ २४ ॥ ६०३ ॥ अहाबुइयाई सुसिक्खएज्जा जइज्जा ताइवेले
वएज्जा । से दिट्ठिमं दिट्ठि न लसएज्जा से जाणइ भासिजं तं समाहिं ॥ २५ ॥ ६०४ ॥
अलसए नो पच्छन्नभासी नो सुतमत्थं च करेज्ज ताई । सत्थाअमत्ती अणुवीइ वायं

सुयं च सम्मं पडिवाययन्ति ॥ २६ ॥ ६०५ ॥ से सुद्धसुत्ते उवहाणवं च धम्मं च
जे विन्दइ तत्थ तत्थ । आपणजक्के कुसले वियत्ते स अरिहइ भासिउं तं समाहिं
॥ २७ ॥ ६०६ ॥ ति बेसि ॥ गन्थज्झयणं चोद्धमं ॥

आयाणियज्झयणे पण्णरहमे

जमईअं पडुप्पन्नं आगमिस्सं च नायओ । सव्वं मज्झइ तं ताई दंसणावरणन्तए
॥ १ ॥ ६०७ ॥ अन्ताए वित्तिणिच्छाए से जाणइ अणेलिसं । अणेलिसस्स अक्खाया
न से होइ तहिं तहिं ॥ २ ॥ ६०८ ॥ तहिं तहिं सुयक्खायं से य सच्चे सुआहिए ।
सया सच्चेण संपन्ने मेत्ति भूएहि कप्पए ॥ ३ ॥ ६०९ ॥ भूएहि न विरुज्झेजा एस
धम्मो वुसीमओ । वुसिमं जगं परित्राय अस्सि जीवियभावणा ॥ ४ ॥ ६१० ॥
भावणाजोगसुद्धप्पा जले नावा व आहिया । नावा व तीरसंपन्ना सव्वदुक्खा तिउ-
द्धइ ॥ ५ ॥ ६११ ॥ तिउद्धइ उ मेहावी जाणं लोगंसि पावगं । तुट्ठन्ति पावकम्माणि
नवं कम्ममकुव्वओ ॥ ६ ॥ ६१२ ॥ अकुव्वओ नवं नत्थि कम्मं नाम विजाणइ ।
वित्राय से महावीरे जेण जाई न मिज्जई ॥ ७ ॥ ६१३ ॥ न मिज्जई महावीरे
जस्स नत्थि पुरेकडं । वाउ व्व जालमच्चेइ पिया लोगंसि इत्थियो ॥ ८ ॥ ६१४ ॥
इत्थियो जे न सेवन्ति आइमोक्खा हु ते जणा । ते जणा बन्धणुम्मुक्का नावकंसन्ति
जीवियं ॥ ९ ॥ ६१५ ॥ जीवियं पिट्ठओ किच्चा अन्तं पावन्ति कम्ममुणं । कम्ममुणा
संमुहीभूया जे मग्गमणुसासई ॥ १० ॥ ६१६ ॥ अणुसासणं पुढो पाणी वसुमं
पूयणासु ते । अणासए जए दन्ते दढे आरयमेहुणे ॥ ११ ॥ ६१७ ॥ नीवारै
व न लीएजा छिन्नसोए अणाविले । अणाइले सया दन्ते संधि पत्ते अणेलिसं ॥ १२ ॥
॥ ६१८ ॥ अणेलिसस्स खेयन्ने न विरुज्झेज्जे केणइ । मणसा वयसा चेव कायसा चेव
चक्खुमं ॥ १३ ॥ ६१९ ॥ से हु चक्खू मणुस्साणं जे कंखाए य अन्तए । अन्तेण
खुरो वहई चक्कं अन्तेण लोद्धइ ॥ १४ ॥ ६२० ॥ अन्ताणि धीरा सेवन्ति तेण
अन्तकरा इह । इह माणुस्सए ठाणे धम्ममाराहिउं नरा ॥ १५ ॥ ६२१ ॥ निट्ठि-
यट्ठा व देवा वा उत्तरीए इयं सुयं । सुयं च मेयमेगेसि अमणुस्सेसु नो तहा ॥ १६ ॥
॥ ६२२ ॥ अन्तं करन्ति दुक्खाणं इहमेगेसिमाहियं । आघायं पुण एगेसि दुल्लभेइयं
समुस्सए ॥ १७ ॥ ६२३ ॥ इओ विद्धंसमाणस्स पुणो संबोहि दुल्लहा । दुल्लहाओ
तहचाओ जे धम्मद्वं वियागरे ॥ १८ ॥ ६२४ ॥ जे धम्मं सुद्धमक्खन्ति पडिपु-
ण्णमणेलिसं । अणेलिसस्स जं ठाणं तस्स जम्मकहा कओ ॥ १९ ॥ ६२५ ॥ कओ
कयाइ मेहावी उप्पज्जन्ति तहागया । तहागया अप्पज्झिआ चक्खू लोगस्सणुत्तरा

॥ २० ॥ ६२६ ॥ अणुत्तरे य ठाणे से कासवेण पवेइए । जं किच्चा निव्वुडा एगे
 निट्ठं पावन्ति पण्डिया ॥ २१ ॥ ६२७ ॥ पण्डिए वीरियं लब्धुं निग्वायाय पवत्तं
 धुणे पुव्वकडं कम्मं नवं वा वि न कुव्वई ॥ २२ ॥ ६२८ ॥ न कुव्वई महावीरे
 अणुपुव्वकडं रयं । रयसा संसुहीभूया कम्मं हेच्चाण जं मयं ॥ २३ ॥ ६२९ ॥ जं
 मयं सव्वसाहूणं तं मयं सल्लगतणं । साहइत्ताण तं तिण्णा देवा वा अभविंसु ते
 ॥ २४ ॥ ६३० ॥ अभविंसु पुरा धीरा आगमिस्सा वि सुव्वया । दुत्तिबोहस्स मग्गस्स
 अन्तं पाउकरा तिण्णे ॥ २५ ॥ ६३१ ॥ ति बेमि ॥ आयाणियज्झयणं पण्णरहमं ॥

गाहज्झयणे सोळसमे

अहाह भगवं—एवं से दन्ते दविए वोसट्टकाए ति वच्चे माहणे ति वा १ समणे
 ति वा २ भिक्खु ति वा ३ निग्गन्थे ति वा ४ । पडिआह—भन्ते कहं नु दन्ते
 दविए वोसट्टकाए ति वच्चे माहणे ति वा समणे ति वा भिक्खु ति वा निग्गन्थे ति
 वा । तं नो बूहि महामुणी ॥ इति विरए सव्वपावकम्मेहिं पिज्जदोसकलह० अन्ध-
 क्खाण० पेसुज० परपरिवाय० अरइरइ० मायामोस० मिच्छादंसणसल्लविरए समिए
 सहिए सया जए नो कुज्झे नो माणी माहणे ति वच्चे ॥ १ ॥ ६३२ ॥ एत्थ वि
 समणे अनिस्सिए अणियाणे आयाणं च अइवायं च मुसवायं च बहिद्धं च कोहं च
 माणं च मायं च लोहं च पिज्जं च दोसं च इच्चेव जओ जओ आयाणं अप्पणो
 पद्दोसहेऊ तओ तओ आयाणाओ पुव्वं पडिविरए पाणाइवाया सिआ दन्ते दविए
 वोसट्टकाए समणे ति वच्चे ॥ २ ॥ ६३३ ॥ एत्थ वि भिक्खु अणुजए विणीए नामए
 दन्ते दविए वोसट्टकाए संविधुणीय विरुवहवे परीसहोवसग्गे अज्झप्पजोगसुद्धादाणे
 उवट्ठिए ठिअप्पा संखाए परदत्तभोई भिक्खु ति वच्चे ॥ ३ ॥ ६३४ ॥ एत्थ वि
 निग्गन्थे एगे एगविऊ बुद्धे संछिन्नसोए सुसंजए सुसमिए सुसामाइए आयवायपत्ते
 विऊ दुहओ वि सोयपल्लिज्जे णो पूयणसक्कारलामट्ठी धम्मट्ठी धम्मविऊ नियाग
 पडिवच्चे समियं चरे दन्ते दविए वोसट्टकाए निग्गन्थे ति वच्चे ॥ ४ ॥ ६३५ ॥
 से एवमेव जाणह जमहं भयन्तारो ॥ ति बेमि ॥ गाहज्झयणं सोळसमं,
 पढमे सुयक्खन्थे समत्ते ॥

पोण्डरियज्झयणे पढमे

॥ सुयं मे आउसं तेणं भगवंना एवमक्खायं । इह खलु पोण्डरीए नामज्झयणे

तत्स णं अयमट्ठे पज्जेते । से जहानामए पुक्खरिणी सिया बहुउदगा बहुसेया बहु-
 पुक्खला लद्धा पुण्डरकिणी पासादिया दरिसणिया अभिरूवा पडिरूवा । तीसे णं
 पुक्खरिणीए तथ तथ देसे देसे तहिं तहिं बहवे पउमवरपोण्डरीया बुइया, अणु-
 पुव्वुट्ठिया ऊसिया रुइला वण्णमन्ता गन्धमन्ता रसमन्ता फासमन्ता पासादिया
 दरिसणिया अभिरूवा पडिरूवा । तीसे णं पुक्खरिणीए बहुमज्जदेसभाए एगे महं
 पउमवरपोण्डरीए बुइए, अणुपुव्वुट्ठिए ऊसिए रुइले वण्णमन्ते गन्धमन्ते रसमन्ते
 फासमन्ते पासादीए जाव पडिरूवे । सव्वावन्ति च णं तीसे पुक्खरिणीए तथ तथ
 देसे देसे तहिं तहिं बहवे पउमवरपोण्डरीया बुइया अणुपुव्वुट्ठिया ऊसिया रुइला
 जाव पडिरूवा । सव्वावन्ति च णं तीसे णं पुक्खरिणीए बहुमज्जदेसभाए एगे महं
 पउमवरपोण्डरीए बुइए अणुपुव्वुट्ठिए जाव पडिरूवे ॥ १ ॥ ६३६ ॥ अह पुरिसे
 पुरित्थिमाओ दिसाओ आगम्म तं पुक्खरिणिं तीसे पुक्खरिणीए तीरे ठिच्चा पासइ
 तं महं एणं पउमवरपोण्डरीयं अणुपुव्वुट्ठियं ऊसियं जाव पडिरूवं । तए णं से पुरिसे
 एवं वयासी-अहमंसि पुरिसे खेयजे कुसले पण्डिए वियत्ते मेहावी अवाले मग्गट्ठे
 मग्गविऊ मग्गस्स गइपरिकमञ्जू । अहमेयं पउमवरपोण्डरीयं उच्चिक्खिस्सामि ति
 कट्ठु इइ बुया से पुरिसे अभिक्कमेइ तं पुक्खरिणिं । जावं जावं च णं अभिक्कमेइ
 तावं तावं च णं महन्ते उदए महन्ते सेए पहीणे तीरं अपत्ते पउमवरपोण्डरीयं
 नो हव्वाए नो पाराए अन्तरा पुक्खरिणीए सेयंसि निसण्णे पढमे पुरिसजाए
 ॥ २ ॥ ६३७ ॥ अहावरे दोच्चे पुरिसजाए । अह पुरिसे दक्खिणाओ दिसाओ
 आगम्म तं पुक्खरिणिं तीसे पुक्खरिणीए तीरे ठिच्चा पासइ तं महं एणं पउमवर-
 पोण्डरीयं अणुपुव्वुट्ठियं पासादीयं जाव पडिरूवं । तं च एथ एणं पुरिसजायं पासइ
 पहीणतीरं अपत्तपउमवरपोण्डरीयं नो हव्वाए नो पाराए अन्तरा पुक्खरिणीए सेयंसि
 निसण्णं । तए णं से पुरिसे तं पुरिसं एवं वयासी-अहो णं इमे पुरिसे अखेयजे
 अकुसले अपण्डिए अवियत्ते अमेहावी बाले नो मग्गट्ठ नो मग्गविऊ नो मग्गस्स
 गइपरिकमञ्जू जं णं एस पुरिसे । अहमंसि खेयजे कुसले जाव पउमवरपोण्डरीयं
 उच्चिक्खिस्सामि । नो य खलु एयं पउमवरपोण्डरीयं एवं उच्चिक्खेयव्वं जहा णं एस
 पुरिसे मजे । अहमंसि पुरिसे खेयजे कुसले पण्डिए वियत्ते मेहावी अवाले मग्गट्ठे
 मग्गविऊ मग्गस्स गइपरिकमञ्जू, अहमेयं पउमवरपोण्डरीयं उच्चिक्खिस्सामि ति कट्ठु
 इइ बुया से पुरिसे अभिक्कमे तं पुक्खरिणिं । जावं जावं च णं अभिक्कमेइ तावं तावं
 च णं महन्ते उदए महन्ते सेए पहीणे तीरं अपत्ते पउमवरपोण्डरीयं नो हव्वाए
 नो पाराए अन्तरा पुक्खरिणीए सेयंसि निसण्णे दोच्चे पुरिसजाए ॥ ३ ॥ ६३८ ॥

अहावरे तच्चे पुरिसजाए । अह पुरिसे पच्चत्थिमाओ दिसाओ आगम्म तं पुक्खरिणि तीसे पुक्खरिणीए तीरे ठिच्चा पासइ तं एगं महं पउमवरपोण्डरीयं अणुपुव्वुट्ठियं जाव पडिह्वं । ते तत्थ दोण्णि पुरिसजाए पासइ पहीणे तीरं अपत्ते पउमवरपोण्डरीयं नो हव्वाए नो पाराए जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना अकुसला अपण्डिया अवियत्ता अमेहावी बाला नो मग्गट्ठा नो मग्गविळ नो मग्गस्स गइपरिक्कमन्नू जं णं एए पुरिसा एवं मन्ने-अम्हे एयं पउमवरपोण्डरीयं उच्चिक्खिस्सामो नो य खलु एयं पउमवरपोण्डरीयं एवं उच्चिक्खेयव्वं जहा णं एए पुरिसा मन्ने । अहमंसि पुरिसे खेयन्ने कुसले पण्डिए वियत्ते मेहावी अवाळे मग्गट्ठे मग्गविळ मग्गस्स गइपरिक्कमन्नू अहमेयं पउमवरपोण्डरीयं उच्चिक्खिस्सामि ति कट्ठु इति वुच्चा से पुरिसे अभिक्कमे तं पुक्खरिणि । जावं जावं च णं अभिक्कमे तावं तावं च णं महन्ते उदए महन्ते सेए जाव अन्तरा पुक्खरिणीए सेयंसि निसण्णे तच्चे पुरिसजाए ॥ ४ ॥ ६३९ ॥ अहावरे चउत्थे पुरिसजाए । अह पुरिसे उत्तराओ दिसाओ आगम्म तं पुक्खरिणि तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं अणुपुव्वुट्ठियं जाव पडिह्वं । ते तत्थ तिण्णि पुरिसजाए पासइ पहीणे तीरं अपत्ते जाव सेयंसि निसण्णे । तए णं से पुरिसे एवं वयासी-अहो णं इमे पुरिसा अखेयन्ना जाव नो मग्गस्स गइपरिक्कमन्नू जं णं एए पुरिसा एवं मन्ने-अम्हे एयं पउमवरपोण्डरीयं उच्चिक्खिस्सामो नो य खलु एयं पउमवरपोण्डरीयं एवं उच्चिक्खेयव्वं जहा णं एए पुरिसा मन्ने । अहमंसि पुरिसे खेयन्ने जाव मग्गस्स गइपरिक्कमन्नू, अहमेयं पउमवरपोण्डरीयं एवं उच्चिक्खिस्सामि ति कट्ठु इति वुच्चा से पुरिसे अभिक्कमे तं पुक्खरिणि । जावं जावं च णं अभिक्कमे तावं तावं च णं महन्ते उदए महन्ते सेए जाव निसण्णे चउत्थे पुरिसजाए ॥ ५ ॥ ६४० ॥ अह भिक्खू ल्हहे तीरट्ठी खेयन्ने जाव गइपरिक्कमन्नू अन्नयराओ दिसाओ वा अणुदिसाओ वा आगम्म तं पुक्खरिणि तीसे पुक्खरिणीए तीरे ठिच्चा पासइ तं महं एगं पउमवरपोण्डरीयं जाव पडिह्वं । ते तत्थ चत्तारि पुरिसजाए पासइ पहीणे तीरं अपत्ते जाव पउमवरपोण्डरीयं नो हव्वाए नो पाराए अन्तरा पुक्खरिणीए सेयंसि निसण्णे । तए णं से भिक्खू एवं वयासी-अहो णं इमे पुरिसा अखेयन्ना जाव नो मग्गस्स गइपरिक्कमन्नू जं एए पुरिसा एवं मन्ने अम्हे एयं पउमवरपोण्डरीयं उच्चिक्खिस्सामो, नो य खलु एयं पउमवरपोण्डरीयं एवं उच्चिक्खेयव्वं जहा णं एए पुरिसा मन्ने । अहमंसि भिक्खू ल्हहे तीरट्ठी खेयन्ने जाव गइपरिक्कमन्नू अहमेयं पउमवरपोण्डरीयं उच्चिक्खिस्सामि ति कट्ठु इति वुच्चा से भिक्खू

नो अभिक्कमे तं पुक्खरिणि तीसे पुक्खरिणीए तीरे ठिच्चा सद्दं कुज्जा-उप्पयाहि
 खलु भो पउमवरपोण्डरीया उप्पयाहि । अह उप्पइए से पउमवरपोण्डरीए ॥ ६ ॥
 ॥ ६४१ ॥ किट्टिए नाए समणाउसो, अट्ठे पुण से जाणियव्वे भवइ । भन्ते त्ति समणं
 भगवं महावीरं निग्गन्था य निग्गन्थीओ य वन्दन्ति नमंसन्ति वन्दित्ता नमंसित्ता
 एवं वयासी-किट्टिए नाए समणाउसो, अट्ठे पुण से न जाणामो समणाउसो त्ति ।
 समणे भगवं महावीरे ते य बहवे निग्गन्थे य निग्गन्थीओ य आमन्तेत्ता एवं
 वयासी-हन्त समणाउसो आइक्खामि विभावेमि कित्तेमि पवेएमि सअट्ठं सहेउं
 सनिमित्तं भुज्जो भुज्जो उवदंसेमि । से वेमि ॥ ७ ॥ ६४२ ॥ लोयं च खलु मए
 अप्पाहट्ठु समणाउसो पुक्खरिणी बुइया । कम्मं च खलु मए अप्पाहट्ठु समणाउसो
 से उदए बुइए । कामभोगे य खलु मए अप्पाहट्ठु समणाउसो से सेए बुइए । जण-
 जाणवयं च खलु मए अप्पाहट्ठु समणाउसो ते बहवे पउमवरपोण्डरीए बुइए ।
 रायाणं च खलु मए अप्पाहट्ठु समणाउसो से एगे महं पउमवरपोण्डरीए बुइए ।
 अन्नतित्थिया य खलु मए अप्पाहट्ठु समणाउसो ते चत्तारि पुरिसजाया बुइया ।
 धम्मं च खलु मए अप्पाहट्ठु समणाउसो से भिक्खु बुइए । धम्मतित्थं च खलु
 मए अप्पाहट्ठु समणाउसो से तीरे बुइए । धम्मकहं च खलु मए अप्पाहट्ठु सम-
 णाउसो से सहे बुइए । निव्वाणं च खलु मए अप्पाहट्ठु समणाउसो से उप्पाए
 बुइए । एवमेयं च मए अप्पाहट्ठु समणाउसो से एवमेयं बुइयं ॥ ८ ॥ ६४३ ॥
 इह खलु पाइणं वा पळीणं वा उळीणं वा दाहिणं वा सन्तेगइया मणुस्सा भवन्ति
 अणुपुब्बेणं लोणं उववच्चा । तंजहा-आरिया वेगे अणारिया वेगे उच्चागोत्ता वेगे
 णीयागोया वेगे कायमन्ता वेगे रहस्समन्ता वेगे सुवण्णा वेगे दुव्वण्णा वेगे सुरुवा
 वेगे दुरुवा वेगे । तेसिं च णं मणुयाणं एगे राया भवइ महया हिमवन्तमलयमन्दर-
 महिन्दसारो अचन्तविज्जुद्धारायकुलवसप्पसूए निरन्तररायलक्खणविराइयज्जमङ्गे बहु-
 जणबहुमाणपूइए सव्वगुणसमिद्धे खत्तिए मुदिए मुद्धाभिसित्ते माउपिउसुजाए दय-
 पिए सीमंकरे सीमंधरे खेमंकरे खेमंधरे मणुस्सिंदे जणवयपिया जणवयपुरोहिए
 सेउकरे केउकरे नरपवरे पुरिसपवरे पुरिससीहे पुरिसआसीबिसे पुरिसवरपोण्डरीए
 पुरिसवरगंधहत्थी अट्ठे दित्ते वित्ते वित्थिण्णविउलभवणसयणासणजाणवाहणाइण्णे
 बहुधणबहुजायरुवरयए आओगपओगसंपउत्ते विच्छट्ठियपउरभत्तपाणे बहुदासीदास-
 गोमहिसगवेलगप्पभूए पड्डिपुण्णजंतकोसकोट्ठागाराउहागारे बलवं दुब्बलपच्चामित्ते
 ओहयकण्ठयं निहयकण्ठयं मलियकण्ठयं उद्धियकण्ठयं अकण्ठयं ओहयसत्तू निहयसत्तू
 मलियसत्तू उद्धियसत्तू निजियसत्तू पराइयसत्तू घववायडुब्बिक्खमारिभयविप्पमुत्तं

(रायवण्णओ जहा ओववाइए) जाव पसंतडिम्बडमरं रजं पसाहेमाणे विहरइ । तस्स णं रजो परिसा भवइ उग्गा उग्गपुत्ता भोगा भोगपुत्ता इक्खागाइ इक्खागाइ-पुत्ता नाया नायपुत्ता कोरव्वा कोरव्वपुत्ता भट्ठा भट्टपुत्ता माहणा माहणपुत्ता लेच्छइ लेच्छइपुत्ता पसत्थारो पसत्थपुत्ता सेणावई सेणावइपुत्ता । तेसिं च णं एगइए सद्धी भवइ कामं तं समणा वा माहणा वा संपहारिंसु गमणाए । तत्थ अन्नयरेणं धम्मणेणं पन्नतारो वयं इमेणं धम्मणेणं पन्नवइस्सामो से एवमायाणह भयंतारो जहा मए एस धम्मं सुयक्खाए सुपन्नते भवइ । तं जहा-उद्धं पायतला अहे केसग्गमतथया तिरियं तयपरियंते जीवे एस आयापज्जवे कसिणे एस जीवे जीवइ, एस मए नो जीवइ, सरीरे धरमाणे धरइ विण्डम्मि य नो धरइ । एयं तं जीवियं भवइ, आदहणाए परेहिं निज्जइ, अणणिझामिए सरीरे कवोयवण्णाणि अट्ठीणि भवन्ति, आसंढीपन्नमा पुरिसा गामं पचागच्छन्ति, एवं असंते असंविजमाणे । जेसिं तं असंते असंविजमाणे तेसिं तं सुयक्खायं भवइ-अजो भवइ जीवो अजं सरीरं, तम्हा ते एवं नो विपडिवे-दंति-अयमाउसो आया बीहे ति वा हस्से ति वा परिमण्डले ति वा वट्ठे ति वा तंसे ति वा चउरंसे ति वा आयए ति वा छलंसिए ति वा अट्ठंसे ति वा किण्हे ति वा नीले ति वा लोहियहाल्लिहे ति वा सुक्किले ति वा सुब्भिगंधे ति वा दुब्भिगंधे ति वा तित्ते ति वा कडुए ति वा कसाए ति वा अम्बिले ति वा महुरे ति वा कक्खव्हे ति वा मउए ति वा गुरुए ति वा लहुए ति वा सीए ति वा उसिणे ति वा निद्धे ति वा लुक्खे ति वा । एवं असंते असंविजमाणे । जेसिं तं सुयक्खायं भवइ-अजो जीवो अजं सरीरं, तम्हा ते नो एवं उवलब्भन्ति । से जहानामए-केइ पुरिसे कोसीओ असिं अभिनिव्वट्ठिता णं उवदंसेज्जा अयमाउसो असी अयं कोसी, एवमेव नत्थि केइ पुरिसे अभिनिव्वट्ठिता णं उवदंसेत्तारो अयमाउसो आया इयं सरीरं । से जहानामए केइ पुरिसे मुञ्जाओ इसियं अभिनिव्वट्ठिता णं उवदंसेज्जा अयमाउसो मुञ्जे इयं इसियं, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे मंसाओ अट्ठिं अभिनिव्वट्ठिता णं उवदंसेज्जा अयमाउसो मंसे अयं अट्ठी, एवमेव नत्थि केइ पुरिसे उवदंसेत्तारो अयमाउसो आया इयं सरीरं । से जहानामए-केइ पुरिसे करयलाओ आमलकं अभिनिव्वट्ठिता णं उवदं-सेज्जा अयमाउसो करयले अयं आमलए, एवमेव नत्थि केइ पुरिसे उवदंसेत्तारो अय-माउसो आया इयं सरीरं । से जहानामए-केइ पुरिसे दहीओ नवणीयं अभिनिव्व-ट्ठिता णं उवदंसेज्जा अयमाउसो नवणीयं अयं तु दही, एवमेव नत्थि केइ पुरिसे जाव सरीरं । से जहानामए-केइ पुरिसे तिळेहिंतो तेल्लं अभिनिव्वट्ठिता णं उवदंसेज्जा

अयमाउसो तेहं अयं पिण्णाए, एवमेव जाव सरीरं । से जहानामए-कैइ पुरिसे इक्खुओ खोयरसं अभिनिव्वट्ठिता णं उवदंसेज्जा अयमाउसो खोयरसे अयं छोए, एवमेव जाव सरीरं । से जहानामए-कैइ पुरिसे अरणीओ अग्गि अभिनिव्वट्ठिता णं उवदंसेज्जा अयमाउसो अरणी अयं अग्गी, एवमेव जाव सरीरं । एवं असंते असंविज्जमाणे । जेसिं तं सुयक्खायं भवइ तं जहा-अन्नो जीवो अन्नं सरीरं । तम्हा ते मिच्छा ॥ से हंता तं हणह खणह छणह डहह पयह आलुम्पह विलुम्पह सह-सक्कारेह विपरामुसह, एयावया जीवे नत्थि परलोए । ते नो एवं विप्पडिंवेदंति, तं जहा-किरिया इ वा अकिरिया इ वा सुक्खे इ वा दुक्खे इ वा कल्लणे इ वा पावए इ वा साहु इ वा असाहु इ वा सिद्धी इ वा असिद्धी इ वा निरए इ वा अणिरए इ वा । एवं ते विरुवरुवेहिं कम्मसमारंभेहिं विरुवरुवाई कामभोगाईं समारभन्ति भोयणाए ॥ एवं एगे पागब्बिभया निक्खम्म मामगं धम्मं पन्नवेति । तं सद्वहमाणा तं पत्तियमाणा तं रोएमाणा साहु सुयक्खाए समणे त्ति वा माहणे त्ति वा कामं खलु आउसो तुमं पूययामि, तं जहा-असणेण वा पाणेण वा खाइमेण वा साइमेण वा वत्थेण वा पडिग्गहेण वा कम्बलेण वा पायपुच्छणेण वा । तत्थेगे पूयणाए समा-उट्ठिंखु तत्थेगे पूयणाए निकाईसु ॥ पुव्वमेव तेसिं नायं भवइ-समणा भविस्सामो अणगारा अकिंचना अपुत्ता अपसू परदत्तभोइणो भिक्खुणो पावं कम्मं नो करि-स्सामो समुट्ठाए । ते अप्पणा अप्पडिविरया भवंति, सयमाइयंति अणे वि आइयावेति अन्नं पि आययंतं समणुजार्णति एवमेव ते इत्थिकामभोगेहिं मुच्छिया गिद्धा गद्धिया अज्झोववन्ना लुद्धा रागदोसवसट्ठा । ते नो अप्पणं समुच्छेदंति ते नो परं समुच्छे-दंति ते नो अन्नाई पाणाई भूयाई जीवाई सत्ताई समुच्छेदंति, पहीणा पुव्वसंजोगं आयरियं मग्गं असंपत्ता इति ते नो हव्वाए नो पाराए अंतरा कामभोगेसु विसण्णा । इति पढमे पुरिसजाए तज्जीवतच्छरीरए त्ति आहिए ॥ ९ ॥ ६४४ ॥

अहावरे दोचे पुरिसजाए पच्चमहब्भूइए त्ति आहिज्जइ । इह खलु पाईणं वा ६ सन्तेगइया मणुस्सा भवन्ति अणुपुव्वेण लोयं उववन्ना, तं जहा-आरिया वेगे अणारिया वेगे एवं जाव दुक्खा वेगे । तेसिं च णं मंहं एगे राया भवइ महया एवं चेव निरव्वेसं जाव सेणावइपुत्ता । तेसिं च णं एगइए सङ्की भवति कामं तं समणा य माहणा य पहारिसु गमणाए । तत्थ अन्नयरेणं धम्मेणं पन्नतारो वयं इमेणं धम्मेणं पन्नवइस्सामो से एवमायाणह भयन्तारो जहा मए एस धम्मे सुअक्खाए उपपत्ते भवइ । इह खलु पच्चमहब्भूया जेहिं नो विज्जइ किरिय त्ति वा अकिरिय त्ति वा सुक्खे त्ति वा दुक्खे त्ति वा कल्लणे त्ति वा पावए त्ति वा साहु त्ति वा असाहु त्ति

वा सिद्धि ति वाअसिद्धि ति वा निरए ति वा अनिरए ति वा अवि अन्तसो
तणमायमवि ॥ तं च पिहुइसेणं पुढोभूयसमवायं जाणेज्जा । तं जहा पुढवी एगे
महब्भूए, आऊ दुच्चे महब्भूए, तेऊ तच्चे महब्भूए, वाऊ चउत्थे महब्भूए, आगासे
पञ्चमे महब्भूए । इच्चेए पञ्च महब्भूया अनिम्मिया अनिम्माविया अकडा नो
कित्तिमा नो कडगा अणाइया अणिहणा अवञ्जा अपुरोहिया सतंता सासया
आयछट्ठा । पुण एगे एवमाहु-सओ नत्थि विणासो असओ नत्थि संभवो । एयावया
व जीवकाए एयावया व अत्थिकाए एयावया व सव्वलोए, एयं मुहं लोणस्स करण-
याए, अवि अन्तसो तणमायमवि । से किणं किणावेमाणे हणं घायमाणे पयं पया-
वेमाणे अवि अन्तसो पुरिसमवि कीणिता घायइत्ता एत्थं पि जाणाहि नत्थित्थ दोसो ।
ते नो एवं विप्पडिवेदेति । तं जहा-किरिया इ वा जाव अनिरए इ वा । एवं ते
विरुवरुवेहिं कम्मसमारंभेहिं विरुवरुवाई कामभोगाई समारमंति भोयणाए । एव-
मेव ते अणारिया विप्पडिवच्चा तं सदहमाणा तं पत्तियमाणा जाव ते नो हव्वाए
नो पाराए अंतरा कामभोगेसु विसण्णा । दोच्चे पुरिसजाए पञ्चमहब्भूइए ति
आहिण ॥ १० ॥ ६४५ ॥ अहावरे तच्चे पुरिसजाए ईसरकरणिए ति आहिजइ ।
इह खलु पाईणं वा ६ संतेगइया मणुस्सा भवंति अणुपुव्वेणं लोयं उववच्चा । तं
जहा-आरिया वेगे जाव तेसिं च णं महंते एगे राया भवइ जाव सेणावइपुत्ता ।
तेसिं च णं एगइए सङ्की भवइ, कामं तं समणा य माहणा य पहारिंसु गमणाए
जाव जहा मए एस धम्मे सुयक्खाए सुपज्जे भवइ । इह खलु धम्मा पुरिसादिया
पुरिसोत्तरिया पुरिसप्पणीया पुरिससंभूया पुरिसपज्जोइया पुरिसमभिसमन्नागया
पुरिसमेव अभिभूय चिट्ठंति । से जहानामए-गण्डे सिया सरीरे जाए सरीरे संवुद्धे
सरीरे अभिसमन्नागए सरीरमेव अभिभूय चिट्ठइ, एवमेव धम्मा पुरिसादिया जाव
पुरिसमेव अभिभूय चिट्ठंति । से जहानामए-अरई सिया सरीरे जाया सरीरे
संवुद्धा सरीरे अभिसमन्नागया सरीरमेव अभिभूय चिट्ठइ, एवमेव धम्मा वि पुरि-
सादिया जाव पुरिसमेव अभिभूय चिट्ठंति से जहानामए-वम्मिए सिया पुढविजाए
पुढविसंवुद्धे पुढविअभिसमन्नागए पुढविमेव अभिभूय चिट्ठइ, एवमेव धम्मा वि
पुरिसादिया जाव पुरिसमेव अभिभूय चिट्ठंति, से जहानामए-क्खे सिया पुढविजाए
पुढविसंवुद्धे पुढविअभिसमन्नागए पुढविमेव अभिभूय चिट्ठइ, एवमेव धम्मा वि
पुरिसादिया जाव पुरिसमेव अभिभूय चिट्ठंति । से जहानामए-पुक्खरिणी सिया
मुढविजाया जाव पुढविमेव अभिभूय चिट्ठइ, एवमेव धम्मा वि पुरिसादिया जाव
पुरिसमेव अभिभूय चिट्ठंति । से जहानामए-उदगपुक्खले सिया उदगजाए जाव

उदगमेव अभिभूय चिद्वह, एवमेव धम्मा वि पुरिसादिया जाव पुरिसमेव अभिभूय चिद्वहति । से जहानामए-उदगबुब्बुए सिया उदगजाए जाव उदगमेव अभिभूय चिद्वह, एवमेव धम्मा वि पुरिसादिया जाव पुरिसमेव अभिभूय चिद्वहति । जं पि य इमं समणाणं निगंथाणं उद्विद्धं पणीयं वियज्जियं दुवालसङ्गं गणिपिडगं, तं जहा-आयारो सूयगङ्गो जाव दिट्ठिवाओ, सव्वमेवं मिच्छा, न एयं तहियं न एयं आहातहियं, इमं सच्चं इमं तहियं इमं आहातहियं । ते एवं सच्चं कुव्वंति, ते एवं सच्चं संठवेंति, ते एवं सच्चं सोवट्ठवेंति । तमेवं ते तज्जाइयं दुक्खं नाइउट्ठंति सउणी पज्जरं जहा । ते नो एवं विप्पडिवेदेंति तं जहा-किरिया इ वा जाव अणिरए इ वा, एवामेव ते विरुवरुवेहिं कम्मसमारम्भेहिं विरुवरुवाइं कामभोगाईं समारम्भंति भोयणाए । एवामेव ते अणारिया विप्पडिवज्जा एवं सद्वहमाणा जाव इति ते नो हव्वाए नो पाराए, अंतरा कामभोगेसु विसण्णे त्ति, तच्चे पुरिसजाए ईसरकारणि त्ति आहिए ॥ ११ ॥ ६४६ ॥ अहावरे चउरथे पुरिसजाए नियइवाइए ति आहिज्जइ । इह खलु पाईणं वा ६ तहेव जाव सेणावइपुत्ता वा । तेसिं च णं एगइए सच्चौ भवइ, कामं तं समणा य माहणा य संपहारिंसु गमणाए जाव मए एस धम्मे सुअक्खाए सुपज्जेते भवइ । इह खलु दुवे पुरिसा भवति-एगे पुरिसे किरियमाइक्खइ एगे पुरिसे नोकिरिय माइक्खइ । जे य पुरिसे किरियमाइक्खइ जे य पुरिसे नोकिरियमाइक्खइ दो वि ते पुरिसा तुल्ला एगट्ठा कारणमावच्चा । बाळे पुण एवं विप्पडिवेदेंति कारण-मावच्चे-अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा अहमेयमकासि, परो वा जं दुक्खइ वा सोयइ वा जूरइ वा तिप्पइ वा पीडइ वा परितप्पइ वा परो एवमकासि । एवं से बाळे सकारणं वा परकारणं वा एवं विप्पडिवेदेंति कारणमावच्चे । मेहावी पुण एवं विप्पडिवेदेंति कारण-मावच्चे-अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा, नो अहं एवमकासि । परो वा जं दुक्खइ वा जाव परितप्पइ वा नो परो एवमकासि, एवं से मेहावी सकारणं वा परकारणं वा एवं विप्पडिवेदेंति कारणमावच्चे । से बेमि पाईणं वा ६ जे तसथावरा पाया ते एवं संचायमागच्छंति ते एवं विप्परियासमावज्जंति ते एवं विवेगमागच्छंति ते एवं विहाणमागच्छंति ते एवं संगइयन्ति उवेहाए । नो एवं विप्पडिवेदेंति, तं जहा-किरिया इ वा जाव निरए इ वा अनिरए इ वा । एवं ते विरुवरुवेहिं कम्मसमारम्भेहिं विरुवरुवाइं कामभोगाईं समारम्भंति भोयणाए । एवमेव ते अणारिया विप्पडिवज्जा तं सद्वह-माणा जाव इति ते नो हव्वाए नो पाराए अंतरा कामभोगेसु विसण्णा । चउरथे

पुरिसजाए नियइवाइए त्ति आहिए ॥ इच्चेए चत्तारि पुरिसजाया नाणापन्ना नाना-
छंदा नाणासीला नाणादिट्ठी नाणारुई नाणारम्भा नाणाअज्जवसाणसंजुत्ता पहीण-
पुव्वसंजोगा आरियं मगं असंपत्ता इति ते नो हव्वाए नो पाराए अंतरा काम-
भोगेसु विसण्णा ॥ १२ ॥ ६४७ ॥ से वेमि पाईणं वा ६ सन्तेगइथा मणुस्सा
भवन्ति । तं जहा-आरिया वेगे अणारिया वेगे उच्चागोया वेगे नीयागोया वेगे
कायमन्ता वेगे हस्समन्ता वेगे सुवण्णा वेगे दुवण्णा वेगे सुरूवा वेगे दुरूवा वेगे ।
तेसिं च णं खेत्तवत्थूणि परिग्गहियाणि भवन्ति, तं जहा अप्पयरो वा भुज्जयरो वा ।
तेसिं च णं जणजाणवयाई परिग्गहियाई भवन्ति, तं जहा अप्पयरा भुज्जयरा वा ।
तहप्पगारेहिं कुळेहिं आगम्म अभिभूय एगे भिक्खायरियाए समुट्ठिया । सओ वा वि
एगे नायओ (अणायओ) य उवगरणं च विप्पजहाय भिक्खायरियाए समुट्ठिया ।
असओ वा वि एगे नायओ (अणायओ) य उवगरणं च विप्पजहाय भिक्खाय-
रियाए समुट्ठिया । [जे ते सओ वा असओ वा नायओ य अणायओ य उवगरणं
च विप्पजहाय भिक्खायरियाए समुट्ठिया] पुव्वमेवं तेहिं नायं भवइ । तं जहा-
इह खलु पुरिसे अन्नमन्नं ममट्ठाए एवं विप्पडिवेदंति । तं जहा-खेत्तं मे वत्थू मे
हिरणं मे सुवणं मे धणं मे धन्नं मे कंसं मे दूंसं मे विपुलधणकणगरयणमणिमो-
त्तियसंखसिलप्पवालरत्तरयणसंतसारसावएयं मे । सदा मे रूवा मे गंधा मे रसा मे
फासा मे । एए खलु मे कामभोगा अहमवि एएसिं । से मेहावी पुव्वामेव अप्पणो
एवं समभिजाणेजा । तं जहा-इह खलु मम अन्नयरे दुक्खे रोगायंके समुप्पजेज्जा
अणिट्ठे अकंते अप्पिए असुभे अमणुचे अमणामे दुक्खे नो सुहे । से हंता भयंतारो
कामभोगाई मम अन्नयरं दुक्खं रोगायंके परियाइयह अणिट्ठं अकंतं अप्पियं असुभं
अमणुखं अमणामं दुक्खं नो सुहं । ता अहं दुक्खामि वा सोयामि वा जूरामि वा
तिप्पामि वा पीडामि वा परितप्पामि वा इमाओ मे अन्नयराओ दुक्खाओ रोगायंकाओ
पडिमोयह अणिट्ठाओ अकंताओ अप्पियाओ असुभाओ अमणुजाओ अमणामाओ
दुक्खाओ नो सुहाओ । एवमेव नो लद्धपुव्वं भवइ । इह खलु कामभोगा नो ताणाए
वा नो सरणाए वा । पुरिसे वा एगया पुव्वि कामभोगे विप्पजहइ, कामभोगा वा
एगया पुव्वि पुरिसं विप्पजहन्ति । अन्ने खलु कामभोगा अन्नो अहमंसि । से किमंग
पुण वयं अन्नमवेहिं कामभोगेहिं मुच्छामो । इति संखाए णं वयं च कामभोगेहिं
विप्पजहिस्सामो । से मेहावी जाणेज्जा बहिरङ्गमेयं इणमेव उवणीययराणं । तं जहा-
माया मे पिया मे भाया मे भगिणी मे भंजा मे पुत्ता मे धूया मे प्रेसा मे नत्ता मे
सुंहा मे सुहा मे पिया मे सहा मे सयणसंगंयसंधुसा मे । एए खलु मम नीयओ

अहमवि एएसिं । एवं से मेहावी पुब्बामेव अप्पणा एवं समभिजाणेजा । इह खलु मम अन्नयरे दुक्खे रोगायकं समुप्पजेजा अणिट्ठे जाव दुक्खे नो सुहे । से हंता भयंतारो नायओ इमं मम अन्नयरं दुक्खं रोगायकं परियाइयह् अणिट्ठं जाव नो सुहं । ता अहं दुक्खामि वा सोयामि वा जाव परितप्पामि वा, इमाओ मे अन्नयराओ दुक्खाओ रोगायकाओ परिमोएह् अणिट्ठाओ जाव नो सुहाओ, एवमेव नो लद्धपुव्वं भवइ । तेसिं वा वि भयंताराणं मम नाययाणं अन्नयरे दुक्खे रोगायकं समुप्पजेजा अणिट्ठे जाव नो सुहे, से हंता अहमेएसिं भयंताराणं नाययाणं इमं अन्नयरं दुक्खं रोगायकं परियाइयामि अणिट्ठं जाव नो सुहे, मा मे दुक्खंतु वा जाव मा मे परितप्पंतु वा, इमाओ णं अन्नयराओ दुक्खाओ रोगायकाओ परिमो-
 एसि अणिट्ठाओ जाव नो सुहाओ, एवमेव नो लद्धपुव्वं भवइ । अन्नस्स दुक्खं अन्नो न परियाइयइ अन्नेण कडं अन्नो नो पडिसंवेदेइ पत्तेयं जायइ पत्तेयं मरइ पत्तेयं चयइ पत्तेयं उववज्जइ पत्तेयं झंझा पत्तेयं सच्चा पत्तेयं मच्चा एवं विन्नू वेयणा । इह खलु नाइसंजोगा नो ताणाए वा नो सरणाए वा । पुरिसे वा एगया पुव्वि नाइसंजोगे विप्पजहइ, नाइसंजोगा वा एगया पुव्वि पुरिसं विप्पजहन्ति, अन्ने खलु नाइसंजोगा अन्नो अहमंसि, से किमंग पुण वयं अन्नमन्नेहिं नाइसंजोगेहिं मुच्छामो, इति संखाए णं वयं नाइसंजोगं विप्पजहिस्सामो । से मेहावी जाणेजा बहिरङ्गमेयं, इणमेव उववणीययराणं । तं जहा-हत्था मे पाया मे बाहा मे उरु मे उयरं मे सीसं मे सीलं मे आरु मे बलं मे वण्णो मे तया मे छाया मे सोयं मे चक्खु मे घाणं मे जिब्भा मे फासा मे ममाइज्जइ, वयाउ पडिज्जरइ । तं जहा-आउओ बलाओ वण्णाओ तयाओ छायाओ सोयाओ जाव फासाओ । सुसंधिओ संधी विसंधीभवइ, वल्लियतरंगे गाए भवइ, किण्हा केसा पलिया भवन्ति । तं जहा-जं पि य इमं सरीरं उरालं आहारोवइयं एयं पि य अणुपुव्वेणं विप्पजहियव्वं भविस्सइ । एयं संखाए से भिक्खु भिक्खायरियाए समुट्ठिए दुहओ लोणं जाणेजा, तं जहा-जीवा चेव अजीवा चेव, तसा चेव थावरा चेव ॥ १३ ॥ ६४८ ॥ इह खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, जे इमे तसा थावरा पाणा ते सयं समारभन्ति अन्नेण वि समारम्भावेति अन्नं पि समारभंतं समणुजाणन्ति । इह खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, जे इमे कामभोगा सचित्ता वा अचित्ता वा ते सयं परिणिण्हुन्ति अन्नेण वि परिणिण्हावेन्ति अन्नं पि परिणिण्हुतं समणु-
 जाणन्ति । इह खलु गारत्था सारम्भा सपरिग्गहा, संतेगइया समणा माहणा वि

सारम्भा सपरिग्गहा, अहं खलु अणारम्भे अपरिग्गहे, जे खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, एएसि चेव निस्साए बम्भचेरवासं वसिस्सामो । कस्स णं तं हेउं ? जहा पुवं तहा अवरं जहा अवरं तहा पुवं, अञ्जु एए अणुवरया अणुवट्ठिया पुणरवि तारिसगा चेव । जे खलु गारत्था सारम्भा सपरिग्गहा, संतेगइया समणा माहणा वि सारम्भा सपरिग्गहा, दुहुओ पावाई कुव्वंति इति संखाए दोहि वि अंतेहिं अदिस्समाणो इति भिक्खू रीएज्जा । से बेमि पाईणं वा ६ जाव एवं से परिचायकम्मे, एवं से ववेयकम्मे, एवं से विअंतकारए भवइ ति-मक्खायं ॥ १४ ॥ ६४९ ॥

तत्थ खलु भगवया छजीवनिकायहेऊ पन्नत्ता । तं जहा-पुढवीकाए जाव तसकाए । से जहानामए-मम असायं दण्डेण वा मुट्ठीण वा लेल्लण वा कवाल्लेण वा आउट्टिजमाणस्स वा हम्ममाणस्स वा तज्जिजमाणस्स वा ताडिजमाणस्स वा परियाविज्जमाणस्स वा किलामिज्जमाणस्स वा उट्ठविज्जमाणस्स वा जाव लोमुक्खणणमायमवि हिंसाकारणं दुक्खं भयं पडिसंवेदेमि, इच्चं जाण सव्वे जीवा सव्वे भूया सव्वे पाणा सव्वे सत्ता दण्डेण वा जाव कवाल्लेण वा आउट्टिजमाणा वा हम्ममाणा वा तज्जिजमाणा वा ताडिजमाणा वा परियाविज्जमाणा वा किलामिज्जमाणा वा उट्ठविज्जमाणा वा जाव लोमुक्खणणमायमवि हिंसाकारणं दुक्खं भयं पडिसंवेदेति । एवं नच्चा सव्वे पाणा जाव सत्ता न हंतव्वा न अज्जावेयव्वा न परिधेयव्वा न परितावेयव्वा न उट्ठवेयव्वा । से बेमि जे य अईया जे य पडुप्पन्ना जे य आगमिस्सा अरिहंता भगवंता सव्वे ते एवमाइक्खंति एवं भासंति एवं पन्नवेंति एवं परुवेंति सव्वे पाणा जाव सत्ता न हंतव्वा न परिधेयव्वा न अज्जावेयव्वा न परितावेयव्वा न उट्ठवेयव्वा । एस धम्मे धुवे नीइए सासए समिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव विरए परिग्गहाओ नो दंतपक्खाल्लेणं दंते पक्खाल्लेज्जा नो अज्जणं नो वमणं नो धूवणे नो तं परिआवि-एज्जा ॥ से भिक्खू अकिरिए अल्लसए अकोहे अमाणे अमाए अलोहे उवसंते परिनिव्वुडे नो आसंसं पुरओ करेज्जा इमेण मे दिट्ठेण वा झएण वा मएण वा विजाएण वा इमेण वा सुचरियतवनियमबम्भचेरवासेण इमेण वा जायामायावुत्तिएणं धम्मेणं इओ चुए पेच्चा देवे सिया कामभोगाण वसवत्ती सिद्धे वा अदुक्खमसुभे एत्थ वि सिया एत्थ वि नो सिया । से भिक्खू सदेहिं अमुच्छिए रुवेहिं अमुच्छिए गंधेहिं अमुच्छिए रसेहिं अमुच्छिए फासेहिं अमुच्छिए विरए कोहाओ माणाओ मायाओ लोभाओ पैजाओ दोसाओ कलहाओ अब्भक्खाणाओ पेडुन्नाओ परपरिवायाओ

अरइरईओ मायाभोसाओ मिच्छादंसणसत्ताओ इति से महओ आयाणाओ उवसंते उवट्टिए पडिविरए से भिक्खू । जे इमे तसथावरा पाणा भवंति ते नो सयं समारम्भइ नो वनेहिं समारम्भावेइ अन्ने समारम्भंते वि न समणुजाणइ इति से महओ आयाणाओ उवसंते उवट्टिए पडिविरए से भिक्खू जे इमे कामभोगा सच्चित्ता वा अचित्ता वा ते णो सयं परिगिण्हंति णो अण्णेणं परिगिण्हवेंति अन्नं परिगिण्हंतंति न समणुजाणंति इति से महओ आयाणाओ उवसंते उवट्टिए पडिविरओ से भिक्खू । जं पि य इमं संपराइयं कम्मं किज्जइ, नो तं सयं करेइ नो अज्जाणं कारवेइ अन्नं पि करेंतं न समणुजाणइ, इति से महओ आयाणाओ उवसंते उवट्टिए पडिविरए । से भिक्खू जाणेज्जा असणं वा ४ अस्सि पडियाए एगं साहम्मियं समुद्दिस्स पाणाइं भूयाइं जीवाइं सत्ताइं समारम्भ समुद्दिस्स कीयं पामिच्चं अच्छिज्जं अनिसट्ठं अभिहडं आहट्ठुद्देसियं तं चेइयं सिया तं नो सयं भुज्जइ नो अज्जेणं भुज्जावेइ अन्नं पि भुज्जंतं न समणुजाणइ, इति से महओ आयाणाओ उवसंते उवट्टिए पडिविरए से भिक्खू अह पुण एवं जाणेज्जा तं विज्जइ तेसिं परकमे । (जस्सट्ठा ते वेइयं सिया तंजहा अप्पणो पुत्ताइणट्ठाए जाव आएसाए पुढो पहेणाए सामासाए पायरासाए संनिहिंसं निचओ किज्जइ इह एएसिं माणवाणं भोयणाए) तत्थ भिक्खू परकडं परनिद्वियसुग्गमुप्पायणेसणासुद्धं सत्थाइयं सत्थपरिणामियं अविहिंसियं एसियं वेसियं सामुदाणियं पत्तमसणं कारणट्ठा पमाणजुत्तं अक्खोवज्जणवणलेवणभूयं संजमजायामायावतियं बिलमिव पन्नगभूएणं अप्पाणेणं आहारं आहारेज्जा अन्ने अन्नकाले पाणं पाणकाले वत्थं वत्थकाले लेणं लेणकाले सयणं सयणकाले । से भिक्खू मायजे अन्नयरं दिसं अणुदिसं वा पडिवज्जे धम्मं आइक्खे विभए किट्टे उवट्टिएसु वा अणुवट्टिएसु वा सुत्सुसमाणेसु पवेयए, संतिविरइं उवसमं निव्वाणं सोयवियं अज्जवियं मदवियं लाघवियं अणइवाइयं सव्वेसिं पाणाणं सव्वेसिं भूयाणं जाव सत्ताणं अणुवाइं किट्टए धम्मं । से भिक्खू धम्मं किट्टमाणे नो अन्नस्स हेउं धम्ममाइक्खेज्जा, नो पाणस्स हेउं धम्ममाइक्खेज्जा, नो वत्थस्स हेउं धम्ममाइक्खेज्जा, नो लेणस्स हेउं धम्ममाइक्खेज्जा, नो सयणस्स हेउं धम्ममाइक्खेज्जा, नो अन्नेसिं विरूवरूवाणं कामभोगाणं हेउं धम्ममाइक्खेज्जा, अगिलाए धम्ममाइक्खेज्जा, नन्नत्थ कम्मनिज्जरट्ठाए धम्ममाइक्खेज्जा । इह खलु तस्स भिक्खुस्स अंतिए धम्मं सोच्चा निसम्म उट्ठाणेणं उट्ठाया वीरा अस्सि धम्मो समुट्ठिया । जे तस्स भिक्खुस्स अंतिए धम्मं सोच्चा निसम्म सम्मं उट्ठाणेणं उट्ठाया वीरा अस्सि धम्मो समुट्ठिया ते एवं सव्वोक्कया ते एवं सव्वोवरया ते एवं सव्वोवसंता ते एवं सव्वत्ताए परिणिव्वुडे ति नैमि । एवं

से भिक्खु धम्मट्ठी धम्मविऊ नियागपडिवजे से जहेयं बुद्धं अदुवा पत्ते पउमवर-
पोण्डरीयं अदुवा अपत्ते पउमवरपोण्डरीयं, एवं से भिक्खु परिज्जायकम्मे परिज्जाय
संगे परिज्जायगेहवासे उवसंते समिए सहिए सयाजए । सेयं वयणिज्जे तं जहा—
समणे त्ति वा माहणे त्ति वा खंते त्ति वा दंते त्ति वा गुत्ते त्ति वा मुत्ते त्ति वा
इस्ति त्ति वा मुणि त्ति वा कइ त्ति वा विउ त्ति वा भिक्खु त्ति वा छहे त्ति वा तीरट्ठि
त्ति वा चरणकरणपारविउ त्ति वेमि ॥ १५ ॥ ६५० ॥ पोण्डरियज्झयणं
पढमं समत्तं ॥

किरियाठाणज्झयणे विद्ध्ये

सुयं मे आउसं । तेणं भगवया एवमक्खायं । इह खलु किरियाठाणे नामज्झयणे
पज्जते, तस्स णं अयमट्ठे । इह खलु संजुहेणं दुवे ठाणे एवमाहिज्जंति । तं जहा ।
धम्मे चेव अधम्मे चेव उवसंते चेव अणुवसंते चेव । तत्थ णं जे से पढमस्स
ठाणस्स अहम्मपक्खस्स विभज्जे तस्स णं अयमट्ठे पज्जते । इह खलु पाईणं वा ६
संतेगइया मणुस्सा भवन्ति । तं जहा—आरिया वेगे अणारिया वेगे उच्चागोया वेगे
नीयागोया वेगे कायमंता वेगे हस्समंता वेगे सुवण्णा वेगे दुव्वण्णा वेगे सुरुवा
वेगे दुरुवा वेगे । तेसिं च णं इमं एयारुवं दण्डसमादानं संपेद्दाए । तं जहा—नेरइ-
एसु वा तिरिक्खजोणिएसु वा मणुस्सेसु वा देवेषु वा जे यावन्ने तहप्पगारा पाणा
विबू वेयणं वेयंति ॥ तेसिं पि य णं इमाइं तेस्स किरियाठाणाइं भवन्तीतिमक्खायं ।
तं जहा—अट्ठादण्डे १, अणट्ठादण्डे २, हिंसादण्डे ३, अकम्हादण्डे ४, दिट्ठिविपरि-
यासियादण्डे ५, मोसवत्तिए ६, अदिज्जादाणवत्तिए ७, अज्झत्थवत्तिए ८, माणवत्तिए
९, मित्तदोसवत्तिए १०, मायावत्तिए ११, लोभवत्तिए १२, इरियावत्तिए १३
॥ १॥ ६५१ ॥ पढमे दण्डसमादाने अट्ठादण्डवत्तिए त्ति आहिज्जइ । से जहानामए—केइ
पुरिसे आयहेउं वा नाइहेउं वा अगारहेउं वा परिवारहेउं वा मित्तहेउं वा नागहेउं
वा भूयहेउं वा जक्खहेउं वा तं दण्डं तसथावरेहिं पाणेहिं सयमेव निसिरइ अन्नेण
वि निसिरावेइ अन्नं पि निसिरंतं समणुयाणइ, एवं खलु तस्स तप्पत्तियं सावज्जं त्ति
आहिज्जइ । पढमे दण्डसमादाने अट्ठादण्डवत्तिए त्ति आहिए ॥ २ ॥ ६५२ ॥
अहावरे दोच्चे दण्डसमादाने अणट्ठादण्डवत्तिए त्ति आहिज्जइ । से जहानामए—
केइ पुरिसे जे इमे तसा पाणा भवन्ति ते नो अच्चाए नो अजिणाए नो मंसाए नो
सोणियाए एवं हिययाए पित्ताए वसाए पिच्छाए पुच्छाए बालाए सिंगाए विसाणाए
१० सुत्ता०

दंताए दाढाए नहाए ण्हारुणिए अट्टीए अट्टिमञ्जाए नो हिंसिषु मे त्ति नो हिंसंति मे त्ति नो हिंसिस्संति मे त्ति नो पुत्तपोसणाए नो पसुपोसणाए नो अगारपरिवृहणयाए नो समणमाहणवत्तणाहेउं नो तस्स सरीरगस्स किंचि विपरियाइत्ता भवंति । से हंता छेत्ता भेत्ता लुम्पइत्ता विलुम्पइत्ता उद्वइत्ता उज्झिउं बाले वेरस्स आभागी भवइ अणट्ठादण्डे । से जहानामए केइ पुरिसे जे इमे थावरा पाणा भवंति । तं जहा-इकडा इ वा कळिणा इ वा जंतुगा इ वा परगा इ वा मोक्खा इ वा तणा इ वा कुसा इ वा कुच्छगा इ वा पव्वगा इ वा पलाळा इ वा, ते नो पुत्तपोसणाए नो पसुपोसणाए नो अगारपरिवृहणयाए नो समणमाहणपोसणयाए नो तस्स सरीरगस्स किंचि विपरियाइत्ता भवंति । से हंता छेत्ता भेत्ता लुम्पइत्ता विलुम्पइत्ता उद्वइत्ता उज्झिउं बाले वेरस्स आभागी भवइ अणट्ठादण्डे ॥ से जहानामए केइ पुरिसे कच्छंसि वा दहंसि वा उदगंसि वा दवियंसि वा वलयंसि वा नूमंसि वा गहणंसि वा गहणविदुग्गंसि वा वर्णंसि वा वणविदुग्गंसि वा पव्वयंसि वा पव्वयविदुग्गंसि वा तणाइं ऊसविय ऊसविय सयमेव अगणिकायं निसिरइ अन्नेण वि अगणिकायं निसिरावेइ अन्नं पि अगणिकायं निसिरंतं समणुजाणइ अणट्ठादण्डे । एवं खलु तस्स तप्पत्तियं सावज्जं ति आहिजइ । दोच्चे दण्डसमादाणे अणट्ठादण्डवत्तिए ति आहिए ॥ ३ ॥ ६५३ ॥ अहावरे तच्चे दण्डसमादाणे हिंसादण्डवत्तिए ति आहिजइ । से जहानामए-केइ पुरिसे ममं वा ममिं वा अन्नं वा अणिं वा हिंसिषु वा हिंसइ वा हिंसिस्सइ वा तं दण्डं तसथावरेहिं पाणेहिं सयमेव निसिरइ अन्नेण वि निसिरावेइ अन्नं पि निसिरंतं समणुजाणइ हिंसादण्डे, एवं खलु तस्स तप्पत्तियं सावज्जं ति आहिजइ । तच्चे दण्डसमादाणे हिंसादण्डवत्तिए ति आहिए ॥ ४ ॥ ६५४ ॥ अहावरे चउत्थे दण्डसमादाणे अकम्हादण्डवत्तिए ति आहिजइ । से जहानामए-केइ पुरिसे कच्छंसि वा जाव वणविदुग्गंसि वा मियवत्तिए मियसंकप्पे मियपणिहाणे मियवहाए गंता एए मिय त्ति काउं अन्नयरस्स मियस्स वहाए उउं आयामेत्ता णं निसिरेज्जा, स मियं वहिस्सामि त्ति कट्ठु तित्तिरं वा वट्ठगं वा चडगं वा लावगं वा कवोयगं वा कविं वा कविंजलं वा विधित्ता भवइ, इह खलु से अन्नस्स अट्ठाए अन्नं फुसइ अकम्हादण्डे । से जहानामए केइ पुरिसे सालीणि वा वीहीणि वा कोहवाणि वा कंगूणि वा परगाणि वा रालाणि वा निलिज्जमाणे अन्नयरस्स तणस्स वहाए सत्थं निसिरेज्जा, से सामगं तणगं कुमुदुगं वीहीऊसियं कलेयुयं तणं छिन्दिस्सामि त्ति कट्ठु सालिं वा वीहिं वा कोहवं वा कंगुं वा परगं वा रालयं वा छिन्दित्ता भवइ । इति खलु से अन्नस्स अट्ठाए अन्नं फुसइ अकम्हादण्डे । एवं खलु तस्स तप्पत्तियं

सावजं आहिज्जइ । चउत्थे दण्डसमादाणे अकम्हादण्डवत्तिए आहिए ॥५॥६५५॥
 अहावरे पच्चमे दण्डसमादाणे दिट्ठिविपरियासियादण्डवत्तिए ति आहिज्जइ । से
 जहानामए-केइ पुरिसे माईहिं वा पिईहिं वा भाईहिं वा भणिणीहिं वा भज्जाहिं वा
 पुतेहिं वा धूयाहिं वा सुण्हाहिं वा सद्धिं संवसमाणे मित्तं अमित्तमेव मज्जमाणे मित्ते
 ह्यपुब्बे भवइ दिट्ठिविपरियासियादण्डे । से जहानामए-केइ पुरिसे गामघायंसि वा
 नगरघायंसि वा खेडघायंसि कब्बडघायंसि मडंबघायंसि वा दोणमुहघायंसि वा
 पट्टणघायंसि वा आसमघायंसि वा संनिवेसघायंसि वा निग्गमघायंसि वा रायहाणि-
 घायंसि वा अतेणं तेणमिति मज्जमाणे अतेणे ह्यपुब्बे भवइ दिट्ठिविपरियासियादण्डे ।
 एवं खलु तस्स तप्पत्तियं सावज्जं ति आहिज्जइ । पच्चमे दण्डसमादाणे दिट्ठिविपरि-
 यासियादण्डवत्तिए ति आहिए ॥ ६ ॥ ६५६ ॥ अहावरे छट्ठे किरियट्ठाणे मोसावत्तिए
 ति आहिज्जइ । से जहानामए-केइ पुरिसे आयहेउं वा नाइहेउं वा अगारहेउं वा
 परिवारहेउं वा सयमेव मुसं वयइ अण्णेण वि मुसं वाएइ मुसं वयन्तं पि अन्नं समणु-
 जाणइ, एवं खलु तस्स तप्पत्तियं सावज्जं ति आहिज्जइ । छट्ठे किरियट्ठाणे मोसावत्तिए
 ति आहिए ॥७॥६५७॥ अहावरे सत्तमे किरियट्ठाणे अदिच्चादाणवत्तिए ति आहिज्जइ ।
 से जहानामए-केइ पुरिसे आयहेउं वा जाव परिवारहेउं वा सयमेव अदिन्नं आदियइ
 अन्नेणं वि अदिन्नं आदियावेइ अदिन्नं आदियन्तं अन्नं समणुजाणइ, एवं खलु तस्स
 तप्पत्तियं सावज्जं ति आहिज्जइ । सत्तमे किरियट्ठाणे अदिच्चादाणवत्तिए ति आहिए
 ॥८॥६५८॥ अहावरे अट्ठमे किरियट्ठाणे अज्झत्थवत्तिए ति आहिज्जइ । से जहानामए-
 केइ पुरिसे नत्थि णं केइ किंचि विसंवादेइ सयमेव हीणे दीणे दुट्ठे दुम्मणे ओहयमण-
 संकप्पे चिन्तासोगसागरसंपविट्ठे करयलपल्हत्थमुहे अट्ठज्झाणोवगए भूमिगयदिट्ठिए
 क्षियाइ, तस्स णं अज्झत्थया आसंसइया चत्तारि ठाणा एवमाहिज्जन्ति । तं जहा-
 कोहे माणे माया लोहे । अज्झत्थमेव कोहमाणमायालोहे । एवं खलु तस्स तप्प-
 त्तियं सावज्जं ति आहिज्जइ । अट्ठमे किरियट्ठाणे अज्झत्थवत्तिए ति आहिए ॥९॥६५९॥
 अहावरे नवमे किरियट्ठाणे माणवत्तिए ति आहिज्जइ । से जहानामए-केइ पुरिसे
 जाइमएण वा कुलमएण वा बलमएण वा रूवमएण वा तवमएण वा सुयमएण वा
 लाभमएण वा इस्सरियमएण वा पन्नामएण वा अन्नयरेण वा मयट्ठाणेणं मत्ते समाणे
 परं हीत्थे निन्देइ खिसइ गरहइ परिभवइ अवमज्जेइ, इतरिए अयं, अहमंसि पुण
 विसिट्ठज्जइकुलबलाइगुणोववेए । एवं अप्पाणं समुक्कस्से, देहक्खुए कम्मबिइए अवसे
 पयाइ । तं जहा-गब्भाओ गब्भं ४ जम्माओ जम्मं माराओ मारं नरगाओ नरगं
 चण्डे थडे ञ्चवळे माणी यावि भवइ । एवं खलु तस्स तप्पत्तियं सावज्जं

ति आहिज्जइ । नवमे किरियट्ठाणे माणवत्तिए त्ति आहिए ॥ १० ॥ ६६० ॥
 अहावरे दसमे किरियट्ठाणे मित्तदोसवत्तिए त्ति आहिज्जइ । से जहानामए-केइ
 पुरिसे माईहिं वा पिईहिं वा भाईहिं वा भइणीहिं वा भज्जहिं वा धूयाहिं वा पुत्तेहिं
 वा सुण्हाहिं वा सद्धिं संवसमाणे तेसिं अन्नयरंसि अहालहुंगंसि अवराहंसि सयमेव
 गरुयं दण्डं निवत्तेइ । तं जहा-सीओदगवियडंसि वा कार्यं उच्छोलित्ता भवइ,
 उत्तिणोदगवियडेण वा कार्यं ओसिञ्चित्ता भवइ, अगणिक्कायेणं कार्यं उवडहिता भवइ,
 जोत्तेण वा वेत्तेण वा नेत्तेण वा तयाइ वा [कण्णेण वा छियाए वा] लयाए वा
 (अन्नयरिण वा दवरएण) पासाई उद्दालित्ता भवइ, दण्डेण वा अट्ठीण वा मुट्ठीण
 वा लेट्ठण वा क्वालेण वा कार्यं आउट्ठित्ता भवइ । तहप्पगारे पुरिसजाए संवस-
 माणे दुम्मणा भवइ, पवसमाणे सुमणा भवइ, तहप्पगारे पुरिसजाए दण्डपासी
 दण्डगुरुए दण्डपुरक्कडे अहिए इमंसि लोगंसि अहिए परंसि लोगंसि संजलणे कोहणे
 पिट्ठिमंसी यावि भवइ । एवं खलु तस्स तप्पत्तियं सावज्जं त्ति आहिज्जइ ।
 दसमे किरियट्ठाणे मित्तदोसवत्तिए त्ति आहिए ॥ ११ ॥ ६६१ ॥ अहावरे
 एकारसमे किरियट्ठाणे मायावत्तिए त्ति आहिज्जइ । जे इमे भवन्ति-गूढायारा
 तमोकसिया उल्लगपत्तलहुया पव्वयगुरुया ते आरिया वि सन्ता अणारियाओ
 भासाओ वि पउज्जन्ति, अन्नहासन्तं अप्पाणं अन्नहा मन्नन्ति, अन्नं पुट्ठा अन्नं
 वागरंति, अन्नं आइक्खियव्वं अन्नं आइक्खंति । से जहानामए केइ पुरिसे अंतो-
 सल्ले तं सल्लं नो सयं निहरइ नो अन्नेण निहरावेइ नो पडिविद्धंसेइ, एवमेव निणहवेइ,
 अविउट्ठमाणे अंतोअंतो रियइ, एवमेव माई मायं कट्ठु नो आलोएइ नो पडिक्कमेइ
 नो निन्दइ नो गरहइ नो विउट्ठइ नो विसोहेइ नो अकरणाए अब्भुट्ठेइ नो अहारिहं
 तवोक्कम्मं पायच्छित्तं पडिवज्जइ, माई अस्सि लोए पच्चायाइ माई परंसि लोए पुणो
 पुणो पच्चायाइ निन्दइ गरहइ पसंसइ निचरइ न नियट्ठइ निसिरियं दण्डं छाएइ,
 माइ असमाहडसुहलेस्से यावि भवइ । एवं खलु तस्स तप्पत्तियं सावज्जं त्ति
 आहिज्जइ । एकारसमे किरियट्ठाणे मायावत्तिए त्ति आहिए ॥ १२ ॥ ६६२ ॥
 अहावरे बारसमे किरियट्ठाणे लोभवत्तिए त्ति आहिज्जइ । जे इमे भवन्ति, तं
 जहा-आरणिगया आवसहिया गामन्तिया कण्हुईरहरसिया नो बहुसंजया नो बहु-
 पडिविरया सव्वपाणभूयजीवसत्तेहिं ते अप्पणो सच्चा मोसाई एवं विउज्जंति । अहं
 न हन्तव्वो अन्ने हन्तव्वा, अहं न अज्जावेयव्वो अन्ने अज्जावेयव्वा, अहं न परि-
 वेयव्वो अन्ने परिवेयव्वा, अहं न परितावेयव्वो, अन्ने परितावेयव्वा, अहं न उद्द-
 वेयव्वो अन्ने उद्दवेयव्वा, एवमेव ते इत्थिकामेहिं मुच्छिया गिद्धा गद्धिया गरहिया

अज्झोववन्ना जाव वासाई चउपच्चमाई छद्दसमाई अप्पयरो वा भुज्ययरो वा भुज्जितु
भोगभोगाई कालमासे कालं किच्चा अन्नयरेसु आसुरिएसु किब्बिसिएसु ठाणेसु उव-
वत्तारो भवन्ति । तओ विप्पमुच्चमाणे भुज्जो भुज्जो एलम्यत्ताए तम्यत्ताए जाइम्य-
त्ताए पच्चायन्ति । एवं खलु तस्स तप्पत्तिथं सावज्जं ति आहिज्जइ । दुवालसमे
किरियट्ठाणे लोभवन्तिए ति आहिए । इच्चेयाई दुवालस किरियट्ठाणाई दविएणं
सम्पणे वा माहणेण वा सम्मं सुपरिजाणियव्वाइ भवन्ति ॥ १३ ॥ ६६३ ॥
अहावरे तेरसमे किरियट्ठाणे इरियावहिए ति आहिज्जइ । इह खलु अत्तत्ताए
संतुडस्स अणगारस्स इरियासमियस्स भासासमियस्स एसणासमियस्स आयाणभण्ड-
मत्तनिकखेवणासमियस्स उच्चारपासवणखेलसिंघाणजल्लपारिट्ठावणिासमियस्स मणस-
मियस्स वयसमियस्स कायसमियस्स मणगुत्तस्स वयगुत्तस्स कायगुत्तस्स गुत्तिन्दि-
यस्स गुत्तवम्भयारिस्स आउत्तं चिट्ठमाणस्स आउत्तं निसीयमाणस्स आउत्तं तुयट्ठमा-
णस्स आउत्तं भुज्जमाणस्स आउत्तं गच्छमाणस्स आउत्तं भासमाणस्स आउत्तं वत्थं
पडिग्गहं कम्बलं पायपुञ्छणं गिण्हमाणस्स वा निक्खिवमाणस्स वा जाव चक्खु-
प्पम्हनिवायमवि अत्थि विमाया सुहुमा किरिया इरियावहिया नाम कज्जइ । सा पढ-
मसमए बद्धा पुट्ठा बिईयसमए वेइया तइयसमए निज्जिण्णा सा बद्धा पुट्ठा उदीरिया
वेइया निज्जिण्णा सेयकाले अकम्मे यावि भवइ । एवं खलु तस्स तप्पत्तिथं सावज्जं
ति आहिज्जइ, तेरसमे किरियट्ठाणे इरियावहिए ति आहिज्जइ । से बेमि जे य अईया
जे य पडुप्पन्ना जे य आगमिस्सा अरिहन्ता भगवन्ता सव्वे ते एयाई चेव तेरस
किरियट्ठाणाई भासिंसु वा भासेन्ति वा भासिस्सन्ति वा पन्नविंसु वा पन्नवेन्ति वा
पन्नविस्सन्ति वा, एवं चेव तेरसमं किरियट्ठाणं सेविंसु वा सेवन्ति वा सेविस्सन्ति
वा ॥ १४ ॥ ६६४ ॥ अदुत्तरं च णं पुरिसविजयं विभङ्गमाइक्खिस्सामि । इह खलु
नाणापन्नाणं नाणाछन्दाणं नाणासीलाणं नाणादिट्ठिणं नाणारुइणं नाणारम्भाणं
नाणाज्झवसाणसंजुताणं नाणाविहपात्रसुयज्जयणं एवं भवइ । तं जहा-भोमं उप्पायं
सुविणं अन्तलिक्खं अङ्गं सरं लक्खणं वज्जणं इत्थिलक्खणं पुरिसलक्खणं हयलक्खणं
गयलक्खणं गोगलक्खणं मेण्डलक्खणं कुक्कुडलक्खणं तित्थिलक्खणं बट्ठालक्खणं
लावयलक्खणं चकलक्खणं छत्तलक्खणं चम्मलक्खणं दण्डलक्खणं असिलक्खणं
मणिलक्खणं कागिणिलक्खणं सुभगाकरं दुब्भगाकरं गम्भाकरं मोहणकरं आहव्वणिं
पागसासणिं दव्वहोमं खत्तियविज्जं चन्दचरियं सूरचरियं सुक्कचरियं बहस्सइचरियं
उक्कापायं दिसादाहं मियचक्कं वायसपरिमण्डलं पंसुवुट्ठिं केसवुट्ठिं मंसवुट्ठिं रहिरुट्ठिं
वेयालिं अद्धवेयालिं ओसोवणिं तालुग्गाडणिं सोवाणिं सोवारिं दामिलिं कालिक्किं

गोरिं गन्धारिं ओवयणिं उप्पयणिं जम्भणिं थम्भणिं लेसणिं आमयकरणिं विसल्ल-
 करणिं पक्कमणिं अन्तद्धाणिं आयमिणिं, एवमाइयाओ विज्जाओ अन्नस्स हेउं
 पउज्जन्ति पाणस्स हेउं पउज्जन्ति वत्थस्स हेउं पउज्जन्ति लेणस्स हेउं पउज्जन्ति
 सयणस्स हेउं पउज्जन्ति, अन्नैसिं वा विरुवरुवाणं कामभोगाण हेउं पउज्जन्ति ।
 तिरिच्छं ते विज्जं सेवन्ति, ते अणारिया विप्पडिवज्जा कालमासे कालं किच्चा अन्न-
 यराइं आसुरियाइं किब्बिसयाइं ठाणाइं उववत्तारो भवन्ति । तओ वि विप्पमुच्चमाणा
 भुज्जो एलमूययाए तमअन्धयाए पचायन्ति ॥ १५ ॥ ६६५ ॥ से एगइओ
 आयहेउं वा नायहेउं वा सयणहेउं वा अगारहेउं वा परिवारहेउं वा नायगं वा
 सहवासियं वा निस्साए अदुवा अणुगामिए १ अदुवा उवचरए २ अदुवा पडिपहिए
 ३ अदुवा संधिच्छेयए ४ अदुवा गण्ठिच्छेयए ५ अदुवा उरब्भिए ६ अदुवा
 सोवरिए ७ अदुवा वागुरिए ८ अदुवा साउणिए ९ अदुवा मच्छिए १० अदुवा
 गोघायए ११ अदुवा गोवालए १२ अदुवा सोवणिए १३ अदुवा सोवणियंतिए १४ ।
 एगइओ आणुगामियभावं पडिसंधाय तमेव अणुगामियाणुगामियं हन्ता छेत्ता भेत्ता
 लुम्पइत्ता विलुम्पइत्ता उद्वइत्ता आहारं आहारेइ, इति से महया पावेहिं कम्मोहिं
 अत्ताणं उवक्खाइत्ता भवइ । से एगइओ उवचरयभावं पडिसंधाय तमेव उवचरियं
 हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं आहारेइ । इति से महया
 पावेहिं कम्मोहिं अत्ताणं उवक्खाइत्ता भवइ । से एगइओ पाडिपहियभावं पडिसंधाय
 तमेव पडिपहे ठिच्चा हन्ता छेत्ता भेत्ता लुम्पइत्ता विलुम्पइत्ता उद्वइत्ता आहारं
 आहारेइ, इति से महया पावेहिं कम्मोहिं अत्ताणं उवक्खाइत्ता भवइ । से एगइओ
 संधिच्छेदगभावं पडिसंधाय तमेव संधिं छेत्ता भेत्ता जाव इति से महया पावेहिं
 कम्मोहिं अत्ताणं उवक्खाइत्ता भवइ । से एगइओ गण्ठिच्छेदगभावं पडिसंधाय तमेव
 गण्ठिं छेत्ता भेत्ता जाव इति से महया पावेहिं कम्मोहिं अत्ताणं उवक्खाइत्ता भवइ ।
 से एगइओ उरब्भियभावं पडिसंधाय उरब्भं वा अन्नयरं वा तसं पाणं हन्ता जाव
 उवक्खाइत्ता भवइ । (एसो अभिलावो सव्वत्थ) से एगइओ सोयरियभावं पडि-
 संधाय महिसं वा अन्नयरं वा तसं पाणं हन्ता जाव उवक्खाइत्ता भवइ । से एगइओ
 वागुरियभावं पडिसंधाय मियं वा अन्नयरं वा तसं पाणं हन्ता जाव उवक्खाइत्ता
 भवइ । से एगइओ सउणियभावं पडिसंधाय सउणिं वा अन्नयरं वा तसं पाणं हन्ता
 जाव उवक्खाइत्ता भवइ । से एगइओ मच्छियभावं पडिसंधाय मच्छं वा अन्नयरं
 वा तसं पाणं हन्ता जाव उवक्खाइत्ता भवइ । से एगइओ गोघायभावं पडिसंधाय
 तमेव गोणं वा अन्नयरं वा तसं पाणं हन्ता जाव उवक्खाइत्ता भवइ । से एगइओ

गोवालभावं पडिसंधाय तमेव गोवालं वा परिजविय परिजविय हन्ता जाव उव-
 क्खाइत्ता भवइ । से एगइओ सोवणियभावं पडिसंधाय तमेव सुणगं वा अन्नयरं
 वा तसं पाणं हन्ता जाव उवक्खाइत्ता भवइ । से एगइओ सोवणियन्तियभावं
 पडिसंधाय तमेव मणुस्सं वा अन्नयरं वा तसं पाणं हन्ता जाव आहारं आहारेइ
 इति से महया पावेहिं कम्मेहिं अत्ताणं उवक्खाइत्ता भवइ ॥ १६ ॥ ६६६ ॥
 से एगइओ परिसामज्झाओ उट्ठिता अहमेयं हणामि त्ति कट्ठु तित्तिरं वा वट्ठगं वा
 लावगं वा कवोयगं वा कविज्जलं वा अन्नयरं वा तसं वा पाणं हन्ता जाव उवक्खा-
 इत्ता भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा
 सुराथालएणं गाहावईण वा गाहावइपुत्ताण वा सयमेव अगणिकाएणं सस्साईं ज्ञामेइ
 अन्नेण वि अगणिकाएणं सस्साईं ज्ञामावेइ अगणिकाएणं सस्साईं ज्ञामन्तं पि अन्नं
 समणुजाणइ, इति से महया पावकम्मेहिं अत्ताणं उवक्खाइत्ता भवइ । से एगइओ
 केणइ आयाणेणं विरुद्धे समाणे अदुवा खलदाणेणं अदुवा सुराथालएणं गाहावईण वा
 गाहावइपुत्ताण वा उट्ठाण वा गोणाण वा घोडगाण वा गद्दभाण वा सयमेव घूराओ
 कप्पेइ अन्नेण वि कप्पावेइ कप्पन्तं पि अन्नं समणुजाणइ, इति से महया जाव
 भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुरा-
 थालएणं गाहावईण वा गाहावइपुत्ताण वा उट्ठसालाओ वा गोणसालाओ वा घोड-
 गसालाओ वा गद्दभसालाओ वा कण्टकबोदियाए पडिपेहिता सयमेव अगणिकाएणं
 ज्ञामेइ अन्नेण वि ज्ञामावेइ ज्ञामन्तं पि अन्नं समणुजाणइ, इति से महया जाव
 भवइ । से एगइओ केणइ आयाणेणं विरुद्धे समाणे अदुवा खलदाणेणं अदुवा सुरा-
 थालएणं गाहावईण वा गाहावइपुत्ताण वा कुण्डलं वा मणिं वा मोत्तिथं वा सयमेव
 अवहरइ अन्नेण वि अवहरावेइ अवहरन्तं पि अन्नं समणुजाणइ इति से महया जाव
 भवइ ॥ से एगइओ केणइ वि आयाणेणं विरुद्धे समाणे अदुवा खलदाणेणं अदुवा
 सुराथालएणं समणाण वा माहणाण वा छत्तगं वा दण्डगं वा भण्डगं वा मत्तगं वा
 लट्ठिं वा भिसिगं वा चेलगं वा चिलिमिलिगं वा चम्मयं वा छेयणं वा चम्मको-
 सियं वा सयमेव अवहरइ जाव समणुजाणइ, इति से महया जाव उवक्खाइत्ता
 भवइ ॥ से एगइओ नो वित्तिगिञ्छइ । तं जहा-गाहावईण वा गाहावइपुत्ताण वा
 सयमेव अगणिकाएणं ओसहीओ ज्ञामेइ जाव अन्नं पि ज्ञामन्तं समणुजाणइ, इति
 से महया जाव उवक्खाइत्ता भवइ । से एगइओ नो वित्तिगिञ्छइ, तं जहा-गाहा-
 वईण वा गाहावइपुत्ताण वा उट्ठाण वा गोणाण वा घोडगाण वा गद्दभाण वा सय-
 मेव घूराओ कप्पेइ अन्नेण वि कप्पावेइ अन्नं पि कप्पन्तं समणुजाणइ । से एगइओ

नो वितिगिञ्छइ, तं जहा-गाहावईण वा गाहावइपुत्ताण वा उट्ठसालाओ वा जाव गइभसालाओ वा कण्टकबोंदियाहिं पडिपेहिता सयमेव अगणिकाएणं ज्ञामेइ जाव समणुजाणइ । से एगइओ नो वितिगिञ्छइ, तं जहा-गाहावईण वा गाहावइपुत्ताण वा जाव मोत्तिर्यं वा सयमेव अवहरइ जाव समणुजाणइ । से एगइओ नो वितिगि-
 ञ्छइ तं जहा-समणाण वा माहणाण वा छत्तगं वा दण्डगं वा जाव चम्मछेयणगं वा सयमेव अवहरइ जाव समणुजाणइ । इति से महया जाव उवक्खाइत्ता भवइ । से एगइओ समणं वा माहणं वा दिस्सा नाणाविहेहिं पावकम्मोहिं अत्ताणं उवक्खा-
 इत्ता भवइ, अदुवा णं अच्छराए आफालित्ता भवइ, अदुवा णं फरुसं वदित्ता भवइ, कालेण वि से अणुपर्विट्ठस्स असणं वा पाणं वा जाव नो दवावेत्ता भवइ, जे इमे भवन्ति वोणमन्ता भारक्कन्ता अलसगा वसलगा किवणगा समणगा निउज्जमा
 वणगा पव्वयन्ति ते इणमेव जीवियं धिज्जीवियं संपडिबूहेन्ति, नाइ ते परलोगस्स अट्ठाए किंचि वि सिलीसन्ति, ते दुक्खन्ति ते सोयन्ति ते जूरन्ति ते तिप्पन्ति ते पिट्ठन्ति ते परितप्पन्ति ते दुक्खणजूरणसोयणतिप्पणपिट्ठणपरितिप्पणवहबन्धणपरि-
 किलेसाओ अप्पडिविरया भवन्ति । ते महया आरम्भेण ते महया समारम्भेण ते महया आरम्भसमारम्भेण विरुवरुवेहिं पावकम्मकिच्चेहिं उरालाई माणुस्सगाई भोगभोगाई भुज्जित्तारो भवन्ति । तं जहा-अन्नं अन्नकाले पाणं पाणकाले वत्थं वत्थकाले लेणं लेणकाले सयणं सयणकाले सपुव्वावरं च णं ण्हाए कण्ठेमालाकडे आविद्धमणिपुव्वणे कप्पियमालामउली पडिबद्धसरीरे वग्धारियसोणिमुत्तगमल्लदाम-
 कलावे अहयवत्थपरिहिए चन्दणोक्खित्तगायसरीरे महइमहालियाए कूडागार-
 सालाए महइमहालयंसि सीहासणंसि इत्थीगुम्मसंपरिवुडे सव्वराइएणं जोइणा झियायमाणेणं महयाहयनट्ठगीयवाइयतन्तीतलतालतुडियघणमुइंगपडुप्पवाइयरवेणं उरालाई माणुस्सगाई भोगभोगाई भुज्जमाणे विहरइ । तस्स णं एगमवि
 आणवेमाणस्स जाव चत्तारि पञ्च जणा अवुत्ता चेव अब्भुट्ठन्ति । भणह देवाणुप्पिया किं करेमो ? किं आहरेमो ? किं उवणेमो ? किं आचिद्धामो ? किं मे हिर्यं इच्छियं ? किं मे आसगस्स सयइ ? तमेव पासित्ता अणारिया एवं वयन्ति-
 देवे खलु अयं पुरिसे, देवसिणाए खलु अयं पुरिसे, देवजीवणिजे खलु अयं पुरिसे, अन्ने वि य णं उवजीवन्ति । तमेव पासित्ता आरिया वयन्ति-
 अभिक्कन्तकूरकम्मे खलु अयं पुरिसे अइधुए अइयायरक्खे दाहिणगामिए नेरइए कण्हपक्खिए आगमिस्साणं दुल्लहबोहियाए यावि भविस्सइ । इच्चेयस्स ठाणस्स उट्ठिया वेगे अभिगिज्जन्ति अणुट्ठिया वेगे अभिगिज्जन्ति अभिज्ञाउरो अभि-

गिज्झन्ति । एस ठाणे अणारिए अकेवले अप्पडिपुण्णे अणेयाउए असंसुद्धे असल्ल-
 गत्तणे असिद्धिमग्गे अमुत्तिमग्गे अनिक्काणमग्गे अनिज्जाणमग्गे असव्वदुक्खपहीण-
 मग्गे एगन्तमिच्छे असाहु । एस खल्ल पढमस्स ठाणस्स अधम्मपक्खस्स विभङ्गे
 एवमाहिण् । ११७॥६६७॥ अहावरे दोच्चस्स ठाणस्स धम्मपक्खस्स विभङ्गे एव-
 माहिज्झ । इह खल्ल पाईणं वा पडीणं वा उदीणं वा दाहिणं वा सन्तेगइया मणुस्सा
 भवन्ति । तं जहा-आरिया वेगे अणारिया वेगे उच्चागोया वेगे नीयागोया वेगे काय-
 मन्ता वेगे हस्समन्ता वेगे सुवण्णा वेगे दुवण्णा वेगे सुरुवा वेगे दुरुवा वेगे । तेसिं
 च णं खेतवत्थूणि परिगगहियाई भवन्ति, एसो आलावगो जहा पोण्डरीए तथा
 नेयव्वो, तेणेव अभिलावेण जाव सव्वोवसन्ता सव्वत्ताए परिनिव्वुडे ति वेमि ॥ एस
 ठाणे आरिए केवले जाव सव्वदुक्खप्पहीणमग्गे एगन्तसम्मो साहु । दोच्चस्स ठाणस्स
 धम्मपक्खस्स विभङ्गे एवमाहिण् ॥ १८॥६६८॥ अहावरे तच्चस्स ठाणस्स मिस्सगस्स
 विभङ्गे एवमाहिज्झ । जे इमे भवन्ति आरणिग्या आवसहिया गामणियन्तिया
 कण्डुईरहसिसया जाव ते तओ विप्पमुच्चमाणा भुज्जो एलमूयाए तमूयत्ताए पच्चा-
 यन्ति । एस ठाणे अणारिए अकेवले जाव असव्वदुक्खपहीणमग्गे एगन्तमिच्छे
 असाहु । एस खल्ल तच्चस्स ठाणस्स मिस्सगस्स विभङ्गे एवमाहिण् ॥ १९॥६६९॥
 अहावरे पढमस्स ठाणस्स अधम्मपक्खस्स विभङ्गे एवमाहिज्झ । इह खल्ल
 पाईणं वा ४ सन्तेगइया मणुस्सा भवन्ति-गिहत्था महिच्छा महारम्भा महापरि-
 गहा अधम्मिया अधम्माणुया अधम्मिद्धा अधम्मक्खाई अधम्मपायजीविणो अध-
 म्मपलोई अधम्मपलज्जणा अधम्मसीलसमुदायारा अधम्मणेणं चेव वित्तिं कप्पेमाणा
 विहरन्ति । हण छिन्द भिन्द विगतगा लोहियपाणी चण्डा रुहा खुहा साहसिसया
 उक्कुच्चणवच्चणमायानियडिकूडकवडसाइसंपओगबहुला दुस्सीला दुव्वया दुप्पडिया-
 णन्दा असाहु सव्वाओ पाणाइवायाओ अप्पडिविरया जावजीवाए जाव सव्वाओ
 परिगगहाओ अप्पडिविरया जावजीवाए सव्वाओ कोहाओ जाव मिच्छादंसणसल्लाओ
 अप्पडिविरया, सव्वाओ ण्हाणुम्महणवण्णमन्धविलेवणसइफरिसरसरुवगन्धमल्ला-
 लंकाराओ अप्पडिविरया जावजीवाए, सव्वाओ सगडरहजागलुगगगिह्थिहिसिया-
 संदमाणियासयणासणजाणवाहणभोगभोयणपवित्थरविहीओ अप्पडिविरया जावजी-
 वाए सव्वाओ कयविक्रयमासद्धमासरुवगसंववहाराओ अप्पडिविरया, जावजीवाए,
 सव्वाओ हिरणसुवण्णधणधम्मणिमोत्तियसंखसिलप्पवालाओ अप्पडिविरया जाव-
 जीवाए सव्वाओ कूडतुलकूडमाणो अप्पडिविरया जावजीवाए सव्वाओ आरम्म-
 समारम्भाओ अप्पडिविरया जावजीवाए सव्वाओ करणकारावणाओ अप्पडिविरया

जावज्जीवाए सव्वाओ पयणपयावणाओ अप्पडिविरया जावज्जीवाए सव्वाओ
 कुट्टणपिट्ठणतज्जणताडणवहबन्धपरिकिलेसाओ अप्पडिविरया जावज्जीवाए । जे
 यावण्णे तहप्पगारा सावजा अबोहिया कम्मन्ता परपाणपरियावणकरा जे अणा-
 रिएहिं कज्जन्ति तओ अप्पडिविरया जावज्जीवाए । से जहानामए केइ पुरिसे
 कलममसूरतिलमुग्गमासनिष्कावकुलत्थआलिसन्दगपलिमन्थगमादिएहिं अयन्ते कूरे
 मिच्छादण्डं पउज्जन्ति, एवमेव तहप्पगारे पुरिसजाए तित्तिरवट्ठगलावगकवोयकविज्ज-
 लमियमहिसवराहगाहगोहकुम्मसिरिसिवमादिएहिं अयन्ते कूरे मिच्छादण्डं पउज्जन्ति
 जा वि य से बाहिरिया परिसा भवइ, तं जहा-दासे इ वा पेसे इ वा भयए इ वा
 भाइहे इ वा कम्मकरए इ वा भोगपुरिसे इ वा तेसिं पि य णं अन्नयरंसि अहाल-
 हुगंसि अवरहंसि सयमेव गरुयं दण्डं निवत्तेइ । तं जहा-इमं दण्डेइ इमं मुण्डेइ इमं
 तज्जेइ इमं तालेइ इमं अदुयबन्धणं करेइ इमं नियलबन्धणं करेइ इमं हट्ठिबन्धणं
 करेइ इमं चारगबन्धणं करेइ इमं नियलजुयलसंकोचियमोडियं करेइ इमं हत्थच्छिन्नयं
 करेइ इमं पायच्छिन्नयं करेइ इमं कण्णच्छिन्नयं करेइ इमं नक्कओट्टसीसमुहच्छिन्नयं करेइ
 वेयगच्छिहियं अज्जच्छिहियं पक्खाफोडियं करेइ इमं नयणुप्पाडियं करेइ इमं दंसणु-
 प्पाडियं वसणुप्पाडियं जिब्बुप्पाडियं ओलम्बियं करेइ घसियं करेइ घोलियं करेइ
 सूलाइयं करेइ सूलाभिन्नयं करेइ खारवत्तियं करेइ वज्जवत्तियं करेइ सीहपुच्छियगं
 करेइ वसभपुच्छियगं करेइ दवगिगदद्धयङ्गं कागणिमंसखावियङ्गं भत्तपाणनिरुद्धं
 इमं जावज्जीवं वहबन्धणं करेइ इमं अन्नयरेण अनुभेणं कुमारेणं मारेइ । जा वि य
 से अब्भिन्तरिया परिसा भवइ, तं जहा-माया इ वा पिया इ वा भाया इ वा
 भगिणी इ वा भज्जा इ वा पुत्ता इ वा धूया इ वा सुण्हा इ वा, तेसिं पि य णं
 अन्नयरंसि अहालहुगंसि अवरहंसि सयमेव गरुयं दण्डं निवत्तेइ, सीओदगवियडंसि
 उच्छोलिता भवइ जहा मित्तदोसवत्तिए जाव अहिए परंसि लोगंसि । ते दुक्खन्ति
 सोयन्ति जूरन्ति तिप्पन्ति पिट्ठन्ति परितप्पन्ति ते दुक्खणसोयणजूरणतिप्पणपिट्ठण-
 परितप्पणवहबन्धणपरिकिलेसाओ अप्पडिविरया भवन्ति । एवमेव ते इत्थिकामेहिं
 मुच्छिया गिद्धा गदिया अज्जोववन्ना जाव वासाइं चउपच्चमाइं छदसमाइं वा अप्प-
 यरो वा भुज्जयरो वा कालं भुज्जित्तु भोगभोगाईं पविसुइत्ता वेराययणाईं संविणिता
 बहूईं पावाइं कम्माईं उस्सन्नाईं संभारकडेण कम्मुणा से जहानामए अयगोले इ वा
 सेलगोले इ वा उदगंसि पक्खित्ते समाणे उदगयलमइवइत्ता अहे धरणियलपइट्ठाणे
 भवइ, एवमेव तहप्पगारे पुरिसजाए वज्जबहुले धूयबहुले पक्कबहुले वेरबहुले अप्पत्तिय-
 बहुले दम्भबहुले नियडिबहुले साइबहुले अयसबहुले उस्सन्नतसपाणघाईं कालमासे

कालं किञ्चा धरणियलमइवइत्ता अहे नरगयलपइद्वाणे भवइ ॥ २० ॥ ६७० ॥ ते णं
 नरगा अन्तो वट्ठा बाहिं चउरंसा अहे खुरप्पसंठाणसंठिया निच्चन्धकारतमसा
 ववगयगहचन्दसूरनक्खत्तजोइसप्पहा मेदवसामंसरुहिरपूयपडलचिक्खिल्ललित्ता-
 णुलेवणयला असुई वीसा परमदुब्बिभगन्धा कण्हा अगणिवण्णाभा कक्खळफासा
 दुरहियासा असुभा नरगा असुभा नरएसु वेयणाओ ॥ नो चेव नरएसु नेरइया
 निहायन्ति वा पयलायन्ति वा सुई वा रई वा धिई वा मई वा उवलभन्ते । ते णं
 तत्थ उज्जलं विउलं पगाढं कडुयं कक्कसं चण्डं दुक्खं दुग्गं तिव्वं दुरहियासं नेरइया
 वेयणं पच्चणुभवमाणा विहरन्ति ॥ २१ ॥ ६७१ ॥ से जहानामए रक्खे सिया
 पव्वयग्गे जाए मूले छिन्ने अग्गे गरुए जओ निण्णं जओ विसमं जओ दुग्गं तओ
 पवडइ, एवामेव तहप्पगारे पुरिसजाए गब्भाओ गब्भं जम्माओ जम्मं माराओ
 मारं नरगाओ नरगं दुक्खाओ दुक्खं दाहिणगामिए नेरइए कण्हपक्खिए आग-
 मिस्साणं दुल्लहबोहिए यावि भवइ । एस ठाणे अणारिए अकेवले जाव असव्वदुक्ख-
 पहीणमग्गे एगन्तमिच्छे असाहू । पढमस्स ठाणस्स अधम्मपक्खस्स विभङ्गे एव-
 माहिए ॥ २२ ॥ ६७२ ॥ अहावरे दोच्चस्स ठाणस्स धम्मपक्खस्स विभङ्गे एव-
 माहिज्ज । इह खलु पाईणं वा ४ सन्तेगइया मणुस्सा भवन्ति । तं जहा-अणारम्भा
 अपरिगगहा धम्मिया धम्माणुगा धम्मिद्धा जाव धम्मेणं चेव वित्तिं कप्पेमाणा
 विहरन्ति, सुसीला सुव्वया सुप्पडियाणन्दा सुसाहू सव्वाओ पाणाइवायाओ पडि-
 विरया जावजीवाए जाव जे यावन्ने तहप्पगारा सावज्जा अबोहिया कम्मन्ता
 परपाणपरियावणकरा कज्जन्ति तओ वि पडिविरया जावजीवाए ॥ से जहानामए-
 अणगारा भगवन्तो इरियासमिया भासासमिया एसणासमिया आयाणभण्डमत्त-
 निक्खेवणसमिया उच्चारपासवणखेलसिंघाणजल्लपरिद्धावणियासमिया मणसमिया वय-
 समिया कायसमिया मणगुत्ता वयगुत्ता कायगुत्ता गुत्ता गुत्तिन्दिया गुत्तबम्मयारी
 अकोहा अमाणा अमाया अलोभा सन्ता पसन्ता उवसन्ता परिनिव्वुडा अणासवा
 अग्गन्था छिन्नसोया निरुव्वेवा कंसपाइ व्व मुक्कतोया संखो इव निरज्जणा जीव इव
 अपडिहयगई गगणतलं पिव निरालम्बणा वाउरिव अपडिबद्धा सारदसल्लिलं व
 सुद्धहियया पुक्खरपत्तं व निरुव्वेवा कुम्भो इव गुत्तिन्दिया विहग इव विप्पमुक्का
 खग्गिविसाणं व एगजाया भारुण्डपक्खी व अप्पमत्ता कुञ्जरो इव सोण्डीरा वसभो
 इव जायत्थामा सीहो इव दुद्धरिसा मन्दरो इव अप्पकम्पा सागरो इव गम्भीरा
 चन्दो इव सोमल्लेसा सूरु इव दित्तेया जच्चकञ्चणगं व जायरुवा वडुंधरा इव
 सव्वफासविसहा सुहुयहुयासणो विय तेयसा जलन्ता । नत्थि णं तेसिं भगवन्ताणं

कथं वि पडिबन्धे भवइ । से पडिबन्धे चउव्विहे पन्नते । तं जहा-अण्डए इ वा पोयए इ वा उगगहे इ वा पगगहे इ वा जं णं जं णं दिसं इच्छन्ति तं णं तं णं दिसं अपडिबद्धा सुइभूया लहुभूया अप्पगन्था संजमेणं तवसा अप्पाणं भावेमाणा विहरन्ति ॥ तेसिं णं भगवन्ताणं इमा एयारुवा जायामायावित्ती होत्था । तं जहा-चउत्थे भत्ते छट्ठे भत्ते अट्ठमे भत्ते दसमे भत्ते दुवालसमे भत्ते चउदसमे भत्ते अद्ध-मासिए भत्ते मासिए भत्ते दोमासिए तिमासिए चाउम्मासिए पच्चमासिए छम्मासिए अदुत्तरं च णं उक्खित्तचरया निक्खित्तचरया उक्खित्तनिक्खित्तचरया अन्तचरगा पन्तचरगा ल्हचरगा समुदाणचरगा संसट्ठचरगा असंसट्ठचरगा तज्जायसंसट्ठचरगा दिट्ठलाभिया अदिट्ठलाभिया पुट्ठलाभिया अपुट्ठलाभिया भिक्खलाभिया अभिक्खला-भिया अन्नायचरगा उवनिहिया संखादत्तिया परिमियपिण्डवाइया सुद्धेसणिया अन्ता-हारा पन्ताहारा अरसाहारा विरसाहारा ल्हहाहारा तुच्छाहारा अन्तजीवी पन्तजीवी आयम्बिलिया पुरिमद्धिया निव्विगइया अमज्जमंसासिणो नो नियामरसभोई ठाणाइया पडिमाठाणाइया उक्कडुआसणिया नेसज्जिया वीरासणिया दण्डायइया लगडसाइणो अप्पाउडा अगत्तया अकण्डुया अणिट्ठुहा (एवं जहोववाइए) धुयकेसमंशुरोमनहा सव्वगायपडिकम्मविप्पमुक्का चिट्ठन्ति । ते णं एएणं विहारेणं विहरमाणा बहूई वासाई सामन्नपरियाणं पाउणन्ति २ बहुबहु आवाहंसि उप्पन्नंसि वा अणुप्पन्नंसि वा बहूई भत्ताई पच्चक्खन्ति पच्चक्खइत्ता बहूई भत्ताई अणसणाए छेदेन्ति, अणसणाए छेदित्ता जस्सट्ठाए कीरइ धेरकप्पभावे जिणकप्पभावे मुण्डभावे अण्हाणभावे अदन्तवण्णे अछत्तए अणोवाहणाए भूमिसेज्जा फलगसेज्जा कट्ठसेज्जा केसलोए बम्भ-चेरवासे परघरपवेसे लद्धावलद्धे माणावमाणणाओ हीलणाओ निन्दणाओ खिसणाओ गरहणाओ तज्जणाओ तालणाओ उच्चावया गामकण्टगा बावीसं परीसहोवसग्गा अहियासिज्जन्ति तमट्ठं आराहेन्ति तमट्ठं आराहिता चरमेहिं उस्सासनिस्सासेहिं अणन्तं अणुत्तरं निव्वाघायं निरावरणं कसिणं पडिपुण्णं केवलवरणाणंदंसणं समु-प्पाडेन्ति, समुप्पाडित्ता तओ पच्छा सिज्जन्ति बुज्जन्ति मुच्चन्ति परिणिव्वयन्ति सव्वदुक्खाणं अन्तं करन्ति । एगच्चाए पुण एगे भयन्तारो भवन्ति, अवरे पुण पुव्वकम्मावसेसेणं कालमासे कालं किच्चा अन्नयरेसु देवलोएसु देवत्ताए उववत्तारो भवन्ति । तं जहा-महद्धिएसु महज्जुइएसु महापरक्कमेसु महाजसेसु महाबलेसु महाणु-भावेषु महासुक्खेसु । ते णं तत्थ देवा भवन्ति महद्धिया महज्जुइया जाव महासुक्खा हारविराइयवच्छा कडगतुडियथम्भियभुया अङ्गयकुण्डलमट्ठगण्डयलकणपीढधारी विचित्तहत्थाभरणा विचित्तमालामउल्लिमउडा कल्लाणगन्धपवरवत्थपरिहिया कल्लाणग-

पवरमल्लानुलेवणधरा भासुरबोदी पलम्बवणमालाधरा दिव्वेणं रूवेणं दिव्वेणं वण्णेणं दिव्वेणं गन्धेणं दिव्वेणं फासेणं दिव्वेणं संघाएणं दिव्वेणं संठाणेणं दिव्वाए इह्वीए दिव्वाए जुईए दिव्वाए पभाए दिव्वाए छायाए दिव्वाए अच्चाए दिव्वेणं तेएणं दिव्वाए लेसाए दस दिसाओ उज्जोवेमाणा पभासेमाणा गइक्कळाणा ठिइक्कळाणा आगमेसिभइया यावि भवन्ति । एस ठाणे आरिए जाव सव्वदुक्खपहीणमग्गे एगन्तसम्मे सुसाहू । दोच्चस्स ठाणस्स धम्मपक्खस्स विभङ्गे एवमाहिए ॥ २३ ॥ ६७३ ॥

अहावरे तच्चस्स ठाणस्स मीसगस्स विभङ्गे एवमाहिजइ । इह खलु पाईणं वा ४ सन्तेगइया मणुस्सा भवन्ति । तं जहा-अप्पिच्छा अप्पारम्भा अप्पपरिग्गहा धम्मिया धम्माणुया जाव धम्मणेणं चेव वित्तिं कप्पेमाणा विहरन्ति सुसीला सुव्वया सुप्पडियणन्दा साहू एगच्चाओ पाणाइवायाओ पडिविरया जावजीवाए एगच्चाओ अप्पडिविरया जाव जे यावन्ने तहप्पगारा सावज्जा अबोहिया कम्मन्ता परपाणपरितावणकरा कज्जन्ति तओ वि एगच्चाओ अप्पडिविरया । से जहानामए समणोवासगा भवन्ति अभिगयजीवाजीवा उवलद्धपुण्णपावा आसवसंवरवेयणा निज्जराकिरियाहिगरणबन्धमोक्खकुसला असहेज्जदेवासुरनागसुव्वणजक्खरक्खसकिंनरकिंपुरिसगरुलगन्धव्वमहोरगाइएहिं देवगणेहिं निग्गन्थाओ पावयणाओ अणइक्कमणिज्जा, इणमेव निग्गन्थे पावयणे निस्संकिया निक्कंखिया निव्विइगिच्छा लद्धा गहियट्ठा पुच्छियट्ठा विणिच्छियट्ठा अभिगयट्ठा अट्ठिसिज्जपेम्माणुरागरत्ता । अयमाउसो निग्गन्थे पावयणे अट्ठे अयं परमट्ठे सेसे अणट्ठे उसियफलिहा अवंगुयदुवाराअचियत्तन्तेउरपरपरपवेसा चाउहसट्ठमुद्धिपुण्णिमासिणीसु पडिपुण्णं पोसहं सम्मं अणुपाळेमाणा समणे निग्गन्थे फासुएसणिज्जेणं असणपाणखाइमसाइमेणं वत्थपडिग्गहक्कम्बलपायपुच्छणेणं ओसहभेसज्जेणं पीठफलगसेज्जासन्थारएणं पडिलाभेमाणा बहूहिं सीलव्वयगुणवेरमणपच्चक्खाणपोसहोववासेहिं अहापरिग्गहिएहिं तवोक्कम्मेहिं अप्पाणं भावेमाणा विहरन्ति ॥

ते णं एयारूवेणं विहारेणं विहरमाणा बहूइं वासाइं समणोवासगपरियागं पाउणंति पाउणित्ता आबाहंसि उप्पणंसि वा, अणुप्पणंसि वा बहूइं भत्ताइं अणसणाए पच्चक्खाएन्ति बहूइं भत्ताइं अणसणाए पच्चक्खाएत्ता बहूइं भत्ताइं अणसणाए छेदेन्ति बहूइं भत्ताइं अणसणाए छेइत्ता आलोइयपडिक्कंता समाहिपत्ता कालमासे कालं किच्चा अन्नयरेसु देवलोएसु देवत्ताए उववत्तारो भवंति, तंजहा-महच्चिएसु महज्जुइएसु जाव महासोक्खेसु सेसं तहेव जाव एसठाणे आयरिए जाव एगंतसम्मे साहू तच्चस्स ठाणस्स मीसगस्स विभंगे एवमाहिए ॥ २४ ॥ ६७४ ॥

अविरइं पडुच्च बाले आहिज्जइ विरइं पडुच्च पंडिए आहिज्जइ विरयाविरइं पडुच्च बालपंडिए आहिज्जइ, तत्थणं

जा सा सव्वओ अविरइ एसठ्ठाणे आरंभठ्ठाणे अणारिए जाव असव्वदुक्खप्पहीणमग्गे एगंतमिच्छे असाहु, तत्थणं जा सा सव्वओ विरइ एसठ्ठाणे अणारंभठ्ठाणे आरिए जाव सव्वदुक्खप्पहीणमग्गे एगंतसम्ममे साहु, तत्थणं जा सा सव्वओ विरयाविरइ एसठ्ठाणे आरंभणोरंआमठ्ठाणे एसठ्ठाणे आरिए जाव सव्वदुक्खप्पहीणमग्गे एगंतसम्ममे साहु ॥ २५ ॥ ६७५ ॥ एवमेव समणग्गम्ममाणा इमेहिं चेव दोहिं ठाणेहिं समोअरंति, तंजहा-धम्ममे चेव अधम्ममे चेव, उवसंते चेव अणुवसंते चेव, तत्थणं जे से पढमठ्ठाणस्स अधम्मपक्खस्स विभगे एवमाहिए तस्सणं इमाइं तिज्जि तेवठ्ठाइं पावा-दुयसयाइं भवंतीति मक्खायाइं, तंजहा-किरियावाइणं अकिरियावाइणं अन्नाणियवा-इणं वेणइयवाइणं तेवि परिनिव्वाणमाहंसु तेवि परिमोक्खमाहंसु तेवि लवंति सावगा तेवि लवंति सावइत्तारो ॥ २६ ॥ ६७६ ॥ ते सव्वे पावाउया आइगरा धम्माणं णाणापन्ना णाणाछंदा णाणासीला णाणादिट्ठी णाणारुई णाणारंभा णाणाज्झवसाण-संजुत्ता एणं महं मंडलिबंधं किच्चा सव्वे एगओ चिट्ठंति ॥ २७ ॥ ६७७ ॥ पुरिसेय सागणियाणं इंगालाणं पाइं बहुपडिपुञ्जं अओमएणं संडासएणं गहाय ते सव्वे पावाउए आइगरा धम्माणं णाणापन्ना जाव णाणाज्झवसाणसंजुत्ते एवं वयासी-हंभो पावाउया आइगरा धम्माणं णाणापन्ना जाव णाणाज्झवसाणसंजुत्ता इमं ताव तुब्भे सागणियाणं इंगालाणं पाइं बहुपडिपुञ्जं गहाय मुहुत्तयं २ पाणिणा धरेह णो बहुसंडा-सणं संसारियं कुज्जा, णो बहुअग्गिथंभणियं कुज्जा णो बहु साहम्मियवेयावडियं कुज्जा णो बहु परधम्मियवेयावडियं कुज्जा, उज्जुया णियागपडिवच्चा अमायं कुव्वमाणा पाणिं पसारेह इतिवुच्चा से पुरिसे तेसिं पावादुयाणं तं सागणियाणं इंगालाणं पाइं बहुप-डिपुञ्जं अउमएणं संडासएणं गहाय पाणिंसु णिसिरति तएणं ते पावादुया आइगरा धम्माणं णाणापन्ना जाव णाणाज्झवसाणसंजुत्ता पाणिं पडिसाहरंति तएणं से पुरिसे ते सव्वे पावाउए आइगरे धम्माणं जाव णाणाज्झवसाणसंजुत्ता एवं वयासी हंभो । पावादुया आइगरा धम्माणं णाणापन्ना जाव णाणाज्झवसाणसंजुत्ता कम्हाणं तुब्भे पाणिं पडिसाहरह पाणिं णो डहिज्जा, दद्धे किं भविरसइ दुक्खं दुक्खं ति मणमाणा पडिसाहरह एस तुला एसप्पमाणे एस समोसरणे पत्तेयं तुला पत्तेयं पमाणे पत्तेयं समोसरणे तत्थणं जे ते समणा माहणा एवमाइक्खंति, जाव परुवेंति सव्वे पाणा जाव सत्ता हंतव्वा अजावेयव्वा परिघेतव्वा परियावेयव्वा किलामेयव्वा उइवेयव्वा ते आगंतु छेयाए ते आगंतु भेयाए जाव ते आगंतु जाइजरामरणजोणिजम्मणसं-सारपुणब्भवगम्भवासभवपवंचकलंकलीभागिणो भविरसंति, ते बहूणं दंडणाणं बहूणं मुंडणाणं तज्जणाणं तालणाणं अंदुबंधणाणं जाव धोलणाणं माइमरणाणं पिइमरणाणं

भाइमरणाणं भगिणीमरणाणं भज्जापुत्तधूयासुण्हामरणाणं दारिद्र्हाणं दोहग्गाणं अपिय-
 संवासाणं पियविप्पओगाणं बहूणं दुक्खदोमणस्साणं आभाणिणो भविस्संति अणादियं
 च णं अणवयग्गं दीहमद्धं चाउरंतसंसारकंतारं भुज्जो भुज्जो अणुपरियट्ठिस्संति ते णो
 सिज्झिस्संति णो बुज्झिस्संति जाव णो सव्वदुक्खाणमंतं करिस्संति एस तुला एस
 पमाणे एस समोसरणे पत्तेयं तुला पत्तेयं पमाणे पत्तेयं समोसरणे । तत्थ णं जे ते
 समणा माहणा एवमाइक्खन्ति जाव परूवेन्ति । सव्वे पाणा सव्वे भूया सव्वे जीवा
 सव्वे सत्ता न हन्तव्वा न अज्जावेयव्वा न परिचेयव्वा न उद्वेयव्वा ते नो आग-
 न्तुच्छेयाए ते नो आगन्तुभेयाए जाव जाइजरा मरणजोणिजम्मणसंसारपुणब्भवग-
 ञ्भवासभवपवंचकलंकलीभाणिणो भविस्सन्ति, जाव अणाइयं च णं अणवयग्गं
 दीहमद्धं चाउरन्तसंसारकन्तारं भुज्जो भुज्जो नो अणुपरियट्ठिस्सन्ति, ते सिज्झिस्सन्ति
 जाव सव्वदुक्खाणं अन्तं करिस्सन्ति ॥ २८ ॥ ६७८ ॥ इच्चेएहिं बारसहिं किरिया-
 ठाणेहिं वट्ठमाणा जीवा नो सिज्झिस्सु नो बुज्झिस्सु नो मुच्चिस्सु नो परिणिव्वाइंसु जाव
 नो सव्वदुक्खाणं अन्तं करेंसु वा नो करेन्ति वा नो करिस्सन्ति वा । एयंसि चेव
 तेरसमे किरियाठाणे वट्ठमाणा जीवा सिज्झिस्सु बुज्झिस्सु मुच्चिस्सु परिणिव्वाइंसु जाव
 सव्वदुक्खाणं अंतं करेंसु वा करेति वा करिस्संति वा । एवं से भिक्खू आयट्ठी आय-
 हिए आयगुत्ते आयजोगे आयपरक्कमे आयरक्खिए आयाणुकम्पए आयणिप्फेडए
 आयाणमेव पडिसाहरेज्जासि त्ति बेमि किरियाट्ठाणज्झयणं विइयं ॥ २९ ॥ ६७९ ॥

आहारपरिन्नज्झयणे तइये

सुयं मे आउसं ! तेणं भगवया एवमक्खायं । इह खलु आहारपरिन्ना नामज्झयणे
 तस्स णं अयमट्ठे । इह खलु पाईणं वा ४ सव्वओ सव्वावंति य णं लोगंसि चत्तारि
 बीयकाया एवमाहिज्जंति । तं जहा-अग्गबीया मूलबीया पोरबीया खंभवीया । तेसिं
 च णं अहावीएणं अहावगासेणं इहेगइया सत्ता पुढवीजोणिया पुढवीसंभवा पुढवी-
 वुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा नाणा-
 विहजोणियासु पुढवीसु रुक्खत्ताए विउट्ठंति ॥ ते जीवा तेसिं नाणाविहजोणियाणं
 पुढवीणं सिणेहमाहारेंति । ते जीवा आहारेंति पुढवीसरीरं आउसरीरं तेउसरीरं
 वाउसरीरं वणस्सइसरीरं । नाणाविहाणं तसथावरणं पाणाणं सरीरं अचित्तं कुव्वंति
 परिविद्धत्थं । तं सरीरं पुव्वाहारियं तयाहारियं विपरिणयं सारुवियकडं संतं । अव्वरे
 वि य णं तेसिं पुढविजोणियाणं रुक्खाणं सरीरा नाणावण्णा नाणागंधा नाणारसा

नाणाफासा नाणासंठाणसंठिया नाणाविहसरीरपुग्गलविउव्विया ते जीवा कम्मोवव-
 न्नगा भवन्तीति मक्खायं ॥ १ ॥ ६८० ॥ अहावरं पुरक्खायं इहेगइया सत्ता रक्ख-
 जोणिया रक्खसंभवा रक्खवुक्कमा तज्जोणिया तस्संभवा तदुवक्कमा कम्मोवगा कम्म-
 नियाणेणं तत्थवुक्कमा पुढवीजोणिएहिं रक्खेहिं रक्खत्ताए विउट्ठंति । ते जीवा तेसिं
 पुढवीजोणियाणं रक्खाणं सिणेहमाहारेंति, ते जीवा आहारेंति पुढवीसरीरं आउते-
 उवाउवणस्सइसरीरं नाणाविहाणं तसथावराणं पाणाणं सरीरं अचित्तं कुव्वंति परिवि-
 द्दत्थं । तं सरीरं पुव्वाहारियं तथाहारियं विप्परिणामियं सारुवियकडं सन्तं । अवरे
 वि य णं तेसिं रक्खजोणियाणं रक्खाणं सरीरा नाणावण्णा नाणागन्धा नाणारसा
 नाणाफासा नाणासंठाणसंठिया नाणाविहसरीरपुग्गलविउव्विया ते जीवा कम्मोव-
 वन्नगा भवन्तीति मक्खायं ॥ २ ॥ ६८१ ॥ अहावरं पुरक्खायं इहेगइया सत्ता
 रक्खजोणिया रक्खसंभवा रक्खवुक्कमा तज्जोणिया तस्संभवा तदुवक्कमा कम्मोवगा
 कम्मणियाणेणं तत्थवुक्कमा रक्खजोणिएसु रक्खत्ताए विउट्ठंति, ते जीवा तेसिं रक्ख-
 जोणियाणं रक्खाणं सिणेहमाहारेंति ते जीवा आहारेंति, पुढवीसरीरं आउतेउवा-
 उवणस्सइसरीरं तसथावराणं पाणाणं सरीरं अचित्तं कुव्वंति परिविद्वत्थं तं सरीरं
 पुव्वाहारियं तथाहारियं विपरिणामियं सारुवियकडं संतं अवरेवि य णं तेसिं रक्ख-
 जोणियाणं रक्खाणं सरीरा नाणावण्णा जाव ते जीवा कम्मोववन्नगा भवन्ति त्ति
 मक्खायं ॥ ३ ॥ ६८२ ॥ अहावरं पुरक्खायं इहेगइया सत्ता रक्खजोणिया रक्ख-
 संभवा रक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थ-
 वुक्कमा रक्खजोणिएसु रक्खेसु मूलत्ताए कंदत्ताए, खंधत्ताए तथत्ताए सालत्ताए पवा-
 लत्ताए पत्तत्ताए पुप्फत्ताए फलत्ताए वीयत्ताए विउट्ठंति ते जीवा तेसिं रक्खजो-
 णियाणं रक्खाणं सिणेहमाहारेंति ते जीवा आहारेंति पुढवीसरीरं आउतेउवाउ-
 वणस्सइ नाणाविहाणं तसथावराणं पाणाणं सरीरं अचित्तं कुव्वंति परिविद्वत्थं तं
 सरीराणं जाव सारुवियकडं संतं अवरेवियणं तेसिं रक्खजोणियाणं मूलणं कंदाणं
 खंधाणं तथाणं सालाणं पवालाणं जाव वीयाणं सरीरा नाणावण्णा नाणागंधा जाव
 नाणाविहसरीरपुग्गलविउव्विया ते जीवा कम्मोववन्नगा भवन्ति त्ति मक्खायं
 ॥ ४ ॥ ६८३ ॥ अहावरं पुरक्खायं इहेगइया सत्ता रक्खजोणिया रक्खसंभवा
 रक्खवुक्कमा तज्जोणिया तस्संभवा तदुवक्कमा कम्मोववन्नगा कम्मनियाणेणं तत्थवक्कमा
 रक्खजोणिएहिं रक्खेहिं अज्झारोहत्ताए विउट्ठंति ते जीवा तेसिं रक्खजोणियाणं
 रक्खाणं सिणेहमाहारेंति ते जीवा आहारेंति पुढवीसरीरं जाव सारुवियकडं संतं
 अवरेवि य णं तेसिं रक्खजोणियाणं अज्झारुहाणं सरीरा नाणावण्णा जाव मक्खायं

॥ ५ ॥ ६८४ ॥ अहावरं पुरक्खायं इहेगइया सत्ता अज्झारोहजोणिया अज्झा-
 रोहसंभवा जाव कम्मनियाणेणं तत्थ वुक्कमा रुक्खजोणिएसु अज्झारोहेसु अज्झा-
 रोहत्ताए विउट्ठंति ते जीवा तेसिं रुक्खजोणियाणं अज्झारोहाणं सिणेहमाहारेंति
 ते जीवा आहारेंति पुढवीसरीरं जाव सारुवियकडं संतं अवरेवि य णं तेसिं
 अज्झारोहजोणियाणं अज्झारोहाणं सरीरा णाणावण्णा जावमक्खायं ॥ ६ ॥ ६८५ ॥
 अहावरं पुरक्खायं इहेगइया सत्ता अज्झारोहजोणिया अज्झारोहसंभवा जाव
 कम्मनियाणेणं तत्थ वुक्कमा अज्झारोहजोणिएसु अज्झारोहत्ताए विउट्ठंति ते जीवा
 तेसिं अज्झारोहजोणियाणं अज्झारोहाणं सिणेहमाहारेंति ते जीवा आहारेंति-
 पुढवीसरीरं आउसरीरं जाव सारुवियकडं संतं अवरेवि य णं तेसिं अज्झारोह
 जोणियाणं अज्झारोहाणं सरीरा णाणावण्णा जावमक्खायं ॥ ७ ॥ ६८६ ॥ अहा-
 वरं पुरक्खायं इहेगइया सत्ता अज्झारोहजोणिया अज्झारोहसंभवा जाव कम्म-
 नियाणेणं तत्थवुक्कमा अज्झारोहजोणिएसु अज्झारोहेसु मूलत्ताए जाव बीयत्ताए
 विउट्ठंति ते जीवा तेसिं अज्झारोहजोणियाणं अज्झारोहाणं सिणेहमाहारेंति जाव
 अवरेवि य णं तेसिं अज्झारोहजोणियाणं मूलणं जाव बीयाणं सरीरा णाणावण्णा
 जावमक्खायं ॥ ८ ॥ ६८७ ॥ अहावरं पुरक्खायं इहेगइया सत्ता पुढविजोणिया
 पुढविसंभवा जाव णाणाविहजोणियासु पुढवीसु तणत्ताए विउट्ठंति ते जीवा तेसिं
 णाणाविहजोणियाणं पुढवीणं सिणेहमाहारेंति जाव ते जीवा कम्मोववन्ना भवंति
 ति मक्खायं-एवं पुढविजोणिएसु तणेसु तणत्ताए विउट्ठंति जाव मक्खायं-एवं
 तणजोणिएसु तणेसु तणत्ताए विउट्ठंति तणजोणियं तणसरीरं च आहारेंति, जाव-
 मक्खायं-एवं तणजोणिएसु तणेसु मूलत्ताए जाव बीयत्ताए विउट्ठंति ते जीवा जाव
 एवमक्खायं-एवं ओसहीणं वि चत्तारि आलावगा-एवं हरियाणवि चत्तारि आला-
 वगा-॥ ९-१० ॥ ६८८-६८९ ॥ अहावरं पुरक्खायं इहेगइया सत्ता पुढवी-
 जोणिया पुढविसंभवा जाव कम्मनियाणेणं तत्थवुक्कमा णाणाविहजोणियासु पुढवीसु
 आयत्ताए वायत्ताए कायत्ताए कूहणत्ताए कन्दुकत्ताए उव्वेहणियत्ताए निव्वेहणिय-
 त्ताए सळत्ताए छत्तगत्ताए वासाणियत्ताए कूरत्ताए विउट्ठन्ति । ते जीवा तेसिं नाणा-
 विहजोणियाणं पुढवीणं सिणेहमाहारेंति । ते वि जीवा आहारेंति पुढवीसरीरं
 जाव सन्तं । अवरे वि य णं तेसिं पुढविजोणियाणं आयत्ताणं जाव कूराणं सरीरा
 नाणावण्णा जाव मक्खायं । एगो चैव आलावगो सेसा तिणि नत्थि । अहावरं
 पुरक्खायं इहेगइया सत्ता उदगजोणिया उदगसंभवा जाव कम्मनियाणेणं तत्थवुक्कमा
 नाणाविहजोणिएसु उदएसु रुक्खत्ताए विउट्ठन्ति । ते जीवा तेसिं नाणाविहजोणियाणं

उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं उदगजोणियाणं रुक्खाणं सरीरा नाणावण्णा जाव मक्खायं । जहा पुढविजोणियाणं रुक्खाणं चत्तारि गमा अज्झारोहणं वि तहेव, तणाणं ओसहीणं हरियाणं चत्तारि आलावगा भाणियव्वा एक्केके, अहावरं पुरक्खायं इहेगइया सत्ता उदगजोणिया उदगसम्भवा जाव कम्मनियाणेणं तत्थवुक्कमा नाणाविहजोणिएसु उदएसु उदगत्ताए अवगत्ताए पणगत्ताए सेवालत्ताए कलम्बुगत्ताए हडत्ताए कसेरुगत्ताए कच्छभाणियत्ताए उप्पलत्ताए पउमत्ताए कुमुयत्ताए नल्लिणत्ताए सुभगत्ताए सोगन्धियत्ताए पोण्डरीयमहापोण्डरीयत्ताए सयपत्तत्ताए सहस्सपत्तत्ताए एवं कल्हारकोकणयत्ताए अरविन्दत्ताए तामरसत्ताए भिसभिसमुणालपुक्खलत्ताए पुक्खलच्छिभगत्ताए विउट्टन्ति । ते जीवा तेसिं नाणाविहजोणियाणं उदगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि य णं तेसिं उदगजोणियाणं उदगाणं जाव पुक्खलच्छिभगाणं सरीरा नाणावण्णा जाव मक्खायं । एगो चेव आलावगो ॥ ११ ॥ ६९० ॥ अहावरं पुरक्खायं इहेगइया सत्ता तेसिं चेव पुढवीजोणिएहिं रुक्खेहिं रुक्खजोणिएहिं रुक्खेहिं रुक्खजोणिएहिं मूलेहिं जाव बीएहिं, रुक्खजोणिएहिं अज्झारोहेहिं अज्झारोहजोणिएहिं अज्झारोहेहिं अज्झारोहजोणिएहिं मूलेहिं जाव बीएहिं, पुढविजोणिएहिं तणेहिं तणजोणिएहिं तणेहिं तणजोणिएहिं मूलेहिं जाव बीएहिं । एवं ओसहीहिं वि तिण्णि आलावगा एवं हरिएहिं वि तिण्णि आलावगा । पुढविजोणिएहिं वि आएहिं काएहिं जाव कूरेहिं उदगजोणिएहिं रुक्खेहिं रुक्खजोणिएहिं रुक्खेहिं रुक्खजोणिएहिं मूलेहिं जाव बीएहिं एवं अज्झारोहेहिं वि तिण्णि । तणेहिं पि तिण्णि आलावगा । ओसहीहिं पि तिण्णि, हरिएहिं पि तिण्णि, उदगजोणिएहिं, उदएहिं अवएहिं जाव पुक्खलच्छिभएहिं तसपाणत्ताए विउट्टन्ति ॥ ते जीवा तेसिं पुढवीजोणियाणं उदगजोणियाणं रुक्खजोणियाणं अज्झारोहजोणियाणं तणजोणियाणं ओसहीजोणियाणं हरियजोणियाणं रुक्खाणं अज्झारोहाणं तणाणं ओसहीणं हरियाणं मूलाणं जाव बीयाणं आयाणं कायाणं जाव कुरवाणं [कूराणं] उदगाणं अवगाणं जाव पुक्खलच्छिभगाणं सिणेहमाहारेन्ति । ते जीवा आहारेन्ति पुढवीसरीरं जाव सन्तं । अवरे वि य णं तेसिं रुक्खजोणियाणं अज्झारोहजोणियाणं तणजोणियाणं ओसहीजोणियाणं हरियजोणियाणं मूलजोणियाणं कन्दजोणियाणं जाव बीयजोणियाणं आयजोणियाणं कायजोणियाणं जाव कूरजोणियाणं उदगजोणियाणं अवगजोणियाणं जाव पुक्खलच्छिभगजोणियाणं तसपाणाणं सरीरा नाणावण्णा जाव मक्खायं ॥ १२ ॥ ६९१ ॥ अहावरं पुरक्खायं नाणाविहाणं मणुस्साणं । तं जहा-कम्मभूम-

गाणं अकम्मभूमगाणं अन्तरदीवगाणं आरियाणं मिलक्खुयाणं । तेसिं च णं अहा-
 बीएणं अहावगासेणं इत्थीए पुरिसस्स य कम्मकडाए जोणिए एत्थ णं मेहुणवत्तिआए
 (व) नामं संजोगे समुप्पज्जइ । ते दुहओ वि सिणेहं संचिणन्ति । तत्थ णं जीवा इत्थि-
 ताए पुरिसत्ताए नपुंसगत्ताए विउट्टन्ति, ते जीवा माओउयं पिउसुक्कं तं तदुभयं संसट्ठं
 कल्लसं किंविस्सं तं पढमत्ताए आहारमाहारैति तओ पच्छा जं से माया णाणाविहाओ
 रसविहीओ आहारमाहारैति तओ एगदेसेणं ओयमाहारैति अणुपुव्वेणं वुद्धा पलिपाग-
 मणुपव्वत्ता तओ कायाओ अभिनिवट्टमाणा इत्थि वेगया जणयंति पुरिसं वेगया जण-
 यंति, णपुंसगं वेगया जणयंति, ते जीवा डहरा समाणा माउक्खीरं सप्पि आहारैति
 आणुपुव्वेणं वुद्धा ओयणं कुम्मासं तसथावरे य पाणे ते जीवा आहारैति पुढविसरीरं
 जाव साहवियकडं संतं अवरेवि य णं तेसिं णाणाविहाणं मणुस्सगाणं कम्मभूमगाणं
 अकम्मभूमगाणं अन्तरदीवगाणं आरियाणं मिलक्खूणं सरीरा णाणावण्णा भवन्ति ति
 मक्खायं ॥ ६९२ ॥ अहावरं पुरक्खायं णाणाविहाणं जलचराणं पंचिंदियतिरिक्ख-
 जोणियाणं, तंजहा-मच्छाणं जाव सुंसुमाराणं तेसिं च णं अहाबीएणं अहावगासेणं
 इत्थीए पुरिसस्स य कम्मकडा तहेव जाव तओ पच्छा एगदेसेणं ओयमाहारैति
 आणुपुव्वेणं वुद्धा पलिपागमणुपव्वत्ता तओ कायाओ अभिनिवट्टमाणा अंडं वेगया
 जणयंति पोयं वेगया जणयंति, से अंडे उच्चिमज्जमाणे इत्थि वेगया जणयंति, पुरिसं
 वेगया जणयंति, णपुंसगं वेगया जणयंति, ते जीवा डहरा समाणा आउसिणेहमा-
 हारैति, आणुपुव्वेणं वुद्धा वणस्सइकायं तसथावरे य पाणे ते जीवा आहारैति
 पुढविसरीरं जाव संतं अवरेवि य णं तेसिं णाणाविहाणं जलचरपंचिंदियतिरिक्ख-
 जोणियाणं मच्छाणं सुंसुमाराणं सरीरा णाणावण्णा जावमक्खायं ॥ ६९३ ॥ अहावरं
 पुरक्खायं णाणाविहाणं चउप्पयथलयरपंचिंदियतिरिक्खजोणियाणं तंजहा एगखुराणं
 दुखुराणं गंडीपदानं सणप्पयाणं तेसिं च णं अहाबीएणं अहावगासेणं इत्थिपुरिसस्स य
 कम्म जाव मेहुणवत्तिए णामं संजोगे समुप्पज्जइ ते दुहओ सिणेहं संचिणंति तत्थणं
 जीवा इत्थिताए पुरिसत्ताए जाव विउट्टंति ते जीवा माउओयं पिउसुक्कं एवं जहा
 माणुस्साणं इत्थि वेगया जणयंति पुरिसंपि नपुंसगंपि ते जीवा डहरा समाणा
 माउक्खीरं सप्पि आहारैति आणुपुव्वेणं वुद्धा वणस्सइकायं तसथावरे य पाणे ते
 जीवा आहारैति पुढविसरीरं जाव संतं अवरेवि य णं तेसिं णाणाविहाणं चउप्प-
 यथलयरपंचिंदियतिरिक्खजोणियाणं एगखुराणं जाव सणप्पयाणं सरीरा णाणावण्णा
 जावमक्खायं ॥ ६९४ ॥ अहावरं पुरक्खायं णाणाविहाणं उरपरिसप्पथलयरपंचि-
 दियतिरिक्खजोणियाणं तंजहा-अहीणं अयगराणं आसालियाणं महोरगाणं तेसिं च

णं अहाबीएणं अहावगासेणं इत्थीए पुरिसस्स जाव एत्थणं मेहुणे एवं तं चेव नाणत्तं
 अंडं वेगइया जणयंति पोयं वेगइया जणयंति से अंडे उब्भिज्जमाणे इत्थि वेगइया
 जणयंति पुरिसंपि णपुंसगंपि, ते जीवा डहरा समाणा वाउकायमाहारेंति आणुपु-
 व्वेणं वुद्धा वणस्सइकायं तसथावरपाणे ते जीवा आहारेंति पुढविसरीरं जाव संतं
 अवरेवि य णं तेसिं णाणाविहाणं उरपरिसप्पथलयरपंचिदियतिरिक्ख० अहीणं जाव
 महोरगाणं सरीरा णाणावण्णा णाणागंधा जावमक्खायं ॥ ६९५ ॥ अहावरं पुर-
 क्खायं णाणाविहाणं भुयपरिसप्पथलयरपंचिदियतिरिक्खजोणियाणं, तंजहा—गोहाणं
 नउलाणं सिहाणं सरडाणं सल्लाणं सरघाणं खराणं घरकोइलियाणं विस्संभराणं
 मुसगाणं मंगुसाणं पयलाइयाणं विरालियाणं जोहाणं चउप्पाइयाणं तेसिं च णं
 अहाबीएणं अहावगासेणं इत्थीए पुरिसस्स य जहा उरपरिसप्पाणं तहा भाणियव्वं
 जाव साहवियकडं संतं अवरेवि य णं तेसिं णाणाविहाणं भुयपरिसप्पपंचिदियथलय-
 रतिरिक्खाणं तं० गोहाणं जावमक्खायं ॥ ६९६ ॥ अहावरं पुरक्खायं णाणाविहाणं
 खहचरपंचिदियतिरिक्खजोणियाणं, तंजहा—चम्मपक्खीणं लोमपक्खीणं समुग्ग-
 पक्खीणं विततपक्खीणं तेसिं च णं अहाबीएणं अहावगासेणं इत्थीए जहा
 उरपरिसप्पाणं नाणत्तं ते जीवा डहरा समाणा माउगात्तसिणेहमाहारेंति आणुपुव्वेणं
 वुद्धा वणस्सइकायं तसथावरे य पाणे ते जीवा आहारेंति पुढविसरीरं जाव संतं अवरे
 वि य णं तेसिं नाणाविहाणं खहचरपञ्चिन्दियतिरिक्खजोणियाणं चम्मपक्खीणं जाव
 मक्खायं ॥ १३ ॥ ६९७ ॥ अहावरं पुरक्खायं इहेगइया सत्ता नाणाविहजोणिया
 नाणाविहसंभवा नाणाविहवुक्कमा तज्जोणिया तस्संभवा तदुवक्कमा कम्मोवगा कम्म-
 नियाणेणं तत्थवुक्कमा नाणाविहाणं तसथावराणं पोग्गलाणं सरीरेसु वा सच्चित्तसु वा
 अच्चित्तसु वा अणुसूयत्ताए विउट्ठन्ति । ते जीवा तेसिं नाणाविहाणं तसथावराणं
 पाणाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे
 वि य णं तेसिं तसथावरजोणियाणं अणुसूयगाणं सरीरा नाणावण्णा जाव मक्खायं ।
 एवं दुरुवसंभवत्ताए । एवं खुरदुगत्ताए ॥ १४ ॥ ६९८ ॥ अहावरं पुरक्खायं इहे-
 गइया सत्ता नाणाविहजोणिया जाव कम्मनियाणेणं तत्थवुक्कमा नाणाविहाणं तसथा-
 वराणं पाणाणं सरीरेसु सच्चित्तसु वा अच्चित्तसु वा तं सरीरगं वायसंसिद्धं वा वाय-
 संगहियं वा वायपरिगगहियं उद्धवाएसु उद्धभाणी भवइ, अहेवाएसु अहेभाणी भवइ,
 तिरियवाएसु तिरियभाणी भवइ । तं जहा—ओसा हिमए महिया करए हरतणुए
 खुद्धोदए । ते जीवा तेसिं नाणाविहाणं तसथावराणं पाणाणं सिणेहमाहारेन्ति । ते
 जीवा आहारेन्ति पुढविसरीरं जाव सन्तं । अवरे वि य णं तेसिं तसथावरजोणि-

याणं ओसाणं जाव सुद्धोदगाणं सरीरा नाणावण्णा जावमक्खायं । अहावरं
 पुरक्खायं इहेगइया सत्ता उदगजोणिया उदगसंभवा जाव कम्मनियणेणं तत्थवुक्कमा
 तसथावरजोणिएसु उदएसु उदगत्ताए विउट्ठन्ति । ते जीवा तेसिं तसथावरजोणियाणं
 उदगाणं सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे
 वि य णं तेसिं तसथावरजोणियाणं उदगाणं सरीरा नाणावण्णा जाव मक्खायं ।
 अहावरं पुरक्खायं इहेगइया सत्ता उदगजोणियाणं जाव कम्मनियणेणं तत्थवुक्कमा
 उदगजोणिएसु उदएसु उदगत्ताए विउट्ठन्ति ते जीवा तेसिं उदगजोणियाणं उदगाणं
 सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं
 तेसिं उदगजोणियाणं उदगाणं सरीरा नाणावण्णा जाव मक्खायं । अहावरं
 पुरक्खायं इहेगइया सत्ता उदगजोणियाणं जाव कम्मनियणेणं तत्थवुक्कमा उदग-
 जोणिएसु उदएसु तसपाणत्ताए विउट्ठन्ति । ते जीवा तेसिं उदगजोणियाणं उदगाणं
 सिणेहमाहारेन्ति । ते जीवा आहारेन्ति पुढविसरीरं जाव सन्तं । अवरे वि य णं तेसिं
 उदगजोणियाणं तसपाणाणं सरीरा नाणावण्णा जाव मक्खायं ॥ १५ ॥ ६९९ ॥
 अहावरं पुरक्खायं इहेगइया सत्ता नाणाविहजोणिया जाव कम्मनियणेणं तत्थवुक्कमा
 नाणाविहाणं तसथावराणं पाणाणं सरीरेसु सच्चित्तसु वा अचित्तसु वा अगणिकायत्ताए
 विउट्ठन्ति । ते जीवा तेसिं नाणाविहाणं तसथावराणं पाणाणं सिणेहमाहारेन्ति ।
 ते जीवा आहारेन्ति पुढविसरीरं जाव सन्तं । अवरे वि य णं तेसिं तसथावरजोणियाणं
 अगणीणं सरीरा नाणावण्णा जावमक्खायं । सेसा तिणि आलावगा जहा उदगाणं ।
 अहावरं पुरक्खायं इहेगइया सत्ता नाणाविहजोणियाणं जाव कम्मनियणेणं तत्थ-
 वुक्कमा नाणाविहाणं तसथावराणं पाणाणं सरीरेसु सच्चित्तसु वा अचित्तसु वा वाउ-
 क्कायत्ताए विउट्ठन्ति । जहा अगणीणं तहा भाणियन्वा चत्तारि गमा ॥ १६ ॥
 ॥ ७०० ॥ अहावरं पुरक्खायं इहेगइया सत्ता नाणाविहजोणिया जाव कम्मनिया-
 णेणं तत्थवुक्कमा नाणाविहाणं तसथावराणं पाणाणं सरीरेसु सच्चित्तसु वा अचित्तसु
 वा पुढवित्ताए सक्करत्ताए वालुयत्ताए । इमाओ गाहाओ अणुगन्तव्वाओ-पुढवी य
 सक्करा वालुया य उवले सिला य लोणूसे । अय तउय तम्ब सीसग रुप सुवण्णय
 वइरे य (१) हरियाले हिंगुलए, मणोसिला सासगंजणपवाले, अब्भपडलब्भवा-
 लुय, बायरकाए मणिविहाणा (२) गोमेजए य रयए, अंके फलिहे य लोहियक्खेय,
 मरगयमसारगळे भुयमोयगइंदनीले य (३) चंदणगेरुयहंसगब्भे, पुलए सोगंधिए य
 बोद्धवे, चंदप्पमवेरुलए, जलकंते सूरकंते य (४) एयाओ एएसु भाणियन्वाओ
 गाहाओ जाव सूरकंतत्ताए विउट्ठन्ति, ते जीवा तेसिं नाणाविहाणं तसथावराणं

पाणाणं सिणेहमाहारेंति, ते जीवा आहारेंति पुढविसरीरं जाव संतं अवरे वि य णं
 तेसिं तसथावरजोणियाणं पुढवीणं जाव सूरकंताणं सरीरा णाणावण्णा जावमक्खायं,
 सेसं तिणिं आलावगा जहा उदगाणं ॥ ७०१ ॥ अहावरं पुरक्खायं सव्वे पाणा
 सव्वे भूया, सव्वे जीवा, सव्वे सत्ता, णाणाविहजोणिया, णाणाविहसंभवा, णाणा-
 विहवुक्कमा, सरीरजोणिया, सरीरसंभवा, सरीरवुक्कमा, सरीराहारा, कम्मोवगा,
 कम्मनियाणा, कम्मगईया, कम्मठिईया, कम्मणा चेव विप्परियासमुर्वेति ॥ ७०२ ॥
 सेएवमायाणह से एवमायाणित्ता आहारगुत्ते सहिए समिए सयाजए त्ति बेमि ॥ ७०३ ॥
 आहारपरिणयज्झयणं तइयं ॥

पच्चक्खाणकिरियज्झयणे चउत्थे

सुयं मे आउसं ! तेणं भगवया एवमक्खायं, इह खलु पच्चक्खाणकिरियाणा-
 मज्झयणे तस्सणं अयमठ्ठे पण्णत्ते, आया अपच्चक्खाणीयावि भवइ, आया अकिरिया
 कुसलेयावि भवइ, आया मिच्छासंठिएयावि भवइ, आया एगंतदंडेयावि भवइ, आया
 एगंतबालेयावि भवइ, आया एगंतसुत्तेयावि भवइ, आया अवियारमणवयणकायवक्के-
 यावि भवइ, आया अप्पडिहयअपच्चक्खायपावकम्मेयावि भवइ, एस खलु भगवया
 अक्खाए, असंजए, अविरए, अप्पडिहयपच्चक्खायपावकम्मे, सकिरिए, असंजुडे,
 एगंतइंडे, एगंतबाले, एगंतसुत्ते से बाले, अवियारमणवयकायवक्के, सुविणमवि ण
 पस्सइ पावे य से कम्मे कज्जइ ॥ ७०४ ॥ तत्थ चोयए पन्नवणं एवं वयासी, असंत-
 एणं मणेणं पावएणं असंतियाए वईए पावियाए, असंतएणं काएणं पावएणं अह-
 णंतस्स अमणक्खस्स, अवियारमणवयकायवक्कस्स सुविणमवि अपस्सओ पावकम्मे
 णो कज्जइ कस्सणं तं हेउं चोयए एवं बवीइ अन्नयरेण मणेणं पावएणं मणवत्तिए
 पावे कम्मे कज्जइ, अन्नयरीए वईए पावियाए वत्तिवत्तिए पावे कम्मे कज्जइ, अन्न-
 यरेणं काएणं पावएणं कायवत्तिए पावेकम्मे कज्जइ, हणंतस्स समणक्खस्स सवियार-
 मणवयकायवक्कस्स सुविणमवि पासओ, एवं गुणजाईयस्स पावेकम्मे कज्जइ, पुणरवि
 चोयए, एव बवीइ तत्थणं जे ते एवमाहंसु असंतएणं मणेणं पावएणं असंतियाए
 वईए पावियाए, असंतएणं काएणं पावएणं अहणंतस्स अमणक्खस्स अवियारमण-
 वयकायवक्कस्स सुविणमवि अपस्सओ पावे कम्मे कज्जइ, तत्थ णं जे ते एवमाहंसु
 मिच्छा ते एवमाहंसु ॥ ७०५ ॥ तत्थ पन्नवए चोयणं एवं वयासी-तं सम्मं जं मए
 पुव्वं वुत्तं असंतएणं मणेणं पावएणं, असंतियाए वईए पावियाए, असंतएणं काएणं
 पावएणं, अहणंतस्स अमणक्खस्स अवियारमणवयकायवक्कस्स सुविणमवि अपस्सओ

पावे कम्मे कज्जइ, तं सम्मं कस्स णं तं हेउं? आयरिय आह, तत्थ खलु भगवया छजीवणिकायहेऊ पण्णत्ता, तंजहा पुढाविकाइया जाव तसकाइया इच्चएहिं छहिं जीवणिकाएहिं आया अप्पडिहयपच्चक्खायपावकम्मे, निच्चं पसढविउवातचित्तदण्डे, तंजहा-पाणाइवाए जाव परिगंहे, कोहे जाव मिच्छादंसणसल्ले ॥ ७०६ ॥ आयरिय आह तत्थ खलु भगवया वहए दिट्ठन्ते पण्णत्ते । से जहानामए-वहए सिया गाहावइस्स वा गाहावइपुत्तस्स वा रण्णो वा रायपुरिसस्स वा खणं निहाय पविसिस्सामि खणं लद्धूणं वहिस्सामि संपहारेमाणे से किं नु हु नाम से वहए तस्स गाहावइस्स वा गाहावइपुत्तस्स वा रण्णो वा रायपुरिसस्स वा खणं निहाय पविसिस्सामि खणं लद्धूणं वहिस्सामि पहारेमाणे दिया वा राओ वा सुत्ते वा जागरमाणे वा अमित्तभूए मिच्छा-संठिए निच्चं पसढविउवायचित्तदण्डे भवइ? एवं वियागरेमाणे समियाए वियागरे चोयए-हंता भवइ । आयरिय आह-जहा से वहए तस्स गाहावइस्स वा तस्स गाहावइपुत्तस्स वा रण्णो वा रायपुरिसस्स वा खणं निहाय पविसिस्सामि खणं लद्धूणं वहिस्सामि ति पहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे, एवमेव बाले वि सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए मिच्छा-संठिए निच्चं पसढविउवायचित्तदण्डे । तं जहा-पाणाइवाए जाव मिच्छादंसणसल्ले । एवं खलु भगवया अक्खाए असंजए अविरए अप्पडिहयपच्चक्खायपावकम्मे सकि-रिए असंबुडे एगन्तदण्डे एगन्तबाले एगन्तसुत्ते यावि भवइ । से बाले अवियारम-णवयणकायवक्के सुविणमवि न पस्सइ पावे य से कम्मे कज्जइ । जहा से वहए तस्स वा गाहावइस्स जाव तस्स वा रायपुरिसस्स पत्तेयं पत्तेयं चित्तसमादाए दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे भवइ, एवमेव बाले सव्वेसिं पाणाणं जाव सव्वेसिं सत्ताणं पत्तेयं पत्तेयं चित्तसमादाए दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविउवायचित्तदण्डे भवइ ॥२॥७०७॥ नो इण्ठे समठे [चोयए] । इह खलु बहवे पाणा० जे इमेणं सरीरसमुस्सएणं नो दिट्ठा वा सुया वा नाभिमया वा विद्याया वा जेसिं नो पत्तेयं पत्तेयं चित्तसमायाए दिया वा राओ वा सुत्ते वा जागर-माणे वा अमित्तभूए मिच्छासंठिए निच्चं पसढविउवायचित्तदण्डे । तं जहा पाणाइवाए जाव मिच्छादंसणसल्ले ॥३॥७०८॥ आयरिय आह-तत्थ खलु भगवया दुवे दिट्ठन्ता पण्णत्ता । तं जहा-सज्जिदिट्ठन्ते य असज्जिदिट्ठन्ते य । से किं तं सज्जिदिट्ठन्ते? जे इमे सज्जिपञ्चिन्दिया पज्जत्तागा एएसिं णं छजीवनिकाए पडुच्च, तं जहा-पुढवी-

कार्यं जाव तसकार्यं । से एगइओ पुढवीकाएणं किच्चं करेइ वि कारवेइ वि । तस्स णं एवं भवइ-एवं खलु अहं पुढवीकाएणं किच्चं करेमि वि कारवेमि वि, नो चेव णं से एवं भवइ-इमेण वा इमेण वा से एएणं पुढवीकाएणं किच्चं करेइ वि कारवेइ वि । से णं तओ पुढवीकायाओ असंजयअविरयअप्पडिहयपच्चक्खायपावकम्मे यावि भवइ । एवं जाव तसकाए त्ति भाणियव्वं । से एगइओ छजीवनिकाएहिं किच्चं करेइ वि कारवेइ वि । तस्स णं एवं भवइ-एवं खलु छजीवनिकाएहिं किच्चं करेमि वि कारवेमि वि । नो चेव णं से एवं भवइ-इमेहिं वा २, से य तेहिं छहिं जीवनिकाएहिं जाव कारवेइ वि । से य तेहिं छहिं जीवनिकाएहिं असंजयअविरयअप्पडिहयपच्चक्खायपावकम्मे, तं जहा-पाणाइवाए जाव मिच्छादंसणसल्ले । एस खलु भगवया अक्खाए असंजए अविरए अप्पडिहयपच्चक्खायपावकम्मे सुविणमवि अपस्सओ । पावे य से कम्मे कज्जइ । से तं सन्निदिट्ठन्ते ॥ से किं तं असन्निदिट्ठन्ते ? जे इमे असन्निणो पाणा, तं जहा-पुढवीकाइया जाव वणस्सइकाइया छट्ठा वेगइया तसा पाणा, जेसिं नो तक्का इ वा सत्ता इ वा पत्ता इ वा मणा इ वा वई इ वा सयं वा करणाए अत्तेहि वा कारवेत्तए करन्तं वा समणुजाणित्तए, ते वि णं बाळे सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूया मिच्छासंठिया निच्चं पसढविउवायचित्तदंडा तं० पाणाइवाए जाव मिच्छादंसणसल्ले । इच्चेव जाव नो चेव मणो नो चेव वई पाणाणं जाव सत्ताणं दुक्खणयाए सोयणयाए जूरणयाए तिप्पणयाए पिट्ठणयाए परितप्पणयाए । ते दुक्खणसोयण जाव परितप्पणवहवन्धणपरिकिलेसाओ अप्पडिविरया भवन्ति । इति खलु से असन्निणो वि सत्ता अहोनिंसिं पाणाइवाए उवक्खाइज्जन्ति जाव अहोनिंसिं परिग्गहे उवक्खाइज्जन्ति जाव मिच्छादंसणसल्ले उवक्खाइज्जन्ति [एवं भूयवाई] । सव्वजोणिया वि खलु सत्ता सन्निणो हुच्चा असन्निणो होन्ति असन्निणो हुच्चा सन्निणो होन्ति, होच्चा सन्नी अदुवा असन्नी, तत्थ से अविविचित्ता अविधूणित्ता असंमुच्छित्ता अणणुतावित्ता असन्निकायाओ वा सन्निकाए संकमन्ति सन्निकायाओ वा असन्निकायं संकमन्ति, सन्निकायाओ वा सन्निकायं संकमन्ति असन्निकायाओ वा असन्निकायं संकमन्ति । जे एए सन्नि वा असन्नि वा सव्वे ते मिच्छायारा निच्चं पसढविउवायचित्तदण्डा । तं जहा-पाणाइवाए जाव मिच्छादंसणसल्ले । एवं खलु भगवया अक्खाए असंजए अविरए अप्पडिहयपच्चक्खायपावकम्मे सकिरिए असंबुडे एगन्तदण्डे एगन्तबाळे एगन्तसुत्ते से बाळे अवियारमणवयणकायवक्के सुविणमवि न पासइ पावे य से कम्मे कज्जइ ॥ ४ ॥ ७०९ ॥ चोयए-से किं कुव्वं किं कारवं क्हं संजयविर-

यप्पडिहयपच्चक्खायपावकम्मे भवइ? आयरिय आह-तत्थ खलु भगवया लज्जीव-
निकायहेऊ पन्नत्ता, तं जहा-पुढवीकाइया जाव तसकाइया । से जहानामए मम
अस्सारं दण्डेण वा अट्ठीण वा सुट्ठीण वा लेट्ठण वा कवालेण वा आतोडिजमाणस्स
वा जाव उवहविजमाणस्स वा जाव लोमुक्खणणमायमवि हिंसाकारं दुक्खं भयं
पडिसंवेदेमि, इच्चें जाण सव्वे पाणा जाव सव्वे सत्ता दण्डेण वा जाव कवालेण वा
आतोडिजमाणे वा हम्ममाणे वा तज्जिजमाणे वा तालिजमाणे जाव उवहविजमाणे
वा जाव लोमुक्खणणमायमवि हिंसाकारं दुक्खं भयं पडिसंवेदेन्ति । एवं नच्चा सव्वे
पाणा जाव सव्वे सत्ता न हन्तव्वा जाव न उह्वेयव्वा । एस धम्मे धुवे निइए सासए
समिच्च लोगं खेयन्नेहिं पवेइए । एवं से भिक्खू विरए पाणाइवायाओ जाव मिच्छा-
दंसणसल्लाओ । से भिक्खू नो दन्तपक्खालणेणं दन्ते पक्खालेज्जा, नो अञ्जणं नो
वमणं नो धूवणित्तं पि आइए । से भिक्खू अकिरिए अल्लसए अकोहे जाव अलोभे
उवसन्ते परिनिव्वुडे । एस खलु भगवया अक्खाए संजयविरयपडिहयपच्चक्खाय-
पावकम्मे अकिरिए संवुडे एगन्तपण्डिए भवइ त्ति वेमि ॥ ५ ॥ ७१० ॥ पच्च-
क्खाणकिरियज्झयणं चउत्थं ॥

आयारसुयज्झयणे पञ्चमे

आदाय बम्मचेरं च आसुपे इमं वई । अस्सि धम्मे अणायारं नायरेज्ज कयाइ
वि ॥ १ ॥ ७११ ॥ अणाइयं परिन्नाय अणवदग्गे त्ति वा पुणो । सासयमसासए
वा इइ दिट्ठिं न धारए ॥ २ ॥ ७१२ ॥ एएहिं दोहिं ठाणेहिं ववहारो न विज्जई ।
एएहिं दोहिं ठाणेहिं अणायारं तु जाणए ॥ ३ ॥ ७१३ ॥ समुच्छिहन्ति सत्थारो
सव्वे पाणा अणेत्तिसा । गण्ठिगा वा भविस्सन्ति सासयं त्ति व नो वए ॥ ४ ॥
॥ ७१४ ॥ एएहिं दोहिं ठाणेहिं ववहारो न विज्जई । एएहिं दोहिं ठाणेहिं अणायारं
तु जाणए ॥ ५ ॥ ७१५ ॥ जे केइ खुद्दगा पाणा अडुवा सन्ति महालया । सरिसं
तेहि वेरं त्ति असरिसं त्ति य नो वए ॥ ६ ॥ ७१६ ॥ एएहिं दोहिं ठाणेहिं ववहारो
न विज्जई । एएहिं दोहिं ठाणेहिं अणायारं तु जाणए ॥ ७ ॥ ७१७ ॥ अहाकम्माणि
भुज्जन्ति, अन्नमज्जे सकम्मुणा । उवलिते त्ति जाणिज्जा अणुवलिते त्ति वा पुणो
॥ ८ ॥ ७१८ ॥ एएहिं दोहिं ठाणेहिं ववहारो न विज्जई । एएहिं दोहिं ठाणेहिं
अणायारं तु जाणए ॥ ९ ॥ ७१९ ॥ जमिदं ओरालमाहारं कम्मणं च तहेव य ।
सव्वत्थ वीरियं अत्थि नत्थि सव्वत्थ वीरियं ॥ १० ॥ ७२० ॥ एएहिं दोहिं ठाणेहिं
ववहारो न विज्जई । एएहिं दोहिं ठाणेहिं अणायारं तु जाणए ॥ ११ ॥ ७२१ ॥

नत्थि लोए अलोए वा नेवं सच्चं निवेसए । अत्थि लोए अलोए वा एवं सच्चं निवेसए
 ॥ १२ ॥ ७२२ ॥ नत्थि जीवा अजीवा वा नेवं सच्चं निवेसए । अत्थि जीवा
 अजीवा वा एवं सच्चं निवेसए ॥ १३ ॥ ७२३ ॥ नत्थि धम्मो अधम्मो वा नेवं सच्चं
 निवेसए । अत्थि धम्मो अधम्मो वा एवं सच्चं निवेसए ॥ १४ ॥ ७२४ ॥ नत्थि
 बन्धे व मोक्खे वा नेवं सच्चं निवेसए । अत्थि बन्धे व मोक्खे वा एवं सच्चं निवे-
 सए ॥ १५ ॥ ७२५ ॥ नत्थि पुण्णे व पावे वा नेवं सच्चं निवेसए । अत्थि पुण्णे
 व पावे वा एवं सच्चं निवेसए ॥ १६ ॥ ७२६ ॥ नत्थि आसवे संवरे वा नेवं सच्चं
 निवेसए । अत्थि आसवे संवरे वा एवं सच्चं निवेसए ॥ १७ ॥ ७२७ ॥ नत्थि
 वेयणा निज्जरा वा नेवं सच्चं निवेसए । अत्थि वेयणा निज्जरा वा एवं सच्चं निवेसए
 ॥ १८ ॥ ७२८ ॥ नत्थि किरिया अकिरिया वा नेवं सच्चं निवेसए । अत्थि किरिया
 अकिरिया वा एवं सच्चं निवेसए ॥ १९ ॥ ७२९ ॥ नत्थि कोहे व माणे वा नेवं
 सच्चं निवेसए । अत्थि कोहे व माणे वा एवं सच्चं निवेसए ॥ २० ॥ ७३० ॥ नत्थि
 माया व लोभे वा नेवं सच्चं निवेसए । अत्थि माया व लोभे वा एवं सच्चं निवेसए
 ॥ २१ ॥ ७३१ ॥ नत्थि पेज्जे व दोसे वा नेवं सच्चं निवेसए । अत्थि पेज्जे व दोसे
 वा एवं सच्चं निवेसए ॥ २२ ॥ ७३२ ॥ नत्थि चाउरन्ते संसारे नेवं सच्चं निवेसए ।
 अत्थि चाउरन्ते संसारे एवं सच्चं निवेसए ॥ २३ ॥ ७३३ ॥ नत्थि देवो व देवी
 वा नेवं सच्चं निवेसए । अत्थि देवो व देवी वा एवं सच्चं निवेसए ॥ २४ ॥ ७३४ ॥
 नत्थि सिद्धी असिद्धी वा नेवं सच्चं निवेसए । अत्थि सिद्धी असिद्धी वा एवं सच्चं
 निवेसए ॥ २५ ॥ ७३५ ॥ नत्थि सिद्धी नियं ठाणं नेवं सच्चं निवेसए । अत्थि
 सिद्धी नियं ठाणं एवं सच्चं निवेसए ॥ २६ ॥ ७३६ ॥ नत्थि साहू असाहू वा नेवं
 सच्चं निवेसए । अत्थि साहू असाहू वा एवं सच्चं निवेसए ॥ २७ ॥ ७३७ ॥ नत्थि
 कल्लाण पावे वा नेवं सच्चं निवेसए । अत्थि कल्लाण पावे वा एवं सच्चं निवेसए
 ॥ २८ ॥ ७३८ ॥ कल्लाणे पावए वा वि ववहारो न विज्झइ । जं वेरं तं न जाणन्ति
 समणा बालपण्डिया ॥ २९ ॥ ७३९ ॥ असेसं अक्खयं वावि सव्वदुक्खे इ वा
 पुणो । वज्झा पाणा न वज्झ ति इइ वार्यं न नीसरे ॥ ३० ॥ ७४० ॥ दीसन्ति
 समियायारा भिक्खुणो साहुजीविणो । एए सिच्छोवजीवन्ति इइ दिट्ठिं न धारए
 ॥ ३१ ॥ ७४१ ॥ दक्खिणाए पडिल्लम्भो अत्थि वा नत्थि वा पुणो । न वियाग-
 रेज्ज मेहावी सन्तिमग्गं च वूहए ॥ ३२ ॥ ७४२ ॥ इच्चेहिं ठाणेहिं जिणदिट्ठेहिं
 संजए । धारयन्ते उ अप्पाणं आ मोक्खाए परिव्वएजासि ॥ ३३ ॥ ७४३ ॥ ति
 वेमि ॥ आयारसुयज्झयणं पञ्चमं ॥

अदइज्जयणे छट्ठे

पुराकडं अह इमं सुणेह मेगन्तयारी समणे पुरासी । से भिक्खुणो उवणेत्ता
 अणेगे आइक्खएण्हि पुढो वित्थरेणं ॥ १ ॥ ७४४ ॥ साऽऽजीविया पट्टवियाऽथिरेणं
 सभागओ गणओ भिक्खुमज्झे । आइक्खमाणो बहुज्जमत्थं न संधयाई अवरेण
 पुव्वं ॥ २ ॥ ७४५ ॥ एगन्तमेवं अदुवा वि एण्हि दोऽवन्नमन्नं न समेइ जम्हा ।
 पुव्वि च एण्हि च अणागयं वा एगन्तमेवं पडिसंधयाइ ॥ ३ ॥ ७४६ ॥ समिच्च
 लोगं तसथावरारणं खेमंकरे समणे माहणे वा । आइक्खमाणो वि सहस्समज्झे एग-
 न्तयं सारयई तहच्चे ॥ ४ ॥ ७४७ ॥ धम्मं कहन्तस्स उ नत्थि दोसो खन्तस्स
 दन्तस्स जिइन्दियस्स । भासाय दोसे य विवज्जगस्स गुणे य भासाय निसेवगस्स
 ॥ ५ ॥ ७४८ ॥ महव्वए पच्च अणुव्वए य तहेव पच्चासव संवरे य । विरइ इह
 स्सामणियम्मि पण्णे लवावसक्की समणे त्ति बेप्पि ॥ ६ ॥ ७४९ ॥ सीओदगं सेवउ
 बीयकायं आहायकम्मं तह इत्थियाओ । एगन्तचारिस्सिह अम्ह धम्मे तवस्सिणो
 नभिसमेइ पावं ॥ ७ ॥ ७५० ॥ सीओदगं वा तह बीयकायं आहायकम्मं तह
 इत्थियाओ । एयाइ जाणं पडिसेवमाणा अगारिणो अस्समणा भवन्ति ॥ ८ ॥
 ७५१ ॥ सिया य बीयोदगइत्थियाओ पडिसेवमाणा समणा भवन्तु । अगारिणो
 वि समणा भवन्तु सेवन्ति ऊ ते पि तहप्पगारं ॥ ९ ॥ ७५२ ॥ जे यावि बीयो-
 दगभोइ भिक्खू भिक्खं विहं जायइ जीवियट्ठी । ते नाइसंजोगमविप्पहाय कायोवगा
 नन्तकरा भवन्ति ॥ १० ॥ ७५३ ॥ इमं वयं तु तुम पाउकुव्वं पावाइणो गरिहसि
 सव्व एव । पावाइणो पुढो किट्ठयन्ता सयं सयं दिट्ठि करेन्ति पाउ ॥ ११ ॥
 ७५४ ॥ ते अन्नमज्जस्स उ गरहमाणा अक्खन्ति भो समणा माहणा य । सओ
 य अत्थी असओ य नत्थि गरहासु दिट्ठि न गरहासु किंचि ॥ १२ ॥ ७५५ ॥ न
 किंचि ह्वेगेऽभिधारयामो सदिट्ठिमग्गं तु करेसु पाउं । मग्गे इमे किट्ठिं आरिएण्हि
 अणुत्तरे सप्पुरिसेहिं अञ्जु ॥ १३ ॥ ७५६ ॥ उट्ठं अहे यं तिरियं दिसासु तसा य
 जे थावर जे य पाणा । भूयाहिंसंक्राभिदुगुञ्छमाणा नो गरहइ बुसिमं किंचि लोए
 ॥ १४ ॥ ७५७ ॥ आगन्तगारे आरामगारे समणे उ भीए न उवेइ वासं । दक्खा
 हु सन्ती बहवे मणुस्सा ऊणाइरित्ता य लवालवा य ॥ १५ ॥ ७५८ ॥ मेहाविणो
 सिक्खिय बुद्धिमन्ता सुत्तेहि अत्थेहि य निच्छयन्ता । पुच्छिस्सु मा णे अणगार अन्ने
 इइ संकमागो न उवेइ तत्थ ॥ १६ ॥ ७५९ ॥ नो कामकिच्चा न य बालकिच्चा
 रायाभियोगेण कुओ भएणं । वियागरेज्ज पसिणं न वा वि सकामकिच्चेण्हि आरियाणं
 ॥ १७ ॥ ७६० ॥ गन्ता च तत्था अदुवा अगन्ता वियागरेज्जा समियासुप्पे ।

अणारिया दंसणओ परिता इइ संकमाणो न उवेइ तत्थ ॥ १८ ॥ ७६१ ॥ पणं
जहा वणिए उदयट्ठी आयस्स हेउं पगरेइ सङ्गं । तयोवमे समणे नायपुत्ते इच्चेव
मे होइ मई वियक्को ॥ १९ ॥ ७६२ ॥ नवं न कुज्जा विहुणे पुराणं चिच्चाऽमई ताइ
य साह एवं । एयावया बम्भवइ ति वुत्ता तस्सोदयट्ठी समणे ति वेमि ॥ २० ॥
॥ ७६३ ॥ समारभन्ते वणिया भूयगांमं परिग्गहं चैव ममायमाणा । ते नाइसं-
जोगमविप्पहाय आयस्स हेउं पगरेन्ति सङ्गं ॥ २१ ॥ ७६४ ॥ वित्तेसिणो मेहुण-
संपगाढा ते भोयणट्ठा वणिया वयन्ति । वयं तु कामेसु अज्झोववन्ना अणारिया
पेमरसेसु गिद्धा ॥ २२ ॥ ७६५ ॥ आरम्भगं चैव परिग्गहं च अविउस्सिया
निस्सिय आयदण्डा । तेसिं च से उदए जं वयासी चउरन्तणन्ताय दुहाय नेह
॥ २३ ॥ ७६६ ॥ नेगन्ति नचन्ति य ओदए सो वयन्ति ते दो वि गुणोदयम्मि ।
से उदए साइमणन्तपत्ते तमुदयं साहयइ ताइ नाई ॥ २४ ॥ ७६७ ॥ अहिंसयं
सव्वपयाणुकम्पी धम्मे ठियं कम्मविवेगहेउं । तमायदण्डेहि समायरन्ता अबोहिए
ते पडिरुवमेयं ॥ २५ ॥ ७६८ ॥ पिण्णागपिण्डीमवि विद्ध सल्ले केई पएज्जा पुरिसे
इमे ति । अलाउयं वा वि कुमारए ति स लिप्पई पाणिवहेण अम्हं ॥ २६ ॥ ७६९ ॥
अहवा वि विद्धूण मिलक्खु सल्ले पिण्णागबुद्धीइ नरं पएज्जा । कुमारगं वा वि अला-
बुयं ति न लिप्पई पाणिवहेण अम्हं ॥ २७ ॥ ७७० ॥ पुरिसं च विद्धूण कुमारगं
वा सल्लमि केई पए जायतेए । पिण्णागपिण्डं सइमारुहेत्ता बुद्धाणं तं कप्पइ पारणाए
॥ २८ ॥ ७७१ ॥ सिणायगाणं तु दुवे सहस्से जे भोयए नियए भिक्खुयाणं ।
ते पुण्णखन्थं सुमहं जिणित्ता भवन्ति आरोप्प महन्त सत्ता ॥ २९ ॥ ७७२ ॥
अजोगरूवं इह संजयाणं पावं तु पाणा ण पसज्ज काउं । अबोहिए दोण्ह वि तं
असाहु वयन्ति जे यावि पडिस्सुणन्ति ॥ ३० ॥ ७७३ ॥ उद्धं अहे यं तिरियं
दिसासु विन्नाय लिङ्गं तसथावराणं । भूयाभिसंकाइ दुगुच्छमाणे वए करेजा व कुओ
विहऽत्थि ॥ ३१ ॥ ७७४ ॥ पुरिसे ति विज्जति न एवमत्थि अणारिए से पुरिसे तहा
हु । को संभवो पिण्णगपिण्डियाए वाया वि एसा बुइया असच्चा ॥ ३२ ॥ ७७५ ॥
वायाभियोगेण जमावहेज्जा नो तारिसं वायमुदाहरेज्जा । अट्ठाणमेयं वयणं गुणाणं
नो दिक्खिए बूयमुरालमेयं ॥ ३३ ॥ ७७६ ॥ लद्धे अट्ठे अहो एव तुब्भे जीवा-
णुभागो सुविचिन्तिए व । पुव्वं समुहं अवरं च पुट्ठे ओलोइए पाणितल्ले ठिए वा
॥ ३४ ॥ ७७७ ॥ जीवाणुभागं सुविचिन्तयन्ता आहारिया अन्नविहीएँ सोहिं ।
न वियागरे छन्नपओपजीवी एसोऽणुधम्मो इह संजयाणं ॥ ३५ ॥ ७७८ ॥ सिणा-
यगाणं तु दुवे सहस्से जे भोयए नियए भिक्खुयाणं । असंजए लोहियपाणि से ऊ

नियच्छई गरिहमिहेव लोए ॥ ३६ ॥ ७७९ ॥ थूलं उरब्भं इह मारियाणं उद्दिट्ठ-
 भत्तं च पगप्पएत्ता । तं लोणतेल्लेण उवक्खडेत्ता सपिप्पलीयं पगरन्ति मंसं ॥ ३७ ॥
 ॥ ७८० ॥ तं भुज्जमाणा पिसियं पभूयं नो ओवल्लिप्पामु वयं रएणं । इच्चेवमाहंसु
 अणज्जधम्मा अणारिया बाल रसेसु गिद्धा ॥ ३८ ॥ ७८१ ॥ जे यावि भुज्जन्ति
 तहप्पगारं सेवन्ति ते पावमजाणमाणा । मणं न एयं कुसला करेन्ति वाया वि
 एसा बुइया उ मिच्छा ॥ ३९ ॥ ७८२ ॥ सव्वेसि जीवाण दयड्डयाए सावज्जदोसं
 परिवज्जयन्ता । तस्संकिणो इसिणो नायपुत्ता उद्दिट्ठभत्तं परिवज्जयन्ति ॥ ४० ॥
 ॥ ७८३ ॥ भूयाभिसंक्राए दुगुच्छमाणा सव्वेसि पाणाण निहाय दण्डं । तम्हा न
 भुज्जन्ति तहप्पगारं एसोऽणुधम्मो इह संजयाणं ॥ ४१ ॥ ७८४ ॥ निगगन्थधम्मम्मि
 इमं समाहिं अस्सि सुट्ठिच्चा अणिहे चरेज्जा । बुद्धे सुणी सीलगुणोववेए अच्चत्थयं
 पाउणई सिलोणं ॥ ४२ ॥ ७८५ ॥ सिणायगाणं तु दुवे सहस्से जे भोयए नियए
 माहणाणं । ते पुण्णखन्धे सुमहऽज्जणित्ता भवन्ति देवा इइ वेयवाओ ॥ ४३ ॥ ७८६ ॥
 सिणायगाणं तु दुवे सहस्से जे भोयए नियए कुलालयाणं । से गच्छई लोलुवसंप-
 गाढे तिक्वाभितावी नरगाभिसेवी ॥ ४४ ॥ ७८७ ॥ दयावरं धम्म दुगुच्छमाणा
 वहावहं धम्म पसंसमाणा । एणं पि जे भोययई असीलं निवो निसं जाइ कुओऽसु-
 रेहिं ॥ ४५ ॥ ७८८ ॥ दुहओ वि धम्मम्मि समुट्ठियामो अस्सि सुट्ठिच्चा तह एस-
 कालं । आयारसीले बुइएह नाणी न-संपरायम्मि विसेसमत्थि ॥ ४६ ॥ ७८९ ॥
 अव्वत्तरुवं पुरिसं महन्तं सणातणं अक्खयमव्वयं च । सव्वेसु भूएसु वि सव्वओ
 से चन्दो व ताराहि समत्तरुवे ॥ ४७ ॥ ७९० ॥ एवं न मिज्जन्ति न संसरन्ति न
 माहणा खत्ति य वेस पेसा । कीडा य पक्खी य सरीसिवा य नरा य सव्वे तह
 देवलोगा ॥ ४८ ॥ ७९१ ॥ लोणं अयाणित्तिह केवलेणं कहन्ति जे धम्ममजाण-
 माणा । नासन्ति अप्पाण परं च नट्ठा संसार घोरम्मि अणोरपारे ॥ ४९ ॥ ७९२ ॥
 लोणं विजाणन्तिह केवलेणं पुण्णेण नाणेण समाहिजुत्ता । धम्मं समत्तं च कहन्ति
 जे उ तारन्ति अप्पाण परं च तिण्णा ॥ ५० ॥ ७९३ ॥ जे गरहियं ठाणमिहाव-
 सन्ति जे यावि लोए चरणोववेया । उदाहडं तं तु समं मईए अहाउसो विप्परिया-
 समेव ॥ ५१ ॥ ७९४ ॥ संवच्छरेणावि य एगमेणं बाणेण मारेउ महागयं तु ।
 सेसाण जीवाण दयड्डयाए वासं वयं वित्ति पक्कपयामो ॥ ५२ ॥ ७९५ ॥ संवच्छ-
 रेणावि य एगमेणं पाणं हणन्ता अणियत्तदोसा । सेसाण जीवाण वहेण लग्गा
 सिया य थोवं गिहिणो वि तम्हा ॥ ५३ ॥ ७९६ ॥ संवच्छरेणावि य एगमेणं पाणं
 हणन्ता समणव्वएसु । आयाहिए से पुरिसे अणजे न तारिसे केवल्लिणो भवन्ति

॥ ५४ ॥ ७९७ ॥ बुद्धस्स आणाए इमं समाहिं अस्सि सुठिच्चा तिविहेण ताई ।
तरिउं समुदं व महाभवोघं आयाणवं धम्ममुदाहरेज्ज ॥ ५५ ॥ ७९८ ॥ त्ति बेमि ॥
अद्दइज्जज्झयणं छट्ठं ॥

नालन्दइज्जज्झयणे सत्तमे

तेणं कालेणं तेणं समएणं रायगिहे नामं नयरे होत्था रिद्धित्थिमियसमिद्धे
(वण्णओ) जाव पडिरूवे । तस्स णं रायगिहस्स नयरस्स बहिया उत्तरपुरत्थिमे
दिसीभाए एत्थ णं नालन्दा नामं बाहिरिया होत्था अणेगभवणसयसंनिविट्ठा जाव
पडिरूवा । तत्थ णं नालन्दाए बाहिरियाए लेवे नामं गाहावई होत्था अट्ठे दित्ते
वित्ते वित्थिण्णविपुलभवणसयणासणजाणवाहणाइण्णे बहुधणवहुजायरुवरजए आओ-
गपओगसंपउत्ते विच्छट्ठियपउरभत्तपाणे बहुदासीदासगोमहिसगवेलगप्पभूए बहु-
जणस्स अपरिभूए यावि होत्था ॥ १ ॥ ७९९ ॥ से णं लेवे नामं गाहावई समणो-
वासए यावि होत्था अभिगयजीवाजीवे जाव विहरइ निग्गन्थे पावयणे निस्संकिए
निकंखिए निव्विइगिच्छे लद्धे गहियट्ठे पुच्छियट्ठे विणिच्छियट्ठे अभिगहियट्ठे अट्ठि-
मिज्जा पेमाणुरागरत्ते । अयमाउसो निग्गन्थे पावयणे, अयं अट्ठे, अयं परमट्ठे, सेसे
अणट्ठे, उस्सियफलिहे अप्पावयदुवारे चियत्तन्तेउरप्पवेसे चाउइस्समुद्धिउपुण्णमासि-
णीसु पडिपुण्णं पोसहं सम्मं अणुपालेमाणे समणे निग्गन्थे तहाविहेणं एसणिज्जेणं
असणपाणखाइमसाइमेणं पडिलाभेमाणे बट्ठहिं सीलव्वयगुणविरमणपच्चक्खाणपोसहो-
ववासेहिं अप्पाणं भावेमाणे एवं च णं विहरइ ॥ २ ॥ ८०० ॥ तस्स णं लेवस्स
गाहावइस्स नालन्दाए बाहिरियाए उत्तरपुरत्थिमे दिसिभाए एत्थ णं सेसदविया
नामं उदगसाला होत्था अणेगखम्मसयसंनिविट्ठा पासादीया जाव पडिरूवा । तीसे
णं सेसदवियाए उदगसालाए उत्तरपुरत्थिमे दिसिभाए एत्थ णं हत्थिजामे नामं
वणसण्डे होत्था किण्हे (वण्णओ वणसण्डस्स) ॥ ३ ॥ ८०१ ॥ तस्सि च णं
गिहपदेसम्मि भगवं गोयमे विहरइ, भगवं च णं अहे आरामंसि । अहे णं उदए
पेढालपुत्ते भगवं पासावच्चिजे निग्गण्ठे मेयज्जे गोत्तेणं जेणेव भगवं गोयमे तेणेव
उवागच्छइ, उवागच्छिता भगवं गोयमं एवं वयासी-आउसंतो गोयमा, अत्थि खलु
मे केइ पदेसे पुच्छियव्वे, तं च आउसो अहासुयं अहादरिसियं मे वियागरेहि
सवायं । भगवं गोयमे उदयं पेढालपुत्तं एवं वयासी-अवियाइ आउसो, सोच्चा
निसम्म जाणिसामो सवायं । उदए पेढालपुत्ते भगवं गोयमं एवं वयासी ॥ ४ ॥

॥ ८०२ ॥ आउसो गोयमा, अत्थि खलु कुमारपुत्तिा नाम समणा निग्गन्था
 दुम्हाणं पवयणं पवयमाणा गाहावई समणोवासणं उवसंपन्नं एवं पच्चक्खावेन्ति ।
 नन्नत्थ अभिओणं गाहावइचोरग्गहणविमोक्खणयाए तसेहिं पाणेहिं निहाय दण्डं ।
 एवं णं पच्चक्खन्ताणं दुप्पच्चक्खायं भवइ । एवं णं पच्चक्खावेमाणाणं दुप्पच्चक्खा-
 वियव्वं भवइ । एवं ते परं पच्चक्खावेमाणा अइयरन्ति सयं पइण्णं । कस्स णं तं
 हेउं ? संसारिया खलु पाणा, थावरा वि पाणा तसत्ताए पच्चायन्ति, तसा वि पाणा
 थावरत्ताए पच्चायन्ति, थावरकायाओ विप्पमुच्चमाणा तसकायंसि उववज्जन्ति, तसका-
 याओ विप्पमुच्चमाणा थावरकायंसि उववज्जन्ति । तेसिं च णं थावरकायंसि उवव-
 ण्णाणं ठाणमेयं वत्तं ॥ ५ ॥ ८०३ ॥ एवं णं पच्चक्खन्ताणं सुपच्चक्खायं भवइ । एवं णं
 पच्चक्खावेमाणाणं सुपच्चक्खावियं भवइ । एवं ते परं पच्चक्खावेमाणा नाइयरन्ति सयं
 पइण्णं नन्नत्थ अभियोगेणं गाहावइचोरग्गहणविमोक्खणयाए तसभूएहिं पाणेहिं निहाय
 दण्डं । एवमेव सइ भासाए परक्कमे विज्जमाणे जे ते कोहा वा लोहा वा परं पच्चक्खा-
 वेन्ति अयं पि नो उवएसे नो नेयाउए भवइ । अवियाइ आउसो गोयमा तुब्भं पि एवं
 रोयइ ? ॥ ६ ॥ ८०४ ॥ सवायं भगवं गोयमे उदयं पेढालपुत्तं एवं वयासी-आउसन्तो
 उदगा, नो खलु अम्हे एवं रोयइ । जे ते समणा वा माहणा वा एवमाइक्खन्ति जाव
 पव्वेन्ति नो खलु ते समणा वा निग्गन्था भासं भासन्ति, अणुतावियं खलु ते भासं
 भासन्ति, अब्भाइक्खन्ति खलु ते समणे समणोवासए वा जेहिं पि अणेहिं जीवेहिं
 पाणेहिं भूएहिं सत्तेहिं संजमयन्ति ताण वि ते अब्भाइक्खन्ति । कस्स णं तं हेउं ?
 संसारिया खलु पाणा, तसा वि पाणा थावरत्ताए पच्चायन्ति थावरा वि वा पाणा
 तसत्ताए पच्चायन्ति तसकायाओ विप्पमुच्चमाणा थावरकायंसि उववज्जन्ति, थावर-
 कायाओ विप्पमुच्चमाणा तसकायंसि उववज्जन्ति, तेसिं च णं तसकायंसि उववज्जणं
 ठाणमेयं अघत्तं ॥ ७ ॥ ८०५ ॥ सवायं उदए पेढालपुत्ते भगवं गोयसं एवं वयासी-
 कयरे खलु ते आउसन्तो गोयमा तुब्भे वयह तसा पाणा तसा आउ अन्नहा ?
 सवायं भगवं गोयमे उदयं पेढालपुत्तं एवं वयासी-आउसन्तो उदगा जे तुब्भे वयह
 तसभूया पाणा तसा ते वयं वयामो तसा पाणा, जे वयं वयामो तसा पाणा ते तुब्भे
 वयह तसभूया पाणा । एए सन्ति दुवे ठाणा तुल्ला एगट्ठा । किमाउसो इमे भे सुप्प-
 णीयतराए भवइ तसभूया पाणा तसा, इमे भे दुप्पणीयतराए भवइ-तसा पाणा
 तसा । तयो एगमाउसो पडिक्कोसह एक्कं अभिनन्दह । अयं पि भेदो से नो नेयाउए
 भवइ । भगवं च णं उदाहु-सन्तेगइया मणुस्सा भवन्ति, तेसिं च णं एवं वुत्तपुव्वं
 भवइ-नो खलु वयं संचाएमो मुण्डा भवित्ता अगाराओ अणगारियं पव्वइत्ताए ।

सावयं ण्हं अणुपुव्वेणं गुत्तस्स लिसिस्सामो । ते एवं संखवेन्ति, ते एवं संखं ठवयन्ति
 ते एवं संखं ठवयन्ति नत्थ अमिओएणं गाहावइचोरगहणविमोक्खणयाए तसेहिं
 पाणेहिं निहाय दण्डं । तं पि तेसिं कुसलमेव भवइ ॥८॥८०६॥ तसा वि वुच्चन्ति
 तसा तससंभारकडेणं कम्मणा नामं च णं अब्भुवगयं भवइ, तसाउयं च णं पलि-
 क्खीणं भवइ, तसकायद्विइया ते तओ आउयं विप्पजहन्ति । ते तओ आउयं
 विप्पजहिता थावरत्ताए पचायन्ति । थावरा वि वुच्चन्ति थावरा थावरसंभारकडेणं
 कम्मणा नामं च णं अब्भुवगयं भवइ थावराउयं च णं पलिक्खीणं भवइ । थावर-
 कायद्विइया ते तओ आउयं विप्पजहन्ति तओ आउयं विप्पजहिता भुज्जो परलो-
 इयत्ताए पचायन्ति । ते पाणा वि वुच्चन्ति, ते तसा वि वुच्चन्ति, ते महाकाया ते
 चिरद्विइया ॥ ९ ॥ ८०७ ॥ सवायं उदए पेढालपुत्ते भयवं गोयमं एवं वयासी-
 आउसन्तो गोयमा नत्थि णं से केइ परियाए जं णं समणोवासगस्स एगपाणाइ-
 वायविरए वि दण्डे निक्खित्ते । कस्स णं तं हेउं ? संसारिया खलु पाणा, थावरा
 वि पाणा तसत्ताए पचायन्ति, तसा वि पाणा थावरत्ताए पचायन्ति, थावरकायाओ
 विप्पमुच्चमाणा सव्वे तसकायंसि उव्वज्जन्ति, तसकायाओ विप्पमुच्चमाणा सव्वे
 थावरकायंसि उव्वज्जन्ति, तेसिं च णं थावरकायंसि उव्वज्जानं ठाणमेयं घत्तं ।
 सवायं भगवं गोयमे उदयं पेढालपुत्तं एवं वयासी-नो खलु आउसो अम्हाकं वत्तव्व-
 एणं तुब्भं चैव अणुप्पवाएणं अत्थि णं से परियाए जे णं समणोवासगस्स सव्व-
 पाणेहिं सव्वभूएहिं सव्वजीवेहिं सव्वसत्तेहिं दण्डे निक्खित्ते भवइ । कस्स णं तं
 हेउं ? संसारिया खलु पाणा, तसा वि पाणा थावरत्ताए पचायन्ति, थावरा वि पाणा
 तसत्ताए पचायन्ति, तसकायाओ विप्पमुच्चमाणा सव्वे थावरकायंसि उव्वज्जन्ति,
 थावरकायाओ विप्पमुच्चमाणा सव्वे तसकायंसि उव्वज्जन्ति, तेसिं च णं तसकायंसि
 उव्वज्जानं ठाणमेयं अघत्तं । ते पाणा वि वुच्चन्ति, ते तसा वि वुच्चन्ति, ते महा-
 काया ते चिरद्विइया । ते बहुयरगा पाणा जेहिं समणोवासगस्स सुपच्चक्खायं
 भवइ । ते अप्पयरगा पाणा जेहिं समणोवासगस्स अपच्चक्खायं भवइ । से महया
 तसकायाओ उव्वसन्तस्स उव्वट्ठियस्स पडिविरयस्स जं णं तुब्भे वा अज्जो वा एवं
 वयह-नत्थि णं से केइ परियाए जंसि समणोवासगस्स एगपाणाए वि दण्डे
 निक्खित्ते । अयं पि भेदे से नो नेयाउए भवइ ॥ १० ॥ ८०८ ॥ भगवं च णं
 उदाहु नियण्ठा खलु पुच्छियव्वा । आउसन्तो नियण्ठा इह खलु सन्तेगइया मणुस्सा
 भवन्ति । तेसिं च एवं वुत्तपुव्वं भवइ-जे इमे मुण्डे भवित्ता अगाराओ अणगारियं
 पव्वइए एसिं च णं आमरणन्ताए दण्डे निक्खित्ते । जे इमे अगारमावसन्ति एएसिं

णं आमरणन्ताए दण्डे नो निक्खित्ते । केई च णं समणा जाव वासाई चउपच्चमाई छट्ठइसमाई अप्पयरो वा भुज्जयरो वा देसं दूइज्जिता अगारमावसेज्जा ? हंता-
वसेज्जा । तस्स णं तं गारत्थं वहमाणस्स से पच्चक्खाणे भङ्गे भवइ ? नो इण्डे
समट्ठे । एवमेव समणोवासगस्स वि तसेहिं पाणेहिं दण्डे निक्खित्ते, थावरेहिं पाणेहिं
दण्डे नो निक्खित्ते । तस्स णं तं थावरकायं वहमाणस्स से पच्चक्खाणे नो भङ्गे
भवइ । से एवमायाणह ? नियण्ठा । एवमायाणियव्वं ॥ भगवं च णं उदाहु नियण्ठा
खलु पुच्छियव्वा-आउसन्तो नियण्ठा इह खलु गाहावई वा गाहावइपुत्तो वा
तहप्पगारेहिं कुलेहिं आगम्म धम्मं सवणवत्तिं उवसंकमेज्जा ? हन्ता उवसंकमेज्जा ।
तेसिं च णं तहप्पगाराणं धम्मं आइक्खियव्वे ? हन्ता आइक्खियव्वे । किं ते
तहप्पगारं धम्मं सोच्चा निसम्म एवं वएज्जा इणमेव निगगन्थं पावयणं सच्चं अणुत्तरं
केवलियं पडिपुण्णं संसुद्धं नेयाउयं सल्लकत्तणं सिद्धिमग्गं मुत्तिमग्गं निज्जाणमग्गं
निव्वाणमग्गं अवितहमसंदिद्धं सव्वदुक्खप्पहीणमग्गं । एत्थ ठिया जीवा सिज्जन्ति
बुज्जन्ति मुचन्ति परिणिव्वायन्ति सव्वदुक्खणमन्तं करेन्ति । तमाणाए तहा
गच्छामो तहा चिट्ठामो तहा निसीयामो तहा तुयट्ठामो तहा भुज्जामो तहा भासामो
तहा अब्भुट्ठामो तहा उट्ठाए उट्ठेमो ति पाणाणं भूयाणं जीवाणं सत्ताणं संजमेणं
संजमामो ति वएज्जा ? हन्ता वएज्जा । किं ते तहप्पगारा कप्पन्ति पव्वावित्तए ?
हन्ता कप्पन्ति । किं ते तहप्पगारा कप्पन्ति मुण्डावित्तए ? हन्ता कप्पन्ति । किं
ते तहप्पगारा कप्पन्ति सिक्खावित्तए ? हन्ता कप्पन्ति । किं ते तहप्पगारा
कप्पन्ति उवट्ठावित्तए ? हन्ता कप्पन्ति । तेसिं च णं तहप्पगाराणं सव्वपाणेहिं
जाव सव्वसत्तेहिं दण्डे निक्खित्ते ? हंता निक्खित्ते । से णं एयाहवेणं विहारेणं
विहरमाणा जाव वासाई चउपच्चमाई छट्ठइसमाई वा अप्पयरो वा भुज्जयरो वा देसं
दूइज्जेता अगारं वएज्जा ? हन्ता वएज्जा । तस्स णं सव्वपाणेहिं जाव सव्वसत्तेहिं
दण्डे नो निक्खित्ते ? नो इण्डे समट्ठे । से जे से जीवे जस्स परेणं सव्वपाणेहिं
जाव सव्वसत्तेहिं दण्डे नो निक्खित्ते । से जे से जीवे जस्स आरेणं सव्वपाणेहिं
जाव सत्तेहिं दण्डे निक्खित्ते । से जे से जीवे जस्स इयाणिं सव्वपाणेहिं जाव सत्तेहिं
दण्डे नो निक्खित्ते भवइ, परेणं असंजए आरेणं संजए, इयाणिं असंजए, असंज-
यस्स णं सव्वपाणेहिं जाव सत्तेहिं दण्डे नो निक्खित्ते भवइ । से एवमायाणह ?
नियण्ठा से एवमायाणियव्वं ॥ भगवं च णं उदाहु नियण्ठा खलु पुच्छियव्वा-
आउसन्तो नियण्ठा इह खलु परिव्वाइया वा परिव्वाइयाओ वा अन्नयरेहितो
तित्थाययणेहितो आगम्म धम्मं सवणवत्तिं उवसंकमेज्जा ? हन्ता उवसंकमेज्जा ।

किं तेसिं तहप्पगारेणं धम्मं आइक्खियव्वे ? हन्ता आइक्खियव्वे । तं चेव उव-
 द्धावित्तए जाव कप्पन्ति ? हन्ता कप्पन्ति । किं ते तहप्पगारा कप्पन्ति संभुजित्तए ?
 हन्ता कप्पन्ति । ते णं एयारूवेणं विहारेणं विहरमाणा तं चेव जाव अगारं वएज्जा ?
 हन्ता वएज्जा । ते णं तहप्पगारा कप्पन्ति संभुजित्तए ? नो इण्ढे समढ्ढे । से जे से
 जीवे जे परेणं नो कप्पन्ति संभुजित्तए । से जे से जीवे आरेणं कप्पन्ति संभुजित्तए ।
 से जे से जीवे जे इयाणिं नो कप्पन्ति संभुजित्तए । परेणं अस्समणे आरेणं समणे,
 इयाणिं अस्समणे, अस्समणेणं सद्धिं नो कप्पन्ति समणाणं निगमथाणं संभुजित्तए ।
 से एवमायाणह ? नियण्ठा से एवमायाणियव्वं ॥ ११ ॥ ८०९ ॥ भगवं च णं
 उदाहु सन्तेगइया समणोवासगा भवन्ति । तेसिं च णं एवं वुत्तपुव्वं भवइ-नो खलु
 वयं संचाएमो मुण्डा भवित्ता अगाराओ अणगारियं पव्वइत्तए । वयं णं चाउदसट्ठ-
 मुद्धिपुण्णिमासिणीसु पडिपुण्णं पोसहं सम्मं अणुपालेमाणा विहरिस्सामो । थूलगं
 पाणाइवायं पच्चक्खाइस्सामो, एवं थूलगं मुसावायं थूलगं अदिन्नादाणं थूलगं मेहुणं
 थूलगं परिग्गहं पच्चक्खाइस्सामो । इच्छापरिमाणं करिस्सामो, दुविहं तिविहेणं ।
 मा खलु ममद्वाए किंचि करेह वा करावेह वा तत्थ वि पच्चक्खाइस्सामो । ते णं
 अमोच्चा अपिच्चा असिणाइत्ता आसन्दीपेडियाओ पच्चोरहिता, ते तद्वा कालगया
 किं वत्तव्वं सिया-सम्मं कालगय ति ? वत्तव्वं सिया । ते पाणा वि वुच्चन्ति ते
 तसा वि वुच्चन्ति ते महाकाया ते चिरट्ठिइया । ते बहुयरगा पाणा जेहिं समणो-
 वासगस्स सुपच्चक्खायं भवइ । ते अप्पयरगा पाणा जेहिं समणोवासगस्स अपच्च-
 क्खायं भवइ । इति से महयाओ जं णं तुब्भे वयह तं चेव जाव अयं पि भेदे से
 नो नेयाउए भवइ ॥ भगवं च णं उदाहु सन्तेगइया समणोवासगा भवन्ति । तेसिं
 च णं एवं वुत्तपुव्वं भवइ-नो खलु वयं संचाएमो मुण्डा भवित्ता अगाराओ जाव
 पव्वइत्तए । नो खलु वयं संचाएमो चाउदसट्ठमुद्धिपुण्णिमासिणीसु जाव अणुपाले-
 माणे विहरित्तए । वयं णं अपच्छिममारणन्तिर्यं संलेहणाजूसणाजूसिया भत्तपाणं
 पडियाइक्खिया जाव कालं अणवकंखमाणा विहरिस्सामो । सव्वं पाणाइवायं पच्च-
 क्खाइस्सामो जाव सव्वं परिग्गहं पच्चक्खाइस्सामो तिविहं तिविहेणं मा खलु मम-
 द्वाए किंचि वि जाव आसन्दीपेडियाओ पच्चोरहिता एए तद्वा कालगया, किं वत्तव्वं
 सिया सम्मं कालगय ति ? वत्तव्वं सिया । ते पाणा वि वुच्चन्ति जाव अयं पि
 भेदे से नो नेयाउए भवइ ॥ भगवं च णं उदाहु सन्तेगइया मणुस्सा भवन्ति । तं
 जहा-महइच्छा महारम्भा महापरिग्गहा अहम्मिया जाव दुप्पडियाणंदा जाव
 सव्वाओ परिग्गहाओ अप्पडिविरया जावजीवाए जेहिं समणोवासगस्स आयाणसो


आमरणंताए दंढे निक्खित्ते ते तओ आउगं विप्पजहंति तओ भुज्जो सगमादाए दुग्गइगामिणो भवंति, ते पाणावि वुच्चंति ते तसावि वुच्चंति ते महाकाया ते चिर-
द्विइया ते बहुयरगा आयाणसो इति से महयाओ णं जणं तुब्भे वदह तं चेव
अयंपि भेदे से णो नेयाउए भवइ-भगवं च णं उदाहु सन्तेगइया मणुस्सा भवन्ति ।
तं जहा-अणारम्भा अपरिग्गहा धम्मिया धम्माणुया जाव सव्वाओ परिग्गहाओ
पडिविरया जावजीवाए, जेहिं समणोवासगस्स आयाणसो आमरणन्ताए दण्डे
निक्खित्ते, ते तओ आउगं विप्पजहन्ति, ते तओ भुज्जो सगमायाए सोग्गइगामिणो
भवन्ति । ते पाणा वि वुच्चन्ति जाव नो नेयाउए भवइ । भगवं च णं उदाहु
सन्तेगइया मणुस्सा भवन्ति । तं जहा-अप्पिच्छा अप्पारम्भा अप्पपरिग्गहा
धम्मिया धम्माणुया जाव एग्गहाओ परिग्गहाओ अप्पडिविरया, जेहिं समणोवास-
गस्स आयाणसो आमरणन्ताए दण्डे निक्खित्ते । ते तओ आउगं विप्पजहन्ति,
तओ भुज्जो सगमादाए सोग्गइगामिणो भवन्ति । ते पाणा वि वुच्चन्ति जाव नो
नेयाउए भवइ । भगवं च णं उदाहु सन्तेगइया मणुस्सा भवन्ति । तं जहा-
आरणिंया आवसहिंया गामणियन्ति या कण्हुईरहस्सिया, जेहिं समणोवासगस्स
आयाणसो आमरणन्ताए दण्डे निक्खित्ते भवइ । नो बहुसंजया नो बहुपडिविरया
पाणभूयजीवसत्तेहिं अप्पणा सच्चा मोसाई एवं विप्पडिवेदेन्ति-अहं न हन्तव्वो
अञ्जे हन्तव्वा जाव कालमासे कालं किच्चा अन्नयराई आन्नुरियाई किव्विसियाई
जाव उववत्तारो भवन्ति, तओ विप्पमुच्चमाणा भुज्जो एलमुयत्ताए तमोह्वत्ताए
पच्चायन्ति । ते पाणा वि वुच्चन्ति जाव नो नेयाउए भवइ । भगवं च णं उदाहु
सन्तेगइया पाणा दीहाउया जेहिं समणोवासगस्स आयाणसो आमरणन्ताए जाव
दण्डे निक्खित्ते भवइ । ते पुव्वामेव कालं करेन्ति करित्ता पारलोइयत्ताए पच्चा-
यन्ति । ते पाणा वि वुच्चन्ति, ते तसा वि वुच्चन्ति । ते महाकाया ते चिरद्विइया
ते दीहाउया ते बहुयरगा, पाणा जेहिं समणोवासगस्स सुपच्चक्खायं भवइ, जाव
नो नेयाउए भवइ । भगवं च णं उदाहु सन्तेगइया पाणा समाउया, जेहिं समणो-
वासगस्स आयाणसो आमरणन्ताए जाव दण्डे निक्खित्ते भवइ । ते सयमेव कालं
करेन्ति, करित्ता पारलोइयत्ताए पच्चायन्ति । ते पाणा वि वुच्चन्ति, तसा वि वुच्चन्ति,
ते महाकाया ते समाउया ते बहुयरगा जेहिं समणोवासगस्स सुपच्चक्खायं भवइ
जाव नो नेयाउए भवइ । भगवं च णं उदाहु सन्तेगइया पाणा अप्पाउया, जेहिं
समणोवासगस्स आयाणसो आमरणन्ताए जाव दण्डे निक्खित्ते भवइ । ते पुव्वामेव
कालं करेन्ति, करित्ता पारलोइयत्ताए पच्चायन्ति । ते पाणा वि वुच्चन्ति, ते तसा वि

वुचन्ति, ते महाकाया ते अप्पाउया ते बहुयरगा पाणा जेहिं समणोवासगस्स सुप-
 च्चक्खायं भवइ, जाव नो नेयाउए भवइ । भगवं च णं उदाहु सन्तेगइया समणो-
 वासगा भवन्ति । तेसिं च णं एवं वुत्तपुव्वं भवइ-नो खलु वयं संचाएमो मुण्डे
 भवित्ता जाव पव्वइत्तए । नो खलु वयं संचाएमो चाउदसट्ठमुद्धिपुण्णमासिणीसु
 पडिपुण्णं पोसहं अणुपालित्तए । नो खलु वयं संचाएमो अपच्छिमं जाव विहरित्तए
 वयं च णं सामाइयं देसावगासियं पुरत्था पाईणं वा पडीणं वा दाहिणं वा उदीणं
 वा एयावया जाव सव्वपाणेहिं जाव सव्वसत्तेहिं दण्डे निक्खित्ते सव्वपाणभूय-
 जीवसत्तेहिं खेमंकरे अहमंसि । तत्थ आरेणं जे तसा पाणा जेहिं समणोवासगस्स
 आयाणसो आमरणन्ताए दण्डे निक्खित्ते । तओ आउं विप्पजहन्ति, विप्पजहिता तत्थ
 आरेणं चेव जे तसा पाणा जेहिं समणोवासगस्स आयाणसो जाव तेसु पच्चायन्ति,
 जेहिं समणोवासगस्स सुपच्चक्खायं भवइ । ते पाणा वि जाव अयं पि भेदे जाव नेया-
 उए भवइ ॥ ८१० ॥ तत्थ आरेणं जे तसा पाणा जेहिं समणोवासगस्स आया-
 णसो आमरणन्ताए दण्डे निक्खित्ते ते तओ आउं विप्पजहन्ति । विप्पजहिता
 तत्थ आरेणं चेव जाव थावरा पाणा जेहिं समणोवासगस्स अट्ठाए दण्डे अनि-
 क्खित्ते अणट्ठाए दण्डे निक्खित्ते तेसु पच्चायन्ति । तेहिं समणोवासगस्स अट्ठाए दण्डे
 अनिक्खित्ते अणट्ठाए दण्डे निक्खित्ते, ते पाणा वि वुचन्ति, ते तसा ते चिरद्विइया
 जाव अयं पि भेदे से... । तत्थ जे आरेणं तसा पाणा जेहिं समणोवासगस्स
 आयाणसो आमरणन्ताए...तओ आउं विप्पजहन्ति विप्पजहिता तत्थ परेणं
 जे तसा थावरा पाणा जेहिं समणोवासगस्स आयाणसो आमरणन्ताए...तेसु
 पच्चायन्ति, तेहिं समणोवासगस्स सुपच्चक्खायं भवइ, ते पाणा वि जाव अयं पि
 भेदे से... । तत्थ जे आरेणं थावरा पाणा जेहिं समणोवासगस्स अट्ठाए दण्डे
 अणिक्खित्ते अणट्ठाए निक्खित्ते ते तओ आउं विप्पजहन्ति, विप्पजहिता तत्थ
 आरेणं चेव जे तसा पाणा जेहिं समणोवासगस्स आयाणसो आमरणन्ताए...
 तेसु पच्चायन्ति, तेसु समणोवासगस्स सुपच्चक्खायं भवइ, ते पाणा वि जाव अयं
 पि भेदे से... । तत्थ जे ते आरेणं जे थावरा पाणा जेहिं समणोवासगस्स अट्ठाए
 दण्डे अणिक्खित्ते अणट्ठाए निक्खित्ते, ते तओ आउं विप्पजहन्ति विप्पजहिता
 ते तत्थ आरेणं चेव जे थावरा पाणा जेहिं समणोवासगस्स अट्ठाए दण्डे अणि-
 क्खित्ते अणट्ठाए निक्खित्ते तेसु पच्चायन्ति । तेहिं समणोवासगस्स अट्ठाए अणट्ठाए
 ते पाणा वि जाव अयं पि भेदे से नो... । तत्थ जे ते आरेणं थावरा पाणा जेहिं
 समणोवासगस्स अट्ठाए दण्डे अणिक्खित्ते, अणट्ठाए निक्खित्ते तओ आउं विप्पज-

हन्ति । विप्पजहिता तत्थ परेणं जे तसथावरा पाणा जेहिं समणोवासगस्स आया-
णसो आमरणन्ताए० तेसु पच्चायन्ति । तेहिं समणोवासगस्स सुपच्चक्खायं भवइ ।
ते पाणा वि जाव अयं पि भेदे से नो नेयाउए भवइ । तत्थ जे ते परेणं तसथा-
वरा पाणा जेहिं समणोवासगस्स आयाणसो आमरणन्ताए० ते तओ आउं विप्पज-
हन्ति, विप्पजहिता तत्थ आरेणं जे तसा पाणा जेहिं समणोवासगस्स आयाणसो
आमरणन्ताए...तेसु पच्चायन्ति । तेहिं समणोवासगस्स सुपच्चक्खायं भवइ । ते
पाणा वि जाव अयं पि भेदे से नो नेयाउए भवइ । तत्थ जे ते परेणं तसथावरा
पाणा जेहिं समणोवासगस्स आयाणसो आमरणन्ताए...ते तओ आउं विप्पजहन्ति
विप्पजहिता तत्थ आरेणं जे थावरा पाणा जेहिं समणोवासगस्स अट्ठाए दण्डे
अणिक्खित्ते अणट्ठाए निक्खित्ते तेसु पच्चायन्ति, जेहिं समणोवासगस्स अट्ठाए
अणिक्खित्ते अणट्ठाए निक्खित्ते जाव ते पाणा वि जाव अयं पि भेदे से नो...।
तत्थ जे ते परेणं तसथावरा पाणा जेहिं समणोवासगस्स आयाणसो आमरणन्ताए...
ते तओ आउं विप्पजहन्ति । विप्पजहिता ते तत्थ परेणं चैव जे तसथावरा पाणा
जेहिं समणोवासगस्स आयाणसो आमरणन्ताए० तेसु पच्चायन्ति, जेहिं समणोवास-
गस्स सुपच्चक्खायं भवइ । ते पाणा वि जाव अयं पि भेदे से नो...। भगवं च णं
उदाहु न एयं भूयं न एयं भव्वं न एयं भविस्सइ जं णं तसा पाणा वोच्छिज्जिहन्ति
थावरा पाणा भविस्सन्ति, थावरा पाणा वि वोच्छिज्जिहन्ति तसा पाणा भवि-
स्सन्ति । अवोच्छिज्जेहिं तसथावरेहिं पाणेहिं जं णं तुब्भे वा अन्नो वा एवं वदह-
न्ति णं से केइ परियाए जाव नो नेयाउए भवइ ॥ ८११ ॥ भगवं च णं उदाहु
आउसन्तो उदगा जे खलु समणं वा माहणं वा परिभासेइ मित्ति मन्नन्ति आगमिता
नाणं आगमिता दंसणं आगमिता चरित्तं पावाणं कम्माणं अकरणयाए से खलु पर-
लोगपल्लिमन्थताए चिट्ठइ, जे खलु समणं वा माहणं वा नो परिभासइ मित्ति
मन्नन्ति आगमिता णाणं आगमिता दंसणं आगमिता चरित्तं पावाणं कम्माणं अक-
रणयाए से खलु परलोगविस्सुद्धीए चिट्ठइ । तए णं से उदए पेढालपुत्ते भगवं गोयमं
अणाढायमाणे जामेव दिसिं पाउब्भूए तामेव दिसिं पहारेत्थ गमणाए । भगवं च
णं उदाहु आउसन्तो उदगा जे खलु तहाभूयस्स समणस्स वा माहणस्स वा
अन्तिए एगमवि आरियं धम्मियं सुवयणं सोच्चा निसम्म अप्पणो चैव सुहुमाए
पडिलेहाए अणुत्तरं जोगखेमपयं लम्भिए समाणे सो वि ताव तं आढाइ परिजाणेइ
वन्दइ नमंसइ सकारेइ सम्माणेइ जाव कल्लणं मंगलं देवयं चेइयं पज्जुवासइ । तए
णं से उदए पेढालपुत्ते भगवं गोयमं एवं वयासी-एएसिं णं भन्ते पदाणं पुब्बि

अन्नाणयाए असवणयाए अबोहिए अणभिगमेणं अदिट्ठाणं असुयाणं अमुयाणं
 अविन्नायाणं अब्बोगडाणं अविगूढाणं अविच्छिन्नाणं अणिसिट्ठाणं अणिवूढाणं अणु-
 वहारियाणं एयमट्ठं नो सद्वहियं नो पत्तियं नो रोइयं । एएसिं णं भन्ते पदाणं एण्हि
 जाणयाए सवणयाए बोहिए जाव उवहारणयाए एयमट्ठं सद्वहामि पत्तियाभि रोएमि
 एवमेव से जहेयं तुब्भे वदह । तए णं भगवं गोयमे उदगं पेढालपुत्तं एवं वयासी
 सद्वहाहि णं अज्जो पत्तियाहि णं अज्जो रोएहि णं अज्जो एवमेयं जहा णं अम्हे
 वयामो । तए णं से उदए पेढालपुत्ते भगवं गोयमं एवं वयासी-इच्छामि णं भन्ते
 तुब्भं अन्तिए चाउज्जामाओ धम्माओ पच्चमहव्वइयं सपडिक्कमणं धम्मं उवसंप-
 ज्जिता णं विहरित्तए ॥ तए णं से भगवं गोयमे उदगं पेढालपुत्तं गहाय जेणेव
 समणे भगवं महावीरे तेणेव उवागच्छइ, उवागच्छिता तए णं से उदए पेढालपुत्ते
 समणं भगवं महावीरं तिक्खुत्तो आयाहिणं पयाहिणं करेइ, तिक्खुत्तो आयाहिणं
 पयाहिणं करित्ता वन्दइ नमंसइ वन्दिता नमंसित्ता एवं वयासी-इच्छामि णं भन्ते
 तुब्भं अन्तिए चाउज्जामाओ धम्माओ पच्चमहव्वइयं सपडिक्कमणं धम्मं उवसंप-
 ज्जिता णं विहरित्तए । तए णं समणे भगवं महावीरे उदगं एवं वयासी-अहासुहं
 देवाणुप्पिया मा पडिबन्धं करेहि । तए णं से उदए पेढालपुत्ते समणस्स भगवओ
 महावीरस्स अन्तिए चाउज्जामाओ धम्माओ पच्चमहव्वइयं सपडिक्कमणं धम्मं उव-
 संपज्जिता णं विहरइ त्ति वेमि ॥ १४ ॥ ८१२ ॥ नालन्दइज्जइयणं सत्तमं ॥

सूयगडं समत्तं ॥



णमो त्थु णं समणस्स भगवओ णायपुत्त महावीरस्स

ठाणे

पढमं ठाणं

सुयं मे आउसं । तेणं भगवया एव मक्खायं, एगे आया ॥ १ ॥ एगे दंडे
 ॥ २ ॥ एगा किरिया ॥ ३ ॥ एगे लोए ॥ ४ ॥ एगे अलोए ॥ ५ ॥ एगे धम्मो
 ॥ ६ ॥ एगे अहम्मो ॥ ७ ॥ एगे बंधे ॥ ८ ॥ एगे मोक्खे ॥ ९ ॥ एगे पुण्णे
 ॥ १० ॥ एगे पावे ॥ ११ ॥ एगे आसवे ॥ १२ ॥ एगे संवरे ॥ १३ ॥ एगा
 वेयणा ॥ १४ ॥ एगा णिज्जरा ॥ १५ ॥ एगे जीवे पाडिक्कएणं सरीरएणं ॥ १६ ॥
 एगा जीवाणं अपरिआइत्ता विगुव्वणा ॥ १७ ॥ एगे मणे ॥ १८ ॥ एगा वई
 ॥ १९ ॥ एगे कायवायामे ॥ २० ॥ एगा उप्पा ॥ २१ ॥ एगा वियती ॥ २२ ॥
 एगा वियत्ता ॥ २३ ॥ एगा गई ॥ २४ ॥ एगा आगई ॥ २५ ॥ एगे चयणे
 ॥ २६ ॥ एगे उववाए ॥ २७ ॥ एगा तक्का ॥ २८ ॥ एगा सज्जा ॥ २९ ॥ एगा
 मज्जा ॥ ३० ॥ एगा विञ्जू ॥ ३१ ॥ एगा वेयणा ॥ ३२ ॥ एगा छेयणा ॥ ३३ ॥
 एगा भेयणा ॥ ३४ ॥ एगे मरणे अंतिमसारीरियाणं ॥ ३५ ॥ एगे संसुद्धे अहाभूते
 पत्ते ॥ ३६ ॥ एगे दुक्खे जीवाणं ॥ ३७ ॥ एगे भूए ॥ ३८ ॥ एगा अहम्मपडिमा
 जं से आया पडिक्किलेसइ ॥ ३९ ॥ एगा धम्मपडिमा जं से आया पज्जवजाए
 ॥ ४० ॥ एगे मणे देवासुरमणुआणं तंसि तंसि समयंसि, एगा वई देवासुरमणुयाणं
 तंसि तंसि समयंसि, एगे कायवायामे देवासुरमणुयाणं तंसि तंसि समयंसि, एगे
 उट्ठाणकम्मबलवीरियपुरिसक्कारपरक्कमे देवासुरमणुयाणं तंसि तंसि समयंसि ॥ ४१ ॥
 एगे नाणे ॥ ४२ ॥ एगे दंसणे ॥ ४३ ॥ एगे चरित्ते ॥ ४४ ॥ एगे समए
 ॥ ४५ ॥ एगे पएसे ॥ ४६ ॥ एगे परमाणू ॥ ४७ ॥ एगा सिद्धी ॥ ४८ ॥ एगे
 सिद्धे ॥ ४९ ॥ एगे परिनिव्वाणे ॥ ५० ॥ एगे परिनिव्वुए ॥ ५१ ॥ एगे सहे
 ॥ ५२ ॥ एगे रुवे ॥ ५३ ॥ एगे गंधे ॥ ५४ ॥ एगे रसे ॥ ५५ ॥ एगे फासे
 ॥ ५६ ॥ एगे सुब्बिमसहे, एगे दुब्बिमसहे ॥ ५७ ॥ एगे सुरुवे एगे दुरुवे ॥ ५८ ॥
 एगे कीहे एगे हस्से ॥ ५९ ॥ एगे वट्ठे-एगे तंसे-एगे चउरंसे-एगे पिहुले-एगे
 परिमंडले ॥ ६० ॥ एगे किण्हे-एगे नीले एगे लोहि-एगे हाल्लि-एगे सुक्किले
 ॥ ६१ ॥ एगे सुब्बिमगंधे-एगे दुब्बिमगंधे ॥ ६२ ॥ एगे तित्ते-एगे कडुए-एगे कसाए
 एगे अंबिले-एगे महुरे ॥ ६३ ॥ एगे कक्खडे-जाव एगे लुक्खे ॥ ६४ ॥ एगे

पाणाइवाए जाव एगे परिग्गहे ॥ एगे कोहे जाव लोहे, एगे पेजे, एगे दोसे, जाव एगे परपरिवाए, एगा अरइइ, एगे मायामोसे एगे मिच्छादंसणसल्ले ॥ ६५ ॥ एगे पाणाइवायवेरमणे जाव परिग्गहवेरमणे, एगे कोहविवेगे, जाव मिच्छादंसणसल्लविवेगे ॥ ६६ ॥ एगा ओसप्पिणी एगा सुसमसुसमा जाव एगा दुसमदुसमा, एगा उस्सप्पिणी, एगा दुसमदुसमा जाव एगा सुसमसुसमा ॥ ६७ ॥ एगा णेरइयाणं वग्गणा, एगा असुरकुमारारणं वग्गणा, चउवीसदंडओ जाव एगा वेमाणियाणं वग्गणा ॥ ६८ ॥ एगा भवसिद्धियाणं वग्गणा, एगा अभवसिद्धियाणं वग्गणा, एगा भवसिद्धियाणं णेरइयाणं वग्गणा, एगा अभवसिद्धियाणं णेरइयाणं वग्गणा, एवं जाव एगा भवसिद्धियाणं वेमाणियाणं वग्गणा एगा अभवसिद्धियाणं वेमाणियाणं वग्गणा ॥ ६९ ॥ एगा सम्मदिट्ठियाणं वग्गणा, एगा मिच्छदिट्ठियाणं वग्गणा, एगा सम्ममिच्छदिट्ठियाणं वग्गणा, एगा सम्मदिट्ठियाणं णेरइयाणं वग्गणा, एगा मिच्छदिट्ठियाणं णेरइयाणं वग्गणा, एगा सम्ममिच्छादिट्ठियाणं नेरइयाणं वग्गणा, एवं जाव थणियकुमारारणं, एगा मिच्छदिट्ठियाणं पुढवीकाइयाणं वग्गणा, एवं जाव वणस्सइकाइयाणं, एगासम्मदिट्ठियाणं बेईदियाणं वग्गणा, एगा मिच्छदिट्ठियाणं बेईदियाणं वग्गणा, एवं तेईदियाणं चउरिंदियाणं वि सेसा जहा नेरइया, जाव एगा सम्ममिच्छदिट्ठियाणं वेमाणियाणं वग्गणा ॥ ७० ॥ एगा कण्हपक्खियाणं वग्गणा, एगा सुक्कपक्खियाणं वग्गणा, एगा कण्हपक्खियाणं नेरइयाणं वग्गणा, एगा सुक्कपक्खियाणं णेरइयाणं वग्गणा, एवं चउवीसदंडओवि भाणियव्वो ॥ ७१ ॥ एगा कण्हलेस्साणं वग्गणा, एगा णीललेस्साणं वग्गणा, एवं जाव सुक्कलेस्साणं वग्गणा, एगा कण्हलेस्साणं नेरइयाणं वग्गणा, जाव काउलेस्साणं नेरइयाणं वग्गणा, एवं जस्स जति लेस्साओ, भवणवइवाणमंतरपुढविआउवणस्सइकाइयाणं च चत्तारि लेस्साओ तेऊवाउबंदियते-इंदियचउरिंदियाणं तिन्निरेस्साओ पंचिंदियतिरिक्खजोणियाणं मणुस्साणं छल्लेस्साओ, जोइसियाणं एगा तेउलेस्सा, वेमाणियाणं तिन्निउवरिमलेस्साओ एगा कण्हलेस्साणं भवसिद्धियाणं वग्गणा, एगा कण्हलेस्साणं अभवसिद्धियाणं वग्गणा, एवं छसु वि लेस्सासु दो दो पयाणि भाणियव्वाणि, एगा कण्हलेस्साणं भवसिद्धियाणं नेरइयाणं वग्गणा, एगा कण्हलेस्साणं अभवसिद्धियाणं नेरइयाणं वग्गणा, एवं जस्स जति लेस्साओ तस्स तति भाणियव्वाओ, जाव वेमाणियाणं । एगा कण्हलेस्साणं समदिट्ठियाणं वग्गणा, एगा कण्हलेस्साणं मिच्छादिट्ठियाणं वग्गणा, एगा कण्हलेस्साणं सम्ममिच्छदिट्ठियाणं वग्गणा, एवं छसु वि लेस्सासु जाव वेमाणियाणं जेसिं जइ दिट्ठीओ, एगा कण्हलेस्साणं कण्हपक्खियाणं वग्गणा, एगा कण्हलेस्साणं सुक्कपक्खियाणं

वग्गणा, एवं जाव वैमाणियाणं, जस्स जइ लेस्साओ, एए अट्ठ चउवीसदंडया ॥ ७२ ॥
 एगा तित्थसिद्धाणं वग्गणा, एगा अतित्थसिद्धाणं वग्गणा, एवं जाव एगा एगसिद्धाणं
 वग्गणा, एगा अणेगसिद्धाणं वग्गणा, एगा पढमसमयसिद्धाणं वग्गणा, एवं जाव
 अणंतसमयसिद्धाणं वग्गणा ॥ ७३ ॥ एगा परमाणुपोग्गलाणं वग्गणा, एवं जाव
 एगा अणंतपएसियाणं खंधाणं पोग्गलाणं वग्गणा, एगा एगपएसोगाढाणं पोग्गलाणं
 वग्गणा, जाव एगा असंखेज्जपएसोगाढाणं पोग्गलाणं वग्गणा, एगा एगसमय-
 ठिइयाणं पोग्गलाणं वग्गणा, जाव असंखेज्जसमयठिइयाणं पोग्गलाणं वग्गणा,
 एगा एगगुणकालयाणं पोग्गलाणं वग्गणा, जाव एगा असंखेज्ज एगा अणंतगुण-
 कालयाणं पोग्गलाणं वग्गणा, एवं वण्णगंधरसफासा भाणियव्वा जाव एगा अणंत-
 गुणलुक्खाणं पोग्गलाणं वग्गणा, एगा जहन्नपएसियाणं खंधाणं वग्गणा, एगा
 उक्कोसपएसियाणं खंधाणं वग्गणा, एगा अजहन्नकोसपएसियाणं खंधाणं वग्गणा,
 एवं जहन्नोगाहणगाणं, उक्कोसोगाहणगाणं, अजहन्नकोसोगाहणगाणं, जहन्नठिइयाणं,
 उक्कोसठिइयाणं, अजहन्नकोसठिइयाणं, जहन्नगुणकालगाणं, उक्कोसगुणकालगाणं,
 अजहन्नकोसगुणकालगाणं, एवं वण्णगंधरसफासाणं वग्गणा भाणियव्वा, जाव एगा
 अजहन्नकोसगुणलुक्खाणं पोग्गलाणं वग्गणा ॥ ७४ ॥ एगे जुबुद्धीवे २ सव्वदीव-
 समुदाणं जाव अद्धगुलं च किंचि विसेसाहि ए परिकखेवेणं ॥ ७५ ॥ एगे समणे
 भगवं महावीरे इमीसे ओसप्पिणीए चउवीसाए तित्थगराणं चरमतित्थयरे सिद्धे
 बुद्धे सुते जाव सव्वदुक्खप्पहीणे ॥ ७६ ॥ अणुत्तरोववाइयाणं देवाणं एगा रयणी
 उद्धं उच्चतेणं पन्नता ॥ ७७ ॥ अद्दानक्खते एगतारे पन्नते, चित्तानक्खते एगतारे
 पन्नते, साईनक्खते एगतारे पन्नते ॥ ७८ ॥ एगपएसोगाढा पोग्गला अणंता
 पन्नता, एवमेगसमयठिइया, एगगुणकालगा पोग्गला अणंता पन्नता, जाव एगगुण-
 लुक्खा पोग्गला अणंता पन्नता ॥ ७९ ॥ पढमं ठाणं समत्तं ॥

जदत्थि णं लोए तं सव्वं दुपडोआरं, तंजहा-जीवा चेव अजीवा चेव, तसे चेव
 थावरे चेव, सजोणिया चेव अजोणिया चेव, साउया चेव अणाउया चेव, सईंदिया
 चेव अणिंदिया चेव, सवेयगा चेव अवेयगा चेव, सरुवि चेव अरुवि चेव, सपो-
 गला चेव अपोग्गला चेव, संसारसमावन्नगा चेव असंसारसमावन्नगा चेव, सासया
 चेव असासया चेव, आगासे चेव नो आगासे चेव, धम्मे चेव अधम्मे चेव, बंधे
 चेव मोक्खे चेव, पुण्णे चेव पावे चेव, आसवे चेव संवरे चेव, वेयणा चेव,
 णिज्जरा चेव ॥ ८० ॥ दो किरियाओ प० तंजहा-जीवकिरिया चेव अजीव-
 किरिया चेव, जीवकिरिया दुविहा पन्नता, तंजहा-सम्मत्तकिरिया चेव सिच्छत-

किरिया चेव, अजीवकिरिया दुविहा पन्नत्ता, तंजहा-इरियावहिया चेव संपराइया-
 चेव ॥ ८१ ॥ दो किरियाओ प० तंजहा-काइया चेव अहिगरणिया चेव,
 काइया किरिया दुविहा पन्नत्ता, तंजहा-अणुवरयकायकिरिया चेव, दुप्पउत्तकाय-
 किरिया चेव, अहिगरणियाकिरिया दुविहा पन्नत्ता, तंजहा-संजोयणाहिगरणिया
 चेव णिवत्तणाहिगरणिया चेव ॥ ८२ ॥ दो किरियाओ प० तंजहा-पाउसिया
 चेव पारियावणिया चेव, पाउसिया किरिया दुविहा पन्नत्ता, तंजहा-जीवपाउसिया
 चेव अजीवपाउसिया चेव, पारियावणियाकिरिया दुविहा पन्नत्ता, तंजहा-सहत्थपारि-
 यावणिया चेव, परहत्थपारियावणिया चेव ॥ ८३ ॥ दो किरियाओ प० तंजहा-
 पाणाइवायकिरिया चेव, अपच्चक्खाणकिरिया चेव, पाणाइवायकिरिया दुविहा
 पन्नत्ता, तंजहा-सहत्थपाणाइवायकिरिया चेव, परहत्थपाणाइवायकिरिया चेव,
 अपच्चक्खाणकिरिया दुविहा पन्नत्ता, तंजहा-जीवअपच्चक्खाणकिरिया चेव, अजीव-
 अपच्चक्खाणकिरिया चेव ॥ ८४ ॥ दो किरियाओ प० तंजहा-आरंभिया चेव
 परिग्गहिया चेव, आरंभियाकिरिया दुविहा पन्नत्ता, तंजहा-जीवआरंभिया चेव
 अजीवआरंभिया चेव, एवं परिग्गहियावि ॥ ८५ ॥ दो किरियाओ प० तंजहा-
 मायावत्तिआ चेव, मिच्छादंसणवत्तिआ चेव, मायावत्तिआकिरिया दुविहा पन्नत्ता,
 तंजहा-आयभाववंकणया चेव परभाववंकणया चेव, मिच्छादंसणवत्तिआकिरिया
 दुविहा पन्नत्ता, तंजहा-ऊणाइरित्तिमिच्छादंसणवत्तिआ चेव तव्वइरित्तिमिच्छादंसण-
 वत्तिआ चेव ॥ ८६ ॥ दो किरियाओ प० तंजहा-दिट्ठिया चेव पुट्ठिया चेव,
 दिट्ठियाकिरिया दुविहा प० तंजहा-जीवदिट्ठिया चेव अजीवदिट्ठिया चेव, एवं
 पुट्ठियावि ॥ ८७ ॥ दो किरियाओ प० तंजहा-पाडुच्चिया चेव सामंतोवणि-
 वाइया चेव, पाडुच्चियाकिरिया दुविहा पन्नत्ता, तंजहा-जीवपाडुच्चिया चेव अजीव-
 पाडुच्चिया चेव, एवं सामंतोवणिवाइयावि ॥ ८८ ॥ दो किरियाओ प० तंजहा-
 साहत्थिया चेव, णेसत्थिया चेव, साहत्थियाकिरिया दुविहा पन्नत्ता, तंजहा-जीव-
 साहत्थिया चेव, अजीवसाहत्थिया चेव, एवं णेसत्थियावि ॥ ८९ ॥ दो किरियाओ
 प० तंजहा-आणवणिया चेव वेयारणिया चेव, जहेव नेसत्थिया ॥ ९० ॥ दो
 किरियाओ प० तंजहा-अणाभोगवत्तिया चेव अणवकंखवत्तिया चेव, अणाभोग-
 वत्तियाकिरिया दुविहा पन्नत्ता, तंजहा-अणाउत्तआइयणया चेव, अणाउत्तपमज्जणया
 चेव, अणवकंखवत्तिया किरिया दुविहा पन्नत्ता, तंजहा-आयसरीरअणवकंखवत्तिया
 चेव, परसरीरअणवकंखवत्तिया चेव ॥ ९१ ॥ दो किरियाओ प० तंजहा-पेज्ज-
 वत्तिया चेव, दोसवत्तिया चेव, पेज्जवत्तियाकिरिया दुविहा पन्नत्ता, तंजहा-माया-

वत्तिया चेव, लोहवत्तिया चेव, दोसवत्तिया किरिया दुविहा पन्नत्ता, तंजहा-कोहे
 चेव माणे चेव ॥ ९२ ॥ दुविहा गरिहा पन्नत्ता, तंजहा-मणसावेगे गरिहइ वयसा-
 वेगे गरिहइ, अहवा गरिहा दुविहा प० दीहं एगे अद्धं गरिहइ, रहस्सं एगे अद्धं
 गरिहइ ॥ ९३ ॥ दुविहे पच्चक्खाणे, मणसावेगे पच्चक्खाइ, वयसावेगे पच्चक्खाइ,
 अहवा पच्चक्खाणे दुविहे, दीहं एगे अद्धं पच्चक्खाइ, रहस्सं एगे अद्धं पच्चक्खाइ
 ॥ ९४ ॥ दोहिं ठाणेहिं अणगारे संपन्ने अणाइयं अणवदग्गं दीहमद्धं चाउरंत-
 संसारकंतारं वीइवएज्जा, तंजहा-विज्जाए चेव, चरणेण चेव ॥ ९५ ॥ दो ठाणाई
 अपरियाणित्ता आया णो केवलपन्नत्तं धम्मं लभेज्जा सवणयाए, तंजहा-आरंभे चेव
 परिग्गहे चेव, दो ठाणाई अपरिआणित्ता आया णो केवलं बोहिं बुज्जेज्जा तं०
 आरंभे चेव परिग्गहे चेव, दो ठाणाई अपरियाइत्ता आया णो केवलं मुंडे भवित्ता
 आगाराओ अणगारिअं पव्वइज्जा, तंजहा-आरंभे चेव परिग्गहे चेव, एवं णो केवलं
 बंभचेरवासमावसेज्जा णो केवलेणं संजमेणं संजमेज्जा, णो केवलेणं संवरेणं संवरेज्जा,
 णो केवलं आभिणिबोहियणाणं उप्पाडेज्जा, एवं सुअणाणं, ओहिणाणं, मण-
 पज्जवणाणं, केवलणाणं ॥ ९६ ॥ दो ठाणाई परियाइत्ता आया केवलीपन्नत्तं धम्मं
 लभेज्जा सवणयाए, तंजहा-आरंभे चेव परिग्गहे चेव, एवं जाव केवलणाणमुप्पा-
 डेज्जा ॥ ९७ ॥ दोहिं ठाणेहिं आया केवलपन्नत्तं धम्मं लभेज्जा सवणयाए तंजहा
 सोच्चा चेव, अभिसमेच्चा चेव, जाव केवलणाणं उप्पाडेज्जा ॥ ९८ ॥ **दो समाओ**
पन्नत्ताओ, तंजहा-उरस्सप्पिणिसमा चेव, ओसप्पिणिसमा चेव ॥ ९९ ॥
 दुविहे उम्माए पन्नत्ते, तंजहा-जक्खावेसे चेव मोहणिजस्स चेव कम्मस्स उदएणं,
 तत्थणं जे से जक्खावेसे से णं सुहवेयतराए चेव सुहविमोयतराए चेव, तत्थणं जे से
 मोहणिजस्स कम्मस्स उदएणं, से णं दुहवेयतराए चेव दुहविमोयतराए चेव ॥ १०० ॥
 दो दंडा पन्नत्ता, तंजहा-अट्ठादंडे चेव, अणट्ठादंडे चेव, नेरइयाणं दो दंडा पन्नत्ता
 तंजहा-अट्ठादंडे चेव अणट्ठादंडे य एवं चउवीसदंडओ जाव वेमाणियाणं ॥ १०१ ॥
 दुविहे दंसणे० सम्मदंसणे चेव, सिच्छादंसणे चेव, सम्मदंसणे दुविहे० णिसग्ग-
 सम्मदंसणे चेव, अभिगमसम्मदंसणे चेव, णिसग्गसम्मदंसणे दुविहे०, पडिवाई चेव,
 अपडिवाई चेव, अभिगमसम्मदंसणे दुविहे०, पडिवाई चेव, अपडिवाई चेव,
 सिच्छादंसणे दुविहे० तं जहा अभिग्गहियसिच्छादंसणे चेव, अणभिग्गहियसिच्छा-
 दंसणे चेव, अभिग्गहियसिच्छादंसणे दुविहे० सपज्जवसिए चेव, अपज्जवसिए चेव,
 एवमणभिग्गहियसिच्छादंसणेवि ॥ १०२ ॥ दुविहे नाणे० पच्चक्खे चेव, परोक्खे
 चेव, पच्चक्खनाणे दुविहे० केवलनाणे चेव, नो केवलनाणे चेव, केवलनाणे दुविहे०

भवत्थकेवलनाणे चेव, सिद्धकेवलनाणे चेव, भवत्थकेवलनाणे दुविहे० सजोगिभवत्थ-
 केवलनाणे चेव, अजोगिभवत्थकेवलनाणे चेव, सजोगिभवत्थकेवलनाणे दुविहे०
 पढमसमयसजोगिभवत्थकेवलनाणे चेव, अपढमसमयसजोगिभवत्थकेवलनाणे चेव,
 अहवा, चरिमसमयसजोगिभवत्थकेवलनाणे चेव, अचरिमसमयसजोगिभवत्थकेवल-
 नाणे चेव, एवं अजोगिभवत्थकेवलनाणे वि, सिद्धकेवलनाणे दुविहे०, अणंतर-
 सिद्धकेवलनाणे चेव, परंपरसिद्धकेवलनाणे चेव, अणंतरसिद्धकेवलनाणे दुविहे०
 एकाणंतरसिद्धकेवलनाणे चेव, अणेक्काणंतरसिद्धकेवलनाणे चेव, परंपरसिद्धकेवल-
 नाणे दुविहे० एकपरंपरसिद्धकेवलनाणे चेव, अणेकपरंपरसिद्धकेवलनाणे चेव, णो
 केवलनाणे दुविहे० ओहिनाणे चेव, मणपज्जवनाणे चेव, ओहिनाणे दुविहे० भव-
 पच्चइए चेव, खओवसमिए चेव, दोण्हं भवपच्चइए० देवाणं चेव, णेरइयाणं चेव,
 दोण्हं खओवसमिए० मणुस्साणं चेव, पंचिदियतिरिक्खजोणियाणं चेव, मणपज्जव-
 नाणे दुविहे० उज्जुमई चेव, विउलमई चेव, परोक्खणाणे दुविहे० आभिणिबोहिय-
 नाणे चेव, सुअणाणे चेव, आभिणिबोहियणाणे दुविहे० सुयनिस्सिए चेव, असुय-
 निस्सिए चेव, सुयनिस्सिए दुविहे० अत्थोग्गहे चेव, वंजणोग्गहे चेव, असुय-
 निस्सिएवि एवमेव, सुयणाणे दुविहे० अंगपविट्ठे चेव, अंगबाहिरे चेव, अंगबाहिरे
 दुविहे० आवस्सए चेव आवस्सयवइरित्ते चेव, आवस्सयवइरित्ते दुविहे० कालिए
 चेव, उक्कालिए चेव ॥ १०३ ॥ दुविहे धम्मो० सुअधम्मो चेव, चरित्तधम्मो चेव,
 सुअधम्मो दुविहे० **सुत्तसुअधम्मो** चेव, **अत्थसुअधम्मो** चेव, चरित्तधम्मो
 दुविहे० अगारचरित्तधम्मो चेव, अणगारचरित्तधम्मो चेव, संजमे दुविहे०
 सरागसंजमे चेव, वीयरारागसंजमे चेव, सरागसंजमे दुविहे० सुहुमसंपराय-
 सरागसंजमे चेव वादरसंपरायसारागसंजमे चेव, सुहुमसंपरायसारागसंजमे दुविहे०
 पढमसमयसुहुमसंपरायसारागसंजमे चेव, अपढमसमयसुहुमसंपरायसारागसंजमे चेव,
 अहवा चरिमसमयसुहुमसंपरायसारागसंजमे चेव, अचरिमसमयसुहुमसंपरायसाराग-
 संजमे चेव, अहवा सुहुमसंपरायसारागसंजमे दुविहे० संकिळेसमाणए चेव, विउज्झ-
 माणए चेव, वादरसंपरायसारागसंजमे दुविहे० पढमसमयवादरसंपरायसारागसंजमे,
 अपढमसमयवादरसंपरायसारागसंजमे, अहवा चरिमसमयवादरसंपरायसारागसंजमे,
 अचरिमसमयवादरसंपरायसारागसंजमे, अहवा वादरसंपरायसारागसंजमे दुविहे०
 पडिवाइए चेव, अपडिवाइए चेव, वीयरारागसंजमे दुविहे० उवसंतकसायवीयराराग-
 संजमे चेव, खीणकसायवीयरारागसंजमे चेव, उवसंतकसायवीयरारागसंजमे दुविहे०
 पढमसमयउवसंतकसायवीयरारागसंजमे चेव, अपढमसमयउवसंतकसायवीयराराग-

संजमे चेव, अहवा चरिमसमयउवसंतकसायवीयरागसंजमे चेव, अचरिमसमय-
उवसंतकसायवीयरागसंजमे चेव, खीणकसायवीयरागसंजमे दुविहे० छउमत्थखीण-
कसायवीयरागसंजमे चेव, केवलखीणकसायवीयरागसंजमे चेव, छउमत्थखीण-
कसायवीयरागसंजमे दुविहे० सयंबुद्धछउमत्थखीणकसायवीयरागसंजमे, बुद्धबोहिय-
छउमत्थखीणकसायवीयरागसंजमे, सयंबुद्धछउमत्थखीणकसायवीयरागसंजमे दुविहे०
पढमसमयसयंबुद्धछउमत्थखीणकसायवीयरागसंजमे, अपढमसमयसयंबुद्धछउमत्थ-
खीणकसायवीयरागसंजमे, अहवा चरिमसमयसयंबुद्धछउमत्थखीणकसायवीयराग-
संजमे, अचरिमसमयसयंबुद्धछउमत्थखीणकसायवीयरागसंजमे, बुद्धबोहियछउमत्थ-
खीणकसायवीयरागसंजमे दुविहे० पढमसमयबुद्धबोहियछउमत्थखीणकसायवीयराग-
संजमे, अपढमसमयबुद्धबोहियछउमत्थखीणकसायवीयरागसंजमे, अहवा चरिमसम-
यबुद्धबोहियछउमत्थखीणकसायवीयरागसंजमे अचरिमसमयबुद्धबोहियछउमत्थखीण-
कसायवीयरागसंजमे, केवलखीणकसायवीयरागसंजमे दुविहे० सजोगिकेवलखीणक-
सायवीयरागसंजमे, अजोगिकेवलखीणकसायवीयरागसंजमे, सजोगिकेवलखीणक-
सायवीयरागसंजमे दुविहे० पढमसमयसजोगिकेवलखीणकसायवीयरागसंजमे अपढ-
मसमयसजोगिकेवलखीणकसायवीयरागसंजमे, अहवा चरिमसमयसजोगिकेवलखी-
णकसायवीयरागसंजमे, अचरिमसमयसजोगिकेवलखीणकसायवीयरागसंजमे, अजो-
गिकेवलखीणकसायवीयरागसंजमे दुविहे० पढमसमयअजोगिकेवलखीणकसायवी-
यरागसंजमे, अपढमसमयअजोगिकेवलखीणकसायवीयरागसंजमे, अहवा चरिमस-
मयअजोगिकेवलखीणकसायवीयरागसंजमे, अचरिमसमयअजोगिकेवलखीणकसाय-
वीयरागसंजमे ॥ १०४ ॥ दुविहा पुढविकाइया पन्नत्ता, तंजहा-सुहुमा चेव, बायरा
चेव, एवं जाव दुविहा वणस्सइकाइया पन्नत्ता तंजहा-सुहुमा चेव बायरा चेव,
दुविहा पुढविकाइया पन्नत्ता तंजहा-पज्जत्तगा चेव, अपज्जत्तगा चेव, एवं जाव
वणस्सइकाइया, दुविहा पुढविकाइया पन्नत्ता, तंजहा-परिणया चेव, अपरिणया
चेव, जाव वणस्सइकाइया, दुविहा दव्वा० परिणया चेव अपरिणया चेव, दुविहा
पुढविकाइया पन्नत्ता तंजहा-गइसमावन्नगा चेव अगइसमावन्नगा चेव, एवं जाव
वणस्सइकाइया, दुविहा दव्वा पन्नत्ता तंजहा-गइसमावन्नगा चेव अगइसमावन्नगा
चेव, दुविहा पुढविकाइया० अणंतरोगाढगा चेव परंपरोगाढगा चेव, जाव दव्वा
॥ १०५ ॥ दुविहे काळे० ओसप्पिणीकाले चेव, उस्सप्पिणीकाले चेव ॥ १०६ ॥
दुविहे आगासे० लोगागासे चेव, अलोगागासे चेव ॥ १०७ ॥ णेरइयाणं दो
सरीरगा० अब्भंतरगे चेव, बाहिरगे चेव, अब्भंतरए कम्मए, बाहिरए वेउब्बिए,

एवं देवाणं भाणियव्वं, पुढविकाइयाणं दो सरीरगा० अब्भंतरगे चेव, बाहिरगे चेव, अब्भंतरए कम्मए, बाहिरगे उरालिए, जाव वणस्सइकाइयाणं, बेईदियाणं दोसरीरगा० अब्भंतरए चेव बाहिरए चेव, अब्भंतरए कम्मए, अट्ठिमंससोणित-बद्धे बाहिरए उरालिए, जाव चउरिंदियाणं, पंचेदियतिरिक्खजोणियाणं दो सरीरगा० अब्भंतरगे चेव, बाहिरगे चेव, अब्भंतरगे कम्मए, अट्ठिमंससोणियण्हा-रुच्छिराबद्धे, बाहिरए उरालिए, मणुस्साणवि एवं चेव, विग्गहगतिसमावन्नगाणं नेरइयाणं दो सरीरगा० तेयए चेव कम्मए चेव, निरंतरं जाव वेमाणियाणं, नेरइयाणं दोहिं ठाणेहिं सरीरुप्पत्ती सिया, तं० रागेणं चेव, दोसेणं चेव, जाव वेमाणियाणं, नेरइयाणं दुट्ठानिब्वत्तिए सरीरगे० रागनिब्वत्तिए चेव दोसनिब्वत्तिए चेव, जाव वेमाणियाणं ॥ १०८ ॥ दो काया० तसकाए चेव, थावरकाए चेव, तसकाए दुविहे पणत्ते० भवसिद्धिए चेव, अभवसिद्धिए चेव, एवं थावरकाए वि ॥ १०९ ॥ दो दिसाओ अभिगिज्झ कप्पइ णिग्गंथाणं वा, णिग्गंशीणं वा, पव्वावित्तए, पाईणं चेव, उदीणं चेव, एवं मुंडावित्तए सिक्खावित्तए, उवट्ठावित्तए, संमुंजित्तए, संवसित्तए, सज्झायं उदिसित्तए, सज्झायं समुदिसित्तए, सज्झायमणु-जाणित्तए, आलोइत्तए, पडिक्कमित्तए, निंदित्तए, गरिहित्तए, विउट्ठित्तए, विसोहित्तए, अकरणयाए अब्भुट्ठित्तए, अहारिहं पायच्छित्तं तवोक्कम्मं पडिवज्जित्तए, दो दिसाओ अभिगिज्झ कप्पइ णिग्गंथाणं वा णिग्गंशीणं वा, अपच्छिममारणंतिए-संलेहणा-इस्सणा इस्सियाणं भत्तपाणपडियाइक्खियाणं पाओवगयाणं कालं अणवक्खमाणाणं विहरित्तए, तंजहा-पाईणं चेव उदीणं चेव ॥ ११० ॥ वीयट्ठाणस्स पढ-मोहेसो समत्तो ॥

जे देवा उट्ठोववण्णगा कप्पोववण्णगा, विमाणोववण्णगा, चारोववण्णगा, चारट्ठिइया, गइरइया, गइसमावण्णगा, तेसिं देवाणं सयासमियं जे पावे कम्मे कज्जइ तत्थगयावि एगइया वेयणं वेयंति अन्नत्थगयावि एगइया वेयणं वेयंति नेरइयाणं सयासमियं जे पावे कम्मे कज्जइ तत्थगयावि एगइया वेयणं वेयंति अन्नत्थगयावि एगइया वेयणं वेयंति, जाव पंचिदियतिरिक्खजोणियाणं, मणुस्साणं सयासमियं जे पावे कम्मे कज्जइ, इहगयावि एगइया वेयणं वेयंति अन्नत्थगयावि एगइया वेयणं वेयंति, मणुस्सवज्जा सेसा एकगमा ॥ १११ ॥ नेरइया दुगइया दुयागइया प० तं० नेरइए नेरइएसु उववज्जमाणे मणुस्सेहिंतो वा पंचिदिय-तिरिक्खजोणिएहिंतो वा उववज्जेज्जा, से चेव णं से नेरइए नेरइयत्तं विप्पज्जहमाणे मणुस्सत्ताए वा पंचिदियतिरिक्खजोणियत्ताए वा गच्छेज्जा, एवं असुरकुमारावि,

गवरं से चेवणं से असुरकुमारत्तं विप्पजहमाणे मणुस्सत्ताए वा तिरिक्खजोणियत्ताए
 वा गच्छेज्जा, एवं सव्वदेवा, पुढविकाइया दुगइया दुयागइया प० तं०-पुढविकाइए
 पुढविकाइएसु उववज्जमाणे पुढविकाइएहिंतो वा णो पुढविकाइएहिंतो वा उववजेज्जा,
 से चेवणं से पुढविकाइयत्तं विप्पजहमाणे पुढविकाइयत्ताए वा णो पुढविकाइयत्ताए
 वा गच्छेज्जा, एवं जाव मणुस्सा ॥ ११२ ॥ दुविहा णेरइया प० तं० भवसिद्धिया
 चेव, अभवसिद्धिया चेव, जाव वेमाणिया, दुविहा णेरइया प० तं० अणंतरोववन्नगा
 चेव परंपरोववन्नगा चेव, जाव वेमाणिया, दुविहा णेरइया प० तं० गइसमावन्नगा
 चेव, अगइसमावन्नगा चेव, जाव वेमाणिया, दुविहा णेरइया प० तं० पढम-
 समयउववन्नगा चेव अपढमसमयउववन्नगा चेव, जाव वेमाणिया, दुविहा णेरइया
 प० तं० आहारगा चेव अणाहारगा चेव, एवं जाव वेमाणिया, दुविहा णेरइया
 पन्नता तं०, उस्सासगा चेव नोउस्सासगा चेव, जाव वेमाणिया, दुविहा णेरइया
 प० तं० सईदिया चेव, अणिंदिया चेव, जाव वेमाणिया, दुविहा णेरइया प० तं०
 पज्जत्तगा चेव, अपज्जत्तगा चेव, जाव वेमाणिया, दुविहा णेरइया प० तं० सन्नी
 चेव असन्नी चेव, एवं जाव पंन्दिदिया सव्वे विगल्लिंदियवज्जा, जाव वाणमंतरा ।
 दुविहा णेरइया प० तं० भासगा चेव अभासगा चेव, एवमेणेंदियवज्जा सव्वे,
 दुविहा णेरइया प० तं० समदिट्ठिया चेव मिच्छदिट्ठिया चेव, एगिंदियवज्जा सव्वे,
 दुविहा णेरइया प० तं० परित्तसंसारिया चेव, अणंतसंसारिया चेव, जाव वेमाणिया,
 दुविहा णेरइया प० तं० संखेज्जकालसमयट्ठिइया चेव असंखेज्जकालसमयट्ठिइया चेव,
 एवं पंविंदिया, एगिंदिया विगल्लिंदियवज्जा जाव वाणमंतरा, दुविहा णेरइया प० तं०
 सुलभबोहिया य दुल्लभबोहिया य जाव वेमाणिया, दुविहा णेरइया प० तं०
 कण्हपक्खिया चेव सुक्कपक्खिया चेव, जाव वेमाणिया, दुविहा णेरइया प० तं०
 चरिमा चेव अचरिमा चेव, जाव वेमाणिया ॥ ११३ ॥ दोहिं ठाणेहिं आया अहे
 लोगं जाणइ पासइ, तं० समोहएणं चेव अप्पाणेणं आया अहे लोगं जाणइ पासइ,
 असमोहएणं चेव अप्पाणेणं आया अहे लोगं जाणइ पासइ, आधोहिं समोहया
 समोहएणं चेव अप्पाणेणं आया अहे लोगं जाणइ पासइ । एवं तिरियलोगं उद्ध-
 लोगं केवलकप्पं लोगं । दोहिं ठाणेहिं आया अहे लोगं जाणइ पासइ, तंजहा-
 विउव्विएणं चेव अप्पाणेणं आया अहेलोगं जाणइ पासइ, अविउव्विएणं चेव
 अप्पाणेणं आया अहेलोगं जाणइ पासइ, आहोहिं विउव्वियाविउव्विएणं चेव
 अप्पाणेणं आया अहेलोगं जाणइ पासइ, एवंतिरियलोगं उद्धलोगं केवलकप्पं लोगं
 ॥ ११४ ॥ दोहिं ठाणेहिं आया सद्दाइं सुणेइ, तंजहा-देसेणवि आया सद्दाइं सुणेइ,

सव्वेणवि आया सद्दाइं सुणेइ, एवं रुवाइं पासइ, गंधाईं आघायइ, रसाईं आसाएइ, फासाईं पडिसंवेएइ, दोहिं ठाणेहिं आया ओभासइ, तंजहा-देसेणवि आया ओभासइ, सव्वेण वि आया ओभासइ, एवं पभासइ, विउव्वइ, परियारेइ, भासं भासइ, आहारेइ, परिणामेइ, वेएइ, निज्जरेइ, दोहिं ठाणेहिं देवे सद्दाइं सुणेइ, तंजहा-देसेणवि देवे सद्दाइं सुणेइ, सव्वेण वि सद्दाइं सुणेइ, जाव णिज्जरेइ ॥ ११५ ॥ मरुया देवा दुविहा प० तं० एगसरीरी चेव विसरीरी चेव, एवं किन्नरा, किंपुरिसा, गंधव्वा, णागकुमारा, सुवन्नकुमारा अग्गि कुमारा, वाउकुमारा देवा दुविहा प० तं० एगसरीरी चेव विसरीरी चेव ॥ ११६ ॥ **वीयट्ठाणस्स वीओहेसो समत्तो ॥**

दुविहे सदे प० तं० भासासदे चेव नोभासासदे चेव । भासासदे दुविहे प० तं० अक्खरसंबदे चेव, नोअक्खरसंबदे चेव । णोभासासदे दुविहे प० तं० आउज्जसदे चेव, णोआउज्जसदे चेव, आउज्जसदे दुविहे प० तं० तते चेव, वितते चेव, तते दुविहे प० तं० घणे चेव छुसिरे चेव, एवं विततेवि, णोआउज्जसदे दुविहे प० तं० भूसणसदे चेव, णोभूसणसदे चेव, णोभूसणसदे दुविहे प० तं० तालसदे चेव लत्तियासदे चेव, दोहिं ठाणेहिं सहुप्पाए सिया तंजहा-साहजंताणं चेव, पुग्गलार्णं सहुप्पाए सिया भिज्जंताणं चेव पोग्गलार्णं सहुप्पाए सिया ॥ ११७ ॥ दोहिं ठाणेहिं पोग्गला साहजंति, तंजहा-सयं वा पोग्गला साहजंति परेण वा पोग्गला साहजंति, दोहिं ठाणेहिं पोग्गला भिज्जंति, तंजहा-सयं वा पोग्गला भिज्जंति, परेण वा पोग्गला भिज्जंति, दोहिं ठाणेहिं पोग्गला परिसडंति, सयं वा पोग्गला परिसडंति, परेण वा पोग्गला परिसाडिज्जंति, एवं परिपडंति, विद्धंसंति ॥ ११८ ॥ दुविहा पोग्गला प० तं० भिन्ना चेव अभिन्ना चेव, दुविहा पोग्गला प० तं० भिउरधम्मा चेव नोभिउरधम्मा चेव, दुविहा पोग्गला प० तं० परमाणुपोग्गला चेव नोपरमाणुपोग्गला चेव, दुविहा पोग्गला प० तं० सुहुमा चेव बायरा चेव, दुविहा पोग्गला प० तं० बद्धपासपुट्ठा चेव नोबद्धपासपुट्ठा चेव, दुविहा पोग्गला प० तं० परियादितचेव, अपरियादितचेव, दुविहा पोग्गला प० तं० अत्ताचेव अणत्ताचेव, दुविहा पोग्गला प० तं० इट्ठा चेव अणिट्ठा चेव, एवं कंता, पिया, मणुत्ता, मणामा । दुविहा सद्दा प० तं० अत्ता चेव, अणत्ता चेव एवं इट्ठा जाव मणामा, दुविहा रुवा प० तं० अत्ता चेव अणत्ता चेव, जाव मणामा । एवं गंधा, रसा, फासा, एवमिक्किक्के छआलावगा भाणियव्वा ॥ ११९ ॥ दुविहे आयारे प० तं० णागायारे चेव णो णागायारे चेव, णोणागायारे दुविहे प० तं० दंसणायारे चेव, णोदंसणायारे चेव, णोदंसणायारे दुविहे पण्णत्ते, चरित्तायारे चेव, णो चरित्तायारे चेव, णो चरित्तायारे दुविहे

प० तं० तवायारे चैव, वीरियायारे चैव ॥ १२० ॥ दो पडिमाओ प० तं० समाहिपडिमा चैव, उवहाणपडिमा चैव, दो पडिमाओ प० तं० विवेगपडिमा चैव, विउसग्गपडिमा चैव, दोपडिमाओ प० तं० भद्दा चैव, सुभद्दा चैव, दो पडिमाओ प० तं० महाभद्दा चैव सव्वतोभद्दा चैव, दो पडिमाओ प० तं० खुट्ठिया चैव मोयपडिमा महत्थिया चैव मोयपडिमा, दोपडिमाओ प० तं० जवमज्जे चैव चंदपडिमा वहरमज्जे चैव चंदपडिमा ॥ १२१ ॥ दुविहे सामाइए प० तं० आगारसामाइए चैव, अणगारसामाइए चैव ॥ १२२ ॥ दोण्हं उववाए प० तं० देवाणं चैव, नेरइयाणं चैव, दोण्हं उव्वट्ठणा प० तं० नेरइयाणं चैव, भवणवासीणं चैव, दोण्हं चयणे प० तं० जोइसियाणं चैव, वेमाणियाणं चैव, दोण्हं गम्भवक्कंती प० तं० मणुस्साणं चैव, पंचिंदियतिरिक्खजोणियाणं चैव । दोण्हं गम्भत्थाणं आहारे प० तं० मणुस्साणं चैव पंचिंदियतिरिक्खजोणियाणं चैव दोण्हं गम्भत्थाणं पुट्ठी प० तं० मणुस्साणं चैव पंचिंदियतिरिक्खजोणियाणं चैव, एवं निव्वुट्ठी विगुव्वणा गइपरियाए समुग्वाए कालसंजोगे आयाइ मरणे, दोण्हं छविपव्वा प० तं० मणुस्साणं चैव पंचिंदियतिरिक्खजोणियाणं चैव, दो सुक्कतोणिअसंभवा, प० तं० मणुस्सा चैव पंचिंदियतिरिक्खजोणिया चैव, दुविहा ठिई, कायट्ठिई चैव, भवट्ठिई चैव, दोण्हं कायट्ठिई, मणुस्साणं चैव पंचिंदियतिरिक्खजोणियाणं चैव, दोण्हं भवट्ठिई, देवाणं चैव णेरइयाणं चैव, दुविहे आउए, अट्ठाउए चैव, भवाउए चैव, दोण्हं अट्ठाउए, मणुस्साणं चैव पंचिंदियतिरिक्खजोणियाणं चैव, दोण्हं भवाउए देवाणं चैव, णेरइयाणं चैव, दुविहे कम्मे, पएसकम्मे चैव, अणुभावकम्मे चैव, दो अहाउयं पालेंति, देवचैव णेरइयचैव, दोण्हं आउयसंवट्ठए प० तं० मणुस्साणं चैव पंचिंदियतिरिक्खजोणियाणं चैव ॥ १२३ ॥ जंबुहीवे दीवे मंदरस्स पव्वयस्स उत्तरदाहिणेणं दोवासो बहुसमउल्ला अविसेसमणाणत्ता अन्नमण्णं णाइवट्ठंति, आयामविकखंभसंठाणपरिणाहेणं, तंजहा-भरहे चैव, एरवए चैव, एवमेणं अहिलावेणं नेयव्वं, हेमवए चैव हेरण्णवए चैव, हरिवरिसे चैव, रम्मयवरिसे चैव ॥ १२४ ॥ जंबुहीवे दीवे मंदरस्स पव्वयस्स पुरच्छिमपच्चत्थिमेणं दो खित्ता, बहुसमउल्ला अविसेस जाव पुव्वविदेहे चैव अवरविदेहे चैव ॥ १२५ ॥ जंबूमंदरस्स पव्वयस्स उत्तरदाहिणेणं दोकुराओ, बहुसमउल्लाओ अविसेसा जाव देवकुरा चैव उत्तरकुरा चैव, तत्थ णं दो महइ महालया महादुमा, बहुसमउल्ला, अविसेसमणाणत्ता अन्नमन्नं णाइवट्ठंति, आयामविकखंभुच्चत्तोव्वेहसंठाणपरिणाहेणं तंजहा कूडसामली चैव, जंबू चैव सुदंसणा, तत्थणं दो देवा महिद्धिया जाव महासोकवा,

पलिओवमठिइया परिवसंति, तंजहा-गरुळे चेव वेणुदेवे अणाडिए चेव जंबूदीवाहिवई ॥ १२६ ॥ जंबूमंदरस्स पव्वयस्स उत्तरदाहिणेणं दोवासहरपव्वया, बहुसमउल्ला, अविसेसमणाणत्ता, अन्नमन्नं नाइवटंति, आयामविकखंभुच्चत्तोव्वेहसंठाणपरिणाहेणं, तंजहा-चुल्लहिमवंते चेव सिहरी चेव एवं महाहिमवंते चेव, रुप्पी चेव, एवं णिसढे चेव, णीलवंते चेव ॥ १२७ ॥ जंबूमंदरस्स पव्वयस्स उत्तरदाहिणेणं हेमवएरन्न-वएसु वासेसु दोवट्टवेयङ्गुपव्वया, बहुसमउल्ला, अविसेसमणाणत्ता जाव सद्दावाई चेव वियडावाई चेव, तत्थणं दो देवा महिङ्गिया जाव पलिओवमठिइया परिवसंति, तंजहा-साई चेव पभासे चेव ॥ १२८ ॥ जंबूमंदरस्स उत्तरदाहिणेणं हरिवासरम्म-एसु वासेसु दोवट्टवेयङ्गुपव्वया, बहुसमउल्ला, जाव गंधावाई चेव, मालवंतपरियाए चेव, तत्थणं दोदेवा महिङ्गिया, जाव पलिओवमठिइया परिवसंति, तंजहा-अरुणे चेव, पउमे चेव ॥ १२९ ॥ जंबूमंदरस्स पव्वयस्स दाहिणेणं देवकुराए पुव्वावरे पासे, एत्थणं आसक्खंधगसरिसा, अद्धचंदसंठाणसंठिया दोवक्खारपव्वया, बहुसमउल्ला जाव, सोमणसे चेव विज्जुप्पमे चेव, जंबूमंदरस्स उत्तरेणं उत्तरकुराए पुव्वावरे पासे एत्थणं आसक्खंधगसरिसा अद्धचंदसंठाणसंठिया दो वक्खारपव्वया प० तं० बहु० जाव, गंधमायणे चेव, मालवंते चेव ॥ जंबूमंदरस्स पव्वयस्स उत्तरदाहिणेणं दोदीहवेयङ्गुपव्वया, बहुसमउल्ला जाव भारहे चेव दीहवेयङ्गु एरावए चेव दीह-वेयङ्गु, भारहेणं दीहवेयङ्गु दोगुहाओ, बहुसमउल्लाओ अविसेसमणाणत्ताओ अन्नमन्नं नाइवटंति आयामविकखंभुच्चत्तसंठाणपरिणाहेणं, तंजहा-तिमिसगुहा चेव, खंड-गप्पवायगुहा चेव, तत्थणं दोदेवा महिङ्गिया, जाव पलिओवमठिइया परिवसंति, तंजहा-कयमालए चेव, णट्टमालए चेव, एरावएणं दीहवेयङ्गु दोगुहा, जाव कयमाल-ए चेव णट्टमालए चेव ॥ १३० ॥ जंबूमंदरस्स पव्वयस्स दाहिणेणं चुल्लहिमवंते वासहरपव्वए दोकूडा, बहुसमउल्ला, जाव विकखंभुच्चत्तसंठाणपरिणाहेणं, तंजहा-चुल्लहिमवंतकूडे चेव वेसमणकूडे चेव, जंबूमंदरस्स दाहिणेणं महाहिमवंते वास-हरपव्वए दोकूडा, बहुसमउल्ला जाव महाहिमवतकूडे चेव, वेरलियकूडे चेव, एवं निसढे वासहरपव्वए दोकूडा, बहुसमउल्ला जाव० निसढकूडे चेव, सयगप्पमे चेव, जंबूमंदरस्स उत्तरेणं नीलवंते वासहरपव्वए दोकूडा, बहुसमउल्ला जाव० नीलवंत-कूडे चेव, उवदंसणकूडे चेव, एवं रुप्पिमि वासहरपव्वए दोकूडा, बहुसमउल्ला जाव० तंजहा रुप्पिकूडे चेव, मणिकंचणकूडे चेव, एवं सिहरिमि वि वासहरपव्वए दोकूडा, बहुसमउल्ला तंजहा-सिहरिकूडे चेव, तिगिच्छिकूडे चेव ॥ १३१ ॥ जंबूमंदरस्स उत्तरदाहिणेणं चुल्लहिमवंतसिहरीसु वासहरपव्वएसु दो महद्दा, बहुसम-

उल्ला, अविसेसमणाणत्ता अण्णमण्णं नाइवट्ठंति, आयामविक्खंभउव्वेहसंठाणपरिणा-
हेणं, तंजहा-पउमइहे चेव, पुंडरीयइहे चेव, तत्थणं दो देवयाओ महिङ्गियाओ
जाव पलिओवमट्ठिइयाओ परिवसंति, तं० सिरी चेव लच्छी चेव, एवं महाहिमवंत-
रूपीसु वासहरपव्वएसु दो महइहा प० बहुसमउल्ला जाव महापउमइहे चेव,
महापोंडरीयइहे चेव, देवताओ हिरिच्चैव बुद्धिच्चैव, एवं निसहनीलवंतेसु तिगि-
च्छिइहे चेव, केसरिइहे चेव, देवताओ धिई चेव किति चेव ॥ १३२ ॥
जंबूमंदरदाहिणेणं महाहिमवंताओ वासहरपव्वयाओ महापउमइहाओ दो महाणईओ
पवहंति तंजहा रोहियच्चैव हरिकंतच्चैव, एवं निसहाओ वासहरपव्वयाओ तिगिच्छि-
इहाओ दोमहानईओ पवहंति तं० हरिच्चैव, सीतोअच्चैव । जंबूमंदरस्स उत्तरेणं नीलवं-
ताओ वासहरपव्वयाओ केसरिइहाओ दो महाणईओ पवहंति तं० सीता चेव, नारि-
कंता चेव, एवं रप्पिवासहरपव्वयाओ महापोंडरीयइहाओ दोमहाणईओ पवहंति,
तंजहा णरकंता चेव रूप्पकूला चेव । जंबूमंदरदाहिणेणं भारहेवासे दोपवायइहा प०
तं० बहुसमउल्ला जाव गंगप्पवायइहे चेव सिंधुप्पवायइहे चेव । एवं हेमवएवासे दोप-
वायइहा प० बहुसमउल्ला तं० रोहियप्पवायइहे चेव, रोहियंसप्पवायइहे चेव, जंबू-
मंदरदाहिणे णं हरिवासे वासे दोपवायइहा प० बहुसमउल्ला तं० हरिप्पवायइहे चेव हरि-
कंतप्पवायइहे चेव, जंबूमंदरउत्तरदाहिणेणं महाविदेहे वासे दोपवायइहा प० तं०
बहुसमउल्ला जाव० सीयप्पवायइहे चेव, सीओयप्पवायइहे चेव, जंबूमंदरउत्तरेणं
रम्मएवासे दोपवायइहा प० बहुसमउल्ला जाव नरकंतप्पवायइहे चेव णारिकंतप्प-
वायइहे चेव, एवं हेरच्चवएवासे दोपवायइहा प० बहुसमउल्ला जाव० सुवच्चकूलप्प-
वायइहे चेव, रूप्पकूलप्पवायइहे चेव, जंबूमंदरउत्तरेणं एरच्चवएवासे दोपवायइहा, प०
बहुसमउल्ला जाव० रत्तप्पवायइहे चेव रत्तावइप्पवायइहे चेव, जंबूमंदरदाहिणेणं भर-
हेवासे दोमहानईओ प० बहुसमउल्ला गंगा चेव, सिंधू चेव, एवं जहा प्पवायइहा एवं
णईओ भाणियव्वाओ, जाव एरवए वासे दोमहानईओ प० बहुसमउल्लाओ जाव रत्ता
चेव रत्तवई चेव ॥ १३३ ॥ जंबुहीवे दीवे भरहेरवएसु वासेसुऽतीताए उस्सप्पिणीए सुस-
मदुसमाए समाए दो सागरोवमकोडाकोडीओ काले होत्था, एवमिमीसे ओसप्पिणीए
जाव प० एवं आगमिस्साए उस्सप्पिणीए जाव भविस्सइ । जंबुहीवे दीवे भरहेरवएसु
वासेसु तीयाए उस्सप्पिणीए सुसमाए समाए मणुया दोगाउयाई उड्डं उच्चतेणं होत्था,
दोणियपलिओवमाई परमाउं पालइत्था एवमिमीसे ओसप्पिणीए जाव पालइत्था,
एवमागमिस्साए उस्सप्पिणीए जाव पालइस्संति ॥ १३४ ॥ जंबुहीवे दीवे भरहेर-
वएसु वासेसु एगसमए एगजुगे दो अरहंतवंसा उप्पज्जिस्सु वा उप्पज्जंति वा उप्पज्जि-

स्सन्ति वा । एवं चक्रवट्टिंसा, दसारवंसा, जंबूभरहेरवएसु एगसमए दोअरिहंता
उप्पज्जिंस्सु वा उप्पज्जन्ति वा उप्पज्जिस्सन्ति वा, एवं चक्रवट्टिणो बलदेवा वासुदेवा,
जाव उपज्जिस्सन्ति वा ॥ १३५ ॥ जंबू० दोसु कुरासु मणुया सया सुसमसुसमुत्तम-
मिद्धिं पत्ता पच्चणुभवमाणा विहरन्ति, तंजहा-देवकुराए चेव, उत्तरकुराए चेव,
जंबुद्दीवे दीवे दोसु वासेसु मणुया सया सुसमुत्तममिद्धिं पत्ता पच्चणुभवमाणा विहरन्ति
तंजहा-हरिवासे चेव रम्मगवासे चेव, जंबु० दोसु वासेसु मणुया सया सुसमदुस-
मुत्तममिद्धिं पत्ता पच्चणुभवमाणा विहरन्ति, तंजहा-हेमवए चेव एरञ्चवए चेव, जंबु-
द्दीवे दीवे दोसु खित्तेसु मणुया सया दुसमसुसमुत्तममिद्धिं पत्ता पच्चणुभवमाणा विह-
रन्ति, तंजहा-पुव्वविदेहे चेव अवरविदेहे चेव, जंबुद्दीवे दीवे दोसु वासेसु मणुया
छव्विहंपिकालं पच्चणुभवमाणा विहरन्ति, तंजहा-भरहे चेव, एरवए चेव ॥ १३६ ॥
जंबुद्दीवे २ दोचंदा पभासिंसु वा, पभासन्ति वा, पभासिस्सन्ति वा, दोसूरिया तवईसु वा,
तवन्ति वा, तविस्सन्ति वा, दो कत्तियाओ, दो रोहिणीओ दो मियसिराओ, दो अद्दाओ,
एवं भाणियव्वं ॥ कत्तिरोहिणिमियसिर अद्दा य पुणव्वसू य पुस्सो य । तत्तोवि
अस्सत्तेसा, महा य दो फग्गुणीओ य १ हत्थो चित्ता साई, विसाहा तह य होंति
अणुराहा, जेठा मूलो पुव्वा य, आसाढा उत्तरा चेव २ अभिई सवण धणिट्ठा
सयभिसया दो य होंति भद्दवया, रेवइ अस्सिणि भरणी, गेयव्वा आणुपुव्वीए ३
एवं गाहानुसारेण णायव्वं जाव दो भरणीओ, दो अग्गी दो पयावई दोसोमा दोरुहा
दोअइई दोबहस्सई दोसप्पी दोपीई दोभगा दोअज्जमा दोसविया दोतट्ठा दोवाऊ
दोईदग्गी दोमिक्का दोईदा दोनिरई दोआऊ दोविस्सा दोबद्धा दोविण्हू दोवसू दोव-
रुणा दोअया दोविविद्धी दोपुस्सा दोअस्सा दोयमा दोईगालगा दोवियालगा
दोलोहियक्खा दोसणिच्चरा दोआहुणिया दोपाहुणिया दोकणा दोकणगा दोकण-
कणगा दोकणगवियाणगा दोकणगसंताणगा दोसोमा दोसहिया दोआसासणा दोकज्जो-
वगा दोकब्बडगा दोअयकरगा दोदुंदुभगा दोसंखा दोसंखवन्ना दोसंखवन्नाभा
दोक्कंसा दोक्कंसवन्ना दोक्कंसवन्नाभा दोरुप्पी दोरुप्पाभासा दोनीला दोनीलोभासा
दोभासा दोभासरासी दोतिला दोतिलपुप्फवन्ना दोदगा दोदगपंचवन्ना दोकाका
दोक्कंधा दोईदग्गीवा दोधूमकेऊ दोहरी दोर्पिगला दोबुहा दोसुक्का दोबहस्सई
दोराहू दोअगत्थी दोमाणवगा दोकासा दोफासा दोधुरा दोपसुहा दोवियडा दोविसंधी
दोनियल्ला दोपइल्ला दोजडियाइलगा दोअरुणा दोअग्गिल्ला दोकाला दोमहाकालगा
दोसोत्थिया दोसोवत्थिया दोवद्धमाणगा दोपूसमाणगा दोअंकुसा दोपलंबा दोनिच्चा-
लोगा दोनिच्चुज्जोया दोसयंपभा दोओभासा दोसेयंकरा दोखेमंकरा दोआभंकरा

दोपभंकरा दोअपराजिता दोअरया दोअसोगा दोविगयसोगा दोविमला दोवि-
 तत्ता दोवितत्था दोविसाला दोसाला दोसुव्वया दोअणियट्ठी दोएगज्जी दोदुज्जी
 दोकरकरिगा दोरायगला दोपुप्फकेऊ दोभावकेऊ ॥१३७॥ जंबूदीवस्स णं दीवस्स
 वेइआ दोगाउआई उट्ठं उच्चतेणं प० लवणेणं समुद्दे दोजोयणसयसहस्साइं चक्कवा-
 लविकखंभेण प० लवणस्सणं समुद्दस्स वेइया दोगाउआई उट्ठं उच्चतेणं प० ॥१३८॥
 धायईखंडेणं दीवे पुरत्थिमद्वेणं मंदरस्स पव्वयस्स उत्तरदाहिणेणं दोवासा, बहुसम-
 उल्ला जाव भरहे चेव, एरवए चेव, एवं जहा जंबूदीवे तहा एत्थ वि भाणियव्वं,
 जाव दोसुवासेसु मणुया छव्विहंपि कालं पच्चणुभवमाणा विहरंति, तंजहा-भरहे चेव
 एरवए चेव, णवरं कूडसामली चेव, धायईरुक्खे चेव, देवा गरुले चेव वेणुदेवे
 सुदंसणेचेव, धायईखंडदीवपच्चच्छिमद्वेणं मंदरस्स पव्वयस्स उत्तरदाहिणेणं दोवासा
 प० बहुसमउल्ला जाव भरहे चेव एरवए चेव, जाव छव्विहंपि कालं पच्चणुभवमाणा
 विहरंति, णवरं कूडसामली चेव महाधायईरुक्खे चेव, देवा गरुले चेव वेणुदेवे
 पियदंसणे चेव, धायईखंडेणं दीवे दोभरहाइं दोएरवयाइं दोहिमवंताइं दो
 हेरण्वयाइं दोहरिवासाइं दोरम्मगवासाइं, दोपुव्वविदेहाइं दोअवरविदेहाइं
 दोदेवकुराओ दोदेवकुरुमहादुमा, दोदेवकुरुमहादुमावासी देवा दोउत्तरकुराओ
 दोउत्तरकुरुमहादुमा दोउत्तरकुरुमहादुमावासी देवा दोचुल्लहिमवंता दोमहाहिमवंता
 दोनिसहा दोनीलवंता दोरुप्पी दोसिहरी दोसद्दावाइं दोसद्दावायवासी साइं देवा,
 दोवियडावाइं दोवियडावाइंवासी पभासा देवा दोगंधावाइं दोगंधावाइंवासी
 अरुणादेवा दोमालवंतपरियागा दोमालवंतपरियागावासी पउमादेवा दोमालवंतां
 दोचित्तकूडा दोपउमकूडा दोनलिनकूडा दोएगसेला दोतिकूडा दोवेसमणकूडा
 दोअंजणा दोमातंजणा दोसोमणसा दोविज्जुप्पभा दोअंकावईं दोपम्हावईं दोआसी-
 विसा दोसुहावहा दोचंदपव्वया दोसूरपव्वया दोणागपव्वया दोदेवपव्वया दोगंध-
 मायणा दोउसुगारपव्वया दोचुल्लहिमवंतकूडा दोवेसमणकूडा दोमहाहिमवंतकूडा दोवे-
 सलियकूडा दोनिसहकूडा दोरुयगकूडा दोनीलवंतकूडा दोउवदंसणकूडा दोरुप्पिकूडा
 दोमणिकंचणकूडा दोसिहरिकूडा दोतिगिच्छिकूडा दोपउमद्दहा, दोपउमद्दहासिणीओ
 सिरीदेवीओ दोमहापउमद्दहा दोमहापउमद्दहासिणीओ हिरीओ एवं जाव दोपुंड-
 रीयद्दहा दोपुंडरीयद्दहासिणीओ लच्छीओ देवीओ दोगंगप्पवायद्दहा जाव दोरत्त-
 वईप्पवायद्दहा दोरोहियाओ जाव दोरुप्पकूलाओ दोगाहावईओ दोदहवईओ दोपंकव-
 ईओ दोतत्तजलाओ दोमत्तजलाओ दोउम्मत्तजलाओ दोखीरोयाओ दोसीहसोयाओ
 दोअंतोवाहिणीओ दोउम्मिमालिणीओ दोफेणमालिणीओ दोगभीरमालिणीओ दोक-

च्छा दोसुकच्छा दोमहाकच्छा दोकच्छगावई दोआवत्ता दोमंगलावत्ता दोपुक्खला
दोपुक्खलावई दोवच्छा दोसुवच्छा दोमहावच्छा दोवच्छगावई दोरम्मा दोरम्मगा
दोरमणिजा दोमंगलावई दोपम्हा दोसुपम्हा दोमहापम्हा दोपम्हागावई दोसंखा दोण-
लिणा दोकुमुया दोसलिलावई दोनलिणावई दोवप्पा दोसुवप्पा दोमहावप्पा दोवप्पगा-
वई दोवग्गू दोसुवग्गू दोगंधिला दोगंधिलावई दोखेमाओ दोखेमपुरीओ दोरिद्धाओ
दोरिद्धपुरीओ दोखग्गीओ दोमंजूसाओ दोओसहीओ दोपुण्डरीगिणीओ दोसुसीमाओ
दोकुंडलाओ दोअपराइआओ दोप्पभंकराओ दोअंकावईओ दोपम्हावईओ दोसुभाओ
दोरयणसंचयाओ दोआसपुराओ दोसीहपुराओ दोमहापुराओ दोविजयपुराओ दोअव-
राजियाओ दोअवराओ दोअसोयाओ दोविगयसोयाओ दोविजयाओ दोवेजयंतीओ
दोजयंतीओ दोअपराजियाओ दोचक्रपुराओ दोखग्गपुराओ दोअवज्झाओ दोअ-
ओज्झाओ दोमहसालवणा दोगंदणवणा दोसोमणसवणा दोपंडगवणा दोपंडुकं-
बलसिलाओ दोअतिपंडुकंबलसिलाओ दोरत्तकंबलसिलाओ दोअइरत्तकंबलसिलाओ
दोमंदरा दोमंदरचूल्याओ, धायइखंडस्सणं दीवस्स वेइया दोगाउयाई उड्डं
उच्चतेणं पज्जता, कालोदस्सणं समुइस्स वेइया दोगाउयाई उड्डं उच्चतेणं पज्जता
पुक्खरवरदीवद्धपुरच्छिमद्धेणं मंदरस्स पव्वयस्स उत्तरदाहिणेणं दोवासा प० बहु-
समज्झा जाव भरहे चैव एरवए चैव जाव दोकुराओ पण्णत्ताओ देवकुरा चैव उत्तर-
कुरा चैव । तत्थणं दोमहइमहालया महहुंसा प० तं० कूडसामली चैव, पउमस्सखे
चैव, देवा गरुले चैव वेणुदेवे पउमे चैव, जाव छव्विहंपि कालं पच्चणुब्भवमाणा
विहरंति, पुक्खरवरदीवद्धपच्चत्थिमद्धेणं मंदरपव्वयस्स उत्तरदाहिणेणं दोवासा प० तं०
तहेव णाणत्तं कूडसामली चैव, महापउमस्सखे चैव, देवा गरुले चैव, वेणुदेवे
पुंडरीए चैव, पुक्खरवरदीवद्धेणं दीवे दोभरहाई दोएरवयाई जाव दोमंदरा दोमंद-
रचूलाओ, पुक्खरवरस्स णं दीवस्स वेइया दोगाउयाई उड्डं उच्चतेणं प० सव्वेसिं पि
णं दीवसमुद्धानं वेइयाओ दोगाउयाई उड्डं उच्चतेणं पण्णत्ताओ ॥ १३९ ॥ दो
असुरकुमारिदा प० तं० चमरे चैव बली चैव, दोनागकुमारिदा प० तं० धरणे चैव
भूयाणंदे चैव, दोसुवण्णकुमारिदा प० तं० वेणुदेवे चैव वेणुदाली चैव, दोविज्जु-
कुमारिदा प० तं० हरी चैव हरिस्सहे चैव, दोअग्गिकुमारिदा प० तं० अग्गिसिहे चैव
अग्गिमाणवे चैव, दोदीवकुमारिदा प० तं० पुण्णे चैव, विसिट्ठे चैव, दोउदधिकुमारिदा
प० तं० जलकंते चैव जलप्पमे चैव, दोदिसाकुमारिदा प० तं० अमियगई चैव,
अमियवाहणे चैव, दोवाउकुमारिदा प० तं० वेलंबे चैव पभंजणे चैव, दोथणिय-
कुमारिदा प० तं० घोसे चैव महाघोसे चैव, दोपिसायईदा प० तं० काले चैव महा-

काले चैव, दोभूयईदा प० तं० सुरूवे चैव पडिरूवे चैव, दोजक्खिदा प० तं० पुण्ण-
भदे चैव माणिभदे चैव, दोरक्खसिंदा प० तं० भीमे चैव महाभीमे चैव, दोकि-
च्चरिंदा प० तं० किच्चरे चैव किंपुरिसे चैव, दोकिंपुरिसिंदा प० तं० सप्पुरिसे चैव
महापुरिसे चैव, दोमहोरगिंदा प० तं० अइकाये चैव महाकाये चैव, दोगंधर्विदा
प० तं० गीयरई चैव गीयजसे चैव, दोअणपण्णिदा प० तं० संनिहिए चैव, सामण्णे
चैव, दोपणपण्णिदा प० तं० धाए चैव विहाए चैव, दोइसिवाईदा प० तं० इसि चैव
इसिवाए चैव, दोभूयवाईदा प० तं० ईसरे चैव महिस्सरे चैव, दोकंदिंदा प०
तं० सुवच्छे चैव विसाले चैव, दोमहाकंदिंदा प० तं० हासे चैव हासरई चैव,
दोकुमंडिंदा प० तं० सेए चैव महासेए चैव, दोपयगिंदा प० तं० पयए चैव पयगवई
चैव, जोइसियाणं देवाणं दोईदा प० तं० चंदे चैव सुरे चैव, सोहम्मसीसाणेषु णं
कप्पेसु दोईदा प० तं० सक्के चैव ईसाणे चैव, एवं सणकुमारमहिंदेसु कप्पेसु दोईदा
प० तं० सणकुमारे चैव माहिंदे चैव, बंभल्लोयलंतगेषु णं दोईदा प० तं० बंभे चैव
लंतए चैव, महासुक्कसहस्सारेसु णं कप्पेसु दोईदा पञ्चत्ता तंजहा-महासुक्के चैव
सहस्सारे चैव, आणयपाणयारणज्जुएसु णं कप्पेसु दोईदा प० तं० पाणए चैव, अज्जुए
चैव ॥ १४० ॥ महासुक्कसहस्सारेसु णं कप्पेसु विमाणा दुवण्णा प० तं० हालिहा
चैव सुक्कल्ल चैव, गेविज्जगाणं देवाणं **दोरयणीओ** उट्ठं उच्चत्तेणं पञ्चत्ता ॥ १४१ ॥
वीयट्ठाणस्स तइओहेसो समत्तो ॥

समयाइ वा आवलियाइ वा, जीवाइ वा अजीवाइ वा पवुच्चइ, आणापाणूइ वा,
थोवाइ वा जीवाइ वा अजीवाइ वा पवुच्चइ, खणाइ वा लवाइ वा जीवाइ वा
अजीवाइ वा पवुच्चइ, एवं मुहुत्ताइ वा, अहोरेत्ताइ वा, पक्खाइ वा, मासाइ वा,
उज्झइ वा, अयणाइ वा, संवच्छराइ वा, जुगाइ वा, वाससयाइ वा, वाससहस्साइ
वा, वाससयसहस्साइ वा, वासकोडीइ वा, पुव्वंगाइ वा, पुव्वाइ वा, तुडियंगाइ
वा तुडियाइ वा अड्डंगाइ वा, अड्डाइ वा, अववंगाइ वा, अववाइ वा हूह्वंगाइ
वा, हूह्वयाइ वा, उप्पलंगाइ वा, उप्पलाइ वा, पउमंगाइ वा, पउमाइ वा, णलिंग-
गाइ वा, णलिणाइ वा, **अच्छणिउरंगाइ वा, अच्छणिउराइ वा, अउअंगाइ वा**
अउआइ वा, णउअंगाइ वा, णउआइ वा पउअंगाइ वा, पउयाइ वा, चूलिअंगाइ
वा चूलियाइ वा, सीसप्पहेलिअंगाइ वा, सीसप्पहेलियाइ वा, पलिओवमाइ वा,
सागरोवमाइ वा उस्सप्पिणीइ वा, ओसप्पिणीइ वा, जीवाइ वा अजीवाइ वा
पवुच्चइ ॥ १४२ ॥ गामाइ वा, नगराइ वा, निगमाइ वा, रायहाणीइ वा, खेडाइ
वा, कव्वडाइ वा, मड्ढाइ वा, दोणमुहाइ वा, पट्टणाइ वा, आभराइ वा, आस-

माइ वा, संवाहाइ वा, संनिवेसाइ वा, घोसाइ वा, आरामाइ वा, उज्जाणाइ वा, वणाइ वा, वणखंडाइ वा, वावीइ वा, पुक्खरणीइ वा, सराइ वा, सरपंतीइ वा, अगडाइ वा, तडागाइ वा, दहाइ वा, णदीइ वा, पुढवीइ वा, उदहीइ वा, वात-
 खंधाइ वा, उवासंतराइ वा, वलयाइ वा, विग्गहाइ वा, बीवाइ वा, समुहाइ वा, वेलाइ वा, वेइयाइ वा, दाराइ वा, तोरणाइ वा, णेरइयाइ वा, णेरइयावासाइ वा, जाव वेमाणियावासाइ वा, कप्पाइ वा, कप्पविमाणवासाइ वा, वासाइ वा, वा-
 सहरपव्वयाइ वा, कूडाइ वा, कूडागराइ वा, विजयाइ वा, रायहाणीइ वा जीवाइ वा अजीवाइ वा पवुच्चइ ॥ १४३ ॥ छायाइ वा, आतवाइ वा, जोसिणाइ वा, अंधगाराइ वा, ओमाणाइ वा, पमाणाइ वा, उम्माणाइ वा, अतितानिगिहाइ वा, उज्जाणिगिहाइ वा, अवलिम्बाइ वा, सणिप्पवायाइ वा जीवाइ वा अजीवाइ वा पवुच्चइ ॥ १४४ ॥ दोरासी प० तं० जीवरासी चेव, अजीवरासी चेव, दुविहे बंधे प० तं० पेज्जबंधे चेव, दोसबंधे चेव, जीवाणं दोहिं ठाणेहिं पावकम्मं बंधन्ति तं० रागेण चेव, दोसेण चेव, जीवाणं दोहिं ठाणेहिं पावकम्मं उदीरेन्ति तं० अब्भो-
 वगमियाए चेव वेयणाए उवक्कमियाए चेव वेयणाए एवं वेदेति एवं णिज्जेरंति अब्भो-
 वगमियाए चेव वेयणाए उवक्कमियाए चेव वेयणाए, दोहिं ठाणेहिं आया सरीरं फुसित्ताणं णिज्जाति तं० देसेणवि आया सरीरं फुसित्ताणं णिज्जाति सव्वेणवि आया सरीरं फुसित्ताणं णिज्जाति, एवं फुरित्ताणं एवं फुडित्ताणं एवं संवट्ठित्ताणं निव्वट्ठि-
 त्ताणं, दोहिं ठाणेहिं आया केवलपिप्पत्तं धम्मं लभेज्जा सवणयाए तंजहा-खएण चेव उवसमेण चेव, एवं जाव मणपज्जवणाणं उप्पाडेज्जा तं० खएण चेव उवसमेण चेव ॥ १४५ ॥ दुविहे अद्धोवमिए प० तं० पलिओवमे चेव सागरोवमे चेव । से किं तं पलिओवमे ? पलिओवमे जं जोयणविच्छिन्नं पल्लं एगाहियप्परूढाणं होज्ज णिरं-
 तरणिचियं भरियं वालगगकोडीणं १ वाससए वाससए एक्केक्के, अवहडंमि जो कालो; सो कालो बोद्धवो, उवमा एगस्स पल्लस्स २ एतेसिं पल्लणं कोडाकोडी हवेज्ज दसगुणिया; तं सागरोवमस्स उ एगस्स भवे परीमाणं ३-॥ १४६ ॥ दुविहे कोहे प० तं० आयपइट्ठिए चेव, परपइट्ठिए चेव, एवं णेरइयाणं जाव वेमाणियाणं, एवं जाव मिच्छादंसणसल्ले ॥ १४७ ॥ दुविहा संसारसमावन्नगा जीवा प० तं० तसा चेव, थावरा चेव, दुविहा सव्वजीवा प० तं० सिद्धा चेव असिद्धा चेव । दुविहा सव्वजीवा प० तं० सइंदिया चेव, अणिंदिया चेव, एवं एसा गाहा फासे-
 यव्वा जाव ससरीरी चेव असरीरी चेव; सिद्धसइंदियकाए, जोगे वेए कसायलेसा य, णाणुवओगाहारे भासगचरिमे य ससरीरी (१) ॥ १४८ ॥ दोमरणाइं समणेणं

भगवत्या महावीरेणं समणाणं णिग्गंथाणं णो णिच्चं वणिण्याइं कित्तियाइं णो णिच्चं
 बुद्धयाइं णो णिच्चं पसत्थाइं णो णिच्चं अब्भणुच्चायाइं भवंति तं० वलयमरणे चेव,
 वसट्टमरणे चेव, एवं णियाणमरणे चेव, तब्भमरणे चेव, गिरिपडणे चेव, तरुपडणे
 चेव, जलप्पवेसे चेव, जलणप्पवेसे चेव, विसभक्खणे चेव, सत्थोवाडणे चेव,
 दोमरणाइं जाव णो णिच्चं अब्भणुच्चायाइं भवंति, कारणेणं पुण अप्पडिकुट्ठाइं तंजहा-
 वेहाणसे चेव गिद्धपिट्ठे चेव ॥ १४९ ॥ दोमरणाइं समणेणं भगवत्या महावीरेणं
 समणाणं णिग्गंथाणं णिच्चं वणिण्याइं जाव अब्भणुच्चायाइं भवंति तं० पाओवगमणे
 चेव भत्तपच्चक्खाणे चेव, पाओवगमणे दुविहे प० तं० णीहारिमे चेव अणीहारिमे
 चेव, णियमं अप्पडिकमे, भत्तपच्चक्खाणे दुविहे प० तं० णीहारिमे चेव, अणीहा-
 रिमे चेव, णियमं सप्पडिकमे ॥ १५० ॥ के अयं लोए ? जीवच्चेव अजीवच्चेव, के
 अणंतालोए ? जीवच्चेव अजीवच्चेव, के सासया लोए ? जीवच्चेव अजीवच्चेव ॥ १५१ ॥
 दुविहा बोही, णाणबोही चेव, दंसणबोही चेव । दुविहा बुद्धा-णाणबुद्धा चेव दंसण-
 बुद्धा चेव, एवं मोहे मूढा ॥ १५२ ॥ णाणावरणिज्जे कम्मे दुविहे पञ्चत्ते तं० देस-
 णाणावरणिज्जे चेव, सव्वणाणावरणिज्जे चेव, दंसणावरणिज्जे कम्मे एवं चेव वेय-
 णिज्जे कम्मे दुविहे प० तं० सायावेयणिज्जे चेव असायावेयणिज्जे चेव मोहणिज्जे
 कम्मे दुविहे प० तं० दंसणमोहणिज्जे चेव चरित्तमोहणिज्जे चेव, आउकम्मे दुविहे
 प० तं० अद्धाउए चेव, भवाउए चेव, णामकम्मे दुविहे प० तं० सुभणामे चेव
 असुभणामे चेव, गोत्तकम्मे दुविहे प० तं० उच्चागोए चेव णीयागोए चेव, अंत-
 राहएकम्मे दुविहे प० तं० पडुप्पण्णविणासिए चेव पिहियआगामिपहं ॥ १५३ ॥
 दुविहा मुच्छा प० तं० पेज्जवत्तिया चेव, दोसवत्तिया चेव, पेज्जवत्तियामुच्छा
 दुविहा प० तं० माए चेव लोहे चेव, दोसवत्तियामुच्छा दुविहा प० तं० कोहे
 चेव माणे चेव ॥ १५४ ॥ दुविहा आराहणा प० तं० धम्मियाराहणा चेव केवल-
 आराहणा चेव, धम्मियाराहणा दुविहा प० तं० सुयधम्माराहणा चेव चरित्त-
 धम्माराहणा चेव, केवलआराहणा दुविहा प० तं० अंतकिरिया चेव कप्पवि-
 माणोववत्तिया चेव ॥ १५५ ॥ दोतित्थयरा नीलुप्पलसमावच्चेणं प० तं० मुणिसुव्वए
 चेव, अरिट्ठणेमी चेव, दोतित्थयरा पियंगुसमावच्चेणं प० तं० मल्ली चेव पासे चेव,
 दोतित्थयरा पउमगोरा वण्णेणं, प० तं० पउमप्पहे चेव, वासुपुज्जे चेव, दोतित्थयरा
 चंदगोरा वण्णेणं प० तं० चंदप्पमे चेव पुप्फदंते चेव ॥ १५६ ॥ सच्चप्पवाय-
 पुव्वस्सणं दुवे वत्थू पज्जत्ता, पुव्वभद्दवयानक्खते दुतारे प० उत्तरभद्दवयानक्खते
 दुतारे प०-एवं पुव्वफग्गुणी, उत्तरफग्गुणी ॥ १५७ ॥ अंतोणं मणुस्सखेत्तस्स दो

समुद्दा, प० तं० लवणे चेव कालोदे चेव, दोचक्कवट्ठी अपरिचत्तकामभोगा काल-
मासे कालं किच्चा अहे सत्तमाए पुढवीए अप्पइट्ठाणनरए नेरइयत्ताए उववच्चा तं०
सुभूमे चेव बंभदत्ते चेव ॥ १५८ ॥ असुरिंदवज्जियाणं भवणवासीणं देवाणं देसू-
णाइं दोपळिओवमाइं ठिई प० सोहम्मे कप्पे देवाणं उक्कोसेणं दोसागरोवमाइं ठिई
प० ईसाणे कप्पे देवाणं उक्कोसेणं साइरेगाइं दोसागरोवमाइं ठिई प० सणकुमारे
कप्पे देवाणं जह्वेणं दोसागरोवमाइं ठिई प० माहिंदे कप्पे देवाणं जह्वेणं
साइरेगाइं दोसागरोवमाइं ठिई पञ्चत्ता ॥ १५९ ॥ दोसु कप्पेसु कप्पत्थियाओ
पणत्ताओ तं० सोहम्मे चेव ईसाणे चेव, दोसु कप्पेसु देवा तेउळेस्सा प० तं०
सोहम्मे चेव ईसाणे चेव, दोसु कप्पेसु देवा कायपरियारगा प० तं० सोहम्मे चेव
ईसाणे चेव, दोसु कप्पेसु देवा फासपरियारगा प० तं० सणकुमारे चेव, माहिंदे
चेव, दोसु कप्पेसु देवा रूवपरियारगा प० तं० बंभलोए चेव, लंतए चेव, दोसु
कप्पेसु देवा सहपरियारगा प० तं० महासुक्के चेव, सहस्सारे चेव, दोइंदा मण-
परियारगा, प० तं० पाणए चेव, अञ्जुए चेव ॥ १६० ॥ जीवाणं दोट्ठाणनिव्वत्तिए
पोग्गले पावकम्मत्ताए चिणिंसु वा चिणंति वा चिणिस्संति वा तंजहा-तसकायनिव्व-
त्तिए चेव, थावरकायनिव्वत्तिए चेव, एवं उवचिणिंसु वा, उवचिणंति वा, उवचिणि-
स्संति वा, बंधिंसु वा, बंधंति वा, बंधिस्संति वा, उदीरिंसु वा, उदीरेंति वा,
उदीरिस्संति वा, वेदिंसु वा, वेदित्ति वा, वेदिस्संति वा, णिज्जरिंसु वा, णिज्जरेति
वा, णिज्जरिस्संति वा ॥ १६१ ॥ दुप्पएसिया खंधा अणंता प० दुपएसोगाडा
पोग्गला अणंता प० एवं जाव दुगुणलुक्खा पोग्गला अणंता पणत्ता ॥ १६२ ॥
वीयट्ठाणस्स चउत्थोदेसो समत्तो, वीयं ठाणं समत्तं ॥

तइयट्ठाणं

तओ इंदा प० तं० णामिंदे-दव्विंदे-भाविंदे ॥ तओ इंदा प० तं० णाणिंदे-
दंसणिंदे-चरित्तिंदे, तओ इंदा प० तं० देविंदे-असुरिंदे-मणुस्सिंदे ॥ १६३ ॥
तिविहा विउव्वणा प० तं० बाहिरए पोग्गलए परियाइत्ता एगा विउव्वणा, बाहिरए
पोग्गले अपरियाइत्ता एगाविउव्वणा, बाहिरए पोग्गले परियाइत्ता वि अपरियाइत्ता वि
एगा विउव्वणा तिविहा विउव्वणा, प० तं० अब्भंतरए पोग्गले परियाइत्ता एगा
विउव्वणा अब्भंतरए पोग्गले अपरियाइत्ता एगाविउव्वणा अब्भंतरए पोग्गले
परियाइत्तावि अपरियाइत्तावि एगा विउव्वणा, तिविहा विउव्वणा प० तं० बाहिर-
ब्भंतरए पोग्गले परियाइत्ता एगा विउव्वणा बाहिरब्भंतरए पोग्गले अपरियाइत्ता

एगा विउव्वणा बाहिरब्भंतरए पोग्गले परियाइत्तावि अपरियाइत्तावि एगा विउव्वणा ॥ १६४ ॥ तिविहा नेरइया प० तं० कतिसंचिया, अकतिसंचिया अवत्तव्वगसंचिया एवमेगिंदियवज्जा जाव वेमाणिया ॥ १६५ ॥ तिविहा परियारणा प० तं० एगे देवे अच्चे देवे अच्चेसिं देवाणं देवीओ य अभिजुंजिय २ परियारेइ, अप्पणिज्जिआओ देवीओ अभिजुंजिय २ परियारेइ अप्पाणमेव अप्पणा विउव्विय २ परियारेइ एगे देवे णो अच्चेदेवे णो अच्चेसिं देवाणं देवीओ अभिजुंजिय २ परियारेइ अप्पणिज्जिआओ देवीओ अभिजुंजिय २ परियारेइ अप्पाणमेव अप्पणा विउव्विय २ परियारेइ ॥ १६६ ॥ तिविहे मेहुणे प० तं० दिव्वे माणुस्सए तिरिक्खजोणिए, तओ मेहुणं गच्छंति तं० देवा मणुस्सा तिरिक्खजोणिया, तओ मेहुणं सेवन्ति तं० इत्थी पुरिसा णपुसगा ॥ १६७ ॥ तिविहे जोगे प० तं० मणजोगे वयजोगे कायजोगे, एवं णेरइयाणं विगल्लिंदियवज्जाणं जाव वेमाणियाणं, तिविहे पओगे प० तं० मणपओगे, वयपओगे, कायपओगे; जहा जोगो विगल्लिंदियवज्जाणं जाव वेमाणियाणं तथा पओगेवि । तिविहे करणे प० तं० मणकरणे, वयकरणे, कायकरणे, एवं णेरइयाणं विगल्लिंदियवज्जाणं जाव वेमाणियाणं । तिविहे करणे पच्चे तं० आरंभकरणे, संरंभकरणे समारंभकरणे, णिरंतरं जाव वेमाणियाणं ॥ १६८ ॥ तिहिं ठाणेहिं जीवा अप्पाउअत्ताए कम्मं पगरंति तं० पाणे अइवाइत्ता भवइ, मुसंवइत्ता भवइ, तहारुवं समणं वा, णिग्गंथं वा, अफासुएणं अणेसणिज्जेणं असणपाणखाइमसाइमेणं पडिलाभित्ता भवइ, इच्चेएहिं तिहिं ठाणेहिं जीवा अप्पाउअत्ताए कम्मं पगरंति । तिहिं ठाणेहिं जीवा बीहाउअत्ताए कम्मं पगरंति तंजहा-णो पाणे अइवाइत्ता भवइ, णो मुसं वइत्ता भवइ, तहारुवं णं समणं णिग्गंथं वा फासुएसणिज्जेणं असणपाणखाइमसाइमेणं पडिलाभेत्ता भवइ । इच्चेएहिं तिहिं ठाणेहिं जीवा बीहाउअत्ताए कम्मं पगरंति ॥ १६९ ॥ तिहिं ठाणेहिं जीवा असुभबीहाउअत्ताए कम्मं पगरंति तं० पाणे अइवाइत्ता भवइ, मुसं वइत्ता भवइ, तहारुवं समणं णिग्गंथं वा हीळेत्ता निंदेत्ता खिसेत्ता गरिहित्ता अवमाणित्ता अन्नयरेणं अमणुज्जेणं अपीइकारएणं असणपाणखाइमसाइमेणं वा पडिलाभेत्ता भवइ, इच्चेएहिं तिहिं ठाणेहिं जीवा असुभबीहाउअत्ताए कम्मं पगरंति, तिहिं ठाणेहिं जीवा सुभबीहाउअत्ताए कम्मं पगरंति, तंजहा-णो पाणे अइवाइत्ता भवइ, णो मुसं वइत्ता भवइ, तहारुवं समणं वा णिग्गंथं वा वंदित्ता नमंसित्ता सक्कारेत्ता सम्माणेत्ता कट्ठाणं मंगलं देवयं चेइयं पजुवासेत्ता

मणुक्केणं पीइकारणं असणपाणखाइमसाइमेणं पडिलाभेत्ता भवइ, इच्चेएहिं तिहिं ठाणेहिं जीवा सुहदीहाउअत्ताए कम्मं पगरेंति ॥ १७० ॥ तओ गुत्तीओ पन्नत्ताओ तं० मणगुत्ती, वयगुत्ती, कायगुत्ती, संजयमणुस्साणं तओ गुत्तीओ प० तं० मण, वय, काय०। तओ अगुत्तीओ प० तं० मणअगुत्ती, वयअगुत्ती, कायअगुत्ती, एवं णेरइयाणं जाव० थणियकुमाराणं पंचिंदियतिरिक्खजोणियाणं असंजयमणुस्साणं वाणमंतराणं जोइ- सियाणं वेमाणियाणं। तओ दंडा प० तं० मणदंडे, वयदंडे, कायदंडे, णेरइयाणं तओ दंडा प० मणदंडे, जाव कायदंडे विगलिंदियवज्जं जाव वेमाणियाणं ॥ १७१ ॥ तिविहा गरिहा प० तं० मणसावेगे गरहइ, वयसावेगे गरहइ, कायसावेगे गरहइ, पावाणं कम्माणं अकरणयाए। अहवा गरहा तिविहा प० तं० दीहवेगे अद्धं गरहइ, रहस्सं वेगे अद्धं गरहइ, कायवेगे पडिसाहरइ पावाणं कम्माणं अकरणयाए, तिविहे पच्चक्खाणे प० तं० मणसावेगे पच्चक्खाइ, वयसावेगे पच्चक्खाइ, कायसावेगे पच्च-क्खाइ, एवं जहा गरहा तहा पच्चक्खाणेवि दो आलावगा भाणियव्वा ॥ १७२ ॥ तओ स्वखा, प० तं० पत्तोवए, फलोवए, पुप्फोवए, एवामेव तओ पुरिसजाया प० तं० पत्तो वा स्वक्समाणे, पुप्फो वा स्वक्समाणे फलो वा स्वक्समाणे ॥ तओ पुरिसजाया प० तं० णामपुरिसे, दव्वपुरिसे, भावपुरिसे, तओ पुरिसजाया प० तं० णाणपुरिसे, दंसणपुरिसे, चरित्तपुरिसे, तओ पुरिसजाया प० तं० वेदपुरिसे, चिंधपुरिसे, अभिलावपुरिसे ॥ १७३ ॥ तिविहा पुरिसा प० तं० उत्तमपुरिसा, मज्झिमपुरिसा जहन्नपुरिसा, उत्तमपुरिसा तिविहा प० तं० धम्मपुरिसा, भोग-पुरिसा, कम्मपुरिसा, धम्मपुरिसा अरिहंता, भोगपुरिसा चक्कवट्ठी, कम्मपुरिसा वासुदेवा, मज्झिमपुरिसा तिविहा-उग्गा भोगा राइण्णा, जहन्नपुरिसा तिविहा, प० तं० दासा, भयगा, भाइल्ला ॥ १७४ ॥ तिविहा मच्छा प० तं० अंडया, पोयया, संमुच्छिमा, अंडया मच्छा तिविहा प० तं० इत्थी, पुरिसा, णपुंसगा; पोयया मच्छा तिविहा प० तं० इत्थी, पुरिसा, णपुंसगा ॥ १७५ ॥ तिविहा पक्खी प० तं० अंडया, पोयया, संमुच्छिमा, अंडया पक्खी तिविहा प० तं० इत्थी पुरिसा, णपुंसगा, पोयया पक्खी तिविहा प० तं० इत्थी, पुरिसा, णपुंसगा, एवमे- एणं अभिलावेणं उरपरिसप्पावि भाणियव्वा, भुजपरिसप्पा वि णेयव्वा, एवं चेव ॥ १७६ ॥ तिविहाओ इत्थीओ पन्नत्ताओ तं० तिरिक्खजोणित्थीओ, मणुस्सित्थीओ, देवित्थीओ, तिरिक्खजोणित्थीओ तिविहाओ प० तं० जलचरीओ, थलचरीओ, खहचरीओ, मणुस्सित्थीओ तिविहाओ पणत्ताओ, तं० कम्मभूमियाओ, अकम्म-भूमियाओ, अंतरदीवियाओ ॥ १७७ ॥ तिविहा पुरिसा तिरिक्खजोणियपुरिसा,

मणुस्सपुरिसा, देवपुरिसा, तिरिक्खजोणियपुरिसा तिविहा प० तं० जलयरा,
थलयरा, खहयरा, मणुस्सपुरिसा तिविहा प० तं० कम्मभूमिया, अकम्मभूमिया अंत-
रदीवया ॥ १७८ ॥ तिविहा णपुंसगा, णेरइयणपुंसगा, तिरिक्खजोणियणपुंसगा मणु-
स्सणपुंसगा, तिरिक्खजोणियणपुंसगा तिविहा-जलयरा थलयरा खहयरा ॥ १७९ ॥
मणुस्सणपुंसगा तिविहा प० तं० कम्मभूमिया अकम्मभूमिया अंतरदीवगा, तिविहा
तिरिक्खजोणिया, इत्थी पुरिसा णपुंसगा ॥ १८० ॥ णेरइयाणं तओ लेस्साओ प०
तं० कण्हलेस्सा नीललेस्सा काउलेस्सा, असुरकुमारणं तओ लेस्साओ संकिलिठाओ
प० तं० कण्हलेस्सा नीललेस्सा काउलेस्सा एवं जाव थणियकुमारणं । एवं पुढवि-
काइयाणं आउवणस्सइकाइयाणं वि तेउवाउबेइंदियतेइंदियचउरिंदियाणं वि तओ
लेस्सा जहा णेरइयाणं, पंचिंदियतिरिक्खजोणियाणं तओ लेस्साओ संकिलिठाओ प०
तं० कण्हनीलकाउलेस्सा, पंचिंदियतिरिक्खजोणियाणं तओ लेस्साओ असंकिलिठाओ
प० तं० तेउपम्हसुक्कलेस्सा एवं मणुस्साणवि वाणमंतराणं जहा असुरकुमारणं,
वेमाणियाणं तओ लेस्साओ प० तं० तेउपम्हसुक्कलेस्सा ॥ १८१ ॥ तिहिं ठाणेहिं
ताराखवे चलेज्जा तं० विक्खवमाणे वा परियारेमाणे वा, ठाणाओ वा ठाणं संकम-
माणे ताराखवे चलेज्जा । तिहिं ठाणेहिं देवे विज्जुयारं करेज्जा तं० विउव्वमाणे वा
परियारेमाणे वा तहाखवस्स समणस्स वा णिग्गथस्स वा इद्धि जुइं जसं बलं वीरियं
पुरिसक्कारपरक्कमं उवदंसेमाणे देवे विज्जुयारं करेज्जा, तिहिं ठाणेहिं देवे थणियसइं
करेज्जा तं० विउव्वमाणे एवं जहा विज्जुयारं तहेव थणियसइं ॥ १८२ ॥ तिहिं
ठाणेहिं लोगंधयारे सिया तंजहा-अरिहंतेहिं वोच्छिज्जमाणेहिं अरिहंतपणत्ते धम्मे
वोच्छिज्जमाणे पुव्वगए वोच्छिज्जमाणे । तिहिं ठाणेहिं लोगुजोए सिया तं० अरिहं-
तेहिं जायमाणेहिं अरिहंतेसु पव्वयमाणेसु, अरिहंताणं णाणुप्पायमहिमासु । तिहिं
ठाणेहिं देवंधयारे सिया तं० अरिहंतेहिं वोच्छिज्जमाणेहिं अरिहंतपणत्ते धम्मे
वोच्छिज्जमाणे पुव्वगए वोच्छिज्जमाणे । तिहिं ठाणेहिं देवुजोए सिया तं० अरिहंतेहिं
जायमाणेहिं, अरिहंतेहिं पव्वयमाणेहिं, अरिहंताणं णाणुप्पायमहिमासु । तिहिं ठाणेहिं
देवसन्निवाए सिया तं० अरिहंतेहिं जायमाणेहिं अरिहंतेहिं पव्वयमाणेहिं अरिहंताणं
णाणुप्पायमहिमासु । एवं देवुक्कलिया, देवकहकहए, तिहिं ठाणेहिं देविंदा माणुसं
लोगं हव्वमागच्छंति तं० अरिहंतेहिं जायमाणेहिं अरिहंतेहिं पव्वयमाणेहिं अरिहं-
ताणं णाणुप्पायमहिमासु, एवं सामाणिया, तायत्तीसगा लोगपाला देवा अग्गमहि-
सीओ देवीओ परिसोववन्नगा देवा, अणियाहिवई देवा, आयरक्खा देवा माणुसं
लोगं हव्वमागच्छंति, तिहिं ठाणेहिं देवा अब्भुट्टेज्जा तं० अरिहंतेहिं जायमाणेहिं

जाव तं चेव । एवमासणाई चलेज्जा, सीहणायं करेज्जा, चेलक्खेवं करेज्जा । तिहिं ठाणेहिं देवाणं स्ख्खा चलेज्जा तं० अरिहंतैहिं जायमाणेहिं, जाव तं चेव । तिहिं ठाणेहिं लोंगंतिया देवा माणुसं लोंगं हव्वमागच्छेज्जा तं० अरिहंतैहिं जायमाणेहिं, अरिहंतैहिं पव्वयमाणेहिं, अरिहंताणं णाणुप्पायमहिमासु ॥ १८३ ॥ तिण्हं दुप्पडियारं समणाउसो तंजहा-अम्मापिउणो भट्टिस्स धम्मायरियस्स, संपाओवि य णं केइ पुरिसे अम्मापियरं सयपागसहस्सपागेहिं तिळेहिं अब्भंगेत्ता, सुरभिणा गंधट्टणं उव्वट्ठित्ता, तिहिं उदगेहिं मज्जावेत्ता, सव्वालंकारविभूसियं करेत्ता, मणुच्चं थालीपागसुद्धं अट्ठारसवंचज्जाउलं भोअणं भोआवेत्ता जावजीवं पिठ्ठिवडिसियाए परिवहेज्जा, तेणावि तस्स अम्मापिउस्स दुप्पडियारं भवइ । अहेणं से तं अम्मापियरं केवलपन्नत्ते धम्मे आघवइत्ता पन्नवइत्ता परूवइत्ता ठावइत्ता भवइ तेणामेव तस्स अम्मापिउस्स सुप्पडियारं भवइ । समणाउसो केइ महचे दरिइं समुक्कसेज्जा तएणं से दरिइं समुक्किठ्ठे समाणे पच्छा पुरं च णं विउलभोगसमिइसमण्णागए या विविहरेज्जा, तएणं से महचे अन्नया कयाइं दरिदी हूए समाणे तस्स दरिइस्स अंतिए हव्वमागच्छेज्जा तएणं से दरिइं तस्स भट्टिस्स सव्वस्समवि दलयमाणे तेणावि तस्स दुप्पडियारं भवइ, अहेणं से तं भट्टिं केवलपन्नत्ते धम्मे आघवइत्ता पण्णवइत्ता परूवइत्ता ठावइत्ता भवइ तेणामेव तस्स भट्टिस्स सुप्पडियारं भवइ । केइ तहारूवस्स समणस्स वा णिगंथस्स वा अंतियमेगमवि आरियं जिणभासियं धम्मं सुवयणं सोच्चा निसम्म कालमासे कालं किच्चा अन्नयरेसु देवलोएसु देवत्ताए उव्वज्जे, तएणं से देवे तं धम्मायरियं दुब्बिक्खाओ वा देसाओ सुभिव्वं देसं साहरेज्जा, कंताराओ वा णिकंतारं करेज्जा, दीहकालिणं वा रोआतंकेणं अभिभूयं समाणं विमोइज्जा, तेणावि तस्स धम्मायरियस्स दुप्पडियारं भवइ, अहेणं से तं धम्मायरियं केवलपन्नत्ताओ धम्माओ भट्ठं समाणं भुज्जोवि केवलपन्नत्ते धम्मे आघवइत्ता जाव ठावइत्ता भवइ तेणामेव तस्स धम्मायरियस्स सुप्पडियारं भवइ ॥ १८४ ॥ तिहिं ठाणेहिं संपन्ने अणगारे अणाइयं अणवदग्गं दीहमद्धं चाउरंतसंसारकंतारं वीइवएज्जा, तंजहा-अणियाणयाए, दिट्ठिसंपन्नयाए, जोगवाहियाए ॥ १८५ ॥ तिविहा ओसप्पिणी प० तं० उक्कोसा मज्झिमा जहन्ना, एवं छप्पिसमाओ भाणियव्वाओ जाव दुसमदुसमा, तिविहा उस्सप्पिणी प० तं० उक्कोसा मज्झिमा जहन्ना एवं छप्पिसमाओ भाणियव्वाओ, जाव सुसमसुसमा ॥ १८६ ॥ तिहिं ठाणेहिं अच्चिन्ने पोगगले चलेज्जा तं० आहारिजमाणे वा पोगगले चलेज्जा, विउव्वमाणे वा पोगगले चलेज्जा, ठाणाओ ठाणं संकामेजमाणे वा पोगगले चलेज्जा ॥ १८७ ॥ तिविहा उवही प० तं० कम्मोवही

सरीरोवही बाहिरभंडमत्तोवही, एवं असुरकुमारानं भाणियच्चं, एवं एगिंदियनेरइय-
वज्जं जाव वेमाणियाणं । अहवा तिविहा उवही प० तं० सच्चित्ता अचित्ता मीसिया ।
एवं नेरइयाणं निरंतरं जाव वेमाणियाणं, तिविहे परिग्गहे प० तं० कम्मपरिग्गहे
सरीरपरिग्गहे बाहिरभंडमत्तपरिग्गहे, एवं असुरकुमारानं, एवं एगिंदियनेरइयवज्जं
जाव वेमाणियाणं, अहवा तिविहे परिग्गहे प० तं० सच्चित्ते अचित्ते मीसए एवं
नेरइयाणं निरंतरं जाव वेमाणियाणं ॥ १८८ ॥ तिविहे पणिहाणे प० तं० मणप-
णिहाणे वयपणिहाणे कायपणिहाणे एवं पंचिंदियाणं जाव वेमाणियाणं । तिविहे सुप्प-
णिहाणे प० तं० मणसुप्पणिहाणे वयसुप्पणिहाणे कायसुप्पणिहाणे, संजयमणुस्साणं
तिविहे सुप्पणिहाणे प० तं० मणसुप्पणिहाणे वयसुप्पणिहाणे कायसुप्पणिहाणे, तिविहे
दुप्पणिहाणे प० तं० मणदुप्पणिहाणे वयदुप्पणिहाणे कायदुप्पणिहाणे, एवं पंचिंदि-
याणं जाव वेमाणियाणं ॥ १८९ ॥ तिविहा जोणी पणत्ता तंजहा-सीआ उसिणा
सीओसिणा । एवमेगिंदियाणं विगलिंदियाणं तेउकाइयवज्जाणं संमुच्छिमपंचिंदियति-
रिक्खजोणियाणं संमुच्छिममणुस्साणं य, तिविहा जोणी प० तं० सच्चित्ता अचित्ता
मीसिया एवमेगिंदियाणं विगलिंदियाणं संमुच्छिमपंचिंदियतिरिक्खजोणियाणं संमु-
च्छिममणुस्साणं य । तिविहा जोणी प० तं० संवुडा, वियडा संवुडवियडा । तिविहा
जोणी प० तं० कुम्मुन्नया संखावत्ता वंसीवत्तिया, कुम्मुन्नयाणं जोणी उत्तमपुरिस-
माऊणं, कुम्मुन्नयाएणं जोणीए तिविहा उत्तमपुरिसा गब्भं वक्कमंति तं० अरिहंता
चक्कवट्ठी बलदेववासुदेवा, संखावत्ता जोणी इत्थीरयणस्स संखावत्ताएणं जोणीए
बहवे जीवा य पोगगला य वक्कमंति विउक्कमंति चयंति उववज्जंति नो चेव णं णिप्पज्जंति ।
वंसीपत्तियाणं जोणी पिहज्जणस्स वंसीवत्तियाएणं जोणीए बहवे पिहज्जणे गब्भं वक्क-
मंति ॥ १९० ॥ तिविहा तणवणस्सइकाइया प० तं० संखेज्जणीविया असंखेज्जणी-
विया अणंतजीविया ॥ १९१ ॥ जंबुद्दीवे दीवे भारहेवासे तओ तित्था प० तं०
मागहे वरदामे पभासे एवं एरवएवि । जंबुद्दीवे दीवे महाविदेहवासे एगमेगे चक्क-
वट्ठिविजए तओ तित्था प० तं० मागहे वरदामे पभासे । एवं धायइखंडे दीवे
पुरच्छिमदेवि पच्चत्थिमदेवि पुक्खरवदीवद्धुपुरच्छिमदेवि पच्चत्थिमदेवि ॥ १९२ ॥
जंबुद्दीवे दीवे भरहेरवएसु वासेसु तीआए उस्सप्पिणीए सुसमाए समाए तिज्जिसागरो-
वमकोडाकोडीओ कालो होत्था । एवं ओसप्पिणीए णवरं प० आगमेस्साए उस्स-
प्पिणीए भविस्सइ । एवं धायइखंडे पुरच्छिमदेवि पच्चत्थिमदेवि । एवं पुक्खरव-
रदीवद्धुपुरत्थिमदेवि पच्चत्थिमदेवि कालो भाणियव्वो ॥ १९३ ॥ जंबुद्दीवे दीवे भरहेर-
वएसु वासेसु तीयाए उस्सप्पिणीए सुसमसुसमाए समाए मणुया तिज्जि गाउआई

उद्धं उच्चतेणं तिणिगपलिओवमाई परमाउं पालइत्था एवं इमीसे ओसप्पिणीए आग-
मेस्साए उस्सप्पिणीए । जंबुद्दीवे दीवे देवकुलउत्तरकुरासु मणुया तिन्नि गाउआई उद्धं
उच्चतेणं प० तिन्निपलिओवमाई परमाउं पालयंति । एवं जाव पुक्खरवरदीवद्धुपच्चत्थि-
मद्धे ॥ १९४ ॥ जंबुद्दीवे दीवे भरहेरवएसु वासेसु एगमेगाए ओसप्पिणिउस्सप्पिणीए
तओ वंसा उप्पज्जिसु वा उप्पज्जंति वा उप्पज्जिस्संति वा तं० अरिहंतवंसे चक्कवट्ठि-
वंसे दसारवंसे । एवं जाव पुक्खरवरदीवद्धुपच्चत्थिमद्धे । जंबुद्दीवे दीवे भरहेरवएसु
वासेसु एगमेगाए ओसप्पिणीउस्सप्पिणीए तओ उत्तमपुरिसा उप्पज्जिसु वा उप्पज्जंति
वा उप्पज्जिस्संति वा तं० अरिहंता वा चक्कवट्ठी वा बलदेववासुदेवा । एवं जाव
पुक्खरवरदीवद्धुपच्चत्थिमद्धे । तओ अहाउयं पालेंति तं० अरिहंता चक्कवट्ठी बलदेव-
वासुदेवा, तओ मज्झिममाउयं पालयंति तं० अरिहंता चक्कवट्ठी बलदेववासुदेवा
॥ १९५ ॥ बायरतेऊकाइयाणं उक्कोसेणं तिन्नि राइंदियाई ठिई प० बायरवाउकाइ-
याणं उक्कोसेणं तिन्निवाससहस्साई ठिई पञ्चत्ता ॥ १९६ ॥ अह मंते सालीणं वीहीणं
गोधूमाणं जवाणं जवजवाणं एएसिणं धन्नाणं कोट्टाउत्ताणं पल्लाउत्ताणं मंचाउत्ताणं
मालाउत्ताणं ओलित्ताणं लित्ताणं लंछियाणं मुहियाणं पिहियाणं केवइयं कालं जोणी
संचिट्ठइ ? गोयमा ! जह्जेणं अंतोमुहुत्तं उक्कोसेणं तिन्निस्संवच्छराइं तेण परं जोणी
पमिलायइ पविद्धंसइ विद्धंसइ तेण परं वीए अवीए भवइ तेण परं जोणी वोच्छेदे
प० ॥ १९७ ॥ दोचाएणं सक्करप्पभाए पुढवीए नेरइयाणं उक्कोसेणं तिन्निसागरो-
वमाई ठिई प० तच्चाएणं वालुयप्पभाए पुढवीए जह्जेणं नेरइयाणं तिन्निसागरोव-
माई ठिई प० । पंचमाए णं धूमप्पभाए पुढवीए तिन्निनिरयावाससयसहस्सा प०
तिसु णं पुढवीसु नेरइया उस्सिणं वेयणं पच्चणुभवमाणा विहरंति तं० पढमाए दोचाए
तच्चाए ॥ १९८ ॥ तओ लोणे समा सपक्खि सपडिदिसिं प० तं० अप्पइट्ठाणे णरए
जंबुद्दीवे दीवे सव्वट्ठसिद्धे महाविमाणे । तओ लोणे समा सपक्खि सपडिदिसिं प०
तं० सीमंतएणं णरए समयक्खेत्ते ईसिपब्भारापुढवी ॥ १९९ ॥ तओ समुद्दा पगईए
उदगरसेणं प० तं० कालोदे पुक्खरोदे सयंभुरमणे, तओ समुद्दा बहुमच्छक्कभा-
इण्णा प० तं० लवणे कालोदे सयंभुरमणे ॥ २०० ॥ तओ लोणे णिस्सीला णिव्वया
णिग्गुणा णिम्मेरा णिपच्चक्खाणपोसहोववासा कालमासे कालं किच्चा अहे सत्तमाए
पुढवीए अप्पइट्ठाणे णरए नेरइयत्ताए उववज्जंति तं० रायाणो मंडलिया जे य महा-
रंभा कोडुंबी । तओ लोए सुसीला सुव्वया सगुणा सम्मेरा सपच्चक्खाणपोसहोव-
वासा कालमासे कालं किच्चा सव्वट्ठसिद्धे महाविमाणे देवत्ताए उववत्तारो भवंति
तं० रायाणो परिचत्तकामभोगा सेणावई पसत्थारो ॥ २०१ ॥ बंभलोगलंतएसु णं

कप्पेसु विमाणा तिवच्चा पञ्चत्ता तं० किण्हा नीला लोहिया । आणयपाणयारणच्चुएसु
णं कप्पेसु देवाणं भवधारणिजसरीरगा उक्कोसेणं तिन्नि रयणीओ उच्चं उच्चत्तेणं प०
॥ २०२ ॥ तओ पञ्चत्तीओ कालेणं अहिज्जन्ति तं० चंदपञ्चत्ती सूरपञ्चत्ती दीवसागर-
पञ्चत्ती ॥ २०३ ॥ तइयट्ठाणस्स पढमोहेसो समत्तो ॥

तिविहे लोणे पञ्चत्ते तं० णामलोणे ठवणलोणे दव्वलोणे, तिविहे लोणे प० तं०
णाणलोणे दंसणलोणे चरित्तलोणे, तिविहे लोणे प० तं० उच्चलोणे अहोलोणे तिरिय-
लोणे ॥ २०४ ॥ चमरस्सणं असुरिंदस्स असुरकुमाररण्णो तओ परिसाओ पण्णत्ताओ
तं० समिया चंडा जाया अब्भितरिया समिया मज्झमिया चंडा बाहिरिया जाया,
चमरस्स णं असुरिंदस्स असुरकुमाररण्णो सामाणियाणं देवाणं तओ परिसाओ
पण्णत्ताओ तं० समिया जहेव चमरस्स । एवं तायत्तीसगाणवि लोगपालाणं तुंबा
तुडिया पव्वा एवं अगमहिंसीण वि । बलिस्स वि एवं चेव जाव अगमहिंसीणं ।
धरणस्स य सामाणियतायत्तीसगाणं च समिया चंडा जाया, लोगपालाणं अग-
महिंसीणं ईसा तुडिया दढरहा, जहा धरणस्स तहा सेसाणं भवणवासीणं, काल-
स्सणं पिसाईदस्स पिसायरण्णो तओ परिसाओ पञ्चत्ताओ, तं० ईसा तुडिया दढरहा,
एवं सामाणियअगमहिंसीणं वि एवं जाव गीयरइ गीयजसाणं चंदस्स णं जोइसिंदस्स
जोइसरण्णो तओ परिसाओ, तुंबा तुडिया पव्वा, एवं सामाणियअगमहिंसीणं,
एवं सूरस्स वि, सक्कस्स णं देविंदस्स देवरण्णो तओ परिसाओ पञ्चत्ताओ तं० समिया
चंडा जाया, एवं जहा चमरस्स जाव अगमहिंसीणं, एवं जाव अच्चुयस्स लोगपालाणं
॥ २०५ ॥ तओ जामा प० तं० पढमे जामे मज्झिमे जामे पच्छिमे जामे, तिहिं
जामेहिं आया केवलपञ्चत्तं धम्मं लभेज्ज सवणयाए तं० पढमे जामे मज्झिमे
जामे पच्छिमे जामे, एवं जाव केवलनाणं उप्पाडेज्जा पढमे जामे मज्झिमे जामे
पच्छिमे जामे । तओ वया प० तं० पढमे वए मज्झिमे वए पच्छिमे वए, तिहिं
वएहिं आया केवलपञ्चत्तं धम्मं लभेज्ज सवणयाए तं० पढमे वए मज्झिमे वए
पच्छिमे वए, एसो चेव गमो गेयव्वो, जाव केवलनार्णत्ति ॥ २०६ ॥ तिविहा बोही
प० तं० णाणबोही दंसणबोही चरित्तबोही, तिविहा बुद्धा प० तं० णाणबुद्धा
दंसणबुद्धा चरित्तबुद्धा, एवं मोहे मूढा ॥ २०७ ॥ तिविहा पव्वज्जा प० तं० इह-
लोगपडिबद्धा, परलोगपडिबद्धा, दुहओ पडिबद्धा, तिविहा पव्वज्जा प० तं० पुरओ-
पडिबद्धा, मग्गओपडिबद्धा, उअओपडिबद्धा, तिविहा पव्वज्जा प० तं० तुयावइत्ता
पुयावइत्ता बुयावइत्ता, तिविहा पव्वज्जा पण्णत्ता तं० उवायपव्वज्जा अक्खाय-
पव्वज्जा संगारपव्वज्जा ॥ २०८ ॥ तओ णियंअ णोसण्णोवत्तत्ता प० तं० पुलाए
१४ सुत्ता०

णियंठे सिणाए, तओ णियंठा सण्णणोसण्णोवउत्ता प० तं० बउसे पडिसेवणाकुसीले
 कसायकुसीले ॥ २०९ ॥ तओ सेहभूमीओ प० तं० उक्कोसा मज्झिमा जहण्णा
 उक्कोसा छम्मासा मज्झिमा चउमासा, जहन्ना सत्तराईदिया ॥ २१० ॥ तओ
 थेरभूमीओ पज्जताओ तं० जाइथेरे सुयथेरे परियायथेरे । सट्ठिवासजाए समणे
 णिग्गंथे जाइथेरे, ठाणसमवायधरे णं समणे णिग्गंथे सुयथेरे, वीसवासपरियाए णं
 समणे णिग्गंथे परियायथेरे ॥ २११ ॥ तओ पुरिसजाया प० सुमणे दुम्मणे णो-
 सुमणेणोदुम्मणे, तओ पुरिसजाया प० गंताणामेगे सुमणे भवइ गंताणामेगे
 दुम्मणे भवइ गंताणामेगे णोसुमणेणोदुम्मणे भवइ, तओ पुरिसजाया प० तं०
 जामि एगे सुमणे भवइ, जामि एगे दुम्मणे भवइ, जामि एगे णोसुमणेणोदुम्मणे
 भवइ, एवं जाइस्सामि एगे सुमणे भवइ (३) तओ पुरिसजाया पणत्ता तं०
 अगंताणामेगे सुमणे भवइ (३) तओ पुरिसजाया प० तं० ण जामि एगे सुमणे
 भवइ (३) तओ पुरिसजाया प० तं० ण जाइस्सामि एगे सुमणे भवइ (३) एवं
 आगंताणामेगे सुमणे भवइ (३) एमि एगे सुमणे भवइ, एस्सामि एगे सुमणे भवइ (३)
 एवं एएणं अभिलावेणं गंता य अगंता य आगंता खलु तहा अणागंता । चिट्ठित्तम-
 चिट्ठित्ता, णिसिद्धा चेव नो चेव ^१ हंता य अहंता य छिंदित्ता खलु तहा अछिंदित्ता,
 बूइत्ता अबूइत्ता, भासित्ता चेव णो चेव ^२ दच्चा य अदच्चा य, भुंजित्ता खलु
 तहा अभुंजित्ता, लंभित्ता अलंभित्ता, पिइत्ता चेव नो चेव ^३ सुइत्ता असुइत्ता,
 जुज्झित्ता खलु तहा अजुज्झित्ता; जइत्ता अजइत्ता य, पराजिणित्ता चेव नो
 चेव ^४ सद्दा रुवा गंधा, रसा य फासा तहेव ठाणा य; निस्सीलस्स गरहिया,
 पसत्था पुण सीलवंतस्स ^५ एवमेक्केक्के तिज्जित्तिज्जिउ आलावगा भाणियव्वा । सइं
 सुणेत्ताणामेगे सुमणे भवइ (३) एवं सुणेमिति (३) सुणेस्सामिति ३ एवं असुणे-
 त्ताणामेगे सुमणे भवइ (३) न सुणेमि ति ३ न सुणेस्सामिति ३ एवं रुवाई गंधाई
 रसाई फासाई इक्केके छळ आलावगा भाणियव्वा, एवं १२७ आलावगा भवंति
 ॥ २१२ ॥ तओ ठाणा णिस्सीलस्स णिव्वयस्स णिग्गुणस्स णिम्मेरस्स णिप्प-
 चक्खणपोसहोववासस्स गरहिया भवंति तं० अस्सि लोगे गरहिए भवइ उववाए
 गरहिए भवइ आयाई गरहिया भवइ । तओ ठाणा सुसीलस्स सुव्वयस्स सगुणस्स
 समेरस्स सपच्चक्खणपोसहोववासस्स पसत्था भवंति तं० अस्सि लोगे पसत्थे
 भवइ उववाए पसत्थे भवइ आयाई पसत्था भवइ ॥ २१३ ॥ ति विहा संसारसमा-
 वज्जगा जीवा प० तं० इत्थी पुरिसा णुंसगा । ति विहा सव्वजीवा प० तं० सम्मदिट्ठी
 मिच्छदिट्ठी सम्ममिच्छदिट्ठी य । अहवा ति विहा सव्वजीवा प० तं० पज्जत्तगा

अपज्जत्तगा नोपज्जत्तगानोअपज्जत्तगा । एवं सम्महिट्ठिपरित्तापज्जत्तगखुहुमसन्नि-
भविया य ॥ २१४ ॥ तिविहा लोग्गिई प० तं० आगासपइट्ठिए वाए वायपइट्ठिए
उदही उदहीपइट्ठिया पुढवी । तओ दिसाओ प० तं० उट्ठा अहा तिरिया, तिहिं
दिसाहिं जीवाणं गई पवत्तई तं० उट्ठाए अहाए तिरियाए, एवं आगई वक्कंती आहारे
बुद्धी णिवुद्धी गइपरियाए समुग्घाए कालसंजोगे दंसणाभिगमे णाणाभिगमे जीवाभि-
गमे । तिहिं दिसाहिं जीवाणं अजीवाभिगमे प० तं० उट्ठाए अहाए तिरियाए, एवं
पंचिदियतिरिक्खजोणियाणं । एवं मणुस्साणवि ॥ २१५ ॥ तिविहा तसा प० तं०
तेउकाइया, वाउकाइया उराला तसा पाणा, तिविहा थावरा प० तं० पुढविकाइया
आउकाइया वणस्सइकाइया ॥ २१६ ॥ तओ अच्छेज्जा प० तं० समए पएसे
परमाणू; एवमभेज्जा अडज्झा अगिज्झा अणज्झा अमज्झा अपएसा । तओ अवि-
भाइसा प० तं० समए पएसे परमाणू ॥ २१७ ॥ अज्जोत्ति समणे भगवं महावीरे
गोयमाई समणे णिग्गंथे आमंतिता एवं वयासी ! किं भया पाणा समणाउसो ?
गोयमाई समणा णिग्गंथा समणं भगवं महावीरं उवसंकमंति, उवसंकमिता वंदंति
नमंसंति वंदिता नमंसित्ता एवं वयासी णो खलु वयं देवाणुप्पिया ! एयमट्ठं जाणामो
वा पासामो वा तं जइणं देवाणुप्पिया ! एयमट्ठं नो गिलायंति परिकहेत्तए तमि-
च्छामो णं देवाणुप्पियाणं अंतिए एयमट्ठं जाणित्तए, अज्जोत्ति समणे भगवं महावीरे
गोयमाई समणे णिग्गंथे आमंतिता एवं वयासी, दुक्ख भया पाणा समणाउसो,
से णं भंते दुक्खे केण कडे ? जीवेण कडे पमाएणं, से णं भंते दुक्खे कइं वेइज्जति ?
अप्पमाएणं ॥ २१८ ॥ अण्णउत्थिया णं भंते एवमाइक्खन्ति, एवं भासेन्ति एवं
परुवेन्ति कहणं समणाणं निग्गंथाणं किरिया कज्जइ तत्थ जासा कडा कज्जइ णो
तं पुच्छंति, तत्थ जासा कडा नो कज्जइ णो तं पुच्छंति, तत्थ जासा अकडा नो
कज्जइ णो तं पुच्छंति, तत्थ जासा अकडा कज्जइ तं पुच्छंति, से एवं वत्तव्वं सिया
अकिच्चं दुक्खं अफुसं दुक्खं अकज्जमाणकडं दुक्खं अकट्ठ अकट्ठ पाणा भूया जीवा
सत्ता वेयणं वेयंति त्ति वत्तव्वं जे ते एवमाहंसु ते मिच्छा, अहं पुण एवमाइक्खामि,
एवं भासामि, एवं पन्नवेमि, एवं परुवेमि, किच्चं दुक्खं फुसं दुक्खं कज्जमाणं कडं
दुक्खं कट्ठ २ पाणा भूया जीवा सत्ता वेयणं वेयंति त्ति वत्तव्वं सिया ॥ २१९ ॥
तइयट्ठाणस्स बीओदेसो समत्तो ॥

तिहिं ठाणेहिं मायी मायं कट्ठ णो आलोएज्जा णो पडिक्कमेज्जा, णो णिदिज्जा णो गर-
हेज्जा णो विउट्ठेज्जा णो विसोहेज्जा णो अकरणयाए अब्भुट्ठेज्जा णो अहारिहं पायच्छित्तं
तवोक्कम्मं पडिक्खिज्जा तं० अकरिंसु वाहं करेमि वाहं करिस्सामि वाहं ॥ २२० ॥

तिहिं ठाणेहिं मायी मायं कट्टु णो आलोएज्जा णो पडिक्कमेज्जा जाव णो पडिवजेज्जा तं० अक्किती वा मे सिया अवन्ने वा मे सिया अविणए वा मे सिया, तिहिं ठाणेहिं मायी मायं कट्टु णो आलोएज्जा जाव णो पडिवजेज्जा तं० किती वा मे परिहाइस्सइ जसो वा मे परिहाइस्सइ पूयासकारे वा मे परिहाइस्सइ, तिहिं ठाणेहिं मायी मायं कट्टु आलोएज्जा पडिक्कमेज्जा निंदेज्जा जाव पडिवजेज्जा तंजहा मायिस्स णं अस्सि लोणे गरहिए भवइ उववाए गरहिए भवइ आयाई गरहिया भवइ । तिहिं ठाणेहिं मायी मायं कट्टु आलोएज्जा जाव पडिवजेज्जा तं० अमायिस्स णं अस्सि लोणे पसत्थे भवइ, उववाए पसत्थे भवइ आयाई पसत्था भवइ; तिहिं ठाणेहिं मायी मायं कट्टु आलोएज्जा जाव पडिवजेज्जा तं० णाणट्ठयाए दंसणट्ठयाए चरित्तट्ठयाए ॥२२१॥ तओ पुरिसजाया प० तं० सुत्तधरे अत्थधरे तदुभयधरे ॥२२२॥ कप्पइ निग्गंथाण वा निग्गंथीण वा तओ वत्थाई धारितए वा परिहरितए वा तं० जंगिए साणिए खोमिए । कप्पइ निग्गंथाणं वा निग्गंथीणं वा तओ पायाई धारितए वा परिहरितए वा तं० लाउयपाए वा दाहपाए वा मट्ठियापाए वा, तिहिं ठाणेहिं वत्थं धरेज्जा तं० हिरिवत्तिं दुग्गुल्लवत्तिं परीसहवत्तिं ॥२२३॥ तओ आयरक्खा प० तं० धम्मियाए पडिचोयणाए पडिचोएत्ता भवइ तुसिणीए वा सिया उट्ठिता वा आयाए एगंतमन्तमवक्कमेज्जा ॥ २२४ ॥ निग्गंथस्स णं गिलायमाणस्स कप्पंति तओ वियडदत्तीओ पडिगाहितए तं० उक्कोसा मज्झिमा जहन्ना ॥ २२५ ॥ तिहिं ठाणेहिं समणे निग्गंथे साहम्मियं संभोइयं विसंभोइयं करेमाणे णाइक्कमइ तं० सयं वा दट्ठं सङ्गुस्स वा निसम्म तच्चं मोसं आउट्ठइ चंउत्थं नो आउट्ठइ ॥ २२६ ॥ तिविहा अणुत्ता प० तं० आयरियत्ताए उवज्झायत्ताए गणित्ताए, तिविहा समणुत्ता प० तं० आयरियत्ताए उवज्झायत्ताए गणित्ताए, एवं उवसंपया एवं विजहण्णा ॥ २२७ ॥ तिविहे वयणे प० तं० तव्वयणे तदन्नवयणे णो अवयणे, तिविहे अवयणे प० तं० णो तव्वयणे णो तदन्नवयणे अवयणे, तिविहे मणे प० तं० तम्मणे तयन्नमणे णो अमणे; तिविहे अमणे णो तंमणे णो तयन्नमणे अमणे ॥ २२८ ॥ तिहिं ठाणेहिं अप्पवुट्ठिकाए सिया तं० तस्सि च णं देसंसि वा पएसंसि वा णो बहवे उदगजोणिया जीवा य पोगगला य उदगत्ताए वक्कमंति विउक्कमंति चयंति उववज्जंति पडिलोमवाऊ समुट्ठियं उदगपोगगलं परिणयं वासिउक्कामं अण्णं देसं साहरइ, अन्नभवद्दलं च णं समुट्ठियं परिणयं वासिउक्कामं वाउकाए विहुणेइ इच्चेएहिं तिहिं ठाणेहिं अप्पवुट्ठिकाये सिया । तिहिं ठाणेहिं महावुट्ठिकाए सिया तं० तस्सि च णं देसंसि वा पएसंसि वा बहवे उदगजोणिया जीवा य पोगगला य उदगत्ताए वक्कमंति विउक्क-

मंति, चयंति उववज्जंति अणुलोमवाऊ समुट्ठियं उदगपोग्गलं परिणयं वासिउकामं
तं देसं साहरति अब्भवइल्लगं च णं समुट्ठियं परिणयं वासिउकामं णो वाउकाओ
विहुणेति, इच्चएहिं तिहिं ठाणेहिं महाउट्ठिकाए सिया ॥ २२९ ॥ तिहिं ठाणेहिं
अहुणोववन्ने देवे देवलोगेसु इच्छेज्जा माणुसं लोगं हव्वमागच्छित्तए, णो चेव णं
संचाएइ हव्वमागच्छित्तए तं० अहुणोववन्ने देवे देवलोगेसु दिव्वेसु कामभोगेसु
मुच्छिए गिद्धे गढिए अज्झोववन्ने से णं माणुस्सए कामभोगे णो आढाइ णो
परियाणाइ णो अट्ठं बंधइ णो णियाणं पगरेइ, णो ठिइप्पकप्पं पकरेइ, अहुणोववन्ने
देवे देवलोगेसु दिव्वेसु कामभोगेसु मुच्छिए गिद्धे गढिए अज्झोववन्ने तस्स णं
माणुस्सए पेम्मे वोच्छिन्ने दिव्वे संकंते भवइ, अहुणोववन्ने देवे देवलोएसु
दिव्वेसु कामभोगेसु मुच्छिए जाव अज्झोववन्ने तस्स णमेवं भवइ इयहिं न गच्छं
मुहुतं गच्छं तेणं कालेणमप्पाउया मणुस्सा कालधम्मणा संजुत्ता भवंति इच्चएहिं
तिहिं ठाणेहिं अहुणोववन्ने देवे देवलोगेसु इच्छेज्जा माणुस्सं लोगं हव्वमागच्छित्तए नो
चेव णं संचाएइ हव्वमागच्छित्तए । तिहिं ठाणेहिं अहुणोववन्ने देवे देवलोएसु इच्छेज्जा
माणुस्सलोगं हव्वमागच्छित्तए संचाएइ हव्वमागच्छित्तए तं० अहुणोववन्ने देवे देव-
लोगेसु दिव्वेसु कामभोगेसु अमुच्छिए अगिद्धे अगढिए अणज्झोववन्ने तस्स णं एवं
भवइ अत्थि णं मम माणुस्सए भवे आयरिएइ वा, उवज्जाएइ वा पवत्तेइ वा थेरेइ वा,
गणीइ वा गणहरेइ वा गणावच्छेइ वा जेसिं पभावेणं मए इमा एया रुवा दिव्वा
देविद्धी दिव्वा देवजुइ दिव्वे देवाणुभावे लद्धे पत्ते अभिसमण्णागए तं गच्छामि णं ते
भगवंते वंदामि णमंसामि सक्कारेमि सम्माणेमि कल्लाणं मंगलं देवयं जाव पज्जुवासामि
अहुणोववन्ने देवे देवलोगेसु दिव्वेसु कामभोगेसु अमुच्छिए जाव अणज्झोववन्ने
तस्स णं एवं भवइ, एसणं माणुस्सए भवे णाणीइ वा, तवस्सीइ वा, अइदुक्कर-
दुक्करकारगे तं गच्छामि णं भगवंतं वंदामि णमंसामि जाव पज्जुवासामि अहुणोव-
वन्ने देवे देवलोगेसु जाव अणज्झोववन्ने तस्स णं एवं भवइ अत्थि णं मम माणुस्सए
भव मायाइ वा जाव सुण्हाइ वा तं गच्छामि णं तेसिमंतियं पाउब्भवामि, पासंतु
ता मे इमं एयालुवं दिव्वं देविद्धिं, दिव्वं देवजुइ दिव्वं देवाणुभावं लद्धं पत्तं
अभिसमण्णागयं इच्चएहिं तिहिं ठाणेहिं अहुणोववन्ने देवे देवलोगेसु इच्छेज्ज माणुसं
लोगं हव्वमागच्छित्तए संचाएइ हव्वमागच्छित्तए ॥ २३० ॥ तओ ठाणाइ देवे
पीहेज्जा तं० माणुस्सगं भवं, आरिए खेत्ते जम्मं, सुकुलपत्तायाइ ॥ २३१ ॥ तिहिं
ठाणेहिं देवे परितप्पेज्जा तं० अहो णं मए संते बल्ले संने वीरिए संवे पुत्तिसक्कार-
परक्कमे खेमसि सुभिव्वंसि आयरियउवज्जाएहिं विज्जमाणेहिं कल्लसरीरेणं णो नहुए

સુએ અહીએ અહો ણં મએ ઇહલોગપડિબદ્ધેણં પરલોગપરંમુહેણં વિસયતિસિણં ણો
 વીહે સામન્નપરિયાએ અણપાલિએ । અહો ણં મએ ઇઙ્ઘિરસસાયગરુણં ભોગામિસગિદ્ધેણં
 ણો વિસુદ્ધે ચરિત્તે ફાસિએ ઇચ્છેઈહિં ॥ ૨૩૨ ॥ તિહિં ઠાળેહિં દેવે ચઈસ્સામીતિ
 જાણહ, તંં વિમાણાભરણાઈં ણિપ્પમાઈં પાસિત્તા, કપ્પરુક્કઘં મિલાયમાણં પાસિત્તા
 અપ્પણો તેયલેસ્સં પરિહાયમાણિં જાણિત્તા, ઇચ્છેઈહિં, તિહિં ઠાળેહિં દેવે ઉવ્વેગમાગ-
 ચ્છેજ્ઞા તંં-અહો ણં મએ ઇમાઓ ઇયારુવાઓ દિવ્વાઓ દેવિઙ્ઘીઓ દિવ્વાઓ દેવ-
 જુઈઓ, દિવ્વાઓ દેવાણુમાવાઓ પત્તાઓ લદ્ધાઓ અભિસમખ્યાગયાઓ ચઈયવ્વં
 ભવિસ્સહ । અહો ણં મએ માડઓયં પિડસુક્કં તંં તદુભયસંસિટ્ઠં તપ્પદમયાએ આહારો
 આહારેયવ્વો ભવિસ્સહ । અહો ણં મએ કલમલજંબાલાએ અસુઈએ ઉવ્વેયણિયાએ
 મીમાએ ગન્નભવસહીએ વસિયવ્વં ભવિસ્સહ । ઇચ્છેઈહિં તિહિં ઠાળેહિં ॥ ૨૩૩ ॥
 તિસંઠિયા વિમાણા પં તંં વદ્ધા તંંસા ચડરંસા । તત્થ ણં જે તે વદ્ધવિમાણા તે ણં
 પુકલ્લરકળિયા સંઠાણસંઠિયા સન્નવો સમંતા પાગારપરિવિખત્તા એગદુવારા પં ।
 તત્થ ણં જે તે તંંસવિમાણા તે સિંઘાહગસંઠાણસંઠિયા દુહાઓ પાગારપરિવિખત્તા
 એગઓ વેઈયા પરિવિખત્તા તિદુવારા પં । તત્થ ણં જે તે ચડરંસવિમાણા તે ણં
 અક્કલાહગસંઠાણસંઠિયા સન્નવો સમંતા વેઈયા પરિવિખત્તા ચડદુવારા પં ।
 તિપ્પદિટ્ઠિયા વિમાણા પં તંં ઘણોદહિપ્પદિટ્ઠિયા, ઘણવાયપ્પદિટ્ઠિયા, ઉવાસંતરપ્પદિટ્ઠિયા ।
 તિવિહા વિમાણા પં તંં અવટ્ઠિયા વેડવ્વિયા પરિજાણિયા ॥ ૨૩૪ ॥ તિવિહા
 ણેરહયા પં તંં સમ્મદિટ્ઠી મિચ્છાદિટ્ઠી સમ્મામિચ્છાદિટ્ઠી । એવં વિગલિંદિયવજ્ઞં
 જાવ વેમાણિયાણં । તઓ દુગ્ગઈઓ પળ્લપ્પાઓ તંં ણેરહયદુગ્ગઈ, તિરિક્કલ્લજોણિય-
 દુગ્ગઈ મળ્લયદુગ્ગઈ । તઓ સુગ્ગઈઓ પં તંં સિદ્ધિસોમ્મઈ દેવસોમ્મઈ મળ્લસ-
 સોમ્મઈ । તઓ દુગ્ગયા પં તંં ણેરહયદુગ્ગયા તિરિક્કલ્લજોણિયદુગ્ગયા, મળ્લસ-
 દુગ્ગયા, તઓ સુગ્ગયા પં તંં સિદ્ધસુગ્ગયા દેવસુગ્ગયા મળ્લસસુગ્ગયા ॥ ૨૩૫ ॥
 ચ્ચઉત્થમત્તિયસ્સ ણં ભિક્કુસ્સ કપ્પંતિ તઓ પાણગાઈં પડિગાહિત્તએ તંં ઉસ્સેઈમે
 સંસેઈમે ચાડલધોવળે । છટ્ઠમત્તિયસ્સ ણં ભિક્કુસ્સ કપ્પંતિ તઓ પાણગાઈં પડિ-
 ગાહિત્તએ, તંંજહા-તિલોદએ તુસોદએ જવોદએ, અટ્ઠમત્તિયસ્સ ભિક્કુસ્સ કપ્પંતિ
 તઓ પાણગાઈં પડિગાહિત્તએ તંંજહા-આયામાએ સોવીરએ સુદ્ધવિયહે ॥ ૨૩૬ ॥
 તિવિહે ઉવ્વહહે પં તંં ફલિઓવ્વહહે સુદ્ધોવ્વહહે સંસટ્ઠોવ્વહહે, તિવિહે ઓગહિએ પં
 તંં જં ચ ઓગિણ્ણહ જં ચ સાહરહ જં ચ આસગંસિ પવિલ્લવહ ॥ ૨૩૭ ॥
 તિવિહા ઓમોયરિયા પં તંં ઉવ્વગરણોમોયરિયા, મત્તપાણોમોયરિયા, માવોમોય-
 રિયા; ઉવ્વગરણોમોયરિયા તિવિહા પં તંં એગો વત્થે, એગો પાયે ચિયત્તોવહિ-

साहज्जया ॥ २३८ ॥ तओ ठाणा णिग्गंथाणं वा णिग्गंशीणं वा अहियाए असुहाए
 अक्खमाए अणित्सेयसाए अणाणुगामियत्ताए भवन्ति, तं० कूअणया, कक्करणया
 अवज्झाणया, तओ ठाणा णिग्गंथाणं वा णिग्गंशीणं वा हियाए सुहाए खमाए
 णित्सेयसाए आणुगामियत्ताए भवन्ति, तं० अकूअणया अक्करणया अणवज्झाणया
 ॥ २३९ ॥ तओ सल्ला प० तं० मायासल्ले गियाणसल्ले मिच्छादंसणसल्ले ॥ २४० ॥
 तिहिं ठाणेहिं समणे णिग्गंथे संखित्तविउलतेउल्लेस्से भवइ तं० आयावणयाए
 खंतिखमाए अपाणगेणं तवोकम्ममेणं ॥ २४१ ॥ तिमासियं णं भिक्खुपडिमं पडि-
 व्वत्तस्स अणगारस्स कप्पंति तओ दत्तीओ भोयणस्स पडिगाहिताए तओ पाणगस्स,
 एगराइयं भिक्खुपडिमं सम्ममणुपालेमाणस्स अणगारस्स इमे तओ ठाणा अहि-
 याए असुभाए अक्खमाए अणित्सेयसाए अणाणुगामियत्ताए भवंति तं० उम्मायं वा
 लभेज्जा, दीहकालियं वा रोयातकं पाउणेज्जा, केवलपण्णत्ताओ धम्माओ भंसेज्जा ।
 एगराइयं णं भिक्खुपडिमं सम्ममणुपालेमाणस्स अणगारस्स तओ ठाणा हियाए
 सुभाए खमाए णित्सेयसाए आणुगामियत्ताए भवंति तं० ओहिणाणे वा से समुप्प-
 ज्जेज्जा मणपज्जवणाणे वा से समुप्पज्जेज्जा, केवलणाणे वा से समुप्पज्जेज्जा ॥ २४२ ॥
 जंबुद्दीवे दीवे तओ कम्मभूमीओ प० तं० भरहे, एरवए, महाविदेहे । एवं धायइ-
 खंडे दीवे पुरच्छिमद्वे जाव पुक्खर-वर-दीवद्धु-पच्चत्थिमद्वे ॥ २४३ ॥ तिविहे दंसणे
 सम्मदंसणे, मिच्छादंसणे, सम्ममिच्छादंसणे, तिविहा रुई प० तं० सम्मरुई,
 मिच्छरुई, सम्ममिच्छरुई, तिविहे पओगे प० तं० सम्मप्पओगे, मिच्छप्पओगे,
 सम्ममिच्छप्पओगे ॥ २४४ ॥ तिविहे ववसाए प० तं० धम्मिए ववसाए अहम्मिए
 ववसाए, धम्मियाधम्मिए ववसाए, अहवा तिविहे ववसाए, प० तं० पच्चक्खे,
 पच्चइए, आणुगामिए, अहवा तिविहे ववसाए प० तं० इहलोइए, परलोइए, इह-
 लोइयपरलोइए, इहलोइए ववसाए तिविहे प० तं० लोइए वेइए सामइए, लोइए
 ववसाए तिविहे प० तं० अत्थे धम्मे कामे, वेइए ववसाए तिविहे प० तं० रिउव्वेए
 जजुव्वेए सामवेए, सामइए ववसाए तिविहे प० तं० णाणे दंसणे चरित्ते ॥ २४५ ॥
 तिविहा अत्थजोणी प० तं० सामे दंडे भेए ॥ २४६ ॥ तिविहा पोग्गला प० तं०
 पओगपरिणया, मीसापरिणया, वीससापरिणया ॥ २४७ ॥ तिपइट्ठिया णरगा प०
 तं० पुढवीपइट्ठिया आगासपइट्ठिया आयपइट्ठिया, नेगमसंगहववहारणं पुढवीप-
 इट्ठिया, उज्जुयस्स आगासपइट्ठिया तिण्हं सट्ठयाणं आयपइट्ठिया ॥ २४८ ॥
 तिविहे मिच्छते प० तं० अकिरिया अविणए अण्णाणे, अकिरिया तिविहा प०
 तं० पओगकिरिया, समुदाणकिरिया, अन्नाणकिरिया, पओगकिरिया तिविहा प०

तं० मणपओगकिरिया वइपओगकिरिया कायपओगकिरिया, समुदाणकिरिया तिविहा
 प० तं० अणंतरसमुदाणकिरिया, परंपरसमुदाणकिरिया तदुभयसमुदाणकिरिया,
 अण्णाणकिरिया तिविहा प० तं० मइअण्णाणकिरिया, सुयअण्णाणकिरिया, विभंग-
 अण्णाणकिरिया, अविणए तिविहे प० तं० देसच्चाई, णिरालंबणया, णाणापेज्जदेसे,
 अण्णाणे तिविहे प० तं० देसअण्णाणे, सव्वअण्णाणे, भावअण्णाणे ॥ २४९ ॥
 तिविहे धम्मे प० तं० सुयधम्मे, चरित्तधम्मे, अत्थिकायधम्मे, तिविहे उवक्कमे
 प० तं० धम्मिए उवक्कमे, अहम्मिए उवक्कमे, धम्मियाधम्मिए उवक्कमे, अहवा
 तिविहे उवक्कमे प० तं० आओवक्कमे, परोवक्कमे, तदुभयोवक्कमे, एवं वेयावच्चे,
 अणुग्गहे, अणुसिट्ठि, उवालंभं, एवमिक्केके तिणि २ आलावगा जहेव उवक्कमे
 ॥ २५० ॥ तिविहा कहा प० तं० अत्थकहा, धम्मकहा, कामकहा, तिविहे विणिच्छए
 प० तं० अत्थविणिच्छए धम्मविणिच्छए कामविणिच्छए ॥ २५१ ॥ तहाएवं णं भंते
 समणं वा णिगंगंथं वा सेवमाणस्स किं फला सेवणया ? सवणफला, से णं भंते सवणे
 किं फले ? णाणफले, से णं भंते णाणे किं फले ? विण्णाण फले, एवमेएणं अभिलावेणं
 इमा गाहा अणुगंतव्वा—“सवणे णाणे य विण्णाणे, पच्चक्खाणे य संजमे । अणण्हए
 तवे चेव, वोदाणे अकिरिय णिव्वाणे (१) जाव से णं भंते अकिरिया किं फला ?
 णिव्वाणफला, से णं भंते णिव्वाणे किं फले ? सिद्धिगइगमणपज्जवसाणफले पण्णत्ते
 समणाउसो । ॥ २५२ ॥ तइयोदेसो समत्तो ॥

पडिमापडिवणस्स णं अणगारस्स कप्पंति तओ उवस्सया पडिलेहितए तं०—
 अहे आगमणगिहंसि वा, अहे वियडगिहंसि वा, अहे रुक्खमूलगिहंसि वा, एव-
 मणुजवेत्तए, उवाइणित्तए, पडिमापडिवजस्स णं अणगारस्स कप्पंति तओ संधारगा
 पडिलेहितए तं० पुढवीसिला, कट्टसिला, अहासंथडमेव, एवमणुजवित्तए उवाइणि-
 त्तए ॥ २५३ ॥ तिविहे काले प० तं० तीए पडुप्पन्ने अणागए, तिविहे समए प०
 तं० तीए, पडुप्पन्ने, अणागए, एवं आवल्लिया, आणापाणू, थोवे लवे मुहुत्ते अहो-
 रत्ते, जाव वाससयसहस्से पुव्वगे, पुव्वे, जाव ओसप्पिणी, तिविहे पोगगलपरियट्ठे
 प० तं० तीते पडुप्पन्ने अणागए ॥ २५४ ॥ तिविहे वयणे प० तं०—एगवयणे,
 दुवयणे, बहुवयणे, अहवा तिविहे वयणे प० तं० इत्थिवयणे, पुंवयणे, णपुंसग-
 वयणे, अहवा तिविहे वयणे प० तं० तीतवयणे, पडुप्पण्णवयणे, अणागयवयणे
 ॥ २५५ ॥ तिविहा पन्नवणा तं० णाणपण्णवणा, दंसणपण्णवणा, चरित्तपण्णवणा,
 तिविहे सम्मे प० तं० णाणसम्मे, दंसणसम्मे, चरित्तसम्मे ॥ २५६ ॥ तिविहे
 उवघाए प० तं० उग्गमोवघाए, उप्पायणोवघाए, एसणोवघाए, एवं विसोही

॥ २५७ ॥ तिविहा आराहणा प० तं० णाणाराहणा, दंसणाराहणा, चरित्ताराहणा,
 णाणाराहणा तिविहा प० तं० उक्कोसा, मज्झिमा, जहन्ना, एवं दंसणाराहणावि,
 चरित्ताराहणावि, तिविहे संकिलेसे प० तं० णाणसंकिलेसे, दंसणसंकिलेसे, चरित्त-
 संकिलेसे, एवं असंकिलेसेवि, एवं अइक्कमे वि, वइक्कमे वि, अइयारे वि, अणायारे
 वि, तिण्हमइक्कमाणं आलोएज्जा, पडिक्कमेज्जा, णिंदेज्जा, गरहिज्जा जाव पडिवज्जिज्जा,
 तं० णाणाइक्कमस्स, दंसणाइक्कमस्स, चरित्ताइक्कमस्स, एवं वइक्कमाणं, अइयारारणं,
 अणायारारणं ॥ २५८ ॥ तिविहे पायच्छित्ते प० तं० आलोयणारिहे, पडिक्कमणा-
 रिहे, तदुभयारिहे ॥ २५९ ॥ जंबुद्वीवे दीवे मंदरस्स पव्वयस्स दाहिणेणं तओ
 अक्कम्मभूमीओ प० तं० हेमवए हरिवासे देवकुरा, जंबुद्वीवे दीवे मंदरस्स पव्व-
 यस्स उत्तरेणं तओ अक्कम्मभूमीओ प० तं० उत्तरकुरा, रम्मगवासे, एरन्नवए,
 जंबुद्वीवे दीवे मंदरपव्वयस्स दाहिणेणं तओ वासा प० तं० भरहे, हेमवए, हरि-
 वासे, जंबूमंदरस्स उत्तरेणं तओ वासा प० तं० रम्मगवासे, हेरन्नवए, एरवए,
 जंबूमंदरस्स दाहिणेणं तओ वासहरपव्वया प० तं० चुल्लहिमवंते, महाहिमवंते,
 णिसढे, जंबूमंदरस्स उत्तरेणं तओ वासहरपव्वया प० तं० णीलवंते, रूप्पी,
 सिहरी, जंबूमंदरस्स दाहिणेणं तओ महादहा प० तं० पउमद्दहे, महापउमद्दहे,
 तिगिच्छिद्दहे, तत्थ णं तओ देवयाओ महिद्धियाओ जाव पल्लिओवमट्ठिइयाओ परि-
 वसंति तं० सिरी, हिरी, धिई । एवं उत्तरेण वि, णवरं केसरिद्दहे, महापोंडरीयद्दहे,
 पोंडरीयद्दहे, देवयाओ कित्ती, बुद्धी, लच्छी, जंबूमंदरस्स दाहिणेणं चुल्लहिमवंताओ
 वासहरपव्वयाओ पउमदहाओ महादहाओ तओ महाणईओ पव्वंति तं० गंगा
 सिन्धू रोहिंयसा । जंबूमंदरस्स उत्तरेणं सिहरीओ वासहरपव्वयाओ पोंडरीयद्दहाओ
 महद्दहाओ तओ महाणदीओ पव्वंति तं० सुवन्नकूला रत्ता रत्तवई । जंबूमंदरस्स
 पुरच्छिमेणं सीयाए महाणईए उत्तरेणं तओ अंतरणईओ प० तं० गाहावई,
 दहवई, पंकवई, जंबूमंदरस्स पुरत्थिमेणं सीयाए महाणईए दाहिणेणं तओ अंत-
 रणईओ प० तं० तत्तज्जला, मत्तज्जला, उम्मत्तज्जला, जंबूमंदरस्स पच्चत्थिमेणं
 सीओदाए महाणईए दाहिणेणं तओ अंतरणईओ प० तं० खीरोदा, सीहसोया,
 अंतोवाहिणी, जंबूमंदरस्स पच्चत्थिमेणं सीओदाए महाणईए उत्तरेणं तओ अंतरण-
 ईओ प० तं० उम्ममालिणी, फेणमालिणी, गंभीरमालिणी, एवं धायईखंडे दीवे
 पुरच्छिमद्देवि अक्कम्मभूमीओ आढवेत्ता जाव अंतरणईओत्ति, णिरवसेसं भाणि-
 यव्वं, जाव पुक्खरवरदीवद्दुपच्चत्थिमद्दे तहेव णिरवसेसं भाणियव्वं ॥ २६० ॥
 तिहिं ठाणेहिं देसे पुढवीए च्छेज्जा तंजहा-अहेणमिमीसे रयणप्पभाए पुढवीए

उराला पोग्गला णिवतेज्जा, तएणं ते उराला पोग्गला णिवयमाणा देसं पुढवीए चलेज्जा । महोरए वा महिङ्खिए जाव महेसक्खे इमीसे रयणप्पभाए पुढवीए अहे उम्मज्जणिमज्जियं करेमाणे देसं पुढवीए चलेज्जा । गागसुवण्णाण वा संगामंसि वट्टमाणंसि देसं पुढवीए चलेज्जा, इच्चेएहिं तिहिं ठाणेहिं केवलकप्पा पुढवी चलेज्जा तं० अहेणं इमीसे रयणप्पभाए पुढवीए घणवाए गुप्पेज्जा, तएणं से घणवाए गुविए समाणे घणीदहिमेएज्जा, तएणं से घणोदही एइए समाणे केवलकप्पं पुढविं चालेज्जा । देवे वा महिङ्खिए जाव महेसक्खे तहारूवस्स समणस्स णिगंथस्स वा इङ्खि जुई जसं बलं वीरियं पुरिसक्कारपरक्कमं उवदसेमाणे केवलकप्पं पुढविं चालेज्जा । देवासुरसंगामंसि वा वट्टमाणंसि केवलकप्पा पुढवी चलेज्जा इच्चेएहिं तिहिं० ॥ २६१ ॥

तिविहा देवा किब्बिसिया प० तं० तिपलिओवमट्ठिईया, तिसागरोवमट्ठिईया, तेरससागरोवमट्ठिईया, कहि णं भंते तिपलिओवमट्ठिईया देवा किब्बिसिया परिवसंति ? उप्पि जोइसियाणं हिट्ठिं सोहम्मीसाणेसु कप्पेसु एत्थणं तिपलिओवमट्ठिईया देवा किब्बिसिया परिवसंति, कहि णं भंते तिसागरोवमट्ठिईया देवा किब्बिसिया परिवसंति ? उप्पि सोहम्मीसाणाणं कप्पाणं, हेट्ठिं सणकुमारमाहिंद-कप्पेसु एत्थ णं तिसायरोवमट्ठिईया देवा किब्बिसिया परिवसंति । कहि णं भंते तेरससागरोवमट्ठिईया देवा किब्बिसिया परिवसंति ? उप्पि बंभलोयस्स कप्पस्स हिट्ठिं लंतगे कप्पे एत्थ णं तेरससागरोवमट्ठिईया देवा किब्बिसिया परिवसंति ॥ २६२ ॥

सक्कस्स णं देविंदस्स देवरण्णो बाहिरपरिसाए देवाणं तिन्निपलिओवमाई ठिई प०—सक्कस्स णं देविंदस्स देवरण्णो अर्द्धिभतरपरिसाए देवीणं तिन्निपलिओवमाई ठिई प० । ईसाणस्सणं देविंदस्स देवरण्णो बाहिरपरिसाए देवीणं तिन्निपलिओवमाई ठिई प० ॥ २६३ ॥

तिविहे पायच्छित्ते प० तं० णाणपायच्छित्ते, दंसणपायच्छित्ते, चरित्तपायच्छित्ते । तओ अणुग्घाइमा प० तं० हत्थकम्मं करेमाणे, मेहुणं सेवेमाणे, राइभोयणं भुंजमाणे, तओ पारंचिया प० तं० दुट्ठे पारंचिए, पमत्ते पारंचिए, अण्णमण्णं करेमाणे पारंचिए, तओ अणवट्टप्पा प० तं० साहम्मियणं तेणं करेमाणे, अण्णघम्मियणं तेणं करेमाणे, हत्थतालं दलयमाणे, तओ णो कप्पंति पच्चावेत्तए, पंडए, वाइए, कीवे, एवं मुंडवेत्तए, सिक्खावेत्तए, उवट्ठावेत्तए, संमुंजित्तए, संवासित्तए ॥ २६४ ॥

तओ अवायणिज्जा प० तं० अविणीए, विगइपडिबद्धे, अविओसियपाहुडे । तओ कप्पंति वाइत्तए तं० विणीए अविगइपडिबद्धे विओसियपाहुडे ॥ २६५ ॥

तओ दुसणप्पा प० तं० दुट्ठे मूढे उग्गाहिए, तओ सुसच्चप्पा प० तं० अदुट्ठे अमूढे अनुग्गाहिए ॥ २६६ ॥ तओ

मंडलियपव्वया प० तं० माणुसुत्तरे कुंडलवरे रुयगवरे, तओ महइमहालया प० तं० जंबुदीवे दीवे मंदरे मंदरेसु, सयंभुरमणसमुदे समुदेसु, बंभलोए कप्पे कप्पेसु ॥ २६७ ॥ तिविहा कप्पठिई प० तं० सामाइयकप्पठिई छेदोवट्ठावणियकप्पठिई निव्विसमाणकप्पठिई, अहवा तिविहा कप्पठिई प० तं० णिविट्ठकप्पठिई, जिणकप्पठिई, थेरकप्पठिई ॥ २६८ ॥ णेरइयाणं तओ सरीरगा प० तं० वेउव्विए, तेयए, कम्मए, असुरकुमारणं तओ सरीरगा, एवं चेव सव्वेसिं देवाणं, पुढवीकाइयाणं तओ सरीरगा प० तं० ओरालिए, तेयए, कम्मए, एवं वाउकाइयवजाणं जाव चउरिंदियाणं ॥ २६९ ॥ गुरं पडुच्च तओ पडिणीया प० तं० आयरियपडिणीए, उवज्झायपडिणीए, थेरपडिणीए, गइं पडुच्च तओ पडिणीया प० तं० इहल्लोयपडिणीए, परल्लोयपडिणीए, दुहओल्लोयपडिणीए । समूहं पडुच्च तओ पडिणीया प० तं० कुलपडिणीए, गणपडिणीए, संघपडिणीए, अणुकंमं पडुच्च तओ पडिणीया प० तं० तवस्सिपडिणीए, गिलाणपडिणीए, सेहपडिणीए, भावं पडुच्च तओ पडिणीया प० तं० णाणपडिणीए, दंसणपडिणीए, चरित्तपडिणीए, सुयं पडुच्च तओ पडिणीया प० तं० सुत्तपडिणीए, अत्थपडिणीए, तदुभयपडिणीए ॥ २७० ॥ तओ पितियंगा प० तं० अट्ठी, अट्ठिमिजा, केसमंसुरोमनहे । तओ माउयंगा प० तं० मंसे, सोणिए, मत्थुल्लिगे ॥ २७१ ॥ तिहिं ठाणेहिं समणे णिगंथे महानिज्जरे महापज्जवसाणे भवइ तं० कया णं अहं अप्पं वा बहुं वा सुयं अहिज्जिस्सामि, कया णं अहं एकल्लविहारपडिमं उवसंपज्जिताणं विहरिस्सामि, कया णं अहं अपच्छिममारणंतियसंलेहणाइस्सणाइस्सिए भत्तपाणपडियाइक्खिए पाओवगए कालमणवकंखमाणे विहरिस्सामि । एवं समणसा सवयसा सकायसा, पागडेमाणे निगंथे महानिज्जरे महापज्जवसाणे भवइ ॥ २७२ ॥ तिहिं ठाणेहिं समणोवासए महानिज्जरे महापज्जवसाणे भवइ तं० कयाणमहमप्यं वा, बहुअं वा परिगहं परिचइस्सामि, कयाणमहं मुंढे भवित्ता आगाराओ अणमारियं पव्वइस्सामि, कयाणमपच्छिममारणंतियसंलेहणाइस्सणाइस्सिए भत्तपाणपडियाइक्खिए पाओवगए कालमणवकंखमाणे विहरिस्सामि, एवं समणसा सवयसा सकायसा जागरमाणे समणोवासए महानिज्जरे महापज्जवसाणे भवइ ॥ २७३ ॥ तिविहे पोग्गलपडिघाए प० तं० परमाणुपोग्गले परमाणुपोग्गलं पप्प पडिहण्णिजा, लुक्खत्ताए वा पडिहण्णिजा, लोगतं वा पडिहण्णिजा ॥ २७४ ॥ तिविहे चक्खू प० तं० एगचक्खू, बिचक्खू, तिचक्खू; छउमत्थेणं मणुस्से एगचक्खू, देवे बिचक्खू, तहारूवे समणे वा णिगंथे वा उप्पन्नणाणदंसणधरे से णं तिचक्खुत्ति वत्तव्वं सिया ॥ २७५ ॥ तिविहे अभि-

समागमे प० तं० उड्डं अहं तिरियं, जया णं तहारुवस्स समणस्स वा णिग्गंथस्स
 वा अइसेसे णाणदंसणे समुप्पज्जइ सेणं तप्पढमयाए उड्डमभिसमेइ, तओ तिरियं
 तओ पच्छा अहे अहोलोगेणं दुरभिगमे प० समणाउसो ॥ २७६ ॥ तिविहा इड्ढी
 प० तं० देविड्ढी-राइड्ढी-गणिड्ढी, देविड्ढी तिविहा प० तं० विमाणिड्ढी, विगुव्विणिड्ढी,
 परियारणिड्ढी, अहवा देविड्ढी तिविहा प० तं० सच्चित्ता, अच्चित्ता, मीसिया, राइड्ढी
 तिविहा प० तं० रण्णो अइयाणिड्ढी, रण्णो णिज्जाणिड्ढी, रण्णो बलवाहणक्कोस-
 कोट्टागारिड्ढी, अहवा राइड्ढी तिविहा प० तं० सच्चित्ता, अच्चित्ता, मीसिया, गणिड्ढी
 तिविहा प० तं० णाणिड्ढी, दंसणिड्ढी, चरित्तिड्ढी, अहवा गणिड्ढी तिविहा प० तं०
 सच्चित्ता अच्चित्ता मीसिया ॥ २७७ ॥ तओ गारवा प० तं० इड्ढीगारवे, रसगारवे,
 सायागारवे । करणे तिविहे प० तं० धम्मिए करणे, अधम्मिए करणे, धम्मिया-
 धम्मिए करणे ॥ २७८ ॥ तिविहे भगवया धम्मे प० तं० सुअहिजिए, सुज्झाइए,
 सुतवस्सिए जया सुअहिजियं भवइ, तदा सुज्झाइयं भवइ, जया सुज्झाइयं भवइ
 तथा सुतवस्सियं भवइ, से सुअहिजिए, सुज्झाइए, सुतवस्सिए, सुयक्खाएणं भग-
 वया धम्मे पज्जेते ॥ २७९ ॥ तिविहा वावत्ती प० तं० जाणू, अजाणू, विति-
 मिच्छा, एवमज्झोववज्जणा परियावज्जणा ॥ २८० ॥ तिविहे अंतं प० तं०
 लोगंतं, वेयंतं, समयंतं ॥ २८१ ॥ तओ जिणा प० तं० ओहिणाणजिणे, मण-
 पज्जवणाणजिणे, केवलणाणजिणे, तओ केवली प० तं० ओहिनाणकेवली, मण-
 पज्जवनाणकेवली, केवलनाणकेवली, तओ अरहा प० तं० ओहिनाणअरहा, मण-
 पज्जवणाणअरहा, केवलनाणअरहा ॥ २८२ ॥ तओ लेस्साओ दुब्भिगंधाओ प०
 तं० कण्हलेस्सा, नीललेस्सा, काउलेस्सा, तओ लेस्साओ सुब्भिगंधाओ प० तं०
 तेऊ पम्ह सुक्कलेस्सा । एवं तिसुगइगामिणीओ, तिसुगइगामिणीओ तओ
 संकिलिद्धाओ, असंकिलिद्धाओ, अमणुजाओ, मणुजाओ, अविसुद्धाओ, विसुद्धाओ,
 अप्पसत्थाओ, पसत्थाओ, सीअलुक्खाओ, णिद्धुणाओ ॥ २८३ ॥ तिविहे मरणे
 प० तं० बालमरणे, पंडियमरणे, बालपंडियमरणे, बालमरणे तिविहे प० तं०
 ठिअलेस्से, संकिलिठुलेस्से, पज्जवायलेस्से । पंडियमरणे तिविहे प० तं० ठिअ-
 लेस्से, असंकिलिठुलेस्से, पज्जवायलेस्से, बालपंडियमरणे तिविहे प० तं० ठिअ-
 लेस्से असंकिलिठुलेस्से अपज्जवायलेस्से ॥ २८४ ॥ तओ ठाणा अव्ववसिअस्स
 अहियाए, असुआए, अखमाए, अणिस्सेसाए, अणाणुगामियत्ताए भवंति तं० से णं
 सुंढे भवित्ता अगाराओ अणगारियं पव्वइए णिग्गंथे पावयणे संकिए कंखिए विति-
 मिच्छिए भेदसमावन्ने कलससमावन्ने णिग्गंथं पावयणं णो सइइह णो पत्तियइ, णो

रोएइ, तं परीसहा अभिजुंजिय अभिजुंजिय अभिभवन्ति, नो से परीसहे अभि-
 जुंजिय अभिजुंजिय अभिभवइ, से णं मुंडे भविता आगाराओ अणगारियं पव्वइए,
 पंचहिं महव्वएहिं संकिए जाव कल्लससमावण्णे, पंचमहव्वयाइं णो सइहइ जाव नो
 से परीसहे अभिजुंजिय २ अभिभवइ, से णं मुंडे भविता आगाराओ अणगारियं
 पव्वइए छहिं जीवनिकाएहिं जाव अभिभवइ, तओ ठाणा ववसिअस्स हियाए जाव
 आणुगामियत्ताए भवन्ति तं० से णं मुंडे भविता आगाराओ अणगारियं पव्वइए
 णिगंथे पावयणे णिस्संकिए णिक्कंखिए जाव णो कल्लससमावण्णे णिगंथं पावयणं
 सइहइ पत्तियइ रोएइ से परीसहे अभिजुंजिय २ अभिभवइ, णो तं परीसहा
 अभिजुंजिय २ अभिभवन्ति, सेणं मुंडे भविता आगाराओ अणगारियं पव्वइए
 समाणे पंचहिं महव्वएहिं णिरसंकिए-णिक्कंखिए जाव, परीसहे अभिजुंजिय २
 अभिभवइ, णो तं परीसहा अभिजुंजिय २ अभिभवन्ति, से णं जाव छहिं जीव-
 निकाएहिं णिस्संकिए जाव परीसहे अभिजुंजिय २ अभिभवइ णो तं परीसहा
 अभिजुंजिय २ अभिभवन्ति ॥ २८५ ॥ एगमेगाणं पुढवी तिहिं वलएहिं सव्वओ
 समंता संपरिविखत्ता तंजहा-घणोदहिवलएणं, घणवायवलएणं, तणुवायवलएणं
 ॥ २८६ ॥ णेरइयाणं उक्कोसेणं तिसमइएणं विग्गहेणं उववज्जंति एणिंदियवज्जं जाव
 वेमाणियाणं ॥ २८७ ॥ खीगमोहस्सणं अरहओ तओ कम्मंसा जुगवं खिज्जंति तं०
 णाणावरणिज्जं, दंसणावरणिज्जं, अंतराइयं ॥ २८८ ॥ अमीईणक्खते तितारे प० एवं
 सवणे अस्सिणी भरणी मगसिरे पूसे जेठ्ठा ॥ २८९ ॥ धम्माओ णं अरहाओ संती
 अरहा तिहिं सागरोवमेहिं तिचउब्भागं पलिओवमऊणएहिं वीडक्कंतेहिं समुप्पणे ।
 समणस्स णं भगवओ महावीरस्स जाव तच्चाओ पुरिसजुगाओ जुगंतकडभूमी, मल्लीणं
 अरहा तिहिं पुरिससएहिं सद्धिं मुंडे भवेत्ता जाव पव्वइए, एवं पासेवि, समणस्स णं
 भगवओ महावीरस्स तिस्सिया चोइसपुव्वीणं अजिणाणं जिणसंकासाणं सव्वक्ख-
 रसज्जिवाईणं जिण इव अवितहवागरमाणाणं उक्कोसिया चोइसपुव्विंसंपया होत्था,
 तओ तित्थयरा चक्कवट्ठी होत्था तं० संती कुंथू अरो ॥ २९० ॥ तओ गेविज्ज-
 विमाणपत्थडा प० तं० हिट्ठिमगेविज्जविमाणपत्थडे, मज्झिमगेविज्जविमाणपत्थडे,
 उवरिमगेविज्जविमाणपत्थडे, हिट्ठिमगेविज्जविमाणपत्थडे तिविहे प० तं० हिट्ठिम-
 हिट्ठिमगेविज्जविमाणपत्थडे, हिट्ठिममज्झिमगेविज्जविमाणपत्थडे हिट्ठिमउवरिम-
 गेविज्जविमाणपत्थडे, मज्झिमगेविज्जविमाणपत्थडे, तिविहे प० तं० मज्झिमहिट्ठिम-
 गेविज्जविमाणपत्थडे, मज्झिममज्झिमगेविज्जविमाणपत्थडे, मज्झिमउवरिमगेविज्ज-
 विमाणपत्थडे, उवरिमगेविज्जविमाणपत्थडे तिविहे प० तं० उवरिमहिट्ठिमगेविज्ज-

विमाणपत्थडे, उवरिममज्झिमगेविज्जविमाणपत्थडे, उवरिमउवरिमगेविज्जविमाण-
पत्थडे ॥ २९१ ॥ जीवाणं तिठाणणिव्वत्तिए पोग्गळे पावकम्मत्ताए चिणिसु
वा चिणंति वा चिणिस्संति वा तंजहा-इत्थिणिव्वत्तिए, पुरिसणिव्वत्तिए, णपुंस-
गणिव्वत्तिए, एवं चिणउवचिणबंधउदीरवेय तह णिज्जरा चेव ॥ २९२ ॥ तिपए-
सिया खंधा अणंता पण्णत्ता, एवं जाव तिगुणलुक्खा पोग्गला अणंता पन्नत्ता
॥ २९३ ॥ तिहाणं समत्तं ॥

चउत्थट्ठाणं

चत्तारि अंतकिरियाओ प० तं० तत्थ खलु इमा पढमा अंतकिरिया,
अप्पकम्मपच्चायाए यावि भवइ, से णं मुंडे भविता अगाराओ अणगारिअं पव्व-
इए, संजमबहुले संवरबहुले समाहिबहुले छहे तीरट्ठी उवहाणवं दुक्खक्खवे तवस्सी
तस्सणं णो तहप्पगारे तवे भवइ णो तहप्पगारा वेयणा भवइ, तहप्पगारे पुरि-
सजाए दीहेणं परियाएणं सिज्झइ, बुज्झइ मुच्चइ परिणिव्वाइ सव्वदुक्खाणमंतं करेइ,
जहा से भरहे राया चाउरंतचक्कवट्ठी पढमा अंतकिरिया, अहावरा दोच्चा अंत-
किरि . १, महाकम्मपच्चायाए यावि भवइ से णं मुंडे भविता अगाराओ अणगारिअं
पव्वइए, संजमबहुले संवरबहुले.....जाव उवहाणवं दुक्खक्खवे तवस्सी तस्स णं
तहप्पगारे तवे भवइ, तहप्पगारा वेयणा भवइ तहप्पगारे पुरिसजाए निरुद्धेणं
परियाएणं सिज्झइ० जाव अंतं करेइ जहा से गजसूमाळे अणगारे, दोच्चा अंत-
किरिया, अहावरा तच्चा अंतकिरिया, महाकम्मपच्चायाएयावि भवइ, से णं मुंडे
भविता अगाराओ अणगारियं पव्वइए जहा दोच्चा, णवरं दीहेणं परियाएणं
सिज्झइ जाव सव्वदुक्खाणमंतं करेइ, जहा से सणकुमारे राया चाउरंतचक्कवट्ठी
तच्चा अंतकिरिया, अहावरा चउत्था अंतकिरिया, अप्पकम्मपच्चायाएयावि
भवइ, से णं मुंडे भविता जाव पव्वइए संजमबहुले जाव तस्स णं णो तहप्पगारे तवे
भवइ नो तहप्पगारा वेयणा भवइ तहप्पगारे पुरिसजाए निरुद्धेणं परियाएणं
सिज्झइ जाव सव्वदुक्खाणमंतं करेइ जहा सा मरुदेवा भगवई, चउत्था अंत-
किरिया ॥ २९४ ॥ चत्तारि रुक्खा प० तं० उच्चए णाममेगे उच्चए, उच्चए णाममेगे
पणए, पणए णाममेगे उच्चए, पणए णाममेगे पणए, एवामेव चत्तारि पुरिसजाया
प० तं० उच्चए णाममेगे उच्चए, तहेव जाव पणए णाममेगे पणए । चत्तारि रुक्खा
प० तं० उच्चए णाममेगे उच्चयपरिणए, उच्चए णाममेगे पणयपरिणए, पणए
णाममेगे उच्चयपरिणए, पणए णाममेगे पणयपरिणए । एवामेव चत्तारि पुरिसजाया
प० तं० उच्चए णाममेगे उच्चयपरिणए, चउभंगो । चत्तारि रुक्खा प० तं० उच्चए

णाममेगे उच्चए रुवे, तहेव चउभंगो, एवमेव चत्तारि पुरिसजाया प० तं० उच्चए
 णामं ४ । चत्तारि पुरिसजाया प० तं० उच्चए णाममेगे उच्चए मणे, उच्च० एवं संकप्पे-
 पत्तेदिट्ठी-सीलाचारे-ववहारे-परक्कमे-एगे पुरिसजाए पडिवक्खो णत्थि ॥ २९५ ॥
 चत्तारि रुक्खा प० तं० उज्जूणाममेगे उज्जू, उज्जूणाममेगे वंके, चउभंगो । एवमेव
 चत्तारि पुरिसजाया, प० तं० उज्जूणाममेगे उज्जू ४ एवं जहा उच्चयपणएहिं गमो
 तहा उज्जुवंकेहिं वि भाणियव्वो, जाव परक्कमे ॥ २९६ ॥ पडिमापडिवक्खस्सणं
 अणगारस्स कप्पति चत्तारि भासाओ भासित्तए तं० जायणी पुच्छणी अणुज-
 वणी पुठुस्स वागरणी । चत्तारिभासजाया प० तं० सच्चमेगं भासजायं,
 वीयं मोसं तइयं सच्चमोसं चउत्थं असच्चमोसं ॥ २९७ ॥ चत्तारि वत्था प०
 तं० सुद्धे णाममेगे सुद्धे, सुद्धे णाममेगे असुद्धे, असुद्धे णाममेगे सुद्धे, असुद्धे णाम-
 मेगे असुद्धे । एवमेव चत्तारि पुरिसजाया प० तं० सुद्धे णाममेगे सुद्धे चउभंगो ।
 एवं परिणयरुवे वत्था सपडिवक्खा ॥ २९८ ॥ चत्तारि पुरिसजाया प० तं० सुद्धे
 णाममेगे सुद्धमेगे चउभंगो, एवं संकप्पे जाव परक्कमे ॥ २९९ ॥ चत्तारि सुया
 प० तं० अइजाए, अणुजाए, अवजाए, कुलिंगाले ॥ ३०० ॥ चत्तारि पुरिसजाया
 प० तं० सच्चे णाममेगे सच्चे, सच्चे णाममेगे असच्चे (४) एवं परिणए जाव पर-
 क्कमे ॥ ३०१ ॥ चत्तारि वत्था प० तं० सुई णाममेगे सुई, सुई णाममेगे असुई,
 चउभंगो, एवमेव चत्तारि पुरिसजाया प० तं० सुई णाममेगे सुई, चउभंगो । एवं
 जहेव सुद्धेणं वत्थेणं भणियं, तहेव सुइणावि जाव परक्कमे ॥ ३०२ ॥ चत्तारि
 कोरवा प० तं० अंबपलंबकोरवे, तालपलंबकोरवे, वल्लिपलंबकोरवे, मिंद-
 विसाणकोरवे, एवमेव चत्तारि पुरिस जाया प० तं० अंबपलंबकोरवसमाणे,
 तालपलंबकोरवसमाणे, वल्लिपलंबकोरवसमाणे, मिंदविसाणकोरवसमाणे
 ॥ ३०३ ॥ चत्तारि घुणा प० तं० तयक्खाए, छल्लिक्खाए, कठुक्खाए, सार-
 क्खाए, एवमेव चत्तारि भिक्खायरा प० तं० तयक्खायसमाणे, जाव सारक्खाय-
 समाणे, तयक्खायसमाणस्स णं भिक्खागस्स सारक्खायसमाणे तवे प० सारक्खाय-
 समाणस्सणं भिक्खागस्स तयक्खायसमाणे तवे पच्चे, छल्लिक्खायसमाणस्स णं
 भिक्खागस्स कठुक्खायसमाणे तवे प० कठुक्खायसमाणस्स णं भिक्खागस्स
 छल्लिक्खायसमाणे तवे प० ॥ ३०४ ॥ चउव्विहा तणवणस्सइकाइया प० तं०
 अगगबीया मूलबीया पोरबीया खंधबीया ॥ ३०५ ॥ चउहिं ठाणेहिं अहुणोववण्णे
 णेरइए णिरयलोगंसि इच्छेज्जा माणुसं लोगं हव्वमागच्छित्तए णो चेवणं संचाएइ
 हव्वमागच्छित्तए, अहुणोववण्णे णेरइए णिरयलोगंसि समुब्भूयं वेयणं वेयमाणे

इच्छेजा माणुसं लोणं हव्वमागच्छित्तए णो चेव णं संचाएइ हव्वमागच्छित्तए,
 अहुणोववक्के णेरइए णिरयलोणंसि णिरयपालेहिं भुज्जो भुज्जो अहिट्ठिजमाणे इच्छेजा
 माणुसं लोणं हव्वमागच्छित्तए, नो चेव णं संचाएइ हव्वमागच्छित्तए, अहुणोववक्के
 णेरइए णिरयवेयणिजंसि कम्मंसि अक्खीणंसि अवेइयंसि अणिजिणंसि इच्छेजा०
 नो चेव णं संचाएइ, हव्वमागच्छित्तए, एवं णिरयाउअंसि कम्मंसि अक्खीणंसि,
 जाव णो संचाएइ हव्वमागच्छित्तए इच्चेएहिं चउहिं ठाणेहिं अहुणोववक्के णेरइए
 जाव णो चेव णं संचाएइ हव्वमागच्छित्तए ॥ ३०६ ॥ कप्पंति णिग्गंथीणं चत्तारि
 संघाडीओ धारित्तए वा परिहरित्तए वा तं० एगं दुहत्थवित्थारं, दोतिहत्थवित्थाराओ,
 एगं चउहत्थवित्थारं ॥ ३०७ ॥ चत्तारि ज्ञाणा प० तं० अट्टे ज्ञाणे, रोहे ज्ञाणे,
 धम्मे ज्ञाणे, सुक्के ज्ञाणे, अट्टे ज्ञाणे चउव्विहे प० तं० अमणुजसंपओगसंपउत्ते
 तस्स विप्पओगसतिसमण्णागए यावि भवइ, मणुजसंपओगसंपउत्ते तस्स अविप्प-
 ओगसतिसमण्णागए यावि भवइ, आर्यकसंपओगसंपउत्ते तस्स विप्पओगसति-
 समण्णागए यावि भवइ, परिउसियकामभोगसंपओगसंपउत्ते तस्स अविप्पओगसति-
 समण्णागए यावि भवइ, अट्टस्सणं ज्ञाणस्स चत्तारि लक्खणा प० तं० कंदणया,
 सोयणया, तिप्पणया परिदेवणया, रोहे ज्ञाणे चउव्विहे प० तं० हिंसाणुबंधि,
 मोसाणुबंधि तेणाणुबंधि संरक्खणाणुबंधि । रोहस्स णं ज्ञाणस्स चत्तारि लक्खणा
 प० तं० ओसन्नदोसे, बहुलदोसे, अन्नाणदोसे आमरणंतदोसे । धम्मे ज्ञाणे
 चउव्विहे चउपडोयारे प० तं० आणाविजए, अवायविजए, विवागविजए, संठाण-
 विजए । धम्मस्स णं ज्ञाणस्स चत्तारि लक्खणा प० तं० आणारुई, णिसग्गरुई,
 सुत्तरुई, ओगाढरुई । धम्मस्स णं ज्ञाणस्स चत्तारि आलंबणा प० तं० वायणा,
 पडिपुच्छणा, परियट्ठणा, अणुप्पेहा । धम्मस्स णं ज्ञाणस्स चत्तारि अणुप्पेहाओ
 प० तं० एगाणुप्पेहा, अणिच्चाणुप्पेहा, असरणाणुप्पेहा, संसाराणुप्पेहा । सुक्के-
 ज्ञाणे चउव्विहे चउप्पडोयारे प० तं० पुहुत्तवियक्केसवियारी, एगत्तवियक्के अवि-
 यारी, सुहुमकिरिए अणियट्ठी, समुच्छिन्नकिरिए अपडिवाई । सुक्कस्स णं ज्ञाणस्स
 चत्तारि लक्खणा प० तं० अक्खहे असम्मोहे विवेगे विउस्सग्गे, सुक्कस्स णं ज्ञाणस्स
 चत्तारि आलंबणा प० तं० खंती मुत्ती मद्दवे अज्जवे, सुक्कस्स णं ज्ञाणस्स चत्तारि
 अणुप्पेहाओ प० तं० अणंतवत्तिथाणुप्पेहा, विपरिणामाणुप्पेहा, असुभाणुप्पेहा,
 अवायाणुप्पेहा ॥ ३०८ ॥ चउव्विहा देवाणं ठिई प० तं० देवेणामेगे, देवसिणाए
 णामेगे, देवपुरोहिण एणामेगे, देवपज्जलणे णामेगे ॥ ३०९ ॥ चउव्विहे संवासे प०
 तं० देवेणामेगे देवीए सद्धि संवासं गच्छेजा, देवेणामेगे छवीए सद्धि संवासं

गच्छेज्जा, छवीणाममेगे देवीए सद्धि संवासं गच्छेज्जा, छवीणाममेगे छवीए सद्धि संवासं गच्छेज्जा ॥ ३१० ॥ चत्तारि कस्साया प० तं० कोहकसाए माणकसाए माया-
कसाए लोभकसाए, एवं नेरइयाणं जाव वैमाणियाणं, चउप्पइठ्ठिए कोहे प० तं० आयपइठ्ठिए, परपइठ्ठिए, तदुभयपइठ्ठिए, अपइठ्ठिए, एवं नेरइयाणं जाव वैमाणि-
याणं, एवं जाव लोभे वैमाणियाणं, चउहिं ठाणेहिं कोउप्पत्ती सिया तं० खेत्तं पडुच्च, वत्थं पडुच्च, सरीरं पडुच्च, उवहिं पडुच्च, एवं नेरइयाणं जाव वैमाणियाणं, एवं जाव लोहे वैमाणियाणं, चउव्विहे कोहे प० तं० अणंताणुबंधिकोहे, अपच्चक्खाणकोहे, पच्चक्खाणावरणे कोहे, संजलणे कोहे, एवं नेरइयाणं जाव वैमाणियाणं, एवं जाव लोभे वैमाणियाणं, चउव्विहे कोहे पण्णत्ते, आभोगनिव्वत्तिए, अणाभोगनिव्वत्तिए, उवसंते, अणुवसंते, एवं नेरइयाणं, जाव वैमाणियाणं, एवं जाव लोभे, जाव वैमाणियाणं ॥ ३११ ॥ जीवा णं चउहिं ठाणेहिं अट्ठकम्मपगडीओ चिणिसु तं० कोहेणं माणेणं मायाए लोभेणं, एवं जाव वैमाणियाणं, एवं चिणंति एस दंडओ । एवं चिणिस्संति एस दंडओ, एवमेणं तिज्झि दंडगा, एवं उवचिणिसु, उवचिणंति, उवचिणिस्संति, बंधिसु ३ । उदीरंसु ३ । वेदंसु ३ । णिज्जरंसु णिज्जरंति णिज्जरिस्संति, जाव वैमाणियाणमेवमेक्किक्के पदे तिज्झि २ दंडगा भाणियव्वा, जाव निज्जरिस्संति ॥ ३१२ ॥ चत्तारि पडिमाओ प० तं० समाहिपडिमा, उवहाण-
पडिमा, विवेगपडिमा, विउस्सग्गपडिमा, चत्तारि पडिमाओ प० तं० भद्दा, सुभद्दा, महाभद्दा, सव्वओभद्दा, चत्तारि पडिमाओ प० तं० खुड्डियामोयपडिमा, महल्लिया-
मोयपडिमा, जवमज्झा, वइरमज्झा ॥ ३१३ ॥ चत्तारि अत्थिकाया अजीवकाया प० तं० धम्मत्थिकाए, अधम्मत्थिकाए, आगासत्थिकाए, पोगलत्थिकाए, चत्तारि अत्थिकाया अरुविकाया प० तं० धम्मत्थिकाए, अधम्मत्थिकाए, आगासत्थिकाए, जीवत्थिकाए ॥ ३१४ ॥ चत्तारि फला प० तं० आमेणाममेगे आममहुरे, आमेणाम-
मेगे पक्कमहुरे, पक्केणाममेगे आममहुरे, पक्केणाममेगे पक्कमहुरे, एवामेव चत्तारि पुरि-
सजाया प० तं० आमेणाममेगे आममहुरफलसमाणे (४) ॥ ३१५ ॥ चउव्विहे सच्चे प० तं० काउज्जुयया, भासुज्जुयया, भावुज्जुयया, अविस्वायणाजोगे, चउ-
व्विहे मोसे प० तं०-कायअणुज्जुयया, भासअणुज्जुयया, भावअणुज्जुयया, विस्-
वादणाजोगे ॥ ३१६ ॥ चउव्विहे पणिहाणे प० तं० मणपणिहाणे, वइपणिहाणे, कायपणिहाणे, उवगरणपणिहाणे । एवं नेरइयाणं पंचिदियाणं जाव वैमाणियाणं, चउव्विहे सुप्पणिहाणे प० तं० मणसुप्पणिहाणे जाव उवगरणसुप्पणिहाणे, एवं संजयमणुस्साणवि, चउव्विहे दुप्पणिहाणे प० तं० मणदुप्पणिहाणे जाव उवगरण

दु० एवं पंचिदियाणं जाव वेसाणियाणं ॥ ३१७ ॥ चत्तारि पुरिसजाया प० तं०
 आवायभद्दए णाममेगे णो संवासभद्दए, संवासभद्दए णाममेगे णो आवायभद्दए, एगे
 आवायभद्दएवि संवासभद्दएवि, एगे णो आवायभद्दए णो संवासभद्दए, चत्तारि
 पुरिसजाया प० तं० अप्पणो णाममेगे वज्जं पासइ णो परस्स, परस्स णाममेगे वज्जं
 पासइ ४ । चत्तारि पुरिसजाया प० तं० अप्पणो णाममेगे वज्जं उदीरेति णो परस्स
 ४ । चत्तारि पुरिसजाया प० तं० अप्पणो णाममेगे वज्जं उवसामेइ णो परस्स ४ ।
 चत्तारि पुरिसजाया प० तं० अब्भुट्ठेइ णाममेगे णो अब्भुट्ठावेइ ४ । एवं वंदइ णाममेगे
 णो वंदावेइ ४ । एवं सक्कारेइ, सम्माणेइ ४ । पूएइ वाएइ पडिपुच्छइ पुच्छइ वाग-
 रेइ ४ । चत्तारि पुरिसजाया प० तं० सुत्तधरे णाममेगे णो अत्थधरे, अत्थधरे
 णाममेगे णो सुत्तधरे, एगे सुत्तधरेवि अत्थधरेवि, एगे णो सुत्तधरे णो अत्थधरे
 ॥ ३१८ ॥ चमरस्स णं असुरिंदस्स असुरकुमाररत्तो चत्तारि लोगपाला प० तं०
 सोमे जमे वरुणे वेसमणे; एवं बलिस्सवि सोमे जमे वेसमणे वरुणे, धरणस्स काल-
 वाले कोलवाले सेलवाले संखवाले । एवं भूतानंदस्स कालवाले कोलवाले संखवाले सेल-
 वाले, वेणुदेवस्स चित्ते विचित्ते चित्तपक्खे विचित्तपक्खे, वेणुदालिस्स चित्ते विचित्ते
 विचित्तपक्खे चित्तपक्खे । हरिकंतस्स पभे सुप्पभे पभकंते सुप्पभकंते; हरिसहस्स पभे
 सुप्पभे सुप्पभकंते पभकंते; अग्गिसिहस्स तेऊ तेउसिहे तेउकंते तेउप्पभे, अग्गि-
 माणवस्स तेऊ तेउसिहे तेउप्पभे तेउकंते, पुन्नस्स रुए रुयंसे रुयकंते रुयप्पभे, विसि-
 ठस्स रुए रुयंसे रुयप्पभे रुयकंते । जलकंतस्स जले जलरए जलकंते जलप्पभे ।
 जलप्पभस्स जले जलरए जलप्पभे जलकंते । अमियगइस्स तुरियगई खिप्पगई
 सीहगई सीहविक्रमगई, अमियवाहणस्स तुरियगई खिप्पगई सीहविक्रमगई सीहगई;
 वेलंबस्स काले महाकाले अंजणे रिट्ठे । पभंजणस्स काले महाकाले रिट्ठे अंजणे ।
 घोसस्स आवत्ते वियावत्ते णंदियावत्ते महानंदियावत्ते । महाघोसस्स आवत्ते वियावत्ते
 महानंदियावत्ते णंदियावत्ते, सक्कस्स सोमे जमे वरुणे वेसमणे । ईसाणस्स सोमे जमे
 वेसमणे वरुणे, एवं एगंतरिया जाव अञ्जुयस्स ॥ ३१९ ॥ चउव्विहा वाउकुमारा
 प० तं० काले महाकाले वेलंबे पभंजणे, चउव्विहा देवा प० तं० भवणवासी
 वाणमंतरा जोइसिया विमाणवासी ॥ ३२० ॥ चउव्विहे पमाणे प० तं० दव्वप्प-
 माणे खेत्तप्पमाणे कालप्पमाणे भावप्पमाणे ॥ ३२१ ॥ चत्तारि दिसाकुमारिमहत्तरि-
 याओ प० तं० रुवा रुवंसा सुरूवा रुवावई । चत्तारि विज्जुकुमारिमहत्तरियाओ प०
 तं० चित्ता चित्तकणगा सेयंसा सोयामणी ॥ ३२२ ॥ सक्कस्स णं देविंदस्स देवरत्तो
 सज्झिमपरिसाए देवाणं चत्तारि पलिओवमाई ठिई प०; ईसाणस्स णं देविंदस्स देव-

रक्षो मज्झिमपरिसाए देवीणं चत्तारि पल्लिओवमाई ठिई प० ॥ ३२३ ॥ चउव्विहे
 र्संसारे दव्वसंसारे खेतसंसारे कालसंसारे भावसंसारे ॥ ३२४ ॥ चउव्विहे
 दिट्ठिवाए प० तं० परिकम्मं सुत्ताई पुव्वगए अणुजोगे ॥ ३२५ ॥ चउव्विहे
 पायच्छित्ते, णाणपायच्छित्ते दंसणपायच्छित्ते चरितपायच्छित्ते वियत्तकिच्चपाय-
 च्छित्ते, चउव्विहे पायच्छित्ते, पडिसेवणापायच्छित्ते संजोयणापायच्छित्ते, आरोवणापा-
 यच्छित्ते, पल्लिउंचणापायच्छित्ते ॥ ३२६ ॥ चउव्विहे क ल्ले पमाणकाले अहाउयणि-
 व्वत्तिकाले मरणकाले अद्धाकाले ॥ ३२७ ॥ चउव्विहे पोम्मलपरिणामे, वण्णपरि-
 णामे गंधपरिणामे रसपरिणामे फासपरिणामे ॥ ३२८ ॥ भरहेरवएसु णं वासेसु
 पुरिमपच्छिमवज्जा मज्झिमगा बावीसं अरहंता भगवंता चाउज्जामं धम्मं पञ्चवित्ति
 तं० सव्वाओ पाणाइवायाओ वेरमणं, एवं सुसावायाओ, अदिच्चादाणाओ, सव्वाओ
 बहिच्चादाणाओ वेरमणं । सव्वेसु णं महाविदेहेसु अरहंता भगवंता चाउज्जामं धम्मं
 पञ्चवयंति तं० सव्वाओ पाणाइवायाओ वेरमणं जाव सव्वाओ बहिच्चादाणाओ
 वेरमणं ॥ ३२९ ॥ चत्तारि दुग्गईओ प० तं० णेरइयदुग्गई, तिरिक्खजोणियदुग्गई,
 मणुस्सदुग्गई, देवदुग्गई, चत्तारि सोग्गई प० तं० सिद्धसोग्गई, देवसोग्गई,
 मणुयसोग्गई, सुकुले पञ्चायाई, चत्तारि दुग्गया प० तं० णेरइयदु० जाव देवदुग्गया,
 चत्तारि सुग्गया प० तं० सिद्धसुग्गया जाव सुकुलपञ्चायाया ॥ ३३० ॥ पढमसमय-
 जिणस्स णं चत्तारि कम्मंसा खीणा भवंति तं० णाणावरणिज्जं, दरिसणावरणिज्जं,
 मोहणिज्जं, अंतराइयं । उप्पन्नणाणदंसणधरे णं अरहा जिणे केवली चत्तारि कम्मंसे
 वेदेति तं० वेयणिज्जं आउयं णामं गोयं । पढमसमयसिद्धस्स णं चत्तारि कम्मंसा
 जुगवं खिजंति तं० वेयणिज्जं आउयं णामं गोयं ॥ ३३१ ॥ चउहिं ठाणेहिं हासु-
 प्पत्ती सिया तं० पासेत्ता भासेत्ता सुणेत्ता संभरेत्ता ॥ ३३२ ॥ चउव्विहे अंतरे
 प० तं० कट्ठंतरे पम्हंतरे लोहंतरे पत्थरंतरे । एवामेव इत्थीए वा पुरिसस्स वा,
 चउव्विहे अंतरे प० तं० कट्ठंतरसमाणे, पम्हंतरसमाणे, लोहंतरसमाणे, पत्थरं-
 तरसमाणे ॥ ३३३ ॥ चत्तारि भयगा प० तं० दिवसभयए जत्ताभयए उच्चत्तभयए
 कब्बालभयए ॥ ३३४ ॥ चत्तारि पुरिसजाया प० तं० संपागडपडिसेवी णाममेगे
 णो पच्छण्णपडिसेवी, पच्छण्णपडिसेवी णाममेगे णो संपागडपडिसेवी, एगे संपागड-
 पडिसेवीवि पच्छण्णपडिसेवीवि, एगे णो संपागडपडिसेवी णो पच्छण्णपडिसेवी
 ॥ ३३५ ॥ चमरस्स णं अक्षुरिंदस्स असुरकुमाररण्णे सोमस्स महारण्णे चत्तारि
 अग्गमहिंसीओ प० तं० कणगा कणगलया चित्तगुत्ता वसुंधरा, एवं जमस्स वरु-
 णस्स वेसमणस्स, बलिस्स णं वइरोयणिंदस्स वइरोयणरण्णे, सोमस्स महारण्णे
 चत्तारि अग्गमहिंसीओ प० तं० सित्तगा सुभहा विज्जुया असणी, एवं जमस्स वेस-

मणस्स वरुणस्स; धरणस्स णं णागकुमारिंदस्स णागकुमाररण्णो कालवालस्स महारण्णो चत्तारि अग्गमहिंसीओ प० तं० असोगा विमला सुप्पभा सुदंसणा, एवं जाव संख-
वालस्स । भूयाणंदस्स णं णागकुमारिंदस्स णागकुमाररण्णो कालवालस्स महारण्णो चत्तारि अग्गमहिंसीओ प० तं० सुणंदा सुभद्दा सुजाया सुमणा । एवं जाव सेल-
वालस्स जहा धरणस्स, एवं सव्वेसिं दाहिणिंदलोगपालाणं जाव घोसस्स जहा भूयाणंदस्स एवं जाव महाघोसस्स लोगपालाणं । कालस्स णं पिसाईदस्स पिसाय-
रण्णो चत्तारि अग्गमहिंसीओ प० तं० कमला कमलप्पभा उप्पला सुदंसणा, एवं महाकालस्स वि । सुखस्स णं भूइंदस्स भूयरण्णो चत्तारि अग्गमहिंसीओ प० तं०
रुववई बहुरुवा सुखा सुभगा । एवं पडिरुवस्स वि, पुण्णभइस्स णं जक्खिंदस्स जक्खरण्णो चत्तारि अग्गमहिंसीओ प० तं० पुत्ता बहुपुत्तिया उत्तमा तारगा, एवं माणिभइस्स वि । भीमस्स णं रक्खसिंदस्स रक्खसरण्णो चत्तारि अग्गमहिंसीओ प० तं० पउमा वसुमई कणगा रयणप्पभा । एवं महाभीमस्स वि किन्नरस्स णं किन्नरिंदस्स चत्तारि अग्गमहिंसीओ प० तं० वडिसा केउमई रइसेणा रइप्पभा । एवं किंपुरिसस्स वि सुपुरिसस्स णं किंपुरिसिंदस्स चत्तारि अग्गमहिंसीओ प० तं० रोहिणी णवमिया हिंरी पुप्फवई । एवं महापुरिसस्स वि, अइकायस्स णं महोरगिंदस्स चत्तारि अग्गमहिंसीओ प० तं० भुयगा भुयगवई महाकच्छा फुडा, एवं महाकायस्स वि, गीयरइस्स णं गंधर्विंदस्स चत्तारि अग्गमहिंसीओ प० तं० सुघोसा विमला सुस्सरा सरस्सई, एवं गीयजसस्स वि, चंदस्स णं जोइसिंदस्स जोइसरण्णो चत्तारि अग्गमहिंसीओ प० तं० चंदप्पभा दोसिनाभा अच्चिमाली पभंकरा । एवं सूरस्स वि, णवरं सूरप्पभा दोसिणाभा अच्चिमाली पभंकरा । इंगालस्स णं महग्गहस्स चत्तारि अग्गमहिंसीओ प० तं० विजया वेजयंती जयंती अपराजिता । एवं सव्वेसिं महग्ग-
हाणं जाव भावकेउस्स । सक्कस्स णं देविंदस्स देवरण्णो सोमस्स महारण्णो चत्तारि अग्गमहिंसीओ प० तं० रोहिणी मयणा चित्ता सोमा, एवं जाव वेसमणस्स ईसाण-
स्स णं देविंदस्स देवरण्णो सोमस्स महारण्णो चत्तारि अग्गमहिंसीओ प० तं० पुढवी राई रयणी विज्जू, एवं जाव वरुणस्स ॥ ३३६ ॥ चत्तारि गोरसविगईओ प० तं० खीरं दहिं सप्पि णवणीअं, चत्तारि सिणेहविगईओ प० तं० तेह्लं घयं वसा णवणीअं, चत्तारि महाविगईओ वज्जणीयाओ तं० महं मंसं मज्जं णवणीयं ॥ ३३७ ॥ चत्तारि कूडागारा प० तं० गुत्तेणाममेगे गुत्ते गुत्तेणाममेगे अगुत्ते अगुत्ते णाममेगे गुत्ते, अगुत्ते णाममेगे अगुत्ते । एवामेव चत्तारि पुरिसजाया प० तं० गुत्तेणाममेगे गुत्ते ४ । चत्तारि कूडागारसालाओ प० तं० गुत्ता णाममेगा गुत्तदुवारा, गुत्ताणाममेगा

अगुत्तद्वारा, अगुत्ता णाममेगा गुत्तद्वारा, अगुत्ता णाममेगा अगुत्तद्वारा, एवामेव
 चत्तारित्थीओ प० तं० गुत्ता णाममेगा गुत्तिदिया, गुत्ता णाममेगा अगुत्तिदिया ४ ।
 ॥ ३३८ ॥ चउव्विहा ओगाहणा प० तं० दव्वोगाहणा खेतोगाहणा कालो-
 गाहणा भावोगाहणा ॥ ३३९ ॥ चत्तारि पण्णत्तीओ अंगबाहिरियाओ प०
 तं० चंदपण्णत्ती सूरपण्णत्ती जंबुद्दीवपण्णत्ती, दीवसागरपण्णत्ती ॥ ३४० ॥
चउट्ठाणस्स पढमोद्देसो समत्तो ॥

चत्तारि पडिसंलीणा प० तं० कोहपडिसंलीणे माणपडिसंलीणे मायापडिसंलीणे
 लोभपडिसंलीणे, चत्तारि अपडिसंलीणा प० तं० कोहअपडिसंलीणे जाव लोभ-
 अपडिसंलीणे । चत्तारि पडिसंलीणा प० तं० मणपडिसंलीणे, वइपडिसंलीणे, काय-
 पडिसंलीणे, इंदियपडिसंलीणे; चत्तारि अपडिसंलीणा प० तं० मणअपडिसंलीणे
 जाव इंदिय० ॥ ३४१ ॥ चत्तारि पुरिसजाया प० तं० दीणे णाममेगे दीणे, दीणे
 णाममेगे अदीणे, अदीणे णाममेगे दीणे, अदीणे णाममेगे अदीणे । चत्तारि पुरिसजाया
 प० तं० दीणे णाममेगे दीणपरिणए, दीणे णाममेगे अदीणपरिणए, अदीणे णाममेगे
 दीणपरिणए, अदीणे णाममेगे अदीणपरिणए, चत्तारि पुरिसजाया प० तं० दीणे
 णाममेगे दीणरूवे ४ । एवं दीणमणे दीणसंकप्पे दीणपण्णे दीणदिट्ठी दीणसीलायारे
 दीणववहारे ४ । चत्तारि पुरिसजाया प० तं० दीणे णाममेगे दीणपरक्कमे, दीणे णाममेगे
 अदीणपरक्कमे ४ । एवं सव्वेसि चउभंगो भाणियव्वो । चत्तारि पुरिसजाया प०
 तं० दीणे णाममेगे दीणवित्ती ४ । एवं दीणजाई दीणभासी दीणोभासी, चत्तारि पुरिस-
 जाया पण्णत्ता प० तं० दीणे णाममेगे दीणसेवी ४ । एवं दीणे णाममेगे दीणपरियाए ४
 एवं दीणे णाममेगे दीणपरियाले ४ । सव्वत्थ चउभंगो ॥ ३४२ ॥ चत्तारि पुरिसजाया
 प० तं० अजे णाममेगे अजे ४ । चत्तारि पुरिसजाया प० तं० अजे णाममेगे अज-
 परिणए ४ । एवं अजरूवे ४ । अजमणे ४ । अजसंकप्पे ४ । अजपण्णे ४ ।
 अज्विट्ठी ४ । अजसीलायारे ४ । अजववहारे ४ । अज परक्कमे ४ । अज-
 वित्ती ४ । अजजाई ४ । अजभासी ४ । अज ओभासी ४ । अजसेवी ४ । एवं
 अजपरियाए ४ । अजपरियाले ४ । एवं सत्तरस आलावगा, जहा दीणेण भणिया
 तहा अजेणवि भाणियव्वा । चत्तारि पुरिसजाया प० तं० अजे णाममेगे अजभावे,
 अजे णाममेगे अणजभावे, अणजे णाममेगे अजभावे, अणजे णाममेगे अणजभावे
 ॥ ३४३ ॥ चत्तारि उसभा प० तं० जाइसंपने कुलसंपने बलसंपने रुवसंपणे,
 एवामेव चत्तारि पुरिसजाया प० तं० जाइसंपने कुलसंपने बलसंपने रुवसंपने,
 चत्तारि उसभा प० तं० जाइसंपने णाममेगे णो कुलसंपने, कुलसंपने णाममेगे णो

जाइसंपन्ने, एगे कुलसंपन्नेवि जाइसंपन्नेवि, एगे णो जाइसंपन्ने णो कुलसंपन्णे ।
 एवामेव चत्तारि पुरिसजाया प० तं० जाइसंपन्ने णाममेगे णो कुलसंपन्ने ४ ।
 चत्तारि उसभा प० तं० जाइसंपन्ने णाममेगे णो बलसंपन्ने ४ । एवामेव चत्तारि
 पुरिसजाया प० तं० जाइसंपन्ने णाममेगे णो बलसंपन्ने ४ । चत्तारि उसभा प० तं०
 जाइसंपन्ने णाममेगे णो रुवसंपन्ने ४ । एवामेव चत्तारि पुरिसजाया प० तं० जाइ-
 संपन्ने णाममेगे णो रुवसंपन्ने ४ । चत्तारि उसभा प० तं० कुलसंपन्ने णाममेगे णो
 बलसंपन्ने ४ । एवामेव चत्तारि पुरिसजाया प० तं० कुलसंपन्ने णाममेगे णो
 बलसंपन्ने ४ । चत्तारि उसभा प० तं० कुलसंपन्ने णाममेगे णो रुवसंपन्ने ४ ।
 एवामेव चत्तारि पुरिसजाया प० तं० कुलसंपन्ने णाममेगे णो रुवसंपन्ने ४ ।
 चत्तारि उसभा प० तं० बलसंपन्ने णाममेगे णो रुवसंपन्ने ४ । एवामेव चत्तारि
 पुरिसजाया प० तं० बलसंपन्ने णाममेगे णो रुवसंपन्ने ४ ॥ ३४४ ॥ चत्तारि
 हत्थी प० तं० भंदे मंदे मिए संकिण्णे, एवामेव चत्तारि पुरिसजाया प० तं० भंदे
 मंदे मिए संकिण्णे, चत्तारि हत्थी प० तं० भंदे णाममेगे भद्दमणे, भंदे णाममेगे
 मंदमणे, भंदे णाममेगे मियमणे, भंदे णाममेगे संकिण्णमणे, एवामेव चत्तारि पुरिस-
 जाया प० तं० भंदे णाममेगे भद्दमणे, भंदे णाममेगे मंदमणे, भंदे णाममेगे मियमणे,
 भंदे णाममेगे संकिण्णमणे, चत्तारि हत्थी प० तं० मंदे णाममेगे भद्दमणे, मंदे
 णाममेगे मंदमणे मंदे णाममेगे मियमणे, मंदे णाममेगे संकिण्णमणे, एवामेव चत्तारि
 पुरिसजाया प० तं० मंदे णाममेगे भद्दमणे, तं चेव । चत्तारि हत्थी प० तं० मिए
 णाममेगे भद्दमणे, मिए णाममेगे मंदमणे, मिए णाममेगे मियमणे, मिए णाममेगे
 संकिण्णमणे, एवामेव चत्तारि पुरिसजाया प० तं० मिए णाममेगे भद्दमणे, तं चेव ।
 चत्तारि हत्थी प० तं० संकिण्णे णाममेगे भद्दमणे, संकिण्णे णाममेगे मंदमणे,
 संकिण्णे णाममेगे मियमणे, संकिण्णे णाममेगे संकिण्णमणे । एवामेव चत्तारि पुरि-
 सजाया प० तं० संकिण्णे णाममेगे भद्दमणे, तं चेव जाव संकिण्णे णाममेगे
 संकिण्णमणे । गाथा=मधुगुलियपिगलक्खो, अणुपुव्वसुजायवीहलंगूलो; पुरओ
 उदग्गधीरो, सव्वंगसमाहिओ भद्दो ॥ ३४५ ॥ (१) चलबहलविसमचम्मो
 थूलसिरो थूलएण पेएण; थूलणहदंतवालो, हरिपिगललोयणो मंदो ॥ ३४६ ॥
 (२) तणुओ तणुयग्गीवो, तणुयतओ तणुयदंतणहवालो; भीरु तत्थुव्विग्गो;
 तासी य भवे मिए णामं ॥ ३४७ ॥ (३) एएसिं हत्थीणं, थोवं थोवं तु जो
 अणुहरइ हत्थी; रुवेण व सीलेण व, सो संकिण्णो ति णायव्वो ॥ ३४८ ॥ (४)
 भद्दो मज्जइ सरए, मंदो उण मज्जए वसंतम्मि; मिउ मज्जइ हेमंते, संकिण्णो सव्व-

कालम्मि (५) ॥ ३४९ ॥ चत्तारि विकहाओ प० तं० इत्थिकहा भत्तकहा
 देसकहा रायकहा । इत्थिकहा चउव्विहा प० तं० इत्थीणं जाइकहा, इत्थीणं
 कुलकहा, इत्थीणं रूवकहा, इत्थीणं नेवत्थकहा, भत्तकहा चउव्विहा प० तं०
 भत्तस्स आवावकहा, भत्तस्स निव्वावकहा, भत्तस्स आरंभकहा, भत्तस्स णिठ्ठाण-
 कहा । देसकहा चउव्विहा प० तं० देसविहिक्कहा, देसविकप्पकहा, देसच्छंदकहा,
 देसनेवत्थकहा, रायकहा चउव्विहा प० तं० रण्णो अइयाणकहा रण्णो निज्जाण-
 कहा, रण्णो बलवाहणकहा, रण्णो कोसकोट्ठागारकहा ॥ ३५० ॥ चउव्विहा धम्म-
 कहा प० तं० अक्खेवणी विक्खेवणी संवेगणी णिव्वेगणी । अक्खेवणी कहा
 चउव्विहा प० तं० आयारऽक्खेवणी ववहारऽक्खेवणी पणत्तिऽक्खेवणी दिट्ठि-
 वायअक्खेवणी । विक्खेवणी कहा चउव्विहा प० तं० ससमयं कहेइ, ससमयं
 कहेत्ता परसमयं कहेइ, परसमयं कहेत्ता ससमयं ठावित्ता भवइ, सम्मावायं
 कहेइ, सम्मावायं कहेत्ता सिच्छावायं कहेइ, सिच्छावायं कहेत्ता सम्मावायं
 ठावित्ता भवइ । संवेगणी कहा चउव्विहा प० तं० इहलोगसंवेगणी परलोग-
 संवेगणी आयसरीरसंवेगणी परसरीरसंवेगणी । णिव्वेगणी कहा चउव्विहा प०
 तं० इहलोगे दुच्चिण्णा कम्मा इहलोगे दुहफलविवागसंजुत्ता भवन्ति, इहलोगे दुच्चिण्णा
 कम्मा परलोगे दुहफलविवागसंजुत्ता भवन्ति, परलोगे दुच्चिण्णा कम्मा इहलोगे दुहफल-
 विवागसंजुत्ता भवन्ति । परलोगे दुच्चिण्णा कम्मा परलोगे दुहफलविवागसंजुत्ता भवन्ति ।
 इहलोगे सुच्चिण्णाकम्मा इहलोगे सुहफलविवागसंजुत्ता भवन्ति, इहलोगे सुच्चिण्णा कम्मा
 परलोगे सुहफलविवागसंजुत्ता भवन्ति, एवं चउभंगो तहेव ॥ ३५१ ॥ चत्तारि पुरि-
 सजाया प० तं० किसे णाममेगे किसे, किसे णाममेगे दढे, दढे णाममेगे किसे, दढे
 णाममेगे दढे । चत्तारि पुरिसजाया प० तं० किसे णाममेगे किससरीरे, किसे णाम-
 मेगे दढसरीरे, दढे णाममेगे किससरीरे, दढे णाममेगे दढसरीरे । चत्तारि पुरिस-
 जाया प० तं० किससरीरस्स णाममेगस्स णाणदंसणे समुप्पज्जइ णो दढसरीरस्स,
 दढसरीरस्स णाममेगस्स णाणदंसणे समुप्पज्जइ णो किससरीरस्स, एगस्स किससरी-
 रस्स वि णाणदंसणे समुप्पज्जइ दढसरीरस्स वि, एगस्स णो किससरीरस्स णाणदंसणे
 समुप्पज्जइ णो दढसरीरस्स ॥ ३५२ ॥ चउहिं ठाणेहिं णिग्गंथाण वा, णिग्गंथीण
 वा अस्सिं समयंसि अइसेसे णाणदंसणे समुपज्जिउकामेवि णो समुप्पज्जेजा तं० अभि-
 क्खणं अभिक्खणं इत्थिकहं भत्तकहं देसकहं रायकहं कहेत्ता भवइ, विवेगेणं विउ-
 सगेणं णो सम्ममप्पाणं भावेत्ता भवइ, पुव्वरत्तावरत्तकालसमयंसि णो धम्मजाग-
 रियं जागरित्ता भवइ, फासुयस्स एसणिजस्स उच्छस्स सामुदाणियस्स णो सम्मं

गवैसइत्ता भवइ, इच्चैएहिं चउहिं ठाणेहिं णिग्गंथाण वा णिग्गंथीण वा जाव णो
समुप्पजेज्जा, चउहिं ठाणेहिं णिग्गंथाण वा णिग्गंथीण वा अइसेसे णाणंदसणे
समुप्पज्जिउकामे समुप्पजेज्जा तं० इत्थिकहं भत्तकहं दैसकहं रायकहं णो कहेत्ता
भवइ, विवेगेण विउसग्गेणं सम्ममप्पाणं भावेत्ता भवइ, पुव्वरत्तावरत्तकालसमयंसि
धम्मजागरियं जागरित्ता भवइ, फासुयस्स एसणिजस्स उच्छस्स सामुदाणियस्स
सम्मं गवैसइत्ता भवइ, इच्चैएहिं चउहिं ठाणेहिं णिग्गंथाण वा णिग्गंथीण वा जाव
समुप्पजेज्जा ॥ ३५३ ॥ णो कप्पइ णिग्गंथाण वा णिग्गंथीण वा चउहिं महा-
पाडिवएहिं सज्झायं करेत्तए तं० आसाढपाडिवए इंदमहपाडिवए कत्तियपाडिवए
सुणिग्गहपाडिवए, णो कप्पइ णिग्गंथाण वा णिग्गंथीण वा चउहिं संझाहिं सज्झायं
करेत्तए तं० पढमाए पच्छिमाए मज्झण्हे अद्धरत्ते । कप्पइ णिग्गंथाण वा णिग्गं-
थीण वा चाउक्कालं सज्झायं करेत्तए तं० पुव्वण्हे अवरण्हे पओसे पच्चूसे ॥ ३५४ ॥
चउव्विहा लोगट्ठिइ प० तं० आगासपइठिए वाए, वायपइठिए उदही, उदहिपइठिया
पुढवी, पुढविपइठिया तसा थावरा पाणा ॥ ३५५ ॥ चत्तारि पुरिसजाया प० तं०
तहे णाममेगे णोतहे णाममेगे सोवत्थी णाममेगे पहाणे णाममेगे ॥ ३५६ ॥ चत्तारि
पुरिसजाया प० तं० आर्यंतकरे णाममेगे णो परंतकरे, परंतकरे णाममेगे णो
आर्यंतकरे, एगे आर्यंतकरेवि परंतकरेवि, एगे णो आर्यंतकरे णो परंतकरे, चत्तारि
पुरिसजाया प० तं० आर्यंतमे णाममेगे णो परंतमे परंतमे णाममेगे णो आर्यंतमे
४ । चत्तारि पुरिसजाया प० तं० आर्यंदमे णाममेगे णो परंदमे, परंदमे णाममेगे
णो आर्यंदमे, एगे आर्यंदमेवि परंदमेवि, एगे णो आर्यंदमे णो परंदमे ॥ ३५७ ॥
चउव्विहा गरहा प० तं० उवसंपज्जामिति एगा गरहा, वित्तिगिच्छामिति एगा
गरहा, जं किंचिमिच्छामिति एगा गरहा, एवंपि पण्णते एगा गरहा ॥ ३५८ ॥
चत्तारि पुरिसजाया प० तं० अप्पणो णाममेगे अलमंथू भवइ णो परस्स, परस्स णाम-
मेगे अलमंथू भवइ णो अप्पणो, एगे अप्पणोवि अलमंथू भवइ परस्सवि, एगे णो
अप्पणो अलमंथू भवइ णो परस्स ॥ ३५९ ॥ चत्तारि मग्गा प० तं० उज्ज णाममेगे
उज्जू, उज्जू णाममेगे वंके, वंके णाममेगे उज्जू, वंके णाममेगे वंके । एवामेव चत्तारि
पुरिसजाया प० तं० उज्जू णाममेगे उज्जू ४ । चत्तारि मग्गा प० तं० खेमे णाममेगे
खेमे, खेमे णाममेगे अखेमे ४ । एवामेव चत्तारि पुरिसजाया प० तं० खेमे णाममेगे
खेमे ४ । चत्तारि मग्गा प० तं० खेमे णाममेगे खेमरूवे, खेमे णाममेगे अखेमरूवे
४ । एवामेव चत्तारि पुरिसजाया प० तं० खेमे णाममेगे खेमरूवे ४ ॥ ३६० ॥
चत्तारि संवुक्का प० तं० वामे णाममेगे वामावत्ते, वामे णाममेगे दाहिणावत्ते,

दाहिणे णाममेगे वामावत्ते, दाहिणे णाममेगे दाहिणावत्ते, एवामेव चत्तारि पुरि-
सजाया प० तं० वामे णाममेगे वामावत्ते ४ । चत्तारि धूमसिहाओ प० तं० वामा
णाममेगा वामावत्ता ४ । एवामेव चत्तारिस्थियाओ प० तं० वामा णाममेगा
वामावत्ता ४ । चत्तारि अग्निसिहाओ प० तं० वामा णाममेगा वामावत्ता ४ ।
एवामेव चत्तारिस्थियाओ प० तं० वामा णाममेगा वामावत्ता ४ । चत्तारि वाय-
मंडलिया, वामा णाममेगा वामावत्ता ४ । एवामेव चत्तारिस्थियाओ प० तं०
वामा णाममेगा वामावत्ता ४ । चत्तारि वणखंडा प० तं० वामे णाममेगे वामावत्ते
४ । एवामेव चत्तारि पुरिसजाया प० तं० वामे णाममेगे वामावत्ते ४ ॥ ३६१ ॥
चउहिं ठाणेहिं णिमंथे णिमंथि आलवमाणे वा संलवमाणे वा णाइक्कमइ, तं० पंथं
पुच्छमाणे वा पंथं देसमाणे वा असणं वा पाणं वा खाइमं वा साइमं वा दलयमाणे
वा, दलवेमाणे वा ॥ ३६२ ॥ तमुक्कायस्स णं चत्तारि णामधेज्जा प० तं० तमेइ वा,
तमुक्काएइ वा, अंधयारेइ वा, महंधयारेइ वा, तमुक्कायस्स णं चत्तारि णामधेज्जा
प० तं० लोगंधयारेइ वा, लोगतमसेइ वा, देवंधयारेइ वा, देवतमसेइ वा, तमु-
क्कायस्स णं चत्तारि णामधेज्जा प० तं० वायफलिहेइ वा, वायफलिहखोभेइ वा,
देवरण्णेइ वा, देवदहेइ वा, तमुक्काए णं चत्तारि कप्पे आवरित्ता चिट्ठइ तं० सोहम्भी-
साणं सणकुमारमाहिंदं ॥ ३६३ ॥ चत्तारि पुरिसजाया प० तं० संपागडपडिसेवी
णाममेगे, पच्छण्णपडिसेवी णाममेगे, पडुप्पण्णंदी णाममेगे, णिस्सरण्णंदी
णाममेगे ॥ ३६४ ॥ चत्तारि सेणाओ प० तं० जइत्ता णाममेगा णो पराजिणित्ता,
पराजिणित्ता णाममेगा णो जइत्ता, एगा जइत्ता वि पराजिणित्तावि, एगा णो जइत्ता
णो पराजिणित्ता । एवामेव चत्तारि पुरिसजाया प० तं० जइत्ता णाममेगे णो
पराजिणित्ता ४ । चत्तारि सेणाओ प० तं० जइत्ता णाममेगा जयइ, जइत्ता णाममेगा
पराजिणइ, पराजिणित्ता णाममेगा जयइ, पराजिणित्ता णाममेगा पराजिणइ, एवा-
मेव चत्तारि पुरिसजाया प० तं० जइत्ता णाममेगे जयइ ॥ ३६५ ॥ चत्तारि केअणा
प० तं० बंसीमूलकेअणए, मेंढविसाणकेअणए, गोमुत्तिकेअणए, अवलेहणियके-
अणए । एवामेव चउव्विहा माया प० तं० बंसीमूलकेअणासमाणा जाव अवलेहणि-
याकेअणासमाणा, बंसीमूलकेअणासमाणं मायं अणुप्पविट्ठे जीवे कालं करेइ णेरइएसु
उववज्जइ, मेंढविसाणकेअणासमाणं मायमणुप्पविट्ठे जीवे कालं करेइ तिरिक्ख-
जोणिएसु उववज्जइ, गोमुत्तिअं जाव कालं करेइ मणुस्सेसु उववज्जइ, अवलेहणिया
जाव देवेषु उववज्जइ ॥ ३६६ ॥ चत्तारि थंभा प० तं० सेलथंभे अट्ठिथंभे दास-
थंभे, तिणिसलयाथंभे; एवामेव चउव्विहे माणे प० तं० सेलथंभसमाणे जाव तिणि-

सलयाथंभसमाणे । सेलथंभसमाणं माणं अणुप्पविठ्ठे जीवे कालं करेइ णेरइएसु उववज्जइ, एवं जाव तिणिसलयाथंभसमाणं माणं अणुप्पविठ्ठे जीवे कालं करेइ देवेषु उववज्जइ ॥ ३६७ ॥ चत्तारि वत्था प० तं० किमिरागरत्ते कइमरागरत्ते खंजणरागरत्ते हलिद्वारागरत्ते एवामेव चउव्विहे लोभे प० तं० किमिरागरत्तवत्थ-समाणे कइमरागरत्तवत्थसमाणे खंजणरागरत्तवत्थसमाणे हलिद्वारागरत्तवत्थसमाणे, किमिरागरत्तवत्थसमाणं लोभमणुप्पविठ्ठे जीवे कालं करेइ णेरइएसु उववज्जइ, तहेव जाव हलिद्वारागरत्तवत्थसमाणं लोभमणुप्पविठ्ठे जीवे कालं करेइ देवेषु उववज्जइ ॥ ३६८ ॥ चउव्विहे संसारे प० तं० णेरइयसंसारे जाव देवसंसारे, चउव्विहे आउए प० तं० णेरइयआउए जाव देवाउए, चउव्विहे भवे प० तं० णेरइयभवे जाव देवभवे ॥ ३६९ ॥ चउव्विहे आहारे प० तं० असणे पाणे खाइमे साइमे । चउव्विहे आहारे प० तं० उवक्खरसंपत्ते, उवक्खडसंपत्ते, सभावसंपत्ते, परि-जुसियसंपत्ते ॥ ३७० ॥ चउव्विहे बंधे प० तं० पगइबंधे ठिइबंधे अणुभावबंधे पएसबंधे, चउव्विहे उवक्कमे प० तं० बंधणोवक्कमे उदीरणोवक्कमे उवसमणोवक्कमे विप्परिणामणोवक्कमे, बंधणोवक्कमे चउव्विहे प० तं० पगइबंधणोवक्कमे ठिइबंधणो-वक्कमे अणुभावबंधणोवक्कमे पएसबंधणोवक्कमे, उदीरणोवक्कमे चउव्विहे प० तं० पगइउदीरणोवक्कमे ठिइउदीरणोवक्कमे अणुभागउदीरणोवक्कमे पएसउदीरणोवक्कमे, उवसामणोवक्कमे चउव्विहे प० तं० पगइउवसामणोवक्कमे ठिइअणुभावपएसउव-सामणोवक्कमे । विपरिणामणोवक्कमे चउव्विहे प० तं० पगइठिइअणुभावपएस-विपरिणामणोवक्कमे । चउव्विहे अप्पाबहुए प० तं० पगइअप्पाबहुए ठिइअणु-भावपएसअप्पाबहुए; चउव्विहे संकमे, पगइसंकमे ठिइअणुभावपएससंकमे । चउव्विहे निधत्ते प० तं० पगइनिधत्ते, ठिइअणुभावपएसनिधत्ते । चउव्विहे निगाइए प० तं० पगइनिगाइए, ठिइनिगाइए, अणुभावनिगाइए, पएसनिगाइए ॥ ३७१ ॥ चत्तारि एक्का प० तं० दविए एकए माउएकए पजएएकए संगहएकए, चत्तारि कई प० तं० दवियकई माउयकई पजवकई संगहकई, चत्तारि सव्वा प० तं० णामसव्वए ठवणसव्वए आएससव्वए निरवसेससव्वए ॥ ३७२ ॥ माणुसुत्त-रस्स णं पव्वयस्स चउहिंसि चत्तारि कूडा प० तं० रयणे रयणुच्चए सव्वरयणए रयणसंचए ॥ ३७३ ॥ जंबुद्दीवे २ भरहेरवएसु वासेसु तीयाए उस्सप्पिणीए सुसमसु-समाए समाए चत्तारि सागरोवमकोडाकोडीओ कालो होत्था, जंबुद्दीवे २ भरहेरवए इमीसे ओसप्पिणीए दुसमसुसमाए समाए जहणपए णं चत्तारि सागरोवमकोडाकोडीओ कालो होत्था । जंबुद्दीवे दीवे जाव आगमिस्साए उस्सप्पिणीए सुसमसुसमाए समाए

चत्तारि सागरोवमकोडाकोडीओ कालो भविस्सइ, जंबुद्वीवे दीवे देवकुरुउत्तरकुरुव-
जाओ चत्तारि अकम्मंभूमीओ प० तं० हेमवए एरण्णवए हरिवसे रम्मगवासे,
चत्तारि वट्ठवेयद्धपव्वया प० तं० सहावई वियडावई गंधावई मालवंतपरियाए ।
तत्थ णं चत्तारि देवा महिद्धिया जाव पलिओवमठिइया परिवसंति तं० साई पभासे
अरुणे पउमे, जंबुद्वीवे दीवे महाविदेहेवासे चउव्विहे प० तं० पुव्वविदेहे,
अवरविदेहे, देवकुरा, उत्तरकुरा, सव्वेवि णं णिसडणीलवंतवासहरपव्वया चत्तारि
जोयणसयाई उद्धं उच्चत्तेणं, चत्तारि गाउयसयाई उव्वेहेणं प० । जंबुद्वीवे
दीवे मंदरस्स पव्वयस्स पुरत्थिमेणं सीआए महाणईए उत्तरकूले चत्तारि वक्खा-
रपव्वया प० तं० चित्तकूडे पम्हकूडे गलिणकूडे एगसेले, जंबूमंदरपुरत्थिमेणं
सीआए महाणईए दाहिणकूले चत्तारि वक्खारपव्वया प० तं० तिकूडे वेसमणकूडे
अंजणे मायंजणे, जंबूमंदरस्स पच्चत्थिमेणं सीओआए महाणईए दाहिणकूले चत्तारि
वक्खारपव्वया प० तं० अंकावई पम्हावई आसीविसे सुहावहे । जंबूमंदरस्स
पच्चत्थिमेणं सीओआए महाणईए उत्तरकूले चत्तारि वक्खारपव्वया प० तं० चंद-
पव्वए सूरपव्वए देवपव्वए णागपव्वए, जंबुद्वीवे दीवे मंदरस्स पव्वयस्स चउसु
विदिसासु चत्तारि वक्खारपव्वया प० तं० सोमणसे विज्जुप्पमे गंधमायणे माल-
वंते, जंबुद्वीवे दीवे महाविदेहे वासे जहण्णपए चत्तारि अरिहंता, चत्तारि चक्रवट्टी,
चत्तारि बलदेवा, चत्तारि वासुदेवा, उप्पज्जिंस्स वा उप्पज्जंति वा उप्पज्जिस्संति
वा, जंबुद्वीवे दीवे मंदरे पव्वए चत्तारि वणा प० तं० भइसालवणे, णंदणवणे,
सोमणसवणे, पंडगवणे, जंबूमंदरपव्वयपंडगवणे चत्तारि अभिसेगसिलाओ प० तं०
पंडुकंबलसिला, अतिपंडुकंबलसिला, रत्तकंबलसिला, अइरत्तकंबलसिला, मंदरचूलि-
या णं उवरिं चत्तारि जोयणाई विक्खंभेणं पण्णत्ता, एवं धायइखंडदीवपुरच्छिमद्धेवि
कालं आई करित्ता जाव मंदरचूलियत्ति । एवं जाव पुक्खरवरदीवपच्चत्थिमद्धे जाव
मंदरचूलियत्ति, जंबूदीवगआवस्सगं तु कालाओ चूलिया जाव धायइखंडे पुक्खर-
वरे य पुव्वावरे पासे । जंबूदीवस्स णं दीवस्स चत्तारि दारा प० तं० विजये वेजयंतं
जयते अपराजिए, ते णं दारा चत्तारि जोयणाई विक्खंभेणं तावइयं चेव पवेसेणं
प० तत्थ णं चत्तारि देवा महिद्धिया जाव पलिओवमठिइया परिवसंति तं० विजए
वेजयंतं जयंतं अपराजिए ॥ ३७४ ॥ जंबुद्वीवे दीवे मंदरस्स पव्वयस्स दाहिणेणं
चुल्लिमवंतस्स वासहरपव्वयस्स चउसु विदिसासु लवणसमुदं तिण्णि तिण्णि जोयण-
सयाई ओगाहेत्ता एत्थणं चत्तारि अंतरदीवा प० तं० एगरुयदीवे ओभासिअदीवे
वेसाणियदीवे णंगोलियदीवे, तेसु णं दीवेसु चउव्विहा मणुस्सा परिवसंति, एगरूया

ओभासिया वेसाणिया णंगोलिया, तेसिं णं दीवाणं चउसु वि दिसासु लवणसमुद्धं चत्तारि चत्तारि जोयणसयाई ओगाहेत्ता एत्थं चत्तारि अंतरदीवा प० तं० हय-
 कण्णदीवे, गयकण्णदीवे गोकण्णदीवे सकुलिकण्णदीवे, तेसु णं दीवेसु चउव्विहा मणुस्सा परिवसंति तं० हयकण्णा गयकण्णा गोकण्णा सकुलिकण्णा, तेसिं णं दीवाणं
 चउसु विदिसासु लवणसमुद्धं पंच पंच जोयणसयाई ओगाहेत्ता एत्थं चत्तारि अंतर-
 दीवा प० तं० आयंसमुहदीवे मँडगमुहदीवे अओमुहदीवे गोमुहदीवे । तेसु णं दीवेसु चउव्विहा मणुस्सा भाणियव्वा, तेसिं णं दीवाणं चउसु विदिसासु लवणसमुद्धं छ
 छजोयणसयाई ओगाहेत्ता एत्थं चत्तारि अंतरदीवा प० तं० आसमुहदीवे हत्थि-
 मुहदीवे सीहमुहदीवे वग्धमुहदीवे, तेसु णं दीवेसु मणुस्सा भाणियव्वा तेसिं णं
 दीवाणं चउसु विदिसासु लवणसमुद्धं सत्तसत्तजोयणसयाई ओगाहिता एत्थं चत्तारि
 अंतरदीवा प० तं० आसकण्णदीवे हत्थिकण्णदीवे अकण्णदीवे कण्णपाउरणदीवे ।
 तेसु णं दीवेसु मणुस्सा भाणियव्वा । तेसिं णं दीवाणं चउसु विदिसासु लवणसमुद्धं
 अट्ठ अट्ठजोयणसयाई ओगाहिता एत्थं चत्तारि अंतरदीवा प० तं० उक्कामुहदीवे
 मेहमुहदीवे विज्जुमुहदीवे विज्जुदंतदीवे तेसु णं दीवेसु मणुस्सा भाणियव्वा । तेसिं णं
 दीवाणं चउसु विदिसासु लवणसमुद्धं णव णव जोयणसयाई ओगाहिता एत्थं चत्तारि
 अंतरदीवा प० तं० घणदंतदीवे लठ्ठदंतदीवे गूढदंतदीवे सुद्धदंतदीवे, तेसु णं दीवेसु
 चउव्विहा मणुस्सा परिवसंति तं० घणदंता लठ्ठदंता गूढदंता सुद्धदंता । जंबुदीवे
 दीवे मंदरस्स पव्वयस्स उत्तरेणं सिहरिस्स वासहरपव्वयस्स चउसु विदिसासु
 लवणसमुद्धं तिण्णि तिण्णि जोयणसयाई ओगाहिता एत्थं चत्तारि अंतरदीवा
 प० तं० एगळ्ळुदीवे सेसं तहेव निरवसेसं भाणियव्वं जाव सुद्धदंता ॥ ३७५ ॥
 जंबुदीवस्स णं दीवस्स बाहिरिळाओ वेइयंताओ चउद्दिंसि लवणसमुद्धं पंचाणउइजोयण-
 सहस्साई ओगाहेत्ता एत्थं महइमहालया महालिंजरसंठाणसंठिया चत्तारि महा-
 पायाला प० तं० वल्लयामुहे केउए जूवए ईसरे, तत्थं चत्तारि देवा महिंठिया जाव
 पलिओवमठिइया परिवसंति तं० काले महाकाले वेलंबे पभंजणे ॥ ३७६ ॥ जंबु-
 दीवस्स णं दीवस्स बाहिरिळाओ वेइयंताओ चउद्दिंसि लवणसमुद्धं बायालीसं २ जोयण-
 सहस्साई ओगाहिता एत्थं चउण्हं बेलंधरणागरायाणं चत्तारि आवासपव्वया
 प० तं० गोथूमे उदयभासे संखे दगसीमे, तत्थं चत्तारि देवा महिंठिया जाव परि-
 वसंति तं० गोथूमे सिवए जाव मणोसिलए । जंबुदीवस्स णं दीवस्स बाहिरिळाओ वेइय-
 न्ताओ चउसु विदिसासु लवणसमुद्धं बायालीसं २ जोयणसहस्साई ओगाहेत्ता एत्थं
 चउण्हं अणुवेलंधरणागराईणं चत्तारि आवासपव्वया प० तं० कक्कोडए विज्जुपभे

केलासे अरुणप्पमे । तत्थ णं चत्तारि महिद्धिया जाव पलिओवमठिईया देवा परिव-
संति तं० कक्कोडए कद्दमए केलासे अरुणप्पमे ॥ ३७७ ॥ लवणे णं समुद्दे चत्तारि चंदा
पभासिखु वा पभासंति वा पभासिस्संति वा, चत्तारि सरिया तविंसु वा तवंति वा तवि-
स्संति वा, चत्तारि कत्तियाओ जाव चत्तारि भरणीओ, चत्तारि अग्गी जाव चत्तारि
जमा, चत्तारि अंगारया जाव चत्तारि भावकेऊ ॥ ३७८ ॥ लवणस्स णं समुद्दस्स
चत्तारि दारा प० तं० विजए वेजयंते जयंते अपराजिए, ते णं दारा णं चत्तारि
जोयणाई विक्खंभेणं तावइयं चेव पवेसेणं पण्णत्ता, तत्थ णं चत्तारि देवा महिद्धिया
जाव पलिओवमठिईया परिवसंति विजए जाव अपराजिए ॥ ३७९ ॥ धायइखंडे णं
दीवे चत्तारि जोयणसयसहस्साई चक्कवालविक्खंभेणं प० ॥ ३८० ॥ जंबुद्वीवस्स णं
द्वीवस्स बहिया चत्तारि भरहाई चत्तारि एरवयाई, एवं जहा सदुद्देसए तहेव गिरव-
सेसं भाणियव्वं, जाव चत्तारि मंदरा चत्तारि मंदरचूलियाओ ॥ ३८१ ॥ णंदीस-
रवरस्स णं द्वीवस्स चक्कवालविक्खंभस्स बहुमज्झदेसभाए चउद्दिसिं चत्तारि
अंजणगपव्वया प० तं० पुरच्छिमिहे अंजणगपव्वए दाहिणिहे अंजणगपव्वए,
पच्चत्थिमिहे अंजणगपव्वए उत्तरिहे अंजणगपव्वए, ते णं अंजणगपव्वया चउरासीइ-
जोयणसहस्साई उड्डं उच्चतेणं एगं जोयणसहस्सं उव्वेहेणं मूले दसजोयणसहस्साई
विक्खंभेणं तदर्णतरं च णं मायाए मायाए परिहाएमाणा परिहाएमाणा उवरिमेणं
जोयणसहस्सं विक्खंभेणं प० मूले एकतीसं जोयणसहस्साई छच्चतेवीसे जोयणसए
परिक्खेवेणं उवरिं तिणिण २ जोयणसहस्साई एगं च छावठुं जोयणसयं परिक्खेवेणं
मूले विच्छिण्णा मज्झे संखित्ता उप्पि तणुया गोपुच्छसंठाणसंठिया सव्वअंजण-
मया अच्छा जाव पडिरूवा, तेसिणं अंजणगपव्वयाणं चउद्दिसिं चत्तारि २ णं-
दाओ पुक्खरणीओ प० तासिणं पोक्खरणीणं पत्तेयं पत्तेयं चउद्दिसिं चत्तारि वण-
खंडा प० तं० पुरच्छिमेणं दाहिणेणं पच्चत्थिमेणं उत्तरेणं, पुव्वेणं असोगवणं
दाहिणओ होति सत्तवणवणं, अवरेण चंपगवणं, अंबवणं उत्तरे पासे ॥ १ ॥
तत्थ णं जे से पुरच्छिमिहे अंजणगपव्वए तस्स णं चउद्दिसिं चत्तारि णंदापोक्खर-
णीओ पण्णत्ताओ तं० णंदा णंदुत्तरा आणंदा णंदिवद्धणा, तासिणं पोक्खरणीणं पत्तेयं
पत्तेयं चउद्दिसिं चत्तारि तिसोवाणपडिरूवगा प० तेसिणं तिसोवाणपडिरूवगाणं पुरओ
चत्तारि तोरणा प० पुरच्छिमेणं दाहिणेणं पच्चत्थिमेणं उत्तरेणं, तासिणं पोक्खर-
णीणं पत्तेयं पत्तेयं चउद्दिसिं चत्तारि वणखंडा प० तं० पुरओ दाहिणओ पच्चत्थिमेणं
उत्तरेणं, पुव्वेणं असोगवणं जाव अंबवणं उत्तरे पासे । तासिणं पुक्खरणीणं बहु-
मज्झदेसभाए चत्तारि दहिमुहगपव्वया प० ते णं दहिमुहगपव्वया चउसठ्ठिं जोयण-

सहस्साईं उड्डं उच्चतेणं एणं जोयणसहस्समुव्वेहेणं, सव्वत्थसमा पल्लगसंठाणसंठिया दसजोयणसहस्साईं विक्खंभेणं एकतीसं जोयणसहस्साईं छच्चतेवीसजोयणसए परिक्खेवेणं सव्वरयणामया अच्छा जाव पडिह्वा । सेसं जहेव अंजगगपव्वयाणं तहेव गिरवसेसं भाणियव्वं जाव अंजवणं उत्तरेपासे । तत्थ णं जे से दाहिणिमिळे अंजगगपव्वए तस्सणं चउदिसिं चत्तारि णंदाओ पुक्खरणीओ प० तं० भद्दा विसाला कुमुया पोंडरीगिणी । सेसं तं चेव जाव दहिमुहगपव्वया जाव वणखंडा । तत्थणं जे से पच्चत्थिमिळे अंजगगपव्वए तस्स णं चउदिसिं चत्तारि णंदाओ पोक्खरणीओ पण्णत्ताओ तं० णंदिसेणा अमोहा गोथूमा सुदंसणा, सेसं तं चेव, तहेव दहिमुहगपव्वया तहेव जाव वणखंडा । तत्थणं जे से उत्तरिळे अंजगगपव्वए तस्स णं चउदिसिं चत्तारि णंदाओ पोक्खरणीओ प० तं० विजया वेजयंती जयंती अपराजिया, तहेव दहिमुहगपव्वया, तहेव जाव वणखंडा । णंदीसरवरस्स णं दीवस्स चक्कवालविक्खंभस्स बहुमज्झदेसभाए चउसु विदिसासु चत्तारि रतिकरगपव्वया प० तं० उत्तरपुरच्छिमिळे रतिकरगपव्वए दाहिणपुरत्थिमिळे रतिकरगपव्वए दाहिणपच्चत्थिमिळे रतिकरगपव्वए उत्तरपच्चत्थिमिळे रतिकरगपव्वए, ते णं रतिकरगपव्वया दसजोयणसयाईं उड्डं उच्चतेणं दसगाउयसयाईं उव्वेहेणं, सव्वत्थसमा झल्लरिसंठाणसंठिया, दसजोयणसहस्साईं विक्खंभेणं, एकतीसं जोयणसहस्साईं छच्चतेवीसे जोयणसए परिक्खेवेणं, सव्वरयणामया अच्छा जाव पडिह्वा । तत्थ णं जे से उत्तरपुरच्छिमिळे रतिकरगपव्वए तस्सणं चउदिसिमीसाणस्स देविंदस्स देवरणो चउण्हमग्गमहिसीणं जंबुद्दीवप्पमाणमेत्ताओ चत्तारि रायहाणीओ पण्णत्ताओ तं० णंदोत्तरा णंदा उत्तरकुरा देवकुरा । कण्हाए कण्हराईए कामाए कामरक्खियाए, तत्थ णं जे से दाहिणपुरच्छिमिळे रतिकरगपव्वए तस्सणं चउदिसिं सक्कस्स देविंदस्स देवरणो चउण्हमग्गमहिसीणं जंबुद्दीवप्पमाणाओ चत्तारि रायहाणीओ प० तं० सुमणा सोमणसा अच्चिमाली मणोरमा । पउमाए सिवाए सईए अंजुए । तत्थणं जे से दाहिणपच्चत्थिमिळे रतिकरगपव्वए तस्सणं चउदिसिं सक्कस्स देविंदस्स देवरणो चउण्हमग्गमहिसीणं जंबुद्दीवप्पमाणमेत्ताओ चत्तारि रायहाणीओ प० तं० भूया भूयवडिंसा गोथूमा सुदंसणा । अमलाए अच्छराए नवमियाए रोहिणीए । तत्थ णं जे से उत्तरपच्चत्थिमिळे रतिकरगपव्वए तस्सणं चउदिसिमीसाणस्स चउण्हमग्गमहिसीणं जंबुद्दीवप्पमाणमेत्ताओ चत्तारि रायहाणीओ प० तं० रयणा रयणोच्चया सव्वरयणा रयणसंचया । वसूए वसुगुत्ताए वसुमिताए वसुंधराए ॥ ३८२ ॥ चउव्विहे सच्चे प० तं० णामसच्चे ठवणसच्चे दव्वसच्चे भावसच्चे ॥ ३८३ ॥ आजी-

वियाणं चउव्विहे तवे प० तं० उगगतवे घोरतवे रसनिज्जुहणया जिब्भिदियपडि-
सेलीणया ॥ ३८४ ॥ चउव्विहे संजमे प० तं० मणसंजमे वइसंजमे कायसंजमे
उवगरणसंजमे । चउव्विहे चियाए प० तं० मणचियाए वइचियाए कायचियाए
उवगरणचियाए, चउव्विहा अकिंचणया प० तं० मणअकिंचणया वइअकिंचणया
कायअकिंचणया उवगरणअकिंचणया ॥ ३८५ ॥ चउत्थहाणस्स बीओ-
हेसो समत्तो ॥

चत्तारि राईओ प० तं० पव्वयराई पुढविराई वालयराई उदगराई । एवामेव
चउव्विहे कोहे प० तं० पव्वयराइसमाणे पुढविराइसमाणे वालयराइसमाणे उदग-
राइसमाणे । पव्वयराइसमाणं कोहमणुपविट्ठे जीवे कालं करेइ गेरइएसु उववज्जइ,
पुढविराइसमाणं कोहमणुपविट्ठे जीवे कालं करेइ तिरिक्खजोणिएसु उववज्जइ, वाल-
यराइसमाणं कोहमणुपविट्ठे जीवे कालं करेइ मणुस्सेसु उववज्जइ, उदगराइसमाणं
कोहमणुपविट्ठे जीवे कालं करेइ देवेषु उववज्जइ, चत्तारि उदगा प० तं० कइमोदए
खंजणोदए वालुओदए सेलोदए, एवामेव चउव्विहे भावे प० तं० कइमोदगसमाणे
खंजणोदगसमाणे वालुओदगसमाणे सेलोदगसमाणे । कइमोदगसमाणं भावमणुपविट्ठे
जीवे कालं करेइ गेरइएसु उववज्जइ एवं जाव सेलोदगसमाणं भावमणुपविट्ठे जीवे
कालं करेइ देवेषु उववज्जइ ॥ ३८६ ॥ चत्तारि पक्खी प० तं० रुयसंपन्ने णाममेगे
णो रुवसंपन्ने, रुवसंपन्ने णाममेगे णो रुयसंपन्ने, एगे रुयसंपन्ने वि रुवसंपन्ने वि,
एगे णो रुयसंपन्ने णो रुवसंपन्ने, एवामेव चत्तारि पुरिसजाया प० तं० रुयसंपन्ने
णाममेगे णो रुवसंपन्ने ४ ॥ ३८७ ॥ चत्तारि पुरिसजाया प० तं० पत्तियं करेमिति
एगे पत्तियं करेइ, पत्तियं करेमिति एगे अपत्तियं करेइ, अपत्तियं करेमिति एगे
पत्तियं करेइ, अपत्तियं करेमिति एगे अपत्तियं करेइ, चत्तारि पुरिसजाया प० तं०
अप्पणो णाममेगे पत्तियं करेइ णो परस्स, परस्स णाममेगे पत्तियं करेइ णो अप्पणो
४ । चत्तारि पुरिसजाया प० तं० पत्तियं पवेसामिति एगे पत्तियं पवेसेइ, पत्तियं
पवेसामिति एगे अपत्तियं पवेसेइ, अपत्तियं पवेसामिति एगे पत्तियं पवेसेइ, अप-
त्तियं पवेसामिति एगे अपत्तियं पवेसेइ, चत्तारि पुरिसजाया प० तं० अप्पणो णाम-
मेगे पत्तियं पवेसेइ णो परस्स ४ ॥ ३८८ ॥ चत्तारि स्क्खा प० तं० पत्तोवए
पुप्फोवए फलोवए छायोवए, एवामेव चत्तारि पुरिसजाया प० तं० पत्तो वा स्क्ख-
समाणे पुप्फो वा स्क्खसमाणे फलो वा स्क्खसमाणे छायो वा स्क्खसमाणे
॥ ३८९ ॥ भारं णं वहमाणस्स चत्तारि आसासा प० तं० जत्थ णं अंसाओ अंसं
साहरइ तत्थ वि य से एगे आसासे पणत्ते, जत्थ वि य णं उच्चारं वा पांसवणं

वा परिठावेति तत्थ वि य से एगे आसासे प० जत्थ वि य णं पागकुमारावासंस्ति
 वा सुवन्नकुमारावासंस्ति वा वासं उवेइ तत्थ वि य से एगे आसासे प० जत्थ वि
 य णं आवकहाए चिट्ठइ जाव आसासे प०, एवामेव समणोवासगस्स चत्तारि
 आसासा प० तं० जत्थ वि य णं सीलव्वयगुणव्वयवेरमणपच्चक्खाणपोसहोववा-
 साइं पडिवज्जइ तत्थ वि य से एगे आसासे प०, जत्थ वि य णं सामाइयं देसा-
 वगासियं सम्ममणुपालेइ तत्थ वि य से एगे आसासे प०, जत्थ वि य णं चाउइसट्ठमु-
 द्दिट्ठपुणिमसिणीसु पडिपुण्णं पोसहं सम्मं अणुपालेइ तत्थ वि य से एगे आसासे
 प०, जत्थ वि य णं अपच्छिममारणंतियसंखेहणाजूसणाजूसिए भत्तपाणपडिय-
 इक्खिए पाओवगए कालमणवकंखमाणे विहरइ तत्थ वि य से एगे आसासे प०
 ॥ ३९० ॥ चत्तारि पुरिसजाया प० तं० उदिओदिए णाममेगे, उदियत्थमिए
 णाममेगे, अत्थमिओदिए णाममेगे, अत्थमियत्थमिए णाममेगे । भरहे राया
 चाउरंतचक्कवट्ठी णं उदिओदिए, बंभदत्ते णं राया चाउरंतचक्कवट्ठी उदियत्थमिए,
 हरिएसबलेणमणगारे अत्थमिओदिए, काले णं सोयरिए अत्थमियत्थमिए ॥ ३९१ ॥
 चत्तारि जुंसा प० तं० कडजुम्मे तेयोए दावरजुम्मे कलिओए, णेरइयाणं चत्तारि
 जुंसा प० तं० कडजुंमे जाव कलिओए, एवमसुरकुमारारणं जाव थणियकुमारारणं,
 एवं पुढविकाइयाणं आउतेउवाउवणस्सइबेंदियाणं तेइदियाणं चउरिंदियाणं पंछि-
 दियतिरिक्खजोणियाणं मणुस्साणं वाणमंतरजोइसियाणं वेमाणियाणं सव्वेसिं जहा
 नेरइयाणं ॥ ३९२ ॥ चत्तारि सूरा प० तं० खंतिसूरे तवसूरे दाणसूरे जुद्धसूरे,
 खंतिसूरा अरिहंता तवसूरा अणगारा; दाणसूरे वेसमणे जुद्धसूरे वासुदेवे ॥ ३९३ ॥
 चत्तारि पुरिसजाया प० तं० उच्चे णाममेगे उच्चच्छंदे उच्चे णाममेगे णीयच्छंदे णीए
 णाममेगे उच्चच्छंदे णीए णाममेगे णीयच्छंदे ॥ ३९४ ॥ असुरकुमारारणं चत्तारि
 लेस्सा प० तं० कण्हलेस्सा णीललेस्सा काउलेस्सा तेउलेस्सा, एवं जाव थणिय-
 कुमारारणं एवं पुढविकाइयाणं आउवणस्सइकाइयाणं वाणमंतरारणं सव्वेसिं जहा
 असुरकुमारारणं ॥ ३९५ ॥ चत्तारि जाणा प० तं० जुत्ते णाममेगे जुत्ते जुत्ते णाममेगे
 अजुत्ते अजुत्ते णाममेगे जुत्ते अजुत्ते णाममेगे अजुत्ते, एवामेव चत्तारि पुरिसजाया
 प० तं० जुत्ते णाममेगे जुत्ते ४ । चत्तारि जाणा प० तं० जुत्ते णाममेगे जुत्तपरिणए,
 जुत्ते णाममेगे अजुत्तपरिणए ४ । एवामेव चत्तारि पुरिसजाया प० तं० जुत्ते णाममेगे
 जुत्तपरिणए ४ । चत्तारि जाणा प० तं० जुत्ते णाममेगे जुत्तरुवे जुत्ते णाममेगे
 अजुत्तरुवे ४ । एवामेव चत्तारि पुरिसजाया प० तं० जुत्ते णाममेगे जुत्तरुवे ४ ।
 चत्तारि जाणा प० तं० जुत्ते णाममेगे जुत्तसोभे ४ । एवामेव चत्तारि पुरिसजाया

प० तं० जुत्ते णाममेगे जुत्तसोभे ४ । चत्तारि जुग्गा प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते णाममेगे जुत्ते ४ । एवं जहा जाणेण चत्तारि आलावगा तहा जुग्गेणवि पडिवक्खो तहेव पुरिसजाया जाव सोभेत्ति, चत्तारि सारही प० तं० जोआवइत्ता णाममेगे णो विजोयावइत्ता, विजोयावइत्ता णाममेगे णो जोयावइत्ता, एगे जोयावइत्तावि विजोयावइत्तावि, एगे णो जोयावइत्ता णो विजोयावइत्ता, एवामेव चत्तारि पुरिसजाया, चत्तारि हया प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते णाममेगे जुत्ते ४ । एवं जुत्तपरिणए जुत्तरुवे जुत्तसोभे सव्वेसि पडिवक्खो पुरिसजाया । चत्तारि गया प० तं० जुत्ते णाममेगे जुत्ते ४ । एवामेव चत्तारि पुरिसजाया प० तं० जुत्ते णाममेगे जुत्ते ४ । एवं जहा हयाणं तहा गयाणवि भाणियव्वं । पडिवक्खो तहेव पुरिसजाया, चत्तारि जुग्गारिया प० तं० पंथजाई णाममेगे णो उप्पहजाई उप्पहजाई णाममेगे णो पंथजाई एगे पंथजाई वि उप्पहजाई वि एगे णो पंथजाई णो उप्पहजाई । एवामेव चत्तारि पुरिसजाया ४ ॥ ३९६ ॥ चत्तारि पुप्फा प० तं० रुवसंपन्ने णाममेगे णो गंधसंपन्ने गंधसंपन्ने णाममेगे णो रुवसंपन्ने एगे रुवसंपन्नेवि गंधसंपन्नेवि एगे णो रुवसंपन्ने णो गंधसंपन्ने । एवामेव चत्तारि पुरिसजाया प० तं० रुवसंपन्ने णाममेगे णो सीलसंपन्ने ४ ॥ ३९७ ॥ चत्तारि पुरिसजाया प० तं० जाइसंपन्ने णाममेगे णो कुलसंपन्ने कुलसंपन्ने णाममेगे णो जाइसंपन्ने ४ । चत्तारि पुरिसजाया प० तं० जाइसंपन्ने णाममेगे णो बलसंपन्ने बलसंपन्ने णाममेगे णो जाइसंपन्ने ४ । एवं जाईए रुवेण य चत्तारि आलावगा, एवं जाईए सुएण य ४ । एवं जाईए सीलेण ४ एवं जाईए चरित्तेण ४ । एवं कुलेण बलेण ४ । कुलेण रुवेण ४ । कुलेण सुएण ४ । कुलेण सीलेण ४ । कुलेण चरित्तेण ४ । चत्तारि पुरिसजाया प० तं० बलसंपन्ने णाममेगे णो रुवसंपन्ने ४ । एवं बलेण सुएण ४ । एवं बलेण सीलेण ४ । एवं बलेण चरित्तेण ४ । चत्तारि पुरिसजाया प० तं० रुवसंपन्ने णाममेगे णो सुयसंपन्ने ४ । एवं रुवेण सीलेण ४ । रुवेण चरित्तेण ४ । चत्तारि पुरिसजाया प० तं० सुयसंपन्ने णाममेगे णो सीलसंपन्ने ४ । एवं सुएण चरित्तेण य ४ । चत्तारि पुरिसजाया प० तं० सीलसंपन्ने णाममेगे णो चरित्तसंपन्ने ४ । एए इक्कवीसं भंगा भाणियव्वा ॥ ३९८ ॥ चत्तारि फला प० तं० आमलगमहुरे मुदियामहुरे खीरमहुरे खंडमहुरे, एवामेव चत्तारि आयरिया प० तं० आमलगमहुरफलसमाणे जाव खंडमहुरफलसमाणे ॥ ३९९ ॥ चत्तारि पुरिसजाया प० तं० आयवेयावच्चकरे णाममेगे णो परवेयावच्चकरे ४ । चत्तारि पुरिसजाया प० तं०

કરેહ્ નામમેગે વૈયાવચ્ચં નો પઢિચ્છહ્ પઢિચ્છહ્ નામમેગે વૈયાવચ્ચં નો કરેહ્ ૪ ।
 ॥ ૪૦૦ ॥ ચત્તારિ પુરિસજાયા પ૦ તં૦ અટ્ટકરે નામમેગે નો માણકરે માણકરે
 નામમેગે નો અટ્ટકરે, એગે અટ્ટકરેવિ માણકરેવિ એગે નો અટ્ટકરે નો માણકરે,
 ચત્તારિ પુરિસજાયા પ૦ તં૦ ગણટ્ટકરે નામમેગે નો માણકરે ૪, ચ૦ પુ૦ જા૦
 પ૦ તં૦ ગણસંગહકરે નામમેગે નો માણકરે ૪ । ચત્તારિ પુરિસજાયા પ૦ તં૦
 ગણસોભકરે નામમેગે નો માણકરે ૪ । ચત્તારિ પુરિસજાયા પ૦ તં૦ ગણસોહિકરે
 નામમેગે નો માણકરે ૪ ॥ ૪૦૧ ॥ ચત્તારિ પુરિસજાયા પ૦ તં૦ રૂવં નામમેગે
 જહ્હ નો ધમ્મં ધમ્મં નામમેગે જહ્હ નો રૂવં એગે રૂવંપિ જહ્હ ધમ્મંપિ જહ્હ,
 એગે નો રૂવં જહ્હ નો ધમ્મં, ચત્તારિ પુરિસજાયા પ૦ તં૦ ધમ્મં નામમેગે
 જહ્હ નો ગણસંઠિઈ ૪ । ચત્તારિ પુરિસજાયા પ૦ તં૦ પિયધમ્મે નામમેગે નો
 દઢધમ્મે દઢધમ્મે નામમેગે નો પિયધમ્મે, એગે પિયધમ્મેવિ દઢધમ્મેવિ એગે નો
 પિયધમ્મે નો દઢધમ્મે ॥ ૪૦૨ ॥ ચત્તારિ આયરિયા પ૦ તં૦ પવ્વાવળાયરિ
 નામમેગે નો ઉવટ્ટાવળાયરિ ઉવટ્ટાવળાયરિ નામમેગે નો પવ્વાવળાયરિ, એગે
 પવ્વાવળાયરિવિ ઉવટ્ટાવળાયરિવિ, એગે નો પવ્વાવળાયરિ નો ઉવટ્ટાવળાય-
 રિ, ચત્તારિ આયરિયા પ૦ તં૦ ઉદ્દેસળાયરિ નામમેગે નો વાયળાયરિ ૪
 ધમ્માયરિ સમ્મત્તપ્પો ણાયવ્વો ॥ ૪૦૩ ॥ ચત્તારિ અંતેવાસી પ૦ તં૦ પવ્વા-
 વળંતેવાસી નામમેગે નો ઉવટ્ટાવળંતેવાસી ૪ જાવ ધમ્મંતેવાસી, ચત્તારિ અંતેવાસી
 પ૦ તં૦ ઉદ્દેસળંતેવાસી નામમેગે નો વાયળંતેવાસી ૪ ॥ ૪૦૪ ॥ ચત્તારિ ણિગંથા
 પ૦ તં૦ રાયણિ સમણે નિગંથે મહાકમ્મે મહાકિરિ અળાયાવી અસમિ ધમ્મસ્સ
 અળારાહુ ભવહ, રાયણિ સમણે નિગંથે અપ્પકમ્મે અપ્પકિરિ આયાવી સમિ
 ધમ્મસ્સ આરાહુ ભવહ, ઓમરાહિણિ સમણે નિગંથે મહાકમ્મે મહાકિરિ અળા-
 યાવી અસમિ ધમ્મસ્સ અળારાહુ ભવહ, ઓમરાહિણિ સમણે નિગંથે અપ્પકમ્મે
 અપ્પકિરિ આયાવી સમિ ધમ્મસ્સ આરાહુ ભવહ, ચત્તારિ નિગંથીઓ પ૦ તં૦
 રાહિણિયા સમણી નિગંથી ૪ એવં ચેવ, ચત્તારિ સમણોવાસગા પ૦ તં૦ રાયણિ
 સમણોવાસે મહાકમ્મે ૪ તહેવ, ચત્તારિ સમણોવાસિયાઓ પ૦ તં૦ રાયણિયા સમ-
 ણોવાસિયા મહાકમ્મા તહેવ ચત્તારિ ગમા ॥ ૪૦૫ ॥ ચત્તારિ સમણોવાસગા પ૦
 તં૦ અમ્માપિહસમાણે ભાહસમાણે સિત્તસમાણે સવત્તિસમાણે । ચત્તારિ સમણોવા-
 સગા પ૦ તં૦ અદ્દાગસમાણે પઢાગસમાણે ક્ખાણુસમાણે ચરકંટકસમાણે ॥ ૪૦૬ ॥
 સમણસ્સ ણં ભગવઓ મહાવીરસ્સ સમણોવાસગાણં સોહમ્મે કપ્પે અરુણામે વિમાણે
 ચત્તારિ પલ્લિઓવમાઈ ઠિઈ પ૦ ॥ ૪૦૭ ॥ ચઉહિ ઠાળેહિ અહુણોવવન્ને દેવે દેવલોગેહુ

इच्छेज्जा माणुसं लोगं हव्वमागच्छित्तए णो चेव णं संचाएइ हव्वमागच्छित्तए तं०
 अहुणोववन्ने देवे देवलोगेसु दिव्वेसु कामभोगेसु मुच्छिए गिद्धे गडिए अज्झोववन्ने
 से णं माणुस्सए कामभोगे णो आढाइ णो परियाणाइ णो अट्ठं बंधइ णो णियाणं
 पगरेइ, णो ठिइप्पगपं पगरेइ, अहुणोववन्ने देवे देवलोगेसु दिव्वेसु कामभोगेसु
 मुच्छिए ४ तस्स णं माणुस्सए पेमे वोच्छिण्णे दिव्वे पेमे संकंते भवइ, अहुणोववन्ने
 देवे देवलोएसु दिव्वेसु कामभोगेसु मुच्छिए ४ तस्स णं एवं भवइ, इयण्हि गच्छं
 सुहुत्तेण गच्छं तेणं कालेणमप्पाउआ मणुस्सा कालधम्मणा संजुत्ता भवंति, अहुणोव-
 वन्ने देवे देवलोएसु दिव्वेसु कामभोगेसु मुच्छिए ४ तस्स णं माणुस्सए गंधे पडिक्खे
 पडिलोमे यावि भवइ, उद्धं पिय णं माणुस्सए गंधे जाव चत्तारिपंचजोयणसयाइं
 हव्वमागच्छइ ४ इच्चेएहिं चउहिं ठाणेहिं अहुणोववन्ने देवे देवलोएसु इच्छेज्जा
 माणुसं लोगं हव्वमागच्छित्तए णो चेव णं संचाएइ हव्वमागच्छित्तए ॥४०८॥ चउहिं
 ठाणेहिं अहुणोववन्ने देवे देवलोएसु इच्छेज्जा माणुसं लोगं हव्वमागच्छित्तए संचा-
 एइ हव्वमागच्छित्तए तं० अहुणोववन्ने देवे देवलोगेसु दिव्वेसु कामभोगेसु अमु-
 च्छिए जाव अणज्झोववन्ने तस्स णं एवं भवइ अत्थि खलु मम माणुस्सए भवे
 आयरिएइ वा उवज्झाएइ वा पवत्तीइ वा थेरेइ वा गणीइ वा गणहरेइ वा गणा-
 वच्छेएइ वा जेसिं पमावेण मए इमा एयारुवा दिव्वा देविद्धी दिव्वा देवजुइं लद्धा
 पत्ता अभिसमण्णागया तं गच्छामि णं ते भगवंते वंदामि जाव पज्जुवासामि, अहु-
 णोववन्ने देवे देवलोएसु जाव अणज्झोववन्ने तस्स णं एवं भवइ एस णं माणुस्सए
 भवे णाणीइ वा तवस्सीइ वा अइदुक्करदुक्करकारए तं गच्छामि णं भगवन्तं वंदामि
 जाव पज्जुवासामि, अहुणोववन्ने देवे जाव अणज्झोववन्ने तस्स णं एवं भवइ अत्थि णं
 मम माणुस्सए भवे मायाइ वा जाव सुण्हाइ वा तं गच्छामि णं तेसिमतियं पाउब्भवामि
 पासंतु ता मे इममेयारुवं दिव्वं देविद्धिं दिव्वं देवजुइं लद्धं पतं अभिसमण्णागयं,
 अहुणोववन्ने देवे देवलोएसु जाव अणज्झोववन्ने तस्स णं एवं भवइ अत्थि णं मम
 माणुस्सए भवे सित्तेइ वा सुहीइ वा सहीइ वा सहाएइ वा संगइए वा तेसिं च णं
 अम्हे अण्णमण्णस्स संगारे पडिसुए भवइ, जो मे पुव्वि चयइ से संबोहियव्वे इच्चे-
 एहिं जाव संचाएइ हव्वमागच्छित्तए ॥ ४०९ ॥ चउहिं ठाणेहिं लोगंधगारे सिया
 तं० अरिहंतेहिं वोच्छिज्जमाणेहिं, अरिहंतपण्णत्ते धम्मे वोच्छिज्जमाणे पुव्वगए
 वोच्छिज्जमाणे जायतेए वोच्छिज्जमाणे, चउहिं ठाणेहिं लोउज्जोए सिया तं० अरिहंतेहिं
 जायमाणेहिं, अरिहंतेहिं पव्वयमाणेहिं, अरिहंताणं णाणुप्पायमहिमासु, अरिहंताणं
 परिनिव्वाणमहिमासु, एवं देवंधगारे देवजुए देवसत्तिवाए देवुकलिया देवकहकहए,

चउहिं ठाणेहिं देविंदा माणुसं लोगं हव्वमागच्छंति, एवं जहा तिठाणे जाव लोगं-
 तिया देवा माणुस्सं लोगं हव्वमागच्छेज्जा तं० अरिहंतेहिं जायमाणेहिं जाव अरिहं-
 ताणं परिनिव्वाणमहिमासु ॥ ४१० ॥ चत्तारि दुहसेज्जाओ प० तं० तत्थ खलु
 इमा पढमा दुहसेज्जा से णं मुंडे भवित्ता अगाराओ अणगारियं पव्वइए निगंथे
 पावयणे संकिए कंखिए वितिगिच्छिए भेयसमावण्णे कलुससमावण्णे निगंथं पावयणं
 णो सद्वहइ णो पत्तियइ णो रोएइ, निगंथं पावयणं असद्वहमाणे अपत्तियमाणे अरोए-
 माणे मणं उच्चावयं नियच्छइ विणिघायमावज्जइ पढमा दुहसेज्जा, अहावरा दोच्चा
 दुहसेज्जा से णं मुंडे भवित्ता अगाराओ अणगारियं पव्वइए सएणं लाभेणं णो
 तुस्सइ परस्स लाभमासाएइ पीहेइ पत्थेइ अभिलसइ परस्स लाभमासाएमाणे
 जाव अभिलसमाणे मणं उच्चावयं नियच्छइ विणिघायमावज्जइ दोच्चा दुहसेज्जा,
 अहावरा तच्चा दुहसेज्जा, से णं मुंडे भवित्ता अगाराओ अणगारियं पव्वइए
 दिव्वे माणुस्सए कामभोगे आसाएइ जाव अभिलसइ दिव्वे माणुस्सए कामभोगे
 आसाएमाणे जाव अभिलसमाणे मणं उच्चावयं नियच्छइ, विणिघायमावज्जइ तच्चा
 दुहसेज्जा, अहावरा चउत्था दुहसेज्जा से णं मुंडे भवित्ता जाव पव्वइए तस्स
 णमेवं भवइ जया णं अहमगारवासमावसांमि तया णमहं संवाहणपरिमद्वृणायव्भंग-
 गाउच्छोलणाइं लभामि जप्पभिइं च णं अहं मुंडे भवित्ता जाव पव्वइए तप्पभिइं-
 च णं अहं संवाहणं जाव गाउच्छोलणाइं णो लभामि से णं संवाहणं जाव गाउ-
 च्छोलणाइं आसाएइ जाव अभिलसइ से णं संवाहणं जाव गाउच्छोलणाइं आसाए-
 माणे जाव मणं उच्चावयं नियच्छइ विणिघायमावज्जइ चउत्था दुहसेज्जा ॥ ४११ ॥
 चत्तारि सुहसेज्जाओ प० तं० तत्थ खलु इमा पढमा सुहसेज्जा से णं मुंडे
 भवित्ता अगाराओ अणगारियं पव्वइए निगंथे पावयणे णिस्संकिए णिक्खिए,
 णिव्वितिगिच्छिए, णो भेयसमावण्णे णो कलुससमावण्णे निगंथं पावयणं सद्वहइ
 पत्तियइ रोएइ निगंथं पावयणं सद्वहमाणे पत्तियमाणे रोएमाणे णो मणं उच्चावयं
 नियच्छइ, णो विणिघायमावज्जइ पढमा सुहसेज्जा, अहावरा दोच्चा सुहसेज्जा से
 णं मुंडे भवित्ता जाव पव्वइए सएणं लाभेणं तुस्सइ, परस्स लाभं णो आसाएइ, णो
 पीहेइ, णो पत्थेइ, णो अभिलसइ, परस्स लाभमणासाएमाणे जाव अणभिलसमाणे
 णो मणं उच्चावयं नियच्छइ, णो विणिघायमावज्जइ, दोच्चा सुहसेज्जा, अहावरा
 तच्चा सुहसेज्जा, से णं मुंडे भवित्ता जाव पव्वइए दिव्वमाणुस्सए कामभोगे णो
 आसाएइ जाव णो अभिलसइ, दिव्वमाणुस्सए कामभोगे अणासाएमाणे जाव अण-
 भिलसमाणे णो मणं उच्चावयं नियच्छइ णो विणिघायमावज्जइ, तच्चा सुहसेज्जा,

अहावरा चउत्था सुहसेज्जा, से णं मुंडे भवित्ता जाव पव्वइए तस्स णमेवं
भवइ जइ ताव अरिहंता भगवंता दृष्टा आरोग्गा बलिया कल्लसरीरा अन्नयराई
ओरालाई कल्लाणाई विउलाई पयत्ताई पग्गहियाई महाणुभागाई कम्मक्खयकारणाई
तवोकम्माई पडिक्कंति किमंगपुण अहं अब्भोवगमिओवक्कमियं वेयणं णो सम्मं
सहामि खमामि तित्तिक्खेमि अहियासेमि ममं च णं अब्भोवगमिओवक्कमियं सम्मम-
सहमाणस्स अखममाणस्स अतित्तिक्खमाणस्स अणहियासेमाणस्स किंमण्णे कज्जइ ?
एगंतसो मे पावे कम्मे कज्जइ ममं च णं अब्भोवगमिओ जाव सम्मं सहमाणस्स
जाव अहियासेमाणस्स किंमण्णे कज्जइ ? एगंतसो मे णिजरा कज्जइ, चउत्था सुह-
सेज्जा ॥ ४१२ ॥ चत्तारि अवायणिज्जा प० तं० अविणीए, विगईपडिबढे,
अविओसवियपाहुडे, मायी, चत्तारि वायणिज्जा प० तं० विणीए, अविगईपडिबढे,
विओसवियपाहुडे, अमायी ॥ ४१३ ॥ चत्तारि पुरिसजाया प० तं० आर्यभरे
णाममेगे णो परंभरे, परंभरे णाममेगे णो आर्यभरे, एगे आर्यभरेवि परंभरेवि,
एगे णो आर्यभरे णो परंभरे ॥ ४१४ ॥ चत्तारि पुरिसजाया प० तं० दुग्गए णाम-
मेगे दुग्गए, दुग्गए णाममेगे सुग्गए, सुग्गए णाममेगे दुग्गए, सुग्गए णाममेगे
सुग्गए, चत्तारि पुरिसजाया प० तं० दुग्गए णाममेगे दुव्वए, दुग्गए णाममेगे
सुव्वए, सुग्गए णाममेगे दुव्वए, सुग्गए णाममेगे सुव्वए, चत्तारि पुरिसजाया प०
तं० दुग्गए णाममेगे दुप्पडियाणंदे, दुग्गए णाममेगे सुप्पडियाणंदे ४ । चत्तारि
पुरिसजाया प० तं० दुग्गए णाममेगे दुग्गइगामी, दुग्गए णाममेगे सुगइगामी ४ ।
चत्तारि पुरिसजाया प० तं० दुग्गए णाममेगे दुग्गइं गए, दुग्गए णाममेगे सुगइं गए
॥ ४१५ ॥ चत्तारि पुरिसजाया प० तं० तमे णाममेगे तमे, तमे णाममेगे जोई,
जोई णाममेगे तमे, जोई णाममेगे जोई, चत्तारि पुरिसजाया प० तं० तमे णाममेगे
तमबले, तमे णाममेगे जोईबले, जोई णाममेगे तमबले, जोई णाममेगे जोईबले, चत्तारि
पुरिसजाया प० तं० तमे णाममेगे तमबलपलज्जणे, तमे णाममेगे जोईबलपलज्जणे,
४ ॥ ४१६ ॥ चत्तारि पुरिसजाया प० तं० परिण्णायकम्मे णाममेगे णो परिण्णायसण्णे,
परिण्णायसण्णे णाममेगे णो परिण्णायकम्मे, एगे परिण्णायकम्मेवि परिण्णायसण्णेवि,
एगे णो परिण्णायकम्मे णो परिण्णायसण्णे, चत्तारि पुरिसजाया प० तं० परिण्णाय-
कम्मे णाममेगे णो परिण्णायगिहावासे, परिण्णायगिहावासे णाममेगे णो परिण्णाय-
कम्मे ४ । चत्तारि पुरिसजाया प० तं० परिण्णायसण्णे णाममेगे णो परिण्णाय-
गिहावासे परिण्णायगिहावासे णाममेगे णो परिण्णायसण्णे ४ ॥ ४१७ ॥ चत्तारि
पुरिसजाया प० तं० इहत्थे णाममेगे णो परत्थे परत्थे णाममेगे णो इहत्थे ४ । चत्तारि

पुरिसजाया प० तं० एगेणं णाममेगे वड्डइ एगेणं हायइ, एगेणं णाममेगे वड्डइ दोहिं हायइ, दोहिं णाममेगे वड्डइ एगेणं हायइ, दोहिं णाममेगे वड्डइ दोहिं हायइ ॥ ४१८ ॥ चत्तारि कंथका प० तं० आइजे णाममेगे आइजे, आइजे णाममेगे खलुंके, खलुंके णाममेगे आइजे, खलुंके णाममेगे खलुंके, एवामेव चत्तारि पुरिसजाया प० तं० आइजे णाममेगे आइजे, चउभंगो । चत्तारि कंथका प० तं० आइजे णाममेगे आइजेत्ताए विहरइ, आइजे णाममेगे खलुंकत्ताए विहरइ ४ । एवामेव चत्तारि पुरिसजाया प० तं० आइजे णाममेगे आइजेत्ताए विहरइ, चउभंगो । चत्तारि पकंथका प० तं० जाइसंपजे णाममेगे णो कुलसंपजे ४ । एवामेव चत्तारि पुरिसजाया प० तं० जाइसंपजे णाममेगे चउभंगो । चत्तारि कंथगा प० तं० जाइसंपजे णाममेगे णो बलसंपजे ४ । एवामेव चत्तारि पुरिसजाया प० तं० जाइसंपजे णाममेगे नो बलसंपजे ४ । चत्तारि कंथगा प० तं० जाइसंपजे णाममेगे णो रुवसंपजे ४ । एवामेव चत्तारि पुरिसजाया प० तं० जाइसंपजे णाममेगे णो रुवसंपजे ४ । चत्तारि कंथगा प० तं० जाइसंपजे णाममेगे णो जयसंपजे ४ । एवामेव चत्तारि पुरिसजाया प० तं० जाइसंपजे ४ । एवं कुलसंपजेण य बलसंपजेण य ४ । कुलसंपजेण य रुवसंपजेण य ४ । कुलसंपजेण य जयसंपजेण य ४ । एवं बलसंपजेण य रुवसंपजेण य ४ । बलसंपजेण य जयसंपजेण य ४ । सव्वत्थ पुरिसजाया पडिवक्खो, चत्तारि कंथगा प० तं० रुवसंपजे णाममेगे णो जयसंपजे ४ । एवामेव चत्तारि पुरिस० ॥ ४१९ ॥ चत्तारि पुरिसजाया प० तं० सीहत्ताए णाममेगे णिक्खंते सीहत्ताए विहरइ, सीहत्ताए णाममेगे णिक्खंते सियालत्ताए विहरइ, सियालत्ताए णाममेगे णिक्खंते सीहत्ताए विहरइ, सियालत्ताए णाममेगे णिक्खंते सियालत्ताए विहरइ ॥ ४२० ॥ चत्तारि लोगे समा प० तं० अपइट्ठाणे णरए, जंबुद्दीवे दीवे, पालए जाणविमाणे, सव्वट्ठसिद्धे महाविमाणे, चत्तारि लोगे समा, सपक्खिं सपडिदिसिं प० तं० सीमंतए णरए समयक्खेत्ते उडुविमाणे ईसिपब्भारा पुढवी ॥ ४२१ ॥ उडुलोए णं चत्तारि बिसरीरा प० तं० पुढविकाइया आउवणस्सइका० उराला तसा पाणा, अहे लोगे णं चत्तारि बिसरीरा प० तं० एवं चेव, एवं तिरियलोएवि ४ ॥ ४२२ ॥ चत्तारि पुरिसजाया प० तं० हिरिसत्ते हिरिमणसत्ते चलसत्ते थिरसत्ते ॥ ४२३ ॥ चत्तारि सेज्जपडिमाओ प० चत्तारि वत्थपडिमाओ प० चत्तारि पायपडिमाओ प० चत्तारि ठाणपडिमाओ प० ॥ ४२४ ॥ चत्तारि सरीरगा जीवकुडा प० तं० वेउव्विए आहारगे तेयए कम्मए; चत्तारि सरीरगा कम्मूम्मीसगा प० तं० ओरालिए वेउव्विए आहारए तेयए ॥ ४२५ ॥ चउहिं अत्थिकाएहिं लोगे फुडे प० तं० धम्म-

त्थिकाएणं अधम्मत्थिकाएणं जीवत्थिकाएणं पोग्गलत्थिकाएणं । चउहिं बायरकाएहिं
 उववज्जमाणेहिं लोगे फुडे प० तं० पुढविकाइएहिं आउकाइएहिं वाउवणस्सइकाइएहिं ।
 चत्तारि पएसग्गेणं तुल्ला प० तं० धम्मत्थिकाए अधम्मत्थिकाए लोगागासे एमाजीवे ।
 चउण्हमेगसरीरं नो सुपस्सं भवइ तं० पुढविआउतेउवणस्सइकाइयाणं ॥ ४२६ ॥
 चत्तारि ईदियत्था पुठ्ठा वेदेंति तं० सोईदियत्थे घाणिंदियत्थे जिब्भिंदियत्थे फासि-
 दियत्थे ॥ ४२७ ॥ चउहिं ठाणेहिं जीवा य पोग्गला य णो संचाएन्ति वहिया लोंगता-
 गमण्याए तं० गइअभावेणं निरुवग्गहयाए लुक्खत्ताए लोगाणुभावेणं ॥ ४२८ ॥
 चउव्विहे णाए प० तं० आहरणे आहरणतेइसे आहरणतद्दोसे उवव्वासोवणए ।
 आहरणे चउव्विहे प० तं० अवाए उवाए ठवणाकम्मे पडुप्पन्नविणासी । आहरण-
 तद्दोसे चउव्विहे प० तं० अणुसिद्धी उवालंभे पुच्छा णिस्सावयणे । आहरणतद्दोसे
 चउव्विहे प० तं० अधम्मजुत्ते पडिलोमे अंतोवणीए दुरुवणीए । उवव्वासोवणए
 चउव्विहे प० तं० तव्वत्थुए तदन्नवत्थुए पडिणिमे हेऊ ॥ ४२९ ॥ चउव्विहे
 हेऊ प० तं० जावए थावए वंसए लसए, अहवा हेऊ चउव्विहे प० तं०
 पक्खले अणुमाणे ओवम्मे आगमे अहवा हेऊ चउव्विहे प० अत्थित्तं अत्थि सो
 हेऊ अत्थित्तं णत्थि सो हेऊ णत्थित्तं अत्थि सो हेऊ णत्थित्तं णत्थि सो हेऊ ॥ ४३० ॥
 चउव्विहे संखाणे प० तं० पडिकम्मं वव्हारे रज्जू रासी ॥ ४३१ ॥ अहोलोणे णं
 चत्तारि अंधयारं करेंति तं० णरगा णेरइया पावाइं कम्माइं असुभा पोग्गला,
 तिरियलोगे णं चत्तारि उज्जोयं करेंति तं० चंदा सूरा मणीं जोई, उड्डलोगे णं
 चत्तारि उज्जोयं करेंति तं० देवा देवीओ विमाणा आभरणा ॥ ४३२ ॥ चउट्ठा-
 णस्स तइओद्दोसो समत्तो ॥

चत्तारि पसप्पगा प० तं० अणुप्पन्नाणं भोगाणं उप्पाएत्ता एगे पसप्पए,
 पुव्वुप्पन्नाणं भोगाणं अविप्पओगेणं एगे पसप्पए, अणुप्पन्नाणं सोक्खाणं उप्पाइत्ता
 एगे पसप्पए पुव्वुप्पन्नाणं सोक्खाणं अविप्पओगेणं एगे पसप्पए ॥ ४३३ ॥
 णेरइयाणं चउव्विहे आहारे प० तं० इंगालोवमे मुम्मुरोवमे सीयले हिमसीयले ।
 तिरिक्खजोणियाणं चउव्विहे आहारे प० तं० कंकोवमे बिलोवमे पाणमंसोवमे
 पुत्तमंसोवमे । मणुस्साणं चउव्विहे आहारे, असणे पाणे खाइमे साइमे । देवाणं
 चउव्विहे आहारे प० तं० वण्णमंते गंधमंते रसमंते फासमंते ॥ ४३४ ॥
 चत्तारि जाइआसीविसा प० तं० विच्छुयजाइआसीविसे मंडुक्कजाइआसीविसे
 उरगजाइआसीविसे मणुस्सजाइआसीविसे । विच्छुयजाइआसीविसस्स णं भंते केवइए
 विसए प० ? पभूणं विच्छुयजाइआसीविसे अद्धभरहप्पमाणमेत्तं बौदि विसेणं

विसपरिणयं विसट्टमाणि करेतए विसएसे विसट्टयाए नो चेव णं संपत्तीए करिंसु
 वा करेति वा करिस्संति वा मंडुकजाइआसीविसस्स पुच्छा, पभूणं मंडुकजाइआसी-
 विसे भरहप्पमाणमेतं बौदिं विसेणं विसपरिणयं विसट्टमाणि तं चेव जाव करिस्संति,
 उरगजाइआसीविसस्स पुच्छा, पभूणं उरगजाइआसीविसे जंबुद्वीवप्पमाणमेतं
 बौदिं विसेणं सेसं तं चेव जाव करिस्संति वा । मणुस्सजाइआसीविसपुच्छा, पभूणं
 मणुस्सजाइआसीविसे समयक्खेत्तपमाणमेतं बौदिं विसेणं विसपरिणयं विसट्टमाणि
 करेतए विसएसे विसट्टयाए नो चेव णं जाव करिस्संति वा ॥ ४३५ ॥ चउव्विहा
 वाही प० तं० वाइए पित्तिए सिंभिण सन्निवाइए, चउव्विहा तिगिच्छा प० तं०
 विज्जो ओसहाइं आउरे परियारए, चत्तारि तिगिच्छगा प० तं० आयतिगिच्छए
 णाममेगे णो परतिगिच्छए परतिगिच्छए णाममेगे णो आयतिगिच्छए जाव चउ-
 भंगो ॥ ४३६ ॥ चत्तारि पुरिसजाया प० तं० वणकरे णाममेगे णो वणपरिमासी,
 वणपरिमासी णाममेगे णो वणकरे, एगे वणकरेवि वणपरिमासीवि, एगे णो वणकरे
 णो वणपरिमासी, चत्तारि पुरिसजाया प० तं० वणकरे णाममेगे णो वणसारक्खी ४ ।
 चत्तारि पुरिसजाया प० तं० वणकरे णाममेगे णो वणसंरोही ४ ॥ ४३७ ॥ चत्तारि
 वणा प० तं० अंतो सल्ले णाममेगे णो बाहिंसल्ले ४ । एवामेव चत्तारि पुरिसजाया
 प० तं० अंतो सल्ले णाममेगे णो बाहिंसल्ले ४ । चत्तारि वणा प० तं० अंतो दुट्ठे
 णाममेगे णो बाहिंदुट्ठे, बाहिंदुट्ठे णाममेगे णो अंतो दुट्ठे ४ । एवामेव चत्तारि
 पुरिसजाया प० तं० अंतो दुट्ठे णाममेगे णो बाहिंदुट्ठे ४ ॥ ४३८ ॥ चत्तारि पुरिस-
 जाया प० तं० सेयंसे णाममेगे सेयंसे, सेयंसे णाममेगे पावंसे, पावंसे णाममेगे सेयंसे,
 पावंसे णाममेगे पावंसे । चत्तारि पुरिसजाया प० तं० सेयंसे णाममेगे सेयंसेत्ति सालि-
 सए सेयंसे णाममेगे पावंसेत्ति सालिसए ४ । चत्तारि पुरिसजाया प० तं० सेयंसेत्ति
 णाममेगे सेयंसेत्ति मण्णइ, सेयंसेत्ति णाममेगे पावंसेत्ति मण्णइ ४ । चत्तारि पुरिसजाया
 प० तं० सेयंसे णाममेगे सेयंसेत्ति सालिसए मन्नइ सेयंसे णाममेगे पावंसेत्ति सालिसए
 मन्नइ ४ ॥ ४३९ ॥ चत्तारि पु० प० तं० आघवइत्ता णाममेगे णो परिभावइत्ता,
 परिभावइत्ता णाममेगे णो आघवइत्ता ४ । चत्तारि पु० प० तं० आघवइत्ता णाम-
 मेगे णो उंछजीवियासंपन्ने, उंछजीवियासंपन्ने णाममेगे णो आघवइत्ता ४ ॥ ४४० ॥
 चउव्विहा रुक्खविगुव्वणा प० तं० पवाळत्ताए पत्तत्ताए पुप्फत्ताए फलत्ताए
 ॥ ४४१ ॥ चत्तारि वाइसमोसरणा प० तं० किरियावाइं अकिरियावाइं अण्णाणियावाइं
 वेणइयावाइं, णेरइयाणं चत्तारि वाइसमोसरणा प० तं० किरियावाइं जाव वेणइया-
 वाइं, एवमसुरकुमाराणावि जाव थणियकुमाराणं, एवं विगल्लिदियवज्जं जाव वेमाणि-

याणं ॥ ४४२ ॥ चत्तारि मेहा प० तं० गज्जिता णाममेगे णो वासित्ता, वासित्ता
 णाममेगे णो गज्जिता, एगे गज्जितावि वासित्तावि, एगे णो गज्जिता णो वासित्ता,
 एवामेव चत्तारि पु० प० तं० गज्जिता णाममेगे णो वासित्ता ४ । चत्तारि मेहा प०
 तं० गज्जिता णाममेगे णो विज्जुयाइत्ता, विज्जुयाइत्ता णाममेगे णो गज्जिता ४ ।
 एवामेव चत्तारि पु० प० तं० गज्जिता णाममेगे णो विज्जुयाइत्ता ४ । चत्तारि मेहा
 प० तं० वासित्ता णाममेगे णो विज्जुयाइत्ता ४ । एवामेव चत्तारि पु० प० तं०
 वासित्ता णाममेगे णो विज्जुयाइत्ता ४ । चत्तारि मेहा प० तं० कालवासी णाममेगे
 णो अकालवासी, अकालवासी णाममेगे णो कालवासी ४ । एवामेव चत्तारि पुरिस-
 जाया प० तं० कालवासी णाममेगे णो अकालवासी ४ । चत्तारि मेहा प० तं०
 खेत्तवासी णाममेगे णो अखेत्तवासी ४ । एवामेव चत्तारि पु० प० तं० खेत्तवासी
 णाममेगे णो अखेत्तवासी ४ । चत्तारि मेहा प० तं० जणइत्ता णाममेगे णो णिम्मव-
 इत्ता, णिम्मवइत्ता णाममेगे णो जणइत्ता ४ । एवामेव चत्तारि अम्मापियरो प०
 तं० जणइत्ता णाममेगे णो णिम्मवइत्ता ४ । चत्तारि मेहा प० तं० देसवासी णाम-
 मेगे णो सव्ववासी ४ । एवामेव चत्तारि रायाणो प० तं० देसाहिर्वई णाममेगे णो
 सव्वाहिर्वई ४ । चत्तारि मेहा प० तं० पुक्खलसंवट्टए पज्जुणे जीमूए जिम्हे ।
 पोक्खलसंवट्टए णं महामेहे एगेणं वासेणं दसवाससहस्साई भावेइ, पज्जुणे णं महामेहे
 एगेणं वासेणं दसवाससयाई भावेइ, जीमूए णं महामेहे एगेणं वासेणं दसवाससई
 भावेइ, जिम्हे णं महामेहे बहुवासेहिं एगं वासं भावेइ वा ण भावेइ वा ॥ ४४३ ॥
 चत्तारि करंडगा प० तं० सोवागकरंडए वेसियाकरंडए गाहावइकरंडए रायकरंडए,
 एवामेव चत्तारि आयरिया प० तं० सोवागकरंडगसमाणे, वेसियाकरंडगसमाणे, गाहा-
 वइकरंडगसमाणे, रायकरंडगसमाणे ॥ ४४४ ॥ चत्तारि रुक्खा प० तं० साले
 णाममेगे सालपरियाए साले णाममेगे एरंडपरियाए ४ । एवामेव चत्तारि आयरिया
 प० तं० साले णाममेगे सालपरियाए साले णाममेगे एरंडपरियाए एरंडे णाममेगे०
 ४ । चत्तारि रुक्खा प० तं० साले णाममेगे सालपरिवारे ४ । एवामेव चत्तारि
 आयरिया प० तं० साले णाममेगे सालपरिवारे ४ । गाहा सालदुममज्झगारे जह
 साले णाम होइ दुमराया, इय सुंदरआयरिए सुंदरसीसे मुणेरयवे (१) एरंडमज्झ-
 गारे जह साले णाम होइ दुमराया, इय सुंदरआयरिए मंगुलसीसे मुणेरयवे (२)
 सालदुममज्झयारे एरंडे णाम होइ दुमराया, इय मंगुलआयरिए सुंदरसीसे मुणेरयवे
 (३) एरंडमज्झयारे, एरंडे णाम होइ दुमराया, इय मंगुलआयरिए मंगुलसीसे मुणे-
 रयवे (४) ॥ ४४५ ॥ चत्तारि मच्छा प० तं० अणुसोयचारी पडिसोयचारी, अंतचारी

मज्झचारी, एवामेव चत्तारि भिक्खागा प० तं० अणुसोयचारी पडिसोयचारी अंत-
 चारी मज्झचारी ॥ ४४६ ॥ चत्तारि गोला प० तं० मधुसिस्थगोले जउगोले
 दाखुगोले मट्ठियागोले, एवामेव चत्तारि पुरिसजाया प० तं० मधुसिस्थगोलसमाणे ४ ।
 चत्तारि गोला प० तं० अयगोले तउगोले तंबगोले सीसगोले एवामेव चत्तारि पु०
 प० तं० अयगोलसमाणे जाव सीसगोलसमाणे ४ । चत्तारि गोला प० तं०
 हिरण्णगोले सुवण्णगोले रयणगोले वयरगोले एवामेव चत्तारि पुरिसजाया प० तं०
 हिरण्णगोलसमाणे जाव वयरगोलसमाणे ॥ ४४७ ॥ चत्तारि पत्ता प० तं० अस्ति-
 पत्ते करपत्ते खुरपत्ते कलंबचीरियापत्ते, एवामेव चत्तारि पु० प० तं० अस्तिपत्त-
 समाणे जाव कलंबचीरियापत्तसमाणे ॥ ४४८ ॥ चत्तारि कडा प० तं० सुंबकडे
 विदलकडे चम्मकडे कंबलकडे एवामेव चत्तारि पु० प० तं० सुंबकडसमाणे जाव
 कंबलकडसमाणे ॥ ४४९ ॥ चउव्विहा चउप्पया प० तं० एगखुरा दुखुरा गंडीपदा
 सणप्पदा, चउव्विहा पक्खी प० तं० चम्मपक्खी लोमपक्खी समुग्गपक्खी विथय-
 पक्खी । चउव्विहा खुद्दपाणा प० तं० बेईदिया तेईदिया चउरिंदिया संमुच्छिम-
 पंचिंदियतिरिक्खजोणिया ॥ ४५० ॥ चत्तारि पक्खी प० तं० णिवइत्ता णाममेगे
 णो परिवइत्ता परिवइत्ता णाममेगे णो णिवइत्ता एगे णिवइत्तावि परिवइत्तावि एगे णो
 णिवइत्ता णो परिवइत्ता एवामेव चत्तारि भिक्खागा प० तं० णिवइत्ता णाममेगे णो
 परिवइत्ता ४ ॥ ४५१ ॥ चत्तारि पुरिसजाया प० तं० णिक्कट्ठे णाममेगे णिक्कट्ठे
 णाममेगे अणिक्कट्ठे ४ । चत्तारि पुरिसजाया प० तं० णिक्कट्ठे णाममेगे णिक्कट्ठप्पा
 णिक्कट्ठे णाममेगे अणिक्कट्ठप्पा ४ । चत्तारि पु० प० तं० बुहे णाममेगे बुहे बुहे
 णाममेगे अबुहे ४ । चत्तारि पुरिसजाया प० तं० बुहे णाममेगे बुहहियए ४ ।
 चत्तारि पुरिसजाया प० तं० आयाणुकंपए णाममेगे णो पराणुकंपए ४ ॥ ४५२ ॥
 चउव्विहे संवासे प० तं० दिव्वे आसुरे रक्खसे माणुसे, चउव्विहे संवासे प० तं०
 देवे णाममेगे देवीए सद्धिं संवासं गच्छइ देवे णाममेगे असुरीए सद्धिं संवासं
 गच्छइ असुरे णाममेगे देवीए सद्धिं संवासं गच्छइ असुरे णाममेगे असुरीए
 सद्धिं संवासं गच्छइ, चउव्विहे संवासे प० तं० देवे णाममेगे देवीए सद्धिं संवासं
 गच्छइ, देवे णाममेगे रक्खसीए सद्धिं संवासं गच्छइ, रक्खसे णाममेगे ० ४ ।
 चउव्विहे संवासे प० तं० देवे णाममेगे देवीए सद्धिं संवासं गच्छइ, देवे णाममेगे
 मणुस्सीहिं सद्धिं संवासं गच्छइ ४ । चउव्विहे संवासे प० तं० असुरे णाममेगे
 असुरीहिं सद्धिं संवासं गच्छइ, असुरे णाममेगे रक्खसीहिं सद्धिं संवासं गच्छइ ४
 चउव्विहे संवासे प० तं० असुरे णाममेगे असुरीए सद्धिं संवासं गच्छइ, असुरे

णाममेगे मणुस्सीए सद्धिं संवासं गच्छइ ४ । चउव्विहे संवासे प० तं० रक्खसे
 णाममेगे रक्खसीए सद्धिं संवासं गच्छइ, रक्खसे णाममेगे माणुस्सीए सद्धिं संवासं
 गच्छइ ४ ॥ ४५३ ॥ चउव्विहे अवद्धंसे प० तं० आसुरे आभियोगे संमोहे
 देवकिंविसे, चउहिं ठाणेहिं जीवा आसुरत्ताए कम्मं पकरेंति तं० कोहसील्याए
 पाहुडसील्याए संसत्ततवोक्कमेणं निमित्ताजीवयाए, चउहिं ठाणेहिं जीवा आभि-
 ओगत्ताए कम्मं पगरेंति तं० अत्तुक्कोसेणं परपरिवाएणं भूइक्कमेणं कोउयकरणेणं ।
 चउहिं ठाणेहिं जीवा सम्मोहत्ताए कम्मं पगरेंति तं० उम्मग्गदेसणाए मग्गंतराएणं
 कामासंसपओगेणं भिज्जानियाणकरणेणं । चउहिं ठाणेहिं जीवा देवकिंविसियाए
 कम्मं पगरेंति तं० अरिहंताणं अवण्णं वयमाणे अरिहंतपण्णत्तस्स धम्मस्स अवण्णं
 वयमाणे, आयरियउव्वज्जायाणमवण्णं वयमाणे चाउव्वण्णस्स संवस्स अवण्णं
 वयमाणे ॥ ४५४ ॥ **चउव्विहा पव्वज्जा** प० तं० इहलोगपडिबद्धा परलोगपडि-
 बद्धा दुहओ लोगपडिबद्धा अप्पडिबद्धा, चउव्विहा **पव्वज्जा** प० तं० पुरओपडिबद्धा
 मग्गओपडिबद्धा दुहओपडिबद्धा अप्पडिबद्धा, चउव्विहा **पव्वज्जा** प० तं० ओवाय-
 पव्वज्जा अक्खायपव्वज्जा संगारपव्वज्जा विहगगइपव्वज्जा चउव्विहा **पव्वज्जा**
 प० तं० तुयावइत्ता पुयावइत्ता मोयावइत्ता परिपूयावइत्ता, चउव्विहा **पव्वज्जा**
 प० तं० णडखइया भडखइया सीहखइया सीयालक्खइया, चउव्विहा किसी
 प० तं० वाविया परिवाविया णिंदिया परिणिंदिया एवामेव चउव्विहा पव्वज्जा
 प० तं० वाविया परिवाविया णिंदिया परिणिंदिया, चउव्विहा पव्वज्जा प० तं०
 धण्णपुंजियसमाणा धण्णविरल्लियसमाणा धण्णविकिखत्तसमाणा धण्णसंकट्टियसमाणा
 ॥ ४५५ ॥ **चत्तारि सण्णाओ** पण्णत्ताओ तं० आहारसण्णा भयसण्णा मेहुण-
 सण्णा परिगहसण्णा चउहिं ठाणेहिं आहारसण्णा समुप्पज्जइ तं० ओमक्को-
 ठुयाए छुहावेयणिज्जस्स कम्मस्स उदएणं मईए तदट्ठोवओगेणं, चउहिं ठाणेहिं
 भयसण्णा समुप्पज्जइ तं० हीणसत्तयाए भयवेयणिज्जस्स कम्मस्स उदएणं मईए
 तदट्ठोवओगेणं, चउहिं ठाणेहिं मेहुणसण्णा समुप्पज्जइ तं० चियमंससोणिययाए
 मोहणिज्जस्स कम्मस्स उदएणं मईए तदट्ठोवओगेणं, चउहिं ठाणेहिं परिगहसण्णा
 समुप्पज्जइ तं० अविमुत्तयाए लोभवेयणिज्जस्स कम्मस्स उदएणं मईए तदट्ठोव-
 ओगेणं ॥ ४५६ ॥ **चउव्विहा कामा** सिंगारा कलुणा वीभच्छा रोहा, **सिगारा**
 कामा देवाणं, **कलुणा** कामा मणुयाणं, **वीभच्छा** कामा तिरिक्खजोणियाणं,
रोहा कामा णेरइयाणं ॥ ४५७ ॥ **चत्तारि उदगा** प० तं० उत्ताणे णाममेगे
 उत्ताणोदए उत्ताणे णाममेगे गंभीरोदए गंभीरे णाममेगे उत्ताणोदए गंभीरे णाममेगे

गंभीरोदए, एवामेव चत्तारि पुरिसजाया प० तं० उत्ताणे णाममेगे उत्ताणहियए
 उत्ताणे णाममेगे गंभीरहियए ४ चत्तारि उदगा प० तं० उत्ताणे णाममेगे उत्ताणोभासी
 उत्ताणे णाममेगे गंभीरोभासी ४ । एवामेव चत्तारि पुरिसजाया प० तं० उत्ताणे
 णाममेगे उत्ताणोभासी, उत्ताणे णाममेगे गंभीरोभासी ४ । चत्तारि उदही प० तं०
 उत्ताणे णाममेगे उत्ताणोदही, उत्ताणे णाममेगे गंभीरोदही ४ । एवामेव चत्तारि
 पुरिसजाया प० तं० उत्ताणे णाममेगे उत्ताणहियए ४ । चत्तारि उदही प० तं० उत्ताणे
 णाममेगे उत्ताणोभासी उत्ताणे णाममेगे गंभीरोभासी ४ । एवामेव चत्तारि पुरिसजाया
 प० तं० उत्ताणे णाममेगे उत्ताणोभासी ४ ॥ ४५८ ॥ चत्तारि तरगा प० तं० समुद्दं
 तरामित्ति एगे समुद्दं तरइ, समुद्दं तरामित्ति एगे गोप्पयं तरइ, गोप्पयं तरामित्ति एगे
 ४ । चत्तारि तरगा प० तं० समुद्दं तरिता णाममेगे समुद्दे विसीयइ, समुद्दं तरिता
 णाममेगे गोप्पए विसीयइ ४ ॥ ४५९ ॥ चत्तारि कुंभा प० तं० पुण्णे णाममेगे पुण्णे
 पुण्णे णाममेगे तुच्छे, तुच्छे णाममेगे पुण्णे तुच्छे णाममेगे तुच्छे, एवामेव चत्तारि
 पुरिसजाया प० तं० पुण्णे णाममेगे पुण्णे ४ । चत्तारि कुंभा प० तं० पुण्णे णाममेगे
 पुण्णोभासी, पुण्णे णाममेगे तुच्छोभासी ४ एवामेव चत्तारि पुरिसजाया प० तं० पुण्णे
 णाममेगे पुण्णोभासी ४ । चत्तारि कुंभा प० तं० पुण्णे णाममेगे पुण्णरूवे पुण्णे
 णाममेगे तुच्छरूवे ४ । एवामेव चत्तारि पुरिसजाया प० तं० पुण्णे णाममेगे
 पुण्णरूवे ४ । चत्तारि कुंभा प० तं० पुण्णेवि एगे पियट्ठे, पुण्णेवि एगे अवदले, तुच्छेवि
 एगे पियट्ठे तुच्छेवि एगे अवदले, एवामेव चत्तारि पुरिसजाया प० तं० पुण्णेवि
 एगे पियट्ठे ४ । तहेव, चत्तारि कुंभा प० तं० पुण्णेवि एगे विस्संदइ, पुण्णेवि एगे णो
 विस्संदइ, तुच्छेवि एगे विस्संदइ, तुच्छेवि एगे णो विस्संदइ । एवामेव चत्तारि
 पुरिसजाया प० तं० पुण्णेवि एगे विस्संदइ ४ तहेव । चत्तारि कुंभा प० तं० भिन्ने
 जजरिए परिस्साई अपरिस्साई । एवामेव चउव्विहे चरित्ते प० तं० भिन्ने जाव
 अपरिस्साई । चत्तारि कुंभा प० तं० महुकुंभे णाममेगे महुप्पिहाणे महुकुंभे णाममेगे
 विसपिहाणे विसकुंभे णाममेगे महुप्पिहाणे विसकुंभे णाममेगे विसपिहाणे ४
 एवामेव चत्तारि पुरिसजाया ४ । हिययमपावमकलुसं जीहा वि य मधुरभासिणी
 णिच्चं, जंमि पुरिसंमि विज्जइ से मधुकुंभे महुपिहाणे (१) हिययमपावमकलुसं,
 जीहा वि य कडुयभासिणी णिच्चं; जंमि पुरिसंमि विज्जइ, से मधुकुंभे विसपिहाणे,
 (२) जं हिययं कलुसमयं जीहा वि य मधुरभासिणी णिच्चं, जंमि पुरिसंमि विज्जइ,
 से विसकुंभे मधुपिहाणे (३) जं हिययं कलुसमयं, जीहा वि य कडुयभासिणी
 णिच्चं, जंमि पुरिसंमि विज्जइ, से विसकुंभे विसपिहाणे (४) ॥ ४६० ॥ चउ-

विहा उवसग्गा प० तं० दिव्वा माणुसा तिरिक्खजोणिया आयसंवेयणिज्जा ।
 दिव्वा उवसग्गा चउविहा प० तं० हासा पओसा वीमंसा पुढोवेमाया,
 माणुस्सा उवसग्गा चउविहा प० तं० हासा पाओसा वीमंसा कुसील-
 पडिसेवणया, तिरिक्खजोणिया उवसग्गा चउविहा प० तं० भया पओसा
 आहारहेउं अवच्चलेणसारक्खणया, आयसंवेयणिज्जा उवसग्गा चउविहा
 प० तं० घट्टणया पवडणया थंभणया लेसणया ॥ ४६१ ॥ चउविहे कम्मे
 प० तं० सुभे णामं एगे सुभे, सुभे णाममेगे असुभे, असुभे० ४ । चउविहे कम्मे
 प० तं० सुभे णाममेगे सुभविवागे, सुभे णाममेगे असुभविवागे, असुभे णाममेगे
 सुभविवागे, असुभे णाममेगे असुभविवागे । चउविहे कम्मे प० तं० पगडीकम्मे,
 ठिइकम्मे, अणुभावकम्मे पदेसकम्मे ॥ ४६२ ॥ चउविहे संवे प० तं० समणा
 समणीओ सावगा साविगाओ ॥ ४६३ ॥ चउविहा बुद्धी प० तं० उप्पत्तिया
 वेणइया कम्मिया, पारिणामिया, चउविहा मई प० तं० उग्गहमई ईहामई
 अवायमई धारणामई अहवा चउविहा मई, अरंजरोदगसमाणा, वियरोदग-
 समाणा सरोदगसमाणा सागरोदगसमाणा ॥ ४६४ ॥ चउविहा संसारसमा-
 वण्णगा जीवा प० तं० गेरइया तिरिक्खजोणिया मणुस्सा देवा, चउविहा सव्व-
 जीवा प० तं० मणजोगी वइजोगी कायजोगी अजोगी, अहवा चउविहा सव्वजीवा
 प० तं० इत्थिवेयगा पुरिसवेयगा णपुंसकवेयगा अवेयगा, अहवा चउविहा सव्व-
 जीवा प० तं० चक्खुदंसणी अचक्खुदंसणी ओहिदंसणी केवलदंसणी, अहवा चउ-
 विहा सव्वजीवा प० तं० संजया असंजया संजयासंजया णोसंजयाणोअसंजया
 ॥ ४६५ ॥ चत्तारि पुरिसजाया प० तं० मित्ते णाममेगे मित्ते, मित्ते णाममेगे अमित्ते,
 अमित्ते णाममेगे मित्ते, अमित्ते णाममेगे अमित्ते, चत्तारि पुरिसजाया प० तं० मित्ते
 णाममेगे मित्तरुवे चउभंगो ॥ ४६६ ॥ चत्तारि पुरिसजाया प० तं० मुत्ते णाममेगे
 मुत्ते मुत्ते णाममेगे अमुत्ते ४ । चत्तारि पुरिसजाया प० तं० मुत्ते णाममेगे मुत्तरुवे
 ४ ॥ ४६७ ॥ पंचिदियतिरिक्खजोणिया चउगइया चउआगइया प० तं० पंचिदिय-
 तिरिक्खजोणिया पंचिदियतिरिक्खजोणिएसु उववज्जमाणा गेरइएहिंतो वा, तिरिक्ख-
 जोणिएहिंतो वा, मणुस्सेहिंतो वा, देवेहिंतो वा उववज्जेजा, से चेव णं से पंचिदियति-
 रिक्खजोणिए पंचिदियतिरिक्खजोणियत्तं विप्पजहमाणे गेरइयत्ताए वा जाव देवत्ताए
 वा उवागच्छेजा, मणुस्सा चउगइया चउआगइया एवं चेव मणुस्सावि ॥ ४६८ ॥
 बेइदिया णं जीवा असमारंभमाणस्स चउविहे संजमे कज्जइ तं० जिन्भामयाओ
 सोक्खाओ अववरोवेत्ता भवइ, जिन्भामएणं दुक्खेणं असंजोगेत्ता भवइ, फासामयाओ

सोक्खाओ अववरोवित्ता भवइ, फासामयाओ दुक्खाओ असंजोगेत्ता भवइ, वेइदिया णं जीवा समारंभमाणस्स चउव्विहे असंजमे कज्जइ तं० जिब्भामयाओ सोक्खाओ ववरोवित्ता भवइ जिब्भामएणं दुक्खेणं संजोगेत्ता भवइ फासामयाओ सोक्खाओ ववरोवित्ता भवइ फासामएणं दुक्खेणं संजोगेत्ता भवइ ॥ ४६९ ॥ समदिट्ठियाणं णेरइयाणं चत्तारि किरियाओ पण्णत्ताओ तं० आरंभिया, परिग्गहिया मायावत्तिया, अपच्चक्खाणकिरिया, सम्मदिट्ठियाणमसुरकुमारानं चत्तारि किरियाओ प० एवं चेव । एवं विगलंदियवज्जं जाव वेमाणियाणं ॥ ४७० ॥ चउहिं ठाणेहिं संते गुणे णासेज्जा तं० कोहेणं पडिनिसेवेणं, अकयण्णयाए, मिच्छत्ताहिणिवेसेणं । चउहिं ठाणेहिं संते गुणे सीवेज्जा तं० अब्भासवत्तियं, परछंदाणवत्तियं, कज्जहेउं, कयपडिकइएइ वा; णेरइयाणं चउहिं ठाणेहिं सरीरुप्पत्ती सिया तं० कोहेणं माणेणं मायाए लोभेणं, एवं जाव वेमाणियाणं, णेरइयाणं चउठाणणिव्वत्तिए सरीरे तं० कोहनिव्वत्तिए जाव लोभनिव्वत्तिए, एवं जाव वेमाणियाणं । चत्तारि धम्मदारा प० तं० खंती मुत्ती अज्जे मद्दे ॥ ४७१ ॥ चउहिं ठाणेहिं जीवा णेरइयत्ताए कम्मं पगरेंति तं० महारंभयाए, महापरिग्गहयाए पंविंदियवहेणं कुणिमाहारेणं, चउहिं ठाणेहिं जीवा तिरिक्खजोणियत्ताए कम्मं पगरेंति तं० माइल्लयाए नियडिल्लयाए अलियवयणेणं कूडतुलकूडमाणेणं, चउहिं ठाणेहिं जीवा मणुस्सत्ताए कम्मं पगरेंति तं० पगइभइयाए पगइविणीययाए साणुक्कोसयाए अमच्छरियाए । चउहिं ठाणेहिं जीवा देवाउयत्ताए कम्मं पगरेंति तं० सरागसंजमेणं संजमासंजमेणं बालतवोक्कमेणं अकामणिज्जराए ॥ ४७२ ॥ चउव्विहे वजे प० तं० तते वितते घणे झुसिरे, चउव्विहे णट्टे प० तं० अंचिए रिभिए आरभडे भिसोळे, चउव्विहे गेये प० तं० उक्खित्तए पत्तए मंदए रोविंदए, चउव्विहे मल्ले प० तं० गंथिमे वेढिमे पूरिमे संवाइमे चउव्विहे अलंकारे प० तं० केसालंकारे वत्थालंकारे मल्लालंकारे आभरणालंकारे, चउव्विहे अभिणए प० तं० दिट्ठंतिए पाडंसुए सामंतोवायणिए लोगमब्भावत्तिए ॥ ४७३ ॥ सणकुमारमाहिंदेसु णं कप्पेसु विमाणा चउवण्णा प० तं० णीला लोहिया हालिद्दा सुक्किळा । महासुक्कतहस्सारेसु णं कप्पेसु देवानं भवधारणिज्जा सरीरगा उक्कोसेणं चत्तारि रयणीओ उहुं उच्चत्तेणं पण्णत्ता ॥ ४७४ ॥ चत्तारि उदगगब्भा प० तं० उस्सा महिया सीया उसिणा, चत्तारि उदगगब्भा प० तं० हेमगा अब्भसंथडा सीओसिणा पंचरुविया माहे उ हेमगा गब्भा फग्गुणे अब्भसंथडा, सीओसिणा उ चित्ते, वइसाहे पंचरुविया (१) चत्तारि माणुस्सीगब्भा प० तं० इत्थित्ताए पुरिसत्ताए णपुंसगत्ताए विवत्ताए अप्पं सुक्कं बहुं ओयं इत्थी तत्थ पजायइ, अप्पं ओयं

बहुं सुक्कं पुरिसो तत्थ पजायइ (१) दोण्हं पि रत्तसुक्काणं, तुल्लभावे नपुंसओ;
 इत्थीओतसमाओगे, बिबं तत्थ पजायइ (२) ॥ ४७५ ॥ उप्पायपुव्वस्स णं
 चत्तारि चूलियावत्थू प०, चउव्विहे कव्वे प० गज्जे पजे कथे गेए ॥ ४७६ ॥ णेरइ-
 याणं चत्तारि समुग्घाया प० तं० वेयणासमुग्घाए कसायसमुग्घाए मारणंतियसमु-
 ग्घाए वेउव्वियसमुग्घाए एवं वाउकाइयाणवि ॥ ४७७ ॥ अरहओ णं अरिठ्ठनेमिस्स
 चत्तारि सया चोइसपुव्वीणं अजिणाणं जिणसंकासाणं सव्वक्खरसंनिवाइणं जिणो इव
 अवितहवागरमाणाणं उक्कोसिया चोइसपुव्विसंपया होत्था, समणस्स णं भगवओ
 महावीरस्स चत्तारि सया वाइणं सदेवमणुयासुराए परिसाए अपराजियाणं उक्कोसिया
 वाइसंपया होत्था ॥ ४७८ ॥ हेट्ठिल्ला चत्तारि कप्पा अद्धचंदसंठाणसंठिया प० तं०
 सोहम्मे ईसाणे सणकुमारं माहिंदे, मज्झिल्ला चत्तारि कप्पा पडिपुण्णचंदसंठाणसंठिया
 प० तं० बंभलोगे लंतए महासुक्के सहस्सारे, उवरिल्ला चत्तारि कप्पा अद्धचंदसंठाण-
 संठिया प० तं० आणए पाणए आरणे अञ्जुए ॥ ४७९ ॥ चत्तारि समुदा पत्तेयरसा
 प० तं० लवणोदए वरुणोदए खीरोदए घओदए, चत्तारि आवत्ता प० तं० खरावत्ते
 उज्जयावत्ते गूढावत्ते आमिसावत्ते, एवामेव चत्तारि कसाया प० तं० खरावत्तसमाणे कोहे
 उज्जयावत्तसमाणे माणे, गूढावत्तसमाणा माया, आमिसावत्तसमाणे लोभे । खरावत्त-
 समाणं कोहमणुपविट्ठे जीवे कालं करेइ णेरइएसु उव्वज्जइ, उज्जयावत्तसमाणं माणं एवं
 चेव गूढावत्तसमाणं मायमेवं चेव आमिसावत्तसमाणं लोभं अणुपविट्ठे जीवे कालं करेइ
 णेरइएसु उव्वज्जइ ॥ ४८० ॥ अणुराहा णक्खत्ते चउतारे प० पुव्वासाढे एवं चेव ।
 उत्तरासाढे एवं चेव ॥ ४८१ ॥ जीवा णं चउट्ठाणनिव्वत्तिए पोगगले पावकम्मत्ताए
 चिणिसु वा चिणंति वा चिणिस्संति वा तं० णेरइयणिव्वत्तिए तिरिक्खजोणियणिव्व-
 त्तिए मणुस्सणिव्वत्तिए देवणिव्वत्तिए । एवं उव्वचिणिसु वा उव्वचिणंति वा उव्वचिणि-
 स्संति वा एवं चिणउव्वचिणबंधोदीरवेय तह णिज्जरा चेव ॥ ४८२ ॥ चउप्पएसिया
 खंधा अणंता प० चउप्पएसोगाढा पोगगला अणंता प० चउसमयठिईया पोगगला
 अणंता प० चउगुणकालगा पोगगला अणंता जाव चउगुणलुक्खा पोगगला अणंता
 प० ॥ ४८३ ॥ चउट्ठाणस्स चउत्थोइसो समत्तो ॥ चउट्ठाणं समत्तं ॥

पंचमहाणं

पंचमहव्वया प० तं० सव्वाओ पाणाइवायाओ वेरमणं, सव्वाओ मुसा-
 वायाओ वेरमणं, सव्वाओ अदिन्नादाणाओ वेरमणं, सव्वाओ मेहुणाओ वेरमणं,
 सव्वाओ परिग्गहाओ वेरमणं, पंचाणुव्वया प० तं० थूलाओ पाणाइवायाओ
 वेरमणं, थूलाओ मुसावायाओ वेरमणं, थूलाओ अदिन्नादाणाओ वेरमणं, थूलाओ

मेहुणाओ वेरमणं (सदारसंतोसे), इच्छापरिमाणे ॥ ४८४ ॥ पंच वण्णा प० तं०
 किण्हा नीला लोहिया हालिहा सुक्किला, **पंचरसा** प० तं० तित्ता कडुया कसाया
 अंबिला महुरा, **पंचकामगुणा** प० तं० सद्दा रुवा गंधा रसा फासा, पंचहिं
 ठाणेहिं जीवा सज्जंति तं० सद्देहिं जाव फासेहिं, एवं रज्जंति मुच्छंति गिज्जंति
 अज्झोववज्जंति, पंचहिं ठाणेहिं जीवा विणिवायमावज्जंति तं० सद्देहिं जाव फासेहिं,
 पंच ठाणा अपरिण्णाया जीवाणं अहियाए असुभाए अखमाए अणिस्सेयसाए
 अणाणुगामियत्ताए भवंति तं० सद्दा जाव फासा, पंचठाणा सुपरिण्णाया जीवाणं
 हियाए सुभाए जाव आणुगामियत्ताए भवंति तं० सद्दा जाव फासा, पंच ठाणा
 अपरिण्णाया जीवाणं दुग्गइगमणाए भवंति तं० सद्दा जाव फासा, पंचठाणा
 परिण्णाया जीवाणं सुगइगमणाए भवंति तं० सद्दा जाव फासा ॥ ४८५ ॥ पंचहिं
 ठाणेहिं जीवा दुग्गइं गच्छंति तं० पाणाइवाएणं जाव परिगहेणं, पंचहिं ठाणेहिं
 जीवा सोगइं गच्छंति तं० पाणाइवायवेरमणेणं जाव परिगहवेरमणेणं ॥ ४८६ ॥
 पंच **पडिमाओ** प० तं० भद्दा सुभद्दा महाभद्दा सव्वओभद्दा भद्दुत्तरपडिमा
 ॥ ४८७ ॥ पंच **थावरकाया** प० तं० इंदे थावरकाए विंबे थावरकाए सिप्पे
 थावरकाए संमई थावरकाए पायावच्चे थावरकाए, पंच **थावरकायाहिवई** प० तं०
 इंदे थावरकायाहिवई, जाव पायावच्चे थावरकायाहिवई ॥ ४८८ ॥ पंचहिं ठाणेहिं
ओहिंदंसणे समुप्पज्जिउकामेवि तप्पढमयाए खंभाएज्जा तं० अप्पभूयं वा
 पुढविं पासित्ता तप्पढमयाए खंभाएज्जा, कुंथुरासिभूयं वा पुढविं पासित्ता तप्पढ-
 मयाए खंभाएज्जा, महइमहालयं वा महोरगसरीरं पासित्ता तप्पढमयाए खंभाएज्जा,
 देवं वा महिद्धियं जाव महेसक्खं पासित्ता तप्पढमयाए खंभाएज्जा, पुरेसु वा
 पोरानाई महइमहालयाई महाणिहाणाई पहीणसामियाई पहीणसेउयाई पहीण-
 गुत्तागाराई उच्छिण्णसामियाई उच्छिण्णसेउयाई उच्छिण्णगुत्तागाराई जाई इमाई
 गामागरणगरखेडकब्बडमंडवदोणमुहपट्टणासमसंबाहसंनिवेसेसु सिंघाडगतिगवउक्क-
 चच्चरचउम्मुहमहापट्टपहेसु णगरणिद्धमणेसु सुसाणसुण्णागारगिरिकंदरसंतिसेलोवट्ठा-
 वणभवणगिहेसु संनिक्खित्ताई चिट्ठंति ताई वा पासित्ता तप्पढमयाए खंभाएज्जा,
 इच्चेएहिं पंचहिं ठाणेहिं ओहिंदंसणे समुप्पज्जिउकामे तप्पढमयाए खंभाएज्जा ॥ ४८९ ॥
 पंचहिं ठाणेहिं केवलवरनाणदंसणे समुप्पज्जिउकामे तप्पढमयाए णो खंभाएज्जा तं०
 अप्पभूयं वा पुढविं पासित्ता तप्पढमयाए णो खंभाएज्जा सेसं तहेव जाव भवणगिहेसु
 संनिक्खित्ताई चिट्ठंति ताई वा पासित्ता तप्पढमयाए णो खंभाएज्जा, सेसं तहेव,
 इच्चेएहिं पंचहिं ठाणेहिं जाव णो खंभाएज्जा ॥ ४९० ॥ णेरइयाणं सरीरगा पंचवण्णा

पंचरसा प० तं० किण्हा जाव सुक्किळा तित्ता जाव मधुरा, एवं निरंतरं जाव वेमाणि-
 याणं ॥ ४९१ ॥ पंच सरीरगा प० तं० ओरालिए वेउव्विए आहारए तेयए
 कम्मए, ओरालियसरीरे पंचवण्णे पंचरसे प० तं० किण्हे जाव सुक्किळे, तित्ते जाव
 मधुरे, एवं जाव कम्मगसरीरे, सव्वे वि णं बादरबोदिधरा कलेवरा पंचवण्णा पंचरसा
 दुग्ंधा अट्ठफासा ॥ ४९२ ॥ पंचहिं ठाणेहिं पुरिमपच्छिमगाणं जिणाणं **दुग्गमं**
 भवइ तं० दुआइक्खं दुविभज्जं दुपस्सं दुतित्तिक्खं दुरणुचरं । पंचहिं ठाणेहिं
 मज्झिमगाणं जिणाणं सुगमं भवइ तं० सुआइक्खं सुविभज्जं सुपस्सं सुतित्तिक्खं
 सुरणुचरं ॥ ४९३ ॥ पंचठाणाई समणेणं भगवया महावीरेणं समणाणं निग्गंथाणं
णिच्चं वण्णियाई णिच्चं किच्चियाई णिच्चं बुइयाई णिच्चं पसत्थाई णिच्चमब्भणु-
 ण्णायाई भवंति तं० खंती सुत्ती अज्जवे मइवे लाघवे, पंचठाणाई समणाणं जाव
अब्भणुण्णायाई भवंति तं० सच्चै संजमे तवे चियाए वंभचेरवासे ॥ ४९४ ॥
 पंचठाणाई समणाणं जाव **अब्भणुण्णायाई** भवंति तं० उक्खित्तचरए णिक्खित्त-
 चरए अंतचरए पंतचरए ल्हचरए, पंचठाणाई जाव **अब्भणुण्णायाई** भवंति तं०
 अन्नयचरए अन्नवेलचरए मोणचरए संसठ्ठकप्पिए तज्जायसंसठ्ठकप्पिए, पंचठाणाई
 जाव **अब्भणुण्णायाई** भवंति तं० उवनिहिए सुद्धेसणिए संखादत्तिए दिठ्ठलाभिए
 पुठ्ठलाभिए, पंचठाणाई जाव **अब्भणुण्णायाई** भवंति तं० आयंबिलिए निव्वियए
 पुरिमट्ठिए परिमियपिंडवाइए भिन्नपिंडवाइए, पंचठाणाई जाव **अब्भणुण्णायाई**
 भवंति तं० अरसाहारे विरसाहारे अंताहारे पंताहारे ल्हहाहारे, पंचठाणाई जाव
 भवंति तं० अरसजीवी विरसजीवी अंतजीवी पंतजीवी ल्हजीवी, पंचठाणाई जाव
 भवंति तंजहा-ठाणाइए उक्कुडुआसणिए पडिमट्ठाई वीरासणिए णेसजिए, पंचठाणाई
 जाव भवंति तं० दंडायइए लगंडसाई आयावए **अवाउडए** अकंडुयए ॥ ४९५ ॥
 पंचहिं ठाणेहिं समणे णिग्गंथे **महानिज्जरे** महापज्जवसाणे भवइ तं० अगिलाए
 आयरियवेयावच्चं करेमाणे एवं उवज्झायवेयावच्चं थेरवेयावच्चं तवस्सिवेयावच्चं
 गिलाणवेयावच्चं करेमाणे, पंचहिं ठाणेहिं समणे णिग्गंथे **महानिज्जरे** महापज्जवसाणे
 भवइ तं० अगिलाए सेहवेयावच्चं करेमाणे, अगिलाए कुलवेयावच्चं करेमाणे, अगि-
 लाए गणवेयावच्चं करेमाणे, अगिलाए संघवेयावच्चं करेमाणे, अगिलाए साहम्मिय-
 वेयावच्चं करेमाणे ॥ ४९६ ॥ पंचहिं ठाणेहिं समणे निग्गंथे **साहम्मियं संभो-**
इयं विसंभोइयं करेमाणे णाइक्कमइ तं० सकिरियट्ठाणं पडिसेविता भवति
 पडिसेविता णो आलोएइ आलोएत्ता णो पठ्वेइ पठ्वेत्ता णो णिव्विसइ जाई
 इमाई थेराणं ठिइप्पकप्पाई भवंति ताई अइयंचिय २ पडिसेवेइ से हंद हं पडिसेवायि

किं मे थेरा करिस्संति ? पंचहिं ठाणेहिं समणे निगंथे साहम्मियं पारिचियं करेमाणे
 णाइक्कमइ तं० सकुले वसइ कुलस्स भेयाए अब्भुट्ठेता भवइ, गणे वसइ गणस्स भेयाए
 अब्भुट्ठेता भवइ हिंसप्येही छिदप्येही अभिक्खणं अभिक्खणं पसिणायतणाइ पउजित्ता
 भवइ, आयरियउवज्झायस्स णं गणंसि पंचवुगहट्ठाणा प० तं० आयरियउवज्झाए
 णं गणंसि आणं वा धारणं वा नो सम्मं पउजित्ता भवइ, आयरियउवज्झाए णं गणंसि
 आहाराइणियाए किइक्कम्मं णो सम्मं पउजित्ता भवइ, आयरियउवज्झाए णं गणंसि जे
 सुयपज्जवजाए धारेन्ति ते काले २ णो सम्ममणुप्पवाएत्ता भवइ, आयरियउवज्झाए णं
 गणंसि गिलाणसेहवेयावच्चं णो सम्ममब्भुट्ठेता भवइ, आयरियउवज्झाए णं गणंसि
 अणापुच्छियचारी यावि भवइ, णो आपुच्छियचारी, आयरियउवज्झायस्स णं गणंसि
 पंच अशुग्गहट्ठाणा प० तं० आयरियउवज्झाए णं गणंसि आणं वा धारणं वा सम्मं
 पउजित्ता भवइ एवमहाराइणियाए सम्मं किइक्कम्मं पउजित्ता भवइ, आयरियउवज्झाए
 णं गणंसि जे सुयपज्जवजाए धारेन्ति ते काले २ सम्ममणुप्पवाइत्ता एवं गिलाणसेहवेया-
 वच्चं सम्मं अब्भुट्ठित्ता भवइ, आयरियउवज्झाए णं गणंसि आपुच्छियचारी यावि भवइ,
 णो अणापुच्छियचारी ॥ ४९७ ॥ पंच निसिज्जाओ प० तं० उकुडुया गोदोहिया सम-
 पायपुया पलियंका अद्वपलियंका ॥ ४९८ ॥ पंच अज्जवट्ठाणा प० तं० साहुअज्जवं साहु-
 म्भवं साहुलाधवं साहुखंती साहुमुत्ती ॥ ४९९ ॥ पंच विहा जोइसिया प० तं० चंदा सूरा
 गहां णक्खत्ता ताराओ ॥ ५०० ॥ पंच विहा देवा प० तं० भवियदव्वदेवा
 णरदेवा धम्मदेवा देवाइदेवा भावदेवा ॥ ५०१ ॥ पंचविहा परियारणा प०
 तं० कायपरियारणा फासपरियारणा रुवपरियारणा सहपरियारणा मणपरियारणा
 ॥ ५०२ ॥ चमरस्स णं असुरिदस्स असुरकुमाररणो पंच अग्गमहिंसीओ प० तं०
 काली राई रयणी विज्जू मेहा, बलिस्स णं वइरोयणिदस्स वइरोयणरणो पंच अग्ग-
 महिंसीओ प० तं० सुभा णिसुभा रंभा णिरंभा मयणा ॥ ५०३ ॥ चमरस्स णं असुरि-
 दस्स असुरकुमाररणो पंच संगामिया अणिया पंच संगामिया अणियाहिवई प०
 तं० पायत्ताणिए पीढाणिए कुंजराणिए महिसाणिए रहाणिए, दुमे पायत्ताणियाहिवई
 सौदामे आसराया पीढाणियाहिवई कुंथू हत्थिराया कुंजराणियाहिवई लोहियक्खे
 महिसाणियाहिवई किण्णरे रहाणियाहिवई, बलिस्स णं वइरोयणिदस्स वइरोयणरणो
 पंच संगामिया अणिया पंच संगामिया अणियाहिवई प० तं० पायत्ताणिए जाव
 रहाणिए, महादुमे पायत्ताणियाहिवई महासौदामे आसराया पीढाणियाहिवई
 मालंकारे हत्थिराया कुंजराणियाहिवई महालोहिअक्खे महिसाणियाहिवई किंपुरिसे
 रहाणियाहिवई, धरणिदस्स णं णागिदस्स नागकुमाररणो पंच संगामिया अणिया

पंच संगामिया अणियाहिवई प० तं० पायत्ताणिए जाव रहाणिए भइसेणे पायत्ताणि-
याहिवई जसोधरे आसराया पीढाणियाहिवई सुदंसणे हत्थिराया कुंजराणियाहिवई
नीलकंठे महिसाणियाहिवई आणंदे रहाणियाहिवई । भूयाणंदस्स नागकुमारिंदस्स
नागकुमाररत्तो पंच संगामिया अणिया पंच संगामिया अणियाहिवई प० तं०
पायत्ताणिए जाव रहाणिए, दक्खे पायत्ताणियाहिवई सुग्गीवे आसराया पीढा-
णियाहिवई सुविक्रमे हत्थिराया कुंजराणियाहिवई सेयकंठे महिसाणियाहिवई गंदुत्तरे
रहाणियाहिवई वेणुदेवस्स गं सुवण्णिंदस्स सुवन्नकुमाररत्तो पंच संगामिया अणिया
पंच संगामिया अणियाहिवई प० तं० पायत्ताणिए एवं जहा धरणस्स तहा वेणुदेवस्स
वि । वेणुदालियस्स य जहा भूयाणंदस्स, जहा धरणस्स तहा सव्वेसिं दाहिणिज्झाणं
जाव घोसस्स जहा भूयाणंदस्स तहा सव्वेसिं उत्तरिज्झाणं जाव महाघोसस्स, सक्कस्स गं
देविंदस्स देवरत्तो पंच संगामिया अणिया पंच संगामिया अणियाहिवई प० तं० पाय-
त्ताणिए जाव उसभाणिए हरिणेगमेसी पायत्ताणियाहिवई वाळ आसराया पीढाणि-
याहिवई एरावणे हत्थिराया कुंजराणियाहिवई दामद्धी उसभाणियाहिवई माढरे रहा-
णियाहिवई ईसाणस्स गं देविंदस्स देवरत्तो पंच संगामिया अणिया जाव पायत्ताणिए
पीढाणिए कुंजराणिए उसभाणिए रहाणिए, लहुपरक्कमे पायत्ताणियाहिवई महावाळ
आसराया पीढाणियाहिवई पुप्फदंते हत्थिराया कुंजराणियाहिवई महामाढरे उस-
भाणियाहिवई महामाढरे रहाणियाहिवई जहा सक्कस्स तहा सव्वेसिं दाहिणिज्झाणं जाव
आरणस्स जहा ईसाणस्स तहा सव्वेसिं उत्तरिज्झाणं जाव अञ्जुयस्स । सक्कस्स गं देवि-
दस्स देवरत्तो अब्भितरपरिसाए देवाणं पंच पल्लिओवमाइं ठिई प० ईसाणस्स गं
देविंदस्स देवरत्तो अब्भितरपरिसाए देवीणं पंच पल्लिओवमाइं ठिई प० ॥ ५०४ ॥ पंच
विहा पडिहा प० तं० गइपडिहा ठिइपडिहा बंधणपडिहा भोगपडिहा बलवीरिय-
पुरिसक्कारपरक्कमपडिहा ॥ ५०५ ॥ पंचविहे आजीवे प० तं० जाइआजीवे
कुलाजीवे कम्माजीवे सिप्पाजीवे लिंगाजीवे ॥ ५०६ ॥ पंच रायककुहा प० तं०
खगगं छत्तं उप्फेसं उवाहणाओ वालवीयणी ॥ ५०७ ॥ पंचहिं ठाणेहिं छंउमत्थेणं
उदिण्णे परिसहोवसणे सम्मं सहेज्जा खमेज्जा तित्तिक्खेज्जा अहियासेज्जा तं०
उदिन्नक्कमे खलु अयं पुरिसे उम्मत्तगभूए तेण मे एस पुरिसे अक्कोसए वा अवह-
सइ वा णिच्छोढेइ वा णिब्भच्छेइ वा बंधइ वा रंधइ वा छविच्छेयं करेइ वा पमारं
वा णेइ उइवेइ वा वत्थं वा पडिगगं वा कंबलं वा पायपुच्छणमच्छिंदइ वा विच्छिंदइ
वा भिंदइ वा अवहरइ वा जक्खाइठ्ठे खलु अयं पुरिसे तेण मे एस पुरिसे अक्कोसइ वा
तहेव जाव अवहरइ वा ममं च गं तंब्भववैयणिज्जे कम्मे उदिन्नं भवइ तेण मे एस

पुरिसे अक्रोसइ वा जाव अवहरइ वा ममं च णं सम्मं असहमाणस्स अखममाणस्स अतितिवखमाणस्स अणहियासेमाणस्स किं मन्ने कज्जइ ? एगंतसो मे पावे कम्मे कज्जइ ममं च णं सम्मं सहमाणस्स जाव अहियासेमाणस्स किं मन्ने कज्जइ ? एगंतसो मे निज्जरा कज्जइ इच्चेएहिं पंचहिं ठाणेहिं छउमत्थे उदिन्ने परिसहोवसग्गे सम्मं सहेज्जा जाव अहियासेज्जा ॥ ५०८ ॥ पंचहिं ठाणेहिं केवली उदिन्ने परिसहोवसग्गे सम्मं सहेज्जा जाव अहियासेज्जा तं० खित्तचित्ते खलु अयं पुरिसे तेण मे एस पुरिसे अक्रोसइ वा तहेव जाव अवहरइ वा दित्तचित्ते खलु अयं पुरिसे तेण मे एस पुरिसे जाव अवहरइ वा जक्खाइठ्ठे खलु अयं पुरिसे तेण मे एस पुरिसे जाव अवहरइ वा ममं च णं तब्भववेयणिज्जे कम्मे उदिन्ने भवइ तेण मे एस पुरिसे जाव अवहरइ वा ममं च णं सम्मं सहमाणं खममाणं तितिवखमाणं अहियासेमाणं पासित्ता बहवे अन्ने छउमत्था समणा निग्गंथा उदिन्ने परिसहोवसग्गे एवं सम्मं सहिस्संति जाव अहियासिस्संति इच्चेएहिं पंचहिं ठाणेहिं केवली उदिन्ने परिसहोवसग्गे सम्मं सहेज्जा जाव अहियासेज्जा ॥ ५०९ ॥ पंच हेऊ प० तं० हेउं न जाणइ हेउं न पासति हेउं ण वुज्झइ हेउं नाभिगच्छइ हेउमण्णाणमरणं मरइ, पंच हेऊ प० तं० हेउणा ण जाणइ जाव हेउणा अण्णाणमरणं मरइ, पंच हेऊ प० तं० हेउं जाणइ जाव हेउं छउमत्थमरणं मरइ, पंच हेऊ प० तं० हेउणा जाणइ जाव हेउणा छउमत्थमरणं मरइ, पंच अहेऊ प० तं० अहेउं न जाणइ जाव अहेउं छउमत्थमरणं मरइ, पंच अहेऊ प० तं० अहेउणा न जाणइ जाव अहेउणा छउमत्थमरणं मरइ, पंच अहेऊ प० तं० अहेउं जाणइ जाव अहेउं केवलिमरणं मरइ, पंच अहेऊ प० तं० अहेउणा ण जाणइ जाव अहेउणा केवलिमरणं मरइ ॥ ५१० ॥ केवलिस्स णं पंच अणुत्तरा प० तं० अणुत्तरे णाणे अणुत्तरे दंसणे अणुत्तरे चरित्ते अणुत्तरे तवे अणुत्तरे वीरिए ॥ ५११ ॥ पउमप्पहे णं अरहा पंच चित्ते होत्था तं० चित्ताहिं चुए चइत्ता गब्भं वक्कंते चित्ताहिं जाए चित्ताहिं मुंडे भवित्ता अगाराओ अणगारियं पव्वइए चित्ताहिं अणंते अणुत्तरे णिव्वाधाए निरावरणे कसिणे पडिपुत्ते केवलवरनाणदंसणे समुप्पन्ने चित्ताहिं परिनिव्वुए । पुप्फदंते णं अरहा पंच मूले होत्था मूलेणं चुए चइत्ता गब्भं वक्कंते, एवं चेव एएणं अभिलावेणं इमाओ गाहाओ अणुगंतव्वाओ ॥ पउमप्पभस्स चित्ता मूले पुण होइ पुप्फदंतस्स; पुव्वाइं आसाढा सीयलस्सुत्तर विमलस्स भइवया (१) रेवइया अणंतजिणो पूसो धम्मस्स संतिणो भरणी, कुंथुस्स कत्तियाओ अरस्स तह रेवईओ य (२) मुणिसुव्वयस्स सवणो आसिणि नमिणो य नेमिणो चित्ता, पासस्स विसाहाओ पंच य हत्थुत्तरे वीरो (३) सेसं जहा आयारे ॥ ५१२ ॥ पंचमट्ठाणस्स पढमोदेसो समत्तो ॥

नो कप्पइ निग्गंथाणं वा, निग्गंशीणं वा इमाओ उहिट्ठाओ गणियाओ विर्यजि-
याओ पंच महण्णवाओ महाणइओ अंतो मासस्स दुखुत्तो वा, तिकखुत्तो वा, उत्तरि-
त्तए वा संतरित्तए वा तं० गंगा जउगा सरऊ एरावई मही, पंचहिं ठाणेहिं कप्पइ तं०
भयंसि वा, दुब्भिकखंसि वा, पव्वहेज्ज व णं कोइ उदयोधंसि वा एज्जमाणंसि, महता
वा अणारिएहिं, णो कप्पइ णिग्गंथाणं वा णिग्गंशीणं वा पढमपाउसंसि गामाणुगामं
दूइज्जित्तए, पंचहिं ठाणेहिं कप्पइ तं० भयंसि वा दुब्भिकखंसि वा जाव महता वा
अणारिएहिं, वासावासं पज्जोसवियाणं णो कप्पइ णिग्गंथाणं वा निग्गंशीणं वा गामाणु-
गामं दूइज्जित्तए, पंचहिं ठाणेहिं कप्पइ तं० णाणट्ठयाए दंसणट्ठयाए चरित्तट्ठयाए
आयरियउवज्झाया वा से वीसुंभेजा आयरियउवज्झायाणं वा बहिया वेयावच्चं करण-
याए ॥ ५१३ ॥ पंच **अणुग्धाइमा** प० तं० हत्थकम्मं करेमाणे मेहुणं पडिसेत्तेमाणे
राइभोयणं भुंजमाणे सागारियपिंडं भुंजमाणे रायपिंडं भुंजमाणे, पंचहिं ठाणेहिं
समणे निग्गंथे रायंतेउरमणुपविसमाणे नाइक्कमइ तं० णगरं सिया सव्वओ समंता
गुत्ते गुत्तदुवारे बहवे समणा निग्गंथा णो संचाएन्ति भत्ताए वा पाणाए वा निक्ख-
मित्तए वा पविसित्तए वा तेसिं विण्णवणट्ठयाए रायंतेउरमणुपविसेजा पाडिहारियं
वा पीढफलंगसेज्जासंथारगं पच्चप्पिणमाणे रायंतेउरमणुपविसेजा हयस्स वा गयस्स
वा दुट्ठस्स आगच्छमाणस्स भीए रायंतेउरमणुपविसेजा परो वा णं सहसा वा
बलसा वा बाहाए गहाय रायंतेउरमणुपविसेजा बहिया व णं आरामगयं वा उज्जाण-
गयं वा रायंतेउरजणो सव्वओ समंता संपरिक्खवित्ता णं निविसेजा इच्चेएहिं पंचहिं
ठाणेहिं समणे निग्गंथे जाव णाइक्कमइ ॥ ५१४ ॥ पंचहिं ठाणेहिं **इत्थी पुरिसेण**
सद्धिं असंवसमाणी वि गब्भं धरेज्जा तं० इत्थी दुब्बियडा दुब्बिसच्चा सुक्क-
पोग्गले अहिट्ठेज्जा, सुक्कपोग्गलसंसिट्ठे वा से वत्थे अंतो जोणीए अणुपविसेजा सयं
वा सा सुक्कपोग्गले अणुपविसेजा परो वा से सुक्कपोग्गले अणुपविसेजा सीओदगविय-
डेण वा से आयममाणीए सुक्कपोग्गले अणुपविसेजा, इच्चेएहिं पंचहिं ठाणेहिं जाव
धरेज्जा, पंचहिं ठाणेहिं **इत्थी पुरिसेण सद्धिं संवसमाणी वि** गब्भं नो
धरेज्जा तं० अप्पत्तजोवणा अइक्कंतजोवणा जाइवच्चा गेलन्नपुट्ठा दोमणंसिया इच्चे-
एहिं पंचहिं ठाणेहिं इत्थी पुरिसेण सद्धिं संवसमाणी वि गब्भं नो धरेज्जा, पंचहिं
ठाणेहिं **इत्थी पुरिसेण सद्धिं संवसमाणी वि** गब्भं नो धरेज्जा तं०
निच्चोउआ अणोउआ वावन्नसोया वाविद्धसोया अणंगपडिसेविणी इच्चेएहिं पंचहिं
ठाणेहिं इत्थी पुरिसेण सद्धिं संवसमाणी वि गब्भं नो धरेज्जा, पंचहिं ठाणेहिं **इत्थी**
पुरिसेण सद्धिं संवसमाणी वि गब्भं नो धरेज्जा तं० उदुंसि णो णिगाम-

पडिसेविणी यावि भवइ, समागया वा से सुक्कपोग्गला पडिविदंसंति उद्विजे वा से पित्त-
 सोणिए पुरा वा देवकम्मुणा पुत्तफले वा नो निदिठे भवइ इच्चेएहिं जाव णो
 धरेज्जा ॥ ५१५ ॥ पंचहिं ठाणेहिं निग्गंथा निग्गंथीओ य एगयओ ठाणं
 वा सेज्जं वा निसीहिंयं वा चेएमाणा णाइक्कमंति तं० अत्थेगइया निग्गंथा
 निग्गंथीओ य एगं महं अगामियं छिन्नावार्यं दीहमद्धं अडविमणुपविट्ठा तत्थेग-
 यओ ठाणं वा सेज्जं वा निसीहिंयं वा चेएमाणा णाइक्कमंति अत्थेगइया निग्गंथा २
 गामंसि वा णगरंसि वा जाव रायहाणिसि वा वासं उवागया एगइया जत्थ उवस्सयं
 लमंति एगइया णो लमंति तत्थेगयओ ठाणं वा जाव णाइक्कमंति अत्थेगइया
 निग्गंथा निग्गंथीओ य णागकुमारावासंसि वा सुवच्चकुमारावासंसि वा वासं उवा-
 गया तत्थेगयओ ठाणं वा जाव णाइक्कमंति, आमोसगा दीसंति ते इच्छंति निग्गंथीओ
 चीवरपडियाए पडिगाहेत्तए तत्थेगयओ ठाणं वा जाव णाइक्कमंति, जुवाणा दीसंति ते
 इच्छंति निग्गंथीओ मेहुणपडियाए पडिगाहेत्तए तत्थेगयओ ठाणं वा जाव णाइक्कमंति,
 इच्चेएहिं पंचहिं ठाणेहिं जाव णाइक्कमंति । पंचहिं ठाणेहिं समणे निग्गंथे अचेलए
 सचेलियाहिं निग्गंथीहिं सद्धिं संवसमाणे नाइक्कमइ तं० खित्तचित्ते समणे निग्गंथे
 निग्गंथेहिं अविज्जमाणेहिं अचेलओ सचेलियाहिं निग्गंथीहिं सद्धिं संवसमाणे नाइ-
 क्कमइ एवमेएणं गमएणं दित्तचित्ते जक्खाइठे उम्मायपत्ते निग्गंथीपच्चावियए समणे
 निग्गंथेहिं अविज्जमाणेहिं अचेलए सचेलियाहिं निग्गंथीहिं सद्धिं संवसमाणे णाइक्कमइ
 ॥ ५१६ ॥ पंच आसवदारा प० तं० मिच्छत्तं अविरई पमाओ कसाया जोगा,
 पंच संवरदारा प० तं० सम्मत्तं विरई अपमाओ अकसाइत्तं पसत्थजोगित्तं, पंच
 दंडा प० तं० अट्ठादंडे अणट्ठादंडे हिंसादंडे अक्कमहादंडे दिट्ठिविपरियासियादंडे ।
 पंच किरियाओ प० तं० आरंभिया परिग्गहिया मायावत्तिया अपच्चक्खाणकिरिया
 मिच्छादंसणवत्तिया, मिच्छादिट्ठिनेरइयाणं पंच किरियाओ प० तं० आरंभिया
 जाव मिच्छादंसणवत्तिया एवं सव्वेसिं निरंतरं जाव मिच्छादिट्ठियाणं वेमाणियाणं ।
 णवरं विगलेंदिया मिच्छादिट्ठी न भवति सेसं तहेव पंच किरियाओ प० तं०
 काइया अहिगरणिया पाओसिया पारियावणिया पाणाइवायकिरिया, नेरइयाणं पंच
 एवं चेव निरंतरं जाव वेमाणियाणं, पंच किरियाओ प० तं० आरंभिया जाव मिच्छादं-
 सणवत्तिया णेरइयाणं पंच जाव वेमाणियाणं । पंच किरियाओ प० तं० दिट्ठिया
 पुट्ठिया पाडुच्चिया सामंतोवणिवाइया साहत्थिया एवं णेरइयाणं जाव वेमाणियाणं, पंच
 किरियाओ प० तं० णेसत्थिया आणवणिया वेयारणिया अणाभोगवत्तिया अणव-
 कंखवत्तिया, एवं जाव वेमाणियाणं, पंच किरियाओ प० तं० पेज्जवत्तिया दोस-
 वत्तिया पथोगकिरिया समुदाणकिरिया इरियावहिया एवं मणुस्साण वि सेसाणं

णत्थि ॥ ५१७ ॥ **पंच विहा परिण्णा** प० तं० उवहिपरिण्णा उवस्सयपरिक्का
 कसायपरिण्णा जोगपरिक्का भत्तपाणपरिण्णा ॥ ५१८ ॥ पंच विहे ववहारं प० तं०
 आगमे सुए आणा धारणा जीए, जहा से तत्थ आगमे सिया आगमेणं ववहारं पठु-
 वेज्जा, णो से तत्थ आगमे सिया जहा से तत्थ सुए सिया सुएणं ववहारं पठुवेज्जा
 णो से तत्थ सुए सिया एवं जाव जहा से तत्थ जीए सिया जीएणं ववहारं पठुवेज्जा
 इच्चएहिं पंचहिं ववहारं पठुवेज्जा, आगमेणं जाव जीएणं जहा २ से तत्थ आगमे जाव
 जीए तथा २ ववहारं पठुवेज्जा से किमाहु भंते ! आगमवळिया समणा णिरंग्था ? इच्चेयं
 पंच विहं ववहारं जया जया जहिं जहिं तथा तथा तहिं तहिं अणिसिओवस्सियं सम्मं
 ववहरमाणे समणे णिरंग्थे आणाए आराहए भवइ ॥ ५१९ ॥ **संजयमणुस्साणं**
सुत्ताणं पंच जागरा प० तं० सदा जाव फासा संजयमणुस्साणं जागराणं पंच
 सुत्ता प० तं० सदा जाव फासा असंजयमणुस्साणं सुत्ताणं वा जागराणं वा पंच
 जागरा प० तं० सदा जाव फासा ॥ ५२० ॥ पंचहिं ठाणेहिं जीवा रयं आइजंति
 तं० पाणाइवाएणं जाव परिग्गहेणं । पंचहिं ठाणेहिं जीवा रयं वसंति तं० पाणाइ-
 वायवेरमणेणं जाव परिग्गहवेरमणेणं । पंचमासियं णं भिक्खुपडिसं पडिवज्जस्स अण-
 गारस्स कपंति पंचदत्तीओ सोयणस्स पडिगाहेत्तए पंचपाणगस्स ॥ ५२१ ॥ पंच
 विहे उवघाए प० तं० उग्गमोवघाए उप्पायणोवघाए एसणोवघाए परिकम्मोवघाए
 परिहरणोवघाए **पंचविहा विसोही** प० तं० उग्गमविसोही उप्पायणविसोही
 एसणाविसोही परिकम्मविसोही परिहरणविसोही, **पंचहिं ठाणेहिं जीवा दुल्लभ-**
वोहियत्ताए कम्मं पगरंति तं० अरिहंताणमवण्णं वदमाणे अरिहंतपण्णत्तस्स
 धम्मस्स अवण्णं वदमाणे आयरियउवज्जायाणमवण्णं वदमाणे चाउवण्णस्स संघस्स
 अवण्णं वदमाणे विविक्तववंभचेराणं देवाणं अवण्णं वदमाणे, पंचहिं ठाणेहिं जीवा
सुल्लभवोहियत्ताए कम्मं पगरंति, अरिहंताणं वण्णं वदमाणे, जाव विविक्तव-
 वंभचेराणं देवाणं वण्णं वदमाणे ॥ ५२२ ॥ पंच **पडिसंलीणा** प० तं० सोइं-
 दियपडिसंलीणे जाव फासिंदियपडिसंलीणे, **पंच अपडिसंलीणा** प० तं० सोइं-
 दियअपडिसंलीणे जाव फासिंदियअपडिसंलीणे, **पंच विहे संवरे** प० तं०-
 सोइंदियसंवरे जाव फासिंदियसंवरे **पंचविहे असंवरे** प० तं० सोइंदियअसंवरे
 जाव फासिंदियअसंवरे ॥ ५२३ ॥ **पंच विहे संजमे** प० तं० सामाइयसंजमे छेवो-
 वट्ठावणियसंजमे परिहारविसुद्धियसंजमे सुहुमसंपरामसंजमे अहक्खायचरित्तसंजमे,
 एग्गिंदिया णं जीवा असमारंभमाणस्स पंचविहे संजमे कज्जइ तं० पुडविकाइयसंजमे
 जाव वणस्सइकाइयसंजमे, एग्गिंदिया णं जीवा समारंभमाणस्स पंचविहे असंजमे

कज्जइ तं० पुढविकाइयअसंजमे जाव वणस्सइकाइयअसंजमे, पंचिंदिया णं जीवा असमारंभमाणस्स पंचविहे संजमे कज्जइ तं० सोइंदियसंजमे जाव फासिंदियसंजमे, पंचिंदिया णं जीवा समारंभमाणस्स पंचविहे असंजमे कज्जइ तं० सोइंदियअसंजमे जाव फासिंदियअसंजमे, सव्वपाणभूयजीवसत्ता णं असमारंभमाणस्स पंचविहे संजमे कज्जइ तं० एगिंदियसंजमे जाव पंचिंदियसंजमे, सव्वपाणभूयजीवसत्ता णं समारंभमाणस्स पंचविहे असंजमे कज्जइ तं० एगिंदियअसंजमे जाव पंचिंदियअसंजमे ॥५२४॥ **पंच-चिहा तणवणस्सइकाइया** प० तं० अग्गबीया मूलबीया पोरबीया खंधबीया बीयस्सहा ॥ ५२५ ॥ **पंचविहे आयारे** प० तं० णाणायारे दंसणायारे चरित्ता-यारे तवायारे वीरियायारे, **पंचविहे आयारपक्खे** प० तं० मासिए उग्घाइए मासिए अणुग्घाइए चउमासिए उग्घाइए चउमासिए अणुग्घाइए आरोवणा, **आरोवणा पंचविहा** प० तं० पठ्ठविआ ठविआ कसिणा अकसिणा हाडहडा ॥ ५२६ ॥ जंबुद्दीवे दीवे मंदरस्स पव्वयस्स पुरच्छिमे णं सीयाए महानईए उत्तरेणं पंचवक्खारपव्वया प० तं० मालवंते चित्तकूडे पम्हकूडे णल्लिणकूडे एगसेले, जंबू-मंदरस्स पुरओ सीयाए महानईए दाहिणेणं पंचवक्खारपव्वया प० तं० तिकूडे वेसमणकूडे अंजणे मायंजणे सोमणसे, जंबूमंदरपव्वयस्स पच्चत्थिमेणं सीओयाए महानईए दाहिणेणं पंचवक्खारपव्वया प० तं० विज्जुप्पभे अंकावई पम्हावई आसीविसे सुहावहे, जंबूमंदरस्स पच्चत्थिमेणं सीओयाए महानईए उत्तरेणं पंच वक्खारपव्वया प० तं० चंदपव्वए सूरपव्वए णागपव्वए देवपव्वए गंधमायणे, जंबूमंदरस्स दाहिणेणं देवकुराए कुराए पंचमहद्दहा प० तं० निसहद्दहे देवकुरुदहे सूरदहे सुलसदहे विज्जुप्पहद्दहे, जंबूमंदरउत्तरेणं उत्तरकुराए कुराए पंचमहद्दहा प० तं० नीलवंतदहे उत्तरकुरुदहे चंददहे एरावणदहे मालवंतदहे, सव्वेवि णं वक्खारप-व्वया सीयासीओयाओ महानईओ मंदरं वा पव्वयंतेणं पंचजोयणसयाइं उट्ठं उच्चतेणं पंचगाउयसयाइं उव्वेहेणं, धायइसंडे बीवे पुरत्थिमद्देणं मंदरस्स पव्वयस्स पुरच्छिमेणं सीयाए महानईए उत्तरेणं पंचवक्खारपव्वया प० तं० मालवंते एवं जहा जंबुद्दीवे तहा जाव पोक्खारवरदीवद्धुपच्चत्थिमद्दे वक्खारा दहा य वक्खारपव्व-याणं उच्चत्तं भाणियव्वं, समयक्खेत्ते णं पंच भरहाइं पंच एरवयाइं एवं जहा चउट्ठाणे बिइए उद्देसे तहा एत्थवि भाणियव्वं जाव पंच मंदरा पंचमंदरचूलियाओ णवरं उट्ठयारा णत्थि ॥ ५२७ ॥ उसभे णं अरहा कोसल्लिए पंचधणुसयाइं उट्ठं उच्चतेणं होत्था भरहे णं राया चाउरंतचक्कवट्ठी पंचधणुसयाइं उट्ठं उच्चतेणं होत्था बाहुबली णं अणगारे एवं चेव । बभी णं अज्जा एवं चेव एवं सुंदरीवि, पंचहिं ठाणेहिं सुत्ते वि

बुज्जेज्जा तं० सदेणं फासेणं भोयणपरिणामेणं णिद्वक्खएणं सुविणंदसणेणं, पंचहिं
 ठाणेहिं समणे णिगंगथे णिगंगंथिं गिण्हमाणे वा अवलंबमाणे वा
 णाइक्कमइ तं० णिगंगंथिं च णं अन्नयरे पसुजाइए वा पक्खीजाइए वा ओहाएज्जा
 तत्थ णिगंगथे णिगंगंथिं गिण्हमाणे वा अवलंबमाणे वा णाइक्कमइ णिगंगंथे णिगंगंथिं
 दुग्गंसि वा विसमंसि वा पक्खल्लमाणि वा पवडमाणि वा गेण्हमाणे वा अवलंबमाणे
 वा णाइक्कमइ णिगंगंथे णिगंगंथिं सेयंसि वा पंकंसि वा पणगंसि वा उदगंसि वा उक्क-
 स्समाणि वा उवुज्झमाणि वा गिण्हमाणे वा अवलंबमाणे वा णाइक्कमइ णिगंगंथे
 णिगंगंथिं णावं आरुहमाणे वा ओरुहमाणे वा णाइक्कमइ खित्तइत्तं दित्तइत्तं जक्खाइत्तं
 उम्मायपत्तं उवसगपत्तं साहिगरणं सपायच्छित्तं जाव भत्तपाणपडियाइक्खियं
 अठ्ठजायं वा निगंगंथे णिगंगंथिं गिण्हमाणे वा अवलंबमाणे वा णाइक्कमइ ॥ ५२८ ॥
 आयरियउवज्झायस्स णं गणंसि पंच अतिसेसा प० तं० आयरियउवज्झाए
 अंतोउवस्सयस्स पाए निगिज्झिय २ पप्फोडेमाणे वा पमज्जेमाणे वा णाइक्कमइ आय-
 रियउवज्झाए अंतो उवस्सयस्स उच्चारपासवणं विगिंचमाणे वा विसोहेमाणे वा णाइ-
 क्कमइ आयरियउवज्झाए पभू इच्छा वेयावडियं करेज्जा इच्छा णो करेज्जा आयरिय-
 उवज्झाए अंतो उवस्सयस्स एगराई वा दुराई वा एगागी वसमाणे णाइक्कमइ । आय-
 रियउवज्झाए बाहिं उवस्सयस्स एगराई वा दुराई वा वसमाणे णाइक्कमइ । पंचहिं
 ठाणेहिं आयरियउवज्झायस्स गणावक्कमणे प० तं० आयरियउवज्झाए गणंसि
 आणं वा धारणं वा नो सम्मं पउंजित्ता भवइ, आयरियउवज्झाए गणंसि अहाराय-
 णियाए किइक्कम्मं वेणइयं नो सम्मं पउंजित्ता भवइ, आयरियउवज्झाए गणंसि जे
 सुयपज्जवजाए धारित्ति ते काले णो सम्मसणुपवादेत्ता भवइ, आयरियउवज्झाए
 गणंसि सगणियाए वा परगणियाए वा निगंगंथीए बहिंल्लेसे भवइ, मित्ते णाइगणे वा से
 गणाओ अवक्कमेज्जा तेसिं संगहोवग्गहठ्ठयाए गणावक्कमणे पण्णत्ते । पंच विहा
 इद्धिमंता मणुस्सा प० तं० अरहंता चक्कवट्ठी बलदेवा वासुदेवा भावियप्पाणो
 अणगारा ॥ ५२९ ॥ पंचमट्ठाणस्स विइओ उदेसो समत्तो ॥

पंच अत्थिकाया प० तं० धम्मत्थिकाए अधम्मत्थिकाए आगासत्थिकाए
 जीवत्थिकाए पोग्गलत्थिकाए धम्मत्थिकाए अवच्चे अगंधे अरसे अफासे अरूवी
 अजीवे सासए अवट्ठिए लोगदव्वे से समासओ पंचविहे प० तं० दव्वओ खेतओ
 कालओ भावओ गुणओ दव्वओ णं धम्मत्थिकाए एगं दव्वं खेतओ लोगपमाणमेत्ते
 कालओ ण कयाइ णासी न कयाइ न भवइ न कयाइ न भविस्सइत्ति भुवि भवइ
 य भविस्सइ य धुवे णितिए सासए अक्खए अव्वए अवट्ठिए णिच्चे, भावतो अवच्चे

अगंधे अरसे अफासे, गुणओ गमणगुणे य (१) अधम्मत्थिकाए अवन्ने एवं चेव नवरं गुणओ ठाणगुणे (२) आगासत्थिकाए अवन्ने एवं चेव णवरं खेत्तओ लोगा-
 लोगप्पमाणमित्ते गुणओ अवगाहणागुणे सेसं तं चेव (३) जीवत्थिकाए णं अवन्ने एवं चेव णवरं दव्वओ णं जीवत्थिकाए अणंताई दव्वाई, अरूवी जीवे सासए, गुणओ उवओगगुणे, सेसं तं चेव (४) पोग्गलत्थिकाए पंचवन्ने पंचरसे दुगंधे अठ्ठाफासे रूवी अजीवे सासए अवट्ठिए जाव दव्वओ णं पोग्गलत्थिकाए अणंताई दव्वाई, खेत्तओ लोभपप्पमाणमेत्ते, कालओ ण कयाइ णासी जाव णिच्चे भावओ वण्णमंते गंधमंते रसमंते फासमंते, गुणओ गहणगुणे ॥ ५३० ॥ **पंच गईओ** प० तं० निरयगई तिरियगई मणुयगई देवगई सिद्धिगई । पंच इंदियत्था प० तं० सोई-
 दियत्थे जाव फासिंदियत्थे **पंच मुंडा** प० तं०-सोईदियमुंडे जाव फासिंदियमुंडे, **अहवा पंच मुंडा** प० तं० कोहमुंडे, माणमुंडे, सायामुंडे, लोभमुंडे, सिरमुंडे ॥ ५३१ ॥ अहे लोणे णं पंच बायरा प० तं० पुढविकाइया आउ० वाउ० वणस्सइ-
 काइया उराला तसा पाणा ॥ उद्धलोगे णं पंच बायरा, एए चेव, तिरियलोगे णं पंच बायरा प० तं० एणिंदिया जाव पंविंदिया । पंच विहा बादरतेउकाइया प० तं० इंगाले जाला मुम्मुरे अच्ची अलाए, **बादरवाउकाइया** पंचविहा प० तं० पाईण-
 वाए पडीणवाए उदीणवाए दाहिणवाए विदिसिवाए **पंचविहा अचित्ता वाउ-
 काइया** प० तं० अक्कंते धंते पीलिए सरीराणुगए संमुच्छिमे ॥ ५३२ ॥ **पंच नियंठा** प० तं० पुलाए बउसे कुसीले नियंठे सिणाए । **पुलाए पंच विहे** प० तं० णाणपुलाए दंसणपुलाए चरित्तपुलाए लिंगपुलाए अहासुहुमपुलाए नामं पंचमे । **बउसे पंचविहे** प० तं० आमोगबउसे अणाभोगबउसे संसुडबउसे असंसुडबउसे अहासुहुमबउसे णामं पंचमे । **कुसीले पंचविहे** प० तं० णाणकुसीले दंसण-
 कुसीले चरित्तकुसीले लिंगकुसीले अहासुहुमकुसीले णामं पंचमे । **नियंठे पंचविहे** प० तं० पढमसमयनियंठे अपढमसमयनियंठे चरिमसमयनियंठे अचरिमसमयनियंठे अहासुहुमनियंठे णामं पंचमे । **सिणाए पंच विहे** प० तं० अच्छवी असवले अक-
 म्मंसे संसुद्धणाणदंसणधरे अरहा जिणे केवली अपरिस्सावी ॥ ५३३ ॥ कप्पइ निग्गंथाण वा निग्गंथीण वा **पंचवत्थाई धारेत्तए** वा परिहरित्तए वा तं० गंमिए खोमिए साणए पोत्तिए तिरीडपट्टए णामं पंचमए । कप्पइ निग्गंथाण वा निग्गंथीण वा पंच रयहरणाई धारित्तए वा परिहरित्तए वा, तंजहा-उणिए उट्टिए साणए पच्चा-
 पिच्चियए मुंजापिच्चिए णामं पंचमे ॥ ५३४ ॥ **धम्मं चरमाणस्स पंच निस्सा-
 ठाणा** प० तं० छक्काए गणो राया गिहवई सरीरं । **पंच णिही** प० तं०

पुत्ताणिही मित्ताणिही सिप्पणिही धणणिही धन्नाणिही पंचविहे सोए प० तं०
 पुढविसोए आउसोए तेउसोए मंतसोए बंसोए, पंचठाणाई छउमत्थे सव्व-
 भावेणं ण जाणइ ण पासइ तं० धम्मत्थिकायं अधम्मत्थिकायं आणासत्थि-
 कायं जीवं असरीरपडिबद्धं परमाणुपोग्गलं, एयाणि चेव उप्पण्णणाणदंसणधरे अरहा
 जिणे केवली सव्वभावेणं जाणइ पासइ धम्मत्थिकायं जाव परमाणुपोग्गलं । अहे
 लोणे णं पंच अणुत्तरा महइमहालया महाणिरया प० तं० काले महाकाले रोरुए
 महारोरुए अप्पइट्ठाणे, उड्डुलोणे णं पंच अणुत्तरा महइमहालया महाविमाणा
 प० तं० विजये वेजयंते जयंते अपराजिए सव्वट्टुसिद्धे ॥ ५३५ ॥ पंच पुरिस-
 जाया प० तं० हिरिसत्ते हिरिमणसत्ते चलसत्ते थिरसत्ते उदयणसत्ते पंच मच्छा
 प० तं० अणुसोयचारी पडिसोयचारी अंतचारी मज्झचारी सव्वचारी, एवामेव पंच
 भिक्खाया प० तं० अणुसोयचारी जाव सव्वसोयचारी पंच वणीमगा प० तं०
 अतिहिवणीमए किणववणीमए माहणवणीमए साणवणीमए समणवणीमए । पंचहिं
 ठाणेहिं अचेले पसत्थे भवइ तं० अप्पा पडिलेहा लाघविए पसत्थे रुवेवेसा-
 सिए तवे अणुण्णाए विउले इंदियनिग्गहे पंच उक्कला प० तं० दंडुकले रज्जुकले
 तेषुकले देसुकले सव्वुकले पंच समिईओ प० तं० इरियासमिई भासा जाव
 पारिठावणियासमिई ॥ ५३६ ॥ पंचविहा संसारसमावन्नगा जीवा प० तं०
 एगिंदिया जाव पंचिंदिया, एगिंदिया पंचगइया पंचागइया प० तं० एगिंदिए एगिं-
 दिएसु उववज्जमाणे एगिंदिएहिंतो वा जाव पंचिंदिएहिंतो वा उववज्जेजा से चेव णं
 से एगिंदिए एगिंदियत्तं विप्पजहमाणे एगिंदियत्ताए वा जाव पंचिंदियत्ताए वा
 गच्छेज्जा, बेईदिया पंचगइया पंचागइया एवं चेव, एवं जाव पंचिंदिया पंचगइया
 पंचागइया प० तं० पंचिंदिया जाव गच्छेज्जा ॥ ५३७ ॥ पंचविहा सव्वजीवा
 प० तं० कोहकसाई जाव लोभकसाई अकसाई, अहवा पंचविहा सव्वजीवा प० तं०
 नेरइया जाव देवा सिद्धा, अह भंते । कलमसूरतिलमुग्गमासिणप्फावकुलत्थआलि-
 संदसईणपलमंथगाणं एएसि णं धन्नाणं कुट्ठाउत्ताणं जहा सालीणं जाव केवइयं
 कालं जोणी संचित्ठइ ? गोयमा ! जहण्णेणं अंतोमुहुत्तं उक्कोसेणं पंच संवच्छराई,
 तेण परं जोणी पमिलायइ जाव तेण परं जोणीवोच्छेदे पण्णत्ते ॥ ५३८ ॥ पंच
 संवच्छरा प० तं० णक्खत्तसंवच्छरे जुगसंवच्छरे पमाणसंवच्छरे लक्खणसंव-
 च्छरे सणिचरसंवच्छरे, जुगसंवच्छरे पंचविहे प० तं० चंदे चंदे अभिवट्ठिए
 चंदे अभिवट्ठिए चेव, पमाणसंवच्छरे पंचविहे प० तं० णक्खत्ते चंदे उक्क
 आइन्ने अभिवट्ठिए लक्खणसंवच्छरे पंचविहे प० तं० स्रमां णक्खत्ता जोगं

जोयंति समगं उऊ परिणमंति; णच्चुहं णाइसीओ बहूदओ होइ णक्खत्ते (१)
 ससिसगलपुण्णमासी जोएइ विसमचारिणक्खत्ते कडुओ बहूदओ या तमाहु संवच्छरं
 चंदं (२) विसमं पवालिगो परिणमंति, अणुदसु देंति पुप्फफलं; वासं ण सम्म वासइ
 तमाहु संवच्छरं कम्मं (३) पुढविदगणं तु रसं पुप्फफलाणं तु देइ आदिच्चो;
 अप्पेण वि वासेणं सम्मं निप्फज्जे सस्सं (४) आइच्चतेयतविया खणलवदिवसा
 उऊ परिणमंति; पूरंति रेणुथलयाइं, तमाहु अभिवद्धियं जाण ५ (५३९) **पंच-**
विहे जीवस्स निज्जाणमग्गे प० तं० पाएहिं ऊरुहिं उरेणं सिरेणं सव्वंगेहिं
 पाएहिं निज्जाणमाणे णिरयंगामी भवइ ऊरुहिं निज्जाणमाणे तिरियंगामी भवइ
 उरेणं निज्जाणमाणे मणुयंगामी भवइ सिरेणं निज्जाणमाणे देवगामी भवइ सव्वंगेहिं
 निज्जाणमाणे सिद्धिगइपज्जवसाणे पण्णत्ते, **पंचविहे छेयणे** प० तं० उप्पायच्छेयणे
 वियच्छेयणे बंधच्छेयणे पएस्सच्छेयणे दोधारच्छेयणे, **पंचविहे आणंतरे**
 प० तं० उप्पायणंतरे वियणंतरे पएसाणंतरे समयाणंतरे सामण्णाणंतरे ।
पंचविहे अणंतरे प० तं० णामणंतरे ठवणाणंतरे दव्वाणंतरे गणणाणंतरे पए-
 साणंतरे, **अहवा पंचविहे अणंतरे** प० तं० एगओडणंतरे दुहओणंतरे देस-
 वित्थाराणंतरे सव्ववित्थाराणंतरे सासयाणंतरे ॥ ५४० ॥ **पंचविहे णाणे** प० तं०
 आभिणिबोहियणाणे सुयणाणे ओहिणाणे मणपज्जवणाणे केवलणाणे **पंचविहे**
णाणावरणिज्जे कम्मे प० तं० आभिणिबोहियणाणावरणिज्जे जाव केवलणाणा-
 वरणिज्जे, **पंचविहे सज्झाए** प० तं० वायणा पुच्छणा परियट्ठणा अणुप्पेहा धम्मकहा,
पंचविहे पच्चक्खाणे प० तं० सद्दहणसुद्धे विणयसुद्धे अणुभासणासुद्धे अणुपालणा-
 सुद्धे भावसुद्धे **पंचविहे पडिक्कमणे** प० तं० आसवदारपडिक्कमणे मिच्छत्तपडि-
 क्कमणे कसायपडिक्कमणे जोगपडिक्कमणे भावपडिक्कमणे **पंचहिं ठाणेहिं सुत्तं**
वाएज्जा तं० संगहट्ठयाए उवगहणट्ठयाए निज्जरणट्ठयाए सुत्ते वा मे पज्जवयाए भवि-
 स्सइ सुत्तस्स वा अवोच्छित्तिणयट्ठयाए **पंचहिं ठाणेहिं सुत्तं सिक्खिज्जा** तं०
 णाणट्ठयाए दंसणट्ठयाए चरितट्ठयाए वुग्गहविमोयणट्ठयाए अहत्थे वा भावे जाणि-
 स्सामीति कडु, सोहम्मीसाणेषु णं कप्पेसु विमाणा पंचवण्णा प० तं० किण्हा जाव
 सुक्किळा (१) सोहम्मीसाणेषु णं कप्पेसु विमाणा पंचजोयणसयाइं उद्धं उच्चत्तेणं प०
 (२) बंभलगलंतएसु णं कप्पेसु देवाणं भवधारणिज्जसरीरगा उक्कोसेणं पंचरयणीओ
 उद्धं उच्चत्तेणं प० (३) णेरइया णं पंचवण्णे पंचरसे पोग्गले बंधेसु वा बंधंति वा
 बंधिस्संति वा तं० किण्हे जाव सुक्किळे, तित्ते जाव मधुरे, एवं जाव वेमाणिया
 ॥ ५४१ ॥ जंबुदीवे दीवे मंदरस्स पव्वयस्स दाहिणेणं गंगामहाणइं पंचमहाणइंओ

समर्पेति तं० जउणा सरऊ आदी कोसी मही (१) जंबूमंदरस्स दाहिणेणं सिंधुमहाणइं पंचमहाणदीओ समर्पेति तं० सयइ विभासा वितत्था एरावती चंदभागा (२) जंबूमंदरस्स उत्तरेणं रत्तामहानइं पंचमहाणइंओ समर्पेति तं० किण्हा महाकिण्हा नीला महानीला महातीरा (३) जंबूमंदरस्स उत्तरेणं रत्तावइं महाणइं पंचमहाणइंओ समर्पेति तं० इंदा इंदसेणा सुसेणा वारिसेणा महाभोया (४) ॥ ५४२ ॥

पंच तित्थयरा कुमारवासमज्जे वसित्ता मुंडा जाव पव्वइया तं० बासुपुजे मल्ली अरिठुनेमी पासे वीरे । चमरचंचाए णं रायहाणीए **पंच सभा** प० तं० सुहम्मासभा उववायसभा अभिसेयसभा अलंकारियसभा ववसायसभा, एगमेगे णं इंदठ्ठाणे णं पंच सभाओ प० तं० सुहम्मासभा जाव ववसायसभा । पंच णक्खत्ता पंच तारा प० तं० धणिट्ठा रोहिणी पुणव्वसू हत्थो विमाहा, जीवा णं पंचठ्ठाणणिव्वत्तिए पोग्गले पावकम्मत्ताए चिणिसु वा चिणंति वा चिणिसंति वा तं० एगिदियनिव्वत्तिए जाव पंचिदियनिव्वत्तिए एवं चिण उवचिण बंध उदीर वेद तह णिज्जरा चेव, पंचपएसिया खंधा अणंता प० पंचपएसोगाढा पोग्गला अणंता प० जाव पंच गुणलुक्खा पोग्गला अणंता पण्णत्ता ॥ ५४३ ॥ **पंचमहाणस्स तइओ उइसो समत्तो, पंचमहाणं समत्तं ॥**

छठ्ठाणं

छहिं ठाणेहिं संपन्ने अणगारे अरिहइ गणं धारित्तए तं० सङ्घी पुरिसजाए, सचे पुरिसजाए, मेहावी पुरिसजाए, बहुस्सए पुरिसजाए, सत्तिमं, अप्पाहिगरणे, छहिं ठाणेहिं निगंथे निगंथिं गिण्हसाणे वा अवलंबसाणे वा नाइक्कमइ, तं० खित्तचित्तं, दित्तचित्तं, जक्खाइठ्ठं, उम्मायपत्तं, उवसग्गपत्तं, साहिरणं ॥ ५४४ ॥ छहिं ठाणेहिं निगंथा निगंथीओ य साहम्मियं कालगयं सभायरमाणा णाइक्कमन्ति तं० अंतोहिंतो वा बाहिं णीणेमाणा, बाहिंहिंतो वा निब्बाहिं णीणेमाणा, उवेहमाणा वा, उवासमाणा वा, अणुन्नवेमाणा वा, तुसिणीए वा संपव्वयमाणा ॥ ५४५ ॥ छ ठाणाइं छउमत्थे सव्वभावेणं ण जाणइ ण पासइ तं० धम्मत्थिकायमधम्मत्थिकायमागासं जीवमसरोरपडिबद्धं परमाणुपोग्गलं सइं एयाणि चेव उप्पन्नानाणंदसणधरे अरहा जिणे जाव सव्वभावेणं जाणइ पासइ धम्मत्थिकायं जाव सइं ॥ ५४६ ॥ छहिं ठाणेहिं सव्वजीवाणं णत्थि इद्धीति वा जुत्तीति वा जसेइ वा बलेइ वा वीरिएइ वा पुरिसकार जाव परक्कमेति वा तं० जीवं वा अजीवं करणयाए, अजीवं वा जीवं करणयाए, एगसमएणं वा दो भासाओ भासित्तए, सयं कडं वा कम्मं वेएमि वा मा वा वेएमि,

परमाणुपोग्गलं वा छिंदित्वा वा भिंदित्वा वा, अगणिकाएण वा समोदहित्वा,
 बहियां वा लोमंता गमण्याए ॥ ५४७ ॥ छज्जीवनिकाया प० तं० पुढविकाइया
 जाव तसकाइया ॥ ५४८ ॥ छ तारग्गहा प० तं० छुक्के, बुहे, बहस्सई, अंगारए,
 सणिचरे, केऊ ॥ ५४९ ॥ छव्विहा संसारसमावज्जंगा जीवा प० तं० पुढविका-
 इया जाव तसकाइया ॥ ५५० ॥ पुढविकाइया छगइया छआगइया प० तं०
 पुढविकाइए पुढविकाइएसु उव्वज्जमाणे पुढविकाइएहिंतो वा जाव तसकाइएहिंतो वा
 उव्वज्जेजा, सो चेव णं से पुढविकाइए पुढविकाइयत्तं विप्पज्जमाणे पुढविकाइयत्ताए
 वा जाव तसकाइयत्ताए वा गच्छेजा, आउकाइयावि छगइया छआगइया, एवं चेव
 जाव तसकाइया ॥ ५५१ ॥ छव्विहा सव्वजीवा प० तं० आभिणिबोहियणाणी
 जाव केवलणाणी, अन्नाणी ॥ ५५२ ॥ अहवा छव्विहा सव्वजीवा प० तं०
 एगिंदिया जाव पंचिंदिया, अणिंदिया ॥ ५५३ ॥ अहवा छव्विहा सव्वजीवा
 प० तं० ओरालियसरीरी, वेउव्वियसरीरी, आहारगसरीरी, तेयगसरीरी, कम्मगस-
 रीरी, असरीरी ॥ ५५४ ॥ छव्विहा तणवणस्सइकाइया प० तं० अग्गाबीया मूलबीया
 पौरबीया खंधबीया बीयरुहा संमुच्छिमा ॥ ५५५ ॥ छठाणाई सव्वजीवाणं णो
 सुलभाई भवंति, तं० माणुस्सए भवे, आयरिए खित्ते जम्मं, सुकुले पच्चायाती, केव-
 लिपन्नत्तस्स धम्मस्स सवणया सुयस्स वा सद्दहणया, सद्दहियस्स वा पत्तियस्स वा
 रोइयस्स वा सम्मं काएणं फासणया ॥ ५५६ ॥ छ इंदियत्था प० तं० सोईदियत्थे
 जाव फासिंदियत्थे णोईदियत्थे ॥ ५५७ ॥ छव्विहे संवरे प० तं० सोईदिय-
 खेवरं जाव फासिंदियसंवरं णोईदियसंवरं ॥ ५५८ ॥ छव्विहे असंवरं प० तं०
 सोईदियअसंवरं, जाव फासिंदिअसंवरं, णोईदिअसंवरं ॥ ५५९ ॥ छव्विहे
 साए प० तं० सोईदियसाए जाव नोईदियसाए ॥ ५६० ॥ छव्विहे असाए
 प० तं० सोईदियअसाए, जाव नोईदियअसाए ॥ ५६१ ॥ छव्विहे पायच्छित्ते
 प० तं० आलोयणारिहे, पडिक्कमणारिहे, तदुभयारिहे, विवेगारिहे, विउस्स-
 ग्गारिहे, तवारिहे ॥ ५६२ ॥ छव्विहा मणुस्सा प० तं० जंबूदीवगा, धायइ-
 खंडदीवपुरच्छिमद्धगा, धायइखंडदीवपच्चत्थिमद्धगा, पुक्खरवरदीवद्धपुरत्थिमद्धगा,
 पुक्खरवरदीवद्धपच्चत्थिमद्धगा, अंतरदीवगा, अहवा छव्विहा मणुस्सा प० तं०
 संमुच्छिममणुस्सा, कम्मभूमगा अकम्मभूमगा अंतरदीवगा, गब्भवक्कंतिमणुस्सा
 कम्मभूमिगा अकम्मभूमिगा अंतरदीवगा ॥ ५६३ ॥ छव्विहा इद्धिमंता मणुस्सा प०
 तं० अरहंता, चक्कवट्ठी, बलदेवा, वासुदेवा, चारणा, विजाहरा ॥ ५६४ ॥ छव्विहा
 अणिद्धिमंता मणुस्सा प० तं० हेमवंतगा हेरन्नवंतगा हरिवंसगा रम्मगवंसगा कुर्-

वासिणो अंतरदीवगा ॥ ५६५ ॥ छविहा ओसप्पिणी प० तं० सुसमसुसमा जाव
 दुसमसुसमा, छविहा उस्सप्पिणी प० तं० दुसमसुसमा जाव सुसमसुसमा ॥ ५६६ ॥
 जंबुदीवे दीवे भरहेरवए सु वासेसु तीताए उस्सप्पिणीए सुसमसुसमाए समाए मणुया
 छच्च धणुसहस्साई उद्धमुच्चतेणं हुत्था, छच्च अद्धपलिओवमाई परमाउं पालयित्था
 ॥ ५६७ ॥ जंबुदीवे दीवे भरहेरवए सु वासेसु इमीसे ओसप्पिणीए सुसमसुसमाए समाए
 एवं चेव ॥ ५६८ ॥ जंबू भरहेरवए आगमिस्साए उस्सप्पिणीए सुसमसुसमाए समाए
 एवं चेव, जाव छच्च अद्धपलिओवमाई परमाउं पालइस्संति ॥ ५६९ ॥ जंबुदीवे
 दीवे देवकुरुत्तरकुरासु मणुया छधणुस्सहस्साई उद्धं उच्चतेणं प० छच्च अद्धपलि-
 ओवमाई परमाउं पालेति ॥ ५७० ॥ एवं धायइसंडदीवपुरच्छिमद्धे चत्तारि आला-
 वगा जाव पुक्खरवरदीववृषच्चच्छिमद्धे चत्तारि आलावगा ॥ ५७१ ॥ छविहे
 संघयणे प० तं० वइरोसभणारायसंघयणे, उसभणारायसंघयणे, नारायसंघयणे, अद्ध-
 नारायसंघयणे, कीलियासंघयणे, छेवटुसंघयणे ॥ ५७२ ॥ छविहे सठाणे प० तं०
 समचउरसे, णग्गोहपरिमंडले, साई, खुजे, वामणे, हुंडे ॥ ५७३ ॥ छट्ठाणां
 अणत्तवओ अहियाए असुभाए जाव अणाणुगामियत्ताए भवंति, तं० परियाए
 परियाले सुए तवे लोभे पूयासक्कारे ॥ ५७४ ॥ छट्ठाणा अत्तवतो हियाए जाव
 आणुगामियत्ताए भवंति तं० परियाए परियाले जाव पूयासक्कारे ॥ ५७५ ॥ छविहा
 जाइआरिया मणुस्सा प० तं० अंबट्टा य कलंदा य वेदेहा वेदिगाइया; हरितां
 चुंचुणा चेव छप्पेया इब्भजाइओ ॥ ५७६ ॥ छविहा कुलारिया मणुस्सा
 प० तं० उग्गा भोगा राइन्ना इक्खागा णाया कोरवा ॥ ५७७ ॥ छविहा लोगट्टिई
 प० तं० आगासपइट्टिए वाए वायपइट्टिए उदही उदहिपइट्टिया पुढवी पुढविपइ-
 ट्टिया तसा थावरा पाणा अजीवा जीवपइट्टिया जीवा कम्मपइट्टिया ॥ ५७८ ॥
 छट्ठिसाओ प० तं० पाईणा पडीणा दाहिणा उईणा उड्ढा अहा ॥ ५७९ ॥ छहिं
 दिसाहिं जीवाणं गई पवत्तइ तं० पाईणाए जाव अहाए एवमागई वक्कंती आहारं
 वुड्ढी निवुड्ढी विगुब्बणा गइपरियाए समुग्घाए कालसंजोगे दंसणाभिगमे णाणाभि-
 गमे जीवाभिगमे अजीवाभिगमे एवं पंचिदियतिरिक्खजोणियाणावि मणुस्साणवि
 ॥ ५८० ॥ छहिं ठाणेहिं समणे णिग्गंथे आहारमाहारेमाणे णाइक्कमइ तं० वेयण-
 वेयावचे इरियट्टाए य संजमट्टाए, तह पाणवत्तियाए छट्ठं पुण धम्मचित्ताए, छहिं
 ठाणेहिं समणे णिग्गंथे आहारं वोच्छिदमाणे णाइक्कमइ तं० आतंके उवसग्गे तित्ति-
 क्खणे बंभचेरगुतीए पाणिदया तवहेउं सरीरुच्छेयणट्टाए ॥ ५८१ ॥ छहिं
 ठाणेहिं आया उम्मायं पाउणेज्जा तं० अरहंताणमवणं वदमाणे, अरहंतपञ्चत्तस्स

धम्मस्स अवणं वदमाणे, आयरियउवज्झायाणमवचं वदमाणे, चाउव्वचस्स संघस्स अवचं वदमाणे, जक्खावेसेण चैव मोहणिज्जस्स चैव कम्मस्स उदएणं ॥ ५८२ ॥ छव्विहे पमाए प० तं० मज्जपमाए, णिद्वपमाए, विसयपमाए, कसाय-
पमाए, जूयपमाए, पडिलेहणापमाए ॥ ५८३ ॥ छव्विहा पमायपडिलेहणा प० तं० आरमडा संमदा, वज्जेयव्वा य मोसली तइया, पप्फोडणा चउत्थी विक्खित्ता
वेइया छट्ठी (१) छव्विहा अप्पमायपडिलेहणा प० तं० अणच्चावियं अवलितं, अणाणुबंधि अमोसलिं चैव छप्पुरिमा णव खोडा पाणी पाणविसोहणी (२)
॥ ५८४ ॥ छ लेसाओ प० तं० कण्हलेसा जाव सुक्कलेसा, पंचिदियतिरिक्खजो-
णियाणं छ लेसाओ प० तं० कण्हलेसा जाव सुक्कलेसा, एवं मणुस्सदेवाण वि
॥ ५८५ ॥ सक्कस्स णं देविंदस्स देवरज्जो सोमस्स महारज्जो छ अग्गमहिंसीओ प०
॥ ५८६ ॥ सक्कस्स णं देविंदस्स देवरण्णो जमस्स महारज्जो छ अग्गमहिंसीओ प०
॥ ५८७ ॥ ईसाणस्स णं देविंदस्स मज्झिमपरिसाए देवाणं छ पलिओवमाई ठिई
प० ॥ ५८८ ॥ छ दिसिकुमारिमहत्तरियाओ प० तं० रुवा रुतंसा सुरुवा रुववई
रुवकंता रुयप्पभा, छ विज्जुमारिमहत्तरियाओ प० तं० आला सक्का सतेरा सोया-
मणी इंदा घणविज्जुया ॥ ५८९ ॥ धरणस्स णं नागकुमारिंदस्स नागकुमाररज्जो
छ अग्गमहिंसीओ प० तं० आला सक्का सतेरा सोयामणी इंदा घणविज्जुया,
भूयाणंदस्स णं नागकुमारिंदस्स नागकुमाररण्णो छ अग्गमहिंसीओ प० तं० रुवा
रुवंसा सुरुवा रुववई रुवकंता रुयप्पभा, जहा धरणस्स तहा सव्वेसिं दाहिणिल्लाणं
जाव घोसस्स, जहा भूयाणंदस्स तहा सव्वेसिं उत्तरिल्लाणं जाव महाघोसस्स
॥ ५९० ॥ धरणस्स णं नागकुमारिंदस्स नागकुमाररज्जो छसामाणियसाहस्सीओ
पण्णत्ताओ, एवं भूयाणंदस्स वि जाव महाघोसस्स ॥ ५९१ ॥ छव्विहा उग्गहमई
प० तं० खिप्पमोगिण्हइ बहुमोगिण्हइ बहुविधमोगिण्हइ धुवमोगिण्हइ अणिसि-
यमोगिण्हइ असंदिद्धमोगिण्हइ ॥ ५९२ ॥ छव्विहा ईहामई प० तं० खिप्पमी-
हइ, बहुमीहइ, जाव असंदिद्धमीहइ ॥ ५९३ ॥ छव्विहा अवायमई प० तं०
खिप्पमवेइ जाव असंदिद्धमवेइ छव्विहा धारणा प० तं० बहुं धारेइ बहुविहं धारेइ
पोराणं धारेइ दुद्धरं धारेइ अणिसियं धारेइ असंदिद्धं धारेइ ॥ ५९४ ॥ छव्विहे
बाहिरए तवे प० तं० अणसणं ओमोयरिया भिक्खायरिया रसपरिच्चाए कायकिल्लेसो
पडिसंलीणया ॥ ५९५ ॥ छव्विहे अब्भंतरीए तवे प० तं० पायच्छित्तं विणजो
वेयावचं तहेव सज्जाओ ज्ञाणं विउस्सग्गो ॥ ५९६ ॥ छव्विहे विवादे प० तं०
ओसक्कत्ता उस्सक्कत्ता अणुलोमइत्ता पडिलोमइत्ता भइत्ता मेलइत्ता ॥ ५९७ ॥

छविहा खुदा पाणा प० तं० तेईदिया तेईदिया चउरिदिया संमुच्छिमपंचिदियतिरि-
 क्खजोणिया तेउकाइया वाउकाइया ॥ ५९८ ॥ छविहा गोयरचरिया प० तं० पेडा
 अद्धपेडा गोमुत्तिया पतंगवीहिया संबुक्कवट्टा गंतुपच्चागया ॥ ५९९ ॥ जंबुदीवे दीवे
 मंदरस्स पव्वयस्स दाहिणेणमिमीसे रयणप्पभाए पुढवीए छ अवक्कंतमहानिरया
 प० तं० लोले लोलुए उद्धे निद्धे जरए पज्जरए ॥ ६०० ॥ चउत्थीए णं पंकप्पभाए
 पुढवीए छ अवक्कंता महानिरया प० तं० आरे वारे मारे रोरे रोए खाडखडे
 ॥ ६०१ ॥ बंभलोए णं कप्पे छ विमाणपत्थडा प० तं० अरए विरए नीरए निम्मले
 वित्तिमिरे विसुद्धे ॥ ६०२ ॥ चंदस्स णं जोइसिंदस्स जोइसरन्नो छ णक्खत्ता पुवं
 भागा समखेत्ता तीसइमुहुत्ता प० तं० पुव्वाभद्वया कत्तिया महा पुव्वाफग्गुणी
 मूलो पुव्वासाढा ॥ ६०३ ॥ चंदस्स णं जोइसिंदस्स जोइसरन्नो छ णक्खत्ता
 णत्तंभागा अवद्धुखेत्ता पजरसमुहुत्ता प० तं० सयभिसया भरणी अद्दा अस्सेसा
 साई जेट्ठा ॥ ६०४ ॥ चंदस्स णं जोइसिंदस्स जोइसरन्नो छ णक्खत्ता उभयंभागा
 दिवद्धुखेत्ता पणयालीसमुहुत्ता प० तं० रोहिणी पुणव्वसू उत्तराफग्गुणी विसाहा
 उत्तरासाढा उत्तराभद्वया ॥ ६०५ ॥ अभिचंदे णं कुलकरे छ धणुसयाई उद्धं उच्च-
 त्तेणं हुत्था ॥ ६०६ ॥ भरहे णं राया चाउरंतचक्कवट्ठी छ पुव्वसयसहस्साई महाराया
 हुत्था ॥ ६०७ ॥ पासस्स णं अरहओ पुरिसादाणियस्स छस्सया वाईणं सदैवमणुया-
 खुराए परिसाए अपराजियाणं संपया होत्था ॥ ६०८ ॥ वासुपुजे णं अरहा छहिं पुरिस-
 साएहिं सद्धि मुंडे जाव पव्वइए ॥ ६०९ ॥ चंदप्पमे णं अरहा छम्मासे छउमत्थे होत्था
 ॥ ६१० ॥ तेईदियाणं जीवाणं असमारभमाणस्स छविहे संजमे कज्जइ तं० घाणामाओ
 सोक्खाओ अववरोवेत्ता भवति घाणामएणं दुक्खेणं असंजोगेत्ता भवइ जिब्बामाओ
 सोक्खाओ अववरोवेत्ता भवइ एवं चेव फासामाओ वि ॥ ६११ ॥ तेईदियाणं
 जीवाणं समारभमाणस्स छविहे असंजमे कज्जइ तं० घाणामाओ सोक्खाओ ववरो-
 वेत्ता भवइ घाणामएणं दुक्खेणं संजोगेत्ता भवइ जाव फासामएणं दुक्खेणं संजोगेत्ता
 भवइ ॥ ६१२ ॥ जंबुदीवे दीवे छ अकम्मभूमीओ प० तं० हेमवए हेरणवए हरि-
 वासे रम्मगवासे देवकुरा उत्तरकुरा ॥ ६१३ ॥ जंबुदीवे दीवे छव्वासा प० तं० भरहे
 एरवए हेमवए हेरणवए हरिवासे रम्मगवासे ॥ ६१४ ॥ जंबुदीवे दीवे छव्वासाहर-
 पव्वया प० तं० चुल्लहिमवंते महाहिमवंते निसडे नीलवंते रुप्पी सिहरी ॥ ६१५ ॥
 जंबूमंदरदाहिणे णं छ कूडा प० तं० चुल्लहिमवंतकूडे वेसमणकूडे महाहिमवंतकूडे
 वेरुलियकूडे निसडकूडे रुयगकूडे ॥ ६१६ ॥ जंबूमंदरउत्तरेणं छकूडा प० तं०
 नीलवंतकूडे उवदंसणकूडे रुप्पिकूडे मणिकंचणकूडे सिहरिकूडे तिगिच्छकूडे ॥ ६१७ ॥

जंबुद्वीवे दीवे छ महद्दहा प० तं० पउमद्दहे महापउमद्दहे तिगिच्छद्दहे केसरिद्दहे
 महापोंडरीयद्दहे पुंडरीयद्दहे ॥ ६१८ ॥ तत्थ णं छ देवयाओ महद्धियाओ जाव
 पलिओवमट्ठिइयाओ परिवसंति तं० सिरी हिरिं धिई किती बुद्धी लच्छी ॥ ६१९ ॥
 जंबूमंदरदाहिणेणं छ महानईओ प० तं० गंगा सिंधू रोहिया रोहियंसा हरी हरिकंता
 ॥ ६२० ॥ जंबूमंदरस्स उत्तरे णं छ महानईओ प० तं० णरकंता णारिकंता सुवण्ण-
 कूला रुप्पकूला रत्ता रत्तवई ॥ ६२१ ॥ जंबूमंदरपुरच्छिमे णं सीयाए महानईए
 उभयकूले छ अंतरनईओ प० तं० गाहावई दहावई पंकवई तत्तजला मत्तजला
 उम्मत्तजला ॥ ६२२ ॥ जंबूमंदरपच्चत्थिमे णं सीओयाए महानईए उभयकूले छ
 अंतरनईओ प० तं० खीरोदा सीहसोया अंतोवाहिणी उम्मिमालिणी फेणमालिणी
 गंभीरमालिणी ॥ ६२३ ॥ धायइसंडदीवपुरच्छिमद्धेणं छ अकम्मभूमीओ प० तं०
 हेमवए एवं जहा जंबुद्वीवे २ तहा णई जाव अंतरणईओ जाव पुक्खरवरदीवद्धपच्चत्थि-
 मद्धे भाणियव्वं ॥ ६२४ ॥ छ उऊ प० तं० पाउसे वरिसारत्ते सरए हेमंते वसंते गिम्हे
 ॥ ६२५ ॥ छ ओमरत्ता प० तं० तइए पव्वे सत्तमे पव्वे एक्कारसमे पव्वे पन्नरसमे
 पव्वे एगूणवीसइमे पव्वे तेवीसइमे पव्वे ॥ ६२६ ॥ छ अइरत्ता प० तं० चउत्थे
 पव्वे अठ्ठमे पव्वे दुवालसमे पव्वे सोलसमे पव्वे वीसइमे पव्वे चउवीसइमे पव्वे
 ॥ ६२७ ॥ आभिणिबोहियणाणस्स णं छव्विहे अत्थोग्गहे प० तं० सोईदियत्थोग्गहे
 जाव नोईदियत्थोग्गहे ॥ ६२८ ॥ छव्विहे ओहिणाणे प० तं० आणुगामिए
 अणणुगामिए वद्धमाणए हीयमाणए पडिवाई अपडिवाई ॥ ६२९ ॥ नो कप्पइ
 निग्गंथाण वा निग्गंथीण वा इमाई छअवयणाई वइत्तए तं० अलियवयणे हीलि-
 यवयणे खिसियवयणे फरुसवयणे गारत्थियवयणे विउसविंयं वा पुणो उदीरितए
 ॥ ६३० ॥ छ कप्पस्स पत्थारा प० तं० पाणाइवायस्स वायं वयमाणे
 सुसावायस्स वायं वयमाणे अदिच्चादाणस्स वायं वयमाणे अविरइवायं वयमाणे
 अपुरिसवायं वयमाणे दासवायं वयमाणे इच्चेए छ कप्पस्स पत्थारे पत्थरेत्ता सम्मम-
 परिपूरेमाणे तट्ठाणपत्ते ॥ ६३१ ॥ छ कप्पस्स पलिमंथू प० तं० कोकुइए संजमस्स
 पलिमंथू मोहरिए सच्चवयणस्स पलिमंथू चक्खुलोलए इरियावहियाए पलिमंथू
 तित्तिणिए एसणागोयरस्स पलिमंथू इच्छालोभिए मुत्तिमग्गस्स पलिमंथू भिज्जाणि-
 दाणकरणे मोक्खमग्गस्स पलिमंथू सव्वत्थ भगवथा अणिदाणता पसत्था ॥ ६३२ ॥
 छव्विहा कप्पठिई प० तं० सामाइयकप्पठिई छेओवट्ठावणियकप्पठिई निव्विसमाण-
 कप्पठिई णिव्विट्ठकप्पठिई जिणकप्पठिई थिविरकप्पठिई ॥ ६३३ ॥ समणे भगवं
 महावीरे छट्ठेणं भत्तेणं अपाणएणं मुंडे जाव पव्वइए ॥ ६३४ ॥ समणस्स णं

भगवओ महावीरस्स छट्ठेणं भत्तेणं अपाणएणं अणंते अणुत्तरे जाव समुप्पण्णे
 ॥ ६३५ ॥ समणे भगवं महावीरे छट्ठेणं भत्तेणं अपाणएणं सिद्धे जाव सव्वदुक्ख-
 प्पहीणे ॥ ६३६ ॥ सणंकुमारमाहिंदेसु णं कप्पेसु विमाणा छ जोगणसयाई उद्धं उच्च-
 त्तेणं प० ॥ ६३७ ॥ सणंकुमारमाहिंदेसु णं कप्पेसु देवाणं भवधारणिज्जगा सरीरगा
 उक्कोसेणं छ रयणीओ उद्धं उच्चत्तेणं पण्णत्ता ॥ ६३८ ॥ छव्विहे भोगणपरिणामे
 प० तं० मणुत्ते रसिए पीणणिज्जे विंहुणिज्जे [मयणणिज्जे दीवणिज्जे] दप्पणिज्जे
 ॥ ६३९ ॥ छव्विहे विसपरिणामे प० तं० डक्के भुत्ते निवइए मंसाणुसारी सोणि-
 याणुसारी अट्ठिमिंजाणुसारी ॥ ६४० ॥ छव्विहे पट्ठे प० तं० संसयपट्ठे वुग्गहपट्ठे अणु-
 जोगी अणुलोमे तहणाणे अतहणाणे ॥ ६४१ ॥ चमरचंचा णं रायहाणी उक्कोसेणं
 छम्मासा विरहिया उववाएणं ॥ ६४२ ॥ एगमेगे णं इंदट्ठाणे उक्कोसेणं छम्मासा
 विरहिए उववाएणं ॥ ६४३ ॥ अहेसत्तमा णं पुढवी उक्कोसेणं छम्मासा विरहिया
 उववाएणं ॥ ६४४ ॥ सिद्धिगई णं उक्कोसेणं छम्मासा विरहिया उववाएणं ॥ ६४५ ॥
 छव्विहे आउयबंधे प० तं० जाइणामनिधत्ताउए गइणामणिधत्ताउए ठिइणामणिध-
 त्ताउए ओगाहणाणामणिधत्ताउए पएसणामणिधत्ताउए अणुभावणामणिधत्ताउए
 ॥ ६४६ ॥ णेरइयाणं छव्विहे आउयबंधे प० तं० जाइणामणिधत्ताउए जाव
 अणुभावणामणिधत्ताउए एवं जाव वेमाणियाणं ॥ ६४७ ॥ णेरइया णियमा छम्मा-
 सावसेसाउया परभवियाउयं पगरेंति, एवामेव असुरकुमारावि जाव थणियकुमारा,
 असंखेज्जवासाउया सन्निपंचिदियतिरिक्खजोणिया णियमं छम्मासावसेसाउया पर-
 भवियाउयं पगरेंति, असंखेज्जवासाउया सन्निमणुस्सा णियमं जाव पगरेंति, वाण-
 मंतरा जोइसवासिया वेमाणिया जहा णेरइया ॥ ६४८ ॥ छव्विहे भावे प० तं०
 ओइइए उवसमिए खइए खयोवसमिए पारिणामिए संनिवाइए ॥ ६४९ ॥ छव्विहे
 पडिक्कमणे प० तं० उच्चारपडिक्कमणे पासवणपडिक्कमणे इत्तरिए आवकहिए जंकिचि-
 मिच्छा सोमणंतिए ॥ ६५० ॥ कत्तियाणक्खत्ते छत्तारे प० ॥ ६५१ ॥ असिलेसा-
 णक्खत्ते छत्तारे प० ॥ ६५२ ॥ जीवा णं छट्ठाणनिव्वत्तिए पोग्गळे पावकम्मत्ताए
 चिणिंसु वा चिणंति वा चिणिस्संति वा तं० पुढविकाइयनिव्वत्तिए जाव तसकायनि-
 व्वत्तिए एवं चिण उवचिण बंध उदीर वेय तह णिज्जरा चेव ॥ ६५३ ॥ छप्पएसिया णं
 खंधा अणंता प० ॥ ६५४ ॥ छप्पएसोगाढा पोग्गला अणंता प० ॥ ६५५ ॥ छससय-
 ठिइया पोग्गला अणंता प० ॥ ६५६ ॥ छगुणकालगा पोग्गला जाव छगुणहक्खला
 पोग्गला अणंता पण्णत्ता ॥ ६५७ ॥ छट्ठाणं छट्ठमज्झयणं समत्तं ॥

सत्तमट्ठाणं

सत्तविहे गणावक्कमणे प० तं० सव्वधम्मा रोएमि एगइया रोएमि एगइया गो रोएमि सव्वधम्मा वितिगिच्छामि एगइया वितिगिच्छामि एगइया नो वितिगिच्छामि सव्वधम्मा जुहुणामि एगइया जुहुणामि एगइया गो जुहुणामि इच्छामिणं भंते ! एगल्लविहारपडिअं उवसंपज्जिता णं विहरित्तए ॥ ६५८ ॥ सत्तविहे विभंगणाणे प० तं० एगदिसिलोगाभिगमे, पंचदिसिलोगाभिगमे, किरियावरणे जीवे, मुदग्गे जीवे, अमुदग्गे जीवे, रूवी जीवे, सव्वमिणं जीवा, तत्थ खलु इमे पढमे विभंगणाणे जया णं तहारूवस्स समणस्स वा माहणस्स वा विभंगणाणे समुप्पज्जइ से णं तेणं विभंगणाणेणं समुप्पज्जेणं पासइ पाईणं वा पडीणं वा दाहिणं वा उदीणं वा उड्डं वा जाव सोहम्मे कप्पे तस्स णमेवं भवइ अत्थि णं मम अइसेसे णाणदंसणे समुप्पजे एगदिसिं लोगाभिगमे संतेगइया समणा वा माहणा वा एवमाहंसु पंचदिसिं लोगाभिगमे जे ते एवमाहंसु मिच्छं ते एव माहंसु पढमे विभंगणाणे, अहावरे दोच्चे विभंगणाणे जया णं तहारूवस्स समणस्स वा माहणस्स वा विभंगणाणे समुप्पज्जइ से णं तेणं विभंगणाणेणं समुप्पज्जेणं पासइ पाईणं वा पडीणं वा दाहिणं वा उदीणं वा उड्डं जाव सोहम्मे कप्पे तस्स णं एवं भवइ अत्थि णं मम अइसेसे णाणदंसणे समुप्पज्जे पंचदिसिं लोगाभिगमे संतेगइया समणा वा माहणा वा एवमाहंसु एगदिसिं लोगाभिगमे जे ते एवमाहंसु मिच्छं ते एवमाहंसु दोच्चे विभंगणाणे । अहावरे तच्चे विभंगणाणे जया णं तहारूवस्स समणस्स वा माहणस्स वा विभंगणाणे समुप्पज्जइ, से णं तेणं विभंगणाणेणं समुप्पज्जेणं पासइ पाणे अइवाएमाणा, मुसं वएमाणे अदिशमादितमाणे मेहुणं पडिसेवमाणे परिग्गहं परिणिहमाणे, राइभोयणं भुंजमाणे वा पावं च णं कम्म कीरमाणं गो पासइ तस्स णमेवं भवइ अत्थि णं मम अइसेसे णाणदंसणे समुप्पजे किरियावरणे जीवे संतेगइया समणा वा माहणा वा एवमाहंसु गो किरियावरणे जीवे जे ते एवमाहंसु मिच्छं ते एवमाहंसु तच्चे विभंगणाणे । अहावरे चउत्थे विभंगणाणे जया णं तहारूवस्स समणस्स वा माहणस्स वा जाव समुप्पज्जइ से णं तेणं विभंगणाणेणं समुप्पज्जेणं देवामेव पासइ बाहिरब्भंतरए पोग्गळे परियाइत्ता पुढेगत्तं णाणत्तं फुसिया फुरित्ता फुट्ठित्ता विकुव्वित्ता णं विकुव्वित्ता णं चिट्ठित्तए तस्स णमेवं भवइ अत्थि णं मम अइसेसे णाणदंसणसमुप्पजे मुदग्गे जीवे संतेगइया समणा वा माहणा वा एवमाहंसु अमुदग्गे जीवे, जे ते एवमाहंसु मिच्छं ते एवमाहंसु चउत्थे विभंगणाणे, अहावरे पंचमे विभंगणाणे जया णं तहारूवस्स समणस्स जाव समुप्पज्जइ, से णं तेणं

विभंगणाणेणं समुप्पन्नेणं देवामेव पासइ बाहिरब्भितरए पोग्गलए अपरियायिइत्ता पुढेगत्तं णाणत्तं जाव विउव्वित्ता णं चिट्ठित्तए तस्स णमेवं भवइ अत्थि जाव समुप्पन्ने अमुदग्गे जीवे, संतेगइया समणा वा माहणा वा एवमाहंसु मुदग्गे जीवे, जे ते एवमाहंसु मिच्छं ते एवमाहंसु, पंचमे विभंगणाणे । अहावरे छट्ठे विभंगणाणे, जया णं तहारुवस्स समणस्स वा माहणस्स वा जाव समुप्पज्जति, से णं तेणं विभंगणाणेणं समुप्पन्नेणं देवामेव पासइ बाहिरब्भितरए पोग्गले परियाइत्ता वा, अपरियायिइत्ता वा पुढेगत्तं णाणत्तं फुसेत्ता जाव विउव्वित्ता चिट्ठित्तए तस्स णमेवं भवइ, अत्थि णं मम अइसेसे णाणदंसणे समुप्पन्ने रूवी जीवे संतेगइया समणा वा माहणा वा एवमाहंसु अरूवी जीवे जे ते एवमाहंसु मिच्छं ते एवमाहंसु छट्ठे विभंगणाणे । अहावरे सत्तमे विभंगणाणे जया णं तहारुवस्स समणस्स वा माहणस्स वा विभंगणाणे समुप्पज्जइ, से णं तेणं विभंगणाणेणं समुप्पन्नेणं पासइ सुहुमेणं वाउकाएणं फुडं पोग्गलकायं एयंतं वेयंतं चलंतं खुब्भंतं फंदंतं घटंतं उदीरंतं तं तं भावं परिणमंतं तस्स णमेवं भवइ अत्थि णं मम अइसेसे णाणदंसणे समुप्पन्ने, सव्वमिणं जीवा संतेगइया समणा वा माहणा वा एवमाहंसु जीवा चेव अजीवा चेव जे ते एवमाहंसु मिच्छं ते एवमाहंसु तस्स णमिमे चत्तारि जीवनिकाया णो सम्ममुवगया भवन्ति तंजहा पुढविकाइया आऊ तेऊ वाउकाइया, इच्चेएहिं चउहिं जीवनिकाएहिं मिच्छादंडं पवत्तेइ, सत्तमे विभंगणाणे ॥ ६५९ ॥ सत्तविहे जोणिसंगहे प० तं० अंडया पोयया जराउया रसया संसेयया संमुच्छिमा उब्भिया, अंडगा सत्तगइया सत्तागइया प० तं० अंडगे अंडगेसु उववज्जमाणे अंडएहिंतो वा पोयएहिंतो वा जाव उब्भिएहिंतो वा उववज्जेजा से चेव णं से अंडए अंडगत्तं विप्पज्जमाणे अंडयत्ताए वा पोययत्ताए वा जाव उब्भियत्ताए वा गच्छेज्जा, पोयया सत्तगइया सत्तागइया, एवं चेव, सत्तणहवि गइरागई भाणियव्वा जाव उब्भियत्ति ॥ ६६० ॥ आयरियउवज्जायस्स णं गणंसि सत्तसंगहठाणा प० तं० आयरियउवज्जाए गणंसि आणं वा धारणं वा सम्मं पडंजित्ता भवइ, एवं जहा पंचठ्ठाणे जाव आयरियउवज्जाए गणंसि आपुच्छियचारी यावि भवइ, नो अणापुच्छियचारी यावि भवइ आयरियउवज्जाए गणंसि अणुप्पन्नाइं उवगरणाइं सम्मं उप्पाइत्ता भवइ, आयरियउवज्जाए गणंसि पुव्वुप्पन्नाइं उवकरणाइं सम्मं सारक्खेत्ता संगोवइत्ता भवइ नो असम्मं सारक्खेत्ता संगोवित्ता भवइ ॥ ६६१ ॥ आयरियउवज्जायस्स णं गणंसि सत्त असंगहठाणा प० तं० आयरियउवज्जाए गणंसि आणं वा धारणं वा नो सम्मं पडंजित्ता भवइ, एवं जाव उवगरणाणं नो सम्मं सारक्खेत्ता संगोवित्ता

भवइ ॥ ६६२ ॥ सत्त पिंडेसणाओ प० ॥ ६६३ ॥ सत्तपाणिसणाओ प० ॥ ६६४ ॥
 सत्त उगहपडिमाओ प० ॥ ६६५ ॥ सत्त सत्तिक्कया प० ॥ ६६६ ॥ सत्त महज्झ-
 यणा प० ॥ ६६७ ॥ सत्तसत्तमिया णं भिक्खुपडिमा एगूणपन्नयाए राईदिहिं एगेण
 य छण्णउएणं भिक्खासएणं अहासुत्तं (अहा अत्थं) जाव आराहिया यावि भवइ
 ॥ ६६८ ॥ अहे लोणे णं सत्त पुढवीओ प० सत्त घणोदहीओ प० सत्त घणवाया
 प० सत्त तणुवाया प० सत्त उवासंतरा प० एएसु णं सत्तसु उवासंतरेसु सत्ततणुवाया
 पइट्ठिया एएसु णं सत्तसु तणुवाएसु सत्त घणवाया पइट्ठिया एएसु णं सत्तसु घणवा-
 एसु सत्त घणोदही पइट्ठिया एतेसु णं सत्तसु घणोदहीसु पिंडलग्गपिहुणसंठाणसंठि-
 आओ सत्त पुढवीओ प० तं० पढमा जाव सत्तमा, एयासि णं सत्तहं पुढवीणं सत्त
 णामवेज्जा प० तं० धम्मा वंसा सेला अंजणा रिठ्ठा मघा माघवई, एयासि णं सत्तहं
 पुढवीणं सत्त गोत्ता प० तं० रयणप्पभा सक्करप्पभा वालुअप्पभा पंकप्पभा धूमप्पभा
 तमा तमतमा ॥ ६६९ ॥ सत्तविहा वायरवाउकाइया प० तं० पाईणवाए पडीण-
 वाए दाहिणवाए उडीणवाए उड्ढवाए अहोवाए विदिसिवाए ॥ ६७० ॥ सत्त संठाणा
 प० तं० बीहे रहस्से वट्टे तंसे चउरंसे पिहुले परिमंडले ॥ ६७१ ॥ सत्त भयट्ठाणा
 प० तं० इहलोगभए परलोगभए आदाणभए अकम्हाभए वेयणभए मरणभए
 असिलोगभए ॥ ६७२ ॥ सत्तहिं ठाणेहिं छउमत्थं जाणेज्जा तं० पाणे अइवाएत्ता
 भवइ सुसं वइत्ता भवइ अदिच्चमाइत्ता भवइ सद्दफरिसरसरुवगंघे आसाएत्ता भवइ
 पूयासक्कारमणुवूहेत्ता भवइ इमं सावज्जंति पण्णवेत्ता पडिसेवेत्ता भवइ णो जहावाई
 तहाकारी यावि भवइ ॥ ६७३ ॥ सत्तहिं ठाणेहिं केवली जाणेज्जा तं० णो पाणे
 अइवाएत्ता भवइ जाव जहावाई तहाकारी यावि भवइ ॥ ६७४ ॥ सत्त मूलगोत्ता
 प० तं० कासवा गोयमा वच्छा कोच्छा कोसिया मंडवा वासिठ्ठा । जे कासवा ते
 सत्तविहा प० तं० ते कासवा ते संबेळा ते गोळा ते वाला ते मुंजइणो ते पव्व-
 पेच्छइणो ते वरिसकण्हा, जे गोयमा ते सत्त विहा प० तं० ते गोयमा ते गग्गा ते
 भारद्वा ते अंगिरसा ते सक्कराभा ते भक्खराभा ते उदगत्ताभा, जे वच्छा ते सत्त
 विहा प० तं० ते वच्छा ते अग्गेया ते भित्तिया ते सामिलिणो ते सेलयया ते
 अट्ठिसेणा ते वीयकम्हा, जे कोच्छा ते सत्तविहा प० तं० ते कोच्छा ते भोग्गलायणा
 ते पिंगलायणा ते कोडीणा ते मंडलिणो ते हारिता ते सोमया, जे कोसिया ते सत्त
 विहा प० तं० ते कोसिया ते कच्चायणा ते सालंकायणा ते गोलिकायणा ते पक्खि-
 कायणा ते अग्गिच्चा ते लोहिता, जे मंडवा ते सत्तविहा प० तं० ते मंडवा ते
 अरिठ्ठा ते समुत्ता ते तेल्ला ते एलावच्चा ते कंडिल्ला ते खारातणा, जे वासिठ्ठा ते

सत्तविहा प० तं० ते वासिठ्ठा ते उंजायणा ते जारेकण्हा ते वग्धावच्चा ते कोडिञ्जा
 ते सण्णी ते पारासरा ॥ ६७५ ॥ सत्त मूलणया प० तं० नेगमे संगहे ववहारे
 उज्जुसुए सहे समभिरुडे एवंभूते ॥ ६७६ ॥ सत्त सरा प० तं० सज्जे रिसमे गंधारे
 मज्झिमे पंचमे सरे, धेवते चेव णिसादे सरा सत्त वियाहिया (१) एएसि णं सत्तण्हं
 सराणं सत्त सरठ्ठाणा प० तं० सज्जं तु अग्गजिब्भाए उरेण रिसमं सरं, कण्डुग्गएण
 गंधारं मज्झजिब्भाए मज्झिमं (२) णासाए पंचमं वूया दंतोठ्ठेण य धेवयं,
 मुद्धाणेण य णेसायं सरठ्ठाणा वियाहिया (३) सत्त सरा जीवनिस्सिया प० तं०
 सज्जं रवइ मयूरो कुकुडो रिसहं सरं, हंसो णदइ गंधारं मज्झिमं तु गवेल्गा (४)
 अह कुसुमसंभवे काले कोइला पंचमं सरं, छट्ठं च सारसा कोंचा णिसायं सत्तमं
 गया (५) सत्तसरा अजीवनिस्सिया प० तं० सज्जं रवइ मुइंगो गोमुही रिसभं
 सरं, संखो णदइ गंधारं मज्झिमं पुण झळरी (६) चउचलणपइठ्ठाणा गोहिया
 पंचमं सरं, आडंबरो य रेवइयं महाभेरी य सत्तमं (७) एएसि णं सत्त सराणं सत्त
 सरलक्खणा प० तं० सज्जेण लभइ वित्तिं कयं च ण विणस्सइ, गावो मित्ता य पुत्ता
 य णारीणं चेव वल्लभो (८) रिसभेण उ एसज्जं, सेणावच्च धणाणि य; वत्थगंधम-
 लंकारं इत्थीओ सयणाणि य (९) गंधारे गीयजुत्तिण्णा वज्जवित्ती कलाहिया,
 भवंति कइणो पन्ना जे अन्ने सत्थपारगा (१०) मज्झिमसरसंपन्ना भवंति सुह-
 जीविणो, खायती पीयती देती, मज्झिमं सरमस्सिओ (११) पंचमसरसंपन्ना भवंति
 पुढवीपई, सूरा संगहकत्तारो अणेगगणणायगा (१२) धेवयसरसंपन्ना भवंति
 कलहपिया; साउणिता वग्गुरिया सोयरिया मच्छवंधा य (१३) चंडाला मुट्ठिया
 सेया, जे अन्ने पावकम्मिणो; गोघातगा य जे चोरा, णिसायं सरमस्सिता (१४)
 एएसि णं सत्तण्हं सराणं तओ गामा प० तं० सज्जगामे मज्झिमगामे गंधारगामे,
 सज्जगामस्स णं सत्त मुच्छणाओ प० तं० मंगी कोरव्वीया हरी य रययणी य
 सारकंता य, छट्ठी य सारसी णाम सुद्धसज्जा य सत्तमा (१५) मज्झिमगामस्स णं
 सत्तमुच्छणाओ प० तं० उत्तरमंदा रयणी उत्तरा उत्तरासमा; आसोकंता य सोवीरा,
 अभीरू हवइ सत्तमा (१६) गंधारगामस्स णं सत्त मुच्छणाओ प० तं० णंदी य
 खुदिमा पूरिमा य चउत्थी य सुद्धगंधारा, उत्तरगंधारा वि य पंचमिया हवइ मुच्छा उ
 (१७) सुटुतरमायामा सा छट्ठी णियमसो उ णायव्वा अह उत्तरायया कोडीमायसा
 सत्तमी मुच्छा (१८) सत्त सराओ कओ संभवति गेयस्स का भवइ जोणी? कइ
 समयो उस्सासा कइ वा गेयस्स आगारा? (१९) सत्त सरा णाभीओ भवंति,
 गीयं च रयजोणीयं; पादसमा उस्सासा तिप्पि य गेयस्स आगारा (२०) आइमिड

आरभंता, समुव्वहंता य मज्झगारंमि; अवसाणे तज्जविंता तिन्नि य गेयस्स आगारा (२१) छद्दोसे अट्ठगुणे तिन्नि य वित्ताइं दो य भणिईओ जाणाहिति सो गाहिइ सुसिक्खिओ रंगमज्झम्मि (२२) भीतं दुतं रहस्सं गायंतो मा य गाहि उत्तालं, काकस्सरमणुणासं च होंति गेयस्स छद्दोसा (२३) पुन्नं रत्तं च अलंकियं च वत्तं तहा अविघुट्ठं; मधुरं सम सुकुमारं अट्ठ गुणा होंति गेयस्स (२४) उरकंठ-सिरपसत्थं च गेज्जंते मउरिभिअपदबद्धं; समतालपडुक्खेवं सत्तसरसीहरं गीयं (२५) निद्दोसं सारवंतं च हेउजुत्तमलंकियं, उवणीय सोवयारं च मियं मधुरमेव य (२६) सममद्धसमं चेव सव्वत्थ विसमं च जं, तिन्नि वित्तप्पयाराइं चउत्थं नोवलब्भइ (२७) सक्कया पागया चेव दुहा भणिईओ आहिया; सरमंडलम्मि गिज्जंते पसत्था इसिभासिया (२८) केसी गायइ मधुरं केसी गायइ खरं च रुक्खं च, केसी गायइ चउरं केसि विलंबं दुतं केसी (२९) विस्सरं पुण केरिसी? सामा गायइ मधुरं काली गायइ खरं च रुक्खं च, गोरी गायइ चउरं, काण विलंबं दुतं अंधा (३०) विस्सरं पुण पिंगला, तंतिसमं तालसमं पादसमं लयसमं गहसमं च, नीससिऊससि-यसमं संचारसमा सरा सत्त (३१) सत्त सरा य तओ गामा मुच्छणा एगवीसई ताणा एगूणपण्णासा समत्तं सरमंडलं (३२) **सरमंडलं समत्तं ॥ ६७७ ॥**

सत्तविहे कायकिल्लेसे प० तं० ठाणाइए उक्कुडुयासणिए पडिमट्ठाई वीरासणिए णेसज्जिए दंडाइए लगंडसाई ॥ ६७८ ॥ जंबुद्दीवे दीवे सत्तवासा प० तं० भरहे एरवए हेमवए हेरन्नवए हरिवासे रम्मगवासे महाविदेहे ॥ ६७९ ॥ जंबुद्दीवे २ सत्त वासहरपव्वया प० तं० चुल्लहिमवंते महाहिमवंते निसहे नीलवंते रुप्पी सिहरी मंदरे ॥ ६८० ॥ जंबुद्दीवे २ सत्त महानईओ पुरत्थाभिमुहीओ लवणसमुद्दं समप्पेंति तं० गंगा रोहिया हिरी सीया णरकंता सुवण्णकूला रत्ता ॥ ६८१ ॥ जंबुद्दीवे २ सत्त महानईओ पच्चत्थाभिमुहीओ लवणसमुद्दं समप्पेंति तं० सिंधू रोहियंसा हरिकंता सीतोदा णारिकंता रुप्पकूला रत्तवई ॥ ६८२ ॥ धायइसंडदीवपुरच्छिमद्धे णं सत्त वासा प० तं० भरहे जाव महाविदेहे, धायइसंडदीवपुरच्छिमे णं सत्त वासहर-पव्वया प० तं० चुल्लहिमवंते जाव मंदरे धायइसंडदीवपुरत्थिमद्धे णं सत्त महानईओ पुरत्थाभिमुहीओ कालोयसमुद्दं समप्पेंति तं० गंगा जाव रत्ता, धायइसंडदीवपुरत्थि-मद्धे णं सत्त महानईओ पच्चत्थाभिमुहीओ लवणसमुद्दं समप्पेंति तं० सिंधू जाव रत्तवई, धायइसंडदीवे पच्चत्थिमद्धे णं सत्त वासा एवं चेव णवरं पुरत्थाभिमुहीओ लवणसमुद्दं समप्पेंति पच्चत्थाभिमुहीओ कालोदं सेसं तं चेव ॥ ६८३ ॥ पुक्खरवर-दीवद्वुपुरच्छिमद्धे णं सत्त वासा तहेव णवरं पुरत्थाभिमुहीओ पुक्खरोदं समुद्दं

समर्पेति पञ्चत्थाभिमुहीओ कालोदं समुदं समर्पेति सेसं तं चेव एवं पञ्चत्थिमदेवि
 णवरं पुरत्थाभिमुहीओ कालोदं समुदं समर्पेति, पञ्चत्थाभिमुहीओ पुक्खरोदं समर्पेति,
 सव्वत्थ वासा वासहरपव्वया णईओ य भाणियव्वाणि ॥ ६८४ ॥ जंबुदीवे २
 भारहे वासेऽतीयाए उस्सप्पिणीए सत्त कुलगरा होत्था, तंजहा-मित्तदामे सुदामे य
 सुपासे य सयंपभे; विमलघोसे सुघोसे य महाघोसे य सत्तमे ॥ ६८५ ॥ जंबुदीवे २
 भारहे वासे इमीसे ओसप्पिणीए सत्त कुलगरा होत्था तं० पढमित्थ विमलवाहण
 चक्खुम जसमं चउत्थमभिचंदे; तत्तो य पसेणइ पुण मरुदेवे चेव नाभी य (१)
 एएसि णं सत्तण्हं कुलगराणं सत्त भारियाओ हुत्था, तं० चंदजसा चंदकंता सुरुव
 पडिरुव चक्खुकंता य; सिरिकंता मरुदेवी, कुलकरइत्थीण नामाई (२) ॥ ६८६ ॥
 जंबुदीवे २ भारहे वासे आगमिस्साए उस्सप्पिणीए सत्त कुलगरा भविस्संति तं०
 मित्तवाहण सुभोमे य सुपभे य सयंपभे; दत्ते सुहुमे [सुहे सुरुवे] सुबंधू य आगमे-
 स्सिण होक्खइ ॥ ६८७ ॥ विमलवाहणे णं कुलगरे सत्तविहा रुक्खा उवभोगत्ताए हव्व-
 मागच्छिस्सु तं० मत्तंगया य भिंगा चित्तंगा चेव होति चित्तरसा; मणियंगा य
 अणियणा सत्तमगा कप्पस्सुखा य (१) ॥ ६८८ ॥ सत्तविहा दंडनीई प० तं०
 हक्कारे मक्कारे धिक्कारे परिभासे मंडलबंधे चारए छविच्छेदे ॥ ६८९ ॥ एगमेगस्स
 णं रत्तो चाउरंतचक्कवट्ठिस्स णं सत्त एगिंदियरयणा प० तं० चक्करयणे छत्तरयणे
 चम्मरयणे दंडरयणे अत्तिरयणे मणिरयणे काकणिरयणे ॥ ६९० ॥ एगमेगस्स णं
 रत्तो चाउरंतचक्कवट्ठिस्स सत्त पंचिंदियरयणा प० तं० सेणावइरयणे गाहावइरयणे
 वट्ठुत्तिरयणे पुरोहियरयणे इत्थिरयणे आसरयणे हत्थिरयणे ॥ ६९१ ॥ सत्तहिं
 ठाणेहिं ओगाढं दुस्समं जाणेज्जा, तं० अकाले वरिसइ काले ण वरिसइ असाधू
 पुजंति साधू ण पुजंति गुरुहिं जणो मिच्छं पडिवन्नो मणोदुहया वइदुहया ॥ ६९२ ॥
 सत्तहिं ठाणेहिं ओगाढं सुसमं जाणेज्जा तं० अकाले ण वरिसइ काले वरिसइ असाधू
 ण पुजन्ति साधू पुजन्ति गुरुहिं जणो सम्मं पडिवन्नो मणोसुहया वइसुहया ॥ ६९३ ॥
 सत्तविहा संसारसमावन्नगा जीवा प० तं० नेरइया, तिरिक्खजोणिया, तिरिक्खजो-
 णिणिओ, मणुस्सा, मणुस्सीओ, देवा, देवीओ ॥ ६९४ ॥ सत्तविहे आउभेदे प०
 तं० अज्झवसाणनिमित्ते, आहारे, वेयणा, परावाए, फासे, आणापाणू, सत्तविहं
 भिजए आउं ॥ ६९५ ॥ सत्तविहा सव्वजीवा प० तं० पुढविकाइया आउ-
 तेउ-वाउ-वणस्सइ० तसकाइया अकाइया, अहवा सत्तविहा सव्वजीवा प० तं०
 कण्हलेसा जाव सुक्खेसा अलेसा ॥ ६९६ ॥ बंभदत्ते णं राया चाउरंतचक्कवट्ठी सत्त
 धणूई उद्धं उच्चतेणं सत्त य वाससयाई परमाउं पालइत्ता कालमासे कालं किच्चा अहे

सत्तामाए पुढवीए अप्पइठ्ठाणे णराए णेरइयत्ताए उववण्णे ॥ ६९७ ॥ मल्ली णं अरहा
 अप्पसत्तमे मुंडे भवित्ता अगाराओ अणगरियं पव्वइए तं० मल्ली विदेहरायवरक-
 ण्णगा, पडिबुद्धी इक्खागराया, चंदच्छाए अंगराया, रूपी कुणालाहिवई, संखे
 कासीराया, अदीणसत्तू कुरराया, जियसत्तू पंचालराया ॥ ६९८ ॥ सत्तविहे दंसणे
 प० तं० सम्मदंसणे मिच्छदंसणे सम्ममिच्छदंसणे चक्खुदंसणे अचक्खुदंसणे
 ओहिदंसणे केवलदंसणे ॥ ६९९ ॥ छउमत्थवीयरगे णं मोहणिज्जवजाओ सत्त
 कम्मपयडीओ वेएइ, तं० गाणावरणिज्जं, दंसणावरणिज्जं, वेयणियं, आउयं, नामं,
 गीयमंतराइयं ॥ ७०० ॥ सत्त ठाणाई छउमत्थे सव्वभावेणं न जाणइ न पासइ,
 तं० धम्मत्थिकायं, अधम्मत्थिकायं, आगासत्थिकायं, जीवं असरीरपडिबद्धं, पर-
 माणुपोग्गलं, सइं, गंधं ॥ ७०१ ॥ एयाणि चेव उप्पन्नणाणे जाव जाणइ पासइ,
 तं० धम्मत्थिकायं जाव गंधं ॥ ७०२ ॥ समणे भगवं महावीरे वयरोसभणाराय-
 संघयणे समचउरंससंठाणसंठिए सत्त रयणीओ उट्ठं उच्चतेणं होत्था ॥ ७०३ ॥
 सत्तविकहाओ प० तं० इत्थिकहा, भत्तकहा, देसकहा, रायकहा, मिउकालणिया,
 दंसणभेयणी, चरित्तभेयणी ॥ ७०४ ॥ आयरियउवज्झायस्स णं गणंसि सत्त अइसेसा
 प० तं० आयरियउवज्झाए अंतो उवस्सयस्स पाए णिगिज्झिय २ पप्फोडेमाणे वा
 पमज्जेमाणे वा णाइक्कमइ एवं जहा पंचठ्ठाणे जाव वाहिं उवस्सयस्स एगरायं वा
 दुरायं वा वसमाणे णाइक्कमइ उवगरणाइसेसे भत्तपाणाइसेसे ॥ ७०५ ॥ सत्तविहे
 संजमे प० तं० पुढविकाइयसंजमे जाव तसकाइयसंजमे अजीवकायसंजमे ॥ ७०६ ॥
 सत्त विहे असंजमे प० तं० पुढविकाइयअसंजमे जाव तसकाइयअसंजमे, अजीवकाय-
 असंजमे ॥ ७०७ ॥ सत्तविहे आरंभे प० तं० पुढविकाइयआरंभे जाव अजीवकाय-
 आरंभे एवमणारंभेवि एवं सारंभे वि एवमसारंभे वि एवं समारंभेवि एवं असमारंभेवि
 जाव अजीवकायअसारंभे ॥ ७०८ ॥ अह भंते ! अयसिकुसुंभकोद्वकंपुरालग (वरा-
 कोदूसगा) सणसरिसवमूलगवीयाणं एएसि णं धन्नाणं कोट्टाउत्ताणं पल्लाउत्ताणं जाव
 पिहियाणं केवइयं कालं जोणी संचिठ्ठइ ? गोयमा ! जह्जेणं अंतोमुहुत्तं उक्कोसेणं
 सत्त संवच्छराई, तेण परं जोणी पमिलायइ जाव जोणीवोच्छेदे प० ॥ ७०९ ॥
 बायरआउकाइयाणं उक्कोसेणं सत्त वाससहस्साई ठिई प० ॥ ७१० ॥ तच्चाए णं
 वालुयप्पमाए पुढवीए उक्कोसेणं नेरइयाणं सत्त सागरोवमाई ठिती प० ॥ ७११ ॥
 चउत्थीए णं पंकप्पमाए पुढवीए जह्ज्जेणं नेरइयाणं सत्तसागरोवमाई ठिती प०
 ॥ ७१२ ॥ सक्कस्स णं देविंदस्स देवरन्नो बरुणस्स महारन्नो सत्त अग्गमहिंसीओ
 प० ॥ ७१३ ॥ ईसाणस्स णं देविंदस्स देवरन्नो सोमस्स महारन्नो सत्त अग्ग

महिशीओ प० ॥ ७१४ ॥ ईसाणस्स णं देविंदस्स देवरण्णो जमस्स महारण्णो सत्त
अगममहिशीओ प० ॥ ७१५ ॥ ईसाणस्स णं देविंदस्स देवरण्णो अब्भितरपरिसाए
देवाणं सत्त पलिओवमाई ठिई प० ॥ ७१६ ॥ सक्कस्स णं देविंदस्स देवरण्णो
अब्भितरपरिसाए देवाणं सत्त पलिओवमाई ठिई प० ॥ ७१७ ॥ सक्कस्स णं
देविंदस्स देवरण्णो अगममहिशीणं देवीणं सत्त पलिओवमाई ठिई प० ॥ ७१८ ॥
सोहम्मे कप्पे परिग्गहियाणं देवीणं उक्कोसेणं सत्त पलिओवमाई ठिई प० ॥ ७१९ ॥
सारस्सयमाइच्चाणं सत्त देवा सत्त देवसया प० ॥ ७२० ॥ गहत्तोयतुसियाणं
देवाणं सत्त देवा सत्त देवसहस्सा प० ॥ ७२१ ॥ सणकुमारे कप्पे उक्कोसेणं देवाणं
सत्त सागरोवमाई ठिई प० ॥ ७२२ ॥ माहिंदे कप्पे उक्कोसेणं देवाणं साइरेगाई
सत्तसागरोवमाई ठिई प० ॥ ७२३ ॥ बंभलोए कप्पे जहन्नेणं देवाणं सत्त सागरो-
वमाई ठिई प० ॥ ७२४ ॥ बंभलोयलंतएसु णं कप्पेसु विमाणा सत्त जौयणसयाई
उड्डं उच्चत्तेणं प० ॥ ७२५ ॥ भवणवासीणं देवाणं भवधारणिज्जा सरीरगा उक्कोसेणं सत्त
रयणीओ उड्डं उच्चत्तेणं प०, एवं वाणमंतराणं एवं जोइसियाणं सोहम्मीसाणेणु णं कप्पेसु
देवाणं भवधारणिज्जगा सरीरा सत्त रयणीओ उड्डं उच्चत्तेणं प० ॥ ७२६ ॥ गंदीसर-
वरस्स णं दीवरस्स अंतो सत्त दीवा प० तं० जंयुहीवे २ थायइसंडे दीवे पोक्खरवरे
वरुणवरे खीरवरे घयवरे खोयवरे ॥ ७२७ ॥ गंदीसरवरस्स णं दीवरस्स अंतो
सत्त समुदा प० तं० लवणे कालोए पुक्खरोदे वरुणोए खीरोदे धओदे खोओए
॥ ७२८ ॥ सत्त सेढीओ प० तं० उज्जुआयया एगओवंका दुहओवंका एगओखुहा
दुहओखुहा चक्कवाला अद्धचक्कवाला ॥ ७२९ ॥ चमरस्स णं असुरिंदस्स असुर-
कुमाररओ सत्त अणिया सत्त अणियाहिंवई प० तं० पायत्ताणिए पीढाणिए कुंज-
राणिए महिसाणिए रहाणिए नट्टाणिए गंधव्वाणिए दुमे पायत्ताणियाहिंवई एवं जहा
पंचट्ठाणे जाव किन्नरे रहाणियाहिंवई रिट्ठे णट्टाणियाहिंवई गीयइरं गंधव्वाणिया-
हिंवई बलिस्स णं वइरोयणिंदस्स वइरोयणरओ सत्त अणिया सत्त अणियाहिंवई
प० तं० पायत्ताणिए जाव गंधव्वाणिए महहुमे पायत्ताणियाहिंवई जाव किंपुरिसे
रहाणियाहिंवई महारिट्ठे णट्टाणियाहिंवई गीयजसे गंधव्वाणियाहिंवई, धरणस्स णं
णागकुमारिंदस्स णागकुमाररण्णो सत्त अणिया सत्त अणियाहिंवई प० तं० पाय-
त्ताणिए जाव गंधव्वाणिए रुह्सेणे पायत्ताणियाहिंवई जाव आणंदे रहाणियाहिंवई
नंदणे णट्टाणियाहिंवई तेतली गंधव्वाणियाहिंवई भूयाणंदस्स सत्त अणिया सत्त
अणियाहिंवई प० तं० पायत्ताणिए जाव गंधव्वाणिए दक्खे पायत्ताणियाहिंवई
जाव णंदुत्तरे रहाणियाहिंवई रई णट्टाणियाहिंवई माणसे गंधव्वाणियाहिंवई एवं

जाव घोसमहाघोसाणं गेयव्वं सक्कस्स णं देविंदस्स देवरत्तो सत्त अणिया सत्त अणियाहिवई प० तं० पायत्ताणिए जाव गंधव्वाणिए हरिणेगमेसी पायत्ताणियाहिवई जाव माढरे रहाणियाहिवई सेए गट्ठाणियाहिवई तुंबुरु गंधव्वाणियाहिवई ईसाणस्स णं देविंदस्स देवरण्णो सत्त अणिया सत्त अणियाहिवइणो प० तं० पायत्ताणिए जाव गंधव्वाणिए लहुपरक्कमे पायत्ताणियाहिवई जाव महासेए गट्ठाणियाहिवई रए गंधव्वाणियाहिवई सेसं जहा पंचट्ठाणे एवं जाव अच्चयस्स वि गेयव्वं ॥ ७३०-७३१ ॥ चमरस्स णं असुरिंदस्स असुरकुमाररत्तो दुमस्स पायत्ताणियाहिवइस्स सत्त कच्छाओ प० तं० पढमा कच्छा जाव सत्तमा कच्छा, चमरस्स णं असुरिंदस्स असुरकुमाररत्तो दुमस्स पायत्ताणियाहिवइस्स पढमाए कच्छाए चउसट्ठि देवसहस्सा प० जावइया पढमा कच्छा तब्बिगुणा दोच्चा कच्छा तब्बिगुणा तच्चा कच्छा एवं जाव जावइया छट्ठा कच्छा तब्बिगुणा सत्तमा कच्छा एवं बल्लिस्स वि णवरं महहुमे सट्ठिदेवसाहसिओ सेसं तं चेव धरणस्स एवं चेव णवरं अट्ठावीसं देवसहस्सा सेसं तं चेव जहा धरणस्स एवं जाव महाघोसस्स णवरं पायत्ताणियाहिवई अत्रे ते पुव्वभणिता ॥ ७३२ ॥ सक्कस्स णं देविंदस्स देवरण्णो हरिणेगमेसिस्स सत्त कच्छाओ प० तं० पढमा कच्छा एवं जहा चमरस्स तहा जाव अच्चयस्स, णाणत्तं पायत्ताणियाहिवईणं ते पुव्वभणिता देवपरिमाणमिमं सक्कस्स चउरासीइं देवसहस्सा ईसाणस्स असीइं देवसहस्साइं देवा इमाए गाहाए अणुगंतव्वा, 'चउरासीइ असीइ बावत्तारि सत्तरी य सट्ठीया; पन्ना चत्तालीसा तीसा वीसा दससहस्सा' (१) जाव अच्चयस्स लहुपरक्कमस्स दसदेवसहस्सा जाव जावइया छट्ठा कच्छा तब्बिगुणा सत्तमा कच्छा ॥ ७३३ ॥ सत्तविहे वयणविकप्पे प० तं० आलावे, अणालावे, उल्लावे, अणुल्लावे, संलावे, पलावे, विप्पलावे ॥ ७३४ ॥ सत्तविहे विणए प० तं० णाणविणए, दंसणविणए, चरित्तविणए, मणविणए, वइविणए, कायविणए, लोगोवयारविणए ॥ ७३५ ॥ पसत्थमणविणए सत्तविहे प० तं० अपावए असावज्जे अकिरिए निस्वक्केसे अण्हकरे अच्छविकरे अभूताभिसंकमणे ॥ ७३६ ॥ अपसत्थमणविणए सत्तविहे प० तं० पावए सावज्जे सकिरिए सउवक्केसे अण्हकरे छविकरे भूयाभिसंकमणे ॥ ७३७ ॥ पसत्थवइविणए सत्तविहे प० तं० अपावए असावज्जे जाव अभूयाभिसंकमणे ॥ ७३८ ॥ अपसत्थवइविणए सत्तविहे प० तं० पावए, जाव भूयाभिसंकमणे ॥ ७३९ ॥ पसत्थकायविणए सत्तविहे प० तं० आउत्तं गमणं आउत्तं ठाणं आउत्तं निसीयणं आउत्तं तुअट्ठणं आउत्तं उल्लंघणं आउत्तं पल्लंघणं आउत्तं सव्विदियजोगजुंजयया ॥ ७४० ॥ अपसत्थकायविणए सत्तविहे प० तं०

अणाउत्तं गमणं, जाव अणाउत्तं सत्त्विदियजोगजुंजणया ॥ ७४१ ॥ लोगोवयार-
विणए सत्तविहे प० तं० अब्भासवत्तियं परच्छंदाणुवत्तियं कज्जहेउं कयपडिकइया
अत्तगवेसणया देसकालणुया सव्वत्थेसु यापडिलोमया ॥ ७४२ ॥ सत्त समुग्घाया
प० तं० वेयणासमुग्घाए कसायसमुग्घाए मारणत्तियसमुग्घाए वेउच्चियसमुग्घाए
तेजससमुग्घाए आहारगसमुग्घाए केवलिसमुग्घाए, मणुस्साणं सत्त समुग्घाया प०
एवं चेव ॥ ७४३ ॥ समणस्स णं भगवओ महावीरस्स तित्थंति सत्त पवयणनि-
ण्हा प० तं० बहुरया जीवपएसिया अवत्तिया सामुच्छेइया दोकिरिया तेरासिया
अवद्धिया, एएसि णं सत्तण्हं पवयणनिण्हगाणं सत्तऽधम्मायरिया होत्था तं० जमाली
तीसगुत्ते आसाढे आसमित्ते गंगे छलुए गोठामाहित्ते, एएसि णं सत्तण्हं पवयणनि-
ण्हगाणं सत्त उप्पत्तिनगरा होत्था तं० सावत्थी उसभपुरं सेयविया मिहिलमुळ-
गातीरं पुरिमंतंरंजि दसपुर णिण्हगउप्पत्तिनगराई ॥ ७४४ ॥ सायावेयणिजस्स
कम्मस्स सत्तविहे अणुभावे प० तं० मणुञ्जा सद्दा मणुण्णा रुवा जाव मणुञ्जा फासा
मणोसुहया वइसुहया ॥ ७४५ ॥ असायावेयणिजस्स णं कम्मस्स सत्तविहे अणु-
भावे प० तं० अमणुञ्जा सद्दा जाव वइदुहया ॥ ७४६ ॥ महाणक्खत्ते सत्ततारे प०
॥ ७४७ ॥ अभिईयाइया सत्तनक्खत्ता पुव्वदारिया प० तं० अभिई सवणो धणिठ्ठा
सयभिसया पुव्वाभद्वया उत्तराभद्वया रेवई, अस्सिणियाइया णं सत्त णक्खत्ता
दाहिणदारिया प० तं० अस्सिणी भरिणी कत्तिया रोहिणी सिगसिरे अद्दा पुणव्वसू
पुस्साइया णं सत्त णक्खत्ता अवरदारिया प० तं० पुस्सो असिळेसा मघा पुव्वाफ-
ग्गुणी उत्तराफग्गुणी हत्थो चित्ता, साइयाइया णं सत्त णक्खत्ता उत्तरदारिया प० तं०
साई विसाहा अणुराहा जेठ्ठा मूलो पुव्वाआसाढा उत्तरासाढा ॥ ७४८ ॥ जंबुद्दीवे
दीवे सोमणसे वक्खारपव्वए सत्त कूडा प० तं० सिद्धे सोमणसे तह बोधव्वे
मंगलावईकूडे, देवकुरु विमल कंचण विसिठ्ठकूडे य बोद्धव्वे ॥ ७४९ ॥ जंबुद्दीवे
दीवे गंधमायणे वक्खारपव्वए सत्त कूडा प० तं० सिद्धे य गंधमायण बोद्धव्वे
गंधिलावईकूडे उत्तरकुरुफलिहे लोहियक्ख आणंदणे चेव ॥ ७५० ॥ विईदि-
याणं सत्त जाइकुलकोडिजोणीपमुहसयसहस्सा प० ॥ ७५१ ॥ जीवा णं सत्त-
ठाणनिव्वत्तिए पोगगले पावकम्मत्ताए चिणिंसु वा चिणंति वा चिणिस्संति वा
तं० नेरइयनिव्वत्तिए जाव देवनिव्वत्तिए एवं चिण जाव णिज्जरा चेव ॥ ७५२ ॥
सत्तपएसिया खंधा अणंता प० ॥ ७५३ ॥ सत्त पएसोगाढा पोगगला जाव सत्त-
गुणलक्खा पोगगला अणंता प० ॥ ७५४ ॥ सत्तमट्ठाणं समत्तं, सत्तम-
मज्झयणं समत्तं ॥

अठमद्वाणं

अठ्ठहिं ठाणेहिं संपन्ने अणगारे अरिहति एगल्लविहारपडिमं उवसंपज्जित्ताणं विदु-
 रित्तए तं० सद्धी पुरिसजाए सच्चे पुरिसजाए मेहावी पुरिसजाए बहुस्सुए पुरिसजाए
 सत्तिमं अप्पाहिगरणे धिइमं वीरियसंपन्ने ॥ ७५५ ॥ अठ्ठविहे जोणिसंगहे प० तं०
 अंडया पोयया जाव उब्भिया उववाइया, अंडया अठ्ठगइया अठ्ठागइया प० तं०
 अंडए अंडएसु उववज्जमाणे अंडएहिंतो वा जाव उववाइएहिंतो वा उववज्जेज्जा,
 से चेव णं से अंडए अंडगत्तं विप्पजहमाणे अंडगत्ताए वा पोयगत्ताए वा जाव
 उववाइयत्ताए वा गच्छेज्जा एवं पोययावि जराउयावि सेसाणं गइरागई णत्थि
 ॥ ७५६ ॥ जीवा णं अठ्ठ कम्मपगडीओ चिणिंसु वा चिणंति वा चिणिस्संति वा
 तं० णाणावरणिज्जं दरिसणावरणिज्जं वेयणिज्जं मोहणिज्जं आउयं नामं गोत्तं अंतरा-
 इयं, नेरइया णं अठ्ठ कम्मपगडीओ चिणिंसु वा ३ एवं चेव, एवं निरंतरं जाव
 वेमाणियाणं २४. जीवाणमठ्ठकम्मपगडीओ उवचिणिंसु वा ३ एवं चेव एवं चिण
 उवचिण बंध उदीर वेय तह णिज्जरा चेव, एए छ चउवीसा दंडगा भाणियव्वा
 ॥ ७५७ ॥ अठ्ठहिं ठाणेहिं माई मायं कट्ठु नो आलोएज्जा नो पडिक्कमेज्जा जाव नो
 पडिवज्जेज्जा, तं० करिंसु वाऽहं करेमि वाऽहं करिस्सामि वाऽहं अकित्ती वा मे
 सिया अवण्णे वा मे सिया अवणए वा मे सिया कित्ती वा मे परिहाइस्सइ जसो
 वा मे परिहाइस्सइ, अठ्ठहिं ठाणेहिं माई मायं कट्ठु आलोएज्जा जाव पडिवज्जेज्जा
 तं० माइस्स णं अस्सि लोए गरहिए भवइ उववाए गरहिए भवइ आजाई गरहिया
 भवइ एगमवि माई मायं कट्ठु नो आलोएज्जा जाव नो पडिवज्जेज्जा णत्थि तस्स
 आराहणा एगमवि माई माय कट्ठु आलोएज्जा जाव पडिवज्जेज्जा अत्थि तस्स
 आराहणा बहुओवि माई मायं कट्ठु नो आलोएज्जा जाव नो पडिवज्जेज्जा नत्थि
 तस्स आराहणा बहुओवि माई मायं कट्ठु आलोएज्जा जाव अत्थि तस्स आराहणा
 आयरियउवज्झायस्स वा मे अइसेसे णाणदंसणे ससुपजेज्जा, से तं मममालोएज्जा
 माई णं एसे माई णं मायं कट्ठु से जहा नामए अयागरेइ वा तंवागरेइ वा तउ-
 आगरेइ वा सीसागरेइ वा रुप्पागरेइ वा सुवन्नागरेइ वा तिलागणीइ वा तुसागणीइ
 वा वुसागणीइ वा णलागणीइ वा दलागणीइ वा सोडियालिच्छाणिवा भंडियालि-
 च्छाणि वा गोलियालिच्छाणि वा कुंभारावाएइ वा कवेल्लुयावाएइ वा इट्ठावाएइ
 वा जंतवाडचुल्लीइ वा लोहरंवरिसाणि वा तत्ताणि समजोइभूयाणि किंसुकफुल्लस-
 माणाणि उक्कासहस्साइं विणिम्भुयमाणाइं २ जालासहस्साइं पसुंचमाणाइं इंगालस-
 हस्साइं परिकिरमाणाइं अंतो २ झियायंति एवामेव माई मायं कट्ठु अंतो २ झिया-

यइ जइवि य णं अण्णे केइ वदंति तं पि य णं माई जाणइ अहमेसे अभिसंकिज्जाभि
माई णं मायं कट्ठु अणालोइयपडिक्कंते कालमासे कालं किच्चा अण्णयरेसु देवलोगेसु
देवत्ताए उववत्तारो भवन्ति तंजहा नो महिद्धिएसु जाव नो दूरंगइएसु नो चिरट्ठिई-
एसु से णं तत्थ देवे भवइ णो महिद्धिए जाव णो चिरट्ठिईए जावि य से तत्थ
बाहिरब्भंतरिया परिसा भवइ साविय णं णो आढाइ णो परिजाणाइ णो महारिहे-
णमासणेणं उवनिमंतेइ भासंपि य से भासमाणस्स जाव चत्तारि पंच देवा अउत्ता
चेव अब्भुट्ठंति मा बहुं देवे ! भासउ से णं तओ देवलोगाओ आउक्खएणं भव-
क्खएणं ठिइक्खएणं अणंतरं चयं चइत्ता इहेव माणुस्सए भवे जाई इमाई कुलाई
भवन्ति तं० अंतकुलाणि वा पंतकुलाणि वा तुच्छकुलाणि वा दरिद्धकुलाणि वा
भिक्षुगकुलाणि वा किवणकुलाणि वा तहप्पगारेसु कुलेसु पुमत्ताए पच्चायाइ से
णं तत्थ पुमे भवइ दुह्वे दुवण्णे दुग्गंधे दुरसे दुफासे अणिठे अकंते अप्पिए अम-
णुण्णे अमणामे हीणस्सरे दीणस्सरे अणिठसरे अकंतसरे अपियस्सरे अमणुण-
स्सरे अमणामस्सरे अणाएज्जवयणपच्चायाए जाविय से तत्थ बाहिरब्भंतरिया
परिसा भवइ सावि य णं णो आढाइ णो परिजाणाइ णो महारिहेणं आसणेणं उव-
णिमंतेइ भासंपि य से भासमाणस्स जाव चत्तारि पंच जणा अउत्ता चेव अब्भु-
ट्ठंति मा बहुं अजउत्तो ! भासउ माई णं मायं कट्ठु आलोइयपडिक्कंते कालमासे
कालं किच्चा अण्णतरेसु देवलोगेसु देवत्ताए उववत्तारो भवन्ति तं० महिद्धिएसु जाव
चिरट्ठिईएसु से णं तत्थ देवे भवइ महिद्धिए जाव चिरट्ठिईए हारविराइयवच्छे
कंडगतुडियथंभियभुए अंगदकुंडलमउडगंडतलकन्नपीढधारी विचित्तहत्थाभरणे
वित्तित्तवत्थाभरणे वित्तित्तमालामउली कल्लणगपवरवत्थपरिहिए कल्लणगपवर-
गंधमल्लणलेवणधरे भासुरबोदी पलंबवणमालधरे दिव्वेणं वण्णेणं दिव्वेणं गंधेणं
दिव्वेणं रसेणं दिव्वेणं फासेणं दिव्वेणं संघाएणं दिव्वेणं संठाणेणं दिव्वाए इड्डीए
दिव्वाए जुईए दिव्वाए पभाए दिव्वाए छायाए दिव्वाए अचीए दिव्वेणं तेएणं
दिव्वाए छेस्साए दसदिसाओ उज्जोएमाणे पभासेमाणे महयाऽहयणट्ठगीयवाइयतंती-
तलतालतुडियघणमुइंगपडुप्पवाइयरवेणं दिव्वाई भोगभोगाई भुंजमाणे विहरइ,
जावि य से तत्थ बाहिरब्भंतरिया परिसा भवइ, सावि य णं आढाइ परिजाणाइ
महारिहेणं आसणेणं उवनिमंतेइ भासंपि य से भासमाणस्स जाव चत्तारि पंच देवा
अउत्ता चेव अब्भुट्ठंति बहुं देवे ! भासउ से णं तओ देवलोगाओ आउक्खएणं
इ जाव चइत्ता इहेव माणुस्सए भवे जाई इमाई कुलाई भवन्ति, इड्ढाई जाव बहु-
जणस्स अपरिभूयाई तहप्पगारेसु कुलेसु पुमत्ताए पच्चायाइ, से णं तत्थ पुमे भवइ

सुरुवे सुवन्ने सुगंधे सुरसे सुफासे इट्ठे कंते जाव मणामे अहीणस्सरे जाव मणाम-
 स्सरे आदेज्जवयणे पच्चायाए जाऽविय से तत्थ बाहिरब्भंतरिया परिसा भवइ
 सावि य णं आढाइ जाव बहुमज्जउत्ते ! भासउ ॥ ७५८ ॥ अट्ठविहे संवरे
 प० तं० सोईदियसंवरे जाव फासिंदियसंवरे मणसंवरे वइसंवरे कायसंवरे, अट्ठविहे
 असंवरे प० तं० सोईदियअसंवरे जाव कायअसंवरे ॥ ७५९ ॥ अट्ठ फासा प०
 तं० कक्कडे मउए गरुए लहुए सीए उसिणे निद्धे लुक्खे ॥ ७६० ॥ अट्ठविहा
 ल्लोगठिई प० तं० आगासपइट्ठिए वाए वायपइट्ठिए उदही एवं जाव छट्ठाणे जाव
 जीवा कम्मपइट्ठिया अजीवा जीवसंगहीया जीवा कम्मसंगहीया ॥ ७६१ ॥ अट्ठविहा
 गणिसंपया प० तं० आयासंपया सुयसंपया सरीरसंपया वयणसंपया वायणासंपया
 मइसंपया पयोगसंपया संगहपरिणणाणम अट्ठमा ॥ ७६२ ॥ एगमेगे णं महानिही
 अट्ठचक्कवालपइट्ठाणे अट्ठजोयणाई उद्धं उच्चत्तेणं प० ॥ ७६३ ॥ अट्ठसमिईओ
 प्र० तं० इरियासमिई भासासमिई एसणासमिई आयाणभंडमत्तनिकखेवणासमिई
 उच्चारपासवणखेलजल्लसिंवाणपारिट्ठावणियासमिई मणसमिई वइसमिई कायसमिई
 ॥ ७६४ ॥ अट्ठहिं ठाणेहिं संपन्ने अणगारे अरिहइ आलोयणा पडिच्छित्तए तं०
 आयासवं आहारवं ववहारवं ओवीलए पकुव्वए अपरिस्साई निज्जावए अवायदंसी
 ॥ ७६५ ॥ अट्ठहिं ठाणेहिं संपन्ने अणगारे अरिहइ अत्तदोसमालोइत्तए तं० जाइ-
 संपन्ने कुलसंपन्ने विणयसंपन्ने गाणसंपन्ने दंसणसंपन्ने चरित्तसंपन्ने खंते दंते ॥ ७६६ ॥
 अट्ठविहे पायच्छित्ते प० तं० आलोयणारिहे पडिक्कमणारिहे तदुभयारिहे विवेगारिहे
 विउस्सग्गारिहे तवारिहे छेयारिहे मूलारिहे ॥ ७६७ ॥ अट्ठ मयट्ठाणा प० तं०
 जाइमए कुलमए बलमए रुवमए तवमए सुयमए लाभमए इस्सरियमए ॥ ७६८ ॥
 अट्ठ अकिरियावाई प० तं० एगावाई अणेगावाई मितवाई निम्मिमतवाई सायवाई
 समुच्छेदवाई णियावाई ण संति परलोगवाई ॥ ७६९ ॥ अट्ठविहे महानिमित्ते
 प० तं० भोमे उप्पाए सुविणे अंतलिकखे अंगे सरे लक्खणे वंजणे ॥ ७७० ॥
 अट्ठविहा वयणविभत्ती प० तं० निहेसे पढमा होइ बिइया उवएसणे; तइया करणंमि
 कया चउत्थी संपयावणे (१) पंचमी य अवायाणे छट्ठी सस्सामिवायणे; सत्तमी
 सज्जिहाणत्थे अट्ठमी आमंतणी भवे (२) तत्थ पढमा विभत्ती निहेसे सो इमो
 अहं वत्ति १-विइया उण उवएसे भण कुण व इमं व तं वत्ति (३) तइया कर-
 णंमि कया णीयं च कयं च तेण व मए वा; हंदि णमो साहाए हवइ चउत्थी
 पयाणंमि (४) अवणे गिण्हसु तत्तो इत्तोत्ति व पंचमी अवादाणे; छट्ठी तस्स
 इमस्स व गयस्स वा सामिसंबंधे (५) हवइ पुण सत्तमीयं इमंमि आहारकाल-

भावे य; आमतणी भवे अट्टमी उ जह हे जुवाणत्ति (६) ॥ ७७१ ॥ अट्ट ठाणाई
छउमत्थे णं सव्वभावेणं ण जाणइ ण पासइ तं० धम्मत्थिकायं जाव गंधं वायं,
एयाणि चैव उप्पण्णगाणदंसणधरे अरहा जिणे केवली जाणइ पासइ जाव गंधं
वायं ॥ ७७२ ॥ अट्टविहे आउवेए प० तं० कुमारभिचे, कायतिगिच्छा, सालाई,
सल्लहत्ता, जंगोली, भूयवेज्जा, खारतंते, रसायणे ॥ ७७३ ॥ सक्कस्स णं देविंदस्स
देवरत्तो अट्टग्गमहिंसीओ प० तं० पउमा सिवा सई अंजू अमला अच्छरा णवमिया
रोहिणी ॥ ७७४ ॥ ईसाणस्स णं देविंदस्स देवरत्तो अट्टग्गमहिंसीओ प० तं०
कण्हा कण्हराई सामा सामरक्खिया वसू वसुगुत्ता वसुमिता वसुंधरा ॥ ७७५ ॥
सक्कस्स णं देविंदस्स देवरत्तो सोमस्स महारत्तो अट्टग्गमहिंसीओ प० ईसाणस्स णं
देविंदस्स देवरत्तो वेसमणस्स महारत्तो अट्टग्गमहिंसीओ प० ॥ ७७६-७७७ ॥
अट्ट महग्गहा प० तं० चंदे सूरै सुक्के बुहे बहस्सई अंगारए सण्णिवरे केऊ ॥ ७७८ ॥
अट्टविहा तणवणस्सइकाइया प० तं० मूले कंदे खंधे तथा साले पवाले पत्ते पुप्फे
॥ ७७९ ॥ चउरिंदिया णं जीवा असमारभमाणस्स अट्टविहे संजमे कज्जइ तं०
चक्खुमाओ सोक्खाओ अववरोवेत्ता भवइ चक्खुमएणं दुक्खेणं असंजोएत्ता भवइ
एवं जाव फासामाओ सोक्खाओ अववरोवेत्ता भवइ फासामएणं दुक्खेणं असंजो-
एत्ता भवइ ॥ ७८० ॥ चउरिंदिया णं जीवा समारभमाणस्स अट्टविहे असंजमे
कज्जइ तं० चक्खुमाओ सोक्खाओ ववरोवेत्ता भवइ चक्खुमएणं दुक्खेणं संजोएत्ता
भवइ एवं जाव फासामाओ सोक्खाओ ॥ ७८१ ॥ अट्ट सुहुमा प० तं० पाणसुहुमे
पणगसुहुमे वीयसुहुमे हरियसुहुमे पुप्फसुहुमे अंडसुहुमे लेणसुहुमे सिणेहसुहुमे
॥ ७८२ ॥ भरहस्स णं रण्णो चाउरंतचक्कवट्ठिस्स अट्टपुरिसजुगाई अणुबद्धं सिद्धाई
जाव सव्वदुक्खप्पहीणाई तं०-आइच्चजसे महाजसे अइबले महाबले तेयवीरिए
कित्तवीरिए दंडवीरिए जलवीरिए ॥ ७८३ ॥ पासस्स णं अरहओ पुरिसादाणियस्स
अट्ट गणा अट्ट गणहरा होत्था तं० सुभे अज्जघोसे वसिठ्ठे बंभयारी सोमे सिरिधरे
वीरिए भइजसे ॥ ७८४ ॥ अट्टविहे दंसणे प० तं० सम्मदंसणे मिच्छदंसणे सम्मा-
मिच्छदंसणे चक्खुदंसणे जाव केवलदंसणे सुविणदंसणे ॥ ७८५ ॥ अट्टविहे अट्ठो-
वमिए प० तं० पल्लिओवमे सागरोवमे उस्सप्पिणी ओसप्पिणी पोगलपरियट्ठे
तीतद्धा अणागयद्धा सव्वद्धा ॥ ७८६ ॥ अरहओ णं अरिट्ठमेमिस्स जाव अट्टमाओ
पुरिसजुगाओ जुगंतकरभूमी दुवासपरियाए अंतमकासी ॥ ७८७ ॥ समणेणं भग-
वया महावीरेणं अट्ट रायाणो मुंडे भवेत्ता अगाराओ अणगारिअं पव्वाविया तं०
वीरंगय वीरजसे संजयए णिजए य रायरिसी, सेयसिवे उदायणे (तह संखे

कासिवद्धणे) ॥ ७८८ ॥ अट्टविहे आहारे प० तं० मणुण्णे असणे पाणे खाइमे साइमे अमणुण्णे जाव साइमे ॥ ७८९ ॥ उप्पि सणकुमारमाहिंदाणं कप्पाणं हेठ्ठि बंभलोए कप्पे रिट्ठे विमाणे पत्थडे एत्थ णमक्खाडगसमचउरंससंठाणसंठियाओ अट्ट कण्हराईओ प० तं० पुरच्छिमेणं दो कण्हराईओ दाहिणेणं दो कण्हराईओ पच्चच्छिमेणं दो कण्हराईओ उत्तरेणं दो कण्हराईओ, पुरच्छिमा अब्भंतरा कण्हराई दाहिणं बाहिरं कण्हराई पुट्ठा, दाहिणा अब्भंतरा कण्हराई पच्चच्छिमं बाहिरं कण्हराई पुट्ठा, पच्चच्छिमा अब्भंतरा कण्हराई उत्तरं बाहिरं कण्हराई पुट्ठा, उत्तरा अब्भंतरा कण्हराई पुरच्छिमं बाहिरं कण्हराई पुट्ठा, पुरच्छिमपच्चच्छिमिल्लो बाहिराओ दो कण्हराईओ छलंसाओ उत्तरदाहिणाओ बाहिराओ दो कण्हराईओ तंसाओ सव्वाओ वि णं अब्भंतरकण्हराईओ चउरंसाओ, एयासि णं अट्ठण्हं कण्हराईणं अट्ट नामधेज्जा प० तं० कण्हराईति वा मेहराईति वा मघाति वा माघवईति वा वातफलिहेति वा वातपल्लिखोभेति वा देवपल्लिहे वा देवपल्लिखोभेति वा, एयासि णं अट्ठण्हं कण्हराईणं अट्ठसु उवासंतरेसु अट्ठलोगंतियविमाणा प० तं० अच्छी अच्छिमाली वइरोयणे पभंकरे चंदाभे सूराम्भे सुपइट्ठाभे अग्गिच्चाभे, एएसु णं अट्ठसु लोगंतियविमाणेसु अट्ठविहा लोगंतिया देवा प० तं० सारस्सयमाइच्चा वण्ही वरुणा य गइतोया य, तुसिया अवावाहा अग्गिच्चा चेव बोधव्वा (१) एएसि णं अट्ठण्हं लोगंतियदेवाणं अजहण्णमणुक्कोसेणं अट्ट सागरोवमाई ठिई प० ॥ ७९० ॥ अट्ट धम्मत्थिकायमज्झपएसा प० अट्ट अहम्मत्थिकायमज्झपएसा एवं चेव अट्ट आगासत्थिकायमज्झपएसा प० एवं चेव अट्ट जीवमज्झपएसा प० ॥ ७९१ ॥ अरहंता णं महापउमे अट्ट रायाणो मुंडा भविता अगाराओ अणगारियं पव्वावेस्सति तं० पउमं पउमगुम्मं नल्लिणं नल्लिणगुम्मं पउमद्वयं धणुद्वयं कणगरहं भरहं ॥ ७९२ ॥ कण्हस्स णं वासुदेवस्स अट्ट अगमहिंसीओ अरहओ णं अरिठु-नेमिस्स अंतिए मुंडा भवेत्ता अगाराओ अणगारियं पव्वइया सिद्धाओ जाव सव्वदुक्खप्पहीणाओ तं० पउमावई य गोरी गंधारी लक्खणा सुसीमा य जंववई सच्चभामा रप्पिणी कण्हअगमहिंसीओ ॥ ७९३ ॥ वीरियपुव्वस्स णं अट्ट वत्थू अट्ट चूलियावत्थू प० ॥ ७९४ ॥ अट्ट गइओ प० तं० णिरयगई तिरियगई जाव सिद्धिगई गुरुगई पणोळ्ळणगई पब्भारगई ॥ ७९५ ॥ गंगासिधुरत्तारत्तवइदेवीणं दीवा अट्ट २ जोयणाई आयामविकखंभेणं प० ॥ ७९६ ॥ उक्कामुहमेहमुहविज्जु-मुहविज्जुदंतदीवाणं दीवा अट्ट २ जोयणसयाई आयामविकखंभेणं प० ॥ ७९७ ॥ कालोदे णं समुदे अट्ट जोयणसयसहस्साई चक्कवालविकखंभेणं प० ॥ ७९८ ॥

अब्भंतरपुक्खरुद्धे णं अट्ठ जोयणसयसहस्साई चक्कवालविकखंभेणं प० एवं बाहिर-
 पुक्खरुद्धेवि ॥ ७९९ ॥ एगमेगस्स णं रत्तो चाउरंतचक्कवट्ठिस्स अट्ठ सोवन्निए
 काकिणिरयणे छत्तले दुवालसंसिए अट्ठकणिए अधिकरणिंसंठिए प० ॥ ८०० ॥
 मागधस्स णं जोयणस्स अट्ठ धणुसहस्साई निघत्ते प० ॥ ८०१ ॥ जंबू णं सुदंसणा
 अट्ठ जोयणाई उट्ठं उच्चत्तेणं बहुमज्झदेसभाए अट्ठ जोयणाई विकखंभेणं साइरेगाई
 अट्ठ जोयणाई सव्वग्गेणं प० ॥ ८०२ ॥ कूडसामली णं अट्ठ जोयणाई एवं चेव
 ॥ ८०३ ॥ तिमिसगुहा णमठ्ठ जोयणाई उट्ठं उच्चत्तेणं ॥ ८०४ ॥ खंडप्पवायगुहा
 णं अट्ठ जोयणाई उट्ठं उच्चत्तेणं एवं चेव ॥ ८०५ ॥ जंबूमंदरस्स पव्वयस्स
 पुरच्छिमेणं सीताए महानईए उभओ कूले अट्ठ वक्खारपव्वया प० तं० चित्तकूडे
 पम्हकूडे नल्लिणकूडे एगसेले तिकूडे वेसमणकूडे अंजणे मायंजणे ॥ ८०६ ॥
 जंबूमंदरपच्चच्छिमेणं सीओयाए महाणईए उभओकूले अट्ठ वक्खारपव्वया
 प० तं० अंकावई पम्हावई आसीविसे सुहावहे चंदपव्वए सूरपव्वए णागपव्वए
 देवपव्वए ॥ ८०७ ॥ जंबूमंदरपुरच्छिमेणं सीआए महाणईए उत्तरेणं अट्ठ
 चक्कवट्ठिविजया प० तं० कच्छे सुकच्छे महाकच्छे कच्छगावई आवत्ते जाव पुक्ख-
 लावई ॥ ८०८ ॥ जंबूमंदरपुरच्छिमेणं सीयाए महाणईए दाहिणेणमठ्ठ चक्कवट्ठि-
 विजया प० तं० वच्छे सुवच्छे जाव मंगलावई ॥ ८०९ ॥ जंबूमंदरपच्चच्छिमेणं
 सीओयाए महाणईए दाहिणेणं अट्ठ चक्कवट्ठिविजया प० तं० पम्हे जाव सलिलावई
 ॥ ८१० ॥ जंबूमंदरपच्चत्थिमेणं सीओयाए महाणईए उत्तरेणं अट्ठ चक्कवट्ठिविजया
 प० तं० वप्पे सुवप्पे जाव गंधिलावई ॥ ८११ ॥ जंबूमंदरपुरच्छिमेणं सीताए
 महाणईए उत्तरेणमठ्ठ रायहाणीओ प० तं० खेमा खेमपुरी चेव जाव पुंडरीगिणी
 ॥ ८१२ ॥ जंबूमंदरपुरच्छिमेणं सीताए महाणईए दाहिणेणमठ्ठ रायहाणीओ प० तं०
 सुसीमा कुंडला चेव जाव रयणसंचया ॥ ८१३ ॥ जंबूमंदरपच्चच्छिमेणं सीओआए
 महाणईए दाहिणेणं अट्ठ रायहाणीओ प० तं० आसपुरा जाव वीतसोगा ॥ ८१४ ॥
 जंबूमंदरस्स पच्चच्छिमेणं सीओआए महाणईए उत्तरेणं अट्ठ रायहाणीओ प० तं०
 विजया वेजयंती जाव अउज्झा ॥ ८१५ ॥ जंबूमंदरस्स पुरच्छिमेणं सीयाए
 महाणईए उत्तरेणं उक्कोसपए अट्ठ अरिहंता अट्ठ चक्कवट्ठी अट्ठ बलदेवा अट्ठ
 वासुदेवा उप्पज्जिषु वा उप्पज्जंति वा उप्पज्जिस्संति वा ॥ ८१६ ॥ जंबूमंदरपुरच्छि-
 मेणं सीयाए महाणईए दाहिणेणं उक्कोसपए एवं चेव ॥ ८१७ ॥ जंबूमंदरपच्चत्थिमेणं
 सीओयाए महाणईए दाहिणेणं उक्कोसपए एवं चेव ॥ ८१८ ॥ एवं उत्तरेणवि
 जंबूमंदरपुरच्छिमेणं सीआए महाणईए उत्तरेणं अट्ठ दीहवेयङ्का अट्ठ तिमिसगुहाओ

अठु खंडगप्पवाग्रुहाओ अठु कयमालगा देवा अठु णट्टमालगा देवा अठु गंगा-
 कुंडा अठु सिंधुकुंडा अठु गंगाओ अठु सिंधूओ अठु उसमकूडपव्वया अठु उस-
 भकूडा देवा प० जंबूमंदरपुरच्छिमेणं सीयाए महाणईए दाहिणेणं अठु दीहवेयद्धा
 एवं चेव जाव अठु उसभकूडा देवा प० णवरमेत्थ रत्तारतावईओ तासिं चेव कुंडा
 ॥ ८१९ ॥ जंबूमंदरपच्चत्थि० सीओआए महाणईए दाहिणेणं अठु दीहवेयद्धा जाव
 अठु गंगाकुंडा अठु सिंधुकुंडा अठु गंगाओ अठु सिंधूओ जाव अठु उसभकूडा देवा
 प० जंबूमंदरपच्चत्थिमेणं सीओआए महाणईए उत्तरेणं अठु दीहवेयद्धा जाव अठु नट्ट-
 मालगा देवा अठु रत्ताकुंडा अठु रत्तावइकुंडा अठु रत्ताओ जाव अठु उसभकूडा देवा
 प० ॥ ८२० ॥ मंदरचूलिया णं बहुमज्झदेसभाए अठु जोयगाईं विक्खंभेणं प०
 ॥ ८२१ ॥ धायइस्संडीवे पुरत्थिमद्धेणं धायइस्सखे अठु जोयगाईं उट्ठं उच्चत्तेणं
 प० बहुमज्झदेसभाए अठु जोयगाईं विक्खंभेणं साइरेगाईं अठु जोयगाईं सव्वगेणं
 प० एवं धायइस्सखाओ आढवेत्ता सच्चैव जंबूरीववत्तव्वया भाणियव्वा जाव मंदर-
 चूलियत्ति एवं पच्चच्छिमद्धेवि महाधायइस्सखाओ आढवेत्ता जाव मंदरचूलियत्ति
 ॥ ८२२ ॥ एवं पुक्खरवरदीवद्धुरच्छिमद्धेवि पउमस्सखाओ आढवेत्ता जाव मंदर-
 चूलियत्ति एवं पुक्खरवरदीवपच्चत्थिमद्धे महापउमस्सखाओ जाव मंदरचूलियत्ति
 ॥ ८२३ ॥ जंबुदीवे दीवे मंदरे पव्वए भइसालवणे अठु दिसाहत्थिकूडा प० तं०-
 पउमुत्तर नीलवंते सुद्धथी अंजगागिरी, कुमुए य पलासए वडिसे अठुमए रोयणा-
 गिरी ॥ ८२४ ॥ जंबुदीवस्स णं दीवस्स जगईं अठु जोयगाईं उट्ठं उच्चत्तेणं बहुम-
 ज्झदेसभाए अठु जोयगाईं विक्खंभेणं प० ॥ ८२५ ॥ जंबुदीवे दीवे मंदरपव्वयस्स
 दाहिणेणं महाहिमवंते वासहरपव्वए अठु कूडा प० तं० सिद्धे महाहिमवंते हिमवंते
 रोहिता हरीकूडे, हरिकंता हरिवासे वेहल्लिए चेव कूडा उ ॥ ८२६ ॥ जंबूमंदरउत्त-
 रेणं रुप्पिमि वासहरपव्वए अठु कूडा प० तं० सिद्धे य रुप्पी रम्मग नरकंता बुद्धि
 रुप्पकूडे या, हिरण्णवए मणिकंचणे य रुप्पिमि कूडा उ ॥ ८२७ ॥ जंबूमंदरपुर-
 च्छिमेणं रुयगवरे पव्वए अठु कूडा प० तं०-रिट्ठे तवणिज्ज कंचण रुयय दिसासोत्थिए
 पलंजे य; अंजणे अंजणपुलए रुयगस्स पुरच्छिमे कूडा (१) तत्थ णं अठु दिसा-
 कुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं० णंदुत्तरा
 य णंदा य आणंदा णंदिवद्धणा, विजया य वेजयंती जयंती अपराजिया ॥ ८२८ ॥
 जंबूमंदरदाहिणेणं रुयगवरे पव्वए अठु कूडा प० तं०-कणए कंचणे पउमे नल्लिणे ससि
 दिवायरं चेव, वेसमणे वेहल्लिए रुयगस्स उ दाहिणे कूडा (१) तत्थ णं अठु दिसा-
 कुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं० समाहारा

सुप्पइत्ता सुप्पबुद्धा जसोहरा; लच्छिवई सेसवई चित्तगुत्ता वहुंधरा ॥ ८३९ ॥
जंबूमंदरपच्चत्थिमेणं रयगवरे पव्वए अठु कूडा प० तं० सोत्थिए य अमोहे य
हिमवं मंदरे तहा, रुअगे रयगुत्तमे चंदे अठुमे य सुदंसणे (१) तत्थ णं अठु
दिसाकुमारिमहत्तरियाओ महिद्धियाओ जाव पलिओवमट्ठिईयाओ परिवसंति तं०-
इलादेवी सुरादेवी पुढवी पउमावई, एगनासा नवमिया सीया भद्दा य अठुसा
॥ ८३० ॥ जंबूमंदरउत्तररुअगवरे पव्वए अठुकूडा प० तं० रयणे रयणुच्चए या
सव्वरयणे रयणसंचए चेव, विजये य वेजयंते य जयंते अपराजिए (१) तत्थ णं
अठु दिसाकुमारिमहत्तरियाओ महिद्धियाओ जाव पलिओवमट्ठिईयाओ परिवसंति
तं०-अलंबुसा मितकेसी पोंडरी गीतवारुणी, आसा य सव्वगा चेव सिरी हिरी चेव
उत्तरओ ॥ ८३१ ॥ अठु अहेलोगवत्थव्वाओ दिसाकुमारिमहत्तरियाओ प०
तं० भोगंकरा भोगवई सुभोगा भोगमालिणी; सुवच्छा वच्छमिता य, वारि-
सेणा बलाहगा (१) अठु उद्धलोगवत्थव्वाओ दिसाकुमारिमहत्तरियाओ प० तं०-
मेघंकरा मेघवई सुमेघा मेघमालिणी, तोयधारा विचिता य पुप्फमाला अणिदिता २
॥ ८३२ ॥ अठु कप्पा तिरियमिस्सोववज्जगा प० तं० सोहम्मे जाव सहस्सारे
॥ ८३३ ॥ एएसु णं अठुसु कप्पेसु अठु इंदा प० तं० सक्के जाव सहस्सारे
॥ ८३४ ॥ एसि णं अठुण्हं इंदाणं अठु परियाणिया विमाणा प० तं० पालए
पुप्फए सोमणसे तिरिवच्छे णंदावत्ते कामकमे पीइमणे विमले ॥ ८३५ ॥ अठुठ-
मिया णं भिक्खुपडिमा णं चउसट्ठीए राईदिएहिं दोहि य अट्ठासीएहिं भिक्खासएहिं
अहासुत्ता जाव अणुपालियावि भवइ ॥ ८३६ ॥ अठुविहा संसारसमावज्जगा जीवा
प० तं० पढमसमयनेरइया अपढमसमयनेरइया एवं जाव अपढमसमयदेवा
॥ ८३७ ॥ अठुविहा सव्वजीवा प० तं० नेरइया तिरिक्खजोणिया तिरिक्खजोणिणीओ
मणुस्सा मणुस्सीओ देवा देवीओ सिद्धा ॥ ८३८ ॥ अहवा अठुविहा सव्वजीवा
प० तं० आभिणिबोहियनाणी जाव केवलनाणी मइअन्नाणी सुयअन्नाणी विभंग-
नाणी ॥ ८३९ ॥ अठुविहे संजमे प० तं० पढमसमयसुहुमसंपरायसरागसंजमे,
अपढमसमयसुहुमसंपरायसरागसंजमे, पढमसमयबादरसंजमे, अपढमसमयबादर-
संजमे, पढमसमयउवसंतकसायवीयरायसंजमे, अपढमसमयउवसंतकसायवीयराय-
संजमे, पढमसमयखीणकसायवीयरायसंजमे, अपढमसमयखीणकसायवीयरायसंजमे
॥ ८४० ॥ अठु पुढवीओ प० तं० रयणप्पभा जाव अहे सत्तमा ईसिपन्भारा
॥ ८४१ ॥ ईसिपन्भाराए णं पुढवीए बहुमज्झदेसभाए अठुजोयणिए खेतो अठु
जोयणाई बाहल्लेणं प० ॥ ८४२ ॥ ईसिपन्भाराए णं पुढवीए अठु नामधेजा प०

तं० ईसीइ वा, ईसिपब्भाराइ वा, तणूइ वा, तणुतणूइ वा, सिद्धीति वा, सिद्धालएइ वा, सुत्तीइ वा, सुत्तालएइ वा ॥ ८४३ ॥ अठुहिं ठाणेहिं सम्मं संघडियव्वं जइयव्वं परक्कमियव्वं अरिंसि च णं अठ्ठे णो पमाएयव्वं भवइ, असुयाणं धम्माणं सम्मं सुण-
 णयाए अब्भुट्ठेयव्वं भवइ, सुयाणं धम्माणं ओगिण्हणयाए उवधारणयाए अब्भुट्ठेयव्वं
 भवइ, पावाणं कम्माणं संजमेणमकरणयाए अब्भुट्ठेयव्वं भवइ, पोराणाणं कम्माणं
 तवसा विगिचणयाए विसोहणयाए अब्भुट्ठेयव्वं भवइ, असंगिहीयपरियणस्स संगि-
 ण्हणयाए अब्भुट्ठेयव्वं भवइ, सेहं आयायोगयरगहणयाए अब्भुट्ठेयव्वं भवइ, गिला-
 णस्स अगिलाए वेयावचकरणयाए अब्भुट्ठेयव्वं भवइ, साहम्मियाणमधिकरणंसि
 उप्पणंसि तत्थ अणित्सिओवस्सिओ अपक्खग्गाही मज्झत्थभावभूए कह णु साह-
 म्मिया अप्पसद्दा अप्पझंझा अप्पतुमंतुमा उवसामणयाए अब्भुट्ठेयव्वं भवइ
 ॥ ८४४ ॥ महासुक्कसहस्सारेसु णं कप्पेसु विमाणा अठ्ठ जोजणसयाई उड्डं उच्चतेणं
 प० ॥ ८४५ ॥ अरहओ णं अरिट्ठनेमिस्स अठ्ठसया वार्डेणं सदेवमणुयासुराए
 परिसाए वाए अपराजियाणं उक्कोसिया वाइसंपया होत्था ॥ ८४६ ॥ अठ्ठसामइए
 केवलिसमुग्घाए प० तं० पढमे समए दंडं करेइ बीए समए कवाडं करेइ तइए
 समए मंथानं करेइ चउत्थे समए लोगं पूरेइ पंचमे समए लोगं पडिसाहरइ छठ्ठे
 समए मंथं पडिसाहरइ सत्तमे समए कवाडं पडिसाहरइ अठ्ठमे समए दंडं पडि-
 साहरइ ॥ ८४७ ॥ समणस्स णं भगवओ महावीरस्स अठ्ठ सया अणुत्तरोववाइ-
 याणं गइकल्लाणाणं जाव आगमेसिभद्धानं उक्कोसिया अणुत्तरोववाइयसंपया होत्था
 ॥ ८४८ ॥ अठ्ठविहा वाणमंतरा देवा प० तं०-पिसाया भूया जक्खा रक्खसा
 किन्नरा किंपुरिसा महोरगा गंधव्वा ॥ ८४९ ॥ एएसि णं अठ्ठण्हं वाणमंतरदेवाणं
 अठ्ठरक्खा प० तं०-कलंबो अ पिसायाणं वडो जक्खाणमेव य; तुलसी भूयाणं
 भवे रक्खसाणं च कंडओ (१) असोओ किन्नराणं च किंपुरिसाणं य चंपओ;
 नागरक्खो भुयंग्गाणं गंधव्वाणं य तैंदुओ (२) ॥ ८५० ॥ इमीसे रयणप्पभाए
 पुढवीए बहुसमरमणिजाओ भूमिभागाओ अठ्ठजोयणसए उड्डवाहाए सूरविमाणे
 चारं चरइ ॥ ८५१ ॥ अठ्ठ नक्खत्ता चंदेणं सद्धिं पमइ जोगं जोएंति तं०
 कत्तिया रोहिणी पुणव्वसू महा चित्ता विसाहा अणुराहा जेष्ठा ॥ ८५२ ॥
 जंबुदीवस्स णं दीवस्स दारा अठ्ठजोयणाई उड्डं उच्चतेणं प०-सव्वेसिपि दीवसमु-
 द्धानं दारा अठ्ठजोयणाई उड्डं उच्चतेणं प० ॥ ८५३ ॥ पुरिसवेयणिजस्स णं कम्मस्स
 जहण्णेणं अठ्ठसंवच्छराई बंधठिई प० ॥ ८५४ ॥ जसोकितीनामणं कम्मस्स
 जहणेणं अठ्ठ मुहुत्ताई बंधठिई प० ॥ ८५५ ॥ उच्चगोयस्स णं कम्मस्स एवं चैव

॥ ८५६ ॥ तेइदियाणमठु जाइकुलकोडीजोणीपमुहसयसहस्सा प० ॥ ८५७ ॥
 जीवा णं अठुठाणणिव्वत्तिए पोगगले पावकम्मत्ताए चिणिंसु वा चिणंति वा चिणि-
 स्संति वा तं०-पढमसमयनेरइयनिव्वत्तिए जाव अपढमसमयदेवनिव्वत्तिए एवं
 चिण उवचिण जाव णिज्जरा चेव ॥ ८५८ ॥ अठुपएसिया खंधा अणंता प०
 ॥ ८५९ ॥ अठु पएसोगाढा पोगगला अणंता प० ॥ ८६० ॥ जाव अठुगुणलुक्खा
 पोगगला अणंता प० ॥ ८६१ ॥ अठुमं ठाणं समत्तं ॥

नवमठ्ठाणं

नवहिं ठाणेहिं समणे णिग्गंथे संभोइयं विसंभोइयं करेमाणे णाइक्कमइ तं०-
 आयरियपडिणीयं उवज्झायपडिणीयं थेरपडिणीयं कुल० गण० संघ० नाण०
 दंसण० चरित्तपडिणीयं ॥ ८६२ ॥ नव बंभचेरा प० तं० सत्थपरिज्जा लोगविजओ
 जाव उवहाणसुयं महापरिण्णा ॥ ८६३ ॥ नव बंभचेरगुत्तीओ प० तं० विवित्ताई
 सयणासणाई सेवित्ता भवइ णो इत्थिसंसत्ताई नो पसुसंसत्ताई नो पंडगसंसत्ताई १
 नो इत्थीणं कहं कहेत्ता २ नो इत्थिठाणाई सेवित्ता भवइ ३ नो इत्थीणमिंदियाई
 मणोहराई मणोरमाई आलोइत्ता निज्झाइत्ता भवइ ४ नो पणीयरसभोई ५ नो
 पाणभोयणस्स अइमत्तं आहारए सया भवइ ६ नो पुव्वरयं पुव्वकीलियं समरेत्ता
 भवइ ७ णो सदाणुवाई णो रुवाणुवाई णो सिलोगाणुवाई ८ णो सायसोक्खपडिब्बे
 यावि भवइ ९ ॥ ८६४ ॥ नव बंभचेरअगुत्तीओ प० तं० नो विवित्ताई सयणा-
 सणाई सेवित्ता भवइ इत्थीसंसत्ताई पसुसंसत्ताई पंडगसंसत्ताई इत्थीणं कहं कहेत्ता
 भवइ इत्थीणं ठाणाई सेवित्ता भवइ इत्थीणं ईदियाई जाव निज्झाइत्ता भवइ पणीय-
 रसभोई पाणभोयणस्स अइमायमाहारए सया भवइ पुव्वरयं पुव्वकीलियं सरित्ता
 भवइ सदाणुवाई रुवाणुवाई सिलोगाणुवाई जाव सायासुक्खपडिब्बे यावि भवइ
 ॥ ८६५ ॥ अभिणंदणाओ णं अरहओ सुमई अरहा नवहिं सागरोवमक्कोडिसयसह-
 स्सेहिं विइक्कंतेहिं समुप्पत्ते ॥ ८६६ ॥ नव सब्भावपयत्था प० तं० जीवा अजीवा
 पुण्यं पावो आसवो संवरो णिज्जरा बंधो मोक्खो ॥ ८६७ ॥ णवविहा संसारसमा-
 चन्नगा जीवा प० तं० पुढविकाइया जाव वणस्सइकाइया बेईदिया जाव पंचिदि-
 यत्ति ॥ ८६८ ॥ पुढवीकाइया नवगइया नव आगइया प० तं० पुढवीकाइए पुढ-
 वीकाइएसु उववज्जमाणे पुढवीकाइएहिंतो वा जाव पंचिदिएहिंतो वा उववज्जेज्जा, से
 चेव णं से पुढवीकाइए पुढवीकायत्तं विप्पजहमाणे पुढविकाइयत्ताए जाव पंचिदि-
 यत्ताए वा गच्छेज्जा, एवं आउकाइयावि जाव पंचिदियत्ति ॥ ८६९ ॥ नवविहा
 सव्वजीवा प० तं० एगिंदिया बेईदिया तेइदिया चउरिंदिया नेरइया पंचिदियत्ति-

रिक्खजोणिया मणुस्सा देवा सिद्धा ॥ ८७० ॥ अहवा नवविहा सव्वजीवा प० तं०
 पढमसमयनेरइया अपढमसमयनेरइया जाव अपढमसमयदेवा सिद्धा ॥ ८७१ ॥
 नवविहा सव्वजीवोगाहणा प० तं० पुढविकाइओगाहणा आउ० जाव वणस्सइकाइ-
 ओगाहणा बेइंदियोगाहणा तेइंदियोगाहणा चउरिंदियोगाहणा पंचिंदियोगाहणा
 ॥ ८७२ ॥ जीवा णं नवहिं ठाणेहिं संसारं वत्तिं सु वा वत्तंति वा वत्तिस्संति वा तं०
 पुढविकाइयत्ताए जाव पंचिंदियत्ताए ॥ ८७३ ॥ नवहिं ठाणेहिं रोगुप्पत्ती सिया तं०
 अच्चासणाए अहियासणाए अइणिहाए अइजागरिणं उच्चारनिरोहेणं पासवणनिरोहेणं
 अद्धानगमणेणं भोयणपडिक्कूल्याए इंदियत्थविकोवणयाए ॥ ८७४ ॥ णवविहे
 दरिसणावरणिज्जे कम्मे प० तं०-निहा निहानिहा पयला पयलापयला श्रीणागिद्धी
 चक्खुदरिसणावरणे अचक्खुदरिसणावरणे ओहिदरिसणावरणे केवलदरिसणावरणे
 ॥ ८७५ ॥ अभीई णं णक्खत्ते साइरेगे नवमुहुत्ते चंदेणं सद्धिं जोगं जोएइ
 ॥ ८७६ ॥ अभिईआइआ णं णवनक्खत्ता णं चंदस्स उत्तरेणं जोगं जोएंति तं०, अभीई
 सवणो धणिट्ठा जाव भरणी ॥ ८७७ ॥ इमीसे णं रयणप्पभाए पुढवीए बहुसम-
 रंमणिजाओ भूमिभागाओ णवजोअणसयाई उड्डं अवाहाए उवरिल्ले ताराहवे चारं
 चरति ॥ ८७८ ॥ जंबुद्दीवे णं दीवे णवजोअणिया मच्छा पविसिंसु वा पविसंति वा
 पविसिस्संति वा ॥ ८७९ ॥ जंबुद्दीवे दीवे भारहे वासे इमीसे ओसप्पिणीए णव
 बलदेववासुदेवपियरो होत्था तं० पयावई य बंभे य रोहे सोमे सिवेइया, महासीहे
 अग्गिसीहे दसरह नवमे य वसुदेवे (१) इत्तो आढत्तं जहा समवाये निरवसेसं
 जाव एगा से गम्भवसही सिज्झिस्सति आगमिस्सेणं ॥ ८८० ॥ जंबुद्दीवे दीवे
 भारहे वासे आगमेस्साए उस्सप्पिणीए नवबलदेववासुदेवपियरो भविस्संति नव
 बलदेववासुदेवमायरो भविस्संति, एवं जहा समवाए निरवसेसं जाव महाभीमसेणे
 य सुग्गीवे य अपच्छिमे; एए खलु पडिसिंसु कित्तीपुरिसाण वासुदेवाणं सव्वेवि
 चक्कजोही हम्मेहंती सचक्केहिं ॥ ८८१ ॥ एगमेगे णं महानिही नवनव जोयणाई
 विक्खंभेणं प० एगमेगस्स णं रण्णो चाउरंतचक्कवट्ठिस्स णव महानिहओ प० तं०
 “णेसप्पे पंडुए पिंगलए सव्वरयण महापउमे, काले य महाकाले माणवग महा-
 निही संखे (१) नेसर्पमि निवेसा गामागरनगरपट्टणाणं च, दोणसुहमडंबाणं
 खंधाराणं गिहाणं च (२) गणियस्स य वीयाणं माणुग्माणस्स जं पमाणं च,
 धन्नस्स य वीयाणं उप्पत्ती पंडुए भणिया (३) सव्वा आभरणविही पुरिसाणं
 जा य होइ महिलाणं, आसाण य हत्थीण य पिंगलगनिहिम्मि सा भणिया (४)
 रयणाई सव्वरयणे चोइस पवराई चक्कवट्ठिस्स, उप्पज्जंति एगिंदियाई पंचिदि-

याइं च (५) वत्थाण य उप्पत्ती निप्पत्ती चेव सव्वभत्तीणं, रंगाण य धोयाण य सव्वा एसा महापउमे (६) काले कालण्णाणं भव्वपुराणं च तीसु वासेसु; सिप्पसयं कम्मणि य, तिचि पयाए हियकराई (७) लोहस्स य उप्पत्ती होइ महाकालि आगराणं च, रूपस्स सुवण्णस्स य मणिमोत्तिसिलप्पवालाणं (८) जोधाण य उप्पत्ती आवरणाणं च पहरणाणं च, सव्वा य जुद्धनीई, माणवए दंडनीई य (९) नडविही नाडगविही, कव्वस्स चउव्विहस्स उप्पत्ती, संखे महानिहिम्मी, तुडियंगणं च सव्वेसिं (१०) चक्कठुपइठ्ठाणा अठुस्सेहा य नव य विक्खंभे, बारसदीहा मंजूससंठिया, जन्हवीइ मुहे (११) वेरलियमणिकवाडा कणगमया विविहरयणपडिपुच्चा, ससिसूरचक्कलक्खण अणुसमजुगवाहुवयणा य (१२) पल्लिओवमट्ठिईया णिहिसरिणामा य तेसु खलु देवा; जेसिं ते आवासा अक्किजा आहि-
वच्चा वा (१३) एए ते नवनिहओ पभूयधंणरयणसंचयसमिद्धा जे वसमुवगच्छंती सव्वेसिं चक्कवट्ठीणं” (१४) ॥ ८८२ ॥ नव विगईओ प० तं० खीरं दहिं णवणीयं सप्पि तेलं गुलो महुं मज्जं मंसं ॥ ८८३ ॥ नवसोयपरिस्सवा बोंदी प० तं० दो सोत्ता दो गेत्ता दो घाणा मुहं पोसे पाऊ ॥ ८८४ ॥ णवविहे पुजे प० तं० अन्नपुच्चे पाणपुच्चे वत्थपुच्चे लेणपुच्चे सयणपुच्चे मणपुच्चे वडपुच्चे कायपुच्चे नमोक्कारपुच्चे ॥ ८८५ ॥ णव पावस्सायतणा प० तं० पाणाइवाए सुसावाए जाव परिग्गहे कोहे माणे माया लोहे ॥ ८८६ ॥ नवविहे पावस्सुयपसंगे प० तं० उप्पाए निमित्ते मंते आइक्खिए तिगिच्छए, कला आवरणे अन्नाणे सिच्छापावयणेति य ॥ ८८७ ॥ णव गेउणिया वत्थु प० तं० संखाणे निमित्ते काइए पोराणे पारिहत्थिए परपंडिए वाइए भूइकम्मे तिगिच्छए ॥ ८८८ ॥ समणस्स णं भगवओ णायपुत्तमहावीरस्स नव गणा होत्था तं० गोदासगणे उत्तरबल्लिस्सहगणे उद्देहगणे चारणगणे उद्वाइयगणे विस्सवाइयगणे कामद्धियगणे माणवगणे कोडियगणे ॥ ८८९ ॥ समणेणं भगवथा महावीरेणं सम-
णाणं णिग्गंथाणं णवकोडिपरिसुद्धे भिक्खे प० तं० ण हणइ ण हणावइ हणंतं पाणुजाणइ ण पयइ ण पयावेइ पर्यंतं पाणुजाणइ ण किणइ ण किणावेइ किणंतं पाणुजाणइ ॥ ८९० ॥ ईसाणस्स णं देविदस्स देवरणो वरुणस्स महारजो णव अग्गमहिसीओ प० ॥ ८९१ ॥ ईसाणस्स णं देविदस्स देवरजो अग्गमहिसीणं णवपल्लिओवमाईं ठिई प० ॥ ८९२ ॥ ईसाणे कप्पे उक्कोसेणं देवीणं णव पल्लिओ-
वमाईं ठिई प० ॥ ८९३ ॥ नव देवनिकाया प० तं० “सारस्सयमाइच्चा वण्ही वरुणा य गहतोया य तुसिया अव्वाबाहा अग्गिच्चा चेव रिठ्ठा य” ॥ ८९४ ॥ अव्वाबाहाणं देवाणं नव देवा नव देवसया प० एवं अग्गिच्चावि एवं रिठ्ठाकि

॥ ८९५-६ ॥ णव गेवेजविमाणपत्थडा प० तं० हेठ्ठिमहेठ्ठिमगेविज्जविमाणपत्थडे
हेठ्ठिममज्झिमगेविज्जविमाणपत्थडे हेठ्ठिमउवरिमगेविज्जविमाणपत्थडे मज्झिमहेठ्ठि-
मगेविज्जविमाणपत्थडे मज्झिममज्झिमगेविज्जविमाणपत्थडे मज्झिमउवरिमगेविज्जवि-
माणपत्थडे उवरिमहेठ्ठिमगेविज्जविमाणपत्थडे उवरिममज्झिमगेविज्जविमाणपत्थडे
उवरिमउवरिमगेविज्जविमाणपत्थडे ॥ ८९७ ॥ एएसि णं णवण्हं गेविज्जविमाणपत्थ-
डाणं णव नामधिज्जा प० तं० भदे सुभदे सुजाए सोमणसे पियदरिसणे, सुदंसणे
अमोहे य सुप्पबुद्धे जसोधरे ॥ ८९८ ॥ नवविहे आउपरिणामे प० तं० गइपरि-
णामे गइबंधणपरिणामे ठिइपरिणामे ठिइबंधणपरिणामे उद्धंगारवपरिणामे अहे-
गारवपरिणामे तिरियंगारवपरिणामे दीहंगारवपरिणामे रहस्संगारवपरिणामे ॥ ८९९ ॥
नवनवमिया णं भिक्खुपडिमा एगासीए राईदिएहिं चउहिं य पंचुत्तरेहिं भिक्खा-
सएहिं अहासुत्ता जाव आराहिया यावि भवइ ॥ ९०० ॥ नवविहे पायच्छित्ते
प० तं० आलोयणारिहे जाव मूलारिहे अणवठुप्पारिहे ॥ ९०१ ॥ जंबूमंदरदाहि-
णेणं भरहे दीहवेयङ्गे नव कूडा प० तं० सिद्धे भरहे खंडग माणी वेयङ्ग पुण्ण
तिमिसगुहा, भरहे वेसमणे या भरहे कूडाण णामाई ॥ ९०२ ॥ जंबूमंदरदाहिणेणं
निसभे वासहरपव्वए णवकूडा प० तं० सिद्धे निसहे हरिवास विदेह हरि धिइ
अ सीओया, अवरविदेहे रुयगे निसभे कूडाण नामाणि ॥ ९०३ ॥ जंबूमंदरपव्वए
णंदणवणे णव कूडा प० तं० णंदणे मंदरे चेव निसहे हेमवए रयय रयए य,
सागरचित्ते वइरे बलकूडे चेव बोद्धव्वे ॥ ९०४ ॥ जंबूमालवंतवक्खारपव्वए णव
कूडा प० तं० सिद्धे य मालवंते य उत्तरकुर कच्छ सागरे रयए, सीया तह पुण्ण-
णामे हरिस्सहकूडे य बोद्धव्वे ॥ ९०५ ॥ जंबू० कच्छे दीहवेयङ्गे नव कूडा प० तं०
सिद्धे कच्छे खंडग माणी वेयङ्ग पुण्ण तिमिसगुहा, कच्छे वेसमणे या कच्छे कूडाण
णामाई ॥ ९०६ ॥ जंबू० सुकच्छे दीहवेयङ्गे णव कूडा प० तं० सिद्धे सुकच्छे खंडग
माणी वेयङ्ग पुण्ण तिमिसगुहा; सुकच्छे वेसमणे या सुकच्छि कूडाण णामाई
॥ ९०७ ॥ एवं जाव पोक्खलावइमि दीहवेयङ्गे एवं वच्छे दीहवेयङ्गे एवं जाव
मंगलावइमि दीहवेयङ्गे ॥ ९०८ ॥ जंबू० विज्जुप्पभे वक्खारपव्वए नव कूडा प०
तं०-सिद्धे अ विज्जुणामे देवकुरा पम्ह कणग सोवत्थी, सीओयाए सजले हरिकूडे
चेव बोद्धव्वे ॥ ९०९ ॥ जंबू० पम्हे दीहवेयङ्गे नव कूडा प० तं०-सिद्धे पम्हे
खंडग माणी वेयङ्ग एवं चेव जाव सलिलावइमि दीहवेयङ्गे एवं वप्पे दीहवेयङ्गे एवं जाव
गंधिलावइमि दीहवेयङ्गे नव कूडा प० तं०-सिद्धे गंधिल खंडग माणी वेयङ्ग पुत्र
तिमिसगुहा; गंधिलावइ वेसमण कूडाणं होति णामाई (१) एवं सव्वेस दीहवेयङ्गेस

दो कूडा सरिसणामगा सेसा ते चेव ॥ ९१० ॥ जंबूमंदरउत्तरेणं नीलवंते वासहर-
 पवण एव कूडा प० तं० सिद्धे नीलवन्त विदेहे सीया किन्ती य नारिकंता य, अव-
 रविदेहे रम्मगकूडे उवदंसणे चेव ॥ ९११ ॥ जंबूमंदरउत्तरेणं एरवए दीहवेयङ्गे
 नव कूडा प० तं० सिद्धे रयणे खंडग माणी वेयङ्ग पुण्ण तिमिसगुहा, एरवए वेस-
 मणे एरवए कूडणामाई ॥ ९१२ ॥ पासे णं अरहा पुरिसादाणि ए वजरिसहणा-
 रायसंघयणे समचउरससंठाणसंठिए नव रयणीओ उङ्ग उच्चत्तेणं होत्था ॥ ९१३ ॥
 समणस्स णं भगवओ महावीरस्स तित्थंसि णवहिं जीवेहिं तित्थगरणामगोत्ते कम्मे
 णिव्वत्ति ए तं० सेणिएणं सुपासेणं उदाङ्गा पोट्टिलेणं अणगारेणं दढाउणा संखेणं
 सयएणं सुलसाए सावियाए रेवईए ॥ ९१४ ॥ एस णं अज्जो ! कण्हे वासुदेवे, रामे
 बलदेवे, उदए पेढालपुत्ते, पुट्टिले, सयये गाहावई, दारुए नियंठे, सच्चई नियंठीपुत्ते,
 सावियबुद्धे अंबडे परिव्वायए, अज्जाविणं सुपासा पासावच्चिजा, आगमेस्साए उस्स-
 प्पिणीए चाउज्जामं धम्मं पन्नवइत्ता सिज्झिहंति जाव अंतं काहंति ॥ ९१५ ॥ एस
 णं अज्जो ! सेणिए राया भिंभिसारे कालमासे कालं किच्चा इमीसे रयणप्पमाए पुढ-
 वीए सीमंतए नरए चउरासीइवाससहस्सट्ठिइयंसि निरयंसि णेरइयत्ताए उववज्जिहंति
 से णं तत्थ णेरइए भविस्सइ काले कालोभासे जाव परमकिण्हे वज्जेणं से णं तत्थ
 वेयणं वेदिहिती उज्जलं जाव दुरहियासं से णं तओ नरयाओ उव्वट्टेत्ता आगमेस्साए
 उस्सप्पिणीए इहेव जंबुद्वीवे द्वीवे भारहे वासे वेयङ्गुरिपायमूले पुडैसु जणवएसु
 सयदुवारे णयरे संसुइस्स कुलगरस्स भद्दाए भारियाए कुच्छिसि पुमत्ताए पच्चा-
 याहिइ तए णं सा भद्दा भारिया नवण्हं मासाणं बहुपडिपुण्णाणं अद्धठमाणं य राई-
 दियाणं वीइक्कंताणं सुकुमालपाणिपायं अहीणपडिपुच्चपंचिंदियसरीरं लक्खणवज्जण०
 जाव सुल्लं दारगं पयाहिती जं रयणिं च णं से दारए पयाहिती तं रयणिं च णं
 सयदुवारे णयरे सब्भंतरबाहिरए भारगसो य कुंभगसो य पउमवासे य रयणवासे
 य वासे वासिहंति तए णं तस्स दारगस्स अम्मापियरो एकारसमे दिवसे वइक्कंते
 जाव बारसाहे दिवसे अयमेयारुवं गोण्णं गुणनिष्फण्णं नामधिज्जं काहंति जम्हा णं
 अम्हं इमंसि दारगंसि जायंसि समाणंसि सयदुवारे नयरे सब्भंतरबाहिरए भार-
 गसो य कुंभगसो य पउमवासे य रयणवासे य वासे बुट्ठे तं होउ णं अम्हं इमस्स
 दारगस्स नामधिज्जं महापउमे तए णं तस्स दारगस्स अम्मापियरो नामधिज्जं
 काहंति महापउमेत्ति, तए णं महापउमं दारगं अम्मापियरो साइरेणं अट्ठवासजायगं
 जाणित्ता महया रायाभिसेएणं अभिसिन्निहंति से णं तत्थ राया भविस्सइ महया
 हिमवंतमहंतमलयमंदररायवन्नओ जाव रज्जं पसाहेमाणे विहरिस्सइ तए णं तस्स

महापउमस्स रत्तो अन्नया कयाइ दो देवा महिद्धिया जाव महेसक्खा सेणाकम्मं काहिंति तं० पुण्णभइए माणिभइए तए णं सयदुवारे णयरे बहवे राईसरतलवरमा-
 ङं वियकोडुं वियइन्भसेडुसेणावइसत्थवाहप्पभिइयो अन्नमच्चं सद्दवेहिंति एवं वइस्संति जम्हा णं देवाणुप्पिया ! अम्हं महापउमस्स रत्तो दो देवा महिद्धिया जाव महेसक्खा
 सेणाकम्मं करेंति तं० पुबभइ य माणिभइ य तं होउ णं अम्हं देवाणुप्पिया ! महा-
 पउमस्स रत्तो दोच्चेवि नामधेजे देवसेणे, तए णं तस्स महापउमस्स दोच्चेवि नाम-
 धेजे भविस्सइ देवसेणेति २ तए णं तस्स देवसेणस्स रण्णो अण्णया कयाइ सेयसं-
 खतलविमलसज्जिकासे चउदंते हत्थिरयणे समुप्पज्जिहिंति तए णं से देवसेणे राया
 तं सेयसंखतलविमलसज्जिकासं चउइतं हत्थिरयणं दुरुढे समाणे सयदुवारं णगरं
 मज्झंमज्जेणं अभिक्खणं २ अइज्जाहि य णिज्जाहि य, तए णं सयदुवारे णगरे बहवे
 राईसरतलवर जाव अन्नमच्चं सद्दवेहिंति २ एवं वइस्संति जम्हा णं देवाणुप्पिया !
 अम्हं देवसेणस्स रत्तो सेयसंखतलविमलसज्जिकासे चउदंते हत्थिरयणे समुप्पजे
 तं होउ णं अम्हं देवाणुप्पिया ! देवसेणस्स रण्णो तच्चेवि णामधेजे विमलवाहणे
 तए णं तस्स देवसेणस्स रत्तो तच्चेवि णामधेजे भविस्सइ विमलवाहणे २ तए णं
 से विमलवाहणे राया तीसं वासाइ अगारवासमज्जे वसित्ता अम्मापिईहिं
 देवत्तगएहिं गुरुमहत्तरएहिं अन्नमज्जाए समाणे उटुंमि सरए संबुद्धे अणुत्तरे
 मोक्खमग्गे पुणरवि लोगंतिएहिं जीयकप्पिएहिं देवेहिं ताहिं इड्ढाहिं कंताहिं पियाहिं
 मणुच्चाहिं मणामाहिं उरालाहिं कल्लाणाहिं धन्नाहिं सिवाहिं मंगल्लाहिं सत्तिरीआहिं
 वग्गूहिं अभिणंदिज्जमाणे अभिथुवमाणे य बहिया सुभूमिभागो उज्जाणे एगं
 देवदूसमादाय मुंडे भवित्ता अगाराओ अणगारियं पव्वयाहिंति तस्स णं भगवंतस्स
 साइरेगाइ दुवालस वासाइ निच्चं वोसठ्ठाए चियत्तदेहे जे केइ उवसग्गा
 उप्पज्जंति तं० दिव्वा वा माणुसा वा तिरिक्खजोणिया वा ते उप्पजे सम्मं सहिस्सइ
 खमिस्सइ तितिक्खिस्सइ अहियासिस्सइ तए णं से भगवं इरियासमिए भासासमिए
 जाव गुत्तवंभयारी अममे अकिंचणे छिन्नगंधे निरुवलेवे कंसपाइव मुक्कतोए जह्वा
 भावणाए जाव सुहुयहुयासणेइव तेयसा जलंते, कंसं संखे जीवे गगणे वाए य सारए
 सलिले, पुक्खरपत्ते कुम्मे विहगे खग्गे य भारंडे (१) कुंजर वसहे सीहे नगराया
 चेव सागरमक्खोभे, चंदे सरे कणगे वसुंधरा चेव सुहुयहुए (२) नत्थि णं तस्स
 भगवंतस्स कत्थइ पडिबंधे भवइ, से य पडिबंधे चउव्विहे प० तं०-अंडए वा पोय-
 एइ वा उग्गहेइ वा पयगहिइ वा जं णं जं णं दिसं इच्छइ तं णं तं णं दिसं अपडिबद्धे
 उइभूए लहुभूए अणप्पगंधे संजमेणं अप्पाणं भावेमाणे विहरिस्सइ, तस्स णं भगवंतस्स

अणुत्तरेण नाणेण अणुत्तरेण दंसणेण अणुत्तरेण चरित्तेण एवं आलएणं विहारेणं
 अज्जवे मद्दवे लाघवे खंती मुत्ती गुत्ती सच्च संजम तवगुणसुचरियसोवच्चियकलपरि-
 निव्वाणमग्गेण अप्पाणं भावेमाणस्स ज्ञाणंतरियाए वट्टमाणस्स अणंते अणुत्तरे
 निव्वाधाए जाव केवलवरनाणदंसणे ससुप्पज्जिहिति, तए णं से भगवं अरहा जिणे
 भविस्सइ केवली सव्वञ्चू सव्वदरिसी सदेवमणुयासुरस्स लोगस्स परियागं जाणइ
 पासइ सव्वलोए सव्वजीवाणं आगइ गइ ठिइ चवणं उववायं तक्कं मणोमाणसिथं
 भुत्तं कडं परिसेवियं आवीकम्मं रहोकम्मं अरहा अरहस्स भागी तं तं कालं मणस-
 वयसकाइए जोगे वट्टमाणं सव्वलोए सव्वजीवाणं सव्वभावे जाणमाणे पासमाणे
 विहरइ, तए णं से भगवं तेणं अणुत्तरेणं केवलवरनाणदंसणेणं सदेवमणुआसुरलोगं
 अभिसमिच्च समणाणं णिग्गंथाणं पंच महव्वयाइं सभावणाइं छच्च जीवनिक्कायधम्मं
 देसेमाणे विहरिस्सइ से जहाणामए अज्जो ! मए समणाणं णिग्गंथाणं एगे आरंभ-
 ठाणे पण्णत्ते एवामेव महापउमेवि अरहा समणाणं णिग्गंथाणं एगं आरंभट्ठाणं पञ्च-
 वेहिति, से जहाणामए अज्जो ! मए समणाणं णिग्गंथाणं दुविहे बंधणे प० तं०
 पेज्जबंधणे, दोसबंधणे, एवामेव महापउमेवि अरहा समणाणं णिग्गंथाणं दुविहं
 बंधणं पञ्चवेहिति तं० पेज्जबंधणं च दोसबंधणं च से जहानामए अज्जो ! मए
 समणाणं णिग्गंथाणं तओ दंडा प० तं० मगदंडे ३ एवामेव महापउमेवि समणाणं
 णिग्गंथाणं तओ दंडे पण्णवेहिति तं० मणोदंडं ३ से जहानामए एएणं अभिलावेणं
 चत्तारि कसाया प० तं० कोहकसाए ४ पंच कामगुणे प० तं० सहे ५ छज्जीवनिक्काया
 प० तं० पुढाविकाइया जाव तसकाइया एवामेव जाव तसकाइया से जहाणामए
 एएणं अभिलावेणं सत्त भयट्ठाणा प० तं० एवामेव महापउमेवि अरहा समणाणं
 णिग्गंथाणं सत्त भयट्ठाणा पञ्चवेहिति, एवमट्ठ मयट्ठाणे, णव बंभचेरगुत्तीओ दस-
 विहे समणधम्मे एवं जाव तेत्तीसमासायणाउत्ति से जहानामए अज्जो ! मए सम-
 णाणं णिग्गंथाणं थेरकप्पे जिणकप्पे मुंडभावे अण्हाणए अदंतवणे अच्छत्तए
 अणुवाहणए भूमिसेज्जा फलगसेज्जा कट्ठसेज्जा केसलोए बंभचेरवासे परघरपवेसे
 जाव लद्धावलद्धवितीओ प० एवामेव महापउमेवि अरहा समणाणं णिग्गंथाणं
 थेरकप्पं जिणकप्पं जाव लद्धावलद्धविती पण्णवेहिति, से जहाणामए अज्जो !
 मए समणाणं णिग्गंथाणं आहाकम्मिण्णइ वा उहेसिण्णइ वा मीसजाण्णइ वा अज्झोय-
 रण्णइ वा पूइए कीए पामिच्चे अच्छेज्जे अणिसट्ठे अभिहड्डे वा कंतारभत्तेइ वा दुक्कि-
 क्खभत्तेइ वा गिलाणभत्ते वड्डियाभत्तेइ वा पाहुणभत्तेइ वा मूलभोग्गेइ वा कंद०
 फल० बीय० हरियभोग्गेइ वा पड्डिसिद्धि एवामेव महापउमे वि अरहा समणाणं०

आहाकम्मियं वा जाव हरियभोयणं वा पडिसेहिस्सइ, से जहाणामए अज्जो ! मए समणाणं णिग्गंथाणं पंचमहव्वइए सपडिक्कमणे अचेलए धम्मे प० एवामेव महा-
पउमेवि अरहा समणाणं णिग्गंथाणं पंचमहव्वइयं जाव अचेलं धम्मं पण्णवेहिती, से जहाणामए अज्जो ! मए पंचाणुव्वइए सत्तसिक्खावइए दुवालसविहे सावगधम्मे
प० एवामेव महापउमेवि अरहा पंचाणुव्वइयं जाव सावगधम्मं पण्णवेस्सइ, से जहाणामए अज्जो ! मए समणाणं णिग्गंथाणं सेज्जायरपिंडेइ वा रायपिंडेइ वा पडि-
सिडे एवामेव महापउमेवि अरहा समणाणं णिग्गंथाणं सेज्जायरपिंडेइ वा जाव पडिसेहिस्सइ, से जहाणामए अज्जो ! मम णव गणा इगारस गणहरा, एवामेव
महापउमस्स वि अरहओ णव गणा इगारस गणहरा भविस्संति । से जहाणामए अज्जो ! अहं तीसं वासाइं अगारवासमज्जे वसित्ता मुंडे भवित्ता जाव पव्वइए दुवा-
लस संवच्छराइं तेरस पक्खा छउमत्थपरियागं पाउणित्ता तेरसहिं पक्खेहिं ऊणगाइं तीसं वासाइं केवलपरियागं पाउणित्ता बायालीसं वासाइं सामण्णपरियागं पाउणित्ता
वावत्तरि वासाइं सव्वाउयं पालइत्ता सिज्झिस्सं जाव सव्वदुक्खाणमंतं करेस्सं, एवा-
मेव महापउमेवि अरहा तीसं वासाइं अगारवासमज्जे वसित्ता जाव पव्विहिति दुवा-
लस संवच्छराइं जाव वावत्तरिवासाइं सव्वाउयं पालइत्ता सिज्झिहिती जाव सव्वदु-
क्खाणमंतं काहिती, “जंसीलसमायारो अरहा तित्थं करो महावीरो, तस्सीलसमा-
यारो होइ उ अरहा महापउमे ॥ ९१६ ॥ महापउमचरिअं समत्तं ॥

णव णक्खत्ता चंदस्स पच्छंभागा प० तं० अभिई सवणो धणिठ्ठा रेवइ अस्सिणि मग्गसिर पूसो, हत्थो चित्ता य तहा पच्छंभागा णव हवंति ॥ ९१७ ॥ आण-
यपाणयआरण्णुएसु कप्पेसु विमाणा णव जोयणसयाइं उड्डं उच्चतेणं प० ॥ ९१८ ॥ विमलवाहणे णं कुलगरे णव धणुसयाइं उड्डं उच्चतेणं होत्था ॥ ९१९ ॥ उसभे णं
अरहा कोसलिए णं इमीसे ओसप्पिणीए णवहिं सागरोवमकोढाकोडीहिं विईकंताहिं तित्थे पवत्तिए ॥ ९२० ॥ घणदंतलठ्ठदंतगूढदंतमुद्धदंतदीवा णं दीवा णवणवजोय-
णसयाइं आयामविक्खंभेणं प० ॥ ९२१ ॥ सुक्कस्स णं महागहस्स णव वीहीओ प० तं०-हयवीही गयवीही णागवीही वसहवीही गोवीही उरगवीही अयवीही
मियवीही वेसाणरवीही ॥ ९२२ ॥ नवविहे नोकसायवेयणिजे कम्मे प० तं०-
इत्थिवेए पुरिसवेए णपुंसगवेए हासे रई अरई भये सोगे दुगुंछे ॥ ९२३ ॥ चउरिं-
दियाणं णव जाइकुलकोडीजोणिपमुहसयसहस्सा प० ॥ ९२४ ॥ भुयगपरिसप्पथल-
यरपंचिंदियतिरिक्खजोणियाणं नवजाइकुलकोडीजोणिपमुहसयसहस्सा प० ॥ ९२५ ॥ जीवा णं णवठ्ठाणनिवत्तिए पोग्गळे पावकम्मत्ताए चिणिंसु वा ३ ॥ ९२६ ॥ पुढवि-

काइयनिवत्तिए जाव पंचिदियनिवत्तिए एवं चिण उवचिण जाव णिजरा चेव
॥ ९२७ ॥ णव पएसिया खंधा अणंता प० ॥ ९२८ ॥ णव पएसोगाढा पोग्गला
अणंता प० ॥ ९२९ ॥ जाव णव गुणलुक्खा पोग्गला अणंता प० ॥ ९३० ॥
नवमं ठाणं नवममज्झयणं समत्तं ॥

दसमहाणं

दसविहा लोगट्ठिई प० तं० जणं जीवा उद्वाइत्ता २ तत्थेव २ भुजो २ पंचायंति,
एवं एगा लोगट्ठिई प० १ जणं जीवाणं सया समियं पावे कम्मे कज्जइ एवं एगा
लोगट्ठिई प० २ जणं जीवा सया समियं मोहणिजे पावे कम्मे कज्जइ एवं एगा लोग-
ट्ठिई प० ३ ण एवं भूयं वा भव्वं वा भविस्सइ वा जं जीवा अजीवा भविस्संति
अजीवा वा जीवा भविस्संति एवं एगा लोगट्ठिई प० ४ ण एवं भूयं ३ जं तसा
पाणा वोच्छिज्जिस्संति थावरा पाणा वोच्छिज्जिस्संति तसा पाणा भविस्संति वा एवं पि
एगा लोगट्ठिई प० ५ ण एवं भूयं वा ३ जं लोगे अलोगे भविस्सइ अलोगे वा लोगे
भविस्सइ एवं एगा लोगट्ठिई प० ६ ण एवं भूयं वा ३ जं लोए अलोए पविस्सइ
अलोए वा लोए पविस्सइ एवं एगा लोगट्ठिई प० ७ जाव ताव लोगे ताव ताव
जीवा जाव ताव जीवा ताव ताव लोए एवं एगा लोगट्ठिई प० ८ जाव ताव जीवाण
य पोग्गलाण य गइपरियाए ताव ताव लोए जाव ताव लोए ताव ताव जीवाण य
पोग्गलाण य गइपरियाए एवं एगा लोगट्ठिई प० ९ सव्वेसु वि णं लोगंतेसु अबद्ध-
पासपुठ्ठा पोग्गला लुक्खत्ताए कज्जंति जेणं जीवा य पोग्गला य नो संचायंति बहिया
लोगंता गमण्याए एवं एगा लोगट्ठिई पण्णत्ता ॥ ९३१ ॥ दसविहे सहे प० तं०
नीहारि पिंडिमे लुक्खे भिजे जजरिए इय; दीहे रहस्से पुहत्ते य, काकणी खिखि-
णिस्सरे ॥ ९३२ ॥ दस इंदियत्थातीता प० तं० देसेण वि एगे सहाईं सुणिसु
सव्वेण वि एगे सहाईं सुणिसु देसेण वि एगे रुवाईं पासिसु सव्वेण वि एगे रुवाईं
पासिसु एवं गंधाईं रसाईं फासाईं जाव सव्वेण वि एगे फासाईं पडिसवेदेंसु
॥ ९३३ ॥ दस इंदियत्था पडुप्पन्ना प० तं०-देसेण वि एगे सहाईं सुणेंति, सव्वेण
वि एगे सहाईं सुणेंति, एवं जाव फासाईं, दस इंदियत्था अणागया प० तं०-देसेण
वि एगे सहाईं सुणिस्संति सव्वेण वि एगे सहाईं सुणिस्संति एवं जाव सव्वेण वि
एगे फासाईं पडिसवेदेस्संति ॥ ९३४ ॥ दसहिं ठाणेहिं अच्छिजे पोग्गले चळेज्जा
तं०-आहारिजमाणे वा चळेज्जा, परिणामेज्जमाणे वा चळेज्जा, उस्ससिज्जमाणे वा
चळेज्जा, निस्ससिज्जमाणे वा चळेज्जा, वेदेज्जमाणे वा चळेज्जा, णिज्जरिज्जमाणे वा

चलेजा, विउव्विज्जमाणे वा चलेजा, परियारिज्जमाणे वा चलेजा, जक्खाइठ्ठे वा चलेजा, वायपरिग्गहे वा चलेजा ॥ ९३५ ॥ दसहिं ठाणेहिं कोहुप्पत्ती सिया तं० मणुन्नाई मे सद्दफरिसरसरुवगंधाइमवहरिंसु, अमणुन्नाई मे सद्दफरिसरसरुवगंधाई उवहरिंसु, मणुन्नाई मे सद्दफरिसरसरुवगंधाई अवहरइ, अमणुन्नाई मे सद्दफरिसजावगंधाई उवहरइ, मणुण्णाई मे सद्द जाव अवहरिस्सइ, अमणुण्णाई मे सद्द जाव उवहरिस्सइ, मणुण्णाई मे सद्द जाव गंधाई अवहरिंसु वा अवहरइ अवहरिस्सइ, अमणुण्णाई मे सद्द जाव उवहरिंसु वा उवहरइ उवहरिस्सइ, मणुण्णामणुण्णाई सद्द जाव अवहरिंसु अवहरइ अवहरिस्सइ उवहरिंसु उवहरइ उवहरिस्सइ अहं च णं आयरियउवज्जायाणं सम्मं वट्ठामि ममं च णं आयरियउवज्जाया मिच्छं पड्विन्ना ॥ ९३६ ॥ दसविहे संजमे प० तं० पुढविकाइयसंजमे जाव वणस्सइकाइयसंजमे बेइंदियसंजमे तेइंदियसंजमे चउरिंदियसंजमे पंचिंदियसंजमे अजीवकायसंजमे ॥ ९३७ ॥ दसविहे असंजमे प० तं० पुढविकाइयअसंजमे, आउ० तेउ० वाउ० वणस्सइ० जाव अजीवकायअसंजमे ॥ ९३८ ॥ दसविहे संवरे प० तं०—सोइंदियसंवरे जाव फासिंदियसंवरे मण० वय० काय० उवकरण० सूचीकुसग्गसंवरे ॥ ९३९ ॥ दसविहे असंवरे प० तं०—सोइंदियअसंवरे, जाव सूचीकुसग्गअसंवरे ॥ ९४० ॥ दसहिं ठाणेहिं अहमंतीति थंभिज्जा तं०—जाइमएण वा कुलमएण वा जाव इस्सरियमएण वा णागसुवन्ना वा मे अंतियं हव्वमागच्छंति, पुरिसधम्माओ वा मे उत्तरिए अहोहिए नाणदंसणे समुप्पन्ने ॥ ९४१ ॥ दसविहा समाही प० तं०—पाणाइवायवेरमणे, मुसा० अदिन्ना० मेहुण० परिग्गह० इरियासमिई भासा० एत्तणा० आयाण० उच्चारपासवणखेलजल्लसिंघाणपारिठ्ठावणिघासमिई ॥ ९४२ ॥ दसविहा असमाही प० तं० पाणाइवाए जाव परिग्गहे, इरियाऽसमिई जाव उच्चार० ॥ ९४३ ॥ दसविहा पव्वजा प० तं०—छंदा रोसा परिजुन्ना सुविणा पडिस्सुआ चेव सारणिघा रोगिणिघा अणाढिया देवसज्जती वच्छाणुवंधिया ॥ ९४४ ॥ दसविहे समणधम्मे प० तं० खंती मुत्ती अज्जवे मद्दवे लाववे सच्चे संजमे तवे चियाए वंभचेरवासे ॥ ९४५ ॥ दसविहे वेयावच्चे प० तं० आयरियवेयावच्चे उवज्जायवेयावच्चे थेरवेयावच्चे तवस्सि० गिलाण० सेह० कुल० गण० संघवेयावच्चे साहम्मियवेयावच्चे ॥ ९४६ ॥ दसविहे जीवपरिणामे प० तं० गइपरिणामे इंदियपरिणामे कसायपरिणामे लेस्सा० जोग० उवओग० णाण० दंसण० चरित्त० वेयपरिणामे ॥ ९४७ ॥ दसविहे अजीवपरिणामे प० तं० बंधणपरिणामे गइ० संठाण० भेद० वण्ण० रस० गंध० फास० अगु-रुल्लहु० सद्दपरिणामे ॥ ९४८ ॥ दसविहे अंतलिक्खिए असज्झाइए प० तं०—

उक्कावाए दिसिदावे गज्जिए विज्जुए निग्घाए ज्युए जक्खालित्ते धूमिया महिया
 रयउग्घाए ॥ ९४९ ॥ दसविहे ओरालिए असज्झाइए प० तं०-अट्ठि मंसं सोणिए
 अलुइसामंते सुसाणसामंते चंदोवराए सूरुवराए पडणे रायवुग्गहे उवस्सयस्स
 अंतो ओरालिए सरीरगे ॥ ९५० ॥ पंचिंदियाणं जीवाणं असमारभमाणस्स दस-
 विहे संजमे कज्जइ तं०-सोयामयाओ सुक्खाओ अववरोवेत्ता भवइ, सोयामएणं
 दुक्खेणं असंजोगेत्ता भवइ, एवं जाव फासामएणं दुक्खेणं असंजोएत्ता भवइ, एवं
 असंजमोवि भाणियव्वो ॥ ९५१ ॥ दससुहुमा प० तं०-पाणसुहुमे, पणगसुहुमे
 जाव सिणेहसुहुमे, गणियसुहुमे, भंगसुहुमे ॥ ९५२ ॥ जंबूमंदरदाहिणेणं गंगासिंधु-
 महाणइओ दसमहाणइओ समप्पेंति तं० जउणा, सरऊ, आवी, कोसी, मही, सिंधू,
 विवच्छा, विभासा, एरावई, चंदभागा ॥ ९५३ ॥ जंबूमंदरउत्तरेणं रत्तारत्तवईओ
 महाणइओ दस महाणइओ समप्पेंति तं०-किण्हा, महाकिण्हा, नीला, महानीला,
 तीरा, महातीरा, इंदा जाव महाभोगा ॥ ९५४ ॥ जंबुद्वीवे दीवे भारहे वासे दस
 रायहाणीओ प० तं० चंपा, महुरा, वाणारसी य, सावत्थी, तह य साएयं, हत्थि-
 णाउर, कंपिल्लं, मिहिला, कोसंबि, रायगिहं ॥ ९५५ ॥ एयासु णं दस रायहाणीसु
 दस रायाणो मुंडा भवेत्ता जाव पव्वइया, तं०-भरहे, सगरो, मघवं, सणकुमारो,
 संती, कुंथू, अरे, महापउमे, हरिसेणो, जयणामे ॥ ९५६ ॥ जंबूमंदरपव्वए दस
 जोयणसयाइ उव्वेहेणं धरणितले दस जोयणसहस्साइं विक्खंभेणं उवरिं दसजोय-
 णसयाइं विक्खंभेणं दसदसाइं जोयणसहस्साइं सव्वग्गेणं प० ॥ ९५७ ॥ जंबुद्वीवे
 दीवे मंदरस्स पव्वयस्स बहुमज्झदेसभाए इमीसे रयणप्पभाए पुढवीए उवरिमहे-
 ठ्ठिल्लेसु खुड्गपयरेसु एत्थ णं अट्ठ पएसिए रयगे प० जओ णं इमाओ दस दिसाओ
 पव्हंति तं० पुरच्छिमा, पुरच्छिमदाहिणा, दाहिणा, दाहिणपच्चत्थिमा, पच्चत्थिमा,
 पच्चत्थिमुत्तरा, उत्तरा, उत्तरपुरच्छिमा, उड्ढा, अहो ॥ ९५८ ॥ एसिं णं दसण्हं दिसाणं
 दस णामधिज्जा, प० तं०-इंदा अग्गीइ जमा णेरईं वारुणी य वायव्वा, सोमा ईसा-
 णावि य विमला य तमा य बोद्धव्वा ॥ ९५९ ॥ लवणस्स णं समुदस्स दस जोयण-
 सहस्साइं गोतित्थिविरहिए खेत्ते प० ॥ ९६० ॥ लवणस्स णं समुदस्स दस जोयण-
 सहस्साइं उदगमाले पन्नते ॥ ९६१ ॥ सव्वेवि णं महापायाला दसदसाइं जोयण-
 सहस्साइं उव्वेहेणं प० मूले दस जोयणसहस्साइं विक्खंभेणं प० बहुमज्झदेसभागो
 एगपएसियाए सेढीए दसदसाइं जोयणसहस्साइं विक्खंभेणं प० उवरिं मुहमूले दस
 जोयणसहस्साइं विक्खंभेणं प० तेसिं णं महापायालाणं कुड्ढा सव्ववइरामया सव्व-
 स्थसमा दस जोयणसयाइं बाहल्लेणं प० सव्वेवि णं खुद्दा पायाला दस जोयणसयाइं

उव्वेहेणं प० मूले दसदसाई जोजणाई विक्खंभेणं बहुमज्झदेसभाए एगपएसियाए
 सेढीए दस जोजणसयाई विक्खंभेणं प० उवरिं मुहमूले दसदसाई जोजणाई विक्खं-
 भेणं प० तेसि णं खुडापायालाणं कुडा सव्ववइरामया सव्वत्थ समा दस जोजणाई
 बाहल्लेणं प० ॥ ९६२ ॥ धायइसंडगा णं मंदरा दस जोजणसयाई उव्वेहेणं धर-
 णितले देसूणाई दस जोजणसहस्साई विक्खंभेणं उवरिं दस जोजणसयाई विक्खं-
 भेणं प० ॥ ९६३ ॥ पुक्खरवरदीवद्धगा णं मंदरा दस जोजण एवं चेव
 ॥ ९६४ ॥ सव्वेवि णं वट्टवेयड्डपव्वया दसजोजणसयाई उड्डं उच्चतेणं दस गाउ-
 यसयाई उव्वेहेणं सव्वत्थसमा पल्लगसंठाणसंठिया दसजोजणसयाई विक्खंभेणं प०
 ॥ ९६५ ॥ जंबुद्दीवे दीवे दस खेत्ता प० तं० भरहे एरवए हेमवए हेरन्नवए
 हरिवस्से रम्मगवस्से पुव्वविदेहे अवरविदेहे देवकुरा उत्तरकुरा ॥ ९६६ ॥
 माणुसुत्तरे णं पव्वए मूले दस बावीसे जोजणसए विक्खंभेणं प० ॥ ९६७ ॥
 सव्वेवि णं अंजगपव्वया दस जोजणसयाई उव्वेहेणं मूले दस जोजण-
 सहस्साई विक्खंभेणं उवरिं दस जोजणसयाई विक्खंभेणं प० ॥ ९६८ ॥ सव्वेवि
 णं दहिमुहपव्वया दस जोजणसयाई उव्वेहेणं सव्वत्थसमा पल्लगसंठाणसंठिया
 दस जोजणसहस्साई विक्खंभेणं प० ॥ ९६९ ॥ सव्वेवि णं रइकरयपव्वया
 दस जोजणसयाई उड्डं उच्चतेणं दस गाउयसयाई उव्वेहेणं सव्वत्थसमा झल्लरिसंठाण-
 संठिया दस जोजणसहस्साई विक्खंभेणं प० ॥ ९७० ॥ रुयगवरे णं पव्वए दस
 जोजणसयाई उव्वेहेणं, मूले दस जोजणसहस्साई विक्खंभेणं उवरिं दस जोजण-
 सयाई विक्खंभेणं प० एवं कुंडलवरेवि ॥ ९७१ ॥ दसविहे दवियाणुओगे प० तं०
 दवियाणुओगे माउयाणुओगे एगठियाणुओगे करणाणुओगे अप्पियणप्पिए भाविया-
 भाविए बाहिराबाहिरं सासयासासए तहणाणे अतहणाणे ॥ ९७२ ॥ चमरस्स णं
 असुरिंदस्स असुरकुमाररत्तो तिगिच्छिक्खे उप्पायपव्वए मूले दसबावीसे जोजणसए
 विक्खंभेणं प० ॥ ९७३ ॥ चमरस्स णं असुरिंदस्स असुरकुमाररत्तो सोमस्स महा-
 रत्तो सोमप्पमे उप्पायपव्वए दस जोजणसयाई उड्डं उच्चतेणं दस गाउयसयाई
 उव्वेहेणं मूले दस जोजणसयाई विक्खंभेणं प० ॥ ९७४ ॥ चमरस्स णं असुरिंदस्स
 असुरकुमाररणो जमस्स महारत्तो जमप्पमे उप्पायपव्वए एवं चेव, एवं वड्ढणस्सवि
 एवं वेसमणस्स वि ॥ ९७५ ॥ बलिस्स णं वड्ढरोयणिंदस्स वड्ढरोयणरत्तो रुयगिंदे
 उप्पायपव्वए मूले दसबावीसे जोजणसए विक्खंभेणं प० ॥ ९७६ ॥ बलिस्स णं
 वड्ढरोयणिंदस्स सोमस्स एवं चेव, जहा चमरस्स लोगपालाणं तं चेव बलिस्स वि
 ॥ ९७७ ॥ धरणस्स णं नागकुमारिंदस्स नागकुमाररत्तो धरणप्पमे उप्पायपव्वए

दस ज्योणसयाई उद्धं उच्चतेणं दस गाउयसयाई उव्वेहेणं मूले दस ज्योणसयाई विक्खंमेणं ॥ ९७८ ॥ धरणस्स नागकुमारिंदस्स णं नागकुमाररण्णो कालवालस्स महारण्णो महाकालप्पमे उप्पायपव्वए दस ज्योणसयाई उद्धं उच्चतेणं एवं चेव, एवं जाव संखवालस्स, एवं भूयाणंदस्स वि, एवं लोगपालाणंपि से जहा धरणस्स, एवं जाव थणियकुमाराणं सलोगपालाणं भाणियव्वं, सव्वेसि उप्पायपव्वया भाणियव्वा सरिसणामगा ॥ ९७९ ॥ सक्कस्स णं देविंदस्स देवरन्नो सक्कप्पमे उप्पायपव्वए दस ज्योणसहस्साई उद्धं उच्चतेणं दसगाउयसहस्साई उव्वेहेणं मूले दस ज्योणसहस्साई विक्खंमेणं प० ॥ ९८० ॥ सक्कस्स णं देविंदस्स देवरण्णो सोमस्स महारन्नो जहा सक्कस्स तहा सव्वेसि लोगपालाणं सव्वेसि च ईदाणं जाव अञ्जुयत्ति, सव्वेसि पमाणमेगं ॥ ९८१ ॥ बायरवणस्सइकाइयाणं उक्कोसेणं दस ज्योणसयाई सरिरीगाहणा प० ॥ ९८२ ॥ जलचरपंचिदियतिरिक्खजोणियाणं उक्कोसेणं दस ज्योणसयाई सरिरीगाहणा प० उरपरिसप्पथलचरपंचिदियतिरिक्खजोणियाणं उक्कोसेणं एवं चेव ॥ ९८३ ॥ संभवाओ णं अरहाओ अभिनंदणे अरहा दसहिं सागरोवमकोडिसयसहस्सेहिं वीइक्कंतेहिं समुप्पन्ने ॥ ९८४ ॥ दसविहे अणंतए प० तं० णामाणंतए ठवणाणंतए दव्वाणंतए गणणाणंतए पएसाणंतए एगओणंतए दुहओणंतए देसवित्थाराणंतए सव्ववित्थाराणंतए सासयाणंतए ॥ ९८५ ॥ उप्पायपुव्वस्स णं दस वत्थू प० ॥ ९८६ ॥ अत्थिणत्थिप्पवायपुव्वस्स णं दस चूलवत्थू प० ॥ ९८७ ॥ दसविहा पडिसेवणा प० तं०-दप्प पमाय णाभोगे आउरे आवईसु य, संकिए सहसक्कारे भय प्पयोसा य वीमंसा ॥ ९८८ ॥ दस आलोयणा दोसा प० तं० आर्कं पइत्ता अणुमाणइत्ता जंदिठ्ठं बायरं च सुहुमं वा, छण्णं सहाउलगं बहुजण अव्वत्त तस्सेवी ॥ ९८९ ॥ दसहिं ठाणेहिं संपन्ने अणगारे अरिहइ अत्तदोसमालोएत्ताए तं०-जाइसंपन्ने कुलसंपन्ने एवं जहा अट्ठट्ठाणे जाव खंते दंते अमाई अपच्छाणुतावी ॥ ९९० ॥ दसहिं ठाणेहिं संपन्ने अणगारे अरिहइ आलोयणं पडिच्छित्तए तं०-आयारवं अवहारवं जाव अवायदंसी पियधम्मे दढधम्मे ॥ ९९१ ॥ दसविहे पायच्छित्ते प० तं०-आलोयणारिहे जाव अणवट्ठप्पारिहे पारंन्धियारिहे ॥ ९९२ ॥ दसविहे मिच्छित्ते प० तं०-अधम्मे धम्मसण्णा धम्मे अधम्मसण्णा उम्मग्गे मग्गसण्णा मग्गे उम्मग्गसण्णा अजीवेसु जीवसन्ना जीवेसु अजीवसण्णा असाहुसु साहुसण्णा साहुसु असाहुसण्णा अमुत्तेसु मुत्तसण्णा मुत्तेसु अमुत्तसण्णा ॥ ९९३ ॥ चंदप्पमे णं अरहा दस पुव्वसयसहस्साई सव्वाउयं पालइत्तां सिद्धे जावप्पहीणे ॥ ९९४ ॥ धम्मे णं अरहा दस वाससयसहस्साई सव्वाउयं पालइत्तां सिद्धे जाव-

प्पहीणे ॥ ९९५ ॥ णमी णं अरहा दस वाससहस्साइं सव्वाउयं पालइत्ता सिद्धे जाव
 प्पहीणे ॥ ९९६ ॥ पुरिससीहे णं वासुदेवे दसवाससयसहस्साइं सव्वाउयं पालइत्ता
 छठीए तमाए पुढवीए नेरइयत्ताए उववणे ॥ ९९७ ॥ णमी णं अरहा दस धणूइं
 उड्डं उच्चतेणं दस य वाससयाइं सव्वाउयं पालइत्ता सिद्धे जावप्पहीणे ॥ ९९८ ॥
 कहे णं वासुदेवे दस धणूइं उड्डं उच्चतेणं दसवाससयाइं सव्वाउयं पालइत्ता तच्चाए
 वालुयप्पमाए पुढवीए नेरइयत्ताए उववणे ॥ ९९९ ॥ दसविहा भवणवासी देवा
 प० तं०-असुरकुमारा जाव थणियकुमारा ॥ १००० ॥ एएसि णं दसविहाणं
 भवणवासीणं देवाणं दस रुक्खा प० तं०-आसत्थ सत्तिवण्णे सामलि उंबर
 सिरीस दहिवणे, वंडुल पलास वप्पे तए य कणियारुक्खे ॥ १००१ ॥ दसविहे
 सोक्खे प० तं०-आरोग दीहमाउं अड्डेजं काम भोग संतोसे; अत्थि सुहभोग
 निक्खम्ममेव ततो अणाबाहे ॥ १००२ ॥ दसविहे उवघाए प० तं०-उग्गमोवघाए
 उप्पायणोवघाए जह पंचमे ठाणे जाव परिहरणोवघाए णाणोवघाए दंसणोवघाए
 चरित्तोवघाए अच्चियत्तोवघाए सारक्खणोवघाए ॥ १००३ ॥ दसविहा विसोही प०
 तं०-उग्गमविसोही उप्पायणविसोही जाव सारक्खणविसोही ॥ १००४ ॥ दसविहे
 संकिलेसे प० तं०-उवहिसंकिलेसे उवस्सयसंकिलेसे कसायसंकिलेसे भत्त-
 पाणसंकिलेसे मणसंकिलेसे वइसंकिलेसे कायसंकिलेसे णाणसंकिलेसे दंसणसंकिलेसे
 चरित्तसंकिलेसे ॥ १००५ ॥ दसविहे असंकिलेसे प० तं० उवहिसंकिलेसे जाव
 चरित्तअसंकिलेसे ॥ १००६ ॥ दसविहे बले प० तं०-सोईदियबले जाव फासिदि-
 यबले णाणबले दंसणबले चरित्तबले तवबले वीरियबले ॥ १००७ ॥ दसविहे सच्चे
 प० तं०-जणवय सम्मय ठवणा नामे रुवे पडुच्चसच्चे य, ववहार भाव जोगे दसमे
 ओवम्मसच्चे य ॥ १००८ ॥ दसविहे मोसे प० तं०-कोहे माणे माया लोभे पिज्जे
 तहेव दोसे य, हास भए अक्खाइय उवघायनिसिए दसमे ॥ १००९ ॥ दसविहे
 सच्चांमोसे प० तं० उप्पन्नमीसए विगयमीसए उप्पन्नविगयमीसए जीवमीसए अजी-
 वमीसए जीवाजीवमीसए अणंतमीसए परित्तमीसए अद्धामीसए अद्धद्वामीसए
 ॥ १०१० ॥ दिट्ठिवायस्स णं दस नामधेज्जा प० तं० दिट्ठिवाएइ वा हेउवाएइ वा
 भूयवाएइ वा तच्चावाएइ वा सम्मावाएइ वा धम्मावाएइ वा भासाविजएइ वा पुव्व-
 गएइ वा अणुजोगगएइ वा सव्वपाणभूयजीवसत्तुद्दावहेइ वा ॥ १०११ ॥ दसविहे
 सत्थे प० तं०-सत्थमग्गी विसं लोणं सिणेहो खार मंबिलं, दुप्पउत्तो मणो वाया काया
 भावो य अविरई ॥ १०१२ ॥ दसविहे दोसे प० तं०-तज्जायदोसे मइभंगदोसे
 पसत्थारदोसे परिहरणदोसे, सलक्खण कारण हेउदोसे संकामणं निग्गह वत्थुदोसे

॥ १०१३ ॥ दसविहे विसेसे प० तं०-वत्थु तज्जायदोसे य दोसे एगट्टिएइ य, कारणे य पडुप्पणे दोसे निव्वे हि अट्टमे; अत्तणा उवणीए य विसेसेति य ते दस...॥ १०१४ ॥ दसविहे सुद्धावायाणुओगे प० तं०-चंकारे मंकारे पिकारे सेयंकारे सायंकारे एगत्ते पुहुत्ते संजुहे संकामिए भिजे ॥ १०१५ ॥ दसविहे दाणे प० तं० अणुकपा संगहे चेव भये कालुणिएइ य; लज्जाए गारवेणं च, अहम्मे पुण सत्तमे ॥ धम्मे य अट्टमे वुत्ते काहीइ य कयंति य ॥ १०१६ ॥ दसविहा गई प० तं०-निरयगई, निरयविग्गहगई, तिरियगई, तिरियविग्गहगई, एवं जाव सिद्धिगई, सिद्धि-विग्गहगई ॥ १०१७ ॥ दसमुंडा प० तं०-सोईदियमुंडे जाव फासिंदियमुंडे, कोह-मुंडे जाव लोभमुंडे दसमे सिरमुंडे ॥ १०१८ ॥ दसविहे संखाणे प० तं०-परि-कम्मं ववहारो रज्जू रासी कलासवजे य, जावंतावइ वग्गो घणो य तह वग्गवग्गो वि, कप्पो य ॥ १०१९ ॥ दसविहे पच्चक्खाणे प० तं०-अणागयमइक्कंतं कोडी-सहियं नियंठियं चेव, सागारमणागारं, परिमाणकडं, निरवसेसं, संकेयं चेव अद्धाए, पच्चक्खाणं दसविहं तु ॥ १०२० ॥ दसविहा सामायारी प० तं०-इच्छा मिच्छा तहक्कारो आवसिसया निसीहिया, आपुच्छणा य पडिपुच्छा छंदणा य निमं-तणा, उवसंपया य काले सामायारी भवे दसविहा उ ॥ १०२१ ॥ समणे भगवं महावीरे छउमत्थकालियाए अंतिमराइयंसि इमे दस महासुमिणे पासित्ता णं पडि-बुद्धे तं०-एगं च णं महाघोररूवदित्तधरं तालपिसायं सुमिणे पराजियं पासित्ता णं पडिबुद्धे १ एगं च णं महं सुक्किलपक्खगं पुंसकोइलगं सुमिणे पासित्ता णं पडि-बुद्धे २ एगं च णं महं चित्तविचित्तपक्खगं पुंसकोइलगं सुविणे पासित्ता णं पडि-बुद्धे ३ एगं च णं महं दामदुगं सव्वरयणामयं सुमिणे पासित्ता णं पडिबुद्धे ४ एगं च णं महं सेयं गोवग्गं सुमिणे पासित्ता णं पडिबुद्धे ५ एगं च णं महं पउ-मसरं सव्वओ समंता कुसुमियं सुमिणे पासित्ता णं पडिबुद्धे ६ एगं च णं महा-सागरं उम्मीवीचीसहस्सकलियं भुयाहिं तिचं सुमिणे पासित्ता णं पडिबुद्धे ७ एगं च णं महं दिणयरं तेयसा जलंतं सुमिणे पासित्ता णं पडिबुद्धे ८ एगं च णं महं हरिवेसलियवन्नामेणं निययेणमंतेणं माणुसुत्तरं पव्वयं सव्वओ समंता आवेडियं परि-वेडियं सुमिणे पासित्ता णं पडिबुद्धे ९ एगं च णं महं मंदरे पव्वए मंदरचूलियाओ उवरिं सीहासणवरगयमत्ताणं सुमिणे पासित्ता णं पडिबुद्धे १० जणं समणे भगवं महावीरे एगं महं घोररूवदित्तधरं तालपिसायं सुमिणे पराजियं पासित्ता णं पडि-बुद्धे तण्णं समणेणं भगवया महावीरेणं मोहणिज्जे कम्मे मूलाओ उग्गंइए १ जणं समणे भगवं महावीरे एगं महं सुक्किलपक्खगं जाव पडिबुद्धे तं णं समणे भगवं

महावीरे सुक्कज्झाणोवगए विहरइ २ जणं समणे भगवं महावीरे एगं महं चित्त-
 विचित्तपक्खगं जाव पडिबुद्धे तं णं समणे भगवं महावीरे ससमयपरसमइयं चित्त-
 विचित्तं दुवालसंगं गणिपिडगं आघवेइ पण्णवेइ परूवेइ दंसेइ निदंसेइ उवदंसेइ
 तं० आयारं जाव दिट्ठिवायं ३ जणं समणे भगवं महावीरे एगं महं दामदुगं
 सव्वरयणा जाव पडिबुद्धे तं णं समणे भगवं महावीरे दुविहं धम्मं पण्णवेइ, तं०—
 अगारधम्मं च अणगारधम्मं च ४ जं णं समणे भगवं महावीरे एगं महं सेयं
 गोवग्गं सुमिणे जाव पडिबुद्धे तं णं समणस्स भगवओ महावीरस्स चाउव्वण्णाइण्णे
 संघे तं०—समणा समणीओ सावगा सावियाओ ५ जणं समणे भगवं महावीरे
 एगं महं पउमसरं जाव पडिबुद्धे तं णं समणे भगवं महावीरे चउव्विहे देवे पण्ण-
 वेइ, तं० भवणवासी वाणमंतरा जोइसवासी वेमाणवासी ६ जणं समणे भगवं
 महावीरे एगं महं उम्मीवीची जाव पडिबुद्धे तं णं समणेणं भगवया महावीरेणं
 अणाईए अणवदग्गे बीहमद्धे चाउरंतसंसारकंतारे तिच्चे ७ जणं समणे भगवं
 महावीरे एगं महं दिणकरं जाव पडिबुद्धे तं णं समणस्स भगवओ महावीरस्स
 अणंते अणुत्तरे जाव समुप्पन्ने ८ जणं समणे भगवं महावीरे एगं महं हरिवे-
 रुलिय जाव पडिबुद्धे तं णं समणस्स भगवओ महावीरस्स सदेवमणुयासुरे लोणे
 उराला कित्तिवन्नसइसिलोगा परिगुव्वंति इति खलु समणे भगवं महावीरे इइ० ९
 जणं समणे भगवं महावीरे मंदरे पव्वए मंदरचूलियाए उवरिं जाव पडिबुद्धे तं
 णं समणे भगवं महावीरे सदेवमणुयासुराए परिसाए मज्झगए केवलिपन्नत्तं धम्मं
 आघवेइ पण्णवेइ जाव उवदंसेइ १० ॥ १०२२ ॥ दसविहे सरागसम्मदंसणे प०
 तं०—निसरगुवएसरई आणरई सुत्तबीयरइमेव, अभिगम वित्थाररई किरिया संखेव
 धम्मरई ॥ १०२३ ॥ दससण्णाओ प० तं०—आहारसण्णा भयसण्णा मेहुणसण्णा
 परिग्गहसण्णा कोहसण्णा माणसण्णा मायासण्णा लोहसण्णा लोगसण्णा ओहसण्णा
 नेरइयाणं दस सण्णाओ एवं चेव एवं निरंतरं जाव वेमाणियाणं २४ ॥ १०२४ ॥
 नेरइया णं दसविहं वेयणं पच्चणुभवमाणा विहरंति तं० सीयं उसिणं खुहं पिवासं कहुं
 परज्झं भयं सोगं जरं वाहिं ॥ १०२५ ॥ दस ठाणाई छउमत्थे णं सव्वभावेणं न
 जाणइ ण पासइ तं०—धम्मत्थिगायं जाव वायं अयं जिणे भविस्सइ वा ण वा भवि-
 स्सइ अयं सव्वदुक्खाणमंतं करेस्सइ वा ण वा करेस्सइ एयाणि चेव उप्पण्णणाण-
 दंसणधरे अरहा जाणइ पासइ जाव अयं सव्वदुक्खाणमंतं करेस्सइ वा ण वा करेस्सइ
 ॥ १०२६ ॥ दस दसाओ प० तं०—कम्मविवागदसाओ, उवासगदसाओ, अंतगड्ढ-
 साओ, अणुत्तरोववायदसाओ, आयारदसाओ, पण्हावागरणदसाओ, बंधदसाओ,

दोगिद्धिदसाओ, वीहदसाओ, संखेवियदसाओ ॥ १०२७ ॥ कम्मविवागदसाणं
 दस अज्झयणा प० तं०-मियापुत्ते य गोत्तासे अंडे सगडेइ यावरे, माहणे णंदिसेणे य
 सोरियत्ति उदुंबरे १ सहसुद्धाहे आमलए कुमारे लेच्छई इह २ ॥ १०२८ ॥ उवासग-
 दसाणं दस अज्झयणा प० तं०-आणंदे कामदेवे अ गाहावइ चूलणीपिया, सुरादेवे
 चुल्लसयए गाहावइ कुंडकोलिए (१) सद्दालपुत्ते महासयए णंदिणीपिया सालइयापिया
 ॥ १०२९ ॥ अंतगडदसाणं दस अज्झयणा प० तं०-णमि मातंगे सोमिले रामगुत्ते
 सुदंसणे चेव, जमाली य भगाली य किंकमै पल्लएइ य (१) फाले अंबडपुत्ते य एमेए
 दस आहिआ ॥ १०३० ॥ अणुत्तरोववाइयदसाणं दस अज्झयणा प० तं०-इसिदासे य
 धण्णे य सुणक्खत्ते य काइए, सट्ठाणे सालिभदे य आणंदे तेयली इय (१) दस-
 ण्णभदे अइमुत्ते एमेए दस आहिआ ॥ १०३१ ॥ आयारदसाणं दस अज्झयणा
 प० तं० वीसं असमाहिट्ठाणा एगवीसं सबला तेत्तीसं आसायणाओ अट्ठविहा गणि-
 संपया दस चित्तसमाहिट्ठाणा एगारसउवासगपडिमाओ बारस भिक्खुपडिमाओ
 पज्जोसवणाकप्पो तीसं मोहणिज्जट्ठाणा आजाइट्ठाणं ॥ १०३२ ॥ पण्हावागर-
 णदसाणं दस अज्झयणा प० तं० उवमा संखा इत्तिभासियाई आयरियभासियाई
 महावीरभासियाई खोमगपसिणाई कोमलपसिणाई अद्दागपसिणाई अंगुट्ठपसिणाई
 बाहुपसिणाई ॥ १०३३ ॥ बंधदसाणं दस अज्झयणा प० तं०-बंधे य मोक्खे य
 देवद्धि दसारमंडलेवि य, आयरियविप्पडिविती उवज्झायविप्पडिविती भावणा
 विमुत्ती साओ कम्मे ॥ १०३४ ॥ दोगेहिदसाणं दस अज्झयणा प० तं० वाए
 विवाए उववाए सुम्बित्ते कसिणे बायालीसं सुमिणे तीसं महासुमिणा बावत्तरिं सव्व-
 सुमिणा हारे रामे गुत्ते एमेए दस आहिआ ॥ १०३५ ॥ वीहदसाणं दस अज्झ-
 यणा प० तं० चंदे सूरए सुक्के य सिरिदेवी पभावई दीवसमुद्दोववत्ती बहुपुत्ती मंद-
 रेइ य थेरे संभूयविजए थेरे पम्ह ऊसासनीसासे ॥ १०३६ ॥ संखेवियदसाणं
 दस अज्झयणा प० तं० खुड्डियाविमाणपविभत्ती महल्लियाविमाणपविभत्ती अंगचू-
 लिया वग्गचूलिया विवाहचूलिया अरुणोववाए वरुणोववाए गरुलोववाए वेलंधरो-
 ववाए वेसमणोववाए ॥ १०३७ ॥ दस सागरोवमकोडाकोडीओ कालो उस्सप्पिणीए
 दस सागरोवमकोडाकोडीओ कालो ओसप्पिणीए ॥ १०३८ ॥ दसविहा नेरइया
 प० तं०-अणत्तरोववच्चा परंपरोववच्चा अणत्तरावगाढा परंपरावगाढा अणत्तराहारगा
 परंपराहारगा अणत्तरपज्जत्ता परंपरपज्जत्ता चरिमा अचरिमा एवं निरंतरं जाव
 जेमणिया ॥ १०३९ ॥ चउत्थीए णं पंकप्पभाए पुढवीए दस तिरयान्नाससयस-
 हस्सा प० ॥ १०४० ॥ रयणप्पभाए पुढवीए जह्जेणं नेरइयाणं दसवाससहस्सा


ठिई प० ॥ १०४१ ॥ चउत्थीए णं पंकप्पभाए पुढवीए उक्कोसेणं नेरइयाणं दस
सागरोवमाई ठिई प० ॥ १०४२ ॥ पंचमाए णं धूमप्पभाए पुढवीए जह्वेणं
नेरइयाणं दस सागरोवमाई ठिई प० ॥ १०४३ ॥ असुरकुमारणं जह्वेणं दस-
वाससहस्साई ठिई प० ॥ १०४४ ॥ एवं जाव थणियकुमारणं बायरवणस्सइकाइ-
याणं उक्कोसेणं दसवाससहस्साई ठिई प० ॥ १०४५ ॥ वाणमंतराणं देवाणं
जह्वेणं दस वाससहस्साई ठिई प० ॥ १०४६ ॥ बंभलोए कप्पे देवाणं उक्कोसेणं
दस सागरोवमाई ठिई प० ॥ १०४७ ॥ लंतए कप्पे देवाणं जह्वेणं दस सागरोवमाई
ठिई प० ॥ १०४८ ॥ दसहिं ठाणेहिं जीवा आगमेसिभइत्ताए कम्मं पगरेंति तं०-
अणिदानयाए, दिट्ठिसंपन्नयाए, जोगवाहियत्ताए, खंतिखमणयाए, जिइंदिययाए, अमा-
इल्लयाए, अपासत्थयाए, सुसामण्णयाए, पवयणवच्छल्लयाए, पवयणउब्भावणयाए
॥ १०४९ ॥ दसविहे आसंसप्पओगे प० तं०-इहलोगासंसप्पओगे, परलोगासंस-
प्पओगे, दुहओलोगासंसप्पओगे, जीवियासंसप्पओगे, मरणासंसप्पओगे, कामासंस-
प्पओगे, भोगासंसप्पओगे, लाभसंसप्पओगे, पूयासंसप्पओगे, सक्कारासंसप्पओगे
॥ १०५० ॥ दसविहे धम्मं प० तं०-गामधम्मं, नगरधम्मं, रठुधम्मं, पासंड-
धम्मं, कुलधम्मं, गणधम्मं, संघधम्मं, सुयधम्मं, चरित्तधम्मं, अत्थिकायधम्मं
॥ १०५१ ॥ दसथेरा प० तं० गामथेरा, नगरथेरा, रठुथेरा, पसत्थारथेरा, कुलथेरा,
गणथेरा, संघथेरा, जाइथेरा, सुअथेरा, परियायथेरा ॥ १०५२ ॥ दसपुत्ता प०
तं०-अत्तए खेत्तए दिन्नए विन्नए उरसे मोहरे सौंढीरे संवुट्ठे उवयाइए धम्मंतेवासी
॥ १०५३ ॥ केवलस्स णं दस अणुत्तरा प० तं० अणुत्तरे णाणे अणुत्तरे दंसणे
अणुत्तरे चरित्ते अणुत्तरे तवे अणुत्तरे वीरिए अणुत्तरा खंती अणुत्तरा मुत्ती अणुत्तरे
अज्जवे अणुत्तरे मइवे अणुत्तरे लाघवे ॥ १०५४ ॥ समयखेत्ते णं दस कुराओ प०
तं०-पंच देवकुराओ पंच उत्तरकुराओ तत्थ णं दस महइमहालया महादुमा प०
तं०-जंबू सुदंसणा धायइरक्खे महाधायइरक्खे पउमरक्खे महापउमरक्खे पंच
कूडसामलीओ तत्थ णं दस देवा महिइत्थिया जाव परिवसंति तं० अणाटिए जंबुद्वी-
वाहिवई सुदंसणे पियदंसणे पोंडरीए महापोंडरीए पंच गरुला वेणुदेवा ॥ १०५५ ॥
दसहिं ठाणेहिं ओगाढं दुस्समं जाणेज्जा तं०-अकाले वरिसइ काले ण वरिसइ
असाहू पूइजंति साहू ण पूइजंति गुरुसु जणो मिच्छं पडिबन्नो अमणुण्णा सदा जाव
फांसा ॥ १०५६ ॥ दसहिं ठाणेहिं ओगाढं सुसमं जाणेज्जा तं०-अकाले न वरिसइ
तं चेव विवरीयं जाव मणुण्णा फांसा ॥ १०५७ ॥ सुसमसुसमाए णं समाए दस-
विहा रक्ख्वा उवभोगत्ताए हव्वमागच्छंति तं०-मत्तंगया य भिंगा तुडियंगा दीव

जोइ चित्तंगा; चित्तरसा मणिर्यंगा गेहागारा अणियणा य ॥ १०५८ ॥ जंबू-
 दीवे २ भारहे वासे तीताए उस्सप्पिणीए दस कुलगरा होत्था तं०-सयज्जले
 सयाऊ य अणंतसेणे य अमितसेणे य, तक्कसेणे भीमसेणे महाभीमसेणे य सत्तमे
 (१) दढरहे दसरहे सयरहे ॥ १०५९ ॥ जंबुदीवे २ भारहे वासे आगमीसाए
 उस्सप्पिणीए दस कुलगरा भविस्संति तं०-सीमंकरे सीमंधरे खेमंकरे खेमंधरे
 विमलवाहणे संमुई पडिस्सुए दढधणू दसधणू सयधणू ॥ १०६० ॥ जंबुदीवे दीवे
 मंदरपव्वयस्स पुरच्छिमेणं सीयाए महानईए उभओ कूले दस वक्खारपव्वया प०
 तं०-मालवंते चित्तकूडे विचित्तकूडे वंभकूडे जाव सोमणसे ॥ १०६१ ॥ जंबूंमंद-
 रपच्चत्थिमे णं सीओआए महानईए उभओ कूले दस वक्खारपव्वया प० तं०-
 विज्जुप्पमे जाव गंधमायणे एवं धायइसंडपुरच्छिमद्धेवि वक्खारा भाणियव्वा जाव
 पुक्खरवरवीवद्धपच्चत्थिमद्धे ॥ १०६२ ॥ दसकप्पा इंदाहिठ्ठिया प० तं० सोहम्मो
 जाव सहस्सारे पाणए अच्चुए एएसु णं दससु कप्पेसु दस इंदा प० तं०-सक्के ईसाणे
 जाव अच्चुए एएसु णं दसण्हं इंदाणं दस परिजाणियविमाणा प० तं०-पालए पुप्फए
 जाव विमलवरे सव्वओभेइ ॥ १०६३ ॥ दस दसमिया णं भिक्खुपडिमा णं एणेण
 राइंदियसएणं अद्धछट्ठेहिं य भिक्खासएहिं अहासुत्ता जाव आराहियावि भवइ
 ॥ १०६४ ॥ दसविहा संसारसमावन्नगा जीवा प० तं०-षट्ठमसमयएगिंदिया
 अपढमसमयएगिंदिया एवं जाव अपढमसमयपंचिंदिया ॥ १०६५ ॥ दसविहा
 सव्वजीवा प० तं०-पुढविकाइया जाव वणस्सइकाइया वेइंदिया जाव पंचिंदिया
 अणिंदिया ॥ १०६६ ॥ अहवा दसविहा सव्वजीवा प० तं० पढमसमयनेरइया
 अपढमसमयनेरइया जाव अपढमसमयदेवा षट्ठमसमयसिद्धा अपढमसमयसिद्धा
 ॥ १०६७ ॥ वाससयाउयस्स णं पुरिसस्स दस दसाओ प० तं०-बाला किद्धा य
 मंदा य बला पत्ता य हायणी, पर्वचा पब्भारा य मुंमुही सावणी तहा ॥ १०६८ ॥
 दसविहा तणवणस्सइकाइया प० तं०-मूले कंदे जाव पुप्फे फले वीए ॥ १०६९ ॥
 सव्वओवि णं विज्जाहरसेदीओ दसदसजोयणाइं विक्खंभेणं प० ॥ १०७० ॥
 सव्वओवि णं आभिओगसेदीओ दस दस जोयणाइं विक्खंभेणं प० ॥ १०७१ ॥
 गेविज्जगविमाणाणं दस जोयणसयाइं उच्चं उच्चतेणं प० ॥ १०७२ ॥ दसहिं ठाणेहिं
 सह तेयसा भासं कुज्जा, तं० केइ तहारुवं समणं वा माहणं वा अच्चासाएज्जा, से
 य अच्चासाइए समाणे परिकुविए तस्स तेयं निसिरेज्जा से तं परितावेइ, से तं
 परितावित्ता तामेव सह तेयसा भासं कुज्जा, केइ तहारुवं समणं वा माहणं वा अच्चा-
 साएज्जा से य अच्चासाइए समाणे देवे, परिकुविए तस्स तेयं निसिरेज्जा से तं परि-

तावेइ से तं २ तमेव सह तेयसा भासं कुज्जा, केइ तहारुवं समणं वा माहणं वा
 अच्चासाएज्जा, से य अच्चासाइए समाणे परिकुविए देवे य परिकुविए दुहओ पडिण्णा
 तस्स तेयं निसिरेज्जा ते तं परित्तवित्ति ते तं परियावेत्ता तमेव सह तेयसा भासं
 कुज्जा, केइ तहारुवं समणं माहणं वा अच्चासाएज्जा से य अच्चासाइए परिकुविए
 तस्स तेयं निसिरेज्जा तत्थ फोडा संमुच्छंति ते फोडा भिज्जंति ते फोडा भिन्ना
 समाणा तामेव सह तेयसा भासं कुज्जा, केइ तहारुवं समणं वा माहणं वा अच्चासाएज्जा
 से य अच्चासाइए देवे परिकुविए तस्स तेयं निसिरेज्जा, तत्थ फोडा संमुच्छंति ते
 फोडा भिज्जंति, ते फोडा भिन्ना समाणा तमेव सह तेयसा भासं कुज्जा, केइ
 तहारुवं समणं वा माहणं वा अच्चासाएज्जा से य अच्चासाइए परिकुविए देवेवि य परि-
 कुविए ते दुहओ पडिण्णा ते तस्स तेयं निसिरेज्जा, तत्थ फोडा संमुच्छंति, सेसं
 तहेव जाव भासं कुज्जा, केइ तहारुवं समणं वा माहणं वा अच्चासाएज्जा, से य
 अच्चासाइए परिकुविए तस्स तेयं निसिरेज्जा, तत्थ फोडा संमुच्छंति ते फोडा
 भिज्जंति तत्थ पुला संमुच्छंति ते पुला भिज्जंति, ते पुला भिन्ना समाणा तामेव
 सह तेयसा भासं कुज्जा, एए तिन्नि आलावगा भाणियव्वा केइ तहारुवं समणं वा
 माहणं वा अच्चासाएमाणे तेयं निसिरेज्जा से य तत्थ णो कम्मइ णो पक्कम्मइ अंचियं
 अंचियं करेइ करेत्ता आयाहिणपयाहिणं करेइ २ ता उहुं वेहासं उप्पयइ २ से णं
 तओ पडिहए पडिणियत्तइ २ ता तमेव सरीरगमणुदहमाणे २ सह तेयसा भासं
 कुज्जा जहा वा गोसालस्स मंखलिपुत्तस्स तवतेए ॥ १०७३ ॥ दस अच्छेरगा
 प० तं०-उवसग्ग गम्भहरणं इत्थीतित्थं अभाविआ परिआ, कण्हस्स अवरकंका
 उत्तरणं चंदसूराणं (१) हरिवंसकुलप्पत्ती चमरुप्पाओ य अठुसयसिद्धा, असंजएसु
 पूआ दसवि अणंतेण कालेण २ ॥ १०७४ ॥ इमीसे णं रयणप्पभाए पुढवीए रयणे
 कंडे दसजोयणसयाइं बाहल्लेणं प० ॥ १०७५ ॥ इमीसे रयणप्पभाए पुढवीए वयरे
 कंडे दस जोयणसयाइं बाहल्लेणं प० एवं वेरुल्लिए लोहितकखे मसारगल्ले हंसगम्भे
 पुलए सोगंधिए जोइरसे अंजणे अंजणपुलए रयए जायरुवे अंके फलिहे रिठ्ठे जहा
 रयणे तहा सोलसविहा भाणियव्वा ॥ १०७६ ॥ सव्वेवि णं दीवसमुद्दा दसजोयण-
 सयाइं उव्वेहेणं प० ॥ १०७७ ॥ सव्वेवि णं महादहा दस जोयणाइं उव्वेहेणं
 प० ॥ १०७८ ॥ सव्वेवि णं सल्लिकुंडा दसजोयणाइं उव्वेहेणं प० ॥ १०७९ ॥
 सीआसीओया णं महानईओ मुहमूले दस दस जोयणाइं उव्वेहेणं प० ॥ १०८० ॥
 कत्तियाणक्खत्ते सव्वबाहिराओ मंडलाओ दससे मंडले चारं चरइ ॥ १०८१ ॥
 अणुराहा णक्खत्ते सव्वभंतराओ मंडलाओ दसमे मंडले चारं चरइ ॥ १०८२ ॥

दस णक्खत्ता णाणस्स विद्धिकरा प० तं० भिगसिरमहा पुस्सो तिन्निय पुब्बाई
मूलमस्सेसा, हत्थो चित्ता य तहा दस विद्धिकराइं णाणस्स ॥ १०८३ ॥ चउप्पय-
थलयरपंचिदियतिरिक्खजोणियाणं दस जाइकुलकोडिजोणिपमुहसयसहस्सा प०
उरपरिसप्पथलयरपंचिदियतिरिक्खजोणियाणं दस जाइकुलकोडिजोणिपमुहसय-
सहस्सा प० ॥ १०८४ ॥ जीवा णं दसठाणनिव्वत्तिया पोग्गले पावकम्मत्ताए
चिणिंसु वा ३ तंजहा-पढमसमयएगिदियनिव्वत्तिए जाव फासिदियनिव्वत्तिए,
एवं च्चिण उव्वचिण बंध उदीर वेय तह णिज्जरा चेव ॥ १०८५ ॥ दसपएसिया
खंधा अणंता प० ॥ १०८६ ॥ दस पएसोगाढा पोग्गला अणंता प० ॥ १०८७ ॥
दससमयठिईया पोग्गला अणंता प० दसगुणकालगा पोग्गला अणंता प०
॥ १०८८ ॥ ॥ एवं वण्णेहिं गंधेहिं रसेहिं फासेहिं दसगुणलुक्खा पोग्गला अणंता
प० ॥ १०८९ ॥ दसमं ठाणं समत्तं ॥ दसमं अज्झयणं समत्तं ॥
ग्रंथसंख्या ॥ ३७०० ॥

ठाणं समत्तं



णमोऽत्थु णं समणस्स भगवओ णायपुत्तमहावीरस्स

समवाए

सुयं मे आउसं ! तेणं भगवया एवमक्खायं ॥ १ ॥ [इह खलु समणेणं भगवया महावीरेणं आइगरेणं तित्थगरेणं सयंसंबुद्धेणं पुरिसुत्तमेणं पुरिससीहेणं पुरिसवरपुंडरीएणं पुरिसवरगंधहत्थिणा लोगुत्तमेणं लोगनाहेणं लोगहिएणं लोगपईवेणं लोगपज्जोअगरेणं अभयदएणं चक्खुदएणं मग्गदएणं सरणदएणं जीवदएणं धम्मदएणं धम्मदेसएणं धम्मनायगेणं धम्मसारहिणा धम्मवरचाउरंतचक्कवट्ठिणा अप्पडिहयवरनाणदंसणधरेणं वियट्ठच्छउमेणं जिणेणं जावएणं तिजेणं तारएणं बुद्धेणं बोहएणं मुत्तेणं मोयगेणं सव्वज्जुणा सव्वदरिसिणा सिवमयलमरुयमणंतमक्खयमव्वाबाहमपुणरावित्तिसिद्धिगइनामधेयं ठाणं संपाविउकामेणं इमे दुवालसंगे गणिपिडगे पन्नत्ते, तं जहा-आयारे १ सूयगडे २ ठाणे ३ समवाए ४ विवाहपन्नत्ती ५ नायाधम्मकहाओ ६ उवासगदसाओ ७ अंतगडदसाओ ८ अणुत्तरोववाइयदसाओ ९ पण्हावागरणं १० विवागसुए ११ दिट्ठिवाए १२ ॥ २ ॥ तत्थ णं जे से चउत्थे अंगे समवाए त्ति आहिते तस्स णं अयमट्ठे पन्नत्ते-तं जहा] एगे आया, एगे अणाया, एगे दंडे, एगे अदंडे, एगा किरिआ, एगा अकिरिआ, एगे लोए, एगे अलोए, एगे धम्मे, एगे अधम्मे, एगे पुण्णे, एगे पावे, एगे बंधे, एगे मोक्खे, एगे आसवे, एगे संवरे, एगा वेयणा, एगा णिज्जरा ॥ ३ ॥ जंबुद्दीवे दीवे एगं जोयणसयसहस्सं आया-मविकखंभेणं पण्णत्ते । अप्पइट्ठाणे नरए एगं जोयणसयसहस्सं आयामविकखंभेणं पन्नत्ते । पालए जाणविमाणे एगं जोयणसयसहस्सं आयामविकखंभेणं पन्नत्ते । सव्वट्ठसिद्धे महाविमाणे एगं जोयणसयसहस्सं आयामविकखंभेणं पन्नत्ते । अहानक्खत्ते एगतारे पन्नत्ते । चित्ताणक्खत्ते एगतारे पन्नत्ते । सातिनक्खत्ते एगतारे पन्नत्ते ॥ ४ ॥ इमीसे णं रयणप्पभाए पुढवीए अत्थेगइयाणं नेरइयाणं एगं पलिओवमं ठिई पन्नत्ता । इमीसे णं रयणप्पहाए पुढवीए नेरइआणं उक्कोसेणं एगं सागरोवमं ठिई पन्नत्ता । दोच्चाए पुढवीए नेरइयाणं जहन्नेणं एगं सागरोवमं ठिई पन्नत्ता । असुरकुमारारणं देवाणं अत्थेगइयाणं एगं पलिओवमं ठिई पन्नत्ता । असुरकुमारारणं देवाणं उक्कोसेणं एगं साहियं सागरोवमं ठिई पन्नत्ता । असुरकुमारिंदवज्जियाणं भोमिज्जाणं देवाणं अत्थेगइआणं एगं पलिओवमं ठिई पन्नत्ता । असंखिज्जवासाउयसण्णिपंचिदियतिरिक्खजोणियाणं अत्थेगइआणं एगं पलिओवमं ठिई पन्नत्ता । असंखिज्जवासाउयग-अभवक्कंतियसण्णिमणुयाणं अत्थेगइयाणं एगं पलिओवमं ठिई पन्नत्ता । वाणमंतराणं

देवाणं उक्कोसेणं एणं पलिओवमं ठिई पन्नत्ता । जोइसियाणं देवाणं उक्कोसेणं एणं पलिओवमं वाससयसहस्समम्भहियं ठिई पन्नत्ता । सोहम्मे कप्पे देवाणं जहन्नेणं एणं पलिओवमं ठिई पन्नत्ता । सोहम्मे कप्पे देवाणं अत्थेगइआणं एणं सागरोवमं ठिई पन्नत्ता । ईसाणे कप्पे देवाणं जहन्नेणं साइरेणं एणं पलिओवमं ठिई पन्नत्ता । ईसाणे कप्पे देवाणं अत्थेगइयाणं एणं सागरोवमं ठिई पन्नत्ता । जे देवा सागरं सुसागरं सागरकंतं भवं मणुं माणुसोत्तरं लोगहियं विमाणं देवत्ताए उववन्ना तेसि णं देवाणं उक्कोसेणं एणं सागरोवमं ठिई पन्नत्ता । ते णं देवा एगस्स अद्धमासस्स आणमंति वा पाणमंति वा उस्ससंति वा नीससंति वा । तेसि णं देवाणं एगस्स वाससहस्सस्स आहारट्ठे समुप्पज्जइ । संतेगइया भवसिद्धिया जे जीवा ते एगेणं भवग्गहणेणं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाण-मंतं करिस्संति ॥ ५ ॥ दो दंडा पन्नत्ता, तं जहा-अट्ठादंडे चेव, अणट्ठादंडे चेव । हुवे रासी पन्नत्ता, तं जहा-जीवरासी चेव, अजीवरासी चेव । दुविहे बंधणे पन्नत्ते, तं जहा-रागबंधणे चेव, दोसबंधणे चेव । पुव्वाफग्गुणी नक्खत्ते दुतारे पन्नत्ते । उत्तराफग्गुणी नक्खत्ते दुतारे पन्नत्ते । पुव्वाभइवया नक्खत्ते दुतारे पन्नत्ते । उत्तरा-भइवया नक्खत्ते दुतारे पन्नत्ते ॥ ६ ॥ इमीसे णं रयणप्पभाए पुढवीए अत्थेगइ-याणं नेरइयाणं दो पलिओवमाई ठिई पन्नत्ता । दुच्चाए पुढवीए अत्थेगइयाणं नेरइ-याणं दो सागरोवमाई ठिई पन्नत्ता । असुरकुमाराणं देवाणं अत्थेगइयाणं दोपलिओ-वमाई ठिई पन्नत्ता । असुरकुमारिंदवज्जियाणं भोमिजाणं देवाणं उक्कोसेणं देसूणाई दो पलिओवमाई ठिई पन्नत्ता । असंखिज्जवासाउयसणिणंपंचेदियतिरिक्खजोणिआणं अत्थेगइयाणं दोपलिओवमाई ठिई पन्नत्ता । असंखिज्जवासाउयग्गम्भवक्कतियसन्निपंचि-दियमाणुस्साणं अत्थेगइयाणं दोपलिओवमाई ठिई पन्नत्ता । सोहम्मे कप्पे अत्थेगइ-याणं देवाणं दो पलिओवमाई ठिई पन्नत्ता । ईसाणे कप्पे अत्थेगइयाणं देवाणं दो पलिओवमाई ठिई पन्नत्ता । सोहम्मे कप्पे अत्थेगइयाणं देवाणं उक्कोसेणं दो साग-रोवमाई ठिई पन्नत्ता । ईसाणे कप्पे देवाणं उक्कोसेणं साहियाई दो सागरोवमाई ठिई पन्नत्ता । सणकुमारे कप्पे देवाणं जहन्नेणं दो सागरोवमाई ठिई पन्नत्ता । माहिंदे कप्पे देवाणं जहन्नेणं साहियाई दो सागरोवमाई ठिई पन्नत्ता । जे देवा सुमं सुभक्तं सुभवणं सुभगंधं सुभल्लेसं सुभफासं सोहम्मवडिसणं विमाणं देवत्ताए उववण्णा तेसि णं देवाणं उक्कोसेणं दो सागरोवमाई ठिई पन्नत्ता ॥ ७ ॥ ते णं देवा दोण्हं अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं दोहिं वाससहस्सेहिं आहारट्ठे समुप्पज्जइ । अत्थेगइया भवसिद्धिया

जीवा जे दोहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ८ ॥ तओ दंडा पन्नत्ता, तं जहा-मणदंडे, वइदंडे, कायदंडे । तओ गुत्तीओ पन्नत्ताओ, तं जहा-मणगुत्ती, वयगुत्ती, कायगुत्ती । तओ सल्ला पन्नत्ता, तं जहा-मायासल्ले णं, नियाणसल्ले णं, मिच्छादंसणसल्ले णं । तओ गारवा पन्नत्ता, तं जहा-इह्वीगारवे णं, रसगारवे णं, सायागारवे णं । तओ विराहणा पन्नत्ता, तं जहा-नाणविराहणा, दंसणविराहणा, चरित्तविराहणा । भिगसिरन-क्खत्ते तितारे पन्नत्ते । पुस्सनक्खत्ते तितारे पन्नत्ते । जेट्टानक्खत्ते तितारे पन्नत्ते । अभीइनक्खत्ते तितारे पन्नत्ते । सवणनक्खत्ते तितारे पन्नत्ते । अस्सिणनक्खत्ते तितारे पन्नत्ते । भरणीनक्खत्ते तितारे पन्नत्ते ॥ ९ ॥ इमीसे णं रयणप्पभाए पुढवीए अत्थे-गइयाणं नेरइयाणं तिणि पलिओवमाई ठिई पन्नत्ता । दोच्चाए णं पुढवीए नेरइयाणं उक्कोसेणं तिणि सागरोवमाई ठिई पन्नत्ता । तच्चाए णं पुढवीए नेरइयाणं जहण्णेणं तिणि सागरोवमाई ठिई पन्नत्ता । असुरकुमाराणं देवाणं अत्थेगइयाणं तिणि पलि-ओवमाई ठिई पन्नत्ता । असंखिज्जवासाउयसन्निपंचिदियतिरिक्खजोणियाणं उक्कोसेणं तिणि पलिओवमाई ठिई पन्नत्ता । असंखिज्जवासाउयसन्निगम्भवक्कंतियमणुस्साणं उक्कोसेणं तिणि पलिओवमाई ठिई पन्नत्ता । सोहम्मीसाणेसु अत्थेगइयाणं देवाणं तिणि पलिओवमाई ठिई पन्नत्ता । सणकुमारमाहिंदेसु कप्पेसु अत्थेगइयाणं देवाणं तिणि सागरोवमाई ठिई पन्नत्ता । जे देवा आभंकरं पभंकरं आभंकरपभंकरं चंदं चंदावत्तं चंदप्पभं चंदकंतं चंदवण्णं चंदलेसं चंदज्झयं चंदसिंणं चंदसिट्ठं चंदकूडं चंदुत्तरवडिसणं विमाणं देवत्ताए उववण्णा तेसि णं देवाणं उक्कोसेणं तिणि सागरो-वमाई ठिई पन्नत्ता ॥ १० ॥ ते णं देवा तिण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं तिहिं वाससहस्सेहिं आहारट्ठे समु-प्पज्जइ । संतेगइया भवसिद्धिया जीवा जे तिहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ११ ॥ चत्तारि कसायां पन्नत्ता, तं जहा-कोहकसाए माणकसाए मायाकसाए लोभकसाए । चत्तारि ज्ञाणा पन्नत्ता, तं जहा-अट्टज्झाणे रुहज्झाणे धम्मज्झाणे सुक्कज्झाणे । चत्तारि विगहाओ प०, तं जहा-इत्थिकहा भत्तकहा रायकहा देसकहा । चत्तारि सण्णा पन्नत्ता, तं जहा-आहारसण्णा भयसण्णा मेहुणसण्णा परिग्गहसण्णा । चउव्विहं बंधे पन्नत्ते, तं जहा-पगइबंधे ठिइबंधे अणुभावबंधे पएसबंधे, चउगाउए जोयणे पन्नत्ते ॥ १२ ॥ अणुराहानक्खत्ते चउतारे पन्नत्ते । पुव्वासाढानक्खत्ते चउतारे पन्नत्ते । उत्तरासाढानक्खत्ते चउतारे पन्नत्ते ॥ १३ ॥ इमीसे णं रयणप्पभाए पुढवीए अत्थे-

गइयाणं नेरइयाणं चत्तारि पलिओवमाई ठिई पन्नत्ता । तच्चाए णं पुढवीए अत्थेगइ-
याणं नेरइयाणं चत्तारि सागरोवमाई ठिई पन्नत्ता । असुरकुमारारणं देवाणं अत्थेगइ-
याणं चत्तारि पलिओवमाई ठिई पन्नत्ता । सोहम्मीसाणेसु कप्पेसु अत्थेगइयाणं देवाणं
चत्तारि पलिओवमाई ठिई पन्नत्ता । सणकुमारमाहिंदेसु कप्पेसु अत्थेगइयाणं देवाणं
चत्तारि सागरोवमाई ठिई पन्नत्ता । जे देवा किट्ठिं सुकिट्ठिं किट्ठियावत्तं किट्ठिपभं
किट्ठिजुत्तं किट्ठिवण्णं किट्ठिल्लेसं किट्ठिज्झयं किट्ठिसिगं किट्ठिसिद्धं किट्ठिकूडं किट्ठुत्तर-
वडिसगं विमाणं देवत्ताए उववण्णा तेसि णं देवाणं उल्लोसेणं चत्तारि सागरोवमाई
ठिई पन्नत्ता ॥ १४ ॥ ते णं देवा चउण्हऽद्धमासाणं आणमंति वा पाणमंति वा
ऊससंति वा नीससंति वा । तेसिं देवाणं चउहिं वाससहस्सेहिं आहारट्ठे समुप्पज्जइ ।
अत्थेगइया भवसिद्धिया जीवा जे चउहिं भवग्गहणेहिं सिज्झस्संति जाव सव्वदु-
क्खाणं अंतं करिस्संति ॥ १५ ॥ पंच किरिया पन्नत्ता, तं जहा-काइया अहिगर-
णिया पाउसिया पारितावणिया पाणाइवायकिरिया । पंचमहव्वया पन्नत्ता, तं जहा-
सव्वाओ पाणाइवायाओ वेरमणं, सव्वाओ मुसावायाओ वेरमणं, सव्वाओ अदत्ता-
दाणाओ वेरमणं, सव्वाओ मेहुणाओ वेरमणं, सव्वाओ परिग्गहाओ वेरमणं । पंच
कामगुणा पन्नत्ता, तं जहा-सद्दा रूवा रसा गंधा फासा । पंच आसवदारा पन्नत्ता,
तं जहा-मिच्छत्तं अविरई पमाया कसाया जोगा । पंच संवरदारा पन्नत्ता, तं जहा-
सम्मत्तं विरई अप्पमत्तया अकसाया अजोगया । पंच निज्जरट्ठाणा पन्नत्ता, तं जहा-
पाणाइवायाओ वेरमणं, मुसावायाओ वेरमणं, अदिन्नादाणाओ वेरमणं, मेहुणाओ
वेरमणं, परिग्गहाओ वेरमणं । पंच समिईओ पन्नत्ताओ, तं जहा-इरियासमिई
भासासमिई एसणासमिई आयाणभेडमत्तनिकखेवणासमिई उच्चारपासवणखेलसिंघा-
णजल्लपारिट्ठावणियासमिई । पंच अत्थिकाया पन्नत्ता, तं जहा-धम्मत्थिकाए अध-
म्मत्थिकाए आगासत्थिकाए जीवत्थिकाए पोगलत्थिकाए ॥ १६ ॥ रोहिणी नक्खत्ते
पंचतारे पन्नत्ते । पुणव्वसुनक्खत्ते पंचतारे पन्नत्ते । हत्थनक्खत्ते पंचतारे पन्नत्ते ।
विसाहानक्खत्ते पंचतारे पन्नत्ते । धणिट्ठानक्खत्ते पंचतारे पन्नत्ते ॥ १७ ॥ इमीसे
णं रयणप्पभाए पुढवीए अत्थेगइयाणं नेरइयाणं पंच पलिओवमाई ठिई पन्नत्ता ।
तच्चाए णं पुढवीए अत्थेगइयाणं नेरइयाणं पंचसागरोवमाई ठिई पन्नत्ता । असुरकु-
मारारणं देवाणं अत्थेगइयाणं पंचपलिओवमाई ठिई पन्नत्ता । सोहम्मीसाणेसु कप्पेसु
अत्थेगइयाणं देवाणं पंचपलिओवमाई ठिई पन्नत्ता । सणकुमारमाहिंदेसु कप्पेसु
अत्थेगइयाणं देवाणं पंच सागरोवमाई ठिई पन्नत्ता । जे देवा वायं सुवायं वायावत्तं
वायप्पभं वायकत्तं वायवणं वायलेसं वायज्झयं वायसिगं वायसिद्धं वायकूडं वाउत्त-

रवडिसंगं सूरं सुसूरं सूरावत्तं सूरप्पमं सूरकंतं सूरवण्णं सूरलेसं सूरज्झयं सूरसिंगं
 सूरसिद्धं सूरकूडं सूत्तरवडिसंगं विमाणं देवत्ताए उववण्णा तेसि णं देवाणं उक्कोसेणं
 पंच सागरोवमाई ठिई पन्नत्ता ॥ १८ ॥ ते णं देवा पंचण्हं अद्धमासाणं आणमंति
 वा पाणमंति वा ऊससंति वा नीससंति वा । तेसि णं देवाणं पंचहिं वाससहस्सेहिं
 आहारट्टे समुप्पज्जइ । संतेगइया भवसिद्धिया जीवा जे पंचहिं भवगहणेहिं सिज्झि-
 स्संति जाव अंतं करिस्संति ॥ १९ ॥ छ लेसाओ पण्णत्ता, तं जहा-कण्हलेसा नील-
 लेसा काउलेसा तेउलेसा पम्हलेसा सुक्कलेसा । छ जीवनिकाया पन्नत्ता, तं जहा-
 पुढविकाए आउकाए तेउकाए वाउकाए वणस्सइकाए तसकाए । छव्विहे बाहिरे
 तवोकम्मे पन्नत्ते, तं जहा-अणसणे ऊणोयरिया वित्तीसंखेवो रसपरिच्चाओ फायकि-
 लेसो संलीणया । छव्विहे अब्भित्तरे तवोकम्मे पन्नत्ते, तं जहा-पायच्छित्तं विणओ
 वेयावच्चं सज्झाओ ज्ञाणं उस्सग्गो । छ छाउमत्थिया समुग्घाया पन्नत्ता, तं जहा-
 वेयणासमुग्घाए कसायसमुग्घाए मारणंतिअसमुग्घाए वेउव्वियसमुग्घाए तेयसमु-
 ग्घाए आहारसमुग्घाए । छव्विहे अत्थुग्गहे पन्नत्ते, तं जहा-सोईदियअत्थुग्गहे
 चक्खुईदियअत्थुग्गहे घाणिदिअत्थुग्गहे जिब्भिदियअत्थुग्गहे फासिंदियअत्थुग्गहे
 नोईदियअत्थुग्गहे ॥ २० ॥ कत्तियानक्खत्ते छतारे पन्नत्ते । असिलेसानक्खत्ते छतारे
 पन्नत्ते ॥ २१ ॥ इमीसे णं रयणप्पभाए पुढवीए अत्थेगइयाणं नेरइयाणं छ पलि-
 ओवमाई ठिई पन्नत्ता । तच्चाए णं पुढवीए अत्थेगइयाणं नेरइयाणं छ सागरोवमाई
 ठिई पन्नत्ता । असुरकुमाराणं देवाणं अत्थेगइयाणं छ पलिओवमाई ठिई पन्नत्ता ।
 सोहम्मसीसाणेसु कप्पेसु अत्थेगइयाणं देवाणं छ पलिओवमाई ठिई पन्नत्ता । सणकु-
 मारमाहिंदेसु कप्पेसु अत्थेगइयाणं देवाणं छ सागरोवमाई ठिई पन्नत्ता । जे देवा
 सयं वाई सयंभुं सयंभूरमणं घोसं सुघोसं महाघोसं किट्ठिघोसं वीरं सुवीरं वीरगतं
 वीरसेणियं वीरावत्तं वीरप्पमं वीरकंतं वीरवण्णं वीरलेसं वीरज्झयं वीरसिंगं वीरसिद्धं
 वीरकूडं वीत्तरवडिसंगं विमाणं देवत्ताए उववण्णा तेसि णं देवाणं उक्कोसेणं छ
 सागरोवमाई ठिई पन्नत्ता ॥ २२ ॥ ते णं देवा छण्हं अद्धमासाणं आणमंति वा
 पाणमंति वा ऊससंति वा नीससंति वा । तेसि णं देवाणं छहिं वाससहस्सेहिं
 आहारट्टे समुप्पज्जइ । संतेगइया भवसिद्धिया जीवा जे छहिं भवगहणेहिं सिज्झि-
 स्संति जाव सब्बदुक्खाणमंतं करिस्संति ॥ २३ ॥ सत्त भयट्ठाणा पन्नत्ता, तं जहा-
 इहलोगभए परलोगभए आदाणभए अकम्हाभए आजीवभए मरणभए असिलोग-
 भए । सत्त समुग्घाया पन्नत्ता, तं जहा-वेयणासमुग्घाए कसायसमुग्घाए मारणंति-
 यसमुग्घाए वेउव्वियसमुग्घाए तेयसमुग्घाए आहारसमुग्घाए केवलिसमुग्घाए ।

समणे भगवं महावीरे सत्त रयणीओ उद्धं उच्चत्तेणं होत्था । इहेव जंबुद्दीवे दीवे
 सत्त वासहरपव्वया पन्नता तं जहा-चुल्लहिमवंते महाहिमवंते निसढे नीलवते
 रुप्पी सिहरी मंदरे । इहेव जंबुद्दीवे दीवे सत्त वासा पन्नता, तं जहा-भरहे हेमवए
 हरिवासे महाविदेहे रम्मए एरण्णवए एरवए । खीणमोहेणं भगवथा मोहणिज्जव-
 ज्जाओ सत्त कम्मपयडीओ वेए(ज)ई ॥ २४ ॥ महानक्खत्ते सत्ततारे पन्नत्ते ।
 कत्तिआइआ सत्त नक्खत्ता पुव्वदारिआ प० (अभियाइया सत्त नक्खत्ता)
 महाइआ सत्त नक्खत्ता दाहिणदारिआ प० । अणुराहाइआ सत्त नक्खत्ता अवर-
 दारिआ प० । धणिट्ठाइआ सत्त नक्खत्ता उत्तरदारिआ प० ॥ २५ ॥ इमीसे
 णं रयणप्पभाए पुढवीए अत्थेगइयाणं नेरइयाणं सत्त पलिओवमाईं ठिई प० ।
 तच्चाए णं पुढवीए नेरइयाणं उक्कोसेणं सत्त सागरोवमाईं ठिई प० । चउत्थीए णं
 पुढवीए नेरइयाणं जहण्णेणं सत्त सागरोवमाईं ठिई प० । असुरकुमाराणं देवाणं अत्थे-
 गइयाणं सत्त पलिओवमाईं ठिई प० । सोहम्मीसाणेसु कपेसु अत्थेगइयाणं देवाणं
 सत्त पलिओवमाईं ठिई प० । सणकुमारे कपे अत्थेगइयाणं देवाणं उक्कोसेणं सत्त
 सागरोवमाईं ठिई प० । माहिंदे कपे देवाणं उक्कोसेणं साइरेगाईं सत्त सागरो-
 वमाईं ठिई प० । बंभलोए कपे अत्थेगइयाणं देवाणं सत्त साहिया सागरोवमाईं
 ठिई प० । जे देवा समं समप्पमं महापभं पभासं भासुरं विमलं कंचणकूडं सण-
 कुमारवडिसगं विमाणं देवत्ताए उववण्णा तेसि णं देवाणं उक्कोसेणं सत्त सागरोवमाईं
 ठिई प० ॥ २६ ॥ ते णं देवा सत्तण्हं अद्धमासाणं आणमंति वा पाणमंति वा
 ऊससंति वा नीससंति वा । तेसि णं देवाणं सत्तहिं वाससहस्सेहिं आहारट्ठे समु-
 प्पज्जइ । संतेगइया भवसिद्धिया जीवा जे णं सत्तहिं भवग्गहणेहिं सिज्झिस्संति
 जाव सव्वदुक्खाणमंतं करिस्संति ॥ २७ ॥ अट्ठ मयट्ठाणा पन्नता, तं जहा-जाति-
 मए कुलमए बलमए रूवमए तवमए सुयमए लाभमए इस्सरियमए । अट्ठ पवयण-
 मायाओ प० तं जहा-इरियासमिई भासासमिई एसणासमिई आयाणभंडमत्त-
 निक्खेवणासमिई उच्चारपासवणखेलजल्लसिंघाणपारिट्ठावणियासमिई मणगुत्ती वड-
 शुत्ती कायगुत्ती । वाणमंतराणं देवाणं रुक्खा अट्ठ जोयणाईं उद्धं उच्चत्तेणं पन्नता ।
 जंबू णं सुदंसणा अट्ठ जोयणाईं उद्धं उच्चत्तेणं प० । कूडसामली णं गरुलावासे
 अट्ठ जोयणाईं उद्धं उच्चत्तेणं पन्नता । जंबुद्दीवस्स णं जगई अट्ठ जोयणाईं उद्धं उच्च-
 त्तेणं पन्नता । अट्ठसामइए केवलिसमुग्घाए पन्नत्ते तं जहा-पढमे समए दंडं करेइ,
 बीए समए क्वाडं करेइ, तइए समए मंथं करेइ, चउत्थे समए मंथंतराईं पूरेइ,
 पंचमे समए मंथंतराईं पडिसाहरइ, छट्ठे समए मंथं पडिसाहरइ, सत्तमे समए क्वाडं

पडिसाहरइ, अट्टमे समए दंडं पडिसाहरइ, तओ पच्छा सरीरत्थे भवइ । पासस्स णं अरहओ पुरिसादाणिअस्स अट्ट गणा अट्ट गणहरा होत्था, तं जहा-सुभे य सुभघोसे य, वसिट्ठे बंभयारि य । सोमे सिरिधरे चेव, वीरभेइ जसे इय ॥ १ ॥ अट्ट नक्खत्ता चंदेणं सद्धिं पमई जोगं जोएंति, तं जहा-कत्तिया, रोहिणी, पुणव्वसू, महा, चित्ता, विसाहा, अणुराहा, जेट्ठा ॥ २८ ॥ इमीसे णं रयणप्पभाए पुढवीए अत्थेगइयाणं नेरइयाणं अट्ट पलिओवमाई ठिई प० । चउत्थीए पुढवीए अत्थेगइयाणं नेरइयाणं अट्ट सागरोवमाई ठिई प० । असुरकुमारारणं देवाणं अत्थेगइयाणं अट्ट पलिओवमाई ठिई प० । सोहम्मीसाणेसु कप्पेसु अत्थेगइयाणं देवाणं अट्ट पलिओवमाई ठिई प० । बंभलोए कप्पे अत्थेगइयाणं देवाणं अट्ट सागरोवमाई ठिई प० । जे देवा अच्चिं अच्चिमारलिं वइरोयणं पभंकरं चंदाभं सूरामं सुपइट्ठाभं अग्गिच्चाभं रिट्ठाभं अरुणाभं अरुणुत्तरवडिंसणं विमाणं देवत्ताए उववण्णा तेसि णं देवाणं उक्कोसेणं अट्ट सागरोवमाई ठिई प० ॥ २९ ॥ ते णं देवा अट्ठण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं अट्ठहिं वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे अट्ठहिं भवग्गहणेहिं सिज्झिस्संति बुज्झिस्संति जाव अंतं करिस्संति ॥ ३० ॥ नव बंभचेरगुत्तीओ पन्नत्ताओ, तं जहा-नो इत्थीपसुपंडगसंसत्ताणि सिज्जासणाणि सेवित्ता भवइ, नो इत्थीणं कहं कहित्ता भवइ, नो इत्थीणं गणाई सेवित्ता भवइ, नो इत्थीणं इंदियाणि मणोहराई मणोरमाई आलोइत्ता निज्झाइत्ता भवइ, नो पणीयरसभोई, नो पाणभोयणस्स अइमायाए आहारइत्ता, नो इत्थीणं पुव्वरयाई पुव्वकीलिआई समरइत्ता भवइ, नो सहाणुवाई नो रुवाणुवाई नो गंधाणुवाई नो रसाणुवाई नो फासाणुवाई नो सिलोगाणुवाई, नो सायासोक्खपडिबद्धे यावि भवइ । नव बंभचेरअगुत्तीओ पन्नत्ताओ तं जहा-इत्थीपसुपंडगसंसत्ताणं सिज्जासणाणं सेवणया जाव सायासुक्खपडिबद्धे यावि भवइ । नव बंभचेरा पन्नत्ता, तं जहा-सत्थपरिण्णा लोगविजओ सीओसणिज्ज सम्मतं । आवंति धुत विमोहा [यणं] उवहाणसुयं महपरिण्णा । पासे णं अरहा पुरिसादाणीए नव रयणीओ उद्धं उच्चत्तेणं होत्था ॥ ३१ ॥ अभीजी नक्खत्ते साइरेगे नव मुहुत्ते चंदेणं सद्धिं जोगं जोएइ । अभीजियाइया नव नक्खत्ता चंदस्स उत्तरेणं जोगं जोएंति, तं जहा-अभीजि सवणो जाव भरणी । इमीसे णं रयणप्पभाए पुढवीए बहुसमरमणिज्जाओ भूमिभागाओ नव जोयणसए उद्धं आबाहाए उवरिल्लि तारारुवे चारं चरइ ॥ ३२ ॥ जंबुद्वीवे णं द्वीवे नवजोयणिआ मच्छा पविसिंसु वा ३ । विजयस्स णं दारस्स एगमेगाए बाहाए नव

नव भोमा पञ्चता । वाणमंतराणं देवाणं सभाओ सुहम्माओ नव जोयणाई उद्धं उच्चत्तेणं पञ्चता । दंसणावरणिजस्स णं कम्मस्स नव उत्तरपगडीओ प०, तं जहा-निद्दा पयला निद्दानिद्दा पयलापयला थीणद्धी चक्खुदंसणावरणे अचक्खुदंसणावरणे ओहिदंसणावरणे केवलदंसणावरणे ॥ ३३ ॥ इमीसे णं रयणप्पभाए पुढवीए अत्थेगइयाणं नेरइयाणं नव पलिओवमाई ठिई प० । चउत्थीए पुढवीए अत्थेगइयाणं नेरइयाणं नव सागरोवमाई ठिई प० । असुरकुमारणं देवाणं अत्थेगइयाणं नव पलिओवमाई ठिई प० । सोहम्मीसाणेसु कप्पेसु अत्थेगइयाणं देवाणं नव पलिओवमाई ठिई प० । वंभलोए कप्पे अत्थेगइयाणं देवाणं नव सागरोवमाई ठिई प० । जे देवा पम्हं सुपम्हं पम्हावत्तं पम्हप्पभं पम्हकंतं पम्हवणं पम्हलेसं पम्हज्झयं पम्हसिगं पम्हसिट्ठं पम्हकूडं पम्हुत्तरवडिसगं सुज्जं सुसुज्जं सुज्जवित्तं सुज्जपभं सुज्जकंतं सुज्जवणं सुज्जलेसं सुज्जज्झयं सुज्जसिगं सुज्जसिट्ठं सुज्जकूडं सुज्जुत्तरवडिसगं रुद्धं रुद्धावत्तं रुद्धप्पभं रुद्धकंतं रुद्धवणं रुद्धलेसं रुद्धज्झयं रुद्धसिगं रुद्धसिट्ठं रुद्धकूडं रुद्धलुत्तरवडिसगं विमाणं देवताए उववण्णा तेसि णं देवाणं नव सागरोवमाई ठिई प० ॥ ३४ ॥ ते णं देवा नवपुं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं नवहिं वाससहस्सेहिं आहारट्ठे समुप्पज्जइ । संतेगइया भवसिद्धिआ जीवा जे नवहिं भवग्गहणेहिं सिज्झिस्संति जाव सव्वदुक्खाणमंतं करिस्संति ॥ ३५ ॥ दसविहे समणधम्मो पञ्चत्ते, तं जहा-खंती मुत्ती अज्जवे मद्दे लाघवे सच्चे संजमे तवे चियाए वंभचेरवासे । दस चित्तसमाहिट्ठाणा पञ्चता, तं जहा-धम्मचिंता वा से असमुप्पण्णपुव्वा समुप्पज्जिजा सव्वं धम्मं जाणित्तए, सुमिणंदसणे वा से असमुप्पण्णपुव्वे समुप्पज्जिजा अहातच्चं सुमिणं पासित्तए, सण्णिनाणे वा से असमुप्पण्णपुव्वे समुप्पज्जिजा पुव्वभवे सुमरित्तए, देवदंसणे वा से असमुप्पण्णपुव्वे समुप्पज्जिजा दिव्वं देविद्धिं दिव्वं देवजुइं दिव्वं देवाणुभावं पासित्तए, ओहिनाणे वा से असमुप्पण्णपुव्वे समुप्पज्जिजा ओहिणा लोगं जाणित्तए, ओहिदंसणे वा से असमुप्पण्णपुव्वे समुप्पज्जिजा ओहिणा लोगं पासित्तए, मणपज्जवनाणे वा से असमुप्पण्णपुव्वे समुप्पज्जिजा जाव मणोगए भावे जाणित्तए, केवलनाणे वा से असमुप्पण्णपुव्वे समुप्पज्जिजा केवलं लोगं जाणित्तए, केवलदंसणे वा से असमुप्पण्णपुव्वे समुप्पज्जिजा केवलं लोगं पासित्तए, केवलमरणं वा मरिज्जा सव्वदुक्खप्पहीणाए । मंदरे णं पव्वए मूले दस जोयणसहस्साईं विक्खंभेणं प० । अरिहा णं अरिट्ठनैमी दस धणूई उद्धं उच्चत्तेणं होत्था । कण्हे णं वासुदेवे दस धणूई उद्धं उच्चत्तेणं होत्था । रामे णं

बलदेवे दस धणूइ उद्धं उच्चतेणं होत्था । दस नक्खत्ता नाणवुद्धिकरा प० तं जहा—“मिगसिर अहा पुस्सो, तिणिण अ पुच्चा य मूलमस्सेसा । हत्थो चित्तो य तहा, दस बुद्धिकराइ नाणस्स” अकम्मभूमियाणं मणुआणं दसविहा सक्खा उव-भोगत्ताए उवत्थिया प० तं जहा—“मत्तंगया य भिंगा, तुडिअंगा दीव जोइ चित्तंगा । चित्तरसा मणिअंगा, गेहागारा अनिणिणा य ॥ १ ॥” ३६ ॥ इमीसे णं रयणप्पभाए पुढवीए अत्थेगइयाणं नेरइयाणं जहण्णेणं दस वाससहस्साइं ठिई प० । इमीसे णं रयणप्पभाए पुढवीए अत्थेगइयाणं नेरइयाणं दस पलिओवमाइं ठिई प० । चउत्थीए पुढवीए दस निरयावाससयसहस्साइ प० । चउत्थीए पुढवीए नेरइयाणं अत्थेगइयाणं उक्कोसेणं दस सागरोवमाइं ठिई प० । पंचमीए पुढवीए अत्थेगइयाणं नेरइयाणं जहण्णेणं दस सागरोवमाइं ठिई प० । असुरकुमारारणं देवाणं अत्थेगइयाणं जहण्णेणं दस वाससहस्साइं ठिई प० । असुरिंदवज्जाणं भोमिज्जाणं देवाणं अत्थेगइयाणं जहण्णेणं दस वाससहस्साइं ठिई पञ्चत्ता । असुरकुमारारणं देवाणं अत्थेगइयाणं दस पलिओवमाइं ठिई प० । बायरवणस्सइकाइयाणं उक्कोसेणं दस वाससहस्साइं ठिई प० । वाणमंतरारणं देवाणं अत्थेगइयाणं जहण्णेणं दस वाससहस्साइं ठिई प० । सोहम्मसीसाणेसु कप्पेसु अत्थेगइयाणं देवाणं दस पलिओवमाइं ठिई प० । बंभलोए कप्पे देवाणं उक्कोसेणं दस सागरोवमाइं ठिई प० । लंतए कप्पे देवाणं अत्थेगइयाणं जहण्णेणं दस सागरोवमाइं ठिई प० । जे देवा घोसं सुघोसं महाघोसं नंदिघोसं सुसरं मणोरमं रम्मं रम्मगं रमणिज्जं मंगलावत्तं बंभलो-गवडिसगं विमाणं देवत्ताए उववण्णा तेसि णं देवाणं उक्कोसेणं दस सागरोवमाइं ठिई प० ॥ ३७ ॥ ते णं देवा दसण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं दसहिं वाससहस्सेहिं आहारट्ठे समुप्प-ज्जइ । संतेगइआ भवसिद्धिआ जीवा जे दसहिं भवग्गहणेहिं सिज्झस्संति बुज्झ-स्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ३८ ॥ एक्कारस उवासगपडिमाओ प० तं जहा—दंसणसावए, कयव्वयकम्मे, सामाइअकडे, पोस-होववासनिरए, दिया बंभयारी रत्ति परिमाणकडे, दिआ वि राओ वि बंभयारी असिणाइ विअडभोई मोलिकडे, सचित्तपरिणाए, आरंभपरिणाए, पेसपरिणाए, उद्दिट्ठभत्तपरिणाए, समणभूए आवि भवइ समणाउसो ! लोगंताओ इक्कारसएहिं एक्कारेहिं जोयणसएहिं आवाहाए जोइसंते पण्णत्ते । जंबूवीवे दीवे मंदरस्स पव्वयस्स एक्कारसहिं एकवीसेहिं जोयणसएहिं अवाहाए जोइसे चारं चरइ । समणस्स णं भग-

वओ महावीरस्स एकारस गणहरा होत्था, तं जहा-ईदभूई अग्निभूई वायुभूई विअत्ते सोहम्मे मंडिए मोरियपुत्ते अर्कपिए अयलभाए मेअजे पभासे । मूले नक्खत्ते एकार-सतारे पन्नत्ते । हेट्ठिमगेविज्जयाणं देवाणं एकारसमुत्तरं रेविज्जविमाणसत्तं भवइ त्ति मक्खत्तायं । मंदरे णं पव्वए धरणितलाओ सिहरतले एकारसभागपरिहीणे उच्चत्तेणं प० ॥ ३९ ॥ इमीसे णं रयणप्पभाए पुढवीए अत्थेगइयाणं नेरइयाणं एकारस पलिओवमाई ठिई प० । पंचमीए पुढवीए अत्थेगइयाणं नेरइयाणं एकारस साग-रोवमाई ठिई प० । असुरकुमारारणं देवाणं अत्थेगइयाणं एकारस पलिओवमाई ठिई प० । सोहम्मीसाणेसु कप्पेसु अत्थेगइयाणं देवाणं एकारस पलिओवमाई ठिई प० । लंतए कप्पे अत्थेगइयाणं देवाणं एकारस सागरोवमाई ठिई प० । जे देवा बंभं सुवंभं वंभावत्तं वंभप्पभं वंभकत्तं वंभवणं वंभलेसं वंभज्जयं वंभ-सिं वंभसिट्ठं वंभकूडं वंभुत्तरवडिसगं विमाणं देवत्ताए उववण्णा तेसि णं देवाणं (उक्कोसेणं) एकारस सागरोवमाई ठिई प० ॥ ४० ॥ ते णं देवा एकारसण्हं अद्धमासाणं आणमंति वा पाणमंति वा ऊससंति वा नीससंति वा । तेसि णं देवाणं एकारसण्हं वाससहस्साणं आहारट्ठे समुप्पज्जइ । संतेगइआ भवसिद्धिआ जीवा जे एकारसहिं भवग्गहणेहिं सिज्जिस्संति बुज्जिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ४१ ॥ बारस भिक्खुपडिमाओ पन्नत्ताओ, तं जहा-मासिआ भिक्खुपडिमा, दोमासिआ भिक्खुपडिमा, तिमासिआ भिक्खुपडिमा, चउ-मासिआ भिक्खुपडिमा, पंचमासिआ भिक्खुपडिमा, छमासिआ भिक्खुपडिमा, सत्तमासिआ भिक्खुपडिमा, पढमा सत्तराईदिआ भिक्खुपडिमा, दोच्चा सत्तराईदिआ भिक्खुपडिमा, तच्चा सत्तराईदिआ भिक्खुपडिमा, अहोराइआ भिक्खुपडिमा, एग-राइआ भिक्खुपडिमा । दुवाल्सविहे संभोगे प० तं जहा-“उवहीसुअभत्तपाणे, अंजलीपग्गहे त्ति य । दायणे य निकाए अ अब्भुट्ठाणेति आवरे । कितिकम्मस्स य करणे, वेयावच्चकरणे इअ । समोसरणं संनिसिज्जा य, कहाए अ पबंघणे” । दुवाल-सावत्ते कितिकम्मे पन्नत्ते, तं जहा-“दुओणयं जहाजायं, कितिकम्मं बारसावयं । चउसिरं तिगुत्तं च, दुपवेसं एगनिक्खमणं” । विजया णं रायहाणी दुवाल्स जोयण-सयसहस्साई आयामविक्खंभेणं प० । रामे णं बलदेवे दुवाल्स वाससयाई सव्वाउयं पालित्ता देवत्तं गए । मंदरस्स णं पव्वयस्स चूलिआ मूले दुवाल्स जोयणाई विक्खंभेणं प० । जंबूदीवस्स णं दीवस्स वेइआ मूले दुवाल्स जोय-णाई विक्खंभेणं प० । सव्वजहणिया राई दुवाल्समुहुत्तिआ प० । एवं दिवसोऽपि नायव्वो । सव्वट्ठसिद्धस्स णं महाविमाणस्स उवरिल्लाओ चूलिअग्गाओ

दुवालस जोयणाई उद्धं उप्पइआ ईसिपब्भारनामपुढवी पण्णत्ता । ईसिपब्भाराए
 णं पुढवीए दुवालस नामधेजा पण्णत्ता, तं जहा—ईसित्ति वा ईसिपब्भाराति वा
 तण्ह वा तण्हयतरि त्ति वा सिद्धित्ति वा सिद्दालए त्ति वा मुतीति वा मुत्तालए त्ति
 वा बंभे त्ति वा बंभवडिंसए त्ति वा लोकपरिपूरणे त्ति वा लोगगगचूळिआइ
 वा ॥ ४२ ॥ इमीसे णं रयणप्पभाए पुढवीए अत्थेगइयाणं नेरइयाणं बारस पलि-
 ओवमाई ठिई प० । पंचमीए पुढवीए अत्थेगइयाणं नेरइयाणं बारस सागरो-
 वमाई ठिई प० । असुरकुमारणं देवाणं अत्थेगइयाणं बारस पलिओवमाई ठिई
 प० । सोहम्मीसाणेसु कप्पेसु अत्थेगइयाणं देवाणं बारस पलिओवमाई ठिई
 प० । लंतए कप्पे अत्थेगइयाणं देवाणं बारस सागरोवमाई ठिई प० । जे
 देवा महिंदं महिंदज्झयं कंबुं कंबुग्गीवं पुंखं सुपुंखं महापुंखं पुंडं सुपुंडं महापुंडं नरिंदं
 नरिंदकंतं नरिंदुत्तरवडिंसणं विमाणं देवत्ताए उववण्णा तेसि णं देवाणं उक्कोसेणं
 बारस सागरोवमाई ठिई प० ॥ ४३ ॥ ते णं देवा बारसण्हं अद्धमासाणं आण-
 मंति वा पाणमंति वा उस्ससंति वा नीससंति वा । तेसि णं देवाणं बारसहिं वास-
 सहस्सेहिं आहारट्ठे समुप्पजइ । संतेगइया भवसिद्धिआ जीवा जे बारसहिं भव-
 ग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं
 करिस्संति ॥ ४४ ॥ तेरस किरियाठाणा प० तं जहा—अट्ठादंडे अणट्ठादंडे
 हिंसादंडे अकम्हादंडे दिट्ठिविपरिआसिआदंडे मुसावायवत्तिए अदिज्ञादाणवत्तिए
 अज्झत्थिए माणवत्तिए मित्तदोसवत्तिए मायावत्तिए लोभवत्तिए इरिआवहिए नामं
 तेरसमे । सोहम्मीसाणेसु कप्पेसु तेरस विमाणपत्थडा प० । सोहम्मवडिंसगे णं
 विमाणे णं अद्धतेरसजोयणसयसहस्साई आयामविकखंभेणं प० । एवं ईसाणव-
 डिंसगे वि । जलयरपंचिंदिअतिरिक्खजोणिआणं अद्धतेरसजाइकुलकोडीजोणीपमुह-
 सयसहस्साई प० । पाणाउस्स णं पुव्वस्स तेरस वत्थू प० । गम्भवक्कंति-
 अपचंचिंदिअतिरिक्खजोणिआणं तेरसविहे पओगे प० तं जहा—सच्चमणपओगे
 मोसमणपओगे सच्चामोसमणपओगे असच्चामोसमणपओगे सच्चवइपओगे मोसवइप-
 ओगे सच्चामोसवइपओगे असच्चामोसवइपओगे ओरालिअसरीरकायपओगे ओरालि-
 अमीससरीरकायपओगे वेउव्विअसरीरकायपओगे वेउव्विअमीससरीरकायपओगे
 कम्मसरीरकायपओगे । सूरसंडलं जोअणेणं तेरसे (स) हिं एगसट्ठिभाग (ने)
 हिं जोयणस्स ऊणं पव्वत्तं ॥ ४५ ॥ इमीसे णं रयणप्पभाए पुढवीए अत्थेगइयाणं
 नेरइयाणं तेरस पलिओवमाई ठिई प० । पंचमीए पुढवीए अत्थेगइयाणं नेरइ-
 याणं तेरस सागरोवमाई ठिई प० । असुरकुमारणं देवाणं अत्थेगइयाणं तेरस

पलिओवमाई ठिई प० । सोहम्मीसाणेसु कप्पेसु अत्थेगइआणं देवाणं तेरस
 पलिओवमाई ठिई प० । लंतए कप्पे अत्थेगइआणं देवाणं तेरस सागरोवमाई
 ठिई प० । जे देवा वज्जं सुवज्जं वज्जावत्तं वज्जप्पभं वज्जकंतं वज्जवण्णं वज्जलेसं
 वज्जरूवं वज्जसिगं वज्जसिट्ठं वज्जकूडं वज्जुत्तरवडिसगं वडरं वडरावत्तं वडरप्पभं वड-
 रकंतं वडरवण्णं वडरलेसं वडररूवं वडरसिगं वडरसिट्ठं वडरकूडं वडरुत्तरवडिसगं लोगं
 लोगावत्तं लोगप्पभं लोगकंतं लोगवण्णं लोगलेसं लोगरूवं लोगसिगं लोगसिट्ठं
 लोगकूडं लोगुत्तरवडिसगं विमाणं देवताए उववण्णा तेसि णं देवाणं उक्कोसेणं तेरस
 सागरोवमाई ठिई प० ॥ ४६ ॥ ते णं देवा तेरसहिं अद्धमासेहिं आणमंति वा
 पाणमंति वा उस्ससंति वा नीससंति वा । तेसि णं देवाणं तेरसहिं वाससहरसेहिं
 आहारट्ठे समुप्पजइ । संतेगइआ भवसिद्धिआ जीवा जे तेरसहिं भवग्गहणेहिं
 सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति
 ॥ ४७ ॥ चउइस भूअग्गामा पन्नत्ता, तं जहा-सुहुमा अपज्जत्तआ सुहुमा पज्जत्तया
 बादरा अपज्जत्तया बादरा पज्जत्तया बेईदिया अपज्जत्तया बेईदिया पज्जत्तया तेंदिया
 अपज्जत्तया तेंदिया पज्जत्तया चउरिंदिया अपज्जत्तया चउरिंदिया पज्जत्तया पंचिंदिया
 असन्निअपज्जत्तया पंचिंदिया असन्निपज्जत्तया पंचिंदिया सन्निअपज्जत्तया पंचिंदिया
 सन्निपज्जत्तया । चउदस पुव्वा प० तं जहा-उप्पायपुव्वमग्गेणियं च तइयं च
 वीरियं पुव्वं । अत्थीनत्थि पवायं तत्तो नाणप्पवायं च ॥ १ ॥ सच्चप्पवायपुव्वं तत्तो
 आयप्पवायपुव्वं च । कम्मप्पवायपुव्वं पच्चक्खाणं भवे नवमं ॥ २ ॥ विजाअणुप्प-
 वायं अवन्न पाणाउ बारसं पुव्वं । तत्तो किरियविसालं पुव्वं तह बिंदुसारं च ॥ ३ ॥
 अग्गेणीअस्स णं पुव्वस्स चउइस वत्थू पन्नत्ता । समणस्स णं भगवओ महावीरस्स
 चउइस समणसाहस्सीओ उक्कोसिआ समणसंपया होत्था । कम्मविसोहिमग्गणं पडुच्च
 चउदस जीवट्ठाणा पन्नत्ता, तं जहा-मिच्छदिट्ठी सासायणसम्महिट्ठी सम्मामिच्छदिट्ठी
 अविरयसम्महिट्ठी विरयाविरए पमत्तसंजए अप्पमत्तसंजए निअट्ठिबायरे अनियट्ठिबायरे
 सुहुमसंपराए उवसामए वा खवए वा उवसंतमोहे खीणमोहे सजोगीकेवली अजोगी-
 केवली । भरहेरवयाओ णं जीवाओ चउइस चउइस जोयणसहस्साई चत्तारि अ एणु-
 त्तरे जोयणसए छच्च एगूणवीसे भागे जोयणस्स आयामेणं पन्नत्ता । एगमेगस्स णं रज्जो
 चाउरंतचक्कवट्ठिस्स चउइस रयणा पन्नत्ता, तं जहा-इत्थीरयणे सेणावइरयणे गाहाव-
 इरयणे पुरोहियरयणे वड्डइरयणे आसरयणे हत्थिरयणे असिरयणे दंडरयणे चक्ररयणे
 छत्तरयणे चम्मरयणे मणिरयणे काणिणिरयणे । जंबुदीवे णं दीवे चउइस महानईओ
 पुव्वावरेण लवणसमुदं समप्पेति, तं जहा-गंगा सिधू रोहिआ रोहिअंसा हरी

हरिकंता सीआ सीओदा नरकंता नारिकंता सुवण्णकूला रूपकूला रत्ता रत्तवई
 ॥ ४८ ॥ इमीसे णं रयणप्पभाए पुढवीए अत्थेगइयाणं नेरइयाणं चउदस पळिओ-
 वमाईं ठिईं प० । पंचमीए णं पुढवीए अत्थेगइयाणं नेरइयाणं चउदस सागरो-
 वमाईं ठिईं प० । असुरकुमारानं देवानं अत्थेगइयाणं चउदस पळिओवमाईं
 ठिईं प० । सोहम्मीसाणेसु कप्पेसु अत्थेगइयाणं देवानं चउदस पळिओवमाईं
 ठिईं प० । लंतए कप्पे देवानं उक्कोसेणं चउदस सागरोवमाईं ठिईं प० ।
 महासुक्के कप्पे देवानं जहण्णेणं चउदस सागरोवमाईं ठिईं प० । जे देवा सिरि-
 कंतं सिरिमहिअं सिरिसोमनसं लंतयं काविट्ठं महिंदं महिंदकंतं महिंदुत्तरवडिसणं
 विमाणं देवत्ताए उववण्णा तेसि णं देवानं उक्कोसेणं चउदस सागरोवमाईं ठिईं
 प० ॥ ४९ ॥ ते णं देवा चउदसहिं अद्धमासेहिं आणमंति वा पाणमंति वा
 उस्ससंति वा नीससंति वा । तेसि णं देवानं चउदसहिं वाससहस्सेहिं आहारट्ठे
 समुप्पज्जइ । संतेगइया भवसिद्धिआ जीवा जे चउदसहिं भवगहणेहिं सिज्झिस्संति
 बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ५० ॥
 पन्नरस परमाहम्मिआ पन्नता, तं जहा-अंबे अंबरिसी चेव, सामे सबळे त्ति आवरे ।
 रुदोवद्धकाले अ, महाकाले त्ति आवरे ॥ १ ॥ असिपत्ते धणु कुंभे, बालुए वेअर-
 णीति अ । खरस्सरे महाघोसे, एते पन्नरसाहिआ ॥ २ ॥ णमी णं अरहा पन्नरस
 धणूइं उद्धं उच्चत्तेणं होत्था । धुवराहू णं बहुलपक्खस्स पडिवाए पन्नरसभागं पन्नरस-
 भागेणं चंदस्स लेसं आवरेत्ताणं चिट्ठति, तं जहा-पढमाए पढमं भागं बीआए
 दुभागं तइआए तिभागं चउत्थीए चउभागं पंचमीए पंचभागं छट्ठीए छभागं सत्त-
 मीए सत्तभागं अट्ठमीए अट्ठभागं नवमीए नवभागं दसमीए दसभागं एक्कारसीए
 एक्कारसभागं बारसीए बारसभागं तेरसीए तेरसभागं चउदसीए चउदसभागं पन्न-
 रसेसु पन्नरसभागं । तं चेव सुक्कपक्खस्स य उवदंसेमाणे २ चिट्ठति, तं जहा-पढमाए
 पढमं भागं जाव पन्नरसेसु पन्नरसभागं । छ णक्खत्ता पन्नरसमुहुत्तसंजुत्ता पन्नता,
 तं जहा-सतभिसय भरणि अहा असलेत्ता साईं तहा जेट्ठा । एते छण्णक्खत्ता पन्न-
 रसमुहुत्तसंजुत्ता ॥ १ ॥ चेत्तासोएसु णं मासेसु पन्नरसमुहुत्तो दिवसो भवति, एवं
 चेत्तासोएसु णं मासेसु पन्नरसमुहुत्ता राईं भवति । विज्जाअणुप्पवायस्स णं पुव्वस्स
 पन्नरस वत्थू पण्णत्ता । मणूसाणं पण्णरसविहे पओगे प० तं जहा-सच्चमणप-
 ओगे मोसमणपओगे सच्चमोसमणपओगे असच्चाओसमणपओगे सच्चवइपओगे मोस-
 वइपओगे सच्चमोसवइपओगे असच्चाओसवइपओगे ओरालिसरीरकायपओगे ओरा-
 लिअमीससरीरकायपओगे वेउव्वियसरीरकायपओगे वेउव्वियमीससरीरकायपओगे

आहारयसरीरकायपओगे आहारयभीससरीरकायप्पओगे कम्मयसरीरकायपओगे
 ॥ ५१ ॥ इमीसे णं रयणप्पभाए पुढवीए अत्थेगइआणं नेरइआणं पण्णरस पलि-
 ओवमाइं ठिई प० । पंचमीए पुढवीए अत्थेगइआणं नेरइयाणं पण्णरस सागरो-
 वमाइं ठिई प० । असुरकुमाराणं देवाणं अत्थेगइयाणं पण्णरस पलिओवमाइं
 ठिई प० । सोहम्मीसाणेसु कप्पेसु अत्थेगइआणं देवाणं पण्णरस पलिओवमाइं
 ठिई प० । महासुक्के कप्पे अत्थेगइआणं देवाणं पण्णरस सागरोवमाइं ठिई
 प० । जे देवा णंदं सुणंदं णंदावत्तं णंदप्पभं णंदकंतं णंदवण्णं णंदलेसं णंदउज्जयं
 णंदसिंगं णंदसिट्ठं णंदकूळं णंदुत्तरवडिसगं विमाणं देवत्ताए उववण्णा तेसि णं देवाणं
 उक्कोसेणं पण्णरस सागरोवमाइं ठिई प० ॥ ५२ ॥ ते णं देवा पण्णरसण्हं
 अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं
 पण्णरसहिं वाससहस्सेहिं आहारट्टे समुप्पज्जइ । संतेगइआ भवसिद्धिआ जीवा जे
 पन्नरसहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति
 सव्वदुक्खाणमंतं करिस्संति ॥ ५३ ॥ सोलस य गाहा सोलसगा पन्नत्ता, तं जहा-
 समए वेयालिए उवसग्गपरिच्चा इत्थीपरिण्णा निरयविभत्ती महावीरथुई कुसीलपरि-
 भासिए वीरिए धम्ममे समाही मग्गे समोसरणे आहाताहिए गंधे जमईए गाहासोल-
 समे सोलसगे । सोलस कसाया पन्नत्ता, तं जहा-अणंताणुबंधी कोहे, अणंताणुबंधी
 माणे, अणंताणुबंधी माया, अणंताणुबंधी लोभे, अपच्चक्खाणकसाए कोहे, अपच्च-
 क्खाणकसाए माणे, अपच्चक्खाणकसाए माया, अपच्चक्खाणकसाए लोभे, पच्च-
 क्खाणावरणे कोहे, पच्चक्खाणावरणे माणे, पच्चक्खाणावरणा माया, पच्चक्खाणावरणे
 लोभे, संजलणे कोहे, संजलणे माणे, संजलणे माया, संजलणे लोभे । मंदरस्स णं
 पव्वयस्स सोलस नामधेया पन्नत्ता, तं जहा-मंदर मेत्त मणोरम, सुदंसण सयंपभे
 य गिरिराया । रयणुच्चय पियदंसण, मज्झे लोगस्स नामी य ॥ १ ॥ अत्थे अ
 सूरिआवत्ते, सूरिआवरणे त्ति अ । उत्तरे अ दिसाई अ, वडिसे इअ सोलसमे ॥ २ ॥
 पासस्स णं अरहतो पुरिसादाणीयस्स सोलस समणसाहस्सीओ उक्कोसिआ समण-
 संपदा होत्था । आयप्पवायस्स णं पुव्वस्स णं सोलस वत्थू पन्नत्ता । चमरबलीणं
 ऊवारियाळेणे सोलस जोयणसहस्साइं आयामविक्खंभेणं प० । लवणे णं समुद्दे
 सोलस जोयणसहस्साइं उस्सेहपरिवुद्धीए पन्नत्ते ॥ ५४ ॥ इमीसे णं रयणप्पभाए
 पुढवीए अत्थेगइयाणं नेरइयाणं सोलस पलिओवमाइं ठिई प० । पंचमीए पुढ-
 वीए अत्थेगइयाणं नेरइयाणं सोलस सागरोवमाइं ठिई प० । असुरकुमाराणं देवाणं
 अत्थेगइयाणं सोलस पलिओवमाइं ठिई प० । सोहम्मीसाणेसु कप्पेसु अत्थेगइ-

याणं देवाणं सोलस पलिओवमाई ठिई प० । महासुक्के कप्पे देवाणं अत्थेगइयाणं
 सोलस सागरोवमाई ठिई प० । जे देवा आवत्तं विआवत्तं नंदिआवत्तं महणंदि-
 आवत्तं अंकुसं अंकुसपलंबं भइं सुभइं महाभइं सव्वओभइं भहुत्तरवडिंसणं विमाणं
 देवत्ताए उववण्णा तेसि णं देवाणं उक्कोसेणं सोलस सागरोवमाई ठिई प०
 ॥ ५५ ॥ ते णं देवा सोलसहिं अद्धमासाणं आणमंति वा पाणमंति वा उस्ससंति वा
 नीससंति वा । तेसि णं देवाणं सोलसवाससहस्सेहिं आहारट्ठे समुप्पज्जइ । संतेग-
 इआ भवसिद्धिआ जीवा जे सोलसहिं भवग्गहणेहिं सिज्झिस्संति बुज्झिस्संति मुच्चि-
 स्संति परिनिव्वाइस्संति सव्वदुक्खाणमंतं करिस्संति ॥ ५६ ॥ सत्तरसविहे असंजमे
 पन्नत्ते, तं जहा-पुढविकायअसंजमे आउकायअसंजमे तेउकायअसंजमे वाउकाय-
 असंजमे वणस्सइकायअसंजमे बेईदिअअसंजमे तेईदियअसंजमे चउरिंदियअसंजमे
 पंचिंदियअसंजमे अजीवकायअसंजमे पेहाअसंजमे उवेहाअसंजमे अवहट्ठअसंजमे
 अप्पमज्जणाअसंजमे मणअसंजमे वइअसंजमे कायअसंजमे । सत्तरसविहे संजमे
 पन्नत्ते, तं जहा-पुढवीकायअसंजमे आउकायअसंजमे तेउकायअसंजमे वाउकायअसंजमे
 वणस्सइकायअसंजमे बेईदिअसंजमे तेईदियअसंजमे चउरिंदियअसंजमे पंचिंदियअसंजमे
 अजीवकायअसंजमे पेहाअसंजमे उवेहाअसंजमे अवहट्ठअसंजमे पमज्जणाअसंजमे मणअसंजमे
 वइअसंजमे कायअसंजमे । माणुसत्तरे णं पव्वए सत्तरस एकवीसे जोयणसए उड्डं उच्चतेणं
 पन्नत्ते । सव्वेसिं पि णं वेलंधरअणुवेलंधरणागराईणं आवासपव्वया सत्तरस एकवीसाई
 जोयणसयाई उड्डं उच्चतेणं पन्नत्ता । लवणे णं समुद्दे सत्तरस जोयणसहस्साई सव्व-
 ग्गेणं पन्नत्ते । इमीसे णं रयणप्पमाए पुढवीए बहुसमरमणिज्जाओ भूमिभागाओ
 सातिरेगाई सत्तरस जोयणसहस्साई उड्डं उप्पत्तिता ततो पच्छा चारणाणं तिरिआ
 गती पव्वत्ति । चमरस्स णं असुरिंदस्स असुररण्णो तिगिच्छिक्खे उप्पायपव्वए सत्त-
 रस एकवीसाई जोयणसयाई उड्डं उच्चतेणं पन्नत्ते । बलिस्स णं असुरिंदस्स रुअंगिंदे
 उप्पायपव्वए सत्तरस एकवीसाई जोयणसयाई उड्डं उच्चतेणं पन्नत्ते । सत्तरसविहे
 मरणे पन्नत्ते, तं जहा-आवीईमरणे ओहिमरणे आयंतियमरणे वलायमरणे वसट्ठमरणे
 अंतोसल्लमरणे तब्भवमरणे बालमरणे पंडितमरणे बालपंडितमरणे छउमत्थमरणे
 केवल्लिमरणे वेहासमरणे गिद्धपिट्ठमरणे भत्तपच्चक्खाणमरणे इंगिणिमरणे पाओवग-
 मणमरणे । सुहुमसंपराए णं भगवं सुहुमसंपरायभावे वट्ठमाणे सत्तरस कम्मपगडीओ
 णिबंघति, तं जहा-आभिणिवोहियणाणावरणे सुयणाणावरणे ओहिणाणावरणे मणप-
 ज्जवणाणावरणे केवलणाणावरणे चक्खुदंसणावरणे अचक्खुदंसणावरणे ओहिदंसणा-
 वरणे केवलदंसणावरणे सायाचेयणिजं जसोकित्तिनामं उच्चागोयं दाणंतरायं लाभंतरायं

भोगंतरायं उवभोगंतरायं वीरिअंतरायं ॥ ५७ ॥ इमीसे णं रयणप्पभाए पुढवीए
 अत्थेगइयाणं नेरइयाणं सत्तरस पलिओवमाइं ठिई पत्तत्ता । पंचमीए पुढवीए अत्थे-
 गइयाणं नेरइयाणं उक्कोसेणं सत्तरस सागरोवमाइं ठिई प० । छट्ठीए पुढवीए अत्थे-
 गइयाणं नेरइयाणं जहण्णेणं सत्तरस सागरोवमाइं ठिई प० । असुरकुमारणं देवाणं
 अत्थेगइयाणं सत्तरस पलिओवमाइं ठिई प० । सोहम्मीसाणेसु कप्पेसु अत्थेगइयाणं
 देवाणं सत्तरस पलिओवमाइं ठिई प० । महाउक्के कप्पे देवाणं उक्कोसेणं सत्तरस
 सागरोवमाइं ठिई प० । सहस्सारे कप्पे देवाणं जहण्णेणं सत्तरस सागरोवमाइं
 ठिई प० । जे देवा सामाणं सुसामाणं महासामाणं पउमं महापउमं कुमुदं महाकुमुदं
 नल्लिणं महानल्लिणं पौडरीअं महापौडरीअं सुक्कं महासुक्कं सीहं सीहक्कंतं सीहवीअं
 भाविअं विमाणं देवत्ताए उववण्णा तेसि णं देवाणं उक्कोसेणं सत्तरस सागरोवमाइं
 ठिई प० ॥ ५८ ॥ ते णं देवा सत्तरसहिं अद्धमासेहिं आणमंति वा पाणमंति वा
 उस्ससंति वा नीससंति वा । तेसि णं देवाणं सत्तरसहिं वाससहस्सेहिं आहारट्ठे
 समुप्पज्जइ । संतेगइया भवसिद्धिआ जीवा जे सत्तरसहिं भवग्गहणेहिं सिज्झिस्संति
 बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ५९ ॥
 अट्ठारसविहे बंभे पत्तते, तं जहा-ओरालिए कामभोगे णेव सयं मणेणं सेवइ, नो
 वि अन्नं मणेणं सेवावेइ, मणेणं सेवंतं पि अण्णं न समणुजाणाइ ओरालिए काम-
 भोगे णेव सयं वायाए सेवइ, नो वि अण्णं वायाए सेवावेइ, वायाए सेवंतं पि अण्णं
 न समणुजाणाइ, ओरालिए कामभोगे णेव सयं काएणं सेवइ, नो वि यऽण्णं काएणं
 सेवावेइ, काएणं सेवंतं पि अण्णं न समणुजाणाइ, दिव्वे कामभोगे णेव सयं मणेणं
 सेवइ, णो वि अण्णं मणेणं सेवावेइ, मणेणं सेवंतं पि अण्णं न समणुजाणाइ, दिव्वे
 कामभोगे णेव सयं वायाए सेवइ, णो वि अण्णं वायाए सेवावेइ, वायाए सेवंतं पि
 अण्णं न समणुजाणाइ, दिव्वे कामभोगे णेव सयं काएणं सेवइ, णो वि अण्णं काएणं
 सेवावेइ, काएणं सेवंतं पि अण्णं न समणुजाणाइ । अरहतो णं अरिट्ठेनेमिस्स
 अट्ठारस समणसाहस्सीओ उक्कोसिया समणसंपया होत्था । समणेणं भगवया महा-
 वीरेणं समणाणं णिम्मंथाणं सखुडुयविअत्ताणं अट्ठारस ठाणा पत्तत्ता, तं जहा-वयछक्कं
 कायछक्कं, अकप्पो गिहिभायणं, पलियंक्कं निसिज्जा य, सिणाणं सोभवज्जणं ॥ १ ॥
 आयारस्स णं भगवतो सच्चूलिआगरस्स अट्ठारस पयसहस्साइं पयग्गेणं पत्तत्ताइ ।
 बंभीए णं लिवीए अट्ठारसविहे केवविहाणे पत्तते, तं०-बंभी जवणी लियदोसा
 ऊरिया खरोट्टिया खरसाविया पहाराइआ उच्चतरिआ अक्खरपुट्टि(त्थि)या
 भोगवयता वेणतिया णिण्हइया अंकलिवि गणिअलिवी गंधव्वलिवी भूयलिवि]

आदंसलिवी माहेसरीलिवी दामिलिवी बोलिंदिलिवी । अत्थिनत्थिप्पवायस्स णं पुव्वस्स णं अट्टारस वत्थू प० । धूमप्पभाए णं पुढवीए अट्टारसुत्तरं जोयणसयसहस्सं बाह्वहेणं प० । पोसासाढेसु णं मासेसु सइ उक्कोसेणं अट्टारस सुहुत्ते दिवसे भवइ सइ उक्कोसेणं अट्टारस सुहुत्ता राती भवइ ॥ ६० ॥ इसीसे णं रयणप्पभाए पुढवीए अत्थेगइयाणं नेरइयाणं अट्टारस(पलिओवमाइं ठिई प० । छट्ठीए पुढवीए अत्थेगइयाणं नेरइयाणं अट्टारस)सागरोवमाइं ठिई प० । असुरकुमाराणं देवाणं अत्थेगइयाणं अट्टारस पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं अट्टारस पलिओवमाइं ठिई प० । सहस्सारे कप्पे देवाणं उक्कोसेणं अट्टारस सागरोवमाइं ठिई प० । आणते कप्पे देवाणं अत्थेगइयाणं जहण्णेणं अट्टारस सागरोवमाइं ठिई प० । जे देवा कालं सुकालं महाकालं अंजणं रिट्ठं सालं समाणं दुमं महादुमं विसालं सुसालं पउमं पउमगुम्मं कुमुदं कुमुदगुम्मं नल्लिणं नल्लिणगुम्मं पुंडरीअं पुंडरीयगुम्मं सहस्सारवडिसगं विमाणं देवताए उववण्णा तेसि णं देवाणं(उक्कोसेणं)अट्टारस सागरोवमाइं ठिई प० ॥ ६१ ॥ ते णं देवा णं अट्टारसेहिं अद्धमासेहिं आणमंति वा पाणमंति वा ऊससंति वा नीससंति वा । तेसि णं देवाणं अट्टारसवाससहस्सेहिं आहारट्ठे समुप्पज्जइ । संतेगइया भवसिद्धिया (जीवा)जे अट्टारसहिं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ६२ ॥ एगूणवीसं णायज्जयणा पञ्चत्ता, तं जहा-उक्खित्तणाए संवाढे, अंढे कुम्मे अ सेलए । तुंवे अ रोहिणी मल्ली, मागंदी चंदिमाति अ ॥ १ ॥ दावद्वे उदगणाए, मंडुक्के तेत्तली इअ । नंदिफले अवरकंका, आइण्णे सुंसमा इअ ॥ २ ॥ अवरे अ पोंडरीए, णाए एगूणवीसमे । जंबुद्दीवे णं दीवे सूरिआ उक्कोसेणं एगूणवीसं जोयणसयाइं उद्धमहो तवयंति । सुक्के णं महग्गहे अवरे णं उदिए समाणे एगूणवीसं णक्खत्ताइं समं चारं चरित्ता अवरेणं अत्थमणं उवागच्छइ । जंबुद्दीवस्स णं दीवस्स कलाओ एगूणवीसं छेअणाओ पञ्चत्ता । **एगूणवीसं तित्थयरा अगारवासमज्जे वसित्ता मुंडे भवित्ता णं अगाराओ अणगारिअं पव्वइआ ॥ ६३ ॥** इसीसे णं रयणप्पभाए पुढवीए अत्थेगइयाणं नेरइआणं एगूणवीसं पलिओवमाइं ठिई प० । छट्ठीए पुढवीए अत्थेगइयाणं नेरइयाणं एगूणवीसं सागरोवमाइं ठिई प० । असुरकुमाराणं देवाणं अत्थेगइयाणं एगूणवीसं पलिओवमाइं ठिई प० । सोहम्मीसाणेसु कप्पेसु अत्थेगइयाणं देवाणं एगूणवीसं पलिओवमाइं ठिई प० । आणयकप्पे[अत्थेगइयाणं] देवाणं उक्कोसेणं एगूणवीसं सागरोवमाइं ठिई प० । पाणए कप्पे[अत्थेगइयाणं]

देवाणं जहण्णेणं एगूणवीसं सागरोवमाई ठिई प० । जे देवा आणतं पाणतं णतं विणतं घणं सुसिरं इंदं इंदोकंतं इंदुत्तरवडिसगं विमाणं देवताए उववण्णा तेसि णं देवाणं उक्कोसेणं एगूणवीसं सागरोवमाई ठिई प० ॥ ६४ ॥ ते णं देवा एगूणवीसाए अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं एगूणवीसाए वाससहस्सेहिं आहारट्टे समुप्पज्जइ । संतेगइआ भवसिद्धिया जीवा जे एगूणवीसाए भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणं अंतं करिस्संति ॥ ६५ ॥ वीसं असमाहिठाणा पन्नत्ता, तं जहा—दवदवचारि यावि भवइ, अपमज्जियचारि यावि भवइ, दुप्पमज्जियचारि आवि भवइ, अतिरित्तसेज्जासणिए, रातिणिअपरिभासी, थेरोवघाइए, भूओवघाइए, संजल्लणे कोहणे, पिट्ठिमंसिए, अभिक्खणं अभिक्खणं ओहारइत्ता भवइ, णवणं अधिकरणं अणुप्पण्णाणं उप्पाएत्ता भवइ, पोराणाणं अधिकरणं खामिअवि—उसविआणं पुणोदीरेत्ता भवइ, ससरक्खपाणिपाए, अकालसज्झायकारए यावि भवइ, कलहकरे, सहकरे, झंझकरे, सूरप्पमाणभोई, एसणाऽसमिते यावि भवइ । मुणिसुव्वए णं अरहा वीसं धणूइं उद्धं उच्चतेणं होत्था । सव्वेऽविअ णं घणोदही वीसं जोयणसहस्साई बाहल्लेणं पन्नत्ता । पाणयस्स णं देविंदस्स देवरण्णो वीसं सामाणिअसाहस्सीओ पन्नत्ताओ । णपुंसयवेयणिज्जस्स णं कम्मस्स वीसं सागरोवमकोडाकोडीओ बंधओ बंधठिई प० । पच्चक्खाणस्स णं पुव्वस्स वीसं वत्थू । उस्सपिणिओसप्पिणिमंडले वीसं सागरोवमकोडाकोडीओ कालो पन्नत्तो ॥ ६६ ॥ इमीसे णं रयणप्पभाए पुढवीए अत्थेगइयाणं नेरइयाणं वीसं पलिओवमाई ठिई प० । छट्ठीए पुढवीए अत्थेगइयाणं नेरइयाणं वीसं सागरोवमाई ठिई प० । असुरकुमारणं देवाणं अत्थेगइयाणं वीसं पलिओवमाई ठिई प० । सोहम्मीसाणेसु कप्पेसु अत्थेगइयाणं देवाणं वीसं पलिओवमाई ठिई प० । पाणते कप्पे देवाणं उक्कोसेणं वीसं सागरोवमाई ठिई प० । आरणे कप्पे देवाणं जहण्णेणं वीसं सागरोवमाई ठिई प० । जे देवा सायं विसायं सुविसायं सिद्धत्थं उप्पलं भित्तिलं तिगिच्छं दिसासोवत्थियं पलंबं रुइलं पुप्फं सुपुप्फं पुप्फावत्तं पुप्फपभं पुप्फकंतं पुप्फवण्णं पुप्फलेसं पुप्फज्झयं पुप्फसिगं पुप्फसिद्धं पुप्फुत्तरवडिसगं विमाणं देवताए उववण्णा तेसि णं देवाणं उक्कोसेणं वीसं सागरोवमाई ठिई प० ॥ ६७ ॥ ते णं देवा वीसाए अद्धमासाणं आणमंति वा पाणमंति वा उस्ससंति वा नीससंति वा । तेसि णं देवाणं वीसाए वाससहस्सेहिं आहारट्टे समुप्पज्जइ । संतेगइया भवसिद्धिया जीवा जे वीसाए भवग्गहणेहिं सिज्झिस्संति

बुज्झिस्संति मुच्चिस्संति परिणिव्वाइस्संति सव्वदुक्खाणमंतं करिस्संति ॥ ६८ ॥
 एकवीसं सबला पण्णात्ता, तं जहा-हत्थकम्मं करेमाणे सबले, मेहुणं पडिसेवमाणे
 सबले, राइभोअणं भुंजमाणे सबले, आहाकम्मं भुंजमाणे सबले, सागारियं पिंडं
 भुंजमाणे सबले, उद्देसियं कीयं आहड्डु दिज्जमाणं भुंजमाणे सबले, अभिक्खणं
 अभिक्खणं पडियाइक्खेत्ता णं भुंजमाणे सबले, अंतो छण्हं मासाणं गणाओ गणं
 संकममाणे सबले, अंतो मासस्स तओ दगळेवे करेमाणे सबले, अंतो मासस्स तओ
 माईठाणे सेवमाणे सबले, रायपिंडं भुंजमाणे सबले, आउट्टिआए पाणाइवायं करे-
 माणे सबले, आउट्टिआए मुसावायं वदमाणे सबले, आउट्टिआए अदिण्णादाणं
 गिण्हमाणे सबले, आउट्टिआए अणंतरहिआए पुढवीए ठाणं वा निसीहियं वा
 चेतेमाणे सबले, एवं आउट्टिआ चित्तमंताए पुढवीए एवं आउट्टिआ चित्तमंताए
 सिलाए कोलावासंसि वा दाए ठाणं वा सिज्जं वा निसीहियं वा चेतेमाणे सबले,
 जीवपइट्टिए सपाणे सबीए सहरिए सउत्तिगे पणगदगमट्टीमक्कडासंताणए तहप्पगारे
 ठाणं वा सिज्जं वा निसीहियं वा चेतेमाणे सबले, आउट्टिआए मूलभोअणं वा कंद-
 भोअणं वा तथाभोयणं वा पवालभोयणं वा पुप्फभोयणं वा फलभोयणं वा हरिय-
 भोयणं वा भुंजमाणे सबले, अंतो संवच्छरस्स दस दगळेवे करेमाणे सबले, अंतो
 संवच्छरस्स दस माइठाणाइ सेवमाणे सबले, अभिक्खणं अभिक्खणं सीतोदय-
 वियडवग्गारियपाणिणा असणं वा पाणं वा खाइमं वा साइमं वा पडिगाहिता भुंज-
 माणे सबले ॥ ६९ ॥ णिअट्टिबादरस्स णं खवियसत्तयस्स मोहणिज्जस्स कम्मस्स
 एकवीस कम्मंसा संतकम्मा प० तं जहा-अपच्चक्खाणकसाए कोहे, अपच्चक्खा-
 णकसाए माणे, अपच्चक्खाणकसाए माया, अपच्चक्खाणकसाए लोभे, पच्चक्खा-
 णावरणकसाए कोहे, पच्चक्खाणावरणकसाए माणे, पच्चक्खाणावरणकसाए माया,
 पच्चक्खाणावरणकसाए लोभे, संजलणकसाए कोहे, संजलणकसाए माणे, संज-
 लणकसाए माया, संजलणकसाए लोभे, इत्थिवेदे, पुंवेदे, णपुंवेदे, हासे, अरति,
 रति, भय, सोग, दुगुंछा । एकमेक्काए णं ओसप्पिणीए पंचमच्छट्ठाओ समाओ एक-
 वीसं एकवीसं वाससहस्साइं कालेणं प० तं जहा-दूसमा दूसमदूसमा । एगमे-
 गाए णं उस्सप्पिणीए पढमबितिआओ समाओ एकवीसं एकवीसं वाससहस्साइं
 कालेणं प० तं जहा-दूसमदूसमाए दूसमाए य ॥ ७० ॥ इमीसे णं रयणप्पभाए
 पुढवीए अत्थेगइयाणं नेरइयाणं एकवीसपलिओवमाइं ठिई प० । छट्ठीए पुढवीए
 अत्थेगइयाणं नेरइयाणं एकवीससागरोवमाइं ठिई प० । असुरकुमारारणं देवारणं
 अत्थेगइयाणं एगवीसपलिओवमाइं ठिई प० । सोहम्मीसाणेसु कप्पेसु अत्थेगइ-

याणं देवाणं एकवीसं पलिओवमाईं ठिईं प० । आरणे कप्पे देवाणं उक्कोसेणं एकवीसं सागरोवमाईं ठिईं प० । अच्चते कप्पे देवाणं जहण्णेणं एकवीसं सागरोवमाईं ठिईं प० । जे देवा सिरिवच्छं सिरिदामकंडं मल्लं किट्टं चावोष्णतं अरण्णवडिसगं विमाणं देवताए उववण्णा तेसि णं देवाणं उक्कोसेणं एकवीसं सागरोवमाईं ठिईं प० ॥ ७१ ॥ ते णं देवा एकवीसाए अद्धमासाणं आणमंति वा प्राणमंति वा उस्ससंति वा नीससंति वा । तेसि णं देवाणं एकवीसाए वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे एकवीसाए भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ ७२ ॥ बावीसं परीसहा प० तं जहा-दिगिंछापरीसहे, पिवासापरीसहे, सीतपरीसहे, उसिणपरीसहे, दंसमसगपरीसहे, अचेलपरीसहे, अरइपरीसहे, इत्थीपरीसहे, चरिआपरीसहे, निसीहिआपरीसहे, सिज्जापरीसहे, अक्कोसपरीसहे, वहपरीसहे, जायणापरीसहे, अलामपरीसहे, रोगपरीसहे, तण्णफासपरीसहे, जल्लपरीसहे, सक्कारपुरक्कारपरीसहे, पण्णापरीसहे, अण्णाणपरीसहे, दंसणपरीसहे । दिट्ठिवायस्स णं बावीसं सुत्ताईं छिन्नछेयणइयाईं ससमयसुत्तपरिवाडीए बावीसं सुत्ताईं अछिन्नछेयणइयाईं आजीवियसुत्तपरिवाडीए । बावीसं सुत्ताईं तिकणइयाईं तेरासियसुत्तपरिवाडीए । बावीसं सुत्ताईं चउक्कणइयाईं ससमयसुत्तपरिवाडीए । बावीसविहे पोग्गलपरिणामे पन्नत्ते, तं जहा-कालवण्णपरिणामे, नीलवण्णपरिणामे, लोहियवण्णपरिणामे, हाल्लिवण्णपरिणामे, सुक्किल्लवण्णपरिणामे, सुब्भिगंधपरिणामे, दुब्भिगंधपरिणामे, तित्तरसपरिणामे, कडुयरसपरिणामे, कसायरसपरिणामे, अबिलरसपरिणामे, महुररसपरिणामे, कक्खडफासपरिणामे, मउयफासपरिणामे, गुरुफासपरिणामे, लहुफासपरिणामे, सीतफासपरिणामे, उसिणफासपरिणामे, णिद्धफासपरिणामे, लुक्खफासपरिणामे, अगुरुलहुफासपरिणामे, गुरुलहुफासपरिणामे ॥ ७३ ॥ इमीसे णं रयणप्पभाए पुढवीए अत्थेगइयाणं नेरइयाणं बावीसं पलिओवमाईं ठिईं प० । छट्ठीए पुढवीए (नेरइयाणं) उक्कोसेणं बावीसं सागरोवमाईं ठिईं प० । अहेसत्तमाए पुढवीए [अत्थेगइयाणं] नेरइयाणं जहण्णेणं बावीसं सागरोवमाईं ठिईं प० । असुरकुमाराणं देवाणं अत्थेगइयाणं बावीसं पलिओवमाईं ठिईं प० । सोहम्मीसाणेसु कप्पेसु अत्थेगइयाणं देवाणं बावीसं पलिओवमाईं ठिईं प० । अच्चते कप्पे देवाणं (उक्कोसेणं) बावीसं सागरोवमाईं ठिईं प० । हेट्ठिमहेट्ठिमगेवेज्जगाणं देवाणं जहण्णेणं बावीसं सागरोवमाईं ठिईं प० । जे देवा महियं विट्ठियं विमलं पभासं वणमालं अच्चतवडिसगं विमाणं देवताए उववण्णा तेसि णं देवाणं उक्कोसेणं बावीसं साग-

रोवमाई ठिई प० ॥ ७४ ॥ ते णं देवा बावीसाए अद्धमासएणं आणमंति वा पाणमंति वा उस्ससंति वा नीससंति वा । तेसि णं देवाणं बावीसवाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे बावीसं भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सब्बदुक्खाणमंतं करिस्संति ॥ ७५ ॥ तेवीसं सुयगडज्जयणा पञ्चत्ता, तं जहा-समए, वेतालिए, उवसग्गपरिणा, थीपरिणा, नरयविभत्ती, महावीरथुई, कुसीलपरिभासिए, वीरिए, धम्मे, समाही, मग्गे, समोसरणे, आहतहिए, गंधे, जमईए, गाथा, पुंडरीए, किरियाठाणा, आहारपरिणा, [अ]प्पच्चक्खाणकिरिआ, अणगारसुर्यं, अहइज्जं, णालंदइज्जं । जंबुद्वीवे णं द्वीवे भारहे वासे इमीसे णं ओसप्पिणीए तेवीसाए जिणाणं सूखग्गमणमुहुत्तंसि केवलवरनाणदंसणे समुप्पण्णे । जंबुद्वीवे णं द्वीवे इमीसे णं ओसप्पिणीए तेवीसं तित्थकरा पुव्वभवे एक्कारसंगिणो होत्था, तं जहा-अजित संभव अभिणंदण सुमई जाव पासो वद्धमाणो य, उसभे णं अरहा कोसलिए चोइसपुव्वी होत्था । जंबुद्वीवे णं द्वीवे इमीसे ओसप्पिणीए तेवीसं तित्थकरा पुव्वभवे मंडलिरायाणो होत्था, तं जहा-अजित संभव अभिणंदण जाव पासो वद्धमाणो य, उसभे णं अरहा कोसलिए पुव्वभवे चक्कवट्ठी होत्था ॥ ७६ ॥ इमीसे णं रयणप्पभाए पुढवीए अत्थेगइयाणं नेरइयाणं तेवीसं पलिओवमाई ठिई प० । अहे सत्तामाए णं पुढवीए अत्थेगइयाणं नेरइयाणं तेवीसं सागरोवमाई ठिई प० । असुरकुमारारणं देवाणं अत्थेगइयाणं तेवीसं पलिओवमाई ठिई प० । सोहम्मीसाणाणं देवाणं अत्थेगइयाणं तेवीसं पलिओवमाई ठिई प० । हेट्ठिममज्झिमगेवेज्जयविमाणेसु देवत्ताए उववण्णा तेसि णं देवाणं उक्कोसेणं तेवीसं सागरोवमाई ठिई प० ॥ ७७ ॥ ते णं देवा तेवीसाए अद्धमासाणं (मासेहिं) आणमंति वा पाणमंति वा उस्ससंति वा नीससंति वा । तेसि णं देवाणं तेवीसाए वाससहस्सेहिं आहारट्ठे समुप्पज्जइ । संतेगइआ भवसिद्धिया जीवा जे तेवीसाए भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सब्बदुक्खाणमंतं करिस्संति ॥ ७८ ॥ चउव्वीसं देवाहिदेवा प० तं जहा-उसभअजितसंभवअभिणंदणसुमइपउमप्पहसुपासचंदप्पहसुविधिसेअलसिज्जंसवासुपुज्जविमलअणंतधम्मसंतिकुंथुअरमल्लीमुणिसुव्वयनमिनेमीपासवद्धमाणा । चुल्लहिमवंतसिहरीणं वासहरपव्वयाणं जीवाओ चउव्वीसं चउव्वीसं जोयणसहस्साई णववत्तीसे जोयणसए एणं अट्ठत्तीसइभागं जोयणस्स किंचि विसेसाहिआओ आयासेणं प० । चउव्वीसं देवठाणा सइंदया प० सेसा अहमिंदा अनिंदा अपुरोहिआ ।

उत्तरायणगते णं सूरिए चउवीसंगुलिए पोरिसीछायं णिब्बत्तइत्ता णं णिअट्ठति ।
 गंगासिधुओ णं महाणदीओ पवाहे सातिरेगेणं चउवीसं कोसे वित्थारेणं प० ।
 रत्तारत्तवतीओ णं महाणदीओ पवाहे सातिरेगे चउवीसं कोसे वित्थारेणं प० ॥७९॥
 इमीसे णं रयणप्पभाए पुढवीए अत्थेगइयाणं नेरइयाणं चउवीसं पलिओवमाइं ठिई
 प० । अहे सत्तमाए पुढवीए अत्थेगइयाणं नेरइयाणं चउवीसं सागरोवमाइं ठिई
 प० । असुरकुमारारणं देवाणं अत्थेगइयाणं चउवीसं पलिओवमाइं ठिई प० ।
 सोहम्मीसाणेसु कप्पेसु अत्थेगइयाणं देवाणं चउवीसं पलिओवमाइं ठिई प० ।
 हेट्ठिमउवरिमगेविज्जाणं देवाणं जहण्णेणं चउवीसं सागरोवमाइं ठिई प० । जे देवा
 हेट्ठिममज्झिमगेवेज्जयविमाणेसु देवताए उववण्णा तेसि णं देवाणं उक्कोसेणं चउवीसं
 सागरोवमाइं ठिई प० ॥ ८० ॥ ते णं देवा चउवीसाए अद्धमासाणं आणमंति
 वा पाणमंति वा ऊससंति वा नीससंति वा । तेसि णं देवाणं चउवीसाए वाससह-
 स्सेहिं आहारट्ठे समुप्पज्जइ । संतेगइआ भवसिद्धिया जीवा जे चउवीसाए भवग्गह-
 णेहिं सिज्झस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं
 करिस्संति ॥ ८१ ॥ पुरिमपच्छिमगणं तित्थगाराणं पंचजामस्स पणवीसं भाव-
 णाओ प० तं जहा-इरियासमिई, मणगुत्ती, वयगुत्ती, आलोयभायणभोयणं,
 आदाणभंडमत्तनिकखेवणासमिई, अणुवीतिभासणया, कोहविवेगे, लोभविवेगे, भयवि-
 वेगे, हासविवेगे, उग्गहअणुणवणया, उग्गहसीमजाणयया, सयमेव उग्गहं अणु-
 गिण्हणया, साहम्मियउग्गहं अणुणविय परिभुंजणया, साहारणभत्तपाणं अणुणविय
 पडिभुंजणया, इत्थीपसुपंडगसंसत्तगसयणासणवज्जणया, इत्थीकहविवज्जणया, इत्थीणं
 इंदियाणमालोयणवज्जणया, पुव्वरयपुव्वकीलिआणं अणुसरणया, पणीताहारविवज्ज-
 णया, सोइंदियरागोवरई, चक्खिंदियरागोवरई, घाणिंदियरागोवरई, जिर्म्मिंदिय-
 रागोवरई, फासिंदियरागोवरई । मल्ली णं अरहा पणवीसं धणु उद्धं उच्चत्तेणं होत्था ।
 सव्वे वि वीहवेयङ्गुपव्वया पणवीसं जोयणाणि उद्धं उच्चत्तेणं पन्नत्ता पणवीसं पणवीसं
 गाउआणि उव्विद्धेणं प० । दोच्चाए णं पुढवीए पणवीसं णिरयावाससयसहस्सा
 पन्नत्ता । आयारस्स णं भगवओ सच्चुलिआयस्स पणवीसं अज्झयणा पन्नत्ता, तं
 जहा-सत्थपरिण्णा लोगविजओ सीओसणीअ सम्मत्तं । आवंति धुय विमोह उव-
 हाणसुयं महपरिण्णा । पिंढेसण सिज्जिरिआ भासज्झयणा य वत्थ पाएसा । उग्गह-
 पडिमा सत्तिक्कसत्तया भावण विमुत्ती । निसीहज्झयणं पणवीसइमं । मिच्छादिट्ठि-
 विगलिंदिए णं अपज्जत्तए णं संकलिट्ठपरिणामे णामस्स कम्मस्स पणवीसं उत्तरपव-
 वीओ णिबंघति-तिरियगतिनामं विगलिंदियजातिनामं ओरालियसरीरणमं तेअग-

सरीरणामं कम्मणसरीरनामं हुंडगसंठाणनामं ओरालिअसरीरंगोवंगणामं छेवट्टसंध-
यणनामं वण्णनामं गंधणामं रसणामं फासणामं तिरिआणुपुव्विनामं अगुरुलहुनामं
उवघायनामं तसनामं बादरणामं अपज्जत्तयणामं पत्तैयसरीरणामं अथिरणामं असुभ-
णामं दुभगणामं अणादेज्जनामं अजसोकित्तिनामं निम्माणनामं । गंगासिंधूओ णं
महाणदीओ पणवीसं गाउयाणि पुहुत्तेणं दुहओ घडमुहपवित्तिएणं मुत्तावलिहार-
संठिएणं पवातेण पडंति । रत्तारत्तवईओ णं महाणदीओ पणवीसं गाउयाणि पुहुत्तेणं
मकर (घड) मुहपवित्तिएणं मुत्तावलिहारसंठिएणं पवातेण पडंति । लोगविंदुसारस्स
णं पुव्वस्स पणवीसं वत्थू प० ॥ ८२ ॥ इमीसे णं रयणप्पभाए पुढवीए
अत्थेगइयाणं नेरइयाणं पणवीसं पलिओवमाईं ठिई प० । अहे सत्तमाए पुढवीए
अत्थेगइआणं नेरइयाणं पणवीसं सागरोवमाईं ठिई पण्णत्ता । असुरकुमारणं देवाणं
अत्थेगइयाणं पणवीसं पलिओवमाईं ठिई प० । सोहम्मीसाणे णं देवाणं अत्थेग-
इयाणं पणवीसं पलिओवमाईं ठिई प० । मज्झिमहेट्ठिमगेवेज्जाणं देवाणं जहण्णेणं
पणवीसं सागरोवमाईं ठिई प० । जे देवा हेट्ठिमउवरिमगेवेज्जगविमाणेसु देवत्ताए
उववण्णा तेसि णं देवाणं उक्कोसेणं पणवीसं सागरोवमाईं ठिई प० ॥ ८३ ॥ ते
णं देवा पणवीसाए अद्धमासेहिं आणमंति वा पाणमंति वा उस्ससंति वा नीससंति
वा । तेसि णं देवाणं पणवीसं वाससहस्सेहिं आहारट्ठे समुप्पज्जइ । संतेगइया
भवसिद्धिआ जीवा जे पणवीसाए भवग्गहणेहिं सिज्झिस्संति बुज्झिस्संति मुच्चिस्संति
परिनिव्वाइस्संति सव्वदुक्खाणमंतं करिस्संति ॥ ८४ ॥ छव्वीसं दसकप्पववहारणं
उद्देसणकाला पन्नत्ता, तं जहा-दस दसाणं छ कप्पस्स दस ववहारस्स । अभव-
सिद्धियाणं जीवाणं मोहणिज्जस्स कम्मस्स छव्वीसं कम्मंसा संतकम्मा पन्नत्ता, तं
जहा-मिच्छत्तमोहणिज्जं सोलस कसाया इत्थीवेदे पुरिसवेदे नपुंसकवेदे हासं अरति
रति भयं सोगं दुगुंछा ॥ ८५ ॥ इमीसे णं रयणप्पभाए पुढवीए अत्थेगइयाणं
नेरइयाणं छव्वीसं पलिओवमाईं ठिई प० । अहे सत्तमाए पुढवीए अत्थेगइयाणं
नेरइयाणं छव्वीसं सागरोवमाईं ठिई प० । असुरकुमारणं देवाणं अत्थेगइयाणं
छव्वीसं पलिओवमाईं ठिई प० । सोहम्मीसाणे णं देवाणं अत्थेगइयाणं छव्वीसं
पलिओवमाईं ठिई प० । मज्झिममज्झिमगेवेज्जायाणं देवाणं जहण्णेणं छव्वीसं
सागरोवमाईं ठिई प० । जे देवा मज्झिमहेट्ठिमगेवेज्जयविमाणेसु देवत्ताए उववच्चा
तेसि णं देवाणं उक्कोसेणं छव्वीसं सागरोवमाईं ठिई प० ॥ ८६ ॥ ते णं देवा
छव्वीसाए अद्धमासाणं आणमंति वा पाणमंति वा उस्ससंति वा नीससंति वा ।
तेसि णं देवाणं छव्वीसं वाससहस्सेहिं आहारट्ठे समुप्पज्जइ । संतेगइया भवसिद्धिया

जीवा जे छव्वीसेहिं भवग्गहणेहिं सिज्झिस्संति बुज्झिस्संति मुच्चिस्संति परिणिव्वाइ-
 स्संति सव्वदुक्खाणमंतं करिस्संति ॥ ८७ ॥ सत्तावीसं अणगारगुणा पञ्चत्ता, तं
 जहा-पाणाइवायाओ वेरमणं, मुसावायाओ वेरमणं, अदिच्चादाणाओ वेरमणं, मेहु-
 णाओ वेरमणं, परिग्गहाओ वेरमणं, सोइंदियनिग्गहे, चक्खिंदियनिग्गहे, घाणिं-
 दियनिग्गहे, जिब्भिंदियनिग्गहे, फासिंदियनिग्गहे, कोहविवेगे, माणविवेगे, मायावि-
 वेगे, लोभविवेगे, भावसच्चे, करणसच्चे, जोगसच्चे, खमा, विरागया, मणसमाहरणया,
 वयसमाहरणया, कायसमाहरणया, पाणसंपण्णया, दंसणसंपण्णया, चरित्तसंपण्णया,
 वेयणअहियासणया, मारणंतियअहियासणया । जंबुद्वीवे दीवे अभिइवज्जेहिं सत्तावी-
 साए णक्खत्तेहिं संववहारे वट्ठति । एगमेगे णं णक्खत्तमासे सत्तावीसाहिं राईदियाहिं
 राईदियगेणं पञ्चते । सोहम्मीसाणेषु कप्पेषु विमाणपुढवी सत्तावीसं जोयणसयाइं
 बाहल्लेणं पञ्चत्ता । वेयगसम्मत्तवंधोवरयस्स णं मोहणिज्जस्स कम्मस्स सत्तावीसे
 उत्तरपगडीओ संतकम्मंसा पञ्चत्ता । सावणसुद्धसत्तमीसु णं सूरिए सत्तावीसंगुलियं
 पोरिसिच्छायं णिव्वत्तइत्ता णं दिवसखेत्तं नियट्टेमाणे रयणिखेत्तं अभिणिवट्टमाणे चारं
 चरइ ॥ ८८ ॥ इमीसे णं रयणप्पभाए पुढवीए अत्थेगइयाणं नेरइयाणं सत्तावीसं
 पलिओवमाइं ठिई प० । अहे सत्तमाए पुढवीए अत्थेगइयाणं नेरइयाणं सत्तावीसं
 सागरोवमाइं ठिई प० । असुरकुमारणं देवाणं अत्थेगइयाणं सत्तावीसं पलि-
 ओवमाइं ठिई प० । सोहम्मीसाणेषु कप्पेषु अत्थेगइयाणं देवाणं सत्तावीसं
 पलिओवमाइं ठिई प० । मज्झिमउवरिमगेवेज्जयाणं देवाणं जहण्णेणं सत्तावीसं
 सागरोवमाइं ठिई प० । जे देवा मज्झिममज्झिमगेवेज्जयविमाणेषु देवत्ताए
 उववण्णा तेसि णं देवाणं उक्कोसेणं सत्तावीसं सागरोवमाइं ठिई प० ॥ ८९ ॥
 ते णं देवा सत्तावीसाए अद्धमासेहिं आणमंति वा पाणमंति वा उस्ससंति वा नीस-
 संति वा । तेसि णं देवाणं सत्तावीसवाससहस्सेहिं आहारट्टे समुप्पज्जइ । संतेगइया
 भवसिद्धिया जीवा जे सत्तावीसाए भवग्गहणेहिं सिज्झिस्संति बुज्झिस्संति मुच्चि-
 स्संति परिणिव्वाइस्संति सव्वदुक्खाणमंतं करिस्संति ॥ ९० ॥ अट्ठावीसविहे
 आयारपकप्पे पञ्चते, तं जहा-मासिआ आरोवणा, संपंचराईमासिया आरोवणा,
 सदसराइमासिया आरोवणा, (सपण्णरसराइमासिआ आरोवणा, सवीसइराइमासिआ
 आरोवणा, संपंचवीसराइमासिआ आरोवणा) एवं चेव दोमासिआ आरोवणा,
 संपंचराईदोमासिआ आरोवणा, एवं तिमासिआ आरोवणा, चउमासिआ आरोवणा,
 उवघाइया आरोवणा, अणुवघाइया आरोवणा, कसिणा आरोवणा, अकसिणा
 आरोवणा, एतावता आयारपकप्पे एताव ताव आयरिअव्वे । भवसिद्धियाणं जीवाणं

अत्थेगइयाणं मोहणिजस्स कम्मस्स अट्ठावीसं कम्मंसा संतकम्मा पञ्चत्ता तं जहा-
 सम्मतवेअणिजं मिच्छत्तवेयणिजं सम्ममिच्छत्तवेयणिजं सोलस कसाया नव णोक-
 साया । आभिणिबोहियणाणे अट्ठावीसइविहे ५० तं० सोइदियअत्थावग्गहे, चक्खि-
 दियअत्थावग्गहे, घाणिदियअत्थावग्गहे, जिब्भदियअत्थावग्गहे, फासिदियअत्था-
 वग्गहे, णोइदियअत्थावग्गहे, सोइदियवंजणोग्गहे, घाणिदियवंजणोग्गहे, जिब्भ-
 दियवंजणोग्गहे, फासिदियवंजणोग्गहे, सोतिंदियईहा, चक्खिदियईहा, घाणिदिय-
 ईहा, जिब्भदियईहा, फासिदियईहा, णोइंदियईहा, सोतिंदियावाए, चक्खिदिया-
 वाए, घाणिदियावाए, जिब्भदियावाए, फासिंदियावाए, णोइंदियावाए, सोइदिय-
 धारणा, चक्खिदियधारणा, घाणिदियधारणा, जिब्भदियधारणा, फासिंदियधारणा,
 णोइंदियधारणा । ईसाणे णं कप्पे अट्ठावीसं विमाणावाससयसहस्सा ५० । जीवे
 णं देवगइम्मि बंधमाणे नामस्स कम्मस्स अट्ठावीसं उत्तरपगढीओ णिबंधति, तं
 जहा-देवमतिनामं, पंचिंदियजातिनामं, वेउव्वियसरीरनामं, तेयगसरीरनामं,
 कम्मणसरीरनामं, ससवउरंससंठाणणामं, वेउव्वियसरीरंगोवंगणामं, वण्णणामं,
 गंधणामं, रसणामं, फासनामं, देवाणुपुव्विणामं, अगुल्लहुनामं, उवघायनामं, परा-
 घायनामं, उस्सासनामं, पसत्थविहायोगइणामं, तसनामं, बायरणामं, पज्जत्तनामं,
 पत्तेयसरीरनामं, थिराथिराणं सुभासुभाणं (सुभगनामं, सुस्सरनामं), आएज्जाणाए-
 ज्जाणं दोण्हं अण्णयरं एगं नामं णिबंधइ, जसोकित्तिनामं, निम्माणनामं । एवं चेव
 नेरइया वि, णाणत्तं अप्पसत्थविहायोगइणामं, हुंडगसंठाणणामं, अथिरणामं,
 दुब्भगणामं, असुभनामं, दुस्सरनामं, अणादिज्जणामं, अजसोकितीणामं, णिम्माण-
 णामं ॥ ९१ ॥ इमीसे णं रयणप्पभाए पुढवीए अत्थेगइयाणं नेरइयाणं अट्ठावीसं
 पलिओवमाइं ठिई ५० । अहे सत्तमाए पुढवीए अत्थेगइयाणं नेरइयाणं अट्ठावीसं
 सागरोवमाइं ठिई ५० । असुरकुमाराणं देवाणं अत्थेगइयाणं अट्ठावीसं पलिओवमाइं
 ठिई पञ्चत्ता । सोहम्मीसाणेसु कप्पेसु देवाणं अत्थेगइयाणं अट्ठावीसं पलिओवमाइं
 ठिई ५० । उवरिमहेट्ठिमगेवेज्जयाणं देवाणं जहण्णेणं अट्ठावीसं सागरोवमाइं ठिई
 ५० । जे देवा मज्झिमउवरिमगेवेज्जएसु विमाणेसु देवत्ताए उववण्णा तेसि णं
 देवाणं उक्कोसेणं अट्ठावीसं सागरोवमाइं ठिई ५० ॥ ९२ ॥ ते णं देवा अट्ठावी-
 साए अद्धमासेहिं आणमंति वा पाणमंति वा ऊससंति वा नीससंति वा । तेसि णं
 देवाणं अट्ठावीसाए वाससहस्सेहिं आहारुद्धे समुप्पज्जइ । संतेगइया भवसिद्धिया
 जीवा जे अट्ठावीसाए भवग्गहणेहिं सिज्झिस्संति बुज्झिस्संति मुच्चिस्संति पदि-
 णिव्वाइस्संति सव्वदुक्खाणमंतं करिस्संति ॥ ९३ ॥ एण्णतीसइविहे पावसुयपसंगे

णं प० तं० भोमे, उप्पाए, सुमिणे, अंतरिक्खे, अंगे, सरे, वंजणे, लक्खणे,
 भोमे ति विहे प० तं० सुत्ते विती वत्तिए, एवं एक्केकं ति विहं, विकहाणुजोगे,
 विजाणुजोगे, मंताणुजोगे, जोगाणुजोगे, अण्णतिथियपवत्ताणुजोगे । आसाढे
 णं मासे एगूणतीसराईदिआई राईदियग्गेणं पन्नत्ताई । (एवं चेव) भइवए णं मासे ।
 कत्तिए णं मासे । पोसे णं मासे । फग्गुणे णं मासे । वइसाहे णं मासे । चंददिणे
 णं एगूणतीसं मुहुत्ते सातिरेगे मुहुत्तग्गेणं प० । जीवे णं पसत्थऽज्जवसाणुजुत्ते
 भविए सम्मदिद्धी तित्थकरनामसहिआओ णामस्स णियमा एगूणतीसं उत्तरपग-
 णीओ निबंधित्ता वेमाणिएसु देवेषु देवत्ताए उववज्जइ ॥ ९४ ॥ इमीसे णं रयण-
 प्पभाए पुढवीए अत्थेगइयाणं नेरइयाणं एगूणतीसं पलिओवमाई ठिई प० । अहे
 सत्तमाए पुढवीए अत्थेगइयाणं नेरइयाणं एगूणतीसं सागरोवमाई ठिई प० ।
 असुरकुमारणं देवाणं अत्थेगइयाणं एगूणतीसं पलिओवमाई ठिई प० । सोहम्मि-
 साणेषु कप्पेषु देवाणं अत्थेगइयाणं एगूणतीसं पलिओवमाई ठिई प० । उवरिम-
 मज्झिमगेवेज्जयाणं देवाणं जहण्णेणं एगूणतीसं सागरोवमाई ठिई प० । जे देवा
 उवरिमहेट्ठिमगेवेज्जयविमाणेषु देवत्ताए उववण्णा तेसि णं देवाणं उक्कोसेणं एगूण-
 तीसं सागरोवमाई ठिई प० ॥ ९५ ॥ ते णं देवा एगूणतीसाए अद्धमासेहिं आण-
 मंति वा पाणमंति वा ऊससंति वा नीससंति वा । तेसि णं देवाणं एगूणतीसं वास-
 सहस्सेहिं आहारद्धे समुप्पजइ । संतेगइया भवसिद्धिया जीवा जे एगूणतीसभव-
 ग्गहणेहिं सिज्झिस्संति बुज्झिस्संति मुच्चिस्संति परिनिवाइस्संति सव्वदुक्खाणमंतं
 करिस्संति ॥ ९६ ॥ तीसं मोहणीयठाणा प० तं० जे यावि तसे पाणे, वारिमज्झे
 विगाहिआ । उदएण कम्मा मारेई, महामोहं पकुव्वइ ॥ १-१ ॥ सीसावेढेणं जे
 केई, आवेढेइ अभिक्खणं । ति व्वासुभसमायारे, महामोहं पकुव्वइ ॥ २-२ ॥
 पाणिणा संपिहित्ता णं, सोयमावरिय पाणिणं । अंतोनदंतं मारेई, महामोहं पकुव्वइ
 ॥ ३-३ ॥ जायतेयं समारब्भ, बहुं ओरुंभिया जणं, अंतोधूमेण मारेई(जा),
 महामोहं पकुव्वइ ॥ ४-४ ॥ सिस्सम्मि जे पहणइ, उत्तमंगम्मि चैयसा । विभज्ज
 मत्थयं फाले, महामोहं पकुव्वइ ॥ ५-५ ॥ पुणो पुणो पणिधिए, हरित्ता उवहसे
 जणं । फलेणं अदुवा दंडेणं, महामोहं पकुव्वइ ॥ ६-६ ॥ गूढायारी निगूहिजा,
 मायं मायाए छायाए । असच्चवाई णिण्हाई, महामोहं पकुव्वइ ॥ ७-७ ॥ धंसेइ जो
 अभूएणं, अकम्मं अत्तकम्मणा । अदुवा तुम कासिस्ति, महामोहं पकुव्वइ ॥ ८-८ ॥
 जाणमाणो परिसओ, सच्चा मोसाणि भासइ । अक्खीणझंझे पुरिसे, महामोहं पकु-
 व्वइ ॥ ९-९ ॥ अणायगस्स नयवं, दारे तस्सेव धंसिया । विउलं विक्खोभइता

णं, किच्चा णं पडिबाहिरं ॥ १० ॥ उवगसंतं पि झंपित्ता, पडिलोमाहिं वग्गुहिं ।
 भोगभोगे विचारैई, महामोहं पकुव्वइ ॥ ११-१० ॥ अकुमारभूए जे केई,
 कुमारभूए त्ति हं वए । इत्थीहिं गिद्धे वसए, महामोहं पकुव्वइ ॥ १२-११ ॥
 अवंभयारी जे केई, वंभयारी त्ति हं वए । गह्वेव गवां मज्झे, विस्सरं नयई
 नदं ॥ १३ ॥ अप्पणो अहिए बाले, मायामोसं बहुं भसे । इत्थीविसयगेहीए,
 महामोहं पकुव्वइ ॥ १४-१२ ॥ जं निस्सिए उव्वहइ, जससाहिगमेण वा । तस्स
 लुब्भइ वित्तम्मि, महामोहं पकुव्वइ ॥ १५-१३ ॥ ईसरेण अदुवा गामेणं, अणि-
 सरे ईसरीकए । तस्स संपयहीणस्स, सिरी अतुलमागया ॥ १६ ॥ ईसादोसेण
 आविट्ठे, कलुसाविलचेयसे । जे अंतराअं चेएइ, महामोहं पकुव्वइ ॥ १७-१४ ॥
 सप्पी जहा अंडउडं, भत्तारं जो विहिंसइ । सेणावइं पसत्थारं, महामोहं पकुव्वइ
 ॥ १८-१५ ॥ जे नायगं च रट्टस्स, नेयारं निगमस्स वा । सेट्ठिं बहुरवं हंता,
 महामोहं पकुव्वइ ॥ १९-१६ ॥ बहुजणस्स गेयारं, बीवं ताणं च पाणिणं ।
 एयारिसं नरं हंता, महामोहं पकुव्वइ ॥ २०-१७ ॥ उवट्ठियं पडिविरयं, संजयं
 सुतवस्सित्थं । वुक्कम्म धम्मआओ भंसेइ, महामोहं पकुव्वइ ॥ २१-१८ ॥ तहेवाणंतणा-
 णीणं, जिणाणं वरदंसिणं । तेसिं अवण्णवं बाले, महामोहं पकुव्वइ ॥ २२-१९ ॥
 नेयाइअस्स मग्गस्स, दुट्ठे अवयरई बहुं । तं तिप्पयंतो भावेइ, महामोहं पकुव्वइ
 ॥ २३-२० ॥ आयरियउवज्जाएहिं, सुयं विणयं च गाहिए । ते चेव खिसई
 बाले, महामोहं पकुव्वइ ॥ २४-२१ ॥ आयरियउवज्जायाणं, सम्मं नो पडित-
 प्पइ । अप्पडिपूयए थद्धे, महामोहं पकुव्वइ ॥ २५-२२ ॥ अबहुस्सए य जे केई,
 सुएणं पविकत्थई । सज्जायवायं वयइ, महामोहं पकुव्वइ ॥ २६-२३ ॥ अतव-
 स्सीए य जे केई, तवेण पविकत्थइ । सव्वलोयपरे तेणे, महामोहं पकुव्वइ
 ॥ २७-२४ ॥ साहारणट्ठा जे केई, गिलाणम्मि उवट्ठिए । पभूण कुणई किच्चं,
 मज्झं पि से न कुव्वइ ॥ २८ ॥ सढे नियडीपण्णाणे, कलुसाउलचेयसे । अप्पणो
 य अबोहीय, महामोहं पकुव्वइ ॥ २९-२५ ॥ जे कहाहिरणाइं, संपउंजे पुणो
 पुणो । सव्वतित्थाण भेयाणं, महामोहं पकुव्वइ ॥ ३०-२६ ॥ जे अ आहम्मिए
 जोए, संपओजे पुणो पुणो । सहाहेउं सहीहेउं, महामोहं पकुव्वइ ॥ ३१-२७ ॥
 जे अ माणुस्सए भोए, अदुवा पारलोइए । तेऽतिप्पयंतो आसयइ, महामोहं पकु-
 व्वइ ॥ ३२-२८ ॥ इड्डी जुई जसो वण्णो, देवाणं बलवीरिय । तेसिं अवण्णवं
 बाले, महामोहं पकुव्वइ ॥ ३३-२९ ॥ अपस्समाणो पस्सामि, देवे जक्खे य
 जुज्झगे । अण्णाणी जिणपूयट्ठी, महामोहं पकुव्वइ ॥ ३४-३० ॥ ९७ ॥ थेरे णं

मंडियपुत्ते तीसं वासाई सामण्णपरियायं पाउणिता सिद्धे बुद्धे जाव सव्वदुक्खप्प-
 हीणे । एणमेगे णं अहोरत्ते तीसमुहुत्ते मुहुत्तगेणं पन्नत्ते । एसिं णं तीसाए मुहुत्ताणं
 तीसं नामधेज्जा प०, तं जहा-रोदे, सत्ते, मित्ते, वाऊ, सुपीए, अभिचंदे, माहिंदे,
 पलंबे, वंभे, सच्चे, आणंदे, विजए, विस्ससेणे, पायावच्चे, उवसमे, ईसाणे, तट्टे,
 भाविअप्पा, वेसमणे, वरुणे, सतरिसमे, गंधव्वे, अग्गिवेसायणे, आतवे, आवत्ते,
 तट्टवे, भूमहे, रिसमे, सव्वट्टसिद्धे, रक्खसे । अरे णं अरहा तीसं धणु(ण)ई उच्चं
 उच्चत्तेणं होत्था । सहस्सारस्स णं देविंदस्स देवरत्तो तीसं सामाणियसाहस्सीओ
 प० । पासे णं अरहा तीसं वासाई अगारवासमज्जे वसित्ता अगाराओ अणगारियं
 पव्वइए । समणे भगवं महावीरे तीसं वासाई अगारवासमज्जे वसित्ता अगाराओ
 अणगारियं पव्वइए । रयणप्पभाए णं पुढवीए तीसं निरयावाससयसहस्सा प०
 ॥ ९८ ॥ इमीसे णं रयणप्पभाए पुढवीए अत्थेगइयाणं नेरइयाणं तीसं पलिओवमाई
 ठिई प० । अहे सत्तामाए पुढवीए अत्थेगइयाणं नेरइयाणं तीसं सागरोवमाई ठिई
 प० । अञ्जरकुमारारं देवाणं अत्थेगइयाणं तीसं पलिओवमाई ठिई प० । सोहम्मी-
 साणेषु कप्पेसु देवाणं अत्थेगइयाणं तीसं पलिओवमाई ठिई प० । उवरिमउवरिम-
 गेवेज्जाणं देवाणं जहण्णेणं तीसं सागरोवमाई ठिई प० । जे देवा उवरिममज्झि-
 मगेवेज्जाणसु विमाणेषु देवत्ताए उववण्णा तेसिं णं देवाणं उक्कोसेणं तीसं सागरोवमाई
 ठिई प० ॥ ९९ ॥ ते णं देवा तीसाए अद्धमासेहिं आणमंति वा पाणमंति वा
 उस्ससंति वा नीससंति वा । तेसिं णं देवाणं तीसाए वाससहस्सेहिं आहारट्टे समु-
 प्पज्जइ । संतेगइया भवसिद्धिया जीवा जे तीसाए भवग्गहणेहिं सिज्झिस्संति
 बुज्झिस्संति मुच्चिस्संति परिनिव्वाइस्संति सव्वदुक्खानमंतं करिस्संति ॥ १०० ॥
 एकतीसं सिद्धाइगुणा पन्नत्ता, तं जहा-खीणे आभिणिबोहियणाणावरणे, खीणे सुय-
 णाणावरणे, खीणे ओहिणाणावरणे, खीणे मणपज्जवणाणावरणे, खीणे केवलणाणा-
 वरणे, खीणे चक्खुदंसणावरणे, खीणे अचक्खुदंसणावरणे, खीणे ओहिंदंसणावरणे,
 खीणे केवलदंसणावरणे, खीणे निद्दा, खीणे णिद्दाणिद्दा, खीणे पयला, खीणे पयला-
 पयला, खीणे शीणद्धी, खीणे सायावेयणिज्जे, खीणे असायावेयणिज्जे, खीणे दंसण-
 मोहणिज्जे, खीणे चरित्तमोहणिज्जे, खीणे नेरइआउए, खीणे तिरिआउए, खीणे मणु-
 स्साउए, खीणे देवाउए, खीणे उच्चागोए, खीणे निच्चागोए, खीणे सुभणामे, खीणे
 असुभणामे, खीणे दाणंतराए, खीणे लाभंतराए, खीणे भोगंतराए, खीणे उवभोगं-
 तराए, खीणे वीरिअंतराए ॥ १०१ ॥ मंदरे णं पव्वए धरणिंतळे एकतीसं जोयण-
 सहस्साई छच्चेव तेवीसे जोयणसए किंचिदेसूणा परिकखेवेणं पन्नत्ता । जया णं सूरिए

सव्वबाहिरियं मंडलं उवसंकमिता चारं चरइ तथा णं इहगयस्स मणुस्सस्स एक-
 तीसाए जोयणसहस्सेहिं अट्टहि अ एकतीसेहिं जोयणसएहिं तीसाए सट्ठिभागे जोय-
 णस्स सूरिए चक्खुप्फासं हव्वमागच्छइ । अभिवट्ठिए णं मासे एकतीसं सातिरेगाइं
 राइंदियाइं राइंदियग्गेणं पज्जते । आइच्चे णं मासे एकतीसं राइंदियाइं किंचि विसेसूणाइं
 राइंदियग्गेणं पज्जते ॥ १०२ ॥ इमीसे णं रयणप्पभाए पुढवीए अत्थेगइयाणं नेरइयाणं
 एकतीसं पलिओवमाइं ठिई प० । अहे सत्तमाए पुढवीए अत्थेगइयाणं नेरइयाणं
 एकतीसं सागरोवमाइं ठिई प० । असुरकुमारारणं देवाणं अत्थेगइयाणं एकतीसं पलि-
 ओवमाइं ठिई प० । सोहम्मीसाणेसु कप्पेसु अत्थेगइयाणं देवाणं एकतीसं पलिओ-
 वमाइं ठिई प० । विजयवेजयंतजयंतअपराजिआणं देवाणं जहण्णेणं एकतीसं साग-
 रोवमाइं ठिई प० । जे देवा उवरिमउवरिमगेवेजयविमाणेसु देवत्ताए उववण्णा तेसि
 णं देवाणं उक्कोसेणं एकतीसं सागरोवमाइं ठिई प० ॥ १०३ ॥ ते णं देवा एकती-
 साए अट्ठमासेहिं आणमंति वा पाणमंति वा उस्ससंति वा नीससंति वा । तेसि णं
 देवाणं एकतीसं(स)वाससहस्सेहिं आहारट्ठे समुप्पज्जइ । संतेगइया भवसिद्धिया जीवा
 जे एकतीसेहिं भवग्गहणेहिं सिज्झिस्संति वुज्झिस्संति मुच्चिस्संति परिनिव्वाइस्संति
 सव्वदुक्खानमंतं करिस्संति ॥ १०४ ॥ बत्तीसं जोगसंगहा प०, तं जहा-आलोयण,
 निरवलावे, आवइंसु दढधम्मया । अणिसिंओवहाणे य, सिक्खा निप्पडिक्कम्मया
 ॥ १ ॥ अण्णायया, अलोभे य, तितिक्खा अज्जवे सुई । सम्मदिट्ठी समाही य,
 आयारे विणओवए ॥ २ ॥ धिईमई य संवेगे, पणिही सुविहि संवरे । अत्तदोसोव-
 संहारे, सव्वकामविरत्तया ॥ ३ ॥ पच्चक्खाणे विउस्सग्गे, अप्पमादे लवालवे ।
 ज्ञाणसंवरजोगे य, उदए मारणंतिए ॥ ४ ॥ संगारणं च परिण्णया, पायच्छित्तकरणे
 वि य । आराहणा य मरणंते, बत्तीसं जोगसंगहा ॥ ५ ॥ १०५ ॥ बत्तीसं देविंदा
 प०, तं जहा-चमरे बली धरणे भूआणंदे जाव घोसे महाघोसे चंदे सूरै सक्के ईसाणे
 सणंकुमारै जाव पाणए अच्चुए । कुंथुस्स णं अरहओ बत्तीसहिंया बत्तीसं जिणसया
 होत्था । सोहम्मे कप्पे बत्तीसं विमाणावाससयसहस्सा प० । रेवइणक्खत्ते बत्ती-
 सइतारे पज्जते । बत्तीसतिविहे णट्ठे पज्जते ॥ १०६ ॥ इमीसे णं रयणप्पभाए पुढ-
 वीए अत्थेगइयाणं नेरइयाणं बत्तीसं पलिओवमाइं ठिई प० । अहे सत्तमाए पुढवीए
 अत्थेगइयाणं नेरइयाणं बत्तीसं सागरोवमाइं ठिई प० । असुरकुमारारणं देवाणं अत्थे-
 गइयाणं बत्तीसं पलिओवमाइं ठिई प० । सोहम्मीसाणेसु कप्पेसु देवाणं अत्थेगइयाणं
 बत्तीसं पलिओवमाइं ठिई प० । जे देवा विजयवेजयंतजयंतअपराजियविमाणेसु
 देवत्ताए उववण्णा तेसि णं देवाणं अत्थेगइयाणं बत्तीसं सागरोवमाइं ठिई प० ।

ते णं देवा बत्तीसाए अद्धमासेहिं आणमंति वा पाणमंति वा उस्ससंति वा नीससंति वा । तेसि णं देवाणं बत्तीसवाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे बत्तीसाए भवग्गहणेहिं सिज्झिस्संति बुज्झिस्संति मुच्चिस्संति परिनिव्वाइस्संति सव्वदुक्खाणमंतं करिस्संति ॥ १०७ ॥ तेत्तीसं आसायणाओ पन्नत्ताओ, तं जहा-सेहे राइणियस्स आसन्नं गंता भवइ आसायणा सेहस्स, सेहे राइणियस्स पुरओ गंता भवइ आसायणा सेहस्स, सेहे राइणियस्स सपक्खं गंता भवइ आसायणा सेहस्स, सेहे राइणियस्स आसन्नं ठिच्चा भवइ आसायणा सेहस्स, जाव सेहे राइणियस्स आलवमाणस्स तत्थगए चेव पड्डिसुणित्ता भवइ आसायणा सेहस्स । चमरस्स णं असुरिंदस्स असुररण्णो चमरचंचाए रायहाणीए एकमेक्कवारए तेत्तीसं तेत्तीसं भोमा प० । महाविदेहे णं वासे तेत्तीसं जोयणसहस्साइं साइरेगाइं विक्खंभेणं प० । जया णं सूरिए बाहिराणंतं तच्चं मंडलं उवसंकमिन्ता णं चारं चरइ तथा णं इह गयस्स पुरिसस्स तेत्तीसाए जोयणसहस्सेहिं किंचिविसेसूणेहिं चक्खुप्फासं हव्वमागच्छइ ॥ १०८ ॥ इमीसे णं रयणप्पभाए पुढवीए अत्थेगइयाणं नेरइयाणं तेत्तीसं पलिओवमाइं ठिई प० । अहे सत्तमाए पुढवीए कालमहाकालरोह्यमहारोरुए सुनेरइयाणं उक्कोसेणं तेत्तीसं सागरोवमाइं ठिई प० । अप्पइट्ठाननरए नेरइयाणं अजहण्णमणुक्कोसेणं तेत्तीसं सागरोवमाइं ठिई प० । असुरकुमारणं अत्थेगइयाणं देवाणं तेत्तीसं पलिओवमाइं ठिई प० । सोहम्मीसाणेसु अत्थेगइयाणं देवाणं तेत्तीसं पलिओवमाइं ठिई प० । विजयवेजयंतजयंतअपराजिएसु विमाणेसु उक्कोसेणं तेत्तीसं सागरोवमाइं ठिई प० । जे देवा सव्वट्ठसिद्धे महाविमाणे देवत्ताए उववण्णा तेसि णं देवाणं अजहण्णमणुक्कोसेणं तेत्तीसं सागरोवमाइं ठिई प० ॥ १०९ ॥ ते णं देवा तेत्तीसाए अद्धमासेहिं आणमंति वा पाणमंति वा उस्ससंति वा निस्ससंति वा । तेसि णं देवाणं तेत्तीसाए वाससहस्सेहिं आहारट्ठे समुप्पज्जइ । संतेगइया भवसिद्धिया जीवा जे तेत्तीसं भवग्गहणेहिं सिज्झिस्संति बुज्झिस्संति मुच्चिस्संति सव्वदुक्खाणमंतं करिस्संति ॥ ११० ॥ चोत्तीसं जिणाइसेसा प० तं जहा-अवट्ठिए केसमंखरोमनहे, निरामया निरुवळेवा गायलट्ठी, गोक्खीरपंडुरे मंससोणिए, पउमुप्पलगंधिए उस्सासनिससासे, पच्छन्ने आहारनीहारे अदिस्से मंसचक्खुणा, आगासगयं चक्कं, आगासगयं छत्तं, आगासगयाओ सेयवरचामराओ, आगासफालिआमयं सपायपीढं सीहासणं, आगासगओ कुड्डीसहस्सपरिमंडिआभिरामो इंदज्झओ पुरओ गच्छइ, जत्थ जत्थ वि य णं अरहंता भगवंतो चिट्ठंति वा निसीयंति वा तत्थ तत्थ वि य णं तक्खणादेव संछन्नपत्तपुप्फपल्लवसमाउलो सच्छन्तो सज्जओ सय्यटो

सपडागो असोगवरपायवो अभिसंजायइ, ईसिं पिट्ठओ मउडठाणंमि तेयमंडलं
 अभिसंजायइ अंधकारे वि य णं दस दिसाओ पभासेइ, बहुसमरमणिजे भूमिभागे,
 अहोसिरा कंटया जायंति, उऊ विवरीया सुहफासा भवंति, सीयलेणं सुहफासेणं सुर-
 भिणा मारुएणं जोयणपरिमंडलं सव्वओ समंता संपमज्जिजइ, जुत्तफुसिएणं मेहेण य
 निहयरयरेणूयं किज्जइ, जलथलयभासुरपभूतेणं बिट्ठाइणा दसद्धवण्णेणं कुसुमेणं जाणु-
 स्सेहप्पमाणमित्ते (अचित्ते) पुप्फोवयारे किज्जइ, अमणुण्णाणं सद्धफरिसरसरूवगंधाणं
 अवकरिसो भवइ, मणुण्णाणं सद्धफरिसरसरूवगंधाणं पाउब्भाओ भवइ, पच्चाहरओ वि
 य णं हिययगमणीओ जोयणनीहारी सरो, भगवं च णं अद्धमागहीए भासाए धम्म-
 माइक्खइ, सा वि य णं अद्धमागही भासा भासिज्जमाणी तेसिं सव्वेसिं आरियम-
 णारियाणं दुप्पयचउप्पअमियपसुपक्खिसरीसिवाणं अप्पणो हियसिबसुहयभासत्ताए
 परिणमइ, पुव्ववद्धवेरा वि य णं देवासुरनागसुवण्णजक्खरक्खसकिंनरकिंपुरिसगरु-
 लंगंधव्वमहोरगा अरहओ पायमूले पसंतच्चित्तमाणसा धम्मं निसामंति, अण्णउत्थि-
 यपावयणिया वि य णमागया वंदंति, आगया समाणा अरहओ पायमूले निप्पलिव-
 यणा हवंति, जओ जओ वि य णं अरहंतो भगवंतो विहरंति तओ तओ वि य णं
 जोयणपणवीसाए णं ईती न भवइ, मारी न भवइ, सचक्कं न भवइ, परचक्कं न भवइ,
 अइवुट्ठी न भवइ, अणावुट्ठी न भवइ, दुब्भिकखं न भवइ, पुव्वुप्पणा वि य णं
 उप्पाइया वाही खिप्पमिव उवसमंति ॥ १११ ॥ जंबुदीवे णं दीवे चउत्तीसं चक्कवट्ठि-
 विजया प० तं जहा-बत्तीसं महाविदेहे दो भरहे एरवए । जंबुदीवे णं दीवे चोत्तीसं
 दीहवेयद्धा प० । जंबुदीवे णं दीवे उक्कोसपए चोत्तीसं तित्थंकरा समुप्पजंति, चमरस्स
 णं असुरिंदस्स असुररण्णो चोत्तीसं भवणावाससयसहस्सा प० । पढमपंचमल्लट्ठी-
 सत्तमासु चउसु पुढवीसु चोत्तीसं निरयावाससयसहस्सा प० ॥ ११२ ॥ पणतीसं
 सच्चवयणाइसेसा प० । कुंथू णं अरहा पणतीसं धणूइं उड्डं उच्चत्तेणं होत्था । दत्ते णं
 वासुदेवे पणतीसं धणूइं उड्डं उच्चत्तेणं होत्था । नंदणे णं बलदेवे पणतीसं धणूइं उड्डं
 उच्चत्तेणं होत्था । वितियचउत्थीसु दोसु पुढवीसु पणतीसं निरयावाससयसहस्सा प०
 ॥ ११३ ॥ छत्तीसं उत्तरज्झयणा प० तं जहा-विणयसुयं, परीसहो, चाउरंगिज्जं, असं-
 खयं, अकाममरणिज्जं, पुरिसविज्जा, उरब्भिज्जं, काविलियं, नमिपव्वज्जा, दुमपत्तयं,
 बहुसुयपूजा, हरिएसिज्जं, चित्तसंभूयं, उसुयारिज्जं, सभिक्खुणं, समाहिठाणाइं, पावस-
 मणिज्जं, संजइज्जं, मियचारिया, अणाहपव्वज्जा, समुद्दपालिज्जं, रहनेमिज्जं, गोयमके-
 सिज्जं, समितिओ, जन्नतिज्जं, सामायारी, खलुंकिज्जं, सोक्खमग्गगई, अप्पसाओ,
 तवोमग्गो, चरणविही, पमायठाणाइं, कम्मपयड्डी, लेसज्झयणं, अणगारमग्गो, जीवा-

जीवविभत्ती य । चमरस्स णं असुरिंदस्स असुररण्णो सभा सुहम्मा छत्तीसं जोयणाइं उड्ढं उच्चत्तेणं होत्था । समणस्स णं भगवओ महावीरस्स छत्तीसं अज्जाणं साहस्सीओ होत्था । चेत्तासोएसु णं मासेसु सइ छत्तीसंगुलियं सूरिए पोरिसिछायं निव्वत्तइ ॥ ११४ ॥ कुंथुस्स णं अरहओ सत्ततीसं गणा सत्ततीसं गणहरा होत्था । हेमवयहेरण्ण-वयाओ णं जीवाओ सत्ततीसं जोयणसहस्साइं छच्च चउसत्तरे जोयणसए सोलस य एगूणवीसइभाए जोयणस्स किंचि विसेसूणाओ आयामेणं पन्नताओ । सव्वासु णं विजयवेज्यंतजयंतअपराजिआसु रायहाणीसु पागारा सत्ततीसं सत्ततीसं जोयणाइं उड्ढं उच्चत्तेणं प० । खुड्डियाए णं विमाणपविभत्तीए पढमे वग्गे सत्ततीसं उद्देसणकाला प० । कत्तियबहुलसत्तमीए णं सूरिए सत्ततीसंगुलियं पोरिसिछायं निव्वत्तइत्ता णं चारं चरइ ॥ ११५ ॥ पासस्स णं अरहओ पुरिसादाणीयस्स अट्ठतीसं अज्जिआसाहस्सीओ उक्कोसिया अज्जियासंपया होत्था । हेमवयएरण्णवईयाणं जीवाणं धणूपिट्ठे अट्ठतीसं जोयणसहस्साइं सत्त य चत्ताले जोयणसए दस एगूणवीसइभागे जोयणस्स किंचि विसेसूणा परिकखेवेणं पन्नता । अत्थस्स णं पव्वयरण्णो बितिए कंडे अट्ठतीसं जोयण-सहस्साइं उड्ढं उच्चत्तेणं होत्था । खुड्डियाए णं विमाणपविभत्तीए बितिए वग्गे अट्ठ-तीसं उद्देसणकाला प० ॥ ११६ ॥ नमिस्स णं अरहओ एगूणचत्तालीसं आहोहिय-सया होत्था । समयखेत्ते एगूणचत्तालीसं कुलपव्वया प०, तं जहा-तीसं वासहरा, पंच मंदरा, चत्तारि उसुकारा । दोच्चउत्थपंचमछट्ठसत्तमासु णं पंचसु पुढवीसु एगू-णचत्तालीसं निरयावाससयसहस्सा प० । नाणावरणिज्जस्स मोहणिज्जस्स गोत्तस्स आउयस्स एयासि णं चउण्हं कम्मपगडीणं एगूणचत्तालीसं उत्तरपगडीओ पन्नताओ ॥ ११७ ॥ अरहओ णं अरिट्ठनेमिस्स चत्तालीसं अज्जियासाहस्सीओ होत्था । मंद-रचूलियाणं चत्तालीसं जोयणाइं उड्ढं उच्चत्तेणं पण्णत्ता । संती अरहा चत्तालीसं धणूइं उड्ढं उच्चत्तेणं होत्था । भूयाणंदस्स णं नागकुमारस्स नागरओ चत्तालीसं भवणावा-ससयसहस्सा प० । खुड्डियाए णं विमाणपविभत्तीए तइए वग्गे चत्तालीसं उद्देसण-काला प० । फग्गुणपुण्णिमासिणीए णं सूरिए चत्तालीसंगुलियं पोरिसिछायं निव्वट्ठइत्ता णं चारं चरइ । एवं कत्तियाए वि पुण्णिमाए । महासुक्के कप्पे चत्तालीसं विमाणा-वाससहस्सा प० ॥ ११८ ॥ नमिस्स णं अरहओ एगचत्तालीसं अज्जियासाहस्सीओ होत्था । चउसु पुढवीसु एकचत्तालीसं निरयावाससयसहस्सा प०, तं जहा-रयण-प्पभाए पंकप्पभाए तमाए तमतमाए । महालियाए णं विमाणपविभत्तीए पढमे वग्गे एकचत्तालीसं उद्देसणकाला प० ॥ ११९ ॥ समणे भगवं महावीरे बायालीसं वासाइं साहियाइं सामणपरियाणं पाउणित्ता सिद्धे जाव सव्वदुक्खप्पहीणे । जंबुद्वीवस्स णं

दीवस्स पुरच्छिमिल्लोओ चरमंताओ गोथूभस्स णं आवासपव्वयस्स पच्चच्छिमिल्ले चरमंते एस णं बायालीसं जोयणसहस्साई अबाहातो अंतरे पन्नत्तं । एवं चउद्दिसिं पि दओभासे संखोदयसीमे य । कालोए णं समुद्दे बायालीसं चंदा जोईसु वा जोईति वा जोइस्संति वा बायालीसं सरिया पभासिंसु वा पभासिति वा पभासिस्संति वा । संमुच्छिमभुयपरिसप्पाणं उक्कोसेणं बायालीसं वाससहस्साई ठिई प० । नामकम्मे बायालीसविहे पन्नत्ते, तं जहा-गइनामे, जाइनामे, सरीरनामे, सरीरंगोवंगनामे, सरीरबंधणनामे, सरीरसंघायणनामे, संघयणनामे, संठाणनामे, वण्णनामे, गंधनामे, रसनामे, फासनामे, अगुहलहुयनामे, उवघायनामे, पराघायनामे, आणुपुव्वीनामे, उस्सासनामे, आयवनामे, उज्जोयनामे, विहगगइनामे, तसनामे, थावरनामे, सुहुमनामे, बायरनामे, पज्जत्तनामे, अपज्जत्तनामे, साहारणसरीरनामे, पत्तेयसरीरनामे, थिरनामे, अथिरनामे, सुभनामे, असुभनामे, सुभगनामे, दुब्भगनामे, सुसरनामे, दुस्सरनामे, आएज्जनामे, अणाएज्जनामे, जसोकित्तिनामे, अजसोकित्तिनामे, निम्माणनामे, तित्थकरनामे । लवणे णं समुद्दे बायालीसं नागसाहस्सीओ अर्ब्भितरियं वेलं धारंति । महालियाए णं विमाणपविभत्तीए बितिए वग्गे बायालीसं उद्देसणकाला प० । एगमेगाए ओसप्पिणीए पंचमच्छट्ठीओ समाओ बायालीसं वाससहस्साई कालेणं पन्नत्ताई । एगमेगाए उस्सप्पिणीए पढमवीयाओ समाओ बायालीसं वाससहस्साई कालेणं पन्नत्ताई ॥ १२० ॥ तेयालीसं कम्मविवागज्झयणा प० । पढमचउत्थपंचमासु पुढवीसु तेयालीसं निरयावाससयसहस्सा प० । जंबुदीवस्स णं दीवस्स पुरच्छिमिल्लोओ चरमंताओ गोथूभस्स णं आवासपव्वयस्स पुरच्छिमिल्ले चरमंते एस णं तेयालीसं जोयणसहस्साई अबाहाए अंतरे प० । एवं चउद्दिसिं पि दगभागे संखे दयसीमे । महालियाए णं विमाणपविभत्तीए तइए वग्गे तेयालीसं उद्देसणकाला प० ॥ १२१ ॥ चोयालीसं अज्झयणा इसिभासिया दियलोगचुयांभासिया प० । विमलस्स णं अरहओ णं वउआलीसं पुरिसजुगाई अणुपिट्ठिं सिद्धाई जाव प्पहीणाई । धरणस्स णं नागिंदस्स नागरण्णो चोयालीसं भवणावाससयसहस्सा प० । महालियाए णं विमाणपविभत्तीए चउत्थे वग्गे चोयालीसं उद्देसणकाला प० ॥ १२२ ॥ समयखेत्ते णं पणयालीसं जोयणसयसहस्साई आयामविकखंभेणं प० । सीमंतए णं नरए पणयालीसं जोयणसयसहस्साई आयामविकखंभेणं प० । एवं उड्डविमाणे वि । ईसिपब्भारा णं पुढवी एवं चेव । धम्मे णं अरहा पणयालीसं धणइं उड्डं उच्चत्तेणं होत्था । मंदरस्स णं पव्वयस्स चउद्दिसिं पि पणयालीसं पणयालीसं जोयणसहस्साई अबाहाए अंतरे प० । सव्वे वि णं दिवड्डुखेत्तिया नक्खत्ता पणयालीसं मुहुत्ते

चंद्रेण सद्धिं जोगं जोइसु वा जोइंति वा जोइस्संति वा-तिजेव उत्तराई, पुणव्वसू
 रोहिणी विसाहा य । एए छ नक्खत्ता, पणयालमुहुत्तसंजोगा ॥ महालियाए णं
 विमाणपविभत्तीए पंचमे वग्गे पणयालीसं उद्देसणकाला प० ॥ १२३ ॥ दिट्ठियायस्स
 णं छायालीसं माउयापया प० । बंभीए णं लिवीए छायालीसं माउयक्खरा प० ।
 पभंजणस्स णं वाउकुमारिंदस्स छायालीसं भवणावाससयसहस्सा प० ॥ १२४ ॥
 जया णं सूरिए सव्वब्भितरमंडलं उवसंकमिता णं चारं चरइ तथा णं इहगयस्स
 मणूसस्स सत्तचत्तालीसं जोयणसहस्सेहिं दोहि य तेवट्ठेहिं जोयणसएहिं एकवीसाए
 य सट्ठिभागेहिं जोयणस्स सूरिए चक्खुफासं हव्वमागच्छइ । थेरे णं अग्गिभूई सत्त-
 च्वालीसं वासाई अगारमज्झे वसित्ता मुंडे भवित्ता अगाराओ अणगारियं पव्वइए
 ॥ १२५ ॥ एगमेगस्स णं रत्तो चाउरंतचक्कवट्ठिस्स अडयालीसं पट्ठणसहस्सा प० ।
 धम्मस्स णं अरहओ अडयालीसं गणा अडयालीसं गणहरा होत्था । सूरमंडले णं
 अडयालीसं एकसट्ठिभागे जोयणस्स विक्खंभेणं प० ॥ १२६ ॥ सत्तसत्तमियाए णं
 भिक्खुपडिमाए एगूणपच्चाए राईदिएहिं छन्नउइभिक्खासएणं अहासुत्तं जाव आरा-
 हिया भवइ । देवकुरुत्तरकुरुएसु णं मणुया एगूणपच्चा राईदिएहिं संपन्नजोव्वणा
 भवंति । तेइंदियाणं उक्कोसेणं एगूणपच्चा राईदिया ठिई प० ॥ १२७ ॥ मुणिसुव्व-
 यस्स णं अरहओ पंचासं अज्जियासाहस्सीओ होत्था । अणंते णं अरहा पच्चासं
 धणूई उड्डं उच्चत्तेणं होत्था । पुरिसुत्तमे णं वासुदेवे पच्चासं धणूई उड्डं उच्चत्तेणं
 होत्था । सव्वे वि णं दीहवेयङ्का मूले पच्चासं पच्चासं जोयणाणि विक्खंभेणं प० ।
 लंतए कप्पे पच्चासं विमाणवासासहस्सा प० । सव्वाओ णं तिमिस्सगुहाखंडगप्पवा-
 यगुहाओ पच्चासं पच्चासं जोयणाई आयामेणं प० । सव्वे वि णं कंचणगपव्वया
 सिहरतले पच्चासं पच्चासं जोयणाई विक्खंभेणं प० ॥ १२८ ॥ नवण्हं बंभचेराणं
 एकावन्नं उद्देसणकाला प० । चमरस्स णं असुरिंदस्स असुररत्तो सभा सुधम्मा एका-
 वन्नखंभसयसंनिविट्ठा प० । एवं चेव बलिस्स वि । सुप्पमे णं बलदेवे एकावन्नं
 वाससयसहस्साई परमाउं पालइत्ता सिद्धे बुद्धे जाव सव्वदुक्खप्पहीणे । दंसणावर-
 णनामाणं दोण्हं कम्माणं एकावन्नं उत्तरकम्मपगडीओ पत्तताओ ॥ १२९ ॥ मोहणि-
 जस्स णं कम्मस्स बावन्नं नामधेज्जा प०, तं जहा-कोहे, कोवे, रोसे, दोसे, अखमा,
 संजलणे, कलहे, चंडिक्के, भंडणे, विवाए, माणे, मदे, दप्पे, थंभे, अत्तुक्कोसे, गव्वे,
 परपरिवाए, अक्कोसे, अवक्कोसे (परिभवे), उन्नए, उच्चांभे, माया, उव्वही, तियडी,
 वल्लए, गहणे, णूमे, कक्के, कुरुए, दंभे, कूडे, जिम्हे, किब्बिसे, अणायरणया, गूह-
 णया, वंचणया, पल्लिंउचणया, सातिजोगे, लोभे, इच्छा, सुच्छा, कंक्षा, मेही,

तिण्हा, भिज्जा, अभिज्जा, कामासा, भोगासा, जीवियासा, मरणासा, नंदी, रागे । गोथूमस्स णं आवासपव्वयस्स पुरच्छिमिन्नाओ चरमंताओ वलयामुहस्स महापायालस्स पच्चच्छिमिन्ने चरमंते एस णं बावन्नं जोयणसहस्साइं अबाहाए अंतरे प० । एवं दगभासस्स णं केउगस्स संखस्स जूयगस्स दगसीमस्स ईसरस्स । नाणावरणिज्जस्स नामस्स अंतरायस्स एतेसि णं तिण्हं कम्मपगडीणं बावन्नं उत्तरपयडीओ पन्नताओ । सोहम्मसणं कुमारमाहिंदेसु तिसु कप्पेसु बावन्नं विमाणावाससयसहस्सा प० ॥ १२० ॥ देवकुरुउत्तरकुर्याओ णं जीवाओ तेवन्नं तेवन्नं जोयणसहस्साइं साइरेगाइं आयामेणं पन्नताओ । महाहिमवंतरूपीणं वासहरपव्वयाणं जीवाओ तेवन्नं तेवन्नं जोयणसहस्साइं नव य एगतीसे जोयणसए छच्च एगूणवीसइभाए जोयणस्स आयामेणं पन्नताओ । समणस्स णं भगवओ महावीरस्स तेवन्नं अणगारा संवच्छरपरियाया पंचसु अणुत्तरेसु महइमहालएसु महाविमाणेसु देवत्ताए उववन्ना । संमुच्छिमउरपरिसप्पाणं उक्कोसेणं तेवन्नं वाससहस्सा ठिई प० ॥ १२१ ॥ भरहेरवएसु णं वासेसु एगमेगाए उस्सप्पिणीए ओसप्पिणीए चउवन्नं चउवन्नं उत्तमपुरिसा उप्पज्जिसु वा उप्पज्जंति वा उप्पज्जिस्संति वा, तं जहा-चउवीसं तित्थकरा बारस चक्कवदी नव बलदेवा नव वासुदेवा । अरहा णं अरिट्ठनेमी चउवन्नं राइंदियाइं छउमत्थपरियायं पाउणित्ता जिणे जाए केवली सव्वबू सव्वभावदरिसी । समणे भगवं महावीरे एगदिवसेणं एगनिसिज्जाए चउप्पन्नाइं वागरणाइं वागरित्था । अणंतस्स णं अरहओ चउपन्नं गणहरा होत्था ॥ १२२ ॥ मल्लिस्स णं अरहओ [मल्ली णं अरहा] पणपन्नं वाससहस्साइं परमाउं पालइत्ता सिद्धे बुद्धे जाव प्पहीणे । मंदरस्स णं पव्वयस्स पच्चच्छिमिन्नाओ चरमंताओ विजयदारस्स पच्चच्छिमिन्ने चरमंते एस णं पणपन्नं जोयणसहस्साइं अबाहाए अंतरे प० । एवं चउदिसिं पि विजयवेजयंतजयंत-अपराजियं ति । समणे भगवं महावीरे अंतिमराइयंसि पणपन्नं अज्झयणाइं कल्लाणफलविवागाइं पणपन्नं अज्झयणाइं पावफलविवागाइं वागरित्ता सिद्धे बुद्धे जाव प्पहीणे । पढमविइयासु दोसु पुढवीसु पणपन्नं निरयावाससयसहस्सा प० । दंसणावरणिज्जनामाउयाणं तिण्हं कम्मपगडीणं पणपन्नं उत्तरपगडीओ प० ॥ १२३ ॥ जंबुद्वीवे णं द्वीवे छप्पन्नं नक्खत्ता चंदेण सद्धिं जोगं जोइंसु वा जोइंति वा जोइस्संति वा । विमलस्स णं अरहओ छप्पन्नं गणा छप्पन्नं गणहरा होत्था ॥ १२४ ॥ तिण्हं गणिपिडगाणं आयारचूलियावज्जाण सत्तावन्नं अज्झयणा प० तं जहा-आयारे सूयगडे ठाणे । गोथूमस्स णं आवासपव्वयस्स पुरच्छिमिन्नाओ चरमंताओ वलयामुहस्स महापायालस्स बहुमज्झदेसभाए एस णं सत्तावन्नं जोयणसहस्साइं अबाहाए

अंतरे प० । एवं दगभासस्स केउयस्स य संखस्स य जूयस्स य दयसीमस्स ईस-
 रस्स य । मल्लिस्स णं अरहओ सत्तावन्नं मणपज्जवनाणिसया होत्था । महाहिमवंत-
 रूपीणं वासहरपव्वयाणं जीवाणं धणुपिट्ठं सत्तावन्नं सत्तावन्नं जोयणसहस्साइं
 दोत्ति य तेणउए जोयणसए दस य एगूणवीसइभाए जोयणस्स परिकखेवेणं प०
 ॥ १३५ ॥ पढमदोच्चपंचमासु तिसु पुढवीसु अट्ठावन्नं निरयावाससयसहस्सा प० ।
 नाणावरणिज्जस्स वेयणियआउयनामअंतराइयस्स एएसि णं पंचण्हं कम्मपगडीणं
 अट्ठावन्नं उत्तरपगडीओ पन्नत्ताओ । गोथूभस्स णं आवासपव्वयस्स पच्चच्छिमिद्धाओ
 चरमंताओ वलयामुहस्स महापायालस्स बहुमज्झदेसभाए एस णं अट्ठावन्नं जोयण-
 सहस्साइं अवाहाए अंतरे प० । एवं चउदिसिं पि नेयव्वं ॥ १३६ ॥ चंदस्स णं
 संवच्छरस्स एगमेगे उळ्ळ एगूणसट्ठिं राईदियाइं राईदियग्गेणं प० । संभवे णं अरहा
 एगूणसट्ठिं पुव्वसयसहस्साइं अगारमज्जे वसित्ता मुंडे जाव पव्वइए । मल्लिस्स णं
 अरहओ एगूणसट्ठिं ओहिनाणिसया होत्था ॥ १३७ ॥ एगमेगे णं मंडले सूरिए सट्ठिए
 सट्ठिए मुहुत्तेहिं संघाइए । लवणस्स णं समुहस्स सट्ठिं नागसाहस्सीओ अग्गोदयं
 धारंति । विमळे णं अरहा सट्ठिं धणूइं उट्ठुं उच्चत्तेणं होत्था । बलिस्स णं वइरोयणिदस्स
 सट्ठिं सामाणियसाहस्सीओ पन्नत्ताओ । बंभस्स णं देविंदस्स देवरणो सट्ठिं सामाणि-
 यसाहस्सीओ पन्नत्ताओ । सोहम्मीसाणेसु दोसु कप्पेसु सट्ठिं विमाणावाससयसहस्सा
 प० ॥ १३८ ॥ पंचसंवच्छरियस्स णं जुगस्स रिउमासेणं मिज्जमाणस्स इगसट्ठिं उळ-
 मासा प० । मंदरस्स णं पव्वयस्स पढमे कंडे इगसट्ठिजोयणसहस्साइं उट्ठुं उच्चत्तेणं
 प० । चंदमंडले णं एगसट्ठिविभागविभाइए समंसे प० । एवं सूरस्स वि ॥ १३९ ॥
 पंचसंवच्छरिए णं जुगे बासट्ठिं पुत्तिमाओ बावट्ठिं अमावसाओ पन्नत्ताओ । वासुपुज्जस्स
 णं अरहओ बासट्ठिं गणा बासट्ठिं गणहरा होत्था । सुक्कपक्खस्स णं चंदे बासट्ठिं भागे
 दिवसे दिवसे परिवट्ठइ, ते चेव बहुलपक्खे दिवसे दिवसे परिहायइ । सोहम्मीसा-
 नेसु कप्पेसु पढमे पत्थडे पढमावलियाए एगमेगाए दिसाए बासट्ठिं बासट्ठिं विमाणा
 प० । सव्वे वेमाणियाणं बासट्ठिं विमाणपत्थडा पत्थडग्गेणं प० ॥ १४० ॥ उसभे
 णं अरहा कोसलिए तेसट्ठिं पुव्वसयसहस्साइं महारायमज्जे वसित्ता मुंडे भवित्ता
 अगाराओ अणगारियं पव्वइए । हरिवासरम्मयवासेसु मणुस्सा तेसट्ठिए राईदिएहिं
 संपत्तजोव्वणा भवंति । निसडे णं पव्वए तेसट्ठिं सूरोदया प० । एवं नीलवंते वि
 ॥ १४१ ॥ अट्ठट्ठमिया णं भिक्खुपडिमा चउसट्ठीए राईदिएहिं दोहि य अट्ठासीएहिं
 भिक्खासएहिं अहासुत्तं जाव भवइ । चउसट्ठिं असुरकुमारावाससयसहस्सा प० ।
 चमरस्स णं रत्तो चउसट्ठिं सामाणियसाहस्सीओ पन्नत्ताओ । सव्वे वि दधि मुहाणं

पव्वया पल्लासंठाणसंठिया सव्वत्थ समा विक्खंभुस्सेहेणं चउसट्ठिं जोयणसहस्साइं
 प० । सोहम्मसीसाणेसु बंभलोए य तिसु कप्पेसु चउसट्ठिं विमाणावाससयसहस्सा
 प० । सव्वस्स वि य णं रत्तो चाउरंतचक्कवट्ठिस्स चउसट्ठिलट्ठीए महप्पे मुत्तामणि-
 (मए)हारे प० ॥ १४२ ॥ जंबुदीवे णं दीवे पणसट्ठिं सूरमंडला प० । थेरे णं मोरि-
 यपुत्ते पणसट्ठिवासाइं अगारमज्जे वसित्ता मुंडे भवित्ता अगाराओ अणगारियं पव्व-
 इए । सोहम्मवडिंसयस्स णं विमाणस्स एगमेगाए बाहाए पणसट्ठिं पणसट्ठिं भोमा
 प० ॥ १४३ ॥ दाहिणद्धमाणस्सखेत्ता णं छावट्ठिं चंदा पभासिंसु वा पभासंति वा
 पभासिस्संति वा । छावट्ठिं सूरिया तविंसु वा तवंति वा तविस्संति वा । उत्तरद्ध-
 माणस्सखेत्ता णं छावट्ठिं चंदा पभासिंसु वा पभासंति वा पभासिस्संति वा ।
 छावट्ठिं सूरिया तविंसु वा तवंति वा तविस्संति वा । सेज्जंसस्स णं अरहओ छावट्ठिं
 गणा छावट्ठिं गणहरा होत्था । आभिणिबोहियनाणस्स णं उक्कोसेणं छावट्ठिं साग-
 रोवमाइं ठिई प० ॥ १४४ ॥ पंचसंवच्छरियस्स णं जुगस्स नक्खत्तामासेणं मिज्ज-
 माणस्स सत्तसट्ठिं नक्खत्तामासा प० । हेमवयएरज्जवयाओ णं बाहाओ सत्तट्ठिं सत्तट्ठिं
 जोयणसयाइं पणपच्चाइं तिण्णि य भागा जोयणस्स आयामेणं प० । मंदरस्स णं
 पव्वयस्स पुरच्छिमिन्नाओ चरमंताओ गोयमदीवस्स पुरच्छिमिल्ले चरमंते एस णं
 सत्तसट्ठिं जोयणसहस्साइं अबाहाए अंतरे प० । सव्वेसिं पि णं नक्खत्ताणं सीमा-
 विक्खंभे णं सत्तट्ठिं भागं भइए समसे प० ॥ १४५ ॥ धायइसंडे णं दीवे अडसट्ठिं
 चक्कवट्ठिविजया अडसट्ठिं रायहाणीओ प० । उक्कोसपए अडसट्ठिं अरहंता समु-
 प्पज्जिस्सु वा समुप्पज्जंति वा समुप्पज्जिस्संति वा । एवं चक्कवट्ठी बलदेवा वासुदेवा ।
 पुक्खरवरदीवट्ठे णं अडसट्ठिं विजया एवं चेव जाव वासुदेवा । विमलस्स णं
 अरहओ अडसट्ठिं समणसाहस्सीओ उक्कोसिया समणसंपया होत्था ॥ १४६ ॥
 समयखित्ते णं मंदरवज्जा एगूणसत्तरिं वासा वासधरपव्वया प० तं जहा-पणतीसं
 वासा तीसं वासहरा चत्तारि उडुयारा । मंदरस्स पव्वयस्स पच्चच्छिमिन्नाओ चरमं-
 ताओ गोयमदीवस्स पच्चच्छिमिल्ले चरमंते एस णं एगूणसत्तरिं जोयणसहस्साइं
 अबाहाए अंतरे प० । मोहणिज्जवज्जाणं सत्तण्हं कम्मपगडीणं एगूणसत्तरिं उत्तर-
 पगडीओ पच्चाओ ॥ १४७ ॥ समणे भगवं महावीरे वासाणं सवीसइराए मासे
 वइकंते सत्तरिएहिं राईदिएहिं सेसेहिं वासावासं पज्जोसवेइ । पासे णं अरहा पुरि-
 सादाणीए सत्तरिं वासाइं बहुपडिपुच्चाइं सामन्नपरियागं पाउणित्ता सिद्धे बुद्धे जाव
 प्पहीणे । वासुपुज्जे णं अरहा सत्तरिं धणूइं उडुं उच्चत्तेणं होत्था । मोहणिज्जस्स णं
 कम्मस्स सत्तरिं सागरोवमकोडाकोडीओ अबाहूणिया कम्मट्ठिइं कम्मनिसेगे प० ।

माहिंदस्स णं देविंदस्स देवरजो सत्तरिं सामाणियसाहस्सीओ पन्नत्ताओ ॥ १४८ ॥
चउत्थस्स णं चंदसंवच्छरस्स हेमंताणं एकसत्तरीए राईदिएहिं वीड्कंतेहिं सब्व-
बाहिराओ मंडलाओ सूरिए आउट्ठिं करेइ । वीरियप्पवायस्स णं पुव्वस्स एकसत्तरिं
पाहुडा प० । अजिते णं अरहा एकसत्तरिं पुव्वसयसहस्साई अगारमज्जे वसित्ता
मुंडे भवित्ता जाव पव्वइए । एवं सगरो वि राया चाउरंतचक्खवट्ठी एकसत्तरिं पुव्व
जाव पव्वइए ति ॥ १४९ ॥ बावत्तरिं सुवन्नकुमारावाससयसहस्सा प० । लवणस्स
समुद्दस्स बावत्तरिं नागसाहस्सीओ बाहिरियं वेल् धारंति । समणे भगवं महावीरे
बावत्तरिं वासाई सव्वाउयं पालइत्ता सिद्धे बुद्धे जाव प्पहीणे । धेरे णं अयलभाया
बावत्तरिं वासाई सव्वाउयं पालइत्ता सिद्धे जाव प्पहीणे । अग्निभतरपुक्खरद्धे णं
बावत्तरिं चंदा पभासिंसु वा पभासंति वा पभासिस्संति वा, बावत्तरिं सूरिया तविंसु
वा तवंति वा तविस्संति वा । एगमेगस्स णं रजो चाउरंतचक्खवट्ठिस्स बावत्तरिपुर-
वरसाहस्सीओ पन्नत्ताओ । बावत्तरि कलाओ प० तं जहा-लेहं, गणियं, रूवं, नट्टं,
गीयं, वाइयं, सरगयं, पुक्खरगयं, समतालं, जूयं, जणवायं, पोक्खच्चं, अट्ठावयं,
दग्गमट्ठियं, अन्नविहीं, पाणविहीं, वत्थविहीं, सयणविहीं, अज्जं, पहेलियं, मागहिंयं,
गाहं, सिलोगं, गंधजुत्तिं, मधुसित्थं, आभरणविहीं, तरुणीपडिकम्मं, इत्थीलक्खणं,
पुरिसलक्खणं, हयलक्खणं, गयलक्खणं, गोणलक्खणं, कुकुडलक्खणं, मिडयल-
क्खणं, चक्कलक्खणं, छत्तलक्खणं, दंडलक्खणं, असिलक्खणं, मणिलक्खणं,
कागणिलक्खणं, चम्मलक्खणं, चंदलक्खणं, सूचरियं, राहुचरियं, गहचरियं,
सोभागकरं, दोभागकरं, विजागयं, मंतगयं, रहस्सगयं, सभासं, चारं, पडिचारं,
वूहं, पडिवूहं, खंधावारमाणं, नगरमाणं, वत्थुमाणं, खंधावारनिवेसं, वत्थुनिवेसं,
नगरनिवेसं, ईसत्थं, छरुप्पवायं, आससिक्खं, हत्थिसिक्खं, धणुव्वेयं, हिरण्णपागं
सुवन्नपागं मणिपागं धातुपागं, बाहुजुद्धं दंडजुद्धं मुट्ठिजुद्धं लट्ठिजुद्धं जुद्धं निजुद्धं
जुद्धाई जुद्धं, सुत्तखेडं नालियाखेडं वट्ठखेडं धम्मखेडं चम्मखेडं, पत्तच्छेज्जं कडग-
च्छेज्जं, सजीवं निजीवं, सउणहयं । संमुच्छिमखहयरपंचिदियतिरिक्खजोणियाणं
उक्कोसेणं बावत्तरिं वाससहस्साई ठिई प० ॥ १५० ॥ हरिवासरम्मयवासयाओ णं
जीवाओ तेवत्तरिं तेवत्तरिं जोयणसहस्साई नव य एगुत्तरे जोयणसए सत्तरस य
एगूणवीसइभागे जोयणस्स अद्धभागं च आयामेणं प० । विजए णं बलदेवे तेव-
त्तरिं वाससयसहस्साई सव्वाउयं पालइत्ता सिद्धे जाव प्पहीणे ॥ १५१ ॥ धेरे णं
अग्निभूई गणहरे चोवत्तरिं वासाई सव्वाउयं पालइत्ता सिद्धे जाव प्पहीणे । निस-
हाओ णं वासहरपव्वयाओ तिगिच्छिओ णं दहाओ सीतोयामहानदीओ चोवत्तरिं

जोयणसयाई साहियाई उत्तराहिमुही पवहिता वइरामयाए जिब्भियाए चउजोयणा-
यामाए पन्नासजोयणविकखेभाए वइरतले कुंडे महया घडमुहपवतिएणं मुत्तावलि-
हारसंठाणसंठिएणं पवाएणं महया सहेणं पवडइ । एवं सीता वि दक्खिणाहिमुही
भाणियव्वा । चउत्थवज्जासु छसु पुढवीसु चोवत्तरिं नरयावाससयसहस्सा प०
॥ १५२ ॥ सुविहिस्स णं पुप्फदंतस्स अरहओ पन्नतरि जिणसया होत्था । सीतले
णं अरहा पन्नतरि पुव्वसहस्साई अगारवासमज्जे वसित्ता मुंडे भवित्ता जाव पव्व-
इए । संती णं अरहा पन्नतरिवाससहस्साई अगारवासमज्जे वसित्ता मुंडे भवित्ता
अगाराओ अणगारियं पव्वइए ॥ १५३ ॥ छावत्तरिं विज्जुकुमारावाससयसहस्सा
प० । एवं-दीवदिसाउदहीणं, विज्जुकुमारिंदयणियमग्गीणं । छण्हं पि जुगलयाणं,
छावत्तरि सयसहस्साई ॥ १५४ ॥ भरहे राया चाउरंतचक्कवट्ठी सत्तहत्तरिं पुव्वसय-
सहस्साई कुमारवासमज्जे वसित्ता महारायाभिसेयं संपत्ते । अंगवसाओ णं सत्तहत्तरि
रायाणो मुंडे जाव पव्वइया । गद्धोयतुसियाणं देवाणं सत्तहत्तरिं देवसहस्सपरिवारा
प० । एगमेगे णं सुहुत्ते सत्तहत्तरिं लवे लवगेणं प० ॥ १५५ ॥ सक्कसप्पिं देविंदस्स
देवरजो वेसमणे महाराया अट्टहत्तरीए सुवन्नकुमारदीवकुमारावाससयसहस्साणं
आहेवच्चं पोरेवच्चं सामितं भट्ठितं महारायत्तं आणाईसरसेणावच्चं कारेमाणे पाळेमाणे
विहरइ । थेरे णं अकंपिए अट्टहत्तरिं वासाई सव्वाउयं पालइत्ता सिद्धे जाव प्पहीणे ।
उत्तरायणनियट्ठे णं सूरिए पढमाओ मंडलाओ एगूणचत्तालीसइमे मंडले अट्टहत्तरिं
एगसट्ठिभाए दिवसखेत्तस्स निवुट्ठेत्ता रयणिखेत्तस्स अभिनिवुट्ठेत्ता णं चारं चरइ,
एवं दक्खिणायणनियट्ठे वि ॥ १५६ ॥ वलयामुहस्स णं पायालस्स हिट्ठिक्काओ चर-
मंताओ इमीसे णं रयणप्पभाए पुढवीए हेट्ठिक्के चरमंते एस णं एगूणासिं जोयणस-
हस्साई अवाहाए अंतरे प० । एवं केउस्स वि ज्यूस्स वि ईसरस्स वि । छट्ठीए
पुढवीए बहुमज्जदेसभायाओ छट्ठस्स घणोदहिस्स हेट्ठिक्के चरमंते एस णं एगूणा-
सीति जोयणसहस्साई अवाहाए अंतरे प० । जंबुद्वीवस्स णं दीवस्स वारस्स य
वारस्स य एस णं एगूणासीई जोयणसहस्साई साइरेगाई अवाहाए अंतरे प०
॥ १५७ ॥ सेज्जेसे णं अरहा असीई धणूई उट्ठुं उच्चत्तेणं होत्था । तिविट्ठे णं वासु-
देवे असीई धणूई उट्ठुं उच्चत्तेणं होत्था । अयले णं बलदेवे असीई धणूई उट्ठुं उच्च-
त्तेणं होत्था । तिविट्ठे णं वासुदेवे असीदवाससयसहस्साई महाराया होत्था । आउ-
बहुले णं कंडे असीई जोयणसहस्साई बाहल्लेणं प० । ईसाणस्स देविंदस्स देवरजो
असीई सामाणियसाहस्सीओ पन्नताओ । जंबुद्वीवे णं दीवे असीउत्तरं जोयणसयं ओगा-
हेत्ता सूरिए उत्तरकट्ठोवगए पढमं उदयं करेइ ॥ १५८ ॥ नवनवमिया णं भिक्खु-

पडिमा एकासीइ राइंदिएहिं चउहि य पंचुत्तरेहिं (भिक्खासएहिं) अहासुत्तं जाव
आराहिया । कुंथुस्स णं अरहओ एकासीतिं मणपज्जवनाणिसया होत्था । विवाहपन्न-
त्तीए एकासीतिं महाजुम्मसया प० ॥ १५९ ॥ जंबुदीवे दीवे वासीयं मंडलसयं जं
सूरिए दुक्खुतो संक्रमित्ता णं चारं चरइ, तं जहा-निक्खममाणे य पविसमाणे य ।
समणे भगवं महावीरे वासीए राइंदिएहिं वीइक्कंतेहिं गम्भाओ गम्भं साहरिए । महा-
हिमवंतस्स णं वासहरपव्वयस्स उवरिळाओ चरमंताओ सोगंधियस्स कंडस्स हेट्ठिळे
चरमंते एस णं वासीइं जोयणसयाइं अवाहाए अंतरे प० । एवं रुप्पिस्स वि ॥ १६० ॥
समणे भगवं महावीरे वासीइ राइंदिएहिं वीइक्कंतेहिं तेयासीइमे राइंदिए वट्टमाणे
गम्भाओ गम्भं साहरिए । सीयलस्स णं अरहओ तेसीइं गणा तेसीइं गणहरा
होत्था । थेरे णं मंडियपुत्ते तेसीइं वासाइं सव्वाउयं पालइत्ता सिद्धे जाव प्पहीणे ।
उसभे णं अरहा कोसलिए तेसीइं पुव्वसयसहस्साइं अगारमज्झे वसित्ता मुंडे
भवित्ता णं जाव पव्वइए । भरहे णं राया चाउरंतचक्कवट्ठी तेसीइं पुव्वसयसहस्साइं
अगारमज्झे वसित्ता जिणे जाए केवली सव्वन्नू सव्वभावदरिसी ॥ १६१ ॥
चउरासीइ निरयावाससयसहस्सा प० । उसभे णं अरहा कोसलिए चउरासीइं
पुव्वसयसहस्साइं सव्वाउयं पालइत्ता सिद्धे बुद्धे जाव प्पहीणे । एवं भरहो बाहुबली
बंभी सुंदरी । सिज्जंसे णं अरहा चउरासीइं वाससयसहस्साइं सव्वाउयं पालइत्ता
सिद्धे जाव प्पहीणे । तिविट्ठे णं वासुदेवे चउरासीइं वाससयसहस्साइं सव्वाउयं
पालइत्ता अप्पइट्ठाणे नरए नेरइयत्ताए उववन्नो । सक्कस्स णं देविंदस्स देवरन्नो
चउरासीइ सामाणियसाहस्सीओ पन्नत्ताओ । सव्वे वि णं बाहिरया मंदरा चउरा-
सीइं चउरासीइं जोयणसहस्साइं उड्ढं उच्चत्तेणं प० । सव्वे वि णं अंजणगपव्वया
चउरासीइं चउरासीइं जोयणसहस्साइं उड्ढं उच्चत्तेणं प० । हरिवासरम्मयवासियाणं
जीवाणं धणुपिट्ठा चउरासीं जोयणसहस्साइं सोलस जोयणाइं चत्तारि य भागा
जोयणस्स परिकखेवेणं प० । पंकबहुलस्स णं कंडस्स उवरिळाओ चरमंताओ हेट्ठिळे
चरमंते एस णं चोरासीइ जोयणसयसहस्साइं अवाहाए अंतरे प० । विवाहपन्नत्तीए
णं भगवतीए चउरासीइं पयसहस्सा पदग्गेणं प० । चोरासीइ नागकुमारावाससय-
सहस्सा प० । चोरासीइ पइन्नगसहस्साइं पन्नत्ताइं । चोरासीइं जोणिप्पमुहसय-
सहस्सा प० । पुव्वाइयाणं सीसपहेलियापज्जवसाणाणं सट्ठाणट्ठाणंतराणं चोरासीए
गुणकारे प० । उसभस्स णं अरहओ कोसलियस्स चउरासीइ गणा चउरासीइ
गणहरा होत्था, उसभस्स णं अरहओ कोसलियस्स उसभसेणपामोक्खाओ चउरा-
सीइ समणसाहस्सीओ होत्था । सव्वे वि चउरासीइ विमाणावाससयसहस्सा

सत्ताणउई च सहस्सा तेवीसं च विमाणा भवंतीति मक्खायं ॥ १६२ ॥
 आयास्स णं भगवओ सचूलियागस्स पंचासीइ उइसणकाला प० । धायइसंडस्स
 णं मंदरा पंचासीइ जोयणसहस्साइं सव्वग्गेणं प० । स्यए णं मंडलियपव्वए पंचा-
 सीइ जोयणसहस्साइं सव्वग्गेणं प० । नंदणवणस्स णं हेट्ठिआओ चरमंताओ सोगंधि-
 यस्स कंडस्स हेट्ठिळे चरमंते एस णं पंचासीइ जोयणसयाइं अवाहाए अंतरे प०
 ॥ १६३ ॥ सुविहिस्स णं पुप्फदंतस्स अरहओ छलसीइ गणा छलसीइ गणहरा
 होत्था । सुपासस्स णं अरहओ छलसीइ वाइसया होत्था । दोच्चाए णं पुढवीए बहु-
 मज्झदेसभागाओ दोच्चस्स घणोदहिस्स हेट्ठिळे चरमंते एस णं छलसीइ जोयणसह-
 स्साइं अवाहाए अंतरे प० ॥ १६४ ॥ मंदरस्स णं पव्वयस्स पुरच्छिमिआओ चर-
 मंताओ गोथूभस्स आवासपव्वयस्स पच्चच्छिमिळे चरमंते एस णं सत्तासीइं जोयण-
 सहस्साइं अवाहाए अंतरे प० । मंदरस्स णं पव्वयस्स दक्खिणिआओ चरमंताओ
 दगभासस्स आवासपव्वयस्स उत्तरिळे चरमंते एस णं सत्तासीइं जोयणसहस्साइं
 अवाहाए अंतरे प० । एवं मंदरस्स पच्चच्छिमिआओ चरमंताओ संखस्स आवास-
 पव्वयस्स पुरच्छिमिळे चरमंते एस णं सत्तासीइं जोयणसहस्साइं अवाहाए अंतरे
 प० । एवं चेव मंदरस्स उत्तरिआओ चरमंताओ दगसीमस्स आवासपव्वयस्स दाहि-
 णिळे चरमंते एस णं सत्तासीइं जोयणसहस्साइं अवाहाए अंतरे प० । छण्हं कम्म-
 पगडीं आइमउवरिल्लवजाणं सत्तासीइं उत्तरपगडीओ पन्नताओ । महाहिमवंतकू-
 ङस्स णं उवरिमंताओ सोगंधियस्स कंडस्स हेट्ठिळे चरमंते एस णं सत्तासीइं जोय-
 णसयाइं अवाहाए अंतरे प० । एवं रुप्पिकूडस्स वि ॥ १६५ ॥ एगमेगस्स णं चंदि-
 मसूरियस्स अट्ठासीइ अट्ठासीइ महवग्गा परिवारो प० । दिट्ठिवायस्स णं अट्ठासीइ
 सुत्ताइं पन्नताइं, तं जहा-उज्जुयुं परिणयापरिणयं एवं अट्ठासीइ सुत्ताणि भाणिय-
 व्वाणि जहा नंदीए । मंदरस्स णं पव्वयस्स पुरच्छिमिआओ चरमंताओ गोथूभस्स
 आवासपव्वयस्स पुरच्छिमिळे चरमंते एस णं अट्ठासीइं जोयणसहस्साइं अवाहाए
 अंतरे प० । एवं चउसु वि दिसासु नेयव्वं । वाहिराओ उत्तराओ णं कट्ठाओ सूरिए
 पढमं छम्मासं अयमाणे चोयालीसइमे मंडलगते अट्ठासीति एगसट्ठिभागे मुहुत्तस्स
 दिवसखेत्तस्स नियुद्धेत्ता रयणिखेत्तस्स अभिनिवुद्धेत्ता सूरिए चारं चरइ । दक्खिण-
 कट्ठाओ णं सूरिए दोच्चं छम्मासं अयमाणे चोयालीसत्तिमे मंडलगते अट्ठासीइं एग-
 सट्ठिभागे मुहुत्तस्स रयणिखेत्तस्स नियुद्धेत्ता दिवसखेत्तस्स अभिनिवुद्धिंता णं सूरिए
 चारं चरइ ॥ १६६ ॥ उसमे णं अरहा कोसलिए इमीसे ओसप्पिणीए तत्तियाए सुस-
 मदूसमाए (समाए) पच्छिमे भागे एगण्णउए अद्धमासेहिं सेसेहिं कालगए जाव सव्व-

दुक्खप्पहीणे । समणे भगवं महावीरे इमीसे ओसप्पिणीए चउत्थाए दूसमसुसमाए
 समाए पच्छिमे भागे एगूणनउइए अद्धमासेहिं सेसेहिं कालगए जाव सव्वदुक्खप्प-
 हीणे । हरिसेणे णं राया चाउरंतचक्कवट्ठी एगूणनउई वाससयाई महाराया होत्था ।
 संतिस्स णं अरहओ एगूणनउई अज्जासाहस्सीओ उक्कोसिया अज्जियासंपया होत्था
 ॥ १६७ ॥ सीयळे णं अरहा नउई धणूई उह्वं उच्चतेणं होत्था । अजियस्स णं अर-
 हओ नउई गणा नउई गणहरा होत्था । एवं संतिस्स वि । सयंभुस्स णं वासुदेवस्स
 णउइ वासाई विजए होत्था । सव्वेसि णं वट्ठवेयद्धपव्वयाणं उवरिद्धाओ सिहरतलाओ
 सोगंधियकण्डस्स हेट्ठिल्ले चरमंते एस णं नउइ जोगणसयाई अबाहाए अंतरे प०
 ॥ १६८ ॥ एकाणउई परवेयावच्चकम्मपडिमाओ पन्नत्ताओ । कालोए णं समुदे
 एकाणउई जोगणसयसहस्साई सहियाई परिकखेवेणं प० । कुंथुस्स णं अरहओ
 एकाणउई आहोहियसया होत्था । आउयगोयवज्जाणं छण्हं कम्मपगडीणं एकाणउई
 उत्तरपगडीओ पन्नत्ताओ ॥ १६९ ॥ बाणउई पडिमाओ पन्नत्ताओ । थेरे णं इंदभूती
 बाणउइ वासाई सव्वाउयं पालइत्ता सिद्धे बुद्धे । मंदरस्स णं पव्वयस्स बहुमज्झ-
 देसभागाओ गोथूभस्स आवासपव्वयस्स पच्चच्छिमिल्ले चरमंते एस णं बाणउई
 जोगणसहस्साई अबाहाए अंतरे प० । एवं चउण्हं वि आवासपव्वयाणं ॥ १७० ॥
 चंदप्पहस्स णं अरहओ तेणउई गणा तेणउई गणहरा होत्था । संतिस्स णं अरहओ
 तेणउई चउहसपुव्विसया होत्था । तेणउइमंडलगते णं सूरिए अतिवट्ठमाणे वा निव-
 ट्ठमाणे वा समं अहोरतं विसमं करेइ ॥ १७१ ॥ निसहनीलवंतियाओ णं जीवाओ चउ-
 णउइ जोगणसहस्साई एक्कं छप्पणं जोगणसयं दोञ्चि य एगूणवीसइभागे जोगणस्स
 आयामेणं प० । अजियस्स णं अरहओ चउणउइ ओहिनाणिसया होत्था ॥ १७२ ॥
 सुपासस्स णं अरहओ पंचाणउइ गणा पंचाणउइ गणहरा होत्था । जंबुद्वीवस्स णं दीव-
 स्स चरमंताओ चउहिंसि लवणसमुहं पंचाणउइ पंचाणउइ जोगणसहस्साई ओगाहिता
 चत्तारि महापायालकल्ला प० तं जहा-वलयासुहे केऊए जूयए ईसरे । लवणसमुहस्स
 उभओ पासं पि पंचाणउयं पंचाणउयं पदेसाओ उव्वेहुस्सेहपरिहाणीए प० । कुंथू णं
 अरहा पंचाणउइ वाससहस्साई परमाउयं पालइत्ता सिद्धे बुद्धे जाव प्पहीणे । थेरे णं
 मोरियपुत्ते पंचाणउइ वासाई सव्वाउयं पालइत्ता सिद्धे बुद्धे जाव प्पहीणे ॥ १७३ ॥
 एगमेगस्स णं रत्तो चाउरंतचक्कवट्ठिस्स छण्णउई छण्णउई गामकोडीओ होत्था ।
 वाउकुमारारणं छण्णउइ भवणावाससयसहस्सा प० । ववहारिए णं दंडे छण्णउइ
 अंगुलाई अंगुलमाणेणं । एवं धणू नालिया जुगे अक्खे मुसळे वि हु । अग्निमतरओ
 आइसुहुत्ते छण्णउइअंगुलछाए प० ॥ १७४ ॥ मंदरस्स णं पव्वयस्स पच्चच्छिमि-

छाओ चरमंताओ गोथूभस्स णं आवासपव्वयस्स पच्चच्छिमिल्ले चरमंते एस णं सत्ता-
 णउइ जोयणसहस्साई अवाहाए अंतरे पन्नते । एवं चउदिसिं पि । अट्ठण्हं कम्मप-
 गडीणं सत्ताणउइ उत्तरपगडीओ पन्नताओ । हरिसेणे णं राया चाउरंतचक्कवटी देसू-
 णाई सत्ताणउइ वाससयाई अगारमज्जे वसित्ता मुंडे भवित्ता णं जाव पव्वइए
 ॥ १७५ ॥ नंदणवणस्स णं उवरिल्लाओ चरमंताओ पंडुयवणस्स हेड्डिल्ले चरमंते एस
 णं अट्ठाणउइ जोयणसहस्साई अवाहाए अंतरे पन्नते । मंदरस्स णं पव्वयस्स पच्च-
 च्छिमिल्लाओ चरमंताओ गोथूभस्स आवासपव्वयस्स पुरच्छिमिल्ले चरमंते एस णं
 अट्ठाणउइ जोयणसहस्साई अवाहाए अंतरे प० । एवं चउदिसिं पि । दाहिणभर-
 ह्हुस्स णं धणुप्पिट्ठे अट्ठाणउइ जोयणसयाई किंचूणाई आयामेणं पन्नते । उत्तराओ
 णं कट्ठाओ सूरिए पढमं छम्मासं अयमाणे एगूणपन्नासतिमे मंडलगते अट्ठाणउइ
 एकसट्ठिभागे सुहुत्तस्स दिवसखेतस्स निवुड्ढेत्ता रयणिखेतस्स अभिनिवुड्ढित्ता णं
 सूरिए चारं चरइ । दक्खिणाओ णं कट्ठाओ सूरिए दोच्चं छम्मासं अयमाणे एगूण-
 पन्नासइमे मंडलगते अट्ठाणउइ एकसट्ठिभाए सुहुत्तस्स रयणिखित्तस्स निवुड्ढेत्ता
 दिवसखेतस्स अभिनिवुड्ढित्ता णं सूरिए चारं चरइ । रेवईपढमजेट्ठापज्जवसाणाणं
 एगूणवीसाए नक्खत्ताणं अट्ठाणउइ ताराओ तारगेणं पन्नताओ ॥ १७६ ॥ मंदरे
 णं पव्वए णवणउइ जोयणसहस्साई उड्डं उच्चत्तेणं पन्नते । नंदणवणस्स णं पुरच्छि-
 मिल्लाओ चरमंताओ पच्चच्छिमिल्ले चरमंते एस णं नवनउइ जोयणसयाई अवाहाए
 अंतरे पन्नते । एवं दक्खिणिळाओ चरमंताओ उत्तरिल्ले चरमंते एस णं णवणउइ
 जोयणसयाई अवाहाए अंतरे पन्नते । उत्तरे पढमे सूरियमंडले नवनउइ जोयण-
 सहस्साई साइरेगाई आयामविकखंभेणं पन्नते । दोच्चे सूरियमंडले नवनउइ जोयण-
 सहस्साई साहियाई आयामविकखंभेणं पन्नते । तइए सूरियमंडले नवनउइ जोयण-
 सहस्साई साहियाई आयामविकखंभेणं पन्नते । इमीसे णं रयणप्पभाए पुडवीए
 अंजणस्स कंडस्स हेड्डिल्लाओ चरमंताओ वाणमंतरभोमेज्जविहारणं उवरिमंते एस
 णं नवनउइ जोयणसयाई अवाहाए अंतरे पन्नते ॥ १७७ ॥ दसदसमिया णं
 भिक्खुपडिमा एगेणं राईदियसतेणं अद्धछट्ठेहिं भिक्खासतेहिं अहासुत्तं जाव आरा-
 हिया वि भवइ । सयभिसया नक्खते एक्कसयतारे पन्नते । सुविही पुप्फदंते णं
 अरहा एगं धणूसयं उड्डं उच्चत्तेणं होत्था । पासे णं अरहा पुरिसादाणीए एक्कं वास-
 सयं सव्वाउयं पालइत्ता सिद्धे जाव प्पहीणे । एवं थेरे वि अज्जसुहम्मे । सव्वे वि
 णं वीहवेय्हूपव्वया एगमेगं गाउयसयं उड्डं उच्चत्तेणं प० । सव्वे वि णं चुल्लहिम-
 वंतसिहरीवासहरपव्वया एगमेगं जोयणसयं उड्डं उच्चत्तेणं प० एगमेगं गाउयसयं

उव्वेहेणं प० । सव्वे वि णं कंचणगपव्वया एगमेगं जोयणसयं उव्वं उच्चत्तेणं प०
 एगमेगं गाउयसयं उव्वेहेणं प० एगमेगं जोयणसयं मूले विक्खंभेणं प० ॥१७८॥
 चंदप्पमे णं अरहा दिवहुं धणुसयं उव्वं उच्चत्तेणं होत्था । आरणे कप्पे दिवहुं
 विमाणावाससयं प० । एवं अक्कुए वि ॥ १७९ ॥ सुपासे णं अरहा दो धणुसया
 उव्वं उच्चत्तेणं होत्था । सव्वे वि णं महाहिमवंतरुप्पीवासहरपव्वया दो दो जोयण-
 सयाई उव्वं उच्चत्तेणं प० दो दो गाउयसयाई उव्वेहेणं प० । जंबुद्दीवे णं दीवे दो
 कंचणपव्वयसया प० ॥ १८० ॥ पउमप्पमे णं अरहा अट्ठाइज्जाई धणुसयाई उव्वं
 उच्चत्तेणं होत्था । असुरकुमाराणं देवाणं पासायवडिंसगा अट्ठाइज्जाई जोयणसयाई
 उव्वं उच्चत्तेणं प० ॥ १८१ ॥ सुमई णं अरहा तिणिण धणुसयाई उव्वं उच्चत्तेणं
 होत्था । अरिद्धनेमी णं अरहा तिणिण वाससयाई कुमारवासमज्जे वसित्ता मुंडे भवित्ता
 जाव पव्वइए । वेमाणियाणं देवाणं विमाणपागारा तिणिण तिणिण जोयणसयाई उव्वं
 उच्चत्तेणं प० । समणस्स भगवओ महावीरस्स तिणि सयाणि चोइसपुव्वीणं होत्था ।
 पंचधणुसइयस्स णं अंतिमसारीरियस्स सिद्धिगयस्स सातिरेगाणि तिणिण धणुसयाणि
 जीवप्पदेसोगाहणा प० ॥१८२॥ पासस्स णं अरहओ पुरिसादाणीयस्स अट्ठुसयाई
 चोइसपुव्वीणं संपया होत्था । अभिनंदणे णं अरहा अट्ठुइज्जाई धणुसयाई उव्वं
 उच्चत्तेणं होत्था ॥ १८३ ॥ संभवे णं अरहा चत्तारि धणुसयाई उव्वं उच्चत्तेणं
 होत्था । सव्वे वि णं णिसडनीलवंता वासहरपव्वया चत्तारि चत्तारि जोयणसयाई
 उव्वं उच्चत्तेणं चत्तारि चत्तारि गाउयसयाई उव्वेहेणं प० । सव्वे वि णं वक्खार-
 पव्वया णिसडनीलवंतवासहरपव्वयाए णं चत्तारि चत्तारि जोयणसयाई उव्वं उच्चत्तेणं
 चत्तारि चत्तारि गाउयसयाई उव्वेहेणं पक्कत्ते । आणयपाणएसु दोसु कप्पेसु चत्तारि
 विमाणसया प० । समणस्स णं भगवओ महावीरस्स चत्तारि सया वाईणं सदेव-
 मणयासुरंमि लोगंमि वाए अपराजियाणं उक्कोसिया वाइसंपया होत्था ॥ १८४ ॥
 अजिए णं अरहा अट्ठपंचमाई धणुसयाई उव्वं उच्चत्तेणं होत्था । सगरे णं राया
 चाउरंतचक्कवट्ठी अट्ठपंचमाई धणुसयाई उव्वं उच्चत्तेणं होत्था ॥ १८५ ॥ सव्वे वि
 णं वक्खारपव्वया सीआसीओआओ महानईओ मंदरपव्वयंतणे पंच पंच जोयण-
 सयाई उव्वं उच्चत्तेणं पंच पंच गाउयसयाई उव्वेहेणं प० । सव्वे वि णं वासहरकूडा
 पंच पंच जोयणसयाई उव्वं उच्चत्तेणं होत्था, मूले पंच पंच जोयणसयाई विक्खंभेणं
 प० । उसभे णं अरहा कोसलिए पंच धणुसयाई उव्वं उच्चत्तेणं होत्था । भरहे णं
 राया चाउरंतचक्कवट्ठी पंच धणुसयाई उव्वं उच्चत्तेणं होत्था । सोमणसगंधमादण-
 विज्जुप्पभमालवंताणं वक्खारपव्वयाणं मंदरपव्वयंतणे पंच पंच जोयणसयाई उव्वं

उच्चतेणं पंच पंच गाउयसयाई उव्वेहेणं प० । सव्वे वि णं वक्खारपव्वयकूडा हरिहरिस्सहकूडवजा पंच पंच जोयणसयाई उव्वं उच्चतेणं मूले पंच पंच जोयणसयाई आयामविवक्खंभेणं प० । सव्वे वि णं नंदणकूडा बलकूडवजा पंच पंच जोयणसयाई उव्वं उच्चतेणं मूले पंच पंच जोयणसयाई आयामविवक्खंभेणं प० । सोहम्मीसाणेसु कप्पेसु विमाणा पंच पंच जोयणसयाई उव्वं उच्चतेणं प० ॥ १८६ ॥ सणं-कुमारमाहिंदेसु कप्पेसु विमाणा छ जोयणसयाई उव्वं उच्चतेणं प० । चुल्लहिमवंत-कूडस्स उवरिल्लाओ चरमंताओ चुल्लहिमवंतस्स वासहरपव्वयस्स समधरणितले एस णं छ जोयणसयाई अबाहाए अंतरे पच्चते । एवं सिहरीकूडस्स वि । पासस्स णं अरहओ छ सया वाईणं सदेवमणुयासुरे लोए वाए अपराजियाणं उक्कोसिया वाईसंपया होत्था । अभिचंदे णं कुलगरे छ धणुसयाई उव्वं उच्चतेणं होत्था । वासुपुजे णं अरहा छहिं पुरिससएहिं सद्धिं मुंडे भवित्ता अगाराओ अणगारियं पव्वइए ॥ १८७ ॥ बंभलंतएसु कप्पेसु विमाणा सत्त सत्त जोयणसयाई उव्वं उच्चतेणं प० । समणस्स णं भगवओ महावीरस्स सत्त जिणसया होत्था । समणस्स भगवओ महावीरस्स सत्त वेउव्वियसया होत्था । अरिट्टनेमी णं अरहा सत्त वाससयाई देसूणाई केवलपरियाणं पाउणिता सिद्धे बुद्धे जाव प्पहीणे । महाहिमवंतकूडस्स णं उवरिल्लाओ चरमंताओ महाहिमवंतस्स वासहरपव्वयस्स समधरणितले एस णं सत्त जोयणसयाई अबाहाए अंतरे पच्चते । एवं रुप्पिकूडस्स वि ॥ १८८ ॥ महासुक्कसहससारेसु दोसु कप्पेसु विमाणा अट्ट जोयणसयाई उव्वं उच्चतेणं प० । इमीसे णं रयणप्पभाए पुढवीए पढमे कंढे अट्टसु जोयणसएसु वाणमंतरभोमेज्जविहारा प० । समणस्स णं भगवओ महावीरस्स अट्टसया अणुत्तरोववाइयाणं देवाणं गइक्कळाणाणं ठिइक्कळाणाणं आगमेसि-भद्धानं उक्कोसिया अणुत्तरोववाइयसंपया होत्था । इमीसे णं रयणप्पभाए पुढवीए बहुसमरमणिज्जाओ भूमिभागाओ अट्टहिं जोयणसएहिं सूरिए चारं चरइ । अरहओ णं अरिट्टनेमिस्स अट्ट सयाई वाईणं सदेवमणुयासुरंमि लोगंमि वाए अपराजियाणं उक्कोसिया वाईसंपया होत्था ॥ १८९ ॥ आणयपाणयआरणअच्चएसु कप्पेसु विमाणा नव नव जोयणसयाई उव्वं उच्चतेणं प० । निसढकूडस्स णं उवरिल्लाओ सिहरतलाओ निसढस्स वासहरपव्वयस्स समे धरणितले एस णं नव जोयणसयाई अबाहाए अंतरे पच्चते । एवं नीलवंतकूडस्स वि । विमलवाहणे णं कुलगरे णं नव धणुसयाई उव्वं उच्चतेणं होत्था । इमीसे णं रयणप्पभाए बहुसमरमणिज्जाओ भूमिभागाओ नवहिं जोयणसएहिं सव्वुवरिमे ताराख्वे चारं चरइ । निसढस्स णं वासहरपव्वयस्स उव-रिल्लाओ सिहरतलाओ इमीसे णं रयणप्पभाए पुढवीए पढमस्स कंडस्स बहुमज्जदे-

सभाए एस णं नव जोयणसयाई अवाहाए अंतरे पन्नत्ते । एवं नीलवंतस्स वि
 ॥ १९० ॥ सव्वे वि णं गेवेज्जविमाणे दस दस जोयणसयाई उड्डं उच्चत्तेणं पन्नत्ते ।
 सव्वे वि णं जमगपव्वया दस दस जोयणसयाई उड्डं उच्चत्तेणं प०, दस दस गाउ-
 यसयाई उव्वेहेणं प०, मूले दस दस जोयणसयाई आयामविकखंभेणं प० । एवं
 चित्तविचित्तकूडा वि भाणियव्वा । सव्वे वि णं वट्टवेयङ्गपव्वया दस दस जोयण-
 सयाई उड्डं उच्चत्तेणं प०, दस दस गाउयसयाई उव्वेहेणं प० मूले दस दस जोय-
 णसयाई विकखंभेणं प०, सव्वत्थ समा पल्लगसंठाणसंठिया प० । सव्वे वि णं हरि-
 हरिस्सहकूडा वक्खारकूडवज्जा दस दस जोयणसयाई उड्डं उच्चत्तेणं प०, मूले दस दस
 जोयणसयाई विकखंभेणं प० । एवं बलकूडा वि नंदणकूडवज्जा । अरहा वि अरिड्ड-
 नेमी दस वाससयाई सव्वाउयं पालइत्ता सिद्धे बुद्धे जाव सव्वदुक्खप्पहीणे । पासस्स
 णं अरहओ दस सयाई जिणाणं होत्था । पासस्स णं अरहओ दस अंतोवासीसयाई
 कालगयाई जाव सव्वदुक्खप्पहीणाई । पउमद्दहपुंडरीयद्वा य दस दस जोयणस-
 याई आयामेणं प० ॥ १९१ ॥ अणुत्तरोववाइयाणं देवाणं विमाणा एक्कारस जोय-
 णसयाई उड्डं उच्चत्तेणं प० । पासस्स णं अरहओ इक्कारस सयाई वेउव्वियाणं होत्था
 ॥ १९२ ॥ महापउममहापुंडरीयदहाणं दो दो जोयणसहस्साई आयामेणं प० ॥ १९३ ॥
 इमीसे णं रयणप्पभाए पुढवीए वइरकंडस्स उवरिल्लाओ चरमंताओ लोहियक्ख-
 कंडस्स हेड्डिल्ले चरमंते एस णं तिन्नि जोयणसहस्साई अवाहाए अंतरे प० ॥ १९४ ॥
 तिगिन्निक्केसरिदहाणं चत्तारि चत्तारि जोयणसहस्साई आयामेणं पन्नत्ताई ॥ १९५ ॥
 धरणितले मंदरस्स णं पव्वयस्स बहुमज्झदेसभाए रयगनाभीओ चउदिसिं पंच पंच
 जोयणसहस्साई अवाहाए अंतरे मंदरपव्वए पन्नत्ते ॥ १९६ ॥ सहस्सारे णं कप्पे
 छ विमाणावाससहस्सा प० ॥ १९७ ॥ इमीसे णं रयणप्पभाए पुढवीए रयणस्स
 कंडस्स उवरिल्लाओ चरमंताओ पुलगस्स कंडस्स हेड्डिल्ले चरमंते एस णं सत्त जोय-
 णसहस्साई अवाहाए अंतरे पन्नत्ते ॥ १९८ ॥ हरिवासरम्मयाणं वासा अड्ड जोय-
 णसहस्साई साइरेगाई वित्थरेणं प० ॥ १९९ ॥ दाहिणङ्गुभरहस्स णं जीवा पाईण-
 पढीणायया दुहओ समुदं पुट्ठा नव जोयणसहस्साई आयामेणं प० । अजियस्स
 णं अरहओ साइरेगाई नव ओहिनाणसहस्साई होत्था, मंदरे णं पव्वए धरणि-
 तले दस जोयणसहस्साई विकखंभेणं पन्नत्ते, जंबूवीवे णं दीवे एणं जोयण-
 सयसहस्सं आयामविकखंभेणं प०, लवणे णं समुदे दो जोयणसयसहस्साई
 चक्कवालविकखंभेणं प० ॥ २०० ॥ पासस्स णं अरहओ तिन्नि सयसाह-
 स्सीओ सत्तावीसं च सहस्साई उक्कोसिया सावियासंपया होत्था ॥ २०१ ॥ धाय-

इखंडे णं दीवे चत्तारि जोयणसयसहस्साई चक्कवालविकखंमेणं पन्नत्ते ॥ २०२ ॥
 लवणस्स णं समुद्स्स पुरच्छिमिल्लाओ चरमंताओ पच्चच्छिमिल्ले चरमंते एस णं पंच
 जोयणसयसहस्साई अवाहाए अंतरे पन्नत्ते ॥ २०३ ॥ भरहे णं राया चाउरंतचक्क-
 वट्ठी छ पुव्वसयसहस्साई रायमज्जे वसित्ता मुंडे भवित्ता अगाराओ अणगारियं
 पव्वइए ॥ २०४ ॥ जंबूदीवस्स णं दीवस्स पुरच्छिमिल्लाओ वेइयंताओ धायइखंड-
 चक्कवालस्स पच्चच्छिमिल्ले चरमंते एस णं सत्त जोयणसयसहस्साई अवाहाए अंतरे
 पन्नत्ते ॥ २०५ ॥ माहिंदे णं कप्पे अट्ठ विमाणावाससयसहस्साई पन्नत्ताई ॥ २०६ ॥
 अजियस्स णं अरहओ साइरेगाई नव ओहिनाणिसहस्साई होत्था ॥ २०७ ॥
 पुरिससीहे णं वासुदेवे दस वाससयसहस्साई सव्वाउयं पालइत्ता पंचमाए पुढवीए
 नेरइए सु नेरइयत्ताए उववन्ने ॥ २०८ ॥ समणे भगवं महावीरे तित्थगरभवग्गहणाओ
 छट्ठे पोडिलभवग्गहणे एगं वासकोडिं सामन्नपरियागं पाउणित्ता सहस्सारे कप्पे
 सव्वट्ठविमाणे देवत्ताए उववन्ने ॥ २०९ ॥ उसभसिरिस्स भगवओ चरिमस्स य
 महावीरवद्धमाणस्स एगा सागरोवमकोडाकोडी अवाहाए अंतरे पन्नत्ते ॥ २१० ॥
 दुवालसंगे गणिपिडगे पन्नत्ते, तं जहा-आयारे, सूयगडे, ठाणे, समवाए,
 विवाहपन्नत्ती, णायाधम्मकहाओ, उवासगदसाओ, अंतगडदसाओ, अणुत्तरोव-
 वाइयदसाओ, पण्हावागरणाई, विवागसुए, दिट्ठिवाए । से किं तं आयारे ?
 आयारे णं समणाणं निग्गंथाणं आयारगोयरविणयवेणइयट्ठाणगमणचंक्रमणपमाण-
 जोगजुंजणभासासमितिगुत्तीसेज्जोवहिभत्तपाणउग्गमउप्पायणएसणाविसोहिसुद्धासुद्ध-
 गहणवयणियमत्तवोवहाणसुप्पसत्थसाहिज्जइ । से समासओ पंचविहे पन्नत्ते, तं
 जहा-णाणायारे, दंसणायारे, चरित्तायारे, तवायारे, विरियायारे । आयारस्स णं
 परित्ता वायणा, संखेज्जा अणुओगदारा, संखेज्जाओ पडिवत्तीओ, संखेज्जा बेढा,
 संखेज्जा सिलोगा, संखेज्जाओ निज्जुत्तीओ । से णं अंगट्ठयाए पढमे अंगे दो सुय-
 कखंधा, पणवीसं अज्झयणा, पंचासीई उदेसणकाला, पंचासीई समुदेसणकाला,
 अट्ठारस पदसहस्साई पदगेणं, संखेज्जा अक्खरा, अणंता गमा, अणंता पज्जवा,
 परित्ता तसा, अणंता थावरा, सासया कडा निबद्धा णिकाइया जिणपण्णत्ता भावा
 आघविज्जंति पण्णविज्जंति परुविज्जंति दंसिज्जंति निदंसिज्जंति उवदंसिज्जंति । से एवं
 णाया एवं विण्णाया । एवं चरणकरणरूवणया आघविज्जंति पण्णविज्जंति परुविज्जंति
 दंसिज्जंति निदंसिज्जंति उवदंसिज्जंति । से तं आयारे ॥ २११ ॥ से किं तं सूअगडे ?
 सूअगडे णं ससमया सइज्जंति, परसमया सइज्जंति, ससमयपरसमया सइज्जंति,
 जीवा सइज्जंति, अजीवा सइज्जंति, जीवाजीवा सइज्जंति, लो गो सइज्जंति, अलो गो

सूइज्जति, लोगालोगो सूइज्जति । सूअगडे णं जीवाजीवपुण्णपावासवसंवरनिज्जरण-
 बंधमोक्खावसाणा पयत्था सूइज्जंति । समणाणं अचिरकालपव्वइयाणं कुसमयमोह-
 मोहमइमोहियाणं संदेहजायसहजबुद्धिपरिणामसंसइयाणं पावकरमलिनमइगुणविसोह-
 णत्थं असीअस्स किरियावाइयसयस्स चउरासीए अकिरियवाईणं सत्तट्ठीए अण्णा-
 णियवाईणं बत्तीसाए वेणइयवाईणं तिण्हं तेवट्ठीणं अण्णदिट्ठियसयाणं वूहं किच्चा
 ससमए ठाविज्जति णाणदिट्ठंतवयणणिस्सारं सुट्ठु दरिसयंता विविहवित्थराणुगमपरम-
 सब्भावगुणविसिट्ठा मोक्खपहोयारगा उदारा अण्णाणतमंधकारदुग्गेसु दीवभूआ
 सोवाणा चेव सिद्धिसुगइणिहुत्तमस्स णिक्खोभनिप्पकंपा सुत्तत्था । सुयगडस्स णं
 परित्ता वायणा संखेज्जा अणुओगदारा संखेज्जाओ पडिवत्तीओ संखेज्जा वेढा संखेज्जा
 सिलोगा संखेज्जाओ निज्जुत्तीओ । से णं अंगट्ठयाए दोचे अंगे दो सुयक्खंधा तेवीसं
 अज्झयणा तेत्तीसं उद्देसणकाला तेत्तीसं समुद्देसणकाला छत्तीसं पदसहस्साई पय-
 ग्गेणं पन्नत्ताई, संखेज्जा अक्खरा अणंता गमा अणंता पज्जवा परित्ता तसा अणंता
 थावरा सासया कडा णिबद्धा णिकाइया जिणपण्णत्ता भावा आघविज्जंति पण्णविज्जंति
 पुरुविज्जंति दंसिज्जंति निदंसिज्जंति उवदंसिज्जंति । से एवं आया एवं णाया एवं
 विण्णाया एवं चरणकरणपुरुवणया आघविज्जंति पण्णविज्जंति पुरुविज्जंति दंसिज्जंति
 निदंसिज्जंति उवदंसिज्जंति । सेत्तं सूअगडे ॥ २१२ ॥ से किं तं ठाणे ? ठाणे णं
 ससमया ठाविज्जंति, परसमया ठाविज्जंति, ससमयपरसमया ठाविज्जंति, जीवा
 ठाविज्जंति, अजीवा ठाविज्जंति, जीवाजीवा ठाविज्जंति, लोगा ठाविज्जंति, अलोगा
 ठाविज्जंति, लोगालोगा ठाविज्जंति, ठाणेणं दव्वगुणखेत्तकालपज्जवपयत्थाणं-सेला
 सलिला य समुदा, सूरभवणविमाणआगरणदीओ । णिहिओ पुरिसज्जाया, सरा य
 गोत्ता य जोइसंचाला ॥ १ ॥ एकविहवत्तव्वयं दुविह जाव दसविहवत्तव्वयं, जीवाण
 पोगगलाण य लोगट्ठाई च णं पुरुवणया आघविज्जंति । ठाणस्स णं परित्ता वायणा,
 संखेज्जा अणुओगदारा, संखेज्जाओ पडिवत्तीओ, संखेज्जा वेढा, संखेज्जा सिलोगा,
 संखेज्जाओ संगहणीओ । से णं अंगट्ठयाए तइए अंगे, एगे सुयक्खंधे, दस अज्झ-
 यणा, एकवीसं उद्देसणकाला, (एकवीसं समुद्देसणकाला), बावत्तरिं पयसहस्साई
 पयग्गेणं पन्नत्ताई । संखेज्जा अक्खरा, (अणंता गमा) अणंता पज्जवा, परित्ता
 तसा, अणंता थावरा, सासया कडा णिबद्धा णिकाइया जिणपन्नत्ता भावा आघवि-
 ज्जंति पण्णविज्जंति पुरुविज्जंति (दंसिज्जंति) निदंसिज्जंति उवदंसिज्जंति । से एवं
 आया एवं णाया एवं विण्णाया एवं चरणकरणपुरुवणया आघविज्जंति । से तं ठाणे
 ॥ २१३ ॥ से किं तं समवाए ? समवाए णं ससमया सूइज्जंति, परसमया सूइज्जंति,

ससमयपरसमया सइज्जंति, जाव लोगालोगा सइज्जंति । समवाए णं एकाइयाणं
 एगुट्ठाणं एगुत्तरियपरिवुद्धीए, दुवालसंगस्स य गणिपिडगस्स पल्लवग्गे सम-
 गुगाइज्जइ ठाणगसयस्स, बारसविहवित्थरेस्स सुयणाणस्स जगजीवहियस्स भगवओ
 समासेणं समोयारे आहिज्जति । तत्थ य नाणाविहप्पगारा जीवाजीवा य वणिण्या
 वित्थरेण, अवरे वि अ बहुविहा विसेसा नरगतिरियमणुअसुरगणाणं आहारुस्सास-
 लेसाआवाससंखआययप्पमाणउववायचवणओगाहणोवहिवेयणविहाणउवओगजोगइं-
 दियकसाय, विविहा य जीवजोणी, विक्खंभुस्सेहपरिरयप्पमाणं विहिविसेसा य मंद-
 रादीणं महीधराणं, कुलगरतित्थगरगणहराणं सम्मत्तभरहाहिवाण चक्कीणं चैव चक्क-
 हरहलहराण य, वासाण य निगमा य समाए । एए अण्णे य एवमाइ एत्थ वित्थ-
 रेणं अत्था समाहिज्जंति । समवायस्स णं परित्ता वायणा जाव से णं अंगट्ठयाए
 चउत्थे अंगे एगे अज्झयणे एगे सुयक्खंधे एगे उद्देसणकाले एगे समुद्देसणकाले एगे
 चउयाले पदसतसहस्से पदग्गेणं पन्नते । संखेज्जाणि अक्खराणि जाव चरणकरण-
 परुवणया आघविज्जंति । से तं समवाए ॥ २१४ ॥ से किं तं वियाहे ? वियाहेणं
 ससमया विआहिज्जंति परसमया विआहिज्जंति ससमयपरसमया विआहिज्जंति, जीवा
 विआहिज्जंति अजीवा विआहिज्जंति जीवाजीवा विआहिज्जंति, लोगे विआहिज्जइ
 अलोगे विआहिज्जइ लोगालोगे विआहिज्जइ । वियाहेणं नाणाविहसुरनरिंदरायरिसि-
 विविहसंसइअपुच्छियाणं जिणेणं वित्थरेण भासियाणं दव्वगुणखेतकालपज्जवपदेस-
 परिणामजहच्छियभावअणुगमनिक्खेवणयप्पमाणसुनिउणोवक्कमविहिवप्पकारपगडप-
 यासियाणं लोगालोगपयासियाणं संसारसमुद्दंदउत्तरणसमत्थाणं सुरवइसंपूजियाणं
 भवियजणपयहिययाभिन्दियाणं तमरयविद्धंसणाणं सुदिट्ठदीवभूयईहामतिबुद्धिवद्ध-
 णाणं छत्तीससहस्समणूयाणं वागरणाणं दंसणाओ सुयत्थबहुविहप्पगारा सीस-
 हियत्था य गुणमहत्था । वियाहस्स णं परित्ता वायणा संखेज्जा अणुओगदारा संखे-
 ज्जाओ पडिवत्तीओ संखेज्जा वेढा संखेज्जा सिलोगा संखेज्जाओ निज्जुत्तीओ । से णं
 अंगट्ठयाए पंचमे अंगे एगे सुयक्खंधे एगे साइरेगे अज्झयणसते दस उद्देसगसहस्साइं
 दस समुद्देसगसहस्साइं छत्तीसं वागरणसहस्साइं चउरासीइं पयसहस्साइं पयग्गेणं
 प० । संखेज्जाइं अक्खराइं अणंता गमा अणंता पज्जवा परित्ता तसा अणंता थावरा
 सासया कडा णिबद्धा णिकाइया जिणपण्णत्ता भावा आघविज्जंति पण्णविज्जंति परुविज्जं-
 ति दंसिज्जंति निदंसिज्जंति उवदंसिज्जंति । से एवं आया से एवं णाया से एवं विण्णाया
 एवं चरणकरणपरुवणया आघविज्जंति । से तं वियाहे ॥ से किं तं णायाधम्मकहाओ ?
 णायाधम्मकहासु णं णायाणं णगराईं उज्जाणाईं वणखंडा रायाणो अम्मापियरो

समोसरणाई धम्मायरिया धम्मकहाओ इहलोइयपरलोइअइड्ढीविसेसा भोगपरिच्चाया पव्वजाओ सुयपरिग्गहा तवोवहाणाई परियागा संलेहणाओ भत्तपच्चक्खाणाई पाओ-
व्रगमणाई देवलोगगमणाई सुकुलपच्चायायाई पुणबोहिलाभा अंतकिरियाओ य आघ-
विजंति जाव नायाधम्मकहासु णं पव्वइयाणं विणयकरणजिणसामिसासणवरे संज-
मपइणपालगधिइमइववसायदुब्बलाणं तवनिमत्तवोवहाणरणदुद्धरभरभग्गयणिस्स-
इयणिसिद्धाणं घोरपरीसहपराजियाणं सहपारद्धरुद्धसिद्धालयमग्गनिग्गयाणं विसयसुह-
तुच्छआसावसदोसमुच्छियाणं विराहियचरित्तनाणदंसणजइगुणविविहप्पयारनिस्सार-
सुन्नयाणं संसारअपारदुक्खदुग्गइभवविविहपरंपरापवंचा । धीराण य जियपरिसहक-
सायसेण्णधिइधणियसंजमउच्छाहनिच्छियाणं आराहियनाणदंसणचरित्तजोगनिस्सल्ल-
सुद्धसिद्धालयमग्गमभिमुहाणं सुरभवणविमाणसुक्खाई अणोवमाई भुत्तूण चिरं च
भोगभोगाणि ताणि दिव्वाणि महरिहाणि ततो य कालक्कमचुयाणं जह य पुणो लद्ध-
सिद्धिमग्गाणं अंतकिरिया । चलियाण य सदेवमाणुस्सधीरकरणकारणानि बोधण-
अणुसासणाणि गुणदोसदरिसणाणि दिट्ठंते पच्चये य सोऊण लोगमुणिणो जहद्विय-
सासणम्मि जरमरणनासणकरे आराहिअसंजमा य सुरलोगपडिनियत्ता ओवेंति जह
सासयं सिवं सव्वदुक्खमोक्खं । एए अण्णे य एवमाइअत्था वित्थरेण य । णाया-
धम्मकहासु णं परिता वायणा संखेज्जा अणुओगदारा जाव संखेज्जाओ संगहणीओ ।
से णं अंगट्टयाए छट्ठे अंगे दो सुअक्खंधा एगूणवीसं अज्झयणा, ते समासओ
दुविहा पन्नत्ता, तं जहा-चरित्ता य कप्पिया य, दस धम्मकहाणं वग्गा, तत्थ णं
एगमेगाए धम्मकहाए पंच पंच अक्खाइयासयाई एगमेगाए अक्खाइयाए पंच
पंच उवक्खाइयासयाई, एगमेगाए उवक्खाइयाए पंच पंच अक्खाइयउवक्खा-
इयासयाई, एवमेव सपुव्वावरेणं अद्दुट्ठाओ अक्खाइयाकोडीओ भवंतीति मक्खा-
याओ, एगूणतीसं उद्देसणकाला एगूणतीसं समुद्देसणकाला संखेज्जाई पयसह-
स्साई पयग्गेणं पन्नत्ता, संखेज्जा अक्खरा जाव चरणकरणपरूवणया आघविजंति ।
से तं णायाधम्मकहाओ ॥ २१५ ॥ से किं तं उवासगदसाओ ? उवास-
गदसासु णं उवासयाणं णगराई उज्जाणाई वणखंडा रायाणो अम्मापियरो समोस-
रणाई धम्मायरिया धम्मकहाओ इहलोइयपरलोइयइड्ढिविसेसा उवासयाणं सीलव्व-
यवेरमणगुणपच्चक्खाणपोसहोववासपडिवज्जणयाओ सुयपरिग्गहा तवोवहाणा पडि-
माओ उवसग्गा संलेहणाओ भत्तपच्चक्खाणाई पाओव्रगमणाई देवलोगगमणाई सुकु-
लपच्चायाया पुणो बोहिलाभा अंतकिरियाओ आघविजंति । उवासगदसासु णं उवा-
सयाणं रिद्धिविसेसा परिसा वित्थरधम्मसवणाणि बोहिलाभअभिगमसम्मत्तविसुद्धया

थिरत्तं मूलगुणउत्तरगुणाइयारा ठिईविसेसा य बहुविसेसा पडिमाभिग्गहग्गहणपालणा
 उवसग्गाहियासणा णिरुवसग्गा य तवा य विचित्ता सीलव्वयगुणवेरमणपच्चक्खाण-
 पोसहोववासा अपच्छिममारणंतिया य संलेहणाज्जोसणाहिं अप्पाणं जह य भावइत्ता
 बहूणि भत्ताणि अणसणाए य छेअइत्ता उववण्णा कप्पवरविमाणुत्तमेसु जह अणुभ-
 वंति सुरवरविमाणवरपोंडरीएसु सोक्खाई अणोवमाई कमेण भुत्तूण उत्तमाई तओ
 आउक्खएणं चुया समाणा जह जिणमयंमि बोहिं लद्धूण य संजमुत्तमं तमरयोघ-
 विप्पमुक्का उवेंति जह अक्खयं सव्वदुक्खमोक्खं । एते अन्ने य एवमाइअत्था वित्थ-
 रेण य । उवासयदसासु णं परित्ता वायणा संखेज्जा अणुओगदारा जाव संखेज्जाओ
 संगहणीओ । से णं अंगट्ठयाए सत्तमे अंगे एगे सुयक्खंधे दस अज्झयणा दस उद्दे-
 सणकाला दस समुद्देसणकाला संखेज्जाई पयसयसहस्साई पयग्गेणं पणत्ता । संखे-
 ज्जाई अक्खराई जाव एवं चरणकरणपरुवणया आघविजंति । से तं उवासगदसाओ
 ॥ २१६ ॥ से किं तं अंतगडदसाओ ? अंतगडदसासु णं अंतगडणं नगराई उज्जाणाई
 वण्णाई राया अम्मापियरो समोसरणा धम्मायरिया धम्मकहा इहलोइयपरलोइयइद्धिवि-
 सेसा भोगपरिचाया पव्वजाओ सुयपरिग्गहा तवोवहाणाई पडिमाओ बहुविहाओ खमा
 अज्जवं मद्दवं च सोअं च सच्चसहियं सत्तरसविहो य संजमो उत्तमं च वंभं आकिं-
 चणया तवो चियाओ समिइगुत्तीओ चेव तह अप्पमायजोगो सज्झायज्झाणेण य
 उत्तमाणं दोण्हं पि लक्खणाई पत्ताण य संजमुत्तमं जियपरीसहाणं चउव्विहक्कम्म-
 क्खयम्मि जह केवलस्स लंभो परियाओ जत्तिओ य जह पालिओ मुणिहिं पायो-
 वगओ य जो जहिं जत्तियाणि भत्ताणि छेअइत्ता अंतगडो मुनिवरो तमरयोघविप्प-
 मुक्को मोक्खसुहमणुत्तरं च पत्ता । एए अन्ने य एवमाइअत्था वित्थारेणं परुवेई ।
 अंतगडदसासु णं परित्ता वायणा संखेज्जा अणुओगदारा जाव संखेज्जाओ संगह-
 णीओ, जाव से णं अंगट्ठयाए अट्ठमे अंगे एगे सुयक्खंधे दस अज्झयणा सत्त वग्गा
 दस उद्देसणकाला दस समुद्देसणकाला संखेज्जाई पयसयसहस्साई पयग्गेणं प०
 संखेज्जा अक्खरा जाव एवं चरणकरणपरुवणया आघविजंति । से तं अंतगड-
 दसाओ ॥ २१७ ॥ से किं तं अणुत्तरोववाइयदसाओ ? अणुत्तरोववाइयदसासु णं
 अणुत्तरोववाइयाणं नगराई उज्जाणाई वणखंडा रायाणो अम्मापियरो समोसरणाई
 धम्मायरिया धम्मकहाओ इहलोगपरलोइद्धिविसेसा भोगपरिचाया पव्वजाओ
 सुयपरिग्गहा तवोवहाणाई परियागो पडिमाओ संलेहणाओ भत्तपाणपच्चक्खाणाई
 पाओवगमणाई अणुत्तरोववाओ सुकुलपचायाया पुणो बोहिलाभो अंतकिरियाओ य
 आघविजंति । अणुत्तरोववाइयदसासु णं तिथकरसमोसरणाई परमंगलजगहियाणि

जिणातिसेसा य बहुविसेसा जिणसीसाणं चेव समणगणपवरगंधहत्थीणं थिरजसाणं
 परिसहसेण्णरिउवलपमद्दणाणं तवदित्तचरित्तणाणसम्मत्तसारविविहप्पगारवित्थरपस-
 त्थगुणसंजुयाणं अणगारमहरिसीणं अणगारगुणाण वण्णओ उत्तमवरतवविसिट्ठणाण-
 जोगजुत्ताणं जह य जगहियं भगवओ जारिसा इट्ठिविसेसा देवासुरमाणसाणं परि-
 साणं पाउब्भावा य जिणसमीवं जह य उवासंति जिणवरं जह य परिकहंति धम्मं
 लोगगुरु अमरनरसुरगणाणं सौळण य तस्स भासियं अवसेसकम्मविसयविरत्ता नरा
 जहा अब्भुवेति धम्ममुरालं संजमं तवं चावि बहुविहप्पगारं जह बहूणि वासाणि
 अणुचरित्ता आराहियनाणदंसणचरित्तजोगा जिणवयणमणुगयमहियभासिया जिणव-
 राण हिययेणमणुणेत्ता जे य जहिं जत्तियाणि भत्ताणि छेअइत्ता लद्धूण य समाहि-
 मुत्तमज्झाणजोगजुत्ता उववच्चा मुणिवरोत्तमा जह अणुत्तरेसु पावंति जह अणुत्तरे
 तत्थ विसयसोक्खं तओ य चुआ कमेण काहिंति संजया जहा य अंतकिरियं एए
 अन्ने य एवमाइअत्था वित्थरेण । अणुत्तरोववाइयदसासु णं परित्ता वायणा संखेज्जा
 अणुओगदारा संखेज्जाओ संगहणीओ । से णं अंगट्ठयाए नवमे अंगे एगे सुयक्खंवे
 दस अज्झयणा तिन्नि वग्गा दस उद्देसणकाला दस समुद्देसणकाला संखेज्जाइं पय-
 सयसहस्साइं पयग्गेणं प० । संखेज्जाणि अक्खराणि जाव एवं चरणकरणपरूवणया
 आघविज्जंति । से तं अणुत्तरोववाइयदसाओ ॥ २१० ॥ से किं तं पण्हावागरणाणि ॥
 पण्हावागरणेसु णं अट्ठुत्तरं पसिणसयं अट्ठुत्तरं अपसिणसयं अट्ठुत्तरं पसिणापसिणसयं
 विज्जाइसया नागसुवच्चेहिं सद्धिं दिव्वा संवाया आघविज्जंति । पण्हावागरणदसासु
 णं ससमयपरसमयपण्णवयपत्तेअबुद्धविविहत्थभासाभासियाणं अइसयगुणउवसमणाण-
 प्पगारआयरियभासियाणं वित्थरेणं वीरमहेसीहिं विविहवित्थरभासियाणं च जगहि-
 याणं अद्दागुट्ठबाहुअसिमणिखोमआइच्चमाइयाणं विविहमहापसिणविज्जामणपसिण-
 विज्जादेवयपयोगपहाणगुणप्पगासियाणं सब्भूयदुगुणप्पभावनरगणमइविम्हयकराणं
 अईसयमईयकालसमयदमसमतित्थकरत्तमस्स ठिइकरणकारणाणं दुरहिगमदुरवगा-
 हस्स सव्वसव्वन्नसम्मअस्स अबुहजणविबोहणकरस्स पच्चक्खयपच्चयकराणं पण्हाणं
 विविहगुणमहत्था जिणवरप्पणीया आघविज्जंति । पण्हावागरणेसु णं परित्ता वायणा
 संखेज्जा अणुओगदारा जाव संखेज्जाओ संगहणीओ । से णं अंगट्ठयाए दसमे अंगे
 एगे सुयक्खंवे पणयालीसं उद्देसणकाला पणयालीसं समुद्देसणकाला संखेज्जाणि पय-
 सयसहस्साणि पयग्गेणं पत्तत्ता । संखेज्जा अक्खरा अणंता गमा जाव चरणकरण-
 परूवणया आघविज्जंति । से तं पण्हावागरणाइं ॥ २११ ॥ से किं तं विवागसुयं ॥
 विवागसुए णं सुक्कडुक्कडाणं कम्माणं फलविवागे आघविज्जंति से समासओ दुविहे

पचते, तं जहा-दुहविवागे चेव सुहविवागे चेव । तत्थ णं दस दुहविवागाणि दस
सुहविवागाणि । से किं तं दुहविवागाणि ? दुहविवागेसु णं दुहविवागाणं नगराई
उज्जाणाई वणखंडा रायाणो अम्मापियरो समोसरणाई धम्मायरिया धम्मकहाओ
नगरगमणाई संसारपवंधे दुहपरंपराओ य आघविजंति । से तं दुहविवागाणि । से
किं तं सुहविवागाई ? सुहविवागेसु सुहविवागाणं नगराई उज्जाणाई वणखंडा रायाणो
अम्मापियरो समोसरणाई धम्मायरिया धम्मकहाओ इहलोइयपरलोइयइद्धिविसेसा
भोगपरिचाया पव्वजाओ सुयपरिग्गहा तवोवहाणाई परियागा पडिमाओ संलेह-
णाओ भत्तपच्चक्खाणाई पाओवगमणाई देवलोवगमणाई सुकुलपच्चाया पुण बोहि-
लाहा अंतकिरियाओ य आघविजंति । दुहविवागेसु णं पाणाइवायअलियवयणचोरि-
क्ककरणपरदारमेहुणससंगयाए महतिव्वकसायईदियप्पमायपावप्पओयअसुहज्जवसा-
णसंचियाणं कम्माणं पावगाणं पावअणुभागकलविवागा णिरयगतितिरिक्खजोणिबहु-
विहवसणसयपरंपरापवद्धाणं मणुयत्ते वि आगयाणं जहा पावकम्मसेसेण पावगा
होति फलविवागा बहवसणविणासनासाक्कुट्टुण्डुकरचरणनहच्छेयणजिम्भच्छेअण-
अंजणकडग्गिदाहगयचलणमलणफालणउल्लवणसूललयालउडलट्ठिभंजणतउसीसगत-
त्ततेल्लकलकअहिसिंचणकुंमिपागककंपणथिरबंधणवेहवज्जकतणपतिभयकरकपल्ली-
वणादिदाहणाणि दुक्खाणि अगोवमाणि । बहुविहपरंपराणुबद्धा ण मुच्चंति पावकम्म-
वल्लीए, अवैयइत्ता हु णत्थि मोक्खो तवेण धिइधणियवद्धकच्छेण सोहणं तस्स वावि
हुज्जा । एत्तो य सुहविवागेसु णं सीलसंजमणियमगुणतवोवहाणेसु साहसु सुविहिएसु
अणुकंपासयप्पओगतिकालमइविउद्धभत्तपाणाई पययमणसा हियसुहनीससतिव्वपरि-
णामनिच्छियमई पयच्छिऊणं पयोगसुद्धाई जह य निव्वंतेति उ बोहिलामं जह
य परितीकरंति नरनरयतिरियसुरगमणविपुलपरियट्ठअरतिभयविसाससोगमिच्छत्तसे-
लसंकडं अन्नाणतमंधकारं चिक्खिल्लसुदुत्तारं जरमरणजोणिंसंखुभियचक्कवालं सोल-
सकसायसावयपयंडचंडं अणाइअं अणवदग्गं संसारसागरमिणं । जह य णिवंधंति
आउगं सुरगणेसु जह य अणुभवन्ति सुरगणविमाणसोक्खाणि अगोवमाणि ततो य
कालंतरे चुआगं इहेव नरलोगमागयाणं आउवपुपु(व)ण्णहवजातिकुलजम्मआरोग-
सुद्धिमेहविसेसा मित्तजणसयणधणधणविभवसमिद्धसारसमुदयविसेसा बहुविहकाम-
भोगुब्भवाण सोक्खाण सुहविवागोत्तमेसु अणुवरयपरंपराणुबद्धा असुभाणं सुभाणं चेव
कम्माणं भासिआ बहुविहा विवागा विवागसुयम्मि भगवया जिगवरेण संवेगकार-
णत्था अजे वि य एवमाइया बहुविहा वित्थरेणं अत्यपरुवणया आघविजंति । विवा-
गसुअस्स णं परिता वायगा संलेज्जा अणुओगदारा जाव संलेज्जाओ संगहणीओ ।

से णं अंगट्ठयाए एक्कारसमे अंगे वीसं अज्झयणा वीसं उद्देसणकाला वीसं समुद्देस-
णकाला । संखेज्जाई पयसयसहस्साई पयग्गेणं पन्नत्ता । संखेज्जाणि अक्खराणि
अणंता गमा अणंता पज्जवा जाव एवं चरणकरणपरूवणया आघविजंति । से त्तं
विवागसुए ॥ २२० ॥ से किं तं दिट्ठिवाए ? दिट्ठिवाए णं सव्वभावपरूवणया आघ-
विजंति । से समासओ पंचविहे पन्नत्ते, तं जहा-परिकम्मं, सुत्ताई, पुव्वगयं, अणु-
ओगो, चूलिया । से किं तं परिकम्मं ? परिकम्मं सत्तविहे पन्नत्ते, तं जहा-सिद्धसेणि-
यापरिकम्मं, मणुस्ससेणियापरिकम्मं, पुट्ठसेणियापरिकम्मं, ओगाहणसेणियापरिकम्मं,
उवसंपज्जसेणियापरिकम्मं, विप्पजहसेणियापरिकम्मं, चुआचुअसेणियापरिकम्मं । से
किं तं सिद्धसेणियापरिकम्मं ? सिद्धसेणियापरिकम्मं चोद्दसविहे पन्नत्ते, तं जहा-माउ-
यापयाणि, एगट्ठियपयाणि, पादोट्ठपयाणि, आगासपयाणि, केउभूयं, रासिबद्धं,
एगगुणं, दुगुणं, तिगुणं, केउभूयं, पडिग्गहो, संसारपडिग्गहो, नंदावत्तं, सिद्धबद्धं, से
त्तं सिद्धसेणियापरिकम्मं । से किं तं मणुस्ससेणियापरिकम्मं ? मणुस्ससेणियापरिकम्मं
चोद्दसविहे पन्नत्ते, तं जहा-ताईं चैव माउआपयाणि जाव नंदावत्तं मणुस्सबद्धं, से
त्तं मणुस्ससेणियापरिकम्मं । अवसेसा परिकम्माईं पुट्ठाइयाईं एक्कारसविहाईं पन्न-
त्ताईं । इच्चेयाईं सत्त परिकम्माईं, छ ससमइयाईं सत्त आजीवियाईं, छ चउक्कण-
इयाईं सत्त तेरासियाईं, एवामेव सपुव्वावरेणं सत्त परिकम्माईं तेसीति भवंतीति
मक्खायाईं, से त्तं परिकम्माईं ॥ २२१ ॥ से किं तं सुत्ताईं ? सुत्ताईं अट्ठासीति
भवंतीति मक्खायाईं, तं जहा-उजुगं परिणयापरिणयं बहुभंगियं विप्पच्चइयं [विन-
(ज)यचरियं] अणंतरं परंपरं समाणं संजुहं [मासाणं] संभिन्नं अहाच्चयं [अह-
व्वायं नन्दीए] सोवत्थि(वत्तं) यं णंदावत्तं बहुलं पुट्ठापुट्ठं वियावत्तं एवंभूयं दुआवत्तं
वत्तमाणपयं समभिरुद्धं सव्वओभइं पणामं [पस्सासं नन्दीए] दुपडिग्गहं इच्चेयाईं
बावीसं सुत्ताईं छिण्णछेअणइआईं ससमयसुत्तपरिवाडीए इच्चेयाईं बावीसं सुत्ताईं
अछिन्नछेअणइयाईं आजीवियसुत्तपरिवाडीए, इच्चेआईं बावीसं सुत्ताईं तिकणइयाईं
तेरासियसुत्तपरिवाडीए, इच्चेआईं बावीसं सुत्ताईं चउक्कणइयाईं ससमयसुत्तपरिवाडीए,
एवामेव सपुव्वावरेणं अट्ठासीति सुत्ताईं भवंतीति मक्खायाईं, से त्तं सुत्ताईं ॥ २२२ ॥
से किं तं पुव्वगयं ? पुव्वगयं चउद्दसविहं पन्नत्तं, तं जहा-उप्पायपुव्वं, अग्गेणीयं,
वीरियं, अत्थिणत्थिप्पवायं, नाणप्पवायं, सच्चप्पवायं, आयप्पवायं, कम्मप्पवायं,
पच्चक्खानप्पवायं, विज्जाणुप्पवायं, अवंहं, पाणाऊ, किरियाविसालं, लोग्गिंदुसारं ।
उप्पायपुव्वस्स णं दसवत्थू पन्नत्ता, चत्तारि चूलियावत्थू पन्नत्ता । अग्गेणियस्स णं
पुव्वस्स चोद्दसवत्थू प०, बारस चूलियावत्थू प० । वीरियप्पवायस्स णं पुव्वस्स

अट्ट वत्थू प०, अट्ट चूलियावत्थू प० । अत्थिणत्थिप्पवायस्स णं पुव्वस्स अट्टारस वत्थू प०, दस चूलियावत्थू प० । नाणप्पवायस्स णं पुव्वस्स बारस वत्थू प० । सच्चप्पवायस्स णं पुव्वस्स दो वत्थू प० । आयप्पवायस्स णं पुव्वस्स सोलस वत्थू प० । कम्मप्पवायपुव्वस्स णं तीसं वत्थू प० । पच्चक्खाणस्स णं पुव्वस्स वीसं वत्थू प० । विज्जाणुप्पवायस्स णं पुव्वस्स पनरस वत्थू प० । अवंझस्स णं पुव्वस्स बारस वत्थू प० । पाणाउस्स णं पुव्वस्स तेरस वत्थू प० । किरियाविसालस्स णं पुव्वस्स तीसं वत्थू प० । लोगविदुसारस्स णं पुव्वस्स पणवीसं वत्थू प० । “दस चोदस अट्टट्टारसे व बारस दुवे य वत्थूणि । सोलस तीसा वीसा पन्नरस अणुप्पवायम्मि ॥ बारस एक्कारसमे, बारसमे तेरसेव वत्थूणि । तीसा पुण तेरसमे चउदसमे पन्नवीसाओ । चत्तारि दुवालस अट्ट चेव दस चेव चूलवत्थूणि । आतिळ्ळण चउण्हं, सेसाणं चूलिया णत्थि” से तं पुव्वगयं ॥ २२३ ॥ से किं तं अणुओगे ? अणुओगे दुविहे पन्नते, तं जहा-मूलपढमाणुओगे य गंडियाणुओगे य । से किं तं मूलपढमाणुओगे ? एत्थ णं अरहंताणं भगवंताणं पुव्वभवा देवलोगगमणाणि आउं चवणाणि जम्मणाणि अ अभिसेया रायवरसिरीओ सीयाओ पव्वजाओ तवा य भत्ता केवलणाणुप्पाया अ तित्थपवत्तणाणि अ संघयणं संठाणं उच्चत्तं आउं वन्नविभागो सीसा गणा गणहरा य अज्जा पवत्तणीओ संघस्स चउट्ठिवहस्स जं वावि परिमाणं जिणमणपज्जवओहिनाणसम्मत्तसुयनाणिणो य वाई अणुत्तरगई य जत्तिया सिद्धा पाओवगया य जे जहिं जत्तियाई भत्ताई छेअइत्ता अंतगडा मुणिवरुत्तमा तमरओघविप्पमुक्का सिद्धिपहमणुत्तरं च पत्ता, एए अब्बे य एवमाइया भावा मूलपढमाणुओगे कहिआ आघविज्जंति पण्णविज्जंति परुविज्जंति, से तं मूलपढमाणुओगे । से किं तं गंडियाणुओगे ? (गंडियाणुओगे) अणेगविहे पन्नते, तं जहा-कुलगरगंडियाओ तित्थगरगंडियाओ गणहरगंडियाओ चक्करगंडियाओ दसारगंडियाओ बलदेवगंडियाओ वासुदेवगंडियाओ हरिवंसगंडियाओ भद्वाहुगंडियाओ तवोकम्मगंडियाओ चित्तंतरगंडियाओ उस्सप्पिणीगंडियाओ ओसप्पिणीगंडियाओ अमरनरतरियनिरयगहगमणविहपरियट्टणाणुओगे, एवमाइयाओ गंडियाओ आघविज्जंति पण्णविज्जंति परुविज्जंति, से तं गंडियाणुओगे ॥ २२४ ॥ से किं तं चूलियाओ ? जण्णं आइळ्ळणं चउण्हं पुव्वाणं चूलियाओ सेसाई पुव्वाई अचूलियाई, से तं चूलियाओ ॥ २२५ ॥ दिट्ठिवायस्स णं परित्ता वायणा, संखेज्जा अणुओगदारा संखेज्जाओ पडिवत्तीओ संखेज्जाओ निज्जुत्तीओ संखेज्जा सिलोगा संखेज्जाओ संगहणीओ, से णं अंगट्टयाए बारसमे अगे एगे सुयक्खंधे चउदस पुव्वाई संखेज्जा वत्थू संखेज्जा चूलवत्थू संखेज्जा

पाहुडा संखेज्जा पाहुडपाहुडा संखेज्जाओ पाहुडियाओ संखेज्जाओ पाहुडपाहुडियाओ
 संखेज्जाणि पयसयसहस्साणि पयग्गेणं पज्जा, संखेज्जा अक्खरा अणंता गमा अणंता
 पज्जा परिता तसा अणंता थावरा सासया कडा णिबद्धा णिकाइया जिणपण्णत्ता
 भावा आघविज्जंति पण्णविज्जंति परूविज्जंति दंसिज्जंति निदंसिज्जंति उवदंसिज्जंति, एवं
 णाया एवं विण्णाया एवं चरणकरणपरूवणया आघविज्जंति, से तं दिट्ठिवाए, से तं
 दुवालसंगे गणिपिडगे ॥ २२६ ॥ इच्चेइयं दुवालसंगं गणिपिडगं अतीतकाले अणंता
 जीवा आणाए विराहिता चाउरंतसंसारकंतारं अणुपरियट्ठिस्सु, इच्चेइयं दुवालसंगं
 गणिपिडगं पडुप्पण्णे काले परिता जीवा आणाए विराहिता चाउरंतसंसारकंतारं
 अणुपरियट्ठंति, इच्चेइयं दुवालसंगं गणिपिडगं अणागए काले अणंता जीवा आणाए
 विराहिता चाउरंतसंसारकंतारं अणुपरियट्ठिस्संति, इच्चेइयं दुवालसंगं गणिपिडगं
 अतीतकाले अणंता जीवा आणाए आराहिता चाउरंतसंसारकंतारं वीईवईसु, एवं
 पडुप्पण्णेऽवि, एवं अणागएऽवि । दुवालसंगे णं गणिपिडगे ण कयावि णत्थि, ण
 कयाइ णासी, ण कयाइ ण भविस्सइ, भुविं च भवति य भविस्सति य (अयले)
 धुवे णिति ए सासए अक्खए अव्वए अवट्ठिए णिच्चे, से जहा णामए पंच अत्थिकाया
 ण कयाइ ण आसि, ण कयाइ णत्थि, ण कयाइ ण भविस्सति, भुविं च भवति य
 भविस्सति य, (अयला) धुवा णितिया सासया अक्खया अव्वया अवट्ठिया णिच्चा,
 एवामेव दुवालसंगे गणिपिडगे ण कयाइ ण आसि, ण कयाइ णत्थि, ण कयाइ ण
 भविस्सइ, भुविं च भवति य भविस्सइ य, (अयले) धुवे जाव अवट्ठिए णिच्चे ।
 एत्थ णं दुवालसंगे गणिपिडगे अणंता भावा अणंता अभावा अणंता हेऊ अणंता
 अहेऊ अणंता कारणा अणंता अकारणा अणंता जीवा अणंता अजीवा अणंता भव-
 सिद्धिया अणंता अभवसिद्धिया अणंता सिद्धा अणंता असिद्धा आघविज्जंति पण्णवि-
 ज्जंति परूविज्जंति दंसिज्जंति निदंसिज्जंति उवदंसिज्जंति । एवं दुवालसंगं गणिपिडगं इति
 ॥ २२७ ॥ धुवे रासी प० तं जहा-जीवरासी अजीवरासी य । अजीवरासी दुविहा
 प० तं जहा-रूवी अजीवरासी अरूवी अजीवरासी य । से किं तं अरूवी अजीवरासी ?
 अरूवी अजीवरासी दसविहा प० तं जहा-धम्मत्थिकाए जाव अद्धसमए । रूवी
 अजीवरासी अणेगविहा प० । जाव से किं तं अणुत्तरोववाइआ ? अणुत्तरोववाइआ
 पंचविहा प० तं जहा-विजयवेजयंतजयंतअपराजितसव्वदुसिद्धिआ, से तं अणुत्तरो-
 ववाइआ, से तं पंचिदियसंसारसमावण्णजीवरासी । दुविहा णेरइया प० तं जहा-
 पज्जा य अपज्जा य, एवं दंडओ भाणियव्वो जाव वेमाणिय ति । इमीसे णं रयण-
 पभाए पुडवीए केवइयं खेतं ओगाहेत्ता केवइया गिरयावासा प० ?, गोयमा । इमीसे

णं रयणप्पभाए पुढवीए असीउत्तरजोयणसयसहस्सवाहल्लाए उवरि एगं जोयणसहस्सं
 ओगाहेत्ता हेट्ठा चेगं जोयणसहस्सं वज्जेत्ता मज्झे अट्ठसत्तारि जोयणसयसहस्से एत्थ
 णं रयणप्पभाए पुढवीए णेरइयाणं तीसं णिरयावासासयसहस्सा भवतीति मक्खाया ।
 ते णं णिरयावासा अंतो वट्ठा बाहिं चउरंसा जाव असुभा णिरया असुभाओ णिर-
 एसु वेयणाओ, एवं सत्त वि भाणियव्वाओ जं जासु जुज्झइ-आसीयं बत्तीसं अट्ठा-
 वीसं तहेव वीसं च । अट्ठारस सोलसगं अट्ठुत्तरमेव बाहल्लं ॥ १ ॥ तीसा य
 पण्णवीसा पन्नरस दसेव सयसहस्साइं । तिण्णेगं पंचूणं पंचेव अणुत्तरा नरगा ॥२॥
 चउसट्ठी असुराणं चउरासीइं च होइ नागाणं । वावत्तरि सुवच्चाण वाउकुमाराण
 छण्णउइ ॥ ३ ॥ दीवदिसाउदहीणं विज्जुकुमारिंदथणियमग्गीणं । छहं पि जुवल्याणं
 वावत्तरिमो य सयसहसा(स्सा) ॥ ४ ॥ बत्तीसट्ठावीसा बारस अड चउरो य सय-
 सहस्सा । पण्णा चत्तालीसा छच्च सहस्सा सहस्सारे ॥ ५ ॥ आणयपाणयकप्पे
 चत्तारि सयाऽऽरणच्चुए तिन्नि । सत्त विमाणसयाइं चउसु वि एएसु कप्पेसु ॥ ६ ॥
 एक्कारसुत्तरं हेट्ठिमेसु सत्तुत्तरं च मज्झिमए । सयमेगं उवरिमए पंचेव अणुत्तरविमाणा
 ॥ ७ ॥ दोच्चाए णं पुढवीए तच्चाए णं पुढवीए चउत्थीए पुढवीए पंचमीए पुढवीए
 छट्ठीए पुढवीए सत्तमीए पुढवीए गाहाहिं भाणियव्वा । सत्तभाए पुढवीए पुच्छा,
 गोयमा । सत्तभाए पुढवीए अट्ठुत्तरजोयणसयसहस्साइं बाहल्लाए उवरि अद्धतेवन्नं
 जोयणसहस्साइं ओगाहेत्ता हेट्ठा वि अद्धतेवन्नं जोयणसहस्साइं वज्जिता मज्झे तिसु
 जोयणसहस्सेसु एत्थ णं सत्तभाए पुढवीए नेरइयाणं पंच अणुत्तरा महइमहालया
 महानिरया प० तं जहा-काले महाकाले रोरुए महारोरुए अप्पइट्ठाणे नामं पंचमे ।
 ते णं निरया वट्ठे य तंसा य अहे खुरप्पसंठाणसंठिया जाव असुभा नरगा असु-
 भाओ नरएसु वेयणाओ ॥ २२८ ॥ केवइया णं भंते ! असुरकुमारावासा प० ?
 गोयमा ! इमीसे णं रयणप्पभाए पुढवीए असीउत्तरजोयणसयसहस्सवाहल्लाए उवरि
 एगं जोयणसहस्सं ओगाहेत्ता हेट्ठा चेगं जोयणसहस्सं वज्जिता मज्झे अट्ठहत्तरि
 जोयणसयसहस्से एत्थ णं रयणप्पभाए पुढवीए चउसट्ठिं असुरकुमारावासयसयसहस्सा
 प० । ते णं भवणा बाहिं वट्ठा अंतो चउरंसा अहे पोक्खरकण्णिआसंठाणसंठिया
 उक्किण्णंतरविउलंगंभीरखायफलिहा अट्ठालयचरियदारगोउरकवाडतोरणपडिदुवारदेस-
 भागा जंतसुसलमुसंढिसयग्घिपरिवारिया अउज्झा अडयालकोट्टरइया अडयालकय-
 वणमाला लाउल्लोइयमहि्या गोसीससरसत्तचंदणदद्दरिण्णपंचंगुलितला कालागुरु-
 पवरकुंदरुक्कुल्लज्जंतधूवमघमघंतंगंधुडुयाभिरामा सुगंधवरगंधिया गंधवट्ठिभूया
 अच्छा सण्हा लण्हा घट्ठा मट्ठा नीरया णिम्मला वितिमिरा विसुद्धा सप्पभा समि-

रीया सउज्जोआ पासाईया दरिसणिज्जा अभिरुवा पडिरुवा, एवं जं जस्स कमती
तं तस्स जं जं गाहाहिं भणियं तह चेव वण्णओ ॥ २२९ ॥ केवइया णं भंते !
पुढविकाइयावासा प० गोयमा ! असंखेज्जा पुढवीकाइयावासा प० एवं जाव मणुस्स
ति । केवइया णं भंते ! वाणमंतरावासा प० गोयमा ! इमीसे णं रयणप्पभाए पुढ-
वीए रयणामयस्स कंडस्स जोयणसहस्सवाहल्लस्स उवरिं एणं जोयणसयं ओगाहेत्ता
हेट्ठा चेगं जोयणसयं वज्जेत्ता मज्झे अट्ठसु जोयणसएसु एत्थ णं वाणमंतराणं देवाणं
तिरियमसंखेज्जा भोमेज्जा नगरावाससयसहस्सा पन्नत्ता, ते णं भोमेज्जा नगरा बाहिं
वट्ठा अंतो चउरंसा, एवं जहा भवणवासीणं तहेव गेयव्वा, णवरं पडागमालाउला
सुरम्मा पासाईया दरिसणिज्जा अभिरुवा पडिरुवा ॥ २३० ॥ केवइया णं भंते !
जोइसियाणं विमाणावासा पन्नत्ता ? गोयमा ! इमीसे णं रयणप्पभाए पुढवीए बहु-
समरमणिज्जाओ भूमिभागाओ सत्तनउयाईं जोयणसयाईं उट्ठं उप्पइत्ता एत्थ णं दसु-
त्तरजोयणसयवाहल्ले तिरियं जोइसविसए जोइसियाणं देवाणं असंखेज्जा जोइसियवि-
माणावासा पन्नत्ता, ते णं जोइसियविमाणावासा अब्भुगयमूसियपहसिया विविहर-
मणिरयणभत्तिचित्ता वाउड्ढुयविजयवेज्जयंतीपडागल्लत्ताइल्लत्तकलिया तुंगा गगणतल-
मणुलिहंतसिहरा जालंतररयणपन्नरुम्मिलियव्व मणिकणगथूमियागा वियसियसयपत्त-
पुंडरीयतिलययणद्धचंदचित्ता अंतो बाहिं च सण्हा तवणिज्जवालुआपत्थडा सुहफासा
सस्तिरीयरुवा पासाईया दरिसणिज्जा ॥ २३१ ॥ केवइया णं भंते ! वेमाणिआवासा
पन्नत्ता ? गोयमा ! इमीसे णं रयणप्पभाए पुढवीए बहुसमरमणिज्जाओ भूमिभागाओ
उट्ठं चंदिमसूरियगहगणनक्खत्तताराख्वाणं वीइवइत्ता बहूणि जोयणाणि बहूणि जोयण-
सयाणि बहूणि जोयणसहस्साणि बहूणि जोयणसयसहस्साणि बहुइओ जोयणकोडीओ
बहुइओ जोयणकोडाकोडीओ असंखेज्जाओ जोयणकोडाकोडीओ उट्ठं दूरं वीइवइत्ता
एत्थ णं विमाणिआणं देवाणं सोहम्मीसाणसणंकुमारमाहिंदवभलंतगसुक्कसहस्सार-
आणयपाणयआरणअन्नुएसु गेवेज्जगमणुत्तरेसु य चउरासीईं विमाणावाससयसहस्सा
सत्ताणउईं च सहस्सा तेवीसं च विमाणा भवंतीति मक्खाया, ते णं विमाणा अब्धि-
मालिप्पभा भासरासिवण्णाभा अरया नीरया णिम्मला वित्तिमिरा विडुद्धा सव्वरयणा-
मया अच्छा सण्हा घट्ठा मट्ठा णिप्पंका णिक्कं कडच्छाया सप्पभा समरीया सउज्जोया
पासाईया दरिसणिज्जा अभिरुवा पडिरुवा । सोहम्मे णं भंते ! कपे केवइया विमाणा-
वासा प० ? गोयमा ! बत्तीसं विमाणावाससयसहस्सा प०, एवं ईसाणाइसु अट्ठावीस
बारस अट्ठ चत्तारि एयाईं सयसहस्साईं पण्णासं चत्तालीसं छ एयाईं सहस्साईं आणए
पाणए चत्तारि आरण्णुए तिज्जि एयाणि सयाणि, एवं गाहाहिं भाणियव्वं ॥ २३२ ॥

नेरइयाणं भंते ! केवइयं कालं ठिई पज्जता ? गोयमा ! जहन्नेणं दस वाससहस्साई उक्कोसेणं तेत्तीसं सागरोवमाई ठिई प० । अपज्जत्तगाणं नेरइयाणं भंते ! केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेण वि अंतोमुहुत्तं । पज्जत्तगाणं जहन्नेणं दस वाससहस्साई अंतोमुहुत्तूणाई । उक्कोसेणं तेत्तीसं सागरोवमाई अंतोमुहुत्तूणाई । इमीसे णं रयणप्पभाए पुढवीए एवं जाव विजयवेजयंतजयंतअपराजियाणं देवाणं केवइयं कालं ठिई प० ? गोयमा ! जहन्नेणं वत्तीसं सागरोवमाई उक्कोसेणं तेत्तीसं सागरोवमाई । सव्वट्ठे अजहण्णमणुक्कोसेणं तेत्तीसं सागरोवमाई ठिई प० ॥ २३३ ॥ कति णं भंते सरीरा पज्जता ? गोयमा ! पंच सरीरा प०, तं जहा-ओरालिए वेउव्विए आहारए तेयए कम्मए । ओरालियसरीरे णं भंते ! कइविहे पज्जत्ते ? गोयमा ! पंचविहे पज्जत्ते, तं जहा-एगिंदियओरालियसरीरे जाव गब्भवक्कंतियमणुस्सपंचिंदियओरालियसरीरे य । ओरालियसरीरस्स णं भंते ! के महालिया सरीरोगाहणा प० ? गोयमा ! जहन्नेणं अंगुलअसंखेज्जतिभाणं उक्कोसेणं साइरेणं जोयणसहस्सं, एवं जहा ओगाहणसंठाणे ओरालियपमाणं तहा निरवसेसं, एवं जाव मणुस्से त्ति उक्कोसेणं तिणि गाउयाई । कइविहे णं भंते ! वेउव्वियसरीरे पज्जत्ते ? गोयमा ! दुविहे पज्जत्ते-एगिंदियवेउव्वियसरीरे य पंचिंदियवेउव्वियसरीरे य, एवं जाव सणकुमारे आढत्तं जाव अणुत्तराणं भवधारणिज्जा जाव तेसिं रयणी रयणी परिहायइ । आहारयसरीरे णं भंते ! कइविहे प० ? गोयमा ! एगाकारे प० । जइ एगाकारे प० किं मणुस्सआहारयसरीरे अमणुस्सआहारयसरीरे ? गोयमा ! मणुस्सआहारगसरीरे णो अमणुस्सआहारगसरीरे, एवं जइ मणुस्सआहारगसरीरे किं गब्भवक्कंतियमणुस्सआहारगसरीरे संमुच्छिममणुस्सआहारगसरीरे ? गोयमा ! गब्भवक्कंतियमणुस्सआहारगसरीरे नो संमुच्छिममणुस्सआहारगसरीरे । जइ गब्भवक्कंतियमणुस्सआहारयसरीरे किं कम्मभूमिगा० अकम्मभूमिगा० ? गोयमा ! कम्मभूमिगा० नो अकम्मभूमिगा० । जइ कम्मभूमिगा० किं संखेज्जवासाउय० असंखेज्जवासाउय० ? गोयमा ! संखेज्जवासाउय० नो असंखेज्जवासाउय० । जइ संखेज्जवासाउय० किं पज्जत्तय० अपज्जत्तय० ? गोयमा ! पज्जत्तय० नो अपज्जत्तय० । जइ पज्जत्तय० किं सम्मदिट्ठी० मिच्छदिट्ठी० सम्मामिच्छदिट्ठी० ? गोयमा ! सम्मदिट्ठी० नो मिच्छदिट्ठी० नो सम्मामिच्छदिट्ठी० । जइ सम्मदिट्ठी० किं संजय० असंजय० संजयासंजय० ? गोयमा ! संजय० नो असंजय० नो संजयासंजय० । जइ संजय० किं पमत्तसंजय० अपमत्तसंजय० ? गोयमा ! पमत्तसंजय० नो अपमत्तसंजय० । जइ पमत्तसंजय० किं इट्ठिपत्त० अणिट्ठिपत्त० ? गोयमा ! इट्ठिपत्त० नो अणिट्ठिपत्त०

व्ययणा विभाणियव्वा आहारयसरीरे समच्चउरंससंठाणसंठिए । आहारयसरीरस्स के महालिया सरीरोगाहणा प० ? गोयमा ! जह्वेणं देसूणा रयणी उक्कोसेणं पडि-
पुण्णा रयणी । तेआसरीरे णं भंते ! कतिविहे प० ? गोयमा ! पंचविहे पन्नत्ते-
एगिंदियतेयसरीरे बित्तिचउपंच० एवं जाव गेवेज्जस्स णं भंते ! देवस्स णं मार-
णंतियसमुग्घाएणं समोहयस्स समाणस्स के महालिया सरीरोगाहणा प० ? गोयमा !
सरीरप्पमाणमेत्ता विक्खंभवाह्वेणं आयामेणं जह्वेणं अहे जाव विजाहरसेदीओ
उक्कोसेणं जाव अहोलोइयग्गामाओ, उद्धं जाव सयाई विमाणाई, तिरियं जाव
मणुस्सखेत्तं, एवं जाव अणुत्तरोववाइया । एवं कम्मयसरीरं भाणियव्वं ॥ २३४ ॥
मेय विसयसंठाणे, अदिंभत्तर बाहिरे य देसोही । ओहिस्स वुद्धिहाणी, पडिवाई
चेव अपडिवाई ॥ १ ॥ २३५ ॥ कइविहे णं भंते ! ओही प० ? गोयमा ! दुविहा
प०-भवपच्चइए य खओवसमिए य, एवं सव्वं ओहिपदं भाणियव्वं ॥ २३६ ॥
सीया य दव्व सारीर साता तह वेयणा भवे दुक्खा । अब्भुवगसुवक्कमिया णीयाए
चेव अणियाए ॥ १ ॥ नेरइया णं भंते ! किं सीतं वेयणं वेयंति उसिणं वेयणं
वेयंति सीतोसिणं वेयणं वेयंति ? गोयमा ! नेरइया० एवं चेव वेयणापदं भाणियव्वं
॥ २३७ ॥ कइ णं भंते ! लेसाओ पन्नत्ताओ ? गोयमा ! छ लेसाओ पन्नत्ताओ, तं
जहा-किण्हा नीला काऊ तेऊ पम्हा सुक्का, एवं लेसापयं भाणियव्वं ॥ २३८ ॥
अणंतरा य आहारे, आहाराभोगणा इय । पोगगला नेव जाणंति, अज्झवसाणे य
सम्मत्ते ॥ १ ॥ नेरइया णं भंते ! अणंतराहारा तओ निव्वत्तणया तओ परिआइय-
णया तओ परिणामणया तओ परियारणया तओ पच्छा विकुव्वणया ? इत्ता
गोयमा ! एवं आहारपदं भाणियव्वं ॥ २३९ ॥ कइविहे णं भंते ! आउगबंधे
प० ? गोयमा ! छव्विहे आउगबंधे प०, तं जहा-जाइनामनिहत्ताउए गतिनाम-
निहत्ताउए ठिइनामनिहत्ताउए पएसनामनिहत्ताउए अणुभागनामनिहत्ताउए ओगा-
हणानामनिहत्ताउए । नेरइयाणं भंते ! कइविहे आउगबंधे प० ? गोयमा ! छव्विहे
प०, तं जहा-जातिनामनिहत्ताउए गइनामनिहत्ताउए ठिइनामनिहत्ताउए पएस-
नामनिहत्ताउए अणुभागनामनिहत्ताउए ओगाहणानामनिहत्ताउए । एवं जाव वेमा-
णियाणं ॥ २४० ॥ निरयगई णं भंते ! केवइयं कालं विरहिया उववाएणं प० ?
गोयमा ! जह्वेणं एक्कं समयं उक्कोसेणं बारस मुहुत्ते, एवं तिरियगई मणुस्सगई
देवगई । सिद्धिगई णं भंते ! केवइयं कालं विरहिया सिज्झणयाए प० ? गोयमा !
जह्वेणं एक्कं समयं उक्कोसेणं छम्मासे, एवं सिद्धिवज्जा उव्वट्ठणा । इमीसे णं भंते !
रयणप्पभाए पुढवीए नेरइया केवइयं कालं विरहिया उववाएणं ? एवं उववायइंदओ

भाणियव्वो उव्वट्ठणादंडओ य । नेरइया णं भंते ! जातिनामनिहत्ताउगं कति आगरिसेहिं पगरंति ? गोयमा ! सिय १ सिय २ सिय ३ सिय ४ सिय ५ सिय ६ सिय ७ सिय अट्ठहिं, नो चेव णं नवहिं । एवं सेसाण वि आउगाणि जाव वेमाणिय ति ॥ २४१ ॥ कइविहे णं भंते ! संघयणे पन्नत्ते ? गोयमा ! छव्विहे संघयणे पन्नत्ते, तं जहा-वइरोसभनारायसंघयणे रिसभनारायसंघयणे नारायसंघयणे अद्धनारायसंघयणे कीलियासंघयणे छेवट्ठसंघयणे । नेरइया णं भंते ! किंसंघयणी ? गोयमा ! छण्हं संघयणाणं असंघयणी णेव अट्ठि णेव छिरा णेव प्हारु जे पोगगला अणिट्ठा अकंता अप्पिया अणाएजा असुभा अमणुण्णा अमणामा अमणाभिरामा ते तेसिं असंघयणत्ताए परिणमंति । असुरकुमाराणं भंते ! किंसंघयणा प० ? गोयमा ! छण्हं संघयणाणं असंघयणी णेवट्ठी णेव छिरा णेव प्हारु जे पोगगला इट्ठा कंता पिया मणुण्णा मणामा मणाभिरामा ते तेसिं असंघयणत्ताए परिणमंति, एवं जाव थणियकुमाराणं । पुढवीकाइया णं भंते ! किंसंघयणी प० ? गोयमा ! छेवट्ठसंघयणी प०, एवं जाव संमुच्छिमपंचिदियतिरिक्खजोणिय ति । गब्भवक्कंतिया छव्विहसंघयणी, संमुच्छिममणुस्सा छेवट्ठसंघयणी, गब्भवक्कंतियमणुस्सा छव्विहे संघयणे प० । जहा असुरकुमारा तहा वाणमंतरजोइसियवेमाणिया य ॥ २४२ ॥ कइविहे णं भंते ! संठाणे पन्नत्ते ? गोयमा ! छव्विहे संठाणे पन्नत्ते, तं जहा-समचउरंसे १ णिगोहपरिमंडले २ साइए ३ वामणे ४ खुजे ५ हुंडे ६ । नेरइया णं भंते ! किंसंठाणी प० ? गोयमा ! हुंडसंठाणी प० । असुरकुमारा णं भंते ! किंसंठाणी प० ? गोयमा ! समचउरंसंठाणसंठिया प०, एवं जाव थणियकुमारा । पुढवी मसूरसंठाणा प०, आऊ थिडुयसंठाणा प०, तेऊ सूइकलावसंठाणा प०, वाऊ पढागासंठाणा प०, वणस्सई नाणासंठाणसंठिया प०, बेईदियतेईदियचउरिदिय-संमुच्छिमपंचिदियतिरिक्खा हुंडसंठाणा प०, गब्भवक्कंतिया छव्विहसंठाणा प०, संमुच्छिममणुस्सा हुंडसंठाणसंठिया प०, गब्भवक्कंतियाणं मणुस्साणं छव्विहा संठाणा प० । जहा असुरकुमारा तहा वाणमंतरजोइसियवेमाणिया वि ॥ २४३ ॥ कइविहे णं भंते ! वेए पन्नत्ते ? गोयमा ! तिविहे वेए प०, तं जहा-इत्थीवेए पुरिसवेए नपुंसवेए । नेरइया णं भंते ! किं इत्थीवेया पुरिसवेया णपुंसगवेया प० ? गोयमा ! णो इत्थीवेए णो पुंवेए णपुंसगवेया प० । असुरकुमारा णं भंते ! किं इत्थीवेया पुरिसवेया नपुंसगवेया ? गोयमा ! इत्थीवेया पुरिसवेया णो णपुंसगवेया, जाव थणियकुमारा, पुढवी आऊ तेऊ वाऊ वणस्सई वितिचउरिंदियसंमुच्छिमपंचिदियतिरिक्खसंमुच्छिममणुस्सा णपुंसगवेया, गब्भवक्कंतियमणुस्सा पंचिदियतिरिया

य तिवेया, जहा असुरकुमारा तहा वाणमंतरा जोइसियवेमाणिया वि ॥ २४४ ॥
 ते णं काले णं ते णं समए णं कप्पस्स समोसरणं णेयव्वं, जाव गणहरा सावच्चा
 निरवच्चा वोच्छिण्णा ॥ २४५ ॥ जंबुद्दीवे णं दीवे भारहे वासे तीआए उस्सप्पिणीए
 सत्त कुलगरा होत्था, तं जहा-मित्तदामे सुदामे य, सुपासे य सयंपभे । विमलघोसे
 सुघोसे य, महाघोसे य सत्तमे ॥ १ ॥ जंबुद्दीवे णं दीवे भारहे वासे तीआए ओस-
 पिणीए दस कुलगरा होत्था, तं जहा-सयंजळे सयाऊ य, अजियसेणे अणंतसेणे
 य । कजसेणे भीमसेणे, महाभीमसेणे य सत्तमे ॥ २ ॥ दढरहे दसरहे सय-
 रहे ॥ जंबुद्दीवे णं दीवे भारहे वासे इमीसे ओसप्पिणीए समाए सत्त कुलगरा होत्था,
 तं जहा-पढमेत्थ विमलवाहण [चक्खुम जसमं चउत्थमभिचंदे । तत्तो य पसेणईए
 मरुदेवे चेव नाभी य ॥ ३ ॥] एतेसि णं सत्तण्हं कुलगराण सत्त भारिया होत्था,
 तं जहा-चंदजसा चंदकंता [सुख पडिख चक्खुकंता य । सिरिकंता मरुदेवी कुल-
 गरपत्तीण णामाई ॥ ४ ॥] २४६ ॥ जंबुद्दीवे णं दीवे भारहे वासे इमीसे णं ओस-
 पिणीए चउवीसं तित्थगराणं पियरो होत्था, तं जहा-णाभी य जियसत्तू य [जियारी
 संवरे इय । मेहे धरे पड्डेय महसेणे य खत्तिए ॥ ५ ॥ सुग्गीवे दढरहे विण्हू वडु-
 पुजे य खत्तिए । कयवम्मा सीहसेणे भाणू विस्ससेणे इय ॥ ६ ॥ सूरे सुदंसणे
 कुंभे, सुमित्तविजए समुद्विजए य । राया य आससेणे य सिद्धत्थेच्चिय खत्तिए
 ॥ ७ ॥] उदितोदियकुलवंसा विसुद्धवंसा गुणेहि उववेया । तित्थप्पवत्तयाणं एए
 पियरो जिणवराणं ॥ ८ ॥ जंबुद्दीवे णं दीवे भारहे वासे इमीसे ओसप्पिणीए चउ-
 वीसं तित्थगराणं मायरो होत्था, तं जहा-मरुदेवी विजया सेणा [सिद्धत्था मंगला
 सुसीमा य । पुहवी लखणा रामा नंदा विण्हू जया सामा ॥ ९ ॥ सुजसा सुव्वय
 अइरा सिरिया देवी पभावई पउमा । वप्पा सिवा य वामा तिसला देवी य जिण-
 माया ॥ १० ॥] २४७ ॥ जंबुद्दीवे णं दीवे भारहे वासे इमीसे ओसप्पिणीए चउ-
 वीसं तित्थगरा होत्था, तं जहा-उसभ अजिय संभव अभिर्नंदण सुमइ पउमप्पह
 सुपास चंदप्पम सुविहि=पुप्फदंत सीयल सिजंस वासुपुज्ज विमल अणंत धम्म संति
 कुंथु अर मल्लि मुणिसुव्वय णसि णेमि पास वड्डमाणो य ॥ २४८ ॥ एएसिं चउवी-
 साए तित्थगराणं चउव्वीसं पुव्वभवया णामधेया होत्था, तं जहा-पढमेत्थ वइर-
 णामे विमले तह विमलवाहणे चेव । तत्तो य धम्मसीहे सुमित्त तह धम्ममित्ते य
 ॥ ११ ॥ सुंदरबाहु तह दीहबाहु जुगबाहु लड्डबाहु य । दिण्णे य ईददत्ते सुंदर
 माहिंदरे चेव ॥ १२ ॥ सीहरहे मेहरहे रुप्पी अ सुदंसणे य बोद्धवे । तत्तो य
 नंदणे खलु सीहगिरी चेव वीसइमे ॥ १३ ॥ अदीणसत्तु संखे सुदंसणे नंदणे य

बोद्धवे । ओसप्पिणीए एए तित्थकराणं तु पुव्वमवा ॥ १४ ॥ २४५ ॥ एएसि णं
 चउव्वीसाए तित्थगराणं चउव्वीसं सीयाओ होत्था, तं जहा-सीया सुदंसणा सुप्पभा
 य सिद्धत्थ सुप्पसिद्धा य । विजया य वेजयंती जयंती अपराजिया चेव ॥ १५ ॥
 अरुणप्पम चंदप्पम सूरप्पह अग्गि सुप्पभा चेव । विमला य पंचवण्णा सागरदत्ता
 य णागदत्ता य ॥ १६ ॥ अभयकर निव्वुइकरा मणोरमा तह मणोहरा चेव । देव-
 कुरुत्तरकुरा विसाल चंदप्पभा सीया ॥ १७ ॥ एआओ सीआओ सव्वेसिं चेव
 जिणवरिदाणं । सव्वजगवच्छलाणं सव्वोउगसुभाए छायाए ॥ १८ ॥ पुव्वि
 ओक्खित्ता माणसेहिं साहहु(ड्ड) रोमकूवेहिं । पच्छा वहंति सीअं असुरिंदसुरिंदना-
 गिंदा ॥ १९ ॥ चलचवलकुंडलधरा सच्छंदविउव्वियाभरणधारी । सुरअसुरवंदि-
 आणं वहंति सीअं जिणंदाणं ॥ २० ॥ पुरओ वहंति देवा नागा पुण दाहिणम्मि
 पासम्मि । पच्चच्छिमेण असुरा गरुला पुण उत्तरे पासो ॥ २१ ॥ उसभो अ
 विणीयाए बारवईए अरिट्ठवरणेमी । अवसेसा तित्थयरा निक्खंता जम्मभूमीसु
 ॥ २२ ॥ सव्वे वि एगद्वेणे [णिग्गया जिणवरा चउव्वीसं । ण य णाम अण्णलिंगे
 ण य गिहिलिंगे कुलिंगे य ॥ २३ ॥] एक्को भगवं वीरो [पासो मल्ली य तिहि
 तिहि सएहिं । भगवं पि वासुपुज्जो छहिं पुरिससएहिं निक्खंतो ॥ २४ ॥] उग्गाणं
 भोगाणं राइणाणं [च खत्तियाणं च । चउहिं सहस्सेहिं उसभो सेसा उ सहस्स-
 परिवारा ॥ २५ ॥] सुमइत्थ णिच्चभत्तेण[णिग्गओ वासुपुज्ज चोत्थेणं । पासो मल्ली य
 अट्टमेण सेसा उ छट्ठेणं ॥ २६ ॥] एएसिं णं चउव्वीसाए तित्थगराणं चउव्वीसं
 पढमभिक्षादायारो होत्था, तं जहा-सिजंस बंभदत्ते सुरिंददत्ते य इंददत्ते य ।
 पउमे य सोमदेवे माहिंदे तह सोमदत्ते य । पुरसे पुणव्वसू पुण्णणंद सुणंदे जये य
 विजये य । तत्तो य धम्मसीहे सुमित्त तह वग्गसीहे अ ॥ २७ ॥ अपराजिय
 विस्ससेणे वीसइमे होइ उसभसेणे य । दिण्णे वरदत्ते धणे बहुले य आणुपुव्वीए
 ॥ २८ ॥ एए विसुद्धलेसा जिणवरभत्तीइ पंजलिउडा उ । तं कालं तं समयं
 पड्डिआमेई जिणवरिंदे ॥ २९ ॥ संवच्छरेण भिक्षा लद्धा उसभेण लोयणाहेण ।
 सेसेहिं बीयदिवसे लद्धाओ पढमभिक्षाओ ॥ ३० ॥ उसभस्स पढमभिक्षा
 खोयरसो आसि लोगणाहस्स । सेसाणं परमण्णं अमियरसरसोवमं आसि ॥ ३१ ॥
 सव्वेसिं पि जिणाणं जहियं लद्धाउ पढमभिक्षाउ । तहियं वसुधाराओ सरीरमेत्तीओ
 बुद्धाओ ॥ ३२ ॥ २५० ॥ एएसिं चउव्वीसाए तित्थगराणं चउवीसं चेइयस्सखा
 [बद्धपीढस्सखा जेसिं अहे केवलाई उप्पण्णाई ति] होत्था, तं जहा-णग्गोह सत्तिवण्णे
 साले पियए पियंगु छात्ताहे । सिरिसे य णागरुक्खे माली य पिलंक्खुस्सुक्खे य ॥ ३३ ॥

तिदुग पाडल जंवू आसत्ये खलु तहेव दहिवण्णे । गंदीरुक्खे तिलए अंबयरुक्खे
 असोगे य ॥ ३४ ॥ चंपय वडले य तथा वेडसरुक्खे य धाग्रईरुक्खे । साले य
 वड्डमाणस्स चेइयरुक्खा जिणवरारणं ॥ ३५ ॥ वत्तीसं धणुयाईं चेइयरुक्खो य
 वड्डमाणस्स । णिच्चोउगो असोगो ओच्छण्णो सालरुक्खेणं ॥ ३६ ॥ तिण्णे व
 गाउआईं चेइयरुक्खो जिणस्स उसभस्स । सेसाणं पुण रुक्खा सरीरओ बारसगुणा
 उ ॥ ३७ ॥ सच्छत्ता सपडागा सवेइया तोरणेहिं उववेया । सुरअसुरगरुलमहिया
 चेइयरुक्खा जिणवरारणं ॥ ३८ ॥ २५१ ॥ एएसिं चउवीसाए तित्थगराणं चउवीसं
 पढमसीसा होत्था, तं जहा-पढमेत्थ उसभसेणे वीइए पुण होइ सीहसेणे य । चारु
 य वज्जणाभे चमरे तह सुव्वय विदब्भे ॥ ३९ ॥ दिण्णे य वराहे पुण आणंदे
 गोथुमे सुहम्मे य । मंदर जसे अरिट्ठे चक्काह सर्यंभु कुंभे य ॥ ४० ॥ इंदे कुंभे
 य सुभे वरदत्ते दिण्ण इंदभूर्इ य । उदितोदितकुलवंसा विसुद्धवंसा गुणेहि उववेया ।
 तित्थप्पवत्तयाणं पढमा सिरसा जिणवरारणं ॥ ४१ ॥ २५२ ॥ एएसिं णं चउवीसाए
 तित्थगराणं चउवीसं पढमसिरसिणी होत्था, तं जहा-बंभी य फग्गु सामा अजिया
 कासवीरई सोमा । सुमणा वारुणि सुलसा धारणि धरणी य धरणिधरा ॥ ४२ ॥
 पउमा सिवासुयी तह अंजुया भावियप्पा य रक्खी य । बंधुवती पुप्फवती अज्जा
 अमिला य अहिया य ॥ ४३ ॥ जक्खिणी पुप्फचूला य चंदणऽज्जा य आहियाउ ।
 उदितोदितकुलवंसा विसुद्धवंसा गुणेहिं उववेया । तित्थप्पवत्तयाणं पढमा सिरसी
 जिणवरारणं ॥ ४४ ॥ २५३ ॥ जंबुद्दीवे णं वीवे भारहे वासे इमीसे ओसप्पिणीए
 बारह चक्कवट्ठिपियरो होत्था, तं जहा-उसभे सुमित्ते विजए समुद्विजए य आस-
 सेणे य । विस्ससेणे य सूरु सुदंसणे कत्तवीरिए चेव ॥ ४५ ॥ पउमुत्तरे महाहरी
 विजए राया तहेव य । वंभे बारसमे उत्ते पिउनामा चक्कवट्ठीणं ॥ ४६ ॥ २५४ ॥
 जंबुद्दीवे णं वीवे भारहे वासे इमीसे ओसप्पिणीए बारस चक्कवट्ठिमायरो होत्था, तं
 जहा-सुमंगला जसवती भद्दा सहदेवी अइरा सिरिदेवी । तारा जाला (जाला
 तारा) मेरा वप्पा चुल्लणि अपच्छिमा ॥ २५५ ॥ जंबुद्दीवे णं वीवे भारहे वासे
 इमीसे ओसप्पिणीए बारस चक्कवट्ठी होत्था, तं जहा-भरहो सगरो मघवं [सणकुमारो
 य रायसहूलो । संती कुंथू य अरो हवइ सुभूमो य कोरव्वो ॥ ४७ ॥ नवमो य महा-
 पउमो हरिसेणो चेव रायसहूलो । जयनामो य नरवई, बारसमो बंभदत्तो य
 ॥ ४८ ॥] एएसिं बारसण्हं चक्कवट्ठीणं बारस इत्थिरयणा होत्था, तं जहा-पढमा
 होइ सुभद्दा भद्द सुणंदा जया य विजया य । किण्हसिरी सूरसिरी पउमसिरी वसुंधरा
 देवी ॥ ४९ ॥ लच्छिमई कुत्तमई इत्थिरयणाण नामाई ॥ २५६ ॥ जंबुद्दीवे णं वीवे

भारहे वासे इमीसे ओसपिणीए नवबलदेवनववासुदेवपियरो होत्था, तं जहा-पया-
वई य बंभो [सोमो रुदो सिवो महसिवो य । अग्निहोत्रो य दसरहो नवमो भणिओ
य वसुदेवो ॥ ५० ॥] जंबुद्वीवे णं दीवे भारहे वासे इमीसे ओसपिणीए णव वासु-
देवमायरो होत्था, तं जहा-मियावई उमा चेव पुहवी सीया य अम्मया । लच्छि-
मई सेसमई केकई देवई तहा ॥ ५१ ॥ जंबुद्वीवे णं दीवे भारहे वासे इमीसे
ओसपिणीए णवबलदेवमायरो होत्था, तं जहा-भदा तह सुभदा य सुप्पभा य
सुदंसणा । विजया वैजयंती य जयंती अपराजिया ॥ ५२ ॥ णवमीया रोहिणी य
बलदेवाण मायरो ॥ २५७ ॥ जंबुद्वीवे णं दीवे भारहे वासे इमीसे ओसपिणीए
नव दसारमंडला होत्था, तं जहा-उत्तमपुरिसा मज्झिमपुरिसा पहाणपुरिसा ओयंसी
तेयंसी वचंसी जसंसी छायंसी कंता सोमा सुभगा पियदंसणा सुरुआ सुहसीलसुहाभि-
गमसव्वजणयणकंता ओहबला अतिबला महाबला अनिहता अपराइया सत्तुमइणा
रिपुसहस्समाणमहणा साणुक्कोसा अमच्छरा अचबला अचंडा मियमंजुलपलाव-
हसियगंभीरमधुरपडिपुण्णसच्चवयणा अब्भुवगयवच्छला सरण्णा लक्खणवज्जणगुणो-
ववेआ माणुम्माणपमाणपडिपुण्णसुजायसव्वंगसुंदरंगा ससिसोमागारकंतपियदंसणा
अमरिसणा पयंडदंडप्पयारा(र)गंभीरदर(रि)सणिज्जा तालद्धओव्विद्धगल्लकैऊ महा-
धणुविकट्टया महासत्तासअरा दुद्धरा धणुद्धरा धीरपुरिसा जुद्धकित्तिपुरिसा विउलकुल-
ससुम्भवा महारयणविहाडगा अद्धभरहसामी सोमा रायकुलवंसतिलया अजिया
अजियरहा हल्लसुसलकणकपाणी संखचक्कगयसत्तिनंदगधरा पवरुज्जलसुक्कंतविमलगो-
त्थुभतिरीडधारी कुंडलउज्जोइयाणणा पुंडरीयणयणा एकावलिकंठलइयवच्छा सिरिव-
च्छसुल्लंछणा वरजसा सव्वोउयसुरभिक्कुसुमरचितपलंबसोभंतकंतविकसंतविचितवरमा-
लरइयवच्छा अट्टसयविभत्तलक्खणपसत्थसुंदरविरइयंगमंगा मत्तगयवरिंदललियविक-
मविलसियगई सारयनवथणियमहुरगंभीरकुंचनिग्घोसदुंदुभिसरा कडिसुत्तगनीलपीय-
कोसेज्जवाससा पवरदित्ततेया नरसीहा नरवई नरिंदा नरवसहा मरुयवसभकप्पा
अब्भहियरायतेयलच्छीए दिप्पमाणा नीलगपीयगवसणा दुवे दुवे रामकेसवा भायरो
होत्था, तं जहा-तिविट्ठ जाव कण्हे अयले जाव रामे यावि अपच्छिमे ॥ ५३ ॥ २५८ ॥
एएसि णं णवण्हं बलदेववासुदेवाणं पुव्वभविया नव नामधेज्जा होत्था, तं जहा-
विस्सभूई पव्वयए धणदत्त समुद्धत्त इसिवाले । पियमित्त ललियमित्ते पुणव्वसू
गंगदत्ते य ॥ ५४ ॥ एयाइं नामाई पुव्वभवे आसि वासुदेवाणं । एत्तो बलदेवाणं
जह्मकमं कित्तइस्सामि ॥ ५५ ॥ विसनंदी य सुबंधू सागरदत्ते असोगललिए य ।
वाराह धम्मसेणे अपराइय रायललिए य ॥ ५६ ॥ २५९ ॥ एएसिं नवण्हं बलदेव-

वासुदेवाणं पुव्वभविआ नव धम्मायरिया होत्था, तं जहा-संभूय सुभइ सुदंसेणे य
 सेयंस कण्ह गंगदत्ते अ । सागरसमुद्दनामे दुमसेणे य णवमए ॥ ५७ ॥ एए धम्मा-
 यरिया कितीपुरिसाण वासुदेवाणं । पुव्वभवे एआसिं जत्थ नियाणाइं कासी य
 ॥ ५८ ॥ २६० ॥ एएसिं नवण्हं वासुदेवाणं पुव्वभवे नव नियाणभूमिओ होत्था,
 तं जहा-महुरा य० हत्थिणाउरं च ॥ ५९ ॥ २६१ ॥ एएसिं णं नवण्हं वासुदेवाणं
 नव नियाणकारणा होत्था, तं जहा-गावी जुवे जाव माउआ ॥ ६० ॥ २६२ ॥
 एएसिं नवण्हं वासुदेवाणं नव पडिसत्तू होत्था, तं जहा-अस्सग्गीवे जाव जरासंघे
 ॥ ६१ ॥ एए खलु पडिसत्तू जाव सचक्केहिं ॥ ६२ ॥ एक्को य सत्तमीए पंच य
 छट्ठीए पंचमी एक्को । एक्को य चउत्थीए कण्हो पुण तच्चपुठवीए ॥ ६३ ॥ अणिदा-
 णकडा रामा [सव्वे वि य केसवा नियाणकडा । उड्डंगामी रामा केसव सव्वे अहो-
 गामी ॥ ६४ ॥] अट्टंतकडा रामा एणो पुण वंभलोयकप्पम्मि । एक्का से गब्भव-
 सही सिज्झिस्सइ आगमिस्सेणं ॥ ६५ ॥ २६३ ॥ जंबुद्दीवे णं दीवे एरवए वासे
 इमीसे ओसप्पिणीए चउव्वीसं तित्थयरा होत्था, तं जहा-चंदाणणं सुचंदं अग्गीसेणं
 च नंदिसेणं च । इस्सिदिणं वइ(व)हारिं वंदिमो सोमचंदं च ॥ ६६ ॥ वंदामि जुत्तिसेणं
 अजियसेणं तहेव सिवसेणं । सुद्धं च देवसम्मं सययं निक्खित्तसत्थं च ॥ ६७ ॥
 असंजलं जिणवसहं वंदे य अणंतयं अमियणाणि । उवसंतं च धुरययं वंदे खलु
 गुत्तिसेणं च ॥ ६८ ॥ अतिपासं च सुपासं देवेसरवंदियं च मरुदेवं । निव्वाणगयं
 च ध(व)रं खीणदुहं सामकोट्टं च ॥ ६९ ॥ जियरागमग्गिसेणं वंदे खीणरायमग्गिउत्तं
 च । वोक्कसियपिज्जदोसं वारिसेणं गयं सिद्धिं ॥ ७० ॥ २६४ ॥ जंबुद्दीवे णं दीवे
 आगमिस्साए उस्सप्पिणीए भारहे वासे सत्त कुलगरा भविस्संति, तं जहा-मिय-
 वाहणे सुभूमे य सुप्पमे य सयंपमे । दत्ते सुहुमे सुबंधू य आगमिस्साण होक्खति
 ॥ ७१ ॥ ॥ २६५ ॥ जंबुद्दीवे णं दीवे आगमिस्साए उस्सप्पिणीए एरवए वासे
 दस कुलगरा भविस्संति, तं जहा-विमलवाहणे सीमंकरे सीमंधरे खेमंकरे खेमंधरे
 दढधणू दसधणू सयधणू पडिसूई सुमइ ति ॥ २६६ ॥ जंबुद्दीवे णं दीवे भारहे
 वासे आगमिस्साए उस्सप्पिणीए चउव्वीसं तित्थयरा भविस्संति, तं जहा-महापउमे
 सूरदेवे, सुपासे य सयंपमे । सव्वाणभूई अरहा, देवस्सुए य होक्खई ॥ ७२ ॥
 उदए पेढालपुत्ते य, पोछिल्ले सत(त्त)कित्ति य । मुणिसुव्वए य अरहा, सव्वभावविऊ
 जिणे ॥ ७३ ॥ अममे णिक्काए य, निप्पुलाए य निम्ममे । चित्तउत्ते समाही य,
 आगमिस्सेण होक्खई ॥ ७४ ॥ संवरे (जसोहरे) अणियट्ठी य, विजए विमलेत्ति य ।
 देवोववाए अरहा, अणंतविजए इय ॥ ७५ ॥ एए वुत्ता चउव्वीसं, भारहे वासम्मि

केवली । आगमिस्सेण होक्खंति, धम्मतिथ्यस्स देसगा ॥ ७६ ॥ २६७ ॥ एएसि
 णं चउव्वीसाए तित्थकराणं पुव्वभविआ चउव्वीसं नामधेज्जा भविस्संति, तं जहा-
 सेणिय सुपास उदए पोद्धिळ्ळ अणगार तह दढाऊ य । कत्तिय संखे य तथा नंद
 सुनंदे य सतए य ॥ ७७ ॥ बोद्धव्वा देवई य सच्चइ तह वासुदेव बलदेवे ।
 रोहिणि सुलसा चेव तत्तो खलु रेवई चेव ॥ ७८ ॥ ततो हवइ सयाली बोद्धवे
 खलु तथा भयाली य । दीवायणे य कण्हे तत्तो खलु नारए चेव ॥ ७९ ॥ अंबड
 दारुमडे य साईबुद्धे य होइ बोद्धवे । भावीतिथ्यगराणं णामाई पुव्वभविआई
 ॥ ८० ॥ २६८ ॥ एएसि णं चउव्वीसाए तित्थगराणं चउव्वीसं पियरो भवि-
 स्संति, चउव्वीसं मायरो भविस्संति, चउव्वीसं पढमसीसा भविस्संति, चउव्वीसं
 पढमसिस्सणीओ भविस्संति, चउव्वीसं पढमभिकखादायगा भविस्संति, चउव्वीसं
 चेइयस्सखा भविस्संति ॥ २६९ ॥ जंबुद्वीवे णं दीवे भारहे वासे आगमिस्साए
 उस्सप्पिणीए वारस चक्कवट्ठिणो भविस्संति, तं जहा-भरहे य दीहदंते गूढदंते य
 सुद्धदंते य । सिरिउत्ते सिरिभूई सिरिसोमे य सत्तमे ॥ ८१ ॥ पउमे य महापउमे
 विमलवाहणे विपुलवाहणे चेव । वरिठ्ठे वारसमे वुत्ते आगमिसा भरहाहिवा ॥ ८२ ॥
 एएसि णं वारसणं चक्कवट्ठिणं वारस पियरो भविस्संति वारस मायरो भविस्संति
 वारस इत्थीरयणा भविस्संति ॥ २७० ॥ जंबुद्वीवे णं दीवे भारहे वासे आगमि-
 स्साए उस्सप्पिणीए नव बलदेववासुदेवपियरो भविस्संति, नव वासुदेवमायरो
 भविस्संति, नव बलदेवमायरो भविस्संति, नव दसारमंडला भविस्संति, तं जहा-
 उत्तमपुरिसा मज्झिमपुरिसा पहाणपुरिसा ओयंसी तेयंसी एवं सो चेव वण्णओ
 भाणियव्वो जाव नीलगपीतगवसणा दुवे दुवे रामकेसवा भायरो भविस्संति, तं
 जहा-नंदे य नंदमित्ते वीहवाहू तथा महावाहू । अद्दल्ले महाबले बलभेइ य सत्तमे
 ॥ ८३ ॥ दुविट्ठू य तिविट्ठू य आगमिस्साण विण्हुणो । जयंते विजये भेइ सुप्पमे य
 सुद्धंसे । आणंदे नंदणे पउमे संकरिसेण य अपच्छिमे ॥ ८४ ॥ २७१ ॥ एएसि
 णं नवणं बलदेववासुदेवाणं पुव्वभविआ णव नामधेज्जा भविस्संति, नव धम्माय-
 रिया भविस्संति, नव नियाणभूमीओ भविस्संति, नव नियाणकारणा भविस्संति,
 नव पडिसत्तू भविस्संति, तं जहा-तिलए य लोहजंघे वडरजंघे य केसरी पहराए ।
 अपराइए य भीमे महाभीमे य सुग्गीवे ॥ ८५ ॥ एए खलु पडिसत्तू किंतीपुरिसाण
 वासुदेवाणं । सव्वे वि चक्कजोही हम्मिहिंति सचक्केहिं ॥ ८६ ॥ २७२ ॥ जंबुद्वीवे
 णं दीवे एरवए वासे आगमिस्साए उस्सप्पिणीए चउव्वीसं तित्थगरा भविस्संति,
 तं जहा-सुमंगले अ सिद्धत्थे, निव्वाणे य महाजसे । धम्मज्झए य अरहा, आग-

मिस्साण होक्खई ॥ ८७ ॥ सिरिचंदे पुप्फकेऊ, महाचंदे य केवली । सुयसायरे
य अरहा, आगमिस्साण होक्खई ॥ ८८ ॥ सिद्धत्थे पुण्णघोसे य, महाघोसे य
केवली । सच्चसेणे य अरहा, आगमिस्साण होक्खई ॥ ८९ ॥ सूरसेणे य अरहा,
महासेणे य केवली । सव्वाणंदे य अरहा, देवउत्ते य होक्खई ॥ ९० ॥ सुपासे
सुव्वए अरहा, अरहे य सुकोसले । अरहा अणंतविजए, आगमिस्साण होक्खई
॥ ९१ ॥ विमले उत्तरे अरहा, अरहा य महाबले । देवाणंदे य अरहा, आगमि-
स्साण होक्खई ॥ ९२ ॥ एए वुत्ता चउव्वीसं, एरवर्यंमि केवली । आगमिस्साण
होक्खंति, धम्मतिथ्यस्स देसगा ॥ ९३ ॥ २७३ ॥ बारस चक्कवट्टिणो भविस्संति,
बारस चक्कवट्टिपियरो भविस्संति, बारस चक्कवट्टिमायरो भविस्संति, बारस इत्थी-
रयणा भविस्संति ॥ नव बलदेववासुदेवपियरो भविस्संति, णव वासुदेवमायरो
भविस्संति, णव बलदेवमायरो भविस्संति, णव दसारमंडला भविस्संति, तं जहा-
उत्तमपुरिसा मज्झिमपुरिसा पहाणपुरिसा जाव दुवे दुवे रामकेसवा भायरो भवि-
स्संति, णव पडिसत्तू भविस्संति, नव पुव्वभवणासवेज्जा, नव धम्मायरिया, णव
णियाणभूमीओ, णव णियाणकारणा, आयाए एरवए आगमिस्साए भाणियव्वा ।
एवं दोसु वि आगमिस्साए भाणियव्वा ॥ २७४ ॥ इच्चैयं एवमाहिज्जंति, तं जहा-
कुलगरवंसेइ य एवं तित्थगरवंसेइ य चक्कवट्टिवंसेइ य दसारवंसेइ य गणधरवंसेइ य
इसिवंसेइ य जइवंसेइ य मुणिवंसेइ य । सुएइ वा सुअंगेइ वा सुयसमासेइ वा सुय-
खंवेइ वा समवाएइ वा संखेइ वा सम्मतमंगमक्खायं अज्झयणं ति वेमि ॥ २७५ ॥

समवायं चउत्थमंगं समत्तं ॥



णमोऽत्थु णं समणस्स भगवओ णायपुत्तमहावीरस्स

भगवई-विवाहपण्णत्ती

णमो अरिहंताणं णमो सिद्धाणं णमो आयरियाणं णमो उवज्झायाणं णमो लोए
सव्वसाहूणं ॥ १ ॥ णमो वंभीयस्स लिवीयस्स ॥ २ ॥ णमो सुयस्स ॥ ३ ॥ ते
णं काले णं ते णं समए णं रायगिहे नामं णयरे होत्था, वण्णओ, तस्स णं रायगि-
हस्स णगरस्स बहिया उत्तरपुरच्छिमे दिसीभाए गुणसिलए णामं उज्जाणे होत्था,
सेणिए राया, चिच्छणा देवी ॥ ४ ॥ ते णं काले णं ते णं समए णं समणे भगवं
महावीरे आइगरे तित्थगरे सहसंबुद्धे पुरिसुत्तमे पुरिससीहे पुरिसवरपुंडरीए पुरिस-
वरगंधहृत्थीए लोगतमे लोगनाहे लोगप्पदीवे लोगप्पजोयगरे अभयदए चक्खुदए
भगवदए सरणदए [धम्मदए] धम्मदेसए धम्मसारहीए धम्मवरचाउरंतचक्खवट्ठी
अप्पडिहयवरनाणदंसणधरे वियट्ठउमे जिणे जाणए बुद्धे बोहए मुत्ते भोयए सव्वबू
सव्वदरिसी सिवमयलमस्यमणंतमक्खयमव्वावाहमपुणरावत्तयं सिद्धिगइनामधेयं ठाणं
संपाविउकामे जाव समोसरणं ॥ ५ ॥ परिसा निग्गया, धम्मो कहिओ, परिसा
पडिगया ॥ ६ ॥ तेणं कालेणं तेणं समएणं समणस्स भगवओ महावीरस्स जेट्ठे
अंतेवासी इंदभूती नामं अणगारे गोयमसगोत्तेणं सत्तुस्सेहे समचउरंसंठाणसंठिए
वज्जरिसहनारायसंधयणे कणगपुलगणिधसपम्हगोरे उग्गतवे दित्ततवे तत्ततवे महातवे
ओराले घोरे घोरगुणे घोरतवस्सी घोरवंभचेरवासी उच्छ्रद्धसरीरे संखितविउलतेय-
लेसे चोहसपुव्वी चउनाणोवगए सव्वक्खरसज्जिवाई समणस्स भगवओ महावीरस्स
अदूरसामंते उड्डंजाणू अहोसिरे ज्ञाणकोट्ठोवगए संजमेणं तवसा अप्पाणं भावेमाणे
विहरइ ॥ ७ ॥ तए णं से भगवं गोयमे जायसद्धे जायसंसए जायकोउहल्ले उप्पन्न-
सद्धे उप्पन्नसंसए उप्पन्नकोउहल्ले संजायसद्धे संजायसंसए संजायकोउहल्ले समुप्पन्न-
सद्धे समुप्पन्नसंसए समुप्पन्नकोउहल्ले उट्ठाए उट्ठेइ उट्ठाए उट्ठेत्ता जेणेव समणे भगवं
महावीरे तेणेव उवागच्छइ उवागच्छित्ता समणं भगवं महावीरं तिव्खुतो आया-
हिणपयाहिणं करेइ २ ता वंदइ नमंसइ २ ता णच्चासजे णाइदूरे सुस्सूसमाणे णमं-
समाणे अभिसुहे विणएणं पंजलिउडे पज्जुवासमाणे एवं वयासी-से नूणं मंते ! चल-
माणे चलिए १, उदीरिजमाणे उदीरिए २, वेइजमाणे वेइए ३, पहिजमाणे पहीणे

१ रायगिह चलण दुक्खे कंखपओसे य पगइ पुढवीओ, जावंते नेरइए बाले
गुरुए य चलणाओ ॥ १ ॥

४, छिजमाणे छिजे ५, भिजमाणे भिजे ६, दड्ड (डज्ज) माणे दड्डे ७, मिजमाणे मए ८, निज्जरिजमाणे निजिजे ९, हंता गोयमा ! चलमाणे चलिए जाव णिज-
 रिजमाणे णिजिण्णे ॥ एए णं भंते ! नव पया किं एगट्ठा णाणाघोसा नाणावंजणा
 उदाहु नाणट्ठा नाणाघोसा नाणावंजणा ?, गोयमा ! चलमाणे चलिए १ उदीरिज-
 माणे उदीरिए २ वेइजमाणे वेइए ३ पहिजमाणे पहीणे ४ ते एए णं चत्तारि पया
 एगट्ठा नाणाघोसा नाणावंजणा उप्पन्नपक्खस्स, छिजमाणे छिजे भिजमाणे भिजे
 दड्ड-(डज्ज)-माणे दड्डे मिजमाणे मडे निज्जरिजमाणे निजिण्णे एए णं पंच पया
 णाणट्ठा नाणाघोसा नाणावंजणा विगयपक्खस्स ॥ ८ ॥ नेरइयाणं भंते ! केवइकालं
 ठिई पत्तत्ता ? गोयमा ! जह्वेणं दस वाससहस्साई उक्कोसेणं तेत्तीसं सागरोवमाई
 ठिई प० १ । नेरइयाणं भंते ! केवइकालस्स आणमंति वा पाणमंति वा ऊससंति
 वा णीससंति वा ?, जहा ऊत्तासपए २ । नेरइया णं भंते आहारट्ठी ?, जहा पन्न-
 वणाए पढमए आहारहेसए तहा भाणियव्वं ३ । ठिइ उत्तासाहारे किं वाऽऽहा-
 रेंति ३६ सव्वओ वावि ३७ । कतिभागं ? ३८ सव्वाणि व ३९ कीस व भुज्जो
 परिणमंति ? ४० ॥ १ ॥ ९ ॥ नेरइयाणं भंते ! पुव्वाहारिया पोग्गला परिणया १ ?
 आहारिया आहारिजमाण्णा पोग्गला परिणया २ ?, अणाहारिया आहारिजिस्समाणा
 पोग्गला परिणया ३ ?, अणाहारिया अणाहारिजिस्समाणा पोग्गला परिणया ४ ?,
 गोयमा ! नेरइयाणं पुव्वाहारिया पोग्गला परिणया १, आहारिया आहारिजमाण्णा
 पोग्गला परिणया परिणमंति य २, अणाहारिया आहारिजिस्समाणा पोग्गला नो
 परिणया परिणमिस्संति ३, अणाहारिया अणाहारिजिस्समाणा पोग्गला नो परिणता
 णो परिणमिस्संति ४ ॥ १० ॥ नेरइयाणं भंते ! पुव्वाहारिया पोग्गला चिया पुच्छा,
 जहा परिणया तहा चियावि, एवं चिया उवचिया उदीरिया वेइया निजिज्जा, गाहा-
 परिणय चिया उवचिय उदीरिया वेइया य निजिज्जा । एक्केकंमि पदंमि(मी) चउ-
 व्विहा पोग्गला होंति ॥ ११ ॥ ११ ॥ नेरइयाणं भंते ! कइविहा पोग्गला भिज्जंति ?,
 गोयमा ! कम्मदव्ववग्गणमहिक्किच्च दुविहा पोग्गला भिज्जति, तंजहा-अणू चेव
 बायरा चेव १ । नेरइयाणं भंते ! कतिविहा पोग्गला भिज्जंति ?, गोयमा ! आहार-
 दव्ववग्गणमहिक्किच्च दुविहा पोग्गला भिज्जंति, तंजहा-अणू चेव बायरा चेव २ ।
 एवं उवचिज्जंति ३ । नेर० क० पो० उदीरेंति ?, गोयमा ! कम्मदव्ववग्गणमहि-
 क्किच्च दुविहे पोग्गले उदीरेंति, तंजहा-अणू चेव बायरा चेव, सेसावि एवं चेव
 भाणियव्वा, एवं वेदेंति ५ निज्जरेंति ६ उयट्ठिउ ७ उव्वट्ठेंति ८ उव्वट्ठिस्संति ९
 संकामिउ १० संकामेंति ११ संकामिस्संति १२ निहत्तिउ १३ निहत्तेंति १४ निह-

तिस्संति १५ निकायंसु १६ निकायंति १७ निकाइस्संति १८, सव्वेसुवि कम्मद-
 व्ववगणमहिक्किच्च गाहा-भेइयचिया उवचिया उदीरिया वेइया य निजिन्ना । उय-
 ट्ठणसंकासननिहत्तणनिकायणे ति विह कालो ॥ १ ॥ १२ ॥ नेरइयाणं भंते ! जे
 पोगगले तेयाकम्मत्ताए गेण्हंति ते किं तीतकालसमए गेण्हंति ? पडुप्पन्नकालसमए
 गेण्हंति ? अणा० का० समए गेण्हंति ?, गोयमा ! नो तीयकालसमए गेण्हंति पडु-
 प्पन्नकालसमए गेण्हंति नो अणा० समए गिण्हंति १ । नेरइयाणं भंते ! जे पोगगला
 तेयाकम्मत्ताए गहिए उदीरंति ते किं तीयकालसमयगहिए पोगगले उदीरंति पडु-
 प्पन्नकालसमए घेप्पमाणे पोगगले उदीरंति गहणसमयपुरक्खडे पोगगले उदीरंति ?,
 गोयमा ! अतीयकालसमयगहिए पोगगले उदीरंति नो पडुप्पन्नकालसमए घेप्पमाणे
 पोगगले उदीरंति नो गहणसमयपुरक्खडे पोगगले उदीरंति २, एवं वेदंति ३
 निज्जरंति ॥ १३ ॥ नेरइयाणं भंते ! जीवाओ किं चलियं कम्मं बंधंति अचलियं
 कम्मं बंधंति ?, गोयमा ! नो चलियं कम्मं बंधंति अचलियं कम्मं बंधंति १ ।
 नेरइयाणं भंते ! जीवाओ किं चलियं कम्मं उदीरंति अचलियं कम्मं उदीरंति ?,
 गोयमा ! नो चलियं कम्मं उदीरंति अचलियं कम्मं उदीरंति २ । एवं वेदंति ३
 उयट्ठंति ४ संकामेति ५ निहत्तंति ६ निकार्येति ७, सव्वेसु अचलियं नो चलियं ।
 नेरइयाणं भंते ! जीवाओ किं चलियं कम्मं निज्जरंति अचलियं कम्मं निज्जरंति ?,
 गोयमा ! चलियं कम्मं निज्जरंति नो अचलियं कम्मं निज्जरंति ८, गाहा-बंधोदय-
 वेदोयट्ठसंकमे तह निहत्तणनिकाये । अचलियं कम्मं तु भवे चलियं जीवाउ निजरए
 ॥ १ ॥ १४ ॥ एवं ठिई आहारो य भाणियव्वो, ठिती-जहा ठितिपदे तहा
 भाणियव्वा, सव्वजीवाणं आहारोऽवि जहा पन्नवणाए पढमे आहारुद्देसए तहा
 भाणियव्वो, एत्तो आढत्तो-नेरइयाणं भंते ! आहारट्ठी ? जाव दुक्खत्ताए भुज्जो
 भुज्जो परिणमंति, गोयमा ! ० । असुरकुमारणं भंते ! केवइयं कालं ठिई प० ?,
 जहत्तेणं दस वाससहस्साइं उक्कोसेणं सातिरेगं सागरोवमं, असुरकुमारणं भंते !
 केवइयं कालस्स आणमंति वा पाणमंति वा ?, गोयमा ! जहत्तेणं सत्तण्हं थोवाणं
 उक्कोसेणं साइरेगस्स पक्खस्स आणमंति वा पाणमंति वा, असुरकुमारणं भंते !
 आहारट्ठी ?, हंता आहारट्ठी, असुरकुमारणं भंते ! केवइकालस्स आहारट्ठे समु-
 प्पज्जइ ?, गोयमा ! असुरकुमारणं दुविहे आहारे पन्नत्ते, तंजहा-आभोगनिव्वत्तिए
 य अणाभोगनिव्वत्तिए य, तत्थ णं जे से अणाभोगनिव्वत्तिए से अणुसमयं अविर-
 हिए आहारट्ठे समुप्पज्जइ, तत्थ णं जे से आभोगनिव्वत्तिए से जहत्तेणं चउत्थ-
 भत्तस्स उक्कोसेणं साइरेगस्स वाससहस्सस्स आहारट्ठे समुप्पज्जइ, असुरकुमारणं

भंते ! किमाहारमाहारंति ? , गोयमा ! दव्वओ अणंतपएसियाइं दव्वाइं खित्तकाल-
भावपन्नवणागमेणं सेसं जहा नेरइयाणं जाव तेणं तेसिं पोगगला कीसत्ताए भुज्जो
भुज्जो परिणमंति ? , गोयमा ! सोइंदियत्ताए सुखत्ताए सुवन्नत्ताए ४ इट्ठत्ताए इच्छि-
यत्ताए भिज्जियत्ताए उट्ठत्ताए णो अहत्ताए सुहत्ताए णो दुहत्ताए भुज्जो भुज्जो परिण-
मंति, असुरकुमारा णं पुव्वाहारिया पुगगला परिणया असुरकुमाराभिलावेण जहा
नेरइयाणं जाव नो अचलियं कम्मं निज्जरंति । नागकुमाराणं भंते ! केवइयं कालं
ठिती प० ? , गोयमा ! जहन्नेणं दस वाससहस्साइं उक्कोसेणं देसूणाइं दो पल्लिओव-
माइं, नागकुमाराणं भंते ! केवइकालस्स आणमंति वा पा० ? , गोयमा ! जहन्नेणं
सत्तण्हं थोवाणं उक्कोसेणं मुहुत्तपुहुत्तस्स आणमंति वा पा०, नागकुमाराणं आहा-
रट्ठी ? , हंता आहारट्ठी, नागकुमाराणं भंते ! केवइकालस्स आहारट्ठे समुप्पज्जइ ? ,
गोयमा ! नागकुमाराणं दुविहे आहारे पन्नत्ते, तंजहा-आभोगनिव्वत्तिए य अणा-
भोगनिव्वत्तिए य, तत्थ णं जे से अणाभोगनिव्वत्तिए से अणुसमयमविरहिए
आहारट्ठे समुप्पज्जइ, तत्थ णं जे से आभोगनिव्वत्तिए से जहन्नेणं चउत्थभत्तस्स
उक्कोसेणं दिवसपुहुत्तस्स आहारट्ठे समुप्पज्जइ, सेसं जहा असुरकुमाराणं जाव नो
अचलियं कम्मं निज्जरंति । एवं सुवन्नकुमारावि जाव थणियकुमाराणंति । पुढविक्का-
इयाणं भंते ! केवइयं कालं ठिई प० ? , गोयमा ! जहन्नेणं अंतोमुहुत्तं उक्कोसेणं
बावीसं वाससहस्साइं, पुढविक्काइया केवइकालस्स आणमंति वा पा० ? , गो-
वेमाय० आणमंति वा पा० ? पुढविक्काइयाणं आहारट्ठी ? , हंता आहारट्ठी, पुढ-
विक्काइयाणं केवइकालस्स आहारट्ठे समुप्पज्जइ ? , गोयमा ! अणुसमयं अविरहिए
आहारट्ठे समुप्पज्जइ, पुढविक्काइया किमाहारंति ! , गोयमा ! दव्वओ जहा नेरइयाणं
जाव निव्वाधाएणं छद्दिसिं वाधायं पडुच्च सिय तिदिसिं सिय चउद्दिसिं सिय पंच-
दिसिं, वन्नओ कालनीलपीतलोहियहालिइसुक्किळाणि, गंधओ सुरभिगंध २ रसओ
तित्त ५ फासओ कक्खड ८ सेसं तहेव, णाणत्तं कइभागं आहारंति ? कइभागं
फासाइंति ? , गोयमा ! असंखिज्जभागं आहारंन्ति अणंतभागं फासाइंति जाव
तेसिं पोगगला कीसत्ताए भुज्जो भुज्जो परिणमंति ? , गोयमा ! फासिंदियवेमायत्ताए
भुज्जो भुज्जो परिणमंति, सेसं जहा नेरइयाणं जाव नो अचलियं कम्मं निज्जरंति ।
एवं जाव वणस्सइकाइयाणं, नवरं ठिती वन्नेयव्वा जाव (इया) जस्स, उस्सासो
वेमायाए । बेइंदियाणं ठिई भाणियव्वा ऊसासो वेमायाए, बेइंदियाणं आहारे
पुच्छा, गोयमा ! आभोगनिव्वत्तिए य अणाभोगनिव्वत्तिए य तहेव, तत्थ णं जे
से आभोगनिव्वत्तिए से णं असंखेज्जसमए अंतोमुहुत्तिए वेमायाए आहारट्ठे समु-

प्पजइ, सेसं तहेव जाव अणंतभागं आसायंति, बेइंदियाणं भंते ! जे पोग्गले आहारत्ताए गण्हंति ते किं सव्वे आहारेंति गो सव्वे आहारेंति ?, गोयमा ! बेइंदियाणं दुव्विहे आहारे पत्ते, तंजहा-लोमाहारे पक्खेवाहारे य, जे पोग्गले लोमाहारत्ताए गण्हंति ते सव्वे अपरिसेसिए आहारेंति, जे पोग्गले पक्खेवाहारत्ताए गण्हंति तेसिणं पोग्गलाणं असंखिज्जइभागं आहारेंति अणेगाइं च णं भागसहस्साइं अणासाइज्जमाणाइं अफासिज्जमाणाइं विद्धंसमागच्छंति, एएसिं णं भंते ! पोग्गलाणं अणासाइज्जमाणाणं अफासाइज्जमाणाणं य कयरे कयरे अप्पा वा बहुया वा तुल्ला वा विसेसाहिया वा ?, गोयमा ! सव्वत्थोवा पुग्गला अणासाइज्जमाणा अफासाइज्जमाणा अणंतगुणा, बेइंदियाणं भंते ! जे पोग्गला आहारत्ताए गण्हंति ते णं तेसिं पुग्गला कीसत्ताए भुज्जो भुज्जो परिणमंति ?, गोयमा ! जिब्भिदियफासिंदियवेमायत्ताए भुज्जो भुज्जो परिणमंति, बेइंदियाणं भंते ! पुव्वाहारिया पुग्गला परिणया तहेव जाव चलियं कम्मं निजरंति । तेइंदियचउरिंदियाणं णाणत्तं ठिइए जाव नेगाइं च णं भागसहस्साइं अणाघाइज्जमाणाइं अणासाइज्जमाणाइं अफासाइज्जमाणाइं विद्धंसमागच्छंति, एएसिणं भंते ! पोग्गलाणं अणाघाइज्जमाणाइं ३ पुच्छा, गोयमा ! सव्वत्थोवा पोग्गला अणाघाइज्जमाणा अणासाइज्जमाणा अणंतगुणा अफासाइज्जमाणा अणंतगुणा, तेइंदियाणं घाणिंदियजिब्भिदियफासिंदियवेमायाए भुज्जो २ परिणमंति, चउरिंदियाणं चर्क्खिदियघाणिंदियजिब्भिदियफासिंदियत्ताए भुज्जो भुज्जो परिणमंति । पंचिंदियतिरिक्खजोणियाणं ठिइं भणिऊणं ऊसासो वेमायाए, आहारो अणाभोगनिव्वत्तिए अणुसमयं अविरहिओ, आभोगनिव्वत्तओ जहन्नेणं अंतोमुहुत्तस्स उक्कोसेणं अट्ठभत्तस्स, सेसं जहा चउरिंदियाणं जाव चलियं कम्मं निजरंति । एवं मणुस्साणवि, नवरं आभोगनिव्वत्तिए जहन्नेणं अंतोमुहुत्तं उक्कोसेणं अट्ठमभत्तस्स सोइंदियवेमायत्ताए भुज्जो भुज्जो परिणमंति सेसं जहा चउरिंदियाणं, तहेव जाव निजरंति । घाणमंतराणं ठिइए नागत्तं, परिणमंति अवसेसं जहा नागकुमाराणं, एवं जोइसियाणवि, नवरं उस्सासो जहन्नेणं मुहुत्तपुहुत्तस्स उक्कोसेणवि मुहुत्तपुहुत्तस्स, आहारो जहन्नेणं दिवसपुहुत्तस्स उक्कोसेणवि दिवसपुहुत्तस्स सेसं तहेव । वेमाणियाणं ठिइं भाणियव्वा ओहिया, ऊसासो जहन्नेणं मुहुत्तपुहुत्तस्स उक्कोसेणं तेत्तीसाए पक्खाणं, आहारो आभोगनिव्वत्तिओ जहन्नेणं दिवसपुहुत्तस्स उक्कोसेणं तेत्तीसाए वाससहस्साणं, सेसं चलियाइयं तहेव जाव निजरंति ॥ १५ ॥ जीवा णं भंते ! किं आयारंभा परारंभा तदुभयारंभा अनारम्भा ?, गोयमा ! अत्थेगइया जीवा आयारंभावि परारंभावि तदुभयारंभावि नो अणारंभा अत्थेगइया जीवा नो आयारंभा

नो परारंभा नो तदुभयारंभा अणारंभा ॥ से केणट्ठेणं भंते ! एवं वुच्चइ-अत्थे-
गइया जीवा आयाारंभावि ? एवं पड्डिउच्चारयेय्वं, गोयमा ! जीवा दुविहा पणत्ता,
तंजहा-संसारसमावन्नगा य असंसारसमावन्नगा य, तत्थ णं जे ते असंसार-
समावन्नगा ते णं सिद्धा, सिद्धा णं नो आयाारंभा जाव अणारम्भा, तत्थ णं
जे ते संसारसमावन्नगा ते दुविहा पणत्ता, तंजहा-संजया य असंजया य, तत्थ
णं जे ते संजया ते दुविहा पणत्ता, तंजहा-पमत्तसंजया य अप्पमत्तसंजया य,
तत्थ णं जे ते अप्पमत्तसंजया ते णं नो आयाारंभा नो परारंभा जाव अणारंभा,
तत्थ णं जे ते पमत्तसंजया ते सुहं जोगं पड्डुच्च नो आयाारंभा नो परारंभा जाव
अणारंभा, असुभं जोगं पड्डुच्च आयाारंभावि जाव नो अणारंभा, तत्थ णं जे ते
असंजया ते अविरतिं पड्डुच्च आयाारंभावि जाव नो अणारंभा, से तेणट्ठेणं गोयमा !
एवं वुच्चइ-अत्थेगइया जीवा जाव अणारंभा ॥ नेरइयाणं भंते ! किं आयाारंभा
परारंभा तदुभयारंभा अणारंभा ?, गोयमा ! नेरइया आयाारंभावि जाव नो अणा-
रंभा, से केणट्ठेणं भन्ते एवं वुच्चइ ?, गोयमा ! अविरतिं पड्डुच्च, से तेणट्ठेणं जाव
नो अणारंभा, एवं जाव असुरकुमाराणवि जाव पंचिदियतिरिक्खजोणिया, मणुस्सा
जहा जीवा, नवरं सिद्धविरहिया भाणियव्वा, वाणमंतरा जाव वेमाणिया जहा नेर-
इया । सल्लेस्सा जहा ओहिया, कण्हलेस्स नीललेस्स काउलेस्स जहा ओहिया
जीवा, नवरं पमत्तअप्पमत्ता न भाणियव्वा, तेउलेस्स पम्हलेस्स सुक्कलेस्स
जहा ओहिया जीवा, नवरं सिद्धा न भाणियव्वा ॥ १६ ॥ इहभविए भंते ! नाणे
परभविए नाणे तदुभयभविए नाणे ?, गोयमा ! इहभविए नाणे परभविए नाणे
तदुभयभविए नाणे । दंसणं पि एवमेव । इहभविए भंते ! चरित्ते परभविए चरित्ते
तदुभयभविए चरित्ते ?, गोयमा ! इहभविए चरित्ते नो परभविए चरित्ते नो तदुभय-
भविए चरित्ते । एवं तवे संजमे ॥ १७ ॥ असंवुडे णं भंते ! अणगारे किं सिज्झइ
बुज्झइ मुच्चइ परिनिव्वाइ सव्वदुक्खाणमंतं करेइ ?, गोयमा ! नो इणट्ठे समट्ठे ।
से केणट्ठेणं जाव नो अंतं करेइ ?, गोयमा ! असंवुडे अणगारे आउयवज्जाओ सत्त
कम्मपगढीओ सिद्धिलबंधणबद्धाओ धणियबंधणबद्धाओ पकरेइ हस्सकालठिइयाओ
वीहकालठिइयाओ पकरेइ मंदाणुभावाओ तिव्वाणुभावाओ पकरेइ अप्पएसग्गाओ
बहुप्पएसग्गाओ पकरेइ आउयं च णं कम्मं सिय बंधइ सिय नो बंधइ अस्साया-
वेयणिज्जं च णं कम्मं भुज्जो भुज्जो उवचिणाइ अणाइयं च णं अणवदग्गं वीहमद्धं
चाउरंतसंसारकंतारं अणुपरियट्ठइ, से एणट्ठेणं गोयमा ! असंवुडे अणगारे णो
सिज्झइ ५ । संवुडे णं भंते ! अणगारे सिज्झइ ५ ?, हंता सिज्झइ जाव अंतं

करेइ, से केणट्ठेणं ?, गोयमा ! संवुडे अणगारे आउयवज्जाओ सत्त कम्मपगडीओ धणियवंधणबद्धाओ सिहिलवंधणबद्धाओ पकरेइ दीहकालठिईयाओ हस्सकालट्ठिइ-याओ पकरेइ तिच्चाणुभावाओ मंदाणुभावाओ पकरेइ बहुप्पएसग्गाओ अप्पएस-ग्गाओ पकरेइ, आउयं च णं कम्मं न बंधइ, अस्सायावेयणिज्जं च णं कम्मं नो भुज्जो भुज्जो उवचिणाइ, अणाइयं च णं अणवदग्गं दीहमद्धं चाउरंतसंसारकंतारं वीइवयइ, से एएणट्ठेणं गोयमा ! एवं वुच्चइ-संवुडे अणगारे सिज्जइ जाव अंतं करेइ ॥ १८ ॥ जीवे णं भंते ! असंसंजए अविरए अप्पडिहयपच्चक्खायपावकम्मे इओ चुए पेच्चा देवे सिया ?, गोयमा ! अत्थेगइए देवे सिया अत्थेगइए नो देवे सिया । से केणट्ठेणं जाव इओ चुए पेच्चा अत्थेगइए देवे सिया अत्थेगइए नो देवे सिया ?, गोयमा ! जे इमे जीवा गामागरनगरनिगमरायहाणिखेडकब्बडमडंबदोण-मुहपट्ठणासमसज्जिवेसेसु अकामतण्हाए अकामल्लुहाए अकामर्भवचेरवासेणं अकाम-सीतातवदंसमसगअण्हाणगसेयजल्लमलपंकपरिदाहेणं अप्पतरं वा भुज्जतरं वा कालं अप्पाणं परिकिलेसंति अप्पाणं परिकिलेसित्ता कालमासे कालं किच्चा अन्नयरेसु वाण-मंतरेसु देवलोगेसु देवत्ताए उववत्तारो भवंति ॥ केरिसाणं भंते ! तेसिं वाणमंतराणं देवाणं देवलोगा पणत्ता ?, गोयमा ! से जहानामए-इहं मणुस्सलोगंमि असोगवणे इ वा सत्तवन्नवणे इ वा चंपयवणे इ वा चूयवणे इ वा तिलगवणे इ वा लाउयवणे इ वा निग्गोहवणे इ वा छतोववणे इ वा असणवणे इ वा सणवणे इ वा अयसिवणे इ वा कुसुंभवणे इ वा सिद्धत्थवणे इ वा बंधुजीवगवणे इ वा णिच्चं कुलुमियमाइ-यलवइयथवइयगुलइयगुच्छियजमलियजुवलियविणमियपणमियसुविभत्तपिंडिमंजरिवडें-सगधरे सिरिए अतीव अतीव उवसोभेमाणे उवसोभेमाणे चिट्ठइ, एवामेव तेसिं वाणमंतराणं देवाणं देवलोगा जहन्नेणं दसवाससहस्सट्ठितीएहिं उक्कोसेणं पलिओव-मट्ठितीएहिं बह्वहिं वाणमंतरेहिं देवेहिं तदेवीहिं य आइण्णा वितिकिण्णा उवत्थडा संथडा फुडा अवगाढगाढसिरिए अतीव अतीव उवसोभेमाणा चिट्ठंति, एरिसगाणं गोयमा ! तेसिं वाणमंतराणं देवाणं देवलोगा ५०, से तेणट्ठेणं गोयमा ! एवं वुच्चइ-जीवे णं असंजए जाव देवे सिया । सेवं भंते ! सेवं भंते ! त्ति भगवं गोयमे समणं भगवं महावीरं वंदति नमंसति वंदइत्ता नमंसइत्ता संजमेणं तवसा अप्पाणं भावे-माणे विहरति ॥ १९ ॥ पढमे सए पढमो उद्देसो समत्तो ॥

रायणिहे नगरे समोसरणं, परिसा निग्गया जाव एवं वयासी-जीवे णं भंते ! सयंकडं दुक्खं वेदेइ ?, गोयमा ! अत्थेगइयं वेएइ अत्थेगइयं नो वेएइ, से केणट्ठेणं भंते ! एवं वुच्चइ-अत्थेगइयं वेदेइ अत्थेगइयं नो वेएइ ?, गोयमा ! उदिच्चं वेएइ

अणुदिशं नो वेएइ, से तेणट्ठेणं एवं वुच्चइ-अत्थेगइयं वेएइ अत्थेगतियं नो वेएइ, एवं चउव्वीसदंडएणं जाव वेमाणिए ॥ जीवा णं भंते ! सयंकडं दुक्खं वेएन्ति ?, गोयमा ! अत्थेगइयं वेयन्ति अत्थेगइयं णो वेयन्ति, से केणट्ठेणं ?, गोयमा ! उदिशं वेयन्ति नो अणुदिशं वेयन्ति, से तेणट्ठेणं, एवं जाव वेमाणिया ॥ जीवे णं भंते ! सयंकडं आउयं वेएइ ? गोयमा ! अत्थेगइयं वेएइ अत्थेगइयं नो वेएइ जहा दुक्खेणं दो दंडगा तथा आउएणवि दो दंडगा एगत्तपुहुत्तिया, एगत्तेणं जाव वेमाणिया पुहुत्तेणवि तहेव ॥ २० ॥ नेरइया णं भंते ! सव्वे समाहारा सव्वे समसरीरा सव्वे समुस्सासनीसासा ?, गोयमा ! नो इणट्ठे समट्ठे । से केणट्ठेणं भंते ! एवं वुच्चइ नेरइया नो सव्वे समाहारा नो सव्वे समसरीरा नो सव्वे समुस्सासनिस्सासा ?, गोयमा ! नेरइया दुविहा पन्नत्ता, तंजहा-महासरीरा य अप्पसरीरा य, तत्थ णं जे ते महासरीरा ते बहुतराए पोग्गले आहारेंति बहुतराए पोग्गले परिणामेंति बहुतराए पोग्गले उस्ससंति बहुतराए पोग्गले नीससंति अभिक्खणं आहारेंति अभिक्खणं परिणामेंति अभिक्खणं उस्ससंति अभिक्खणं नी०, तत्थ णं जे ते अप्पसरीरा ते णं अप्पतराए पुग्गले आहारेंति अप्पतराए पुग्गले परिणामेंति अप्पतराए पोग्गले उस्ससंति अप्पतराए पोग्गले नीससंति आहच्च आहारेंति आहच्च परिणामेंति आहच्च उस्ससंति आहच्च नीससंति, से तेणट्ठेणं गोयमा ! एवं वुच्चइ-नेरइया नो सव्वे समाहारा जाव नो सव्वे समुस्सासनिस्सासा ॥ नेरइया णं भंते ! सव्वे समकम्मा ?, गोयमा ! णो इणट्ठे समट्ठे, से केणट्ठेणं ?, गोयमा ! नेरइया दुविहा पण्णत्ता, तंजहा-पुव्वोववन्नगा य पच्छोववन्नगा य, तत्थ णं जे ते पुव्वोववन्नगा ते णं अप्पकम्मतरागा, तत्थ णं जे ते पच्छोववन्नगा ते णं महाकम्मतरागा, से तेणट्ठेणं गोयमा ! ० ॥ नेरइया णं भंते ! सव्वे समवन्ना ?, गोयमा ! नो इणट्ठे समट्ठे, से केणट्ठेणं तहेव ? गोयमा ! जे ते पुव्वोववन्नगा ते णं विमुद्धवन्नतरागा, तत्थ णं जे ते पच्छोववन्नगा ते णं अविमुद्धवन्नतरागा तहेव से तेणट्ठेणं एवं० ॥ नेरइया णं भंते ! सव्वे समलेस्सा ?, गोयमा ! नो इणट्ठे समट्ठे, से केणट्ठेणं जाव नो सव्वे समलेस्सा ?, गोयमा ! नेरइया दुविहा पण्णत्ता, तंजहा-पुव्वोववन्नगा य पच्छोववन्नगा य, तत्थ णं जे ते पुव्वोववन्नगा ते णं विमुद्धलेस्सतरागा, तत्थ णं जे ते पच्छोववन्नगा ते णं अविमुद्धलेस्सतरागा, से तेणट्ठेणं ० ॥ नेरइया णं भंते ! सव्वे समवेयणा ?, गोयमा ! नो इणट्ठे समट्ठे, से केणट्ठेणं ?, गोयमा ! नेरइया दुविहा पन्नत्ता, तंजहा-सज्जिभूया य असज्जिभूया य, तत्थ णं जे ते सज्जिभूया ते णं महावेयणा, तत्थ णं जे ते असज्जिभूया ते णं अप्पवेयणतरागा, से तेणट्ठेणं गोयमा ! ० ॥ नेरइया

सव्वे समकिरिया ?, गोयमा ! नो इणट्ठे समट्ठे, से केणट्ठेणं ?, गोयमा ! नेरइया तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी, तत्थ णं जे ते सम्मदिट्ठी तेसि णं चत्तारि किरियाओ पण्णत्ताओ, तंजहा-आरंभिया १ परि० २ माया० ३ अप्पच्च० ४, तत्थ णं जे ते मिच्छादिट्ठी तेसि णं पंच किरियाओ कज्जंति-आरंभिया जाव मिच्छादंसणवत्तिया, एवं सम्मामिच्छादिट्ठीणंभि, से तेणट्ठेणं गोयमा ! ० ॥ नेरइया णं भंते ! सव्वे समाउया सव्वे समोववन्नगा ?, गोयमा ! नो इणट्ठे समट्ठे, से केणट्ठेणं ?, गोयमा ! नेरइया चउव्विहा प०, तंजहा-अत्थेगइया समाउया समोववन्नगा १ अत्थेगइया समाउया विसमोववन्नगा २ अत्थेगइया विसमाउया समोववन्नगा ३ अत्थेगइया विसमाउया विसमोववन्नगा ४ से तेणट्ठेणं गोयमा ! ० ॥ असुरकुमारा णं भंते ! सव्वे समाहारा सव्वे समसरीरा, जहा नेरइया तहा भाणियव्वा, नवरं कम्मवन्नलेस्साओ परिवण्णेयव्वाओ, पुव्वोववन्नगा महा-कम्मतरागा अविसुद्धवन्नतरागा अविसुद्धलेसतरागा, पच्छोववन्नगा पसत्था, सेसं तहेव, एवं जाव थणियकुमाराणं । पुढविकाइयाणं आहारकम्मवन्नलेस्सा जहा नेरइयाणं ॥ पुढविकाइया णं भंते ! सव्वे समवेयणा ?, हंता समवेयणा, से केणट्ठेणं भंते ! समवेयणा ?, गोयमा ! पुढविकाइया सव्वे असच्ची असन्निभूया अणिदाए वेयणं वेदंति से तेणट्ठेणं ॥ पुढविकाइया णं भंते ! सव्वे समकिरिया ? हंता समकिरिया, से केणट्ठेणं ?, गोयमा ! पुढविकाइया सव्वे माई मिच्छादिट्ठी ताणं णिययाओ पंच किरियाओ कज्जंति, तंजहा-आरंभिया जाव मिच्छादंसणवत्तिया, से तेणट्ठेणं समाउया समोववन्नगा, जहा नेरइया तहा भाणियव्वा, जहा पुढविकाइया तहा जाव चउरिंदिया । पंचिंदियतिरिक्खजोणिया जहा नेरइया नाणत्तं किरियासु, पंचिंदियतिरिक्खजोणिया णं भंते ! सव्वे समकिरिया ?, गो०, णो ति०, से केणट्ठेणं ? गो० पंचिंदियतिरिक्खजोणिया तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी, तत्थ णं जे ते सम्मदिट्ठी ते दुविहा प०, तंजहा-अस्संजया य संजयासंजया य, तत्थ णं जे ते संजयासंजया तेसिणं तिन्नि किरियाओ कज्जंति, तंजहा-आरंभिया परिग्गहि्या मायावत्तिया, असंजयाणं चत्तारि, मिच्छादिट्ठीणं पंच, सम्मामिच्छादिट्ठीणं पंच, मणुस्सा जहा नेरइया नाणत्तं जे महासरीरा ते बहुतराए पोग्गले आहारंति आहच्च आहारंति जे अप्पसरीरा ते अप्पतराए आहारंति अभिक्खणं आहारंति सेसं जहा नेरइयाणं जाव वेयणा । मणुस्सा णं भंते ! सव्वे समकिरिया ?, गोयमा ! णो तिणट्ठे समट्ठे, से केणट्ठेणं ?, गोयमा ! मणुस्सा तिविहा प०, तंजहा-सम्मदिट्ठी मिच्छादिट्ठी सम्मामिच्छादिट्ठी, तत्थ णं

जे ते सम्मदिट्ठी ते तिविहा प०, तंजहा-संजया अस्संजया संजयासंजया य, तत्थ
 णं जे ते संजया ते दुविहा प०, तंजहा-सरागसंजया य वीयरगसंजया य, तत्थ
 णं जे ते वीयरगसंजया ते णं अकिरिया, तत्थ णं जे ते सरागसंजया ते दुविहा
 प०, तंजहा-पमत्तसंजया य अपमत्तसंजया य, तत्थ णं जे ते अपमत्तसंजया तेसिणं
 एगा मायावत्तिया किरिया कज्जइ, तत्थ णं जे ते पमत्तसंजया तेसिणं दो किरियाओ
 कज्जंति, तं०-आरंभिया य मायावत्तिया य, तत्थ णं जे ते संजयासंजया तेसि णं
 आइल्लओ तिचि किरियाओ कज्जंति, तंजहा-आरंभिया १ परिग्हिया २ मायावत्तिया
 ३, अस्संजयाणं चत्तारि किरियाओ कज्जंति-आरं० १ परि० २ मायावत्तिया ३ अप्प-
 च्च० ४, मिच्छादिट्ठीणं पंच-आरंभि० १ परि० २ माया० ३ अप्पच्च० ४ मिच्छा-
 दंसण० ५, सम्मामिच्छदिट्ठीणं पंच ५ । वाणमंतरजोतिसवेमाणिया जहा असुरकु-
 मारा, नवरं वेयणाए नाणत्तं-मायिमिच्छादिट्ठीउववन्नगा य अप्पवेदणतरा अमायि-
 सम्मदिट्ठीउववन्नगा य महावेयणतरागा भाणियव्वा, जोतिसवेमाणिया ॥ सलेस्सा
 णं भंते ! नेरइया सव्वे समाहारगा ?, ओहिया णं सलेस्साणं सुक्खेस्साणं, एएसि णं
 तिहं एक्को गमो, कण्हलेस्साणं नीललेस्साणंपि एक्को गमो नवरं वेदणाए मायिमि-
 च्छादिट्ठीउववन्नगा य अमायिसम्मदिट्ठीउवव० भाणियव्वा । मणुस्सा किरियासु
 सरागवीयरगपमत्तापमत्ता ण भाणियव्वा । काउलेसाएवि एसेव गमो, नवरं नेरइए
 जहा ओहिए दंडए तहा भाणियव्वा, तेउलेस्सा पम्हलेस्सा जस्स अत्थि जहा ओहिओ
 दंडओ तहा भाणियव्वा नवरं मणुस्सा सरागा वीयरगा य न भाणियव्वा, गाहा-
 दुक्खाउए उदिच्चे आहारे कम्मवन्नलेस्सा य । समवेयणसमकिरिया समाउए चेव
 बोद्धव्वा ॥ १॥ २१ ॥ कइ णं भंते ! लेस्साओ पन्नत्ताओ ?, गोयमा ! छेलेसाओ पन्नता,
 तंजहा-लेसाणं वीयओ उद्देसओ भाणियव्वो जाव इट्ठी ॥ २२ ॥ जीवस्स णं भंते !
 तीतद्धाए आदिट्ठस्स कइविहे संसारसंचिट्ठणकाले पण्णत्ते ?, गोयमा ! चउव्विहे संसा-
 रसंचिट्ठणकाले पण्णत्ते, तंजहा-णेरइयसंसारसंचिट्ठणकाले तिरिक्ख० मणुस्स० देवसं-
 सारसंचिट्ठणकाले य पण्णत्ते ॥ नेरइयसंसारसंचिट्ठणकाले णं भंते ! कतिविहे पण्णत्ते ?,
 गोयमा ! तिविहे पण्णत्ते, तंजहा-सुन्नकाले असुन्नकाले मिस्सकाले ॥ तिरिक्खजोणि-
 यसंसार पुच्छा, गोयमा ! दुविहे पन्नत्ते, तंजहा-असुन्नकाले य मिस्सकाले य, मणु-
 स्साण य देवाण य जहा नेरइयाणं ॥ एयस्स णं भंते ! नेरइयसंसारसंचिट्ठणका-
 लस्स सुन्नकालस्स असुन्नकालस्स मीसकालस्स य कयरेरहिंतो अप्पा वा बहुए वा
 तुल्ले वा विसेसाहिए वा ?, गोयमा ! सव्व० असुन्नकाले मिस्सकाले अणंतगुणे सुन्न-
 काले अणंतगुणे ॥ तिरि० जो० भंते ! सव्व० असुन्नकाले मिस्सकाले अणंतगुणे,

मणुस्सदेवाण य जहा नेरइयाणं ॥ एयस्स णं भंते ! नेरइयस्स संसारसंचिट्ठणका-
लस्स जाव देवसंसारसंचिट्ठण जाव विसेसाहि ए वा ?, गोयमा ! सव्वत्थोवे मणुस्ससं-
सारसंचिट्ठणकाले, नेरइयसंसारसंचिट्ठणकाले असंखेज्जगुणे, देवसंसारसंचिट्ठणकाले
असंखेज्जगुणे, तिरिक्खजोणि ए अणंतगुणे ॥ २३ ॥ जीवे णं भंते ! अंतकिरियं
करेज्जा ?, गोयमा ! अत्थेगतिया करेज्जा अत्थेगतिया नो करेज्जा, अंतकिरियापयं
नेयव्वं ॥ २४ ॥ अह भंते ! असंजयभविद्यदव्वदेवाणं १ अविराहियसंजमाणं २
विराहियसं ३ अविराहियसंजमासंज ४ विराहियसंजमासं ५ असत्तीणं ६
तावसाणं ७ कंदप्पियाणं ८ चरगपरिव्वायगाणं ९ किव्विसियाणं १० तेरिच्छि-
याणं ११ आजीवियाणं १२ आभिओगियाणं १३ सल्लिगीणं दंसणवावन्नगाणं १४
ए एसि णं देवलो गेसु उववज्जमाणाणं कस्स कहिं उववा ए पण्णत्ते ?, गोयमा ! अस्स-
जयभविद्यदव्वदेवाणं जहन्नेणं भवणवासीसु उक्कोसेणं उवरिमगेवेज्जएसु १, अविरा-
हियसंजमाणं जहन्नेणं सोहम्मे कप्पे उक्कोसेणं सव्वट्ठसिद्धे विमाणे २, विराहियसंज-
माणं जहन्नेणं भवणवासीसु उक्कोसेणं सोहम्मे कप्पे ३, अविराहियसंजमा ४ २ णं
जह ० सोहम्मे कप्पे उक्कोसेणं अच्चु ए कप्पे ४, विराहियसंजमासं ० जहन्नेणं भवण-
वासीसु उक्कोसेणं जोतिसिएसु ५, असत्तीणं जहन्नेणं भवणवासीसु उक्कोसेणं वाणमंत-
रेसु ६, अवसेसा सव्वे जह ० भवणवा ० उक्कोसणं वोच्छामि-तावसाणं जोतिसिएसु,
कंदप्पियाणं सोहम्मे, चरगपरिव्वायगाणं बंभलो ए कप्पे, किव्विसियाणं लंतगे कप्पे,
तेरिच्छियाणं सहस्सारे कप्पे, आजीवियाणं अच्चु ए कप्पे, आभिओगियाणं अच्चु ए
कप्पे, सल्लिगीणं दंसणवावन्नगाणं उवरिमगेवेज्जएसु १४ ॥ २५ ॥ कतिविहे णं भंते !
असत्तिआउ ए पण्णत्ते ?, गोयमा ! चउव्विहे असत्तिआउ ए पण्णत्ते, तंजहा-नेरइय-
असत्तिआउ ए तिरिक्ख ० मणुस्स ० देव ० । असत्ती णं भंते ! जीवे किं नेरइयाउयं
पकरेइ तिरि ० मणु ० देवाउयं पकरेइ ?, हंता गोयमा ! नेरइयाउयं पकरेइ तिरि ०
मणु ० देवाउयं पकरेइ, नेरइयाउयं पकरेमाणे जहन्नेणं दसवाससहस्साइ उक्कोसेणं
पलिओवमस्स असंखेज्जइभाणं पकरेति तिरिक्खजोणियाउयं पकरेमाणे जहन्नेणं
अंतोमुहुत्तं उक्कोसेणं पलिओवमस्स असंखेज्जइभाणं पकरेइ, मणुस्साउ ए वि एवं चेव,
देवाउयं जहा नेरइया ॥ एयस्स णं भंते ! नेरइयअसत्तिआउयस्स तिरि ० मणु ०
देवअसत्तिआउयस्स कयरे कयरे जाव विसेसाहि ए वा ?, गोयमा ! सव्वत्थोवे देव-
असत्तिआउ ए, मणुस्स ० असंखेज्जगुणे, तिरिय ० असंखेज्जगुणे, नेरइए ० असंखेज्ज-
गुणे । सेवं भंते ! सेवं भंते ! त्ति ॥ २६ ॥ वित्तिओ उहेसओ समत्तो ॥
जीवाणं भंते ! कंखामोहणज्जे कम्मे कडे ?, हंता कडे ॥ से भंते ! किं देसेणं

देसे कडे ? १ देसेणं सव्वे कडे ? २ सव्वेणं देसे कडे ? ३ सव्वेणं सव्वे कडे ?
 ४, गोयमा ! नो देसेणं देसे कडे १ नो देसेणं सव्वे कडे २ नो सव्वेणं देसे कडे
 ३ सव्वेणं सव्वे कडे ४ ॥ नेरइया णं भंते ! कंखामोहणिज्जे कम्मं कडे ?, हंता कडे,
 जाव सव्वेणं सव्वे कडे ४ । एवं जाव वेमाणियाणं दंडओ भाणियव्वो ॥ २७ ॥
 जीवा णं भंते ! कंखामोहणिज्जं कम्मं करिंसु ?, हंता करिंसु । तं भंते ! किं देसेणं
 देसं करिंसु ?, एएणं अभिलावेणं दंडओ भाणियव्वो जाव वेमाणियाणं, एवं करेति
 एत्थवि दंडओ जाव वेमाणियाणं, एवं करेस्संति, एत्थवि दंडओ जाव वेमाणियाणं ॥
 एवं चिए चिणिंसु च्चिणंति च्चिणिस्संति, उवचिए उवचिणिंसु उवचिणंति उवचिणि-
 स्संति, उदीरेंसु उदीरेंति उदीरिस्संति, वेदिंसु वेदंति वेदिस्संति, निज्जरेंसु निज्जरेंति
 निज्जिस्संति, गाहा-कडचिया उवचिया उदीरिया वेदिया य निज्जिहा । आदिति ए
 चउभेदा तियभेदा पच्छिमा तिणि ॥ १ ॥ २८ ॥ जीवा णं भंते ! कंखामोहणिज्जं
 कम्मं वेदेंति ?, हंता वेदेंति । कहञ्चं भंते ! जीवा कंखामोहणिज्जं कम्मं वेदेंति ?,
 गोयमा ! तेहिं तेहिं कारणेहिं संकिया कंखिया वितिगिच्छिया भेदसमावन्ना कळुस-
 समावन्ना, एवं खलु जीवा कंखामोहणिज्जं कम्मं वेदेंति ॥ २९ ॥ से नूणं भंते !
 तमेव सच्चं णीसंकं जं जिणेहिं पवेइयं ?, हंता गोयमा ! तमेव सच्चं णीसंकं जं
 जिणेहिं पवेदितं ॥ ३० ॥ से नूणं भंते ! एवं मणं धारेमाणे एवं पकरमाणे एवं
 चिट्ठेमाणे एवं संवरेमाणे आणाए आराहए भवति ?, हंता गोयमा ! एवं मणं धारे-
 माणे जाव भवइ ॥ ३१ ॥ से नूणं भंते ! अत्थित्तं अत्थित्ते परिणमइ नत्थित्तं नत्थित्ते
 परिणमइ ?, हंता गोयमा ! जाव परिणमइ ॥ जणं भंते ! अत्थित्तं अत्थित्ते परिण-
 मइ नत्थित्तं नत्थित्ते परिणमइ तं किं पयोगसा वीससा ?, गोयमा ! पयोगसावि तं
 वीससावि तं, जहा ते भंते ! अत्थित्तं अत्थित्ते परिणमइ तहा ते नत्थित्तं नत्थित्ते
 परिणमइ ? जहा ते नत्थित्तं नत्थित्ते परिणमइ तहा ते अत्थित्तं अत्थित्ते परिणमइ ?,
 हंता गोयमा ! जहा मे अत्थित्तं अत्थित्ते परिणमइ तहा मे नत्थित्तं नत्थित्ते परिण-
 मइ, जहा मे नत्थित्तं नत्थित्ते परिणमइ तहा मे अत्थित्तं अत्थित्ते परिणमइ ॥ से
 णूणं भंते ! अत्थित्तं अत्थित्ते गमणिज्जं जहा परिणमइ दो आलावगा तहा ते इह
 गमणिज्जेणवि दो आलावगा भाणियव्वा जाव जहा मे अत्थित्तं अत्थित्ते गमणिज्जं
 ॥ ३२ ॥ जहा ते भंते ! एत्थ गमणिज्जं तहा ते इहं गमणिज्जं जहा ते इहं गमणिज्जं
 तहा ते एत्थं गमणिज्जं ?, हंता ! गोयमा ! जहा मे एत्थं गमणिज्जं जाव तहा
 मे एत्थं (इहं) गमणिज्जं ॥ ३३ ॥ जीवाणं भंते ! कंखामोहणिज्जं कम्मं बंधंति ?, हंता !
 बंधंति । कहं णं भंते ! जीवा कंखामोहणिज्जं कम्मं बंधंति ?, गोयमा ! पमादपचया

जोगनिमित्तं च ॥ से णं भंते ! पमाए किंपवहे ?, गोयमा ! जोगप्पवहे । से णं भंते ! जोए किंपवहे ?, गोयमा ! वीरियप्पवहे । से णं भंते वीरिए किंपवहे ?, गोयमा ! सरीरप्पवहे । से णं भंते ! सरीरे किंपवहे ?, गोयमा ! जीवप्पवहे । एवं सति अत्थि उट्ठाणे ति वा कम्मे ति वा बले इ वा वीरिए इ वा पुरिसक्कारपरक्कमे इ वा ॥ ३४ ॥

से णूणं भंते ! अप्पणा चेव उदीरेइ अप्पणा चेव गरहइ अप्पणा चेव संवरइ ?, हंता ! गोयमा ! अप्पणा चेव तं चेव उच्चारयेय्वं ३ ॥ जं तं भंते ! अप्पणा चेव उदीरेइ अप्पणा चेव गरहेइ अप्पणा चेव संवरेइ तं किं उदिच्चं उदीरेइ १ अणु-दिच्चं उदीरेइ २ अणुदिच्चं उदीरणाभवियं कम्मं उदीरेइ ३ उदयाणंतरपच्छाकडं कम्मं उदीरेइ ४ ?, गोयमा ! नो उदिण्णं उदीरेइ १ नो अणुदिच्चं उदीरेइ २ अणु-दिच्चं उदीरणाभवियं कम्मं उदीरेइ ३ णो उदयाणंतरपच्छाकडं कम्मं उदीरेइ ४ ॥

जं तं भंते ! अणुदिच्चं उदीरणाभवियं कम्मं उदीरेइ तं किं उट्ठाणेणं कम्मेणं बलेणं वीरिएणं पुरिसक्कारपरक्कमेणं अणुदिच्चं उदीरणाभवियं क० उदी० ? उदाहु तं अणुट्ठाणेणं अकम्मेणं अबलेणं अवीरिएणं अपुरिसक्कारपरक्कमेणं अणुदिच्चं उदीरणा-भवियं कम्मं उदी० ?, गोयमा ! तं० उट्ठाणेणवि कम्मे० बले० वीरिए० पुरि-सक्कारपरक्कमेणवि अणुदिच्चं उदीरणाभवियं कम्मं उदीरेइ, णो तं अणुट्ठाणेणं अक-म्मेणं अबलेणं अवीरिएणं अपुरिसक्कार० अणुदिच्चं उदी० भ० क० उदी०, एवं सति अत्थि उट्ठाणे इ वा कम्मे इ वा बले इ वा वीरिए इ वा पुरिसक्कारपरक्कमे इ वा ॥ से नूणं भंते ! अप्पणा चेव उवसामेइ अप्पणा चेव गरहइ अप्पणा चेव संवरइ ?, हंता गोयमा ! एत्थ वि तहेव भाणियव्वं, नवरं अणुदिच्चं उवसामेइ सेसा पडिसेहेयव्वा तिच्चि ॥ जं तं भंते ! अणुदिच्चं उवसामेइ तं किं उट्ठाणेणं जाव पुरि-सक्कारपरक्कमेति वा, से नूणं भंते ! अप्पणा चेव वेदेइ अप्पणा चेव गरहइ ?, एत्थवि सच्चेव परिवाडी, नवरं उदिच्चं वेएइ नो अणुदिच्चं वेएइ, एवं जाव पुरि-सक्कारपरक्कमे इ वा । से नूणं भंते ! अप्पणा चेव निज्जेरति अप्पणा चेव गरहइ, एत्थवि सच्चेव परिवाडी नवरं उदयाणंतरपच्छाकडं कम्मं निज्जेरेइ एवं जाव परिक-मेइ वा ॥ ३५ ॥ नेरइयाणं भंते ! कंखामोहणिज्जं कम्मं वेएन्ति ?, जहा ओहिया जीवा तहा नेरइया, जाव थणियकुमारा ॥ पुढविक्काइयाणं भंते ! कंखामोहणिज्जं कम्मं वेइंति, हंता वेइंति, कहण्णं भंते ! पुढविक्का० कंखामोहणिज्जं कम्मं वेइंति ?, गोयमा ! तेसिणं जीवाणं णो एवं तक्का इ वा सण्णा इ वा पण्णा इ वा मणे इ वा वइ ति वा—अम्हे णं कंखामोहणिज्जं कम्मं वेएमो, वेएंति पुण ते । से णूणं भंते ! तमेव सच्चं नीसंकं जं जिणेहिं पवेइयं, सेसं तं चेव, जाव पुरिसक्कारपरक्कमेइ वा ।

एवं जाव चउरिंदियाणं पंचिंदियतिरिक्खजोणिया जाव वेमाणिया जहा ओहिया जीवा ॥ ३६ ॥ अत्थि णं भंते ! समणावि निग्गंथा कंखामोहणिजं कम्मं वेएन्ति ?, हंता अत्थि, कहञ्चं भंते ! समणा निग्गंथा कंखामोहणिजं कम्मं वेएन्ति ?, गोयमा तेहिं २ नाणंतरेहिं दंसणंतरेहिं चरित्तंतरेहिं लिंगंतरेहिं पवयणंतरेहिं पावयणंतरेहिं कप्पंतरेहिं मग्गंतरेहिं मत्तंतरेहिं भंगंतरेहिं णयंतरेहिं नियमंतरेहिं पमाणंतरेहिं संकिया कंखिया वितिगिच्छिया भेयसमावच्चा कलुससमावच्चा, एवं खलु समणा निग्गंथा कंखामोहणिजं कम्मं वेइंति, से नूणं भंते ! तमेव सच्चं नीसंकं जं जिणेहिं पवेइयं, हंता गोयमा ! तमेव सच्चं नीसंकं, जाव पुरिसक्कारपरक्कमेइ वा सेवं भंते ! सेवं भंते ! ॥ ३७ ॥ पढमसए तत्तिओ उद्देसओ समत्तो ॥

कति णं भंते ! कम्मप्पगडीओ पण्णत्ताओ ? गोयमा ! अट्ठ कम्मप्पगडीओ पण्णत्ताओ, कम्मप्पगडीए पढमो उद्देसो नेयव्वो जाव अणुभागो सम्मत्तो । गाहा-कइ पयडी कह बंधइ कइहि व ठाणेहि बंधइ पयडी । कइ वेदेइ य पयडी अणुभागो कइविहो कस्स ? ॥ १ ॥ ३८ ॥ जीवे णं भंते ! मोहणिजेणं कडेणं कम्मेणं उदिन्नेणं उवट्ठाएज्जा ? हंता उवट्ठाएज्जा । से भंते ! किं वीरियत्ताए उवट्ठाएज्जा अवीरियत्ताए उवट्ठाएज्जा ? गोयमा ! वीरियत्ताए उवट्ठाएज्जा नो अवीरियत्ताए उवट्ठाएज्जा, जइ वीरियत्ताए उवट्ठाएज्जा किं बालवीरियत्ताए उवट्ठाएज्जा पंडियवीरियत्ताए उवट्ठाएज्जा बालपंडियवीरियत्ताए उवट्ठाएज्जा ?, गोयमा ! बालवीरियत्ताए उवट्ठाएज्जा णो पंडियवीरियत्ताए उवट्ठाएज्जा णो बालपंडियवीरियत्ताए उवट्ठाएज्जा । जीवे णं भंते ! मोहणिजेणं कडेणं कम्मेणं उदिन्नेणं अवक्कमेज्जा ? हंता अवक्कमेज्जा, से भंते ! जाव बालपंडियवीरियत्ताए अवक्कमेज्जा ३?, गोयमा ! बालवीरियत्ताए अवक्कमेज्जा नो पंडियवीरियत्ताए अवक्कमेज्जा, सिय बालपंडियवीरियत्ताए अवक्कमेज्जा । जहा उदिन्नेणं दो आलावगा तहा उवसंतेणवि दो आलावगा भाणियव्वा, नवरं उवट्ठाएज्जा पंडियवीरियत्ताए अवक्कमेज्जा बालपंडियवीरियत्ताए ॥ से भंते ! किं आयाए अवक्कमइ ? अणायाए अवक्कमइ ? गोयमा ! आयाए अवक्कमइ णो अणायाए अवक्कमइ, मोहणिजं कम्मं वेएमाणे से कहमेयं भंते ! एवं ? गोयमा ! पुब्बि से एयं एवं रोयइ इयाणि से एयं एवं नो रोयइ एवं खलु एवं ॥ ३९ ॥ से नूणं भंते ! नेरइयस्स वा तिरिक्खजोणियस्स वा मणुसस्स वा देवस्स वा जे कडे पावे कम्मे नत्थि तस्स अवेइत्ता मोकखो ?, हंता गोयमा ! नेरइयस्स वा तिरिक्ख० मणु० देवस्स वा जे कडे पावे कम्मे नत्थि तस्स अवेइत्ता मोकखो । से केणट्ठेणं भंते ! एवं वुच्चति-नेरइयस्स वा जाव मोकखो, एवं खलु मए गोयमा ! दुविहे कम्मे पण्णत्ते, तंजहा-पएसकम्मे य अणुभागकम्मे य,

तत्थ णं जं तं पएसकम्मं तं नियमा वेएइ, तत्थ णं जं तं अणुभागकम्मं तं अत्थे-
 गइयं वेएइ अत्थेगइयं नो वेएइ । णायमेयं अरहया सुयमेयं अरहया विच्चायमेयं
 अरहया इमं कम्मं अयं जीवे अज्झोवगमियाए वेयणाए वेदिस्सइ इमं कम्मं अयं
 जीवे उवक्कमियाए वेदणाए वेदिस्सइ, अहाकम्मं अहानिकरणं जहा जहा तं भग-
 वया दिट्ठं तहा तहा तं विप्परिणमिस्सतीति, से तेणट्ठेणं गोयमा ! नेरइयस्स वा
 ४ जाव मोक्खो ॥ ४० ॥ एस णं भंते ! पोगगले तीतमणंतं सासयं समयं भुवीति
 वत्तव्वं सिया ?, हंता गोयमा ! एस णं पोगगले अतीतमणंतं सासयं समयं भुवीति
 वत्तव्वं सिया । एस णं भंते ! पोगगले पडुप्पन्नसासयं समयं भवतीति वत्तव्वं
 सिया ?, हंता गोयमा ! तं चेव उच्चारयव्वं । एस णं भंते ! पोगगले अणागयमणंतं
 सासयं समयं भविस्सतीति वत्तव्वं सिया ?, हन्ता गोयमा ! तं चेव उच्चारयव्वं ।
 एवं खंधेणवि तिञ्चि आलावगा, एवं जीवेणवि तिञ्चि आलावगा भाणियव्वा ॥ ४१ ॥
 छउमत्थे णं भंते ! मणूसे अतीतमणंतं सासयं समयं भुवीति केवलेणं संजमेणं केवलेणं
 संवरेणं केवलेणं बंभचेरवासेणं केवलाहिं पवयणमाईहिं सिज्झिस्सु बुज्झिस्सु जाव सव्व-
 दुक्खानमंतं करेस्सु ? गोयमा ! नो इणट्ठे समट्ठे । से केणट्ठेणं भंते ! एवं वुच्चइ तं चेव
 जाव अंतं करेस्सु ? गोयमा ! जे केइ अंतकरा वा अंतिमसरीरिया वा सव्वदुक्खान-
 मंतं करेस्सु वा करेति वा करिस्संति वा सव्वे ते उप्पन्नानाणदंसणधरा अरहा जिणे
 केवली भवित्ता तओ पच्छा सिज्झंति बुज्झंति मुच्चंति परिनिव्वायंति सव्वदुक्खान-
 मंतं करेस्सु वा करेति वा करिस्संति वा, से तेणट्ठेणं गोयमा ! जाव सव्वदुक्खान-
 मंतं करेस्सु, पडुप्पन्नेऽवि एवं चेव नवरं सिज्झंति भाणियव्वं, अणागएवि एवं चेव,
 नवरं सिज्झिस्संति भाणियव्वं, जहा छउमत्थो तहा आहो हिओवि तहा परमाहोहि-
 ओऽवि तिञ्चि तिञ्चि आलावगा भाणियव्वा । केवली णं भंते ! मणूसे तीतमणंतं
 सासयं समयं जाव अंतं करेस्सु ? हंता सिज्झिस्सु जाव अंतं करेस्सु, एते तिञ्चि आला-
 वगा भाणियव्वा छउमत्थस्स जहा नवरं सिज्झिस्सु सिज्झंति सिज्झिस्संति । से णूणं
 भंते ! तीतमणंतं सासयं समयं पडुप्पन्नं वा सासयं समयं अणागयमणंतं वा सासयं
 समयं जे केइ अंतकरा वा अंतिमसरीरिया वा सव्वदुक्खानमंतं करेस्सु वा करेति वा
 करिस्संति वा सव्वे ते उप्पन्नानाणदंसणधरा अरहा जिणे केवली भवित्ता तओ पच्छा
 सिज्झंति जाव अंतं करेस्संति वा ? हंता गोयमा ! तीतमणंतं सासयं समयं जाव
 अंतं करेस्संति वा । से णूणं भंते ! उप्पन्नानाणदंसणधरे अरहा जिणे केवली अलम-
 त्थुत्ति वत्तव्वं सिया ? हंता गोयमा ! उप्पन्नानाणदंसणधरे अरहा जिणे केवली अलम-
 त्थुत्ति वत्तव्वं सिया । सेवं भंते ! सेवं भंते ! ति ॥ ४२ ॥ चउत्थो उद्देसो समत्तो ॥

कति णं भंते ! पुढवीओ पन्नत्ताओ ?, गोयमा ! सत्त पुढवीओ पन्नत्ताओ, तंजहा-
रयणप्पभा जाव तमतमा ॥ इमीसे णं भंते ! रयणप्पभाए पुढवीए कति निरया-
वाससयसहस्सा प० ?, गोयमा ! तीसं निरयावाससयसहस्सा प०, गाहा—तीसा
य पन्नवीसा पन्नरस दसेव या सयसहस्सा । तिन्नेगं पंचूणं पंचेव अणुत्तरा निरया
॥ १ ॥ केवइया णं भंते ? असुरकुमारावाससयसहस्सा प० ?, एवं—चउसट्ठी
असुराणं चउरासीई य होइ नागाणं । वावत्तरिं सुवन्नाण वाउकुमाराण छन्नउई
॥ १ ॥ दीवदिसाउदहीणं विज्जुकुमारिंदथणियमग्गीणं । छण्हं पि जुयलयाणं छावत्त-
रिमो सयसहस्सा ॥ २ ॥ केवइया णं भंते ! पुढविकाइयावाससयसहस्सा प० ?,
गोयमा ! असंखेज्जा पुढविकाइयावाससयसहस्सा प०, गोयमा ! जाव असंखिज्जा
जोतिसियविमाणावाससयसहस्सा प० । सोहम्मे णं भंते ! कप्पे केवइया विमाणा-
वाससयसहस्सा प० ?, गोयमा ! वत्तीसं विमाणावाससयसहस्सा प०, एवं—वत्ती-
सट्ठावीसा बारस अट्ठ चउरो सयसहस्सा । पन्ना चत्तालीसा छच्च सहस्सा सह-
स्सारे ॥ १ ॥ आणयपाणयकप्पे चत्तारि सयाऽऽरण्णुए तिन्नि । सत्त विमाणसयाई
चउसुवि एएसु कप्पेसुं ॥ २ ॥ एक्कारसुत्तरं हेट्ठिमेसु सत्तुत्तरं सयं च मज्झिमए ।
सयमेगं उवरिमए पंचेव अणुत्तरविमाणा ॥ ३ ॥ ४३ ॥ पुढवि द्विति ओगाहण-
सरीरसंघयणमेव संठाणे । लेस्सा दिट्ठी णाणे जोगुवओगे य दस ठाणा ॥ १ ॥
इमीसे णं भंते ! रयणप्पभाए पुढवीए तीसाए निरयावाससयसहस्सेसु एगमेगंसि
निरयावासंसि नेरइयाणं केवइया ठितिठाणा प० ?, गोयमा ! असंखेज्जा ठितिठाणा
प०, तंजहा—जहन्निया ठिती समयाहिया जहन्निया ठिई दुसमयाहिया जाव
असंखेज्जसमयाहिया जहन्निया ठिई तप्पाउग्गुक्कोसिया ठिती ॥ इमीसे णं भंते
रयणप्पभाए पुढवीए तीसाए निरयावाससयसहस्सेसु एगमेगंसि निरयावासंसि
जहन्नियाए ठितीए वट्ठमाणा नेरइया किं कोहोवउत्ता माणोवउत्ता मायोवउत्ता
लोभोवउत्ता ?, गोयमा ! सव्वेवि ताव होज्जा कोहोवउत्ता १, अहवा कोहोवउत्ता य
माणोवउत्ते य २, अहवा कोहोवउत्ता य माणोवउत्ता य ३, अहवा कोहोवउत्ता य
मायोवउत्ते य ४, अहवा कोहोवउत्ता य मायोवउत्ता य ५, अहवा कोहोवउत्ता य
लोभोवउत्ते य ६, अहवा कोहोवउत्ता य लोभोवउत्ता य ७ । अहवा कोहोवउत्ता
य माणोवउत्ते य मायोवउत्ते य १, कोहोवउत्ता य माणोवउत्ते य मायोवउत्ता य
२, कोहोवउत्ता य माणोवउत्ता य मायोवउत्ते य ३, कोहोवउत्ता य माणोवउत्ता य
मायोवउत्ता य ४ एवं कोहमाणलोभेणवि चउ ४, एवं कोहमायालोभेणवि चउ ४
एवं १२, पच्छा माणेण मायाए लोभेण य कोहो भइयव्वो, ते कोहं अमुंचता ८,

एवं सत्तावीसं भंगा गेयव्वा ॥ इमीसे णं भंते ! रयणप्पभाए पुढवीए तीसाए
 निरयावाससयसहस्सेसु एगमेगंसि निरयावासंसि समयाहियाए जहन्नद्धितीए वट्ट-
 माणा नेरइया किं कोहोवउत्ता माणोवउत्ता मायोवउत्ता लोभोवउत्ता ?, गोयमा !
 कोहोवउत्ते य माणोवउत्ते य मायोवउत्ते य लोभोवउत्ते य, कोहोवउत्ता य माणो-
 वउत्ता य मायोवउत्ता य लोभोवउत्ता य, अहवा कोहोवउत्ते य माणोवउत्ते य,
 अहवा कोहोवउत्ते य माणोवउत्ता य एवं असीति भंगा नेयव्वा, एवं जाव संखिज्ज-
 समयाहिया ठिई असंखेज्जसमयाहियाए ठिईए तप्पाउग्गुक्कोसियाए ठिईए सत्तावीसं
 भंगा भाणियव्वा ॥ ४४ ॥ इमीसे णं भंते ! रयणप्पभाए पुढवीए तीसाए निरयावा-
 ससयसहस्सेसु एगमेगंसि निरयावासंसि नेरइयाणं केवइया ओगाहणाठाणा पन्नता ?,
 गोयमा ! असंखेज्जा ओगाहणाठाणा पन्नता, तंजहा-जहन्निया ओगाहणा अंगुलस्स
 असंखेज्जइभागं जहणिया ओगाहणा एगपदेसाहिया जहन्निया ओगाहणा, दुप्पए-
 साहिया जहन्निया ओगाहणा, जाव असंखिज्जपएसाहिया जहन्निया ओगाहणा,
 तप्पाउग्गुक्कोसिया ओगाहणा ॥ इमीसे णं भंते ! रयणप्पभाए पुढवीए तीसाए
 निरयावाससयसहस्सेसु एगमेगंसि निरयावासंसि जहन्नियाए ओगाहणाए वट्टमाणा
 नेरइया किं कोहोवउत्ता ?, असीइभंगा भाणियव्वा जाव संखिज्जपएसाहिया जह-
 न्निया ओगाहणा, असंखेज्जपएसाहियाए जहन्नियाए ओगाहणाए वट्टमाणानं तप्पा-
 उग्गुक्कोसियाए ओगाहणाए वट्टमाणानं नेरइयाणं दोसुवि सत्तावीसं भंगा ॥ इमीसे
 णं भंते ! रयण० जाव एगमेगंसि निरयावासंसि नेरइयाणं कइ सरीरया पण्णत्ता ?,
 गोयमा ! तिन्नि सरीरया पण्णत्ता, तंजहा-वेउव्विए तेयए कम्मए ॥ इमीसे णं भंते !
 जाव वेउव्वियसरीरे वट्टमाणा नेरइया किं कोहोवउत्ता ? सत्तावीसं भंगा भाणियव्वा,
 एएणं गमएणं तिन्नि सरीरा भाणियव्वा ॥ इमीसे णं भंते ! रयणप्पभाए पुढवीए
 जाव नेरइयाणं सरीरया किं संघयणी पन्नत्ता ?, गोयमा ! छण्हं संघयणाणं अस्से-
 वयणी, नेवट्ठी नेव छिरा नेव ण्डारुणि जे पोगगला अणिट्ठा अकंता अप्पिया अख्खा
 अमणुच्चा अमणामा, एतेसिं सरीरसंघायत्ताए परिणमंति ॥ इमीसे णं भंते ! जाव
 छण्हं संघयणाणं असंघयणे वट्टमाणानं नेरइया किं कोहोवउत्ता ? सत्तावीसं भंगा ॥
 इमीसे णं भंते ! रयणप्पभा जाव सरीरिया किंसंठिया पन्नत्ता ?, गोयमा ! दुविहा
 पन्नत्ता, तंजहा-भवधारणिज्जा य उत्तरविउव्विया य, तत्थ णं जे ते भवधारणिज्जा
 ते हुंडसंठिया पण्णत्ता, तत्थ णं जे ते उत्तरवेउव्विया तेवि हुंडसंठिया पण्णत्ता ।
 इमीसे णं जाव हुंडसंठाणे वट्टमाणा नेरइया किं कोहोवउत्ता ? सत्तावीसं भंगा ॥
 इमीसे णं भंते ! रयणप्पभाए पुढवीए नेरइयाणं कति लेस्साओ पन्नत्ता ?, गोयमा !

एगां काउलेस्सा पण्णत्ता । इमीसे णं भंते ! रयणप्पभाए जाव काउलेस्साए वट्ट-
 माणा सत्तावीसं भंगा ॥ ४५ ॥ इमीसे णं जाव किं सम्महिट्ठी मिच्छादिट्ठी सम्मा-
 मिच्छादिट्ठी ?, तिञ्चिवि । इमीसे णं जाव सम्महंसणे वट्टमाणा नेरइया सत्तावीसं
 भंगा, एवं मिच्छादंसणेवि, सम्मामिच्छादंसणे असीति भंगा ॥ इमीसे णं भंते !
 जाव किं नाणी अज्ञाणी ?, गोयमा ! नाणीवि अज्ञाणीवि, तिञ्चि नाणाई नियमा,
 तिञ्चि अज्ञाणाई भयणाए । इमीसे णं भंते ! जाव आभिणिबोहियनाणे वट्टमाणा
 सत्तावीसं भंगा, एवं तिञ्चि नाणाई तिञ्चि अज्ञाणाई भाणियव्वाई ॥ इमीसे णं जाव
 किं मणजोगी वड्जोगी कायजोगी, ? तिञ्चिवि । इमीसे णं जाव मणजोए वट्टमाणा
 कोहोवउत्ता ?, सत्तावीसं भंगा । एवं वड्जोए एवं कायजोए ॥ इमीसे णं जाव नेर-
 इया किं सागारोवउत्ता अणागारोवउत्ता ?, गोयमा ! सागारोवउत्तावि अणागारो-
 वउत्तावि । इमीसे णं जाव सागारोवओगे वट्टमाणा किं कोहोवउत्ता ?, सत्तावीसं
 भंगा । एवं अणागारोवउत्तावि सत्तावीसं भंगा ॥ एवं सत्तवि पुढवीओ नेयव्वाओ,
 णाणत्तं लेसासु गाहा—काऊ य दोसु तइयाए मीसिया नीलिया चउत्थीए । पंच-
 मियाए मीसा कण्हा तत्तो परमकण्हा ॥ १ ॥ ४६ ॥ चउसट्ठीए णं भंते ! असुर-
 कुमारावाससयसहस्सेसु एगमेगंसि असुरकुमारावासंसि असुरकुमारानं केवइया ठिइ-
 ठाणा प० ?, गोयमा ! असंखेज्जा ठितिठाणा प०, जहन्निया ठिई जहा नेरइया
 तहा, नवरं पडिलोमा भंगा भाणियव्वा—सव्वेवि ताव होज लोभोवउत्ता, अहवा
 लोभोवउत्ता य मायोवउत्ते य, अहवा लोभोवउत्ता य मायोवउत्ता य, एएणं गमेणं
 नेयव्वं जाव थणियकुमारानं, नवरं णाणत्तं जाणियव्वं ॥ ४७ ॥ असंखेज्जेसु णं
 भंते ! पुढविकाइयावाससयसहस्सेसु एगमेगंसि पुढविकाइयावासंसि पुढविकाइयाणं
 केवतिया ठितिठाणा प० ?, गोयमा ! असंखेज्जा ठितिठाणा प०, तंजहा—जहन्निया
 ठिई जाव तप्पाउग्गुक्कोसिया ठिई । असंखेज्जेसु णं भंते ! पुढविकाइयावाससयसह-
 स्सेसु एगमेगंसि पुढविकाइयावासंसि जहन्नियाए ठिटीए वट्टमाणा पुढविकाइया किं
 कोहोवउत्ता माणोवउत्ता मायोवउत्ता लोभोवउत्ता ?, गोयमा ! कोहोवउत्तावि माणो-
 वउत्तावि मायोवउत्तावि लोभोवउत्तावि, एवं पुढविकाइयाणं सव्वेसुवि ठाणेसु अभं-
 गयं, नवरं तेउलेस्साए असीति भंगा, एवं आउकाइयावि, तेउकाइयवाउकाइयाणं
 सव्वेसुवि ठाणेसु अभंगयं ॥ वणस्सइकाइया जहा पुढविकाइया ॥ ४८ ॥ वेईदिय-
 तेईदियचउरिंदियाणं जेहिं ठाणेहिं नेरइयाणं असीइभंगा तेहिं ठाणेहिं असीई
 चेव, नवरं अब्भहिया सम्मत्ते आभिणिबोहियनाणे सुयनाणे य, एएहिं असीइभंगा,
 जेहिं ठाणेहिं नेरइयाणं सत्तावीसं भंगा तेसु ठाणेसु सव्वेसु अभंगयं ॥ पंचिंदिय-

तिरिक्खजोणिया जहा नेरइया तहा भाणियव्वा, नवरं जेहिं सत्तावीसं भंगा तेहिं अभंगयं कायव्वं जत्थ असीति तत्थ असीति चेव ॥ मणुस्साणवि जेहिं ठाणेहिं नेरइयाणं असीतिभंगा तेहिं ठाणेहिं मणुस्साणवि असीतिभंगा भाणियव्वा, जेसु ठाणेषु सत्तावीसा तेसु अभंगयं, नवरं मणुस्साणं अब्भहियं जहन्धिया ठिई आहारए य असीति भंगा ॥ वाणमंतरजोइसवेमाणिया जहा भवणवासी, नवरं णाणत्तं जाणियव्वं जं जस्स, जाव अणुत्तरा, सेवं भंते ! सेवं भंते ! त्ति ॥ ४९ ॥

पढमसयस्स पंचमो उद्देसो समत्तो ॥

जावइयाओ य णं भंते ! उवासंतराओ उदयंते सूरिए चक्खुप्फासं हव्वमागच्छति अत्थमंतेविय णं सूरिए तावइयाओ चेव उवासंतराओ चक्खुप्फासं हव्वमागच्छति ?, हंता ! गोयमा ! जावइयाओ णं उवासंतराओ उदयंते सूरिए चक्खुप्फासं हव्वमागच्छति अत्थमंतेवि सूरिए जाव हव्वमागच्छति । जावइयणं भंते ! खित्तं उदयंते सूरिए आतावेणं सव्वओ समंता ओभासेइ उज्जोएइ तवेइ पभासेइ, अत्थमंतेविय णं सूरिए तावइयं चेव खित्तं आयावेणं सव्वओ समंता ओभासेइ उज्जोएइ तवेइ पभासेइ ?, हंता गोयमा ! जावतियणं खेत्तं जाव पभासेइ ॥ तं भंते ! किं पुट्ठं ओभासेइ अपुट्ठं ओभासेइ ?, जाव छद्दिसिं ओभासेति, एवं उज्जोवेइ तवेइ पभासेइ जाव नियमा छद्दिसिं ॥ से नूणं भंते ! सव्वंति सव्वावंति फुसमाणकालसमयंसि जावतियं खेत्तं फुसइ तावतियं फुसमाणे पुट्ठेति वत्तव्वं सिया ?, हंता ! गोयमा ! सव्वंति जाव वत्तव्वं सिया ॥ तं भंते ! किं पुट्ठं फुसइ अपुट्ठं फुसइ ? जाव नियमा छद्दिसिं ॥ ५० ॥ लोयंते भंते ! अलोयंतं फुसइ अलोयंतेवि लोयंतं फुसइ ?, हंता गोयमा ! लोयंते अलोयंतं फुसइ अलोयंतेवि लोयंतं फुसइ ३ । तं भंते ! किं पुट्ठं फुसइ अपुट्ठं फुसइ ? जाव नियमा छद्दिसिं फुसइ । वीवंते भंते ! सागरंतं फुसइ सागरंतेवि वीवंतं फुसइ ?, हंता जाव नियमा छद्दिसिं फुसइ, एवं एएणं अभिलावेणं उदयंते पोयंतं फुसइ छिद्धंते दूसंतं छायंतं आयवंतं जाव नियमा छद्दिसिं फुसइ ॥ ५१ ॥ अत्थि णं भंते ! जीवाणं पाणाइवाएणं किरिया कज्जइ ?, हंता अत्थि । सा भंते ! किं पुट्ठा कज्जइ अपुट्ठा कज्जइ ?, जाव निव्वाघाएणं छद्दिसिं वाघायं पडुच्च सिय तिदिसिं सिय चउदिसिं सिय पंचदिसिं । सा भंते ! किं कडा कज्जइ अकडा कज्जइ ?, गोयमा ! कडा कज्जइ नो अकडा कज्जइ । सा भंते ! किं अत्तकडा कज्जइ परकडा कज्जइ तदुभयकडा कज्जइ ?, गोयमा ! अत्तकडा कज्जइ णो परकडा कज्जइ णो तदुभयकडा कज्जइ । सा भंते ! किं आणुपुत्वि कडा कज्जइ अणाणुपुत्वि कडा कज्जइ ?, गोयमा ! आणुपुत्वि कडा कज्जइ नो अणाणुपुत्वि कडा

कज्जइ, जा य कडा जा य कज्जइ जा य कज्जिस्सइ सव्वा सा आणुपुर्व्वि कडा नो अणणुपुर्व्वि कडत्ति वत्तव्वं सिया । अत्थि णं भंते ! नेरइयाणं पाणाइवायकिरिया कज्जइ ?, हंता अत्थि । सा भंते ! किं पुट्ठा कज्जइ अपुट्ठा कज्जइ जाव नियमा छद्दिसिं कज्जइ, सा भंते ! किं कडा कज्जइ अकडा कज्जइ ?, तं चेव जाव नो अणणुपुर्व्वि कडत्ति वत्तव्वं सिया, जहा नेरइया तहा एगिंदियवज्जा भाणियव्वा, जाव वेमाणिया, एगिंदिया जहा जीवा तहा भाणियव्वा, जहा पाणाइवाए तहा मुसावाए तहा अदिन्नादाणे मेहुणे परिग्गहे कोहे जाव मिच्छादंसणसत्ते, एवं एए अट्ठारस, चउवीसं दंडगा भाणियव्वा, सेवं भंते ! सेवं भंते ! त्ति भगवं गोयमे समणं भगवं जाव विहरति ॥ ५२ ॥ तेणं कालेणं तेणं समएणं समणस्स भगवओ महावीरस्स अंतेवासी रोहे नामं अणगारे पगइभइए पगइमउए पगइविणीए पगइउवसंते पगइ-पयणुकोहमाणमायालोभे मिउमइवसंपजे अल्लीणे भइए विणीए समणस्स भगवओ महावीरस्स अदूरसामंते उड्डंजाणू अहोसिरे ज्ञाणकोट्ठोवगए संजमेणं तवसा अप्पाणं भावेमाणे विहरइ, तए णं से रोहे नामं अणगारे जायसद्धे जाव पज्जुवासमाणे एवं वदासी-पुर्व्वि भंते ! लोए पच्छा अलोए पुर्व्वि अलोए पच्छा लोए ?, रोहा ! लोए य अलोए य पुर्व्विपेते पच्छापेते दोवि एए सासया भावा, अणणुपुर्व्वी एसा रोहा ! । पुर्व्वि भंते ! जीवा पच्छा अजीवा पुर्व्वि अजीवा पच्छा जीवा ?, जहेव लोए य अलोए य तहेव जीवा य अजीवा य, एवं भवसिद्धिया य अभव-सिद्धिया य सिद्धी असिद्धी सिद्धा असिद्धा, पुर्व्वि भंते ! अंडए पच्छा कुकुडी पुर्व्वि कुकुडी पच्छा अंडए ?, रोहा ! से णं अंडए कओ ?, भयवं ! कुकुडीओ, सा णं कुकुडी कओ ?, भंते ! अंडयाओ, एवामेव रोहा ! से य अंडए सा य कुकुडी, पुर्व्विपेते पच्छापेते दुवेते सासया भावा, अणणुपुर्व्वी एसा रोहा ! । पुर्व्वि भंते ! लोयंते पच्छा अलोयंते पुर्व्वि अलोयंते पच्छा लोयंते ?, रोहा ! लोयंते य अलो-यंते य जाव अणणुपुर्व्वी एसा रोहा ! । पुर्व्वि भंते ! लोयंते पच्छा सत्तमे उवा-संतरे पुच्छा, रोहा ! लोयंते य सत्तमे उवासंतरे पुर्व्विपि दोवि एते जाव अणणु-पुर्व्वी एसा रोहा ! । एवं लोयंते य सत्तमे य तणुवाए, एवं घणवाए घणोदही सत्तमा पुडवी, एवं लोयंते एक्केक्केणं संजोएयव्वे इमेहिं ठाणेहिं-तंजहा-ओवासवायघणउदहिं पुडवी दीवा य सागरा वासा । नेरइयाई अत्थिय समया कम्माईं लेस्साओ ॥ १ ॥ दिट्ठी दंसण णाणा सन्न सरीरा य जोग उवओगे । दव्वपएसा पज्जव अद्धा किं पुर्व्वि लोयंते ? ॥ २ ॥ पुर्व्वि भंते ! लोयंते पच्छा सव्वद्धा ? । जहा लोयंतेणं संजोइया सव्वे ठाणा एते एवं अलोयंतेणवि संजोएयव्वा सव्वे । पुर्व्वि भंते !

सत्तमे उवासंतरे पच्छा सत्तमे तणुवाए ?, एवं सत्तमं उवासंतरं सव्वेहिं समं संजोएयव्वं जाव सव्वद्धाए । पुर्व्वि भंते ! सत्तमे तणुवाए पच्छा सत्तमे घणवाए ?, एयंपि तहेव नेयव्वं जाव सव्वद्धा, एवं उवरिळ्ळं एक्केकं संजोयंतेणं जो जो हिट्ठिओ तं तं छट्ठंतेणं नेयव्वं जाव अतीयअणागयद्धा पच्छा सव्वद्धा जाव अणाणुपुव्वी एसा रोहा ! सेव्वं भंते ! सेव्वं भंतेत्ति ! जाव विहरइ ॥ ५३ ॥ भंतेत्ति भगवं गोयमे समणं जाव एवं वयासी-कतिविहा णं भंते ! लोयट्ठिती प० ?, गोयमा ! अट्ठविहा लोयट्ठिती प०, तंजहा-आगासपइट्ठिए वाए १ वायपइट्ठिए उदही २ उदहीपइट्ठिया पुढवी ३ पुढविपइट्ठिया तसा थावरा पाणा ४ अजीवा जीवपइट्ठिया ५ जीवा कम्मपइट्ठिया ६ अजीवा जीवसंगहिया ७ जीवा कम्मसंगहिया ८ । से केणट्ठेणं भंते ! एवं बुच्चइ ?-अट्ठविहा जाव जीवा कम्मसंगहिया ?, गोयमा ! से जहानामए-केइ पुरिसे वत्थिमाडोवेइ वत्थिमाडोवित्ता उप्पि सितं वंधइ २ मज्झेणं गंठिं वंधइ २ उवरिळ्ळं गंठिं मुयइ २ उवरिळ्ळं देसं वामेइ २ उवरिळ्ळं देसं वामेत्ता उवरिळ्ळं देसं आउयायस्स पूरेइ २ उप्पिसि तं वंधइ २ मज्झिळ्ळं गंठिं मुयइ । से नूणं गोयमा ! से आउयाए तस्स वाउयायस्स उप्पि उवरितले चिट्ठइ ?, हंता चिट्ठइ, से तेणट्ठेणं जाव जीवा कम्मसंगहिया, से जहा वा केइ पुरिसे वत्थिमाडोवेइ २ कडीए वंधइ २ अत्थाहमतारमपोरसियंसि उदगंसि ओगाहेज्जा, से नूणं गोयमा ! से पुरिसे तस्स आउयायस्स उवरिमतले चिट्ठइ ?, हंता चिट्ठइ, एवं वा अट्ठविहा लोयट्ठिई पणत्ता जाव जीवा कम्मसंगहिया ॥ ५४ ॥ अत्थि णं भंते ! जीवा य पोगगला य अन्नमन्न-वद्धा अन्नमन्नपुट्ठा अन्नमन्नमोगाढा अन्नमन्नसिणेहपडिबद्धा अन्नमन्नवडत्ताए चिट्ठंति ?, हंता ! अत्थि । से केणट्ठेणं भंते ! जाव चिट्ठंति ?, गोयमा ! से जहानामए-हरदे सिया पुण्णे पुण्णप्पमाणे वोल्डमाणे वोसट्ठमाणे समभरवडत्ताए चिट्ठइ, अहे णं केइ पुरिसे तंसि हरदंसि एणं महं नावं सयासवं सयच्छिड्ढं ओगाहेज्जा, से नूणं गोयमा ! सा णावा तेहिं आसवदारेहिं आपूरमाणी २ पुण्णा पुण्णप्पमाणा वोल्डमाणा वोसट्ठमाणा समभरवडत्ताए चिट्ठइ ?, हंता चिट्ठइ, से तेणट्ठेणं गोयमा ! अत्थि णं जीवा य जाव चिट्ठंति ॥ ५५ ॥ अत्थि णं भंते ! सया समियं सुहुमे सिणेहकाए पवडइ ?, हंता अत्थि । से भंते ! किं उट्ठे पवडइ अहे पवडइ तिरिए पवडइ ?, गोयमा ! उट्ठेवि पवडइ अहे पवडइ तिरिएवि पवडइ, जहा से बादरे आउयाए अन्नमन्नसमाउत्ते चिरंपि वीहकालं चिट्ठइ तथा णं सेवि ?, नो इणट्ठे समट्ठे, से णं खिप्पामेव विट्ठस-मागच्छइ । सेव्वं भंते ! सेव्वं भंतेत्ति ॥ १ ॥ ५६ ॥ छट्ठो उदेसो समत्तो ॥

नेरइए णं भंते ! नेरइएसु उववज्जमाणे किं देसेणं देसं उववज्जइ देसेणं सव्वं

उववज्जइ सव्वेणं देसं उववज्जइ सव्वेणं सव्वं उववज्जइ ?, गोयमा ! नो देसेणं देसं उववज्जइ नो देसेणं सव्वं उववज्जइ नो सव्वेणं देसं उववज्जइ सव्वेणं सव्वं उववज्जइ, जहा नेरइए एवं जाव वेमाणिए ॥ १ ॥ ५७ ॥ नेरइए णं भंते ! नेरइएसु उववज्जमाणे किं देसेणं देसं आहारेइ १ देसेणं सव्वं आहारेइ २ सव्वेणं देसं आहारेइ ३ सव्वेणं सव्वं आहारेइ ? ४, गोयमा ! नो देसेणं देसं आहारेइ नो देसेणं सव्वं आहारेइ सव्वेण वा देसं आहारेइ सव्वेण वा सव्वं आहारेइ, एवं जाव वेमाणिए २ । नेरइए णं भंते ! नेरइएहिंतो उव्वट्टमाणे किं देसेणं देसं उववज्जइ ? जहा उववज्जमाणे तहेव उववट्टमाणेऽवि दंडगो भाणियव्वो ३ । नेरइए णं भंते ! नेरइएहिंतो उववट्टमाणे किं देसेणं देसं आहारेइ तहेव जाव सव्वेण वा देसं आहारेइ ?, सव्वेण वा सव्वं आ० १, एवं जाव वेमाणिए ४ । नेरइ० भंते ! नेर० उववज्जे किं देसेणं देसं उववज्जे, एसोऽवि तहेव जाव सव्वेणं सव्वं उववज्जे ?, जहा उववज्जमाणे उववट्टमाणे य चत्तारि दंडगा तहा उववज्जेणं उव्वट्टेणवि चत्तारि दंडगा भाणियव्वा, सव्वेणं सव्वं उववज्जे सव्वेण वा देसं आहारेइ सव्वेण वा सव्वं आहारेइ, एएणं अभिलावेणं उववज्जेवि उव्वट्टेणवि नेयव्वं ८ ॥ नेरइए णं भंते ! नेरइएसु उववज्जमाणे किं अद्धेणं अद्धं उववज्जइ ? १ अद्धेणं सव्वं उववज्जइ ? २ सव्वेणं अद्धं उववज्जइ ? ३ सव्वेणं सव्वं उववज्जइ० ? ४, जहा पढमिद्धेणं अद्ध दंडगा तहा अद्धेणवि अद्ध दंडगा भाणियव्वा, नवरं जहिं देसेणं देसं उववज्जइ तहिं अद्धेणं अद्धं उववज्जइ इति भाणियव्वं, एवं णाणत्तं, एते सव्वेवि सोलसदंडगा भाणियव्वा ॥ ५८ ॥ जीवे णं भंते ! किं विग्गहगतिसमावज्जए अविग्गहगतिसमावज्जए ?, गोयमा ! सिय विग्गहगइसमावज्जए सिय अविग्गहगतिसमावज्जगे, एवं जाव वेमाणिए । जीवा णं भंते ! किं विग्गहगइसमावज्जया अविग्गहगइसमावज्जगा ?, गोयमा ! विग्गहगइसमावज्जगावि अविग्गहगइसमावज्जगावि । नेरइया णं भंते ! किं विग्गहगतिसमावज्जया अविग्गहगतिसमावज्जगा ?, गोयमा ! सव्वेवि ताव होज्जा अविग्गहगतिसमावज्जगा १ । अहवा अविग्गहगतिसमावज्जगा य विग्गहगतिसमावज्जे य २ अहवा अविग्गहगतिसमावज्जगा य विग्गहगइसमावज्जगा य ३ ॥ एवं जीवेगिन्दियवज्जो तियभंगो ॥ ५९ ॥ देवे णं भंते ! महिद्धिए महज्जुइए महब्बले महायसे महासुखे महाणुभावे अविउक्कंतियं चयमाणे किंचिविकालं हिरिवत्तियं दुण्छावत्तियं परिसहवत्तियं आहारं नो आहारेइ, अहे णं आहारेइ, आहारिज्जमाणे आहारिए परिणामिज्जमाणे परिणामिए पहीणे य आउए भवइ जत्थ उववज्जइ तमाउयं पडिसंवेइइ, तंजहा-तिरिक्खजोणियाउयं वा मणुस्साउयं वा ?, इंता गोयमा ! देवे णं महिद्धिए

जाव मणुस्साउयं वा ॥६०॥ जीवे णं भंते गब्भं वक्कममाणे किं सईदिए वक्कमइ अणि-
 दिए वक्कमइ ?, गोयमा ! सिय सईदिए वक्कमइ सिय आणिदिए वक्कमइ, से केणट्ठेणं ?,
 गोयमा ! दब्बिदियाइं पडुच्च अणिदिए वक्कमइ भाविंदियाइं पडुच्च सईदिए वक्कमइ,
 से तेणट्ठेणं । जीवे णं भंते ! गब्भं वक्कममाणे किं ससरीरी वक्कमइ असरीरी
 वक्कमइ ?, गोयमा ! सिय ससरीरी व० सिय असरीरी वक्कमइ, से केणट्ठेणं ?,
 गोयमा ! ओरालियवेउव्वियआहारयाइं पडुच्च असरीरी व० तेयाक्कम्मा० प० सस०
 वक्क० से तेणट्ठेणं गोयमा !० । जीवे णं भंते ! गब्भं वक्कममाणे तप्पढमयाए
 किमाहारमाहारेइ ?, गोयमा ! माउओयं पिउउळ्ळं तं तदुभयसंसिट्ठं कळुसं किव्विसं
 तप्पढमयाए आहारमाहारेइ । जीवे णं भंते ! गब्भगए समाणे किमाहारमाहारेइ ?,
 गोयमा ! जं से माया नाणाविहाओ रसविगईओ आहारमाहारेइ तदेक्कदेसेणं ओय-
 माहारेइ । जीवस्स णं भंते ! गब्भगयस्स समाणस्स अत्थि उच्चारैइ वा पासवणेइ
 वा खेळेइ वा सिंघाणेइ वा वंतेइ वा पित्तेइ वा ?, णो इणट्ठे समट्ठे, से केणट्ठेणं ?,
 गोयमा ! जीवे णं गब्भगए समाणे जमाहारेइ तं चिणाइ तं सोईदियत्ताए जाव
 फासिंदियत्ताए अट्ठिअट्ठिमिजकेसमंसुरोमनहत्ताए, से तेणट्ठेणं । जीवे णं भंते !
 गब्भगए समाणे पभू मुहेणं कावलियं आहारं आहारित्तए ?, गोयमा ! णो इणट्ठे
 समट्ठे, से केणट्ठेणं ?, गोयमा ! जीवे णं गब्भगए समाणे सव्वओ आहारेइ सव्वओ
 परिणामेइ सव्वओ उस्ससइ सव्वओ निस्ससइ अभिक्खणं आहारेइ अभिक्खणं
 परिणामेइ अभिक्खणं उस्ससइ अभिक्खणं निस्ससइ आहच आहारेइ आहच
 परिणामेइ आहच उस्ससइ आहच नीससइ ॥ माउजीवरसहरणी पुत्तजीवरसहरणी
 माउजीवपडिबद्धा पुत्तजीवं फुडा तम्हा आहारेइ तम्हा परिणामेइ, अवरावि य णं
 पुत्तजीवपडिबद्धा माउजीवफुडा तम्हा चिणाइ तम्हा उवचिणाइ से तेणट्ठेणं जाव
 नो पभू मुहेणं कावलियं आहारं आहारित्तए ॥ कइ णं भंते ! माइअंगा प० ?,
 गोयमा ! तओ माइयंगा प०, तंजहा-मंसे सोणिए मत्थुल्लंगे । कइ णं भंते ! पिइ-
 यंगा प० ?, गोयमा ! तओ पिइयंगा प०, तंजहा-अट्ठि अट्ठिमिजा केसमंसुरोमनहे ।
 अम्मापिइए णं भंते ! सरीरए केवइयं कालं संचिट्ठइ ?, गोयमा ! जावइयं से कालं
 भवधारणिज्जे सरीरए अव्वावन्ने भवइ एवतियं कालं संचिट्ठइ, अहे णं समए समए
 वोक्कसिज्जमाणे २ चरमकालसमयंसि वोच्छिन्ने भवइ ॥ ६१ ॥ जीवे णं भंते !
 गब्भगए समाणे नेरइएस्स उववज्जेज्जा ?, गोयमा ! अत्थेगइए उववज्जेज्जा अत्थेगइए
 नो उववज्जेज्जा, से केणट्ठेणं ?, गोयमा ! से णं सच्ची पंचिदिए सव्वाहिं पज्जत्तीहिं
 पज्जत्ताए वीरियलद्धीए वेउव्वियलद्धीए पराणीएणं आगयं सोच्चा निस्सम्म पएसे

निच्छुभइ नि० २ वेउव्वियसमुग्घाएणं समोहणइ समो० २ चाउरंणिणिं सेज्जं विउव्वइ चाउरंणिणीसेज्जं विउव्वेत्ता चाउरंणिणीए सेणाए पराणीएणं सद्धिं संगामं संगामेइ, से णं जीवे अत्थकामए रज्जकामए भोगकामए कामकामए अत्थकंखिए रज्जकंखिए भोगकंखिए कामकंखिए अत्थपिवासिए रज्जपिवासिए भोगपिवासिए कामपिवासिए तच्चित्ते तम्मणे तल्लेसे तदज्झवसिए तत्तिव्वज्झवसाणे तदट्ठोवउत्ते तदप्पियकरणे तब्भावणाभाविए एयंसि णं अंतरंसि कालं करेज्ज नेरइएसु उववज्जइ, से तेणट्ठेणं गोयमा ! जाव अत्थेगइए उववजेज्जा अत्थेगइए नो उववजेज्जा । जीवे णं भंते ! गब्भगए समाणे देवलोगेसु उववजेज्जा ?, गोयमा ! अत्थेगइए उववजेज्जा अत्थेगइए नो उववजेज्जा, से केणट्ठेणं ?, गोयमा ! से णं सज्जी पंचिदिए सव्वाहिं पज्जतीहिं पज्जतए तहारुवस्स समणस्स वा माहणस्स वा अंतिए एगमवि आयरियं धम्मियं सुवयणं सोच्चा निसम्म तथो भवइ संवेगजायसद्धे तिव्वधम्माणरागरत्ते, से णं जीवे धम्मकामए पुण्णकामए सगगकामए मोक्खकामए धम्मकंखिए पुण्णकंखिए सगगमोक्खकं० धम्मपिवासिए पुण्णसगगमोक्खपिवासिए तच्चित्ते तम्मणे तल्लेसे तदज्झवसिए तत्तिव्वज्झवसाणे तदट्ठोवउत्ते तदप्पियकरणे तब्भावणाभाविए एयंसि णं अंतरंसि कालं करे० देवलो० उव०, से तेणट्ठेणं गोयमा ! ० । जीवे णं भंते ! गब्भगए समाणे उत्ताणए वा पासिज्जए वा अंबखुज्जए वा अच्छेज्ज वा चिट्ठेज्ज वा निसीएज्ज वा तुयट्ठेज्ज वा माऊए सुयमाणीए सुवइ जागरमाणीए जागरइ सुहियाए सुहिए भवइ दुहियाए दुहिए भवइ ?, हंता गोयमा ! जीवे णं गब्भगए समाणे जाव दुहियाए दुहिए भवइ, अहे णं पसवणकालसमयंसि सीसेण वा पाएहिं वा आगच्छइ सममागच्छइ तिरियमागच्छइ विणिहायमागच्छइ ॥ वण्णवज्झाणि य से कम्माईं बद्धाईं पुट्ठाईं निहत्ताईं कडाईं पट्ठवियाईं अभिनिविट्ठाईं अभिसमन्नागयाईं उदिन्नाईं नो उवसंताईं भवंति तथो भवइ दुरुवे दुव्वजे दुग्गंधे दुरसे दुप्फासे अणिट्ठे अकंते अप्पिए असुभे अमणुज्जे अमणामे हीणस्सरे दीणस्सरे अणिट्ठस्सरे अकंतस्सरे अप्पियस्सरे असुभस्सरे अमणुज्जस्सरे अमणामस्सरे अणाएज्जवयणे पच्चायाए यावि भवइ, वज्जवज्झाणि य से कम्माईं नो बद्धाईं पसत्थं नेयव्वं जाव आदेज्जवयणं पच्चायाए यावि भवइ, सेवं भंते ! सेवं भंते ! ति ॥ ६२ ॥ **पढमसयस्स सत्तमो उहेसो समत्तो ॥**

रायगिहे समोसरणं जाव एवं वयासी-एगंतवाले णं भंते ! मणूसे किं नेरइयाउयं पकरेइ तिरिक्ख० मणु० देवा० पक० ?, नेरइयाउयं किच्चा नेरइएसु उव० तिरियाउयं कि० तिरिएसु उवव० मणुस्साउयं किच्चा मणुस्से० उव० देवाउ० कि० देव-

लोएसु उववज्जइ ?, गोयमा ! एगंतवाळे णं मणुस्से नेरइयाउयंपि पकरेइ तिरि० मणु० देवाउयंपि पकरेइ, नेरइयाउयंपि किच्चा नेरइएसु उव० तिरि० मणु० देवाउयं किच्चा तिरि० मणु० देवलोएसु उववज्जइ ॥ ६३ ॥ एगंतपंडिए णं भंते ! मणुस्से किं नेर० पकरेइ जाव देवाउयं किच्चा देवलोएसु उवव० ?, गोयमा ! एगंतपंडिए णं मणुस्से आउयं सिय पकरेइ सिय नो पकरेइ, जइ पकरेइ नो नेरइया० पकरेइ नो तिरि० नो मणु० देवाउयं पकरेइ, नो नेरइयाउयं किच्चा नेर० उव० णो तिरि० णो मणुस्स० देवाउयं किच्चा देवेसु उव०, से केणट्टेणं जाव देवा० किच्चा देवेसु उववज्जइ ?, गोयमा ! एगंतपंडियस्स णं मणुस्सस्स केवलमेव दो गइओ पन्नायंति, तंजहा-अंतकिरिया चेव कप्पोववत्तिया चेव, से तेणट्टेणं गोयमा ! जाव देवाउयं किच्चा देवेसु उववज्जइ ॥ बालपंडिएणं भंते ! मणुस्से किं नेरइयाउयं पकरेइ जाव देवाउयं किच्चा देवेसु उववज्जइ ?, गोयमा ! नो नेरइयाउयं पकरेइ जाव देवाउयं किच्चा देवेसु उववज्जइ, से केणट्टेणं जाव देवाउयं किच्चा देवेसु उववज्जइ ?, गोयमा ! बालपंडिए णं मणुस्से तहारुवस्स समणस्स वा माहणस्स वा अंतिए एगमवि आयरियं धम्मियं सुवयणं सोच्चा निसम्म देसं उवरमइ देसं नो उवरमइ देसं पच्चक्खाइ देसं णो पच्चक्खाइ, से तेणट्टेणं देसोवरमदेसपच्चक्खाणेणं नो नेरइयाउयं पकरेइ जाव देवाउयं किच्चा देवेसु उववज्जइ, से तेणट्टेणं जाव देवेसु उववज्जइ ॥ ६४ ॥ पुरिसे णं भंते ! कच्छंसि वा १ दहंसि वा २ उदगंसि वा ३ दवियंसि वा ४ वलयंसि वा ५ नूमंसि वा ६ गहणंसि वा ७ गहणविदुगंसि वा ८ पव्वयंसि ९ पव्वयविदुगंसि वा १० वणंसि वा ११ वणविदुगंसि वा १२ मियवित्तीए मियसंकप्पे मियपणिहाणे मियवहाए गंता एए मिएत्तिकारुअञ्जयरस्स मियस्स वहाए कूडपासं उद्दाइ, ततो णं भंते ! से पुरिसे कतिकिरिए पण्णते ?, गोयमा ! जावं च णं से पुरिसे कच्छंसि वा १० (१२) जाव कूडपासं उद्दाइ तावं च णं से पुरिसे सिय तिकि० सिय चउ० सिय पंच०, से केणट्टेणं सिय ति० सिय च० सिय पं० ?, गोयमा ! जे भविए उद्दवणयाए णो बंधणयाए णो मारणयाए तावं च णं से पुरिसे काइयाए अहिगरणियाए पाउसियाए तिहिं किरियाहिं पुट्ठे, जे भविए उद्दवणयाएवि बंधणयाएवि णो मारणयाए तावं च णं से पुरिसे काइयाए अहिगरणियाए पाउसियाए पारियावणि-याए चउहिं किरियाहिं पुट्ठे, जे भविए उद्दवणयाएवि बंधणयाएवि मारणयाएवि तावं च णं से पुरिसे काइयाए अहिगरणियाए पाउसियाए जाव पंचहिं पुट्ठे, से तेणट्टेणं जाव पंचकिरिए ॥ ६५ ॥ पुरिसे णं भंते ! कच्छंसि वा जाव वणविदुगंसि वा तणाइं ऊसविय २ अगणिकायं निस्सरइ तावं च णं से भंते ! से पुरिसे कति-

किरिए ?, गोयमा ! सिय तिकिरिए सिय चउकि० सिय पंच०, से केणट्टेणं ?, गोयमा ! जे भविए उस्सवणयाए तिहिं, उस्सवणयाएवि निस्सिरणयाएवि नो दहणयाए चउहिं, जे भविए उस्सवणयाएवि निस्सिरणयाएवि दहणयाएवि तावं च णं से पुरिसे काइयाए जाव पंचहिं किरियाहिं पुट्टे, से तेण० गोयमा ! ॥ ६६ ॥ पुरिसे णं भंते ! कच्छंसि वा जाव वणविदुग्गंसि वा सियवित्तीए मियसंकप्पे सियपणिहाणे मियवहाए गंता एए मिएत्तिकारुं अन्नयरस्स मियस्स वहाए उअं निसिरइ, ततो णं भंते ! से पुरिसे कइकिरिए ?, गोयमा ! सिय तिकिरिए सिय चउकिरिए सिय पंचकिरिए, से केणट्टेणं ?, गोयमा ! जे भविए निस्सिरणयाए नो विद्धंसणयाएवि नो मारणयाए तिहिं, जे भविए निस्सिरणयाएवि विद्धंसणयाएवि नो मारणयाए चउहिं, जे भविए निस्सिरणयाएवि वि० मा० तावं च णं से पुरिसे जाव पंचहिं किरियाहिं पुट्टे, से तेणट्टेणं गोयमा ! सिय तिकिरिए सिय चउकिरिए सिय पंचकिरिए ॥ ६७ ॥ पुरिसे णं भंते ! कच्छंसि वा जाव अन्नयरस्स मियस्स वहाए आययकन्नाययं उअं आयामेत्ता चिट्ठिज्जा, अन्नयरे पुरिसे मग्गओ आगम्म सयपाणिणा अस्सिणा सीसं छिंदेज्जा से य उअं ताए चेव पुव्वायामणयाए तं विवेज्जा से णं भंते ! पुरिसे किं मियवेरेणं पुट्टे पुरिसवेरेणं पुट्टे ?, गोयमा ! जे मियं मारेइ से मियवेरेणं पुट्टे, जे पुरिसं मारेइ से पुरिसवेरेणं पुट्टे, से केणट्टेणं भंते ! एवं वुच्चइ जाव से पुरिसवेरेणं पुट्टे ?, से नूणं गोयमा ! कज्जमाणे कडे संधिज्जमाणे संधिए निव्वत्तिज्जमाणे निव्वत्तिए निसिरिज्जमाणे निसिट्ठेत्ति वत्तव्वं सिया ?, हंता भगवं ! कज्जमाणे कडे जाव निसिट्ठेत्ति वत्तव्वं सिया, से तेणट्टेणं गोयमा ! जे मियं मारेइ से मियवेरेणं पुट्टे, जे पुरिसं मारेइ से पुरिसवेरेणं पुट्टे ॥ अंतो छण्हं मासाणं मरइ काइयाए जाव पंचहिं किरियाहिं पुट्टे, बाहिं छण्हं मासाणं मरइ काइयाए जाव पारियावणियाए चउहिं किरियाहिं पुट्टे ॥ ६८ ॥ पुरिसे णं भंते ! पुरिसं सत्तीए समभिधंसेज्जा सयपाणिणा वा से अस्सिणा सीसं छिंदेज्जा तओ णं भंते ! से पुरिसे कतिकिरिए ?, गोयमा ! जावं च णं से पुरिसे तं पुरिसं सत्तीए अभिसंधेइ सयपाणिणा वा से अस्सिणा सीसं छिंदइ तावं च णं से पुरिसे काइयाए अहिगरणि० जाव पाणाइवायकिरियाए पंचहिं किरियाहिं पुट्टे, आसन्नवहएण य अणवकंखवत्तिएणं पुरिसवेरेणं पुट्टे ॥ ६९ ॥ दो भंते ! पुरिसा सरिसया सरित्तया सरिव्वया सरिसभंडमतोवगरणा अन्नमज्जेणं सद्धिं संगामं संगामेन्ति, तत्थं णं एगे पुरिसे पराइणइ एगे पुरिसे पराइज्जइ, से कहमेयं भंते ! एवं ?, गोयमा ! सवीरिए पराइणइ अवीरिए पराइज्जइ, से केणट्टेणं जाव पराइज्जइ ?, गोयमा ! जस्स णं वीरियवज्झाई कम्माई णो बद्धाई णो पुट्ठाई जाव

नो अभिसमन्नागयाई नो उदिन्नाई उवसंताई भवंति से णं पराइणइ, जस्स णं वीरि-
यवज्झाई कम्माई बद्धाई जाव उदिन्नाई नो उवसंताई भवंति से णं पुरिसे पराइ-
ज्झइ, से तेणट्ठेणं गोयमा ! एवं वुच्चइ-सवीरिए पराइणइ अवीरिए पराइज्झइ ॥ ७० ॥
जीवा णं भंते ! किं सवीरिया अवीरिया ?, गोयमा ! सवीरियावि अवीरियावि, से
केणट्ठेणं ?, गोयमा ! जीवा दुविहा पन्नत्ता, तंजहा-संसारसमावन्नगा य असंसार-
समावन्नगा य, तत्थ णं जे ते असंसारसमावन्नगा ते णं सिद्धा, सिद्धा णं अवीरिया,
तत्थ णं जे ते संसारसमावन्नगा ते दुविहा पन्नत्ता, तंजहा-सेलेसिपडिवन्नगा य
असेलेसिपडिवन्नगा य, तत्थ णं जे ते सेलेसिपडिवन्नगा ते णं लद्धिवीरिएणं सवी-
रिया करणवीरिएणं अवीरिया, तत्थ णं जे ते असेलेसिपडिवन्नगा ते णं लद्धिवीरि-
एणं सवीरिया करणवीरिएणं सवीरियावि अवीरियावि, से तेणट्ठेणं गोयमा ! एवं
वुच्चइ-जीवा दुविहा पण्णत्ता, तंजहा-सवीरियावि अवीरियावि । नेरइया णं भंते !
किं सवीरिया अवीरिया ?, गोयमा ! नेरइया लद्धिवीरिएणं सवीरिया करणवीरिएणं
सवीरियावि अवीरियावि, से केणट्ठेणं ?, गोयमा ! जेसि णं नेरइयाणं अत्थि उट्ठाणे
कम्मे बले वीरिए पुरिसक्कारपरकमे ते णं नेरइया लद्धिवीरिएणवि सवीरिया करण-
वीरिएणवि सवीरिया, जेसि णं नेरइयाणं नत्थि उट्ठाणे जाव परकमे ते णं नेरइया
लद्धिवीरिएणं सवीरिया करणवीरिएणं अवीरिया, से तेणट्ठेणं, जहा नेरइया एवं
जाव पंचिंदियतिरिक्खजोणिया, मणुस्सा जहा ओहिया जीवा, नवरं सिद्धवज्जा
भाणियव्वा, वाणमंतरजोइसवेमाणिया जहा नेरइया, सेवं भंते ! सेवं भंते ! त्ति
॥ ७१ ॥ पढमस्सए अट्ठमो उद्देशो समत्तो ॥

कहन्नं भंते ! जीवा गस्यत्तं हव्वमागच्छन्ति ?, गोयमा ! पाणाइवाएणं मुसा-
चाएणं अदिन्ना० मेहुण० परि० कोह० माण० माया० लोभ० पे० दोस० कलह०
अब्भक्खाण० पेसुन्न० रतिअरति० परपरिवाय० मायामोसमिच्छादंसणसल्लेणं, एवं
खलु गोयमा ! जीवा गस्यत्तं हव्वमागच्छन्ति । कहन्नं भंते ! जीवा लहुयत्तं हव्व-
मागच्छन्ति ?, गोयमा ! पाणाइवायवेरमणेणं जाव मिच्छादंसणसल्लवेरमणेणं एवं
खलु गोयमा ! जीवा लहुयत्तं हव्वमागच्छन्ति, एवं संसारं आउलीकरेंति एवं परि-
त्तीकरेंति दीहीकरेंति हस्सीकरेंति एवं अणुपरियट्ठंति एवं वीइवयंति-पसत्था चत्तारि
अप्पसत्था चत्तारि ॥ ७२ ॥ सत्तमे णं भंते ओवासंतरे किं गुरुए लहुए गुरुयलहुए
अगुरुयलहुए ?, गोयमा ! नो गुरुए नो लहुए नो गुरुयलहुए अगुरुयलहुए । सत्तमे
णं भंते ! तण्णाए किं गुरुए लहुए गुरुयलहुए अगुरुयलहुए ?, गोयमा ! नो गुरुए
नो लहुए गुरुयलहुए नो अगुरुयलहुए । एवं सत्तमे घणवाए सत्तमे घणोदही सत्तमा

पुढवी, उवासंतराई सव्वाइ जहा सत्तमे ओवासंतरे, (सेसा) जहा तणुवाए, एवं-
ओवासवायघणउदहि पुढवी दीवा य सागरा वासा । नेरइया णं भंते ! किं गुरुया
जाव अगुरुलहुया ?, गोयमा ! नो गुरुया नो लहुया गुरुयलहुयावि अगुरुलहुयावि,
से केणट्ठेणं ?, गोयमा ! वेउव्वियतेयाइं पडुच्च नो गुरुया नो लहुया गुरुयलहुआ
नो अगुरुलहुया, जीवं च कम्मणं च पडुच्च नो गुरुया नो लहुया नो गुरुयलहुया
अगुरुयलहुया, से तेणट्ठेणं जाव वेमाणिया, नवरं गाणत्तं जाणियव्वं सरीरेहिं ।
धम्मत्थिकाए जाव जीवत्थिकाए चउत्थपएणं । पोग्गलत्थिकाए णं भंते ! किं गुरुए
लहुए गुरुयलहुए अगुरुयलहुए ?, गोयमा ! गो गुरुए नो लहुए गुरुयलहुएवि अगुरु-
यलहुएवि, से केणट्ठेणं ?, गोयमा ! गुरुयलहुयदव्वाइं पडुच्च नो गुरुए नो लहुए
गुरुयलहुए नो अगुरुयलहुए, अगुरुयलहुयदव्वाइं पडुच्च नो गुरुए नो लहुए नो गुरु-
यलहुए अगुरुयलहुए, समया कम्माणि य चउत्थपदेणं । कण्हलेसा णं भंते ! किं
गुरुया जाव अगुरुयलहुया ?, गोयमा ! नो गुरुया नो लहुया गुरुयलहुयावि अगु-
रुयलहुयावि, से केणट्ठेणं ?, गोयमा ! दव्वलेसं पडुच्च ततियपदेणं भावलेसं पडुच्च
चउत्थपदेणं, एवं जाव सुक्खलेसा, दिट्ठीदंसणनाणअन्नाणसण्णा चउत्थपदेणं णेय-
व्वाओ, हेट्ठिळा चत्तारि सरीरा नायव्वा ततियपदेणं, कम्मं य चउत्थयपएणं, मण-
जोगो वइजोगो चउत्थएणं पदेणं, कायजोगो ततिएणं पदेणं, सागारोवओगो
अणागारोवओगो चउत्थपदेणं, सव्वपदेसा सव्वदव्वा सव्वपजवा जहा पोग्गल-
त्थिकाओ, तीतद्धा अणागयद्धा सव्वद्धा चउत्थएणं पदेणं ॥ ७३ ॥ से नूणं भंते !
लाघवियं अप्पिच्छा अमुच्छा अगेही अपडिबद्धया समणाणं निग्गंथाणं पसत्थं ?,
हंता गोयमा ! लाघवियं जाव पसत्थं ॥ से नूणं भंते ! अकोहत्तं अमाणत्तं अमायत्तं
अलोभत्तं समणाणं निग्गंथाणं पसत्थं ?, हंता गोयमा ! अकोहत्तं अमाणत्तं जाव
पसत्थं ॥ से नूणं भंते ! कंखापदोसे खीणे समणे निग्गंथे अंतकरे भवति अंतिम-
सारीरिए वा बहुमोहेविये य णं पुव्विं विहरित्ता अह पच्छा संवुडे कालं करेति तओ
पच्छा सिज्झति ३ जाव अंतं करेइ ?, हंता गोयमा ! कंखापदोसे खीणे जाव अंतं
करेति ॥ ७४ ॥ अण्णउत्थिया णं भंते ! एवमाइक्खंति एवं भासेंति एवं पण्णवेति
एवं परुवेति-एवं खलु एगे जीवे एगेणं समएणं दो आउयाइं पकरेति, तंजहा-
इहभविआउयं च परभविआउयं च, जं समयं इहभविआउयं पकरेति तं समयं
परभविआउयं पकरेति, जं समयं परभविआउयं पकरेति तं समयं इहभविआउयं
पकरेति, इहभविआउयस्स पकरणयाए परभविआउयं पकरेइ, परभविआउयस्स
पकरणयाए इहभविआउयं पकरेति, एवं खलु एगे जीवे एगेणं समएणं दो आउयाइं

पकरेति, तं०-इहभविआउयं च परभविआउयं च, से कहमेवं भंते ! एवं ?, खलु
 गोयमा ! जणं ते अण्णउत्थिआ एवमाइक्खंति जाव परभविआउयं च, जे ते
 एवमाइंसु सिच्छं ते एवमाइंसु, अहं पुण गोयमा ! एवमाइक्खामि जाव पक्खेमि-
 एवं खलु एगे जीवे एगेणं समएणं एगं आउयं पकरेति, तं०-इहभविआउयं वा
 परभविआउयं वा, जं समयं इहभविआउयं पकरेति णो तं समयं परभविआउयं
 पकरेति, जं समयं परभविआउयं पकरेइ णो तं समयं इहभविआउयं पकरेइ, इह-
 भविआउयस्स पकरणताए णो परभविआउयं पकरेति, परभविआउयस्स पकरणताए
 णो इहभविआउयं पकरेति, एवं खलु एगे जीवे एगेणं समएणं एगं आउयं पकरेति,
 तं०-इहभविआउयं वा परभविआउयं वा, सेवं भंते ! सेवं भंते ! ति भगवं गोयमे
 जाव विहरति ॥ ७५ ॥ तेणं कालेणं तेणं समएणं पासावच्चिजे कालासवेसियपुत्ते
 णामं अणगारे जेणेव थेरा भगवंतो तेणेव उवागच्छति २ ता थेरे भगवंते एवं
 वयासी-थेरा सामाइयं ण जाणंति थेरा सामाइयस्स अट्ठं ण याणंति थेरा पच्चक्खाणं
 ण याणंति थेरा पच्चक्खाणस्स अट्ठं ण याणंति थेरा संजमं ण याणंति थेरा संज-
 मस्स अट्ठं ण याणंति थेरा संवरं ण याणंति थेरा संवरस्स अट्ठं ण याणंति थेरा
 विवेगं ण याणंति थेरा विवेगस्स अट्ठं ण याणंति थेरा विउस्सग्गं ण याणंति थेरा
 विउस्सग्गस्स अट्ठं ण याणंति ६ । तए णं ते थेरा भगवंतो कालासवेसियपुत्तं
 अणगारं एवं वयासी-जाणामो णं अज्जो ! सामाइयं जाणामो णं अज्जो ! सामाइ-
 यस्स अट्ठं जाव जाणामो णं अज्जो ! विउस्सग्गस्स अट्ठं । तए णं से कालासवेसि-
 यपुत्ते अणगारे थेरे भगवंते एवं वयासी-जति णं अज्जो ! तुब्भे जाणह सामाइयं
 जाणह सामाइयस्स अट्ठं जाव जाणह विउस्सग्गस्स अट्ठं किं भे अज्जो ! सामाइए
 किं भे अज्जो सामाइयस्स अट्ठे ? जाव किं भे विउस्सग्गस्स अट्ठे ?, तए णं ते
 थेरा भगवंतो कालासवेसियपुत्तं अणगारं एवं वयासी-आया णे अज्जो ! सामाइए
 आया णे अज्जो ! सामाइयस्स अट्ठे जाव विउस्सग्गस्स अट्ठे । तए णं से कालासवे-
 सियपुत्ते अणगारे थेरे भगवंते एवं वयासी-जति भे अज्जो ! आया सामाइए
 आया सामाइयस्स अट्ठे एवं जाव आया विउस्सग्गस्स अट्ठे अवहट्ठु कोहमाणमाया-
 लोभे किमट्ठं अज्जो ! गरहह ?, कालास० संजमट्ठयाए, से भंते ! किं गरहा संजमे
 अगरहा संजमे ?, कालास० गरहा संजमे नो अगरहासंजमे, गरहावि य णं सव्वं
 दोसं पविणेति सव्वं बालियं परिण्णाए, एवं खु णे आया संजमे उवहिए भवति,
 एवं खु णे आया संजमे उवचिए भवति, एवं खु णे आया संजमे उवट्ठिए भवति,
 एत्थ णं से कालासवेसियपुत्ते अणगारे संबुद्धे थेरे भगवंते वंदति णमंसति २ एवं

वयासी-एएसि णं भंते ! पयाणं पुर्व्वि अण्णागयाए असवणयाए अबोहियाए अण-
भिगमेणं अदिट्ठाणं असुयाणं असुयाणं अविण्णायाणं अब्बोगडाणं अब्बोच्छिन्नाणं
अणिज्जूढाणं अणुवधारियाणं एयमट्ठं णो सदहिए णो पत्तिइए णो रोइए इयाणि
भंते ! एतेसिं पयाणं जाणणयाए सवणयाए बोहीए अभिगमेणं दिट्ठाणं सुयाणं मुयाणं
विण्णायाणं वोगडाणं वोच्छिन्नाणं णिज्जूढाणं उवधारियाणं एयमट्ठं सदहामि पत्ति-
यामि रोएमि एवमेयं से जहेयं तुब्भे वदह, तए णं ते थेरा भगवंतो कालासवेसि-
यपुत्तं अणगारं एवं वयासी-सदहाहि अज्जो ! पत्तियाहि अज्जो ! रोएहि अज्जो ! से
जहेयं अम्हे वदामो । तए णं से कालासवेसियपुत्ते अणगारे थेरे भगवंतो वंदइ
नमंसइ २ एवं वदासी-इच्छामि णं भंते ! तुब्भं अंतिए चाउज्जामाओ धम्माओ
पंचमहव्वइयं सपडिक्कमणं धम्मं उवसंपजित्ता णं विहरितए, अहासुहं देवाणुप्पिया !
मा पडिबंधं । तए णं से कालासवेसियपुत्ते अणगारे थेरे भगवंते वंदइ नमंसइ वंदित्ता
नमंसित्ता चाउज्जामाओ धम्माओ पंचमहव्वइयं सपडिक्कमणं धम्मं उवसंपजित्ता णं
विहरइ । तए णं से कालासवेसियपुत्ते अणगारे बहुणि वासाणि सामण्णपरियागं
पाउणइ जस्सट्ठाए कीरइ थेरकप्पभावे जिणकप्पभावे मुंडभावे अण्हणयं अदंतधु-
व्वणयं अच्छत्तयं अणोवाहणयं भूमिसेज्जा फलहसेज्जा कट्टसेज्जा केसलोओ बंभचेर-
वासो परघरपवेसो लद्धावलद्धी उच्चावया गामकंटगा बावीसं परिसहोवसग्गा अहि-
यासिज्जति तमट्ठं आराहेइ २ चरिमेहिं उस्सासनीसासेहिं सिद्धे बुद्धे मुक्के परिनिव्वुडे
सव्वदुक्खप्पहीणे ॥ ७६ ॥ भंतेत्ति भगवं गोयमे समणं भगवं महावीरं वंदति नमं-
सति २ एवं वदासी-से नूनं भंते ! सेट्ठियस्स य तणुयस्स य किवणस्स य खति-
यस्स य समं चेव अपच्चक्खाणकिरिया कज्जइ ?, हंता गोयमा ! सेट्ठियस्स य जाव
अपच्चक्खाणकिरिया कज्जइ, से केणट्ठेणं भंते ! ?, गोयमा ! अविरतिं पडुच्च से
तेण० गोयमा ! एवं बुच्चइ-सेट्ठियस्स य तणु० जाव कज्जइ ॥ ७७ ॥ आहाकम्मं
भुंजमाणे समणे निग्गंथे किं बंधइ किं पकरेइ किं चिणाइ किं उवचिणाइ ?, गोयमा !
आहाकम्मं णं भुंजमाणे आउयवज्जाओ सत्त कम्मपगडीओ सिट्ठिलबंधणबद्धाओ
धणियबंधणबद्धाओ पकरेइ जाव अणुपरियट्ठइ, से केणट्ठेणं जाव अणुपरियट्ठइ ?,
गोयमा ! आहाकम्मं णं भुंजमाणे आयाए धम्मं अइक्कमइ आयाए धम्मं अइक्कम-
माणे पुढविकायं णावकंखइ जाव तसकायं णावकंखइ, जेसिपि य णं जीवाणं सरी-
राइ आहारमाहारेइ तेवि जीवे नावकंखइ, से तेणट्ठेणं गोयमा ! एवं बुच्चइ-आहा-
कम्मं णं भुंजमाणे आउयवज्जाओ सत्त कम्मपगडीओ जाव अणुपरियट्ठइ ॥ फासुए-
सणिज्जं भंते ! भुंजमाणे किं बंधइ जाव उवचिणाइ ?, गोयमा ! फासुएसणिज्जं णं

भुंजमाणे आउयवजाओ सत्त कम्मपयडीओ धणियबंधणबद्धाओ सिद्धिलबंधणबद्धाओ पकरेइ जहा संवुडे णं नवरं आउयं च णं कम्मं सिय बंधइ सिय नो बंधइ, सेसं तहेव जाव वीईवयइ, से केणट्टेणं जाव वीईवयइ ?, गोयमा ! फासुएसणिज्जं भुंजमाणे समणे निगंथे आयाए धम्मं नो अइक्कमइ, आयाए धम्मं अणइक्कममाणे पुढ-विकाइयं अवकंखति जाव तसकार्यं अवकंखइ, जेसिपि य णं जीवाणं सरीराई आहा-रेइ तेऽवि जीवे अवकंखति से तेणट्टेणं जाव वीईवयइ ॥ ७८ ॥ से नूणं भंते ! अथिरे पलोइइ नो थिरे पलोइति अथिरे भज्जइ नो थिरे भज्जइ सासए बालए बालियत्तं असासयं सासए पंडिए पंडियत्तं असासयं ?, हंता गोयमा ! अथिरे पलोइइ जाव पंडियत्तं असासयं सेवं भंते ! सेवं भंतेति जाव विहरति ॥ ७९ ॥ पढमसए, नवमो उद्देसो समत्तो ॥

अन्नउत्थिया णं भंते ! एवमाइक्खंति जाव एवं परुवेति-एवं खलु चलमाणे अचलिए जाव निज्जरिजमाणे अणिज्जिणे, दो परमाणुपोगगला एगयओ न साह-णंति, कम्हा दो परमाणुपोगगला एगततो न साहणंति ?, दोण्हं परमाणुपोगगलाणं नत्थि सिणेहकाए, तम्हा दो परमाणुपोगगला एगयओ न साहणंति, तिन्नि परमाणु-पोगगला एगयओ साहणंति, कम्हा ? तिन्नि परमाणुपोगगला एगयओ साहणंति, तिण्हं परमाणुपोगगलाणं अत्थि सिणेहकाए, तम्हा तिणिण परमाणुपोगगला एगयओ सा०, ते भिज्जमाणा दुहावि तिहावि कज्जंति, दुहा कज्जमाणा एगयओ दिवड्ढे परमा-णुपोगगले भवति एगयओवि दिवड्ढे पर० पो० भवति, तिहा कज्जमाणा तिणिण पर-माणुपोगगला भवंति, एवं जाव चत्तारि पंचपरमाणुपो० एगयओ साहणंति, एगयओ साहणिता दुक्खताए कज्जंति, दुक्खेवि य णं से सासए सया समियं उवचिज्जइ य अवचिज्जइ य पुर्वि भासा भासा भासिज्जमाणी भासा अभासा भासासमयवीति-क्कंतं च णं भासिया भासा, जा सा पुर्वि भासा भासा भासिज्जमाणी भासा अभासा भासासमयवीतिककंतं च णं भासिया भासा सा किं भासओ भासा अभासओ भासा ?, अभासओ णं सा भासा नो खलु सा भासओ भासा । पुर्वि किरिया दुक्खा कज्जमाणी किरिया अदुक्खा किरियासमयवीतिककंतं च णं कडा किरिया दुक्खा, जा सा पुर्वि किरिया दुक्खा कज्जमाणी किरिया अदुक्खा किरियासमयवीतिककंतं च णं कडा किरिया दुक्खा सा किं करणओ दुक्खा अकरणओ दुक्खा ?, अकरणओ णं सा दुक्खा णो खलु सा करणओ दुक्खा, सेवं वत्तव्वं सिया-अकिच्चं दुक्खं अफुसं दुक्खं अकज्ज-माणकडं दुक्खं अकट्ठु अकट्ठु पाणभूयजीवसत्ता वेदणं वेदंतीति वत्तव्वं सिया ॥ से कहमेयं भंते ! एवं ?, गोयमा ! जणं ते अण्णउत्थिया एवमातिक्खंति जाव वेदणं

वेदेंति, वत्तव्वं सिया, जे ते एवमाहंसु मिच्छा ते एवमाहंसु, अहं पुण गोयमा ।
 एवमातिक्खामि, एवं खलु चलमाणे चलिए जाव निज्जरिज्जमाणे निज्जिण्णे, दो
 परमाणुपोग्गला एगयओ साहणंति, कम्हा ? दो परमाणुपोग्गला एगयओ साह-
 णंति ?, दोण्हं परमाणुपोग्गलाणं अत्थि सिणेहकाए, तम्हा दो परमाणुपोग्गला
 एगयओ सा०, ते भिज्जमाणा दुहा कज्जंति, दुहा कज्जमाणे एगयओ पर० पोग्गले
 एगयओ प० पोग्गले भवन्ति, तिण्णि परमा० एगओ साह०, कम्हा ? तिण्णि परमा-
 णुपोग्गले एग० सा० ?, तिण्हं परमाणुपोग्गलाणं अत्थि सिणेहकाए, तम्हा तिण्णि
 परमाणुपोग्गला एगयओ साहणंति, ते भिज्जमाणा दुहावि तिहावि कज्जंति, दुहा
 कज्जमाणा एगयओ परमाणुपोग्गले एगयओ दुपदेसिए खंधे भवति, तिहा कज्जमाणा
 तिण्णि परमाणुपोग्गला भवन्ति, एवं जाव चत्तारिपंचपरमाणुप० एगओ साहणित्ता
 २ खंधत्ताए कज्जंति, खंधेवि य णं से असासए सया समियं उवचिज्जइ य अवचि-
 ज्जइ य । पुर्वि भासा अभासा भासिज्जमाणी भासा २ भासासमयवीतिकंतं च णं
 भासिया भासा अभासा जा सा पुर्वि भासा अभासा भासिज्जमाणी भासा २
 भासासमयवीतिकंतं च णं भासिया भासा अभासा सा किं भासओ भासा अभा-
 सओ भासा ?, भासओ णं भासा नो खलु सा अभासओ भासा । पुर्वि किरिया
 अदुक्खा जहा भासा तहा भाणियव्वा, किरियावि जाव करणओ णं सा दुक्खा नो
 खलु सा अकरणओ दुक्खा, सेवं वत्तव्वं सिया-किच्चं फुसं दुक्खं कज्जमाणकडं कहु
 २ पाणभूयजीवसत्ता वेदणं वेदेंतीति वत्तव्वं सिया ॥ ८० ॥ अण्णउत्थिया णं भंते !
 एवमाइक्खंति जाव-एवं खलु एगे जीवे एगेणं समएणं दो किरियाओ पकरेइ,
 तंजहा-इरियावहियं च संपराइयं च, [जं समयं इरियावहियं पकरेइ तं समयं संप-
 राइयं पकरेइ, जं समयं संपराइयं पकरेइ तं समयं इरियावहियं पकरेइ, इरियावहि-
 याए पकरणत्ताए संपराइयं पकरेइ संपराइयपकरणयाए इरियावहियं पकरेइ, एवं
 खलु एगे जीवे एगेणं समएणं दो किरियाओ पकरेति, तंजहा-इरियावहियं च
 संपराइयं च । से कहमेयं भंते एवं ?, गोयमा ! जं णं ते अण्णउत्थिया एवमाइ-
 क्खंति तं चेव जाव जे ते एवमाहंसु मिच्छा ते एवमाहंसु, अहं पुण गोयमा !
 एवमाइक्खामि ४-एवं खलु एगे जीवे एगसमए एक्कं किरियं पकरेइ] परउत्थिय-
 वत्तव्वं णेयव्वं, ससमयवत्तव्वयाए नेयव्वं जाव इरियावहियं संपराइयं वा ॥ ८१ ॥
 निरयगई णं भंते ! केवतियं कालं विरहिया उववाएणं प० ?, गोयमा ! जहचेणं
 एक्कं समयं उक्कोसेणं बारस मुहुत्ता, एवं वक्कंतीपर्यं भाणियव्वं निरवसेसं, सेवं भंते !
 सेवं भंते ति जाव विहरइ ॥ ८२ ॥ दसमो उदेसओ ॥ पढमं सयं समत्तं ॥

गाहा—ऊसासखंदए वि य १ समुग्वाय २ पुढवि ३ दिय ४ अन्नउत्थिभासा
 ५ य । देवा य ६ चमरचंचा ७ समय ८ खित ९ थियकाय १० बीयसए ॥१॥८३॥
 तेणं कालेणं तेणं समएणं रायणिहे नामं नगरे होत्वा, वण्णओ, सामी समोसडे
 परिसा निग्गया धम्मो कहिओ पडिग्गया परिसा । तेणं कालेणं २ जेट्ठे अंतेवासी
 जाव पज्जुवासमाणे एवं वयासी—जे इमे भंते ! जेइंदिया तेइंदिया चउरिंदिया
 पंचेदिया जीवा एएसिणं आणामं वा पाणामं वा उस्सासं वा नीससं वा आणामो
 पासामो, जे इमे पुढविक्काइया जाव वणस्सइक्काइया एगिंदिया जीवा एएसिणं
 आणामं वा पाणामं वा उस्सासं वा निस्सासं वा ण याणामो ण पासामो, एएसिणं
 भंते ! जीवा आणमंति वा पाणमंति वा उस्ससंति वा नीससंति वा ? हंता गोयमा !
 एएवि य णं जीवा आणमंति वा पाणमंति वा उस्ससंति वा नीससंति वा ॥ ८४ ॥
 किण्णं भंते ! जीवा आण० पा० उ० नी० ?, गोयमा ! दव्वओ णं अणंतपए-
 सियाइं दव्वाइं खेतओ णं असंखपएसोगाढाईं कालओ अन्नयरट्ठितीयाईं भावओ
 वण्णमंताईं गंधमंताईं रसमंताईं फासमंताईं आणमंति वा पाणमंति वा ऊससंति
 वा नीससंति वा, जाईं भावओ वण्णमंताईं आण० पाण० ऊस० नीस० ताईं किं
 एगवण्णाईं आणमंति पाणमंति ऊस० नीस० ?, आहारगमो नेयव्वो जाव तिचउ-
 पंचदिसिं । किण्णं भंते ! नेरइया आ० पा० उ० नी० तं चेव जाव नियमा
 छहिसिं आ० पा० उ० नी० जीवा एगिंदिया वावाया य निव्वावाया य भाणियव्वा,
 सेसा नियमा छहिसिं ॥ वाउयाए णं भंते ! वाउयाए चेव आणमंति वा पाणमंति
 वा ऊससंति वा नीससंति वा ?, हंता गोयमा ! वाउयाए णं जाव नीससंति वा
 ॥ ८५ ॥ वाउयाए णं भंते ! वाउयाए चेव अणेगसयसहस्सखुत्तो उदाइता २
 तत्थेव भुज्जो भुज्जो पच्चायाति ?, हंता गोयमा ! जाव पच्चायाति । से भंते किं पुट्ठे
 उदाति अपुट्ठे उदाति ?, गोयमा ! पुट्ठे उदाइ नो अपुट्ठे उदाइ । से भंते ! किं सस-
 सीरी निक्खमइ असरीरी निक्खमइ ?, गोयमा ! सिय ससरीरी निक्खमइ सिय
 असरीरी निक्खमइ । से केगट्ठेणं भंते ! एवं बुच्चइ सिय ससरीरी निक्खमइ सिय
 असरीरी निक्खमइ ?, गोयमा ! वाउकायस्स णं चतारि सरीरया पन्नता, तंजहा-
 ओरालिए वेउव्विए तेयए कम्मए, ओरालियवेउव्वियाईं विप्पजहाय तेयकम्मएहिं
 निक्खमति, से तेणट्ठेणं गोयमा ! एवं बुच्चइ—सिय ससरीरी सिय असरीरी निक्ख-
 मइ ॥ ८६ ॥ मडाईं णं भंते ! निर्यठे नो निरुद्धभवे नो निरुद्धभवपवंचे णो पहीण-
 संसारे णो पहीणसंसारवेयणिजे णो वोच्छिग्गसंसारे णो वोच्छिग्गसंसारवेयणिजे
 नो निठियट्ठे नो निठियट्ठकरणिजे पुणरवि इत्यतं हव्वमाणच्छति ?, हंता गोयमा !

मडाई णं नियंठे जाव पुणरवि इत्थत्तं हव्वमागच्छइ ॥ ८७ ॥ से णं भंते ! किं वत्तव्वं सिया ? गोयमा ! पाणेति वत्तव्वं सिया भूतेति वत्तव्वं सिया जीवेति वत्तव्वं सत्तेति वत्तव्वं विव्भुत्ति वत्तव्वं वेदेति वत्तव्वं सिया पाणे भूए जीवे सत्ते विव्भू वेएति वत्तव्वं सिया, से केणट्ठेणं भंते ! पाणेति वत्तव्वं सिया जाव वेदेति वत्तव्वं सिया ?, गोयमा ! जम्हा आ० पा० उ० नी० तम्हा पाणेति वत्तव्वं सिया, जम्हा भूते भवति भविस्सति य तम्हा भूएत्ति वत्तव्वं सिया, जम्हा जीवे जीवइ जीवत्तं आउयं च कम्मं उवजीवइ तम्हा जीवेति वत्तव्वं सिया, जम्हा सत्ते सुहासुहेहिं कम्मेहिं तम्हा सत्तेति वत्तव्वं सिया, जम्हा तित्तकडुयकसायअं विलम्हुरे रसे जणइ तम्हा विव्भुत्ति वत्तव्वं सिया, वेदेइ य सुहदुक्खं तम्हा वेदेति वत्तव्वं सिया, से तेणट्ठेणं जाव पाणेति वत्तव्वं सिया जाव वेदेति वत्तव्वं सिया ॥ ८८ ॥ मडाई णं भंते ! नियंठे निरुद्धभवे निरुद्धभवपवंचे जाव निट्ठियट्ठुकरणिजे णो पुणरवि इत्थत्तं हव्वमागच्छति ?, हुंता गोयमा ! मडाई णं नियंठे जाव नो पुणरवि इत्थत्तं हव्वमागच्छति से णं भंते ! किंति वत्तव्वं सिया ?, गोयमा ! सिद्धेति वत्तव्वं सिया बुद्धेति वत्तव्वं सिया मुत्तेति वत्तव्वं पारगएत्ति व० परंपरगएत्ति व० सिद्धे बुद्धे मुत्ते परिनिव्वुडे अंतकडे सव्वदुक्खप्पहीणेत्ति वत्तव्वं सिया, सेवं भंते ! सेवं भंते ! ति भगवं गोयमे समणं भगवं महावीरं वंदइ नमंसइ २ संजमेणं तवसा अप्पाणं भावेमाणे विहरति ॥ ८९ ॥ तेणं कालेणं तेणं समएणं समणे भगवं महावीरे रायणिहाओ नगराओ गुणसिलाओ उज्जाणाओ पडिनिक्खमइ पडिनिक्खमिता बहिया जणवयविहारं विहरइ, तेणं कालेणं तेणं समएणं कर्यंगलानामं नगरी होत्था वण्णओ, तीसे णं कर्यंगलाए नगरीए बहिया उत्तरपुरच्छिमे दिसीभाए छत्तपलासए नामं उज्जाणे होत्था वण्णओ, तए णं समणे भगवं महावीरे उप्पण्णनाणदंसणधरे जाव समोसरणं परिसा निग्गच्छति, तीसे णं कर्यंगलाए नगरीए अदूरसामंते सावत्थी नामं नयरी होत्था वण्णओ, तत्थ णं सावत्थीए नयरीए गह्मालिस्स अंतेवासी खंदए नामं कच्चायणस्सगोत्ते परिव्वायगे परिवसइ रिउव्वेदजजुव्वेदसामवेदअह्वणवेदइतिहासपंचमाणं निग्घंटुल्लङ्घाणं चउण्हं वेदाणं संगोवंगणं सरहस्साणं सारए वारए धारए पारए सडंगवी सट्ठितंतविसारए संखाणे सिक्खाकप्पे वागरणे छंदे निरुत्ते जोतिसामयणे अत्तेल्ले य बहूसु बंभण्णएसु परिव्वायएसु य नयेसु सुपरिनिट्ठिए यावि होत्था, तत्थ णं सावत्थीए नयरीए पिंगलए नामं नियंठे वेसालियसावए परिवसइ, तए णं से पिंगलए णामं पिग्रंठे वेसालियसावए अण्णया कयाई जेणेव

खंदए कच्चायणस्सगोते तेणेव उवागच्छइ २ खंदए कच्चायणस्सगोतं इणमक्खेवं पुच्छे-मागहा । किं सअंते लोए अणंते लोए १ सअंते जीवे अणंते जीवे २ सअंता सिद्धी अणंता सिद्धी ३ सअंते सिद्धे अणंते सिद्धे ४ केण वा मरणेणं मरमाणे जीवे वड्ढति वा हायति वा ५ ? एतावं ताव आयक्खाहि वुच्चमाणे एवं, तए णं से खंदए कच्चा० गोते पिंगलएणं णियंठेणं वेसालीसावएणं इणमक्खेवं पुच्छिए समाणे संकिए कंखिए वित्तिणिच्छिए भेदसमावच्चे कलुससमावच्चे णो संचाएइ पिंगलयस्स नियंठस्स वेसालियसावयस्स किंचिवि पमोक्खमक्खाइउं, तुसिणीए संचिद्धइ, तए णं से पिंगले नियंठे वेसालीसावए खंदयं कच्चायणस्सगोतं दोच्चंपि तच्चंपि इणमक्खेवं पुच्छे-मागहा । किं सअंते लोए जाव केण वा मरणेणं मरमाणे जीवे वड्ढइ वा हायति वा ? एतावं ताव आइक्खाहि वुच्चमाणे एवं, तते णं से खंदए कच्चा० गोते पिंगलएणं नियंठेणं वेसालीसावएणं दोच्चंपि तच्चंपि इणमक्खेवं पुच्छिए समाणे संकिए कंखिए वित्तिणिच्छिए भेदसमावण्णे कलुसमावण्णे नो संचाएइ पिंगलयस्स नियंठस्स वेसालिसावयस्स किंचिवि पमोक्खमक्खाउं तुसिणीए संचिद्धइ । तए णं सावत्थीए नयरीए सिंवाडग जाव महापहेसु महया जणसंमहे इ वा जणवूहे इ वा परिसा निगगच्छइ । तए णं तस्स खंदयस्स कच्चायणस्सगोतस्स बहुजणस्स अंतिए एयमट्ठं सोच्चा निसम्म इमेयारूवे अब्भत्थिए चित्तिए पत्थिए मणोगए संकप्पे समुप्पज्जित्था- एवं खलु समणे भगवं महावीरे कयंगलाए नयरीए बहिया छत्तपलासए उज्जाणे संजमेणं तवसा अप्पाणं भावेमाणे विहरइ, तं गच्छामि णं समणं भगवं महावीरं, वंदामि नमंसामि, सेयं खलु मे समणं भगवं महावीरं वंदित्ता णमंसित्ता सक्कारेत्ता सम्माणित्ता कल्लणं मंगलं देवयं चेइयं पज्जुवासित्ता इमाइ च णं एयारूवाइं अट्ठाइं हेऊइं पसिणाइं कारणाइं पुच्छित्तएत्ति कट्ठु एवं संपेहेइ २ जेणेव परिव्वायावसहे तेणेव उवागच्छइ २ ता तिदंडं च कुंडियं च कंचणियं च करोडियं च भिसियं च केसरियं च छत्रालयं च अंकुसयं च पवित्तयं च गणेत्तियं च छत्तयं च वाहणाओ य पाउयाओ य धाउरत्ताओ य गेण्हइ गेण्हइत्ता परिव्वायावसहीओ पडिनिक्खमइ पडिनिक्खमइत्ता तिदंडकुंडियकंचणियकरोडियभिसियकेसरियछत्रालयअंकुसयपवित्तगणेत्तियहत्थगए छतोवाहणसंजुत्ते धाउरत्तवत्थपरिहिए सावत्थीए नगरीए मज्झं-मज्झेणं निगगच्छइ निगगच्छइत्ता जेणेव कयंगला नगरी जेणेव छत्तपलासए उज्जाणे जेणेव समणे भगवं महावीरे तेणेव पहारेत्थ गमणाए । गोयमाइ समणे भगवं महावीरे भगवं गोयमं एवं वयासी-दच्छिसि णं गोयमा । पुव्वसंगतियं, कहं भंते !?, खंदयं नाम, से काहं वा किहं वा केवच्चिरेण वा ?, एवं खलु गोयमा । तेणं काळेणं

२ सावत्थीनामं नगरी होत्था वन्नओ, तत्थ णं सावत्थीए नगरीए भद्दमालिस्स
 अंतैवासी खंदए णामं कच्चायणस्सगोत्ते परिवव्वायए परिवसइ तं चेव जाव जेणेव
 ममं अंतिए तेणेव पद्दारेत्थ गमणाए, से तं अदूरागते बहुसंपत्ते अद्धानपडिवण्णी
 अंतरापद्दे वट्टइ । अज्जेव णं दच्छिसि गोयमा !, अंतैति भगवं गोयमे समणं भगवं
 वंदइ नमंसइ २ एवं वदासी-पट्ट णं भंते ! खंदए कच्चायणस्सगोत्ते देवाणुप्पियाणं
 अंतिए मुंडे भविता अगाराओ अणगारियं पव्वइत्तए ?, हंता पभू, जावं च णं
 समणे भगवं महावीरे भगवओ गोयमस्स एयमट्ठं परिकहेइ तावं च णं से खंदए
 कच्चायणस्सगोत्ते तं देसं हव्वमागते, तए णं भगवं गोयमे खंदयं कच्चायणस्सगोत्तं
 अदूरआगयं जाणित्ता खिप्पामेव अब्भुट्ठेति खिप्पामेव पञ्जुवगच्छइ २ जेणेव खंदए
 कच्चायणस्सगोत्ते तेणेव उवागच्छइ २ ता खंदयं कच्चायणस्सगोत्तं एवं वयासी-हे
 खंदया ! सागयं खंदया ! सुसागयं खंदया ! अणुरागयं खंदया ! सागयमणुरागयं
 खंदया ! से नूणं तुमं खंदया ! सावत्थीए नयरीए पिगलएणं नियंठेणं वेसालिय-
 सावएणं इणमक्खेवं पुच्छिए—मागहा ! किं सअंते लोगे अणंते लोगे ? एवं तं
 जेव जेणेव इहं तेणेव हव्वमागए, से नूणं खंदया ! अट्ठे समट्ठे ?, हंता अत्थि, तए
 णं से खंदए कच्चा० भगवं गोयमं एवं वयासी-से केणट्ठेणं गोयमा ! तहारुवे साम्पी
 वा तत्तसी वा जेणं तव एस अट्ठे मम ताव रहस्सकडे हव्वमक्खाए ? जओ णं
 तुमं जाणसि, तए णं से भगवं गोयमे खंदयं कच्चायणस्सगोत्तं एवं वयासी-एवं खल्ल
 खंदया ! मम धम्मायरिए धम्मोवएसए समणे भगवं महावीरे उप्पण्णणाणदंसणधरे
 अरहा जिणे केवली तीयपञ्चुप्पन्नमणागयवियाणए सव्वन्नू सव्वदरिसी जेणं ममं
 एस अट्ठे तव ताव रहस्सकडे हव्वमक्खाए जओ णं अहं जानामि खंदया !
 तए णं से खंदए कच्चायणस्सगोत्ते भगवं गोयमं एवं वयासी—गच्छामो णं
 गोयमा ! तव धम्मायरियं धम्मोवदेसयं समणं भगवं महावीरं वंदामो णमंसामो
 जाव पञ्जुवासामो, अहासुहं देवाणुप्पिया ! मा पडिवंथं, तए णं से भगवं गोयमे
 खंदएणं कच्चायणस्सगोत्तेणं सद्धि जेणेव समणे भगवं महावीरे तेणेव पद्दारेत्थ गम-
 णयाए । तेणं कालेणं २ समणे भगवं महावीरे वियड्ढोई यावि होत्था, तए णं
 समणस्स भगवओ महावीरस्स वियड्ढोइस्स सरीरं ओरालं सिंगारं कळाणं सिवं
 धण्णं मंगलं सस्सिरियं अणलंकियविभूसियं लक्खणवंजणगुणोववेयं सिरीए अतीव
 २ उवसोभेमाणं चिट्ठइ । तए णं से खंदए कच्चायणस्सगोत्ते समणस्स भगवओ महा-
 वीरस्स वियड्ढोइस्स सरीरं ओरालं जाव अतीव २ उवसोभेमाणं पासइ २ ता
 इट्ठुट्ठचित्तमार्णदिए मीइमणे परमसोमणस्सिए हरिसव्वसविसप्पमाणाहियए जेणेव

समणे भगवं महावीरे तेणेव उवागच्छइ २ ता समणं भगवं महावीरं तिव्खुत्तो
 आयाहिणप्पयाहिणं करेइ जाव पज्जुवासइ । खंदयाति समणे भगवं महावीरे खंदयं
 कच्चाय० एवं वयासी-से नूणं तुमं खंदया । सावत्थीए नयरीए पिंगलएणं गियंठेणं
 वेसालियसावएणं इणमक्खेवं पुच्छिए मागहा । किं सअंते लोए अणंते लोए एवं तं
 जेणेव मम अंतिए तेणेव हव्वमागए, से नूणं खंदया ! अयमट्ठे समट्ठे ?, हंता
 अत्थि, जेविय ते खंदया ! अयमेयारुवे अब्भत्थिए चिंतिए पत्थिए मणोगए संकप्पे
 समुप्पज्जित्था-किं सअंते लोए अणंते लोए ? तस्सवि य णं अयमट्ठे-एवं खलु मए
 खंदया ! चउव्विहे लोए पन्नते, तंजहा-दव्वओ खेत्तओ कालओ भावओ । दव्वओ
 णं एगे लोए सअंते १, खेत्तओ णं लोए असंखेज्जाओ जोयणकोडाकोडीओ आयाम-
 विक्खंभेणं असंखेज्जाओ जोयणकोडाकोडीओ परिक्खेवेणं प० अत्थि पुण सअंते २,
 कालओ णं लोए ण कयावि न आसी न कयावि न भवति न कयावि न भविस्सति
 भवित्तु य भवति य भविस्सइ य धुवे गितिए सासते अक्खए अव्वए अव्वट्टिए
 णिच्चे, नत्थि पुण से अंते ३, भावओ णं लोए अणंता वण्णपज्जवा गंध० रस०
 फासपज्जवा अणंता संठाणपज्जवा अणंता गरुयलहुयपज्जवा अणंता अगस्सयलहुय-
 पज्जवा, नत्थि पुण से अंते ४, सेतं खंदगा ! दव्वओ लोए सअंते खेत्तओ लोए
 सअंते कालओ लोए अणंते भावओ लोए अणंते । जेवि य ते खंदया ! जाव सअंते
 जीवे अणंते जीवे, तस्सवि य णं अयमट्ठे-एवं खलु जाव दव्वओ णं एगे जीवे
 सअंते, खेत्तओ णं जीवे असंखेज्जपएसिए असंखेज्जपदेसोगाढे अत्थि पुण से अंते,
 कालओ णं जीवे न कयावि न आसि जाव निच्चे नत्थि पुण से अंते, भावओ णं
 जीवे अणंता णाणपज्जवा अणंता दंसणप० अणंता चरित्तप० अणंता अगुल्लहुयप०
 नत्थि पुण से अंते, सेतं दव्वओ जीवे सअंते खेत्तओ जीवे सअंते कालओ जीवे
 अणंते भावओ जीवे अणंते । जेवि य ते खंदया पुच्छा [इमेयारुवे चितिए जाव
 सअंता सिद्धी अणंता सिद्धी, तस्सवि य णं अयमट्ठे खंदया !-मए एवं खलु चउ-
 व्विहा सिद्धी प०, तं०-दव्वओ ४, दव्वओ णं एगा सिद्धी सअंता खेत्तओ णं
 सिद्धी पणयालीसं जोयणसयसहस्साइं आयामविक्खंभेणं एगा जोयणकोडी वायालीसं
 च जोयणसयसहस्साइं तीसं च जोयणसहस्साइं दोन्नि य उज्जापन्नजोयणसए
 किंन्वि विसेसाहिए परिक्खेवेणं अत्थि पुण से अंते, कालओ णं सिद्धी न कयावि न
 आसि० भावओ य जहा लोयस्स तहा भाणियव्वा, तत्थ दव्वओ सिद्धी सअंता
 खे० सिद्धी सअंता का० सिद्धी अणंता भावओ सिद्धी अणंता । जेवि य ते खंदया !
 जाव किं अणंते सिद्धे तं चेव जाव दव्वओ णं एगे सिद्धे सअंते, खे० सिद्धे अस्सं-

खेजपएसिए असंखेजपदेसोगादे, अत्थि पुण से अंते, कालओ णं सिद्धे साइए
 अपज्ववसिए नत्थि पुण से अंते, भा० सिद्धे अणंता णाणपज्जावा अणंता दंसणपज्जावा
 जाव अणंता अगुल्लहुयप० नत्थि पुण से अंते, सेतं दव्वओ सिद्धे सअंते खेत्तओ
 सिद्धे सअंते का० सिद्धे अणंते भा० सिद्धे अणंते । जेवि य ते खंदया ! इमेयाह्वे
 अब्भत्थिए चित्तिए जाव समुप्पज्जित्था-केण वा मरणेणं मरमाणे जीवे वड्ढति वा
 हायति वा ? तस्सवि य णं अयमट्ठे एवं खलु खंदया ! मए दुविहे मरणे पण्णत्ते,
 तंजहा-बालमरणे य पंडियमरणे य, से किं तं बालमरणे ?, २ दुवालसविहे प०,
 तं० वलयमरणे वसट्टमरणे अंतोसल्लमरणे तब्भवमरणे गिरिपडणे तत्तपडणे जलप्पवेसे
 जलणप्प० विसभक्खणे सत्थोवाडणे वेहाणसे गिद्धपट्ठे । इच्चेतेणं खंदया ! दुवाल-
 सविहेणं बालमरणेणं मरमाणे जीवे अणंतेहिं नेरइयभवग्गहणेहिं अप्पाणं संजोएइ
 तिरियमणुदेव० अणाइयं च णं अणवदग्गं दीहमद्धं चाउरुंतसंसारकंतारं अणुपरि-
 यट्ठइ, सेतं मरमाणे वड्ढइ २, सेतं बालमरणे । से किं तं पंडियमरणे ?, २
 दुविहे प०, तं० पाओवगमणे य भत्तपच्चक्खाणे य । से किं तं पाओवगमणे ?,
 २ दुविहे प०, तं०-नीहारिमे य अनीहारिमे य नियमा अप्पडिक्कमे, सेतं
 पाओवगमणे । से किं तं भत्तपच्चक्खाणे ?, २ दुविहे प०, तं०-नीहारिमे
 य अनीहारिमे य, नियमा सपडिक्कमे, सेतं भत्तपच्चक्खाणे । इच्चेते खंदया ! दुवि-
 हेणं पंडियमरणेणं मरमाणे जीवे अणंतेहिं नेरइयभवग्गहणेहिं अप्पाणं विसंजोएइ
 जाव वीईवयति, सेतं मरमाणे हायइ, सेतं पंडियमरणे । इच्चेणं खंदया !
 दुविहेणं मरणेणं मरमाणे जीवे वड्ढइ वा हायति वा ॥ ९० ॥ एत्थ णं से
 खंदए कच्चायणस्स गोत्ते संबुद्धे समणं भगवं महावीरं वंदइ नमंसइ २ एवं
 वदासी-इच्छामि णं भंते ! तुब्भं अंतिए केवलपन्नत्तं धम्मं निसामेत्तए, अहासुहं
 देवाणुप्पिया ! मा पडिबंथं । तए णं समणे भगवं महावीरे खंदयस्स कच्चाय-
 णस्सगोत्तस्स तीसे महत्तिमहालियाए परिसाए धम्मं परिकहेइ, धम्मकहा भाणि-
 यव्वा । तए णं से खंदए कच्चायणस्सगोत्ते समणस्स भगवओ महावीरस्स अंतिए
 धम्मं सोच्चा निसम्म हट्ठतुट्ठे जाव हियए उट्ठाए उट्ठेइ २ समणं भगवं महावीरं
 तिवक्खत्तो आयाहिणं पयाहिणं करेइ २ एवं वदासी-सद्धामि णं भंते ! निग्गंथं
 पावयणं, पत्तियामि णं भंते ! निग्गंथं पावयणं, रोएमि णं भंते ! निग्गंथं पावयणं,
 अब्भुट्ठेमि णं भंते ! निग्गंथं पा०, एवमेयं भंते ! तहमेयं भंते ! अवितहमेयं भंते !
 असंदिद्धमेयं भंते ! इच्छियमेयं भंते ! पडिच्छियमेयं भंते ! इच्छियपडिच्छियमेयं
 भंते ! से जहेयं तुब्भे वदहत्ति कट्ठु समणं भगवं महावीरं वंदति नमंसति २ उत्तर-

पुरच्छिन्नं दिसीभायं अवक्कमइ २ तिदंढं च कुंडियं च जाव धाउरताओ य एगंते
एडेइ २ जेणेव समणे भगवं महावीरे तैणेव उवागच्छइ २ समणं भगवं महावीरं
तिक्खुतो आयाहिणं पयाहिणं करेइ करेइत्ता जाव नमंसित्ता एवं वदासी-आलित्ते
णं भंते ! लोए पलित्ते णं भंते ! लोए आ० प० भं० लो० जरामरणेण य, से
जहानामए-केइ गाहावती आगारंस्ति झियायमाणंसि जे से तत्थ भंडे भवइ अप्पभारे
मोल्लगरुए तं गहाय आयाए एगंतमंतं अवक्कमइत्ति, एस मे नित्थारिए समाणे पच्छा
पुरा हियाए सुहाए खमाए निस्सेसाए आणुगामियत्ताए भविस्सइ, एवामेव देवाणु-
प्पिया ! मज्झवि आया एगे भंडे इट्ठे कंते पिए मणुजे मणामे थेजे वेसासिए संमए
बहुमए अणुमए भंडकरंडगसमाणे मा णं सीयं मा णं उण्हं मा णं खुहा मा णं पिवासा
मा णं चोरा मा णं वाला मा णं दंसा मा णं मस्रगा मा णं वाइयपित्तियसंभियसं-
निवाइयविविहा रोगायुक्ता परीसहोवसग्गा फुसंतुत्ति कट्टु एस मे नित्थारिए समाणे
परलोयस्स हियाए सुहाए खमाए नीसेसाए अणुगामियत्ताए भविस्सइ, तं इच्छामि
णं देवाणुप्पिया ! सयमेव पव्वावियं सयमेव मुंडावियं सयमेव सेहावियं सयमेव
सिक्खावियं सयमेव आयारगोयरं विणयवेणइयचरणकरणजायामायावत्तियं धम्म-
माइक्खिअं । तए णं समणे भगवं महावीरे खंदयं कच्चायणस्सगोत्तं सयमेव पव्वा-
वेइ जाव धम्ममातिकवइ, एवं देवाणुप्पिया ! गंतव्वं एवं चिट्ठियव्वं एवं निसीति-
यव्वं एवं तुयट्ठियव्वं एवं भुंजियव्वं एवं भासियव्वं एवं उट्ठाए पाणेहिं भूएहिं
जीवेहिं सत्तेहिं संजमेणं संजमियव्वं, अस्सि च णं अट्ठे णो किंचिवि पमाइयव्वं ।
तए णं से खंदए कच्चायणस्सगोत्ते समणस्स भगवओ महावीरस्स इमं एयाख्वं
धम्मियं उवएसं सम्मं संपडिवज्जति तमाणाए तह गच्छइ तह चिट्ठइ तह निसीयति
तह तुयट्ठइ तह भुंजइ तह भासइ तह उट्ठाए २ पाणेहिं भूएहिं जीवेहिं सत्तेहिं
संजमेणं संजमियव्वमिति, अस्सि च णं अट्ठे णो पमायइ । तए णं से खंदए कच्चाय०
अणगारे जाते इरियासमिए भासासमिए एसणासमिए आयाणभंडमत्तनिकखेवणा-
समिए उच्चारपासवणखेलसिंघाणजल्लपारिद्धावणियासमिए मणसमिए वयसमिए काय-
समिए मणगुत्ते वइगुत्ते कायगुत्ते गुत्ते गुत्तिदिए गुत्तवंभयारी चाई लज्जू धण्णे खंति-
खमे जिइदिए सोहिए अणियाणे अप्पुस्सुए अबहिंस्से सुसामण्णरए दंते इणमेव
णिग्गंथं पावयणं पुरओ काउं विहरइ ॥ ९१ ॥ तए णं समणे भगवं महावीरे
कयंगलाओ नयरीओ छत्तपलासयाओ उज्जाणाओ पडिनिक्खमइ २ बहिया जणव-
यविहारं विहरति । तए णं से खंदए अणगारे समणस्स भगवओ महावीरस्स तहा-
ख्वाणं थेराणं अंतिए सामाइयमाइयाई एकारस अंगाई अहिज्जइ, जेणेव समणे

भगवं महावीरे तेणेव उवागच्छइ २ समणं भगवं महावीरं वंदइ नमंसइ २ एवं वयासी-इच्छामि णं भंते ! तुब्भेहिं अब्भणुण्णाए समाणे मासियं भिक्खुपडिमं उवसंपजित्ता णं विहरित्तए, अहासुहं देवाणुप्पिया ! मा पडिबंधं । तए णं से खंदए अणगारे समणेणं भगवया महावीरेणं अब्भणुण्णाए समाणे हट्ठे जाव नमंसित्ता मासियं भिक्खुपडिमं उवसंपजित्ता णं विहरइ, तए णं से खंदए अणगारे मासिय-भिक्खुपडिमं अहासुत्तं अहाकप्पं अहामग्गं अहातच्चं अहासम्मं काएण फासेति पाळेति सोभेति तीरेति पूरेति किट्ठेति अणुपालेइ आणाए आराहेइ संमं काएण फासित्ता जाव आराहेत्ता जेणेव समणे भगवं महावीरे तेणेव उवागच्छइ २ समणं भगवं जाव नमंसित्ता एवं वयासी-इच्छामि णं भंते ! तुब्भेहिं अब्भणुण्णाए समाणे दोमासियं भिक्खुपडिमं उवसंपजित्ता णं विहरित्तए अहासुहं देवाणुप्पिया ! मा पडिबंधं, तं चेव, एवं तेमासियं चाउम्मासियं पंचछसत्तमा०, पढमं सत्तराईदियं दोच्चं सत्तराईदियं तच्चं सत्तरातिदियं अहोरातिदियं एगरा०, तए णं से खंदए अणगारे एगराईदियं भिक्खुपडिमं अहासुत्तं जाव आराहेत्ता जेणेव समणे० तेणेव उवागच्छति २ समणं भगवं म० जाव नमंसित्ता एवं वदासी-इच्छामि णं भंते ! तुब्भेहिं अब्भणुण्णाए समाणे गुणरयणसंवच्छरं तवोकम्मं उवसंपजित्ता णं विहरित्तए, अहासुहं देवाणुप्पिया ! मा पडिबंधं । तए णं से खंदए अणगारे समणेणं भगवया महावीरेणं अब्भणुण्णाए समाणे जाव नमंसित्ता गुणरयणसंवच्छरं तवोकम्मं उवसंपजित्ता णं विहरति, तं०-पढमं मासं चउत्थं चउत्थेणं अनिक्खित्तेणं तवोकम्मेणं दिया ठाणकुडुए सूराभिमुहे आयावणभूमीए आयावेमाणे रत्तिं वीरासणेणं अवाउडेणं य । एवं दोच्चं मासं छट्ठं छट्ठेणं एवं तच्चं मासं अट्ठमं अट्ठमेणं चउत्थं मासं दसमं दसमेणं पंचमं मासं बारसमं बारसमेणं छट्ठं मासं चोइसमं चोइसमेणं सत्तमं मासं सोलसमं २ अट्ठमं मासं अट्ठारसमं २ नवमं मासं वीसतिमं २ दसमं मासं बावीसं २ एक्कारसमं मासं चउव्वीसतिमं २ बारसमं मासं छव्वीसतिमं २ तेरसमं मासं अट्ठावीसतिमं २ चोइसमं मासं तीसइमं २ पन्नरसमं मासं बत्तीसतिमं २ सोलसमं मासं चोत्तीसइमं २ अनिक्खित्तेणं तवोकम्मेणं दिया ठाणकुडुए सूराभिमुहे आयावणभूमीए आयावेमाणे रत्तिं वीरासणेणं अवाउडेणं, तए णं से खंदए अणगारे गुणरयणसंवच्छरं तवोकम्मं अहासुत्तं अहाकप्पं जाव आराहेत्ता जेणेव समणे भगवं महावीरे तेणेव उवागच्छइ २ समणं भगवं महावीरं वंदइ नमंसइ २ बहूहिं चउत्थं छट्ठदसमदुवाल्सेहिं मासइमासखमणेहिं विचित्तेहिं तवोकम्मेहिं अप्पाणं भावेमाणे विहरति । तए णं से खंदए अणगारे तेणं ओराळेणं विउळेणं पयत्तेणं पग्ग-

हिएणं कल्लणेणं सिवेणं धच्चेणं मंगल्लेणं सस्सिरीएणं उदरगेणं उदत्तेणं उत्तमेणं उदा-
 रेणं महाणुभागेणं तवोकम्मेणं सुक्के लुक्खे निम्मसे अट्टिचम्मावणदे किडिकिडिया-
 भूए किसे धमणिस्तंतए जाते यावि होत्था, जीवंचीवेण गच्छइ जीवंचीवेण चिट्ठइ
 भासं भासित्तावि गिलाइ भासं भासमाणे गिलाति भासं भासिस्सामीति गिलायति,
 से जहा नामए-कट्टसगडिया इ वा पत्तसगडिया इ वा पत्ततिलभंडगसगडिया इ वा
 एरंडकट्टसगडिया इ वा इंगालसगडिया इ वा उण्हे दिण्णा सुक्का समाणी ससइ
 गच्छइ ससइ चिट्ठइ एवामेव खंदएवि अणगारे ससइ गच्छइ ससइ चिट्ठइ उवचिते
 तवेणं अवचिए मंससोणिएणं हुयासणेविव भासरासिपडिच्छजे तवेणं तेएणं तवते-
 यसिरीए अतीव २ उवसोभमाणे २ चिट्ठइ ॥ ९२ ॥ तेणं कालेणं २ रायगिहे नगरे
 जाव समोसरणं जाव परिसा पडिगया, तए णं तस्स खंदयस्स अण० अण्णया
 कयाइ पुव्वरत्तावरत्तकालसमयंसि धम्मजागरियं जागरमाणस्स इमेयारुवे अब्भत्थिए
 चितिए जाव समुप्पज्जित्था-एवं खलु अहं इमेणं एयारुवेणं ओरालेणं जाव किसे
 धमणिस्तंतए जाते जीवंचीवेणं गच्छामि जीवंचीवेणं चिट्ठामि जाव गिलामि जाव
 एवामेव अहंपि ससइ गच्छामि ससइ चिट्ठामि तं अत्थि ता मे उट्ठाणे कम्मे बळे
 वीरिए पुरिसक्कारपरक्कमे तं जाव ता मे अत्थि उट्ठाणे कम्मे बळे वीरिए पुरिसक्कार-
 परक्कमे जाव य मे धम्मायरिए धम्मोवदेसए समणे भगवं महावीरे जिणे सुहत्थी
 विहरइ ताव ता मे सेयं कल्लं पाउप्पभायाए रयणीए फुट्ठुप्पलकमलकोमलुम्मिह्लि-
 यंसि अहापांडुरे पभाए रत्तासोयप्पकासकिंसुयसुयमुहगुंजद्धरागसरिसे कमलागरसंड-
 बोहए उट्ठियंसि सूरं सहस्सरस्सिमि दिणयरं तेयसा जलंते समणं भगवं महावीरं
 वंदित्ता जाव पज्जुवासित्ता समणेणं भगवया महावीरेणं अब्भणुण्णाए समाणे सयमेव
 पंच महव्वयाणि आरोवेत्ता समणा य समणीओ य खामेत्ता तहारुवेहिं थेरेहिं
 कडाईहिं सद्धिं विपुलं पव्वयं सणियं २ दुरुहित्ता मेघवणसज्जिगासं देवसज्जिवातं
 पुढवीसिलावट्ठयं पडिलेहिता दब्भसंथारयं संथरित्ता दब्भसंथारोवगयस्स संछेहणा-
 जोसणाजूसियस्स भत्तपाणपडियाइक्खियस्स पाओवगयस्स कालं अणवकंखमाणस्स
 विहरित्तएत्ति कट्ठु एवं संपेहेइ २ ता कल्लं पाउप्पभायाए रयणीए जाव जलंते जेणेव
 समणे भग० जाव पज्जुवासति, खंदयाइ समणे भगवं महावीरं खंदयं अणगारं एवं
 वयासी-से नूणं तव खंदया । पुव्वरत्तावरत्तकालस० जाव जागरमाणस्स इमेयारुवे
 अब्भत्थिए जाव समुप्पज्जित्था-एवं खलु अहं इमेणं एयारुवेणं तवेणं ओरालेणं
 विपुळेणं तं चेव जाव कालं अणवकंखमाणस्स विहरित्तएत्ति कट्ठु एवं संपेहेति २
 कल्लं पाउप्पभाए जाव जलंते जेणेव मम अंतिए तेणेव हव्वमागए, से नूणं खंदया ।

अट्टे समट्टे ?, हंता अत्थि, अहासुहं देवाणुप्पिया ! मा पडिवंधं ॥ ९३ ॥ तए णं
 से खंदए अणगारे समणेणं भगवया महावीरेणं अब्भणुण्णाए समाणे हट्टुट्ठ जाव
 हयहियए उट्ठाए उट्ठेइ २ समणं भगवं महा० तिक्खुत्तो आयाहिणं पयाहिणं करेइ
 २ जाव नमंसित्ता सयमेव पंच महव्वयाइं आरुहेइ २ ता समणे य समणीओ य
 खामेइ २ ता तहारुवेहिं थेरेहिं कडाईहिं सद्धिं विपुलं पव्वयं सणियं २ दुरुहेइ
 मेहघणसन्निगासं देवसन्निवायं पुढविसिलावट्ठयं पडिलेहेइ २ उच्चारपासवणभूमिं
 पडिलेहेइ २ दब्भसंथारयं संथरइ २ ता पुरत्थाभिमुहे संपलियं कनिसजे करयल-
 परिग्गहियं दसनहं सिरसावत्तं मत्थए अंजलिं कट्ठु एवं वदासी-नमोऽत्थु णं अरहं-
 ताणं भगवंताणं जाव संपत्ताणं, नमोऽत्थु णं समणस्स भगवओ म० जाव संपा-
 विउकामस्स, वंदामि णं भगवंतं तत्थ गयं इहगते, पासउ मे भयवं तत्थगए इह-
 गयंति कट्ठु वंदइ नमंसति २ एवं वदासी—पुव्विपि मए समणस्स भगवओ महा-
 वीरस्स अंतिए सव्वे पाणाइवाए पच्चक्खाए जावजीवाए जाव मिच्छादंसणसल्ले
 पच्चक्खाए जावजीवाए इयाणिपि य णं समणस्स भ० म० अंतिए सव्वं पाणाइ-
 वायं पच्चक्खामि जावजीवाए जाव मिच्छादंसणसल्लं पच्चक्खामि, एवं सव्वं असणं
 पाणं खा० सा० चउव्विहंपि आहारं पच्चक्खामि जावजीवाए, जंपि य इमं सरीरं
 इट्ठं कंतं पियं जाव फुसंतुत्तिकट्ठु एयंपि णं चरिमेहिं उस्सासनीसासेहिं वोसिरा-
 मित्तिकट्ठु संलेहणाजूसणाजूसिए भत्तपाणपडियाइक्खिए पाओवगए कालं अणवकंख-
 माणे विहरति । तए णं से खंदए अण० समणस्स भ० म० तहारुवाणं थेराणं
 अंतिए सामाइयमाइयाइं इक्कारस अंगाइं अहिजित्ता बहुपडिपुण्णाइं दुवालसवासाइं
 सामन्नपरियागं पाउणिता मासियाए संलेहणाए अत्ताणं झूसित्ता सट्ठिं भत्ताइं अण-
 सणाए छेदेत्ता आलोइयपडिक्कंते समाहिपत्ते आणुपुव्वीए कालगए ॥ ९४ ॥ तए
 णं ते थेरा भगवंतो खंदयं अण० कालगयं जाणिता परिनिव्वाणवत्तियं काउस्सग्गं
 करेति २ पत्तचीवराणि गिण्हंति २ विपुलाओ पव्वयाओ सणियं २ पच्चोरुहंति २
 जेणेव समणे भगवं म० तेणेव उवा० समणं भगवं म० वंदंति नमंसति २ एवं
 वदासी—एवं खलु देवाणुप्पियाणं अंतेवासी खंदए नामं अणगारे पगइभइए पगति-
 विणीए पगतिउवसंते पगतिपयणुकोहमाणमायालोमे मिउमद्ववसंपन्ने अल्लीणे भइए
 विणीए, से णं देवाणुप्पिएहिं अब्भणुण्णाए समाणे सयमेव पंच महव्वयाणि आरो-
 वित्ता समणे य समणीओ य खामेत्ता अम्हेहिं सद्धिं विपुलं पव्वयं तं चेव निरव-
 सेसं जाव आणुपुव्वीए कालगए इमे य से आयारमंडए । भंते त्ति भगवं गोयमे
 समणं भगवं म० वंदति नमंसति २ एवं वदासी—एवं खलु देवाणुप्पियाणं अंतेवासी

खंदए नामं अण० कालमासे कालं किच्चा कहिं गए ? कहिं उववण्णे ?, गोयमाइ समणे भगवं महा० भगवं गोयमं एवं वयासी-एवं खलु गोयमा ! मम अंतवासी खंदए नामं अणगारे पगतिभ० जाव से णं मए अब्भणुण्णाए समाणे सयमेव पंच महव्वयाइं आरुहेत्ता तं चेव सव्वं अविसेसियं नेयव्वं जाव आलोइयपडिक्कते समाहिपत्ते कालमासे कालं किच्चा अच्चुए कप्पे देवत्ताए उववण्णे, तत्थ णं अत्थेग-इयाणं देवाणं बावीसं सागरोवमाइं ठिती प०, तस्स णं खंदयस्सवि देवस्स बावीसं सागरोवमाइं ठिती प० । से णं भंते ! खंदए देवे ताओ देवलोगाओ आउक्खएणं भवक्खएणं ठिइक्खएणं अणंतरं चयं चइत्ता कहिं गच्छिहिति ? कहिं उववज्जिहिति ?, गोयमा ! महाविदेहे वासे सिज्झिहिति बुज्झिहिति मुच्चिहिति परिनिव्वाहिति सव्व-दुक्खाणमंतं करेहिति ॥ ९५ ॥ **खंदओ समत्तो ॥ वितीयसयस्स पढमो ॥**

कति णं भंते ! समुग्घाया पण्णत्ता ?, गोयमा ! सत्त समुग्घाया पण्णत्ता, तंजहा-वेदणासमुग्घाए एवं समुग्घायपदं छाउमत्थियसमुग्घायवज्जं भाणियव्वं, जाव वेमा-णियाणं कसायसमुग्घाया अप्पाबहुयं । अणगारस्स णं भंते ! भावियप्पणो केवल-समुग्घाय जाव सासयमणागयद्धं चिद्धंति, समुग्घायपदं नेयव्वं ॥ ९६ ॥ **वितीय-सए वितीयोद्देसो भाणियव्वो ॥**

कति णं भंते ! पुढवीओ पन्नत्ताओ ?, जीवाभिगमे नेरइयाणं जो बितिओ उद्देसो सो नेयव्वो, पुढविं ओगाहिता निरया संठाणमेव बाहल्लं । [विक्खंभपरिक्खेवो वण्णो गंधो य फासो य ॥ १ ॥] जाव किं सव्वपाणा उववण्णपुव्वा ?, हंता गोयमा ! असत्ति अदुवा अणंतखुत्तो ॥ ९७ ॥ **पुढवी उद्देसो तइओ ॥**

कति णं भंते ! इंदिया पन्नत्ता ?, गोयमा ! पंचिंदिया पन्नत्ता, तंजहा-पढमिल्लो इंदियउद्देसो नेयव्वो, संठाणं बाहल्लं पोहत्तं जाव अलोगो ॥ ९८ ॥ **इंदियउद्देसो ॥**

अण्णउत्थिया णं भंते ! एवमाइक्खंति भासंति पक्खेंति परुवेंति, तंजहा-एवं खलु नियंठे कालगए समाणे देवब्भूएणं अप्पाणेणं से णं तत्थ णो अजे देवे नो अज्जेसिं देवाणं देवीओ अहिजुंजिय २ परियारेइ १ णो अप्पणच्चियाओ देवीओ अभिजुंजिय २ परियारेइ २ अप्पणामेव अप्पाणं विउव्विय २ परियारेइ ३ एगेवि य णं जीवे एगेणं समएणं दो वेदे वेदेइ, तंजहा-इत्थिवेदं च पुरिसवेदं च, एवं परउ-त्थियवत्तव्वया नेयव्वा जाव इत्थिवेदं च पुरिसवेदं च । से कहमेयं भंते ! एवं ?, गोयमा ! जणं ते अजउत्थिया एवमाइक्खंति जाव इत्थिवेदं च पुरिसवेदं च, जे ते एवमाहंसु मिच्छं ते एवमाहंसु, अहं पुण गोयमा ! एवमातिक्खामि भा० प० परू०-एवं खलु नियंठे कालगए समाणे अन्नयरेसु देवलोएसु देवत्ताए उववत्तारो

भवन्ति महिद्धिएसु जाव महाणुभागेसु दूरगतीसु चिरद्वितीएसु, से णं तत्थ देवे भवति महिद्धिए जाव दस दिसाओ उज्जोवेमाणे पभासेमाणे जाव पडिह्वे । से णं तत्थ अन्ने देवे अन्नेसिं देवाणं देवीओ अभिजुंजिय २ परियारेइ १ अप्पणच्चियाओ देवीओ अभिजुंजिय २ परियारेइ २ नो अप्पणामेव अप्पाणं विउव्विय २ परियारेइ ३, एगेविय णं जीवे एगेणं समएणं एणं वेदं वेदेइ, तंजहा-इत्थिवेदं वा पुरिसवेदं वा, जं समयं इत्थिवेदं वेदेइ णो तं समयं पुरसवेयं वेएइ जं समयं पुरिसवेयं वेएइ नो तं समयं इत्थिवेयं वेदेइ, इत्थिवेयस्स उदएणं नो पुरिसवेदं वेएइ, पुरिसवेयस्स उदएणं नो इत्थिवेयं वेएइ, एवं खलु एगे जीवे एगेणं समएणं एणं वेदं वेदेइ, तंजहा-इत्थीवेयं वा पुरिसवेयं वा, इत्थी इत्थिवेएणं उदिज्जेणं पुरिसं पत्थेइ, पुरिसो पुरिसवेएणं उदिज्जेणं इत्थिं पत्थेइ, दोवि ते अन्नमन्नं पत्थेति, तंजहा-इत्थी वा पुरिसं पुरिसे वा इत्थि ॥९९॥ उदगगम्भे णं भंते ! उदगगम्भेति कालतो केवचिरं होइ ?, गोयमा ! जहन्नेणं एक्कं समयं उक्कोसेणं छम्मासा ॥ तिरिक्खजोणियगम्भे णं भंते ! तिरिक्खजोणियगम्भेति कालओ केवचिरं होति ?, गोयमा ! जहन्नेणं अंतोमुहुत्तं उक्कोसेणं अट्ठ संवच्छराइं । मणुस्सीगम्भे णं भंते ! मणुस्सीगम्भेति कालओ केवचिरं होइ ?, गोयमा ! जहन्नेणं अंतोमुहुत्तं उक्कोसेणं बारस संवच्छराइं ॥ १०० ॥ कायभवत्थे णं भंते ! कायभवत्थेति कालओ केवचिरं होइ ?, गोयमा ! जहन्नेणं अंतोमुहुत्तं उक्कोसेणं चउव्वीसं संवच्छराइं ॥ १०१ ॥ मणुस्सपंचेदियतिरिक्खजोणियवीए णं भंते ! जोणियब्भूए केवतियं कालं संचिद्धइ ?, गोयमा ! जहन्नेणं अंतोमुहुत्तं उक्कोसेणं बारस मुहुत्ता ॥ १०२ ॥ एगजीवे णं भंते ! जोणिए बीयब्भूए केवतियाणं पुत्तत्ताए हव्वमागच्छइ ?, गोयमा ! जहन्नेणं इक्कस्स वा दोण्हं वा तिण्हं वा, उक्कोसेणं सयपुहुत्तस्स जीवाणं पुत्तत्ताए हव्वमागच्छति ॥ १०३ ॥ एगजीवस्स णं भंते ! एगभवग्गहणेणं केवइय्म जीवा पुत्तत्ताए हव्वमागच्छंति ? गोयमा ! जहन्नेणं इक्को वा दो वा तिन्नि वा, उक्कोसेणं सयसहस्सपुहत्तं जीवा णं पुत्तत्ताए हव्वमागच्छंति, से केणट्ठेणं भंते ! एवं वुच्चइ-जाव हव्वमागच्छइ ?, गोयमा ! इत्थीए य पुरिसस्स य कम्मकडाए जोणीए मेहुणवत्तिए नामं संजोए समुप्पज्जइ, ते दुहओ सिणेहं संचिणंति २ तत्थ णं जहन्नेणं एक्को वा दो वा तिणिण वा उक्कोसेणं सयसहस्सपुहत्तं जीवाणं पुत्तत्ताए हव्वमागच्छंति, से तेणट्ठेणं जाव हव्वमागच्छइ ॥ १०४ ॥ मेहुणे णं भंते ! सेवमाणस्स केरिसिए असंजमे कज्जइ ?, गोयमा ! से जहानामए केइ पुरिसे रुय्मालियं वा बूरनालियं वा तत्तेणं कणएणं समभिधंसेजा एरिसए णं गोयमा ! मेहुणं सेवमाणस्स असंजमे कज्जइ, सेवं भंते ! सेवं भंते ! जाव विहरति ॥ १०५ ॥ तए णं

समणे भगवं महावीरे रायणिहाओ नगराओ गुणसिलाओ उज्जाणाओ पडिनिक्खमइ २
 बहिया जणवयविहारं विहरति । तेणं कालेणं २ तुंगिया नामं नगरी होत्था वण्णओ,
 सीसेणं तुंगियाए नगरीए बहिया उत्तरपुरच्छिमे दिसीभाए पुप्फवतिए नामं उज्जाणे
 होत्था, वण्णओ, तत्थ णं तुंगियाए नगरीए बहवे समणोवासया परिवसंति अट्ठा
 दित्ता विच्छिण्णविपुलभवणसयणासणजाणवाहणाइण्णा बहुधणबहुजायखवरयया
 आओगपओगसंपउत्ता विच्छड्डियविपुलभत्तपाणा बहुदासीदासगोमहिंसगवेलयप्प-
 भूया बहुजणस्स अपरिभूया अभिगयजीवाजीवा उवलद्धपुण्णपावा आसवसंवरनिज-
 रकिरियाहिंकरणबंधमोक्खकुसला असहेज्जदेवासुरनागसुवण्णजक्खरक्खसकिंनरकिं-
 पुरिसगरुल्लगंधव्वसहोरगाइएहिं देवगणेहिं निग्गंथाओ पावयणाओ अणतिकमणिज्जा
 णिग्गंथे पावयणे निस्संकिया निक्कंखिया निव्वितिगिच्छा लद्धट्ठा गहियट्ठा पुच्छियट्ठा
 अभिगयट्ठा विणिच्छियट्ठा अट्ठिमिजपेम्माणुरागरत्ता अयमाउसो ! निग्गंथे पावयणे
 अट्ठे अयं परमट्ठे सेसे अणट्ठे ऊसियफलिहा अवंगुयदुवारा चियतंतैउरवरप्पवेसा बट्ठहिं
 सीलव्वयगुणवेरमणपच्चक्खाणपोसहोववासेहिं, चाउहसट्ठमुद्विद्वपुण्णमासिणीसु पडिपुञ्ञं
 पोसहं सम्मं अणुपालेमाणा समणे निग्गंथे फासुएसणिजेणं असणपाणखाइमसाइमेणं
 वत्थपडिग्गहक्कंबलपायपुंछणेणं पीढफलगसेज्जासंधारएणं ओसहभेसज्जेण य पडि-
 लाभेमाणा अहापडिग्गहिएहिं तवोक्कम्मेहिं अप्पाणं भावेमाणा विहरंति ॥ १०६ ॥
 तेणं कालेणं २ पासावच्चिजा थेरा भगवंतो जातिसंपन्ना कुलसंपन्ना बलसंपन्ना
 ख्वसंपन्ना विणयसंपन्ना णाणसंपन्ना दंसणसंपन्ना चरित्तसंपन्ना लज्जासंपन्ना लाघव-
 संपन्ना ओयंसी तेयंसी वच्चंसी जसंसी जियकोहा जियमाणा जियलोभा जियनिहा
 जित्तिदिया जियपरीसहा जीवियासमरणभयविप्पमुक्का जाव कुत्तियावणभूता बहु-
 स्सुया बहुपरिवारा पंचहिं अणगारसएहिं सद्धिं संपरिवुडा अहाणुपुर्वि चरमाणा
 गामाणुगामं दूइज्जमाणा सुहंसुहेणं विहरमाणा जेणेव तुंगिया नगरी जेणेव पुप्फ-
 वतीए उज्जाणे तेणेव उवागच्छंति २ अहापडिरुवं उग्गहं उगिण्हित्ता णं संजमेणं
 तवसा अप्पाणं भावेमाणा विहरंति ॥ १०७ ॥ तए णं तुंगियाए नगरीए सिंघाड-
 गतिगचउक्कवच्चरमहापहपहेसु जाव एगदिसाभिमुहा णिजायंति, तए णं ते समणो-
 वासया इमीसे कहाए लद्धट्ठा समाणा हट्ठुट्ठा जाव सदावेंति २ एवं वदासी-एवं
 खलु देवाणुप्पिया ! पासावच्चेज्जा थेरा भगवंतो जातिसंपन्ना जाव अहापडिरुवं
 उग्गहं उगिण्हित्ता णं संजमेणं तवसा अप्पाणं भावेमाणा विहरंति, तं महाफलं
 खलु देवाणुप्पिया ! तहारूप्पाणं थेराणं भगवंताणं णामगोयस्सवि सवणयाए किमंग
 पुण अभिगमणवंदणनमंसणपडिपुच्छणपज्जुवासणयाए ? जाव गहणयाए ? तं

गच्छामो णं देवाणुप्पिया ! थेरे भगवंते वंदामो नमंसामो जाव पज्जुवासामो, एयं
णं इह भवे वा परभवे वा जाव अणुगामियत्ताए भविस्सतीतिकट्ठु अन्नमन्नस्स अंतिए
एयमट्ठं पडिखुण्णेंति २ जेणेव सयाई २ गिहाई तेणेव उवागच्छंति २ ण्हाया
सुद्धप्पावेसाई मंगळाई वत्थाई पवराई परिहिया अप्पमहग्घाभरणालंकियसरीरा
सएहिं २ गेहेहिंतो पडिनिक्खमंति २ ता एगयओ मेलायंति २ पायविहारचारेणं
तुंगियाए नगरीए मज्झमज्जेणं णिग्गच्छंति २ जेणेव पुप्फवतीए उज्जाणे तेणेव
उवागच्छंति २ थेरे भगवंते पंचविहेणं अभिगमेणं अभिगच्छंति, तंजहा-सच्चित्ताणं
दब्बाणं बिउसरणयाए १ अच्चित्ताणं दब्बाणं अबिउसरणयाए २ एगसाडिएणं
उत्तरासंगकरणेणं ३ चक्खुप्फासे अंजलिप्पग्गहेणं ४ मणसो एगत्तीकरणेणं ५ जेणेव
थेरा भगवंतो तेणेव उवागच्छंति २ तिक्खुत्तो आयाहिणं पयाहिणं करेन्ति २ जाव
तिविहाए पज्जुवासणाए पज्जुवासंति ॥ १०८ ॥ तए णं ते थेरा भगवंतो तेसिं
समणोवासयाणं तीसे य महतिमहालियाए चाउज्जामं धम्मं परिकहेंति जहा केसि-
सामिस्स जाव समणोवासियत्ताए आणाए आराहणे भवति जाव धम्मो कहिओ ।
तए णं ते समणोवासया थेराणं भगवंताणं अंतिए धम्मं सोच्चा निसम्म हट्ठ तुट्ठ
जाव हयहियया तिक्खुत्तो आयाहिणप्पयाहिणं करंति २ जाव तिविहाए पज्जुवास-
णाए पज्जुवासंति २ एवं वदासी-संजमे णं भंते ! किंफले ? तवे णं भंते ! किंफले ?
तए णं ते थेरा भगवंतो ते समणोवासए एवं वदासी-संजमे णं अज्जो ! अण्हय-
फले तवे वोदाणफले, तए णं ते समणोवासया थेरे भगवंते एवं वदासी-जति णं
भंते ! संजमे अण्हयफले तवे वोदाणफले किंपत्तियं णं भंते ! देवा देवलोएसु
उववज्जंति, तत्थ णं कालियपुत्ते नामं थेरे ते समणोवासए एवं वदासी-पुव्वतवेणं
अज्जो ! देवा देवलोएसु उववज्जंति, तत्थ णं मेहिळे नामं थेरे ते समणोवासए एवं
वदासी-पुव्वसंजमेणं अज्जो ! देवा देवलोएसु उववज्जंति, तत्थ णं आणंदरक्खिए
णामं थेरे ते समणोवासए एवं वदासी-कम्मियाए अज्जो ! देवा देवलोएसु उव-
वज्जंति, तत्थ णं कासवे णामं थेरे ते समणोवासए एवं वदासी-संगियाए अज्जो !
देवा देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो !
देवा देवलोएसु उववज्जंति, सच्चे णं एस अट्ठे नो चेव णं आयभाववत्तव्वयाए,
तए णं ते समणोवासया थेरेहिं भगवंतेहिं इमाई एयारूवाई वागरणाई वाग-
रिया समाणा हट्ठतुट्ठा थेरे भगवंते वंदंति नमंसंति २ पसिणाई पुच्छंति २ उट्ठाई
उवादियंति २ उट्ठाइ उट्ठंति २ थेरे भगवंते तिक्खुत्तो वंदंति णमंसंति २ थेराणं
भगवं० अंतियाओ पुप्फवतियाओ उज्जाणाओ पडिनिक्खमंति २ जामेव दिसिं ॥

पाउब्भूया तामेव दिस्सि पडिगया ॥ तए णं ते थेरा अन्नया कयाइं तुंगियाओ पुप्फवतिउज्जाणाओ पडिनिग्गच्छन्ति २ बहिया जणवयविहारं विहरन्ति ॥ १०९ ॥ तेणं कालेणं २ रायगिहे नामं नगरे जाव परिसा पडिगया, तेणं कालेणं २ समणस्स भगवओ महावीरस्स जेट्ठे अंतेवासी इंदभूतीनामं अणगारे जाव संखितविउलतेयलेस्से छट्ठंछट्ठेणं अनिक्खितेणं तवोक्कमेणं संजमेणं तवसा अप्पाणं भावेमाणे जाव विहरति । तए णं से भगवं गोयमे छट्ठक्खमणपारणगंसि पढमाए पोरिसीए सज्जायं करेइ बीयाए पोरिसीए ज्ञाणं झियायइ तइयाए पोरिसीए अतुरियमच्चवलमसंभंते सुहपोत्तिथं पडिलेहेइ २ भायणाइं वत्थाइं पडिलेहेइ २ भायणाइं पमज्जइ २ भायणाइं उग्गाहेइ २ जेणेव समणे भगवं महावीरे तेणेव उवागच्छइ २ समणं भगवं महावीरं वंदइ नमंसइ २ एवं वदासी-इच्छामि णं भंते ! तुब्भेहिं अब्भणुन्नाए छट्ठक्खमणपारणगंसि रायगिहे नगरे उच्चनीयमज्झिमाइं कुलाइं घरसमुदाणस्स भिक्खायरियाए अडितए, अहासुहं देवाणुप्पिया । मा पडिवंधं, तए णं भगवं गोयमे समणेणं भगवया महावीरेणं अब्भणुन्नाए समाणे समणस्स भगवओ महावीरस्स अंतियाओ गुणसिलाओ उज्जाणाओ पडिनिक्खमइ २ अतुरियमच्चवलमसंभंते जुगंतरपलोयणाए दिट्ठीए पुरओ रियं सोहेमाणे २ जेणेव रायगिहे नगरे तेणेव उवागच्छइ २ रायगिहे नगरे उच्चनीयमज्झिमाइं कुलाइं घरसमुदाणस्स भिक्खायरियं अडइ । तए णं से भगवं गोयमे रायगिहे न० जाव अडमाणे बहुज्जणसइं निसामेइ-एवं खलु देवाणुप्पिया ! तुङ्गियाए नगरीए बहिया पुप्फवतीए उज्जाणे पासावच्चिज्जा थेरा भगवंतो समणोवासएहिं इमाइं एयाहवाइं वागरणाइं पुच्छिया-संजमे णं भंते ! किंफले ? तवे णं भंते ! किंफले ?, तए णं ते थेरा भगवंतो ते समणोवासए एवं वदासी-संजमे णं अज्जो ! अणण्हयफले तवे वोदाणफले तं चेव जाव पुव्वतवेणं पुव्वसंजमेणं कम्मियाए संगियाए अज्जो ! देवा देवलोएसु उववज्जंति, सच्चे णं एसमट्ठे णो चेव णं आयभाववत्तवयाए ॥ से कहमेयं मण्णे एवं ?, तए णं समणे० गोयमे इसीसे कहाए लद्धट्ठे समाणे जायसद्धे जाव समुप्पन्नकोउहट्ठे अहापज्जतं समुदाणं गेण्हइ २ रायगिहाओ नगराओ पडिनिक्खमइ २ अतुरियं जाव सोहेमाणे जेणेव गुणसिलए उज्जाणे जेणेव समणे भगवं महावीरे तेणेव उवा० सम० भ० महावीरस्स अद्दुसामंते गमणागमणए पडिक्कमइ एसणमणेसणं आलोएइ २ भत्तपाणं पडिदंसैइ २ समणं भ० महावीरं जाव एवं वयासी-एवं खलु भंते ! अहं तुब्भेहिं अब्भणुन्नाए समाणे रायगिहे नगरे उच्चनीयमज्झिमाणि कुलाणि घरसमुदाणस्स भिक्खायरियाए अडमाणे बहुज्जणसइं निसामेति(मि),

एवं खलु देवां तुंगिया ए नगरी ए बहिया पुष्कवई ए उज्जाणे पासावच्चिजा थेरा भगवंतो
समणोवासएहिं इमाई एयारूवाई वागरणाई पुच्छिया—संजमे णं भंते ! किंफले ?
तवे किंफले ? तं चेव जाव सच्चे णं एसमट्ठे णो चेव णं आयभाववत्तव्वयाए, तं
पभू णं भंते ! ते थेरा भगवंतो तेसिं समणोवासयाणं इमाई एयारूवाई वागरणाई
वागरित्तए उदाहु अप्पभू ?, समिया णं भंते ! ते थेरा भगवंतो तेसिं समणोवास-
याणं इमाई एयारूवाई वागरणाई वागरित्तए उदाहु असमिया ? आउज्जिया णं भंते !
ते थेरा भगवंतो तेसिं समणोवासयाणं इमाई एयारूवाई वागरणाई वागरित्तए ?
उदाहु अणाउज्जिया ? पलिउज्जिया णं भंते ! ते थेरा भगवंतो तेसिं समणोवासयाणं
इमाई एयारूवाई वागरणाई वागरित्तए उदाहु अपलिउज्जिया ?, पुव्वतवेणं अज्जो !
देवा देवलोएसु उव्वज्जंति पुव्वसंजमेणं कम्मियाए संगियाए अज्जो ! देवा देव-
लोएसु उव्वज्जंति, सच्चे णं एसमट्ठे णो चेव णं आयभाववत्तव्वयाए, पभू णं गोयमा !
ते थेरा भगवंतो तेसिं समणोवासयाणं इमाई एयारूवाई वागरणाई वागरेत्तए, णो
चेव णं अप्पभू, तह चेव नेयव्वं अवसेसियं जाव पभू समियं आउज्जिया पलिउ-
ज्जिया जाव सच्चे णं एसमट्ठे णो चेव णं आयभाववत्तव्वयाए, अहंपि णं गोयमा !
एवमाइक्खामि भासेमि पण्णवेमि परूवेमि पुव्वतवेणं देवा देवलोएसु उव्वज्जंति
पुव्वसंजमेणं देवा देवलोएसु उव्वज्जंति कम्मियाए देवा देवलोएसु उव्वज्जंति संगि-
याए देवा देवलोएसु उव्वज्जंति, पुव्वतवेणं पुव्वसंजमेणं कम्मियाए संगियाए अज्जो !
देवा देवलोएसु उव्वज्जंति, सच्चे णं एसमट्ठे णो चेव णं आयभाववत्तव्वयाए ॥ ११० ॥
तहारूवं भंते ! समणं वा माहणं वा पज्जुवासमाणस्स किंफला पज्जुवासणा ?,
गोयमा ! सवणफला, से णं भंते ! सवणे किंफले ?, णाणफले, से णं भंते ! नाणे
किंफले ?, विण्णाणफले, से णं भंते ! विज्जाणे किंफले ?, पच्चक्खाणफले, से णं भंते !
पच्चक्खाणे किंफले ?, संजमफले, से णं भंते ! संजमे किंफले ?, अण्हयफले, एवं
अण्हए तवफले, तवे वोदाणफले, वोदाणे अकिरियाफले, से णं भंते ! अकिरिया
किं फला ?, सिद्धिपज्जवसाणफला पण्णत्ता गोयमा !, गाहा—सवणे णाणे य विण्णाणे
पच्चक्खाणे य संजमे । अण्हए तवे चेव वोदाणे अकिरिया सिद्धी ॥ ११ ॥ १११ ॥
अण्णउत्थिया णं भंते ! एवमातिक्खंति भासंति पण्णवेंति परूवेंति—एवं खलु राय-
गिहस्स नगरस्स बहिया वेभारस्स पव्वयस्स अहे एत्थ णं महं एगे हरए अग्ने
पन्नत्ते अणेगाई जोयणाई आयामविकखंमेणं नाणादुमसंडमंडितउदेसे सस्सिरीए
जाव पडिरूवे, तत्थ णं बहवे ओराला बलाहया संसेयंति सम्मुच्छित्ति वासंति
तव्वतिरित्ते य णं सया समिओ उषिणे २ आउकाए अभिनिस्सवइ । से कहमेयं

भंते ! एवं ? गोयमा ! जणं ते अण्णउत्थिया एवमातिक्खंति जाव जे ते एवं पहरुं वैति मिच्छं ते एवमातिक्खंति जाव सव्वं नेयव्वं, जाव अहं पुण गोयमा ! एवमातिक्खामि भा० प० प० एवं खलु रायगिहस्स नगरस्स बहिया वेभारपव्वयस्स अदूरसामंते, एत्थ णं महातवोवतीरप्पभवे नामं पासवणे पन्नते पंचधणुसयाणि आयामविक्खंभेण नाणादुमसंडमंडिउद्देसे सत्सिरीए पासाइए दरिसणिजे अभिरुवे पडिरुवे तत्थ णं बहवे उसिणजोणिया जीवा य पोग्गला य उदगत्ताए वक्कमंति निउक्कमंति चयंति उव्वज्जंति तव्वतिरित्तेवि य णं सया समियं उसिणे २ आउयाए अभिनिस्सवइ, एस णं गोयमा ! महातवोवतीरप्पभवे पासवणं एस णं गोयमा ! महातवोवतीरप्पभवस्स पासवणस्स अट्ठे पन्नते, सेवं भंते २ त्ति भगवं गोयमे समणं भगवं महावीरं वंदति नमंसति ॥ ११२ ॥ **वीए सए पंचमो उद्देसो ॥**

से णूणं भंते ! मण्णामीति ओहारिणी भासा, एवं भासापदं भाणियव्वं ॥ ११३ ॥

वीए सए छट्ठो उद्देसो समत्तो ॥

कतिविहा णं भंते ! देवा प० ?, गोयमा ! चउव्विहा देवा प०, तंजहा-भवणवइवाणमंतरजोतिसवेमाणिया । कहि णं भंते ! भवणवासीणं देवाणं ठाणा प० ?, गोयमा ! इमीसे रयणप्पभाए पुढवीए जहा ठाणपदे देवाणं वत्तव्वया सा भाणियव्वा, नवरं भवणा प०, उववाएणं लोयस्स असंखेज्जइभागे, एवं सव्वं भाणियव्वं जाव सिद्धगंडिया समत्ता-कप्पाण पडट्ठाणं बाहुल्लुच्चत्तमेव संठाणं । जीवाभिगमे जाव वेमाणियल्लेसो भाणियव्वो सव्वो ॥ ११४ ॥ **वीए सए सत्तमो उद्देसो ॥**

कहि णं भंते ! चमरस्स असुरिंदस्स असुरकुमाररत्तो सभा सुहम्मा प० ?, गोयमा ! जंबुईवे बीवे मंदरस्स पव्वयस्स दाहिणेणं तिरियमसंखेजे दीवसमुद्दे वीईवइत्ता अरुणवरस्स दीवस्स बाहिरिल्लाओ वेइयंताओ अरुणोदयं समुद्दं बायालीसं जोयणसहस्साइं ओगाहिता एत्थ णं चमरस्स असुरिंदस्स असुरकुमाररण्णो तिगिच्छियकूडे नामं उप्पायपव्वए पण्णते, सत्तरसएक्कीसे जोयणसए उट्ठं उच्चतेणं चत्तारि तीसे जोयणसए कोसं च उव्वेहेणं गोथुमस्स आवासपव्वयस्स पमाणेणं णेयव्वं नवरं उवरिल्लं पमाणं मज्झे भाणियव्वं [मूले दसवावीसे जोयणसए विक्खंभेणं मज्झे चत्तारि चउवीसे जोयणसते विक्खंभेणं उवरिं सत्ततेवीसे जोयणसते विक्खंभेणं मूले तिणिणं जोयणसहस्साइं दोणिणं य बत्तीसुत्तरे जोयणसते किंचिविसेसूणे परिकखेवेणं मज्झे एणं जोयणसहस्सं तिणिणं य इगयाले जोयणसते किंचिविसेसूणे परिकखेवेणं उवरिं दोणिणं य जोयणसहस्साइं दोणिणं य छलसीते जोयणसते किंचिविसेसाहिए परिकखेवेणं] जाव मूले वित्थडे मज्झे संखिते उप्पि

विसाले मज्झे वरवइरविग्गहिए महामउदसंठाणसंठिए सव्वरयणामए अच्छे जाव पडिह्वे, से णं एगाए पउमवरवेइयाए एगेणं वणसंडेण य सव्वओ समंता संपरि-
क्खित्ते, पउमवरवेइयाए वणसंडस्स य वण्णओ, तस्स णं तिगिच्छिक्कूडस्स उप्पाय-
पव्वयस्स उप्पि बहुसमरमणिजे भूमिभागे पण्णत्ते, वण्णओ, तस्स णं बहुसमरमणि-
जस्स भूमिभागस्स बहुमज्झदेसभागे एत्थ णं महं एगे पासायवडिसए पन्नत्ते, अट्ठा-
इज्जाइं जोयणसयाइं उट्ठं उच्चत्तेणं पणवीसं जोयणसयाइं विक्खंभेणं, पासायवण्णओ
उल्लोयभूमिवन्नओ अट्ठ जोयणाइं मणिपेडिया चमरस्स सीहासणं सपरिवारं भाणि-
यव्वं, तस्स णं तिगिच्छिक्कूडस्स दाहिणेणं छल्लोडिसए पणपन्नं च कोढीओ पणतीसं
च सयसहस्साइं पण्णासं च सहस्साइं अरुणोदे समुदे तिरियं वीइवइत्ता अहे रयण-
प्पभाए पुढवीए चत्तालीसं जोयणसहस्साइं ओगाहिंता एत्थ णं चमरस्स असुरिंदस्स
असुरकुमाररण्णो चमरचंचा नामं रायहाणी प० एगं जोयणसयसहस्सं आयाम-
विक्खंभेणं जंबुद्वीवप्पमाणं, पागारो दिवह्वं जोयणसयं उट्ठं उच्चत्तेणं मूले पन्नासं जोय-
णाइं विक्खंभेणं उवरिं अद्धतेरसजोयणा कविसीसगा अद्धजोयणआयामं कोसं
विक्खंभेणं देसूणं अद्धजोयणं उट्ठं उच्चत्तेणं एगमेगाए बाहाए पंच २ दारसया अट्ठा-
इज्जाइं जोयणसयाइं २५० उट्ठं उच्चत्तेणं १२५ अद्धं विक्खंभेणं उवरियलेणं सोल-
सजोयणसहस्साइं आयामविक्खंभेणं पन्नासं जोयणसहस्साइं पंच य सत्ताणउयजोय-
णसए किंचिविसेसुणे परिकखेवेणं सव्वप्पमाणं वेमाणियप्पमाणस्स अद्धं नेवव्वं,
सभा सुहम्मा, तओ उववायसभा हरओ अभिसेय० अलंकारो जहा विजयस्स
अभिसेयविभूषणा य ववसाओ । चमरपरिवार इट्ठत्तं ॥ ११५ ॥ **वीयसए**
अट्ठमो उद्देसओ समत्तो ॥

किमिदं भंते ! समयखेत्तेति पवुच्चति ?, गोयमा ! अट्ठाइज्जा दीवा दो य समुहा
एस णं एवइए समयखेत्तेति पवुच्चति, तत्थ णं अयं जंबुद्वीवे २ सव्वदीवसमुहाणं
सव्वब्भंतरे एवं जीवाभिगमवत्तव्वया (जोइसविट्ठणं) नेयव्वा जाव अग्निमतं
पुक्खरद्धं जोइसविट्ठणं (इमा गाहा) ॥ ११६ ॥ **बितीयस्स नवमो उद्देसो ॥**

कति णं भंते ! अत्थिकाया प० ?, गोयमा ! पंच अत्थिकाया प०, तंजहा-
धम्मत्थिकाए अधम्मत्थिकाए आगासत्थिकाए जीवत्थिकाए पोगलत्थिकाए ॥ धम्म-
त्थिकाए णं भंते ! कतिवन्ने कतिगंधे कतिरसे कतिफासे ?, गोयमा ! अवण्णे अंगंधे
अरसे अफासे अरुवी अजीवे सासए अवट्टिए लोगदव्वे, से समासओ पंचविट्ठे
पन्नत्ते, तंजहा-दव्वओ खेतओ कालओ भावओ गुणओ, दव्वओ णं धम्मत्थिकाए
एगे दव्वे, खेतओ णं लोगप्पमाणमेत्ते, कालओ न कयावि न आसि न कयाइ

नत्थि जाव निच्चे, भावओ अवण्णे अगंधे अरसे अफासे, गुणओ गमणगुणे । अहम्मत्थिकाएवि एवं चेव, नवरं गुणओ ठाणगुणे, आगासत्थिकाएवि एवं चेव, नवरं खेत्तओ णं आगासत्थिकाए लोयालोयप्पमाणमेत्ते अणंते चेव जाव गुणओ अवगाहणागुणे । जीवत्थिकाए णं भंते ! कतिवच्चे कतिगंधे कतिरसे कइफासे ?, गोयमा ! अवण्णे जाव अरुवी जीवे सासए अवट्टिए लोगदव्वे, से समासओ पंचविहे पण्णत्ते, तंजहा-दव्वओ जाव गुणओ, दव्वओ णं जीवत्थिकाए अणंताइं जीवदव्वाइं, खेत्तओ लोगप्पमाणमेत्ते कालओ न कयाइ न आसि जाव निच्चे, भावओ पुण अवण्णे अगंधे अरसे अफासे, गुणओ उव्वओगगुणे । पोग्गलत्थिकाए णं भंते ! कतिवण्णे कतिगंधे ० रसे ० फासे ?, गोयमा ! पंचवण्णे पंचरसे दुगंधे अट्टफासे रूवी अजीवे सासए अवट्टिए लोगदव्वे, से समासओ पंचविहे पण्णत्ते, तंजहा-दव्वओ खेत्तओ कालओ भावओ गुणओ, दव्वओ णं पोग्गलत्थिकाए अणंताइं दव्वाइं, खेत्तओ लोयप्पमाणमेत्ते, कालओ न कयाइ न आसि जाव निच्चे, भावओ वण्णमंते गंध ० रस ० फासमंते, गुणओ गहणगुणे ॥ ११७ ॥ एगे भंते ! धम्मत्थिकायपदेसे धम्मत्थिकाएत्ति वत्तव्वं सिया ?, गोयमा ! णो इण्ठे समट्ठे, एवं दोच्चिवि तिच्चिवि चत्तारि पंच छ सत्त अट्ठ नव दस संखेज्जा, असंखेज्जा भंते ! धम्मत्थिकायपएसा धम्मत्थिकाएत्ति वत्तव्वं सिया ?, गोयमा ! णो इण्ठे समट्ठे, एगपदेसूणेवि य णं भंते ! धम्मत्थिकाए रत्ति वत्तव्वं सिया ? णो तिण्ठे समट्ठे, से केणट्ठेणं भंते ! एवं वुच्चइ ? एगे धम्मत्थिकायपदेसे नो धम्मत्थिकाएत्ति वत्तव्वं सिया जाव एगपदेसूणेवि य णं धम्मत्थिकाए नो धम्मत्थिकाएत्ति वत्तव्वं सिया ?, से नूणं गोयमा ! खंडे चक्के सगळे चक्के ?, भगवं ! नो खंडे चक्के सकळे चक्के, एवं छत्ते चम्मे दंडे दूसे आउ पहे मोयए, से तेणट्ठेणं गोयमा ! एवं वुच्चइ-एगे धम्मत्थिकायपदेसे नो धम्मत्थिकाएत्ति वत्तव्वं सिया जाव एगपदेसूणेवि य णं धम्मत्थिकाए नो धम्मत्थिकाएत्ति वत्तव्वं सिया ॥ से किंखातिए णं भंते ! धम्मत्थिकाए त्ति वत्तव्वं सिया ?, गोयमा ! असंखेज्जा धम्मत्थिकायपएसा ते सव्वे कसिणा पडिपुण्णा निरवसेसा एगगहणगहिया एस णं गोयमा ! धम्मत्थिकाएत्ति वत्तव्वं सिया, एवं अहम्मत्थिकाएवि, आगासत्थिकाएवि, जीवत्थिकायपोग्गलत्थिकायावि एवं चेव, नवरं तिण्हंपि पदेसा अणंता भाणियव्वा, सेसं तं चेव ॥ ११८ ॥ जीवे णं भंते ! सउट्ठाणे सक्कमे सबळे सवीरिए सपुसिस्कारपरक्कमे आयभावेणं जीवभावं उव्वंसेतीति वत्तव्वं सिया ?, हंता गोयमा ! जीवे णं सउट्ठाणे जाव उव्वंसेतीति वत्तव्वं सिया । से केणट्ठेणं जाव वत्तव्वं सिया ?, गोयमा ! जीवे णं अणं-

ताणं आभिणिबोहियनीणपज्जवाणं एवं सुयनाणपज्जवाणं ओहिनाणपज्जवाणं मणपज्ज-
वनाणप० केवलनाणप० मइअन्नाणप० सुयअन्नाणप० विभंगणाणपज्जवाणं चक्खु-
दंसणप० अचक्खुदंसणप० ओहिदंसणप० केवलदंसणप० उवओगं गच्छइ, उवओ-
गलक्खणे णं जीवे, से तेणट्ठेणं एवं वुच्चइ-गोयमा ! जीवे णं सउट्ठाणे जाव वत्तव्वं
सिया ॥ ११९ ॥ कतिविहे णं भंते ! आगासे पण्णते ?, गोयमा ! दुविहे आगासे
प०, तंजहा-लोयागासे य अलोयागासे य ॥ लोयागासे णं भंते ! किं जीवा जीव-
देसा जीवपदेसा अजीवा अजीवदेसा अजीवपएसा ?, गोयमा ! जीवावि जीवदे-
सावि जीवपदेसावि अजीवावि अजीवदेसावि अजीवपदेसावि जे जीवा ते नियमा
एगिंदिया बेंदिया तेइंदिया चउरिंदिया पंचेंदिया अणिंदिया, जे जीवदेसा ते नियमा
एगिंदियदेसा जाव अणिंदियदेसा, जे जीवपदेसा ते नियमा एगिंदियपदेसा जाव
अणिंदियपदेसा, जे अजीवा ते दुविहा पज्जता, तंजहा-रूवी य अरूवी य, जे
रूवी ते चउव्विहा पण्णत्ता, तंजहा-खंधा खंधदेसा खंधपदेसा परमाणुपोगला, जे
अरूवी ते पंचविहा पण्णत्ता, तंजहा-धम्मत्थिकाए नो धम्मत्थिकायस्स देसे धम्म-
त्थिकायस्स पदेसा अधम्मत्थिकाए नो अधम्मत्थिकायस्स देसे अधम्मत्थिकायस्स
पदेसा अद्दासमाए ॥ १२० ॥ अलोयागासे णं भंते ! किं जीवा ? पुच्छा तह चेव,
गोयमा ! नो जीवा जाव नो अजीवप्पएसा एगे अजीवदव्वदेसे अगुह्यलहुए अणं-
तेहिं अगुह्यलहुयगुणेहिं संजुत्ते सव्वागासे अणंतभागूणे ॥ १२१ ॥ धम्मत्थिकाए
णं भंते ! किं (के) महालए पण्णत्ते ?, गोयमा ! लोए लोयमेत्ते लोयप्पमाणे लोयफुडे
लोयं चेव फुसित्ता णं चिट्ठइ, एवं अहम्मत्थिकाए लोयागासे जीवत्थिकाए पोगल-
त्थिकाए पंचवि एक्काभिलावा ॥ १२२ ॥ अहेलोए णं भंते ! धम्मत्थिकायस्स
केवइयं फुसति ?, गोयमा ! सातिरेगं अद्धं फुसति । तिरियलोए णं भंते ! पुच्छा,
गोयमा ! असंखेज्जइभागं फुसइ । उट्ठलोए णं भंते ! पुच्छा, गोयमा ! देसूणं अद्धं
फुसइ ॥ १२३ ॥ इमा णं भंते ! रयणप्पभापुढवी धम्मत्थिकायस्स किं संखेज्जइ-
भागं फुसति ? असंखेज्जइभागं फुसइ ? संखिजे भागे फुसति ? असंखेजे भागे
फुसति ? सव्वं फुसति ?, गोयमा ! णो संखेज्जइभागं फुसति असंखेज्जइभागं फुसइ
णो संखेजे णो असंखेजे नो सव्वं फुसति । इमीसे णं भंते ! रयणप्पभाए पुढवीए
उवासंतरे घणोदही धम्मत्थिकायस्स पुच्छा, किं संखेज्जइभागं फुसति ? जहा
रयणप्पभा तहा घणोदहिघणवायतणुवाया । इमीसे णं भंते ! रयणप्पभाए पुढवीए
उवासंतरे धम्मत्थिकायस्स किं संखेज्जतिभागं फुसति असंखेज्जइभागं फुसइ जाव
सव्वं फुसइ ?, गोयमा ! संखेज्जइभागं फुसइ णो असंखेज्जइभागं फुसइ नो संखेजे ॥

नो असंखेजे० नो सव्वं फुसइ, उवासंतराई सव्वाई जहा रयणप्पभाए पुढवीए वत्तव्वया भणिया, एवं जाव अहेसत्तमाए, जंबुदीवाइया दीवा लवणसमुदाइया समुदा, एवं सोहम्मे कप्पे जाव ईसिपब्भारापुढवीए, एते सव्वेऽवि असंखेज्जतिभागं फुसति, सेसा पडिसेहेयव्वा । एवं अधम्मत्थिकाए, एवं लोयागासेवि, गाहा— पुढवोदहीधणतणुकप्पा गेवेज्जणुत्तरा सिद्धी । संखेज्जतिभागं अंतरेसु सेसा असंखेज्जा ॥ १ ॥ १२४ ॥ **दसमो उद्देशो, वित्तियं सयं समत्तं ॥**

गाहा—केरिसविउव्वणा चमर किरिय जाणित्थि नगर पाला य । अहिवइ इंदियपरिसा ततियम्मि सए दसुद्देशा ॥ १ ॥ तेणं कालेणं तेणं समएणं मोया नामं नगरी होत्था, वण्णओ, तीसे णं मोयाए नगरीए बहिया उत्तरपुरच्छिमे दिस्सीभागे णं नंदणे नामं उज्जाणे होत्था, वण्णओ, तेणं कालेणं २ सामी समोसढे, परिसा निग्गच्छइ पडिगया परिसा, तेणं कालेणं तेणं समएणं समणस्स भगवओ महावीरस्स दोच्चे अंतवासी अग्गिभूती नामं अणगारे गोयमगोत्तेणं सत्तुस्सेहे जाव पज्जुवासमाणे एवं वदासी—चमरे णं भंते ! असुरिंदे असुरराया केमहिद्धिए ? केमहजुइए ? केमहाबले ? केमहायसे ? केमहासोक्खे ? केमहाणुभागे ? केवइयं च णं पभू विउव्वित्तए ? गोयमा ! चमरे णं असुरिंदे असुरराया महिद्धिए जाव महाणुभागे से णं तत्थ चोत्तीसाए भवणावाससयसहस्साणं चउसट्ठीए सामाणियसाहस्सीणं तायत्तीसाए तायत्तीसगाणं जाव विहरइ, एवंमहिद्धिए जाव महाणुभागे, एवत्तियं च णं पभू विउव्वित्तए से जहानामए—जुवइं जुवाणे हत्थेणं हत्थे गेण्हेज्जा चक्कस्स वा नाभी अरगाउत्ता सिया, एवामेव गोयमा ! चमरे असुरिंदे असुरराया वेउव्वियसमुग्घाएणं समोहणइ २ संखेज्जाइं जोयणाइं उट्ठं दंडं निसिरइ, तंजहा—रयणाणं जाव रिट्ठाणं अहावायरे पोग्गले परिसाडेइ २ अहासुद्धुमे पोग्गले परियाएति २ दोच्चं पि वेउव्वियसमुग्घाएणं समोहणति २, पभू णं गोयमा ! चमरे असुरिंदे असुरराया केवलकप्पं जंबुदीवं २ बहूहिं असुरकुमारेहिं देवेहिं देवीहि य आइणं वित्तिकिण्णं उवत्थडं संथडं फुडं अवगाढाऽवगाढं करेत्तए । अदुत्तरं च णं गोयमा ! पभू चमरे असुरिंदे असुरराया तिरियमसंखेजे दीवसमुद्दं बहूहिं असुरकुमारेहिं देवेहिं देवीहि य आइणं वित्तिकिण्णे उवत्थडे संथडे फुडे अवगाढावगाढे करेत्तए, एस णं गोयमा ! चमरस्स असुरिंदस्स असुररणो अयमेयाह्वे विसए विसयमेत्ते बुइए णो चेव णं संपत्तीए विकुव्विसु वा विकुव्वति वा विकुव्विस्सति वा ॥ १२५ ॥ जति णं भंते ! चमरे असुरिंदे असुरराया एमहिद्धिए जाव एवइयं च णं पभू विकुव्वित्तए, चमरस्स णं भंते ! असुरिंदस्स असुररन्नो

सामाण्या देवा केमहिद्धिया जाव केवतियं च णं पभू विकुव्वित्तए ?, गोयमा ! चमरस्स असुरिंदस्स असुररत्तो सामाण्या देवा महिद्धिया जाव महाणुभागा, ते णं तत्थ साणं २ भवणाणं साणं २ सामाण्याणं साणं २ अगमहिंसीणं जाव दिव्वाइं भोगभोगाईं भुंजमाणा विहरंति, एवंमहिद्धिया जाव एवइयं च णं पभू विकुव्वित्तए, से जहानामए-जुवतिं जुवाणे हत्थेणं हत्थे गेण्हेज्जा चक्रस्स वा नामी अरयाउत्ता सिया एवामेव गोयमा ! चमरस्स असुरिंदस्स असुररत्तो एगमेगे सामा-
 णिए देवे वेउव्वियसमुग्घाएणं समोहणइ २ जाव दोच्चंपि वेउव्वियसमुग्घाएणं समोहणति २ पभू णं गोयमा ! चमरस्स असुरिंदस्स असुररत्तो एगमेगे सामाणिए देवे केवलकप्पं जंबुद्धीवं २ बहूहिं असुरकुमारेहिं देवेहिं देवीहि य आइजं वितिकिञ्चे उवत्थडं संथडं फुडं अवगाढावगाढं करेतए, अदुत्तरं च णं गोयमा ! पभू चमरस्स असुरिंदस्स असुररत्तो एगमेगे सामाणियदेवे तिरियमसंखेजे दीवसमुद्दे बहूहिं असुर-
 कुमारेहिं देवेहिं देवीहि य आइणे वितिकिण्णे उवत्थडे संथडे फुडे अवगाढावगाढे करेतए, एस णं गोयमा ! चमरस्स असुरिंदस्स असुररत्तो एगमेगस्स सामाणिय-
 देवस्स अयमेयारूवे विसए विसयमेत्ते बुइए णो चैव णं संपत्तीए विकुव्विसु वा विकुव्वति वा विकुव्विस्सति वा । जति णं भंते ! चमरस्स असुरिंदस्स असुररत्तो सामाण्या देवा एवंमहिद्धिया जाव एवतियं च णं पभू विकुव्वित्तए चमरस्स णं भंते ! असुरिंदस्स असुररत्तो तायत्तीसिया देवा केमहिद्धिया ?, तायत्तीसिया देवा जहा सामाण्या तहा नेयव्वा, लोयपाला तहेव, नवरं संखेज्जा दीवसमुद्दा आणियव्वा, बहूहिं असुरकुमारेहिं २ आइजे जाव विउव्विस्संति वा । जति णं भंते ! चमरस्स असुरिंदस्स असुररत्तो लोयपाला देवा एवंमहिद्धिया जाव एवतियं च णं पभू विउव्वित्तए चमरस्स णं भंते ! असुरिंदस्स असुररत्तो अगमहिंसीओ देवीओ केमहिद्धियाओ जाव केवतियं च णं पभू विकुव्वित्तए ?, गोयमा ! चमरस्स णं असुरिंदस्स असुररत्तो अगमहिंसीओ महिद्धियाओ जाव महाणुभागाओ, ताओ णं तत्थ साणं २ भवणाणं साणं २ सामाणियसाहस्सीणं साणं २ महत्तरियाणं साणं २ परिसाणं जाव एमहिद्धियाओ अन्नं जहा लोयपालाणं अपरिसेसं । सेवं भंते ! २ ति ॥ १२६ ॥ भगवं दोच्चे गोयमे समणं भगवं महावीरं वंदइ नमंसइ २ जेणेव तच्चे गोयमे वायुभूतिअणगारे तेणेव उवागच्छति २ तच्चं गोयमं वायुभूतिं अणगारं एवं वदासी-एवं खलु गोयमा ! चमरे असुरिंदे असुरराया एवंमहिद्धिए तं चैव एवं सव्वं अपुट्टवागरणं नेयव्वं अपरिसेसियं जाव अगमहिंसीणं वत्तव्वया समत्ता । तए णं से तच्चे गोयमे वायुभूती अणगारे दोच्चस्स गोयमस्स अणिभूइस्स अणगा-

रस्स एवमाइक्खमाणस्स भा० प० परु० एयमट्ठं नो सद्दइ नो पत्तियइ नो रोयइ
 एयमट्ठं असद्दमाणे अपत्तियमाणे अरोएमाणे उट्ठाए उट्ठेइ २ जेणेव समणे भगवं
 महावीरे तेणेव उवागच्छइ जाव पज्जुवासमाणे एवं वयासी-एवं खलु भंते । दोच्चे
 गोयमे अग्गिभूतिअणगारे मम एवमातिकखइ भासइ पन्नवेइ परुवेइ-एवं खलु
 गोयमा ! चमरे असुरिंदे असुरराया महिद्धिए जाव महाणुभावे से णं तत्थ चोत्ती-
 साए भवणावाससयसहस्साणं एवं तं चेव सव्वं अपरिसेसं भाणियव्वं जाव अग्ग-
 महिसीणं वत्तव्वया समत्ता, से कहमेयं भंते !, एवं ? गोयमादि समणे भगवं महा-
 वीरे तच्चं गोयमं वाउभूतिं अणगारं एवं वदासी-जण्णं गोयमा ! दोच्चे गो० अग्गि-
 भूइअणगारे तव एवमातिकखइ ४-एवं खलु गोयमा ! चमरे ३ महिद्धिए एवं तं
 चेव सव्वं जाव अग्गमहिसीणं वत्तव्वया समत्ता, सच्चे णं एसमट्ठे, अहंपि णं
 गोयमा ! एवमातिकखामि भा० प० परु०, एवं खलु गोयमा !-चमरे ३ जाव
 महिद्धिए सो चेव वितिओ गमो भाणियव्वो जाव अग्गमहिसीओ, सच्चे णं एसमट्ठे,
 सेवं भंते २, तच्चे गोयमे ! वायुभूती अणगारे समणं भगवं महावीरं वंदइ नमंसइ
 २ जेणेव दोच्चे गोयमे अग्गिभूती अणगारे तेणेव उवागच्छइ २ दोच्चे गो० अग्गि-
 भूतिं अणगारं वंदइ नमंसति २ एयमट्ठं सम्मं विणएणं भुज्जो २ खामेति ॥ १२७ ॥
 तए णं से तच्चे गोयमे वाउभूती अणगारे दोच्चेणं गोयमेणं अग्गिभूतीणामेणं अण-
 गारेणं सद्धिं जेणेव समणे भगवं महावीरे जाव पज्जुवासमाणे एवं वयासी-जति
 णं भंते ! चमरे असुरिंदे असुरराया एवंमहिद्धिए जाव एवतियं च णं पभू विक्कुव्वि-
 त्तए बली णं भंते ! वइरोयणिंदे वइरोयणराया केमहिद्धिए जाव केवइयं च णं पभू
 विक्कुव्वित्तए १, गोयमा ! बली णं वइरोयणिंदे वइरोयणराया महिद्धिए जाव महाणु-
 भागे, से णं तत्थ तीसाए भवणावाससयसहस्साणं सट्ठीए सामाणियसाहस्सीणं सेसं
 जहा चमरस्स तहा बलियस्सवि नेयव्वं, णवरं सातिरेगं केवलकपं जंबुदीवति
 भाणियव्वं, सेसं तं चेव णिरवसेसं नेयव्वं, णवरं णाणतं जाणियव्वं भवणेहिं सामा-
 णिएहिं, सेवं भंते २ त्ति तच्चे गोयमे वायुभूती जाव विहरति । भंते त्ति भगवं दोच्चे
 गोयमे अग्गिभूती अणगारे समणं भगवं महावीरं वंदइ २ एवं वदासी-जइ णं
 भंते ! बली वइरोयणिंदे वइरोयणराया एमहिद्धिए जाव एवइयं च णं पभू विक्कु-
 व्वित्तए धरणे णं भंते ! नागकुमारिंदे नागकुमारराया केमहिद्धिए जाव केवतियं च
 णं पभू विक्कुव्वित्तए १, गोयमा ! धरणे णं नागकुमारिंदे नागकुमारराया एमहिद्धिए
 जाव से णं तत्थ चोयालीसाए भवणावाससयसहस्साणं छण्हं सामाणियसाहस्सीणं
 तायत्तीसाए तायत्तीसगाणं चउण्हं लोगपालाणं छण्हं अग्गमहिसीणं सपरिवाराणं

तिहं परिसाणं सत्तण्हं अणियाणं सत्तण्हं अणियाहिवईणं चउवीसाए आयरक्खदे-
वसाहस्सीणं अजेसिं च जाव विहरइ, एवतियं च णं पभू विउव्वित्तए से जहाना-
मए—जुवतिं जुवाणे जाव पभू केवलकप्पं जंबुदीवं २ जाव तिरियं संखेजे दीवसमुदे
बहुहिं नागकुमारेहिं २ जाव विउव्विस्संति वा, सामाणिया तायत्तीसलोगपालगा महि-
सीओ य तहेव, जहा चमरस्स एवं धरणे णं नागकुमारराया महिहिण्ण जाव एवतियं
जहा चमरे तहा धरणेणावि, नवरं संखेजे दीवसमुदे भाणियव्वं, एवं जाव थणिय-
कुमारा वाणमंतरा जोइसियावि, नवरं दाहिणिळे सव्वे अग्निभूती पुच्छति, उत्तरिळे
सव्वे वाउभूती पुच्छइ, भंतेत्ति भगवं दोच्चे गोयमे अग्निभूती अणगारे समणं
भगवं म० वंदति नमंसति २ एवं वयासी-जति णं भंते ! जोइसिंदे जोतिसराया
एवंमहिहिण्ण जाव एवतियं च णं पभू विउव्वित्तए सक्के णं भंते ! देविंदे देवराया
केमहिहिण्ण जाव केवतियं च णं पभू विउव्वित्तए ?, गोयमा ! सक्के णं देविंदे देव-
राया महिहिण्ण जाव महाणुभागे, से णं तत्थ बत्तीसाए विमाणावाससयसहस्साणं
चउरासीए सामाणियसाहस्सीणं जाव चउण्हं चउरासीणं आयरक्ख (देव) साह-
स्सीणं अजेसिं च जाव विहरइ, एवंमहिहिण्ण जाव एवतियं च णं पभू विउव्वित्तए,
एवं जहेव चमरस्स तहेव भाणियव्वं, नवरं दो केवलकप्पे जंबुदीवे २ अवसेसं तं
चेव, एस णं गोयमा ! सक्कस्स देविंदस्स देवरणो इमेयारूवे विसए विसयमेत्ते णं
बुइए नो चेव णं संपत्तीए विउव्विसु वा विउव्वति वा विउव्विस्सति वा ॥ १२८ ॥
जइ णं भंते ! सक्के देविंदे देवराया एमहिहिण्ण जाव एवतियं च णं पभू विउव्वि-
त्तए ॥ एवं खलु देवाणुप्पियाणं अंतेवासी तीसए णामं अणगारे पगतिभइए जाव
विणीए छट्ठंछट्ठेणं अणिकिखत्तेणं तवोक्कमेणं अप्पाणं भावेमाणे बहुपडिपुण्णाइ अट्ठ
संवच्छराइ सामण्णपरियाणं पाउणिता मासियाए संलेहणाए अत्ताणं इस्सेत्ता सट्ठि
भत्ताइ अणसणाए छेदेत्ता आलोइयपडिकंते समाहिपत्ते कालमासे काळं किच्चा
सोहम्मे कप्पे सयंसि विमाणंसि उववायसभाए देवसयणिजंसि देवदूंसंतरिए अंमु-
लस्स असंखेजइभागमेत्ताए ओगाहणाए सक्कस्स देविंदस्स देवरणो सामाणियदेव-
त्ताए उववण्णे, तए णं तीसए देवे अहुणोववन्नमेत्ते समाणे पंचविहाए पज्जतीए
पज्जत्तिभावं गच्छइ, तंजहा-आहारपज्जतीए सरिर० इंदिय० आणुपाणुपज्जतीए
भासामणपज्जतीए, तए णं तं तीसयं देवं पंचविहाए पज्जतीए पज्जत्तिभावं गयं
समाणं सामाणियपरिसोववन्नया देवा करयलपरिग्गहिंयं दसमहं सिरसावत्तं मत्थए
अंजलिं कट्ठु जएणं विजएणं वड्ढाविंति ॥ एवं वदासी-अहो णं देवाणुप्पिए ! दिव्वा
देविंदी दिव्वा देवजुइ दिव्वे देवाणुभावे लळे पत्ते अभिसमन्नागते, जारिसिया णं

देवाणुप्पिएहिं दिव्वा देविद्धी दिव्वा देवजुई दिव्वे देवाणुभावे लद्धे पत्ते अभि-
समन्नागते तारिसिया णं सक्केणं देविंदेणं देवरत्ता दिव्वा देविद्धी जाव अभिसमन्ना-
गया, जारिसिया णं (सक्केणं देविंदेणं देवरत्ता दिव्वा देविद्धी जाव अभिसमन्ना-
गया तारिसिया णं) देवाणुप्पिएहिं दिव्वा देविद्धी जाव अभिसमन्नागया । से णं
भंते ! तीसए देवे केमहिद्धिए जाव केवतियं च णं पभू विउव्वित्तए ?, गोयमा !
महिद्धिए जाव महाणुभागे, से णं तत्थ सयस्स विमाणस्स चउण्हं सामाणियसाह-
स्सीणं चउण्हं अग्गमहिंसीणं सपरिवाराणं तिण्हं परिसाणं सत्तण्हं अणियाणं सत्तण्हं
अणियाहिवईणं सोलसण्हं आयरक्खदेवसाहस्सीणं अण्णेसिं च बहूणं वेमाणियाणं
देवाणं य देवीणं य जाव विहरति, एवंमहिद्धिए जाव एवइयं च णं पभू विउव्वित्तए,
से जहाणामए जुवतिं जुवाणे हत्थेणं हत्थे गेण्हेज्जा जहेव सक्कस्स तहेव जाव एस णं
गोयमा ! तीसयस्स देवस्स अयमेयारूवे विसए विसयमेत्ते बुइए नो चेव णं संपत्तीए
विउव्विसु वा ३ । जति णं भंते ! तीसए देवे महिद्धिए जाव एवइयं च णं पभू विउ-
व्वित्तए सक्कस्स णं भंते ! देविंदस्स देवरत्तो अवसेसा सामाणिया देवा केमहिद्धिया
तहेव सव्वं जाव एस णं गोयमा ! सक्कस्स देविंदस्स देवरत्तो एगमेगस्स सामाणियस्स
देवस्स इमेयारूवे विसए विसयमेत्ते बुइए नो चेव णं संपत्तीए विउव्विसु वा विउव्विति
वा विउव्विस्संति वा तायतीसा य लोगपालअग्गमहिंसीणं जहेव चमरस्स नवरं दो
केवलकप्पे जंबूदीवे २ अण्णं तं चेव, सेवं भंते २ त्ति दोच्चे गोयमे जाव विहरति
॥ १२९ ॥ भंतेत्ति भगवं तच्चे गोयमे वाउभूती अणगारे समणं भगवं जाव एवं
वदासी-जति णं भंते ! सक्के देविंदे देवराया एमहिद्धिए जाव एवइयं च णं पभू
विउव्वित्तए ईसाणे णं भंते ! देविंदे देवराया केमहिद्धिए ? एवं तहेव, नवरं साहिए
दो केवलकप्पे जंबूदीवे २ अवसेसं तहेव ॥ १३० ॥ जति णं भंते ! ईसाणे देविंदे देव-
राया एमहिद्धिए जाव एवतियं च णं पभू विउव्वित्तए ॥ एवं खलु देवाणुप्पियाणं अंते-
वासी कुरुदत्तपुत्ते नामं पगतिभइए जाव विणीए अट्ठमंअट्ठमेणं अणिविखत्तेणं पारणए
आर्यबिलपरिग्गहिणं तवोकम्ममेणं उट्ठं बाहाओ पगिज्झिय २ सूराम्भिसुहे आया-
वणभूमीए आयावेमाणे बहुपडिपुजे छम्मासे सामण्णपरियाणं पाउणिता अद्धमासि-
याए संलेहणाए अत्ताणं झोसित्ता तीसं भत्ताइं अणसणाए छेदित्ता आलोइयपडिक्कंते
समाहिपत्ते कालमासे कालं किच्चा ईसाणे कप्पे सयंसि विमाणंसि जा चेव तीसए
वत्तव्वया ता सव्वेव अपरिसेसा कुरुदत्तपुत्तेवि, नवरं सातिरेगे दो केवलकप्पे
जंबूदीवे २, अवसेसं तं चेव, एवं सामाणियतायतीसलोगपालअग्गमहिंसीणं जाव
एस णं गोयमा ! ईसाणस्स देविंदस्स देवरत्तो एवं एगमेगाए अग्गमहिंसीए देवीए

अयमेयारूवे विसए विसयमेत्ते बुइए नो चेव णं संपत्तीए विउव्विसु वा ३ ॥१३१॥
 एवं सणकुमारएवि, नवरं चत्तारि केवलकप्पे जंबुद्दीवे दीवे अदुत्तरं च णं तिरियम-
 संखेजे, एवं सामाणियतायत्तीसलोगपालअगमहिशीणं असंखेजे दीवसमुद्दे सव्वे
 विउव्वंति, सणकुमाराओ आरद्धा उवरिल्ला लोगपाला सव्वेवि असंखेजे दीवसमुद्दे
 विउव्वंति, एवं माहिंदेवि, नवरं सातिरेगे चत्तारि केवलकप्पे जंबुद्दीवे २, एवं बंभ-
 लोएवि, नवरं अट्ठ केवलकप्पे, एवं लंतएवि, नवरं सातिरेगे अट्ठ केवलकप्पे, महा-
 सुक्के सोलस केवलकप्पे, सहस्सारे सातिरेगे सोलस, एवं पाणएवि, नवरं बत्तीसं
 केवल०, एवं अच्चुएवि नवरं सातिरेगे बत्तीसं केवलकप्पे जंबुद्दीवे २ अशं तं चेव;
 सेवं भंते २ त्ति तच्चे गोयमे वायुभूती अणगारे समणं भगवं महावीरं वंदइ नमंसति
 जाव विहरति । तए णं समणे भगवं महावीरे अन्नया कयाइ मोयाओ नगरीओ
 नंदणाओ उज्जाणाओ पडिनिक्खमइ २ बहिया जणवयविहारं विहरइ ॥ १३२ ॥
 तेणं कालेणं तेणं० रायगिहे नामं नगरे होत्था, वन्नओ, जाव परिसा पज्जुवा-
 सइ । तेणं कालेणं २ ईसाणे देविंदे देवराया सूलपाणी वसभवाहणे उत्तरङ्गुलोगा-
 हिंवई अट्ठावीसविमाणावाससयसहस्साहिंवई अयरंवरवत्थधरे आलइयमालमउडे
 नवहेमचारुचित्तंचलकुंडलविलिहिज्जमाणगंडे जाव दस दिसाओ उज्जोवेमाणे पभा-
 सेमाणे ईसाणे कप्पे ईसाणवडिसए विमाणे जहेव रायप्पसेणइजे जाव दिव्वं देविट्ठिं
 जाव जामेव दिसि पाउब्भूए तामेव दिसि पडिगए । भंतेत्ति भगवं गोयमे समणं
 भगवं महावीरं वंदति णमंसति २ एवं वदासी-अहो णं भंते ! ईसाणे देविंदे देव-
 राया महिण्डिए ईसाणस्स णं भंते ! सा दिव्वा देविट्ठी कहिं गता कहिं अणुपविट्ठा ?,
 गोयमा ! सरीरं गता २, से केणट्ठेणं भंते ! एवं बुच्चति सरीरं गता ? २, गोयमा !
 से जहानामए-कूडागारसाला सिया दुहुओ लित्ता गुत्ता गुत्तुदुवारा णिवाया णिवाय-
 गंभीरा तीसे णं कूडागारे जाव कूडागारसालादिट्ठंतो भाणियव्वो । ईसाणेणं भंते !
 देविंदेणं देवरणा सा दिव्वा देविट्ठी दिव्वा देवजुई दिव्वे देवाणुभागे किण्णा लद्धे
 किच्चा पत्ते किण्णा अभिसमन्नागए के वा एस आसि पुव्वभवे किण्णामए वा किंगोत्ते
 वा कयरंसि वा गामंसि वा नगरंसि वा जाव संनिवेसंसि वा किं वा सुच्चा किं वा
 दच्चा किं वा भोच्चा किं वा किच्चा किं वा समायरित्ता कस्स वा तहारूवस्स समणस्स
 वा माहणस्स वा अंतिए एगमवि आयरियं धम्मियं सुवयणं सोच्चा निसम्म [जण्णं]
 ईसाणेणं देविंदेणं देवरणा सा दिव्वा देविट्ठी जाव अभिसमन्नागया ?, एवं खल्ल
 गोयमा ! तेणं कालेणं २ इहेव जंबुद्दीवे २ भारहे वासे तामलित्ती नामं नगरी
 होत्था, वन्नओ, तत्थ णं तामलित्तीए नगरीए तामली नामं मोरियपुत्ते गाहावती

होत्था, अद्धे दित्ते जाव बहुजणस्स अपरिभूए यावि होत्था, तए णं तस्स मोरिय-
 पुत्तस्स तामलित्तस्स गाहावइयस्स अण्णया कयाइ पुब्बरत्तावरत्तकालसमयंसि कुटुं-
 बजागरियं जागरमाणस्स इमेयारूवे अज्झत्थिए जाव समुप्पजित्था-अत्थि ता मे
 पुरा पोराणाणं सुचिन्नाणं सुपरिक्रंताणं सुभाणं कल्लाणाणं कडाणं कम्माणं कल्लाणफल-
 वित्तिविसेसो जेणाहं हिरण्णेणं वड्ढामि सुवन्नेणं वड्ढामि धणेणं वड्ढामि धन्नेणं वड्ढामि
 पुत्तेहिं वड्ढामि पसूहिं वड्ढामि विउलधणकणगरयणमणिमोत्तियसंखसिलप्पवालरत्तर-
 यणसंतसारसावएजेणं अतीव २ अभिवड्ढामि, तं किण्णं अहं पुण पोराणाणं सुचि-
 न्नाणं जाव कडाणं कम्माणं एगंतसोक्खयं उवेहेमाणे विहरामि ?, तं जाव ताव अहं
 हिरण्णेणं वड्ढामि जाव अतीव २ अभिवड्ढामि जावं च णं मे मित्तनातिनियगसंबं-
 धिपरियणो आढाति परियाणाइ सक्कारेइ सम्माणेइ कल्लाणं मंगलं देवयं चेइयं विणएणं
 पज्जुवासइ ताव ता मे सेयं कल्लं पाउप्पभायाए रयणीए जाव जलंते सयमेव दाह-
 मयं पडिग्गहियं करेत्ता विउलं असणं पाणं खातिमं सातिमं उवक्खडावेत्ता मित्तणा-
 तिनियगसयणसंबंधिपरियणं आमंतेत्ता तं मित्तनाइनियगसंबंधिपरियणं विउलेणं
 असणपाणखातिमसातिमेणं वत्थगंधमल्लालंकारेण य सक्कारेत्ता सम्माणेत्ता तस्सेव
 मित्तणाइनियगसंबंधिपरियणस्स पुरतो जेट्ठपुत्तं कुटुंबे ठावेत्ता तं मित्तणातिणियग-
 संबंधिपरियणं जेट्ठपुत्तं च आपुत्तिच्छत्ता सयमेव दाहमयं पडिग्गहं गहाय मुंडे भवित्ता
 पाणामाए पव्वजाए पव्वइत्तए, पव्वइएऽवि य णं समाणे इमं एयारूवं अभिग्गहं
 अभिणिण्हिस्सामि-कप्पइ मे जावजीवाए छट्ठंछट्ठेणं अणिक्खित्तेणं तवोकम्मेणं उड्ढं-
 बाहाथो पगिज्झिय २ सूराम्भिमुहस्स आयावणभूमीए आयावेमाणस्स विहरित्तए,
 छट्ठस्सवि य णं पारणयंसि आयावणभूमीतो पच्चोरुभित्ता सयमेव दाहमयं पडिग्ग-
 हयं गहाय तामलित्तीए नगरीए उच्चनीयमज्झिमाइ कुलाइं घरसमुदाणस्स भिक्खा-
 यरियाए अडित्ता सुद्धोदणं पडिग्गाहेत्ता तं तिसत्तखुत्तो उदएणं पक्खालेत्ता तओ
 पच्छा आहारं आहारित्तएत्तिकट्ठु एवं संपेहेइ २ कल्लं पाउप्पभायाए जाव जलंते
 सयमेव दाहमयं पडिग्गहयं करेइ २ विउलं असणं पाणं खाइमं साइमं उवक्खडावेइ
 २ तओ पच्छा ण्हाए सुद्धप्पावेसाइं मंगल्लाइं वत्थाइं पवरपरिहिए अप्पमहपद्मभरणा-
 लंकियसरीरे भोयणवेलाए भोयणमंडवंसि सुहासणवरगए तए णं मित्तणाइनियगस-
 यणसंबंधिपरिजणेणं सद्धिं तं विउलं असणं पाणं खातिमं साइमं आसादेमाणे
 वीसाएमाणे परिभाएमाणे परिभुंजेमाणे विहरइ । जिमियमुत्तुत्तरागएऽवि य णं
 समाणे आयंते चोक्खे परमसुइभूए तं मित्तं जाव परियणं विउलेणं असणपाण
 ४-पुप्फवत्थगंधमल्लालंकारेण य सक्कारेइ २ तस्सेव मित्तणाइ जाव परियणस्स पुरओ

जेट्टं पुत्तं कुट्टंवे ठावेइ २ ता तस्सेव तं मित्तनाइणियगसयणसंबंधिपरिजणं जेट्टपुत्तं
 च आपुच्छइ २ मुंडे भवित्ता पाणामाए पव्वजाए पव्वइए, पव्वइएवि य णं समणे
 इमं एयारुवं अभिग्गहं अभिगिण्हइ-कप्पइ मे जावजीवाए छट्ठंछट्ठेणं जाव आहारि-
 त्तएत्तिकट्ठु इमं एयारुवं अभिग्गहं अभिगिण्हइ २ ता जावजीवाए छट्ठंछट्ठेणं अणि-
 विखत्तेणं तवोकम्मेणं उट्ठं बाहाओ पगिज्झिय २ सूरामिसुहे आयावणभूमीए
 आयावेमाणे विहरइ, छट्ठस्सवि यं णं पारणयंसि आयावणभूमीओ पच्चोरुहइ २
 सयमेव दासुमयं पडिग्गहं गहाय तामलितीए नगरीए उच्चनीयमज्झिमाइं कुलाइं
 घरसमुदाणस्स भिक्खायरियाए अडइ २ सुद्धोयणं पडिग्गाहेइ २ तिसत्तखत्तो
 उदएणं पक्खालेइ, तओ पच्छा आहारं आहारेइ । से केणट्ठेणं भंते ! एवं वुच्चइ-
 पाणामा पव्वजा २ ?, गोयमा ! पाणामाए णं पव्वजाए पव्वइए समणे जं जत्थ
 पासइ इदं वा खंदं वा रूढं वा सिवं वा वेसमणं वा अज्जं वा कोट्टकियं वा रायं वा
 जाव सत्थवाहं वा कागं वा साणं वा पाणं वा उच्चं पासइ उच्चं पणामं करेइ नीयं
 पासइ नीयं पणामं करेइ, जं जहा पासति तस्स तहा पणामं करेइ, से तेणट्ठेणं
 गोयमा ! एवं वुच्चइ—पाणामा जाव पव्वजा ॥ १३३ ॥ तए णं से तामली
 मोरियपुत्ते तेणं ओरालेणं विपुलेणं पयत्तेणं पग्गहिणं बालतवोकम्मेणं सुक्के भुक्खे
 जाव धमणिसंतए जाए यावि होत्था, तए णं तस्स तामलित्तस्स बालतवस्सिस्स
 अन्नया कयाइ पुव्वरत्तावरत्तकालसमयंसि अणिच्चजागरियं जागरमाणस्स इमेयारुवे
 अज्झत्थिए वित्तिए जाव समुप्पज्जित्था—एवं खलु अहं इमेणं ओरालेणं विपुलेणं
 जाव उदरगेणं उदत्तेणं उत्तमेणं महाणुभागेणं तवोकम्मेणं सुक्के भुक्खे जाव धमणि-
 संतए जाए, तं अत्थि जा मे उट्ठाणे कम्मे बले वीरिए पुरिसक्कारपरक्कमे ताव ता
 मे सेयं कल्लं जाव जलंते तामलितीए नगरीए दिट्ठाभट्टे य पासंडत्थे य पुव्वसंगतिए
 य गिहत्थे य पच्छासंगतिए य परियायसंगतिए य आपुच्छित्ता तामलितीए नगरीए
 मज्झमज्झेणं निग्गच्छित्ता पाउग्गं कुडियमादीयं उवकरणं दासुमयं च पडिग्गहियं
 एगंते [एडेइ] एडित्ता तामलितीए नगरीए उत्तरपुरच्छिमे दिसीभाए णियत्तणिय-
 मंडलं [आलिहइ] आलिहत्ता संलेहणाद्दसणाद्दसियस्स भत्तपाणपडियाइविखयस्स
 पाओवगयस्स कालं अणवकंखमाणस्स विहरित्तएत्तिकट्ठु एवं संपेहेइ एवं संपेहेत्ता
 कल्लं जाव जलंते जाव आपुच्छइ २ तामलितीए [एगंते एडेइ] जाव जलंते जाव
 भत्तपाणपडियाइविखाए पाओवगमणं निवजे । तेणं कालेणं २ बल्लिचंचारायहाणी
 अणिंदा अपुरोहिया यावि होत्था । तए णं ते बल्लिचंचारायहाणिणिवत्थव्वया बहवे
 असुरकुमार देवा य देवीओ य तामलि बालतवस्सि ओहिणा आहोयंति २ अन्नमन्नं

सहावैति २ एवं वयासी-एवं खलु देवाणुप्पिया ! बलिचंचा रायहाणी अणिदा अपुरोहिया अम्हे णं देवाणुप्पिया ! इंदाहीणा इंदाधिद्विया इंदाहीणकजा अयं च णं देवाणुप्पिया ! तामली बालतवस्सी तामलितीए नगरीए बहिया उत्तरपुरच्छिमे दिसीभाए नियत्तणियमंडलं आलिहिता संलेहणाझूसणाझूसिए भत्तपाणपडियाइक्खिए पाओवगमणं निवजे, तं सेयं खलु देवाणुप्पिया ! अम्हं तामलिं बालतवस्सिं बलिचंचाए रायहाणीए ठित्तिपकप्पं पकरावेत्तएत्तिकट्ठु अन्नमन्नस्स अंतिए एयमट्ठं पडि-
 सुणेंति २ बलिचंचाए रायहाणीए मज्झमज्झेणं निगगच्छन्ति २ जेणेव स्यगिंदे उप्पायपव्वए तेणेव उवागच्छन्ति २ वेउव्वियसमुग्घाएणं समोहणंति जाव उत्तर-
 वेउव्वियाइं रुवाईं विकुव्वंति, ताए उक्किट्ठाए तुरियाए चवलाए चंडाए जइणाए छेयाए सीहाए सिग्घाए दिव्वाए उड्डुयाए देवगतीए तिरियमसंखेज्जाणं दीवसमुद्धानं मज्झमज्झेणं जेणेव जंबुद्वीवे २ जेणेव भारहे वासे जेणेव तामलिती[ए]नगरी[ए]जे-
 णेव तामलिती मोरियपुत्ते तेणेव उवागच्छंति २ ता तामलिस्स बालतवस्सिस्स उप्पिं सपक्खिं सपडिदिसिं ठिच्चा दिव्वं देविद्धिं दिव्वं देवज्जुइं दिव्वं देवाणुभागं दिव्वं बत्तीसविहं नट्ठविहं उवदंसंति २ तामलिं बालतवस्सिं तिव्खुत्तो आयाहिणं पयाहिणं करेंति वंदंति नमंसंति २ एवं वदासी-एवं खलु देवाणुप्पिया ! अम्हे बलिचंचारायहाणिवत्थव्वया बहवे असुरकुमारा देवा य देवीओ य देवाणुप्पियं वंदामो नमंसामो जाव पज्जुवासामो, अम्हाणं देवाणुप्पिया ! बलिचंचा रायहाणी अणिदा अपुरोहिया अम्हेऽपि य णं देवाणुप्पिया ! इंदाहीणा इंदाहिद्विया इंदा-
 हीणकजा तं तुब्भे णं देवाणुप्पिया ! बलिचंचारायहाणिं आढाह परियागह सुमरह अट्ठं बंधह निदानं पकरेह ठित्तिपकप्पं पकरेह, तते णं तुब्भे कालमासे कालं किच्चा बलिचंचारायहाणीए उववज्जिस्सह, तते णं तुब्भे अम्हं इंदा भविस्सह, तए णं तुब्भे अम्हेहिं सद्धिं दिव्वाइं भोगभोगाइं भुंजमाणा विहरिस्सह । तए णं से तामली बालतवस्सी तेहिं बलिचंचारायहाणिवत्थव्वेहिं बह्वहिं असुर-
 कुमारेहिं देवेहिं देवीहि य एवं वुत्ते समाणे एयमट्ठं नो आढाइ नो परियाणेइ तुसिणीए संचिद्धइ, तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिं मोरियपुत्तं दोच्चपि तच्चपि तिव्खुत्तो आयाहिणप्पयाहिणं करेंति २ जाव अम्हं च णं देवाणुप्पिया ! बलिचंचारायहाणी अणिदा जाव ठित्तिप-
 कप्पं पकरेह जाव दोच्चपि तच्चपि, एवं वुत्ते समाणे जाव तुसिणीए संचिद्धइ, तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिणा बालतवस्सिणा अणाढाइज्जमाणा अपरियाणिज्जमाणा जामेव दिसिं पाउब्भूया तामेव

दिसिं पडिगया ॥ १३४ ॥ तेणं कालेणं २ ईसाणे कप्पे अणिदे अपुरोहि ए यावि
 होत्या, तते णं से तामली बालतवस्सी बहुपडिपुच्चाईं सट्ठिं वाससहस्साईं परियागं
 पाउणिता दोमासियाए संलेहणाए अत्ताणं झसित्ता सवीसं भत्तसयं अणसणाए छेदित्ता
 कालमासे कालं किच्चा ईसाणे कप्पे ईसाणवडिंसए विमाणे उववायसभाए देवसय-
 णिज्जंसि देवदसंतरिए अंगुलस्स असंखेज्जभागमेत्ताए ओगाहणाए ईसाणदेविंद-
 विरहकालसमयंसि ईसाणदेविंदत्ताए उववण्णे, तए णं से ईसाणे देविंदे देवराया
 अहुणोववन्ने पंचविहाए पज्जतीए पज्जत्तिभावं गच्छति, तंजहा-आहारप० जाव
 भासामणपज्जतीए, तए णं ते बलिचंचारायहाणिवत्थव्वया बहवे असुरकुमारा देवा
 य देवीओ य तामलि बालतवस्सि कालगयं जाणित्ता ईसाणे य कप्पे देविंदत्ताए
 उववणं पासित्ता आसुरत्ता कुविया चंडिक्रिया मिसिमिसेमाणा बलिचंचाराय०
 मज्झमज्झेणं निग्गच्छंति २ ताए उक्किट्ठाए जाव जेणेव भारहे वासे जेणेव ताम-
 लिती [ए] नयरी [ए] जेणेव तामलिस्स बालतवस्सिस्स सरीरए तेणेव उवागच्छंति
 २ वामे पाए सुंबेणं बंधंति २ तिक्खुत्तो मुहे उट्ठहंति २ तामलितीए नगरीए
 सिंघाडगतिगचउक्कचच्चरचउम्मुहमहापहपहेसु आकड्ढविकड्ढिं करेमाणा महया २
 सट्ठेणं उग्घोसेमाणा २ एवं वयासी-केसं णं भो से तामली बालतव० सयंगहि यलिगे
 पाणामाए पव्वजाए पव्वइए ? केसं णं भते (भो) ! ईसाणे कप्पे ईसाणे देविंदे
 देवरायाइतिकट्ठु तामलिस्स बालतव० सरीरयं हीलंति निंदंति खिंसंति गरिहंति
 अवमञ्जंति तज्जंति तालंति परिवहंति पव्वहंति आकड्ढविकड्ढिं करंति हीलेत्ता जाव
 आकड्ढविकड्ढिं करेत्ता एगंते एडेंति २ जामेव दिसिं पाउब्भूया तामेव दिसिं पडि-
 गया ॥ १३५ ॥ तए णं ते ईसाणकप्पवासी बहवे वेमाणिया देवा य देवीओ य
 बलिचंचारायहाणिवत्थव्वएहिं असुरकुमारेहिं देवेहिं देवीहिं य तामलिस्स बालतव-
 स्सिस्स सरीरयं हीलिज्जमाणं निदिज्जमाणं जाव आकड्ढविकड्ढिं कीरमाणं पासंति २
 आसुरत्ता जाव मिसिमिसेमाणा जेणेव ईसाणे देविंदे देवराया तेणेव उवागच्छंति
 २ करयलपरिगगहियं दसनहं सिरसावत्तं मत्थए अंजलिं कट्ठु जएणं विजएणं वज्झवेंति
 २ एवं वदासी-एवं खलु देवाणुप्पिया ! बलिचंचारायहाणिवत्थव्वया बहवे असुर-
 कुमारा देवा य देवीओ य देवाणुप्पिए कालगए जाणित्ता ईसाणे कप्पे ईदत्ताए
 उववन्ने पासित्ता आसुरत्ता जाव एगंते एडेंति २ जामेव दिसिं पाउब्भूया तामेव
 दिसिं पडिगया । तए णं से ईसाणे देविंदे देवराया तेसिं ईसाणकप्पवासीणं बहूणं
 वेमाणियाणं देवाणं य देवीणं य अंतिए एयमट्ठं सोच्चा निसम्म आसुरत्तो जाव
 मिसिमिसेमाणे तत्थेव सयणिज्जवरगए तिवल्लियं भिउडिं निडाले साहट्ठं बलिचंचा-

रायहाणिं अहे सपक्खिं सपडिदिसिं समभिलोएइ, तए णं सा बलिचंचारायहाणीं
 ईसाणेणं देविंदेणं देवरत्ता अहे सपक्खिं सपडिदिसिं समभिलोइया समाणीं तेणं
 दिव्वप्पभावेणं इंगालब्भूया मुम्मुरभूया छारियब्भूया तत्तकवेल्लकब्भूया तत्ता सम-
 जोइभूया जाया यावि होत्था, तए णं ते बलिचंचारायहाणिवत्थव्वया बहवे असुर-
 कुमारा देवा य देवीओ य तं बलिचंचं रायहाणिं इंगालब्भूयं जाव समजोतिब्भूयं
 प्रासंति २ भीया तत्था तसिया उव्विग्गा संजायमया सव्वओ समंता आधावेति परि-
 धावेति २ अन्नमन्नस्स कायं समतुरंगेमाणा २ चिट्ठंति, तए णं ते बलिचंचारायहाणि-
 वत्थव्वया बहवे असुरकुमारा देवा य देवीओ य ईसाणं देविंदं देवरायं परिकुवियं
 जाणित्ता ईसाणस्स देविंदस्स देवरत्तो तं दिव्वं देविद्धिं दिव्वं देवज्जुइं दिव्वं देवा-
 णुभागं दिव्वं तेयलेस्सं असहमाणा सव्वे सपक्खिं सपडिदिसिं ठिच्चा करयलपरि-
 गगहिंयं दंसनहं सिरसावत्तं मत्थए अंजलिं कट्ठु जएणं विजएणं वड्ढाविति २ एवं
 वयासी-अहो णं देवाणुप्पिण्हिं दिव्वा देविद्धी जाव अभिसमन्नागता तं दिव्वा णं
 देवाणुप्पियाणं दिव्वा देविद्धी जाव लद्धा पत्ता अभिसमन्नागया तं खामेसि णं देवा-
 णुप्पिया ! खमंतु णं देवाणुप्पिया ! [खमंतु] मरिहंतु णं देवाणुप्पिया ! णाइं भुज्जो
 २ एवंकरणयाएत्तिकट्ठु एयमट्ठं सम्मं विणएणं भुज्जो २ खामेति, तते णं से ईसाणे
 देविंदे देवराया तोहिं बलिचंचारायहाणिवत्थव्वेहिं बह्वहिं असुरकुमारेहिं देवेहिं
 देवीहि य एयमट्ठं सम्मं विणएणं भुज्जो २ खामिए समाणे तं दिव्वं देविद्धिं जाव
 तेयलेस्सं पडिसाहरइ, तप्पमिति च णं गोयमा !, ते बलिचंचारायहाणिवत्थव्वया
 बहवे असुरकुमारा देवा य देवीओ य ईसाणं देविंदं देवरायं आर्दति जाव पज्जुवा-
 संति, ईसाणस्स देविंदस्स देवरत्तो आणाउववायवयणनिंदेसे चिट्ठंति, एवं खलु
 गोयमा ! ईसाणेणं देविंदेणं देवरत्ता सा दिव्वा देविद्धी जाव अभिसमन्नागया ।
 ईसाणस्स णं भंते ! देविंदस्स देवरत्तो केवतियं कालं ठिती पण्णत्ता ?, गोयमा !
 सातिरेगाइं दो सागरोवमाइं ठिती पत्ता ईसाणे णं भंते ! देविंदे देवराया
 ताओ देवलोगाओ आउक्खएणं जाव कहिं गच्छिहिति ? कहिं उव्वज्जि-
 हिति ?, गो० ! महाविदेहे वासे सिज्जिहिति जाव अंतं काहेति ॥ १३६ ॥
 सक्कस्स णं भंते ! देविंदस्स देवरत्तो विमाणेहिंतो ईसाणस्स देविंदस्स देवरत्तो
 विमाणा ईसिं उच्चयरा चेव ईसिं उच्चयतरा चेव ईसाणस्स वा देविंदस्स देवरत्तो
 विमाणेहिंतो सक्कस्स देविंदस्स देवरत्तो विमाणा णीययरा चेव ईसिं निच्चयरा चेव ?,
 हंता ! गोयमा ! सक्कस्स तं चेव सव्वं नेयव्वं । से केणट्ठेणं ?, गोयमा ! से जहा-
 नामए-करयले सिया देसे उच्चे देसे उच्चए देसे णीए देसे निच्चे, से तेणट्ठेणं

गोयमा ! सक्कस्स देविंदस्स देवरत्तो जाव ईसिं निण्णतरा चेव ॥ १३७ ॥ पभू णं
 भंते ! सक्के देविंदे देवराया ईसाणस्स देविंदस्स देवरत्तो अंतियं पाउब्भवित्तए ?,
 हंता पभू, से णं भंते ! किं आढायमाणे पभू अणाढायमाणे पभू ?, गोयमा !
 आढायमाणे पभू नो अणाढायमाणे पभू, पभू णं भंते ! ईसाणे देविंदे देवराया
 सक्कस्स देविंदस्स देवरत्तो अंतियं पाउब्भवित्तए ?, हंता पभू, से भंते ! किं
 आढायमाणे पभू अणाढायमाणे पभू ?, गोयमा ! आढायमाणेवि पभू अणाढाय-
 माणेवि पभू । पभू णं भंते ! सक्के देविंदे देवराया ईसाणं देविंदं देवरायं सपक्खि
 सपडिदिंसि समभिलोएत्तए जहा पादुब्भवणा तथा दोवि आलावगा नेयव्वा । पभू
 णं भंते ! सक्के देविंदे देवराया ईसाणेणं देविंदेणं देवरत्ता सद्धिं आलावं वा
 संलावं वा करेत्तए ?, हंता ! पभू जहा पादुब्भवणा । अत्थि णं भंते ! तेसिं
 सक्कीसाणाणं देविंदाणं देवराईणं किच्चाईं करणिज्जाईं समुप्पज्जंति ?, हंता ! अत्थि, से
 कहमिदाणिं पकरेंति ?, गोयमा ! ताहे चेव णं से सक्के देविंदे देवराया ईसाणस्स
 देविंदस्स देवरत्तो अंतियं पाउब्भवति, ईसाणे णं देविंदे देवराया सक्कस्स देविंदस्स
 देवरायस्स अंतियं पाउब्भवइ, इति भो ! सक्का देविंदा देवराया दाहिणद्धुलोगाहि-
 वई, इति भो ! ईसाणा देविंदा देवराया उत्तरद्धुलोगाहिवई, इति भो ! इति भो ति
 ते अन्नमन्नस्स किच्चाईं करणिज्जाईं पच्चणुब्भवमाणा विहरंति ॥ १३८ ॥ अत्थि णं
 भंते ! तेसिं सक्कीसाणाणं देविंदाणं देवराईणं विवादा समुप्पज्जंति ?, हंता !
 अत्थि । से कहमिदाणिं पकरेंति ?, गोयमा ! ताहे चेव णं ते सक्कीसाणा देविंदा
 देवरायाणो सणंकुमारं देविंदं देवरायं मणसीकरेंति, तए णं से सणंकुमारे देविंदे
 देवराया तेहिं सक्कीसाणेहिं देविंदेहिं देवराईहिं मणसीकए समाणे खिप्पामेव
 सक्कीसाणाणं देविंदाणं देवराईणं अंतियं पाउब्भवति, जं से वदइ तस्स आणाउ-
 ववायवयणनिद्देसे चिद्धंति ॥ १३९ ॥ सणंकुमारे णं भंते ! देविंदे देवराया किं
 भवसिद्धिए अभवसिद्धिए सम्मदिद्धी मिच्छदिद्धी परित्तसंसारए अणंतसंसारए
 सुलभबोहिए दुलभबोहिए आराहए विराहए चरिमे अचरिमे ?, गोयमा ! सणंकुमारे
 णं देविंदे देवराया भवसिद्धिए नो अभवसिद्धिए, एवं सम्मदिद्धी परित्तसंसारए
 सुलभबोहिए आराहए चरिमे पसत्थं नेयव्वं । से केणट्ठेणं भंते ! ?, गोयमा !
 सणंकुमारे देविंदे देवराया बहूणं समणाणं बहूणं समणीणं बहूणं सावयाणं बहूणं
 सावियाणं हियकामए सुहकामए पत्थकामए आणुकंपिए निस्सेयसिए हियसुहनिस्से-
 सकामए, से तेणट्ठेणं गोयमा ! सणंकुमारे णं भवसिद्धिए जावं नो अचरिमे । सण-
 कुमारस्स णं भंते ! देविंदस्स देवरत्तो केवतियं कालं ठिती पच्चत्ता ?, गोयमा !

सत्त सागरोवमाणि ठिती पन्नत्ता । से णं भंते । ताओ देवलोगाओ आउक्खएणं जाव कहिं उववज्जिहिति ? गोयमा ! महाविदेहे वासे सिज्झिहिति जाव अंतं करेहिति, सेवं भंते । सेवं भंते । २ । गाहाओ-छट्ठममासो अद्धमासो वासाई अद्ध छम्मासा । तीसगकुरुदत्तानं तवभत्तपरिणपेरियाओ ॥ १ ॥ उच्चत्तविमाणणं पाउब्भव पेच्छणा य संलावे । किंचि विवादुप्पत्ती सणकुमारे य भवियव्वं (त्तं) ॥ २ ॥ १४० ॥ **मोया समत्ता । तईयसए पढमो उद्देसो समत्तो ॥**

तेणं कालेणं तेणं समएणं रायगिहे नामं नगरे होत्था जाव परिसा पज्जुवासइ, तेणं कालेणं तेणं समएणं चमरे असुरिंदे असुरराया चमरचंचाए रायहाणीए सभाए सुहम्माए चमरंसि सीहासणंसि चउसट्ठीए सामाणियसाहस्सीहिं जाव नट्ठ-विहिं उवदंसेत्ता जामेव दिसिं पाउब्भूए तामेव दिसिं पडिणए । भंतेति भगवं गोथमे समणं भगवं महावीरं वंदति नमंसति २ एवं वदासी-अत्थि णं भंते ! इमीसे रयणप्पभाए पुढवीए अहे असुरकुमारा देवा परिवसंति ?, गोयमा ! नो इण्ठे समट्ठे, जाव अहेसत्तमाए पुढवीए, सोहम्मस्स कप्पस्स अहे जाव अत्थि णं भंते ! ईसि-पब्भाराए पुढवीए अहे असुरकुमारा देवा परिवसंति ?, णो इण्ठे समट्ठे । से कहिं खाइ णं भंते ! असुरकुमारा देवा परिवसंति ?, गोयमा ! इमीसे रयणप्पभाए पुढवीए असीउत्तरजोयणसयसहस्सबाहल्लाए, एवं असुरकुमारदेववत्तव्वया जाव दिव्वाइं भोगभोगाईं भुंजमाणा विहरंति । अत्थि णं भंते ! असुरकुमाराणं देवाणं अहे गतिविसए ?, हुंता अत्थि, केवतियं च णं पभू ! ते असुरकुमाराणं देवाणं अहे गतिविसए पन्नत्ते ?, गोयमा ! जाव अहेसत्तमाए पुढवीए तच्चं पुण पुढविं गया य गमिस्संति य । किं पत्तियन्नं भंते ! असुरकुमारा देवा तच्चं पुढविं गया य गमिस्संति य ?, गोयमा ! पुव्ववेरियस्स वा वेदणउदीरणयाए पुव्वसंगइयस्स वा वेदणउवसा-मणयाए, एवं खलु असुरकुमारा देवा तच्चं पुढविं गया य गमिस्संति य । अत्थि णं भंते ! असुरकुमाराणं देवाणं तिरियं गतिविसए पन्नत्ते ?, हुंता अत्थि, केवतियं च णं भंते ! असुरकुमाराणं देवाणं तिरियं गइविसए पन्नत्ते ?, गोयमा ! जाव असंखेज्जा चीवसमुद्दा नंदिस्सरवरं पुण चीवं गया य गमिस्संति य । किं पत्तियन्नं भंते ! असुरकुमारा देवा नंदीसरवरचीवं गया य गमिस्संति य ?, गोयमा जे इमे अरिहंता भगवंता एएसि णं जम्मणमहेसु वा निक्खमणमहेसु वा णाणुप्पायमहिमासु वा परि-निव्वाणमहिमासु वा, एवं खलु असुरकुमारा देवा नंदीसरवरचीवं गया य गमिस्संति य । अत्थि णं भंते ! असुरकुमाराणं देवाणं उच्चं गतिविसए ?, हुंता ! अत्थि । केवतियं च णं भंते ! असुरकुमाराणं देवाणं उच्चं गतिविसए ?, गोयमा ! जावऽच्चए

कप्पे सोहम्मं पुण कप्पं गया य गमिस्संति य । किं पत्तियणं भंते ! असुरकुमारा देवा सोहम्मं कप्पं गया य गमिस्संति य ?, गोयमा ! तेसि णं देवाणं भवपच्चइय-
वेराणुबंधे, ते णं देवा विक्खवेमाणा परियारेमाणा वा आयरक्खे देवे वित्तासेंति
अहालहुस्सगाईं रयणाईं गहाय आयाए एणंतमेतं अवक्कमंति । अत्थि णं भंते !
तेसिं देवाणं अहालहुस्सगाईं रयणाईं ?, हंता अत्थि । से कहमियाणि पकरेंति ?,
तओ से पच्छा कायं पव्वहंति । पभू णं भंते ! ते असुरकुमारा देवा तत्थ गया
चेव समाणा ताहिं अच्छराहिं सद्धि दिव्वाइं भोगभोगाईं भुंजमाणा विहरितए ?,
णो तिण्ठे समट्ठे, ते णं तओ पडिनियत्तंति २ ता इहमागच्छंति २ जति णं
ताओ अच्छराओ आढायंति परियाणंति । पभू णं ते असुरकुमारा देवा ताहिं
अच्छराहिं सद्धि दिव्वाइं भोगभोगाईं भुंजमाणा विहरितए अहंताओ अच्छराओ
नो आढायंति नो परियाणंति णो णं पभू ते असुरकुमारा देवा ताहिं अच्छराहिं
सद्धि दिव्वाइं भोगभोगाईं भुंजमाणा विहरितए, एवं खलु गोयमा ! असुरकुमारा
देवा सोहम्मं कप्पं गया य गमिस्संति य ॥ १४१ ॥ केवइकालस्स णं भंते !
असुरकुमारा देवा उट्ठं उप्पयंति जाव सोहम्मं कप्पं गया य गमिस्संति य ?,
गोयमा ! अणंताहिं उस्सप्पिणीहिं अणंताहिं अवसप्पिणीहिं समइक्कंताहिं, अत्थि
णं एस भावे लोयच्छेरयभूए समुप्पज्जइ जन्नं असुरकुमारा देवा उट्ठं उप्पयंति जाव
सोहम्मो कप्पो, किं निस्साए णं भंते ! असुरकुमारा देवा उट्ठं उप्पयंति जाव
सोहम्मो कप्पो ?, गोयमा ! से जहानामए-इह सबरा इ वा बब्बरा इ वा टंकणा इ
वा भुत्तुया इ वा पल्हया इ वा पुलिंदा इ वा एणं महं गड्ढं वा खड्ढं वा दुग्गं
वा दरिं वा विसमं वा पव्वयं वा णीसाए सुमहल्लमवि आसबलं वा हत्थिबलं वा
जोहबलं वा धणुबलं वा आगलेंति, एवामेव असुरकुमारावि देवा, णणत्थ अरिहंते
वा अणगारे वा भावियप्पणो निस्साए उट्ठं उप्पयंति जाव सोहम्मो कप्पो ।
सव्वेवि णं भंते ! असुरकुमारा देवा उट्ठं उप्पयंति जाव सोहम्मो कप्पो ?, गोयमा !
णो इण्ठे समट्ठे, महिद्धिया णं असुरकुमारा देवा उट्ठं उप्पयंति जाव सोहम्मो
कप्पो । एसवि णं भंते ! चमरे असुरिंदे असुरकुमारराया उट्ठं उप्पय्यपुत्वि जाव
सोहम्मो कप्पो ?, हंता गोयमा ! २ । अहो णं भंते ! चमरे असुरिंदे असुरकुमार-
राया महिद्धिए महज्जुईए जाव कहिं पविट्ठा ?, कूडागारसालादिट्ठं तो भाणियव्वो
॥ १४२ ॥ चमरेणं भंते ! असुरिदेणं असुररच्चा सा दिव्वा देविद्धी तं चेव जाव
किञ्चा लद्धा पत्ता अभिसमन्नागया, एवं खलु गोयमा ! तेषां कालेणं तेषां समएणं
इहेव जंबुद्वीवे २ भारहे वासे विज्जगिरिपायमूले बेसेले नामं संनिवेसे होत्था, वज्जओ,

तत्थ णं बेमेले संनिवेसे पूरणे नामं गाहावई परिवसति अङ्गे दित्ते जहा तामलिस्स वत्तव्वया तहा नेयव्वा, नवरं चउप्पुडयं दारुमयं पडिग्गहयं करेत्ता जाव विपुलं असणं पाणं खाइमं साइमं जाव सयमेव चउप्पुडयं दारुमयं पडिग्गहयं गहाय मुंडे भवित्ता दाणामाए पव्वज्जाए पव्वइत्ताए पव्वइएऽवि य णं समाणे तं चेव, जाव आयावणभूमीओ पच्चोरुभइ २ ता सयमेव चउप्पुडयं दारुमयं पडिग्गहियं गहाय बेमेले सन्निवेसे उच्चनीयमज्झिमाइं कुलाइं घरसमुदाणस्स भिक्खारियाए अडेत्ता जं मे पढमे पुडए पडइ कप्पइ मे तं पंथे पहियाणं दलइत्ताए जं मे दोखे पुडए पडइ कप्पइ मे तं कागसुणयाणं दलइत्ताए जं मे तच्चे पुडए पडइ कप्पइ मे तं मच्छकच्छभाणं दलइत्ताए जं मे चउत्थे पुडए पडइ कप्पइ मे तं अप्पणा आहारि-
त्ताएत्तिकट्टु एवं संपेहेइ २ कळं पाउप्पभायाए रयणीए तं चेव निरवसेसं जाव जं मे (से) चउत्थे पुडए पडइ तं अप्पणा आहारं आहारेइ, तए णं से पूरणे बालत-
वस्सी तेणं ओराळेणं विउळेणं पयत्तेणं पग्गहिएणं बालतवोक्कमेणं तं चेव जाव बेमेलेस्स सन्निवेसस्स मज्झंमज्झेणं निग्गच्छति २ पाउयं कुंडियमादीयं उवगरणं चउप्पुडयं च दारुमयं पडिग्गहियं एगंतमंते एडेइ २ बेमेलेस्स सन्निवेसस्स दाहि-
णपुरच्छिमे दिस्सीभागे अद्धनियत्तणियमंडलं आलिहिता संलेहणाइसणाइसिए भत्त-
पाणपडियाइक्खिए पाओवगमणं निवण्णे । तेणं कालेणं तेणं समएणं अहं गोयमा !
छउमत्थकालियाए एकारसवासपरियाए छट्ठंछट्ठेणं अनिक्खित्तेणं तवोक्कमेणं संज-
मेणं तवसा अप्पाणं भावेमाणे पुव्वाणुपुवि चरमाणे गामाणुगामं दइज्जमाणे जेणेव
सुंसमारपुरे नगरे जेणेव असोयवणसंखे उज्जाणे जेणेव असोयवरपायवे जेणेव
पुढविसिलापट्टए तेणेव उवागच्छामि २ असोयवरपायवस्स हेट्ठा पुढविसिलापट्ट-
यंसि अट्ठमभत्तं परिणिहामि, दोवि पाए साहट्टु वगवारियपाणी एगपोग्गलनिविट्ठदिट्ठी
अणिमिसनयणे ईसिंपब्भारगएणं काएणं अहापणिहिएहिं गत्तेहिं सव्विदिएहिं गुत्तेहिं
एगराइयं महापडिंमं उवसंपज्जिता णं विहरामि । तेणं कालेणं तेणं समएणं चमर-
चंचारायहाणी अणिंदा अपुरोहिया यावि होत्था, तए णं से पूरणे बालतवस्सी
बहुपडिपुत्ताइं दुवालसवासाइं परियाणं पाउणित्ता मासियाए संलेहणाए अत्ताणं इस्सेत्ता
सट्ठि भत्ताइं अणसणाए छेदेत्ता कालमासे कालं किच्चा चमरचंचाए रायहाणीए
उववायसभाए जाव इंदत्ताए उववत्ते, तए णं से चमरे असुरिंदे असुरराया अहुणो-
ववत्ते पंचविहाए पज्जतीए पज्जतिभावं गच्छइ, तंजहा-आहारपज्जतीए जाव भासा-
मणपज्जतीए, तए णं से चमरे असुरिंदे असुरराया पंचविहाए पज्जतीए पज्जतिभावं
गए समाणे उट्ठं वीससाए ओहिणा आभोएइ जाव सोहम्मो कप्पो, पासइ य तत्थ

सक्कं देविंदं देवरायं मघवं पाकसासणं सयक्कतुं सहस्सकखं वज्जपाणि पुरंदरं जाव
दस दिसाओ उज्जोवेमाणं पभासेमाणं सोहम्मं कप्पे सोहम्मवडेंसए विमाणे सक्कंसि
सीहासणंसि जाव दिव्वाइं भोगभोगाईं भुंजमाणं पासइ २ इमेयारूवे अज्झत्थिए
चित्थिए पत्थिए मणोगए संकप्पे समुप्पज्जित्था-केस णं एस अपत्थियपत्थए दुरंत-
पंतलक्खणे हिरिसिरिपरिवज्जिए हीणपुन्नचाउइसे जन्नं ममं इमाए एयारूवाए दिव्वाए
देविट्ठीए जाव दिव्वे देवाणुभावे लद्धे पत्ते अभिसमन्नागए उप्पि अप्पुस्सए दिव्वाइं
भोगभोगाईं भुंजमाणे विहरइ, एवं संपेहेइ २ सामाणियपरिसोववन्नए देवे सद्दावेइ
२ एवं वयासी-केस णं एस देवाणुप्पिया अपत्थियपत्थए जाव भुंजमाणे विहरइ १,
तए णं ते सामाणियपरिसोववन्नगा देवा चमरेणं असुरिंदेणं असुररत्ता एवं वुत्ता
समाणा दट्ठुट्ठा जाव हयहियया करयलपरिग्गहिंयं दसनहं सिरसावत्तं मत्थए
अंजलिं कट्ठु जएणं विजएणं वद्धावैति २ एवं वयासी-एस णं देवाणुप्पिया ! सक्के
देविंदे देवराया जाव विहरइ, तए णं से चमरे असुरिंदे असुरराया तेसि सामाणि-
यपरिसोववन्नगाणं देवाणं अंतिए एयमट्ठं सोच्चा निसम्म आसुस्ते रुट्ठे कुविए चंडि-
क्किए मिसिमिसेमाणे ते सामाणियपरिसोववन्नए देवे एवं वयासी-अन्ने खलु भो !
(से)सक्के देविंदे देवराया अन्ने खलु भो ! से चमरे असुरिंदे असुरराया, महिट्ठिए
खलु भो ! से सक्के देविंदे देवराया, अप्पट्ठिए खलु भो ! से चमरे असुरिंदे असुरराया,
तं इच्छामि णं देवाणुप्पिया ! सक्कं देविंदं देवरायं सयमेव अच्चासादेत्तएत्तिकट्ठु उत्तिणे
उत्तिणम्भूए जाए यावि होत्था, तए णं से चमरे असुरिंदे असुरराया ओहिं पंजंइ
२ ममं ओहिणा आभोएइ २ इमेयारूवे अज्झत्थिए जाव समुप्पज्जित्था-एवं खलु
समणे भगवं महावीरे जंबुद्वीवे २ भारहे वासे सुंसमारपुरे नगरे असोगवणसंडे उज्जाणे
असोगवरपायवस्स अहे पुढविसिलापट्ठयंसि अट्टमभत्तं पडिगिण्हित्ता एगराइयं महा-
पडिमं उवसंपज्जित्ता णं विहरति, तं सेयं खलु मे समणं भगवं महावीरं नीसाए सक्कं
देविंदं देवरायं सयमेव अच्चासादेत्तएत्तिकट्ठु एवं संपेहेइ २ सयणिज्जाओ अन्धुट्ठेइ
२ ता देवदूसं परिहेइ २ उववायसभाए पुरच्छिमिल्लेणं दारेणं णिग्गच्छइ, जेणेव
सभा सुहम्मा जेणेव चोप्पाळे पहरणकोसे तेणैव उवागच्छइ २ ता फलिहरयणं
परामुसइ २ एगे अबीए फलिहरयणमायाए महया अमरिसं वहमाणे चमरचंचाए
रायहाणीए मज्झमज्झेणं निग्गच्छइ २ जेणेव तिगिच्छिक्कूडे उप्पायपव्वए तेणामेव
उवागच्छइ २ ता वेउव्वियसमुग्धाएणं समोहणइ २ ता संखेज्जाइं जोयणाइं जाव
उत्तरवेउव्वियरूवं विउव्वइ २ ता ताए उक्किट्ठाए जाव जेणेव पुढविसिलापट्ठए जेणेव
मम अंतिए तेणेव उवागच्छति २ मम तिकखुत्ती आयाहिणं पमाहिणं करेति जाव

नमंसित्ता एवं वयासी-इच्छामि णं भंते ! तुब्भं नीसाए सक्कं देविदं देवरायं सयमेव
 अच्चासादित्तएत्तिकहु उत्तरपुरच्छिमे दिसीभागे अवक्कमइ २ वेउव्वियसमुग्घाएणं
 समोहणइ २ जाव दोच्चं पि वेउव्वियसमुग्घाएणं समोहणइ २ एगं महं घोरं घोरागारं
 भीमं भीमागारं भासुरं भयाणीयं गंभीरं उत्तासणयं कालद्धुरत्तमासरासिंसकासं जोय-
 णसयसाहस्सीयं महाबोदिं विउव्वइ २ अप्फोडेइ २ वग्गइ २ गज्जइ २ हयहेसियं
 करेइ २ हत्थिगुलगुलाइयं करेइ २ रहघणघणाइयं करेइ २ पायदहरां करेइ २
 भूमिचवेडयं दलयइ २ सीहणादं नदइ २ उच्छोलेइ २ पच्छोलेइ २ तिपइं छिंदइ
 २ वामं भुयं उस्सवेइ २ दाहिणहत्थपदेसिणीए य अंगुट्ठणहेण य वित्तिरिच्छमुहं
 विडंबेइ २ महया २ सहेणं कलकलरवं करेइ, एगे अबीए फलिहरयणमायाए
 उद्धं वेहासं उप्पइए, खोभंते चेव अहेलोयं कंपेमाणे च मेयणितलं आकट्टं (साकट्टं)
 तेव तिरियलोयं फोडेमाणेव अंबरतलं कत्थइ गज्जंतो कत्थइ विज्जुयायंतो कत्थइ वासं
 वासमाणे कत्थइ रउग्घायं पकरेमाणे कत्थइ तमुक्कायं पकरेमाणे वाणमंतरदेवे वित्ता-
 सेमाणे जोइसिए देवे दुहा विभयमाणे २ आयरक्खे देवे विपलायमाणे २ फलिहर-
 यणं अंबरतलंसि वियट्ठमाणे २ विउज्झाएमाणे २ ताए उक्किट्ठाए जाव तिरियमसं-
 खेज्जाणं दीवसमुद्दाणं मज्झंमज्झेणं वीइवयमाणे २ जेणेव सोहम्मे कप्पे जेणेव
 सोहम्मवडेंसए विमाणे जेणेव सभा सुधम्मा तेणेव उवागच्छइ २ एगं पायं पउस-
 वरवेइयाए करेइ एगं पायं सभाए सुहम्माए करेइ फलिहरयणेणं महया २ सहेणं
 तिक्खुत्तो इंदकीलं आउडेइ २ एवं वयासी-कहि णं भो ! सक्के देविदे देवराया ?
 कहि णं ताओ चउरासीइ सामाणियसाहस्सीओ ? जाव कहि णं ताओ चत्तारि चउ-
 रासीओ आयरक्खदेवसाहस्सीओ ? कहि णं ताओ अणेगाओ अच्छराकोडीओ ?
 अज्ज हणामि अज्ज महेमि अज्ज वहेमि अज्ज ममं अवसाओ अच्छराओ वसमुवण-
 मंतुत्तिकहु तं अणिट्ठं अकंतं अप्पियं असुभं अमणुणं अमणामं फरुसं गिरं निसिरइ,
 तए णं से सक्के देविदे देवराया तं अणिट्ठं जाव अमणामं अस्सुयपुव्वं फरुसं गिरं
 सोच्चा निसम्म आसुत्ते जाव मिसिमिसेमाणे तिबलियं भिउडिं निडाले साहहु चमरं
 असुरिदं असुररायं एवं वदासी-हं भो चमरा ! असुरिदा ! असुरराया ! अपत्थिय-
 पत्थया ! जाव हीणपुन्नचाउइसा ! अज्जं न भवसि नाहि ते सुहमत्थीतिकहु तत्थेव
 सीहासणवरगए वज्जं परामुसइ २ तं जलंतं फुडंतं तडतडंतं उक्कासहस्साइं विणि-
 म्मुयमाणं जालासहस्साइं पमुंचमाणं इंगालसहस्साइं पविक्खिरमाणं २ फुलिग-
 जालामालासहस्सेहिं चक्खुविकखेवदिट्ठिपडिघायं पकरेमाणं हुयवहअइरेगतेयदिपंतं
 जइणवेगं फुल्लकिंसुयसमाणं महब्भयं भयंकरं चमरस्स असुरिदस्स असुररओ वहाए

वज्रं निसिरइ । तते णं से चमरे असुरिंदे असुरराया तं जलंतं जाव भयंकरं वज्र-
मभिसुहं आवयमाणं पासइ पासइत्ता झियाति पिहाइ झियाइत्ता पिहाइत्ता तहेव
संभगमउडविडए सालंबहत्थाभरणे उडुंपाए अहोसिरे कक्खागयसेयंपि व विणि-
म्मुयमाणे २ ताए उक्किट्ठाए जाव तिरियमसंखेज्जाणं दीवसमुद्धानं मज्झमज्झेणं
वीईवयमाणे २ जेणेव जंबुद्वीवे २ जाव जेणेव असोगवरपायवे जेणेव मम अंतिए
तेणेव उवागच्छइ २ ता भीए भयगगरसररे भगवं सरणमिति बुयमाणे ममं दोण्हवि
पायाणं अंतरंसि झत्तिवेगेण समोवडिए ॥ १४३ ॥ ताए णं तस्स सक्कस्स देविंदस्स देव-
रत्तो इमेयारूवे अज्झत्थिए जाव समुप्पज्जित्था-नो खलु पभू चमरे असुरिंदे
असुरराया नो खलु समत्थे चमरे असुरिंदे असुरराया नो खलु विसए चमरस्स
असुरिंदस्स असुररत्तो अप्पणो निस्साए उडुं उप्पइत्ता जाव सोहम्मो कप्पो णणत्थ
अरिहंते वा अणगारे वा भावियप्पणो णीसाए उडुं उप्पयति जाव सोहम्मो कप्पो,
तं महाडुक्खं खलु तहारूवाणं अरहंताणं भगवंताणं अणगाराणं य अच्चासायणाए-
त्तिकहु ओहिं पउंजति २ ममं ओहिणा आभोएति २ हा हा अहो हतोऽहमंसित्तिकहु
ताए उक्किट्ठाए जाव दिव्वाए देवगतीए वज्रस्स वीहिं अणुगच्छमाणे २ तिरियम-
संखेज्जाणं दीवसमुद्धानं मज्झमज्झेणं जाव जेणेव असोगवरपायवे जेणेव ममं अंतिए
तेणेव उवागच्छइ २ ममं चउरंगुलमसंपत्तं वज्रं पडिसाहरइ ॥ १४४ ॥ अविद्याइं
मे गोयमा ! मुट्ठिवाएणं केसग्गे वीइत्था, ताए णं से सक्के देविंदे देवराया वज्रं
पडिसाहरित्ता ममं तिव्खुत्तो आयाहिणं पयाहिणं करेइ २ वंदइ नमंसइ २ एवं
बयासी-एवं खलु भंते ! अहं तुब्भं नीसाए चमरेणं असुरिंदेणं असुररत्ता सयमेव
अच्चासाइए, ताए णं मए परिउविणं समाणेणं चमरस्स असुरिंदस्स असुररत्तो
वहाए वजे निसिट्ठे, ताए णं मे इमेयारूवे अज्झत्थिए जाव समुप्पज्जित्था-नो खलु
पभू चमरे असुरिंदे असुरराया तहेव जाव ओहिं पउंजामि देवाणुप्पिए ओहिणा
आभोएमि हा हा अहो हतोमीत्तिकहु ताए उक्किट्ठाए जाव जेणेव देवाणुप्पिए तेणेव
उवागच्छामि देवाणुप्पियाणं चउरंगुलमसंपत्तं वज्रं पडिसाहरामि वज्रपडिसाहर-
णट्ठयाए णं इहमागए इह समोसढे इह संपत्ते इहेव अज उवसंपज्जित्ता णं विहरामि,
तं खामेसि णं देवाणुप्पिया ! खमंतु णं देवाणुप्पिया ! [खमंतु] मरहंतु णं देवाणु-
प्पिया ! णाइसुज्जो एवं पकरणयाएत्तिकहु ममं वंदइ नमंसइ २ उत्तरपुरच्छिमं दिसी-
भागं अवक्कमइ २ वामेणं पादेणं तिव्खुत्तो भूमिं दलेइ २ चमरं असुरिंदं असुररायं
एवं वदासी-मुक्कोऽसि णं भो चमरा ! असुरिंदा ! असुरराया ! समणस्स भगवओ
महावीरस्स पमावेणं नाहि ते दाणिं ममाओ मयमत्थीत्तिकहु जमिंवे दिसिं पाउ-

बभूए तामेव दिसिं पडिगए ॥ १४५ ॥ भंतेति भगवं गोयमे समणं भगवं महावीरं
 वंदति २ एवं वदासी-देवे णं भंते ! महिद्धिए महज्जुतीए जाव महाणुभागे पुव्वा-
 मेव पोग्गलं खिवित्ता पभू तमेव अणुपरियट्ठित्ता णं गेण्हित्तए ?, हंता पभू ॥ से
 केणट्ठेणं भंते ! जाव गेण्हित्तए ?, गोयमा ! पोग्गले निक्खित्ते समाणे पुव्वामेव
 सिग्घगती भवित्ता ततो पच्छा मंदगती भवति, देवे णं महिद्धिए पुव्विपिय पच्छावि
 सीहे सीहगती चेव तुरिए तुरियगती चेव, से तेणट्ठेणं जाव पभू गेण्हित्तए । जति
 णं भंते ! देवे महिद्धिए जाव अणुपरियट्ठित्ता णं गेण्हित्तए कम्हा णं भंते ! सक्के-
 णं देविंदेणं देवरत्ता (राया) चमरे असुरिंदे असुरराया नो संचाएति साहत्थि
 गेण्हित्तए ?, गोयमा ! असुरकुमाराणं देवाणं अहे गतिविसए सीहे २ चेव तुरिए
 २ चेव उड्डं गतिविसए अप्पे २ चेव मंदे मंदे चेव वेमाणियाणं देवाणं उड्डं गति-
 विसए सीहे २ चेव तुरिए २ चेव अहे गतिविसए अप्पे २ चेव मंदे २ चेव,
 जावतिथं खेतं सक्के देविंदे देवराया उड्डं उप्पयति एक्केणं समएणं तं वज्जे दोहिं, जं
 वज्जे दोहिं तं चमरे तिहिं, सव्वत्थोवे सक्कस्स देविंदस्स देवरत्तो उड्डलोकंडए
 अहेलोकंडए संखेज्जगुणे, जावतिथं खेतं चमरे असुरिंदे असुरराया अहे ओवयति
 एक्केणं समएणं तं सक्के दोहिं जं सक्के दोहिं तं वज्जे तिहिं, सव्वत्थोवे चमरस्स
 असुरिंदस्स असुररत्तो अहेलोकंडए उड्डलोकंडए संखेज्जगुणे । एवं खलु गोयमा !
 सक्केणं देविंदेणं देवरत्ता चमरे असुरिंदे असुरराया नो संचाएति साहत्थि गेण्हि-
 त्तए ॥ सक्कस्स णं भंते ! देविंदस्स देवरत्तो उड्डं अहे तिरियं च गतिविसयस्स
 कयरे २ हित्तो अप्पे वा बहुए वा तुल्ले वा विसेसाहिं वा ?, गोयमा ! सव्वत्थोवं
 खेतं सक्के देविंदे देवराया अहे ओवयइ एक्केणं समएणं तिरियं संखेजे भागे गच्छइ
 उड्डं संखेजे भागे गच्छइ । चमरस्स णं भंते ! असुरिंदस्स असुररत्तो उड्डं अहे
 तिरियं च गतिविसयस्स कयरे २ हित्तो अप्पे वा बहुए वा तुल्ले वा विसेसाहिं
 वा ?, गोयमा ! सव्वत्थोवं खेतं चमरे असुरिंदे असुरराया उड्डं उप्पयति एक्केणं
 समएणं तिरियं संखेजे भागे गच्छइ अहे संखेजे भागे गच्छइ, वज्जं जहा सक्कस्स
 देविंदस्स तहेव नवरं विसेसाहिं कायव्वं ॥ सक्कस्स णं भंते ! देविंदस्स देवरत्तो
 ओवयणकालस्स य उप्पयणकालस्स य कयरे २ हित्तो अप्पे वा बहुए वा तुल्ले वा
 विसेसाहिं वा ?, गोयमा ! सव्वत्थोवे सक्कस्स देविंदस्स देवरत्तो उड्डं उप्पयणकाले
 ओवयणकाले संखेज्जगुणे ॥ चमरस्सवि जहा सक्कस्स णवरं सव्वत्थोवे ओवयणकाले
 उप्पयणकाले संखेज्जगुणे ॥ वज्जस्स पुच्छा, गोयमा ! सव्वत्थोवे उप्पयणकाले
 ओवयणकाले विसेसाहिं ॥ एयस्स णं भंते ! वज्जस्स वज्जाहिवइस्स चमरस्स य

असुरिदस्स असुररत्तो ओवयणकालस्स य उप्पयणकालस्स य कयरे २ हितो अप्पे वा ४?, गोयमा ! सक्कस्स य उप्पयणकाले चमरस्स य ओवयणकाले एए णं दोच्चिवि तुल्ला सव्वत्थोवा, सक्कस्स य ओवयणकाले वज्जस्स य उप्पयणकाले एस णं दोण्हवि तुल्ले संखेज्जगुणे चमरस्स य उप्पयणकाले वज्जस्स य ओवयणकाले एस णं दोण्हवि तुल्ले विसेसाहिए ॥ १४६ ॥ तए णं से चमरे असुरिदे असुरराया वज्जभय-विप्पमुक्के सक्केणं देविदेणं देवरत्ता महया अवमाणेणं अवमाणिए समाणे चमरचंचाए रायहाणीए सभाए सुहम्माए चमरंसि सीहासणंसि ओहयमणसंकप्पे चिंतासोयसागर-संपविट्ठे करयलपल्लत्थमुहे अट्टज्झाणोवगए भूमिगयदिट्ठीए झियाति, तते णं तं चमरं असुरिदं असुररायं सामाणियपरिसोववज्जया देवा ओहयमणसंकप्पं जाव झियायमाणं पासंति २ करयल जाव एवं वयासी-किणं देवाणुप्पिया ! ओहयमण-संकप्पा जाव झियायह ?, तए णं से चमरे असुरिदे असुर० ते सामाणियपरिसोव-वज्जए देवे एवं वयासी-एवं खलु देवाणुप्पिया ! मए समणं भगवं महावीरं नीसाए सक्के देविदे देवराया सयमेव अच्चासादिए, तए णं तेणं परिकुविएणं समाणेणं ममं वहाए वज्जे निसिट्ठे तं भण्णं भवतु देवाणुप्पिया ! समणस्स भगवओ महावीरस्स जस्स मम्मिमुपभावेण अक्किट्ठे अव्वहिए अपरिताविए इहमागए इह समोसढे इह संपत्ते इहेव अज्जं उवसंपज्जिता णं विहरामि, तं गच्छामो णं देवाणुप्पिया ! समणं भगवं महावीरं वंदामो णमंसामो जाव पज्जुवासामोत्तिकड्डु चउसट्ठीए सामाणिय-साहस्सीहिं जाव सव्विह्वीए जाव जेणेव असोगवरपायवे जेणेव मम अंतिए तेणेव उवागच्छइ २ ममं तिव्वुत्तो आयाहिणं पयाहिणं जाव नमंसित्ता एवं वदासी-एवं खलु भंते ! मए तुब्भं नीसाए सक्के देविदे देवराया सयमेव अच्चासादिए जाव तं भदं णं भवतु देवाणुप्पियाणं मम्मि जस्स अणुपभावेणं अक्किट्ठे जाव विहरामि तं खामेमि णं देवाणुप्पिया ! जाव उत्तरपुरच्छिभं दिसीभागं अवक्कमइ २ ता जाव बत्तीसहवदं नट्टविहिं उवदंसेइ २ जामेव दिसिं पाउब्भूए तामेव दिसिं पड्डिगए, एवं खलु गोयमा ! चमरेणं असुरिदेणं असुररत्ता सा दिव्वा देविह्वी लद्धा पत्ता जाव अभिसमन्नागया, ठित्ती सागरोवमं, महाविदेहे वासे सिज्झहिंति जाव अंतं काहिति ॥ १४७ ॥ किं पत्तिए णं भंते ! असुरकुमारा देवा उट्ठं उप्परयंति जाव सोहम्मो कप्पो ?, गोयमा ! तेषि णं देवाणं अहुणोववज्जगाण वा चरिमभवत्थाण वा इमेयारूवे अज्झत्थिए जाव समुप्पज्जइ-अहो णं अम्हेहिं दिव्वा देविह्वी लद्धा पत्ता जाव अभिसमन्नागया जारिसिया णं अम्हेहिं दिव्वा देविह्वी जाव अभिसमन्नागया तारि-सिया णं सक्केणं देविदेणं देवरत्ता दिव्वा देविह्वी जाव अभिसमन्नागया जारिसिया

णं सक्केणं देविदेणं देवरत्ता जाव अभिसमन्नागया तारिसिया णं अम्हेहिवि जाव अभिसमन्नागया तं गच्छामो णं सकस्स देविंदस्स देवरत्तो अंतियं पाउब्भवामो पासामो ताव सकस्स देविंदस्स देवरत्तो दिव्वं देविद्धिं जाव अभिसमन्नागयं पासतु ताव अम्हवि सक्के देविंदे देवराया दिव्वं देविद्धिं जाव अभिसमन्नागयं, तं जाणामो ताव सकस्स देविंदस्स देवरत्तो दिव्वं देविद्धिं जाव अभिसमन्नागयं जाणउ ताव अम्हवि सक्के देविंदे देवराया दिव्वं देविद्धिं जाव अभिसमन्नागयं, एवं खलु गोयमा ! असुरकुमारा देवा उद्धुं उप्पयंति जाव सोहम्मो कप्पो । सेवं भंते ! सेवं भंते ! ति ॥ १४८ ॥ चमरो समत्तो ॥ तइयसए वीओ उडेसओ समत्तो ॥

तेणं कालेणं तेणं समएणं रायगिहे नामं नगरे होत्था जाव परिसा पडिगया । तेणं कालेणं तेणं समएणं जाव अंतेवासी मंडियपुत्ते णामं अणगारे पगतिभइए जाव पज्जुवासमाणे एवं वदासी-कति णं भंते ! किरियाओ पण्णत्ताओ ?, मंडिय-पुत्ता ! पंच किरियाओ पण्णत्ताओ, तंजहा-काइयाअ हिगरणिया पाओसिया पारिया-वणिया पाणाइवायकिरिया । काइया णं भंते ! किरिया कतिविहा पण्णत्ता ?, मंडिय-पुत्ता ! दुविहा पण्णत्ता, तंजहा-अणुवरयकायकिरिया य दुप्पउत्तकायकिरिया य । अहिगरणिया णं भंते ! किरिया कतिविहा पण्णत्ता ?, मंडियपुत्ता ! दुविहा पण्णत्ता, तंजहा-संजोयणाहिगरणकिरिया य निव्वत्तणाहिगरणकिरिया य । पाओसिया णं भंते ! किरिया कतिविहा पण्णत्ता ?, मंडियपुत्ता ! दुविहा पण्णत्ता, तंजहा-जीवपा-ओसिया य अजीवपाओसिया य । पारियावणिया णं भंते ! किरिया कइविहा प० ?, मंडियपुत्ता ! दुविहा प०, तंजहा-सहत्थपारियावणिया य । परहत्थपारियावणिया य । पाणाइवायकिरिया णं भंते ! पुच्छा, पाणाइवायकिरिया कइविहा प० ?, मंडिय-पुत्ता ! दुविहा पण्णत्ता, तंजहा-सहत्थपा० परहत्थपा० किरिया य ॥ १४९ ॥ पुव्वि भंते ! किरिया पच्छा वेदणा पुव्वि वेदणा पच्छा किरिया ?, मंडियपुत्ता ! पुव्वि किरिया पच्छा वेदणा, णो पुव्वि वेदणा पच्छा किरिया ॥ १५० ॥ अत्थि णं भंते ! समणार्णं निगंथाणं किरिया कज्जइ, हंता ! अत्थि । कहं णं भंते ! समणार्णं निगंथाणं किरिया कज्जइ ?, मंडियपुत्ता ! पमायपच्चया जोगनिमित्तं च, एवं खलु समणार्णं निगंथाणं किरिया कज्जति ॥ १५१ ॥ जीवे णं भंते ! सया समियं एयति वेयति चलति फंदइ घट्टइ खुब्भइ उदीरइ तं तं भावं परिणमति ?, हन्ता ! मंडियपुत्ता ! जीवे णं सया समियं एयति जाव तं तं भावं परिणमइ । जावं च णं भंते ! से जीवे सया समितं जाव परिणमइ तावं च णं तस्स जीवस्स अंते अंतकिरिया भवति ?, णो तिण्ठे समट्ठे, से केणट्ठेणं भंते ! एवं बुच्चइ-जावं च णं

से जीवे सया समितं जाव अंते अंतकिरिया न भवति ?, मंडियपुत्ता ! जावं च णं से जीवे सया समितं जाव परिणमति तावं च णं से जीवे आरंभइ सारंभइ समारंभइ आरंभे वट्टइ सारंभे वट्टइ समारंभे वट्टइ आरंभमाणे सारंभमाणे समारंभमाणे आरंभे वट्टमाणे सारंभे वट्टमाणे समारंभे वट्टमाणे बहूणं पाणाणं भूयाणं जीवाणं सत्ताणं दुक्खावणयाए सोयावणयाए जूरावणयाए तिप्पावणयाए पिट्ठावणयाए परियावणयाए वट्टइ, से तेणट्ठेणं मंडियपुत्ता ! एवं लुब्ध-जावं च णं से जीवे सया समियं एयति जाव परिणमति तावं च णं तस्स जीवस्स अंते अंतकिरिया न भवइ ॥ जीवे णं भंते ! सया समियं णो एयइ जाव नो तं तं भावं परिणमइ ?, हंता मंडियपुत्ता ! जीवे णं सया समियं जाव नो परिणमति । जावं च णं भंते ! से जीवे नो एयति जाव नो तं तं भावं परिणमति तावं च णं तस्स जीवस्स अंते अंतकिरिया भवइ ? हंता ! जाव भवति । से केणट्ठेणं भंते ! जाव भवति ?, मंडियपुत्ता ! जावं च णं से जीवे सया समियं णो एयति जावं णो परिणमइ तावं च णं से जीवे नो आरंभइ नो सारंभइ नो समारंभइ नो आरंभे वट्टइ णो सारंभे वट्टइ णो समारंभे वट्टइ अणारंभमाणे असारंभमाणे असमारंभमाणे आरंभे अवट्टमाणे सारंभे अवट्टमाणे समारंभे अवट्टमाणे बहूणं पाणाणं ४ अदुक्खावणयाए जाव अपरियावणयाए वट्टइ । से जहानामए केइ पुरिसे सुक्कं तणहत्थयं जायतेयंसि पक्खिवेज्जा, से नूणं मंडियपुत्ता ! से सुक्के तणहत्थए जायतेयंसि पक्खित्ते समाणे खिप्पामेव मसमसाविज्जइ ? हंता ! मसमसाविज्जइ, से जहानामए-केइ पुरिसे तत्तंसि अयकवल्लंसि उदयविंदू पक्खिवेज्जा, से नूणं मंडियपुत्ता ! से उदयविंदू तत्तंसि अयकवल्लंसि पक्खित्ते समाणे खिप्पामेव विद्धंसमागच्छइ ?, हंता ! विद्धंसमागच्छइ, से जहानामए हरए सिया पुण्णे पुण्णप्पमाणे वोलट्टमाणे वोसट्टमाणे समभरघडत्ताए चिट्ठति ?, हंता ! चिट्ठति, अहे णं केइ पुरिसे तंसि हरयंसि एणं महं णावं सतासवं सयच्छिइ ओगाहेज्जा से नूणं मंडियपुत्ता ! सा नावा तेहिं आसवदारेहिं आपूरेमाणी २ पुण्णा पुण्णप्पमाणा वोलट्टमाणा वोसट्टमाणा समभरघडत्ताए चिट्ठति ? हंता ! चिट्ठति, अहे णं केइ पुरिसे तीसे नावाए सव्वतो समंता आसवदाराइं पिहेइ २ नावाउत्तिसिचणएणं उदयं उत्तिसिचिज्जा से नूणं मंडियपुत्ता ! सा नावा तंसि उदयंसि उत्तिसिचिज्जंसि समाणंसि खिप्पामेव उद्धं उदाइ ?, हंता ! उदाइज्जा, एवामेव मंडियपुत्ता ! अत्तत्तासंबुडस्स अणगारस्स इरियासमियस्स जाव सुत्तवंभयारिस्स आउत्तं गच्छमाणस्स चिट्ठमाणस्स निसीयमाणस्स तुयट्टमाणस्स आउत्तं वत्थपडिग्गहकंबलपायपुंछणं गेण्हमाणस्स णिक्खिवमाणस्स जाव चक्खुपम्हनिवाय-

मवि वेमाया सुहुमा इरियावहिया किरिया कज्जइ, सा पढमसमयवद्धपुट्ठा बितियस-
मयवेइया तइयसमयनिज्जरिया सा बद्धा पुट्ठा उचीरिया वेदिया निज्जिण्णा सेय-
काळे अकम्मं वावि भवति, से तेणट्ठेणं मंडियपुत्ता ! एवं वुच्चति-जावं च णं से जीवे
सया समियं नो एयति जाव अंतो अंतकिरिया भवति ॥ १५२ ॥ पमत्तसंजयस्स णं
भंते ! पमत्तसंजमे वट्ठमाणस्स सव्वावि य णं पमत्तद्धा कालओ केवच्चिरं होइ ?,
मंडियपुत्ता ! एगजीवं पडुच्च जहन्नेणं एक्कं समयं उक्कोसेणं देसूणा पुव्वकोडी, णाणा-
जीवे पडुच्च सव्वद्धा ॥ अप्पमत्तसंजयस्स णं भंते ! अप्पमत्तसंजमे वट्ठमाणस्स
सव्वावि य णं अप्पमत्तद्धा कालओ केवच्चिरं होइ ?, मंडियपुत्ता ! एगजीवं पडुच्च
जहन्नेणं अंतोमुहुत्तं उक्को० पुव्वकोडी देसूणा, णाणाजीवे पडुच्च सव्वद्धं, सेवं भंते !
२ ति भयवं मंडियपुत्ते अणगारे समणं भगवं महावीरं वंदइ नमंसइ २ संजमेणं
तवसा अप्पाणं भावेमाणे विहरइ ॥ १५३ ॥ भंते ! ति भगवं गोयमे समणं भगवं
महावीरं वंदइ नमंसइ २ ता एवं वयासी-कम्हा णं भंते ! लवणसमुद्धे चाउद्दसद्ध-
मुद्धिपुत्तमासिणीसु अतिरेयं वड्ढति वा हायति वा ?, जहा जीवाभिगमे लवणसमु-
द्धवत्तवया नेयव्वा जाव लोयट्ठित्ती, जणं लवणसमुद्धे जंबुदीवं २ णो उप्पिलेति णो
चेव णं एगोदणं करेइ (लोयट्ठिई) लोयाणुभावे । सेवं भंते ! २ ति जाव विहरति ॥
किरिया समत्ता ॥ १५४ ॥ तइयस्स सयस्स तइयो उदेसो समत्तो ॥

अणगारे णं भंते ! भावियप्पा देवं वेउव्वियसमुग्घाएणं समोहयं जाणरूवेणं जाय-
माणं जाणइ पासइ ? गोयमा ! अत्थेगइए देवं पासइ णो जाणं पासइ १ अत्थेगइए
जाणं पासइ नो देवं पासइ २ अत्थेगइए देवंपि पासइ जाणपि पासइ ३ अत्थेगइए
नो देवं पासइ नो जाणं पासइ ४ ॥ अणगारे णं भंते ! भावियप्पा देविं वेउव्वियस-
मुग्घाएणं समोहयं जाणरूवेणं जायमाणं जाणइ पासइ ?, गोयमा ! एवं चेव ॥ अण-
गारे णं भंते ! भावियप्पा देवं सदेवीयं वेउव्वियसमुग्घाएणं समोहयं जाणरूवेणं
जायमाणं जाणइ पासइ ?, गोयमा ! अत्थेगइए देवं सदेवीयं पासइ नो जाणं पासइ,
एएणं अभिलावेणं चत्तारि भंगा ॥ अणगारे णं भंते ! भावियप्पा खक्खस्स किं
अंतो पासइ बाहिं पासइ ? चउभंगो । एवं किं मूलं पासइ कंदं पा० ?, चउभंगो, मूलं
पा० खंवं पा० ? चउभंगो, एवं मूलेणं बीजं संजोएयव्वं, एवं कंदेणवि समं संजोएयव्वं
जाव बीयं, एवं जाव पुप्फेण समं बीयं संजोएयव्वं ॥ अणगारे णं भंते ! भावियप्पा
खक्खस्स किं फलं पा० बीयं पा० ?, चउभंगो ॥ १५५ ॥ यभू णं भंते ! वाउकाए एणं महं
इत्थिरूवं वा पुरिसरूवं वा हत्थिरूवं वा जाणरूवं वा एवं जुगगिगिल्लिथिल्लिसीयसंदमा-
णियरूवं वा विउव्वित्तए ?, गोयमा ! णो तिणट्ठे समट्ठे, वाउकाएणं विकुव्वमाणे एणं

महं पडागासंठियं ह्वं विकुव्वइ । पभू णं भंते ! वाउकाए एगं महं पडागासंठियं
 ह्वं विउव्वित्ता अणेगाइं जोयणाइं गमित्तए ?, हंता ! पभू । से भंते ! किं आयद्धीए
 गच्छइ परिद्धीए गच्छइ ?, गोयमा ! आयद्धीए ग० णो परिद्धीए ग० जहा आयद्धीए
 एवं चेव आयकम्मुणावि आयप्पओगेणवि भाणियव्वं । से भंते ! किं ऊसिओदगं
 गच्छइ पयोदगं ग० ?, गोयमा ! ऊसिओदयंपि ग० पयोदयंपि ग०, से भंते !
 किं एगओपडागं गच्छइ दुहओपडागं गच्छइ ?, गोयमा ! एगओपडागं गच्छइ नो
 दुहओपडागं गच्छइ, से णं भंते ! किं वाउकाए पडागा ?, गोयमा ! वाउकाए णं
 से नो खलु सा पडागा ॥ १५६ ॥ पभू णं भंते ! बलाहणे एगं महं इत्थिरुव्वं वा जाव
 संदमाणियरुव्वं वा परिणामेत्ताए ?, हंता ! पभू । पभू णं भंते ! बलाहए एगं महं
 इत्थिरुव्वं परिणामेत्ता अणेगाइं जोयणाइं गमित्तए ?, हंता ! पभू, से भंते ! किं
 आयद्धीए गच्छइ परिद्धीए गच्छइ ?, गोयमा ! नो आयद्धीए बाच्छति, परिद्धीए ग०
 एवं नो आयकम्मुणा परकम्मुणा नो आयपओगेणं परप्पओगेणं ऊसितोदयं वा
 गच्छइ पयोदयं वा गच्छइ, से भंते ! किं बलाहए इत्थी ?, गोयमा ! बलाहए णं
 से णो खलु सा इत्थी, एवं पुरिसे आसे हत्थी ॥ पभू णं भंते ! बलाहए एगं महं
 जाणरुव्वं परिणामेत्ता अणेगाइं जोयणाइं गमित्तए ? जहा इत्थिरुव्वं तहा भाणियव्वं,
 णवरं एगओचक्कवाल्पि दुहओचक्कवाल्पि गच्छइ (ति) भाणियव्वं, जुगगिद्धि-
 थिद्धिसीयासंदमाणियाणं तह्वेव ॥ १५७ ॥ जीवे णं भंते ! जे भविए नेरइएसु उव-
 वज्जित्तए से णं भंते ! किंलेसेसु उववज्जति ?, गोयमा ! जल्लेसाइं दव्वाइं परियाइत्ता
 कालं करेइ तल्लेसेसु उववज्जइ, तं०-कण्हलेसेसु वा नीललेसेसु वा काउलेसेसु वा,
 एवं जस्स जा लेस्सा सा तस्स भाणियव्वा जाव जीवे णं भंते ! जे भविए
 जोतिसिएसु उववज्जित्तए ? पुच्छा, गोयमा ! जल्लेसाइं दव्वाइं परियाइत्ता
 कालं करेइ तल्लेसेसु उववज्जइ, तं०-तेउलेसेसु । जीवे णं भंते ! जे भविए वेमाणि-
 एसु उववज्जित्तए से णं भंते ! किंलेसेसु उववज्जइ ?, गोयमा ! जल्लेसाइं दव्वाइं
 परियाइत्ता कालं करेइ तल्लेसेसु उववज्जइ, तं०-तेउलेसेसु वा पम्हलेसेसु वा सुक्क-
 लेसेसु वा ॥ १५८ ॥ अणगारे णं भंते ! भावियप्पा बाहिरए पोग्गळे अपरियाइत्ता
 पभू वेभारं पव्वयं उल्लंघेत्ताए वा पलंघेत्ताए वा ?, गोयमा ! णो तिण्ठे समंठे । अण-
 गारे णं भंते ! भावियप्पा बाहिरए पोग्गळे परियाइत्ता पभू वेभारं पव्वयं उल्लंघेत्ताए
 वा पलंघेत्ताए वा ?, हंता ! पभू । अणगारे णं भंते ! भावियप्पा बाहिरए पोग्गळे
 अपरियाइत्ता जावइयाइं रायगिहे नगरं रुवाइं एवइयाइं विकुव्वित्ता वेभारं पव्वयं
 अंतो अणुप्पविसित्ता पभू समं वा विससं करेत्ताए विससं वा समं करेत्ताए ?, गोयमा !

णो इण्ठे समट्ठे, एवं चेव वितिओऽवि आलावगो णवरं परियाइत्ता पभू ॥ से भंते ! किं माई विकुव्वति अमाई विकुव्वइ ? , गोयमा ! माई विकुव्वइ नो अमाई विकुव्वति, से केणट्ठेणं भंते ! एवं चुच्चइ जाव नो अमाई विकुव्वइ ? , गोयमा ! माइए पणीयं पाणभोयणं भोच्चा २ वामेति तस्स णं तेणं पणीएणं पाणभोयणेणं अट्ठि अट्ठिमिज्जा बहलीभवन्ति पयणुए मंससोणिए भवति, जेविय से अहावायरा पोग्गला तेविय से परिणमंति, तं जहा-सोतिंदियत्ताए जाव फासिंदियत्ताए अट्ठि-अट्ठिमिज्जेसमंसुरोमनहत्ताए सुक्कत्ताए सोणियत्ताए, अमाई णं ल्हं पाणभोयणं भोच्चा २ णो वामेइ, तस्स णं तेणं ल्हेणं पाणभोयणेणं अट्ठि अट्ठिमिज्जा० पयणु भवन्ति बहले मंससोणिए, जेविय से अहावादरा पोग्गला तेविय से परिणमंति, तंजहा-उच्चारत्ताए पासवणत्ताए जाव सोणियत्ताए, से तेणट्ठेणं जाव नो अमाई विकुव्वइ ॥ माई णं तस्स ठाणस्स अणालोइयपडिक्कंते कालं करेइ नत्थि तस्स आराहणा । अमाई णं तस्स ठाणस्स आलोइयपडिक्कंते कालं करेइ अत्थि तस्स आराहणा । सेवं भंते ! सेवं भंते ! ति ॥ १५९ ॥ तइयसए चउत्थो उदेसो समत्तो ॥

अणगारे णं भंते ! भावियप्पा बाहिरए पोग्गले अपरियाइत्ता पभू एणं महं इत्थिरूवं वा जाव संदमाणियरूवं वा विउव्वित्तए ? णो ति०, अणगारे णं भंते ! भावियप्पा बाहिरए पोग्गले परियाइत्ता पभू एणं महं इत्थिरूवं वा जाव संदमाणियरूवं वा विउव्वित्तए ? , हंता ! पभू, अणगारे णं भंते ! भावि० केवतियाई पभू इत्थिरूवाइं विकुव्वित्तए ? , गोयमा ! से जहानामए जुवइं जुवाणे हत्थेणं हत्थे गेण्हेज्जा चक्कस्स वा नामी अरगाउत्ता सिया एवामेव अणगारेवि भावियप्पा वेउ-व्वियसमुग्घाएणं समोहणइ जाव पभू णं गोयमा ! अणगारे णं भावियप्पा केवल-कप्पं जंबुदीवं बट्ठहिं इत्थिरूवेहिं आइच्चं वित्थिक्खं जाव एस णं गोयमा ! अणगा-रस्स भावि० अयमेयारूवे विसए विसयमेत्ते चुच्चइ नो चेव णं संपत्तीए विकुव्विसु वा ३, एवं परिवाडीए नेयव्वं जाव संदमाणिया । से जहानामए केइ पुरिसे अस्सि-चम्मपायं गहाय गच्छेज्जा एवामेव भावियप्पा अणगारेवि अस्सिचम्मपायहत्थक्खि-गएणं अप्पाणेणं उट्ठं वेहासं उप्पइज्जा ? , हंता ! उप्पइज्जा, अणगारे णं भंते ! भावि-यप्पा केवतियाई पभू अस्सिचम्मपायहत्थक्खिगयाइं रूवाइं विउव्वित्तए ? , गोयमा ! से जहानामए-जुवतिं जुवाणे हत्थेणं हत्थे गेण्हेज्जा तं चेव जाव विउव्विसु वा ३ । से जहानामए केइ पुरिसे एगओपडाणं काउं गच्छेज्जा, एवामेव अणगारेवि भावि-यप्पा एगओपडागाहत्थक्खिगएणं अप्पाणेणं उट्ठं वेहासं उप्पइज्जा ? , हंता गोयमा ! उप्पइज्जा, अणगारे णं भंते ! भावियप्पा केवतियाई पभू एगओपडागाहत्थक्खिग-

याई रुवाई विउव्वित्तए ? एवं चेव जाव विकुव्विसु वा ३ । एवं दुहओपडांगिं । से जहानामए—केइ पुरिसे एगओजण्णोवइयं काउं गच्छेज्जा, एवामेव अण० भा० एगओजण्णोवइयकिच्चगएणं अप्पाणेणं उड्डं वेहासं उप्पएज्जा ? हंता ! उप्पएज्जा, अणगारे णं भंते ! भावियप्पा केवतियाईं पभू एगओजण्णोवइयकिच्चगयाईं रुवाईं विकुव्वित्तए ? तं चेव जाव विकुव्विसु वा ३, एवं दुहओजण्णोवइयं पि । से जहानामए—केइ पुरिसे एगओपल्हत्थियं काउं चिट्ठेज्जा, एवामेव अणगारेवि भावियप्पा एवं चेव जाव विकुव्विसु वा ३ एवं दुहओपल्लियं कं पि । अणगारे णं भंते ! भावियप्पा बाहिरए पोग्गले अपरियाइत्ता पभू एगं महं आसरूवं वा हत्थिरूवं वा सीहरूवं वा वग्गवगदीवियअच्छतरच्छपरासररूवं वा अभिजुंजित्तए ?, णो तिण्ठे समट्ठे, अणगारे णं एवं बाहिरए पोग्गले परियाइत्ता पभू । अणगारे णं भंते ! भा० एगं महं आसरूवं वा अभिजुंजित्ता अपेगाईं जोयणाईं गमित्तए ? हंता ! पभू, से भंते ! किं आयद्धीए गच्छति परिद्धीए गच्छति ?, गोयमा ! आयद्धीए गच्छइ नो परिद्धीए, एवं आयकम्मुणा नो परकम्मुणा आयप्पओगेणं नो परप्पओगेणं उस्सिओदयं वा गच्छइ पयोदगं वा गच्छइ । से णं भंते ! किं अणगारे आसे ?, गोयमा ! अणगारे णं से नो खल्लु से आसे, एवं जाव परासररूवं वा । से भंते ! किं माईं विकुव्वति अमाईं विकुव्वति ?, गोयमा ! माईं विकुव्वति नो अमाईं विकुव्वति, माईं णं भंते ! तस्स ठाणस्स अणालोइयपडिक्कंते कालं करेइ कहिं उव्वज्जति ?, गोयमा ! अन्नयरेसु आभियोगेसु देवलोगेसु देवत्ताए उव्वज्जइ, अमाईं णं तस्स ठाणस्स आलोइयपडिक्कंते कालं करेइ कहिं उव्वज्जति ?, गोयमा ! अन्नयरेसु अणामिओगेसु देवलोगेसु देवत्ताए उव्वज्जइ, सेवं भंते २ त्ति, गाहा—इत्थीअसीपडागा जण्णोवइए य होइ बोद्धवे । पल्हत्थियपल्लियं के अमिओगविकुव्वणा माईं ॥ १ ॥ ॥ १६० ॥ तइए सए पंचमो उद्देशो समत्तो ॥

अणगारे णं भंते ! भावियप्पा माईं मिच्छदिट्ठी वीरियलद्धीए वेउव्वियलद्धीए विभंगनाणलद्धीए वाणारसिं नगरिं समोहए समोहणित्ता रायगिहे नगरे रुवाईं जाणति पासति ?, हंता ! जाणइ पासइ । से भंते ! किं तहाभावं जाणइ पासइ अन्नहाभावं जा० पा० ?, गोयमा ! णो तहाभावं जाणइ पा० अण्णहाभावं जा० पा० । से केणट्ठेणं भंते ! एवं बुच्चइ नो तहाभावं जा० पा० अन्नहाभावं जाणइ पा० ?, गोयमा ! तस्स णं एवं भवति—एवं खल्लु अहं रायगिहे नगरे समोहए समोहणित्ता वाणारसीए नगरीए रुवाईं जाणामि पासामि, से से दंसणे विवचासे भवति, से तेणट्ठेणं जाव पासति । अणगारे णं भंते ! भावियप्पा माईं मिच्छदिट्ठी

जाव रायगिहे नगरे समोहए समोहणित्ता वाणारसीए नगरीए रुवाई जाणइ पासइ ?, हंता ! जाणइ पासइ, तं चेव जाव तस्स णं एवं होइ-एवं खलु अहं वाणारसीए नगरीए समोहए २ रायगिहे नगरे रुवाई जाणामि पासामि, से से दंसणे विवच्चासे भवति, से तेणट्ठेणं जाव अन्नहाभावं जाणइ पासइ ॥ अणगारे णं भंते ! भावियप्पा माई मिच्छदिट्ठी वीरियलद्धीए वेउव्वियलद्धीए विभंगणाणलद्धीए वाणारसिं नगरिं रायगिहं च नगरं अंतरा एगं महं जणवयवग्गं समोहए २ वाणारसिं नगरिं रायगिहं च नगरं अंतरा एगं महं जणवयवग्गं जाणति पासति ? हंता ! जाणइ पासइ, से भंते ! किं तद्वाभावं जाणइ पासइ अन्नहाभावं जाणइ पा० ?, गोयमा ! णो तद्वाभावं जाणति पासइ अन्नहाभावं जाणइ पासइ, से केणट्ठेणं जाव पासइ ?, गोयमा ! तस्स खलु एवं भवति एस खलु वाणारसी [ए] नगरी एस खलु रायगिहे नगरे एस खलु अंतरा एगे महं जणवयवग्गे नो खलु एस महं वीरियलद्धी वेउव्वियलद्धी विभंगणाणलद्धी इट्ठी जुई जसे बले वीरिए पुरिसक्कारपरक्कमे लद्धे पत्ते अभिसमण्णागए, से से दंसणे विवच्चासे भवति, से तेणट्ठेणं जाव पासति ॥ अणगारे णं भंते ! भावियप्पा अमाई सम्मदिट्ठी वीरियलद्धीए वेउव्वियलद्धीए ओहिनाणलद्धीए रायगिहे नगरे समोहए २ वाणारसीए नगरीए रुवाई जाणइ पासइ ?, हंता !, से भंते ! किं तद्वाभावं जाणइ पासइ अन्नहाभावं जाणति पासति ?, गोयमा ! तद्वाभावं जाणति पासति नो अन्नहाभावं जाणति पासति, से केणट्ठेणं भंते ! एवं वुच्चइ ?, गोयमा ! तस्स णं एवं भवति-एवं खलु अहं रायगिहे नगरे समोहणित्ता वाणारसीए नगरीए रुवाई जाणामि पासामि, से से दंसणे अविवच्चासे भवति, से तेणट्ठेणं गोयमा ! एवं वुच्चति, बीओ आलावगो एवं चेव नवरं वाणारसीए नगरीए समोहणा नेयक्वा रायगिहे नगरे रुवाई जाणइ पासइ । अणगारे णं भंते ! भावियप्पा अमाई सम्मदिट्ठी वीरियलद्धीए वेउव्वियलद्धीए ओहिनाणलद्धीए रायगिहं नगरं वाणारसिं नगरिं च अंतरा एगं महं जणवयवग्गं समोहए २ रायगिहं नगरं वाणारसिं च नगरिं तं च अंतरा एगं महं जणवयवग्गं जाणइ पासइ ?, हंता ! जा० पा०, से भंते ! किं तद्वाभावं जाणइ पासइ अन्नहाभावं जाणइ पासइ ?, गोयमा ! तद्वाभावं जाणइ पा०, णो अन्नहाभावं जा० पा०, से केणट्ठेणं ? गोयमा ! तस्स णं एवं भवति-नो खलु एस रायगिहे नगरे णो खलु एस वाणारसी नगरी नो खलु एस अंतरा एगे जणवयवग्गे एस खलु ममं वीरियलद्धी वेउव्वियलद्धी ओहिनाणलद्धी इट्ठी जुई जसे बले वीरिए पुरिसक्कारपरक्कमे लद्धे पत्ते अभिसमण्णागए से से दंसणे अविवच्चासे भवति से तेणट्ठेणं गोयमा ! एवं वुच्चति तद्वाभावं जाणति पासति नो अन्नहाभावं

जाणति पासति । अणगारे णं भंते ! भावियप्पा बाहिरए पोग्गले अपरियाइत्ता पभू एणं महं गामरूवं वा नगररूवं वा जाव सञ्चिवेसरूवं वा विकुव्वित्तए ? , णो तिण्ठे सम्भे, एवं वितिओवि आलावगो, णवरं बाहिरए पोग्गले परियाइत्ता पभू । अणगारे णं भंते ! भावियप्पा केवत्तियाइं पभू गामरूवाइं विकुव्वित्तए ? , गोयमा ! से जहानामए जुवति जुवाणे हत्थेणं हत्थे गेण्हेज्जा तं चेव जाव विकुव्विसु वा ३ एवं जाव सञ्चिवेसरूवं वा ॥ १६१ ॥ चमरस्स णं भंते ! असुरिंदस्स असुररत्तो कति आयरक्खदेवसाहस्सीओ पण्णत्ता ? गोयमा ! चत्तारि चउसट्ठीओ आयरक्खदेवसाहस्सीओ पण्णत्ताओ, ते णं आयरक्खा वण्णओ जहा रायप्पसेणइज्जे, एवं सव्वेसि इंदणं जस्स जत्तिया आयरक्खा भाणियन्वा । सेवं भंते २ त्ति ॥ १६२ ॥

तइयसए छट्ठो उद्देसो समत्तो ॥

रायग्गिहे नगरे जाव पज्जुवासमाणे एवं वयासी-सक्कस्स णं भंते ! देविंदस्स देवरत्तो कति लोगपाला पण्णत्ता ? , गोयमा ! चत्तारि लोगपाला पण्णत्ता, तंजहा-सोमे जमे वरुणे वेसमणे । एएसि णं भंते ! चउण्हं लोगपालाणं कति विमाणा पण्णत्ता ? गोयमा ! चत्तारि विमाणा प०, तंजहा-संझप्पमे वरसिट्ठे सयंजले वग्गू । कहिं णं भंते ! सक्कस्स देविंदस्स देवरण्णो सोमस्स महारत्तो संझप्पमे णामं महाविमाणे पण्णत्ते ? , गोयमा ! जंबुद्वीवे २ मंदरस्स पव्वयस्स दाहिणेणं इमीसे रयणप्पमाए पुढवीए बहुसमरमणिज्जाओ भूमिभागाओ उट्ठं चंदिमसूरियगहगणणक्खत्ततारारूवाणं बहूइं जोयणाइं जाव पंच वड्डिसया पण्णत्ता, तंजहा-असोयवड्डेसए सत्तवन्नवड्डेसए चंपयवड्डेसए अंबवड्डेसए मज्जे सोहम्मवड्डेसए, तरस्स णं सोहम्मवड्डेसयस्स महाविमाणस्स पुरच्छिमेणं सोहम्मे कप्पे असंखेज्जाइं जोयणाइं वीइवइत्ता एत्थ णं सक्कस्स देविंदस्स देवरत्तो सोमस्स महारत्तो संझप्पमे नामं महाविमाणे पण्णत्ते अद्धतेरस जोयणसयसहस्साइं आयामविकखंमेणं उयालीसं जोयणसयसहस्साइं बावन्नं च सहस्साइं अट्ठ य अडयाले जोयणसए किंचिविसेसाहिए परिकखेवेणं प० जा सूरियाभविमाणस्स वत्तव्वया सा अपरिसेसा भाणियन्वा जाव अभिसेओ नवरं सोमे देवे ॥ संझप्पभस्स णं महाविमाणस्स अहे सपक्खिं सपडिदिसिं असंखेज्जाइं जोयणसयसहस्साइं ओगाहिता एत्थ णं सक्कस्स देविंदस्स देवरत्तो सोमस्स महारत्तो सोमा नामं रायहाणी पण्णत्ता एणं जोयणसयसहस्सं आया-मविकखंमेणं जंबुद्वीवपमाणे (ण) वेमाणियाणं पमाणस्स अद्धं नेयव्वं जाव उवरियि-लेणं सोलस जोयणसहस्साइं आयामविकखंमेणं पच्चासं जोयणसहस्साइं पंच य सत्ताणउए जोयणसते किंचिविसेसूणे परिकखेवेणं पण्णत्ते, पासायाणं चत्तारि परि-

वाडीओ नेयव्वाओ, सेसा नत्थि । सक्कस्स णं देविंदस्स देवरत्तो सोमस्स महारत्तो इमे देवा आणाउववायवयणनिहेसे चिट्ठंति, तंजहा-सोमकाइयाइ वा सोमदेवकाइ-याइ वा विज्जुकुमारा विज्जुकुमारीओ अग्गिकुमारा अग्गिकुमारीओ वाउकुमारा वाउकुमारीओ चंदा सूरा गहा णक्खत्ता ताराख्वा जे यावन्ने तहप्पगारा सव्वे ते तब्भत्तिया तप्पक्खिया तब्भारिया सक्कस्स देविंदस्स देवरत्तो सोमस्स महारत्तो आणाउववायवयणनिहेसे चिट्ठंति । जंबुद्वीवे २ मंदरस्स पव्वयस्स दाहिणेणं जाइं इमाइं समुप्पज्जंति, तं जहा-गहदंडाइ वा गहमुसलाइ वा गहगजियाइ वा, एवं गहजुद्धाइ वा गहसिंघाडगाइ वा गहावसव्वाइ वा अब्भाइ वा अब्भरक्खाइ वा संझाइ वा गंधव्वनगराइ वा उक्कापायाइ वा दिसीदाहाइ वा गजियाइ वा विज्जुयाइ वा पंसुवुट्ठीइ वा जूवेत्ति वा जक्खालित्तयत्ति वा धूमियाइ वा महियाइ वा रउगवायाइ वा चंदोवरागाइ वा सूरोवरागाइ वा चंदपरिवेसाइ वा सूरपरिवेसाइ वा पडिचंदाइ वा पडिसूराइ वा ईदधणूइ वा उदगमच्छकपिहसियअमोहापाईण-वायाइ वा पडीणवाताइ वा जाव संवड्ढयवाताइ वा गामदाहाइ वा जाव सञ्चिवे-सदाहाइ वा पाणक्खया जणक्खया धणक्खया कुलक्खया वसणब्भूया अणारिया जे यावन्ने तहप्पगारा ण ते सक्कस्स देविंदस्स देवरत्तो सोमस्स महारत्तो अण्णाया अदिट्ठा असुया अमुया अविण्णाया तेसिं वा सोमकाइयाणं देवाणं, सक्कस्स णं देविंदस्स देवरत्तो सोमस्स महारत्तो इमे अहावच्चा देवा अभिजाया होत्था, तं जहा-ईंगालए वियालए लोहियक्खे सणिच्चरे चंदे सूरें सुक्के बुहे बहस्सती राट्ठ ॥ सक्कस्स णं देविंदस्स देवरत्तो सोमस्स महारत्तो सत्तिभागं पलिओवमं ठिती पण्णत्ता, अहा-वच्चाभिजायाणं देवाणं एगं पलिओवमं ठिई पण्णत्ता, एवंमहिट्ठिए जाव महाण्भागे सोमे महाराया ॥ १६३ ॥ कहि णं भंते ! सक्कस्स देविंदस्स देवरत्तो जमस्स महारत्तो वरसिट्ठे णामं महाविमाणे पण्णत्ते ?, गीयमा ! सोहम्मवड्डिसयस्स महाविमा-णस्स दाहिणेणं सोहम्मे कप्पे असंखेज्जाइं जोयणसहस्साइं वीइवइत्ता एत्थ णं सक्कस्स देविंदस्स देवरत्तो जमस्स महारत्तो वरसिट्ठे णामं महाविमाणे पण्णत्ते अद्ध-तेरस जोयणसयसहस्साइं जहा सोमस्स विमाणे तहा जाव अभिसेओ रायहाणी तहेव जाव पासायपंतीओ ॥ सक्कस्स णं देविंदस्स देवरत्तो जमस्स महारत्तो इमे देवा आणा० जाव चिट्ठंति, तं जहा-जमकाइयाइ वा जमदेवकाइयाइ वा पेयकाइया-इ वा पेयदेवकाइयाइ वा असुरकुमारा असुरकुमारीओ कंदप्पा निरयवाला आभि-ओगा जे यावन्ने तहप्पगारा सव्वे ते तब्भत्तिगा तप्पक्खिया तब्भारिया सक्कस्स देविंदस्स देवरत्तो जमस्स महारत्तो आणाए जाव चिट्ठंति ॥ जंबुद्वीवे २ मंदरस्स

पव्वयस्स दाहिणेणं जाई इमाई समुप्पजंति, तंजहा-डिबाइ वा डमराइ वा कल-
हाइ वा बोलाइ वा खाराइ वा महाजुद्धाइ वा महासंगामाइ वा महासत्थनिव-
डणाइ वा एवं पुरिसनिवडणाइ वा महारुधिरनिवडणाइ वा दुब्भूयाइ वा कुल-
रोगाइ वा गामरोगाइ वा मंडलरोगाइ वा नगररोगाइ वा सीसवेयणाइ वा
अच्छिवेयणाइ वा कन्ननहर्दंतवेयणाइ वा इंदगाहाइ वा खंदगाहाइ वा कुमारगाह
जक्खगाहा० भूयगाहा० एगाहियाइ वा बेआहियाइ वा तेयाहियाइ वा चाउत्थहियाइ
वा उव्वेयगाइ वा कासा० सासाइ वा सोसेइ वा जराइ वा दाहा० कच्छकोहाइ वा
अजीरया पंडुरगा हरिसाइ वा भगंदराइ वा हिययसूलाइ वा मत्थयसू० जोणिसू०
पाससू० कुच्छिसू० गाममारीइ वा नगर० खेड० कब्बड० दोणमुह० मडंब० पट्टण०
आसम० संवाह० संनिवेसमारीइ वा पाणक्खया धणक्खया जणक्खया कुलक्खया
वसणब्भूयमणारिया जे यावन्ने तहप्पगारा न ते सक्कस्स देविंदस्स देवरत्तो जमस्स
महारत्तो अण्णाया०५ तेसिं वा जमकाइयाणं देवाणं ॥१६४॥ सक्कस्स णं देविंदस्स
देवरत्तो जमस्स महारत्तो इमे देवा अहावच्चा अभिण्णाया होत्था, तंजहा-अंबे १ अंब-
रिसे चव २, सामे ३ सबळेत्ति यावरे ४ । खो ५-वखे ६ काले ७ य, महाकालेत्ति
यावरे ८ ॥ १ ॥ असिपत्ते ९ धणू १० कुंभे ११ (असी य असिपत्ते कुंभे) वाल्
१२ वेयरणीत्ति य १३ । खरस्सरे १४ महाघोसे १५, एए पन्नरसाहिया ॥ २ ॥
सक्कस्स णं देविंदस्स देवरत्तो जमस्स महारत्तो सत्तिभागं पलिओवमं ठिई प०,
अहावच्चाभिण्णायाणं देवाणं एणं पलिओवमं ठिई पजत्ता, एवंमहिद्धि ए जाव जमे
महाराया २ ॥१६५॥ कहि णं भंते ! सक्कस्स देविंदस्स देवरत्तो वरुणस्स महारत्तो
सयंजले नामं महाविमाणे पज्जेते ?, गोयमा ! तस्स णं सोहम्मवडिसयस्स महावि-
माणस्स पच्चत्थिमेणं सोहम्मे कप्पे असंखेजाइं जहा सोमस्स तहा विमाणरायहा-
णीओ भाणियव्वा जाव पासायवडिसया नवरं नामणाणत्तं । सक्कस्स णं ३ वरुणस्स
महारत्तो इमे देवा आणा० जाव चिट्ठत्ति, तं०-वरुणकाइयाइ वा वरुणदेवकाइ-
याइ वा नागकुमारा नागकुमारीओ उदहिकुमारा उदहिकुमारीओ थणियकुमारा थणि-
यकुमारीओ जे यावण्णे तहप्पगारा सव्वे ते तब्भत्तिया जाव चिट्ठत्ति ॥ जंबुदीवे २
मंदरस्स पव्वयस्स दाहिणेणं जाई इमाई समुप्पजंति, तंजहा-अइवासाइ वा मंद-
वासाइ वा सुवुट्ठीइ वा दुवुट्ठीइ वा उदम्भेयाइ वा उदप्पीलाइ वा उदवाहाइ
वा पव्वाहाइ वा गामवाहाइ वा जाव सन्नियेसवाहाइ वा पाणक्खया जाव तेसिं
वा वरुणकाइयाणं देवाणं, सक्कस्स णं देविंदस्स देवरत्तो वरुणस्स महारत्तो जाव
अहावच्चाभिण्णाया होत्था, तंजहा-कक्कोडए कइमए अंजणे संखवालए पुंडे पलासे

मोएजए दहिमुहे अयंपुले कायरिए । सकस्स णं देविंदस्स देवरत्तो वरुणस्स महारण्णो
 देसूणाई दो पल्लिओवमाई ठिई पण्णत्ता, अहावच्चाभिन्नायाणं देवाणं एणं पल्लिओ-
 वमं ठिई पण्णत्ता, एवमहिद्धिए जाव वरुणे महाराया ३ ॥ १६६ ॥ कहि णं भंते !
 सकस्स देविंदस्स देवरत्तो वेसमणस्स महारत्तो वग्गूणामं महाविमाणे पण्णत्ते ?,
 गोयमा ! तस्स णं सोहम्मवडिसयस्स महाविमाणस्स उत्तरेणं जहा सोमस्स विमा-
 णरायहाणिवत्तव्वया तहा नेयव्वा जाव पासायवडिसया । सकस्स णं देविंदस्स
 देवरत्तो वेसमणस्स महारत्तो इमे देवा आणाउववायवयणनिहेसे चिट्ठंति, तंजहा-
 वेसमणकाइयाइ वा वेसमणदेवकाइयाइ वा सुवन्नकुमारा सुवन्नकुमारीओ दीवकु-
 मारा दीवकुमारीओ दिसाकुमारा दिसाकुमारीओ वाणमंतरा वाणमंतरीओ जे यावन्ने
 तहप्पगारा सव्वे ते तव्वमत्तिथा जाव चिट्ठंति ॥ जंबूदीवे २ मंदरस्स पव्वयस्स
 दाहिणेणं जाई इमाई समुप्पज्जंति, तंजहा-अयागराई वा तउयागराई वा तंबयाग-
 राई वा एवं सीसागराई वा हिरन्न० सुवन्न० रयण० वयरागराई वा वसुहाराई
 वा हिरन्नवासाई वा सुवन्नवासाई वा रयण० वइर० आभरण० पत्त० पुप्फ०
 फल० बीय० मल्ल० वण्ण० चुन्न० गंध० वत्थवासाई वा हिरन्नबुट्ठीई वा सु० र०
 व० आ० प० पु० फ० बी० व० चुन्न० गंधबुट्ठी० वत्थबुट्ठीई वा भायणबुट्ठीई
 वा खीरबुट्ठीई वा सुयालाई वा दुक्कालाई वा अप्पग्वाइ वा महग्वाइ वा सुभिक्षवाइ
 वा दुभिक्षवाइ वा कयविकयाइ वा सन्निहियाइ वा संनिचयाइ वा निहीइ वा
 णिहाणाइ वा चिरपोराणाई पहीणसामियाइ वा पहीणसेउयाइ वा [पहीणमग्गाणि
 वा] पहीणगोत्तागाराई वा उच्छिन्नसामियाइ वा उच्छिन्नसेउयाइ वा उच्छिन्नगोत्ता-
 गाराई वा सिंघाडगतिगचउक्कचचरउम्मुहमहापहपहेसु नगरनिद्धमणेसु वा सुसाण-
 गिरिकंदरसंतिसेलोवट्ठाणभवणगिहेसु संनिक्खिताई चिट्ठंति, एयाई सकस्स देविंदस्स
 देवरत्तो वेसमणस्स महारत्तो ण अण्णायाई अदिट्ठाई असुयाई अविन्नायाई तेसिं वा
 वेसमणकाइयाणं देवाणं, सकस्स णं देविंदस्स देवरत्तो वेसमणस्स महारत्तो इमे
 देवा अहावच्चाभिन्नाया होत्था, तंजहा-पुन्नभेदे माणिभेदे सालिभेदे सुमणभेदे चक्के
 रक्खे पुन्नरक्खे सव्वाणे [पव्वाणे] सव्वजसे सव्वकामे समिद्धे असोहे असंगे,
 सकस्स णं देविंदस्स देवरत्तो वेसमणस्स महारत्तो दो पल्लिओवमाणि ठिई पण्णत्ता,
 अहावच्चाभिन्नायाणं देवाणं एणं पल्लिओवमं ठिई पण्णत्ता, एमहिद्धिए जाव वेसमणे
 महाराया सेवं भंते । २ त्ति ॥ १६७ ॥ तइए सए सत्तमो उदेसओ समत्तो ॥

रायगिहे नगरे जाव पज्जुवासमाणे एवं वदासी-असुरकुमारारणं भंते ! देवाणं
 कइ देवा आहेवच्चं जाव विहरंति ?, गोयमा ! दस देवा आहेवच्चं जाव विहरंति,

तंजहा-चमरे असुरिंदे असुरराया सोमे जमे वरुणे वेसमणे बली वइरोयणिंदे वइ-
 रोयणराया सोमे जमे वरुणे वेसमणे । नागकुमारारणं भंते ! पुच्छा, गोयमा ! दस
 देवा आहेवच्चं जाव विहरंति, तंजहा-धरणे नागकुमारिंदे नागकुमाराराया कालवाले
 कोलवाले सेलवाले संखवाले भूयार्णंदे नागकुमारिंदे नागकुमाराराया कालवाले कोल-
 वाले संखवाले सेलवाले, जहा नागकुमारिंदारणं एयाए वत्तव्वयाए णेयव्वं एवं इमाणं
 नेयव्वं, सुवन्नकुमारारणं वेणुदेवे वेणुदाली चित्ते विचित्ते चित्तपक्खे विचित्तपक्खे,
 विज्जुकुमारारणं हरिक्कंते हरिस्सहे पमे १ सुप्पमे २ पभकंते ३ सुप्पभकंते ४, अग्गि-
 कुमारारणं अग्गिसीहे अग्गिमाणवे तेऊ तेउसीहे तेउकंते तेउप्पमे, दीवकुमारारणं पुण्ण-
 विसिट्ठरुयसुल्लुयसुल्लकंतं (रुयंस, रुयसीह) रुयप्पभा, उदहिकुमारारणं जलकंतजलप्पभ-
 जलजलरुयजलकंतजलप्पभा, दिसाकुमारारणं अमियगई अमियवाहणे तुरियगई खिप्प-
 गई सीहगई सीहविक्रमगई, वाउकुमारारणं वेलंबपभंजणकालमहाकालअंजरिद्धा,
 थणियकुमारारणं घोसमहाघोसआवत्तवियावत्तनंदियावत्तमहानंदियावत्ता, एवं भाणियव्वं
 जहा असुरकुमारारणं । सो० १ का० २ चि० ३ प० ४ ते० ५ रु० ६ ज०
 ७ तु० ८ का० ९ आ० १० सोमे य महाकाले, चित्तप्पभ तेउ तह रुप चेव ।
 जल तह तुरियगई य काले आउत्त पढमा उ । पिसायकुमारारणं पुच्छा, गोयमा !
 दो देवा आहेवच्चं जाव विहरंति, तंजहा-काले य महाकाले सुल्लवपडिल्लव पुत्रभदे य ।
 अमरवइ माणिभदे भीमे य तहा महाभीमे ॥१॥ किंनरकिंपुरिसे खलु सप्पुरिसे खलु
 तहा महापुरिसे । अइकाय महाकाए गीयरई चेव गीयजसे ॥ २ ॥ एए वाणमंतरारणं
 देवारणं । जोइसियाणं देवारणं दो देवा आहेवच्चं जाव विहरंति, तंजहा-चंदे य सूरे
 य । सोहम्मिसाणेसु णं भंते ! कप्पेसु कइ देवा आहेवच्चं जाव विहरंति ? गोयमा !
 दस देवा जाव विहरंति, तंजहा-सक्के देविंदे देवराया सोमे जमे वरुणे वेसमणे,
 ईसाणे देविंदे देवराया सोमे जमे वरुणे वेसमणे, एसा वत्तव्वया सव्वेद्धवि कप्पेसु,
 एए चेव भाणियव्वा, जे य इंदा ते य भाणियव्वा सेवं भंते ! २ ति ॥ १६८ ॥
तइए सए अट्ठमो उद्देसओ समत्तो ॥

रायगिहे जाव एवं वदासी-कइविहे णं भंते ! इंदियविसए पण्णत्ते ?, गोयमा !
 पंचविहे इंदियविसए पण्णत्ते, तं०-सोर्तिदियविसए० जीवाभिगमे जोइसियउद्देसो
 नेयव्वो अपरिसेसो, से० २ ति ॥ १६९ ॥ **तइए सए नवमो उद्देसओ समत्तो ॥**

रायगिहे जाव एवं वयासी-चमरस्स णं भंते ! असुरिंदस्स असुररओ कइ
 परिसाओ पण्णत्ताओ ?, गोयमा ! तओ परिसाओ पण्णत्ताओ, तंजहा-समिया चंडा
 जाया, एवं जहाणुपुव्वीए जावऽच्चुओ कप्पो, सेवं भंते ! २ ति ॥ १७० ॥ **तइयसए
 दसमो उद्देसो समत्तो, तइयं सयं समत्तं ॥**

चत्तारि विमाणेहिं चत्तारि य होति रायहाणीहिं । नेरइए लेस्साहि य दस उद्देसा चउत्थसए ॥ १ ॥ रायगिहे नगरे जाव एवं वयासी-ईसाणस्स णं भंते ! देविंदस्स देवरण्णो कइ लोगपाला प० १, गोयमा ! चत्तारि लोगपाला प०, तंजहा-सोमे जमे वेसमणे वरुणे । एएसि णं भंते ! लोगपालाणं कइ विमाणा प० १, गोयमा ! चत्तारि विमाणा प०, तंजहा-सुमणे सव्वओभदे वग्गू सुवग्गू । कहि णं भंते ! ईसाणस्स देविंदस्स देवरओ सोमस्स महारओ सुमणे नामं महाविमाणे पण्णत्ते १, गोयमा ! जंबूदीवे २ मंदरस्स पव्वयस्स उत्तरेण इमीसे रयणप्पभाए पुढवीए जाव ईसाणे णामं कप्पे पण्णत्ते, तत्थ णं जाव पंचवडेंसया प०, तंजहा-अंकवडेंसए फलिहवडिंसए रयणवडेंसए जायहवडिंसए मज्झे य तत्थ ईसाणवडेंसए, तस्स णं ईसाणवडेंसयस्स महाविमाणस्स पुरच्छिमेणं तिरियमसंखेजाइं जोयणसह-स्साइं वीइवइत्ता एत्थ णं ईसाणस्स ३ सोमस्स २ सुमणे नामं महाविमाणे पण्णत्ते अद्धतेरसजोयण जहा सक्कस्स वत्तव्वया तइयसए तहा ईसाणस्सवि । चउण्हवि लोगपालाणं विमाणे २ उद्देसओ, चउसु विमाणेसु चत्तारि उद्देसा अपरिसेसा, नवरं ठिईए नाणत्ते-आदिदुय तिभागूणा पलिया धणयस्स होति दो चेव । दो सतिभागा वरुणे पलियमहावच्चदेवाणं १ ॥ १७१ ॥ चउत्थे सए पढमविइयतइयचउत्था उद्देसा समत्ता ॥

रायहाणीसुवि चत्तारि उद्देसा भाणियव्वा जाव एवंमहिद्धिए जाव वरुणे महाराया ॥ १७२ ॥ चउत्थे सए पंचमछटुत्तमट्टमा उद्देसा समत्ता ॥

नेरइए णं भंते ! नेरइएसु उव्वज्जइ अनेरइए नेरइएसु उव्वज्जइ ? पन्नवणाए लेस्सापए तइओ उद्देसओ भाणियव्वो जाव नाणाइं ॥ १७३ ॥ चउत्थसए नवमो उद्देसो समत्तो ॥

से नूणं भंते ! कण्हलेस्सा नीललेस्सं पप्प तारुवत्ताए तावण्णत्ताए एवं चउत्थो उद्देसओ पन्नवणाए चेव लेस्सापदे नेयव्वो जाव-परिणामवण्णरसंगंधसुद्धअपसत्थ-संकिलिद्धण्हा । गइपरिणामपदेसोगाहणवग्गणाठाणमप्पबहुं ॥ १ ॥ सेवं भंते ! २ ति ॥ १७४ ॥ चउत्थसए दसमो उद्देसो समत्तो ॥ चउत्थं सयं समत्तं ॥

चंप(चंपाए)रवि १ अनिल २ गंठिय ३ सदे ४ छउमाउ ५-६ एयण ७ णियंठे ८ । रायगिहं ९ चंपाचंदिमा १० य दस पंचमंमि सए ॥ ११ ॥ तेणं कालेणं २ चंपा नामं नगरी होत्था, वन्नओ, तीसे णं चंपाए णगरीए पुण्णभदे नामं उज्जाणे होत्था, वण्णओ, सामी समोसडे जाव परिसा पडिगया । तेणं कालेणं २ समणस्स भगवओ महा-वीरस्स जेट्ठे अंतेवासी इंदभूई णामं अणगारे गोयमगोत्तेणं जाव एवं वंदासी-जंबू-

दीवे णं भंते । दीवे सूरिया उदीणपाईणमुग्गच्छ पाईणदाहिणमागच्छंति, पाईण-
 दाहिणमुग्गच्छ दाहिणपडीणमागच्छंति, दाहिणपडीणमुग्गच्छ पडीणउदीणमागच्छंति
 पडीणउदीणं उग्गच्छ उदीचिपाईणमागच्छंति ?, हंता । गोयमा ! जंबूदीवे णं
 दीवे सूरिया उदीचिपाईणमुग्गच्छ जाव उदीचिपाईणमागच्छंति ॥ १७५ ॥
 जया णं भंते ! जंबूदीवे २ दाहिणद्धे दिवसे भवइ तदा णं उत्तरद्धे दिवसे भवइ
 जदा णं उत्तरद्धेवि दिवसे भवइ तदा णं जंबूदीवे २ मंदरस्स पव्वयस्स पुरच्छिम-
 पच्चत्थिमेणं राई भवइ ?, हंता गोयमा ! जया णं जंबूदीवे २ दाहिणद्धेवि दिवसे
 जाव राई भवइ । जदा णं भंते ! जंबू० मंदरस्स पव्वयस्स पुरच्छिमेणं दिवसे
 भवइ तदा णं पच्चत्थिमेणवि दिवसे भवइ जया णं पच्चत्थिमेणं दिवसे भवइ तदा
 णं जंबूदीवे २ मंदरस्स पव्वयस्स उत्तरदाहिणेणं राई भवइ ?, हंता गोयमा !
 जदा णं जंबू० मंदरपुरच्छिमेणं दिवसे जाव राई भवइ, जदा णं भंते ! जंबूदीवे
 २ दाहिणद्धे उक्कोसए अट्टारसमुहुत्ते दिवसे भवइ तदा णं उत्तरद्धेवि उक्कोसए अट्टा-
 रसमुहुत्ते दिवसे भवइ जदा णं उत्तरद्धे उक्कोसए अट्टारसमुहुत्ते दिवसे भवइ तदा
 णं जंबूदीवे २ मंदरस्स पुरच्छिमपच्चत्थिमेणं जहन्धिया दुवालसमुहुत्ता राई भवइ ?,
 हंता गोयमा ! जदा णं जंबू० जाव दुवालसमुहुत्ता राई भवइ । जदा णं जंबू०
 मंदरस्स पुरच्छिमेणं उक्कोसए अट्टारस जाव तदा णं जंबूदीवे २ पच्चत्थिमेणवि
 उक्को० अट्टारसमुहुत्ते दिवसे भवइ जया णं पच्चत्थिमेणं उक्कोसए अट्टारसमुहुत्ते
 दिवसे भवइ तदा णं भंते ! जंबूदीवे २ उत्तर० दुवालसमुहुत्ता जाव राई भवइ ?,
 हंता गोयमा ! जाव भवइ । जया णं भंते ! जंबू० दाहिणद्धे अट्टारसमुहुत्ताणंतरे
 दिवसे भवइ तदा णं उत्तरे अट्टारसमुहुत्ताणंतरे दिवसे भवइ जदा णं उत्तरे अट्टा-
 रसमुहुत्ताणंतरे दिवसे भवइ तदा णं जंबू० मंदरस्स पव्वयस्स पुरच्छिमपच्चत्थिमेणं
 सातिरेगा दुवालसमुहुत्ता राई भवइ ?, हंता गोयमा ! जदा णं जंबू० जाव राई
 भवइ । जदा णं भंते ! जंबूदीवे २ पुरच्छिमेणं अट्टारसमुहुत्ताणंतरे दिवसे भवइ
 तदा णं पच्चत्थिमेणं अट्टारसमुहुत्ताणंतरे दिवसे भवइ जदा णं पच्चत्थिमेणं अट्टार-
 समुहुत्ताणंतरे दिवसे भवइ तदा णं जंबू० २ मंदरस्स पव्वयस्स दाहिणेणं साइ-
 रेगा दुवालसमुहुत्ता राई भवइ ?, हंता गोयमा ! जाव भवइ ॥ एवं एएणं कमेणं
 उच्चारयव्वं सत्तरसमुहुत्ते दिवसे तेरसमुहुत्ता राई भवइ सत्तरसमुहुत्ताणंतरे दिवसे
 सातिरेगा तेरसमुहुत्ता राई सोलसमुहुत्ते दिवसे चोइसमुहुत्ता राई सोलसमुहुत्ताण-
 तरे दिवसे सातिरेगाचोइसमुहुत्ता राई पन्नरसमुहुत्ते दिवसे पन्नरसमुहुत्ता राई
 भवइ पन्नरसमुहुत्ताणंतरे दिवसे सातिरेगा पन्नरसमुहुत्ता राई चोइसमुहुत्ते

दिवसे सोलसमुहुत्ता राई चोइसमुहुत्ताणंतरे दिवसे सातिरेगा सोलसमुहुत्ता राई तेरसमुहुत्ते दिवसे सत्तरसमुहुत्ता राई तेरसमुहुत्ताणंतरे दिवसे सातिरेगा सत्तरसमुहुत्ता राई । जया णं जंबू० दाहिणङ्गे जहण्णए दुवाल्समुहुत्ते दिवसे भवइ तथा णं उत्तरङ्गेवि, जया णं उत्तरङ्गे तथा णं जंबूदीवे २ मंदरस्स पव्वयस्स पुरच्छिमेणं उक्कोसिया अट्टारसमुहुत्ता राई भवइ?, हंता गोयमा ! एवं चेव उच्चारैयव्वं जाव राई भवइ । जया णं भंते ! जंबू० मंदरस्स पव्वयस्स पुरच्छिमेणं जहण्णए दुवाल्समुहुत्ते दिवसे भवइ तथा णं पच्चत्थिमेणवि० तथा णं जंबू० मंदरस्स उत्तरदाहिणेणं उक्कोसिया अट्टारसमुहुत्ता राई भवइ?, हंता गोयमा ! जाव राई भवइ ॥ १७६ ॥ जया णं भंते ! जंबू० दाहिणङ्गे वासाणं पढमे समए पडिवज्जइ तथा णं उत्तरङ्गेवि वासाणं पढमे समए पडिवज्जइ जया णं उत्तरङ्गेवि वासाणं पढमे समए पडिवज्जइ तथा णं जंबूदीवे २ मंदरस्स पव्वयस्स पुरच्छिमपच्चत्थिमेणं अणंतरपुरक्खडसमयंसि वासाणं प० स० प०?, हंता गोयमा ! जया णं जंबू० २ दाहिणङ्गे वासाणं प० स० पडिवज्जइ तह चेव जाव पडिवज्जइ । जया णं भंते ! जंबू० मंदरस्स० पुरच्छिमेणं वासाणं पढमे स० पडिवज्जइ तथा णं पच्चत्थिमेणवि वासाणं पढमे समए पडिवज्जइ, जया णं पच्चत्थिमेणवि वासाणं पढमे समए पडिवज्जइ तथा णं जाव मंदरस्स पव्वयस्स उत्तरदाहिणेणं अणंतरपच्छाकडसमयंसि वासाणं प० स० पडिवज्जे भवइ?, हंता गोयमा ! जया णं जंबू० मंदरस्स पव्वयस्स पुरच्छिमेणं, एवं चेव उच्चारैयव्वं जाव पडिवज्जे भवइ ॥ एवं जहा समएणं अभिलावो भणिओ वासाणं तहा आवलियाएवि २ भाणियव्वो, आणापाणुणवि ३ थोवेणवि ४ लवेणवि ५ मुहुत्तेणवि ६ अहोरत्तेणवि ७ पक्खेणवि ८ मासेणवि ९ उउणावि १०, एएसिं सव्वेसिं जहा समयस्स अभिलावो तहा भाणियव्वो । जया णं भंते ! जंबू० दाहिणङ्गे हेमंताणं पढमे समए पडिवज्जइ जहेव वासाणं अभिलावो तहेव हेमंताणवि २० गिम्हाणवि ३० भाणियव्वो जाव उऊ, एवं एए तिथिवि, एएसिं तीसं आलावगा भाणियव्वा । जया णं भंते ! जंबू० मंदरस्स पव्वयस्स दाहिणङ्गे पढमे अयणे पडिवज्जइ तथा णं उत्तरङ्गेवि पढमे अयणे पडिवज्जइ, जहा समएणं अभिलावो तहेव अयणेणवि भाणियव्वो ज्ञाव अणंतरपच्छाकडसमयंसि पढमे अयणे पडिवज्जे भवइ, जहा अयणेणं अभिलावो तहा संवच्छरेणवि भाणियव्वो जुएणवि वाससएणावि वाससहस्सेणवि वाससयसहस्सेणवि पुव्वंगेणवि पुव्वेणवि तुडियंगेणवि तुडिणवि, एवं पुव्वे २ तुडि २ अडडै २ अववे २ दूट्टए २ उप्पळे २ पडमे २ नलिणे २ अच्छ(अत्थि)णिउरे २ अउए २ णउए २ पउए २ चूलिया

२ सीसपहेलिया २ पलिओवमेणवि सागरोवमेणवि भाणियव्वो । जया णं भंते !
 जंबूदीवे २ दाहिणङ्खे पढमा ओसप्पिणी पडिवज्जइ तथा णं उत्तरङ्खेवि पढमा ओसप्पिणी
 पडिवज्जइ, जया णं उत्तरङ्खेवि पडिवज्जइ तदा णं जंबूदीवे २ मंदरस्स पव्वयस्स
 पुरच्छिमपच्चत्थिमेणवि नेवत्थि ओसप्पिणी नेवत्थि उस्सप्पिणी अवट्ठिए णं तत्थ
 काले पन्नत्ते ? समणाउसो !, हंता गोयमा ! तं चेव उच्चारयव्वं जाव समणाउसो !,
 जहा ओसप्पिणीए आलावओ भणिओ एवं उस्सप्पिणीएवि भाणियव्वो ॥ १७७ ॥
 लवणे णं भंते ! समुद्दे सूरिया उदीचिपाईणमुग्गच्छ जच्चेव जंबूदीवस्स वत्तव्वया
 भणिया सच्चेव सव्वा अपरिसेसिया लवणसमुद्दस्सवि भाणियव्वा, नवरं अभिलावो
 इमो गेयव्वो-जया णं भंते ! लवणे समुद्दे दाहिणङ्खे दिवसे भवइ तं चेव जाव
 तदा णं लवणे समुद्दे पुरच्छिमपच्चत्थिमेणं राई भवइ, एएणं अभिलावेणं नेयव्वं ।
 जदा णं भंते ! लवणसमुद्दे दाहिणङ्खे पढमा ओसप्पिणी पडिवज्जइ तदा णं उत्तरङ्खेवि
 पढमा ओसप्पिणी पडिवज्जइ, जदा णं उत्तरङ्खे पढमा ओसप्पिणी पडिवज्जइ तदा णं
 लवणसमुद्दे पुरच्छिमपच्चत्थिमेणं नेवत्थि ओसप्पिणी २ समणाउसो !, हंता गोयमा !
 जाव समणाउसो ! ॥ धायइसंडे णं भंते ! दीवे सूरिया उदीचिपाईणमुग्गच्छ जहेव
 जंबूदीवस्स वत्तव्वया भणिया सच्चेव धायइसंडस्सवि भाणियव्वा, नवरं इमेणं अभि-
 लावेणं सव्वे आलावगा भाणियव्वा । जया णं भंते ! धायइसंडे दीवे दाहिणङ्खे
 दिवसे भवइ तदा णं उत्तरङ्खेवि जया णं उत्तरङ्खेवि तदा णं धायइसंडे दीवे मंदराणं
 पव्वयाणं पुरच्छिमपच्चत्थिमेणं राई भवइ ?, हंता गोयमा ! एवं चेव जाव राई
 भवइ । जदा णं भंते ! धायइसंडे दीवे मंदराणं पव्वयाणं पुरच्छिमेण दिवसे
 भवइ तदा णं पच्चत्थिमेणवि, जदा णं पच्चत्थिमेणवि तदा णं धायइसंडे दीवे मंद-
 राणं पव्वयाणं उत्तरेणं दाहिणेणं राई भवइ ?, हंता गोयमा ! जाव भवइ, एवं
 एएणं अभिलावेणं नेयव्वं जाव जया णं भंते ! दाहिणङ्खे पढमा ओस० तथा णं
 उत्तरङ्खे जया णं उत्तरङ्खे तथा णं धायइसंडे दीवे मंदराणं पव्वयाणं पुरच्छिम-
 पच्चत्थिमेणं नत्थि ओस० जाव समणाउसो !, ? हंता गोयमा ! जाव समणाउसो !,
 जहा लवणसमुद्दस्स वत्तव्वया तहा कालोदस्सवि भाणियव्वा, नवरं कालोदस्स
 नामं भाणियव्वं । अब्भितरपुक्खरद्धे णं भंते ! सूरिया उदीचिपाईणमुग्गच्छ जहेव
 धायइसंडस्स वत्तव्वया तहेव अब्भितरपुक्खरद्धस्सवि भाणियव्वा नवरं अभिलावो
 जाव जाणेयव्वो जाव तथा णं अब्भितरपुक्खरद्धे मंदराणं पुरच्छिमपच्चत्थिमेणं
 नेवत्थि ओस० नेवत्थि उस्सप्पिणी अवट्ठिए णं तत्थ काले पन्नत्ते समणाउसो ! सेवं
 भंते ! २ ति ॥ १७८ ॥ पंचमसए पढमो उद्देसो समत्तो ॥

रायगिहे नगरे जाव एवं वदासी-अत्थि णं भंते ! ईसिं पुरेवाया पत्थावाया
 मंदावाया महावाया वार्यंति ? हंता ! अत्थि, अत्थि णं भंते ! पुरच्छिमेणं ईसिं पुरेवाया
 पत्थावाया मंदावाया महावाया वार्यंति ? हंता ! अत्थि । एवं पच्चत्थिमेणं दाहिणेणं
 उत्तरेणं उत्तरपुरच्छिमेणं पुरच्छिमदाहिणेणं दाहिणपच्चत्थिमेणं पच्छिमउत्तरेणं ॥
 जया णं भंते ! पुरच्छिमेणं ईसिं पुरेवाया पत्थावाया मंदावाया महावाया वार्यंति
 तया णं पच्चत्थिमेणवि ईसिं पुरेवाया जया णं पच्चत्थिमेणं ईसिं पुरेवाया तया णं
 पुरच्छिमेणवि ?, हंता गोयमा ! जया णं पुरच्छिमेणं तया णं पच्चत्थिमेणवि ईसिं
 जया णं पच्चत्थिमेणवि ईसिं तया णं पुरच्छिमेणवि ईसिं, एवं दिसासु विदिसासु ॥
 अत्थि णं भंते ! दीविच्चया ईसिं ?, हंता ! अत्थि । अत्थि णं भंते ! सामुद्दया ईसिं ?,
 हंता ! अत्थि । जया णं भंते ! दीविच्चया ईसिं तया णं सामुद्दयावि ईसिं जया
 णं सामुद्दया ईसिं तया णं दीविच्चयावि ईसिं ?, णो इण्ठे सम्भे । से केण्ठेणं भंते !
 एवं बुच्चइ जया णं दीविच्चया ईसिं णो णं तया सामुद्दया ईसिं जया णं सामुद्दया
 ईसिं णो णं तया दीविच्चया ईसिं ?, गोयमा ! तेसिं णं वायाणं अन्नमन्नस्स विवच्चा-
 सेणं लवणे समुद्दे वेलं नाइक्कमइ से तेण्ठेणं जाव वाया वार्यंति ॥ अत्थि णं भंते !
 ईसिं पुरेवाया पत्थावाया मंदावाया महावाया वार्यंति ?, हंता ! अत्थि । कया
 णं भंते ! ईसिं जाव वार्यंति ?, गोयमा ! जया णं वाउयाए अहारियं रियंति तया
 णं ईसिं जाव वार्यंति । अत्थि णं भंते ! ईसिं० ? हंता ! अत्थि, कया णं भंते !
 ईसिं पुरेवाया पत्था० ?, गोयमा ! जया णं वाउयाए उत्तरकिरियं रियइ तया णं
 ईसिं जाव वार्यंति । अत्थि णं भंते ! ईसिं० ?, हंता ! अत्थि, कया णं भंते ! ईसिं
 पुरेवाया पत्था० ?, गोयमा ! जया णं वाउकुमारा वाउकुमारीओ वा अप्पणो वा
 परस्स वा तदुभयस्स वा अट्ठाए वाउकायं उदीरंति तया णं ईसिं पुरेवाया जाव
 वार्यंति ॥ वाउकाए णं भंते ! वाउकायं चेव आपणमंति पाण० जहा खंदए तहा
 चत्तारि आलावगा नेयव्वा अणेगसयसहस्स० पुट्ठे उद्दाइ वा, ससररीरी निक्खमइ
 ॥ १७९ ॥ अह भंते ! ओदणे कुम्मासे सुरा एए णं किंसरीराति वत्तव्वं सिया ?,
 गोयमा ! ओदणे कुम्मासे सुराए य जे ण्णे दव्वे एए णं पुव्वभावपन्नवणं पडुच्च
 वणस्सइजीवसरीरा तओ पच्छा सत्थातीया सत्थपरिणामिआ अगणिज्झासिया अग-
 णिज्झसिया अगणिसेविया अगणिपरिणामिया अगणिजीवसरीराति वत्तव्वं सिया,
 सुराए य जे दवे दव्वे एए णं पुव्वभावपन्नवणं पडुच्च आउजीवसरीरा, तओ पच्छा
 सत्थातीया जाव अगणिकायसरीराति वत्तव्वं सिया । अहन्नं भंते ! अए तंवे तउए
 सीसए उवले कसट्टिया एए णं किंसरीराइ वत्तव्वं सिया ? गोयमा ! अए तंवे तउए

सीसए उवले कसट्टिया, एए णं पुव्वभावपन्नवणं पडुच्च पुढविजीवसरीरा तओ पच्छा सत्थातीया जाव अगणिजीवसरीराति वत्तव्वं सिया । अहण्णं भंते ! अट्ठी अट्ठिज्झामे चम्मे चम्मज्झामे रोमे २ सिंगे २ खुरे २ नखे २ एए णं किंसरीराति वत्तव्वं सिया ?, गोयमा ! अट्ठी चम्मे रोमे सिंगे खुरे नहे एए णं तसपाणजीवसरीरा अट्ठिज्झामे चम्मज्झामे रोमज्झामे सिंग० खुर० णहज्झामे एए णं पुव्वभावपण्णवणं पडुच्च तसपाणजीवसरीरा तओ पच्छा सत्थातीया जाव अगणिजीव० ति वत्तव्वं सिया । अह भंते ! इंगाले छारिए भुसे गोमए एए णं किंसरीराइ वत्तव्वं सिया ?, गोयमा ! इंगाले छारिए भुसे गोमए एए णं पुव्वभावपण्णवणं पडुच्च एगिंदियजीवसरीरप्पओगपरिणामियावि जाव पंचिंदियजीवसरीरप्पओगपरिणामियावि तओ पच्छा सत्थातीया जाव अगणिजीवसरीराति वत्तव्वं सिया ॥ १८० ॥ लवणे णं भंते ! समुदे केवइयं चक्रवालविकखंभेणं पन्नते ?, एवं नेयव्वं जाव लोगट्टिई लोगाणुभावे, सेवं भंते ! २ ति भगवं जाव विहरइ ॥ १८१ ॥

पंचमे सए वीओ उदेसो समत्तो ॥

अण्णउत्थिया णं भंते ! एवमाइक्खंति भा० प० एवं प० से जहानामए जाल-गठिया सिया आणुपुव्विगढिया अणंतरगढिया परंपरगढिया अन्नमन्नगढिया अन्नमन्नगुह्यत्ताए अन्नमन्नभारियत्ताए अन्नमन्नगुह्यसंभारियत्ताए अण्णमण्णघटत्ताए जाव चिट्ठंति, एवामेव बहूणं जीवाणं बहूसु आजाइसयसहस्सेसु बहूई आउयसहस्साई आणुपुव्विगढियाई जाव चिट्ठंति, एगेऽविय णं जीवे एगेणं समएणं दो आउयाई पडिसंवेदेइ, तंजहा-इहभविआउयं च परभविआउयं च, जं समयं इहभविआउयं पडिसंवेदेइ तं समयं परभविआउयं पडिसंवेदेइ जाव से कहमेयं भंते ! एवं ?, गोयमा ! जन्नं ते अन्नउत्थिया तं चेव जाव परभविआउयं च, जे ते एवमाहंसु तं मिच्छा, अहं पुण गोयमा ! एवमाइक्खामि जाव पल्लवेमि जाव अन्नमन्नघटत्ताए चिट्ठंति, एवामेव एगमेगस्स जीवस्स बहूहिं आजाइसहस्सेहिं बहूई आउयसहस्साई आणुपुव्विगढियाई जाव चिट्ठंति, एगेऽविय णं जीवे एगेणं समएणं एगं आउयं पडिसंवेदेइ, तंजहा-इहभविआउयं वा परभविआउयं वा, जं समयं इहभविआउयं पडिसंवेदेइ नो तं समयं पर० पडिसंवेदेइ जं समयं प० नो तं समयं इहभविआउयं प०, इहभविआउयस्स पडिसंवेयणाए नो परभविआउयं पडिसंवेदेइ परभविआउयस्स पडिसंवेयणाए नो इहभविआउयं पडिसंवेदेइ, एवं खलु एगे जीवे एगेणं समएणं एगं आउयं प० तंजहा-इहभ० वा परभ० वा ॥ १८२ ॥ जीवे णं भंते ! जे भविए नेरइए उवन्नजित्ताए से णं भंते ! किं साउए संक्रमइ निराउए संक्रमइ ?,

गोयमा ! साउए संक्रमइ नो निराउए संक्रमइ । से णं भंते ! आउए कहिं कडे कहिं समाइण्णे ? गोयमा ! पुरिमे भवे कडे पुरिमे भवे समाइण्णे, एवं जाव वेमाणियाणं इंडओ । से नूणं भंते ! जे जंभविए जोणिं उव्वज्जितए से तमाउयं पकरेइ, तंजहा-नेरइयाउयं वा जाव देवाउयं वा ?, हंता गोयमा ! जे जंभविए जोणिं उव्वज्जितए से तमाउयं पकरेइ, तंजहा-नेरइयाउयं वा तिरि० मणु० देवाउयं वा, नेरइयाउयं पकरेमाणे सत्तविहं पकरेइ, तंजहा-रयणप्पभापुढविनेरइयाउयं वा जाव अहेसत्तमापुढविनेरइयाउयं वा, तिरिक्खजोणियाउयं पकरेमाणे पंचविहं पकरेइ, तंजहा-एगिदियतिरिक्खजोणियाउयं वा, भेदो सव्वो भाणियव्वो, मणुस्साउयं दुविहं, देवाउयं चउव्विहं, सेवं भंते ! सेवं भंते ! ति ॥ १८३ ॥ पंचमे सए तइओ उहेसो समत्तो ॥

छउमत्थे णं भंते ! मणुस्से आउडिज्जमाणाइं सद्दाइं सुणेइ, तंजहा-संखसद्दाणि वा सिंगस० संखियस० खरसुहिस० पोयास० परिपिरियास० पणवस० पडहस० भंभास० होरंभस० भेरिसद्दाणि वा झल्लरिस० दुंदुहिस० तथाणि वा वितयाणि वा घणाणि वा झुसिराणि वा ?, हंता गोयमा ! छउमत्थे णं मणुस्से आउडिज्जमाणाइं सद्दाइं सुणेइ, तंजहा-संखसद्दाणि वा जाव झुसिराणि वा । ताइं भंते ! किं पुट्ठाइं सुणेइ अपुट्ठाइं सुणेइ ?, गोयमा ! पुट्ठाइं सुणेइ नो अपुट्ठाइं सुणेइ, जाव नियमा छहिसिं सुणेइ । छउमत्थे णं मणुस्से किं आरगयाइं सद्दाइं सुणेइ पारगयाइं सद्दाइं सुणेइ ?, गोयमा ! आरगयाइं सद्दाइं सुणेइ नो पारगयाइं सद्दाइं सुणेइ । जहा णं भंते ! छउमत्थे मणुस्से आरगयाइं सद्दाइं सुणेइ नो पारगयाइं सद्दाइं सुणेइ तहा णं भंते ! केवली मणुस्से किं आरगयाइं सद्दाइं सुणेइ पारगयाइं सद्दाइं सुणेइ ?, गोयमा ! केवली णं आरगयं वा पारगयं वा सव्वदूरमूलमणंतियं सइं जाणेइ पासइ, से केणट्ठेणं तं चेव केवली णं आरगयं वा पारगयं वा जाव पासइ ?, गोयमा ! केवली णं पुरच्छिमेणं मियंपि जाणइ अमियंपि जा० एवं दाहिणेणं पच्चत्थिमेणं उत्तरेणं उट्ठं अहे मियंपि जाणइ अमियंपि जा० सव्वं जाणइ केवली सव्वं पासइ केवली सव्वओ जाणइ पासइ सव्वकालं जा० पा० सव्वभावे जाणइ केवली सव्वभावे पासइ केवली ॥ अणंते नाणे केवलिसस अणंते दंसणे केवलिसस निव्वुडे नाणे केवलिसस निव्वुडे दंसणे केवलिसस से तेणट्ठेणं जाव पासइ ॥ १८४ ॥ छउमत्थे णं भंते ! मणुस्से हसेज्ज वा उस्सुयाएज्ज वा ?, हंता ! हसेज्ज वा उस्सुयाएज्ज वा, जहा णं भंते ! छउमत्थे मणुस्से हसेज्ज जाव उस्सु० तहा णं केवलीवि हसेज्ज वा उस्सुयाएज्ज वा ?, गोयमा ! नो इणट्ठे समट्ठे, से केणट्ठेणं भंते ! जाव

नो णं तहा केवली हसेज्ज वा जाव उस्सुयाएज्ज वा ?, गोयमा ! जण्णं जीवा चरि-
 त्तमोहणिज्जस्स कम्मस्स उदएणं हसंति वा उस्सुयार्यंति वा से णं केवलस्स नत्थि,
 से तेणट्ठेणं जाव नो णं तहा केवली हसेज्ज वा उस्सुयाएज्ज वा । जीवे णं भंते !
 हसमाणे वा उस्सुयमाणे वा कइ कम्मपयडीओ बंधइ ?, गोयमा ! सत्तविहबंधए वा
 अट्ठविहबंधए वा, णेरइएणं भंते ! हसमाणे वा उस्सुयमाणे वा कइ कम्मपगडीओ
 बंधइ ? गोयमा ! सत्तविहबंधए वा अट्ठविहबंधए वा, जीवा णं भंते ! हसमाणा वा
 उस्सुययमाणा वा कइ कम्मपगडीओ बंधंति ? गोयमा ! सत्तविहबंधगा वा अट्ठविह-
 बंधगा वा, णेरइयाणं पुच्छा, गोयमा ! सव्वे वि ताव होज्जा सत्तविहबंधगा अहवा
 सत्तविहबंधगावि अट्ठविहबंधगावि, अदुवा सत्तविहबंधगा य अट्ठविहबंधगा य ।
 एवं जाव वेमाणिए, पोहत्तिएहिं जीवेगिंदियवज्जो तियभंगो ॥ छउमत्थे णं भंते !
 मणूसे निद्दाएज्ज वा पयलाएज्ज वा ? हंता ! निद्दाएज्ज वा पयलाएज्ज वा, जहा
 हसेज्ज वा तहा नवरं दरिसणावरणिज्जस्स कम्मस्स उदएणं निद्दायंति वा पयलायंति
 वा, से णं केवलस्स नत्थि, अन्नं तं चेव । जीवे णं भंते ! निद्दायमाणे वा
 पयलायमाणे वा कइ कम्मपयडीओ बंधइ ?, गोयमा ! सत्तविहबंधए वा अट्ठविहबंध-
 ए वा, एवं जाव वेमाणिए, पोहत्तिएसु जीवेगिंदियवज्जो तियभंगो ॥ १८५ ॥
 हरी णं भंते ! हरिणेगमेसी सक्कूए इत्थीगब्भं संहरणमाणे किं गब्भाओ
 गब्भं साहरइ १ गब्भाओ जोणिं साहरइ २ जोणीओ गब्भं साहरइ ३
 जोणीओ जोणिं साहरइ ४ ?, गोयमा ! नो गब्भाओ गब्भं साहरइ नो
 गब्भाओ जोणिं साहरइ नो जोणीओ जोणिं साहरइ परामुसिय २ अव्वा-
 बाहेणं अव्वाबाहं जोणीओ गब्भं साहरइ ॥ पभू णं भंते ! हरिणेगमेसी सक्कस्स
 णं दूए इत्थीगब्भं नहसिरंसि वा रोमकूवंसि वा साहरित्तए वा नीहरित्तए वा ?,
 हंता ! पभू, नो चेव णं तस्स गब्भस्स किंचिवि आबाहं वा विबाहं वा उप्पाएज्जा
 छविच्छेदं पुण करेज्जा, एसुहुमं च णं साहरिज्ज वा नीहरिज्ज वा ॥ १८६ ॥
 तेणं कालेणं तेणं समएणं समणस्स भगवओ महावीरस्स अंतेवासी अइमुत्ते णासं
 कुमारसमणे पगइभइए जाव विणीए, तए णं से अइमुत्ते कुमारसमणे अण्णया
 कयाइ महावुट्ठिकार्यंसि निवयमाणंसि कक्खपडिग्गहरयहरणमायाए बहिया संपट्ठिए
 विहाराए, तए णं से अइमुत्ते कुमारसमणे वाहयं वहमाणं पासइ २ मट्ठियाए पालिं
 बंधइ २ णाविद्या मे २ नाविओविव णावमयं पडिग्गहगं उदगंसि कट्ठ पव्वाहमाणे २
 अभिरमइ, तं च थेरा अइक्खु, जेणेव समणे भगवं ० तेणेव उवागच्छंति २ एवं
 वदासी-एवं खलु देवाणुप्पियाणं अंतेवासी अइमुत्ते णासं कुमारसमणे से णं भंते !

अइमुत्ते कुमारसमणे कइहिं भवग्गहणेहिं सिज्झिहिइ जाव अंतं करेहिइ ?, अजोत्ति समणे भगवं महावीरे ते थेरे एवं वयासी-एवं खलु अजो ! मम अंतेवासी अइमुत्ते णांमं कुमारसमणे पगइभइए जाव विणीए से णं अइमुत्ते कुमारसमणे इमेणं चेव भवग्गहणेणं सिज्झिहिइ जाव अंतं करेहिइ, तं मा णं अजो ! तुब्भे अइमुत्तं कुमारसमणं हीलेह निदह खिसह गरहह अवमज्जह, तुब्भे णं देवाणुप्पिया ! अइमुत्तं कुमारसमणं अगिलाए संगिण्हह अगिलाए उवगिण्हह अगिलाए भत्तेणं पाणेणं विणएणं वेयावडियं करेह, अइमुत्ते णं कुमारसमणे अंतकरे चेव अंतिमसरीरिए चेव, तए णं ते थेरा भगवंतो समणेणं भगवया म० एवं वुत्ता समाणा समणं भगवं महावीरं वंदंति नमंसंति अइमुत्तं कुमारसमणं अगिलाए संगिण्हंति जाव वेयावडियं करेति ॥ १८७ ॥ तेणं कालेणं २ महासुक्काओ कप्पाओ महासग्गाओ महाविमाणाओ दो देवा महिङ्गिया जाव महाणुभागा समणस्स भगवओ महावीरस्स अंतियं पाउब्भूया, तए णं ते देवा समणं भगवं महावीरं मणसा चेव वंदंति नमंसंति मणसा चेव इमं एयारूवं वागरणं पुच्छंति-कइ णं भंते ! देवाणुप्पियाणं अंतेवासिसयाइं सिज्झिहिंति जाव अंतं करेहिंति ?, तए णं समणे भगवं महावीरे तेहिं देवेहिं मणसा पुट्ठे तेसिं देवाणं मणसा चेव इमं एयारूवं वागरणं वागरेइ-एवं खलु देवाणुप्पिया ! मम सत्त अंतेवासिसयाइं सिज्झिहिंति जाव अंतं करेहिंति, तए णं ते देवा समणेणं भगवया महावीरेणं मणसा पुट्ठेणं मणसा चेव इमं एयारूवं वागरणं वागरिया समाणा हट्ठुट्ठा जाव हयहियया समणं भगवं महावीरं वंदंति णमंसंति २ ता मणसा चेव सुस्समाणा णमंसमाणा अभिमुहा जाव पज्जुवासंति । तेणं कालेणं २ समणस्स भगवओ महावीरस्स जेट्ठे अंतेवासी इंदभूर्इ णांमं अणगारे जाव अदूरसामंते उद्धंजाणू जाव विहरइ, तए णं तस्स भगवओ गोयमस्स ज्ञाणंतरियाए वट्ठमाणस्स इमेयारूवे अज्झत्थिए जाव समुप्पज्जित्था, एवं खलु दो देवा महिङ्गिया जाव महाणुभागा समणस्स भगवओ महावीरस्स अंतियं पाउब्भूया तं नो खलु अहं ते देवे जाणामि कयराओ कप्पाओ वा सग्गाओ वा विमाणाओ वा कस्स वा अत्थस्स अट्ठाए इहं हव्वमागया ?, तं गच्छामि णं भगवं महावीरं वंदामि णमंसामि जाव पज्जुवासामि इमाइं च णं एयारूवाइं वागरणाइं पुच्छिस्सामिति कट्ठु एवं संपेहेइ २ उट्ठाए उट्ठेइ २ जेणेव समणे भगवं महा० जाव पज्जुवासइ, गोयमादि समणे भगवं म० भगवं गोयमं एवं वदासी-से णूणं तव गोयमा ! ज्ञाणंतरियाए वट्ठमाणस्स इमेयारूवे अज्झत्थिए जाव जेणेव मम अंतिए तेणेव हव्वमागए से णूणं गोयमा ! अत्थे समत्थे ?, हंता ! अत्थि, तं गच्छाहिं णं गोयमा ! एए चेव देवा

इमाई एयाळ्वाइ वागरणाइ वागरेहिंति, तए णं भगवं गोयमे समणेणं भगवया
महावीरेणं अब्भणुजाए समाणे समणं भगवं महावीरं वंदइ णमंसइ २ जेणेव ते
देवा तेणेव पहारेत्थ गमणाए, तए णं ते देवा भगवं गोयमं एज्जमाणं पासंति
२ हट्ठा जाव हयहियया खिप्पामेव अब्भुट्ठेति २ खिप्पामेव पच्चुवागच्छंति २ जेणेव
भगवं गोयमे तेणेव उवागच्छंति २ ता जाव णमंसित्ता एवं वयासी-एवं खल्ल
भंते ! अम्हे महाउक्काओ कप्पाओ महासग्गाओ महाविमाणाओ दो देवा महिद्धिया
जाव पाउब्भूआ तए णं अम्हे समणं भगवं महावीरं वंदामो णमंसामो २ मणसा
चेव इमाई एयाळ्वाइ वागरणाइ पुच्छामो-कइ णं भंते ! देवाणुप्पियाणं अंतैवा-
सिसयाइ सिज्झिहंति जाव अंतं करेहिंति ?, तए णं समणे भगवं महावीरे अम्हेहिं
मणसा पुट्ठे अम्हं मणसा चेव इमं एयाळ्वं वागरणं वागरेइ-एवं खल्ल देवाणु०
मम सत्त अंतैवासिसयाइ जाव अंतं करेहिंति, तए णं अम्हे समणेणं भगवया
महावीरेणं मणसा चेव पुट्ठेणं मणसा चेव इमं एयाळ्वं वागरणं वागरिया समाणा
समणं भगवं महावीरं वंदामो नमंसामो २ जाव पच्चुवासामोत्तिकट्ठु भगवं गोयमं
वंदंति नमंसंति २ जामेव दिसिं पाउ० तामेव दिसिं प० ॥ १८८ ॥ भंतेत्ति
भगवं गोयमे समणं जाव एवं वदासी-देवा णं भंते ! संजयाति वत्तव्वं सिया ?,
गोयमा ! णो तिणट्ठे समट्ठे, अब्भक्खाणमेयं, देवा णं भंते ! असंजयाइ
वत्तव्वं सिया ?, गोयमा ! णो तिणट्ठे०, णिडुरवयणमेयं, देवा णं भंते ! संजया-
संजयाति वत्तव्वं सिया ?, गोयमा ! णो तिणट्ठे समट्ठे, असब्भूयमेयं देवाणं, से किं
खाइ णं भंते ! देवाति वत्तव्वं सिया ?, गोयमा ! देवा णं नोसंजयाति वत्तव्वं
सिया ॥ १८९ ॥ देवा णं भंते ! कयराए भासाए भासंति ?, कयरा वा भासा
भासिज्जमाणी विसिस्सइ ?, गोयमा ! देवा णं अद्धमागहाए भासाए भासंति, सावि
य णं अद्धमागहा भासा भासिज्जमाणी विसिस्सइ ॥ १९० ॥ केवली णं भंते !
अंतकरं वा अंतिमसरीरियं वा जाणइ पासइ ?, हंता ! गोयमा ! जाणइ पासइ !
जहा णं भंते ! केवली अंतकरं वा अंतिमसरीरियं वा जाणति पासति तहा णं छउ-
मत्थेवि अंतकरं वा अंतिमसरीरियं वा जाणइ पासइ ?, गोयमा ! णो तिणट्ठे
समट्ठे, सोच्चा जाणइ पासइ, पमाणओ वा, से किं तं सोच्चा ?, सोच्चा णं केवलिस्स
वा केवलिसावयस्स वा केवलिसावियाए वा केवलित्वासगस्स वा केवलित्वासियाए
वा तप्पक्खियस्स वा तप्पक्खियसावगस्स वा तप्पक्खियसावियाए वा तप्पक्खिय-
उवासगस्स वा तप्पक्खियउवासियाए वा से तं सोच्चा ॥ १९१ ॥ से किं तं
पमाणे ?, पमाणे चउव्विहे प० तंजहा-पच्चक्खे अणुमाणे ओवम्मि आगमे, जहा

अणुओंगदारे तहा गेयव्वं पमाणं जाव तेण परं नो अत्तागमे नो अणंतरागमे परं-
 परागमे ॥ १९२ ॥ केवली णं भंते ! चरिमकम्मं वा चरिमणिज्जरं वा जाणइ
 पासइ ?, हुंता गोयमा ! जाणइ पासइ । जहा णं भंते ! केवली चरिमकम्मं वा
 जहा णं अंतकरेणं आलावगो तहा चरिमकम्मेणवि अपरिसेसिओ गेयव्वो ॥ १९३ ॥
 केवली णं भंते ! पणीयं मणं वा वइं वा धारेज्जा ?, हुंता ! धारेज्जा, जहा णं भंते !
 केवली पणीयं मणं वा वइं वा धारेज्जा ते णं वेमाणिया देवा जाणंति पासंति ?,
 गोयमा ! अत्थेगइया जाणंति पा० अत्थेगइया न जाणंति न पा०, से केणट्ठेणं
 जाव ण जाणंति ण पासंति ?, गोयमा ! वेमाणिया देवा दुविहा पण्णत्ता, तंजहा-
 माइमिच्छादिट्ठिउववन्नगा य अमाइसम्मदिट्ठिउववन्नगा य, तत्थ णं जे ते माइमि-
 च्छादिट्ठिउववन्नगा ते न जाणंति न पासंति, तत्थ णं जे ते अमाइसम्मदिट्ठिउव-
 वन्नगा ते णं जाणंति पासंति, से केणट्ठेणं एवं वु० अमाई सम्मदिट्ठी जाव पा० ?,
 गोयमा ! अमाई सम्मदिट्ठी दुविहा पण्णत्ता-अणंतरोववन्नगा य परंपरोववन्नगा य,
 तत्थ अणंतरोववन्नगा न जा० परंपरोववन्नगा जाणंति, से केणट्ठेणं भंते ! एवं
 परंपरोववन्नगा जाव जाणंति ?, गोयमा ! परंपरोववन्नगा दुविहा पण्णत्ता-पज्जत्ता
 य अपज्जत्ता य, पज्जत्ता जा० अपज्जत्ता न जा०, एवं अणंतरपरंपरपज्जत्ताप-
 ज्जत्ता य उवउत्ता अणुवउत्ता, तत्थ णं जे ते उवउत्ता ते जा० पा० से तेणट्ठेणं
 तं चेव ॥ १९४ ॥ पभू णं भंते ! अणुत्तरोववाइया देवा तत्थगया चेव समाणा
 इहगएणं केवलिणा सद्धिं आलावं वा संलावं वा करेतए ?, हुंता ! पभू, से केणट्ठेणं
 जाव पभू णं अणुत्तरोववाइया देवा जाव करेतए ?, गोयमा ! जण्णं अणुत्तरोववा-
 इया देवा तत्थगया चेव समाणा अट्ठं वा हेउं वा पसिणं वा वागरणं वा कारणं
 वा पुच्छंति तण्णं इहगए केवली अट्ठं वा जाव वागरणं वा वागरेइ से तेणट्ठेणं ।
 जन्नं भंते ! इहगए चेव केवली अट्ठं वा जाव वागरेइ तण्णं अणुत्तरोववाइया देवा
 तत्थगया चेव समाणा जा० पा० ?, हुंता ! जाणंति पासंति, से केणट्ठेणं जाव
 पासंति ?, गोयमा ! तेसि णं देवाणं अणंताओ मणोदव्ववग्गणाओ लद्धाओ पत्ताओ
 अभिसमन्नागयाओ भवंति से तेणट्ठेणं जण्णं इहगए केवली जाव पा० ॥ १९५ ॥
 अणुत्तरोववाइया णं भंते ! देवा किं उदिन्नमोहा उवसंतमोहा खीणमोहा ?, गोयमा !
 नो उदिन्नमोहा उवसंतमोहा णो खीणमोहा ॥ १९६ ॥ केवली णं भंते ! आया-
 णेहिं जा० पा० ?, गोयमा ! णो तिण्ठे स०, से केणट्ठेणं जाव केवली णं आया-
 णेहिं न जाणइ न पासइ ?, गोयमा ! केवली णं पुरच्छिमेणं मियंपि जाणइ
 अमियंपि जा० जाव निव्वुडे दंसणे केवलिस्स से तेण० ॥ १९७ ॥ केवली णं

भंते ! अस्सि समयंसि जेसु आगासपदेसेसु हत्थं वा पायं वा बाहुं वा ऊरुं वा ओगाहिता णं चिट्ठइ पभू णं भंते ! केवली सेयकालंसिवि तेसु चेव आगास-पदेसेसु हत्थं वा जाव ओगाहिता णं चिट्ठित्तए ?, गोयमा ! णो ति०, से केणट्ठेणं भंते ! जाव केवली णं अस्सि समयंसि जेसु आगासपदेसेसु हत्थं वा जाव चिट्ठइ णो णं पभू केवली सेयकालंसिवि तेसु चेव आगासपदेसेसु हत्थं वा जाव चिट्ठित्तए ?, गो० ! केवलस्स णं वीरियसजोगसइव्वयाए चलाई उवगरणाई भवंति, चलोवग-रणट्ठयाए य णं केवली अस्सि समयंसि जेसु आगासपदेसेसु हत्थं वा जाव चिट्ठइ णो णं पभू केवली सेयकालंसिवि तेसु चेव जाव चिट्ठित्तए, से तेणट्ठेणं जाव चुच्चइ-केवली णं अस्सि समयंसि जाव चिट्ठित्तए ॥ १९८ ॥ पभू णं भंते ! चोइसपुव्वी घडाओ घडसहस्सं पडाओ पडसहस्सं कडाओ २ रहाओ २ छत्ताओ छत्तसहस्सं दंडाओ दंडसहस्सं अभिनिव्वट्ठेता उवदंसेत्तए ?, हंता ! पभू, से केणट्ठेणं पभू चोइसपुव्वी जाव उवदंसेत्तए ? गोयमा ! चउइसपुव्विस्स णं अणंताई दव्वाई उक्क-रियाभेएणं भिज्जमाणाई लद्धाई पत्ताई अभिसमन्नागयाई भवंति, से तेणट्ठेणं जाव उवदंसेत्तए । सेवं भंते ! सेवं भंते ! ति ॥ १९९ ॥ **पंचमे सए चउत्थो उद्देसो ॥**

छउमत्थे णं भंते ! मणूसे तीयमणंतं सासयं समयं केवलेणं संजमेणं जहा पढ-मसए चउत्थुद्देसे आलावगा तथा नेयव्वा जाव अलमत्थुत्ति वत्तव्वं सिया ॥ २०० ॥ अन्नउत्थिया णं भंते ! एवमाइक्खंति जाव परुवेंति सव्वे पाणा सव्वे भूया सव्वे जीवा सव्वे सत्ता एवंभूयं वेदणं वेदेंति से कहमेयं भंते ! एवं ?, गोयमा ! जणं ते अन्नउत्थिया एवमाइक्खंति जाव वेदेंति जे ते एवमाहंसु मिच्छा ते एवमा-हंसु, अहं पुण गोयमा ! एवमाइक्खामि जाव परुवेमि अत्थेगइया पाणा भूया जीवा सत्ता एवंभूयं वेदणं वेदेंति अत्थेगइया पाणा भूया जीवा सत्ता अणेवंभूयं वेदणं वेदेंति, से केणट्ठेणं अत्थेगइया ? तं चेव उच्चारयव्वं, गोयमा ! जे णं पाणा भूया जीवा सत्ता जहा कडा कम्मा तथा वेदणं वेदेंति ते णं पाणा भूया जीवा सत्ता एवंभूयं वेदणं वेदेंति, जे णं पाणा भूया जीवा सत्ता जहा कडा कम्मा नो तथा वेदणं वेदेंति ते णं पाणा भूया जीवा सत्ता अणेवंभूयं वेदणं वेदेंति, से तेणट्ठेणं तहेव । नेरइया णं भंते ! किं एवंभूयं वेदणं वेदेंति अणेवंभूयं वेदणं वेदेंति ?, गोयमा ! नेर-इया णं एवंभूयं वेदणं वेदेंति अणेवंभूयं वेदणं वेदेंति । से केणट्ठेणं तं चेव ? गोयमा ! जे णं नेरइया जहा कडा कम्मा तथा वेयणं वेदेंति ते णं नेरइया एवंभूयं वेदणं वेदेंति जे णं नेरइया जहा कडा कम्मा णो तथा वेदणं वेदेंति ते णं नेरइया अणेवंभूयं वेदणं वेदेंति, से तेणट्ठेणं, एवं जाव वेमाणिया संसारमंडलं नेयव्वं

॥ २०१ ॥ जंबुद्वीवे णं भंते ! भारहे वासे इमीसे ओस० कइ कुलगरा होत्था ?, गोयमा ! सत्त एवं तित्थयरा तित्थयरमायरो पियरो पढमा सिस्सिणीओ चक्रवट्टी-मायरो पियरो इत्थिरयणं बलदेवा वासुदेवा वासुदेवमायरो पियरो, एएसिं पडिसत्तू जहा समवाए णामपरिवादी तहा णेयव्वा, सेवं भंते ! २ ति जाव विहरइ ॥ २०२ ॥
पंचमसए पंचमो उद्देसओ समत्तो ॥

कहण्णं भंते ! जीवा अप्पाउयत्ताए कम्मं पकरेंति ?, गोयमा ! तिहिं ठाणेहिं, तंजहा-पाणे अइवाएत्ता मुसं वइत्ता तहारुवं समणं वा माहणं वा अफासुणं अणे-सणिज्जेणं असणपाणखाइमसाइमेणं पडिलाभेत्ता, एवं खलु जीवा अप्पाउयत्ताए कम्मं पकरेन्ति ॥ कहण्णं भंते ! जीवा दीहाउयत्ताए कम्मं पकरेंति ?, गोयमा ! तिहिं ठाणेहिं-नो पाणे अइवाइत्ता नो मुसं वइत्ता तहारुवं समणं वा माहणं वा फासुण-सणिज्जेणं असणपाणखाइमसाइमेणं पडिलाभेत्ता एवं खलु जीवा दीहाउयत्ताए कम्मं पकरेंति ॥ कहण्णं भंते ! जीवा असुभदीहाउयत्ताए कम्मं पकरेंति ?, गोयमा ! पाणे अइवाइत्ता मुसं वइत्ता तहारुवं समणं वा माहणं वा हीलित्ता निदिता खिसित्ता गरहित्ता अवमज्जित्ता अन्नयरेणं अमणुज्जेणं अपीइकारएणं असणपाणखाइमसाइमेणं पडिलाभेत्ता एवं खलु जीवा असुभदीहाउयत्ताए कम्मं पकरेंति ॥ कहण्णं भंते ! जीवा सुभदीहाउयत्ताए कम्मं पकरेंति ?, गोयमा ! नो पाणे अइवाइत्ता नो मुसं वइत्ता तहारुवं समणं वा माहणं वा वंदित्ता नमंसित्ता जाव पज्जुवासित्ता अन्नयरेणं मणुज्जेणं पीइकारएणं असणपाणखाइमसाइमेणं पडिलाभेत्ता एवं खलु जीवा सुभ-दीहाउयत्ताए कम्मं पकरेंति ॥ २०३ ॥ गाहावइस्स णं भंते ! भंडं विकिणमाणस्स केइ भंडं अवहरेज्जा तस्स णं भंते ! तं भंडं अणुगवेसमाणस्स किं आरंभिया किरिया कज्जइ परिग्गहिया० माया० अप० मिच्छा० ?, गोयमा ! आरंभिया किरिया कज्जइ परि० माया० अपच० मिच्छादंसणकिरिया सिय कज्जइ सिय नो कज्जइ ॥ अह से भंडे अभिसमन्नागए भवइ, तओ से पच्छा सव्वाओ ताओ पयणुईभवन्ति ॥ गाहावइस्स णं भंते ! तं भंडं विकिणमाणस्स कहए भंडं साइ-ज्जेज्जा भंडे य से अणुवणीए सिया, गाहावइस्स णं भंते ! ताओ भंडाओ किं आरंभिया किरिया कज्जइ जाव मिच्छादंसणकिरिया कज्जइ ? कइयस्स वा ताओ भंडाओ किं आरंभिया किरिया कज्जइ जाव मिच्छादंसणकिरिया कज्जइ ?, गोयमा ! गाहावइस्स ताओ भंडाओ आरंभिया किरिया कज्जइ जाव अपचक्खाणिमा मिच्छा-दंसणवत्तिया किरिया सिय कज्जइ सिय नो कज्जइ, कइयस्स णं ताओ सव्वाओ पयणुईभवन्ति । गाहावइस्स णं भंते ! भंडं विकिणमाणस्स जाव भंडे से उवणीए

सिया कइयस्स णं भंते ! ताओ भंडाओ किं आरंभिया किरिया कज्जइ ?, गाहावइस्स वा ताओ भंडाओ किं आरंभिया किरिया कज्जइ ?, गोयमा ! कइयस्स ताओ भंडाओ हेट्ठिळाओ चत्तारि किरियाओ कज्जंति सिच्छादंसणकिरिया भयणाए गाहावइस्स णं ताओ सव्वाओ पयणुईभवन्ति । गाहावइस्स णं भंते ! भंडं जाव धणे यं से अणुवणीए सिया एवंपि जहा भंडे उवणीए तहा नेयव्वं चउत्थो आलावगो, धणे से उवणीए सिया जहा पढसो आलावगो भंडे य से अणुवणीए सिया तहा नेयव्वो पढमचउत्थाणं एक्को गमो विइयतइयाणं एक्को गमो ॥ अगणिकाए णं भंते ! अहुणोज्जलिए समाणे महाकम्मतराए चेव महाकिरियतराए चेव महासवतराए चेव महावेयणतराए चेव भवइ, अहे णं समए २ वोक्कसिज्जमाणे २ चरिमकालसमयंसि इंगालभूए मुम्मुरभूए छारियभूए तओ पच्छा अप्पकम्मतराए चेव अप्पकिरियतराए चेव अप्पासवतराए चेव अप्पवेयणतराए चेव भवइ ?, इंता गोयमा ! अगणिकाए णं अहुणोज्जलिए समाणे तं चेव ॥ २०४ ॥ पुरिसे णं भंते ! धणुं परामुसइ धणुं परामुसित्ता उउं परामुसइ २ ठाणं ठाइ ठाणं ठिब्बा आययकणाययं उउं करेइ आययकन्नाययं उउं करेत्ता उउं वेहासं उउं उव्विहइ २ तओ णं से उउं उउं वेहासं उव्विहिए समाणे जाइं तत्थ पाणाइं भूयाइं जीवइं सत्ताइं अभिहणइ वत्तेइ लेस्सेइ संघाएइ संघट्टेइ परियावेइ किलामेइ ठाणाओ ठाणं संकामेइ जीवियाओ ववरोवेइ तए णं भंते ! से पुरिसे कइकिरिए ?, गोयमा ! जावं च णं से पुरिसे धणुं परामुसइ २ जाव उव्विहइ तावं च णं से पुरिसे काइयाए जाव पाणाइयायकिरियाए पंचहिं किरियाहिं पुट्ठे, जेसिंपि य णं जीवाणं सरीरेहिं धणू निव्वत्तिए तेऽवि य णं जीवा काइयाए जाव पंचहिं किरियाहिं पुट्ठे(ट्ठा) एवं धणुपुट्ठे पंचहिं किरियाहिं, जीवा पंचहिं, ण्हारु पंचहिं, उस्स पंचहिं, सरे पत्तणे फले ण्हारु पंचहिं ॥ २०५ ॥ अहे णं से उउं अप्पणो गुरुयत्ताए भारियत्ताए गुरुयसंभारियत्ताए अहे वीससाए पच्चोवयमाणे जाइं तत्थ पाणाइं जाव जीवियाओ ववरोवेइ तावं च णं से पुरिसे कइकिरिए ?, गोयमा ! जावं च णं से उउं अप्पणो गुरुयत्ताए जाव ववरोवेइ तावं च णं से पुरिसे काइयाए जाव चउहिं किरियाहिं पुट्ठे, जेसिंपि य णं जीवाणं सरीरेहिं धणू निव्वत्तिए तेवि जीवा चउहिं किरियाहिं, धणुपुट्ठे चउहिं, जीवा चउहिं, ण्हारु चउहिं, उस्स पंचहिं, सरे पत्तणे फले ण्हारु पंचहिं, जेवि य से जीवा अहे पच्चोवयमाणस्स उव्वगहे चिट्ठंति तेवि य णं जीवा काइयाए जाव पंचहिं किरियाहिं पुट्ठा ॥ २०६ ॥ अण्णउत्थिया णं भंते ! एवमाइव्वीति जाव पुरुवेत्ति से जहानामए-उव्वइं जुवाणे हत्थेणं हत्थे गेण्हेज्जा

चक्रस्स वा नाभी अरगाउत्ता सिया एवामेव जाव चत्तारि पंच जोयणसयाई बहु-
समाइहे मणुयलोए मणुस्सेहिं, से कहमेयं भंते ! एवं ?, गोयमा ! जणं ते अण्ण-
उत्थिया जाव मणुस्सेहिं जे ते एवमाहंसु मिच्छा०, अहं पुण गोयमा ! एवमाइ-
क्खामि जाव एवामेव चत्तारि पंच जोयणसयाई बहुसमाइण्णे निरयलोए नेरइएहिं
॥ २०७ ॥ नेरइया णं भंते ! किं एगत्तं पभू विउव्वित्तए पुहुत्तं पभू विउव्वित्तए ?,
जहा जीवाभिगमे आलावगो तहा नेयव्वो जाव दुरहियासे ॥ २०८ ॥ आहाकम्मं
अणवज्जेत्ति मणं पहारैत्ता भवइ, से णं तस्स ठाणस्स अणालोइयपडिक्कंते कालं
करेइ नत्थि तस्स आराहणा, से णं तस्स ठाणस्स आलोइयपडिक्कंते कालं करेइ
अत्थि तस्स आराहणा, एएणं गमेणं नेयव्वं-कीयगडं ठवियं रइयं कंतारभत्तं
दुब्भिकखभत्तं वइलियाभत्तं गिलाणभत्तं सेजायरपिडं रायपिडं । आहाकम्मं अण-
वज्जेत्ति बहुजणमज्झे भासित्ता सयमेव परिभुंजित्ता भवइ से णं तस्स ठाणस्स
जाव अत्थि तस्स आराहणा, एयंपि तह चेव जाव रायपिडं । आहाकम्मं अणव-
ज्जेत्ति सयं अन्नमन्नस्स अणुप्पदावेत्ता भवइ, से णं तस्स एयं तह चेव जाव
रायपिडं । आहाकम्मं णं अणवज्जेत्ति बहुजणमज्झे पच्चवइत्ता भवइ से णं तस्स
जाव अत्थि आराहणा जाव रायपिडं ॥ २०९ ॥ आयरियउवज्जाए णं भंते !
सविसयंसि गणं अगिलाए संगिण्हमाणे अगिलाए उवगिण्हमाणे कइहिं भवग्गह-
णेहिं सिज्झइ जाव अंतं करेइ ?, गोयमा ! अत्थेगइए तेणेव भवग्गहणेणं सिज्झइ
अत्थेगइए दोच्चेणं भवग्गहणेणं सिज्झइ तच्चं पुण भवग्गहणं णाइक्कमइ ॥ २१० ॥ जे
णं भंते ! परं अलिएणं असब्भूएणं अब्भक्खाणेणं अब्भक्खाइ तस्स णं कहप्पगारा
कम्मा कज्जति ?, गोयमा ! जे णं परं अलिएणं असंत(एणं)वयणेणं अब्भक्खाणेणं
अब्भक्खाइ तस्स णं तहप्पगारा चेव कम्मा कज्जति, जत्थेव णं अभिसमा-
गच्छंति तत्थेव णं पडिस्सवेदंति तथो से पच्छा वेदंति सेवं भंते । २ त्ति ॥ २११ ॥

पंचमसए छट्ठो उद्देसो समत्तो ॥

परमाणुपोगले णं भंते ! एयइ वेयइ जाव तं तं भावं परिणमइ ?, गोयमा !
सिय एयइ वेयइ जाव परिणमइ सिय णो एयइ जाव णो परिणमइ । दुपदेसिए
णं भंते ! खंवे एयइ जाव परिणमइ ?, गोयमा ! सिय एयइ जाव परिणमइ सिय
णो एयइ जाव णो परिणमइ, सिय देसे एयइ देसे नो एयइ । तिपएसिए णं
भंते ! खंवे एयइ० ?, गोयमा ! सिय एयइ सिय नो एयइ, सिय देसे एयइ नो
देसे एयइ सिय देसे एयइ नो देसा एयंति सिय देसा एयंति नो देसे एयइ । चउप्प-
एसिए णं भंते ! खंवे एयइ० ?, गोयमा ! सिय एयइ सिय नो एयइ सिय देसे

एयइ णो देसे एयइ सिय देसे एयइ णो देसा एयंति सिय देसा एयंति नो देसे
 एयइ सिय देसा एयंति नो देसा एयंति जहा चउप्पदेसिओ तहा पंचपदेसिओ
 तहा जाव अणंतपदेसिओ ॥ २१२ ॥ परमाणुपोगगले णं भंते ! असिधारं वा खुर-
 धारं वा ओगाहेज्जा ?, हंता ! ओगाहेज्जा ! से णं भंते ! तत्थ छिजेज्ज वा भिजेज्ज
 वा ?, गोयमा ! णो तिण्ण्डे समट्ठे, नो खलु तत्थ सत्थं कमइ, एवं जाव असंखेज्ज-
 पएसिओ । अणंतपदेसिए णं भंते ! खंधे असिधारं वा खुरधारं वा ओगाहेज्जा ?,
 हंता ! ओगाहेज्जा, से णं तत्थ छिजेज्ज वा भिजेज्ज वा ?, गोयमा ! अत्थेगइए
 छिजेज्ज वा भिजेज्ज वा अत्थेगइए नो छिजेज्ज वा नो भिजेज्ज वा, एवं अगणि-
 कायस्स मज्झमज्झेणं तहिं णवरं झियाएज्जा भाणियव्वं, एवं पुक्खलसंवट्ठगस्स
 महामेहस्स मज्झमज्झेणं तहिं उल्ले सिया, एवं गंगाए महानइए पडिसोयं हव्वमा-
 गच्छेज्जा, तहिं विणिहायमावजेज्जा, उदगावत्तं वा उदगबिंदुं वा ओगाहेज्जा से णं
 तत्थ परियावजेज्जा ॥ २१३ ॥ परमाणुपोगगले णं भंते ! किं सअट्ठे समज्झे सप-
 एसे ? उदाहु अणट्ठे अमज्झे अपएसे ?, गोयमा ! अणट्ठे अमज्झे अपएसे नो सअट्ठे
 नो समज्झे नो सपएसे ॥ दुपदेसिए णं भंते ! खंधे किं सअट्ठे समज्झे सपदेसे उदाहु
 अणट्ठे अमज्झे अपदेसे ?, गोयमा ! सअट्ठे अमज्झे सपदेसे णो अणट्ठे णो समज्झे
 णो अपदेसे । तिपदेसिए णं भंते ! खंधे पुच्छा, गोयमा ! अणट्ठे समज्झे सपदेसे
 नो सअट्ठे णो अमज्झे णो अपदेसे, जहा दुपदेसिओ तहा जे समा ते भाणियव्वा,
 जे विसमा ते जहा तिपएसिओ तहा भाणियव्वा । संखेज्जपदेसिए णं भंते ! खंधे किं
 सअट्ठे ६ ? पुच्छा, गोयमा ! सिय सअट्ठे अमज्झे सपदेसे सिय अणट्ठे समज्झे सप-
 देसे जहा संखेज्जपदेसिओ तहा असंखेज्जपदेसिओऽवि अणंतपदेसिओऽवि ॥ २१४ ॥
 परमाणुपोगगले णं भंते ! परमाणुपोगगलं फुसमाणे किं देसेणं देसं फुसइ १ देसेणं
 देसे फुसइ २ देसेणं सव्वं फुसइ ३ देसेहिं देसं फुसइ ४ देसेहिं देसे फुसइ ५
 देसेहिं सव्वं फुसइ ६ सव्वेणं देसं फुसइ ७ सव्वेणं देसे फुसइ ८ सव्वेणं सव्वं
 फुसइ ९ ?, गोयमा ! णो देसेणं देसं फुसइ णो देसेणं देसे फुसइ णो देसेणं सव्वं
 फुसइ णो देसेहिं देसं फुसइ नो देसेहिं देसे फुसइ नो देसेहिं सव्वं फुसइ णो
 सव्वेणं देसं फुसइ णो सव्वेणं देसे फुसइ सव्वेणं सव्वं फुसइ, एवं परमाणुपोगगले
 दुपदेसियं फुसमाणे सत्तमणवमेहिं फुसइ, परमाणुपोगगले तिपएसियं फुसमाणे
 णिप्पच्छिमएहिं तिहिं फु०, जहा परमाणुपोगगले तिपएसियं फुसविओ एवं फुसावे-
 यव्वो जाव अणंतपएसिओ ॥ दुपएसिए णं भंते ! खंधे परमाणुपोगगलं फुसमाणे
 पुच्छा, तइयत्तवमेहिं फुसइ, दुपदेसियं फुसमाणो पढमतइयत्तमणवमेहिं फुसइ,

दुपदेसिओ तिपदेसियं फुसमाणो आदिछएहि य पच्छिछएहि य तिहिं फुसइ, मज्झि-
मएहिं तिहिं विपडिसेहेयव्वं, दुपदेसिओ जहा तिपदेसियं फुसाविओ एवं फुसावेयव्वो
जाव अणंतपएसियं । तिपएसिए णं भंते ! खंधे परमाणुपोगलं फुसमाणे पुच्छा,
तइयछट्टणवमेहिं फुसइ, तिपएसिओ दुपएसियं फुसमाणो पढमएणं तइएणं चउ-
त्थछट्टसत्तमणवमेहिं फुसइ, तिपएसिओ तिपएसियं फुसमाणो सव्वेसुवि ठाणेसु
फुसइ, जहा तिपएसिओ तिपदेसियं फुसाविओ एवं तिपदेसिओ जाव अणंतपएसि-
एणं संजोएयव्वो, जहा तिपएसिओ एवं जाव अणंतपएसिओ भाणियव्वो ॥२१५॥
परमाणुपोगले णं भंते ! कालओ केवच्चिरं होइ ?, गोयमा ! जहन्नेणं एणं समयं
उक्कोसेणं असंखेज्जं कालं, एवं जाव अणंतपएसिओ । एगपदेसोगाढे णं भंते !
पोगले सेए तम्मि वा ठाणे अन्नंमि वा ठाणे कालओ केवच्चिरं होइ ?, गोयमा !
जह० एणं समयं उक्को० आवलियाए असंखेज्जइभागं, एवं जाव असंखेज्जपदेसो-
गाढे । एगपदेसोगाढे णं भंते ! पोगले निरेए कालओ केवच्चिरं होइ ?, गोयमा !
जहन्नेणं एणं समयं उक्कोसेणं असंखेज्जं कालं, एवं जाव असंखेज्जपदेसोगाढे । एग-
गुणकालए णं भंते ! पोगले कालओ केवच्चिरं होइ ?, गोयमा ! जह० एणं समयं
उ० असंखेज्जं कालं एवं जाव अणंतगुणकालए, एवं वन्नगंधरसफास० जाव अणंत-
गुणलुक्खे, एवं सुहुमपरिणए पोगले एवं बायरपरिणए पोगले । सइपरिणए णं
भंते ! पोगले कालओ केवच्चिरं होइ ?, गोयमा ! ज० एणं समयं उ० आवलियाए
असंखेज्जइभागं, असइपरिणए जहा एगगुणकालए ॥ परमाणुपोगलस्स णं भंते !
अंतरं कालओ केवच्चिरं होइ ?, गोयमा ! जहन्नेणं एणं समयं उक्कोसेणं असंखेज्जं
कालं, दुपएसियस्स णं भंते ! खंधस्स अंतरं कालओ केवच्चिरं होइ ?, गोयमा !
जहन्नेणं एणं समयं उक्कोसेणं अणंतं कालं, एवं जाव अणंतपएसिओ । एगपएसो-
गाढस्स णं भंते ! पोगलस्स सेयस्स अंतरं कालओ केवच्चिरं होइ ?, गोयमा !
जहन्नेणं एणं समयं उक्कोसेणं असंखेज्जं कालं, एवं जाव असंखेज्जपएसोगाढे । एग-
पएसोगाढस्स णं भंते ! पोगलस्स निरेयस्स अंतरं कालओ केवच्चिरं होइ ?,
गोयमा ! जहन्नेणं एणं समयं उक्कोसेणं आवलियाए असंखेज्जइभागं, एवं जाव असं-
खेज्जपएसोगाढे । वन्नगंधरसफाससुहुमपरिणयबायरपरिणयाणं एसिं जं चेव संचि-
ट्टणा तं चेव अंतरंपि भाणियव्वं । सइपरिणयस्स णं भंते ! पोगलस्स अंतरं
कालओ केवच्चिरं होइ ?, गोयमा ! जहन्नेणं एणं समयं उक्कोसेणं असंखेज्जं कालं ।
असइपरिणयस्स णं भंते ! पोगलस्स अंतरं कालओ केवच्चिरं होइ ?, गोयमा !
जहन्नेणं एणं समयं उक्कोसेणं आवलियाए असंखेज्जइभागं ॥ २१६ ॥ एयस्स णं

भंते ! दव्वट्टाणाउयस्स खेत्तट्टाणाउयस्स ओगाहणट्टाणाउयस्स भावट्टाणाउयस्स
 कयरे २ जाव विसेसाहिया वां ?, गोयमा ! सव्वत्थोवे खेत्तट्टाणाउए ओगाहणट्टा-
 णाउए असंखेज्जगुणे दव्वट्टाणाउए असंखेज्जगुणे भावट्टाणाउए असंखेज्जगुणे-
 खेतोगाहणदव्वे भावट्टाणाउयं च अप्पबहुं । खेते सव्वत्थोवे सेसा ठाणा असं-
 खेज्जा ॥ १ ॥ २१७ ॥ नेरइया णं भंते ! किं सारंभा सपरिग्गहा उदाहु अणारंभा
 अपरिग्गहा ?, गोयमा ! नेरइया सारंभा सपरिग्गहा नो अणारंभा णो अपरि-
 ग्गहा । से केणट्ठेणं जाव अपरिग्गहा ?, गोयमा ! नेरइया णं पुढविकायं समारंभंति
 जाव तसकायं समारंभंति सरीरा परिग्गहिया भवंति कम्मा परिग्गहिया भवंति
 सच्चित्ताचित्तमीसयाइं दव्वाइं परि० भ०, से तेणट्ठेणं तं चेव । असुरकुमारा णं
 भंते ! किं सारंभा ४ ? पुच्छा, गोयमा ! असुरकुमारा सारंभा सपरिग्गहा नो अणा-
 रंभा अप० । से केणट्ठेणं ?, गोयमा ! असुरकुमारा णं पुढविकायं समारंभंति
 जाव तसकायं समारंभंति सरीरा परिग्गहिया भवंति कम्मा परिग्गहिया भवंति
 भवणा परि० भवंति देवा देवीओ मणुस्सा मणुस्सीओ तिरिक्खजोणिया तिरिक्ख-
 जोणिणीओ परिग्गहियाओ भवंति आसणसयणभंडमत्तोवगरणा परिग्गहिया भवंति
 सच्चित्ताचित्तमीसयाइं दव्वाइं परिग्गहियाइं भवंति से तेणट्ठेणं तहेव एवं जाव
 थणियकुमारा । एगिंदिया जहा नेरइया । बेइंदिया णं भंते ! किं सारंभा सपरि-
 ग्गहा तं चेव जाव सरीरा परिग्गहिया भवंति बाहिरिया भंडमत्तोवगरणा परि०
 भवंति सच्चित्ताचित्त० जाव भवंति एवं जाव चउरिंदिया । पंचेंदियतिरिक्खजोणिया
 णं भंते ! तं चेव जाव कम्मा परि० भवन्ति टंका कूडा सेला सिहरी पब्भारा
 परिग्गहिया भवंति जलथलबिलगुहालेणा परिग्गहिया भवंति उज्झरनिज्झरचिल्ल-
 पल्लवपिप्पणा परिग्गहिया भवंति अगडतडागदहनईओ वाविपुक्खरिणीवीहिया
 गुंजालिया सरा सरपंतियाओ सरसरपंतियाओ बिलपंतियाओ परिग्गहियाओ भवंति
 आरामुज्जाणा काणणा वणाइं वणसंडाइं वणराइंओ परिग्गहियाओ भवन्ति देवउ-
 लसभापवाथ्थूभाखाइयपरिखाओ परिग्गहियाओ भवंति पागारट्टालगचरियदारगो-
 पुरा परिग्गहिया भवंति पासायघरसरणलेणआवणा परिग्गहिया भवंति सिंघाडगति-
 गचउक्कचचरउम्मुहमहापहा परिग्गहिया भवंति सगडरहजाणजुग्गगिळ्ळिचिल्लिसी-
 यसंदमाणियाओ परिग्गहियाओ भवंति लोहीलोहकडाहकडुच्छुया परिग्गहिया
 भवंति भवणा परिग्गहिया भवंति देवा देवीओ मणुस्सा मणुस्सीओ तिरिक्खजो-
 णिआ तिरिक्खजोणिणीओ आसणसयणखंभंडसच्चित्ताचित्तमीसयाइं दव्वाइं परि-
 ग्गहियाइं भवंति से तेणट्ठेणं०, (जहा) तिरिक्खजोणिया तहा मणुस्सावि

भाणियच्चा, वाणमंतरजोइसवेमाणिया जहा भवणवासी तहा नेयच्चा ॥ २१८ ॥
 पंच हेऊ पण्णत्ता, तंजहा-हेउं जाणइ हेउं पासइ हेउं बुज्झइ हेउं अभिसमाग-
 च्छइ हेउं छउमत्थमरणं मरइ ॥ पंच हेऊ प०, तंजहा-हेउणा जाणइ जाव
 हेउणा छउमत्थमरणं मरइ ॥ पंच हेऊ पण्णत्ता, तंजहा-हेउं न जाणइ जाव हेउं
 अच्चाणमरणं मरइ ॥ पंच हेऊ पञ्जत्ता, तंजहा-हेउणा ण जाणइ जाव हेउणा अण्णाण-
 मरणं मरइ ॥ पंच अहेऊ पण्णत्ता, तंजहा-अहेउं जाणइ जाव अहेउं केवलिमरणं
 मरइ ॥ पंच अहेऊ पण्णत्ता, तंजहा-अहेउणा जाणइ जाव अहेउणा केवलिमरणं
 मरइ ॥ पंच अहेऊ पण्णत्ता, तंजहा-अहेउं न जाणइ जाव अहेउं छउमत्थमरणं
 मरइ ॥ पंच अहेऊ पण्णत्ता, तंजहा-अहेउणा न जाणइ जाव अहेउणा छउमत्थमरणं
 मरइ । सेवं भंते ! २ ति ॥ २१९ ॥ **पंचमे सए सत्तमो उद्देसो समत्तो ॥**

तेणं कालेणं २ जाव परिसा पडिगया, तेणं कालेणं २ समणस्स ३ जाव अंते-
 वासी नारयपुत्ते नामं अणगारे पगइभइए जाव विहरइ, तेणं कालेणं २ समणस्स
 ३ जाव अंतेवासी नियंठिपुत्ते नामं अण० पगइभइए जाव विहरइ, तए णं से
 नियंठिपुत्ते अण० जेणामेव नारयपुत्ते अणगारे तेणेव उवागच्छइ २ नारयपुत्तं
 अण० एवं वयासी-सव्वा पोगगला ते अज्जो ! किं सअङ्घा समज्झा सपएसा उदाहु
 अणङ्घा अमज्झा अपएसा ?, अज्जोत्ति नारयपुत्ते अणगारे नियंठिपुत्तं अणगारं एवं
 वयासी-सव्वपोगगला मे अज्जो ! सअङ्घा समज्झा सपदेसा नो अणङ्घा अमज्झा
 अपएसा, तए णं से नियंठिपुत्ते अणगारे नारयपुत्तं अ० एवं वदासी-जइ णं
 ते अज्जो ! सव्वपोगगला सअङ्घा समज्झा सपदेसा नो अणङ्घा अमज्झा अपदेसा
 किं दव्वादेसेणं अज्जो ! सव्वपोगगला सअङ्घा समज्झा सपदेसा नो अणङ्घा अमज्झा
 अपदेसा ? खेत्तादेसेणं अज्जो ! सव्वपोगगला सअङ्घा समज्झा सपएसा तहेव चेव,
 कालादेसेणं तं चेव, भावादेसेणं अज्जो ! तं चेव, तए णं से नारयपुत्ते अणगारे
 नियंठिपुत्तं अणगारं एवं वदासी-दव्वादेसेणवि मे अज्जो ! सव्वपोगगला सअङ्घा
 समज्झा सपदेसा नो अणङ्घा अमज्झा अपदेसा खेत्ताएसेणवि सव्वे पोगगला
 सअङ्घा तह चेव कालादेसेणवि, तं चेव भावादेसेण वि । तए णं से नियंठिपुत्ते
 अण० नारयपुत्तं अणगारं एवं वयासी-जइ णं अज्जो ! दव्वादेसेणं सव्वपोगगला
 सअङ्घा समज्झा सपएसा नो अणङ्घा अमज्झा अपएसा, एवं ते परमाणुपोगगळेवि
 सअङ्घे समज्झे सपएसे णो अणङ्घे अमज्झे अपएसे, जइ णं अज्जो ! खेत्तादेसेणवि
 सव्वपोगगला सअ० ३ जाव एवं ते एगपएसोगाळेवि पोगगले सअङ्घे समज्झे सप-
 एसे, जइ णं अज्जो ! कालादेसेणं सव्वपोगगला सअङ्घा समज्झा सपएसा, एवं

ते एगसमयठिईएवि पोगगले ३ तं चेव, जइ णं अज्जो ! भावादेसेणं सव्वपोगगला
सअङ्गा समज्झा सपएसा, एवं ते एगगुणकालएवि पोगगले सअ० ३ तं चेव,
अह ते एवं न भवइ तो जं वयसि दव्वादेसेणवि सव्वपोगगला सअ० ३ नो
अणङ्गा अमज्झा अपदेसा एवं खेत्तादेसेणवि काला० भावादेसेणवि तच्चं मिच्छा,
तए णं से नारयपुत्ते अणगारे नियंठिपुत्तं अ० एवं वयासी-नो खलु वयं देवा०
एयमट्ठं जाणामो पासामो, जइ णं देवा० नो गिलार्यंति परिकहितए तं इच्छासि
णं देवा० अंतिए एयमट्ठं सोच्चा निसम्म जाणितए, तए णं से नियंठिपुत्ते अणगारे
नारयपुत्तं अणगारं एवं वयासी-दव्वादेसेणवि मे अज्जो सव्वे पोगगला सपदेसावि
अपदेसावि अणंता खेत्तादेसेणवि एवं चेव कालादेसेणवि भावादेसेणवि एवं चेव ॥
जे दव्वओ अपदेसे से खेत्तओ नियमा अपदेसे कालओ सिय सपदेसे सिय अप-
देसे भावओ सिय सपदेसे सिय अपदेसे । जे खेत्तओ अपदेसे से दव्वओ सिय
सपदेसे सिय अपदेसे कालओ भयणाए भावओ भयणाए । जहा खेत्तओ एवं
कालओ भावओ ॥ जे दव्वओ सपदेसे से खेत्तओ सिय सपदेसे सिय अपदेसे,
एवं कालओ भावओवि, जे खेत्तओ सपदेसे से दव्वओ नियमा सपदेसे कालओ
भयणाए भावओ भयणाए जहा दव्वओ तहा कालओ भावओवि ॥ एएसि णं
मंते ! पोगगलाणं दव्वादेसेणं खेत्तादेसेणं कालादेसेणं भावादेसेणं सपदेसाणं य
अपदेसाणं य कयरे २ जाव विसेसाहिया वा ?, नारयपुत्ता ! सव्वत्थोवा पोगगला
भावादेसेणं अपदेसा कालादेसेणं अपदेसा असंखेज्जगुणा दव्वादेसेणं अपदेसा
असंखेज्जगुणा खेत्तादेसेणं अपदेसा असंखेज्जगुणा खेत्तादेसेणं चेव सपदेसा असं-
खेज्जगुणा दव्वादेसेणं सपदेसा विसेसाहिया कालादेसेणं सपदेसा विसेसाहिया
भावादेसेणं सपदेसा विसेसाहिया । तए णं से नारयपुत्ते अणगारे नियंठिपुत्तं अण-
गारं वंदइ नमंसइ नियंठिपुत्तं अणगारं वंदित्ता णमंसित्ता एयमट्ठं सम्मं विणएणं
भुज्जो २ खामेइ २ ता संजमेणं तवसा अप्पाणं भावेमाणे विहरइ ॥ २२० ॥
भन्तेति भगवं गोयमे जाव एवं वयासी-जीवा णं मंते ! किं वट्ठंति हायंति अव-
ट्ठिया ?, गोयमा ! जीवा णो वट्ठंति नो हायंति अवट्ठिया । नेरइया णं मंते ! किं
वट्ठंति हायंति अवट्ठिया ?, गोयमा ! नेरइया वट्ठंतिवि हायंतिवि अवट्ठियावि, जहा
नेरइया एवं जाव वेमाणिया । सिद्धा णं मंते ! पुच्छा, गोयमा ! सिद्धा वट्ठंति नो
हायंति अवट्ठियावि ॥ जीवा णं मंते ! केवइयं कालं अवट्ठिया [वि] ?, सव्वदं ।
नेरइया णं मंते ! केवइयं कालं वट्ठंति ?, गोयमा ! ज० एयं संसयं उक्को० आवलि-
याए असंखेज्जइभागं, एवं हायंति, नेरइया णं मंते ! केवइयं कालं अवट्ठिया ?,

गोयमा ! जहन्नेण एगं समयं उक्को० चउव्वीसं मुहुत्ता, एवं सत्तसुवि पुढवीसु
 वड्ढंति हायंति भाणियव्वं, नवरं अवट्ठिएसु इमं नाणत्तं, तंजहा-रयणप्पभाए पुढ-
 वीए अडतालीसं मुहुत्ता सकर० चौइस राईदियाईं वाळु० मासं पंक० दो मासा
 धूम० चत्तारि मासा तमाए अट्ठ मासा तमतमाए बारस मासा । असुरकुमारावि
 वड्ढंति हायंति जहा नेरइया, अवट्ठिया जह० एगं समयं उक्को० अट्ठचत्तालीसं
 मुहुत्ता, एवं दसविहावि, एगिंदिया वड्ढंतिवि हायंतिवि अवट्ठियावि, एएहिं तिहिंवि
 जहन्नेण एक्कं समयं उक्को० आवलियाए असंखेज्जइभागं, बेईदिया वड्ढंति हायंति
 तहेव, अवट्ठिया ज० एक्कं समयं उक्को० दो अंतोमुहुत्ता, एवं जाव चउरिंदिया,
 अवसेसा सव्वे वड्ढंति हायंति तहेव, अवट्ठियाणं णाणत्तं इमं, तं--संसुच्छिमपंचि-
 दियतिरिक्खजोणियाणं दो अंतोमुहुत्ता, गम्भवक्कंतियणं चउव्वीसं मुहुत्ता, संसु-
 च्छिममणुस्साणं अट्ठचत्तालीसं मुहुत्ता, गम्भवक्कंतियमणुस्साणं चउव्वीसं मुहुत्ता,
 वाणमंतरजोइससोहम्मीसाणेसु अट्ठचत्तालीसं मुहुत्ता, सणकुमारे अट्ठारस राई-
 दियाईं चत्तालीस य मुहुत्ता, माहिंदे चउवीसं राईदियाईं वीस य मु०, बंमलोए
 पंचचत्तालीसं राईदियाईं, लंतए नउइ राईदियाईं, महासुक्के सट्ठि राईदियसयं,
 सहस्सारे दो राईदियसयाईं, आणयपाणयाणं संखेज्जा मासा, आरणच्चुयाणं संखे-
 ज्जाईं वासाईं, एवं गेवेज्जदेवाणं विजयवेजयंतजयंतअपराजियाणं असंखेज्जाईं वास-
 सहस्साईं, सव्वट्ठसिद्धे य पलिओवमस्स असंखेज्जइभागो, एवं भाणियव्वं, वड्ढंति
 हायंति जह० एक्कं समयं उ० आवलियाए असंखेज्जइभागं, अवट्ठियाणं जं भणियं ।
 सिद्धा णं भंते ! केवइयं कालं वड्ढंति ?, गोयमा ! जह० एक्कं समयं उक्को० अट्ठ
 समया, केवइयं कालं अवट्ठिया ?, गोयमा ! जह० एक्कसमयं उक्को० छम्मासा ॥
 जीवा णं भंते ! किं सोवचया सावचया सोवचयसावचया निरुवचयनिरवचया ?,
 गोयमा ! जीवा णो सोवचया नो सावचया णो सोवचयसावचया निरुवचयनिर-
 वचया । एगिंदिया तइयपए, सेसा जीवा चउहिंवि एएहिंवि भाणियव्वा, सिद्धा णं
 भंते ! पुच्छा, गोयमा ! सिद्धा सोवचया णो सावचया णो सोवचयसावचया निरु-
 वचयनिरवचया । जीवा णं भंते ! केवइयं कालं निरुवचयनिरवचया ?, गोयमा !
 सव्ववड्ढं, नेरइया णं भंते ! केवइयं कालं सोवचया ?, गोयमा ! जह० एक्कं समयं
 उ० आवलियाए असंखेज्जइभागं । केवइयं कालं सावचया ? एवं चेव । केवइयं
 कालं सोवचयसावचया ?, एवं चेव । केवइयं कालं निरुवचयनिरवचया ?, गोयमा !
 ज० एक्कं समयं उक्को० बारसमु० एगिंदिया सव्वे सोवचयसावचया सव्ववड्ढं सेसा
 सव्वे सोवचयावि सावचयावि सोवचयसावचयावि निरुवचयनिरवचयावि जहन्नेणं

एणं समयं उक्कोसेणं आवलियाए असंखेज्जभाणं अवट्ठिएहिं वक्कंतियकालो भाणियुव्वो
सिद्धा णं भंते ! केवइयं कालं सोवचया ?, गोयमा ! जह० एक्कं समयं उक्को० अट्ठ
समया, केवइयं कालं निरुवचयनिरवचया ?, जह० एक्कं समयं उ० छस्मासा ।
सेवं भंते ! २ ति ॥ २२१ ॥ पंचमसए अट्ठमो उहेसो समत्तो ॥

तेणं कालेणं तेणं समएणं जाव एवं वयासी-किमिदं भंते ! नगरं रायगिहंति
पवुच्चइ ?, किं पुढवी नगरं रायगिहंति पवुच्चइ, आऊ नगरं रायगिहंति पवुच्चइ ?
जाव वणस्सइ ?, जहा एयण्डेसए पंचिदियतिरिक्खजोणियाणं वत्तव्वया तहा भाणि-
यव्वं जाव सच्चित्ताच्चित्तमीसियाइं दव्वाइं नगरं रायगिहंति पवुच्चइ ?, गोयमा ! पुढ-
वीवि नगरं रायगिहंति पवुच्चइ जाव सच्चित्ताच्चित्तमीसियाइं दव्वाइं नगरं रायगिहंति
पवुच्चइ । से केणट्ठेणं ?, गोयमा ! पुढवी जीवाइय अजीवाइय नगरं रायगिहंति
पवुच्चइ जाव सच्चित्ताच्चित्तमीसियाइं दव्वाइं जीवाइय अजीवाइय नगरं रायगिहंति
पवुच्चइ से तेणट्ठेणं तं चेव ॥ २२२ ॥ से नूणं भंते ! दिया उज्जोए राइं अंध-
यारे ?, हंता गोयमा ! जाव अंधयारे । से केणट्ठेणं ?, गोयमा ! दिया सुभा
पोगगला सुभे पोगगलपरिणामे राइं असुभा पोगगला असुभे पोगगलपरिणामे से
तेणट्ठेणं० । नेरइयाणं भंते ! किं उज्जोए अंधयारे ?, गोयमा ! नेरइयाणं नो
उज्जोए अंधयारे, से केणट्ठेणं० ?, गोयमा ! नेरइयाणं असुहा पोगगला असुभे पोगग-
लपरिणामे से तेणट्ठेणं० । असुरकुमारणं भंते ! किं उज्जोए अंधयारे ?, गोयमा !
असुरकुमारणं उज्जोए नो अंधयारे । से केणट्ठेणं ?, गोयमा ! असुरकुमारणं सुभा
पोगगला सुभे पोगगलपरिणामे, से तेणट्ठेणं एवं वुच्चइ, एवं जाव थणियकुमारणं,
पुढविकाइया जाव तेइंदिया जहा नेरइया । चउरिंदियाणं भंते ! किं उज्जोए अंध-
यारे ?, गोयमा ! उज्जोएवि अंधयारेवि, से तेणट्ठेणं० ?, गोयमा ! चउरिंदियाणं
सुभासुभा पोगगला सुभासुभे पोगगलपरिणामे, से तेणट्ठेणं एवं जाव मणुस्साणं ।
वाणमंतरजोइसवेमाणिया जहा असुरकुमारा ॥ २२३ ॥ अत्थि णं भंते ! नेरइयाणं
तत्थगयाणं एवं पञ्चायइ-समयाइ वा आवलियाइ वा जाव ओसप्पिणीइ वा
उस्सप्पिणीइ वा ?, णो तिण्ठे समट्ठे । से केणट्ठेणं जाव समयाइ वा आवलियाइ
वा ओसप्पिणीइ वा उस्सप्पिणीइ वा ?, गोयमा ! इहं तेसिं माणं इहं तेसिं पमाणं
इहं तेसिं पण्णायइ, तंजहा-समयाइ वा जाव उस्सप्पिणीइ वा, से तेणट्ठेणं जाव
नो एवं पण्णायए, तंजहा-समयाइ वा जाव उस्सप्पिणीइ वा, एवं जाव पंचिदि-
यतिरिक्खजोणियाणं, अत्थि णं भंते ! मणुस्साणं इहगयाणं एवं पञ्चायइ, तंजहा-
समयाइ वा जाव उस्सप्पिणीइ वा ?, हंता ! अत्थि । से केणट्ठेणं ? गोयमा !

इहं तेसिं माणं इहं चेव तेसिं एवं पण्णायइ, तंजहा-समयाइ वा जाव उस्सप्पि-
णीइ वा से तेणं वाणमंतरजोइसियवेमाणियाणं जहा नेरइयाणं ॥ २२४ ॥ तेणं
कालेणं २ पासावच्चिजा [ते] थेरा भगवंतो जेणेव समणे भगवं महावीरे तेणेव
उवागच्छंति २ समणस्स भगवओ महावीरस्स अदूरसामंते ठिचा एवं वदासी-से
नूणं भंते । असंखेजे लोए अणंता राईदिया उप्पज्जिंसु वा उप्पज्जंति वा उप्पज्जि-
स्संति वा विगच्छिंसु वा विगच्छंति वा विगच्छिस्संति वा परिता राईदिया उप्प-
ज्जिंसु वा ३ विगच्छिंसु वा ३ ? , हंता अज्जो ! असंखेजे लोए अणंता राईदिया तं
चेव, से केणट्ठेणं जाव विगच्छिस्संति वा ? , से नूणं भंते ! अज्जो ! पासेणं अरहया
पुरिसादाणिणं सासए लोए बुइए अणाइए अणवदग्गे परिस्ते परिवुडे हेट्ठा
विच्छिण्णे मज्झे संखिते उप्पि विसाले अहे पलियंकसंठिए मज्झे वरवइरविग्गहिए
उप्पि उद्धमुइंगाकारसंठिए तेसिं च णं सासयंसि लोगंसि अणादियंसि अणवदग्गंसि
परितंसि परिवुडंसि हेट्ठा विच्छिन्नंसि मज्झे संखितंसि उप्पि विसालंसि अहे पलियं-
कसंठियंसि मज्झे वरवइरविग्गहियंसि उप्पि उद्धमुइंगाकारसंठियंसि अणंता जीव-
घणा उप्पज्जिता २ निलीयंति परिता जीवघणा उप्पज्जिता २ निलीयंति से नूणं भूए
उप्पन्ने विगए परिणए अजीवेहिं लोकइ पलोक्कइ, जे लोकइ से लोए ? , हंता भगवं
[ते] ! , से तेणट्ठेणं अज्जो ! एवं वुच्चइ असंखेजे तं चेव । तप्पभिइं च णं ते
पासावच्चिजा थेरा भगवंतो समणं भगवं महावीरं पच्चभिजाणंति सव्वत्थुं सव्वदरिसिं
त्तए णं ते थेरा भगवंतो समणं भगवं महावीरं वंदंति नमंसंति २ एवं वदासी-
इच्छामि णं भंते ! तुब्भं अंतिए चाउज्जामाओ धम्माओ पंचमहव्वइयं सप्पडिक्कमणं
धम्मं उवसंपज्जिता णं विहरितए, अहासुइं देवाणुप्पिया । मा पडिबंथं करेह, तए
णं ते पासावच्चिजा थेरा भगवंतो जाव चरिमेहिं उस्सासनिस्सासेहिं सिद्धा जाव
सव्वदुक्खप्पहीणा अत्थेगइया देवा देवल्लोएसु उववन्ना ॥ २२५ ॥ कइविहा णं
भंते ! देवल्लोगा पण्णत्ता ? , गोयमा ! चउव्विहा देवल्लोगा पण्णत्ता, तंजहा-भवण-
वासिवाणमंतरजोइसियवेमाणियभेएण, भवणवासी दसविहा वाणमंतरा अट्ठविहा
जोइसिया पंचविहा वेमाणिया दुविहा । गाहा-किमियं रायगिहंति य उज्जोए अंध-
यार समए य । पासंतिवासि पुच्छा राईदिय देवल्लोगा य ॥ १ ॥ सेवं भंते ! २
त्ति ॥ २२६ ॥ पंचमे सए नवमो उद्देसो समत्तो ॥

तेणं कालेणं तेणं समएणं चंपा नामं नयरी जहा पढमिस्सो उद्देसओ तहा नेयव्वो
एसोवि, नवरं चंदिमा भाणियव्वा ॥ २२७ ॥ पंचमे सए दसमो उद्देसो
समत्तो ॥ पंचमं सयं समत्तं ॥

गाहा—वेयण १ आहार २ महस्सवे य ३ सपएस ४ तमुए य ५ भविए ।
 ६ साली ७ पुढवी ८ कम्म ९ अन्नउत्थि १० दस छट्ठगंमि सए ॥ १ ॥ से नूणं
 भंते ! जे महावेयणे से महानिजरे जे महानिजरे से महावेदणे, महावेदणस्स य
 अप्पवेदणस्स य से सेए जे पसत्थनिजराए ?, हंता गोयमा ! जे महावेदणे एवं
 चेव । छट्ठसत्तमासु णं भंते ! पुढवीसु नेरइया महावेयणा ?, हंता ! महावेयणा, ते
 णं भंते ! समणेहिंतो निगंथेहिंतो महानिज्जरतरा ?, गोयमा ! णो तिण्ठे समट्ठे,
 से केणट्ठेणं भंते ! एवं वुच्चइ जे महावेदणे जाव पसत्थनिजराए ?, गोयमा ! से
 जहानामए—दुवे वत्था सिया, एगे वत्थे कद्दमरागरत्ते एगे वत्थे खंजणरागरत्ते एएसि
 णं गोयमा ! दोहं वत्थाणं कयरे वत्थे दुधोयतराए चेव दुवामतराए चेव दुपरिक-
 म्मतराए चेव कयरे वा वत्थे सुधोयतराए चेव सुवामतराए चेव सुपरिकम्मतराए
 चेव, जे वा से वत्थे कद्दमरागरत्ते जे वा से वत्थे खंजणरागरत्ते ?, भगवं ! तत्थ
 णं जे से वत्थे कद्दमरागरत्ते से णं वत्थे दुधोयतराए चेव दुवामतराए चेव दुप्परि-
 कम्मतराए चेव, एवामेव गोयमा ! नेरइयाणं पावाइं कम्माइं गाढीकयाइं चिक्कणी-
 कयाइं (अ) सिद्धिलीकयाइं खिलीभूयाइं भवंति संपगाढं पि य णं ते वेयणं वेदेमाणा
 णो महानिज्जरा णो महापज्जवसाणा भवंति, से जहा वा केइ पुरिसे अहिगरणं
 आउडेमाणे महया २ सहेणं महया २ घोसेणं महया २ परंपराघाएणं णो संचाएइ
 तीसे अहिगरणीए अहाबायरे पोग्गळे परिसाडित्तए एवामेव गोयमा ! नेरइ-
 याणं पावाइं कम्माइं गाढीकयाइं जाव नो महापज्जवसाणा भवंति, भगवं ! तत्थ
 जे से वत्थे खंजणरागरत्ते से णं वत्थे सुधोयतराए चेव सुवामतराए चेव सुपरिक-
 म्मतराए चेव, एवामेव गोयमा ! समणाणं निगंथाणं अहाबायराइं कम्माइं सिद्धि-
 लीकयाइं निट्ठियाइं कडाइं विप्परिणामियाइं खिप्पामेव विद्धत्थाइं भवंति, जावइयं
 तावइयं पि णं ते वेयणं वेदेमाणा महानिज्जरा महापज्जवसाणा भवंति, से जहाना-
 मए—केइ पुरिसे सुकतणहत्थयं जायतेयंसि पक्खिवेज्जा से नूणं गोयमा ! से सुक्के
 तणहत्थए जायतेयंसि पक्खित्ते समाणे खिप्पामेव मसमसाविज्जइ ?, हंता ! मसम-
 साविज्जइ, एवामेव गोयमा ! समणाणं निगंथाणं अहाबायराइं कम्माइं जाव महा-
 पज्जवसाणा भवंति, से जहानामए केइ पुरिसे तत्तंसि अयकवहंसि उदगविंदू जाव
 हंता ! विद्धंसमागच्छइ, एवामेव गोयमा ! समणाणं निगंथाणं जाव महापज्जवसाणा
 भवंति, से तेणट्ठेणं जे महावेदणे से महानिजरे जाव निजराए ॥ २२८ ॥ कइ-
 विहे णं भंते ! करणे पन्नत्ते ?, गोयमा ! चउव्विहे करणे पन्नत्ते, तंजहा—मणकरणे
 वइकरणे कायकरणे कम्मकरणे । नेरइयाणं भंते ! कइविहे करणे पन्नत्ते ?, गोयमा !

चउव्विहे पञ्चते, तंजहा—मणकरणे वइकरणे कायकरणे कम्मकरणे ४ [चउ०], एवं पंचिदियाणं सव्वेसिं चउव्विहे करणे पञ्चते । एगिंदियाणं दुव्विहे—कायकरणे य कम्मकरणे य, विगलेंदियाणं ३—वइकरणे कायकरणे कम्मकरणे । नेरइयाणं भंते ! किं करणओ असायं वेयणं वेयंति अकरणओ असायं वेयणं वेदेंति ?, गोयमा ! नेरइयाणं करणओ असायं वेयणं वेयंति नो अकरणओ असायं वेयणं वेयंति, से केणट्ठेणं०, ? गोयमा ! नेरइयाणं चउव्विहे करणे पञ्चते, तंजहा—मणकरणे वइकरणे कायकरणे कम्मकरणे, इच्चैएणं चउव्विहेणं असुमेणं करणेणं नेरइया करणओ असायं वेयणं वेयंति नो अकरणओ, से तेणट्ठेणं० । असुरकुमारारणं किं करणओ अकरणओ ?, गोयमा ! करणओ नो अकरणओ, से केणट्ठेणं० ?, गोयमा ! असुरकुमारारणं चउव्विहे करणे पण्णत्ते, तंजहा—मणकरणे वइकरणे कायकरणे कम्मकरणे, इच्चैएणं सुमेणं करणेणं असुरकुमारारणं करणओ सायं वेयणं वेयंति नो अकरणओ, एवं जाव थणियकुमारारणं । पुढविकाइयाणं एवामेवं पुच्छा, नवरं इच्चैएणं सुभासुमेणं करणेणं पुढविकाइया करणओ वेमायाए वेयणं वेयंति नो अकरणओ, ओरालियसरीरा सव्वे सुभासुमेणं वेमायाए । देवा सुमेणं सायं वेयणं वेयन्ति ॥ २२९ ॥ जीवा णं भंते ! किं महावेयणा महानिज्जरा १ महावेदणा अप्पनिज्जरा २ अप्पवेदणा महानिज्जरा ३ अप्पवेदणा अप्पनिज्जरा ४ ?, गोयमा ! अत्थेगइया जीवा महावेदणा महानिज्जरा १ अत्थेगइया जीवा महावेयणा अप्पनिज्जरा २ अत्थेगइया जीवा अप्पवेदणा महानिज्जरा ३ अत्थेगइया जीवा अप्पवेदणा अप्पनिज्जरा ४ । से केणट्ठेणं० ?, गोयमा ! पडिमापडिवन्नए अणगारे महावेदणे महानिज्जरे छट्ठसत्तमासु पुढवीसु नेरइया महावेदणा अप्पनिज्जरा सेलेसिं पडिवन्नए अणगारे अप्पवेदणे महानिज्जरे अणुत्तरोववाइया देवा अप्पवेदणा अप्पनिज्जरा, सेवं भंते । २ त्ति ॥—महवेदणे य वत्थे कइमखंजणमए य अहिगरणी । तणहत्थे य कवळे करण महावेदणा जीवा ॥ १ ॥ ॥ २३० ॥ सेवं भंते ! सेवं भंते ! त्ति ॥ छट्ठसयस्स पढमो उद्देसो समत्तो ॥ रायणिहं नगरं जाव एवं वयासी—आहारुद्देसो जो पज्जवणाए सो सव्वो निरवसेसो नेयव्वो । सेवं भंते ! सेवं भंते ! त्ति ॥ २३१ ॥ छट्ठे सए वीओ उद्देसो समत्तो ॥ बहुकम्मवत्थपोग्गलपयोगसावीससा य साईए । कम्मट्ठिईत्थिसंजय सम्मट्ठिणी य सञ्जी य ॥ १ ॥ भविए दंसण पञ्चते भासअपरित्त नाणजोगे य । उवओगा-हारगसुहुमचरिमबंधी य अप्पबहुं ॥ २ ॥ से नूणं भंते ! महाकम्मस्स महाकिरि-यस्स महासवस्स महावेदणस्स सव्वओ पोग्गला बज्झंति सव्वओ पोग्गला चिज्जंति सव्वओ पोग्गला उवचिज्जंति सया समियं च णं पोग्गला बज्झंति सया

समियं पोगगला चिज्जंति सया समियं पोगगला उवचिज्जंति सया समियं च णं तस्स
 आया दुरुवत्ताए दुवत्तत्ताए दुग्धत्ताए दुरसत्ताए दुकासत्ताए अणिट्ठत्ताए अकंत०
 अप्पिय० असुभ० अमणुज० अमणामत्ताए अण्णिच्छियत्ताए अभिज्झियत्ताए अह-
 त्ताए नो उद्धत्ताए दुक्खत्ताए नो सुहत्ताए भुज्जो २ परिणमंति ?, हंता गोयमा !
 महाकम्मस्स तं चेव । से केणट्ठेणं ?, गोयमा ! से जहानामए-वत्थस्स अहयस्स
 वा धोयस्स वा तंतुगयस्स वा आणुपुव्वीए परिभुज्जमाणस्स सव्वओ पोगगला
 बज्जंति सव्वओ पोगगला चिज्जंति जाव परिणमंति से तेणट्ठेणं । से नूणं भंते !
 अप्पासवस्स अप्पकम्मस्स अप्पकिरियस्स अप्पवेदणस्स सव्वओ पोगगला भिज्जंति
 सव्वओ पोगगला छिज्जंति सव्वओ पोगगला विद्धंसंति सव्वओ पोगगला परिविद्धंसंति
 सया समियं पोगगला भिज्जंति सव्वओ पोगगला छिज्जंति विद्धंसंति परिविद्धंसंति
 सया समियं च णं तस्स आया सुखत्ताए पसत्थं नेयव्वं जाव सुहत्ताए नो दुक्ख-
 त्ताए भुज्जो २ परिणमंति ?, हंता गोयमा ! जाव परिणमंति । से केणट्ठेणं ?,
 गोयमा ! से जहानामए-वत्थस्स जल्लियस्स वा पंकियस्स वा मइल्लियस्स वा रइल्लि-
 यस्स वा आणुपुव्वीए परिकम्मिज्जमाणस्स सुद्धेणं वारिणा धोवेमाणस्स पोगगला
 भिज्जंति जाव परिणमंति से तेणट्ठेणं ॥ २३२ ॥ वत्थस्स णं भंते ! पोगगलोवचए
 किं पयोगसा वीससा ?, गोयमा ! पओगसावि वीससावि । जहा णं भंते ! वत्थस्स
 णं पोगगलोवचए पओगसावि वीससावि तहा णं जीवाणं कम्मोवचए किं पओगसा
 वीससा ?, गोयमा ! पओगसा नो वीससा, से केणट्ठेणं ?, गोयमा ! जीवाणं
 तिविहे पओगे पण्णत्ते, तंजहा-मणप्पओगे वइ० का०, इच्चेणं तिविहेणं पओगेणं
 जीवाणं कम्मोवचए पओगसा नो वीससा, एवं सव्वेसि पंचेदियाणं तिविहे पओगे
 भाणियव्वे, पुढविक्काइयाणं एगविहेणं पओगेणं एवं जाव वणस्सइकाइयाणं, विग-
 ल्लिदियाणं दुविहे पओगे पण्णत्ते, तंजहा-वइपओगे य कायप्पओगे य, इच्चेणं
 दुविहेणं पओगेणं कम्मोवचए पओगसा नो वीससा, से एएणट्ठेणं जाव नो वीससा
 एवं जस्स जो पओगो जाव वेमाणियाणं ॥ २३३ ॥ वत्थस्स णं भंते ! पोगगलो-
 वचए किं साइए सपज्जवसिए १ साइए अपज्जवसिए २ अणाइए संपज्ज० ३
 अणा० अप० ४ ?, गोयमा ! वत्थस्स णं पोगगलोवचए साइए सपज्जवसिए नो
 साइए अप० नो अणा० स० नो अणा० अप० । जहा णं भंते ! वत्थस्स
 पोगगलोवचए साइए सपज्ज० नो साइए अप० नो अणा० सप० नो अणा०
 अप० तहा णं जीवाणं कम्मोवचए पुच्छा, गोयमा ! अत्थेणइयाणं जीवाणं कम्मो-
 वचए साइए सपज्जवसिए अत्थे० अणाइए सपज्जवसिए अत्थे० अणाइए अप-

ज्वसिए नो चेव णं जीवाणं कम्मोवचए साइए अप० । से केण०?, गोयमा !
 इरियावहियाबंधयस्स कम्मोवचए साइए सप० भवसिद्धियस्स कम्मोवचए अणा-
 इए सपज्वसिए अभवसिद्धियस्स कम्मोवचए अणाइए अपज्वसिए, से तेणट्ठेणं
 गोयमा ! एवं वुच्चइ अत्थे० जीवाणं कम्मोवचए साइए नो चेव णं जीवाणं
 कम्मोवचए साइए अपज्वसिए, वत्थे णं भंते ! किं साइए सपज्वसिए चउ-
 भंगो?, गोयमा ! वत्थे साइए सपज्वसिए अवसेसा तिन्निवि पडिसेहेयव्वा । जहा
 णं भंते ! वत्थे साइए सपज्वसिए नो साइए अपज० नो अणाइए सप० नो
 अणाइए अपज्वसिए तथा णं जीवाणं किं साइया सपज्वसिया? चउभंगो पुच्छा,
 गोयमा ! अत्थेगइया साइया सपज्वसिया चत्तारिवि भाणियव्वा । से केणट्ठेणं?,
 गोयमा ! नेरइया तिरिक्खजोणिया मणुस्सा देवा गइरागइं पडुच्च साइया सप-
 ज्वसियां सिद्धि (द्धा) गइं पडुच्च साइया अपज्वसिया, भवसिद्धिया लद्धिं पडुच्च
 अणाइया सपज्वसिया अभवसिद्धिया संसारं पडुच्च अणाइया अपज्वसिया, से
 तेणट्ठेणं ॥ २३४ ॥ कइ णं भंते ! कम्मप्पगढीओ पणत्ताओ?, गोयमा ! अट्ठ
 कम्मप्पगढीओ प०, तंजहा-णाणावरणिज्जं दरिसणावरणिज्जं जाव अंतराईयं ।
 नाणावरणिज्जस्स णं भंते ! कम्मस्स केवइयं कालं बंधठिईं प०?, गोयमा ! जह०
 अंतोमुहुत्तं उक्को० तीसं सागरोवमकोडाकोडीओ तिन्नि य वाससहस्साईं अबाहा
 अबाह्वणिया कम्मट्ठिईं कम्मनिसेओ, एवं दरिसणावरणिज्जं, वेदणिज्जं जह० दो
 समया उक्को० जहा नाणावरणिज्जं, मोहणिज्जं जह० अंतोमुहुत्तं उक्को० सत्तरि साग-
 रोवमकोडाकोडीओ, सत्त य वाससहस्साणि अबाहा, अबाह्वणिया कम्मठिईं कम्मनि-
 सेओ, आउगं जह्वेणं अंतोमुहुत्तं उक्को० तेत्तीसं सागरोवमाणि पुव्वकोडितिभाग-
 मब्बहियाणि, (पुव्वकोडितिभागो अबाहा, अबाह्वणिया) कम्मट्ठिईं कम्मनिसेओ,
 नामगोयाणं जह० अट्ठ मुहुत्ता उक्को० वीसं सागरोवमकोडाकोडीओ दोण्णि य वास-
 सहस्साणि अबाहा, अबाह्वणिया कम्मट्ठिईं कम्मनिसेओ, अंतराईयं जहा नाणा-
 वरणिज्जं ॥ २३५ ॥ नाणावरणिज्जं णं भंते ! कम्मं किं इत्थी बंधइ पुरिसो बंधइ
 नपुंसओ बंधइ? गोइत्थी नोपुरिसो नोनपुंसओ बंधइ? गोयमा ! इत्थीवि बंधइ
 पुरिसोवि बंधइ नपुंसओवि बंधइ नोइत्थी नोपुरिसो नोनपुंसओ सिय बंधइ सिय
 नो बंधइ एवं आउगवज्जाओ सत्त कम्मप्पगढीओ ॥ आउगं णं भंते ! कम्मं किं
 इत्थी बंधइ पुरिसो बंधइ नपुंसओ बंधइ०? पुच्छा, गोयमा ! इत्थी सिय बंधइ
 सिय नो बंधइ, एवं तिन्निवि भाणियव्वा, नोइत्थी नोपुरिसो नोनपुंसओ न बंधइ ॥
 नाणावरणिज्जं णं भंते ! कम्मं किं संजए बंधइ असंजए० एवं संजयासंजए बंधइ

नोसंजएनोअसंजएनोसंजयासंजए बंधइ ?, गोयमा ! संजए सिय बंधइ सिय नो
 बंधइ असंजए बंधइ संजयासंजएवि बंधइ नोसंजएनोअसंजएनोसंजयासंजए न
 बंधइ, एवं आउगवज्जाओ सत्तवि, आउगे हेट्ठिळा तिन्नि भयणाए उवरिल्ले ण बंधइ ॥
 णाणावरणिज्जं णं भंते ! कम्मं किं सम्मदिट्ठी बंधइ मिच्छादिट्ठी बंधइ सम्मामिच्छ-
 दिट्ठी बंधइ ?, गोयमा ! सम्मदिट्ठी सिय बंधइ सिय नो बंधइ मिच्छदिट्ठी बंधइ
 सम्मामिच्छदिट्ठी बंधइ, एवं आउगवज्जाओ सत्तवि, आउए हेट्ठिळा दो भयणाए
 सम्मामिच्छदिट्ठी न बंधइ ॥ णाणावरणिज्जं किं सण्णी बंधइ असत्ती बंधइ नोसण्णी-
 नोअसण्णी बंधइ ?, गोयमा ! सत्ती सिय बंधइ सिय नो बंधइ असत्ती बंधइ
 नोसत्तीनोअसत्ती न बंधइ, एवं वेदणिज्जाउगवज्जाओ छ कम्मप्पगबीओ, वेदणिज्जं
 हेट्ठिळा दो बंधंति, उवरिल्ले भयणाए, आउगं हेट्ठिळा दो भयणाए, उवरिल्लो न
 बंधइ ॥ णाणावरणिज्जं कम्मं किं भवसिद्धिए बंधइ अभवसिद्धिए बंधइ नोभक्-
 सिद्धिएनोअभवसिद्धिए बंधइ ?, गोयमा ! भवसिद्धिए भयणाए अभवसिद्धिए बंधइ
 नोभवसिद्धिएनोअभवसिद्धिए न बंधइ, एवं आउगवज्जाओ सत्तवि, आउगं हेट्ठिळा
 दो भयणाए उवरिल्लो न बंधइ ॥ णाणावरणिज्जं किं चक्खुदंसणी बंधइ अचक्खु-
 दंस० ओहिदंस० केवलदंस० ?, गोयमा ! हेट्ठिळा तिन्नि भयणाए उवरिल्ले ण बंधइ,
 एवं वेदणिज्जवज्जाओ सत्तवि, वेदणिज्जं हेट्ठिळा तिन्नि बंधंति केवलदंसणी भयणाए ॥
 णाणावरणिज्जं कम्मं किं पज्जत्तओ बंधइ अपज्जत्तओ बंधइ नोपज्जत्तएनोअपज्जत्तए
 बंधइ ?, गोयमा ! पज्जत्तए भयणाए, अपज्जत्तए बंधइ, नोपज्जत्तएनोअपज्जत्तए न
 बंधइ, एवं आउगवज्जाओ, आउगं हेट्ठिळा दो भयणाए उवरिल्ले ण बंधइ ॥ नाणा-
 वरणिज्जं किं भासए बंधइ अभासए० ?, गोयमा ! दोवि भयणाए, एवं वेयणिज्ज-
 वज्जाओ सत्त, वेदणिज्जं भासए बंधइ अभासए भयणाए ॥ णाणावरणिज्जं किं परित्ते
 बंधइ अपरित्ते बंधइ नोपरित्तेनोअपरित्ते बंधइ ?, गोयमा ! परित्ते भयणाए अपरित्ते
 बंधइ नोपरित्तेनोअपरित्ते न बंधइ, एवं आउगवज्जाओ सत्त कम्मप्पगबीओ, आउए
 परित्तोवि अपरित्तोवि भयणाए, नोपरित्तोनोअपरित्तो न बंधइ ॥ णाणावरणिज्जं कम्मं
 किं आभिणिबोहियनाणी बंधइ सुयनाणी ओहिनाणी मणपज्जवनाणी केवलनाणी
 बंधइ ?, गोयमा ! हेट्ठिळा चत्तारि भयणाए केवलनाणी न बंधइ, एवं वेदणिज्ज-
 वज्जाओ सत्तवि, वेदणिज्जं हेट्ठिळा चत्तारि बंधंति केवलनाणी भयणाए । णाणावर-
 णिज्जं किं मइअन्नाणी बंधइ सुय० विभंग० ?, गोयमा ! (सव्वेवि) आउगवज्जाओ
 सत्तवि बंधंति, आउगं भयणाए ॥ णाणावरणिज्जं किं मणजोगी बंधइ वय० काय०
 अजोगी बंधइ ?, गोयमा ! हेट्ठिळा तिन्नि भयणाए अजोगी न बंधइ, एवं वेदणिज्ज-

ब्रज्जाओ, वेदणिज्जं हेट्ठिळा बंधंति अजोगी न बंधइ ॥ पाणावरणिज्जं किं सागारो-
वउत्ते बंधइ अणागारोवउत्ते बंधइ ?, गोयमा । अट्ठसुवि भयणाए ॥ पाणावरणिज्जं
किं आहारए बंधइ अणाहारए बंधइ ?, गोयमा । दोवि भयणाए, एवं वेदणिज्जा-
उगवज्जाणं छण्हं, वेदणिज्जं आहारए बंधइ अणाहारए भयणाए, आउए आहा-
रए भयणाए, अणाहारए न बंधइ ॥ पाणावरणिज्जं किं सुहुमे बंधइ बायरे बंधइ
नोसुहुमेनोबादरे बंधइ ?, गोयमा । सुहुमे बंधइ बायरे भयणाए नोसुहुमेनोबादरे न
बंधइ, एवं आउगवज्जाओ सत्तवि, आउए सुहुमे बायरे भयणाए नोसुहुमेनोबायरे ण
बंधइ ॥ पाणावरणिज्जं किं चरिमे अचरिमे बंधं ?, गोयमा । अट्ठवि भयणाए ॥ २३६ ॥
एएसि णं भंते ! जीवाणं इत्थिवेदगाणं पुरिसवेदगाणं नपुंसगवेदगाणं अव्येयगाणं
य कयरे २ अप्पा वा ४ ?, गोयमा । सव्वत्थोवा जीवा पुरिसवेदगा इत्थिवेदगा
संखेज्जगुणा अव्येदगा अणंतगुणा नपुंसगवेदगा अणंतगुणा ॥ एएसि सव्वेसिं पदार्थं
अप्पवहुगाई उच्चरियव्वाई जाव सव्वत्थोवा जीवा अचरिमा चरिमा अणंतगुणा ।
सेवं भंते ! सेवं भंते ! ति ॥ २३७ ॥ छट्ठसए तइओ उइसो समत्तो ॥
जीवे णं भंते ! कालाएसेणं किं सपदेसे अपदेसे ?, गोयमा । तियमा सपदेसे ।
नेरइए णं भंते ! कालादेसेणं किं सपदेसे अपदेसे ?, गोयमा । सिय सपदेसे सिय
अपदेसे, एवं जाव सिद्धे । जीवा णं भंते ! कालादेसेणं किं सपदेसा अपदेसा ?,
गोयमा । नियमा सपदेसा । नेरइया णं भंते ! कालादेसेणं किं सपदेसा अपदेसा ?,
गोयमा । सव्वेवि ताव होज्जा सपदेसा १ अहवा सपएसा य अपदेसे य २ अहवा
सपदेसा य अपदेसा य ३, एवं जाव यणियकुमारा ॥ पुढविकाइया णं भंते ! किं
सपदेसा अपदेसा ?, गोयमा । सपदेसावि अपदेसावि, एवं जाव पण्णप्फइकाइया,
सेसा जहा नेरइया तहा जाव सिद्धा ॥ आहारगाणं जीवेगंदियवज्जा तियभंगो,
अणाहारगाणं जीवेगंदियवज्जा छब्भंगा एवं भाणियव्वा-सपदेसा वा १ अपएसा
वा २ अहवा सपदेसे य अपदेसे य ३ अहवा सपदेसे य अपदेसा य ४ अहवा
सपदेसा य अपदेसे य ५ अहवा सपदेसा य अपदेसा य ६, सिद्धेहिं तियभंगो,
भवसिद्धिया अभवसिद्धिया [भवसिद्धिया] जहा ओहिया, नोभवसिद्धियोअभ-
वसिद्धिया जीवसिद्धेहिं तियभंगो, सण्णीहिं जीवादिओ तियभंगो, असण्णीहिं एगि-
दियवज्जा तियभंगो, नेरइयदेवमणुएहिं छब्भंगो, नोसत्तिनोअसत्तिजीवमणुयसिद्धेहिं
तियभंगो सळेसा जहा ओहिया ॥ कण्हलेस्सा नीललेस्सा काउलेस्सा जहा आहारओ
नवरं जस्स अत्थि एयाओ, तेउलेस्साए जीवादिओ तियभंगो, नवरं पुढविकाइएसु
आउवणप्फईसु छब्भंगा, पम्हलेससुक्खलेस्साए जीवादिओ तियभंगो, अलेसीहिं

जीवसिद्धेहिं तियभंगो मणुस्से(सु) छब्भंगा, सम्मदिट्ठीहिं जीवाइ(य)तियभंगो, विग-
लिंदिएसु छब्भंगा, मिच्छदिट्ठीहिं एगिंदियवज्जो तियभंगो, सम्मामिच्छदिट्ठीहिं छब्भंगा,
संजएहिं जीवाइओ तियभंगो, असंजएहिं एगिंदियवज्जो तियभंगो, संजयासंजएहिं तिय-
भंगो जीवादिओ, नोसंजयनो असंजयनो संजयासंजय जीवसिद्धेहिं तियभंगो, सकसाईहिं
जीवादिओ तियभंगो, एगिंदिएसु अभंगयं, कोहकसाईहिं जीवएगिंदियवज्जो तियभंगो,
देवेहिं छब्भंगा, माणकसाई मायाकसाई जीवेगिंदियवज्जो तियभंगो, नेरइयदेवेहिं
छब्भंगा, लोभकसाईहिं जीवेगिंदियवज्जो तियभंगो, नेरइएसु छब्भंगा, अकसाईजी-
वमणुएहिं सिद्धेहिं तियभंगो, ओहियनाणे आभिणिबोहियनाणे सुयनाणे जीवादिओ
तियभंगो, विगलिंदिएहिं छब्भंगा, ओहिनाणे मण० केवलनाणे जीवादिओ तियभंगो,
ओहिए अच्चाणे मइअण्णाणे सुयअण्णाणे एगिंदियवज्जो तियभंगो, विभंगनाणे
जीवादिओ तियभंगो, सजोगी जहा ओहिओ, मणजोगी वयजोगी कायजोगी जीवा-
दिओ तियभंगो नवरं कायजोगी एगिंदिया तेसु अभंगयं, अजोगी जहा अलेसा,
सागारोवउत्ते अणागारोवउत्ते जीवएगिंदियवज्जो तियभंगो, सवैयगा य जहा सक-
साई, इत्थिवेयगपुरिसवेयगनपुंसगवेयगेसु जीवादिओ तियभंगो, नवरं नपुंसगवेदे
एगिंदिएसु अभंगयं, अवेयगा जहा अकसाई, ससरीरी जहा ओहिओ, ओरालियवे-
उव्वियसरीराणं जीवएगिंदियवज्जो तियभंगो, आहारगसरीरे जीवमणुएसु छब्भंगा,
तेयगकम्मगाणं जहा ओहिया, असरीरेहिं जीवसिद्धेहिं तियभंगो, आहारपज्जतीए
सरीरपज्जतीए इंदियपज्जतीए आणापाणुपज्जतीए जीवएगिंदियवज्जो तियभंगो, भासा-
मणपज्जतीए जहा सण्णी, आहारअपज्जतीए जहा अणाहारगा, सरीरअपज्जतीए
इंदियअपज्जतीए आणापाणअपज्जतीए जीवेगिंदियवज्जो तियभंगो, नेरइयदेवमणुएहिं
छब्भंगा, भासामणअपज्जतीए जीवादिओ तियभंगो, नेरइयदेवमणुएहिं छब्भंगा ॥
गाहा—सपदेसा आहारगभवियसन्निलेस्सा दिट्ठी संजयकसाए । णाणे जोगुवओगे वेदे
य सरीरपज्जती ॥ १ ॥ २३८ ॥ जीवा णं भंते ! किं पच्चक्खाणी अपच्चक्खाणी
पच्चक्खाणापच्चक्खाणी ?, गोयमा ! जीवा पच्चक्खाणीवि अपच्चक्खाणीवि पच्चक्खा-
णापच्चक्खाणीवि । सव्वजीवाणं एवं पुच्छा, गोयमा ! नेरइया अपच्चक्खाणी जाव
चउरिंदिया, सेसा दो पडिसेहेयव्वा, पंचेदियतिरिक्खजोणिया नो पच्चक्खाणी अप-
च्चक्खाणीवि पच्चक्खाणापच्चक्खाणीवि, मणुस्सा तिन्निवि, सेसा जहा नेरइया ॥
जीवा णं भंते ! किं पच्चक्खाणं जाणंति अपच्चक्खाणं जाणंति पच्चक्खाणापच्चक्खाणं
जाणंति ?, गोयमा ! जे पंचेदिया ते तिन्निवि जाणंति अवसेसा पच्चक्खाणं न जाणंति
३॥ जीवा णं भंते ! किं पच्चक्खाणं कुव्वंति अपच्चक्खाणं कुव्वंति पच्चक्खाणापच्चक्खाणं

कुव्वंति ?, जहा ओहिया तहा कुव्वणा ॥ जीवा णं भंते ! किं पच्चक्खाणनिव्वत्ति-
याउया अपच्चक्खाणणि० पच्चक्खाणापच्चक्खाणनि० ?, गोयमा ! जीवा य वेमाणिया
य पच्चक्खाणनिव्वत्तियाउया तिच्चिवि अवसेसा अपच्चक्खाणनिव्वत्तियाउया ॥ पच-
क्खाणं १ जाणइ २ कुव्वंति ३ तिच्चे(तेणे)व आउनिव्वत्ती ४ । सपदेसुदेसंमि य
एमेए दंडगा चउरो ॥ १ ॥ २३९ ॥ सेवं भंते ! सेवं भंते ! ति ॥ छइ सए
चउत्थो उहेसो समत्तो ॥

किमियं भंते ! तमुक्काएत्ति पवुच्चइ किं पुढवी तमुक्काएत्ति पवुच्चइ आऊ तमुक्काएत्ति
पवुच्चइ ? गोयमा ! नो पुढवी तमुक्काएत्ति पवुच्चइ आऊ तमुक्काएत्ति पवुच्चइ । से
केणट्ठेणं ?, गोयमा ! पुढविकाए णं अत्थेगइए सुभे देसं पकासेइ अत्थेगइए देसं
नो पकासेइ, से तेणट्ठेणं० । तमुक्काए णं भंते ! कहिं समुट्ठिए कहिं संनिट्ठिए ?,
गोयमा ! जंबुद्दीवस्स २ बहिया तिरियमसंखेज्जे दीवसमुदे वीईवइत्ता अरुणवरस्स
दीवस्स बाहिरिल्लाओ वेइयन्ताओ अरुणोदयं समुदं बायालीसं जोयणसहस्साणि
ओगाहिता उवरिल्लाओ जलंताओ एगपदेसियाए सेदीए इत्थ णं तमुक्काए समुट्ठिए,
सत्तरस एकवीसे जोयणसए उड्डं उप्पइत्ता तओ पच्छा तिरियं पविथरमाणे २ सोह-
म्मीसाणसणंकुमारमाहिंदे चत्तारिवि कप्पे आवरित्ता णं उड्डंपि य णं जाव बंभलोणे
कप्पे रिट्ठविमाणपत्थडं संपत्ते एत्थ णं तमुक्काए णं संनिट्ठिए ॥ तमुक्काए णं भंते !
किंसंठिए पन्नत्ते ?, गोयमा ! अहे मल्लगमूलसंठिए उप्पि कुक्कडगपंजरगसंठिए
पण्णत्ते ॥ तमुक्काए णं भंते ! केवइयं विक्खंभेणं केवइयं परिकखेवेणं पण्णत्ते ?,
गोयमा ! दुविहे पण्णत्ते, तंजहा-संखेज्जवित्थडे य असंखेज्जवित्थडे य, तत्थ णं जे
से संखेज्जवित्थडे से णं संखेज्जाइं जोयणसहस्साइं विक्खंभेणं असंखेज्जाइं जोयण-
सहस्साइं परिकखेवेणं प०, तत्थ णं जे से असंखेज्जवित्थडे से णं असंखेज्जाइं जोय-
णसहस्साइं विक्खंभेणं असंखेज्जाइं जोयणसहस्साइं परिकखेवेणं प० । तमुक्काए
णं भंते ! केमहालए प० ?, गोयमा ! अयं णं जंबुद्दीवे २ सव्वदीवसमुदाणं सव्व-
व्भंतराए जाव परिकखेवेणं पण्णत्ते ॥ देवे णं महिच्चिए जाव महाणुभावे इणामेव २
त्तिकट्ठु केवलकपं जंबुद्दीवं २ तिहिं अच्छरानिवाएहिं तिसत्तखुतो अणुपरियट्ठित्ता णं
हव्वमागच्छिज्जा से णं देवे ताए उक्किट्ठाए तुरियाए जाव देवगइए वीईवयमाणे २
जाव एगाहं वा दुयाहं वा तियाहं वा उक्कोसेणं छम्मासे वीईवएज्जा अत्थेगइए(यं)
तमुक्कायं वीईवएज्जा अत्थेगइए नो तमुक्कायं वीईवएज्जा, एमहालए णं गोयमा !
तमुक्काए पन्नत्ते । अत्थि णं भंते ! तमुक्काए गेहाइ वा गेहावणाइ वा ?, णो तिणट्ठे
समट्ठे, अत्थि णं भंते ! तमुक्काए गामाइ वा जाव संनिवेसाइ वा ?, णो तिणट्ठे

समट्ठे । अत्थि णं भंते ! तमुक्काए ओराला बलाहया संसेयंति संसुच्छंति वासं वासंति वा ?, हंता ! अत्थि, तं भंते ! किं देवो पकरेइ असुरो पकरेइ नागो पकरेइ ?, गोयमा ! देवोवि पकरेइ असुरोवि पकरेइ नागोवि पकरेइ । अत्थि णं भंते ! तमुक्काए बादरे थणियसदे बायरे विज्जुए ?, हंता ! अत्थि, तं भंते ! किं देवो पकरेइ ३?, तिच्चिवि पकरेन्ति, अत्थि णं भंते ! तमुक्काए बायरे पुढविकाए बादरे अगणिकाए ?, णो तिणट्ठे समट्ठे गण्णत्थ विग्गहगइसमावन्नएणं । अत्थि णं भंते ! तमुक्काए चंदिमसूरियगहगणणक्खत्ततारारूवा ?, णो तिणट्ठे समट्ठे, पलियस्सतो पुण अत्थि । अत्थि णं भंते ! तमुक्काए चंदाभाइ वा सूरभाइ वा ?, णो तिणट्ठे समट्ठे, कादूसणिया पुण सा । तमुक्काए णं भंते ! केरिसए वज्जेणं पण्णत्ते ?, गोयमा ! काले कालावभासे गंभीरलोमहरिसजणणे भीमे उत्तासणए परमकिण्हे वज्जेणं पण्णत्ते, देवेवि णं अत्थेगइए जे णं तप्पढमयाए पासित्ता णं खुभाएज्जा अहे णं अभिसमागच्छेज्जा तथो पच्छा सीहं २ तुरियं २ खिप्पामेव वीईवएज्जा ॥ तमुक्कायस्स णं भंते ! कइ नामधेज्जा पण्णत्ता ?, गोयमा ! तेरस नामधेज्जा पण्णत्ता, तंजहा-तमेइ वा तमुक्काएइ वा अंधकारेइ वा महुंधकारेइ वा लोगंधकारेइ वा लोगतमिस्सेइ वा देवंधकारेइ वा देवतमिस्सेइ वा देवारस्सेइ वा देववूहेइ वा देवफलिहेइ वा देवपडिक्खोभेइ वा अरुणोदएइ वा समुदे ॥ तमुक्काए णं भंते ! किं पुढविपरिणामे आउपरिणामे जीवपरिणामे पोगलपरिणामे ?, गोयमा ! नो पुढविपरिणामे आउपरिणामेवि जीवपरिणामेवि पोगलपरिणामेवि । तमुक्काए णं भंते ! सव्वे पाणा भूया जीवा सत्ता पुढविकाइयत्ताए जाव तसकाइयत्ताए उववन्नपुव्वा ?, हंता गोयमा ! असइं अदुवा अणंतखुत्तो णो चेव णं बादरपुढविकाइयत्ताए बादरअगणिकाइयत्ताए वा ॥ २४० ॥ कइ णं भंते ! कण्हराईओ पण्णत्ताओ ?, गोयमा अट्ठ कण्हराईओ पण्णत्ताओ । कहि णं भंते ! एयाओ अट्ठ कण्हराईओ पण्णत्ताओ ?, गोयमा ! उप्पि सणंकुमारमाहिंदाणं कप्पाणं हिट्ठिं बंमलोए कप्पे रिट्ठे विमाणे पत्थडे, एत्थ णं अक्खाडगसमचउरंससंठाणसंठियाओ अट्ठ कण्हराईओ पण्णत्ताओ, तंजहा-पुरच्छिमेणं दो पच्चत्थिमेणं दो दाहिणेणं दो उत्तरेणं दो, पुरच्छिमब्भंतरा कण्हराई दाहिणं बाहिरं कण्हराईं पुट्ठा दाहिणब्भंतरा कण्हराई पच्चत्थिमबाहिरं कण्हराईं पुट्ठा पच्चत्थिमब्भंतरा कण्हराई उत्तरबाहिरं कण्हराईं पुट्ठा उत्तरमब्भंतरा कण्हराई पुरच्छिमबाहिरं कण्हराईं पुट्ठा, दो पुरच्छिमपच्चत्थिमाओ बाहिराओ कण्हराईओ छलंसाओ दो उत्तरदाहिणबाहिराओ कण्हराईओ तंसाओ दो पुरच्छिमपच्चत्थिमाओ अब्भितराओ कण्हराईओ चउरंसाओ दो उत्तरदाहिणाओ अब्भितराओ कण्हरा-

ईओ चउरंसाओ 'पुन्वावरा छलंसा तंसा पुण दाहिणुत्तरा बज्झा । अन्भंतर
 (अवसेसा)चउरंसा सन्वावि य कण्हराईओ ॥ १ ॥' कण्हराईओ णं भंते ! केवइयं
 आयामेणं केवइयं विक्खंभेणं केवइयं परिकखेवेणं पण्णत्ता ? गोयमा ! असंखेज्जाई
 जोयणसहस्साई आयामेणं असंखेज्जाई जोयणसहस्साई विक्खंभेणं असंखेज्जाई
 जोयणसहस्साई परिकखेवेणं पण्णत्ताओ । कण्हराईओ णं भंते ! केमहालियाओ
 पण्णत्ता ? गोयमा ! अयणं जंबुद्दीवे २ जाव अ(ट्ट)दुमासं वीईवएज्जा अत्थेगइयं
 कण्हराई वीईवएज्जा अत्थेगइयं कण्हराई णो वीईवएज्जा, एमहालियाओ णं गोयमा !
 कण्हराईओ पण्णत्ताओ । अत्थि णं भंते ! कण्हराईसु गेहाइ वा गेहावणाइ वा ?, नो
 तिणट्ठे समट्ठे । अत्थि णं भंते ! कण्हराईसु गामाइ वा० ?, णो तिणट्ठे समट्ठे ।
 अत्थि णं भंते ! कण्ह० ओराला बलाहया संमुच्छंति ३ ?, हंता । अत्थि, तं भंते !
 किं देवो प० ३ ?, गो० देवो पकरेइ नो सुरो नो नागो य । अत्थि णं भंते !
 कण्हराईसु बादरे थणियसइ जहा ओराला तहा । अत्थि णं भंते ! कण्हराईए बादरे
 आउकाए बादरे अगणिकाए वायरे वणप्फइकाए ?, णो तिणट्ठे समट्ठे, णणत्थ
 विग्गहगइसमावन्नएणं । अत्थि णं चंदिमसूरिय ४ प० ?, णो तिण० । अत्थि णं
 कण्ह० चंदाभाइ वा २ ?, णो तिणट्ठे समट्ठे । कण्हराईओ णं भंते ! केरिसियाओ
 वज्जेणं पत्ताओ ?, गोयमा ! कालाओ जाव खिप्पामेव वीईवएज्जा । कण्हराईओ
 णं भंते ! कइ नामधेज्जा पण्णत्ता ? गोयमा ! अट्ठ नामधेज्जा पण्णत्ता, तंजहा-
 कण्हराइति वा मेहराईइ वा मघावई(घे)इ वा माघवईइ वा वायफलिहेइ वा
 वायपलिकखोमेइ वा देवफलिहेइ वा देवपलिकखोमेइ वा, कण्हराईओ णं भंते !
 किं पुढविपरिणामाओ आउपरिणामाओ जीवपरिणामाओ पोगगलपरिणामाओ ?,
 गोयमा ! पुढविपरिणामाओ नो आउपरिणामाओ जीवपरिणामाओवि पोगगलपरि-
 णामाओवि । कण्हराईसु णं भंते ! सव्वे पाणा भूया जीवा सत्ता उववन्नपुन्वा ?,
 हंता गोयमा ! असइ अदुवा अणंतखुत्तो नो चेव णं बादरआउकाइयत्ताए बादरअ-
 गणिकाइयत्ताए वा बादरवणप्फइकाइयत्ताए वा ॥ २४१ ॥ एएसि णं अट्ठहं कण्ह-
 राईणं अट्ठसु उवासंतरेसु अट्ठ लोगंतियविमाणा पण्णत्ता, तंजहा-१ अची २ अच्चिमाली
 ३ वइरोयणे ४ पभंकरे ५ चंदाभे ६ सूरामे ७ सुक्कामे ८ सुपइट्ठामे ९ मज्झे रिट्ठामे ।
 कहि णं भंते ! अच्चिविमाणे प० ?, गोयमा ! उत्तरपुरच्छिमेणं, कहि णं भंते ! अच्चि-
 मालिविमाणे प० ?; गोयमा ! पुरच्छिमेणं, एवं परिवाडीए नेयव्वं जाव कहि णं
 भंते ! रिट्ठे विमाणे पण्णत्ते ?, गोयमा ! बहुमज्झदेसभागे । एएसु णं अट्ठसु लोगंति-
 यविमाणेसु अट्ठविहा लोगंतियदेवा परिवसंति, तंजहा-सारस्सयमाइच्चा वण्ही वरुणा

य गदतोया य । तुसिया अन्वावाहा अग्निच्चा चेव रिद्धा य ॥ १ ॥ कहि णं भंते ! सारस्सया देवा परिवसंति ?, गोयमा ! अच्चिविमाणे परिवसंति, कहि णं भंते ! आइच्चा देवा परिवसंति ?, गोयमा ! अच्चिमाळिविमाणे, एवं नेयव्वं जहाणुपुव्वीए जाव कहि णं भंते ! रिद्धा देवा परिवसंति ?, गोयमा ! रिद्धविमाणे ॥ सारस्सयमा-इच्चाणं भंते ! देवाणं कइ देवा कइ देवसया पण्णत्ता ?, गोयमा ! सत्त देवा सत्त देवसया परिवारो पण्णत्तो, वण्हीवरुणाणं देवाणं चउइस देवा चउइस देवसहस्सा परिवारो पण्णत्तो, गदतोयतुसियाणं देवाणं सत्त देवा सत्त देवसहस्सा पण्णत्ता, अव-सेसाणं नव देवा नव देवसया पण्णत्ता—‘पढमजुगलम्मि सत्त उ सयाणि वीयंमि चोइसहस्सा । तइए सत्तसहस्सा नव चेव सयाणि सेसेसु ॥ १ ॥’ लोगंतियवि-माणा णं भंते ! किंपइट्टिया पण्णत्ता ?, गोयमा ! वाउपइट्टिया तदुभयपइट्टिया प०, एवं नेयव्वं—‘विमाणानं पइट्ठाणं बाहल्लुच्चत्तमेव संठाणं ।’ बंभलोयवत्तव्वया नेयव्वा [जहा जीवाभिगमे देवुइसए] जाव हंता गोयमा ! असई अदुवा अणंतखुत्तो । नो चेव णं देवित्ताए । लोगंतियविमाणेसु णं भंते ! केवइयं कालं ठिई पण्णत्ता ?, गोयमा ! अट्ट सागरोवमाई ठिई पण्णत्ता । लोगंतियविमाणेहिंतो णं भंते ! केवइयं अबाहाए लोगंते पण्णत्ते ?, गोयमा ! असंखेज्जाई जोयणसहस्साई अबाहाए लोगंते पण्णत्ते । सेवं भंते ! सेवं भंते ! त्ति ॥ २४२ ॥ छट्ठसए पंचमो उइसओ समत्तो ॥

कइ णं भंते ! पुढवीओ पण्णत्ताओ ?, गोयमा ! सत्त पुढवीओ पण्णत्ताओ, तंजहा—रयणप्पभा जाव तमतमा, रयणप्पभाईणं आवासा भाणियव्वा (जाव) अहेसत्तमाए, एवं जे जत्तिया आवासा ते भाणियव्वा जाव कइ णं भंते ! अणुत्तरविमाणा पण्णत्ता ?, गोयमा ! पंच अणुत्तरविमाणा पण्णत्ता, तंजहा—विजए जाव सव्वट्ठसिद्धे ॥ २४३ ॥ जीवे णं भंते ! मारणंतियसमुग्घाएणं समोहए समोहणित्ता जे भविए इमीसे रयणप्पभाए पुढवीए तीसाए निरयावाससयसहस्सेसु अन्नयरंसि निरयावासंसि नेरइयत्ताए उववज्जित्ताए से णं भंते ! तत्थगए चेव आहारेज वा परिणामेज वा सरिरं वा बंधेज्जा ?, गोयमा ! अत्थेगइए तत्थगए चेव आहारेज वा परिणामेज वा सरिरं वा बंधेज्जा अत्थेगइए तओ पडिनियत्तइ, तओ पडिनियत्तित्ता इहमागच्छइ २ दोब्बपि मारणंतियसमुग्घाएणं समोहणइ २ इमीसे रयणप्पभाए पुढवीए तीसाए निरयावाससयसहस्सेसु अन्नयरंसि निरयावासंसि नेरइयत्ताए उववज्जित्ताए, तओ पच्छा आहारेज वा परिणामेज वा सरिरं वा बंधेज्जा एवं जाव अहेसत्तमा पुढवी । जीवे णं भंते ! मारणंतियसमुग्घाएणं समोहए २ जे भविए चउसट्ठीए असुरकुमारावाससयसहस्सेसु अन्नयरंसि असुरकुमारावासंसि असु-

रकुमारत्ताए उववज्जितए जहा नेरइया तहा भाणियव्वा जाव थणियकुमारा । जीवे णं भंते ! मारणंतियसमुग्घाएणं समोहए २ जे भविए असंखेज्जेसु पुढविकाइयावाससयसहस्सेसु अण्णयरंसि पुढविकाइयावासंसि पुढविकाइयत्ताए उववज्जितए से णं भंते ! मंदरस्स पव्वयस्स पुरच्छिमेणं केवइयं गच्छेज्जा केवइयं पाउणेज्जा ?, गोयमा ! लोयंतं गच्छेज्जा लोयंतं पाउणिज्जा, से णं भंते ! तत्थगए चेव आहारेज्ज वा परिणामेज्ज वा सरीरं वा बंधेज्जा ?, गोयमा ! अत्थेगइए तत्थगए चेव आहारेज्ज वा परिणामेज्ज वा सरीरं वा बंधेज्जा अत्थेगइए तओ पडिनियत्तइ २ ता इह हव्वमागच्छइ २ ता दोच्चंमि मारणंतियसमुग्घाएणं समोहणइ २ ता मंदरस्स पव्वयस्स पुरच्छिमेणं अंगुलस्स असंखेज्जभागमेत्तं वा संखेज्जभागमेत्तं वा वालगं वा वालगपुहुत्तं वा एवं लिक्खं जूयं जवं अंगुलं जाव, जोयणकोडिं वा जोयणकोडा-कोडिं वा संखेज्जेसु वा असंखेज्जेसु वा जोयणसहस्सेसु लोगंते वा एगपदेसियं सेडिं मोत्तूण असंखेज्जेसु पुढविकाइयावाससयसहस्सेसु अन्नयरंसि पुढविकाइयावासंसि पुढविकाइयत्ताए उववज्जेत्ता तओ पच्छा आहारेज्ज वा परिणामेज्ज वा सरीरं वा बंधेज्जा, जहा पुरच्छिमेणं मंदरस्स पव्वयस्स आलावओ भणिओ एवं दाहिणेणं पच्चत्थिमेणं उत्तरेणं उट्ठे अहे, जहा पुढविकाइया तहा एगिंदियाणं सव्वेसिं, एक्के-क्कस्स छ आलावया भाणियव्वा । जीवे णं भंते ! मारणंतियसमुग्घाएणं समोहए २ ता जे भविए असंखेज्जेसु बेदियावाससयसहस्सेसु अण्णयरंसि बेदियावासंसि बेईदियत्ताए उववज्जितए से णं भंते ! तत्थगए चेव जहा नेरइया, एवं जाव अणु-त्तरोववाइया । जीवे णं भंते ! मारणंतियसमुग्घाएणं समोहए २ जे भविए एवं पंचसु अणुत्तरेसु महइमहालएसु महाविमाणेसु अन्नयरंसि अणुत्तरविमाणंसि अणुत्त-रोववाइयदेवताए उववज्जितए, से णं भंते ! तत्थगए चेव जाव आहारेज्ज वा परिणामेज्ज वा सरीरं वा बंधेज्जा ?० । सेवं भंते ! सेवं भंते ! ति ॥२४४॥ पुढवि-उदेसो समत्तो । छडुसए छडो उदेसो समत्तो ॥

अह णं भंते ! सालीणं वीहीणं गोधूमाणं जवाणं जवजवाणं एएसि णं धन्नाणं कोट्ठाउत्ताणं पल्लाउत्ताणं मंचाउत्ताणं मालाउत्ताणं उल्लित्ताणं लिताणं पिहियाणं मुद्दि-याणं लंछियाणं केवइयं कालं जोणी संचिट्ठइ ?, गोयमा ! जहचेणं अंतोमुहुत्तं उल्लोसेणं तिन्नि संवच्छराइं तेण परं जोणी पमिलायइ तेण परं जोणी पविद्धंसइ तेण परं बीए अबीए भवइ तेण परं जोणीवोच्छेदे पक्कते समणाउसो ! । अह भंते ! कलायमसूरतिलमुग्गमासनिप्फावकुलत्थआलिसंदगसतीणपलिसंथगमाईणं एएसि णं धन्नाणं जहा सालीणं तहा एयाणिवि, नवरं पंच संवच्छराइं, सेसं तं चेव । अह

भंते ! अयसिकुलुभगकोद्वकंगुवरगरालगकोदूसगसणसरिसवमूलगवीयमाईणं एएस्ति
 णं धन्नाणं, एयाणिवि तहेव, नवरं सत्त संवच्छराइं, सेसं तं चेव ॥ २४५ ॥
 एगमेगस्स णं भंते ! मुहुत्तस्स केवइया ऊसासद्धा वियाहिया ?, गोयमा ! असं-
 खेज्जाणं समयाणं समुदयसमिइसमागमेणं सा एगा आवलियत्ति पवुच्चइ, संखेज्जा
 आवलिया ऊसासो संखेज्जा आवलिया निस्सासो-हट्ठस्स अणवगल्लस्स, निस्सवकिट्ठस्स
 जंतुणो । एगे ऊसासनीसासे, एस पाणुत्ति वुच्चइ ॥ १ ॥ सत्त पाणूणि से थोवे,
 सत्त थोवाई से लवे । लवाणं सत्तहत्तरिए, एस मुहुत्ते वियाहिए ॥ २ ॥ तिच्चि
 सहस्सा सत्त य सयाइं तेवत्तरिं च ऊसासा । एस मुहुत्तो दिट्ठो सव्वेहिं अणंत-
 नाणीहिं ॥ ३ ॥ एएणं मुहुत्तपमाणेणं तीसमुहुत्तो अहोरत्तो, पन्नरस अहोरत्ता
 पक्खो, दो पक्खा मासे, दो मासा उऊ, तिच्चि उउए अयणे, दो अयणे संवच्छरे,
 पंचसंवच्छरिए जुगे, वीसं जुगाइं वाससर्यं, दस वाससयाइं वाससहस्सं, सर्यं वास-
 सहस्साइं वाससयसहस्सं, चउरासीइ वाससयसहस्साणि से एगे पुव्वंगे, चउरासीइ
 पुव्वंगसयसहस्साइं से एगे पुव्वे, [एवं पुव्वे] २ तुडिए २ अडडे २ अववे २
 हूहूए २ उप्पले २ पउमे २ नल्लिणे २ अच्छणिउरे २ अउए २ पउए य २ नउए
 य २ चूलिया २ सीसपहेलिया २ एताव ताव गणिए एताव ताव गणियस्स विसए,
 तेण परं ? ओवमिए । से किं तं ओवमिए ?, २ दुविहे पण्णत्ते तंजहा पलिओवमे
 य सागरोवमे य, से किं तं पलिओवमे ? से किं तं सागरोवमे ? ॥ सत्थेण सुत्ति-
 क्खेणवि छेत्तुं भेत्तुं च जं न किर सक्का । तं परमाणुं सिद्धा वयंति आईं पमाणाणं
 ॥ १ ॥ अणंताणं परमाणुपोगलाणं समुदयसमिइसमागमेणं सा एगा उस्सण्ह-
 सण्हियाइ वा सण्हसण्हियाइ वा उड्डुरेणूइ वा तसरेणूइ वा रहरेणूइ वा वाल-
 ग्गेइ वा लिक्खाइ वा जूयाइ वा जवमज्जेइ वा अंगुलेइ वा, अट्ठ उस्सण्ह-
 सण्हियाओ सा एगा सण्हसण्हिया, अट्ठ सण्हसण्हियाओ सा एगा उड्डुरेणू, अट्ठ
 उड्डुरेणूओ सा एगा तसरेणू, अट्ठ तसरेणूओ सा एगा रहरेणू, अट्ठ रहरेणूओ से
 एगे देवकुसुउत्तरकुसुगाणं मणूसाणं वालग्गे, एवं हरिवासरम्मगहेमवएरज्जवयाणं पुव्व-
 विदेहाणं मणूसाणं अट्ठ वालग्गा सा एगा लिक्खा, अट्ठ लिक्खाओ सा एगा जूया,
 अट्ठ जूयाओ से एगे जवमज्जे, अट्ठ जवमज्जाओ से एगे अंगुले, एएणं अंगुलपमा-
 णेणं छ अंगुलाणि पाओ, बारस अंगुलाई विहत्थी, चउव्वीसं अंगुलाई रयणी, अडया-
 लीसं अंगुलाई कुच्छी, छन्नउइ अंगुलाणि से एगे दंडेइ वा धणूइ वा जूएइ वा
 नालियाइ वा अक्खेइ वा मुसलेइ वा, एएणं धणुप्पमाणेणं दो धणुसहस्साइं
 गाउर्यं, चत्तारि गाउयाइं जोयणं, एएणं जोयणप्पमाणेणं जे पल्ले जोयणं आयाम-

विक्खंभेणं जोयणं उड्डं उच्चतेणं तं तिउणं सविसेसं परिरएणं, से णं एगाहियवेया-
हियतेयाहिय उक्कोसं सत्तरत्तप्पकूढाणं संमट्ठे संनिचिए भरिए वालगगकोडीणं [ते],
से णं वालगे नो अग्गी दहेज्जा नो वाऊ हरेज्जा नो कुत्थेज्जा नो परिविद्धंसेज्जा
नो पूइत्ताए हव्वमागच्छेज्जा, तओ णं वाससए २ एगमेणं वालगं अवहाय जाव-
इएणं कालेणं से पळे खीणे नीरए निम्मले तिट्ठिए निळेवे अवहडे विखुद्धे भवइ,
से तं पळिओवमे । गाहा-एएसिं पळाणं कोडाकोडी हवेज्ज दसगुणिया । तं साग-
रोवमस्स उ एक्कस्स भवे परिमाणं ॥ १ ॥ एएणं सागरोवमपमाणेणं चत्तारि साग-
रोवमकोडाकोडीओ कालो सुसमसुसमा १ तिन्नि सागरोवमकोडाकोडीओ कालो
सुसमा २ दो सागरोवमकोडाकोडीओ कालो सुसमदुसमा ३ एगा सागरोवमकोडा-
कोडी बायालीसाए वाससहस्सेहिं ऊणिया कालो दुसमसुसमा ४ एक्कवीसं वाससह-
स्साइं कालो दुसमा ५ एक्कवीसं वाससहस्साइं कालो दुसमदुसमा ६ । पुणरवि
ओसप्पिणीए एक्कवीसं वाससहस्साइं कालो दुसमदुसमा १ एक्कवीसं वाससहस्साइं
जाव चत्तारि सागरोवमकोडाकोडीओ कालो सुसमसुसमा, दस सागरोवमकोडा-
कोडीओ कालो ओसप्पिणी दस सागरोवमकोडाकोडीओ कालो उस्सप्पिणी वीसं
सागरोवमकोडाकोडीओ कालो ओसप्पिणी य उस्सप्पिणी य ॥ २४६ ॥ जंबुदीवे णं
भंते ! दीवे इमीसे ओसप्पिणीए सुसमसुसमाए समाए उत्तमद्वपत्ताए भरहस्स
वासस्स केरिए आगारभावपडोयारे होत्था ?, गोयमा ! बहुसमरमणिज्जे भूमिभागे
होत्था, से जहानामए-आलिंगपुक्खरेइ वा एवं उत्तरकुत्तव्वया नेयव्वा जाव
आसयंति सयंति, तीसे णं समाए भारहे वासे तत्थ २ देसे २ तहिं २ बहवे
ओराला कुहाला जाव कुसविकुसविसुद्धत्तव्वमूला जाव छव्विहा मणुस्सा अणुसज्जित्था
प०, तं०-पम्हगंधा १ मियगंधा २ अममा ३ तेयली ४ सहा ५ सण्णिचारी ६ ।
सेवं भंते ! सेवं भंते ! ति ॥ २४७ ॥ छट्ठसए सत्तमो उद्देसओ समत्तो ॥

कइ णं भंते ! पुढवीओ पत्तताओ ?, गोयमा ! अट्ठ पुढवीओ पण्णत्ताओ,
तंजहा-रयणप्पमा जाव ईसिप्पम्भारा । अत्थि णं भंते ! इमीसे रयणप्पमाए पुढवीए
अहे गेहाइ वा गेहावणाइ वा ?, गोयमा ! णो तिण्ठे समट्ठे । अत्थि णं भंते !
इमीसे रयणप्पमाए अहे गामाइ वा जाव संनिवेसाइ वा ? नो तिण्ठे समट्ठे । अत्थि
णं भंते ! इमीसे रयणप्पमाए पुढवीए अहे उराला बलाहया संसेयंति संमुच्छंति
वासं वासंति ?, हंता ! अत्थि, तिन्निवि पकरंति देवोवि पकरेइ असुरोवि प० नागोवि
प० । अत्थि णं भंते ! इमीसे रयण० बादरे थणियसहे ?, हंता ! अत्थि, तिन्निवि
पकरंति । अत्थि णं भंते ! इमीसे रयण० अहे बादरे अगणिकाए ?, गोयमा ! नो

तिण्डे समट्टे, नन्नत्थ विग्गहगइसमावन्नएणं । अत्थि णं भंते ! इमीसे रयण० अहे चंदिम जाव ताराख्वा ? , नो तिण्डे समट्टे । अत्थि णं भंते ! इमीसे रयणप्पभाए पुढवीए चंदाभाइ वा २ ? , णो इण्डे समट्टे, एवं दोच्चाएवि पुढवीए भाणियव्वं, एवं तच्चाएवि भाणियव्वं, नवरं देवोवि पकरेइ असुरोवि पकरेइ णो णागो पकरेइ, चउत्थाएवि एवं नवरं देवो एक्को पकरेइ नो असुरो० नो नागो पकरेइ, एवं हेट्ठिल्लासु सव्वासु देवो एक्को पकरेइ । अत्थि णं भंते ! सोहम्मीसाणाणं कप्पाणं अहे गेहाइ वा २ ? नो इण्डे समट्टे । अत्थि णं भंते ! उराला बलाहया ? हुंता ! अत्थि, देवो पकरेइ असुरोवि पकरेइ नो नाओ पकरेइ, एवं थणियसदेवि । अत्थि णं भंते ! बायरे पुढविकाए वादरे अगणिकाए ? , णो इण्डे समट्टे, नणत्थ विग्गहगइसमावन्नएणं । अत्थि णं भंते ! चंदिम० ? , णो तिण्डे समट्टे । अत्थि णं भंते ! गामाइ वा० ? , णो तिण्डे स० । अत्थि णं भंते ! चंदाभाइ वा २ ? , गोयमा ! णो तिण्डे समट्टे । एवं सणकुमारमाहिंदेसु नवरं देवो एगो पकरेइ । एवं बंभलोएवि । एवं बंभलगस्स उवरिं सव्वहिं देवो पकरेइ, पुच्छियव्वो य, बायरे आउकाए बायरे अगणिकाए बायरे वणस्सइकाए अन्नं तं चेव ॥ गाहा—तमुकाए कप्पपणए अगणी पुढवी य अगणि पुढवीसु । आऊतेउवणस्सइ कप्पुवरिमकणहराईसु ॥ १ ॥ ॥ २४८ ॥ कइविहे णं भंते ! आउयबंधए पन्नते ? , गोयमा ! छव्विहा आउय-बंधा पन्नत्ता, तंजहा—जाइनामनिहत्ताउए १ गइनामनिहत्ताउए २ ठिइनामनिहत्ताउए ३ ओगाहणानामनिहत्ताउए ४ पएसनामनिहत्ताउए ५ अणुभागनामनिहत्ताउए ६ दंडओ जाव वेमाणियाणं ॥ जीवा णं भंते ! किं जाइनामनिहत्ता जाव अणुभागनामनिहत्ता ? , गोयमा ! जाइनामनिहत्तावि जाव अणुभागनामनिहत्तावि, दंडओ जाव वेमाणियाणं । जीवा णं भंते ! किं जाइनामनिहत्ताउया जाव अणुभागनामनिहत्ताउया ? , गोयमा ! जाइनामनिहत्ताउयावि जाव अणुभागनामनिहत्ताउयावि, दंडओ जाव वेमाणियाणं । एवं एए दुवाल्स दंडगा भाणियव्वा । जीवा णं भंते ! किं जाइनामनिहत्ता १ जाइनामनिहत्ताउया २ ? , १२ । जीवा णं भंते ! किं जाइनामनिउत्ता ३ जाइनामनिउत्ताउया ४ जाइगोयनिहत्ता ५ जाइगोयनिहत्ताउया ६ जाइगोयनिउत्ता ७ जाइगोयनिउत्ताउया ८ जाइणामगोयनिहत्ता ९ जाइणामगोयनिहत्ताउया १० जाइणामगोयनिउत्ता ११ ? जीवा णं भंते ! किं जाइनामगोयनिउत्ताउया १२ जाव अणुभागनामगोयनिउत्ताउया ? , गोयमा ! जाइनामगोयनिउत्ताउयावि जाव अणुभागनामगोयनिउत्ताउयावि दंडओ जाव वेमाणियाणं ॥ २४९ ॥ लवणे णं भंते ! समुदे किं उस्सिओदए पत्थढीदए खुभियजले अखु-

भियजले ?, गोयमा ! लवणे णं समुद्दे ऊसिओदए नो पत्थडोदए खुभियजले नो अखुभियजले एत्तो आढत्तं जहा जीवाभिगमे जाव से तेण० गोयमा ! बाहिरया णं दीवससुद्धा पुञ्जा पुञ्जप्पमाणा वोल्हमाणा वोसट्टमाणा समभरघडत्ताए चिट्ठंति संठा-
णओ एगविहिविहाणा वित्थारओ अणेगविहिविहाणा दुगुणादुगुणप्पमाणाओ जाव अस्सि तिरियलोए असंखेज्जा दीवससुद्धा सयंभुरमणपज्जवसाणा पन्नत्ता समणाउसो ! ।
दीवससुद्धा णं भंते ! केवइया नामधेजेहिं पन्नत्ता ?, गोयमा ! जावइया लोए सुभा नामा सुभा रुवा सुभा गंधा सुभा रसा सुभा फासा एवइया णं दीवससुद्धा नामधेजेहिं पन्नत्ता, एवं नेयव्वा सुभा नामा उद्धारो परिणामो सव्वजीवाणं । सेवं भंते ! सेवं भंते ! ति ॥ २५० ॥ छट्ठसयस्स अट्ठमो उद्देसो समत्तो ॥

जीवे णं भंते ! णाणावरणिजं कम्म बंधमाणे कइ कम्मप्पगडीओ बंधइ ?, गोयमा ! सत्तविहवंधए वा अट्ठविहवंधए वा छव्विहवंधए वा, बंधुद्देसो पन्नवणाए नेयव्वो ॥ २५१ ॥ देवे णं भंते ! महिद्धिए जाव महाणुभागे बाहिरए पोग्गले अपरियाइत्ता पभू एगवन्नं एगरूवं विउव्वित्तए ?, गोयमा ! नो तिण्ठे० । देवे णं भंते ! बाहिरए पोग्गले परियाइत्ता पभू ? हंता ! पभू, से णं भंते ! किं इहगए पोग्गले परियाइत्ता विउव्वइ तत्थगए पोग्गले परियाइत्ता विउव्वइ अन्नत्थगए पोग्गले परि-
याइत्ता विउव्वइ ?, गोयमा ! नो इहगए पोग्गले परियाइत्ता विउव्वइ, तत्थगए पोग्गले परियाइत्ता विउव्वइ, नो अन्नत्थगए पोग्गले परियाइत्ता विउव्वइ, एवं एएणं गमेणं जाव एगवन्नं एगरूवं १ एगवणं अणेगरूवं २ अणेगवन्नं एगरूवं ३ अणेगवन्नं अणेगरूवं ४ चउभंगो । देवे णं भंते ! महिद्धिए जाव महाणुभागे बाहि-
रए पोग्गले अपरियाइत्ता पभू कालयं पोग्गलं नीलगपोग्गलत्ताए परिणामेत्तए नीलगं पोग्गलं वा कालगपोग्गलत्ताए परिणामेत्तए ?, गोयमा ! नो तिण्ठे समट्ठे, परिया-
इत्ता पभू । से णं भंते ! किं इहगए पोग्गले तं चेव नवरं परिणामेइति भाणियव्वं, एवं कालगपोग्गलं लोहियपोग्गलत्ताए, एवं कालएणं जाव सुक्किलं, एवं णीलएणं जाव सुक्किलं, एवं लोहियपोग्गलं जाव सुक्किलत्ताए, एवं हालिइएणं जाव सुक्किलं, तंजहा-एवं एयाए परिवाडीए गंधरसफास० कक्खडफासपोग्गलं मउयफासपोग्गल-
त्ताए २ एवं दो दो गरुयलहुय २ सीयउत्तिण २ णिद्धलक्ख २, वन्नाइ सव्वत्थ परि-
णामेइ, आलावगा य दो दो पोग्गले अपरियाइत्ता परियाइत्ता ॥ २५२ ॥ अविउद्धलेसे णं भंते ! देवे असमोहएणं अप्पाणएणं अविउद्धलेसं देवं देविं अन्नयरं जाणइ पासइ १ ? णो तिण्ठे समट्ठे, एवं अविउद्धलेसे देवे असमोहएणं अप्पाणेणं विउद्धलेसं देवं ३, २ । अविउद्धलेसे समोहएणं अप्पाणेणं अविउद्धलेसं देवं ३, ३ । अवि-

सुद्धलेसे देवे समोहएणं अप्पाणेणं विसुद्धलेसं देवं ३, ४ । अविमुद्धलेसे समोहया-
समोहएणं अप्पाणेणं अविमुद्धलेसं देवं ३, ५ । अविमुद्धलेसे समोहया० विसुद्धलेसं
देवं ३, ६ ॥ विसुद्धलेसे असमो० अविमुद्धलेसं देवं ३, १ । विसुद्धलेसे असमोहएणं
विसुद्धलेसं देवं ३, २ । विसुद्धलेसे णं भंते ! देवे समोहएणं अविमुद्धलेसं देवं ३
जाणइ०?, हंता ! जाणइ०, एवं विसुद्ध० समो० विसुद्धलेसं देवं ३ जाणइ ?, हंता !
जाणइ ४ । विसुद्धलेसे समोहयासमोहएणं अविमुद्धलेसं देवं ३, ५ । विसुद्धलेसे
समोहयासमोहएणं विसुद्धलेसं देवं ३, ६ । एवं हेट्ठिण्हिं अट्ठिं न जाणइ न
पासइ उवरिण्हिं चउहिं जाणइ पासइ । सेवं भंते ! सेवं भंते ! त्ति ॥ २५३ ॥
छट्ठसए नवमो उद्देशो समत्तो ॥

अन्नउत्थिया णं भंते ! एवमाइक्खंति जाव परूवेति जावइया रायगिहे नयरे
जीवा एवइयाणं जीवाणं नो चक्किया केइ सुहं वा दुहं वा जाव कोलट्टिगमायमवि
निप्फावमायमवि कलममायमवि मासमायमवि मुग्गमायमवि जूयामायमवि लिक्खा-
मायमवि अभिनिवेत्ता उवदंसित्तए, से कहमेयं भंते ! एवं ?, गोयमा ! जन्नं ते
अन्नउत्थिया एवमाइक्खंति जाव मिच्छं ते एवमाहंसु, अहं पुण गोयमा ! एवमाइ-
क्खामि जाव परूवेमि सव्वलोएवि य णं सव्वजीवाणं णो चक्किया कोई सुहं वा तं
चेव जाव उवदंसित्तए । से केणट्ठेणं ?, गोयमा ! अयन्नं जंबुदीवे २ जाव विसेसाहिए
परिक्खेवेणं पक्कते, देवे णं महिद्धिं जाव महाणुभागे एणं महं सविलेवणं गंधससुग्गं
गहाय तं अवहालेइ तं अवहालेता जाव इणामेव कट्ठ केवलकप्पं जंबुदीवं २ तिहिं
अच्छरानिवाएहिं तिसत्तखुत्तो अणुपरियट्ठिता णं हव्वमागच्छेज्जा, से नूनं गोयमा ! से
केवलकप्पे जंबुदीवे २ तेहिं घाणपोग्गलेहिं फुडे?, हंता ! फुडे, चक्किया णं गोयमा !
केइ तेसिं घाणपोग्गलाणं कोलट्टियामायमवि जाव उवदंसित्तए ?, णो तिणट्ठे समट्ठे,
से तेणट्ठेणं जाव उवदंसित्तए ॥ २५४ ॥ जीवे णं भंते ! जीवे २ जीवे ?, गोयमा !
जीवे ताव नियमा जीवे जीवेवि नियमा जीवे । जीवे णं भंते ! नेरइए नेरइए जीवे ?,
गोयमा ! नेरइए ताव नियमा जीवे जीवे पुण सिय नेरइए सिय अनेरइए, जीवे णं
भंते ! असुरकुमारे असुरकुमारे जीवे ?, गोयमा ! असुरकुमारे ताव नियमा जीवे जीवे
पुण सिय असुरकुमारे सिय णो असुरकुमारे, एवं दंडओ भाणियव्वो जाव वेमाणियाणं ।
जीवइ भंते ! जीवे जीवे जीवइ ?, गोयमा ! जीवइ ताव नियमा जीवे जीवे पुण
सिय जीवइ सिय नो जीवइ, जीवइ भंते ! नेरइए २ जीवइ ?, गोयमा ! नेरइए
ताव नियमा जीवइ २ पुण सिय नेरइए सिय अनेरइए, एवं दंडओ नेयव्वो जाव
वेमाणियाणं । भवसिद्धिं णं भंते ! नेरइए २ भवसिद्धिं ?, गोयमा ! भवसिद्धिं

सिय नेरइए सिय अनेरइए नेरइएऽविय सिय भवसिद्धिए सिय अभवसिद्धिए, एवं दंडओ जाव वेमाणियाणं ॥ २५५ ॥ अन्नउत्थिया णं भंते ! एवमाइक्खंति जाव परूवेति एवं खलु सत्त्वे पाणा भूया जीवा सत्ता एगंतदुक्खं वेयणं वेयंति, से कहमेयं भंते ! एवं ?, गोयमा ! जज्ञं ते अन्नउत्थिया जाव मिच्छं ते एवमाहंसु, अहं पुण गोयमा ! एवमाइक्खामि जाव परूवेमि अत्थेगइया पाणा भूया जीवा सत्ता एगंतदुक्खं वेयणं वेयंति आहच्च सायं, अत्थेगइया पाणा भूया जीवा सत्ता एगंतसायं वेयणं वेयंति आहच्च असायं, अत्थेगइया पाणा भूया जीवा सत्ता वेमायाए वेयणं वेयंति आहच्च सायमसायं । से केणट्ठेणं ? , गोयमा ! नेरइया एगंतदुक्खं वेयणं वेयंति [आहच्च सायमसायं] आहच्च सायं, भवणवइवाणमंतरजोइसवेमाणिया एगंतसायं वेयणं वेयंति आहच्च असायं, पुढविकाइया जाव मणुस्सा वेमायाए वेयणं वेयंति आहच्च सायमसायं, से तेणट्ठेणं ० ॥ २५६ ॥ नेरइया णं भंते ! जे पोग्गले अत्तमायाए आहारेंति ते किं आयसरीरखेत्तोगाढे पोग्गले अत्तमायाए आहारेंति अणंतरखेत्तोगाढे पोग्गले अत्तमायाए आहारेंति परंपरखेत्तोगाढे पोग्गले अत्तमायाए आहारेंति ?, गोयमा ! आयसरीरखेत्तोगाढे पोग्गले अत्तमायाए आहारेंति नो अणंतरखेत्तोगाढे पोग्गले अत्तमायाए आहारेंति नो परंपरखेत्तोगाढे, जहा नेरइया तहा जाव वेमाणियाणं दंडओ ॥ २५७ ॥ केवली णं भंते ! आयाणेहिं जाणइ पासइ ?, गोयमा ! नो तिणट्ठे ० । से केणट्ठेणं ?, गोयमा ! केवली णं पुरच्छिमेणं मियंयि जाणइ अमियंयि जाणइ जाव निव्वुडे दंसणे केवलिस्स से तेणट्ठेणं ० । गाहा-जीवाण सुहं दुक्खं जीवे जीवइ तहेव भविया य । एगंतदुक्खवेयण अत्तमाया य केवली ॥१॥ सेवं भंते ! सेवं भंते ! ति ॥ २५८ ॥ छट्ठं सयं समत्तं ॥

गाहा—आहार १ विरइ २ थावर ३ जीवा ४ पक्खी य ५ आउ ६ अणगारे ७ । छउमत्थ ८ असंवुड ९ अन्नउत्थि १० दस सत्तममि सए ॥ १ ॥ तेणं कलेणं तेणं समएणं जाव एवं वयासी-जीवे णं भंते ! कं समयमणाहारए भवइ ?, गोयमा ! पढमे समए सिय आहारए सिय अणाहारए बिइए समए सिय आहारए सिय अणाहारए तइए समए सिय आहारए सिय अणाहारए चउत्थे समए नियमा आहारए, एवं दंडओ, जीवा य एगिंदिया य चउत्थे समए सेसा तइए समए ॥ जीवे णं भंते ! कं समयं सव्वप्पाहारए भवइ ?, गोयमा ! पढमसमयोववज्जए वा चरमसमए भवत्थे वा एत्थ णं जीवे णं सव्वप्पाहारए भवइ, दंडओ भाणियव्वो जाव वेमाणियाणं ॥ २५९ ॥ किंसंठिए णं भंते ! लोए पज्जेते ?, गोयमा ! सुपइट्ठगसंठिएलोए पज्जेते, हेट्ठा विच्छिजे जाव उप्पि उद्धमुइगागारसंठिए, तेसिं च णं

सासयंसि लोगंसि हेट्ठा विच्छिन्नंसि जाव उर्यि उद्धुमुहंगागारसंठियंसि उप्पन्नाना-
दंसणधरे अरहा जिणे केवली जीवेवि जाणइ पासइ अजीवेवि जाणइ पासइ तओ
पच्छा सिज्झइ जाव अंतं करेइ ॥ २६० ॥ समणोवासगस्स णं भंते ! सामाइय-
कडस्स समणोवासए अच्छमाणस्स तस्स णं भंते ! किं इरियावहिया किरिया
कज्जइ संपराइया किरिया कज्जइ ?, गोयमा ! समणोवासयस्स णं सामाइयकडस्स
समणोवासए अच्छमाणस्स आया अहिगरणीभवइ आयाहिगरणवत्तियं च णं तस्स
नो इरियावहिया किरिया कज्जइ संपराइया किरिया कज्जइ, से तेणट्ठेणं जाव संपरा-
इया० ॥ २६१ ॥ समणोवासगस्स णं भंते ! पुव्वामेव तसपाणसमारंभे पच्चक्खाए
भवइ पुढविसमारंभे अपच्चक्खाए भवइ से य पुढविं खणमाणेऽण्णयरं तसं पाणं
विहिंसेजा से णं भंते ! तं वयं अइचरइ ?, णो तिणट्ठे समट्ठे, नो खलु से तस्स
अइवायाए आउट्ठइ । समणोवासयस्स णं भंते ! पुव्वामेव वणस्सइसमारंभे पच्च-
क्खाए से य पुढविं खणमाणे अन्नयरस्स रुक्खस्स मूलं छिदेज्जां से णं भंते ! तं
वयं अइचरइ ?, णो तिणट्ठे समट्ठे, नो खलु तस्स अइवायाए आउट्ठइ ॥ २६२ ॥
समणोवासए णं भंते ! तहारूवं समणं वा माहणं वा फासुएसणिजेणं असणपाण-
खाइमसाइमेणं पडिलाभेमाणे किं लब्भइ ?, गोयमा ! समणोवासए णं तहारूवं समणं
वा जाव पडिलाभेमाणे तहारूवस्स समणस्स वा माहणस्स वा समाहिं उप्पाएइ,
समाहिकारएणं तमेव समाहिं पडिलभइ । समणोवासए णं भंते ! तहारूवं समणं
वा जाव पडिलाभेमाणे किं चयइ ?, गोयमा ! जीवियं चयइ दुच्चयं चयइ दुक्करं
करेइ दुल्लं लहइ बोहिं बुज्झइ तओ पच्छा सिज्झइ जाव अंतं करेइ ॥ २६३ ॥
अत्थि णं भंते ! अकम्मस्स गई पच्चायइ ?, हंता ! अत्थि ॥ कहवं भंते ! अक-
म्मस्स गई पच्चायइ ?, गोयमा ! निस्संगयाए निरंगणयाए गइपरिणामेणं बंधण-
छेयणयाए निरंधणयाए पुव्वप्पओगेणं अकम्मस्स गई प० ॥ कहवं भंते ! निस्संग-
याए निरंगणयाए गइपरिणामेणं बंधणछेयणयाए निरंधणयाए पुव्वप्पओगेणं अक-
म्मस्स गई पच्चायइ ?, से जहानामए-केइ पुरिसे सुक्कं तुवं निच्छिइं निस्सवहयंति
आणुपुव्वीए परिकम्मेमाणे २ दब्भेहिं य कुसेहिं य वेढेइ २ अट्ठहिं मट्ठियालेवेहिं
लिपइ २ उण्हे दलयइ भूइं २ सुक्कं समाणं अत्थाहमतारमपोरसियंसि उदगंसि
पक्खिवेज्जा, से नूणं गोयमा ! से तुंवे तेसिं अट्ठहं मट्ठियालेवेणं गुरुयत्ताए भारिय-
त्ताए गुरुसंभारियत्ताए सलिलतलमइवइत्ता अहे धरणितलपइट्ठणे भवइ ?, हंता !
भवइ, अहे णं से तुंवे अट्ठहं मट्ठियालेवेणं परिकखएणं धरणितलमइवइत्ता उर्यि
सलिलतलपइट्ठणे भवइ ?, हंता ! भवइ, एवं खलु गोयमा ! निस्संगयाए निरंगण-

याए गइपरिणामेणं अकम्मस्स गई पन्नायइ । कहन्नं भंते ! बंधणछेयणयाए अक-
 म्मस्स गई प० ?, गोयमा ! से जहानामए-कलसिंबलियाइ वा मुग्गसिंबलियाइ वा
 माससिंबलियाइ वा सिंबलिसिंबलियाइ वा एरंडमिंजियाइ वा उण्हे दिन्ना सुक्का-
 समाणी फुडित्ता णं एगंतमंतं गच्छइ, एवं खलु गोयमा ! ० । कहन्नं भंते ! निरं-
 धणयाए अकम्मस्स गई प० ?, गोयमा ! से जहानामए-धूमस्स ईधणविप्पमुक्कस्स
 उद्धं वीससाए निव्वाधाएणं गई पवत्तइ, एवं खलु गोयमा ! ० । कहन्नं भंते !
 पुव्वप्पओगेणं अकम्मस्स गई प० ?, गोयमा ! से जहानामए कंडस्स कोदंडविप्प-
 मुक्कस्स लक्खाभिमुही निव्वाधाएणं गई पवत्तइ, एवं खलु गोयमा ! नीसंगयाए
 निरंगणयाए जाव पुव्वप्पओगेणं अकम्मस्स गई प० ॥ २६४ ॥ दुक्खी भंते !
 दुक्खेणं फुडे अदुक्खी दुक्खेणं फुडे ?, गोयमा ! दुक्खी दुक्खेणं फुडे नो अदुक्खी
 दुक्खेणं फुडे । दुक्खी णं भंते ! नेरइए दुक्खेणं फुडे अदुक्खी नेरइए दुक्खेणं
 फुडे ?, गोयमा ! दुक्खी नेरइए दुक्खेणं फुडे नो अदुक्खी नेरइए दुक्खेणं फुडे,
 एवं दंडओ जाव वेमाणियाणं, एवं पंच दंडगा नेयव्वा-दुक्खी दुक्खेणं फुडे १
 दुक्खी दुक्खं परियायइ २ दुक्खी दुक्खं उदीरेइ ३ दुक्खी दुक्खं वेदेइ ४ दुक्खी
 दुक्खं निजरेइ ५ ॥ २६५ ॥ अणगारस्स णं भंते ! अणाउत्तं गच्छमाणस्स वा
 चिट्ठमाणस्स वा निसीयमाणस्स (वा) तुयट्ठमाणस्स वा अणाउत्तं वत्थं पडिग्गहं
 कंबलं पायपुंछणं गेण्हमाणस्स वा निक्खिवमाणस्स वा तस्स णं भंते ! किं इरिया-
 वहिया किरिया कज्जइ ? संपराइया किरिया कज्जइ ?, गो० नो इरियावहिया किरिया
 कज्जइ संपराइया किरिया कज्जइ । से केणट्ठेणं ० ?, गोयमा ! जस्स णं कोहमाण-
 मायालोभा वोच्छिन्ना भवन्ति तस्स णं इरियावहिया किरिया कज्जइ नो संपराइया
 किरिया कज्जइ, जस्स णं कोहमाणमायालोभा अवोच्छिन्ना भवन्ति तस्स णं संपराइया
 किरिया कज्जइ नो इरियावहिया, अहासुत्तं रीयमाणस्स इरियावहिया किरिया कज्जइ
 उस्सुत्तं रीयमाणस्स संपराइया किरिया कज्जइ, से णं उस्सुत्तमेव रियइ, से तेण-
 ट्ठेणं ० ॥ २६६ ॥ अह भंते ! सईगालस्स सधूमस्स संजोयणादोसदुट्ठस्स पाण-
 भोयणस्स के अट्ठे पण्णत्ते ?, गोयमा ! जे णं निग्गंथे वा निग्गंथी वा फासुएसणिज्जं
 असणपाण ४ पडिगाहिता मुच्छिए गिद्धे गटिए अज्झोववन्ने आहारं आहारेइ
 एस णं गोयमा ! सईगाले पाणभोयणे, जे णं निग्गंथे वा निग्गंथी वा फासुएसणिज्जं
 असणपाण ४ पडिगाहिता महया २ अप्पत्तिक्कोहकिलामं करेमाणे आहारमाहारेइ
 एस णं गोयमा ! सधूमे पाणभोयणे, जे णं निग्गंथे वा २ जाव पडिगाहेत्ता गुणु-
 पाप्यणहेउं अन्नदव्वेण सद्धिं संजोएत्ता आहारमाहारेइ एस णं गोयमा ! संजोयणा-

दोसदुट्टे पाणभोयणे, एस णं गोयमा ! सइंगालस्स सधूमस्स संजोयणादोसदुट्टस्स पाणभोयणस्स अट्टे पन्नते । अह भंते ! वीतिंगालस्स वीयधूमस्स संजोयणादोस-विप्पमुक्कस्स पाणभोयणस्स के अट्टे पन्नते ?, गोयमा ! जे णं निगंग्थे वा जाव पडिगाहेत्ता अमुच्छिण्ण जाव आहारेइ एस णं गोयमा ! वीतिंगाले पाणभोयणे, जे णं निगंग्थे वा निगंग्थी वा जाव पडिगाहेत्ता णो महया अप्पत्तियं जाव आहारेइ, एस णं गोयमा ! वीयधूमे पाणभोयणे, जे णं निगंग्थे वा निगंग्थी वा जाव पडिगाहेत्ता जहालद्धं तद्वा आहारमाहारेइ एस णं गोयमा ! संजोयणादोसविप्पमुक्के पाणभोयणे, एस णं गोयमा ! वीतिंगालस्स वीयधूमस्स संजोयणादोसविप्पमुक्कस्स पाणभोयणस्स अट्टे पन्नते ॥ २६७ ॥ अह भंते ! खेत्ताइक्कंतस्स कालाइक्कंतस्स मग्गाइक्कंतस्स पमाणाइक्कंतस्स पाणभोयणस्स के अट्टे पन्नते ?, गो० जे णं निगंग्थे वा निगंग्थी वा फासुएसणिज्जं णं असणं ४ अणुग्गए सूरिए पडिगाहिता उग्गए सूरिए आहारमाहारेइ एस णं गोयमा ! खेत्ताइक्कंते पाणभोयणे, जे णं निगंग्थो वा २ जाव साइमं पढमाए पोरिसीए पडिगाहेत्ता पच्छिमं पोरिसिं उवायणावेत्ता आहारं आहारेइ एस णं गोयमा ! कालाइक्कंते पाणभोयणे, जे णं निगंग्थो वा २ जाव साइमं पडिगाहिता परं अद्धजोयणमेराए वीइक्कमावइत्ता आहारमाहारेइ एस णं गोयमा ! मग्गाइक्कंते पाणभोयणे, जे णं निगंग्थो वा निगंग्थी वा फासुएसणिज्जं जाव साइमं पडिगाहिता परं बत्तीसाए पमाणमेत्ताणं कवलणं आहारमाहारेइ एस णं गोयमा ! पमाणाइक्कंते पाणभोयणे, अट्टपमाणमेत्ते कवले आहारमाहारेमाणे अप्पाहारे दुवालसपमाणमेत्ते कवले आहारमाहारेमाणे अवद्धोमोयरिया सोलस-पमाणमेत्ते कवले आहारमाहारेमाणे दुभागपत्ते चउव्वीसं पमाणमेत्ते कवले आहारमाहारेमाणे ओमोयरिए बत्तीसं पमाणमेत्ते कवले (जत्तिओ जस्स पुरिसस्स आहारो तस्साहारस्स बत्तीसइमो भागो तप्पुरिसावेक्खाए कवले, इणमेव 'कवल' पमाणं ति,) आहारमाहारेमाणे पमाणपत्ते, एत्तो एक्केणवि गासेणं ऊणगं आहारमाहारेमाणे समणे निगंग्थे नो पक्कामरसभोईति वत्तव्वं सिया, एस णं गोयमा ! खेत्ताइक्कंतस्स कालाइक्कंतस्स मग्गाइक्कंतस्स पमाणाइक्कंतस्स पाणभोयणस्स अट्टे पन्नते ॥ २६८ ॥ अह भंते ! सत्थाईयस्स सत्थपरिणामियस्स एसियस्स वेसियस्स समुदाणियस्स पाणभोयणस्स के अट्टे पन्नते ?, गोयमा ! जे णं निगंग्थे वा निगंग्थी वा निक्खित्तसत्थमुसले ववगयमालावन्नगविलेवणे ववगयसुयच्चइयचत्तदेहं जीवविप्पज्जं अकयमकारियमसंकप्पियमणाह्वयमकीयकडमणुद्धिं नवकोडीपरिसुद्धं दसदोसविप्पमुक्कं उग्गमुप्पायणेसणासुपरिसुद्धं वीतिंगालं वीयधूसं संजोयणादोसविप्पमुक्कं असुरसुरं

अच्चवचवं अदुयमविलंबियं अपरिसाडिं अवखोवज्जणवणाणुलेवणभूयं संजमजायामा-
यावत्तियं संजमभारवहणट्टयाए विलमिव पन्नगभूएणं अप्पाणेणं आहारमाहारेइ एस
णं गोयमा ! सत्थाईयस्स सत्थपरिणामियस्स जाव पाणभोयणस्स अयमट्टे पन्नत्ते ।
सेवं भंते ! सेवं भंते ! ति ॥ २६९ ॥ **सत्तमसए पढमो उद्देसो समत्तो ॥**

से नूणं भंते ! सव्वपाणेहिं सव्वभूएहिं सव्वजीवेहिं सव्वसत्तेहिं पच्चक्खायमिति
वयमाणस्स सुपच्चक्खायं भवइ दुपच्चक्खायं भवइ ?, गोयमा ! सव्वपाणेहिं जाव
सव्वसत्तेहिं पच्चक्खायमिति वयमाणस्स सिय सुपच्चक्खायं भवइ सिय दुपच्चक्खायं
भवइ, से केणट्टेणं भंते ! एवं वुच्चइ सव्वपाणेहिं जाव सिय दुपच्चक्खायं भवइ ?,
गोयमा ! जस्स णं सव्वपाणेहिं जाव सव्वसत्तेहिं पच्चक्खायमिति वयमाणस्स णो
एवं अभिसमन्नागयं भवइ इमे जीवा इमे अजीवा इमे तसा इमे थावरा तस्स णं
सव्वपाणेहिं जाव सव्वसत्तेहिं पच्चक्खायमिति वयमाणस्स नो सुपच्चक्खायं भवइ
दुपच्चक्खायं भवइ, एवं खलु से दुपच्चक्खाई सव्वपाणेहिं जाव सव्वसत्तेहिं पच्च-
क्खायमिति वयमाणो नो सच्चं भासं भासइ मोसं भासं भासइ, एवं खलु से मुसा-
वाई सव्वपाणेहिं जाव सव्वसत्तेहिं तिविहं तिविहेणं असंजयविरयपडिहयपच्चक्खा-
यपावकम्मे सकिरिए असंवुडे एगंतदंडे एगंतवाले यावि भवइ, जस्स णं सव्वपा-
णेहिं जाव सव्वसत्तेहिं पच्चक्खायमिति वयमाणस्स एवं अभिसमन्नागयं भवइ-इमे
जीवा इमे अजीवा इमे तसा इमे थावरा, तस्स णं सव्वपाणेहिं जाव सव्वसत्तेहिं
पच्चक्खायमिति वयमाणस्स सुपच्चक्खायं भवइ नो दुपच्चक्खायं भवइ, एवं खलु
से सुपच्चक्खाई सव्वपाणेहिं जाव सव्वसत्तेहिं पच्चक्खायमिति वयमाणे सच्चं भासं
भासइ नो मोसं भासं भासइ, एवं खलु से सच्चवाई सव्वपाणेहिं जाव सव्वसत्तेहिं
तिविहं तिविहेणं संजयविरयपडिहयपच्चक्खायपावकम्मे अकिरिए संवुडे एगंतपं-
डिए यावि भवइ, से तेणट्टेणं गोयमा ! एवं वुच्चइ जाव सिय दुपच्चक्खायं भवइ
॥ २७० ॥ कइविहे णं भंते ! पच्चक्खाणे पन्नत्ते ?, गोयमा ! दुविहे पच्चक्खाणे
पन्नत्ते, तंजहा-मूलगुणपच्चक्खाणे य उत्तरगुणपच्चक्खाणे य । मूलगुणपच्चक्खाणे णं
भंते ! कइविहे पन्नत्ते ?, गोयमा ! दुविहे पन्नत्ते, तंजहा-सव्वमूलगुणपच्चक्खाणे य
देसमूलगुणपच्चक्खाणे य, सव्वमूलगुणपच्चक्खाणे णं भंते ! कइविहे पन्नत्ते ?,
गोयमा ! पंचविहे पन्नत्ते, तंजहा-सव्वाओ पाणाइवायाओ वेरमणं जाव सव्वाओ
परिग्गहाओ वेरमणं । देसमूलगुणपच्चक्खाणे णं भंते ! कइविहे पन्नत्ते ?, गोयमा !
पंचविहे पन्नत्ते, तंजहा-थूलाओ पाणाइवायाओ वेरमणं जाव थूलाओ परिग्गहाओ
वेरमणं । उत्तरगुणपच्चक्खाणे णं भंते ! कइविहे पन्नत्ते ? गोयमा ! दुविहे पन्नत्ते,

तंजहा-सव्वुत्तरगुणपच्चक्खाणे यं देसुत्तरगुणपच्चक्खाणे यं, सव्वुत्तरगुणपच्चक्खाणे णं भंते ! कइविहे पच्चत्ते ?, गोयमा ! दसविहे पच्चत्ते, तंजहा-अणागय १ मइक्कंतं २ कोडीसहियं ३ नियंठियं ४ चेव । सागार ५ मणागारं ६ परिमाणकडं ७ निरवसेसं ८ ॥ १ ॥ सा(सं)केयं ९ चेव अद्धाए १० पच्चक्खाणं भवे दसहा । देसुत्तरगुणपच्चक्खाणे णं भंते ! कइविहे पच्चत्ते ?, गोयमा ! सत्तविहे पच्चत्ते, तंजहा-दिसिब्बयं १ उवभोगपरिभोगपरिमाणं २ अणत्थदंडवेरमणं ३ सामाइयं ४ देसावगासियं ५ पोसहोववासो ६ अतिहिसंविभागो ७ अपच्छिममारणंतियसंलेहणाइसुणाराहण्या ॥ २७१ ॥ जीवा णं भंते ! किं मूलगुणपच्चक्खाणी उत्तरगुणपच्चक्खाणी अपच्चक्खाणी ?, गोयमा ! जीवा मूलगुणपच्चक्खाणीवि उत्तरगुणपच्चक्खाणीवि अपच्चक्खाणीवि । नेरइया णं भंते ! किं मूलगुणपच्चक्खाणी० पुच्छा, गोयमा ! नेरइया नो मूलगुणपच्चक्खाणी नो उत्तरगुणपच्चक्खाणी अपच्चक्खाणी, एवं जाव चउरिंदिया, पंचिंदियतिरिक्खजोणिया मणुस्सा य जहा जीवा, वाणमंतरजोइसियवेमाणिया जहा नेरइया ॥ एएसि णं भंते ! जीवाणं मूलगुणपच्चक्खाणीणं उत्तरगुणपच्चक्खाणीणं अपच्चक्खाणीण य कयरे २ हितो जाव विसेसाहिया वा ?, गोयमा ! सव्वत्थोवा जीवा मूलगुणपच्चक्खाणी उत्तरगुणपच्चक्खाणी असंखेज्जगुणा अपच्चक्खाणी अणंतगुणा । एएसि णं भंते ! पंचिंदियतिरिक्खजोणियाणं पुच्छा, गोयमा ! सव्वत्थोवा जीवा पंचिंदियतिरिक्खजोणिया मूलगुणपच्चक्खाणी उत्तरगुणपच्चक्खाणी असंखेज्जगुणा अपच्चक्खाणी असंखेज्जगुणा । एएसि णं भंते ! मणुस्साणं मूलगुणपच्चक्खाणीणं० पुच्छा, गोयमा ! सव्वत्थोवा मणुस्सा मूलगुणपच्चक्खाणी उत्तरगुणपच्चक्खाणी संखेज्जगुणा अपच्चक्खाणी असंखेज्जगुणा । जीवा णं भंते ! किं सव्वमूलगुणपच्चक्खाणी देसमूलगुणपच्चक्खाणी अपच्चक्खाणी ?, गोयमा ! जीवा सव्वमूलगुणपच्चक्खाणीवि देसमूलगुणपच्चक्खाणीवि अपच्चक्खाणीवि । नेरइयाणं पुच्छा, गोयमा ! नेरइया नो सव्वमूलगुणपच्चक्खाणी नो देसमूलगुणपच्चक्खाणी अपच्चक्खाणी, एवं जाव चउरिंदिया । पंचिंदियतिरिक्ख० पुच्छा, गोयमा ! पंचिंदियतिरिक्ख० नो सव्वमूलगुणपच्चक्खाणी देसमूलगुणपच्चक्खाणीवि अपच्चक्खाणीवि, मणुस्सा जहा जीवा, वाणमंतरजोइसवेमाणिया जहा नेरइया । एएसि णं भंते ! जीवाणं सव्वमूलगुणपच्चक्खाणीणं देसमूलगुणपच्चक्खाणीणं अपच्चक्खाणीण य कयरे २ हितो जाव विसेसाहिया वा ?, गोयमा ! सव्वत्थोवा जीवा सव्वमूलगुणपच्चक्खाणी देसमूलगुणपच्चक्खाणी असंखेज्जगुणा अपच्चक्खाणी अणंतगुणा । एवं अप्पाबहुगाणि तिच्चिवि जहा पढमिहए दंडए, नवरं सव्वत्थोवा पंचिंदियतिरिक्खजोणिया देसमूलगुणपच्चक्खाणी अपच्चक्खाणी ३३ सुत्ता०

असंखेज्जगुणा । जीवा णं भंते ! किं सव्वुत्तरगुणपच्चक्खाणी देसुत्तरगुणपच्चक्खाणी अपच्चक्खाणी ?, गोयमा ! जीवा सव्वुत्तरगुणपच्चक्खाणीवि तिच्चिवि, पंचिंदियतिरिक्खजोणिया मणुस्सा य एवं चेव, सेसा अपच्चक्खाणी जाव वेमाणिया । एएसि णं भंते ! जीवाणं सव्वुत्तरगुणपच्चक्खाणीणं० अप्पावहुगाणि, तिच्चिवि जहा पढमे दंडए जाव मणूसाणं ॥ जीवा णं भंते ! किं संजया असंजया संजयासंजया ? गोयमा ! जीवा संजयावि असंजयावि संजयासंजयावि, एवं जहेव पच्चवणाए तहेव भाणियव्वं जाव वेमाणिया, अप्पावहुगं तहेव तिण्हवि भाणियव्वं ॥ जीवा णं भंते ! किं पच्चक्खाणी अपच्चक्खाणी पच्चक्खाणापच्चक्खाणी ?, गोयमा ! जीवा पच्चक्खाणीवि एवं तिच्चिवि, एवं मणुस्सावि तिच्चिवि, पंचिंदियतिरिक्खजोणिया आइ-ल्लविरहिया सेसा सव्वे अपच्चक्खाणी जाव वेमाणिया । एएसि णं भंते ! जीवाणं पच्चक्खाणीणं जाव विसेसाहिया वा ?, गोयमा ! सव्वत्थोवा जीवा पच्चक्खाणी पच्चक्खाणापच्चक्खाणी असंखेज्जगुणा अपच्चक्खाणी अणंतगुणा, पंचिंदियतिरिक्खजोणिया सव्वत्थोवा पच्चक्खाणापच्चक्खाणी अपच्चक्खाणी असंखेज्जगुणा, मणुस्सा सव्वत्थोवा पच्चक्खाणी पच्चक्खाणापच्चक्खाणी संखेज्जगुणा अपच्चक्खाणी असंखेज्जगुणा ॥ २७२ ॥ जीवा णं भंते ! किं सासया असासया ?, गोयमा ! जीवा सिय सासया सिय असासया । से केणट्ठेणं भंते ! एवं वुच्चइ-जीवा सिय सासया सिय असासया ?, गोयमा ! दव्वट्ठयाए सासया भावट्ठयाए असासया, से तेणट्ठेणं गोयमा ! एवं वुच्चइ-जाव सिय असासया । नेरइया णं भंते ! किं सासया असासया ?, एवं जहा जीवा तहा नेरइयावि, एवं जाव वेमाणिया जाव सिय सासया सिय असासया । सेवं भंते ! सेवं भंते ! ति ॥ २७३ ॥ **सत्तमस्स विइओ उदेसो समत्तो ॥**

वणस्सइकाइया णं भंते ! किंकालं सव्वप्पाहारगा वा सव्वमहाहारगा वा भवंति ?, गोयमा ! पाउसवरिसारत्तेसु णं एत्थ णं वणस्सइकाइया सव्वमहाहारगा भवंति तयाणंतरे च णं सरए, तयाणंतरे च णं हेमते, तयाणंतरे च णं वसंते, तयाणंतरे च णं गिम्हा, गिम्हासु णं वणस्सइकाइया सव्वप्पाहारगा भवंति, जइ णं भंते ! गिम्हासु वणस्सइकाइया सव्वप्पाहारगा भवंति, कम्हा णं भंते ! गिम्हासु बहवे वणस्सइकाइया पत्तिया पुप्फिया फलिया हरियगरेरिज्जमाणा सिरीए अईव अईव उवसोभेमाणा उवसोभेमाणा चिट्ठंति ?, गोयमा ! गिम्हासु णं बहवे उसिणजोणिया जीवा य पोग्गला य वणस्सइकाइयत्ताए वक्कमंति विउक्कमंति चर्यंति उववज्जंति, एवं खलु गोयमा ! गिम्हासु बहवे वणस्सइकाइया पत्तिया पुप्फिया जाव चिट्ठंति ॥ २७४ ॥ से नूणं भंते ! मूला मूलजीवफुडा कंदा कंदजीवफुडा जाव बीया बीय-

जीवफुडा ?, हंता गोयमा ! मूला मूलजीवफुडा जाव बीया बीयजीवफुडा । जइ णं भंते ! मूला मूलजीवफुडा जाव बीया बीयजीवफुडा कम्हा णं भंते ! वणस्सइ-काइया आहारेंति कम्हा परिणामेंति ?, गोयमा ! मूला मूलजीवफुडा पुढविजीव-पडिबद्धा तम्हा आहारेंति तम्हा परिणामेंति, कंदा कंदजीवफुडा मूलजीवपडिबद्धा तम्हा आहारेन्ति तम्हा परिणामेन्ति, एवं जाव बीया बीयजीवफुडा फलजीवपडिबद्धा तम्हा आहारेन्ति तम्हा परिणामेन्ति ॥ २७५ ॥ अह भंते ! आलुए मूलए सिंगवेरे हिरिली सिरिली सिस्सिरिली किट्टिया छिरिया छीरिविरालिया कण्हकंदे वज्जकंदे सूरणकंदे खेल्ले अइए भइमुत्था पिंडहलिद्दा लोही णीहू शीहू थिरुगा मुगकन्नी अस्सकन्नी सीहकण्णी मुसुंढी जे यावन्ने तहप्पगारा सव्वे ते अणंतजीवा विविहसत्ता ?, हंता गोयमा ! आलुए मूलए जाव अणंतजीवा विविहसत्ता ॥ २७६ ॥ सिय भंते ! कण्हलेसे नेरइए अप्पकम्मतराए नीललेसे नेरइए महाकम्मतराए ?, हंता ! सिया, से केणट्टेणं भंते ! एवं वुच्चइ-कण्हलेसे नेरइए अप्पकम्मतराए नीललेसे नेरइए महा-कम्मतराए ?, गोयमा ! ठिई पडुच्च, से तेणट्टेणं गोयमा ! जाव महाकम्मतराए । सिय भंते ! नीललेसे नेरइए अप्पकम्मतराए काउलेसे नेरइए महाकम्मतराए ? हंता ! सिया, से केणट्टेणं भंते ! एवं वुच्चइ-नीललेसे नेरइए अप्पकम्मतराए काउलेसे नेरइए महाकम्मतराए ?, गोयमा ! ठिई पडुच्च, से तेणट्टेणं गोयमा ! जाव महाकम्म-तराए । एवं असुरकुमारेवि, नवरं तेउल्लेसा अब्भहिया एवं जाव वेमाणिया, जस्स जइ लेसाओ तस्स तत्तिथा भाणियव्वाओ, जोइसियस्स न भन्नइ, जाव सिय भंते ! पम्हलेसे वेमाणिए अप्पकम्मतराए सुक्कलेसे वेमाणिए महाकम्मतराए ?, हंता ! सिया, से केणट्टेणं ? सेसं जहा नेरइयस्स जाव महाकम्मतराए ॥ २७७ ॥ से नूणं भंते ! जा वेयणा सा निज्जरा जा निज्जरा सा वेयणा ?, गोयमा ! णो तिणट्ठे समट्ठे, से केणट्टेणं भंते ! एवं वुच्चइ जा वेयणा न सा निज्जरा जा निज्जरा न सा वेयणा ?, गोयमा ! कम्म वेयणा णोकम्म निज्जरा, से तेणट्टेणं गोयमा ! जाव न सा वेयणा । नेरइयाणं भंते ! जा वेयणा सा निज्जरा जा निज्जरा सा वेयणा ?, गोयमा ! णो तिणट्ठे समट्ठे, से केणट्टेणं भंते ! एवं वुच्चइ नेरइयाणं जा वेयणा न सा निज्जरा जा निज्जरा न सा वेयणा ?, गोयमा ! नेरइयाणं कम्म वेयणा णोकम्म निज्जरा, से तेणट्टेणं गोयमा ! जाव न सा वेयणा, एवं जाव वेमाणियाणं । से नूणं भंते ! जं वेदेंसु तं निज्जरिंसु जं निज्जरिंसु तं वेदेंसु ?, णो तिणट्ठे समट्ठे, से केणट्टेणं भंते ! एवं वुच्चइ जं वेदेंसु नो तं निज्जरेंसु जं निज्जरेंसु नो तं वेदेंसु ?, गोयमा ! कम्मं वेदेंसु नोकम्मं निज्जरिंसु, से तेणट्टेणं गोयमा ! जाव नो तं वेदेंसु, नेरइया णं भंते !

जं वेदेंसु तं निज्जरिस्सु ? एवं नेरइयावि एवं जाव वेमाणिआ । से नूणं भंते ! जं वेदेंति तं निज्जरेंति जं निज्जरिति तं वेदेंति ?, गोयमा ! णो तिणट्ठे समट्ठे, से केणट्ठेणं भंते ! एवं वुच्चइ जाव नो तं वेदेंति ?, गोयमा ! कम्मं वेदेंति नोक्कम्मं निज्जरेंति, से तेणट्ठेणं गोयमा ! जाव नो तं वेदेंति, एवं नेरइयावि जाव वेमाणिआ । से नूणं भंते ! जं वेदिस्संति तं निज्जरिस्संति जं निज्जरिस्संति तं वेदिस्संति ?, गोयमा ! णो तिणट्ठे समट्ठे, से केणट्ठेणं जाव णो तं वेदिस्संति ?, गोयमा ! कम्मं वेदिस्संति नोक्कम्मं निज्जरिस्संति, से तेणट्ठेणं जाव नो तं निज्जरिस्संति, एवं नेरइयावि जाव वेमाणिआ । से णूणं भंते ! जे वेयणासमए से निज्जरासमए जे निज्जरासमए से वेयणासमए ?, नो तिणट्ठे समट्ठे, से केणट्ठेणं भंते ! एवं वुच्चइ जे वेयणासमए न से निज्जरासमए जे निज्जरासमए न से वेयणासमए ?, गोयमा ! जं समयं वेदेंति नो तं समयं निज्जरेंति जं समयं निज्जरेंति नो तं समयं वेदेंति, अन्नम्मि समए वेदेंति अन्नम्मि समए निज्जरेंति अन्ने से वेयणासमए अन्ने से निज्जरासमए, से तेणट्ठेणं जाव न से वेयणासमए न से निज्जरासमए । नेरइयाणं भंते ! जे वेयणासमए से निज्जरासमए जे निज्जरासमए से वेयणासमए ?, गोयमा ! णो तिणट्ठे समट्ठे, से केणट्ठेणं भंते ! एवं वुच्चइ नेरइयाणं जे वेयणासमए न से निज्जरासमए जे निज्जरासमए न से वेयणासमए ?, गोयमा ! नेरइया णं जं समयं वेदेंति णो तं समयं निज्जरेंति जं समयं निज्जरेंति नो तं समयं वेदेंति अन्नम्मि समए वेदेंति अन्नम्मि समए निज्जरेंति अन्ने से वेयणासमए अन्ने से निज्जरासमए, से तेणट्ठेणं जाव न से वेयणासमए एवं जाव वेमाणिआ ॥ २७८ ॥ नेरइया णं भंते ! किं सासया असासया ?, गोयमा ! सिय सासया सिय असासया, से केणट्ठेणं भंते ! एवं वुच्चइ नेरइया सिय सासया सिय असासया ?, गोयमा ! अव्वोच्छित्तिणयट्ठयाए सासया वोच्छित्तिणयट्ठयाए असासया, से तेणट्ठेणं जाव सिय सासया सिय असासया, एवं जाव वेमाणिआ जाव सिय असासया । सेवं भंते ! सेवं भंते ! ति ॥ २७९ ॥

सत्तमे सए तइओ उद्देसो समत्तो ॥

रायगिहे नगरे जाव एवं वयासी-कइविहा णं भंते ! संसारसमावन्नगा जीवा पन्नत्ता ?, गोयमा ! छव्विहा संसारसमावन्नगा जीवा पन्नत्ता, तंजहा—पुढविकाइया एवं जहा जीवाभिगमे जाव सम्मत्तकिरियं वा मिच्छत्तकिरियं वा ॥ जीवा छव्विह पुढवी जीवाण ठिई भवट्ठिई काए । निल्लेवण अणगारे किरिया सम्मत्तमिच्छत्ता ॥ १ ॥ सेवं भंते ! सेवं भंते ! ति ॥ २८० ॥

सत्तमे सए चउत्थो उद्देसो समत्तो ॥

रायगिहे जाव एवं वयासी-खइयरपंविदियतिरिक्खजोणियाणं भंते ! कइविहे

णं जोणीसंगहे पण्णत्ते ?, गोयमा ! तिविहे जोणीसंगहे पण्णत्ते, तंजहा-अंडया पोयया संमुच्छिमा, एवं जहा जीवाभिगमे जाव नो चेव णं ते विमाणे वीईव-एजा । एवंमहालायाणं गोयमा ! ते विमाणा पन्नत्ता ॥ 'जोणीसंगह लेसा दिट्ठी नाणे य जोग उवओगे । उववायठिइसमुग्वायचवणजईकुलविहीओ' ॥ १ ॥ सेवं भंते ! सेवं भंते ! ति ॥ २८१ ॥ **सत्तमे सए पंचमो उद्देसो समत्तो ॥**

रायगिहे जाव एवं वयासी-जीवे णं भंते ! जे भविए नेरइएसु उववज्जितए से णं भंते ! किं इहगए नेरइयाउयं पकरेइ उववज्जमाणे नेरइयाउयं पकरेइ उववजे नेरइयाउयं पकरेइ ?, गोयमा ! इहगए नेरइयाउयं पकरेइ नो उववज्जमाणे नेरइया-उयं पकरेइ नो उववजे नेरइयाउयं पकरेइ, एवं असुरकुमारेसुवि एवं जाव वेमाणि-एसु । जीवे णं भंते ! जे भविए नेरइएसु उववज्जितए से णं भंते ! किं इहगए नेर-इयाउयं पडिसंवेदेइ उववज्जमाणे नेरइयाउयं पडिसंवेदेइ उववजे नेरइयाउयं पडिसंवेदेइ ?, गोयमा ! णो इहगए नेरइयाउयं पडिसंवेदेइ उववज्जमाणे नेरइयाउयं पडिसंवेदेइ उववजे नेरइयाउयं पडिसंवेदेइ, एवं जाव वेमाणिएसु । जीवे णं भंते ! जे भविए नेरइएसु उववज्जितए से णं भंते ! किं इहगए महावेयणे उववज्जमाणे महावेयणे उववजे महावेयणे ?, गोयमा ! इहगए सिय महावेयणे सिय अप्पवेयणे उववज्जमाणे सिय महावेयणे सिय अप्पवेयणे अहे णं उववजे भवइ तओ पच्छा एगंतदुक्खं वेयणं वेयइ आहच्च सायं । जीवे णं भंते ! जे भविए असुरकुमारेसु उववज्जितए पुच्छा, गोयमा ! इहगए सिय महावेयणे सिय अप्पवेयणे उववज्जमाणे सिय महावेयणे सिय अप्पवेयणे अहे णं उववजे भवइ तओ पच्छा एगंतसायं वेयणं वेदेइ आहच्च असायं, एवं जाव थणियकुमारेसु । जीवे णं भंते ! जे भविए पुढविकाइएसु उववज्जितए पुच्छा, गोयमा ! इहगए सिय महावेयणे सिय अप्पवेयणे, एवं उववज्जमाणेवि, अहे णं उववजे भवइ तओ पच्छा वेमायाए वेयणं वेयइ, एवं जाव मणुस्सेसु, वाणमंतरजोइसियवेमाणिएसु जहा असुरकुमारेसु ॥ २८२ ॥ जीवा णं भंते ! किं आभोगनिव्वत्तियाउया अणाभोगनिव्वत्तियाउया ?, गोयमा ! नो आभोगनिव्वत्तियाउया अणाभोगनिव्वत्तियाउया, एवं नेरइयावि, एवं जाव वेमाणिया ॥ २८३ ॥ अत्थि णं भंते ! जीवाणं कक्कसवेयणिज्जा कम्मा कज्जंति ?, [गोयमा !] हंता ! अत्थि, कहन्नं भंते ! जीवाणं कक्कसवेयणिज्जा कम्मा कज्जंति ?, गोयमा ! पाणाइवाएणं जाव सिच्छादंसणसल्लेणं, एवं खलु गोयमा ! जीवाणं कक्कस-वेयणिज्जा कम्मा कज्जंति । अत्थि णं भंते ! नेरइयाणं कक्कसवेयणिज्जा कम्मा कज्जंति ?, [एवं चेव] एवं जाव वेमाणियाणं । अत्थि णं भंते ! जीवाणं अकक्कसवेयणिज्जा

कम्मा कज्जंति ?, हन्ता ! अत्थि, कहञ्चं भंते ! जीवाणं अकक्खसवेयणिज्जा कम्मा कज्जंति ?, गोयमा ! पाणाइवायवेरमणेणं जाव परिग्गहवेरमणेणं कोहविवेगेणं जाव मिच्छाईसणसल्लविवेगेणं, एवं खलु गोयमा ! जीवाणं अकक्खसवेयणिज्जा कम्मा कज्जंति । अत्थि णं भंते ! नेरइयाणं अकक्खसवेयणिज्जा कम्मा कज्जंति ?, गोयमा ! णो तिणट्ठे समट्ठे, एवं जाव वेमाणिया, नवरं मणुस्साणं जहा जीवाणं ॥ २८४ ॥ अत्थि णं भंते ! जीवाणं सायावेयणिज्जा कम्मा कज्जंति ?, हंता ! अत्थि, कहञ्चं भंते ! जीवाणं सायावेयणिज्जा कम्मा कज्जंति ?, गोयमा ! पाणाणुकंपाए भूयाणुकंपाए जीवाणुकंपाए सत्ताणुकंपाए बहूणं पाणाणं जाव सत्ताणं अदुक्खणयाए असोयणयाए अजूरणयाए अतिप्पणयाए अपिट्ठणयाए अपरियावणयाए एवं खलु गोयमा ! जीवाणं सायावेयणिज्जा कम्मा कज्जंति, एवं नेरइयाणवि, एवं जाव वेमाणियाणं । अत्थि णं भंते ! जीवाणं असायावेयणिज्जा कम्मा कज्जंति ?, हंता ! अत्थि । कहञ्चं भंते ! जीवाणं असायावेयणिज्जा कम्मा कज्जंति ?, गोयमा ! परदुक्खणयाए परसोयणयाए परजूरणयाए परतिप्पणयाए परपिट्ठणयाए परपरियावणयाए बहूणं पाणाणं जाव सत्ताणं दुक्खणयाए सोयणयाए जाव परियावणयाए एवं खलु गोयमा ! जीवाणं असायावेयणिज्जा कम्मा कज्जंति, एवं नेरइयाणवि, एवं जाव वेमाणियाणं ॥ २८५ ॥ जंबुद्दीवे णं भंते ! दीवे भारहे वासे इमीसे ओसप्पिणीए दुसमदुसमाए समाए उत्तमकट्ठपत्ताए भारहस्स वासस्स केरिसए आगारभावपडोयारे भविस्सइ ?, गोयमा ! कालो भविस्सइ हाहाभूए भंभाभूए कोलाहलभूए समयणुभावेण य णं खरफरुसधूलिमइला दुव्विसइहा वाउला भयंकरा वाया संवट्ठगा य वाहिंति, इह अभिक्खं २ धूमाहिंति य दिसा सव्वओ समंता रउस्सला रेणुकलसतमपडलनिरालोगा समयलुक्खयाए य णं अहियं चंदा सीयं मोच्छंति अहियं सुरिया तवइस्संति अदुत्तरं च णं अभिक्खणं बहवे अरसमेहा विरसमेहा खारमेहा खट्ठमेहा अग्गिमेहा विज्जुमेहा विसमेहा असणिमेहा अप्पवणिज्जोदगा (अजवणिज्जोदया) वाहिरोगवेयणेदीरणापरिणामसलिला अमणुजपाणियगा चंडानिलपहयतिक्खधारानिवायपउरवासं वासिहिंति । जे णं भारहे वासे गामागरनगरखेडकव्वडमडंबदोणमुहपट्ठणासमगयं जणवयं चउप्पयगवेलगाए खहयरे य पक्खिसंवे गामारजपयारनिरए तसे य पाणे बहुप्पगारे रुक्खगुच्छगुम्मलयचलितणपव्वगहरियोसहिपवालंकुरमाइए य तणवणस्सइकाइए विद्धंसेहिंति, पव्वयगिरिडोंगरउच्छ(त्थ)लभट्ठिमाइए य वेयङ्गगिरिवज्जे विरावेहिंति सलिलबिलगडुदुग्गविसमं निण्णुजयाई.च गंगासिंधुवज्जाई समीकरेहिंति ॥ तीसे णं भंते ! समाए भरहवासस्स भूमीए केरिसए आगारभावपडोयारे भविस्सइ ?, गोयमा ! भूमी भविस्सइ

इंगालभूया मुम्मुरभूया छारियभूया तत्तकवेळयभूया तत्तसमजोइभूया धूलिबहुला रेणु-
 बहुला पंकबहुला पणगबहुला चलणिबहुला बहूणं धरणिगोयराणं सत्ताणं दुञ्चिकमा
 यावि भविस्सइ ॥ २८६ ॥ तीसे णं भंते ! समाए भारहे वासे मणुयाणं केरिसए
 आगारभावपडोयारे भविस्सइ ?, गोयमा ! मणुया भविस्संति दुहूवा दुवच्चा दुगंधा
 दुरसा दुफासा अणिट्ठा अकंता जाव अमणामा हीणस्सरा दीणस्सरा अणिट्ठस्सरा
 जाव अमणामस्सरा अणादेज्जवयणपच्चायाया निळजा कूडकवडकलहवहबंधवेरनिरया
 मज्जायाइक्कमप्पहाणा अकज्जनिच्चुज्जया गुरुनियोयविणयरहिया य विकलरूवा परूढ-
 नहकेसमंसुरोमा काला खरफरुसझामवच्चा फुट्टसिरा कविलपलियकेसा बहुण्हार [णि]-
 संपिणद्धुइंसणिज्जरूवा संकुडियवलितरंगपरिवेदियंगमंगा जरापरिणयव्व थेरगनरा
 पविरलपरिसडियदंतसेदी उब्भडघडमुहा विसमनयणा वंकनासा वंगवलिविगय-
 भेसणमुहा कच्छुकसराभिभूया खरतिक्खनहकंइइयविकखयतणू ददुकिडिभिसिंझ-
 फुडियफरुसच्छवी चित्तलंगा टोलागइविसमसंधिवंधणउकुडुअट्टिगविभत्तदुब्बलकु-
 संघयणकुप्पमाणकुसंठिया कुरूवा कुठाणासणकुसेजकुभोइणो असुइणो अणेगवाहि-
 परिपीलियंगमंगा खलंतविब्भलगई निरुच्छाहा सत्तपरिवज्जिया विगयचिट्ठा नट्टतेया
 अभिक्खणं सीयउण्हखरफरुसवायविज्झडिया मलिणपंसुरयगुंडियंगमंगा बहुकोह-
 माणमाया बहुलोभा असुहदुक्खभोगी ओसच्चं धम्मसण्णसम्मत्तपरिब्भट्ठा उक्कोसेणं
 रयणिप्पमाणमेत्ता सोलसवीसइवासपरमाउसो पुत्तनत्तुपरियालपणयबहुला गंगा-
 सिंधूओ महानईओ वेयह्वं च पव्वयं निस्साए बावत्तरिं निओदा बीयं वीयामेत्ता
 बिलवासिणो भविस्संति ॥ ते णं भंते ! मणुया किमाहारमाहारेहिंति ?, गोयमा ! ते
 णं काळे णं ते णं समए णं गंगासिंधूओ महानईओ रहपहवित्थराओ अक्खसोयप्प-
 माणमेत्तं जलं वोज्झिहिंति सेवि य णं जले बहुमच्छकच्छभाइसे णो चेव णं आउबहुले
 भविस्सइ, तए णं ते मणुया सूरुग्गमणमुहुत्तंसि य सूरत्थमणमुहुत्तंसि य बिलेहिंतो
 निद्धाहिंति निद्धाइत्ता मच्छकच्छभे थलाई गाहेहिंति सीयायवततएहिं मच्छकच्छ-
 एहिं एक्कवीसं वाससहस्साई वित्तिं कप्पेमाणा विहरिस्संति ॥ ते णं भंते ! मणुया
 निस्सीला निग्गुणा निम्मेरा निप्पच्चक्खाणपोसहोववासा ओसण्णं मंसांहारा मच्छा-
 हारा खोदाहारा कुणिमाहारा कालमासे कालं किच्चा कहिं गच्छिहिंति कहिं उववज्जि-
 हिंति ?, गोयमा ! ओसच्चं नरगतिरिक्खजोणिएसु उववज्जिहिंति, ते णं भंते ! सीहा
 वग्घा वगा दीविया अच्छा तरच्छा परस्सरा निस्सीला तहेव जाव कहिं उववज्जि-
 हिंति ?, गोयमा ! ओसच्चं नरगतिरिक्खजोणिएसु उववज्जिहिंति, ते णं भंते ! ढंका
 कंका बिलका महुगा सिही निस्सीला तहेव जाव ओसच्चं नरगतिरिक्खजोणिएसु उव-
 वज्जिहिंति । सेवं भंते ! सेवं भंते ! ति ॥ २८७ ॥ सत्तमस्स छट्ठो उद्देसओ ॥

संवुडस्स णं भंते ! अणगारस्स आउत्तं गच्छमाणस्स जाव आउत्तं तुयइमा-
णस्स आउत्तं वत्थं पडिग्गहं कंबलं पायपुंछणं गेण्हमाणस्स वा निक्खिखमाणस्स वा
तस्स णं भंते ! किं इरियावहिया किरिया कज्जइ संपराइया किरिया कज्जइ ?,
गोयमा ! संवुडस्स णं अणगारस्स जाव तस्स णं इरियावहिया किरिया कज्जइ णो
संपराइया किरिया कज्जइ । से केणट्ठेणं भंते ! एवं वुच्चइ-संवुडस्स णं जाव संप-
राइया किरिया कज्जइ ?, गोयमा ! जस्स णं कोहमाणमायालोभा वोच्छिन्ना भवंति
तस्स णं इरियावहिया किरिया कज्जइ, तहेव जाव उस्सुत्तं रीयमाणस्स संपराइया
किरिया कज्जइ, से णं अहासुत्तमेव रीयइ, से तेणट्ठेणं गोयमा ! जाव नो संपराइया
किरिया कज्जइ ॥ २८८ ॥ रूवी भंते ! कामा अरूवी कामा ? गोयमा ! रूवी कामा
समणाउसो ! नो अरूवी कामा । सच्चित्ता भंते ! कामा अच्चित्ता कामा ?, गोयमा !
सच्चित्तावि कामा अच्चित्तावि कामा । जीवा भंते ! कामा अजीवा कामा ?, गोयमा !
जीवावि कामा अजीवावि कामा । जीवाणं भंते ! कामा अजीवाणं कामा ?, गोयमा !
जीवाणं कामा नो अजीवाणं कामा, कइविहा णं भंते ! कामा पन्नत्ता ?, गोयमा !
दुविहा कामा पन्नत्ता, तंजहा-सद्दा य रूवा य, रूवी भंते ! भोगा अरूवी भोगा ?,
गोयमा ! रूवी भोगा नो अरूवी भोगा, सच्चित्ता भंते ! भोगा अच्चित्ता भोगा ?,
गोयमा ! सच्चित्तावि भोगा अच्चित्तावि भोगा, जीवा भंते ! भोगा अजीवा भोगा ?,
गोयमा ! जीवावि भोगा अजीवावि भोगा, जीवाणं भंते ! भोगा अजीवाणं भोगा ?,
गोयमा ! जीवाणं भोगा नो अजीवाणं भोगा, कइविहा णं भंते ! भोगा पन्नत्ता ?,
गोयमा ! ति विहा भोगा पन्नत्ता तंजहा-गंधा रसा फासा । कइविहा णं भंते !
कामभोगा पन्नत्ता ?, गोयमा ! पंचविहा कामभोगा पन्नत्ता, तंजहा-सद्दा रूवा गंधा
रसा फासा । जीवा णं भंते ! किं कामी भोगी ?, गोयमा ! जीवा कामीवि भोगीवि ।
से केणट्ठेणं भंते ! एवं वुच्चइ जीवा कामीवि भोगीवि ?, गोयमा ! सोइंदियच्चक्खि-
दियाई पडुच्च कामी घाणिदियजिब्भियफासिंदियाई पडुच्च भोगी, से तेणट्ठेणं
गोयमा ! जाव भोगीवि । नेरइया णं भंते ! किं कामी भोगी ?, एवं चेव एवं जाव
थणियकुमारा । पुढविकाइयाणं पुच्छा, गोयमा ! पुढविकाइया नो कामी भोगी, से
केणट्ठेणं जाव भोगी ?, गोयमा ! फासिंदियं पडुच्च से तेणट्ठेणं जाव भोगी, एवं जाव
वणस्सइकाइया, बेइंदिया एवं चेव नवरं जिब्भियफासिंदियाई पडुच्च भोगी,
तेइंदियावि एवं चेव नवरं घाणिदियजिब्भियफासिंदियाई पडुच्च भोगी चउरिंदि-
याणं पुच्छा, गोयमा ! चउरिंदिया कामीवि भोगीवि, से केणट्ठेणं जाव भोगीवि ?,
गोयमा ! चक्खिदियं पडुच्च कामी घाणिदियजिब्भियफासिंदियाई पडुच्च भोगी,

से तेणट्टेणं जाव भोगीवि, अवसेसा जहा जीवा जाव वेमाणिया । एएसि णं भंते ! जीवाणं कामभोगीणं नोकाभीणं नोभोगीणं भोगीणं य कयरे कयरेहिंतो जाव विसे-
साहिया वा ?, गोयमा ! सव्वत्थोवा जीवा कामभोगी नोकाभीनोभोगी अणंतगुणा
भोगी अणंतगुणा ॥ २८९ ॥ छउमत्थे णं भंते ! मणुसे जे भविए अन्नयरेसु देव-
लोएसु देवत्ताए उववज्जितए, से नूणं भंते ! से खीणभोगी नो पभू उट्ठाणेणं कम्मेणं
बलेणं वीरिएणं पुरिसक्कारपरक्कमेणं विउलाइं भोगभोगाईं भुंजमाणे विहरितए, से
नूणं भंते ! एयमट्ठं एवं वयह ?, गोयमा ! णो इणट्टे समट्टे, से केणट्टेणं भंते ! एवं
बुच्चइ ? गोयमा ! पभू णं से उट्ठाणेणवि कम्मेणवि बलेणवि वीरिएणवि पुरिसक्कारपर-
क्कमेणवि अन्नयराईं विपुलाइं भोगभोगाईं भुंजमाणे विहरितए, तम्हा भोगी भोगे
परिचयमाणे महानिज्जरे महापज्जवसाणे भवइ । आहोहिए णं भंते ! मणुस्से जे भविए
अन्नयरेसु देवलोएसु एवं चेव जहा छउमत्थे जाव महापज्जवसाणे भवइ । परमाहोहिए
णं भंते ! मणुस्से जे भविए तेणेव भवग्गहणेणं सिज्झितए जाव अंतं करेतए, से
नूणं भंते ! से खीणभोगी सेसं जहा छउमत्थस्स । केवली णं भंते ! मणुस्से जे भविए
तेणेव भवग्गहणेणं एवं जहा परमाहोहिए जाव महापज्जवसाणे भवइ ॥ २९० ॥
जे इमे भंते ! असज्जिणो पाणा, तंजहा-पुढविकाइया जाव वणस्सइकाइया छट्ठा य
एगइया तसा, एए णं अंधा मूढा तमंपविट्ठा तमपडलमोहजालपडिच्छण्णा अकाम-
निकरणं वेयणं वेदंतीति वत्तव्वं सिया ?, हंता गोयमा ! जे इमे असज्जिणो पाणा
पुढविकाइया जाव वणस्सइकाइया छट्ठा य जाव वेयणं वेदंतीति वत्तव्वं सिया ॥ अत्थि
णं भंते ! पभूवि अकामनिकरणं वेयणं वेएइ ?, हंता गोयमा ! अत्थि, कहन्नं भंते !
पभूवि अकामनिकरणं वेयणं वेदेइ ?, गोयमा ! जे णं णो पभू विणा दीवेणं अंध-
कारंसि रुवाईं पासित्तए जे णं नो पभू पुरओ रुवाईं अणिज्झाइत्ता णं पासित्तए जे णं
नो पभू मग्गजो रुवाईं अणवयक्खित्ता णं पासित्तए [जे णं नो पभू पासओ रुवाईं
अणुलोइत्ता णं पासित्तए जे णं नो पभू उट्ठं रुवाईं अणालोएत्ता णं पासित्तए जे णं
नो पभू अहे रुवाईं अणालोएत्ता णं पासित्तए] एस णं गोयमा ! पभूवि अकाम-
निकरणं वेयणं वेदेइ ॥ अत्थि णं भंते ! पभूवि पकामनिकरणं वेयणं वेदेइ ?,
हंता ! अत्थि, कहन्नं भंते ! पभूवि पकामनिकरणं वेयणं वेदेइ ?, गोयमा ! जे णं
नो पभू समुइस्स पारं गमित्तए जे णं नो पभू समुइस्स पारगयाइं रुवाईं पासित्तए
जे णं नो पभू देवलोणं गमित्तए जे णं नो पभू देवलोगगयाइं रुवाईं पासित्तए एस
णं गोयमा ! पभूवि पकामनिकरणं वेयणं वेदेइ । सेवं भंते । सेवं भंते । ति
॥ २९१ ॥ सत्तमस्स सयस्स सत्तमो उदेसओ समत्तो ॥

छउमत्थे णं भंते ! मणूसे तीयमणंतं सासयं समयं केवलेणं संजमेणं एवं जहा पढमसए चउत्थे उद्देसए तहा भाणियव्वं जाव अलमत्थु० ॥२९२॥ से णूणं भंते ! हत्थिस्स य कुंथुस्स य समे चेव जीवे ?, हंता गोयमा ! हत्थिस्स य कुंथुस्स य एवं जहा रायप्पसेणइजे जाव खुड्डियं वा महालियं वा से तेणट्ठेणं गोयमा ! जाव समे चेव जीवे ॥ २९३ ॥ नेरइयाणं भंते ! पावे कम्मे जे य कडे जे य कज्जइ जे य कज्जिस्सइ सव्वे से दुक्खे जे निज्जिसे से सुहे ?, हंता गोयमा ! नेरइयाणं पावे कम्मे जाव सुहे, एवं जाव वेसाणियाणं ॥ २९४ ॥ कह णं भंते ! सच्चाओ पच्चाओ ?, गोयमा ! दस सच्चाओ पच्चाओ, तंजहा-आहारसच्चा १ भयसच्चा २ मेहुणसच्चा ३ परिग्गहसच्चा ४ कोहसच्चा ५ माणसच्चा ६ मायासच्चा ७ लोभसच्चा ८ लोगसच्चा ९ ओहसच्चा १०, एवं जाव वेसाणियाणं ॥ नेरइया दसविहं वेयणिज्जं पच्चणुभवमाणा विहरंति, तंजहा-सीयं उसिणं खुहं पिवासं कंडुं परज्झं जरं दाहं भयं सोगं ॥२९५॥ से नूणं भंते ! हत्थिस्स य कुंथुस्स य समा चेव अपच्चक्खाणकिरिया कज्जइ ?, हंता गोयमा ! हत्थिस्स य कुंथुस्स य जाव कज्जइ । से केणट्ठेणं भंते ! एवं वुच्चइ जाव कज्जइ ?, गोयमा ! अविरइं पडुच्च, से तेणट्ठेणं जाव कज्जइ ॥ २९६ ॥ आहा-कम्मणं भंते ! भुंजमाणे किं बंधइ ? किं पकरेइ ? किं च्चिणाइ ? किं उवच्चिणाइ ? एवं जहा पढमे सए नवमे उद्देसए तहा भाणियव्वं जाव सासए पंडिए पंडियत्तं असासयं, सेवं भंते ! सेवं भंते ! ति ॥२९७॥ **सत्तमसयस्स अट्ठमो उद्देसो ॥**

असंबुडे णं भंते ! अणगारे बाहिरए पोगगले अपरियाइत्ता पभू एगवन्नं एगरुवं विउव्वित्तए ?, णो तिणट्ठे समट्ठे । असंबुडे णं भंते ! अणगारे बाहिरए पोगगले परियाइत्ता पभू एगवन्नं एगरुवं जाव हंता ! पभू, से भंते ! किं इहगए पोगगले परियाइत्ता विउव्वइ तत्थगए पोगगले परियाइत्ता विउव्वइ **अन्नत्थगए** पोगगले परियाइत्ता विउव्वइ ?, गोयमा ! इहगए पोगगले परियाइत्ता विउव्वइ नो तत्थगए पोगगले परियाइत्ता विउव्वइ नो **अन्नत्थगए** पोगगले जाव विउव्वइ, एवं एगवन्नं अणेगरुवं चउमंगो जहा छट्ठसए, नवमे उद्देसए तहा इहावि भाणियव्वं, नवरं अणगारे इहगए चेव पोगगले परियाइत्ता विउव्वइ, सेसं तं चेव जाव लुक्खपोगगलं निद्धपोगगलत्ताए परिणामेत्ताए ?, हंता ! पभू, से भंते ! किं इहगए पोगगले परियाइत्ता जाव नो **अन्नत्थगए** पोगगले परियाइत्ता विउव्वइ ॥ २९८ ॥ णायमेयं अरहया सुयमेयं अरहया विन्नायमेयं अरहया महासिलाकंटए संगामे ॥ महासिलाकंटए णं भंते ! संगामे वट्टमाणे के जइत्था के पराजइत्था ?, गोयमा ! वज्जी विदेहपुत्ते जइत्था, नवमल्लई नवलेच्छई कासीकोसलगा अट्टारसवि गणरायाणो पराजइत्था ॥

तए णं से कोणिए राया महासिलाकंटयं संगामं उवट्ठियं जाणित्ता कोडुंवियपुरिसे सद्दावेइ २ एवं वयासी-खिप्पामेव भो देवाणुप्पिया ! उदाइं हत्थिरायं पडिकप्पेह हयगयरहजोहकलियं चाउरंगिणि सेणं सन्नाहेह २ ता मम एयमाणत्तियं खिप्पा-मेव पच्चप्पिणह । तए णं ते कोडुंवियपुरिसा कोणिएणं रत्ता एवं वुत्ता समाणा हट्ठ-तुट्ठ जाव अंजलिं कट्ठु एवं सामी ! तहत्ति आणाए विणएणं वयणं पडिसुणंति २ खिप्पामेव छेयायरियोवएसमइकप्पणाविकप्पेहिं सुनिउणेहिं एवं जहा उववाइए जाव भीमं संगामियं अउज्झं उदाइं हत्थिरायं पडिकप्पेति हयगय जाव सन्नाहेति २ जेणेव कूणिए राया तेणेव उवागच्छन्ति तेणेव उवागच्छित्ता करयल० कूणियस्स रत्तो तमाणत्तियं पच्चप्पिणंति, तए णं से कूणिए राया जेणेव मज्जणवरं तेणेव उवा-गच्छइ तेणेव उवागच्छित्ता मज्जणवरं अणुपविसइ मज्जणवरं अणुपविसित्ता ण्हाए सव्वालंकारविभूसिए सन्नद्धवद्धवम्मियकवए उप्पीलियसरासणपट्टिए पिणद्धगे-वेजे विमलवरवद्धचिंधपट्टे गहियाउहप्पहरणे सकोरिंटमल्लदामेणं छत्तेणं धरिजमा-णेणं चउचामरवालवीड्यंगे मंगलजयसइकयालोए एवं जहा उववाइए जाव उवा-गच्छित्ता उदाइं हत्थिरायं दुरुढे, तए णं से कूणिए राया हारोत्थयसुकुरइयवच्छे जहा उववाइए जाव सेयवरचामराहिं उड्डुव्वमाणीहिं उड्डुव्वमाणीहिं हयगयरहप-वरजोहकलियाए चाउरंगिणीए सेणाए सद्धिं संपरिवुडे महया भडचडगरविंदपरि-क्खित्ते जेणेव महासिलाकंटए संगामे तेणेव उवागच्छइ तेणेव उवागच्छित्ता महासिलाकंटयं संगामं ओयाए, पुरओ य से सक्के देविंदे देवराया एणं महं अभे-ज्जकवयं वड्ढरपडिरूवगं विउव्वित्ता णं चिट्ठइ, एवं खलु दो इंदा संगामं संगामेंति, तंजहा-देविंदे य मणुइंदे य, एगहत्थिणावि णं पभू कूणिए राया पराजिणित्ता, तए णं से कूणिए राया महासिलाकंटयं संगामं संगामेमाणे नव मल्लइ नव छेच्छइ कासीकोसलगा अट्टारसवि गणरायाणो हयमहियपवरवीरघाइयवियडियचिंधद्वय-डगे किच्छपाणगए दित्तो दिसिं पडिसेहित्था ॥ से केणट्टेणं भंते ! एवं वुच्चइ महा-सिलाकंटए संगामे ?, गोयमा ! महासिलाकंटए णं संगामे वट्टमाणे जे तत्थ आसे वा हत्थी वा जोहे वा सारही वा तणेण वा पत्तेण वा कट्टेण वा सक्कराए वा अभि-हम्मइ सव्वे से जाणइ महासिलाए अहं अभिहए म० २, से तेणट्टेणं गोयमा ! महासिलाकंटए संगामे । महासिलाकंटए णं भंते ! संगामे वट्टमाणे कइ जणसय-साहस्सीओ वहियाओ ?, गोयमा ! चउरासीइं जणसयसाहस्सीओ वहियाओ । ते णं भंते ! मणुया निस्सीला जाव निप्पच्चक्खणपोसहोववासा रुद्धा परिकुव्विया सम-रवहिया अणुवसंता कालमासे कालं किच्चा कहिं गया कहिं उववत्ता ?, गोयमा !

ओसन्नं नरगतिरिक्खजोणिएसु उववन्ना ॥ २९९ ॥ णायमेयं अरहया सुयमेयं
 अरहया विज्ञायमेयं अरहया रहमुसले संगामे, रहमुसले णं भंते ! संगामे वट्टमाणे
 के जइत्था के पराजइत्था ?, गोयमा ! वज्जी विदेहपुत्ते चमरे असुरिंदे असुरकुमार-
 राया जइत्था नव मल्लई नव लेच्छई पराजइत्था, तए णं से कूणिए राया रहमुसलं
 संगामं उवट्ठियं सेसं जहा महासिलाकंटए नवरं भूयाणंदे हत्थिराया जाव रहमुसलं
 संगामं ओयाए, पुरओ यं से सक्के देविंदे देवराया, एवं तहेव जाव चिट्ठंति, मग्गओ यं
 से चमरे असुरिंदे असुरकुमारराया एगं महं आयसं किण्णिणपडिरूवणं विजव्वित्ता णं
 चिट्ठइ, एवं खलु तओ इंदा संगामं संगामेंति, तंजहा-देविंदे यं मणुइंदे यं असुरिंदे
 यं, एगहत्थिणावि णं पभू कूणिए राया जइत्तए तहेव जाव दिसो दिसिं पडिसे-
 हित्था । से केगट्ठेणं भंते ! एवं वुच्चइ रहमुसले संगामे ?, गोयमा ! रहमुसले णं
 संगामे वट्टमाणे एगे रहे अणासए असारहिए अणारोहए ससुसले महया जगक्खयं
 जणवहं जणप्पमइं जणसंवट्ठकप्पं सहिरकइं करेमाणे सव्वओ समंता परिधावित्था
 से तेणट्ठेणं जाव रहमुसले संगामे । रहमुसले णं भंते ! संगामे वट्टमाणे कइ जण-
 सयसाहस्सीओ वहियाओ ?, गोयमा ! छन्नउइं जणसयसाहस्सीओ वहियाओ । ते
 णं भंते ! मणुया निस्सीला जाव उववन्ना ?, गोयमा ! तत्थ णं दस साहस्सीओ
 एगाए मच्छीए कुट्ठिंसि उववन्नाओ, एगे देवलोगेसु उववन्ने, एगे सुकुले पच्चायाए,
 अवसेसा ओसन्नं नरगतिरिक्खजोणिएसु उववन्ना ॥ ३०० ॥ कम्हा णं भंते ! सक्के
 देविंदे देवराया चमरे असुरिंदे असुरकुमारराया कूणियस्स रत्तो साहेज्जं दलइत्था ?,
 गोयमा ! सक्के देविंदे देवराया पुव्वसंगइए चमरे असुरिंदे असुरकुमारराया परि-
 यायसंगइए, एवं खलु गोयमा ! सक्के देविंदे देवराया चमरे यं असुरिंदे असुरकु-
 मारराया कूणियस्स रत्तो साहिज्जं दलइत्था ॥ ३०१ ॥ बहुजणे णं भंते ! अन्नमज्जस्स
 एवमाइक्खइ जाव परूवेइ एवं खलु बहवे मणुस्सा अन्नयरेसु उच्चावएसु संगामेसु
 अभिमुहा चेव पहया समाणा कालमासे कालं किच्चा अन्नयरेसु देवलोएसु देवत्ताए
 उववत्तारो भवन्ति, से कहमेयं भंते ! एवं ?, गोयमा ! जणं से बहुजणो अन्नमज्जस्स
 एवं आइक्खइ जाव उववत्तारो भवन्ति जे ते एवमाहंसु मिच्छंते एवमाहंसु, अहं
 पुण गोयमा ! एवमाइक्खामि जाव परूवेमि-एवं खलु गोयमा ! तेणं कालेणं तेणं
 समएणं वेसाली नामं नगरी होत्था, वण्णओ, तत्थ णं वेसालीए णगरीए वरुणे नामं
 णागनत्तुए परिवसइ अट्ठे जाव अपरिभूए समणोवासए अभिगयजीवाजीवे जाव
 पडिलामेमाणे छट्ठंछट्ठेणं अनिक्खित्तेणं तवोकम्मेणं अप्पाणं भावेमाणे विहरइ,
 तए णं से वरुणे णागनत्तुए अन्नया कयाइ रायाभिओगेणं गणाभिओगेणं बलाभि-

ओगेणं रहमुसले संगामे आणत्ते समाणे छट्ठमत्तिए अट्ठमभत्तं अणुवट्ठे(हे)इ अट्ठमभत्तं
 अणुवट्ठेता कोडुंबियपुरिसे सद्दवेइ २ एवं वयासी-खिप्पामेव भो देवाणुप्पिया !
 चाउग्घटं आसरहं जुत्तामेव उवट्ठावेह हयगयरहपवर जाव सच्चाहेत्ता मम एयमाण-
 त्तियं पच्चप्पिणह, तए णं ते कोडुंबियपुरिसा जाव पडिस्सुणेत्ता खिप्पामेव सच्छत्तं
 सज्झयं जाव उवट्ठावेति हयगयरह जाव सच्चाहेति २ जेणेव वरुणे नागनत्तुए
 जाव पच्चप्पिणत्ति, तए णं से वरुणे नागनत्तुए जेणेव मज्जणघरे तेणेव उवा-
 गच्छइ जहा कूणिओ सव्वालंकारविभूसिए सन्नद्धबद्धे सकोरेंटमल्लदामेणं जाव
 धरिज्जमाणेणं अणेगगणनायग जाव दूयसंधिवालसद्धिं संपरिवुडे मज्जणघराओ
 पडिनिक्खमइ पडिनिक्खमिता जेणेव बाहिरिया उवट्ठाणसाला जेणेव चाउग्घटे
 आसरहे तेणेव उवागच्छइ उवागच्छिता चाउग्घटं आसरहं दुरुहइ २ हयगयरह
 जाव संपरिवुडे महया भडचडगर० जाव परिक्खित्ते जेणेव रहमुसले संगामे तेणेव
 उवागच्छइ २ ता रहमुसलं संगामं ओयाए, तए णं से वरुणे नागणत्तुए रहमुसलं
 संगामं ओयाए समाणे अयमेयारुवं अभिग्गहं अभिगिण्हइ-कप्पइ मे रहमुसलं
 संगामं संगामेमाणस्स जे पुर्विं पहणइ से पडिहणित्तए अवसेसे नो कप्पइ ति, अय-
 मेयारुवं अभिग्गहं अभिगेण्हइ अभिगेण्हिता रहमुसलं संगामं संगामेइ, तए णं
 तस्स वरुणस्स नागनत्तुयस्स रहमुसलं संगामं संगामेमाणस्स एगे पुरिसे सरिसए
 सरिसतए सरिसव्वए सरिसभंडमतोवगरणे रहेणं पडिरहं हव्वमागए, तए णं से
 पुरिसे वरुणं नागणत्तुयं एवं वयासी-पहण भो वरुणा ! नागणत्तुया ! प० २, तए
 णं से वरुणे नागणत्तुए तं पुरिसं एवं वयासी-नो खलु मे कप्पइ देवाणुप्पिया ! पुर्विं
 अहयस्स पहणित्तए, तुमं चेव णं पुर्विं पहणाहि, तए णं से पुरिसे वरुणेणं नागणत्तुएणं
 एवं वुत्ते समाणे आसुरत्ते जाव मिसिमिसेमाणे धणुं परामुसइ २ उसुं परामुसइ उसुं
 परामुसित्ता ठाणं ठाइ ठाणं ठिच्चा आययकन्नाययं उसुं करेइ आययकन्नाययं उसुं
 करेत्ता वरुणं नागणत्तुयं गाढप्पहारी करेइ, तए णं से वरुणे नागणत्तुए तेणं पुरिसेणं
 गाढप्पहारीकए समाणे आसुरत्ते जाव मिसिमिसेमाणे धणुं परामुसइ धणुं परामुसित्ता
 उसुं परामुसइ उसुं परामुसित्ता आययकन्नाययं उसुं करेइ आययकन्नाययं० २ तं
 पुरिसं एगाहच्चं कूडाहच्चं जीवियाओ ववरोवेइ, तए णं से वरुणे नागणत्तुए तेणं पुरि-
 सेणं गाढप्पहारीकए समाणे अत्थामे अवले अवीरिए अपुरिसक्कारपरक्कमे अधारणि-
 ज्जमित्तिकट्टु तुरए निगिण्हइ तुरए निगिण्हिता रहं परावत्तेइ रहं परावत्तिता रहमुस-
 लाओ संगामाओ पडिनिक्खमइ २ एगंतमंतं अवक्कमइ एगंतमंतं अवक्कमिता तुरए
 निगिण्हइ २ रहं ठवेइ २ ता रहाओ पच्चोहइ रहाओ २ रहाओ तुरए मोएइ

तुरए मोएत्ता तुरए विसजेइ २ ता दब्भसंथारगं संथरइ २ ता [पुरच्छा-
 भिसुहे दुरुहइ दब्भसं० २] पुरच्छाभिसुहे संपलियंक्रनिसन्ने करयल जाव कहु
 एवं वयासी-नमोत्थु णं अरिहंताणं जाव संपत्ताणं नमोऽत्थु णं समणस्स भगवओ ।
 महावीरस्स आइगरस्स जाव संपाविउकामस्स मम धम्माययियस्स धम्मोवएसगस्स
 वंदामि णं भगवन्तं तत्थगयं इहगए पासउ मे से भगवं तत्थगए जाव वंदइ नमंसइ २
 एवं वयासी-पुब्बिपि णं मए समणस्स भगवओ महावीरस्स अंतिए थूलए पाणाइवाए
 पच्चक्खाए जावज्जीवाए एवं जाव थूलए परिगहे पच्चक्खाए जावज्जीवाए, इयाणिपि णं
 अहं तस्सेव अरिहंतस्स भगवओ महावीरस्स अंतियं सव्वं पाणाइवायं पच्चक्खामि
 जावज्जीवाए एवं जहा खंदओ जाव एयंपि णं चरमेहिं उसासनीसासेहिं वोसिरामित्ति-
 कहु सच्चाहपटं मुयइ सच्चाहपटं मुइत्ता सल्लुद्धरणं करेइ सल्लुद्धरणं करेत्ता आलोइय-
 पडिक्कते समाहिपत्ते आणुपुव्वीए कालगए, तए णं तस्स वरुणस्स णागनत्तुयस्स
 एगे पियबालवयंसए रहमुसलं संगामं संगामेमाणे एगेणं पुरिसेणं गाढप्पहारीकए
 समाणे अत्थामे अबले जाव अधारणिज्जमितिकहु वरुणं णागनत्तुयं रहमुसलाओ
 संगामाओ पडिनिक्खममाणं पासइ पासित्ता तुरए निगेण्हइ तुरए निगेणिहत्ता जहा
 वरुणे जाव तुरए विसजेइ पडिसंथारगं दुरुहइ पडिसंथारगं दुरुहिता पुरत्थाभिसुहे
 जाव अंजलिं कहु एवं वयासी-जाई णं मम पियबालवयस्सस्स वरुणस्स
 नागनत्तुयस्स सीलाइं वयाइं गुणाइं वेरमणाइं पच्चक्खाणपोसहोववासाइं ताईं णं
 ममंपि भवंतुत्तिकहु सच्चाहपटं मुयइ २ सल्लुद्धरणं करेइ सल्लुद्धरणं करेत्ता आणुपु-
 व्वीए कालगए, तए णं तं वरुणं णागनत्तुयं कालगयं जाणिता अहासन्निहिएहिं
 वाणमंतरेहिं देवेहिं दिव्वे सुरभिगंधोदगवासे वुट्ठे दसद्धवन्ने कुसुमे निवाडिए दिव्वे
 य शीयगंधव्वनिनाए कए यावि होत्था, तए णं तस्स वरुणस्स णागनत्तुयस्स तं
 दिव्वं देविङ्गिं दिव्वं देवज्जुइं दिव्वं देवाणुभागं सुणिता य पासित्ता य बहुजणो
 अन्नमन्नस्स एवमाइक्खइ जाव पक्खेइ-एवं खलु देवाणुप्पिया ! बहवे मणुस्सा
 जाव उववत्तारो भवंति ॥ ३०२ ॥ वरुणे णं भंते ! नागनत्तुए कालमासे कालं
 किच्चा कहिं गए कहिं उववच्चे ?, गोयमा ! सोहम्मे कप्पे अरुणामे विमाणे देवत्ताए
 उववच्चे, तत्थ णं अत्थेगइयाणं देवाणं चत्तारि पल्लिओवमाणि ठिई पन्नत्ता, तत्थ
 णं वरुणस्सवि देवस्स चत्तारि पल्लिओवमाइं ठिई पन्नत्ता । से णं भंते ! वरुणे देवे
 ताओ देवलोगाओ आउक्खएणं भवक्खएणं ठिइक्खएणं जाव महाविदेहे वासे
 सिज्जिहिइ जाव अंतं करेहिइ । वरुणस्स णं भंते ! णागनत्तुयस्स पियबालवयं-
 सए कालमासे कालं किच्चा कहिं गए कहिं उववच्चे ?, गोयमा ! सुकुले पच्चायाए ।

से णं भंते ! तओहिंते अणंतरे उव्वट्ठिता कहिं गच्छिहिइ कहिं उव्वज्झिहिइ ?,
गोयमा ! महाविदेहे वासे सिञ्जिहिइ जाव अंतं करेहिइ । सेवं भंते ! सेवं भंते !
ति ॥ २०३ ॥ सत्तमस्स सयस्स णवमो उद्देसो समत्तो ॥

तेणं कालेण तेणं समएणं रायणिहे नामं नगरे होत्था वन्नओ, गुणसिलए
उज्जाणे वन्नओ, जाव पुढविसिलापट्टए वण्णओ, तस्स णं गुणसिलयस्स उज्जाणस्स
अदूरसामंते बहवे अन्नउत्थिया परिवसंति, तंजहा-कालोदाई सेलोदाई सेवालोदाई
उदए नामुदए नमुदए अन्नवालए सेलवालए संखवालए सुहत्थी गाहावई, तए
णं तेसि अन्नउत्थियाणं अन्नया कयाई एगयओ समुवागयाणं सन्निविट्ठणं सन्नि-
सन्नाणं अयमेयारुवे मिहो कहासमुल्लावे समुप्पज्जित्या-एवं खलु समणे नाय-
पुत्ते पंच अत्थिकाए पन्नवेइ, तंजहा-धम्मत्थिकायं जाव आगासत्थिकायं, तत्थ णं
समणे नायपुत्ते चत्तारि अत्थिकाए अजीवकाए पन्नवेइ, तंजहा-धम्मत्थिकायं अध-
म्मत्थिकायं आगासत्थिकायं पोग्गलत्थिकायं, एणं च णं समणे नायपुत्ते जीवत्थिकायं
अरुविकायं जीवकायं पन्नवेइ, तत्थ णं समणे नायपुत्ते चत्तारि अत्थिकाए अरुवि-
काए पन्नवेइ, तंजहा-धम्मत्थिकायं अधम्मत्थिकायं आगासत्थिकायं जीवत्थिकायं,
एणं च णं समणे नायपुत्ते पोग्गलत्थिकायं रूविकायं अजीवकायं पन्नवेइ, से कहमेयं
मञ्जे एवं ?, तेणं कालेण तेणं समएणं समणे भगवं महावीरे जाव गुणसिलए उज्जाणे
समोसडे जाव परिसा पडिगया, तेणं कालेण तेणं समएणं समणस्स भगवओ महा-
वीरस्स जेट्ठे अंतेवासी इंदभूई णामं अणगारे गोयमगोत्तेणं एवं जहा बिइयसए
नियंठुद्देसए जाव भिक्खायरियाए अडमाणे अहापज्जतं भत्तपाणं पडिगाहिता राय-
णिहाओ जाव अतुरियमच्चवलमसंभंतं जाव रियं सोहेमाणे सोहेमाणे तेसि अन्नउ-
त्थियाणं अदूरसामंतेणं वीइवयइ, तए णं ते अन्नउत्थिया भगवं गोयमं अदूर-
सामंतेणं वीइवयमाणं पासंति पासेत्ता अन्नमञ्जं सद्दावेंति अन्नमञ्जं सद्दावेत्ता एवं
वयासी-एवं खलु देवाणुप्पिया ! अम्हं इमा कहा अविप्पकडा अयं च णं गोयमे
अम्हं अदूरसामंतेणं वीइवयइ तं सेयं खलु देवाणुप्पिया ! अम्हं गोयमं एयमट्ठं
पुच्छित्तएत्तिकट्ठु अन्नमन्नस्स अंतिए एयमट्ठं पडिहुणेंति २ ता जेणेव भगवं गोयमे
तेणेव उवागच्छंति तेणेव उवागच्छित्ता ते भगवं गोयमं एवं वयासी-एवं खलु
गोयमा ! तव धम्मायरिए धम्मोवएसए समणे नायपुत्ते पंच अत्थिकाए पन्नवेइ,
तंजहा-धम्मत्थिकायं जाव आगासत्थिकायं, तं चैव जाव रूविकायं अजीवकायं
पन्नवेइ से कहमेयं भंते ! गोयमा ! एवं ?, तए णं से भगवं गोयमे ते अन्नउत्थिए
एवं वयासी-नो खलु अयं देवाणुप्पिया ! अत्थिभावं नत्थित्ति वयासो नत्थिभावं

अत्थित्ति वयामो, अम्हे णं देवाणुप्पिया ! सव्वं अत्थिमावं अत्थित्ति वयामो सव्वं
 नत्थिमावं नत्थित्ति वयामो, तं चेयसा खलु तुब्भे देवाणुप्पिया ! एयमट्ठं सयमेव
 पच्चुवेक्खहत्तिकट्ठु ते अन्नजत्थिए एवं वयासी-एवं २, जेणेव गुणसिलए उज्जाणे
 जेणेव समणे भगवं महावीरे एवं जहा नियंउहेसए जाव भत्तपाणं पडिदंसेइ भत्त-
 पाणं पडिदंसेत्ता समणं भगवं महावीरं वंदइ नमंसइ २ नच्चासच्चे जाव पच्चुवासइ ।
 तेणं कालेणं तेणं समएणं समणे भगवं महावीरे महाकहापडिवचे यावि होत्था,
 कालोदाई य तं देसं हव्वमागए, कालोदाईति समणे भगवं महावीरे कालोदाई
 एवं वयासी-से नूणं कालोदाई ! अन्नया कयाइ एगयओ सहियाणं समुवाग-
 याणं सन्नविट्ठाणं तहेव जाव से कहमेयं मन्ने एवं ?, से नूणं कालोदाई ! अट्ठे
 समट्ठे ?, हंता ! अत्थि, तं सच्चे णं एसमट्ठे कालोदाई ! अहं पंचत्थिकायं पच्चवेमि,
 तंजहा-धम्मत्थिकायं जाव पोगगलत्थिकायं, तत्थ णं अहं चत्तारि अत्थिकाए अजी-
 वत्थिकाए अजीवत्ताए पण्णवेमि तहेव जाव एगं च णं अहं पोगगलत्थिकायं रुविकायं
 पण्णवेमि, तए णं से कालोदाई समणं भगवं महावीरं एवं वयासी-एयंसि णं भंते !
 धम्मत्थिकायंसि अधम्मत्थिकायंसि आगासत्थिकायंसि अरुविकायंसि अजीवकायंसि
 चक्किया केइ आसइत्तए वा १ सइत्तए वा २ चिट्ठइत्तए वा ३ निसीइत्तए वा ४
 तुयट्ठित्तए वा ५ ?, णो तिण्णट्ठे ०, कालोदाई ! एगंसि णं पोगगलत्थिकायंसि रुविकायंसि
 अजीवकायंसि चक्किया केइ आसइत्तए वा सइत्तए वा जाव तुयट्ठित्तए वा, एयंसि
 णं भंते ! पोगगलत्थिकायंसि रुविकायंसि अजीवकायंसि जीवाणं पावा कम्मा पाव-
 कम्मफलविवागसंजुत्ता कज्जंति ?, णो इण्णट्ठे समट्ठे कालोदाई !, एयंसि णं जीवत्थि-
 कायंसि अरुविकायंसि जीवाणं पावा कम्मा पावफलविवागसंजुत्ता कज्जंति ?, हंता !
 कज्जंति, एत्थ णं से कालोदाई संबुद्धे समणं भगवं महावीरं वंदइ नमंसइ वंदित्ता
 नमंसित्ता एवं वयासी-इच्छामि णं भंते ! तुब्भं अंतियं धम्मं निसामेत्तए एवं
 जहा खंदए तहेव पव्वइए तहेव एक्कारस अंगाई जाव विहरइ ॥ ३०४ ॥ तए णं
 समणे भगवं महावीरे अन्नया कयाइ रायगिहाओ नगराओ गुणसिलयाओ उज्जाणाओ
 पडिनिक्खमइ २ बहिया जणवयविहारं विहरइ, तेणं कालेणं तेणं समएणं रायगिहे
 नामं नगरे गुणसिलए णामं उज्जाणे होत्था, तए णं समणे भगवं महावीरे अन्नया
 कयाइ जाव समोसडे ० परिसा पडिगया, तए णं से कालोदाई अणगारे अन्नया कयाइ
 जेणेव समणे भगवं महावीरे तेणेव उवागच्छइ २ समणं भगवं महावीरं वंदइ नमं-
 सइ वंदित्ता नमंसित्ता एवं वयासी अत्थि णं भंते ! जीवाणं पावा कम्मा पावफल-
 विवागसंजुत्ता कज्जंति ?, हंता ! अत्थि । कहण्णं भंते ! जीवाणं पावा कम्मा पावफल-

लविवागसंजुत्ता कज्जंति ? , कालोदाई ! से जहानामए केइ पुरिसे मणुञ्चं थालीपागसुद्धं
अट्टारसवंजणाउलं विससंमिस्सं भोयणं भुंजेज्जा, तस्स णं भोयणस्स आवाए भइए
भवइ, तओ पच्छा परिणममाणे परि० दुक्खत्ताए दुग्गंघत्ताए जहा महासवए जाव
भुज्जो २ परिणमइ, एवामेव कालोदाई ! जीवाणं पाणाइवाए जाव मिच्छादंसणसत्थे
तस्स णं आवाए भइए भवइ तओ पच्छा परिणममाणे २ दुक्खत्ताए जाव भुज्जो
२ परिणमइ, एवं खलु कालोदाई ! जीवाणं पावा कम्मा पावफलविवागसंजुत्ता
कज्जंति । अत्थि णं भंते ! जीवाणं कल्लाणा कम्मा कल्लाणफलविवागसंजुत्ता कज्जंति ? ,
हंता ! अत्थि, कहञ्चं भंते ! जीवाणं कल्लाणा कम्मा जाव कज्जंति ? , कालोदाई ! से
जहानामए केइ पुरिसे मणुञ्चं थालीपागसुद्धं अट्टारसवंजणाउलं ओसहमिस्सं भोयणं
भुंजेज्जा, तस्स णं भोयणस्स आवाए नो भइए भवइ, तओ पच्छा परिणममाणे २
सुक्खत्ताए सुवच्चत्ताए जाव सुहत्ताए नो दुक्खत्ताए भुज्जो २ परिणमइ, एवामेव
कालोदाई ! जीवाणं पाणाइवायवेरमणे जाव परिग्गहवेरमणे कौहविवेगे जाव मिच्छा-
दंसणसत्थविवेगे तस्स णं आवाए नो भइए भवइ तओ पच्छा परिणममाणे २ सुक्ख-
त्ताए जाव/नो दुक्खत्ताए भुज्जो २ परिणमइ, एवं खलु कालोदाई ! जीवाणं कल्लाणा
कम्मा जाव कज्जंति ॥ ३०५ ॥ दो भंते ! पुरिसा सरिसया जाव सरिसमंडमतोव-
गरणा अन्नमत्तेणं सद्धिं अगणिकायं समारंभंति तत्थ णं एगे पुरिसे अगणिकायं उज्जा-
लेइ एगे पुरिसे अगणिकायं निव्वावेइ, एएसि णं भंते ! दोण्हं पुरिसाणं कयरे
पुरिसे महाकम्मतराए चेव महाकिरियतराए चेव महासवतराए चेव महावेयण-
तराए चेव कयरे वा पुरिसे अप्पकम्मतराए चेव जाव अप्पवेयणतराए चेव,
जे वा से पुरिसे अगणिकायं उज्जालेइ जे वा से पुरिसे अगणिकायं निव्वावेइ ? ,
कालोदाई ! तत्थ णं जे से पुरिसे अगणिकायं उज्जालेइ से णं पुरिसे महाकम्म-
तराए चेव जाव महावेयणतराए चेव, तत्थ णं जे से पुरिसे अगणिकायं निव्वावेइ से
णं पुरिसे अप्पकम्मतराए चेव जाव अप्पवेयणतराए चेव । से केणट्ठेणं भंते !
एवं वुच्चइ-तत्थ णं जे से पुरिसे जाव अप्पवेयणतराए चेव ? , कालोदाई ! तत्थ
णं जे से पुरिसे अगणिकायं उज्जालेइ से णं पुरिसे बहुतराणं पुढविकायं समारंभइ
बहुतराणं आउक्कायं समारंभइ अप्पतरायं तेउकायं समारंभइ बहुतराणं वाउकायं
समारंभइ बहुतरायं वणस्सइकायं समारंभइ बहुतराणं तसकायं समारंभइ, तत्थ
णं जे से पुरिसे अगणिकायं निव्वावेइ से णं पुरिसे अप्पतरायं पुढविकायं समारं-
भइ अप्पतराणं आउक्कायं समारंभइ बहुतराणं तेउक्कायं समारंभइ अप्पतराणं वाउ-
कायं समारंभइ अप्पतराणं वणस्सइकायं समारंभइ अप्पतराणं तसकायं समारंभइ,

से तेणट्टेणं कालोदाई ! जाव अप्पवेयणतराए चेव ॥ ३०६ ॥ अत्थि णं भंते !
अचित्तावि पोग्गला ओभासंति उज्जोवेति तवेति पभासेति ? , हंता ! अत्थि । कयरे
णं भंते ! अचित्तावि पोग्गला ओभासंति जाव पभासेति ? , कालोदाई ! कुद्धस्स अण-
गारस्स तेयळेस्सा निसट्ठा समाणी दूरं गंता दूरं निवयइ देसं गंता देसं निवयइ
जहिं जहिं च णं सा निवयइ तहिं तहिं च णं ते अचित्तावि पोग्गला ओभासंति
जाव पभासंति, एएणं कालोदाई ! ते अचित्तावि पोग्गला ओभासंति जाव पभा-
सेति, तए णं से कालोदाई अणगारे समणं भगवं महावीरं वंदइ नमंसइ २ बहूहिं
चउत्थल्लट्ठम जाव अप्पाणं भावेमाणे जहा पढमसए कालासवेसियपुत्ते जाव सव्व-
दुक्खप्पहीणे । सेवं भंते ! सेवं भंते ! ति ॥ ३०७ ॥ **सत्तमं सयं समत्तं ॥**

गाहा—पोग्गल १ आसीविस २ रुक्ख ३ किरिय ४ आजीव ५ फासुग ६
मदत्ते ७ । पडिणीय ८ बंध ९ आराहणा य १० दस अट्ठमंमि सए ॥ १ ॥ राय-
ग्गिहे जाव एवं वयासी-कइविहा णं भंते ! पोग्गला पन्नत्ता ? , गोयमा ! तिविहा
पोग्गला पन्नत्ता, तंजहा-पओगपरिणया मीससापरिणया वीससापरिणया ॥ ३०८ ॥
पओगपरिणया णं भंते ! पोग्गला कइविहा पन्नत्ता ? , गोयमा ! पंचविहा पन्नत्ता,
तंजहा-एगिंदियपओगपरिणया बेईंदियपओगपरिणया जाव पंचिंदियपओगपरिणया ।
एगिंदियपओगपरिणया णं भंते ! पोग्गला कइविहा पन्नत्ता ? , गोयमा ! पंचविहा प०
तंजहा-पुढविक्काइयएगिंदियपओगपरिणया जाव वणस्सइक्काइयएगिंदियपओगपरि-
णया । पुढविक्काइयएगिंदियपओगपरिणया णं भंते ! पोग्गला कइविहा पन्नत्ता ? ,
गोयमा ! दुविहा पन्नत्ता, तंजहा-सुहुमपुढविक्काइयएगिंदियपओगपरिणया बायरपुढवि-
क्काइयएगिंदियपओगपरिणया, आउक्काइयएगिंदियपओगपरिणया एवं चेव, एवं दुयओ
मेओ जाव वणस्सइक्काइयएगिंदियपओगपरिणया । बेईंदियपओगपरिणयाणं पुच्छा,
गोयमा ! अणेगविहा पन्नत्ता, एवं तेईंदियचउरिंदियपओगपरिणयावि । पंचिंदियपओ-
गपरिणयाणं पुच्छा, गोयमा ! चउव्विहा पन्नत्ता, तंजहा-नेरइयपंचिंदियपओगपरिणया
तिरिक्ख० एवं मणुस्स० देवपंचिंदिय०, नेरइयपंचिंदियपओगपरिणयाणं पुच्छा,
गोयमा ! सत्तविहा पन्नत्ता, तंजहा-रयणप्पभापुढविनेरइयपंचिंदियपओगपरिणया य
जाव अहेसत्तमपुढविनेरइयपंचिंदियपओगपरिणया य, तिरिक्खजोणियपंचिंदियपओ-
गपरिणयाणं पुच्छा, गोयमा ! तिविहा पन्नत्ता, तंजहा-जलयरतिरिक्खजोणियपंचिं-
दिय० थलयरतिरिक्खजोणियपंचिंदिय० खहयरतिरिक्खजोणियपंचिंदिय०, जलयरति-
रिक्खजोणियपंचिंदियपओगपरिणयाणं पुच्छा, गोयमा ! दुविहा प०, तंजहा-संसुच्छि-
मजलयर०, गम्भवक्कंतियजलयर०, थलयरतिरिक्ख० पुच्छा, गोयमा ! दुविहा प०,

तंजहा-चउप्पयथलयर० परिसप्पयथलयर०, चउप्पयथलयर० पुच्छा, गोयमा ! दुविहा प०, तंजहा-संमुच्छिमचउप्पयथलयर० गब्भवक्कंतियचउप्पयथलयर०, एवं एएणं अभिलावेणं परिसप्प० दुविहा प०, तंजहा-उरपरिसप्प० य भुयपरिसप्प० य, उर-परिसप्प० दुविहा प०, तंजहा-संमुच्छिम० य गब्भवक्कंतिय० य, एवं भुयपरिसप्प० वि, एवं खहयर० वि । मणुस्सपंचिदियपओग० पुच्छा, गोयमा ! दुविहा प०, तंजहा-संमुच्छिममणुस्स० गब्भवक्कंतियमणुस्स० । देवपंचिदियपओग० पुच्छा, गोयमा ! चउव्विहा पन्नत्ता, तंजहा-भवणवासिदेवपंचिदियपओग० एवं जाव वेमाणिय० । भवणवासिदेवपंचिदिय० पुच्छा, गोयमा ! दसविहा प०, तंजहा-असुरकुमार० जाव थणियकुमार०, एवं एएणं अभिलावेणं अट्ठविहा वाणमंतर० पिसाय० जाव गंधव्व०, जोइसिय० पंचविहा प०, तंजहा-चंदविमाणजोइसिय० जाव ताराविमाणजोइसिय-देव०, वेमाणिय० दुविहा पन्नत्ता, तंजहा-कप्पोववन्न० कप्पाईयगवेमाणिय०, कप्पोववन्नग० दुवालसविहा पणत्ता, तंजहा-सोहम्मकप्पोववण्णग० जाव अञ्जुयक-प्पोववण्णगवेमाणिय० । कप्पाईय० दुविहा पणत्ता, तंजहा-गेवेज्जकप्पातीयवे० अणुत्तरोववाइयकप्पाईयवे०, गेवेज्जकप्पातीयग० नवविहा पणत्ता, तंजहा-हेट्ठिम २ गेवेज्जकप्पातीयग० जाव उवरिम २ गेविज्जकप्पाईय० । अणुत्तरोववाइ-यकप्पाईयगवेमाणियदेवपंचिदियपओगपरिणया णं भंते ! पोगगला कइविहा प० १, गोयमा ! पंचविहा पणत्ता, तंजहा-विजयअणुत्तरोववाइय जाव परिणया जाव सव्वट्ठसिद्धअणुत्तरोववाइय० देवपंचिदियपओगपरिणया ॥ सुहुमपुढविकाइयएगिदिय-पओगपरिणया णं भंते ! पोगगला कइविहा पणत्ता ? गोयमा ! दुविहा पणत्ता, [केइ अपज्जतंगं पढमं भणंति पच्छा पज्जतंगं] पज्जतगसुहुमपुढविकाइय जाव परिणया य अपज्जतसुहुमपुढविकाइय जाव परिणया य, बायरपुढविकाइयएगिदिय० वि एवं चेव, एवं जाव वणस्सइकाइय०, एक्केका दुविहा पोगगला-सुहुमा य बायरा य, पज्जतगा य अपज्जतगा य भाणियव्वा । बेंदियपओगपरिणयाणं पुच्छा, गोयमा ! दुविहा पन्नत्ता, तंजहा-पज्जतगबेंदियपओगपरिणया य अपज्जतग जाव परिणया य, एवं तेईंदिय० वि एवं चउरिंदिय० वि । रयणप्पभापुढविनेरइय० पुच्छा, गोयमा ! दुविहा प०, तंजहा-पज्जतगरयणप्पभापुढवि जाव परिणया य अपज्जतग जाव परिणया य, एवं जाव अहेसत्तम० । संमुच्छिमजलयरतिरिक्ख० पुच्छा, गोयमा ! दुविहा प०, तंजहा-पज्ज-तग० अपज्जतग०, एवं गब्भवक्कंतिय० वि, संमुच्छिमचउप्पयथलयर० वि एवं चेव, एवं गब्भवक्कंतिय० वि, एवं जाव संमुच्छिमखहयर० गब्भवक्कंतिय० य, एक्के पज्जतगा य अपज्जतगा य भाणियव्वा । संमुच्छिममणुस्सपंचिदिय० पुच्छा, गोयमा ! एगविहा प०,

अपज्जत्तग० चेव । गम्भवक्कंतियमणुस्सपंचिंदिय० पुच्छा, गोयमा ! दुविहा प०, तंजहा-पज्जत्तगगम्भवक्कंतिय० अपज्जत्तगगम्भवक्कंतिय० । असुरकुमारभवणवासिदेव० पुच्छा, गोयमा ! दुविहा प०, तंजहा-पज्जत्तगअसुरकुमार० अपज्जत्तगअसुर०, एवं जाव पज्जत्तगथणियकुमार० एवं अपज्जत्तग० य, एवं एएणं अभिलावेणं दुयएणं भेएणं पिसाय० य जाव गंधव्व०, चंद० जाव ताराविमाण०, सोहम्मकप्पोववण्णग० जाव अञ्चुय०, हिट्ठिमहिट्ठिमगेविज्जकप्पाईय० जाव उवरिमउवरिमगेविज्ज०, एवं विजय-अणुत्तरो० जाव अपराजिय०, सव्वट्टसिद्धकप्पाईय० पुच्छा, गोयमा ! दुविहा प०, तंजहा-पज्जत्तगसव्वट्टसिद्धअणुत्तरो० अपज्जत्तगसव्वट्ट जाव परिणया य, २ दंडगा ॥

जे अपज्जत्ता सुहुमपुढविकाइयएगिंदियपओगपरिणया ते ओरालियतेयाकम्मासरीर-प्पओगपरिणया जे पज्जत्ता सुहुम० जाव परिणया ते ओरालियतेयाकम्मासरीर-प्पओगपरिणया एवं जाव पज्जत्तगचउरिंदिय०, नवरं जे पज्जत्तवायरवाउकाइयएगि-दियपओगपरिणया ते ओरालियवेउव्वियतेयाकम्मासरीरपओगपरिणया, सेसं तं चेव, जे अपज्जत्तरयणप्पभापुढविनेरइयपंचिंदियपओगपरिणया ते वेउव्वियतेयाक-म्मासरीरप्पओगपरिणया, एवं पज्जत्तय० वि, एवं जाव अहेसत्तम० । जे अपज्जत्तगसंसु-च्छिमजलयर जाव परिणया ते ओरालियतेयाकम्मासरीरप्पओगपरिणया एवं पज्जत्त-ग० वि, अपज्जत्तगगम्भवक्कंतिय० वि एवं चेव, पज्जत्तय० वि एवं चेव नवरं सरीरगाणि चत्तारि जहा बायरवाउकाइयाणं पज्जत्तगाणं, एवं जहा जलयरेसु चत्तारि आलावगा भणिया एवं चउप्पयउरपरिसप्पभुयपरिसप्पखहयरेसुवि चत्तारि आलावगा भाणि-यव्वा । जे संसुच्छिममणुस्सपंचिंदियपओगपरिणया ते ओरालियतेयाकम्मासरीर-प्पओगपरिणया, एवं गम्भवक्कंतियावि अपज्जत्तगा, पज्जत्तावि एवं चेव, नवरं सरी-रगाणि पंच भाणियव्वाणि, जे अपज्जत्ता असुरकुमारभवणवासि० जहा नेरइय० तहेव, एवं पज्जत्तावि, एवं दुयएणं भेएणं जाव थणियकुमार०, एवं पिसाय० जाव गंधव्व०, चंद० जाव ताराविमाण०, एवं सोहम्मकप्पो० जाव अञ्चुअ०, हेट्ठिम २ गेवेज्ज० जाव उवरिम२ गेवेज्ज०, विजयअणुत्तरोववाइय० जाव सव्वट्टसिद्धअणु०, एक्केक्केणं दुयओ भेओ भाणियव्वो जाव जे पज्जत्तसव्वट्टसिद्धअणुत्तरोववाइय जाव परिणया ते वेउव्विय-तेयाकम्मासरीरपओगपरिणया, दंडगा ३ ॥ जे अपज्जत्ता सुहुमपुढविकाइयएगिंदिय-पओगपरिणया ते फासिंदियपओगपरिणया जे पज्जत्ता सुहुमपुढविकाइय० एवं चेव, जे अपज्जत्ता बादरपुढविकाइय० एवं चेव, एवं पज्जत्तावि, एवं चउक्कएणं भेएणं जाव वणस्सइकाइय०, जे अपज्जत्ता बेइंदियपओगपरिणया ते जिब्भिंदियफासिंदियपओगप-रिणया जे पज्जत्ता बेइंदिय० एवं चेव, एवं जाव चउरिंदिय० नवरं एक्केक्के इंदियं वट्ठे-

यव्वं । जे अपज्जत्ता रयणप्पभापुढविनेरइयपंचिदियपओगपरिणया ते सोइंदियचक्खि-
 दियघाणिंदियजिब्बिंदियफासिंदियपओगपरिणया, एवं पज्जत्तागावि, एवं सव्वे भाणि-
 यव्वा, तिरिक्खजोणिय० मणुस्स० देव० जाव जे पज्जत्ता सव्वट्टसिद्धअणुत्तरोववाइय
 जाव परिणया ते सोइंदियचक्खिंदिय जाव परिणया ४ ॥ जे अपज्जत्ता सुहुमपुढविका-
 इयएगिंदियओरालियतेयाकम्मासरीरप्पओगपरिणया ते फासिंदियपओगपरिणया जे
 पज्जत्ता सुहु० एवं चेव, अपज्जत्तावायर० एवं चेव, एवं पज्जत्तागावि, एवं एणं अभिलावेणं
 जस्स जइ इंदियाणि सरीराणि य ताणि भाणियव्वाणि जाव जे य पज्जत्ता सव्वट्टसिद्ध-
 अणुत्तरोववाइय जाव देवपंचिंदियवेउव्वियतेयाकम्मासरीरपओगपरिणया ते सोइंदिय-
 चक्खिंदिय जाव फासिंदियपओगपरिणया ५ ॥ जे अपज्जत्ता सुहुमपुढविकाइयएगिंदिय-
 पओगपरिणया ते वन्नओ कालवन्नपरिणयावि नील० लोहिय० हालिद्द० सुक्खिळ्ळ०,
 मंधओ सुब्भिगंधपरिणयावि दुब्भिगंधपरिणयावि, रसओ तित्तरसपरिणयावि कडुयरस-
 परिणयावि कसायरसप० अंबिलरसप० म्हुुररसप०, फासओ कक्खडफासपरि०
 जाव लुक्खफासपरि०, संठाणओ परिमंडलसंठाणपरिणयावि वट्ट० तंस० चउरंस०
 आययसंठाणपरिणयावि, जे पज्जत्ता सुहुमपुढवि० एवं चेव, एवं जहाणुपुव्वीए नेयव्वं
 जाव जे पज्जत्ता सव्वट्टसिद्धअणुत्तरोववाइय जाव परिणया ते वन्नओ कालवन्न-
 परिणयावि जाव आययसंठाणपरिणयावि ६ ॥ जे अपज्जत्ता सुहुमपुढवि० एगिं-
 दियओरालियतेयाकम्मासरीरपओगपरिणया ते वन्नओ कालवन्नपरि० जाव आय-
 यसंठाणपरि०, जे पज्जत्ता सुहुमपुढवि० एवं चेव, एवं जहाणुपुव्वीए नेयव्वं जस्स
 जइ सरीराणि जाव जे पज्जत्ता सव्वट्टसिद्धअणुत्तरोववाइय० देवपंचिंदियवेउव्वियते-
 याकम्मासरीरप्पओगपरिणया ते वन्नओ कालवन्नपरिणयावि जाव आययसंठाण-
 परिणयावि ७ ॥ जे अपज्जत्ता सुहुमपुढविकाइयएगिंदियफासिंदियपओगपरिणया ते
 वन्नओ कालवन्नपरिणयावि जाव आययसंठाणपरिणयावि, जे पज्जत्ता सुहुमपुढवि०
 एवं चेव, एवं जहाणुपुव्वीए जस्स जइ इंदियाणि तस्स तत्तियाणि भाणियव्वाणि
 जाव जे पज्जत्ता सव्वट्टसिद्धअणुत्तरो० देवपंचिंदियसोइंदिय जाव फासिंदियपओग-
 परिणया ते वन्नओ कालवन्नपरिणयावि जाव आययसंठाणपरिणयावि ८ ॥ जे
 अपज्जत्ता सुहुमपुढविकाइयएगिंदियओरालियतेयाकम्मासरीरफासिंदियपओगपरिणया
 ते वन्नओ कालवन्नपरिणयावि जाव आययसंठाणप०, जे पज्जत्ता सुहुमपुढवि० एवं
 चेव, एवं जहाणुपुव्वीए जस्स जइ सरीराणि इंदियाणि य तस्स तइ भाणियव्वाणि
 जाव जे पज्जत्ता सव्वट्टसिद्धअणुत्तरोववाइय जाव देवपंचिंदियवेउव्वियतेयाकम्मा-
 सरीरसोइंदिय जाव फासिंदियपओगपरि० ते वन्नओ कालवन्नपरि० जाव आययसंठा-

णपरिणयावि, एवं एए नव दंडगा ९ ॥ ३०९ ॥ मीसापरिणया णं भंते ! पोगगला कइविहा पण्णत्ता ?, गोयमा ! पंचविहा पण्णत्ता, तंजहा-एगिंदियमीसापरिणया जाव पंचिंदियमीसापरिणया, एगिंदियमीसापरिणया णं भंते ! पोगगला कइविहा पण्णत्ता ?, एवं जहा पओगपरिणएहिं नव दंडगा भणिया एवं मीसापरिणएहिं नव दंडगा भाणियव्वा, तहेव सव्वं निरवसेसं, नवरं अभिलावो मीसापरिणया भाणि-यव्वो, सेसं तं चेव, जाव जे पज्जत्ता सव्वट्ठसिद्धअणुत्तरो० जाव आययसंठाणपरिणयावि ॥ ३१० ॥ वीससापरिणया णं भंते ! पोगगला कइविहा पञ्चत्ता ?, गोयमा ! पंचविहा पञ्चत्ता, तंजहा-वन्नपरिणया गंधपरिणया रसपरिणया फासपरिणया संठाणपरिणया, जे वन्नपरिणया ते पंचविहा पञ्चत्ता, तंजहा-कालवन्नपरिणया जाव सुक्खि-वन्नपरिणया, जे गंधपरिणया ते दुविहा पञ्चत्ता, तंजहा-सुद्धिगंधपरिणयावि दुद्धि-गंधपरिणयावि, एवं जहा पञ्चवणापए तहेव निरवसेसं जाव जे संठाणओ आययसं-ठाणपरिणया ते वन्नओ कालवन्नपरिणयावि जाव लुक्खफासपरिणयावि ॥ ३११ ॥ एगे भंते ! दव्वे किं पओगपरिणए मीसापरिणए वीससापरिणए ?, गोयमा ! पओगपरिणए वा मीसापरिणए वा वीससापरिणए वा । जइ पओगपरिणए किं मणप्पओगपरिणए वइप्पओगपरिणए कायप्पओगपरिणए ?, गोयमा ! मणप्पओगपरिणए वा वइप्पओगपरिणए वा कायप्पओगपरिणए वा, जइ मणप्पओगपरिणए किं सच्चमणप्पओगपरिणए मोसमणप्पओग० सच्चाओसमणप्पओ० असच्चाओसमणप्पओ० ?, गोयमा ! सच्चमणप्पओगपरिणए वा मोसमणप्पओग० सच्चाओसमणप्पओ० असच्चाओसमणप्पओ०, जइ सच्चमणप्पओगप० किं आरंभसच्चमणप्पओ० अणारंभसच्चमणप्पओगपरि० सारंभसच्चमणप्पओग० असारंभसच्चमण० समारंभसच्चमणप्पओगपरि० असमारंभसच्चमणप्पओगपरिणए ?, गोयमा ! आरंभसच्चमणप्पओगपरिणए वा जाव असमारंभसच्चमणप्पओगपरिणए वा, जइ मोसमणप्पओगपरिणए किं आरंभमोसमणप्पओगपरिणए ? एवं जहा सच्चेणं तहा मोसेणवि, एवं सच्चाओसमणप्पओगपरिणए, एवं असच्चाओसमणप्पओगेणवि । जइ वइप्पओगपरिणए किं सच्चवइप्पओगपरिणए मोसवइप्पओगपरिणए ? एवं जहा मणप्पओगपरिणए तहा वइप्पओगपरिणए जाव असमारंभवइप्पओगपरिणए वा । जइ कायप्पओगपरिणए किं ओराळियसरीरकायप्पओगपरिणए ओराळियमीसासरीरकायप्पओ० वेउव्वियसरीरकायप्प० वेउव्वियमीसासरीरकायप्पओगपरिणए आहारगसरीरकायप्पओगपरिणए आहारगमीसासरीरकायप्पओगपरिणए कम्मासरीरकायप्पओगपरिणए ?, गोयमा ! ओराळियसरीरकायप्पओगपरिणए वा जाव कम्मासरीरकायप्पओगपरिणए वा, जइ

ओरालियसरीरकायप्पओगपरिणए किं एगिंदियओरालियसरीरकायप्पओगपरिणए एवं जाव पंचिंदियओरालिय जाव परि० ?, गोयमा ! एगिंदियओरालियसरीरकायप्प-ओगपरिणए वा बैंदिय जाव परिणए वा जाव पंचिंदिय जाव परिणए वा, जइ एगिंदियओरालियसरीरकायप्पओगपरिणए किं पुढविकाइयएगिंदिय जाव परिणए जाव वणस्सइकाइयएगिंदियओरालियसरीरकायप्पओगपरिणए ?, गोयमा ! पुढविकाइय-एगिंदिय जाव परिणए वा जाव वणस्सइकाइयएगिंदिय जाव परिणए वा, जइ पुढविकाइयएगिंदियओरालियसरीर जाव परिणए किं सुहुमपुढविकाइय जाव परिणए बायरपुढविकाइयएगिंदिय जाव परिणए ?, गोयमा ! सुहुमपुढविकाइयएगिंदिय जाव परिणए वा बायरपुढविकाइय जाव परिणए वा, जइ सुहुमपुढविकाइय जाव परिणए किं पज्जत्तसुहुमपुढवि जाव परिणए अपज्जत्तसुहुमपुढवि जाव परिणए ?, गोयमा ! पज्जत्तसुहुमपुढविकाइय जाव परिणए वा अपज्जत्तसुहुमपुढविकाइय जाव परिणए वा, एवं बायरावि, एवं जाव वणस्सइकाइयाणं चउक्कओ मेओ, वेईंदिय-तेईंदियचउरिंदियाणं दुयओ मेओ पज्जत्तंगा य अपज्जत्तंगा य । जइ पंचिंदियओरालियसरीरकायप्पओगपरिणए किं तिरिक्खजोणियपंचिंदियओरालियसरीरकायप्पओगपरिणए मणुस्सपंचिंदिय जाव परिणए ?, गोयमा ! तिरिक्खजोणिय जाव परिणए वा मणुस्सपंचिंदिय जाव परिणए वा, जइ तिरिक्खजोणिय जाव परिणए किं जलयरतिरिक्खजोणिय जाव परिणए थलयरखहयर० ? एवं चउक्कओ मेओ जाव खहयराणं । जइ मणुस्सपंचिंदिय जाव परिणए किं संमुच्छिममणुस्सपंचिंदिय जाव परिणए गम्भवक्कंतियमणुस्स जाव परिणए ?, गोयमा ! दोसुवि, जइ गम्भवक्कंतियमणुस्स जाव परिणए किं पज्जत्तगम्भवक्कंतिय जाव परिणए अपज्जत्तगम्भवक्कंतियमणुस्सपंचिंदियओरालियसरीरकायप्पओगपरिणए ?, गोयमा ! पज्जत्तगम्भवक्कंतिय जाव परिणए वा अपज्जत्तगम्भवक्कंतिय जाव परिणए वा १ । जइ ओरालियमीसासरीरकायप्पओगपरिणए किं एगिंदियओरालियमीसासरीरकायप्पओगपरिणए वेईंदिय जाव परिणए जाव पंचिंदियओरालिय जाव परिणए ?, गोयमा ! एगिंदियओरालिय जाव परिणए एवं जहा ओरालियसरीरकायप्पओगपरिणएणं आलावगो भणिओ तहा ओरालियमीसासरीरकायप्पओगपरिणएवि आलावगो भाणियव्वो, नवरं बायरवाउक्काइयगम्भवक्कंतियपंचिंदियतिरिक्खजोणियगम्भवक्कंतियमणुस्साणं एएसि णं पज्जत्तापज्जत्तगाणं सेसाणं अपज्जत्तगाणं २ । जइ वेउव्वियसरीरकायप्पओगपरिणए किं एगिंदियवेउव्वियसरीरकायप्पओगपरिणए जाव पंचिंदियवेउव्वियसरीर जाव परिणए ?, गोयमा ! एगिंदिय जाव परिणए वा पंचिंदिय जाव परिणए वा, जइ एगिंदिय

जाव परिणए किं वाउक्काइयएगिंदिय जाव परिणए अवाउक्काइयएगिंदिय जाव परिणए ? , गोयमा ! वाउक्काइयएगिंदिय जाव परिणए नो अवाउक्काइय जाव परिणए, एवं एणं अभिलावेणं जहा ओगाहणसंठाणे वेउव्वियसरीरं भणियं तहा इहवि भाणियव्वं जाव पज्जत्तसव्वट्टसिद्धअणुत्तरोववाइयकप्पाइयवेमाणियदेवपंचिंदियवेउव्वियसरीरकायप्पओगपरिणए वा अपज्जत्तसव्वट्टसिद्धकायप्पओगपरिणए वा ३ । जइ वेउव्वियमीसासरीरकायप्पओगपरिणए किं एगिंदियमीसासरीरकायप्पओगपरिणए जाव पंचिंदियमीसासरीरकायप्पओगपरिणए ? , एवं जहा वेउव्वियं तहा वेउव्वियमीसगंपि, नवरं देवनेरइयाणं अपज्जत्तगाणं सेसाणं पज्जत्तगाणं तहेव जाव नो पज्जत्तसव्वट्टसिद्धअणुत्तरो जाव पओग ० अपज्जत्तसव्वट्टसिद्धअणुत्तरोववाइयदेवपंचिंदियवेउव्वियमीसासरीरकायप्पओगपरिणए ४ । जइ आहारगसरीरकायप्पओगपरिणए किं मणुस्साहारगसरीरकायप्पओगपरिणए अमणुस्साहारग जाव प ० ? , एवं जहा ओगाहणसंठाणे जाव इट्ठिपत्तपमतसंजयसम्मदिट्ठिपज्जत्तगसंखेज्जवासाउय जाव परिणए नो अणिट्ठिपत्तपमतसंजयसम्मदिट्ठिपज्जत्तगसंखेज्जवासाउय जाव प ० ५ । जइ आहारगमीसासरीरकायप्पओग ० किं मणुस्साहारगमीसासरीर ० ? एवं जहा आहारगं तहेव मीसगंपि निरवसेसं भाणियव्वं ६ । जइ कम्मासरीरकायप्पओग ० किं एगिंदियकम्मासरीरकायप्पओग ० जाव पंचिंदियकम्मासरीर जाव प ० ? , गोयमा ! एगिंदियकम्मासरीरकायप्पओ ० एवं जहा ओगाहणसंठाणे कम्मगस्स भेओ तहेव इहवि जाव पज्जत्तसव्वट्टसिद्धअणुत्तरोववाइय जाव देवपंचिंदियकम्मासरीरकायप्पओगपरिणए वा अपज्जत्तसव्वट्टसिद्धअणु ० जाव परिणए वा ७ ॥ जइ मीसापरिणए किं मणमीसापरिणए वइमीसापरिणए कायमीसापरिणए ? , गोयमा ! मणमीसापरिणए वा वइमीसा ० वा कायमीसापरिणए वा, जइ मणमीसापरिणए किं सच्चमणमीसापरिणए मोसमणमीसापरिणए ? जहा पओगपरिणए तहा मीसापरिणएवि भाणियव्वं निरवसेसं जाव पज्जत्तसव्वट्टसिद्धअणुत्तरोववाइय जाव देवपंचिंदियकम्मासरीरमीसापरिणए वा अपज्जत्तसव्वट्टसिद्धअणु ० जाव कम्मासरीरमीसापरिणए वा । जइ वीससापरिणए किं वन्नपरिणए गंधपरिणए रसपरिणए फासपरिणए संठाणपरिणए ? , गोयमा ! वन्नपरिणए वा गंधपरिणए वा रसपरिणए वा फासपरिणए वा संठाणपरिणए वा, जइ वन्नपरिणए किं कालवन्नपरिणए नील जाव सुक्खिवन्नपरिणए ? , गोयमा ! कालवन्नपरिणए वा जाव सुक्खिवन्नपरिणए वा, जइ गंधपरिणए किं सुब्भिगंधपरिणए दुब्भिगंधपरिणए ? , गोयमा ! सुब्भिगंधपरिणए वा दुब्भिगंधपरिणए वा, जइ रसपरिणए किं तितरसपरिणए ५, पुच्छा, गोयमा ! तितरसपरिणए वा जाव महुर-

रसपरिणए वा, जइ फासपरिणए किं कक्खडफासपरिणए जाव लुक्खफासपरिणए ?, गोयमा ! कक्खडफासपरिणए वा जाव लुक्खफासपरिणए वा, जइ संठाणपरिणए पुच्छा, गोयमा ! परिमंडलसंठाणपरिणए वा जाव आययसंठाणपरिणए वा ॥ ३१२ ॥ दो भंते ! दव्वा किं पओगपरिणया मीसापरिणया वीससापरिणया ?, गोयमा ! पओगपरिणया वा १ मीसापरिणया वा २ वीससापरिणया वा ३ अहवा एगे पओगपरिणए एगे मीसापरिणए ४ अहवेगे पओगप० एगे वीससापरि० ५ अहवा एगे मीसापरिणए एगे वीससापरिणए एवं ६ । जइ पओगपरिणया किं मणप्पओगपरिणया वइप्पओग० कायप्पओगपरिणया ?, गोयमा ! मणप्पओ० वइप्पओगप० कायप्पओगपरिणया वा अहवेगे मणप्पओगप० एगे वइप्पओगप०, अहवेगे मणप्पओगपरिणए एगे कायप०, अहवेगे वइप्पओगप० एगे कायप्पओगपरि०, जइ मणप्पओगप० किं सच्चमणप्पओगप० ४ ?, गोयमा ! सच्चमणप्पओगपरिणया वा जाव असच्चा मोसमणप्पओगप० वा १ अहवा एगे सच्चमणप्पओगपरिणए एगे मोसमणप्पओगपरिणए १ अहवा एगे सच्चमणप्पओगप० एगे सच्चा मोसमणप्पओगपरिणए २ अहवा एगे सच्चमणप्पओगपरिणए एगे असच्चा मोसमणप्पओगपरिणए ३ अहवा एगे मोसमणप्पओगप० एगे सच्चा मोसमणप्पओगप० ४ अहवा एगे मोसमणप्पओगप० एगे असच्चा मोसमणप्पओगप० ५ अहवा एगे सच्चा मोसमणप्पओगप० एगे असच्चा मोसमणप्पओगप० ६ । जइ सच्चमणप्पओगप० किं आरंभसच्चमणप्पओगपरिणया जाव असमारंभसच्चमणप्पओगप० ?, गोयमा ! आरंभसच्चमणप्पओगपरिणया वा जाव असमारंभसच्चमणप्पओगपरिणया वा, अहवा एगे आरंभसच्चमणप्पओगप० एगे अणारंभसच्चमणप्पओगप० एवं एएणं गमएणं दुयसंजोएणं नेयव्वं, सव्वे संजोगा जत्थ जत्ति या उट्ठेति ते भाणियव्वा जाव सव्वट्ठसिद्धगति । जइ मीसाप० किं मणमीसापरि० ? एवं मीसापरि० वि । जइ वीससापरिणया किं वन्नपरिणया गंधप० ? एवं वीससापरिणया वि जाव अहवा एगे चउरंसंठाणपरि० एगे आययसंठाणपरिणए वा ॥ तिन्नि भंते ! दव्वा किं पओगपरिणया मीसाप० वीससाप० ?, गोयमा ! पओगपरिणया वा मीसापरिणया वा वीससापरिणया वा । अहवा एगे पओगपरिणए दो मीसाप० १ अहवेगे पओगपरिणए दो वीससाप० २ अहवा दो पओगपरिणया एगे मीससापरिणए ३ अहवा दो पओगप० एगे वीससाप० ४ अहवा एगे मीसापरिणए दो वीससाप० ५ अहवा दो मीससाप० एगे वीससाप० ६ अहवा एगे पओगप० एगे मीसापरि० एगे वीससाप० ७ । जइ पओगप० किं मणप्पओगपरिणया वइप्पओगप० कायप्पओगप० ?, गोयमा ! मणप्पओगपरिणया वा एवं एकगसंजोगो दुयासंजोगो तियासंजोगो भाणि-

यव्वो, जइ मणप्पओगपरि० किं सच्चमणप्पओगपरिणया ४?, गोयमा ! सच्चमणप्प-
 ओगपरिणया वा जाव असच्चामोसमणप्पओगपरिणया वा ४, अहवा एगे सच्चमण-
 प्पओगपरिणए दो मोसमणप्पओगपरिणया, एवं दुयासंजोगो तियासंजोगो भाणि-
 यव्वो, एत्थवि तहेव जाव अहवा एगे तंससंठाणपरिणए वा एगे चउरससंठाण-
 परिणए वा एगे आययसंठाणपरिणए वा ॥ चत्तारि भंते ! दव्वा किं पओगपरिणया
 ३?, गोयमा ! पओगपरिणया वा मीसापरिणया वा वीससापरिणया वा, अहवा एगे
 पओगपरिणए तिज्जि मीसापरिणया १ अहवा एगे पओगपरिणए तिज्जि वीससापरि-
 णया २ अहवा दो पओगपरिणया दो मीसापरिणया ३ अहवा दो पओगपरिणया
 दो वीससापरिणया ४ अहवा तिज्जि पओगपरिणया एगे मीससापरिणए ५ अहवा
 तिज्जि पओगपरिणया एगे वीससापरिणए ६ अहवा एगे मीससापरिणए तिज्जि वीस-
 सापरिणया ७ अहवा दो मीसापरिणया दो वीससापरिणया ८ अहवा तिज्जि मीसा-
 परिणया एगे वीससापरिणए ९ अहवा एगे पओगपरिणए दो वीससापरिणया
 (एगे मीसापरिणए) १ अहवा एगे पओगपरिणए दो मीसापरिणया एगे वीससा-
 परिणए २ अहवा दो पओगपरिणया एगे मीसापरिणए एगे वीससापरिणए ३ । जइ
 पओगपरिणया किं मणप्पओगपरिणया ३? ॥ एवं एएणं कमेणं पंच छ सत्त जाव
 दस संखेज्जा असंखेज्जा अणंता य दव्वा भाणियव्वा (एक्कगसंजोगेणं) दुयासंजो-
 एणं तियासंजोएणं जाव दससंजोएणं बारससंजोएणं उवज्जुज्जिऊणं जत्थ जत्तिया
 संजोगा उट्ठेति ते सव्वे भाणियव्वा, एए पुण जहा नवमसए पवेसणए भणिहामि
 तहा उवज्जुज्जिऊण भाणियव्वा जाव असंखेज्जा अणंता एवं चेव, नवरं एणं पयं
 अब्भहियं, जाव अहवा अणंता परिमंडलसंठाणपरिणया जाव अणंता आययसंठा-
 णपरिणया ॥ ३१३ ॥ एएसि णं भंते ! पोग्गलणं पओगपरिणयाणं मीसापरिणयाणं
 वीससापरिणयाणं य कयरे २ हिंतो जाव विसेसाहिया वा?, गोयमा ! सव्वत्थोवा
 पोग्गला पओगपरिणया मीसापरिणया अणंतगुणा वीससापरिणया अणंतगुणा ।
 सेवं भंते ! सेवं भंते ! ति ॥ ३१४ ॥ अट्ठमसयस्स पढमो उदेसो समत्तो ॥

कइविहा णं भंते ! आसीविसा पन्नता?, गोयमा ! दुविहा आसीविसा पन्नता,
 तंजहा-जाइआसीविसा य कम्मआसीविसा य, जाइआसीविसा णं भंते ! कइविहा
 प०?, गोयमा ! चउविहा प०, तंजहा-विच्छुयजाइआसीविसे मंडुक्कजाइआसीविसे
 उरगजाइआसीविसे मणुस्सजाइआसीविसे, विच्छुयजाइआसीविस्स णं भंते ! केव-
 इए विसए पन्नते?, गोयमा ! पभू णं विच्छुयजाइआसीविसे अट्ठभरहप्पमाणमेत्तं
 बोदिं विसेणं विसपरिगयं विसट्ठमाणं पकरेत्तए, विसए से विसट्ठयाए नो चेव णं

संपत्तीए करेसु वा करेति वा करेस्संति वा १, मंडुकजाइआसीविसपुच्छा, गोयमा !
 पभू णं मंडुकजाइआसीविसे भरहप्पमाणमेत्तं बोदिं विसेणं विसपरिगयं सेसं तं चेव
 जाव करेस्संति वा २, एवं उरगजाइआसीविसस्सवि नवरं जंबुद्दीवप्पमाणमेत्तं बोदिं
 विसेणं विसपरिगयं सेसं तं चेव जाव करेस्संति वा ३, मणुस्सजाइआसीविसस्सवि
 एवं चेव नवरं समयखेत्तप्पमाणमेत्तं बोदिं विसेणं विसपरिगयं सेसं तं चेव जाव करे-
 स्संति वा ४ । जइ कम्मआसीविसे किं नेरइयकम्मआसीविसे तिरिक्खजोणियकम्म-
 आसीविसे मणुस्सकम्मआसीविसे देवकम्मासीविसे ?, गोयमा ! नो नेरइयकम्मासी-
 विसे तिरिक्खजोणियकम्मासीविसेवि मणुस्सकम्मा० देवकम्मासी०, जइ तिरिक्खजो-
 णियकम्मासीविसे किं एगिंदियतिरिक्खजोणियकम्मासीविसे जाव पंचिंदियतिरिक्खजो-
 णियकम्मासीविसे ?, गोयमा ! नो एगिंदियतिरिक्खजोणियकम्मासीविसे जाव नो
 चउरिंदियतिरिक्खजोणियकम्मासीविसे, पंचिंदियतिरिक्खजोणियकम्मासीविसे, जइ
 पंचिंदियतिरिक्खजोणियकम्मासीविसे किं संमुच्छिमपंचिंदियतिरिक्खजोणियकम्मासी-
 विसे गब्भवक्कंतियपंचिंदियतिरिक्खजोणियकम्मासीविसे ?, एवं जहा वेउव्वियसरी-
 रस्स भेओ जाव पज्जतासंखेज्जवासाउयगब्भवक्कंतियपंचिंदियतिरिक्खजोणियक-
 म्मासीविसे नो अपज्जतासंखेज्जवासाउय जाव कम्मासीविसे । जइ मणुस्सकम्मासीविसे
 किं संमुच्छिममणुस्सकम्मासीविसे गब्भवक्कंतियमणुस्सकम्मासीविसे ?, गोयमा ! णो
 संमुच्छिममणुस्सकम्मासीविसे गब्भवक्कंतियमणुस्सकम्मासीविसे एवं जहा वेउव्विय-
 सरीरं जाव पज्जतासंखेज्जवासाउयकम्मभूमियगब्भवक्कंतियमणुस्सकम्मासीविसे नो अप-
 ज्जता जाव कम्मासीविसे । जइ देवकम्मासीविसे किं भवणवासिदेवकम्मासीविसे
 जाव वेमाणियदेवकम्मासीविसे ?, गोयमा ! भवणवासिदेवकम्मासीविसेवि वाणमंतर०
 जोइसिय० वेमाणियदेवकम्मासीविसेवि, जइ भवणवासिदेवकम्मासीविसे किं असुर-
 कुमारभवणवासिदेवकम्मासीविसे जाव थणियकुमार जाव कम्मासीविसे ?, गोयमा !
 असुरकुमारभवणवासिदेवकम्मासीविसेवि जाव थणियकुमार० आसीविसेवि, जइ असुर-
 कुमार जाव कम्मासीविसे किं पज्जतअसुरकुमार जाव कम्मासीविसे अपज्जतअसुर-
 कुमारभवणवासिदेवकम्मासीविसे ? गोयमा ! नो पज्जतअसुरकुमार जाव कम्मासीविसे
 अपज्जतअसुरकुमारभवणवासिदेवकम्मासीविसे, एवं थणियकुमारणं, जइ वाणमंत-
 रदेवकम्मासीविसे किं पिसायवाणमंतर० एवं सव्वेसिपि अपज्जतगणं, जोइसियणं
 सव्वेसि अपज्जतगणं, जइ वेमाणियदेवकम्मासीविसे किं कप्पोववण्णगवेमाणिय-
 देवकम्मासीविसे कप्पाइयवेमाणियदेवकम्मासीविसे ?, गोयमा ! कप्पोववण्णगवेमा-
 णियदेवकम्मासीविसे नो कप्पातीयवेमाणियदेवकम्मासीविसे, जइ कप्पोववण्णगवे-

माणियदेवकम्मासीविसे किं सोहम्मकप्पोव० जाव कम्मासीविसे जाव अचुयकप्पोवग जाव कम्मासीविसे ?, गोयमा ! सोहम्मकप्पोववण्णगवेमाणियदेवकम्मासीविसेवि जाव सहस्सारकप्पोववण्णगवेमाणियदेवकम्मासीविसेवि, नो आणयकप्पोववण्णग० जाव नो अचुयकप्पोववण्णगवेमाणियदेव०, जइ सोहम्मकप्पोववण्णग जाव कम्मासी- विसे किं पज्जत्तसोहम्मकप्पोववण्णगवेमाणिय० अपज्जत्तगसोहम्मक० ?, गोयमा ! नो पज्जत्तसोहम्मकप्पोववण्णगवेमाणिय० अपज्जत्तसोहम्मकप्पोववण्णगवेमाणिय- देवकम्मासीविसे, एवं जाव नो पज्जत्तसहस्सारकप्पोववण्णगवेमाणियदेवकम्मा- सीविसे, अपज्जत्तसहस्सारकप्पोववण्णग जाव कम्मासीविसे ॥ ३१५ ॥ दस ठाणाइं छउमत्थे सव्वभावेणं न जाणइ न पासइ, तंजहा-धम्मत्थिकायं १ अध- म्मत्थिकायं २ आगासत्थिकायं ३ जीवं असरीरपडिबद्धं ४ परमाणुपोगलं ५ सद्दं ६ गंधं ७ वायं ८ अयं जिणे भविस्सइ ण वा भविस्सइ ९ अयं सव्वदुक्खाणं अंतं करिस्सइ न वा करेस्सइ १० ॥ एयाणि चेव उप्पन्नानाणदंसणधरे अरहा जिणे केवली सव्वभावेणं जाणइ पासइ, तंजहा-धम्मत्थिकायं जाव करेस्सइ न वा करेस्सइ ॥ ३१६ ॥ कइविहे णं भंते ! नाणे पन्नते ?, गोयमा ! पंचविहे नाणे पन्नते, तंजहा-आभिणिबोहियनाणे सुयनाणे ओहिनाणे मणपज्जवनाणे केवल- नाणे, से किं तं आभिणिबोहियनाणे ?, आभिणिबोहियनाणे चउव्विहे पन्नते, तंजहा-उग्गहो ईहा अवाओ धारणा, एवं जहा रायप्पसेणीए णाणाणं भेओ तहेव इहवि भाणियव्वो जाव सेतं केवलनाणे ॥ अच्चाणे णं भंते ! कइविहे पण्णत्ते ?, गोयमा ! तिविहे पण्णत्ते, तंजहा-मइअच्चाणे सुयअच्चाणे विभंगनाणे । से किं तं मइ- अच्चाणे ?, २ चउव्विहे पण्णत्ते, तंजहा-उग्गहो जाव धारणा । से किं तं उग्गहे ?, २ दुविहे पण्णत्ते, तंजहा-अत्थेगग्गहे य वंजणोगग्गहे य, एवं जहेव आभिणिबोहिय- नाणं तहेव, नवरं एगड्डियवज्जं जाव नोईदियधारणा, सेतं धारणा, सेतं मइअच्चाणे । से किं तं सुयअच्चाणे ?, २ जं इमं अच्चाणिएहिं मिच्छहिट्टिएहिं जहा नंदीए जाव चत्तारि वेया संगोवंगा, सेतं सुयअच्चाणे । से किं तं विभंगनाणे ?, २ अणेगविहे पण्णत्ते, तंजहा-गामसंठिए नगरसंठिए जाव संनिवेससंठिए दीवसंठिए समुदसंठिए वाससंठिए वासहरसंठिए पव्वयसंठिए रुक्खसंठिए थूमसंठिए हयसंठिए गयसंठिए नरसंठिए किंनरसंठिए किंपुरिससंठिए महोरगसंठिए गंधव्वसंठिए उसभसंठिए पसुप- सयविहगवानरणाणासंठाणसंठिए पण्णत्ते ॥ जीवा णं भंते ! किं नाणी अच्चाणी ?, गोयमा ! जीवा नाणीवि अच्चाणीवि, जे नाणी ते अत्थेगइया दुच्चाणी अत्थेगइया तिच्चाणी अत्थेगइया चउनाणी अत्थेगइया एगताणी, जे दुच्चाणी ते आभिणि-

बोहियनाणी य सुयनाणी य, जे तिन्नाणी ते आभिणिबोहियनाणी सुयनाणी ओहि-
 नाणी अहवा आभिणिबोहियनाणी सुयनाणी मणपज्जवनाणी, जे चउनाणी ते
 आभिणिबोहियनाणी सुयनाणी ओहिनाणी मणपज्जवनाणी, जे एगनाणी ते नियमा
 केवलनाणी, जे अन्नाणी ते अत्थेगइया दुअन्नाणी अत्थेगइया तिअन्नाणी, जे दुअ-
 न्नाणी ते मइअन्नाणी य सुयअन्नाणी य, जे तियअन्नाणी ते मइअन्नाणी सुयअन्नाणी
 विभंगनाणी । नेरइया णं भंते ! किं नाणी अन्नाणी ?, गोयमा ! नाणीवि अन्नाणीवि,
 जे नाणी ते नियमा तिन्नाणी, तंजहा-आभिणिबोहि० सुयनाणी ओहिनाणी, जे
 अन्नाणी ते अत्थेगइया दुअन्नाणी अत्थेगइया तिअन्नाणी, एवं तिन्नि अन्नाणाणि
 भयणाए । असुरकुमारा णं भंते ! किं नाणी अन्नाणी ?, जहेव नेरइया तहेव तिन्नि
 नाणाणि नियमा, तिन्नि अन्नाणाणि भयणाए, एवं जाव थणियकुमारा । पुढविक्काइया
 णं भंते ! किं नाणी अन्नाणी ?, गोयमा ! नो नाणी अन्नाणी, जे अन्नाणी ते नियमा
 दुअन्नाणी-मइअन्नाणी य सुयअन्नाणी य, एवं जाव वणस्सइकाइया । बेइंदियाणं पुच्छा,
 गोयमा ! णाणीवि अन्नाणीवि, जे नाणी ते नियमा दुअन्नाणी, तंजहा-आभिणि-
 बोहियनाणी य सुयनाणी य, जे अन्नाणी ते नियमा दुअन्नाणी तं० आभिणिबोहिय-
 अन्नाणी सुयअन्नाणी, एवं तेइंदियचउरिंदियावि, पंचिंदियतिरिक्खजो० पुच्छा,
 गोयमा ! नाणीवि अन्नाणीवि, जे नाणी ते अत्थे० दुअन्नाणी अत्थे० तिन्नाणी
 एवं तिन्नि नाणाणि तिन्नि अन्नाणाणि य भयणाए । मणुस्सा जहा जीवा
 तहेव पंच नाणाणि तिन्नि अन्नाणाणि भयणाए । वाणमंतरा जहा ने०, जोइ-
 सियवेसाणियाणं तिन्नि नाणाइं तिन्नि अन्नाणाइं नियमा । सिद्धा णं भंते !
 पुच्छा, गोयमा ! नाणी नो अन्नाणी, नियमा एगनाणी केवलनाणी ॥ ३१७ ॥
 निरयगइया णं भंते ! जीवा किं नाणी अन्नाणी ?, गोयमा ! नाणीवि अन्नाणीवि,
 तिन्नि नाणाइं नियमा तिन्नि अन्नाणाइं भयणाए । तिरियगइया णं भंते ! जीवा किं
 नाणी अन्नाणी ?, गोयमा ! दो नाणाइं दो अन्नाणाइं नियमा । मणुस्सगइया णं भंते !
 जीवा किं नाणी अन्नाणी ?, गोयमा ! तिन्नि नाणाइं भयणाए दो अन्नाणाइं नियमा,
 देवगइया जहा निरयगइया । सिद्धगइया णं भंते ! जहा सिद्धा ॥ सइंदिया णं
 भंते ! जीवा किं नाणी अन्नाणी ?, गोयमा ! चत्तारि नाणाइं तिन्नि अन्नाणाइं भय-
 णाए । एगिंदिया णं भंते ! जीवा किं नाणी० ?, जहा पुढविक्काइया, बेइंदियतेइंदि-
 यचउरिंदियाणं दो नाणाइं दो अन्नाणाइं नियमा । पंचिंदिया जहा सइंदिया । आणि-
 दिया णं भंते ! जीवा किं नाणी० ?, जहा सिद्धा ॥ सकाइया णं भंते ! जीवा किं
 नाणी अन्नाणी ?, गोयमा ! पंच नाणाणि तिन्नि अन्नाणाइं भयणाए । पुढविक्काइया

जाव वणस्सइकाइया नो नाणी अन्नाणी नियमा दुअन्नाणी, तंजहा-मइअन्नाणी य
 सुयअन्नाणी य, तसकाइया जहा सकाइया । अकाइया णं भंते ! जीवा किं नाणी० ?
 जहा सिद्धा ३ ॥ सुहुमा णं भंते ! जीवा किं नाणी० ? जहा पुढविकाइया । वायरा
 णं भंते ! जीवा किं नाणी० ? जहा सकाइया । नोसुहुमानोवायरा णं भंते ! जीवा०
 जहा सिद्धा ४ ॥ पज्जत्ता णं भंते ! जीवा किं नाणी० ? जहा सकाइया । पज्जत्ता
 णं भंते ! नेरइया किं नाणी० ? तिन्नि नाणा तिन्नि अन्नाणा नियमा जहा नेरइया
 एवं जाव थणियकुमारा । पुढविकाइया जहा एगिंदिया, एवं जाव चउरिंदिया ।
 पज्जत्ता णं भंते ! पंचिंदियतिरिक्खजोणिया किं नाणी अन्नाणी ? तिन्नि नाणा तिन्नि
 अन्नाणा भयणाए । मणुस्सा जहा सकाइया । वाणमंतरा जोइसिया वेमाणिया जहा
 नेरइया । अपज्जत्ता णं भंते ! जीवा किं नाणी० ? तिन्नि नाणा तिन्नि अन्नाणा
 भयणाए । अपज्जत्ता णं भंते ! नेरइया किं नाणी अन्नाणी ? तिन्नि नाणा नियमा
 तिन्नि अन्नाणा भयणाए, एवं जाव थणियकुमारा । पुढविकाइया जाव वणस्सइका-
 इया जहा एगिंदिया । वेदियाणं पुच्छा, दो नाणा दो अन्नाणा नियमा, एवं जाव
 पंचिंदियतिरिक्खजोणियाणं । अपज्जत्ता णं भंते ! मणुस्सा किं नाणी अन्नाणी ?
 तिन्नि नाणाई भयणाए दो अन्नाणाई नियमा, वाणमंतरा जहा नेरइया, अपज्जत्ता
 जोइसियवेमाणियाणं तिन्नि नाणा तिन्नि अन्नाणा नियमा । नोपज्जत्तगनोअप-
 ज्जत्ता णं भंते ! जीवा किं नाणी० ? जहा सिद्धा ५ ॥ निरयभवत्था णं भंते !
 जीवा किं नाणी अन्नाणी ? जहा निरयगइया । तिरियभवत्था णं भंते ! जीवा किं
 नाणी अन्नाणी ? तिन्नि नाणा तिन्नि अन्नाणा भयणाए । मणुस्सभवत्था णं० जहा
 सकाइया । देवभवत्था णं भंते ! जहा निरयभवत्था । अभवत्था जहा सिद्धा ६ ॥
 भवसिद्धिया णं भंते ! जीवा किं नाणी० ? जहा सकाइया, अभवसिद्धियाणं
 पुच्छा, गोयमा ! नो नाणी अन्नाणी तिन्नि अन्नाणाई भयणाए । नो भवसिद्धिया-
 नोअभवसिद्धिया णं भंते ! जीवा० जहा सिद्धा ७ ॥ सच्चीणं पुच्छा जहा
 सईदिया, असच्ची जहा वेईदिया, नोसच्चीनोअसच्ची जहा सिद्धा ८ ॥ ३१८ ॥
 कइविहा णं भंते ! लद्धी पण्णत्ता ? गोयमा ! दसविहा लद्धी ५०, तंजहा-नाण-
 लद्धी ५ दंसणलद्धी २ चरित्तलद्धी ३ चरित्ताचरित्तलद्धी ४ दाणलद्धी ५ लाभलद्धी
 ६ भोगलद्धी ७ उवभोगलद्धी ८ वीरियलद्धी ९ ईंदियलद्धी १० । णाणलद्धी णं
 भंते ! कइविहा ५० ? गोयमा ! पंचविहा ५०, तंजहा-आभिणिबोहियणाणलद्धी
 जाव केवलणाणलद्धी ॥ अन्नाणलद्धी णं भंते ! कइविहा ५० ? गोयमा ! त्रिविहा
 ५०, तंजहा-मइअन्नाणलद्धी सुयअन्नाणलद्धी विमंगनाणलद्धी ॥ दंसणलद्धी णं भंते !

कइविहा प० १, गोयमा ! तिबिहा प०, तंजहा-सम्मइंसणलद्धी मिच्छादंसणलद्धी
सम्मामिच्छादंसणलद्धी ॥ चरित्तलद्धी णं भंते ! कइविहा प० १, गोयमा ! पंचविहा प०,
तंजहा-सामाइयचरित्तलद्धी छेदोवट्ठावणियलद्धी परिहारविसुद्धचरित्तलद्धी सुहुमसंप-
रायचरित्तलद्धी अहक्खायचरित्तलद्धी ॥ चरित्ताचरित्तलद्धी णं भंते ! कइविहा प० १,
गोयमा ! एगागारा प०, एवं जाव उवभोगलद्धी एगागारा प० ॥ वीरियलद्धी णं
भंते ! कइविहा प० १, गोयमा ! तिबिहा प०, तंजहा-बालवीरियलद्धी पंडियवीरि-
यलद्धी बालपंडियवीरियलद्धी । इंदियलद्धी णं भंते ! कइविहा प० १, गोयमा !
पंचविहा प०, तंजहा-सोईंदियलद्धी जाव फासिंदियलद्धी ॥ नाणलद्धिया णं भंते !
जीवा किं नाणी अच्चाणी ?, गोयमा ! नाणी नो अच्चाणी, अत्थेगइया दुच्चाणी, एवं
पंच नाणाईं भयणाए । तस्स अलद्धिया णं भंते ! जीवा किं नाणी अच्चाणी ?,
गोयमा ! नो नाणी अच्चाणी, अत्थेगइया दुअच्चाणी तिच्चि अच्चाणाणि भयणाए ।
आभिणिबोहियणाणलद्धिया णं भंते ! जीवा किं नाणी अच्चाणी ?, गोयमा ! नाणी
नो अच्चाणी, अत्थेगइया दुच्चाणी तिनाणी, चत्तारि नाणाईं भयणाए । तस्स अलद्धिया
णं भंते ! जीवा किं नाणी अच्चाणी ?, गोयमा ! नाणीवि अच्चाणीवि, जे नाणी ते
नियमा एगनाणी केवलनाणी, जे अच्चाणी ते अत्थेगइया दुअच्चाणी तिच्चि अच्चा-
णाईं भयणाए । एवं सुयनाणलद्धियावि, तस्स अलद्धियावि जहा आभिणिबोहिय-
नाणस्स लद्धिया । ओहिनाणलद्धियाणं पुच्छा, गोयमा ! नाणी नो अच्चाणी,
अत्थेगइया तिच्चाणी अत्थेगइया चउनाणी, जे तिच्चाणी ते आभिणिबोहियनाणी
सुयनाणी ओहिनाणी, जे चउनाणी ते आभिणिबोहियनाणी सुय० ओहि० मण-
पज्जवनाणी । तस्स अलद्धिया णं भंते ! जीवा किं नाणी० १, गोयमा ! नाणीवि
अच्चाणीवि । एवं ओहिनाणवज्जाईं चत्तारि नाणाईं तिच्चि अच्चाणाईं भयणाए । मण-
पज्जवनाणलद्धियाणं पुच्छा, गोयमा ! नाणी नो अच्चाणी, अत्थेगइया तिच्चाणी
अत्थेगइया चउनाणी, जे तिच्चाणी ते आभिणिबोहियनाणी सुयणाणी मणपज्जव-
णाणी, जे चउनाणी ते आभिणिबोहियनाणी सुयनाणी ओहिनाणी मणपज्जवनाणी,
तस्स अलद्धियाणं पुच्छा, गोयमा ! नाणीवि अच्चाणीवि, मणपज्जवणाणवज्जाईं
चत्तारि नाणाईं, तिच्चि अच्चाणाईं भयणाए । केवलनाणलद्धिया णं भंते ! जीवा किं
नाणी अच्चाणी ?, गोयमा ! नाणी नो अच्चाणी, नियमा एगणाणी केवलनाणी,
तस्स अलद्धियाणं पुच्छा, गोयमा ! नाणीवि अच्चाणीवि, केवलनाणवज्जाईं चत्तारि
णाणाईं तिच्चि अच्चाणाईं भयणाए ॥ अच्चाणलद्धियाणं पुच्छा, गोयमा ! नो नाणी
अच्चाणी, तिच्चि अच्चाणाईं भयणाए, तस्स अलद्धियाणं पुच्छा, गोयमा ! नाणी नो

अन्नाणी, पंच नाणाई भयणाए जहा अन्नाणस्स लद्धिया अलद्धिया य भणिया एवं मईअन्नाणस्स सुयअन्नाणस्स य लद्धिया अलद्धिया य भाणियव्वा । विभंगनाण-
लद्धियाणं तिञ्चि अन्नाणाई नियमा, तस्स अलद्धियाणं पंच नाणाई भयणाए दो
अन्नाणाई नियमा ॥ दंसणलद्धिया णं भंते ! जीवा किं नाणी अन्नाणी ?, गोयमा !
नाणीवि अन्नाणीवि, पंच नाणाई तिञ्चि अन्नाणाई भयणाए, तस्स अलद्धिया णं भंते !
जीवा किं नाणी अन्नाणी ?, गोयमा ! तस्स अलद्धिया नत्थि । सम्माईसणलद्धियाणं पंच
नाणाई भयणाए, तस्स अलद्धियाणं तिञ्चि अन्नाणाई भयणाए, मिच्छादंसणलद्धिया
णं भंते ! पुच्छा, णो नाणी अण्णाणी, तिञ्चि अन्नाणाई भयणाए, तस्स अलद्धियाणं
पंच नाणाई तिञ्चि य अन्नाणाई भयणाए, सम्मामिच्छादंसणलद्धिया अलद्धिया य
जहा मिच्छादंसणलद्धिया अलद्धिया तद्देव भाणियव्वा ॥ चरित्तलद्धिया णं भंते ! जीवा
किं नाणी अन्नाणी ?, गोयमा ! नाणी नो अण्णाणी पंच नाणाई भयणाए, तस्स अल-
द्धियाणं मणपज्जवणाणवज्जाई चत्तारि नाणाई तिञ्चि य अन्नाणाई भयणाए, सामाइय-
चरित्तलद्धिया णं भंते ! जीवा किं नाणी अन्नाणी ?, गोयमा ! नाणी० केवलवज्जाई
चत्तारि नाणाई भयणाए, तस्स अलद्धियाणं पंच नाणाई तिञ्चि य अन्नाणाई भयणाए, एवं
जहा सामाइयचरित्तलद्धिया अलद्धिया य भणिया एवं जाव अहक्खायचरित्तलद्धिया
अलद्धिया य भाणियव्वा, नवरं अहक्खायचरित्तलद्धियाणं पंच नाणाई भं०, चरित्ता-
चरित्तलद्धिया णं भंते ! जीवा किं नाणी अन्नाणी ?, गोयमा ! नाणी नो अन्नाणी,
अत्थेगइया दुण्णाणी अत्थेगइया तिञ्चाणी, जे दुञ्चाणी ते आभिणिबोहियनाणी य
सुयनाणी य, जे तिञ्चाणी ते आभि० सुयनाणी ओहिनाणी, तस्स अलद्धियाणं पंच
नाणाई तिञ्चि अन्नाणाई भयणाए ४ ॥ दाणलद्धियाणं पंच नाणाई तिञ्चि अन्नाणाई
भयणाए, तस्स अ० पुच्छा, गोयमा ! नाणी नो अन्नाणी, नियमा एगनाणी केवल-
नाणी । एवं जाव वीरियलद्धिया अलद्धिया य भाणियव्वा ॥ बालवीरियलद्धियाणं
तिञ्चि नाणाई तिञ्चि अन्नाणाई भयणाए, तस्स अलद्धियाणं पंच नाणाई भयणाए ।
पंडियवीरियलद्धियाणं पंच नाणाई भयणाए, तस्स अलद्धियाणं मणपज्जवणाणव-
ज्जाई णाणाई अन्नाणाणि तिञ्चि य भयणाए । बालपंडियवीरियलद्धिया णं भंते !
जीवा० तिञ्चि नाणाई भयणाए, तस्स अलद्धियाणं पंच नाणाई तिञ्चि अन्नाणाई
भयणाए ॥ इंदियलद्धिया णं भंते ! जीवा किं नाणी अन्नाणी ?, गोयमा ! चत्तारि
णाणाई तिञ्चि य अन्नाणाई भयणाए, तस्स अलद्धियाणं पुच्छा, गोयमा ! नाणी
नो अन्नाणी नियमा एगनाणी केवलनाणी, सोईदियलद्धियाणं जहा इंदियलद्धिया,
तस्स अलद्धियाणं पुच्छा, गोयमा ! नाणीवि अन्नाणीवि, जे नाणी ते अत्थे-

गइया दुन्नाणी अत्थेगइया एगणाणी जे दुन्नाणी ते आभिणिबोहियनाणी सुयनाणी,
जे एगनाणी ते केवलनाणी, जे अन्नाणी ते नियमा दुअन्नाणी, तंजहा-मइअन्नाणी य
सुयअन्नाणी य, चर्क्खिदियघाणिदियलद्धियाणं अलद्धियाणं य जहेव सोइंदिय-
लद्धिया अलद्धिया य, जिळिंभंदियलद्धियाणं चत्तारि णाणाइं तिज्जि य अन्नाणाणि भय-
णाए, तस्स अलद्धियाणं पुच्छा, गोयमा । नाणीवि अन्नाणीवि, जे नाणी ते नियमा
एगनाणी केवलनाणी, जे अन्नाणी ते नियमा दुअन्नाणी, तंजहा-मइअन्नाणी य
सुयअन्नाणी य, फासिंदियलद्धियाणं अलद्धियाणं जहा इंदियलद्धिया य अलद्धिया
य ॥ ३१५ ॥ सागारोवउत्ता णं भंते ! जीवा किं नाणी अन्नाणी ? पंच नाणाइं
तिज्जि अन्नाणाइं भयणाए ॥ आभिणिबोहियनाणसागारोवउत्ता णं भंते ! चत्तारि
णाणाइं भयणाए । एवं सुयनाणसागारोवउत्तावि । ओहिनाणसागारोवउत्ता जहा
ओहिनाणलद्धिया, मणपज्जवनाणसागारोवउत्ता जहा मणपज्जवनाणलद्धिया, केवल-
नाणसागारोवउत्ता जहा केवलनाणलद्धिया, मइअन्नाणसागारोवउत्ताणं तिज्जि अन्ना-
णाइं भयणाए, एवं सुयअन्नाणसागारोवउत्तावि, विभंगनाणसागारोवउत्ताणं तिज्जि
अन्नाणाइं नियमा ॥ अणागारोवउत्ता णं भंते ! जीवा किं नाणी अन्नाणी ? पंच
नाणाइं तिज्जि अन्नाणाइं भयणाए । एवं चक्खुदंसणअचक्खुदंसणअणागारोवउत्तावि,
नवरं चत्तारि णाणाइं तिज्जि अन्नाणाइं भयणाए, ओहिदंसणअणागारोवउत्ताणं
पुच्छा, गोयमा । नाणीवि अन्नाणीवि, जे नाणी ते अत्थेगइया तिन्नाणी अत्थेगइया
चउनाणी, जे तिन्नाणी ते आभिणिबोहियनाणी सुयनाणी ओहिनाणी, जे चउनाणी
ते आभिणिबोहियनाणी जाव मणपज्जवनाणी, जे अन्नाणी ते नियमा तिअन्नाणी,
तंजहा-मइअन्नाणी सुयअन्नाणी विभंगनाणी, केवलदंसणअणागारोवउत्ता जहा केवल-
नाणलद्धिया ॥ सजोगी णं भंते ! जीवा किं नाणी० ? जहा सकाइया, एवं मणजोगी
वइजोगी कायजोगीवि, अजोगी जहा सिद्धा ॥ सळेस्सा णं भंते ! जीवा किं नाणी० ?
जहा सकाइया, कण्हळेस्सा णं भंते ! जहा सकाइया सईदिया, एवं जाव पम्हळेसा, सुक्क-
ळेस्सा जहा सळेस्सा, अळेस्सा जहा सिद्धा ॥ सकसाई णं भंते ! जहा सईदिया, एवं
जाव लोहकसाई, अकसाई णं भंते !० ? पंच नाणाइं भयणाए ॥ सवेयगा णं
भंते ! जहा सईदिया, एवं इत्थिवेयगावि, एवं पुरिसवेयगावि, एवं नपुंसगवे०, अवेयगा
जहा अकसाई ॥ आहारगा णं भंते ! जीवा० ? जहा सकसाई नवरं केवल-
नाणंपि, अणाहारगा णं भंते ! जीवा किं नाणी अन्नाणी ? मणपज्जवनाणवज्जाइं
नाणाइं अन्नाणाणि य तिज्जि भयणाए ॥ ३२० ॥ आभिणिबोहियनाणस्स णं भंते !
केवइए विसए पच्चे ? गोयमा ! से समासओ चउत्विहे प०, तंजहा-दव्वओ खेतओ
३५ सुत्ता०

कालओ भावओ, दव्वओ णं आभिणिबोहियनाणी आप्सेणं सव्वदव्वाइं जाणइ पासइ, खेतओ णं आभिणिबोहियणाणी आप्सेणं सव्वखेतं जाणइ पासइ, एवं काल-ओवि, एवं भावओवि । सुयनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं सुयनाणी उवउत्ते सव्वदव्वाइं जाणइ पासइ, एवं खेतओवि कालओवि, भावओ णं सुयनाणी उवउत्ते सव्वभावे जाणइ पासइ । ओहिनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं ओहिनाणी रुविद-व्वाइं जाणइ पासइ जहा नंदीए जाव भावओ । मणपज्जवनाणस्स णं भंते ! केव-इए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं उज्जुमई अणत्ते अणंतपएसिए जहा नंदीए जाव भावओ । केवलनाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ खेतओ कालओ भावओ, दव्वओ णं केवलनाणी सव्वदव्वाइं जाणइ पासइ एवं जाव भावओ ॥ मइअन्नाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ खेतओ कालओ भावओ, दव्वओ णं मइअन्नाणी मइअन्नाणपरिगयाइं दव्वाइं जाणइ पासइ, एवं जाव भावओ मइअन्नाणी मइअन्नाणपरिगए भावे जाणइ पासइ । सुयअन्नाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं सुयअन्नाणी सुयअन्नाणपरिगयाइं दव्वाइं आघवेइ पन्नवेइ परूवेइ, एवं खेतओ कालओ, भावओ णं सुयअन्नाणी सुयअन्नाणपरिगए भावे आघवेइ तं चेव । विभंग-णाणस्स णं भंते ! केवइए विसए पण्णत्ते ? गोयमा ! से समासओ चउव्विहे पण्णत्ते, तंजहा-दव्वओ ४, दव्वओ णं विभंगनाणी विभंगनाणपरिगयाइं दव्वाइं जाणइ पासइ, एवं जाव भावओ णं विभंगनाणी विभंगनाणपरिगए भावे जाणइ पासइ ॥ ३२१ ॥ णाणी णं भंते ! णाणीति कालओ केवच्चिरं होइ ? गोयमा ! नाणी दुविहे पण्णत्ते, तंजहा-साइए वा अपज्जवसिए साइए वा सपज्जवसिए, तत्थ णं जे से साइए सपज्जवसिए से जह्जेणं अंतोमुहुत्तं उक्कोसेणं छावट्ठिं सागरोवमाइं साइ-रेगाइं । आभिणिबोहियणाणी णं भंते ! आभिणिबोहिय० एवं नाणी आभिणिबो-हियनाणी जाव केवलनाणी । अन्नाणी मइअन्नाणी सुयअन्नाणी विभंगनाणी, एएसिं दसण्हवि संचिट्ठणा जहा कायठिईए ॥ अंतरं सव्वं जहा जीवाभिगमे ॥ अप्पाव-हुगाणि तिज्जि जहा बहुवत्तव्वयाए ॥ केवइया णं भंते ! आभिणिबोहियणाणपज्जवा पण्णत्ता ? गोयमा ! अणंता आभिणिबोहियणाणपज्जवा पण्णत्ता । केवइया णं भंते !

सुयनाणपज्जवा प० ? एवं चेव एवं जाव केवलनाणस्स । एवं मइअन्नाणस्स सुय-
अन्नाणस्स, केवइया णं भंते ! विभंगनाणपज्जवा प० ? गोयमा ! अणंता विभंग-
नाणपज्जवा प०, एएसि णं भंते ! आभिणिबोहियनाणपज्जवाणं सुयनाण० ओहि-
नाण० मणपज्जवनाण० केवलनाणपज्जवाण य कयरे २ जाव विसेसाहिया वा ?
गोयमा ! सव्वत्थोवा मणपज्जवनाणपज्जवा ओहिनाणपज्जवा अणंतगुणा सुयनाणप-
ज्जवा अणंतगुणा आभिणिबोहियनाणपज्जवा अणंतगुणा केवलनाणपज्जवा अणंत-
गुणा ॥ एएसि णं भंते ! मइअन्नाणपज्जवाणं सुयअन्नाण० विभंगनाणपज्जवाण य कयरे
२ जाव विसेसाहिया वा ? गोयमा ! सव्वत्थोवा विभंगनाणपज्जवा सुयअन्नाणपज्जवा
अणंतगुणा मइअन्नाणपज्जवा अणंतगुणा ॥ एएसि णं भंते ! आभिणिबोहि-
यणाणपज्जवाणं जाव केवलनाणप० मइअन्नाणप० सुयअन्नाणप० विभंगनाणप०
कयरे २ जाव विसेसाहिया वा ? गोयमा ! सव्वत्थोवा मणपज्जवनाणपज्जवा विभंग-
नाणपज्जवा अणंतगुणा ओहिणाणपज्जवा अणंतगुणा सुयअन्नाणपज्जवा अणंतगुणा
सुयनाणपज्जवा विसेसाहिया मइअन्नाणपज्जवा अणंतगुणा आभिणिबोहियनाणपज्जवा
विसेसाहिया केवलनाणपज्जवा अणंतगुणा । सेवं भंते ! सेवं भंते ! त्ति ॥ ३२२ ॥
अट्टमस्स सयस्स बिइओ उद्देसो समत्तो ॥

कइविहा णं भंते ! रुक्खा पन्नता ? गोयमा ! तिविहा रुक्खा प०, तंजहा-
संखेज्जजीविया असंखेज्जजीविया अणंतजीविया । से किं तं संखेज्जजीविया ? संखेज्ज०
अणेगविहा प०, तंजहा-ताले तमाले तक्कलि तेतलि जहा पन्नवणाए जाव नालि-
एरी, जे यावन्ने तहप्पगारा, सेत्तं संखेज्जजीविया । से किं तं असंखेज्जजीविया ?
असंखेज्जजीविया दुविहा प०, तंजहा-एगट्टिया य बहुवीयगा य । से किं तं एग-
ट्टिया ? २ अणेगविहा प०, तंजहा-निंबंबजंबू० एवं जहा पन्नवणाए जाव फला
बहुवीयगा, सेत्तं बहुवीयगा, सेत्तं असंखेज्जजीविया । से किं तं अणंतजीविया ?
अणंतजीविया अणेगविहा प०, तंजहा-आलुए मूलए सिंगबेरे, एवं जहा सत्तमसए
जाव सीउण्हे सिउंडी मुसुंडी, जे यावन्ने त०, सेत्तं अणंतजीविया ॥ ३२३ ॥ अह
भंते ! कुम्मे कुम्मावलिया गोहे गोहावलिया गोणे गोणावलिया मणुस्से मणुस्सा-
वलिया महिसे महिसावलिया एएसि णं दुहा वा तिहा वा संखेज्जहा वा छिन्नार्णं जे
अंतरा तेवि णं तेहिं जीवपएसेहिं फुडा ? हंता ! फुडा । पुरिसे णं भंते ! (जं अंतरं)
ते अंतरे हत्थेण वा पाएण वा अंगुलियाए वा सलागाए वा कट्ठेण वा कलिंचेण
वा आमुसमाणे वा संमुसमाणे वा आलिहमाणे वा विलिहमाणे वा अन्नयरेण वा
तिक्खेण सत्थजाएणं आच्छिदमाणे वा विच्छिदमाणे वा अगणिकाएणं वा समोड-

हमाणे तेसिं जीवपएसाणं किंवि आवाहं वा विवाहं वा उप्पायइ छविच्छेदं वा करेइ ? णो तिण्ठे समट्ठे, नो खलु तत्थ सत्थं संकमइ ॥ ३२४ ॥ कइ णं भंते ! पुढवीओ पण्णात्ताओ ? गोयमा ! अट्ठ पुढवीओ पञ्जात्ताओ, तंजहा-रयणप्पभा जाव अहे सत्तमा पुढविईसिपम्भारा । इमा णं भंते ! रयणप्पमापुढवी किं चरिमा अचरिमा ? चरिमपयं निरवसेसं भाणियव्वं जाव वेमाणिया णं भंते ! फासचरिमेणं किं चरिमा अचरिमा ? गोयमा ! चरिमावि अचरिमावि । सेवं भंते ! २ ति भगवं गो० ॥ ३२५ ॥ अट्ठमसए तइओ उहेसो समत्तो ॥

रायणिहे जाव एवं वयासी-कइ णं भंते ! किरियाओ पञ्जात्ताओ ? गोयमा ! पंच किरियाओ पञ्जात्ताओ, तंजहा-काइया अहिगरणिया, एवं किरियापयं निरवसेसं भाणियव्वं जाव मायावत्तियाओ किरियाओ विसेसाहियाओ, सेवं भंते ! सेवं भंते ! ति भगवं गोयमे० ॥ ३२६ ॥ अट्ठमसए चउत्थो उहेसो समत्तो ॥

रायणिहे जाव एवं वयासी-आजीविया णं भंते ! थेरे भगवंते एवं वयासी-समणोवासगस्स णं भंते ! सामाइयकडस्स समणोवस्सए अच्छमाणस्स केइ भंडं अवहरेज्जा से णं भंते ! तं भंडं अणुगवेसमाणे किं सयं भंडं अणुगवेसइ परायगं भंडं अणुगवेसइ ? गोयमा ! सयं भंडं अणुगवेसइ नो परायगं भंडं अणुगवेसेइ, तस्स णं भंते ! तेहिं सीलव्वयगुणवेरमणपच्चक्खाणपोसहोववासेहिं से भंडे अभंडे भवइ ? हंता ! भवइ ॥ से केणं खाइ णं अट्ठेणं भंते ! एवं चुच्चइ सयं भंडं अणुगवेसइ नो परायगं भंडं अणुगवेसइ ? गोयमा ! तस्स णं एवं भवइ-णो मे हिरजे नो मे सुवजे नो मे कंसे नो मे दूसे नो मे विउलधणकणगरयणमणिमोत्तियसंख-सिलप्पवालरत्तरयणमाइए संतसारसान्णजे, ममत्तभावे पुण से अपरिण्णाए भवइ, से तेणट्ठेणं गोयमा ! एवं चुच्चइ-सयं भंडं अणुगवेसइ नो परायगं भंडं अणुगवेसइ ॥ समणोवासगस्स णं भंते ! सामाइयकडस्स समणोवस्सए अच्छमाणस्स केइ जायं चरेज्जा से णं भंते ! किं जायं चरइ अजायं चरइ ? गोयमा ! जायं चरइ नो अजायं चरइ, तस्स णं भंते ! तेहिं सीलव्वयगुणवेरमणपच्चक्खाणपोसहोववासेहिं सा जाया अजाया भवइ ? हंता ! भवइ, से केणं खाइ णं अट्ठेणं भंते ! एवं चुच्चइ-जायं चरइ नो अजायं चरइ ? गोयमा ! तस्स णं एवं भवइ-णो मे माया णो मे पिया णो मे भाया णो मे भणिणी णो मे भज्जा णो मे पुत्ता णो मे धूया नो मे सुण्हा, पेज्जवंधणे पुण से अवोच्छिजे भवइ, से तेणट्ठेणं गोयमा ! जाव नो अजायं चरइ ॥ ३२७ ॥ समणोवासगस्स णं भंते ! पुन्वामेव थूलए पाणाइवाए अपच्चक्खाए भवइ से णं भंते ! पच्छा पच्चाइक्खमाणे किं करेइ ? गोयमा ! तीयं पडिक्क-

मइ पडुप्पन्नं संवरेइ अणागयं पच्चस्वाइ ॥ तीयं पडिक्कममाणे किं तिविहं तिविहेणं पडिक्कमइ १ तिविहं दुविहेणं पडिक्कमइ २ तिविहं एगविहेणं पडिक्कमइ ३ दुविहं तिविहेणं पडिक्कमइ ४ दुविहं दुविहेणं पडिक्कमइ ५ दुविहं एगविहेणं पडिक्कमइ ६ एकविहं तिविहेणं पडिक्कमइ ७ एकविहं दुविहेणं पडिक्कमइ ८ एकविहं एगविहेणं पडिक्कमइ ९ ? गोयमा ! तिविहं तिविहेणं पडिक्कमइ तिविहं दुविहेणं वा पडिक्कमइ तं चेव जाव एकविहं वा एकविहेणं पडिक्कमइ, तिविहं तिविहेणं पडिक्कममाणे न करेइ न कारवेइ करेत्तं णाणुजाणइ मणसा वयसा कायसा १, तिविहं दुविहेणं पडि० न क० न का० करेत्तं नाणुजाणइ मणसा वयसा २, अहवा न करेइ न का० करेत्तं नाणुजाणइ मणसा कायसा ३, अहवा न करेइ ३ वयसा कायसा ४, तिविहं एगविहेणं पडि० न करेइ ३ मणसा ५, अहवा न करेइ ३ वयसा ६, अहवा न करेइ ३ कायसा ७, दुविहं ति० प० न करेइ न का० मणसा वयसा कायसा ८, अहवा न करेइ करेत्तं नाणुजाणइ मणसा वयसा कायसा ९, अहवा न कारवेइ करेत्तं नाणुजाणइ मणसा वयसा कायसा १०, दु० दु० प० न क० न का० म० व० ११, अहवा न क० न का० म० कायसा १२, अहवा न क० न का० वयसा कायसा १३, अहवा न करेइ करेत्तं नाणुजाणइ मणसा वयसा १४, अहवा न करेइ करेत्तं नाणुजाणइ मणसा कायसा १५, अहवा न करेइ करेत्तं नाणुजाणइ वयसा कायसा १६, अहवा न कारवेइ करेत्तं नाणुजाणइ मणसा वयसा १७, अहवा न कारवेइ करेत्तं नाणुजाणइ मणसा कायसा १८, अहवा न कारवेइ करेत्तं नाणुजाणइ वयसा कायसा १९, दुविहं एकविहेणं पडिक्कममाणे न करेइ न कारवेइ मणसा २०, अहवा न करेइ न कारवेइ वयसा २१, अहवा न करेइ न कारवेइ कायसा २२, अहवा न करेइ करेत्तं नाणुजाणइ मणसा २३, अहवा न करेइ करेत्तं नाणुजाणइ वयसा २४, अहवा न करेइ करेत्तं नाणुजाणइ कायसा २५, अहवा न कारवेइ करेत्तं नाणुजाणइ मणसा २६, अहवा न कारवेइ करेत्तं नाणुजाणइ वयसा २७, अहवा न कारवेइ करेत्तं नाणुजाणइ कायसा २८, एगविहं तिविहेणं पडि० न करेइ मणसा वयसा कायसा २९, अहवा न कारवेइ मणसा वयसा कायसा ३०, अहवा करेत्तं नाणुजाणइ मणसा ३१, एकविहं दुविहेणं पडिक्कममाणे न करेइ मणसा वयसा ३२, अहवा न करेइ मणसा कायसा ३३, अहवा न करेइ वयसा कायसा ३४, अहवा न कारवेइ मणसा वयसा ३५, अहवा न कारवेइ मणसा कायसा ३६, अहवा न कारवेइ वयसा कायसा ३७, अहवा करेत्तं नाणुजाणइ मणसा वयसा ३८, अहवा करेत्तं नाणुजाणइ मणसा कायसा ३९, अहवा करेत्तं नाणुजाणइ

वयसा कायसा ४०, एकविहं एगविहेणं पडिक्कममाणे न करेइ मणसा ४१, अहवा न करेइ वयसा ४२, अहवा न करेइ कायसा ४३, अहवा न कारवेइ मणसा ४४, अहवा न कारवेइ वयसा ४५, अहवा न कारवेइ कायसा ४६, अहवा करेत्तं नाणु-जाणइ मणसा ४७, अहवा करेत्तं नाणुजाणइ वयसा ४८, अहवा करेत्तं नाणुजाणइ कायसा ४९ । पडुप्पन्नं संवरमाणे किं तिविहं तिविहेणं संवरेइ ? एवं जहा पडि-क्कममाणेणं एगूणपन्नं भंगा भणिया एवं संवरमाणेणवि एगूणपन्नं भंगा भाणियव्वा । अणागयं पच्चक्खमाणे किं तिविहं तिविहेणं पच्चक्खाइ ? एवं ते चेव भंगा एगूण-पण्णं भाणियव्वा जाव अहवा करेत्तं नाणुजाणइ कायसा ॥ समणोवासगस्स णं भंते ! पुव्वमेव थूलए मुसावाए अपच्चक्खाए भवइ से णं भंते ! पच्छा पच्चाइक्ख-माणे एवं जहा पाणाइवायस्स सीयालं भंगसयं भणियं तहा मुसावायस्सवि भाणि-यव्वं । एवं अदिच्चादाणस्सवि, एवं थूलगस्स मेहुणस्सवि थूलगस्स परिग्गहस्सवि जाव अहवा करेत्तं नाणुजाणइ कायसा ॥ एए खलु एरिसगा समणोवासगा भवन्ति, नो खलु एरिसगा आजीवियोवासगा भवन्ति ॥ ३२८ ॥ आजीवियसमयस्स णं अयमट्ठे पण्णत्ते अक्खीणपडिभोइणो सव्वे सत्ता से हंता छेत्ता भेत्ता लुं पित्ता विहं-पित्ता उद्वइत्ता आहारमाहारिंति, तत्थ खलु इमे दुवालस आजीवियोवासगा भवन्ति, तंजहा-ताले, १ तालपलंबे, २ उव्विहे, ३ संविहे, ४ अवविहे, ५ उदए, ६ नामुदए, ७ णमुदए, ८ अणुवालए, ९ संखवालए, १० अयंपुळे, ११ कायरिए, १२, इच्चेए दुवालस आजीवियोवासगा अरिहंतदेवयागा अम्मापिउसुस्सुसगा पंचफल-पडिक्कंता तंजहा उंबरेहिं, वडेहिं, बोरेहिं, सतरेहिं, पिलंखहिं, पलंडुल्लहस(सु)णकंद-मूलविवज्जगा अणिल्लंछिएहिं अणक्कभिच्चेहिं गोणेहिं तसपाणविवज्जिएहिं चि(वि)तोहिं विंत्ति कप्पेमाणा विहरंति एएवि ताव एवं इच्छंति, किमंग पुण जे इमे समणोवासगा भवन्ति जेसिं नो कप्पंति इमाइं पन्नरस कम्मादाणाइं सयं करेत्तए वा कारवेत्तए वा करेत्तं वा अन्नं समणुजाणेत्तए तंजहा-इंगालकम्मे, वणकम्मे, साडीकम्मे, भाडीकम्मे, फोडीकम्मे, दंतवाणिजे, लक्खवाणिजे, केसवाणिजे, रसवाणिजे, विसवाणिजे, जंतपीलणकम्मे, निल्लंछणकम्मे, दवग्गिगदावणया, सरदहतलायपरिसोसणया, असइ-पोसणया, इच्चेए समणोवासगा सुक्का सुक्काभिजाइया भविया भविता कालमासे कालं किच्चा अन्नयरेखु देवलोएसु देवताए उव्वत्तारो भवन्ति ॥ ३२९ ॥ कइविहा णं भंते ! [देवा] देवलोगा पण्णत्ता ? गोयमा ! चउव्विहा देवलोगा प०, तंजहा-भवणवासिवाणमंतरजोइसवेमाणिया, सेवं भंते ! २ ति ॥ ३३० ॥ अट्ठमसयस्स पंचमो उदेसो समत्तो ॥

समणोवासगस्स णं भंते ! तद्दहं समणं वा माहणं वा फासुएसणिज्जेणं अस-
 णपाणखाइमसाइमेणं पडिलभेमाणस्स किं कज्जइ ? गोयमा ! एगंतसो निज्जरा
 कज्जइ नत्थि य से पावे कम्मे कज्जइ । समणोवासगस्स णं भंते ! तद्दहं समणं
 वा माहणं वा अफासुएणं अणेसणिज्जेणं असणपाण जाव पडिलभेमाणस्स किं कज्जइ ?
 गोयमा ! बहुतरिया से निज्जरा कज्जइ अप्पतराए से पावे कम्मे कज्जइ । समणोवास-
 गस्स णं भंते ! तद्दहं असंजयअविरयअपडिहयपच्चखायपावकम्मं फासुएण वा
 अफासुएण वा एसणिज्जेण वा अणेसणिज्जेण वा असणपाण जाव किं कज्जइ ? गोयमा !
 एगंतसो से पावे कम्मे कज्जइ नत्थि से काइ निज्जरा कज्जइ, [मोकखत्थं जं दाणं, तं
 पइ एसो विही समक्खाओ । अणुकंपादाणं पुण, जिणेहिं न कयाइ पडिसिद्धं] ॥ ३२१ ॥
 निग्गंथं च णं गाहावइकुलं पिंडवायपडियाए अणुप्पविट्ठं केइ दोहिं पिंडेहिं उवनिमंते-
 ज्जा-एगं आउसो ! अप्पणा भुंजाहि एगं थेराणं दलयाहि, से य तं पिण्डं पडिग्गाहेज्जा,
 थेरा य से अणुगवेसियव्वा सिया जत्थेव अणुगवेसमाणे थेरे पासिज्ज तत्थेव अणुप्प-
 दायव्वे सिया नो चेव णं अणुगवेसमाणे थेरे पासिज्जा तं नो अप्पणा भुंजेज्जा नो अन्नेसिं
 दावए एगंतं अणावाए अचित्ते बहुफासुए थंडिल्ले पडिलेहेत्ता पमज्जित्ता परिट्ठावेयव्वे
 सिया । निग्गंथं च णं गाहावइकुलं पिंडवायपडियाए अणुप्पविट्ठं केइ तिहिं पिंडेहिं
 उवनिमंतेज्जा-एगं आउसो ! अप्पणा भुंजाहि दो थेराणं दलयाहि, से य तं पडि-
 ग्गाहेज्जा, थेरा य से अणुगवेसियव्वा सेसं तं चेव जाव परिट्ठावेयव्वे सिया, एवं
 जाव दसहिं पिंडेहिं उवनिमंतेज्जा नवरं एगं आउसो ! अप्पणा भुंजाहि नव थेराणं
 दलयाहि सेसं तं चेव जाव परिट्ठावेयव्वे सिया । निग्गंथं च णं गाहावइकुलं जाव
 केइ दोहिं पडिग्गहेहिं उवनिमंतेज्जा एगं आउसो ! अप्पणा पडिभुंजाहि एगं थेराणं
 दलयाहि, से य तं पडिग्गहेज्जा, तहेव जाव तं नो अप्पणा पडिभुंजेज्जा नो अन्नेसिं
 दावए सेसं तं चेव जाव परिट्ठावेयव्वे सिया, एवं जाव दसहिं पडिग्गहेहिं, एवं
 जहा पडिग्गहवत्तव्वया भणिया एवं गोच्छगरयहरणचोलपट्टगकंबललट्टिसंथारगव-
 त्तव्वया य भाणियव्वा जाव दसहिं संथारएहिं उवनिमंतेज्जा जाव परिट्ठावेयव्वे
 सिया ॥ ३३२ ॥ निग्गंथेण य गाहावइकुलं पिंडवायपडियाए पविट्ठेणं अन्नयरे
 अकिच्चट्ठाणे पडिसेविए, तस्स णं एवं भवइ-इहेव ताव अहं एयस्स ठाणस्स आलो-
 एमि पडिक्कमामि निंदामि गरिहामि विउट्टामि विसोहेमि अकरणयाए अब्भुट्ठेमि
 अहारिहं पायच्छित्तं तवोकम्मं पडिवज्जामि, तओ पच्छा थेराणं अंतियं आलोए-
 स्सामि जाव तवोकम्मं पडिवज्जिस्सामि, से य संपट्ठिए असंपत्ते थेरा य पुव्वामेव
 अमुहा सिया से णं भंते ! किं आराहए विराहए ? गोयमा ! आराहए नो विरा-

हए १ । से य संपट्टिए असंपत्ते अप्पणा य पुव्वामेव अमुहे सिया से णं भंते । किं आराहए विराहए ? गोयमा ! आराहए नो विराहए २, से य संपट्टिए असंपत्ते थेरा य कालं करेज्जा से णं भंते । किं आराहए विराहए ? गोयमा ! आराहए नो विराहए ३, से य संपट्टिए असंपत्ते अप्पणा य पुव्वामेव कालं करेज्जा से णं भंते । किं आराहए विराहए ? गोयमा ! आराहए नो विराहए ४, से य संपट्टिए संपत्ते थेरा य अमुहा सिया से णं भंते । किं आराहए विराहए ? गोयमा ! आराहए नो विराहए, से य संपट्टिए संपत्ते अप्पणा य० एवं संपत्तेणवि चत्तारि आलावगा भाणियव्वा जहेव असंपत्तेणं । निगंग्थेण य बहिया वियारभूमिं वा विहारभूमिं वा निक्खंतंतेणं अन्नयरे अक्किच्चट्ठाणे पडिसेविए तस्स णं एवं भवइ-इहेव ताव अहं० एवं एत्थवि एए चेव अट्ठ आलावगा भाणियव्वा जाव नो विराहए । निगंग्थेण य गामाणुगामं दूइज्जमाणेणं अन्नयरे अक्किच्चट्ठाणे पडिसेविए तस्स णं एवं भवइ इहेव ताव अहं० एत्थवि ते चेव अट्ठ आलावगा भाणियव्वा जाव नो विराहए ॥ निगंग्थीए य गाहावइकुलं पिंडवायपडियाए अणुपविट्ठाए अन्नयरे अक्किच्चट्ठाणे पडिसेविए तीसे णं एवं भवइ इहेव ताव अहं एयस्स ठाणस्स आलोएमि जाव तवोक्कम्मं पडिवज्जामि तओ पच्छा पवत्तिणीए अंतियं आलोएस्सामि जाव पडिवज्जिस्सामि, सा य संपट्टिया असंपत्ता पवत्तिणी य अमुहा सिया सा णं भंते । किं आराहिया विराहिया ? गोयमा ! आराहिया नो विराहिया, सा य संपट्टिया जहा निगंग्थस्स तिन्निगमा भणिया एवं निगंग्थीएवि तिन्नि आलावगा भाणियव्वा जाव आराहिया नो विराहिया ॥ से केणट्ठेणं भंते ! एवं वुच्चइ-आराहए नो विराहए ? गोयमा ! से जहा नामए-केइ पुरिसे एगं महं उन्नालोमं वा गयलोमं वा सणलोमं वा कप्पासलोमं वा तणसूर्यं वा दुहा वा तिहा वा संखेज्जहा वा छिंदित्ता अगणिकायंसि पक्खिवेज्जा से नूणं गोयमा ! छिज्जमाणे छिन्ने पक्खिक्खप्पमाणे पक्खित्ते दज्जमाणे दट्ठेत्ति वत्तव्वं सिया ? हंता भगवं ! छिज्जमाणे छिन्ने जाव दट्ठेत्ति वत्तव्वं सिया, से जहा वा केइ पुरिसे वत्थं अहयं वा धोयं वा तंतुग्गयं वा मंजिट्ठादोणीए पक्खिवेज्जा से नूणं गोयमा ! उक्खिक्खप्पमाणे उक्खित्ते पक्खिक्खप्पमाणे पक्खित्ते रज्जमाणे रत्तेत्ति वत्तव्वं सिया ? हंता भगवं ! उक्खिक्खप्पमाणे उक्खित्ते जाव रत्तेत्ति वत्तव्वं सिया, से तेणट्ठेणं गोयमा ! एवं वुच्चइ-आराहए नो विराहए ॥ ३३३ ॥ पईवस्स णं भंते ! झियायमाणस्स किं पईवे झियाइ लट्ठी झियाइ वत्ती झियाइ तेळे झियाइ पईवचंपए झियाइ जोई झियाइ ? गोयमा ! नो पईवे झियाइ जाव नो पईवचंपए झियाइ, जोई झियाइ ॥ अगारस्स णं भंते ! झियाय-

माणस्स किं अगारे झियाइ कुट्टा झियाइ कडणा झि० धारणा झि० बलहरणे
झि० वंसा० मल्ला झि० वग्गा झियाइ छित्तरा झियाइ छाणे झियाइ जोई झियाइ ?
गोयमा ! नो अगारे झियाइ नो कुट्टा झियाइ जाव नो छाणे झियाइ, जोई झियाइ
॥ ३३४ ॥ जीवे णं भंते ! ओरालियसरीराओ कइकिरिए ? गोयमा ! सिय
तिकिरिए सिय चउकिरिए सिय पंचकिरिए सिय अकिरिए ॥ नेरइए णं भंते !
ओरालियसरीराओ कइकिरिए ? गोयमा ! सिय तिकिरिए सिय चउकिरिए
सिय पंचकिरिए । असुरकुमारे णं भंते ! ओरालियसरीराओ कइकिरिए ? एवं चेव,
एवं जाव वेमाणिए, नवरं मणुस्से जहा जीवे । जीवे णं भंते ! ओरालियसरीरेहिंतो
कइकिरिए ? गोयमा ! सिय तिकिरिए जाव सिय अकिरिए । नेरइए णं भंते !
ओरालियसरीरेहिंतो कइकिरिए ? एवं एसो जहा पढमो दंडओ तहा इमोवि अपरिसेसो
भाणियव्वो जाव वेमाणिए, नवरं मणुस्से जहा जीवे । जीवा णं भंते ! ओरालिय-
सरीराओ कइकिरिया ? गोयमा ! सिय तिकिरिया जाव सिय अकिरिया, नेरइया णं
भंते ! ओरालियसरीराओ कइकिरिया ? एवं एसोवि जहा पढमो दंडओ तहा भाणि-
यव्वो, जाव वेमाणिया, नवरं मणुस्सा जहा जीवा । जीवा णं भंते ! ओरालियसरी-
रेहिंतो कइकिरिया ? गोयमा ! तिकिरियावि चउकिरियावि पंचकिरियावि अकिरि-
यावि, नेरइया णं भंते ! ओरालियसरीरेहिंतो कइकिरिया ? गोयमा ! तिकिरियावि
चउकिरियावि पंचकिरियावि एवं जाव वेमाणिया, नवरं मणुस्सा जहा जीवा ॥ जीवे
णं भंते ! वेउव्वियसरीराओ कइकिरिए ? गोयमा ! सिय तिकिरिए सिय चउकिरिए
सिय अकिरिए, नेरइए णं भंते ! वेउव्वियसरीराओ कइकिरिए ? गोयमा ! सिय
तिकिरिए सिय चउकिरिए एवं जाव वेमाणिए, नवरं मणुस्से जहा जीवे, एवं जहा
ओरालियसरीरेणं चत्तारि दंडगा तहा वेउव्वियसरीरेणवि चत्तारि दंडगा भाणियव्वा,
नवरं पंचमकिरिया न भञ्जइ, सेसं तं चेव, एवं जहा वेउव्वियं तहा आहारंगं पि
तेयंगं पि कम्मगं पि भाणियव्वं, एक्केक्के चत्तारि दंडगा भाणियव्वा जाव वेमाणिया णं
भंते ! कम्मगसरीरेहिंतो कइकिरिया ? गोयमा ! तिकिरियावि चउकिरियावि । सेवं
भंते ! सेवं भंते ! ति ॥ ३३५ ॥ अट्टमसयस्स छट्ठो उद्देसओ समत्तो ॥

तेणं कालेणं २ रायगिहे नगरे वज्जओ, गुणसिलिए उज्जाणे वज्जओ, जाव पुढवि-
सिलापट्टए, तस्स णं गुणसिलयस्स उज्जाणस्स अदूरसामंते बहवे अन्नउत्थिया परि-
वसंति, तेणं कालेणं २ समणे भगवं महावीरे आइगरे जाव समोसढे जाव परिसा
पडिगया, तेणं कालेणं २ समणस्स भगवओ महावीरस्स बहवे अंतेवासी थेरा
भगवंतो जाइसंपन्ना कुलसंपन्ना जहा विइयसए जाव जीवियासामरणभयविप्पमुक्का

समणस्स भगवओ महावीरस्स अदूरसामंते उद्धुंजाणू अहोसिरा झ्णानकोट्टोवगया संजमेणं तवसा अप्पाणं भावेमाणा विहरंति, तए णं ते अन्नउत्थिया जेणेव थेरा भगवंतो तेणेव उवागच्छंति २ ता ते थेरे भगवंते एवं वयासी-तुब्भे णं अज्जो ! तिविहं तिविहेणं असंजयअविरयअप्पडिहय जहा सत्तमसए बिइए उदेसए जाव एगंतबाला यावि भवह, तए णं ते थेरा भगवंतो ते अन्नउत्थिए एवं वयासी-केण कारणेणं अज्जो ! अम्हे तिविहं तिविहेणं असंजयअविरय जाव एगंतबाला यावि भवामो ?, तए णं ते अन्नउत्थिया ते थेरे भगवंते एवं वयासी-तुब्भे णं अज्जो ! अदिच्चं गेण्हह अदिच्चं भुंजह अदिच्चं साइज्जह, तए णं ते तुब्भे अदिच्चं गेण्हमाणा अदिच्चं भुंजमाणा अदिच्चं साइज्जमाणा तिविहं तिविहेणं असंजयअविरय जाव एगंतबाला यावि भवह, तए णं ते थेरा भगवंतो ते अन्नउत्थिए एवं वयासी-केण कारणेणं अज्जो ! अम्हे अदिच्चं गेण्हामो अदिच्चं भुंजामो अदिच्चं साइज्जामो, जएणं अम्हे अदिच्चं गेण्हमाणा जाव अदिच्चं साइज्जमाणा तिविहं तिविहेणं असंजय जाव एगंतबाला यावि भवामो ?, तए णं ते अन्नउत्थिया ते थेरे भगवंते एवं वयासी-तुम्हे णं अज्जो ! दिज्जमाणे अदिचे पडिग्गाहेज्जमाणे अपडिग्गहिए निसिरिज्जमाणे अणिसिट्ठे, तुब्भे णं अज्जो ! दिज्जमाणं पडिग्गहणं असंपत्तं एत्थ णं अंतरा केइ अवहरिज्जा, गाहावइस्स णं तं भंते ! नो खलु तं तुब्भं, तए णं तुज्झे अदिच्चं गेण्हह जाव अदिच्चं साइज्जह, तए णं तुज्झे अदिच्चं गेण्हमाणा जाव एगंतबाला यावि भवह, तए णं ते थेरा भगवंतो ते अन्नउत्थिए एवं वयासी-नो खलु अज्जो ! अम्हे अदिच्चं गिण्हामो अदिच्चं भुंजामो अदिच्चं साइज्जामो अम्हे णं अज्जो ! दिच्चं गेण्हामो दिच्चं भुंजामो दिच्चं साइज्जामो, तएणं अम्हे दिच्चं गेण्हमाणा दिच्चं भुंजमाणा दिच्चं साइज्जमाणा तिविहं तिविहेणं संजयविरयपडिहय जहा सत्तमसए जाव एगंतपंडिया यावि भवामो, तएणं ते अन्नउत्थिया ते थेरे भगवंते एवं वयासी-केण कारणेणं अज्जो ! तुम्हे दिच्चं गेण्हह जाव दिच्चं साइज्जह, जएणं तुज्झे दिच्चं गेण्हमाणा जाव एगंतपंडिया यावि भवह ?, तएणं ते थेरा भगवंतो ते अन्नउत्थिए एवं वयासी-अम्हे णं अज्जो ! दिज्जमाणे दिचे पडिग्गाहेज्जमाणे पडिग्गहिए निसिरिज्जमाणे निसिट्ठे । अम्हे णं अज्जो ! दिज्जमाणं पडिग्गहणं असंपत्तं एत्थ णं अंतरा केइ अवहरिज्जा अम्हानं तं णो खलु तं गाहावइस्स, जएणं अम्हे दिच्चं गेण्हामो दिच्चं भुंजामो दिच्चं साइज्जामो तएणं अम्हे दिच्चं गेण्हमाणा जाव दिच्चं साइज्जमाणा तिविहं तिविहेणं संजय जाव एगंतपंडिया यावि भवामो, तुज्झे णं अज्जो ! अप्पणा चेव तिविहं तिविहेणं असंजय जाव एगंतबाला यावि भवह, तए णं ते अन्नउत्थिया ते थेरे

भगवंते एवं वयासी-केण कारणेणं अज्जो ! अम्हे तिविहं जाव एगंतबाला यावि भवामो ?, तए णं ते थेरा भगवंतो ते अन्नउत्थिए एवं वयासी-तुज्जे णं अज्जो ! अदिच्चं गेण्हह ३, तए णं तु अज्जो ! तुब्भे अदिच्चं गे० जाव एगंत०, तए णं ते अन्नउत्थिया ते थेरे भगवंते एवं वयासी-केण कारणेणं अज्जो ! अम्हे अदिच्चं गेण्हामो जाव एगंतबा० ?, तए णं ते थेरा भगवंतो ते अन्नउत्थिए एवं वयासी-तुज्जे णं अज्जो ! दिज्जमाणे अदिच्चे तं चेव जाव गाहावइस्स णं णो खलु तं तुज्जे, तए णं तुज्जे अदिच्चं गेण्हह, तं चेव जाव एगंतबाला यावि भवह, तए णं ते अन्नउत्थिया ते थेरे भ० एवं व०-तुज्जे णं अज्जो ! तिविहं तिविहेणं असंजय जाव एगंतबा० भवह, तए णं ते थेरा भ० ते अन्नउत्थिए एवं वयासी-केण कारणेणं अम्हे तिविहं तिविहेणं जाव एगंतबाला यावि भवामो ?, तए णं ते अन्नउत्थिया ते थेरे भगवंते एवं वयासी-तुज्जे णं अज्जो ! रीयं रीयमाणा पुढविं पेच्चेह अभिहणह वत्तेह लेसेह संघाएह संघट्टेह परियावेह किलामेह उवइवेह तएणं तुज्जे पुढविं पेच्चेमाणा जाव उवइवेमाणा तिविहं तिविहेणं असंजयअविरय जाव एगंतबाला यावि भवह, तए णं ते थेरा भगवंतो ते अन्नउत्थिए एवं वयासी-नो खलु अज्जो ! अम्हे रीयं रीयमाणा पुढविं पेच्चेमो अभिहणामो जाव उवइवेमो अम्हे णं अज्जो ! रीयं रीयमाणा कार्यं वा जोगं वा रीयं वा पडुच्च देसं देसेणं वयामो पएसं पएसेणं वयामो तेणं अम्हे देसं देसेणं वयमाणा पएसं पएसेणं वयमाणा नो पुढविं पेच्चेमो अभिहणामो जाव उवइवेमो, तएणं अम्हे पुढविं अपेच्चेमाणा अणभिहणेमाणा जाव अणुवइवेमाणा तिविहं तिविहेणं संजय जाव एगंतपंडिया यावि भवामो, तुज्जे णं अज्जो ! अप्पणा चेव तिविहं तिविहेणं असंजय जाव एगंत बाला यावि भवह, तए णं ते अन्नउत्थिया थेरे भगवंते एवं वयासी-केण कारणेणं अज्जो ! अम्हे तिविहं तिविहेणं जाव एगंतबाला यावि भवामो ?, तए णं ते थेरा भगवंतो ते अन्नउत्थिए एवं वयासी-तुज्जे णं अज्जो ! रीयं रीयमाणा पुढविं पेच्चेह जाव उवइवेह, तए णं तुज्जे पुढविं पेच्चेमाणा जाव उवइवेमाणा तिविहं तिविहेणं जाव एगंतबाला यावि भवह, तए णं ते अन्नउत्थिया ते थेरे भगवंते एवं वयासी-तुज्जे णं अज्जो ! गममाणे अगाए वीइक्कमिज्जमाणे अवीइक्कंते रायगिहं नगरं संपाविउकामे असंपत्ते, तए णं ते थेरा भगवंतो ते अन्नउत्थिए एवं वयासी-नो खलु अज्जो ! अम्हे गममाणे अगाए वीइक्कमिज्जमाणे अवीइक्कंते रायगिहं नगरं जाव असंपत्ते, अम्हे णं अज्जो ! गममाणे गाए वीइक्कमिज्जमाणे वीइक्कंते रायगिहं नगरं संपाविउकामे संपत्ते, तुज्जे णं अप्पणा चेव गममाणे अगाए वीइक्कमिज्जमाणे अवीइक्कंते रायगिहं नगरं जाव असंपत्ते, तए

णं ते थेरा भगवतो अन्नउत्थिए एवं पडिहणेन्ति पडिहणित्ता गइप्पवायनामं अज्झ-
यणं पन्नवईसु ॥ ३३६ ॥ कइविहे णं भंते ! गइप्पवाए पण्णत्ते ? गोयमा ! पंचविहे
गइप्पवाए पण्णत्ते, तंजहा-पओगगई, ततगई, बंधणछेयणगई, उववायगई, विहाय-
गई, एत्तो आरब्भ पओगपयं निरवसेसं भाणियव्वं, जाव सेत्तं विहायगई । सेव
भंते ! सेव भंते ! त्ति ॥ ३३७ ॥ अट्टमसयस्स सत्तमो उद्देसो समत्तो ॥

रायगिहे नयरे जाव एवं वयासी-गुरूणं भंते ! पडुच्च कइ पडिणीया पण्णत्ता ?
गोयमा ! तओ पडिणीया पण्णत्ता, तंजहा-आयरियपडिणीए, उवज्जायपडिणीए,
थेरपडिणीए ॥ गइं णं भंते ! पडुच्च कइ पडिणीया पण्णत्ता ? गोयमा ! तओ पडिणीया
पण्णत्ता, तंजहा-इहलोगपडिणीए, परलोगपडिणीए, दुइओलोगपडिणीए ॥ समूहणं
भंते ! पडुच्च कइ पडिणीया पण्णत्ता ? गोयमा ! तओ पडिणीया पण्णत्ता, तंजहा-कुल-
पडिणीए, गणपडिणीए, संघपडिणीए ॥ अणुकंपं भंते ! पडुच्च पुच्छा, गोयमा !
तओ पडिणीया पण्णत्ता, तंजहा-तवस्सिपडिणीए, गिलाणपडिणीए, सेहपडिणीए ॥
सुयणं भंते ! पडुच्च पुच्छा, गोयमा ! तओ पडिणीया पण्णत्ता, तंजहा-सुत्तपडिणीए,
अत्थपडिणीए, तदुभयपडिणीए । भावं णं भंते ! पडुच्च पुच्छा, गोयमा ! तओ
पडिणीया पन्नत्ता, तंजहा-नाणपडिणीए, दंसणपडिणीए, चरित्तपडिणीए ॥ ३३८ ॥
कइविहे णं भंते ! ववहारे पन्नत्ते ? गोयमा ! पंचविहे ववहारे पन्नत्ते, तंजहा-
आगमे, सुए, आणा, धारणा, जीए, जहा से तत्थ आगमे सिया आगमेणं ववहारं
पट्टवेज्जा, णो य से तत्थ आगमे सिया जहा से तत्थ सुए सिया सुएणं ववहारं
पट्टवेज्जा, णो य से तत्थ सुए सिया जहा से तत्थ आणा सिया आणाए ववहारं
पट्टवेज्जा, णो य से तत्थ आणा सिया जहा से तत्थ धारणा सिया धारणाए
ववहारं पट्टवेज्जा, णो य से तत्थ धारणा सिया जहा से तत्थ जीए सिया जीएणं
ववहारं पट्टवेज्जा, इच्चेएहिं पंचहिं ववहारं पट्टवेज्जा, तंजहा-आगमेणं, सुएणं, आणाए,
धारणाए, जीएणं, जहा २ से आगमे सुए आणा धारणा जीए तथा २ ववहारं
पट्टवेज्जा ॥ से किमाहु भंते ! आगमवळिया समणा निगंथा इच्चयं पंचविहं ववहारं
जहा २ जहिं २ तथा २ तहिं २ अणिसिओवसियं सम्मं ववहरमाणे समणे निगंथे
आणाए आराहए भवइ ॥ ३३९ ॥ कइविहे णं भंते ! बंधे पण्णत्ते ? गोयमा !
दुविहे बंधे पन्नत्ते, तंजहा-इरियावहियबंधे य संपराइयबंधे य । इरियावहियणं
भंते ! कम्मं किं नेरइओ बंधइ तिरिक्खजोणिओ बंधइ तिरिक्खजोणिणी बंधइ
मणुस्सो बंधइ मणुस्सी बंधइ देवो बंधइ देवी बंधइ ? गोयमा ! नो नेरइओ बंधइ
नो तिरिक्खजोणिओ बंधइ नो तिरिक्खजोणिणी बंधइ नो देवो बंधइ नो देवी बंधइ,

पुव्वपडिवज्जए पडुच्च मणुस्सा य मणुस्सीओ य बंधंति, पडिवज्जमाणए पडुच्च मणुस्सो वा बंधइ १ मणुस्सी वा बंधइ २ मणुस्सा वा बंधंति ३ मणुस्सीओ वा बंधंति ४ अहवा मणुस्सो य मणुस्सी य बंधइ ५ अहवा मणुस्सो य मणुस्सीओ य बंधन्ति ६ अहवा मणुस्सा य मणुस्सी य बंधइ ७ अहवा मणुस्सा य मणुस्सीओ य बंधंति ॥ तं भंते ! किं इत्थी बंधइ पुरिसो बंधइ नपुंसगो बंधइ, इत्थीओ बंधन्ति पुरिसा बंधंति नपुंसगा बंधन्ति, नोइत्थीनोपुरिसोनोनपुंसओ बंधइ ? गोयमा ! नो इत्थी बंधइ नो पुरिसो बंधइ जाव नो नपुंसगा बंधन्ति, पुव्वपडिवज्जए पडुच्च अवगयवेया बंधंति, पडिवज्जमाणए य पडुच्च अवगयवेओ वा बंधइ अवगयवेया वा बंधंति ॥ जइ भंते ! अवगयवेओ वा बंधइ अवगयवेया वा बंधंति तं भंते ! किं इत्थीपच्छाकडो बंधइ १ पुरिसपच्छाकडो बंधइ २ नपुंसगपच्छाकडो बंधइ ३ इत्थीपच्छाकडा बंधंति ४ पुरिसपच्छाकडा बंधंति ५ नपुंसगपच्छाकडा बंधंति ६ उदाहु इत्थि-पच्छाकडो य पुरिसपच्छाकडो य बंधइ, उदाहु इत्थिपच्छाकडो य पुरिसपच्छाकडा य बंधंति, उदाहु इत्थिपच्छाकडा य पुरिसपच्छाकडो य बंधइ, उदाहु इत्थिपच्छा-कडा य पुरिसपच्छाकडा य बंधंति, उदाहु इत्थीपच्छाकडो य नपुंसगपच्छाकडो य बंधइ ४ उदाहु पुरिसपच्छाकडो य नपुंसगपच्छाकडो य बंधइ ४ उदाहु इत्थिपच्छाकडो य पुरिसपच्छाकडो य नपुंसगपच्छाकडो य (बंधइ) भाणियव्वं ८, एवं एए छव्वीसं भंगा २६ जाव उदाहु इत्थीपच्छाकडा य पुरिसप० नपुंसगप० बंधंति ? गोयमा ! इत्थिपच्छाकडोवि बंधइ १ पुरिसपच्छाकडोवि बंधइ २ नपुंसग-पच्छाकडोवि बंधइ ३ इत्थीपच्छाकडावि बंधंति ४ पुरिसपच्छाकडावि बंधंति ५ नपुंसगपच्छाकडावि बंधंति ६ अहवा इत्थीपच्छाकडो पुरिसपच्छाकडो य बंधइ ७ एवं एए चेव छव्वीसं भंगा भाणियव्वा, जाव अहवा इत्थिपच्छाकडा य पुरिस-पच्छाकडा य नपुंसगपच्छाकडा य बंधंति ॥ तं भंते ! किं बंधी बंधइ बंधिस्सइ १ बंधी बंधइ न बंधिस्सइ २ बंधी न बंधइ बंधिस्सइ ३ बंधी न बंधइ न बंधि-स्सइ ४ न बंधी बंधइ बंधिस्सइ ५ न बंधी बंधइ न बंधिस्सइ ६ न बंधी न बंधइ बंधिस्सइ ७ न बंधी न बंधइ न बंधिस्सइ ८ ? गोयमा ! भवागरिसं पडुच्च अत्थेगइए बंधी बंधइ बंधिस्सइ अत्थेगइए बंधी बंधइ न बंधिस्सइ, एवं तं चेव सव्वं जाव अत्थेगइए न बंधी न बंधइ न बंधिस्सइ, गहणागरिसं पडुच्च अत्थेगइए बंधी बंधइ बंधिस्सइ एवं जाव अत्थेगइए न बंधी बंधइ बंधिस्सइ, णो चेव णं न बंधी बंधइ न बंधिस्सइ, अत्थेगइए न बंधी न बंधइ बंधिस्सइ अत्थेगइए न बंधी न बंधइ न बंधिस्सइ ॥ तं भंते ! किं साइयं सपज्जवसियं बंधइ साइयं अपज्जवसियं

बंधइ अणाइयं सपज्जवसियं बंधइ अणाइयं अपज्जवसियं बंधइ ? गोयमा ! साइयं सपज्जवसियं बंधइ नो साइयं अपज्जवसियं बंधइ नो अणाइयं सपज्जवसियं बंधइ नो अणाइयं अपज्जवसियं बंधइ ॥ तं भंते ! किं देसेणं देसं बंधइ देसेणं सव्वं बंधइ सव्वेणं देसं बंधइ सव्वेणं सव्वं बंधइ ? गोयमा ! नो देसेणं देसं बंधइ णो देसेणं सव्वं बंधइ नो सव्वेणं देसं बंधइ सव्वेणं सव्वं बंधइ ॥ ३४० ॥ संपराइयणं भंते ! कम्मं किं नेरइओ बंधइ तिरिक्खजोणिओ बंधइ जाव देवी बंधइ ? गोयमा ! नेरइओवि बंधइ तिरिक्खजोणिओवि बंधइ तिरिक्खजोणिणीवि बंधइ मणुस्सोवि बंधइ मणुस्सीवि बंधइ देवोवि बंधइ देवीवि बंधइ ॥ तं भंते ! किं इत्थी बंधइ पुरिसो बंधइ तहेव जाव नोइत्थीनोपुरिसोनोपुंसओ बंधइ ? गोयमा ! इत्थीवि बंधइ पुरिसोवि बंधइ जाव नपुंसगावि बंधन्ति अहवेए य अवगयवेओ य बंधइ अहवेए य अवगयवेया य बंधन्ति । जइ भंते ! अवगयवेओ य बंधइ अवगयवेया य बंधन्ति तं भंते ! किं इत्थीपच्छाकडो बंधइ पुरिसपच्छाकडो बंधइ ? एवं जहेव इरियावहियाबंधगस्स तहेव निरवसेसं जाव अहवा इत्थीपच्छाकडा य पुरिसपच्छाकडा य [बंधइ] नपुंसगपच्छाकडा य बंधंति ॥ तं भंते ! किं बंधी बंधइ बंधिस्सइ १ बंधी बंधइ न बंधिस्सइ २ बंधी न बंधइ बंधिस्सइ ३ बंधी न बंधइ न बंधिस्सइ ४ ? गोयमा ! अत्थेगइए बंधी बंधइ बंधिस्सइ १ अत्थेगइए बंधी बंधइ न बंधिस्सइ २ अत्थेगइए बंधी न बंधइ बंधिस्सइ ३ अत्थेगइए बंधी न बंधइ न बंधिस्सइ ॥ तं भंते ! किं साइयं सपज्जवसियं बंधइ ? पुच्छा तहेव, गोयमा ! साइयं वा सपज्जवसियं बंधइ अणाइयं वा सपज्जवसियं बंधइ अणाइयं वा अपज्जवसियं बंधइ णो चेव णं साइयं अपज्जवसियं बंधइ । तं भंते ! किं देसेणं देसं बंधइ० एवं जहेव इरियावहियाबंधगस्स जाव सव्वेणं सव्वं बंधइ ॥ ३४१ ॥ कइ णं भंते ! कम्मपयडीओ पन्नाताओ ? गोयमा ! अट्ठ कम्मपयडीओ पन्नाताओ ?, तंजहा-णाणावरणिज्जं जाव अंतराइयं ॥ कइ णं भंते ! परीसहा पण्णत्ता ? गोयमा ! बावीसं परीसहा ५०, तंजहा-दिग्गिच्छापरीसहे, पिवासापरीसहे, जाव दंसणपरीसहे । एए णं भंते ! बावीसं परीसहा कइसु कम्मपगडीसु समोयरंति ? गोयमा ! चउसु कम्मपयडीसु समोयरंति, तंजहा-णाणावरणिज्जे, वेयणिज्जे, मोहणिज्जे, अंतराइए । नाणावरणिज्जे णं भंते ! कम्मे कइ परीसहा समोयरंति ? गोयमा ! दो परीसहा समोयरंति, तं०-पन्नापरीसहे अण्णाणपरीसहे य, वेयणिज्जे णं भंते ! कम्मे कइ परीसहा समोयरंति ? गोयमा ! एक्कारस परीसहा समोयरंति, तंजहा-पंचेव आणुपुन्वी चरिया सेज्जा वहे य रोगे य । तणफास जल्लमेव य एक्कारस वेयणिज्जं ॥ १ ॥ दंसणमोहणिज्जे णं

भंते ! कम्मे कइ परीसहा समोयरंति ? गोयमा ! एगे दंसणपरीसहे समोयरइ,
चरित्तमोहणिजे णं भंते ! कम्मे कइ परीसहा समोयरंति ? गोयमा ! सत्त परीसहा
समोयरंति, तंजहा-अरइ अचेल इत्थी निसीहिया जायणा य अक्कोसे । सक्कारपुर-
क्कारे चरित्तमोहंमि सत्तेए ॥ १ ॥ अंतराइए णं भंते ! कम्मे कइ परीसहा समोय-
ति ? गोयमा ! एगे अलाभपरीसहे समोयरइ ॥ सत्तविहबंघगस्स णं भंते ! कइरं
परीसहा पण्णत्ता ? गोयमा ! बावीसं परीसहा पण्णत्ता, वीसं पुण वेदेइ, जं समयं
सीयपरीसहं वेदेइ णो तं समयं उस्सिणपरीसहं वेदेइ जं समयं उस्सिणपरीसहं वेदेइ
णो तं समयं सीयपरीसहं वेदेइ, जं समयं चरियापरीसहं वेदेइ णो तं समयं निसी-
हियापरीसहं वेदेइ जं समयं निसीहियापरीसहं वेदेइ णो तं समयं चरियापरीसहं
वेदेइ । अट्टविहबंघगस्स णं भंते ! कइ परीसहा पण्णत्ता ? गोयमा ! बावीसं परी-
सहा पण्णत्ता, तंजहा-कुहापरीसहे, पिवासापरीसहे, सीयप०, दंसमसगप० जाव
अलाभप०, एवं अट्टविहबंघगस्सवि सत्तविहबंघगस्सवि । छव्विहबंघगस्स णं
भंते ! सरागछउमत्थस्स कइ परीसहा पण्णत्ता ? गोयमा ! चोइस परीसहा पण्णत्ता
बारस पुण वेदेइ, जं समयं सीयपरीसहं वेदेइ णो तं समयं उस्सिणपरीसहं वेदेइ जं
समयं उस्सिणपरीसहं वेदेइ नो तं समयं सीयपरीसहं वेदेइ, जं समयं चरियापरीसहं
वेदेइ णो तं समयं सेज्जापरीसहं वेदेइ जं समयं सेज्जापरीसहं वेदेइ णो तं समयं
चरियापरीसहं वेदेइ । एकविहबंघगस्स णं भंते ! वीयरागछउमत्थस्स कइ परीसहा
पण्णत्ता ? गोयमा ! एवं चेव जहेव छव्विहबंघगस्स । एगविहबंघगस्स णं भंते !
सजोगिभवत्थकेवलस्स कइ परीसहा पण्णत्ता ? गोयमा ! एक्कारस परीसहा पण्णत्ता,
नव पुण वेदेइ, सेसं जहा छव्विहबंघगस्स । अबंघगस्स णं भंते ! अजोगिभवत्थके-
वलस्स कइ परीसहा पण्णत्ता ? गोयमा ! एक्कारस परीसहा पण्णत्ता, नव पुण वेदेइ,
जं समयं सीयपरीसहं वेदेइ नो तं समयं उस्सिणपरीसहं वेदेइ जं समयं उस्सिणपरीसहं
वेदेइ नो तं समयं सीयपरीसहं वेदेइ, जं समयं चरियापरीसहं वेदेइ नो तं समयं सेज्जा-
परीसहं वेदेइ जं समयं सेज्जापरीसहं वेदेइ नो तं समयं चरियापरीसहं वेदेइ ॥ ३४२ ॥
जंबुद्दीवे णं भंते ! दीवे सूरिया उग्गमणमुहुत्तंसि दूरे य मूले य दीसंति मज्झंतिय-
मुहुत्तंसि मूले य दूरे य दीसंति अत्थमणमुहुत्तंसि दूरे य मूले य दीसंति ? हंता
गोयमा ! जंबुद्दीवे णं दीवे सूरिया उग्गमणमुहुत्तंसि दूरे य तं चेव जाव अत्थमण-
मुहुत्तंसि दूरे य मूले य दीसंति, जंबूदीवे णं भंते ! दीवे सूरिया उग्गमण-
मुहुत्तंसि मज्झंतियमुहुत्तंसि य अत्थमणमुहुत्तंसि य सव्वत्थ समा उच्चत्तेणं ?
हंता गोयमा ! जंबुद्दीवे णं दीवे सूरिया उग्गमण जाव उच्चत्तेणं । जइ णं

भंते ! जंबुद्वीवे २ सूरिया उग्गमणमुहुत्तंसि य मज्झंति य अत्थमणमुहुत्तंसि मूले जाव उच्चतेणं से केणं खाइणं अट्टेणं भंते ! एवं वुच्चइ जंबुद्वीवे णं द्वीवे सूरिया उग्गमणमुहुत्तंसि दूरे य मूले य दीसंति जाव अत्थमणमुहुत्तंसि दूरे य मूले य दीसंति ? गोयमा ! लेसापडिघाएणं उग्गमणमुहुत्तंसि दूरे य मूले य दीसंति लेसाभितावेणं मज्झंति य मुहुत्तंसि मूले य दूरे य दीसंति लेसापडिघाएणं अत्थमणमुहुत्तंसि दूरे य मूले य दीसंति, से तेणट्टेणं गोयमा ! एवं वुच्चइ-जंबुद्वीवे णं द्वीवे सूरिया उग्गमणमुहुत्तंसि दूरे य मूले य दीसन्ति जाव अत्थमण जाव दीसंति । जंबुद्वीवे णं भंते ! द्वीवे सूरिया किं तीयं खेत्तं गच्छंति पडुप्पन्नं खेत्तं गच्छंति अणागयं खेत्तं गच्छंति ? गोयमा ! णो तीयं खेत्तं गच्छंति पडुप्पन्नं खेत्तं गच्छंति णो अणागयं खेत्तं गच्छंति, जंबुद्वीवे णं द्वीवे सूरिया किं तीयं खेत्तं ओभासंति पडुप्पन्नं खेत्तं ओभासंति अणागयं खेत्तं ओभासंति ? गोयमा ! नो तीयं खेत्तं ओभासंति पडुप्पन्नं खेत्तं ओभासंति नो अणागयं खेत्तं ओभासंति, तं भंते ! किं पुट्टं ओभासंति अपुट्टं ओभासंति ? गोयमा ! पुट्टं ओभासंति नो अपुट्टं ओभासंति जाव नियमा छहिसिं । जंबुद्वीवे णं भंते ! द्वीवे सूरिया किं तीयं खेत्तं उज्जोवेंति एवं चेव जाव नियमा छहिसिं, एवं तवेंति एवं भासंति जाव नियमा छहिसिं ॥ जंबुद्वीवे णं भंते ! द्वीवे सूरियाणं किं तीए खेत्ते किरियां कज्जइ पडुप्पन्ने खेत्ते किरिया कज्जइ अणागए खेत्ते किरिया कज्जइ ? गोयमा ! नो तीए खेत्ते किरिया कज्जइ पडुप्पन्ने खेत्ते किरिया कज्जइ णो अणागए खेत्ते किरिया कज्जइ, सा भंते ! किं पुट्टा कज्जइ अपुट्टा कज्जइ ? गोयमा ! पुट्टा कज्जइ नो अपुट्टा कज्जइ जाव नियमा छहिसिं । जंबुद्वीवे णं भंते ! द्वीवे सूरिया केवइयं खेत्तं उड्डं तवेंति केवइयं खेत्तं अहे तवेंति केवइयं खेत्तं तिरियं तवेंति ? गोयमा ! एणं जोयणसयं उड्डं तवेंति अट्टारस जोयणसयाइं अहे तवेंति सीयालीसं जोयणसहस्साइं दोच्चि य तेवट्टे जोयणसए एकवीसं च सट्ठिभाए जोयणस्स तिरियं तवेंति ॥ अंतो णं भंते ! माणुसुत्तरस्स पव्वयस्स जे चंदिमसूरियगहगणणक्खत्तताराख्वा ते णं भंते ! देवा किं उड्डोववन्नगा जहा जीवाभिगमे तहेव निरवसेसं जाव उक्कोसेणं छम्मासा । बहिया णं भंते ! माणुसुत्तरस्स जहा जीवाभिगमे जाव ईदट्ठाणे णं भंते ! केवइयं कालं उववाएणं विरहिए पन्नते ? गोयमा ! जहन्नेणं एक्कं समयं उक्कोसेणं छम्मासा । सेवं भंते ! सेवं भंते ! त्ति ॥ ३४३ ॥ अट्टमसए अट्टमो उदेसो समत्तो ॥

कइविहे णं भंते ! बंधे पण्णत्ते ? गोयमा ! दुविहे बंधे पण्णत्ते, तंजहा-पओग-बंधे य वीससाबंधे य ॥ ३४४ ॥ वीससाबंधे णं भंते ! कइविहे पण्णत्ते ? गोयमा !

दुविहे पण्णत्ते, तंजहा-साइयवीससाबंधे य अणाइयवीससाबंधे य । अणाइयवीससा-
बंधे णं भंते ! कइविहे पण्णत्ते ? गोयमा ! तिविहे पण्णत्ते, तंजहा-धम्मत्थिकायअन्न-
मन्नअणाइयवीससाबंधे, अधम्मत्थिकायअन्नमन्नअणाइयवीससाबंधे, आगासत्थि-
कायअन्नमन्नअणाइयवीससाबंधे । धम्मत्थिकायअन्नमन्नअणाइयवीससाबंधे णं भंते !
किं देसबंधे सव्वबंधे ? गोयमा ! देसबंधे नो सव्वबंधे, एवं अधम्मत्थिकायअन्न-
मन्नअणाइयवीससाबंधेवि, एवमागासत्थिकायअन्नमन्नअणाइयवीससाबंधेवि । धम्म-
त्थिकायअन्नमन्नअणाइयवीससाबंधे णं भंते ! कालओ केवच्चिरं होइ ? गोयमा !
सव्वद्धं, एवं अधम्मत्थिकाए, एवं आगासत्थिकाए । साइयवीससाबंधे णं भंते !
कइविहे पण्णत्ते ? गोयमा ! तिविहे पण्णत्ते, तंजहा-बंधणपच्चइए, भायणपच्चइए, परि-
णामपच्चइए । से किं तं बंधणपच्चइए ? २ जजं परमाणुपोग्गला दुपएसिया तिपएसिया
जाव दसपएसिया संखेज्जपएसिया असंखेज्जपएसिया, अणंतपएसियाणं खंधाणं वेमा-
यनिद्वयाए वेमायलुक्खयाए वेमायनिद्वलुक्खयाए एवं बंधणपच्चइए णं बंधे समुप्पज्जइ
जहन्नेणं एक्कं समयं उक्कोसेणं असंखेज्जं कालं, सेतं बंधणपच्चइए । से किं तं भायण-
पच्चइए ? भायणपच्चइए जजं जुन्नसुराजुन्नगुलजुन्नतंदुलाणं भायणपच्चइएणं बंधे
समुप्पज्जइ जहन्नेणं अंतोमुहुतं उक्कोसेणं संखेज्जं कालं, सेतं भायणपच्चइए । से किं तं
परिणामपच्चइए ? परिणामपच्चइए जजं अब्भाणं अब्भक्ख्वाणं जहा तइयसए जाव
अमोहाणं परिणामपच्चइए णं बंधे समुप्पज्जइ जहन्नेणं एक्कं समयं उक्कोसेणं
छम्मासा, सेतं परिणामपच्चइए, सेतं साइयवीससाबंधे, सेतं वीससाबंधे ॥ ३४५ ॥
से किं तं पओगबंधे ? पओगबंधे तिविहे पण्णत्ते, तंजहा-अणाइए वा अपज्जवसिए,
साइए वा अपज्जवसिए, साइए वा सपज्जवसिए, तत्थ णं जे से अणाइए अपज्जव-
सिए से णं अट्ठण्हं जीवमज्झपएसणं ॥ तत्थवि णं तिण्हं २ अणाइए अपज्जवसिए
सेसाणं साइए, तत्थ णं जे से साइए अपज्जवसिए से णं सिद्धाणं, तत्थ णं जे से
साइए सपज्जवसिए से णं चउव्विहे पण्णत्ते, तंजहा-आलावणबंधे, अल्लियावणबंधे,
सरीरबंधे, सरीरप्पओगबंधे ॥ से किं तं आलावणबंधे, आलावणबंधे, जण्णं तण-
भाराण वा कट्ठभाराण वा पत्तभाराण वा पलालभाराण वा वेल्लभाराण वा वेत्तल-
यावागवरत्तरज्जुवल्लिकुसदब्भमाइएहिं आलावणबंधे समुप्पज्जइ जहन्नेणं अंतोमुहुतं
उक्कोसेणं संखेज्जं कालं, सेतं आलावणबंधे । से किं तं अल्लियावणबंधे ? अल्लिया-
वणबंधे चउव्विहे पण्णत्ते, तंजहा-लेसणाबंधे, उच्चयबंधे, समुच्चयबंधे, साहणाणाबंधे,
से किं तं लेसणाबंधे ? लेसणाबंधे जजं कुट्ठा(डा)णं कोट्टिमाणं खंभाणं पासायाणं कट्ठाणं
चम्माणं घडाणं पडाणं कडाणं छुहान्चिक्खिक्खसिलेसलक्खमहुसित्थमाइएहिं लेसणएहिं

बंधे समुप्पज्जइ जह्वेणं अंतोमुहुत्तं उक्कोसेणं संखेज्जं कालं, सेत्तं लेसणाबंधे, से किं तं उच्चयबंधे ? उच्चयबंधे जज्जे तणरासीण वा कट्टरासीण वा पत्तरासीण वा तुसरासीण वा भुसरासीण वा गोमयरासीण वा अवगररासीण वा उच्चएणं बंधे समुप्पज्जइ जह्वेणं अंतोमुहुत्तं उक्कोसेणं संखेज्जं कालं, सेत्तं उच्चयबंधे, से किं तं समुच्चयबंधे ? समुच्चयबंधे जज्जे अगडतडागनईदहवावीपुक्खरिणीवीहियाणं गुंजालियाणं सराणं सरपंतिआणं सरसरपंतियाणं बिलपंतियाणं देवकुलसभापव्वधुमखाइयाणं फरिहाणं पागारट्टालगच्चरियदारगोपुरतोरणाणं पासायघरसरणलेणआवणाणं सिंघाडगतिथच्चउक्कच्चच्चउम्मुहुमहापहमाईणं लुहाचिक्खिल्लसिलेससमुच्चएणं बंधे समुप्पज्जइ जह्वेणं अंतोमुहुत्तं उक्कोसेणं संखेज्जं कालं, सेत्तं समुच्चयबंधे, से किं तं साहणणाबंधे ? साहणणाबंधे दुविहे पन्नत्ते, तंजहा-देससाहणणाबंधे य सव्वसाहणणाबंधे य, से किं तं देससाहणणाबंधे ? देससाहणणाबंधे जज्जे सगडरहजाणजुग्गगिल्लिथिल्लिसीयसंदमाणियलोहीलोहकडाहकडुच्छुयआसणसयणखंभंभंडमत्तोवगरणमाईणं देससाहणणाबंधे समुप्पज्जइ जह्वेणं अंतोमुहुत्तं उक्कोसेणं संखेज्जं कालं, सेत्तं देससाहणणाबंधे, से किं तं सव्वसाहणणाबंधे ? सव्वसाहणणाबंधे से णं खीरोदगमाईणं, सेत्तं सव्वसाहणणाबंधे, सेत्तं साहणणाबंधे, सेत्तं अल्लियावणबंधे ॥३४६॥ से किं तं सरीरबंधे ? सरीरबंधे दुविहे पण्णत्ते, तंजहा-पुव्वप्पओगपच्चइए य पडुप्पन्नपओगपच्चइए य, से किं तं पुव्वप्पओगपच्चइए ? पुव्वप्पओगपच्चइए जज्जे नेरइयाणं संसारत्थाणं सव्वजीवाणं तत्थ २ तेसु २ कारणेसु समोहणमाणानं जीवप्पएसाणं बंधे समुप्पज्जइ सेत्तं पुव्वप्पओगपच्चइए, से किं तं पडुप्पन्नपओगपच्चइए ? २ जज्जे केवलनाणिस्स अणगारस्स केवलिसमुग्घाएणं समोहयस्स ताओ समुग्घायाओ पडिनियत्तेमाणस्स अंतरा मंथे वट्टमाणस्स तेयाकम्माणं बंधे समुप्पज्जइ, किं कारणं ? ताहे से पएसा एगत्तीगया भवंतित्ति, सेत्तं पडुप्पन्नपओगपच्चइए, सेत्तं सरीरबंधे ॥ से किं तं सरीरप्पओगबंधे ? सरीरप्पओगबंधे पंचविहे पन्नत्ते, तंजहा-ओरालियसरीरप्पओगबंधे, वेउव्वियसरीरप्पओगबंधे, आहारगसरीरप्पओगबंधे, तेयासरीरप्पओगबंधे, कम्मासरीरप्पओगबंधे । ओरालियसरीरप्पओगबंधे णं भंते ! कइविहे पण्णत्ते ? गोयमा ! पंचविहे पन्नत्ते, तंजहा-एगिंदियओरालियसरीरप्पओगबंधे बेंदियओ । जाव पंचिंदियओरालियसरीरप्पओगबंधे । एगिंदियओरालियसरीरप्पओगबंधे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-पुढविकाइयएगिंदिय० एवं एएणं अभिलावेणं भेओ जहा ओगाहणसंठाणे ओरालियसरीरस्स तहा भाणियव्वो जाव पज्जत्तगब्भवक्कंतियमणुस्सपंचिंदियओरा-

लियसरीरप्पओगबंधे य अपजत्तगब्भवक्कंतियमणुस्स जाव बंधे य ॥ ओरालिय-
सरीरप्पओगबंधे णं भंते ! कस्स कम्मस्स उदएणं ? गोयमा ! वीरियसजोगसद्दव्व-
याए पमादपच्चया कम्मं च जोगं च भवं च आउयं च पडुच्च ओरालियसरीरप्प-
ओगनामाए कम्मस्स उदएणं ओरालियसरीरप्पओगबंधे ॥ एगिंदियओरालियसरीर-
प्पओगबंधे णं भंते ! कस्स कम्मस्स उदएणं ? एवं चेव, पुढविकाइयएगिंदियओरा-
लियसरीरप्पओगबंधेवि एवं चेव, एवं जाव वणस्सइकाइया, एवं बेइदिया, एवं तेइदिया,
एवं चउरिंदिया, तिरिक्खजोणियपंचिंदियओरालियसरीरप्पओगबंधे णं भंते ! कस्स
कम्मस्स उदएणं ? एवं चेव, मणुस्सपंचिंदियओरालियसरीरप्पओगबंधे णं भंते !
कस्स कम्मस्स उदएणं ? गोयमा ! वीरियसजोगसद्दव्वयाए पमादपच्चया जाव
आउयं च पडुच्च मणुस्सपंचिंदियओरालियसरीरप्पओगनामाए कम्मस्स उदएणं ॥
ओरालियसरीरप्पओगबंधे णं भंते ! किं देसबंधे सव्वबंधे ? गोयमा ! देसबंधेवि
सव्वबंधेवि, एगिंदियओरालियसरीरप्पओगबंधे णं भंते ! किं देसबंधे सव्वबंधे ?
एवं चेव, एवं पुढविकाइया, एवं जाव मणुस्सपंचिंदियओरालियसरीरप्पओगबंधे णं
भंते ! किं देसबंधे सव्वबंधे ? गोयमा ! देसबंधेवि सव्वबंधेवि ॥ ओरालियसरीर-
प्पओगबंधे णं भंते ! कालओ केवच्चिरं होइ ? गोयमा ! सव्वबंधे एक्कं समयं,
देसबंधे जहन्नेणं एक्कं समयं, उक्कोसेणं तिच्चि पल्लिओवमाइं समयऊणाइं, एगिंदिय-
ओरालियसरीरप्पओगबंधे णं भंते ! कालओ केवच्चिरं होइ ? गोयमा ! सव्वबंधे एक्कं
समयं, देसबंधे जहन्नेणं एक्कं समयं, उक्कोसेणं बावीसं वाससहस्साइं समयऊणाइं, पुढवि-
काइयएगिंदियपुच्छां, गोयमा ! सव्वबंधे एक्कं समयं, देसबंधे जहन्नेणं खुट्ठागं भवग्गहणं
तिसमयऊणं, उक्कोसेणं बावीसं वाससहस्साइं समयऊणाइं, एवं सव्वेसिं सव्वबंधो
एक्कं समयं, देसबंधो जेसिं नत्थि वेउव्वियसरीरं तेसिं जहन्नेणं खुट्ठागं भवग्गहणं
तिसमयऊणं, उक्कोसेणं जा जस्स उक्कोसिया ठिई सा समयऊणा कायव्वा, जेसिं पुण
अत्थि वेउव्वियसरीरं तेसिं देसबंधो जहन्नेणं एक्कं समयं, उक्कोसेणं जा जस्स ठिई सा
समयऊणा कायव्वा जाव मणुस्साणं देसबंधे जहन्नेणं एक्कं समयं, उक्कोसेणं तिच्चि पल्लि-
ओवमाइं समयऊणाइं ॥ ओरालियसरीरप्पओगबंधंतरे णं भंते ! कालओ केवच्चिरं
होइ ? गोयमा ! सव्वबंधंतरे जहन्नेणं खुट्ठागं भवग्गहणं तिसमयऊणं, उक्कोसेणं तेत्तीसं
सागरोवमाइं पुव्वक्कोडिसमयाहियाइं, देसबंधंतरे जहन्नेणं एक्कं समयं, उक्कोसेणं तेत्तीसं
सागरोवमाइं तिसमयाहियाइं, एगिंदियओरालियपुच्छा, गोयमा ! सव्वबंधंतरे जह-
न्नेणं खुट्ठागं भवग्गहणं तिसमयऊणं, उक्कोसेणं बावीसं वाससहस्साइं समयाहियाइं,
देसबंधंतरे जहन्नेणं एक्कं समयं, उक्कोसेणं अंतोमुहुत्तं, पुढविकाइयएगिंदियपुच्छा

गोयमा ! सव्वबंधंतरं जहेव एगिंदियस्स तहेव भाणियव्वं, देसबंधंतरं जहजेणं एक्कं समयं, उक्कोसेणं तिच्चि समया, जहा पुढविकाइयाणं एवं जाव चउरिंदियाणं वाउक्काइय-
 वज्जाणं, नवरं सव्वबंधंतरं उक्कोसेणं जा जस्स ठिई सा समयाहिया कायव्वा, वाउ-
 क्काइयाणं सव्वबंधंतरं जहजेणं खुड्ढागभवग्गहणं तिसमयऊणं, उक्कोसेणं तिच्चि वाससह-
 स्साइं समयाहियाइं, देसबंधंतरं जहजेणं एक्कं समयं, उक्कोसेणं अंतोमुहुत्तं, पंचिंदिय-
 तिरिक्खजोणियओरालियपुच्छा, गोयमा ! सव्वबंधंतरं जहजेणं खुड्ढागभवग्गहणं तिस-
 मयऊणं, उक्कोसेणं पुव्वकोढी समयाहिया, देसबंधंतरं जहा एगिंदियाणं तहा पंचिंदिय-
 तिरिक्खजोणियाणं, एवं मणुस्साणवि निरवसेसं भाणियव्वं जाव उक्कोसेणं अंतोमुहुत्तं ॥
 जीवस्स णं भंते ! एगिंदियत्ते णोएगिंदियत्ते पुणरवि एगिंदियत्ते एगिंदियओरालियस-
 रीरप्पओगबंधंतरं कालओ केवच्चिरं होइ ? गोयमा ! सव्वबंधंतरं जहजेणं दो खुड्ढा-
 गभवग्गहणाइं तिसमयऊणाइं, उक्कोसेणं दो सागरोवमसहस्साइं संखेजवासमम्भहि-
 याइं, देसबंधंतरं जहजेणं खुड्ढागं भवग्गहणं समयाहियं, उक्कोसेणं दो सागरोवमसह-
 स्साइं संखेजवासमम्भहियाइं, जीवस्स णं भंते ! पुढविकाइयत्ते नोपुढविकाइयत्ते पुण-
 रवि पुढविकाइयत्ते पुढविकाइयएगिंदियओरालियसरीरप्पओगबंधंतरं कालओ केवच्चिरं
 होइ ? गोयमा ! सव्वबंधंतरं जहजेणं दो खुड्ढागभवग्गहणाइं तिसमयऊणाइं, उक्कोसेणं
 अणंतं कालं अणंताओ उस्सप्पिणिओसप्पिणीओ कालओ, खेत्तओ अणंता लोगा
 असंखेज्जा पोगगलपरियट्ठात्ते णं पोगगलपरियट्ठा आवलियाए असंखेज्जइभागो, देस-
 बंधंतरं जहजेणं खुड्ढागभवग्गहणं समयाहियं, उक्कोसेणं अणंतं कालं जाव आवलियाए
 असंखेज्जइभागो, जहा पुढविकाइयाणं एवं वणस्सइकाइयवज्जाणं जाव मणुस्साणं,
 वणस्सइकाइयाणं दोच्चि खुड्ढाइं, एवं चेव उक्कोसेणं असंखेज्जं कालं असंखेज्जाओ उस्स-
 प्पिणिओसप्पिणीओ कालओ, खेत्तओ असंखेज्जा लोगा, एवं देसबंधंतरंपि उक्कोसेणं
 पुढविकालो ॥ एएसि णं भंते ! जीवाणं ओरालियसरीरस्स देसबंधगाणं सव्वबंध-
 गाणं अवंधगाणं य कयरे २ जाव विसेसाहिया वा ? गोयमा ! सव्वत्थोवा जीवा ओरा-
 लियसरीरस्स सव्वबंधगा, अवंधगा विसेसाहिया, देसबंधगा असंखेज्जगुणा ॥ ३४७॥
 वेउव्वियसरीरप्पओगबंधे णं भंते ! कइविहे पचत्ते ? गोयमा ! दुविहे पचत्ते, तंजहा-
 एगिंदियवेउव्वियसरीरप्पओगबंधे य पंचिंदियवेउव्वियसरीरप्पओगबंधे य । जइ
 एगिंदियवेउव्वियसरीरप्पओगबंधे किं वाउक्काइयएगिंदियवेउव्वियसरीरप्पओगबंधे
 अवाउक्काइयएगिंदिय० एवं एएणं अभिलावेणं जहा ओगाहणसंठाणे वेउव्वियसरीर-
 मेओ तहा भाणियव्वो जाव पज्जतसव्वट्ठसिद्धअणुत्तरोववाइयकप्पाइयवेमाणियदेव-
 पंचिंदियवेउव्वियसरीरप्पओगबंधे य अपज्जतसव्वट्ठसिद्धअणुत्तरोववाइय जाव पओ-

गर्बं ये य । वेउव्वियसरीरप्पओगर्बं णं भंते ! कस्स कम्मस्स उदएणं ? गोयमा ! वीरियसजोगसहव्वयाए जाव आउयं वा लद्धिं वा पडुच्च वेउव्वियसरीरप्पओगनामाए कम्मस्स उदएणं वेउव्वियसरीरप्पओगर्बं । वाउक्काइयएगिंदियवेउव्वियसरीरप्प-ओग० पुच्छा, गोयमा ! वीरियसजोगसहव्वयाए एवं चेव जाव लद्धिं च पडुच्च जाव वाउक्काइयएगिंदियवेउव्विय जाव बंधे । रयणप्पभापुढविनेरइयपंचिंदियवेउव्वियसरी-रप्पओगर्बं णं भंते ! कस्स कम्मस्स उदएणं ? गोयमा ! वीरियसजोगसहव्वयाए जाव आउयं वा पडुच्च रयणप्पभापुढवि जाव बंधे, एवं जाव अहेसत्तमाए । तिरिक्खजोणिय-पंचिंदियवेउव्वियसरीरपुच्छा, गोयमा ! वीरिय० जाव जहा वाउक्काइयाणं, मणुस्स-पंचिंदियवेउव्वियसरीरप्पओग० पुच्छा, एवं चेव, असुरकुमारभवणवासिदेवपंचि-दियवेउव्विय जाव बंधे, जहा रयणप्पभापुढविनेरइयाणं एवं जाव थणियकुमारा, एवं वाणमंतरा, एवं जोइसिया, एवं सोहम्मकप्पोवगया वेमाणिया एवं जाव अञ्जुयगेवेज्जग-कप्पाइयवेमाणिया णेयव्वा, अणुत्तरोववाइयकप्पाइयवेमाणिया एवं चेव । वेउव्विय-सरीरप्पओगर्बं णं भंते ! किं देसबंधं सव्वबंधे ? गोयमा ! देसबंधेवि सव्वबंधेवि, वाउक्काइयएगिंदिय० एवं चेव, रयणप्पभापुढविनेरइया एवं चेव, एवं जाव अणुत्तरोव-वाइया ॥ वेउव्वियसरीरप्पओगर्बं णं भंते ! कालओ केवच्चिरं होइ ? गोयमा ! सव्वबंधं जहजेणं एक्कं समयं, उक्कोसेणं दो समयं, देसबंधं जहजेणं एक्कं समयं, उक्कोसेणं तेत्तीसं सागरोवमाइं समयऊणाइं ॥ वाउक्काइयएगिंदियवेउव्वियपुच्छा, गोयमा ! सव्वबंधं एक्कं समयं, देसबंधं जहजेणं एक्कं समयं, उक्कोसेणं अंतोमुहुत्तं ॥ रयणप्पभा-पुढविनेरइयपुच्छा, गोयमा ! सव्वबंधं एक्कं समयं, देसबंधं जहजेणं दसवाससहस्साइं तिसमयऊणाइं, उक्कोसेणं सागरोवमं समयऊणं, एवं जाव अहेसत्तमाए, नवरं देस-बंधं जस्स जा जहन्धिया ठिई सा तिसमयऊणा कायव्वा जाव उक्कोसा समयऊणा ॥ पंचिंदियतिरिक्खजोणियाणं मणुस्साणं य जहा वाउक्काइयाणं । असुरकुमारनाग-कुमार जाव अणुत्तरोववाइयाणं जहा नेरइयाणं नवरं जस्स जा ठिई सा भाणि-यव्वा जाव अणुत्तरोववाइयाणं सव्वबंधं एक्कं समयं, देसबंधं जहजेणं एक्कतीसं साग-रोवमाइं तिसमयऊणाइं, उक्कोसेणं तेत्तीसं सागरोवमाइं समयऊणाइं ॥ वेउव्वियसरी-रप्पओगर्बंधंतरे णं भंते ! कालओ केवच्चिरं होइ ? गोयमा ! सव्वबंधंतरं जहजेणं एक्कं समयं, उक्कोसेणं अणंतं कालं अणंतो जाव आवलियाए असंखेज्जइमाणो, एवं देसबंधंतरं ॥ वाउक्काइयवेउव्वियसरीरपुच्छा, गोयमा ! सव्वबंधंतरं जहजेणं अंतोमुहुत्तं, उक्कोसेणं पल्लोवमस्स असंखेज्जइमाणं, एवं देसबंधंतरं ॥ तिरिक्ख-जोणियपंचिंदियवेउव्वियसरीरप्पओगर्बंधंतरं पुच्छा, गोयमा ! सव्वबंधंतरं जहजेणं

अंतोमुहुत्तं, उक्कोसेणं पुव्वकोडिपुहुत्तं, एवं देसबंधंतरं पि, एवं मणुस्सस्स वि ॥ जीवस्स णं भंते ! वाउकाइयत्ते नोवाउकाइयत्ते पुणरवि वाउकाइयत्ते वाउकाइयएगिदियवेउ-
 व्वियपुच्छा, गोयमा ! सव्वबंधंतरं जहन्नेणं अंतोमुहुत्तं, उक्कोसेणं अणंतं कालं वण-
 स्सइकालो, एवं देसबंधंतरं पि ॥ जीवस्स णं भंते ! रयणप्पभापुढविनेरइयत्ते णोरय-
 णप्पभापुढविं पुच्छा, गोयमा ! सव्वबंधंतरं जहन्नेणं दस वाससहस्साई अंतोमु-
 हुत्तमब्भहियाई, उक्कोसेणं वणस्सइकालो, देसबंधंतरं जहन्नेणं अंतोमुहुत्तं, उक्कोसेणं
 अणंतं कालं वणस्सइकालो, एवं जाव अहेसत्तमाए, नवरं जा जस्स ठिई जहन्निया
 सा सव्वबंधंतरं जहन्नेणं अंतोमुहुत्तमब्भहिया कायव्वा, सेसं तं चेव, पंचिंदियति-
 रिक्खजोणियमणुस्साणं य जहा वाउक्काइयाणं । असुरकुमारनागकुमार जाव सहस्सा-
 रदेवाणं एएसिं जहा रयणप्पभापुढविनेरइयाणं नवरं सव्वबंधंतरं जस्स जा ठिई
 जहन्निया सा अंतोमुहुत्तमब्भहिया कायव्वा, सेसं तं चेव ॥ जीवस्स णं भंते ! आण-
 यदेवत्ते नोआणयदेवत्तेपुच्छा, गोयमा ! सव्वबंधंतरं जहन्नेणं अट्टारस सागरोवमाई
 वासपुहुत्तमब्भहियाई, उक्कोसेणं अणंतं कालं वणस्सइकालो, देसबंधंतरं जहन्नेणं
 वासपुहुत्तं उक्कोसेणं अणंतं कालं वणस्सइकालो, एवं जाव अचुए नवरं जस्स जा
 ठिई सा सव्वबंधंतरं जहन्नेणं वासपुहुत्तमब्भहिया कायव्वा सेसं तं चेव । गेवेज्ज-
 कप्पातीयपुच्छा, गोयमा ! सव्वबंधंतरं जहन्नेणं बावीसं सागरोवमाई वासपुहुत्त-
 मब्भहियाई, उक्कोसेणं अणंतं कालं वणस्सइकालो, देसबंधंतरं जहन्नेणं वासपुहुत्तं
 उक्कोसेणं वणस्सइकालो ॥ जीवस्स णं भंते ! अणुत्तरोववाइयपुच्छा, गोयमा !
 सव्वबंधंतरं जहन्नेणं एकतीसं सागरोवमाई वासपुहुत्तमब्भहियाई, उक्कोसेणं
 संखेज्जाई सागरोवमाई, देसबंधंतरं जहन्नेणं वासपुहुत्तं, उक्कोसेणं संखेज्जाई सागरो-
 वमाई ॥ एएसिं णं भंते ! जीवाणं वेउव्वियसरीरस्स देसबंधगाणं सव्वबंधगाणं
 अबंधगाणं य कयरेरहिंती जाव विसेसाहिया वा ? गोयमा ! सव्वत्थोवा जीवा
 वेउव्वियसरीरस्स सव्वबंधगा, देसबंधगा असंखेज्जगुणा, अबंधगा अणंतगुणा ॥
 आहारगसरीरप्पओगबंधे णं भंते ! कइविहे पण्णत्ते ? गोयमा ! एगागारे पण्णत्ते ।
 जइ एगागारे पण्णत्ते किं मणुस्साहारगसरीरप्पओगबंधे अमणुस्साहारगसरीरप्प-
 ओगबंधे ? गोयमा ! मणुस्साहारगसरीरप्पओगबंधे नो अमणुस्साहारगसरीरप्प-
 ओगबंधे, एवं एएणं अमिल्लवेणं जहा ओगाहणसंठाणे जाव इद्धिपत्तपमत्तसंजयस-
 म्मदिट्ठिपज्जत्तसंखेज्जवासाउयकम्मभूमियगब्भवक्कंतियमणुस्साहारगसरीरप्पओगबंधे,
 णो अणिद्धिपत्तपमत्त जाव आहारगसरीरप्पओगबंधे । आहारगसरीरप्पओगबंधे णं
 भंते ! कस्स कम्मस्स उदएणं ? गोयमा ! वीरियसजोगसइव्वयाए जाव लद्धिं वा

पडुच्च आहारगसरीरप्पओगणामाए कम्मस्स उदएणं आहारगसरीरप्पओगबंधे ।
 आहारगसरीरप्पओगबंधे णं भंते । किं देसबंधे सव्वबंधे ? गोयमा । देसबंधेवि
 सव्वबंधेवि । आहारगसरीरप्पओगबंधे णं भंते । कालओ केवच्चिरं होइ ? गोयमा ।
 सव्वबंधे एक्कं समयं, देसबंधे जहन्नेणं अंतोमुहुत्तं उक्कोसेणवि अंतोमुहुत्तं ॥ आहार-
 गसरीरप्पओगबंधंतरे णं भंते । कालओ केवच्चिरं होइ ? गोयमा । सव्वबंधंतरे
 जहन्नेणं अंतोमुहुत्तं उक्कोसेणं अणंतं कालं अणंताओ ओसप्पिणिउस्सप्पिणीओ
 कालओ, खेत्तओ अणंता लोया अवहुं पोग्गलपरियइं देसूणं, एवं देसबंधंतरेपि ॥
 एएसि णं भंते । जीवाणं आहारगसरीरस्स देसबंधगाणं सव्वबंधगाणं अबंधगाण
 य कयरे २ हितो जाव विसेसाहिया वा ? गोयमा । सव्वत्थोवा जीवा आहारगसरीरस्स
 सव्वबंधगा, देसबंधगा संखेज्जगुणा, अबंधगा अणंतगुणा ३ ॥ ३४८ ॥ तेयासरीर-
 प्पओगबंधे णं भंते । कइविहे पणत्ते ? गोयमा । पंचविहे पणत्ते, तंजहा-एगिदिय-
 तेयासरीरप्पओगबंधे य बेइंदिय० तेइंदिय० जाव पंचिदियतेयासरीरप्पओगबंधे य ।
 एगिदियतेयासरीरप्पओगबंधे णं भंते । कइविहे पणत्ते ? एवं एएणं अभिलावेणं
 भेओ जहा ओगाहणसंठाणे जाव पज्जत्तसव्वट्ठसिद्धअणुत्तरोववाइयकप्पातीयवेमाणि-
 यदेवपंचिदियतेयासरीरप्पओगबंधे य अपज्जत्तसव्वट्ठसिद्धअणुत्तरोववाइय जाव बंधे
 य । तेयासरीरप्पओगबंधे णं भंते । कस्स कम्मस्स उदएणं ? गोयमा । वीरियस-
 जोगसव्वयाए जाव आउयं च पडुच्च तेयासरीरप्पओगणामाए कम्मस्स उदएणं
 तेयासरीरप्पओगबंधे । तेयासरीरप्पओगबंधे णं भंते । किं देसबंधे सव्वबंधे ?
 गोयमा । देसबंधे नो सव्वबंधे ॥ तेयासरीरप्पओगबंधे णं भंते । कालओ केवच्चिरं
 होइ ? गोयमा । दुविहे पणत्ते, तंजहा-अणाइए वा अपज्जवसिए अणाइए वा सप-
 ज्जवसिए ॥ तेयासरीरप्पओगबंधंतरे णं भंते । कालओ केवच्चिरं होइ ? गोयमा ।
 अणाइयस्स अपज्जवसियस्स नत्थि अंतरं, अणाइयस्स सपज्जवसियस्स नत्थि अंतरं ॥
 एएसि णं भंते । जीवाणं तेयासरीरस्स देसबंधगाणं अबंधगाण य कयरे २ हितो जाव
 विसेसाहिया वा ? गोयमा । सव्वत्थोवा जीवा तेयासरीरस्स अबंधगा, देसबंधगा
 अणंतगुणा ४ ॥ ३४९ ॥ कम्मासरीरप्पओगबंधे णं भंते । कइविहे पणत्ते ?
 गोयमा । अट्ठविहे पणत्ते, तंजहा-नाणावरणिज्जकम्मासरीरप्पओगबंधे जाव अंतराइ-
 यकम्मासरीरप्पओगबंधे । नाणावरणिज्जकम्मासरीरप्पओगबंधे णं भंते । कस्स कम्म-
 स्स उदएणं ? गोयमा । नाणपडिणीययाए, नाणणिण्हवणयाए, पाणंतरेएणं, पाणिप्प-
 ओसेणं, पाणच्चासायणाए, पाणविसंवायणाजोगेणं, नाणावरणिज्जकम्मासरीरप्पओग-
 णामाए कम्मस्स उदएणं नाणावरणिज्जकम्मासरीरप्पओगबंधे । दरिसणावरणिज्जक-

म्मासरीरप्पओगबंधे णं भंते ! कस्स कम्मस्स उदएणं ? गोयमा ! दंसणपडिणीय-
याए एवं जहा णाणावरणिज्जं नवरं दंसणनाम धेत्तव्वं जाव दंसणविसंवायणाजोगेणं
दरिसणावरणिज्जकम्मासरीरप्पओगनामाए कम्मस्स उदएणं जाव पओगबंधे । साया-
वेयणिज्जकम्मासरीरप्पओगबंधे णं भंते ! कस्स कम्मस्स उदएणं ? गोयमा ! पाणा-
णुकंपयाए भूयाणुकंपयाए एवं जहा सत्तमसए दसमोद्देसए जाव अपरियावणयाए
सायावेयणिज्जकम्मासरीरप्पओगनामाए कम्मस्स उदएणं सायावेयणिज्जकम्मा जाव
बंधे । असायावेयणिज्जपुच्छा, गोयमा ! परदुक्खणयाए परसोयणयाए जहा सत्तमसए
दसमोद्देसए जाव परियावणयाए असायावेयणिज्जकम्मा जाव पओगबंधे । मोहणिज्ज-
कम्मासरीरप्पओगपुच्छा, गोयमा ! तिक्वकोहयाए, तिक्वमाणयाए, तिक्वमाययाए,
तिक्वल्लोहयाए, तिक्वदंसणमोहणिज्जयाए, तिक्वचरित्तमोहणिज्जयाए, मोहणिज्जकम्मास-
रीरप्पओग जाव पओगबंधे । नेरइयाउयकम्मासरीरप्पओगबंधे णं भंते ! पुच्छा,
गोयमा ! महारंभयाए, महापरिग्गहयाए, कुणिमाहारेणं, पंविदियवहेणं, नेरइयाउय-
कम्मासरीरप्पओगनामाए कम्मस्स उदएणं नेरइयाउयकम्मासरीर जाव पओगबंधे ।
तिरिक्खजोणियाउयकम्मासरीरप्पओगपुच्छा, गोयमा ! माइल्लयाए, नियडिल्लयाए,
अलियवयणेणं, कूडतुलकूडमाणेणं, तिरिक्खजोणियाउयकम्मासरीर जाव पओगबंधे ।
मणुस्सआउयकम्मासरीरपुच्छा, गोयमा ! पगइभट्टयाए, पगइविणीययाए, साणुक्को-
सयाए, अमच्छरियाए, मणुस्साउयकम्मा जाव पओगबंधे । देवाउयकम्मासरीर-
पुच्छा, गोयमा ! सरागसंजमेणं, संजमासंजमेणं, बालतवोकम्मेणं, अकामनिज्जराए,
देवाउयकम्मासरीर जाव पओगबंधे ॥ सुभनामकम्मासरीरपुच्छा, गोयमा ! काय-
उज्जुययाए, भावुज्जुययाए, भासुज्जुययाए, अविसंवायणाजोगेणं, सुभनामकम्मासरीर
जाव पओगबंधे ॥ असुभनामकम्मासरीरपुच्छा, गोयमा ! कायअणुज्जुययाए, भाव-
अणुज्जुययाए, भासअणुज्जुययाए, विसंवायणाजोगेणं, असुभनामकम्मा जाव पओग-
बंधे । उच्चागोयकम्मासरीरपुच्छा, गोयमा ! जाइअमएणं, कुलअमएणं, बलअमएणं,
रुवअमएणं, तवअमएणं, सुयअमएणं, लाभअमएणं, इस्सरियअमएणं, उच्चागोय-
कम्मासरीर जाव पओगबंधे, नीयागोयकम्मासरीरपुच्छा, गोयमा ! जाइमएणं,
कुलमएणं, बलमएणं, जाव इस्सरियमएणं, णीयागोयकम्मासरीर जाव पओगबंधे ।
अंतराइयकम्मासरीरपुच्छा, गोयमा ! दाणंतराएणं, लाभंतराएणं, भोगंतराएणं,
उवभोगंतराएणं, वीरियंतराएणं, अंतराइयकम्मासरीरप्पओगनामाए कम्मस्स
उदएणं अंतराइयकम्मासरीरप्पओगबंधे ॥ णाणावरणिज्जकम्मासरीरप्पओगबंधे णं
भंते ! किं देसबंधे सव्वबंधे ? गोयमा ! देसबंधे णो सव्वबंधे, एवं जाव

अंतराइयकम्मा० । पाणावरणिज्जकम्मासरीरप्पओगबंधे णं भंते ! कालओ केवच्चिरं होइ ? गोयमा ! पाणा० दुविहे पण्णत्ते, तंजहा-अणाइए सपज्जवसिए अणाइए अपज्जवसिए, एवं जहा तेयगस्स संचिट्ठणा तहेव एवं जाव अंतराइयकम्मस्स । पाणावरणिज्जकम्मासरीरप्पओगबंधंतरे णं भंते ! कालओ केवच्चिरं होइ ? गोयमा ! अणाइयस्स एवं जहा तेयगसरीरस्स अंतरं तहेव एवं जाव अंतराइयस्स । एएसि णं भंते ! जीवाणं नाणावरणिज्जस्स कम्मस्स देसबंधगाणं अबंधगाणं य कयरे२ जाव अप्पाबहुगं जहा तेयगस्स, एवं आउयवज्जं जाव अंतराइयं ॥ आउयस्स पुच्छा, गोयमा ! सव्वत्थोवा जीवा आउयस्स कम्मस्स देसबंधगा, अबंधगा संखेज्जगुणा ५ ॥३५०॥ जस्स णं भंते ! ओरालियसरीरस्स सव्वबंधे से णं भंते ! वेउव्वियसरीरस्स किं बंधए अबंधए ? गोयमा ! नो बंधए अबंधए, आहारगसरीरस्स किं बंधए अबंधए ? गोयमा ! नो बंधए अबंधए, तेयासरीरस्स किं बंधए अबंधए ? गोयमा ! बंधए नो अबंधए, जइ बंधए किं देसबंधए सव्वबंधए ? गोयमा ! देसबंधए नो सव्वबंधए, कम्मासरीरस्स किं बंधए अबंधए ? जहेव तेयगस्स जाव देसबंधए नो सव्वबंधए ॥ जस्स णं भंते ! ओरालियसरीरस्स देसबंधे से णं भंते ! वेउव्वियसरीरस्स किं बंधए अबंधए ? गोयमा ! नो बंधए अबंधए, एवं जहेव सव्वबंधेणं भणियं तहेव देसबंधेणवि भाणियव्वं जाव कम्मगस्स । जस्स णं भंते ! वेउव्वियसरीरस्स सव्वबंधे से णं भंते ! ओरालियसरीरस्स किं बंधए अबंधए ? गोयमा ! नो बंधए अबंधए, आहारगसरीरस्स एवं चेव, तेयगस्स कम्मगस्स य जहेव ओरालिएणं समं भणियं तहेव भाणियव्वं जाव देसबंधए नो सव्वबंधए । जस्स णं भंते ! वेउव्वियसरीरस्स देसबंधे से णं भंते ! ओरालियसरीरस्स किं बंधए अबंधए ? गोयमा ! नो बंधए अबंधए, एवं जहा सव्वबंधेणं भणियं तहेव देसबंधेणवि भाणियव्वं जाव कम्मगस्स । जस्स णं भंते ! आहारगसरीरस्स सव्वबंधे से णं भंते ! ओरालियसरीरस्स किं बंधए अबंधए ? गोयमा ! नो बंधए अबंधए, एवं वेउव्वियस्सवि, तेयाकम्माणं जहेव ओरालिएणं समं भणियं तहेव भाणियव्वं । जस्स णं भंते ! आहारगसरीरस्स देसबंधे से णं भंते ! ओरालियसरीरस्स एवं जहा आहारगसरीरस्स सव्वबंधेणं भणियं तहा देसबंधेणवि भाणियव्वं जाव कम्मगस्स । जस्स णं भंते ! तेयासरीरस्स देसबंधे से णं भंते ! ओरालियसरीरस्स किं बंधए अबंधए ? गोयमा ! बंधए वा अबंधए वा, जइ बंधए किं देसबंधए सव्वबंधए ? गोयमा ! देसबंधए वा सव्वबंधए वा, वेउव्वियसरीरस्स किं बंधए अबंधए ? एवं चेव, एवं आहारगसरीरस्सवि, कम्मगसरीरस्स किं बंधए

अबंधए ? गोयमा । बंधए नो अबंधए, जइ बंधए किं देसबंधए सव्वबंधए ? गोयमा । देसबंधए नो सव्वबंधए । जस्स णं भंते ! कम्मगसरीरस्स देसबंधे से णं भंते ! ओरालियसरीरस्स जहा तेयगस्स वत्तव्वया भणिया तहा कम्मगस्सवि भाणियव्वा जाव तेयासरीरस्स जाव देसबंधए नो सव्वबंधए ॥ ३५१ ॥ एएसि णं भंते ! सव्वजीवाणं ओरालियवेउव्वियआहारगतेयाकम्मासरीरगणं देसबंधगाणं सव्वबंधगाणं अबंधगाणं य कयरे २ जाव विसेसाहिया वा ? गोयमा ! सव्वत्थोवा जीवा आहारगसरीरस्स सव्वबंधगा १ तस्स चैव देसबंधगा संखेज्जगुणा २ वेउ-व्वियसरीरस्स सव्वबंधगा असंखेज्जगुणा ३ तस्स चैव देसबंधगा असंखेज्जगुणा ४ तेयाकम्मगाणं दुण्हवि तुल्ला अबंधगा अणंतगुणा ५ ओरालियसरीरस्स सव्वबंधगा अणंतगुणा ६ तस्स चैव अबंधगा विसेसाहिया ७ तस्स चैव देसबंधगा असंखेज्जगुणा ८ तेयाकम्मगाणं देसबंधगा विसेसाहिया ९ वेउव्वियसरीरस्स अबंधगा विसेसाहिया १० आहारगसरीरस्स अबंधगा विसेसाहिया ११ । सेवें भंते ! २ त्ति ॥ ३५२ ॥ अहमसयस्स नवमो उद्देसओ समत्तो ॥

रायगिहे नगरे जाव एवं वयासी-अन्नउत्थिया णं भंते ! एवमाइक्खंति जाव एवं पस्वेंति-एवं खलु सीलं सेयं, सुयं सेयं, सुयं सेयं सीलं सेयं, से कहमेयं भंते ! एवं ? गोयमा ! जज्जं ते अन्नउत्थिया एवमाइक्खंति जाव जे ते एवमाहंसु मिच्छा ते एवमाहंसु, अहं पुण गोयमा ! एवमाइक्खामि जाव पल्लवेमि, एवं खलु मए चत्तारि पुरिसजाया पण्णत्ता, तंजहा-सीलसंपन्ने णामं एगे णो सुयसंपन्ने १ सुयसंपन्ने नामं एगे नो सीलसंपन्ने २ एगे सीलसंपन्नेवि सुयसंपन्नेवि ३ एगे णो सीलसंपन्ने नो सुयसंपन्ने ४, तत्थ णं जे से पढमे पुरिसजाए से णं पुरिसे सीलवं असुयवं, उवरए अविन्नायधम्मे, एस णं गोयमा ! मए पुरिसे देसाराहए पण्णत्ते, तत्थ णं जे से दोच्चे पुरिसजाए से णं पुरिसे असीलवं सुयवं, अणुवरए विन्नायधम्मे, एस णं गोयमा ! मए पुरिसे देसविराहए पण्णत्ते, तत्थ णं जे से तच्चे पुरिसजाए से णं पुरिसे सीलवं सुयवं, उवरए विन्नायधम्मे, एस णं गोयमा ! मए पुरिसे सव्वाराहए पण्णत्ते, तत्थ णं जे से चउत्थे पुरिसजाए से णं पुरिसे असीलवं असुयवं, अणुवरए अवि-ण्णायधम्मे, एस णं गोयमा ! मए पुरिसे सव्वविराहए पण्णत्ते ॥ ३५३ ॥ कइविहा णं भंते ! आराहणा पण्णत्ता ? गोयमा ! तिविहा आराहणा पण्णत्ता, तंजहा-नाणा-राहणा दंसणाराहणा चरित्ताराहणा । णाणाराहणा णं भंते ! कइविहा पण्णत्ता ? गोयमा ! तिविहा पण्णत्ता, तंजहा-उक्कोसिया मज्झिमा जहन्ना । दंसणाराहणा णं भंते ! कइविहा प० ? एवं चैव तिविहावि । एवं चरित्ताराहणावि ॥ जस्स णं भंते !

उक्कोसिया णाणाराहणा तस्स उक्कोसिया दंसणाराहणा जस्स उक्कोसिया दंसणाराहणा तस्स उक्कोसिया णाणाराहणा ? गोयमा ! जस्स उक्कोसिया णाणाराहणा तस्स दंसणाराहणा उक्कोसिया वा अजहन्नउक्कोसिया वा, जस्स पुण उक्कोसिया दंसणाराहणा तस्स नाणाराहणा उक्कोसा वा जहन्ना वा अजहन्नमणुक्कोसा वा । जस्स णं भंते ! उक्कोसिया णाणाराहणा तस्स उक्कोसिया चरित्ताराहणा जस्स उक्कोसिया चरित्ताराहणा तस्स उक्कोसिया णाणाराहणा ? जहा उक्कोसिया णाणाराहणा य दंसणाराहणा य भणिया तहा उक्कोसिया नाणाराहणा य चरित्ताराहणा य भाणियव्वा ॥ जस्स णं भंते ! उक्कोसिया दंसणाराहणा तस्स उक्कोसिया चरित्ताराहणा जस्स उक्कोसिया चरित्ताराहणा तस्स उक्कोसिया दंसणाराहणा ? गोयमा ! जस्स उक्कोसिया दंसणाराहणा तस्स चरित्ताराहणा उक्कोसा वा जहन्ना वा अजहन्नमणुक्कोसा वा जस्स पुण उक्कोसिया चरित्ताराहणा तस्स दंसणाराहणा नियमा उक्कोसा ॥ उक्कोसियं णं भंते ! णाणाराहणं आराहेत्ता कइहिं भवग्गहणेहिं सिज्झइ जाव अंतं करेइ ? गोयमा ! अत्थेगइए तेणेव भवग्गहणेणं सिज्झइ जाव अंतं करेइ अत्थेगइए दोच्चेणं भवग्गहणेणं सिज्झइ जाव अंतं करेइ, अत्थेगइए कप्पोवएसु वा कप्पातीयएसु वा उव्वज्जइ, उक्कोसियं णं भंते ! दंसणाराहणं आराहेत्ता कइहिं भवग्गहणेहिं ० एवं चेव, उक्कोसियणं भंते ! चरित्ताराहणं आराहेत्ता ० एवं चेव, नवरं अत्थेगइए कप्पातीयएसु उव्वज्जइ । मज्झिमियं णं भंते ! णाणाराहणं आराहेत्ता कइहिं भवग्गहणेहिं सिज्झइ जाव अंतं करेइ ? गोयमा ! अत्थेगइए दोच्चेणं भवग्गहणेणं सिज्झइ जाव अंतं करेइ तच्चं पुण भवग्गहणं नाइक्कमइ, मज्झिमियं णं भंते ! दंसणाराहणं आराहेत्ता ० एवं चेव, एवं मज्झिमियं चरित्ताराहणं पि । जहन्नियच्चं भंते ! नाणाराहणं आराहेत्ता कइहिं भवग्गहणेहिं सिज्झइ जाव अंतं करेइ ? गोयमा ! अत्थेगइए तच्चेणं भवग्गहणेणं सिज्झइ जाव अंतं करेइ सत्तड्ढभवग्गहणाइ पुण नाइक्कमइ, एवं दंसणाराहणं पि, एवं चरित्ताराहणं पि ॥ ३५४ ॥ कइविहे णं भंते ! पोग्गलपरिणामे पण्णत्ते ? गोयमा ! पंचविहे पोग्गलपरिणामे पण्णत्ते, तंजहा-वन्नपरिणामे १ गंधप० २ रसप० ३ फासप० ४ संठाणप० ५, वन्नपरिणामे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-कालवन्नपरिणामे जाव सुक्किल्लवन्नपरिणामे, एवं एएणं अभिलवेणं गंधपरिणामे दुविहे, रसपरिणामे पंचविहे, फासपरिणामे अट्ठविहे, संठाणपरिणामे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-परिमंडलसंठाणपरिणामे जाव आययसंठाणपरिणामे ॥ ३५५ ॥ एणे भंते ! पोग्गलत्थिकायपएसे किं दव्वं १ दव्वदेसे २ दव्वाइ ३ दव्वदेसा ४ उदाहु दव्वं च दव्वदेसे य ५ उदाहु दव्वं च दव्वदेसा य ६ उदाहु दव्वाइ च

दव्वदेसे य ७ उदाहु दव्वाइं च दव्वदेसा य ८ ? गोयमा ! सिय दव्वं सिय दव्वदेसे नो दव्वाइं नो दव्वदेसा नो दव्वं च दव्वदेसे य जाव नो दव्वाइं च दव्वदेसा य ॥ दो भंते ! पोग्गलत्थिकायपएसा किं दव्वं दव्वदेसे ? पुच्छा तहेव, गोयमा ! सिय दव्वं १ सिय दव्वदेसे २ सिय दव्वाइं ३ सिय दव्वदेसा ४ सिय दव्वं च दव्वदेसे य ५ नो दव्वं च दव्वदेसा य ६ सेसा पडिसेहेयव्वा ॥ तिञ्चि भंते ! पोग्गलत्थिकायपएसा किं दव्वं दव्वदेसे ० ? पुच्छा, गोयमा ! सिय दव्वं १ सिय दव्वदेसे २ एवं सत्त भंगा भाणियव्वा जाव सिय दव्वाइं च दव्वदेसे य नो दव्वाइं च दव्वदेसा य । चत्तारि भंते ! पोग्गलत्थिकायपएसा किं दव्वं ० ? पुच्छा, गोयमा ! सिय दव्वं १ सिय दव्वदेसे २ अट्ठवि भंगा भाणियव्वा जाव सिय दव्वाइं च दव्वदेसा य ८ । जहा चत्तारि भणिया एवं पंच छ सत्त जाव संखेजा असंखेजा । अणंता भंते ! पोग्गलत्थिकायपएसा किं दव्वं ० ? एवं चेव जाव सिय दव्वाइं च दव्वदेसा य ॥ ३५६ ॥ केवइया णं भंते ! लोयागासपएसा प० ? गोयमा ! असंखेजा लोयागासपएसा प० ॥ एगमेगस्स णं भंते ! जीवस्स केवइया जीवपएसा प० ? गोयमा ! जावइया लोयागासपएसा एगमेगस्स णं जीवस्स एवइया जीवपएसा पण्णत्ता ॥ ३५७ ॥ कइ णं भंते ! कम्मपगडीओ पण्णत्ताओ ? गोयमा ! अट्ठ कम्मपगडीओ पण्णत्ताओ, तंजहा-नाणावरणिजं जाव अंतराइयं, नेरइयाणं भंते ! कइ कम्मपगडीओ पण्णत्ताओ ? गोयमा ! अट्ठ, एवं सव्वजीवाणं अट्ठ कम्मपगडीओ ठावेयव्वाओ जाव वेमाणियाणं । नाणावरणिजस्स णं भंते ! कम्मस्स केवइया अविभागपलिच्छेया प० ? गोयमा ! अणंता अविभागपलिच्छेया प०, नेरइयाणं भंते ! नाणावरणिजस्स कम्मस्स केवइया अविभागपलिच्छेया प० ? गोयमा ! अणंता अविभागपलिच्छेया प०, एवं सव्वजीवाणं जाव वेमाणियाणं पुच्छा, गोयमा ! अणंता अविभागपलिच्छेया प०, एवं जहा नाणावरणिजस्स अविभागपलिच्छेया भणिया तहा अट्ठण्हवि कम्मपगडीणं भाणियव्वा जाव वेमाणियाणं अंतराइयस्स । एगमेगस्स णं भंते ! जीवस्स एगमेगे जीवपएसे नाणावरणिजस्स कम्मस्स केवइएहिं अविभागपलिच्छेएहिं आवेडिए परिवेडिए ? गोयमा ! सिय आवेडियपरिवेडिए सिय नो आवेडियपरिवेडिए, जइ आवेडियपरिवेडिए नियमा अणंतेहिं, एगमेगस्स णं भंते ! नेरइयस्स एगमेगे जीवपएसे नाणावरणिजस्स कम्मस्स केवइएहिं अविभागपलिच्छेएहिं आवेडिए परिवेडिए ? गोयमा ! नियमा अणंतेहिं, जहा नेरइयस्स एवं जाव वेमाणियस्स, नवरं मणूसस्स जहा जीवस्स । एगमेगस्स णं भंते ! जीवस्स एगमेगे जीवपएसे दरिसणावरणिजस्स कम्मस्स केवइएहिं ० एवं जहेव नाणावरणिजस्स

तहेव दंडगो भाणियव्वो जाव वेमाणियस्स, एवं जाव अंतराइयस्स भाणियव्वं, नवरं वेयणिजस्स आउयस्स णामस्स गोयस्स एएसिं चउण्हवि कम्मार्णं मणूसस्स जहा नेरइयस्स तद्वा भाणियव्वं सेसं तं चेव ॥ ३५८ ॥ जस्स णं भंते ! नाणावरणिजं तस्स दरिसणावरणिजं जस्स दंसणावरणिजं तस्स नाणावरणिजं ? गोयमा ! जस्स नाणावरणिजं तस्स दंसणावरणिजं नियमा अत्थि, जस्स दरिसणावरणिजं तस्सवि नाणावरणिजं नियमा अत्थि । जस्स णं भंते ! नाणावरणिजं तस्स वेयणिजं जस्स वेयणिजं तस्स नाणावरणिजं ? गोयमा ! जस्स नाणावरणिजं तस्स वेय-
 णिजं नियमा अत्थि, जस्स पुण वेयणिजं तस्स नाणावरणिजं सिय अत्थि सिय नत्थि । जस्स णं भंते ! नाणावरणिजं तस्स मोहणिजं जस्स मोहणिजं तस्स नाणावरणिजं ? गोयमा ! जस्स नाणावरणिजं तस्स मोहणिजं सिय अत्थि सिय नत्थि, जस्स पुण मोहणिजं तस्स नाणावरणिजं नियमा अत्थि । जस्स णं भंते ! नाणावरणिजं तस्स आउयं ? एवं जहा वेयणिज्जेण समं भणियं तद्वा आउएणवि समं भाणियव्वं, एवं नामेणवि एवं गोएणवि समं, अंतराइएण समं जहा दरिसणा-
 वरणिज्जेण समं तहेव नियमा परोप्परं भाणियव्वाणि १ ॥ जस्स णं भंते ! दरि-
 सणावरणिजं तस्स वेयणिजं जस्स वेयणिजं तस्स दरिसणावरणिजं ? जहा नाणा-
 वरणिजं उवरिमेहिं सत्तहिं कम्मेहिं समं भणियं तद्वा दरिसणावरणिजंवि उवरिमेहिं
 छहिं कम्मेहिं समं भाणियव्वं जाव अंतराइएण २ । जस्स णं भंते ! वेयणिजं
 तस्स मोहणिजं जस्स मोहणिजं तस्स वेयणिजं ? गोयमा ! जस्स वेयणिजं तस्स
 मोहणिजं सिय अत्थि सिय नत्थि, जस्स पुण मोहणिजं तस्स वेयणिजं नियमा
 अत्थि । जस्स णं भंते ! वेयणिजं तस्स आउयं ? एवं एयाणि परोप्परं नियमा,
 जहा आउएण समं एवं नामेणवि गोएणवि समं भाणियव्वं । जस्स णं भंते ! वेय-
 णिजं तस्स अंतराइयं ? पुच्छा, गोयमा ! जस्स वेयणिजं तस्स अंतराइयं सिय
 अत्थि सिय नत्थि, जस्स पुण अंतराइयं तस्स वेयणिजं नियमा अत्थि ३ । जस्स
 णं भंते ! मोहणिजं तस्स आउयं जस्स आउयं तस्स मोहणिजं ? गोयमा ! जस्स
 मोहणिजं तस्स आउयं नियमा अत्थि, जस्स पुण आउयं तस्स मोहणिजं सिय
 अत्थि सिय नत्थि, एवं नामं गोयं अंतराइयं च भाणियव्वं ४, जस्स णं भंते !
 आउयं तस्स नामं ? पुच्छा, गोयमा ! दोवि परोप्परं नियमं, एवं गोत्तेणवि समं
 भाणियव्वं, जस्स णं भंते ! आउयं तस्स अंतराइयं ? पुच्छा, गोयमा ! जस्स
 आउयं तस्स अंतराइयं सिय अत्थि सिय नत्थि, जस्स पुण अंतराइयं तस्स आउयं
 नियमा अत्थि ५ । जस्स णं भंते ! नामं तस्स गोयं जस्स गोयं तस्स नामं ?

गोयमा ! जस्स णामं तस्स नियमा गोयं, जस्स गोयं तस्स नियमा नामं, गोयमा !
 दोवि एए परोप्परं नियमा, जस्स णं भंते ! णामं तस्स अंतराइयं० ? पुच्छा,
 गोयमा ! जस्स नामं तस्स अंतराइयं सिय अत्थि सिय नत्थि, जस्स पुण अंतराइयं
 तस्स नामं नियमा अत्थि ६ । जस्स णं भंते ! गोयं तस्स अंतराइयं० ? पुच्छा,
 गोयमा ! जस्स गोयं तस्स अंतराइयं सिय अत्थि सिय नत्थि, जस्स पुण अंत-
 राइयं तस्स गोयं नियमा अत्थि ७ ॥ ३५९ ॥ जीवे णं भंते ! किं पोग्गली पोग्गले ?
 गोयमा ! जीवे पोग्गलीवि पोग्गलेवि, से केणट्ठेणं भंते ! एवं वुच्चइ जीवे पोग्गलीवि
 पोग्गलेवि ? गोयमा ! से जहानामए छत्तेणं छत्ती, दंडेणं दंडी, घडेणं घडी, पडेणं
 पडी, करेणं करी, एवामेव गोयमा ! जीवेवि सोइंदियचक्खिंदियघाणिंदियजिब्भि-
 दियफासिंदियाइं पडुच्च पोग्गली, जीवं पडुच्च पोग्गले, से तेणट्ठेणं गोयमा ! एवं
 वुच्चइ जीवे पोग्गलीवि पोग्गलेवि । नेरइए णं भंते ! किं पोग्गली० ? एवं चेव, एवं
 जाव वेमाणिए नवरं जस्स जइ इंदियाइं तस्स तइ भाणियव्वाइं । सिद्धे णं भंते !
 किं पोग्गली पोग्गले ? गोयमा ! नो पोग्गली पोग्गले, से केणट्ठेणं भंते ! एवं वुच्चइ
 जाव पोग्गले ? गोयमा ! जीवं पडुच्च, से तेणट्ठेणं गोयमा ! एवं वुच्चइ सिद्धे नो
 पोग्गली पोग्गले । सेवं भंते ! सेवं भंते ! ति ॥ ३६० ॥ **अट्टमसए दसमो**
उद्देसो समत्तो, अट्टमं सयं समत्तं ॥

जंबुद्दीवे १ जोइस २ अंतरदीवा ३० असोच्च ३१ गंगेय ३२ । कुंडगगमे ३३
 पुरिसे ३४ नवमंसि सए चउत्तीसा ॥ १ ॥ तेणं कालेणं तेणं सम्मएणं मिहिला नामं
 नगरी होत्था वन्नओ, माणिभदे उज्जाणे वन्नओ, सामी समोसडे परिसा निग्गया जाव
 भगवं गोयमे पज्जुवासमाणे एवं वयासी-कहिं णं भंते । जंबुद्दीवे दीवे ? किंसंठिए णं
 भंते ! जंबुद्दीवे दीवे ? एवं जंबुद्दीवपन्नत्ती भाणियव्वा जाव एवामेव सपुव्वावरेणं
 जंबुद्दीवे २ चोइस सलिला सयसहस्सा छप्पन्नं च सहस्सा भवंतीतिमक्खाया । सेवं
 भंते ! सेवं भंते ! ति ॥ ३६१ ॥ **नवमसए पढमो उद्देसो समत्तो ॥**

रायगिहे जाव एवं वयासी-जम्बुद्दीवे णं भंते । दीवे केवइया चंदा पभासिंसु वा
 पभासेंति वा पभासिस्संति वा ? एवं जहा जीवाभिगमे जाव-‘एणं च सयसहस्सं
 तेत्तीसं खल्ल भवे सहस्साइं । नव य सया पन्नासा तारागणकोडिकोडीणं ॥ १ ॥’
 सोमं सोमिंसु सोमिति सोमिस्संति ॥ लवणे णं भंते ! ससुद्धे केवइया चंदा पभासिंसु
 वा पभासेंति वा पभासिस्संति वा ३ एवं जहा जीवाभिगमे जाव ताराओ ॥ धायइ-
 संडे कालोदे पुक्खरवरे अब्भितरपुक्खरद्धे मणुस्सखेत्ते, एएसु सव्वेसु जहा जीवा-
 भिगमे जाव-‘एगससीपरिवारो तारागणकोडा(कोडि)कोडीणं ।’ पुक्खरद्धे णं भंते ।

समुदे केवइया चंदा पभासिंसु वा ३ ? एवं सव्वेसु दीवसमुदेसु जोइसियाणं भाणियव्वं जाव सयंभुरमणे जाव सोभं सोभिंसु वा सोभंति वा सोभिस्संति वा । सेवं भंते ! सेवं भंते ! ति ॥ ३६२ ॥ **नवमसए वीथो उद्देसो समत्तो ॥**

रायगिहे जाव एवं वयासी-कहि णं भंते ! दाहिणिह्णं एगो (गू) रुयमणुस्साणं एगोरुयदीवे णामं दीवे पन्नते ? गोयमा ! जंबुदीवे दीवे मंदरस्स पव्वयस्स दाहिणेणं चुल्लहिमवंतस्स वासहरपव्वयस्स उत्तरपुरच्छिमिह्णो चरिमंताओ लवणसमुद्दं उत्तरपुरच्छिमे णं तिन्नि जोयणसयाइं ओगाहिता एत्थ णं दाहिणिह्णं एगोरुयमणुस्साणं एगोरुयदीवे नामं दीवे पण्णत्ते, तं गोयमा ! तिन्नि जोयणसयाइं आयामविकखंभेणं णवएगूणवण्णे जोयणसए किंचिविसे (साहिए) सणे परिकखेवेणं पन्नत्ते, से णं एगाए पउमवरवेइयाए एगेण य वणसंडेणं सव्वओ समंता संपरिकिखत्ते दोण्हवि पमाणं वन्नओ य, एवं एएणं कमेणं जहा जीवाभिगमे जाव सुद्धदंतदीवे जाव देवलोगपरिग्गहिया णं ते मणुया पण्णत्ता समणाउसो । एवं अट्ठावीसं अंतरदीवा सएणं २ आयामविकखंभेणं भाणियव्वा, नवरं दीवे २ उद्देसओ, एवं सव्वेवि अट्ठावीसं उद्देसगा भाणियव्वा । सेवं भंते ! सेवं भंते ! ति ॥ ३६३ ॥ **नवमस्स सयस्स तइयाइथा तीसंता उद्देसा समत्ता, तीसइमो उद्देसो समत्तो ॥**

रायगिहे जाव एवं वयासी-असोच्चा णं भंते ! केवलस्स वा केवलिसावगस्स वा केवलिसावियाए वा केवलिउवासगस्स वा केवलिउवासियाए वा तप्पक्खियस्स वा तप्पक्खियसावगस्स वा तप्पक्खियसावियाए वा तप्पक्खियउवासगस्स वा तप्पक्खियउवासियाए वा केवलिपन्नत्तं धम्मं लभेज्ज सवणयाए ? गोयमा ! असोच्चा णं केवलस्स वा जाव तप्पक्खियउवासियाए वा अत्थेगइए केवलिपन्नत्तं धम्मं लभेज्ज सवणयाए, अत्थेगइए केवलिपन्नत्तं धम्मं नो लभेज्ज सवणयाए ॥ से केणट्ठेणं भंते ! एवं वुच्चइ-असोच्चा णं जाव नो लभेज्ज सवणयाए ? गोयमा ! जस्स णं नाणावरणिज्जाणं कम्माणं खओवसमे कडे भवइ से णं असोच्चा केवलस्स वा जाव तप्पक्खियउवासियाए वा केवलिपन्नत्तं धम्मं लभेज्ज सवणयाए, जस्स णं नाणावरणिज्जाणं कम्माणं खओवसमे नो कडे भवइ से णं असोच्चा णं केवलस्स वा जाव तप्पक्खियउवासियाए वा केवलिपन्नत्तं धम्मं नो लभेज्ज सवणयाए से तेणट्ठेणं गोयमा ! एवं वुच्चइ-तं चैव जाव नो लभेज्ज सवणयाए ॥ असोच्चा णं भंते ! केवलस्स वा जाव तप्पक्खियउवासियाए वा केवलं बोहिं वुज्जेजा ? गोयमा ! असोच्चा णं केवलस्स वा जाव अत्थेगइए केवलं बोहिं वुज्जेजा, अत्थेगइए केवलं बोहिं पो वुज्जेजा ॥ से केणट्ठेणं भंते ! जाव नो वुज्जेजा ? गोयमा ! जस्स णं दसिणाव-

रणिजाणं कम्माणं खओवसमे कडे भवइ से णं असोच्चा केवल्लिस्स वा जाव केवलं बोहिं बुज्झेज्जा, जस्स णं दरिस्सणावरणिजाणं कम्माणं खओवसमे णो कडे भवइ से णं असोच्चा केवल्लिस्स वा जाव केवलं बोहिं णो बुज्झेज्जा, से तेणट्ठेणं जाव णो बुज्झेज्जा ॥ असोच्चा णं भंते ! केवल्लिस्स वा जाव तप्पक्खियउवासियाए वा केवलं मुंडे भवित्ता अगाराओ अणगारियं पव्वएज्जा ? गोयमा ! असोच्चा णं केवल्लिस्स वा जाव उवासियाए वा अत्थेगइए केवलं मुंडे भवित्ता अगाराओ अणगारियं पव्वइज्जा, अत्थेगइए केवलं मुंडे भवित्ता अगाराओ अणगारियं नो पव्वएज्जा, से केणट्ठेणं जाव नो पव्वएज्जा ? गोयमा ! जस्स णं धम्मंतराइयाणं कम्माणं खओवसमे कडे भवइ से णं असोच्चा केवल्लिस्स वा जाव केवलं मुंडे भवित्ता अगाराओ अणगारियं पव्वएज्जा, जस्स णं धम्मंतराइयाणं कम्माणं खओवसमे नो कडे भवइ से णं असोच्चा केवल्लिस्स वा जाव मुंडे भवित्ता जाव णो पव्वएज्जा, से तेणट्ठेणं गोयमा ! जाव नो पव्वएज्जा । असोच्चा णं भंते ! केवल्लिस्स वा जाव उवासियाए वा केवलं बंभचेरवासं आवसेज्जा ? गोयमा ! असोच्चा णं केवल्लिस्स वा जाव उवासियाए वा अत्थेगइए केवलं बंभचेरवासं आवसेज्जा, अत्थेगइए केवलं बंभचेरवासं नो आवसेज्जा, से केणट्ठेणं भंते ! एवं वुच्चइ जाव नो आवसेज्जा ? गोयमा ! जस्स णं चरित्तावरणिजाणं कम्माणं खओवसमे कडे भवइ से णं असोच्चा केवल्लिस्स वा जाव केवलं बंभचेरवासं आवसेज्जा, जस्स णं चरित्तावरणिजाणं कम्माणं खओवसमे नो कडे भवइ से णं असोच्चा केवल्लिस्स वा जाव नो आवसेज्जा, से तेणट्ठेणं जाव नो आवसेज्जा । असोच्चा णं भंते ! केवल्लिस्स वा जाव केवलेणं संजमेणं संजमेज्जा ? गोयमा ! असोच्चा णं केवल्लिस्स वा जाव उवासियाए वा जाव अत्थेगइए केवलेणं संजमेणं संजमेज्जा, अत्थेगइए केवलेणं संजमेणं नो संजमेज्जा, से केणट्ठेणं जाव नो संजमेज्जा ? गोयमा ! जस्स णं जयणावरणिजाणं कम्माणं खओवसमे कडे भवइ से णं असोच्चा णं केवल्लिस्स वा जाव केवलेणं संजमेणं संजमेज्जा, जस्स णं जयणावरणिजाणं कम्माणं खओवसमे नो कडे भवइ से णं असोच्चा केवल्लिस्स वा जाव नो संजमेज्जा, से तेणट्ठेणं गोयमा ! जाव अत्थेगइए नो संजमेज्जा । असोच्चा णं भंते ! केवल्लिस्स वा जाव उवासियाए वा केवलेणं संवरेणं संवरेज्जा ? गोयमा ! असोच्चा णं केवल्लिस्स वा जाव अत्थेगइए केवलेणं संवरेणं संवरेज्जा, अत्थेगइए केवलेणं जाव नो संवरेज्जा, से केणट्ठेणं जाव नो संवरेज्जा ? गोयमा ! जस्स णं अज्झवसाणावरणिजाणं कम्माणं खओवसमे कडे भवइ से णं असोच्चा केवल्लिस्स वा जाव केवलेणं संवरेणं संवरेज्जा, जस्स णं अज्झवसाणावरणिजाणं कम्माणं खओवसमे

णो कडे भवइ से णं असोच्चा केवलस्स वा जाव नो संवरेज्जा, से तेणट्ठेणं जाव नो संवरेज्जा । असोच्चा णं भंते ! केवलस्स वा जाव केवलं आभिणिबोहियनाणं उप्पाडेज्जा ? गोयमा ! असोच्चा णं केवलस्स वा जाव उवासियाए वा अत्थेगइए केवलं आभिणिबोहियनाणं उप्पाडेज्जा, अत्थेगइए केवलं आभिणिबोहियनाणं नो उप्पाडेज्जा, से केणट्ठेणं जाव नो उप्पाडेज्जा ? गोयमा ! जस्स णं आभिणिबोहिय-
नाणावरणिज्जाणं कम्माणं खओवसमे कडे भवइ से णं असोच्चा केवलस्स वा जाव केवलं आभिणिबोहियनाणं उप्पाडेज्जा, जस्स णं आभिणिबोहियनाणावरणिज्जाणं कम्माणं खओवसमे नो कडे भवइ से णं असोच्चा केवलस्स वा जाव केवलं आभिणि-
बोहियनाणं नो उप्पाडेज्जा, से तेणट्ठेणं जाव नो उप्पाडेज्जा, असोच्चा णं भंते ! केव-
लिस्स वा जाव केवलं सुयनाणं उप्पाडेज्जा ? एवं जहा आभिणिबोहियनाणस्स वत्तव्वया भणिया तथा सुयनाणस्सवि भाणियव्वा, नवरं सुयनाणावरणिज्जाणं कम्माणं खओव-
समे भाणियव्वे । एवं चेव केवलं ओहिनाणं भाणियव्वं, नवरं ओहिणाणावरणिज्जाणं कम्माणं खओवसमे भाणियव्वे, एवं केवलं मणपज्जवनानं उप्पाडेज्जा, नवरं मणप-
ज्जवणावरणिज्जाणं कम्माणं खओवसमे भाणियव्वे, असोच्चा णं भंते ! केवलस्स वा जाव तप्पक्खियउवासियाए वा केवलनाणं उप्पाडेज्जा ? एवं चेव नवरं केवल-
नाणावरणिज्जाणं कम्माणं खए भाणियव्वे, सेसं तं चेव, से तेणट्ठेणं गोयमा ! एवं वुच्चइ जाव केवलनाणं नो उप्पाडेज्जा । असोच्चा णं भंते ! केवलस्स वा जाव तप्प-
क्खियउवासियाए वा केवलपन्नतं धम्मं लभेज्ज सवणयाए केवलं बोहिं बुज्जेज्जा केवलं मुंडे भवित्ता अगाराओ अणगारियं पव्वएज्जा केवलं बंभचेरवासं आवसेज्जा केवलेणं संजमेणं संजमेज्जा केवलेणं संवरेणं संवरेज्जा केवलं आभिणिबोहियनाणं उप्पाडेज्जा जाव केवलं मणपज्जवनानं उप्पाडेज्जा केवलनाणं उप्पाडेज्जा ? गोयमा !
असोच्चा णं केवलस्स वा जाव उवासियाए वा अत्थेगइए केवलपन्नतं धम्मं लभेज्ज सवणयाए, अत्थेगइए केवलपन्नतं धम्मं नो लभेज्ज सवणयाए, अत्थेगइए केवलं बोहिं बुज्जेज्जा, अत्थेगइए केवलं बोहिं णो बुज्जेज्जा, अत्थेगइए केवलं मुंडे भवित्ता अगाराओ अणगारियं पव्वएज्जा, अत्थेगइए जाव नो पव्वएज्जा, अत्थेगइए केवलं बंभचेरवासं आवसेज्जा, अत्थेगइए केवलं बंभचेरवासं नो आवसेज्जा, अत्थेगइए केव-
लेणं संजमेणं संजमेज्जा, अत्थेगइए केवलेणं संजमेणं नो संजमेज्जा, एवं संवरेणत्ति, अत्थेगइए केवलं आभिणिबोहियनाणं उप्पाडेज्जा, अत्थेगइए जाव नो उप्पाडेज्जा, एवं जाव मणपज्जवनानं, अत्थेगइए केवलनाणं उप्पाडेज्जा, अत्थेगइए केवलनाणं नो उप्पाडेज्जा । से केणट्ठेणं भंते ! एवं वुच्चइ असोच्चा णं तं चेव जाव अत्थेगइए

केवलनाणं नो उप्पाडेज्जा ? गोयमा ! जस्स णं नाणावरणिज्जाणं कम्माणं खओवसमे नो कडे भवइ १ जस्स णं दरिसणावरणिज्जाणं कम्माणं खओवसमे नो कडे भवइ २ जस्स णं धम्मंतराइयाणं कम्माणं खओवसमे नो कडे भवइ ३ एवं चरित्तावरणिज्जाणं ४ जयणावरणिज्जाणं ५ अज्झवसाणावरणिज्जाणं ६ आभिणिबोहियनाणावरणिज्जाणं ७ जाव मणपज्जवनाणावरणिज्जाणं कम्माणं खओवसमे नो कडे भवइ १० जस्स णं केवलनाणावरणिज्जाणं जाव खए नो कडे भवइ ११ से णं असोच्चा केवलस्स वा जाव केवलिपन्नत्तं धम्मं नो लभेज्ज सवणयाए केवलं बोहिं नो बुज्झेज्जा जाव केवल-
नाणं नो उप्पाडेज्जा, जस्स णं नाणावरणिज्जाणं कम्माणं खओवसमे कडे भवइ जस्स णं दरिसणावरणिज्जाणं कम्माणं खओवसमे कडे भवइ जस्स णं धम्मंतराइयाणं एवं जाव जस्स णं केवलनाणावरणिज्जाणं कम्माणं खए कडे भवइ से णं असोच्चा केवलस्स वा जाव केवलिपन्नत्तं धम्मं लभेज्ज सवणयाए केवलं बोहिं बुज्झेज्जा जाव केवल-
णाणं उप्पाडेज्जा ॥ ३६४ ॥ तस्स णं भंते ! छट्ठंछट्ठेणं अनिक्खित्तेणं तवोक्कमेणं उट्ठं बाहाओ पगिज्झिय पगिज्झिय सूरामिमुहंस्स आयावणभूमीए आयावेमाणस्स पगइभइयाए पगइउवसंतयाए पगइपयणुकोहमाणमायालोभयाए मिउमद्वसंपन्नयाए अल्लीवणयाए भइयाए विणीययाए अन्नया कयाइ सुभेणं अज्झवसाणेणं सुभेणं परिणामेणं लेस्साहिं विसुज्झमाणीहिं २ तयावरणिज्जाणं कम्माणं खओवसमेणं ईहापोहमग्गणगवैसणं करेमाणस्स विभंगे नामं अन्नाणे समुप्पज्जइ, से णं तेणं विभंगनाणेणं समुप्पज्जेणं जहन्नेणं अंगुलस्स असंखेज्जइभागं उक्कोसेणं असंखेज्जाइ जोयणसहस्साइ जाणइ पासइ, से णं तेणं विभंगनाणेणं समुप्पज्जेणं जीवेवि जाणइ अजीवेवि जाणइ पासंडत्थे सारंमे सपरिग्गहे संकिलिस्समाणेवि जाणइ विसुज्झ-
माणेवि जाणइ से णं पुव्वामेव सम्मतं पडिवज्जइ सम्मतं पडिवज्जिता समणधम्मं रोएइ समणधम्मं रोएत्ता चरित्तं पडिवज्जइ चरित्तं पडिवज्जिता लिंगं पडिवज्जइ, तस्स णं तेहिं मिच्छत्तपज्जवेहिं परिहायमाणेहिं २ सम्मईसणपज्जवेहिं परिवट्ठमाणेहिं २ से विभंगे अन्नाणे सम्मतपरिग्गहिए खिप्पामेव ओही परावत्तइ ॥ ३६५ ॥ से णं भंते ! कइसु लेस्सासु होज्जा ? गोयमा ! तिसु विसुद्धलेस्सासु होज्जा, तंजहा-तेउले-
स्साए पम्हलेस्साए सुक्कलेस्साए । से णं भंते ! कइसु णाणेषु होज्जा ? गोयमा ! तिसु आभिणिबोहियनाणसुयनाणओहिनाणेषु होज्जा । से णं भंते ! किं सजोगी होज्जा अजोगी होज्जा ? गोयमा ! सजोगी होज्जा नो अजोगी होज्जा, जइ सजोगी होज्जा किं मणजोगी होज्जा वइजोगी होज्जा कायजोगी होज्जा ? गोयमा ! मणजोगी वा होज्जा वइजोगी वा होज्जा कायजोगी वा होज्जा । से णं भंते ! किं सागारोवउत्ते

होज्जा अणागारोवउत्ते होज्जा ? गोयमा ! सागारोवउत्ते वा होज्जा अणागारोवउत्ते वा होज्जा । से णं भंते ! कयरंमि संघयणे होज्जा ? गोयमा ! वइरोसभनारायसंघयणे होज्जा । से णं भंते ! कयरंमि संठाणे होज्जा ? गोयमा ! छह्णं संठाणाणं अन्नयरे संठाणे होज्जा । से णं भंते ! कयरंमि उच्चत्ते होज्जा ? गोयमा ! जहन्नेणं सत्त रयणी उक्कोसेणं पंचधणुसइए होज्जा । से णं भंते ! कयरंमि आउए होज्जा ? गोयमा ! जहन्नेणं साइरेगट्ठवासाउए उक्कोसेणं पुव्वकोडिआउए होज्जा । से णं भंते ! किं सवेदए होज्जा अवेदए होज्जा ? गोयमा ! सवेदए होज्जा नो अवेदए होज्जा, जइ सवेदए होज्जा किं इत्थिवेयए होज्जा पुरिसवेदए होज्जा नपुंसगवेदए होज्जा पुरिस-नपुंसगवेदए होज्जा ? गोयमा ! नो इत्थिवेदए होज्जा पुरिसवेदए वा होज्जा नो नपुंसगवेदए होज्जा पुरिसनपुंसगवेदए वा होज्जा । से णं भंते ! किं सकसाई होज्जा अकसाई होज्जा ? गोयमा ! सकसाई होज्जा नो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु संजलणकोहमाणमाया-लोभेसु होज्जा । तस्स णं भंते ! केवइया अज्झवसाणा प० ? गोयमा ! असंखेज्जा अज्झवसाणा प०, ते णं भंते ! किं पसत्था अप्पसत्था ? गोयमा ! पसत्था नो अप्प-सत्था, से णं भंते ! तेहिं पसत्थेहिं अज्झवसाणेहिं वट्ठमाणेहिं अणंतेहिं नेरइयभव-ग्गहणेहिंतो अप्पाणं विसंजोएइ अणंतेहिं तिरिक्खजोणिय जाव विसंजोएइ अणंतेहिं मणुस्सभवग्गहणेहिंतो अप्पाणं विसंजोएइ अणंतेहिं देवभवग्गहणेहिंतो अप्पाणं विसंजोएइ, जाओवि य से इमाओ नेरइयतिरिक्खजोणियमणुस्सदेवगइनामाओ चत्तारि उत्तरपयडीओ तासिं च णं उवग्गहिए अणंताणुबंधी कोहमाणमायालोभे खवेइ अणं० २ ता अपच्चक्खाणकसाए कोहमाणमायालोभे खवेइ अप० २ ता पच्चक्खाणावरणकोह-माणमायालोभे खवेइ पच्च० २ ता संजलणकोहमाणमायालोभे खवेइ संज० २ ता पंचविहं नाणावरणिज्जं नवविहं दरिसणावरणिज्जं पंचविहमंतराडयं तालमत्थकडं च णं मोहणिज्जं कट्ठु कम्मरयविकरणकरं अपुव्वकरणं अणुपविट्ठस्स अणंते अणुत्तरे निव्वाघाए निरा-वरणे कसिणे पडिपुजे केवलवरणाणदंसणे समुप्पज्जइ ॥ ३६६ ॥ से णं भंते ! केवलि-पन्नंतं धम्मं आधवेज्ज वा पन्नवेज्ज वा परुवेज्ज वा ? नो तिण्ठे समट्ठे, णण्णत्थ एग-णाएण वा एगवागरणेण वा, से णं भंते ! पव्वावेज्ज वा मुंडावेज्ज वा ? णो तिण्ठे समट्ठे, उवएसं पुण करेज्जा, से णं भंते ! किं सिज्झइ जाव अंतं करेइ ? हंता सिज्झइ जाव अंतं करेइ ॥ ३६७ ॥ से णं भंते ! किं उट्ठं होज्जा अहो होज्जा तिरियं होज्जा ? गोयमा ! उट्ठं वा होज्जा अहे वा होज्जा तिरियं वा होज्जा, उट्ठं होज्जमाणे सहावड-वियडावइग्धावइमालंबंतपरियाएसु वट्ठवेयट्ठपव्वएसु होज्जा, साहरणं पडुच्च सोम-

णसवणे वा पंडगवणे वा होजा, अहे होजमाणे गड्डाए वा दरीए वा होजा, साहरणं पडुच्च पायाले वा भवणे वा होजा, तिरियं होजमाणे पन्नरससु कम्मभूसीसु होजा, साहरणं पडुच्च अड्डाइजे दीवसमुदे तदेकदेसभाए होजा, ते णं भंते ! एगसमएणं केवइया होजा ? गोयमा ! जह्जेणं एक्को वा दो वा तिणि वा उक्कोसेणं दस, से तेणट्ठेणं गोयमा ! एवं वुच्चइ असोच्चा णं केवलिसस वा जाव अत्थेगइए केवलिपन्नत्तं धम्मं लभेज सवणयाए, अत्थेगइए असोच्चा णं केवलिसस वा जाव नो लभेज सवणयाए जाव अत्थेगइए केवलनाणं उप्पाडेज्जा, अत्थेगइए केवलनाणं नो उप्पाडेज्जा ॥३६८॥ सोच्चा णं भंते ! केवलिसस वा जाव तप्पक्खियउवासियाए वा केवलपन्नत्तं धम्मं लभेज सवणयाए ? गोयमा ! सोच्चा णं केवलिसस वा जाव अत्थेगइए केवलिपन्नत्तं धम्मं एवं जा चेव असोच्चाए वत्तव्वया सा चेव सोच्चाएवि भाणियव्वा, नवरं अभिलावो सोच्चत्ति, सेसं तं चेव निरवसेसं जाव जस्स णं मणपज्जवनाणावरणिज्जाणं कम्माणं खओवसमे कडे भवइ जस्स णं केवलनाणावरणिज्जाणं कम्माणं खए कडे भवइ से णं सोच्चा केवलिसस वा जाव उवासियाए वा केवलपन्नत्तं धम्मं लभेज सवणयाए केवलं वोहिं बुज्जेज्जा जाव केवलनाणं उप्पाडेज्जा, तस्स णं अट्ठमंअट्ठमेणं अनिक्खित्तेणं तवोक्कमेणं अप्पाणं भावेमाणस्स पगइभइयाए तहेव जाव गवेसणं करेमाणस्स ओहिणणे समुप्पज्जइ, से णं तेणं ओहिनाणेणं समुप्पेणं जह्जेणं अंगुलस्स असंखेज्जइभागं उक्कोसेणं असंखेजाइं अलोए लोयप्पमाणमेत्ताइं खण्डाइं जाणइ पासइ ॥ से णं भंते ! कइसु लेस्सासु होजा ? गोयमा ! छसु लेस्सासु होजा, तंजहा-कण्हलेसाए जाव सुक्कलेसाए । से णं भंते ! कइसु णाणेसु होजा ? गोयमा ! तिसु वा चउसु वा होजा, तिसु होजमाणे तिसु आभिणिबोहियनाणसुयनाणओहिनाणेसु होजा, चउसु होजमाणे आभि० सुय० ओहि० मणपज्जवणाणेसु होजा । से णं भंते ! किं सजोगी होजा अजोगी होजा ? एवं जोगोवओगो संघयणं संठाणं उच्चत्तं आउयं च, एयाणि सव्वाणि जहा असोच्चाए तहेव भाणियव्वाणि । से णं भंते ! किं सवेदए० ? पुच्छा, गोयमा ! सवेदए वा होजा अवेदए वा होजा, जइ अवेदए होजा किं उवसंतवेयए होजा खीणवेयए होजा ? गोयमा ! नो उवसंतवेदए होजा खीणवेदए होजा, जइ सवेदए होजा किं इत्थिवेदए होजा पुरिसवेदए होजा नपुंसगवेदए होजा पुरिसनपुंसगवेदए होजा ? पुच्छा, गोयमा ! इत्थिवेदए वा होजा पुरिसवेदए वा होजा पुरिसनपुंसगवेदए वा होजा । से णं भंते ! किं सकसाई होजा अकसाई होजा ? गोयमा ! सकसाई वा होजा अकसाई वा होजा, जइ अकसाई होजा किं उवसंतकसाई होजा खीणकसाई होजा ? गोयमा !

नो उवसंतकसाई होज्जा खीणकसाई होज्जा, जइ सकसाई होज्जा से णं भंते । कइसु कसाएसु होज्जा ? गोयमा ! चउसु वा तिसु वा दोसु वा एक्कंसि वा होज्जा, चउसु होज्जमाणे चउसु संजलणकोहमाणमायालोभेसु होज्जा, तिसु होज्जमाणे तिसु संजलणमाणमायालोभेसु होज्जा, दोसु होज्जमाणे दोसु संजलणमायालोभेसु होज्जा, एगंसि होज्जमाणे एगंसि संजलणे लोभे होज्जा । तस्स णं भंते ! केवइया अज्झवसाणा पण्णत्ता ? गोयमा ! असंखेज्जा, एवं जहा असोच्चाए तहेव जाव केवलवरनाणदंसणे समुप्पज्जइ, से णं भंते ! केवलिपन्नतं धम्मं आघवेज वा पन्नवेज वा परुवेज वा ? हंता गोयमा ! आघवेज वा पन्नवेज वा परुवेज वा । से णं भंते ! पव्वावेज वा मुंडावेज वा ? हंता गोयमा ! पव्वावेज वा मुंडावेज वा, तस्स णं भंते ! सिस्सावि पव्वावेज वा मुंडावेज वा ? हंता पव्वावेज वा मुण्डावेज वा, तस्स णं भंते ! पसिस्सावि पव्वावेज वा मुंडावेज वा ? हंता पव्वावेज वा मुंडावेज वा । से णं भंते ! सिज्झइ बुज्झइ जाव अंतं करेइ ? हंता सिज्झइ जाव अंतं करेइ, तस्स णं भंते ! सिस्सावि सिज्झंति जाव अंतं करेन्ति ? हंता सिज्झंति जाव अंतं करेन्ति, तस्स णं भंते ! पसिस्सावि सिज्झंति जाव अंतं करेन्ति ? एवं चेव जाव अंतं करेन्ति । से णं भंते ! किं उड्ढं होज्जा जहेव असोच्चाए जाव तदेक्कदेसभाए होज्जा । ते णं भंते ! एगसमएणं केवइया होज्जा ? गोयमा ! जहन्नेणं एक्को वा दो वा तिन्नि वा उक्कोसेणं अट्ठसयं १०८, से तेणट्ठेणं गोयमा ! एवं वुच्चइ-सोच्चा णं केवलस्स वा जाव केवलिउवासियाए वा जाव अत्थेगइए केवलनाणं उप्पाडेज्जा अत्थेगइए केवलनाणं नो उप्पाडेज्जा । सेवं भंते ! २ ति ॥ ३६९ ॥

नवमसयस्स इगतीसइमो उद्देसो समत्तो ॥

तेणं कालेणं तेणं समएणं वाणियगामे नगरे होत्था वज्जओ, दूइपलासे उज्जाणे सामी समोसढे, परिसा निग्गया, धम्मो कहिओ, परिसा पडिग्गया, तेणं कालेणं तेणं समएणं पासावच्चिजे गंगेए नामं अणगारे जेणेव समणे भगवं महावीरे तेणेव उवागच्छइ तेणेव उवागच्छइत्ता समणस्स भगवओ महावीरस्स अदूरसामंते ठिच्चा समणं भगवं महावीरं एवं वयासी-संतरं भंते ! नेरइया उववज्जंति निरंतरं नेरइया उववज्जंति ? गंगेया ! संतरंपि नेरइया उववज्जंति निरंतरंपि नेरइया उववज्जंति, संतरं भंते ! असुरकुमारा उववज्जंति निरंतरं असुरकुमारा उववज्जंति ? गंगेया ! संतरंपि असुरकुमारा उववज्जंति निरंतरंपि असुरकुमारा उववज्जंति, एवं जाव यणियकुमारा, संतरं भंते ! पुढविकाइया उववज्जंति निरंतरं पुढविकाइया उववज्जंति ? गंगेया ! नो संतरं पुढविकाइया उववज्जंति निरंतरं पुढविकाइया उववज्जंति, एवं जाव वणस्सइ-

काइया, बेईदिया जाव वेमाणिया एए जहा गेरइया ॥ ३७० ॥ संतरं भंते ! नेरइया उववइति निरंतरं नेरइया उववइति ? गंगेया ! संतरं पि नेरइया उववइति निरंतरं पि नेरइया उववइति, एवं जाव थणियकुमारा, संतरं भंते ! पुढविकाइया उववइति० ? पुच्छा, गंगेया ! पो संतरं पुढविकाइया उववइति निरंतरं पुढविकाइया उववइति, एवं जाव वणस्सइकाइया नो संतरं निरंतरं उववइति, संतरं भंते ! बेईदिया उववइति निरंतरं बेईदिया उववइति ? गंगेया ! संतरं पि बेईदिया उववइति निरंतरं पि बेईदिया उववइति, एवं जाव वाणमंतरा, संतरं भंते ! जोइसिया चयंति० ? पुच्छा, गंगेया ! संतरं पि जोइसिया चयंति निरंतरं पि जोइसिया चयंति, एवं जाव वेमाणिया ॥ ३७१ ॥ कइविहे णं भंते ! पवेसणए प० ? गंगेया ! चउव्विहे पवेसणए पन्नत्ते तंजहा—नेरइयपवेसणए, तिरिक्खजोणियपवेसणए, मणुस्सपवेसणए, देवपवेसणए । नेरइयपवेसणए णं भंते ! कइविहे पन्नत्ते ? गंगेया ! सत्तविहे पन्नत्ते, तंजहा—रयणप्पभापुढविनेरइयपवेसणए जाव अहेसत्तमापुढविनेरइयपवेसणए ॥ एगे णं भंते ! नेरइए नेरइयपवेसणएणं पविसमाणे किं रयणप्पभाए होज्जा सक्करप्पभाए होज्जा एवं जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा होज्जा । दो भंते ! नेरइया नेरइयपवेसणएणं पविसमाणा किं रयणप्पभाए होज्जा जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा होज्जा, अहवा एगे रयणप्पभाए एगे सक्करप्पभाए होज्जा अहवा एगे रयणप्पभाए एगे वालुयप्पभाए होज्जा जाव एगे रयणप्पभाए एगे अहेसत्तमाए होज्जा, अहवा एगे सक्करप्पभाए एगे वालुयप्पभाए होज्जा जाव अहवा एगे सक्करप्पभाए एगे अहेसत्तमाए होज्जा, अहवा एगे वालुयप्पभाए एगे पंक्कप्पभाए होज्जा एवं जाव अहवा एगे वालुयप्पभाए एगे अहेसत्तमाए होज्जा, एवं एक्केक्का पुढवी छड्डुयव्वा जाव अहवा एगे तमाए एगे अहेसत्तमाए होज्जा ॥ तिञ्जि भंते ! नेरइया नेरइयपवेसणएणं पविसमाणा किं रयणप्पभाए होज्जा जाव अहेसत्तमाए होज्जा ? गंगेया ! रयणप्पभाए वा होज्जा जाव अहेसत्तमाए वा होज्जा, अहवा एगे रयणप्पभाए दो सक्करप्पभाए होज्जा जाव अहवा एगे रयणप्पभाए दो अहेसत्तमाए होज्जा ६ अहवा दो रयणप्पभाए एगे सक्करप्पभाए होज्जा जाव अहवा दो रयणप्पभाए एगे अहेसत्तमाए होज्जा १३ अहवा एगे सक्करप्पभाए दो वालुयप्पभाए होज्जा जाव अहवा एगे सक्करप्पभाए दो अहेसत्तमाए होज्जा १७ अहवा दो सक्करप्पभाए एगे वालुयप्पभाए होज्जा जाव अहवा दो सक्करप्पभाए एगे अहेसत्तमाए होज्जा २२ एवं जहा सक्करप्पभाए वत्तव्वया भणिया तहा सव्वपुढवीणं भाणियव्वा जाव अहवा दो

तमाए एगे अहेसत्तमाए होज्जा, ४-४-३-३-२-२-१-१ (४२) अहवा एगे रयणप्पभाए एगे सक्करप्पभाए एगे वालुयप्पभाए होज्जा १ अहवा एगे रयणप्पभाए एगे सक्करप्पभाए एगे पंकप्पभाए होज्जा २ जाव अहवा एगे रयणप्पभाए एगे सक्करप्पभाए एगे अहेसत्तमाए होज्जा ५ अहवा एगे रयणप्पभाए एगे वालुयप्पभाए एगे पंकप्पभाए होज्जा ६ अहवा एगे रयणप्पभाए एगे वालुयप्पभाए एगे धूमप्पभाए होज्जा ७ एवं जाव अहवा एगे रयणप्पभाए एगे वालुयप्पभाए एगे अहेसत्तमाए होज्जा ९, अहवा एगे रयणप्पभाए एगे पंकप्पभाए एगे धूमप्पभाए होज्जा १० जाव अहवा एगे रयणप्पभाए एगे पंकप्पभाए एगे अहेसत्तमाए होज्जा १२ अहवा एगे रयणप्पभाए एगे धूमप्पभाए एगे तमाए होज्जा १३ अहवा एगे रयणप्पभाए एगे धूमप्पभाए एगे अहेसत्तमाए होज्जा १४ अहवा एगे रयणप्पभाए एगे तमाए एगे अहेसत्तमाए होज्जा १५ अहवा एगे सक्करप्पभाए एगे वालुयप्पभाए एगे पंकप्पभाए होज्जा १६ अहवा एगे सक्करप्पभाए एगे वालुयप्पभाए एगे धूमप्पभाए होज्जा १७ जाव अहवा एगे सक्करप्पभाए एगे वालुयप्पभाए एगे अहेसत्तमाए होज्जा १९ अहवा एगे सक्करप्पभाए एगे पंकप्पभाए एगे धूमप्पभाए होज्जा २० जाव अहवा एगे सक्कर० एगे पंक० एगे अहेसत्तमाए होज्जा २२ अहवा एगे सक्करप्पभाए एगे धूमप्पभाए एगे तमाए होज्जा २३ अहवा एगे सक्करप्पभाए एगे धूमप्पभाए एगे अहेसत्तमाए होज्जा २४ अहवा एगे सक्करप्पभाए एगे तमाए एगे अहेसत्तमाए होज्जा २५ अहवा एगे वालुयप्पभाए एगे पंकप्पभाए एगे धूमप्पभाए होज्जा २६ अहवा एगे वालुयप्पभाए एगे पंकप्पभाए एगे तमाए होज्जा २७ अहवा एगे वालुयप्पभाए एगे पंकप्पभाए एगे अहेसत्तमाए होज्जा २८ अहवा एगे वालुयप्पभाए एगे धूमप्पभाए एगे तमाए होज्जा २९ अहवा एगे वालुयप्पभाए एगे धूमप्पभाए एगे अहेसत्तमाए होज्जा ३० अहवा एगे वालुयप्पभाए एगे तमाए एगे अहेसत्तमाए होज्जा ३१ अहवा एगे पंकप्पभाए एगे धूमप्पभाए एगे तमाए होज्जा ३२ अहवा एगे पंकप्पभाए एगे धूमप्पभाए एगे अहेसत्तमाए होज्जा ३३ अहवा एगे पंकप्पभाए एगे तमाए एगे अहेसत्तमाए होज्जा ३४ अहवा एगे धूमप्पभाए एगे तमाए एगे अहेसत्तमाए होज्जा ३५ ॥ चत्तारि भंते ! नेरइया नेरइयपवेसणएणं पविसमाणा किं रयणप्पभाए होज्जा० ? पुच्छा, ग्रंगेया ! रयणप्पभाए वा होज्जा जाव अहेसत्तमाए वा होज्जा ७, अहवा एगे रयणप्पभाए तिज्जि सक्करप्पभाए होज्जा अहवा एगे रयणप्पभाए तिज्जि वालुयप्पभाए होज्जा एवं जाव अहवा एगे रयणप्पभाए तिज्जि अहेसत्तमाए होज्जा ६ अहवा दो रयणप्पभाए दो सक्करप्पभाए होज्जा एवं जाव अहवा दो रयणप्पभाए दो अहेसत्तमाए होज्जा १२,

अहवा तिञ्चि रयणप्पभाए एगे सक्करप्पभाए होज्जा, एवं जाव अहवा तिञ्चि रयण-
 प्पभाए एगे अहेसत्तमाए होज्जा १८, अहवा एगे सक्करप्पभाए तिञ्चि वालुयप्पभाए
 होज्जा, एवं जहेव रयणप्पभाए उवरिमाहिं समं संचारियं तहा सक्करप्पभाएवि उव-
 रिमाहिं समं संचारेयव्वं ५, एवं एक्केक्काए समं संचारियव्वं जाव अहवा तिञ्चि तमाए
 एगे अहेसत्तमाए होज्जा १२-६-३-(६३) अहवा एगे रयणप्पभाए एगे सक्कर-
 प्पभाए दो वालुयप्पभाए होज्जा अहवा एगे रयणप्पभाए एगे सक्कर० दो पंक०
 होज्जा एवं जाव अहवा एगे रयणप्पभाए एगे सक्कर० दो अहेसत्तमाए होज्जा ५ अहवा
 एगे रयण० दो सक्कर० एगे वालुयप्पभाए होज्जा एवं जाव अहवा एगे रयण० दो
 सक्कर० एगे अहेसत्तमाए होज्जा १० अहवा दो रयण० एगे सक्कर० एगे वालुय-
 प्पभाए होज्जा, एवं जाव अहवा दो रयण० एगे सक्कर० एगे अहेसत्तमाए होज्जा
 १५ अहवा एगे रयण० एगे वालुय० दो पंकप्पभाए होज्जा एवं जाव अहवा एगे
 रयणप्पभाए एगे वालुय० दो अहेसत्तमाए होज्जा ४ एवं एणं गमएणं जहा तिहं
 तियसंजोगे तहा भाणियव्वो जाव अहवा दो धूमप्पभाए एगे तमाए एगे अहेसत्त-
 माए होज्जा १०५ अहवा एगे रयणप्पभाए एगे सक्करप्पभाए एगे वालुयप्पभाए
 एगे पंकप्पभाए होज्जा १ अहवा एगे रयणप्पभाए एगे सक्कर० एगे वालुय० एगे
 धूमप्पभाए होज्जा २ अहवा एगे रयण० एगे सक्कर० एगे वालुय० एगे तमाए
 होज्जा ३ अहवा एगे रयणप्पभाए एगे सक्करप्पभाए एगे वालुयप्पभाए एगे अहेसत्त-
 माए होज्जा ४ अहवा एगे रयण० एगे सक्कर० एगे पंक० एगे धूमप्पभाए होज्जा ५
 अहवा एगे रयण० एगे सक्कर० एगे पंकप्पभाए एगे तमाए होज्जा ६ अहवा एगे
 रयण० एगे सक्कर० एगे पंक० एगे अहेसत्तमाए होज्जा ७ अहवा एगे रयणप्पभाए
 एगे सक्कर० एगे धूम० एगे तमाए होज्जा ८ अहवा एगे रयण० एगे सक्कर० एगे
 धूम० एगे अहेसत्तमाए होज्जा ९ अहवा एगे रयण० एगे सक्करप्पभाए एगे तमाए
 एगे अहेसत्तमाए होज्जा १० अहवा एगे रयण० एगे वालुय० एगे पंक० एगे
 धूमप्पभाए होज्जा ११ अहवा एगे रयण० एगे वालुय० एगे पंक० एगे तमाए
 होज्जा १२ अहवा एगे रयण० एगे वालुय० एगे पंक० एगे अहेसत्तमाए होज्जा
 १३ अहवा एगे रयण० एगे वालुय० एगे धूम० एगे तमाए होज्जा १४ अहवा
 एगे रयणप्पभाए एगे वालुय० एगे धूम० एगे अहेसत्तमाए होज्जा १५ अहवा एगे
 रयण० एगे वालुय० एगे तमाए एगे अहेसत्तमाए होज्जा १६ अहवा एगे रयण०
 एगे पंक० एगे धूम० एगे तमाए होज्जा १७ अहवा एगे रयण० एगे पंक० एगे
 धूम० एगे अहेसत्तमाए होज्जा १८ अहवा एगे रयण० एगे पंक० एगे तमाए एगे

अहेसत्तमाए होज्जा १९ अहवा एगे रयण० एगे धूम० एगे तमाए एगे अहेसत्त-
माए होज्जा २० अहवा एगे सक्कर० एगे वालुय० एगे पंक० एगे धूमप्पमाए होज्जा
२१ एवं जहा रयणप्पमाए उवरिमाओ पुढवीओ संचारियाओ तहा सक्करप्पमाएवि
उवरिमाओ चा(उच्चा)रियव्वाओ जाव अहवा एगे सक्कर० एगे धूम० एगे तमाए एगे
अहेसत्तमाए होज्जा ३० अहवा एगे वालुय० एगे पंक० एगे धूम० एगे तमाए होज्जा
३१ अहवा एगे वालुय० एगे पंक० एगे धूमप्पमाए एगे अहेसत्तमाए होज्जा ३२
अहवा एगे वालुय० एगे पंक० एगे तमाए एगे अहेसत्तमाए होज्जा ३३ अहवा एगे
वालुय० एगे धूम० एगे तमाए एगे अहेसत्तमाए होज्जा ३४ अहवा एगे पंक० एगे
धूम० एगे तमाए एगे अहेसत्तमाए होज्जा ३५ ॥ पंच भंते ! नेरइया नेरइयप्पवे-
सणएणं पविसमाणा किं रयणप्पमाए होज्जा० ? पुच्छा, गंगेया ! रयणप्पमाए वा
होज्जा जाव अहेसत्तमाए वा होज्जा अहवा एगे रयण० चत्तारि सक्करप्पमाए होज्जा
जाव अहवा एगे रयण० चत्तारि अहेसत्तमाए होज्जा अहवा दो रयण० तिन्नि सक्क-
रप्पमाए होज्जा एवं जाव अहवा दो रयणप्पमाए तिन्नि अहेसत्तमाए होज्जा अहवा
तिन्नि रयण० दो सक्करप्पमाए होज्जा एवं जाव अहवा तिन्नि रयणप्पमाए दोण्णि
अहेसत्तमाए होज्जा अहवा चत्तारि रयण० एगे सक्करप्पमाए होज्जा एवं जाव अहवा
चत्तारि रयण० एगे अहेसत्तमाए होज्जा अहवा एगे सक्कर० चत्तारि वालुयप्पमाए
होज्जा एवं जहा रयणप्पमाए समं उवरिमपुढवीओ संचारियाओ तहा सक्करप्पमाएवि
समं चा(उच्चा)रियव्वाओ जाव अहवा चत्तारि सक्करप्पमाए एगे अहेसत्तमाए होज्जा
एवं एक्केकाए समं चा(उच्चा)रियव्वाओ जाव अहवा चत्तारि तमाए एगे अहेसत्तमाए
होज्जा अहवा एगे रयण० एगे सक्कर० तिन्नि वालुयप्पमाए होज्जा एवं जाव अहवा
एगे रयण० एगे सक्कर० तिन्नि अहेसत्तमाए होज्जा अहवा एगे रयण० दो सक्कर०
दो वालुयप्पमाए होज्जा एवं जाव अहवा एगे रयण० दो सक्कर० दो अहेसत्तमाए
होज्जा अहवा दो रयणप्पमाए एगे सक्करप्पमाए दो वालुयप्पमाए होज्जा एवं जाव
अहवा दो रयणप्पमाए एगे सक्करप्पमाए दो अहेसत्तमाए होज्जा अहवा एगे रयण०
तिन्नि सक्कर० एगे वालुयप्पमाए होज्जा एवं जाव अहवा एगे रयण० तिन्नि सक्कर०
एगे अहेसत्तमाए होज्जा अहवा दो रयण० दो सक्कर० एगे वालुयप्पमाए होज्जा एवं
जाव दो रयण० दो सक्कर० एगे अहेसत्तमाए होज्जा अहवा तिन्नि रयण० एगे सक्कर०
एगे वालुयप्पमाए होज्जा एवं जाव अहवा तिन्नि रयण० एगे सक्कर० एगे अहेस-
त्तमाए होज्जा अहवा एगे रयण० एगे वालुय० तिन्नि पंकप्पमाए होज्जा, एवं एणं
कमेणं जहा चउण्हं ब्रियासंजोगो भणिओ तहा पंचण्हवि तियासंजोगो भाणियव्वो

नवरं तत्थ एगो संचारिज्जइ इह दोन्नि सेसं तं चेव जाव अहवा तिन्नि धूमप्पभाए
 एगे तमाए एगे अहेसत्तमाए होज्जा अहवा एगे रयण० एगे सक्कर० एगे वालुय०
 दो पंकप्पभाए होज्जा एवं जाव अहवा एगे रयण० एगे सक्कर० एगे वालुय० दो
 अहेसत्तमाए होज्जा ४ अहवा एगे रयण० एगे सक्कर० दो वालुय० एगे पंकप्पभाए
 होज्जा एवं जाव अहवा एगे रयण० एगे सक्कर० दो वालुय० एगे अहेसत्तमाए
 होज्जा ८, अहवा एगे रयण० दो सक्करप्पभाए एगे वालुय० एगे पंकप्पभाए होज्जा
 एवं जाव अहवा एगे रयण० दो सक्कर० एगे वालुय० एगे अहेसत्तमाए होज्जा
 १२ अहवा दो रयण० एगे सक्कर० एगे वालुय० एगे पंकप्पभाए होज्जा एवं जाव
 अहवा दो रयण० एगे सक्कर० एगे वालुय० एगे अहेसत्तमाए होज्जा १६ अहवा
 एगे रयण० एगे सक्कर० एगे पंक० दो धूमप्पभाए होज्जा एवं जहा चउण्हं चउ-
 क्संजोगो भण्णिओ तद्वा पंचण्हवि चउक्कसंजोगो भाणियव्वो, नवरं अब्भहिंयं एगो
 संचारेयव्वो, एवं जाव अहवा दो पंक० एगे धूम० एगे तमाए एगे अहेसत्तमाए
 होज्जा अहवा एगे रयण० एगे सक्कर० एगे वालुय० एगे पंक० एगे धूमप्पभाए
 होज्जा १ अहवा एगे रयण० एगे सक्कर० एगे वालुय० एगे पंक० एगे तमाए
 होज्जा २ अहवा एगे रयण० जाव एगे पंक० एगे अहेसत्तमाए होज्जा ३ अहवा
 एगे रयण० एगे सक्कर० एगे वालुयप्पभाए एगे धूमप्पभाए एगे तमाए होज्जा ४
 अहवा एगे रयण० एगे सक्कर० एगे वालुय० एगे धूमाए एगे अहेसत्तमाए होज्जा
 ५ अहवा एगे रयण० एगे सक्कर० एगे वालुय० एगे तमाए एगे अहेसत्तमाए
 होज्जा ६ अहवा एगे रयण० एगे सक्कर० एगे पंक० एगे धूम० एगे तमाए होज्जा
 ७ अहवा एगे रयण० एगे सक्कर० एगे पंक० एगे धूम० एगे अहेसत्तमाए होज्जा
 ८ अहवा एगे रयण० एगे सक्कर० एगे पंक० एगे तमाए एगे अहेसत्तमाए होज्जा
 ९ अहवा एगे रयण० एगे सक्कर० एगे धूम० एगे तमाए एगे अहेसत्तमाए होज्जा
 १० अहवा एगे रयण० एगे वालुय० एगे पंक० एगे धूम० एगे तमाए होज्जा ११
 अहवा एगे रयण० एगे वालुय० एगे पंक० एगे धूम० एगे अहेसत्तमाए होज्जा १२
 अहवा एगे रयण० एगे वालुय० एगे पंक० एगे तमाए एगे अहेसत्तमाए होज्जा १३
 अहवा एगे रयण० एगे वालुय० एगे धूम० एगे तमाए एगे अहेसत्तमाए होज्जा १४
 अहवा एगे रयण० एगे पंक० जाव एगे अहेसत्तमाए होज्जा १५ अहवा एगे सक्कर०
 एगे वालुय० जाव एगे तमाए होज्जा १६ अहवा एगे सक्कर० जाव एगे पंक० एगे
 धूम० एगे अहेसत्तमाए होज्जा १७ अहवा एगे सक्कर० जाव एगे पंक० एगे
 तमाए एगे अहेसत्तमाए होज्जा १८ अहवा एगे सक्कर० एगे वालुय० एगे धूम०

एगे तमाए एगे अहेसत्तमाए होज्जा १९ अहवा एगे सक्कर० एगे पंक० जाव एगे अहेसत्तमाए होज्जा २० अहवा एगे वालुय० जाव एगे अहे सत्तमाए होज्जा २१ ॥ छब्भंते ! नेरइया नेरइयप्पवेसणएणं पविसमाणां किं रयणप्पभाए होज्जा० ? पुच्छा, मंगेया ! रयणप्पभाए वा होज्जा जाव अहेसत्तमाए वा होज्जा ७ अहवा एगे रयण० पंच सक्करप्पभाए होज्जा अहवा एगे रयण० पंच वालुयप्पभाए होज्जा एवं जाव अहवा एगे रयण० पंच अहेसत्तमाए होज्जा अहवा दो रयण० चत्तारि सक्करप्पभाए होज्जा एवं जाव अहवा दो रयण० चत्तारि अहेसत्तमाए होज्जा अहवा तिन्नि रयण० तिन्नि सक्करप्पभाए होज्जा, एवं एएणं कमेणं जहा पंचण्हं दुयासंजोगो तहा छण्हवि भाणियव्वो नवरं एक्को अब्भहिओ संचारेयव्वो जाव अहवा पंच तमाए एगे अहेसत्तमाए होज्जा, अहवा एगे रयण० एगे सक्कर० चत्तारि वालुयप्पभाए होज्जा अहवा एगे रयण० एगे सक्कर० चत्तारि पंकप्पभाए होज्जा एवं जाव अहवा एगे रयण० एगे सक्कर० चत्तारि अहेसत्तमाए होज्जा अहवा एगे रयण० दो सक्कर० तिन्नि वालुयप्पभाए होज्जा, एवं एएणं कमेणं जहा पंचण्हं तियासंजोगो भणिओ तहा छण्हवि भाणियव्वो नवरं एक्को अब्भहिओ उच्चारयेव्वो, सेसं तं चेव ३४, चउक्कसंजोगोवि तहेव, पंचगसंजोगोवि तहेव, नवरं एक्को अब्भहिओ संचारेयव्वो जाव पच्छिमो मंगो अहवा दो वालुय० एगे पंक० एगे धूम० एगे तमाए एगे अहेसत्तमाए होज्जा अहवा एगे रयण० एगे सक्कर० जाव एगे तमाए होज्जा १ अहवा एगे रयण० जाव एगे धूम० एगे अहेसत्तमाए होज्जा २ अहवा एगे रयण० जाव एगे पंक० एगे तमाए एगे अहेसत्तमाए होज्जा ३ अहवा एगे रयण० जाव एगे वालुय० एगे धूम० जाव एगे अहेसत्तमाए होज्जा ४ अहवा एगे रयण० एगे सक्कर० एगे पंक० जाव एगे अहेसत्तमाए होज्जा ५ अहवा एगे रयण० एगे वालुय० जाव एगे अहेसत्तमाए होज्जा ६ अहवा एगे सक्करप्पभाए एगे वालुयप्पभाए जाव एगे अहेसत्तमाए होज्जा ७ ॥ सत्त भंते ! नेरइया नेरइयपवेसणएणं पविसमाणां पुच्छा, मंगेया ! रयणप्पभाए वा होज्जा जाव अहे सत्तमाए वा होज्जा ७, अहवा एगे रयणप्पभाए छ सक्करप्पभाए होज्जा एवं एएणं कमेणं जहा छण्हं दुयासंजोगो तहा सत्तण्हवि भाणियव्वं नवरं एगे अब्भहिओ संचारिज्जइ, सेसं तं चेव, तियासंजोगो चउक्कसंजोगो पंचसंजोगो छक्कसंजोगो य छण्हं जहा तहा सत्तण्हवि भाणियव्वं, नवरं एक्को अब्भहिओ संचारेयव्वो जाव छक्कगसंजोगो अहवा दो सक्कर० एगे वालुय० जाव एगे अहेसत्तमाए होज्जा अहवा एगे रयण० एगे सक्कर० जाव एगे अहेसत्तमाए होज्जा ॥ अट्ठ भंते ! नेरइया नेरइयपवेसणएणं पविसमाणां पुच्छा, मंगेया ! रयणप्पभाए

वा होजा जाव अहेसत्तमाए वा होजा अहवा एगे रयण० सत्त सकरप्पमाए होजा एवं दुयासंजोगो जाव छकसंजोगो य जहा सत्तण्हं भणि(यं)ओ तहा अट्ठण्हवि भाणियव्वं नवरं एक्केक्को अब्भहिओ संचारेयव्वो सेसं तं चेव जाव छकसंजोगस्स अहवा तिज्जि सकर० एगे वालुय० जाव एगे अहेसत्तमाए होजा अहवा एगे रयण० जाव एगे तमाए दो अहेसत्तमाए होजा अहवा एगे रयण० जाव दो तमाए एगे अहेसत्तमाए होजा एवं संचारेयव्वं जाव अहवा दो रयण० एगे सकर० जाव एगे अहेसत्तमाए होजा ॥ नव भंते ! नेरइया नेरइयपवेसणएणं पविसमाणा किं रयणप्पमाए होजा० ? पुच्छा, गंगेया ! रयणप्पमाए वा होजा जाव अहेसत्तमाए वा होजा अहवा एगे रयण० अट्ठ सकरप्पमाए होजा एवं दुयासंजोगो जाव सत्तगसंजोगो य जहा अट्ठण्हं भणियं तहा नवण्हंपि भाणियव्वं नवरं एक्केक्को अब्भहिओ संचारेयव्वो, सेसं तं चेव पच्छिमो आलावगो अहवा तिज्जि रयण० एगे सकर० एगे वालुय० जाव एगे अहेसत्तमाए होजा ॥ दस भंते ! नेरइया नेरइयपवेसणएणं पविसमाणा० पुच्छा, गंगेया ! रयणप्पमाए वा होजा जाव अहेसत्तमाए वा होजा ७ अहवा एगे रयणप्पमाए नव सकरप्पमाए होजा एवं दुयासंजोगो जाव सत्तसंजोगो य जहा नवण्हं नवरं एक्केक्को अब्भहिओ संचारेयव्वो सेसं तं चेव पच्छिमो आलावगो अहवा चत्तारि रयण० एगे सकरप्पमाए जाव एगे अहेसत्तमाए होजा ॥ संखेजा भंते ! नेरइया नेरइयपवेसणएणं पविसमाणा० पुच्छा, गंगेया ! रयणप्पमाए वा होजा जाव अहेसत्तमाए वा होजा ७ अहवा एगे रयण० संखेजा सकरप्पमाए होजा एवं जाव अहवा एगे रयण० संखेजा अहेसत्तमाए होजा अहवा दो रयण० संखेजा सकरप्पमाए होजा एवं जाव अहवा दो रयण० संखेजा अहेसत्तमाए होजा अहवा तिज्जि रयण० संखेजा सकरप्पमाए होजा एवं एणं कमेणं एक्केक्को संचारेयव्वो जाव अहवा दस रयण० संखेजा सकरप्पमाए होजा एवं जाव अहवा दस रयण० संखेजा अहेसत्तमाए होजा अहवा संखेजा रयण० संखेजा सकरप्पमाए होजा जाव अहवा संखेजा रयणप्पमाए संखेजा अहेसत्तमाए होजा अहवा एगे सकर० संखेजा वालुयप्पमाए होजा एवं जहा रयणप्पमा उवरिमपुढवी(ए)हिं समं चारिया एवं सकरप्पमा- (ए)वि उवरिमपुढवीहिं समं चारेयव्वा, एवं एक्केक्का पुढवी उवरिमपुढवी(ए)हिं समं चारेयव्वा जाव अहवा संखेजा तमाए संखेजा अहेसत्तमाए होजा अहवा एगे रयण० एगे सकर० संखेजा वालुयप्पमाए होजा अहवा एगे रयण० एगे सकर० संखेजा पंकप्पमाए होजा जाव अहवा एगे रयण० एगे सकर० संखेजा अहेसत्तमाए होजा अहवा एगे रयण० दो सकर० संखेजा वालुयप्पमाए होजा

जाव अहवा एगे रयण० दो सकर० संखेज्जा अहेसत्तमाए होज्जा अहवा एगे
रयण० तिन्नि सकर० संखेज्जा वालुयप्पभाए होज्जा, एवं एएणं कमेणं एक्केल्लो संचा-
रेयव्वो जाव अहवा एगे रयण० संखेज्जा सकर० संखेज्जा वालुयप्पभाए होज्जा जाव
अहवा एगे रयण० संखेज्जा सकर० संखेज्जा अहेसत्तमाए होज्जा अहवा दो रयण०
संखेज्जा सकर० संखेज्जा वालुयप्पभाए होज्जा जाव अहवा दो रयण० संखेज्जा सकर०
संखेज्जा अहेसत्तमाए होज्जा अहवा तिन्नि रयण० संखेज्जा सकर० संखेज्जा वालुय-
प्पभाए होज्जा, एवं एएणं कमेणं एक्केल्लो रयणप्पभाए संचारेयव्वो जाव अहवा
संखेज्जा रयण० संखेज्जा सकर० संखेज्जा वालुयप्पभाए होज्जा जाव अहवा
संखेज्जा रयण० संखेज्जा सकर० संखेज्जा अहेसत्तमाए होज्जा अहवा एगे रयण०
एगे वालुय० संखेज्जा पंकप्पभाए होज्जा जाव अहवा एगे रयण० एगे वालुय०
संखेज्जा अहेसत्तमाए होज्जा अहवा एगे रयण० दो वालुय० संखेज्जा पंकप्पभाए
होज्जा, एवं एएणं कमेणं तियासंजोगो चउक्कसंजोगो जाव सत्तगसंजोगो य जहा
दसण्हं तहेव भाणियव्वो पच्छिमो आलावगो सत्तसंजोगस्स अहवा संखेज्जा रयण०
संखेज्जा सकर० जाव संखेज्जा अहेसत्तमाए होज्जा ॥ असंखेज्जा भंते ! नेरइया
नेरइयपवेसणएणं पविसमाणा० पुच्छा, गंगेया ! रयणप्पभाए वा होज्जा जाव अहे-
सत्तमाए वा होज्जा, अहवा एगे रयण० असंखेज्जा सकरप्पभाए होज्जा, एवं दुयासं-
जोगो जाव सत्तगसंजोगो य जहा संखेज्जाणं भणिओ तहा असंखेज्जाणवि भाणि-
यव्वो, नवरं असंखेज्जाओ अब्भहिओ भाणियव्वो, सेसं तं चेव जाव सत्तगसंजो-
गस्स पच्छिमो आलावगो अहवा असंखेज्जा रयण० असंखेज्जा सकर० जाव असं-
खेज्जा अहेसत्तमाए होज्जा ॥ उक्कोसेणं भंते ! नेरइया नेरइयपवेसणएणं० पुच्छा,
गंगेया ! सव्वेवि ताव रयणप्पभाए होज्जा अहवा रयणप्पभाए य सकरप्पभाए य
होज्जा अहवा रयणप्पभाए य वालुयप्पभाए य होज्जा जाव अहवा रयणप्पभाए य
अहेसत्तमाए य होज्जा अहवा रयणप्पभाए य सकरप्पभाए य वालुयप्पभाए य होज्जा
एवं जाव अहवा रयण० य सकरप्पभाए य अहेसत्तमाए य होज्जा ५ अहवा रयण०
य वालुय० य पंकप्पभाए य होज्जा जाव अहवा रयण० य वालुय० य अहेसत्तमाए
य होज्जा ४ अहवा रयण० य पंकप्पभाए य धूमाए य होज्जा एवं रयणप्पभं अमुयं-
तेसु जहा तिण्हं तियासंजोगो भणिओ तहा भाणियव्वं जाव अहवा रयण० य तमाए
य अहेसत्तमाए य होज्जा १५ अहवा रयणप्पभाए य सकरप्पभाए य वालुय० य
पंकप्पभाए य होज्जा अहवा रयणप्पभाए य सकरप्पभाए य वालुय० य धूसप्पभाए
य होज्जा जाव अहवा रयणप्पभाए य सकरप्पभाए य वालुय० य अहेसत्तमाए य

होज्जा ४ अहवा रयण० य सक्कर० य पंक० य धूमप्पभाए य होज्जा एवं रयणप्पभं
अमुयंतेसु जहा चउण्हं चउक्कसंजोगो तहा भाणियव्वं जाव अहवा रयण० य धूम०
य तमाए य अहेसत्तमाए य होज्जा अहवा रयण० य सक्कर० य वालुय० य पंक०
य धूमप्पभाए य होज्जा १ अहवा रयणप्पभाए य जाव पंक० य तमाए य होज्जा २
अहवा रयण० य जाव पंकप्पभाए य अहेसत्तमाए य होज्जा ३ अहवा रयण० य सक्कर०
य वालुय० य धूम० य तमाए य होज्जा ४ एवं रयणप्पभं अमुयंतेसु जहा पंचण्हं
पच्चगसंजोगो तहा भाणियव्वं जाव अहवा रयण० य पंकप्पभाए य जाव अहेसत्तमाए य
होज्जा अहवा रयण० य सक्कर० य जाव धूमप्पभाए य तमाए य होज्जा १ अहवा
रयण० य जाव धूम० य अहेसत्तमाए य होज्जा २ अहवा रयण० य सक्कर० य जाव
पंक० य तमाए य अहेसत्तमाए य होज्जा ३ अहवा रयण० य सक्कर० य वालुय०
य धूमप्पभाए य तमाए य अहेसत्तमाए य होज्जा ४ अहवा रयण० य सक्कर० य
पंक० य जाव अहेसत्तमाए य होज्जा ५ अहवा रयण० य वालुय० य जाव अहे-
सत्तमाए य होज्जा ६ अहवा रयणप्पभाए य सक्कर० य जाव अहेसत्तमाए य होज्जा
७ ॥ एयस्स णं भंते ! रयणप्पभापुढविनेरइयपवेसणस्स सक्करप्पभापुढवि० जाव
अहेसत्तमापुढविनेरइयपवेसणस्स य कयरे २ जाव विसेसाहिया वा ? गंगेया !
सव्वत्थोवे अहेसत्तमापुढविनेरइयपवेसणए, तमापुढविनेरइयपवेसणए असंखेज्जगुणे,
एवं पडिलोमगं जाव रयणप्पभापुढविनेरइयपवेसणए असंखेज्जगुणे ॥ ३७२ ॥
तिरिक्खजोणियपवेसणए णं भंते ! कइविहे पन्नते ? गंगेया ! पंचविहे पन्नते,
तंजहा-एग्गिंदियतिरिक्खजोणियपवेसणए जाव पंचेदियतिरिक्खजोणियपवेसणए ।
एगे भंते ! तिरिक्खजोणिए तिरिक्खजोणियपवेसणएणं पविसमाणे किं एग्गिंदिएसु
होज्जा जाव पंचिंदिएसु होज्जा ? गंगेया ! एग्गिंदिएसु वा होज्जा जाव पंचिंदिएसु वा
होज्जा । दो भंते ! तिरिक्खजोणिया० पुच्छा, गंगेया ! एग्गिंदिएसु वा होज्जा जाव
पंचिंदिएसु वा होज्जा, अहवा एगे एग्गिंदिएसु होज्जा एगे बेइंदिएसु होज्जा एवं जहा
नेरइयपवेसणए तहा तिरिक्खजोणियपवेसणएवि भाणियव्वे जाव असंखेज्जा ।
उक्कोसा भंते ! तिरिक्खजोणिया० पुच्छा, गंगेया ! सव्वेवि ताव एग्गिंदिएसु होज्जा
अहवा एग्गिंदिएसु य बेइंदिएसु य होज्जा, एवं जहा नेरइया संचारिया तहा तिरिक्ख-
जोणियावि संचारेयव्वा, एग्गिंदिया अमुयंतेसु दुयासंजोगो तियासंजोगो चउक्कसंजोगो
पंचसंजोगो उव(उज्जि)उंजिळण भाणियव्वो जाव अहवा एग्गिंदिएसु य बेइंदिएसु
य जाव पंचिंदिएसु य होज्जा ॥ एयस्स णं भंते ! एग्गिंदियतिरिक्खजोणियपवेसण-
गस्स जाव पंचिंदियतिरिक्खजोणियपवेसणयस्स कयरे २ जाव विसेसाहिया वा ?

गंगेया ! सव्वत्थोवे पंचिदियतिरिक्खजोणियपवेसणए, चउरिंदियतिरिक्खजोणिय०
 विसेसाहिए, तेईदिय० विसेसाहिए, बेईदिय० विसेसाहिए, एगिंदियतिरिक्ख०
 विसेसाहिए ॥ ३७३ ॥ मणुस्सपवेसणए णं भंते ! कइविहे पन्नते ? गंगेया ! दुविहे
 पन्नते, तंजहा-संमुच्छिममणुस्सपवेसणए य गब्भवक्कंतियमणुस्सपवेसणए य । एगे
 भंते ! मणुस्से मणुस्सपवेसणएणं पविसमाणे किं संमुच्छिममणुस्सेसु होज्जा गब्भ-
 वक्कंतियमणुस्सेसु होज्जा ? गंगेया ! संमुच्छिममणुस्सेसु वा होज्जा गब्भवक्कंतियमणु-
 स्सेसु वा होज्जा । दो भंते ! मणुस्सा० पुच्छा, गंगेया ! संमुच्छिममणुस्सेसु वा होज्जा
 गब्भवक्कंतियमणुस्सेसु वा होज्जा अहवा एगे संमुच्छिममणुस्सेसु होज्जा एगे गब्भ-
 वक्कंतियमणुस्सेसु होज्जा, एवं एएणं कमेणं जहा नेरइयपवेसणए तहा मणुस्सपवेसण-
 एवि भाणियव्वे एवं जाव दस ॥ संखेज्जा भंते ! मणुस्सा० पुच्छा, गंगेया !
 संमुच्छिममणुस्सेसु वा होज्जा गब्भवक्कंतियमणुस्सेसु वा होज्जा अहवा एगे संमुच्छि-
 ममणुस्सेसु होज्जा संखेज्जा गब्भवक्कंतियमणुस्सेसु होज्जा अहवा दो संमुच्छिममणु-
 स्सेसु होज्जा संखेज्जा गब्भवक्कंतियमणुस्सेसु होज्जा एवं एक्केकं उस्सारिते (रिए)सु जाव
 अहवा संखेज्जा संमुच्छिममणुस्सेसु होज्जा संखेज्जा गब्भवक्कंतियमणुस्सेसु होज्जा ॥
 असंखेज्जा भंते ! मणुस्सा० पुच्छा, गंगेया ! सव्वेवि ताव संमुच्छिममणुस्सेसु होज्जा
 अहवा असंखेज्जा संमुच्छिममणुस्सेसु एगे गब्भवक्कंतियमणुस्सेसु होज्जा अहवा असं-
 खेज्जा संमुच्छिममणुस्सेसु दो गब्भवक्कंतियमणुस्सेसु होज्जा एवं जाव असंखेज्जा
 संमुच्छिममणुस्सेसु होज्जा संखेज्जा गब्भवक्कंतियमणुस्सेसु होज्जा ॥ उक्कोसा भंते !
 मणुस्सा० पुच्छा, गंगेया ! सव्वेवि ताव संमुच्छिममणुस्सेसु होज्जा अहवा संमुच्छि-
 ममणुस्सेसु य गब्भवक्कंतियमणुस्सेसु य होज्जा । एयस्स णं भंते ! संमुच्छिममणुस्स-
 पवेसणगस्स गब्भवक्कंतियमणुस्सपवेसणगस्स य कयरे २ जाव विसेसाहिया वा ?
 गंगेया ! सव्वत्थोवे गब्भवक्कंतियमणुस्सपवेसणए, संमुच्छिममणुस्सपवेसणए असं-
 खेज्जगुणे ॥ ३७४ ॥ देवपवेसणए णं भंते ! कइविहे पन्नते ? गंगेया ! चउग्विहे
 पन्नते, तंजहा-भवणवासिदेवपवेसणए जाव वेमाणियदेवपवेसणए । एगे भंते ! देवे
 देवपवेसणएणं पविसमाणे किं भवणवासीसु होज्जा वाणमंतरजोइसियवेमाणिएसु
 होज्जा ? गंगेया ! भवणवासीसु वा होज्जा वाणमंतरजोइसियवेमाणिएसु वा होज्जा ।
 दो भंते ! देवा देवपवेसणएणं पुच्छा, गंगेया ! भवणवासीसु वा होज्जा वाणमंतर-
 जोइसियवेमाणिएसु वा होज्जा अहवा एगे भवणवासीसु एगे वाणमंतरेसु होज्जा एवं
 जहा तिरिक्खजोणियपवेसणए तहा देवपवेसणएवि भाणियव्वे जाव असंखेज्जति ॥
 उक्कोसा भंते ! पुच्छा, गंगेया ! सव्वेवि ताव जोइसिएसु होज्जा अहवा जोइसियभ-

वणवासीसु य होज्जा अहवा जोइसियवाणमंतरेसु य होज्जा अहवा जोइसियवेमाणि-
 एसु य होज्जा अहवा जोइसिएसु य भवणवासीसु य वाणमंतरेसु य होज्जा अहवा जोइ-
 सिएसु य भवणवासीसु य वेमाणिएसु य होज्जा अहवा जोइसिएसु य वाणमंतरेसु य
 वेमाणिएसु य होज्जा अहवा जोइसिएसु य भवणवासीसु य वाणमंतरेसु य वेमाणि-
 एसु य होज्जा । एयस्स णं भंते ! भवणवासिदेवपवेसणगस्स वाणमंतरदेवपवेसणगस्स
 जोइसियदेवपवेसणगस्स वेमाणियदेवपवेसणगस्स य कयरे २ जाव विसेसाहिया
 वा ? गंगेया ! सव्वत्थोवे वेमाणियदेवपवेसणए, भवणवासिदेवपवेसणए असंखेज्जगुणे,
 वाणमंतरदेवपवेसणए असंखेज्जगुणे, जोइसियदेवपवेसणए संखेज्जगुणे ॥ ३७५ ॥
 एयस्स णं भंते ! नेरइयपवेसणगस्स तिरिक्ख ० मणुस्स ० देवपवेसणगस्स कयरे कयरे
 जाव विसेसाहिया वा ? गंगेया ! सव्वत्थोवे मणुस्सपवेसणए, नेरइयपवेसणए असंखे-
 ज्जगुणे, देवपवेसणए असंखेज्जगुणे, तिरिक्खजोगियपवेसणए असंखेज्जगुणे ॥ ३७६ ॥
 संतरं भंते ! नेरइया उववज्जंति निरंतरं नेरइया उववज्जंति संतरं असुरकुमारा
 उववज्जंति निरंतरं असुरकुमारा उववज्जंति जाव संतरं वेमाणिया उववज्जंति निरंतरं
 वेमाणिया उववज्जंति संतरं नेरइया उववज्जंति निरंतरं नेरइया उववज्जंति जाव संतरं
 वाणमंतरा उववज्जंति निरंतरं वाणमंतरा उववज्जंति संतरं जोइसिया चर्यंति निरंतरं
 जोइसिया चर्यंति संतरं वेमाणिया चर्यंति निरंतरं वेमाणिया चर्यंति ? गंगेया ! संतरंपि
 नेरइया उववज्जंति निरंतरंपि नेरइया उववज्जंति जाव संतरंपि थणियकुमारा उववज्जंति
 निरंतरंपि थणियकुमारा उववज्जंति नो संतरं पुढविकाइया उववज्जंति निरंतरं पुढ-
 विकाइया उववज्जंति एवं जाव वणस्सइकाइया सेसा जहा नेरइया जाव संतरंपि
 वेमाणिया उववज्जंति निरंतरंपि वेमाणिया उववज्जंति, संतरंपि नेरइया उववज्जंति
 निरंतरंपि नेरइया उववज्जंति एवं जाव थणियकुमारा नो संतरं पुढविकाइया उव-
 वज्जंति निरंतरं पुढविकाइया उववज्जंति एवं जाव वणस्सइकाइया सेसा जहा नेरइया,
 नवरं जोइसियवेमाणिया चर्यंति अभिलावो, जाव संतरंपि वेमाणिया चर्यंति निरंतरंपि
 वेमाणिया चर्यंति ॥ सओ भंते ! नेरइया उववज्जंति असओ भंते ! नेरइया उव-
 वज्जंति ? गंगेया ! सओ नेरइया उववज्जंति नो असओ नेरइया उववज्जंति, एवं जाव
 वेमाणिया, सओ भंते ! नेरइया उववज्जंति असओ नेरइया उववज्जंति ? गंगेया !
 सओ नेरइया उववज्जंति नो असओ नेरइया उववज्जंति, एवं जाव वेमाणिया, नवरं
 जोइसियवेमाणिएसु चर्यंति भाणियव्वं । सओ भंते ! नेरइया उववज्जंति असओ
 भंते ! नेरइया उववज्जंति सओ असुरकुमारा उववज्जंति जाव सओ वेमाणिया उववज्जंति
 असओ वेमाणिया उववज्जंति सओ नेरइया उववज्जंति असओ नेरइया उववज्जंति

सओ असुरकुमारा उववज्जंति जाव सओ वेमाणिया चयंति असओ वेमाणिया चयंति ? गंगेया ! सओ नेरइया उववज्जंति नो असओ नेरइया उववज्जंति सओ असुरकुमारा उववज्जंति नो असओ असुरकुमारा उववज्जंति जाव सओ वेमाणिया उववज्जंति नो असओ वेमाणिया उववज्जंति, सओ नेरइया उववज्जंति नो असओ नेरइया उववज्जंति जाव सओ वेमाणिया चयंति नो असओ वेमाणिया चयंति, से केणट्ठेणं भंते ! एवं वुच्चइ सओ नेरइया उववज्जंति नो असओ नेरइया उववज्जंति जाव सओ वेमाणिया चयंति नो असओ वेमाणिया चयंति ? से नूणं भो ! गंगेया ! पासेणं अरहया पुरिसादाणिणं सासए लोए बुइए अणाइए अणवयग्गे जहा पंचमसए जाव जे लोकइ से लोए, से तेणट्ठेणं गंगेया ! एवं वुच्चइ जाव सओ वेमाणिया चयंति नो असओ वेमाणिया चयंति ॥ सयं भंते ! एए एवं जाणह उदाहु असयं, असोच्चा एए एवं जाणह उदाहु सोच्चा, सओ नेरइया उववज्जंति नो असओ नेरइया उववज्जंति जाव सओ वेमाणिया चयंति नो असओ वेमाणिया चयंति ? गंगेया ! सयं एए एवं जाणामि नो असयं, असोच्चा एए एवं जाणामि नो सोच्चा सओ नेरइया उववज्जंति नो असओ नेरइया उववज्जंति जाव सओ वेमाणिया चयंति नो असओ वेमाणिया चयंति, से केणट्ठेणं भंते ! एवं वुच्चइ तं चेव जाव नो असओ वेमाणिया चयंति ? गंगेया ! केवली णं पुरच्छिमेणं मियंपि जाणइ अभियंपि जाणइ दाहिणेणं एवं जहा स(हु)गड्ढेसए जाव निव्वुडे नाणे केवलिसस, से तेणट्ठेणं गंगेया ! एवं वुच्चइ तं चेव जाव नो असओ वेमाणिया चयंति ॥ सयं भंते ! नेरइया नेरइएसु उववज्जन्ति असयं नेरइया नेरइएसु उववज्जंति ? गंगेया ! सयं नेरइया नेरइएसु उववज्जंति नो असयं नेरइया नेरइएसु उववज्जंति, से केणट्ठेणं भंते ! एवं वुच्चइ जाव उववज्जंति ? गंगेया ! कम्मोदएणं कम्मगुरुयत्ताए कम्मभारियत्ताए कम्मगुरुयत्तंभारियत्ताए असुभाणं कम्माणं उदएणं असुभाणं कम्माणं विवागेणं असुभाणं कम्माणं फलविवागेणं सयं नेरइया नेरइएसु उववज्जंति नो असयं नेरइया नेरइएसु उववज्जंति, से तेणट्ठेणं गंगेया ! जाव उववज्जंति ॥ सयं भंते ! असुरकुमारा० पुच्छा, गंगेया ! सयं असुरकुमारा जाव उववज्जंति नो असयं असुरकुमारा जाव उववज्जंति, से केणट्ठेणं तं चेव जाव उववज्जंति ? गंगेया ! कम्मोदएणं कम्मोवसमेणं कम्मविगईए कम्मविसोहीए कम्मविसुद्धीए सुभाणं कम्माणं उदएणं सुभाणं कम्माणं विवागेणं सुभाणं कम्माणं फलविवागेणं सयं असुरकुमारा असुरकुमारत्ताए जाव उववज्जंति नो असयं असुरकुमारा असुरकुमारत्ताए जाव उववज्जंति, से तेणट्ठेणं जाव उववज्जंति, एवं जाव थणियकुमारा ॥ सयं भंते ! पुढविकाइया० पुच्छा, गंगेया ! सयं पुढविकाइया जाव

उव्वजंति नो असयं जाव उव्वजंति, से केणट्ठेणं भंते ! एवं वुच्चइ जाव उव्वजंति ? गंगेया ! कम्मोदएणं कम्मगुह्यत्ताए कम्मभारियत्ताए कम्मगुह्यसंभारियत्ताए सुभा-
सुभाणं कम्माणं उदएणं सुभासुभाणं कम्माणं विवागेणं सुभासुभाणं कम्माणं फल-
विवागेणं सयं पुढविकाइया जाव उव्वजंति नो असयं पुढविकाइया जाव उव्वजंति,
से तेणट्ठेणं जाव उव्वजंति, एवं जाव मणुस्सा, वाणमंतरजोइसियवेमाणिया
जहा असुरकुमारा, से तेणट्ठेणं गंगेया ! एवं वुच्चइ सयं वेमाणिया जाव उव्वजंति
नो असयं वेमाणिया जाव उव्वजंति ॥ ३७७ ॥ तप्पभिइं च णं से गंगेए अणगारे
समणं भगवं महावीरं पच्चभिजाणइ सव्वण्णू सव्वदरिसी, तए णं से गंगेए अणगारे
समणं भगवं महावीरं तिकखुत्तो आयाहिणं पयाहिणं करेइ करेत्ता वंदइ नमंसइ
वंदिता नमंसित्ता एवं वयासी-इच्छामि णं भंते ! तुज्झं अंतियं चाउज्जामाओ
धम्माओ पंचमहव्वइयं एवं जहा कालासवेसियपुत्ते अणगारे तहेव भाणियव्वं जाव
सव्वदुक्खप्पहीणे ॥ सेवं भंते ! सेवं भंते ! ति ॥ ३७८ ॥ गंगेयो समत्तो ॥ ११३२ ॥

तेणं कालेणं तेणं समएणं माहणकुंडग्गामे णामं नयरे होत्था वन्नओ, बहुसालए
उज्जाणे वन्नओ, तत्थ णं माहणकुंडग्गामे नयरे उसभदत्ते नामं माहणे परिवसइ अट्ठे
दित्ते वित्ते जाव अपरिभूए रिउव्वेयजजुव्वेयसामवेयअथव्वणवेय जहा खन्दओ जाव
अन्नेसु य बहुसु वंभन्नएसु नएसु सुपरिनिट्ठिए समणोवासए अभिगयजीवाजीवे उव-
लद्धपुण्णपात्रे जाव अप्पाणं भावेमाणे विहरइ, तस्स णं उसभदत्तस्स माहणस्स देवा-
णंदा नामं माहणी होत्था, सुकुमालपाणिपाया जाव पियदंसणा सुख्खा समणोवासिया
अभिगयजीवाजीवा उवलद्धपुन्नपावा जाव विहरइ । तेणं कालेणं तेणं समएणं सामी
समोसदे, परिसा जाव पज्जुवासइ, तए णं से उसभदत्ते माहणे इमीसे कहाए लद्धे
समाणे हट्ठ जाव हियए जेणेव देवाणंदा माहणी तेणेव उवागच्छइ २ ता देवाणंदे
माहणि एवं वयासी-एवं खलु देवाणुप्पिए ! समणे भगवं महावीरे आइगरे जाव
सव्वन्न सव्वदरिसी आगासगएणं चक्केणं जाव सुहंसुहेणं विहरमाणे बहुसालए उज्जाणे
अहापडिरुवं उगहं जाव विहरइ, तं महाफलं खलु देवाणुप्पिए ! जाव तहारुवाणं
अरिहंताणं भगवंताणं नामगोयस्सवि सव्वणयाए किमंग पुण अभिगमणवंदणनमंसण-
पडिपुच्छणपज्जुवासणयाए, एगस्सवि आ(य)रियस्स धम्मियस्स सुवयणस्स सव्वण-
याए किमंग पुण विउलस्स अट्ठस्स गहणयाए, तं गच्छामो णं देवाणुप्पिए ! समणं
भगवं महावीरं वंदामो नमंसामो जाव पज्जुवासामो, एयणं इहभवे य परभवे य
हियाए सुहाए खमाए निस्सेसाए आणुगामियत्ताए भविस्सइ । तए णं सा देवाणंदा
माहणी उसभदत्तेणं माहणेणं एवं वुत्ता समाणी हट्ठ जाव हियया करयल जाव कट्ठ

उसभदत्तस्स माहणस्स एयमट्ठं विणएणं पडिसुणेइ, तए णं से उसभदत्ते माहणे
 कोडुंबियपुरिसे सहावेइ कोडुंबियपुरिसे सहावेत्ता एवं वयासी-खिप्पामेव भो देवाण-
 पिपया ! लहुकरणजुत्तजोइयसमखुरवालिहाणसमलिहियसिगेहिं जंबूयायामयकलावजुत्त-
 परिविसिद्धेहिं रययामयघंटसुत्तरज्जुयपवरकंचणनत्थपग्गहोगहियएहिं नीलुप्पलकयासे-
 लएहिं पवरगोगजुवाणएहिं नाणामणि(मय)रयणघंटियाजालपरिगयं सुजायजुग्गजोत्तर-
 ज्जुयजुगपसत्थसुविरइयनिम्मियं पवरलक्खणोवचेयं धम्मियं जाणप्पवरं जुत्तामेव उव-
 ट्ठवेह २ ता मम एयमाणत्तियं पच्चप्पिणह, तए णं ते कोडुंबियपुरिसा उसभदत्तेणं
 माहणेणं एवं जुत्ता समाणा हट्ठ जाव हियया करयल जाव एवं सामी ! तहत्ति आणाए
 विणएणं वयणं जाव पडिसुणेत्ता खिप्पामेव लहुकरणजुत्त जाव धम्मियं जाणप्पवरं
 जुत्तामेव उवट्ठवेत्ता जाव तमाणत्तियं पच्चप्पिणंति, तए णं से उसभदत्ते माहणे ष्हाए
 जाव अप्पमहग्गवाभरणालंकियसरीरे साओ गिहाओ पडिनिक्खमइ साओ गिहाओ
 पडिनिक्खमिता जेणेव बाहिरिया उवट्ठाणसाला जेणेव धम्मिए जाणप्पवरे तेणेव उवा-
 गच्छइ तेणेव उवागच्छिता धम्मियं जाणप्पवरं दुरुढे । तए णं सा देवाणंदा माहणी
 अंतो अंतेउरंसि ष्हाया किंच वरपायपत्तनेउरमणिमेहलाहारविरइयउचियकडगखुट्ठा-
 (इ)यएगावलीकंठसुत्तउरत्थगेवेज्जसोणिसुत्तगनाणामणिरयणभूसणविराइयंभी चीणं-
 सुयवत्थपवरपरिहिया दुग्गल्लसुकुमालउत्तरिज्जा सव्वोउयसुरभिकुसुमव(ध)रियसिरया
 वरचंदणवेदिया वरा(भूसण)भरणभूसियंभी कालागु(ग)रुध्वध्विया सिरिसमाणवेसा
 जाव अप्पमहग्गवाभरणालंकियसरीरा बहूहिं खुजाहिं चिलाइयाहिं वामणियाहिं वडहि-
 याहिं बब्बरियाहिं पओसियाहिं ईसिगणियाहिं जोण्हियाहिं चारु(चास)गणियाहिं पल्ह-
 वियाहिं ल्हासियाहिं लउसियाहिं आरबीहिं दमिलाहिं सिंघलीहिं पुलिंदीहिं पुक्खली-
 (पक्की)हिं बहलीहिं सुरुंदीहिं सबरीहिं पारसीहिं नाणादेसीहिं विदेसपरिपिडियाहिं
 ईगियचिंतियपत्थियवियाणियाहिं संदेसनेवत्थगहियवेसाहिं कुसलाहिं विणीयाहि य
 चेडियाचक्कवालवसिधरथेरकंनुइज्जमहत्तरगविदपरिक्खिता अंतेउराओ निग्गच्छइ
 अंतेउराओ निग्गच्छिता जेणेव बाहिरिया उवट्ठाणसाला जेणेव धम्मिए जाणप्पवरे
 तेणेव उवागच्छइ तेणेव उवागच्छिता जाव धम्मियं जाणप्पवरं दुरुढा ॥ तए णं से
 उसभदत्ते माहणे देवाणंदाए माहणीए सद्धि धम्मियं जाणप्पवरं दुरुढे समाणे णियग-
 परियालसंपरिवुडे माहणकुंडग्गामं नगरं मज्झिमज्जेणं निग्गच्छइ निग्गच्छइता जेणेव
 बहुसालए उज्जाणे तेणेव उवागच्छइ तेणेव उवागच्छइत्ता छत्ताइए तिथयराइसए पा-
 सइछ०२ ता धम्मियं जाणप्पवरं ठवेइ २ ता धम्मियाओ जाणप्पवराओ पक्कीसइध०
 २ ता संसणं भगवं महावीरं पंचविहेणं अभिगमेसां अभि(समा)गच्छइ, तज्जहा-सचित्ताणं

दव्वाणं विउसरण्याए एवं जहा बिइयसए जाव तिबिहाए पज्जुवासण्याए पज्जुवासइ, तए णं सा देवाणंदा माहणी धम्मियाओ जाणप्पवराओ पच्चोरुहइ धम्मियाओ जाणप्पवराओ पच्चोरुहिता बहूहिं खुज्जाहिं जाव महत्तरगवंदपरिक्खिता समणं भगवं महावीरं पंचविहेणं अभिगमेणं अभिगच्छइ, तंजहा-सच्चिताणं दव्वाणं विउसरण्याए, अच्चिताणं दव्वाणं अविमोयण्याए, विणयोगण्याए गायलट्ठीए, चक्खुप्फासे अंजलिपग्गहेणं, मणस्स एगत्तीभावकरणेणं जेणेव समणे भगवं महावीरे तेणेव उवागच्छइ तेणेव उवागच्छिता समणं भगवं महावीरं तिकखुत्तो आयाहिणं पयाहिणं करेइ २ ता वंदइ नमंसइ वंदिता नमंसिता उसभदत्तं माहणं पुरओ कट्ठु ठिया चेव सपरिवारा सुस्ससमाणी णमंसमाणी अभिमुहा विणएणं पंजलिउडा जाव पज्जुवासइ ॥३७९॥ तएणं सा देवाणंदा माहणी आगयपण्हया पप्फुयलोयणा संवरियवलयबाहा कंचुयपरिक्खितिया धाराहयकलंबपुप्फगंपिव स(सुस्ससिय)भूसवियरोमकूवा समणं भगवं महावीरं अणिमिसाए दिट्ठीए देहमाणी २ चिट्ठइ ॥ भंते ! त्ति भगवं गोयमे समणं भगवं महावीरं वंदइ नमंसइ वंदिता नमंसिता एवं वयासी-किण्णं भंते ! एसा देवाणंदा माहणी आगयपण्हया तं चेव जाव रोमकूवा देवाणुप्पिए अणिमिसाए दिट्ठीए देहमाणी २ चिट्ठइ ! गोयमाइ समणे भगवं महावीरे भगवं गोयमं एवं वयासी-एवं खलु गोयमा ! देवाणंदा माहणी मम अम्मगा, अहन्नं देवाणंदाए माहणीए अत्तए, तए णं सा देवाणंदा माहणी तेणं पुव्वपुत्तसिणेहाणुराएणं आगयपण्हया जाव समूसवियरोमकूवा ममं अणिमिसाए दिट्ठीए देहमाणी २ चिट्ठइ ॥ ३८० ॥ तए णं समणे भगवं महावीरे उसभदत्तस्स माहणस्स देवाणंदाए माहणीए तीसे य महइमहालियाए इसिपरिसाए जाव परिसा पडिगया । तए णं से उसभदत्ते माहणे समणस्स भगवओ महावीरस्स अंतियं धम्मं सोच्चा निसम्म हट्ठुट्ठे उट्ठाए उट्ठेइ उट्ठाए उट्ठेत्ता समणं भगवं महावीरं तिकखुत्तो जाव नमंसिता एवं वयासी-एवमेयं भंते ! तहमेयं भंते ! जहा खंदओ जाव से जहेयं तुब्भे वदहत्ति कट्ठु उत्तरपुरच्छिन्नं विसीभागं अवक्कमइ उत्तरपु० २ ता सयमेव आभरणमल्लालंकारं ओमुयइ सयमे० २ ता सयमेव पंचमुट्ठियं लोयं करेइ सयमे० २ ता जेणेव समणे भगवं महावीरे तेणेव उवागच्छइ २ ता समणं भगवं महावीरं तिकखुत्तो आयाहिणं पयाहिणं जाव नमंसिता एवं वयासी-आलित्ते णं भंते ! लोए, पलित्ते णं भंते ! लोए, आलित्तपलित्ते णं भंते ! लोए जराए मरणेण य, एवं एएणं कमेणं जहा खंदओ तहेव पव्वइओ जाव सामाइयमाइयाई एकारस अंगाई अहिज्जइ जाव बहूहिं चउत्थल्लट्ठुमदंसम जाव विच्चित्तेहिं तवोकमेहिं अप्पाणं भावेमाणे बहूइं वासाइं सामन्नपरियागं प्राउणइ २ ता मासियाए संलेहणाए

अत्ताणं झूसेइ मासि० २ ता सट्ठि भत्ताइं अणसणाए छेदेइ सट्ठि० २ ता जस्सट्ठाए
 कीरइ जिणकप्पभावे थेरकप्पभावे जाव तमट्ठं आराहेइ तमट्ठं आराहेत्ता तए
 णं सो जाव सव्वदुक्खप्पहीणे । तए णं सा देवाणंदा माहणी समणस्स भगवओ
 महावीरस्स अंतियं धम्मं सोच्चा निसम्म हट्ठुट्ठा समणं भगवं महावीरं तिव्वुत्तो
 आयाहिणं पयाहिणं जाव नमंसित्ता एवं वयासी-एवमेयं भंते ! तहमेयं भंते ! एवं
 जहा उसभदत्तो तहेव जाव धम्ममाइ(क्खइ)क्खियं । तए णं समणे भगवं महावीरे
 देवाणंदं माहणिं सयमेव पव्वावेइ सय० २ ता सयमेव अज्जचंदणाए अज्जाए
 सीसिणित्ताए दलयइ ॥ तए णं सा अज्जचंदणा अज्जा देवाणंदं माहणिं सयमेव
 मुंडावेइ सयमेव सेहावेइ एवं जहेव उसभदत्तो तहेव अज्जचंदणाए अज्जाए इमं
 एयारूवं धम्मियं उवएसं सम्मं संपडिवज्जइ तमाणाए तह गच्छइ जाव संजमेणं
 संजमेइ, तए णं सा देवाणंदा अज्जा अज्जचंदणाए अज्जाए अंतियं सामाइयमा-
 इयाइ एक्कारस अंगाई अहिज्जइ सेसं तं चेव जाव सव्वदुक्खप्पहीणा ॥ ३८१ ॥
 तस्स णं माहणकुंडग्गामस्स नगरस्स पच्चत्थिमेणं एत्थ णं खत्तियकुंडग्गामे नामं
 नगरे होत्था वन्नओ, तत्थ णं खत्तियकुंडग्गामे नयरे जमाली नामं खत्तियकुमारे
 परिवसइ अट्ठे दिते जाव अपरिभूए उप्पि पासायवरगए फुट्टमाणेहिं मुइगमत्थएहिं
 बत्तीसइबदेहिं नाडएहिं णाणाविहवरतरुणीसंपउत्तेहिं उवनच्चिज्जमाणे उवनच्चिज्जमाणे
 उवगिज्जमाणे २ उवलालिज्जमाणे २ पाउसवासारत्तसरयहेमंतसिसिरवसंतगिम्हपज्जते
 छप्पिउऊ जहा विभवैणं माणमाणे २ कालं गाळेमाणे इट्ठे सट्ठफरिसरसरूवगंधे पंच-
 विहे माणुस्सए कामभोगे पच्चणुब्भवमाणे विहरइ । तए णं खत्तियकुंडग्गामे नगरे
 सिंघाडगतिचउक्कचच्चर जाव बहुजणसहेइ वा जहा उववाइए जाव एवं पन्नवेइ एवं
 पल्लवेइ-एवं खलु देवाणुप्पिया ! समणे भगवं महावीरे आइगरे जाव सव्वभू सव्व-
 दरिसी माहणकुंडग्गामस्स नगरस्स बहिया बहुसालए उज्जाणे अहापडिरूवं जाव
 विहरइ, तं महप्फलं खलु देवाणुप्पिया ! तहारूवाणं अरहंताणं भगवंताणं जहा उव-
 वाइए जाव एगामिमुहे खत्तियकुंडग्गामं नगरं मज्झंमज्झेणं निगगच्छइ निगग-
 च्छित्ता जेणेव माहणकुंडग्गामे नगरे जेणेव बहुसालए उज्जाणे एवं जहा उववाइए
 जाव तिविहाए पज्जुवासणाए पज्जुवासइ । तए णं तस्स जमालिस्स खत्तियकुमारस्स
 तं महया जणसई वा जाव जणसन्निवायं वा सुणमाणस्स वा पासमाणस्स वा अय-
 मेयारूवे अज्झत्थिइ जाव समुप्पज्जित्था-किन्नं अज्ज खत्तियकुंडग्गामे नगरे इंदम-
 हेइ वा खंदमहेइ वा मुयंदमहेइ वा णागमहेइ वा जक्खमहेइ वा भूयमहेइ वा
 कूवमहेइ वा तडागमहेइ वा नइमहेइ वा दहमहेइ वा पव्वयमहेइ वा ख्वममहेइ वा

श्रुभमहेइ वा जणं एए बहवे उग्गा भोगा राइन्ना इक्खागा णाया कोरव्वा खत्तिया
 खत्तियपुत्ता भडा भडपुत्ता० जहा उववाइए जाव सत्थवाहप्पभिइ(य)ओ ण्हाया
 जहा उववाइए जाव निग्गच्छंति ? एवं सपेहेइ एवं सपेहिता कंचुइजपुरिसं सद्दावेइ
 कंचु० २ ता एवं वयासी-किणं देवाणुप्पिया ! अज्ज खत्तियकुंडग्गामे नगरे इंदमहेइ
 वा जाव निग्गच्छंति ? तए णं से कंचुइजपुरिसे जमालिणा खत्तियकुमारेणं एवं वुत्ते
 समाणे हट्टुट्टे समणस्स भगवओ महावीरस्स आगमणगहियविणिच्छए करयल०
 जमालि खत्तियकुमारं जएणं विजएणं वद्धावेइ वद्धावेत्ता एवं वयासी-णो खलु देवा-
 णुप्पिया ! अज्ज खत्तियकुंडग्गामे नगरे इंदमहेइ वा जाव निग्गच्छन्ति, एवं खलु
 देवाणुप्पिया ! अज्ज समणे भगवं महावीरे जाव सव्वच्चू सव्वदरिसी माहणकुंडग्गा-
 मस्स नयरस्स बहिया बहुसालए उज्जाणे अहापडिरुवं उग्गहं जाव विहरइ, तए णं
 एए बहवे उग्गा भोगा जाव अप्पेगइया वंदणवत्तियं जाव निग्गच्छंति । तए णं से
 जमाली खत्तियकुमारं कंचुइजपुरिसस्स अंतिए एयमट्ठं सोच्चा निसम्म हट्टुट्टु०
 कोडुंबियपुरिसे सद्दावेइ कोडुंबियपुरिसे सद्दावइत्ता एवं वयासी-खिप्पामेव भो देवाणु-
 प्पिया ! चाउग्घंटं आसरहं जुत्तामेव उवट्टवेह उवट्टवेत्ता मम एयमाणत्तियं पच्चप्पि-
 ण्ह, तए णं ते कोडुंबियपुरिसा जमालिणा खत्तियकुमारेणं एवं वुत्ता समाणा जाव
 पच्चप्पिणंति, तए णं से जमाली खत्तियकुमारं जेणेव मज्जणघरे तेणेव उवागच्छइ
 तेणेव उवागच्छिता ण्हाए जहा उववाइए परिसावन्नओ तहा भाणियव्वं जाव चंदणु-
 निक्खत्ते)णाकिन्नगायसरीरे सव्वाल्लकारविभूसिए मज्जणघराओ पडिनिक्खमइ मज्जणघ-
 रांओ पडिनिक्खमित्ता जेणेव बाहिरिया उवट्ठाणसाला जेणेव चाउग्घंटे आसरहे तेणेव
 उवागच्छइ तेणेव उवागच्छिता चाउग्घंटं आसरहं दुरुहेइ चाउ० २ ता सकोरं-
 मल्लदामेणं छत्तेणं धरिजमाणेणं महया भडचडगरपहकरवंदपरिक्खित्ते खत्तियकुंड-
 ग्गामं नगरं मज्जंमज्जेणं निग्गच्छइ निग्गच्छिता जेणेव माहणकुंडग्गामे नगरे
 जेणेव बहुसालए उज्जाणे तेणेव उवागच्छइ तेणेव उवागच्छिता तुरए निगिहेइ २
 ता रहं ठवेइ रहं ठवेत्ता रहाओ पच्चोरहइ रहा० २ ता पुप्फंतंबोलाउहमाइयं
 वा(णहा)हणाओ य विसज्जेइ २ ता एगसाडियं उत्तरासंगं करेइ उत्तरासंगं करेत्ता
 आयंते चोक्खे परमसुइब्भूए अंजलिमउल्लियहत्थे जेणेव समणे भगवं महावीरे तेणेव
 उवागच्छइ तेणेव उवागच्छिता समणं भगवं महावीरं तिक्खुतो आयाहिणं पया-
 हिणं करेइ २ ता जाव तिविहाए पज्जुवासणाए पज्जुवासइ । तए णं समणे
 भगवं महावीरे जमालिस्स खत्तियकुमारस्स तीसे य महइमहालियाए इसि० जाव
 धम्मकहा जाव परिसा पडिगया, तए णं से जमाली खत्तियकुमारं समणस्स भग-

वओ महावीरस्स अंतियं धम्मं सोच्चा निसम्म हट्ठ जाव हियए उट्ठाए उट्ठेइ उट्ठाए
उट्ठेत्ता समणं भगवं महावीरं तिक्खुत्तो जाव नमंसित्ता एवं वयासी-सहहामि णं
भंते ! निग्गंथं पावयणं, पत्तियामि णं भंते ! निग्गंथं पावयणं, रोएमि णं भंते !
निग्गंथं पावयणं, अब्भुट्ठेमि णं भंते ! निग्गंथं पावयणं, एवमेयं भंते ! तहमेयं भंते !
अवित्तहमेयं भंते ! असंदिद्धमेयं भंते ! जाव् से जहेयं तुब्भे वदह, जं नवरं देवाणु-
प्पिया ! अम्मापियरो आपुच्छामि । तए णं अहं देवाणुप्पियाणं अंतियं मुंडे भविता
अगाराओ अणगारियं पव्वयामि, अहासुहं देवाणुप्पिया ! मा पडिवंधं ॥ ३८२ ॥
तए णं से जमाली खत्तियकुमारं समणेणं भगवया महावीरेणं एवं वुत्ते समाणे हट्ठ-
तुट्ठे जाव समणं भगवं महावीरं तिक्खुत्तो जाव नमंसित्ता तमेव चाउग्घटं आसरहं
दुरुहेइ दुरुहिता समणस्स भगवओ महावीरस्स अंतियाओ बहुसालाओ उज्जाणाओ
पडिनिक्खमइ पडिनिक्खमिता सकोरंट० जाव धरिजमाणेणं महया भडचडगर जाव
परिक्खिते जेणेव खत्तियकुंडग्गामे नयरे तेणेव उवागच्छइ तेणेव उवागच्छित्ता
खत्तियकुंडग्गामं नगरं मज्झिमज्जेणं जेणेव सए गिहे जेणेव बाहिरिया उवट्ठाणसाला
तेणेव उवागच्छइ तेणेव उवागच्छित्ता तुरए निगिण्हइ तुरए निगिण्हित्ता रहं ठवेइ
रहं ठवेत्ता रहाओ पच्चोरुहइ रहाओ पच्चोरुहिता जेणेव अर्द्धिभतरिया उवट्ठाणसाला
जेणेव अम्मापियरो तेणेव उवागच्छइ तेणेव उवागच्छित्ता अम्मापियरो जएणं
विजएणं वद्धावेइ वद्धावेत्ता एवं वयासी-एवं खलु अम्मताओ ! मए समणस्स भग-
वओ महावीरस्स अंतियं धम्मे निसंते, सेवि य मे धम्मे इच्छिए पडिच्छिए
अभिरुइए, तए णं तं जमालिं खत्तियकुमारं अम्मापियरो एवं वयासी-धत्तेसि णं
तुमं जाया ! कयत्थेसि णं तुमं जाया ! कयपुत्तेसि णं तुमं जाया ! कयलक्खणेसि
णं तुमं जाया ! जज्जं तुमे समणस्स भगवओ महावीरस्स अंतियं धम्मे निसंते सेवि
य धम्मे इच्छिए पडिच्छिए अभिरुइए, तए णं से जमाली खत्तियकुमारं अम्मापियरो
दोच्चंपि एवं वयासी-एवं खलु सए अम्मताओ ! समणस्स भगवओ महावीरस्स
अंतिए धम्मे निसंते जाव अभिरुइए, तए णं अहं अम्मताओ ! संसारभयउव्विग्गे
सीए जम्मजरामरणेणं तं इच्छामि णं अम्म ! ताओ ! तुब्भेहिं अब्भणुत्ताए समाणे
समणस्स भगवओ महावीरस्स अंतिए मुंडे भविता अगाराओ अणगारियं पव्वइतए ।
तए णं सा जमालिस्स खत्तियकुमारस्स माया तं अणिट्ठं अकंतं अपियं अमणुक्कं
अमणामं असुयपुव्वं गिरं सोच्चा निसम्म सेयागयरोमकूवपगलंतविलीणत्ता सोगभर-
पवेवियंगमंगी नित्तैया क्षीणविमणवयणा करयलमलियव्व कमलमाला तक्खणओलुग-
दुब्बलसरीरलायन्नसुज्जनिच्छाया गयसिरीया पसिठिलभूषणप(डिय)उंतखुणिययसंनु-

न्नियधवलवल्यपब्भट्टउत्तरिजा मुच्छावसणट्ठचेयगु(ग)रुई सुकुमालविकिञ्चकेसहत्था
 परसुणियत्तव्व चंपगलया निव्वत्तमहे व्व इंदलट्ठी विमुक्कसंभिवंधणा कोट्टिमत्तलंसि
 धसत्ति सव्वंगेहिं संनिवड्डिया, तए णं सा जमालिस्स खत्तियकुमारस्स माया ससंभ-
 मोयत्तियाए तुरियं कंचणभिगारमुहविणिग्गयसीयलविमलजलधारपरिसिंचमाणत्ति-
 व्वावियगायलट्ठी उक्खेवयतालियंठवीयणगजणियवाएणं सफुसिएणं अंतेउरपरिजणेणं
 आसासिया समाणी रोयमाणी कंदमाणी सोयमाणी विलवमाणी जमालिं खत्ति-
 कुमारं एवं वयासी—तुमंसि णं जाया ! अम्हं एगे पुत्ते इट्ठे कंते पिए मणुजे मणाये
 थेजे वेसासिए संमए बहुमए अणुमए भंडकरंडगसमाणे रयणे रयणभूए जीविउस-
 विए हिययानंदिजणणे उंबरपुप्फमिव दुल्लहे सवणयाए किमंग पुण पासणयाए, तं
 नो खलु जाया ! अम्हे इच्छामो तुज्झं खणमवि विप्पओगं, तं अच्छाहि ताव
 जाया ! जाव ताव अम्हे जीवामो, तओ पच्छा अम्हेहिं कालगएहिं समाणेहिं
 परिणयवए वड्ढियकुलवंसतंतुकज्जंमि निरवयक्खे समणस्स भगवओ महावीरस्स
 अंतिए मुंडे भवित्ता अगाराओ अणगारियं पव्वइहिसि । तए णं से जमाली खत्ति-
 कुमारे अम्मापियरो एवं वयासी—तहावि णं तं अम्म ! ताओ ! जणं तुब्भे ममं
 एवं वदह तुमंसि णं जाया ! अम्हं एगे पुत्ते इट्ठे कंते तं चेव जाव पव्वइहिसि,
 एवं खलु अम्म ! ताओ ! माणुस्सए भवे अणेगजाइजरामरणरोगसारीरमाणसप-
 कामदुक्खवेयणवसणसओवद्वाभिभूए अधुवे अणिइए असासए संज्ञभमरागसरिसे
 जलबुब्बुयसमाणे कुसग्गजलबिंदुसन्निभे सुविणगदंसणोवमे विजुलयाचंचले अणिच्चे
 सडणपडणविद्धंसणधम्मो पुर्व्वि वा पच्छा वा अवस्सं विप्पजहियव्वे भविस्सइ, से
 केस णं जाणइ अम्म ! ताओ ! के पुर्व्वि गमणयाए के पच्छा गमणयाए, तं
 इच्छामि णं अम्मताओ ! तुब्भेहिं अब्भणुजाए समाणे समणस्स भगवओ महा-
 वीरस्स जाव पव्वइत्तए । तए णं तं जमालिं खत्तियकुमारं अम्मापियरो एवं
 वयासी—इमं च णं ते जाया ! सरीरगं पविसिट्ठरूवलक्खणवंजणगुणोववेयं उत्तम-
 बलवीरियसत्तजुतं विण्णाणवियक्खणं ससोहग्गगुणसमुत्तियं अभिजायमहक्खमं
 विविहवाहिरोगरहियं निरुवहयउदत्तलट्ठं पंचिदियपडुपढमजोव्वणत्थं अणेगउत्तम-
 गुणेहिं संजुतं तं अणुहोहि ताव जाव जाया ! नियगसरीररूवसोहग्गजोव्वणगुणे,
 तओ पच्छा अणुभूयनियगसरीररूवसोहग्गजोव्वणगुणे अम्हेहिं कालगएहिं समाणेहिं
 परिणयवए वड्ढियकुलवंसतंतुकज्जंमि निरवयक्खे समणस्स भगवओ महावीरस्स
 अंतियं मुंडे भवित्ता अगाराओ अणगारियं पव्वइहिसि, तए णं से जमाली खत्ति-
 कुमारे अम्मापियरो एवं वयासी—तहावि णं तं अम्मताओ ! जज्जं तुब्भे ममं एवं

वदह—इमं च णं ते जाया । सरीरं तं चेव जाव पव्वइहिसि, एवं खलु अम्म-
ताओ । माणुस्सं सरीरं दुक्खाययणं विविहवाहिसयसंनिकेयं अट्टियकट्टुट्टियं छिरा-
णहारुजालओणद्धसंपिणद्धं मट्टियभंडं व दुब्बलं असुइसंकिलिट्ठं अणिट्टवियसव्व-
कालसंठप्पयं जराकुणिमज्जरघरं व सडणपडणविद्धसंनधम्मं पुत्वि वा पच्छा वा
अवस्सं विप्पजहियव्वं भविस्सइ, से केस णं जाणइ, अम्मताओ ! के पुत्वि तं चेव
जाव पव्वइत्तए । तए णं तं जमालिं खत्तियकुमारं अम्मापियरो एवं वयासी—
इमाओ य ते जाया ! विउलकुलबालियाओ सरिसयाओ सरित्तयाओ सरिव्वयाओ
सरिसलावन्नरुवजोव्वणगुणोव्वेयाओ सरिसएहिंतो अ कुलेहिंतो आणिएल्लियाओ
कलकुसलसव्वकाललालियसुहोचियाओ मद्दवगुणजुत्तानिउणविणओवयारपंडियविय-
क्खणाओ मंजुलमियमहुरभणियविहसियविप्पेक्खियगइविलासचिट्ठियविसारयाओ
अविकलकुलसीलसालिणीओ विसुद्धकुलवंससंताणतंतुवद्धणप्पग(ब्भु)ब्भव(य)प्प-भा-
विणीओ मणाणुकूलहियइच्छियाओ अट्ट तुज्ज गुणवल्लहाओ उत्तमाओ तिच्चं भावाणु-
(रत्त)त्तरसव्वंगसुंदरीओ भारियाओ, तं भुंजाहि ताव जाव जाया ! एयाहिं सद्धिं विउळे
माणुस्सए कामभोगे, तओ पच्छा भुत्तभोगी विसयविगयवोच्छिन्नकोउहल्ले अम्हेहिं
कालगएहिं जाव पव्वइहिसि । तए णं से जमाली खत्तियकुमारं अम्मापियरो एवं
वयासी—तहावि णं तं अम्म ! ताओ ! जन्नं तुब्भे मम एवं वयह इमाओ य ते जाया !
विउलकुल जाव पव्वइहिसि, एवं खलु अम्म ! ताओ ! माणुस्सया कामभोगा असुइ
असासया वंतासवा पित्तासवा खेलासवा सुक्कासवा सोणियासवा उच्चारपासवणखे-
लसिंघाणगवंतपित्तपूयसुक्कसोणियसमुब्भवा अमणुज्जदुरुव्वमुत्तपूइयपुरीसपुजा मयगंधु-
स्सासअसुभानिस्सासउव्वेयणगा बीमच्छा अप्पकालिया लहूसगा कलमलाहिया सट्ठ-
क्खबहुजणसाहारणा परिकिलेसकिच्छदुक्खसज्झा अबुहजणणिसेविद्या सयां साहुग-
रहणिज्जा अणंतसंसारवद्धणा कडुयफलविवागा चु(ड)डलिव्व अमुच्चमाणदुक्खाणु-
वंधिणो सिद्धिगमणविग्धा, से केस णं जाणइ अम्मताओ ! के पुत्वि गमण्याए के
पच्छा गमण्याए, तं इच्छामि णं अम्मताओ ! जाव पव्वइत्तए । तए णं तं जमालिं
खत्तियकुमारं अम्मापियरो एवं वयासी—इमे य ते जाया ! अज्जयपज्जयपिउपज्ज-
यागए बहु हिरन्ने य सुवन्ने य कंसे य दूसे य विउलधणकणग जाव संतसारसावएज्जे
अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिक्खाएउं
तं अणुहोहि ताव जाया ! विउळे माणुस्सए इहिसिक्कारसमुदए, तओ पच्छा अणुभूय-
क्खण्णे वट्ठियकुलवंसतंतु जाव पव्वइहिसि । तए णं से जमाली खत्तियकुमारं अम्मा-
पियरो एवं वयासी—तहावि णं तं अम्मताओ ! जन्नं तुब्भे मम एवं वदह—इमं

च ते जाया ! अज्ययपज्य जाव पव्वइहिसि, एवं खलु अम्मताओ ! हिरणे य सुवणे
 य जाव सावएजे अग्गिसाहिणं चोरसाहिणं रायसाहिणं मच्चुसाहिणं दाइयसाहिणं
 अग्गिसामन्ने जाव दाइयसामन्ने अणुवे अण्णिए असासए पुव्वि वा पच्छा वा
 अवस्सं विप्पजहियव्वे भविस्सइ, से केसं णं जाणइ तं चेव जाव पव्वइत्तए । तए
 णं तं जमालिं खत्तियकुमारं अम्मताओ जाहे नो संचाएन्ति विसयाणुलोमाहिं बहूहिं
 आघवणाहिं य पन्नवणाहिं य सन्नवणाहिं य विन्नवणाहिं य आघवेत्तए वा पन्नवेत्तए
 वा सन्नवेत्तए वा विन्नवेत्तए वा ताहे विसयपडिकूलाहिं संजमभयउव्वेयणकराहिं
 पन्नवणाहिं पन्नवेमाणा एवं वयासी—एवं खलु जाया ! निग्गंथे पावयणे सच्चे अणु-
 त्तरे केवले जहा आवस्सए जाव सव्वदुक्खाणमंतं करेति अहीव एगंतदिट्ठीए खुरो
 इव एगंतधाराए लोहमया जवा चावेयव्वा वालुयाकवले इव निस्सा(रे)ए गंगा वा
 महानई पडिसोयगमण्याए महासमुदोव्व भुयाहिं दुत्तरो तिक्खं कमियव्वं ग(गु)र्यं
 लंबेयव्वं असिधारणं वयं चरियव्वं, नो खलु कप्पइ जाया ! समणाणं निग्गंधाणं
 आहाकम्मिए वा उदेसिए वा मिस्सजाएइ वा अज्झोयरएइ वा पूइएइ वा कीएइ
 वा पामिचेइ वा अच्छेजेइ वा अणिसिद्धेइ वा अभिहडेइ वा कंतारभत्तेइ वा दुब्बिक्ख-
 भत्तेइ वा गिलाणभत्तेइ वा वदलियाभत्तेइ वा पाहुणगभत्तेइ वा सेजायरपिंडेइ वा
 रायपिंडेइ वा मूलभोयणेइ वा कंदभोयणेइ वा फलभोयणेइ वा बीयभोयणेइ वा हरिय-
 भोयणेइ वा भुत्तए वा प्रायए वा, तुमं च णं जाया ! सुहसमुच्चिए णो चेव णं दुह-
 समुच्चिए नालं सीर्यं नालं उण्हं नालं खुहा नालं पिवासा नालं चोरा नालं वाला नालं
 दंसा नालं मसगा नालं वाइयपित्तियसेंभियसन्निवाइए विविहे रोगायंके परीसहोवसग्गे
 उदिन्ने अहियासेत्तए, तं नो खलु जाया ! अम्हे इच्छामो तुज्झं खणमवि विप्पओगं
 तं अच्छाहिं ताव जाया ! जाव ताव अम्हे जीवामो, तओ पच्छा अम्हेहिं कालगएहिं
 जाव पव्वइहिसि । तए णं से जमाली खत्तियकुमारं अम्मापियरो एवं वयासी-
 तहावि णं तं अम्म ! ताओ ! जन्नं तुज्झे ममं एवं वयह—एवं खलु जाया ! निग्गंथे
 पावयणे सच्चे अणुत्तरे केवले तं चेव जाव पव्वइहिसि, एवं खलु अम्मताओ ! निग्गंथे
 पावयणे कीवाणं कायराणं कापुरिसाणं इहलोगपडिबद्धाणं परलोगपरमुहाणं विसय-
 तिसियाणं दुरणुचरे पांगयजणस्स, धीरस्स निच्छियस्स ववसियस्स नो खलु एत्थं
 किंचिवि दुक्करं करणयाए, तं इच्छामि णं अम्म ! ताओ ! तुब्भेहिं अब्भणुन्नाए समाणे
 समणस्स भगवओ महावीरस्स जाव पव्वइत्तए । तए णं तं जमालिं खत्तियकुमारं
 अम्मापियरो जाहे नो संचाएन्ति विसयाणुलोमाहिं य विसयपडिकूलाहिं य बहूहिं
 आघवणाहिं य पन्नवणाहिं य ४ आघवेत्तए वा जाव विन्नवेत्तए वा ताहे अकामए

चेव जमालिस्स खत्तियकुमारस्स निक्खमणं अणुमन्तिथा ॥ ३८३ ॥ तए णं तस्स जमालिस्स खत्तियकुमारस्स पिया कोडुंबियपुरिसे सद्दावेइ सद्दावेत्ता एवं वयासी-
खिप्पामेव भो देवाणुप्पिया ! खत्तियकुंडग्गामं नगरं सन्निभतरबाहिरियं आसिय-
संमज्जिओवलितं जहा उववाइए जाव पच्चप्पिणंति, तए णं से जमालिस्स खत्तिय-
कुमारस्स पिया दोच्चं पि कोडुंबियपुरिसे सद्दावेइ सद्दावेत्ता एवं वयासी-खिप्पामेव भो
देवाणुप्पिया ! जमालिस्स खत्तियकुमारस्स महत्थं महत्थं महत्थं विपुलं निक्खमणा-
भिसेयं उवट्ठवेह, तए णं ते कोडुंबियपुरिसा तहेव जाव पच्चप्पिणंति, तए णं तं जमालि-
खत्तियकुमारं अम्मापियरो सीहासणवरंसि पुरत्थाभिमुहं निसीयावेंति निसीयावेत्ता
अट्ठसएणं सोवज्जियाणं कलसाणं एवं जहा रायप्पसेणइजे जाव अट्ठसएणं भोमेज्जाणं
कलसाणं सव्विद्धीए जाव रवेणं महया महया निक्खमणाभिसेगेणं अभिसिंचन्ति
निक्खमणाभिसेगेणं अभिसिंचित्ता करयल जाव जएणं विजएणं वद्धावेन्ति, जएणं
विजएणं वद्धावेत्ता एवं वयासी-भण जाया ! किं देमो किं पयच्छामो किणा वा
ते अट्ठो ? तए णं से जमाली खत्तियकुमारे अम्मापियरो एवं वयासी-इच्छामि णं
अम्म ! ताओ ! कुत्तियावणाओ रयहरणं च पडिग्गहं च आणेउं कासवगं च सद्दा-
विउं, तए णं से जमालिस्स खत्तियकुमारस्स पिया कोडुंबियपुरिसे सद्दावेइ सद्दावेत्ता
एवं वयासी-खिप्पामेव भो देवाणुप्पिया ! सिरिघराओ तिन्नि सयसहस्साइं गहाय
दोहिं सयसहस्सेहिं कुत्तियावणाओ रयहरणं च पडिग्गहं च आणेह सयसहस्सेणं
कासवगं च सद्दावेह, तए णं ते कोडुंबियपुरिसा जमालिस्स खत्तियकुमारस्स पिउणा
एवं वुत्ता समाणा हट्ठुट्ठा करयल जाव पडिउणेत्ता खिप्पामेव सिरिघराओ तिन्नि
सयसहस्साइं तहेव जाव कासवगं सद्दावेंति । तए णं से कासवए जमालिस्स
खत्तियकुमारस्स पिउणा कोडुंबियपुरिसेहिं सद्दाविए समाणे हट्ठे तुट्ठे ण्हाए जाव
सरीरे जेणेव जमालिस्स खत्तियकुमारस्स पिया तेणेव उवागच्छइ तेणेव उवा-
गच्छित्ता करयल० जमालिस्स खत्तियकुमारस्स पियरं जएणं विजएणं वद्धावेइ जएणं
विजएणं वद्धावित्ता एवं वयासी-संदिसंतु णं देवाणुप्पिया ! जं मए करणिजं, तए
णं से जमालिस्स खत्तियकुमारस्स पिया तं कासवगं एवं वयासी-तुमं देवाणुप्पिया !
जमालिस्स खत्तियकुमारस्स परेणं जत्तेणं चउरंगुलवजे निक्खमणपओगे अगक्केसे
(कप्पेह) पडिक्पेहि, तए णं से कासवए जमालिस्स खत्तियकुमारस्स पिउणा एवं
वुत्ते समाणे हट्ठुट्ठे करयल जाव एवं सामी ! तहत्ति आणाए विणएणं वयणं पडिउणेइ
३ ता सुरभिणा पंधोदएणं हत्थंपाए पक्खालेइ सुरभिणा० ३ ता सुद्धाए अट्ठपडलाए
प्रेतीए मुहं बंधइ मुहं बंधित्ता जमालिस्स खत्तियकुमारस्स परेणं जत्तेणं चउ-

रंगुलवज्जे निक्खमणपओगे अग्गकेसे कप्पेइ । तए णं सा जमालिस्स खत्तियकुमा-
 रस्स माया हंसलक्खणेणं पडसाडएणं अग्गकेसे पडिच्छइ अग्गकेसे पडिच्छित्ता
 सुरभिणा गंधोदएणं पक्खालेइ सुरभिणा गंधोदएणं पक्खालेत्ता अग्गेहिं वरेहिं गंधेहिं
 मल्लेहिं अच्चेइ २ ता सुद्धवत्थेणं बंधेइ सुद्धवत्थेणं बंधित्ता रयणकरंडगंसि पक्खिवइ
 २ ता हारवारिधारसिंदुवारछिन्नमुत्तावलप्पगासाइं सुयविओगदूसहाइं अंसइं
 विणिम्मुयमाणी २ एवं वयासी-एस णं अम्हं जमालिस्स खत्तियकुमारस्स बहूसु
 तिहीसु य पव्वणीसु य उस्सवेसु य जजेसु य छणेसु य अपच्छिमे दरिसणे भविस्स-
 तीतिकट्ठ ओसीसगमुले ठवेइ, तए णं तस्स जमालिस्स खत्तियकुमारस्स अम्मापि-
 यरो दोच्चंपि उत्तरावक्कमणं सीहासणं रयावेंति २ ता दोच्चंपि जमालिं खत्तियकुमारं
 सीयापीयएहिं कलसेहिं ण्हाणेंति सीयापीयएहिं कलसेहिं ण्हावेत्ता पम्हलसुकुमालाए
 सुरभिएणं गंधकासाइएणं गायाइं ल्हेंति सुरभिएणं गंधकासाइएणं गायाइं ल्हेत्ता
 सरसेणं गोसीसचंदणेणं गायाइं अणुलिंपन्ति गायाइं अणुलिंपित्ता नासानिस्सासवा-
 यवोच्चं चक्खुरं वन्नफरिसजुतं ह्यलालापेलवाइरेणं धवलं कणगखचियंतकम्मं
 महुरिहं हंसलक्खणपडसाडगं परिहिंति २ ता हारं पिणद्धेंति २ ता अद्धहारं पिणद्धेंति
 २ ता० एवं जहा सूरियाभस्स अलंकारो तहेव जाव चित्तं रयणसंकड्ढकं मउडं
 पिणद्धेंति, किं बहुणा गंथिमवेढिमपूरिमसंघाइमेणं चउव्विहेणं मल्लेणं कप्पस्खगं पिव
 अलंकियविभूसियं करेंति । तए णं से जमालिस्स खत्तियकुमारस्स पिया कोडुंबिय-
 पुरिसे सद्दवेइ सद्दवेत्ता एवं वयासी-खिप्पामेव भो देवाणुप्पिया ! अणेगखंभसय-
 सन्नविट्ठं लीलट्टियसालिभंजियागं जहा रायप्पसेणइज्जे विमाणवन्नओ जाव मणिरय-
 णधंटियाजालपरिक्खित्तं पुरिससहस्सवाहिणीयं सीयं उवट्टवेह उवट्टवेत्ता मम एयमा-
 णत्तियं पच्चप्पिणह, तए णं ते कोडुंबियपुरिसा जाव पच्चप्पिणंति । तए णं से जमाली
 खत्तियकुमारि केसालंकारेणं वत्थालंकारेणं मल्लालंकारेणं आभरणालंकारेणं चउव्वि-
 हेणं अलंकारेणं अलंकारिए समाणे पडिपुञ्जालंकारे सीहासणाओ अब्भुट्ठेइ सीहास-
 णाओ अब्भुट्ठेत्ता सीयं अणुप्पयाहिणीकरेमाणे सीयं दुरूहइ २ ता सीहासणवरंसि
 पुरत्थाभिमुहे सन्निसण्णे । तए णं तस्स जमालिस्स खत्तियकुमारस्स माया ण्हाया
 जाव सरीरा हंसलक्खणं पडसाडगं गहाय सीयं अणुप्पयाहिणीकरेमाणी सीयं
 दुरूहइ सीयं दुरूहिता जमालिस्स खत्तियकुमारस्स दाहिणे पासे भ्हासणवरंसि संनि-
 सत्ता, तए णं तस्स जमालिस्स खत्तियकुमारस्स अम्मधाइं ण्हाया जाव सरीरा
 रयहरणं च पडिग्गहं च गहाय सीयं अणुप्पयाहिणी करेमाणी सीयं दुरूहइ सीयं
 दुरूहिता जमालिस्स खत्तियकुमारस्स वामे पासे भ्हासणवरंसि संनिसत्ता । तए णं

तस्स जमालिस्स खत्तियकुमारस्स पिट्ठो एगा वरतरुणी सिंगारागारचारुवेसा
संगयय जाव रुवजोव्वणविलासकलिया सुंदरथण० हिमरययकुमुयकुंदेदुप्पगासं
सकोरेंटमल्लदामं धवलं आयवत्तं गहाय सलीलं उवरिं धारेमाणी २ चिट्ठइ, तए णं
तस्स जमालिस्स उभओपासिं दुवे दरतरुणीओ सिंगारागारचारु जाव कलियाओ
नाणामणिकणगरयणविमलमहरिहतवणिज्जुजलविचित्तदंडाओ चिल्लियाओ संखं-
कुंददगरयअमयमहियफेणपुंजसंनिगासाओ धवलाओ चामराओ गहाय सलीलं
वीयमाणीओ वीयमाणीओ चिट्ठंति, तए णं तस्स जमालिस्स खत्तियकुमारस्स उत्तर-
पुरच्छिमेणं एगा वरतरुणी सिंगारागार जाव कलिया सेयरययामयं विमलसलिलपुण्णं
मत्तगयमहामुहाकिइसमाणं भिंगारं गहाय चिट्ठइ । तए णं तस्स जमालिस्स खत्तिय-
कुमारस्स दाहिणपुरच्छिमेणं एगा वरतरुणी सिंगारागार जाव कलिया चित्तकणगदंडं
तालवेंटं गहाय चिट्ठइ, तए णं तस्स जमालिस्स खत्तियकुमारस्स पिया कोडुंबिय-
पुरिसे सद्दावेइ को० २ ता एवं वयासी-खिप्पामेव भो देवाणुप्पिया ! सरिसयं
सरित्थं सरिव्वयं सरिसलावन्नरुवजोव्वणगुणोव्वेयं एगाभरणवसणगहियनिजोयं
कोडुंबियवरतरुणसहस्सं सद्दावेइ, तए णं ते कोडुंबियपुरिसा जाव पड्डिसुणेत्ता
खिप्पामेव सरिसयं सरित्थं जाव सद्दावेंति, तए णं ते कोडुंबियपुरिसा जमालिस्स
खत्तियकुमारस्स पिउणा कोडुंबियपुरिसेहिं सद्दाविया समाणा द्दट्ठुट्ठ० ण्हाया
एगाभरणवसणगहियनिजोया जेणेव जमालिस्स खत्तियकुमारस्स पिया तेणेव उवा-
गच्छन्ति ते० २ ता करयल जाव वद्धावेत्ता एवं वयासी-संदिसंतु णं देवाणुप्पिया !
जं अम्हेहिं करणिज्जं, तए णं से जमालिस्स खत्तियकुमारस्स पिया तं कोडुंबियवर-
तरुणसहस्संपि एवं वयासी-तुब्भे णं देवाणुप्पिया ! ण्हाया जाव गहियनिजोगा
जमालिस्स खत्तियकुमारस्स सीयं परिवहह । तए णं ते कोडुंबियपुरिसा जमालिस्स
खत्तियकुमारस्स जाव पड्डिसुणेत्ता ण्हाया जाव गहियनिजोगा जमालिस्स खत्तिय-
कुमारस्स सीयं परिवहंति । तए णं तस्स जमालिस्स खत्तियकुमारस्स पुरिससहस्स-
ब्राहिणिं सीयं दुरुढस्स समाणस्स तप्पढमयाए इमे अट्ठमंगलगा पुरओ अहाणु-
पुव्वीए संपट्टिया, तं—तोत्थिय सिरिवच्छ जाव दप्पणं, तयाणंतरं च णं पुन्नकल-
सभिगारं जहा उववाइए जाव गगणतलमणुलिहंती पुरओ अहाणुपुव्वीए संपट्टिया,
एवं जहा उववाइए तद्देव भाणियव्वं जाव आलोयं वा करेमाणा जय २ सद्दं च
पडंजमाणा पुरओ अहाणुपुव्वीए संपट्टिया । तयाणंतरं च णं बहवे, उग्गा भोगा जहा
उववाइए जाव महापुरिसवरगुरापरिक्खित्ता जमालिस्स खत्तियकुमारस्स पुरओ य
सुभगाओ य मासुओ य अहाणुपुव्वीए संपट्टिया । तए णं से जमालिस्स खत्तियकुमा-

रस्स पिया ण्हाए जाव विभूसिए हत्थिखंधवरगए सकोरेंटमल्लदामेणं छत्तेणं धरिज्ज-
 माणेणं सेयवरचामराहिं उद्धुवमाणे २ हयगयरहपवरजोहकलियाए चाउरंगिणीए
 सेणाए सद्धिं संपरिवुडे महया भडचडगर जाव परिकिखते जमालिस्स खत्तियकुमा-
 रस्स पिट्ठओ २ अणुगच्छइ । तए णं तस्स जमालिस्स खत्तियकुमारस्स पुरओ महं
 आसा आसवरा उभओ पासिं णागा णागवरा पिट्ठओ रहा रहसंगेल्ली । तए णं से
 जमाली खत्तियकुमारे अब्भुगयभिगारे परिगगहियतालियंटे ऊसवियसेयल्लते
 पवीइयसेयचामरवालवीयणीए सव्विह्वीए जाव णाइयरवेणं । तयाणंतरे च णं बहवे
 लट्ठिग्गाहा कुंतग्गाहा जाव पुत्थयग्गाहा जाव वीणग्गाहा, तयाणंतरे च णं अट्ठसयं
 गयाणं अट्ठसयं तुस्याणं अट्ठसयं र्हाणं, तयाणंतरे च णं लउडअसिकोतहत्थाणं बहूणं
 पायत्ताणीणं पुरओ संपट्ठियं, तयाणंतरे च णं बहवे राईसरतलवर जाव सत्थवाहप्पभि-
 इओ पुरओ संपट्ठिया जाव णाइयरवेणं खत्तियकुंडग्गामं नगरं मज्झमज्जेणं जेणेव
 माहणकुंडग्गामे नयरे जेणेव बहुसालए उज्जाणे जेणेव समणे भगवं महावीरे तेणेव
 पहारेत्थ गमणाए । तए णं तस्स जमालिस्स खत्तियकुमारस्स खत्तियकुंडग्गामं नगरं
 मज्झमज्जेणं निग्गच्छमाणस्स सिंघाडगतियचउक्क जाव पहेसु बहवे अत्थत्थिया जहा
 उववाइए जाव अभिनंदंता य अभित्थुणंता य एवं वय्यासी-जय जय णंदा धम्मेणं,
 जय जय णंदा तवेणं, जय जय णंदा ! भद्दं ते अभग्गेहिं णाणदंसणचरित्तमुत्तमेहिं
 अजियाइं जिणाहि इंदियाइं जियं च पालेहि समणधम्मं जियविग्घोऽवि य वसाहि तं
 देव ! सिद्धिमज्जे णिहणाहि य रागदोसमल्ले तवेण धिइधणियवदकच्छे महाहि अट्ठ-
 कम्मसत्तु ज्ञाणेणं उत्तमेणं दुक्केणं अप्पमत्तो हराहि आराहणपडागं च धीर ! तेलो-
 क्करंगमज्जे पावय वित्तिमिरमणुत्तरे च केवल्लणाणं गच्छय मोक्खं परं पयं जिणव-
 रोवइट्ठेणं सिद्धिमग्गेणं अकुडिलेणं हंता परीसहचर्मं अभिभवि य गमकंटगोवसग्गाणं
 धम्मे ते अविग्घमत्थुत्तिकट्ठु अभिनंदंति य अभिथुणंति य । तए णं से जमाली खत्ति-
 यकुमारे नयणमालासहस्सेहिं पिच्छिज्जमाणे २ एवं जहा उववाइए कूणिओ जाव
 णिग्गच्छइ निग्गच्छिता जेणेव माहणकुंडग्गामे नयरे जेणेव बहुसालए उज्जाणे तेणेव
 उवागच्छइ तेणेव उवागच्छिता छत्ताइए तित्थगराइसए पासइ पासित्ता पुरिससह-
 स्सवाहिणिं सीयं ठवेइ २ ता पुरिससहस्सवाहिणीओ सीयाओ पबोरोहइ, तए णं तं
 जमालिं खत्तियकुमारं अम्मापियरो पुरओ काउं जेणेव समणे भगवं महावीरे तेणेव
 उवागच्छंति तेणेव उवागच्छिता समणं भगवं महावीरं तिव्वुत्तो जाव नमंस्सित्ता एवं
 वयासी-एवं खलु भंते ! जमाली खत्तियकुमारे अम्हं एगे पुत्ते इट्ठे कंते जाव किमंभ
 पुण पासणयाए, से जहानामए-उप्पलेइ वा पउमेइ वा जाव सहस्सपत्तेइ वा पंके

जाए जले संवुद्धे णोवल्लिप्पइ पंकरएणं णोवल्लिप्पइ जलरएणं एवामेव जमालीवि खत्ति-
 यकुमारं कामेहिं जाए भोगेहिं संवुद्धे णोवल्लिप्पइ कामरएणं णोवल्लिप्पइ भोगरएणं
 णोवल्लिप्पइ मित्तणाइनियगसयणसंबंधिपरिजणेणं, एस णं देवाणुप्पिया ! संसारभयउ-
 त्तिग्गे भीए जम्मजरामरणेणं इच्छइ देवाणुप्पियाणं अंतिए मुंडे भवित्ता अगाराओ
 अणगारियं पव्वइत्तए, तं एयञ्चं देवाणुप्पियाणं अम्हे सीसभिकखं दलयामो, पडिच्छंतु
 णं देवाणुप्पिया ! सीसभिकखं, तए णं समणे० ३ तं जमालिं खत्तियकुमारं एवं
 वयासी-अहासुहं देवाणुप्पिया ! मा पडिबंघं । तए णं से जमाली खत्तियकुमारं समणेणं
 भगवया महावीरेणं एवं वुत्ते समाणे हट्ठुट्ठे समणं भगवं महावीरं तिकखुत्तो जाव
 नमंस्सित्ता उत्तरपुरच्छिमं दिसीभागं अवक्कमइ २ ता सयमेव आभरणमल्लालंकारं ओमु-
 यइ, तए णं सा जमालिस्स खत्तियकुमारस्स माया हंसलक्खणेणं पडसाडएणं आभ-
 रणमल्लालंकारं पडिच्छइ पडिच्छित्ता हारवारि जाव विणिम्मयमाणी २ जमालिं
 खत्तियकुमारं एवं वयासी-वडियव्वं जाया ! जइयव्वं जाया ! परक्कमियव्वं जाया !
 अरिंस च णं अट्ठे णो पमायेयव्वंति कट्ठु जमालिस्स खत्तियकुमारस्स अम्मापियरो
 समणं भगवं महावीरं वंदन्ति णमंसन्ति वंदित्ता णमंस्सित्ता जामेव दिसिं पाउब्भूया
 तामेव दिसिं पडिगया । तए णं से जमाली खत्तियकुमारं सयमेव पंचमुट्ठियं लोयं
 करेइ २ ता जेणेव समणे भगवं महावीरे तेणेव उवागच्छइ तेणेव उवागच्छित्ता एवं
 जहा उसभदत्तो तहेव पव्वइओ नवरं पंचहिं पुरिससएहिं सद्धिं तहेव जाव सव्वं
 सामाइयसाइयाई एक्कारस अंगाई अहिज्जइ अहिजेत्ता बहूहिं चउत्थल्लुट्ठम जाव
 मासद्धमासखमणेहिं विचित्तेहिं तवोक्कम्मेहिं अप्पाणं भावेमाणे विहरइ ॥ ३८४ ॥
 तए णं से जमाली अणगारे अन्नया कयाई जेणेव समणे भगवं महावीरे तेणेव उवा-
 गच्छइ तेणेव उवागच्छित्ता समणं भगवं महावीरं वंदइ नमंसइ वंदित्ता नमंस्सित्ता एवं
 वयासी-इच्छामि णं भंते ! तुब्भेहिं अब्भणुन्नाए समाणे पंचहिं अणगारसएहिं
 सद्धिं बहिया जणवयविहारं विहरित्तए, तए णं समणे भगवं महावीरं जमालिस्स
 अणगारस्स एयमट्ठं णो आढाइ णो परिजाणाइ तुसिणीए संचिट्ठइ । तए णं से
 जमाली अणगारे समणं भगवं महावीरं दोच्चंपि तच्चंपि एवं वयासी-इच्छामि णं
 भंते ! तुब्भेहिं अब्भणुन्नाए समाणे पंचहिं अणगारसएहिं सद्धिं जाव विहरित्तए,
 तए णं समणे भगवं महावीरं जमालिस्स अणगारस्स दोच्चंपि तच्चंपि एयमट्ठं णो
 आढाइ जाव तुसिणीए संचिट्ठइ । तए णं से जमाली अणगारे समणं भगवं महावीरं
 वंदइ णमंसइ वंदित्ता णमंस्सित्ता समणस्स भगवओ महावीरस्स अंतियाओ बहुसा-
 लाओ उजाणाओ पडिनिक्खमइ पडिनिक्खमितां पंचहिं अणगारसएहिं सद्धिं बहिया

जणवयविहारं विहरइ, तेणं कालेणं तेणं समएणं सावत्थी नामं नयरी होत्था वज्जओ,
कोट्टए उज्जाणे वज्जओ जाव वणसंडस्स, तेणं कालेणं तेणं समएणं चंपा नामं
नयरी होत्था वज्जओ, पुच्चभेइ उज्जाणे वज्जओ जाव पुढविसिलापट्टए । तए णं से
जमाली अणगारे अन्नया कयाइ पंचहिं अणगारसएहिं सद्धिं संपरिवुडे पुव्वाणुपुविं
चरमाणे यामाणुगामं दूहजमाणे जेणेव सावत्थी नयरी जेणेव कोट्टए उज्जाणे तेणेव
उवागच्छइ तेणेव उवागच्छिता अहापडिरुवं उग्गहं उगिगण्हइ अहापडिरुवं उग्गहं
उगिगण्हिता संजमेणं तवसा अप्पाणं भावेमाणे विहरइ । तए णं समणे भगवं
महावीरे अन्नया कयाइ पुव्वाणुपुविं चरमाणे जाव सुहंसुहेणं विहरमाणे जेणेव
चंपानगरी जेणेव पुच्चभेइ उज्जाणे तेणेव उवागच्छइ तेणेव उवागच्छिता अहापडि-
रुवं उग्गहं उगिगण्हइ अहा० २ ता संजमेणं तवसा अप्पाणं भावेमाणे विहरइ ॥ तए
णं तस्स जमालिस्स अणगारस्स तेहिं अरसेहि य विरसेहि य अंतेहि य पंतेहि य
ल्लहेहि य तुच्छेहि य कालाइक्कंतेहि य पमाणाइक्कंतेहि य सीयएहि य पाणभोयणेहिं
अन्नया कयाइ सरीरगंसि विउले रोगायंके पाउब्भूए उज्जळे विउळे पगाडे कक्कसे कडए
चंडे दुक्खे दुग्गे तिक्खे दुरहियासे पित्तज्जरपरिगयसरीरे दाहवक्कंतिए यावि विहरइ ।
तए णं से जमाली अणगारे वेयणाए अभिभूए समाणे समणे णिगंग्थे सद्दावेइ
सद्दावेत्ता एवं वयासी-तुब्भे णं देवाणुप्पिया । मम सेज्जासंधारणं संधरेह, तए णं ते
समणा णिगंग्था जमालिस्स अणगारस्स एयमट्ठं विणएणं पडिसुणेंति पडिसुणेंता
जमालिस्स अणगारस्सं सेज्जासंधारणं संधरेंति, तए णं से जमाली अणगारे बलिय-
तं वेयणाए अभिभूए समाणे दोच्चंपि समणे निगंग्थे सद्दावेइ २ ता दोच्चंपि एवं
वयासी-ममणं देवाणुप्पिया ! सेज्जासंधारणं किं कडे कज्जइ ? (एवं वुत्ते समाणे समणा
निगंग्था विति-भो सामी ! कीरइ) तए णं ते समणा निगंग्था जमालिं अणगारं
एवं वयासी-णो खलु देवाणुप्पियाणं सेज्जासंधारणं कडे कज्जइ, तए णं तस्स जमा-
लिस्स अणगारस्स अयमेयारुवे अज्झत्थिए जाव समुप्पज्जित्था-जजं समणे भगवं
महावीरे एवं आइक्खइ जाव एवं परुवेइ-एवं खलु चलमाणे चलिए उदीरिजमाणे
उदीरिए जाव निज्जरिजमाणे णिज्जिजे तं णं मिच्छा इमं च णं पच्चक्खमेव दीसइ
सेज्जासंधारणं कज्जमाणे अकडे संधरिजमाणे असंधरिए जम्हा णं सेज्जासंधारणं कज्ज-
माणे अकडे संधरिजमाणे असंधरिए तम्हा चलमाणेवि अचलिए जाव निज्जरिज-
माणेवि अणिज्जिजे, एवं संपेहेइ एवं संपेहेत्ता समणे निगंग्थे सद्दावेइ समणे निगंग्थे
सद्दावेत्ता एवं वयासी-जजं देवाणुप्पिया । समणे भगवं महावीरे एवं आइक्खइ जाव
परुवेइ-एवं खलु चलमाणे चलिए तं चेव सव्वं जाव णिज्जरिजमाणे अणिज्जिजे । तए

णं तस्स जमालिस्स अणगारस्स एवं आइक्खमाणस्स जाव पल्लवेमाणस्स अत्थेगइया समणा निग्गंथा एयमट्ठं सद्धंति पत्तिर्यंति रोयंति, अत्थेगइया समणा निग्गंथा एयमट्ठं णो सद्धंति ३, तत्थ णं जे ते समणा निग्गंथा जमालिस्स अणगारस्स एयमट्ठं सद्धंति ३ ते णं जमालिं चेव अणगारं उवसंपज्जिता णं विहरंति, तत्थ णं जे ते समणा निग्गंथा जमालिस्स अणगारस्स एयमट्ठं णो सद्धंति णो पत्तिर्यंति णो रोयंति ते णं जमालिस्स अणगारस्स अंतियाओ कोट्टयाओ उज्जाणाओ पडिनिक्खमंति २ ता पुव्वाणुपुव्विं चरमाणा गामाणुगामं दूइज्जमाणा जेणेव चंपानयरी जेणेव पुन्नभेइ उज्जाणे जेणेव समणे भगवं महावीरं तेणेव उवागच्छन्ति २ ता समणं भगवं महावीरं तिक्खुत्तो आयाहिणं पयाहिणं करेति २ ता वंदंति णमंसंति २ ता समणं भगवं महावीरं उवसंपज्जिता णं विहरंति ॥ ३८५ ॥ तए णं से जमाली अणगारं अन्नया कयइ ताओ रोगायंकाओ विप्पमुक्के हट्ठे तुट्ठे जाए अरोए बलियसरीरे सावत्थीओ नयरीओ कोट्टयाओ उज्जाणाओ पडिनिक्खमइ २ ता पुव्वाणुपुव्विं चरमाणे गामाणुगामं दूइज्जमाणे जेणेव चंपानयरी जेणेव पुन्नभेइ उज्जाणे जेणेव समणे भगवं महावीरं तेणेव उवागच्छइ २ ता समणस्स भगवओ महावीरस्स अवूरसामंते ठिच्चा समणं भगवं महावीरं एवं वयासी-जह्वा णं देवाणुप्पियाणं बहवे अंतेवासी समणा निग्गंथा छउमत्था भवेत्ता छउमत्थावक्कमणेणं अवक्कंता णो खलु अहं तहा चेव छउमत्थे भवित्ता छउमत्थावक्कमणेणं अवक्कमिए, अहन्नं उप्पन्नणाणंदंसणधरे अरहा जिणे केवली भवित्ता केवलिवक्कमणेणं अवक्कमिए, तए णं भगवं गोयमे जमालिं अणगारं एवं वयासी-णो खलु जमाली ! केवलिस्स णाणे वा दंसणे वा सेलंसि वा थंभंसि वा थूभंसि वा आवरिज्जइ वा णिवारिज्जइ वा, जइ णं तुमं जमाली ! उप्पन्नणाणंदंसणधरे अरहा जिणे केवली भवित्ता केवलिवक्कमणेणं अवक्कंते तो णं इमाइ दो वागरणाइ वागरेहि-सासए लोए जमाली ! असासए लोए जमाली ? सासए जीवे जमाली ! असासए जीवे जमाली ? तए णं से जमाली अणगारं भगवया गोयमेणं एवं वुत्ते समणे संकिए कंखिए जाव कलुससमावन्ने जाए यावि होत्था, णो संचाएइ भगवओ गोयमस्स किंचिवि पमोक्खमाइक्खित्तए तुत्तिणीए संचिट्ठइ, जमालीति समणे भगवं महावीरं जमालिं अणगारं एवं वयासी-अत्थि णं जमाली ! ममं बहवे अंतेवासी समणा निग्गंथा छउमत्था जे णं पभू एयं वागरणं वागरित्तए जहा णं अहं, नो चेव णं एयप्पगारं भासं भासित्तए जहा णं तुमं, सासए लोए जमाली ! जन्न कयाइ णासि ण कयाइ ण भवइ ण कयाइ ण भविस्सइ भुवि च भवइ य भविस्सइ य धुवे णिइए सासए अक्खए अक्खए अवट्टिए णिच्चे, असासए लोए जमाली ! जओ

ओसप्पिणी भवित्ता उस्सप्पिणी भवइ उस्सप्पिणी भवित्ता ओसप्पिणी भवइ,
 सासए जीवे जमाली ! जं न कयाइ णासि जाव णिचे, असासए जीवे जमाली ! जं
 नेरइए भवित्ता तिरिक्खजोणिए भवइ तिरिक्खजोणिए भवित्ता मणुस्से भवइ मणुस्से
 भवित्ता देवे भवइ । तए णं से जमाली अणगारे समणस्स भगवओ महावीरस्स
 एवमाइक्खमाणस्स जाव एवं परूवेमाणस्स एयमट्ठं णो सद्दहइ णो पत्तियइ णो रोएइ
 एयमट्ठं असद्दहमाणे अपत्तियमाणे अरोएमाणे दोच्चं पि समणस्स भगवओ महावीरस्स
 अंतियाओ आयाए अवक्कमइ दोच्चं पि आयाए अवक्कमित्ता बहूहिं असब्भावुब्भावणाहिं
 मिच्छत्ताभिणिवेसेहि य अप्पाणं च परं च तदुभयं च बुग्गाहेमाणे पुप्पाएमाणे बहूइं
 वासाइं सामन्नपरियागं पाउणइ २ ता अद्धमासियाए संलेहणाए अत्ताणं झुसेइ अ० २ ता
 तीसं भत्ताइं अणसणाए छेदेइ २ ता तस्स ठाणस्स अणालोइयपडिक्कंते कालमासे कालं
 किच्चा लंतए कप्पे तेरससागरोवमठिइए सु देवकिव्विसियए सु देवे सु देवकिव्विसियत्ताए
 उववच्चे ॥ ३८६ ॥ तए णं से भगवं गोयमे जमालिं अणगारं कालगयं जाणित्ता जेणेव
 समणे भगवं महावीरे तेणेव उवागच्छइ ते ० २ ता समणं भगवं महावीरं वंदइ नमंसइ
 २ ता एवं वयासी-एवं खलु देवाणुप्पियाणं अंतेवासी कुसिस्से जमाली णामं अणगारे से
 णं भंते ! जमाली अणगारे कालमासे कालं किच्चा कहिं गए कहिं उववच्चे ? गोयमाइ
 समणे भगवं महावीरे भगवं गोयमं एवं वयासी-एवं खलु गोयमा ! ममं अंतेवासी
 कुसिस्से जमाली नामं अणगारे से णं तथा मम एवं आइक्खमाणस्स ४ एयमट्ठं णो सद्द-
 हइ ३ एयमट्ठं असद्दहमाणे ३ दोच्चं पि ममं अंतियाओ आयाए अवक्कमइ २ ता बहूहिं
 असब्भावुब्भावणाहिं तं चेव जाव देवकिव्विसियत्ताए उववच्चे ॥ ३८७ ॥ कइविहा
 णं भंते ! देवकिव्विसिया प० ? गोयमा ! तिविहा देवकिव्विसिया प०, तंजहा-
 तिपलिओवमट्ठिइया तिसागरोवमट्ठिइया तेरससागरोवमट्ठिइया, कहिं णं भंते !
 तिपलिओवमट्ठिइया देवकिव्विसिया परिवसंति ? गोयमा ! उप्पि जोइसियाणं हिट्ठिं
 सोहम्मीसाणे सु कप्पे सु एत्थ णं तिपलिओवमट्ठिइया देवकिव्विसिया परिवसंति ।
 कहिं णं भंते ! तिसागरोवमट्ठिइया देवकिव्विसिया परिवसंति ? गोयमा ! उप्पि
 सोहम्मीसाणाणं कप्पाणं हिट्ठिं सणकुमारमाहिंदे सु कप्पे सु एत्थ णं तिसागरोवमट्ठि-
 इया देवकिव्विसिया परिवसंति, कहिं णं भंते ! तेरससागरोवमट्ठिइया देवकिव्वि-
 सिया देवा परिवसंति ? गोयमा ! उप्पि बंभलोगस्स कप्पस्स हिट्ठिं लंतए कप्पे
 एत्थ णं तेरससागरोवमट्ठिइया देवकिव्विसिया देवा परिवसंति । देवकिव्विसिया
 णं भंते ! के सु कम्मादाणे सु देवकिव्विसियत्ताए उववत्तारो भवन्ति ? गोयमा ! जे
 इमे जीवा आयरियपडिणीया उवज्झायपडिणीया कुलपडिणीया गणपडिणीया संघ-

पडिणीया आयरियउवज्झायाणं अयसकरा अवन्नकरा अकित्तिकरा बहूहिं अस-
 ञ्भावुब्भावणाहिं मिच्छत्ताभिनिवेसेहि य अप्पाणं च ३ वुग्गाहेमाणा वुप्पाएमाणा
 बहूइं वासाइं सामन्नपरियागं पाउणंति २ ता तस्स ठाणस्स अणालोइयपडिक्कंता
 कालमासे कालं किच्चा अन्नयरेसु देवकिव्विसिएसु देवकिव्विसियत्ताए उववत्तारो
 भवंति, तंजहा-तिपल्लिओवमट्ठिइएसु वा तिसागरोवमट्ठिइएसु वा तेरससागरोव-
 मट्ठिइएसु वा । देवकिव्विसिया णं भंते ! ताओ देवलोगाओ आउक्खएणं भवक्खएणं
 ठिइक्खएणं अणंतरं चयं चइत्ता कहिं गच्छंति कहिं उववज्जंति ? गोयमा ! जाव
 चत्तारि पंच नेरइयतिरिक्खजोणियमणुस्सदेवभवग्गहणाइं संसारं अणुपरियट्ठित्ता
 तओ पच्छा सिज्झंति बुज्झंति जाव अंतं करंति, अत्थेगइया अणाइयं अणवदग्गं
 दीहमद्धं चाउरंतसंसारकंतारं अणुपरियट्ठंति ॥ जमाली णं भंते ! अणगारे अरसाहारे
 विरसाहारे अंताहारे पंताहारे ल्हाहारे तुच्छाहारे अरसजीवी विरसजीवी जाव तुच्छ-
 जीवी उवसंतजीवी पसंतजीवी विवित्तजीवी ? हंता गोयमा ! जमाली णं अणगारे
 अरसाहारे विरसाहारे जाव विवित्तजीवी । जइ णं भंते ! जमाली अणगारे अरसा-
 हारे विरसाहारे जाव विवित्तजीवी कम्हा णं भंते ! जमाली अणगारे कालमासे
 कालं किच्चा लंतए कप्पे तेरससागरोवमट्ठिइएसु देवकिव्विसिएसु देवेसु देवकिव्वि-
 सियत्ताए उववत्ते ? गोयमा ! जमाली णं अणगारे आयरियपडिणीए उवज्झाय-
 पडिणीए आयरियउवज्झायाणं अयसकारए जाव वुप्पाएमाणे बहूइं वासाइं सामन्न-
 परियागं पाउणित्ता अद्धमासियाए संलेहणाए तीसं भत्ताइं अणसणाए छेदेइ तीसं
 २ ता तस्स ठाणस्स अणालोइयपडिक्कंते कालमासे कालं किच्चा लंतए कप्पे जाव
 उववत्ते ॥ ३८८ ॥ जमाली णं भंते ! देवे ताओ देवलोयाओ आउक्खएणं जाव
 कहिं उववज्जिहिइ ? गोयमा ! चत्तारि पंच तिरिक्खजोणियमणुस्सदेवभवग्गहणाइं
 संसारं अणुपरियट्ठित्ता तओ पच्छा सिज्झिहिइ जाव अंतं काहिइ । सेवं भंते !
 २ ति ॥ ३८९ ॥ **जमाली समत्तो ॥ नवमसए ३३ इमो उद्देसो समत्तो ॥**

तैणं कालेणं तेणं समएणं रायगिहे जाव एवं वयासी-पुरिसे णं भंते ! पुरिसं
 हणमाणे किं पुरिसं हणइ नोपुरिसं हणइ ? गोयमा ! पुरिसंपि हणइ नोपुरि(सेवि)संपि
 हणइ, से केणट्ठेणं भंते ! एवं वुच्चइ पुरिसंपि हणइ नोपुरिसंपि हणइ ? गोयमा !
 तस्स णं एवं भवइ एवं खल्ल अहं एणं पुरिसं हणामि से णं एणं पुरिसं हणमाणे अणे-
 गजीवा हणइ, से तेणट्ठेणं गोयमा ! एवं वुच्चइ पुरिसंपि हणइ नोपुरिसंपि हणइ ।
 पुरिसे णं भंते ! आसं हणमाणे किं आसं हणइ नोआसे हणइ ? गोयमा ! आसंपि
 हणइ नोआसेवि हणइ, से केणट्ठेणं अट्ठो तहेव, एवं हत्थि सीहं वग्घं जाव चिल्ल-

लगं । पुरिसे णं भंते ! अन्नयरं तसपाणं हणमाणे किं अन्नयरं तसपाणं हणइ नोअ-
 न्नयरे तसपाणे हणइ ? गोयमा ! अन्नयरंपि तसपाणं हणइ नोअन्नयरेवि तसे पाणे
 हणइ, से केणट्ठेणं भंते ! एवं वुच्चइ अन्नयरंपि तसं पाणं हणइ नोअन्नयरेवि तसे पाणे
 हणइ ? गोयमा ! तस्स णं एवं भवइ एवं खलु अहं एगं अन्नयरं तसं पाणं हणामि
 से णं एगं अन्नयरं तसं पाणं हणमाणे अणेगे जीवे हणइ, से तेणट्ठेणं गोयमा ! तं
 चेव, एए सव्वेवि एकगमा । पुरिसे णं भंते ! इसिं हणमाणे किं इसिं हणइ नोइसिं
 हणइ ? गोयमा ! इसिंपि हणइ नोइसिंपि हणइ, से केणट्ठेणं भंते ! एवं वुच्चइ जाव
 नोइसिंपि हणइ ? गोयमा ! तस्स णं एवं भवइ एवं खलु अहं एगं इसिं हणामि, से
 णं एगं इसिं हणमाणे अणंते जीवे हणइ, से तेणट्ठेणं निक्खेवओ । पुरिसे णं भंते ! पुरिसं
 हणमाणे किं पुरिसवेरेणं पुट्ठे नोपुरिसवेरेणं पुट्ठे ? गोयमा ! नियमा ताव पुरिसवेरेणं
 पुट्ठे, अहवा पुरिसवेरेणं यं णोपुरिसवेरेणं यं पुट्ठे अहवा पुरिसवेरेणं यं नोपुरिसवेरेहिं
 यं पुट्ठे, एवं आसं एवं जाव चिळलगं जाव अहवा चिळलगवेरेणं यं णोचिळलगवेरेहिं यं
 पुट्ठे, पुरिसे णं भंते ! इसिं हणमाणे किं इसिवेरेणं पुट्ठे नोइसिवेरेणं पुट्ठे ? गोयमा !
 नियमा इसिवेरेणं यं नोइसिवेरेहिं यं पुट्ठे ॥३९०॥ पुढविकाइया णं भंते ! पुढविकाइयं
 चेव आणमंति वा पाणमंति वा ऊससंति वा नीससंति वा ? हंता गोयमा ! पुढवि-
 काइया पुढविकाइयं चेव आणमंति वा जाव नीससंति वा । पुढविकाइया णं भंते !
 आउक्काइयं आणमंति वा जाव नीससंति वा ? हंता गोयमा ! पुढविकाइया आउक्काइयं
 आणमंति वा जाव नीससंति वा, एवं तेउक्काइयं वाउक्काइयं एवं वणस्सइकाइयं ।
 आउक्काइया णं भंते ! पुढविकाइयं आणमंति वा पाणमंति वा० ? एवं चेव, आउ-
 क्काइया णं भंते ! आउक्काइयं चेव आणमंति वा० ? एवं चेव, एवं तेउवाउवणस्सइ-
 काइयं । तेउक्काइया णं भंते ! पुढविकाइयं आणमंति वा० ? एवं जाव वणस्सइकाइया
 णं भंते ! वणस्सइकाइयं चेव आणमंति वा० ? तहेव । पुढविकाइए णं भंते ! पुढविका-
 इयं चेव आणममाणे वा पाणममाणे वा ऊससमाणे वा नीससमाणे वा कइकिरिए ?
 गोयमा ! सिय तिकिरिए सिय चउकिरिए सिय पंचकिरिए, पुढविकाइए णं भंते ! आउ-
 क्काइयं आणममाणे वा० ? एवं चेव, एवं जाव वणस्सइकाइयं, एवं आउकाइएणवि सव्वे
 भाणियव्वा, एवं तेउक्काइएणवि, एवं वाउक्काइएणवि, जाव वणस्सइकाइए णं भंते !
 वणस्सइकाइयं चेव आणममाणे वा० ? पुच्छा, गोयमा ! सिय तिकिरिए सिय चउ-
 किरिए सिय पंचकिरिए ॥३९१॥ वाउक्काइए णं भंते ! स्वखस्स मूलं पचाळेमाणे वा
 पवाडेमाणे वा कइकिरिए ? गोयमा ! सिय तिकिरिए सिय चउकिरिए सिय पंचकि-
 रिए । एवं कंदं एवं जाव मूलं, वीयं पचाळेमाणे वा० पुच्छा, गोयमा ! सिय तिकिरिए

स्तिय चउकिरिए सिय पंचकिरिए । सेवं भंते ! सेवं भंते ! त्ति ॥ ३९२ ॥ नवम-
सए चउत्तीसइमो उद्देसो समत्तो ॥ नवमं सयं समत्तं ॥

गाहा—दिसि १ संवुडअणगारे २ आइह्वी ३ सामहत्थि ४ देवि ५ सभा ६ ।
उत्तरअंतरदीवा २८ दसमंमि सयंमि चोत्तीसा ॥ ३४॥ रायगिहे जाव एवं वयासी-
किमियं भंते ! पाईणत्ति पवुच्चइ ? गोयमा ! जीवा चेव अजीवा चेव, किमियं भंते !
पडीणत्ति पवुच्चइ ? गोयमा ! एवं चेव, एवं दाहिणा, एवं उदीणा, एवं उट्ठा, एवं
अहोवि । कइ णं भंते ! दिसाओ पण्णत्ताओ ? गोयमा ! दस दिसाओ पण्णत्ताओ,
तंजहा—पुरच्छिमा १ पुरच्छिमदाहिणा २ दाहिणा ३ दाहिणपच्चत्थिमा ४ पच्चत्थिमा
५ पच्चत्थिमुत्तरा ६ उत्तरा ७ उत्तरपुरच्छिमा ८ उट्ठा ९ अहो १० । एयासि णं
भंते ! दसण्हं दिसाणं कइ णामधेज्जा पण्णत्ता ? गोयमा ! दस नामधेज्जा पण्णत्ता,
तंजहा—इंदा १ अग्गेई २ जमा य ३ नेरई ४ वारुणी य ५ वायव्वा ६, सोमा ७
ईसाणी य ८ विमला य ९ तमा य १० बोद्धव्वा । इंदा णं भंते ! दिसा किं जीवा
जीवदेसा जीवपएसा अजीवा अजीवदेसा अजीवपएसा ? गोयमा ! जीवावि ३ तं
चेव जाव अजीवपएसावि, जे जीवा ते नियमा एगिंदिया बेईंदिया जाव पंचिंदिया
अणिंदिया, जे जीवदेसा ते नियमा एगिंदियदेसा जाव अणिंदियदेसा, जे जीवपएसा
ते नियमा एगिंदियपएसा बेईंदियपएसा जाव अणिंदियपएसा, जे अजीवा ते दुविहा
पन्नत्ता, तंजहा—रूवी अजीवा य अरूवी अजीवा य, जे रूवी अजीवा ते चउग्विहा
पन्नत्ता, तंजहा—खंधा १ खंधदेसा २ खंधपएसा ३ परमाणुपोगला ४, जे अरूवी
अजीवा ते सत्तविहा पन्नत्ता, तंजहा—नोधम्मत्थिकाए धम्मत्थिकायस्स देसे, धम्म-
त्थिकायस्स पएसा, नोधम्मत्थिकाए अधम्मत्थिकायस्स देसे, अधम्मत्थिकायस्स
पएसा, नोआगासत्थिकाए आगासत्थिकायस्स देसे, आगासत्थिकायस्स पएसा, अद्धा-
समए ॥ अग्गेई णं भंते ! दिसा किं जीवा जीवदेसा जीवपएसा ? पुच्छा, गोयमा !
णोजीवा जीवदेसावि १ जीवपएसावि २ अजीवावि १ अजीवदेसावि २ अजीवप-
एसावि ३, जे जीवदेसा ते नियमा एगिंदियदेसा अहवा एगिंदियदेसा य बेईदि-
यस्स देसे १ अहवा एगिंदियदेसा य बेईदियस्स देसा २ अहवा एगिंदियदेसा य
बेईदियाण य देसा ३ अहवा एगिंदियदेसा तेईदियस्स देसे एवं चेव तियभंगो
माणियव्वो एवं जाव अणिंदियाणं तियभंगो, जे जीवपएसा ते नियमा एगिंदिय-
पएसा अहवा एगिंदियपएसा य बेईदियस्स पएसा अहवा एगिंदियपएसा य
बेईदियाण य पएसा एवं आइल्लविरहिओ जाव अणिंदियाणं, जे अजीवा ते दुविहा
पन्नत्ता, तंजहा—रूवी अजीवा य अरूवी अजीवा य, जे रूवी अजीवा ते चउग्विहा

पन्नत्ता, तंजहा-खंवा जाव परमाणुपोग्गला ४, जे अरुवी अजीवा ते सत्तविहा पन्नत्ता, तंजहा-नोधम्मत्थिकाए धम्मत्थिकायस्स देसे धम्मत्थिकायस्स पएसा एवं अधम्मत्थिकायस्सवि जाव आगासत्थिकायस्स पएसा अद्दासमए । विदिसासु नत्थि जीवा देसे भंगो य होइ सव्वत्थ । जमा णं भंते ! दिसा किं जीवा० ? जहा इंदा तहेव निरवसेसा, नेरई य जहा अग्गेई, वारुणी जहा इंदा, वायव्वा जहा अग्गेई, सोमा जहा इंदा, ईसाणी जहा अग्गेई, विमलाए जीवा जहा अग्गेई, अजीवा जहा इंदा, एवं तमाएवि, नवरं अरुवी छव्विहा अद्दासमओ न भन्नइ ॥ ३९३ ॥ कइ णं भंते ! सरीरा पन्नत्ता ? गोयमा ! पंच सरीरा पन्नत्ता, तंजहा-ओरालिए जाव कम्मए । ओरालियसरीरे णं भंते ! कइविहे पन्नत्ते ? एवं ओगाहणसंठाणं निरवसेसं भाणियव्वं जाव अप्पावहुगंति । सेवं भंते ! सेवं भंते ! ति ॥ ३९४ ॥ **दसमे सए पढमो उदेसो समत्तो ॥**

रायणिहे जाव एवं वयासी-संबुडस्स णं भंते ! अणगारस्स वीइपंथे ठिच्चा पुरओ रुवाई निज्झायमाणस्स मग्गओ रुवाई अवयक्खमाणस्स पासओ रुवाई अवलोए-माणस्स उट्ठं रुवाई ओलोएमाणस्स अहे रुवाई आलोएमाणस्स तस्स णं भंते ! किं इरियावहिया किरिया कज्जइ संपराइया किरिया कज्जइ ? गोयमा ! संबुडस्स णं अणगारस्स वीइपंथे ठिच्चा जाव तस्स णं णो इरियावहिया किरिया कज्जइ संपराइया किरिया कज्जइ, से केणट्ठेणं भंते ! एवं वुच्चइ संबुडस्स जाव संपराइया किरिया कज्जइ ? गोयमा ! जस्स णं कोहमाणमायालोभा एवं जहा सत्तमसए पढमोइसए जाव से णं उस्सुत्तमेव रीयइ, से तेणट्ठेणं जाव संपराइया किरिया कज्जइ । संबुडस्स णं भंते ! अणगारस्स अवीइपंथे ठिच्चा पुरओ रुवाई निज्झायमाणस्स जाव तस्स णं भंते ! किं इरियावहिया किरिया कज्जइ० ? पुच्छा, गोयमा ! संबुड० जाव तस्स णं इरियावहिया किरिया कज्जइ नो संपराइया किरिया कज्जइ, से केणट्ठेणं भंते ! एवं वुच्चइ जहा सत्तमे सए पढमोइसए जाव से णं अहासुत्तमेव रीयइ से तेणट्ठेणं जाव नो संपराइया किरिया कज्जइ ॥ ३९५ ॥ कइविहा णं भंते ! जोणी प० ? गोयमा ! तिविहा जोणी प०, तंजहा-सीया उसिणा सीओसिणा, एवं जोणीपर्यं निरवसेसं भाणियव्वं ॥ ३९६ ॥ कइविहा णं भंते ! वेयणा प० ? गोयमा ! तिविहा वेयणा प०, तंजहा-सीया उसिणा सीओसिणा, एवं वेयणापर्यं निरवसेसं भाणियव्वं जाव नेरइया णं भंते ! किं दुक्खं वेयणं वेदैति सुहं वेयणं वेयंति अदुक्खमसुहं वेयणं वेयंति ? गोयमा ! दुक्खंपि वेयणं वेयंति सुहंपि वेयणं वेयंति अदुक्खमसुहंपि वेयणं वेयंति ॥ ३९७ ॥ मासियणं भंते ! भिक्खुपडिमं पडिवन्नस्स अणगारस्स

निच्च वोसट्टकाए चियत्तदेहे, एवं मासिया भिक्खुपडिमा निरवसेसा भाणियव्वा
[जहा दसाहिं] जाव आराहिया भवइ ॥ ३९८ ॥ भिक्खू य अन्नयरं अकिच्चट्ठाणं
पडिसेवित्ता से णं तस्स ठाणस्स अणालोइयपडिक्कंते कालं करेइ नत्थि तस्स आरा-
हणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा,
भिक्खू य अन्नयरं अकिच्चट्ठाणं पडिसेवित्ता तस्स णं एवं भवइ पच्छावि णं अहं
च(रि)रमकालसमयंसि एयस्स ठाणस्स आलोएस्सामि जाव पडिवज्जिस्सामि, से णं
तस्स ठाणस्स अणालोइयपडिक्कंते जाव नत्थि तस्स आराहणा, से णं तस्स ठाणस्स
आलोइयपडिक्कंते कालं करेइ अत्थि तस्स आराहणा, भिक्खू य अन्नयरं अकिच्चट्ठाणं
पडिसेवित्ता तस्स णं एवं भवइ-जइ ताव समणोवासगावि कालमासे कालं किच्चा
अन्नयरेसु देवलोएसु देवत्ताए उववत्तारो भवंति किमंग पुण अहं अन्नपन्नियदेवत्तणंपि
नो लभिस्सामित्ति कट्ठु से णं तस्स ठाणस्स अणालोइयपडिक्कंते कालं करेइ नत्थि तस्स
आराहणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा ।
सेवं भंते ! सेवं भंते ! ति ॥ ३९९ ॥ **दसमसयस्स बीओ उद्देसो समत्तो ॥**

रायगिहे जाव एवं वयासी-आइद्धीए णं भंते ! देवे जाव चत्तारि पंच देवावा-
संतराई वीड्ढंते तेण परं परिद्धीए ? हंता गोयमा ! आइद्धीए णं तं चेव, एवं असुर-
कुमारेवि, नवरं असुरकुमारावासंतराई सेसं तं चेव, एवं एएणं कमेणं जाव थणिय-
कुमारे, एवं वाणमंतरजोइसियवेमाणिए जाव तेण परं परिद्धीए । अप्पिद्धिए णं भंते !
देवे से महिद्धियस्स देवस्स मज्झमज्जेणं वीड्ढएज्जा ? गोयमा ! णो इणट्ठे समट्ठे ।
समिद्धिए णं भंते ! देवे समिद्धियस्स देवस्स मज्झमज्जेणं वीड्ढएज्जा ? णो इणट्ठे
समट्ठे, पमतं पुण वीड्ढएज्जा, से णं भंते ! किं विमोहत्ता पभू अविमोहत्ता पभू ?
गोयमा ! विमोहत्ता पभू नो अविमोहत्ता पभू । से भंते ! किं पुर्वि विमोहत्ता
पच्छा वीड्ढएज्जा पुर्वि वीड्ढएत्ता पच्छा विमोहेज्जा ? गोयमा ! पुर्वि विमोहत्ता
पच्छा वीड्ढएज्जा णो पुर्वि वीड्ढएत्ता पच्छा विमोहेज्जा । महिद्धिए णं भंते ! देवे
अप्पिद्धियस्स देवस्स मज्झमज्जेणं वीड्ढएज्जा ? हंता वीड्ढएज्जा, से णं भंते ! किं
विमोहत्ता पभू अविमोहत्ता पभू ? गोयमा ! विमोहत्तावि पभू अविमोहत्तावि पभू,
से भंते ! किं पुर्वि विमोहत्ता पच्छा वीड्ढएज्जा पुर्वि वीड्ढएत्ता पच्छा विमोहेज्जा ?
गोयमा ! पुर्वि वा विमोहत्ता पच्छा वीड्ढएज्जा पुर्वि वा वीड्ढएत्ता पच्छा विमो-
हेज्जा । अप्पिद्धिए णं भंते ! असुरकुमारे महिद्धियस्स असुरकुमारस्स मज्झमज्जेणं
वीड्ढएज्जा ? णो इणट्ठे समट्ठे, एवं असुरकुमारेणवि तिच्चि आलावगा भाणियव्वा जहा
ओहिणं देवेणं भणिया, एवं जाव थणियकुमा(रा)रेणं, वाणमंतरजोइसियवेमाणिएणं

एवं चेव । अपिह्णिए णं भंते ! देवे महिह्णियाए देवीए मज्झमज्जेणं वीइवएज्जा ? णो इणट्ठे समट्ठे, समिह्णिए णं भंते ! देवे समिह्णियाए देवीए मज्झमज्जेणं०; एवं तहेव देवेण य देवी(ण)ए य दंडओ भाणियव्वो जाव वेमाणि(या)ए । अपिह्णिया णं भंते ! देवी महिह्णियस्स देवस्स मज्झमज्जेणं एवं एसोवि तइओ दंडओ भाणियव्वो जाव महिह्णिया वेमाणिणी अपिह्णियस्स वेमाणियस्स मज्झमज्जेणं वीइवएज्जा ? हंता वीइवएज्जा । अपिह्णिया णं भंते ! देवी महिह्णियाए देवीए मज्झमज्जेणं वीइवएज्जा ? णो इणट्ठे समट्ठे, एवं समिह्णिया देवी समिह्णियाए देवीए तहेव, महिह्णियावि देवी अपिह्णियाए देवीए तहेव, एवं एक्केत्ते तिहि २ आलावगा भाणियव्वा जाव महिह्णिया णं भंते ! वेमाणिणी अपिह्णियाए वेमाणिणीए मज्झमज्जेणं वीइवएज्जा ? हंता वीइवएज्जा, सा भंते ! किं विमोहिता पभू तहेव जाव पुव्वि वा वीइवइत्ता पच्छा विमोहेज्जा एए चत्तारि दंडगा ॥ ४०० ॥ आसस्स णं भंते ! धावमाणस्स किं खुखुत्ति करेइ ? गोयमा ! आसस्स णं धावमाणस्स हिययस्स य जगयस्स य अंतरा एत्थ णं क(क्क)ब्बडए नामं वाए संमुच्छइ जे णं आसस्स धावमाणस्स खुखुत्ति करेइ ॥ ४०१ ॥ अहं भंते ! आसइस्सामो सइस्सामो चिट्ठिस्सामो निसीइस्सामो तुयट्ठिस्सामो, आमंतणि आणवणी जायणी तह पुच्छणी य पणवणी । पच्चक्खाणी भासा भासा इच्छाणुलोमा य ॥ १॥ अणभिग्गहिंया भासा भासा य अभिग्गहंमि बोद्धव्वा । संसयकरणी भासा वोयडमव्वोयडा चेव ॥ २ ॥ पच्चवणी णं एसा भासा न एसा भासा मोसा ? हंता गोयमा ! आसइस्सामो तं चेव जाव न एसा भासा मोसा । सेवं भंते ! सेवं भंते ! ति ॥ ४०२ ॥ **दसमे सए तइओ उदेसो समत्तो ॥**

तेणं कालेणं तेणं समएणं वाणियगामे नामं नयरे होत्था वन्नओ, दूइपलासए उज्जाणे, सामी समोसडे जाव परिसा पडिगया । तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूर्ह नामं अणगारे जाव उड्डंजाणू जाव विहरइ । तेणं कालेणं तेणं समएणं समणस्स भगवओ महावीरस्स अंतेवासी सामहत्थी नामं अणगारे पगइभइए जहा रोहे जाव उड्डंजाणू जाव विहरइ, तए णं से सामहत्थी अणगारे जायसहे जाव उट्ठाए उट्ठेत्ता जेणेव भगवं गोयमे तेणेव उवागच्छइ तेणेव उवागच्छित्ता भगवं गोयमं तिक्खुतो जाव पज्जुवासमाणे एवं वयासी-अत्थि णं भंते ! चमरस्स असुरिंदस्स असुरकुमाररण्णो तायत्तीसगा देवा ? हंता अत्थि, से केणट्ठेणं भंते ! एवं बुच्चइ चमरस्स असुरिंदस्स असुरकुमाररण्णो तायत्तीसगा देवा ? एवं खलु सामहत्थी ! तेणं कालेणं तेणं समएणं इहेव जंबुदीवे २ भारहे वासे कायंदी नामं नयरी होत्था वन्नओ, तत्थ णं कायंदीए नय-

रीए तायतीसं सहाया गाहावई समणोवासगा परिवसन्ति अद्धा जाव अपरिभूया अभिगयजीवाजीवा उवलद्धपुण्णपावा जाव विहरन्ति, तए णं ते तायतीसं सहाया गाहावई समणोवासगा पुर्वि उग्गा उग्गविहारी संविग्गा संविग्गविहारी भवित्ता तओ पच्छा पासत्था पासत्थविहारी ओसच्चा ओसच्चविहारी कुसीला कुसीलविहारी अहाछंदा अहाछंदविहारी बहूई वासाईं समणोवासगपरियागं पाउणंति २ ता अद्ध-
मासियाए संछेहणाए अत्ताणं झूसेंति अत्ताणं झूसेत्ता तीसं भत्ताई अणसणाए छेदैंति २ ता तस्स ठाणस्स अणालोइयपडिक्कंता कालमासे कालं किच्चा चमरस्स असुरिंदस्स असुरकुमाररत्तो तायतीसगदेवत्ताए उववच्चा, जप्पभिइं च णं भंते ! कायंदगा तायतीसं सहाया गाहावई समणोवासगा चमरस्स असुरिंदस्स असुरकुमाररत्तो ताय-
तीसगदेवत्ताए उववच्चा तप्पभिइं च णं भंते ! एवं वुच्चइ चमरस्स असुरिंदस्स असुर-
कुमाररत्तो तायतीसगा देवा २ ? (तत्थ)तए णं भगवं गोयमे सामहत्थिणा अणगारेणं एवं वुत्ते समाणे संकिए कंखिए वितिगिच्छिए उट्ठाए उट्ठेइ उट्ठाए उट्ठेत्ता सामह-
त्थिणा अणगारेणं सद्धिं जेणेव समणे भगवं महावीरे तेणेव उवागच्छइ तेणेव उवागच्छित्ता समणं भगवं महावीरं वंदइ नमंसइ वंदित्ता नमंसित्ता एवं वयासी-
अत्थि णं भंते ! चमरस्स असुरिंदस्स असुररण्णे तायतीसगा देवा २ ? हंता अत्थि, से केणट्ठेणं भंते ! एवं वुच्चइ ? एवं तं चेव सव्वं भाणियव्वं जाव तप्पभिइं च णं एवं वुच्चइ चमरस्स असुरिंदस्स असुरकुमाररत्तो तायतीसगा देवा २ ? गो
इणट्ठे समट्ठे, एवं खलु गोयमा ! चमरस्स णं असुरिंदस्स असुरकुमाररत्तो तायतीसगाणं देवाणं सासए नामधेज्जे पण्णत्ते, जं न कयाइ नासी न कयाइ न भवइ ण कयाइ ण भविस्सइ जाव निच्चे अक्कोच्छित्तिनयट्ठयाए अच्चे चयंति अच्चे उववज्जंति । अत्थि णं भंते ! बलिस्स वइरोयणिंदस्स वइरोयणरत्तो तायतीसगा देवा २ ? हंता अत्थि,
से केणट्ठेणं भंते ! एवं वुच्चइ बलिस्स वइरोयणिंदस्स जाव तायतीसगा देवा २ ? एवं खलु गोयमा ! तेणं कालेणं तेणं समएणं इहेव जंबुदीवे २ भारहे वासे बिभेले णामं संनिवेसे होत्था वच्चओ, तत्थ णं बिभेले संनिवेसे जहा चमरस्स जाव उव-
वच्चा, जप्पभिइं च णं भंते ! ते बिभेलगा तायतीसं सहाया गाहावई समणोवा-
सगा बलिस्स वइरोयणिंदस्स सेसं तं चेव जाव निच्चे अक्कोच्छित्तिणयट्ठयाए अच्चे चयंति अच्चे उववज्जंति । अत्थि णं भंते ! धरणस्स नागकुमारिंदस्स नागकुमाररत्तो तायतीसगा देवा २ ? हंता अत्थि, से केणट्ठेणं जाव तायतीसगा देवा २ ? गोयमा !
धरणस्स नागकुमारिंदस्स नागकुमाररत्तो तायतीसगाणं देवाणं सासए नामधेज्जे पण्णत्ते जं न कयाइ नासी जाव अच्चे चयंति अच्चे उववज्जंति, एवं भूयाणंदस्सवि,

एवं जाव महाघोसस्स । अत्थि णं भंते ! सक्कस्स देविंदस्स देवरत्तो० पुच्छा, हंता अत्थि, से केणट्ठेणं भंते ! जाव तायत्तीसगा देवा २ ? एवं खलु गोयमा ! तेणं कालेणं तेणं समएणं इहेव जंबुद्वीवे वीवे भारहे वासे पालासए (वालाए) नामं संनिवेसे होत्था वन्नओ, तत्थ णं पालासए सन्निवेसे तायत्तीसं सहाया गाहावई समणोवासगा जहा चमरस्स जाव विहरंति, तए णं ते तायत्तीसं सहाया गाहावई समणोवासगा पुर्विपि पच्छावि उग्गा उग्गविहारी संविग्गा संविग्गविहारी बहूईं वासाईं समणोवासगपरि-यागं पाउणंति पाउणिता मासियाए संलेहणाए अत्ताणं झूसेन्ति झूसिता सद्धिं भत्ताई अणसणाए छेदंति २ ता आलोइयपडिक्कंता समाहिपता कालमासे कालं किच्चा जाव उववन्ना, जप्पभिई च णं भंते ! पालासिगा तायत्तीसं सहाया गाहावई समणोवासगा सेसं जहा चमरस्स जाव अण्णे उववज्जंति । अत्थि णं भंते ! ईसाणस्स ३ एवं जहा सक्कस्स नवरं चंपाए नयरीए जाव उववन्ना, जप्पभिई च णं भंते ! चंपिज्जा ताय-त्तीसं सहाया० सेसं तं चेव जाव अन्ने उववज्जंति । अत्थि णं भंते ! सणकुमारस्स देविंदस्स देवरत्तो० पुच्छा, हंता अत्थि, से केणट्ठेणं जहा धरणस्स तहेव एवं जाव प्राणयस्स एवं अञ्चुयस्स जाव अन्ने उववज्जंति । सेवं भंते ! सेवं भंते ! ति ॥४०३॥

दसमस्स सयस्स चउत्थो उद्देसओ समत्तो ॥

तेणं कालेणं तेणं समएणं रायगिहे नामं नगरे गुणसिलए उज्जाणे जाव परिसा पडिगया, तेणं कालेणं तेणं समएणं समणस्स भगवओ महावीरस्स बहवे अंतेवासी थेरा भगवंतो जाइसंपन्ना जहा अट्टमे सए सत्तमुद्देसए जाव विहरंति । तए णं ते थेरा भगवंतो जायसद्धा जाव संसया जहा गोयमसामी जाव पज्जुवासमाणा एवं वयासी-चमरस्स णं भंते ! असुरिंदस्स असुरकुमाररत्तो कइ अग्गमहिंसीओ पन्न-त्ताओ ? अज्जो ! पंच अग्गमहिंसीओ पन्नत्ताओ, तंजहा-काली राई रयणी विज्जू मेहा, तत्थ णं एगमेगाए देवीए अट्टट्ट देविसहस्सा परिवारो पन्नत्तो, पभू णं भंते ! ताओ एगमेगा देवी अच्चाई अट्टट्ट देवीसहस्साईं परि(या)वारं विउव्वित्तए ? एवामेव सपुव्वा-वरेणं चत्तालीसं देवीसहस्सा, से तं तुडिए, पभू णं भंते ! चमरे असुरिंदे असुरकुमा-रराया चमरचंचाए रायहाणीए सभाए सुहम्माए चमरंसि सीहासणंसि तुडिएणं सद्धिं दिव्वाई भोगभोगाई भुंजमाणे विहरित्तए ? नो इणट्ठे समट्ठे । पभू णं अज्जो ! चमरे असुरिंदे असुरकुमारराया चमरचंचाए रायहाणीए सभाए सुहम्माए चमरंसि सीहास-णंसि चउसट्ठीए सामाणियसाहस्सीहिं तायत्तीसाए जाव अच्चेहिं च बहूहिं असुरकुमारेहिं देवेहिं य देवीहिं य सद्धिं संपरिवुडे महयाहय जाव भुंजमाणे विहरित्तए० केवलं परि-यारिद्धीए नो चेव णं मेहुणवत्तिथं ॥ ४०४ ॥ चमरस्स णं भंते ! असुरिंदस्स असुर-

कुमाररत्नो सोमस्स महारत्नो कइ अग्गमहिंसीओ पन्नत्ताओ ? अज्जो ! चत्तारि अग्ग-
महिंसीओ पन्नत्ताओ, तंजहा-कणगा कणगलया चित्तगुत्ता वसुंधरा, तत्थ णं एग-
मेगाए देवीए एगमेगं देविसहस्सं परिवारो पन्नत्तो, पभू णं ताओ एगमेगा(ए) देवी(ए)
अन्नं एगमेगं देविसहस्सं परियारं विउव्वित्तए, एवामेव सपुव्वाचरेणं चत्तारि देवि-
सहस्सा, सेत्तं तुडिण्णं, पभू णं भंते ! चमरस्स असुरिंदस्स असुरकुमाररत्नो सोमे
महाराया सोमाए रायहाणीए सभाए सुहम्माए सोमंसि सीहासणंसि तुडिण्णं अवसेसं
जहा चमरस्स, नवरं परियारो जहा सूरियाभस्स, सेसं तं चेव, जाव णो चेव णं
मेहुणवत्तियं । चमरस्स णं भंते ! जाव रत्नो जमस्स महारत्नो कइ अग्गमहिंसीओ ?
एवं चेव नवरं जमाए रायहाणीए सेसं जहा सोमस्स, एवं वरुणस्सवि, नवरं वरुणाए
रायहाणीए, एवं वेसमणस्सवि नवरं वेसमणाए रायहाणीए सेसं तं चेव जाव मेहु-
णवत्तियं । बलिस्स णं भंते ! वइरोयणिंदस्स पुच्छा, अज्जो ! पंच अग्गमहिंसीओ
पन्नत्ताओ, तंजहा-सुभा निंसुभा रंभा निरंभा मयणा, तत्थ णं एगमेगाए देवीए
अट्ठइ सेसं जहा चमरस्स, नवरं बलिचंचाए रायहाणीए परिया(वा)रो जहा मोउडे-
सए, सेसं तं चेव जाव मेहुणवत्तियं । बलिस्स णं भंते ! वइरोयणिंदस्स वइरोय-
णरत्नो सोमस्स महारत्नो कइ अग्गमहिंसीओ पन्नत्ताओ ? अज्जो ! चत्तारि अग्गम-
हिंसीओ पन्नत्ताओ, तंजहा-मीणगा सुभदा वि(ज्जु)जया असणी, तत्थ णं एगमेगाए
देवीए सेसं जहा चमर(सोम)स्स, एवं जाव वेसमणस्स ॥ धरणस्स णं भंते ! नाग-
कुमारिंदस्स नागकुमाररत्नो कइ अग्गमहिंसीओ पन्नत्ताओ ? अज्जो ! छ अग्गमहिंसीओ
पन्नत्ताओ, तंजहा-इ(अ)ला सु(स)क्का स(ते)दारा सोयामणी इंदो घणविज्जुया, तत्थ णं
एगमेगाए देवीए छ छ देविसहस्सा परिवारो पन्नत्तो, पभू णं भंते ! ताओ एगमेगा(ए)
देवी(ए) अन्नाइं छ छ देविसहस्साइं परियारं विउव्वित्तए एवामेव सपुव्वाचरेणं छत्तीसं
देविसहस्साइं, सेत्तं तुडिण्णं । पभू णं भंते ! धरणे सेसं तं चेव, नवरं धरणाए राय-
हाणीए धरणंसि सीहासणंसि सओ परिवारो सेसं तं चेव । धरणस्स णं भंते ! नागकु-
मारिंदस्स कालवालस्स लोगवालस्स महारत्नो कइ अग्गमहिंसीओ पन्नत्ताओ ? अज्जो !
चत्तारि अग्गमहिंसीओ पन्नत्ताओ, तंजहा-असोगा विमला सुप्पभा सुदंसणा, तत्थ णं
एगमेगाए देवीए अवसेसं जहा चमरस्स लोगपालाणं, एवं सेसाणं तिण्हवि । भूया-
णंदस्स णं भंते ! पुच्छा, अज्जो ! छ अग्गमहिंसीओ पन्नत्ताओ, तंजहा-रुया रुयंसा
सुहया रु(रु)यगावईं रुयकंता रुयप्पभा, तत्थ णं एगमेगाए देवीए अवसेसं जहा धर-
णस्स, भूयाणंदस्स णं भंते ! नागकुमारस्स वि(न्वि)त्तस्स पुच्छा, अज्जो ! चत्तारि
अग्गमहिंसीओ पण्णत्ताओ, तंजहा-सुणंदा सुभदा सुजाया सुमणा, तत्थ णं एगमेगाए

देवीए अवसेसं जहा चमरलोगपालाणं एवं सेसाणं तिण्हवि लोगपालाणं, जे दाहिणि-
 छाणिंदा तेसिं जहा धरणिंदस्स, लोगपालाणंपि तेसिं जहा धरणस्स लोगपालाणं,
 उत्तरिछाणं इंदाणं जहा भूयाणंदस्स, लोगपालाणवि तेसिं जहा भूयाणंदस्स लोगपा-
 लाणं, नवरं इंदाणं सव्वेसिं रायहाणीओ सीहासणाणि य सरिसणामगाणि, परिवारो
 जहा तइयसए पढमे उद्देसए, लोगपालाणं सव्वेसिं रायहाणीओ सीहासणाणि य सरि-
 सणामगाणि, परिवारो जहा चमरस्स लोगपालाणं । कालस्स णं भंते ! पिसाईंदस्स
 पिसायरओ कइ अग्गमहिंसीओ पन्नत्ताओ ? अज्जो ! चत्तारि अग्गमहिंसीओ पन्न-
 त्ताओ, तंजहा-कमला कमलप्पभा उप्पला सुदंसणा, तत्थ णं एगमेगाए देवीए एग-
 मेगं देविसहस्सं सेसं जहा चमरलोगपालाणं, परिवारो तहेव, नवरं कालाए राय-
 हाणीए कालंसि सीहासणंसि, सेसं तं चेव, एवं महाकालस्सवि । सुरुवस्स णं भंते !
 भूईंदस्स भूयरओ पुच्छा, अज्जो ! चत्तारि अग्गमहिंसीओ पन्नत्ताओ, तंजहा-
 रुववई बहुरुवा सुरुवा सुभगा, तत्थ णं एगमेगा(ए) सेसं जहा कालस्स, एवं पडि-
 रुवस्सवि । पुन्नभइस्स णं भंते ! जक्खिंदस्स पुच्छा, अज्जो ! चत्तारि अग्गमहिंसीओ
 पन्नत्ताओ, तंजहा-पुञ्जा बहुपुत्तिया उत्तमा तारया, तत्थ णं एगमेगाए सेसं जहा
 कालस्स, एवं माणिभइस्सवि । भीमस्स णं भंते ! रक्खसिंदस्स पुच्छा, अज्जो !
 चत्तारि अग्गमहिंसीओ पन्नत्ताओ, तंजहा-पउमा पउमावई कणगा रयणप्पभा, तत्थ
 णं एगमेगा देवी सेसं जहा कालस्स । एवं महाभीमस्सवि । किन्नरस्स णं भंते ! पुच्छा,
 अज्जो ! चत्तारि अग्गमहिंसीओ पन्नत्ताओ, तंजहा-वडेंसा केउमई रइसेणा रइप्पिया,
 तत्थ णं सेसं तं चेव, एवं किंपुरिसस्सवि । स(सु)प्पुरिसस्स णं पुच्छा, अज्जो ! चत्तारि
 अग्गमहिंसीओ पन्नत्ताओ, तंजहा-रोहिणी नवमिया हिंरी पुप्फवई, तत्थ णं एग-
 मेगा देवी सेसं तं चेव, एवं महापुरिसस्सवि । अइकायस्स णं पुच्छा, अज्जो ! चत्तारि
 अग्गमहिंसीओ प०, तंजहा-भु(य)यंगा भुर्यगवई महाकच्छा फुडा, तत्थ णं०, सेसं तं
 चेव, एवं महाकायस्सवि । गीयरइस्स णं भंते ! पुच्छा, अज्जो ! चत्तारि अग्गमहिं-
 सीओ प०, तंजहा-सुघोसा विमला सुस्सरा सरस्सई, तत्थ णं०, सेसं तं चेव, एवं
 गीयजसस्सवि, सव्वेसिं एएसिं जहा कालस्स, नवरं सरिसना(मगा)मियाओ रायहा-
 णीओ सीहासणाणि य, सेसं तं चेव । चंदस्स णं भंते ! जोइसिंदस्स जोइसरओ पुच्छा,
 अज्जो ! चत्तारि अग्गमहिंसीओ पन्नत्ताओ, तंजहा-चंदप्पभा दोसिणाभा अच्चिमाली
 पमंकरा, एवं जहा जीवाभिगमे जोइसियउद्देसए तहेव, सूरस्सवि सूरप्पभा आ(इच्चा)-
 यवाभा अच्चिमाली पमंकरा, सेसं तं चेव, जाव नो चेव णं मेहुणवत्तिर्यं । इंगालस्स
 णं भंते ! महग्गहस्स कइ अग्गमहिंसीओ पुच्छा, अज्जो ! चत्तारि अग्गमहिंसीओ

पन्नत्ताओ, तंजहा-विजया वेजयंती जयंती अपराजिया, तत्थ णं एगमेगाए देवीए सेसं तं चेव जहा चंदस्स, नवरं इंगालवडेंसए विमाणे इंगालगंसि सीहासणंसि सेसं तं चेव, एवं वियालगस्सवि, एवं अट्ठासी(ई)एवि महागहाणं भाणियव्वं जाव भावकेउस्स, नवरं वडेंसगा सीहासणाणि य सरिसनामगाणि, सेसं तं चेव । सक्कस्स णं भंते ! देविंदस्स देवरजो पुच्छा, अज्जो ! अट्ठ अग्गमहिंसीओ पन्नत्ताओ, तंजहा-पउमा-सिवा से(वा)या अंजू अमला अच्छरा नवमिया रोहिणी, तत्थ णं एगमेगाए देवीए सोलस सोलस देविसहस्सा परिवारो पन्नतो, पभू णं ताओ एगमेगा देवी अच्चाई सोलस २ देविसहस्सपरियारं विउव्वित्तए, एवामेव सपुव्वावरेणं अट्ठावीसुत्तरं देविसयसहस्सं परियारं विउव्वित्तए, सेतं तुडिणं । पभू णं भंते ! सक्के देविंदे देवराया सोहम्मे कप्पे सोहम्मवडेंसए विमाणे सभाए सुहम्माए सक्कंसि सीहासणंसि तुडिणं सद्धिं सेसं जहा चमरस्स नवरं परिवारो जहा मोउडेंसए । सक्कस्स णं भंते ! देविंदस्स देवरजो सोमस्स महारजो कइ अग्गमहिंसीओ पुच्छा, अज्जो ! चत्तारि अग्गमहिंसीओ पन्नत्ताओ, तंजहा-रोहिणी मयणा चित्ता सोमा, तत्थ णं एगमेगा० सेसं जहा चमरलोगपालाणं, नवरं सयंपभे विमाणे सभाए सुहम्माए सोमंसि सीहासणंसि, सेसं तं चेव, एवं जाव वेसमणस्स, नवरं विमाणाई जहा तइयसए । ईसाणस्स णं भंते ! पुच्छा, अज्जो ! अट्ठ अग्गमहिंसीओ प०, तंजहा-कण्हा कण्ह-राई रामा रामरक्खिया वसू वसुपुत्ता वसुमिता वसुंधरा, तत्थ णं एगमेगाए० सेसं जहा सक्कस्स । ईसाणस्स णं भंते ! देविंदस्स देवरण्णो सोमस्स महारण्णो कइ अग्गमहिंसीओ पुच्छा, अज्जो ! चत्तारि अग्गमहिंसीओ प०, तंजहा-पुढवी राई रयणी विज्जू, तत्थ णं०, सेसं जहा सक्कस्स लोगपालाणं, एवं जाव वरुणस्स, नवरं विमाणा जहा चउत्थसए, सेसं तं चेव, जाव नो चेव णं मेहुणवत्तियं । सेवं भंते ! सेवं भंते ! ति जाव विहरइ ॥४०५॥ **दसमसए पंचमो उद्देशो समत्तो ॥**

कहि णं भंते ! सक्कस्स देविंदस्स देवरजो सभा सुहम्मा पन्नत्ता ? गोयमा ! जंबुदीवे २ मंदरस्स पव्वयस्स दाहिणेणं इमीसे रयणप्पभाए पुढवीए एवं जहा रायप्पसेणइज्जे जाव पंच वडेंसगा पन्नत्ता, तंजहा-असोगवडेंसए जाव मज्झे सोहम्मवडेंसए, से णं सोहम्मवडेंसए महाविमाणे अद्धतेरस जोयणसयसहस्साई आयाम-विक्खंभेणं, एवं जह सूरियाभे तहेव माणं तहेव उववाओ । सक्कस्स य अभिसेओ तहेव जह सूरियाभस्स ॥ १ ॥ अलंकारो तहेव जाव आयरक्खदेवत्ति, दो सागरो-वमाई ठिई । सक्के णं भंते ! देविंदे देवराया केमहिंष्टिणं जाव केम(हेस)हासोक्खे ? गोयमा ! महिंष्टिणं जाव महासोक्खे, से णं तत्थ बत्तीसाए विमाणावाससयसहस्साणं

जाव विहरइ, एवंमहिङ्गिए जाव महासोकखे सक्के देविंदे देवराया । सेवं भंते ! सेवं भंते ! त्ति ॥ ४०६ ॥ **दसमसए छट्ठो उद्देसो समत्तो ॥**

कहिंभं भंते ! उत्तरिच्छाणं एगोख्यमणुस्साणं एगोख्यदीवे नामं दीवे पज्जते ? एवं जहा जीवाभिगमे तहेव निरवसेसं जाव सुद्धइंतवीवोत्ति, एए अट्ठावीसं उद्देसगा भाणियव्वा । सेवं भंते ! सेवं भंते ! त्ति जाव विहरइ ॥ ४०७ ॥ **दसमसए चउत्तीसइमो उद्देसो समत्तो ॥ दसमं सयं समत्तं ॥**

उप्पल १ साल २ पलासे ३ कुंभी ४ नाली य ५ पउम ६ कची ७ य । नल्लिण ८ सिव ९ लोग १० काला ११ लंभिय १२ दस दो य एक्कारे ॥ १ ॥ उववाओ १ परिमाणं २ अवहाइ ३ चत्त ४ बंध ५ वेए ६ य । उदए ७ उदीरणए ८ लेसा ९ दिट्ठी १० य नाणे ११ य ॥ १ ॥ जोगु १२ वओगे १३ वज्ज १४ रसमाई १५ ऊसासगे १६ य आहारं १७ । विरई १८ किरिया १९ बंधे २० सन्न २१ कसायि २२ त्थि २३ बंधे २४ य ॥ २ ॥ सज्जि २५ दिय २६ अणुबंधे २७ संवेहा २८ हार २९ ठिइ ३० समुग्घाए ३१ । चयणं ३२ मूलईसु य उववाओ ३३ सव्वजीवाणं ॥ ३ ॥ तेणं कालेणं तेणं समएणं रायगिहे जाव पज्जुवासमाणे एवं वयासी-उप्पलेणं भंते ! एगपत्तए किं एगजीवे अणेगजीवे ? गोयमा ! एगजीवे नो अणेगजीवे, तेण परं जे अजे जीवा उववज्जंति ते णं गो एगजीवा अणेगजीवा । ते णं भंते ! जीवा कओहिंतो उववज्जंति किं नेरइएहिंतो उववज्जंति तिरिक्खमणुस्स-देवेहिंतो उववज्जंति ? गोयमा ! नो नेरइएहिंतो उववज्जंति तिरिक्खजोणिएहिंतोवि उववज्जन्ति मणुस्सेहिंतोवि उववज्जंति देवेहिंतोवि उववज्जंति, एवं उववाओ भाणियव्वो जहा वक्कंतीए वणस्सइकाइयाणं जाव ईसाणेत्ति १ । ते णं भंते ! जीवा एगसम-एणं केवइया उववज्जंति ? गोयमा ! जहजेणं एक्को वा दो वा तिज्जि वा उक्कोसेणं संखेज्जा वा असंखेज्जा वा उववज्जंति २ । ते णं भंते ! जीवा समए २ अवहीरमाणा २ केवइयकालेणं अवहीरंति ? गोयमा ! ते णं असंखेज्जा समए २ अवहीरमाणा २ असंखेज्जाहिं उस्सप्पिणिओसप्पिणीहिं अवहीरंति नो चेव णं अवहिया सिया ३ । तेसि णं भंते ! जीवाणं केमहालिया सरीरोगाहणा पण्णत्ता ? गोयमा ! जहजेणं अंगुलस्स असंखेज्जभागं उक्कोसेणं साइरेणं जोयणसहरस्सं ४ । ते णं भंते ! जीवा णाणावरणिजस्स कम्मस्स किं बंधगा अबंधगा ? गोयमा ! नो अबंधगा बंधए वा बंधगा वा एवं जाव अंतराइयस्स, नवरं आउयस्स पुच्छा, गोयमा ! बंधए वा अबंधए वा बंधगा वा अबंधगा वा अहवा बंधए य अबंधए य अहवा बंधए य अबंधगाय अहवा बंधगा य अबंधए य अहवा बंधगा य अबंधगा य ८ एए अट्ठ

भंगा ५ । ते णं भंते ! जीवा णाणावरणिजस्स कम्मस्स किं वेयगा अवेयगा ? गोयमा ! नो अवेयगा वेदए वा वेयगा वा एवं जाव अंतराइयस्स, ते णं भंते ! जीवा किं सायावेयगा असायावेयगा ? गोयमा ! सायावेयए वा असायावेयए वा अट्ठ भंगा ६ । ते णं भंते ! जीवा णाणावरणिजस्स कम्मस्स किं उदई अणुदई ? गोयमा ! नो अणुदई उदई वा उदइणो वा, एवं जाव अंतराइयस्स ७ ॥ ते णं भंते ! जीवा णाणावरणिजस्स कम्मस्स किं उदीरगा० ? गोयमा ! नो अणुदीरगा उदीरए वा उदीरगा वा, एवं जाव अंतराइयस्स, नवरं वेयणिजाउएसु अट्ठ भंगा ८ । ते णं भंते ! जीवा किं कण्हलेसा नीललेसा काउलेसा तेउलेसा ? गोयमा ! कण्हलेसे वा जाव तेउलेसे वा कण्हलेस्सा वा नीललेस्सा वा काउलेस्सा वा तेउलेसा वा अहवा कण्हलेसे य नीललेस्से य एवं एए दुयासंजोगतियासंजोगचउक्कसंजोगेणं असीइ भंगा भवन्ति ९ ॥ ते णं भंते ! जीवा किं सम्मदिट्ठी मिच्छादिट्ठी सम्मा-मिच्छादिट्ठी ? गोयमा ! नो सम्मदिट्ठी नो सम्मामिच्छादिट्ठी मिच्छादिट्ठी वा मिच्छा-दिट्ठिणो वा १० । ते णं भंते ! जीवा किं नाणी अन्नाणी ? गोयमा ! नो नाणी अण्णाणी वा अन्नाणिणो वा ११ । ते णं भंते ! जीवा किं मणजोगी वइजोगी कायजोगी ? गोयमा ! नो मणजोगी णो वइजोगी कायजोगी वा कायजोगिणो वा १२ । ते णं भंते ! जीवा किं सागारोवउत्ता अणागारोवउत्ता ? गोयमा ! सागा-रोवउत्ते वा अणागारोवउत्ते वा अट्ठ भंगा १३ । तेसि णं भंते ! जीवाणं सरीरगा कइवन्ना कइगंधा कइरसा कइफासा ५० ? गोयमा ! पंचवन्ना पंचरसा दुग्ंधा अट्ठ-फासा ५०, ते पुण अप्पणा अवन्ना अगंधा अरसा अफासा ५० १४-१५ ॥ ते णं भंते ! जीवा किं उस्सासा निस्सासा नो उस्सासनिस्सासा ? गोयमा ! उस्सासए वा १ निस्सासए वा २ नो उस्सासनिस्सासए वा ३ उस्सासगा वा ४ निस्सासगा वा ५ नो उस्सासनीसासगा वा ६, अहवा उस्सासए य निस्सासए य ४ अहवा उस्सासए य नो उस्सासनिस्सासए य ४ अहवा निस्सासए य नो उस्सासनीसासए य ४, अहवा उस्सासए य नीसासए य नो उस्सासनिस्सासए य अट्ठ भंगा, एए छव्वीसं भंगा भवन्ति ॥ १६ ॥ ते णं भंते ! जीवा किं आहारगा अणाहारगा ? गोयमा ! नो अणाहारगा आहारए वा अणाहारए वा एवं अट्ठ भंगा १७ । ते णं भंते ! जीवा किं विरया अविरया विरयाविरया ? गोयमा ! नो विरया नो विरयाविरया अविरए वा अविरया वा १८ । ते णं भंते ! जीवा किं सकिरिया अकिरिया ? गोयमा ! नो अकिरिया सकिरिए वा सकिरिया वा १९ । ते णं भंते ! जीवा किं सत्तविहबंधगा अट्ठविहबंधगा ? गोयमा ! सत्तविहबंधए वा अट्ठविहबंधए वा अट्ठ भंगा २० । ते

णं भंते ! जीवा किं आहारसन्नोवउत्ता भयसन्नोवउत्ता मेहुणसन्नोवउत्ता परिगहसन्नो-
वउत्ता ? गोयमा ! आहारसन्नोवउत्ता वा असीइ भंगा २१ । ते णं भंते ! जीवा
किं कोहकसाई माणकसाई मायाकसाई लोभकसाई ? गोयमा ! कोहकसाई वा
असीइ भंगा २२ । ते णं भंते ! जीवा किं इत्थिवेदगा पुरिसवेदगा नपुंसगवेदगा ?
गोयमा ! नो इत्थिवेदगा नो पुरिसवेदगा नपुंसगवेदए वा नपुंसगवेदगा वा २३ ।
ते णं भंते ! जीवा किं इत्थिवेदबंधगा पुरिसवेदबंधगा नपुंसगवेदबंधगा ? गोयमा !
इत्थिवेदबंधए वा पुरिसवेदबंधए वा नपुंसगवेदबंधए वा, छव्वीसं भंगा २४ । ते
णं भंते ! जीवा किं सन्नी असन्नी ? गोयमा ! नो सन्नी असन्नी वा असन्निणो वा
२५ । ते णं भंते ! जीवा किं सईदिया अणिदिया ? गोयमा ! नो अणिदिया सई-
दिए वा सईदिया वा २६ । से णं भंते ! उप्पलजीवेति कालओ केवच्चिरं होइ ?
गोयमा ! जह्णेणं अंतोमुहुत्तं उक्कोसेणं असंखेज्जं कालं २७ । से णं भंते ! उप्पल-
जीवे पुढविजीवे पुणरवि उप्पलजीवेति केवइयं कालं सेवेज्जा केवइयं कालं गइ-
रागई करेज्जा ? गोयमा ! भवादेसेणं जह्णेणं दो भवग्गहणाई उक्कोसेणं असंखेज्जाई
भवग्गहणाई, कालादेसेणं जह्णेणं दो अंतोमुहुत्ता उक्कोसेणं असंखेज्जं कालं, एवइयं
कालं सेवेज्जा एवइयं कालं गइरागई करेज्जा, से णं भंते ! उप्पलजीवे आउजीवे
एवं चए एवं जहा पुढविजीवे भणिए तथा जाव वाउजीवे भाणियव्वे, से णं भंते !
उप्पलजीवे से वणस्सइजीवे से पुणरवि उप्पलजीवेति केवइयं कालं सेवेज्जा केवइयं
कालं गइरागई करेज्जा ? गोयमा ! भवादेसेणं जह्णेणं दो भवग्गहणाई उक्कोसेणं
अणंताई भवग्गहणाई, कालादेसेणं जह्णेणं दो अंतोमुहुत्ता उक्कोसेणं अणंतं कालं
तरकालं एवइयं कालं सेवेज्जा एवइयं कालं गइरागई करेज्जा, से णं भंते ! उप्पल-
जीवे बैईदियजीवे पुणरवि उप्पलजीवेति केवइयं कालं सेवेज्जा केवइयं कालं गइ-
रागई करेज्जा ? गोयमा ! भवादेसेणं जह्णेणं दो भवग्गहणाई उक्कोसेणं संखेज्जाई
भवग्गहणाई, कालादेसेणं जह्णेणं दो अंतोमुहुत्ता उक्कोसेणं संखेज्जं कालं एवइयं
कालं सेवेज्जा एवइयं कालं गइरागई करेज्जा, एवं तेईदियजीवि, एवं चउरिंदियजीवेवि,
से णं भंते ! उप्पलजीवे पंचेदियतिरिक्खजोणियजीवे पुणरवि उप्पलजीवेति पुच्छा,
गोयमा ! भवादेसेणं जह्णेणं दो भवग्गहणाई उक्कोसेणं अट्ठ भवग्गहणाई काला-
देसेणं जह्णेणं दो अंतोमुहुत्ताई उक्कोसेणं पुव्वकोडिपुहुत्ताई एवइयं कालं सेवेज्जा
एवइयं कालं गइरागई करेज्जा, एवं मणस्सेणवि समं जाव एवइयं कालं गइरागई
करेज्जा २८ । ते णं भंते ! जीवा किमाहारमाहारंति ? गोयमा ! दव्वओ अणंत-
पएसियाई दव्वाई एवं जहा आहारइए वणस्सइकाइयाणं आहारो तहेव जाव

सव्वप्पणयाए आहारमाहारैरिति नवरं निय(मं)मा छद्दिसिं सेसं तं चेव २९ । तेसि णं भंते ! जीवाणं केवइयं कालं ठिई प० ? गोयमा । जहन्नेणं अंतोमुहुत्तं उक्कोसेणं दस वाससहस्साई ३० । तेसि णं भंते ! जीवाणं कइ समुग्घाया प० ? गोयमा । तवो समुग्घाया प०, तंजहा-वेयणासमुग्घाए, कसायसमुग्घाए, मारणंतियसमुग्घाए ३१ । ते णं भंते ! जीवा मारणंतियसमुग्घाएणं किं समोहया मरंति असमोहया मरंति ? गोयमा ! समोहयावि मरंति असमोहयावि मरंति ३२ । ते णं भंते ! जीवा अणंतरं उव्वट्ठिता कहिं गच्छंति कहिं उव्वज्जंति किं नेरइएसु उव्वज्जंति तिरिक्खजोणिएसु उव्वज्जंति एवं जहा वक्कंतीए उव्वट्ठणाए वणस्सइकाइयाणं तहा भाणियव्वं । अह भंते ! सव्वपाणा सव्वभूया सव्वजीवा सव्वसत्ता उप्पलमूलत्ताए उप्पलकंदत्ताए उप्पलनालत्ताए उप्पलपत्तत्ताए उप्पलकेसरत्ताए उप्पलकन्नियत्ताए उप्पलधिभुगत्ताए उव्वन्नपुव्वा ? हंता गोयमा ! असइं अदुवा अणंतखुत्तो । सेवं भंते ! सेवं भंते ! ति ३३ ॥ ४०८ ॥ एक्कारसमस्स सयस्स पढमो उप्पलुद्देसओ समत्तो ॥

सालुए णं भंते ! एगपत्तए किं एगजीवे अणेगजीवे ? गोयमा ! एगजीवे, एवं उप्पलुद्देसगवत्तव्वया अपरिसेसा भाणियव्वा जाव अणंतखुत्तो, नवरं सरीरोगाहणा जहन्नेणं अंगुलस्स असंखेज्जइभागं, उक्कोसेणं धणुपुहुत्तं, सेसं तं चेव । सेवं भंते ! सेवं भंते ! ति ॥ ४०९ ॥ ११-२ ॥ पलासे णं भंते ! एगपत्तए किं एगजीवे अणेगजीवे ? एवं उप्पलुद्देसगवत्तव्वया अपरिसेसा भाणियव्वा, नवरं सरीरोगाहणा जहन्नेणं अंगुलस्स असंखेज्जइभागं उक्कोसेणं गाउयपुहुत्तं)त्ता, देवा एएसु न उव्वज्जंति । लेसासु ते णं भंते ! जीवा किं कण्हलेसा नीललेसा काउलेसा० ? गोयमा ! कण्हलेस्से वा नीललेस्से वा काउलेस्से वा छव्वीसं भंगा, सेसं तं चेव । सेवं भंते ! २ ति ॥ ४१० ॥ ११-३ ॥ कुंभिए णं भंते एगपत्तए किं एगजीवे अणेगजीवे ? एवं जहा पलासुद्देसए तहा भाणियव्वे, नवरं ठिई जहन्नेणं अंतोमुहुत्तं, उक्कोसेणं वासपुहुत्तं, सेसं तं चेव । सेवं भंते ! सेवं भंते ! ति ॥ ४११ ॥ ११-४ ॥ नालिए णं भंते ! एगपत्तए किं एगजीवे अणेगजीवे ? एवं कुंभिउद्देसगवत्तव्वया निरवसेसा भाणियव्वा । सेवं भंते ! सेवं भंते ! ति ॥ ४१२ ॥ ११-५ ॥ पढमे णं भंते ! एगपत्तए किं एगजीवे अणेगजीवे ? एवं उप्पलुद्देसगवत्तव्वया निरवसेसा भाणियव्वा । सेवं भंते ! सेवं भंते ! ति ॥ ४१३ ॥ ११-६ ॥ कन्निए णं भंते ! एगपत्तए किं एगजीवे० ? एवं चेव निरवसेसं भाणियव्वं । सेवं भंते ! सेवं भंते ! ति ॥ ४१४ ॥ ११-७ ॥ नल्लिणे णं भंते ! एगपत्तए किं एगजीवे अणेगजीवे ? एवं चेव निरवसेसं जाव अणंतखुत्तो ॥ सेवं भंते ! सेवं भंते ! ति ॥ ४१५ ॥ एया-रहमे सए अट्टमो उद्देसो समत्तो ॥

तेणं कालेणं तेणं समएणं हत्थिणापुरे नामं नयरे होत्था वन्नओ, तस्स णं हत्थिणापुरस्स नयरस्स बहिया उत्तरपुरच्छिमे दिसीभागे एत्थ णं सहसंबवणे णामं उज्जाणे होत्था सव्वोउयपुप्फफलसमिद्धे रम्मे णंदणवणसंनिगासे सुहसीयलच्छाए मणोरमे साउफले अकंटए पासईए जाव पडिरूवे, तत्थ णं हत्थिणापुरे नयरे सिवे नामं राया होत्था महयाहिमवंत० वन्नओ, तस्स णं सिवस्स रत्तो धारिणी नामं देवी होत्था सुकुमालपाणिपाया वन्नओ, तस्स णं सिवस्स रत्तो पुत्ते धारणीए अत्तए सिव-भट्टए नामं कुमारे होत्था सुकुमाल० जहा सरियकंते जाव पच्चुवेक्खमाणे पच्चुवेक्खमाणे विहरइ, तए णं तस्स सिवस्स रत्तो अन्नया कयाइ पुव्वरत्तावरत्ताकालसमयंसि रज्जधुरं चित्तेमाणस्स अयमेयारूवे अब्भत्थिए जाव समुप्पजित्था-अत्थि ता मे पुरा पोराणाणं जहा तामलिस्स जाव पुत्तेहिं वड्ढामि पसूहिं वड्ढामि रज्जेणं वड्ढामि एवं रट्ठेणं बलेणं बाहणेणं कोसेणं कोट्टागारेणं पुरेणं अंतोउरेणं वड्ढामि विपुलधणकणगरयण जाव संतसारसावएज्जेणं अईव २ अभिवड्ढामि, तं किञ्च अहं पुरा पोराणाणं जाव एगंत-सोत्थयं उव्वेहमाणे विहरामि ? तं जाव ताव अहं हिरत्तेणं वड्ढामि तं चेव जाव अभिवड्ढामि जाव मे सामंतरायाणोवि वसे वट्ठति ताव ता मे सेयं कळं पाउप्पभायाए जाव जलंते सुबहुं लोहीलोहकडाहकडुच्छुयं तंबियं तावसभंडगं घडावेत्ता सिवभई कुमारं रजे ठावेत्ता तं सुबहुं लोहीलोहकडाहकडुच्छुयं तंबियं तावसभंडगं गहाय जे इमे गंगाकूले वाणपत्या तावसा भवन्ति, तं०-होत्तिया पोत्तिया को(सो)त्तिया जन्नई सद्धई थालई हुंबउट्ठा दंतुक्खलिया उम्मज्जगा संमज्जगा निम्मज्जगा संपक्खाला उद्धकंइयगा अहोक्कंइयगा दाहिणकूलगा उत्तरकूलगा संखधमगा कूलधमगा मियलु-द्धया हत्थितावसा जलाभिसेयक(कि)दिणगाया अंबुवासिणो वाउवासिणो जलवासिणो वे(चे)लवासिणो अंबुभक्खिणो वाउभक्खिणो सेवालभक्खिणो मूलाहारा कंदाहारा पत्ताहारा तयाहारा पुप्फाहारा फलाहारा बीयाहारा परिसडियकंदमूलतयपंडुपत्तपुप्फ-फलाहारा उडंडगा स्वक्खमूलिया बिलवासिणो वक्क(ल)वासिणो दिसापोक्खिणो आयाव-णाहिं पंचमिगतावेहिं इंगालसोल्लियंपिव कंदुसोल्लियंपिव कट्टसोल्लियंपिव जाव अप्पाणं करेमाणं विहरन्ति ॥ तत्थ णं जे ते दिसापोक्खियतावसा तेसिं अंतियं मुंडे भवित्ता दिसापोक्खियतावसत्ताए पव्वइत्तए, पव्वइएवि य णं समाणे अयमेयारूवं अभिरगहं अभिनिगिहस्सामि-कप्पइ मे जावजीवाए छट्ठंछट्ठेणं अनिक्खित्तेणं दिसाचक्कवालेणं तवोक्कमेणं उड्डं बाहाओ पमिज्झिय २ जाव विहरित्तएत्तिकट्टु, एवं संपेहेइ संपेहेत्ता कळं जाव जलंते सुबहुं लोहीलोह जाव घडावेत्ता कोडुंबियपुरिसे सदावेइ सदावेत्ता एवं वयासी-खिप्पामेव भो देवाणुप्पिया ! हत्थिणाउरं नयरं सत्तिभतरबाहियं

आसिय जाव तमाणत्तियं पच्चप्पिणंति, तए णं से सिवे राया दोब्बपि कोडुंबियपुरिसे सहावेइ २ ता एवं वयासी-खिप्पामेव भो देवाणुप्पिया । सिवभइस्स कुमारस्स महत्थं ३ विउलं रायाभिसेयं उवट्टवेह, तए णं ते कोडुंबियपुरिसा तहेव जाव उवट्टवेंति, तए णं से सिवे राया अणेगगणनायगदंडनायग जाव संधिवाल सद्धिं संपरिवुडे सिवभइ कुमारं सीहासणवरंसि पुरत्थाभिमुहं निसीयावे(न्ति)इ २ ता अट्टसएणं सोवज्जियाणं कलसाणं जाव अट्टसएणं भोमेज्जाणं कलसाणं सव्विह्वीए जाव रवेणं महया २ रायाभिसेएणं अभिसिच(न्ति)इ २ ता पम्हलसकुमालाए सुरभिए गंधकासाईए गायआई लहे(न्ति)इ पम्ह० २ ता सरसेणं गोसीसेणं एवं जहेव जमालिस्स अलंकारो तहेव जाव कप्पस्ख-गंपिव अलंकियविभूसियं करंति २ ता करयल जाव कट्टु सिवभइ कुमारं जएणं विजएणं वट्ठावेंति जएणं विजएणं वट्ठावेत्ता ताहिं इट्ठाहिं कंताहिं पियाहिं एवं जहा उववाइए कोणियस्स जाव परमाउं पालयाहि इट्टजणसंपरिवुडे हत्थिणापुरस्स नयरस्स अब्बेसि च बट्ठणं गामागरनगर जाव विहराहित्तिकट्टु जयजयसइ पडंजंति, तए णं से सिवभइ कुमारे राया जाए महया हिमवंत० वन्नओ जाव विहरइ, तए णं से सिवे राया अन्नया कयाइं सोहणंसि तिहिकरणदिवसमुहुत्तनक्खत्तंसि विपुलं असणं पाणं खाइमं साइमं उवक्खडावेइ उवक्खडावेत्ता मित्तणाइनियग जाव परिजणं रायाणो खत्तिए य आमं-तेइ आमंतेत्ता तओ पच्छा ण्हाए जाव सरीरे भोयणवेलाए भोयणमंडवंसि सुहासण-वरगए तेणं मित्तणाइनियगसयण जाव परिजणेणं राएहि य खत्तिएहि य सद्धिं विपुलं असणं पाणं खाइमं साइमं एवं जहा तामली जाव सक्कारेइ सम्माणेइ सक्कारेत्ता सम्माणेत्ता तं मित्तणाइनियग जाव परिजणं रायाणो य खत्तिए य सिवभइ च रायाणं आपु-च्छइ आपुच्छित्ता सुवहुं लोहीलोहकडाहकडुच्छुयं जाव भंडगं गहाय जे इमे गंगा-कूलगा वाणपत्या तावसा भवंति तं चेव जाव तेसि अंतियं मुंडे भविता दिसापोकख-यतावसत्ताए पव्वइए, पव्वइएऽविय णं समाणे अयमेयालुवं अभिगगहं अभिणिण्हइ-कप्पइ मे जावज्जीवाए छट्ठं तं चेव जाव अभिगगहं अभिणिण्हइ २ ता पढमं छट्ठक्ख-मणं उवसंपज्जित्ता णं विहरइ । तए णं से सिवे रायरिसी पढमछट्ठक्खमणपारणगंसि आयावणभूमीए पच्चोरुहइ आयावणभूमीए पच्चोरुहिता वागलवत्थनियत्थे जेणेव सए उडए तेणेव उवागच्छइ तेणेव उवागच्छित्ता किट्ठिणसंकाइयगं गिण्हइ गिण्हित्ता पुर-च्छिमं दिसिं पोकखेइ पुरच्छिमाए दिसाए सोमे महाराया पत्थाणे पत्थियं अभिर-क्खउ सिवं रायरिसिं अभि० २, जाणि य तत्थ कंदाणि य मूलाणि य तयाणि य पच्चाणि य पुप्फाणि य फलाणि य बीयाणि य हरियाणि य ताणि अणुजाणउत्ति कट्टु पुरच्छिमं दिसं पसरइ पुर० २ ता जाणि य तत्थ कंदाणि य जाव हरियाणि य ताइ

गेण्डइ २ ता किठिणसंकाइयं भरेइ किदि० २ ता दब्भे य कुसे य समिहाओ य पत्तामोडं च गेण्डइ २ ता जेणेव सए उडए तेणेव उवागच्छइ २ ता किठिणसंकाइयं ठवेइ किदि० २ ता वेई वड्डइ २ ता उवळेवणसंमज्जणं करेइ उ० २ ता दब्भसगम्भकल-साहत्थगए जेणेव गंगा महानई तेणेव उवागच्छइ गंगामहानई ओगाहेइ २ ता जल-मज्जणं करेइ २ ता जलकीडं करेइ २ ता जलाभिसेयं करेइ २ ता आयंते चोक्खे पर-मसुइभूए देवयपिइकयकज्जे दब्भसगम्भकलसाहत्थगए गंगाओ महानईओ पञ्चत्तरइ २ ता जेणेव सए उडए तेणेव उवागच्छइ तेणेव उवागच्छित्ता दब्भेहि य कुसेहि य वालुयाए य वेई रएइ वेई रएत्ता सरएणं अरणिं महेइ सर० २ ता अग्गि पाडेइ २ ता अग्गि संशुक्केइ २ ता समिहाकट्ठाई पक्खिवइ समिहाकट्ठाई पक्खिवित्ता अग्गि उज्जालेइ अग्गि उज्जालेत्ता-‘अग्गिस्स दाहिणे पासे, सत्तांगाई समादहे । तं०-सकहं वक्कलं ठाणं, सिज्जाभंडं कमंडलुं ॥१॥ दंडदारं त(हप्पा)हा पाणं अहेताई समादहे ॥ महुणा य घएण य तंदुलेहि य अग्गि हुणइ, अग्गि हुणित्ता चरं साहेइ, चरं साहेत्ता बलिं वइस्सदेवं करेइ बलिं वइस्सदेवं करेत्ता अतिहिपूर्यं करेइ अतिहिपूर्यं करेत्ता तओ पच्छा अप्पणा आहारमाहारेइ, तए णं से सिवे रायरिसी दोच्चं छट्ठक्खमणं उवसंप-ज्जित्ताणं विहरइ, तए णं से सिवे रायरिसी दोक्खे छट्ठक्खमणपारणंति आयावणभू-मीओ पच्चोरुहइ आयावण० २ ता एवं जहा पढमपारणं नवरं दाहिणं दिसं पोक्खेइ २ ता दाहिणाए दिसाए जमे महाराया पत्थाणे पत्थियं सेसं तं चेव जाव आहार-माहारेइ, तए णं से सिवरायरिसी तच्चं छट्ठक्खमणं उवसंपज्जित्ता णं विहरइ, तए णं से सिवे रायरिसी सेसं तं चेव नवरं पच्चत्थिमं दिसिं पोक्खेइ पच्चत्थिमाए दिसाए वरुणे महाराया पत्थाणे पत्थियं सेसं तं चेव जाव आहारमाहारेइ, तए णं से सिवे रायरिसी चउत्थं छट्ठक्खमणं उवसंपज्जित्ता णं विहरइ, तए णं से सिवे रायरिसी चउत्थछट्ठक्खमण एवं तं चेव नवरं उत्तरं दिसं पोक्खेइ उत्तराए दिसाए वेसमणे महाराया पत्थाणे पत्थियं अभिरक्खउ सिवं० सेसं तं चेव जाव तओ पच्छा अप्पणा आहारमाहारेइ ॥ ४१६ ॥ तए णं तस्स सिवस्स रायरिसिस्स छट्ठंछट्ठेणं अनिक्खित्तेणं दिसाचक्खवालेणं जाव आयावेमाणस्स पगइभइयाए जाव विणीययाए अन्नया कयाइ तयावरणिजाणं कम्माणं खओवसमेणं ईहापोहमग्गणवेसणं करेमा-णस्स विभंगे नामं अजाणे समुप्पजे, से णं तेणं विभंगनाणेणं समुप्पजेणं पासइ अस्सि लोए सत्त दीवे सत्त समुदे तेण परं न जाणइ न पासइ, तए णं तस्स सिवस्स रायरिसिस्स अयमेयारुवे अब्भत्थिए जाव समुप्पजित्था-अत्थि णं ममं अइसेसे नाणदंसणे समुप्पजे एवं खलु अस्सि लोए सत्त दीवा सत्त समुदा तेण परं

वोच्छिन्ना दीवा य समुद्रा य, एवं संपेहेइ २ ता आयावणभूमीओ पच्चोखइ
 आ० २ ता वागलवत्थनियत्थे जेणेव सए उडए तेणेव उवागच्छइ २ ता सुबहुं
 खोहीलोहकडाहकडुच्छयं जाव भंडगं किट्ठिणसंकाइयं च गेण्हइ २ ता जेणेव हत्थि-
 णापुरे नयरे जेणेव तावसावसहे तेणेव उवागच्छइ २ ता भंडनिकखेवं करेइ २
 ता हत्थिणापुरे नयरे सिंघाडगतिग जाव पहेसु बहुजणस्स एवमाइक्खइ जाव एवं
 परूवेइ-अत्थि णं देवाणुप्पिया ! ममं अइसेसे नाणदंसणे समुप्पन्ने, एवं खलु अस्सि
 लोए जाव दीवा य समुद्रा य, तए णं तस्स सिवस्स रायरिसिस्स अंतियं एयमट्ठं
 सोच्चा निसम्म हत्थिणापुरे नयरे सिंघाडगतिग जाव पहेसु बहुजणो अन्नमन्नस्स
 एवमाइक्खइ जाव परूवेइ-एवं खलु देवाणुप्पिया ! सिवे रायरिसी एवं आइक्खइ
 जाव परूवेइ-अत्थि णं देवाणुप्पिया ! ममं अइसेसे नाणदंसणे समुप्पण्णे जाव तेण
 परं वोच्छिन्ना दीवा य समुद्रा य, से कहमेयं मन्ने एवं ? । तेणं कालेणं तेणं सम-
 एणं सामी समोसढे परिसा जाव पडिगया । तेणं कालेणं तेणं समएणं समणस्स
 भगवओ महावीरस्स जेट्ठे अंतेवासी जहा विइयसए नियंउहेसए जाव अडमाणे
 बहुजणसइ निसामेइ बहुजणो अन्नमन्नस्स एवं आइक्खइ जाव एवं परूवेइ-एवं
 खलु देवाणुप्पिया ! सिवे रायरिसी एवं आइक्खइ जाव परूवेइ-अत्थि णं देवाणु-
 प्पिया ! तं चेव जाव वोच्छिन्ना दीवा य समुद्रा य, से कहमेयं मन्ने एवं ? तए
 णं भगवं गोयमे बहुजणस्स अंतियं एयमट्ठं सोच्चा निसम्म जायसद्धे जहा
 नियंउहेसए जाव तेण परं वोच्छिन्ना दीवा य समुद्रा य, से कहमेयं भंते ! एवं ?
 गोयमादि समणे भगवं महावीरे भगवं गोयमं एवं वयासी-जन्नं गोयमा । से बहुजणे
 अन्नमन्नस्स एवमाइक्खइ तं चेव सव्वं भाणियव्वं जाव भंडनिकखेवं करेइ हत्थि-
 णापुरे नयरे सिंघाडग० तं चेव जाव वोच्छिन्ना दीवा य समुद्रा य, तए णं तस्स
 सिवस्स रायरिसिस्स अंतिए एयमट्ठं सोच्चा निसम्म तं चेव सव्वं भाणियव्वं जाव
 तेण परं वोच्छिन्ना दीवा य समुद्रा य तण्णं मिच्छा, अहं पुण गोयमा ! एवमाइ-
 क्खामि जाव परूवेमि-एवं खलु जंबुदीवाईया दीवा लवणाईया समुद्रा संठाणओ
 एगविहिविहाणा वित्थारओ अणेगविहिविहाणा एवं जहा जीवाभिगमे जाव संयंभूरमण-
 समुद्रपज्ववसाणा अस्सि तिरियलोए असंखेजा दीवसमुद्रा पन्नता समणाउसो । ॥ अत्थि
 णं भंते ! जंबुदीवे दीवे दव्वाइं सव्वन्नाइंपि अवन्नाइंपि सगंधाईपि अगंधाईंपि
 सरसाईपि अरसाईपि सफासाईपि अफासाईपि अन्नमन्नपुट्ठाइं जाव
 घडत्ताए चिट्ठंति ? हंता अत्थि । अत्थि णं भंते ! लवणसमुदे दव्वाइं सव्वन्नाइंपि
 अवन्नाइंपि सगंधाईपि अगंधाईपि सरसाईपि अरसाईपि सफासाईपि अफासाईपि

अन्नमन्नवद्धाई अन्नमन्नपुद्धाई जाव घडत्ताए चिट्ठंति ? हंता अत्थि । अत्थि णं मंते ! धायइसंडे दीवे दव्वाई सवन्नाईपि० एवं चेव, एवं जाव सयंभूरमणसमुद्धे जाव हंता अत्थि । तए णं सा महइमहालिया महच्चपरिसा समणस्स भगवओ महावीरस्स अंतियं एयमट्ठं सोच्चा निसम्म हट्ठुट्ठा समणं भगवं महावीरे वंदइ नमंसइ वंदित्ता नमंसित्ता जामेव दिसिं पाउब्भूया तामेव दिसिं पडिग्या, तए णं हत्थिणापुरे नयरे सिंघाडग जाव पहेसु बहुजणो अन्नमन्नस्स एवमाइक्खइ जाव परुवेइ-जन्नं देवाणुप्पिया ! सिवे रायरिसी एवमाइक्खइ जाव परुवेइ-अत्थि णं देवाणुप्पिया ! ममं अइसेसे नाणदंसणे जाव समुद्दा य, तं नो इणट्ठं समट्ठे, समणे भगवं महावीरे एवमाइक्खइ जाव परुवेइ-एवं खलु एयस्स सिवस्स रायरिसिस्स छट्ठंछट्ठेणं तं चेव जाव भंडनिकखेवं करेइ भंडनिकखेवं करेत्ता हत्थिणापुरे नयरे सिंघाडग जाव समुद्दा य, तए णं तस्स सिवस्स रायरिसिस्स अंतियं एयमट्ठं सोच्चा निसम्म जाव समुद्दा य, तण्णं मिच्छा, समणे भगवं महावीरे एवमाइक्खइ०-एवं खलु जंबुद्दीर्वाइया दीवा लवणाईया समुद्दा तं चेव जाव असंखेज्जा वीवसमुद्दा पन्नत्ता समणाउसो ! । तए णं से सिवे रायरिसी बहुजणस्स अंतियं एयमट्ठं सोच्चा निसम्म संकिए कंखिए वित्तिगिच्छिए मेदसमावन्ने कल्लससमावन्ने जाए यावि होत्था, तए णं तस्स सिवस्स रायरिसिस्स संकियस्स कंखियस्स जाव कल्लससमावन्नस्स से विभंगे अन्नाणे खिप्पामेव परिवडिए, तए णं तस्स सिवस्स रायरिसिस्स अयमेयारुवे अन्नमत्थिए जाव समुप्पज्जित्था-एवं खलु समणे भगवं महावीरे आहगरे तित्थगरे जाव सव्वन्नू सव्वदरिसी आगासगएणं चक्केणं जाव सहसंबवणे उज्जाणे अहापडि-रुवं जाव विहरइ, तं महाफलं खलु तहारुवाणं अरहंताणं भगवंताणं नामगोयस्स जहा उववाइए जाव गहणयाए, तं गच्छामि णं समणं भगवं महावीरं वंदामि जाव पज्जुवासामि, एयं णे इहभवे य परभवे य जाव भविस्सइत्तिकट्ठु एवं संपेहेइ एवं संपेहित्ता जेणेव तावसावसहे तेणेव उवागच्छइ तेणेव उवागच्छित्ता तावसावसहं अणुप्पविसइ २ ता सुवहुं लोहीलोहकडाह जाव किट्ठिणसंकाइगं च गेण्हइ गेण्हित्ता तावसावसहाओ पडिनिक्खमइ ताव० २ ता परिवडियविभंगे हत्थिणापुरं नयरं मज्झमउज्जेणं निग्गच्छइ निग्गच्छित्ता जेणेव सहसंबवणे उज्जाणे जेणेव समणे भगवं महावीरे तेणेव उवागच्छइ तेणेव उवागच्छित्ता समणं भगवं महावीरं तिकखुत्तो आयाहिणं पयाहिणं करेइ वंदइ नमंसइ वंदित्ता नमंसित्ता नच्चासन्ने नाइदूरे जाव पंजलिउडे पज्जुवासइ, तए णं समणे भगवं महावीरे सिवस्स रायरिसिस्स तीसे य महइमहालियाए जाव आणाए आराहए भवइ, तए णं से सिवे रायरिसी समणस्स

भगवओ महावीरस्स अंतियं धम्मं सोच्चा निसम्म जहा खंदओ जाव उत्तरपुरच्छिमं
दिसीभागं अवक्कमइ २ ता सुवहुं लोहीलोहकडाह जाव किडिणसंकाइं च एगंते एवेइ
एडिता सयमेव पंचमुट्ठियं लोयं करेइ सयमे० २ ता समणं भगवं महावीरं एवं जहेव
उसभदत्तो तहेव पव्वइओ तहेव एक्कारस अंगाईं अहिजइ तहेव सव्वं जाव सव्व-
दुक्खप्पहीणे ॥ ४१७ ॥ भंते ! त्ति भगवं गोयमे समणं भगवं महावीरं वंदइ नमंसइ
वंदिता नमंसित्ता एवं वयासी-जीवा णं भंते ! सिज्झमाणा कयरम्मि संघयणे सिज्झंति ?
गोयमा ! वइरोसभणारायसंघयणे सिज्झंति, एवं जहेव उववाइए तहेव संघयणं
संठाणं उच्चतं आउयं च परिवसणा, एवं सिद्धिगंडिया निरवसेसा भाणियव्वा जाव
अव्वाबाहं सोक्खं अणुहवं (हुंती) ति सास(यं)या सिद्धा । सेवं भंते ! २ त्ति ॥
॥ ४१८ ॥ **सिवो समत्तो । एक्कारसमे सए नवमो उद्देसो समत्तो ॥**

रायगिहे जाव एवं वयासी-कइविहे णं भंते । लोए पन्नते ? गोयमा ! चउव्विहे
लोए पन्नते, तंजहा-दव्वलोए, खेतलोए, काललोए, भावलोए । खेतलोए णं भंते !
कइविहे पण्णते ? गोयमा ! तिविहे पन्नते, तंजहा-अहोलोयखेतलोए १ तिरियलो-
यखेतलोए २ उड्डलोयखेतलोए ३ । अहोलोयखेतलोए णं भंते ! कइविहे पन्नते ?
गोयमा ! सत्तविहे पन्नते, तंजहा-रयणप्पभापुडविअहोलोयखेतलोए जाव अहेसत्त-
मापुडविअहोलोयखेतलोए । तिरियलोयखेतलोए णं भंते ! कइविहे पन्नते ? गोयमा !
असंखेजविहे पन्नते, तंजहा-जंबुद्दीवे २ तिरियलोयखेतलोए जाव सयंभूरमणसमुद्दे
तिरियलोयखेतलोए । उड्डलोयखेतलोए णं भंते ! कइविहे पन्नते ? गोयमा ! पन्नर-
सविहे पन्नते, तंजहा-सोहम्मकप्पउड्डलोयखेतलोए जाव अञ्जुयकप्पउड्डलोयखेतलोए
गेवेजविमाणउड्डलोयखेतलोए अणुत्तरविमाणउड्डलोयखेतलोए ईसिपव्वभारपुडविउड्ड-
लोयखेतलोए । अहोलोयखेतलोए णं भंते ! किंसंठिए पन्नते ? गोयमा ! तप्पागारसंठिए
पन्नते । तिरियलोयखेतलोए णं भंते ! किंसंठिए पन्नते ? गोयमा ! झल्लरिसंठिए पन्नते ।
उड्डलोयखेतलोय० पुच्छा, गोयमा ! उड्डमुईगागारसंठिए पन्नते । लोए णं भंते ! किं-
संठिए पन्नते ? गोयमा ! सुपइट्ठगसंठिए लोए पन्नते, तंजहा-हेट्ठा बिच्छे मज्जे संखिते
जहा सत्तमसए पढमोद्देसए जाव अंतं करंति । अलोए णं भंते ! किंसंठिए पन्नते ?
गोयमा ! झुसिरगोलसंठिए पन्नते ॥ अहेलोयखेतलोए णं भंते ! किं जीवा जीवदेसा जीव-
पएसा० ? एवं जहा ईदा दिसा तहेव निरवसेसं भाणियव्वं जाव अद्दासमए । तिरिय-
लोयखेतलोए णं भंते ! किं जीवा० ? एवं चेव, एवं उड्डलोयखेतलोएवि, नवरं अरुवी
छव्विहा अद्दासमओ नत्थि ॥ लोए णं भंते ! किं जीवा० ? जहा विइयसए अत्थिउद्देसए
लोगागासे, नवरं अरुवी सत्तविहा जाव अहम्मत्थिकायस्स पएसां नो आगासत्थिकाए

आगासत्थिकायस्स देसे आगासत्थिकायस्स पएसा अद्धासमए, सेसं तं चेव ॥ अलोए णं भंते ! किं जीवा० ? एवं जहा अत्थिकायउद्देसए अलोगागासे तहेव निरवसेसं जाव अणंतभागूणे ॥ अहेलोगखेत्तलोगस्स णं भंते ! एगंसि आगासपएसे किं जीवा जीवदेसा जीवपएसा अजीवा अजीवदेसा अजीवपएसा ? गोयमा ! नो जीवा जीवदेसावि जीवपएसावि अजीवावि अजीवदेसावि अजीवपएसावि, जे जीवदेसा ते नियमा एगिंदियदेसा १ अहवा एगिंदियदेसा य वेईंदियस्स देसे २ अहवा एगिंदियदेसा य वेईंदियाण य देसा ३ एवं मज्झिक्खविरहिओ जाव अणिंदिएसु जाव अहवा एगिंदियदेसा य अणिंदियाणयदेसा, जे जीवपएसा ते नियमा एगिंदियपएसा १ अहवा एगिंदियपएसा य वेईंदियस्स पएसा २ अहवा एगिंदियपएसा य वेईंदियाण य पएसा ३ एवं आइक्खविरहिओ जाव पंचिंदिएसु अणिंदिएसु तियभंगो, जे अजीवा ते दुविहा पञ्चाता, तंजहा-रूवी अजीवा य अरूवी अजीवा य, रूवी तहेव, जे अरूवी अजीवा ते पंचविहा पण्णाता, तंजहा-नो धम्मत्थिकाए धम्मत्थिकायस्स देसे १ धम्मत्थिकायस्स पएसे २ एवं अहम्मत्थिकायस्सवि ४ अद्धासमए ५ । तिरियलोगखेत्तलोगस्स णं भंते ! एगंसि आगासपएसे किं जीवा० ? एवं जहा अहोलोगखेत्तलोगस्स तहेव, एवं उद्धलोगखेत्तलोगस्सवि, नवरं अद्धासमओ नत्थि, अरूवी चउव्विहा लोगस्स जहा अहेलोगखेत्तलोगस्स एगंसि आगासपएसे ॥ अलोगस्स णं भंते ! एगंसि आगासपएसे० पुच्छा, गोयमा ! नो जीवा नो जीवदेसा तं चेव जाव अणंतेहिं अगुख्यलहुयगुणेहिं संजुते सव्वागासस्स अणंतभागूणे ॥ दव्वओ णं अहेलोगखेत्तलोए अणंताई जीवदव्वाई अणंताई अजीवदव्वाई अणंता जीवाजीवदव्वा एवं तिरियलोगखेत्तलोएवि, एवं उद्धलोगखेत्तलोएवि, दव्वओ णं अलोए णेवत्थि जीवदव्वा नेवत्थि अजीवदव्वा नेवत्थि जीवाजीवदव्वा एगे अजीवदव्वदेसे जाव सव्वागासस्स अणंतभागूणे । कालओ णं अहेलोगखेत्तलोए न कयाइ नासि जाव निच्चे एवं जाव अलोए । भावओ णं अहेलोगखेत्तलोए अणंता वज्जपज्जवा जहा खंदए जाव अणंता अगुख्यलहुयपज्जवा एवं जाव लोए, भावओ णं अलोए नेवत्थि वज्जपज्जवा जाव नेवत्थि अगुख्यलहुयपज्जवा एगे अजीवदव्वदेसे जाव अणंतभागूणे ॥ ४१९ ॥ लोए णं भंते ! केमहालए पज्जेते ? गोयमा ! अयच्चं जंबुदीवे २ सव्वदीव० जाव परिकखेवेणं, तेणं कालेणं तेणं समएणं छ देवा महिद्धिया जाव महेसक्खा जंबुदीवे २ मंदरे पव्वए मंदरचूलियं सव्वओ समंता संपरिक्खित्ताणं चिट्ठेज्जा, अहे णं चत्तारि दिसाकुमारीओ महत्तरियाओ चत्तारि बलिपिंडे गहाय जंबुदीवस्स २ चउसुवि दिसासु बहियाभिमुहीओ ठिच्चा ते चत्तारि बलिपिंडे जमगसमगं

बहियाभिमुहे पक्खिवेजा, पभू णं गोयमा ! तओ एगमेगे देवे ते चत्तापि बलिपिडे
 धरणितलमसंपत्ते खिप्पामेव पडिसाहरित्तए, ते णं गोयमा ! देवा ताए उक्किट्ठाए जाव
 देवगईए एगे देवे पुरच्छाभिमुहे पयाए एवं दाहिणाभिमुहे एवं पच्चत्थाभिमुहे एवं
 उत्तराभिमुहे एवं उट्ठाभिमुहे एगे देवे अहोभिमुहे पयाए, तेणं कालेणं तेणं समएणं
 वाससहस्साउए दारए पयाए, तए णं तस्स दारगस्स अम्मापियरो पहीणा भवन्ति
 णो चेव णं ते देवा लोगंतं संपाउणंति, तए णं तस्स दारगस्स आउए पहीणे भवइ
 णो चेव णं जाव संपाउणंति, तए णं तस्स दारगस्स अट्ठिमिंजा पहीणा भवन्ति णो
 चेव णं ते देवा लोगंतं संपाउणंति, तए णं तस्स दारगस्स आसत्तमेवि कुलवसे
 पहीणे भवइ णो चेव णं ते देवा लोगंतं संपाउणंति, तए णं तस्स दारगस्स नामगोएवि
 पहीणे भवइ णो चेव णं ते देवा लोगंतं संपाउणंति, तेसि णं भंते ! देवाणं किं गए
 बहुए अगए बहुए ? गोयमा ! गए बहुए नो अगए बहुए, गया(ओ)उ से अगए असंखे-
 जइभागे अगयाउ से गए असंखेज्जगुणे, लोए णं गोयमा ! एमहालए पच्चते । अलोए
 णं भंते । केमहालए पच्चते ? गोयमा ! अयन्नं समयखेत्ते पणयालीसं जोयणसयसह-
 स्साई आयामविकखंभेणं जहा खंदए जाव परिकखेवणं, तेणं कालेणं तेणं समएणं
 दस देवा महिद्धिया तहेव जाव संपरिकखित्ताणं संचिट्ठेजा, अहे णं अट्ठ दिसाकुमा-
 रीओ महत्तरियाओ अट्ठ बलिपिडे गहाय माणुसुत्तरस्स पव्वयस्स चउसुवि दिसासु
 चउसुवि विदिसासु बहियाभिमुहीओ ठिच्चा अट्ठ बलिपिडे जमगंसमगं बहियाभिमु-
 हीओ पक्खिवेजा, पभू णं गोयमा ! तओ एगमेगे देवे ते अट्ठ बलिपिडे धरणित-
 लमसंपत्ते खिप्पामेव पडिसाहरित्तए, ते णं गोयमा ! देवा ताए उक्किट्ठाए जाव देव-
 गईए लोगंते ठिच्चा असब्भावपट्टवणाए एगे देवे पुरच्छाभिमुहे पयाए एगे देवे
 दाहिणपुरच्छाभिमुहे पयाए एवं जाव उत्तरपुरच्छाभिमुहे पयाए एगे देवे उट्ठाभिमुहे
 एगे देवे अहोभिमुहे पयाए, तेणं कालेणं तेणं समएणं वाससयसहस्साउए दारए
 पयाए, तए णं तस्स दारगस्स अम्मापियरो पहीणा भवन्ति नो चेव णं ते देवा अलोयंतं
 संपाउणंति, तं चेव जाव तेसि णं भंते ! देवाणं किं गए बहुए अगए बहुए ? गोयमा !
 नो गए बहुए अगए बहुए, गयाउ से अगए अणंतगुणे अगयाउ से गए अणंतभागे,
 अलोए णं गोयमा ! एमहालए पच्चते ॥४२०॥ लोगस्स णं भंते ! एणंमि आगासप-
 एसे जे एणंदियपएसा जाव पंविदियपएसा अणंदियपएसा अन्नमन्नबद्धा अन्नमन्नपुट्ठा
 जाव अन्नमन्नसमभरघट्ठाए चिट्ठंति, अत्थि णं भंते ! अन्नमन्नस्स किंवि आबाहं वा
 वाबाहं वा उप्पायंति छविच्छेदं वा करंति ? णो इणट्ठे समट्ठे, से केणट्ठेणं भंते ।
 एवं वुच्चइ लोगस्स णं एणंमि आगासपएसे जे एणंदियपएसा जाव चिट्ठंति अत्थि

णं अन्नमन्नस्स किञ्चि आबाहं वा जाव करेति ? गोयमा ! से जहानामए नट्टिया सिया सिंगारागारचारवेसा जाव कलिया रंगट्ठाणंसि जगसयाउलंसि जणसय-सहस्साउलंसि बत्तीसइविहस्स नट्टस्स अन्नयरं नट्टविहिं उवदंसेज्जा, से नूणं गोयमा ! ते पेच्छगा तं नट्टियं अणिमिसाए दिट्ठीए सव्वओ समंता समभिलोएंति ? हंता भंते ! समभिलोएंति, ताओ णं गोयमा ! दिट्ठीओ तंसि नट्टियंसि सव्वओ समंता सण्णिपडियाओ ? हंता सज्जि(घ)पडियाओ, अत्थि णं गोयमा ! ताओ दिट्ठीओ तीसे नट्टियाए किञ्चिवि आबाहं वा वाबाहं वा उप्पाएंति छविच्छेदं वा करेति ? णो इणट्ठे समट्ठे, अहवा सा नट्टिया तासि दिट्ठीणं किञ्चि आबाहं वा वाबाहं वा उप्पाएइ छविच्छेदं वा करेइ ? णो इणट्ठे समट्ठे, ताओ वा दिट्ठीओ अन्नमन्नाए दिट्ठीए किञ्चि आबाहं वा वाबाहं वा उप्पाएंति छविच्छेदं वा करेन्ति ? णो इणट्ठे समट्ठे, से तेणट्ठेणं गोयमा ! एवं वुच्चइ तं चेव जाव छविच्छेदं वा करेति ॥ ४२१ ॥ लोगस्स णं भंते ! एगंसि आगासपएसे जहन्नपए जीवपएसाणं उक्कोसपए जीवपएसाणं सव्व-जीवाण य कयरे २ जाव विसेसाहिया वा ? गोयमा ! सव्वत्थोवा लोगस्स एगंसि आगासपएसे जहन्नपए जीवपएसा, सव्वजीवा असंखेज्जगुणा, उक्कोसपए जीवपएसा विसेसाहिया । सेवं भंते । सेवं भंते । ति ॥ ४२२ ॥ **एक्कारसमस्स सयस्स दसमो उदेसो समत्तो ॥**

तेणं कालेणं तेणं समएणं वाणियगामे नामं नयरे होत्या वन्नओ, दूइपलासे उज्जाणे वन्नओ जाव पुडविसिलापट्ठओ, तत्थ णं वाणियगामे नयरे सुदंसणे नामं सेट्ठी परिवसइ अट्ठे जाव अपरिभूए समणोवासए अभिगयजीवाजीवे जाव विहरइ, सामी समोसडे जाव परिसा पज्जुवासइ, तए णं से सुदंसणे सेट्ठी इमीसे कहाए लद्धट्ठे समाणे हट्टुट्ठे ण्हाए सव्वालंकारविभूसिए साओ गिहाओ पडिनिक्खमइ साओ गिहाओ पडिनिक्खमिता सकोरेंटमल्लदामेणं छत्तेणं धरिज्जमाणेणं पायविहारचारेणं महया पुरिसवग्गुरापरिक्खिते वाणियगामं नयरं मज्झमज्जेणं निग्गच्छइ निग्गच्छित्ता जेणेव दूइपलासे उज्जाणे जेणेव समणे भगवं महावीरे तेणेव उवागच्छइ तेणेव उवागच्छित्ता समणं भगवं महावीरं पंचविहेणं अभिगमेणं अभिगच्छइ, तं—सच्चित्ताणं दक्खणां जहा उसभदत्तो जाव तिविहाए पज्जुवासणाए पज्जुवासइ । तए णं समणे भगवं महावीरे सुदंसणस्स सेट्ठिस्स तीसे य महइमहालियाए जाव आराहए भवइ । तए णं से सुदंसणे सेट्ठी समणस्स भगवओ महावीरस्स अंतियं धम्मं सोच्चा निसम्म हट्टुट्ठे उट्ठाए उट्ठेइ २ ता समणं भगवं महावीरं तिक्खुत्तो जाव नमंसित्ता एवं वयासी—कइविहे णं भंते ! काले पन्नत्ते ? सुदंसणा ! चउव्विहे काले

पन्नते, तंजहा-पमाणकाले १ अहाउनिव्वत्तिकाले २ मरणकाले ३ अद्धाकाले ४, से किं तं पमाणकाले ? २ दुविहे पणत्ते, तंजहा-दिवसप्पमाणकाले य १ राइप्पमाणकाले य २, चउपोरिसिए दिवसे चउपोरिसिया राई भवइ ॥ ४२३ ॥ उक्कोसिया अद्धपंचममुहुत्ता दिवसस्स वा राईए वा पोरिसी भवइ, जहन्निया तिसुहुत्ता दिवसस्स वा राईए वा पोरिसी भवइ, जया णं भंते ! उक्कोसिया अद्धपंचममुहुत्ता दिवसस्स वा राईए वा पोरिसी भवइ तथा णं कइभागमुहुत्तभागेणं परिहायमाणी २ जहन्निया तिसुहुत्ता दिवसस्स वा राईए वा पोरिसी भवइ तथा णं कइभागमुहुत्तभागेणं परिवह्णमाणी २ उक्कोसिया अद्धपंचममुहुत्ता दिवसस्स वा राईए वा पोरिसी भवइ ? सुदंसणा ! जया णं उक्कोसिया अद्धपंचममुहुत्ता दिवसस्स वा राईए वा पोरिसी भवइ तथा णं बावीससयभागमुहुत्तभागेणं परिहायमाणी २ जहन्निया तिसुहुत्ता दिवसस्स वा राईए वा पोरिसी भवइ, जया णं जहन्निया तिसुहुत्ता दिवसस्स वा राईए वा पोरिसी भवइ तथा णं बावीससयभागमुहुत्तभागेणं परिवह्णमाणी परिवह्णमाणी उक्कोसिया अद्धपंचममुहुत्ता दिवसस्स वा राईए वा पोरिसी भवइ । कया णं भंते ! उक्कोसिया अद्धपंचममुहुत्ता दिवसस्स वा राईए वा पोरिसी भवइ कया वा जहन्निया तिसुहुत्ता दिवसस्स वा राईए वा पोरिसी भवइ ? सुदंसणा ! जया णं उक्कोसए अट्टारसमुहुत्ते दिवसे भवइ जहन्निया दुवालसमुहुत्ता राई भवइ तथा णं उक्कोसिया अद्धपंचममुहुत्ता दिवसस्स पोरिसी भवइ जहन्निया तिसुहुत्ता राईए पोरिसी भवइ, जया णं उक्कोसिया अट्टारसमुहुत्तिया राई भवइ जहन्निए दुवालसमुहुत्ते दिवसे भवइ तथा णं उक्कोसिया अद्धपंचममुहुत्ता राईए पोरिसी भवइ जहन्निया तिसुहुत्ता दिवसस्स पोरिसी भवइ । कया णं भंते ! उक्कोसए अट्टारसमुहुत्ते दिवसे भवइ जहन्निया दुवालसमुहुत्ता राई भवइ कया वा उक्कोसिया अट्टारसमुहुत्ता राई भवइ जहन्निए दुवालसमुहुत्ते दिवसे भवइ ? सुदंसणा ! आसाढपुत्तिमाए णं उक्कोसए अट्टारसमुहुत्ते दिवसे भवइ जहन्निया दुवालसमुहुत्ता राई भवइ, पोसस्स पुत्तिमाए णं उक्कोसिया अट्टारसमुहुत्ता राई भवइ जहन्निए दुवालसमुहुत्ते दिवसे भवइ ॥ अत्थि णं भंते ! दिवसा य राईओ य समा चेव भवन्ति ? हंता ! अत्थि, कया णं भंते ! दिवसा य राईओ य समा चेव भवन्ति ? सुदंसणा ! चित्तासोयपुत्तिमाउ णं, एत्थि णं दिवसा य राईओ य समा चेव भवन्ति, पन्नरसमुहुत्ते दिवसे पन्नरसमुहुत्ता राई भवइ चउभागमुहुत्तभागूणा चउमुहुत्ता दिवसस्स वा राईए वा पोरिसी भवइ, सेत्तं पमाणकाले ॥ ४२४ ॥ से किं तं अहाउनिव्वत्तिकाले ? अहाउनिव्वत्तिकाले जन्नं जेणं नेरइएण वा तिरिक्खजोणिएण वा मणुस्सेण वा देवेण वा अहाउयं

निव्वत्तिं सेत्तं पालेमाणे अहाउनिव्वत्तिकाले । से किं तं मरणकाले ? २ जीवो वा
 सरीराओ सरीरं वा जीवाओ, सेत्तं मरणकाले ॥ सै किं तं अद्धाकाले ? अद्धाकाले
 अणेगविहे पन्नत्ते, तं० समयट्ठयाए आवलियट्ठयाए जाव उस्सपिणीट्ठयाए । एस णं
 सुदंसणा ! अद्धा दोहारच्छेयणेणं छिज्जमाणी जाहे विभागं नो हव्वमागच्छइ सेत्तं
 समए, समयट्ठयाए असंखेज्जाणं समयाणं समुदयसमिद्दसमागमेणं सा एगा आवलि-
 यत्ति पवुच्चइ, संखेज्जाओ आवलियाओ जहा सालिउइसए जाव तं सागरोवमस्स उ
 एगस्स भवे परिमाणं । एएहि णं भंते ! पलिओवमसागरोवमेहिं किं पओयणं ?
 सुदंसणा ! एएहिं पलिओवमसागरोवमेहिं नेरइयतिरिक्खजोणियमणुस्सदेवाणं आउ-
 याइं माविज्जंति ॥ ४२५ ॥ नेरइयाणं भंते ! केवइयं कालं ठिई पत्ता ? एवं ठिइपयं
 निरवसेसं भाणियव्वं जाव अजहन्नमणुक्कोसेणं तेत्तीसं सागरोवमाइं ठिई पत्ता
 ॥ ४२६ ॥ अत्थि णं भंते ! एएसिं पलिओवमसागरोवमाणं खएइ वा अवच्चएइ
 वा ? हंता अत्थि, से केणट्ठेणं भंते ! एवं वुच्चइ अत्थि णं एएसिं णं पलिओवमसा-
 गरोवमाणं जाव अवचएइ वा ? । एवं खलु सुदंसणा ! तेणं कालेणं तेणं समएणं
 हत्थिणापुरे नामं नयरे होत्था वन्नओ, सहसंबवणे उज्जाणे वन्नओ, तत्थ णं हत्थि-
 णापुरे नयरे बले नामं राया होत्था वन्नओ, तस्स णं बलस्स रन्नो पभावई नामं
 देवी होत्था सुकुमाल० वन्नओ जाव विहरइ । तए णं सा पभावई देवी अन्नया
 कयाइ तंसि तारिसगंसि वासघरंसि अब्भितरओ सचित्तकम्मे बाहिरिओ दूमियघट्ट-
 मट्ठे विचित्तउल्लोगचिल्लियतले मणिरयणपणासियंधयारे बहुसमसुविभत्तदेसभाए पंच-
 वन्नसरससुरभिमुक्कपुप्फपुंजोवयारकलिए कालागुरुपवरकुंदुक्कतुक्कधुवमघमधंतगंधुहु
 यामिरामे सुगंधिवरगंधिए गंधवट्ठिभूए तंसि तारिसगंसि सयणिजंसि सालिगणवट्ठिए
 उमओ विव्वोयणे दुहओ उन्नए मज्झेणयगंभीरे गंगापुल्लिणवालुयउहालसालिसए
 उवचियखोमियदुगुल्लपट्टपट्ठिच्छायणे सुविरइयरयत्ताणे रत्तंसुयसंबुडे सुरम्मे आइणगरू-
 यवूरणवणीयत्तलफासे सुगंधवरकुल्लमचुन्नसयणोवयारकलिए अद्धरत्तकालसमयंसि सुत्ता-
 जागरा ओहीरमाणी २ अयमेयारूवं ओरालं कल्लणं सिवं धन्नं मंगलं सत्तिरियं महा-
 सुविणं पासित्ता णं पडिबुद्धा तं० हाररययखीरसागरससंककिरणदगरयययमहासेलपं-
 डुरतरोरुमणिजपेच्छणिजं थिरलट्टपउट्टवट्टपीवरसुसिलिट्ठिविसिट्ठित्तिकवदाढाविडंबि-
 यमुहं परिकम्मियजच्चमलकमलमाइयसोहंतलट्टउट्टं रत्तुप्पलपत्तमउयसुकुमालता-
 लुजीहं मूसंगायपवरकणगतावियआवत्तायंतवट्ठतडि विमलसरिसनयणं विसालपीवरोरु-
 पडिपुन्नविउल्लखंधं मिउविसयसुहुमलक्खणपसत्थविच्छिन्नकेसरसडोवसोहिंयं ऊसिय-
 सुनिम्मियसुजायअप्फोडियलंगूलं सोमं सोमाकारं लीलायंतं जंभायंतं नहयलाओ

ओवयमाणं निययवयणमइवयंतं सीहं सुविणे पासित्ता णं पडिबुद्धा । तए णं सा पभावई देवी अयमेयाख्वं ओरालं जाव सस्सिरीयं महासुविणं पासित्ता णं पडिबुद्धा समाणी हट्टतुट्ट जाव हियया धाराहयकलंबपुण्णं पिव समूससियरोमकूवा तं सुविणं ओगिण्हइ ओगिण्हित्ता सयणिजाओ अब्भुट्ठेइ सयणिजाओ अब्भुट्ठेत्ता अतुरियमच्च-वल्लमसंभेताए अविलंबियाए रायहंससरिसीए गईए जेणेव वलस्स रत्तो सयणिज्जे तेणेव उवागच्छइ तेणेव उवागच्छित्ता वलं रायं ताहिं इट्ठाहिं कंताहिं पियाहिं मणुत्ताहिं मणामाहिं ओरालाहिं कल्लणाहिं सिवाहिं धन्नाहिं मंगल्लाहिं सस्सिरीयाहिं मिउमहुरसंजुलाहिं गिराहिं संलवमाणी संलवमाणी पडिवोहेइ पडिवोहेत्ता बलेणं रत्ता अब्भणुत्ताया समाणी नाणामणिरयणभत्तिचित्तंसि भद्दासणंसि णिसीयइ णिसी-इत्ता आसत्था वीसत्था सुहासणवरगया वलं रायं ताहिं इट्ठाहिं कंताहिं जाव संलव-माणी २ एवं वयासी-एवं खलु अहं देवाणुप्पिया ! अज्ज तंसि तारिसगंसि सयणि-ज्जंसि सालिंगण० तं चेव जाव नियगवयणमइवयंतं सीहं सुविणे पासित्ता णं पडि-बुद्धा, तण्णं देवाणुप्पिया ! एयस्स ओरालस्स जाव महासुविणस्स के मत्ते वल्लणे फलवित्तिविसेसे भविस्सइ ? तए णं से बले राया पभावईए देवीए अंतियं एयमट्ठं सोच्चा निसम्म हट्टतुट्ट जाव हयहियए धाराहयनीवसुरभिकुसुमचंचुमालइयतणुयउ-सवियरोमकूवे तं सुविणं ओगिण्हइ ओगिण्हित्ता ईहं पविसइ ईहं पविसित्ता अप्पणो साभाविएणं मइपुव्वएणं बुद्धिविज्ञाणेणं तस्स सुविणस्स अत्थोग्गहणं करेइ तस्स० २ ता पभावई देविं ताहिं इट्ठाहिं कंताहिं जाव मंगल्लाहिं मिउमहुरसस्सिरीयाहिं संलव-माणे २ एवं वयासी-ओराले णं तुमे देवी ! सुविणे दिट्ठे, कल्लणे णं तुमे देवी ! सुमिणे दिट्ठे जाव सस्सिरीए णं तुमे देवी ! सुविणे दिट्ठे, आरोग्गतुट्ठिवीहाउकल्लणमंगल-कारए णं तुमे देवी ! सुविणे दिट्ठे, अत्थलाभो देवाणुप्पिए ! भोगलाभो देवाणु-प्पिए ! पुत्तलाभो देवाणुप्पिए ! रज्जलाभो देवाणुप्पिए !, एवं खलु तुमं देवाणुप्पिए ! णवहं मासाणं बहुपडिपुत्ताणं अब्भुत्ताणं राईदियाणं वीइक्कंताणं अम्हं कुलकेउं कुलवीवं कुलपव्वयं कुलवडंसयं कुलतिलगं कुलकित्तिकरं कुलनंदिकरं कुलजसकरं कुलाधारं कुलपायवं कुलविकद्धणकरं सुकुमालपाणिपायं अहीणपडिपुण्णपंचिदिय-सरीरं जाव सस्सिसोमाकारं कंतं पियदंसणं सुरूवं देवकुमारसमप्पभं दारगं पया-हिसि । सेऽवि य णं दारए उम्मुक्कबालभावे विज्ञायपरिणयमित्ते जीव्वणममणुपत्ते सुरे वीरे विक्कंते वित्थिन्नविउलबलवाहणे रज्जवई राया भविस्सइ, तं उराले णं तुमे देवी ! सुमिणे दिट्ठे जाव आरोग्गतुट्ठि जावं मंगलकारए णं तुमे देवी ! सुविणे दिट्ठेत्तिकहु पभावई देविं ताहिं इट्ठाहिं जाव वग्गहिं दोब्बपि तच्चपि अणुबूहइ । तए

णं सा पभावई देवी बलस्स रत्नो अंतियं एयमट्टं सोच्चा निसम्म हट्टुट्टं करयल
जाव एवं वयासी-एवमेयं देवाणुप्पिया ! तहमेयं देवाणुप्पिया ! अवितहमेयं देवाणु-
प्पिया ! असंदिद्धमेयं देवाणुप्पिया ! इच्छियमेयं देवाणुप्पिया ! पडिच्छियमेयं
देवाणुप्पिया ! इच्छियपडिच्छियमेयं देवाणुप्पिया ! से जहेयं तुज्झे वदहत्तिकट्ठु तं
सुविणं सम्मं पडिच्छइ पडिच्छित्ता बलेणं रत्ना अच्चणुत्ताया समाणी णाणामणिरयण-
भत्तिचित्ताओ भद्दासणाओ अच्चुट्टेइ अच्चुट्टेत्ता अतुरियमचवल जाव गईए जेणेव सए
सयणिज्जे तेणेव उवागच्छइ तेणेव उवागच्छित्ता सयणिज्जंति निसीयइ निसीइत्ता एवं
वयासी-मा मे से उत्तमे पढाणे मंगले सुविणे अजेहिं पावसुमिणेहिं पडिहम्मिस्सइत्तिकट्ठु
देवगुरुजणसंबद्धाहिं पसत्थाहिं मंगल्लाहिं धम्मियाहिं कहाहिं सुविणजागरियं पडिजा-
गरमाणी २ विहरइ । तए णं से बले राया कोडुंबियपुरिसे सदावेइ सदावेत्ता एवं
वयासी-खिप्पामेव भो देवाणुप्पिया ! अज्ज सविसेसं बाहिरियं उवट्ठाणसालं गंधो-
दयसित्तसुइयसंमज्जिओवलित्तं सुगंधपवरपंचवन्नपुप्फोवयारकलियं कालागुरुपवरकुंदुरुक्क
जाव गंधवट्ठिभूयं करेह य करावेह य करेत्ता करावेत्ता सीद्दासणं रयावेह सीद्दासणं
रयावेत्ता ममेयं जाव पच्चप्पिणह, तए णं ते कोडुंबियपुरिसा जाव पडिसुणेत्ता खिप्पा-
मेव सविसेसं बाहिरियं उवट्ठाणसालं जाव पच्चप्पिणंति, तए णं से बले राया पच्चू-
त्तालसमयंसि सयणिज्जाओ अच्चुट्टेइ सयणिज्जाओ अच्चुट्टेत्ता पायपीढाओ पच्चोरुहइ
पायपीढाओ पच्चोरुहत्ता जेणेव अट्ठणसाला तेणेव उवागच्छइ २ त्ता अट्ठणसालं अणु-
पविसइ जहा उववाइए तहेव अट्ठणसाला तहेव मज्जणधरे जाव ससिव्व पियदंसणे
नरवई मज्जगधराओ पडिनिक्खमइ पडिनिक्खमिन्ति जेणेव बाहिरिया उवट्ठाणसाला
तेणेव उवागच्छइ तेणेव उवागच्छित्ता सीद्दासणवरंसि पुरच्छाभिमुहे निसीयइ निसी-
इत्ता अप्पणो उत्तरपुरच्छिमे दिसीभाए अट्ठ भद्दासणाई सेयवत्थपच्चुत्थुयाई सिद्धत्थग-
कयमंगलोवयाराई रयावेइ रयावेत्ता अप्पणो अवूरसामंते णाणामणिरयणमंडियं
अहियपेच्छणिज्जं महग्गवरपट्ठणुगयं सण्हपट्टबहुभत्तिसयचित्तताणं ईहामियउसभ
जाव भत्तिचित्तं अट्ठिततरियं जवणियं अंछावेइ अंछावेत्ता नाणामणिरयणभत्तिचित्तं
अत्थरयमउयमसूरगोच्छणं सेयवत्थपच्चुत्थुयं अंगसुहफासयं सुमउयं पभावईए देवीए
भद्दासणं रयावेइ रयावेत्ता कोडुंबियपुरिसे सदावेइ सदावेत्ता एवं वयासी-खिप्पामेव
भो देवाणुप्पिया ! अट्ठममहानिमित्तसुत्तत्थधारए विविहसत्थकुसले सुविणलक्खणपाढए
सदावेह, तए णं ते कोडुंबियपुरिसा जाव पडिसुणेत्ता बलस्स रत्नो अंतियाओ पडि-
निक्खमन्ति पडिनिक्खमिन्ति सिग्घं तुरियं चवलं चंडं वेइयं हत्थिणापुरं नयरं मज्झं-
मज्झेणं निग्गच्छंति २ त्ता जेणेव तेसिं सुविणलक्खणपाढगणं गिहाइं तेणेव उवाग-

च्छन्ति तेणेव उवागच्छिता ते सुविणलक्खणपाढए सद्धान्वेति । तए णं ते सुविण-
लक्खणपाढगा बलस्स रत्तो कोडुंबियपुरिसेहिं सद्धान्विया समाणा हट्ठुट्ठा ण्हाया जाव
सरीरा सिद्धत्थगहरियालियाकयमंगलमुद्धाणा सएहिं २ गिहेहिंतो निग्गच्छन्ति स० २
ता हत्थिणापुरं नयरं मज्झमज्जेणं जेणेव बलस्स रत्तो भवणवरवडेंसए तेणेव उवा-
गच्छन्ति तेणेव उवागच्छिता भवणवरवडेंसगपडिदुवारंसि एगओ मिलंति एगओ
मिलित्ता जेणेव बाहिरिया उवट्ठाणसाला जेणेव बले राया तेणेव उवागच्छन्ति तेणेव
उवागच्छिता करयल० बलं रायं जएणं विजएणं वद्धावेंति । तए णं ते सुविणलक्खण-
पाढगा बलेणं रत्ता वंदियपुड्डयसक्कारियसम्माणिया समाणा पत्तेयं २ पुव्वजत्थेसु
भद्दासणेसु निसीयंति, तए णं से बले राया पभावई देविं जवणियंतारियं ठावेइ ठावेत्ता
पुप्फफलपडिपुञ्जहत्थे परेणं विणएणं ते सुविणलक्खणपाढए एवं वयासी-एवं खलु
देवाणुप्पिया ! पभावई देवी अज्ज तंसि तारिसगंसि वासवरंसि जाव सीहं सुविणे
पासित्ता णं पडिबुद्धा, तण्णं देवाणुप्पिया ! एयस्स ओरालस्स जाव के मन्ने कल्लणे
फलवित्तिविसेसे भविस्सइ ? तए णं ते सुविणलक्खणपाढगा बलस्स रत्तो अंतियं एय-
मट्ठं सोत्वा निसम्म हट्ठुट्ठ० तं सुविणं ओगिण्हन्ति २ ता ईहं अणुप्पविसन्ति अणुप्प-
विसित्ता तस्स सुविणस्स अत्थोग्गहणं करेन्ति तस्स० २ ता अन्नमन्नेणं सद्धिं संचालेंति
२ ता तस्स सुविणस्स लद्धा गहियट्ठा पुच्छियट्ठा विणिच्छियट्ठा अभिगयट्ठा बलस्स
रत्तो पुरओ सुविणसत्थाई उच्चारमाणा २ एवं वयासी-एवं खलु देवाणुप्पिया ! अम्हं
सुविणसत्थंसि बायालीसं सुविणा तीसं महासुविणा वावत्तरिं सब्बसुविणा दिट्ठा, तत्थ णं
देवाणुप्पिया ! तित्थगरमायरो वा चक्कवट्ठिमायरो वा तित्थगरंसि वा चक्कवट्ठिसि वा
गब्भं वक्कममाणंसि एएसिं तीसाए महासुविणाणं इमे चोइस महासुविणे पासित्ता णं
पडिबुज्झंति, तंजहा-गयवसहसीहअभिसेयदामससिदिणयरं झयं कुंभं । पडमसर-
सागरविमाणभवणरयणुच्चयसिहिं च १४ ॥ १ ॥ वासुदेवमायरो वा वासुदेवंसि
गब्भं वक्कममाणंसि एएसिं चोइसण्हं महासुविणाणं अन्नयरे सत्त महासुविणे पासित्ता
णं पडिबुज्झंति, बलदेवमायरो वा बलदेवंसि गब्भं वक्कममाणंसि एएसिं चोइसण्हं
महासुविणाणं अन्नयरे चत्तारि महासुविणे पासित्ता णं पडिबुज्झंति, मंडलियमायरो
वा मंडलियंसि गब्भं वक्कममाणंसि एएसिं णं चउदसण्हं महासुविणाणं अन्नयरं एणं
महासुविणं पासित्ता णं पडिबुज्झन्ति, इमे य णं देवाणुप्पिया ! पभावईए देवीए एणे
महासुविणे दिट्ठे, तं ओराले णं देवाणुप्पिया ! पभावईए देवीए सुविणे दिट्ठे जाव
आरोग्गुट्ठि जाव मंगलकारए णं देवाणुप्पिया ! पभावईए देवीए सुविणे दिट्ठे,
अत्थलामो देवाणुप्पिया ! भोग० पुत्त० रज्जलामो देवाणुप्पिया ! एवं खलु देवाण-

पिया ! पभावई देवी नवण्हं मासाणं बहुपडिपुत्राणं जाव वीइकंताणं तुम्हं कुलकेउं जाव दारणं पयाहिइ, सेऽविय णं दारए उम्मुक्कबालभावे जाव रज्जवई राया भविस्सइ अणगारे वा भावियप्पा, तं ओराले णं देवाणुपिया ! पभावईए देवीए सुविणे दिट्ठे जाव आरोग्गतुट्ठिवीहाउयकल्लणं जाव दिट्ठे । तए णं से बले राया सुविणलक्खण-पाढराणं अंतियं एयमट्ठं सोच्चा निसम्म हट्ठुट्ठ करयल जाव कट्ठु ते सुविण-लक्खणपाढरो एवं वयासी-एवमेयं देवाणुपिया ! जाव से जहेयं तुम्मे वदहत्तिकट्ठु तं सुविणं सम्मं पडिच्छइ तं २ ता सुविणलक्खणपाढए विउलेणं असणपाणखाइम-साइमपुप्फवत्थगंधमल्ललंकारेणं सकारेइ सम्माणेइ सक्कारेता सम्माणेता विउलं जीवि-यारिहं पीइदाणं दलयइ २ ता पडिविसज्जेइ पडिविसज्जेता सीहासणाओ अब्भुट्ठेइ अब्भुट्ठेता जेणेव पभावई देवी तेणेव उवागच्छइ तेणेव उवागच्छिता पभावई देवि ताहिं इट्ठाहिं कंताहिं जाव संलवमाणे संलवमाणे एवं वयासी-एवं खलु देवाणुपिए ! सुविणसत्थंसि बायालीसं सुविणा तीसं महासुविणा बावत्तरिं सव्वसुविणा दिट्ठा, तत्थ णं देवाणुपिए ! तित्थगरमायरो वा चक्कवट्ठिमायरो वा तं चेव जाव अन्नयरं एणं महासुविणं पासित्ता णं पडिबुज्झति, इमे य णं तुम्मे देवाणुपिए ! एये महासुविणे दिट्ठे, तं ओराले णं तुम्मे देवी ! सुविणे दिट्ठे जाव रज्जवई राया भविस्सइ अणगारे वा भावियप्पा, तं ओराले णं तुम्मे देवी ! सुविणे दिट्ठे जाव दिट्ठेत्तिकट्ठु पभावई देवि ताहिं इट्ठाहिं कंताहिं जाव दोच्चं पि तच्चं पि अणुबूहइ, तए णं सा पभावई देवी बलस्स रन्नो अंतियं एयमट्ठं सोच्चा निसम्म हट्ठुट्ठु करयल जाव एवं वयासी-एवमेयं देवाणु-पिया ! जाव तं सुविणं सम्मं पडिच्छइ तं सुविणं सम्मं पडिच्छिता बलेणं रत्ता अब्भणुत्ताया समाणी नाणामणिरयणभत्तिचित्त जाव अब्भुट्ठेइ अतुरियमचवल जाव गईए जेणेव सए भवणे तेणेव उवागच्छइ तेणेव उवागच्छिता सयं भवणमणुपविट्ठा । तए णं सा पभावई देवी ष्हाया सव्वालंकारविभूसिया तं गव्भं णाइसीएहिं नाइ-उण्हेहिं नाइतिहेहिं नाइकट्ठुएहिं नाइकसाएहिं नाइअंविहेहिं नाइमहुरेहिं उउब्भय-माणसुहेहिं भोयणच्छायणगंधमल्लेहिं जं तस्स गव्वस्स हियं मियं पत्थं गव्वभोसणं तं देसे य काले य आहारमाहारेमाणी विवित्तमउएहिं सयणासणेहिं पइरिक्कसुहाए मणाणुकूलाए विहारभूमीए पसत्थदोहला संपुबदोहला सम्माणियदोहला अवमाणिय-दोहला वोच्छिन्नदोहला विणीयदोहला ववगयरोगसोगमोहभयपरितत्तासा तं गव्वं सुहंसुहेणं परिवहइ । तए णं सा पभावई देवी नवण्हं मासाणं बहुपडिपुत्राणं अट्ठ-माण राईदियाणं वीइकंताणं सुकुमालपाणिपायं अहीणपडिपुत्रपंचिदियसरीरं लक्खण-वज्जणगुणोववेयं जाव सत्तिसोमाकारं कंतं पियदंसणं सुखं दारयं पप्पया । तए णं

तीसे पभावईए देवीए अंगपडियारियाओ पभावई देवि पसूयं जाणेता जेणेव बले
 राया तेणेव उवागच्छन्ति तेणेव उवागच्छिता करयल जाव बलं रायं जएणं विजएणं
 बद्धावेंति जएणं विजएणं बद्धावेत्ता एवं वयासी-एवं खलु देवाणुप्पिया ! पभावई
 देवी णवण्हं मासाणं बहुपडिपुण्णाणं जाव दारणं पयाया तं एयणं देवाणुप्पियाणं
 पियट्ठयाए पियं निवेदेमो पियं मे भवउ । तए णं से बले राया अंगपडिया-
 रियाणं अंतियं एयमट्ठं सोच्चा निसम्म दट्ठुट्ठ जाव धाराहयणीव जाव रोमकूवे
 तासिं अंगपडियारियाणं मउडवज्जं जहामालियं ओमोयं दलयइ २ ता सेयं
 रययामयं विमलसलिलपुन्नं भिंगारं च गिण्हइ गिण्हिता मत्थए धोवइ मत्थए धोवित्ता
 विउलं जीवियारिहं पीइदाणं दलयइ पीइदाणं दलइत्ता सक्कारेइ सम्माणेइ स० २
 ता पडिविसज्जेइ ॥ ४२७ ॥ तए णं से बले राया कोडुंबियपुरिसे सदावेइ सदावेत्ता
 एवं वयासी-खिप्पामेव भो देवाणुप्पिया ! हत्थिणापुरे नयरे चारगसोहणं करेह
 चारग० २ ता माणुम्माण(प्पमाण)वट्ठुणं करेह मा० २ ता हत्थिणापुरं नयरं सट्ठिभ-
 तरबाहिरियं आसियसंमज्जिओवलित्तं आव करेह य कारवेह य करेत्ता य कारवेत्ता य
 जूयसहस्सं वा चक्कसहस्सं वा पूयामहामहिमसक्कारं वा उस्सवेह २ ता ममेयमाणत्तिर्यं
 पच्चप्पिण्ह, तए णं ते कोडुंबियपुरिसा बलेणं रत्ता एवं वुत्ता समाणा जाव पच्चप्पि-
 णंति । तए णं से बले राया जेणेव अट्ठणसाला तेणेव उवागच्छइ तेणेव उवाग-
 च्छिता तं चेव जाव मज्जणवराओ पडिनिक्खमइ पडिनिक्खमिता उस्सुक्कं उक्करं
 उक्किट्ठं अदिज्जं अमिज्जं अभडप्पवेसं अदंडकोदंडिमं अधरिमं गणियावरनाडइज्जक-
 लियं अणेगतालाचराणुवरियं अणुद्धुयमुइंगं अमिलायमल्लदामं पमुइयपक्कीलियं सपु-
 रज्जणजणवयं दसदिवसे ठिइवडियं करेइ, तए णं से बले राया दसाहियाए
 ठिइवडियाए वट्ठमाणीए सइए य साहस्सिए य सयसाहस्सिए य जाए य दाए य
 भाए य दलमाणे य दवावेमाणे य सइए य साहस्सिए य सयसाहस्सिए य लंभे
 पडिच्छमाणे य पडिच्छावेमाणे य एवं विहरइ । तए णं तस्स दारगस्स अम्मापियरो
 पढमे दिवसे ठिइवडियं करेन्ति, तइए दिवसे चंदसरदंसणियं करेन्ति, छट्ठे दिवसे
 जागरियं करेन्ति, एक्कारसमे दिवसे वीइक्कते निव्वते असइजायकम्मकरणे संपत्ते
 बारसाहदिवसे विउलं असणं पागं खाइमं साइमं उवक्खडावेंति २ ता जहा सिवो
 जाव खत्तिए य आमंतेंति २ ता तओ पच्छा ण्हाया तं चेव जाव सक्कारेंति
 सम्माणेंति स० २ ता तस्सेव मित्तणाइ जाव राईण य खत्तियाण य पुरओ अज्जयपज्जय-
 पिउपज्जयागयं बहुपुरिसपरंपरप्परुवं कुलणुखवं कुलसरिसं कुलसंताणतंतुविवद्वणकरं
 अवमेयारुवं गोणं गुणनिप्पन्नं नामधेज्जं करेंति-जम्हा णं अम्हं इमे दारए बलस्स

रञ्जो पुते पभावईए देवीए अंतए तं होउ णं अम्हं एयस्स दारगस्स नामधेज्जं महव्वले, तए णं तस्स दारगस्स अम्मापियरो नामधेज्जं करेति महव्वलेति । तए णं से महव्वले दारए पंचधाईपरिगगहिए, तंजहा-खीरधाईए एवं जहा ददपइजे जाव निवायनिव्वाघायंसि सुहंसुहेणं परिवड्ढइ । तए णं तस्स महव्वलस्स दारगस्स अम्मापियरो अणुपुव्वेणं ठिइवडियं वा चंदसूरदंसावणियं वा जागरियं वा नामकरणं वा परंगामणं वा पयच्चं कामणं वा जेमा(म)वणं वा पिंडवदणं वा पजंपावणं वा कण्णवेहणं वा संवच्छरपडिलेहणं वा चोलीयणं च उवणयणं च अच्चाणि य वट्टणि गब्भाहाणजम्मणमाइयाई कोउयाई करेति । तए णं तं महव्वलं कुमारं अम्मापियरो साइरेगट्टवासगं जाणित्ता सोभणंसि तिहिकरणमुहुत्तंसि एवं जहा ददप्पइजे जाव अलं भोगसमत्थे जाए यावि होत्था । तए णं तं महव्वलं कुमारं उम्मुक्कवालभावं जाव अलं भोगसमत्थं विजाणित्ता अम्मापियरो अट्ट पासायवडेंसए कारेति अब्भुग्गयमूसियपहसिए इव वज्जओ जहा रायप्पसेणइजे जाव पडिरूवे, तेसि णं पासायवडेंसगाणं बहुमज्जदेसभाए एत्थ णं महेगं भवणं कारेति अणेगखंभसयसंनिविट्ठं वज्जओ जहा रायप्पसेणइजे पेच्छाघरमंडवंसि जाव पडिरूवे ॥ ४२८ ॥ तए णं तं महव्वलं कुमारं अम्मापियरो अजया कयाइ सोभणंसि तिहिकरणदिवसनक्खत्तमुहुत्तंसि ण्हायं सव्वालंकारविभूसियं पमक्खणगण्हाणगीयाइयपसाहणट्ठंगतिलगकंकणअविहववहुउवणीयं मंगलमुजंपिएहि य वरकोउयमंगलोवयारकयसंतिकम्मं सरिसियाणं सरित्तयाणं सरिव्वयाणं सरिसलावन्नरूवजोव्वणगुणोववेयाणं विणीयाणं सरिसएहिं रायकुलेहिंतो आणिल्लियाणं अट्टण्हं रायवरकन्नाणं एगदिवसेणं पाणिं गिण्हाविस्सु । तए णं तस्स महाबलस्स कुमारस्स अम्मापियरो अयमेयारूवं पीइदाणं दलयंतं ति०-अट्ट हिरन्नकोडीओ अट्ट सुवन्नकोडीओ अट्ट मउडे मउडप्पवरे अट्ट कुंडलजोए कुंडलजोयप्पवरे अट्ट हारे हारप्पवरे अट्ट अद्धहारे अद्धहारप्पवरे अट्ट एगावलीओ एगावलिप्पवराओ एवं सुत्तावलीओ एवं कणगावलीओ एवं रयणावलीओ अट्ट कडगजोए कडगजोयप्पवरे एवं तुडियजोए अट्ट खोमजुयलाइं खोमजुयलप्पवराइं एवं वडगजुयलाइं एवं पडजुयलाइं एवं हुगुल्लजुयलाइं अट्ट सिरीओ अट्ट हिरीओ एवं धिईओ कितीओ बुद्धीओ लच्छीओ अट्ट नंदाइं अट्ट भद्दाइं अट्ट तले तलप्पवरे सव्वरयणामए णियगवरभवणकेऊ अट्ट झए झयप्पवरे अट्ट वए वयप्पवरे दससोसाहस्सिएणं वएणं अट्ट नाडगाइं नाडगप्पवराइं बत्तीसबद्धेणं नाडएणं अट्ट आसे आसप्पवरे सव्वरयणामए सिरिघरपडिरूवए अट्ट हत्थी हत्थिप्पवरे सव्वरयणामए सिरिघरपडिरूवए अट्ट जाणाइं जाणप्पवराइं अट्ट जुगाइं जुगप्पवराइं एवं सिबियाओ

एवं संदमाणीओ एवं गिह्नीओ थिह्नीओ अट्ट वियडजाणाई वियडजाणप्पवराई अट्ट रहे
 पारिजाणिए अट्ट रहे संगमिए अट्ट आसे आसप्पवरे अट्ट हत्थी हत्थिप्पवरे अट्ट
 गामे गामप्पवरे दसकुलसाहस्सिएणं गामेणं अट्ट दासे दासप्पवरे एवं दासीओ
 एवं किंकरे एवं कंचुइजे एवं वरिसधरे एवं महत्तरए अट्ट सोवन्निए ओलंबणदीवे
 अट्ट रूपमए ओलंबणदीवे अट्ट सुवन्नरूपमए ओलंबणदीवे अट्ट सोवन्निए उक्कंचण-
 दीवे एवं चेव तिणिवि, अट्ट सोवणिए पंजरदीवे एवं चेव तिणिवि, अट्ट सोवणिए
 थाले अट्ट रूपमए थाले अट्ट सुवन्नरूपमए थाले अट्ट सोवन्नियाओ पत्तीओ ३ अट्ट
 सोवन्नियाई थासयाई ३ अट्ट सोवन्नियाई मंगळा(मल्ला)ई ३ अट्ट सोवन्नियाओ तलि-
 याओ ३ अट्ट सोवन्नियाओ कविचियाओ ३ अट्ट सोवन्निए अवएडए अट्ट सोवन्नियाओ
 अवयक्काओ ३ अट्ट सोवणिए पायपीढए ३ अट्ट सोवन्नियाओ भित्तियाओ ३ अट्ट
 सोवन्नियाओ करोडियाओ ३ अट्ट सोवन्निए पल्लंके ३ अट्ट सोवन्नियाओ पडिसेज्जाओ
 ३ अट्ट हंसासणाई अट्ट कोंचासणाई एवं गह्लासणाई उच्चयासणाई पणयासणाई
 वीहासणाई भदासणाई पक्खासणाई मगरासणाई अट्ट पउमासणाई अट्ट दिसा-
 सोवत्थियासणाई अट्ट तेल्लसमुग्गे जहा रायप्पसेणइजे जाव अट्ट सरिसवसमुग्गे
 अट्ट खुज्जाओ जहा उववाइए जाव अट्ट पारिसीओ अट्ट छत्ते अट्ट छत्तधारीओ
 चेडीओ अट्ट चामराओ अट्ट चामरधारीओ चेडीओ अट्ट तालियंटे अट्ट तालियंट-
 धारीओ चेडीओ अट्ट करोडियाधारीओ चेडीओ अट्ट खीरधाईओ जाव अट्ट अंक-
 धाईओ अट्ट अंगमद्वियाओ अट्ट उम्मद्वियाओ अट्ट ण्हावियाओ अट्ट पसाहियाओ अट्ट
 वन्नग(चंदण)पेसीओ अट्ट चुन्नगपेसीओ अट्ट कोट्टागारीओ अट्ट दवकारीओ अट्ट
 उवत्थाणियाओ अट्ट नाडइज्जाओ अट्ट कोट्टुंविणीओ अट्ट महाणसिणीओ अट्ट भंडा-
 गारिणीओ अट्ट अ(ब्भा)ज्झाधारिणीओ अट्ट पुप्फधारिणीओ अट्ट पाणिधारिणीओ
 अट्ट बलिकारीओ अट्ट सेज्जाकारीओ अट्ट अर्द्धितरियाओ पडिहारीओ अट्ट बाहि-
 रियाओ पडिहारीओ अट्ट मालाकारीओ अट्ट पेसणकारीओ अन्नं च सुवहुं हिरन्नं
 वा सुवन्नं वा कंसं वा दूसें वा विउलधणकणग जाव संतसारसावएज्जं अलाहिं जाव
 आसत्तमाओ कुलवंसाओ पकामं दाउं पकामं भोत्तुं पकामं परिभाएउं । तए णं से
 महब्बले कुमारे एगमेगाए भज्जाए एगमेगं हिरन्नकोडिं दलयइ एगमेगं सुवन्नकोडिं
 दलयइ एगमेगं मउडं मउडप्पवरं दलयइ एवं तं चेव सव्वं जाव एगमेगं पेसणकारिं
 दलयइ अन्नं च सुवहुं हिरन्नं वा सुवण्णं वा जाव परिभाएउं, तए णं से सहब्बले
 कुमारे उप्पिं पासायवरमए जहा ज्जमाली जाव विहरइ ॥ ४२९ ॥ तैणं कालेणं
 तेणं समएणं विमलस्सं अरहओ पओप्पए धम्मोसे नामं अणंगारे जाइसंभने

धनञ्जो जहा केसिसामिस्स जाव पंचहिं अणगारसएहिं सद्धिं संपरिचुडे पुव्वाणुपुव्विं
 चरमाणे गामाणुगामं दूइज्जमाणे जेणेव हत्थिणापुरे नयरे जेणेव सहसंबवणे उज्जाणे
 तेणेव उवागच्छइ २ ता अहापडिह्वं उगगहं ओगिण्हइ २ ता संजमेणं तवसा
 अप्पाणं भावेमाणे विहरइ । तए णं हत्थिणापुरे नयरे सिंघाडगतिय जाव परिसा
 पज्जुवासइ । तए णं तस्स महब्बलस्स कुमारस्स तं महया जणसइ वा जणवूहं वा
 एवं जहा जमाली तहेव चिंता तहेव कंचुइज्जपुरिसं सहावेइ, कंचुइज्जपुरिसोवि तहेव
 अक्खाइ, नवरं धम्मघोसस्स अणगारस्स आगमणगहियविणिच्छए करयल जाव
 निग्गच्छइ, एवं खलु देवाणुप्पिया । विमलस्स अरहओ पउप्पए धम्मघोसे नामं
 अणगारे सेसं तं चेव जाव सोवि तहेव रहवरेणं निग्गच्छइ, धम्मकहा जहा
 केसिसामिस्स, सोवि तहेव अम्मापियरो आपुच्छइ, नवरं धम्मघोसस्स अणगारस्स
 अंतिए मुंढे भवित्ता अगाराओ अणगारियं पव्वइत्तए तहेव वुत्तपडिवुत्तया नवरं
 इमाओ य ते जाया विउलरायकुलबालियाओ कला० सेसं तं चेव जाव ताहे
 अकामाई चेव महब्बलकुमारं एवं वयासी-तं इच्छामो ते जाया । एगदिवसमवि
 रज्जसिरिं पासित्तए, तए णं से महब्बले कुमारे अम्मापियराण वयणमणुयत्तमाणे
 तुत्तिणीए संचिट्ठइ । तए णं से बळे राया कोडुंबियपुरिसे सहावेइ एवं जहा सिव-
 भट्टस्स तहेव रायाभिसेओ भाणियव्वो जाव अभिसिंचइ २ ता करयलपरिगहियं
 महब्बलं कुमारं जएणं विजएणं वद्धावेति जएणं विजएणं वद्धावित्ता एवं वयासी-
 भण जाया । किं देसो किं पयच्छामो सेसं जहा जमालिस्स तहेव जाव तए णं से
 महब्बले अणगारे धम्मघोसस्स अणगारस्स अंतियं सामाइयमाइयाई चोइस पुव्वाइ
 अहिज्जइ २ ता बहूहिं चउत्थ जाव विचित्तेहिं तवोक्कमेहिं अप्पाणं भावेमाणे
 बहुपडिपुच्चाई दुवालस वासाई सामन्नपरियागं पाउणइ २ ता मासियाए संलेहणाए
 सद्धिं भत्ताई अणसणाए छेदेइ २ ता आलोइयपडिक्कंते समाहिपते कालमासे कालं किच्चा
 उह्वं चंदिमसूरिय जहा अम्मडो जाव बंभलोए कप्पे देवत्ताए उववन्ने, तत्थ णं अत्थे-
 गइयाणं देवाणं दस सागरोवमाई ठिई पण्णत्ता, तत्थ णं महब्बलस्सवि देवस्स दस
 सागरोवमाई ठिई पञ्चत्ता, से णं तुमं सुदंसणा । बंभलोए कप्पे दस सागरोवमाई
 दिव्वाइ भोगभोगाई भुंजमाणे विहरित्ता ताओ चेव देवलोगाओ आउक्खएणं ३
 अणंतरं चयं चइत्ता इहेव वाणियगामे नयरे सेट्टिकुलंसि पुत्तत्ताए पच्चायाए ॥४३०॥
 तए णं तुमे सुदंसणा । उम्मुक्कबालभावेणं विज्ञायपरिणयमेत्तेणं जोव्वणगमणुप्पत्तेणं
 तहारुवाणं थेराणं अंतियं केवलपिन्नत्ते धम्मे निसंते, सेडविय धम्मे इच्छिए पडि-
 च्छिए अभिरुइए तं सुट्ठु ण तुमं सुदंसणा । इदाणि पकरेसि । से तेणट्ठेणं सुदंसणा ।

एवं वुच्चइ-अत्थि णं एएसिं पलिओवमसागरोवमाणं खएइ वा अवचएइ वा, तए णं तस्स सुदंसणस्स सेट्ठिस्स समणस्स भगवओ महावीरस्स अंतियं एयमट्ठं सोच्चा निसम्म सुभेणं अज्झवसाणेणं सुभेणं परिणामेणं लेसाहिं विमुज्झमाणीहिं तयावरणि-
ज्जाणं कम्माणं खओवसमेणं ईहापोहमग्गणगवेसणं करेमाणस्स सन्नीपुव्वजाईसरणे समुप्पन्ने एयमट्ठं सम्मं अभिसमेइ, तए णं से सुदंसणे सेट्ठी समणेणं भगवया महावीरेणं संभारियपुव्वभवे दुगुणाणीयसङ्खसंवेगे आणंदसुपुञ्जनयणे समणं भगवं महावीरं तिकखुतो आ० २ वंदइ नमंसइ वं० २ ता एवं वयासी-एवमेयं भंते ! जाव से जहेयं तुब्भे वदहत्तिककट्ठ उत्तरपुरच्छिम्मं दिसीभागं अवक्कमइ सेसं जहा उसभदत्तस्स जाव सव्वदुक्खप्पहीणे, नवरं चोदस पुव्वाइं अहिज्जइ, बहुपडिपुच्चाइं दुवालस वासाइं सामन्नपरियागं पाउणइ, सेसं तं चेव । सेवं भंते ! सेवं भंते ! त्ति ॥४३१॥
महव्वलो समत्तो ॥ एगारसमे सए एगारसमो उदेसो समत्तो ॥

तेणं कालेणं तेणं समएणं आलंभिया नामं नयरी होत्या वन्नओ, संखवणे उज्जाणे वन्नओ, तत्थ णं आलंभियाए नयरीए वहवे इसिभइपुत्तपामोक्खा समणोवासगा परिवसंति, अट्ठा जाव अपरिभूया अभिगयजीवाजीवा जाव विहरंति । तए णं तेसिं समणोवासयाणं अन्नया कयाइ एगयओ सहियाणं समुवागयाणं संनि(समु)विट्ठाणं सन्निसन्नाणं अयमेयारूवे मिहो कहासमुल्लावे समुप्पजित्था-देवलोगेसु णं अज्जो ! देवाणं केवइयं कालं ठिई पण्णत्ता ? तए णं से इसिभइपुत्ते समणोवासए देवट्ठिइगहियट्ठे ते समणोवासए एवं वयासी-देवलोएसु णं अज्जो ! देवाणं जहण्णेणं दसवाससहस्साइं ठिई पण्णत्ता, तेण परं समयाहिया दुसमयाहिया जाव दससमयाहिया संखेजसम-
याहिया असंखेजसमयाहिया उक्कोसेणं तेत्तीसं सागरोवमाइं ठिई पण्णत्ता, तेण परं बोच्छिन्ना देवा य देवलोगा य । तए णं ते समणोवासगा इसिभइपुत्तस्स समणो-
वासगस्स एवमाइक्खमाणस्स जाव एवं पुरुवेमाणस्स एयमट्ठं नो सदहंति नो पत्ति-
यंति नो रोयंति एयमट्ठं असदहमाणा अपत्तियमाणा अरोएमाणा जामेव दिसिं पाउब्भूया तामेव दिसिं पडिगया ॥ ४३२ ॥ तेणं कालेणं तेणं समएणं समणे भगवं महावीरे जाव समोसडे जाव परिसा पज्जुवासइ । तए णं ते समणोवासगा इमीसे कहाए लद्धट्ठा समाणा हट्ठतुट्ठा एवं जहा तुंगिज्जेसए जाव पज्जुवासंति । तए णं समणे भगवं महावीरे तेसिं समणोवासगाणं तीसे य सदइ० धम्मकहा जाव आणाए आराहए भवइ । तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठतुट्ठा उट्ठाए उट्ठेन्ति उ० २ ता समणं भगवं महावीरं वंदन्ति नमंसन्ति वं० २ ता एवं वयासी-एवं खलु भंते ! इसिभइपुत्ते समणोवासए

अम्हं एवं आइक्खइ जाव परुवेइ-देवलोएसु णं अज्जो ! देवाणं जह्वेणं दस वासस-
हस्साइं ठिई पन्नता तेण परं समयाहिया जाव तेण परं वोच्छिन्ना देवा य देवलोगा
य, से कहमेयं भंते ! एवं ? अज्जोत्ति समणे भगवं महावीरे ते समणोवासए एवं
वयासी-जन्नं अज्जो ! इसिभद्दुत्ते समणोवासए तुब्भं एवं आइक्खइ जाव परुवेइ-
देवलोगेसु णं अज्जो ! देवाणं जह्वेणं दस वाससहस्साइं ठिई पन्नता तेण परं सम-
याहिया जाव तेण परं वोच्छिन्ना देवा य देवलोगा य, सच्चे णं एसमट्ठे, अहं पुण
अज्जो ! एवमाइक्खामि जाव परुवेमि-देवलोगेसु णं अज्जो ! देवाणं जह्वेणं दस
वाससहस्साइं तं चेव जाव तेण परं वोच्छिन्ना देवा य देवलोगा य, सच्चे णं एसमट्ठे ।
तए णं ते समणोवासगा समणस्स भगवओ महावीरस्स अंतियं एयमट्ठं सोच्चा
निसम्म समणं भगवं महावीरं वंदन्ति नमंसन्ति वं० २ ता जेणेव इसिभद्दुत्ते समणो-
वासए तेणेव उवागच्छन्ति २ ता इसिभद्दुत्तं समणोवासगं वंदंति नमंसन्ति वं० २ ता
एयमट्ठं सम्मं विणएणं भुज्जो २ खामेति । तए णं ते समणोवासगा पसिणाइं पुच्छंति
२ ता अट्ठाइं परियादिंयंति अ० २ ता समणं भगवं महावीरं वंदंति नमंसन्ति वं०
२ ता जामेव दिसिं पाउब्भूया तामेव दिसिं पडिगया ॥ ४३३ ॥ भंतेत्ति भगवं
गोयमे समणं भगवं महावीरं वंदइ णमंसइ वं० २ ता एवं वयासी-पभूणं भंते !
इसिभद्दुत्ते समणोवासए देवाणुप्पियाणं अंतियं मुंडे भवित्ता अगाराओ अणगारियं
पव्वइत्ताए ? गोयमा ! णो इणट्ठे समट्ठे, गोयमा ! इसिभद्दुत्ते णं समणोवासए वट्ठहिं
सीलव्वयगुणवयवेरमणपच्चक्खाणपोसहोववासेहिं अहापरिग्गहिं तवोक्कम्मोहिं
अप्पाणं भावेमाणे बट्ठइं वासाइं समणोवासगपरियागं पाउणिहिइ व० २ ता मासि-
याए संलेहणाए अत्ताणं झसेहिइ मा० २ ता सट्ठिं भत्ताइं अणसणाए छेदेहिइ २ ता
आलोइयपडिक्कंते समाहिपत्ते कालमासे कालं किच्चा सोहम्ममे कप्पे अरुणामे विमाणे
देवताए उववज्जिहिइ, तत्थ णं अत्थेगइयाणं देवाणं चत्तारिं पलिओवमाइं ठिई प०,
तत्थ णं इसिभद्दुत्तस्सवि देवस्स चत्तारिं पलिओवमाइं ठिई भविस्सइ । से णं भंते !
इसिभद्दुत्ते देवे ताओ देवलोगाओ आउक्खएणं भवक्खएणं ठिइक्खएणं जाव कहिं
उववज्जिहिइ ? गोयमा ! महाविदेहे वासे सिज्झिहिइ जाव अंतं काहिइ । सेवं भंते !
सेवं भंते ! ति भगवं गोयमे जाव अप्पाणं भावेमाणे विहरइ ॥ ४३४ ॥ तए णं समणे
भगवं महावीरे अन्नया कयाइ आलंभियाओ नयरीओ संखवणाओ उज्जाणाओ पडि-
निक्खमइ पडिनिक्खमित्ता बहिया जणवयविहारं विहरइ । तेणं कालेणं तेणं समएणं
आलंभिया नामं नयरी होत्था वन्नओ, तत्थ णं संखवणे णामं उज्जाणे होत्था वन्नओ,
तस्स णं संखवणस्स उज्जाणस्स अदूरसामंते पोगगळे नामं परिव्वायए परिवसइ रिउ-

व्येजजुव्वेय जाव नएसु सुपरिनिट्ठिए छट्ठंछट्ठेणं अणिविखत्तेणं तवोक्कमेणं उहं
 बाहाओ जाव आयावेमाणे विहरइ । तए णं तस्स पोग्गलस्स छट्ठंछट्ठेणं जाव
 आयावेमाणस्स पगइभइयाए जहा सिवस्स जाव विभंगे नामं अन्नाणे समुप्पजे, से
 णं तेणं विभंगेणं अण्णाणेणं समुप्पजेणं बंभलोए कप्पे देवाणं ठिइं जाणइ पासइ । तए
 णं तस्स पोग्गलस्स परिव्वायगस्स अयमेयारुवे अवमत्थिए जाव समुप्पजित्था-
 अत्थि णं ममं अइसेसे नाणदंसणे समुप्पजे, देवलोएसु णं देवाणं जहजेणं दसवास-
 सहस्साइं ठिइं प०, तेण परं समयाहिया दुसमयाहिया जाव असंखेज्जसमयाहिया
 उक्कोसेणं दससागरोवमाइं ठिइं प०, तेण परं वोच्छिन्ना देवा य देवलोगा य, एवं
 संपेहेइ २ ता आयावणभूमीओ पच्चोरुहइ आ० २ ता तिदंडकुंडिया जाव
 धाउरत्ताओ य गेण्हइ २ ता जेणेव आलंभिया नयरी जेणेव परिव्वायगावसहे
 तेणेव उवागच्छइ २ ता भंडनिकखेवं करेइ भं० २ ता आलंभियाए नयरीए
 सिंघाडग जाव पहेसु अन्नमज्जस्स एवमाइक्खइ जाव परुवेइ-अत्थि णं देवाणुप्पिया ।
 ममं अइसेसे नाणदंसणे समुप्पजे, देवलोएसु णं देवाणं जहजेणं दसवाससहस्साइं
 तहेव जाव वोच्छिन्ना देवा य देवलोगा य । तए णं आलंभियाए नयरीए एएणं
 अभिलावेणं जहा सिवस्स तं चेव जाव से कहमेयं मजे एवं ? सामी समोसडे जाव
 परिसा पडिगया, भगवं गोयमे तहेव भिक्खायरियाए तहेव बहुजणसइं निसामेइ
 तहेव बहुजणसइं निसामेत्ता तहेव सव्वं भाणियव्वं जाव अहं पुण गोयमा ! एवं
 आइक्खामि एवं भासामि जाव परुवेमि-देवलोएसु णं देवाणं जहजेणं दस वास-
 सहस्साइं ठिइं पण्णत्ता, तेण परं समयाहिया दुसमयाहिया जाव उक्कोसेणं तेत्तीसं
 सागरोवमाइं ठिइं पन्नत्ता, तेण परं वोच्छिन्ना देवा य देवलोगा य । अत्थि णं
 भंते ! सोहम्मे कप्पे दव्वाइं सव्वन्नाइंपि अवन्नाइंपि तहेव जाव हंता अत्थि, एवं
 ईसाणेवि, एवं जाव अच्चुए, एवं गेवेज्जविमाणेसु अणुत्तरविमाणेसुवि, ईसिपन्भाराएवि
 जाव हंता अत्थि, तए णं सा महइमहालिया जाव पडिगया, तए णं आलंभियाए
 नयरीए सिंघाडगतिय० अवसेसं जहा सिवस्स जाव सव्वदुक्खप्पहीणे नवरं तिदंड-
 कुंडियं जाव धाउरत्तवत्थपरिहिए परिवडियविभंगे आलंभियं नयरं मज्झमज्झेणं
 निग्गच्छइ जाव उत्तरपुरच्छिमं दिसीभागं अवक्कमइ २ ता तिदंडं कुंडियं च जहा
 खंदओ जाव पव्वइओ सेसं जहा सिवस्स जाव अव्वावाहं सोक्खं अणुभवति सासयं
 सिद्धा । सेवं भंते ! २ ति ॥ ४३५ ॥ एक्कारससे सए बारहमो उहेसो
 समत्तो, एक्कारसमं सयं समत्तं ॥

संखे १ जयंति २ पुठवी ३ पोमगल ४ अइवाय ५ राहु ६ लोगे य ७ । नारे य ८ देव ९ आया १० बारसमसए दसुहेसा ॥ १ ॥ तेणं कालेणं तेणं समएणं सावत्थी नामं नयरी होत्था वच्चओ, कोट्टए उज्जाणे वच्चओ, तत्थ णं सावत्थीए नयरीए बहवे संखप्पामोक्खा समणोवासगा परिवसंति, अट्ठा जाव अपरिभूया अभिगयजीवाजीवा जाव विहरंति, तस्स णं संखस्स समणोवासगस्स उप्पला नामं भारिया होत्था, सुकुमाल जाव सुरुवा समणोवासिया अभिगयजीवाजीवा जाव विहरइ, तत्थ णं सावत्थीए नयरीए पोक्खली नामं समणोवासए परिवसइ अट्ठे अभिगय जाव विहरइ, तेणं कालेणं तेणं समएणं सायी समोसढे परिसा निग्गया जाव पज्जुवासइ, तए णं ते समणोवासगा इमीसे कहाए जहा आलंभियाए जाव पज्जुवासन्ति, तए णं समणे भगवं महावीरे तेसिं समणोवासगणं तीसे य महइ० धम्मकहा जाव परिसा पडिगया, तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठतुट्ठा समणं भगवं महावीरं वंदंति नमंसंति वं० २ ता पसिणाई पुच्छंति २ ता अट्ठाई परियादियंति अ० २ ता उट्ठाए उट्ठंति उ० २ ता समणस्स भगवओ महावीरस्स अंतियाओ कोट्टयाओ उज्जाणाओ पडिनिक्खमन्ति २ ता जेणेव सावत्थी नयरी तेणेव पहारेत्थ गमणाए ॥ ४३६ ॥ तए णं से संखे समणोवासए ते समणोवासए एवं वयासी-तुब्बे णं देवाणुप्पिया! विउलं असणं पाणं खाइमं साइमं उवक्खडावेह, तए णं अम्हे तं विपुलं असणं पाणं खाइमं साइमं आसाएमाणा विस्साएमाणा परिभुंजेमाणा परिभाएमाणा पक्खियं पोसहं पडिजागरमाणा विहरिस्सामो, तए णं ते समणोवासगा संखस्स समणोवासगस्स एयमट्ठं विणएणं पडिजुणंति, तए णं तस्स संखस्स समणोवासगस्स अयमेयारुवे अब्भत्थिए जाव समुप्पज्जित्था-नो खलु मे सेयं तं विउलं असणं जाव साइमं आसाएमाणस्स ४ पक्खियं पोसहं पडिजागरमाणस्स विहरितए, सेयं खलु मे पोसहसालाए पोसहियस्स बंभयारिस्स उम्मुक्कमणिसुवन्नस्स ववगयमालावन्नगविलेवणस्स निक्खित्तसत्थमुसलस्स एगस्स अविइयस्स दब्भसंथारोवगयस्स पक्खियं पोसहं पडिजागरमाणस्स विहरितएतिकट्ठु एवं संपेहेइ २ ता जेणेव सावत्थी नयरी जेणेव सए गिहे जेणेव उप्पला समणोवासिया तेणेव उवागच्छइ २ ता उप्पलं समणोवासियं आपुच्छइ २ ता जेणेव पोसहसाला तेणेव उवागच्छइ २ ता पोसहसालं अणुपविसइ २ ता पोसहसालं पमज्जइ पो० २ ता उच्चारपासवणभूमिं पडिलेहेइ उ० २ ता दब्भसंथारणं संथरइ दब्भ० २ ता दब्भसंथारणं दुरुहइ २ ता पोसहसालाए पोसहिए बंभयारी जाव पक्खियं पोसहं पडिजागरमाणे विहरइ, तए

णं ते समणोवासगा जेणेव सावत्थी नयरी जेणेव साइं २ गिहाइं तेणेव उवागच्छंति
 २ ता विपुलं असणं पाणं खाइमं साइमं उवक्खडावेति २ ता अन्नमजे सदावेति
 अ० २ ता एवं वयासी-एवं खलु देवाणुप्पिया । अम्हेहिं से विउले असणपाणखा-
 इमसाइमे उवक्खडाविए, संखे य णं समणोवासए नो हव्वमागच्छइ, तं सेयं खलु
 देवाणुप्पिया ! अम्हं संखं समणोवासगं सदावेत्तए । तए णं से पोक्खली समणो-
 वासए ते समणोवासए एवं वयासी-अच्छह णं तुब्भे देवाणुप्पिया ! सुनिव्वुया
 वीसत्था अहञ्चं संखं समणोवासगं सदावेमित्तिकट्ट तेसिं समणोवासगाणं अंतियाओ
 पडिनिक्खमइ २ ता सावत्थीए नयरीए मज्झिमज्जेणं जेणेव संखस्स समणोवास-
 गस्स गिहे तेणेव उवागच्छइ २ ता संखस्स समणोवासगस्स गिहं अणुपविट्ठे । तए
 णं सा उप्पला समणोवासिया पोक्खलिं समणोवासगं एज्जमाणं पासइ २ ता
 हट्ठतुट्ठा आसणाओ अब्भुट्ठेइ २ ता सत्तट्ठपयाइं अणुगच्छइ २ ता पोक्खलिं
 समणोवासगं वंदइ नमंसइ वं० २ ता आसणेणं उवनिमंतेइ आ० २ ता एवं वयासी-
 संदिसंतु णं देवाणुप्पिया । किमागमणप्पओयणं ? तए णं से पोक्खली समणो-
 वासए उप्पलं समणोवासियं एवं वयासी-कहिञ्चं देवाणुप्पिए ! संखे समणोवासए ?
 तए णं सा उप्पला समणोवासिया पोक्खलिं समणोवासयं एवं वयासी-एवं खलु
 देवाणुप्पिया ! संखे समणोवासए पोसहसालाए पोसहिए बंभयारी जाव विहरइ ।
 तए णं से पोक्खली समणोवासए जेणेव पोसहसाला जेणेव संखे समणोवासए
 तेणेव उवागच्छइ २ ता गमणागमणाए पडिक्कमइ ग० २ ता संखं समणोवासगं
 वंदइ नमंसइ वं० २ ता एवं वयासी-एवं खलु देवाणुप्पिया ! अम्हेहिं से विउले
 असण जाव साइमे उवक्खडाविए तं गच्छामो णं देवाणुप्पिया ! तं विउलं
 असणं जाव साइमं आसाएमाणा जाव पडिजागरमाणा विहरामो, तए णं से
 संखे समणोवासए पोक्खलिं समणोवासगं एवं वयासी-णो खलु कप्पइ मे देवाणु-
 प्पिया ! तं विउलं असणं पाणं खाइमं साइमं आसाएमाणस्स जाव पडिजागरमा-
 णस्स विहरित्तए, कप्पइ मे पोसहसालाए पोसहियस्स जाव विहरित्तए, तं छंदेणं
 देवाणुप्पिया ! तुब्भे तं विउलं असणं पाणं खाइमं साइमं आसाएमाणा जाव
 विहरइ, तए णं से पोक्खली समणोवासए संखस्स समणोवासगस्स अंतियाओ
 पोसहसालाओ पडिनिक्खमइ २ ता सावत्थी नयरी मज्झिमज्जेणं जेणेव ते समणो-
 वासगा तेणेव उवागच्छइ २ ता ते समणोवासए एवं वयासी-एवं खलु देवाणुप्पिया !
 संखे समणोवासए पोसहसालाए पोसहिए जाव विहरइ तं छंदेणं देवाणुप्पिया !
 तुब्भे विउलं असणपाणखाइमसाइमं जाव विहरइ, संखे णं समणोवासए नो

हृव्वमागच्छइ । तए णं ते समणोवासमा तं विउलं असणं ४ आसाएमाणा जाव विहरंति । तए णं तस्स संखस्स समणोवासगस्स पुव्वरत्तावरत्ताकालसमयंसि धम्मजागरियं जागरमाणस्स अयमेयाह्वे जाव समुप्पज्जित्था-सेयं खलु मे कळ जाव जलंते समणं भगवं महावीरं वंदित्ता नमंसित्ता जाव पज्जुवासित्ता तओ पडिनियत्तस्स पक्खियं पोसहं पारित्तएत्तिकट्टु एवं संपेहेइ २ ता कळं जाव जलंते पोसहसालाओ पडिनिक्खमइ २ ता सुदप्पावेसाइ मंगळाइ वत्थाइ पवरपरिहिण सयाओ गिहाओ पडिनिक्खमइ सयाओ गिहाओ पडिनिक्खमित्ता पायविहारचारेणं सावत्थि नयरिं मज्झमज्झेणं जाव पज्जुवासइ, अभिगमो नत्थि । तए णं ते समणो-वासगा कळं पाउप्पभायाए जाव जलंते ण्हाया जाव सरीरा सएहिं सएहिं गेहेहिंतो पडिनिक्खमंति २ ता एगयओ मिलायंति २ ता सेसं जहा पढमं जाव पज्जुवासंति । तए णं समणे भगवं महावीरे तेसिं समणोवासगाणं तीसे य धम्मकहा जाव आणाए आराहए भवइ । तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठुट्ठा उट्ठाए उट्ठेति २ ता समणं भगवं महावीरं वंदंति नमंसंति वं २ ता जेणेव संखे समणोवासए तेणेव उवागच्छन्ति २ ता संखं समणोवासगं एवं वयासी-तुमं देवाणुप्पिया ! हिज्जो अम्हे अप्पणा चेव एवं वयासी-तुम्हे णं देवाणुप्पिया ! विउलं असणं जाव विहरिस्सामो, तए णं तुमं पोसहसालाए जाव विहरिए तं सुट्ठु णं तुमं देवाणुप्पिया ! अम्हं हीलसि, अज्जोत्ति समणे भगवं महावीरे ते समणोवासए एवं वयासी-मा णं अज्जो ! तुब्भे संखं समणोवासगं हीलह निंदह खिसह गरहह अवमज्जह, संखे णं समणोवासए पियधम्मे चेव दढधम्मे चेव सुदक्खुजागरियं जागरिए ॥४३७॥ भंतेति भगवं बोयमे समणं भगवं महावीरं वंदइ नमंसइ वं २ ता एवं वयासी-कइविहा णं भंते ! जागरिया प० ? गोयमा ! तिविहा जागरिया प०, तंजहा-बुद्धजागरिया, अबुद्धजागरिया, सुदक्खुजागरिया, से केणट्ठेणं भंते ! एवं वुच्चइ तिविहा जागरिया प० तंजहा-बुद्धजागरिया १ अबुद्धजागरिया २ सुदक्खुजागरिया ३ ? गोयमा ! जे इमे अरिहंता भगवंतो उप्पन्नणाणंदसणधरा जहा खंदए जाव सव्वबू सव्वदरिसी एए णं बुद्धा बुद्धजागरियं जागरंति, जे इमे अणगारा भगवंतो इरियासमिया भासासमिया जाव गुतवंभयारी एए णं अबुद्धा अबुद्धजागरियं जागरंति, जे इमे समणोवासगा अभिगयजीवाजीवा जाव विहरन्ति एए णं सुदक्खु-जागरियं जागरंति, से तेणट्ठेणं गोयमा ! एवं वुच्चइ तिविहा जागरिया जाव सुदक्खु-जागरिया ॥४३८॥ तए णं से संखे समणोवासए समणं भगवं महावीरं वंदइ नमंसइ वं २ ता एवं वयासी-कोहवसट्ठे णं भंते ! जीवे किं बंधइ किं पकरेइ किं चिणाइ

किं उवविणाइ? संखा ! कोहवसट्ठे णं जीवे आउयवज्जाओ सत्त कम्मपगडीओ सिद्धिबन्धनबद्धाओ एवं जहा पढमसए असेवुडस्स अणगारस्स जाव अणुपरियट्ठइ । माणवसट्ठे णं भंते ! जीवे एवं चेव । एवं मायावसट्ठेवि, एवं लोभवसट्ठेवि जाव अणु-परियट्ठइ । तए णं ते समणोवासगा समणस्स भगवओ महावीरस्स अंतियं एयमट्ठं सोच्चा निसम्म भीया तत्था तसिया संसारभउव्विग्गा समणं भगवं महावीरं वंदंति नम-संति वं० २ ता जेणेव संखे समणोवासए तेणेव उवागच्छंति २ ता संखं समणोवासगं वंदंति नमसंति वं० २ ता एयमट्ठं सम्मं विणएणं भुज्जो २ खामेति । तए णं ते समणोवासगा सेसं जहा आलंभियाए जाव पडिगया, भंते ! त्ति भगवं गोथमे समणं भगवं महावीरं वंदइ नमसइ वं० २ ता एवं वयासी-पभू णं भंते ! संखे समणोवासए देवाणुप्पियाणं अंतियं सेसं जहा इसिभइपुत्तस्स जाव अंतं काहिइ । सेवं भंते ! सेवं भंते ! त्ति जाव विहरइ ॥ ४३९ ॥ बारहमे सए पढमो उहेसो समत्तो ॥

तेणं कालेणं तेणं समएणं कोसंबी नामं नयरी होत्था वन्नओ, चंदो(तराय)वतरणे उज्जाणे वन्नओ, तत्थ णं कोसंबीए नयरीए सहस्साणीयस्स रत्तो पोत्ते सयाणीयस्स रत्तो पुत्ते चेडगस्स रत्तो नत्तुए मिगावईए देवीए अत्तए जयंतीए समणोवासियाए भत्तिजए उदायणे नामं राया होत्था वन्नओ, तत्थ णं कोसंबीए नयरीए सहस्साणीयस्स रत्तो सुण्हा सयाणीयस्स रत्तो भज्जा चेडगस्स रत्तो धूया उदायणस्स रत्तो माया जयंतीए समणोवासियाए भाउज्जा मियावई नामं देवी होत्था वन्नओ सुकुमाल जाव सुरुवा समणोवासिया जाव विहरइ, तत्थ णं कोसंबीए नयरीए सहस्साणीयस्स रत्तो धूया सयाणीयस्स रत्तो भगिणी उदायणस्स रत्तो पिउच्छा मिगावईए देवीए नणंदा वेसालीसावयाणं अरहंताणं पुव्वसिज्जायरी जयंती नामं समणोवासिया होत्था सुकुमाल जाव सुरुवा अभिगय जाव विहरइ ॥ ४४० ॥ तेणं कालेणं तेणं समएणं सामी समोसट्ठे जाव परिसा पज्जवासइ । तए णं से उदायणे राया इमीसे कहाए लद्धट्ठे समाणे हट्ठुट्ठे कोडुंबियपुरिसे सहावेइ २ ता एवं वयासी-खिप्पामेव भो देवाणुप्पिया ! कोसंबिं नयरिं सम्भितरबाहिरियं एवं जहा कूणिओ तहेव सव्वं जावं पज्जवासइ । तए णं सा जयंती समणोवासिया इमीसे कहाए लद्धट्ठा समाणी हट्ठुट्ठा जेणेव मिगावई देवी तेणेव उवागच्छइ २ ता मियावई देवि एवं वयासी-एवं जहा नवमसए उसभदत्तो जाव भविस्सइ । तए णं सा मियावई देवी जयंतीए समणोवासियाए जहा देवाणंदा जाव पडिसुणेइ । तए णं सा मियावई देवी कोडुंबियपुरिसे सहावेइ २ ता एवं वयासी-खिप्पामेव भो देवाणुप्पिया ! लहुकरणजुत्तजोइय जाव धम्मियं ज्ञाणप्परं जुत्तामेव उवट्ठवेह जाव उवट्ठवेति जाव पच्चप्पिणंति । तए णं सा मियावई देवी

जयंतीए समणोवासियाए सद्धिं ण्हाया जाव सरीरा बहूहिं खुज्जाहिं जाव अंतेउराओ निग्गच्छइ २ ता जेणेव बाहिरिया उवट्ठाणसाळा जेणेव धम्मिए जाणप्पवरे तेणेव उवागच्छइ २ ता जाव दुरुढा । तए णं सा मियावई देवी जयंतीए समणोवासियाए सद्धिं धम्मियं जाणप्पवरं दुरुढा समाणी नियगपरियालगा जहा उसभदत्तो जाव धम्मियाओ जाणप्पवराओ पच्चोरुहइ । तए णं सा मियावई देवी जयंतीए समणोवासियाए सद्धिं बहूहिं खुज्जाहिं जहा देवाणंदा जाव वंदइ नमंसइ उदायणं रायं पुरओ कट्ठु ठिइया चेव जाव पज्जुवासइ । तए णं समणे भगवं महावीरे उदायणस्स रत्तो मियावईए देवीए जयंतीए समणोवासियाए तीसे य महइ० जाव धम्मं परिकहेइ जाव परिसा पडिगया उदायणे पडिगए मियावई देवीवि पडिगया ॥ ४४१ ॥ तए णं सा जयंती समणोवासिया समणस्स भगवओ महावीरस्स अंतियं धम्मं सोच्चा निसम्म हट्ठुट्ठा समणं भगवं महावीरं वंदइ नमंसइ वं० २ ता एवं वयासी-कहच्चं भंते ! जीवा गरुयत्तं हव्वमागच्छन्ति ? जयंती ! पाणाइवाएणं जाव सिच्छादंसणसत्तेणं, एवं खलु जीवा गरुयत्तं हव्वमागच्छन्ति एवं जहा पढमसए जाव वीईवयंति । भवसिद्धियत्तणं भंते ! जीवाणं किं सभावओ परिणामओ ? जयंती ! सभावओ नो परिणामओ । सव्वेवि णं भंते ! भवसिद्धिया जीवा सिज्झस्संति ? हंता जयंती ! सव्वेवि णं भवसिद्धिया जीवा सिज्झस्संति । जइ णं भंते ! सव्वेवि भवसिद्धिया जीवा सिज्झस्संति तम्हा णं भवसिद्धियविरहिए लोए भविस्सइ ? णो इणट्ठे समट्ठे, से केणं खाइएणं अट्ठेणं भंते ! एवं बुच्चइ सव्वेवि णं भवसिद्धिया जीवा सिज्झस्संति नो चेव णं भवसिद्धियविरहिए लोए भविस्सइ ? जयंती ! से जहानामए सव्वांगाससेदी सिया अणाइया अणवदग्गा परित्ता परिवुडा सा णं परमाणुपोगलमेत्तेहिं खंडेहिं समए २ अवहीर-माणी २ अणंताहिं उस्सप्पिणीओसप्पिणीहिं अवहीरइ नो चेव णं अवहिया सिया, से तेणट्ठेणं जयंती ! एवं बुच्चइ सव्वेवि णं भवसिद्धिया जीवा सिज्झस्संति नो चेव णं भवसिद्धियविरहिए लोए भविस्सइ ॥ सुत्तत्तं भंते ! साहू जागरियत्तं साहू ? जयंती ! अत्थेगइयाणं जीवाणं सुत्तत्तं साहू अत्थेगइयाणं जीवाणं जागरियत्तं साहू, से केणट्ठेणं भंते ! एवं बुच्चइ अत्थेगइयाणं जाव साहू ? जयंती ! जे इमे जीवा अहम्मिया अहम्माणुया अहम्मिद्वा अहम्मक्खाई अहम्मपलोई अहम्मपल-ज्जमाणा अहम्मसमुदायारा अहम्मेणं चेव वित्तिं कप्पेमाणा विहरंति एएसि णं जीवाणं सुत्तत्तं साहू, एए णं जीवा सुत्ता समाणा नो बहूणं प्राणभूयजीवसत्ताणं दुक्खणयाए सोयणयाए जाव परियावणयाए वट्ठंति, एए णं जीवा सुत्ता समाणा अप्पाणं वा परं वा तदुभयं वा नो बहूहिं अहम्मियाहिं संजोयणाहिं संजोएत्तारो

भवन्ति, एएसि जीवाणं सुत्तत्तं साहू, जयंती ! जे इमे जीवा धम्मिया धम्माण्या जाव धम्मेणं चेव वित्तिं कप्पेमाणा विहरन्ति एएसि णं जीवाणं जागरियत्तं साहू, एए णं जीवा जागरा समाणा बहूणं पाणाणं जाव सत्ताणं अदुक्खणयाए जाव अपरियावणयाए वट्ठन्ति, ते णं जीवा जागरमाणा अप्पाणं वा परं वा तदुभयं वा बहूहिं धम्मियाहिं संजोयणाहिं संजोएत्तारो भवन्ति, एए णं जीवा जागरमाणा धम्मजागरियाए अप्पाणं जागरइत्तारो भवन्ति, एएसि णं जीवाणं जागरियत्तं साहू, से तेणट्ठेणं जयंती ! एवं वुच्चइ अत्थेगइयाणं जीवाणं सुत्तत्तं साहू अत्थेगइयाणं जीवाणं जागरियत्तं साहू ॥ बलियत्तं भंते ! साहू दुब्बलियत्तं साहू ? जयंती ! अत्थेगइयाणं जीवाणं बलियत्तं साहू अत्थेगइयाणं जीवाणं दुब्बलियत्तं साहू, से केणट्ठेणं भंते ! एवं वुच्चइ जाव साहू ? जयंती ! जे इमे जीवा अहम्मिया जाव विहरन्ति एएसि णं जीवाणं दुब्बलियत्तं साहू, एए णं जीवा एवं जहा सुत्तस्स तहा दुब्बलियस्स वत्तव्वया भाणियव्वा, बलियस्स जहा जागरस्स तहा भाणियव्वं जाव संजोएत्तारो भवन्ति, एएसि णं जीवाणं बलियत्तं साहू, से तेणट्ठेणं जयंती ! एवं वुच्चइ तं चेव जाव साहू ॥ दक्खत्तं भंते ! साहू आलसियत्तं साहू ? जयंती ! अत्थेगइयाणं जीवाणं दक्खत्तं साहू अत्थेगइयाणं जीवाणं आलसियत्तं साहू, से केणट्ठेणं भंते ! एवं वुच्चइ तं चेव जाव साहू ? जयंती ! जे इमे जीवा अहम्मिया जाव विहरन्ति एएसि णं जीवाणं आलसियत्तं साहू, एए णं जीवा आलसा समाणा नो बहूणं जहा सुत्ता तहा आलसा भाणियव्वा, जहा जागरा तहा दक्खा भाणियव्वा जाव संजोएत्तारो भवन्ति, एए णं जीवा दक्खा समाणा बहूहिं आयरियवेयावच्चेहिं उवज्झाय० येर० तवस्सि० गिलाणवेयावच्चेहिं सेहवेयावच्चेहिं कुलवेयावच्चेहिं गणवेयावच्चेहिं संघवेयावच्चेहिं साहम्मियवेयावच्चेहिं अत्ताणं संजोएत्तारो भवन्ति, एएसि णं जीवाणं दक्खत्तं साहू, से तेणट्ठेणं तं चेव जाव साहू ॥ सोइदियवसट्ठे णं भंते ! जीवे किं बंधइ ? एवं जहा कोहवसट्ठे तहेव जाव अणुपरियट्ठइ । एवं चर्खिदियवसट्ठेवि, एवं जाव फासिदियवसट्ठेवि जाव अणुपरियट्ठइ । तए णं सा जयंती समणोवासिया समणस्स भगवओ महावीरस्स अंतियं एयमट्ठं सोच्चा निसम्म हट्ठुट्ठा सेसं जहा देवाणंदाए तहेव पव्वइया जाव सब्बदुक्खप्पहीणा । सेवं भंते ! २ त्ति ॥ ४४२ ॥

बारहमे सए बीओ उदेसो समत्तो ॥

रायगिहे जाव एवं वयासी-कइ णं भंते ! पुडवीओ पन्नत्ताओ ? गोयमा ! सत्त पुडवीओ पण्णत्ताओ, तंजहा-पढमा दोच्चा जाव सत्तमा । पढमा णं भंते ! पुडवी किंनामा किंगोत्ता पण्णत्ता ? गोयमा ! धम्मा नामेणं रयणप्पभा नोत्तैणं, एवं जहा

जीवाभिगमे पढसो नेरइयउद्देसओ सो चंव निरवसेसो भाणियव्वो जाव अप्पाबहु-
गंति । सेवं भंते ! सेवं भंते ! ति ॥ ४४३ ॥ **बारहमे सए तइओ उद्देसो समत्तो ॥**

रायगिहे जाव एवं वयासी-दो भंते ! परमाणुपोगगला एगयओ साहजंति एग-
यओ साहण्णिता किं भवइ ? गोयमा ! दुप्पएसिए खंधे भवइ, से भिज्जमाणे दुहा
कजइ एगयओ परमाणुपोगगले एगयओ परमाणुपोगगले भवइ । तिज्जि भंते ! परमा-
णुपोगगला एगयओ साहजंति २ ता किं भवइ ? गोयमा ! तिपएसिए खंधे भवइ, से
भिज्जमाणे दुहावि तिहावि कजइ, दुहा कज्जमाणे एगयओ परमाणुपोगगले एगयओ
दुपएसिए खंधे भवइ, तिहा कज्जमाणे तिण्णि परमाणुपोगगला भवंति । चत्तारि भंते !
परमाणुपोगगला एगयओ साहजंति ० पुच्छा, गोयमा ! चउपएसिए खंधे भवइ,
से भिज्जमाणे दुहावि तिहावि चउहावि कजइ, दुहा कज्जमाणे एगयओ परमाणु-
पोगगले एगयओ तिपएसिए खंधे भवइ, अहवा दो दुपएसिया खंधा भवंति, तिहा
कज्जमाणे एगयओ दो परमाणुपोगगला एगयओ दुप्पएसिए खंधे भवइ, चउहा कज्ज-
माणे चत्तारि परमाणुपोगगला भवंति । पंच भंते ! परमाणुपोगगला ० पुच्छा, गोयमा !
पंचपएसिए खंधे भवइ, से भिज्जमाणे दुहावि तिहावि चउहावि पंचहावि कजइ,
दुहा कज्जमाणे एगयओ परमाणुपोगगले एगयओ चउपएसिए खंधे भवइ अहवा
एगयओ दुपएसिए खंधे भवइ एगयओ तिपएसिए खंधे भवइ, तिहा कज्जमाणे
एगयओ दो परमाणुपोगगला एगयओ तिप्पएसिए खंधे भवइ अहवा एगयओ परमा-
णुपोगगले एगयओ दो दुपएसिया खंधा भवंति, चउहा कज्जमाणे एगयओ तिज्जि
परमाणुपोगगला एगयओ दुप्पएसिए खंधे भवइ, पंचहा कज्जमाणे पंच परमाणुपो-
गगला भवंति । छब्भंते ! परमाणुपोगगला ० पुच्छा, गोयमा ! छप्पएसिए खंधे भवइ,
से भिज्जमाणे दुहावि तिहावि जाव छव्विहावि कजइ, दुहा कज्जमाणे एगयओ पर-
माणुपोगगले एगयओ पंचपएसिए खंधे भवइ अहवा एगयओ दुप्पएसिए खंधे एग-
यओ चउपएसिए खंधे भवइ अहवा दो तिपएसिया खंधा भवन्ति, तिहा कज्जमाणे
एगयओ दो परमाणुपोगगला एगयओ चउपएसिए खंधे भवइ अहवा एगयओ पर-
माणुपोगगले एगयओ दुपएसिए खंधे एगयओ तिपएसिए खंधे भवइ अहवा तिज्जि
दुपएसिया खंधा भवन्ति, चउहा कज्जमाणे एगयओ तिज्जि परमाणुपोगगला एगयओ
तिपएसिए खंधे भवइ अहवा एगयओ दो परमाणुपोगगला भवंति एगयओ दो दुप्प-
एसिया खंधा भवंति, पंचहा कज्जमाणे एगयओ चत्तारि परमाणुपोगगला एगयओ
दुपएसिए खंधे भवइ, छहा कज्जमाणे छ परमाणुपोगगला भवंति । सत्त भंते ! पर-
माणुपोगगला ० पुच्छा, गोयमा ! सत्तपएसिए खंधे भवइ, से भिज्जमाणे दुहावि जाव

सत्तहावि कज्जइ, दुहा कज्जमाणे एगयओ परमाणुपोग्गले एगयओ छप्पएसिए खंधे भवइ अहवा एगयओ दुप्पएसिए खंधे भवइ एगयओ पंचपएसिए खंधे भवइ अहवा एगयओ तिप्पएसिए खंधे एगयओ चउपएसिए खंधे भवइ, तिहा कज्जमाणे एगयओ दो परमाणुपोग्गला एगयओ पंचपएसिए खंधे भवइ अहवा एगयओ परमाणुपोग्गले एगयओ दुपएसिए खंधे एगयओ चउपएसिए खंधे भवइ अहवा एगयओ परमाणुपोग्गले एगयओ दो तिपएसिया खंधा भवन्ति अहवा एगयओ दो दुपएसिया खंधा भवन्ति एगयओ तिपएसिए खंधे भवइ, चउहा कज्जमाणे एगयओ तिन्नि परमाणुपोग्गला एगयओ चउप्पएसिए खंधे भवइ अहवा एगयओ दो परमाणुपोग्गला एगयओ दुपएसिए खंधे एगयओ तिपएसिए खंधे भवइ अहवा एगयओ परमाणुपोग्गले एगयओ तिन्नि दुपएसिया खंधा भवन्ति, पंचहा कज्जमाणे एगयओ चत्तारि परमाणुपोग्गला एगयओ तिपएसिए खंधे भवइ अहवा एगयओ तिन्नि परमाणुपोग्गला एगयओ दो दुपएसिया खंधा भवन्ति, छहा कज्जमाणे एगयओ पंच परमाणुपोग्गला एगयओ दुपएसिए खंधे भवइ, सत्तहा कज्जमाणे सत्त परमाणुपोग्गला भवन्ति । अट्ठ भन्ति । परमाणुपोग्गला० पुच्छा, गोयमा । अट्ठपएसिए खंधे भवइ जाव दुहा कज्जमाणे एगयओ परमाणुपोग्गले एगयओ सत्तपएसिए खंधे भवइ अहवा एगयओ दुपएसिए खंधे एगयओ छप्पएसिए खंधे भवइ अहवा एगयओ तिपएसिए खंधे एगयओ पंचपएसिए खंधे भवइ अहवा दो चउप्पएसिया खंधा भवन्ति, तिहा कज्जमाणे एगयओ दो परमाणुपोग्गला एगयओ छप्पएसिए खंधे भवइ अहवा एगयओ परमाणुपोग्गले एगयओ दुप्पएसिए खंधे एगयओ पंचपएसिए खंधे भवइ अहवा एगयओ परमाणुपोग्गले एगयओ तिपएसिए खंधे एगयओ चउपएसिए खंधे भवइ अहवा एगयओ दो दुपएसिया खंधा एगयओ चउप्पएसिए खंधे भवइ अहवा एगयओ दुपएसिए खंधे एगयओ दो तिपएसिया खंधा भवन्ति, चउहा कज्जमाणे एगयओ तिन्नि परमाणुपोग्गला एगयओ पंचपएसिए खंधे भवइ अहवा एगयओ दोन्नि परमाणुपोग्गला एगयओ दुपएसिए खंधे एगयओ चउप्पएसिए खंधे भवइ अहवा एगयओ दो परमाणुपोग्गला एगयओ दो तिपएसिया खंधा भवन्ति अहवा एगयओ परमाणुपोग्गले एगयओ दो दुपएसिया खंधा० एगयओ तिपएसिए खंधे भवइ अहवा चत्तारि दुपएसिया खंधा भवन्ति, पंचहा कज्जमाणे एगयओ चत्तारि परमाणुपोग्गला एगयओ चउप्पएसिए खंधे भवइ अहवा एगयओ तिन्नि परमाणुपोग्गला एगयओ दुपएसिए खंधे एगयओ तिपएसिए खंधे भवइ अहवा एगयओ दो परमाणुपोग्गला एगयओ तिन्नि दुपएसिया खंधा भवन्ति, छहा कज्जमाणे एगयओ पंच परमाणुपोग्गला एगयओ तिपएस-

सिए खंधे भवइ अहवा एगयओ चत्तारि परमाणुपोगला एगयओ दो दुपएसिया खंधा भवन्ति, सत्तहा कजमाणे एगयओ छ परमाणुपोगला एगयओ दुपएसिए खंधे भवइ अट्टहा कजमाणे अट्ट परमाणुपोगला भवन्ति ॥ नव भंते ! परमाणुपोगला० पुच्छा, गोयमा ! जाव नवविहा कज्जति, दुहा कजमाणे एगयओ परमाणुपोगले एगयओ अट्ट-पएसिए खंधे भवइ, एवं एक्केक संचा(रिए) रेंतेहिं जाव अहवा एगयओ चउप्पएसिए खंधे एगयओ पंचपएसिए खंधे भवइ, तिहा कजमाणे एगयओ दो परमाणुपोगला एगयओ सत्तपएसिए खंधे भवइ अहवा एगयओ परमाणुपोगले एगयओ दुपएसिए खंधे एगयओ छप्पएसिए खंधे भवइ अहवा एगयओ परमाणुपोगले एगयओ तिपएसिए खंधे एगयओ पंचपएसिए खंधे भवइ अहवा एगयओ परमाणुपोगले एगयओ दो चउप्पएसिया खंधा भवन्ति अहवा एगयओ दुपएसिए खंधे एगयओ तिपएसिए खंधे एगयओ चउपएसिए खंधे भवइ अहवा तिज्जि तिपएसिया खंधा भवन्ति, चउहा कज-माणे एगयओ तिज्जि परमाणुपोगला एगयओ छप्पएसिए खंधे भवइ अहवा एगयओ दो परमाणुपोगला एगयओ दुपएसिए खंधे एगयओ पंचपएसिए खंधे भवइ अहवा एगयओ दो परमाणुपोगला एगयओ तिपएसिए खंधे एगयओ चउप्पएसिए खंधे भवइ अहवा एगयओ परमाणुपोगले एगयओ दो दुपएसिया खंधा एगयओ चउप्पएसिए खंधे भवइ अहवा एगयओ परमाणुपोगले एगयओ दुपएसिए खंधे एगयओ दो तिप-एसिया खंधा भवन्ति अहवा एगयओ तिज्जि दुप्पएसिया खंधा एगयओ तिपएसिए खंधे भवइ, पंचहा कजमाणे एगयओ चत्तारि परमाणुपोगला एगयओ पंचपएसिए खंधे भवइ अहवा एगयओ तिज्जि परमाणुपोगला एगयओ दुपएसिए खंधे एगयओ चउप्प-एसिए खंधे भवइ अहवा एगयओ तिज्जि परमाणुपोगला एगयओ दो तिपएसिया खंधा भवन्ति अहवा एगयओ दो परमाणुपोगला एगयओ दो दुपएसिया खंधा एगयओ तिपएसिए खंधे भवइ अहवा एगयओ परमाणुपोगले एगयओ चत्तारि दुपएसिया खंधा भवन्ति, छहा कजमाणे एगयओ पंच परमाणुपोगला एगयओ चउप्पएसिए खंधे भवइ अहवा एगयओ चत्तारि परमाणुपोगला एगयओ दुप्पएसिए खंधे एगयओ तिपएसिए खंधे भवइ अहवा एगयओ तिज्जि परमाणुपोगला एगयओ तिज्जि दुप्प-एसिया खंधा भवन्ति, सत्तहा कजमाणे एगयओ छ परमाणुपोगला एगयओ तिप्प-एसिए खंधे भवइ अहवा एगयओ पंच परमाणुपोगला एगयओ दो दुपएसिया खंधा भवन्ति, अट्टहा कजमाणे एगयओ सत्त परमाणुपोगला एगयओ दुपएसिए खंधे भवइ, नवहा कजमाणे नव परमाणुपोगला भवन्ति ॥ दस भंते ! परमाणु-पोगला० पुच्छा, गोयमा ! जाव दुहा कजमाणे एगयओ परमाणुपोगले एगयओ

नवपएसिए खंधे भवइ अहवा एगयओ दुपएसिए खंधे एगयओ अट्टपएसिए खंधे भवइ एवं एक्केक्कं संचारेयव्वंति जाव अहवा दो पंचपएसिया खंधा भवन्ति, तिहा कज्जमाणे एगयओ दो परमाणुपोग्गला एगयओ अट्टपएसिए खंधे भवइ अहवा एग-
यओ परमाणुपोग्गले एगयओ दुपएसिए खंधे एगयओ सत्तपएसिए खंधे भवइ अहवा एगयओ परमाणुपोग्गले एगयओ तिपएसिए खंधे भवइ एगयओ छप्पएसिए खंधे भवइ अहवा एगयओ परमाणुपोग्गले एगयओ चउप्पएसिए० एगयओ पंचप-
एसिए खंधे भवइ अहवा एगयओ दुपएसिए खंधे एगयओ तिपएसिए खंधे एगयओ पंच-
पएसिए खंधे भवइ अहवा एगयओ दुपएसिए खंधे एगयओ दो चउप्पएसिया खंधा भवन्ति अहवा एगयओ दो तिपएसिया खंधा० एगयओ चउप्पएसिए खंधे भवइ,
चउहा कज्जमाणे एगयओ तिन्नि परमाणुपोग्गला एगयओ सत्तपएसिए खंधे भवइ अहवा एगयओ दो परमाणुपोग्गला एगयओ दुपएसिए० एगयओ छप्पएसिए खंधे भवइ
अहवा एगयओ दो परमाणुपोग्गला एगयओ तिप्पएसिए खंधे एगयओ पंचपएसिए खंधे भवइ अहवा एगयओ दो परमाणुपोग्गला एगयओ दो चउप्पएसिया खंधा भवन्ति
अहवा एगयओ परमाणुपोग्गले एगयओ दुपएसिए० एगयओ तिपएसिए० एगयओ चउप्पएसिए खंधे भवइ अहवा एगयओ परमाणुपोग्गले एगयओ तिन्नि तिपएसिया
खंधा भवन्ति अहवा एगयओ तिन्नि दुपएसिया खंधा० एगयओ चउप्पएसिए खंधे भवइ अहवा एगयओ दो दुपएसिया खंधा एगयओ दो तिपएसिया खंधा भवन्ति, पंचहा
कज्जमाणे एगयओ चत्तारि परमाणुपोग्गला एगयओ छपएसिए खंधे भवइ अहवा एग-
यओ तिन्नि परमाणुपोग्गला एगयओ दुपएसिए खंधे एगयओ पंचपएसिए खंधे भवइ अहवा एगयओ तिन्नि परमाणुपोग्गला एगयओ तिपएसिए खंधे एगयओ चउप्पएसिए
खंधे भवइ अहवा एगयओ दो परमाणु० एग० दो दुपएसिया खंधा एग० चउप्प-
एसिए खंधे भवइ अहवा एगयओ दो परमाणुपोग्गला एगयओ दुपएसिए खंधे०
एगयओ दो तिपएसिया खंधा भवन्ति अहवा एगयओ परमाणुपोग्गले एगयओ तिन्नि दुपएसिया० एगयओ तिपएसिए खंधे भवइ अहवा पंच दुपएसिया खंधा
भवन्ति, छहा कज्जमाणे एगयओ पंच परमाणुपोग्गला एगयओ पंचपएसिए खंधे भवइ अहवा एगयओ चत्तारि परमाणुपोग्गला एगयओ दुपएसिए० एगयओ चउप्पएसिए
खंधे भवइ अहवा एगयओ चत्तारि परमाणुपोग्गला एगयओ दो तिपएसिया खंधा भवन्ति अहवा एगयओ तिन्नि परमाणुपोग्गला एगयओ दो दुपएसिया खंधा०
एगयओ तिपएसिए खंधे भवइ अहवा एगयओ दो परमाणुपोग्गला एगयओ चत्तारि
दुपएसिया खंधा भवन्ति, सत्तहा कज्जमाणे एगयओ छ परमाणुपोग्गला एगयओ
चउप्पएसिए खंधे भवइ अहवा एगयओ पंच परमाणुपोग्गला एगयओ दुपएसिए०

एगयओ तिपएसिए खंधे भवइ अहवा एगयओ चत्तारि परमाणुपोगगला एगयओ तिचि दुपएसिया खंधा भवन्ति, अट्टहा कज्जमाणे एगयओ सत्त परमाणुपोगगला एगयओ तिपएसिए खंधे भवइ अहवा एगयओ छ परमाणुपोगगला एगयओ दो दुप-एसिया खंधा भवन्ति, नवहा कज्जमाणे एगयओ अट्ट परमाणुपोगगला एगयओ दुप-एसिए खंधे भवइ दसहा कज्जमाणे दस परमाणुपोगगला भवन्ति । संखेज्जा णं भंते ! परमाणुपोगगला एगयओ साहज्जंति एगयओ साहणित्ता किं भवइ ? गोयमा ! संखेज्जपएसिए खंधे भवइ से भिज्जमाणे दुहावि जाव दसहावि संखेज्जहावि कज्जइ, दुहा कज्जमाणे एगयओ परमाणुपोगगले एगयओ संखेज्जपएसिए खंधे भवइ अहवा एगयओ दुपएसिए खंधे एगयओ संखेज्जपएसिए खंधे भवइ अहवा एगयओ तिप-एसिए खंधे एगयओ संखेज्जपएसिए खंधे भवइ एवं जाव अहवा एगयओ दसप-एसिए खंधे एगयओ संखेज्जपएसिए खंधे भवइ अहवा दो संखेज्जपएसिया खंधा भवन्ति, तिहा कज्जमाणे एगयओ दो परमाणुपोगगला एगयओ संखेज्जपएसिए खंधे भवइ अहवा एगयओ परमाणुपोगगले एगयओ दुपएसिए खंधे एगयओ संखेज्जपएसिए खंधे भवइ अहवा एगयओ परमाणुपोगगले एगयओ तिपएसिए खंधे एगयओ संखेज्जपएसिए खंधे भवइ एवं जाव अहवा एगयओ परमाणुपोगगले एगयओ दसपएसिए खंधे एगयओ संखेज्जपएसिए खंधे भवइ अहवा एगयओ परमाणुपोगगले एगयओ दो संखेज्जपएसिया खंधा भवन्ति अहवा एगयओ दुपएसिए खंधे एगयओ दो संखेज्जपएसिया खंधा भवन्ति, एवं जाव अहवा एगयओ दसपएसिए खंधे एगयओ दो संखेज्जपएसिया खंधा भवन्ति अहवा तिन्नि संखेज्जपएसिया खंधा भवन्ति, चउहा कज्जमाणे एगयओ तिचि परमाणुपोगगला एगयओ संखेज्जपएसिए खंधे भवइ अहवा एगयओ दो परमाणुपोगगला एगयओ दुपएसिए खंधे एगयओ संखेज्जपएसिए खंधे भवइ अहवा एगयओ दो परमाणुपोगगला एगयओ तिप्पएसिए० एगयओ संखेज्ज-पएसिए खंधे भवइ एवं जाव अहवा एगयओ दो परमाणुपोगगला एगयओ दसपएसिए० एगयओ संखेज्जपएसिए खंधे भवइ अहवा एगयओ दो परमाणुपोगगला एगयओ दो संखेज्जपएसिया खंधा भवन्ति अहवा एगयओ परमाणुपोगगले एगयओ दुपएसिए खंधे एगयओ दो संखेज्जपएसिया खंधा भवन्ति एवं जाव अहवा एगयओ परमाणुपोगगले एगयओ दसपएसिए खंधे एगयओ दो संखेज्जपएसिया खंधा भवन्ति अहवा एगयओ परमाणुपोगगले एगयओ तिन्नि संखेज्जपएसिया खंधा भवन्ति अहवा एगयओ दुपएसिए खंधे एगयओ तिन्नि संखेज्जपएसिया खंधा भवन्ति एवं जाव अहवा एगयओ दसपएसिए खंधे एगयओ तिन्नि संखेज्जपएसिया खंधा भवन्ति अहवा

चत्तारि संखेज्जपएसिया खंधा भवन्ति, एवं एएणं कमेणं पंचगसंजोगोवि भाणियव्वो जाव नवगसंजोगो, दसहा कज्जमाणे एगयओ नव परमाणुपोग्गला एगयओ संखेज्जपएसिए खंधे भवइ अहवा एगयओ अट्ठ परमाणुपोग्गला एगयओ दुपएसिए० एगयओ संखेज्जपएसिए खंधे भवइ, एवं एएणं कमेणं एक्केल्लो पूरेयव्वो जाव अहवा एगयओ दसपएसिए खंधे एगयओ नव संखेज्जपएसिया खंधा भवन्ति अहवा दस संखेज्जपएसिया खंधा भवन्ति, संखेज्जहा कज्जमाणे संखेज्जा परमाणुपोग्गला भवन्ति । असंखेज्जा णं भन्ते ! परमाणुपोग्गला एगयओ साहणंति एगयओ साहणित्ता किं भवइ ? गोयमा ! असंखेज्जपएसिए खंधे भवइ, से भिज्जमाणे दुहावि जाव दसहावि संखेज्जहावि असंखेज्जहावि कज्जइ, दुहा कज्जमाणे एगयओ परमाणुपोग्गले एगयओ असंखेज्जपएसिए खंधे भवइ एवं जाव अहवा एगयओ दसपएसिए० एगयओ असंखेज्जपएसिए खंधे भवइ अहवा एगयओ संखेज्जपएसिए खंधे एगयओ असंखेज्जपएसिए खंधे भवइ अहवा दो असंखेज्जपएसिया खंधा भवन्ति, तिहा कज्जमाणे एगयओ दो परमाणुपोग्गला एगयओ असंखेज्जपएसिए खंधे भवइ अहवा एगयओ परमाणुपोग्गले एगयओ दुपएसिए० एगयओ असंखेज्जपएसिए खंधे भवइ जाव अहवा एगयओ परमाणुपोग्गले एगयओ दसपएसिए० एगयओ असंखेज्जपएसिए खंधे भवइ अहवा एगयओ परमाणुपोग्गले एगयओ संखेज्जपएसिए० एगयओ असंखेज्जपएसिए खंधे भवइ अहवा एगयओ परमाणुपोग्गले एगयओ दो असंखेज्जपएसिया खंधा भवन्ति अहवा एगयओ दुपएसिए० एगयओ दो असंखेज्जपएसिया खंधा भवन्ति एवं जाव अहवा एगयओ संखेज्जपएसिए खंधे भवइ एगयओ दो असंखेज्जपएसिया खंधा भवन्ति अहवा तिन्नि असंखेज्जपएसिया खंधा भवन्ति, चउहा कज्जमाणे एगयओ तिन्नि परमाणुपोग्गला एगयओ असंखेज्जपएसिए खंधे भवइ एवं चउक्कगसंजोगो जाव दसगसंजोगो ए(वं)ए जहेव संखेज्जपएसियस्स नवरं असंखेज्जयं एगं अहिगं भाणियव्वं जाव अहवा दस असंखेज्जपएसिया खंधा भवन्ति, संखेज्जहा कज्जमाणे एगयओ संखेज्जा परमाणुपोग्गला एगयओ असंखेज्जपएसिए खंधे भवइ अहवा एगयओ संखेज्जा दुपएसिया खंधा एगयओ असंखेज्जपएसिए खंधे भवइ एवं जाव अहवा एगयओ संखेज्जा दसपएसिया खंधा एगयओ असंखेज्जपएसिए खंधे भवइ अहवा एगयओ संखेज्जा संखेज्जपएसिया खंधा एगयओ असंखेज्जपएसिए खंधे भवइ अहवा संखेज्जा असंखेज्जपएसिया खंधा भवन्ति, असंखेज्जहा कज्जमाणे असंखेज्जा परमाणुपोग्गला भवन्ति । अणंता णं भन्ते ! परमाणुपोग्गला जाव किं भवन्ति ? गोयमा ! अणंतपएसिए खंधे भवइ, से भिज्जमाणे दुहावि तिहावि जाव दसहावि संखेज्जहा असंखेज्जहा अणंतहावि कज्जइ,

दुहा कजमाणे एगयओ परमाणुपोगले एगयओ अणंतपएसिए खंधे भवइ एवं जाव
 अहवा दो अणंतपएसिया खंधा भवति, तिहा कजमाणे एगयओ दो परमाणुपोगला
 एगयओ अणंतपएसिए खंधे भवइ अहवा एगयओ परमाणुपोगले एगयओ दुपएसिए०
 एगयओ अणंतपएसिए खंधे भवइ जाव अहवा एगयओ परमाणुपोगले एगयओ असं-
 खेजपएसिए० एगयओ अणंतपएसिए खंधे भवइ अहवा एगयओ परमाणुपोगले एग-
 यओ दो अणंतपएसिया खंधा भवति अहवा एगयओ दुपएसिए० एगयओ दो अणंतप-
 एसिया खंधा भवति एवं जाव अहवा एगयओ दसपएसिए० एगयओ दो अणंतपए-
 सिया खंधा भवति अहवा एगयओ संखेजपएसिए० एगयओ दो अणंतपएसिया खंधा
 भवति अहवा एगयओ असंखेजपएसिए खंधे एगयओ दो अणंतपएसिया खंधा भवति
 अहवा तिनि अणंतपएसिया खंधा भवति, चउहा कजमाणे एगयओ तिनि परमा-
 णुपोगला एगयओ अणंतपएसिए खंधे भवइ एवं चउकसंजोगो जाव असंखेजग-
 संजोगो, एए सव्वे जहेव असंखेजाणं भाणिया तहेव अणंताणवि भाणियव्वा नवरं
 एकं अणंतगं अब्भइयं भाणियव्वं जाव अहवा एगयओ संखेजा संखेजपएसिया
 खंधा एगयओ अणंतपएसिए खंधे भवइ अहवा एगयओ संखेजा असंखेजपएसिया
 खंधा एगयओ अणंतपएसिए खंधे भवइ अहवा संखेजा अणंतपएसिया खंधा भवति,
 असंखेजहा कजमाणे एगयओ असंखेजा परमाणुपोगला एगयओ अणंतपएसिए
 खंधे भवइ अहवा एगयओ असंखेजा दुपएसिया खंधा एगयओ अणंतपएसिए
 खंधे भवइ जाव अहवा एगयओ असंखेजा संखेजपएसिया खंधा एगयओ अणंतप-
 एसिए खंधे भवइ अहवा एगयओ असंखेजा असंखेजपएसिया खंधा एगयओ अणं-
 तपएसिए खंधे भवइ अहवा असंखेजा अणंतपएसिया खंधा भवति, अणंतहा कज-
 माणे अणंता परमाणुपोगला भवति ॥ ४४४ ॥ एएसि णं भंते । परमाणुपोगलाणं
 साहणणाभेदाणुवाएणं अणंताणं पोगगलपरियट्ठाणं अणंताणंता पोगगलपरियट्ठा सम-
 णुगंतव्वा भवंतीति मक्खाया ? हंता गोयमा ! एएसि णं परमाणुपोगलाणं साहण-
 णाभेदाणु जाव मक्खाया ॥ कइविहे णं भंते ! पोगगलपरियट्ठे पण्णते ? गोयमा !
 सत्तविहे पोगगलपरियट्ठे पण्णते, तंजहा-ओरालियपोगगलपरियट्ठे वेउव्विय० तेयापो-
 गगलपरियट्ठे कम्मापोगगलपरियट्ठे मणपोगगलपरियट्ठे वइपोगगलपरियट्ठे आणापाणुपोगग-
 लपरियट्ठे । नेरइयाणं भंते ! कइविहे पोगगलपरियट्ठे पण्णते ? गोयमा ! सत्तविहे पोगग-
 लपरियट्ठे पण्णते, तंजहा-ओरालियपोगगलपरियट्ठे वेउव्वियपोगगलपरियट्ठे जाव
 आणापाणुपोगगलपरियट्ठे, एवं जाव वेमाणियाणं ॥ एगमेगस्स णं भंते ! नेरइयस्स
 केवइया ओरालियपोगगलपरियट्ठा अतीया ? गोयमा ! अणंता, केवइया पुरक्खडा ?

गोयमा ! कस्सइ अत्थि कस्सइ नत्थि जस्सइत्थि जहन्नेणं एक्को वा दो वा तिज्जि वा उक्कोसेणं संखेज्जा वा असंखेज्जा वा अणंता वा । एगमेगस्स णं भंते ! असुरकुमारस्स केवइया ओरालियपोग्गलपरियट्ठा० ? एवं चेव, एवं जाव वेमाणियस्स । एगमेगस्स णं भंते ! नेरइयस्स केवइया वेउव्वियपोग्गलपरियट्ठा अतीया ? गोयमा ! अणंता, एवं जहेव ओरालियपोग्गलपरियट्ठा तहेव वेउव्वियपोग्गलपरियट्ठावि भाणियव्वा, एवं जाव वेमाणियस्स एवं जाव आणापाणुपोग्गलपरियट्ठा, एए एगत्ति(इ)या सत्त दंडगा भवंति । नेरइयाणं भंते ! केवइया ओरालियपोग्गलपरियट्ठा अतीया ? गोयमा ! अणंता, केवइया पुरक्खडा ? अणंता, एवं जाव वेमाणियाणं, एवं वेउव्वियपोग्गलपरियट्ठावि एवं जाव आणापाणुपोग्गलपरियट्ठावि जाव वेमाणियाणं, एवं एए पोहत्तिया सत्तचउव्वीसइ दंडगा ॥ एगमेगस्स णं भंते ! नेरइयस्स नेरइयत्ते केवइया ओरालियपोग्गलपरियट्ठा अतीया ? गोयमा ! नत्थि एक्कोवि, केवइया पुरक्खडा ? नत्थि एक्कोवि, एगमेगस्स णं भंते ! नेरइयस्स असुरकुमारत्ते केवइया ओरालियपोग्गलपरियट्ठा० ? एवं चेव, एवं जाव थणियकुमारत्ते जहा असुरकुमारत्ते । एगमेगस्स णं भंते ! नेरइयस्स पुढविकाइयत्ते केवइया ओरालियपोग्गलपरियट्ठा अतीया ? अणंता, केवइया पुरक्खडा ? कस्सइ अत्थि कस्सइ नत्थि जस्सत्थि तस्स जहन्नेणं एक्को वा दो वा तिज्जि वा उक्कोसेणं संखेज्जा वा असंखेज्जा वा अणंता वा एवं जाव मणुस्सत्ते, वाणमंतरजोइसियवेमाणियत्ते जहा असुरकुमारत्ते । एगमेगस्स णं भंते ! असुरकुमारस्स नेरइयत्ते केवइया अतीया ओरालियपोग्गलपरियट्ठा एवं जहा नेरइयस्स वत्तव्वया भाणिया तहा असुरकुमारस्सवि भाणियव्वा जाव वेमाणियत्ते, एवं जाव थणियकुमारस्स, एवं पुढविकाइयस्सवि, एवं जाव वेमाणियस्स, सव्वेसिं एक्को गमो । एगमेगस्स णं भंते ! नेरइयस्स नेरइयत्ते केवइया वेउव्वियपोग्गलपरियट्ठा अतीया ? अणंता, केवइया पुरक्खडा ? एगुत्तरिया जाव अणंता, एवं जाव थणियकुमारत्ते, पुढविकाइयत्ते पुच्छा, नत्थि एक्कोवि, केवइया पुरक्खडा ? नत्थि एक्कोवि, एवं जत्थ वेउव्वियसरीरं अत्थि तत्थ एगुत्तरि(या)ओ जत्थ नत्थि तत्थ जहा पुढविकाइयत्ते तहा भाणियव्वं जाव वेमाणियस्स वेमाणियत्ते । तेयापोग्गलपरियट्ठा कम्मापोग्गलपरियट्ठा य सव्वत्थ एगुत्तरिया भाणियव्वा, मणपोग्गलपरियट्ठा सव्वेसु पंचिदिएसु एगुत्तरिया, विगलिदिएसु नत्थि, वइपोग्गलपरियट्ठा एवं चेव, नवरं एणिदिएसु नत्थि भाणियव्वा । आणापाणुपोग्गलपरियट्ठा सव्वत्थ एगुत्तरिया एवं जाव वेमाणियस्स वेमाणियत्ते । नेरइयाणं भंते ! नेरइयत्ते केवइया ओरालियपोग्गलपरियट्ठा अतीया ? नत्थि एक्कोवि, केवइया पुरक्खडा ? नत्थि एक्कोवि, एवं जाव थणि-

यकुमारत्ते, पुढविकाइयत्ते पुच्छा, गोयमा ! अणंता, केवइया पुरक्खडा ? अणंता, एवं जाव मणुस्सत्ते, वाणमंतरजोइसियवेमाणियत्ते जहा नेरइयत्ते एवं जाव वेमाणियस्स वेमाणियत्ते, एवं सत्तवि पोग्गलपरियट्ठा भाणियव्वा, जत्थ अत्थि तत्थ अतीयावि पुरक्खडावि अणंता भाणियव्वा, जत्थ नत्थि तत्थ दोवि नत्थि भाणियव्वा जाव वेमाणियाणं वेमाणियत्ते केवइया आणापाणुपोग्गलपरियट्ठा अतीया ? अणंता, केवइया पुरक्खडा ? अणंता ॥ ४४५ ॥ से केणट्ठेणं भंते ! एवं वुच्चइ-ओरालिय-पोग्गलपरियट्ठे २ ? गोयमा ! जणं जीवेणं ओरालियसरीरे वट्ठमाणेणं ओरालिय-सरीरपाउग्गाइं दव्वाइं ओरालियसरीरत्ताए गहियाइं बद्धाइं पुट्ठाइं कडाइं पट्ठवियाइं निविट्ठाइं अभिनिविट्ठाइं अभिसमन्नागयाइं परिया(ग)इयाइं परिणामियाइं निज्जिन्नाइं निसिरियाइं निसिट्ठाइं भवंति, से तेणट्ठेणं गोयमा ! एवं वुच्चइ ओरालियपोग्गलपरियट्ठे २, एवं वेउव्वियपोग्गलपरियट्ठेवि, नवरं वेउव्वियसरीरे वट्ठमाणेणं वेउव्विय-सरीरप्पाउग्गाइं सेसं तं चेव सव्वं एवं जाव आणापाणुपोग्गलपरियट्ठे, नवरं आणापाणुपाउग्गाइं सव्वदव्वाइं आणापाणुत्ताए सेसं तं चेव ॥ ओरालियपोग्गलपरियट्ठे णं भंते ! केवइकालस्स निव्वत्तिजइ ? गोयमा ! अणंताहिं उस्सप्पिणिओसप्पिणीहिं एवइकालस्स निव्वत्तिजइ, एवं वेउव्वियपोग्गलपरियट्ठेवि, एवं जाव आणापाणुपोग्गलपरियट्ठेवि ॥ एयस्स णं भंते ! ओरालियपोग्गलपरियट्ठनिव्वत्तणाकालस्स वेउव्वियपोग्गल० जाव आणापाणुपोग्गलपरियट्ठनिव्वत्तणाकालस्स कयरे कयरेहिंतो जाव विसैसाहिया वा ? गोयमा ! सव्वत्थोवे कम्मगपोग्गलपरियट्ठनिव्वत्तणाकाले, तेयापोग्गलपरियट्ठनिव्वत्तणाकाले अणंतगुणे, ओरालियपोग्गलपरियट्ठ० अणंतगुणे, आणापाणुपोग्गल० अणंतगुणे, मणपोग्गल० अणंतगुणे, वइपोग्गल० अणंतगुणे, वेउव्वियपोग्गलपरियट्ठनिव्वत्तणाकाले अणंतगुणे ॥ ४४६ ॥ एएसि णं भंते ! ओरालियपोग्गलपरियट्ठणं जाव आणापाणुपोग्गलपरियट्ठाणं य कयरे २ हिंतो जाव विसैसाहिया वा ? गोयमा ! सव्वत्थोवा वेउव्वियपोग्गलपरियट्ठा, वइपोग्गलपरियट्ठा अणंतगुणा, मणपोग्गलपरियट्ठा अणंतगुणा, आणापाणुपोग्गल० अणंतगुणा, ओरालियपोग्गल० अणंतगुणा, तेयापोग्गल० अणंतगुणा, कम्मगपोग्गल० अणंतगुणा । सेवं भंते ! सेवं भंते ! त्ति भगवं जाव विहरइ ॥ ४४७ ॥ बारहमे सए चउत्थो उद्देसो समत्तो ॥

रायगिहे जाव एवं वयासी-अह भंते ! पाणाइवाए सुसावाए अदिण्णादाणे मेहुणे परिग्गहे, एस णं कइवन्ने कइवंधे कइरसे कइफासे पण्णत्ते ? गोयमा ! पंचवन्ने पंचरसे दुगंधे चउफासे पण्णत्ते ॥ अह भंते ! कोहे १ कोवे २ रोसे ३ दोसे ४ अख(मा)मे ५ संजलणे ६ कलहे ७ चंडिक्के ८ भंडणे ९ विवाए १०, एस णं कइवन्ने जाव कइफासे

पण्णत्ते ? गोयमा ! पंचवच्चे पंचरसे दुग्ंधे चउफासे पण्णत्ते ॥ अहं भंते ! माणे मदे दप्पे थंमे गव्वे अ(णु)त्तुक्कोसे परपरिवाए उक्कासे अवक्कासे उन्नए उन्नामे दुन्नामे १२, एस णं कइवच्चे ४ प० ? गोयमा ! पंचवच्चे जहा कोहे तहेव । अहं भंते ! माया उवही नियडी वलए गहणे णूमे कक्के कुरूए जिम्हे किव्विसे १० आयरण्या गूहण्या वंचण्या पल्लिउंचण्या साइजोगे य १५, एस णं कइवच्चे ४ प० ? गोयमा ! पंचवच्चे जहेव कोहे ॥ अहं भंते ! लोभे इच्छा मुच्छा कंखा गेही तण्हा भिज्झा अभिज्झा आसा-सण्या पत्थण्या १० लालप्पण्या कामासा भोगासा जीवियासा मरणासा नंदिरागे १६, एस णं कइवच्चे ४ प० ? गोयमा ! जहेव कोहे । अहं भंते ! पेजे दोसे कलहे जाव मिच्छादंसणसल्ले एस णं कइवच्चे ४ प० ? जहेव कोहे तहेव जाव चउफासे ॥ ४४८ ॥ अहं भंते ! पाणाइवायवेरमणे जाव परिग्गहवेरमणे, कोहविवेगे जाव मिच्छादंसणसल्ल-विवेगे एस णं कइवच्चे जाव कइफासे पण्णत्ते ? गोयमा ! अवच्चे अगंधे अरसे अफासे पण्णत्ते ॥ अहं भंते ! उप्पत्तिया वेणइया कम्मिया परिणामिया एस णं कइवच्चा ४ प० ? तं चेव जाव अफासा पन्नत्ता ॥ अहं भंते ! उग्गहे ईहा अवाए धारणा एस णं कइवच्चा ४ प० ? एवं चेव जाव अफासा पन्नत्ता ॥ अहं भंते ! उट्ठाणे कम्मे बले वीरिए पुरिसक्कारपरक्कमे एस णं कइवच्चे ४ प० ? तं चेव जाव अफासे पन्नत्ते । सत्तमे णं भंते ! उवासंतरे कइवच्चे ४ प० ? एवं चेव जाव अफासे पन्नत्ते । सत्तमे णं भंते ! तणुवाए कइवच्चे ४ प० ? जहा पाणाइवाए, नवरं अट्ठफासे पण्णत्ते, एवं जहा सत्तमे तणुवाए तहा सत्तमे घणवाए घणोदही पुढवी, छट्ठे उवासंतरे अवच्चे, तणुवाए जाव छट्ठी पुढवी एयाइं अट्ठ फासाइं, एवं जहा सत्तमाए पुढवीए वत्तव्वया भणिया तहा जाव पढमाए पुढवीए भाणियव्वं, जंबुदीवे २ जाव सयंभुरमणे समुदे, सोहम्ममे कप्पे जाव ईत्तिपब्भारा पुढवी, नेरइयावासा जाव वेमाणियावासा एयाणि सव्वाणि अट्ठफा-साणि । नेरइया णं भंते ! कइवच्चा जाव कइफासा पन्नत्ता ? गोयमा ! वेउव्वियतेयाइं पडुच्च पंचवच्चा पंचरसा दुग्ंधा अट्ठफासा पण्णत्ता, कम्मगं पडुच्च पंचवच्चा पंचरसा दुग्ंधा चउफासा पण्णत्ता, जीवं पडुच्च अवच्चा जाव अफासा पण्णत्ता, एवं जाव थणियकुमारा, पुढविकाइयाणं पुच्छा, गोयमा ! ओरालियतेयगाइं पडुच्च पंचवच्चा जाव अट्ठफासा पण्णत्ता, कम्मगं पडुच्च जहा नेरइयाणं, जीवं पडुच्च तहेव, एवं जाव चउरिंदिया, नवरं वाउक्काइया ओरालियवेउव्वियतेयगाइं पडुच्च पंचवच्चा जाव अट्ठफासा पण्णत्ता, सेसं जहा नेरइयाणं, पंचिंदियतिरिक्खजोणिया जहा वाउक्काइया, मणुस्साणं पुच्छा, गोयमा ! ओरालियवेउव्वियआहारगतेयगाइं पडुच्च पंचवच्चा जाव अट्ठफासा पण्णत्ता, कम्मगं जीवं च पडुच्च जहा नेरइयाणं, वाणमंतरजोइसियवेमाणिया

जहा नेरइया, धम्मत्थिकाए जाव पोग्गलत्थिकाए एए सव्वे अवन्ना जाव अफासा, नवरं पोग्गलत्थिकाए पंचवन्ने पंचरसे दुग्ंधे अट्ठफासे पण्णत्ते, णाणावरणिज्जे जाव अंतराइए एयाणि जाव चउफासाणि, कण्हलेसा णं भंते ! कइवन्ना ४ प० ? गोयमा ! दव्वलेसं पडुच्च पंचवन्ना जाव अट्ठफासा पण्णत्ता, भावलेसं पडुच्च अवन्ना ४, एवं जाव सुक्कलेस्सा, सम्मदिट्ठी ३ चक्खुइंसणे ४ आभिणिबोहियणाणे ५ जाव विभंगणाणे आहारसन्ना जाव परिग्गहसन्ना एयाणि अवन्नाणि ४, ओरालियसरीरे जाव तेयग-सरीरे एयाणि अट्ठफासाणि, कम्मगसरीरे चउफासे, मणजोगे य वइजोगे य चउफासे, कायजोगे अट्ठफासे, सागारोवओगे य अणागारोवओगे य अवन्ना । सव्वदव्वा णं भंते ! कइवन्ना० पुच्छा, गोयमा ! अत्थेगइया सव्वदव्वा पंचवन्ना जाव अट्ठफासा पण्णत्ता, अत्थेगइया सव्वदव्वा पंचवन्ना जाव चउफासा पण्णत्ता, अत्थेगइया सव्वदव्वा एगगंधा एगवण्णा एगरसा दुफासा पञ्चत्ता, अत्थेगइया सव्वदव्वा अवन्ना जाव अफासा पञ्चत्ता, एवं सव्वपएसावि सव्वपज्जवावि, तीयद्धा अवन्ना जाव अफासा पण्णत्ता, एवं जाव अणागयद्धावि, एवं सव्वद्धावि ॥ ४४९ ॥ जीवे णं भंते ! गव्वं वक्कममाणे कइवच्चं कइगंधं कइरसं कइफासं परिणामं परिणमइ ? गोयमा ! पंचवच्चं पंचरसं दुग्ंधं अट्ठफासं परिणामं परिणमइ ॥ ४५० ॥ कम्मओ णं भंते ! जीवे नो अकम्मओ विभत्तिभावं परिणमइ कम्मओ णं जए नो अकम्मओ विभत्तिभावं परिणमइ ? हुंता गोयमा ! कम्मओ णं तं चेव जाव परिणमइ नो अकम्मओ विभत्तिभावं परिणमइ, सेवं भंते ! सेवं भंते ! त्ति ॥ ४५१ ॥ बारहमे सप पञ्चमो उद्देशो समत्तो ॥

रायणिहे जाव एवं वयासी-बहुजणे णं भंते ! अन्नमन्नस्स एवमाइक्खइ जाव एवं पल्लवेइ-एवं खलु राहू चंदं गेण्हइ एवं० २, से कहमेयं भंते ! एवं ? गोयमा ! जन्नं से बहुजणे णं अन्नमन्नस्स जाव मिच्छं ते एव माहंछु, अहं पुण गोयमा ! एवमाइक्खामि जाव एवं पल्लवेमि-एवं खलु राहू देवे महिच्चिए जाव महेसक्खे वरवत्थधरे वरमल्लधरे वरगंधधरे वराभरणधारी, राहुस्स णं देवस्स नव नामधेज्जा प०, तंजहा-सिंघाडए १ जडिलए २ खंभए [खतए] ३ खरए ४ दहुरे ५ मगरे ६ मच्छे ७ कच्छमे ८ कण्हसप्पे ९, राहुस्स णं देवस्स विमाणा पंचवन्ना पण्णत्ता, तंजहा-किण्हा नीला लोहिया हालिद्धा सुक्खिळा, अत्थि कालए राहुविमाणे खंजण-वन्नामे पण्णत्ते, अत्थि नीलए राहुविमाणे लाउयवन्नामे प०, अत्थि लोहिए राहुवि-माणे मंजिट्टवन्नामे प०, अत्थि पीयए राहुविमाणे हालिद्धवन्नामे पञ्चत्ते, अत्थि सुक्खिळए राहुविमाणे भासरसिवन्नामे पञ्चत्ते ॥ जया णं राहू आगच्छमाणे वा गच्छमाणे

चा विउव्वमाणे वा परियारेमाणे वा चंदलेस्सं पुरच्छिमेण आवरेत्ता णं पच्चच्छिमेण
वीईवयइ, तया णं पुरच्छिमेणं चंदे उवदंसेइ पच्चच्छिमेणं राहू, जया णं राहू आग-
च्छमाणे वा गच्छमाणे वा विउव्वमाणे वा परियारेमाणे वा चंदलेस्सं पच्चच्छिमेणं
आवरेत्ताणं पुरच्छिमेणं वीईवयइ, तया णं पच्चच्छिमेणं चंदे उवदंसेइ पुरच्छिमेणं राहू,
एवं जहा पुरच्छिमेणं पच्चच्छिमेण य दो आलावगा भणिया तहा दाहिणेणं उत्तरेण
य दो आलावगा भाणियव्वा, एवं उत्तरपुरच्छिमेणं दाहिणपच्चच्छिमेण य दो आलावगा
भाणियव्वा, एवं दाहिणपुरच्छिमेणं उत्तरपच्चच्छिमेण य दो आलावगा भाणियव्वा
एवं चेव जाव तया णं उत्तरपच्चच्छिमेणं चंदे उवदंसेइ दाहिणपुरच्छिमेणं राहू, जया
णं राहू आगच्छमाणे वा गच्छमाणे वा विउव्वमाणे वा परियारेमाणे वा चंदलेस्सं
आवरेमाणे २ चिट्ठइ, तया णं मणुस्सलोए मणुस्सा वदंति-एवं खलु राहू चंदं गेण्हइ
एवं०, जया णं राहू आगच्छमाणे वा ४ चंदस्स लेस्सं आवरेत्ताणं पासेणं वीईवयइ
तया णं मणुस्सलोए मणुस्सा वदंति-एवं खलु चंदेणं राहुस्स कुच्छी भिन्ना एवं०, जया
णं राहू आगच्छमाणे वा ४ चंदस्स लेस्सं आवरेत्ताणं पच्चोसक्कइ तया णं मणुस्सलोए
मणुस्सा वदंति-एवं खलु राहुणा चंदे वंते एवं०, जया णं राहू आगच्छमाणे वा
जाव परियारेमाणे वा चंदलेस्सं अहे सपक्खिं सपडिदिसिं आवरेत्ताणं चिट्ठइ, तया णं
मणुस्सलोए मणुस्सा वदंति-एवं खलु राहुणा चंदे घत्थे एवं० ॥ कइविहे णं भंते !
राहू पन्नत्ते ? गोयमा ! दुविहे राहू पन्नत्ते, तंजहा-धुवराहू य पव्वराहू य, तत्थ णं
जे से धुवराहू से णं बहुलपक्खस्स पाडिबए पन्नरसतिभागेणं पन्नरसभागं चंदस्स
लेस्सं आवरेमाणे २ चिट्ठइ, तंजहा-पढमाए पढमं भागं विइयाए विइयं भागं जाव
पन्नरसेसु पन्नरसमं भागं, चरिमसमए चंदे रत्ते भवइ अवसेसे समए चंदे रत्ते वा
विरत्ते वा भवइ, तमेव सुक्कपक्खस्स उवदंसेमाणे २ चिट्ठइ तं० पढमाए पढमं
भागं जाव पन्नरसेसु पन्नरसमं भागं, चरिमसमए चंदे विरत्ते भवइ अवसेसे समए
चंदे रत्ते वा विरत्ते वा भवइ, तत्थ णं जे से पव्वराहू से जह्वेणं छण्हं मासाणं
उक्कोसेणं बायालीसाए मासाणं चंदस्स, अडयालीसाए संवच्छराणं सूरस्स ॥ ४५२ ॥
से केणट्ठेणं भंते ! एवं वुच्चइ-चंदे ससी २ ? गोयमा ! चंदस्स णं जोइसिंदस्स
जोइसरत्तो मियंके विमाणे कंता देवा कंताओ देवीओ कंताइं आसणसयणखंभंड-
मत्तोवगरणाइं अप्पणोवि य णं चंदे जोइसिंदे जोइसराया सोमे कंते सुभगे पिय-
दंसणे सुरुवे से तेणट्ठेणं जाव ससी ॥ ४५३ ॥ से केणट्ठेणं भंते ! एवं वुच्चइ-सूरे
आइच्चे सूरे० २ ? गोयमा ! सूराइया णं समयाइ वा आवलियाइ वा जाव उस्सप्पि-
णीइ वा अवसप्पिणीइ वा से तेणट्ठेणं गोयमा ! जाव आइच्चे० २ ॥ ४५४ ॥ चंदस्स णं

भंते ! जोइसिंदस्स जोइसरन्नो कइ अगगमहिंसीओ पण्णत्ताओ ? जहा दसमसए जाव णो चेव णं मेहुणवत्तियं । सूरस्सवि तहेव । चंदिमसूरिया णं भंते ! जोइसिंदा जोइ-सरायाणो केरिसए कामभोगे पच्चणुब्भवमाणा विहरंति ? गोयमा ! से जहानामए केइ पुरिसे पढमजोव्वणुट्ठाणबलत्थे पढमजोव्वणुट्ठाणबलत्थाए भारियाए साद्धिं अचिरवत्तविवाहकजे अत्थगवेसणयाए सोलसवासविप्पवासिए से णं तओ लद्धे कयकजे अणहसम(ए)ग्गे पुणरवि नियगगिहं हव्वमागए ण्हाए सव्वालंकारविभूसिए मणुच्चं थालीपागसुद्धं अट्टारसवज्जणाउलं भोयणं भुत्ते समाणे तंसि तारिसगंसि वासघरंसि वज्जओ महव्वले जाव सयणोवयारकलिए ताए तारिसियाए भारियाए सिंगा-रागारस्वास्वेसाए जाव कलियाए अणुरत्ताए अविरत्ताए मणाणकूलाए साद्धिं इट्ठे सहे फरिसे जाव पंचविहे माणुस्सए कामभोगे पच्चणुब्भवमाणे विहरइ, ता से णं गोयमा ! पुरिसे विउसमणकालसमयंसि केरिसयं सायासोक्खं पच्चणुब्भवमाणे विहरइ ? ओरालं समणाउत्तो !, तस्स णं गोयमा ! पुरिसस्स कामभोगेहिंनो वाणमंतराणं देवाणं एत्तो अणंतगुणविसिद्धतरा चेव कामभोगा, वाणमंतराणं देवाणं कामभोगेहिंतो असुरिंदवज्जियाणं भवणवासिणं देवाणं एत्तो अणंतगुणविसिद्धतरा चेव कामभोगा, असुरिंदवज्जियाणं भवणवासियाणं देवाणं कामभोगेहिंतो असुरकुमाराणं देवाणं एत्तो अणंतगुणविसिद्धतरा चेव कामभोगा, असुरकुमाराणं देवाणं कामभोगेहिंतो गहगणनक्खत्ततारारूवाणं जोइसियाणं देवाणं एत्तो अणंतगुणविसिद्धतरा चेव कामभोगा, गहगणनक्खत्त० जाव कामभोगेहिंतो चंदिमसूरियाणं जोइसियाणं जोइ-सराईणं एत्तो अणंतगुणविसिद्धतरा चेव कामभोगा, चंदिमसूरिया णं गोयमा ! जोइ-सिंदा जोइसरायाणो एरिसए कामभोगे पच्चणुब्भवमाणा विहरंति । सेवं भंते ! सेवं भंते ! त्ति भगवं गोयमे समणं भगवं महावीरं जाव विहरइ ॥ ४५५ ॥ वारहमे सए छट्ठो उद्देसो समत्तो ॥

तेणं कालेणं तेणं समएणं जाव एवं वयासी-केमहालए णं भंते ! लोए पन्नते ? गोयमा ! महइमहालए लोए पन्नते, पुरच्छिमेणं असंखेज्जाओ जोयणकोडाकोडीओ दाहिणेणं असंखेज्जाओ एवं चेव, एवं पच्चच्छिमेणवि, एवं उत्तरेणवि, एवं उट्ठं पि, अहे असंखेज्जाओ जोयणकोडाकोडीओ आयासविकखंभेणं । एयंसि णं भंते ! एमहाल्यंसि लोगंसि अत्थि केइ परमाणुपोगलमेत्तेवि पएसे जत्थ णं अयं जीवे न जाए वा न मए वावि ? गोयमा ! नो इणट्ठे समट्ठे, से केणट्ठेणं भंते ! एवं बुच्चइ एयंसि णं एमहाल्यंसि लोगंसि नत्थि केइ परमाणुपोगलमेत्तेवि पएसे जत्थ णं अयं जीवे न जाए वा न मए वावि ? गोयमा ! से जहानामए-केइ पुरिसे अयासयस्स एणं महं

अयावयं करेजा, से णं तत्थ जहन्नेणं एणं वा दो वा तिञ्जि वा उक्कोसेणं अयास-
हस्सं पक्खिवेज्जा, ताओ णं तत्थ पउरगोयराओ पउरपाणियाओ जहन्नेणं एगाहं वा
दुयाहं वा तियाहं वा उक्कोसेणं छम्मासे परिवसेज्जा, अत्थि णं गोयमा ! तस्स
अयावयस्स केइ परमाणुपोग्गलमेत्तेवि पएसे जे णं तासिं अयाणं उच्चारण वा पास-
वणेण वा खेलेण वा सिंघाणएण वा वंतेण वा पित्तेण वा पूएण वा सुक्केण वा
सोणिएण वा चम्मेहिं वा रोमेहिं वा सिंगेहिं वा खुरेहिं वा नहेहिं वा अणाकंतपुव्वे
भवइ ? भगवं ! णो इण्ठे सम्भे, होज्जावि णं गोयमा ! तस्स अयावयस्स केइ
परमाणुपोग्गलमेत्तेवि पएसे जे णं तासिं अयाणं उच्चारण वा जाव णहेहिं वा
अणकंतपुव्वे णो चेव णं एयंसि एमहालयंसि लोगंसि लोगस्स शासयं भावं
संसारस्स य अणाइभावं जीवस्स य णिच्चभावं कम्मबहुतं जम्मणमरणबाहुल्लं च
पडुच्च नत्थि केइ परमाणुपोग्गलमेत्तेवि पएसे जत्थ णं अयं जीवे न जाए वा न मए
वावि, से तेण्ठेणं तं चेव जाव न मए वावि ॥ ४५६ ॥ कइ णं भंते ! पुढवीओ
पण्णत्ताओ ? गोयमा ! सत्त पुढवीओ पण्णत्ताओ जहा पढमसए पंचमउहेसए तहेव
आवासा ठावेयव्वा जाव अणुत्तरविमाणेति जाव अपराजिए सव्वट्टसिद्धि । अयन्नं
भंते ! जीवे इमीसे रयणप्पभाए पुढवीए तीसाए निरयावाससयसहस्सेसु एगमेगंसि
निरयावासंसि पुढविकाइयत्ताए जाव वणस्सइकाइयत्ताए नरगत्ताए नेरइयत्ताए उव-
वन्नपुव्वे ? हंता गोयमा ! असइं अदुवा अणंतखुत्तो, अयन्नं भंते ! जीवे सक्करप्प-
भाए पुढवीए पणवीसाए एवं जहा रयणप्पभाए तहेव दो आलावगा भाणियव्वा,
एवं जाव धूमप्पभाए । अयन्नं भंते ! जीवे तमाए पुढवीए पंचूणे निरयावाससयस-
हस्से एगमेगंसि सेसं तं चेव, अयन्नं भंते ! जीवे अहेसत्तमाए पुढवीए पंचसु
अणुत्तरेसु महइमहालएसु महानिरएसु एगमेगंसि निरयावासंसि सेसं जहा रयणप्प-
भाए, अयन्नं भंते ! जीवे चोसट्ठीए असुरकुमारावाससयसहस्सेसु एगमेगंसि असुर-
कुमारावासंसि पुढविकाइयत्ताए जाव वणस्सइकाइयत्ताए देवत्ताए देविताए आसण-
सयणभंडमत्तोवगरणत्ताए उववन्नपुव्वे ? हंता गोयमा ! जाव अणंतखुत्तो, सव्वजीवावि
णं भंते ! एवं चेव, एवं जाव थणियकुमारेसु, नाणत्तं आवासेसु, आवासा पुव्वभणिया,
अयन्नं भंते ! जीवे असंखेज्जेसु पुढविकाइयावाससयसहस्सेसु एगमेगंसि पुढविकाइ-
यावासंसि पुढविकाइयत्ताए जाव वणस्सइकाइयत्ताए उववन्नपुव्वे ? हंता गोयमा ! जाव
अणंतखुत्तो, एवं सव्वजीवावि, एवं जाव वणस्सइकाइएसु, अयण्णं भंते ! जीवे असंखे-
ज्जेसु बैदियावाससयसहस्सेसु एगमेगंसि बैदियावासंसि पुढविकाइयत्ताए जाव वणस्स-
इकाइयत्ताए वैइदियत्ताए उववन्नपुव्वे ? हंता गोयमा ! जाव अणंतखुत्तो, सव्वजी-

चावि णं एवं चेव, एवं जाव मणस्सेसु, नवरं तेइंदिएसु जाव वणस्सइकाइयत्ताए तेइंदियत्ताए चउरिंदिएसु चउरिंदियत्ताए पंचिंदियतिरिक्खजोणिएसु पंचिंदियतिरिक्खजोणियत्ताए मणस्सेसु मणस्सत्ताए सेसं जहा वेंदियाणं, वाणमंतरजोइसियसोहम्मीसाणेसु य जहा असुरकुमाराणं, अयणं भंते ! जीवे सणकुमारे कप्पे बारससु विमाणावाससयसहस्सेसु एगमेगंसि वेमाणियावासंसि पुढविकाइयत्ताए सेसं जहा असुरकुमाराणं जाव अणंतखुत्तो, नो चेव णं देवित्ताए, एवं सव्वजीवावि, एवं जाव आणयपाणएसु, एवं आरण्णुएसुवि, अयन्नं भंते ! जीवे तिसुवि अट्टारसुत्तरेसु गेविज्जविमाणावाससएसु एवं चेव, अयन्नं भंते ! जीवे पंचसु अणुत्तरविमाणेसु एगमेगंसि अणुत्तरविमाणंसि पुढवि तहेव जाव अणंतखुत्तो, नो चेव णं देवत्ताए वा देवित्ताए वा एवं सव्वजीवावि । अयन्नं भंते ! जीवे सव्वजीवाणं माइत्ताए पियत्ताए भाइत्ताए भणिणित्ताए भज्जत्ताए पुत्तत्ताए धूयत्ताए सुण्हत्ताए उववन्नपुव्वे ? हंता गोयमा ! असइं अदुवा अणंतखुत्तो, सव्वजीवावि णं भंते ! इमस्स जीवस्स माइत्ताए जाव उववन्नपुव्वे ? हंता गोयमा ! जाव अणंतखुत्तो, अयणं भंते ! जीवे सव्वजीवाणं अरित्ताए वेरियत्ताए धायगत्ताए वहगत्ताए पडिणीयत्ताए पच्चामित्तत्ताए उववन्नपुव्वे ? हंता गोयमा ! जाव अणंतखुत्तो, सव्वजीवावि णं भंते ! एवं चेव, अयन्नं भंते ! जीवे सव्वजीवाणं रायत्ताए जुवरायत्ताए जाव सत्थवाहत्ताए उववन्नपुव्वे ? हंता गोयमा ! असइं जाव अणंतखुत्तो, सव्वजीवाणं एवं चेव । अयन्नं भंते ! जीवे सव्वजीवाणं दासत्ताए पेसत्ताए भयगत्ताए भाइल्लगत्ताए भोगपुरिसत्ताए सीसत्ताए वेसत्ताए उववन्नपुव्वे ? हंता गोयमा ! जाव अणंतखुत्तो, एवं सव्वजीवावि जाव अणंतखुत्तो । सेवं भंते ! सेवं भंते ! त्ति जाव विहरइ ॥ ४५७ ॥ **बारहमे सए सत्तमो उद्देसो समत्तो ॥**

तेणं कालेणं तेणं समएणं जाव एवं वयासी-देवे णं भंते ! महिङ्गिए जाव महेसक्खे अणंतरं चयं चइत्ता बिसरीरेसु नागेसु उववज्जेज्जा ? हंता गोयमा ! उववज्जेज्जा, से णं तत्थ अच्चियवंदियपूइयसक्कारियसम्माणिए दिव्वे सच्चे सच्चोवाए संनिहियपाडिहेरे यावि भवेज्जा ? हंता भवेज्जा, से णं भंते ! तओहिंतो अणंतरं उव्वट्ठित्ता सिज्झेज्जा बुज्झेज्जा जाव अंतं करेज्जा ? हंता सिज्झेज्जा जाव अंतं करेज्जा, देवे णं भंते ! महिङ्गिए एवं चेव जाव बिसरीरेसु मणीसु उववज्जेज्जा, एवं चेव जहा नागाणं, देवे णं भंते ! महिङ्गिए जाव बिसरीरेसु स्क्खेसु उववज्जेज्जा ? हंता उववज्जेज्जा, एवं चेव, नवरं इमं नाणत्तं जाव सच्चिहियपाडिहेरे लाउल्लोइयमहिए यावि भवेज्जा ? हंता भवेज्जा, सेसं तं चेव जाव अंतं करेज्जा ॥ ४५८ ॥ अह

भंते ! गोलंगूलवसभे कुकुडवसभे मंडुकवसभे एए णं निस्सीला निव्वया निग्गुणा निम्मेरा निप्पच्चक्खाणपेसहोववासा कालमासे कालं किच्चा इमीसे रयणप्पभाए पुढवीए उक्कोसेणं सागरोवमड्डियंसि नरगंसि नेरइयत्ताए उववज्जेजा ? समणे भगवं महावीरे वागरेइ-उववज्जमाणे उववज्जेति वत्तव्वं सिया । अह भंते ! सीहे वग्घे जहा उस्सप्पिणीउद्देसए जाव परस्सरे एए णं निस्सीला एवं चेव जाव वत्तव्वं सिया, अह भंते ! ढंके कंके विलए मग्गुए सिखीए, एए णं निस्सीला० सेसं तं चेव जाव वत्तव्वं सिया । सेवं भंते ! सेवं भंते ! त्ति जाव विहरइ ॥ ४५९ ॥
वारहमे सए अट्टमो उद्देसो समत्तो ॥

कइविहा णं भंते ! देवा पण्णत्ता ? गोयमा ! पंचविहा देवा पण्णत्ता, तंजहा-भवियदव्वदेवा १ नरदेवा २ धम्मदेवा ३ देवा(इ)हिदेवा ४ भावदेवा ५, से केणट्ठेणं भंते ! एवं वुच्चइ भवियदव्वदेवा भवियदव्वदेवा ? गोयमा ! जे भविए पंचिदियतिरिक्खजोणिए वा मणुस्से वा देवेसु उववज्जितए से तेणट्ठेणं गोयमा ! एवं वुच्चइ भवियदव्वदेवा २, से केणट्ठेणं भंते ! एवं वुच्चइ नरदेवा नरदेवा ? गोयमा ! जे इमे रायाणो चाउरंतचक्कवट्ठी उप्पन्नसमत्तचक्करयणप्पहाणा नवनिहिपइणो समिद्धकोसा बत्तीसं रायवरसहस्साणुजायमग्गा सागरवरमेहलाहिवइणो मणुस्सिदा से तेणट्ठेणं जाव नरदेवा २, से केणट्ठेणं भंते ! एवं वुच्चइ धम्मदेवा धम्मदेवा ? गोयमा ! जे इमे अणगारा भगवंतो इरियासमिया जाव गुत्तवंभयारी से तेणट्ठेणं जाव धम्मदेवा २, से केणट्ठेणं भंते ! एवं वुच्चइ देवाहिदेवा देवाहिदेवा ? गोयमा ! जे इमे अरिहंता भगवंतो उप्पन्नानणदंसणधरा जाव सव्वदरिसी से तेणट्ठेणं जाव देवाहिदेवा २, से केणट्ठेणं भंते ! एवं वुच्चइ-भावदेवा भावदेवा ? गोयमा ! जे इमे भवणवइवाणमंतरजोइसियवेमाणिआ देवा देवगइनामगोयाइं कम्माइं वेदैति से तेणट्ठेणं जाव भावदेवा ॥ ४६० ॥
 भवियदव्वदेवा णं भंते ! कओहिंतो उववज्जंति किं नेरइएहिंतो उववज्जंति तिरिक्ख० मणुस्स० देवेहिंतो उववज्जंति ? गोयमा ! नेरइएहिंतो उववज्जंति तिरि० मणु० देवेहिंतोवि उववज्जंति, भेओ जहा वक्कंतीए सव्वेसु उववाएयव्वा जाव अणुत्तरोववाइयत्ति, नवरं असंखेज्जवासाउयअकम्मभूमियअंतरदीवगसव्वट्ठसिद्धवज्जं जाव अपराजियदेवेहिंतोवि उववज्जंति, णो सव्वट्ठसिद्धदेवेहिंतो उववज्जंति । नरदेवा णं भंते ! कओहिंतो उववज्जंति किं नेरइए० पुच्छा, गोयमा ! नेरइएहिंतो उववज्जंति नो तिरि० नो मणु० देवेहिंतोवि उववज्जंति, जइ नेरइएहिंतो उववज्जंति किं रयणप्पभापुढविनेरइएहिंतो उववज्जंति जाव अहेसत्तमापुढविनेरइएहिंतो उववज्जंति ?

गोयमा ! रयणप्पभापुढविनेरइएहिंतो उववजंति नो सक्कर जाव नो अहेसत्तमा-
 पुढविनेरइएहिंतो उववजंति, जइ देवेहिंतो उववजंति किं भवणवासिदेवेहिंतो उव-
 वजंति वाणमंतरं जोइसियं वेमाणियदेवेहिंतो उववजंति ? गोयमा ! भवण-
 वासिदेवेहिंतोवि उववजंति वाणमंतर एवं सव्वदेवेसु उववाएयव्वा वक्कंतीभेएणं जाव
 सव्वट्टसिद्धत्ति, धम्मदेवा णं भंते ! कओहिंतो उववजंति किं नेरइएहिंतो ? एवं
 वक्कंतीभेएणं सव्वेसु उववाएयव्वा जाव सव्वट्टसिद्धत्ति, नवरं तमा अहेसत्तमाए
 तेउवाउअसंखेज्जवासाउयअकम्मभूमियअंतरदीवगवज्जेसु, देवाहिदेवा णं भंते !
 कओहिंतो उववजंति किं नेरइएहिंतो उववजंति पुच्छा, गोयमा ! नेरइएहिंतो
 उववजंति नो तिरिं नो मणुं देवेहिंतोवि उववजंति, जइ नेरइएहिंतो एवं तिसु
 पुढवीसु उववजंति सेसाओ खोडैयव्वाओ, जइ देवेहिंतो वेमाणिएसु सव्वेसु
 उववजंति जाव सव्वट्टसिद्धत्ति, सेसा खोडैयव्वा, भावदेवा णं भंते ! कओहिंतो
 उववजंति ? एवं जहा वक्कंतीए भवणवासीणं उववाओ तहा भाणियव्वं ॥ ४६१ ॥
 भवियदव्वदेवाणं भंते ! केवइयं कालं ठिई पं ? गोयमा ! जह्जेणं अंतोमुहुत्तं
 उक्कोसेणं तिज्जि पलिओवमाई, नरदेवाणं पुच्छा, गोयमा ! जह्जेणं सत्त वाससयाई
 उक्कोसेणं चउरासीइ पुव्वसयसहस्साई, धम्मदेवाणं भंते ! पुच्छा, गोयमा ! जह-
 ज्जेणं अंतोमुहुत्तं उक्कोसेणं देसुणा पुव्वकोडी, देवाहिदेवाणं पुच्छा, गोयमा ! जह्जेणं
 वावत्तरिं वासाई उक्कोसेणं चउरासीई पुव्वसयसहस्साई, भावदेवाणं पुच्छा, गोयमा !
 जह्जेणं दस वाससहस्साई उक्कोसेणं तेत्तीसं सागरोवमाई ॥ ४६२ ॥ भवियदव्व-
 देवा णं भंते ! किं एगत्तं पभू विउव्वित्तए पुहुत्तं पभू विउव्वित्तए ? गोयमा ! एग-
 त्तंपि पभू विउव्वित्तए पुहुत्तंपि पभू विउव्वित्तए, एगत्तं विउव्वमाणे एगिंदियरुवं वा
 जाव पंचिंदियरुवं वा पुहुत्तं विउव्वमाणे एगिंदियरुवाणि वा जाव पंचिंदियरुवाणि
 वा ताई संखेजाणि वा असंखेजाणि वा संबद्धाणि वा असंबद्धाणि वा सरिसाणि
 वा असरिसाणि वा विउव्वंति विउव्वित्ता तओ पच्छा अप्पणो जहिच्छियाई कज्जाई
 करंति, एवं नरदेवावि, एवं धम्मदेवावि, देवाहिदेवाणं पुच्छा, गोयमा ! एगत्तंपि
 पभू विउव्वित्तए पुहुत्तंपि पभू विउव्वित्तए, नो चेव णं संपत्तीए विउव्विसु वा विउ-
 व्विति वा विउव्विस्संति वा । भावदेवाणं पुच्छा, जहा भवियदव्वदेवा ॥ ४६३ ॥
 भवियदव्वदेवाणं भंते ! अणंतरं उव्वट्ठित्ता कहिं गच्छंति कहिं उववजंति किं
 नेरइएसु उववजंति जाव देवेसु उववजंति ? गोयमा ! नो नेरइएसु उववजंति नो
 तिरिं नो मणुं देवेसु उववजंति, जइ देवेसु उववजंति सव्वदेवेसु उववजंति
 जाव सव्वट्टसिद्धत्ति । नरदेवा णं भंते ! अणंतरं उव्वट्ठित्ता पुच्छा, गोयमा ! नेरइ-

एस उववज्जंति नो तिरि० नो मणु० णो देवेसु उववज्जंति, जइ नेरइएसु उववज्जंति० सत्तसुवि पुढवीसु उववज्जंति । धम्मदेवा णं भंते ! अणंतरं उव्वट्ठिता पुच्छा, गोयमा ! नो नेरइएसु उववज्जंति नो तिरि० नो मणु० देवेसु उववज्जंति, जइ देवेसु उववज्जंति किं भवणवासि० पुच्छा, गोयमा ! नो भवणवासिदेवेसु उववज्जंति नो वाणमंतर० नो जोइसिय० वेमाणियदेवेसु उववज्जंति, सव्वेसु वेमाणिएसु उववज्जंति जाव सव्व-
ट्ठसिद्धअणुत्तरोववाइएसु उववज्जंति, अत्थेगइया सिज्झंति जाव अंतं करंति । देवाहि-
देवा णं भंते ! अणंतरं उव्वट्ठिता कहिं गच्छंति कहिं उववज्जंति ? गोयमा ! सिज्झंति जाव अंतं करंति । भावदेवा णं भंते ! अणंतरं उव्वट्ठिता पुच्छा, जहा वक्कंतीए असुरकुमाराणं उव्वट्ठणा तहा भाणियव्वा ॥ भवियदव्वदेवे णं भंते ! भवियदव्व-
देवेत्ति कालओ केवच्चिरं होइ ? गोयमा ! जहजेणं अंतोमुहुत्तं उक्कोसेणं तिक्खि पलिओवमाइं, एवं जहेव ठिई सच्चैव संचिट्ठणावि जाव भावदेवस्स, नवरं धम्मदेवस्स जहण्णेणं एक्कं समयं उक्कोसेणं देसूणा पुव्वकोडी ॥ भवियदव्वदेवस्स णं भंते !
केवइयं कालं अंतरं होइ ? गोयमा ! जहण्णेणं दसवाससहस्साइं अंतोमुहुत्तमम्भहियाइं उक्कोसेणं अणंतं कालं वणस्सइकालो । नरदेवाणं पुच्छा, गोयमा ! जहजेणं साइरेणं सागरोवमं उक्कोसेणं अणंतं कालं अवह्वं पोगगलपरियट्ठं देसूणं । धम्मदेवस्स णं पुच्छा, गोयमा ! जहजेणं पलिओवमपुहुत्तं उक्कोसेणं अणंतं कालं जाव अवह्वं पोगगलपरियट्ठं देसूणं । देवाहिदेवाणं पुच्छा, गोयमा ! नत्थि अंतरं । भावदेवस्स णं पुच्छा, गोयमा ! जहजेणं अंतोमुहुत्तं उक्कोसेणं अणंतं कालं वणस्सइकालो ॥
एएसि णं भंते ! भवियदव्वदेवाणं नरदेवाणं जाव भावदेवाणं य कयरे २ जाव विसेसाहिया वा ? गोयमा ! सव्वत्थोवा नरदेवा, देवाहिदेवा संखेज्जगुणा, धम्मदेवा संखेज्जगुणा, भवियदव्वदेवा असंखेज्जगुणा, भावदेवा असंखेज्जगुणा ॥ ४६४ ॥ एएसि णं भंते ! भावदेवाणं भवणवासीणं वाणमंतराणं जोइसियाणं वेमाणियाणं सोहम्म-
गाणं जाव अञ्चुयगाणं गेवेज्जगाणं अणुत्तरोववाइयाणं य कयरे २ जाव विसेसाहिया वा ? गोयमा ! सव्वत्थोवा अणुत्तरोववाइया भावदेवा, उवरिमगेवेजा भावदेवा संखेज्जगुणा, मज्झिमगेवेजा संखेज्जगुणा, हेट्ठिमगेवेजा संखेज्जगुणा, अञ्चुए कप्पे देवा संखेज्जगुणा जाव आपयकप्पे भावदेवा संखेज्जगुणा एवं जहा जीवाभिगमे तिविहे देवपुरिसे अप्पावहुयं जाव जोइसिया भावदेवा असंखेज्जगुणा । सेवं भंते !
२ ति ॥ ४६५ ॥ वारहमस्स सयस्स नवमो उद्देसो समत्तो ॥

कव्विहा णं भंते ! आया पण्णत्ता ? गोयमा ! अट्ठविहा आया पण्णत्ता, तंजहा-
दवियाया कसायाया जोगाया उवओगाया णाणाया दंसणाया चरित्ताया वीरियाया ॥

जस्स णं भंते ! दवियाया तस्स कसायाया जस्स कसायाया तस्स दवियाया ? गोयमा ! जस्स दवियाया तस्स कसायाया सिय अत्थि सिय नत्थि, जस्स पुण कसायाया तस्स दवियाया नियमं अत्थि । जस्स णं भंते ! दवियाया तस्स जोगाया ? एवं जहा दवियाया कसायाया भणिया तहा दवियाया जोगायावि भाणियव्वा । जस्स णं भंते ! दवियाया तस्स उवओगाया एवं सव्वत्थ पुच्छा भाणियव्वा, गोयमा ! जस्स दवियाया तस्स उवओगाया नियमं अत्थि, जस्सवि उवओगाया तस्सवि दवियाया नियमं अत्थि, जस्स दवियाया तस्स णाणाया भयणाए, जस्स पुण णाणाया तस्स दवियाया नियमं अत्थि, जस्स दवियाया तस्स दंसणाया नियमं अत्थि, जस्सवि दंसणाया तस्स दवियाया नियमं अत्थि, जस्स दवियाया तस्स चरित्ताया भयणाए, जस्स पुण चरित्ताया तस्स दवियाया नियमं अत्थि, एवं वीरियायाएवि समं । जस्स णं भंते ! कसायाया तस्स जोगाया पुच्छा, गोयमा ! जस्स कसायाया तस्स जोगाया नियमं अत्थि, जस्स पुण जोगाया तस्स कसायाया सिय अत्थि सिय नत्थि, एवं उवओगायाएवि समं कसायाया नेयव्वा, कसायाया य णाणाया य परोप्परं दोवि भइयव्वाओ, जहा कसायाया य उवओगाया य तहा कसायाया य दंसणाया य कसायाया य चरित्ताया य दोवि परोप्परं भइयव्वाओ, जहा कसायाया य जोगाया य तहा कसायाया य वीरियाया य भाणियव्वाओ, एवं जहा कसायायाए वत्तव्वया भणिया तहा जोगायाएवि उवरिमाहिं समं भाणियव्वा । जहा दवियायाए वत्तव्वया भणिया तहा उवओगायाएवि उवरिमाहिं समं भाणियव्वा । जस्स णाणाया तस्स दंसणाया नियमं अत्थि, जस्स पुण दंसणाया तस्स णाणाया भयणाए, जस्स णाणाया तस्स चरित्ताया सिय अत्थि सिय नत्थि, जस्स पुण चरित्ताया तस्स णाणाया नियमं अत्थि, णाणाया वीरियाया दोवि परोप्परं भयणाए । जस्स दंसणाया तस्स उवरिमाओ दोवि भयणाए, जस्स पुण ताओ तस्स दंसणाया नियमं अत्थि । जस्स चरित्ताया तस्स वीरियाया नियमं अत्थि, जस्स पुण वीरियाया तस्स चरित्ताया सिय अत्थि सिय नत्थि ॥ एयासि णं भंते ! दवियायाणं कसायायाणं जाव वीरियायाणं य कयरे २ जाव विसेसाहिया वा ? गोयमा ! सव्वत्थोवाओ चरित्तायाओ, णाणायाओ अणंतगुणाओ, कसायायाओ अणंतगुणाओ, जोगायाओ विसेसाहियाओ, वीरियायाओ विसेसाहियाओ; उवओगदवियदंसणायाओ तिच्चिवि तुल्लाओ विसेसाहियाओ ॥ ४६६ ॥ आया भंते ! नाणे अन्नाणे ? गोयमा ! आया सिय नाणे सिय अन्नाणे, णाणे पुण नियमं आया ॥ आया भंते ! नेरइयाणं नाणे अब्बे नेरइयाणं नाणे ? गोयमा ! आया नेरइयाणं

सिय नाणे सिय अन्नाणे, नाणे पुण से नियमं आया, एवं जाव थणियकुमारणं, आया भंते ! पुढविकाइयाणं अन्नाणे अन्ने पुढविकाइयाणं अन्नाणे ? गोयमा ! आया पुढविकाइयाणं नियमं अन्नाणे अन्नाणेवि नियमं आया, एवं जाव वणस्सइ-काइयाणं, वेईदियतेईदिय जाव वेमाणियाणं जहा नेरइयाणं । आया भंते ! दंसणे अन्ने दंसणे ? गोयमा ! आया नियमं दंसणे दंसणेवि नियमं आया । आया भंते ! नेरइयाणं दंसणे अण्णे नेरइयाणं दंसणे ? गोयमा ! आया नेरइयाणं नियमं दंसणे दंसणेवि से नियमं आया, एवं जाव वेमाणियाणं निरंतरं दंडओ ॥४६७॥ आया भंते ! रयणप्पभापुढवी अन्ना रयणप्पभापुढवी ? गोयमा ! रयणप्पभापुढवी सिय आया सिय नो आया सिय अवत्तव्वं आयाइ य नो आयाइ य, से केणट्ठेणं भंते ! एवं बुच्चइ रयणप्पभापुढवी सिय आया सिय नो आया सिय अवत्तव्वं आयाइ य नो आयाइ य ? गोयमा ! अप्पणो आइट्ठे आया, परस्स आइट्ठे नो आया, तदुभयस्स आइट्ठे अवत्तव्वं रयणप्पभापुढवी आयाइ य नो आयाइ य, से तेणट्ठेणं तं चेव जाव नो आयाइ य । आया भंते ! सक्करप्पभापुढवी जहा रयणप्पभापुढवी तहा सक्करप्प-भा(ए)वि एवं जाव अहे सत्तमा(ए) । आया भंते ! सोहम्मकप्पे पुच्छा, गोयमा ! सोहम्मे कप्पे सिय आया सिय नो आया जाव नो आयाइ य, से केणट्ठेणं भंते ! जाव नो आयाइ य ? गोयमा ! अप्पणो आइट्ठे आया, परस्स आइट्ठे नो आया, तदुभयस्स आइट्ठे अवत्तव्वं आयाइ य नो आयाइ य, से तेणट्ठेणं गोयमा ! तं चेव जाव नो आयाइ य, एवं जाव अच्चुए कप्पे । आया भंते ! गेविज्जविमाणे अन्ने गेविज्जविमाणे ? एवं जहा रयणप्पभापुढवी तहेव, एवं अणुत्तरविमाणावि, एवं ईत्तिपब्भारावि । आया भंते ! परमाणुपोग्गळे अन्ने परमाणुपोग्गळे ? एवं जहा सोहम्मं कप्पे तहा परमाणु-पोग्गळेवि भाणियव्वे ॥ आया भंते ! दुपएसिए खंधे अन्ने दुपएसिए खंधे ? गोयमा ! दुपएसिए खंधे सिय आया १ सिय नो आया २ सिय अवत्तव्वं आयाइ य नो आयाइ य ३ सिय आया य नो आया य ४ सिय आया य अवत्तव्वं आयाइ य नो आयाइ य ५ सिय नो आया य अवत्तव्वं आयाइ य नो आयाइ य ६, से केणट्ठेणं भंते ! एवं तं चेव जाव नो आया य अवत्तव्वं आयाइ य नो आयाइ य ? गोयमा ! अप्पणो आइट्ठे आया १ परस्स आइट्ठे नो आया २ तदुभयस्स आइट्ठे अवत्तव्वं दुपएसिए खंधे आयाइ य नो आयाइ य ३ देसे आइट्ठे सब्भावपज्जवे देसे आइट्ठे असब्भावपज्जवे दुप्पएसिए खंधे आया य नो आया य ४ देसे आइट्ठे सब्भाव-पज्जवे देसे आइट्ठे तदुभयपज्जवे दुपएसिए खंधे आया य अवत्तव्वं आयाइ य नो आयाइ य ५ देसे आइट्ठे असब्भावपज्जवे देसे आइट्ठे तदुभयपज्जवे दुपएसिए खंधे

नो आया य अवत्तव्वं आयाइ य नो आयाइ य ६, से तेणट्ठेणं तं चेव जाव नो आयाइ य ॥ आया भंते ! तिपएसिए खंधे अन्ने तिपएसिए खंधे ? गोयमा ! तिपएसिए खंधे सिय आया १ सिय नो आया २ सिय अवत्तव्वं आयाइ य नो आयाइ य ३ सिय आया य नो आया य ४ सिय आया य नो आयाओ य ५ सिय आयाओ य नो आया य ६ सिय आया य अवत्तव्वं आयाइ य नो आयाइ य ७ सिय आया य अवत्तव्वाइं आया(इ)ओ य नो आयाओ य ८ सिय आयाओ य अवत्तव्वं आयाइ य नो आयाइ य ९ सिय नो आया य अवत्तव्वं आयाइ य नो आयाइ य १० सिय(नो) आया य अवत्तव्वाइं आयाओ य नो आयाओ य ११ सिय नो आयाओ य अवत्तव्वं आयाइ य नो आयाइ य १२ सिय आया य नो आया य अवत्तव्वं आयाइ य नो आयाइ य १३, से केणट्ठेणं भंते ! एवं वुच्चइ तिपएसिए खंधे सिय आया एवं चेव उच्चारयेयव्वं जाव सिय आया य नो आया य अवत्तव्वं आयाइ य नो आयाइ य ? गोयमा ! अप्पणो आइट्ठे आया १ परस्स आइट्ठे नो आया २ तदुभयस्स आइट्ठे अवत्तव्वं आयाइ य नो आयाइ य ३ देसे आइट्ठे सत्त्भावपज्जवे देसे आइट्ठे असत्त्भावपज्जवे तिपएसिए खंधे आया य नो आया य ४ देसे आइट्ठे सत्त्भावपज्जवे देसा आइट्ठा असत्त्भावपज्जवा तिपएसिए खंधे आया य नो आयाओ य ५ देसा आइट्ठा सत्त्भावपज्जवा देसे आइट्ठे असत्त्भावपज्जवे तिपएसिए खंधे आयाओ य नो आया य ६ देसे आइट्ठे सत्त्भावपज्जवे देसे आइट्ठे तदुभयपज्जवे तिपएसिए खंधे आया य अवत्तव्वं आयाइ य नो आयाइ य ७ देसे आइट्ठे सत्त्भावपज्जवे देसा आइट्ठा तदुभयपज्जवा तिपएसिए खंधे आया य अवत्तव्वाइं आयाओ य नो आयाओ य ८ देसा आइट्ठा सत्त्भावपज्जवा देसे आइट्ठे तदुभयपज्जवे तिपएसिए खंधे आयाओ य अवत्तव्वं आयाइ य नो आयाइ य ९, ए तिभिं भंगा, देसे आइट्ठे असत्त्भावपज्जवे देसे आइट्ठे तदुभयपज्जवे तिपएसिए खंधे नो आया य अवत्तव्वं आयाइ य नो आयाइ य १० देसे आइट्ठे असत्त्भावपज्जवे देसा आइट्ठा तदुभयपज्जवा तिपएसिए खंधे नो आया य अवत्तव्वाइं आयाओ य नो आयाओ य ११ देसा आइट्ठा असत्त्भावपज्जवा देसे आइट्ठे तदुभयपज्जवे तिपएसिए खंधे नो आयाओ य अवत्तव्वं आयाइ य नो आयाइ य १२ देसे आइट्ठे सत्त्भावपज्जवे देसे आइट्ठे असत्त्भावपज्जवे देसे आइट्ठे तदुभयपज्जवे तिपएसिए खंधे आया य नो आया य अवत्तव्वं आयाइ य नो आयाइ य १३, से तेणट्ठेणं गोयमा ! एवं वुच्चइ तिपएसिए खंधे सिय आया तं चेव जाव नो आयाइ य ॥ आया भंते ! चउप्पएसिए खंधे अन्ने० पुच्छा, गोयमा ! चउप्पएसिए खंधे सिय

आया १ सिय नो आया २ सिय अवत्तव्वं आयाइ य नो आयाइ य ३ सिय
 आया य नो आया य ४ सिय आया य अवत्तव्वं ४ सिय नो आया य अवत्तव्वं
 ४ सिय आया य नो आया य अवत्तव्वं आयाइ य नो आयाइ य १६ सिय आया
 य नो आया य अवत्तव्वं आयाओ य नो आयाओ य १७ सिय आया य नो
 आयाओ य अवत्तव्वं आयाइ य नो आयाइ य १८ सिय आयाओ य नो आया
 य अवत्तव्वं आयाइ य नो आयाइ य १९ । से केणट्ठेणं भंते ! एवं तुच्चइ चउप्प-
 एसिए खंधे सिय आया य नो आया य अवत्तव्वं तं चेव अट्ठे पडिउच्चारैयव्वं,
 गोयमा ! अप्पणो आइट्ठे आया १ परस्स आइट्ठे नो आया २ तदुभयस्स आइट्ठे
 अवत्तव्वं आयाइ य नो आयाइ य ३ देसे आइट्ठे सब्भावपज्जवे देसे आइट्ठे अस-
 ब्भावपज्जवे चउभंगो, सब्भावपज्जवेण तदुभएण य चउभंगो, असब्भाववेण तदु-
 भएण य चउभंगो, देसे आइट्ठे सब्भावपज्जवे देसे आइट्ठे असब्भावपज्जवे देसे
 आइट्ठे तदुभयपज्जवे चउप्पएसिए खंधे आया य नो आया य अवत्तव्वं आयाइ य
 नो आयाइ य, देसे आइट्ठे सब्भावपज्जवे देसे आइट्ठे असब्भावपज्जवे देसा आइट्ठा
 तदुभयपज्जवा चउप्पएसिए खंधे आया य नो आया य अवत्तव्वं आयाओ
 य नो आयाओ य १७ देसे आइट्ठे सब्भावपज्जवे देसा आइट्ठा असब्भावपज्जवा
 देसे आइट्ठे तदुभयपज्जवे चउप्पएसिए खंधे आया य नो आयाओ य अवत्तव्वं
 आयाइ य नो आयाइ य १८ देसा आइट्ठा सब्भावपज्जवा देसे आइट्ठे असब्भावपज्जवे
 देसे आइट्ठे तदुभयपज्जवे चउप्पएसिए खंधे आयाओ य नो आया य अवत्तव्वं
 आयाइ य नो आयाइ य १९, से तेणट्ठेणं गोयमा ! एवं तुच्चइ चउप्पएसिए खंधे सिय
 आया सिय नो आया सिय अवत्तव्वं निक्खेवे ते चेव भंगा उच्चारैयवा जाव नो
 आयाइ य ॥ आया भंते ! पंचपएसिए खंधे अन्ने पंचपएसिए खंधे ? गोयमा !
 पंचपएसिए खंधे सिय आया १ सिय नो आया २ सिय अवत्तव्वं आयाइ य नो
 आयाइ य ३ सिय आया य नो आया य ४ सिय अवत्तव्वं (४) आया य नो आया य
 ४ (नोआया य अवत्तव्वेण य ४) तियगसंजोगे एक्को ण पडइ, से केणट्ठेणं भंते !
 तं चेव पडिउच्चारैयव्वं ? गोयमा ! अप्पणो आइट्ठे आया १ परस्स आइट्ठे नो आया
 २ तदुभयस्स आइट्ठे अवत्तव्वं ३ देसे आइट्ठे सब्भावपज्जवे देसे आइट्ठे असब्भाव-
 पज्जवे एवं दुयगसंजोगे सव्वे पडंति तियगसंजोगे एक्को ण पडइ । छप्पएसियस्स
 सव्वे पडंति, जहा छप्पएसिए एवं जाव अणंतपएसिए । सेवं भंते ! सेवं भंते ! ति
 जाव विहरइ ॥ ४६८ ॥ दसमो उद्देशो समत्तो, वारसमं सयं समत्तं ॥

पुढवी १ देव २ मणंतर ३ पुढवी ४ आहारमेव ५ उववाए ६ । भासा ७

कम्म ८ अणगारे केयावडिया ९ समुग्घाए १० ॥ रायगिहे जाव एवं वयासी-कइ णं भंते । पुढवीओ पन्नत्ताओ ? गोयमा ! सत्त पुढवीओ पन्नत्ताओ, तंजहा-रयण-प्पभा जाव अहेसत्तमा । इमीसे णं भंते ! रयणप्पभाए पुढवीए केवइया निरया-वाससयसहस्सा पण्णत्ता ? गोयमा ! तीसं निरयावाससयसहस्सा पन्नत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि असंखेज्ज-वित्थडावि, इमीसे णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु एगसमएणं केवइया नेरइया उववज्जंति १ ? केवइया काउ-लेस्सा उववज्जंति २ ? केवइया कण्हपक्खिया उववज्जंति ३ ? केवइया सुक्कपक्खिया उववज्जंति ४ ? केवइया सत्ती उववज्जंति ५ ? केवइया असत्ती उववज्जंति ६ ? केवइया भवसिद्धिया जीवा उववज्जंति ७ ? केवइया अभवसिद्धिया जीवा उववज्जंति ८ ? केवइया आभिणिबोहियनाणी उववज्जंति ९ ? केवइया सुयनाणी उववज्जंति १० ? केवइया ओहिनाणी उववज्जंति ११ ? केवइया मइअन्नाणी उववज्जंति १२ ? केवइया सुयअन्नाणी उववज्जंति १३ ? केवइया विभंगनाणी उववज्जंति १४ ? केवइया चक्खुदंसणी उववज्जंति १५ ? केवइया अचक्खुदंसणी उववज्जंति १६ ? केवइया ओहिदंसणी उववज्जंति १७ ? केवइया आहारसन्नोवत्ता उववज्जंति १८ ? केवइया भयसन्नोवत्ता उववज्जंति १९ ? केवइया मेहुणसन्नोवत्ता उववज्जंति २० ? केवइया परिग्गहसन्नोवत्ता उववज्जंति २१ ? केवइया इत्थिवेयगा उववज्जंति २२ ? केवइया पुरिसवेयगा उववज्जंति २३ ? केवइया नपुंसगवेयगा उववज्जंति २४ ? केवइया कोहकसाई उववज्जंति २५ जाव केवइया लोभकसाई उववज्जंति २६ ? केवइया सोइंदियउवत्ता उववज्जंति २७ जाव केवइया फासिंदियोवत्ता उववज्जंति २८ ? केवइया नोइंदियोवत्ता उववज्जंति २९ ? केवइया मणजोगी उववज्जंति ३० ? केवइया वइजोगी उववज्जंति ३१ ? केवइया कायजोगी उववज्जंति ३२ ? केवइया सागा-रोवत्ता उववज्जंति ३३ ? केवइया अणागारोवत्ता उववज्जंति ३४ ? गोयमा ! इमीसे णं रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु जहन्नेणं एक्को वा दो वा तिन्नि वा उक्कोसेणं संखेज्जा नेरइया उववज्जंति, जहन्नेणं एक्को वा दो वा तिन्नि वा उक्कोसेणं संखेज्जा काउलेस्सा उववज्जंति, जहन्नेणं एक्को वा दो वा तिन्नि वा उक्कोसेणं संखेज्जा कण्हपक्खिया उववज्जंति, एवं सुक्कपक्खि-यावि, एवं सत्तीवि एवं असत्तीवि, एवं भवसिद्धिया एवं अभवसिद्धिया, आभिणिबोहि-यनाणी सुयनाणी ओहिनाणी मइअन्नाणी सुयअन्नाणी विभंगनाणी एवं चेव, चक्खु-दंसणी ण उववज्जंति, जहन्नेणं एक्को वा दो वा तिन्नि वा उक्कोसेणं संखेज्जा अचक्खु-

दंसणी उववज्जंति, एवं ओहिदंसणीवि, एवं आहारसञ्चोवउत्तावि जाव परिग्गहसञ्चोव-
 उत्तावि, इत्थीवेयगा न उववज्जंति पुरिसवेयगावि न उववज्जंति, जहन्नेण एक्को वा दो वा
 तिञ्चि वा उक्कोसेण संखेज्जा नपुंसगवेयगा उववज्जंति, एवं कोहकसाई जाव लोभकसाई,
 सोईदियउवउत्ता न उववज्जंति एवं जाव फासिदिओवउत्ता न उववज्जंति, जहन्नेण एक्को
 वा दो वा तिञ्चि वा उक्कोसेण संखेज्जा नोईदिओवउत्ता उववज्जंति, मणजोगी
 ण उववज्जंति, एवं वइजोगीवि, जहन्नेण एक्को वा दो वा तिञ्चि वा उक्कोसेण संखेज्जा
 कायजोगी उववज्जंति, एवं सागारोवउत्तावि एवं अणागारोवउत्तावि ॥ इमीसे णं
 भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु
 एगसमएणं केवइया नेरइया उववट्ठंति, केवइया काउलेस्सा उववट्ठंति जाव
 केवइया अणागारोवउत्ता उववट्ठंति ? गोयमा ! इमीसे णं रयणप्पभाए पुढवीए
 तीसाए निरयावाससयसहस्सेसु संखेज्जवित्थडेसु नरएसु एगसमएणं जहन्नेण एक्को
 वा दो वा तिञ्चि वा उक्कोसेण संखेज्जा नेरइया उववट्ठंति, एवं जाव सञ्ची, असञ्ची
 ण उववट्ठंति, जहन्नेण एक्को वा दो वा तिञ्चि वा उक्कोसेण संखेज्जा भवसिद्धिया
 उववट्ठंति एवं जाव सुयअन्नाणी विभंगनाणी ण उववट्ठंति, चक्खुदंसणी ण उववट्ठंति,
 जहन्नेण एक्को वा दो वा तिञ्चि वा उक्कोसेण संखेज्जा अचक्खुदंसणी उववट्ठंति, एवं
 जाव लोभकसाई, सोईदियउवउत्ता ण उववट्ठंति एवं जाव फासिदियोवउत्ता न
 उववट्ठंति, जहन्नेण एक्को वा दो वा तिञ्चि वा उक्कोसेण संखेज्जा नोईदियोवउत्ता
 उववट्ठंति, मणजोगी न उववट्ठंति एवं वइजोगीवि, जहन्नेण एक्को वा दो वा तिञ्चि वा
 उक्कोसेण संखेज्जा कायजोगी उववट्ठंति, एवं सागारोवउत्तावि अणागारोवउत्तावि ॥ इमीसे
 णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु
 केवइया नेरइया पज्जता ? केवइया काउलेस्सा प० जाव केवइया अणागारोवउत्ता
 पज्जता ? केवइया अणंतरोववन्नगा पज्जता १ ? केवइया परंपरोववन्नगा पज्जता २ ?
 केवइया अणंतरोगाढा पज्जता ३ ? केवइया परंपरोगाढा प० ४ ? केवइया अणंत-
 राहारा प० ५ ? केवइया परंपराहारा प० ६ ? केवइया अणंतरपज्जता प० ७ ? केव-
 इया परंपरपज्जता पज्जता ८ ? केवइया चरिमा प० ९ ? केवइया अचरिमा प०
 १० ? गोयमा ! इमीसे रयणप्पभाए पुढवीए तीसाए निरयावाससयसहस्सेसु संखेज्ज-
 वित्थडेसु नरएसु संखेज्जा नेरइया प०, संखेज्जा काउलेस्सा प०, एवं जाव संखेज्जा सञ्ची
 प०, असञ्ची सिय अत्थि सिय नत्थि जइ अत्थि जहन्नेण एक्को वा दो वा तिञ्चि वा
 उक्कोसेण संखेज्जा प०, संखेज्जा भवसिद्धिया प०, एवं जाव संखेज्जा परिग्गहसञ्चोवउत्ता
 प०, इत्थीवेयगा नत्थि पुरिसवेयगा नत्थि, संखेज्जा नपुंसगवेयगा प०, एवं कोहकसा-

ईवि, माणकसाई जहा असन्नी, एवं जाव लोभकसाई, संखेज्जा सोईदियोवउत्ता प०, एवं जाव फासिदियोवउत्ता, नोईदियोवउत्ता जहा असन्नी, संखेज्जा मणजोगी प०, एवं जाव अणागारोवउत्ता, अणंतरोववन्नगा सिथ अत्थि सिथ नत्थि जइ अत्थि जहा असन्नी, संखेज्जा परंपरोववन्नगा प०, एवं जहा अणंतरोववन्नगा तथा अणंतरोगाढगा अणंतरा-
हारगा अणंतरपज्जत्ता चरिमा, परंपरोगाढगा जाव अचरिमा जहा परंपरोववन्नगा ॥
इमीसे णं भंते ! रयणप्पभाए पुढवीए तीसाए निरयावाससयसहस्सेसु असंखेज्ज-
वित्थडेसु नरएसु एगसमएणं केवइया नेरइया उववज्जंति जाव केवइया अणागारोवउत्ता
उववज्जंति ? गोयमा ! इमीसे णं रयणप्पभाए पुढवीए तीसाए निरयावाससयसहस्सेसु
असंखेज्जवित्थडेसु नरएसु एगसमएणं जहण्णेणं एक्को वा दो वा तिन्नि वा उक्कोसेणं
असंखेज्जा नेरइया उववज्जंति, एवं जहेव संखेज्जवित्थडेसु तिन्नि गमगा तथा
असंखेज्जवित्थडेसुवि तिन्नि गमगा, नवरं असंखेज्जा भाणियव्वा सेसं तं चेव जाव
असंखेज्जा अचरिमा प०, नाणत्तं लेस्सासु लेसाओ जहा पढमसए नवरं संखेज्जवित्थडेसुवि
असंखेज्जवित्थडेसुवि ओहिनाणी ओहिदंसणी य संखेज्जा उव्वडावेयव्वा, सेसं तं चेव ॥
सक्करप्पभाए णं भंते ! पुढवीए केवइया निरयावास० पुच्छा, गोयमा ! पणवीसं
निरयावाससयसहस्सा पणत्ता, ते णं भंते ! किं संखेज्जवित्थडा असंखेज्जवित्थडा ?
एवं जहा रयणप्पभाए तथा सक्करप्पभाएवि, नवरं असन्नी तिसुवि गमएसु न भन्नइ,
सेसं तं चेव । वालुयप्पभाए णं पुच्छा, गोयमा ! पन्नरस निरयावाससयसहस्सा
प०, सेसं जहा सक्करप्पभाए णाणत्तं लेसासु लेसाओ जहा पढमसए ॥ पंकप्पभाए णं
पुच्छा, गोयमा ! दस निरयावाससयसहस्सा प०, एवं जहा सक्करप्पभाए नवरं ओहि-
नाणी ओहिदंसणी य न उव्वट्ठंति, सेसं तं चेव ॥ धूमप्पभाए णं पुच्छा, गोयमा !
तिन्नि निरयावाससयसहस्सा एवं जहा पंकप्पभाए ॥ तमाए णं भंते ! पुढवीए केवइया
निरयावास० पुच्छा, गोयमा ! एगे पंचूणे निरयावाससयसहस्से पणत्ते, सेसं जहा
पंकप्पभाए ॥ अहेसत्तमाए णं भंते ! पुढवीए कइ अणुत्तरा महइमहालया महानि-
रया पज्जता ? गोयमा ! पंच अणुत्तरा जाव अपइट्ठणे, ते णं भंते ! किं संखेज्ज-
वित्थडा असंखेज्जवित्थडा ? गोयमा ! संखेज्जवित्थडे य असंखेज्जवित्थडा य, अहे-
सत्तमाए णं भंते ! पुढवीए पंचसु अणुत्तरेसु महइमहालया जाव महानिरएसु संखे-
ज्जवित्थडे नरए एगसमएणं केवइया उववज्जंति ? एवं जहा पंकप्पभाए नवरं तिसु
नाणेसु न उववज्जंति न उव्वट्ठंति, पज्जत्तएसु तहेव अत्थि, एवं असंखेज्जवित्थडेसुवि
नवरं असंखेज्जा भाणियव्वा ॥४६९॥ इमीसे णं भंते ! रयणप्पभाए पुढवीए तीसाए
निरयावाससयसहस्सेसु संखेज्जवित्थडेसु नरएसु किं सम्महिट्ठी नेरइया उववज्जंति मिच्छ-

दिट्ठी नेरइया उववज्जंति सम्मामिच्छदिट्ठी नेरइया उववज्जंति ? गोयमा ! सम्मदिट्ठीवि नेरइया उववज्जंति, मिच्छादिट्ठीवि नेरइया उववज्जंति, नो सम्मामिच्छदिट्ठी नेरइया उववज्जंति । इमीसे णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु किं सम्मदिट्ठी नेरइया उव्वट्ठंति ? एवं चेव । इमीसे णं भंते ! रयणप्पभाए पुढवीए तीसाए निरयावाससयसहस्सेसु संखेज्जवित्थडा नरगा किं सम्मदिट्ठीहिं नेरइएहिं अविरहिया मिच्छादिट्ठीहिं नेरइएहिं अविरहिया सम्मामिच्छदिट्ठीहिं नेरइएहिं अविरहिया ? गोयमा ! सम्मदिट्ठीहिं नेरइएहिं अविरहिया मिच्छादिट्ठीहिं नेरइएहिं अविरहिया, सम्मामिच्छादिट्ठीहिं नेरइएहिं अविरहिया विरहिया वा, एवं असंखेज्जवित्थडेसुवि तिन्नि गमगा भाणियव्वा, एवं सक्करप्पभाएवि, एवं जाव तमाएवि । अहेसत्तमाए णं भंते ! पुढवीए पंचसु अणुत्तरेसु जाव संखेज्जवित्थडे नरए किं सम्मदिट्ठी नेरइया पुच्छा, गोयमा ! सम्मदिट्ठी नेरइया न उववज्जंति, मिच्छादिट्ठी नेरइया उववज्जंति, सम्मामिच्छदिट्ठी नेरइया न उववज्जंति, एवं उव्वट्ठंतिवि, अविरहिए जहेव रयणप्पभाए, एवं असंखेज्जवित्थडेसुवि तिन्नि गमगा ॥ ४७० ॥ से नूनं भंते ! कण्हलेस्से नीललेस्से जाव सुक्कलेस्से भवित्ता कण्हलेस्सेसु नेरइएसु उववज्जंति ? हंता गोयमा ! कण्हलेस्से जाव उववज्जंति, से केणट्ठेणं भंते ! एवं वुच्चइ कण्हलेस्से जाव उववज्जंति ? गोयमा ! लेस्सट्ठणेषु संकिलिस्समाणेषु २ कण्हलेसं परिणमइ २ ता कण्हलेसेसु नेरइएसु उववज्जंति, से तेणट्ठेणं जाव उववज्जंति । से नूनं भंते ! कण्हलेस्से जाव सुक्कलेसे भवित्ता नीललेस्सेसु नेरइएसु उववज्जंति ? हंता गोयमा ! जाव उववज्जंति, से केणट्ठेणं जाव उववज्जंति ? गोयमा ! लेस्सट्ठणेषु संकिलिस्समाणेषु वा विसुज्झमाणेषु नीललेस्सं परिणमइ २ ता नीललेस्सेसु नेरइएसु उववज्जंति, से तेणट्ठेणं गोयमा ! जाव उववज्जंति, से नूनं भंते ! कण्हलेस्से नीललेस्से जाव भवित्ता काउलेस्सेसु नेरइएसु उववज्जंति ? एवं जहा नीललेस्साए तहा काउलेस्सा(ए)वि भाणियव्वा जाव से तेणट्ठेणं जाव उववज्जंति । सेवं भंते ! सेवं भंते ! ति ॥ ४७१ ॥ तेरहमे सए पढमो उद्देसो समत्तो ॥

कइविहा णं भंते ! देवा पण्णत्ता ? गोयमा ! चउव्विहा देवा पण्णत्ता, तंजहा-भवणवासी वाणमंतरा जोइसिया वेमाणिया । भवणवासी णं भंते ! देवा कइविहा पण्णत्ता ? गोयमा ! दसविहा पण्णत्ता, तंजहा-असुरकुमारा एवं मेज्जो जहा विइयसए देवुइसए जाव अपराजिया सव्वट्ठसिद्धगा । केवइया णं भंते ! असुरकुमारावाससयसहस्सा पण्णत्ता ? गोयमा ! चोसट्ठि असुरकुमारावाससयसहस्सा पण्णत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि

असंखेजवित्थडावि, चोसट्टीए णं भंते ! असुरकुमारावाससयसहस्सेसु संखेजवित्थडेसु असुरकुमारावासेसु एगसमएणं केवइया असुरकुमारा उववज्जंति केवइया तेउळेसा उववज्जंति केवइया कण्हपक्खिया उववज्जंति एवं जहा रयणप्पभाए तहेव पुच्छा, तहेव वागरणं, नवरं दोहिं वेदेहिं उववज्जंति, नपुंसगवेयगा न उववज्जंति, सेसं तं चेव, उव्वट्ठंगावि तहेव नवरं असन्नी उव्वट्ठंति, ओहिनाणी ओहिदंसणी य ण उव्वट्ठंति, सेसं तं चेव, पन्नत्तएसु तहेव नवरं संखेजगा इत्थिवेदगा पण्णत्ता, एवं पुरिसवेदगावि, नपुंसगवेदगा नत्थि, कोहकसाई सिंय अत्थि सिंय नत्थि जइ अत्थि जहण्णेणं एक्को वा दो वा तिञ्चि वा उक्कोसेणं संखेज्जा पण्णत्ता, एवं माण माया संखेज्जा लोभकसाई पण्णत्ता, सेसं तं चेव तिसुवि गमएसु संखेजवित्थडेसु चत्तारि छेस्साओ भाणियव्वाओ, एवं असंखेजवित्थडेसुवि नवरं तिसुवि गमएसु असंखेज्जा भाणियव्वा जाव असंखेज्जा अचरिमा पण्णत्ता । केवइया णं भंते ! नागकुमारावास० एवं जाव थणियकुमारावास नवरं जत्थ जत्तिया भवणा ॥ केवइया णं भंते ! वाणमंतरावाससयसहस्सा पन्नत्ता ? गोयमा ! असंखेज्जा वाणमंतरावाससयसहस्सा पन्नत्ता, ते णं भंते ! किं संखेजवित्थडा असंखेजवित्थडा ? गोयमा ! संखेजवित्थडा नो असंखेज्जवित्थडा, संखेजेसु णं भंते ! वाणमंतरावाससयसहस्सेसु एगसमएणं केवइया वाणमंतरा उववज्जंति ? एवं जहा असुरकुमाराणं संखेजवित्थडेसु तिञ्चि गमगा तहेव भाणियव्वा वाणमंतराणावि तिञ्चि गमगा । केवइया णं भंते ! जोइसियविमाणावाससयसहस्सा पण्णत्ता ? गोयमा ! असंखेज्जा जोइसियविमाणावाससयसहस्सा पण्णत्ता, ते णं भंते ! किं संखेजवित्थडा० ? एवं जहा वाणमंतराणं तहा जोइसियाणावि तिञ्चि गमगा भाणियव्वा नवरं एगा तेउळेस्सा, उववज्जंतेसु पन्नत्तेसु य असन्नी नत्थि, सेसं तं चेव ॥ सोहम्मे णं भंते ! कप्पे केवइया विमाणावाससयसहस्सा पन्नत्ता ? गोयमा ! वत्तीसं विमाणावाससयसहस्सा पण्णत्ता, ते णं भंते ! किं संखेजवित्थडा असंखेजवित्थडा ? गोयमा ! संखेजवित्थडावि असंखेजवित्थडावि, सोहम्मे णं भंते ! कप्पे वत्तीसाए विमाणावाससयसहस्सेसु संखेजवित्थडेसु विमाणेसु एगसमएणं केवइया सोहम्मगा देवा उववज्जंति केवइया तेउळेसा उववज्जंति ? एवं जहा जोइसियाणं तिञ्चि गमगा तहेव तिञ्चि गमगा भाणियव्वा नवरं तिसुवि संखेज्जा भाणियव्वा, ओहिनाणी ओहिदंसणी य चयावेयव्वा, सेसं तं चेव । असंखेजवित्थडेसु एवं चेव तिञ्चि गमगा णवरं तिसुवि गमएसु असंखेज्जा भाणियव्वा, ओहिनाणी य ओहिदंसणी य संखेज्जा चयंति, सेसं तं चेव, एवं जहा सोहम्मे वत्तव्वया भणिया तहा ईसाणेवि छ गमगा भाणियव्वा, सर्णकुमारेवि एवं

चेव नवरं इत्थीवियगा न उववज्जंति पन्नत्तेसु य न भण्णंति, असन्नी तिसुवि गमएसु न भण्णंति, सेसं तं चेव, एवं जाव सहस्सारे, नाणत्तं विमाणेसु लेस्सासु य, सेसं तं चेव ॥ आणयपाणएसु णं भंते ! कप्पेसु केवइया विमाणावाससया पण्णत्ता ? गोयमा ! चत्तारि विमाणावाससया पण्णत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडावि असंखेज्जवित्थडावि, एवं संखेज्जवित्थडेसु तिञ्चि गमगा जहा सहस्सारे असंखेज्जवित्थडेसु उववज्जंतेसु य चयंतेसु य एवं चेव संखेज्जा भाणियव्वा पन्नत्तेसु असंखेज्जा नवरं नोइंदियोवउत्ता अणंतरोववन्नगा अणंतरोगाटगा अणंतराहारगा अणंतरपज्जत्तगा य एएसिं जह्णेणं एक्को वा दो वा तिञ्चि वा उक्कोसेणं संखेज्जा प०, सेसा असंखेज्जा भाणियव्वा । आरणञ्जुएसु एवं चेव जहा आणयपाणएसु नाणत्तं विमाणेसु, एवं गेवेज्जावि । कइ णं भंते ! अणुत्तरविमाणा पन्नत्ता ? गोयमा ! पंच अणुत्तरविमाणा पन्नत्ता, ते णं भंते ! किं संखेज्जवित्थडा असंखेज्जवित्थडा ? गोयमा ! संखेज्जवित्थडे य असंखेज्जवित्थडा य, पंचसु णं भंते ! अणुत्तरविमाणेसु संखेज्जवित्थडे विमाणे एगसमएणं केवइया अणुत्तरोवाइया देवा उववज्जंति केवइया सुक्कलेस्सा उववज्जंति पुच्छा तहेव, गोयमा ! पंचसु णं अणुत्तरविमाणेसु संखेज्जवित्थडे अणुत्तरविमाणे एगसमएणं जह्णेणं एक्को वा दो वा तिञ्चि वा उक्कोसेणं संखेज्जा अणुत्तरोवाइया देवा उववज्जंति, एवं जहा गेवेज्जविमाणेसु संखेज्जवित्थडेसु नवरं किण्हपक्खिया अभवसिद्धिया तिसु अच्चाणेसु एए न उववज्जंति न चयंति नवि पन्नत्तएसु भाणियव्वा अचरिमावि खोडिज्जंति जाव संखेज्जा चरिमा प०, सेसं तं चेव, असंखेज्जवित्थडेसुवि एए न भञ्जंति नवरं अचरिमा अत्थि, सेसं जहा गेवेज्जएसु असंखेज्जवित्थडेसु जाव असंखेज्जा अचरिमा प० । चोसट्ठीए णं भंते ! असुरकुमारावाससयसहस्सेसु संखेज्जवित्थडेसु असुरकुमारावासेसु किं सम्महिट्ठी असुरकुमारा उववज्जंति मिच्छादिट्ठी एवं जहा रयणप्पभाए तिञ्चि आलावगा भणिया तहा भाणियव्वा, एवं असंखेज्जवित्थडेसुवि तिञ्चि गमगा, एवं जाव गेवेज्जविमाणेसु अणुत्तरविमाणेसु एवं चेव, नवरं तिसुवि आलावएसु मिच्छादिट्ठी सम्मासिच्छादिट्ठी य न भञ्जंति, सेसं तं चेव । से नूर्णं भंते ! कण्हलेस्से नील जाव सुक्कलेस्से भवित्ता कण्हलेस्सेसु देवेसु उववज्जंति ? हुंता गोयमा ! एवं जहेव नेरइएसु पढमे उद्देसए तहेव भाणियव्वं, नीललेसाएवि जहेव नेरइयाणं, जहा नीललेस्साए एवं जाव पग्गहलेस्सेसु सुक्कलेस्सेसु एवं चेव, नवरं लेस्सट्ठाणेसु विमुज्झमाणेसु २ सुक्कलेस्सं परिणमइ २त्ता सुक्कलेस्सेसु देवेसु उववज्जंति, से तेणट्ठेणं जाव उववज्जंति ॥ सेवं भंते । सेवं भंते । ति ॥ ४७२ ॥ तेरहमे सण वीओ उद्देसो समत्तो ॥

नेरइया णं भंते ! अणंतराहारा तओ निव्वत्तणया एवं परियारणापयं निरव-
सेसं भाणियव्वं । सेवं भंते ! सेवं भंते ! त्ति ॥ ४७३ ॥ तेरहमे सए तइओ
उहेसो समत्तो ॥

कइ णं भंते ! पुढवीओ पन्नत्ताओ ? गोयमा ! सत्त पुढवीओ पणत्ताओ,
तंजहा-रयणप्पभा जाव अहेसत्तमा, अहेसत्तमाए णं भंते ! पुढवीए पंच अणुत्तरा
महइमहालया जाव अपइट्ठाणे, ते णं णरगा छट्ठीए तमाए पुढवीए नरएहिंतो
महततरा चेव १ महाविच्छिन्नतरा चेव २ महावासतरा चेव ३ महापइरिक्कतरा
चेव ४, णो तहा महापवेसणतरा चेव १ नो आइन्नतरा चेव २ नो आउलतरा
चेव ३ नो अणो(मा)यणतरा चेव ४, तेसु णं नरएसु नेरइया छट्ठीए तमाए पुढवीए
नेरइएहिंतो महाकम्मतरा चेव १ महाकिरियतरा चेव २ महासवतरा चेव ३
महावेयणतरा चेव ४ नो तहा अप्पकम्मतरा चेव १ नो अप्पकिरियतरा चेव २
नो अप्पासवतरा चेव ३ नो अप्पवेयणतरा चेव ४ अप्पिद्धियतरा चेव १ अप्प-
जुइयतरा चेव २ नो तहा महिद्धियतरा चेव १ नो महाजुइयतरा चेव २ । छट्ठीए
णं तमाए पुढवीए एगे पंचूणे निरयावाससयसहस्से पणत्ते, ते णं नरगा अहेसत्त-
माए पुढवीए नरएहिंतो नो तहा महत्तरा चेव महाविच्छिन्नतरा चेव ४, महप्पवेस-
णतरा चेव आइन्नतरा चेव ४, तेसु णं नरएसु नेरइया अहेसत्तमाए पुढवीए नेर-
इएहिंतो अप्पकम्मतरा चेव अप्पकिरियतरा चेव ४ नो तहा महाकम्मतरा चेव
महाकिरियतरा चेव ४ महिद्धियतरा चेव महाजुइयतरा चेव, नो तहा अप्पिद्धियतरा
चेव अप्पजुइयतरा चेव । छट्ठीए णं तमाए पुढवीए नरगा पंचमाए धूमप्पभाए पुढ-
वीए नरएहिंतो महत्तरा चेव ४ नो तहा महप्पवेसणतरा चेव ४, तेसु णं नरएसु
नेरइया पंचमाए धूमप्पभाए पुढवीए नेरइएहिंतो महाकम्मतरा चेव ४ नो तहा
अप्पकम्मतरा चेव ४ अप्पिद्धियतरा चेव २ नो तहा महिद्धियतरा चेव २, पंच-
माए णं धूमप्पभाए पुढवीए तिथि निरयावाससयसहस्सा पन्नत्ता, एवं जहा छट्ठीए
भणिया एवं सत्तवि पुढवीओ परोप्परं भण्णंति जाव रयणप्पमत्ति जाव नो तहा
महिद्धियतरा चेव अप्पजुइयतरा चेव ॥ ४७४ ॥ रयणप्पभापुढविनेरइया णं भंते !
केरिसयं पुढविकासं पच्चणुब्भवमाणा विहरंति ? गोयमा ! अणिट्ठं जाव अमणामं, एवं
जाव अहेसत्तमापुढविनेरइया, एवं आउफासं एवं जाव वणस्सइफासं ॥ ४७५ ॥ इमा
णं भंते ! रयणप्पभापुढवी दोच्चं सक्करप्पभं पुढविं पणिहाय सव्वमहंतिया बाहल्लेणं
सव्वखुड्डिया सव्वंतेसु एवं जहा जीवाभिगमे बिइए नेरइयउहेसए ॥ ४७६ ॥ इमीसे
णं भंते ! रयणप्पभाए पुढवीए णिरयपरिसामंतेसु जे पुढविकाइया एवं जहा नेरइ-

यउद्देसए जाव अहेसत्तमाए ॥ ४७७ ॥ कहि णं भंते ! लोगस्स आयाममज्जे पण्णत्ते ? गोयमा ! इसीसे णं रयणप्पभाए उवासंतरस्स असंखेज्जइभागं ओगाहेत्ता एत्थ णं लोगस्स आयाममज्जे पण्णत्ते । कहि णं भंते ! अहेलोगस्स आयाममज्जे पण्णत्ते ? गोयमा ! चउत्थीए पंकप्पभाए पुढवीए उवासंतरस्स साइरेगं अद्धं ओगाहिता एत्थ णं अहेलोगस्स आयाममज्जे पण्णत्ते, कहि णं भंते ! उद्धलोगस्स आयाममज्जे पण्णत्ते ? गोयमा ! उप्पि सणंकुमारमाहिंदाणं कप्पाणं हेट्ठि वंभलोए कप्पे रिट्ठविमाणे पत्थडे एत्थ णं उद्धलोगस्स आयाममज्जे पण्णत्ते । कहिं भंते ! तिरियलोगस्स आयाममज्जे पण्णत्ते ? गोयमा ! जंव्वीवे २ मंदरस्स पच्चयस्स बहुमज्जदेसभाए इसीसे रयणप्पभाए पुढवीए उवरिमहेट्ठिल्लेसु खुट्ठगपयरेसु एत्थ णं तिरियलोगस्स मज्जे अट्ठपएसिए रयए पण्णत्ते, जओ णं इमाओ दस दिसाओ पवहंति, तंजहा-पुरच्छिमा पुरच्छिमदाहिणा एवं जहा दसमसए नामधेज्जंति ॥ ४७८ ॥ इंदा णं भंते ! दिसा किमाइया किंपवहा कइपएसाइया कइपएसुत्तरा कइपएसिया किंपज्जवसिया किंसंठिया पत्ता ? गोयमा ! इंदा णं दिसा रयगाइया रयगप्पवहा दुपएसाइया दुपएसुत्तरा लोगं पडुच्च असंखेज्जपएसिया, अलोगं पडुच्च अणंतपएसिया, लोगं पडुच्च साइया सपज्जवसिया, अलोगं पडुच्च साइया अपज्जवसिया, लोगं पडुच्च मुरजसंठिया, अलोगं पडुच्च संगडुद्धिसंठिया पत्ता । अग्गेई णं भंते ! दिसा किमाइया किंपवहा कइपएसाइया कइपएसविच्छिन्ना कइपएसिया किंपज्जवसिया किंसंठिया पत्ता ? गोयमा ! अग्गेई णं दिसा रयगाइया रयगप्पवहा एगपएसाइया एगपएसविच्छिन्ना अणुत्तरा लोगं पडुच्च असंखेज्जपएसिया अलोगं पडुच्च अणंतपएसिया, लोगं पडुच्च साइया सपज्जवसिया अलोगं पडुच्च साइया अपज्जवसिया, छिन्नमुत्तावलिंसंठिया पण्णत्ता । जमा जहा इंदा, नेरई जहा अग्गेई, एवं जहा इंदा तहा दिसाओ चत्तारि, जहा अग्गेई तहा चत्तारिवि विदिसाओ । विमला णं भंते ! दिसा किमाइया० पुच्छा जहा अग्गेईए, गोयमा ! विमला णं दिसा रयगाइया रयगप्पवहा चउप्पएसाइया दुपएसविच्छिन्ना अणुत्तरा लोगं पडुच्च सेसं जहा अग्गेईए नवरं रयगसंठिया पण्णत्ता, एवं तमावि ॥ ४७९ ॥ किमियं भंते ! लोएत्ति पवुचइ ? गोयमा ! पंचत्थिकाया, एस णं एवइए लोएत्ति पवुचइ, तंजहा-धम्मत्थिकाए अहम्मत्थिकाए जाव पोगलत्थिकाए । धम्मत्थिकाएणं भंते ! जीवाणं किं पवत्तइ ? गोयमा ! धम्मत्थिकाएणं जीवाणं आगमणगमणभासुम्मसेसमणजोगा वड्जोमा कायजोगा जे यावत्ते तहप्पगारा चला भावा खव्वे ते धम्मत्थिकाए पवत्तंति, गइलवखणे णं धम्मत्थिकाए । अहम्मत्थिकाएणं भंते ! जीवाणं किं पवत्तइ ? गोयमा !

अहम्मत्थिकाएणं जीवाणं ठाणनिसीयणतुयट्ठण मणस्स य एगत्तीभावकरणया जे यावत्ते तहप्पगारा थिरा भावा सव्वे ते अहम्मत्थिकाए पवत्तन्ति, ठाणलक्खणे णं अहम्मत्थिकाए ॥ आगासत्थिकाएणं भंते ! जीवाणं अजीवाण य किं पवत्तइ ? गोयमा ! आगासत्थिकाएणं जीवदब्बाण य अजीवदब्बाण य भायणभूए-एगेणवि से पुत्ते दोहिवि पुत्ते सयंपि माएज्जा । कोडिसएणवि पुत्ते कोडिसहस्संपि माएज्जा ॥ १ ॥ अवगाहणा-लक्खणे णं आगासत्थिकाए ॥ जीवत्थिकाएणं भंते ! जीवाणं किं पवत्तइ ? गोयमा ! जीवत्थिकाएणं जीवे अणंताणं आभिणिदोहियनाणपज्जवाणं अणंताणं सुयनाणपज्जवाणं एवं जहा विइयसए अत्थिकायउद्देसए जाव उवओगं गच्छइ, उवओगलक्खणे णं जीवे ॥ पोग्गलत्थिकाए णं पुच्छा, गोयमा ! पोग्गलत्थिकाएणं जीवाणं ओरालि-यवेउव्वियआहारगतेयाकम्मा सोईदियचक्खिदियघाणिंदियजिब्बिदियफासिंदियम-णजोगवइजोगकायजोगआणापाणूणं च गहणं पवत्तइ, गहणलक्खणे णं पोग्गलत्थिकाए ॥ ४८० ॥ एगे भंते ! धम्मत्थिकायपएसे केवइएहिं धम्मत्थिकायपएसेहिं पुट्ठे ? गोयमा ! जहन्नपए तिहिं उक्कोसपए छहिं । केवइएहिं अहम्मत्थिकायपएसेहिं पुट्ठे ? गोयमा ! जहन्नपए चउहिं उक्कोसपए सत्तहिं । केवइएहिं आगासत्थिकायपएसेहिं पुट्ठे ? गोयमा ! सत्तहिं । केवइएहिं जीवत्थिकायपएसेहिं पुट्ठे ? गोयमा ! अणंतेहिं । केवइएहिं पोग्गलत्थिकायपएसेहिं पुट्ठे ? गोयमा ! अणंतेहिं । केवइएहिं अद्दासम-एहिं पुट्ठे ? सिय पुट्ठे सिय नो पुट्ठे जइ पुट्ठे नियमं अणंतेहिं ॥ एगे भंते ! अहम्मत्थिकायपएसे केवइएहिं धम्मत्थिकायपएसेहिं पुट्ठे ? गोयमा ! जहन्नपए चउहिं उक्को-सपए सत्तहिं । केवइएहिं अहम्मत्थिकायपएसेहिं पुट्ठे ? गोयमा ! जहन्नपए तिहिं उक्कोसपए छहिं, सेसं जहा धम्मत्थिकायस्स ॥ एगे भंते ! आगासत्थिकायपएसे केवइएहिं धम्मत्थिकायपएसेहिं पुट्ठे ? गोयमा ! सिय पुट्ठे सिय नो पुट्ठे, जइ पुट्ठे जहन्नपए एक्केण वा दोहिं वा तिहिं वा चउहिं वा उक्कोसपए सत्तहिं, एवं अहम्मत्थिकायपएसे-हिवि । केवइएहिं आगासत्थिकाय० ? गोयमा ! छहिं, केवइएहिं जीवत्थिकायपएसेहिं पुट्ठे ? सिय पुट्ठे सिय नो पुट्ठे, जइ पुट्ठे नियमं अणंतेहिं । एवं पोग्गलत्थिकायपएसेहिवि अद्दासमएहिवि ॥ ४८१ ॥ एगे भंते ! जीवत्थिकायपएसे केवइएहिं धम्मत्थिकाय० पुच्छा, जहन्नपए चउहिं उक्कोसपए सत्तहिं, एवं अहम्मत्थिकायपएसेहिं वि । केवइएहिं आगासत्थिकाय० ? सत्तहिं । केवइएहिं जीवत्थि० ? सेसं जहा धम्मत्थिकायस्स ॥ एगे भंते ! पोग्गलत्थिकायपएसे केवइएहिं धम्मत्थिकायपएसेहिं० ? एवं जहेव जीव-त्थिकायस्स ॥ दो भंते ! पोग्गलत्थिकायपएसा केवइएहिं धम्मत्थिकायपएसेहिं पुट्ठा ? जहन्नपए छहिं उक्कोसपए बारसहिं, एवं अहम्मत्थिकायपएसेहिवि । केवइएहिं आगा-

सत्थिकाय० ? बारसहिं, सेसं जहा धम्मत्थिकायस्स ॥ तिस्सि भंते ! पोग्गलत्थिका-
यपएसा केवइएहिं धम्मत्थिकाय० ? जहन्नपए अट्ठहिं उक्कोसपए सत्तरसहिं । एवं अह-
म्मत्थिकायपएसेहिं । केवइएहिं आगासत्थि० ? सत्तरसहिं, सेसं जहा धम्मत्थि-
कायस्स । एवं एएणं गमेणं भाणियव्वं जाव दस, नवरं जहन्नपए दोन्नि पक्खि-
यव्वा उक्कोसपए पंच । चत्तारि पोग्गलत्थिकायपएसे० जहन्नपए दसहिं उक्कोसपए
बावीसाए, पंच पोग्गलत्थिकाय० जहण्णपए बारसहिं उक्कोसपए सत्तावीसाए, छ
पोग्गल० जहण्णपए चोइसहिं उक्कोसेणं बत्तीसाए, सत्त पोग्गल० जहन्नेणं सोलसहिं
उक्कोसपए सत्तत्तीसाए, अट्ठ पोग्गल० जहन्नपए अट्ठारसहिं उक्कोसेणं बायालीसाए, नव
पोग्गल० जहन्नपए वीसाए उक्कोसपए सीयालीसाए, दस पोग्गल० जहण्णपए बावी-
साए उक्कोसपए बावन्नाए । आगासत्थिकायस्स सव्वत्थ उक्कोसगं भाणियव्वं ॥
संखेज्जा णं भंते ! पोग्गलत्थिकायपएसा केवइएहिं धम्मत्थिकायपएसेहिं पुट्ठा ? जहन्न-
पए तेणेव संखेज्जएणं दुगुणेणं दुरुवाहिएणं, उक्कोसपए तेणेव संखेज्जएणं पंचगुणेणं
दुरुवाहिएणं, केवइएहिं अधम्मत्थिकाएहिं ? एवं चेव, केवइएहिं आगासत्थिकाय०
तेणेव संखेज्जएणं पंचगुणेणं दुरुवाहिएणं, केवइएहिं जीवत्थिकाय० ? अणंतेहिं, केव-
इएहिं पोग्गलत्थिकाय० ? अणंतेहिं, केवइएहिं अद्दासमएहिं ? सिय पुट्ठे सिय नो पुट्ठे
जाव अणंतेहिं । असंखेज्जा भंते ! पोग्गलत्थिकायप्पएसा केवइएहिं धम्मत्थिकाय० ?
जहन्नपए तेणेव असंखेज्जएणं दुगुणेणं दुरुवाहिएणं, उक्कोसपए तेणेव असंखेज्जएणं
पंचगुणेणं दुरुवाहिएणं, सेसं जहा संखेज्जाणं जाव नियमं अणंतेहिं ॥ अणंता भंते !
पोग्गलत्थिकायपएसा केवइएहिं धम्मत्थिकाय० एवं जहा असंखेज्जा तहा अणंतावि
निरवसेसं ॥ एगे भंते ! अद्दासमए केवइएहिं धम्मत्थिकायपएसेहिं पुट्ठे ? सत्तहिं,
केवइएहिं अहम्मत्थि० ? एवं चेव, एवं आगासत्थिकायपएसेहिं, केवइएहिं जीव-
त्थिकाय० ? अणंतेहिं, एवं जाव अद्दासमएहिं ॥ धम्मत्थिकाए णं भंते ! केवइएहिं
धम्मत्थिकायप्पएसेहिं पुट्ठे ? नत्थि एक्केणवि, केवइएहिं अधम्मत्थिकायप्पएसेहिं ?
असंखेज्जेहिं, केवइएहिं आगासत्थिकायप० ? असंखेज्जेहिं, केवइएहिं जीवत्थिका-
यपएसेहिं ? अणंतेहिं, केवइएहिं पोग्गलत्थिकायपएसेहिं ? अणंतेहिं, केवइएहिं अद्दा-
समएहिं ? सिय पुट्ठे सिय नो पुट्ठे, जइ पुट्ठे नियमा अणंतेहिं । अहम्मत्थिकाए णं
भंते ! केवइएहिं धम्मत्थिकाय० ? असंखेज्जेहिं, केवइएहिं अहम्मत्थि० ? नत्थि एक्के-
णवि, सेसं जहा धम्मत्थिकायस्स, एवं एएणं गमएणं सव्वेवि सट्ठाणए नत्थि एक्के-
णवि पुट्ठा, परट्ठाणए आइल्लएहिं तिहिं असंखेज्जेहिं भाणियव्वं, पच्छिल्लएस्स तिसु
अणंता भाणियव्वा जाव अद्दासमओत्ति जाव केवइएहिं अद्दासमएहिं पुट्ठे ? नत्थि

एक्केणवि ॥ जत्थ णं भंते ! एगे धम्मत्थिकायपएसे ओगाढे तत्थ केवइया धम्मत्थिकायप्पएसा ओगाढा ? नत्थि एक्कोवि, केवइया अहम्मत्थिकायप्पएसा ओगाढा ? एक्को, केवइया आगासत्थिकाय० ? एक्को, केवइया जीवत्थिकाय० ? अणंता, केवइया पोग्गलत्थिकाय० ? अणंता, केवइया अद्दासमया ? सिय ओगाढा सिय नो ओगाढा जइ ओगाढा अणंता । जत्थ णं भंते ! एगे अहम्मत्थिकायपएसे ओगाढे तत्थ केवइया धम्मत्थिकाय० ? एक्को, केवइया अहम्मत्थि० ? नत्थि एक्कोवि, सेसं जहा धम्मत्थिकायस्स । जत्थ णं भंते ! एगे आगासत्थिकायपएसे ओगाढे तत्थ केवइया धम्मत्थिकाय० ? सिय ओगाढा सिय नो ओगाढा, जइ ओगाढा एक्को, एवं अहम्मत्थिकायपएसावि, केवइया आगासत्थिकाय० ? नत्थि एक्कोवि, केवइया जीवत्थि० ? सिय ओगाढा सिय नो ओगाढा, जइ ओगाढा अणंता, एवं जाव अद्दासमया । जत्थ णं भंते ! एगे जीवत्थिकायपएसे ओगाढे तत्थ केवइया धम्मत्थिकाय० ? एक्को, एवं अहम्मत्थिकायपएसावि, एवं आगासत्थिकायपएसावि, केवइया जीवत्थिकाय० ? अणंता, सेसं जहा धम्मत्थिकायस्स । जत्थ णं भंते ! एगे पोग्गलत्थिकायपएसे ओगाढे तत्थ केवइया धम्मत्थिकाय० ? एवं जहा जीवत्थिकायपएसे तहेव निरवसेसं । जत्थ णं भंते ! दो पोग्गलत्थिकायपएसा ओगाढा तत्थ केवइया धम्मत्थिकाय० ? सिय एक्को सिय दोन्नि, एवं अहम्मत्थिकायस्सवि, एवं आगासत्थिकायस्सवि, सेसं जहा धम्मत्थिकायस्स । जत्थ णं भंते ! तिन्नि पोग्गलत्थिकायपएसा ओगाढा तत्थ केवइया धम्मत्थिकाय० ? सिय एक्को सिय दोन्नि सिय तिन्नि, एवं अहम्मत्थिकायस्सवि, एवं आगासत्थिकायस्सवि, सेसं जहेव दोण्हं, एवं एक्केक्को वन्टियव्वो पएसो आइलएहिं तिहिं अत्थिकाएहिं, सेसं जहेव दोण्हं जाव दसण्हं सिय एक्को सिय दोन्नि सिय तिन्नि जाव सिय दस, संखेज्जाणं सिय एक्को सिय दोन्नि जाव सिय दस सिय संखेज्जा, असंखेज्जाणं सिय एक्को जाव सिय संखेज्जा सिय असंखेज्जा, जहा असंखेज्जा एवं अणंतावि । जत्थ णं भंते ! एगे अद्दासमए ओगाढे तत्थ केवइया धम्मत्थिकाय० ? एक्को, केवइया अहम्मत्थिकाय० ? एक्को, केवइया आगासत्थिकाय० ? एक्को, केवइया जीवत्थि० ? अणंता, एवं जाव अद्दासमया । जत्थ णं भंते ! धम्मत्थिकाए ओगाढे तत्थ केवइया धम्मत्थिकायपएसा ओगाढा ? नत्थि एक्कोवि, केवइया अहम्मत्थिकाय० ? असंखेज्जा, केवइया आगासत्थि० ? असंखेज्जा, केवइया जीवत्थिकाय० ? अणंता, एवं जाव अद्दासमया । जत्थ णं भंते ! अहम्मत्थिकाए ओगाढे तत्थ केवइया धम्मत्थिकाय० ? असंखेज्जा, केवइया अहम्मत्थिकाय० ? नत्थि एक्कोवि, सेसं जहा धम्मत्थिकायस्स, एवं सव्वे सट्ठाणे नत्थि एक्कोवि

भाणियव्वं, परट्ठाणे आइल्लगा तिञ्जि असंखेज्जा भाणियव्वा, पच्छिळ्ळगा तिञ्जि अणंता
 भाणियव्वा जाव अद्वासमओत्ति जाव केवइया अद्वासमया ओगाढा ? नत्थि एक्कोवि
 ॥ ४८२ ॥ जत्थ णं भंते ! एगे पुढविकाइए ओगाढे तत्थ णं केवइया पुढविकाइया
 ओगाढा ? असंखेज्जा, केवइया आउकाइया ओगाढा ? असंखेज्जा, केवइया तेउका-
 इया ओगाढा ? असंखेज्जा, केवइया वाउकाइया ओगाढा ? असंखेज्जा, केवइया वण-
 स्सइकाइया ओगाढा ? अणंता, जत्थ णं भंते ! एगे आउकाइए ओगाढे तत्थ णं
 केवइया पुढवि० ? असंखेज्जा, केवइया आउ० ? असंखेज्जा, एवं जहेव पुढविका-
 इयाणं वत्तव्वया तहेव सव्वेसिं निरवसेसं भाणियव्वं जाव वणस्सइकाइयाणं जाव
 केवइया वणस्सइकाइया ओगाढा ? अणंता ॥ ४८३ ॥ एयंसि णं भंते ! धम्मत्थिकाय०
 अधम्मत्थिकाय० आगासत्थिकायंसि चक्किया केइ आसइत्तए वा सुइत्तए वा चिट्ठित्तए
 वा निसीइत्तए वा तुयट्ठित्तए वा ? नो इणट्ठे समट्ठे, अणंता पुण तत्थ जीवा ओगाढा,
 से केणट्ठेणं भंते ! एवं वुच्चइ एयंसि णं धम्मत्थि० जाव आगासत्थिकायंसि णो
 चक्किया केइ आसइत्तए वा जाव ओगाढा ? गोयमा ! से जहा नामए-कूडागारसाला
 सिया दुहुओ लित्ता गुत्ता गुत्तदुवारा जहा रायप्पसेणइजे जाव दुवारवयणाईं पिहेइ
 दु० २ ता तीसे कूडागारसालाए बहुमज्झदेसभाए जह्वेणं एक्को वा दो वा तिञ्जि
 वा उक्कोसेणं पईवस्सहस्सं पलीवेज्जा, से नूणं गोयमा ! ताओ पईवलेस्साओ अन्नम-
 न्नसंवद्धाओ अन्नमन्नपुट्ठाओ जाव अन्नमन्नघडत्ताए चिट्ठित्ति ? हंता चिट्ठित्ति, चक्किया
 णं गोयमा ! केइ तासु पईवलेस्सासु आसइत्तए वा जाव तुयट्ठित्तए वा ? भगवं ! णो
 इणट्ठे समट्ठे, अणंता पुण तत्थ जीवा ओगाढा, से तेणट्ठेणं गोयमा ! एवं वुच्चइ जाव
 ओगाढा ॥ ४८४ ॥ कहि णं भंते ! लोए बहुसमे, कहि णं भंते ! लोए सव्वविग्गहिए
 पण्णत्ते ? गोयमा ! इमीसे रयणप्पभाए पुढवीए उवरिमहेट्ठिल्लेसु खुट्ठगपयरेसु एत्थ
 णं लोए बहुसमे एत्थ णं लोए सव्वविग्गहिए पण्णत्ते ! कहि णं भंते ! विग्गहविग्ग-
 हिए लोए पण्णत्ते ? गोयमा ! विग्गहकंडए एत्थ णं विग्गहविग्गहिए लोए पण्णत्ते
 ॥ ४८५ ॥ किंसंठिए णं भंते ! लोए पण्णत्ते ? गोयमा ! सुपइट्ठियसंठिए लोए पण्णत्ते,
 हेट्ठा विच्छिन्ने मज्झे संखिते जहा सत्तमसए पढमुद्देसए जाव अंतं करेइ ॥ एयस्स णं
 भंते ! अहेलोगस्स तिरियलोगस्स उट्ठलोगस्स य कयरे २ हिंता जाव विसेसाहिया
 वा ? गोयमा ! सव्वत्थोवे तिरियलोए, उट्ठलोए असंखेज्जगुणे, अहेलोए विसेसाहिए ।
 सेवं भंते ! सेवं भंते ! ति ॥ ४८६ ॥ तेरहमे सए चउत्थो उहेसो समत्तो ॥
 नेरइया णं भंते ! किं सचित्ताहारा अचित्ताहारा मीसाहारा ? गोयमा ! नो
 सचित्ताहारा अचित्ताहारा नो मीसाहारा, एवं अखरकुमारा पढमो नेरइयउद्देसओ

निरवसेसो भाणियव्वो ॥ सेवं भंते ! सेवं भंते ! त्ति ॥ ४८७ ॥ तेरहमे सए पञ्चमो उद्देसो समत्तो ॥

रायगिहे जाव एवं वयासी-संतरं भंते ! नेरइया उववज्जंति, निरंतरं नेरइया उववज्जंति ? गोयमा ! संतरं पि नेरइया उववज्जंति, निरंतरं पि नेरइया उववज्जंति, एवं असुरकुमारावि, एवं जहा गंगेए तहेव दो दंडगा जाव संतरं पि वेमाणिया चयंति निरंतरं पि वेमाणिया चयंति ॥ ४८८ ॥ कहिञ्चं भंते ! चमरस्स असुरिंदस्स असुररत्तो चमरचंचा नामं आवासे पण्णत्ते ? गोयमा ! जंबुदीवे २ मंदरस्स पव्वयस्स दाहिणेणं तिरियमसंखेजे दीवसमुद्दे एवं जहा बिइयसए सभाए उद्देसए वत्तव्वया सच्चैव अपरिसेसा नेयव्वा, नवरं इमं नागतं जाव तिगिच्छिक्कूडस्स उप्पायपव्वयस्स चमरचंचाए रायहाणीए चमरचंचस्स आवासपव्वयस्स अच्चेसिं च बहूणं सेसं तं चेव जाव तेरस य अंगुलाई अद्धंगुलं च किंचिविसेसाहिया परिक्खेवेणं, तीसे णं चमरचंचाए रायहाणीए दाहिणपच्चच्छिमेणं छक्कोडिसए पणपञ्चं च कोडीओ पणतीसं च सयसहस्साई पञ्चासं च सहस्साई अरुणोदगसमुद्दे तिरियं वीईवइत्ता एत्थ णं चमरस्स असुरिंदस्स असुरकुमाररत्तो चमरचंचे नामं आवासे पण्णत्ते, चउरासीई जोयणसहस्साई आयामविकखंभेणं दो जोयणसयसहस्सा पञ्चट्ठिं च सहस्साई छच्चवतीसे जोयणसए किंचिविसेसाहिए परिक्खेवेणं, से णं एगेणं पागारेणं सव्वओ समंता संपरिक्खित्ते, से णं पागारे दिवहुं जोयणसयं उहुं उच्चत्तेणं, एवं चमरचंचाए रायहाणीए वत्तव्वया भाणियव्वा सभाविहुणा जाव चत्तारि पासायपंतीओ । चमरे णं भंते ! असुरिंदे असुरकुमारराया चमरचंचे आवासे वसहिं उवेइ ? नो इणट्ठे समट्ठे, से केणं खाइ णं अट्ठेणं भंते ! एवं लुच्चइ चमरचंचे आवासे २ ? गोयमा ! से जहानामए-इहं मणुस्सलोगंसि उवगारियलेणाइ वा उज्जाणियलेणाइ वा णिज्जाणियलेणाइ वा वारिधारियलेणाइ वा तत्थ णं बहवे मणुस्सा य मणुस्सीओ य आसयंति सयंति जहा रायप्पसेणइजे जाव कल्लाणफलवित्तिविसेसं पच्चणुब्भवमाणा विहरंति, अजत्थ पुण वसहिं उव्वेति, एवामेव गोयमा ! चमरस्स असुरिंदस्स असुरकुमाररत्तो चमरचंचे आवासे केवलं किडारइपत्तिं अजत्थ पुण वसहिं उवेइ, से तेणट्ठेणं जाव आवासे, सेवं भंते ! सेवं भंते ! त्ति जाव विहरइ ॥ ४८९ ॥ तए णं समणे भगवं महावीरे अन्नया कयाइ रायगिहाओ नयराओ गुणसिलाओ जाव विहरइ । तेणं कालेणं तेणं समएणं चंपा नामं नयरी होत्था वन्नओ, पुन्नभे उज्जाणे वन्नओ, तए णं समणे भगवं महावीरे अन्नया कयाइ पुव्वाणुपुविं चरमाणे जाव विहरमाणे जेणेव चंपा नयरी जेणेव पुन्नभे उज्जाणे तेणेव उवागच्छइ २ ता

जाव विहरइ, तेणं कालेणं तेणं समणं सिंधुसोवीरेसु जणवएसु वीइभए नामं नयरे
 होत्था वन्नओ, तस्स णं वीइभयस्स नयरस्स बहिया उत्तरपुरच्छिमे दिसीभाए एत्थ
 णं मियवणे नामं उज्जाणे होत्था सव्वोउय० वन्नओ; तत्थ णं वीइभए नयरे उदायणे
 नामं राया होत्था महया वन्नओ, तस्स णं उदायणस्स रत्तो प(उमा)भावई नामं देवी
 होत्था सुकुमाल० वन्नओ, तस्स णं उदायणस्स रत्तो पुत्ते पभावईए देवीए अत्ताए
 अभीइनामं कुमारे होत्था सुकुमाल जहा सिवभंदे जाव पच्चुवेक्खमाणे विहरइ, तस्स णं
 उदायणस्स रत्तो नियए भायणेज्जे केसीनामं कुमारे होत्था सुकुमाल जाव सुरुवे,
 से णं उदायणे राया सिंधुसोवीरप्पामोक्खाणं सोलसण्हं जणवयाणं, वीइभयप्पामो-
 क्खाणं तिण्हं तेसट्ठीणं नगरागरसयाणं, महसेणप्पामोक्खाणं दसण्हं राईणं बद्धम-
 उडाणं विइज्जत्तचामरवालवीयणाणं अन्नेसि च बहूणं राईसरतलवर जाव सत्थवा-
 हप्पभिईणं आहेवच्चं पोरेवच्चं जाव कारेमाणे पालेमाणे समणोवासए अभिगयजीवा-
 जीवे जाव विहरइ । तए णं से उदायणे राया अन्नया कयाइ जेणेव पोसहसाला तेणेव
 उवागच्छइ २ ता जहा संखे जाव विहरइ । तए णं तस्स उदायणस्स रत्तो पुव्वरतावर-
 त्तकालसमयंसि धम्मजागरियं जागरमाणस्स अयमेयाहवे अज्झत्थिए जाव समुप्प-
 जित्था-धच्चा णं ते गामागरनगरखेडकब्बडमडंबदोणमुहपट्टणासमसंबाहसच्चिवेसा
 जत्थ णं समणे भगवं महावीरे विहरइ, धच्चा णं ते राईसरतलवर जाव सत्थवाहप्प-
 भिइओ जे णं समणं भगवं महावीरं वंदंति नमंसंति जाव पज्जुवासंति, जइ णं
 समणे भगवं महावीरे पुव्वानुपुव्वि चरमाणे गामाणुगामं जाव विहरमाणे इहमाग-
 च्छेज्जा इह समोसरेज्जा, इहेव वीइभयस्स नयरस्स बहिया मियवणे उज्जाणे अहा-
 पडिह्वं उग्गहं उग्गिण्हित्ता संजमेणं तवसा जाव विहरेज्जा, तो णं अहं समणं भगवं
 महावीरं वंदेज्जा नमसेज्जा जाव पज्जुवासेज्जा, तए णं समणे भगवं महावीरे उदाय-
 णस्स रत्तो अयमेयाह्वं अज्झत्थियं जाव समुप्पन्नं विजाणित्ता चंपाओ नयरीओ
 पुन्नभदाओ उज्जाणाओ पडिनिक्खमइ २ ता पुव्वानुपुव्वि चरमाणे गामाणुगामं जाव
 विहरमाणे जेणेव सिंधुसोवीरे जणवए जेणेव वीइभए नयरे जेणेव मियवणे उज्जाणे
 तेणेव उवागच्छइ २ ता जाव विहरइ । तए णं वीइभए नयरे सिंघाडग जाव परिसा
 पज्जुवासइ । तए णं से उदायणे राया इमीसे कहाए लद्धे समाने हट्ठुट्ठ० कोडं-
 बियपुरिसे सद्दावेइ २ ता एवं वयासी-खिप्पामेव भो देवानुप्पिया । वीइभयं नयरं
 सच्चिभतरबाहिरियं जहा कूणिओ उववाइए जाव पज्जुवासइ, पभावईपामोक्खाओ
 देवीओ तहेव जाव वज्जुवासंति, धम्मकहा । तए णं से उदायणे राया समणस्स
 भगवओ महावीरस्स अंतियं धम्मं सोच्चा निसम्म हट्ठुट्ठे उट्ठाए उट्ठे २ ता समणं

भगवं महावीरं तिव्वुत्तो जाव नमंसित्ता एवं वयासी-एवमेयं भंते ! तहमेयं भंते ! जाव से जहेयं तुब्भे वदहत्तिकट्ठु जं नवरं देवाणुप्पिया ! अभीइकुमारं रज्जे ठावेमि, तए णं अहं देवाणुप्पियाणं अंतिए मुंडे भविता जाव पव्वयामि, अहासुहं देवाणुप्पिया ! मा पडिबंघं । तए णं से उदायणे राया समणेणं भगवया महावीरेणं एवं सुत्ते समाणे हट्ठएट्ठे समणं भगवं महावीरं वंदइ नमंसइ वं० २ ता तमेव आभिसेक्कं हत्थि दुरुहइ २ ता समणस्स भगवओ महावीरस्स अंतियाओ मियवणाओ उज्जाणाओ पडिनिक्खमइ २ ता जेणेव वीइभए नयरे तेणेव पहारेत्थ गमणाए । तए णं तस्स उदायणस्स रत्थो अयमेयारुवे अज्झत्थिए जाव समुप्पजित्था-एवं खलु अभीइकुमारे ममं एगे पुत्ते इट्ठे कंते जाव किमंग पुण पासण्याए, तं जइ णं अहं अभीइकुमारं रज्जे ठावेत्ता समणस्स भगवओ महावीरस्स अंतियं मुंडे भविता जाव पव्वयामि तो णं अभीइकुमारे रज्जे य रट्ठे य जाव जणवए य माणुस्सएसु य कामभोगेसु मुच्छिए गिद्धे गटिए अज्झोववत्ते अणाइयं अणवदग्गं दीहमद्धं चाउरंतसंसारकंतारं अणुपरियट्ठिस्सइ, तं नो खलु मे सेयं अभीइकुमारं रज्जे ठावेत्ता समणस्स भगवओ महावीरस्स जाव पव्वइत्तए, सेयं खलु मे णियगं भाइणेज्जं केसिकुमारं रज्जे ठावेत्ता समणस्स भगवओ महावीरस्स जाव पव्वइत्तए, एवं संपेहेइ २ ता जेणेव वीइभए नयरे तेणेव उवागच्छइ २ ता वीइभयं नयरं मज्झमज्जेणं जेणेव सए गेहे जेणेव बाहिरिया उवट्ठाणसाला तेणेव उवागच्छइ २ ता आभिसेक्कं हत्थि ठवेइ आभि० २ ता आभिसेक्काओ हत्थीओ पच्चोरुहइ २ ता जेणेव सीहासणे तेणेव उवागच्छइ २ ता सीहासणवरंसि पुरत्थाभिमुहे निसीयइ २ ता कोडुंबियपुरिसे सद्दावेइ २ ता एवं वयासी-खिप्पामेव भो देवाणुप्पिया ! वीइभयं नयरं सत्तिमतरबाहिरियं जाव पच्चपिणंति, तए णं से उदायणे राया दोच्चंपि कोडुंबियपुरिसे सद्दावेइ २ ता एवं वयासी-खिप्पामेव भो देवाणुप्पिया ! केसिस्स कुमारस्स महत्थं ३ एवं रायाभिसेओ जहा सिवभइस्स कुमारस्स तहेव भाणियव्वो जाव परमाउं पालयाहि इट्ठजणसंपरिवुडे सिंधुसोवीरपामोक्खाणं सोलसण्हं जणवयाणं, वीइभयपामोक्खाणं तिण्णि तेसट्ठीणं, नगरागरसयाणं, महसेणपामोक्खाणं दसण्हं राइणं अच्चेसिं च बहूणं राईसर जाव कारेमाणे पालेमाणे विहराहित्तिकट्ठु जयजयसइ पउंजंति । तए णं से केसीकुमारे राया जाए महया जाव विहरइ । तए णं से उदायणे राया केसिं रायाणं आपुच्छइ, तए णं से केसीराया कोडुंबियपुरिसे सद्दावेइ एवं जहा जमाळिस्स तहेव सत्तिमतरबाहिरियं तहेव जाव निक्खमणाभिसेयं उवट्ठवेइ, तए णं से केसीराया अणेगगणयायग जाव संपरिवुडे उदायणं रायं सीहासणवरंसि पुरत्थाभिमुहे निसी-

यावेइ २ ता अट्टसएणं सोवन्नियाणं एवं जहा जमालिस्स जाव एवं वयासी-भण
सामी ! किं देमो किं पयच्छामो किणा वा ते अट्टो ? तए णं से उदायणे राया केसि
रायं एवं वयासी-इच्छामि णं देवाणुप्पिया ! कुत्तियावणाओ एवं जहा जमालिस्स णवरं
पडमावई अगगकेसे पडिच्छइ पियविप्पओगदस्स (णा)हा, तए णं से केसी राया दोब्बपि
उत्तरावक्कमणं सीहासणं रयावेइ दो० २ ता उदायणं रायं सेयापीयएहिं कलसेहिं सेसं
जहा जमालिस्स जाव सन्निसन्ने, तहेव अम्मधाई नवरं पडमावई हंसलक्खणं
पडसाडगं गहाय सेसं तं चेव जाव सीयाओ पच्चोसहइ २ ता जेणेव समणे भगवं
महावीरे तेणेव उवागच्छइ २ ता समणं भगवं महावीरं तिवग्खुत्तो जाव वंदइ नमंसइ
वंदिता नमंसिता उत्तरपुरच्छिमं दिसीभाणं अवक्कमइ २ ता सयमेव आभरणमल्लालंकारं
तं चेव जाव पडमावई पडिच्छइ जाव षडियव्वं सामी ! जाव नो पमाएयव्वंतिक्कहु
केसी राया पडमावई य समणं भगवं महावीरं वंदंति नमंसंति वं० २ ता जाव पडि-
गया । तए णं से उदायणे राया सयमेव पंचमुट्ठियं लोयं सेसं जहा उसभदत्तस्स जाव
सव्वदुक्खप्पहीणे ॥ ४९० ॥ तए णं तस्स अभीइकुमारस्स अन्नया कयाइ पुव्व-
रत्तावरत्तकालसमयंसि कुडुंबजागरियं जागरमाणस्स अयमेयारुवे अज्झत्थिए जाव
समुप्पजित्था-एवं खलु अहं उदायणस्स पुत्ते पभावईए देवीए अत्तए, तए णं से
उदायणे राया ममं अवहाय नियगं भायणिज्जं केसिकुमारं रजे ठावेत्ता समणस्स
भगवओ महावीरस्स जाव पव्वइए, इमेणं एयारुवेणं महया अप्पत्तिएणं मणोमाण-
सिएणं दुक्खेणं अभिभूए समाणे अंतेउरपरियालसंपरिवुडे सभंडमत्तोवगरणमायाए
वीइभयाओ नयराओ निग्गच्छइ २ ता पुव्वाणुपुर्वि चरमाणे गामाणुगामं दृड्ढमाणे
जेणेव चंपा नयरी जेणेव कूणिए राया तेणेव उवागच्छइ २ ता कूणिं रायं उवसंप-
जित्ताणं विहरइ, तत्थवि णं से विउलभोगसमिइसमन्नागए यावि होत्था, तए णं से
अभीइकुमारे समणोवासए यावि होत्था, अभिगय जाव विहरइ, उदायणंसि रायरि-
सिमि समणुबद्धवेरे यावि होत्था, तेणं कालेणं तेणं समएणं इमीसे रयणप्पभाए पुढवीए
निरयपरिसामंतेसु चो(य)सट्ठिं असुरकुमारावाससयसहस्सा पन्नता, तए णं से अभीइ-
कुमारे बहूइं वासाइं समणोवासगपरियाणं पाउणइ २ ता अट्टमासियाए संलेहणाए तीसं
भत्ताइं अणसणाए छेदेइ २ ता तस्स ठाणस्स अणालोइयपडिक्कंते कालमासे कालं किच्चा
इमीसे रयणप्पभाए पुढवीए तीसाए निरयपरिसामंतेसु चोयट्ठीए आयावा जाव सह-
स्सेसु अन्नयरंसि आयावा असुरकुमारा(आया)वासंसि असुरकुमारदेवताए उवक्खणे,
तत्थ णं अत्थेगइयाणं आयावगाणं असुरकुमाराणं देवाणं एणं पलिओवमं ठिई प०,
तस्स णं अभीइस्सवि देवस्स एणं पलिओवमं ठिई पण्णत्ता । से णं भंते ! अभीइदेवे

ताओ देवलोगाओ आउक्खएणं ३ अणंतरं उव्वट्ठितां कहिं गच्छिहिइ कहिं उवव-
ज्जिहिइ? गोयमा! महाविदेहे वासे सिज्झिहिइ जाव अंतं काहिइ, सेवं भंते! सेवं
भंते! ति ॥ ४९१ ॥ तेरहमे सए छट्ठो उहेसो समत्तो ॥

रायगिहे जाव एवं वयासी-आया भंते! भासा अन्ना भासा? गोयमा! नो
आया भासा अन्ना भासा, रु(विं)वी भंते! भासा अरूवी भासा? गोयमा! रूवी
भासा नो अरूवी भासा, सचित्ता भंते! भासा अचित्ता भासा? गोयमा!
नो सचित्ता भासा अचित्ता भासा, जीवा भंते! भासा अजीवा भासा?
गोयमा! नो जीवा भासा अजीवा भासा । जीवाणं भंते! भासा अजी-
वाणं भासा? गोयमा! जीवाणं भासा नो अजीवाणं भासा, पुर्व्वि भंते!
भासा भासिज्जमाणी भासा भासासमयवीइक्कंता भासा? गोयमा! नो पुर्व्वि
भासा भासिज्जमाणी भासा णो भासासमयवीइक्कंता भासा, पुर्व्वि भंते! भासा
भिज्जइ, भासिज्जमाणी भासा भिज्जइ, भासासमयवीइक्कंता भासा भिज्जइ? गोयमा!
नो पुर्व्वि भासा भिज्जइ, भासिज्जमाणी भासा भिज्जइ, नो भासासमयवीइक्कंता भासा
भिज्जइ । कइविहे णं भंते! भासा पण्णत्ता? गोयमा! चउव्विहा भासा पण्णत्ता,
तंजहा-सच्चा, मोसा, सच्चा मोसा, असच्चा मोसा ॥ ४९२ ॥ आया भंते! मणे अन्ने
मणे? गोयमा! नो आया मणे अन्ने मणे, जहा भासा तहा मणेवि जाव नो अजी-
वाणं मणे, पुर्व्वि भंते! मणे मणिज्जमाणे मणे०? एवं जहेव भासा, पुर्व्वि भंते!
मणे भिज्जइ, मणिज्जमाणे मणे भिज्जइ, मणसमयवीइक्कंते मणे भिज्जइ? एवं जहेव
भासा । कइविहे णं भंते! मणे पण्णत्ते? गोयमा! चउव्विहे मणे पन्नत्ते, तंजहा-
सच्चे जाव असच्चा मोसे ॥ ४९३ ॥ आया भंते! काए अन्ने काए? गोयमा! आयावि
काए अन्नेवि काए, रूवी भंते! काए अरूवी काए? गोयमा! रूवीवि काए
अरूवीवि काए, एवं एक्केक्के पुच्छा, गोयमा! सचित्तेवि काए अचित्तेवि काए, जीवेवि
काए अजीवेवि काए, जीवाणवि काए अजीवाणवि काए, पुर्व्वि भंते! काए पुच्छा,
गोयमा! पुर्व्विपि काए काइज्जमाणेवि काए कायसमयवीइक्कंतेवि काए, पुर्व्वि भंते!
काए भिज्जइ पुच्छा, गोयमा! पुर्व्विपि काए भिज्जइ काइज्जमाणेवि काए भिज्जइ, काय-
समयवीइक्कंतेविकाए भिज्जइ ॥ कइविहे णं भंते! काए पन्नत्ते? गोयमा! सत्तविहे काए
पन्नत्ते, तंजहा-ओरालिओ ओरालियमीसए वेउव्विए वेउव्वियमीसए आहारए आहार-
गमीसए कम्मए ॥ ४९४ ॥ कइविहे णं भंते! मरणे पन्नत्ते? गोयमा! पंचविहे मरणे
पण्णत्ते, तंजहा-आवीचियमरणे ओहिमरणे आईतियमरणे बालमरणे पंडियमरणे ।
आवीचियमरणे णं भंते! कइविहे पण्णत्ते? गोयमा! पंचविहे पण्णत्ते, तंजहा-दव्वा-

वीचियमरणे खेत्तावीचियमरणे कालावीचियमरणे भवावीचियमरणे भावावीचियमरणे, दव्वावीचियमरणे णं भंते ! कइविहे पण्णत्ते ? गोयमा ! चउव्विहे पण्णत्ते, तंजहा-नेरइयदव्वावीचियमरणे, तिरिक्खजोणियदव्वावीचियमरणे, मणुस्सदव्वावीचियमरणे, देवदव्वावीचियमरणे, से केणट्ठेणं भंते ! एवं वुच्चइ नेरइयदव्वावीचियमरणे नेरइयदव्वावीचियमरणे ? गोयमा ! जण्णं नेरइया नेरइयदव्वे वट्ठमाणा जाई दव्वाइं नेरइयाउयत्ताए गहियाइं बद्धाईं पुट्ठाईं कडाईं पट्ठवियाइं निविट्ठाईं अभिनिविट्ठाईं अभिसमन्नागयाइं भवंति ताईं दव्वाइं आवी(चियं)ची अणुसमयं निरंतरं मरंति तिककट्टु से तेणट्ठेणं गोयमा ! एवं वुच्चइ नेरइयदव्वावीचियमरणे, एवं जाव देवदव्वावीचियमरणे । खेत्तावीचियमरणे णं भंते ! कइविहे पण्णत्ते ? गोयमा ! चउव्विहे पण्णत्ते, तंजहा-नेरइयखेत्तावीचियमरणे जाव देवखेत्तावीचियमरणे, से केणट्ठेणं भंते ! एवं वुच्चइ नेरइयखेत्तावीचियमरणे २ ? गोयमा ! जण्णं नेरइया नेरइयखेत्ते वट्ठमाणा जाईं दव्वाइं नेरइयाउयत्ताए एवं जहेव दव्वावीचियमरणे तहेव खेत्तावीचियमरणेवि, एवं जाव भावावीचियमरणे । ओहिमरणे णं भंते ! कइविहे पण्णत्ते ? गोयमा ! पंचविहे पण्णत्ते, तंजहा-दव्वोहिमरणे खेतोहिमरणे जाव भावोहिमरणे । दव्वोहिमरणे णं भंते ! कइविहे पण्णत्ते ? गोयमा ! चउव्विहे पण्णत्ते, तंजहा-नेरइयदव्वोहिमरणे जाव देवदव्वोहिमरणे, से केणट्ठेणं भंते ! एवं वुच्चइ नेरइयदव्वोहिमरणे २ ? गोयमा ! जण्णं नेरइया नेरइयदव्वे वट्ठमाणा जाईं दव्वाइं संपयं मरंति जण्णं नेरइया ताईं दव्वाइं अणागए काले पुणोवि मरिस्संति, से तेणट्ठेणं गोयमा ! जाव दव्वोहिमरणे, एवं तिरिक्खजोणिय० मणुस्स० देवदव्वोहिमरणेवि, एवं एएणं गमेणं खेतोहिमरणेवि कालोहिमरणेवि भवोहिमरणेवि भावोहिमरणेवि । आइंतियमरणे णं भंते ! पुच्छा, गोयमा ! पंचविहे पण्णत्ते, तं०-दव्वाइंतियमरणे खेत्ताइंतियमरणे जाव भावाइंतियमरणे, दव्वाइंतियमरणे णं भंते ! कइविहे प० ? गोयमा ! चउव्विहे प० तं०-नेरइयदव्वाइंतियमरणे जाव देवदव्वाइंतियमरणे, से केणट्ठेणं भंते ! एवं वुच्चइ नेरइयदव्वाइंतियमरणे २ ? गोयमा ! जण्णं नेरइया नेरइयदव्वे वट्ठमाणा जाईं दव्वाइं संपयं मरंति जे णं नेरइया ताईं दव्वाइं अणागए काले नो पुणोवि मरिस्संति, से तेणट्ठेणं जाव मरणे, एवं तिरिक्ख० मणुस्स० देवाइंतियमरणे, एवं खेत्ताइंतियमरणेवि, एवं जाव भावाइंतियमरणेवि । बालमरणे णं भंते ! कइविहे प० ? गोयमा ! दुवालसविहे प० तं०-बलयमरणे जहा खंदए जाव गिद्धपिट्ठे ॥ पंडियमरणे णं भंते ! कइविहे पण्णत्ते ? गोयमा ! दुविहे पण्णत्ते, तंजहा-पाओवगमणे य भत्तपच्चक्खणे य । पाओवगमणे णं भंते ! कइविहे प० ? गोयमा ! दुविहे

प०, तं०-णीहारिमे य अनीहारिमे य जाव नियमं अपडि(कमे)कम्मे । भत्तपच्चक्खाणे णं भंते ! कइविहे प० ? एवं तं चेव नवरं नियमं सपडिकम्मे । सेवं भंते ! २ ति ॥ ४९५ ॥ तेरहमे सए सत्तमो उद्देसो समत्तो ॥

कइ णं भंते ! कम्मपगडीओ पण्णत्ताओ ? गोयमा ! अट्ठ कम्मपगडीओ पण्णत्ताओ, एवं बंधट्ठिउद्देसो भाणियव्वो निरवसेसो जहा पन्नवणाए । सेवं भंते ! सेवं भंते ! ति ॥ ४९६ ॥ तेरहमे सए अट्ठमो उद्देसो समत्तो ॥

रायणिहे जाव एवं वयासी-से जहानामए-केइ पुरिसे केयाघडियं गहाय गच्छेज्जा, एवामेव अणगारेवि भावियप्पा केयाघडियाकिच्चहत्थगएणं अप्पाणेणं उट्ठं वेहासं उप्पएज्जा ? हंता गोयमा ! जाव समुप्पएज्जा, अणगारे णं भंते ! भावियप्पा केवइ-याईं पभू केयाघडियाकिच्चहत्थगयाईं रूवाईं विउव्वित्तए ? गोयमा ! से जहानामए-जुवईं जुवाणे हत्थेणं हत्थे एवं जहा तइयसए पंचमुद्देसए जाव नो चेव णं संपत्तीए विउव्विसु वा विउव्विति वा विउव्विस्संति वा, से जहानामए-केइ पुरिसे हिरन्न-पे(डिं)लं गहाय गच्छेज्जा, एवामेव अणगारेवि भावियप्पा हिरण्णपेलहत्थकिच्चगएणं अप्पाणेणं सेसं तं चेव, एवं सुवन्नपेलं, एवं रयणपेलं वइ(य)रपेलं वत्थपेलं आभरणपेलं, एवं वियलकि(डं)डुं सुंबकिडुं चम्मकिडुं कंबलकिडुं, एवं अयभारं तंबभारं तउयभारं सीसगभारं हिरन्नभारं सुवन्नभारं वइरभारं, से जहानामए-वग्गुली सिया दोवि पाए उल्लंबिय २ उट्ठंपाया अहोसिरा चिट्ठेज्जा, एवामेव अणगारेवि भावियप्पा वग्गुलीकि-च्चगएणं अप्पाणेणं उट्ठं वेहासं एवं जन्नोवइयवत्तव्वया भाणियव्वो जाव विउव्विस्संति वा, से जहानामए-जलोया सिया उदगंसि कायं उव्विहिय २ गच्छेज्जा, एवामेव सेसं जहा वग्गुलीए, से जहाणामए-बीयंबीयगसउणे सिया दोवि पाए समतुरंगेमाणे २ गच्छेज्जा, एवामेव अणगारे सेसं तं चेव, से जहाणामए-पक्खिविरालए सिया रुक्खाओ रुक्खं डेवैमाणे गच्छेज्जा, एवामेव अणगारे सेसं तं चेव, से जहाणामए-जीवंजीवगसउणे सिया दोवि पाए समतुरंगेमाणे २ गच्छेज्जा, एवामेव अणगारे सेसं तं चेव, से जहाणामए-हंसं सिया तीराओ तीरं अभिरममाणे २ गच्छेज्जा, एवामेव अणगारे हंसकिच्चगएणं अप्पाणेणं सेसं तं चेव, से जहाणामए-समुद्-वायसए सिया वीईओ वीईं डेवैमाणे गच्छेज्जा; एवामेव तहेव, से जहाणामए-केइ पुरिसे चक्कं गहाय गच्छेज्जा, एवामेव अणगारेवि भावियप्पा चक्ककिच्चहत्थगएणं अप्पाणेणं सेसं जहा केयाघडियाए, एवं छत्तं, एवं चामरं, से जहाणामए-केइ पुरिसे रयणं गहाय गच्छेज्जा, एवं चेव, एवं वइरं वेरुलियं जाव रिट्ठं, एवं उप्पलहत्थगं पउमहत्थगं कुमुदहत्थगं, एवं जाव से जहाणामए-केइ पुरिसे सहस्सपत्तगं

गहाय गच्छेज्जा, एवं चेव, से जहानामए-कैइ पुरिसे भिसं अवहालिय २ गच्छेज्जा, एवामेव अणगारेवि भिसकिच्चगएणं अप्पाणेणं तं चेव, से जहानामए-मुणालिया सिया उदगंसि कायं उम्मज्जिय २ चिट्ठिज्जा, एवामेव सेसं जहा वग्गुलीए, से जहानामए-वण(खं)संडे सिया किण्हे किण्होभासे जाव निक्खवंभूए पासादीए ४, एवामेव अणगारेवि भावियप्पा वगसंडकिच्चगएणं अप्पाणेणं उद्धं वेहासं उप्पएज्जा, सेसं तं चेव, से जहानामए-पुक्खरिणी सिया चउक्कोणा समतीरा अणुपुव्वसुजाय जावसहु-न्नइयमहुरसरणाया पासाईया ४, एवामेव अणगारेवि भावियप्पा पोक्खरिणीकिच्चगएणं अप्पाणेणं उद्धं वेहासं उप्पएज्जा ? हंता उप्पएज्जा, अणगारे णं भंते ! भावियप्पा केवइयाई पभू पोक्खरिणीकिच्चगयाई रुवाइं विउव्वित्तए, सेसं तं चेव जाव विउव्विस्संति वा । से भंते ! किं माई विउव्वइ अमाई विउव्वइ ? गोयमा ! माई विउव्वइ नो अमाई विउव्वइ, माई णं तस्स ठाणस्स अणालोइय० एवं जहा तइयसए चउत्थुइसए जाव अत्थि तस्स आराहणा । सेवं भंते ! सेवं भंते ! त्ति जाव विहरइ ॥ ४९७ ॥ **तेरहमे सए नवमो उद्देसो समत्तो ॥**

कइ णं भंते ! छाउमत्थियसमुग्घाया पन्नत्ता ? गोयमा ! छ छाउमत्थिया समुग्घाया पन्नत्ता, तंजहा-वेयणासमुग्घाए एवं छाउमत्थियसमुग्घाया नेयव्वा जहा पन्नवणाए जाव आहारगसमुग्घाएत्ति । सेवं भंते ! सेवं भंते ! त्ति जाव विहरइ ॥ ४९८ ॥ **तेरहमे सए दसमो उद्देसो समत्तो, तेरसमं सयं समत्तं ॥**

चर १ उम्माय २ सरीरे ३ पोग्गल ४ अगणी ५ तथा किमाहारे ६ । संसिद्ध ७ मंतरे खलु ८ अणगारे ९ केवली चेव १० ॥ १ ॥ रायगिहे जाव एवं वयासी-अणगारे णं भंते ! भावियप्पा चरमं देवावासं वीइक्कंते परमं देवावासमसंपत्ते एत्थ णं अंतरा कालं करेज्जा, तस्स णं भंते ! कहिं गई कहिं उववाए पन्नते ? गोयमा ! जे से तत्थ परि(य)स्सओ तल्लेसा देवावासा तहिं तस्स गई तहिं तस्स उववाए पन्नते, से य तत्थगए विराहेज्जा कम्मलेस्सामेव पडि(म)वडइ, से य तत्थ गए नो विराहेज्जा तामेव लेस्सं उवसंपज्जित्ताणं विहरइ ॥ अणगारे णं भंते ! भावियप्पा चरमं असुरकुमारा-वासं वीइक्कंते परमं असुरकुमारा० एवं चेव, एवं जाव थणियकुमारावासं जोइसिया-वासं, एवं वेमाणियावासं जाव विहरइ ॥ ४९९ ॥ नेरइयाणं भंते ! कइ सीहा गई कइ सीहे गइविसए पण्णते ? गोयमा ! से जहानामए-कैइ पुरिसे तरुणे बलवं जुगवं जाव निउणसिप्पोवगए आउंटियं बाहं पसारेज्जा पसारियं वा बाहं आउंटेज्जा, विक्खिण्णं वा मुट्ठिं साहरेज्जा साहरियं वा मुट्ठिं विक्खिरेज्जा, उम्मिसियं वा अट्ठिं निम्मिसिज्जा निम्मिसियं वा अट्ठिं उम्मिसेज्जा, भवे एयारुवे ? यो इण्ठे

समष्टे, नेरइया णं एगसमएण वा दुसमएण वा तिसमएण वा विग्गहेणं उववज्जंति,
 नेरइयाणं गोयमा ! तहा सीहा गई तहा सीहे गइविसए पण्णत्ते, एवं जाव वेमाणि-
 याणं, नवरं एगिंदियाणं चउसमइए विग्गहे भाणियव्वे, सेसं तं चेव ॥ ५०० ॥
 नेरइया णं भंते ! किं अणंतरोववन्नगा परंपरोववन्नगा अणंतरपरंपरअणुववन्नगा ?
 गोयमा ! नेरइया णं अणंतरोववन्नगावि परंपरोववन्नगावि अणंतरपरंपरअणुववन्नगावि,
 से केणट्ठेणं भंते ! एवं बुच्चइ जाव अणंतरपरंपरअणुववन्नगावि ? गोयमा ! जे णं
 नेरइया पुढमसमयोववन्नगा ते णं नेरइया अणंतरोववन्नगा, जे णं नेरइया अपढम-
 समयोववन्नगा ते णं नेरइया परंपरोववन्नगा, जे णं नेरइया विग्गहगइसमावन्नगा ते
 णं नेरइया अणंतरपरंपरअणुववन्नगा, से तेणट्ठेणं जाव अणुववन्नगावि, एवं निरंतरं
 जाव वेमाणिया १ । अणंतरोववन्नगा णं भंते ! नेरइया किं नेरइयाउयं पकरेंति,
 तिरिक्ख० मणुस्स० देवाउयं पकरेंति ? गोयमा ! नो नेरइयाउयं पकरेंति जाव नो
 देवाउयं पकरेंति । परंपरोववन्नगा णं भंते ! नेरइया किं नेरइयाउयं पकरेंति जाव
 देवाउयं पकरेंति ? गोयमा ! नो नेरइयाउयं पकरेंति, तिरिक्खजोणियाउयं पकरेंति,
 मणुस्साउयं पकरेंति, नो देवाउयं पकरेंति । अणंतरपरंपरअणुववन्नगा णं भंते !
 नेरइया किं नेरइयाउयं पकरेंति पुच्छा, गोयमा ! नो नेरइयाउयं पकरेंति जाव नो
 देवाउयं पकरेन्ति, एवं जाव वेमाणियाणं, नवरं पंचिंदियतिरिक्खजोणिया मणुस्सा य
 परंपरोववन्नगा चत्तारिवि आउयाइं पकरें(बंधं)ति, सेसं तं चेव २ ॥ नेरइया णं भंते ! किं
 अणंतरनिग्गया परंपरनिग्गया अणंतरपरंपरअणिग्गया ? गोयमा ! नेरइया णं अणंतर-
 निग्गयावि जाव अणंतरपरंपरअणिग्गयावि, से केणट्ठेणं भंते ! जाव अणिग्गयावि ?
 गोयमा ! जे णं नेरइया पढमसमयणिग्गया ते णं नेरइया अणंतरणिग्गया, जे णं नेरइया
 अपढमसमयणिग्गया ते णं नेरइया परंपरणिग्गया, जे णं नेरइया विग्गहगइसमा-
 वन्नगा ते णं नेरइया अणंतरपरंपरअणिग्गया, से तेणट्ठेणं गोयमा ! जाव अणिग्ग-
 यावि, एवं जाव वेमाणिया ३ ॥ अणंतरणिग्गया णं भंते ! नेरइया किं नेरइया-
 उयं पकरेंति जाव देवाउयं पकरेंति ? गोयमा ! नो नेरइयाउयं पकरेंति जाव नो
 देवाउयं पकरेंति । परंपरणिग्गया णं भंते ! नेरइया किं नेरइयाउयं० पुच्छा,
 गोयमा ! नेरइयाउयं पकरेंति जाव देवाउयं पकरेंति । अणंतरपरंपरअणिग्गया
 णं भंते ! नेरइया पुच्छा, गोयमा ! नो नेरइयाउयं पकरेंति जाव नो देवाउयं
 पकरेंति, एवं निरवसेसं जाव वेमाणिया ४ ॥ नेरइया णं भंते ! किं अणंतर-
 खेदोववन्नगा परंपरखेदोववन्नगा अणंतरपरंपरखेदाणुववन्नगा ? गोयमा ! नेरइया०
 एवं एएणं अभिलावेणं तं चेव चत्तारि दंडगा भाणियव्वा । सेवं भंते ! सेवं
 भंते ! ति जाव विहरइ ॥ ५०१ ॥ चोइसमसयस्स पढमो उहेसो समत्तो ॥

कइविहे णं भंते ! उम्माए पण्णत्ते ? गोयमा ! दुविहे उम्माए पण्णत्ते, तंजहा-
जक्खावेसे य मोहणिजस्स य कम्मस्स उदएणं, तत्थ णं जे से जक्खावेसे से णं
सुहवेयणतराए चेव सुहविमोयणतराए चेव, तत्थ णं जे से मोहणिजस्स कम्मस्स
उदएणं से णं दुहवेयणतराए चेव दुहविमोयणतराए चेव ॥ नेरइयाणं भंते !
कइविहे उम्माए पण्णत्ते ? गोयमा ! दुविहे उम्माए पण्णत्ते, तंजहा-जक्खावेसे य
मोहणिजस्स य कम्मस्स उदएणं, से केणट्ठेणं भंते ! एवं वुचइ नेरइयाणं दुविहे
उम्माए पण्णत्ते, तंजहा-जक्खावेसे य मोहणिजस्स कम्मस्स उदएणं ? गोयमा !
देवे वा से असुभे पोग्गले पक्खिवेज्जा, से णं तेसिं असुभाणं पोग्गलाणं पक्खिवण-
याए जक्खावेसं उम्मायं पाउणेज्जा, मोहणिजस्स वा कम्मस्स उदएणं मोहणिजं
उम्मायं पाउणेज्जा, से तेणट्ठेणं जाव उदएणं । असुरकुमाराणं भंते ! कइविहे
उम्माए पण्णत्ते ? एवं जहेव नेरइयाणं नवरं देवे वा से महिद्धियतराए चेव असुभे
पोग्गले पक्खिवेज्जा, से णं तेसिं असुभाणं पोग्गलाणं पक्खिवणयाए जक्खा(ए)वेसं
उम्मायं पाउणेज्जा, मोहणिजस्स वा सेसं तं चेव, से तेणट्ठेणं जाव उदएणं,
एवं जाव थणियकुमाराणं, पुढविकाइयाणं जाव मणुस्साणं एएसिं जहा नेरइयाणं,
वाणमंतरजोइसियवेमाणिग्याणं जहा असुरकुमाराणं ॥ ५०२ ॥ अत्थि णं भंते !
पज्जे कालवासी वुट्ठिकायं पकरेइ ? हंता अत्थि ॥ जाहे णं भंते ! सक्के देविंदे
देवराया वुट्ठिकायं काउंकाभे भवइ से कहमियाणि पकरेइ ? गोयमा ! ताहे चेव णं
से सक्के देविंदे देवराया अब्भितरपरि(सा)सए देवे सद्दवेइ, तए णं ते अब्भितरपरि-
सगा देवा सद्दविद्या समाणा मज्झिमपरिसए देवे सद्दवेति, तए णं ते मज्झिमप-
रिसगा देवा सद्दविद्या समाणा बाहिरंपरिसए देवे सद्दवेति, तए णं ते बाहिरपरि-
सगा देवा सद्दविद्या समाणा बाहिरंबाहिरगा देवा सद्दवेति, तए णं ते बाहिरबाहि-
रगा देवा सद्दविद्या समाणा आभिओणिए देवे सद्दवेति, तए णं ते जाव सद्दविद्या
समाणा वुट्ठिकाइए देवे सद्दवेति, तए णं ते वुट्ठिकाइया देवा सद्दविद्या समाणा
वुट्ठिकायं पकरेति, एवं खलु गोयमा ! सक्के देविंदे देवराया वुट्ठिकायं पकरेइ ॥
अत्थि णं भंते ! असुरकुमारावि देवा वुट्ठिकायं पकरेति ? हंता अत्थि, किं पत्तियन्नं
भंते ! असुरकुमारा देवा वुट्ठिकायं पकरेति ? गोयमा ! जे इमे अरहंता भगवंता
एएसिं णं जम्मणमहिमासु वा, निक्खमणमहिमासु वा, णाणुप्पायमहिमासु वा,
परिनिब्बाणमहिमासु वा, एवं खलु गोयमा ! असुरकुमारावि देवा वुट्ठिकायं पकरेति,
एवं नागकुमारावि, एवं जाव थणियकुमारा, वाणमंतरजोइसियवेमाणिग्या एवं चेव
॥ ५०३ ॥ जाहे णं भंते ! ईसाणे देविंदे देवराया तमुकायं काउंकाभे भवइ से

कहमियाणिं पकरेइ ? गोयमा ! ताहे चेव णं से ईसाणे देविंदे देवराया अब्भित-
रपरिसए देवे सहावेइ, तए णं ते अब्भितरपरिसगा देवा सहाविया समाणा एवं
जहेव सकस्स जाव तए णं ते आभिओगिया देवा सहाविया समाणा तमुक्काइए
देवे सहावेति, तए णं ते तमुक्काइया देवा सहाविया समाणा तमुक्कायं पकरेंति,
एवं खलु गोयमा ! ईसाणे देविंदे देवराया तमुक्कायं पकरेइ ॥ अत्थि णं भंते !
असुरकुमारावि देवा तमुक्कायं पकरेंति ? हंता अत्थि । किं पत्तियन्नं भंते ! असुर-
कुमारा देवा तमुक्कायं पकरेंति ? गोयमा ! किङ्गारइपत्तियं वा पडिणीयविमोहणट्टयाए
वा गुत्तीसंरक्खणहेउं वा अप्पणो वा सरीरपच्छायणट्टयाए, एवं खलु गोयमा !
असुरकुमारावि देवा तमुक्कायं पकरेंति, एवं जाव वेमाणिया । सेवं भंते ! २ त्ति
जाव विहरइ ॥ ५०४ ॥ **चोइसमसयस्स वीओ उहेसो समत्तो ॥**

देवे णं भंते ! महाकाए महासरीरे अणगारस्स भावियप्पणो मज्झंमज्झेणं
वीईवएज्जा ? गोयमा ! अत्थेगइए वीईवएज्जा अत्थेगइए नो वीईवएज्जा, से केणट्ठेणं
भंते ! एवं वुच्चइ अत्थेगइए वीईवएज्जा अत्थेगइए नो वीईवएज्जा ? गोयमा ! देवा
दुविहा पण्णत्ता, तंजहा-माइमिच्छादिट्ठिउववन्नगा य अमाइसम्मदिट्ठिउववन्नगा य,
तत्थ णं जे से माइमिच्छदिट्ठिउववन्नए देवे से णं अणगारं भावियप्पाणं पासइ २
त्ता नो वंदइ नो नमंसइ नो सक्कारेइ नो सम्माणेइ नो कल्लणं मंगलं देवयं जाव पज्जु-
वासइ, से णं अणगारस्स भावियप्पणो मज्झंमज्झेणं वीईवएज्जा, तत्थ णं जे से अमाइ
सम्मदिट्ठिउववन्नए देवे से णं अणगारं भावियप्पाणं पासइ पासित्ता वंदइ नमंसइ
जाव पज्जुवासइ, से णं अणगारस्स भावियप्पणो मज्झंमज्झेणं नो वीईवएज्जा, से
तेणट्ठेणं गोयमा ! एवं वुच्चइ जाव नो वीईवएज्जा । असुरकुमारे णं भंते ! महाकाए
महासरीरे एवं चेव, एवं देवदंडओ भाणियव्वो जाव वेमाणिए ॥ ५०५ ॥ अत्थि
णं भंते ! नेरइयाणं सक्कारेइ वा सम्माणेइ वा किङ्कम्मेइ वा अब्भुट्ठाणेइ वा अंज-
लिपग्गहेइ वा आसणाभिग्गहेइ वा आसणाणुप्पदाणेइ वा इंतस्स पक्खुग्गच्छणया
ठियस्स पज्जुवासणया गच्छंतस्स पडिसंसाहणया ? नो इणट्ठे समट्ठे । अत्थि णं
भंते ! असुरकुमाराणं सक्कारेइ वा सम्माणेइ वा जाव पडिसंसाहणया ? हंता
अत्थि, एवं जाव थणियकुमाराणं, पुढविकाइयाणं जाव चउरिंदियाणं एएसिं जहा
नेरइयाणं, अत्थि णं भंते ! पंचिंदियतिरिक्खजोणियाणं सक्कारेइ वा जाव पडिसं-
साहणया ? हंता अत्थि, नो चेव णं आसणाभिग्गहेइ वा आसणाणुप्पदाणेइ वा,
मणुस्साणं जाव वेमाणियाणं जहा असुरकुमाराणं ॥ ५०६ ॥ अप्पिट्ठिए णं भंते !
देवे महिद्धियस्स देवस्स मज्झंमज्झेणं वीईवएज्जा ? नो इणट्ठे समट्ठे, समिद्धिए

णं भंते ! देवे समिद्धियस्स देवस्स मज्झमज्जेणं वीईवएज्जा ? णो इणट्ठे समट्ठे, पमतं पुण वीईवएज्जा, से णं भंते ! किं सत्थेणं अक्कमित्ता पभू अणक्कमित्ता पभू ? गोयमा ! अक्कमित्ता पभू नो अणक्कमित्ता पभू, से णं भंते ! किं पुर्व्वि सत्थेणं अक्कमित्ता पच्छा वीईवएज्जा, पुर्व्वि वीईवएज्जा पच्छा सत्थेणं अक्कमेज्जा ? एवं एएणं अभिलावेणं जहा दसमसए आइद्धिउद्देसए तहेव निरवसेसं चत्तारि दंडगा भाणियव्वा जाव महिद्धिया वेमाणिणी अप्पिद्धियाए वेमाणिणीए ॥ ५०७ ॥ रयणप्पभापुढविनेरइया णं भंते ! केरिसयं पोगगलपरिणामं पच्चणुब्भवमाणा विहरंति ? गोयमा ! अणिट्ठं जाव अमणामं, एवं जाव अहेसत्तमापुढविनेरइया, एवं वेयणापरिणामं, एवं जहा जीवाभिगमे बिइए नेरइयउद्देसए जाव अहेसत्तमापुढविनेरइया णं भंते ! केरिसयं परिगहसत्तापरिणामं पच्चणुब्भवमाणा विहरंति ? गोयमा ! अणिट्ठं जाव अमणामं । सेवं भंते ! २ ति ॥ ५०८ ॥ **चोइसमसयस्स तइथो उद्देसो समत्तो ॥**

एस णं भंते ! पोगगले तीतमणंतं सासयं समयं लुक्खी समयं अलुक्खी समयं लुक्खी वा अलुक्खी वा, पुर्व्वि च णं करणेणं अणेगवन्नं अणेगरुन्नं परिणामं परिणमइ, अह से परिणामे निज्जिन्ने भवइ तओ पच्छा एगवच्चे एगरुवे सिया ? हंता गोयमा ! एस णं पोगगले तीतं तं चेव जाव एगरुवे सिया ॥ एस णं भंते ! पोगगले पडुप्पन्नं सासयं समयं ० ? एवं चेव, एवं अणागयमणंतं पि ॥ एस णं भंते ! खंधे तीतमणंतं ० ? एवं चेव, खंधेवि जहा पोगगले ॥ ५०९ ॥ एस णं भंते ! जीवे तीतमणंतं सासयं समयं दुक्खी समयं अदुक्खी समयं दुक्खी वा अदुक्खी वा, पुर्व्वि च णं करणेणं अणेगभावं अणेगभूयं परिणामं परिणमइ, अह से वेयणिज्जे निज्जिन्ने भवइ तओ पच्छा एगभावे एगभूए सिया ? हंता गोयमा ! एस णं जीवे जाव एगभूए सिया, एवं पडुप्पन्नं सासयं समयं, एवं अणागयमणंतं सासयं समयं ॥ ५१० ॥ परमाणुपोगगले णं भंते ! किं सासए असासए ? गोयमा ! सिय सासए सिय असासए, से केणट्ठेणं भंते ! एवं वुच्चइ सिय सासए सिय असासए ? गोयमा ! दव्वट्ठयाए सासए, वन्नपज्जवेहिं जाव फासपज्जवेहिं असासए, से तेणट्ठेणं जाव सिय सासए सिय असासए ॥ ५११ ॥ परमाणुपोगगले णं भंते ! किं चरिमे अचरिमे ? गोयमा ! दव्वादेसेणं नो चरिमे अचरिमे, खेत्तादेसेणं सिय चरिमे सिय अचरिमे, कालादेसेणं सिय चरिमे सिय अचरिमे, भावादेसेणं सिय चरिमे सिय अचरिमे ॥ ५१२ ॥ कइविहे णं भंते ! परिणामे पण्णत्ते ? गोयमा ! कुविहे परिणामे पण्णत्ते, तंजहा—जीवपरिणामे य अजीवपरिणामे य, एवं परिणामपयं निरवसेसं भाणियव्वं । सेवं भंते ! २ ति जाव विहरइ ॥ ५१३ ॥ **चोइसमस-**

नेरइए णं भंते ! अगणिकायस्स मज्झंमज्झेणं वीईवएज्जा ? गोयमा ! अत्थेगइए वीईवएज्जा अत्थेगइए नो वीईवएज्जा, से केणट्ठेणं भंते ! एवं वुच्चइ अत्थेगइए वीईवएज्जा अत्थेगइए नो वीईवएज्जा ? गोयमा ! नेरइया दुविहा पण्णत्ता, तंजहा-विग्गहगइसमावन्नगा य अविग्गहगइसमावन्नगा य, तत्थ णं जे से विग्गहगइसमावन्नए नेरइए से णं अगणिकायस्स मज्झंमज्झेणं वीईवएज्जा, से णं तत्थ झियाएज्जा ? णो इणट्ठे समट्ठे, नो खलु तत्थ सत्थं कमइ, तत्थ णं जे से अविग्गहगइसमावन्नए नेरइए से णं अगणिकायस्स मज्झंमज्झेणं णो वीईवएज्जा, से तेणट्ठेणं जाव नो वीईवएज्जा ॥ असुरकुमारे णं भंते ! अगणिकायस्स० पुच्छा, गोयमा ! अत्थेगइए वीईवएज्जा अत्थेगइए नो वीईवएज्जा से केणट्ठेणं जाव नो वीईवएज्जा ? गोयमा ! असुरकुमारा दुविहा पण्णत्ता, तंजहा-विग्गहगइसमावन्नगा य अविग्गहगइसमावन्नगा य, तत्थ णं जे से विग्गहगइसमावन्नए असुरकुमारे से णं एवं जहेव नेरइए जाव कमइ, तत्थ णं जे से अविग्गहगइसमावन्नए असुरकुमारे से णं अत्थेगइए अगणिकायस्स मज्झंमज्झेणं वीईवएज्जा, अत्थेगइए नो वीईवएज्जा, जे णं वीईवएज्जा से णं तत्थ झियाएज्जा ? नो इणट्ठे समट्ठे, नो खलु तत्थ सत्थं कमइ, से तेणट्ठेणं एवं जाव थणियकुमारे, एगिंदिया जहा नेरइया । बेइंदिए णं भंते ! अगणिकायस्स मज्झंमज्झेणं जहा असुरकुमारे तहा बेइंदिएवि, नवरं जे णं वीईवएज्जा से णं तत्थ झियाएज्जा ? हंता झियाएज्जा, सेसं तं चेव एवं जाव चउरिंदिए ॥ पंचिंदियतिरिक्खजोणिए णं भंते ! अगणिकाय० पुच्छा, गोयमा ! अत्थेगइए वीईवएज्जा अत्थेगइए नो वीईवएज्जा, से केणट्ठेणं० ? गोयमा ! पंचिंदियतिरिक्खजोणिया दुविहा पण्णत्ता, तंजहा-विग्गहगइसमावन्नगा य अविग्गहगइसमावन्नगा य, विग्गहगइसमावन्नए जहेव नेरइए जाव नो खलु तत्थ सत्थं कमइ, अविग्गहगइसमावन्नगा पंचिंदियतिरिक्खजोणिया दुविहा पण्णत्ता, तंजहा-इड्ढिप्पत्ता य अणिड्ढिप्पत्ता य, तत्थ णं जे से इड्ढिप्पत्ते पंचिंदियतिरिक्खजोणिए से णं अत्थेगइए अगणिकायस्स मज्झंमज्झेणं वीईवएज्जा अत्थेगइए नो वीईवएज्जा, जे णं वीईवएज्जा से णं तत्थ झियाएज्जा ? नो इणट्ठे समट्ठे, नो खलु तत्थ सत्थं कमइ, तत्थ णं जे से अणिड्ढिप्पत्ते पंचिंदियतिरिक्खजोणिए से णं अत्थेगइए अगणिकायस्स मज्झंमज्झेणं वीईवएज्जा अत्थेगइए नो वीईवएज्जा, जे णं वीईवएज्जा से णं तत्थ झियाएज्जा ? हंता झियाएज्जा, से तेणट्ठेणं जाव नो वीईव- (झिया)एज्जा, एवं मणुस्सेवि, वाणमंतरजोइसियवेमाणिए जहा असुरकुमारे ॥५१४॥ नेरइया दस ठाणाई पच्चणुब्भवमाणा विहरंति, तंजहा-अणिट्ठा सहा अणिट्ठा रुवा

अणिट्ठा गंधा अणिट्ठा रसा अणिट्ठा फासा अणिट्ठा गई अणिट्ठा ठिई अणिट्ठे लायत्ते
 अणिट्ठे जसोकिती अणिट्ठे उट्ठाणकम्मबलवीरियपुरिसकारपरक्कमे । असुरकुमारा
 दस ठाणाई पच्चणुब्भवमाणा विहरंति, तंजहा-इट्ठा सद्दा इट्ठा रुवा जाव इट्ठे
 उट्ठाणकम्मबलवीरियपुरिसकारपरक्कमे, एवं जाव थणियकुमारा ॥ पुढविकाइया
 लट्ठाणाई पच्चणुब्भवमाणा विहरंति, तं०-इट्ठाणिट्ठा फासा इट्ठाणिट्ठा गई एवं जाव
 परक्कमे, एवं जाव वणस्सइकाइया । बेईदिया सत्तट्ठाणाई पच्चणुब्भवमाणा विहरंति,
 तंजहा-इट्ठाणिट्ठा रसा सेसं जहा एगिदियाणं, तेईदिया णं अट्ठाणाई पच्चणुब्भव-
 माणा विहरंति, तं०-इट्ठाणिट्ठा गंधा सेसं जहा बेईदियाणं, चउरिंदिया णं नवट्ठाणाई
 पच्चणुब्भवमाणा विहरंति, तं०-इट्ठाणिट्ठा रुवा सेसं जहा तेईदियाणं, पंचिंदियतिरि-
 क्खजोणिया दस ठाणाई पच्चणुब्भवमाणा विहरंति, तंजहा-इट्ठाणिट्ठा सद्दा जाव
 परक्कमे, एवं मणुस्सावि, वाणमंतरजोइसियवेमाणिया जहा असुरकुमारा ॥ ५१५ ॥
 देवे णं भंते ! महिद्धिए जाव महेसक्खे बाहिरए पोग्गले अपरियाइत्ता पभू
 तिरियपव्वयं वा तिरियभित्ति वा उल्लंघेतए वा पल्लंघेतए वा ? गोयमा ! णो इणट्ठे
 समट्ठे । देवे णं भंते ! महिद्धिए जाव महेसक्खे बाहिरए पोग्गले परियाइत्ता
 पभू तिरिय जाव पल्लंघेतए वा ? इत्ता पभू । सेवं भंते ! सेवं भंते ! त्ति ॥ ५१६ ॥
चोदसमे सए पञ्चमो उद्देसो समत्तो ॥

रायगिहे जाव एवं वयासी-नेरइया णं भंते ! किमाहारा किंपरिणामा किंजो-
 णिया किंठिईया पण्णत्ता ? गोयमा ! नेरइया णं पोग्गलाहारा पोग्गलपरिणामा
 पोग्गलजोणिया पोग्गलट्ठिईया कम्मोवगा कम्मनियाणा कम्मट्ठिईया कम्मुणा(चे)मेव
 विप्परियासमेंति, एवं जाव वेमाणिया ॥ ५१७ ॥ नेरइया णं भंते ! किं वीचिदव्वाइं
 आहारंति अवीचिदव्वाइं आहारंति ? गोयमा ! नेरइया वीचिदव्वाइंपि आहारंति
 अवीचिदव्वाइंपि आहारंति, से केणट्ठेणं भंते ! एवं वुच्चइ नेरइया वीचि० तं चेव
 जाव आहारंति ? गोयमा ! जे णं नेरइया एगपएसूणाइंपि दव्वाइं आहारंति ते णं
 नेरइया वीचिदव्वाइं आहारंति, जे णं नेरइया पडिपुच्चाइं दव्वाइं आहारंति ते णं
 नेरइया अवीचिदव्वाइं आहारंति, से तेणट्ठेणं गोयमा ! एवं वुच्चइ जाव आहारंति,
 एवं जाव वेमाणिया आहारंति ॥ ५१८ ॥ जाहे णं भंते ! सक्के देविंदे देवराया
 दिव्वाइं भोगभोगाई भुंजिउंक्रमे भवइ से कहमियाणि पकरेइ ? गोयमा ! ताहे
 चेव णं से सक्के देविंदे देवराया एगं महं नेमिपडिरुवगं विउव्वइ, एगं जोयणसय-
 सहस्सं आयामविकस्संमेणं तिज्जि जोयणसयसहस्साइं जाव अद्धं गुलं क्व किंचिद्विसे-
 साहियं परिकखेवेणं, तस्स णं नेमिपडिरुवस्स उचरिं बहुसमरमणिजे भूमिभागे पञ्चते

जाव मणीणं फासे, तस्स णं नेमिपडिख्वगस्स बहुमज्झदेसभागे तत्थ णं महं एणं
पासायवडिंसगं विउव्वइ पंच जोयणसयाइ उड्डं उच्चत्तेणं, अट्ठाइज्जाइ जोयणसयाइ
विकखंभेणं, अब्भुगयमूसियवन्नओ जाव पडिख्वं, तस्स णं पासायवडिंसगस्स उल्लोए
पउमल्लयभत्तिचित्ते जाव पडिख्वे, तस्स णं पासायवडिंसगस्स अंतो बहुसमरमणिजे
भूमिभाए जाव मणीणं फासो, मणिपेडिया अट्ठजोयणिया जहा वेमाणियाणं, तीसे णं
मणिपेडियाए उवरिं महं एगे देवसयणिजे विउव्वइ सयणिज्जवन्नओ जाव पडिख्वे,
तत्थ णं से सक्के देविंदे देवराया अट्ठहिं अगमहिंसीहिं सपरिवाराहिं दोहि य
अणिएहिं तं०-नट्ठाणिण्ण य गंधव्वाणिण्ण य सद्धिं महायाहयनट्ठ जाव दिव्वाइ भोग-
भोगाइ भुंजमाणे विहरइ ॥ जाहे णं ईसाणे देविंदे देवराया दिव्वाइ जहा सक्के तहा
ईसाणेवि निरवसेसं, एवं सणकुमारेवि, नवरं पासायवडिंसओ छ जोयणसयाइ उड्डं
उच्चत्तेणं तिज्जि जोयणसयाइ विकखंभेणं, मणिपेडिया तहेव अट्ठजोयणिया, तीसे
णं मणिपेडियाए उवरिं एत्थ णं महेगं सीहासणं विउव्वइ सपरिवारं भाणियव्वं,
तत्थ णं सणकुमारे देविंदे देवराया वावत्तरीए सामाणियसाहस्सीहिं जाव चउहिं
बावत्तरीहिं आयरक्खदेवसाहस्सीहि य बट्ठहिं सणकुमारकप्पवासीहिं वेमाणिएहिं
देवेहि य देवीहि य सद्धिं संपरिवुडे महाया जाव विहरइ । एवं जहा सणकुमारे
तहा जाव पाणओ अच्चुओ, नवरं जो जस्स परिवारो सो तस्स भाणियव्वो, पासा-
यउच्चत्तं जं सएसु २ कपेसु विमाणणं उच्चत्तं अट्ठद्वं वित्थारो जाव अच्चुयस्स
नवजोयणसयाइ उड्डं उच्चत्तेणं अट्ठपंचमाइ जोयणसयाइ विकखंभेणं, तत्थ णं
गोयमा ! अच्चुए देविंदे देवराया दसहिं सामाणियसाहस्सीहिं जाव विहरइ, सेवं
भंते । २ ति ॥ ५१९ ॥ **चोइसमे सए छट्ठो उइसो समत्तो ॥**

रायणिहे जाव परिसा पडिगया, गोयमाइ समणे भगवं महावीरे भगवं गोयमं
आमंतेत्ता एवं वयासी-चिरसंसिद्धोऽसि मे गोयमा ! चिरसंयुओऽसि मे गोयमा !
चिरपरिचिओऽसि मे गोयमा ! चिरजुसिओऽसि मे गोयमा ! चिराणुगओऽसि मे
गोयमा ! चिराणुवत्तीसि मे गोयमा ! अणंतरं देवलोए अणंतरं माणुस्सए भवे किं
परं मरणा कायस्स भेदा इओ चुया दोवि तुल्ला एगट्ठा अविसेसमाणान्ता भवि-
स्सामो ॥ ५२० ॥ जहा णं भंते ! वयं एयमट्ठं जाणामो पासामो तहा णं अणुत्तरो-
ववाइया देवावि एयमट्ठं जाणंति पासंति ? हंता गोयमा ! जहा णं वयं एयमट्ठं
जाणामो पासामो तहा णं अणुत्तरोववाइया देवावि एयमट्ठं जाणंति पासंति, से
केणट्ठेणं जाव पासंति ? गोयमा ! अणुत्तरोववाइयाणं अणंताओ मणोदव्ववग्गणाओ
रुद्धाओ पत्ताओ अभिसमन्नागयाओ भवंति, से तेणट्ठेणं गोयमा ! एवं सुच्चइ जाव

पासन्ति ॥ ५२१ ॥ कइविहे णं भंते ! तुल्लए पण्णत्ते ? गोयमा ! छव्विहे तुल्लए पण्णत्ते, तंजहा-दव्वतुल्लए, खेत्तुल्लए, कालतुल्लए, भवतुल्लए, भावतुल्लए, संठाणतुल्लए, से केणट्ठेणं भंते ! एवं वुच्चइ दव्वतुल्लए २ ? गोयमा ! परमाणुपोगगले परमाणुपोगगलस्स दव्वओ तुल्ले, परमाणुपोगगले परमाणुपोगगलवइरित्तस्स दव्वओ णो तुल्ले, दुपएसिए खंधे दुपएसियस्स खंधस्स दव्वओ तुल्ले, दुपएसिए खंधे दुपएसियवइरित्तस्स खंधस्स दव्वओ णो तुल्ले, एवं जाव दसपएसिए, तुल्लसंखेजपएसिए खंधे तुल्लसंखेजपएसियस्स खंधस्स दव्वओ तुल्ले, तुल्लसंखेजपएसिए खंधे तुल्लसंखेजपएसियवइरित्तस्स खंधस्स दव्वओ णो तुल्ले, एवं तुल्लअसंखेजपएसिएवि, एवं तुल्लअणंतपएसिएवि, से तेणट्ठेणं गोयमा ! एवं वुच्चइ दव्वतुल्लए । से केणट्ठेणं भंते ! एवं वुच्चइ खेत्तुल्लए २ ? गोयमा ! एगपएसोगाढे पोगगले एगपएसोगाढस्स पोगगलस्स खेत्तओ तुल्ले, एगपएसोगाढे पोगगले एगपएसोगाढवइरित्तस्स पोगगलस्स खेत्तओ णो तुल्ले, एवं जाव दसपएसोगाढे, तुल्लसंखेजपएसोगाढेवि एवं चेव, एवं तुल्लअसंखेजपएसोगाढेवि, से तेणट्ठेणं जाव खेत्तुल्लए । से केणट्ठेणं भंते ! एवं वुच्चइ कालतुल्लए २ ? गोयमा ! एगसमयटि-ईए पोगगले एगसमयटिईयस्स पोगगलस्स कालओ तुल्ले, एगसमयटिईए पोगगले एगसमयटिईयवइरित्तस्स पोगगलस्स कालओ णो तुल्ले, एवं जाव दससमयटिईए, तुल्लसंखेजसमयटिईए एवं चेव, एवं तुल्लअसंखेजसमयटिईएवि, से तेणट्ठेणं जाव काल-तुल्लए । से केणट्ठेणं भंते ! एवं वुच्चइ भवतुल्लए २ ? गोयमा ! नेरइए नेरइयस्स भवट्टयाए तुल्ले, नेरइए नेरइयवइरित्तस्स भवट्टयाए नो तुल्ले, तिरिक्खजोणिए एवं चेव, एवं मणु-स्सेवि, एवं देवेवि, से तेणट्ठेणं जाव भवतुल्लए । से केणट्ठेणं भंते ! एवं वुच्चइ भावतुल्लए भावतुल्लए ? गोयमा ! एगगुणकालए पोगगले एगगुणकालयस्स पोगगलस्स भावओ तुल्ले, एगगुणकालए पोगगले एगगुणकालगवइरित्तस्स पोगगलस्स भावओ णो तुल्ले, एवं जाव दसगुणकालए, एवं तुल्लसंखेजगुणकालए पोगगले, एवं तुल्लअसंखेजगुणकालएवि, एवं तुल्लअणंतगुणकालएवि, जहा कालए एवं नीलए लोहियए हालिइए सुक्खिइए, एवं सुब्बिभगंधे, एवं दुब्बिभगंधे, एवं तित्ते जाव महुरे, एवं कक्खडे जाव लक्खे, उदइए भावे उदइयस्स भावस्स भावओ तुल्ले, उदइए भावे उदइयभाववइरित्तस्स भावस्स भावओ नो तुल्ले, एवं उवसमिएवि, खइए० खओवसमिए० पारिणामिए० संनिवाइए भावे संनिवाइयस्स भावस्स, से तेणट्ठेणं गोयमा ! एवं वुच्चइ भावतुल्लए २ । से केणट्ठेणं भंते ! एवं वुच्चइ संठाणतुल्लए २ ? गोयमा ! परिमंडले संठाणे परिमंडलस्स संठाणस्स संठाणओ तुल्ले, परिमंडलसंठाणे परिमंडलसंठाणवइरित्तस्स संठाणस्स संठाणओ नो तुल्ले, एवं वट्ठे तंसे चउरंसे आयए, समचउरंसंठाणे सम-

चउरंसस्स संठाणस्स संठाणओ तुल्ले, समचउरंसे संठाणे समचउरंससंठाणवइरित्तस्स संठाणस्स संठाणओ नो तुल्ले, एवं परिमंडले, एवं जाव हुंडे, से तेणट्ठेणं जाव संठाणतुल्लए २ ॥ ५२२ ॥ भत्तपच्चक्खायए णं भंते ! अणगारे मुच्छिए जाव अज्झोववच्चे आहारमाहारेइ अहे णं वीससाए कालं करेइ तओ पच्छा अमुच्छिए अगिद्धे जाव अणज्झोववच्चे आहारमाहारेइ ? हंता गोयमा ! भत्तपच्चक्खायए णं अणगारे तं चेव, से केणट्ठेणं भन्ते ! एवं वुच्चइ भत्तपच्चक्खायए णं तं चेव, गोयमा ! भत्तपच्चक्खायए णं अणगारे मुच्छिए जाव अज्झोववच्चे आहारे भवइ, अहे णं वीससाए कालं करेइ तओ पच्छा अमुच्छिए जाव आहारे भवइ, से तेणट्ठेणं गोयमा ! जाव आहारमाहारेइ ॥ ५२३ ॥ अत्थि णं भंते ! लवसत्तमा देवा २ ? हंता अत्थि, से केणट्ठेणं भन्ते ! एवं वुच्चइ लवसत्तमा देवा २ ? गोयमा ! से जहानामए-केइ पुरिसे तरुणे जाव निउणसिप्पोवगए सालीण वा वीहीण वा गोधूमाण वा जवाण वा जवजवाण वा प(पि)क्काणं परियाताणं हरियाणं हरियकंडाणं तिवखेणं गवपज्जणएणं असिअएणं पडिसाहरिया २ पडिसंखिविया २ जाव इणामेव (२) तिकइ सुत्तलवए लुएज्जा, जइ णं गोयमा ! तेसिं देवाणं एवइयं कालं आउए पढुप्पए तो णं ते देवा तेणं चेव भवग्गहणेणं सिज्झं(ता)ति जाव अंतं करंति, से तेणट्ठेणं जाव लवसत्तमा देवा लवसत्तमा देवा ॥ ५२४ ॥ अत्थि णं भंते ! अणुत्तरोववाइया देवा २ ? हंता अत्थि, से केणट्ठेणं भंते ! एवं वुच्चइ अणुत्तरोववाइया देवा २ ? गोयमा ! अणुत्तरोववाइयाणं देवाणं अणुत्तरा सद्दा अणुत्तरा रुवा जाव अणुत्तरा फासा, से तेणट्ठेणं गोयमा ! एवं वुच्चइ जाव अणुत्तरोववाइया देवा २ । अणुत्तरोववाइया णं भंते ! देवा केवइएणं कम्मावसेसेणं अणुत्तरोववाइयदेवत्ताए उववच्चा ? गोयमा ! जावइयं छट्ठभत्तिए समणे निग्गंधे कम्मं निज्जेरेइ एवइएणं कम्मावसेसेणं अणुत्तरोववाइया देवा देवत्ताए उववच्चा । सेवं भंते ! २ ति ॥ ५२५ ॥ **चोइसमे सए सत्तमो उइसो समत्तो ॥**

इमीसे णं भंते ! रयणप्पभाए पुढवीए सक्करप्पभाए य पुढवीए केवइयं अबाहाए अंतरे पण्णत्ते ? गोयमा ! असंखेज्जाइं जोयणसहस्साइं अबाहाए अंतरे पण्णत्ते, सक्करप्पभाए णं भंते ! पुढवीए वालुयप्पभाए य पुढवीए केवइयं ० ? एवं चेव, एवं जाव तमाए अहेसत्तमाए य, अहेसत्तमाए णं भंते ! पुढवीए अलोगस्स य केवइयं अबाहाए अंतरे पण्णत्ते ? गोयमा ! असंखेज्जाइं जोयणसहस्साइं अबाहाए अंतरे पण्णत्ते । इमीसे णं भंते ! रयणप्पभाए पुढवीए जोइसियस्स य केवइयं पुच्छा, गोयमा ! सत्तनउए जोयणसए अबाहाए अंतरे पण्णत्ते, जोइसियस्स णं भंते ! सोहम्मीसाणाण य कप्पाणं केवइयं पुच्छा, गोयमा ! असंखेज्जाइं जोयण जाव

अंतरे पण्णत्ते, सोहम्मीसाणाणं भंते ! सणकुमारमाहिंदाणं य केवइयं० ? एवं चेव,
सणकुमारमाहिंदाणं भंते ! बंभलोगस्स य कप्पस्स केवइयं० ? एवं चेव, बंभलोगस्स
णं भंते ! लंतगस्स य कप्पस्स केवइयं० ? एवं चेव, लंतगस्स णं भंते ! महासुक्कस्स
य कप्पस्स केवइयं० ? एवं चेव, एवं महासुक्कस्स य कप्पस्स सहस्सारस्स य, एवं
सहस्सारस्स आणयपाणयकप्पाणं, एवं आणयपाणयाणं य कप्पाणं आरणच्चुयाण
य कप्पाणं, एवं आरणच्चुयाणं गेविज्जविमाणाणं य, एवं गेविज्जविमाणाणं
अणुत्तरविमाणाणं य । अणुत्तरविमाणाणं भंते ! ईसिप्पम्भाराए य पुढवीए केवइयं०
पुच्छा, गोयमा ! दुवाल्सजोयणे अवाहाए अंतरे पण्णत्ते, ईसिप्पम्भाराए णं भंते !
पुढवीए अलोगस्स य केवइए अवाहाए० पुच्छा, गोयमा ! देसूणं जोयणं अवाहाए
अंतरे पण्णत्ते ॥ ५२६ ॥ एस णं भंते ! सालस्सखे उण्हाभिहए तण्हाभिहए दवग्गिजा-
लाभिहए कालमासे कालं किच्चा कहिं गच्छिहिइ कहिं उववज्जिहिइ ? गोयमा ! इहेव
रायगिहे नयरे सालस्सखत्ताए पच्चायाहिइ, से णं तत्थ अच्चियवंदियपूइयसकारियस-
म्माणिणं दिव्वे सच्चे सच्चोवाए सच्चिहियपाडिहेरे लाउल्लोइयमहिए यावि भविस्सइ, से
णं भंते ! तओहिंतो अणंतरं उव्वट्ठित्ता कहिं गमिहिइ कहिं उववज्जिहिइ ? गोयमा !
महाविदेहे वासे सिज्जिहिइ जाव अंतं काहिइ ॥ एस णं भंते ! साललट्ठिया उण्हाभिहया
तण्हाभिहया दवग्गिजालाभिहया कालमासे कालं किच्चा जाव कहिं उववज्जिहिइ ?
गोयमा ! इहेव जंबुदीवे २ भारहे वासे विव्वगिरिपायमूले महेस्सरीए नयरीए
सामलिस्सखत्ताए पच्चायाहिइ, सा णं तत्थ अच्चियवंदियपूइय जाव लाउल्लोइय-
महिंया यावि भविस्सइ, से णं भंते ! तओहिंतो अणंतरं उव्वट्ठित्ता सेसं जहा
सालस्सखस्स जाव अंतं काहिइ । एस णं भंते ! उंवरलट्ठिया उण्हाभिहया ३
कालमासे कालं किच्चा जाव कहिं उववज्जिहिइ ? गोयमा ! इहेव जंबुदीवे २ भारहे
वासे पाडलिपुत्ते नयरे पाडलिस्सखत्ताए पच्चायाहिइ, से णं तत्थ अच्चियवंदिय
जाव भविस्सइ, से णं भंते ! अणंतरं उव्वट्ठित्ता सेसं तं चेव जाव अंतं
काहिइ ॥ ५२७ ॥ तेणं कालेणं तेणं समएणं अम्मडस्स परिव्वायगस्स सत्त
अत्तेवासीसया गिम्हकालसमयंसि एवं जहा उववाइए जाव आराहगा ॥ ५२८ ॥
बहुजणे णं भंते ! अन्नमन्नस्स एवमाइक्खइ ४ एवं खलु अम्मडे परिव्वायगे कं पिप्पपुरे
नयरे घरसए एवं जहा उववाइए अम्मडस्स वत्तव्वया जाव दढप्पइणो अंतं
काहिइ ॥ ५२९ ॥ अत्थि णं भंते ! अव्वाबाहा देवा अव्वाबाहा देवा ? हंता
अत्थि, से केणट्ठेणं भंते ! एवं तुच्चइ अव्वाबाहा देवा २ ? गोयमा ! पमू णं
एगमेगे अव्वाबाहे देवे एगमेगस्स पुरिसस्स एगमेगंसि अच्चिपत्तंसि दिव्वं

देविच्छि दिव्वं देवजुइ दिव्वं देवाणुभा(व)णं दिव्वं बत्तीसइविहं नद्विहिं उवदंसेत्ताए,
 णो चेव णं तस्स पुरिसस्स किंचि आबाहं वा वाबाहं वा उप्पाएइ छविच्छेदं
 वा करेइ, एसुहुमं च णं उवदंसेज्जा, से तेणट्ठेणं जाव अवावाहा देवा २ ॥ ५३० ॥
 पभू णं भंते ! सङ्के देविंदे देवराया पुरिसस्स सीसं सपाणिणा असिणा छिंदित्ता
 कमंडलुमि पक्खिवत्तए ? हंता पभू, से कहमिदाणि पकरेइ ? गोयमा ! छिंदिया
 छिंदिया च णं वा पक्खिवेज्जा, भिंदिया भिंदिया च णं वा पक्खिवेज्जा, कुट्टिया कुट्टिया
 च णं वा पक्खिवेज्जा, चुन्निया चुन्निया च णं वा पक्खिवेज्जा, तथो पच्छा खिप्पामेव
 पडिसंघाएज्जा, नो चेव णं तस्स पुरिसस्स किंचि आबाहं वा वाबाहं वा उप्पाएज्जा,
 छविच्छेदं पुण करेइ, एसुहुमं च णं पक्खिवेज्जा ॥ ५३१ ॥ अत्थि णं भंते ! जंभया
 देवा जंभया देवा ? हंता अत्थि, से केणट्ठेणं भंते ! एवं वुच्चइ जंभया देवा
 जंभया देवा ? गोयमा ! जंभगा णं देवा निच्चं पमुइयपक्खीलिया कंदप्परइमोहण-
 सीला जे णं ते देवे कुद्वे पासेज्जा से णं पुरिसे महंतं अयसं पाउणिज्जा, जे णं ते
 देवे तुट्ठे पासेज्जा से णं महंतं जसं पाउणेज्जा, से तेणट्ठेणं गोयमा ! जंभगा देवा
 २ ॥ कइविहा णं भंते ! जंभगा देवा पण्णत्ता ? गोयमा ! दसविहा पण्णत्ता,
 तंजहा-अन्नजंभगा पाणजंभगा वत्थजंभगा लेणजंभगा सयणजंभगा पुप्फजंभगा
 फलजंभगा पुप्फफलजंभगा विज्जाजंभगा अवियत्तजंभगा, जंभगा णं भंते ! देवा
 कहिं वसहिं उवेंति ? गोयमा ! सव्वेसु चेव बीहवेयङ्गेषु चित्तविचित्तजमगपव्वएसु
 कंचणपव्वएसु य एत्थ णं जंभगा देवा वसहिं उवेंति । जंभगाणं भंते ! देवाणं
 केवइयं कालं ठिई पण्णत्ता ? गोयमा ! एणं पलिओवमं ठिई पण्णत्ता । सेवं भंते ! सेवं
 भंते ! ति जाव विहरइ ॥ ५३२ ॥ **चोइसमे सए अट्ठमो उइसो समत्तो ॥**

अणगारे णं भंते ! भावियप्पा अप्पणो कम्मलेस्सं न जाणइ न पासइ तं पुण
 जीवं सरूविं सकम्मलेस्सं जाणइ पासइ ? हंता गोयमा ! अणगारे णं भावियप्पा
 अप्पणो जाव पासइ ॥ अत्थि णं भंते ! सरू(वी)विं सकम्मलेस्सा पोग्गला ओभासंति
 ४ ? हंता अत्थि ॥ कयरे णं भंते ! सरूवी सकम्मलेस्सा पोग्गला ओभासंति जाव
 पभासंति ? गोयमा ! जाओ इमाओ चंदिमसूरियाणं देवाणं विमाणेहिंतो लेस्साओ
 बहिया अभिनिस्सडाओ ताओ ओभासंति जाव पभासंति एवं एएणं गोयमा ! ते
 सरूवी सकम्मलेस्सा पोग्गला ओभासंति ४ ॥ ५३३ ॥ नेरइयाणं भंते ! किं अत्ता
 पोग्गला अणत्ता पोग्गला ? गोयमा ! नो अत्ता पोग्गला अणत्ता पोग्गला, अजुरकुमारारणं
 भंते ! किं अत्ता पोग्गला अणत्ता पोग्गला ? गोयमा ! अत्ता पोग्गला णो अणत्ता
 पोग्गला, एवं जाव थणियकुमारारणं, पुढविकाइयाणं पुच्छा, गोयमा ! अत्तावि पोग्गला

अणत्तावि पोग्गला, एवं जाव मणुस्साणं, वाणमंतरजोइसियवेमाणियाणं जहा असुर-
कुमारणं, नेरइयाणं भंते ! किं इट्ठा पोग्गला अणिट्ठा पोग्गला ? गोयमा ! नो इट्ठा
पोग्गला अणिट्ठा पोग्गला, जहा अत्ता भणिया एवं इट्ठावि कंतावि पियावि मणुजावि
भाणियव्वा ए(वं)ए पंच दंडगा ॥ देवे णं भंते ! महिद्धि ए जाव महेसक्खे ख्वसहस्सं
विउव्विता पभू भासासहस्सं भासित्तए ? हंता पभू, सा णं भंते ! किं एगा भासा
भासासहस्सं ? गोयमा ! एगा णं सा भासा णो खलु तं भासासहस्सं ॥ ५३४ ॥
तेणं कालेणं तेणं समएणं भगवं गोयमे अविस्सगयं बालसूरियं जासुमणाकुसुमपुंजप्प-
गासं लोहितगं पासइ पासित्ता जायसद्धे जाव समुप्पन्नकोउहल्ले जेणेव समणे भगवं
महावीरे तेणेव उवागच्छइ २ ता जाव नमंस्सित्ता एवं वयासी-किमिदं भंते ! सूरिए
किमिदं भंते ! सूरियस्स अट्ठे ? गोयमा ! सुभे सूरिए सुभे सूरियस्स अट्ठे । किमिदं
भंते ! सूरिए किमिदं भंते ! सूरियस्स पभा ? एवं चेव, एवं छाया, एवं लेस्सा ॥ ५३५ ॥
जे इमे भंते ! अज्जत्ताए समणा निग्गंथा विहरंति एए णं कस्स ते(उ)यलेस्सं वीइ-
वयंति ? गोयमा ! मासपरियाए समणे निग्गंथे वाणमंतराणं देवाणं तेयलेस्सं वीइवयइ,
दुमासपरियाए समणे निग्गंथे असुरिंदवज्जियाणं भवणवासीणं देवाणं तेयलेस्सं वीइ-
वयइ, एवं एएणं अभिलावेणं तिमासपरियाए समणे निग्गंथे असुरकुमारणं देवाणं
तेयलेस्सं वीइवयइ, चउम्मासपरियाए समणे निग्गंथे गहगणनक्खत्तताराव्वाणं जोइ-
सियाणं देवाणं तेयलेस्सं वीइवयइ, पंचमासपरियाए समणे निग्गंथे चंदिमसूरियाणं जोइ-
सिंदाणं जोइसरायाणं तेयलेस्सं वीइवयइ, छम्मासपरियाए समणे निग्गंथे सोहम्मीसा-
णाणं देवाणं ० सत्तमासपरियाए ० सर्णकुमारमाहिंदाणं देवाणं ० अट्टमासपरियाए समणे
निग्गंथे बंभलोगलंतगाणं देवाणं तेयलेस्सं वीइवयइ, नवमासपरियाए समणे निग्गंथे
महासुक्कसहस्साराणं देवाणं तेयलेस्सं वीइवयइ, दसमासपरियाए समणे निग्गंथे आणय-
पाणयआरणच्चुयाणं देवाणं ० एकारसमासपरियाए समणे निग्गंथे गेवेज्जगाणं देवाणं ०
बारसमासपरियाए समणे निग्गंथे अणुत्तरोववाइयाणं देवाणं तेयलेस्सं वीइवयइ, तेण
परं सुक्खे सुक्काभिजाए भविता तओ पच्छा सिज्झइ जाव अंतं करेइ । सेवं भंते । सेवं
भंते ! ति जाव विहरइ ॥ ५३६ ॥ **चोइसमे सए नवमो उडेसो समत्तो ॥**

केवली णं भंते ! छउमत्थं जाणइ पासइ ? हंता जाणइ पासइ, जहा णं भंते ।
केवली छउमत्थं जाणइ पासइ तथा णं सिद्धेवि छउमत्थं जाणइ पासइ ? हंता
जाणइ पासइ, केवली णं भंते ! आहोहिंयं जाणइ पासइ ? एवं चेव, एवं परमाहो-
हिंयं, एवं केवलिं एवं सिद्धं जाव जहा णं भंते ॥ केवली सिद्धं जाणइ पासइ तथा
णं सिद्धेवि सिद्धं जाणइ पासइ ? हंता जाणइ पासइ । केवली णं भंते । भासेज वा

वागरेज वा ? हंता भासेज वा वागरेज वा, जहा णं भंते ! केवली भासेज वा वागरेज वा तथा णं सिद्धेवि भासेज वा वागरेज वा ? णो इण्ठे समठ्ठे, से केण-
 ड्ठेणं भंते ! एवं वुच्चइ जहा णं केवली भासेज वा वागरेज वा णो तथा णं सिद्धे
 भासेज वा वागरेज वा ? गोयमा ! केवली णं सउट्ठाणे सक्कम्मे सबळे सवीरिए
 सपुरिसकारपरक्कमे, सिद्धे णं अणुट्ठाणे जाव अपुरिसकारपरक्कमे, से तेणट्ठेणं जाव नो
 वागरेज वा, केवली णं भंते ! उम्मिसेज वा निम्मिसेज वा ? हंता गोयमा ! उम्मि-
 सेज वा निम्मिसेज वा एवं चेव, एवं आउट्टेज वा पसारेज वा, एवं ठाणं वा सेजं
 वा निसीहियं वा चेएजा, केवली णं भंते ! इमं रयणप्पभं पुढविं रयणप्पभापुढवीति
 जाणइ पासइ ? हंता गोयमा ! जाणइ पासइ, जहा णं भंते ! केवली इमं रयणप्पभं
 पुढविं रयणप्पभापुढवीति जाणइ पासइ तथा णं सिद्धेवि इमं रयणप्पभं पुढविं रय-
 णप्पभापुढवीति जाणइ पासइ ? हंता जाणइ पासइ, केवली णं भंते ! सक्करप्पभं पुढविं
 सक्करप्पभापुढवीति जाणइ पासइ ? एवं चेव, एवं जाव अहेसत्तमं, केवली णं भंते !
 सोहम्मं कप्पं सोहम्मकप्पेति जाणइ पासइ ? हंता जाणइ पासइ, एवं ईसाणं
 एवं जाव अच्चुयं, केवली णं भंते ! गेवेज्जविमाणं गेवेज्जविमाणेति जाणइ पासइ ?
 एवं चेव, एवं अणुत्तरविमाणेवि, केवली णं भंते ! ईसिप्पभमारं पुढविं ईसिप्पभमार-
 पुढवीति जाणइ पासइ ? एवं चेव, केवली णं भंते ! परमाणुपोगगलं परमाणुपोगगलेत्ति
 जाणइ पासइ ? एवं चेव, एवं दुपएसियं खंधं एवं जाव जहा णं भंते ! केवली
 अणंतपएसियं खंधं अणंतपएसिए खंधेत्ति जाणइ पासइ तथा णं सिद्धेवि अणंतपएसियं
 खंधं जाव पासइ ? हंता जाणइ पासइ । सेवं भंते ! सेवं भंते ! ति ॥ ५३७ ॥

चोहसमे सए दसमो उद्दसो समत्तो ॥ चोहसमं सयं समत्तं ॥

नमो सुयदेवयाए भगवद्देए । तेणं कालेणं तेणं समएणं सावत्थी नामं नयरी
 होत्था वन्नओ, तीसे णं सावत्थीए नयरीए बहिया उत्तरपुरच्छिमे दिसीभाए तत्थ
 णं कोट्टए नामं उज्जाणे होत्था वन्नओ, तत्थ णं सावत्थीए नयरीए हालाहला
 नामं कुंभकारी आजीवियोवासिया परिवसइ, अट्ठा जाव अपरिभूया आजीविय-
 समयंसि लद्धट्ठा गहियट्ठा पुच्छियट्ठा विणिच्छियट्ठा अट्ठिमिजपेम्माणुरागरत्ता अय-
 माउसो ! आजीवियसमए अट्ठे अयं परमट्ठे सेसे अणट्ठेत्ति आजीवियसमएणं अप्पाणं
 भावेमाणी विहरइ । तेणं कालेणं तेणं समएणं गोसाले मंखलिपुत्ते चउव्वीसवास-
 परियाए हालाहलाए कुंभकारीए कुंभकारावणंसि आजीवियसंघसंपरिवुडे आजी-
 वियसमएणं अप्पाणं भावेमाणे विहरइ, तए णं तस्स गोसालस्स मंखलिपुत्तस्स
 अन्नया कयाइ इमे छ दिसाचरा अंतियं पाउब्भवित्था, तंजहा साणे क(णं)लंदे-

कणियारे अच्छिदे अग्गिवेसायणे अज्जणे गोमायुपुत्ते, तए णं ते छ दिसाचरा
 अट्ठविहं पुव्वगयं मग्गदसमं सएहिं २ मइरंसणेहिं निज्जूहंति स० २ ता गोसालं
 मंखलिपुत्तं उवट्ठाइंसु, तए णं से गोसाले मंखलिपुत्ते तेणं अट्ठंगस्स महानिमित्तस्स
 केणइ उल्लोयमेत्तेणं सव्वेसिं पाणाणं भूयाणं जीवाणं सत्ताणं इमाइं छ अणइक्क-
 मणिज्जाइं वागरणाइं वागरेइ, तं०-लाभं अलाभं सुहं दुक्खं जीवियं मरणं तद्वा ।
 तए णं से गोसाले मंखलिपुत्ते तेणं अट्ठंगस्स महानिमित्तस्स केणइ उल्लोयमेत्तेणं
 सावत्थीए नयरीए अजिणे जिणप्पलावी अणरहा अरहप्पलावी अकेवली केवलि-
 प्पलावी असव्वन्नू सव्वन्नूप्पलावी अजिणे जिणसइं पगासेमाणे विहरइ ॥ ५३८ ॥
 तए णं सावत्थीए नयरीए सिंघाडग जाव पहेसु बहुजणो अन्नमन्नस्स एवमाइक्खइ
 जाव एवं पुरुवेइ-एवं खलु देवाणुप्पिया ! गोसाले मंखलिपुत्ते जिणे जिणप्पलावी
 जाव पगासेमाणे विहरइ, से कहमेयं मन्ने एवं ?, तेणं कालेणं तेणं समएणं सामी
 समोसढे जाव परिसा पडिगया, तेणं कालेणं तेणं समएणं समणस्स भगवओ महा-
 वीरस्स जेट्ठे अंतेवासी इंदभूई णामं अणगारे गोयमगोत्तेणं जाव छट्ठंछट्ठेणं एवं जहा
 विइयसए नियंहुदेसए जाव अडमाणे बहुजणसइं निसामेइ, बहुजणो अन्नमन्नस्स
 एवमाइक्खइ ४-एवं खलु देवाणुप्पिया ! गोसाले मंखलिपुत्ते जिणे जिणप्पलावी
 जाव पगासेमाणे विहरइ, से कहमेयं मन्ने एवं ?, तए णं भगवं गोयमे बहुजणस्स
 अंतियं एयमट्ठं सोच्चा निसम्म जाव जायसट्ठे जाव भत्तपाणं पडिदंसेइ जाव
 पज्जुवासमाणे एवं वयासी-एवं खलु अहं भंते ! छट्ठं तं चेव जाव जिणसइं पगासेमाणे
 विहरइ, से कहमेयं भंते ! एवं ? तं इच्छामि णं भंते ! गोसालस्स मंखलिपुत्तस्स
 उट्ठाणपरियाणियं परिकहियं, गोयमादि समणे भगवं महावीरे भगवं गोयमं एवं
 वयासी-जणं गोयमा ! से बहुजणे अन्नमन्नस्स एवमाइक्खइ ४-एवं खलु गोसाले
 मंखलिपुत्ते जिणे जिणप्पलावी जाव पगासेमाणे विहरइ तण्णं मिच्छा, अहं पुण
 गोयमा ! एवमाइक्खामि जाव पुरुवेमि-एवं खलु एयस्स गोसालस्स मंखलिपुत्तस्स
 मंखलिनारं मंखे पिया होत्था, तस्स णं मंखलिस्स मंखस्स भद्दा नामं भारिया
 होत्था सुकुमाल जाव पडिरूवा, तए णं सा भद्दा भारिया अन्नया कयाइ गुब्बिणी
 यावि होत्था, तेणं कालेणं तेणं समएणं सरवणे नामं सन्निवेसे होत्था रिद्धत्थिमिय
 जाव सन्निभप्पगासे पासार्हए ४, तत्थ णं सरवणे सन्निवेसे गोबहुले नामं माहणे
 परिवसइ, अट्ठे जाव अपरिभूए रिउव्वेय जाव सुपरिनिट्ठिए यावि होत्था, तस्स णं
 गोबहुलस्स माहणस्स गोसाला यावि होत्था, तए णं से मंखलिमंखे नामं अन्नया
 कयाइ अट्ठाए भारियाए गुब्बिणीए सद्धिं चित्तफलमहत्थमए मंखत्तेणं अपपा

भावेमाणे पुव्वाणुपुव्वि चरमाणे गामाणुगामं दूइजमाणे जेणेव सरवणे सन्निवेसे जेणेव गोबहुलस्स माहणस्स गोसाला तेणेव उवागच्छइ २ ता गोबहुलस्स माहणस्स गोसालाए एगदेसंसि भंडनिकखेवं करेइ भं० २ ता सरवणे सन्निवेसे उच्चनीय-मज्झिमाई कुलाई घरसमुदाणस्स भिक्खायरियाए अडमाणे वसहीए सव्वओ समंता मग्गणगवेसणं करेइ, वसहीए सव्वओ समंता मग्गणगवेसणं करेमाणे अन्नत्थ वसहिं अलभमाणे तस्सेव गोबहुलस्स माहणस्स गोसालाए एगदेसंसि वासावासं उवागए, तए णं सा भद्दा भारिया नवण्हं मासाणं बहुपडिपुच्चाणं अडट्टमाण राईदियाणं वीइक्कंताणं सुकुमाल जाव पडिरूवं दारगं पयाया, तए णं तस्स दारगस्स अम्मापियरो एक्कारसमे दिवसे वीइक्कंते जाव बारसाहे दिवसे अयमेयारूवं गोणं गुण-निप्फन्नं नामधेज्जं करेति-जम्हा णं अम्हं इमे दारए गोबहुलस्स माहणस्स गोसालाए जाए, तं होउ णं अम्हं इमस्स दारगस्स नामधेज्जं गोसाले गोसालेति, तए णं तस्स दारगस्स अम्मापियरो नामधेज्जं करेति गोसालेति, तए णं से गोसाले दारए उम्मुक्कवालभावे विण्णायपरिणयमेते जोव्वणगमणुप्पत्ते सयमेव पाडिएक्कं चित्तफलं करेइ २ ता चित्तफलगहत्थगए मंखत्तणेणं अप्पाणं भावेमाणे विहरइ ॥ ५३९ ॥

तेणं कालेणं तेणं समएणं अहं गोयमा ! तीसं वासाई अगारवासमज्जे वसित्ता अम्मापिईहिं देवत्तगएहिं एवं जहा भावणाए जाव एणं देवदूसमादाय मुंडे भवित्ता अगाराओ अणगारियं पव्वइत्तए, तए णं अहं गोयमा ! पढमं वासं अद्धमासं-अद्धमासेणं खममाणे अट्टियगामं निस्साए पढमं अंतरावासं वासावासं उवागए, दोच्चं वासं मासंमासेणं खममाणे पुव्वाणुपुव्वि चरमाणे गामाणुगामं दूइजमाणे जेणेव रायगिहे नयरे जेणेव नालिंदा बाहिरिया जेणेव तंतुवायसाला तेणेव उवा-गच्छामि ते० २ ता अहापडिरूवं उगगहं ओगिण्हामि अहा० २ ता तंतुवायसालाए एगदेसंसि वासावासं उवागए, तए णं अहं गोयमा ! पढमं मासकखमणं उवसंप-जित्ताणं विहरामि । तए णं से गोसाले मंखलिपुत्ते चित्तफलगहत्थगए मंखत्तणेणं अप्पाणं भावेमाणे पुव्वाणुपुव्वि चरमाणे जाव दूइजमाणे जेणेव रायगिहे नयरे जेणेव नालिंदा बाहिरिया जेणेव तंतुवायसाला तेणेव उवागच्छइ ते० २ ता तंतुवायसालाए एगदेसंसि भंडनिकखेवं करेइ भं० २ ता रायगिहे नयरे उच्चनीय जाव अन्नत्थ कत्थवि वसहिं अलभमाणे तीसे य तंतुवायसालाए एगदेसंसि वासा-वासं उवागए जत्थेव णं अहं गोयमा !, तए णं अहं गोयमा ! पढममासकख-मणपारणंसि तंतुवायसालाओ पडिनिकखामि तंतु० २ ता नालिंदाबाहिरियं मज्झमज्जेणं जेणेव रायगिहे नयरे तेणेव उवागच्छामि २ ता रायगिहे नयरे

उच्चनीय जाव अडमाणे विजयस्स गाहावइस्स गिहं अणुप्पविट्ठे, तए णं से विजए गाहावई ममं एज्जमाणं पासइ २ ता हट्ठतुट्ठं खिप्पामेव आसणाओ अब्भुट्ठेइ खि० २ ता पायपीढाओ पच्चोरुहइ २ ता पाउयाओ ओमुयइ पा० २ ता एगसाडियं उत्तरासंगं करेइ २ ता अंजलिमउलियहतथे ममं सत्तट्ठपयाइं अणुगच्छइ २ ता ममं तिव्वखुत्तो आयाहिणं पयाहिणं करेइ २ ता ममं वंदइ नमंसइ वं० २ ता ममं विउल्लेणं असणपणखाइमसाइमेणं पडिलाभिस्सामित्तिकट्ठ तुट्ठे पडिलाभेमाणेवि तुट्ठे पडिलाभिएवि तुट्ठे, तए णं तस्स विजयस्स गाहावइस्स तेणं दच्चसुद्धेणं दायगसुद्धेणं [तवस्सविउद्धेणं तिकरणसुद्धेणं] पडिगाहगसुद्धेणं तिविहेणं तिकरणसुद्धेणं दाणेणं मए पडिलाभिए समाणे देवाउए निबद्धे संसारे परितीकए गिहंसि य से इमाइं पंच दिव्वाइं पाउब्भूयाइं, तंजहा-वसुहारा वुट्ठा १ दसद्धवचे कुसुमे निवाइए २ चेलुक्खेवे कए ३ आहयाओ देवतुंदुभीओ ४ अंतरावि य णं आगासे अहो दाणे २ त्ति वुट्ठे ५, तए णं रायगिहे नयरे सिंघाडग जाव पहेसु बहुजणो अन्नमन्नस्स एवमाइक्खइ जाव एवं परुवेइ-धन्ने णं देवाणुप्पिया ! विजए गाहावई, कयत्थे णं देवाणुप्पिया ! विजए गाहावई, कयपुत्ते णं देवाणुप्पिया ! विजए गाहावई, कयलक्खणे णं देवाणुप्पिया ! विजए गाहावई, कया णं लोया देवाणुप्पिया ! विजयस्स गाहावइस्स, सुलद्धे णं देवाणुप्पिया ! माणुस्सए जम्मजीवियफले विजयस्स गाहावइस्स जस्स णं गिहंसि तहारूवे साहू साहुरूवे पडिलाभिए समाणे इमाइं पंच दिव्वाइं पाउब्भूयाइं, तंजहा-वसुहारा वुट्ठा जाव अहो दाणे २ वुट्ठे, तं धन्नेणं० कयत्थे० कयपुत्ते० कयलक्खणे० कया णं लोया० सुलद्धे माणुस्सए जम्मजीवियफले विजयस्स गाहावइस्स विजय० २ । तए णं से गोसाळे मंखलिपुत्ते बहुजणस्स अंतिए एयमट्ठं सोच्चा निसम्म समुप्पन्नसंसए समुप्पन्नकोउहल्ले जेणेव विजयस्स गाहावइस्स गिहे तेणेव उवागच्छइ २ ता पासइ विजयस्स गाहावइस्स गिहंसि वसुहारं वुट्ठे दसद्धवचं कुसुमं निवडियं ममं च णं विजयस्स गाहावइस्स गिहाओ पडिनिक्खममाणं पासइ २ ता हट्ठतुट्ठं जेणेव ममं अंतिए तेणेव उवागच्छइ २ ता ममं तिव्वखुत्तो आयाहिणं पयाहिणं करेइ २ ता ममं वंदइ नमंसइ वं० २ ता ममं एवं वयासी-तुब्भे णं भंते ! ममं धम्मायरिया अट्ठन्नं तुब्भं धम्मंतेवासी, तए णं अहं गोयमा । गोसाळस्स मंखलिपुत्तस्स एयमट्ठं नो आढामि नो परिजाणामि तुसिणीए संचिद्धामि, तए णं अहं गोयमा । रायगिहाओ नयराओ पडिनिक्खमामि २ ता पाउब्भूयाइं बाहिरियं मज्झमज्झेणं जेणेव तंतुवायसाला तेणेव उवागच्छामि २ ता दोव मासक्खमणं उवसंपज्जित्तानं विहरामि, तए णं अहं गोयमा । दोव मासक्खमणपारणमं

तंतुवायसालाओ पडिनिक्खमामि तं० २ ता नालंदं बाहिरियं मज्झमज्झेणं जेणेव
 रायगिहे नयरे जाव अडमाणे आणंदस्स गाहावइस्स गिहं अणुप्पविट्ठे, तए णं से
 आणंदे गाहावई ममं एज्जमाणं पासइ २ ता एवं जहेव विजयस्स, नवरं ममं विउलाए
 खज्जगविहीए पडिलाभेस्सामीति तुट्ठे सेसं तं चेव जाव तच्चं मासक्खमणं उवसंप-
 ज्जित्ताणं विहरामि, तए णं अहं गोयमा । तच्चं मासक्खमणपारणगंसि तंतुवायसालाओ
 पडिनिक्खमामि तं० २ ता तहेव जाव अडमाणे सुणंदस्स गाहावइस्स गिहं अणुप्प-
 विट्ठे, तए णं से सु(इंसणे)णंदे गाहावई एवं जहेव विजयगाहावई, नवरं ममं सब्ब-
 कामगुणिणं भोयणेणं पडिलाभेइ सेसं तं चेव जाव चउत्थं मासक्खमणं उवसंपज्जि-
 त्ताणं विहरामि, तीसे णं नालंदाए बाहिरियाए अदूरसामंते एत्थ णं कोल्लाए नामं
 सन्निवेसे होत्था सन्निवेसं वन्नओ, तत्थ णं कोल्लाए संनिवेसे बहुले नामं माहणे
 परिवसइ, अहे जाव अपरिभूए रिउव्वेय जाव सुपरिनिट्ठिए यावि होत्था, तए णं
 से बहुले माहणे कत्तिचउम्मासियपाडिबयंसि विउल्लेणं महुघयसंजुत्तेणं परमण्णेणं
 माहणे आयामेत्था, तए णं अहं गोयमा । चउत्थमासक्खमणपारणगंसि तंतुवाय-
 सालाओ पडिनिक्खमामि २ ता णालंदं बाहिरियं मज्झमज्झेणं निग्गच्छामि २
 ता जेणेव कोल्लाए संनिवेसे तेणेव उवागच्छामि २ ता कोल्लाए सन्निवेसे उच्चनीय
 जाव अडमाणे बहुलस्स माहणस्स गिहं अणुप्पविट्ठे, तए णं से बहुले माहणे ममं
 एज्जमाणं तहेव जाव ममं विउल्लेणं महुघयसंजुत्तेणं परमज्जेणं पडिलाभेस्सामीति
 तुट्ठे सेसं जहा विजयस्स जाव बहुले माहणे बहु० २ । तए णं से गोसाले मंखलिपुत्ते
 ममं तंतुवायसालाए अपासमाणे रायगिहे नयरे सन्निवतरवाहिरियाए ममं सब्बओ
 समंता मग्गणगवैसणं करेइ, ममं कत्थवि सुइं वा खुइं वा पविर्त्ति वा अलभमाणे
 जेणेव तंतुवायसाला तेणेव उवागच्छइ २ ता साडियाओ य पाडियाओ य कुंडियाओ
 य पाहणा(वाणहा)ओ य चित्तफलं च माहणे आयामेइ आयामेता सउत्तरोट्ठं मुंडं
 करेइ स० २ ता तंतुवायसालाओ पडिनिक्खमइ तं० २ ता णालंदं बाहिरियं
 मज्झमज्झेणं निग्गच्छइ निग्गच्छित्ता जेणेव कोल्लागसन्निवेसे तेणेव उवागच्छइ,
 तए णं तस्स कोल्लागस्स संनिवेसस्स बहिया बहुजणो अन्नमज्जस्स एवमाइक्खइ
 जाव परुवेइ-धन्ने णं देवाणुप्पिया ! बहुले माहणे तं चेव जाव जीवियफले बहु-
 लस्स माहणस्स ब० २, तए णं तस्स गोसालस्स मंखलिपुत्तस्स बहुजणस्स
 अंतियं एयमट्ठं सोच्चा निसम्म अयमेयारुवे अज्झत्थिए जाव समुप्पज्जित्था-जारी-
 सिया णं मम धम्मायरियस्स धम्मोवएसगस्स समणस्स भगवओ महावीरस्स इह्ठी
 जु(त्ती)ई जसे बले वीरिए पुरिसक्कारपरकमे लद्धे पत्ते अभिसमन्नागए, नो खलु अत्थि

तारिसिया णं अन्नस्स कस्स(वि)इ तहारुवस्स समणस्स वा माहणस्स वा इह्मी जुई
जाव परक्कमे लद्धे पत्ते अभिसमन्नागए, तं निस्संदिद्धं च णं एत्थ ममं धम्मायरिए
धम्मोवएसए समणे भगवं महावीरे भविस्सतीतिकट्टु कोल्लागसन्निवेसे सन्धिभतरवा-
हिरिए ममं सव्वओ समंता मग्गणगवेसणं करेइ, ममं सव्वओ जाव करेमाणे
कोल्लागसंनिवेसस्स बहिया पणियभूमीए मए सद्धिं अभिसमन्नागए, तए णं से
गोसाले मंखलिपुत्ते हट्टुट्टे ममं तिव्वुत्तो आयाहिणं पयाहिणं जाव
नमंसित्ता एवं वयासी-तुब्भे णं भंते ! ममं धम्मायरिया अहंत्तं तुब्भं अंतेवासी,
तए णं अहं गोयमा ! गोसालस्स मंखलिपुत्तस्स एयमट्ठं पड्डिसुणेमि, तए णं
अहं गोयमा ! गोसालेणं मंखलिपुत्तेणं सद्धिं पणियभूमीए छव्वासाइं लाभं अलाभं
सुहं दुक्खं सक्कारमसक्कारं पच्चणुब्भवमाणे अणिच्चजागरियं विहरित्था ॥ ५४० ॥
तए णं अहं गोयमा ! अन्नया कयाइ पढमसरदकालसमयंसि अप्पवुट्ठिकार्यंसि
गोसालेणं मंखलिपुत्तेणं सद्धिं सिद्धत्थगामाओ नयरओ कुम्ममारगामं नयरं संपट्टिए
विहारए, तस्स णं सिद्धत्थगामस्स नयरस्स कु(म्म)म्ममारगामस्स नयरस्स य
अंतरा एत्थ णं महं एगे तिलथंभए पत्तिए पुप्फिए हरियगरेरिजमाणे सिरीए अईव
२ उवसोभेमाणे २ चिट्ठइ, तए णं से गोसाले मंखलिपुत्ते तं तिलथंभगं पासइ २ ता
ममं वंदइ नमंसइ वं० २ ता एवं वयासी-एस णं भंते ! तिलथंभए किं निप्फजि-
स्सइ नो निप्फजिस्सइ, एए य सत्त तिलपुप्फजीवा उद्दाइत्ता २ कहिं गच्छिहिंति
कहिं उववज्जिहिंति ?, तए णं अहं गोयमा ! गोसालं मंखलिपुत्तं एवं वयासी-
गोसाला ! एस णं तिलथंभए निप्फजिस्सइ नो न निप्फजिस्सइ, एए य सत्त
तिलपुप्फजीवा उद्दाइत्ता २ एयस्स चेव तिलथंभगस्स एगाए तिलसं(गु)गलियाए सत्त
तिला पच्चायाइस्संति, तए णं से गोसाले मंखलिपुत्ते ममं एवं आइक्खमाणस्स
एयमट्ठं नो सद्दइ नो पत्तिइ नो रोएइ, एयमट्ठं असद्दमाणे अपत्तियमाणे
अरोएमाणे ममं पणिहाय अयण्णं सिच्छावाइं भवउत्तिकट्टु ममं अंतियाओ सणियं
२ पच्चोसक्कइ २ ता जेणेव से तिलथंभए तेणेव उवागच्छइ २ ता तं तिलथंभगं
सलेट्टुयायं चेव उप्पाडेइ, २ ता एगंते एडेइ, तक्खणमेत्तं च णं गोयमा ! दिव्वे
अब्भवइलए पाउब्भूए, तए णं से दिव्वे अब्भवइलए खिप्पामेव पत्तणतणा(य)एइ
२ ता खिप्पामेव पविज्जुयाइ २ ता खिप्पामेव नच्चोदगं णाइमट्ठियं पविरलपप्फुसियं
रयरएणुविणासणं दिव्वं सलिलोदगं वासं वासइ, जेणं से तिलथंभए आसत्थे वीसत्थए
पच्चायाए तत्थेव बद्धमूले तत्थेव पट्टिए, ते य सत्त तिलपुप्फजीवा उद्दाइत्ता २ तस्सेव
तिलथंभगस्स एगाए तिलसंगलियाए सत्त तिला पच्चायाया ॥ ५४१ ॥ तए णं

अहं गोयमा ! गोसालेणं मंखलिपुत्तेणं सद्धिं जेणेव कुंडगामे नयरे तेणेव उवा-
गच्छामि, तए णं तस्स कुंडगामस्स नयरस्स बहिया वेसियायणे नामं बालतवस्सी
छट्ठंछट्ठेणं अणिविखत्तेणं तवोक्कमेणं उट्ठं बाहाओ पगिज्झिय २ सूरामिमुहे
आयावणभूमीए आयावेमाणे विहरइ, आइच्चतेयतवियाओ य से छप्पदीओ सव्वओ
समंता अभिनिस्सवन्ति पाणभूयजीवसत्तदयट्ठयाए च णं पडियाओ २ तत्थेव २
भुज्जो २ पच्चोसहइ, तए णं से गोसाले मंखलिपुत्ते वेसियायणं बालतवस्सि पासइ
२ ता ममं अंतियाओ सणियं २ पच्चोसकइ ममं० २ ता जेणेव वेसियायणे बालत-
वस्सी तेणेव उवागच्छइ २ ता वेसियायणं बालतवस्सि एवं वयासी-किं भवं
मुणी मुणिए उदाहु जूयासेज्जायरए ?, तए णं से वेसियायणे बालतवस्सी गोसालस्स
मंखलिपुत्तस्स एयमट्ठं णो आढाइ नो परिजाणाइ तुसिणीए संचिट्ठइ, तए णं से
गोसाले मंखलिपुत्ते वेसियायणं बालतवस्सि दोच्चंपि तच्चंपि एवं वयासी-किं भवं
मुणी मुणिए जाव सेज्जायरए ?, तए णं से वेसियायणे बालतवस्सी गोसालेणं मंखलि-
पुत्तेणं दोच्चंपि तच्चंपि एवं वुत्ते समाणे आसुरते जाव मिसिमिसेमाणे आयावणभूमीओ
पच्चोसहइ आ० २ ता तेयासमुग्घाएणं समोहणइ तेयासमुग्घाएणं समोहणित्ता
सत्तट्ठपयाइ पच्चोसकइ स० २ ता गोसालस्स मंखलिपुत्तस्स वहाए सरीरगंसि तेयं
निसिरइ, तए णं अहं गोयमा ! गोसालस्स मंखलिपुत्तस्स अणुकंपणट्ठयाए वेसियायणस्स
बालतवस्सिस्स सीओसिणतेयलेस्सा-(तेय)पडिसाहरणट्ठयाए एत्थ णं अंतरा अहं
सीयलियं तेयलेस्सं निसिरामि, जाए सा ममं सीयलियाए तेयलेस्साए वेसियायणस्स
बालतवस्सिस्स सीओ(सा-उ)सिणा तेयलेस्सा पडिहया, तए णं से वेसियायणे बालत-
वस्सी ममं सीयलियाए तेयलेस्साए सीओसिणं तेयलेस्सं पडिहयं जाणित्ता गोसालस्स
य मंखलिपुत्तस्स सरीरगस्स किंचि आबाहं वा वाबाहं वा छविच्छेदं वा अकीरमाणं
पासित्ता सीओसिणं तेयलेस्सं पडिसाहरइ सीओ० २ ता ममं एवं वयासी-से
गयमेयं भगवं ! गयगयमेयं भगवं !, तए णं से गोसाले मंखलिपुत्ते ममं एवं वयासी-
किण्णं भंते ! एस जूयासिज्जायरए तुब्भे एवं वयासी-से गयमेयं भगवं ! गयगयमेयं
भगवं !, तए णं अहं गोयमा ! गोसालं मंखलिपुत्तं एवं वयासी-तुमं णं गोसाला !
वेसियायणं बालतवस्सि पास(इ)सि पासित्ता ममं अंतियाओ सणियं २ पच्चोसकसि
जेणेव वेसियायणे बालतवस्सी तेणेव उवागच्छसि ते० २ ता वेसियायणं बालत-
वस्सि एवं वयासी-किं भवं मुणी मुणिए उदाहु जूयासेज्जायरए ?, तए णं से
वेसियायणे बालतवस्सी तव एयमट्ठं नो आढाइ नो परिजाणाइ तुसिणीए संचिट्ठइ,
तए णं तुमं गोसाला ! वेसियायणं बालतवस्सि दोच्चंपि तच्चंपि एवं वयासी-किं भवं

मुणी मुणिए जाव जूयासेजायरए ? , तए णं से वेसियायणे बालतवस्सी तुमं दोचंपि
तचंपि एवं वुत्ते समाणे आसुरते जाव पच्चोसकइ २ ता तव वहाए सरीरगं(सि)
तेयलेस्सं निसिरइ, तए णं अहं गोसाला ! तव अणुकंपणट्टयाए वेसियायणस्स
बालतवस्सिस्स सीयतेयलेस्सापडिसाहरणट्टयाए एत्थ णं अंतरा सीयलियं तेयलेस्सं
निसिरामि जाव पडिहयं जाणिता तव य सरीरगस्स किंचि आवाहं वा वावाहं वा
छविच्छेदं वा अकीरमाणं पासित्ता सीओसिणं तेयलेस्सं पडिसाहरइ सी० २ ता ममं
एवं वयासी-से गयमेयं भगवं ! गयगयमेयं भगवं !, तए णं से गोसाले मंखलिपुत्ते
ममं अंतियाओ एयमट्ठं सोच्चा निसम्म भीए जाव संजायभए ममं वंदइ नमंसइ
ममं वं० २ ता एवं वयासी-कहं भंते ! संखित्तविउलतेयलेस्से भवइ ? , तए णं अहं
गोयमा ! गोसालं मंखलिपुत्तं एवं वयासी-जे णं गोसाला ! एगाए सणहाए कुम्मास-
पिंडियाए एगेण य वियडासएणं छट्ठं छट्ठेणं अणिविखतेणं तवोक्कमेणं उट्ठं बाहाओ
पणिज्झिय २ जाव विहरइ, से णं अंतो छण्हं मासाणं संखित्तविउलतेयलेस्से भवइ,
तए णं से गोसाले मंखलिपुत्ते ममं एयमट्ठं सम्मं विणएणं पडिउणेइ ॥ ५४२ ॥
तए णं अहं गोयमा ! अच्चा कयाइ गोसालेणं मंखलिपुत्तेणं सद्धिं कुम्मागमाओ
नयराओ सिद्धत्थगामं नयरं संपट्टिए विहाराए, जाहे य मो तं देसं हव्वमागया
जत्थ णं से तिलथंभए, तए णं से गोसाले मंखलिपुत्ते ममं एवं वयासी-तु(ज्जे)ब्भे णं
भंते ! तया ममं एवं आइक्खह जाव एवं परुवेह-गोसाला ! एस णं तिलथंभए
निप्फजिस्सइ नो नो निप्पजिस्सइ तं चेव जाव पच्चायाइस्संति तण्णं मिच्छा, इमं
च णं पच्चक्खमेव दीसइ एस णं से तिलथंभए णो निप्फजे अनिप्फजमेव ते य
सत्त तिलपुप्फजीवा उद्वाइत्ता २ नो एयस्स चेव तिलथंभगस्स एगाए तिलसंगलि-
याए सत्त तिला पच्चायाया, तए णं अहं गोयमा ! गोसालं मंखलिपुत्तं एवं वयासी-
तुमं णं गोसाला ! तदा ममं एवं आइक्खमाणस्स जाव एवं परुवेमाणस्स एयमट्ठं
नो सइहसि नो पत्तियसि नो रोयसि, एयमट्ठं असइहमाणे अपत्तियमाणे अरोएमाणे
ममं पणिहा(ए)य अयच्चं मिच्छावाइं भवउत्तिकट्ठु ममं अंतियाओ सणियं २ पच्चोस-
कसि २ ता जेणेव से तिलथंभए तेणेव उवागच्छसि २ ता जाव एगंतमंते एहेसि,
तक्खणमेतं गोसाला ! दिव्वे अब्भवइलए पाउब्भूए, तए णं से दिव्वे अब्भवइलए
खिप्पामेव तं चेव जाव तस्स चेव तिलथंभगस्स एगाए तिलसंगलियाए सत्त तिला
पच्चायाया, तं एस णं गोसाला ! से तिलथंभए निप्फजे णो अनिप्फजमेव, ते य
सत्त तिलपुप्फजीवा उद्वाइत्ता २ एयस्स चेव तिलथंभगस्स एगाए तिलसंगलियाए
सत्त तिला पच्चायाया, एवं खलु गोसाला ! वणस्सइकाइया पउट्टपरिहारं परिहरंति,

तए णं से गोसाले मंखलिपुत्ते ममं एवमाइक्खमाणस्स जाव परुवेमाणस्स एयमट्ठं
 नो सइहइ २ एयमट्ठं असइहमाणे जाव अरोएमाणे जेणेव से तिलथंभए तेणेव उवा-
 गच्छइ २ ता ताओ तिलथंभयाओ तं तिलसंगलियं खुइ खुडिता करयलंसि सत्त
 तिले पप्फोडेइ, तए णं तस्स गोसालस्स मंखलिपुत्तस्स ते सत्त तिले गणमाणस्स
 अयमेयारुवे अज्झत्थिए जाव समुप्पजित्था-एवं खलु सव्वजीवावि पउट्टपरिहारं
 परिहरति, एस णं गोयमा ! गोसालस्स मंखलिपुत्तस्स पउट्टे, एस णं गोयमा !
 गोसालस्स मंखलिपुत्तस्स ममं अंतियाओ आया(ओ)ए अवक्कमणे प० ॥ ५४३ ॥
 तए णं से गोसाले मंखलिपुत्ते एगाए सणहाए कुम्मासपिंडियाए एगेण य वियडा-
 सएणं छट्ठंछट्ठेणं अणिविखत्तेणं तवोक्कम्मेणं उट्ठं बाहाओ पणिज्झय २ जाव विहरइ,
 तए णं से गोसाले मंखलिपुत्ते अंतो छण्हं मासाणं संखित्तविउल्लतेयलेस्से जाए
 ॥ ५४४ ॥ तए णं तस्स गोसालस्स मंखलिपुत्तस्स अन्नया कयाइ इमे छद्दिसाचरा
 अंतियं पाउब्भवित्था तं०-साणे तं चेव सव्वं जाव अजिणे जिणसइं पगासेमाणे
 विहरइ, तं नो खलु गोयमा ! गोसाले मंखलिपुत्ते जिणे जिणप्पलावी जाव जिणसइं
 पगासेमाणे विहरइ, गोसाले णं मंखलिपुत्ते अजिणे जिणप्पलावी जाव पगासेमाणे
 विहरइ, तए णं सा मइइमहालिया मइच्चपरिसा जहा सिवे जाव पडिगया । तए णं
 सावत्थीए नयरीए सिंघाडग जाव बहुजणो अन्नमन्नस्स जाव परुवेइ-जसं देवाणु-
 प्पिया ! गोसाले मंखलिपुत्ते जिणे जिणप्पलावी जाव विहरइ तं णं मिच्छा, समणे
 भगवं महावीरे एवं आइक्खइ जाव परुवेइ-एवं खलु तस्स गोसालस्स मंखलि-
 पुत्तस्स मंखली मामं मंखे पिया होत्था, तए णं तस्स मंखलिस्स एवं तं चेव सव्वं
 भाणियव्वं जाव अजिणे जिणप्पलावी जिणसइं पगासेमाणे विहरइ, तं नो खलु
 गोसाले मंखलिपुत्ते जिणे जिणप्पलावी जाव विहरइ, गोसाले णं मंखलिपुत्ते अजिणे
 जिणप्पलावी जाव विहरइ, समणे भगवं महावीरे जिणे जिणप्पलावी जाव जिणसइं
 पगासेमाणे विहरइ, तए णं से गोसाले मंखलिपुत्ते बहुजणस्स अंतियं एयमट्ठं सोच्चा
 निसम्म आसुत्ते जाव मिसिमिसेमाणे आयावणभूमीओ पच्चोरुहइ आयावणभूमीओ
 पच्चोरुहइत्ता सावत्थिं नयरीं मज्झंमज्झेणं जेणेव हालाहलाए कुंभकारीए कुंभकारावणे
 तेणेव उवागच्छइ उवागच्छित्ता हालाहलाए कुंभकारीए कुंभकारावणंसि आजीविय-
 संघसंपरिवुडे महया अमरिसं वइमाणे एवं वावि विहरइ ॥ ५४५ ॥ तेणं कालेणं तेणं
 समएणं समणस्स भगवओ महावीरस्स अंतेवासी आणंदे नामं थेरे पगइभइए जाव
 विणीए छट्ठंछट्ठेणं अणिविखत्तेणं तवोक्कम्मेणं संजमेणं तवसा अप्पाणं भावेमाणे
 विहरइ, तए णं से आणंदे थेरे छट्ठक्खमणपारणंसि पढमाए पोरिसीए एवं जहा

गोयमसामी तहेव आपुच्छइ, तहेव जाव उच्चनीयमज्झिम जाव अडमाणे हालाहलाए कुंभकारीए कुंभकारावणस्स अदूरसामंतेणं वीईवयइ, तए णं से गोसाले मंखलिपुत्ते आणंदं थेरं हालाहलाए कुंभकारीए कुंभकारावणस्स अदूरसामंतेणं वीईवयमाणं पासइ २ ता एवं वयासी-एहि ताव आणंदा ! इओ एणं महं उवमियं निसामेहि, तए णं से आणंदे थेरे गोसालेणं मंखलिपुत्तेणं एवं वुत्ते समाणे जेणेव हालाहलाए कुंभकारीए कुंभकारावणे जेणेव गोसाले मंखलिपुत्ते तेणेव उवागच्छइ, तए णं से गोसाले मंखलिपुत्ते आणंदं थेरं एवं वयासी-एवं खलु आणंदा ! इओ चिरा(ती)इयाए अद्धाए केइ उच्चावया वणिया अत्यत्थी अत्यलुद्धा अत्यगवेसी अत्यकंखिया अत्य-पिवासिया अत्यगवेसणयाए णाणाविहविउलपणियभंडमायाय सगढीसागडेणं सुबहुं भत्तपाणपत्ययणं गहाय एणं महं अगामियं अणोहियं छिन्नावायं वीहमद्धं अडविं अणुप्पविट्ठा, तए णं तेसिं वणियाणं तीसे अगामियाए अणोहियाए छिन्नावायाए वीहमद्धाए अडवीए किंचि देसं अणुप्पत्ताणं समाणाणं से पुव्वगहिए उदए अणुपुव्वेणं परि(भुज्झ)भुंजेमाणे २ खीणे, तए णं ते वणिया खीणोदगा समाणा तण्हाए परिभ्व-माणा अन्नमन्ने सहावेति अन्न० २ ता एवं वयासी-एवं खलु देवाणुप्पिया ! अम्हं इमीसे अगामियाए जाव अडवीए किंचि देसं अणुप्पत्ताणं समाणाणं से पुव्वगहिए उदए अणुपुव्वेणं परिभुंजेमाणे २ खीणे, तं सेयं खलु देवाणुप्पिया ! अम्हं इमीसे अगामियाए जाव अडवीए उदगस्स सव्वओ समंता मग्गणगवेसणं करेत्तएतिकट्ठु अन्नमन्नस्स अंतिए एयमट्ठं पडिसुणेंति अन्न० २ ता तीसे अगामियाए जाव अडवीए उदगस्स सव्वओ समंता मग्गणगवेसणं करेति, उदगस्स सव्वओ समंता मग्गणगवेसणं करेमाणा एणं महं वणसंडं आसादेति, किण्हं किण्होभासं जाव निकुरं-(रं)वभूयं पासाईयं जाव पडिह्वं, तस्स णं वणसंडस्स बहुमज्झदेसभाए एत्थ णं महेणं वम्मीयं आसादेति, तस्स णं वम्मीयस्स चत्तारि वप्पुओ अब्भुगयाओ अभि-निस(डा)डाओ तिरियं सुसंपगहियाओ अहे पन्नगद्धरूवाओ पन्नगद्धसंठाणसंठियाओ पासाईयाओ जाव पडिह्वओ, तए णं ते वणिया हट्ठतुट्ठा अन्नमन्नं सहावेति अ० २ ता एवं वयासी-एवं खलु देवाणुप्पिया ! अम्हं इमीसे अगामियाए जाव सव्वओ समंता मग्गणगवेसणं करेमाणेहिं इमे वणसंडे आसादिए किण्हे किण्होभासे० इमस्स णं वणसंडस्स बहुमज्झदेसभाए इमे वम्मीए आसादिए, इमस्स णं वम्मीयस्स चत्तारि वप्पुओ अब्भुगयाओ जाव पडिह्वओ, तं सेयं खलु देवाणुप्पिया ! अम्हं इमस्स वम्मीयस्स पढमं वर्षिणं भिन्दित्तए, अवि याई ओरालं उदगरयणं अस्सादे-स्सामो, तए णं ते वणिया अन्नमन्नस्स अंतियं एयमट्ठं पडिसुणेंति २ ता तस्स

वम्मीयस्स पढमं वप्पि भिंदंति, ते णं तत्थ अच्छं पत्थं जच्चं तणुयं फालियवज्जामं उरालं उदगरयणे आसादेंति; तए णं ते वणिग्या हट्टुट्टा पाणियं पिवंति २ ता वाहणाई पज्जेति वा० २ ता भायणाई भरेंति भा० २ ता दोच्चंपि अन्नमन्नं एवं वयासी-एवं खलु देवाणुप्पिया ! अम्हेहिं इमस्स वम्मीयस्स पढमाए वप्पाए भिन्नाए ओराले उदगरयणे अस्सादिए, तं सेयं खलु देवाणुप्पिया ! अम्हं इमस्स वम्मीयस्स दोच्चंपि वप्पि भिंदित्तए, अवि याई एत्थ ओरालं सुवन्नरयणं अस्सादेस्सामो, तए णं ते वणिग्या अन्नमन्नस्स अंतियं एयमट्ठं पडिसुणेंति अ० २ ता तस्स वम्मीयस्स दोच्चंपि वप्पि भिंदंति, ते णं तत्थ अच्छं जच्चं तावणिज्जं महत्थं महग्घं महरिहं ओरालं सुवन्नरयणं अस्सादेंति, तए णं ते वणिग्या हट्टुट्टा भायणाई भरेंति २ ता पवहणाई भरेंति २ ता तच्चंपि अन्नमन्नं एवं वयासी-एवं खलु देवाणुप्पिया ! अम्हे इमस्स वम्मीयस्स पढमाए वप्पाए भिन्नाए ओराले उदगरयणे अस्सादिए, दोच्चाए वप्पाए भिन्नाए ओराले सुवन्नरयणे अस्सादिए, तं सेयं खलु देवाणुप्पिया ! अम्हं इमस्स वम्मीयस्स तच्चंपि व(प्पं)प्पि भिंदित्तए, अवि याई एत्थं ओरालं मणिरयणं अस्सादेस्सामो, तए णं ते वणिग्या अन्नमन्नस्स अंतियं एयमट्ठं पडिसुणेंति अ० २ ता तस्स वम्मीयस्स तच्चंपि वप्पि भिंदंति, ते णं तत्थ विमलं निम्मलं नित्तलं निक्कलं महत्थं महग्घं महरिहं ओरालं मणिरयणं अस्सादेंति, तए णं ते वणिग्या हट्टुट्टा भायणाई भरेंति भा० २ ता पवहणाई भरेंति २ ता चउत्थंपि अन्नमन्नं एवं वयासी-एवं खलु देवाणुप्पिया ! अम्हे इमस्स वम्मीयस्स पढमाए वप्पाए भिन्नाए ओराले उदगरयणे अस्सादिए, दोच्चाए वप्पाए भिन्नाए ओराले सुवन्नरयणे अस्सादिए, तच्चाए वप्पाए भिन्नाए ओराले मणिरयणे अस्सादिए, तं सेयं खलु देवाणुप्पिया ! अम्हं इमस्स वम्मीयस्स चउत्थंपि वप्पि भिंदित्तए, अवि याई इत्थं उत्तमं महग्घं महत्थं महरिहं ओरालं वइररयणं अस्सादेस्सामो, तए णं तेसिं वणिग्याणं एगे वणिए हियकामए सुहकामए पत्थकामए आणुकंपिए निस्सेयसिए हियसुहनिस्सेसकामए ते वणिए एवं वयासी-एवं खलु देवाणुप्पिया ! अम्हे इमस्स वम्मीयस्स पढमाए वप्पाए भिन्नाए ओराले उदगरयणे जाव तच्चाए वप्पाए भिन्नाए ओराले मणिरयणे अस्सादिए, तं होउ अलाहि पज्जतं णे एसा चउत्थी वप्पा मा भिज्जउ, चउत्थी णं वप्पा सउवसग्गा यावि हो(त्था)ज्जा, तए णं ते वणिग्या तस्स वणिग्यस्स हियकामगस्स सुहकामगस्स जाव हियसुहनिस्सेसकामगस्स एवमाइक्खमाणस्स जाव पळवेमाणस्स एयमट्ठं नो सइहंति जाव नो रोयंति, एयमट्ठं असइहमाणस्स जाव अरोएमाणा तस्स वम्मीयस्स चउत्थंपि वप्पि भिंदंति, ते णं तत्थ उग्गविस्सं

चंडविसं घोरविसं महाविसं अइकायमहाकायं मसिमूसाकालगं नयणविसरोसपुत्रं
 अंजणपुंजनगरप्पगासं रत्तच्छं जमलजुयलचंचलचलंतजीहं धरणि तलवेणिभूयं
 उक्कडफुडकुडिलजडुलकक्खडविकडफडाडोवकरणदच्छं लोहागरधम्ममाणधमधमे-
 तघोसं अणागलियचंडतिव्वरोसं समुहिं तुरियं चवलं धमंतं दिट्ठिविसं सप्पं संघट्ठेति,
 तए णं से दिट्ठिविसे सप्पे तेहिं वणिएहिं संघट्ठिए समाणे आसुस्ते जाव मिसिमिसे-
 माणे सणियं २ उट्ठेइ २ ता सरसरसरस्स वम्मीयस्स सिहरतलं दुरुहइ सि० २
 ता आइच्चं णिज्झाइ आ० २ ता ते वणिए अणिमिसाए दिट्ठीए सव्वओ समंता
 समभिलोएइ, तए णं ते वणिथा तेणं दिट्ठिविसेणं सप्पेणं अणिमिसाए दिट्ठीए
 सव्वओ समंता समभिलोइया समाणा खिप्पामेव सभंडमत्तोवगरणमायाए एगाहच्चं
 कूडाहच्चं भासरासी कया यावि होत्था, तत्थ णं जे से वणिए तेसिं वणियाणं हिय-
 कामए जाव हियसुहन्निस्सेसकामए से णं अणुकं(प)पियाए देवयाए सभंडमत्तोवगर-
 णमायाए नियगं नयरं साहिए, एवामेव आणंदा ! तववि धम्मायरिएणं धम्मोवए-
 सएणं समणेणं नायपुत्तेणं ओराले परियाए अस्सादिए, ओराला कित्तिवजसइसिलोगा
 सदेवमणुयासुरे लोए पुव्वंति गुवंति थुवंति इति खलु समणे भगवं महावीरे
 इति० २, तं जइ मे से अज्ज किंचिवि वदइ, तो णं तवेणं तेएणं एगाहच्चं
 कूडाहच्चं भासरासिं करेमि जइहा वा वालेणं ते वणिथा, तुमं च णं आणंदा !
 सारक्खामि संगोवयामि जइहा वा से वणिए तेसिं वणिथाणं हियकामए जाव निस्सेस-
 कामए अणुकंपियाए देवयाए सभंडमत्तोव० जाव साहिए, तं गच्छह णं तुमं
 आणंदा ! तव धम्मायरियस्स धम्मोवएसगस्स समणस्स नायपुत्तस्स एयमट्ठं
 परिकहेहि । तए णं से आणंदे थेरे गोसालेणं मंखलिपुत्तेणं एवं वुत्ते समाणे भीए
 जाव संजायभए गोसालस्स मंखलिपुत्तस्स अंतियाओ हालाहलाए कुंभकारीए
 कुंभकारावणाओ पडिनिक्खमइ २ ता सिग्घं तुरियं सावत्थिं नयरिं मज्झिमज्झेणं
 निग्गच्छइ २ ता जेणेव कोट्टए उज्जाणे जेणेव समणे भगवं महावीरे तेणेव उवा-
 गच्छइ २ ता समणं भगवं महावीरं तिक्खुत्तो आयाहिणं पयाहिणं करेइ २ ता वंदइ
 नमंसइ वं० २ ता एवं वयासी-एवं खलु अहं भंते ! छट्ठक्खमणपारणगंसि तुब्भेहिं
 अब्भणुन्नाए समाणे सावत्थीए नयरीए उच्चनीय जाव अडमाणे हालाहलाए
 कुंभकारीए जाव वीईवयामि, तए णं गोसाले मंखलिपुत्ते ममं हालाहलाए जाव
 पासिता एवं वयासी-एहि ताव आणंदा ! इओ एगं महं उवमियं निसामेहि, तए
 णं अहं गोसालेणं मंखलिपुत्तेणं एवं वुत्ते समाणे जेणेव हालाहलाए कुंभकारीए
 कुंभकारावणे जेणेव गोसाले मंखलिपुत्ते तेणेव उवागच्छामि, तए णं से गोसाले

मंखलिपुत्ते ममं एवं वयासी-एवं खलु आणंदा ! इओ चिराईयाए अद्दाए केइ उच्चावया
चणिया एवं तं चेव सव्वं निरवसेसं भाणियव्वं जाव नियगं नयरं साहिए तं गच्छ
णं तुमं आणंदा ! तव धम्मयारियस्स धम्मोवएसगस्स जाव परिकहेहि ॥ ५४६ ॥
तं पभू णं भंते ! गोसाले मंखलिपुत्ते तवेणं तेएणं एगाहच्चं कूडाहच्चं भासरासिं
करेतए, विसए णं भंते ! गोसालस्स मंखलिपुत्तस्स जाव करेतए; समत्थे णं भंते !
गोसाले मंखलिपुत्ते तवेणं जाव करेतए ? पभू णं आणंदा ! गोसाले मंखलिपुत्ते तवेणं
जाव करेतए, विसए णं आणंदा ! गोसाले जाव करेतए, समत्थे णं आणंदा ! गोसाले
जाव करेतए, नो चेव णं अरिहंते भगवंते, परियावणियं पुण करेज्जा, जावइएणं
आणंदा ! गोसालस्स मंखलिपुत्तस्स तवतेए एत्तो अणंतगुणविसिद्धतराए चेव तवतेए
अणगाराणं भगवंताणं, खंतिखमा पुण अणगारा भगवंतो, जावइएणं आणंदा !
अणगाराणं भगवंताणं तवतेए एत्तो अणंतगुणविसिद्धतराए चेव तवतेए थेराणं
भगवंताणं, खंतिखमा पुण थेरा भगवंतो, जावइएणं आणंदा ! थेराणं भगवंताणं
तवतेए एत्तो अणंतगुणविसिद्धितराए चेव तवतेए अरिहंताणं भगवंताणं, खंति-
खमा पुण अरहंता भगवंतो, तं पभू णं आणंदा ! गोसाले मंखलिपुत्ते तवेणं
तेएणं जाव करेतए, विसए णं आणंदा ! जाव करेतए, समत्थे णं आणंदा ! जाव
करेतए, नो चेव णं अरिहंते भगवंते, पारियावणियं पुण करेज्जा ॥ ५४७ ॥ तं
गच्छ णं तुमं आणंदा ! गोयमाईणं समणाणं निग्गंथाणं एयमट्ठं परिकहेहि-मा णं
अज्जो ! तुब्भं केइ गोसालं मंखलिपुत्तं धम्मियाए पडिचोयणाए पडिचोएउ,
धम्मियाए पडिसारणाए पडिसारेउ, धम्मिएणं पडोयारेणं पडोयारेउ, गोसाले णं
मंखलिपुत्ते समणेहिं निग्गंथेहिं मिच्छं विप्पडिवन्ने, तए णं से आणंदे थेरे समणेणं
भगवया महावीरेणं एवं वुत्ते समाणे समणं भगवं महावीरं वंदइ नमंसइ वं २ ता
जेणेव गोयमाइसमणा निग्गंथा तेणेव उवागच्छइ २ ता गोयमाइसमणे निग्गंथे
आमंतेइ २ ता एवं वयासी-एवं खलु अज्जो ! छट्ठक्खमणपारणगंसि समणेणं भगवया
महावीरेणं अब्भणुत्ताए समाणे सावत्थीए नयरीए उच्चनीय तं चेव सव्वं जाव
णायपुत्तस्स एयमट्ठं परिकहेहि, तं मा णं अज्जो ! तुब्भं केइ गोसालं मंखलिपुत्तं
धम्मियाए पडिचोयणाए पडिचोएउ जाव मिच्छं विप्पडिवन्ने ॥ ५४८ ॥ जावं
च णं आणंदे थेरे गोयमाईणं समणाणं निग्गंथाणं एयमट्ठं परिकहेइ तावं च णं से
गोसाले मंखलिपुत्ते हालाहलाए कुंभकारीए कुंभकारावणाओ पडिनिक्खमइ पडिनि-
क्खमिता आजीवियसंघसंपरिवुडे महया अमरिसं वहमांणे सिग्गं तुरियं जाव सावत्थि
नयरिं मज्झंमज्जेणं निग्गच्छइ २ ता जेणेव कोट्टए उज्जाणे जेणेव समणे भगवं

महावीरे तेणेव उवागच्छइ ते० २ ता समणस्स भगवओ महावीरस्स अदूरसामंते
 ठिच्चा समणं भगवं महावीरं एवं वयासी-सुद्धं णं आउसो । कासवा । ममं एवं
 वयासी साहु णं आउसो । कासवा । ममं एवं वयासी-गोसाले मंखलिपुत्ते ममं
 धम्मंतेवासी गोसाले० २, जे णं गोसाले मंखलिपुत्ते तव धम्मंतेवासी से णं सुक्के
 सुक्काभिजाइए भवित्ता कालमासे कालं किच्चा अन्नयरेसु देवलोएसु देवताए उववजे,
 अहण्णं उदाई नामं कुंडियायणीए अज्जुणस्स गोयमपुत्तस्स सरीरगं विप्पजहामि
 अ० २ ता गोसालस्स मंखलिपुत्तस्स सरीरगं अणुप्पविसामि गो० २ ता इमं सत्तमं
 पउट्टपरिहारं परिहरामि, जेवि आ(या)इं आउसो । कासवा । अमहं समयंसि केइ
 सिज्झिअसु वा सिज्झंति वा सिज्झिअस्संति वा सव्वे ते चउरासीइ महाकप्पसयसह-
 स्साइं सत्त दिव्वे सत्त संजुहे सत्त सण्णिगब्बे सत्त पउट्टपरिहारे पंच कम्मणि-
 सयसहस्साइं सट्ठि च सहस्साइं छब्ब सए तिञ्चि य कम्मसे अणुपुव्वेणं खवइत्ता
 तओ पच्छा सिज्झंति बुज्झंति मुच्चंति परिनिव्वाइंति सव्वदुक्खाणमंतं करिं सु वा
 करंति वा करिस्संति वा, से जहा वा गंगा महानइ जओ पवूडा जहिं वा पज्जुव-
 त्थिया एस णं अद्धपंचजोयणसयाइं आयामेणं अद्धजोयणं विक्खंभेणं पंच धणुहसयाइं
 उव्वेहेणं एएणं गंगापमाणेणं सत्त गंगाओ सा एगा महागंगा, सत्त महागंगाओ सा
 एगा साईणगंगा, सत्त साईणगंगाओ सा एगा मच्चुगंगा, सत्त मच्चुगंगाओ सा एगा
 लोहियगंगा, सत्त लोहियगंगाओ सा एगा आवईगंगा, सत्त आवईगंगाओ सा एगा
 परमावई, एवामेव सपुव्वावरेणं एणं गंगासयसहस्सं सत्तरस य सहस्सा छच्चगुणपज-
 गंगासया भवंतीति मक्खाया, तासिं दुविहे उद्दारे पण्णत्ते, तंजहा-सुहुमबोदिकलेवरे
 चेव बायरबोदिकलेवरे चेव, तत्थ णं जे से सुहुमबोदिकलेवरे से ठप्पे, तत्थ णं जे
 से बायरबोदिकलेवरे तओ णं वाससए २ गए २ एगमेणं गंगावाळुयं अवहाय
 जावइएणं कालेणं से कोट्टे खीणे णी(र)रेणं निळेवे निट्टिए भवइ, सेतं सरे सरप्पमाणे,
 एएणं सरप्पमाणेणं तिञ्चि सरसयसाहस्सीओ से एगे महाकप्पे, चउरासीइ महाकप्प-
 सयसहस्साइं से एगे महामाणसे, अणंताओ संजुहाओ जीवे चयं चइत्ता उव्वरिल्ले
 माणसे संजुहे देवे उव्वज्जइ, से णं तत्थ दिव्वाइं भोगभोगाइं भुंजमाणे विहरइ
 विहरित्ता ताओ देवलोगाओ आउक्खएणं भवक्खएणं ठिइक्खएणं अणंतरं चयं
 चइत्ता पढमे सन्निगब्बे जीवे पच्चायाइ, से णं तओहिंतो अणंतरं उव्वट्ठित्ता मज्झिल्ले
 माणसे संजुहे देवे उव्वज्जइ, से णं तत्थ दिव्वाइं भोगभोगाइं जाव विहरित्ता ताओ
 देवलोगाओ आउक्खएणं ३ जाव चइत्ता दोबे सन्निगब्बे जीवे पच्चायाइ, से णं
 तओहिंतो अणंतरं उव्वट्ठित्ता हेट्ठिल्ले माणसे संजुहे देवे उव्वज्जइ, से णं तत्थ

दिव्वाइं जाव चइत्ता तच्चे सन्निगम्भे जीवे पच्चायाइ, से णं तओहिंतो जाव उव्व-
 ट्ठित्ता उवरिल्ले माणुसुत्तरे संजुहे देवे उव्वज्जइ, से णं तत्थ दिव्वाइं भोग जाव
 चइत्ता चउत्थे सन्निगम्भे जीवे पच्चायाइ, से णं तओहिंतो अणंतंरं उव्वट्ठित्ता
 मज्झिल्ले माणुसुत्तरे संजुहे देवे उव्वज्जइ, से णं तत्थ दिव्वाइं भोग जाव चइत्ता
 पंचमे सन्निगम्भे जीवे पच्चायाइ, से णं तओहिंतो अणंतंरं उव्वट्ठित्ता हिट्ठिल्ले माणु-
 सुत्तरे संजुहे देवे उव्वज्जइ, से णं तत्थ दिव्वाइं भोग जाव चइत्ता छट्ठे सन्निगम्भे
 जीवे पच्चायाइ, से णं तओहिंतो अणंतंरं उव्वट्ठित्ता बंभलोगे नामं से कप्पे पञ्चत्ते,
 पाईणपडीणायए उदीणदाहिणविच्छिन्ने जहा ठाणपए जाव पंच वडेंसगा प०,
 तंजहा-असोगवडेंसए जाव पडिरुवा, से णं तत्थ देवे उव्वज्जइ, से णं तत्थ दस
 सागरोवमाइं दिव्वाइं भोग जाव चइत्ता सत्तमे सन्निगम्भे जीवे पच्चायाइ, से ण
 तत्थ नवण्हं मासाणं बहुपडिपुजाणं अद्धट्ठमाण जाव वीइक्कंताणं सुकुमालगमहलए
 मिउकुंडलकुंचियकेसए मट्ठगंडतलकन्नपीढए देवकुमारस(म)प्पमए दारए पया(ए)-
 यइ, से णं अहं कासवा ! ते (तए)णं अहं आउसो ! कासवा ! कोमारियाए पव्वजाए
 कोमारएणं बंभचेरवासेणं अविद्धकन्नए चेव संखाणं पडिल्लमामि सं० २ ता इमे सत्त
 पउट्टपरिहारे परिहरामि, तंजहा-एणेज्जगस्स, मल्लरामस्स, मंडियस्स, रोहस्स, भार-
 द्वाइस्स, अज्जुणस्स गोयमपुत्तस्स, गोसालस्स मंखलिपुत्तस्स, तत्थ णं जे से पढमे
 पउट्टपरिहारे से णं रायणिहस्स नयरस्स बहिया मंडियकुच्छिसि उज्जाणंसि उदा(यणे)-
 इस्स कुंडियायणस्स सरीरं विप्पजहामि उदा० २ ता एणेज्जगस्स सरीरं अणुप्प-
 विसामि एणे० २ ता बावीसं वासाइं पढमं पउट्टपरिहारं परिहरामि, तत्थ णं जे
 से दोच्चे पउट्टपरिहारे से णं उहंडपुरस्स नयरस्स बहिया चंदोयरणंसि उज्जाणंसि
 एणेज्जगस्स सरीरं विप्पजहामि २ ता मल्लरामस्स सरीरं अणुप्पविसामि
 मल्ल० २ ता एगवीसं वासाइं दोच्चं पउट्टपरिहारं परिहरामि, तत्थ णं जे से तच्चे
 पउट्टपरिहारे से णं चंपाए नयरीए बहिया अंगमंदिरंमि उज्जाणंसि मल्लरामस्स
 सरीरं विप्पजहामि मल्ल० २ ता मंडियस्स सरीरं अणुप्पविसामि मंडि० २ ता
 वीसं वासाइं तच्चं पउट्टपरिहारं परिहरामि, तत्थ णं जे से चउत्थे पउट्टपरिहारे से
 णं वाणारसीए नयरीए बहिया काममहावर्णंसि उज्जाणंसि मंडियस्स सरीरं विप्प-
 जहामि मंडि० २ ता रोहस्स सरीरं अणुप्पविसामि रोह० २ ता एगणवीसं
 वासाइं चउत्थं पउट्टपरिहारं परिहरामि, तत्थ णं जे से पंचमे पउट्टपरिहारे से
 णं आलंभियाए नयरीए बहिया पत्तकालांसि उज्जाणंसि रोहस्स सरीरं विप्पज-
 हामि रोह० २ ता भारद्वाइस्स सरीरं अणुप्पविसामि भा० २ ता अट्ठारस्स

वासार्हं पंचमं पड्डपरिहारं परिहरामि, तत्थ णं जे से छट्ठे पड्डपरिहारे से णं वेसालीए नयरीए बहिया कों(कं)डियायणंसि उज्जाणंसि भारद्वाजस्स सरीरगं विप्पज-
हामि भा० २ ता अज्जुणगस्स गोयमपुत्तस्स सरीरगं अणुप्पविसामि अ० २ ता
सत्तरस वासाईं छट्ठं पड्डपरिहारं परिहरामि, तत्थ णं जे से सत्तमे पड्डपरिहारे से
णं इहेव सावत्थीए नयरीए हालाहलाए कुंभकारीए कुंभकारावणंसि अज्जुणगस्स
गोयमपुत्तस्स सरीरगं विप्पजहामि अज्जुणगस्स० २ ता गोसालस्स मंखलिपुत्तस्स
सरीरगं अलं थिरं धुवं धारणिज्जं सीयसहं उण्हसहं खुहासहं विविहदंसमसग-
परीसहोवसगसहं थिरसंघयणंतिक्कहु तं अणुप्पविसामि २ ता तं सोलस
वासाईं इमं सत्तमं पड्डपरिहारं परिहरामि, एवामेव आउसो ! कासवा !
एणेणं तेतीसेणं वाससएणं सत्त पड्डपरिहारा परिहरिया भवंतीति मक्खाया,
तं सुट्ठु णं आउसो ! कासवा ! ममं एवं वयासी साहु णं आउसो ! कासवा !
ममं एवं वयासी-गोसाले मंखलिपुत्ते ममं धम्मंतेवासिति गोसाले० २ ॥ ५४९ ॥
तए णं समणे भगवं महावीरे गोसालं मंखलिपुत्तं एवं वयासी-गोसाला ! से जहा-
नामए तेणए सिया गामेळएहिं परब्भ(व)माणे २ कत्थ(वि)इ ग(त्तं)हुं वा दरिं वा दुग्गं
वा निज्जं वा पव्वयं वा विसमं वा अणस्सादेमाणे एणेणं महं उच्चालोमेण वा सणलोमेण
वा कप्पासपम्हेण वा तणसूएण वा अत्ताणं आवरेत्ताणं चिट्ठेज्जा, से णं अणावरिए
आवरियमिति अप्पाणं मज्झइ, अपच्छण्णे य पच्छण्णमिति अप्पाणं मज्झइ, अ(ण)णि-
लुक्के णिलक्कमिति अप्पाणं मज्झइ, अपलायए पलायमिति अप्पाणं मज्झइ, एवामेव तुमंपि
गोसाला ! अण्णे संते अन्नमिति अप्पाणं उपलभसि, तं मा एवं गोसाला ! नारिहसि
गोसाला ! सच्चेव ते सा छाया नो अन्ना ॥ ५५० ॥ तए णं से गोसाले मंखलिपुत्ते
समणेणं भगवया महावीरेणं एवं वुत्ते समाणे आसुरत्ते ५ समणं भगवं महावीरं
उच्चावयाहिं आउसणाहिं आउसइ उच्चा० २ ता उच्चावयाहिं उदंसणाहिं उदंसइ
उदंसेता उच्चावयाहिं निब्भंछणाहिं निब्भंछेइ उ० २ ता उच्चावयाहिं निच्छोडणाहिं
निच्छोडेइ उ० २ ता एवं वयासी-नट्टेसि कयाइ, विणट्टेसि कयाइ, भट्टेसि कयाइ,
नट्टविणट्टभट्टेसि कयाइ, अज्ज न भवसि नाहि ते ममाहिंतो सुहमत्थि ॥ ५५१ ॥
तेणं कालेणं तेणं समएणं समणस्स भगवओ महावीरस्स अंतेवासी पाईणजाणवए
सव्वाणुभूई णामं अणगारे पगइभइए जाव विणीए धम्मायरियाणुरागेणं एयमट्ठे
असइहमाणे उट्ठाए उट्ठेइ उ० २ ता जेणेव गोसाले मंखलिपुत्ते तेणेव उवागच्छइ २
ता गोसालं मंखलिपुत्तं एवं वयासी-जेवि ताव गोसाला ! त्हास्सस्स सणस्स वा
माहणस्स वा अंतियं एगमवि आ(य)रियं धम्मियं सुवयणं निसामेइ सेवि ताव तं

वंदइ नमंसइ जाव कळणं मंगलं देवयं चेइयं पञ्जुवासइ, किमंग पुण तुमं गोसाला !
 भगवया चेव पव्वाविए, भगवया चेव सुंडाविए, भगवया चेव सेहाविए, भगवया
 चेव सिक्खाविए, भगवया चेव बहुस्सईकए, भगवओ चेव मिच्छं विप्पडिव्जे, तं
 मा एवं गोसाला ! नारिहसि गोसाला ! सच्चैव ते सा छाया नो अन्ना, तए णं से
 गोसाले मंखलिपुत्ते सव्वाणुभूइणामेणं अणगारेणं एवं वुत्ते समाणे आसुरते
 ५ सव्वाणुभूइं अणगारं तवेणं तेएणं एगाहच्चं कूडाहच्चं जाव भासरासिं करेइ, तए
 णं से गोसाले मंखलिपुत्ते सव्वाणुभूइं अणगारं तवेणं तेएणं एगाहच्चं कूडाहच्चं जाव
 भासरासिं करेत्ता दोच्चंपि समणं भगवं महावीरं उच्चावयाहिं आउसणाहिं आउसइ
 जाव सुहं नत्थि । तेणं कालेणं तेणं समएणं समणस्स भगवओ महावीरस्स
 अंतैवासी कोसलजाणवए सुणक्खत्ते णामं अणगारे पगइभइए जाव विणीए धम्माय रि-
 याणुरागेणं जहा सव्वाणुभूइं तहेव जाव सच्चैव ते सा छाया नो अन्ना । तए णं से
 गोसाले मंखलिपुत्ते सुणक्खत्तेणं अणगारेणं एवं वुत्ते समाणे आसुरते ५ सुनक्खत्तं
 अणगारं तवेणं तेएणं परितावेइ, तए णं से सुनक्खत्ते अणगारे गोसालेणं मंखलि-
 पुत्तेणं तवेणं तेएणं परिताविए समाणे जेणेव समणे भगवं महावीरे तेणेव उवागच्छइ
 २ ता समणं भगवं महावीरं तिक्खुत्तो आयाहिणं पयाहिणं करेइ २ ता वंदइ
 नमंसइ वं० २ ता सयमेव पंच महव्वयाइं आरुहेइ स० २ ता समणा य समणीओ य
 खामेइ सस० २ ता आलोइयपडिक्कंते समाहिपत्ते आणुपुव्वीए कालगए । तए णं से
 गोसाले मंखलिपुत्ते सुनक्खत्तं अणगारं तवेणं तेएणं परितावेत्ता तच्चंपि समणं
 भगवं महावीरं उच्चावयाहिं आउसणाहिं आउसइ सव्वं तं चेव जाव सुहं नत्थि ।
 तए णं समणे भगवं महावीरे गोसालं मंखलिपुत्तं एवं वयासी-जेवि ताव गोसाला !
 तहाह्वस्स समणस्स वा माहणस्स वा तं चेव जाव पञ्जुवासइ, किमंग पुण
 गोसाला ! तुमं मए चेव पव्वाविए जाव मए चेव बहुस्सईकए ममं चेव मिच्छं
 विप्पडिव्जे, तं मा एवं गोसाला ! जाव नो अन्ना, तए णं से गोसाले मंखलिपुत्ते
 समणेणं भगवया महावीरेणं एवं वुत्ते समाणे आसुरते ५ तेयासमुग्वाएणं समोहणइ
 तेया० २ ता सत्तट्ठपयाइं पच्चोसकइ २ ता समणस्स भगवओ महावीरस्स वहाए
 सरीरगंसि तेयं निसिरइ, से जहानामए वाउक्कलियाइ वा वायमंडलियाइ वा सेलंसि
 वा कुइंसि वा थंभंसि वा थूमंसि वा आवरिज्जमा(णा)णी वा निवारिज्जमाणी वा
 सा णं तत्थ णो कमइ नो पक्कमइ, एवामेव गोसालस्सवि मंखलिपुत्तस्स तवे तेए
 समणस्स भगवओ महावीरस्स वहाए सरीरगंसि निसिठ्ठे समाणे से णं तत्थ नो
 कम्मइ नो पक्कमइ, अंचियंचिं करेइ अंचि० २ ता आयाहिणं पयाहिणं करेइ आ०

२ ता उड्डं वेहासं उप्पइए, से णं तओ पडिहए पडिनियत्ते समाणे त(स्से)मेव गोसालस्स मंखलिपुत्तस्स सरीरगं अणुडहमाणे २ अंतो २ अणुप्पविट्ठे, तए णं से गोसाले मंखलिपुत्ते सएणं तेएणं अच्चाइट्ठे समाणे समणं भगवं महावीरं एवं वयासी-
तुमं णं आउसो ! कासवा ! ममं तवेणं तेएणं अच्चाइट्ठे समाणे अंतो छहं मासाणं पित्तज्जरपरिगयसरीरे दाहवक्कंतीए छउमत्थे चैव कालं करिस्ससि, तए णं समणे भगवं महावीरे गोसालं मंखलिपुत्तं एवं वयासी-नो खलु अहं गोसाला ! तव तवेणं तेएणं अच्चाइट्ठे समाणे अंतो छहं मासाणं जाव कालं करिस्सामि, अहं अच्चाइं सोल-
सवासाइं जिणे सुहत्थी विहरिस्सामि, तुमं णं गोसाला ! अप्पणा चैव सएणं तवेणं तेएणं अच्चाइट्ठे समाणे अंतो सत्तरत्तस्स पित्तज्जरपरिगयसरीरे जाव छउमत्थे चैव कालं करिस्ससि, तए णं सावत्थीए नयरीए सिंघाडग जाव पहेसु बहुजणो अन्नमन्नस्स एवमाइक्खइ जाव एवं परूवेइ-एवं खलु देवाणुप्पिया ! सावत्थीए नयरीए बहिया कोट्टए उज्जाणे दुवे जिणा संलवंति, एगे एवं वदंति-तुमं पुर्वि कालं करिस्ससि एगे एवं वदंति तुमं पुर्वि कालं करिस्ससि, तत्थ णं के पुणं सम्मावाई के पुणं मिच्छावाई ?
तत्थ णं जे से अहप्पहाणे जणे से वदइ-समणे भगवं महावीरे सम्मावाई गोसाले मंखलिपुत्ते मिच्छावाई, अज्जोत्ति समणे भगवं महावीरे समणे निग्गंथे आमंतेत्ता एवं वयासी-अज्जो ! से जहानामए तणरासीइ वा कट्टरासीइ वा पत्तरासीइ वा तयारासीइ वा तुसरासीइ वा भुसरासीइ वा गोमयरासीइ वा अवकरासीइ वा अगणिज्झामिए अगणिज्झूसिए अगणिपरिणामिए हयतेए गयतेए नट्टतेए भट्टतेए लुत्ततेए विणट्टतेए जाव एवामेव गोसाले मंखलिपुत्ते ममं वहाए सरीरगंसि तेयं निसिरित्ता हयतेए गयतेए जाव विणट्टतेए जाए, तं छंदेणं अज्जो ! तुब्भे गोसालं मंखलिपुत्तं धम्मियाए पडिचोयणाए पडिचोएह धम्मि० २ ता धम्मियाए पडिसा-
रणाए पडिसारेह धम्मि० २ ता धम्मिएणं पडोयारेणं पडोयारेह धम्मि० २ ता अट्ठेहि य हेऊहि य पसिणेहि य त्तागरणेहि य कारणेहि य निप्पट्टपसिणवागरणं करेइ, तए णं ते समणा निग्गंथा समणेणं भगवया महावीरेणं एवं वुत्ता समाणा समणं भगवं महावीरं वंदंति नमंसंति वंदित्ता नमंसित्ता जेणेव गोसाले मंखलिपुत्ते तेणेव उवागच्छंति तेणेव उवागच्छित्ता गोसालं मंखलिपुत्तं धम्मियाए पडिचोयणाए पडिचोएंति ध० २ ता धम्मियाए पडिसा(ह)रणाए पडिसारेंति ध० २ ता धम्मिएणं पडोयारेणं पडोयारेंति ध० २ ता अट्ठेहि य हेऊहि य कारणेहि य जाव वागरणं क(वाग)रेंति । तए णं से गोसाले मंखलिपुत्ते समणेहि निग्गंथेहि धम्मियाए पडिचोयणाए पडिचोइज्झमाणे जाव निप्पट्टपसिणवागरणं कीरमाणे आसुस्ते जाव

मिसिमिसेमाणे नो संचाएइ समणां निगंथाणं सरीरगस्स किंचि आबाहं वा
चाबाहं वा उप्पाएत्तए छविच्छेदं वा करेत्तए, तए णं ते आजीविया थेरा गोसालं
मंखलिपुत्तं समणेहिं निगंथेहिं धम्मियाए पडिचोयणाए पडिचोएज्जमाणं धम्मियाए
पडिसारणाए पडिसारिज्जमाणं धम्मिएणं पडोयारेणं पडोयारिज्जमाणं अट्ठेहि य
हेऊहि य जाव कीरमाणं आसुरत्तं जाव मिसिमिसेमाणं समणां निगंथाणं सरीर-
गस्स किंचि आबाहं वा चाबाहं वा छविच्छेदं वा अकरेमाणं पासंति २ ता गोसा-
लस्स मंखलिपुत्तस्स अंतियाओ आयाए अवक्कमंति आयाए अवक्कमिता जेणेव
समणे भगवं महावीरे तेणेव उवागच्छंति ते० २ ता समणं भगवं महावीरं तिक्खुत्तो
आयाहिणं पयाहिणं० वंदंति नमंसंति वं० २ ता समणं भगवं महावीरं उवसंपज्जिताणं
विहरंति, अत्थेगइया आजीविया थेरा गोसालं चेव मंखलिपुत्तं उवसंपज्जिताणं
विहरंति । तए णं से गोसाले मंखलिपुत्ते जस्सट्ठाए हव्वमागए तमट्ठं असाहेमाणे
रुंदाई पलोएमाणे वीहुण्हाई नी(स)सासमाणे दाढियाए लोमा(ई)ए लुंचमाणे अवहुं
कंइयमाणे पुयलिं पप्फोडेमाणे हत्थे विणिद्धुणमाणे दोहिवि पाएहिं भूमिं कोट्टेमाणे
हाहा अहो ! हओऽहमस्सीतिकट्ठु समणस्स भगवओ महावीरस्स अंतियाओ
कोट्टयाओ उज्जाणाओ पडिनिक्खमइ २ ता जेणेव सावत्थी नयरी जेणेव हालाहलाए
कुंभकारीए कुंभकारावणे तेणेव उवागच्छइ ते० २ ता हालाहलाए कुंभकारीए कुंभ-
कारावणंसि अंबकूणगहत्थगए मज्जपाणं पियमाणे अभिक्खणं गायमाणे अभि-
क्खणं नच्चमाणे अभिक्खणं हालाहलाए कुंभकारीए अंजलिकम्मं करेमाणे सीयल-
एणं मट्ठियापाणएणं आयंचणिउदएणं गायआई परिसिंचमाणे विहरइ ॥ ५५२ ॥
अज्जोत्ति समणे भगवं महावीरे समणे निगंथे आमंतेत्ता एवं वयासी-जावइएणं
अज्जो ! गोसालेणं मंखलिपुत्तेणं ममं वहाए सरीरगंसि तेए निसट्ठे से णं अलाहि
पज्जंते सोलसण्हं जणवयाणं, तं०-अंगाणं वंगाणं मगहाणं मलयाणं मालवगाणं
अ(च्छा)त्थाणं वत्थाणं कोत्थाणं पाठाणं लाढाणं वज्जीणं मोलीणं कासीणं कोसलगाणं
अवाहाणं सुंभुत्तराणं घायाए वहाए उच्छादणद्वयाए भासीकरणयाए, जंपि य अज्जो !
गोसाले मंखलिपुत्ते हालाहलाए कुंभकारीए कुंभकारावणंसि अंबकूणगहत्थगए
मज्जपाणं पियमाणे अभिक्खणं जाव अंजलिकम्मं करेमाणे विहरइ, तस्सवि य णं
वज्जस्स पच्छादणद्वयाए इमाई अट्ठ चरिमाई पन्नवेइ, तंजहा-चरिमे पाणे, चरिमे
गेए, चरिमे नट्टे, चरिमे अंजलिकम्मं, चरिमे पोक्खलसंवट्टए महामेहे, चरिमे सेयणाए
गंधहत्थी, चरिमे महासिलाकंटए संगामे, अहं च णं इमीसे ओसप्पिणीए चउवीसाए
तित्थंकराणं चरिमे तित्थंकरे सिज्झिस्सं जाव अंतं करेस्सं ति, जंपि य अज्जो !

गोसाले मंखलिपुत्ते सीयलएणं मट्टियापाणएणं आयं चण्डिउदएणं गायार्हं परिसिचमाणे विहरइ, तस्सवि य णं वज्जस्स पच्छादणट्ठयाए इमाइं चत्तारि पाणगाइं चत्तारि अपाणगाइं पञ्चवेइ, से किं तं पाणए ? पाणए चउव्विहे पञ्चते, तंजहा-गोपुट्टए, हत्थम-द्वियए, आयवतत्तए, सिलापन्मट्टए, सेत्तं पाणए, से किं तं अपाणए ? अपाणए चउव्विहे पण्णते, तंजहा-थालपाणए, तयापाणए, सिबलिपाणए, सुद्धपाणए, से किं तं थाल-प्पणए ? २ जणं (जेणं) दाथालगं वा दावारगं वा दाकुंभगं वा दाकलसं वा सीयलगं (वा) उल्लगं हत्थेहिं परामुसइ न य पाणियं पियइ, सेत्तं थालपाणए, से किं तं तयापा-णए ? २ जणं अंबं वा अंबाडगं वा जहा पओगपए जाव बोरे वा तिंदुर्यं वा [तर्यं] वा तरुणगं वा आमगं वा आसगंसि आवीलेइ वा पवीलेइ वा न य पाणियं पियइ, सेत्तं तयापाणए, से किं तं सिबलिपाणए ? २ जणं कलसंगलियं वा मुग्गसंगलियं वा माससंगलियं वा सिबलिसंगलियं वा तरुणियं आमियं आसगंसि आवीलेइ वा पवीलेइ वा न य पाणियं पियइ, सेत्तं सिबलिपाणए, से किं तं सुद्धपाणए ? सुद्धपा-णए जणं छम्मासे सुद्धखाइमं खाइ दो मासे पुढविसंथारोवगए दो मासे कट्ठ-संथारोवगए दो मासे दब्भसंथारोवगए, तस्स णं बहुपडिपुज्जाणं छण्हं मासाणं अंतिमराइए इमे दो देवा महिङ्गिया जाव महेसक्खा अंतियं पाउब्भवंति, तं-पुन्नभेइ य माणिभेइ य, तए णं ते देवा सीयलएहिं उल्लएहिं हत्थेहिं गायार्हं परा-मुसंति, जे णं ते देवे साइजइ से णं आसीविसत्ताए कम्मं पकरेइ, जे णं ते देवे नो साइजइ तस्स णं संसि सरीरगंसि अगणिकाए संभवइ, से णं सएणं तेएणं सरीरगं ज्ञामेइ स० २ ता तओ पच्छा सिज्झइ जाव अंतं करेइ, सेत्तं सुद्धपाणए । तत्थ णं सावत्थीए नयरीए अयंपुले णामं आजीवियोवासए परिवसइ अङ्गे जाव अपरिभूए जहा हालाहला जाव आजीवियसमएणं अप्पाणं भावेमाणे विह-रइ, तए णं तस्स अयंपुलस्स आजीवियोवासगस्स अन्नया कयाइ पुव्वर-त्तावरत्तकालसमयंसि कुडुंबजागरियं जागरमाणस्स अयमेयारूवे अज्झत्थिए जाव समुप्पज्जित्था-किंसंठिया हल्ला पण्णत्ता ?, तए णं तस्स अयंपुलस्स आजी-योवासगस्स दोचंपि अयमेयारूवे अज्झत्थिए जाव समुप्पज्जित्था-एवं खलु मम धम्मयायरिए धम्मोवएसए गोसाले मंखलिपुत्ते उप्पन्नानाणदंसणधरे जाव सव्वन्नू सव्वदरिसी इहेव सावत्थीए नयरीए हालाहलाए कुंभकारीए कुंभकारावणंसि आजीवियसंपसंपरिवुडे आजीवियसमएणं अप्पाणं भावेमाणे विहरइ, तं सेयं खलु मे कल्लं जाव जलंते गोसालं मंखलिपुत्तं वंदित्ता जाव पज्जुवासित्ता इमं एया(णु)ख्वं वागरणं वागरित्तएत्तिकहु एवं संपेहेइ संपेहित्ता कल्लं जाव जलंते ण्हाए जाव

अप्पमहग्घाभरणाळंकियसरीरे साओ गिहाओ पडिनिक्खमइ सा० २ ता पाय-
विहारचारेणं सावत्थि नयरिं मज्झमज्जेणं जेणेव हालाहलाए कुंभकारीए कुंभकारा-
वणे तेणेव उवागच्छइ २ ता पासइ गोसालं मंखलिपुत्तं हालाहलाए कुंभकारीए
कुंभकारावणंसि अंबकूणगहत्थगयं जाव अंजलिकम्मं करेमाणं सीयलयाएणं मट्टिया
जाव गायार्हं परिसिंचमाणं पासइ २ ता लज्जिए विलिए विड्डे सणियं २ पच्चोसक्कइ,
तए णं ते आजीविया थेरा अयंपुलं आजीवियोवासगं लज्जियं जाव पच्चोसक्कमाणं
पासेति २ ता एवं वयासी-एहि ताव अयंपुला ! एत(इ)ओ, तए णं से अयंपुले
आजीवियोवासए आजीवियथेरेहिं एवं वुत्ते समाणे जेणेव आजीविया थेरा तेणेव
उवागच्छइ उवागच्छिता आजीविए थेरे वंदइ नमंसइ वं० २ ता नच्चासप्पे जाव
पज्जुवासइ, अयंपुलाइ आजीविया थेरा अयंपुलं आजीवियोवासगं एवं वयासी-से
नूणं ते(भे) अयंपुला ! पुव्वरत्तावरत्तकालसमयंसि जाव किंसंठिया हल्ला पण्णत्ता ?,
तए णं तव अयंपुला ! दोच्चपि अयमेया० तं चेव सव्वं भाणियव्वं जाव सावत्थि
नयरिं मज्झमज्जेणं जेणेव हालाहलाए कुंभकारीए कुंभकारावणे जेणेव इहं तेणेव
हव्वमागए, से नूणं ते अयंपुला ! अट्ठे समट्ठे ? हंता अत्थि, जंपि य अयंपुला !
तव धम्मायरिए धम्मोवएसए गोसाले मंखलिपुत्ते हालाहलाए कुंभकारीए
कुंभकारावणंसि अंबकूणगहत्थगए जाव अंजलिं करेमाणे विहरइ, तत्थवि णं भगवं
इमाई अट्ठ चरिमाई पन्नवेइ, तं०-चरिमे पाणे जाव अंतं करेस्सइ, जेवि य
अयंपुला ! तव धम्मायरिए धम्मोवएसए गोसाले मंखलिपुत्ते सीयलयाएणं मट्टिया
जाव विहरइ, तत्थवि णं भगवं इमाई चत्तारि पाणगाई चत्तारि अपाणगाई पन्नवेइ, से
किं तं पाणए ? पाणए जाव तओ पच्छा सिज्झ(न्ति)इ जाव अंतं करे(न्ति)इ, तं गच्छ-
ह णं तुमं अयंपुला ! एस चेव तव धम्मायरिए धम्मोवएसए गोसाले मंखलिपुत्ते इमं
एयारुवं वागरणं वाग(रेही)रित्तएत्ति, तए णं से अयंपुले आजीवियोवासए आजीविएहिं
थेरेहिं एवं वुत्ते समाणे हट्ठुट्ठ० उट्ठाए उट्ठेइ उ० २ ता जेणेव गोसाले मंखलिपुत्ते
तेणेव पहारेत्थ गमणाए, तए णं ते आजीविया थेरा गोसालस्स मंखलिपुत्तस्स
अंबकूणगप(ए)डावणट्ठयाए एगंतमंते संगारं कुव्वंति, तए णं से गोसाले मंखलिपुत्ते
आजीवियाणं थेराणं संगारं पडिच्छइ २ ता अंबकूणगं एगंतमंते एड्डेइ, तए णं से
अयंपुले आजीवियोवासए जेणेव गोसाले मंखलिपुत्ते तेणेव उवागच्छइ उवागच्छि-
त्ता गोसालं मंखलिपुत्तं तिक्खुत्तो जाव पज्जुवासइ, अयंपुलाइ गोसाले मंखलिपुत्ते
अयंपुलं आजीवियोवासगं एवं वयासी-से नूणं अयंपुला ! पुव्वरत्तावरत्तकालसमयंसि
जाव जेणेव ममं अंतियं तेणेव हव्वमागए, से नूणं अयंपुला ! अट्ठे समट्ठे ? हंता

अत्थि, तं नो खलु एस अंबकूणए अंबचोयए णं एसे, किंसंठिया हल्ला पक्कत्ता ? वंसीमूलसंठिया हल्ला पण्णत्ता, वीणं वाएहि रे वीरगा वी० २, तए णं से अयंपुले आजीवियोवासए गोसालेणं मंखलिपुत्तेणं इमं एयारूवं वागरणं वागरिए समाणे हट्टुट्टु जाव हियए गोसालं मंखलिपुत्तं वंदइ नमंसइ वं० २ ता पसिणाइं पुच्छइ २ ता अट्ठाइं परियादियइ अ० २ ता उट्ठाए उट्ठेइ उ० २ ता गोसालं मंखलिपुत्तं वंदइ नमंसइ वं० २ ता जाव पडिगए । तए णं से गोसाले मंखलिपुत्ते अप्पणो मरणं आभोएइ २ ता आजीविए थेरे सदावेइ आ० २ ता एवं वयासी-तुब्भे णं देवाणुप्पिया ! ममं कालगयं जाणित्ता सुरभिणा गंधोदएणं प्हाणेह सु० २ ता पम्हलसुकुमालाए गंधकासाईए गायार्इ ल्हेहेह गा० २ ता सरसेणं गोसीसचंदणेणं गायार्इ अणुलिपह स० २ ता महरीहं हंसलक्खणं पाडसाडगं नियंसेह मह० २ ता सव्वालंकार-विभूसियं करेह स० २ ता पुरिससहस्सवाहिणिं सीयं दुरुहेह पुरि० २ ता सावत्थीए नयरीए सिंघाडग जाव पहेसु महया महया सहेणं उग्गोसेमाणा २ एवं वदह-एवं खलु देवाणुप्पिया ! गोसाले मंखलिपुत्ते जिणे जिणप्पलावी जाव जिणसइं पगासेमाणे विहरित्ता इमीसे ओसप्पिणीए चउवीसाए तित्थयराणं चरिमे तित्थयरे सिद्धे जाव सव्वदुक्खप्पहीणे, इड्डीसक्कारसमुदएणं ममं सरीरगस्स णीहरणं करेह, तए णं ते आजीविया थेरा गोसालस्स मंखलिपुत्तस्स एयमट्ठं विणएणं पडिमुणेंति ॥ ५५३ ॥ तए णं तस्स गोसालस्स मंखलिपुत्तस्स सत्तरत्तंसि परिणम-माणंसि पडिलिद्धसम्मत्तस्स अयमेयारूवे अज्झत्थिए जाव समुप्पज्जित्था-णो खलु अहं जिणे जिणप्पलावी जाव जिणसइं पगासेमाणे विहरइ, अहं णं गोसाले चेव मंखलिपुत्ते समणघायए समणमारए समणपडिणीए आयरियउवज्जायाणं अयस-कारए अवन्नकारए अकित्तिकारए बहूहिं असब्भाबुब्भावणाहिं मिच्छताभिनिवेशेहि य-अप्पाणं वा परं वा तदुभयं वा वुग्गाहेमाणे वुप्पाएमाणे विहरित्ता सएणं तेएणं अच्चाइट्ठे समाणे अंतो सत्तरत्तस्स पित्तज्जरपरिगयसरीरे दाहवक्कंतीए छउमत्थे चेव कालं करेस्सं, समणे भगवं महावीरे जिणे जिणप्पलावी जाव जिणसइं पगासेमाणे विहरइ, एवं संपेहेइ एवं संपेहित्ता आजीविए थेरे सदावेइ आ० २ ता उच्चावय-सवहसाविए करेइ उच्चा० २ ता एवं वयासी-नो खलु अहं जिणे जिणप्पलावी जाव पगासेमाणे विहरइ, अहं गोसाले मंखलिपुत्ते समणघायए जाव छउमत्थे चेव कालं करेस्सं, समणे भगवं महावीरे जिणे जिणप्पलावी जाव जिणसइं पगा-सेमाणे विहरइ, तं तुब्भे णं देवाणुप्पिया ! ममं कालमयं जाणित्ता वामे पासं तुब्भेयं बंधह वा० २ ता तिव्वत्थो मुहे उट्ठुमह ति० २ ता सावत्थीए नयरीए सिंघाडग

जाव पहेसु आकङ्कविकङ्कि करेमाणा महया २ सदेणं उग्घोसेमाणा २ एवं वदह-नो-
खलु देवाणुप्पिया ! गोसाले मंखलिपुत्ते जिणे जिणप्पलावी जाव विहरइरिए, एस
णं गोसाले चेव मंखलिपुत्ते समणघायए जाव छउमत्थे चेव कालगए, समणे
भगवं महावीरे जिणे जिणप्पलावी जाव विहरइ, अणिङ्गीअसक्कारसमुदएणं ममं
सरीरगस्स नीहरणं करेज्जाह, एवं वदित्ता कालगए ॥५५४॥ तए णं ते आजीविया
थेरा गोसालं मंखलिपुत्तं कालगयं जाणित्ता हालाहलाए कुंभकारीए कुंभकारावणस्स
दुवाराइं पिहेति दु० २ ता हालाहलाए कुंभकारीए कुंभकारावणस्स बहुमज्झदेस-
भाए सावत्थि नयरिं आलिहंति सा० २ ता गोसालस्स मंखलिपुत्तस्स सरीरगं
वामे पाए सुवेणं वंधंति वा० २ ता तिव्वुत्तो मुहे उडुभंति २ ता सावत्थीए
नयरीए सिंघाडग जाव पहेसु आकङ्कविकङ्कि करेमाणा णीयं २ सदेणं उग्घोसेमाणा
२ एवं वयासी-नो खलु देवाणुप्पिया ! गोसाले मंखलिपुत्ते जिणे जिणप्पलावी
जाव विहरिए, एस णं गोसाले चेव मंखलिपुत्ते समणघायए जाव छउमत्थे चेव
कालगए, समणे भगवं महावीरे जिणे जिणप्पलावी जाव विहरइ, सवहपडिमोक्ख-
णं करंति स० २ ता दोब्बपि पूयासक्कारथिरीकरणट्टयाए गोसालस्स मंखलिपुत्तस्स
वामाओ पायाओ सुवं मुयंति सु० २ ता हालाहलाए कुंभकारीए कुंभकारावणस्स
दुवारवयणाइं अवगुणंति २ ता गोसालस्स मंखलिपुत्तस्स सरीरगं सुरभिणा
गंधोदएणं ण्हाणेंति तं चेव जाव महया २ इङ्गीअसक्कारसमुदएणं गोसालस्स मंखलिपु-
त्तस्स सरीरगस्स नीहरणं करंति ॥ ५५५ ॥ तए णं समणे भगवं महावीरे अन्नया
कयाइ सावत्थीओ नयरीओ कोट्टयाओ उज्जाणाओ पडिनिक्खमइ २ ता बहिया
जणवयविहारं विहरइ । तेणं कालेणं तेणं समएणं मिंढियगामे नामं नयरे होत्था
वन्नओ, तस्स णं मेंढियगामस्स नयरस्स बहिया उत्तरपुरच्छिमे दिसीभाए एत्थ णं
सालकोट्टए नामं उज्जाणे होत्था वन्नओ जाव पुढविसिलापट्टओ, तस्स णं सालको-
ट्टगस्स उज्जाणस्स अदूरसामंते एत्थ णं महेगे मालुयाकच्छए यावि होत्था
किण्हे किण्होभासे जाव निकुहंभूए पत्तिए पुप्फिए फल्लिए हरियगरैरिज्जमाणे
सिरीए अईव २ उवसोमेमाणे २ चिट्ठइ, तत्थ णं मेंढियगामे नयरे रेवई नामं
गाहावइणी परिवसइ अट्ठा जाव अपरिभूया, तए णं समणे भगवं महावीरे अन्नया
कयाइ पुव्वाणुपुत्वि चरमाणे जाव जेणेव मेंढियगामे नयरे जेणेव साण(ल)कोट्टए
उज्जाणे जाव परिसा पडिगया । तए णं समणस्स भगवओ महावीरस्स सरीरगं
विउले रोगायंके पाउब्भूए उज्जले जाव दुरहियासे पित्तज्वरपरिगयसरीरे दाहवक्क-
त्तीए यावि विहरइ, अवियाइं लोहियवच्चाइंपि पकरेइ, चाउव्वन्नं वागरेइ-एवं खलु

समणे भगवं महावीरे गोसालस्स मंखलिपुत्तस्स तवेणं तेएणं अच्चाइट्ठे समाणे अंतो छण्हं मासाणं पित्तजरपरिगयसरीरे दाहवक्कंतीए छउमत्थे चेव कालं करिस्सइ । तेणं कालेणं तेणं समएणं समणस्स भगवओ महावीरस्स अंतेवासी सीहे नामं अणगारे पगइभइए जाव विणीए मालुयाकच्छगस्स अदूरसामंते छट्ठंछट्ठेणं अनिक्खित्तेणं तवोकम्मेणं उट्ठं वाहाओ जाव विहरइ, तए णं तस्स सीहस्स अणगारस्स ज्ञाणंतरियाए वट्टमाणस्स अयमेयारूवे जाव समुप्पज्जित्था-एवं खलु मम धम्मायरियास्स धम्मोवएसगस्स समणस्स भगवओ महावीरस्स सरीरगंसि विउले रोगायंके पाउब्भूए उज्जले जाव छउमत्थे चेव कालं करेस्सइ, वदिस्संति य णं अन्नउत्थिया छउमत्थे चेव कालगए, इमेणं एयारूवेणं महया मणोमाणसिएणं दुक्खेणं अभिभूए समाणे आयावणभूमीओ पच्चोसइ आया० २ ता जेणेव मालुयाकच्छए तेणेव उवागच्छइ २ ता मालुयाकच्छयं अंतो २ अणुप्पविसइ मालुया० २ ता महया २ सट्ठेणं कुहुकुहुस्स परस्से । अज्जोत्ति समणे भगवं महावीरे समणे निगंथे आसंतेइ २ ता एवं वयासी-एवं खलु अज्जो । ममं अंतेवासी सीहे नामं अणगारे पगइभइए तं चेव सव्वं भाणियव्वं जाव परस्से, तं गच्छइ णं अज्जो । तुब्भे सीहं अणगारं सइ, तए णं ते समणा निगंथा समणेणं भगवया महावीरेणं एवं वुत्ता समाणा समणं भगवं महावीरं वंदंति नमंसंति वं० २ ता समणस्स भगवओ महावीरस्स अंतियाओ सालकोट्टयाओ उज्जाणाओ पडिनिक्खमंति सा० २ ता जेणेव मालुयाकच्छए जेणेव सीहे अणगारे तेणेव उवागच्छन्ति २ ता सीहं अणगारं एवं वयासी-सीहा । तव धम्मायरिया सहावेंति, तए णं से सीहे अणगारे समणेहिं निगंथेहिं सद्धिं मालुयाकच्छयाओ पडिनिक्खमइ २ ता जेणेव सालकोट्टए उज्जाणे जेणेव समणे भगवं महावीरे तेणेव उवागच्छइ २ ता समणं भगवं महावीरं तिक्खुत्तो आयाहिणं २ जाव पज्जुवासइ, सीहादि समणे भगवं महावीरे सीहं अणगारं एवं वयासी-से नूणं ते सीहा । ज्ञाणंतरियाए वट्टमाणस्स अयमेयारूवे जाव परस्से, से नूणं ते सीहा । अट्ठे समट्ठे ? हंता अत्थि, तं नो खलु अहं सीहा । गोसालस्स मंखलिपुत्तस्स तवेणं तेएणं अच्चाइट्ठे समाणे अंतो छण्हं मासाणं जाव कालं करेस्सं, अहं अच्चाइ अद्धोलसवासाइं जिणे सुहत्थी विहरिस्सामि, तं गच्छइ णं तुमं सीहा । मंढियगामं नयरं रेवईए गाहावइणीए गिहे, तत्थ णं रेवईए गाहावइणीए ममं अट्ठाए दुवे (कोहंडफला) उवक्खड्डिया तेहिं नो अट्ठो, अत्थि से अज्जे पारियासिए [फासुए वीयज्जए] तमाहराहि तेणं अट्ठो, तए णं से सीहे अणगारे समणेणं भगवया महावीरेणं एवं वुत्ते समाणे हट्ठतुट्ठ जाव हियए समणं भगवं महावीरं वंदइ नमंसइ वंदित्ता

नमंसित्ता अतुरियमचवलमसंभंतं मुहपोत्तियं पडिलेहेइ मु० २ ता जहा गोयमसामी जाव जेणेव समणे भगवं महावीरे तेणेव उवागच्छइ २ ता समणं भगवं महावीरं वंदइ नमंसइ वं० २ ता समणस्स भगवओ महावीरस्स अंतियाओ सालकोट्टयाओ उज्जाणाओ पडिनिक्खमइ २ ता अतुरिय जाव जेणेव मेंडियगामे नयरे तेणेव उवागच्छइ २ ता मेंडियगामं नयरं मज्झमज्झेणं जेणेव रेवईए गाहावइणीए गिहे तेणेव उवागच्छइ २ ता रेवईए गाहावइणीए गिहं अणुप्पविट्ठे, तए णं सा रेवई गाहावइणी सीहं अणगारं एज्जमाणं पासइ २ ता हट्ठुट्ठं खिप्पामेव आसणाओ अब्भुट्ठेइ २ ता सीहं अणगारं सत्तट्ठपयाइ अणुगच्छइ स० २ ता तिक्खुत्तो आयाहिणं पयाहिणं० वंदइ नमंसइ वं० २ ता एवं वयासी-संदिसंतु णं देवाणुप्पिया ! किमागमणप्पओयणं ?, तए णं से सीहे अणगारे रेवई गाहावइणि एवं वयासी-एवं खलु तुमे देवाणुप्पिए ! समणस्स भगवओ महावीरस्स अट्ठाए दुवे [कोहंडफला] उव-क्खडिया तेहिं नो अट्ठो, अत्थि ते अत्थे पारियासिए (फासुए बीयऊरए) तमाहराहि तेणं अट्ठो, तए णं सा रेवई गाहावइणी सीहं अणगारं एवं वयासी-केस णं सीहा ! से णाणी वा तवस्सी वा जेणं तव एस अट्ठे मम ताव रहस्सकडे हव्वमक्खाए जओ णं तुमं जाणासि ? एवं जहा खंदए जाव जओ णं अहं जाणामि, तए णं सा रेवई गाहावइणी सीहस्स अणगारस्स अंतियं एयमट्ठं सोच्चा निसम्म हट्ठुट्ठा जेणेव भत्तघरे तेणेव उवागच्छइ २ ता पत्तगं मोएइ पत्तगं मोएत्ता जेणेव सीहे अणगारे तेणेव उवागच्छइ २ ता सीहस्स अणगारस्स पडिगहगंसि तं सर्व्वं सम्मं निस्सिरइ, तए णं तीए रेवईए गाहावइणीए तेणं दव्व-सुद्धेणं जाव दाणेणं सीहे अणगारे पडिलामिए समणे देवाउए निबद्धे जहा विजयस्स जाव जम्मजीवियफले रेवईए गाहावइणीए रेवईए गाहावणीए, तए णं से सीहे अणगारे रेवईए गाहावइणीए गिहाओ पडिनिक्खमइ २ ता मेंडियगामं नयरं मज्झमज्झेणं निग्गच्छइ निग्गच्छइत्ता जहा गोयमसामी जाव भत्तपाणं पडिदंसेइ २ ता समणस्स भगवओ महावीरस्स पाणिसि तं सर्व्वं सम्मं निस्सिरइ, तए णं समणे भगवं महावीरे अमुच्छिए जाव अणज्झोववत्ते बिलमिव पन्नगभूएणं अप्पाणेणं तमाहारं सरीरकोट्टगंसि पक्खिवइ, तए णं समणस्स भगवओ महा-वीरस्स तमाहारं आहारियस्स समानस्स से विउले रोगायंके खिप्पामेव उवसमं पत्ते हट्ठे जाए आरोगे बलियसरीरे तुट्ठा समणा तुट्ठाओ समणीओ तुट्ठा सावया तुट्ठाओ सावियाओ तुट्ठा देवा तुट्ठाओ देवीओ सदेवमणुयासुरे लोए तुट्ठे हट्ठे जाए समणे भगवं महावीरे हट्ठे० २ ॥ ५५६ ॥ भंतेत्ति भगवं गोयमे समणं भगवं

महावीरं वंदइ नमंसइ वं० २ ता एवं वयासी-एवं खलु देवाणुप्पियाणं अंतेवासी
 पाईणजाणवए सव्वाणुभूई नामं अणगारे पगइभइए जाव विणीए, से णं भंते !
 तथा गोसालेणं मंखलिपुत्तेणं तवेणं तेएणं भासरासीकए समाणे कहिं गए कहिं
 उववन्ने ? एवं खलु गोयमा ! ममं अंतेवासी पाईणजाणवए सव्वाणुभूई नामं अणगारे
 पगइभइए जाव विणीए, से णं तथा गोसालेणं मंखलिपुत्तेणं तवेणं तेएणं भासरासीकए
 समाणे उद्धं चंदिमसूरिय जाव वंभलंतगमहासुक्के कप्पे वीईवइत्ता सहस्सारे कप्पे
 देवत्ताए उववन्ने, तत्थ णं अत्थेगइयाणं देवाणं अट्टारस सागरोवमाई ठिई पज्जत्ता,
 तत्थ णं सव्वाणुभूइस्सवि देवस्स अट्टारस सागरोवमाई ठिई पज्जत्ता, से णं सव्वा-
 णुभूई देवे ताओ देवलोगाओ आउक्खएणं भवक्खएणं ठिइक्खएणं जाव महा-
 विदेहे वासे सिज्झिहिइ जाव अंतं करेहिइ । एवं खलु देवाणुप्पियाणं अंतेवासी
 कोसलजाणवए सुनक्खत्ते नामं अणगारे पगइभइए जाव विणीए, से णं भंते !
 तथा गोसालेणं मंखलिपुत्तेणं तवेणं तेएणं परिताविए समाणे कालमासे कालं किच्चा
 कहिं गए कहिं उववन्ने ? एवं खलु गोयमा ! ममं अंतेवासी सुनक्खत्ते नामं
 अणगारे पगइभइए जाव विणीए, से णं तथा गोसालेणं मंखलिपुत्तेणं तवेणं तेएणं
 परिताविए समाणे जेणेव ममं अंतिए तेणेव उवागच्छइ २ ता वंदइ नमंसइ वं०
 २ ता सयमेव पंच महव्वयाई आरुहेइ सयमेव पंच महव्वयाई आरुहेत्ता समणा
 य समणीओ य खामेइ २ ता आलोइयपडिक्कंते समाहिपत्ते कालमासे कालं किच्चा
 उद्धं चंदिमसूरिय जाव आणयपाणयारणकप्पे वीईवइत्ता अञ्जुए कप्पे देवत्ताए
 उववन्ने, तत्थ णं अत्थेगइयाणं देवाणं बावीसं सागरोवमाई ठिई पण्णत्ता, तत्थ णं
 सुनक्खत्तस्सवि देवस्स बावीसं सागरोवमाई सेसं जहा सव्वाणुभूइस्स जाव अंतं
 काहिइ ॥ ५५७ ॥ एवं खलु देवाणुप्पियाणं अंतेवासी कुसिस्से गोसाले नामं
 मंखलिपुत्ते से णं भंते ! गोसाले मंखलिपुत्ते कालमासे कालं किच्चा कहिं गए कहिं
 उववन्ने ? एवं खलु गोयमा ! ममं अंतेवासी कुसिस्से गोसाले नामं मंखलिपुत्ते
 समणघायए जाव छउमत्थे चेव कालमासे कालं किच्चा उद्धं चंदिमसूरिय जाव अञ्जुए
 कप्पे देवत्ताए उववन्ने, तत्थ णं अत्थेगइयाणं देवाणं बावीसं सागरोवमाई ठिई प०,
 तत्थ णं गोसालस्सवि देवस्स बावीसं सागरोवमाई ठिई प० । से णं भंते !
 गोसाले देवे ताओ देवलोगाओ आउक्खएणं ३ जाव कहिं उववज्झिहिइ ? गोयमा !
 इहेव जंबूदीवे २ भारहे वासे विंझगिरिपायमूले पुंडेसु जणवएसु सयदुवारे नयरे
 संसु(सुम)इस्स रत्तो भइए भारियाए कुळिंसि पुत्तत्ताए पच्चाप्पाहिइ, से णं तत्थ नवण्हं
 मासाणं बहुपडिपुज्जाणं जाव वीइक्कंताणं जाव सुखे दाए पयाहिइ, जं रयणि च णं से

दारए जाइ(पया)हिइ तं रयणिं च णं सयदुवारे नयरे सन्निभतरबाहिरिए भारगसो
य कुंभगसो य पउमवासे य रयणवासे य वासे वासिहिइ, तए णं तस्स दारगस्स
अम्मापियरो एकारसमे दिवसे वीइक्कंते जाव संपत्ते बारसाहदिवसे अयमेयारुव
गोण्णं गुणनिष्कञ्चं नामधेज्जं काहिंति-जम्हा णं अम्हं इमंसि दारगंसि जायंसि
समाणंसि सयदुवारे नयरे सन्निभतरबाहिरिए जाव रयणवासे य वासे वुट्ठे, तं होउ णं
अम्हं इमस्स दारगस्स नामधेज्जं महापउमे महापउमे, तए णं तस्स दारगस्स
अम्मापियरो नामधेज्जं करेहिंति महापउमेत्ति, तए णं तं महापउमं दारगं
अम्मापियरो साइरेगट्टवासाजायगं जाणिता सोहणंसि तिहिकरणदिवसनक्खत्तमुहुत्तंसि
महया २ रायाभिसेगेणं अभिसिचेहिंति, से णं तत्थ राया भविस्सइ महया
हिमवंतमहंत० वज्जओ जाव विहरिस्सइ, तए णं तस्स महापउमस्स रज्जो अन्नया
कयाइ दो देवा महिद्धिया जाव महेसक्खा सेणाकम्मं काहिंति, तं०-पुन्नभदे
य माणिभदे य, तए णं सयदुवारे नयरे बहवे राईसरतलवर जाव
सत्थवाहप्पभिईओ अन्नमन्नं सदावेहिंति अ० २ ता एवं वदेहिंति-जम्हा णं
देवाणुप्पिया ! अम्हं महापउमस्स रज्जो दो देवा महिद्धिया जाव सेणाकम्मं करेति
तं०-पुन्नभदे य माणिभदे य, तं होउ णं देवाणुप्पिया ! अम्हं महापउमस्स रज्जो
दोच्चेवि नामधेजे देवसेणे २, तए णं तस्स महापउमस्स रज्जो दोच्चेवि नामधेजे
भविस्सइ देवसेणेति, तए णं तस्स देवसेणस्स रज्जो अन्नया कयाइ सेए संख-
तलविमलसन्निगासे चउइंते हत्थिरयणे समुप्पजिस्सइ, तए णं से देवसेणे राया
तं सेयं संखतलविमलसन्निगासं चउइंते हत्थिरयणं दुरुढे समणे सयदुवारं नयरं
मज्झंमउद्देणं अभिक्खणं २ अ(भि)इजाहिइ यं निज्जाहिइ य, तए णं सयदुवारे नयरे
बहवे राईसर जाव पभिईओ अन्नमन्नं सदावेहिंति अ० २ ता वदेहिंति-जम्हा णं
देवाणुप्पिया ! अम्हं देवसेणस्स रज्जो सेए संखतलसन्निगासे चउइंते हत्थिरयणे
समुप्पजे, तं होउ णं देवाणुप्पिया ! अम्हं देवसेणस्स रज्जो तच्चेवि नामधेजे विम-
लवाहणे २, तए णं तस्स देवसेणस्स रज्जो तच्चेवि नामधेजे भविस्सइ विमलवाह-
णेत्ति । तए णं से विमलवाहणे राया अन्नया कयाइ समणेहिं निगंथेहिं मिच्छं
विप्पडिज्जहिइ, अ(त्थे)प्पेगइए आउसेहिइ, अप्पेगइए अ(उ)वहसिहिइ, अप्पेगइए
निच्छोडेहिइ, अप्पेगइए निब्भच्छेहिइ, अप्पेगइए बंधेहिइ, अप्पेगइए णिरुंभेहिइ, अप्पे-
गइयाणं छविच्छेइं करेहिइ, अप्पेगइए पमारोहिइ, अप्पेगइयाणं उइवेहिइ, अप्पेगइयाणं
वत्थं पडिग्गहं कंबलं पायपुंळणं आच्छिदिहिइ विच्छिदिहिइ भिदिहिइ अवहरिहिइ,
अप्पेगइयाणं भत्तपाणं वोच्छिदिहिइ, अप्पेगइ(याणं)ए णिन्नगरे करेहिइ, अप्पेगइए

निव्विसए करेहि(न्ति)इ, तए णं सयदुवारे नयरे बहवे राईसर जाव वदिहिंति-एवं
 खलु देवाणुप्पिया ! विमलवाहणे राया समणेहिं निगंगेहिं मिच्छं विप्पडिवन्ने, अप्पेगइए
 आउसइ जाव निव्विसए करेइ, तं नो खलु देवाणुप्पिया ! एयं अम्हं सेयं, नो
 खलु एयं विमलवाहणस्स रत्तो सेयं, नो खलु एयं रजस्स वा रट्ठस्स वा बलस्स वा
 वाहणस्स वा पुरस्स वा अंतोउरस्स वा जणवयस्स वा सेयं जणं विमलवाहणे
 राया समणेहिं निगंगेहिं मिच्छं विप्पडिवन्ने, तं सेयं खलु देवाणुप्पिया ! अम्हं
 विमलवाहणं रायं एयमट्ठं विज्जवित्तएत्तिकट्ठु अन्नमज्जस्स अंतियं एयमट्ठं पडिसुणेंति
 अ० २ ता जेणेव विमलवाहणे राया तेणेव उवागच्छंति २ ता करयलपरिगहियं
 विमलवाहणं रायं जएणं विजएणं वद्धावेति ज० २ ता एवं वयासी-एवं खलु
 देवाणुप्पिया ! समणेहिं निगंगेहिं मिच्छं विप्पडिवन्ना, अप्पेगइए आउसंति जाव
 अप्पेगइए निव्विसए करेंति, तं नो खलु एयं देवाणुप्पियाणं सेयं, नो खलु एयं
 अम्हं सेयं, नो खलु एयं रजस्स वा जाव जणवयस्स वा सेयं जं णं देवाणुप्पिया !
 समणेहिं निगंगेहिं मिच्छं विप्पडिवन्ना, तं विरमंतु णं देवाणुप्पिया ! एयस्स अट्ठस्स
 अकरण्याए, तए णं से विमलवाहणे राया तेहिं बह्विं राईसर जाव सत्थवाहप्प-
 भिईहिं एयमट्ठं विज्जते समाणे नो धम्मोत्ति नो तवोत्ति मिच्छाविणएणं एयमट्ठं
 पडिसुणेहिइ, तस्स णं सयदुवारस्स नयरस्स बहिया उत्तरपुरच्छिमे दिसीभाए
 एत्थं सुभूमिभागे नाम उज्जाणे भविस्सइ सव्वोउय० वन्नओ । तेणं कालेणं तेणं
 समएणं विमलस्स अरहओ पउप्पए सुमंगले नाम अणगारे जाइसंपन्ने जहा धम्म-
 घोसस्स वन्नओ जाव संखित्तविउलतेयलेस्से तिन्नाणोवगए सुभूमिभागस्स उज्जाणस्स
 अदूरसामंते छट्ठंछट्ठेणं अणिकिखत्तेणं जाव आयावेमाणे विहरिस्सइ । तए णं से
 विमलवाहणे राया अन्नया कयाइ रहचरियं काउं निजाहिइ, तए णं से विमल-
 वाहणे राया सुभूमिभागस्स उज्जाणस्स अदूरसामंते रहचरियं करेमाणे सुमंगलं
 अणगारं छट्ठंछट्ठेणं जाव आयावेमाणं पासिहिइ २ ता आसुस्ते जाव मिसिमिसेमाणे
 सुमंगलं अणगारं रहसिरेणं णोल्लावेहिइ, तए णं से सुमंगले अणगारे विमलवाहणेणं
 रत्ता रहसिरेणं णोल्लाविए समाणे सणियं २ उट्ठेहिइ २ ता दोच्चं पि उट्ठं बाहाओ
 पणिज्झिय २ जाव आयावेमाणे विहरिस्सइ, तए णं से विमलवाहणे राया सुमंगलं
 अणगारं दोच्चं पि रहसिरेणं णोल्लावेहिइ, तए णं से सुमंगले अणगारे विमलवाहणेणं
 रत्ता दोच्चं पि रहसिरेणं णोल्लाविए समाणे सणियं २ उट्ठेहिइ २ ता ओहिं पउंजेहिइ
 २ ता विमलवाहणस्स रण्णे तीत्तदं ओहिणा आभोएहिइ २ ता विमलवाहणं रायं
 एवं वदिहिइ-नो खलु तुमं विमलवाहणे राया, नो खलु तुमं देवसेणे राया, नो खलु

सुमं महापउमे राया, तुमणं इओ तच्चे भवग्गहणे गोसाले नामं मंखलिपुत्ते होत्था,
 समणवायए जाव छउमत्थे चैव कालगए, तं जइ ते तथा सव्वाणुभूणा अणगारेणं
 पभुणावि होऊणं सम्मं सहियं खमियं तितिक्खियं अहियासियं, जइ ते तथा सुनक्ख-
 त्तेण अणगारेणं पभुणावि होऊणं जाव अहियासियं, जइ ते तथा समणेणं भगवया महा-
 वीरेणं पभुणावि जाव अहियासियं, तं नो खलु अहं ते तद्वा सम्मं सहिस्सं जाव अहिया-
 सिस्सं, अहं ते नवरं सहयं सरहं ससारहियं तवेणं तेएणं एगाहच्चं कूडाहच्चं भास-
 रासिं करेज्जामि, तए णं से विमलवाहणे राया सुमंगलेणं अणगारेणं एवं वुत्ते समाणे
 आसुस्ते जाव मिसिमिसेमाणे सुमंगलं अणगारं तच्चंपि रहसिरेणं णोल्लावेहिइ, तए
 णं से सुमंगले अणगारे विमलवाहणेणं रण्णा तच्चंपि रहसिरेणं णोल्लाविए समाणे
 आसुस्ते जाव मिसिमिसेमाणे आयावणभूमीओ पच्चोहंइ आ० २ ता तेयासमु-
 न्वाएणं समोहणिहिइ तेया० २ ता सत्तट्ठपयाइं पच्चोसक्किहिइ सत्तट्ठ० २ ता
 विमलवाहणं रायं सहयं सरहं ससारहियं तवेणं तेएणं जाव भासरासिं करेहिइ ।
 सुमंगले णं भंते ! अणगारे विमलवाहणं रायं सहयं जाव भासरासिं करेता कहिं
 गच्छिहिइ कहिं उववज्जिहिइ ? गोयमा ! सुमंगले णं अणगारे विमलवाहणं रायं
 सहयं जाव भासरासिं करेता बट्ठहिं चउत्थल्लट्ठमदसमदुवालस जाव विचित्तेहिं
 तवोक्कमेहिं अप्पाणं भावेमाणे बट्ठइं वासाइं सामन्नपरियाणं पाउणिहिइ बट्ठ० २ ता
 भासियाए संलेहणाए सट्ठिं भत्ताइं अणसणाए जाव छेदेत्ता आलोइयपडिक्कंते समाहि-
 पत्ते उट्ठं वेदिमसूरिय जाव गेविज्जविमाणावासयं वीईवइत्ता सव्वट्ठसिद्धे महाविमाणे
 देवत्ताए उववज्जिहिइ, तत्थ णं देवाणं अजहन्नमणुक्कोसेणं तेत्तीसं सागरोवमाइं ठिई
 प०, तत्थ णं सुमंगलस्सवि देवस्स अजहन्नमणुक्कोसेणं तेत्तीसं सागरोवमाइं ठिई
 प० । से णं भंते ! सुमंगले देवे ताओ देवलोगाओ जाव महाविदेहे वासे सिज्झिहिइ
 जाव अंतं करेहिइ ॥ ५५८ ॥ विमलवाहणे णं भंते ! राया सुमंगलेणं अणगारेणं सहए
 जाव भासरासीकए समाणे कहिं गच्छिहिइ कहिं उववज्जिहिइ ? गोयमा ! विमलवाहणे
 णं राया सुमंगलेणं अणगारेणं सहए जाव भासरासीकए समाणे अहे सत्तमाए पुढवीए
 उक्कोसकालट्ठिइयंसि नरयंसि नेरइयत्ताए उववज्जिहिइ, से णं तओ अणंतरं उव्वट्ठित्ता
 मच्छेसु उववज्जिहिइ, तत्थवि णं सत्थवज्जे दाहवक्कंतीए कालमासे कालं किच्चा
 दोच्चंपि अहे सत्तमाए पुढवीए उक्कोसकालट्ठिइयंसि नरयंसि नेरइयत्ताए उववज्जिहिइ,
 से णं तओ अणंतरं उव्वट्ठित्ता दोच्चंपि मच्छेसु उववज्जिहिइ, तत्थवि णं सत्थवज्जे
 जाव किच्चा छट्ठीए तमाए पुढवीए उक्कोसकालट्ठिइयंसि नरयंसि नेरइयत्ताए उवव-
 ज्जिहिइ, से णं तओहिंतो जाव उव्वट्ठित्ता इत्थियासु उववज्जिहिइ, तत्थवि णं

सत्थवज्जे दाह जाव दोच्चंपि छट्ठीए तमाए पुढवीए उक्कोसकाल जाव उव्वट्ठिता दोच्चंपि इत्थियासु उव्वज्जिहिइ, तत्थवि णं सत्थवज्जे जाव किच्चा पंचमाए धूमप्प-
 भाए पुढवीए उक्कोसकालद्विइयंसि जाव उव्वट्ठिता उरएसु उव्वज्जिहिइ, तत्थवि णं सत्थवज्जे जाव किच्चा दोच्चंपि पंचमाए जाव उव्वट्ठिता दोच्चंपि उरएसु उव्वज्जिहिइ
 जाव किच्चा चउत्थीए पंकप्पभाए पुढवीए उक्कोसकालद्विइयंसि जाव उव्वट्ठिता सीहेसु उव्वज्जिहिइ, तत्थवि णं सत्थवज्जे तहेव जाव कालं किच्चा दोच्चंपि चउत्थीए पंक-
 प्पभाए जाव उव्वट्ठिता दोच्चंपि सीहेसु उव्वज्जिहिइ जाव किच्चा तच्चाए वालुयप्पभाए पुढवीए उक्कोसकाल जाव उव्वट्ठिता पक्खीसु उव्वज्जिहिइ, तत्थवि णं सत्थवज्जे जाव
 किच्चा दोच्चंपि तच्चाए वालुय० जाव उव्वट्ठिता दोच्चंपि पक्खीसु उव्वज्जिहिइ जाव किच्चा दोच्चाए सक्करप्पभाए जाव उव्वट्ठिता सिरीसवेसु उव्वज्जिहिइ, तत्थवि णं
 सत्थवज्जे जाव किच्चा दोच्चंपि दोच्चाए सक्करप्पभाए जाव उव्वट्ठिता दोच्चंपि सिरीसवेसु उव्वज्जिहिइ जाव किच्चा इमीसे रयणप्पभाए पुढवीए उक्कोसकालद्विइयंसि नरयंसि
 नेरइयत्ताए उव्वज्जिहिइ जाव उव्वट्ठिता सण्णीसु उव्वज्जिहिइ, तत्थवि णं सत्थवज्जे जाव किच्चा असत्तीसु उव्वज्जिहिइ, तत्थवि णं सत्थवज्जे जाव किच्चा दोच्चंपि इमीसे
 रयणप्पभाए पुढवीए पल्लिओवमस्स असंखेज्जइभागद्विइयंसि नरयंसि नेरइयत्ताए उव्वज्जिहिइ, से णं तओ जाव उव्वट्ठिता जाइं इमाइं खहचरविहाणाइं भवंति, तं०-
 चम्मपक्खीणं, लोमपक्खीणं, समुग्गपक्खीणं, विययपक्खीणं, तेसु अणेगसयसहस्स-
 खुतो उदाइत्ता २ तत्थेव २ भुज्जो २ पच्चायाहिइ, सव्वत्थवि णं सत्थवज्जे दाहवक्कंतीए
 कालमासे कालं किच्चा जाइं इमाइं भुयपरिसप्पविहाणाइं भवंति, तंजहा-गोहाणं
 नउलाणं जहा पन्नवणापए जाव जाहगणं, तेसु अणेगसयसहस्सखुतो सेसं जहा
 खहचराणं जाव किच्चा जाइं इमाइं उरपरिसप्पविहाणाइं भवंति, तं०-अहीणं अय-
 गराणं आसालियाणं महोरगाणं, तेसु अणेगसयसहस्सखुतो जाव किच्चा जाइं इमाइं
 चउप्पयविहाणाइं भवंति, तं०-एगखुराणं दुखुराणं गंडीपयाणं सणहपयाणं, तेसु
 अणेगसयसहस्स जाव किच्चा जाइं इमाइं जलचरविहाणाइं भवंति, तं०-मच्छाणं
 कच्छभाणं जाव सुंसुमाराणं, तेसु अणेगसयसहस्स जाव किच्चा जाइं इमाइं चउरिं-
 दियविहाणाइं भवंति, तं०-अंधियाणं पोत्तियाणं जहा पन्नवणापए जाव गोमय-
 कीडाणं, तेसु अणेगसयसहस्स जाव किच्चा जाइं इमाइं तेइंदियविहाणाइं भवंति,
 तं०-उ(ओ)वच्चियाणं जाव हत्थिसोडाणं, तेसु अणेग जाव किच्चा जाइं इमाइं वेइं-
 दियविहाणाइं भवंति, तं०-पुलाकिसियाणं जाव समुहलक्ख्वाणं, तेसु अणेगसय जाव
 किच्चा जाइं इमाइं वणस्सइविहाणाइं भवंति, तं०-स्ख्खाणं गुच्छाणं जाव कुह(हु)णं,

तेसु अणेगसय जाव पचायाइस्सइ, उस्सन्नं च णं कडुयक्खेसु कडुयवल्लीसु सव्व-
 त्थवि णं सत्थवज्जे जाव किच्चा जाइं इमाइं वाउक्काइयविहाणाइं भवंति, तंजहा-
 पाईणवायाणं जाव सुद्धवायाणं, तेसु अणेगसयसहस्स जाव किच्चा जाइं इमाइं
 तेउक्काइयविहाणाइं भवंति, तं०-इंगलाणं जाव सूरियकंतमणिनिसियाणं, तेसु अणे-
 गसयसहस्स जाव किच्चा जाइं इमाइं आउक्काइयविहाणाइं भवंति, तं०-उस्साणं
 जाव खातोदगाणं, तेसु अणेगसयसहस्स जाव पचायाइस्सइ, उस्सण्णं च णं
 खारोदएसु खातोदएसु, सव्वत्थवि णं सत्थवज्जे जाव किच्चा जाइं इमाइं पुढविका-
 इयविहाणाइं भवंति, तं०-पुढवीणं सक्कराणं जाव सूरकंताणं, तेसु अणेगसय जाव
 पचायाहिइ, उस्सन्नं च णं खरबायरपुढविकाइएसु, सव्वत्थवि णं सत्थवज्जे जाव
 किच्चा रायगिहे नयरे वाहिं खरियत्ताए उववज्जिहिइ, तत्थवि णं सत्थवज्जे जाव
 किच्चा दोच्चं पि रायगिहे नयरे अंतो खरियत्ताए उववज्जिहिइ, तत्थवि णं सत्थ-
 वज्जे जाव किच्चा इहेव जंबुद्दीये दीवे भारहे वासे विंझगिरिपायमूले बिभेले
 सच्चिवेसे माहणकुलंसि दारियत्ताए पचायाहिइ । तए णं तं दारियं अम्मापियरो
 उम्मुक्कबालभावं जोव्वणगमणुप्पत्तं पडिरुवणं सुक्केणं पडिरुवणं विणणं पडि-
 रुवियस्स भत्तारस्स भारियत्ताए दलइस्संति, सा णं तस्स भारिया भविस्सइ इट्ठा
 कंता जाव अणुमया भंडकरंडगसमाणा तेल्लकेला इव सुसंगोविया चेलपे(ला)डा इव
 सुसंपरिग्गहिया रयणकरंडओविव सुसारक्खिया सुसंगोविया मा णं सीयं मा णं उण्हं
 जाव परिस्सहोवसग्गा फुसंतु । तए णं सा दारिया अन्नया कयाइ गुब्बिणी ससुरकु-
 लाओ कुलघरं निज्जमाणी अंतरा दवग्गिजालाभिहया कालमासे कालं किच्चा दाहिणि-
 ण्हेसु अग्गिकुमारेसु देवेसु देवत्ताए उववज्जिहिइ, से णं तओहिंतो अणंतरं उव्वट्ठिता
 माणुस्सं विग्गहं लभिहिइ माणुस्सं० २ ता केवलं बोहिं बुज्झिहिइ के० २ ता केवलं
 मुडे भवित्ता अगाराओ अणगारियं पव्वइहिइ, तत्थविय णं विराहियसामन्ने कालमासे
 कालं किच्चा दाहिणिण्हेसु असुरकुमारेसु देवेसु देवत्ताए उववज्जिहिइ, से णं तओहिंतो
 जाव उव्वट्ठिता माणुस्सं विग्गहं तं चैव जाव तत्थवि णं विराहियसामन्ने कालमासे
 कालं किच्चा दाहिणिण्हेसु नागकुमारेसु देवेसु देवत्ताए उववज्जिहिइ, से णं तओहिंतो
 अणंतरं उव्वट्ठिता एवं एएणं अभिलावेणं दाहिणिण्हेसु सुवन्नकुमारेसु एवं विज्जुकुमारेसु
 एवं अग्गिकुमारवज्जं जाव दाहिणिण्हेसु थणियकुमारेसु से णं तओ जाव उव्वट्ठिता
 माणुस्सं विग्गहं लभिहिइ जाव विराहियसामन्ने जोइसिएसु देवेसु उववज्जिहिइ, से
 णं तओ अणंतरं चयं चइत्ता माणुस्सं विग्गहं लभिहिइ जाव अविराहियसामन्ने
 कालमासे कालं किच्चा सोहम्मे कप्पे देवत्ताए उववज्जिहिइ, से णं तओहिंतो अणंतरं

चयं चइत्ता माणुस्सं विग्गहं लभिहिइ, केवलं वोहिं बुज्झिहिइ, तत्थवि णं अविराहियसामन्ने कालमासे कालं किच्चा ईसाणे कप्पे देवत्ताए उववज्झिहिइ, से णं तओ० चइत्ता माणुस्सं विग्गहं लभिहिइ० तत्थवि णं अविराहियसामन्ने कालमासे कालं किच्चा सणकुमारे कप्पे देवत्ताए उववज्झिहिइ, से णं तओहिंतो एवं जहा सणकुमारे तहा वंभलोए महासुक्के आणए आरणे, से णं तओ जाव अविराहियसामन्ने कालमासे कालं किच्चा सव्वट्ठसिद्धे महाविमाणे देवत्ताए उववज्झिहिइ, से णं तओहिंतो अणंतरं चयं चइत्ता महाविदेहे वासे जाई इमाई कुलाई भवंति-अट्ठाई जाव अपरिभूयाई, तहप्पगारेसु कुलेसु पुत्तताए पच्चायाहिइ, एवं जहा उववाइए दढप्प-इज्जवत्तव्वया सच्चव वत्तव्वया निरवसेसा भाणियव्वा जाव केवलवरनाणदंसणे समुप्पज्झिहिइ, तए णं से दढप्पइज्जे केवली अप्पणो तीतद्धं आभोएहिइ अप्प० २ ता समणे निगंथे सद्वावेहिइ सम० २ ता एवं वदिहिइ-एवं खलु अहं अज्जो ! इओ चिरातीयाए अट्ठाए गोसाले नामं मंखलिपुत्ते होत्था समणघायए जाव छउमत्थे चेव कालगए, तम्मूलगं च णं अहं अज्जो ! अणादीयं अणवदग्गं दीहमद्धं चाउरंत-संसारकंतारं अणुपरियट्ठिए, तं मा णं अज्जो ! तुब्भंपि केइ भवउ आयरियपडिणीए उवज्झायपडिणीए आयरियउवज्झायाणं अयसकारए अवन्नकारए अकित्तिकारए, मा णं सेऽवि एवं चेव अणादीयं अणवदग्गं जाव संसारकंतारं अणुपरियट्ठिहिइ जहा णं अहं । तए णं ते समणा निगंथा दढप्पइज्जस्स केवलस्स अंतियं एयमद्धं सोच्चा निसम्म भीया तत्था तसिया संसारभयउव्विग्गा दढप्पइज्जं केवलं वंदिहिंति नमंसिहिंति वं० २ ता तस्स ठाणस्स आलोइएहिंति निदिहिंति जाव पडिवज्झिहिंति, तए णं से दढप्पइज्जे केवली बहूई वासाई केवलपरियागं पाउणिहिइ बहूई० २ ता अप्पणो आउसेसं जाणित्ता भत्तं पच्चक्खाहिइ, एवं जहा उववाइए जाव सव्वदुक्खाण-मंतं काहिइ । सेवं भंते ! २ त्ति जाव विहरइ ॥ ५५९ ॥ **तेयनिसग्गो समत्तो (अट्ठेणं) ॥ समत्तं च पन्नरसमं सयं एकसरयं ॥**

अहिगरणि जरा कम्मे जावइयं गंगदत्त सुमिणे य । उवओग लोग बलि ओहि दीव उदही दिसा थणिया ॥१॥ चउइस १ सोलसमे ॥ तेणं कालेणं तेणं समएणं रायगिहे जाव पज्जुवासमाणे एवं वयासी-अत्थि णं भंते ! अहिगरणिसि वाउयाए वक्कमइ ? हंता अत्थि, से भंते ! किं पुट्ठे उद्दाइ अपुट्ठे उद्दाइ ? गोयमा । पुट्ठे उद्दाइ नो अपुट्ठे उद्दाइ, से भंते ! किं ससरीरी निक्खमइ असरीरी निक्खमइ ? एवं जहा खंदए जाव से तेणट्ठेणं जाव नो असरीरी निक्खमइ ॥५६०॥ इंगालकारियाए णं भंते ! अगणि-काए केवइयं कालं संचिद्धइ ? गोयमा ! जहजेणं अंतोमुहुत्तं उक्कोसेणं तिज्जि राईदियाई,

अत्रेवि तत्थ वाउयाए वक्कमइ, न विणा वाउयाएणं अगणिकाए उज्जलइ ॥ ५६१ ॥
पुरिसे णं भंते ! अयं अयकोट्टंसि अयोमएणं संडासएणं उव्विहमाणे वा पव्विहमाणे
वा कइकिरिए ? गोयमा ! जावं च णं से पुरिसे अयं अयकोट्टंसि अयोमएणं संडा-
सएणं उव्विहिइ वा पव्विहिइ वा तावं च णं से पुरिसे काइयाए जाव पाणाइवाय-
किरियाए पंचहिं किरियाहिं पुट्ठे, जेसिपिय णं जीवाणं सरीरेहिंतो अए निव्वत्तिए
अयकोट्ठे निव्वत्तिए संडासए निव्वत्तिए इंगाला निव्वत्तिया इंगालकट्ठिणी निव्व-
त्तिया भत्था निव्वत्तिया तेवि णं जीवा काइयाए जाव पंचहिं किरियाहिं पुट्ठा ।
पुरिसे णं भंते ! अयं अयकोट्ठाओ अयोमएणं संडासएणं गहाय अहिगरणिसि
उक्खिखमाणे वा निक्खिखमाणे वा कइकिरिए ? गोयमा ! जावं च णं से पुरिसे
अयं अयकोट्ठाओ जाव निक्खिखवइ वा तावं च णं से पुरिसे काइयाए जाव
पाणाइवायकिरियाए पंचहिं किरियाहिं पुट्ठे, जेसिपिय णं जीवाणं सरीरेहिंतो अए
निव्वत्तिए संडासए निव्वत्तिए चम्मेट्ठे निव्वत्तिए मुट्ठिए निव्वत्तिए अहिगरणी
निव्वत्ति(ए)या अहिगरणिसोडी णिव्वत्तिया उदगदोणी णिव्वत्तिया अहिगरणसाला
निव्वत्तिया तेविय णं जीवा काइयाए जाव पंचहिं किरियाहिं पुट्ठा ॥ ५६२ ॥ जीवे
णं भंते ! किं अहिगरणी अहिगरणं ? गोयमा ! जीवे अहिगरणीवि अहिगरणंपि,
से केणट्ठेणं भंते ! एवं वुच्चइ जीवे अहिगरणीवि अहिगरणंपि ? गोयमा ! अविरइं
पडुच्च, से तेणट्ठेणं जाव अहिगरणंपि ॥ नेरइए णं भंते ! किं अधिगरणी अधिग-
रणं ? गोयमा ! अहिगरणीवि अहिगरणंपि, एवं जहेव जीवे तहेव नेरइएवि, एवं
निरंतरं जाव वेमाणिए ॥ जीवे णं भंते ! किं साहिगरणी निरहिगरणी ? गोयमा !
साहिगरणी नो निरहिगरणी, से केणट्ठेणं पुच्छा, गोयमा ! अविरइं पडुच्च, से
तेणट्ठेणं जाव नो निरहिगरणी, एवं जाव वेमाणिए ॥ जीवे णं भंते ! किं आया-
हिगरणी पराहिगरणी तदुभयाहिगरणी ? गोयमा ! आयाहिगरणीवि पराहिगरणीवि
तदुभयाहिगरणीवि, से केणट्ठेणं भंते ! एवं वुच्चइ जाव तदुभयाहिगरणीवि ?
गोयमा ! अविरइं पडुच्च, से तेणट्ठेणं जाव तदुभयाहिगरणीवि, एवं जाव वेमा-
णिए ॥ जीवाणं भंते ! अहिगरणे किं आयप्पओगनिव्वत्तिए परप्पओगनिव्वत्तिए
तदुभयप्पओगनिव्वत्तिए ? गोयमा ! आयप्पओगनिव्वत्तिएवि परप्पओगनिव्वत्ति-
एवि तदुभयप्पओगनिव्वत्तिएवि, से केणट्ठेणं भंते ! एवं वुच्चइ ० ? गोयमा ! अविरइं
पडुच्च, से तेणट्ठेणं जाव तदुभयप्पओगनिव्वत्तिएवि, एवं जाव वेमाणियाणं ॥ ५६३ ॥
कइ णं भंते ! सरीरगा पण्णत्ता ? गोयमा ! पंच सरीरगा पण्णत्ता, तंजहा-ओरालिए
जाव कम्मए । कइ णं भंते ! इंदिया पण्णत्ता ? गोयमा ! पंच इंदिया पण्णत्ता,

तंजहा-सोईदिए जाव फासिंदिए, कइविहे णं भंते ! जोए पण्णत्ते ? गोयमा ! तिविहे जोए पण्णत्ते, तंजहा-मणजोए वइजोए कायजोए ॥ जीवे णं भंते ! ओरालियसरीरं निव्वत्तेमाणे किं अहिगरणी अहिगरणं ? गोयमा ! अहिगरणीवि अहिगरणंपि, से केणट्ठेणं भंते ! एवं वुच्चइ अहिगरणीवि अहिगरणंपि ? गोयमा ! अविरइं पडुच्च, से तेणट्ठेणं जाव अहिगरणंपि, पुढविकाइए णं भंते ! ओरालियसरीरं निव्वत्तेमाणे किं अहिगरणी अहिगरणं ? एवं चेव, एवं जाव मणुस्से । एवं वेउव्वियसरीरंपि, नवरं जस्स अत्थि । जीवे णं भंते ! आहारगसरीरं निव्वत्तेमाणे किं अहिगरणी० पुच्छा, गोयमा ! अहिगरणीवि अहिगरणंपि, से केणट्ठेणं जाव अहिगरणंपि ? गोयमा ! पमायं पडुच्च, से तेणट्ठेणं जाव अहिगरणंपि, एवं मणुस्सेवि, तेयासरीरं जहा ओरालियं, नवरं सव्वजीवाणं भाणियव्वं, एवं कम्मगसरीरंपि । जीवे णं भंते ! सोईदियं निव्वत्तेमाणे किं अहिगरणी अहिगरणं ? एवं जहेव ओरालिय-सरीरं तहेव सोईदियंपि भाणियव्वं, नवरं जस्स अत्थि सोईदियं, एवं चर्क्खिदिय-घाणिंदियजिर्म्मिदियफासिंदियाणवि, नवरं जाणियव्वं जस्स जं अत्थि । जीवे णं भंते ! मणजोगं निव्वत्तेमाणे किं अहिगरणी अहिगरणं ? एवं जहेव सोईदियं तहेव निरवसेसं, वइजोगो एवं चेव, नवरं एणिंदियवज्जाणं, एवं कायजोगोवि, नवरं सव्वजीवाणं जाव वेमाणिए । सेवं भंते ! २ ति ॥ ५६४ ॥ **सोलसमस्स सयस्स पढमो उद्देसो समत्तो ॥**

रायणिहे जाव एवं वयासी-जीवाणं भंते ! किं जरा सोगे ? गोयमा ! जीवाणं जरावि सोगेवि, से केणट्ठेणं भंते ! एवं वुच्चइ जाव सोगेवि ? गोयमा ! जे णं जीवा सारीरं वेयणं वेदेंति तेसि णं जीवाणं जरा, जे णं जीवा माणसं वेयणं वेदेंति तेसि णं जीवाणं सोगे, से तेणट्ठेणं जाव सोगेवि, एवं नेरइयाणवि, एवं जाव थणियकुमा-राणं, पुढविकाइयाणं भंते ! किं जरा सोगे ? गोयमा ! पुढविकाइयाणं जरा नो सोगे, से केणट्ठेणं जाव नो सोगे ? गोयमा ! पुढविकाइया णं सारीरं वेयणं वेदेंति नो माणसं वेयणं वेदेंति, से तेणट्ठेणं जाव नो सोगे, एवं जाव चउरिंदियाणं, सेसाणं जहा जीवाणं जाव वेमाणियाणं, सेवं भंते ! २ ति जाव पज्जुवासइ ॥ ५६५ ॥ तेणं कालेणं तेणं समएणं सक्के देविंदे देवराया वज्जपाणी पुरंदरे जाव भुंजमाणे विहरइ, इमं च णं केवलकप्पं जंबुहीवं २ विउलेणं ओहिणा आभोएमाणे २ पासइ समणं भगवं महावीरं जंबुहीवे वीवे एवं जहा ईसाणे तइयसए तहेव सक्कोवि नवरं आभिओगे ण सद्दावेइ हरी पायत्ताणियाहिचई, सुवोसा घंटा, पालओ विमाणकारी पालणं विमाणं, उत्तरिल्ले निज्जाणमग्गे, दाहिणपुरच्छिमिल्ले रइकरगपव्वए सेसं तं चेव

जाव नामं सावेता पज्जुवासइ, धम्मकहा जाव परिसा पडिगया, तए णं से सक्के देविंदे देवराया समणस्स भगवओ महावीरस्स अंतियं धम्मं सोच्चा निसम्म हट्ठ-
 तुट्ठं समणं भगवं महावीरं वंदइ नमंसइ वं० २ ता एवं वयासी-कइविहे णं भंते !
 उग्गहे पच्चते ? सक्का ! पंचविहे उग्गहे पणत्ते, तंजहा-देविंदोग्गहे, रायोग्गहे,
 गाहावइउग्गहे, सागारियउग्गहे, साहम्मियउग्गहे ॥ जे इमे भंते ! अज्जत्ताए समणा
 निग्गंथा विहरंति, एएसि णं अहं उग्गहं अणुजाणामीतिकट्ठु समणं भगवं महावीरं
 वंदइ नमंसइ वं० २ ता तमेव दिव्वं जाणविमाणं दुरुहइ २ ता जामेव दिसिं पाउब्भूए
 तामेव दिसिं पडिगए ॥ भंते ! ति भगवं गोयमे समणं भगवं महावीरं वंदइ नमंसइ
 वं० २ ता एवं वयासी-जं णं भंते ! सक्के देविंदे देवराया तुब्भे एवं वदइ सच्चे णं
 एसमट्ठे ? हंता सच्चे ॥ ५६६ ॥ सक्के णं भंते ! देविंदे देवराया किं सम्मावाई
 मिच्छावाई ? गोयमा ! सम्मावाई नो मिच्छावाई ॥ सक्के णं भंते ! देविंदे देव-
 राया किं सच्चं भासं भासइ, मोसं भासं भासइ, सच्चा मोसं भासं भासइ, असच्चा मोसं
 भासं भासइ ? गोयमा ! सच्चं पि भासं भासइ जाव असच्चा मोसं पि भासं भासइ ॥
 सक्के णं भंते ! देविंदे देवराया किं सावज्जं भासं भासइ अणवज्जं भासं भासइ ?
 गोयमा ! सावज्जं पि भासं भासइ अणवज्जं पि भासं भासइ, से केणट्ठेणं भंते ! एवं
 वुच्चइ-सावज्जं पि जाव अणवज्जं पि भासं भासइ ? गोयमा ! जाहे णं सक्के देविंदे
 देवराया सुहुमकायं अणिज्जहिताणं भासं भासइ ताहे णं सक्के देविंदे देवराया
 सावज्जं भासं भासइ, जाहे णं सक्के देविंदे देवराया सुहुमकायं निज्जहिताणं भासं
 भासइ ताहे णं सक्के देविंदे देवराया अणवज्जं भासं भासइ, से तेणट्ठेणं जाव
 भासइ, सक्के णं भंते ! देविंदे देवराया किं भवसिद्धिं अभावसिद्धिं सम्महिट्ठिं
 मिच्छादिट्ठिं एवं जहा मोउद्देसए सणकुमारं जाव नो अचरिमे ॥ ५६७ ॥ जीवाणं भंते !
 किं चेयकडा कम्मा कज्जंति अचेयकडा कम्मा कज्जंति ? गोयमा ! जीवाणं चेयकडा
 कम्मा कज्जंति नो अचेयकडा कम्मा कज्जंति, से केणट्ठेणं भंते ! एवं वुच्चइ जाव
 कज्जंति ? गोयमा ! जीवाणं आहारोवच्चिया पोग्गला, बौदिच्चिया पोग्गला, क(डे)लेवर-
 चिया पोग्गला तहा २ णं ते पोग्गला परिणमंति नत्थि अचेयकडा कम्मा समणा-
 उसो !, दुट्ठाणेषु दुसेज्जासु दुत्थिसीहियासु तहा २ णं ते पोग्गला परिणमंति नत्थि
 अचेयकडा कम्मा समणाउसो !, आर्यके से वहाए होइ संकप्पे से वहाए होइ मर-
 णंते से वहाए होइ तहा २ णं ते पोग्गला परिणमंति नत्थि अचेयकडा कम्मा
 समणाउसो !, से तेणट्ठेणं जाव कम्मा कज्जंति, एवं नेरइयाणवि एवं जाव वेमाणि-
 याणं । सेवं भंते ! सेवं भंते ! ति जाव विहरइ ॥ ५६८ ॥ सोलसमस्स
 सयस्स वीओ उद्देसो समत्तो ॥

रायगिहे जाव एवं वयासी-कइ णं भंते ! कम्मपगडीओ पण्णत्ताओ ? गोयमा ! अट्ठ कम्मपगडीओ पण्णत्ताओ, तंजहा-नाणावरणिज्जं जाव अंतराइयं, एवं जाव वेमाणियाणं । जीवे णं भंते ! नाणावरणिज्जं कम्मं वेदेमाणे कइ कम्मपगडीओ वेदेइ ? गोयमा ! अट्ठ कम्मपगडीओ, एवं जहा पन्नवणाए वेयावेउहेसओ सो चेव निरवसेसो भाणियव्वो, वेदाबंधोवि तहेव, बंधावेदोवि तहेव, बंधाबंधोवि तहेव भाणियव्वो जाव वेमाणियाणंति । सेवं भंते ! २ ति जाव विहरइ ॥ ५६९ ॥ तए णं समणे भगवं महावीरे अन्नया कयाइ रायगिहाओ नयराओ गुणसिलाओ उज्जाणाओ पडिनिक्खमइ २ ता बहिया जणवयविहारं विहरइ, तेणं कालेणं तेणं समएणं उल्लुयातीरे नामं नयरे होत्था वन्नओ, तस्स णं उल्लुयातीरस्स नयरस्स बहिया उत्तरपुरच्छिमे दिसीभाए एत्थ णं एगजंबुए नामं उज्जाणे होत्था वन्नओ, तए णं समणे भगवं महावीरे अन्नया कयाइ पुव्वाणुपुर्वि चरमाणे जाव एगजंबुए समोसडे जाव परिसा पडिगया, भंते ! ति भगवं गोयमे समणं भगवं महावीरं वंदइ नमंसइ वंदित्ता नमंसित्ता एवं वयासी-अणगारस्स णं भंते ! भावियप्पणो छट्ठंछट्ठेणं अणिक्खित्तेणं जाव आयावेमाणस्स तस्स णं पुरच्छिमेणं अवड्ढं दिवसं नो कप्पइ हत्थं वा पायं वा बाहं वा ऊरुं वा आउंटावेत्तए वा पसारत्तए वा, पच्चच्छिमेणं से अवड्ढं दिवसं कप्पइ हत्थं वा पायं वा जाव ऊरुं वा आउंटावेत्तए वा पसारत्तए वा, तस्स णं अंसियाओ लंबंति, तं च वेजे अदक्खुइ(ई)सिं पाडेइ २ ता अंसियाओ छिंदेजा, से नूणं भंते ! जे छिंदइ तस्स किरिया कज्जइ, जस्स छिज्जइ नो तस्स किरिया कज्जइ णणत्थेगेणं धम्मंतराइएणं ? हंता गोयमा ! जे छिंदइ जाव धम्मंतराइएणं । सेवं भंते ! सेवं भंते ! ति ॥ ५७० ॥ **सोलसमस्स सयस्स तइओ उहेसो समत्तो ॥**

रायगिहे जाव एवं वयासी-जावइयन्नं भंते ! अन्नगिलायए समणे निग्गंथे कम्मं निज्जरेइ एवइयं कम्मं नरएसु नेरइयाणं वासेण वा वासेहिं वा वाससए(ण)हिं वा खवयंति ? णो इण्ठे समट्ठे, जावइयणं भंते ! चउत्थमत्तिए समणे निग्गंथे कम्मं निज्जरेइ एवइयं कम्मं नरएसु नेरइया वाससएण वा वाससएहिं वा वाससहस्से(ण)हिं वा वाससयसहस्से(ण)हिं वा खवयंति ? णो इण्ठे समट्ठे, जावइयन्नं भंते ! छट्ठमत्तिए समणे निग्गंथे कम्मं निज्जरेइ एवइयं कम्मं नरएसु नेरइया वाससहस्सेण वा वाससहस्सेहिं वा वाससयसहस्से(हिं)ण वा खवयंति ? णो इण्ठे समट्ठे, जावइयन्नं भंते ! अट्ठमत्तिए समणे निग्गंथे कम्मं निज्जरेइ एवइयं कम्मं नरएसु नेरइया वाससयसहस्सेण वा वाससयसहस्सेहिं वा वासकोडीए वा खवयंति ? नो

इण्ठे समठ्ठे, जावइयन्नं भंते ! दसमभत्तिए समणे निग्गंथे कम्मं निज्जरेइ एवइयं कम्मं नरएसु नेरइया वासकोडीए वा वासकोडीहिं वा वासकोडाकोडीए वा खवयंति ? नो इण्ठे समठ्ठे, से केण्ठेणं भंते ! एवं वुच्चइ जावइयं अन्न(इ)गिलायए समणे निग्गंथे कम्मं निज्जरेइ एवइयं कम्मं नरएसु नेरइया वासेण वा वासेहिं वा वासस-एण वा (जाव) वास-(सय) सहस्सेण वा नो खवयंति, जावइयं चउत्थभत्तिए एवं तं चेव पुव्वभणियं उच्चारयेय्वं जाव वासकोडाकोडीए वा नो खवयंति ? गोयमा ! से जहानामए-केइ पुरिसे जुञ्जे जराजज्जरियदेहे सिद्धिलतयावलितरंगसपिणद्धगत्ते पविरलपरिसडियदंतसेढी उण्हाभिहए तण्हाभिहए आउरे झुंझिए पिवासिए दुब्बले किलंते एगं महं कोसंबगंडियं सुक्कं जडिलं गंठिळं चिक्कणं वाइइं अपत्तियं मुंढेण परसुणा अक्कमेज्जा, तए णं से पुरिसे महंताइं २ सद्दाइं करेइ नो महंताइं २ दलाइं अवद्दालेइ, एवामेव गोयमा ! नेरइयाणं पावाइं कम्माइं गाढीकयाइं चिक्कणीकयाइं एवं जहा छट्ठसए जाव नो महापज्जवसाणा भवन्ति, से जहानामए-केइ पुरिसे अहिगरणिं आउडेमाणे महया जाव नो महापज्जवसाणा भवन्ति, से जहानामए-केइ पुरिसे तरुणे बलवं जाव मेहावी निउणसिप्पोवगए एगं महं सामलिगंडियं उल्लं अजडिलं अगंठिळं अचिक्कणं अवाइइं सपत्तियं अइत्तिकखेण परसुणा अक्कमेज्जा, तए णं से पुरिसे नो महंताइं २ सद्दाइं करेइ, महंताइं २ दलाइं अवद्दालेइ, एवामेव गोयमा ! समणाणं निग्गंथाणं अहाबायराइं कम्माइं सिद्धिलीकयाइं णिट्ठियाइं कयाइं जाव खिप्पामेव परिविद्धत्थाइं भवन्ति, जावइयं तावइयं जाव महापज्जवसाणा भवन्ति, से जहा वा केइ पुरिसे सुक्कतणहत्थगं जायतेयंसि पक्खिवेज्जा, एवं जहा छट्ठसए तहा अयोक्वलेवि जाव महापज्जवसाणा भवन्ति, से तेण्ठेणं गोयमा ! एवं वुच्चइ जावइयं अन्नगिलायए समणे निग्गंथे कम्मं निज्जरेइ तं चेव जाव वासकोडाकोडीए वा नो खवयंति ॥ सेवं भंते ! सेवं भंते ! त्ति जाव विहरइ ॥ ५७१ ॥ सोलसमस्स सयस्स चउत्थो उहेसो समत्तो ॥

तेणं कालेणं तेणं समएणं उल्लुयातीरे नामं नयरे होत्था वज्जओ, एगजंजुए उज्जाणे वज्जओ, तेणं कालेणं तेणं समएणं सामी समोसडे जाव परिसा पज्जुवासइ, तेणं कालेणं तेणं समएणं सक्के देविंदे देवराया वज्जपाणी एवं जहेव बिइए उहेसए तहेव दिव्वेणं जाणविमाणेणं आगओ जाव जेणेव समणे भगवं महावीरे तेणेव उवागच्छइ २ ता जाव नमंसित्ता एवं वयासी—देवे णं भंते ! महिद्धिए जाव महेसक्खे बाहिरए पोगले अपरियाइत्ता पभू आगमित्तए ? नो इण्ठे समठ्ठे, देवे णं भंते ! महिद्धिए जाव महेसक्खे बाहिरए पोगले परियाइत्ता पभू आग-

मित्तए ? हंता भभू, देवे णं भंते ! महिद्धिए एवं एएणं अभिलावेणं गमित्तए
 २, एवं भासित्तए वा वा(विया)गरित्तए वा ३, उम्मिसावेत्तए वा निम्मिसावेत्तए वा ४,
 आउंटावेत्तए वा पसारैत्तए वा ५, ठाणं वा सेज्जं वा निसीहियं वा चेइत्तए वा ६, एवं
 विउन्वित्तए वा ७, एवं परियारावेत्तए वा ८ जाव हंता भभू, इमाई अट्ठ उक्खि-
 त्तपसिणवागरणाई पुच्छइ इमाई० २ ता संभंतियवंदणएणं वंदइ संभंतिय० २ ता
 तमेव दिव्वं जाणविमाणं दुरुहइ २ ता जामेव दिसिं पाउब्भूए तामेव दिसिं पडिगए
 ॥५७२॥ भंते ! त्ति भगवं गोयमे समणं भगवं महावीरं वंदइ नमंसइ वं० २ ता एवं
 वयासी-अन्नया णं भंते ! सक्के देविंदे देवराया देवाणुप्पियं वंदइ नमंसइ सक्कारेइ
 जाव पज्जुवासइ, किण्णं भंते ! अज्ज सक्के देविंदे देवराया देवाणुप्पियं अट्ठ उक्खि-
 त्तपसिणवागरणाई पुच्छइ २ ता संभंतियवंदणएणं वंदइ णमंसइ वं० २ ता जाव
 पडिगए ? गोयमादि समणे भगवं महावीरे भगवं गोयमं एवं वयासी-एवं खलु
 गोयमा ! तेणं कालेणं तेणं समएणं महाउक्के कप्पे महासामाणे विमाणे दो देवा
 महिद्धिया जाव महेसक्खा एगविमाणंसि देवत्ताए उववन्ना, तं०-माइमिच्छदिट्ठि-
 उववन्नए य अमाइसम्मदिट्ठिउववन्नए य, तए णं से माइमिच्छदिट्ठिउववन्नए देवे तं
 अमाइसम्मदिट्ठिउववन्नं देवं एवं वयासी-परिणममाणा पोगगला नो परिणया अप-
 रिणया, परिणमंतीति पोगगला नो परिणया अपरिणया, तए णं से अमाइसम्मदिट्ठि-
 उववन्नए देवे तं माइमिच्छदिट्ठिउववन्नं देवं एवं वयासी-परिणममाणा पोगगला
 परिणया नो अपरिणया, परिणमंतीति पोगगला परिणया नो अपरिणया, तं माइमि-
 च्छदिट्ठिउववन्नं देवं एवं पडिहणइ २ ता ओहिं पउंजइ २ ता ममं ओहिणा आभोएइ
 ममं० २ ता अयमेयारूवे जाव समुप्पजित्था-एवं खलु समणे भगवं महावीरे
 जंबुद्वीवे २ जेणेव भारहे वासे जेणेव उल्लुयातीरे नयरे जेणेव एगजंबुए उज्जाणे अहा-
 पडिरूवं जाव विहरइ, तं सेयं खलु मे समणं भगवं महावीरं वंदित्ता जाव पज्जुवा-
 सित्ता इमं एयारूवं वागरणं पुच्छित्तएत्तिकट्ठु एवं संपेहेइ एवं संपेहिता चउहिनि
 सामाणियसाहस्सीहिं परियारो जहा सूरियाभस्स जाव निग्घोसनाइयरवेणं जेणेव
 जंबुद्वीवे २ जेणेव भारहे वासे जेणेव उल्लुयातीरे नयरे जेणेव एगजंबुए उज्जाणे
 जेणेव ममं अंतिए तेणेव पदारेत्थ गमणाए, तए णं से सक्के देविंदे देवराया तस्स
 देवस्स तं दिव्वं देविद्धिं दिव्वं देवजुइ दिव्वं देवाणुभा(वं)गं दिव्वं तेयलेस्स असहमाणे
 ममं अट्ठ उक्खित्तपसिणवागरणाई पुच्छइ २ ता संभंतिय जाव पडिगए ॥५७३॥ जावं
 च णं समणे भगवं महावीरे भगवओ गोयमस्स एयमट्ठं परिकहेइ तावं च णं से
 देवे तं देसं हव्वमागए, तए णं से देवे समणं भगवं महावीरं तिक्खुतो वंदइ

नमंसइ वं० २ ता एवं वयासी-एवं खलु भंते ! महासुक्के कप्पे महासामाणे विमाणे एगे माइमिच्छादिट्ठिउववन्नए देवे ममं एवं वयासी-परिणममाणा पोग्गला नो परिणया अपरिणया, परिणमंतीति पोग्गला नो परिणया अपरिणया, तए णं अहं तं माइमिच्छदिट्ठिउववन्नं देवं एवं वयासी-परिणममाणा पोग्गला परिणया नो अपरिणया, परिणमंतीति पोग्गला परिणया णो अपरिणया, से कहमेयं भंते ! एवं ? गंगदत्तादि समणे भगवं महावीरे गंगदत्तं देवं एवं वयासी-अहंपि णं गंगदत्ता । एवमाइक्खामि ४-परिणममाणा पोग्गला जाव नो अपरिणया सच्चमेसे अट्ठे, तए णं से गंगदत्ते देवे समणस्स भगवओ महावीरस्स अंतियं एयमट्ठं सोच्चा निसम्म हट्ठुट्ठं समणं भगवं महावीरं वंदइ नमंसइ वं० २ ता नचासच्चे जाव पज्जुवासइ, तए णं समणे भगवं महावीरे गंगदत्तस्स देवस्स तीसे य जाव धम्मं परिकहेइ जाव आराहए भवइ, तए णं से गंगदत्ते देवे समणस्स भगवओ महावीरस्स अंतिए धम्मं सोच्चा निसम्म हट्ठुट्ठे उट्ठाए उट्ठेइ उ० २ ता समणं भगवं महावीरं वंदइ नमंसइ वं० २ ता एवं वयासी-अहण्णं भंते ! गंगदत्ते देवे किं भवसिद्धिए अभवसिद्धिए ? एवं जहा सूरियाभो जाव बत्तीसइविहं नट्ठविहं उवदंसेइ २ ता जाव तामेव दिस्सि पडिगए ॥ ५७४ ॥ भंते ! ति भगवं गोयमे समणं भगवं महावीरं जाव एवं वयासी-गंगदत्तस्स णं भंते ! देवस्स सा दिव्वा देविट्ठी दिव्वा देवजुई जाव अणुप्पविट्ठा ? गोयमा ! सरिरं गया सरिरं अणुप्पविट्ठा कूडागारसालादिट्ठतो जाव सरिरं अणुप्पविट्ठा । अहो णं भंते ! गंगदत्ते देवे महिङ्खिए जाव महेसक्खे, गंगदत्तेणं भंते ! देवेणं सा दिव्वा देविट्ठी दिव्वा देवजुई किण्णा लद्धा जाव जं णं गंगदत्तेणं देवेणं सा दिव्वा देविट्ठी जाव अभिसमन्नागया ? गोयमादि समणे भगवं महावीरे भगवं गोयमं एवं वयासी-एवं खलु गोयमा ! तेणं कालेणं तेणं समएणं इहेव जंशुहीवे २ भारहे वासे हत्थिणापुरे नामं नयरे होत्था वन्नओ, सहसंबवणे उज्जाणे वन्नओ, तत्थ णं हत्थिणापुरे नयरे गंगदत्ते नामं गाहावई परिवसइ अट्ठे जाव अपरिभूए, तेणं कालेणं तेणं समएणं मुणिसुव्वए अरहा आइगरे जाव सव्वन्नू सव्वदरिसी आगासगएणं चक्केणं जाव पक्कडिज्जमाणेणं २ सीसगणसंपरिवुडे पुव्वाणुपुव्विं चरमाणे गामाणुगामं जाव जेणेव सहसंबवणे उज्जाणे जाव विहरइ, परिसा निगया जाव पज्जुवासइ, तए णं से गंगदत्ते गाहावई इमीसे कहाए लद्धे समाणे हट्ठुट्ठ जाव सरिरे साओ गिहाओ पडिनिक्खमइ २ ता पायविहारचारेणं हत्थिणाउरं नयरं मज्झमज्झेणं निगच्छइ २ ता जेणेव सहसंबवणे उज्जाणे जेणेव मुणिसुव्वए अरहा तेणेव उवागच्छइ २ ता मुणिसुव्वयं अरहं तिकखुत्तो

आयाहिणं पयाहिणं जाव तिविहाए पञ्जुवासणाए पञ्जुवासइ, तए णं मुणिसुव्वए अरहा गंगदत्तस्स गाहावइस्स तीसे य महइ जाव परिसा पडिगया, तए णं से गंगदत्ते गाहावई मुणिसुव्वयस्स अरहओ अंतियं धम्मं सोच्चा निसम्म हट्टतुट्ठं उट्ठाए उट्ठेइ २ ता मुणिसुव्वयं अरहं वंदइ नमंसइ वंदित्ता नमंसित्ता एवं वयासी-सह्वामि णं भंते ! निगगंथं पावयणं जाव से जहेयं तुब्भे वदह, जं नवरं देवाणुप्पिया ! जेट्ठपुत्तं कुडुंबे ठावेमि, तए णं अहं देवाणुप्पियाणं अंतियं मुंडे जाव पव्वयामि, अहासुहं देवाणुप्पिया ! मा पडिबंधं, तए णं से गंगदत्ते गाहावई मुणिसुव्वएणं अरहया एवं वुत्ते समाणे हट्टतुट्ठं मुणिसुव्वयं अरहं वंदइ नमंसइ वं० २ ता मुणिसुव्वयस्स अरहओ अंतियाओ सहसंबवणाओ उज्जाणाओ पडिनिक्खमइ २ ता जेणेव हत्थिणापुरे नयरे जेणेव सए गिहे तेणेव उवागच्छइ २ ता विउलं असणं पाणं जाव उवक्खडावेइ २ ता मित्तणाइणियग जाव आमंतेइ आमंतेत्ता तओ पच्छा ण्हाए जहा पूरणे जाव जेट्ठपुत्तं कुडुंबे ठावेइ, तं मित्तणाइ जाव जेट्ठपुत्तं च आपुच्छइ २ ता पुरिससहस्स-वाहिणं सीयं दुरुहइ पुरिससह० २ ता मित्तणाइणियग जाव परिजणेणं जेट्ठपुत्तेण य समणुगम्ममाणमग्गे सव्विद्धीए जाव णाइयरवेणं हत्थिणापुरं नयरं मज्झमज्झेणं निगगच्छइ २ ता जेणेव सहसंबवणे उज्जाणे तेणेव उवागच्छइ २ ता छत्ताइए तित्थगराइसए पासइ एवं जहा उदायणे जाव सयमेव आभरणं उमुयइ स० २ ता सयमेव पंचमुट्ठियं लोयं करेइ स० २ ता जेणेव मुणिसुव्वए अरहा एवं जहेव उदायणे तहेव पव्वइए, तहेव एक्कारस अंगाई अहिज्जइ जाव मासियाए संलेहणाए सट्ठिं भत्ताई अणसणाए (जाव) छेदेइ सट्ठिं भत्ताई० २ ता आलोइयपडिक्कंते समाहिपत्ते कालमासे कालं किच्चा महासुक्के कप्पे महासामाणे विमाणे उववायसभाए देवसयणिज्जंसी जाव गंगदत्तदेवत्ताए उववन्ने, तए णं से गंगदत्ते देवे अहुणोववन्न-मेत्तए समाणे पंचविहाए पज्जतीए पज्जत्तिभावं गच्छइ, तंजहा-आहारपज्जतीए जाव भासामणपज्जतीए, एवं खलु गोयमा ! गंगदत्तेणं देवेणं सा दिव्वा देविद्धी जाव अभिसमन्नागया । गंगदत्तस्स णं भंते ! देवस्स केवइयं कालं ठिई पन्नत्ता ? गोयमा ! सत्तर ससागरोवमाई ठिई प०, गंगदत्ते णं भंते ! देवे ताओ देवलोगाओ आउक्खएणं जाव महाविदेहे वासे सिज्झहिइ जाव अंतं काहिइ ॥ सेवं भंते ! २ ति ॥ ५७५ ॥ सोलसमस्स सयस्स पञ्चमो उद्देसो समत्तो ॥

कइविहे णं भंते ! सुविणंदंसेणे पण्णत्ते ? गोयमा ! पंचविहे सुविणंदंसेणे पण्णत्ते, तंजहा-अहातच्चे पयाणे चित्तासुविणे तत्त्विवरीए अव्वत्तदंसेणे ॥ सुत्ते णं भंते ! सुविणं पासइ, जागरे सुविणं पासइ, सुत्तजागरे सुविणं पासइ ? गोयमा ! नो सुत्ते सुविणं पासइ,

नो जागरे सुविणं पासइ, सुत्तजागरे सुविणं पासइ ॥ जीवा णं भंते ! किं सुत्ता जागरा सुत्तजागरा ? गोयमा ! जीवा सुत्तावि जागरावि सुत्तजागरावि, नेरइया णं भंते ! किं सुत्ता० पुच्छा, गोयमा ! नेरइया सुत्ता नो जागरा नो सुत्तजागरा, एवं जाव चउ-
रिंदिया, पंचिंदियतिरिक्खजोणिया णं भंते ! किं सुत्ता० पुच्छा, गोयमा ! सुत्ता नो जागरा सुत्तजागरावि, मणुस्सा जहा जीवा, वाणमंतरजोइसियवेमाणिया जहा नेरइया ॥ ५०६ ॥ संवुडे णं, भंते ! सुविणं पासइ, असंवुडे सुविणं पासइ, संवुडासंवुडे सुविणं पासइ ? गोयमा ! संवुडेवि सुविणं पासइ, असंवुडेवि सुविणं पासइ, संवुडासंवुडेवि सुविणं पासइ, संवुडे सुविणं पासइ अहातच्चं पासइ, असंवुडे सुविणं पासइ तहा वा तं होज्जा अहा वा तं होज्जा, संवुडासंवुडे सुविणं पासइ एवं चेव ॥ जीवा णं भंते ! किं संवुडा असंवुडा संवुडासंवुडा ? गोयमा ! जीवा संवुडावि असंवुडावि संवुडासंवुडावि, एवं जहेव सुत्ताणं दंडओ तहेव भाणियव्वो ॥ कइ णं भंते ! सुविणा पण्णत्ता ? गोयमा ! बायालीसं सुविणा पण्णत्ता, कइ णं भंते ! महासुविणा पण्णत्ता ? गोयमा ! तीसं महासुविणा पण्णत्ता, कइ णं भंते ! सव्वसुविणा पण्णत्ता ? गोयमा ! बावत्तरिं सव्वसुविणा पण्णत्ता । तित्थगरमायरो णं भंते ! तित्थगरंसि गब्भं वक्कममाणंसि कइ महासुविणे पासित्ताणं पडिबुज्झंति ? गोयमा ! तित्थगरमायरो णं तित्थगरंसि गब्भं वक्कममाणंसि एएसिं तीसाए महासुविणाणं इमे चोइस महासुविणे पासित्ताणं पडिबुज्झंति, तं०-गयउसभसीहअभिसेय जाव सिहिं च । चक्कवट्ठिमायरो णं भंते ! चक्कवट्ठिसि गब्भं वक्कममाणंसि कइ महासुविणे पासित्ताणं पडिबुज्झंति ? गोयमा ! चक्कवट्ठिमायरो चक्कवट्ठिसि जाव वक्कममाणंसि एएसिं तीसाए महासुविणाणं एवं जहा तित्थगरमायरो जाव सिहिं च । वासुदेवमायरो णं पुच्छा, गोयमा ! वासुदेवमायरो जाव वक्कममाणंसि एएसिं चोइसण्हं महासुविणाणं अन्नयरे सत्त महासुविणे पासित्ताणं पडिबुज्झंति । बलदेवमायरो णं पुच्छा, गोयमा ! बलदेवमायरो जाव एएसिं चोइसण्हं महासुविणाणं अन्नयरे चत्तारि महासुविणे पासित्ताणं पडिबुज्झंति । मंडलियमायरो णं भंते ! पुच्छा, गोयमा ! मंडलियमायरो जाव एएसिं चोइसण्हं महासुविणाणं अन्नयरे एणं महासुविणं जाव पडिबुज्झंति ॥ ५०७ ॥ समणे भगवं महावीरे छउमत्थकालियाए अंतिमराइयंसि इमे दस महासुविणे पासित्ताणं पडिबुडे, तं०-एणं च णं महं घोररूवदित्थरं तालपिसायं सुविणे पराजियं पासित्ताणं पडिबुडे १, एणं च णं महं सुक्खिपक्खगं पुंसकोइलं सुविणे पासित्ताणं पडिबुडे २, एणं च णं महं चित्तविचित्तपक्खगं पुंसकोइलं सुविणे पासित्ताणं पडिबुडे ३, एणं च णं महं दामदुगं सव्वरयणामयं सुविणे पासित्ताणं

पडिबुद्धे ४, एगं च णं महं सेयं गोवग्गं सुविणे पासित्ताणं पडिबुद्धे ५, एगं च णं महं पउमसरं सव्वओ समंता कुसुमियं सुविणे पासित्ताणं पडिबुद्धे ६, एगं च णं महं सागरं उम्मीवीईसहस्सकलियं भुयाहिं तिन्नं सुविणे पासित्ताणं पडिबुद्धे ७, एगं च णं महं दिणयरं तेयसा जलंतं सुविणे पासित्ताणं पडिबुद्धे ८, एगं च णं महं हरि-
वेरुलियवन्नाभेणं नियगेणं अंतेणं माणुसुत्तरं पव्वयं सव्वओ समंता आवेढियं परिवेढियं सुविणे पासित्ताणं पडिबुद्धे ९, एगं च णं महं मंदरे पव्वए मंदरचूलियाए उवरिं सीहासणवरगयं अप्पाणं सुविणे पासित्ताणं पडिबुद्धे १० । जण्णं समणे भगवं महावीरे एगं महं घोररूवदित्तधरं तालपिसायं सुविणे पराजियं पासित्ताणं पडि-
बुद्धे, तण्णं समणेणं भगवया महावीरेणं मोहणिज्जे कम्मे मूलाओ उग्घाइए १, जन्नं समणे भगवं महावीरे एगं महं सुक्किळ्ळ जाव पडिबुद्धे, तण्णं समणे भगवं महावीरे सुक्कज्झाणोवगाए विहरइ २, जण्णं समणे भगवं महावीरे एगं महं चित्तविचित्त जाव पडिबुद्धे, तण्णं समणे भगवं महावीरे विचित्तं ससमयपरसमइयं दुवालसंगं गणिपि-
डगं आघवेइ पन्नवेइ परूवेइ दंसेइ निर्दंसेइ उवदंसेइ, तंजहा-आयारं सूयगडं जाव दिट्ठिवायं ३, जण्णं समणे भगवं महावीरे एगं महं दामदुगं सव्वरयणाभयं सुविणे पासित्ताणं पडिबुद्धे, तण्णं समणे भगवं महावीरे दुविहं धम्मं पन्नवेइ, तं०-आगा-
रधम्मं वा अणागारधम्मं वा ४, जण्णं समणे भगवं महावीरे एगं महं सेयगोवग्गं जाव पडिबुद्धे, तण्णं समणस्स भगवओ महावीरस्स चाउव्वण्णाइन्ने समणसंघे प०,
तं०-समणा समणीओ सावया सावियाओ ५, जण्णं समणे भगवं महावीरे एगं महं पउमसरं जाव पडिबुद्धे, तण्णं समणे भगवं महावीरे चउव्विहे देवे पन्नवेइ,
तं०-भवणवासी वाणमंतरे जोइसिए वेमाणिए ६, जन्नं समणे भगवं महावीरे एगं महं सागरं जाव पडिबुद्धे, तन्नं समणेणं भगवया महावीरेणं अणादीए अणवदग्गे जाव संसारकंतारे तिन्ने ७, जन्नं समणे भगवं महावीरे एगं महं दिणयरं जाव पडि-
बुद्धे, तन्नं समणस्स भगवओ महावीरस्स अणंते अणुत्तरे निव्वाघाए निरावरणे कसिणे पडिपुन्ने केवलरनानाणदंसणे समुप्पन्ने ८, जण्णं समणे जाव वीरे एगं महं हरिवेरुलिय जाव पडिबुद्धे, तण्णं समणस्स भगवओ महावीरस्स ओराला कित्तिवन्नसहसिलोया सदे-
वमणुयासुरे लोगे परिभ(वं)मंति-इति खलु समणे भगवं महावीरे इति खलु समणे भगवं महावीरे ९, जन्नं समणे भगवं महावीरे मंदरे पव्वए मंदरचूलियाए जाव पडिबुद्धे, तण्णं समणे भगवं महावीरे सदेवमणुयासुराए परिसाए मज्झगए केवलीपन्नत्तं धम्मं आघ-
वेइ जाव उवदंसेइ ॥५७८॥ इत्थी वा पुरिसे वा सुविणंते एगं महं हयपंतिं वा गयपंतिं वा जाव उसभपंतिं वा पासमाणे पासइ, दुरुहमाणे दुरुहइ, दुरुढमिति अप्पाणं मज्झइ,

तक्खणामेव बुज्झइ, तेणेव भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं दामिणिं पाईणपडीणाययं दुहुओ समुहे पुट्ठं पासमाणे पासइ, संवेळेमाणे संवेळेइ, संवेळियमिति अप्पाणं मच्चइ, तक्खणामेव बुज्झइ, तेणेव भवग्गहणेणं जाव अंतं करेइ । इत्थी वा पुरिसे वा सुविणंते एगं महं रज्जुं पाईणपडीणाययं दुहुओ लोगंते पुट्ठं पासमाणे पासइ, छिंदमाणे छिंदइ, छिन्नमिति अप्पाणं मच्चइ, तक्खणामेव जाव अंतं करेइ । इत्थी वा पुरिसे वा सुविणंते एगं महं किण्हसुत्तगं वा जाव सुक्किळसुत्तगं वा पासमाणे पासइ, उग्गोवेमाणे उग्गोवेइ, उग्गोवियमिति अप्पाणं मच्चइ, तक्खणामेव जाव अंतं करेइ । इत्थी वा पुरिसे वा सुविणंते एगं महं अयरसिं वा तंबरासिं वा तउयरासिं वा सीसगरासिं वा पासमाणे पासइ, दुरूहमाणे दुरूहइ, दुरूहमिति अप्पाणं मच्चइ, तक्खणामेव बुज्झइ, दोच्चेणं भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं हिरञ्जरासिं वा सुवञ्जरासिं वा रयणरासिं वा वइररासिं वा पासमाणे पासइ, दुरूहमाणे दुरूहइ, दुरूहमिति अप्पाणं मच्चइ, तक्खणामेव बुज्झइ, तेणेव भवग्गहणेणं सिज्झइ जाव अंतं करेइ । इत्थी वा पुरिसे वा सुविणंते एगं महं तणरासिं वा जहा तेयनिसग्गे जाव अवकरासिं वा पासमाणे पासइ, विक्खि-रमाणे विक्खिरइ, विक्किणमिति अप्पाणं मच्चइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं सरथंभं वा वीरिणथंभं वा वंसीमूलथंभं वा वल्लीमूलथंभं वा पासमाणे पासइ, उम्मूलेमाणे उम्मूलेइ, उम्मूलियमिति अप्पाणं मच्चइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं खीरकुंभं वा दहिकुंभं वा घयकुंभं वा महुकुंभं वा पासमाणे पासइ, उप्पाडेमाणे उप्पाडेइ, उप्पाडियमिति अप्पाणं मच्चइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा सुविणंते एगं महं सुरावियडकुंभं वा सोवीर-वियडकुंभं वा तेळकुंभं वा वसाकुंभं वा पासमाणे पासइ, भिंदमाणे भिंदइ, भिन्न-मिति अप्पाणं मच्चइ, तक्खणामेव बुज्झइ, दोच्चेणं भवग्गहणेणं जाव अंतं करेइ । इत्थी वा पुरिसे वा सुविणंते एगं महं पउमसरं कुसुसियं पासमाणे पासइ, ओगाहेमाणे ओगाहेइ, ओगाहमिति अप्पाणं मच्चइ, तक्खणामेव बुज्झइ, तेणेव जाव अंतं करेइ । इत्थी वा जाव सुविणंते एगं महं सागरं उम्मीवीई जाव कलियं पासमाणे पासइ, तरमाणे तरइ, तिन्नमिति अप्पाणं मच्चइ, तक्खणामेव बुज्झइ, तेणेव जाव अंतं करेइ । इत्थी वा जाव सुविणंते एगं महं भवणं सव्वरयणामयं पासमाणे पासइ, [दुरूहमाणे दुरूहइ, दुरूहमिति अप्पाणं मण्णइ,] अणुप्पविसमाणे अणुप्पविसइ, अणुप्पविट्ठमिति अप्पाणं मच्चइ, तक्खणामेव बुज्झइ, तेणेव जाव अंतं करेइ । इत्थी वा पुरिसे वा

सुविणंते एगं महं विमाणं सव्वरयणामयं पासमाणे पासइ, दुरुहमाणे दुरुहइ, दुरुढ-
मिति अप्पाणं मच्चइ, तक्खणामेव बुज्झइ, तेणेव जाव अंतं करेइ ॥ ५७९ ॥ अह
भंते ! कोट्टपुडाण वा जाव केयईपुडाण वा अणुवायंसि उब्भिज्जमाणाण वा जाव
ठाणाओ वा ठाणं संक्रामिज्जमाणाणं किं कोट्टे वाइ जाव केयई वाइ ? गोयमा ! नो
कोट्टे वाइ जाव नो केयई वाइ, घाणसहगया पोग्गला वाइ । सेवं भंते ! २ त्ति
॥ ५८० ॥ **सोलसमस्स सयस्स छट्ठो उद्देसो समत्तो ॥**

कइविहे णं भंते ! उवओगे पन्नत्ते ? गोयमा ! दुविहे उवओगे पन्नत्ते, एवं जहा
उवओगपयं पन्नवणाए तहेव निरवसेसं भाणियव्वं, पासणयापयं च निरवसेसं
नेयव्वं । सेवं भंते ! सेवं भंते ! त्ति ॥ ५८१ ॥ **सोलसमस्स सयस्स सत्तमो
उद्देसो समत्तो ॥**

केमहालए णं भंते ! लोए पन्नत्ते ? गोयमा ! महइमहालए जहा बारसमसए
तहेव जाव असंखेजाओ जोयणकोडाकोडीओ परिकखेवेणं, लोगस्स णं भंते ! पुर-
च्छिमिहे चरिमंते किं जीवा जीवदेसा जीवप्पएसा अजीवा अजीवदेसा अजीव-
प्पएसा ? गोयमा ! नो जीवा जीवदेसावि जीवप्पएसावि अजीवावि अजीवदेसावि
अजीवप्पएसावि ॥ जे जीवदेसा ते नियमं एगिंदियदेसा अहवा एगिंदियदेसा य
बेइंदियस्स य देसे एवं जहा दसमसए अग्गेइंदिसा तहेव, नवरं देसेसु अणिदियाणं
आइल्लविरहिओ । जे अरूवी अजीवा ते छव्विहा, अद्धासमओ नत्थि, सेसं तं चेव
सव्वं निरवसेसं । लोगस्स णं भंते ! दाहिणिहे चरिमंते किं जीवा० ? एवं चेव,
एवं पच्चच्छिमिहेवि, एवं उत्तरिल्लेवि, लोगस्स णं भंते ! उवरिल्ले चरिमंते किं जीवा०
पुच्छा, गोयमा ! नो जीवा जीवदेसावि जीवप्पएसावि जाव अजीवप्पएसावि । जे
जीवदेसा ते नियमं एगिंदियदेसा य अणिंदियदेसा य अहवा एगिंदियदेसा य
अणिंदियदेसा य बेइंदियस्स य देसे, अहवा एगिंदियदेसा य अणिंदियदेसा य
बेइंदियाण य देसा, एवं मज्झिल्लविरहिओ जाव पंचिंदियाणं, जे जीवप्पएसा ते
नियमं एगिंदियप्पएसा य अणिंदियप्पएसा य अहवा एगिंदियप्पएसा य अणिंदिय-
प्पएसा य बेइंदियस्स पएसा य अहवा एगिंदियप्पएसा य अणिंदियप्पएसा य बेइं-
दियाण य पएसा, एवं आइल्लविरहिओ जाव पंचिंदियाणं, अजीवा जहा दसमसए
तमाए तहेव निरवसेसं भाणियव्वं ॥ लोगस्स णं भंते ! हेट्ठिल्ले चरिमंते किं जीवा०
पुच्छा, गोयमा ! नो जीवा जीवदेसावि जीवप्पएसावि जाव अजीवप्पएसावि, जे
जीवदेसा ते नियमं एगिंदियदेसा अहवा एगिंदियदेसा य बेइंदियस्स देसे अहवा
एगिंदियदेसा बेइंदियाण य देसा, एवं मज्झिल्लविरहिओ जाव अणिंदियाणं पएसा,

आइल्लविरहिओ सव्वेसिं जहा पुरच्छिमिल्ले चरिमंते तहेव, अजीवा जहेव उवरिल्ले चरिमंते तहेव ॥ इमीसे णं भंते ! रयणप्पभाए पुढवीए पुरच्छिमिल्ले चरिमंते किं जीवा० पुच्छा, गोयमा ! नो जीवा एवं जहेव लोगस्स तहेव चत्तारिवि चरिमंता जाव उत्तरिल्ले, उवरिल्ले तहेव जहा दसमसए विमला दिसा तहेव निरवसेसं, हेट्ठिल्ले चरिमंते जहेव लोगस्स हेट्ठिल्ले चरिमंते तहेव, नवरं देसे पंचिदिएसु तियभंगोत्ति सेसं तं चेव, एवं जहा रयणप्पभाए चत्तारि चरिमंता भणिया एवं सक्करप्पभाएवि उवरि-महेट्ठिल्ला जहा रयणप्पभाए हेट्ठिल्ले, एवं जाव अहे सत्तमाए, एवं सोहम्मस्सवि जाव अच्चुयस्स, गेविज्जविमाणणं एवं चेव, नवरं उवरिमहेट्ठिल्लेसु चरिमंतेसु देसेसु पंचिदियाणवि मज्झिन्नल्लविरहिओ सेसं तहेव, एवं जहा गेवेज्जविमाणा तहा अणुत्तरवि-माणवि, ईसिप्पब्भारावि ॥५८२॥ परमाणुपोगगले णं भंते ! लोगस्स पुरच्छिमिल्लाओ चरिमंताओ पच्चच्छिमिल्लं चरिमंतं एगसमएणं गच्छइ, पच्चच्छिमिल्लाओ चरिमंताओ पुरच्छिमिल्लं चरिमंतं एगसमएणं गच्छइ, दाहिणिमिल्लाओ चरिमंताओ उत्तरिल्लं जाव गच्छइ, उत्तरिल्लाओ चरिमंताओ दाहिणिमिल्लं चरिमंतं जाव गच्छइ, उवरिल्लाओ चरिमं-ताओ हेट्ठिल्लं चरिमंतं जाव गच्छइ, हेट्ठिल्लाओ चरिमंताओ उवरिल्लं चरिमंतं एगसमएणं गच्छइ ? हंता गोयमा ! परमाणुपोगगले णं लोगस्स पुरच्छिमिल्लं तं चेव जाव उवरिल्लं चरिमंतं गच्छइ ॥ ५८३ ॥ पुरिसे णं भंते ! वासइ नो वासइत्ति हत्थं वा पायं वा बाहुं वा ऊरुं वा आउंटावेमाणे वा पसारमाणे वा कइकिरिए ? गोयमा ! जावं च णं से पुरिसे वासं वासइ वासं नो वासतीत्ति हत्थं वा जाव ऊरुं वा आउंटावेइ वा पसारेइ वा तावं च णं से पुरिसे काइयाए जाव पंचहिं किरियाहिं पुट्ठे ॥५८४॥ देवे णं भंते ! महिच्चिए जाव महेसक्खे लोगंते ठिच्चा पभू अलोगंसि हत्थं वा जाव ऊरुं वा आउंटावेत्तए वा पसारेत्तए वा ? णो इण्ठे समट्ठे, से केणट्ठेणं भंते ! एवं वुच्चइ देवे णं महिच्चिए जाव महेसक्खे लोगंते ठिच्चा णो पभू अलोगंसि हत्थं वा जाव पसारेत्तए वा ? गोयमा ! जीवाणं आहारोवचिया पोगगला बौदिविया पोगगला कलेवरचिया पोगगला पोगगला (चे)सेव पप्प जीवाण य अजीवाण य गइपरि-याए आहिज्जइ, अलोए णं नेवत्थि जीवा नेवत्थि पोगगला से तेणट्ठेणं जाव पसारेत्तए वा ॥ सेवं भंते ! २ ति ॥५८५॥ सोलसमे सए अट्ठमो उद्देसो समत्तो ॥

कहिचं भंते ! बलिस्स वइरोयणिंदस्स वइरोयणरत्तो सभा सुहम्मा प० ? गोयमा ! इहेव जंबुदीवे दीवे मंदरस्स पव्वयस्स उत्तरेणं तिरियमसंखेजे जहेव चमरस्स जाव बायालीसं जोयणसहस्साई ओगाहिता एत्थ णं बलिस्स वइरोयणिंदस्स वइ-रोयणरत्तो रुयगिंदे नामं उप्पायपव्वए पन्नते, सत्तरस एक्कवीसे जोयणसए एवं

परिमाणं जहेव तिमिच्छिच्छूडस्स पासायवडिंसगस्सवि तं चेव पमाणं सीहासणं सप-
रिवारं बलिस्स परि(वा)यारेणं अट्ठो तहेव, नवरं ख्यगिंदप्पभाई ३ सेसं तं चेव जाव
बलिचंचाए रायहाणीए अत्तेसिं च जाव (णिच्चे) ख्यगिंदस्स णं उप्पायपव्वयस्स उत्तरेणं
छक्कोडिसए तहेव जाव चत्तालीसं जोयणसहस्साईं ओगाहिता एत्थ णं बलिस्स
वइरोयणिंदस्स वइरोयणरत्तो बलिचंचा नामं रायहाणी प० एणं जोयणसयसहस्सं
पमाणं तहेव उववाओ जाव आयरक्खा सव्वं तहेव निरवसेसं, नवरं साइरेणं
सागरोवमं ठिई प०, सेसं तं चेव जाव बली वइरोयणिंदे बली० २ ॥ सेवं भंते ! २
त्ति जाव विहरइ ॥ ५८६ ॥ सोलसमस्स सयस्स नवमो उद्देसो समत्तो ॥

कइविहे णं भंते ! ओही पज्जे ? गोयमा ! दुविहा ओही प०, तं०-ओहीपयं निरव-
सेसं भाणियव्वं ॥ सेवं भंते ! सेवं भंते ! त्ति जाव विहरइ ॥ ५८७ ॥ सोल-
समस्स सयस्स दसमो उद्देसो समत्तो ॥

दीवकुमारा णं भंते ! सव्वे समाहारा सव्वे समुस्सासनिस्सासा ? णो इण्ठे
समट्ठे, एवं जहा पढमसए विइयउद्देसए दीवकुमाराणं वत्तव्वया तहेव जाव समाउया
समुस्सासनिस्सासा । एवं नागावि, दीवकुमाराणं भंते ! कइ लेस्साओ पन्नत्ताओ ?
गोयमा ! चत्तारि लेस्साओ पन्नत्ताओ, तंजहा-कण्हलेस्सा जाव तेउलेस्सा । एएसि
णं भंते ! दीवकुमाराणं कण्हलेस्साणं जाव तेउलेस्साण य कयरे कयरेहिंतो जाव
विसेसाहिया वा ? गोयमा ! सव्वत्थोवा दीवकुमारा तेउलेस्सा, काउलेस्सा असंखेज्ज-
गुणा, नीललेस्सा विसेसाहिया, कण्हलेस्सा विसेसाहिया । एएसि णं भंते ! दीवकुमाराणं
कण्हलेस्साणं जाव तेउलेस्साण य कयरे कयरेहिंतो अप्पिड्डिया वा महिड्डिया वा ?
गोयमा ! कण्हलेस्साहिंतो नीललेस्सा महिड्डिया जाव सव्वमहिड्डिया तेउलेस्सा ।
सेवं भंते ! सेवं भंते ! त्ति जाव विहरइ ॥ १६ ॥ ११ ॥ उदहिकुमारा णं भंते !
सव्वे समाहारा० एवं चेव, सेवं भंते ! २ त्ति ॥ १६ ॥ १२ ॥ एवं दिसाकुमारावि
सेवं भंते ! २ त्ति ॥ १६ ॥ १३ ॥ एवं थणियकुमारावि, सेवं भंते ! सेवं भंते ! त्ति
जाव विहरइ ॥ ५८८ ॥ सोलसमस्स सयस्स चउद्दसमो उद्देसो
समत्तो ॥ सोलसमं सयं समत्तं ॥

नमो सुयदेवयाए भगवईए ॥ कुंजर १ संजय २ सेलेसि ३ किरिय ४ ईसाण
५ पुढवि ६-७ दग ८-९ वाळ १०-११ । एगिंदिय १२ नाग १३ सुवन्न १४
विज्जु १५ वाउ १६ ऽग्गि १७ सत्तरसे ॥ १ ॥ रायगिहे जाव एवं वसासी-
उदाई णं भंते ! हत्थिराया कओहिंतो अणंतं उव्वट्ठिता उदाइहत्थिरायाए
उव्वज्जे ? गोयमा ! अखुरकुमारेहिंतो देवेहिंतो अणंतं उव्वट्ठिता उदाइहत्थिरा-
४८ सुत्ता०

यत्ताए उववजे, उदाई णं भंते ! हत्थिराया कालमासे कालं किच्चा कहिं गच्छिहिइ
 कहिं उववज्जिहिइ ? गोयमा ! इमीसे णं रयणप्पभाए पुढवीए उक्कोससागरोवमट्ठि-
 इयंसि निरयावासंसि नेरइयत्ताए उववज्जिहिइ, से णं भंते ! तओहिंतो अणंतरं
 उव्वट्ठित्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिञ्जिहिइ
 जाव अंतं काहिइ ॥ भूयाणंदे णं भंते ! हत्थिराया कओहिंतो अणंतरं उव्वट्ठित्ता
 भूयाणंदे हत्थिरायत्ताए एवं जहेव उदाई जाव अंतं काहिइ ॥ ५८९ ॥ पुरिसे णं
 भंते ! तालमारुइ ता० २ ता तालाओ तालफलं पचाळेमाणे वा पवाडेमाणे वा
 कइकिरिए ? गोयमा ! जावं च णं से पुरिसे तालमारुइ तालमारुहिता तालाओ
 तालफलं पचालेइ वा पवाडेइ वा तावं च णं से पुरिसे काइयाए जाव पंचहिं किरि-
 याहिं पुट्ठे, जेसिंपिय णं जीवाणं सरीरेहिंतो तले निव्वत्तिए तालफले निव्वत्तिए
 तेवि णं जीवा काइयाए जाव पंचहिं किरियाहिं पुट्ठा ॥ अहे णं भंते ! से ताल-
 फले अप्पणो गरुयत्ताए जाव पच्चोवयमाणे जाइं तत्थ पाणाइं जाव जीवियाओ
 ववरोवेइ तए णं भंते ! से पुरिसे कइकिरिए ? गोयमा ! जावं च णं से पुरिसे
 तालफले अप्पणो ग(गु)रुयत्ताए जाव जीवियाओ ववरोवेइ तावं च णं से पुरिसे
 काइयाए जाव चउहिं किरियाहिं पुट्ठे, जेसिंपिय णं जीवाणं सरीरेहिंतो तले निव्वत्तिए
 तेवि णं जीवा काइयाए जाव चउहिं किरियाहिं पुट्ठा, जेसिंपिय णं जीवाणं सरीरे-
 हिंतो तालफले निव्वत्तिए तेवि णं जीवा काइयाए जाव पंचहिं किरियाहिं पुट्ठा,
 जेविय से जीवा अहे वीससाए पच्चोवयमाणस्स उवग्गहे वट्ठति तेविय णं जीवा
 काइयाए जाव पंचहिं किरियाहिं पुट्ठा ॥ पुरिसे णं भंते ! रुक्खस्स मूलं पचाळेमाणे
 वा पवाडेमाणे वा कइकिरिए ? गोयमा ! जावं च णं से पुरिसे रुक्खस्स मूलं
 पचालेइ वा पवाडेइ वा तावं च णं से पुरिसे काइयाए जाव पंचहिं किरियाहिं
 पुट्ठे, जेसिंपिय णं जीवाणं सरीरेहिंतो मूले निव्वत्तिए जाव बीए निव्वत्तिए तेविय
 णं जीवा काइयाए जाव पंचहिं किरियाहिं पुट्ठा, अहे णं भंते ! से मूले अप्पणो
 गुसुयत्ताए जाव जीवियाओ ववरोवेइ तओ णं भंते ! से पुरिसे कइकिरिए ? गोयमा !
 जावं च णं से मूले अप्पणो जाव ववरोवेइ तावं च णं से पुरिसे काइयाए
 जाव चउहिं किरियाहिं पुट्ठे, जेसिंपिय णं जीवाणं सरीरेहिंतो कंदे निव्वत्तिए जाव
 बीए निव्वत्तिए तेवि णं जीवा काइयाए जाव चउहिं किरियाहिं पुट्ठा, जेसिंपिय
 णं जीवाणं सरीरेहिंतो मूले निव्वत्तिए तेवि णं जीवा काइयाए जाव पंचहिं
 किरियाहिं पुट्ठा, जेविय णं से जीवा अहे वीससाए पच्चोवयमाणस्स उवग्गहे वट्ठति
 तेवि णं जीवा काइयाए जाव पंचहिं किरियाहिं पुट्ठा ॥ पुरिसे णं भंते ! रुक्खस्स

कंदं पचाळे० ? गोयमा । जावं च णं से पुरिसे जाव पंचहिं किरियाहिं पुट्टे, जेसिपिय णं जीवाणं सरीरेहिंतो मूले निव्वत्तिए जाव बीए निव्वत्तिए तेवि णं जीवा जाव पंचहिं किरियाहिं पुट्टा, अहे णं भंते । से कंदे अप्पणो जाव चउहिं किरियाहिं पुट्टे, जेसिपिय णं जीवाणं सरीरेहिंतो मूले निव्वत्तिए खंधे निव्वत्तिए जाव चउहिं पुट्टा, जेसिपिय णं जीवाणं सरीरेहिंतो कंदे निव्वत्तिए तेवि णं जीवा जाव पंचहिं किरियाहिं पुट्टा, जेवि य से जीवा अहे वीससाए पच्चोवयमाणस्स जाव पंचहिं पुट्टा जहा (कंदे) खंधो एवं जाव वीयं ॥५९०॥ कइ णं भंते । सरीरगा पणत्ता ? गोयमा । पंच सरीरगा पणत्ता, तंजहा-ओरालिए जाव कम्मए । कइ णं भंते । इंदिया प० ? गोयमा । पंच इंदिया प०, तं०-सोईदिए जाव फासिंदिए । कइविहे णं भंते । जोए प० ? गोयमा । तिविहे जोए प०, तं०-मणजोए वइजोए कायजोए । जीवे णं भंते । ओरालियसरीरं निव्वत्तेमाणे कइकिरिए ? गोयमा । सिय तिकिरिए सिय चउकिरिए सिय पंचकिरिए, एवं पुढविकाइएवि, एवं जाव मणुस्से । जीवा णं भंते । ओरालियसरीरं निव्वत्तेमाणा कइकिरिया ? गोयमा । तिकिरियावि चउकिरियावि पंचकिरियावि, एवं पुढविकाइयावि, एवं जाव मणुस्सा, एवं वेउव्वियसरीरेणवि दो दंडगा नवरं जस्स अत्थि वेउव्वियं, एवं जाव कम्मगसरीरं, एवं सोईदियं जाव फासिंदियं, एवं मणजोगं वइजोगं कायजोगं जस्स जं अत्थि तं भाणियव्वं, एए एगत्तपुहुत्तेणं छवीसं दंडगा ॥ ५९१ ॥ कइविहे णं भंते । भावे पणत्ते ? गोयमा । छव्विहे भावे प०, तं०-उदइए उवसमिए जाव सन्निवाइए, से किं तं उदइए भावे ? उदइए भावे दुविहे पणत्ते, तंजहा-उदइएय उदयनिप्पत्ते य, एवं एएणं अभिलावेणं जहा अणुओगदारे छन्नामं तहेव निरवसेसं भाणियव्वं जाव से तं सन्निवाइए भावे ॥ सेवं भंते । सेवं भंते । ति ॥५९२॥ सत्तरसमे सए पढमो उदेसो समत्तो ॥

से नूणं भंते । संजयविरयपडिहयपच्चक्खायपावकम्मे धम्मे ठिए, असंजयविरयपडिहयपच्चक्खायपावकम्मे अहम्मे ठिए, संजयासंजए धम्माधम्मे ठिए ? इंता गोयमा । संजयविरय जाव धम्माधम्मे ठिए, एएसि णं भंते । धम्मंसि वा अहम्मंसि वा धम्माधम्मंसि वा चक्किया केइ आसइत्तए वा जाव तुयट्ठित्तए वा ? गोयमा । णो इण्टे समट्टे, से केणं खाइ अट्टेणं भंते । एवं वुच्चइ जाव धम्माधम्मे ठिए ? गोयमा । संजयविरय जाव पावकम्मे धम्मे ठिए धम्मं चेव उवसंपजित्ताणं विहरइ, असंजय जाव पावकम्मे अहम्मे ठिए अहम्मं चेव उवसंपजित्ताणं विहरइ, संजयासंजए धम्माधम्मे ठिए धम्माधम्मं उवसंपजित्ताणं विहरइ, से तेणट्टेणं गोयमा । जाव ठिए ॥ जीवा णं भंते । किं धम्मे ठिया अहम्मे ठिया धम्माधम्मे ठिया ?

गोयमा ! जीवा धम्मेवि ठिया अहम्मेवि ठिया धम्माधम्मेवि ठिया, नेरइयाणं भंते !
 पुच्छा, गोयमा ! नेरइया णो धम्मे ठिया, अहम्मे ठिया, णो धम्माधम्मे ठिया,
 एवं जाव चउरिंदियाणं, पंचिंदियतिरिक्खजोणियाणं पुच्छा, गोयमा ! पंचिंदियति-
 रिक्खजोणिया नो धम्मे ठिया, अहम्मे ठिया, धम्माधम्मेवि ठिया, मणुस्सा जहा
 जीवा, वाणमंतरजोइसियवेमाणिया जहा नेरइया ॥ ५९३ ॥ अन्नउत्थिया णं
 भंते ! एवमाइक्खंति जाव परुवेंति-एवं खलु समणा पंडिया समणोवासगा बाल-
 पंडिया, जस्स णं एगपाणाएवि दंडे अणिकिखत्ते से णं एगंतबाळेत्ति वत्तव्वं सिया,
 से कहमेयं भंते ! एवं ? गोयमा ! जणं ते अन्नउत्थिया एवमाइक्खंति जाव वत्तव्वं
 सिया, जे ते एवमाहंसु मिच्छं ते एवमाहंसु, अहं पुण गोयमा ! एवमाइक्खामि
 जाव परुवेमि-एवं खलु समणा पंडिया, समणोवासगा बालपंडिया, जस्स णं एग-
 पाणाएवि दंडे निक्खत्ते से णं नो एगंतबाळेत्ति वत्तव्वं सिया ॥ जीवा णं भंते !
 किं बाला पंडिया बालपंडिया ? गोयमा ! जीवा बालावि पंडियावि बालपंडियावि,
 नेरइयाणं पुच्छा, गोयमा ! नेरइया बाला नो पंडिया नो बालपंडिया, एवं जाव
 चउरिंदियाणं । पंचिंदियतिरिक्खजोणियाणं पुच्छा, गोयमा ! पंचिंदियतिरिक्ख-
 जोणिया बाला नो पंडिया बालपंडियावि, मणुस्सा जहा जीवा, वाणमंतरजोइसिय-
 वेमाणिया जहा नेरइया ॥ ५९४ ॥ अन्नउत्थिया णं भंते ! एवमाइक्खंति जाव
 परुवेंति-एवं खलु पाणाइवाए मुसावाए जाव मिच्छादंसणसल्ले वट्टमाणस्स अच्चे
 जीवे अच्चे जीवाया, पाणाइवायवेरमणे जाव परिगह्वेवरमणे कोहविवेगे जाव
 मिच्छादंसणसल्लविवेगे वट्टमाणस्स अच्चे जीवे अच्चे जीवाया, उप्पत्तियाए जाव
 पारिणामियाए वट्टमाणस्स अच्चे जीवे अच्चे जीवाया, उग्गहे ईहा अवाए धारणाए
 वट्टमाणस्स जाव जीवाया, उट्ठाणे जाव परक्कमे वट्टमाणस्स जाव जीवाया,
 नेरइयते तिरिक्खमणुस्सदेवत्ते वट्टमाणस्स जाव जीवाया, नाणावरणिजे जाव अंत-
 राइए वट्टमाणस्स जाव जीवाया, एवं कण्हेस्साए जाव सुक्खेस्साए, सम्महिट्ठीए
 ३, एवं चक्खुदंसणे ४, आभिणिबोहियनाणे ५, मइअन्नाणे ३, आहारसच्चाए ४, एवं
 ओरालियसरीरे ५, एवं मणजोए ३, सागारोवओगे अणागारोवओगे वट्टमाणस्स
 अण्णे जीवे अच्चे जीवाया, से कहमेयं भंते ! एवं ? गोयमा ! जणं ते अन्नउत्थिया
 एवमाइक्खंति जाव मिच्छं ते एवमाहंसु, अहं पुण गोयमा ! एवमाइक्खामि जाव
 परुवेमि-एवं खलु पाणाइवाए जाव मिच्छादंसणसल्ले वट्टमाणस्स सच्चेव जीवे सच्चेव
 जीवाया जाव अणागारोवओगे वट्टमाणस्स सच्चेव जीवे सच्चेव जीवाया ॥ ५९५ ॥
 देवे, णं भंते ! महिड्ढिए जाव महेसक्खे पुब्बामेव हवी भविता पभू अरुवि विउ-

वित्ताणं चिट्ठित्तए ? णो इण्ठे समट्ठे, से केणट्ठेणं भंते ! एवं वुच्चइ देवे णं जाव नो पभू अरुविं विउव्वित्ताणं चिट्ठित्तए ? गोयमा ! अहमेयं जाणामि, अहमेयं पासामि, अहमेयं बुज्झामि, अहमेयं अभिसमन्नागच्छामि, मए एयं नायं, मए एयं दिट्ठं, मए एयं बुद्धं, मए एयं अभिसमन्नागयं—जणं तहागयस्स जीवस्स सारुविस्स सकम्मस्स सारागस्स सवेयस्स समोहस्स सलेसस्स ससरीरस्स ताओ सरीराओ अविप्पमुक्कस्स एवं पञ्चायइ, तंजहा—कालत्ते वा जाव सुक्खिलत्ते वा, सुब्भिगंधत्ते वा दुब्भिगंधत्ते वा, तित्तत्ते वा जाव महुरत्ते वा, कक्खडत्ते वा जाव लुक्खत्ते वा, से तेणट्ठेणं गोयमा ! जाव चिट्ठित्तए ॥ सच्चैव णं भंते ! से जीवे पुब्बामेव अरुवी भवित्ता पभू रुविं विउव्वित्ताणं चिट्ठित्तए ? णो इण्ठे समट्ठे, से केणट्ठेणं जाव चिट्ठित्तए ? गोयमा ! अहमेयं जाणामि जाव जन्नं तहागयस्स जीवस्स अरुविस्स अकम्मस्स अरागस्स अवेयस्स अमोहस्स अलेसस्स असरीरस्स ताओ सरीराओ विप्पमुक्कस्स णो एवं पञ्चायइ, तं०—कालत्ते वा जाव लुक्खत्ते वा, से तेणट्ठेणं जाव चिट्ठित्तए वा ॥ सेवं भंते ! २ ति ॥ ५९६ ॥ सत्तारस्समस्स सयस्स बीओ उद्देसो समत्तो ॥

सेलेसिं पडिबन्नए णं भंते ! अणगारे सया समियं एयइ वेयइ जाव तं तं भावं परिणमइ ? णो इण्ठे समट्ठे, णणत्थेणेणं परप्पओगेणं ॥ कइविहा णं भंते ! एयणा प० ? गोयमा ! पंचविहा एयणा प०, तंजहा—दव्वेयणा खेत्तेयणा कालेयणा भावेयणा भावेयणा, दव्वेयणा णं भंते ! कइविहा प० ? गोयमा ! चउव्विहा प०, तंजहा—नेरइयदव्वेयणा, तिरिक्खदव्वेयणा, मणुस्सदव्वेयणा, देवदव्वेयणा, से केणट्ठेणं भंते ! एवं वुच्चइ—नेरइयदव्वेयणा २ ? गोयमा ! जन्नं नेरइया नेरइयदव्वे वट्ठिसु वा वट्ठंति वा वट्ठिस्संति वा ते णं तत्थ नेरइया नेरइयदव्वे वट्ठमाणा नेरइयदव्वेयणं एइंसु वा एयंति वा एइस्संति वा, से तेणट्ठेणं जाव दव्वेयणा, से केणट्ठेणं भंते ! एवं वुच्चइ तिरिक्खजोणियदव्वेयणा २ ? एवं चेव, नवरं तिरिक्खजोणियदव्वे० भाणियव्वं, सेसं तं चेव, एवं जाव देवदव्वेयणा । खेत्तेयणा णं भंते ! कइविहा प० ? गोयमा ! चउव्विहा प०, तं०—नेरइयखेत्तेयणा जाव देवखेत्तेयणा, से केणट्ठेणं भंते ! एवं वुच्चइ नेरइयखेत्तेयणा २ ? एवं चेव, नवरं नेरइयखेत्तेयणा भाणियव्वा, एवं जाव देवखेत्तेयणा, एवं कालेयणावि, एवं भावेयणावि, एवं जाव देवभावेयणावि ॥ ५९७ ॥ कइविहा णं भंते ! चलणा प० ? गोयमा ! ति विहा चलणा प०, तं०—सरीरचलणा इंदियचलणा जोगचलणा, सरीरचलणा णं भंते ! कइविहा प० ? गोयमा ! पंचविहा प०, तं०—ओरालियसरीरचलणा जाव कम्मगसरीरचलणा, इंदियचलणा णं भंते ! कइविहा प० ? गोयमा ! पंचविहा प०, तंजहा—

सोईदियचलणा जाव फासिंदियचलणा, जोगचलणा णं भंते ! कइविहा प० ?
 गोयमा ! तिबिहा प०, तं०—मणजोगचलणा वइजोगचलणा कायजोगचलणा,
 से केणट्ठेणं भंते ! एवं वुच्चइ ओरालियसरीरचलणा २ ? गोयमा ! जं णं जीवा
 ओरालियसरीरे वट्टमाणा ओरालियसरीरप्पाओगाईं दव्वाईं ओरालियसरीरत्ताए
 परिणामेमाणा ओरालियसरीरचलणं चलिंसु वा चलंति वा चलिस्संति वा से तेणट्ठेणं
 जाव ओरालियसरीरचलणा २, से केणट्ठेणं भंते ! एवं वुच्चइ वेउव्वियसरीरचलणा २ ?
 एवं चेव, नवरं वेउव्वियसरीरे वट्टमाणा एवं जाव कम्मगसरीरचलणा, से केणट्ठेणं
 भंते ! एवं वुच्चइ सोईदियचलणा २ ? गोयमा ! जन्नं जीवा सोईदिए वट्टमाणा
 सोईदियप्पाओगाईं दव्वाईं सोईदियत्ताए परिणामेमाणा सोईदियचलणं चलिंसु वा
 चलंति वा चलिस्संति वा से तेणट्ठेणं जाव सोईदियचलणा २, एवं जाव फासिंदिय-
 चलणा, से केणट्ठेणं भंते ! एवं वुच्चइ मणजोगचलणा २ ? गोयमा ! जण्णं जीवा
 मणजोए वट्टमाणा मणजोगप्पाओगाईं दव्वाईं मणजोगत्ताए परिणामेमाणा मणजोग-
 चलणं चलिंसु वा चलंति वा चलिस्संति वा से तेणट्ठेणं जाव मणजोगचलणा २,
 एवं वइजोगचलणावि, एवं कायजोगचलणावि ॥ ५९८ ॥ अह भंते ! संवेगे
 निव्वे(गे)ए गुरुसाहम्मियसुस्सणया आलोयणया निंदणया गरहणया खमावणया
 सुयसहायया विउसमणया भावे अप्पडिबद्धया विणिवट्टणया विवित्तसयणासणसेव-
 णया सोईदियसंवरे जाव फासिंदियसंवरे जोगपच्चक्खाणे सरीरपच्चक्खाणे कसाय-
 पच्चक्खाणे संभोगपच्चक्खाणे उवहिपच्चक्खाणे भत्तपच्चक्खाणे खमा विरागया भाव-
 सच्चे जोगसच्चे करणसच्चे मणसमण्णाहरणया वइसमन्नाहरणया कायसमन्नाहरणया
 कोहविवेगे जाव सिच्छादंसणसल्लविवेगे पाणसंपन्नया दंसणसंपन्नया चरित्तसंपन्नया
 वेयणअहियासणया भारणंतियअहियासणया एए णं भन्ते ! पया किंपजवसाणफला
 पण्णत्ता ? समणाउसो ! गोयमा ! संवेगे निव्वेए जाव भारणंतियअहियासणया एए
 णं सिद्धिपजवसाणफला प० समणाउसो ! ॥ सेवं भंते ! २ ति जाव विहरइ
 ॥ ५९९ ॥ सत्तरसमस्स सयस्स तइओ उहेसो समत्तो ॥

तेणं कालेणं तेणं समएणं रायगिहे नयरे जाव एवं वयासी—अत्थि णं भंते !
 जीवाणं पाणाइवाएणं किरिया कज्जइ ? हंता अत्थि, सा भंते ! किं पुट्ठा कज्जइ
 अपुट्ठा कज्जइ ? गोयमा ! पुट्ठा कज्जइ नो अपुट्ठा कज्जइ, एवं जहा पढमसए
 छट्ठेइसए जाव नो अणाणुपुव्विकडत्ति वत्तव्वं सिया, एवं जाव वेमाणियाणं, नवरं
 जीवाणं एगिंदियाण य निव्वाद्याएणं छट्ठिसिं वाघायं पड्डुच्च सिय तिदिसिं सिय
 चउदिसिं सिय पंचदिसिं सेसाणं नियमं छट्ठिसिं । अत्थि णं भंते ! जीवाणं मुसा-

वाएणं किरिया कज्जइ ? हंता अत्थि, सा भंते ! किं पुट्ठा कज्जइ अपुट्ठा कज्जइ ? जहा पाणाइवाएणं दंडओ एवं मुसावाएणवि, एवं अदिन्नादाणेणवि मेहुणेणवि परिग्गहेणवि, एवं एए पंच दंडगा ५ । जंसमयञं भंते ! जीवाणं पाणाइवाएणं किरिया कज्जइ सा भंते ! किं पुट्ठा कज्जइ अपुट्ठा कज्जइ ? एवं तहेव जाव वत्तव्वं सिया जाव वेमाणियाणं, एवं जाव परिग्गहेणं, एवं एएवि पंच दंडगा १० । जंदेसेणं भंते ! जीवाणं पाणाइवाएणं किरिया कज्जइ एवं चेव जाव परिग्गहेणं, एवं एएवि पंच दंडगा १५ । जंपएसञं भंते ! जीवाणं पाणाइवाएणं किरिया कज्जइ सा भंते ! किं पुट्ठा कज्जइ एवं तहेव दण्डओ, एवं जाव परिग्गहेणं २०, एवं एए वीसं दंडगा ॥ ६०० ॥ जीवाणं भंते ! किं अत्तकडे दुक्खे, परकडे दुक्खे, तदुभयकडे दुक्खे ? गोयमा ! अत्तकडे दुक्खे, नो परकडे दुक्खे, नो तदुभयकडे दुक्खे, एवं जाव वेमाणियाणं, जीवा णं भंते ! किं अत्तकडं दुक्खं वेदेंति, परकडं दुक्खं वेदेंति, तदुभयकडं दुक्खं वेदेंति ? गोयमा ! अत्तकडं दुक्खं वेदेंति, नो परकडं दुक्खं वेदेंति, नो तदुभयकडं दुक्खं वेदेंति, एवं जाव वेमाणियाणं । जीवाणं भंते ! किं अत्तकडा वेयणा, परकडा वेयणा, तदुभयकडा वेयणा ? गोयमा ! अत्तकडा वेयणा, णो परकडा वेयणा, णो तदुभयकडा वेयणा, एवं जाव वेमाणियाणं, जीवा णं भंते ! किं अत्तकडं वेयणं वेदेंति, परकडं वेयणं वेदेंति, तदुभयकडं वेयणं वेदेंति ? गोयमा ! जीवा अत्तकडं वेयणं वेदेंति, नो परकडं वेयणं वेदेंति, नो तदुभयकडं वेयणं वेदेंति, एवं जाव वेमाणियाणं । सेवं भंते ! सेवं भंते ! त्ति ॥ ६०१ ॥ सत्तरसमे सए चउत्थो उद्देसो समत्तो ॥

कहि णं भंते ! ईसाणस्स देविंदस्स देवरजो सभा सुहम्मा पण्णत्ता ? गोयमा ! जंबु-द्वीवे २ मंदरस्स पव्वयस्स उत्तरेणं इमीसे णं रयणप्पभाए पुडवीए बहुसमरमणिज्जाओ भूमिभागाओ उड्डं चंदिमसूरिय जहा ठाणपए जाव कज्जे ईसाणवडिंसए महाविमाणे से णं ईसाणवडिंसए महाविमाणे अद्धतेरसजोयगसयसहसाइ० एवं जहा दसमसए सक्खविमाणवत्तव्वया सा इहवि ईसाणस्स निरवसेसा भाणियव्वा जाव आयरक्खत्ति, ठिई साइरेगाई दो सागरोवमाई, सेसं तं चेव जाव ईसाणे देविंदे देवराया २, सेवं भंते ! सेवं भंते ! त्ति ॥ ६०२ ॥ सत्तरसमे स पंचमो उद्देसो समत्तो ॥

पुढविकाइए णं भंते ! इमीसे रयणप्पभाए पुडवीए समोहए २ ता जे भविए सोहम्मे कपे पुढविकाइयत्ताए उववज्जितए से भंते ! किं पुढ्वि उववज्जित्ता पच्छा संपाउणेज्जा, पुढ्वि वा संपाउणित्ता पच्छा उववज्जेज्जा ? गोयमा ! पुढ्वि वा उववज्जित्ता पच्छा संपाउणेज्जा, पुढ्वि वा संपाउणित्ता पच्छा उववज्जेज्जा, से केणट्ठेणं जाव पच्छा उववज्जेज्जा ? गोयमा ! पुढविकाइयाणं तओ समुग्घाया प०, तं०-

वेयणासमुग्घाए कसायसमुग्घाए मारणंतियसमुग्घाए, मारणंतियसमुग्घाएणं समो-
हणमाणे देसेणं वा समोहणइ सव्वेण वा समोहणइ, देसेणं समोहणमाणे पुव्वि
संपाउणिता पच्छा उववज्जिजा, सव्वेणं समोहणमाणे पुव्वि उववज्जिता पच्छा
संपाउणेजा, से तेणट्ठेणं जाव उववज्जेजा । पुढविकाइए णं भंते ! इमीसे रयणप्प-
भाए पुढवीए जाव समोहए २ ता जे भविए ईसाणे कप्पे पुढवि० एवं चेव ईसाणेवि,
एवं जाव अच्चुयगेविज्जविमाणे, अणुत्तरविमाणे ईसिप्पभाराए य एवं चेव । पुढविकाइए
णं भंते ! सक्करप्पभाए पुढवीए समोहए २ ता जे भविए सोहम्मं कप्पे पुढवि० एवं
जहा रयणप्पभाए पुढविकाइओ उववाइओ एवं सक्करप्पभाएवि पुढविकाइओ उववा-
एयव्वो जाव ईसिप्पभाराए, एवं जहा रयणप्पभाए वत्तव्वया भणिआ एवं जाव अहे
सत्तमाए समोहए ईसिप्पभाराए उववाएयव्वो । सेवं भंते ! २ ति (१७-६) ॥ ६०३ ॥
पुढविकाइए णं भंते ! सोहम्मं कप्पे समोहए समोहणिता जे भविए इमीसे रयण-
प्पभाए पुढवीए पुढविकाइयत्ताए उववज्जितए से णं भंते ! किं पुव्वि सेसं तं चेव
जहा रयणप्पभाए पुढविकाइओ सव्वकप्पेसु जाव ईसिप्पभाराए ताव उववाइओ एवं
सोहम्मपुढविकाइओवि सत्तसुवि पुढवीसु उववाएयव्वो जाव अहे सत्तमाए, एवं जहा
सोहम्मपुढविकाइओ सव्वपुढवीसु उववाइओ एवं जाव ईसिप्पभारापुढविकाइओ
सव्वपुढवीसु उववाएयव्वो जाव अहे सत्तमाए, सेवं भंते ! २ ति (१७-७) ॥ ६०४ ॥
आउक्काइए णं भंते ! इमीसे रयणप्पभाए पुढवीए समोहए २ ता जे भविए सोहम्मं
कप्पे आउक्काइयत्ताए उववज्जितए एवं जहा पुढविकाइओ तहा आउक्काइओवि
सव्वकप्पेसु जाव ईसिप्पभाराए तहेव उववाएयव्वो, एवं जहा रयणप्पभाआउ-
क्काइओ उववाइओ तहा जाव अहेसत्तमापुढविआउक्काइओ उववाएयव्वो जाव ईसिप्प-
भाराए, सेवं भंते ! २ ति (१७-८) ॥ ६०५ ॥ आउक्काइए णं भंते ! सोहम्मं कप्पे
समोहए समोहणिता जे भविए इमीसे रयणप्पभाए पुढवीए घणोदहिवलएसु आउ-
क्काइयत्ताए उववज्जितए से णं भंते ! सेसं तं चेव एवं जाव अहे सत्तमाए जहा सोहम्म-
आउक्काइओ एवं जाव ईसिप्पभाराआउक्काइओ जाव अहे सत्तमाए उववाएयव्वो,
सेवं भंते ! २ ति (१७-९) ॥ ६०६ ॥ वाउक्काइए णं भंते ! इमीसे रयणप्पभाए पुढवीए
जाव जे भविए सोहम्मं कप्पे वाउक्काइयत्ताए उववज्जितए से णं जहा पुढविकाइओ
तहा वाउक्काइओवि नवरं वाउक्काइयाणं चत्तारि समुग्घाया प०, तं--वेयणासमु-
ग्घाए जाव वेउव्वियसमुग्घाए, मारणंतियसमुग्घाएणं समोहणमाणे देसेण वा समो०
सेसं तं चेव जाव अहे सत्तमाए समोहओ ईसिप्पभाराए उववाएयव्वो, सेवं भंते !
२ ति (१७-१०) ॥ ६०७ ॥ वाउक्काइए णं भंते ! सोहम्मं कप्पे समोहए २ ता जे

भविण् इमीसे रयणप्पभाए पुढवीए घणवाए तणुवाए घणवायवलएसु तणुवायवलएसु
वाउक्काइयत्ताए उववज्जित्तए से णं भंते ! सेसं तं चेव एवं जहा सोहम्मकप्पवाउकाइओ
सत्तसुवि पुढवीसु उववाइओ एवं जाव ईसिप्पन्भाराए वाउकाइओ अहे सत्तमाए जाव
उववाएयव्वो, सेवं भंते ! २ ति (१७-११) ॥ ६०८ ॥ एणिंदिया णं भंते ! सव्वे
समाहारा सव्वे (समसरीरा) समुत्तासणीसासा एवं जहा पढमसए विइयउहेसए
पुढविकाइयाणं वत्तव्वया भणिया सा चेव एणिंदियाणं इह भाणियव्वा जाव समाउया
समोववन्ना । एणिंदियाणं भंते ! कइ लेस्साओ प० ? गोयमा ! चत्तारि लेस्साओ प०,
तं०-कण्हलेस्सा जाव तेउलेस्सा । एएसि णं भंते ! एणिंदियाणं कण्हलेस्साणं जाव
विसेसाहिया वा ? गोयमा ! सव्वत्थोवा एणिंदियाणं तेउलेस्सा, काउलेस्सा अणंतगुणा,
णीलेस्सा विसेसाहिया, कण्हलेस्सा विसेसाहिया । एएसि णं भंते ! एणिंदियाणं
कण्हलेस्सा इड्ढी जहेव दीवकुमाराणं, सेवं भंते ! २ ति (१७-१२) ॥ ६०९ ॥
नागकुमारा णं भंते ! सव्वे समाहारा जहा सोलसमसए दीवकुमारहेसए तहेव निरवसेसं
भाणियव्वं जाव इड्ढीति, सेवं भंते ! २ ति जाव विहरइ (१७-१३) ॥ ६१० ॥
सुवन्नकुमारा णं भंते ! सव्वे समाहारा० एवं चेव, सेवं भंते ! २ ति (१७-१४)
॥ ६११ ॥ विज्जुकुमारा णं भंते ! सव्वे समाहारा० एवं चेव, सेवं भंते ! २ ति
(१७-१५) ॥ ६१२ ॥ वाउकुमारा णं भंते ! सव्वे समाहारा० एवं चेव, सेवं
भंते ! २ ति (१७-१६) ॥ ६१३ ॥ अग्गिकुमारा णं भंते ! सव्वे समाहारा०
एवं चेव, सेवं भंते ! २ ति ॥ ६१४ ॥ **सत्तरसमस्स सयस्स सत्तरसमो
उहेसो समत्तो ॥ सत्तरसमं सयं समत्तं ॥**

पढमे १ विसाह २ मार्यदिण् य ३ पाणाइवाय ४ असुरे य ५ । गुल ६ केवल
७ अणगारे ८ भविण् ९ तह सोमिलऽद्वारसे १० ॥ १ ॥ तेणं कालेणं तेणं सम-
एणं रायणिहे जाव एवं वयासी-जीवे णं भंते ! जीवभावेणं किं पढमे अपढमे ?
गोयमा ! नो पढमे अपढमे, एवं नेरइए जाव वेमाणिए । सिद्धे णं भंते ! सिद्ध-
भावेणं किं पढमे अपढमे ? गोयमा ! पढमे नो अपढमे, जीवा णं भंते ! जीवभावेणं
किं पढमा अपढमा ? गोयमा ! नो पढमा अपढमा, एवं जाव वेमाणियाणं १ ॥
सिद्धाणं पुच्छा, गोयमा ! पढमा नो अपढमा ॥ आहारए णं भंते ! जीवे आहार-
भावेणं किं पढमे अपढमे ? गोयमा ! नो पढमे अपढमे, एवं जाव वेमाणिए,
पोहत्तिएवि एवं चेव । अणाहारए णं भंते ! जीवे अणाहारभावेणं पुच्छा, गोयमा !
सिय पढमे सिय अपढमे । नेरइए णं भंते ! एवं नेरइए जाव वेमाणिए नो पढमे
अपढमे, सिद्धे पढमे नो अपढमे । अणाहारगा णं भंते ! जीवा अणाहारभावेणं

पुच्छा, गोयमा ! पढमावि अपढमावि, नेरइया जाव वेमाणिया णो पढमा अप-
 ढमा, सिद्धा पढमा नो अपढमा, एक्केक्के पुच्छा भाणियव्वा २ ॥ भवसिद्धि ए
 एगत्तपुहुत्तेणं जहा आहारए, एवं अभवसिद्धि एवि, नोभवसिद्धियनोअभवसिद्धि ए
 णं भंते ! जीवे नोभव० पुच्छा, गोयमा ! पढमे नो अपढमे, णोभवसिद्धिय नोअभ-
 वसिद्धिया णं भंते ! सिद्धा नोभ० अभव०, एवं चेव पुहुत्तेणवि दोण्हवि ॥ सच्ची
 णं भंते ! जीवे सण्णिभावेणं किं पढमे पुच्छा, गोयमा ! नो पढमे अपढमे, एवं
 विगल्लिदियवज्जं जाव वेमाणिए, एवं पुहुत्तेणवि ३ ॥ असच्ची एवं चेव एगत्तपुहुत्तेणं
 नवरं जाव वाणमंतरा, नोसच्चीनोअसच्ची जीवे मणुस्से सिद्धे पढमे नो अपढमे,
 एवं पुहुत्तेणवि ४ ॥ सलेस्से णं भंते ! पुच्छा, गोयमा ! जहा आहारए एवं पुहुत्ते-
 णवि, कण्हलेस्सा जाव सुक्कलेस्सा एवं चेव नवरं जरस्स जा लेस्सा अत्थि । अलेस्से
 णं जीवमणुस्ससिद्धे जहा नोसच्चीनोअसच्ची ५ ॥ सम्महिट्टिए णं भंते ! जीवे
 सम्महिट्टिभावेणं किं पढमे पुच्छा, गोयमा ! सिय पढमे सिय अपढमे, एवं एग्गि-
 दियवज्जं जाव वेमाणिए, सिद्धे पढमे नो अपढमे, पुहुत्तिया जीवा पढमावि अपढ-
 मावि, एवं जाव वेमाणिया, सिद्धा पढमा नो अपढमा, मिच्छादिट्टिए एगत्तपुहुत्तेणं
 जहा आहारगा, सम्मामिच्छादिट्टिए एगत्तपुहुत्तेणं जहा सम्मदिट्ठी, नवरं जरस्स अत्थि
 सम्मामिच्छत्तं ६ ॥ संजए जीवे मणुस्से य एगत्तपुहुत्तेणं जहा सम्मदिट्ठी, असंजए
 जहा आहारए, संजयासंजए जीवे पंचिदियतिरिक्खजोणियमणुस्सा एगत्तपुहुत्तेणं
 जहा सम्मदिट्ठी, नोसंजएनोअसंजएनोसंजयासंजए जीवे सिद्धे य एगत्तपुहुत्तेणं पढमे
 नो अपढमे ७ ॥ सक्कसाई कोहकसाई जाव लोभकसाई एए एगत्तपुहुत्तेणं जहा
 आहारए, अकसाई जीवे सिय पढमे सिय अपढमे, एवं मणुस्सेवि, सिद्धे पढमे नो
 अपढमे, पुहुत्तेणं जीवा मणुस्सा पढमावि अपढमावि, सिद्धा पढमा नो अपढमा
 ८ ॥ णाणी एगत्तपुहुत्तेणं जहा सम्मदिट्ठी, आसिणिबोहियनाणी जाव मणपजव-
 नाणी एगत्तपुहुत्तेणं एवं चेव, नवरं जरस्स जं अत्थि, केवलनाणी जीवे मणुस्से सिद्धे
 य एगत्तपुहुत्तेणं पढमा नो अपढमा । अच्चाणी भइअच्चाणी सुयअच्चाणी विभंगनाणी
 एगत्तपुहुत्तेणं जहा आहारए ९ ॥ सजोगी मणजोगी वइजोगी कायजोगी एगत्त-
 पुहुत्तेणं जहा आहारए, नवरं जरस्स जो जोगो अत्थि, अजोगी जीवमणुस्ससिद्धा
 एगत्तपुहुत्तेणं पढमा नो अपढमा १० ॥ सागारोवउत्ता अणागारोवउत्ता एगत्तपुहु-
 त्तेणं जहा अणाहारए ११ ॥ सवेदगो जाव नपुंसगवेदगो एगत्तपुहुत्तेणं जहा
 आहारए नवरं जरस्स जो वेदो अत्थि, अवेदओ एगत्तपुहुत्तेणं तिसुवि पएसु जहा
 अकसाई १२ ॥ ससरिरी जहा आहारए, एवं जाव कम्मगसरिरी जरस्स जं अत्थि

सरीरं, नवरं आहारगसरीरी एगत्तपुहुत्तेणं जहा सम्महिट्ठी, असरीरी जीवो सिद्धो एगत्तपुहुत्तेणं पढमो नो अपढमो १३ ॥ पंचहिं पज्जत्तीहिं पंचहिं अपज्जत्तीहिं एगत्तपुहुत्तेणं जहा आहारए, नवरं जस्स जा अत्थि जाव वेमाणिया नो पढमा अपढमा १४ ॥ इमा लक्खणगाहा—जो जेण पत्तपुव्वो भावो सो तेण अपढमो होइ । सेसेसु होइ पढमो अपत्तपुव्वेसु भावेसु ॥ १ ॥ जीवे णं भंते ! जीवभावेणं किं चरिमे अचरिमे ? गोयमा ! नो चरिमे अचरिमे । नेरइए णं भंते ! नेरइयभावेणं पुच्छा, गोयमा ! सिय चरिमे सिय अचरिमे, एवं जाव वेमाणिए, सिद्धे जहा जीवे । जीवाणं पुच्छा, गोयमा ! जीवा नो चरिमा अचरिमा, नेरइया चरिमावि अचरिमावि, एवं जाव वेमाणिया, सिद्धा जहा जीवा १ ॥ आहारए सव्वत्थ एगत्तेणं सिय चरिमे सिय अचरिमे, पुहुत्तेणं चरिमावि अचरिमावि, अणाहारओ जीवो सिद्धो य एगत्तेणवि पुहुत्तेणवि नो चरिमो अचरिमो, सेसट्ठाणेषु एगत्तपुहुत्तेणं जहा आहारओ २ ॥ भवसिद्धीओ जीवपए एगत्तपुहुत्तेणं चरिमे नो अचरिमे, सेसट्ठाणेषु जहा आहारओ । अभवसिद्धीओ सव्वत्थ एगत्तपुहुत्तेणं नो चरिमे अचरिमे, नोभवसिद्धीयनोअभवसिद्धीय जीवा सिद्धा य एगत्तपुहुत्तेणं जहा अभवसिद्धीओ ३ ॥ सच्ची जहा आहारओ, एवं असच्चीवि, नोसच्चीनोअसच्ची जीवपए सिद्धपए य अचरिमो, मणुस्सपए चरिमो एगत्तपुहुत्तेणं ४ ॥ सळेस्सो जाव सुक्कळेस्सो जहा आहारओ नवरं जस्स जा अत्थि, अळेस्सो जहा नोसच्चीनोअसच्ची ५ ॥ सम्महिट्ठी जहा अणाहारओ, मिच्छादिट्ठी जहा आहारओ, सम्मामिच्छादिट्ठी एगिदियविगल्लिदियवज्जं सिय चरिमे सिय अचरिमे, पुहुत्तेणं चरिमावि अचरिमावि ६ ॥ संजओ जीवो मणुस्सो य जहा आहारओ, असंजओवि तहेव, संजयासंजओवि तहेव, नवरं जस्स जं अत्थि, नोसंजयनोअसंजयनोसंजयासंजय जहा नोभवसिद्धीयनोअभवसिद्धीओ ७ ॥ सक्साई जाव लोभकसाई सव्वट्ठाणेषु जहा आहारओ, अक्साई जीवपए सिद्धपए य नो चरिमो अचरिमो, मणुस्सपए सिय चरिमो सिय अचरिमो ८ ॥ णाणी जहा सम्महिट्ठी सव्वत्थ आभिणिबोहियनाणी जाव मणपज्जवनाणी जहा आहारओ नवरं जस्स जं अत्थि, केवलनाणी जहा नोसच्चीनोअसच्ची, अच्चाणी जाव विभंगनाणी जहा आहारओ ९ ॥ सजोगी जाव कायजोगी जहा आहारओ जस्स जो जोगो अत्थि, अजोगी जहा नोसच्चीनोअसच्ची १० ॥ सागारोवउत्तो अणागारोवउत्तो य जहा अणाहारओ ११ ॥ सवेदओ जाव नपुंसगवेदओ जहा आहारओ, अवेदओ जहा अक्साई १२ ॥ ससरीरी जाव कम्मगसरीरी जहा आहारओ नवरं जस्स जं अत्थि, असरीरी जहा नोभवसिद्धीयनोअभवसिद्धीय १३ ॥ पंचहिं पज्जत्तीहिं पंचहिं

अपज्जतीहिं जहा आहारओ सव्वत्थ एगत्तपुहुत्तेणं दंडगा भाणियव्वा १४ ॥ इमा
लक्खणागाहा—जो जं पाविहिइ पुणो भावं सो तेण अचरिमो होइ । अच्चंतविओगो
जस्स जेण भावेण सो चरिमो ॥ १ ॥ सेवं भंते ! २ त्ति जाव विहरइ ॥ ६१५ ॥
अट्टारसमस्स सयस्स पढमो उद्देसो समत्तो ॥

तेणं कालेणं तेणं समएणं विसाहा नामं नयरी होत्था वज्जओ, बहुपुत्तिए उज्जाणे
वज्जओ, सामी समोसढे जाव पज्जुवासइ, तेणं कालेणं तेणं समएणं सक्के देविंदे
देवराया वज्जपाणी पुरंदरे एवं जहा सोलसमसए विइयउद्देसए तहेव दिव्वेणं
जाणविमाणेणं आगओ नवरं एत्थ अभिओगा(वि)इ अत्थि जाव वत्तीसइविहं नट्टविहिं
उवदंसेइ २ ता जाव पडिगए । भंते ! त्ति भगवं गोयमे समणं भगवं महावीरं जाव
एवं वयासी—जहा तइयसए ईसाणस्स तहेव कूडागारसालादिट्ठंतो तहेव पुव्वभव-
पुच्छा जाव असितमचागया ? गोयमादि समणे भगवं महावीरं भगवं गोयमं एवं
वयासी—एवं खलु गोयमा ! तेणं कालेणं तेणं समएणं इहेव जंबुदीवे २ भारहे वासे
हत्थिणाउरे नामं नयरे होत्था वज्जओ, सहसंबवणे उज्जाणे वज्जओ, तत्थ णं
हत्थिणाउरे नयरे कत्तिए नामं सेट्ठी परिवसइ अट्ठे जाव अपरिभूए नेगमपढमा-
सणिए नेगमट्ठसहस्सस्स बहुसु कज्जेसु य कारणेसु य काहुंबेसु य एवं जहा राय-
प्पसेणइजे चित्ते जाव चक्खभूए नेगमट्ठसहस्सस्स स(सी)यस्स य कुडुंबस्स आहेवचं
जाव कारेमाणे पाळेमाणे य समणोवासए अभिगयजीवाजीवे जाव विहरइ । तेणं
कालेणं तेणं समएणं मुणिसुव्वए अरहा आइगरे जहा सोलसमसए तहेव जाव
समोसढे जाव परिसा पज्जुवासइ, तए णं से कत्तिए सेट्ठी इमीसे कहाए लद्धे
समाणे हट्ठतुट्ठं एवं जहा एकारसमसए सुदंसणे तहेव निग्गओ जाव पज्जुवासइ,
तए णं मुणिसुव्वए अरहा कत्तियस्स सेट्ठिस्स धम्मकहा जाव परिसा पडिगया, तए
णं से कत्तिए सेट्ठी मुणिसुव्वयस्स जाव निसम्म हट्ठतुट्ठं उट्ठाए उट्ठेइ उ० २ ता मुणि-
सुव्वयं जाव एवं वयासी—एवमेयं भंते ! जाव से जहेयं तुज्जे वदह, जं नवरं देवाणु-
प्पिया ! नेगमट्ठसहस्स आपुच्छामि जेट्ठपुत्तं च कुडुंबे ठावेमि, तए णं अहं देवाणु-
प्पियाणं अंतियं पव्वयामि, अहासुहं जाव मा पडिबंथं, तए णं से कत्तिए सेट्ठी जाव
पडिनिक्खमइ २ ता जेणेव हत्थिणापुरे नयरे जेणेव सए गेहे तेणेव उवागच्छइ
२ ता नेगमट्ठसहस्सं सहावेइ २ ता एवं वयासी—एवं खलु देवाणुप्पिया ! मए
मुणिसुव्वयस्स अरहओ अंतियं धम्मे निसन्ते सेविय मे धम्मे इच्छिए पडिच्छिए
अभिहए, तए णं अहं देवाणुप्पिया ! संसारभयउव्विग्गे जाव पव्वयामि, तं तुब्भे णं
देवाणुप्पिया ! किं करेह किं ववसह किं भे हियइच्छिए किं भे सामत्थे ?, तए णं

तं नेगमट्टसहस्सं पि तं कत्तियं सेट्ठी एवं वयासी-जइ णं देवाणुप्पिया ! संसारभय-
उव्विग्गा भीया जाव पव्वइस्संति अम्हं देवाणुप्पिया ! किं अन्ने आलंबणे वा आहारे
वा पडिबंघे वा ? अम्हे वि णं देवाणुप्पिया ! संसारभयउव्विग्गा भीया जम्मणमरणाणं
देवाणुप्पिएहिं सद्धिं मुणिसुव्वयस्स अरहओ अंतियं मुं(डे)डा भवित्ता अगाराओ
जाव पव्वयामो, तए णं से कत्तिए सेट्ठी तं नेगमट्टसहस्सं एवं वयासी-जइ णं देवाणु-
प्पिया ! संसारभयउव्विग्गा भीया जम्मणमरणाणं मए सद्धिं मुणिसुव्वय जाव पव्वयह
तं गच्छह णं तुब्भे देवाणुप्पिया ! सएसु २ गिहेसु विउलं असणं जाव उवक्खडावेह
मित्तणाइ जाव पुरओ जेट्ठपुत्ते कुडुंवे ठावेह जेट्ठ० २ ता तं मित्तणाइ जाव जेट्ठपुत्ते
आपुच्छह २ ता पुरिससहस्सवाहिणीओ सीयाओ दुरुहह पु० २ ता मित्तणाइ जाव
परिजणेणं जेट्ठपुत्तेहि य समणुगम्ममाणमग्गा सव्विद्धीए जाव रवेणं अकालपरिहीणं
चेव ममं अंतियं पाउब्भवह, तए णं ते नेगमट्टसहस्सं पि कत्तियस्स सेट्ठिस्स एय-
मट्ठं विणएणं पडिसुणेति २ ता जेणेव साई साई गिहाई तेणेव उवागच्छंति २ ता
विपुलं असणं जाव उवक्खडावेति २ ता मित्तणाइ जाव तस्सेव मित्तणाइ जाव
पुरओ जेट्ठपुत्ते कुडुंवे ठावेति जेट्ठपुत्ते० २ ता तं मित्तणाइ जाव जेट्ठपुत्ते य
आपुच्छंति जेट्ठ० २ ता पुरिससहस्सवाहिणीओ सीयाओ दुरुहंति २ ता मित्तणाइ
जाव परिजणेणं जेट्ठपुत्तेहि य समणुगम्ममाणमग्गा सव्विद्धीए जाव रवेणं अकाल-
परिहीणं चेव कत्तियस्स सेट्ठिस्स अंतियं पाउब्भवंति, तए णं से कत्तिए सेट्ठी विपुलं
असणं ४ जहा गंगदत्तो जाव मित्तणाइ जाव परिजणेणं जेट्ठपुत्तेणं नेगमट्टसहस्सेण
य समणुगम्ममाणमग्गे सव्विद्धीए जाव रवेणं हत्थिणापुरं नयरं मज्झंमज्झेणं जहा
गंगदत्तो जाव आलिते णं भंते ! लोए पलिते णं भंते ! लोए आलितपलिते णं भंते !
लोए जाव आणुगामियत्ताए भविस्सइ, तं इच्छामि णं भंते ! नेगमट्टसहस्सेणं सद्धिं
सयमेव पव्वावियं सयमेव मुंडावियं जाव धम्ममाइक्खियं, तए णं मुणिसुव्वए अरहा
कत्तियं सेट्ठी नेगमट्टसहस्सेणं सद्धिं सयमेव पव्वावेइ जाव धम्ममाइक्खइ, एवं देवाणु-
प्पिया ! गंतव्वं एवं चिट्ठियव्वं जाव संजमियव्वं, तए णं से कत्तिए सेट्ठी नेगमट्टसह-
स्सेणं सद्धिं मुणिसुव्वयस्स अरहओ इमं एयारुवं धम्मियं उवएसं सम्मं संपडिवजइ,
तमाणाए तहा गच्छइ जाव संजमेइ, तए णं से कत्तिए सेट्ठी नेगमट्टसहस्सेणं सद्धिं
अणगारे जाए इरियासमिए जाव गुत्तबंभयारी, तए णं से कत्तिए अणगारे मुणि-
सुव्वयस्स अरहओ तहारुवाणं थेराणं अंतियं सामाइयमाइयाई चोइस पुव्वाइ
अहिजइ सा० २ ता बट्ठहिं चउत्थछट्ठम जाव अप्पाणं भावेमाणे बहुपडिपुवाइ
दुवाळसवासाई सामन्नपरियाणं पाउणइ २ ता मासियाए संछेहणाए अत्ताणं सोप्पेइ

मा० २ ता सद्धिं भत्ताई अणसणाए छेदेइ स० २ ता आलोइयपडिक्कते जाव कालं किच्चा सोहम्मे कप्पे सोहम्मवडिंसए विमाणे उववायसभाए देवसयणिज्जंसि जाव सक्के देविंदत्ताए उववन्ने, तए णं से सक्के देविंदे देवराया अहुणोववण्णे सेसं जहा गंगदत्तस्स जाव अंतं काहिइ, नवरं ठिई दो सागरोवमाई प० सेसं तं चेव । सेवं भंते ! २ ति ॥ ६१६ ॥ अट्टारस्समस्स सयस्स वीओ उइसो समत्तो ॥

तेणं कालेणं तेणं समएणं रायगिहे नामं नयरे होत्था वन्नओ, गुणसिलए उज्जाणे वन्नओ जाव परिसा पडिगया, तेणं कालेणं तेणं समएणं समणस्स भगवओ महावीरस्स जाव अंतेवासी मार्गदियपुत्ते नामं अणगारे पगइभइए जहा मंडियपुत्ते जाव पज्जुवासमाणे एवं वयासी-से नूणं भंते ! काउलेस्से पुढविकाइए काउलेस्से-हिंतो पुढविकाइएहिंतो अणंतरं उव्वट्ठित्ता माणुसं विग्गहं लभइ मा० २ ता केवलं बोहिं बुज्झइ के० २ ता तओ पच्छा सिज्झइ जाव अंतं करेइ ? हंता मार्गदियपुत्ता ! काउलेस्से पुढविकाइए जाव अंतं करेइ । से नूणं भंते ! काउलेस्से आउकाइए काउलेस्सेहिंतो आउकाइएहिंतो अणंतरं उव्वट्ठित्ता माणुसं विग्गहं लभइ मा० २ ता केवलं बोहिं बुज्झइ जाव अंतं करेइ ? हंता मार्गदियपुत्ता ! जाव अंतं करेइ । से नूणं भंते ! काउलेस्से वणस्सइकाइए एवं चेव जाव अंतं करेइ, सेवं भंते ! २ ति मार्गदियपुत्ते अणगारे समणं भगवं महावीरं जाव नमंसित्ता जेणेव समणे निग्गंथे तेणेव उवागच्छइ २ ता समणे निग्गंथे एवं वयासी-एवं खलु अज्जो ! काउलेस्से पुढविकाइए तहेव जाव अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं खलु अज्जो ! काउलेस्से वणस्सइकाइए जाव अंतं करेइ, तए णं ते समणा निग्गंथा मा(कं)गंदियपुत्तस्स अणगारस्स एवमाइक्खमाणस्स जाव एवं परूवे-माणस्स एयमट्ठं नो सहंति ३ एयमट्ठं असइहमाणा ३ जेणेव समणे भगवं महावीरे तेणेव उवागच्छंति २ ता समणं भगवं महावीरं वंदंति नमंसंति व० २ ता एवं वयासी-एवं खलु भंते ! मार्गदियपुत्ते अणगारे अम्हं एवमाइक्खइ जाव परूवेइ-एवं खलु अज्जो ! काउलेस्से पुढविकाइए जाव अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं खलु० वणस्सइकाइएवि जाव अंतं करेइ, से कहमेयं भंते ! एवं ? अज्जोत्ति समणे भगवं महावीरे ते समणे निग्गंथे आमंतेत्ता एवं वयासी-जण्णं अज्जो ! मार्गदियपुत्ते अणगारे तुज्जे एवं आइक्खइ जाव परूवेइ-एवं खलु अज्जो ! काउलेस्से पुढवीकाइए जाव अंतं करेइ, एवं खलु अज्जो ! काउलेस्से आउकाइए जाव अंतं करेइ, एवं खलु अज्जो ! काउलेस्से वणस्सइकाइएवि जाव अंतं करेइ, सचे णं एसमट्ठे, अहंपि णं अज्जो ! एवमाइक्खामि ४-एवं खलु

अजो ! कण्हलेस्से पुढविकाइए कण्हलेस्सेहिंतो पुढविकाइएहिंतो जाव अंतं करेइ, एवं खल्लु अजो ! नीललेस्से पुढविकाइए जाव अंतं करेइ, एवं काउलेस्सेवि जहा पुढविकाइए जाव अंतं करेइ, एवं आउकाइएवि, एवं वणस्सइकाइएवि, सच्चे णं एसमट्ठे ॥ सेवं भंते ! २ त्ति समणा निग्गंथा समणं भगवं महावीरं वंदंति नमंसंति वं० २ ता जेणेव मार्गंदियपुत्ते अणगारे तेणेव उवागच्छंति २ ता मार्गंदियपुत्तं अणगारं वंदंति नमंसंति वं० २ ता एयमट्ठं सम्मं विणएणं भुज्जो २ खामेंति ॥६१७॥ तए णं से मार्गंदियपुत्ते अणगारे उट्ठाए उट्ठेइ २ ता जेणेव समणे भगवं महावीरे तेणेव उवागच्छइ ते० २ ता समणं भगवं महावीरं वंदइ नमंसइ वं० २ ता एवं वयासी-अणगारस्स णं भंते ! भावियप्पणो सव्वं कम्मं वेदेमाणस्स सव्वं कम्मं निज्जरेमाणस्स सव्वं मारं मरमाणस्स सव्वं सरीरं विप्पजहमाणस्स चरिमं कम्मं वेदेमाणस्स चरिमं कम्मं निज्जरेमाणस्स चरिमं मारं मरमाणस्स चरिमं सरीरं विप्पजहमाणस्स मारणंतियं कम्मं वेदेमाणस्स मारणंतियं कम्मं निज्जरेमाणस्स मारणंतियं मारं मरमाणस्स मारणंतियं सरीरं विप्पजहमाणस्स जे चरिमा निज्जरापोग्गला सुहुमा णं ते पोग्गला प०, समणाउसो ! सव्वं लोगंपिणं ते उग्गाहित्ताणं चिट्ठंति ? इंता मार्गंदियपुत्ता ! अणगारस्स णं भावियप्पणो जाव ओग्गाहित्ताणं चिट्ठंति, छउमत्थे णं भंते ! मणुस्से तेसिं निज्जरापोग्गलाणं किंचि आणत्तं वा णाणत्तं वा एवं जहा ईदियउद्देसए पढमे जाव वेमाणिया जाव तत्थ णं जे ते उवउत्ता ते जाणंति पासंति आहारेंति, से तेणट्ठेणं निक्खेवो भाणियव्वोत्ति न पासंति आहारेंति, नेरइया णं भंते ! निज्जरापोग्गला न जाणंति न पासंति आहारेंति, एवं जाव पंचिदियतिरिक्खजोणियाणं, मणुस्सा णं भंते ! निज्जरापोग्गले किं जाणंति पासंति आहारेंति उदाहु न जाणंति न पासंति न आहारेंति ? गोयमा ! अत्थेगइया जाणंति ३ अत्थेगइया न जाणंति न पासंति आहारेंति, से केणट्ठेणं भंते ! एवं वुच्चइ अत्थेगइया जाणंति पासंति आहारेंति, अत्थेगइया न जाणंति न पासंति आहारेंति ? गोयमा ! मणुस्सा दुविहा प०, तंजहा-सन्निभूया य असन्निभूया य, तत्थ णं जे ते असन्निभूया ते न जाणंति न पासंति आहारेंति, तत्थ णं जे ते सन्निभूया ते दुविहा प०, तं०-उवउत्ता य अणुवउत्ता य, तत्थ णं जे ते अणुवउत्ता ते न जाणंति न पासंति आहारेंति, तत्थ णं जे ते उवउत्ता ते जाणंति ३, से तेणट्ठेणं गोयमा ! एवं वुच्चइ अत्थेगइया न जाणंति २ आहारेंति, अत्थेगइया जाणंति ३, वाणमंतरजोइसिया जहा नेरइया । वेमाणिया णं भंते ! ते निज्जरापोग्गले किं जाणंति ६ ? गोयमा ! जहा मणुस्सा नवरं वेमाणिया दुविहा प०, तं०-माइमिच्छदिट्ठिउववन्नगा य अमा-

इसम्मदिट्ठिउववन्नगा य, तत्थ णं जे ते माइमिच्छदिट्ठिउववन्नगा ते णं न जाणंति न पासंति आहारेंति, तत्थ णं जे ते अमाइसम्मदिट्ठिउववन्नगा ते दुविहा प०, तं०—अणंतरोववन्नगा य परंपरोववन्नगा य, तत्थ णं जे ते अणंतरोववन्नगा ते णं न जाणंति न पासंति आहारेंति, तत्थ णं जे ते परंपरोववन्नगा ते दुविहा प०, तं०—पज्जत्तगा य अपज्जत्तगा य, तत्थ णं जे ते अपज्जत्तगा ते णं न जाणंति न पासंति आहारेंति, तत्थ णं जे ते पज्जत्तगा ते दुविहा प०, तं०—उवउत्ता य अणुवउत्ता य, तत्थ णं जे ते अणुवउत्ता ते णं न जाणंति २ आहारेंति ॥६१८॥ कइविहे णं भन्ते ! बंधे प० ? मार्गदियपुत्ता ! दुविहे बंधे प०, तं०—दव्वबंधे य भावबंधे य, दव्वबंधे णं भंते ! कइविहे प० ? मार्गदियपुत्ता ! दुविहे प०, तं०—पओगबंधे य वीससाबंधे य, वीससाबंधे णं भंते ! कइविहे प० ? मार्गदियपुत्ता ! दुविहे प०, तं०—साईयवीससाबंधे य अणाईयवीससाबंधे य, पओगबंधे णं भंते ! कइविहे प० ? मार्गदियपुत्ता ! दुविहे प०, तं०—सिद्धिलबंधणबन्धे य धणियबंधणबन्धे य, भावबंधे णं भंते ! कइविहे प० ? मार्गदियपुत्ता ! दुविहे प०, तं०—मूलपगडिबंधे य उत्तरपगडिबंधे य, नेरइयाणं भंते ! कइविहे भावबंधे प० ? मार्गदियपुत्ता ! दुविहे भावबंधे प०, तं०—मूलपगडिबंधे य उत्तरपगडिबंधे य, एवं जाव वेमाणियाणं, नाणावरणिजस्स णं भंते ! कम्मस्स कइविहे भावबंधे प० ? मार्गदियपुत्ता ! दुविहे भावबंधे प०, तं०—मूलपगडिबंधे य उत्तरपगडिबंधे य, नेरइयाणं भंते ! नाणावरणिजस्स कम्मस्स कइविहे भावबंधे प० ? मार्गदियपुत्ता ! दुविहे भावबंधे प०, तं०—मूलपगडिबंधे य उत्तरपगडिबंधे य, एवं जाव वेमाणियाणं, जहा नाणावरणिज्जेणं दंडओ भणिओ एवं जाव अंतराइएणं भाणियव्वो ॥ ६१९ ॥ जीवाणं भंते ! पावे कम्मे जे य कडे जाव जे य कजिस्सइ अत्थि याइ तस्स केइ णाणत्ते ? हंता अत्थि, से केणट्ठेणं भंते ! एवं वुच्चइ जीवाणं पावे कम्मे जे य कडे जाव जे य कजिस्सइ अत्थि याइ तस्स णाणत्ते ? मार्गदियपुत्ता ! से जहानामए—केइ पुरिसे घणुं परामुसइ २ ता उडुं परामुसइ २ ता ठाणं ठाइ २ ता आययकच्चाययं उडुं करेइ आ० २ ता उडुं वेहासं उव्विहइ से नूणं मार्गदियपुत्ता ! तस्स उखस्स उडुं वेहासं उव्विहस्स समाणस्स एयइवि णाणत्तं जाव तं तं भावं परिणमइवि णाणत्तं ? हंता भगवं ! एयइवि णाणत्तं जाव परिणमइवि णाणत्तं, से तेणट्ठेणं मार्गदियपुत्ता ! एवं वुच्चइ जाव तं तं भावं परिणमइवि णाणत्तं, नेरइयाणं भंते ! पावे कम्मे जे य कडे एवं चेव, एवं जाव वेमाणियाणं ॥ ६२० ॥ नेरइया णं भंते ! जे प्रोगळे आहारत्ताए गेण्हंति तेस्सिः णं भंते ! प्रोगलारणं सेयकालंसि कइभागं आहारेंति कइभागं निज्जरेंति ?

मागंदियपुत्ता ! असंखेज्जइभागं आहारेंति अणंतभागं निज्जरेंति, चक्किया णं भंते !
 केइ तेसु निज्जरापोगगलेसु आसइत्तए वा जाव तुयट्ठितए वा ? णो इणट्ठे समट्ठे,
 अणाहरणमेयं बुद्धं समणाउसो ! एवं जाव वेमाणियाणं । सेवं भंते ! सेवं भंते !
 त्ति ॥ ६२१ ॥ **अट्टारसमस्स सयस्स तइओ उइसो समत्तो ॥**

तेणं कालेणं तेणं समएणं रायगिहे जाव भगवं गोयमे एवं वयासी-अह भंते !
 पाणाइवाए मुसावाए जाव मिच्छादंसणसल्ले, पाणाइवायवेरमणे मुसावाय० जाव
 मिच्छादंसणसल्लवेरमणे, पुढविकाइए जाव वणस्सइकाइए, धम्मत्थिकाए अधम्मत्थि-
 काए आगासत्थिकाए जीवे असरीरपडिबद्धे परमाणुपोगगले सेलेसिं पडिवन्नए अणगारे
 सव्वे य बायरबोदिधरा कलेवरा एए णं दुविहा जीवदव्वा य अजीवदव्वा य जीवाणं
 परिभोगत्ताए हव्वमागच्छंति ? गोयमा ! पाणाइवाए जाव एए णं दुविहा जीवदव्वा
 य अजीवदव्वा य अत्थेगइया जीवाणं परिभोगत्ताए हव्वमागच्छंति, अत्थेगइया
 जीवाणं जाव नो हव्वमागच्छंति, से केणट्ठेणं भंते ! एवं वुच्चइ पाणाइवाए जाव नो
 हव्वमागच्छंति ? गोयमा ! पाणाइवाए जाव मिच्छादंसणसल्ले, पुढविकाइए जाव
 वणस्सइकाइए, सव्वे य बायरबोदिधरा कलेवरा एए णं दुविहा जीवदव्वा य अजी-
 वदव्वा य जीवाणं परिभोगत्ताए हव्वमागच्छंति, पाणाइवायवेरमणे जाव मिच्छा-
 दंसणसल्लविवेगे, धम्मत्थिकाए अधम्मत्थिकाए जाव परमाणुपोगगले सेलेसिं पडिवन्नए
 अणगारे एए णं दुविहा जीवदव्वा य अजीवदव्वा य जीवाणं परिभोगत्ताए नो
 हव्वमागच्छन्ति, से तेणट्ठेणं जाव नो हव्वमागच्छंति ॥ ६२२ ॥ कइ णं भंते !
 कसाया पन्नत्ता ? गोयमा ! चत्तारि कसाया प०, तं०-कसायपयं निरवसेसं भाणि-
 यव्वं जाव निज्जरिस्संति लोभेणं ॥ कइ णं भंते ! जुम्मा पन्नत्ता ? गोयमा !
 चत्तारि जुम्मा पन्नत्ता, तं०-कडजुम्मे तेओगे दावरजुम्मे कलिओगे, से केणट्ठेणं भंते !
 एवं वुच्चइ जाव कलिओगे ? गोयमा ! जे णं रासी चउक्कएणं अवहारेणं अवहीरमाणे
 चउपज्जवसिए सेत्तं कडजुम्मे, जे णं रासी चउक्कएणं अवहारेणं अवहीरमाणे तिप-
 ज्जवसिए सेत्तं तेओगे, जे णं रासी चउक्कएणं अवहारेणं अवहीरमाणे (२) दुपज्जव-
 सिए सेत्तं दावरजुम्मे, जे णं रासी चउक्कएणं अवहारेणं अवहीरमाणे एगपज्जवसिए
 सेत्तं कलिओगे, से तेणट्ठेणं गोयमा ! एवं वुच्चइ जाव कलिओगे ॥ नेरइया णं भंते !
 किं कडजुम्मा तेओगा दावरजुम्मा कलिओगा ? गोयमा ! जहन्नपए कडजुम्मा,
 उक्कोसपए तेओगा, अजहण्णमणुक्कोसपए सिय कडजुम्मा जाव सिय कलिओगा, एवं
 जाव थणियकुमारा । वणस्सइकाइयाणं पुच्छा, गोयमा ! जहन्नपए अपया उक्कोस-
 पए य अपया अजहण्णमणुक्कोसपए सिय कडजुम्मा जाव सिय कलिओगा । बेइदि-

याणं पुच्छा, गोयमा ! जहन्नपए कडजुम्मा, उक्कोसपए दावरजुम्मा, अजहन्नमणु-
क्कोसपए सिय कडजुम्मा जाव सिय कलिओगा, एवं जाव चउरिंदिया, सेसा एणिं-
दिया जहा वेईंदिया, पंचिंदियतिरिक्खजोणिया जाव वेमाणिया जहा नेरइया, सिद्धा
जहा वणस्सइकाइया । इत्थीओ णं भंते ! किं कडजुम्माओ० पुच्छा, गोयमा !
जहन्नपए कडजुम्माओ, उक्कोसपए कडजुम्माओ, अजहन्नमणुक्कोसपए सिय कडजु-
म्माओ जाव सिय कलिओगाओ, एवं असुरकुमारइत्थीओवि जाव थणियकुमारइ-
त्थीओवि, एवं तिरिक्खजोणियइत्थीओवि, एवं मणुस्सइत्थीओवि, एवं वाणमं-
तरजोइसियवेमाणियदेवइत्थीओवि ॥ ६२३ ॥ जावइयाणं भंते ! वरा अंधगवण्हिणो
जीवा तावइया परा अंधगवण्हिणो जीवा ? हुंता गोयमा ! जावइया वरा अंधग-
वण्हिणो जीवा तावइया परा अंधगवण्हिणो जीवा । सेवं भंते ! २ ति ॥ ६२४ ॥
अट्टारसमस्स सयस्स चउत्थो उद्देसो समत्तो ॥

दो भंते ! असुरकुमारा एगंसि असुरकुमारावासंसि असुरकुमारादेवत्ताए उववन्ना,
तत्थ णं एगे असुरकुमारे देवे पासादीए दरिसणिजे अभिरुवे पडिरुवे, एगे असुर-
कुमारे देवे से णं नो पासादीए नो दरिसणिजे नो अभिरुवे नो पडिरुवे, से कहमेयं
भंते ! एवं ? गोयमा ! असुरकुमारा देवा दुविहा प०, तं०-वेउव्वियसरीरा य अवे-
उव्वियसरीरा य, तत्थ णं जे से वेउव्वियसरीरे असुरकुमारे देवे से णं पासादीए
जाव पडिरुवे, तत्थ णं जे से अवेउव्वियसरीरे असुरकुमारे देवे से णं नो पासादीए
जाव नो पडिरुवे, से केणट्टेणं भंते ! एवं वुच्चइ-तत्थ णं जे से वेउव्वियसरीरे तं
चेव जाव णो पडिरुवे ? गोयमा ! से जहानामए-इहं मणुस्सलोगंसि दुवे पुरिसा
भवन्ति, एगे पुरिसे अलंकियविभूसिए, एगे पुरिसे अगलंकियविभूसिए, एएसि णं
गोयमा ! दोहं पुरिसाणं कयरे पुरिसे पासादीए जाव पडिरुवे, कयरे पुरिसे नो
पासादीए जाव नो पडिरुवे, जे वा से पुरिसे अलंकियविभूसिए जे वा से पुरिसे
अगलंकियविभूसिए ? भगवं ! तत्थ जे से पुरिसे अलंकियविभूसिए से णं पुरिसे
पासादीए जाव पडिरुवे, तत्थ णं जे से पुरिसे अगलंकियविभूसिए से णं पुरिसे नो
पासादीए जाव नो पडिरुवे, से तेणट्टेणं जाव नो पडिरुवे । दो भंते ! नागकुमारा
देवा एगंसि नागकुमारावासंसि एवं चेव, एवं जाव थणियकुमारा, वाणमंतरजोइसिय-
वेमाणिया एवं चेव ॥ ६२५ ॥ दो भंते ! नेरइया एगंसि नेरइयावासंसि नेरइयत्ताए
उववन्ना, तत्थ णं एगे नेरइए महाकम्मतराए चेव जाव महावेयणतराए चेव, एगे
नेरइए अप्पकम्मतराए चेव जाव अप्पवेयणतराए चेव, से कहमेयं भंते ! एवं ?
गोयमा ! नेरइया दुविहा प०, तं०-माइमिच्छादिट्ठिउववन्नगा य अमाइसम्मदिट्ठि-

उववन्नगा य, तत्थ णं जे से माइमिच्छादिट्ठिउववन्नए नेरइए से णं महाकम्मतराए
 चेव जाव महावेयणतराए चेव, तत्थ णं जे से अमाइसम्महिट्ठिउववन्नए नेरइए
 से णं अप्पकम्मतराए चेव जाव अप्पवेयणतराए चेव, दो भंते ! असुरकुमारा एवं
 चेव, एवं एगिंदियविगलिंदियवज्जं जाव वेमाणिया ॥ ६२६ ॥ नेरइ(या)ए णं भंते !
 अणंतरं उव्वट्ठिता जे भविए पंचिंदियतिरिक्खजोणिएसु उववज्जित्तए, से णं भंते !
 कयरं आउयं पडिसंवेदेइ ? गोयमा ! नेरइयाउयं पडिसंवेदेइ, पंचिंदियतिरिक्ख-
 जोणियाउए से पुरओ कडे चिट्ठइ, एवं मणुस्सेवि, नवरं मणुस्साउए से पुरओ
 कडे चिट्ठइ । असुरकुमारा णं भंते ! अणंतरं उव्वट्ठिता जे भविए पुढविकाइएसु
 उववज्जित्तए पुच्छा, गोयमा ! असुरकुमाराउयं पडिसंवेदेइ, पुढविकाइयाउए से
 पुरओ कडे चिट्ठइ, एवं जो जहिं भविओ उववज्जित्तए तस्स तं पुरओ कडं चिट्ठइ,
 जत्थ ठिओ तं पडिसंवेदेइ जाव वेमाणिए, नवरं पुढविकाइए पुढविकाइएसु उव-
 वज्जइ पुढविकाइयाउयं पडिसंवेदेइ, अन्ने य से पुढविकाइयाउए पुरओ कडे चिट्ठइ,
 एवं जाव मणुस्सो सट्ठाणे उववाएयव्वो परट्ठाणे तहेव ॥ ६२७ ॥ दो भंते ! असुर-
 कुमारा एगंसि असुरकुमारावासंसि असुरकुमारदेवत्ताए उववन्ना, तत्थ णं एगे असुर-
 कुमारे देवे उज्जुयं विउव्विस्सामिति उज्जुयं विउव्वइ, वंकं विउव्विस्सामिति वंकं
 विउव्वइ, जं जहा इच्छइ तं तहा विउव्वइ, एगे असुरकुमारे देवे उज्जुयं विउव्वि-
 स्सामिति वंकं विउव्वइ, वंकं विउव्विस्सामिति उज्जुयं विउव्वइ, जं जहा इच्छइ णो
 तं तहा विउव्वइ, से कहमेयं भंते ! एवं ? गोयमा ! असुरकुमारा देवा दुविहा प०,
 तं०-माइमिच्छादिट्ठिउववन्नगा य अमाइसम्महिट्ठिउववन्नगा य, तत्थ णं जे से माइ-
 मिच्छादिट्ठिउववन्नए असुरकुमारे देवे से णं उज्जुयं विउव्विस्सामिति वंकं विउव्वइ
 जाव णो तं तहा विउव्वइ, तत्थ णं जे से अमाइसम्महिट्ठिउववन्नए असुरकुमारे देवे
 से णं उज्जुयं विउव्विस्सामीति उज्जुयं विउव्वइ जाव तं तहा विउव्वइ । दो भंते !
 नागकुमारा एवं चेव, एवं जाव थणियकुमारा, वाणमंतरजोइसियवेमाणिया एवं चेव ॥
 सेवं भंते ! २ ति ॥ ६२८ ॥ अट्ठारसमस्स सयस्स पंचमो उडेसो समत्तो ॥

फाणियगुळे णं भंते ! कइवन्ने कइगंधे कइरसे कइफासे पण्णत्ते ? गोयमा ! एत्थ
 णं दो नया भवंति, तं०-निच्छइयनए य वावहारियनए य, वावहारियनयस्स गोड्ढे
 फाणियगुळे, नेच्छइयनयस्स पंचवन्ने दुगंधे पंचरसे अट्ठफासे प० । भमरे णं भंते !
 कइवन्ने० पुच्छा, गोयमा ! एत्थ णं दो नया भवंति, तं०-निच्छइयनए य वाव-
 हारियनए य, वावहारियनयस्स कालए भमरे, नेच्छइयनयस्स पंचवन्ने जाव अट्ठ-
 फासे प० । सुयपिच्छे णं भंते ! कइवन्ने० प० ? एवं चेव, नवरं वावहारियनयस्स

नीलए सुयपिच्छे, नेच्छइयनयस्स पंचवण्णे सेसं तं चेव, एवं एएणं अभिलावेणं लोहिं-
 (ति)या मंजिट्टिया, पीतिया हालिहा, सुक्खिण्णं संखे, सुब्भिगंधे कोट्ठे, दुब्भिगंधे सियग-
 सरीरे, तित्ते निंबे, कड्डया सुंठी, कसाए कविट्ठे, अंबा अंबिलिया, महुरे खंडे, कक्खंडे
 वड्डरे, मउए नवणीए, गुरुए अए, लहुए उल्लयपत्ते, सीए हिमे, उसिणे अगणिकाए,
 णिद्धे तेत्ते । छारिया णं भंते ! पुच्छा, गोयमा ! एत्थ णं दो नया भवंति, तं०-निच्छ-
 इयनए य वावहारियनए य, वावहारियनयस्स लुक्खा छारिया, नेच्छइयनयस्स पंच-
 वज्जा जाव अट्ठफासा प० ॥ ६२९ ॥ परमाणुपोग्गळे णं भंते ! कइवन्ने जाव कइ-
 फासे पन्नत्ते ? गोयमा ! एगवन्ने एगगंधे एगरसे दुफासे पन्नत्ते ॥ दुपएसिए णं भंते !
 खंधे कइवन्ने० पुच्छा, गोयमा ! सिय एगवन्ने सिय दुवन्ने, सिय एगगंधे सिय दुगंधे,
 सिय एगरसे सिय दुरसे, सिय दुफासे सिय तिफासे सिय चउफासे पन्नत्ते, एवं तिप-
 एसिएवि, नवरं सिय एगवन्ने सिय दुवन्ने सिय तिवन्ने, एवं रसेसुवि, सेसं जहा
 दुपएसियस्स, एवं चउप्पएसिएवि, नवरं सिय एगवन्ने जाव सिय चउवन्ने, एवं रसे-
 सुवि, सेसं तं चेव, एवं पंचपएसिएवि, नवरं सिय एगवन्ने जाव सिय पंचवन्ने, एवं
 रसेसुवि, गंधफासा तहेव, जहा पंचपएसिओ एवं जाव असंखेजपएसिओ ॥ सुहुम-
 परिणए णं भंते ! अणंतपएसिए खंधे कइवन्ने० ? जहा पंचपएसिए तहेव निरवसेसं,
 बायरपरिणए णं भंते ! अणंतपएसिए खंधे कइवन्ने० पुच्छा, गोयमा ! सिय एगवन्ने
 जाव सिय पंचवन्ने, सिय एगगंधे सिय दुगंधे, सिय एगरसे जाव सिय पंचरसे, सिय
 चउफासे जाव सिय अट्ठफासे प० ॥ सेवं भंते ! सेवं भंते ! त्ति ॥ ६३० ॥
अट्ठारसमस्स सयस्स छट्ठो उद्देसो समत्तो ॥

रायगिहे जाव एवं वयासी-अन्नउत्थिया णं भंते ! एवमाइक्खंति जाव पर-
 वेंति-एवं खलु केवली जक्खाएसेणं आइस्सइ, एवं खलु केवली जक्खाएसेणं आइट्ठे
 समाणे आहच्च दो भासाओ भासइ, तं०-मोसं वा सच्चा मोसं वा, से कहमेयं भंते !
 एवं ? गोयमा ! जणं ते अन्नउत्थिया जाव जे ते एवमाहंसु मिच्छं ते एवमाहंसु,
 अहं पुण गोयमा ! एवमाइक्खामि ४-नो खलु केवली जक्खाएसेणं आइस्सइ, नो
 खलु केवली जक्खाएसेणं आइट्ठे समाणे आहच्च दो भासाओ भासइ, तं०-मोसं
 वा सच्चा मोसं वा, केवली णं असावज्जाओ अपरोवघाइयाओ आहच्च दो भासाओ
 भासइ, तं०-सच्चं वा असच्चा मोसं वा ॥ ६३१ ॥ कइविहे णं भंते ! उवही
 पण्णत्ते ? गोयमा ! तिविहे उवही प०, तं०-कम्मोवही, सरीरोवही, बाहिरभंडमत्तो-
 वगरणोवही, नेरइयाणं भंते ! पुच्छा, गोयमा ! दुविहे उवही प०, तं०-कम्मोवही य
 सरीरोवही य, सेसाणं तिविहे उवही एगिदियवजाणं जाव वेमाणियाणं, एगिदियाणं

दुविहे उवही प०, तंजहा-कम्मोवही य सरीरोवही य, कइविहे णं भंते ! उवही प० ? गोयमा ! तिविहे उवही प०, तंजहा-सच्चित्ते, अच्चित्ते, मीसए, एवं नेरइयाणवि, एवं निरवसे(सा)सं जाव वेमाणियाणं । कइविहे णं भंते ! परिग्गहे प० ? गोयमा ! तिविहे परिग्गहे प०, तं०-कम्मपरिग्गहे, सरीरपरिग्गहे, बाहिरभंडमत्तोवगरण-परिग्गहे, नेरइयाणं भंते ! एवं जहा उवहिणा दो दंडगा भणिया तहेव परिग्गहेणवि दो दंडगा भाणियव्वा, कइविहे णं भंते ! पणिहाणे प० ? गोयमा ! तिविहे पणिहाणे प०, तं०-मणपणिहाणे, वइपणिहाणे, कायपणिहाणे, नेरइयाणं भंते ! कइविहे पणिहाणे प० ? एवं चेव, एवं जाव थणियकुमाराणं, पुढविकाइयाणं पुच्छा, गोयमा ! एगे कायपणिहाणे प०, एवं जाव वणस्सइकाइयाणं, बेइंदियाणं पुच्छा, गोयमा ! दुविहे पणिहाणे प०, तं०-वइपणिहाणे य कायपणिहाणे य, एवं जाव चउरिंदियाणं, सेसाणं तिविहेवि जाव वेमाणियाणं । कइविहे णं भंते ! दुप्पणिहाणे प० ? गोयमा ! तिविहे दुप्पणिहाणे प०, तं०-मणदुप्पणिहाणे, वइदुप्पणिहाणे, कायदुप्पणिहाणे, जहेव पणिहाणेणं दंडगो भणिओ तहेव दुप्पणिहाणेणवि भाणियव्वा । कइविहे णं भंते ! सुप्पणिहाणे प० ? गोयमा ! तिविहे सुप्पणिहाणे प०, तंजहा-मणसुप्पणिहाणे, वइसुप्पणिहाणे, कायसुप्पणिहाणे, मणुस्साणं भंते ! कइविहे सुप्पणिहाणे प० ? एवं चेव जाव वेमाणियाणं, सेवं भंते ! २ त्ति जाव विहरइ ॥ तए णं समणे भगवं महावीरे जाव बहिया जणवयविहारं विहरइ ॥ ६३२ ॥ तेणं कालेणं तेणं समएणं रायगिहे नामं नयरे गुणसिलए उज्जाणे वन्नओ जाव पुढविसिला-पुढओ, तस्स णं गुणसिलयस्स उज्जाणस्स अदूरसामंते बहवे अन्नउत्थिया परिवसंति, तं०-कालोदाई सेलोदाई एवं जहा सत्तमसए अन्नउत्थिउहेसए जाव से कहमेयं मजे एवं ? तत्थ णं रायगिहे नयरे महुए नामं समणोवासए परिवसइ, अद्धे जाव अपरि-भूए अभिगयजीवाजीवे जाव विहरइ, तए णं समणे भगवं महावीरे अन्नया कयाइ पुव्वाणुपुर्वि चरमाणे जाव समोसढे, परिसा जाव पज्जुवासइ, तए णं म(इ)-हुए समणोवासए इमीसे कहाए लद्धे समणे हट्टुट्ट जाव हियए ण्हाए जाव सरीरे सयाओ गिहाओ पडिनिक्खमइ स० २ ता पायविहारचारेणं रायगिहं नयरं जाव निग्गच्छइ २ ता तेसिं अन्नउत्थियाणं अदूरसामंतेणं वीईवयइ, तए णं ते अन्नउत्थिया महुयं समणोवासयं अदूरसामंतेणं वीईवयमाणं पासंति २ ता अन्नमंजं सहावेत्ति २ ता एवं वयासी-एवं खलु देवाणुप्पिया ! अम्हं इमा कहा अविउप्पकडा इमं च णं महुए समणोवासए अम्हं अदूरसामंतेणं वीईवयइ, तं सेयं खलु देवाणु-प्पिया ! अम्हं महुयं समणोवासणं एयमइं पुच्छित्तएत्तिकट्टु अन्नमन्नस्स अंतियं

एयमट्ठं पडिसुणेंति अन्नमन्नस्स० २ ता जेणेव महुए समणोवासए तेणेव उवा-
गच्छंति २ ता महुयं समणोवासगं एवं वयासी-एवं खलु महु(मंडु)या ! तव धम्मायरिए
धम्मोवएसए समणे णायपुत्ते पंच अत्थिकाए पन्नवेइ जहा सत्तमे सए अन्नउत्थिय-
उद्देसए जाव से कहमेयं महुया ! एवं ?, तए णं से महुए समणोवासए ते अन्नउत्थिए
एवं वयासी-जइ कज्जं कज्जइ जाणामो पासामो, अह कज्जं न कज्जइ न जाणामो न
पासामो, तए णं ते अन्नउत्थिया महुयं समणोवासयं एवं वयासी-केस णं तुमं
महुया ! समणोवासगणं भवसि, जे णं तुमं एयमट्ठं न जाणसि न पाससि ?, तए णं
से महुए समणोवासए ते अन्नउत्थिए एवं वयासी-अत्थि णं आउसो ! वाउयाए
वाइ ? हंता महुया ! वाइ, तु(उद्दे)ब्भे णं आउसो ! वाउयायस्स वायमाणस्स ह्वं
पासह ? णो इणट्ठे समट्ठे, अत्थि णं आउसो ! घाणसहगया पोगला ? हंता अत्थि,
तुब्भे णं आउसो ! घाणसहगयाणं पोगलाणं रुवं पासह ? णो इणट्ठे समट्ठे, अत्थि
णं आउसो ! अरणिसहगए अगणिकाए ? हंता अत्थि, तुब्भे णं आउसो !
अरणिसहगयस्स अगणिकायस्स रुवं पासह ? णो इणट्ठे समट्ठे, अत्थि णं आउसो !
समुद्दस्स पारगयाइं रुवाई ? हंता अत्थि, तुब्भे णं आउसो ! समुद्दस्स पारगयाइं
रुवाई पासह ? णो इणट्ठे समट्ठे, अत्थि णं आउसो ! देवलोगगयाइं रुवाई ?
हंता अत्थि, तुब्भे णं आउसो ! देवलोगगयाइं रुवाई पासह ? णो इणट्ठे समट्ठे,
एवामेव आउसो ! अहं वा तुब्भे वा अन्नो वा छउमत्थो जइ जो जं न जाणइ न
पासइ तं सव्वं न भवइ एवं मे सुवहुए लोए ण भविस्सतीतिकडु ते अन्नउत्थिए
एवं पडिहणइ एवं पडिहणित्ता जेणेव गुणसिलए उज्जाणे जेणेव समणे भगवं महावीरे
तेणेव उवागच्छइ २ ता समणं भगवं महावीरं पंचविहेणं अभिगमेणं अभि० जाव
पज्जुवासइ । महुयादि । समणे भगवं महावीरे महुयं समणोवासयं एवं वयासी-सुट्ठु णं
महुया ! तुमं ते अन्नउत्थिए एवं वयासी, साहु णं महुया ! तुमं ते अन्नउत्थिए एवं
वयासी, जे णं महुया ! अट्ठं वा हेउं वा पसिणं वा वागरणं वा अन्नायं अदिट्ठं
अस्सुयं अमयं अविण्णायं बहुज्जणमउद्दे आघवेइ पन्नवेइ जाव उवदंसेइ, से णं
अरिहंताणं आसायणाए वट्ठइ, अरिहंतपन्नत्तस्स धम्मस्स आसायणाए वट्ठइ, केवलीणं
आसायणाए वट्ठइ, केवल्लिपन्नत्तस्स धम्मस्स आसायणाए वट्ठइ, तं सुट्ठु णं तुमं महुया !
ते अन्नउत्थिए एवं वयासी, साहु णं तुमं महुया ! जाव एवं वयासी, तए णं महुए
समणोवासए समणेणं भगवया महावीरेणं एवं वुत्ते समाणे हट्ठउट्ठे समणं भगवं
महावीरं वंदइ नमंसइ व० २ ता णच्चासन्ने जाव पज्जुवासइ, तए णं समणे भगवं
महावीरे महुयस्स समणोवासगस्स तीसे य जाव परिसा पडिगया, तए णं महुए

समणोवासए समणस्स भगवओ महावीरस्स जाव निसम्म हट्ठुट्ठे पसिणाई (वागर-
णाई) पुच्छइ प० २ ता अट्ठाई परियादियइ २ ता उट्ठाए उट्ठेइ २ ता समणं भगवं
महावीरं वंदइ नमंसइ वं० २ ता जाव पडिगए । भंते ! त्ति भगवं गोयमे समणं भगवं
महावीरं वंदइ नमंसइ वं० २ ता एवं वयासी-पभू णं भंते ! महुए समणोवासए देवाणु-
प्पियाणं अंतियं जाव पव्वइत्तए ? णो इणट्ठे समट्ठे, एवं जहेव संखे तहेव अरुणाभे
जाव अंतं करे(का)हिइ ॥ ६३३ ॥ देवे णं भंते ! महिद्धिए जाव महेसक्खे रुवसहस्सं
विउव्वित्ता पभू अन्नमज्जेणं सद्धिं संगामं संगामेत्तए ? हंता पभू । ताओ णं भंते !
वोंदीओ किं एगजीवफुडाओ अणेगजीवफुडाओ ? गोयमा ! एगजीवफुडाओ णो
अणेगजीवफुडाओ, तेसि णं भंते ! वोंदीणं अंतरा किं एगजीवफुडा अणेगजीव-
फुडा ? गोयमा ! एगजीवफुडा नो अणेगजीवफुडा । पुरिसे णं भंते ! अंतरेणं
हत्थेण वा एवं जहा अट्ठमसए तइए उट्ठेसए जाव नो खलु तत्थ सत्थं कमइ
॥ ६३४ ॥ अत्थि णं भंते ! देवासुराणं संगामे २ ? हंता अत्थि, देवासुरेसु णं
भंते ! संगामेसु वट्ठमाणेसु किञ्चं तेसिं देवाणं पहरणरयणत्ताए परिणमइ ? गोयमा !
जन्नं ते देवा तणं वा कट्ठं वा पत्तं वा सक्करं वा परामुसंति तं (णं) तं तेसिं देवाणं
पहरणरयणत्ताए परिणमइ, जहेव देवाणं तहेव असुरकुमाराणं ? णो इणट्ठे समट्ठे,
असुरकुमाराणं देवाणं निच्चं विउव्विया पहरणरयणा प० ॥ ६३५ ॥ देवे णं भंते !
महिद्धिए जाव महेसक्खे पभू लवणसमुइं अणुपरियट्ठित्ताणं हव्वमागच्छित्तए ?
हंता पभू, देवे णं भंते ! महिद्धिए एवं धायइसंडं दीवं जाव हंता पभू, एवं जाव
रुयगवरं दीवं जाव हंता पभू, ते णं परं वीईवएज्जा नो चेव णं अणुपरियट्ठेज्जा
॥ ६३६ ॥ अत्थि णं भंते ! देवा जे अणंते कम्मसे जहन्नेणं एक्केण वा दोहिं वा
तिहिं वा उक्कोसेणं पंचहिं वाससएहिं खवयंति ? हंता अत्थि, अत्थि णं भंते !
देवा जे अणंते कम्मसे जहन्नेणं एक्केण वा दोहिं वा तिहिं वा उक्कोसेणं पंचहिं वास-
सहस्सेहिं खवयंति ? हंता अत्थि, अत्थि णं भंते ! ते देवा जे अणंते कम्मसे जहन्नेणं
एक्केण वा दोहिं वा तिहिं वा उक्कोसेणं पंचहिं वाससयसहस्सेहिं खवयंति ? हंता अत्थि,
कयरे णं भंते ! ते देवा जे अणंते कम्मसे जहन्नेणं एक्केण वा दोहिं वा तिहिं वा जाव
पंचहिं वाससएहिं खवयंति, कयरे णं भंते ! ते देवा जाव पंचहिं वाससहस्सेहिं
खवयंति, कयरे णं भंते ! ते देवा जाव पंचहिं वाससयसहस्सेहिं खवयंति ?
गोयमा ! वाणमंतरा देवा अणंते कम्मसे एगेणं वाससएणं खवयंति, असुरिंदव-
ज्जिया णं भवणवासी देवा अणंते कम्मसे दोहिं वाससएहिं खवयंति, असुरकुमारा णं
देवा अणंते कम्मसे ति(ती)हिं वाससएहिं खवयंति, गहगणनक्खत्तारारूवा जोइसिय

देवा अणंते कम्मंसे चउहिं वास जाव खवयंति, चंदिमसूरिया जोइसिंदा जोइसरा-
याणो अणंते कम्मंसे पंचहिं वाससएहिं खवयंति, सोहम्मीसाणगा देवा अणंते
कम्मंसे एणेण वाससहस्सेण (जाव) खवयंति, सणकुमारमाहिंदगा देवा अणंते कम्मंसे
दोहिं वाससहस्सेहिं खवयंति, एवं एएणं अभिलावेणं वंभलोगलंतगा देवा अणंते
कम्मंसे तिहिं वाससहस्सेहिं खवयंति, महासुक्कसहस्सारगा देवा अणंते कम्मंसे चउहिं
वाससहस्सेहिं खवयंति, आणयपाणयआरणअञ्जुयगा देवा अणंते कम्मंसे पंचहिं वास-
सहस्सेहिं खवयंति, हेट्टिमगेवेजगा देवा अणंते कम्मंसे एणेण वाससयसहस्सेणं खव-
यंति, मज्झिमगेवेजगा देवा अणंते कम्मंसे दोहिं वाससयसहस्सेहिं खवयंति, उवरि-
मगेवेजगा देवा अणंते कम्मंसे तिहिं वाससयसहस्सेहिं खवयंति, विजयवेजयंतजयं-
तअपराजियगा देवा अणंते कम्मंसे चउहिं वाससयसहस्सेहिं खवयंति, सव्वट्टसिद्धगा
देवा अणंते कम्मंसे पंचहिं वाससयसहस्सेहिं खवयंति, एएणं गोयमा ! ते देवा जे
अणंते कम्मंसे जहजेणं एकेण वा दोहिं वा तिहिं वा उक्कोसेणं पंचहिं वाससएहिं खवयंति,
एएणं गोयमा ! ते देवा जाव पंचहिं वाससहस्सेहिं खवयंति, एएणट्टेणं गोयमा ! ते
देवा जाव पंचहिं वाससयसहस्सेहिं खवयंति । सेवं भंते ! सेवं भंते ! ति ॥ ६३७ ॥

अट्टारसमस्स सयस्स सत्तमो उद्देसो समत्तो ॥

रायगिहे जाव एवं वयासी-अणगारस्स णं भंते ! भावियप्पणो पुरओ दुहओ
जुगमायाए पेहाए रीयं रीयमाणस्स पायस्स अहे कुकुडपोए वा वट्टापोए वा कुलिं-
गच्छाए वा परियावजेज्जा, तस्स णं भंते ! किं इरियावहिया किरिया कज्जइ, संप-
राइया किरिया कज्जइ ? गोयमा ! अणगारस्स णं भावियप्पणो जाव तस्स णं इरि-
यावहिया किरिया कज्जइ, नो संपराइया किरिया कज्जइ, से केणट्टेणं भंते ! एवं
वुच्चइ० ? जहा सत्तमसए संवुडुद्देसए जाव अट्टो निक्खित्तो । सेवं भंते ! सेवं भंते !
त्ति जाव विहरइ ॥ तए णं समणे भगवं महावीरे बहिया जाव विहरइ ॥ ६३८ ॥
तेणं कालेणं तेणं समएणं रायगिहे जाव पुढविसिलापट्टए, तस्स णं गुणसिलयस्स
उज्जाणस्स अट्टरसामंते बहवे अन्नउत्थिया परिवसंति, तए णं समणे भगवं महावीरे
जाव समोसडे जाव परिसा पडिगया, तेणं कालेणं तेणं समएणं समणस्स भगवओ
महावीरस्स जेट्ठे अंतवासी इंदभूई नामं अणगारे जाव उट्ठं जाणू जाव विहरइ, तए
णं ते अन्नउत्थिया जेणेव भगवं गोयमे तेणेव उवागच्छन्ति उवागच्छइत्ता भगवं
गोयमं एवं वयासी-तुब्भे णं अज्जो ! तिविहं तिविहेणं असंजय जाव एगंतबाला यावि
भवह, तए णं भगवं गोयमे ते अन्नउत्थिए एवं वयासी-से केणं कारणेणं अज्जो !
अम्हे तिविहं तिविहेणं असंजय जाव एगंतबाला यावि भवामो ?, तए णं ते अन्न-

उत्थिया भगवं गोयमं एवं वयासी-तुब्भे णं अज्जो ! रीयं रीयमाणा पाणे पेच्चैह अभिहणह जाव उ(व)द्वेह, तए णं तुब्भे पाणे पेच्चैमाणा जाव उद्वेमाणा तिविहं तिविहेणं जाव एगंतबाला यावि भवह, तए णं भगवं गोयमे ते अन्नउत्थिए एवं वयासी-नो खलु अज्जो ! अम्हे रीयं रीयमाणा पाणे पेच्चैमो जाव उद्वेमो, अम्हे णं अज्जो ! रीयं रीयमाणा कायं च जोयं च रीयं च पडुच्च दिस्सा २ पदिस्सा २ वयामो, तए णं अम्हे दिस्सा दिस्सा वयमाणा पदिस्सा पदिस्सा वयमाणा णो पाणे पेच्चैमो जाव णो उद्वेमो, तए णं अम्हे पाणे अपेच्चैमाणा जाव अणोद्वेमाणा तिविहं तिविहेणं जाव एगंतपंडिया यावि भवामो, तुब्भे णं अज्जो ! अप्पणा चेव तिविहं तिविहेणं जाव एगंतबाला यावि भवह, तए णं ते अन्नउत्थिया भगवं गोयमं एवं वयासी-केणं कारणेणं अज्जो ! अम्हे तिविहं तिविहेणं जाव भवामो ?, तए णं भगवं गोयमे ते अन्नउत्थिए एवं वयासी-तु(उद्धे)ब्भे णं अज्जो ! रीयं रीयमाणा पाणे पेच्चैह जाव उद्वेह, तए णं तुब्भे पाणे पेच्चैमाणा जाव उद्वेमाणा तिविहं जाव एगंत-बाला यावि भवह, तए णं भगवं गोयमे ते अन्नउत्थिए एवं पडिहणइ एवं पडिहणित्ता जेणेव समणे भगवं महावीरे तेणेव उवागच्छइ २ ता समणं भगवं महावीरं वंदइ नमंसइ वंदित्ता नमंसित्ता णच्चासन्ने जाव पज्जुवासइ, गोयमादि ! समणे भगवं महा-वीरे भगवं गोयमं एवं वयासी-सुद्धु णं तुमं गोयमा ! ते अन्नउत्थिए एवं वयासी, साहु णं तुमं गोयमा ! ते अन्नउत्थिए एवं वयासी, अत्थि णं गोयमा ! ममं बहवे अंतेवासी समणा निग्गंथा छउमत्था जे णं नो पभू एयं वागरणं वागरेत्तए जहा णं तुमं, तं सुद्धु णं तुमं गोयमा ! ते अन्नउत्थिए एवं वयासी, साहु णं तुमं गोयमा ! ते अन्नउत्थिए एवं वयासी ॥ ६३९ ॥ तए णं भगवं गोयमे समणेणं भगवया महा-वीरेणं एवं वुत्ते समणे हट्ठतुट्ठ० समणं भगवं महावीरं वंदइ नमंसइ वं० २ ता एवं वयासी-छउमत्थे णं भंते ! मणुस्से परमाणुपोगलं किं जाणइ पासइ उदाहु न जाणइ न पासइ ? गोयमा ! अत्थेगइए जाणइ पासइ, अत्थेगइए न जाणइ न पासइ, छउ-मत्थे णं भंते ! मणुस्से दुपएसियं खंधं किं जाणइ पासइ ? एवं चेव, एवं जाव असं-खेज्जपएसियं, छउमत्थे णं भंते ! मणुस्से अणंतपएसियं खंधं किं पुच्छा, गोयमा ! अत्थेगइए जाणइ पासइ १, अत्थेगइए जाणइ न पासइ २, अत्थेगइए न जाणइ पासइ ३, अत्थेगइए न जाणइ न पासइ ४, आहोहिए णं भंते ! मणुस्से परमाणु-पोगलं जहा छउमत्थे एवं आहोहिएवि जाव अणंतपएसियं, परमाहोहिए णं भंते ! मणुस्से परमाणुपोगलं जं समयं जाणइ तं समयं पासइ, जं समयं पासइ तं समयं जाणइ ? णो इणट्ठे समट्ठे, से केणट्ठेणं भंते ! एवं वुच्चइ परमाहोहिए णं मणुस्से पर-

माणुपोगलं जं समयं जाणइ नो तं समयं पासइ, जं समयं पासइ नो तं समयं जाणइ ? गोयमा ! सागारे से नाणे भवइ, अणागारे से दंसणे भवइ, से तेणट्टेणं जाव नो तं समयं जाणइ, एवं जाव अणंतपएसियं । केवली णं भंते ! मणुस्से परमाणुपोगलं जहा परमाहोहिए तथा केवलीवि जाव अणंतपएसियं ॥ सेवं भंते ! सेवं भंते ! ति ॥ ६४० ॥ **अट्टारसमस्स सयस्स अट्टमो उद्देसो समत्तो ॥**

रायणिहे जाव एवं वयासी-अत्थि णं भंते ! भवियदव्वनेरइया २ ? हंता अत्थि, से केणट्टेणं भंते ! एवं वुच्चइ भवियदव्वनेरइया २ ? गोयमा ! जे भविए पंचिदियतिरिक्खजोणिए वा मणुस्से वा नेरइएसु उववज्जितए से तेणट्टेणं, एवं जाव थणियकुमारा, अत्थि णं भंते ! भवियदव्वपुढविकाइया २ ? हंता अत्थि, से केणट्टेणं भंते ! एवं ० ? गोयमा ! जे भविए तिरिक्खजोणिए वा मणुस्से वा देवे वा पुढविकाइएसु उववज्जितए से तेणट्टेणं, आउक्काइयवणस्सइकाइयाणं एवं चेव उववाओ, तेउवाउबेइंदियतेइंदियच्चरिंदियण य जे भविए तिरिक्खजोणिए वा मणुस्से वा पंचिदियतिरिक्खजोण्याणं जे भविए नेरइए वा तिरिक्खजोणिए वा मणुस्से वा देवे वा पंचिदियतिरिक्खाजोणिए(वा)सु उववज्जितए एवं मणुस्सावि, वाणमंतरजोइसियवेमाणियाणं जहा नेरइयाणं ॥ भवियदव्वनेरइयस्स णं भंते ! केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेणं पुव्वकोडी, भवियदव्वअसुरकुमारस्स णं भंते ! केवइयं कालं ठिई प० ? गोयमा ! जहन्नेणं अंतोमुहुत्तं उक्कोसेणं तिचि पलिओवमाइं, एवं जाव थणियकुमारस्स । भवियदव्वपुढविकाइयस्स णं पुच्छा, गोयमा ! जहन्नेणं अंतोमुहुत्तं उक्कोसेणं साइरेगाइं दो सागरोवमाइं, एवं आउक्काइयस्सवि, तेउवाऊ जहा नेरइयस्स, वणस्सइकाइयस्स जहा पुढविकाइयस्स, बेइंदियस्स तेइंदियस्स चउरिंदियस्स जहा नेरइयस्स, पंचिदियतिरिक्खजोणियस्स जहन्नेणं अंतोमुहुत्तं उक्कोसेणं तेत्तीसं सागरोवमाइं, एवं मणुस्सावि, वाणमंतरजोइसियवेमाणियस्स जहा असुरकुमारस्स ॥ सेवं भंते ! सेवं भंते ! ति ॥ ६४१ ॥ **अट्टारसमस्स सयस्स नवमो उद्देसो समत्तो ॥**

रायणिहे जाव एवं वयासी-अणगारे णं भंते ! भावियप्पा असिधारं वा खुरधारं वा ओगाहेज्जा ? हंता ओगाहेज्जा, से णं तत्थ छिज्जेज वा भिज्जेज वा ? णो इण्टे समट्टे, णो खलु तत्थ सत्थं कमइ, एवं जहा पंचमसए परमाणुपोगलवत्त्ववया जाव अणगारे णं भंते ! भावियप्पा उदावत्तं वा जाव नो खलु तत्थ सत्थं कमइ ॥ ६४२ ॥ परमाणुपोगले णं भंते ! वाउयाएणं फुडे वाउयाए वा परमाणुपोगलेणं फुडे ? गोयमा ! परमाणुपोगले वाउयाएणं फुडे नो वाउयाए परमाणुपोगलेणं

फुडे । दुपएसिए णं भंते ! खंधे वाउयाएणं एवं चेव, एवं जाव असंखेजपएसिए ॥
 अणंतपएसिए णं भंते ! खंधे वाउयाए० पुच्छा, गोयमा ! अणंतपएसिए खंधे वाउया-
 एणं फुडे वाउयाए अणंतपएसिएणं खंधेणं सिय फुडे सिय नो फुडे ॥ वत्थी णं भंते !
 वाउयाएणं फुडे वाउयाए वत्थिणा फुडे ? गोयमा ! वत्थी वाउयाएणं फुडे नो
 वाउयाए वत्थिणा फुडे ॥६४३॥ अत्थि णं भंते ! इमीसे रयणप्पभाए पुढवीए अहे-
 दव्वाइ वन्नओ कालनीललोहियहालिदुसुक्खिळाई, गंधओ सुब्भिगंधाई दुब्भिगंधाई,
 रसओ तित्तकडुयकसायअंबिलमहुराई, फासओ कक्खडमउयगुरुयलहुयसीयउसिण-
 निदुल्लुक्खाई, अन्नमन्नवद्धाई अन्नमन्नपुट्ठाई जाव अन्नमन्नघडत्ताए चिट्ठंति ? हंता-
 अत्थि, एवं जाव अहेसत्तमाए । अत्थि णं भंते ! सोहम्मस्स कप्पस्स अहे० एवं
 चेव, एवं जाव ईसिप्पभाराए पुढवीए । सेवं भंते ! २ त्ति जाव विहरइ । तए णं
 समणे भगवं महावीरे जाव बहिया जणवयविहारं विहरइ ॥६४४॥ तेणं कालेणं तेणं
 समएणं वाणियगामे नामं नयरे होत्था वन्नओ, दूइपलासए उज्जाणे वन्नओ, तत्थ-
 णं वाणियगामे नयरे सोमिले नामं माहणे परिवसइ, अट्ठे जाव अपरिभूए, रिउव्वेय-
 जाव सुपरिनिट्ठिए पंचण्हं खंडियसयाणं सयस्स कुडुंबस्स आहेवच्चं जाव विहरइ,
 तए णं समणे भगवं महावीरे जाव समोसडे जाव परिसा पज्जुवासइ, तए णं तस्स
 सोमिलस्स माहणस्स इमीसे कहाए लद्धट्ठस्स समाणस्स अयमेयारूवे जाव समुप्प-
 ज्जित्था-एवं खलु समणे णायपुत्ते पुव्वाणुपुत्तिं चरमाणे गामाणुगामं दूइज्जमाणे
 सुहंसुहेणं जाव इहमागए जाव दूइपलासए उज्जाणे अहापडिरूवं जाव विहरइ, तं
 गच्छामि णं समणस्स नायपुत्तस्स अंतियं पाउब्भवामि, इमाई च णं एयारूवाइं
 अट्ठाई जाव वागरणाई पुच्छिस्सामि, तं जइ मे से इमाई एयारूवाइं अट्ठाई जाव वागर-
 णाई वागरेहिइ तओ णं वं(दी)दिहामि नमं(सी)सिहामि जाव पज्जुवासिहामि, अहमेयं
 से इमाई अट्ठाई जाव वागरणाई नो वागरेहिइ तो णं एएहिं चेव अट्ठेहि य जाव
 वागरेहि य निप्पट्ठपसिणवागरणं करेस्सामित्तिकहु एवं संपेहेइ २ ता ण्हाए जाव
 सरीरे साओ गिहाओ पडिनिक्खमइ २ ता पायविहारचारेणं एगेणं खंडियसएणं
 सद्धिं संपरिवुडे वाणियगामं नयरं मज्झमज्जेणं निगगच्छइ २ ता जेणेव दूइपलासए
 उज्जाणे जेणेव समणे भगवं महावीरे तेणेव उवागच्छइ २ ता समणस्स भगवओ
 महावीरस्स अदूरसामंते ठिच्चा समणं भगवं महावीरं एवं वयासी-जत्ता ते भंते !
 जवणिज्जं ते भंते ! अव्वाबाहं ते भंते ! फासुयविहारं ते भंते ! ? सोमिला । जत्ता वि मे,
 जवणिज्जं पि मे, अव्वाबाहं पि मे, फासुयविहारं पि मे, किं ते भंते ! जत्ता ? सोमिला ।
 जं मे तव नियमसंजमसज्झायज्झाणावस्सयमाइएसु जोगेसु जयणा सेत्तं जत्ता, किं ते

भंते ! जवणिजं ? सोमिला ! जवणिजे दुविहे प०, तं०-इंदियजवणिजे य नोईदिय-
जवणिजे य, से किं तं इंदियजवणिजे ? इंदियजवणिजे जं मे सोईदियचक्खिदियघाणि-
दियजिज्झिभदियफासिदियाइं निरुवहयाइं वसे वट्ठंति सेत्तं इंदियजवणिजे, से किं-तं
नोईदियजवणिजे ? २ जं मे कोहमाणमायालोभा वोच्छिन्ना नो उदीरंति सेत्तं नोईदिय-
जवणिजे, सेत्तं जवणिजे, से किं ते भंते ! अवावाहं ? सोमिला ! जं मे वाइयपित्ति-
यसिंभियसन्निवाइया विविहा रोगायंका सरीरगया दोसा उवसंता नो उदीरंति सेत्तं
अवावाहं, किं ते भंते ! फासुयविहारं ? सोमिला ! जन्नं आरामेसु उज्जाणेसु देवकुलेसु
सभासु पवासु इत्थीपसुपंडगविवज्जियासु वसहीसु फासुएसणिजं पीढफलगसेज्जासंथा-
रगं उवसंपज्जिताणं विहरामि सेत्तं फासुयविहारं ॥ सरिसवा ते भंते ! किं भक्खेया
अभक्खेया ? सोमिला ! सरिसवा भक्खेयावि अभक्खेयावि, से केणट्ठेणं भंते !
एवं वुच्चइ सरिसवा भक्खेयावि अभक्खेयावि ? से नूणं ते सोमिला ! वंभन्नएसु
नएसु दुविहा सरिसवा पन्नत्ता, तंजहा-मित्तसरिसवा य धन्नसरिसवा य, तत्थ णं
जे ते मित्तसरिसवा ते तिविहा प०, तं०-सहजायया सहवट्ठि(य)या सहपंडुकीलि-
(य)या, ते णं समणाणं निग्गंथाणं अभक्खेया, तत्थ णं जे ते धन्नसरिसवा ते
दुविहा प०, तं०-सत्थपरिणया य असत्थपरिणया य, तत्थ णं जे ते असत्थपरि-
णया ते णं समणाणं तिग्गंथाणं अभक्खेया, तत्थ णं जे ते सत्थपरिणया ते
दुविहा प०, तं०-एसणिज्जा य अणेसणिज्जा य, तत्थ णं जे ते अणेसणिज्जा ते
समणाणं निग्गंथाणं अभक्खेया, तत्थ णं जे ते एसणिज्जा ते दुविहा प०, तं०-
जाइया य अजाइया य, तत्थ णं जे ते अजाइया ते णं समणाणं निग्गंथाणं अभ-
क्खेया, तत्थ णं जे ते जाइया ते दुविहा प०, तं०-लद्धा य अलद्धा य, तत्थ
णं जे ते अलद्धा ते णं समणाणं निग्गंथाणं अभक्खेया, तत्थ णं जे ते लद्धा ते
णं समणाणं निग्गंथाणं भक्खेया, से तेणट्ठेणं सोमिला ! एवं वुच्चइ जाव अभक्खे-
यावि । मासा ते भंते ! किं भक्खेया अभक्खेया ? सोमिला ! मासा मे भक्खेयावि
अभक्खेयावि, से केणट्ठेणं भंते ! जाव अभक्खेयावि ? से नूणं ते सोमिला !
वंभन्नएसु नएसु दुविहा मासा प०, तं०-दव्वमासा य कालमासा य, तत्थ णं जे ते
कालमासा ते णं सावणादीया आसाढपज्जवसाणा दुवालस प०, तं०-सावणे भव्वए
आसोए कत्तिए मग्गसिरे पोसे माहे फागुणे चेत्ते वइसाहे जेट्ठामूले आसाढे, ते णं
समणाणं निग्गंथाणं अभक्खेया, तत्थ णं जे ते दव्वमासा ते दुविहा प०, तं०-
अत्थमासा य धण्णमासा य, तत्थ णं जे ते अत्थमासा ते दुविहा प०, तं०-
सुवन्नमासा य रुप्पमासा य, ते णं समणाणं निग्गंथाणं अभक्खेया, तत्थ णं जे ते

धनमासा ते दुविहा प०, तं०-सत्यपरिणया य असत्यपरिणया य, एवं जहा धन-
सरिसवा जाव से तेणट्टेणं जाव अभक्खेयावि । कुलत्था ते भंते ! किं भक्खेया
अभक्खेया ? सोमिला ! कुलत्था मे भक्खेयावि अभक्खेयावि, से केणट्टेणं जाव
अभक्खेयावि ? से नूनं ते सोमिला ! बंभन्नएसु नएसु दुविहा कुलत्था प०, तं०-
इत्थिकुलत्था य धन्नकुलत्था य, तत्थ णं जे ते इत्थिकुलत्था ते तिविहा प०, तंजहा-
कुलकन्नयाइ वा कुलवट्ठ(धू)याइ वा कुलमाउयाइ वा, ते णं समणानं निग्गं-
त्थानं अभक्खेया, तत्थ णं जे ते धन्नकुलत्था एवं जहा धन्नसरिसवा, से तेणट्टेणं
जाव अभक्खेयावि ॥ ६४५ ॥ एगे भवं दुवे भवं अक्खए भवं अव्वए भवं अव-
ट्ठिए भवं अणेगभूयभावभविए भवं ? सोमिला ! एगेवि अहं जाव अणेगभूयभाव-
भविएवि अहं, से केणट्टेणं भंते ! एवं वुच्चइ जाव भविएवि अहं ? सोमिला ! दव्व-
ट्ठयाए एगे अहं, नाणदंसणट्ठयाए दुविहे अहं, पएसट्ठयाए अक्खएवि अहं अव्वएवि
अहं अवट्ठिएवि अहं, उवओगट्ठयाए अणेगभूयभावभविएवि अहं, से तेणट्टेणं जाव
भविएवि अहं, एत्थ णं से सोमिले माहणे संबुद्धे, तए णं से समणं भगवं महावीरं जहा
खंदओ जाव से जहेयं तुब्भे वदह जहा णं देवाणुप्पियाणं अंतियं बहवे राईसर
एवं जहा रायप्पसेणइजे चित्तो जाव दुवालसविहं सावगधम्मं पडिवज्जइ पडिवज्जिता
समणं भगवं महावीरं वंदइ नमंसइ वं० २ ता जाव पडिगाए, तए णं से सोमिले माहणे-
समणोवासए जाए अभिगयजीवा जाव विहरइ । भंते ! ति भगवं गोयमे समणं भगवं
महावीरं वंदइ नमंसइ वं० २ ता एवं वयासी-पभू णं भंते ! सोमिले माहणे-
देवाणुप्पियाणं अंतिए मुंडे भविता जहेव संखे तहेव निरवसेसं जाव अंतं काहिइ ।
सेवं भंते ! २ ति जाव विहरइ ॥ ६४६ ॥ अट्टारसमस्स सयस्स दसमो-
उद्देसो समत्तो ॥ अट्टारसमं सयं समत्तं ॥

लेस्सा य १ गब्भ २ पुढवी ३ महासवा ४ चरम ५ वीव ६ भवणा ७ य ८
निव्वत्ति ८ करण ९ वणचरसुरा य १० एगूणवीसइमे ॥ १ ॥ रायगिहे जाव एवं
वयासी-कइ णं भंते ! लेस्साओ पन्नत्ताओ ? गोयमा ! छेस्साओ पन्नत्ताओ, तंजहा-
एवं जहा पन्नवणाए चउत्थो लेसुद्देसओ भाणियव्वो निरवसेसो । सेवं भंते ! २ ति
॥ ६४७ ॥ एगूणवीसइमस्स सयस्स पढमो उद्देसो समत्तो ॥

कइ णं भंते ! लेस्साओ प० ? एवं जहा पन्नवणाए गम्भुद्देसो सो चेव निरवसेसो
भाणियव्वो । सेवं भंते ! सेवं भंते ! ति (१९-२) ॥ ६४८ ॥ रायगिहे जाव एवं
वयासी-सिय भंते ! जाव चत्तारि पंच पुढविकाइया एगयओ साहारणसरीरं बंधंति
एग० २ ता तओ पच्छा आहारंति वा परिणामंति वा सरीरं वा बंधंति ? नो इणट्ठे-

समष्टे, पुढविकाइयाणं पत्तेयाहारा पत्तेयपरिणामा पत्तेयं सरीरं बंधंति प० २ ता
 तओ पच्छा आहारंति वा परिणामंति वा सरीरं वा बंधंति १, तेसि णं भंते !
 जीवाणं कइ लेस्साओ प० ? गोयमा ! चत्तारि लेस्साओ प०, तं०-कण्हलेस्सा,
 नीललेस्सा, काउलेस्सा, तेउलेस्सा २, ते णं भंते ! जीवा किं सम्मदिट्ठी मिच्छादिट्ठी
 सम्मामिच्छादिट्ठी ? गोयमा ! मिच्छादिट्ठी नो सम्मदिट्ठी नो सम्मामिच्छादिट्ठी ३,
 ते णं भंते ! जीवा किं नाणी अन्नाणी ? गोयमा ! नो नाणी अन्नाणी, नियमा
 दुअन्नाणी, तं०-मइअन्नाणी य सुयअन्नाणी य ४, ते णं भंते ! जीवा किं मणजोगी
 वइजोगी कायजोगी ? गोयमा ! नो मणजोगी, नो वइजोगी, कायजोगी ५, ते णं
 भंते ! जीवा किं सागारोवउत्ता अणागारोवउत्ता ? गोयमा ! सागारोवउत्तावि अणा-
 गारोवउत्तावि ६, ते णं भंते ! जीवा किमाहारमाहारंति ? गोयमा ! द्ववओ णं
 अणंतपएसियाईं द्ववाइं एवं जहा पन्नवणाए पढमे आहारुदेसए जाव संवप्पणयाए
 आहारमाहारंति ७, ते णं भन्ते ! जीवा जमाहारंति तं चिज्जंति, जं नो आहारंति
 तं नो चिज्जंति, चिन्ने वा से उद्दाइ पलिसप्पइ वा ? हंता गोयमा ! ते णं जीवा
 जमाहारंति तं चिज्जंति, जं नो जाव पलिसप्पइ वा ८, तेसि णं भंते ! जीवाणं एवं
 सन्नाइ वा पन्नाइ वा मणोइ वा वइइ वा अम्हे णं आहारमाहारेमो ? णो इण्ट्ठे
 समष्टे, आहारंति पुण ते ९, तेसि णं भंते ! जीवाणं एवं सन्नाइ वा जाव वइइ वा
 अम्हे णं इट्ठाणिट्ठे फासेयरे वेदेमो पडिसंवेदेमो ? णो इण्ट्ठे समष्टे, पडिसंवेदंति पुण
 ते १०, ते णं भंते ! जीवा किं पाणाइवाए उवक्खाइज्जंति, मुसावाए अदिन्नादाणे
 जाव मिच्छादंसणसल्ले उवक्खाइज्जंति ? गोयमा ! पाणाइवाएवि उवक्खाइज्जंति जाव
 मिच्छादंसणसल्लेवि उवक्खाइज्जंति, जेसिंपिय णं जीवाणं ते जीवा एवमाहिज्जंति
 तेसिंपिय णं जीवाणं नो वि(ण्णा)ज्जाए नाणत्ते ११ ॥ ते णं भंते ! जीवा कओहिंतो
 उववज्जंति किं नेइएहिंतो उववज्जंति ? एवं जहा वक्कंतीए पुढविकाइयाणं उववाओ तहा
 माणियव्वो १२ । तेसि णं भंते ! जीवाणं केवइयं कालं ठिई प० ? गोयमा ! जह-
 ज्ञेणं अंतोमुहुत्तं उक्कोसेणं बावीसं वाससहस्साईं १३ ॥ तेसि णं भंते ! जीवाणं कइ
 समुग्घाया प० ? गोयमा ! तओ समुग्घाया प०, तं०-वेयणासमुग्घाए, कसायसमु-
 ग्घाए, मारणंतियसमुग्घाए । ते णं भंते ! जीवा मारणंतियसमुग्घाएणं किं समोहया
 मरंति असमोहया मरंति ? गोयमा ! समोहयावि मरंति, असमोहयावि मरंति ॥ ते
 णं भंते ! जीवा अणंतरं उव्वट्ठिता कहिं गच्छंति कहिं उववज्जंति ? एवं उव्वट्ठणा
 जहा वक्कंतीए १४ । सिय भंते ! जाव चत्तारि पंच आउक्काइया एगयओ साहा-
 र्णं सरीरं बंधंति २ ता तओ पच्छा आहारंति एवं जो पुढविकाइयाणं गमो

सो चेव भाणियव्वो जाव उव्वट्ठंति, नवरं ठिई सत्तवाससहस्साई उक्कोसेणं सेसं तं चेव । सिय भंते ! जाव चत्तारि पंच तेउक्काइया एवं चेव नवरं उववाओ ठिई उव्वट्ठणा य जहा पन्नवणाए सेसं तं चेव । वाउकाइयाणं एवं चेव नाणत्तं नवरं चत्तारि समुग्घाया । सिय भंते ! जाव चत्तारि पंच वणस्सइकाइया पुच्छा, गोयमा ! णो इणट्ठे समट्ठे, अणंता वणस्सइकाइया एगयओ साहारणसरीरं बंधंति एग० २ ता तओ पच्छा आहारंति वा परिणामंति वा सेसं जहा तेउकाइयाणं जाव उव्वट्ठंति, नवरं आहारो नियमं छद्दिसिं, ठिई जह्वेणं अंतोमुहुत्तं उक्कोसेणवि अंतोमुहुत्तं, सेसं तं चेव ॥ ६४९ ॥ एएसि णं भंते ! पुढविकाइयाणं आउतेउवाउवणस्सइकाइयाणं सुहुमाणं बायराणं पज्जत्तगाणं अपज्जत्तगाणं जाव जह्वुक्कोसियाए ओगाहणाए कयरे २ जाव विसेसाहिया वा ? गोयमा ! सव्वत्थोवा सुहुमनिगोयस्स अपज्जत्तगस्स जहन्निया ओगाहणा १, सुहुमवाउकाइयस्स अपज्जत्तगस्स जहन्निया ओगाहणा असंखेज्जगुणा २, सुहुमतेउअपज्जत्तगस्स जहणिया ओगाहणा असंखेज्जगुणा ३, सुहुमआउअपज्जत्तगस्स जहणिया ओगाहणा असंखेज्जगुणा ४, सुहुमपुढविअपज्जत्तगस्स जहन्निया ओगाहणा असंखेज्जगुणा ५, बायरवाउकाइयस्स अपज्जत्तगस्स जहन्निया ओगाहणा असंखेज्जगुणा ६, बायरतेउअपज्जत्तगस्स जहन्निया ओगाहणा असंखेज्जगुणा ७, बायरआउअपज्जत्तगस्स जहन्निया ओगाहणा असंखेज्जगुणा ८, बायरपुढविकाइयअपज्जत्तगस्स जहन्निया ओगाहणा असंखेज्जगुणा ९, पत्तयसरीरबायरवणस्सइकाइयस्स बायरनिगोयस्स एएसि णं पज्जत्तगाणं एएसि णं अपज्जत्तगाणं जहन्निया ओगाहणा दोण्हवि तुल्ला असंखेज्जगुणा १०-११, सुहुमनिओयस्स पज्जत्तगस्स जहन्निया ओगाहणा असंखेज्जगुणा १२, तस्स चेव अपज्जत्तगस्स उक्कोसिया ओगाहणा विसेसाहिया १३, तस्स चेव पज्जत्तगस्स उक्कोसिया ओगाहणा विसेसाहिया १४, सुहुमवाउकाइयस्स पज्जत्तगस्स जहणिया ओगाहणा असंखेज्जगुणा १५, तस्स चेव अपज्जत्तगस्स उक्कोसिया ओगाहणा विसेसाहिया १६, तस्स चेव पज्जत्तगस्स उक्कोसिया ओगाहणा विसेसाहिया १७, एवं सुहुमतेउक्काइयस्स विसे० १८।१९।२०। एवं सुहुमआउकाइयस्सवि २१।२२।२३। एवं सुहुमपुढविकाइयस्स विसेसाहिया २४।२५।२६। एवं बायरवाउकाइयस्स विसेसाहिया २७।२८। २९। एवं बायरतेउकाइयस्स विसेसाहिया ३०।३१।३२। एवं बायरआउकाइयस्स विसेसाहिया ३३।३४।३५। एवं बायरपुढविकाइयस्स विसेसाहिया ३६।३७।३८। सव्वेसिं तिविहेणं गमेणं भाणियव्वं, बायरनिगोयस्स पज्जत्तगस्स जहन्निया ओगाहणा असंखेज्जगुणा ३९, तस्स चेव अपज्जत्तगस्स उक्कोसिया ओगाहणा विसेसा-

हिया ४०, तस्स चेव पज्जत्तगस्स उक्कोसिया ओगाहणा विसेसाहिया ४१, पत्ते-
यसरीरवायरवणस्सइकाइयस्स पज्जत्तगस्स जहणिया ओगाहणा असंखेज्जगुणा ४२,
तस्स चेव अपज्जत्तगस्स उक्कोसिया ओगाहणा असंखेज्जगुणा ४३, तस्स चेव
पज्जत्तगस्स उक्कोसिया ओगाहणा असंखेज्जगुणा ४४ ॥ ६५० ॥ एयस्स णं भंते !
पुढविकाइयस्स आउक्काइयस्स तेउकाइयस्स वाउकाइयस्स वणस्सइकाइयस्स
कयरे काए सव्वसुहुमे कयरे काए सव्वसुहुमतराए ? गोयमा ! वणस्सइकाइए
सव्वसुहुमे वणस्सइकाइए सव्वसुहुमतराए १, एयस्स णं भंते ! पुढविकाइयस्स
आउक्काइयस्स तेउकाइयस्स वाउकाइयस्स कयरे काए सव्वसुहुमे कयरे काए
सव्वसुहुमतराए ? गोयमा ! वाउकाइए सव्वसुहुमे वाउकाइए सव्वसुहुमतराए
२, एयस्स णं भंते ! पुढविकाइयस्स आउक्काइयस्स तेउकाइयस्स कयरे काए
सव्वसुहुमे कयरे काए सव्वसुहुमतराए ? गोयमा ! तेउकाइए सव्वसुहुमे तेउकाइए
सव्वसुहुमतराए ३, एयस्स णं भंते ! पुढविकाइयस्स आउक्काइयस्स कयरे काए
सव्वसुहुमे कयरे काए सव्वसुहुमतराए ? गोयमा ! आउकाइए सव्वसुहुमे आउकाइए
सव्वसुहुमतराए ४ ॥ एयस्स णं भंते ! पुढविकाइयस्स आउकाइयस्स तेउकाइयस्स
वाउकाइयस्स वणस्सइकाइयस्स कयरे काए सव्वबादरे कयरे काए सव्वबादरत-
राए ? गोयमा ! वणस्सइकाइए सव्वबादरे वणस्सइकाइए सव्वबादरतराए १, एयस्स
णं भंते ! पुढविकाइयस्स आउकाइयस्स तेउकाइयस्स वाउकाइयस्स कयरे काए
सव्वबादरे कयरे काए सव्वबादरतराए ? गोयमा ! पुढविकाइए सव्वबादरे पुढविकाइए
सव्वबादरतराए २, एयस्स णं भंते ! आउकाइयस्स तेउकाइयस्स वाउकाइयस्स
कयरे काए सव्वबादरे कयरे काए सव्वबादरतराए ? गोयमा ! आउकाइए सव्वबादरे
आउकाइए सव्वबादरतराए ३, एयस्स णं भंते ! तेउकाइयस्स वाउकाइयस्स कयरे
काए सव्वबादरे कयरे काए सव्वबादरतराए ? गोयमा ! तेउकाइए सव्वबादरे तेउकाइए
सव्वबादरतराए ४ ॥ केमहालए णं भंते ! पुढविसरीरे पत्ते ? गोयमा ! अणंताणं
सुहुमवणस्सइकाइयाणं जावइया सरीरा से एगे सुहुमवाउसरीरे, असंखेजाणं सुहुम-
वाउसरीराणं जावइया सरीरा से एगे सुहुमतेउसरीरे, असंखेजाणं सुहुमतेउकाइय-
सरीराणं जावइया सरीरा से एगे सुहुमआउसरीरे, असंखेजाणं सुहुमआउकाइय-
सरीराणं जावइया सरीरा से एगे सुहुमपुढविसरीरे, असंखेजाणं सुहुमपुढविकाइय-
सरीराणं जावइया सरीरा से एगे वायरवाउसरीरे, असंखेजाणं वायरवाउकाइयाणं
जावइया सरीरा से एगे वायरतेउसरीरे, असंखेजाणं वायरतेउकाइयाणं जावइया
सरीरा से एगे वायरआउसरीरे, असंखेजाणं वायरआउकाइयाणं जावइया सरीरा

से एगे बायरपुढविसरीरे, एमहालए णं गोयमा ! पुढविसरीरे पन्नते ॥ ६५१ ॥
 पुढविकाइयस्स णं भंते ! केमहालिया सरीरोगाहणा प० ? गोयमा ! से जहानामए
 रञ्जो चाउरंतचक्कवट्टिस्स वन्नगपेसिया तरुणी बलवं जुगवं जुवाणी अप्पायंका
 वन्नओ जाव निउणसिप्पोवगया नवरं चम्मेदुदुहणमुट्ठियसमाहयणिचियगत्तकाया न
 भण्णइ सेसं तं चेव जाव निउणसिप्पोवगया तिक्खाए वइरामईए सण्हकरणीए
 तिक्खेणं वइरामएणं वट्टावरएणं एणं महं पुढविकाइयं जउगोलासमाणं गहाय पडि-
 साहरिय २ पडिसंखिविय २ जाव इणाभेवत्तिकहु तिसत्तखुत्तो उप्पीसेज्जा, तत्थ णं
 गोयमा ! अत्थेगइया पुढविकाइया आलिद्धा, अत्थेगइया पुढविकाइया नो आलिद्धा,
 अत्थेगइया संघट्ठि(ट्ठि)या, अत्थेगइया नो संघट्ठि(ट्ठि)या, अत्थेगइया परियाविया,
 अत्थेगइया नो परियाविया, अत्थेगइया उद्विया, अत्थेगइया नो उद्विया, अत्थेगइया
 पिट्ठा, अत्थेगइया नो पिट्ठा, पुढविकाइयस्स णं गोयमा ! एमहालिया सरीरोगाहणा
 प० ॥ पुढविकाइए णं भंते ! अक्कंते समाणे केरिसियं वेयणं पच्चणुब्भवमाणे विह-
 रइ ? गोयमा ! से जहानामए-केइ पुरिसे तरुणे बलवं जाव निउणसिप्पोवगए एणं
 पुरिसं जुजं जराजज्जरियदेहं जाव दुब्बलं किलंतं जमलपाणिणा मुद्धानंसि अभिह-
 णिज्जा, से णं गोयमा ! पुरिसे तेणं पुरिसेणं जमलपाणिणा मुद्धानंसि अभिहए समाणे
 केरिसियं वेयणं पच्चणुब्भवमाणे विहरइ ? अणिट्ठं समणाउसो !, तस्स णं गोयमा !
 पुरिसस्स वेयणाहिंतो पुढविकाइए अक्कंते समाणे एत्तो अणिट्ठतरियं चेव अक्कंततरियं
 चेव जाव अमणामतरियं चेव वेयणं पच्चणुब्भवमाणे विहरइ । आउयाए णं भंते !
 संघट्ठिए समाणे केरिसियं वेयणं पच्चणुब्भवमाणे विहरइ ? गोयमा ! जहा पुढविकाइए
 एवं आउकाएवि, एवं तेउकाएवि, एवं वाउकाएवि, एवं वणस्सइकाएवि जाव विहरइ,
 सेवं भंते ! २ ति ॥ ६५२ ॥ एगूणवीसइमे सए तइओ उदेसो समत्तो ॥

सिय भंते ! नेरइया महासवा महाकिरिया महावेयणा महानिज्जरा ? गोयमा !
 णो इणट्ठे समट्ठे १, सिय भंते ! नेरइया महासवा महाकिरिया महावेयणा अप्प-
 निज्जरा ? हंता सिया २, सिय भंते ! नेरइया महासवा महाकिरिया अप्पवेयणा
 महानिज्जरा ? गोयमा ! णो इणट्ठे समट्ठे ३, सिय भंते ! नेरइया महासवा महा-
 किरिया अप्पवेयणा अप्पनिज्जरा ? गोयमा ! णो इणट्ठे समट्ठे ४, सिय भंते !
 नेरइया महासवा अप्पकिरिया महावेयणा महानिज्जरा ? गोयमा ! णो इणट्ठे समट्ठे
 ५, सिय भंते ! नेरइया महासवा अप्पकिरिया महावेयणा अप्पनिज्जरा ? गोयमा !
 नो इणट्ठे समट्ठे ६, सिय भंते ! नेरइया महासवा अप्पकिरिया अप्पवेयणा
 महानिज्जरा ? नो इणट्ठे समट्ठे ७, सिय भंते ! नेरइया महासवा अप्पकिरिया

अप्पवेयणा अप्पनिज्जरा ? णो इण्ठे समट्ठे ८, सिय भंते ! नेरइया अप्पासवा महाकिरिया महावेयणा महानिज्जरा ? नो इण्ठे समट्ठे ९, सिय भंते ! नेरइया अप्पासवा महाकिरिया महावेयणा अप्पनिज्जरा ? नो इण्ठे समट्ठे १०, सिय भंते ! नेरइया अप्पासवा महाकिरिया अप्पवेयणा महानिज्जरा ? नो इण्ठे समट्ठे ११, सिय भंते ! नेरइया अप्पासवा महाकिरिया अप्पवेयणा अप्पनिज्जरा ? णो इण्ठे समट्ठे १२, सिय भंते ! नेरइया अप्पासवा अप्पकिरिया महावेयणा महानिज्जरा ? नो इण्ठे समट्ठे १३, सिय भंते ! नेरइया अप्पासवा अप्पकिरिया महावेयणा अप्पनिज्जरा ? नो इण्ठे समट्ठे १४, सिय भंते ! नेरइया अप्पासवा अप्पकिरिया अप्पवेयणा महानिज्जरा ? नो इण्ठे समट्ठे १५, सिय भंते ! नेरइया अप्पासवा अप्पकिरिया अप्पवेयणा अप्पनिज्जरा ? णो इण्ठे समट्ठे १६, एए सोलस भंगा । सिय भंते ! असुरकुमारा महासवा महाकिरिया महावेयणा महानिज्जरा ? णो इण्ठे समट्ठे, एवं चउत्थो भंगो भाणियव्वो, सेसा पन्नरस भंगा खोडेयव्वा, एवं जाव थणियकुमारा, सिय भंते ! पुढविकाइया महासवा महाकिरिया महावेयणा महानिज्जरा ? हंता सिया, एवं जाव सिय भंते ! पुढविकाइया अप्पासवा अप्पकिरिया अप्पवेयणा अप्पनिज्जरा ? हंता सिया, एवं जाव मणुस्सा, वाणमंतरजोइसियवेमाणिया जहा असुरकुमारा, सेवं भंते ! सेवं भंते ! ति ॥ ६५३ ॥ एगूणवी-सइमस्स सयस्स चउत्थो उद्देसो समत्तो ॥

अत्थि णं भंते ! चरिमावि नेरइया परमावि नेरइया ? हंता अत्थि, से नूणं भंते ! चरिमेहिंतो नेरइएहिंतो परमा नेरइया महाकम्मतराए चेव महाकिरियतराए चेव महासवतराए चेव महावेयणतराए चेव, परमेहिंतो वा नेरइएहिंतो चरमा नेरइया अप्पकम्मतराए चेव अप्पकिरियतराए चेव अप्पासवतराए चेव अप्पवेयणतराए चेव ? हंता गोयमा ! चरमेहिंतो नेरइएहिंतो परमा जाव महावेयणतराए चेव, परमेहिंतो नेरइएहिंतो चरमा नेरइया जाव अप्पवेयणतरा चेव, से केणट्ठेणं भंते ! एवं वुच्चइ जाव अप्पवेयणतरा चेव ? गोयमा ! ठिइं पडुच्च, से तेणट्ठेणं गोयमा ! एवं वुच्चइ जाव अप्पवेयणतरा चेव । अत्थि णं भंते ! चरमावि असुरकुमारा परमावि असुरकुमारा ? एवं चेव, नवरं विवरीयं भाणियव्वं, परमा अप्पकम्मा, चरमा महाकम्मा, सेसं तं चेव जाव थणियकुमारा ताव एवमेव, पुढविकाइया जाव मणुस्सा एए जहा नेरइया, वाणमंतरजोइसियवेमाणिया जहा असुरकुमारा ॥ ६५४ ॥ कइविहा णं भंते ! वेयणा प० ? गोयमा ! दुविहा वेयणा प०, तं०-निदा य अनिदा य । नेरइया णं भंते ! किं निदायं वेयणं वेदंति अनिदायं वेयणं वेदंति ? जहा पन्न-

वणाए जाव वेमाणियत्ति । सेवं भंते ! सेवं भंते ! ति ॥ ६५५ ॥ एगूणवीसइ-
मस्स सयस्स पंचमो उद्देसो समत्तो ॥

कहि णं भंते ! दीवसमुद्दा, केवइया णं भंते ! दीवसमुद्दा, किंसंठिया णं भंते !
दीवसमुद्दा ? एवं जहा जीवाभिगमे दीवसमुद्देसो सो चेव इहवि जोइसियमंडि-
उद्देसगवज्जो भाणियव्वो जाव परिणामो जीवउववाओ जाव अणंतखुत्तो, सेवं भंते !
२ ति ॥ ६५६ ॥ एगूणवीसइमस्स सयस्स छट्ठो उद्देसो समत्तो ॥

केवइया णं भंते ! असुरकुमारभवणावाससयसहस्सा प० ? गोयमा ! चउसट्ठिं
असुरकुमारभवणावाससयसहस्सा प०, ते णं भंते ! किमया प० ? गोयमा !
सव्वरयणामया अच्छा सण्हा जाव पडिह्वा, तत्थ णं बहवे जीवा य पोमगला य
वक्कमंति विउक्कमंति चर्यंति उववज्जंति, सासया णं ते भवणा दव्वट्ठयाए, वन्नपज्जवेहिं
जाव फासपज्जवेहिं असासया, एवं जाव थणियकुमारावासा, केवइया णं भंते !
वाणसंतरभोमेज्जनयरावाससयसहस्सा प० ? गोयमा ! असंखेज्जा वाणसंतरभोमे-
ज्जनयरावाससयसहस्सा प०, ते णं भंते ! किमया प० ? सेसं तं चेव, केवइया णं
भंते ! जोइसियविमाणावाससयसहस्सा पुच्छा, गोयमा ! असंखेज्जा जोइसिय-
विमाणावाससयसहस्सा प०, ते णं भंते ! किमया प० ? गोयमा ! सव्वफालिहा-
मया अच्छा सेसं तं चेव, सोहम्मो णं भंते ! कप्पे केवइया विमाणावाससयसहस्सा
प० ? गोयमा ! वत्तीसं विमाणावाससयसहस्सा प०, ते णं भंते ! किमया प० ?
गोयमा ! सव्वरयणामया अच्छा सेसं तं चेव, एवं जाव अणुत्तरविमाणा, नवरं
जाणियव्वा जत्थ जत्तिया भवणा विमाणा वा । सेवं भंते ! २ ति ॥ ६५७ ॥

एगूणवीसइमस्स सयस्स सत्तमो उद्देसो समत्तो ॥

कइविहा णं भंते ! जीवनिव्वत्ती प० ? गोयमा ! पंचविहा जीवनिव्वत्ती प०,
तं०-एगिंदियजीवनिव्वत्ती जाव पंचिंदियजीवनिव्वत्ती, एगिंदियजीवनिव्वत्ती णं भंते !
कइविहा प० ? गोयमा ! पंचविहा प०, तं०-पुढविकाइयएगिंदियजीवनिव्वत्ती जाव
वणस्सइकाइयएगिंदियजीवनिव्वत्ती, पुढविकाइयएगिंदियजीवनिव्वत्ती णं भंते ! कइ-
विहा प० ? गोयमा ! दुविहा प०, तं०-सुहुमपुढविकाइयएगिंदियजीवनिव्वत्ती य बाय-
रपुढवीकाइयएगिंदियजीवनिव्वत्ती य, एवं एएणं अभिलावेणं भेओ जहा वड्डगबंधो
तेयगसरीरस्स जाव सव्वट्ठसिद्धअणुत्तरोववाइयकप्पातीतवेमाणियदेवपंचिंदियजीव-
निव्वत्ती णं भंते ! कइविहा प० ? गोयमा ! दुविहा प०, तं०-पज्जतगसव्वट्ठसिद्धअ-
णुत्तरोववाइय जाव देवपंचिंदियजीवनिव्वत्ती य अपज्जतगसव्वट्ठसिद्धअणुत्तरोववाइय
जाव देवपंचिंदियजीवनिव्वत्ती य । कइविहा णं भंते ! कम्मनिव्वत्ती प० ? गोयमा !

अट्टविहा कम्मनिव्वत्ती प०, तं०-नाणावरणिज्जकम्मनिव्वत्ती जाव अंतराइयक-
 म्मनिव्वत्ती, नेरइयाणं भंते ! कइविहा कम्मनिव्वत्ती प० ? गोयमा ! अट्टविहा
 कम्मनिव्वत्ती प०, तं०-नाणावरणिज्जकम्मनिव्वत्ती जाव अंतराइयकम्मनिव्वत्ती,
 एवं जाव वेमाणियाणं । कइविहा णं भंते ! सरीरनिव्वत्ती प० ? गोयमा ! पंच-
 विहा सरीरनिव्वत्ती प०, तं०-ओरालियसरीरनिव्वत्ती जाव कम्मगसरीरनिव्वत्ती ।
 नेरइयाणं भंते ! एवं चेव, एवं जाव वेमाणियाणं, नवरं नायव्वं जस्स जइ सरी-
 राणि । कइविहा णं भंते ! सव्विदियनिव्वत्ती प० ? गोयमा ! पंचविहा सव्वि-
 दियनिव्वत्ती प०, तं०-सोईदियनिव्वत्ती जाव फासिंदियनिव्वत्ती, एवं (जाव) नेरइया
 जाव थणियकुमारा णं, पुढविकाइयाणं पुच्छा, गोयमा ! एगा फासिंदियनिव्वत्ती
 प०, एवं जस्स जइ इंदियाणि जाव वेमाणियाणं । कइविहा णं भंते ! भासानि-
 व्वत्ती प० ? गोयमा ! चउव्विहा भासानिव्वत्ती प०, तं०-सच्चाभासानिव्वत्ती,
 मोसाभासानिव्वत्ती, सच्चाभोसभासानिव्वत्ती, असच्चाभोसभासानिव्वत्ती, एवं एगिं-
 दियवज्जं जस्स जा भासा जाव वेमाणियाणं, कइविहा णं भंते ! मणनिव्वत्ती प० ?
 गोयमा ! चउव्विहा मणनिव्वत्ती प०, तं०-सच्चमणनिव्वत्ती जाव असच्चाभोसम-
 णनिव्वत्ती, एवं एगिंदियविगल्लिंदियवज्जं जाव वेमाणियाणं । कइविहा णं भंते !
 कसायनिव्वत्ती प० ? गोयमा ! चउव्विहा कसायनिव्वत्ती प०, तं०-कोहकसाय-
 निव्वत्ती जाव लोभकसायनिव्वत्ती, एवं जाव वेमाणियाणं । कइविहा णं भंते !
 वच्चनिव्वत्ती प० ? गोयमा ! पंचविहा वच्चनिव्वत्ती प०, तं०-कालवच्चनिव्वत्ती
 जाव सुक्खिलवच्चनिव्वत्ती, एवं निरवसेसं जाव वेमाणियाणं, एवं गंधनिव्वत्ती दुविहा
 जाव वेमाणियाणं, रसनिव्वत्ती पंचविहा जाव वेमाणियाणं, फासनिव्वत्ती अट्टविहा
 जाव वेमाणियाणं । कइविहा णं भंते ! संठाणनिव्वत्ती प० ? गोयमा ! छव्विहा
 संठाणनिव्वत्ती प०, तं०-समचउरंससंठाणनिव्वत्ती जाव हुंडसंठाणनिव्वत्ती, नेर-
 इयाणं पुच्छा, गोयमा ! एगा हुंडसंठाणनिव्वत्ती प०, असुरकुमाराणं पुच्छा,
 गोयमा ! एगा समचउरंससंठाणनिव्वत्ती प०, एवं जाव थणियकुमाराणं, पुढवि-
 काइयाणं पुच्छा, गोयमा ! एगा मसूरचंदसंठाणनिव्वत्ती प०, एवं जस्स जं संठाणं
 जाव वेमाणियाणं, कइविहा णं भंते ! सन्नानिव्वत्ती प० ? गोयमा ! चउव्विहा
 सन्ना निव्वत्ती प०, तं०-आहारसन्नानिव्वत्ती जाव परिग्गहसन्नानिव्वत्ती, एवं जाव
 वेमाणियाणं, कइविहा णं भंते ! लेस्सानिव्वत्ती प० ? गोयमा ! छव्विहा लेस्सा-
 निव्वत्ती प०, तं०-कण्हलेस्सानिव्वत्ती जाव सुक्खलेस्सानिव्वत्ती, एवं जाव वेमाणि-
 याणं जस्स जइ लेस्साओ तस्स तत्तिया भाणियव्वा । कइविहा णं भंते ! दिट्ठिनिव्वत्ती

प० ? गोयमा ! तिविहा दिट्टिनिव्वत्ती प०, तंजहा-सम्मादिट्टिनिव्वत्ती, मिच्छादिट्टिनिव्वत्ती, सम्मामिच्छादिट्टिनिव्वत्ती, एवं जाव वेमाणियाणं जस्स जइविहा दिट्ठी । कइविहा णं भंते ! णाणनिव्वत्ती पन्नत्ता ? गोयमा ! पंचविहा णाणनिव्वत्ती प०, तं०-आभिणिवोहियणानि व्वत्ती जाव केवलनाणनिव्वत्ती, एवं एगिंदियवज्जं जाव वेमाणियाणं जस्स जइ णाणाइ । कइविहा णं भंते ! अन्नाणनिव्वत्ती प० ? गोयमा ! तिविहा अन्नाणनिव्वत्ती प०, तं०-मइअन्नाणनिव्वत्ती, सुयअण्णाणनिव्वत्ती, विभंगनाणनिव्वत्ती, एवं जस्स जइ अन्नाणा जाव वेमाणियाणं । कइविहा णं भंते ! जोगनिव्वत्ती प० ? गोयमा ! तिविहा जोगनिव्वत्ती प०, तं०-मणजोगनिव्वत्ती, वइजोगनिव्वत्ती, कायजोगनिव्वत्ती, एवं जाव वेमाणियाणं जस्स जइविहो जोगो । कइविहा णं भंते ! उवओगनिव्वत्ती प० ? गोयमा ! दुविहा उवओगनिव्वत्ती प०, तं०-सागारोवओगनिव्वत्ती अणागारोवओगनिव्वत्ती, एवं जाव वेमाणियाणं, संगहगाहा-जीवाणं निव्वत्ती कम्मप्पगळी सरीरनिव्वत्ती । सव्विदियनिव्वत्ती भासा य मणे कसाया य ॥ १ ॥ व्वे गंधे रसे फासे संठाणविही य होइ बोद्धव्वो । लेस्सा दिट्ठी णाणे उवओगे चेव जोगे य ॥ २ ॥ सेवं भंते ! सेवं भंते ! ति ॥ ६५८ ॥ एगूणवीसइमस्स सयस्स अट्ठमो उडेसो समत्तो ॥

कइविहे णं भंते ! करणे पणत्ते ? गोयमा ! पंचविहे करणे पन्नत्ते, तंजहा-दव्वकरणे, खेत्तकरणे, कालकरणे, भवकरणे, भावकरणे, नेरइयाणं भंते ! कइविहे करणे प० ? गोयमा ! पंचविहे करणे प०, तं०-दव्वकरणे, जाव भावकरणे, एवं जाव वेमाणियाणं, कइविहे णं भंते ! सरीरकरणे प० ? गोयमा ! पंचविहे सरीरकरणे पन्नत्ते, तंजहा-ओरालियसरीरकरणे जाव कम्मगसरीरकरणे, एवं जाव वेमाणियाणं जस्स जइ सरीराणि । कइविहे णं भंते ! इंदियकरणे प० ? गोयमा ! पंचविहे इंदियकरणे प०, तंजहा-सोइंदियकरणे जाव फासिंदियकरणे, एवं जाव वेमाणियाणं जस्स जइ इंदियाइ, एवं एएणं कमेणं भासाकरणे चउव्विहे, मणकरणे चउव्विहे, कसायकरणे चउव्विहे, समुग्घायकरणे सत्तविहे, सन्नाकरणे चउव्विहे, लेस्साकरणे छव्विहे, दिट्ठिकरणे तिविहे, वेयकरणे तिविहे पन्नत्ते, तंजहा-इत्थिवेयकरणे, पुरिसवेयकरणे, नपुंसगवेयकरणे, एए सव्वे नेरइयादिदंडगा जाव वेमाणियाणं जस्स जं अत्थि तं तस्स सव्वं भाणियव्वं । कइविहे णं भंते ! पाणाइवायकरणे प० ? गोयमा ! पंचविहे पाणाइवायकरणे प०, तं०-एगिंदियपाणाइवायकरणे जाव पंचिंदियपाणाइवायकरणे, एवं निरवसेसं जाव वेमाणियाणं । कइविहे णं भंते ! पोगलकरणे प० ? गोयमा ! पंचविहे पोगलकरणे प०, तं०-वन्नकरणे, गंधकरणे,

रसकरणे, फासकरणे, संठाणकरणे, वन्नकरणे णं भंते ! कइविहे प० ? गोयमा ! पंचविहे प०, तंजहा-कालवन्नकरणे जाव सुक्खिवन्नकरणे, एवं भेदो, गंधकरणे दुविहे, रसकरणे पंचविहे, फासकरणे अट्टविहे, संठाणकरणे णं भंते ! कइविहे प० ? गोयमा ! पंचविहे प०, तंजहा-परिमंडलसंठाणकरणे जाव आययसंठाणकरणे, सेवं भंते ! सेवं भंते ! ति जाव विहरइ ॥ ६५९ ॥ एगूणवीसइमस्स सयस्स नवमो उद्देसो समत्तो ॥

वाणमंतराणं भंते ! सव्वे समाहारा एवं जहा सोलसमसए दीवकुमारुद्देसए जाव अप्पिद्धियत्ति, सेवं भंते ! २ ति ॥ ६६० ॥ एगूणवीसइमे सए दसमो उद्देसो समत्तो ॥ एगूणवीसइमं सयं समत्तं ॥ १९ ॥

वेईदिय १ मागासे २ पाणवहे ३ उवचए ४ य परमाणू ५ । अंतर ६ बंधे ७ भूमी ८ चारण ९ सोवक्कमा जीवा १० ॥ १ ॥ रायगिहे जाव एवं वयासी-सिय भंते ! जाव चत्तारि पंच वेईदिया एगयओ साहारणसरीरं बंधंति २ ता तओ पच्छा आहारेंति वा परिणामेंति वा सरीरं वा बंधंति ? णो इणट्ठे समट्ठे, वेईदिया णं पत्तेयाहारा पत्तेयपरिणामा पत्तेयसरीरं बंधंति प० २ ता तओ पच्छा आहारेंति वा परिणामेंति वा सरीरं वा बंधंति, तेसि णं भंते ! जीवाणं कइ लेस्साओ प० ? गोयमा ! तओ लेस्साओ प०, तं-कण्हलेस्सा नीललेस्सा काउलेस्सा, एवं जहा एगूणवीसइमे सए तेउकाइयाणं जाव उव्वट्ठंति, नवरं सम्मदिट्ठीवि मिच्छदिट्ठीवि, नो सम्मामिच्छादिट्ठी, दो नाणा दो अन्नाणा नियमं, नो मणजोगी, वइजोगीवि कायजोगीवि, आहारो नियमं छहिसिं, तेसि णं भंते ! जीवाणं एवं सन्नाइ वा पन्नाइ वा मणेइ वा वईइ वा अम्हे णं इट्ठाणिट्ठे रसे इट्ठाणिट्ठे फासे पडिसंवेदेमो ? णो इणट्ठे समट्ठे, पडिसंवेदेति पुण ते, ठिई जहन्नेणं अंतोमुहुत्तं उक्कोसेणं वारस-संवच्छराइं, सेसं तं चेव, एवं तेईदिया(ण)वि, एवं चउरिंदियावि, नाणत्तं ईदिएसु ठिईए य सेसं तं चेव ठिई जहा पन्नवणाए । सिय भंते ! जाव चत्तारि पंच पंचिंदिया एगयओ साहारणसरीरं एवं जहा वेईदियाणं नवरं छहेस्साओ, दिट्ठी ति विहावि, चत्तारि नाणा, तिन्नि अन्नाणा भयणाए, ति विहा जोगा, तेसि णं भंते ! जीवाणं एवं सन्नाइ वा पन्नाइ वा जाव वईइ वा अम्हे णं आहारमाहारेमो ? गोयमा ! अत्थेगइयाणं एवं सन्नाइ वा पन्नाइ वा मणेइ वा वईइ वा अम्हे णं आहारमाहारेमो, अत्थेगइयाणं नो एवं सन्नाइ वा जाव वईइ वा अम्हे णं आहारमाहारेमो, आहारेंति पुण ते, तेसि णं भंते ! जीवाणं एवं सन्नाइ वा जाव वईइ वा अम्हे णं इट्ठाणिट्ठे सदे, इट्ठाणिट्ठे रुवे, इट्ठाणिट्ठे गंधे, इट्ठाणिट्ठे रसे, इट्ठाणिट्ठे फासे पडिसं-

वेदेमो ? गोयमा ! अत्थेगइयाणं एवं सच्चाइ वा जाव वईइ वा अम्हे णं इट्ठाणिट्ठे सहे जाव इट्ठाणिट्ठे फासे पडिसंवेदेमो, अत्थेगइयाणं नो एवं सच्चाइ वा पण्णाइ वा जाव वईइ वा अम्हे णं इट्ठाणिट्ठे सहे जाव इट्ठाणिट्ठे फासे पडिसंवेदेमो, पडिसंवेदेति पुण ते, ते णं भंते ! जीवा किं पाणाइवाए उवक्खाइज्जंति० ? गोयमा ! अत्थेगइया पाणाइवाएवि उवक्खाइज्जंति जाव मिच्छादंसणसल्लेवि उवक्खाइज्जंति, अत्थेगइया नो पाणाइवाए उवक्खाइज्जंति नो मुसावाए उवक्खाइज्जंति जाव नो मिच्छादंसणसल्ले उवक्खाइज्जंति, जेसिंपिय णं जीवाणं ते जीवा एवमाहिज्जंति तेसिंपि णं जीवाणं अत्थेगइयाणं विज्जाए नाणत्ते, अत्थेगइयाणं नो विण्णाए नाणत्ते, उववाओ सव्वओ जाव सव्वट्ठसिद्धाओ, ठिई जहजेणं अंतोमुहुत्तं उक्कोसेणं तेत्तीसं सागरोवमाई, छस्स-मुग्घाया केवलिवज्जा, उव्वट्ठणा सव्वत्थ गच्छंति जाव सव्वट्ठसिद्धंति, सेसं जहा वेइंदियाणं । एएसि णं भंते ! वेइंदियाणं जाव पंचिंदियाणय कयरे २ जाव विसे-साहिया वा ? गोयमा ! सव्वत्थोवा पंचिंदिया, चउरिंदिया विसेसाहिया, तेइंदिया विसेसाहिया, वेइंदिया विसेसाहिया । सेवं भंते ! सेवं भंते ! त्ति जाव विहरइ ॥ ६६१ ॥ वीसइमस्स सयस्स पढमो उद्देसो समत्तो ॥

कइविहे णं भंते ! आगासे प० ? गोयमा ! दुविहे आगासे प०, तं०-लोयागासे य अलोयागासे य, लोयागासे णं भंते ! किं जीवा जीवदेसा० ? एवं जहा विइयसए अत्थिउद्देसए तह चेव इहवि भाणियव्वं, नवरं अभिलावो जाव धम्मत्थिकाए णं भंते ! केमहालए प० ? गोयमा ! लोए लोयमेत्ते लोयप्पमाणे लोयफुडे लोयं चेव ओगाहिताणं चिट्ठइ, एवं जाव पोगलत्थिकाए । अहेलोए णं भंते ! धम्मत्थिका-यस्स केवइयं ओगाढे ? गोयमा ! साइरेगं अद्धं ओगाढे, एवं एएणं अभिलावेणं जहा विइयसए जाव ईसिप्पभारा णं भंते ! पुढवी लोयागासस्स किं संखेज्जइभागं ओगाढा० पुच्छा, गोयमा ! नो संखेज्जइभागं ओगाढा, असंखेज्जइभागं ओगाढा, नो संखेजे भागे ओगाढा, नो असंखेजे भागे ओगाढा, नो सव्वलोयं ओगाढा, सेसं तं चेव ॥ ६६२ ॥ धम्मत्थिकायस्स णं भंते ! केवइया अभिवयणा प० ? गोयमा ! अणेगा अभिवयणा प०, तंजहा-धम्मोइ वा धम्मत्थिकाएइ वा पाणाइवायवेरमणेइ वा मुसावायवेरमणेइ वा एवं जाव परिग्गहवेरमणेइ वा कोहविवेगेइ वा जाव मिच्छा-दंसणसल्लविवेगेइ वा इरियासमि(ए)ईइ वा भासासमिईइ वा एसणासमिईइ वा आया-णभंडमत्तनिकखेवणासमिईइ वा उच्चारपासवणखेलजल्लसिंघाणपारिट्ठावणियासमिईइ वा मणगुत्तीइ वा वइगुत्तीइ वा कायगुत्तीइ वा जे यावजे तहप्पगारा सव्वे ते धम्म-त्थिकायस्स अभिवयणा, अहम्मत्थिकायस्स णं भंते ! केवइया अभिवयणा प० ?

गोयमा । अणेगा अभिवयणा प०, तं०-अधम्मेइ वा अधम्मत्थिकाएइ वा पाणाइ-
वाएइ वा जाव सिच्छादंसणसल्लेइ वा इरियाअसमिईइ वा जाव उच्चारपासवण
जाव पारिट्ठावणियाअसमिईइ वा मणअगुत्तीइ वा वइअगुत्तीइ वा कायअगुत्तीइ वा
जे यावन्ने तहप्पगारा सव्वे ते अहम्मत्थिकायस्स अभिवयणा, आगासत्थिकायस्स
णं पुच्छा, गोयमा । अणेगा अभिवयणा प०, तं०-आगासेइ वा आगासत्थिकाएइ
वा गगणेइ वा नमेइ वा समेइ वा विसमेइ वा खहेइ वा विहेइ वा वीईइ वा
विवरेइ वा अंबरेइ वा अंबरसेइ वा छिड्डेइ वा झुसिरेइ वा मग्गेइ वा विमुहेइ वा
अ(ट्टे)इ वा विय(ट्टे)इ वा आधारेइ वा वोमेइ वा भायणेइ वा अंतरिकखेइ वा सामेइ
वा उवासंतरेइ वा अगमेइ वा फलिहेइ वा अणंतेइ वा जे यावन्ने तहप्पगारा सव्वे
ते आगासत्थिकायस्स अभिवयणा प० । जीवत्थिकायस्स णं भंते । केवइया अभिवयणा
प० ? गोयमा । अणेगा अभिवयणा प०, तं०-जीवेइ वा जीवत्थिकाएइ वा पाणेइ
वा भूएइ वा सत्तेइ वा विज्जूइ वा चेयाइ वा जेयाइ वा आयाइ वा रंगणेइ वा
हिंडुएइ वा पोग्गलेइ वा माणवेइ वा कत्ताइ वा विकत्ताइ वा जएइ वा जंतूइ वा
जोणीइ वा सयंभूइ वा ससररीइ वा नायएइ वा अंतरप्पाइ वा जे यावन्ने तहप्प-
गारा सव्वे ते जीवअभिवयणा प० । पोग्गलत्थिकायस्स णं भंते । पुच्छा, गोयमा ।
अणेगा अभिवयणा प०, तं०-पोग्गलेइ वा पोग्गलत्थिकाएइ वा परमाणुपोग्गलेइ
वा दुपएसिएइ वा तिपएसिएइ वा जाव असंखेज्जपएसिएइ वा अणंतपएसिएइ वा
(खंघे) जे यावन्ने तहप्पगारा सव्वे ते पोग्गलत्थिकायस्स अभिवयणा प० । सेवं
भंते । २ ति ॥ ६६३ ॥ **वीसइमस्स सयस्स वीओ उहेसो समत्तो ॥**

अह भंते ! पाणाइवाए सुसावाए जाव सिच्छादंसणसल्ले, पाणाइवायवेरमणे जाव
सिच्छादंसणसल्लविवेगे, उप्पत्तिया जाव पारिणामिया, उग्गहे जाव धारणा, उट्ठाणे
कम्मे बले वीरिए पुरिसकारपरक्कमे, नेरइयत्ते असुरकुमारत्ते जाव वेमाणियत्ते, नाणा-
वरणिजे जाव अंतराइए, कण्हलेस्सा जाव सुक्कलेस्सा, सम्मदिट्ठी ३, चक्खुदंसणे ४,
आभिणिन्नोहियणाणे जाव विभंगनाणे, आहारसत्ता ४, ओरोल्लियसरिरे ५, मणजोगे
३, सागारोवओगे अणागारोवओगे जे यावन्ने तहप्पगारा सव्वे ते णण्णत्थ आयाए
परिणमंति ? हंता गोयमा । पाणाइवाए जाव सव्वे ते णण्णत्थ आयाए परिणमंति
॥ ६६४ ॥ जीवे णं भंते ! गब्भं वक्कममाणे कइवन्नं कइगंधं एवं जहा बारसमसए
पंचमुहेसए जाव कम्मओ णं जए णो अकम्मओ विभत्तिभावं परिणमइ । सेवं भंते !
२ ति जाव विहरइ ॥ ६६५ ॥ **वीसइमे सए तइओ उहेसो समत्तो ॥**

कइविहे णं भंते ! इंदियउवचए पज्जे ? गोयमा । पंचविहे इंदियउवचए प०,

तं०—सोईदियउवचए एवं विइओ ईदियउद्देसओ निरवसेसो भाणियव्वो जहा पन्नव-
णाए । सेवं भंते ! सेवं भंते ! त्ति भगवं गोयमे जाव विहरइ ॥ ६६६ ॥

वीसइमस्स सयस्स चउत्थो उद्देसो समत्तो ॥

परमाणुपोगले णं भंते ! कइवन्ने कइगंधे कइरसे कइफासे पन्नते ? गोयमा !
एगवन्ने एगगंधे एगरसे दुफासे पन्नते, तंजहा—जइ एगवन्ने सिय कालए सिय नीलए
सिय लोहिए सिय हालिइए सिय सुक्किणए, जइ एगगंधे सिय सुब्भिगंधे सिय दुब्भि-
गंधे, जइ एगरसे सिय तित्ते सिय कडुए सिय कसाए सिय अंबिले सिय महुरे, जइ
दुफासे सिय सीए य निद्धे य १, सिय सीए य लुक्खे य २, सिय उसिणे य निद्धे
य ३, सिय उसिणे य लुक्खे य ४ ॥ दुपएसिए णं भंते ! खंधे कइवन्ने० ? एवं जहा
अट्टारसमसए छट्ठुद्देसए जाव सिय चउफासे पन्नते । जइ एगवन्ने सिय कालए जाव
सिय सुक्किणए, जइ दुवन्ने सिय कालए य नीलए य १, सिय कालए य लोहिए य २,
सिय कालए य हालिइए य ३, सिय कालए य सुक्किणए य ४, सिय नीलए य लोहियए
य ५, सिय नीलए य हालिइए य ६, सिय नीलए य सुक्किणए य ७, सिय लोहियए य
हालिइए य ८, सिय लोहियए य सुक्किणए य ९, सिय हालिइए य सुक्किणए य १०, एवं
एए दुयासंजोगे दस भंगा । जइ एगगंधे सिय सुब्भिगंधे सिय दुब्भिगंधे । जइ
दुगंधे सुब्भिगंधे य दुब्भिगंधे य, रसेसु जहा वन्नेसु, जइ दुफासे सिय सीए य
निद्धे य एवं जहेव परमाणुपोगले ४, जइ तिफासे सव्वे सीए देसे निद्धे देसे लुक्खे
१, सव्वे उसिणे देसे निद्धे देसे लुक्खे २, सव्वे निद्धे देसे सीए देसे उसिणे ३, सव्वे
लुक्खे देसे सीए देसे उसिणे ४, जइ चउफासे देसे सीए देसे उसिणे देसे निद्धे देसे
लुक्खे १, एए नव भंगा फासेसु ॥ तिपएसिए णं भंते ! खंधे कइवन्ने० जहा अट्टार-
समसए छट्ठुद्देसे जाव चउफासे ५०, जइ एगवन्ने सिय कालए जाव सुक्किणए ५, जइ
दुवन्ने सिय कालए य सिय नीलए य १, सिय कालए य नीलगा य २, सिय कालगा
य नीलए य ३, सिय कालए य लोहियए य १, सिय कालए य लोहियगा य २, सिय
कालगा य लोहियए य ३, एवं हालिइएणवि समं भंगा ३, एवं सुक्किणएणवि समं ३,
सिय नीलए य लोहियए य एत्थंपि भंगा ३, एवं हालिइएणवि समं भंगा ३, एवं
सुक्किणएणवि समं भंगा ३, सिय लोहियए य हालिइए य भङ्गा ३, एवं सुक्किणएणवि समं
भंगा ३, सिय हालिइए य सुक्किणए य भंगा ३, एवं सव्वेते दस दुयासंजोगा भंगा
तीसं भवंति, जइ तिवन्ने सिय कालए य नीलए य लोहियए य १, सिय कालए य
नीलए य हालिइए य २, सिय कालए य नीलए य सुक्किणए य ३, सिय कालए य
लोहियए य हालिइए य ४, सिय कालए य लोहियए य सुक्किणए य ५, सिय कालए

य हालिहए य सुक्किहए य ६, सिय नीलए य लोहियए य हालिहए य ७, सिय नीलए
 य लोहियए य सुक्किहए य ८, सिय नीलए य हालिहए य सुक्किहए य ९, सिय लोहि-
 यए य हालिहए य सुक्किहए य १०, एवं एए दस तियासंजोगा । जइ एगगंधे सिय
 सुब्भिगंधे सिय दुब्भिगंधे, जइ दुगंधे सुब्भिगंधे य दुब्भिगंधे य भंगा ३ ।
 रसा जहा वच्चा । जइ दुकासे सिय सीए य निद्धे य एवं जहेव दुपएसियस्स
 तहेव चत्तारि भंगा, जइ तिफासे सव्वे सीए देसे निद्धे देसे लुक्खे १, सव्वे
 सीए देसे निद्धे देसा लुक्खा २, सव्वे सीए देसा निद्धा देसे लुक्खे ३, सव्वे उस्सिणे
 देसे निद्धे देसे लुक्खे एत्थवि भंगा तिन्नि ६, सव्वे निद्धे देसे सीए देसे उस्सिणे
 भंगा तिन्नि ९, सव्वे लुक्खे देसे सीए देसे उस्सिणे भंगा तिन्नि एवं १२, जइ
 चउफासे देसे सीए देसे उस्सिणे देसे निद्धे देसे लुक्खे १, देसे सीए देसे उस्सिणे
 देसे निद्धे देसा लुक्खा २, देसे सीए देसे उस्सिणे देसा निद्धा देसे लुक्खे ३, देसे
 सीए देसा उस्सिणा देसे निद्धे देसे लुक्खे ४, देसे सीए देसा उस्सिणा देसे निद्धे
 देसा लुक्खा ५, देसे सीए देसा उस्सिणा देसा निद्धा देसे लुक्खे ६, देसा सीया
 देसे उस्सिणे देसे निद्धे देसे लुक्खे ७, देसा सीया देसे उस्सिणे देसे निद्धे देसा
 लुक्खा ८, देसा सीया देसे उस्सिणे देसा निद्धा देसे लुक्खे ९, एवं एए तिपएसिए
 फासेसु पणवीसं भंगा ॥ चउप्पएसिए णं भंते । खंधे कइव्वे ० जहा अट्टारसमसए जाव
 सिय चउफासे पन्नत्ते, जइ एगवच्चे सिय कालए य जाव सुक्किहए य ५, जइ दुवच्चे सिय
 कालए य नीलए य १, सिय कालए य नीलगा य २, सिय कालगा य नीलए य
 ३, सिय कालगा य नीलगा य ४, सिय कालए य लोहियए य एत्थवि चत्तारि भंगा
 ४, सिय कालए य हालिहए य ४, सिय कालए य सुक्किहए य ४, सिय नीलए य
 लोहियए य ४, सिय नीलए य हालिहए य ४, सिय नीलए य सुक्किहए य ४, सिय
 लोहियए य हालिहए य ४, सिय लोहियए य सुक्किहए य ४, सिय हालिहए य
 सुक्किहए य ४, एवं एए दस दुयासंजोगा भंगा पुण चत्तालीसं ४०, जइ तिवच्चे
 सिय कालए य नीलए य लोहियए य १, सिय कालए य नीलए य लोहियगा य
 २, सिय काल(ए)गा य नीलगा य लोहियए य ३, सिय कालगा य नीलए य
 लोहियए य, एए णं चत्तारि भंगा, एवं कालनीलहालिहएहिं भंगा ४, कालनील-
 सुक्किह ४, काललोहियहालिह ४, काललोहियसुक्किह ४, कालहालिहसुक्किह ४,
 नीललोहियहालिहगणं भंगा ४, नीललोहियसुक्किह ४, नीलहालिहसुक्किह ४, लोहिय-
 हालिहसुक्किहगणं भंगा ४, एवं एए दसतियासंजोगा एक्केक्के संजोए चत्तारि भंगा सव्वे
 ते चत्तालीसं भंगा ४०, जइ चउवच्चे सिय कालए य नीलए य लोहियए य हालिहए

य १, सिय कालए य नीलए य लोहियए य सुक्लिहए य २, सिय कालए य नीलए य
 हालिहए य सुक्लिहए य ३, सिय कालए य लोहियए य हालिहए य सुक्लिहए य ४, सिय
 नीलए य लोहियए य हालिहए य सुक्लिहए य ५, एवमेए चउक्कगसंजोए पंच भंगा, एए
 सव्वे नउइभंगा, जइ एगगंधे सिय दुब्भिगंधे सिय दुब्भिगंधे, जइ दुगंधे सुब्भिगंधे
 य दुब्भिगंधे य । रसा जहा वच्चा । जइ दुफासे जहेव परमाणुपोगळे ४, जइ
 तिफासे सव्वे सीए देसे निद्धे देसे लुक्खे १, सव्वे सीए देसे निद्धे देसा लुक्खा २,
 सव्वे सीए देसा निद्धा देसे लुक्खे ३, सव्वे सीए देसा निद्धा देसा लुक्खा ४, सव्वे
 उसिणे देसे निद्धे देसे लुक्खे एवं भंगा ४, सव्वे निद्धे देसे सीए देसे उसिणे ४,
 सव्वे लुक्खे देसे सीए देसे उसिणे ४, एए तिफासे सोलस भंगा, जइ चउफासे देसे
 सीए देसे उसिणे देसे निद्धे देसे लुक्खे १, देसे सीए देसे उसिणे देसे निद्धे देसा
 लुक्खा २, देसे सीए देसे उसिणे देसा निद्धा देसे लुक्खे ३, देसे सीए देसे उसिणे
 देसा निद्धा देसा लुक्खा ४, देसे सीए देसा उसिणा देसे निद्धे देसे लुक्खे ५, देसे
 सीए देसा उसिणा देसे निद्धे देसा लुक्खा ६, देसे सीए देसा उसिणा देसा निद्धा
 देसे लुक्खे ७, देसे सीए देसा उसिणा देसा निद्धा देसा लुक्खा ८, देसा सीया
 देसे उसिणे देसे निद्धे देसे लुक्खे ९, एवं एए चउफासे सोलस भंगा भाणियव्वा
 जाव देसा सीया देसा उसिणा देसा निद्धा देसा लुक्खा, सव्वे एए फासेसु छत्तीसं
 भंगा ॥ पंचपएसिए णं भंते ! खंधे कइवन्ने० जहा अट्टारसमसए जाव सिय चउफासे
 प०, जइ एगवन्ने एगवच्चदुवच्चा जहेव चउप्पएसिए, जइ तिवन्ने सिय कालए य नीलए
 य लोहियए य १, सिय कालए य नीलए य लोहियगा य २, सिय कालए य नीलगा य
 लोहियए य ३, सिय कालए य नीलगा य लोहियगा य ४, सिय काल(गा)ए य नीलए य
 लोहियए य ५, सिय कालगा य नीलए य लोहियगा य ६, सिय कालगा य नीलगा
 य लोहियए य ७, सिय कालए य नीलए य हालिहए य एत्थवि सत्त भंगा ७, एवं काल-
 गनीलगसुक्लिहएसु सत्त भंगा ७, कालगलोहियहालिहएसु ७, कालगलोहियसुक्लिहएसु ७,
 कालगहालिहसुक्लिहएसु ७, नीलगलोहियहालिहएसु ७, नीलगलोहियसुक्लिहएसु सत्त भंगा
 ७, नीलगहालिहसुक्लिहएसु ७, लोहियहालिहसुक्लिहएसुवि सत्त भंगा ७, एवमेए तियासं-
 जोएणं सत्तरि भंगा, जइ चउवन्ने सिय कालए य नीलए य लोहियए य हालिहए य
 १, सिय कालए य नीलए य लोहियए य हालिहगा य २, सिय कालए य नीलए
 य लोहियगा य हालिहगे य ३, सिय कालए य नीलगा य लोहियगे य हालिहगे य
 ४, सिय कालगा य नीलए य लोहियगे य हालिहगे य ५, एए पंच भंगा, सिय
 कालए य नीलए य लोहियए य सुक्लिहए य एत्थवि पंच भंगा, एवं कालगनीलग-

हालिद्सुक्लिण्णसुवि पंच भंगा, कालगलोहियहालिद्सुक्लिण्णसुवि पंच भंगा ५, नीलग-
लोहियहालिद्सुक्लिण्णसुवि पंच भंगा, एवमेए चउक्कगसंजोणं पणवीसं भंगा, जइ पंच-
वन्ने कालए य नीलए य लोहियए य हालिद्ए य सुक्लिण्णए य सव्वमेए एकगदुयगतिय-
गचउक्कपंचगसंजोणेणं ईयालं भंगसयं भवइ । गंधा जहा चउप्पएसियस्स । रसा जहा
वन्ना । फासा जहा चउप्पएसियस्स ॥ छप्पएसिए णं भंते ! खंधे कइवन्ने ० ? एवं
जहा पंचपएसिए जाव सिय चउफासे पन्नत्ते, जइ एगवन्ने एगवन्नदुवन्ना जहा
पंचपएसियस्स, जइ तिवन्ने सिय कालए य नीलए य लोहियए य एवं जहेव
पंचपएसियस्स सत्त भंगा जाव सिय कालगा य नीलगा य लोहियए य ७, सिय
कालगा य नीलगा य लोहियगा य ८, एए अट्ठ भन्ना, एवमेए दस तियासंजोगा
एक्केए संजोगे अट्ठ भंगा, एवं सव्वेवि तियगसंजोगे असीइ भंगा, जइ चउवन्ने
सिय कालए य नीलए य लोहियए य हालिद्ए य १, सिय कालए य नीलए य
लोहियए य हालिद्गा य २, सिय कालए य नीलए य लोहियगा य हालिद्ए य ३,
सिय कालए य नीलए य लोहियगा य हालिद्गा य ४, सिय कालए य नीलगा य
लोहियए य हालिद्ए य ५, सिय कालए य नीलगा य लोहियए य हालिद्गा य ६,
सिय कालए य नीलगा य लोहियगा य हालिद्ए य ७, सिय कालगा य नीलए य
लोहियए य हालिद्ए य ८, सिय कालगा य नीलए य लोहियए य हालिद्गा य ९,
सिय कालगा य नीलए य लोहियगा य हालिद्ए य १०, सिय कालगा य नीलगा य
लोहियए य हालिद्ए य ११, एए एक्कारस भंगा, एवमेए पंचचउक्कासंजोगा कायव्वा,
एक्केकसंजोए एक्कारस भंगा, सव्वेते चउक्कगसंजोणेणं पणपन्नं भंगा, जइ पंचवन्ने
सिय कालए य नीलए य लोहियए य हालिद्ए य सुक्लिण्णए य १, सिय कालए य
नीलए य लोहियए य हालिद्ए य सुक्लिण्णगा य २, सिय कालए य नीलए य लोहियगे
य हालिद्गा य सुक्लिण्णे य ३, सिय कालए य नीलए य लोहियगा य हालिद्ए य
सुक्लिण्णए य ४, सिय कालए य नीलगा य लोहियए य हालिद्ए य सुक्लिण्णए य ५,
सिय कालगा य नीलए य लोहियए य हालिद्ए य सुक्लिण्णए य ६, एवं एए छब्भंगा
भाणियव्वा, एवमेए सव्वेवि एकगदुयगतियगचउक्कगपंचगसंजोगेसु छासीयं भंगसयं
भवइ । गंधा जहा पंचपएसियस्स । रसा जहा एसस्स चेव वन्ना, फासा जहा चउ-
प्पएसियस्स ॥ सत्तपएसिए णं भंते ! खंधे कइवन्ने ० ? जहा पंचपएसिए जाव सिय
चउफासे ५०, जइ एगवन्ने एवं एगवन्नदुवण्णतिवन्ना जहा छप्पएसियस्स, जइ चउ-
वन्ने सिय कालए य नीलए य लोहियए य हालिद्ए य १, सिय कालए य नीलए
य लोहियए य हालिद्गा य २, सिय कालए य नीलए य लोहियगा य हालिद्ए य

३, एवमेते चउक्कसंजोगेणं पन्नरस भंगा भाणियव्वा जाव सिय कालगा य नीलगा य लोहियगा य हालिद्दए य १५, एवमेए पंचचउक्कसंजोगा नेयव्वा एक्केक्के संजोए पन्नरस भंगा, सव्वमेए पंचसत्तरिं भंगा भवन्ति । जइ पंचवन्ने सिय कालए य नीलए य लोहियए य हालिद्दए य सुक्किळ्ळए य १, सिय कालए य नीलए य लोहियए य हालिद्दए य सुक्किळ्ळगा य २, सिय कालए य नीलए य लोहियए य हालिद्दगा य सुक्किळ्ळए य ३, सिय कालए य नीलए य लोहियए य हालिद्दगा य सुक्किळ्ळगा य ४, सिय कालए य नीलए य लोहियगा य हालिद्दए य सुक्किळ्ळए य ५, सिय कालए य नीलए य लोहियगा य हालिद्दए य सुक्किळ्ळगा य ६, सिय कालए य नीलए य लोहियगा य हालिद्दगा य सुक्किळ्ळए य ७, सिय कालए य नीलगा य लोहियए य हालिद्दए य सुक्किळ्ळए य ८, सिय कालए य नीलगा य लोहियए य हालिद्दए य सुक्किळ्ळगा य ९, सिय कालगे य नीलगा य लोहियए य हालिद्दगा य सुक्किळ्ळगे य १०, सिय कालए य नीलगा य लोहियगा य हालिद्दए य सुक्किळ्ळए य ११, सिय कालगा य नीलए य लोहियए य हालिद्दए य सुक्किळ्ळए य १२, सिय कालगा य नीलए य लोहियए य हालिद्दए य सुक्किळ्ळगा य १३, सिय कालगा य नीलए य लोहियए य हालिद्दगा य सुक्किळ्ळए य १४, सिय कालगा य नीलए य लोहियगा य हालिद्दए य सुक्किळ्ळए य १५, सिय कालगा य नीलगा य लोहियए य हालिद्दए य सुक्किळ्ळए य १६, एए सोलस भंगा, एवं सव्वमेए एक्कगदुयगतियगचउक्कगपंचगसंजोगेणं दो सोलस भंगसया भवन्ति, गंधा जहा चउप्पएसियस्स, रसा जहा एयस्स चेव वन्ना, फासा जहा चउप्पएसियस्स ॥ अट्टपएसिए णं मन्ते ! खंधे० पुच्छा, गोयमा ! सिय एगवन्ने जहा सत्तपएसियस्स जाव सिय चउफासे प०, जइ एगवन्ने एवं एगवन्नदुवन्नतिवन्ना जहेव सत्तपएसिए, जइ चउवन्ने सिय कालए य नीलए य लोहियए य हालिद्दए य १, सिय कालए य नीलए य लोहियए य हालिद्दगा य २, एवं जहेव सत्तपएसिए जाव सिय कालगा य नीलगा य लोहियगा य हालिद्दगे य १५, सिय कालगा य नीलगा य लोहियगा य हालिद्दगा य १६, एए सोलस भंगा, एवमेए पंच चउक्कसंजोगा, एवमेए असीइ भंगा ८०, जइ पंचवन्ने सिय कालए य नीलए य लोहियए य हालिद्दए य सुक्किळ्ळए य १, सिय कालए य नीलए य लोहियए य हालिद्दए य सुक्किळ्ळगा य २, एवं एएणं कमेणं भंगा चा(उच्चा)रेयव्वा जाव सिय कालए य नीलगा य लोहियगा य हालिद्दगा य सुक्किळ्ळए य १५, एसो पन्नरसमो भंगो, सिय कालगा य नीलगे य लोहियए य हालिद्दए य सुक्किळ्ळए य १६, सिय कालगा य नीलगे य लोहियए य हालिद्दए य सुक्किळ्ळगा य

१७, सिय कालगा य नीलए य लोहियए य हालिद्गा य सुक्किळगे य १८, सिय कालगा य नीलगे य लोहियगे य हालिद्गा य सुक्किळगा य १९, सिय कालगा य नीलगे य लोहियगा य हालिद्ए य सुक्किळए य २०, सिय कालगा य नीलगे य लोहियगा य हालिद्ए य सुक्किळगा य २१, सिय कालगा य नीलगे य लोहियगा य हालिद्गा य सुक्किळगे य २२, सिय कालगा य नीलगा य लोहियए य हालिद्ए य सुक्किळए य २३, सिय कालगा य नीलगा य लोहियगे य हालिद्ए य सुक्किळगा य २४, सिय कालगा य नीलगा य लोहियगे य हालिद्गा य सुक्किळए य २५, सिय कालगा य नीलगा य लोहियगा य हालिद्ए य सुक्किळए य २६, एए पंचसंजोएणं छव्वीसं भंगा भवन्ति, एवमेव सपुव्वावरेणं एक्कगदुयगतियगचउक्कगपंचगसंजोगेहिं दो एक्कतीसं भंगसया भवन्ति, गंधा जहा सत्तपएसियस्स, रसा जहा एयस्स चेव वन्ना, फासा जहा चउप्पएसियस्स ॥ नवपएसियस्स पुच्छा, गोयमा ! सिय एगवन्ने जहा अट्टपएसिए जाव सिय चउफासे प०, जइ एगवन्ने एगवन्नदुवन्नतिवन्नचउवन्ना जहेव अट्टपएसियस्स, जइ पंचवन्ने सिय कालए य नीलए य लोहियए य हालिद्ए य सुक्किळए य १, सिय कालए य नीलए य लोहियए य हालिद्ए य सुक्किळगा य २, एवं परिवाडीए एक्कतीसं भंगा भाणियव्वा जाव सिय कालगा य नीलगा य लोहियगा य हालिद्गा य सुक्किळए य ३१, एवं एक्कगदुयगतियगचउक्कगपंचगसंजोगेहिं दो छतीसा भंगसया भवन्ति, गंधा जहा अट्टपएसियस्स, रसा जहा एयस्स चेव वन्ना, फासा जहा चउप्पएसियस्स । दसपएसिए णं भंते ! खंथे० पुच्छा, गोयमा ! सिय एगवन्ने जहा नवपएसिए जाव सिय चउफासे पन्नत्ते, जइ एगवन्ने एगवन्नदुवन्नतिवन्नचउवन्ना जहेव नवपएसियस्स, पंचवन्नेवि तहेव नवरं वत्तीसइमोवि भंगो भन्नइ, एवमेए एक्कगदुयगतियगचउक्कगपंचगसंजोएसु दोन्नि सत्तती(सं)सा भंगसया भवन्ति, गंधा जहा नवपएसियस्स, रसा जहा एयस्स चेव वन्ना, फासा जहा चउप्पएसियस्स । जहा दसपएसिओ एवं संखेजपएसिओवि, एवं असंखेजपएसिओवि, सुहुमपरिणओवि अणंतपएसिओवि एवं चेव ॥ ६६७ ॥ बायरपरिणए णं भंते ! अणंतपएसिए खंथे कइवन्ने० ? एवं जहा अट्टारसमसए जाव सिय अट्टफासे पन्नत्ते, वन्नगंधरसा जहा दसपएसियस्स, जइ चउफासे सव्वे कक्खडे सव्वे गुरुए सव्वे सीए सव्वे निद्धे १, सव्वे कक्खडे सव्वे गुरुए सव्वे सीए सव्वे लुक्खे २, सव्वे कक्खडे सव्वे गुरुए सव्वे उसिणे सव्वे निद्धे ३, सव्वे कक्खडे सव्वे गुरुए सव्वे उसिणे सव्वे लुक्खे ४, सव्वे कक्खडे सव्वे लहुए सव्वे सीए सव्वे णिद्धे ५, सव्वे कक्खडे सव्वे लहुए सव्वे सीए सव्वे लुक्खे ६, सव्वे कक्खडे सव्वे लहुए सव्वे

उसिणे सव्वे निद्धे ७, सव्वे कक्खडे सव्वे लहुए सव्वे उसिणे सव्वे लुक्खे ८, सव्वे मउए सव्वे गुरुए सव्वे सीए सव्वे निद्धे ९, सव्वे मउए सव्वे गुरुए सव्वे सीए सव्वे लुक्खे १०, सव्वे मउए सव्वे गुरुए सव्वे उसिणे सव्वे निद्धे ११, सव्वे मउए सव्वे गुरुए सव्वे उसिणे सव्वे लुक्खे १२, सव्वे मउए सव्वे लहुए सव्वे सीए सव्वे निद्धे १३, सव्वे मउए सव्वे लहुए सव्वे सीए सव्वे लुक्खे १४, सव्वे मउए सव्वे लहुए सव्वे उसिणे सव्वे निद्धे १५, सव्वे मउए सव्वे लहुए सव्वे उसिणे सव्वे लुक्खे १६, एए सोलस भंगा ॥ जइ पंचफासे सव्वे कक्खडे सव्वे गुरुए सव्वे सीए देसे निद्धे देसे लुक्खे १, सव्वे कक्खडे सव्वे गुरुए सव्वे सीए देसे निद्धे देसा लुक्खा २, सव्वे कक्खडे सव्वे गुरुए सव्वे सीए देसा निद्धा दे(सा)से लुक्खे ३, सव्वे कक्खडे सव्वे गुरुए सव्वे सीए देसा निद्धा देसा लुक्खा ४, सव्वे कक्खडे सव्वे गुरुए सव्वे उसिणे देसे निद्धे देसे लुक्खे ४, सव्वे कक्खडे सव्वे लहुए सव्वे सीए देसे निद्धे देसे लुक्खे ४, सव्वे कक्खडे सव्वे लहुए सव्वे उसिणे देसे निद्धे देसे लुक्खे ४ । ४ । एवं एए कक्खडेणं सोलस भंगा । सव्वे मउए सव्वे गुरुए सव्वे सीए देसे निद्धे देसे लुक्खे ४, एवं मउएणवि समं सोलस भंगा, एवं वत्तीसं भंगा । सव्वे कक्खडे सव्वे गुरुए सव्वे निद्धे देसे सीए देसे उसिणे ४, सव्वे कक्खडे सव्वे गुरुए सव्वे लुक्खे देसे सीए देसे उसिणे ४, एए वत्तीसं भंगा, सव्वे कक्खडे सव्वे सीए सव्वे निद्धे देसे गुरुए देसे लहुए ४, एत्थवि वत्तीसं भंगा, सव्वे गुरुए सव्वे सीए सव्वे निद्धे देसे कक्खडे देसे मउए ४, एत्थवि वत्तीसं भंगा, एवं सव्वेते पंचफासे अट्ठावीसं भंगसयं भवइ । जइ छप्पासे सव्वे कक्खडे सव्वे गुरुए देसे सीए देसे उसिणे देसे निद्धे देसे लुक्खे १, सव्वे कक्खडे सव्वे गुरुए देसे सीए देसे उसिणे देसे निद्धे देसा लुक्खा २, एवं जाव सव्वे कक्खडे सव्वे गुरुए देसा सीया देसा उसिणा देसा निद्धा देसा लुक्खा १६, एए सोलस भंगा । सव्वे कक्खडे सव्वे लहुए देसे सीए देसे उसिणे देसे निद्धे देसे लुक्खे एत्थवि सोलस भंगा, सव्वे मउए सव्वे गुरुए देसे सीए देसे उसिणे देसे निद्धे देसे लुक्खे एत्थवि सोलस भंगा, सव्वे मउए सव्वे लहुए देसे सीए देसे उसिणे देसे निद्धे देसे लुक्खे एत्थवि सोलस भंगा, एए चउसट्ठिं भंगा, सव्वे कक्खडे सव्वे सीए देसे गुरुए देसे लहुए देसे निद्धे देसे लुक्खे एवं जाव सव्वे मउए सव्वे उसिणे देसा गुरुया देसा लहुया देसा निद्धा देसा लुक्खा एत्थवि चउसट्ठिं भंगा, सव्वे कक्खडे सव्वे निद्धे देसे गुरुए देसे लहुए देसे सीए देसे उसिणे जाव सव्वे मउए सव्वे लुक्खे देसा गुरुया देसा लहुया देसा सीया देसा उसिणा

१६, एए चउसट्ठिं भंगा, सव्वे गुरुए सव्वे सीए देसे कक्खडे देसे मउए देसे निद्धे देसे लुक्खे एवं जाव सव्वे लहुए सव्वे उसिणे देसा कक्खडा देसा निद्धा देसा मउया देसा लुक्खा, एए चउसट्ठिं भंगा, सव्वे गुरुए सव्वे निद्धे देसे कक्खडे देसे मउए देसे सीए देसे उसिणे जाव सव्वे लहुए सव्वे लुक्खे देसा कक्खडा देसा मउया देसा सीया देसा उसिणा, एए चउसट्ठिं भंगा, सव्वे सीए सव्वे निद्धे देसे कक्खडे देसे मउए देसे गुरुए देसे लहुए जाव सव्वे उसिणे सव्वे लुक्खे देसा कक्खडा देसा मउया देसा गुरुया देसा लहुया, एवमेए चउसट्ठिं भंगा, सव्वे ते छप्फासे तिच्चिचउरासीया भंगसया भवन्ति ३८४ । जइ सत्तफासे सव्वे कक्खडे देसे गुरुए देसे लहुए देसे सीए देसे उसिणे देसे निद्धे देसे लुक्खे १, सव्वे कक्खडे देसे गुरुए देसे लहुए देसे सीए देसे उसिणे देसा निद्धा देसा लुक्खा ४, सव्वे कक्खडे देसे गुरुए देसे लहुए देसे सीए देसा उसिणा देसे निद्धे दे(से)सा लुक्खा ४, सव्वे कक्खडे देसे गुरुए देसे लहुए देसा सीया देसे उसिणे देसे निद्धे देसे लुक्खे ४, सव्वे कक्खडे देसे गुरुए देसे लहुए देसा सीया देसा उसिणा देसे निद्धे देसे लुक्खे, सव्वेए सोलस भंगा भाणियव्वा, सव्वे कक्खडे देसे गुरुए देसा लहुया देसे सीए देसे उसिणे देसे निद्धे देसे लुक्खे, एवं गुरुएणं एगत्तेणं लहुएणं पुहुत्तेणं एएवि सोलस भंगा, सव्वे कक्खडे देसा गुरुया देसे लहुए देसे सीए देसे उसिणे देसे निद्धे देसे लुक्खे एएवि सोलस भंगा भाणियव्वा, सव्वे कक्खडे देसा गुरुया देसा लहुया देसे सीए देसे उसिणे देसे निद्धे देसे लुक्खे एएवि सोलस भंगा भाणियव्वा, एवमेए चउसट्ठिं भंगा कक्खडेण समं, सव्वे मउए देसे गुरुए देसे लहुए देसे सीए देसे उसिणे देसे निद्धे देसे लुक्खे । एवं मउएणवि समं चउसट्ठिं भंगा भाणियव्वा, सव्वे गुरुए देसे कक्खडे देसे मउए देसे सीए देसे उसिणे देसे निद्धे देसे लुक्खे एवं गुरुएणवि समं चउसट्ठिं भंगा कायव्वा, सव्वे लहुए देसे कक्खडे देसे मउए देसे सीए देसे उसिणे देसे निद्धे देसे लुक्खे एवं लहुएणवि समं चउसट्ठिं भंगा कायव्वा, सव्वे सीए देसे कक्खडे देसे मउए देसे गुरुए देसे लहुए देसे निद्धे देसे लुक्खे एवं सीएणवि समं चउसट्ठिं भंगा कायव्वा, सव्वे उसिणे देसे कक्खडे देसे मउए देसे गुरुए देसे लहुए देसे निद्धे देसे लुक्खे एवं उसिणेणवि समं चउसट्ठिं भंगा कायव्वा, सव्वे निद्धे देसे कक्खडे देसे मउए देसे गुरुए देसे लहुए देसे सीए देसे उसिणे एवं निद्धेणवि समं चउसट्ठिं भंगा कायव्वा, सव्वे लुक्खे देसे कक्खडे देसे मउए देसे गुरुए देसे लहुए देसे सीए देसे उसिणे एवं लुक्खेणवि समं चउसट्ठिं भंगा कायव्वा जाव सव्वे लुक्खे देसा कक्खडा देसा

मउया देसा गुर्या देसा लहुया देसा सीया देसा उसिणा, एवं सत्ताफसे पंचबार-
सुत्तरा भंगसया भवन्ति । जइ अट्टफासे देसे कक्खडे देसे मउए देसे गुरुए देसे
लहुए देसे सीए देसे उसिणे देसे निद्धे देसे लुक्खे ४, देसे कक्खडे देसे मउए देसे
गुरुए देसे लहुए देसे सीए देसा उसिणा देसे निद्धे देसे लुक्खे ४, देसे कक्खडे देसे
मउए देसे गुरुए देसे लहुए देसा सीया दे(सा)से उसिणे देसे निद्धे देसे लुक्खे ४,
देसे कक्खडे देसे मउए देसे गुरुए देसे लहुए देसा सीया देसा उसिणा देसे निद्धे
देसे लुक्खे ४, एए चत्तारि चउक्का सोलस भंगा, देसे कक्खडे देसे मउए देसे
गुरुए देसा लहुया देसे सीए देसे उसिणे देसे निद्धे देसे लुक्खे, एवं एए गुरुएणं
एगत्तएणं लहुएणं पोहत्तएणं सोलस भंगा कायव्वा, देसे कक्खडे देसे मउए देसा
गुर्या देसे लहुए देसे सीए देसे उसिणे देसे निद्धे देसे लुक्खे एएवि सोलस
भंगा कायव्वा, देसे कक्खडे देसे मउए देसा गुर्या देसा लहुया देसे सीए देसे
उसिणे देसे निद्धे देसे लुक्खे एएवि सोलस भंगा कायव्वा, सव्वेऽवि ते चउसट्ठिं
भंगा कक्खडमउएहिं एगत्तएहिं, ताहे कक्खडेणं एगत्तएणं मउएणं पुहत्तेणं एए चेव
चउसट्ठिं भंगा कायव्वा, ताहे कक्खडेणं पुहत्तएणं मउएणं एगत्तएणं चउसट्ठिं भंगा
कायव्वा, ताहे एएहिं चेव दोहिवि पुहुत्तेहिं चउसट्ठिं भंगा कायव्वा जाव देसा
कक्खडा देसा मउया देसा गुर्या देसा लहुया देसा सीया देसा उसिणा देसा
निद्धा देसा लुक्खा एसो अपच्छिमो भंगो, सव्वेते अट्टफासे दो छप्पन्ना भंगसया
भवन्ति । एवं एए बायरपरिणए अणंतपएसिए खंधे सव्वेसु संजोएसु बारस छन्नउया
भंगसया भवन्ति ॥ ६६८ ॥ कइविहे णं भंते ! परमाणू प० ? गोयमा ! चउव्विहे
परमाणू प०, तं०-दव्वपरमाणू, खेत्तपरमाणू, कालपरमाणू, भावपरमाणू, दव्व-
परमाणू णं भंते ! कइविहे प० ? गोयमा ! चउव्विहे प०, तं०-अच्छेजे, अमेजे,
अडज्जे, अगेज्जे, खेत्तपरमाणू णं भंते ! कइविहे प० ? गोयमा ! चउव्विहे प०,
तं०-अण्ण्हे, अमज्जे, अपएसे, अविभाइमे, कालपरमाणू पुच्छा, गोयमा ! चउव्विहे
प०, तं०-अव्वे, अगंधे, अरसे, अफासे, भावपरमाणू णं भंते ! कइविहे प० ?
गोयमा ! चउव्विहे प०, तं०-वन्नमंते, गंधमंते, रसमंते, फासमंते । सेवं भंते ! २
ति जाव विहरइ ॥ ६६९ ॥ वीसइमस्स सयस्स पंचमो उद्देसो समत्तो ॥

पुढविकाइए णं भंते ! इमीसे रयणप्पभाए य सक्करप्पभाए य अंतरा समोहए
समोहणित्ता जे भविए सोहम्मे कप्पे पुढविकाइयत्ताए उव्वज्जित्तए से णं भंते । किं
पुर्व्वि उव्वज्जित्ता पच्छा आहारेजा पुर्व्वि आहारित्ता पच्छा उव्वज्जेजा ? गोयमा !
पुर्व्वि वा उव्वज्जित्ता एवं जहा सत्तरसमसए छट्ठेसए जाव से तेणट्ठेणं गोयमा !

एवं पुचइ पुर्वि वा जाव उववजेजा नवरं तर्हि संपाउणेजा इमेहिं आहारो भन्नइ
 सेसं तं चेव । पुढविकाइए णं भंते ! इमीसे रयणप्पभाए पुढवीए सक्करप्पभाए पुढवीए
 अंतरा समोहए जे भविए ईसाणे कप्पे पुढविकाइयत्ताए उववजित्तए एवं चेव, एवं
 जाव ईसिप्पन्भाराए उववाएयव्वो । पुढविकाइए णं भंते ! सक्करप्पभाए पुढवीए
 वालुयप्पभाए पुढवीए अंतरा समोहए २ ता जे भविए सोहम्मे जाव ईसिप्पन्भाराए,
 एवं एएणं कमेणं जाव तमाए अहेसत्तमाए य पुढवीए अंतरा समोहए २ ता जे
 भविए सोहम्मे कप्पे जाव ईसिप्पन्भाराए उववाएयव्वो । पुढविकाइए णं भंते !
 सोहम्मीसाणाणं सणकुमारमाहिंदाण य कप्पाणं अंतरा समोहए २ ता जे भविए
 इमीसे रयणप्पभाए पुढवीए पुढविकाइयत्ताए उववजित्तए से णं भंते ! पुर्वि उव-
 वजित्ता पच्छा आहारेजा सेसं तं चेव जाव से तेणट्ठेणं जाव णिक्खेवओ । पुढ-
 विकाइए णं भंते ! सोहम्मीसाणाणं सणकुमारमाहिंदाण य कप्पाणं अंतरा समोहए
 २ ता जे भविए सक्करप्पभाए पुढवीए पुढविकाइयत्ताए उववजित्तए एवं चेव, एवं
 जाव अहेसत्तमाए उववाएयव्वो, एवं सणकुमारमाहिंदाणं बंभलोगस्स कप्पस्स
 अंतरा समोहए समोहणित्ता पुणरवि जाव अहेसत्तमाए उववाएयव्वो, एवं बंभलो-
 गस्स लंतगस्स य कप्पस्स अंतरा समोहए पुणरवि जाव अहेसत्तमाए, एवं लंत-
 गस्स महासुक्कस्स कप्पस्स य अंतरा समोहए पुणरवि जाव अहेसत्तमाए, एवं
 महासुक्कस्स सहस्सारस्स य कप्पस्स अंतरा पुणरवि जाव अहेसत्तमाए, एवं सह-
 स्सारस्स आणयपाणयकप्पाणं अंतरा पुणरवि जाव अहेसत्तमाए, एवं आणयपाण-
 याणं आरणअच्चुयाण य कप्पाणं अंतरा पुणरवि जाव अहेसत्तमाए, एवं आरणअच्चु-
 याणं गेवेज्जविमाणण य अंतरा पुणरवि जाव अहेसत्तमाए, एवं गेवेज्जविमाणं
 अणुत्तरविमाणण य अंतरा पुणरवि जाव अहेसत्तमाए, एवं अणुत्तरविमाणं ईसि-
 प्पन्भाराए य पुणरवि जाव अहेसत्तमाए उववाएयव्वो ॥ ६७० ॥ आउकाइए णं
 भंते ! इमीसे रयणप्पभाए य सक्करप्पभाए य पुढवीए अंतरा समोहए समोहणित्ता
 जे भविए सोहम्मे कप्पे आउकाइयत्ताए उववजित्तए सेसं जहा पुढविकाइयस्स
 जाव से तेणट्ठेणं, एवं पढमादोच्चाणं अंतरा समोहओ जाव ईसिप्पन्भाराए उववाए-
 यव्वो, एवं एएणं कमेणं जाव तमाए अहेसत्तमाए य पुढवीए अंतरा समोहए २
 ता जाव ईसिप्पन्भाराए उववाएयव्वो आउकाइयत्ताए, आउकाइए णं भंते ! सोह-
 म्मीसाणाणं सणकुमारमाहिंदाण य कप्पाणं अंतरा समोहए समोहणित्ता जे भविए
 इमीसे रयणप्पभाए पुढवीए घणोदहि(२)-वलएसु आउकाइयत्ताए उववजित्तए सेसं
 तं चेव एवं एएहिं चेव अंतरा समोहए जाव अहेसत्तमाए पुढवीए घणोदहिवलएसु

आउक्काइयत्ताए उववाएयव्वो, एवं जाव अणुत्तरविमाणानं ईसिप्पम्भाराए पुढवीए अंतरा समोहए जाव अहेसत्तमाए घणोदहिवलएसु उववाएयव्वो ॥ ६७१ ॥ वाउक्काइए णं भंते ! इमीसे रयणप्पभाए पुढवीए सकरप्पभाए पुढवीए अंतरा समोहए समोहणित्ता जे भविए सोहम्मे कप्पे वाउक्काइयत्ताए उववज्जित्तए एवं जहा सत्तरसमसए वाउक्काइयउद्देसए तहा इहवि, नवरं अंतरेसु समोहणा नेयव्वा सेसं तं चेव जाव अणुत्तरविमाणानं ईसिप्पम्भाराए य पुढवीए अंतरा समोहए समोहणित्ता जे भविए घणवायतणुवाए घणवायतणुवायवलएसु वाउक्काइयत्ताए उववज्जित्तए सेसं तं चेव जाव से तेणट्ठेणं जाव उववज्जेज्जा । सेवं भंते ! २ ति ॥ ६७२ ॥

वीसइमस्स सयस्स छट्ठो उद्देसो समत्तो ॥

कइविहे णं भंते ! बंधे प० ? गोयमा ! तिविहे बंधे प०, तं०-जीवप्पओगबंधे, अणंतरबंधे, परंपरबंधे । नेरइयाणं भंते ! कइविहे बंधे प० ? एवं चेव, एवं जाव वेमाणियाणं । नाणावरणिज्जस्स णं भंते ! कम्मस्स कइविहे बंधे प० ? गोयमा ! तिविहे बंधे प०, तं०-जीवप्पओगबंधे, अणंतरबंधे, परंपरबंधे, नेरइयाणं भंते ! नाणावरणिज्जस्स कम्मस्स कइविहे बंधे प० ? एवं चेव, एवं जाव वेमाणियाणं, एवं जाव अंतराइयस्स । नाणावरणिज्जोदयस्स णं भंते ! कम्मस्स कइविहे बंधे प० ? गोयमा ! तिविहे बंधे प० एवं चेव, एवं नेरइयाणवि एवं जाव वेमाणियाणं, एवं जाव अंतराइयउदयस्स, इत्थीवेयस्स णं भंते ! कइविहे बंधे प० ? गोयमा ! तिविहे बंधे प० एवं चेव, असुरकुमारानं भंते ! इत्थीवेयस्स कइविहे बंधे प० ? गोयमा ! तिविहे बंधे प० एवं चेव, एवं जाव वेमाणियाणं, नवरं जस्स इत्थिवेदो अत्थि, एवं पुरिसवेयस्सवि, एवं नपुंसगवेयस्सवि जाव वेमाणियाणं, नवरं जस्स जो अत्थि वेदो, दंसणमोहणिज्जस्स णं भंते ! कम्मस्स कइविहे बंधे प० ? एवं चेव निरंतरं जाव वेमाणियाणं, एवं चरित्तमोहणिज्जस्सवि जाव वेमाणियाणं, एवं एएणं कमेणं ओरालियसरीरस्स जाव कम्मगसरीरस्स, आहारसच्चाए जाव परिग्गहसण्णाए, कण्हलेस्साए जाव सुक्कलेस्साए, सम्मदिट्ठीए मिच्छादिट्ठीए सम्मामिच्छादिट्ठीए, आभिणिबोहियणाणस्स जाव केवलनाणस्स, मइअच्चाणस्स सुयअच्चाणस्स विभंगनाणस्स, एवं आभिणिबोहियणाणविसयस्स णं भंते ! कइविहे बंधे प० जाव केवलनाणविसयस्स मइअच्चाणविसयस्स सुयअच्चाणविसयस्स विभंगणाणविसयस्स एएसिं सव्वेसिं पयाणं तिविहे बंधे प०, सव्वेते चउव्वीसं दंडगा भाणियव्वा, नवरं जाणियव्वं जस्स जइ अत्थि जाव वेमाणियाणं भंते ! विभंगणाणविसयस्स कइविहे बंधे प० ? गोयमा ! तिविहे बंधे प०, तं०-जीवप्पओगबंधे, अणंतरबंधे, परंपरबंधे, सेवं भंते ! २ ति जाव विहरइ ॥ ६७३ ॥ **वीसइमस्स सयस्स सत्तमो उद्देसो समत्तो ॥**

कइ णं भंते ! कम्मभूमीओ प० ? गोयमा ! पन्नरस कम्मभूमीओ प०, तं०-पंच
 भरहाई, पंच एरवयाई, पंच महाविदेहाई, कइ णं भंते ! अकम्मभूमीओ प० ?
 गोयमा ! तीसं अकम्मभूमीओ प०, तं०-पंच हेमवयाई, पंच हे(ए)रन्नवयाई, पंच हरि-
 वासाई, पंच रम्मगवासाई, पंच देवकुराई, पंच उत्तरकुराई, एयासु णं भंते ! तीसासु
 अकम्मभूमीसु अत्थि उस्सप्पिणीइ वा ओसप्पिणीइ वा ? णो इण्ठे समट्ठे, एएसु
 णं भंते ! पंचसु भरहेसु पंचसु एरवएसु अत्थि उस्सप्पिणीइ वा ओसप्पिणीइ वा ?
 हुंता अत्थि, एएसु णं पंचसु महाविदेहेसु, णेवत्थि उस्सप्पिणी नेवत्थि ओस-
 प्पिणी अवट्ठिए णं तत्थ काले प० समणाउसो ॥ ६७४ ॥ एएसु णं भंते ! पंचसु
 महाविदेहेसु अरिहंता भगवंतो पंचमहव्वइयं सपडिक्कमणं धम्मं पन्नवयंति ? णो
 इण्ठे समट्ठे, एएसु णं पंचसु भरहेसु पंचसु एरवएसु पु(रिम)रच्छिमप(च्च)च्छिमगा
 दुवे अरिहंता भगवंतो पंचमहव्वइयं पंचाणुव्वइयं सपडिक्कमणं धम्मं पन्न(वै)वयंति,
 अवसेसा णं अरिहंता भगवंतो चाउज्जामं धम्मं पन्नवयंति, एएसु णं पंचसु महावि-
 देहेसु अरहंता भगवंतो चाउज्जामं धम्मं पन्नवयंति । जंबुद्वीवे णं भंते ! द्वीवे भारहे
 वासे इमीसे ओसप्पिणीए कइ तित्थगरा पन्नत्ता ? गोयमा ! चउव्वीसं तित्थगरा
 पन्नत्ता, तंजहा-उसभअजियसंभवअभिनंदणसुमइसुप्पभसुपाससिपुप्फदंतसीयलसे-
 जंसवासुपुज्जिमलअणंतधम्मसंतिकुंथुअरमल्लिमु णिसुव्वयनमिनेमिपासवद्धमाणा २४
 ॥ ६७५ ॥ एएसि णं भंते ! चउवीसाए तित्थगराणं कइ जिणंतरा प० ? गोयमा !
 तेवीसं जिणंतरा प० । एएसु णं भंते ! तेवीसाए जिणंतरेसु कस्स कहिं कालिय-
 सुयस्स वोच्छेदे प० ? गोयमा ! एएसु णं तेवीसाए जिणंतरेसु पुरिमपच्छिमएसु
 अट्ठसु २ जिणंतरेसु एत्थ णं कालियसुयस्स अवोच्छेदे प०, मज्झिमएसु सत्तसु
 जिणंतरेसु एत्थ णं कालियसुयस्स वोच्छेदे प०, सव्वत्थवि णं वोच्छेदे दिट्ठिवाए
 ॥ ६७६ ॥ जंबुद्वीवे णं भंते ! द्वीवे भारहे वासे इमीसे ओसप्पिणीए देवाणुप्पियाणं
 केवइयं कालं पुव्वगए अणु(सि)सज्जिस्सइ ? गोयमा ! जंबुद्वीवे णं द्वीवे भारहे वासे
 इमीसे ओसप्पिणीए ममं एणं वाससहस्सं पुव्वगए अणुसज्जिस्सइ, जहा णं भंते !
 जंबुद्वीवे द्वीवे भारहे वासे इमीसे ओसप्पिणीए देवाणुप्पियाणं एणं वाससहस्सं पुव्वगए
 अणुसज्जिस्सइ तहा णं भंते ! जंबुद्वीवे द्वीवे भारहे वासे इमीसे ओसप्पिणीए अवसे-
 साणं तित्थगराणं केवइयं कालं पुव्वगए अणुसज्जित्था ? गोयमा ! अत्थेगइयाणं
 संखेजं कालं अत्थेगइयाणं असंखेजं कालं ॥ ६७७ ॥ जंबुद्वीवे णं भंते ! द्वीवे
 भारहे वासे इमीसे ओसप्पिणीए देवाणुप्पियाणं केवइयं कालं तित्थे अणुसज्जिस्सइ ?
 गोयमा ! जंबुद्वीवे द्वीवे भारहे वासे इमीसे ओसप्पिणीए ममं एगवीसं वाससहस्साई

तित्थे अणुसज्जिस्सइ ॥ ६७८ ॥ जहा णं भंते ! जंबुदीवे दीवे भारहे वासे इमीसे ओसप्पिणीए देवाणुप्पियाणं एकवीसं वाससहस्साइ तित्थे अणुसिज्जिस्सइ तथा णं भंते ! जंबुदीवे दीवे भारहे वासे आगमेस्साणं चरिमतित्थगरस्स केवइयं कालं तित्थे अणुसज्जिस्सइ ? गोयमा ! जावइए णं उसभस्स अरहओ कोसलियस्स जिणपरियाए एवइयाइ संखेज्जाइ आगमेस्साणं चरिमतित्थगरस्स तित्थे अणुसज्जिस्सइ ॥ ६७९ ॥ तित्थं भंते ! ति(त्थे)त्थं तित्थगरे तित्थं ? गोयमा ! अरहा ताव नियमं तित्थगरे, तित्थं पुण चाउवन्नाइजे समणसंघे, तं०-समणा समणीओ सावगा सावियाओ ॥ ६८० ॥ पवयणं भंते ! पवयणं पावयणी पवयणं ? गोयमा ! अरहा ताव नियमं पावयणी, पवयणं पुण दुवालसंगे गणिपिडगे, तं०-आयारो जाव दिट्ठिवाओ ॥ जे इमे भंते ! उग्गा भोगा राइन्ना इक्खागा नाया कोरव्वा एए णं अस्सिं धम्ममे ओगाहंति अस्सि० २ ता अट्ठविहं कम्मरयमलं पवाहंति पवाहिता तओ पच्छा सिज्जंति जाव अंतं करंति ? हंता गोयमा ! जे इमे उग्गा भोगा तं चेव जाव अंतं करंति, अत्थेगइया अन्नयरेसु देवलोएसु देवत्ताए उववत्तारो भवंति । कइविहा णं भंते ! देवलोया प० ? गोयमा ! चउव्विहा देवलोया प०, तं०-भवणवासी, वाणमंतरा, जोइसिया, वेमाणिया । सेवं भंते ! २ ति ॥ ६८१ ॥ **वीसइमे सए अट्ठमो उद्देसो समत्तो ॥**

कइविहा णं भंते ! चारणा प० ? गोयमा ! दुविहा चारणा प०, तंजहा-विजा-चारणा य जंघाचारणा य, से केणट्ठेणं भंते ! एवं बुच्चइ विजाचारणा विजाचारणा ? गोयमा ! तस्स णं छट्ठंछट्ठेणं अनिक्खित्तेणं तवोकम्ममेणं विजाए उत्तरगुणलद्धिं खममाणस्स विजाचारणलद्धी नामं लद्धी समुप्पज्जइ, से तेणट्ठेणं जाव विजाचारणा २, विजाचारणस्स णं भंते ! कहां सीहा गई कहां सीहे गइविसए पण्णत्ते ? गोयमा ! अयन्नं जंबुदीवे दीवे जाव किंचिविसेसाहिए परिकखेवेणं देवे णं महिद्धिंए जाव महेसक्खे जाव इणामेवत्तिकट्ठु केवलकपपं जंबुदीवं दीवं तिहिं अच्छरानिवाएहिं तिकछुत्तो अणुपरियट्ठिताणं हव्वमागच्छेज्जा, विजाचारणस्स णं गोयमा ! तथा सीहा गई तथा सीहे गइविसए पण्णत्ते । विजाचारणस्स णं भंते ! तिरियं केवइए गइविसए पण्णत्ते ? गोयमा ! से णं इओ एगेणं उप्पाएणं माणुसुत्तरे पव्वए समोसरणं करेइ करेत्ता बिइएणं उप्पाएणं नंदीसरवरे दीवे समोसरणं करेइ करेत्ता तओ पडिनियत्तइ २ ता इहमागच्छइ, विजाचारणस्स णं गोयमा ! तिरियं एवइए गइविसए पण्णत्ते, विजाचारणस्स णं भंते ! उट्ठं केवइए गइविसए पण्णत्ते ? गोयमा ! से णं इओ एगेणं उप्पाएणं नंदगवणे समोसरणं करेइ करेत्ता बिइएणं उप्पाएणं पंडगवणे समोसरणं करेइ करेत्ता तओ पडिनियत्तइ २ ता इहमागच्छइ,

विज्जाचारणस्स णं गोयमा ! उद्धं एवइए गइविसए पण्णत्ते, से णं तस्स ठाणस्स अणालोइयपडिक्कंते कालं करेइ नत्थि तस्स आराहणा, से णं तस्स ठाणस्स आलोइयपडिक्कंते कालं करेइ अत्थि तस्स आराहणा ॥६८२॥ से केणट्ठेणं भंते ! एवं वुच्चइ जंघाचार(णे)णा २ ? गोयमा ! तस्स णं अट्ठमंअट्ठमेणं अनिक्खित्तेणं तवोक्कमेणं अप्पाणं भावेमाणस्स जंघाचारणलद्धी नामं लद्धी समुप्पज्जइ, से तेणट्ठेणं जाव जंघाचारणा २, जंघाचारणस्स णं भंते ! कइं सीहा गई कइं सीहे गइविसए पण्णत्ते ? गोयमा ! अयञ्चं जंबुद्दीवे दीवे एवं जहेव विज्जाचारणस्स नवरं तिसत्तखुत्तो अणुपरियट्ठित्ताणं हव्वमागच्छेज्जा, जंघाचारणस्स णं गोयमा ! तहा सीहा गई तहा सीहे गइविसए पण्णत्ते सेसं तं चेव । जंघाचारणस्स णं भंते ! तिरियं केवइए गइविसए पण्णत्ते ? गोयमा ! से णं इओ एगेणं उप्पाएणं रुयगवरे दीवे समोसरणं करेइ करेत्ता तओ पडिनियत्तमाणे बिइएणं उप्पाएणं नंदीसरवर-दीवे समोसरणं करेइ करेत्ता इह(हव्व)मागच्छइ । जंघाचारणस्स णं गोयमा ! तिरियं एवइए गइविसए पण्णत्ते, जंघाचारणस्स णं भंते ! उद्धं केवइए गइविसए पण्णत्ते ? गोयमा ! से णं इओ एगेणं उप्पाएणं पंडगवणे समोसरणं करेइ करेत्ता तओ पडिनियत्तमाणे बिइएणं उप्पाएणं नंदणवणे समोसरणं करेइ २ ता इहमागच्छइ, जंघा-चारणस्स णं गोयमा ! उद्धं एवइए गइविसए पण्णत्ते, से णं तस्स ठाणस्स अणा-लोइयपडिक्कंते कालं करेइ नत्थि तस्स आराहणा, से णं तस्स ठाणस्स आलोइयप-डिक्कंते कालं करेइ अत्थि तस्स आराहणा, सेवं भंते ! सेवं भंते ! त्ति जाव विहरइ ॥ ६८३ ॥ वीसइमे सए नवमो उद्देसो समत्तो ॥

जीवां णं भंते ! किं सोवक्कमाउया निरुवक्कमाउया ? गोयमा ! जीवा सोवक्कमा-उयावि निरुवक्कमाउयावि, नेरइयाणं पुच्छा, गोयमा ! नेरइया नो सोवक्कमाउया निरुवक्कमाउया, एवं जाव थणियकुमारा, पुढविकाइया जहा जीवा, एवं जाव मणुस्सा, वाणमंतरजोइसियवेमाणिया जहा नेरइया ॥६८४॥ नेरइया णं भंते ! किं आओवक्कमेणं उववज्जंति, परोवक्कमेणं उववज्जंति, निरुवक्कमेणं उववज्जंति ? गोयमा ! आओवक्कमेणवि उववज्जंति, परोवक्कमेणवि उववज्जंति, निरुवक्कमेणवि उववज्जंति, एवं जाव वेमाणिया णं । नेरइया णं भंते ! किं आओवक्कमेणं उववट्ठंति, परोवक्क-मेणं उववट्ठंति, निरुवक्कमेणं उववट्ठंति ? गोयमा ! नो आओवक्कमेणं उववट्ठंति, नो परोवक्कमेणं उववट्ठंति, निरुवक्कमेणं उववट्ठंति, एवं जाव थणियकुमारा, पुढविकाइया जाव मणुस्सा तिष्ठ उववट्ठंति, सेसा जहा नेरइया नवरं जोइसियवेमाणिया चयंति ॥ नेरइया णं भंते ! किं आ(य)इद्धीए उववज्जंति परिद्धीए उववज्जंति ? गोयमा ! आइद्धीए

उववज्जंति नो परिङ्खीए उववज्जंति, एवं जाव वेमाणिया णं । नेरइया णं भंते ! किं आइङ्खीए उववट्ठंति परिङ्खीए उववट्ठंति ? गोयमा ! आइङ्खीए उववट्ठंति नो परिङ्खीए उववट्ठंति, एवं जाव वेमाणिया, नवरं जोइसियवेमाणिया चयंतीति अभिलावो । नेरइया णं भंते ! किं आयकम्मुणा उववज्जंति परकम्मुणा उववज्जंति ? गोयमा ! आयकम्मुणा उववज्जंति नो परकम्मुणा उववज्जंति, एवं जाव वेमाणिया, एवं उव्वट्ठणादंडओवि । नेरइया णं भंते ! किं आयप्पओगेणं उववज्जंति परप्पओगेणं उववज्जंति ? गोयमा ! आयप्पओगेणं उववज्जंति नो परप्पओगेणं उववज्जंति, एवं जाव वेमाणिया, एवं उव्वट्ठणादंडओवि ॥ ६८५ ॥ नेरइया णं भंते ! किं कइसंचिया अकइसंचिया अव्वत्त(व)गसंचिया ? गोयमा ! नेरइया कइसंचियावि अकइसंचियावि अव्वत्तगसंचियावि, से केणट्ठेणं जाव अव्वत्तगसंचियावि ? गोयमा ! जे णं नेरइया संखेज्जएणं पवेसणएणं पविसंति ते णं नेरइया कइसंचिया, जे णं नेरइया असंखेज्जएणं पवेसणएणं पविसंति ते णं नेरइया अकइसंचिया, जे णं नेरइया एक्कएणं पवेसणएणं पविसंति ते णं नेरइया अव्वत्तगसंचिया, से तेणट्ठेणं गोयमा ! जाव अव्वत्तगसंचियावि, एवं जाव थणियकुमारा, पुढविकाइयाणं पुच्छा, गोयमा ! पुढविकाइया नो कइसंचिया अकइसंचिया नो अव्वत्तगसंचिया, से केणट्ठेणं भंते ! एवं वुच्चइ जाव नो अव्वत्तगसंचिया ? गोयमा ! पुढविकाइया असंखेज्जएणं पवेसणएणं पविसंति से तेणट्ठेणं जाव नो अव्वत्तगसंचिया, एवं जाव वणस्सइकाइया, बेईदिया जाव वेमाणिया जहा नेरइया, सिद्धाणं पुच्छा, गोयमा ! सिद्धा कइसंचिया नो अकइसंचिया अव्वत्त(व्व)गसंचियावि, से केणट्ठेणं भंते ! जाव अव्वत्तगसंचियावि ? गोयमा ! जे णं सिद्धा संखेज्जएणं पवेसणएणं पविसंति ते णं सिद्धा कइसंचिया, जे णं सिद्धा एक्कएणं पवेसणएणं पविसंति ते णं सिद्धा अव्वत्तगसंचिया, से तेणट्ठेणं गोयमा ! जाव अव्वत्तगसंचियावि ॥ एएसि णं भंते ! नेरइयाणं कइसंचियाणं अकइसंचियाणं अव्वत्तगसंचियाणं य कयरे २ जाव विसेसाहिया वा ? गोयमा ! सव्वत्थोवा नेरइया अव्वत्तगसंचिया, कइसंचिया संखेज्जगुणा, अकइसंचिया असंखेज्जगुणा, एवं एगिंदियवज्जाणं जाव वेमाणियाणं अप्पाबहुणं, एगिंदियाणं नत्थि अप्पाबहुणं । एएसि णं भंते ! सिद्धाणं कइसंचियाणं अव्वत्तगसंचियाणं य कयरे २ जाव विसेसाहिया वा ? गोयमा ! सव्वत्थोवा सिद्धा कइसंचिया, अव्वत्तगसंचिया संखेज्जगुणा ॥ नेरइया णं भंते ! किं छक्कसमज्जिया १, नोछक्कसमज्जिया २, छक्केण य नोछक्केण य समज्जिया ३, छक्केहि य समज्जिया ४, छक्केहि य नोछक्केण य समज्जिया ५ ? गोयमा ! नेरइया छक्कसमज्जियावि १, नोछक्कसमज्जियावि २, छक्केण य नोछक्केण य समज्जियावि ३,

छक्केहिं समज्जियावि ४, छक्केहि य नोछक्केण य समज्जियावि ५, से केणट्ठेणं भंते ! एवं वुच्च नेरइया छक्कसमज्जियावि जाव छक्केहि य नोछक्केण य समज्जियावि ? गोयमा ! जे णं नेरइया छक्कएणं पवेसणएणं पविसंति ते णं नेरइया छक्कसमज्जिया १, जे णं नेरइया जह्जेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं नेरइया नोछक्कसमज्जिया २, जे णं नेरइया एगेणं छक्कएणं अच्चेण य जह्जेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं नेरइया छक्केण य नोछक्केण य समज्जिया ३, जे णं नेरइया अणेगेहिं छक्केहिं पवेसणएणं पविसंति ते णं नेरइया छक्केहिं समज्जिया ४, जे णं नेरइया अणेगेहिं छक्केहिं अण्णेण य जह्जेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं नेरइया छक्केहि य नोछक्केण य समज्जिया ५, से तेणट्ठेणं तं चव जाव समज्जियावि, एवं जाव थणियकुमारा । पुढविकाइयाणं पुच्छा, गोयमा ! पुढविकाइया नो छक्कसमज्जिया १, नो नोछक्कसमज्जिया २, णो छक्केण य नोछक्केण य समज्जिया ३, छक्केहिं समज्जियावि ४, छक्केहि य नोछक्केण य समज्जियावि ५, से केणट्ठेणं भंते ! जाव समज्जियावि ? गोयमा ! जे णं पुढविकाइया णेगेहिं छक्कएहिं पवेसणं पविसंति ते णं पुढविकाइया छक्केहिं समज्जिया, जे णं पुढविकाइया णेगेहिं छक्कएहिं अच्चेण य जह्जेणं एक्केण वा दोहिं वा तिहिं वा उक्कोसेणं पंचएणं पवेसणएणं पविसंति ते णं पुढविकाइया छक्केहि य नोछक्केण य समज्जिया, से तेणट्ठेणं जाव समज्जियावि, एवं जाव वणस्सइकाइया, बेइदिया जाव वेमाणिया सिद्धा एए जहा नेरइया । एएसि णं भंते ! नेरइयाणं छक्कसमज्जियाणं नोछक्कसमज्जियाणं छक्केण य नोछक्केण य समज्जियाणं छक्केहि य समज्जियाणं छक्केहि य नोछक्केण य समज्जियाणं य कयरे २ जाव विसेसाहिया वा ? गोयमा ! सव्वत्थोवा नेरइया छक्कसमज्जिया, नोछक्कसमज्जिया संखेज्जगुणा, छक्केण य नोछक्केण य समज्जिया संखेज्जगुणा, छक्केहि य समज्जिया असंखेज्जगुणा, छक्केहि य नोछक्केण य समज्जिया संखेज्जगुणा, एवं जाव थणियकुमारा । एएसि णं भंते ! पुढविकाइयाणं छक्केहिं समज्जियाणं छक्केहि य नोछक्केण य समज्जियाणं कयरे २ जाव विसेसाहिया वा ? गोयमा ! सव्वत्थोवा पुढविकाइया छक्केहिं समज्जिया, छक्केहि य नोछक्केण य समज्जिया संखेज्जगुणा, एवं जाव वणस्सइकाइयाणं, बेइदियाणं जाव वेमाणियाणं जहा नेरइयाणं । एएसि णं भंते ! सिद्धाणं छक्कसमज्जियाणं नोछक्कसमज्जियाणं जाव छक्केहि य नोछक्केण य समज्जियाणं य कयरे २ जाव विसेसाहिया वा ? गोयमा ! सव्वत्थोवा सिद्धा छक्केहि य नोछक्केण य समज्जिया, छक्केहिं समज्जिया संखेज्जगुणा, छक्केण य नोछक्केण य सम-

जिया संखेजगुणा, छक्कसमजिया संखेजगुणा, नोछक्कसमजिया संखेजगुणा । नेर-
इया णं भंते ! किं बारससमजिया १, नोबारससमजिया २, बारसएण य नोबारस-
एण य समजिया ३, बारसएहिं समजिया ४, बारसएहि य नोबारसएण य समजिया
५ ? गोयमा ! नेरइया बारससमजियावि जाव बारसएहि य नोबारसएण य सम-
जियावि, से केणट्टेणं भंते ! एवं जाव समजियावि ? गोयमा ! जे णं नेरइया बार-
सएणं पवेसणएणं पविसंति ते णं नेरइया बारससमजिया १, जे णं नेरइया जह-
न्नेणं एक्केण वा दोहिं वा तिहिं वा उक्कोसेणं एक्कारसएणं पवेसणएणं पविसंति ते णं
नेरइया नोबारससमजिया २, जे णं नेरइया बारसएणं पवेसणएणं अन्नेण य जह-
न्नेणं एक्केण वा दोहिं वा तिहिं वा उक्कोसेणं एक्कारसएणं पवेसणएणं पविसंति ते णं
नेरइया बारसएण य नोबारसएण य समजिया ३, जे णं नेरइया नेगेहिं बारसएहिं
पवेसणं पविसंति ते णं नेरइया बारसएहिं समजिया ४, जे णं नेरइया नेगेहिं
बारसएहिं अन्नेण य जहन्नेणं एक्केण वा दोहिं वा तिहिं वा उक्कोसेणं एक्कारसएणं
पवेसणएणं पविसंति ते णं नेरइया बारसएहि य नोबारसएण य समजिया ५, से
तेणट्टेणं जाव समजियावि, एवं जाव थणियकुमारा, पुढविकाइयाणं पुच्छा,
गोयमा ! पुढविकाइया नो बारससमजिया १, नो नोबारससमजिया २, नो बारस-
एण य नोबारसएण य समजिया ३, बारसएहिं समजिया ४, बारसएहि य नो बार-
सएण य समजियावि ५, से केणट्टेणं भंते ! जाव समजियावि ? गोयमा ! जे णं पुढ-
विकाइया नेगेहिं बारसएहिं पवेसणं पविसंति ते णं पुढविकाइया बारसएहिं सम-
जिया, जे णं पुढविकाइया नेगेहिं बारसएहिं अन्नेण य जहन्नेणं एक्केण वा दोहिं वा
तिहिं वा उक्कोसेणं एक्कारसएणं पवेसणएणं पविसंति ते णं पुढविकाइया बारसएहि य
नोबारसएण य समजिया, से तेणट्टेणं जाव समजियावि, एवं जाव वणस्सइकाइया,
वेईदिया जाव सिद्धा जहा नेरइया । एएसि णं भंते ! नेरइयाणं बारससमजियाणं
सव्वेसिं अप्पाबहुणं जहा छक्कसमजियाणं नवरं बारसाभिलावो सेसं तं चेव । नेर-
इया णं भंते ! किं चुलसीइसमजिया १, नोचुलसीइसमजिया २, चुलसीइए य
नोचुलसीइए य समजिया ३, चुलसीइहिं समजिया ४, चुलसीइहि य नोचुलसीइए
य समजिया ५ ? गोयमा ! नेरइया चुलसीइसमजियावि जाव चुलसीइहि य
नोचुलसीइए य समजियावि, से केणट्टेणं भंते ! एवं वुच्चइ जाव समजियावि ?
गोयमा ! जे णं नेरइया चुलसी(इं)इएणं पवेसणएणं पविसंति ते णं नेरइया चुलसीइ-
समजिया १, जे णं नेरइया जहन्नेणं एक्केण वा दोहिं वा तिहिं वा उक्कोसेणं तेसीइ-
पवेसणएणं पविसंति ते णं नेरइया नोचुलसीइसमजिया २, जे णं नेरइया, चुलसी-

इएणं अन्नेण य जहन्नेणं एक्केण वा दोहिं वा तिहिं वा उक्कोसेणं तेसीइएणं पवे-
 सणएणं पविसंति ते णं नेरइया चुलसीइए य नोचुलसीइए य समज्जिया ३, जे णं
 नेरइया णेगेहिं चुलसीइएहिं पवेसणगं पविसंति ते णं नेरइया चुलसीइए(ए)हिं सम-
 ज्जिया ४, जे णं नेरइया णेगेहिं चुलसीइएहिं अन्नेण य जहन्नेणं एक्केण वा जाव
 उक्कोसेणं तेसीइएणं जाव पविसंति ते णं नेरइया चुलसीइहिं य नोचुलसीइए य
 समज्जिया ५, से तेणट्ठेणं जाव समज्जियावि, एवं जाव थणियकुमारा, पुढविक्काइया
 तहेव पच्छिळएहिं दोहिं २ नवरं अभिलावो चुलसीइओ भंगो एवं जाव वणस्सइ-
 काइया, बेइदिया जाव वेमाणिया जहा नेरइया । सिद्धाणं पुच्छा, गोयमा ! सिद्धा
 चुलसीइसमज्जियावि १, नोचुलसीइसमज्जियावि २, चुलसीइए य नोचुलसीइए य
 समज्जियावि ३, नो चुलसीइहिं समज्जिया ४, नो चुलसीइहिं य नोचुलसीइए य सम-
 ज्जिया ५, से केणट्ठेणं भंते ! जाव समज्जिया ? गोयमा ! जे णं सिद्धा चुलसीइएणं
 पवेसणएणं पविसंति ते णं सिद्धा चुलसीइसमज्जिया, जे णं सिद्धा जहन्नेणं एक्केण वा
 दोहिं वा तिहिं वा उक्कोसेणं तेसीइएणं पवेसणएणं पविसंति ते णं सिद्धा नोचुलसी-
 इसमज्जिया, जे णं सिद्धा चुलसीइएणं अन्नेण य जहन्नेणं एक्केण वा दोहिं वा तिहिं
 वा उक्कोसेणं तेसीइएणं पवेसणएणं पविसंति ते णं सिद्धा चुलसीइए य नोचुलसीइए
 य समज्जिया, से तेणट्ठेणं जाव समज्जिया । एएसि णं भंते ! नेरइयाणं चुलसीइस-
 मज्जियाणं नोचुलसीइसमज्जियाणं० सव्वेसिं अप्पाबहुगं जहा छक्कसमज्जियाणं जाव
 वेमाणियाणं, नवरं अभिलावो चुलसीइओ । एएसि णं भंते ! सिद्धाणं चुलसीइसम-
 ज्जियाणं नोचुलसीइसमज्जियाणं चुलसीइए य नोचुलसीइए य समज्जियाणं कयरे २
 जाव विसेसाहिया वा ? गोयमा ! सव्वत्थोवा सिद्धा चुलसीइए य नोचुलसीइए य
 समज्जिया, चुलसीइसमज्जिया अणंतगुणा, नोचुलसीइसमज्जिया अणंतगुणा । सेवं
 भंते ! २ ति जाव विहरइ ॥ ६८६ ॥ वीसइमस्स सयस्स दसमो उद्देसो
 समत्तो ॥ वीसइमं सयं समत्तं ॥ २० ॥

सालि कल अयसि वंसे इक्खू दब्भे य अब्भ तुलसी य । अट्टेए दस वग्गा
 असीइं पुण होंति उद्देसा ॥ १ ॥ रायगिहे जाव एवं वयासी-अह भंते ! साली वीही
 गोधूम जाव जबजवाणं एएसि णं भंते ! जे जीवा मूलत्ताए वक्कमंति ते णं भंते ! जीवा
 कओहिंतो उववज्जंति किं नेरइएहिंतो उववज्जंति तिरि० मणु० देवेहिंतो० जहा
 वक्कंतीए तहेव उववाओ नवरं देववज्जं, ते णं भंते ! जीवा एगसमएणं केवइया उव-
 वज्जंति ? गोयमा ! जहन्नेणं एक्को वा दो वा तिचि वा उक्कोसेणं संखेज्जा वा असंखेज्जा
 वा उववज्जंति, अवहारो जहा उप्पलुद्देसए, तेसि णं भंते ! जीवाणं केमहालिया सरी-

रोगाहणा प० ? गोयमा ! जहन्नेणं अंगुलस्स असंखेज्जभागं उक्कोसेणं धणुहपुहुत्तं, ते णं भंते ! जीवा नाणावरणिजस्स कम्मस्स किं बंधगा अबंधगा ? तहेव जहा उप्प-
लुद्देसए, एवं वेदेवि उदएवि उदीरणाएवि । ते णं भंते ! जीवा किं कण्हलेस्सा नील-
लेस्सा काउलेस्सा छव्वीसं भंगा, दिट्ठी जाव इंदिया जहा उप्पलुद्देसए, ते णं भंते !
साली वीही गोधूम जाव जवजवगमूलगजीवे कालओ केवच्चिरं होइ ? गोयमा ! जह-
ण्णेणं अंतोमुहुत्तं उक्कोसेणं असंखेज्जं कालं ॥ से णं भंते ! साली वीही गोधूम जाव
जवजवगमूलगजीवे पुढवीजीवे पुणरवि साली वीही जाव जवजवगमूलगजीवेत्ति
केवइयं कालं सेवेज्जा केवइयं कालं गइरागइं करेज्जा ? एवं जहा उप्पलुद्देसए, एएणं
अभिलावेणं जाव मणुस्सजीवे, आहारो जहा उप्पलुद्देसे ठिई जहण्णेणं अंतोमुहुत्तं
उक्कोसेणं वासपुहुत्तं, समुग्घायसमोहया उव्वट्ठणा य जहा उप्पलुद्देसे । अह भंते !
सव्वपाणा जाव सव्वसत्ता साली वीही जाव जवजवगमूलगजीवत्ताए उव्वन्नपुव्वा ?
हंता गोयमा ! असइं अदुवा अणंतखुत्तो । सेवं भंते ! २ ति ॥ ६८७ ॥ **एगवी-**
सइमे सए पढमवग्गस्स पढमो उद्देसो समत्तो ॥ २१-१-१ ॥

अह भंते ! साली वीही जाव जवजवाणं एएसि णं जे जीवा कंदत्ताए वक्कमंति
ते णं भंते ! जीवा कओहिंतो उव्वज्जंति एवं कंदहिंकारेण सो चेव मूलद्देसो अपरि-
सेसो भाणियव्वो जाव असइं अदुवा अणंतखुत्तो, सेवं भंते ! २ ति (२१-१-२)
एवं खंवेवि उद्देसओ णेयव्वो (२१-१-३) एवं तयाएवि उद्देसो भाणियव्वो
(२१-१-४) सालेवि उद्देसो भाणियव्वो (२१-१-५) पवालैवि उद्देसो भाणियव्वो
(२१-१-६) पत्तैवि उद्देसो भाणियव्वो (२१-१-७) एए सत्तावि उद्देसगा अपरिसेसं
जहा मूले तहा णेयव्वा । एवं पुप्फेवि उद्देसओ णवरं देवो उव्वज्जइ जहा उप्प-
लुद्देसे चत्तारि लेस्साओ असीइ भंगा ओगाहणा जहण्णेणं अंगुलस्स असंखेज्जभागं
उक्कोसेणं अंगुलपुहुत्तं सेसं तं चेव, सेवं भंते ! २ ति (२१-१-८) जहा पुप्फे एवं
फलेवि उद्देसओ अपरिसेसो भाणियव्वो (२१-१-९) एवं बीएवि उद्देसओ
(२१-१-१०) एए दस उद्देसगा ॥ पढमो वग्गो समत्तो ॥ २१-१ ॥ अह भंते !
कलायमसूरतिलमुग्गमासनिप्फावकुलत्थआलिसंदगसइणपलिमंथगाणं एएसि णं जे
जीवा मूलत्ताए वक्कमंति ते णं भंते ! जीवा कओहिंतो उव्वज्जंति ? एवं मूलादीया
दस उद्देसगा भाणियव्वा जहेव सालीणं णिरवसेसं तहेव ॥ विइओ वग्गो समत्तो ॥
॥ २१-२ ॥ अह भंते ! अयसिकुसुंभकोद्दवकंगुरालगुवरीकोदूसाणसरिसवमूलग-
बीयाणं एएसि णं जे जीवा मूलत्ताए वक्कमंति ते णं भंते ! जीवा कओहिंतो उव्व-
ज्जंति ? एवं एत्थवि मूलादीया दस उद्देसगा जहेव सालीणं णिरवसेसं तहेव भाणि-

यव्वं ॥ तइओ वग्गो समत्तो ॥ २१-३ ॥ अह भंते ! वंसवेणुकणगकक्कावंसवासवंस-
 दंडाकुडाविमाचंडावेणुयाकल्लाणीणं एएसि णं जे जीवा मूलत्ताए वक्कमंति एवं एत्थवि
 मूलादीया दस उद्देसगा जहेव सालीणं, णवरं देवो सव्वत्थवि न उववज्जइ, तिण्णि
 लेस्साओ, सव्वत्थवि छव्वीसं भंगा सेसं तं चेव ॥ चउत्थो वग्गो समत्तो ॥ २१-४ ॥
 अह भंते ! उक्खुइक्खुवाडियावीरणाइक्कडभमाससुंठिसत्तवेत्ततिमिरसयपोरगनलाणं
 एएसि णं जे जीवा मूलत्ताए वक्कमंति एवं जहेव वंसवग्गो तहेव एत्थवि मूलादीया
 दस उद्देसगा, णवरं खंयुद्देसे देवा उववज्जंति, चत्तारि लेस्साओ ५०, सेसं तं चेव ॥ पंचमो
 वग्गो समत्तो ॥ २१-५ ॥ अह भंते ! सेडियभंडियदब्भकोतियदब्भकुसदब्भगयो-
 इदलअंजुलआसाढगरोहियंसमुतवखीरभुसएरिंडकुरुभकुंदकरवरसुंठविभंगुमहुवयणथु-
 रगसिप्पियसुंक्कलितणाणं एएसि णं जे जीवा मूलत्ताए वक्कमंति एवं एत्थवि दस उद्दे-
 सगा निरवसेसं जहेव वंस (वग्गो) स्स ॥ छट्ठो वग्गो समत्तो ॥ २१-६ ॥ अह भंते ! अब्भ-
 रुहवोयाणहरितगतंदुलेजगतणवत्थुलचोरगमजारयाईचिल्लियालक्कदगपिप्पलियदव्वि-
 सोत्थिकसायमंडुक्किमूलगसरिसवअंबिलसागजिवंतगाणं एएसि णं जे जीवा मूलत्ताए
 वक्कमंति एवं एत्थवि दस उद्देसगा जहेव वंसस्स ॥ सत्तमो वग्गो समत्तो ॥ २१-७ ॥
 अह भंते ! तुलसीकण्हदलफणेजाअजाचूयणाचोराजीरादमणामरुयाइंदीवरसय-
 पुप्फाणं एएसि णं जे जीवा मूलत्ताए वक्कमंति एत्थवि दस उद्देसगा निरवसेसं जहा
 वंसाणं ॥ अट्ठमो वग्गो समत्तो ॥ २१-८ ॥ एवं एएसु अट्ठसु वग्गेसु असीइ उद्देसगा
 भवंति ॥ ६८८ ॥ **एक्कवीसइमं सयं समत्तं ॥**

तालेगट्टियबहुवीयगा य गुच्छा य गुम्म वल्ली य । छइस वग्गा एए सट्ठि पुण
 होंति उद्देसा ॥ १ ॥ रायगिहे जाव एवं वयासी-अह भंते ! तालतमालतकलिते-
 तलिसालसरलासारगल्लाणं जाव केयतिकदलक्कम्मरक्खगुंतक्खवहिंगुक्खल्लवंगक्ख-
 पूयक्खल्लज्जूरिनालिएरीणं एएसि णं जे जीवा मूलत्ताए वक्कमंति ते णं भंते । जीवा
 कओहिंतो उववज्जंति ? एवं एत्थवि मूलादीया दस उद्देसगा कायव्वा जहेव सालीणं-
 णवरं इमं णाणत्तं मूले कंदे खंधे तथाए साले य एएसु पंचसु उद्देसएसु देवो न उव-
 वज्जइ, तिण्णि लेस्साओ, ठिई जहण्णेणं अंतोमुहुत्तं उक्कोसेणं दसवाससहस्साइ, उव,
 रिद्धेसु पंचसु उद्देसएसु देवो उववज्जइ, चत्तारि लेस्साओ, ठिई जहण्णेणं अंतोमुहुत्तं
 उक्कोसेणं वासपुहुत्तं, ओगाहणा मूले कंदे धण्हपुहुत्तं, खंधे तथाय साले य गाउय-
 पुहुत्तं, पवाले पत्ते धण्हपुहुत्तं, पुप्फे हत्थपुहुत्तं, फले बीए य अंगुलपुहुत्तं, सव्वेसिं
 जहण्णेणं अंगुलस्स असंखेजइभागं सेसं जहा सालीणं, एवं एए दस उद्देसगा ॥
 षडमो वग्गो समत्तो ॥ २२-१ ॥ अह भंते ! निंबवजंबुकोसंबतालअंकोलपीलुसेलुस-

ल्लमोयइमालुयचउलपलासकरंजपुत्तंजीवगरिट्ठवहेडगहरियगभल्लायउंवरियखीरणिधा-
यइपियालपूइयणिवायगसेण्हयपासियसीसवअयसिपुण्णागगारुक्खसीवण्णअसोगाणं
एएसि णं जे जीवा मूलत्ताए वक्कमंति एवं मूलादीया दस उद्देसगा कायव्वा निरव-
सेसं जहा तालवग्गो ॥ बिइओ वग्गो समत्तो ॥ २२-२ ॥ अह भंते ! अत्थियातिंदु-
यबोरकविट्ठअंबाडगमाउलिंगबिळआमलगफणसदाडिमआसत्थउंवरवडणग्गोहनंदिरु-
क्खपिप्पलिसतरपिलक्खुरुक्खकाउंवरियकुच्छुंभरियदेवदालितिलगलउयछत्तोहसिरी-
ससत्तवण्णदहिवण्णलोद्धवचंदणअज्जुणणीवकुडुगकलंबाणं एएसि णं जे जीवा मूल-
त्ताए वक्कमंति ते णं भंते ! एवं एत्थवि मूलादीया दस उद्देसगा तालवग्गसरिसा णेयव्वा
जाव बीयं ॥ तइओ वग्गो समत्तो ॥ २२-३ ॥ अह भंते ! वाइंगणिअल्लपोडइ एवं
जहा पण्णवणाए गाहाणुसारेणं णेयव्वं जाव गंजपाडलावासिअंकोल्लणं एएसि णं जे
जीवा मूलत्ताए वक्कमंति एवं एत्थवि मूलादीया दस उद्देसगा तालवग्गसरिसा णेयव्वा
जाव बीयंति निरवसेसं जहा वंसवग्गो ॥ चउत्थो वग्गो समत्तो ॥ २२-४ ॥ अह
भंते ! सिरियकाणवनालियकोरंटरगवंधुजीवगमणोज्जा जहा पण्णवणाए पडमपए गाहा-
णुसारेणं जाव नलणी य कुंदमहाजाईणं एएसि णं जे जीवा मूलत्ताए वक्कमंति एवं
एत्थवि मूलादीया दस उद्देसगा निरवसेसं जहा सालीणं ॥ पंचमो वग्गो समत्तो ॥
॥ २२-५ ॥ अह भंते ! पूसफलिकालिगीतुंवीतउसीएलावालुंकी एवं पयाणि छिंदिय-
व्वाणि पण्णवणागाहाणुसारेणं जहा तालवग्गो जाव दधिफोल्लइकाकलिसोक्कलिकक्क-
वोदीणं एएसि णं जे जीवा मूलत्ताए वक्कमंति एवं मूलादीया दस उद्देसगा कायव्वा
जहा तालवग्गो, णवरं फलउद्देसे ओगाहणा जहण्णेणं अंगुलस्स असंखेज्जभागं
उक्कोसेणं धणुहपुहुत्तं, ठिई सव्वत्थ जहण्णेणं अंतोमुहुत्तं उक्कोसेणं वासपुहुत्तं सेसं
तं चेव ॥ छट्ठो वग्गो समत्तो ॥ २२-६ ॥ एवं छसुवि वग्गेसु सट्ठि उद्देसगा भवंति
॥ ६८९ ॥ **बावीसइमं सयं समत्तं ॥**

णमो सुयदेवयाए भगवईए । आलुयलोही अवया पाढी तह मासवणिवल्ली य ।
पंचेते दसवग्गा पण्णासं होंति उद्देसा ॥ १ ॥ रायगिहे जाव एवं वयासी-अह भंते !
आलुयमूलगसिगबेरहालिइरुक्खकंडरियजारुच्छीरविरालिकिट्ठिकुंदुकण्हकडडसुमहुप-
यलइमहुसिंणिगिरुहासप्पसुगंधाछिण्णरुहाबीयरुहाणं एएसि णं जे जीवा मूलत्ताए
वक्कमंति एवं मूलादीया दस उद्देसगा कायव्वा वंसवग्गसरिसा णवरं परिमाणं जह-
ण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा अणंता वा
उववर्जंति, अवहारो गोयमा ! ते णं अणंता समए २ अवहीरमाणा २ अणंताहिं
ओसप्पिणीहिं उरस्सप्पिणीहिं एवइयकालेणं अवहीरंति णो चेव णं अवहरिया सिया,

ठिई जहण्णेणवि उक्कोसेणवि अंतोमुहुत्तं, सेसं तं चेव ॥ पढमो वग्गो समत्तो ॥ २३-१ ॥ अह भंते ! लोहीणीहूथीहूथिवगाअस्सकणीसीहकणीसीउंढीमुसंढीणं एएसि णं जे जीवा मूलत्ताए वक्कमंति एवं एत्थवि दस उद्देसगा जहेव आलुयवग्गे, णवरं ओगाहणा तालवग्गसरिसा, सेसं तं चेव, सेवं भंते ! २ ति ॥ बिइओ वग्गो समत्तो ॥ २३-२ ॥ अह भंते ! आयकायकुहुणकुंदुरुक्कउव्वेहलियासफासज्जाछत्तावं-साणियकुमारारणं एएसि णं जे जीवा मूलत्ताए एवं एत्थवि मूलादीया दस उद्देसगा निरवसेसं जहा आलुवग्गो णवरं ओगाहणा तालवग्गसरिसा, सेसं तं चेव, सेवं भंते ! २ ति ॥ तइओ वग्गो समत्तो ॥ २३-३ ॥ अह भंते ! पाढासियवालुंकि-महुररसारावलिपउमामोढरिइंतिचंढीणं एएसि णं जे जीवा मूल० एवं एत्थवि मूला-दीया दस उद्देसगा आलुयवग्गसरिसा णवरं ओगाहणा जहा वल्लीणं, सेसं तं चेव, सेवं भंते ! २ ति ॥ चउत्थो वग्गो समत्तो ॥ २३-४ ॥ अह भंते ! मासपणीमु-ग्गपणीजीवसरिसवकएणुयकाओलिखीरकाकोलिभंगिणहिंकिमिरासिभइमुच्छणंगलइ-पओयकिणापउलपाढेहरेणुयालोहीणं एएसि णं जे जीवा मूल० एवं एत्थवि दस उद्देसगा निरवसेसं आलुयवग्गसरिसा ॥ पंचमो वग्गो समत्तो ॥ २३-५ ॥

एवं एत्थ पंचसुवि वग्गेसु पन्नासं उद्देसगा भाणियव्वा सव्वत्थ देवा ण उववज्जंति, तिन्नि लेस्साओ । सेवं भंते ! २ ति ॥ ६९० ॥ **तेवीसइमं सयं समत्तं ॥**

उववायपरीमाणं संघयणुच्चत्तमेव संठाणं । लेस्सा दिट्ठी णाणे अन्नाणे जोग उव-ओगे ॥ १ ॥ सन्नाकसायईदियसमुग्वाया वेयणा य वेदे य । आउं अज्झवसाणा अणुवंधो कायसंवेहो ॥ २ ॥ जीवपदे जीवपदे जीवाणं दंडगंसि उद्देसो । चउवीस-इमंसि सए चउवीसं होंति उद्देसा ॥ ३ ॥ रायगिहे जाव एवं वयासी-णेरइया णं भंते ! कओहिंतो उववज्जंति, किं नेरइएहिंतो उववज्जंति, तिरिक्खजोणिएहिंतो उववज्जंति, मणुस्सेहिंतो उववज्जंति, देवेहिंतो उववज्जंति ? गोयमा ! णो नेरइएहिंतो उववज्जंति, तिरिक्खजोणिएहिंतोवि उववज्जंति, मणुस्सेहिंतोवि उववज्जंति, णो देवेहिंतो उववज्जंति, जइ तिरिक्खजोणिएहिंतो उववज्जंति किं एगिंदियतिरिक्खजोणिएहिंतो उववज्जंति, बेइ-दियतिरिक्खजोणिएहिंतो० तेइंदियतिरिक्खजोणिएहिंतो० चउरिंदियतिरिक्खजोणिए-हिंतो० पंचिंदियतिरिक्खजोणिएहिंतो उववज्जंति ? गोयमा ! नो एगिंदियतिरिक्खजो-णिएहिंतो उववज्जंति, णो बेइंदिय० णो तेइंदिय० णो चउरिंदिय० पंचिंदियतिरिक्ख-जोणिएहिंतो उववज्जंति, जइ पंचिंदियतिरिक्खजोणिएहिंतो उववज्जंति किं सण्णिपंचि-दियतिरिक्खजोणिएहिंतो उववज्जंति असण्णिपंचिंदियतिरिक्खजोणिएहिंतो उववज्जंति ? गोयमा ! सन्निपंचिंदियतिरिक्खजोणिएहिंतो उववज्जंति असन्निपंचिंदियतिरिक्खजोणि

एहिंतोवि उववज्जंति, जइ सच्चिपंचिदियतिरिक्खजोणिएहिंतो उववज्जंति किं जलचरे-
हिंतो उववज्जंति थलचरेहिंतो उववज्जंति खहचरेहिंतो उववज्जंति ? गोयमा ! जलच-
रेहिंतो उववज्जंति, थलचरेहिंतोवि उववज्जंति, खहचरेहिंतोवि उववज्जंति, जइ जल-
चरे० थलचरे० खहचरेहिंतो उववज्जंति किं पज्जतएहिंतो उववज्जंति अपज्जतएहिंतो
उववज्जंति ? गोयमा ! पज्जतएहिंतो उववज्जंति णो अपज्जतएहिंतो उववज्जंति,
पज्जतअसच्चिपंचिदियतिरिक्खजोणिए णं भंते ! जे भविए नेरइएसु उववज्जितए से
णं भंते ! कइसु पुढवीसु उववजेज्जा ? गोयमा ! एगाए रयणप्पभाए पुढवीए
उववजेज्जा, पज्जतअसच्चिपंचिदियतिरिक्खजोणिए णं भंते ! जे भविए रयणप्पभाए
पुढवीए नेरइएसु उववज्जितए से णं भंते ! केवइयकालट्ठिईएसु उववजेज्जा ? गोयमा !
जहन्नेणं दसवाससहस्सट्ठिईएसु उक्कोसेणं पत्तिओवमस्स असंखेज्जइभागट्ठिईएसु
उववजेज्जा १, ते णं भंते ! जीवा एगसमएणं केवइया उववज्जंति ? गोयमा !
जहन्नेणं एक्को वा दो वा तिच्चि वा उक्कोसेणं संखेज्जा वा असंखेज्जा वा उववज्जंति
२, तेसि णं भंते ! जीवाणं सरीरगा किंसंघयणी पन्नता ? गोयमा ! छेवट्ठसंघयणी
प० ३, तेसि णं भंते ! जीवाणं केमहाल्लिया सरीरोगाहणा पन्नता ? गोयमा !
जहन्नेणं अंगुलस्स असंखेज्जइभागं उक्कोसेणं जोयणसहस्सं ४, तेसि णं भंते !
जीवाणं सरीरगा किंसंठिया पन्नता ? गोयमा ! हुंडसंठाणसंठिया पन्नता ५, तेसि
णं भंते ! जीवाणं कइ लेस्साओ प० ? गोयमा ! तिच्चि लेस्साओ प०, तं०-कण्हलेस्सा
नीललेस्सा काउलेस्सा ६, ते णं भंते ! जीवा किं सम्मदिट्ठी मिच्छादिट्ठी सम्मा-
मिच्छादिट्ठी ? गोयमा ! णो सम्मदिट्ठी मिच्छादिट्ठी णो सम्मामिच्छादिट्ठी ७, ते णं
भंते ! जीवा किं णाणी अन्नाणी ? गोयमा ! णो णाणी अन्नाणी नियमा दुअन्नाणी
तं०-मइअन्नाणी य सुयअन्नाणी य ८-९, ते णं भंते ! जीवा किं मणजोगी वइ-
जोगी कायजोगी ? गोयमा ! णो मणजोगी वइजोगीवि कायजोगीवि १०, ते णं
भंते ! जीवा किं सागारोवउत्ता अणागारोवउत्ता ? गोयमा ! सागारोवउत्तावि
अणागारोवउत्तावि ११, तेसि णं भंते ! जीवाणं कइ सन्नाओ पन्नताओ ?
गोयमा ! चत्तारि सन्नाओ प०, तं०-आहारसन्ना भयसन्ना मेहुणसन्ना परिग्गहसन्ना
१२, तेसि णं भंते ! जीवाणं कइ कसाया प० ? गोयमा ! चत्तारि कसाया प०,
तं०-कोहकसाए माणकसाए मायाकसाए लोभकसाए १३, तेसि णं भंते ! जीवाणं
कइ इंदिया प० ? गोयमा ! पंचिदिया प०, तं०-सोईदिए चक्खिदिए जाव
फासिदिए १४, तेसि णं भंते ! जीवाणं कइ समुग्घाया प० ? गोयमा ! तओ
समुग्घाया प०, तं०-वैयणासमुग्घाए कलायसमुग्घाए मारणंतिथसमुग्घाए १५,

ते णं भंते ! जीवा किं सायावेयगा आसायावेयगा ? गोयमा ! सायावेयगावि
 असायावेयगावि १६, ते णं भंते ! जीवा किं इत्थीवेयगा पुरिसवेयगा नपुंसग-
 वेयगा ? गोयमा ! णो इत्थीवेयगा णो पुरिसवेयगा नपुंसगवेयगा १७, तेसि णं
 भंते ! जीवाणं केवइयं कालं ठिई प० ? गोयमा ! जह्वेणं अंतोमुहुत्तं उक्कोसेणं
 पुव्वकोडी १८, तेसि णं भंते ! जीवाणं केवइया अज्झवसाणा प० ? गोयमा !
 असंखेज्जा अज्झवसाणा प०, ते णं भंते ! किं पसत्था अप्पसत्था ? गोयमा !
 पसत्थावि अप्पसत्थावि १९, से णं भंते ! पज्जतअसन्निपंचिदियतिरिक्खजोणिएत्ति
 कालओ केवच्चिरं होइ ? गोयमा ! जह्वेणं अंतोमुहुत्तं उक्कोसेणं पुव्वकोडी २०,
 से णं भंते ! पज्जतअसन्निपंचिदियतिरिक्खजोणिए रयणप्पभापुढवीणेरइए
 पुणरवि पज्जतअसन्निपंचिदियतिरिक्खजोणिएत्ति केवइयं कालं सेवेज्जा केवइयं कालं
 गइरागई करेज्जा ? गोयमा ! भवादेसेणं दो भवग्गहणाई, कालादेसेणं जह्वेणं दस-
 वाससहस्साई अंतोमुहुत्तमब्भहियाई उक्कोसेणं पलिओवमस्स असंखेज्जइभागं
 पुव्वकोडिमब्भहियं एवइयं कालं सेवेज्जा एवइयं कालं गइरागई करेज्जा २१ ।
 पज्जतअसन्निपंचिदियतिरिक्खजोणिए णं भंते ! जे भविए जह्वकालट्ठिईएसु रयण-
 प्पभापुढविनेरइएसु उववज्जितए से णं भंते ! केवइयकालट्ठिईएसु उववज्जेज्जा ?
 गोयमा ! जह्वेणं दसवाससहस्सट्ठिईएसु उक्कोसेणावि दसवाससहस्सट्ठिईएसु उवव-
 ज्जेज्जा, ते णं भंते ! जीवा एगसमएणं केवइया उववज्जंति ? एवं सच्चैव वत्तववया
 निरवसेसा भाणियव्वा जाव अणुबंधोत्ति, से णं भंते ! पज्जतअसन्निपंचिदियति-
 रिक्खजोणिए जह्वकालट्ठिईयरयणप्पभापुढविणेरइए जह्वकाल० २ पुणरवि
 पज्जतअसन्नि जाव गइरागई करेज्जा ? गोयमा ! भवादेसेणं दो भवग्गहणाई, काला-
 देसेणं जह्वेणं दसवाससहस्साई अंतोमुहुत्तमब्भहियाई उक्कोसेणं पुव्वकोडी दसहिं
 वाससहस्सेहिं अब्भहिया एवइयं कालं सेवेज्जा एवइयं कालं गइरागई करेज्जा २ ।
 पज्जतअसन्निपंचिदियतिरिक्खजोणिए णं भंते ! जे भविए उक्कोसकालट्ठिईएसु रयणप्प-
 भापुढविनेरइएसु उववज्जितए से णं भंते ! केवइयकालट्ठिईएसु उववज्जेज्जा ? गोयमा !
 जह्वेणं पलिओवमस्स असंखेज्जइभागट्ठिईएसु उववज्जेज्जा, उक्कोसेणावि पलिओवमस्स
 असंखेज्जइभागट्ठिईएसु उववज्जेज्जा, ते णं भंते ! जीवा अवसेसं तं चेव जाव अणु-
 बंधो । से णं भंते ! पज्जतअसन्निपंचिदियतिरिक्खजोणिए उक्कोसकालट्ठिईयरयण-
 प्पभापुढविनेरइए उक्कोसं पुणरवि पज्जत जाव करेज्जा ? गोयमा ! भवादेसेणं दो भव-
 ग्गहणाई, कालादेसेणं जह्वेणं पलिओवमस्स असंखेज्जइभागं अंतोमुहुत्तमब्भहियं
 उक्कोसेणं पलिओवमस्स असंखेज्जइभागं पुव्वकोडिमब्भहियं एवइयं कालं सेवेज्जा

एवइयं कालं गइरागईं करेजा ३ । जहन्नकालट्टिइयपज्जत्तअसन्निपंचिदियतिरिक्ख-
जोणिए णं भंते ! जे भविए रयणप्पभापुढविनेरइएसु उववज्जित्तए से णं भंते !
केवइयकालट्टिइएसु उववजेजा ? गोयमा ! जहन्नेणं दसवाससहस्सट्टिइएसु उक्कोसेणं
पलिओवमस्स असंखेज्जइभागट्टिइएसु उववजेजा, ते णं भंते ! जीवा एगसमएणं
केवइया अवसेसं तं चेव णवरं इमाईं तिन्नि णाणत्ताईं आउं अज्जवसाणा अणुबंधो
य, जहन्नेणं ठिई अंतोमुहुत्तं उक्कोसेणवि अंतोमुहुत्तं, तेसि णं भंते ! जीवाणं केवइया
अज्जवसाणा प० ? गोयमा ! असंखेजा अज्जवसाणा प०, ते णं भंते ! किं
पसत्था अप्पसत्था ? गोयमा ! णो पसत्था अप्पसत्था, अणुबंधो अंतोमुहुत्तं सेसं
तं चेव । से णं भंते ! जहन्नकालट्टिइयपज्जत्तअसन्निपंचिदिय० रयणप्पभा जाव
करेजा ? गोयमा ! भवादेसेणं दो भवग्गहणाईं, कालादेसेणं जहन्नेणं दसवाससह-
स्साईं अंतोमुहुत्तमब्भहियाईं उक्कोसेणं पलिओवमस्स असंखेज्जइभागं अंतोमुहु-
त्तमब्भहियं एवइयं कालं सेवेजा जाव गइरागईं करेजा ४ । जहन्नकालट्टिइयप-
ज्जत्तअसन्निपंचिदियतिरिक्खजोणिए णं भंते ! जे भविए जहन्नकालट्टिइएसु रयण-
प्पभापुढविनेरइएसु उववज्जित्तए से णं भंते ! केवइयकालट्टिइएसु उववजेजा ?
गोयमा ! जहन्नेणं दसवाससहस्सट्टिइएसु उक्कोसेणवि दसवाससहस्सट्टिइएसु उव-
वजेजा, ते णं भंते ! जीवा सेसं तं चेव ताईं चेव तिन्नि णाणत्ताईं जाव से णं
भंते ! जहन्नकालट्टिइयपज्जत्त जाव जोणिए जहन्नकालट्टिइयरयणप्पभा पुणरवि
जाव गोयमा ! भवादेसेणं दो भवग्गहणाईं, कालादेसेणं जहन्नेणं दसवाससहस्साईं
अंतोमुहुत्तमब्भहियाईं उक्कोसेणवि दसवाससहस्साईं अंतोमुहुत्तमब्भहियाईं एवइयं
कालं सेवेजा जाव करेजा ५ । जहन्नकालट्टिइयपज्जत्त जाव तिरिक्खजोणियाणं
भंते ! जे भविए उक्कोसकालट्टिइएसु रयणप्पभापुढविनेरइएसु उववज्जित्तए से णं भंते !
केवइयकालट्टिइएसु उववजेजा ? गोयमा ! जहन्नेणं पलिओवमस्स असंखेज्जइभा-
गट्टिइएसु उक्कोसेणवि पलिओवमस्स असंखेज्जइभागट्टि(इ)इएसु उववजेजा, ते णं
भंते ! जीवा अवसेसं तं चेव ताईं चेव तिन्नि णाणत्ताईं जाव से णं भंते ! जह-
न्नकालट्टिइयपज्जत्त जाव तिरिक्खजोणिए उक्कोसकालट्टिइयरयणप्पभा जाव करेजा ?
गोयमा ! भवादेसेणं दो भवग्गहणाईं, कालादेसेणं जहन्नेणं पलिओवमस्स असंखे-
ज्जइभागं अंतोमुहुत्तमब्भहियं उक्कोसेणवि पलिओवमस्स असंखेज्जइभागं अंतोमुहुत्त-
मब्भहियं एवइयं कालं जाव करेजा ६ । उक्कोसकालट्टिइयपज्जत्तअसन्निपंचिदिय-
तिरिक्खजोणिए णं भंते ! जे भविए रयणप्पभापुढविनेरइएसु उववज्जित्तए से णं
भंते ! केवइयकाल(ट्टिइ)स्स जाव उववजेजा ? गोयमा ! जहन्नेणं दसवाससहस्सट्टि-

ईएसु उक्कोसेणं पलिओवमस्स असंखेज्जइभागट्ठिईएसु उववज्जेजा, ते णं भंते ! जीवा एगसमएणं अवसेसं जहेव ओहियगमएणं तहेव अणुगंतव्वं, नवरं (जाव) इमाई दोन्नि नाणत्ताइ-ठिई जह्णेणं पुव्वकोडी उक्कोसेणवि पुव्वकोडी, एवं अणुबंधोवि, अवसेसं तं चेव, से णं भंते ! उक्कोसकालट्ठिईयपज्जत्तअसन्नि जाव तिरिक्खजोणिए रयणप्पभा जाव गोयमा ! भवादेसेणं दो भवग्गहणाई, कालादेसेणं जह्णेणं पुव्वकोडी दसहिं वाससहस्सेहिं अब्भहिया उक्कोसेणं पलिओवमस्स असंखेज्जइभागं पुव्वकोडीए अब्भहियं एवइयं जाव करेजा ७ । उक्कोसकालट्ठिईयपज्जत्त-तिरिक्खजोणिए णं भंते ! जे भविए जह्णकालट्ठिईएसु रयणप्पभा जाव उववज्जितए से णं भंते ! केवइ जाव उववज्जेजा ? गोयमा ! जह्णेणं दसवाससहस्सट्ठिईएसु उक्कोसेणवि दसवाससहस्सट्ठिईएसु उववज्जेजा, ते णं भंते ! सेसं तं चेव जहा सत्तमगमए जाव से णं भंते ! उक्कोसकालट्ठिई जाव तिरिक्खजोणिए जह्णकालट्ठि-ईयरयणप्पभा जाव करेजा ? गोयमा ! भवादेसेणं दो भवग्गहणाई, कालादेसेणं जह्णेणं पुव्वकोडी दसहिं वाससहस्सेहिं अब्भहिया उक्कोसेणवि पुव्वकोडी दसहिं वाससहस्सेहिं अब्भहिया एवइयं जाव करेजा ८ । उक्कोसकालट्ठिईयपज्जत्त जाव तिरिक्खजोणिए णं भंते ! जे भविए उक्कोसकालट्ठिईएसु रयणप्पभा जाव उववज्जितए से णं भंते ! केवइयकाल जाव उववज्जेजा ? गोयमा ! जह्णेणं पलिओवमस्स असंखेज्जइभागट्ठिईएसु उक्कोसेणवि पलिओवमस्स असंखेज्जइभागट्ठिईएसु उववज्जेजा, ते णं भंते ! जीवा एगसमएणं सेसं जहा सत्तमगमए जाव से णं भंते ! उक्कोसकालट्ठिईयपज्जत्त जाव तिरिक्खजोणिए उक्कोसकालट्ठिईयरयणप्पभा जाव करेजा ? गोयमा ! भवादेसेणं दो भवग्गहणाई, कालादेसेणं जह्णेणं पलिओवमस्स असंखेज्जइभागं पुव्वकोडीए अब्भहियं उक्कोसेणवि पलिओवमस्स असंखेज्जइभागं पुव्वकोडीए अब्भहियं एवइयं कालं सेवेजा जाव गइरागई करेजा ९ । एवं एए ओहिया तिन्नि गमगा ३, जह्णकालट्ठिईएसु तिन्नि गमगा ६, उक्कोसकालट्ठिईएसु तिन्नि गमगा ९, सव्वेते णव गमगा भवन्ति ॥ ६९१-२ ॥ जइ सन्निपंचिदियतिरिक्खजोणिएहिंतो उववज्जंति किं संखेज्जवासाउयसन्निपंचिदिय-तिरिक्खजोणिएहिंतो उववज्जंति असंखेज्जवासाउयसन्निपंचिदियतिरिक्ख जाव उव-वज्जंति ? गोयमा ! संखेज्जवासाउयसन्निपंचिदियतिरिक्खजोणिएहिंतो उववज्जंति णो असंखेज्जवासाउयसन्निपंचिदिय जाव उववज्जंति, जइ संखेज्जवासाउयसन्निपंचिदिय जाव उववज्जंति किं जलचरेहिंतो उववज्जंति पुच्छा, गोयमा ! जलचरेहिंतो उवव-ज्जंति जहा असन्नी जाव पज्जत्तएहिंतो उववज्जंति णो अपज्जत्तएहिंतो उववज्जंति,

पज्जत्तसंखेज्जवासाउयसन्निपंचिदियतिरिक्खजोणिए णं भंते ! जे भविए णेरइएसु उववज्जितए से णं भंते ! कइसु पुढवीसु उववज्जेजा ? गोयमा ! सत्तसु पुढवीसु उववज्जेजा, तंजहा-रयणप्पभाए जाव अहेसत्तमाए, पज्जत्तसंखेज्जवासाउयसन्निपंचि-दियतिरिक्खजोणिए णं भंते ! जे भविए रयणप्पभापुढविनेरइएसु उववज्जितए से णं भंते ! केवइयकालट्ठिईएसु उववज्जेजा ? गोयमा ! जह्वेणं दसवाससहस्सट्ठिई-एसु उक्कोसेणं सागरोवमट्ठिईएसु उववज्जेजा, ते णं भंते ! जीवा एगसमएणं केव-इया उववज्जंति ? जहेव असच्ची, तेसि णं भंते ! जीवाणं सरीरगा किंसंघयणी प० ? गोयमा ! छव्विहसंघयणी प०, तं०-वइरोसभनारायसंघयणी उसभनाराय-संघयणी जाव छेवट्ठसंघयणी, सरीरोगाहणा जहेव असच्चीणं जह्वेणं अंगुलस्स असंखेज्जइभागं उक्कोसेणं जोयणसहस्सं, तेसि णं भंते ! जीवाणं सरीरगा किंसंठिया प० ? गोयमा ! छव्विहसंठिया प०, तंजहा-समचउरंस० णग्गोह० जाव हुंड०, तेसि णं भंते ! जीवाणं कइ लेस्साओ प० ? गोयमा ! छलेस्साओ पन्नत्ताओ, तंजहा-कण्हलेस्सा जाव सुकलेस्सा, दिट्ठी ति विहावि, तिन्नि नाणा तिन्नि अच्चाणा भयणाए, जोगो ति विहोवि सेसं जहा असच्चीणं जाव अणुबंधो, नवरं पंच समुग्घाया प० आइल्लागा, वेदो ति विहोवि, अवसेसं तं चेव जाव से णं भंते ! पज्जत्तसंखेज्जवासाउय जाव तिरिक्खजोणिए रयणप्पभा जाव करेजा ? गोयमा ! भवादेसेणं जह्वेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जह्वेणं दसवाससहस्साइं अंतोमुहुत्तमब्भहियाइं उक्कोसेणं चत्तारि सागरोवमाइं चउहिं पुव्वकोडीहिं अब्भहि-याइं एवइयं कालं सेवेजा जाव करेजा १ । पज्जत्तसंखेज्जवासाउय जाव जे भविए जह्वकाल जाव से णं भंते ! केवइयकालट्ठिईएसु उववज्जेजा ? गोयमा ! जह्वेणं दसवाससहस्सट्ठिईएसु उक्कोसेणवि दसवाससहस्सट्ठिईएसु उववज्जेजा, ते णं भंते ! जीवा एवं सो चेव पढमो गमओ निरवसेसो भाणियव्वो जाव कालादेसेणं जह्वेणं दसवाससहस्साइं अंतोमुहुत्तमब्भहियाइं उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एवइयं कालं सेवेजा एवइयं कालं गइ-रागइं करेजा २, सो चेव उक्कोसकालट्ठिईएसु उववज्जो जह्वेणं सागरोवमट्ठिईएसु उक्कोसेणवि सागरोवमट्ठिईएसु उववज्जेजा, अवसेसो परि(णामा)माणानीओ भवादेसप-ज्जवसाणो सो चेव पढमगमगो णेयव्वो जाव कालादेसेणं जह्वेणं सागरोवमं अंतोमुहु-त्तमब्भहियं उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं एवइयं कालं सेवेजा जाव करेजा ३, जह्वकालट्ठिईयपज्जत्तसंखेज्जवासाउयसन्निपंचिदिय-तिरिक्खजोणिए णं भंते ! जे भविए रयणप्पभापुढवि जाव उववज्जितए से णं भंते !

केवइयकालट्टिईएसु उववजेज्जा ? गोयमा ! जह्वेणं दसवाससहस्सट्टिईएसु उक्कोसेणं सागरोवमट्टिईएसु उववजेज्जा, ते णं भंते ! जीवा अवसेसो सो चेव गमओ नवरं इमाई अट्ठ णाणत्ताई-सरीरोगाहणा जह्वेणं अंगुलस्स असंखेज्जभागं उक्कोसेणं घणुहपुहुत्तं, ठेस्साओ तिच्चि आदिल्लाओ, णो सम्मदिट्ठी मिच्छादिट्ठी णो सम्मा-मिच्छादिट्ठी, णो णाणी दो अच्चाणा णियमं, समुग्घाया आदिल्ला तिच्चि, आउं अज्झवसाणा अणुबंधो य जहेव असत्तीणं अवसेसं जहा पढमगमए जाव काला-देसेणं जह्वेणं दसवाससहस्साई अंतोमुहुत्तमब्भहियाई उक्कोसेणं चत्तारि सागरोव-माई चउहिं अंतोमुहुत्तेहिं अब्भहियाई एवइयं कालं जाव करेज्जा ४, सो चेव जह्वकालट्टिईएसु उववज्जो जह्वेणं दसवाससहस्सट्टिईएसु उक्कोसेणवि दसवाससह-स्सट्टिईएसु उववजेज्जा, ते णं भंते ! एवं सो चेव चउत्थो गमओ निरवसेसो भाणियव्वो जाव कालादेसेणं जह्वेणं दसवाससहस्साई अंतोमुहुत्तमब्भहियाई उक्कोसेणं चत्तालीसं वाससहस्साई चउहिं अंतोमुहुत्तेहिं अब्भहियाई एवइयं जाव करेज्जा ५ । सो चेव उक्कोसकालट्टिईएसु उववज्जो जह्वेणं सागरोवमट्टिईएसु उक्कोसेणवि सागरोवमट्टिईएसु उववजेज्जा, ते णं भंते ! एवं सो चेव चउत्थो गमओ निरवसेसो भाणियव्वो जाव कालादेसेणं जह्वेणं साग-रोवमं अंतोमुहुत्तमब्भहियं उक्कोसेणं चत्तारि सागरोवमाई चउहिं अंतोमुहुत्तेहिं अब्भहियाई एवइयं जाव करेज्जा ६ । उक्कोसकालट्टिईयपज्जतसंखेज्जवासाउय जाव तिरिक्खजोणिए णं भंते ! जे भविए रयणप्पभापुढविनेरइएसु उववज्जितए से णं भंते ! केवइयकालट्टिईएसु उववजेज्जा ? गोयमा ! जह्वेणं दसवाससहस्सट्टिईएसु उक्कोसेणं सागरोवमट्टिईएसु उववजेज्जा, ते णं भंते ! जीवा अवसेसो परिमाणावीओ भवादेसपज्जवसाणो एएसिं चेव पढमो गमओ णेयव्वो नवरं ठिई जह्वेणं पुव्वकोडी उक्कोसेणवि पुव्वकोडी, एवं अणुबंधोवि, सेसं तं चेव, कालादेसेणं जह्वेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि सागरोवमाई चउहिं पुव्वकोडीहिं अब्भहियाई एवइयं कालं जाव करेज्जा ७ । सो चेव जह्वकालट्टिईएसु उववज्जो जह्वेणं दसवाससहस्सट्टिईएसु उक्कोसेणवि दसवाससहस्सट्टिईएसु उवव-जेज्जा, ते णं भंते ! जीवा सो चेव सत्तमो गमओ निरवसेसो भाणियव्वो जाव भवा-देसोत्ति, कालादेसेणं जह्वेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एवइयं जाव करेज्जा ८, उक्कोसकालट्टिईयपज्जत जाव तिरिक्खजोणिए णं भंते ! जे भविए उक्कोसकालट्टिईय जाव उववज्जितए से णं भंते ! केवइयकालट्टिईएसु उववजेज्जा ? गोयमा ! जह्वेणं

सागरोवमट्टिईएसु उक्कोसेणवि सागरोवमट्टिईएसु उववज्जेजा, ते णं भंते ! जीवा सो चेव सत्तमो गमओ निरवसेसो भाणियव्वो जाव भवादेसोत्ति, कालादेसेणं जह्जेणं सागरोवमं पुव्वकोडीए अब्भहियं उक्कोसेणं चत्तारि सागरोवमाई चउहिं पुव्वकोडीहिं अब्भहियाई एवइयं जाव करेज्जा ९ । एवं एए णव गमगा उक्खेवनिक्खेवओ नवसुवि जहेव असत्तीणं ॥ ६९३ ॥ पज्जत्तसंखेज्जवासाउयसच्चिपंचिदियतिरिक्ख-जोणिए णं भंते ! जे भविए सक्करप्पभाए पुढवीए णेरइएसु उववज्जितए से णं भंते ! केवइयकालट्टिईएसु उववज्जेजा ? गोयमा ! जह्जेणं सागरोवमट्टिईएसु उववज्जेजा, उक्कोसेणं तिसागरोवमट्टिईएसु उववज्जेजा, ते णं भंते ! जीवा एगसमएणं एवं जहेव रयणप्पभाए उववज्जंत(गम)गरुस लद्धी सच्चेव निरवसेसा भाणियव्वा जाव भवादेसोत्ति, कालादेसेणं जह्जेणं सागरोवमं अंतोमुहुत्तमम्भहियं उक्कोसेणं बार-ससागरोवमाई चउहिं पुव्वकोडीहिं अब्भहियाई एवइयं जाव करेज्जा १, एवं रयणप्पभापुढविगमगरसिसा णववि गमगा भाणियव्वा नवरं सब्वगमएसुवि नेरइय-ट्टिई(य)संवेहेसु सागरोवमा भाणियव्वा एवं जाव छट्ठीपुढविति, णवरं नेरइयठिई जा जत्थ पुढवीए जह्ज्जुकोसिया सा तेणं चेव कमेणं चउग्गुणा कायव्वा, वालुयप्पभाए पुढवीए अट्ठावीसं सागरोवमा चउग्गुणिया भवंति, पंकप्पभाए चत्तालीसं, धूमप्प-भाए अट्ठसट्ठि, तमाए अट्ठासीई, संघयणाई वालुयप्पभाए पंचविहसंघयणी तं०-वइ-रोसभनारायसंघयणी जाव कीलियासंघयणी, पंकप्पभाए चउव्विहसंघयणी, धूमप्प-भाए तिविहसंघयणी, तमाए दुविहसंघयणी तं०-वइरोसभनारायसंघयणी य उसभनारायसंघयणी य, सेसं तं चेव ॥ पज्जत्तसंखेज्जवासाउय जाव तिरिक्ख-जोणिए णं भंते ! जे भविए अहेसत्तमाए पुढवीए नेरइएसु उववज्जितए से णं भंते ! केवइयकालट्टिईएसु उववज्जेजा ? गोयमा ! जह्जेणं बावीससागरोवमट्टिईएसु उक्को-सेणं तेत्तीससागरोवमट्टिईएसु उववज्जेजा, ते णं भंते ! जीवा एवं जहेव रयणप्प-भाए णव गमगा लद्धीवि सच्चेव णवरं वइरोसभनारायसंघयणी, इत्थिवेदगा न उववज्जंति सेसं तं चेव जाव अणुबंधोत्ति, संवेहो भवादेसेणं जह्जेणं तिन्नि भवग्गहणाई उक्कोसेणं सत्त भवग्गहणाई, कालादेसेणं जह्जेणं बावीसं सागरोवमाई दोहिं अंतोमुहुत्तेहिं अब्भहियाई उक्कोसेणं छावट्ठि सागरोवमाई चउहिं पुव्वकोडीहिं अब्भहियाई एवइयं जाव करेज्जा १, सो चेव जह्ज्जकालट्टिईएसु उववज्जो सच्चेव वत्तव्वया जाव भवादेसोत्ति, कालादेसेणं जह्जेणं कालादेसोवि तहेव जाव चउहिं पुव्वकोडीहिं अब्भहियाई एवइयं जाव करेज्जा २, सो चेव उक्कोसकालट्टिईएसु उववण्णो सच्चेव लद्धी जाव अणुबंधोत्ति, भवादेसेणं जह्जेणं तिन्नि भवग्गहणाई

उक्कोसेणं पंच भवग्गहणाई, कालादेसेणं जहण्णेणं तेत्तीसं सागरोवमाई दोहिं अंतो-
मुहुत्तेहिं अब्भहियाई उक्कोसेणं छावट्ठिं सागरोवमाई तिहिं पुव्वकोडीहिं अब्भहियाई
एवइयं जाव करेजा ३, सो चेव अप्पणा जहन्नकालट्ठिईओ जाओ सच्चैव रयणप्पमा-
पुढविजहन्नकालट्ठिईयवत्तव्वया भाणियव्वा जाव भवादेसोत्ति, नवरं पढमसंघयणं णो
इत्थिवेदगा, भवादेसेणं जहन्नेणं तिन्नि भवग्गहणाई उक्कोसेणं सत्त भवग्गहणाई, काला-
देसेणं जहन्नेणं बावीसं सागरोवमाई दोहिं अंतोमुहुत्तेहिं अब्भहियाई उक्कोसेणं छावट्ठिं
सागरोवमाई चउहिं अंतोमुहुत्तेहिं अब्भहियाई एवइयं जाव करेजा ४ । सो चेव
जहन्नकालट्ठिईएसु उववन्नो एवं सो चेव चउत्थो गमओ निरवसेसो भाणियव्वो
जाव कालादेसोत्ति ५ । सो चेव उक्कोसकालट्ठिईएसु उववन्नो सच्चैव लद्धी जाव
अणुबंधोत्ति, भवादेसेणं जहन्नेणं तिन्नि भवग्गहणाई उक्कोसेणं पंच भवग्गहणाई,
कालादेसेणं जहन्नेणं तेत्तीसं सागरोवमाई दोहिं अंतोमुहुत्तेहिं अब्भहियाई उक्कोसेणं
छावट्ठिं सागरोवमाई तिहिं अंतोमुहुत्तेहिं अब्भहियाई एवइयं कालं जाव करेजा ६ । सो
चेव अप्पणा उक्कोसकालट्ठिईओ जाओ जहन्नेणं बावीससागरोवमट्ठिईएसु उक्कोसेणं
तेत्तीससागरोवमट्ठिईएसु उववज्जेजा, ते णं भंते । अवसेसा सच्चैव सत्तमपुढविपढ-
मगमगवत्तव्वया भाणियव्वा जाव भवादेसोत्ति, नवरं ठिई अणुबंधो य जहन्नेणं
पुव्वकोडी उक्कोसेणवि पुव्वकोडी सेसं तं चेव, कालादेसेणं जहन्नेणं बावीसं सागरो-
वमाई दोहिं पुव्वकोडीहिं अब्भहियाई उक्कोसेणं छावट्ठिं सागरोवमाई चउहिं
पुव्वकोडीहिं अब्भहियाई एवइयं जाव करेजा ७ । सो चेव जहन्नकालट्ठिईएसु
उववन्नो सच्चैव लद्धी संवेहोवि तहेव सत्तमगमगसरिसो ८ । सो चेव उक्कोसकाल-
ट्ठिईएसु उववन्नो सच्चैव लद्धी जाव अणुबंधोत्ति, भवादेसेणं जहन्नेणं तिन्नि
भवग्गहणाई उक्कोसेणं पंच भवग्गहणाई, कालादेसेणं जहन्नेणं तेत्तीसं सागरोवमाई
दोहिं पुव्वकोडीहिं अब्भहियाई उक्कोसेणं छावट्ठिं सागरोवमाई तिहिं पुव्वकोडीहिं
अब्भहियाई एवइयं कालं सेवेजा जाव करेजा ॥ ६९४ ॥ जइ मणुस्सेहिंतो
उववज्जंति किं सन्निमणुस्सेहिंतो उववज्जंति असण्णिमणुस्सेहिंतो उववज्जंति ? गोयमा !
सन्निमणुस्सेहिंतो उववज्जंति णो असण्णिमणुस्सेहिंतो उववज्जंति, जइ सन्निमणुस्सेहिंतो
उववज्जन्ति किं संखेज्जवासाउयसन्निमणुस्सेहिंतो उववज्जंति असंखेज्जवासाउय जाव
उववज्जंति ? गोयमा ! संखेज्जवासाउयसन्निमणुस्सेहिंतो उ० णो असंखेज्जवासाउय
जाव उववज्जन्ति, जइ संखेज्जवासाउय जाव उववज्जन्ति किं पज्जत्तसंखेज्जवासाउय
जाव उववज्जंति अपज्जत्त जाव उववज्जंति ? गोयमा ! पज्जत्तसंखेज्जवासाउय जाव
उववज्जंति नो अपज्जत्तसंखेज्जवासाउय जाव उववज्जंति, पज्जत्तसंखेज्जवासाउयसन्नि-

मणुस्से णं भंते ! जे भविए नेरइएसु उववज्जितए से णं भंते ! कइसु पुढवीसु उव-
 वज्जेजा ? गोयमा ! सत्तसु पुढवीसु उववज्जेजा, तं०-रयणप्पभाए जाव अहेसत्तमाए,
 पज्जत्तसंखेज्जावासाउयसन्निमणुस्से णं भंते ! जे भविए रयणप्पभाए पुढवीए
 नेरइएसु उववज्जितए से णं भंते ! केवइयकालट्ठिईएसु उववज्जेजा ? गोयमा ! जह-
 ण्णेणं दसवाससहस्सट्ठिईएसु उक्कोसेणं सागरोवमट्ठिईएसु उववज्जेजा, ते णं भंते !
 जीवा एगसमएणं केवइया उववज्जंति ? गोयमा ! जह्णेणं एक्को वा दो वा तिन्नि वा
 उक्कोसेणं संखेज्जा (वा) उववज्जंति, संघयणा छ, सरीरोगाहणा जह्णेणं अंगुलपुहुत्तं
 उक्कोसेणं पंचधणुहसयाई, एवं सेसं जहा सन्निपंचिदियतिरिक्खजोणियाणं जाव भवा-
 देसोत्ति, नवरं चत्तारि णाणा तिन्नि अन्नाणा भयणाए, छ समुग्घाया केवलिवज्जा,
 ठिई अणुबंधो य जह्णेणं मासपुहुत्तं उक्कोसेणं पुव्वकोडी सेसं तं चेव, कालादेसेणं
 जह्णेणं दसवाससहस्साई मासपुहुत्तमब्भहियाई उक्कोसेणं चत्तारि सागरोवमाई
 चउहिं पुव्वकोडीहिं अब्भहियाई एवइयं जाव करेज्जा १, सो चेव जह्णकालट्ठि-
 ईएसु उववन्नो सा चेव वत्तव्वया नवरं कालादेसेणं जह्णेणं दसवाससहस्साई मास-
 पुहुत्तमब्भहियाई उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहि-
 याओ एवइयं जाव करेज्जा २, सो चेव उक्कोसकालट्ठिईएसु उववन्नो एस चेव
 वत्तव्वया नवरं कालादेसेणं जह्णेणं सागरोवमं मासपुहुत्तमब्भहियं उक्कोसेणं चत्तारि
 सागरोवमाई चउहिं पुव्वकोडीहिं अब्भहियाई एवइयं जाव करेज्जा ३, सो चेव
 अप्पणा जह्णकालट्ठिईओ जाओ एस चेव वत्तव्वया नवरं इमाई पंच नाणत्ताई-
 सरीरोगाहणा जह्णेणं अंगुलपुहुत्तं उक्कोसेणवि अंगुलपुहुत्तं, तिन्नि नाणा तिन्नि अन्ना-
 णा भयणाए, पंच समुग्घाया आइल्ला, ठिई अणुबंधो य जह्णेणं मासपुहुत्तं उक्को-
 सेणवि मासपुहुत्तं सेसं तं चेव जाव भवादेसोत्ति, कालादेसेणं जह्णेणं दसवासस-
 हस्साई मासपुहुत्तमब्भहियाई उक्कोसेणं चत्तारि सागरोवमाई चउहिं मासपुहुत्तेहिं
 अब्भहियाई एवइयं जाव करेज्जा ४ । सो चेव जह्णकालट्ठिईएसु उववन्नो एस
 चेव वत्तव्वया चउत्थगमगरिसा णेयव्वा नवरं कालादेसेणं जह्णेणं दसवाससह-
 स्साई मासपुहुत्तमब्भहियाई उक्कोसेणं चत्तालीसं वाससहस्साई चउहिं मासपुहुत्तेहिं
 अब्भहियाई एवइयं जाव करेज्जा ५ । सो चेव उक्कोसकालट्ठिईएसु उववन्नो एस
 चेव गमगो नवरं कालादेसेणं जह्णेणं सागरोवमं मासपुहुत्तमब्भहियं उक्कोसेणं
 चत्तारि सागरोवमाई चउहिं मासपुहुत्तेहिं अब्भहियाई एवइयं जाव करेज्जा ६ ।
 सो चेव अप्पणा उक्कोसकालट्ठिईओ जाओ सो चेव पढमगमओ णेयव्वो नवरं
 सरीरोगाहणा जह्णेणं पंचधणुहसयाई उक्कोसेणवि पंचधणुहसयाई, ठिई जह्णेणं

पुव्वकोडी उक्कोसेणवि पुव्वकोडी, एवं अणुबंधोवि, कालादेसेणं जहजेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि सागरोवमाई चउहिं पुव्वकोडीहिं अब्भहियाई एवइयं कालं जाव करेजा ७ । सो चेव जहज्जकालट्टिईएसु उववज्जो सच्चैव सत्तमगमगवत्तव्वया नवरं कालादेसेणं जहजेणं पुव्वकोडी दसहिं वाससहस्सेहिं अब्भहिया उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ एवइयं कालं जाव करेजा ८ । सो चेव उक्कोसकालट्टिईएसु उववज्जो सा चेव सत्तमगमगवत्तव्वया नवरं कालादेसेणं जहजेणं एणं सागरोवमं पुव्वकोडीए अब्भहियं उक्कोसेणं चत्तारि सागरोवमाई चउहिं पुव्वकोडीहिं अब्भहियाई एवइयं कालं जाव करेजा ९ ॥ ६९५ ॥ पज्जत्तसंखेज्जवासाउयसच्चिमणुस्से णं भंते ! जे भविए सक्करप्पभाए पुढवीए नेरइएसु जाव उववज्जितए से णं भंते ! केवइयकाल जाव उववज्जेजा ? गोयमा ! जहजेणं सागरोवमट्टिईएसु उक्कोसेणं तिसागरोवमट्टिईएसु उववज्जेजा, ते णं भंते ! एवं सो चेव रयणप्पभापुढविगमओ णेयव्वो नवरं सरीरोगाहणा जहजेणं रयणिपुहुत्तं उक्कोसेणं पंचधणुहसयाई, ठिई जहजेणं वासपुहुत्तं उक्कोसेणं पुव्वकोडी, एवं अणुबंधोवि, सेसं तं चेव जाव भवादेसोत्ति, कालादेसेणं जहजेणं सागरोवमं वासपुहुत्तमब्भहियं उक्कोसेणं बारस सागरोवमाई चउहिं पुव्वकोडीहिं अब्भहियाई एवइयं जाव करेजा १, एवं एसा ओहिएसु तिसु गमएसु मणूसस्स लद्धी नाणत्तं नेरइयट्टिई कालादेसेणं संवेहं च जाणेजा ३, सो चेव अप्पणा जहज्जकालट्टिईओ जाओ तिसुवि गमएसु एस चेव लद्धी नवरं सरीरोगाहणा जहजेणं रयणिपुहुत्तं उक्कोसेणवि रयणिपुहुत्तं, ठिई जहजेणं वासपुहुत्तं उक्कोसेणवि वासपुहुत्तं एवं अणुबंधोवि, सेसं जहा ओहि-याणं संवेहो सव्वो उव(जुज्जि)जुंजिऊण भाणियव्वो ४-५-६, सो चेव अप्पणा उक्कोसकालट्टिईओ जाओ तस्सवि तिसुवि गमएसु इमं णाणत्तं-सरीरोगाहणा जहजेणं पंचधणुहसयाई उक्कोसेणवि पंचधणुहसयाई, ठिई जहजेणं पुव्वकोडी उक्कोसेणवि पुव्वकोडी एवं अणुबंधोवि, सेसं जहा पडमगमए नवरं नेरइयट्टि(ई) इं कायसंवेहं च जाणेजा ९, एवं जाव छट्ठपुढवी नवरं तच्चाए आढवेत्ता एक्केक्कं संघयणं परिहायइ जहेव तिरिक्खजोणियाणं कालादेसोवि तहेव नवरं मणुस्सट्टिई भाणियव्वा ॥ पज्जत्तसंखेज्जवासाउयसच्चिमणुस्से णं भंते ! जे भविए अहेसत्तमापुढविनेरइएसु उववज्जितए से णं भंते ! केवइयकालट्टिईएसु उववज्जेजा ? गोयमा ! जहजेणं वावीसं सागरोवमट्टिईएसु उक्कोसेणं तेत्तीसं सागरोवमट्टिईएसु उववज्जेजा, ते णं भंते ! जीवा एगसमएणं अवसेसो सो चेव सक्करप्पभापुढविगमओ णेयव्वो नवरं पढमं संघयणं इत्थिवेयगा न उववज्जंति सेसं तं चेव जाव अणुबंधोत्ति, भवादेसेणं दो भवगहणाई

कालादेसेणं जहन्नेणं बावीसं सागरोवमाई वासपुहुत्तमब्भहियाई उक्कोसेणं तेत्तीसं सागरोवमाई पुव्वकोडीए अब्भहियाई एवइयं जाव करेज्जा १, सो चेव जहन्नकालट्टिईएसु उववन्नो एस चेव वत्तव्वया नवरं नेरइयट्टिई संवेहं च जाणेज्जा २, सो चेव उक्कोसकालट्टिईएसु उववन्नो एस चेव वत्तव्वया नवरं संवेहं च जाणेज्जा ३, सो चेव अप्पणा जहन्नकालट्टिईओ जाओ तस्सवि तिसुवि गमएसु एस चेव वत्तव्वया नवरं सरीरोगाहणा जहन्नेणं रयणिपुहुत्तं उक्कोसेणवि रयणिपुहुत्तं, ठिई जहन्नेणं वासपुहुत्तं उक्कोसेणवि वासपुहुत्तं एवं अणुबंधोवि, संवेहो उवउंजिऊण भाणियव्वो ६ । सो चेव अप्पणा उक्कोसकालट्टिईओ जाओ तस्सवि तिसुवि गमएसु एस चेव वत्तव्वया नवरं सरीरोगाहणा जहन्नेणं पंचधणुहसयाई उक्कोसेणवि पंचधणुहसयाई, ठिई जहन्नेणं पुव्वकोडी उक्कोसेणवि पुव्वकोडी एवं अणुबंधोवि णवसुवि एसु गमएसु नेरइयट्टि(ई)ई संवेहं च जाणेज्जा, सव्वत्थ भवग्गहणाई दोन्नि जाव णवमगमए कालादेसेणं जहन्नेणं तेत्तीसं सागरोवमाई पुव्वकोडीए अब्भहियाई उक्कोसेणवि तेत्तीसं सागरोवमाई पुव्वकोडीए अब्भहियाई एवइयं कालं सेवेज्जा एवइयं कालं गइरागई करेज्जा ९ । सेवं भंते ! २ ति जाव विहरइ ॥ ६९६ ॥ **चउवीसइमस्स सयस्स पढमो उद्देसो समत्तो ॥**

रायगिहे जाव एवं वयासी-असुरकुमारा णं भंते ! कओहिंतो उववज्जंति किं नेरइ-एहिंतो उववज्जंति तिरिक्ख० मणुस्से० देवेहिंतो उववज्जंति ? गोयमा ! णो नेरइएहिंतो उववज्जंति तिरिक्ख० मणुस्सेहिंतो उववज्जंति नो देवेहिंतो उववज्जंति, एवं जहेव नेरइय-उद्देसए जाव पज्जतअसन्निपंचिदियतिरिक्खजोणिए णं भंते ! जे भविए असुरकुमारेसु उववज्जितए से णं भंते ! केवइयकालट्टिईएसु उववजेज्जा ? गोयमा ! जहन्नेणं दसवास-सहस्सट्टिईएसु उक्कोसेणं पलिओवमस्स असंखेज्जइभागट्टिईएसु उववजेज्जा, ते णं भंते ! जीवा एवं रयणप्पभागमगसरिसा णववि गमा भाणियव्वा नवरं जाहे अप्पणा जहन्नकालट्टिईओ भवइ ताहे अज्झवसाणा पसत्था णो अप्पसत्था तिसुवि गमएसु अवसेसं तं चेव ९॥ जइ सन्निपंचिदियतिरिक्खजोणिएहिंतो उववज्जंति किं संखेज्जवासाउय-सन्निपंचिदिय जाव उववज्जंति असंखेज्जवासाउय जाव उववज्जंति ? गोयमा ! संखेज्ज-वासाउय जाव उववज्जंति असंखेज्जवासाउय जाव उववज्जंति, असंखेज्जवासाउय-सन्निपंचिदियतिरिक्खजोणिए णं भंते ! जे भविए असुरकुमारेसु उववज्जितए से णं भंते ! केवइयकालट्टिईएसु उववजेज्जा ? गोयमा ! जहन्नेणं दसवाससहस्सट्टिईएसु उववजेज्जा उक्कोसेणं तिपलिओवमट्टिईएसु उववजेज्जा, ते णं भंते ! जीवा एगसमएणं पुच्छा, गोयमा ! जहन्नेणं एको वा दो वा तिन्नि वा उक्कोसेणं संखेज्जा

उववज्जंति, वइरोसभनारायसंघयणी, ओगाहणा जहणेणं धणुहपुहुत्तं उक्कोसेणं छ
गाउयाई, समचउरंससंठाणसंठिया प०, चत्तारि खेस्साओ आइल्लाओ, णो सम्महिट्ठी
मिच्छादिट्ठी णो सम्मामिच्छादिट्ठी, णो णाणी अच्चाणी नियमं दुअच्चाणी मइअच्चाणी य
सुयअच्चाणी य, जोगो तिबिहोवि, उवओगो दुबिहोवि, चत्तारि सच्चाओ, चत्तारि
कसाया, पंच इंदिया, तिच्चि समुग्घाया आइल्लागा, समोहयावि मरंति असमोहयावि
मरंति, वेयणा दुविहावि सायावेयगावि असायावेयगावि, वेदो दुविहोवि इत्थिवेयगावि
पुरिसवेयगावि णो नपुंसगवेयगा, ठिई जहणेणं साइरेगा पुव्वकोडी उक्कोसेणं तिच्चि
पलिओवमाई, अज्जवसाणा पसत्थावि अप्पसत्थावि, अणुबंधो जहेव ठिई, कायसंवेहो
भवादेसेणं दो भवग्गहणाई, कालादेसेणं जहणेणं साइरेगा पुव्वकोडी दसहिं वास-
सहस्सेहिं अब्भहिया उक्कोसेणं छप्पलिओवमाई एवइयं जाव करेज्जा १, सो चेव
जहन्नकालट्ठिईएसु उववन्नो एस चेव वत्तव्वया नवरं असुरकुमारट्ठिई(ई)ई संवेहं च
जाणेज्जा २, सो चेव उक्कोसकालट्ठिईएसु उववन्नो जहणेणं तिपलिओवमट्ठिईएसु
उक्कोसेणवि तिपलिओवमट्ठिईएसु उववज्जेज्जा एस चेव वत्तव्वया नवरं ठिई से
जहणेणं तिच्चि पलिओवमाई उक्कोसेणवि तिच्चि पलिओवमाई एवं अणुबंधोवि,
कालादेसेणं जहणेणं छप्पलिओवमाई उक्कोसेणवि छप्पलिओवमाई एवइयं सेसं तं
चेव ३, सो चेव अप्पणा जहन्नकालट्ठिईओ जाओ जहणेणं दसवाससहस्सेहिं उक्कोसेणं
साइरेणं पुव्वकोडीआउएसु उववज्जेज्जा, ते णं भंते! अवसेसं तं
चेव जाव भवादेसोत्ति, नवरं ओगाहणा जहणेणं धणुहपुहुत्तं उक्कोसेणं साइरेणं
धणुहसहस्सं, ठिई जहणेणं साइरेगा पुव्वकोडी उक्कोसेणवि साइरेगा पुव्वकोडी एवं
अणुबंधोवि, कालादेसेणं जहणेणं साइरेगा पुव्वकोडी दसहिं वाससहस्सेहिं अब्भहिया
उक्कोसेणं साइरेगाओ दो पुव्वकोडीओ एवइयं ४, सो चेव अप्पणा जहन्नकालट्ठिई-
एसु उववण्णो एस चेव वत्तव्वया नवरं असुरकुमारट्ठिई संवेहं च जाणेज्जा ५, सो चेव
उक्कोसकालट्ठिईएसु उववण्णो जहणेणं साइरेगपुव्वकोडिआउएसु उक्कोसेणवि साइरे-
गपुव्वकोडीआउएसु उववज्जेज्जा सेसं तं चेव, नवरं कालादेसेणं जहणेणं साइरेगाओ दो
पुव्वकोडीओ उक्कोसेणवि साइरेगाओ दो पुव्वकोडीओ एवइयं कालं सेवेज्जा ६, सो
चेव अप्पणा उक्कोसकालट्ठिईओ जाओ सो चेव पढमगमगो भाणियव्वो नवरं ठिई
जहणेणं तिच्चि पलिओवमाई उक्कोसेणवि तिच्चि पलिओवमाई एवं अणुबंधोवि,
कालादेसेणं जहणेणं तिच्चि पलिओवमाई दसहिं वाससहस्सेहिं अब्भहियाई उक्को-
सेणं छ पलिओवमाई एवइयं ७, सो चेव जहन्नकालट्ठिईएसु उववन्नो एस चेव वत्त-
व्वया नवरं असुरकुमारट्ठिई संवेहं च जाणेज्जा ८, सो चेव उक्कोसकालट्ठिईएसु उववन्नो

जहण्णेणं तिपलिओव० उक्कोसेणवि तिपलिओव० एस चेव वत्तव्वया नवरं कालादेसेणं जहण्णेणं छप्पलिओवमाई उक्कोसेणवि छप्पलिओवमाई एवइयं० ९ ॥ जइ संखेज्जवा-
साउयसन्निर्पंचिदिय जाव उववज्जंति किं जलचर० एवं जाव पज्जत्तसंखेज्जवासाउयस-
न्निर्पंचिदियतिरिक्खजोणिणं णं भंते ! जे भविए अन्नुरकुमारेसु उववज्जितए से णं भंते !
केवइयकालट्ठिईएसु उववज्जेजा ? गोयमा ! जहण्णेणं दसवाससहस्सट्ठिईएसु उक्कोसेणं
साइरेगसागरोवमट्ठिईएसु उववज्जेजा, ते णं भंते ! जीवा एगसमएणं एवं एएसिं रय-
णप्पभपुढविगमगसरिसा नव गमगा णेयव्वा, नवरं जाहे अप्पणा जहन्नकालट्ठिईओ
भवइ ताहे तिसुवि गमएसु इमं णाणत्तं चत्तारि लेस्साओ अज्झवसाणा पसत्था नो
अप्पसत्था सेसं तं चेव संवेहो साइरेगेण सागरोवमेण कायव्वो ९ ॥ जइ मणुस्सेहिंतो
उववज्जंति किं सन्निमणुस्सेहिंतो उ० असन्निमणुस्सेहिंतो उ० ? गोयमा ! सन्निमणु-
स्सेहिंतो उ० नो असन्निमणुस्सेहिंतो उववज्जंति, जइ सन्निमणुस्सेहिंतो उववज्जंति
किं संखेज्जवासाउयसन्निमणुस्सेहिंतो उववज्जंति असंखेज्जवासाउयसन्निमणुस्सेहिंतो
उववज्जंति ? गोयमा ! संखेज्जवासाउय जाव उववज्जंति असंखेज्जवासाउय जाव
उववज्जंति, असंखेज्जवासाउयसन्निमणुस्से णं भंते ! जे भविए अन्नुरकुमारेसु
उववज्जितए से णं भंते ! केवइयकालट्ठिईएसु उववज्जेजा ? गोयमा ! जहण्णेणं दस-
वाससहस्सट्ठिईएसु उक्कोसेणं तिपलिओवमट्ठिईएसु उववज्जेजा, एवं असंखेज्जवासा-
उयतिरिक्खजोणिण्यसरिसा आइल्ला तिन्नि गमगा नेयव्वा, नवरं सरीरोगाहणा
पढमविइएसु गमएसु जहन्नेणं साइरेगाई पंचधणुहसयाई उक्कोसेणं तिन्नि गाउयाई
सेसं तं चेव, तइयगमे ओगाहणा जहन्नेणं तिन्नि गाउयाई उक्कोसेणवि तिन्नि
गाउयाई सेसं जहेव तिरिक्खजोणिणयाणं ३, सो चेव अप्पणा जहन्नकालट्ठिईओ
जाओ तस्सवि जहन्नकालट्ठिईयतिरिक्खजोणिण्यसरिसा तिन्नि गमगा भाणियव्वा,
नवरं सरीरोगाहणा तिसुवि गमएसु जहण्णेणं साइरेगाई पंचधणुहसयाई उक्कोसेणवि
साइरेगाई पंचधणुहसयाई सेसं तं चेव ६, सो चेव अप्पणा उक्कोसकालट्ठिईओ
जाओ तस्सवि ते चेव पच्छिज्जगा तिन्नि गमगा भाणियव्वा नवरं सरीरोगाहणा
तिसुवि गमएसु जहन्नेणं तिन्नि गाउयाई उक्कोसेणवि तिन्नि गाउयाई अवसेसं तं चेव
९ ॥ जइ संखेज्जवासाउयसन्निमणुस्सेहिंतो उववज्जंति किं पज्जत्तसंखेज्जवासाउय०
अपज्जत्तसंखेज्ज जाव उववज्जंति ? गोयमा ! पज्जत्तसंखेज्ज० णो अपज्जत्तसंखेज्ज०,
पज्जत्तसंखेज्जवासाउयसन्निमणुस्से णं भंते ! जे भविए अन्नुरकुमारेसु उववज्जितए से
णं भंते ! केवइयकालट्ठिईएसु उववज्जेजा ? गोयमा ! जहन्नेणं दसवाससहस्सट्ठिईएसु
उक्कोसेणं साइरेगसागरोवमट्ठिईएसु उववज्जेजा, ते णं भंते ! जीवा एवं जहेव

एएसिं रयणप्पभाए उववज्जमाणं णव गमगा तहेव इहवि णव गमगा भाणियव्वा
णवरं संवेहो साइरेणेण सागरोवमेण कायव्वो सेसं तं चेव ९, सेवं भंते ! २ ति
॥ ६९७ ॥ चउवीसइमे सए वीओ उइसो समत्तो ॥

रायणिहे जाव एवं वयासी-नागकुमारा णं भंते ! कओहिंतो उववज्जंति किं
नेरइएहिंतो उववज्जंति तिरि० मणु० देवेहिंतो उववज्जंति ? गोयमा ! णो णेरइएहिंतो
उववज्जंति तिरिक्खजोणिएहिंतो उ० मणुस्सेहिंतो उववज्जंति नो देवेहिंतो उववज्जंति,
जइ तिरिक्खजोणि० एवं जहा असुरकुमारारं वत्तव्वया तहा एएसिंपि जाव अस-
णिणति, जइ सन्निपंचिदियतिरिक्खजोणिएहिंतो उ० किं संखेज्जवासाउय० असंखेज्जवा-
साउय० ? गोयमा ! संखेज्जवासाउय० असंखेज्जवासाउय जाव उववज्जंति, असंखे-
ज्जवासाउयसन्निपंचिदियतिरिक्खजोणिए णं भंते ! जे भविए नागकुमारेसु उववज्जि-
त्तए से णं भंते ! केवइकालट्टिई० ? गोयमा ! जहन्नेणं दस वाससहस्सट्टिईएसु उक्को-
सेणं देसूणदुपलिओवमट्टिईएसु उववज्जेजा, ते णं भंते ! जीवा अबसेसो सो चेव असु-
रकुमारेसु उववज्जमाणस्स गमगो भाणियव्वो जाव भवादेसोत्ति, कालादेसेणं जहन्नेणं
साइरेणा पुव्वकोढी दसहिं वाससहस्सेहिं अब्भहिया उक्कोसेणं देसूणाइं पंच पलि-
ओवमाइं एवइयं जाव करेजा १, सो चेव जहन्नकालट्टिईएसु उववज्जो एस चेव वत्त-
व्वया नवरं णागकुमारट्टिईं संवेहं च जाणेजा २, सो चेव उक्कोसकालट्टिईएसु उववज्जो
तस्सवि एस चेव वत्तव्वया नवरं ठिई जहन्नेणं देसूणाइं दो पलिओवमाइं उक्कोसेणं
तिज्जि पलिओवमाइं सेसं तं चेव जाव भवादेसोत्ति, कालादेसेणं जहन्नेणं देसूणाइं
चत्तारि पलिओवमाइं उक्कोसेणं देसूणाइं पंच पलिओवमाइं एवइयं कालं० ३, सो चेव
अप्पणा जहन्नकालट्टिईओ जाओ तस्सवि तिसुवि गमएसु जहेव असुरकुमारेसु उव-
वज्जमाणस्स जहन्नकालट्टिईयस्स तहेव निरवसेसं ६, सो चेव अप्पणा उक्कोसकाल-
ट्टिईओ जाओ तस्सवि तहेव तिज्जि गमगा जहा असुरकुमारेसु उववज्जमाणस्स नवरं
नागकुमारट्टिईं संवेहं च जाणेजा सेसं तं चेव ९ ॥ जइ संखेज्जवासाउयसन्निपंचिदिय
जाव किं पज्जतसंखेज्जवासाउय० अपज्जतसंखेज्ज० ? गोयमा ! पज्जतसंखेज्जवासाउय०
णो अपज्जतसंखेज्जवासाउय०, पज्जतसंखेज्जवासाउय जाव जे भविए णागकुमारेसु
उववज्जित्तए से णं भंते ! केवइयकालट्टिईएसु उववज्जेजा ? गोयमा ! जहन्नेणं दसवा-
ससहस्सट्टि० उक्कोसेणं देसूणदोपलिओवमट्टि० एवं जहेव असुरकुमारेसु उववज्जमाणस्स
वत्तव्वया तहेव इहवि णवसुवि गमएसु, णवरं णागकुमारट्टिईं संवेहं च जाणेजा, सेसं
तं चेव ९ ॥ जइ मणुस्सेहिंतो उववज्जंति किं सन्निमणु० असणिमणु० ? गोयमा !
सन्निमणु० णो असन्निमणुस्से० जहा असुरकुमारेसु उववज्जमाणस्स जाव असंखेज्जवा-

साउयसन्निमणुस्से णं भंते ! जे भविए णागकुमारेसु उववज्जितए से णं भंते ! केवइयकालट्ठिईएसु उववज्जइ ? गोयमा ! जह्णेणं दसवाससहस्सट्ठिईएसु उक्कोसेणं देसूणदोपलिओवमट्ठिईएसु एवं जहेव असंखेज्जवासाउयाणं तिरिक्खजोणियाणं नागकुमारेसु आइल्ला तिजि गमगा तहेव इमस्सवि, नवरं पढमबिइएसु गमएसु सरीरोगाहणा जह्णेणं साइरेगाइं पंचघणुहसयाइं उक्कोसेणं तिजि गाउयाइं, तइयगमे ओगाहणा जह्णेणं देसूणाइं दो गाउयाइं उक्कोसेणं तिजि गाउयाइं सेसं तं चेव ३, सो चेव अप्पणा जह्णकालट्ठिईओ जाओ तस्स तिसुवि गमएसु जहा तस्स चेव असुरकुमारेसु उववज्जमाणस्स तहेव निरवसेसं ६, सो चेव अप्पणा उक्कोसकालट्ठिईओ जाओ तस्स तिसुवि गमएसु जहा तस्स चेव उक्कोसकालट्ठिईयस्स असुरकुमारेसु उववज्जमाणस्स नवरं णागकुमारट्ठिईं संवेहं च जाणेज्जा, सेसं तं चेव ९ ॥ जइ संखेज्जवासाउयसन्निमणु० किं पज्जत्तसंखेज्ज० अपज्जत्तसंखेज्ज० ? गोयमा ! पज्जत्तसंखेज्ज० णो अपज्जत्तसंखेज्ज०, पज्जत्तसंखेज्जवासाउयसन्निमणुस्से णं भंते ! जे भविए णागकुमारेसु उववज्जितए से णं भंते ! केवइ ? गोयमा ! जह्णेणं दसवाससहस्सट्ठिईएसु उक्कोसेणं देसूणदोपलिओवमट्ठिईएसु उ० एवं जहेव असुरकुमारेसु उववज्जमाणस्स सच्चैव लद्धी निरवसेसा नवसु गमएसु णवरं णागकुमारट्ठिईं संवेहं च जाणेज्जा, सेवं भंते ! २ ति ॥ ६९८ ॥ **चउवीसइमस्स सयस्स तइओ उहेसो समत्तो ॥**

अवसेसा सुवन्नकुमाराइं जाव थणियकुमारा एएवि अट्ठ उहेसगा जहेव नागकुमाराणं तहेव निरवसेसा भाणियव्वा, सेवं भंते ! सेवं भंते ! ति ॥ ६९९ ॥

चउवीसइमस्स सयस्स एक्कारसमो उहेसो समत्तो ॥

पुढविकाइया णं भंते ! कओहिंतो उववज्जंति किं नेरइएहिंतो उववज्जंति तिरिक्ख० मणु० देवेहिंतो उववज्जंति ? गोयमा ! णो नेरइएहिंतो उववज्जंति तिरिक्ख० मणु० देवेहिंतोवि उववज्जंति, जइ तिरिक्खजोणिएहिंतो उ० किं एगिदियतिरिक्खजोणिए० एवं जहा वक्कतीए उववाओ जाव जइ बायरपुढविकाइयएगिदियतिरिक्खजोणिएहिंतो उववज्जंति किं पज्जत्तबादर जाव उववज्जंति अपज्जत्तबादरपुढवि जाव उ० ? गोयमा ! पज्जत्तबादरपुढवि० अपज्जत्तबादरपुढवि जाव उववज्जंति, पुढविकाइए णं भंते ! जे भविए पुढविकाइएसु उववज्जितए से णं भंते ! केवइयकालट्ठिईएसु उववज्जेज्जा ? गोयमा ! जह्णेणं अंतोमुहुत्तट्ठिईएसु उक्कोसेणं बावीसवाससहस्सट्ठिईएसु उववज्जेज्जा, तै णं भंते ! जीवा एगसमएणं पुच्छा, गोयमा ! अणुसमयं अविरहिया असंखेज्जा उववज्जंति, छेवट्ठसंघयणी, सरीरोगाहणा जह्णेणं अंगुलस्स असंखेज्जइ-भागं उक्कोसेणवि अंगुलस्स असंखेज्जइभागं, मसूरचंदसंठिया, चत्तारि छेस्ताओ, णो

सम्मदिट्ठी मिच्छादिट्ठी णो सम्मामिच्छादिट्ठी, णो णाणी अन्नाणी दो अन्नाणा नियमं,
 णो मणजोगी णो वज्जोगी कायजोगी, उवओगो दुविहोवि, चत्तारि सन्नाओ, चत्तारि
 कसाया, एगे फासिंदिए पन्नो, तिन्नि समुग्घाया, वेयणा दुविहा, णो इत्थिवेदगा
 णो पुरिसवेदगा नपुंसगवेदगा, ठिई जहन्नेणं अंतोमुहुत्तं उक्कोसेणं बावीसं वास-
 सहस्साई, अज्झवसाणा पसत्थावि अप्पसत्थावि अणुबंधो जहा ठिई १, से णं
 भंते ! पुढविकाइए पुणरवि पुढविकाइएत्ति केवइयं कालं सेवेज्जा केवइयं कालं
 गइरागई करेज्जा ? गोयमा ! भवादेसेणं जहन्नेणं दो भवग्गहणाई उक्कोसेणं असं-
 खेज्जाई भवग्गहणाई, कालादेसेणं जहन्नेणं दो अंतोमुहुत्ता उक्कोसेणं असंखेज्जं कालं
 एवइयं जाव करेज्जा १, सो चेव जहन्नकालट्ठिईएसु उववन्नो जहन्नेणं अंतोमुहुत्त-
 ट्ठिईएसु उक्कोसेणवि अंतोमुहुत्तट्ठिईएसु एवं चेव वत्तव्वया निरवसेसा २, सो चेव
 उक्कोसकालट्ठिईएसु उववन्नो जहन्नेणं बावीसवाससहस्सट्ठिईएसु उक्कोसेणवि बावीस-
 वाससहस्सट्ठिईएसु सेसं तं चेव जाव अणुबंधोत्ति, पवरं जहन्नेणं एक्को वा दो वा
 तिन्नि वा उक्कोसेणं संखेज्जा वा असंखेज्जा वा उववज्जेज्जा, भवादेसेणं जहन्नेणं दो
 भवग्गहणाई उक्कोसेणं अट्ठ भवग्गहणाई, कालादेसेणं जहन्नेणं बावीसं वाससह-
 स्साई अंतोमुहुत्तमब्भहियाई उक्कोसेणं छावत्तरिं वाससहस्सुत्तरं सयसहस्सं एवइयं
 कालं जाव करेज्जा ३, सो चेव अप्पणा जहन्नकालट्ठिईओ जाओ सो चेव पढमि-
 ल्लओ गमओ भाणियव्वो नवरं लेस्साओ तिन्नि, ठिई जहन्नेणं अंतोमुहुत्तं उक्कोसेणवि
 अंतोमुहुत्तं, अप्पसत्था अज्झवसाणा, अणुबंधो जहा ठिई सेसं तं चेव ४, सो चेव
 जहन्नकालट्ठिईएसु उववन्नो सच्चैव चउत्थगमगवत्तव्वया भाणियव्वा ५, सो
 चेव उक्कोसकालट्ठिईएसु उववन्नो एस चेव वत्तव्वया नवरं जहन्नेणं एक्को वा दो वा
 तिन्नि वा उक्कोसेणं संखेज्जा वा असंखेज्जा वा जाव भवादेसेणं जहन्नेणं दो भवग्गहणाई
 उक्कोसेणं अट्ठ भवग्गहणाई, कालादेसेणं जहन्नेणं बावीसं वाससहस्साई अंतोमुहुत्त-
 मब्भहियाई उक्कोसेणं अट्ठासीई वाससहस्साई चउहिं अंतोमुहुत्तेहिं अब्भहियाई
 एवइयं ६, सो चेव अप्पणा उक्कोसकालट्ठिईओ जाओ एवं तइयगमगसरिसो
 निरवसेसो भाणियव्वो नवरं अप्पणा से ठिई जहन्नेणं बावीसं वाससहस्साई उक्कोसे-
 णवि बावीसं वाससहस्साई ७, सो चेव जहन्नकालट्ठिईएसु उववन्नो जहन्नेणं अंतो-
 मुहुत्तं उक्कोसेणवि अंतोमुहुत्तं, एवं जहा सत्तमगमगो जाव भवादेसो, कालादेसेणं
 जहन्नेणं बावीसं वाससहस्साई अंतोमुहुत्तमब्भहियाई उक्कोसेणं अट्ठासीई वाससह-
 स्साई चउहिं अंतोमुहुत्तेहिं अब्भहियाई एवइयं ८, सो चेव उक्कोसकालट्ठिईएसु
 उववन्नो जहन्नेणं बावीसं वाससहस्सट्ठिईएसु उक्कोसेणवि बावीसं वाससहस्सट्ठिईएसु एस

चेव सत्तमगमगवत्तव्वया जाणियव्वा जाव भवादेसोत्ति, कालादेसेणं जहण्णेणं
 चोयालीसं वाससहस्साइं उक्कोसेणं छावत्तरिवाससहस्सुत्तरं सयसहस्सं एवइयं० ९ ॥
 जइ आउक्काइयएगिंदियतिरिक्खजोणिएहिंतो उववज्जंति किं सुहुमआउ० बादर-
 आउ० एवं चउक्कओ भेदो भाणियव्वो जहा पुढविकाइयाणं, आउक्काइयाणं भंते !
 जे भविए पुढविकाइएसु उववज्जितए से णं भंते ! केवइयकालट्टिईएसु उववज्जेजा ?
 गोयमा ! जहन्नेणं अंतोमुहुत्तट्टिईएसु उक्कोसेणं बावीसं वाससहस्सट्टिईएसु उववज्जेजा,
 एवं पुढविकाइयगमगरिसा नव गमगा भाणियव्वा ९, नवरं थिबुगाबिंदुसंठिए,
 ठिई जहन्नेणं अंतोमुहुत्तं उक्कोसेणं सत्त वाससहस्साइं, एवं अणुबंधोवि एवं तिसुवि
 गमएसु, ठिई संवेहो तइयछट्टसत्तमट्टमणवमगमएसु भवादेसेणं जहण्णेणं दो भवग्ग-
 हणाइं उक्कोसेणं अट्ट भवग्गहणाइं, सेसेसु चउसु गमएसु जहण्णेणं दो भवग्गहणाइं
 उक्कोसेणं असंखेज्जाइं भवग्गहणाइं, तइयगमए कालादेसेणं जहन्नेणं बावीसं वासस-
 हस्साइं अंतोमुहुत्तमब्भहियाइं उक्कोसेणं सोलसुत्तरं वाससयसहस्सं एवइयं०, छट्ठे
 गमए कालादेसेणं जहन्नेणं बावीसं वाससहस्साइं अंतोमुहुत्तमब्भहियाइं उक्कोसेणं
 अट्टासीइं वाससहस्साइं चउहिं अंतोमुहुत्तेहिं अब्भहियाइं एवइयं०, सत्तमे गमए
 कालादेसेणं जहन्नेणं सत्त वाससहस्साइं अंतोमुहुत्तमब्भहियाइं उक्कोसेणं सोलसुत्त-
 रवाससयसहस्सं एवइयं०, अट्ठमे गमए कालादेसेणं जहन्नेणं सत्त वाससहस्साइं
 अंतोमुहुत्तमब्भहियाइं उक्कोसेणं अट्टावीसं वाससहस्साइं चउहिं अंतोमुहुत्तेहिं
 अब्भहियाइं एवइयं०, णवमे गमए भवादेसेणं जहन्नेणं दो भवग्गहणाइं उक्कोसेणं
 अट्ट भवग्गहणाइं, कालादेसेणं जहन्नेणं एगूणतीसं वाससहस्साइं उक्कोसेणं सोलसु-
 त्तरं वाससयसहस्सं एवइयं०, एवं णवसुवि गमएसु आउक्काइयठिई जाणियव्वा ९ ॥
 जइ तेउक्काइएहिंतो उववज्जंति तेउक्काइयाणवि एस चेव वत्तव्वया नवरं नवसुवि
 गमएसु तिजि लेस्साओ तेउक्काइयाणं सु(सू)ईकलावसंठिया ठिई जाणियव्वा तइय-
 गमए कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं
 अट्टासीइं वाससहस्साइं बारसहिं राइंदिएहिं अब्भहियाइं एवइयं एवं संवेहो उवजुंजि-
 ऊण भाणियव्वो ९॥ जइ वाउक्काइएहिंतो उववज्जंति वाउक्काइयाणवि एवं चेव णव
 गमगा जहेव तेउक्काइयाणं णवरं पडागासंठिया प० संवेहो वाससहस्सेहिं कायव्वो
 तइयगमए कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं
 उक्कोसेणं एणं वाससयसहस्सं एवं संवेहो उवजुंजिऊण भाणियव्वो ॥ जइ वणस्सइ-
 काइएहिंतो उववज्जंति वणस्सइकाइयाणं आउक्काइयगमगरिसा णव गमगा
 भाणियव्वा नवरं णाणासंठिया सरीरोगाहणा प० पढमएसु पच्छिळएसु

य तिसु गमएसु जहण्णेणं अंगुलस्स असंखेज्जइभागं उक्कोसेणं साइरेणं जोयणसहस्सं मज्झिअएसु तिसु तहेव जहा पुढविकाइयाणं संवेहो ठिई य जाणियव्वा तइयगमए कालादेसेणं जहणेणं बावीसं वाससहस्साइं अंतोमुहुत्तमब्भहियाइं उक्कोसेणं अट्ठावीसुत्तरं वाससयसहस्सं एवइयं एवं संवेहो उवजुंजिऊण भाणियव्वो ॥ ७०० ॥

जइ बेईदिएहिंतो उववज्जंति किं पज्जतबेईदिएहिंतो उववज्जंति अपज्जतबेईदिएहिंतो उववज्जंति ? गोयमा ! पज्जतबेईदिएहिंतो उववज्जंति अपज्जतबेईदिएहिंतोवि उववज्जंति, बेईदिए णं भंते ! जे भविए पुढविकाइएसु उववज्जितए से णं भंते ! केवइ-काल० ? गोयमा ! जहण्णेणं अंतोमुहुत्तट्ठिईएसु उक्कोसेणं बावीसं वाससहस्सट्ठिईएसु, ते णं भंते ! जीवा एगसमएणं० ? गोयमा ! जहणेणं एक्को वा दो वा तिचि वा उक्कोसेणं संखेज्जा वा असंखेज्जा वा उववज्जंति, छेवट्ठसंघयणी, ओगाहणा जहणेणं अंगुलस्स असंखेज्जइभागं उक्कोसेणं बारस जोयणाइं, हुंडसंठिया, तिचि लेस्साओ, सम्मदिट्ठीवि मिच्छादिट्ठीवि नो सम्मामिच्छादिट्ठी, दो गाणा दो अन्नाणा नियमं, णो मणजोगी वइजोगीवि कायजोगीवि, उवओगो दुविहोवि, चत्तारि सन्नाओ, चत्तारि कसाया, दो इंदिया प०, तं०-जिब्भदिए य फासिदिए य, तिचि समुग्घाया सेसं जहा पुढविकाइयाणं णवरं ठिई जहणेणं अंतोमुहुत्तं उक्कोसेणं बारस संवच्छराइं एवं अणुबंधोवि, सेसं तं चेव, भवादेसेणं जहण्णेणं दो भवग्गहणाइं उक्कोसेणं संखेज्जाइं भवग्गहणाइं, कालादेसेणं जहणेणं दो अंतोमुहुत्ता उक्कोसेणं संखेज्जं कालं एवइयं० १, सो चेव जहलकालट्ठिईएसु उववओ एस चेव वत्तव्वया सव्वा २, सो चेव उक्कोसकालट्ठिईएसु उववओ एसा चेव बेईदियस्स लद्धी नवरं भवादेसेणं जहण्णेणं दो भवग्गहणाइं उक्कोसेणं अट्ठ भवग्गहणाइं, कालादेसेणं जहण्णेणं बावीसं वाससहस्साइं अंतोमुहुत्तमब्भहियाइं उक्कोसेणं अट्ठासीइं वाससहस्साइं अडयालीसाए संवच्छरेहिं अब्भहियाइं एवइयं० ३, सो चेव अप्पणा जहलकालट्ठिईओ जाओ तस्सवि एस चेव वत्तव्वया तिसुवि गमएसु नवरं इमाइं सत्त णाणत्ताइं सरीरोगाहणा जहा पुढविकाइयाणं, णो सम्मदिट्ठी मिच्छादिट्ठी णो सम्मामिच्छादिट्ठी, दो अन्नाणा नियमं, णो मणजोगी णो वइजोगी कायजोगी, ठिई जहणेणं अंतोमुहुत्तं उक्कोसेणावि अंतोमुहुत्तं, अज्झवसाणा अप्पसत्था, अणुबंधो जहा ठिई, संवेहो तहेव आइल्लेसु दोसु गमएसु तइयगमए भवादेसो तहेव अट्ठ भवग्गहणाइं कालादेसेणं जहणेणं बावीसं वाससहस्साइं अंतोमुहुत्तमब्भहियाइं उक्कोसेणं अट्ठासीइं वाससहस्साइं चउहिं अंतोमुहुत्तेहिं अब्भहियाइं ६, सो चेव अप्पणा उक्कोसकालट्ठिईओ जाओ एयस्सवि ओहियगमगरिसा तिचि गमगा भाणियव्वा नवरं तिसुवि गमएसु ठिई जहणेणं

बारस संवच्छराई उक्कोसेणवि बारस संवच्छराई, एवं अणुबंधोवि, भवादेसेणं जहण्णेणं दो भवग्गहणाई उक्कोसेणं अट्ठ भवग्गहणाई, कालादेसेणं उवजुंजिऊण भाणियव्वं जाव णवमे गमए जहन्नेणं बावीसं वाससहस्साई बारसहिं संवच्छरेहिं अब्भहियाई उक्कोसेणं अट्ठासीइ वाससहस्साई अडयालीसाए संवच्छरेहिं अब्भहियाई एवइयं० ९ ॥ जइ तेइदिएहिंतो पुढविकाइएसु उववज्जन्ति एवं चेव नव गमगा भाणियव्वा नवरं आइहेसु तिसुवि गमएसु सरीरोगाहणा जहन्नेणं अंगुलस्स असंखेज्जइभागं उक्कोसेणं तिज्जि गाउयाई, तिज्जि इंदियाई, ठिई जहन्नेणं अंतोमुहुत्तं उक्कोसेणं एगूण-पन्नं राईदियाई, तइयगमए कालादेसेणं जहन्नेणं बावीसं वाससहस्साई अंतोमुहुत्त-मब्भहियाई उक्कोसेणं अट्ठासीइ वाससहस्साई छन्नउई राईदियसयमब्भहियाई एवइयं०, मज्झिमगा तिज्जि गमगा तहेव पच्छिमगावि तिज्जि गमगा तहेव नवरं ठिई जहन्नेणं एगूणपन्नं राईदियाई उक्कोसेणवि एगूणपन्नं राईदियाई संवेहो उवजुंजिऊण भाणियव्वो ९ ॥ जइ चउरिदिएहिंतो उववज्जन्ति एवं चेव चउरिदियाणवि नव गमगा भाणियव्वा नवरं एएसु चेव ठाणेषु नाणत्ता भाणियव्वा सरीरोगाहणा जहन्नेणं अंगुलस्स असंखेज्जइभागं उक्कोसेणं चत्तारि गाउयाई, ठिई जहन्नेणं अंतोमुहुत्तं उक्कोसेणं छम्मासा एवं अणुबंधोवि, चत्तारि इंदियाई सेसं तं चेव जाव नवगमगए कालादेसेणं जहण्णेणं बावीसं वाससहस्साई छहिं मासेहिं अब्भहियाई उक्कोसेणं अट्ठा-सीइ वाससहस्साई चउवीसाए मासेहिं अब्भहियाई एवइयं० ९ ॥ जइ पंचिंदियतिरि-क्खजोणिएहिंतो उववज्जन्ति किं सन्निपंचिंदियतिरिक्खजोणिएहिंतो उववज्जन्ति असन्निप-ंचिंदियतिरिक्खजोणि०? गोयमा ! सन्निपंचिंदिय०, असणिपंचिंदिय०, जइ असणि-पंचिंदिय जाव उ० किं जलचरेहिंतो उववज्जन्ति जाव किं पज्जतएहिंतो उववज्जन्ति अप-ज्जतएहिंतो उववज्जन्ति ? गोयमा ! पज्जतएहिंतोवि उववज्जन्ति अपज्जतएहिंतोवि उवव-ज्जन्ति, असन्निपंचिंदियतिरिक्खजोणिए णं भंते ! जे भविए पुढविकाइएसु उववज्जितए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं बावीसं वाससहस्साई, ते णं भंते ! जीवा एवं जहेव बेइंदियस्स ओहियगमए लद्धी तहेव नवरं सरीरोगाहणा जहण्णेणं अंगुलस्स असंखेज्जइभागं उक्कोसेणं जोयणसहस्सं, पंचिंदिया, ठिई अणुबंधो य जहण्णेणं अंतोमुहुत्तं उक्कोसेणं पुव्वकोडी सेसं तं चेव, भवादेसेणं जहण्णेणं दो भव-ग्गहणाई उक्कोसेणं अट्ठ भवग्गहणाई, कालादेसेणं जहण्णेणं दो अंतोमुहुत्ता उक्कोसेणं चत्तारि पुव्वकोडीओ अट्ठासीइ वाससहस्सेहिं अब्भहियाओ एवइयं० णवसुवि गमएसु कायसंवेहो भवादेसेणं जहन्नेणं दो भवग्गहणाई उक्कोसेणं अट्ठ भवग्गहणाई कालादेसेणं उवजुंजिऊण भाणियव्वं, नवरं मज्झिमएसु तिसु गमएसु जहेव बेइंदियस्स

मज्झिमएसु तिसु गमएसु पच्छिज्जएसु तिसु गमएसु जहा एयस्स चेव पढमगमए, नवरं ठिई अणुबंधो जहन्नेणं पुव्वकोडी उक्कोसेणवि पुव्वकोडी, सेसं तं चेव जाक्क नवम गमए जहण्णेणं पुव्वकोडी बावीसाए वाससहरस्सेहिं अब्भहिया उक्कोसेणं चत्तारि पुव्वकोडीओ अट्ठासीईए वाससहरस्सेहिं अब्भहियाओ एवइयं कालं सेवेज्जा० ९ ॥ जइ सन्निपंचिदियतिरिक्खजोणि जाव उ० किं संखेज्जवासाउय० असंखेज्जवासाउय० ? गोयमा ! संखेज्जवासाउय० णो असंखेज्जवासाउय जाव उ०, जइ संखेज्जवासाउय जाव उ० किं जलचरेहिंतो सेसं जहा असत्तीणं जाव ते णं भंते ! जीवा एगसमएणं केवइया उववज्जंति एवं जहा रयणप्पभाए उववज्जमाणस्स सन्निपंचिदियस्स तहेव इहवि, नवरं ओगाहणा जहन्नेणं अंगुलस्स असंखेज्जइभागं उक्कोसेणं जोयणसहरस्सं सेसं तहेव जाव कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ अट्ठासीईए वाससहरस्सेहिं अब्भहियाओ एवइयं०, एवं संवेहो णवसुवि गमएसु जहा असत्तीणं तहेव निरवसेसं लद्धी से आइल्लएसु तिसुवि गमएसु एस चेव मज्झिमएसुवि तिसु गमएसु एस चेव नवरं इमाई नव णाणत्ताई ओगाहणा जहन्नेणं अंगुलस्स असंखेज्जइभागं उक्कोसेणवि अंगुलस्स असंखेज्जइभागं, तिन्नि लेस्साओ, मिच्छादिट्ठी, दो अन्नाणा, कायजोगी, तिन्नि समुग्घाया, ठिई जहन्नेणं अंतोमुहुत्तं उक्कोसेणवि अंतोमुहुत्तं, अप्पसत्था अज्झवसाणा, अणुबंधो जहा ठिई सेसं तं चेव, पच्छिज्जएसु तिसुवि गमएसु जहेव पढमगमए णवरं ठिई अणुबंधो जहन्नेणं पुव्वकोडी उक्कोसेणवि पुव्वकोडी, सेसं तं चेव ९ ॥ ७०१ ॥ जइ मणुरसेहिंतो उववज्जंति किं सण्णिमणुरस्सेहिंतो उववज्जंति असण्णिमणुरस्सेहिंतो उ० ? गोयमा ! सण्णिमणुरस्सेहिंतो उववज्जंति असण्णिमणुरस्सेहिंतोवि उववज्जंति, असन्निमणुरस्सेणं भंते ! जे भविए पुढविकाइएसु० से णं भंते ! केवइयकालट्ठिईएसु एवं जहा असण्णिपंचिदियतिरिक्खजोणियस्स जहन्नकालट्ठिईयस्स तिन्नि गमगा तहा एयस्सवि ओहिया तिन्नि गमगा भाणियव्वा तहेव निरवसेसा सेसा छ न भण्णंति १ ॥ जइ सन्निमणुरस्सेहिंतो उववज्जंति किं संखेज्जवासाउय० असंखेज्जवासाउय जाव उ० ? गोयमा ! संखेज्जवासाउय० णो असंखेज्जवासाउय जाव उ०, जइ संखेज्जवासाउय जाव उ० किं पज्जत० अपज्जत० ? गोयमा ! पज्जतसंखेज्जवासाउय० अपज्जतसंखेज्जवासा जाव उ०, सन्निमणुरस्से णं भंते ! जे भविए पुढविकाइएसु उववज्जितए से णं भंते ! केवइकाल० ? गोयमा ! जहण्णेणं अंतोमुहुत्तं उक्कोसेणं बावीसं वाससहरस्सट्ठिईएसु, ते णं भंते ! जीवा एवं जहेव रयणप्पभाए उववज्जमाणस्स तहेव तिसुवि गमएसु लद्धी नवरं ओगाहणा जहण्णेणं अंगुलस्स असंखेज्जइभागं उक्कोसेणं पंचधणुहसयाई, ठिई जहण्णेणं अंतोमुहुत्तं उक्को-

सेणं पुव्वकोडी एवं अणुबंधोवि, संवेहो नवसु गमएसु जहेव सन्निपंचिदियस्स मज्झि-
 ळएसु तिसु गमएसु लद्धी जहेव सन्निपंचिदियस्स म० सेसं तं चेव निरवसेसं, पच्छि-
 तिन्नि गमगा जहा एयस्स चेव ओहिया गमगा नवरं ओगाहणा जहण्णेणं पंचध-
 णुहसयाई उक्कोसेणवि पंच धणुहसयाई, ठिई अणुबंधो जहण्णेणं पुव्वकोडी उक्कोसेणवि
 पुव्वकोडी सेसं तहेव नवरं पच्छि-
 ळएसु गमएसु संखेज्जा उववज्जंति नो असंखेज्जा
 उववज्जंति ॥ जइ देवेहिंतो उववज्जंति किं भवणवासिदेवेहिंतो उववज्जंति वाणसं-
 तर० जोइसियदेवेहिंतो उववज्जंति वेमाणियदेवेहिंतो उववज्जंति ? गोयमा ! भवण-
 वासिदेवेहिंतोवि उववज्जंति जाव वेमाणियदेवेहिंतोवि उववज्जंति, जइ भवणवासिदे-
 वेहिंतो उववज्जंति किं असुरकुमारभवणवासिदेवेहिंतो उववज्जंति जाव थणियकुमा-
 रभवणवासिदेवेहिंतो उ० ? गोयमा ! असुरकुमारभवणवासिदेवेहिंतो उववज्जंति जाव
 थणियकुमारभवणवासिदेवेहिंतो उववज्जंति, असुरकुमारे णं भंते ! जे भविए पुढवि-
 काइएसु उववज्जित्तए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं
 बावीसं वाससहस्साई ठिई, ते णं भंते ! जीवा पुच्छा, गोयमा ! जहण्णेणं एक्को
 वा दो वा तिन्नि वा उक्कोसेणं संखेज्जा वा असंखेज्जा वा उववज्जंति, तेसि णं भंते !
 जीवाणं सरीरगा किंसंघयणी प० ? गोयमा ! छण्हं संघयणाणं असंघयणी जाव
 परिणमंति, तेसि णं भंते ! जीवाणं केमहालिया सरीरोगाहणा ? गोयमा ! दुविहा
 प०, तं०—भवधारणिज्जा य उत्तरवेउव्विया य, तत्थ णं जा सा भवधारणिज्जा सा
 जहन्नेणं अंगुलस्स असंखेज्जइभागं उक्कोसेणं सत्त रयणीओ, तत्थ णं जा सा उत्तर-
 वेउव्विया सा जहन्नेणं अंगुलस्स असंखेज्जइभागं उक्कोसेणं जोयणसयसहस्सं,
 तेसि णं भंते ! जीवाणं सरीरगा किंसंठिया प० ? गोयमा ! दुविहा प०, तं०—
 भवधारणिज्जा य उत्तरवेउव्विया य, तत्थ णं जे ते भवधारणिज्जा ते समच्चउरंस-
 संठाणसंठिया प०, तत्थ णं जे ते उत्तरवेउव्विया ते णाणासंठाणसंठिया प०, छेस्साओ
 चत्तारि, दिट्ठी तिबिहावि, तिन्नि णाणा नियमं, तिन्नि अन्नाणा भयणाए, जोगो तिबिहोवि,
 उवओगो दुविहोवि, चत्तारि सन्नाओ, चत्तारि कसाया, पंच ईदिया, पंच समुग्घाया,
 वेयणा दुविहावि, इत्थिवेदगावि पुरिसवेदगावि णो णपुंसगवेदगा, ठिई जहन्नेणं
 दसवाससहस्साई उक्कोसेणं साइरेणं सागरोवमं, अज्झवसाणा असंखेज्जा पसत्थावि
 अप्पसत्थावि, अणुबंधो जहा ठिई, भवादेसेणं दो भवग्गहणाई, कालादेसेणं जहण्णेणं
 दसवाससहस्साई अंतोमुहुत्तमब्भहियाई उक्कोसेणं साइरेणं सागरोवमं बावीसाए
 वाससहस्सेहिं अब्भहियं एवइयं०, एवं णववि गमा णेयव्वा नवरं मज्झि-
 ळएसु तिसु गमएसु असुरकुमारणं ठिइविसैसो जाणियव्वो सेसा ओहिया चेव

लद्धी कायसंवेहं च जाणेज्जा, सव्वत्थ दो भवग्गहणाई जाव णवमगमए कालादेसेणं जहण्णेणं साइरेगं सागरोवमं बावीसाए वाससहस्सेहिं अब्भहियं उक्कोसेणवि साइरेगं सागरोवमं बावीसाए वाससहस्सेहिं अब्भहियं एवइयं० ९ ॥ णागकुमारा णं भंते ! जे भविए पुढविकाइए एस चेव वत्तव्वया जाव भवादेसोत्ति, णवरं ठिई जहण्णेणं दसवाससहस्साई उक्कोसेणं देसणाई दो पळिओवमाई, एवं अणुबंधोवि, कालादे-
सेणं जहण्णेणं दसवाससहस्साई अंतोमुहुत्तमब्भहियाई उक्कोसेणं देसणाई दो पळि-
ओवमाई बावीसाए वाससहस्सेहिं अब्भहियाई, एवं णववि गमगा असुरकुमारगमग-
सरिसा नवरं ठिई कालादेसं च जाणेज्जा, एवं जाव थणियकुमारणं ॥ जइ वाणमंतरदे-
वेहिंतो उववज्जंति किं पिसायवाणमंतर० जाव गंधव्ववाणमंतर० ? गोयमा ! पिसाय-
वाणमंतर० जाव गंधव्ववाणमंतर०, वाणमंतरदेवे णं भंते ! जे भविए पुढविकाइए
एएसिपि असुरकुमारगमगसरिसा नव गमगा भाणियव्वा, नवरं ठिई कालादेसं च
जाणेज्जा, ठिई जहन्नेणं दसवाससहस्साई उक्कोसेणं पळिओवमं सेसं तहेव ॥ जइ
जोइसियदेवेहिंतो उववज्जंति किं चंदविमाणजोइसियदेवेहिंतो उववज्जंति जाव तारा-
विमाणजोइसियदेवेहिंतो उ० ? गोयमा ! चंदविमाण जाव उ० जाव ताराविमाण जाव
उ०, जोइसियदेवे णं भंते ! जे भविए पुढविकाइए लद्धी जहा असुरकुमारणं णवरं एगा
तेउळेसा प०, तिञ्चि णाणा तिञ्चि अन्नाणा णियमं, ठिई जहन्नेणं अट्टभागपळिओवमं
उक्कोसेणं पळिओवमं वाससयसहस्समब्भहियं एवं अणुबंधोवि, कालादेसेणं जहण्णेणं
अट्टभागपळिओवमं अंतोमुहुत्तमब्भहियं उक्कोसेणं पळिओवमं वाससयसहस्सेणं बावी-
साए वाससहस्सेहिं अब्भहियं एवइयं०, एवं सेसावि अट्ट गमगा भाणियव्वा नवरं ठिई
कालादेसं च जाणेज्जा ॥ जइ वेमाणियदेवेहिंतो उववज्जंति किं कप्पोववण्णगवेमाणिय०
कप्पातीयवेमाणिएहिंतो उ० ? गोयमा ! कप्पोववण्णगवेमाणिय जाव उ० णो कप्पाती-
तवेमाणिय जाव उ०, जइ कप्पोववन्नग जाव उ० किं सोहम्मकप्पोववण्णगवेमाणिय०
जाव अञ्चुयकप्पोववण्णगवेमाणिय जाव उ० ? गोयमा ! सोहम्मकप्पोववन्नगवेमाणिय०
ईसाणकप्पोववन्नगवेमाणिय जाव उ०, णो सणंकुमार जाव णो अञ्चुयकप्पोववण्णगवे-
माणिय जाव उ०, सोहम्मगदेवे णं भंते ! जे भविए पुढविकाइएसु उववज्जितए से णं
भंते ! केवइयं० एवं जहा जोइसियस्स गमगो णवरं ठिई अणुबंधो य जहन्नेणं पळि-
ओवमं उक्कोसेणं दो सागरोवमाई, कालादेसेणं जहण्णेणं पळिओवमं अंतोमुहुत्तमब्भ-
हियं उक्कोसेणं दो सागरोवमाई बावीसाए वाससहस्सेहिं अब्भहियाई एवइयं कालं०,
एवं सेसावि अट्ट गमगा भाणियव्वा, णवरं ठिई कालादेसं च जाणेज्जा । ईसाणदेवे णं
भंते ! जे भविए एवं ईसाणदेवेणवि णव गमगा भाणियव्वा नवरं ठिई अणुबंधो जहन्नेणं

सादरेणं पल्लिओवमं उक्कोसेणं सादरेगाइं दो सागरोवमाइं सेसं तं चेव । सेवं भंते । २ ति जाव विहरइ ॥ ७०२ ॥ **चउवीसइमे सए बारहमो उद्देसो समत्तो ॥**

आउक्काइया णं भंते ! कओहिंतो उववज्जंति ? एवं जहेव पुढविकाइयउद्देसए जाव पुढविकाइए णं भंते ! जे भविए आउक्काइएसु उववज्जितए से णं भंते ! केवइ० ? गोयमा ! जह्वेणं अंतोमुहुत्तां उक्कोसेणं सत्तवाससहस्सट्ठिईएसु उववज्जेज्जा, एवं पुढविकाइयउद्देसगसरिसो भाणियव्वो णवरं ठिइं संवेहं च जाणेज्जा, सेसं तहेव, सेवं भंते ! २ ति ॥ ७०३ ॥ **चउवीसइमे सए तेरहमो उद्देसो समत्तो ॥**

तेउक्काइया णं भंते ! कओहिंतो उववज्जंति ? एवं (णवरं) पुढविकाइयउद्देसगसरिसो उद्देसो भाणियव्वो नवरं ठिइं संवेहं च जाणेज्जा, देवेहिंतो ण उववज्जंति, सेसं तं चेव । सेवं भंते ! २ ति जाव विहरइ ॥ ७०४ ॥ **चउवीसइमस्स सयस्स चउहसमो उद्देसो समत्तो ॥**

वाउक्काइया णं भंते ! कओहिंतो उववज्जंति ? एवं जहेव तेउक्काइयउद्देसओ तहेव नवरं ठिइं संवेहं च जाणेज्जा । सेवं भंते ! २ ति ॥ ७०५ ॥ **चउवीसइमे सए पण्णरहमो उद्देसो समत्तो ॥**

वणस्सइकाइया णं भंते ! कओहिंतो उववज्जंति ? एवं पुढविकाइयसरिसो उद्देसो नवरं जाहे वणस्सइकाइया वणस्सइकाइएसु उववज्जन्ति ताहे पढमबिइयचउत्थपंचमेसु गमएसु परिमाणं अणुसमयं अविरहियं अणंता उववज्जंति, भवादेसेणं जह्वेणं दो भवग्गहणाइं उक्कोसेणं अणंताइं भवग्गहणाइं, कालादेसेणं जह्वेणं दो अंतोमुहुत्ता उक्कोसेणं अणंतं कालं एवइयं०, सेसा पंच गमा अट्ठभवग्गहणिया तहेव नवरं ठिइं संवेहं च जाणेज्जा । सेवं भंते ! २ ति ॥ ७०६ ॥ **चउवीसइमस्स सयस्स सोलहमो उद्देसो समत्तो ॥**

वेईदिया णं भंते ! कओहिंतो उववज्जंति जाव पुढविकाइए णं भंते ! जे भविए वेईदिएसु उववज्जितए से णं भंते ! केवइ० सचेव पुढविकाइयस्स लद्धी जाव कालादेसेणं जह्वेणं दो अंतोमुहुत्ता उक्कोसेणं संखेज्जाइं भवग्गहणाइं एवइयं०, एवं तेसु चेव चउसु गमएसु संवेहो सेसेसु पंचसु गमएसु तहेव अट्ठ भवा । एवं जाव चउरिदिएणं समं चउसु संखेज्जा भवा, पंचसु अट्ठ भवा, पंचिंदियतिरिक्खजोणियमणुस्सेसु समं तहेव अट्ठ भवा, देवे चेव न उववज्जंति, ठिइं संवेहं च जाणेज्जा । सेवं भंते ! २ ति ॥ ७०७ ॥ २४-१७ ॥ तेईदिया णं भंते ! कओहिंतो उववज्जंति ? एवं तेईदियाणं जहेव वेईदियाणं उद्देसो नवरं ठिइं संवेहं च जाणेज्जा, तेउक्काइएसु समं तइयगमो उक्कोसेणं अट्ठतराईं बेराईदियसयाइं वेईदिएहिं समं तइयगमे

उक्कोसेणं अडयालीसं संवच्छराईं छन्नउयराईंदियसयमम्भहियाईं तेईंदिएहिं समं तइयगमे उक्कोसेणं बाणउयाईं तिन्नि राईंदियसयाईं एवं संवत्थ जाणेज्जा जाव सन्निमणुस्सत्ति, सेवं भंते ! २ ति ॥ ७०८ ॥ २४-१८ ॥ चउरिंदिया णं भंते ! कओहिंतो उववज्जंति ? जहा तेईंदियाणं उद्देसओ तहेव चउरिंदियाणावि नवरं ठिईं संवेहं च जाणेज्जा । सेवं भंते ! सेवं भंते ! ति ॥ ७०९ ॥ २४-१९ ॥ पंचिंदिय-तिरिक्खजोणिया णं भंते ! कओहिंतो उववज्जंति किं नेरइ० तिरिक्ख० मणु० देवेहिंतो उववज्जंति ? गोयमा ! नेरइएहिंतोवि उववज्जंति तिरिक्ख० मणुस्सेहिंतोवि उ० देवेहिंतोवि उववज्जंति, जइ नेरइएहिंतो उववज्जंति किं रयणप्पभापुढविनेरइएहिंतो उववज्जंति जाव अहेसत्तमापुढविनेरइएहिंतो उववज्जंति ? गोयमा ! रयणप्पभापुढविनेरइएहिंतो उववज्जंति जाव अहेसत्तमापुढविनेरइएहिंतोवि उववज्जंति, रयणप्पभापुढविनेरइए णं भंते ! जे भविए पंचिंदियतिरिक्खजोणिएसु उववज्जित्तए से णं भंते ! केवइकालट्टिईएसु उववजेज्जा ? गोयमा ! जहन्नेणं अंतोमुहुत्तट्टिईएसु उक्कोसेणं पुव्वकोडिआउएसु उववजेज्जा, ते णं भंते ! जीवा एगसमएणं केवइया उव-वज्जंति ? एवं जहा असुरकुमाराणं वत्तव्वया नवरं संचयणे पोग्गला अणिट्ठा अकंता जाव परिणमंति, ओगाहणा दुविहा प०, तं०-भवधारणिज्जा य उत्तरवेउव्विया य, तत्थ णं जा सा भवधारणिज्जा सा जहन्णेणं अंगुलस्स असंखेज्जइभागं उक्कोसेणं सत्त धणूइं तिन्नि रयणीओ छब्बंगुलाईं, तत्थ णं जा सा उत्तरवेउव्विया सा जहन्नेणं अंगुलस्स संखेज्जइभागं उक्कोसेणं पन्नरस धणूइं अट्ठाइज्जाओ रयणीओ, तेसि णं भंते ! जीवाणं सरीरगा किंसंठिया प० ? गोयमा ! दुविहा प०, तं०-भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंडसंठिया प०, तत्थ णं जे ते उत्तरवेउव्विया तेवि हुंडसंठिया प०, एगा काउलेस्सा प०, समुग्धाया चत्तारि, णो इत्थिवेदगा णो पुरिसवेदगा णपुंसगवेदगा, ठिई जहन्नेणं दसवाससहस्साईं उक्कोसेणं सागरोवमं एवं अणुबंधोवि, सेसं तहेव, भवादेसेणं जहन्णेणं दो भवग्ग-हणाईं उक्कोसेणं अट्ठ भवग्गहणाईं, कालादेसेणं जहन्नेणं दसवाससहस्साईं अंतो-मुहुत्तमम्भहियाईं उक्कोसेणं चत्तारि सागरोवमाईं चउहिं पुव्वकोडीहिं अब्भहियाईं एवइयं०, सो चेव जहन्नकालट्टिईएसु उववज्जो जहन्नेणं अंतोमुहुत्तट्टिईएसु उववजेज्जा, उक्कोसेणावि अंतोमुहुत्तट्टिईएसु अवसेसं तहेव, नवरं कालादेसेणं जहन्नेणं तहेव उक्कोसेणं चत्तारि सागरोवमाईं चउहिं अंतोमुहुत्तेहिं अब्भहियाईं एवइयं कालं २, एवं सेसावि सत्त गमगा भाणियव्वा जहेव नेरइयउद्देसए सन्निपंचिंदिए(णं)हिं समं णेरइयाणं मज्झिमएसु य तिसुवि गमएसु पच्छिमएसु तिसुवि गमएसु ठिइणाणत्तं

भवइ, सेसं तं चेव सव्वत्थ ठिई संवेहं च जाणेजा ९ ॥ सक्करप्पभापुढविनेरइए णं भंते । जे भविए एवं जहा रयणप्पभाए णव गमगा तहेव सक्करप्पभाएवि, नवरं सरी-
 रोगाहणा जहा ओगाहणासंठाणे, तिच्चि णाणा तिच्चि अन्नाणा नियमं, ठिई अणुबंधो य
 पुव्वभणिया, एवं णववि गमगा उवजुंजिऊण भाणियव्वा, एवं जाव छट्ठपुढवी,
 नवरं ओगाहणा लेस्सा ठिई अणुबंधो संवेहो य जाणियव्वा, अहेसत्तमापुढवी-
 नेरइए णं भंते । जे भविए एवं चेव णव गमगा, णवरं ओगाहणा लेस्सा ठिई
 अणुबंधा जाणियव्वा, संवेहो भवादेसेणं जहण्णेणं दो भवग्गहणाई उक्कोसेणं छम्भव-
 ग्गहणाई, कालादेसेणं जहण्णेणं बावीसं सागरोवमाई अंतोमुहुत्तमब्भहियाई उक्कोसेणं
 छावट्ठि सागरोवमाई तिहिं पुव्वकोडीहिं अब्भहियाई एवइयं०, आइल्लएसु छसुवि गम-
 एसु जह्जेणं दो भवग्गहणाई उक्कोसेणं छ भवग्गहणाई, पच्चिल्लएसु तिसु गमएसु जह-
 ज्जेणं दो भवग्गहणाई उक्कोसेणं चत्तारि भवग्गहणाई, लद्धी नवसुवि गमएसु जहा
 षडमगमए नवरं ठिईविसेसो कालादे(सेणं)सो य विइयगमए जह्जेणं बावीसं
 सागरोवमाई अंतोमुहुत्तमब्भहियाई उक्कोसेणं छावट्ठि सागरोवमाई तिहिं अंतोमुहुत्तेहिं
 अब्भहियाई एवइयं कालं०, तइयगमए जह्जेणं बावीसं सागरोवमाई पुव्वकोडीए
 अब्भहियाई उक्कोसेणं छावट्ठि सागरोवमाई तिहिं पुव्वकोडीहिं अब्भहियाई, चउ-
 रयगमए जह्जेणं बावीसं सागरोवमाई अंतोमुहुत्तमब्भहियाई उक्कोसेणं छावट्ठि
 सागरोवमाई तिहिं पुव्वकोडीहिं अब्भहियाई, पंचमगमए जह्जेणं बावीसं सागरोव-
 माई अंतोमुहुत्तमब्भहियाई उक्कोसेणं छावट्ठि सागरोवमाई तिहिं अंतोमुहुत्तेहिं
 अब्भहियाई, छट्ठमगमए जह्जेणं बावीसं सागरोवमाई पुव्वकोडीहिं अब्भहियाई
 उक्कोसेणं छावट्ठि सागरोवमाई तिहिं पुव्वकोडीहिं अब्भहियाई, सत्तमगमए जह्जेणं
 तेत्तीसं सागरोवमाई अंतोमुहुत्तमब्भहियाई उक्कोसेणं छावट्ठि सागरोवमाई दोहिं
 (अंतोमुहुत्तेहिं) पुव्वकोडीहिं अब्भहियाई, अट्ठमगमए जह्जेणं तेत्तीसं सागरोवमाई
 अंतोमुहुत्तमब्भहियाई उक्कोसेणं छावट्ठि सागरोवमाई दोहिं अंतोमुहुत्तेहिं अब्भहियाई,
 णवमगमए जह्जेणं तेत्तीसं सागरोवमाई पुव्वकोडीए अब्भहियाई उक्कोसेणं छावट्ठि
 सागरोवमाई दोहिं पुव्वकोडीहिं अब्भहियाई एवइयं० ९ ॥ जइ तिरिक्खजोणिएहिंतो
 उववज्जंति किं एगिंदियतिरिक्खजोणिएहिंतो उ० एवं उववाओ जहा पुढविकाइयउदेसए
 जाव पुढविकाइए णं भंते ! जे भविए पंचिंदियतिरिक्खजोणिएसु उववज्जितए से
 णं भंते ! केवइ० ? गोयमा ! जह्जेणं अंतोमुहुत्तट्ठिईएसु उक्कोसेणं पुव्वकोडीआउ-
 एसु उववज्जेजा, ते णं भंते ! जीवा एवं परिमाणादीया अणुबंधपज्जसाणा जच्चेव
 अप्पणो सट्ठणे वतव्वया सच्चेव पंचिंदियतिरिक्खजोणिएसुवि उववज्जमाणस्स

भाणियव्वा णवरं णवसुवि गमएसु परिमाणो जहन्नेणं एको वा दो वा तिञ्चि वा उक्कोसेणं संखेज्जा वा असंखेज्जा वा उववज्जंति, भवादेसेणवि णवसुवि गमएसु जहन्नेणं दो भवग्गहणाई उक्कोसेणं अट्ठ भवग्गहणाई, सेसं तं चेव, कालादेसेणं उभओ ठि(ई)ई पकरेज्जा । जइ आउक्काइएहिंतो उववज्जन्ति एवं आउक्काइ(ए)याणवि एवं जाव चउरिंदिया उववाएयव्वा, नवरं सव्वत्थ अप्पणो लद्धी भाणियव्वा, णवसुवि गमएसु भवादेसेणं जहन्नेणं दो भवग्गहणाई उक्कोसेणं अट्ठ भवग्गहणाई, कालादेसेणं उभओ ठिई करेज्जा सव्वेसिं सव्वगमएसु, जहेव पुढविकाइएसु उववज्जमाणानं लद्धी तहेव सव्वत्थ ठिई संवेहं च जाणेज्जा ॥ जइ पंचिंदियतिरिक्खजोणिएहिंतो उववज्जंति किं सन्निपंचिंदियतिरिक्खजोणिएहिंतो उववज्जंति असन्निपंचिंदियतिरिक्खजोणिएहिंतो उववज्जंति ? गोयमा ! सन्निपंचिंदिय० असन्निपंचिंदिय०, भेदो जहेव पुढविकाइएसु उववज्जमाणस्स जाव असन्निपंचिंदियतिरिक्खजोणिए णं भंते ! जे भविए पंचिंदियतिरिक्खजोणिएसु उववज्जितए से णं भंते ! केवइकाल० ? गोयमा ! जहन्नेणं अंतोमुहुतं उक्कोसेणं पलिओवमस्स असंखेज्जइभागट्ठिईएसु उवव०, ते णं भंते ! अवसेसं जहेव पुढविकाइएसु उववज्जमाणस्स असन्निस्स तहेव निरवसेसं जाव भवादेसोत्ति, कालादेसेणं जहन्नेणं दो अंतोमुहुत्ता उक्कोसेणं पलिओवमस्स असंखेज्जइभागं पुव्वकोडिपुहुत्तमब्भहियं एवइयं० १, विइयगमए एस चेव लद्धी नवरं कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तोहिं अब्भहियाओ एवइयं० २, सो चेव उक्कोसकालट्ठिईएसु उववज्जो जहन्नेणं पलिओवमस्स असंखेज्जइभागट्ठिईएसु उक्कोसेणवि पलिओवमस्स असंखेज्जइभागट्ठिईएसु उववज्जइ, ते णं भंते ! जीवा एवं जहा रयणप्पभाए उववज्जमाणस्स असन्निस्स तहेव निरवसेसं जाव कालादेसोत्ति, नवरं परिमाणं जहन्नेणं एको वा दो वा तिञ्चि वा उक्कोसेणं संखेज्जा उववज्जंति, सेसं तं चेव ३, सो चेव अप्पणा जहन्नकालट्ठिईओ जाओ जहन्नेणं अंतोमुहुत्तट्ठिईएसु उक्कोसेणं पुव्वकोडिआउएसु उववजेज्जा, ते णं भंते ! अवसेसं जहा एसस्स पुढविकाइएसु उववज्जमाणस्स मज्झिमेसु तिसु गमएसु तहा इहवि मज्झिमेसु तिसु गमएसु जाव अणुबंयोत्ति, भवादेसेणं जहन्नेणं दो भवग्गहणाई उक्कोसेणं अट्ठ भवग्गहणाई, कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तोहिं अब्भहियाओ ४, सो चेव जहन्नकालट्ठिईएसु उववज्जो एस चेव वत्तव्वया नवरं कालादेसेणं जहन्नेणं दो अंतोमुहुत्ता उक्कोसेणं अट्ठ अंतोमुहुत्ता एवइयं० ५, सो चेव उक्कोसकालट्ठिईएसु उववज्जो जहन्नेणं पुव्वकोडिआउएसु उक्कोसेणवि पुव्वकोडिआउएसु उववजेज्जा, एस चेव वत्तव्वया नवरं कालादेसेणं जाणेज्जा ६, सो चेव

अप्पणा उक्कोसकालट्ठिईओ जाओ सचेव पढमगमगवत्तव्वया नवरं ठिई जहण्णेणं पुव्वकोडी उक्कोसेणवि पुव्वकोडी सेसं तं चेव, कालादेसेणं जहण्णेणं पुव्वकोडी अंतोमुहुत्तमब्भहिया उक्कोसेणं पलिओवमस्स असंखेज्जभागं पुव्वकोडिपुहुत्तमब्भहियं एवइयं ७, सो चेव जहन्नकालट्ठिईएस उववन्नो एस चेव वत्तव्वया जहा सत्तमगमए नवरं कालादेसेणं जहन्नेणं पुव्वकोडी अंतोमुहुत्तमब्भहिया उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ एवइयं ८, सो चेव उक्कोसकालट्ठिईएस उववन्नो जहन्नेणं पलिओवमस्स असंखेज्जभागं उक्कोसेणवि पलिओवमस्स असंखेज्जभागं, एवं जहा रयणप्पभाए उववज्जमाणस्स असन्नस्स नवमगमए तहेव निरवसेसं जाव कालादेसोत्ति, नवरं परिमाणं जहा एयस्सेव तइयगमे सेसं तं चेव ९॥ जइ सन्निपंचिदियतिरिक्खजोणिएहिंतो उववज्जंति किं संखेज्जवासा० असंखेज्जवासा० ? गोयमा ! संखेज्ज० णो असंखेज्ज०, जइ संखेज्जवासाउय जाव किं पज्जत्तसंखेज्ज० अपज्जत्तसंखेज्ज० ? दोसुवि, संखेज्जवासाउयसन्निपंचिदियतिरिक्खजोणि ए णं भंते ! जे भविए पंचिदियतिरिक्खजोणिएस उववज्जितए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं तिपलिओवमट्ठिईएस उववज्जेज्जा, ते णं भंते ! अवसेसं जहा एयस्स चेव सन्नस्स रयणप्पभाए उववज्जमाणस्स पढमगमए, नवरं ओगाहणा जहन्नेणं अंगुलस्स असंखेज्जभागं उक्कोसेणं जोअणसहस्सं सेसं तं चेव जाव भवादेसोत्ति, कालादेसेणं जहन्नेणं दो अंतोमुहुत्ता उक्कोसेणं तिन्नि पलिओवमाई पुव्वकोडीपुहुत्तमब्भहियाई एवइयं १, सो चेव जहन्नकालट्ठिईएस उववन्नो एस चेव वत्तव्वया नवरं कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ २, सो चेव उक्कोसकालट्ठिईएस उववण्णो जहण्णेणं तिपलिओवमट्ठिईएस उक्कोसेणवि तिपलिओवमट्ठिईएस उववज्जेज्जा, एस चेव वत्तव्वया नवरं परिमाणं जहन्नेणं एको वा दो वा तिन्नि वा उक्कोसेणं संखेज्जा उववज्जंति, ओगाहणा जहन्नेणं अंगुलस्स असंखेज्जभागं उक्कोसेणं जोयणसहस्सं सेसं तं चेव जाव अणुबंधोत्ति, भवादेसेणं दो भवंगगहणाई, कालादेसेणं जहन्नेणं तिन्नि पलिओवमाई अंतोमुहुत्तमब्भहियाई उक्कोसेणं तिन्नि पलिओवमाई पुव्वकोडीए अब्भहियाई ३, सो चेव अप्पणा जहन्नकालट्ठिईओ जाओ जहण्णेणं अंतोमुहुत्तं उक्कोसेणं पुव्वकोडिआउएस उववज्जेज्जा, लद्धी से जहा एयस्स चेव सन्निपंचिदियस्स पुढविक्काइएस उववज्जमाणस्स मज्झिअएस तिसु गमएस सच्चेव इहवि मज्झिमेअ तिसु गमएस कायव्वा, संवेहो जहेव एत्थ चेव असन्नस्स मज्झिमेअ तिसु गमएस, सो चेव अप्पणा उक्कोसकालट्ठिईओ जाओ जहा पढमगमए नवरं

ठिई अणुबंधो जहन्नेणं पुव्वकोडी उक्कोसेणवि पुव्वकोडी, कालादेसेणं जहन्नेणं पुव्वकोडी अंतोमुहुत्तमब्भहिया उक्कोसेणं तिन्नि पलिओवमाई पुव्वकोडीपुहुत्तमब्भहियाई ७, सो चेव जहन्नकालट्ठिईएसु उववन्नो एस चेव वत्तव्वया नवरं कालादेसेणं जहन्नेणं पुव्वकोडी अंतोमुहुत्तमब्भहिया उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ ८, सो चेव उक्कोसकालट्ठिईएसु उववन्नो जहन्नेणं तिपलिओवमट्ठिईएसु उक्कोसेणवि तिपलिओवमट्ठिईएसु अवसेसं तं चेव, नवरं परिमाणं ओगाहणा य जहा एयस्सेव तइयगमए, भवादेसेणं दो भवग्गहणाई, कालादेसेणं जहन्नेणं तिन्नि पलिओवमाई पुव्वकोडीए अब्भहियाई उक्कोसेणवि तिन्नि पलिओवमाई पुव्वकोडीए अब्भहियाई एवइयं ० ९॥ जइ मणुस्सेहिंतो उववज्जंति किं सन्निमणु० असन्निमणु० ? गोयमा ! सन्निमणु० असन्निमणु०, असन्निमणुस्से णं भंते ! जे भविए पंचिंदियतिरिक्खजोणिएसु उववज्जितए से णं भंते ! केवइकाल० ? गोयमा ! जहन्नेणं अंतोमुहुत्तं उक्कोसेणं पुव्वकोडीआउएसु उववज्जंति, लद्धी से तिसुवि गमएसु जहा पुढविकाइएसु उववज्जमाणस्स संवेहो जहा एत्थ चेव असन्निपंचिंदियस्स मज्झिमेसु तिसु गमएसु तहेव निरवसेसो भाणियव्वो, जइ सन्निमणुस्स० किं संखेज्जवासाउयसन्निमणुस्स० असंखेज्जवासाउयसण्णिमणुस्स० ? गोयमा ! संखेज्जवासाउय० नो असंखेज्जवासाउय०, जइ संखेज्ज० किं पज्जत० अपज्जत० ? गोयमा ! पज्जत० अपज्जत० संखेज्जवासाउय०, सन्निमणुस्से णं भंते ! जे भविए पंचिंदियतिरिक्खजोणिएसु उववज्जितए से णं भंते ! केवइ० ? गोयमा ! जहन्नेणं अंतोमुहुत्तं उक्कोसेणं तिपलिओवमट्ठिईएसु उववज्जेज्जा, ते णं भंते ! लद्धी से जहा एयस्सेव सन्निमणुस्सस्स पुढविकाइएसु उववज्जमाणस्स पढमगमए जाव भवादेसोत्ति, कालादेसेणं जहन्नेणं दो अंतोमुहुत्ता उक्कोसेणं तिन्नि पलिओवमाई पुव्वकोडिपुहुत्तमब्भहियाई १, सो चेव जहन्नकालट्ठिईएसु उववन्नो एस चेव वत्तव्वया णवरं कालादेसेणं जहन्नेणं दो अंतोमुहुत्ता उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ २, सो चेव उक्कोसकालट्ठिईएसु उववन्नो जहन्नेणं ति(ण्णि)पलिओवमट्ठिईएसु उक्कोसेणवि तिपलिओवमट्ठिईएसु सच्चेव वत्तव्वया नवरं ओगाहणा जहन्नेणं अंगुलपुहुत्तं उक्कोसेणं पंच धणुहसयाई, ठिई जहन्नेणं मासपुहुत्तं उक्कोसेणं पुव्वकोडी एवं अणुबंधोवि, भवादेसेणं दो भवग्गहणाई, कालादेसेणं जहन्नेणं तिन्नि पलिओवमाई मासपुहुत्तमब्भहियाई उक्कोसेणं तिन्नि पलिओवमाई पुव्वकोडीए अब्भहियाई एवइयं ० ३, सो चेव अप्पणा जहन्नकालट्ठिईओ जाओ जहा सन्निपंचिंदियतिरिक्खजोणियस्स पंचिंदियतिरिक्खजोणिएसु उववज्जमाणस्स मज्झिमेसु तिसु गमएसु वत्तव्वया भाणिया सच्चेव

एयस्सवि मज्झिमेसु तिसु गमएसु निरवसेसा भाणियव्वा, नवरं परिमाणं उक्कोसेणं संखेज्जा उववज्जंति, सेसं तं चेव ६, सो चेव अप्पणा उक्कोसकालट्टिईओ जाओ सच्चैव पढमगमगवत्तव्वया नवरं ओगाहणा जहण्णेणं पंच धणुहसयाई उक्कोसेणवि पंच धणुहसयाई, ठिई अणुबंधो जहण्णेणं पुव्वकोडी उक्कोसेणवि पुव्वकोडी, सेसं तहेव जाव भवादेसोत्ति, कालादेसेणं जहण्णेणं पुव्वकोडी अंतोमुहुत्तमब्भहिया उक्कोसेणं तिज्जि पलिओवमाई पुव्वकोडिपुहुत्तमब्भहियाई एवइयं० ७, सो चेव जह्वकाल-ट्टिईएसु उववन्नो एस चेव वत्तव्वया नवरं कालादेसेणं जहण्णेणं पुव्वकोडी अंतोमुहु-त्तमब्भहिया उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ ८, सो चेव उक्कोसकालट्टिईएसु उववन्नो जहण्णेणं तिज्जि पलिओवमाई उक्कोसेणवि तिज्जि पलि-ओवमाई, एस चेव लद्धी जहेव सत्तमगमए, भवादेसेणं दो भवग्गहणाई, कालादेसेणं जह्वेणं तिज्जि पलिओवमाई पुव्वकोडीए अब्भहियाई उक्कोसेणवि तिज्जि पलिओवमाई पुव्वकोडीए अब्भहियाई एवइयं० ९ ॥ जइ देवेहिंतो उववज्जंति किं भवणवासिदे-वेहिंतो उववज्जंति वाणमंतरं जोइसियं वेमाणियदेवेहिंतो उ० ? गोयमा ! भवण-वासिदेवेहिंतो उ० जाव वेमाणियदेवेहिंतोवि उ०, जइ भवणवासि जाव उ० किं असुर-कुमारभवणं जाव थणियकुमारभवणं ? गोयमा ! असुरकुमारं जाव थणियकुमार-भवणं, असुरकुमारेणं भंते ! जे भविए पंचिदियतिरिक्खजोणिएसु उववज्जितए से णं भंते ! केवइयं० ? गोयमा ! जह्वेणं अंतोमुहुत्तट्टिईएसु उक्कोसेणं पुव्वकोडिआउएसु उववज्जेज्जा, असुरकुमारणं लद्धी णवसुवि गमएसु जहा पुढविकाइएसु उववज्जमाणस्स एवं जाव ईसाणदेवस्स तहेव लद्धी भवादेसेणं सव्वत्थ अट्ठ भवग्गहणाई उक्कोसेणं जहण्णेणं दोज्जि, भवट्टिई संवेहं च सव्वत्थ जाणेज्जा ९॥ नागकुमारा णं भंते ! जे भविए एस चेव वत्तव्वया नवरं ठिई संवेहं च जाणेज्जा, एवं जाव थणियकुमारे ९। जइ वाणमंतरेहिंतो उ० किं पिसायं तहेव जाव वाणमंतरे णं भंते ! जे भविए पंचिदियतिरिक्खं एवं चेव नवरं ठिई संवेहं च जाणेज्जा ९, जइ जोइसियं उववाओ तहेव जाव जोइसिए णं भंते ! जे भविए पंचिदियतिरिक्खं एस चेव वत्तव्वया जहा पुढविकाइयउद्देसए भवग्गहणाई णवसुवि गमएसु अट्ठ जाव कालादेसेणं जह्वेणं अट्ठ-भागपलिओवमं अंतोमुहुत्तमब्भहियं उक्कोसेणं चत्तारि पलिओवमाई चउहिं पुव्वको-डीहिं चउहिं य वाससयसहस्सेहिं अब्भहियाई एवइयं०, एवं नवसुवि गमएसु नवरं ठिई संवेहं च जाणेज्जा ९॥ जइ वेमाणियदेवे० किं कप्पोववन्नगं कप्पातीतवेमाणियं ? गोयमा ! कप्पोववण्णगवेमाणियं नो कप्पातीतवेमाणियं, जइ कप्पोववण्णगं जाव सहस्सारकप्पोववण्णगवेमाणियदेवेहिंतोवि उववज्जंति, नो आणय जाव णो

अञ्चयकप्पोववण्णगवेमाणिय०, सोहम्मगदेवे णं भंते ! जे भविए पंचिंदियतिरिक्ख-
जोणिएसु उववज्जितए से णं भंते ! केवइ० ? गोयमा ! जहण्णेणं अंतोमुहुत्त०
उक्कोसेणं पुव्वकोडिआउएसु सेसं जहेव पुढविकाइयउइएसए नवसुवि गमएसु नवरं
नवसुवि गमएसु जहणेणं दो भवग्गहणाई उक्कोसेणं अट्ठ भवग्गहणाई, ठिई काला-
देसं च जाणेज्जा, एवं ईसाणदेवेवि, एवं एएणं कमेणं अवसेसावि जाव सहस्सार-
देवेसु उववाएयव्वा नवरं ओगाहणा जहा ओगाहणासंठाणे, छेस्सा सणकुमार-
माहिंदवंभलोएसु एगा पम्हलेस्सा सेसाणं एगा सुक्कलेस्सा, वेदे नो इत्थिवेदगा
पुरिसवेदगा णो नपुंसगवेदगा, आउअणुबंधा जहा ठिइपदे सेसं जहेव ईसाणगाणं
कायसंवेहं च जाणेज्जा । सेवं भंते ! सेवं भंते ! त्ति ॥ ७१० ॥ **चउवीसइमे सए
वीसइमो उदेसो समत्तो ॥**

मणुस्सा णं भंते ! कओहिंतो उववज्जंति किं नेरइएहिंतो उववज्जंति जाव
देवेहिंतो उववज्जंति ? गोयमा ! नेरइएहिंतोवि उववज्जंति जाव देवेहिंतोवि उवव-
ज्जंति, एवं उववाओ जहा पंचिंदियतिरिक्खजोणियउइएसए जाव तमापुढविनेरइएहिं-
तोवि उववज्जंति णो अहेसत्तमापुढविनेरइएहिंतो उववज्जंति, रयणप्पभापुढविनेरइए
णं भंते ! जे भविए मणुस्सेसु उववज्जितए से णं भंते ! केवइकाल० ? गोयमा !
जहण्णेणं मासपुहुत्तट्ठिईएसु उक्कोसेणं पुव्वकोडीआउएसु अवसेसा वत्तव्वया जहा
पंचिंदियतिरिक्खजोणिए उववज्जंतस्स तहेव नवरं परिमाणे जहण्णेणं एक्को वा दो
वा तिन्नि वा उक्कोसेणं संखेज्जा उववज्जंति, जहा तहिं अंतोमुहुत्तोहिं तथा इहं मास-
पुहुत्तोहिं संवेहं करेज्जा सेसं तं चेव ९ ॥ जहा रयणप्पभाए वत्तव्वया तथा सक्कर-
प्पभाएवि वत्तव्वया नवरं जहणेणं वासपुहुत्तट्ठिईएसु उक्कोसेणं पुव्वकोडि०, ओगा-
हणाछेस्साणाणट्ठिइअणुबंधसंवेहं णाणत्तं च जाणेज्जा जहेव तिरिक्खजोणियउइएसए
एवं जाव तमापुढविनेरइए ९ ॥ जइ तिरिक्खजोणिएहिंतो उववज्जंति किं एगिंदि-
यतिरिक्खजोणिएहिंतो उववज्जंति जाव पंचिंदियतिरिक्खजोणिएहिंतो उववज्जंति ?
गोयमा ! एगिंदियतिरिक्खजोणिए० भेदो जहा पंचिंदियतिरिक्खजोणियउइएसए नवरं
तेउवाऊ पडिसेहेयव्वा, सेसं तं चेव जाव पुढविकाइए णं भंते ! जे भविए
मणुस्सेसु उववज्जितए से णं भंते ! केवइ० ? गोयमा ! जहणेणं अंतोमुहुत्तट्ठिईएसु
उक्कोसेणं पुव्वकोडीआउएसु उववज्जेज्जा, ते णं भंते ! जीवा एवं जचेव पंचिंदियति-
रिक्खजोणिएसु उववज्जमाणस्स पुढविकाइयस्स वत्तव्वया सा चेव इहवि उववज्ज-
माणस्स भाणियव्वा णवसुवि गमएसु, नवरं तइयल्लट्ठणवमेसु गमएसु परिमाणं
जहणेणं एक्को वा दो वा तिन्नि वा उक्कोसेणं संखेज्जा उववज्जंति, जाहे अप्पणा

जहन्नकालट्टिईओ भवइ ताहे पढमगमए अज्झवसाणा पसत्थावि अप्पसत्थावि, विइयगमए अप्पसत्था, तइयगमए पसत्था भवन्ति सेसं तं चेव निरवसेसं ९ ॥ जइ आउक्काइए एवं आउक्काइयाणवि, एवं वणस्सइकाइयाणवि, एवं जाव चउरिंदियाणवि, असन्निपंचिंदियतिरिक्खजोणिया सन्निपंचिंदियतिरिक्खजोणिया असन्निमणुस्सा सन्निमणुस्सा य एए सव्वेवि जहा पंचिंदियतिरिक्खजोणियउद्देसए तहेव भाणियव्वा, नवरं एयाणि चेव परिमाणअज्झवसाणणाणत्ताणि जाणिज्जा, पुढविकाइयस्स एत्थ चेव उद्देसए भणियाणि सेसं तहेव निरवसेसं ॥ जइ देवेहिंतो उववज्जंति किं भवणवासिदेवेहिंतो उववज्जंति वाणमंतरं० जोइसियं० वेमाणियदेवेहिंतो उववज्जंति ? गोयमा ! भवणवासिं० जाव वेमाणिय जाव उ०, जइ भवणं० किं असुरं० जाव थणियं ? गोयमा ! असुरं० जाव थणियं, असुरकुमारे णं भंते ! जे भविए मणुस्सेसु उववज्जितए से णं भंते ! केवइं ? गोयमा ! जहण्णेणं मासपुहुत्तट्टिईएसु उक्कोसेणं पुव्वकोडिआउएसु उववज्जेज्जा, एवं जच्चेव पंचिंदियतिरिक्खजोणियउद्देसए वत्तव्वया सच्चेव एत्थवि भाणियव्वा, नवरं जहा तहिं जहन्नगं अंतोमुहुत्तट्टिईएसु तहा इहं मासपुहुत्तट्टिईएसु, परिमाणं जहन्नेणं एक्को वा दो वा तिन्नि वा उक्कोसेणं संखेज्जा उववज्जंति, सेसं तं चेव, एवं जाव ईसाणदेवोत्ति, एयाणि चेव पाणत्ताणि सणकुमारादीया जाव सहस्सारोत्ति जहेव पंचिंदियतिरिक्खजोणियउद्देसए, नवरं परिमाणं जहण्णेणं एक्को वा दो वा तिन्नि वा उक्कोसेणं संखेज्जा उववज्जंति, उववाओ जहन्नेणं वासपुहुत्तट्टिईएसु उक्कोसेणं पुव्वकोडिआउएसु उववज्जंति, सेसं तं चेव संवेहं वा(मा)सपुहुत्तपुव्वकोडीसु करेज्जा ॥ सणकुमारे टिई चउगुणिया अट्ठावीसं सागरोवमा भवन्ति, माहिंदे ताणि चेव साइरेगाणि, बंभलोए चत्तालीसं, लंतए छप्पन्नं, महासुक्के अट्ठसट्ठि, सहस्सारे बावत्तरिं सागरोवमाइं एसा उक्कोसा टिई भाणियव्वा जहन्नट्टिइं चउ गुणेज्जा ९ ॥ आणयदेवे णं भंते ! जे भविए मणुस्सेसु उववज्जितए से णं भंते ! केवइं ? गोयमा ! जहन्नेणं वासपुहुत्तट्टिईएसु उववज्जेज्जा उक्कोसेणं पुव्वकोडिटिईएसु, ते णं भंते ! एवं जहेव सहस्सारदेवाणं वत्तव्वया नवरं ओगाहणा टिई अणुबंधो य जाणेज्जा, सेसं तं चेव, भवादेसेणं जहन्नेणं दो भवगहणाइं उक्कोसेणं छ भवगहणाइं, कालादेसेणं जहन्नेणं अट्ठारस सागरोवमाइं वासपुहुत्तमब्भहियाइं उक्कोसेणं सत्तावच्चं सागरोवमाइं तिहिं पुव्वकोडीहिं अब्भहियाइं एवइयं कालं०, एवं णववि गमगा, नवरं टिई अणुबंधं संवेहं च जाणेज्जा, एवं जाव अन्नयदेवो, नवरं टिई अणुबंधं संवेहं च जाणेज्जा, पाणयदेवस्स टिई तिगुणिया सट्ठि सागरोवमाइं, आरणगस्स तेवट्ठि सागरोवमाइं, अन्नयदेवस्स छावट्ठि सागरो-

वमाई ॥ जइ कप्पातीतवेमाणियदेवेहिंतो उववज्जंति किं गेवेज्जकप्पातीत० अणुत्त-
 रोववाइयकप्पातीत जाव उ० ? गोयमा ! गेवेज्ज० अणुत्तरोववाइय०, जइ गेवेज्ज० किं
 हेट्ठिम २ गेविज्जगकप्पातीत० जाव उवरिम २ गेवेज्ज० ? गोयमा ! हेट्ठिम २ गेवेज्ज०
 जाव उवरिम २ गेवेज्ज०, गेवेज्जगदेवे णं भंते ! जे भविए मणुस्सेसु उववज्जित्तए से णं
 भंते ! केवइकाल० ? गोयमा ! जहण्णेणं वासपुहुत्तट्ठिईएसु उक्कोसेणं पुव्वकोडिआउएसु
 उ० अवसेसं जहा आणयदेवस्स वत्तव्वया नवरं ओगाहणा० गोयमा ! एगे भवधा-
 रणिजे सरीरए से जहन्नेणं अंगुलस्स असंखेज्जइभागं उक्कोसेणं दो रयणीओ, संठाणं,
 गोयमा ! एगे भवधारणिजे सरीरए से समच्चउरंससंठाणसंठिए प०, पंच समुग्घाया
 प०, तं०— वेयणासमुग्घाए जाव तेयगसमुग्घाए णो चेव णं वेउव्वियत्तेयगसमुग्घा-
 एहिंतो समोहणिसु वा समोहणंति वा समोहणिस्संति वा, ठिई अणुबंधो जहन्नेणं
 बावीसं सागरोवमाई उक्कोसेणं एकतीसं सागरोवमाई, सेसं तं चेव, कालादेसेणं जहण्णेणं
 बावीसं सागरोवमाई वासपुहुत्तमब्भहियाई उक्कोसेणं तेणउई सागरोवमाई तिहिं पुव्व-
 कोडीहिं अब्भहियाई एवइयं०, एवं सेसेसुवि अट्ठगमएसु नवरं ठिई संवेहं च जाणेज्जा
 ९॥ जइ अणुत्तरोववाइयकप्पातीतवेमाणिय जाव उ० किं विजयअणुत्तरोववाइय०
 वेजयंतअणुत्तरोववाइय० जाव सव्वट्ठसिद्ध० ? गोयमा ! विजयअणुत्तरोववाइय०
 जाव सव्वट्ठसिद्धअणुत्तरोववाइय०, विजयवेजयंतजयंतअपराजियदेवे णं भंते ! जे
 भविए मणुस्सेसु उववज्जित्तए से णं भंते ! केवइ० ? एवं जहेव गेवेज्जगदेवाणं नवरं
 ओगाहणा जहण्णेणं अंगुलस्स असंखेज्जइभागं उक्कोसेणं एगा रयणी, सम्महिट्ठी
 णो मिच्छादिट्ठी णो सम्मामिच्छादिट्ठी, णाणी णो अच्चाणी नियमं तिच्चाणी तं०—
 आभिणिबोहियनाणी सुयनाणी ओहिणाणी, ठिई जहन्नेणं एकतीसं सागरोवमाई
 उक्कोसेणं तेत्तीसं सागरोवमाई, सेसं तहेव, भवादेसेणं जहण्णेणं दो भवग्गहणाई
 उक्कोसेणं चत्तारि भवग्गहणाई, कालादेसेणं जहण्णेणं एकतीसं सागरोवमाई वास-
 पुहुत्तमब्भहियाई उक्कोसेणं छावट्ठिं सागरोवमाई दोहिं पुव्वकोडीहिं अब्भहियाई
 एवइयं०, एवं सेसावि अट्ठगमगा भाणियव्वा नवरं ठिई अणुबंधं संवेहं च जाणेज्जा
 सेसं तं चेव ॥ सव्वट्ठसिद्धगदेवे णं भंते ! जे भविए मणुस्सेसु उववज्जित्तए सा
 चेव विजयादिदेववत्तव्वया भाणियव्वा णवरं ठिई अजहन्नमणुक्कोसेणं तेत्तीसं साग-
 रोवमाई एवं अणुबंधोवि, सेसं तं चेव, भवादेसेणं दो भवग्गहणाई, कालादेसेणं
 जहन्नेणं तेत्तीसं सागरोवमाई वासपुहुत्तमब्भहियाई उक्कोसेणं तेत्तीसं सागरोवमाई
 पुव्वकोडीए अब्भहियाई एवइयं० १। सो चेव जहन्नकालट्ठिईएसु उववन्नो एस चेव
 वत्तव्वया नवरं कालादेसेणं जहन्नेणं तेत्तीसं सागरोवमाई वासपुहुत्तमब्भहियाई

उक्कोसेणवि तेत्तीसं सागरोवमाई वासपुहुत्तमब्भहियाई एवइयं० २ । सो चेव उक्कोसकालट्टिईएसु उववन्नो एस चेव वत्तव्वया, नवरं कालादेसेणं जहण्णेणं तेत्तीसं सागरोवमाई पुव्वकोडीए अब्भहियाई उक्कोसेणवि तेत्तीसं सागरोवमाई पुव्वकोडीए अब्भहियाई एवइयं० ३, एए चेव तिन्नि गमगा सेसा न भण्णंति । सेवं भंते ! २ ति ॥ ७११ ॥ चउवीसइमे सए एकवीसइमो उहेसो समत्तो ॥

वाणमन्तराणं भंते ! कओहिंतो उववज्जंति किं नेरइएहिंतो उववज्जंति तिरिक्ख० एवं जहेव णागकुमारउहेसए असन्नी तहेव निरवसेसं । जइ सन्निपंचिदिय० जाव असंखेज्जवासाउयसन्निपंचिदिय० जे भविए वाणमंतर० से णं भंते ! केवइ० ? गोयमा ! जहन्नेणं दसवाससहस्सट्टिईएसु उक्कोसेणं पलिओवमट्टिईएसु सेसं तं चेव जहा नागकुमारउहेसए जाव कालादेसेणं जहण्णेणं साइरेगा पुव्वकोडी दसहिं वाससहस्सेहिं अब्भहिया उक्कोसेणं चत्तारि पलिओवमाई एवइयं०, सो चेव जहन्नकालट्टिईएसु उववन्नो जहेव णागकुमाराणं बिइयगमे वत्तव्वया २, सो चेव उक्कोसकालट्टिईएसु उववण्णो जहण्णेणं पलिओवमट्टिईएसु उक्कोसेणवि पलिओवमट्टिईएसु एस चेव वत्तव्वया नवरं ठिई से जहण्णेणं पलिओवमं उक्कोसेणं तिन्नि पलिओवमाई, संवेहो जहण्णेणं दो पलिओवमाई उक्कोसेणं चत्तारि पलिओवमाई एवइयं० ३, मज्झिमगमगा तिन्निवि जहेव नागकुमारेसु पच्छिमेसु तिसु गमएसु तं चेव जहा नागकुमारउहेसए नवरं ठिई संवेहं च जाणेजा, संखेज्जवासाउय तहेव नवरं ठिई अणुबंधो संवेहं च उभओ ठिईएसु जाणेजा, जइ मणुस्स० असंखेज्जवासाउयाणं जहेव नागकुमाराणं उहेसए तहेव वत्तव्वया नवरं तइयगमए ठिई जहन्नेणं पलिओवमं उक्कोसेणं तिन्नि पलिओवमाई, ओगाहणा जहण्णेणं गाउयं उक्कोसेणं तिन्नि गाउयाई सेसं तं चेव, संवेहो से जहा एत्थ चेव उहेसए असंखेज्जवासाउयसन्निपंचिदियाणं, संखेज्जवासाउयसन्निमणुस्से जहेव नागकुमारउहेसए नवरं वाणमंतरे ठिई संवेहं च जाणेजा । सेवं भंते ! २ ति ॥ ७१२ ॥ चउवीसइमे सए बावीसइमो उहेसो समत्तो ॥

जोइसियाणं भंते ! कओहिंतो उववज्जंति किं नेरइए० भेदो जाव सन्निपंचिदियतिरिक्खजोणिएहिंतो उववज्जंति नो असन्निपंचिदियतिरिक्ख०, जइ सन्नि० किं संखेज्ज० असंखेज्ज० ? गोयमा ! संखेज्जवासाउय० असंखेज्जवासाउय जाव उ०, असंखेज्जवासाउयसन्निपंचिदियतिरिक्खजोणिए णं भंते ! जे भविए जोइसिएसु उववज्जितए से णं भंते ! केवइ० ? गोयमा ! जहन्नेणं अट्ठभागपलिओवमट्टिईएसु उक्कोसेणं पलिओवमवाससयसहस्समब्भहियट्टिईएसु उववज्जजा, अवसेसं जहा अखुरकुमारउहेसए नवरं ठिई जहन्नेणं अट्ठभागपलिओवमं उक्कोसेणं तिन्नि पलिओवमाई एवं अणुबंधो सेसं

तहेव, नवरं कालादेसेणं जहण्णेणं दो अट्टभागपलिओवमाई उक्कोसेणं चत्तारि पलिओ-
वमाई वाससयसहस्समम्भहियाई एवइयं० १, सो चेव जहन्नकालट्टिईएसु उववन्नो
जहण्णेणं अट्टभागपलिओवमट्टिईएसु उक्कोसेणवि अट्टभागपलिओवमट्टिईएसु उ०, एस
चेव वत्तव्वया नवरं कालादेसं जाणेज्जा २, सो चेव उक्कोसकालट्टिईएसु उववण्णो एस
चेव वत्तव्वया णवरं ठिई जहण्णेणं पलिओवमं वाससयसहस्समम्भहियं उक्कोसेणं
तिञ्चि पलिओवमाई, एवं अणुबंधोवि, कालादेसेणं जहण्णेणं दो पलिओवमाई दोहिं वास-
सयसहस्सेहिं अम्भहियाई उक्कोसेणं चत्तारि पलिओवमाई वाससयसहस्समम्भहियाई
३, सो चेव अप्पणा जहन्नकालट्टिईओ जाओ जहन्नेणं अट्टभागपलिओवमट्टिईएसु
उववज्जेज्जा उक्कोसेणवि अट्टभागपलिओवमट्टिईएसु उववज्जेज्जा, ते णं भंते ! जीवा
एगसमए एस चेव वत्तव्वया नवरं ओगाहणा जहन्नेणं धणुहपुहुतं उक्कोसेणं साइरेगाई
अट्टारसधणुहसयाई, ठिई जहन्नेणं अट्टभागपलिओवमं उक्कोसेणवि अट्टभागपलि-
ओवमं, एवं अणुबंधोवि सेसं तहेव, कालादेसेणं जहण्णेणं दो अट्टभागपलिओवमाई
उक्कोसेणवि दो अट्टभागपलिओवमाई एवइयं० जहन्नकालट्टिईयस्स एस चेव एक्को गमो
६, सो चेव अप्पणा उक्कोसकालट्टिईओ जाओ सा चेव ओहिया वत्तव्वया नवरं ठिई
जहन्नेणं तिञ्चि पलिओवमाई उक्कोसेणवि तिञ्चि पलिओवमाई एवं अणुबंधोवि, सेसं
तं चेव, एवं पच्छिमा तिञ्चि गमगा पेयव्वा नवरं ठिई संवेहं च जाणेज्जा, एए सत्त
गमगा । जइ संखेज्जवासाउयसन्निपंचिदियं० संखेज्जवासाउयाणं जहेव असुरकुमा-
रेसु उववज्जमाणाणं तहेव नववि गमा भाणियव्वा नवरं जोइसियठिई संवेहं च
जाणेज्जा, सेसं तहेव निरवसेसं भाणियव्वं, जइ मणुस्सेहिंतो उववज्जंति भेदो तहेव
जाव असंखेज्जवासाउयसन्निमणुस्से णं भंते ! जे भविए जोइसिएसु उववज्जितए से
णं भंते ! एवं जहा असंखेज्जवासाउयसन्निपंचिदियस्स जोइसिएसु चेव उववज्ज-
माणस्स सत्त गमगा तहेव मणुस्साणवि नवरं ओगाहणाविसेसो पढमेसु तिसु गमएसु
ओगाहणा जहन्नेणं साइरेगाई नव धणुहसयाई उक्कोसेणं तिञ्चि गाउयाई, मज्झिमग-
मए जहण्णेणं साइरेगाई नव धणुहसयाई उक्कोसेणवि साइरेगाई नव धणुहसयाई,
पच्छिमेसु तिसुवि गमएसु जहण्णेणं तिञ्चि गाउयाई उक्कोसेणवि तिञ्चि गाउयाई, सेसं
तहेव निरवसेसं जाव संवेहोति, जइ संखेज्जवासाउयसन्निमणुस्से० संखेज्जवासा-
उयाणं जहेव असुरकुमारेसु उववज्जमाणाणं तहेव नव गमगा भाणियव्वा, नवरं
जोइसियठिई संवेहं च जाणेज्जा, सेसं तं चेव निरवसेसं । सेवं भंते ! २ ति ॥ ७१३ ॥

चउवीसइमे सए तेवीसइमो उहेसो समत्तो ॥

सोहम्मगदेवा णं भंते ! कओहिंतो उववज्जंति किं नेरइएहिंतो उववज्जंति० ? भेदो

जहा जोइसियउद्देसए, असंखेज्जवासाउयसन्निपंचिदियतिरिक्खजोणिए णं भंते ! जे भविए सोहम्मगदेवेषु उववज्जितए से णं भंते ! केवइकाल० ? गोयमा ! जहण्णेणं पलिओवमट्ठिईएसु उ० उक्कोसेणं तिपलिओवमट्ठिईएसु उववज्जेजा, ते णं भंते ! अवसेसं जहा जोइसिएसु उववज्जमाणस्स नवरं सम्महिट्ठीवि मिच्छादिट्ठीवि णो सम्मामिच्छादिट्ठी, णाणीवि अन्नाणीवि दो णाणा दो अन्नाणा नियमं, ठिई जहण्णेणं पलिओवमं उक्कोसेणं तिणि पलिओवमाई एवं अणुबंधोवि सेसं तहेव, कालादेसेणं जहण्णेणं दो पलिओवमाई उक्कोसेणं छप्पलिओवमाई एवइयं० १, सो चेव जहन्नकालट्ठिईएसु उववन्नो एस चेव वत्तव्वया नवरं कालादेसेणं जहन्नेणं दो पलिओवमाई उक्कोसेणं चत्तारि पलिओवमाई एवइयं० २, सो चेव उक्कोसकालट्ठिईएसु उववन्नो जहन्नेणं तिपलिओव० उक्कोसेणवि तिपलिओव० एस चेव वत्तव्वया नवरं ठिई जहन्नेणं तिणि पलिओवमाई उक्कोसेणवि तिणि पलिओवमाई सेसं तं चेव, कालादेसेणं जहण्णेणं छप्पलिओवमाई उक्कोसेणवि छप्पलिओवमाई एवइयं० ३, सो चेव अप्पणा जहन्नकालट्ठिईओ जाओ जहण्णेणं पलिओवमट्ठिईएसु उक्कोसेणवि पलिओवमट्ठिईएसु एस चेव वत्तव्वया नवरं ओगाहणा जहण्णेणं धणुहपुहुत्तं उक्कोसेणं दो गाउयाई, ठिई जहन्नेणं पलिओवमं उक्कोसेणवि पलिओवमं सेसं तहेव, कालादेसेणं जहण्णेणं दो पलिओवमाई उक्कोसेणपि दो पलिओवमाई एवइयं० ६, सो चेव अप्पणा उक्कोसकालट्ठिईओ जाओ आइल्लगमगसरिसा तिणि गमगा णेयव्वा नवरं ठिई कालादेसं च जाणेज्जा ९ ॥ जइ संखेज्जवासाउयसन्निपंचिदिय० संखेज्जवासाउयस्स जहेव असुरकुमारेसु उववज्जमाणस्स तहेव नववि गमगा, नवरं ठिई संवेहं च जाणेज्जा, जाहे य अप्पणा जहन्नकालट्ठिईओ भवइ ताहे तिसुवि गमएसु सम्महिट्ठीवि मिच्छादिट्ठीवि णो सम्मामिच्छादिट्ठी, दो णाणा दो अन्नाणा नियमं सेसं तं चेव ॥ जइ मणुस्सेहिंतो उववज्जंति भेदो जहेव जोइसिएसु उववज्जमाणस्स जाव असंखेज्जवासाउयसन्निमणुस्से णं भंते ! जे भविए सोहम्मे कप्पे देवत्ताए उववज्जितए एवं जहेव असंखेज्जवासाउयस्स सन्निपंचिदियतिरिक्खजोणियस्स सोहम्मे कप्पे उववज्जमाणस्स तहेव सत्त गमगा नवरं आइल्लएसु दोसु गमएसु ओगाहणा जहन्नेणं गाउयं उक्कोसेणं तिणि गाउयाई, तइयगमे जहन्नेणं तिणि गाउयाई उक्कोसेणवि तिणि गाउयाई, चउत्थगमए जहन्नेणं गाउयं उक्कोसेणवि गाउयं, पच्छिमएसु तिसु गमएसु जहण्णेणं तिणि गाउयाई उक्कोसेणवि तिणि गाउयाई सेसं तहेव निरवसेसं ९ ॥ जइ संखेज्जवासाउयसन्निमणुस्सेहिंतो० एवं संखेज्जवासाउयसन्निमणुस्साणं जहेव असुरकुमारेसु उववज्जमाणं तहेव णव गमगा भाणियव्वा नवरं सोहम्मगदेवट्ठिईं संवेहं च जाणेज्जा, सेसं तं चेव ९ ॥ ईसाणदेवा णं भंते ! कओहिंतो

उववज्जंति० ईसाणदेवाणं एस चेव सोहम्मगदेवसरिसा वत्तव्वया नवरं असंखेज्जवा-
 साउयसञ्चिपंचिदियतिरिक्खजोणियस्स जेसु ठाणेसु सोहम्मे उववज्जमाणस्स पलिओ-
 वमट्ठिई तेसु ठाणेसु इहं साइरेगं पलिओवमं कायव्वं, चउत्थगमे ओगाहणा जह्जेणं
 धणहुपुहुतं उक्कोसेणं साइरेगाई दो गाउयाई सेसं तं चेव ९ ॥ असंखेज्जवासाउयस-
 ञ्चिमणुस्सस्सवि तहेव ठिई जहा पंचिदियतिरिक्खजोणियस्स असंखेज्जवासाउयस्स
 ओगाहणावि जेसु ठाणेसु गाउयं तेसु ठाणेसु इहं साइरेगं गाउयं सेसं तहेव ९ ॥
 संखेज्जवासाउयाणं तिरिक्खजोणियाणं मणुस्साण य जहेव सोहम्मेसु उववज्जमाणानं
 तहेव निरवसेसं णववि गमगा नवरं ईसाणट्ठिई संवेहं च जाणेज्जा ९ ॥ सणकुमार-
 गदेवा णं भंते ! कओहिंतो उववज्जंति० उववाओ जहा सक्करप्पभापुठविनेरइयाणं जाव
 पज्जत्तसंखेज्जवासाउयसञ्चिपंचिदियतिरिक्खजोणिए णं भंते ! जे भविए सणकुमारग-
 देवेसु उववज्जितए अवसेसा परिमाणदीया भवादेसपज्जवसाणा सच्चेव वत्तव्वया
 भाणियव्वा जहा सोहम्मे उववज्जमाणस्स नवरं सणकुमारट्ठिई संवेहं च जाणेज्जा,
 जाहे य अप्पणा जह्जकालट्ठिईओ भवइ ताहे तिसुवि गमएसु पंच लेस्साओ आइ-
 छाओ कायव्वाओ सेसं तं चेव ९ ॥ जइ मणुस्सेहिंतो उववज्जंति मणुस्साणं जहेव
 सक्करप्पभाए उववज्जमाणानं तहेव णववि गमा भाणियव्वा नवरं सणकुमारट्ठिई संवेहं
 च जाणेज्जा ९ ॥ माहिंदगदेवा णं भंते ! कओहिंतो उववज्जंति० जहा सणकुमार-
 देवाणं वत्तव्वया तहा माहिंदगदेवाणवि भाणियव्वा, नवरं माहिंदगदेवाणं ठिई साइ-
 रेगा जा(भा)णियव्वा सा चेव, एवं वंमलोगदेवाणवि वत्तव्वया नवरं वंमलोगट्ठिई
 संवेहं च जाणेज्जा, एवं जाव सहस्सारो, णवरं ठिई संवेहं च जाणेज्जा, लंतगाईणं
 जह्जकालट्ठिईयस्स तिरिक्खजोणियस्स तिसुवि गमएसु छप्पि लेस्साओ कायव्वाओ,
 संघयणाई वंमलोगलंतएसु पंच आइल्लाणि, महासुक्कसहस्सारेसु चत्तारि, तिरिक्ख-
 जोणियाणवि मणुस्साणवि, सेसं तं चेव ९ ॥ आणयदेवा णं भंते ! कओहिंतो उव-
 वज्जंति० उववाओ जहा सहस्सारे देवाणं णवरं तिरिक्खजोणिया खोडेयव्वा जाव
 पज्जत्तसंखेज्जवासाउयसञ्चिमणु(स्सा)स्से णं भंते ! जे भविए आणयदेवेसु उववज्जितए
 मणुस्साणं वत्तव्वया जहेव सहस्सारेसु उववज्जमाणानं णवरं तिञ्चि संघयणाणि सेसं
 तहेव जाव अणुवंधो भवादेसेणं जह्जेणं तिञ्चि भवगहणाई उक्कोसेणं सत्त भवग-
 हणाई, कालादेसेणं जह्जेणं अट्ठारस सागरोवमाई दोहिं वासपुहुतोहिं अब्भहियाई
 उक्कोसेणं सत्तावचं सागरोवमाई चउहिं पुव्वकोडीहिं अब्भहियाई एवइयं०, एवं
 सेसावि अट्ठ गमगा भाणियव्वा नवरं ठिई संवेहं च जाणेज्जा, सेसं तहेव ९ ॥
 एवं जाव अच्चयदेवा, नवरं ठिई संवेहं च जाणेज्जा ९ ॥ चउसुवि संघयणा तिञ्चि

आणयाईसु । गेवेज्जगदेवा णं भंते ! कओहिंतो उववज्जंति० एस चेव वत्तव्वया नवरं दो संघयणा, ठिई संवेहं च जाणेज्जा । विजयवेज्यंतजयंतअपराजियदेवा णं भंते ! कओहिंतो उववज्जंति० एस चेव वत्तव्वया निरवसेसा जाव अणुबंधोत्ति, नवरं पढमं संघयणं, सेसं तहेव, भवादेसेणं जहजेणं तिन्नि भवग्गहणाई उक्कोसेणं पंच भवग्गहणाई, कालादेसेणं जहजेणं एकत्तीसं सागरोवमाई दोहिं वासपुहुत्तेहिं अब्भहियाई उक्कोसेणं छावट्ठि सागरोवमाई तिहिं पुव्वकोडीहिं अब्भहियाई एवइयं०, एवं सेसावि अट्ठ गमगा भाणियव्वा, नवरं ठिई संवेहं च जाणेज्जा, मणूसे लद्धी णवसुवि गमएसु जहा गेवेज्जेसु उववज्जमाणस्स नवरं पढमं संघयणं । सव्वट्ठसिद्धगदेवा णं भंते ! कओहिंतो उववज्जंति० उववाओ जहेव विजयाईणं जाव से णं भंते ! केवइयकालट्ठि-ईएसु उववजेज्जा ? गोयमा । जहजेणं तेत्तीसं सागरोवमट्ठिईएसु उक्कोसेणवि तेत्तीसं सागरोवमट्ठिईएसु उववजेज्जा, अवसेसा जहा विजयाईसु उववज्जंताणं नवरं भवादे-सेणं तिन्नि भवग्गहणाई, कालादेसेणं जहजेणं तेत्तीसं सागरोवमाई दोहिं वासपुहु-त्तेहिं अब्भहियाई उक्कोसेणवि तेत्तीसं सागरोवमाई दोहिं पुव्वकोडीहिं अब्भहियाई एवइयं० ९ ॥ सो चेव अप्पणा जह्वकालट्ठिईओ जाओ एस चेव वत्तव्वया नवरं ओगाहणाठिईओ रयणिपुहुत्तवासपुहुत्ताणि सेसं तहेव संवेहं च जाणेज्जा ९ ॥ सो चेव अप्पणा उक्कोसकालट्ठिईओ जाओ एस चेव वत्तव्वया नवरं ओगाहणा जहण्णेणं पंच धणुहसयाई उक्कोसेणवि पंचधणुहसयाई, ठिई जहण्णेणं पुव्वकोडी उक्कोसेणवि पुव्व-कोडी, सेसं तहेव जाव भवादेसोत्ति, कालादेसेणं जहण्णेणं तेत्तीसं सागरोवमाई दोहिं पुव्वकोडीहिं अब्भहियाई उक्कोसेणवि तेत्तीसं सागरोवमाई दोहिं पुव्वकोडीहिं अब्भहि-याई एवइयं कालं सेवेज्जा एवइयं कालं गइरागई करेज्जा, एए तिन्नि गमगा सव्वट्ठसि-द्धगदेवाणं । सेवं भंते ! २ ति भगवं गोयमे जाव विहरइ ॥ ७१४ ॥ चउवीसइमस्स सयस्स चउवीसइमो उद्देसो समत्तो ॥ चउवीसइमं सयं समत्तं ॥

लेस्सा य १ दव्व २ संठाण ३ जुम्म ४ पज्जव ५ नियंठ ६ समणा य ७ ओहे ८ भविया ९ भविए १० सम्मा ११ सिच्छे य १२ उद्देसा ॥ ११ ॥ तेणं कालेणं तेणं समएणं रायगिहे जाव एवं वयासी-कइ णं भंते ! लेस्साओ प०? गोयमा ! छहेस्साओ प०, तं०-कण्हलेस्सा जहा पढमसए बिइए उद्देसए तहेव लेस्साविभागो अप्पाबहुगं च जाव चउव्विहाणं देवाणं चउव्विहाणं देवीणं भीसगं अप्पाबहुगं ति ॥ ७१५ ॥ कइविहा णं भंते ! संसारसमावन्नगा जीवा पन्नत्ता ? गोयमा । चउद्दसविहा संसारस-मावन्नगा जीवा प०, तं०-सुहुमअपज्जत्तगा १, सुहुमपज्जत्तगा २, बायरअपज्जत्तगा ३, बायरपज्जत्तगा ४, बेईदिया अपज्जत्तगा ५, बेईदिया पज्जत्तगा ६, एवं तेई-

दिया ८, एवं चउरिंदिया १०, असन्निपंचिंदिया अपज्जत्तगा ११, असन्निपंचिंदिया पज्जत्तगा १२, सन्निपंचिंदिया अपज्जत्तगा १३, सन्निपंचिंदिया पज्जत्तगा १४।
 एएसि णं भंते ! चउइसविहाणं संसारसमावन्नगाणं जीवाणं जह्मुक्कोसगस्स जोगस्स कयरे २ जाव विसेसाहिया वा ? गोयमा ! सव्वत्थोवे सुहुमस्स अपज्जत्तगस्स जह्नुए जोए १, बायरस्स अपज्जत्तगस्स जह्नुए जोए असंखेज्जगुणे २, बेइंदियस्स अपज्जत्तगस्स जह्नुए जोए असंखेज्जगुणे ३, एवं तेइंदियस्स ४, एवं चउरिंदियस्स ५, असन्निपंचिंदियस्स अपज्जत्तगस्स जह्नुए जोए असंखेज्जगुणे ६, सन्निपंचिंदियस्स अपज्जत्तगस्स जह्नुए जोए असंखेज्जगुणे ७, सुहुमस्स पज्जत्तगस्स जह्नुए जोए असंखेज्जगुणे ८, बायरस्स पज्जत्तगस्स जह्नुए जोए असंखेज्जगुणे ९, सुहुमस्स अपज्जत्तगस्स उक्कोसए जोए असंखेज्जगुणे १०, बायरस्स अपज्जत्तगस्स उक्कोसए जोए असंखेज्जगुणे ११, सुहुमस्स पज्जत्तगस्स उक्कोसए जोए असंखेज्जगुणे १२, बायरस्स पज्जत्तगस्स उक्कोसए जोए असंखेज्जगुणे १३, बेइंदियस्स पज्जत्तगस्स जह्नुए जोए असंखेज्जगुणे १४, एवं तेइंदियस्सवि १५, एवं जाव सन्निपंचिंदियस्स पज्जत्तगस्स जह्नुए जोए असंखेज्जगुणे १८, बेइंदियस्स अपज्जत्तगस्स उक्कोसए जोए असंखेज्जगुणे १९, एवं तेइंदियस्सवि २०, एवं चउरिंदियस्सवि २१, एवं जाव सन्निपंचिंदियस्स अपज्जत्तगस्स उक्कोसए जोए असंखेज्जगुणे २३, बेइंदियस्स पज्जत्तगस्स उक्कोसए जोए असंखेज्जगुणे २४, एवं तेइंदियस्सवि पज्जत्तगस्स उक्कोसए जोए असंखेज्जगुणे २५, चउरिंदियस्स पज्जत्तगस्स उक्कोसए जोए असंखेज्जगुणे २६, असन्निपंचिंदियपज्जत्तगस्स उक्कोसए जोए असंखेज्जगुणे २७, एवं सन्निपंचिंदियस्स पज्जत्तगस्स उक्कोसए जोए असंखेज्जगुणे ॥ २८ ॥ ७१६ ॥ दो भंते ! नेरइया पढमसमयोववन्नगा किं समजोगी किं विसमजोगी ? गोयमा ! सिय समजोगी सिय विसमजोगी, से केणट्ठेणं भंते ! एवं वुच्चइ सिय समजोगी सिय विसमजोगी ? गोयमा ! आहारयाओ वा से अणाहारए अणाहारयाओ वा से आहारए सिय हीणे सिय तुल्ले सिय अब्भहिए, जइ हीणे असंखेज्जइभागहीणे वा संखेज्जइभागहीणे वा संखेज्जगुणहीणे वा असंखेज्जगुणहीणे वा, अह अब्भहिए असंखेज्जइभागमब्भहिए वा संखेज्जइभागमब्भहिए वा संखेज्जगुणमब्भहिए वा असंखेज्जगुणमब्भहिए वा, से तेणट्ठेणं जाव सिय समजोगी सिय विसमजोगी, एवं जाव वेमाणियाणं ॥ ७१७ ॥ कइविहे णं भंते ! जोए प० ? गोयमा ! पन्नरसविहे जोए प०, तं०-सच्चमणजोए मोसमणजोए सच्चामोसमणजोए असच्चामोसमणजोए सच्चवइजोए मोसवइजोए सच्चामोसवइजोए असच्चामोसवइजोए ओरालियसरीरकायजोए ओरालि-

यमीसासरीरकायजोए वेउव्वियसरीरकायजोए वेउव्वियमीसासरीरकायजोए आहार-
गसरीरकायजोए आहारगमीसासरीरकायजोए कम्मासरीरकायजोए १५ ॥ एयस्स णं
भंते । पन्नरसविहस्स जह्खुक्कोसगस्स कयरं २ जाव विसेसाहिया वा ? गोयमा ! सव्व-
त्थोवे कम्मगसरीरस्स जह्खए जोए १, ओरालियमीसगस्स जह्खए जोए असंखेज्ज-
गुणे २, वेउव्वियमीसगस्स जह्खए जोए असंखेज्जगुणे ३, ओरालियसरीरस्स जह्खए
जोए असंखेज्जगुणे ४, वेउव्वियसरीरस्स जह्खए जोए असंखेज्जगुणे ५, कम्मगसरीरस्स
उक्कोसए जोए असंखेज्जगुणे ६, आहारगमीसगस्स जह्खए जोए असंखेज्जगुणे ७,
आहारगमीसगस्स उक्कोसए जोए असंखेज्जगुणे ८, ओरालियमीसगस्स वेउव्वियमी-
सगस्स एएसि णं उक्कोसए जोए दोण्हवि तुल्ले असंखेज्जगुणे ९-१०, असच्चा मोसमण-
जोगस्स जह्खए जोए असंखेज्जगुणे ११, आहारगसरीरस्स जह्खए जोए असंखेज्ज-
गुणे १२, ति विहस्स मणजोगस्स चउव्विहस्स वइजोगस्स एएसि णं सत्तण्हवि तुल्ले
जह्खए जोए असंखेज्जगुणे १९, आहारगसरीरस्स उक्कोसए जोए असंखेज्जगुणे २०,
ओरालियसरीरस्स वेउव्वियसरीरस्स चउव्विहस्स य मणजोगस्स चउव्विहस्स य
वइजोगस्स एएसि णं दसण्हवि तुल्ले उक्कोसए जोए असंखेज्जगुणे ३०, सेवं भंते ! २
त्ति ॥ ७१८ ॥ **पणवीसइमस्स सयस्स पढमो उद्देशो समत्तो ॥**

कइविहा णं भंते ! दव्वा पन्नता ? गोयमा ! दुविहा दव्वा प०, तं०-जीवदव्वा
य अजीवदव्वा य, अजीवदव्वा णं भंते ! कइविहा प० ? गोयमा ! दुविहा प०,
तंजहा-रुविअजीवदव्वा य अरुविअजीवदव्वा य, एवं एएणं अभिलावेणं जहा
अजीवपज्जवा जाव से तेणट्ठेणं गोयमा ! एवं वुच्चइ ते णं नो संखेज्जा नो असंखेज्जा
अणंता । जीवदव्वा णं भंते ! किं संखेज्जा असंखेज्जा अणंता ? गोयमा ! नो संखेज्जा
नो असंखेज्जा अणंता, से केणट्ठेणं भंते ! एवं वुच्चइ जीवदव्वा णं नो संखेज्जा नो
असंखेज्जा अणंता ? गोयमा ! असंखेज्जा नेरइया जाव असंखेज्जा वाउक्काइया, वणस्स-
इकाइया अणंता, असंखेज्जा वेइंदिया एवं जाव वेमाणिया, अणंता सिद्धा, से तेणट्ठेणं
जाव अणंता ॥ ७१९ ॥ जीवदव्वाणं भंते ! अजीवदव्वा परिभोगत्ताए हव्वमागच्छंति
अजीवदव्वाणं जीवदव्वा परिभोगत्ताए हव्वमागच्छंति ? गोयमा ! जीवदव्वाणं
अजीवदव्वा परिभोगत्ताए हव्वमागच्छंति नो अजीवदव्वाणं जीवदव्वा परिभोगत्ताए
हव्वमागच्छंति, से केणट्ठेणं भंते ! एवं वुच्चइ जाव हव्वमागच्छंति ? गोयमा ! जीव-
दव्वा णं अजीवदव्वे परियादियंति अजीव० २ ता ओरालियं वेउव्वियं आहारं तेयं
कम्मं सोइंदियं जाव फासिंदियं मणजोगं वइजोगं कायजोगं आणापाणुत्तं च निव्व-
(त्त)त्तिरंति, से तेणट्ठेणं जाव हव्वमागच्छंति, नेरइयाणं भंते ! अजीवदव्वा परिभोग-

त्ताए हव्वमागच्छंति अजीवदव्वाणं नेरइया परिभोगत्ताए हव्वमागच्छंति ? गोयमा !
 नेरइयाणं अजीवदव्वा परिभोगत्ताए हव्वमागच्छंति नो अजीवदव्वाणं नेरइया जाव
 हव्वमागच्छंति, से केणट्ठेणं ? गोयमा ! नेरइया णं अजीवदव्वे परियादियंति अ० २
 ता वेउव्वियं तेयगं कम्मगं सोईदियं जाव फासिंदियं अणापाणुत्तं च निव्वत्तियंति, से
 तेणट्ठेणं गोयमा ! एवं वुच्चइ०, एवं जाव वेमाणिया नवरं सरीरइंदियजोगा भाणियव्वा
 जस्स जे अत्थि ॥ ७२० ॥ से नूणं भंते ! असंखेजे लोए अणंताई दव्वाई आगासे
 भइयव्वाई ? हंता गोयमा ! असंखेजे लोए जाव भइयव्वाई ॥ लोगस्स
 णं भंते ! एगंमि आगासपएसे कइदिसिं पोग्गला चिज्जंति ? गोयमा ! निव्वाधाएणं
 छइदिसिं वाघायं पडुच्च सिय तिदिसिं सिय चउदिसिं सिय पंचदिसिं, लोगस्स
 णं भंते ! एगंमि आगासपएसे कइदिसिं पोग्गला छिज्जंति ? एवं चेव, एवं उवचिज्जंति
 एवं अवचिज्जंति ॥ ७२१ ॥ जीवे णं भंते ! जाई दव्वाई ओरालियसरीरत्ताए
 गेण्हइ ताई किं ठियाई गेण्हइ अठियाई गेण्हइ ? गोयमा ! ठियाईपि गेण्हइ अठि-
 याईपि गेण्हइ, ताई भंते ! किं दव्वओ गेण्हइ खेतओ गेण्हइ कालओ गेण्हइ
 भावओ गेण्हइ ? गोयमा ! दव्वओवि गेण्हइ खेतओवि गेण्हइ कालओवि गेण्हइ
 भावओवि गेण्हइ, ताई दव्वओ अणंतपएसियाई दव्वाई खेतओ असंखेजपएसोगा-
 ढाई एवं जहा पञ्चवणाए पढमे आहारुहेसए जाव निव्वाधाएणं छइदिसिं वाघायं पडुच्च
 सिय तिदिसिं सिय चउदिसिं सिय पंचदिसिं ॥ जीवे णं भंते ! जाई दव्वाई वेउ-
 व्वियसरीरत्ताए गेण्हइ ताई किं ठियाई गेण्हइ अठियाई गेण्हइ ? एवं चेव नवरं
 नियमं छइदिसिं, एवं आहारगसरीरत्ताएवि ॥ जीवे णं भंते ! जाई दव्वाई तेयग-
 सरीरत्ताए गिण्हइ पुच्छा, गोयमा ! ठियाई गेण्हइ नो अठियाई गेण्हइ सेसं जहा
 ओरालियसरीरस्स कम्मगसरीरे एवं चेव एवं जाव भावओवि गेण्हइ, जाई दव्वाई
 दव्वओ गेण्हइ ताई किं एगपएसियाई गेण्हइ दुपएसियाई गेण्हइ ? एवं जहा
 भासापए जाव आणुपुव्वि गेण्हइ नो अणाणुपुव्वि गेण्हइ, ताई भंते ! कइदिसिं
 गेण्हइ ? गोयमा ! निव्वाधाएणं जहा ओरालियस्स ॥ जीवे णं भंते ! जाई दव्वाई
 सोईदियत्ताए गेण्हइ जहा वेउव्वियसरीरं एवं जाव जिब्बिभदियत्ताए फासिंदियत्ताए
 जहा ओरालियसरीरं मणजोगत्ताए जहा कम्मगसरीरं नवरं नियमं छइदिसिं एवं
 वइजोगत्ताएवि कायजोगत्ताएवि जहा ओरालियसरीरस्स । जीवे णं भंते ! जाई
 दव्वाई अणापाणुत्ताए गेण्हइ जहेव ओरालियसरीरत्ताए जाव सिय पंचदिसिं । सेव
 भंते ! २ ति । केइ चउवीसदंडएणं एयाणि पयाणि भञ्जंति जस्स जं अत्थि ॥ ७२२ ॥
 पणवीसइमस्स सयस्स बीथो उइसो समत्तो ॥

कइ णं भंते ! संठाणा प० ? गोयमा ! छ संठाणा प०, तं०-परिमंडले वट्टे तंसे चउ-
 रंसे आयए अणित्थंथे, परिमंडला णं भंते ! संठाणा दव्वट्टयाए किं संखेज्जा असंखेज्जा
 अणंता ? गोयमा ! नो संखेज्जा नो असंखेज्जा अणंता, वट्ठा णं भंते ! संठाणा० एवं चेव,
 एवं जाव अणित्थंथा, एवं पएसट्टयाएवि, एवं दव्वट्टपएसट्टयाएवि, एएसि णं भंते !
 परिमंडलवट्टतंसचउरंसआययअणित्थंथाणं संठाणाणं दव्वट्टयाए पएसट्टयाए दव्वट्ट-
 पएसट्टयाए कयरे २ हिंतो जाव विसंसाहिया वा ? गोयमा ! सव्वत्थोवा परिमंडला
 संठाणा दव्वट्टयाए, वट्ठा संठाणा दव्वट्टयाए संखेज्जगुणा, चउरंसा संठाणा दव्वट्टयाए
 संखेज्जगुणं, तंसा संठाणा दव्वट्टयाए संखेज्जगुणा, आययसंठाणा दव्वट्टयाए संखेज्ज-
 गुणा, अणित्थंथा संठाणा दव्वट्टयाए असंखेज्जगुणा, पएसट्टयाए-सव्वत्थोवा परि-
 मंडला संठाणा पएसट्टयाए, वट्ठा संठाणा पएसट्टयाए संखेज्जगुणा, जहा दव्वट्टयाए
 तहा पएसट्टयाएवि जाव अणित्थंथा संठाणा पएसट्टयाए असंखेज्जगुणा, दव्वट्टपएस-
 ट्टयाए सव्वत्थोवा परिमंडला संठाणा दव्वट्टयाए सो चेव गमओ भाणियव्वो जाव
 अणित्थंथा संठाणा दव्वट्टयाए असंखेज्जगुणा, अणित्थंथेहिंतो संठाणेहिंतो दव्वट्टयाए
 (हिंतो) परिमंडला संठाणा पएसट्टयाए असंखेज्जगुणा, वट्ठा संठाणा पएसट्टयाए
 संखेज्जगुणा, सो चेव पएसट्टयाए गमओ भाणियव्वो जाव अणित्थंथा संठाणा पएस-
 ट्टयाए असंखेज्जगुणा ॥७२३॥ कइ णं भंते ! संठाणा पन्नता ? गोयमा ! पंच संठाणा
 प०, तं०-परिमंडले जाव आयए । परिमंडला णं भंते ! संठाणा किं संखेज्जा असंखेज्जा
 अणंता ? गोयमा ! नो संखेज्जा नो असंखेज्जा अणंता, वट्ठा णं भंते ! संठाणा किं
 संखेज्जा० ? एवं चेव, एवं जाव आयया । इमीसे णं भंते ! रयणप्पभाए पुढवीए परि-
 मंडला संठाणा किं संखेज्जा असंखेज्जा अणंता ? गोयमा ! नो संखेज्जा नो असंखेज्जा
 अणंता, वट्ठा णं भंते ! संठाणा किं संखेज्जा असंखेज्जा० ? एवं चेव, एवं जाव आयया ।
 सक्करप्पभाए णं भंते ! पुढवीए परिमंडला संठाणा एवं चेव, एवं जाव आयया,
 एवं जाव अहेसत्तमाए । सोहम्मं णं भंते ! कप्पे परिमंडला संठाणा एवं चेव, एवं जाव
 अञ्जुए, गेवेज्जगविमाणाणं भंते ! परिमंडलसंठाणा एवं चेव, एवं अणुत्तरविमाणेसुवि, एवं
 ईसिप्पव्वभाराएवि ॥ जत्थ णं भंते ! एगे परिमंडले संठाणे जवमज्जे तत्थ परिमंडला
 संठाणा किं संखेज्जा असंखेज्जा अणंता ? गोयमा ! नो संखेज्जा नो असंखेज्जा अणंता ।
 वट्ठा णं भंते ! संठाणा किं संखेज्जा असंखेज्जा अणंता ? एवं चेव, एवं जाव
 आयया । जत्थ णं भंते ! एगे वट्टे संठाणे जवमज्जे तत्थ परिमंडला संठाणा एवं चेव,
 वट्ठा संठाणा एवं चेव, एवं जाव आयया, एवं एक्केक्केणं संठाणेणं पंचवि चारेयव्वा,
 जत्थ णं भंते ! इमीसे रयणप्पभाए पुढवीए एगे परिमंडले संठाणे जवमज्जे तत्थ

णं परिमंडलसंठाणा किं संखेज्जा० पुच्छा, गोयमा ! नो संखेज्जा नो असंखेज्जा
 अणंता, वट्ठा णं भंते ! संठाणा किं संखेज्जा० पुच्छा, गोयमा ! नो संखेज्जा नो
 असंखेज्जा अणंता, एवं (चेव) जाव आयया, जत्थ णं भंते ! इमीसे रयणप्पभाए
 पुढवीए एगे वट्ठे संठाणे जवमज्झे तत्थ णं परिमंडला संठाणा किं संखेज्जा० पुच्छा,
 गोयमा ! नो संखेज्जा नो असंखेज्जा अणंता, वट्ठा संठाणा एवं चेव, एवं जाव
 आयया, एवं पुणरवि एक्केणं संठाणेणं पंचवि चारेयवा जहेव हेट्ठिळा जाव
 आय(ए)याणं, एवं जाव अहेसत्तमाए, एवं कप्पेसुवि जाव ईसिप्पम्भाराए पुढवीए
 ॥ ७२४ ॥ वट्ठे णं भंते ! संठाणे कइपएसिए कइपएसोगाढे प० ? गोयमा ! वट्ठे
 संठाणे दुविहे प०, तं०-घणवट्ठे य पयरवट्ठे य, तत्थ णं जे से पयरवट्ठे से दुविहे प०,
 तं०-ओयपएसिए य जुम्मपएसिए य, तत्थ णं जे से ओयपएसिए पयरवट्ठे से जहन्नेणं
 पंचपएसिए पंचपएसोगाढे उक्कोसेणं अणंतपएसिए असंखेज्जपएसोगाढे, तत्थ णं जे
 से जुम्मपएसिए से जहन्नेणं बारसपएसिए बारसपएसोगाढे उक्कोसेणं अणंतपएसिए
 असंखेज्जपएसोगाढे, तत्थ णं जे से घणवट्ठे से दुविहे प०, तं०-ओयपएसिए य जुम्म-
 पएसिए य, तत्थ णं जे से ओयपएसिए से जहन्नेणं सत्तपएसिए सत्तपएसोगाढे प०,
 उक्कोसेणं अणंतपएसिए असंखेज्जपएसोगाढे प०, तत्थ णं जे से जुम्मपएसिए से
 जहन्नेणं बत्तीसपएसिए बत्तीसपएसोगाढे प०, उक्कोसेणं अणंतपएसिए असंखेज्जप-
 सोगाढे प० ॥ तंसे णं भंते ! संठाणे कइपएसिए कइपएसोगाढे प० ? गोयमा ! तंसे
 णं संठाणे दुविहे प०, तं०-घणतंसे य पयरतंसे य, तत्थ णं जे से पयरतंसे से
 दुविहे प०, तं०-ओयपएसिए य जुम्मपएसिए य, तत्थ णं जे से ओयपएसिए से जह-
 ण्णेणं तिपएसिए तिपएसोगाढे प०, उक्कोसेणं अणंतपएसिए असंखेज्जपएसोगाढे प०,
 तत्थ णं जे से जुम्मपएसिए से जहन्नेणं छप्पएसिए छप्पएसोगाढे प०, उक्कोसेणं
 अणंतपएसिए असंखेज्जपएसोगाढे प०, तत्थ णं जे से घणतंसे से दुविहे प०,
 तं०-ओयपएसिए य जुम्मपएसिए य, तत्थ णं जे से ओयपएसिए से जहन्नेणं पण-
 तीसपएसिए पणतीसपएसोगाढे प०, उक्कोसेणं अणंतपएसिए तं चेव, तत्थ णं जे से
 जुम्मपएसिए से जहन्नेणं चउप्पएसिए चउप्पएसोगाढे प०, उक्कोसेणं अणंतपएसिए
 तं चेव ॥ चउरंसे णं भंते ! संठाणे कइपएसिए० पुच्छा, गोयमा ! चउरंसे संठाणे
 दुविहे प०, भेदो जहेव वट्ठस्स जाव तत्थ णं जे से ओयपएसिए से जहन्नेणं
 नवपएसिए नवपएसोगाढे प०, उक्कोसेणं अणंतपएसिए असंखेज्जपएसोगाढे प०,
 तत्थ णं जे से जुम्मपएसिए से जहन्नेणं चउप्पएसिए चउप्पएसोगाढे प०, उक्कोसेणं
 अणंतपएसिए तं चेव, तत्थ णं जे से घणचउरंसे से दुविहे प०, तंजहा-ओयपएसिए

य जुम्मपएसिए य, तत्थ णं जे से ओयपएसिए से जहन्नेणं सत्तावीसइपएसिए सत्ता-
वीसइपएसोगाढे उक्कोसेणं अणंतपएसिए तहेव, तत्थ णं जे से जुम्मपएसिए से जह-
न्नेणं अट्टपएसिए अट्टपएसोगाढे प०, उक्कोसेणं अणंतपएसिए तहेव ॥ आयए णं
भंते ! संठाणे कइपएसिए कइपएसोगाढे प० ? गोयमा ! आयए णं संठाणे तिविहे
प०, तं०-सेढिआयए पयरायए घणायए, तत्थ णं जे से सेढिआयए से दुविहे प०,
तं०-ओयपएसिए य जुम्मपएसिए य, तत्थ णं जेसे ओयपएसिए से जहन्नेणं तिप-
एसिए तिपएसोगाढे उक्कोसेणं अणंतपएसिए तं चेव, तत्थ णं जे से जुम्मपएसिए से
जहन्नेणं दुपएसिए दुपएसोगाढे उक्कोसेणं अणंतपएसिए तं चेव, तत्थ णं जे से पयरा-
यए से दुविहे प०, तं०-ओयपएसिए य जुम्मपएसिए य, तत्थ णं जे से ओयपएसिए
से जहन्नेणं पन्नरसपएसिए पन्नरसपएसोगाढे उक्कोसेणं अणंत० तहेव, तत्थ णं जे से
जुम्मपएसिए से जहन्नेणं छप्पएसिए छप्पएसोगाढे उक्कोसेणं अणंत० तहेव, तत्थ णं
जे से घणायए से दुविहे प०, तं०-ओयपएसिए य जुम्मपएसिए य, तत्थ णं जे से
ओयपएसिए से जहन्नेणं पणयालीसपएसिए पणयालीसपएसोगाढे प०, उक्कोसेणं अणं-
त० तहेव, तत्थ णं जे से जुम्मपएसिए से जहन्नेणं बारसपएसिए बारसपएसोगाढे
प०, उक्कोसेणं अणंत० तहेव ॥ परिमंडले णं भंते ! संठाणे कइपएसिए० पुच्छा,
गोयमा ! परिमंडले णं संठाणे दुविहे प०, तं०-घणपरिमंडले य पयरपरिमंडले य,
तत्थ णं जे से पयरपरिमंडले से जहन्नेणं वीसइपएसिए वीसइपएसोगाढे उक्कोसेणं
अणंतपएसिए तहेव, तत्थ णं जे से घणपरिमंडले से जहन्नेणं चत्तालीसपएसिए
चत्तालीसपएसोगाढे प०, उक्कोसेणं अणंतपएसिए असंखेजपएसोगाढे पन्नते
॥ ७२५ ॥ परिमंडले णं भंते ! संठाणे दव्वट्टयाए किं कडजुम्मे तेओए दावर-
जुम्मे कलिओए ? गोयमा ! नो कडजुम्मे णो तेओए णो दावरजुम्मे कलिओए,
वट्टे णं भंते ! संठाणे दव्वट्टयाए एवं चेव, एवं जाव आयए ॥ परिमंडला णं भंते !
संठाणा दव्वट्टयाए किं कडजुम्मा तेओगा दावरजुम्मा कलिओगा पुच्छा, गोयमा !
ओघादेसेणं सिय कडजुम्मा सिय तेओगा सिय दावरजुम्मा सिय कलिओगा,
विहाणादेसेणं नो कडजुम्मा नो तेओगा नो दावरजुम्मा कलिओगा, एवं जाव
आयया ॥ परिमंडले णं भंते ! संठाणे पएसट्टयाए किं कडजुम्मे० पुच्छा,
गोयमा ! सिय कडजुम्मे सिय तेओगे सिय दावरजुम्मे सिय कलिओगे, एवं जाव
आयए, परिमंडला णं भंते ! संठाणा पएसट्टयाए किं कडजुम्मा० पुच्छा, गोयमा !
ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि
तेओगावि दावरजुम्मावि कलिओगावि, एवं जाव आयया ॥ परिमंडले णं

भंते ! संठाणे किं कडजुम्मपएसोगाढे जाव कलिओगपएसोगाढे ? गोयमा ! कड-
 जुम्मपएसोगाढे णो तेओगपएसोगाढे नो दावरजुम्मपएसोगाढे नो कलिओगपए-
 सोगाढे ॥ वट्टे णं भंते ! संठाणे किं कडजुम्म० पुच्छा, गोयमा ! सिय कडजुम्म-
 पएसोगाढे सिय तेओगपएसोगाढे नो दावरजुम्मपएसोगाढे सिय कलिओगपएसो-
 गाढे ॥ तंसे णं भंते ! संठाणे पुच्छा, गोयमा ! सिय कडजुम्मपएसोगाढे सिय
 तेओगपएसोगाढे सिय दावरजुम्मपएसोगाढे नो कलिओगपएसोगाढे । चउरंसे णं
 भंते ! संठाणे जहा वट्टे तहा चउरंसेवि । आयए णं भंते ! पुच्छा, गोयमा ! सिय
 कडजुम्मपएसोगाढे जाव सिय कलिओगपएसोगाढे । परिमंडला णं भंते ! संठाणा
 किं कडजुम्मपएसोगाढा तेओगपएसोगाढा० पुच्छा, गोयमा ! ओघादेसेणवि विहा-
 णादेसेणवि कडजुम्मपएसोगाढा णो तेओगपएसोगाढा नो दावरजुम्मपएसोगाढा
 नो कलिओगपएसोगाढा । वट्टा णं भंते ! संठाणा किं कडजुम्मपएसोगाढा० पुच्छा,
 गोयमा ! ओघादेसेण कडजुम्मपएसोगाढा नो तेओग० नो दावरजुम्म० नो कलि-
 ओग०, विहाणादेसेण कडजुम्मपएसोगाढावि तेओगपएसोगाढावि णो दावरजुम्म-
 पएसोगाढा कलिओगपएसोगाढावि, तंसा णं भंते ! संठाणा किं कडजुम्मा० पुच्छा,
 गोयमा ! ओघादेसेण कडजुम्मपएसोगाढा नो तेओग० नो दावरजुम्म० नो कलि-
 ओगपएसोगाढा, विहाणादेसेण कडजुम्मपएसोगाढावि तेओगपएसोगाढावि (नो)
 दावरजुम्मपएसोगाढा नो कलिओगपएसोगाढा । चउरंसा जहा वट्टा, आयया णं
 भंते ! संठाणा पुच्छा, गोयमा ! ओघादेसेण कडजुम्मपएसोगाढा नो तेओगपए-
 सोगाढा नो दावरजुम्मपएसोगाढा नो कलिओगपएसोगाढा, विहाणादेसेण कड-
 जुम्मपएसोगाढावि जाव कलिओगपएसोगाढावि ॥ परिमंडले णं भंते ! संठाणे किं
 कडजुम्मसमयठिईए तेओगसमयठिईए दावरजुम्मसमयठिईए कलिओगसमयठि-
 ईए ? गोयसा ! सिय कडजुम्मसमयठिईए जाव सिय कलिओगसमयठिईए, एवं जाव
 आयए । परिमंडला णं भंते ! संठाणा किं कडजुम्मसमयठिईया० पुच्छा, गोयमा !
 ओघादेसेण सिय कडजुम्मसमयठिईया जाव सिय कलिओगसमयठिईया, विहाणादेसेण
 कडजुम्मसमयठिईयावि जाव कलिओगसमयठिईयावि, एवं जाव आयया ॥
 परिमंडले णं भंते ! संठाणे कालवन्नपज्जवेहिं किं कडजुम्मे जाव कलिओगे ?
 गोयमा ! सिय कडजुम्मे एवं एएणं अभिलावेणं जहेव ठिईए एवं नीलवन्नपज्जवेहिं,
 एवं पंचहिं वचेहिं, दोहिं गंधेहिं, पंचहिं रसेहिं, अट्ठहिं फासेहिं जाव लुक्खफासपज्जवेहिं
 ॥ ७२६ ॥ सेढीओ णं भंते ! दव्वट्टयाए किं संखेजाओ असंखेजाओ अणंताओ ?
 गोयमा ! नो संखेजाओ नो असंखेजाओ अणंताओ, पाईणपडीणाययाओ णं भंते !

सेदीओ दव्वट्टयाए किं संखेज्जाओ ३ एवं चेव, एवं दाहिणुत्तराययाओवि, एवं उड्डु-
महाययाओवि । लोगागाससेदीओ णं भंते ! दव्वट्टयाए किं संखेज्जाओ असंखेज्जाओ
अणंताओ ? गोयमा ! नो संखेज्जाओ असंखेज्जाओ नो अणंताओ, पाईणपडीणाय-
याओ णं भंते ! लोगागाससेदीओ दव्वट्टयाए किं संखेज्जाओ० एवं चेव, एवं
दाहिणुत्तराययाओवि, एवं उड्डुमहाययाओवि । अलोगागाससेदीओ णं भंते !
दव्वट्टयाए किं संखेज्जाओ असंखेज्जाओ अणंताओ ? गोयमा ! नो संखेज्जाओ नो
असंखेज्जाओ अणंताओ, एवं पाईणपडीणाययाओवि, एवं दाहिणुत्तराययाओवि, एवं
उड्डुमहाययाओवि । सेदीओ णं भंते ! पएसट्टयाए किं संखेज्जाओ० जहा दव्वट्टयाए
तहा पएसट्टयाएवि जाव उड्डुमहाययाओवि सव्वाओ अणंताओ । लोगागाससेदीओ
णं भंते ! पएसट्टयाए किं संखेज्जाओ० पुच्छा, गोयमा ! सिय संखेज्जाओ सिय असं-
खेज्जाओ नो अणंताओ, एवं पाईणपडीणाययाओवि, एवं दाहिणुत्तराययाओवि, एवं चेव
उड्डुमहाययाओवि नो संखेज्जाओ असंखेज्जाओ नो अणंताओ ॥ अलोगागाससेदीओ
णं भंते ! पएसट्टयाए पुच्छा, गोयमा ! सिय संखेज्जाओ सिय असंखेज्जाओ सिय
अणंताओ, पाईणपडीणाययाओ णं भंते ! अलोया० पुच्छा, गोयमा ! नो संखे-
ज्जाओ नो असंखेज्जाओ अणंताओ, एवं दाहिणुत्तराययाओवि, उड्डुमहाययाओ
पुच्छा, गोयमा ! सिय संखेज्जाओ सिय असंखेज्जाओ सिय अणंताओ ॥ ७२७ ॥
सेदीओ णं भंते ! किं साइयाओ सपज्जवसियाओ १, साइयाओ अपज्जवसियाओ २,
अणाइयाओ सपज्जवसियाओ ३, अणाइयाओ अपज्जवसियाओ ४ ? गोयमा ! नो
साइयाओ सपज्जवसियाओ, नो साइयाओ अपज्जवसियाओ, णो अणाइयाओ सपज्ज-
वसियाओ, अणाइयाओ अपज्जवसियाओ, एवं जाव उड्डुमहाययाओ, लोगागाससेदीओ
णं भंते ! किं साइयाओ सपज्जवसियाओ० पुच्छा, गोयमा ! साइयाओ सपज्जव-
सियाओ, नो साइयाओ अपज्जवसियाओ, नो अणाइयाओ सपज्जवसियाओ, नो अणा-
इयाओ अपज्जवसियाओ, एवं जाव उड्डुमहाययाओ । अलोगागाससेदीओ णं भंते !
किं साइयाओ सपज्जवसियाओ० पुच्छा, गोयमा ! सिय साइयाओ सपज्जवसियाओ
१, सिय साइयाओ अपज्जवसियाओ २, सिय अणाइयाओ सपज्जवसियाओ ३, सिय
अणाइयाओ अपज्जवसियाओ ४, पाईणपडीणाययाओ दाहिणुत्तराययाओ य एवं
चेव, नवरं नो साइयाओ सपज्जवसियाओ सिय साइयाओ अपज्जवसियाओ सेसं तं
चेव, उड्डुमहाययाओ जहा ओहियाओ तहेव चउभंगो । सेदीओ णं भंते ! दव्वट्ट-
याए किं कडजुम्माओ तेओयाओ० पुच्छा, गोयमा ! कडजुम्माओ नो तेओगाओ
नो दावरजुम्माओ नो कलिओगाओ, एवं जाव उड्डुमहाययाओ, लोगागाससेदीओ

एवं चेव, एवं अलोगागाससेदीओवि । सेदीओ णं भंते ! पएसट्ठयाए किं कडजुम्माओ० पुच्छा, एवं चेव, एवं जाव उड्डमहाययाओ । लोगागाससेदीओ णं भंते ! पएसट्ठयाए पुच्छा, गोयमा ! सिय कडजुम्माओ नो तेओगाओ सिय दावरजुम्माओ नो कलिओगाओ, एवं पाईणपवीगाययाओवि दाहिणुत्तराययाओवि, उड्डमहाययाओ णं पुच्छा, गोयमा ! कडजुम्माओ नो तेओगाओ नो दावरजुम्माओ नो कलिओगाओ । अलोगागाससेदीओ णं भंते ! पएसट्ठयाए पुच्छा, गोयमा ! सिय कडजुम्माओ जाव सिय कलिओगाओ, एवं पाईणपवीगाययाओवि, एवं दाहिणुत्तराययाओवि, उड्डमहाययाओवि एवं चेव, नवरं नो कलिओगाओ सेसं तं चेव ॥ ७२८ ॥ कइ णं भंते ! सेदीओ प० ? गोयमा ! सत्त सेदीओ पन्नताओ, तंजहा-उज्जुआयया एगओवंका दुहओवंका एगओखहा दुहओखहा चक्कवाला अद्वचक्कवाला ॥ परमाणु-पोग्गलणं भंते ! किं अणुसेदिं (दी) गई पवत्तइ विसेदिं गई पवत्तइ ? गोयमा ! अणु-सेदिं गई पवत्तइ नो विसेदिं गई पवत्तइ । दुपएसियाणं भंते ! खंधाणं अणुसेदिं गई पवत्तइ विसेदिं गई पवत्तइ ? एवं चेव, एवं जाव अणंतपएसियाणं खंधाणं । नेरइयाणं भंते ! किं अणुसेदिं गई पवत्तइ विसेदिं गई पवत्तइ ? एवं चेव, एवं जाव वेमाणियाणं ॥ ७२९ ॥ इमीसे णं भंते ! रयणप्पभाए पुढवीए केवइया निरयावाससयसहस्सा प० ? गोयमा ! तीसं निरयावाससयसहस्सा प०, एवं जहा पढमसए पंचमुद्देसए जाव अणुत्तरविमाणत्ति ॥ ७३० ॥ कइविहे णं भंते ! गणिपिडए प० ? गोयमा ! दुवालसंगे गणिपिडए प०, तं०-आयारो जाव दिट्ठिवाओ, से किं तं आयारो ? आयारे णं समणाणं निगंथाणं आयारगोयर० एवं अंगपरूवणा भाणियव्वा जहा नंदीए जाव सुत्तत्थो खलु पढमो वीओ निज्जुत्तिमीसिओ भणिओ । तइओ य निर-वसेसो एस विही होइ अणुओगे ॥ १ ॥ ७३१ ॥ एएसि णं भंते ! नेरइयाणं जाव देवाणं सिद्धाणं य पंचगइसमासेणं कयरे २ हिंतो० पुच्छा, गोयमा ! अप्पाबहुयं जहा बहुवत्तव्वयाए अट्ठगइसमासअप्पाबहुगं च । एएसि णं भंते ! सईदियाणं एणि-दियाणं जाव अणिंदियाणं य कयरे० ? एयंपि जहा बहुवत्तव्वयाए तहेव ओहियं पर्यं भाणियव्वं, सकाइयअप्पाबहुगं तहेव ओहियं भाणियव्वं ॥ एएसि णं भंते ! जीवाणं पोग्गलणं जाव सव्वपज्जवाणं य कयरे २ जाव बहुवत्तव्वयाए एएसि णं भंते ! जीवाणं आउयस्स कम्मस्स बंधगाणं अबंधगाणं जहा बहुवत्तव्वयाए जाव आउयस्स कम्मस्स अबंधगा विसेसाहिया । सेवं भंते ! सेवं भंते ! त्ति ॥ ७३२ ॥

पणवीसइमस्स सयस्स तइओ उद्देसो समत्तो ॥

कइ णं भंते ! जुम्मा पन्नता ? गोयमा ! चत्तारि जुम्मा प०, तं०-कडजुम्मे जाव

कलिओगे, से केणट्टेणं भंते ! एवं वुच्चइ चत्तारि जुम्मा प० कडजुम्मे जाव कलिओगे एवं जहा अट्टारसमसए चउत्थे उद्देसए तहेव जाव से तेणट्टेणं गोयमा ! एवं वुच्चइ । नेरइयाणं भंते ! कड जुम्मा प० ? गोयमा ! चत्तारि जुम्मा प०, तंजहा-कडजुम्मे जाव कलिओगे, से केणट्टेणं भंते ! एवं वुच्चइ नेरइयाणं चत्तारि जुम्मा प०, तं०-कडजुम्मे अट्टो तहेव, एवं जाव वाउकाइयाणं, वणस्सइकाइयाणं पुच्छा, गोयमा ! वणस्स-इकाइया सिय कडजुम्मा सिय तेओया सिय दावरजुम्मा सिय कलिओया, से केणट्टेणं भंते ! एवं वुच्चइ वणस्सइकाइया जाव कलिओगा ? गोयमा ! उववायं पडुच्च, से तेणट्टेणं तं चेव, बेइंदियाणं जहा नेरइयाणं, एवं जाव वेमाणियाणं, सिद्धाणं जहा वणस्सइकाइयाणं ॥ कइविहा णं भंते ! सव्वदव्वा प० ? गोयमा ! छविहा सव्वदव्वा प०, तंजहा-धम्मत्थिकाए अधम्मत्थिकाए जाव अट्टासमए । धम्मत्थिकाए णं भंते ! दव्वट्टयाए किं कडजुम्मे जाव कलिओगे ? गोयमा ! नो कडजुम्मे नो तेओगे नो दावरजुम्मे कलिओगे, एवं अहम्मत्थिकाएवि, एवं आगासत्थिकाएवि, जीवत्थिकाए णं भंते ! पुच्छा, गोयमा ! कडजुम्मे नो तेओए नो दावरजुम्मे नो कलिओए, पोग्गलत्थिकाए णं भंते ! पुच्छा, गोयमा ! सिय कडजुम्मे जाव सिय कलिओगे, अट्टासमए जहा जीवत्थिकाए ॥ धम्मत्थिकाए णं भंते ! पएसट्टयाए किं कडजुम्मे० पुच्छा, गोयमा ! कडजुम्मे नो तेओए नो दावरजुम्मे नो कलिओए, एवं जाव अट्टासमए ॥ एसि णं भंते ! धम्मत्थिकायअहम्मत्थिकाय जाव अट्टासमयाणं दव्वट्टयाए० एसि णं अप्पाबहुगं जहा बहुवत्तव्वयाए तहेव निरवसेसं ॥ धम्म-त्थिकाए णं भंते ! किं ओगाढे अणोगाढे ? गोयमा ! ओगाढे नो अणोगाढे, जइ ओगाढे किं संखेज्जपएसोगाढे असंखेज्जपएसोगाढे अणंतपएसोगाढे ? गोयमा ! नो संखेज्जपएसोगाढे असंखेज्जपएसोगाढे नो अणंतपएसोगाढे, जइ असंखेज्जपएसोगाढे किं कडजुम्मपएसोगाढे० पुच्छा, गोयमा ! कडजुम्मपएसोगाढे नो तेओग० नो दावरजुम्म० नो कलिओगपएसोगाढे, एवं अहम्मत्थिकाएवि, एवं आगासत्थिकाएवि, जीवत्थिकाए पोग्गलत्थिकाए अट्टासमए एवं चेव ॥ इमा णं भंते ! रयणप्पभ पुढवी किं ओगाढा अणोगाढा जहेव धम्मत्थिकाए एवं जाव अहेसत्तमा, सोहम्मे एवं चेव, एवं जाव ईसिप्पभारापुढवी ॥ ७३३ ॥ जीवे णं भंते ! दव्वट्टयाए किं कडजुम्मे० पुच्छा, गोयमा ! नो कडजुम्मे नो तेओगे नो दावरजुम्मे कलिओगे, एवं नेरइएवि, एवं जाव सिद्धे । जीवा णं भंते ! दव्वट्टयाए किं कडजुम्मा० पुच्छा गोयमा ! ओघादेसेणं कडजुम्मा नो तेओगा नो दावरजुम्मा नो कलिओगा, विहाण्ण देसेणं नो कडजुम्मा नो तेओगा नो दावरजुम्मा कलिओगा, नेरइया णं भंते

दव्वट्ठयाए पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं णो कडजुम्मा णो तेओगा णो दावरजुम्मा कलिओगा, एवं जाव सिद्धा ॥ जीवे णं भंते ! पएसट्ठयाए किं कडजुम्मे० पुच्छा, गोयमा ! जीवपएसे पडुच्च कडजुम्मे नो तेओगे नो दावरजुम्मे नो कलिओगे, सरीरपएसे पडुच्च सिय कडजुम्मे जाव सिय कलिओगे, एवं जाव वेमाणिए । सिद्धे णं भंते ! पएसट्ठयाए किं कडजुम्मे० पुच्छा, गोयमा ! कडजुम्मे नो तेओगे नो दावरजुम्मे नो कलिओगे । जीवा णं भंते ! पएसट्ठयाए किं कडजुम्मा० पुच्छा, गोयमा ! जीवपएसे पडुच्च ओघादेसेणवि विहाणादेसेणवि कडजुम्मा नो तेओगा नो दावरजुम्मा नो कलिओगा, सरीरपएसे पडुच्च ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि जाव कलिओगावि, एवं नेरइयावि, एवं जाव वेमाणिया । सिद्धा णं भंते ! पुच्छा, गोयमा ! ओघादेसेणवि विहाणादेसेणवि कडजुम्मा नो तेओगा नो दावरजुम्मा नो कलिओगा ॥ ७३४ ॥ जीवे णं भंते ! किं कडजुम्मपएसोगाढे० पुच्छा, गोयमा ! सिय कडजुम्मपएसोगाढे जाव सिय कलिओगपएसोगाढे, एवं जाव सिद्धे । जीवा णं भंते ! किं कडजुम्मपएसोगाढा० पुच्छा, गोयमा ! ओघादेसेणं कडजुम्मपएसोगाढा नो तेओग० नो दावर० नो कलिओगपएसोगाढा, विहाणादेसेणं कडजुम्मपएसोगाढावि जाव कलिओगपएसोगाढावि, नेरइया णं भंते ! पुच्छा, गोयमा ! ओघादेसेणं सिय कडजुम्मपएसोगाढा जाव सिय कलिओगपएसोगाढा, विहाणादेसेणं कडजुम्मपएसोगाढावि जाव कलिओगपएसोगाढावि, एवं एगिंदियसिद्धवज्जा (जाव वेमाणिया) सव्वेवि, सिद्धा एगिंदिया य जहा जीवा । जीवे णं भंते ! किं कडजुम्मसमयट्ठिईए० पुच्छा, गोयमा ! कडजुम्मसमयट्ठिईए नो तेओग० नो दावर० नो कलिओगसमयट्ठिईए । नेरइए णं भंते ! पुच्छा, गोयमा ! सिय कडजुम्मसमयट्ठिईए जाव सिय कलिओगसमयट्ठिईए, एवं जाव वेमाणिए, सिद्धे जहा जीवे । जीवा णं भंते ! पुच्छा, गोयमा ! ओघादेसेणवि विहाणादेसेणवि कडजुम्मसमयट्ठिईया नो तेओग० नो दावरजुम्म० नो कलिओगसमयट्ठिईया, नेरइयाणं पुच्छा, गोयमा ! ओघादेसेणं सिय कडजुम्मसमयट्ठिईया जाव सिय कलिओगसमयट्ठिईया, विहाणादेसेणं कडजुम्मसमयट्ठिईयावि जाव कलिओगसमयट्ठिईयावि, एवं जाव वेमाणिया, सिद्धा जहा जीवा ॥ ७३५ ॥ जीवे णं भंते ! कालवन्नपज्जवेहिं किं कडजुम्मे० पुच्छा, गोयमा ! जीवपएसे पडुच्च णो कडजुम्मे जाव णो कलिओगे, सरीरपएसे पडुच्च सिय कडजुम्मे जाव सिय कलिओगे, एवं जाव वेमाणिए, सिद्धो चैव न पुच्छिज्जइ ।

जीवा णं भंते ! कालवन्नपज्जवेहिं० पुच्छा, गोयमा ! जीवपएसे पडुच्च ओघादेसेणवि विहाणादेसेणवि णो कडजुम्मा जाव णो कलिओगा, सरिरपएसे पडुच्च ओघादेसेण सिय कडजुम्मा जाव सिय कलिओगा, विहाणादेसेण कडजुम्मावि जाव कलिओगावि, एवं जाव वेमाणिया, एवं नीलवन्नपज्जवेहिं दंडओ भाणियव्वो एगत्तपुहत्तेणं एवं जाव लुक्खफासपज्जवेहिं ॥ जीवे णं भंते ! आभिणिबोहियणाणपज्जवेहिं किं कडजुम्मे० पुच्छा, गोयमा ! सिय कडजुम्मे जाव सिय कलिओगे, एवं एगिदियवज्जं जाव वेमाणिए । जीवा णं भंते ! आभिणिबोहियणाणपज्जवेहिं० पुच्छा, गोयमा ! ओघादेसेण सिय कडजुम्मा जाव सिय कलिओगा, विहाणादेसेण कडजुम्मावि जाव कलिओगावि, एवं एगिदियवज्जं जाव वेमाणिया, एवं सुयणाणपज्जवेहिवि, ओहि-णाणपज्जवेहिवि एवं चेव, नवरं विगल्लिदियाणं नत्थि ओहिनाणं, मणपज्जवनानंपि एवं चेव, नवरं जीवाणं मणुस्साण य, सेसाणं नत्थि, जीवे णं भंते ! केवलनाणपज्जवेहिं किं कडजुम्मे० पुच्छा, गोयमा ! कडजुम्मे णो तेओगे णो दावरजुम्मे णो कलिओगे, एवं मणुस्सेवि, एवं सिद्धेवि, जीवा णं भंते ! केवलनाण०पुच्छा, गोयमा ! ओघादेसेणवि विहाणादेसेणवि कडजुम्मा नो तेओगा नो दावरजुम्मा णो कलिओगा, एवं मणुस्सावि, एवं सिद्धावि । जीवे णं भंते ! मइअन्नाणपज्जवेहिं किं कडजुम्मे० ? जहा आभिणिबोहियणाणपज्जवेहिं तहेव दो दंडगा, एवं सुयअन्नाणपज्जवेहिवि, एवं विभंगनाणपज्जवेहिवि । चक्खुदंसणअचक्खुदंसणओहिदंसणपज्जवेहिवि एवं चेव, नवरं जस्स जं अत्थि तस्स तं भाणियव्वं, केवलदंसणपज्जवेहिं जहा केवलनाणपज्जवेहिं ॥ ७३६ ॥ कइ णं भंते ! सरीरगा प० ? गोयमा ! पंच सरीरगा प०, तं०-ओरालिए जाव कम्मए, एत्थं सरीरपदं निरवसेसं भाणियव्वं जहा पन्नवणाए ॥ ७३७ ॥ जीवा णं भंते ! किं सेया णिरेया ? गोयमा ! जीवा सेयावि निरेयावि, से केणट्ठेणं भंते ! एवं वुच्चइ जीवा सेयावि निरेयावि ? गोयमा ! जीवा दुविहा प०, तंजहा-संसारसमावन्नगा य असंसारसमावन्नगा य, तत्थ णं जे ते असंसारसमावन्नगा ते णं सिद्धा, सिद्धा णं दुविहा प०, तंजहा-अणंतरसिद्धा य परंपरसिद्धा य, तत्थ णं जे ते परंपरसिद्धा ते णं निरेया, तत्थ णं जे ते अणंतरसिद्धा ते णं सेया, ते णं भंते ! किं देसेया सव्वेया ? गोयमा ! णो देसेया सव्वेया, तत्थ णं जे ते संसार-समावन्नगा ते दुविहा प०, तंजहा-सेलेसिपडिवन्नगा य असेलेसिपडिवन्नगा य, तत्थ णं जे ते सेलेसीपडिवन्नगा ते णं निरेया, तत्थ णं जे ते असेलेसीपडिवन्नगा ते णं सेया, ते णं भंते ! किं देसेया सव्वेया ? गोयमा ! देसेयावि सव्वेयावि, से तेणट्ठेणं जाव निरेयावि । नेरइया णं भंते ! किं देसेया सव्वेया ? गोयमा ! देसे-

यावि सव्वेयावि, से केणट्ठेणं जाव सव्वेयावि ? गोयमा ! नेरइया दुविहा प०, तं०-विग्गहगइसमावन्नगा य अविग्गहगइसमावन्नगा य, तत्थ णं जे ते विग्गहगइसमावन्नगा ते णं सव्वेया, तत्थ णं जे ते अविग्गहगइसमावन्नगा ते णं देसेया, से तेणट्ठेणं जाव सव्वेयावि, एवं जाव वेमाणिया ॥ ७३८ ॥ परमाणुपोग्गला णं भंते ! किं संखेज्जा असंखेज्जा अणंता ? गोयमा ! नो संखेज्जा नो असंखेज्जा अणंता, एवं जाव अणंतपएसिया खंधा । एगपएसोगाढा णं भंते ! पोग्गला किं संखेज्जा असंखेज्जा अणंता ? एवं चेव, एवं जाव असंखेज्जपएसोगाढा । एगसमयट्ठिईया णं भंते ! पोग्गला किं संखेज्जा० ? एवं चेव, एवं जाव असंखेज्जसमयट्ठिईया । एगगुणकालगा णं भंते ! पोग्गला किं संखेज्जा० ? एवं चेव, एवं जाव अणंतगुणकालगा, एवं अवसेसावि वण्णगंधरसफासा णेयव्वा जाव अणंतगुणलुक्खत्ति । एएसि णं भंते ! परमाणुपोग्गलाणं दुपएसियाण य खंधाणं दव्वट्ठयाए कयरे २ हिंतो अप्पा वा बहुया वा तुल्ला वा विसेसाहिया वा ? गोयमा ! दुपएसिएहिंतो खंधेहिंतो परमाणुपोग्गला दव्वट्ठयाए बहुया, एएसि णं भंते ! दुपएसियाणं तिपएसियाण य खंधाणं दव्वट्ठयाए कयरे २ हिंतो बहुया ? गोयमा ! तिपएसिएहिंतो खंधेहिंतो दुपएसिया खंधा दव्वट्ठयाए बहुया, एवं एएणं गमएणं जाव दसपएसिएहिंतो खंधेहिंतो नवपएसिया खंधा दव्वट्ठयाए बहुया । एएसि णं भंते ! दसपएसि० पुच्छा, गोयमा ! दसपएसिएहिंतो खंधेहिंतो संखेज्जपएसिया खंधा दव्वट्ठयाए बहुया, एएसि णं भंते ! संखेज्ज० पुच्छा, गोयमा ! संखेज्जपएसिएहिंतो खंधेहिंतो असंखेज्जपएसिया खंधा दव्वट्ठयाए बहुया, एएसि णं भंते ! असंखेज्जपएसि० पुच्छा, गोयमा ! अ(संखेज्ज)णंतपएसिएहिंतो खंधेहिंतो अ(णंत)संखेज्जपएसिया खंधा दव्वट्ठयाए बहुया, एएसि णं भंते ! परमाणुपोग्गलाणं दुपएसियाण य खंधाणं पएसट्ठयाए कयरे २ हिंतो बहुया ? गोयमा ! परमाणुपोग्गलेहिंतो दुपएसिया खंधा पएसट्ठयाए बहुया, एवं एएणं गमएणं जाव नवपएसिएहिंतो खंधेहिंतो दसपएसिया खंधा पएसट्ठयाए बहुया, एवं सव्वत्थ पुच्छियव्वं, दसपएसिएहिंतो खंधेहिंतो संखेज्जपएसिया खंधा पएसट्ठयाए बहुया, संखेज्जपएसिएहिंतो खंधेहिंतो असंखेज्जपएसिया खंधा पएसट्ठयाए बहुया, एएसि णं भंते ! असंखेज्जपएसियाणं पुच्छा, गोयमा ! अणंतपएसिएहिंतो खंधेहिंतो असंखेज्जपएसिया खंधा पएसट्ठयाए बहुया ॥ एएसि णं भंते ! एगपएसोगाढाणं दुपएसोगाढाण य पोग्गलाणं दव्वट्ठयाए कयरे २ हिंतो जाव विसेसाहिया वा ? गोयमा ! दुपएसोगाढेहिंतो पोग्गलेहिंतो एगपएसोगाढा पोग्गला दव्वट्ठयाए विसेसाहिया, एवं एएणं गमएणं तिपएसोगाढेहिंतो पोग्गलेहिंतो दुपएसोगाढा पोग्गला दव्वट्ठयाए विसेसाहिया जाव दसपएस-

सोगादेहिंतो पोग्गलेहिंतो नवपएसोगाढा पोग्गला दव्वट्टयाए विसेसाहिया, एएसि णं भंते ! दसपए० पुच्छा, गोयमा ! दसपएसोगादेहिंतो पोग्गलेहिंतो संखेजपएसोगाढा पोग्गला दव्वट्टयाए बहुया, संखेजपएसोगादेहिंतो पोग्गलेहिंतो असंखेजपएसोगाढा पोग्गला दव्वट्टयाए बहुया, पुच्छा सव्वत्थ भाणियव्वा । एएसि णं भंते ! एगपएसोगाढाणं दुपएसोगाढाणं य पोग्गलाणं पएसट्टयाए कयरे २ हिंतो जाव विसेसाहिया वा ? गोयमा ! एगपएसोगादेहिंतो पोग्गलेहिंतो दुपएसोगाढा पोग्गला पएसट्टयाए विसेसाहिया, एवं जाव नवपएसोगादेहिंतो पोग्गलेहिंतो दसपएसोगाढा पोग्गला पएसट्टयाए विसेसाहिया, दसपएसोगादेहिंतो पोग्गलेहिंतो संखेजपएसोगाढा पोग्गला पएसट्टयाए बहुया, संखेजपएसोगादेहिंतो पोग्गलेहिंतो असंखेजपएसोगाढा पोग्गला पएसट्टयाए बहुया । एएसि णं भंते ! एगसमयट्ठिईयाणं दुसमयट्ठिईयाणं य पोग्गलाणं दव्वट्टयाए जहा ओगाहणाए वत्तव्वया एवं ठिईएवि । एएसि णं भंते ! एगगुणकालयाणं दुगुणकालयाणं य पोग्गलाणं दव्वट्टयाए एएसि णं जहा परमाणुपोग्गलाइणं तहेव वत्तव्वया निरवसेसा, एवं सव्वेसिं वच्चगंधरसाणं, एएसि णं भंते ! एगगुणकक्खडाणं दुगुणकक्खडाणं य पोग्गलाणं दव्वट्टयाए कयरे २ हिंतो जाव विसेसाहिया वा ? गोयमा ! एगगुणकक्खडेहिंतो पोग्गलेहिंतो दुगुणकक्खडा पोग्गला दव्वट्टयाए विसेसाहिया, एवं जाव नवगुणकक्खडेहिंतो पोग्गलेहिंतो दसगुणकक्खडा पोग्गला दव्वट्टयाए विसेसाहिया, दसगुणकक्खडेहिंतो पोग्गलेहिंतो संखेजगुणकक्खडा पोग्गला दव्वट्टयाए बहुया, संखेजगुणकक्खडेहिंतो पोग्गलेहिंतो असंखेजगुणकक्खडा पोग्गला दव्वट्टयाए बहुया, असंखेजगुणकक्खडेहिंतो पोग्गलेहिंतो अणंतगुणकक्खडा पोग्गला दव्वट्टयाए बहुया, एवं पएसट्टयाए सव्वत्थ पुच्छा भाणियव्वा, जहा कक्खडा एवं मउयगुरयलहुयावि, सीयउसिणनिद्धलुक्खा जहा वच्चा ॥ ७२९ ॥ एएसि णं भंते ! परमाणुपोग्गलाणं संखेजपएसियाणं असंखेजपएसियाणं अणंतपएसियाणं य खंधाणं दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा अणंतपएसिया खंधा दव्वट्टयाए, परमाणुपोग्गला दव्वट्टयाए अणंतगुणा, संखेजपएसिया खंधा दव्वट्टयाए संखेजगुणा, असंखेजपएसिया खंधा दव्वट्टयाए असंखेजगुणा, पएसट्टयाए-सव्वत्थोवा अणंतपएसिया खंधा पएसट्टयाए, परमाणुपोग्गला अपएसट्टयाए अणंतगुणा, संखेजपएसिया खंधा पएसट्टयाए संखेजगुणा, असंखेजपएसिया खंधा पएसट्टयाए असंखेजगुणा, दव्वट्टपएसट्टयाए-सव्वत्थोवा अणंतपएसिया खंधा दव्वट्टयाए ते चेव पएसट्टयाए अणंतगुणा, परमाणुपोग्गला दव्वट्टयाए अपएसट्टयाए

अणंतगुणा, संखेजपएसिया खंधा दव्वट्टयाए संखेजगुणा ते चेव पएसट्टयाए संखेजगुणा, असंखेजपएसिया खंधा दव्वट्टयाए असंखेजगुणा ते चेव पएसट्टयाए असंखेजगुणा । एसि णं भंते ! एगपएसोगाढाणं संखेजपएसोगाढाणं असंखेजपएसोगाढाणं य पोग्गलाणं दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा एगपएसोगाढा पोग्गला दव्वट्टयाए, संखेजपएसोगाढा पोग्गला दव्वट्टयाए संखेजगुणा, असंखेजपएसोगाढा पोग्गला दव्वट्टयाए असंखेजगुणा, पएसट्टयाए-सव्वत्थोवा एगपएसोगाढा पोग्गला(अ)पएसट्टयाए, संखेजपएसोगाढा पोग्गला पएसट्टयाए(अ)संखेजगुणा, असंखेजपएसोगाढा पोग्गला पएसट्टयाए असंखेजगुणा, दव्वट्टपएसट्टयाए-सव्वत्थोवा एगपएसोगाढा पोग्गला दव्वट्टपएसट्टयाए, संखेजपएसोगाढा पोग्गला दव्वट्टयाए संखेजगुणा ते चेव पएसट्टयाए संखेजगुणा, असंखेजपएसोगाढा पोग्गला दव्वट्टयाए असंखेजगुणा ते चेव पएसट्टयाए असंखेजगुणा । एसि णं भंते ! एगसमयट्ठिइयाणं संखेजसमयट्ठिइयाणं असंखेजसमयट्ठिइयाणं य पोग्गलाणं जहा ओगाहणाए तहा ठिईएवि भाणियव्वं अप्पाबहुगं । एसि णं भंते ! एगगुणकालगाणं संखेजगुणकालगाणं असंखेजगुणकालगाणं अणंतगुणकालगाणं य पोग्गलाणं दव्वट्टयाए पएसट्टयाए दव्वट्टपएसट्टयाए एसि णं जहा परमाणुपोग्गलाणं अप्पाबहुगं तहा एसिपि अप्पाबहुगं, एवं सेसाणवि वज्रगंधरसाणं । एसि णं भंते ! एगगुणकक्खडाणं संखेजगुणकक्खडाणं असंखेजगुणकक्खडाणं अणंतगुणकक्खडाणं य पोग्गलाणं दव्वट्टयाए पएसट्टयाए दव्वट्टपएसट्टयाए कयरे २ जाव विसेसाहिया वा ? गोयमा ! सव्वत्थोवा एगगुणकक्खडा पोग्गला दव्वट्टयाए, संखेजगुणकक्खडा पोग्गला दव्वट्टयाए संखेजगुणा, असंखेजगुणकक्खडा पोग्गला दव्वट्टयाए असंखेजगुणा, अणंतगुणकक्खडा पोग्गला दव्वट्टयाए अणंतगुणा, पएसट्टयाए एवं चेव नवरं संखेजगुणकक्खडा पोग्गला पएसट्टयाए असंखेजगुणा सेसं तं चेव, दव्वट्टपएसट्टयाए सव्वत्थोवा एगगुणकक्खडा पोग्गला दव्वट्टपएसट्टयाए, संखेजगुणकक्खडा पोग्गला दव्वट्टयाए संखेजगुणा ते चेव पएसट्टयाए संखेजगुणा, असंखेजगुणकक्खडा पो० दव्वट्टयाए असंखेजगुणा ते चेव पएसट्टयाए असंखेजगुणा, अणंतगुणकक्खडा पो० दव्वट्टयाए अणंतगुणा ते चेव पएसट्टयाए अ(संखेज) णंतगुणा, एवं मउयगुरुयलहुयाणवि अप्पाबहुगं, सीयउसिणनिद्धलक्ख्वाणं जहा वज्राणं तहेव ॥ ७४० ॥ परमाणुपोग्गले णं भंते ! दव्वट्टयाए किं कडजुम्मे तेओए दावरजुम्मे कलिओए ? गोयमा ! नो कडजुम्मे नो तेओए नो दावरजुम्मे कलिओए, एवं जाव अणंतपएसिए

खंधे । परमाणुपोग्गला णं भंते ! दव्वट्टयाए किं कडजुम्मा० पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं नो कडजुम्मा नो तेओगा नो दावरजुम्मा कलिओगा, एवं जाव अणंतपएसिया खंधा । परमाणु-पोग्गले णं भंते ! पएसट्टयाए किं कडजुम्मे० पुच्छा, गोयमा ! नो कडजुम्मे नो तेओए नो दावरजुम्मे कलिओए, दुपएसिए पुच्छा, गोयमा ! नो कडजुम्मे नो तेओए दावरजुम्मे नो कलिओए, तिपएसिए पुच्छा, गोयमा ! नो कडजुम्मे तेओए नो दावरजुम्मे नो कलिओए, चउप्पएसिए पुच्छा, गोयमा ! कडजुम्मे नो तेओए नो दावरजुम्मे नो कलिओए, पंचपएसिए जहा परमाणुपोग्गले, छप्पएसिए जहा दुपएसिए, सत्तपएसिए जहा तिपएसिए, अट्टपएसिए जहा चउप्पएसिए, नवपएसिए जहा परमाणुपोग्गले, दसपएसिए जहा दुपएसिए, संखेजपएसिए णं भंते ! पोग्गले पुच्छा, गोयमा ! सिय कडजुम्मे जाव सिय कलिओगे, एवं असंखेजपएसिएवि, एवं अणंतपएसिएवि । परमाणुपोग्गला णं भंते ! पएसट्टयाए किं कडजुम्मा० पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं नो कडजुम्मा नो तेओगा नो दावरजुम्मा कलिओगा, दुपएसियाणं पुच्छा, गोयमा ! ओघादेसेणं सिय कडजुम्मा नो तेओगा सिय दावरजुम्मा नो कलिओगा, विहाणा-देसेणं नो कडजुम्मा नो तेओगा दावरजुम्मा नो कलिओगा, तिपएसियाणं पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं नो कडजुम्मा तेओगा नो दावरजुम्मा नो कलिओगा, चउप्पएसियाणं पुच्छा, गोयमा ! ओघादेसेणवि विहाणादेसेणवि कडजुम्मा नो तेओगा नो दावरजुम्मा नो कलिओगा, पंचपएसिया जहा परमाणुपोग्गला, छप्पएसिया जहा दुपएसिया, सत्तपएसिया जहा तिपएसिया, अट्टपएसिया जहा चउप्पएसिया, नवपएसिया जहा परमाणु-पोग्गला, दसपएसिया जहा दुपएसिया, संखेजपएसियाणं पुच्छा, गोयमा ! ओघादेसेणं सिय कडजुम्मा जाव सिय कलिओगा, विहाणादेसेणं कडजुम्मावि जाव कलिओगावि, एवं असंखेजपएसियावि अणंतपएसियावि ॥ परमाणुपोग्गले णं भंते ! किं कडजुम्मपएसोगाढे० पुच्छा, गोयमा ! (णो) कडजुम्मपएसोगाढे नो तेओग० नो दावरजुम्म० कलिओगपएसोगाढे । दुपएसिए णं पुच्छा, गोयमा ! नो कडजुम्म-पएसोगाढे णो तेओग० सिय दावरजुम्मपएसोगाढे सिय कलिओगपएसोगाढे । तिपएसिए णं पुच्छा, गोयमा ! णो कडजुम्मपएसोगाढे सिय तेओगपएसोगाढे सिय दावरजुम्मपएसोगाढे सिय कलिओगपएसोगाढे ३ । चउप्पएसिए णं पुच्छा, गोयमा ! सिय कडजुम्मपएसोगाढे जाव सिय कलिओगपएसोगाढे ४, एवं जाव

अर्णतपएसिए ॥ परमाणुपोगला णं भंते ! किं कडजुम्मपएसोगाढा० पुच्छा, गोयमा ! ओघादेसेणं कडजुम्मपएसोगाढा णो तेओग० नो दावर० नो कलिओग०, विहाणादेसेणं नो कडजुम्मपएसोगाढा णो तेओग० नो दावर० कलिओगपएसोगाढा । दुपएसियाणं पुच्छा, गोयमा ! ओघादेसेणं कडजुम्मपएसोगाढा नो तेओग० नो दावर० नो कलिओगपएसोगाढा, विहाणादेसेणं नो कडजुम्मपएसोगाढा नो तेओगपएसोगाढा दावरजुम्मपएसोगाढावि कलिओगपएसोगाढावि । तिपएसियाणं पुच्छा, गोयमा ! ओघादेसेणं कडजुम्मपएसोगाढा नो तेओग० नो दावर० नो कलिओगपएसोगाढा, विहाणादेसेणं नो कडजुम्मपएसोगाढावि दावरजुम्मपएसोगाढावि कलिओगपएसोगाढावि ३ । चउप्पएसियाणं पुच्छा, गोयमा ! ओघादेसेणं कडजुम्मपएसोगाढा नो तेओग० नो दावर० नो कलिओगपएसोगाढा, विहाणादेसेणं कडजुम्मपएसोगाढावि जाव कलिओगपएसोगाढावि, एवं जाव अर्णतपएसिया ॥ परमाणुपोगले णं भंते ! किं कडजुम्मसमयट्ठिईए० पुच्छा, गोयमा ! सिय कडजुम्मसमयट्ठिईए जाव सिय कलिओगसमयट्ठिईए, एवं जाव अर्णतपएसिए । परमाणुपोगला णं भंते ! किं कडजुम्मसमयट्ठिईया० पुच्छा, गोयमा ! ओघादेसेणं सिय कडजुम्मसमयट्ठिईया जाव सिय कलिओगसमयट्ठिईया ४, विहाणादेसेणं कडजुम्मसमयट्ठिईयावि जाव कलिओगसमयट्ठिईयावि ४, एवं जाव अर्णतपएसिया । परमाणुपोगले णं भंते ! कालवन्नपज्जवेहिं किं कडजुम्मे तेओगे० जहा ठिईए वत्तव्वया एवं वत्तेसुवि सव्वेसु गंधेसुवि एवं चेव रसेसुवि जाव मडुरो रसोत्ति, अर्णतपएसिए णं भंते ! खंधे कक्खड्ढासपज्जवेहिं किं कडजुम्मे० पुच्छा, गोयमा ! सिय कडजुम्मे जाव सिय कलिओगे । अर्णतपएसिया णं भंते ! खंधा कक्खड्ढासपज्जवेहिं किं कडजुम्मा० पुच्छा, गोयमा ! ओघादेसेणं सिय कडजुम्मा जाव सिय कलिओगा ४, विहाणादेसेणं कडजुम्मावि जाव कलिओगावि ४, एवं मउयगुरुयलहुयावि भाणियव्वा, सीयउत्तिणनिदल्लक्खा जहा वच्चा ॥ ७४१ ॥ परमाणुपोगले णं भंते ! किं स(अ)ण्हे अण्हे ? गोयमा ! नो सण्हे अण्हे । दुपएसिए णं पुच्छा, गोयमा ! सण्हे नो अण्हे, तिपएसिए जहा परमाणुपोगले, चउप्पएसिए जहा दुपएसिए, पंचपएसिए जहा तिपएसिए, छप्पएसिए जहा दुपएसिए, सत्तपएसिए जहा तिपएसिए, अट्ठपएसिए जहा दुपएसिए, नवपएसिए जहा तिपएसिए, दसपएसिए जहा दुपएसिए, संखेज्जपएसिए णं भंते ! खंधे पुच्छा, गोयमा ! सिय सण्हे सिय अण्हे, एवं असंखेज्जपएसिएवि, एवं अर्णतपएसिएवि ; । परमाणुपोगला णं भंते ! किं सद्धा अण्हा ?

गोयमा ! सद्धा वा अणद्धा वा, एवं जाव अणंतपएसिया ॥ ७४२ ॥
 परमाणुपोग्गले णं भंते ! किं सेए निरेए ? गोयमा ! सिय सेए सिय निरेए, एवं
 जाव अणंतपएसिए । परमाणुपोग्गला णं भंते ! किं सेया निरेया ? गोयमा !
 सेयावि निरेयावि, एवं जाव अणंतपएसिया ॥ परमाणुपोग्गले णं भंते ! सेए कालओ
 केवच्चिरं होइ ? गोयमा ! जहण्णेणं एकं समयं उक्कोसेणं आवलियाए असंखेज्जइभागं,
 परमाणुपोग्गले णं भंते ! निरेए कालओ केवच्चिरं होइ ? गोयमा ! जहण्णेणं एकं
 समयं उक्कोसेणं असंखेज्जं कालं, एवं जाव अणंतपएसिए, परमाणुपोग्गला णं भंते !
 सेया कालओ केवच्चिरं हो(इ)न्ति ? गोयमा ! सव्वद्धं, परमाणुपोग्गला णं भंते ! निरेया
 कालओ केवच्चिरं होन्ति ? गोयमा ! सव्वद्धं, एवं जाव अणंतपएसिया ॥ परमाणु-
 पोग्गलस्स णं भंते ! सेयस्स केवइयं कालं अंतरं होइ ? गोयमा ! सट्ठाणंतरं पडुच्च
 जहन्नेणं एकं समयं उक्कोसेणं असंखेज्जं कालं, परट्ठाणंतरं पडुच्च जहन्नेणं एकं समयं
 उक्कोसेणं असंखेज्जं कालं । निरेयस्स केवइयं कालं अंतरं होइ ? गोयमा ! सट्ठाणं-
 तरं पडुच्च जहन्नेणं एकं समयं उक्कोसेणं आवलियाए असंखेज्जइभागं, परट्ठाणंतरं
 पडुच्च जहन्नेणं एकं समयं उक्कोसेणं असंखे(ज्ज)ज्जं कालं । दुपएसियस्स णं भंते !
 खंधस्स सेयस्स पुच्छा, गोयमा ! सट्ठाणंतरं पडुच्च जहन्नेणं एकं समयं उक्कोसेणं
 असंखेज्जं कालं, परट्ठाणंतरं पडुच्च जहण्णेणं एकं समयं उक्कोसेणं अणंतं कालं ।
 निरेयस्स केवइयं कालं अंतरं होइ ? गोयमा ! सट्ठाणंतरं पडुच्च जहन्नेणं एकं समयं
 उक्कोसेणं आवलियाए असंखेज्जइभागं, परट्ठाणंतरं पडुच्च जहन्नेणं एकं समयं
 उक्कोसेणं अणंतं कालं, एवं जाव अणंतपएसियस्स । परमाणुपोग्गलाणं भंते !
 सेयाणं केवइयं कालं अंतरं होइ ? गोयमा ! नत्थि अंतरं, निरेयाणं केवइयं
 कालं अंतरं होइ ? गोयमा ! नत्थि अंतरं, एवं जाव अणंतपएसियाणं
 खंधाणं ॥ एएसि णं भंते ! परमाणुपोग्गलाणं सेयाणं निरेयाणं य कयरे २ हितो
 जाव विसेसाहिया वा ? गोयमा ! सव्वत्थोवा परमाणुपोग्गला सेया, निरेया असं-
 खेज्जगुणा एवं जाव असंखेज्जपएसियाणं खंधाणं । एएसि णं भंते ! अणंतपएसि-
 याणं खंधाणं सेयाणं निरेयाणं य कयरे २ जाव विसेसाहिया वा ? गोयमा !
 सव्वत्थोवा अणंतपएसिया खंधा निरेया, सेया अणंतगुणा ॥ एएसि णं भंते !
 परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाणं य खंधाणं
 सेयाणं निरेयाणं य दव्वट्ठयाए पएसट्ठयाए दव्वट्ठपएसट्ठयाए कयरे २ जाव विसे-
 साहिया वा ? गोयमा ! सव्वत्थोवा अणंतपएसिया खंधा निरेया दव्वट्ठयाए १,
 अणंतपएसिया खंधा सेया दव्वट्ठयाए अणंतगुणा २, परमाणुपोग्गला सेया दव्व-

द्वयाए अणंतगुणा ३, संखेजपएसिया खंधा सेया दव्वद्वयाए असंखेजगुणा ४, असंखेजपएसिया खंधा सेया दव्वद्वयाए असंखेजगुणा ५, परमाणुपोग्गला निरेया दव्वद्वयाए असंखेजगुणा ६, संखेजपएसिया खंधा निरेया दव्वद्वयाए संखेजगुणा ७, असंखेजपएसिया खंधा निरेया दव्वद्वयाए असंखेजगुणा ८, पएसद्वयाए एवं चेव नवरं परमाणुपोग्गला अपएसद्वयाए भाणियन्वा, संखेजपएसिया खंधा निरेया पएसद्वयाए असंखेजगुणा सेसं तं चेव, दव्वद्वपएसद्वयाए-सव्वत्थोच्चा अणंतपएसिया खंधा निरेया दव्वद्वयाए १, ते चेव पएसद्वयाए अणंतगुणा २, अणंतपएसिया खंधा सेया दव्वद्वयाए अणंतगुणा ३, ते चेव पएसद्वयाए अणंतगुणा ४, परमाणुपोग्गला सेया दव्वद्वयाए अपएसद्वयाए अणंतगुणा ५, संखेजपएसिया खंधा सेया दव्वद्वयाए असंखेजगुणा ६, ते चेव पएसद्वयाए (अ)संखेजगुणा ७, असंखेजपएसिया खंधा सेया दव्वद्वयाए असंखेजगुणा ८, ते चेव पएसद्वयाए असंखेजगुणा ९, परमाणुपोग्गला निरेया दव्वद्वयाए अपएसद्वयाए असंखेजगुणा १०, संखेजपएसिया खंधा निरेया दव्वद्वयाए असंखेजगुणा ११, ते चेव पएसद्वयाए (अ)संखेजगुणा १२, असंखेजपएसिया खंधा निरेया दव्वद्वयाए असंखेजगुणा १३, ते चेव पएसद्वयाए असंखेजगुणा १४ । परमाणुपोग्गले णं भंते ! किं देसेए सव्वेए निरेए ? गोयमा ! नो देसेए सिय सव्वेए सिय निरेए, दुपएसिए णं भंते ! खंधे पुच्छा, गोयमा ! सिय देसेए सिय सव्वेए सिय निरेए, एवं जाव अणंतपएसिए । परमाणुपोग्गला णं भंते ! किं देसेया सव्वेया निरेया ? गोयमा ! नो देसेया सव्वेयावि निरेयावि, दुपएसिया णं भंते ! खंधा पुच्छा, गोयमा ! देसेयावि सव्वेयावि निरेयावि, एवं जाव अणंतपएसिया । परमाणुपोग्गले णं भंते ! सव्वेए कालओ केवच्चिरं होइ ? गोयमा ! जहजेणं एक्कं समयं उक्कोसेणं आवलियाए असंखेजइभागं, निरेए कालओ केवच्चिरं होइ ? गोयमा ! जहजेणं एक्कं समयं उक्कोसेणं असंखेजं कालं । दुपएसिए णं भंते ! खंधे देसेए कालओ केव(च्चि)चिरं होइ ? गोयमा ! जहजेणं एक्कं समयं उक्कोसेणं आवलियाए असंखेजइभागं, सव्वेए कालओ केवच्चिरं होइ ? गोयमा ! जहजेणं एक्कं समयं उक्कोसेणं आवलियाए असंखेजइभागं, निरेए कालओ केवच्चिरं होइ ? गोयमा ! जहजेणं एक्कं समयं उक्कोसेणं असंखेजं कालं, एवं जाव अणंतपएसिए । परमाणुपोग्गला णं भंते ! सव्वेया कालओ केवच्चिरं होंति ? गोयमा ! सव्वदं, निरेया कालओ केवच्चिरं हो(न्ति)इ ? गोयमा ! सव्वदं । दुपएसिया णं भंते ! खंधा देसेया कालओ केवच्चिरं होंति ? गोयमा ! सव्वदं, सव्वेया कालओ केवच्चिरं होंति ? सव्वदं, निरेया कालओ केवच्चिरं होंति ? सव्वदं, एवं जाव अणंतपएसिया । परमाणुपोग्ग-

लस्स णं भंते ! सव्वेयस्स केवइयं कालं अंतरं होइ ? गोयमा ! सट्ठाणंतरं पडुच्च जह-
 ज्ञेण एक्कं समयं उक्कोसेण असंखेज्जं कालं, परट्ठाणंतरं पडुच्च जहज्ञेण एक्कं समयं उक्को-
 सेण असंखेज्जं कालं । निरेयस्स केवइयं कालं अंतरं होइ ? सट्ठाणंतरं पडुच्च जहण्णेण
 एक्कं समयं उक्कोसेण आवलियाए असंखेज्जइभागं, परट्ठाणंतरं पडुच्च जहज्ञेण एक्कं
 समयं उक्कोसेण असंखेज्जं कालं । दुपएसियस्स णं भंते ! खंधस्स देसेयस्स केवइयं
 कालं अंतरं होइ ? गोयमा ! सट्ठाणंतरं पडुच्च जहज्ञेण एक्कं समयं उक्कोसेण असंखेज्जं
 कालं, परट्ठाणंतरं पडुच्च जहज्ञेण एक्कं समयं उक्कोसेण अणंतं कालं, सव्वेयस्स केवइयं
 कालं० ? एवं चेव जहा देसेयस्स, निरेयस्स केवइयं कालं० ? सट्ठाणंतरं पडुच्च
 जहज्ञेण एक्कं समयं उक्कोसेण आवलियाए असंखेज्जइभागं, परट्ठाणंतरं पडुच्च जहज्ञेण
 एक्कं समयं उक्कोसेण अणंतं कालं, एवं जाव अणंतपएसियस्स ॥ परमाणुपोग्गलाणं
 भंते ! सव्वेयाणं केवइयं कालं अंतरं होइ ? गोयमा ! नत्थि अंतरं, निरेयाणं केव-
 इयं० ? नत्थि अंतरं, दुपएसियाणं भंते ! खंधाणं देसेयाणं केवइयं कालं० ? नत्थि
 अंतरं, सव्वेयाणं केवइयं कालं० ? नत्थि अंतरं, निरेयाणं केवइयं कालं० ? नत्थि
 अंतरं, एवं जाव अणंतपएसियाणं । एएसि णं भंते ! परमाणुपोग्गलाणं सव्वेयाणं
 निरेयाणं य कयरे २ जाव विसेसाहिया वा ? गोयमा ! सव्वत्थोवा परमाणुपोग्गला
 सव्वेया, निरेया असंखेज्जगुणा । एएसि णं भंते ! दुपएसियाणं खंधाणं देसेयाणं
 सव्वेयाणं निरेयाणं य कयरे २ जाव विसेसाहिया वा ? गोयमा ! सव्वत्थोवा दुपए-
 सिया खंधा सव्वेया, देसेया असंखेज्जगुणा, निरेया असंखेज्जगुणा, एवं जाव असं-
 खेज्जपएसियाणं खंधाणं । एएसि णं भंते ! अणंतपएसियाणं खंधाणं देसेयाणं सव्वे-
 याणं निरेयाणं य कयरे २ जाव विसेसाहिया वा ? गोयमा ! सव्वत्थोवा अणंतप-
 एसिया खंधा सव्वेया, निरेया अणंतगुणा, देसेया अणंतगुणा । एएसि णं भंते !
 परमाणुपोग्गलाणं संखेज्जपएसियाणं असंखेज्जपएसियाणं अणंतपएसियाणं य खंधाणं
 देसेयाणं सव्वेयाणं निरेयाणं दव्वट्ठयाए पएसट्ठयाए दव्वट्ठपएसट्ठयाए कयरे २ जाव
 विसेसाहिया वा ? गोयमा ! सव्वत्थोवा अणंतपएसिया खंधा सव्वेया दव्वट्ठयाए १,
 अणंतपएसिया खंधा निरेया दव्वट्ठयाए अणंतगुणा २, अणंतपएसिया खंधा देसेया
 दव्वट्ठयाए अणंतगुणा ३, असंखेज्जपएसिया खंधा सव्वेया दव्वट्ठयाए अ(णंत)संखेज्ज-
 गुणा ४, संखेज्जपएसिया खंधा सव्वेया दव्वट्ठयाए असंखेज्जगुणा ५, परमाणुपोग्गला
 सव्वेया दव्वट्ठयाए असंखेज्जगुणा ६, संखेज्जपएसिया खंधा देसेया दव्वट्ठयाए असं-
 खेज्जगुणा ७, असंखेज्जपएसिया खंधा देसेया दव्वट्ठयाए असंखेज्जगुणा ८, परमाणु-
 पोग्गला निरेया दव्वट्ठयाए असंखेज्जगुणा ९, संखेज्जपएसिया खंधा निरेया दव्व-

द्वयाए संखेजगुणा १०, असंखेजपएसिया खंधा निरेया दव्वद्वयाए असंखेजगुणा ११, पएसद्वयाए-सव्वत्थोवा अणंतपएसिया खंधा पएसद्वयाए एवं पएसद्वयाएवि नवरं परमाणुपोग्गला अपएसद्वयाए भाणियव्वा, संखेजपएसिया खंधा निरेया पएसद्वयाए असंखेजगुणा सेसं तं चेव, दव्वद्वपएसद्वयाए सव्वत्थोवा अणंतपएसिया खंधा सव्वेया दव्वद्वयाए १, ते चेव पएसद्वयाए अणंतगुणा २, अणंतपएसिया खंधा निरेया दव्वद्वयाए अणंतगुणा ३, ते चेव पएसद्वयाए अणंतगुणा ४, अणंतपएसिया खंधा देसेया दव्वद्वयाए अणंतगुणा ५, ते चेव पएसद्वयाए अणंतगुणा ६, असंखेजपएसिया खंधा सव्वेया दव्वद्वयाए अणंतगुणा ७, ते चेव पएसद्वयाए असंखेजगुणा ८, संखेजपएसिया खंधा सव्वेया दव्वद्वयाए असंखेजगुणा ९, ते चेव पएसद्वयाए (अ)संखेजगुणा १०, परमाणुपोग्गला सव्वेया दव्वद्वअपएसद्वयाए असंखेजगुणा ११, संखेजपएसिया खंधा देसेया दव्वद्वयाए असंखेजगुणा १२, ते चेव पएसद्वयाए (अ)संखेजगुणा १३, असंखेजपएसिया खंधा देसेया दव्वद्वयाए असंखेजगुणा १४, ते चेव पएसद्वयाए असंखेजगुणा १५, परमाणुपोग्गला निरेया दव्वद्वअपएसद्वयाए असंखेजगुणा १६, संखेजपएसिया खंधा निरेया दव्वद्वयाए संखेजगुणा १७, ते चेव पएसद्वयाए संखेजगुणा १८, असंखेजपएसिया निरेया दव्वद्वयाए असंखेजगुणा १९, ते चेव पएसद्वयाए असंखेजगुणा २० ॥ ७४३ ॥

कइ णं भंते ! धम्मत्थिकायस्स मज्झपएसो प० ? गोयमा ! अट्ठ धम्मत्थिकायस्स मज्झपएसो प० । कइ णं भंते ! अहम्मत्थिकायस्स मज्झपएसो प० ? गोयमा ! एवं चेव, कइ णं भंते ! आगासत्थिकायस्स मज्झपएसो प० ? एवं चेव । कइ णं भंते ! जीवत्थिकायस्स मज्झपएसो प० ? गोयमा ! अट्ठ जीवत्थिकायस्स मज्झपएसो प०, एए णं भंते ! अट्ठ जीवत्थिकायस्स मज्झपएसो कइसु आगासपएसो अगाहंति ? गोयमा ! जहत्तेणं एक्कंसि वा दोहिं वा तिहिं वा चउहिं वा पंचहिं वा छहिं वा उक्कोसेणं अट्ठसु, नो चेव णं सत्तसु । सेवं भंते ! २ त्ति ॥ ७४४ ॥ **पणवी-सइमस्स सयस्स चउत्थो उद्देसो समत्तो ॥**

कइविहा णं भंते ! पज्जवा पचत्ता ? गोयमा ! दुविहा पज्जवा प०, तं०-जीव-पज्जवा य अजीवपज्जवा य, पज्जवपयं निरवसेसं भाणियव्वं जहा पन्नवणाए ॥ ७४५ ॥ आवलियाणं भंते ! किं संखेज्जा समया असंखेज्जा समया अणंता समया ? गोयमा ! नो संखेज्जा समया असंखेज्जा समया नो अणंता समया, आणापाणूणं भंते ! किं संखेज्जा० ? एवं चेव, थोवे णं भंते ! किं संखेज्जा० ? एवं चेव, एवं लवेवि मुहुत्तेवि, एवं अहोरेत्तेवि, एवं पक्खे मासे उ(ऊ)इ अयणे संवच्छरे जुगे वाससए

वाससहस्से वाससयसहस्से पुर्व्वगे पुर्व्वे वुडियंगे वुडिए अडडंगे अडडे अववंगे
 अववे हुहुअंगे हुहुए उपपलंगे उ।पले पउमंगे पउमे नल्लिङगे नल्लिणे अच्छिणि(उ)-
 पूरंगे अच्छिणि(उ)पूरे अउयंगे अउए नउयंगे नउए पउयंगे पउए चूलियंगे चूलि(या)ए
 सीसपहेलियंगे सीसपहेलिया पलिओवमे सागरोवमे ओसप्पिणी एवं उस्सप्पिणीवि,
 पोग्गलपरियट्टे णं भंते ! किं संखेज्जा समया असंखेज्जा समया अणंता समया ?
 गोयमा ! नो संखेज्जा समया नो असंखेज्जा समया अणंता समया, एवं तीयद्धा
 अणागयद्धा सव्वद्धा ॥ आवलियाओ णं भंते ! किं संखेज्जा समया० पुच्छा,
 गोयमा ! नो संखेज्जा समया सिय असंखेज्जा समया सिय अणंता समया, आणापा-
 णूणं भंते ! किं संखेज्जा समया० पुच्छा, एवं चेव, थोवाणं भंते ! किं संखेज्जा समया
 ३ ? एवं चेव एवं जाव उस्सप्पिणीओत्ति, पोग्गलपरियट्टाणं भंते ! किं संखेज्जा
 समया० पुच्छा, गोयमा ! णो संखेज्जा समया णो असंखेज्जा समया अणंता
 समया, आणापाणूणं भंते ! किं संखेज्जाओ आवलियाओ० पुच्छा, गोयमा ! संखे-
 ज्जाओ आवलियाओ णो असंखेज्जाओ आवलियाओ नो अणंताओ आवलियाओ,
 एवं थोवेवि, एवं जाव सीसप्पहेलियत्ति । पलिओवमे णं भंते ! किं संखेज्जा०
 पुच्छा, गोयमा ! णो संखेज्जाओ आवलियाओ असंखेज्जाओ आवलियाओ नो
 अणंताओ आवलियाओ, एवं सागरोवमेवि, एवं ओसप्पिणीवि उस्सप्पिणीवि,
 पोग्गलपरियट्टे पुच्छा, गोयमा ! नो संखेज्जाओ आवलियाओ णो असंखेज्जाओ
 आवलियाओ अणंताओ आवलियाओ, एवं जाव सव्वद्धा । आणापाणूणं भंते !
 किं संखेज्जाओ आवलियाओ० पुच्छा, गोयमा ! सिय संखेज्जाओ आवलियाओ
 सिय असंखेज्जाओ सिय अणंताओ, एवं जाव सीसप्पहेलियाओ, पलिओवमाणं
 पुच्छा, गोयमा ! णो संखेज्जाओ आवलियाओ सिय असंखेज्जाओ आवलियाओ सिय
 अणंताओ आवलियाओ, एवं जाव उस्सप्पिणीओत्ति, पोग्गलपरियट्टाणं पुच्छा,
 गोयमा ! णो संखेज्जाओ आवलियाओ णो असंखेज्जाओ आवलियाओ अणंताओ
 आवलियाओ । थोवे णं भंते ! किं संखेज्जाओ आणापाणूओ असंखेज्जाओ जहा आव-
 लियाए वत्तव्वया एवं आणापाणूओवि निरवसेसा, एवं एएणं गमएणं जाव सीसप्पहे-
 लिया भाणियव्वा । सागरोवमे णं भंते ! किं संखेज्जा पलिओवमा० पुच्छा, गोयमा !
 संखेज्जा पलिओवमा णो असंखेज्जा पलिओवमा णो अणंता पलिओवमा, एवं ओस-
 प्पिणीएवि उस्सप्पिणीएवि, पोग्गलपरियट्टे णं भंते ! पुच्छा, गोयमा ! णो संखेज्जा
 पलिओवमा णो असंखेज्जा पलिओवमा अणंता पलिओवमा, एवं जाव सव्वद्धा ।
 सागरोवमाणं भंते ! किं संखेज्जा पलिओवमा० पुच्छा, गोयमा ! सिय संखेज्जा

पलिओवमा सिय असंखेज्जा पलिओवमा सिय अणंता पलिओवमा, एवं जाव
 ओसप्पिणी(ओ)वि उस्सप्पिणीवि । पोग्गलपरियट्ठाणं पुच्छा, गोयमा ! णो संखेज्जा
 पलिओवमा णो असंखेज्जा पलिओवमा अणंता पलिओवमा । ओसप्पिणी णं भंते !
 किं संखेज्जा सागरोवमा जहा पलिओवमस्स वत्तव्वया तहा सागरोवमस्सवि,
 पोग्गलपरियट्ठे णं भंते ! किं संखेज्जाओ ओसप्पिणीओ० पुच्छा, गोयमा ! णो संखे-
 ज्जाओ ओसप्पिणीओ णो असंखेज्जाओ अणंताओ ओसप्पिणीओ, पोग्गलपरियट्ठाणं
 भंते ! किं संखेज्जाओ ओसप्पिणीओ० पुच्छा, गोयमा ! नो संखेज्जाओ नो असंखे-
 ज्जाओ अणंताओ, पोग्गलपरियट्ठे णं भंते ! किं संखेज्जाओ ओसप्पिणिउस्सप्पिणीओ०
 पुच्छा, गोयमा ! णो संखेज्जाओ ओसप्पिणिउस्सप्पिणीओ णो असंखेज्जाओ अणं-
 ताओ ओसप्पिणिउस्सप्पिणीओ, एवं जाव सव्वद्धा, पोग्गलपरियट्ठाणं भंते ! किं
 संखेज्जाओ ओसप्पिणिउस्सप्पिणीओ० पुच्छा, गोयमा ! णो संखेज्जाओ ओसप्पिणि-
 उस्सप्पिणीओ णो असंखेज्जाओ अणंताओ ओसप्पिणिउस्सप्पिणीओ । तीतद्धाणं
 भंते ! किं संखेज्जा पोग्गलपरियट्ठा० पुच्छा, गोयमा ! नो संखेज्जा पोग्गलपरियट्ठा
 नो असंखेज्जा अणंता पोग्गलपरियट्ठा, एवं अणागयद्धावि, एवं सव्वद्धावि ॥ ७४६ ॥
 अणागयद्धाणं भंते ! किं संखेज्जाओ तीतद्धाओ असंखेज्जाओ० अणंताओ० ? गोयमा !
 णो संखेज्जाओ तीतद्धाओ णो असंखेज्जाओ तीतद्धाओ णो अणंताओ तीतद्धाओ,
 अणागयद्धा णं तीतद्धाओ समयाहिया, तीतद्धा णं अणागयद्धाओ समयऊणा ।
 सव्वद्धाणं भंते ! किं संखेज्जाओ तीतद्धाओ० पुच्छा, गोयमा ! णो संखेज्जाओ तीत-
 द्धाओ णो असंखेज्जाओ तीतद्धाओ णो अणंताओ तीतद्धाओ, सव्वद्धा णं तीतद्धाओ
 साइरेग्गुणा तीतद्धा णं सव्वद्धाओ थोवूणए अद्धे, सव्वद्धाणं भन्ते ! किं संखे-
 ज्जाओ अणागयद्धाओ० पुच्छा, गोयमा ! णो संखेज्जाओ अणागयद्धाओ णो असं-
 खेज्जाओ अणागयद्धाओ णो अणंताओ अणागयद्धाओ, सव्वद्धा णं अणागयद्धाओ
 थोवूणग्गुणा अणागयद्धा णं सव्वद्धाओ साइरेगे अद्धे ॥ ७४७ ॥ कइविहा णं
 भंते ! णिओदा प० ? गोयमा ! दुविहा णिओदा प०, तं०-णिओ(य)गा य णिओ-
 यजीवा य, णिओदा णं भंते ! कइविहा प० ? गोयमा ! दुविहा प०, तंजहा-सुहु-
 मनिओदा य बायरनिओ(दा)गा य, एवं निओदा भाणियव्वा जहा जीवाभिगमे
 तहेव निरवसेसं ॥ ७४८ ॥ कइविहे णं भंते ! णामे पक्कते ? गोयमा ! छव्विहे
 णामे पक्कते, तंजहा-उदइए जाव सन्निवाइए । से किं तं उदइए णामे ? उदइए णामे
 दुविहे प०, तं०-उद(इ)ए य उदयनिप्फले य, एवं जहा सत्तरसमसए पढमे उहेसए
 भावो तहेव इहवि, नवरं इमं नामणाणत्तं, सेसं तहेव जाव सन्निवाइए । सेवं भंते !
 २ ति ॥ ७४९ ॥ पणवीसइमे सए पंचमो उदेसो समत्तो ॥

पञ्चवण १ वेय २ रागे ३ कप्प ४ चरित्त ५ पडिसेवणा ६ णाणे ७ । तित्थे
 ८ लिंग ९ सरीरे १० खेत्ते ११ काले १२ गइ १३ संजम १४ निगासे १५
 ॥ १ ॥ जोगु १६ वओग १७ कसाए १८ छेसा १९ परिणाम २० बंध २१ वेदे
 य २२ । कम्मोदीरण २३ उवसंपजहन्न २४ सज्जा य २५ आहारे २६ ॥ २ ॥
 भव २७ आगरिसे २८ कालं २९ तरे य ३० समुग्घाय ३१ खेत ३२ फुसणा य
 ३३ । भावे ३४ परि(माणे)णामे ३५ (खल्ल)विय अप्पाबहुयं ३६ नियंठाणं ३७ ॥ ३ ॥
 रायगिहे जाव एवं वयासी-कइ णं भंते ! गियंठा पन्नत्ता ? गोयमा ! पंच गियंठा
 पन्नत्ता, तंजहा-पुलाए-बउसे कुसीले गियंठे सिणाए ॥ पुलाए णं भंते ! कइविहे
 पन्नत्ते ? गोयमा ! पंचविहे प०, तं०-नाणपुलाए दंसणपुलाए चरित्तपुलाए लिंगपु-
 लाए अहासुहुमपुलाए णामं पंचमे । बउसे णं भंते ! कइविहे प० ? गोयमा !
 पंचविहे प०, तं०-आभोगबउसे अणाभोगबउसे संवुडबउसे असंवुडबउसे अहा-
 सुहुमबउसे णामं पंचमे । कुसीले णं भंते ! कइविहे प० ? गोयमा ! दुविहे प०,
 तं०-पडिसेवणाकुसीले य कसायकुसीले य, पडिसेवणाकुसीले णं भंते ! कइविहे
 पन्नत्ते ? गोयमा ! पंचविहे प०, तंजहा-नाणपडिसेवणाकुसीले दंसणपडिसेवणा-
 कुसीले चरित्तपडिसेवणाकुसीले लिंगपडिसेवणाकुसीले अहासुहुमपडिसेवणाकुसीले
 णामं पंचमे, कसायकुसीले णं भंते ! कइविहे पन्नत्ते ? गोयमा ! पंचविहे प०, तं०-
 नाणकसायकुसीले दंसणकसायकुसीले चरित्तकसायकुसीले लिंगकसायकुसीले अहासु-
 हुमकसायकुसीले णामं पंचमे । गियंठे णं भंते ! कइविहे प० ? गोयमा ! पंचविहे
 प०, तंजहा-पढमसमयनियंठे अपढमसमयनियंठे चरिमसमयनियंठे अचरिमसमय-
 नियंठे अहासुहुमनियंठे णामं पंचमे । सिणाए णं भंते ! कइविहे प० ? गोयमा !
 पंचविहे प०, तं०-अच्छवी १, असबले २, अकम्मंसे ३, संसुद्धणाणदंसणधरे अरहा
 जिणे केवली ४, अपरिस्सावी ५।१। पुलाए णं भंते ! किं सवेयए होज्जा अवैयए
 होज्जा ? गोयमा ! सवेयए होज्जा णो अवैयए होज्जा, जइ सवेयए होज्जा किं
 इत्थिवेयए होज्जा पुरिसवेयए होज्जा पुरिसनपुंसगवेयए होज्जा ? गोयमा ! नो
 इत्थिवेयए होज्जा पुरिसवेयए होज्जा पुरिसनपुंसगवेयए वा होज्जा । बउसे णं भंते !
 किं सवेयए होज्जा अवैयए होज्जा ? गोयमा ! सवेयए होज्जा णो अवैयए होज्जा, जइ
 सवेयए होज्जा किं इत्थिवेयए होज्जा पुरिसवेयए होज्जा पुरिसनपुंसगवेयए होज्जा ?
 गोयमा ! इत्थिवेयए वा होज्जा पुरिसवेयए वा होज्जा पुरिसनपुंसगवेयए वा होज्जा,
 एवं पडिसेवणाकुसीलेवि, कसायकुसीले णं भंते ! किं सवेयए होज्जा० पुच्छा, गोयमा !
 सवेयए वा होज्जा अवैयए वा होज्जा, जइ अवैदए होज्जा किं उवसंतवेदए होज्जा

खीणवेदए होजा ? गोयमा ! उवसंतवेदए वा होजा खीणवेदए वा होजा, जइ
 सवेदए होजा किं इत्थिवेदए होजा० पुच्छा, गोयमा ! तिसुवि जहा बउसे । गियंठे णं
 भंते ! किं सवेदए० पुच्छा, गोयमा ! णो सवेदए होजा अवेदए होजा, जइ अवेदए
 होजा किं उवसंत० पुच्छा, गोयमा ! उवसंतवेदए वा होजा खीणवेदए वा होजा ।
 सिणाए णं भंते ! किं सवेयए होजा० ? जहा नियंठे तहा सिणाएवि, नवरं
 णो उवसंतवेयए होजा खीणवेयए होजा २ ॥ ७५० ॥ पुलए णं भंते ! किं
 सरागे होजा वीयरगे होजा ? गोयमा ! सरागे होजा णो वीयरगे होजा, एवं
 जाव कसायकुसीले । गियंठे णं भंते ! किं सरागे होजा० पुच्छा, गोयमा ! णो सरागे
 होजा वीयरगे होजा, जइ वीयरगे होजा किं उवसंतकसायवीयरगे होजा खीण-
 कसायवीयरगे होजा ? गोयमा ! उवसंतकसायवीयरगे वा होजा खीणकसायवीयरगे
 वा होजा, सिणाए एवं चेव, नवरं णो उवसंतकसायवीयरगे होजा खीणकसायवीयरगे
 होजा ३ ॥ ७५१ ॥ पुलए णं भंते ! किं ठियकप्पे होजा अट्ठियकप्पे होजा ?
 गोयमा ! ठियकप्पे वा होजा अट्ठियकप्पे वा होजा, एवं जाव सिणाए । पुलए णं
 भंते ! किं जिणकप्पे होजा थेरकप्पे होजा कप्पातीते होजा ? गोयमा ! नो जिणकप्पे
 होजा थेरकप्पे होजा णो कप्पातीते होजा । बउसे णं भंते ! पुच्छा, गोयमा !
 जिणकप्पे वा होजा थेरकप्पे वा होजा नो कप्पातीते होजा, एवं पडिसेवणाकु-
 सीलेवि । कसायकुसीले णं पुच्छा, गोयमा ! जिणकप्पे वा होजा थेरकप्पे वा होजा
 कप्पातीते वा होजा । नियंठे णं पुच्छा, गोयमा ! नो जिणकप्पे होजा नो थेरकप्पे
 होजा कप्पातीते होजा, एवं सिणाएवि ४ ॥ ७५२ ॥ पुलए णं भंते ! किं सामाइय-
 संजमे होजा छेओवट्ठावणियसंजमे होजा परिहारविसुद्धियसंजमे होजा सुहुमसंपराय-
 संजमे होजा अहक्खायसंजमे होजा ? गोयमा ! सामाइयसंजमे वा होजा
 छेओवट्ठावणियसंजमे वा होजा णो परिहारविसुद्धियसंजमे होजा णो सुहुमसंपराय-
 संजमे होजा णो अहक्खायसंजमे होजा, एवं बउसेवि, एवं पडिसेवणाकुसीलेवि,
 कसायकुसीले णं पुच्छा, गोयमा ! सामाइयसंजमे वा होजा जाव सुहुमसंपराय-
 संजमे वा होजा णो अहक्खायसंजमे होजा । नियंठे णं पुच्छा, गोयमा ! णो
 सामाइयसंजमे होजा जाव णो सुहुमसंपरायसंजमे होजा अहक्खायसंजमे होजा,
 एवं सिणाएवि ५ ॥ ७५३ ॥ पुलए णं भंते ! किं पडिसेवए होजा अपडिसेवए
 होजा ? गोयमा ! पडिसेवए होजा णो अपडिसेवए होजा, जइ पडिसेवए होजा
 किं मूलगुणपडिसेवए होजा उत्तरगुणपडिसेवए होजा ? गोयमा ! मूलगुणपडिसेवए
 वा होजा उत्तरगुणपडिसेवए वा होजा, मूलगुणपडिसेवमाणे पंचण्हं अणासवाणं

अन्नयरं पडिसेवेज्जा, उत्तरगुणपडिसेवमाणे दसविहस्स पच्चक्खाणस्स अन्नयरं पडिसेवेज्जा । बउसे णं पुच्छा, गोयमा ! पडिसेवए होज्जा णो अपडिसेवए होज्जा, जइ पडिसेवए होज्जा किं मूलगुणपडिसेवए होज्जा उत्तरगुणपडिसेवए होज्जा ? गोयमा ! णो मूलगुणपडिसेवए होज्जा उत्तरगुणपडिसेवए होज्जा, उत्तरगुणपडिसेवमाणे दसविहस्स पच्चक्खाणस्स अन्नयरं पडिसेवेज्जा, पडिसेवणाकुसीले जहा पुलाए । कसायकुसीले णं पुच्छा, गोयमा ! णो पडिसेवए होज्जा अपडिसेवए होज्जा, एवं नियंठेवि, एवं सिणाएवि ६ ॥ ७५४ ॥ पुलाए णं भंते ! कइसु नाणेसु होज्जा ? गोयमा ! दोसु वा तिसु वा होज्जा, दोसु होज्जमाणे दोसु आभिणिबोहियनाणे सुअनाणे होज्जा, तिसु होज्जमाणे तिसु आभिणिबोहियनाणे सुयनाणे ओहिनाणे होज्जा, एवं बउसेवि, एवं पडिसेवणाकुसीलेवि, कसायकुसीले णं पुच्छा, गोयमा ! दोसु वा तिसु वा चउसु वा होज्जा, दोसु होज्जमाणे दोसु आभिणिबोहियनाणे सुयनाणे होज्जा, तिसु होज्जमाणे तिसु आभिणिबोहियनाणसुयनाणओहिनाणेसु होज्जा अहवा तिसु होज्जमाणे आभिणिबोहियनाणसुयनाणमणपज्जवनाणेसु होज्जा, चउसु होज्जमाणे चउसु आभिणिबोहियनाणसुयनाणओहिनाणमणपज्जवनाणेसु होज्जा, एवं नियंठेवि । सिणाए णं पुच्छा, गोयमा ! एगंमि केवलनाणे होज्जा ॥ ७५५ ॥ पुलाए णं भंते ! केवइयं सुयं अहिजेज्जा ? गोयमा ! जहन्नेणं नवमस्स पुव्वस्स तइयं आचारवत्थं, उक्कोसेणं नव पुव्वाइं अहिजेज्जा । बउसे णं पुच्छा, गोयमा ! जहन्नेणं अट्ठ पवयणमायाओ उक्कोसेणं दस पुव्वाइं अहिजेज्जा । एवं पडिसेवणाकुसीलेवि । कसायकुसीले णं पुच्छा, गोयमा ! जहन्नेणं अट्ठ पवयणमायाओ उक्कोसेणं चउइसु पुव्वाइं अहिजेज्जा, एवं नियंठेवि । सिणाए णं पुच्छा, गोयमा ! सुयवइरित्ते होज्जा ७॥७५६॥ पुलाए णं भंते ! किं तित्थे होज्जा अतित्थे होज्जा ? गोयमा ! तित्थे होज्जा णो अतित्थे होज्जा, एवं बउसेवि, एवं पडिसेवणाकुसीलेवि । कसायकुसीले पुच्छा, गोयमा ! तित्थे वा होज्जा अतित्थे वा होज्जा, जइ अतित्थे होज्जा किं तित्थयरं होज्जा पत्तेयबुद्धे होज्जा ? गोयमा ! तित्थगरे वा होज्जा पत्तेयबुद्धे वा होज्जा, एवं नियंठेवि, एवं सिणाएवि ८॥७५७॥ पुलाए णं भंते ! किं सल्लिगे होज्जा अन्नल्लिगे होज्जा गिहिल्लिगे होज्जा ? गोयमा ! द्ववल्लिगं पडुच्च सल्लिगे वा होज्जा अन्नल्लिगे वा होज्जा गिहिल्लिगे वा होज्जा, भावल्लिगं पडुच्च निय(मं)मा सल्लिगे होज्जा, एवं जाव सिणाए ९॥७५८॥ पुलाए णं भंते ! कइसु सरीरेसु होज्जा ? गोयमा ! तिसु ओरालियतेयाकम्मएसु होज्जा, बउसे णं भंते ! पुच्छा, गोयमा ! तिसु वा चउसु वा होज्जा, तिसु होज्जमाणे तिसु ओरालियतेयाकम्मएसु होज्जा, चउसु होज्जमाणे चउसु ओरालिय-

वेउव्वियतेयाकम्मएसु होजा, एवं पडिसेवणाकुसीलेवि । कसायकुसीले पुच्छा, गोयमा ! तिसु वा चउसु वा पंचसु वा होजा, तिसु होजमाणे तिसु ओरालियतेया-
 कम्मएसु होजा, चउसु होजमाणे चउसु ओरालियवेउव्वियतेयाकम्मएसु होजा, पंचसु
 होजमाणे पंचसु ओरालियवेउव्वियआहारगतेयाकम्मएसु होजा, णियंठो सिणाओ
 य जहा पुलाओ ॥ १० ॥ ७५९ ॥ पुलाए णं भंते ! किं कम्मभूमी(सु)ए होजा अकम्म-
 भूमीए होजा ? गोयमा ! जम्मणसंतिभावं पडुच्च कम्मभूमीए होजा णो अकम्मभूमीए
 होजा, वउसे णं पुच्छा, गोयमा ! जम्मणसंतिभावं पडुच्च कम्मभूमीए होजा
 णो अकम्मभूमीए होजा, साहरणं पडुच्च कम्मभूमीए वा होजा अकम्मभूमीए वा
 होजा, एवं जाव सिणाए ॥ ११ ॥ ७६० ॥ पुलाए णं भंते ! किं ओसप्पिणिकाले
 होजा उस्सप्पिणिकाले होजा णोओसप्पिणिणोउस्सप्पिणिकाले होजा ? गोयमा !
 ओसप्पिणिकाले वा होजा उस्सप्पिणिकाले वा होजा नोओसप्पिणिणोउस्स-
 प्पिणिकाले वा होजा, जइ ओसप्पिणिकाले होजा किं सुसमसुसमाकाले होजा
 १, सुसमाकाले होजा २, सुसमदूसमाकाले होजा ३, दूसमसुसमाकाले होजा
 ४, दूसमाकाले होजा ५, दूसमदूसमाकाले होजा ६ ? गोयमा ! जम्मणं पडुच्च णो
 सुसमसुसमाकाले होजा १, णो सुसमाकाले होजा २, सुसमदूसमाकाले वा होजा ३,
 दूसमसुसमाकाले वा होजा ४, णो दूसमाकाले होजा ५, णो दूसमदूसमाकाले होजा ६,
 संतिभावं पडुच्च णो सुसमसुसमाकाले होजा णो सुसमाकाले होजा सुसमदूसमाकाले
 वा होजा दूसमसुसमाकाले वा होजा दूसमाकाले वा होजा णो दूसमदूसमाकाले
 होजा, जइ उस्सप्पिणिकाले होजा किं दूसमदूसमाकाले होजा दूसमाकाले होजा
 दूसमसुसमाकाले होजा सुसमदूसमाकाले होजा सुसमाकाले होजा सुसमसुसमाकाले
 होजा ? गोयमा ! जम्मणं पडुच्च णो दूसमदूसमाकाले होजा १, दूसमाकाले वा
 होजा २, दूसमसुसमाकाले वा होजा ३, सुसमदूसमाकाले वा होजा ४, णो सुसमा-
 काले होजा ५, णो सुसमसुसमाकाले होजा ६, संतिभावं पडुच्च णो दूसमदूसमाकाले
 होजा १, (नो)दूसमाकाले होजा २, दूसमसुसमाकाले वा होजा ३, सुसमदूसमाकाले
 वा होजा ४, णो सुसमाकाले होजा ५, णो सुसमसुसमाकाले होजा ६ । जइ णोओस-
 प्पिणिणोउस्सप्पिणिकाले होजा किं सुसमसुसमापलिभागे होजा सुसमापलिभागे
 होजा सुसमदूसमापलिभागे होजा दूसमसुसमापलिभागे होजा ? गोयमा ! जम्मणं
 संतिभावं च पडुच्च णो सुसमसुसमापलिभागे होजा णो सुसमापलिभागे होजा णो दू(सु)
 समदूसमापलिभागे होजा दूसमसुसमापलिभागे होजा । वउसे णं भंते ! पुच्छा,
 गोयमा ! ओसप्पिणिकाले वा होजा उस्सप्पिणिकाले वा होजा नोओसप्पिणिणोउस्स-

पिणिकाळे वा होजा, जइ ओसपिणिकाळे होजा किं सुसमसुसमाकाले० पुच्छा, गोयमा ! जम्मणं संतिभावं च पडुच्च णो सुसमसुसमाकाले होजा णो सुसमाकाले होजा सुसमदूसमाकाले वा होजा दुस्समसुसमाकाले वा होजा दूसमाकाले वा होजा णो दूसमदूसमाकाले होजा, साहरणं पडुच्च अन्नयरे समाकाले होजा । जइ उस्सपिणिकाळे होजा किं दूसमदूसमाकाले होजा ६ पुच्छा, गोयमा ! जम्मणं पडुच्च णो दुस्समदुस्समाकाले होजा जहेव पुलाए, संतिभावं पडुच्च णो दूसमदूसमाकाले होजा णो दूसमाकाले होजा एवं संतिभावेणवि जहा पुलाए जाव णो सुसमसुसमाकाले होजा, साहरणं पडुच्च अन्नयरे समाकाले होजा । जइ नोओसपिणि-नोउस्सपिणिकाळे होजा० पुच्छा, गोयमा ! जम्मणसंतिभावं पडुच्च णो सुसमसुसमापलिभागे होजा जहेव पुलाए जाव दूसमसुसमापलिभागे होजा, साहरणं पडुच्च अन्नयरे पलिभागे होजा, जहा बउसे एवं पडिसेवणाकुसीलेवि, एवं कसायकुसीलेवि, निर्यठो सिणाओ य जहा पुलाओ, नवरं एएसिं अब्भहियं साहरणं भाणियच्चं, सेसं तं चेव १२ ॥ ७६१ ॥ पुलाए णं भंते ! कालगए समाणे (किं)कं गइं गच्छइ ? गोयमा ! देवगइं गच्छइ, देवगइं गच्छमाणे किं भवणवासीसु उववजेज्जा वाणमंतरेसु उववजेज्जा जोइसियवेमाणिएसु उववजेज्जा ? गोयमा ! णो भवणवासीसु उ० णो वाणमंतरेसु उ० णो जोइसिएसु उ० वेमाणिएसु उववजेज्जा, वेमाणिएसु उववज्जमाणे जहण्णेणं सोहम्मं कप्पे उक्कोसेणं सहस्सारे कप्पे उववजेज्जा, बउसे णं एवं चेव नवरं उक्कोसेणं अच्चुए कप्पे, पडिसेवणाकुसीले जहा बउसे, कसायकुसीले जहा पुलाए, नवरं उक्कोसेणं अणुत्तरविमाणेसु उववजेज्जा, णियंठे णं भंते ! एवं चेव, एवं जाव वेमाणिएसु उववज्जमाणे अजहन्नमणुक्कोसेणं अणुत्तरविमाणेसु उववजेज्जा, सिणाए णं भंते ! कालगए समाणे कं गइं गच्छइ ? गोयमा ! सिद्धिगइं गच्छइ । पुलाए णं भंते ! देवेसु उववज्जमाणे किं इंदत्ताए उववजेज्जा सामाणियत्ताए उववजेज्जा तायत्तीसगत्ताए उववजेज्जा लोगपालत्ताए उववजेज्जा अहमिंदत्ताए उववजेज्जा ? गोयमा ! अविराहणं पडुच्च इंदत्ताए उववजेज्जा सामाणियत्ताए उववजेज्जा लोगपालत्ताए वा उववजेज्जा तायत्तीसगत्ताए वा उववजेज्जा नो अहमिंदत्ताए उववजेज्जा, विराहणं पडुच्च अन्नयरेसु उववजेज्जा, एवं बउसेवि, एवं पडिसेवणाकुसीलेवि, कसायकुसीले पुच्छा, गोयमा ! अविराहणं पडुच्च इंदत्ताए वा उववजेज्जा जाव अहमिंदत्ताए उववजेज्जा, विराहणं पडुच्च अन्नयरेसु उववजेज्जा, निर्यठे पुच्छा, गोयमा अविराहणं पडुच्च णो इंदत्ताए उववजेज्जा जाव णो लोगपालत्ताए उववजेज्जा अहमिंदत्ताए उववजेज्जा, विराहणं पडुच्च अन्नयरेसु उववजेज्जा ॥ पुलागस्स णं भंते ! देवलोगेसु उववज्जमाणस्स

केवइयं कालं ठिई प० ? गोयमा ! जहजेणं पलिओवमपुहुत्तं उक्कोसेणं अट्टारस-
 सागरोवमाई, बउसस्स णं पुच्छा, गोयमा ! जहजेणं पलिओवमपुहुत्तं उक्कोसेणं
 बावीसं सागरोवमाई, एवं पडिसेवणाकुसीलस्सवि, कसायकुसीलस्स पुच्छा, गोयमा !
 जहजेणं पलिओवमपुहुत्तं उक्कोसेणं तेत्तीसं सागरोवमाई, णियंठस्स पुच्छा, गोयमा !
 अजहन्नमणुक्कोसेणं तेत्तीसं सागरोवमाई १३ ॥ ७६२ ॥ पुलागस्स णं भंते !
 केवइया संजमट्टाणा प० ? गोयमा ! असंखेज्जा संजमट्टाणा प०, एवं जाव कसाय-
 कुसीलस्स । नियंठस्स णं भंते ! केवइया संजमट्टाणा प० ? गोयमा ! एणे अजहन्नस-
 णुक्कोसए संजमट्टाणे प०, एवं सिणायस्सवि, एएसि णं भंते ! पुलागवउसपडिसेवणाक-
 सायकुसीलनियंठसिणायाणं संजमट्टाणाणं कयरे २ जाव विसैसाहिया वा ? गोयमा !
 सव्वथोवे नियंठस्स सिणायस्स य एणे अजहन्नमणुक्कोसए संजमट्टाणे, पुलागस्स
 संजमट्टाणा असंखेज्जगुणा, बउसस्स संजमट्टाणा असंखेज्जगुणा, पडिसेवणाकुसीलस्स
 संजमट्टाणा असंखेज्जगुणा, कसायकुसीलस्स संजमट्टाणा असंखेज्जगुणा १४ ॥ ७६३ ॥
 पुलागस्स णं भंते ! केवइया चरित्तपज्जवा प० ? गोयमा ! अणंता चरित्तपज्जवा
 प०, एवं जाव सिणायस्स । पुलाए णं भंते ! पुलागस्स सट्ठाणसन्निगासेणं
 चरित्तपज्जवेहिं किं हीणे तुल्ले अब्भहिए ? गोयमा ! सिय हीणे १, सिय तुल्ले २, सिय
 अब्भहिए ३, जइ हीणे अणंतभागहीणे वा असंखेज्जइभागहीणे वा संखेज्जइभागहीणे
 वा संखेज्जगुणहीणे वा असंखेज्जगुणहीणे वा अणंतगुणहीणे वा, अह अब्भहिए अणंत-
 भागमब्भहिए वा असंखेज्जइभागमब्भहिए वा संखेज्जइभागमब्भहिए वा संखेज्जगुण-
 मब्भहिए वा असंखेज्जगुणमब्भहिए वा अणंतगुणमब्भहिए वा ॥ पुलाए णं भंते !
 बउसस्स परट्ठाणसन्निगासेणं चरित्तपज्जवेहिं किं हीणे तुल्ले अब्भहिए ? गोयमा ! हीणे
 नो तुल्ले नो अब्भहिए, अणंतगुणहीणे, एवं पडिसेवणाकुसीलेवि, कसायकुसीलेण समं
 छट्ठाणवडिए जहेव सट्ठाणे, नियंठस्स जहा बउसस्स, एवं सिणायस्सवि ॥ बउसे णं
 भंते ! पुलागस्स परट्ठाणसन्निगासेणं चरित्तपज्जवेहिं किं हीणे तुल्ले अब्भहिए ?
 गोयमा ! णो हीणे णो तुल्ले अब्भहिए अणंतगुणमब्भहिए । बउसे णं भंते ! बउसस्स
 सट्ठाणसन्निगासेणं चरित्तपज्जवेहिं ० पुच्छा, गोयमा ! सिय हीणे सिय तुल्ले सिय
 अब्भहिए, जइ हीणे छट्ठाणवडिए । बउसे णं भंते ! पडिसेवणाकुसीलस्स परट्ठाणस-
 न्निगासेणं चरित्तपज्जवेहिं किं हीणे ? छट्ठाणवडिए, एवं कसायकुसीलस्सवि ॥
 बउसे णं भंते ! नियंठस्स परट्ठाणसन्निगासेणं चरित्तपज्जवेहिं ० पुच्छा, गोयमा !
 हीणे णो तुल्ले णो अब्भहिए, अणंतगुणहीणे, एवं सिणायस्सवि, पडिसेवणाकुसीलस्स
 एस चेव बउसवत्तव्वया भाणियव्वा, कसायकुसीलस्स सण्णिगासेणं एस चेव

बउसवत्तव्वया नवरं पुलाएणवि समं छट्ठाणवडिए । णियंठे णं भंते ! पुलागस्स परट्ठाणसन्निगासेणं चरित्तपज्जवेहिं० पुच्छा, गोयमा ! णो हीणे णो तुल्ले अब्भहिए अणंतगुणमब्भहिए, एवं जाव कसायकुसीलस्स । णियंठे णं भंते ! णियंठस्स सट्ठाणसन्निगासेणं पुच्छा, गोयमा ! नो हीणे तुल्ले णो अब्भहिए, एवं सिणायस्सवि । सिणाए णं भंते ! पुलागस्स परट्ठाणसण्णिगासेणं एवं जहा नियंठस्स वत्तव्वया तहा सिणायस्सवि भाणियव्वा जाव सिणाए णं भंते ! सिणायस्स सट्ठाणसन्निगासेणं पुच्छा, गोयमा ! णो हीणे तुल्ले णो अब्भहिए ॥ एएसि णं भंते ! पुलागबउसपडिसेवणाकुसीलकसायकुसीलनियंठसिणायाणं जहनुक्कोसगाणं चरित्तपज्जवाणं कयरे २ जाव विसेसाहिया वा ? गोयमा ! पुलागस्स कसायकुसीलस्स य एएसि णं जहन्नगा चरित्तपज्जवा दोण्हवि तुल्ला सव्वत्थोवा, पुलागस्स उक्कोसगा चरित्तपज्जवा अणंतगुणा, बउसस्स पडिसेवणाकुसीलस्स य एएसि णं जहन्नगा चरित्तपज्जवा दोण्हवि तुल्ला अणंतगुणा, बउसस्स उक्कोसगा चरित्तपज्जवा अणंतगुणा, पडिसेवणाकुसीलस्स उक्कोसगा चरित्तपज्जवा अणंतगुणा, कसायकुसीलस्स उक्कोसगा चरित्तपज्जवा अणंतगुणा, णियंठस्स सिणायस्स य एएसि णं अजहन्नमणुक्कोसगा चरित्तपज्जवा दोण्हवि तुल्ला अणंतगुणा १५ ॥ ७६४ ॥ पुलाए णं भंते ! किं सजोगी होज्जा अजोगी होज्जा ? गोयमा ! सजोगी होज्जा नो अजोगी होज्जा, जइ सजोगी होज्जा किं मणजोगी होज्जा वइजोगी होज्जा कायजोगी होज्जा ? गोयमा ! मणजोगी वा होज्जा वइजोगी वा होज्जा कायजोगी वा होज्जा, एवं जाव नियंठे । सिणाए णं भंते ! पुच्छा, गोयमा ! सजोगी वा होज्जा अजोगी वा होज्जा, जइ सजोगी होज्जा किं मणजोगी होज्जा सेसं जहा पुलागस्स १६ ॥ ७६५ ॥ पुलाए णं भंते ! किं सागारोवउत्ते होज्जा अणागारोवउत्ते होज्जा ? गोयमा ! सागारोवउत्ते वा होज्जा अणागारोवउत्ते वा होज्जा, एवं जाव सिणाए १७ ॥ ७६६ ॥ पुलाए णं भंते ! किं सकसाई होज्जा अकसाई होज्जा ? गोयमा ! सकसाई होज्जा णो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु कोहमाणमायालोमेसु होज्जा, एवं बउसेवि, एवं पडिसेवणाकुसीलेवि, कसायकुसीले णं पुच्छा, गोयमा ! सकसाई होज्जा णो अकसाई होज्जा, जइ सकसाई होज्जा से णं भंते ! कइसु कसाएसु होज्जा ? गोयमा ! चउसु वा तिसु वा दोसु वा एगम्मि वा होज्जा, चउसु होज्जमाणे चउसु संजलणकोहमाणमायालोमेसु होज्जा, तिसु होज्जमाणे तिसु संजलणमाणमायालोमेसु होज्जा, दोसु होज्जमाणे दोसु संजलणमायालोमेसु होज्जा, एगम्मि होज्जमाणे एगम्मि संजलणलोमे होज्जा, नियंठे णं पुच्छा, गोयमा ! णो सकसाई

होजा अकसाई होजा, जइ अकसाई होजा किं उवसंतकसाई होजा खीणकसाई होजा ? गोयमा ! उवसंतकसाई वा होजा खीणकसाई वा होजा, सिणाए एवं चेव, नवरं णो उवसंतकसाई होजा, खीणकसाई होजा १८ ॥ ७६७ ॥ पुलाए णं भंते ! किं सलेस्से होजा अलेस्से होजा ? गोयमा ! सलेस्से होजा णो अलेस्से होजा, जइ सलेस्से होजा से णं भंते ! कइसु लेस्सासु होजा ? गोयमा ! तिसु विसुद्धलेस्सासु होजा, तं०-तेउलेस्साए पम्हलेस्साए सुकलेस्साए, एवं बउसस्सवि, एवं पडिसेवणाकुसीलेवि, कसायकुसीले पुच्छा, गोयमा ! सलेस्से होजा णो अलेस्से होजा, जइ सलेस्से होजा से णं भंते ! कइसु लेस्सासु होजा ? गोयमा ! छसु लेस्सासु होजा, तं०-कम्हलेस्साए जाव सुकलेस्साए, निर्यंठे णं भंते ! पुच्छा, गोयमा ! सलेस्से होजा णो अलेस्से होजा, जइ सलेस्से होजा से णं भंते ! कइसु लेस्सासु होजा ? गोयमा ! एगाए सुकलेस्साए होजा, सिणाए पुच्छा, गोयमा ! सलेस्से वा होजा अलेस्से वा होजा, जइ सलेस्से होजा से णं भंते ! कइसु लेस्सासु होजा ? गोयमा ! एगाए परमसुकलेस्साए होजा १९ ॥ ७६८ ॥ पुलाए णं भंते ! किं वड्डमाणपरिणामे होजा ही(हा)यमाणपरिणामे होजा अवट्टियपरिणामे होजा ? गोयमा ! वड्डमाणपरिणामे वा होजा हीयमाणपरिणामे वा होजा अवट्टियपरिणामे वा होजा, एवं जाव कसायकुसीले । निर्यंठे णं पुच्छा, गोयमा ! वड्डमाणपरिणामे होजा, णो हीयमाणपरिणामे होजा, अवट्टियपरिणामे वा होजा, एवं सिणाएवि ॥ पुलाए णं भंते ! केवइयं कालं वड्डमाणपरिणामे होजा ? गोयमा ! जहन्नेणं एकं समयं उक्कोसेणं अंतोमुहुत्तं, केवइयं कालं हीयमाणपरिणामे होजा ? गोयमा ! जहन्नेणं एकं समयं उक्कोसेणं अंतोमुहुत्तं, केवइयं कालं अवट्टियपरिणामे होजा ? गोयमा ! जहन्नेणं एकं समयं उक्कोसेणं सत्त समया, एवं जाव कसायकुसीले । निर्यंठे णं भंते ! केवइयं कालं वड्डमाणपरिणामे होजा ? गोयमा ! जहन्नेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्टियपरिणामे होजा ? गोयमा ! जहन्नेणं एकं समयं उक्कोसेणं अंतोमुहुत्तं । सिणाए णं भंते ! केवइयं कालं वड्डमाणपरिणामे होजा ? गोयमा ! जहन्नेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्टियपरिणामे होजा ? गोयमा ! जहन्नेणं अंतोमुहुत्तं उक्कोसेणं देसूणा पुव्वकोवी २० ॥ ७६९ ॥ पुलाए णं भंते ! कइ कम्मप्पगडीओ बंधइ ? गोयमा ! आउयवज्जाओ सत्त कम्मप्पगडीओ बंधइ । बउसे पुच्छा, गोयमा ! सत्तविहबंधए वा अट्ठविहबंधए वा, सत्त बंधमाणे आउयवज्जाओ सत्त कम्मप्पगडीओ बंधइ, अट्ठ बंधमाणे पडिपुत्ताओ अट्ठ कम्मप्पगडीओ बंधइ, एवं पडिसेवणाकुसीलेवि, कसायकुसीले णं पुच्छा, गोयमा !

सत्तविहवंधए वा अट्टविहवंधए वा छव्विहवंधए वा, सत्त वंधमाणे आउयवज्जाओ सत्त कम्मप्पगडीओ वंधइ, अट्ट वंधमाणे पडिपुच्चाओ अट्ट कम्मप्पगडीओ वंधइ, छ वंधमाणे आउयमोहणिज्वज्जाओ छकम्मप्पगडीओ वंधइ । नियंठे णं पुच्छा, गोयमा ! एगं वेयणिजं कम्मं वंधइ । सिणाए णं पुच्छा, गोयमा ! एगविहवंधए वा अवंधए वा, एगं वंधमाणे एगं वेयणिजं कम्मं वंधइ २१ ॥ ७७० ॥ पुलए णं भंते ! कइ कम्मप्पगडीओ वेदेइ ? गोयमा ! नियमं अट्ट कम्मप्पगडीओ वेदेइ, एव जाव कसायकुसीले, नियंठे णं पुच्छा, गोयमा ! मोहणिज्वज्जाओ सत्त कम्मप्पगडीओ वेदेइ । सिणाए णं पुच्छा, गोयमा ! वेयणिजआउयनामगोयाओ चत्तारि कम्मप्पगडीओ वेदेइ २२ ॥ ७७१ ॥ पुलए णं भंते ! कइ कम्मप्पगडीओ उदीरेइ ? गोयमा ! आउयवेयणिज्वज्जाओ छ कम्मप्पगडीओ उदीरेइ । बउसे णं पुच्छा, गोयमा ! सत्तविहउदीरए वा अट्टविहउदीरए वा छव्विहउदीरए वा, सत्त उदीरेमाणे आउयवज्जाओ सत्त कम्मप्पगडीओ उदीरेइ, अट्ट उदीरेमाणे पडिपुच्चाओ अट्ट कम्मप्पगडीओ उदीरेइ, छ उदीरेमाणे आउयवेयणिज्वज्जाओ छ कम्मप्पगडीओ उदीरेइ, पडिसेवणाकुसीले एवं चेव, कसायकुसीले णं पुच्छा, गोयमा ! सत्तविहउदीरए वा अट्टविहउदीरए वा छव्विहउदीरए वा पंचविहउदीरए वा, सत्त उदीरेमाणे आउयवज्जाओ सत्त कम्मप्पगडीओ उदीरेइ, अट्ट उदीरेमाणे पडिपुच्चाओ अट्ट कम्मप्पगडीओ उदीरेइ, छ उदीरेमाणे आउयवेयणिज्वज्जाओ छ कम्मप्पगडीओ उदीरेइ, पंच उदीरेमाणे आउयवेयणिजमोहणिज्वज्जाओ पंच कम्मप्पगडीओ उदीरेइ । नियंठे णं पुच्छा, गोयमा ! पंचविहउदीरए वा दुविहउदीरए वा, पंच उदीरेमाणे आउयवेयणिजमोहणिज्वज्जाओ पंच कम्मप्पगडीओ उदीरेइ, दो उदीरेमाणे णामं च गोयं च उदीरेइ । सिणाए णं पुच्छा, गोयमा ! दुविहउदीरए वा अणुदीरए वा, दो उदीरेमाणे णामं च गोयं च उदीरेइ २३ ॥ ७७२ ॥ पुलए णं भंते ! पुलायत्तं जहमाणे किं जहइ किं उवसंपजइ ? गोयमा ! पुलायत्तं जहइ कसायकुसीलं वा अस्संजमं वा उवसंपजइ, बउसे णं भंते ! बउसत्तं जहमाणे किं जहइ किं उवसंपजइ ? गोयमा ! बउसत्तं जहइ पडिसेवणाकुसीलं वा कसायकुसीलं वा अस्संजमं वा संजमासंजमं वा उवसंपजइ, पडिसेवणाकुसीले णं भंते ! पडिसेवणाकुसीलत्तं० पुच्छा, गोयमा ! पडिसेवणाकुसीलत्तं जहइ बउसं वा कसायकुसीलं वा अस्संजमं वा संजमासंजमं वा उवसंपजइ, कसायकुसीले पुच्छा, गोयमा ! कसायकुसीलत्तं जहइ पुलायं वा बउसं वा पडिसेवणाकुसीलं वा नियंठं वा अस्संजमं वा संजमासंजमं वा उवसंपजइ, नियंठे णं पुच्छा, गोयमा ! नियंठत्तं जहइ कसाय-

कुसीलं वा सिणायं वा अस्संजमं वा उवसंपज्जइ । सिणाए णं पुच्छा, गोयमा ! सिणा-
यतं जहइ सिद्धिगइं उवसंपज्जइ २४ ॥ ७७३ ॥ पुलाए णं भंते ! किं सन्नोवउत्ते
होज्जा नोसन्नोवउत्ते होज्जा ? गोयमा ! णो सन्नोवउत्ते होज्जा नोसन्नोवउत्ते होज्जा ।
बउसे णं भंते ! पुच्छा, गोयमा ! सन्नोवउत्ते वा होज्जा नोसन्नोवउत्ते वा होज्जा,
एवं पडिसेवणाकुसीलेवि, एवं कसायकुसीलेवि, नियंठे सिणाए य जहा पुलाए
२५ ॥ ७७४ ॥ पुलाए णं भंते ! किं आहारए होज्जा अणाहारए होज्जा ? गोयमा !
आहारए होज्जा णो अणाहारए होज्जा, एवं जाव नियंठे । सिणाए णं पुच्छा,
गोयमा ! आहारए वा होज्जा अणाहारए वा होज्जा २६ ॥ ७७५ ॥ पुलाए णं
भंते ! कइ भवग्गहणाइं होज्जा ? गोयमा ! जहन्नेणं एक्कं उक्कोसेणं तिञ्चि । बउसे णं
पुच्छा, गोयमा ! जहन्णेणं एक्कं उक्कोसेणं अट्ठ, एवं पडिसेवणाकुसीलेवि, एवं कसा-
यकुसीलेवि, नियंठे जहा पुलाए । सिणाए णं पुच्छा, गोयमा ! एक्कं २७ ॥ ७७६ ॥
पुलागस्स णं भंते ! एगभवग्गहणिआ केवइया आगरिसा प० ? गोयमा ! जहन्नेणं
एक्को उक्कोसेणं तिञ्चि । बउसस्स णं पुच्छा, गोयमा ! जहन्नेणं एक्को उक्कोसेणं सयग्गसो,
एवं पडिसेवणाकुसीलेवि, कसायकुसीले एवं चेव । णियंठस्स णं पुच्छा, गोयमा !
जहन्नेणं एक्को उक्कोसेणं दोञ्चि । सिणायस्स णं पुच्छा, गोयमा ! एक्को ॥ पुलागस्स
णं भंते ! नाणाभवग्गहणिआ केवइया आगरिसा प० ? गोयमा ! जहन्नेणं दोञ्चि
उक्कोसेणं सत्त । बउसस्स णं पुच्छा, गोयमा ! जहन्नेणं दोञ्चि उक्कोसेणं सहस्सग्गसो,
एवं जाव कसायकुसीलस्स । नियंठस्स णं पुच्छा, गोयमा ! जहन्नेणं दोञ्चि उक्कोसेणं
पंच । सिणायस्स णं पुच्छा, गोयमा ! नत्थि एक्कोवि २८ ॥ ७७७ ॥ पुलाए णं भंते !
कालओ केवच्चिरं होइ ? गोयमा ! जहन्नेणं अंतोमुहुत्तं उक्कोसेणवि अंतोमुहुत्तं । बउसे
णं पुच्छा, गोयमा ! जहन्णेणं एक्कं समयं उक्कोसेणं देसूणा पुव्वकोडी, एवं पडिसेवणा-
कुसीलेवि, कसायकुसीलेवि एवं चेव । नियंठे णं पुच्छा, गोयमा ! जहन्णेणं एक्कं समयं
उक्कोसेणं अंतोमुहुत्तं । सिणाए णं पुच्छा, गोयमा ! जहन्नेणं अंतोमुहुत्तं उक्कोसेणं देसूणा
पुव्वकोडी ॥ पुलागा णं भंते ! कालओ केवच्चिरं होइ ? गोयमा ! जहन्नेणं एक्कं समयं
उक्कोसेणं अंतोमुहुत्तं । बउसा णं भंते ! पुच्छा, गोयमा ! सव्वद्धं, एवं जाव कसाय-
कुसीला, नियंठा जहा पुलागा, सिणाया जहा बउसा २९ ॥ ७७८ ॥ पुलागस्स
णं भंते ! केवइयं कालं अंतरं होइ ? गोयमा ! जहन्णेणं अंतोमुहुत्तं उक्कोसेणं अणंतं
कालं अणंताओ ओसप्पिणिउस्सप्पिणीओ कालओ, खेतओ अवहं पोगगलपरियट्ठं
देसूणं, एवं जाव नियंठस्स । सिणायस्स णं पुच्छा, गोयमा ! नत्थि अंतरं ॥ पुलागाणं
भंते ! केवइयं कालं अंतरं होइ ? गोयमा ! जहन्णेणं एक्कं समयं उक्कोसेणं संखे-

जाइं वासाइं । बउसाणं भंते ! पुच्छा, गोयमा ! नत्थि अंतरं, एवं जाव कसाय-
कुसीलाणं । निर्यंठाणं पुच्छा, गोयमा ! जहण्णेणं एक्कं समयं उक्कोसेणं छम्मासा,
सिणायणं जहा बउसाणं ३० ॥ ७७९ ॥ पुलागस्स णं भंते ! कइ समुग्घाया
प० ? गोयमा ! तिन्नि समुग्घाया प०, तं०-वेयणासमुग्घाए कसायसमुग्घाए मारणं-
तियसमुग्घाए, बउसस्स णं भंते ! पुच्छा, गोयमा ! पंच समुग्घाया प०, तं०-
वेयणासमुग्घाए जाव तेयासमुग्घाए, एवं पडिसेवणाकुसीलेवि, कसायकुसीलस्स
पुच्छा, गोयमा ! छ समुग्घाया प०, तं०-वेयणासमुग्घाए जाव आहारगसमुग्घाए,
निर्यंठस्स णं पुच्छा, गोयमा ! नत्थि एक्कोवि, सिणायस्स णं पुच्छा, गोयमा ! एगे
केवलिसमुग्घाए प० ३१ ॥ ७८० ॥ पुलाए णं भंते ! लोगस्स किं संखेजइभागे
होज्जा १, असंखेजइभागे होज्जा २, संखेजेसु भागेसु होज्जा ३, असंखेजेसु भागेसु
होज्जा ४, सव्वलोए होज्जा ५ ? गोयमा ! णो संखेजइभागे होज्जा, असंखेजइभागे
होज्जा, णो संखेजेसु भागेसु होज्जा, (णो) असंखेजेसु भागेसु होज्जा, णो सव्वलोए
होज्जा, एवं जाव निर्यंठे । सिणाए णं पुच्छा, गोयमा ! णो संखेजइभागे होज्जा
असंखेजइभागे होज्जा णो संखेजेसु भागेसु होज्जा असंखेजेसु भागेसु होज्जा सव्व-
लोए वा होज्जा ३२ ॥ ७८१ ॥ पुलाए णं भंते ! लोगस्स किं संखेजइभागं फुसइ
असंखेजइभागं फुसइ० ? एवं जहा ओगाहणा भणिया तहा फुसणावि भाणियव्वा
जाव सिणाए ३३ ॥ ७८२ ॥ पुलाए णं भंते ! कयरम्मि भावे होज्जा ? गोयमा !
खओवसमिए भावे होज्जा, एवं जाव कसायकुसीले । निर्यंठे पुच्छा, गोयमा !
उवसमिए वा भावे होज्जा खइए वा भावे होज्जा । सिणाए पुच्छा, गोयमा ! खइए
भावे होज्जा ३४ ॥ ७८३ ॥ पुलाया णं भंते ! एगसमएणं केवइया होज्जा ?
गोयमा ! पडिवज्जमाणए पडुच्च सिय अत्थि सिय नत्थि, जइ अत्थि जहन्नेणं एक्को
वा दो वा तिन्नि वा उक्कोसेणं सयपुहुत्तं, पुव्वपडिवन्नए पडुच्च सिय अत्थि सिय
नत्थि, जइ अत्थि जहन्नेणं एक्को वा दो वा तिन्नि वा उक्कोसेणं सहस्सपुहुत्तं । बउसा
णं भंते ! एगसमएणं० पुच्छा, गोयमा ! पडिवज्जमाणए पडुच्च सिय अत्थि सिय
नत्थि, जइ अत्थि जहन्नेणं एक्को वा दो वा तिन्नि वा उक्कोसेणं सयपुहुत्तं, पुव्वपडि-
वन्नए पडुच्च जहन्नेणं कोडिसयपुहुत्तं उक्कोसेणवि कोडिसयपुहुत्तं, एवं पडिसेवणा-
कुसीलेवि । कसायकुसीलाणं पुच्छा, गोयमा ! पडिवज्जमाणए पडुच्च सिय अत्थि सिय
नत्थि, जइ अत्थि जहन्नेणं एक्को वा दो वा तिन्नि वा उक्कोसेणं (कोडि)सहस्सपुहुत्तं,
पुव्वपडिवन्नए पडुच्च जहन्नेणं कोडिसहस्सपुहुत्तं उक्कोसेणवि कोडिसहस्सपुहुत्तं ।
निर्यंठाणं पुच्छा, गोयमा ! पडिवज्जमाणए पडुच्च सिय अत्थि सिय नत्थि, जइ

अत्थि जहन्नेणं एक्को वा दो वा तिज्जि वा उक्कोसेणं वावट्ठं सयं, अट्ठसयं खवगाणं चउप्पन्नं उव(स)सामगाणं, पुव्वपडिवन्नए पडुच्च सिय अत्थि सिय नत्थि, जइ अत्थि जहन्नेणं एक्को वा दो वा तिज्जि वा उक्कोसेणं सयपुहुत्तं । सिणायाणं पुच्छा, गोयमा ! पडिवज्जमाणए पडुच्च सिय अत्थि सिय नत्थि, जइ अत्थि जहन्नेणं एक्को वा दो वा तिज्जि वा उक्कोसेणं अट्ठसयं, पुव्वपडिवन्नए पडुच्च जहन्नेणं कोडिपुहुत्तं उक्कोसेणवि कोडिपुहुत्तं ॥ एएसि णं भंते ! पुलागवउसपडिसेवणाकुसीलकसायकुसीलनियंठं सिणायाणं कयरे २ जाव विसेसाहिया वा ? गोयमा ! सव्वत्थोवा नियंठा, पुलागा संखेज्जगुणा, सिणाया संखेज्जगुणा, वउसा संखेज्जगुणा, पडिसेवणाकुसीला संखेज्जगुणा, कसायकुसीला संखेज्जगुणा । सेवं भंते ! सेवं भंते ! ति जाव विहरइ ॥ ७८४ ॥

पणवीसइमस्स सयस्स छट्ठो उदेसो समत्तो ॥

कइ णं भंते ! संजया प० ? गोयमा ! पंच संजया प०, तं०-सामाइयसंजए छेओवट्ठावणियसंजए परिहारविसुद्धियसंजए सुहुमसंपरायसंजए अहक्खायसंजए, सामाइयसंजए णं भंते ! कइविहे पन्नत्ते ? गोयमा ! दुविहे पन्नत्ते, तंजहा-इत्तरिए य आवकहिए य, छेओवट्ठावणियसंजए णं पुच्छा, गोयमा ! दुविहे प०, तं०-साइयारे य निरइयारे य, परिहारविसुद्धियसंजए पुच्छा, गोयमा ! दुविहे प०, तं०-णिव्विसमाणए य निव्विट्ठकाइए य, सुहुमसंपराय० पुच्छा, गोयमा ! दुविहे प०, तं०-संकिलिस्समाणए य विसुद्धमाणए य, अहक्खायसंजए पुच्छा, गोयमा ! दुविहे प०, तं०-छउमत्थे य केवली य ॥ गाहाओ-सामाइयंमि उ कए चाउज्जामं अणुत्तरं धम्मं । तिविहेण फासयंतो सामाइयसंजओ स खलु ॥ १ ॥ छेत्तण उ परियागं पोरणं जो ठवेइ अप्पाणं । धम्मंमि पंचजामे छेओवट्ठावणो स खलु ॥ २ ॥ परिहरइ जो विसुद्धं तु पंचजामं अणुत्तरं धम्मं । तिविहेण फासयंतो परिहारियसंजओ स खलु ॥ ३ ॥ लोमाण वेययंतो जो खलु उवसामओ व खवओ वा । सो सुहुमसंपराओ अहक्खाया ऊणओ किंचि ॥ ४ ॥ उवसंते खीणंमि व जो खलु कम्मंमि मोहणिजंमि । छउमत्थो व जिणो वा अहक्खाओ संजओ स खलु ॥ ५ ॥ ७८५ ॥ सामाइयसंजए णं भंते ! किं सवेदए होज्जा अवेदए होज्जा ? गोयमा ! सवेदए वा होज्जा अवेदए वा होज्जा, जइ सवेदए होज्जा० एवं जहा कसायकुसीले तहेव निरवसेसं, एवं छेओवट्ठावणियसंजएवि, परिहारविसुद्धियसंजओ जहा पुलाओ, सुहुमसंपरायसंजओ अहक्खायसंजओ य जहा नियंठो २ । सामाइयसंजए णं भंते ! किं सरागे होज्जा वीयरगे होज्जा ? गोयमा ! सरागे होज्जा नो वीयरगे होज्जा, एवं जाव सुहुमसंपरायसंजए, अहक्खायसंजए जहा नियंठो ३ ॥ सामाइयसंजए णं भंते ! किं

ठियकप्पे होज्जा अट्ठियकप्पे होज्जा ? गोयमा ! ठियकप्पे वा होज्जा अट्ठियकप्पे वा होज्जा, छेदोवट्ठावणियसंजए पुच्छा, गोयमा ! ठियकप्पे होज्जा नो अट्ठियकप्पे होज्जा, एवं परिहारविसुद्धियसंजएवि, सेसा जहा सामाइयसंजए । सामाइयसंजए णं भंते ! किं जिणकप्पे होज्जा थेरकप्पे होज्जा कप्पातीते होज्जा ? गोयमा ! जिणकप्पे वा होज्जा जहा कसायकुसीले तहेव निरवसेसं, छेदोवट्ठावणिओ परिहार-
विसुद्धिओ य जहा बउसो, सेसा जहा नियंटे ४ ॥ ७८६ ॥ सामाइयसंजए णं भंते ! किं पुलाए होज्जा बउसे जाव सिणाए होज्जा ? गोयमा ! पुलाए वा होज्जा बउसे जाव कसायकुसीले वा होज्जा, नो नियंटे होज्जा नो सिणाए होज्जा, एवं छेदो-
वट्ठावणिएवि, परिहारविसुद्धियसंजए णं भंते ! पुच्छा, गोयमा ! नो पुलाए नो बउसे नो पडिसेवणाकुसीले होज्जा, कसायकुसीले होज्जा, नो नियंटे होज्जा नो सिणाए होज्जा, एवं सुहुमसंपराएवि, अहक्खायसंजए पुच्छा, गोयमा ! नो पुलाए होज्जा जाव नो कसायकुसीले होज्जा, नियंटे वा होज्जा सिणाए वा होज्जा ५ ॥ सामाइय-
संजए णं भंते ! किं पडिसेवए होज्जा अपडिसेवए होज्जा ? गोयमा ! पडिसेवए वा होज्जा अपडिसेवए वा होज्जा, जइ पडिसेवए होज्जा किं मूलगुणपडिसेवए होज्जा० सेसं जहा पुलागस्स, जहा सामाइयसंजए एवं छेदोवट्ठावणिएवि, परिहारविसुद्धिय-
संजए पुच्छा, गोयमा ! नो पडिसेवए होज्जा अपडिसेवए होज्जा, एवं जाव अह-
क्खायसंजए ६ ॥ सामाइयसंजए णं भंते ! कइसु नाणेसु होज्जा ? गोयमा ! दोसु वा तिसु वा चउसु वा नाणेसु होज्जा, एवं जहा कसायकुसीलस्स तहेव चत्तारि नाणाई भयणाए, एवं जाव सुहुमसंपरा(इ)ए, अहक्खायसंजयस्स पंच नाणाई भय-
णाए जहा नाणुद्देसए । सामाइयसंजए णं भंते ! केवइयं सुयं अहिज्जेज्जा ? गोयमा ! जहन्नेणं अट्ठ पवयणमायाओ जहा कसायकुसीले, एवं छेदोवट्ठावणिएवि, परिहार-
विसुद्धियसंजए पुच्छा, गोयमा ! जहन्नेणं नवमस्स पुव्वस्स तइयं आयारवत्तुं उक्कोसेणं असंपुच्चाई दस पुव्वाई अहिज्जेज्जा, सुहुमसंपरायसंजए जहा सामाइयसंजए, अहक्खायसंजए पुच्छा, गोयमा ! जहन्नेणं अट्ठ पवयणमायाओ उक्कोसेणं चउद्दस पुव्वाई अहिज्जेज्जा सुयवइरित्ते वा होज्जा ७ । सामाइयसंजए णं भंते ! किं तित्थे होज्जा अतित्थे होज्जा ? गोयमा ! तित्थे वा होज्जा अतित्थे वा होज्जा जहा कसाय-
कुसीले, छेदोवट्ठावणिए परिहारविसुद्धिए (सुहुमसंपराए) य जहा पुलाए, सेसा जहा सामाइयसंजए ८ । सामाइयसंजए णं भंते ! किं सल्लिगे होज्जा अन्नल्लिगे होज्जा गिहि-
ल्लिगे होज्जा ? जहा पुलाए, एवं छेदोवट्ठावणिएवि, परिहारविसुद्धियसंजए णं भंते ! किं पुच्छा, गोयमा ! दव्वल्लिगं पि भावल्लिगं पि पडुच्च सल्लिगे होज्जा नो अन्नल्लिगे

होज्जा नो गिहिलिंगे होज्जा, सेसा जहा सामाइयसंजए ९ । सामाइयसंजए णं भंते ! कइसु सरीरेसु होज्जा ? गोयमा ! तिसु वा चउसु वा पंचसु वा होज्जा जहा कसाय-कुसीले, एवं छेओवट्ठावणिएवि, सेसा जहा पुलाए १० । सामाइयसंजए णं भंते ! किं कम्मभूमीए होज्जा अकम्मभूमीए होज्जा ? गोयमा ! जम्मणं संतिभावं च पडुच्च कम्मभूमीए होज्जा नो अकम्मभूमीए जहा बउसे, एवं छेओवट्ठावणिएवि, परिहारवि-सुद्धिए य जहा पुलाए, सेसा जहा सामाइयसंजए ११ ॥ ७८७ ॥ सामाइयसंजए णं भंते ! किं ओसप्पिणीकाले होज्जा उस्सप्पिणीकाले होज्जा नोओसप्पिणिनोउस्सप्पि-णिनाले होज्जा ? गोयमा ! ओसप्पिणीकाले जहा बउसे, एवं छेओवट्ठावणिएवि, नवरं जम्मणं संतिभावं (च) पडुच्च चउसुवि पलिभागेसु नत्थि, साहरणं पडुच्च अन्नयरे पलिभागे होज्जा, सेसं तं चेव, परिहारविसुद्धिए पुच्छा, गोयमा ! ओस-प्पिणीकाले वा होज्जा उस्सप्पिणीकाले वा होज्जा नोओसप्पिणिनोउस्सप्पिणीकाले वा होज्जा, जइ ओसप्पिणीकाले होज्जा जहा पुलाओ, उस्सप्पिणीकालेवि जहा पुलाओ, सुहुमसंपरा(इ)ओ जहा नियंठे, एवं अहक्खाओवि १२ ॥ ७८८ ॥ सामा-इयसंजए णं भंते ! कालगए समाणे किं गइं गच्छइ ? गोयमा ! देवगइं गच्छइ, देवगइं गच्छमाणे किं भवणवासीसु उववज्जेज्जा वाणमंतरेसु उववज्जेज्जा जोइसिएसु उववज्जेज्जा वेमाणिएसु उववज्जेज्जा ? गोयमा ! णो भवणवासीसु उववज्जेज्जा जहा कसायकुसीले, एवं छेओवट्ठावणिएवि, परिहारविसुद्धिए जहा पुलाए, सुहुमसंपराए जहा नियंठे, अहक्खाए पुच्छा, गोयमा ! एवं अहक्खायसंजएवि जाव अजहन्नम-णुक्कोसेणं अणुत्तरविमाणेसु उववज्जेज्जा, अत्थेगइ(या)ए सिज्झ(न्ति)इ जाव अंतं करे- (न्ति)इ ॥ सामाइयसंजए णं भंते ! देवलोगेसु उववज्जमाणे किं ईदत्ताए उववज्जइ पुच्छा, गोयमा ! अविराहणं पडुच्च एवं जहा कसायकुसीले, एवं छेओवट्ठावणिएवि, परिहारविसुद्धिए जहा पुलाए, सेसा जहा नियंठे । सामाइयसंजयस्स णं भंते ! देव-लोगेसु उववज्जमाणस्स केवइयं कालं ठिई प० ? गोयमा ! जहत्तेणं दो पलिओवमाई उक्कोसेणं तेत्तीसं सागरोवमाई, एवं छेओवट्ठावणिएवि, परिहारविसुद्धियस्स पुच्छा, गोयमा ! जहत्तेणं दो पलिओवमाई उक्कोसेणं अट्ठारस सागरोवमाई, सेसाणं जहा नियंठस्स १३ ॥ ७८९ ॥ सामाइयसंजयस्स णं भंते ! केवइया संजमट्ठाणा प० ? गोयमा ! असंखेज्जा संजमट्ठाणा प०, एवं जाव परिहारविसुद्धियस्स, सुहुमसंपराय-संजयस्स पुच्छा, गोयमा ! असंखेज्जा अंतोमुहुत्तिया संजमट्ठाणा प०, अहक्खाय-संजयस्स पुच्छा, गोयमा ! एगे अजहन्नमणुक्कोसए संजमट्ठाणे प० । एएसि णं भंते ! सामाइयछेओवट्ठावणियपरिहारविसुद्धियसुहुमसंपरायअहक्खायसंजयाणं संजमट्ठाणाणं

क्यरे २ जाव विसैसाहिया वा ? गोयमा ! सव्वत्थोवे अहक्खायसंजयस्स एगे
अजहन्नमणुक्कोसए संजमट्ठाणे, सुहुमसंपरायसंजयस्स अंतोमुहुत्तिया संजमट्ठाणा
असंखेज्जगुणा, परिहारविसुद्धियसंजयस्स संजमट्ठाणा असंखेज्जगुणा, सामाइयसंजयस्स
छेदोवट्ठावणियसंजयस्स य एएसि णं संजमट्ठाणा दोण्हवि तुल्ला असंखेज्जगुणा १४
॥ ७९० ॥ सामाइयसंजयस्स णं भंते ! केवइया चरित्तपज्जवा प० ? गोयमा !
अणंता चरित्तपज्जवा प०, एवं जाव अहक्खायसंजयस्स ॥ सामाइयसंजए णं भंते !
सामाइयसंजयस्स सट्ठाणसन्निगासेणं चरित्तपज्जवेहिं किं हीणे तुल्ले अब्भहिए ?
गोयमा ! सिय हीणे छट्ठाणवडिए, सामाइयसंजए णं भंते ! छेदोवट्ठावणियसंजयस्स
परट्ठाणसन्निगासेणं चरित्तपज्जवेहिं० पुच्छा, गोयमा ! सिय हीणे छट्ठाणवडिए, एवं
परिहारविसुद्धियस्सवि, सामाइयसंजए णं भंते ! सुहुमसंपरायसंजयस्स परट्ठाण-
सन्निगासेणं चरित्तपज्जवे० पुच्छा, गोयमा ! हीणे नो तुल्ले नो अब्भहिए, अणंतगुण-
हीणे, एवं अहक्खायसंजयस्सवि, एवं छेदोवट्ठावणिएवि, हेट्ठिल्लेसु तिसुवि समं
छट्ठाणवडिए, उवरिल्लेसु दोसुवि तहेव हीणे, जहा छेदोवट्ठावणिए तहा परिहारविसुद्धि-
एवि, सुहुमसंपरागसंजए णं भंते ! सामाइयसंजयस्स परट्ठाण० पुच्छा, गोयमा ! नो
हीणे नो तुल्ले अब्भहिए अणंतगुणमब्भहिए, एवं छेदोवट्ठावणियपरिहारविसुद्धिएसुवि
समं सट्ठाणे सिय हीणे नो (सिय)तुल्ले सिय अब्भहिए, जइ हीणे अणंतगुणहीणे, अह
(जइ) अब्भहिए अणंतगुणमब्भहिए, सुहुमसंपरायसंजयस्स अहक्खायसंजयस्स पर-
ट्ठाण० पुच्छा, गोयमा ! हीणे नो तुल्ले नो अब्भहिए, अणंतगुणहीणे, अहक्खाए हेट्ठि-
ल्लाणं चउण्हवि नो हीणे नो तुल्ले अब्भहिए अणंतगुणमब्भहिए, सट्ठाणे नो हीणे तुल्ले
नो अब्भहिए । एएसि णं भंते ! सामाइयछेदोवट्ठावणियपरिहारविसुद्धियसुहुमसंपराय-
अहक्खायसंजयाणं जहन्नुक्कोसगार्णं चरित्तपज्जवाणं क्यरे २ जाव विसैसाहिया
वा ? गोयमा ! सामाइयसंजयस्स छेदोवट्ठावणियसंजयस्स य एएसि णं जहन्नगा
चरित्तपज्जवा दोण्हवि तुल्ला सव्वत्थोवा, परिहारविसुद्धियसंजयस्स जहन्नगा चरित्त-
पज्जवा अणंतगुणा तस्स चैव उक्कोसगा चरित्तपज्जवा अणंतगुणा, सामाइयसंजयस्स
छेदोवट्ठावणियसंजयस्स य एएसि णं उक्कोसगा चरित्तपज्जवा दोण्हवि तुल्ला अणंत-
गुणा, सुहुमसंपरायसंजयस्स जहन्नगा चरित्तपज्जवा अणंतगुणा तस्स चैव उक्कोसगा
चरित्तपज्जवा अणंतगुणा, अहक्खायसंजयस्स अजहन्नमणुक्कोसगा चरित्तपज्जवा
अणंतगुणा १५ ॥ सामाइयसंजए णं भंते ! किं सजोगी होजा अजोगी होजा ?
गोयमा ! सजोगी जहा पुलए, एवं जाव सुहुमसंपरायसंजए, अहक्खाए जहा
सिणाए १६ ॥ सामाइयसंजए णं भंते ! किं सागारोवउत्ते होजा अणागारोवउत्ते

होज्जा ? गोयमा ! सागारोवउत्ते जहा पुलाए, एवं जाव अहक्खाए, नवरं सुहुमसं-
 पराए सागारोवउत्ते होज्जा नो अणागारोवउत्ते होज्जा १७ ॥ सामाइयसंजए णं भंते !
 किं सकसाई होज्जा अकसाई होज्जा ? गोयमा ! सकसाई होज्जा नो अकसाई होज्जा,
 जहा कसायकुसीले, एवं छेदेवट्ठावणिएवि, परिहारविसुद्धिए जहा पुलाए, सुहुमसंपरा-
 यसंजए पुच्छा, गोयमा ! सकसाई होज्जा नो अकसाई होज्जा, जइ सकसाई होज्जा
 से णं भंते ! कइसु कसाएसु होज्जा ? गोयमा ! एगम्मि संजलणलोभे होज्जा, अह-
 क्खायसंजए जहा नियंठे १८ ॥ सामाइयसंजए णं भंते ! किं सलेस्से होज्जा
 अलेस्से होज्जा ? गोयमा ! सलेस्से होज्जा जहा कसायकुसीले, एवं छेदेवट्ठावणिएवि,
 परिहारविसुद्धिए जहा पुलाए, सुहुमसंपराए जहा नियंठे, अहक्खाए जहा सिणाए,
 नवरं जइ सलेस्से होज्जा एगाए सुक्खेस्साए होज्जा १९ ॥ ७९१ ॥ सामाइयसंजए
 णं भंते ! किं वड्डमाणपरिणामे होज्जा हीयमाणपरिणामे होज्जा अवट्ठियपरिणामे होज्जा ?
 गोयमा ! वड्डमाणपरिणामे होज्जा जहा पुलाए, एवं जाव परिहारविसुद्धिए, सुहुमसं-
 पराय० पुच्छा, गोयमा ! वड्डमाणपरिणामे वा होज्जा हीयमाणपरिणामे वा होज्जा नो
 अवट्ठियपरिणामे होज्जा, अहक्खाए जहा नियंठे । सामाइयसंजए णं भंते ! केवइयं
 कालं वड्डमाणपरिणामे होज्जा ? गोयमा ! जहण्णेणं एकं समयं जहा पुलाए, एवं जाव
 परिहारविसुद्धिए, सुहुमसंपरायसंजए णं भंते ! केवइयं कालं वड्डमाणपरिणामे होज्जा ?
 गोयमा ! जहण्णेणं एकं समयं उक्कोसेणं अंतोमुहुत्तं, केवइयं कालं हीयमाणपरिणामे
 होज्जा एवं चेव, अहक्खायसंजए णं भंते ! केवइयं कालं वड्डमाणपरिणामे होज्जा ?
 गोयमा ! जहण्णेणं अंतोमुहुत्तं उक्कोसेणवि अंतोमुहुत्तं, केवइयं कालं अवट्ठियपरिणामे
 होज्जा ? गोयमा ! जहण्णेणं एकं समयं उक्कोसेणं देसुणा पुव्वकोडी २० ॥ ७९२ ॥
 सामाइयसंजए णं भंते ! कइ कम्मप्पगडीओ बंधइ ? गोयमा ! सत्तविहबंधए वा
 अट्ठविहबंधए वा एवं जहा बउसे, एवं जाव परिहारविसुद्धिए, सुहुमसंपरायसंजए
 पुच्छा, गोयमा ! आउयमोहणिज्जवज्जाओ छ कम्मप्पगडीओ बंधइ, अहक्खायसंजए
 जहा सिणाए २१ ॥ सामाइयसंजए णं भंते ! कइ कम्मप्पगडीओ वेदेइ ? गोयमा !
 नियमं अट्ठ कम्मप्पगडीओ वेदेइ, एवं जाव सुहुमसंपराए, अहक्खाए पुच्छा,
 गोयमा ! सत्तविहवेदए वा चउव्विहवेदए वा, सत्त वेदेमाणे मोहणिज्जवज्जाओ
 सत्त कम्मप्पगडीओ वेदेइ, चत्तारि वेदेमाणे वेयणिज्जआउयनामगोयाओ चत्तारि
 कम्मप्पगडीओ वेदेइ २२ ॥ सामाइयसंजए णं भंते ! कइ कम्मप्पगडीओ उदीरेइ ?
 गोयमा ! सत्तविह० जहा बउसे, एवं जाव परिहारविसुद्धिए, सुहुमसंपराए पुच्छा,
 गोयमा ! छव्विहउदीरेए वा पंचविहउदीरेए वा, छ उदीरेमाणे आउयवेयणिज्जव-

ज्जाओ छ कम्मप्पगडीओ उदीरेइ, पंच उदीरेमाणे आउयवेयणिज्जमोहणिज्जवज्जाओ
 पंच कम्मप्पगडीओ उदीरेइ, अहक्खायसंजए पुच्छा, गोयमा । पंचविहउदीरेए वा
 दुविहउदीरेए वा अणुदीरेए वा, पंच उदीरेमाणे आउय० सेसं जहा नियंठस्स २३
 ॥ ७९३ ॥ सामाइयसंजए णं भंते ! सामाइयसंजयत्तं जहमाणे किं जहइ किं उवसं-
 पज्जइ ? गोयमा । सामाइयसंजयत्तं जहइ छेदोवट्ठावणियसंज(यं)मं वा सुहुमसंपराय-
 संज(यं)मं वा असंजमं वा संजमासंजमं वा उवसंपज्जइ, छेदोवट्ठावणिय० पुच्छा,
 गोयमा । छेदोवट्ठावणियसंजयत्तं जहइ सामाइयसंजमं वा परिहारविसुद्धियसंजमं वा
 सुहुमसंपरायसंजमं वा असंजमं वा संजमासंजमं वा उवसंपज्जइ, परिहारविसुद्धिए
 पुच्छा, गोयमा । परिहारविसुद्धियसंजयत्तं जहइ छेदोवट्ठावणियसंज(यं)मं वा असंजमं
 वा उवसंपज्जइ, सुहुमसंपराए पुच्छा, गोयमा । सुहुमसंपरायसंजयत्तं जहइ सामाइय-
 संज(यं)मं वा छेदोवट्ठावणियसंज(यं)मं वा अहक्खायसंज(यं)मं वा असंजमं वा उवसं-
 पज्जइ, अहक्खायसंजए णं पुच्छा, गोयमा । अहक्खायसंजयत्तं जहइ सुहुमसंपरायसं-
 ज(यं)मं वा असंजमं वा सिद्धिगइं वा उवसंपज्जइ २४ ॥ ७९४ ॥ सामाइयसंजए णं
 भंते ! किं सन्नोवउत्ते होज्जा नोसन्नोवउत्ते होज्जा ? गोयमा । सन्नोवउत्ते होज्जा जहा
 बउसे, एवं जाव परिहारविसुद्धिए, सुहुमसंपराए अहक्खाए य जहा पुलाए २५ ॥
 सामाइयसंजए णं भंते ! किं आहारए होज्जा अणाहारए होज्जा ? जहा पुलाए, एवं जाव
 सुहुमसंपराए, अहक्खायसंजए जहा सिणाए २६ ॥ सामाइयसंजए णं भंते ! कइ भवग्ग-
 हणाइं होज्जा ? गोयमा । जहणेणं एकं (समयं) उक्कोसेणं अट्ठ, एवं छेदोवट्ठावणिएवि,
 परिहारविसुद्धिए पुच्छा, गोयमा । जहणेणं एकं उक्कोसेणं तिन्नि, एवं जाव अहक्खाए
 २७ ॥ ७९५ ॥ सामाइयसंजयस्स णं भंते ! एगभवग्गहणिया केवइया आगरिसा
 प० ? गोयमा । जहन्नेणं जहा बउसस्स, छेदोवट्ठावणियस्स पुच्छा, गोयमा । जहन्नेणं
 एकं उक्कोसेणं वीसपुहुत्तं, परिहारविसुद्धियस्स पुच्छा, गोयमा । जहन्नेणं एकं उक्को-
 सेणं तिन्नि, सुहुमसंपरायस्स पुच्छा, गोयमा । जहन्नेणं ए(क्को)कं उक्कोसेणं चत्तादि,
 अहक्खायस्स पुच्छा, गोयमा । जहन्नेणं एकं उक्कोसेणं दोन्नि । सामाइयसंजयस्स
 णं भंते ! नाणाभवग्गहणिया केवइया आगरिसा प० ? गोयमा । जहा बउसे, छेदो-
 वट्ठावणियस्स पुच्छा, गोयमा । जहन्नेणं दोन्नि उक्कोसेणं उवरिं नवण्हं सयाणं अंतो-
 सहरस्सस्स, परिहारविसुद्धियस्स जहन्नेणं दोन्नि उक्कोसेणं सत्त, सुहुमसंपरायस्स जह-
 न्नेणं दोन्नि उक्कोसेणं नव, अहक्खायस्स जहन्नेणं दोन्नि उक्कोसेणं पंच २८ ॥ ७९६ ॥
 सामाइयसंजए णं भंते ! कालओ केवच्चिरं होइ ? गोयमा । जहन्नेणं एकं समयं
 उक्कोसेणं देसूणएहिं नवहिं वासेहिं ऊणिया पुव्वकोडी, एवं छेदोवट्ठावणिएवि,

परिहारविबुद्धि ए जहन्नेण एक्कं समयं उक्कोसेण देसूणएहिं एगूणतीसाए वासेहिं
 ऊणिया पुव्वकोडी, सुहुमसंपराए जहा नियंटे, अहक्खाए जहा सामाइयसंजए ।
 सामाइयसंजया णं भंते । कालओ केवच्चिरं होइ ? गोयमा ! सव्व(द्धं)दा, छेदोवट्ठा-
 वणिय० पुच्छा, गोयमा ! जहन्नेणं अट्ठाइजाई वाससयाई उक्कोसेणं पन्नासं सागरो-
 वमकोडिसयसहस्साई, परिहारविबुद्धि ए पुच्छा, गोयमा ! जहन्नेणं देसूणाई दो वास-
 सयाई उक्कोसेणं देसूणाओ दो पुव्वकोडीओ, सुहुमसंपरायसंजया णं भंते । पुच्छा,
 गोयमा ! जहन्नेणं एक्कं समयं उक्कोसेणं अंतोमुहुत्तं, अहक्खायसंजया जहा सामाइ-
 यसंजया २९ ॥ सामाइयसंजयस्स णं भंते ! केवइयं कार्ल अंतरं होइ ? गोयमा !
 जहन्नेणं जहा पुलागस्स एवं जाव अहक्खायसंजयस्स, सामाइयसंजयाणं भंते !
 पुच्छा, गोयमा ! नत्थि अंतरं, छेदोवट्ठावणिय० पुच्छा, गोयमा ! जहन्नेणं तेवट्ठिं
 वाससहस्साई उक्कोसेणं अट्ठारस सागरोवमकोडाकोडीओ, परिहारविबुद्धियस्स पुच्छा,
 गोयमा ! जहन्नेणं चउरासीई वाससहस्साई उक्कोसेणं अट्ठारस सागरोवमकोडाको-
 डीओ, सुहुमसंपरायाणं जहा नियंठाणं, अहक्खायाणं जहा सामाइयसंजयाणं ३० ॥
 सामाइयसंजयस्स णं भंते ! कइ समुग्वाया पज्जत्ता ? गोयमा ! छ समुग्वाया
 पज्जत्ता, जहा कसायकुसीलस्स, एवं छेदोवट्ठावणियस्सवि, परिहारविबुद्धियस्स
 जहा पुलागस्स, सुहुमसंपरायस्स जहा नियंठस्स, अहक्खायस्स जहा सिणायस्स
 ३१ ॥ सामाइयसंजए णं भंते ! लोगस्स किं संखेज्जभागे होजा असंखेज्जभागे०
 पुच्छा, गोयमा ! नो संखेज्ज० जहा पुलाए, एवं जाव सुहुमसंपराए । अहक्खाय-
 संजए जहा सिणाए ३२ ॥ सामाइयसंजए णं भंते ! लोगस्स किं संखेज्जभागं
 फुसइ जहेव होजा तहेव फुसइ ३३ ॥ सामाइयसंजए णं भंते ! कयरम्मि भावे
 होजा ? गोयमा ! उ(खओ)वसमिए भावे होजा, एवं जाव सुहुमसंपराए, अहक्खाय-
 संजए पुच्छा, गोयमा ! उवसमिए वा खइए वा भावे होजा ३४ । सामाइय-
 संजया णं भंते ! एगसमएणं केवइया होजा ? गोयमा ! पडिवजमाणए पडुच्च जहा
 कसायकुसीला तहेव निरवसेसं, छेदोवट्ठावणिया पुच्छा, गोयमा ! पडिवजमाणए
 पडुच्च सिय अत्थि सिय नत्थि, जइ अत्थि जहन्नेणं एको वा दो वा तिन्नि वा उक्कोसेणं
 सयपुहुत्तं, पुव्वपडिवच्चाए पडुच्च सिय अत्थि सिय नत्थि, जइ अत्थि जहन्नेणं कोडि-
 सयपुहुत्तं उक्कोसेणवि कोडिसयपुहुत्तं, परिहारविबुद्धिया जहा पुलागा, सुहुमसंपराया
 जहा नियंठा, अहक्खायसंजयाणं पुच्छा, गोयमा ! पडिवजमाणए पडुच्च सिय अत्थि
 सिय नत्थि, जइ अत्थि जहन्नेणं एको वा दो वा तिन्नि वा उक्कोसेणं वावट्ठसयं अट्ठ-
 त्तरसयं खवगाणं चउप्पन्नं उवसामगाणं, पुव्वपडिवच्चाए पडुच्च जहन्नेणं कोडिपुहुत्तं

उक्कोसेणवि कोट्ठिपुहुत्तं ॥ एएसि णं भंते ! सामाइयछेदोवट्ठावणियपरिहारविसुद्धियसु-
हुमसंपरायअहक्खायसंजयाणं कयरे २ जाव विसेसाहिया वा ? गोयमा ! सव्वत्थोवा
सुहुमसंपरायसंजया, परिहारविसुद्धियसंजया संखेज्जगुणा, अहक्खायसंजया संखेज्ज-
गुणा, छेदोवट्ठावणियसंजया संखेज्जगुणा, सामाइयसंजया संखेज्जगुणा ३६ ॥ ७९७ ॥
पडिसेवण दोसालोयणा य आलोयणारिहे चेव । तत्तो सामायारी पायच्छित्ते तवे चेव
॥ १ ॥ कइविहा णं भंते ! पडिसेवणा प० ? गोयमा ! दसविहा पडिसेवणा प०, तं०—
दप्प १ प्पमाद २ ण्णाभोगे ३, आउरे ४ आवती ५ ति य । संकिञ्चे ६ सहसक्कारे,
७ भय ८ प्पओसा ९ य वीमंसा १० ॥ १ ॥ दस आलोयणादोसा प०, तंजहा—
आकंपइत्ता १ अणुमाणइत्ता २ जं दिट्ठं ३ वायरं च ४ सुहुमं (च) वा ५ । छन्नं ६ सहा-
उल्लयं ७ बहुजण ८ अव्वत्त ९ तस्सेवी १० ॥ २ ॥ दसहिं ठाणेहिं संपन्ने अणगारे
अरिहइ अत्तदोसं आलोइत्तए, तंजहा—जाइसंपन्ने १, कुलसंपन्ने २, विणयसंपन्ने ३,
णाणसंपन्ने ४, दंसणसंपन्ने ५, चरित्तसंपन्ने ६, खंते ७, दंते ८, अमाई ९, अपच्छा-
णुतावी १० । अट्ठहिं ठाणेहिं संपन्ने अणगारे अरिहइ आलोयणं पडिच्छित्तए, तंजहा—
आयारवं १, आहारवं २, ववहारवं ३, उव्वीलए ४, पकुव्वए ५, अपरिस्सावी ६,
निजवए ७, अवयदंसी ८ ॥ ७९८ ॥ दसविहा सामायारी प०, तं०—इच्छा १
मिच्छा २ तहक्कारे ३, आवस्सिया य ४ निसीहिया ५ । आपुच्छणा य ६ पडिपुच्छा
७, छंदणा य ८ निमंतणा ९ ॥ १ ॥ उवसंपया १० य काले, सामायारी भवे दसहा
॥ ७९९ ॥ दसविहे पायच्छित्ते प०, तं०—आलोयणारिहे पडिक्कमणारिहे तदुभयारिहे
विवेगारिहे विउसग्गारिहे तवारिहे छेदारिहे मूलारिहे अणवट्ठप्पारिहे पारंचियारिहे
॥ ८०० ॥ दुविहे तवे पन्नत्ते, तंजहा—बाहि(रि)रए य अर्द्धिभतरए य, से किं तं बाहि-
रए तवे ? बाहिरए तवे छव्विहे प०, तं०—अणसण ऊणोयरिया भिक्खायरिया य
रसपरिच्चाओ । कायकिलेसो पडिसंलीणया (बज्झो तवो होइ) ॥ १ ॥ से किं तं
अणसणे ? अणसणे दुविहे प०, तं०—इत्तरिए य आवकहिए य, से किं तं इत्तरिए ?
इत्तरिए अणेगविहे पन्नत्ते, तंजहा—चउत्थे भत्ते छट्ठे भत्ते अट्ठमे भत्ते दसमे भत्ते
दुवालसमे भत्ते चउट्ठसमे भत्ते अद्धमासिए भत्ते मासिए भत्ते दोमासिए भत्ते
ते(ति)मासिए भत्ते जाव छम्मासिए भत्ते, सेत्तं इत्तरिए । से किं तं आवकहिए ?
आवकहिए दुविहे प०, तं०—पाओवगमणे य भत्तपच्चक्खाणे य, से किं तं पाओवगमणे ?
पाओवगमणे दुविहे प०, तं०—नीहारिमे य अणीहारिमे य निय(मा)मं अपडिक्कमे, से
तं पाओवगमणे, से किं तं भत्तपच्चक्खाणे ? भत्तपच्चक्खाणे दुविहे प०, तं०—नीहारिमे
य अनीहारिमे य नियमं सपडिक्कमे, सेत्तं भत्तपच्चक्खाणे, सेत्तं आवकहिए, सेत्तं

अणसणे । से किं तं ओमोयरिया ? ओमोयरिया दुविहा प०, तं०—द्वोमोयरिया य भावोमोयरिया य, से किं तं द्वोमोयरिया ? द्वोमोयरिया दुविहा प०, तं०—
 उवगरणद्वोमोयरिया य भत्तपाणद्वोमोयरिया य, से किं तं उवगरणद्वोमोय-
 रिया ? उवगरणद्वोमोयरिया एगे वत्थे एगे पाए चियत्तोवगरणसाइजगया, सेतं
 उवगरणद्वोमोयरिया, से किं तं भत्तपाणद्वोमोयरिया ? भत्तपाणद्वोमोयरिया
 अट्ठकवले आहारं आहारेमा(णे)णस्स अप्पाहारे दुवालस० जहा सत्तमसए पढमोद्दे-
 सए जाव नो पक्कामरसमोईति वत्तव्वं सिया, सेतं भत्तपाणद्वोमोयरिया, सेतं द्वो-
 मोयरिया, से किं तं भावोमोयरिया ? भावोमोयरिया अणेगविहा प०, तं०—अप्पकोहे
 जाव अप्पलोभे अप्पसद्दे अप्पझञ्जे अप्पतुमंतुमे, सेतं भावोमोयरिया, सेतं ओमोय-
 रिया । से किं तं भिक्खायरिया ? भिक्खायरिया अणेगविहा प०, तं०—द्वाम्भि-
 काहचरए जहा उववाइए जाव खुट्टेसणिए संखादत्तिए, सेतं भिक्खायरिया । से किं
 तं रसपरिचाए ? रसपरिचाए अणेगविहे प०, तं०—निव्विगइए पणीयरसविवज्जए जहा
 उववाइए जाव ल्हाहारे, सेतं रसपरिचाए । से किं तं कायकिलेसे ? कायकिलेसे अणेग-
 विहे प०, तं०—ठाणाईए उक्कुडयासणिए जहा उववाइए जाव सव्वगायपडिक्कम्मवि-
 प्पमुक्के, सेतं कायकिलेसे । से किं तं पडिसंलीगया ? पडिसंलीगया चउव्विहा प०, तं०—
 ईदियपडिसंलीगया कसायपडिसंलीगया जोगपडिसंलीगया विवित्तसयणासणसेव-
 णया । से किं तं ईदियपडिसंलीगया ? ईदियपडिसंलीगया पंचविहा प०, तं०—सोईदिय-
 विसयप्पयारणिरोहो वा सोईदियविसयप्पत्तेसु वा अत्थेसु रागदोसविणिग्गहो चर्क्खिदि-
 यविसय० एवं जाव फासिंदियविसयप्पयारणिरोहो वा फासिंदियविसयप्पत्तेसु वा अत्थेसु
 रागदोसविणिग्गहो, सेतं ईदियपडिसंलीगया, से किं तं कसायपडिसंलीगया ? कसाय-
 पडिसंलीगया चउव्विहा प०, तं जहा—कोहोदयनिरोहो वा उदयप्पत्तस्स वा कोहस्स
 विफलीकरणं एवं जाव लोभोदयनिरोहो वा उदयप्पत्तस्स वा लोभस्स विफलीकरणं,
 सेतं कसायपडिसंलीगया, से किं तं जोगपडिसंलीगया ? जोगपडिसंलीगया तिविहा
 प०, तं०—मणजोगप० वइजोगप० कायजोगपडिसंलीगया, से किं तं मणजोगपडि-
 संलीगया ? २ तिविहा प०, तं०—अकुसलमणनिरोहो वा कुसलमणउदीरणं वा मणस्स
 वा एगत्तीभावकरणं, से किं तं वइजोगपडिसंलीगया ? २ तिविहा प०, तं०—अकुसल-
 वइनिरोहो वा कुसलवइउदीरणं वा वईए वा एगत्तीभावकरणं, से किं तं कायपडि-
 संलीगया ? कायपडिसंलीगया जञ्जं सुत्तमाहिग्रपसंतसाहरियापाणिपाए कुम्भो इव
 शुत्तिदिए अह्मीणे पल्लीणे चिट्ठइ, सेतं कायपडिसंलीगया, सेतं जोगपडिसंलीगया,
 से किं तं विवित्तसयणासणसेवणया ? विवित्तसयणासणसेवणया जञ्जं आरामेसु

चा उज्जाणेषु वा जहा। सौमिल्लदेसए जाव सेज्जासंथारणं उवसंपज्जितार्णं विहरइ, सेतं विवित्तसयणासणसेवणया, सेतं पडिसंलीणया, सेतं बाहिरए तवे १ ॥ से किं तं अब्भितरए तवे ? अब्भितरए तवे छव्विहे प०, तं०-पायच्छित्तं विणओ वेयावच्चं तद्देव सज्झाओ । ज्ञाणं विउसग्गो । से किं तं पायच्छित्ते ? पायच्छित्ते दसविहे प०, तं०-आलोयणारिहे जाव पारंनियारिहे, सेतं पायच्छित्ते । से किं तं विणए ? विणए सत्तविहे पन्नत्ते, तंजहा-नाणविणए दंसणविणए चरित्तविणए मणविणए वइविणए कायविणए लोगेवयारविणए, से किं तं नाणविणए ? नाणविणए पंचविहे प०, तं०-आभिणिबोहियनाणविणए जाव केवलनाणविणए, सेतं नाणविणए, से किं तं दंसणविणए ? दंसणविणए दुविहे प०, तं०-सुस्सूसणाविणए य अणच्चासायणाविणए य, से किं तं सुस्सूसणाविणए ? सुस्सूसणाविणए अणेगविहे प०, तं०-सक्कारेइ वा सम्माणेइ वा जहा चउइसमसए तइए उदेसए जाव पडिसंसाह(र)णया, सेतं सुस्सूसणाविणए, से किं तं अणच्चासायणाविणए ? अणच्चासायणाविणए पणयालीसइविहे प०, तं०-अरिहंतार्णं अणच्चासायणया अरिहंतपन्नत्तस्स धम्मस्स अणच्चासायणया आयरियाणं अणच्चासायणया उवज्झायाणं अणच्चासायणया थेराणं अणच्चासायणया कुलस्स अणच्चासायणया गणस्स अणच्चासायणया संघस्स अणच्चासायणया किरियाए अणच्चासायणया संभोगस्स अणच्चासायणया आभिणिबोहियनाणस्स अणच्चासायणया जाव केवलनाणस्स अणच्चासायणया १५, एएसिं चेव भत्तिवहुमाणेणं एएसिं चेव वन्नसंजलणया, सेतं अणच्चासायणयाविणए, सेतं दंसणविणए, से किं तं चरित्तविणए ? चरित्तविणए पंचविहे प०, तं०-सामाइयचरित्तविणए जाव अहक्खायचरित्तविणए, सेतं चरित्तविणए, से किं तं मणविणए ? मणविणए दुविहे प०, तं०-पसत्थमणविणए य अपसत्थमणविणए य, से किं तं पसत्थमणविणए ? पसत्थमणविणए सत्तविहे प०, तंजहा-अपावए असावजे अकिरिए निहक्केसे अण्हयकरे अच्छविकरे अभूयाभिसंक्के, सेतं पसत्थमणविणए, से किं तं अपसत्थमणविणए ? अपसत्थमणविणए सत्तविहे प०, तं०-पावए सावजे सकिरिए सउवक्केसे अण्हयकरे छविकरे भूयाभिसंक्के, सेतं अप्सत्थमणविणए, सेतं मणविणए, से किं तं वइविणए ? वइविणए दुविहे प०, तं०-पसत्थवइविणए य अप्सत्थवइविणए य, से किं तं पसत्थवइविणए ? पसत्थवइविणए सत्तविहे प०, तं०-अपावए जाव अभूयाभिसंक्के, सेतं पसत्थवइविणए, से किं तं अप्सत्थवइविणए ? अप्सत्थवइविणए सत्तविहे प०, तं०-पावए सावजे जाव भूयाभिसंक्के, सेतं अप्सत्थवइविणए, से तं वइविणए, से किं तं कायविणए ? कायविणए दुविहे प०, तं०-पसत्थकायविणए य अप्सत्थकायविणए

य, 'से किं तं पसत्थकायविणए ? पसत्थकायविणए सत्तविहे प०, तंजहा-आउत्तं गमणं आउत्तं ठाणं आउत्तं निसीयणं आउत्तं तुयट्ठणं आउत्तं उल्लंघणं आउत्तं पल्लंघणं आउत्तं सव्विदियजोगजुंजणया, सेत्तं पसत्थकायविणए, से किं तं अप्पसत्थकायविणए ? अप्पसत्थकायविणए सत्तविहे पन्नत्ते, तंजहा-अणाउत्तं गमणं जाव अणाउत्तं सव्विदियजोगजुंजणया, सेत्तं अप्पसत्थकायविणए, सेत्तं कायविणए, से किं तं लोगोवयारविणए ? लोगोवयारविणए सत्तविहे प०, तं०-अब्भासवत्तिर्यं परच्छंदाणुवत्तिर्यं कज्जहेऊं कयपडिक्किइया अत्तगवेसणया देसकालणया सव्वत्थेसु अप्पडिलोमया, सेत्तं लोगोवयारविणए, सेत्तं विणए । से किं तं वेयावच्चे ? वेयावच्चे दसविहे प०, तं०-आयरियवेयावच्चे उवज्झायवेयावच्चे थेरवेयावच्चे तवस्सिवेयावच्चे गिलाणवेयावच्चे सेहुवेयावच्चे कुलवेयावच्चे गणवेयावच्चे संघवेयावच्चे साहुम्मियवेयावच्चे, सेत्तं वेयावच्चे । से किं तं सज्झाए ? सज्झाए पंचविहे पन्नत्ते, तं०-वायणा पडिपुच्छणा परियट्ठणा अणुप्पेहा धम्मकहा, सेत्तं सज्झाए ॥ ८०१ ॥ से किं तं ज्ञाणे ? ज्ञाणे चउव्विहे पन्नत्ते, तंजहा-अट्ठे ज्ञाणे रोदे ज्ञाणे धम्मे ज्ञाणे सुक्के ज्ञाणे, अट्ठे ज्ञाणे चउव्विहे पन्नत्ते, तंजहा-अमणुन्नसंपओगसंपउत्ते तस्स विप्पओगसइसमन्नागए यावि भवइ १, मणुन्नसंपओगसंपउत्ते तस्स अविप्पओगसइसमन्नागए यावि भवइ २, आर्यकसंपओगसंपउत्ते तस्स विप्पओगसइसमन्नागए यावि भवइ ३, परिजुसियकामभोगसंपओगसंपउत्ते तस्स अविप्पओगसइसमन्नागए यावि भवइ ४, अट्ठस्स णं ज्ञाणस्स चत्तारि लक्खणा प०, तं०-कंदणया सोयणया तिप्पणया परिदेवणया १ । रोद्वज्झाणे चउव्विहे प०, तं०-हिंसाणुबंधी मोसाणुबंधी तेयाणुबंधी सारक्खणाणुबंधी, रोद्वस्स णं ज्ञाणस्स चत्तारि लक्खणा प०, तं०-ओसन्नदोसे बहुलदोसे अण्णाणदोसे आमरणांतदोसे २ । धम्मे ज्ञाणे चउव्विहे चउप्पडोयारे प०, तं०-आणाविजए अवायविजए विवागविजए संठाणविजए, धम्मस्स णं ज्ञाणस्स चत्तारि लक्खणा प०, तं०-आणारुई निसग्गरुई सुत्तरुई ओगाढरुई, धम्मस्स णं ज्ञाणस्स चत्तारि आलंबणा प०, तं०-वायणा पडिपुच्छणा परियट्ठणा धम्मकहा, धम्मस्स णं ज्ञाणस्स चत्तारि अणुप्पेहाओ प०, तं०-एगत्ताणुप्पेहा अणिच्चाणुप्पेहा असरणाणुप्पेहा संसाराणुप्पेहा ३ । सुक्के ज्ञाणे चउव्विहे चउप्पडोयारे प०, तं०-पुहुत्तवियक्के सवियारी १, एगंतवियक्के अवियारी २, सुहुमकिरिए अनियट्ठी ३, समुच्छिन्नकिरिए अप्पडिवाई ४, सुक्कस्स णं ज्ञाणस्स चत्तारि लक्खणा प०, तं०-खंती मुत्ती अज्जवे महवे, सुक्कस्स णं ज्ञाणस्स चत्तारि आलंबणा प०, तं०-अव्वहे असंमोहे विवेगे विउसग्गे, सुक्कस्स णं ज्ञाणस्स चत्तारि

अणुप्पेहाओ प०, तं०—अणंतवत्तियाणुप्पेहा विप्परिणामाणुप्पेहा असुभाणुप्पेहा
अवायाणुप्पेहा ४, सेत्तं ज्ञाणे ॥ ८०२ ॥ से किं तं विउसग्गे ? विउसग्गे दुविहे
प०, तं०—द्व्वविउसग्गे य भावविउसग्गे य, से किं तं द्व्वविउसग्गे ? द्व्व-
विउसग्गे चउव्विहे प०, तं०—गणविउसग्गे सरीरविउसग्गे उव्विहिविउसग्गे
भत्तपाणविउसग्गे, सेत्तं द्व्वविउसग्गे, से किं तं भावविउसग्गे ? भावविउसग्गे
तिविहे प०, तं०—कसायविउसग्गे संसारविउसग्गे कम्मविउसग्गे, से किं तं
कसायविउसग्गे ? कसायविउसग्गे चउव्विहे प०, तंजहा—कोहविउसग्गे माणवि-
उसग्गे मायाविउसग्गे लोभविउसग्गे, सेत्तं कसायविउसग्गे, से किं तं संसारविउ-
सग्गे ? संसारविउसग्गे चउव्विहे पञ्जते, तंजहा—नेरइयसंसारविउसग्गे जाव
देवसंसारविउसग्गे, सेत्तं संसारविउसग्गे, से किं तं कम्मविउसग्गे ? कम्मविउसग्गे
अट्टविहे प०, तंजहा—णाणावरणिज्जकम्मविउसग्गे जाव अंतराइयकम्मविउसग्गे,
सेत्तं कम्मविउसग्गे, सेत्तं भावविउसग्गे, सेत्तं अब्भित्त(र)रिए तवे । सेवं भंते ! २
त्ति ॥ ८०३ ॥ पणवीसइमस्स सयस्स सत्तमो उदेसो समत्तो ॥

रायणिहे जाव एवं वयासी—नेरइया णं भंते ! कहं उव्वज्जंति ? गोयमा ! से
जहानामए पवए पवमाणे अज्झवसाणनिव्वत्तिएणं करणोवाएणं सेयकाले तं ठाणं
विप्पजहिता पुरिमं ठाणं उव्वसंपज्जिताणं विहरइ एवामेव एए(ते)वि जीवा पवओविव
पवमाणा अज्झवसाणनिव्वत्तिएणं करणोवाएणं सेयकाले तं भवं विप्पजहिता पुरिमं
भवं उव्वसंपज्जिताणं विहरन्ति । तेसि णं भंते ! जीवाणं कहं सीहा गई कहं सीहे
गइविसए प० ? गोयमा ! से जहानामए—केइ पुरिसे तरुणे बलवं एवं जहा चउइसम-
सए पढमुदेसए जाव तिसमएण वा विग्गहेणं उव्वज्जंति, तेसि णं जीवाणं तहा
सीहा गई तहा सीहे गइविसए प० । ते णं भंते ! जीवा कहं परभवियाउयं पक-
रंति ? गोयमा ! अज्झवसाण(जोग)निव्वत्तिएणं करणोवाएणं एवं खलु ते जीवा पर-
भवियाउयं पकरन्ति, तेसि णं भंते ! जीवाणं कहं गई पवत्तइ ? गोयमा ! आउ-
क्खएणं भवक्खएणं ठिइक्खएणं, एवं खलु तेसि जीवाणं गई पवत्तइ, ते णं भंते !
जीवा किं आइइणीए उव्वज्जंति परिइणीए उव्वज्जंति ? गोयमा ! आइइणीए उव्वज्जंति
नो परिइणीए उव्वज्जंति । ते णं भंते ! जीवा किं आयकम्मुणा उव्वज्जंति परकम्मुणा
उव्वज्जंति ? गोयमा ! आयकम्मुणा उव्वज्जंति नो परकम्मुणा उव्वज्जंति, ते णं
भंते ! जीवा किं आयप्पओगेणं उव्वज्जंति परप्पओगेणं उव्वज्जंति ? गोयमा !
आयप्पओगेणं उव्वज्जंति नो परप्पओगेणं उव्वज्जंति । असुरकुमारा णं भंते ! कहं
उव्वज्जंति ? जहा नेरइया तहेव निरवसेसं जाव नो परप्पओगेणं उव्वज्जंति, एवं

एगिंदियवज्जा जाव वेमाणिया, एगिंदिया तं (एवं) चेव नवरं चउसमइओ विग्गहो,
 सेसं तं चेव, सेवं भंते ! २ ति जाव विहरइ ॥ ८०४ ॥ २५ । ८ ॥ भवसिद्धिय-
 नेरइया णं भंते ! कहं उववज्जंति ? गोयमा ! से जहानामए पवए पवमाणे अवसेसं
 तं चेव जाव वेमाणिए, सेवं भंते ! २ ति ॥ ८०५ ॥ २५ । ९ ॥ अभवसिद्धिय-
 नेरइया णं भंते ! कहं उववज्जंति ? गोयमा ! से जहानामए पवए पवमाणे अवसेसं
 तं चेव एवं जाव वेमाणि(ए)या, सेवं भंते ! २ ति ॥ ८०६ ॥ २५ । १० ॥ सम्महिट्ठि-
 नेरइया णं भंते ! कहं उववज्जंति ? गोयमा ! से जहानामए पवए पवमाणे अवसेसं
 तं चेव एवं एगिंदियवज्जं जाव वेमाणि(ए)या, सेवं भंते ! २ ति ॥ ८०७ ॥ २५ । ११ ॥
 मिच्छादिट्ठिनेरइया णं भंते ! कहं उववज्जंति ? गोयमा ! से जहानामए-पवए पवमाणे
 अवसेसं तं चेव एवं जाव वेमाणिए, सेवं भंते ! २ ति जाव विहरइ ॥ ८०८ ॥
 २५ । १२ ॥ पणवीसइमस्स सयस्स बारहमो उहेसो समत्तो ॥ पण-
 वीसइमं सयं समत्तं ॥

नमो सुयदेवयाए भगवईए । जीवा १ य लेस्स २ पक्खिय ३ दिट्ठी ४ अज्ञाण ५ नाण
 ६ सत्ताओ ७ । वेय ८ कसा(य)ए ९ उवओ(गे)ग १० जोग ११ एक्कार(स)वि ठाणा
 ॥ १ ॥ तेणं कालेणं तेणं समएणं रायगिहे जाव एवं वयासी-जीवे णं भंते । पावं
 कम्मं किं बंधी बंधइ बंधिस्सइ १, बंधी बंधइ ण बंधिस्सइ २, बंधी न बंधइ
 बंधिस्सइ ३, बंधी न बंधइ न बंधिस्सइ ४ ? गोयमा ! अत्थेगइए (जीवे) बंधी बंधइ
 बंधिस्सइ १, अत्थेगइए बंधी बंधइ ण बंधिस्सइ २, अत्थेगइए बंधी ण बंधइ
 बंधिस्सइ ३, अत्थेगइए बंधी ण बंधइ ण बंधिस्सइ ४-१ ॥ सलेस्से णं भंते !
 जीवे पावं कम्मं किं बंधी बंधइ बंधिस्सइ, बंधी बंधइ ण बंधिस्सइ० पुच्छा,
 गोयमा ! अत्थेगइए बंधी बंधइ बंधिस्सइ, अत्थेगइए एवं चउभंगो । कण्हलेस्से
 णं भंते ! जीवे पावं कम्मं किं बंधी० पुच्छा, गोयमा ! अत्थेगइए बंधी बंधइ बंधि-
 स्सइ अत्थेगइए बंधी बंधइ न बंधिस्सइ एवं जाव पण्हलेस्से सव्वत्थ पढमबिइया
 भंगा, सुक्कलेस्से जहा सलेस्से तहेव चउभंगो । अलेस्से णं भंते ! जीवे पावं कम्मं
 किं बंधी० पुच्छा, गोयमा ! बंधी न बंधइ न बंधिस्सइ २ ॥ कण्हपक्खिए णं
 भंते ! जीवे पावं कम्मं० पुच्छा, गोयमा ! अत्थेगइए बंधी पढमबिइया भंगा ।
 सुक्कपक्खिए णं भंते ! जीवे पुच्छा, गोयमा ! चउभंगो भाणियव्वो ॥ ८०९ ॥
 सम्महिट्ठीणं चत्तारि भंगा, मिच्छादिट्ठीणं पढमबिइया भंगा, सम्मामिच्छादिट्ठीणं
 एवं चेव । नाणीणं चत्तारि भंगा, आभिणिबोहियणाणीणं जाव मणपज्जवणाणीणं
 चत्तारि भंगा, केवलनाणीणं चरिमो भंगो जहा अलेस्साणं ५, अज्ञाणीणं पढमबिइया,

एवं मइअन्नाणीणं सुयअन्नाणीणं विभंगणाणीणवि ६ । आहारसन्नोवउत्ताणं जाव परिगहसन्नोवउत्ताणं पढमविइया नोसन्नोवउत्ताणं चत्तारि ७ । सवेदगाणं पढमविइया, एवं इत्थिवेदगाणं पुरिसवेदगाणं नपुंसगवेदगाणवि, अवेदगाणं चत्तारि भंगा ॥ सकसाईणं चत्तारि, कोहकसाईणं पढमविइया भंगा, एवं माणकसा(य)इस्सवि मायकसाइस्सवि लोभकसाइस्सवि चत्तारि भंगा, अकसाई णं भंते ! जीवे पावं कम्मं किं बंधी० पुच्छा, गोयमा ! अत्थेगइए बंधी न बंधइ बंधिस्सइ ३, अत्थेगइए बंधी ण बंधइ ण बंधिस्सइ ४ । सजोगिस्स चउभंगो, एवं मणजो(ग)गिस्सवि वइजोगिस्सवि कायजोगिस्सवि, अजोगिस्स चरिमो, सागारोवउत्ते चत्तारि, अणागारोवउत्तेवि चत्तारि भंगा ११ ॥ ८१० ॥ नेरइए णं भंते ! पावं कम्मं किं बंधी बंधइ बंधिस्सइ० पुच्छा, गोयमा ! अत्थेगइए बंधी पढमविइया १, सलेस्से णं भंते ! नेरइए पावं कम्मं० एवं चेव, एवं कण्हलेस्सेवि नीललेस्सेवि काउलेस्सेवि, एवं कण्हपक्खिए(वि) सुक्कपक्खिए(वि), सम्मदिट्ठी मिच्छादिट्ठी सम्मामिच्छादिट्ठी, णाणी आभिणिबोहियनाणी सुयनाणी ओहिणाणी अन्नाणी मइअन्नाणी सुयअन्नाणी विभंगनाणी आहारसन्नोवउत्ते जाव परिगहसन्नोवउत्ते, सवेदए जाव नपुंसगवेदए, सकसाई जाव लोभकसाई, सजोगी मणजोगी वइजोगी कायजोगी, सागारोवउत्ते अणागारोवउत्ते, एएसु सव्वेसु पएसु पढमविइया भंगा भाणियव्वा, एवं असुरकुमारस्सवि वत्तव्वया भाणियव्वा नवरं तेउलेस्सा इत्थिवेयगा पुरिसवेयगा य अब्भहिया नपुंसगवेदगा न भन्नेति सेसं तं चेव सव्वत्थ पढमविइया भंगा, एवं जाव थणियकुमारस्स, एवं पुढविकाइयस्सवि आउकाइयस्सवि जाव पंचिदियतिरिक्खजोणियस्सवि सव्वत्थवि पढमविइया भंगा नवरं जस्स जा लेस्सा दिट्ठी णाणं अन्नाणं वेदो जोगो य जं जस्स अत्थि तं तस्स भाणियव्वं सेसं तहेव, मणूसस्स जच्चेव जीवपदे वत्तव्वया सच्चेव निरवसेसा भाणियव्वा, वाणमंतरस्स जहा असुरकुमारस्स, जोइसियस्स वेमाणियस्स एवं चेव नवरं लेस्साओ जाणियव्वाओ, सेसं तहेव भाणियव्वं ॥ ८११ ॥ जीवे णं भंते ! नाणावरणिज्जं कम्मं किं बंधी बंधइ बंधिस्सइ एवं जहेव पावकम्मस्स वत्तव्वया भाणिया तहेव नाणावरणिज्जस्सवि वत्तव्वया भाणियव्वा नवरं जीवपदे मणुस्सपदे य सकसाई जाव लोभकसाईमि य पढमविइया भंगा अवसेसं तं चेव जाव वेमाणिए, एवं दरिसणावरणिज्जेणवि दंडगो भाणियव्वो निरवसेसो ॥ जीवे णं भंते ! वेयणिज्जं कम्मं किं बंधी० पुच्छा, गोयमा ! अत्थेगइए बंधी बंधइ बंधिस्सइ १, अत्थेगइए बंधी बंधइ न बंधिस्सइ २, अत्थेगइए बंधी न बंधइ न बंधिस्सइ ४, सलेस्सेवि एवं चेव तइयविहूणा भंगा, कण्हलेस्से जाव पम्हलेस्से पढम-

विइया भंगा, सुक्कळेस्से तइयविहूणा भंगा, अलेस्से चरिमो भंगो, कण्हपक्खिए पढमविइया भंगा, सुक्कपक्खिया तइयविहूणा, एवं सम्महिट्टिस्सवि, मिच्छादिट्टिस्स सम्मामिच्छादिट्टिस्स य पढमविइया, णा(ण)णिस्स तइयविहूणा, आभिणिबोहियनाणी जाव मणपज्जवणाणी पढमविइया, केवलनाणी तइयविहूणा, एवं नोसन्नोवउत्ते अवे-
दए अकसाई सागारोवउत्ते अणागारोवउत्ते एएसु तइयविहूणा, अजोगिम्मि य चरिमो, सेसेसु पढमविइया । नेरइए णं भंते ! वेयणिजं कम्मं किं बंधी बंधइ बंधिस्सइ० एवं नेरइया(बीया) जाव वेमाणियत्ति जस्स जं अत्थि सव्वत्थवि पढमविइया, नवरं मणु-
स्से(सु) जहा जीवे, जीवे णं भंते ! मोहणिजं कम्मं किं बंधी बंधइ० जहेव पावं कम्मं तहेव मोहणिजंपि निरवसेसं जाव वेमाणिए ॥ ८१२ ॥ जीवे णं भंते ! आउयं कम्मं किं बंधी बंधइ० पुच्छा, गोयमा ! अत्थेगइए बंधी चउभंगो, सळेस्से जाव सुक्क-
ळेस्से चत्तारि भंगा, अलेस्से चरिमो भंगो । कण्हपक्खिए णं पुच्छा, गोयमा ! अत्थेगइए बंधी बंधइ बंधिस्सइ अत्थेगइए बंधी न बंधइ बंधिस्सइ, सुक्कपक्खिए सम्महिट्ठी मिच्छादिट्ठी चत्तारि भंगा, सम्मामिच्छादिट्ठी पुच्छा, गोयमा ! अत्थेग-
इए बंधी न बंधइ बंधिस्सइ अत्थेगइए बंधी न बंधइ न बंधिस्सइ, नाणी जाव ओहिनाणी चत्तारि भंगा, मणपज्जवणाणी पुच्छा, गोयमा ! अत्थेगइए बंधी बंधइ बंधिस्सइ, अत्थेगइए बंधी न बंधइ बंधिस्सइ, अत्थेगइए बंधी न बंधइ न बंधिस्सइ, केवलना(णी)णे चरिमो भंगो, एवं एएणं कमेणं नोसन्नोवउत्ते विइयविहूणा जहेव मणपज्जवणाणे, अवेदए अकसाई य तइयचउत्था जहेव सम्मामिच्छते, अजोगिम्मि चरिमो, सेसेसु पदेसु चत्तारि भंगा जाव अणागारोवउत्ते ॥ नेरइए णं भंते ! आउयं कम्मं किं बंधी० पुच्छा, गोयमा ! अत्थेगइए चत्तारि भंगा एवं सव्वत्थवि नेरइयाणं चत्तारि भंगा नवरं कण्हळेस्से कण्हपक्खिए य पढमतइया भंगा, सम्मामिच्छते तइयचउत्था, असुरकुमारे एवं चेव, नवरं कण्हळेस्से(सु)वि चत्तारि भंगा भाणियव्वा सेसं जहा नेरइयाणं एवं जाव थणियकुमारणं, पुढविकाइयाणं सव्वत्थवि चत्तारि भंगा, नवरं कण्हपक्खिए पढमतइया भंगा, तेउळेस्से पुच्छा, गोयमा ! बंधी न बंधइ बंधिस्सइ, सेसेसु सव्वत्थ चत्तारि भंगा, एवं आउक्काइयवणस्सइकाइयाणकि निरवसेसं, तेउक्काइयवाउक्काइयाणं सव्वत्थवि पढमतइया भंगा, बेईदियतेईदियचउरिंदियाणंपि सव्वत्थवि पढमतइया भंगा, नवरं सम्मत्ते नाणे आभिणिबोहियनाणे सुयनाणे तइओ भंगो । पंविंदियतिरिक्खजोणियाणं कण्हपक्खिए पढमतइया भंगा, सम्मामिच्छते तइयचउत्था भंगा, सम्मत्ते नाणे आभिणिबोहियनाणे सुयनाणे ओहिनाणे एएसु पंचसुवि पदेसु विइयविहूणा भंगा, सेसेसु चत्तारि भंगा, मणुस्साणं

जहा जीवाणं, नवरं सम्मत्ते ओहिणं नाणे आभिणिबोहियनाणे सुयनाणे ओहिनाणे
सुएसु विइयविट्ठणा भंगा, सेसं तं चेव, वाणमंतरजोइसियवेमाणिया जहा अउर-
कुमारा, नामं गोयं अंतरा(इ)यं च एयाणि जहा नाणावरणिज्जं । सेवं भंते ! २ ति
जाव विहरइ ॥ ८१३ ॥ **बंधिसयस्स पढमो उद्देसो समत्तो ॥**

अणंतरोववन्नए णं भंते ! नेरइए पावं कम्मं किं बंधी० पुच्छा तहेव, गोयमा !
अत्थेगइए बंधी पढमविइया भंगा । सलेस्से णं भंते ! अणंतरोववन्नए नेरइए पावं
कम्मं किं बंधी० पुच्छा, गोयमा ! पढमविइया भंगा, एवं खलु सव्वत्थ पढमविइया
भंगा, नवरं सम्मामिच्छत्तं मणजोगो वइजोगो य न पुच्छिजइ, एवं जाव थणिय-
कुमारारणं, बेइदियतेइदियचउरिदियाणं वइजोगो न भवइ, पंचिदियतिरिक्खजोणि-
याणंपि सम्मामिच्छत्तं ओहिनाणं विभंगनाणं मणजोगो वइजोगो एयाणि पंच पदाणि
ण भवन्ति । मणुस्साणं अलेस्ससम्मामिच्छत्तमणपजववणाणकेवल्लनाणविभंगनाण-
नोसन्नोवउत्तअवेदगअकसाईमणजो(णि)गवइजोगअजोगी एयाणि एक्कारस पयाणि
ण भवन्ति, वाणमंतरजोइसियवेमाणियाणं जहा नेरइयाणं तहेव ते तिज्जि न भवन्ति
सव्वेसिं, जाणि सेसाणि ठाणाणि सव्वत्थ पढमविइया भंगा, एगिंदियाणं सव्वत्थ
पढमविइया भंगा, जहा पावे एवं नाणावरणिज्जेगवि दंडओ, एवं आउयवज्जेसु
जाव अंतराइए दंडओ ॥ अणंतरोववन्नए णं भंते ! नेरइए आउयं कम्मं किं बंधी०
पुच्छा, गोयमा ! बंधी न बंधइ बंधिस्सइ । सलेस्से णं भंते ! अणंतरोववन्नए
नेरइए आउयं कम्मं किं बंधी० ? एवं चेव तइओ भंगो, एवं जाव अणागारोवउत्ते,
सव्वत्थवि तइओ भंगो, एवं मणुस्सवज्जं जाव वेमाणियाणं, मणुस्साणं सव्वत्थ
तइयचउत्तथा भंगा, नवरं कण्हपक्खिएसु तइओ भंगो सव्वेसिं नाणत्ताइं ताइं चेव ।
सेवं भंते ! २ ति ॥ ८१४ ॥ **बंधिसयस्स विइओ उद्देसो समत्तो ॥**

परंपरोववन्नए णं भंते ! नेरइए पावं कम्मं किं बंधी० पुच्छा, गोयमा ! अत्थेग-
इए पढमविइया, एवं जहेव पढमो उद्देसओ तहेव परंपरोववन्नएहिंवि उद्देसओ
भाणियव्वो नेरइयाइओ तहेव नवदंडगसंगहिओ, अट्ठण्हवि कम्मप्पगढीं जा जस्स
कम्मस्स वत्तव्वया सा तस्स अहीणमइरित्ता नेयव्वा जाव वेमाणिया अणागारो-
वउत्ता । सेवं भंते ! २ ति ॥ ८१५ ॥ **बंधिसयस्स तइओ उद्देसो समत्तो ॥**

अणंतरोगाढए णं भंते ! नेरइए पावं कम्मं किं बंधी० पुच्छा, गोयमा ! अत्थे-
गइए० एवं जहेव अणंतरोववन्नएहिं नवदंडगसंगहिओ उद्देसओ भणिओ तहेव
अणंतरोगाढएहिंवि अहीणमइरित्तो भाणियव्वो नेरइयाइए जाव वेमाणिए । सेवं
भंते ! २ ति ॥ २६-४ ॥ परंपरोगाढए णं भंते ! नेरइए पावं कम्मं किं बंधी० जहेव

परंपरोववन्नएहिं उद्देसो सो चेव निरवसेसो भाणियव्वो । सेवं भंते ! २ ति ॥ २६-५ ॥
अणंतराहारए णं भंते ! नेरइए पावं कम्मं किं बंधी० पुच्छा, गोयमा ! एवं जहेव
अणंतरोववन्नएहिं उद्देसो तहेव निरवसे(सो)सं । सेवं भंते ! २ ति ॥ २६-६ ॥
परंपराहारए णं भंते ! नेरइए पावं कम्मं किं बंधी० पुच्छा, गोयमा ! एवं जहेव
परंपरोववन्नएहिं उद्देसो तहेव निरवसेसो भाणियव्वो । सेवं भंते ! सेवं भंते ! ति
॥ २६-७ ॥ अणंतरपज्जतए णं भंते ! नेरइए पावं कम्मं किं बंधी० पुच्छा,
गोयमा ! एवं जहेव अणंतरोववन्नएहिं उद्देसो तहेव निरवसेसं । सेवं भंते ! २ ति
॥ २६-८ ॥ परंपरपज्जतए णं भंते ! नेरइए पावं कम्मं किं बंधी० पुच्छा,
गोयमा ! एवं जहेव परंपरोववन्नएहिं उद्देसो तहेव निरवसेसो भाणियव्वो । सेवं
भंते ! २ ति जाव विहरइ ॥ २६-९ ॥ चरिमे णं भंते ! नेरइए पावं कम्मं किं
बंधी० पुच्छा, गोयमा ! एवं जहेव परंपरोववन्नएहिं उद्देसो तहेव चरिमेहिं निरव-
से(सं)सो । सेवं भंते ! २ ति जाव विहरइ ॥ २६-१० ॥ अचरिमे णं भंते ! नेरइए
पावं कम्मं किं बंधी० पुच्छा, गोयमा ! अत्थेगइए एवं जहेव पढमोद्देसए तहेव पढ-
मविइया भंगा भाणियव्वा सव्वत्थ जाव पंचिदियतिरिक्खजोणियाणं । अचरिमे णं
भंते ! मणुस्से पावं कम्मं किं बंधी० पुच्छा, गोयमा ! अत्थेगइए बंधी बंधइ बंधि-
स्सइ, अत्थेगइए बंधी बंधइ न बंधिस्सइ, अत्थेगइए बंधी न बंधइ(न) बंधिस्सइ ।
सल्लेस्से णं भंते ! अचरिमे मणुस्से पावं कम्मं किं बंधी० ? एवं चेव तिन्नि भंगा चरि-
मविट्ठणा भाणियव्वा एवं जहेव पढमुद्देसे, नवरं जेसु तत्थ वीससु पदेसु चत्तारि भंगा
तेसु इह आविळा तिन्नि भंगा भाणियव्वा चरिमभंगवज्जा, अल्लेस्से केवलनाणी य
अजोगी य एए तिन्निवि न पुच्छिज्जंति, सेसं तहेव, वाणमंतरजोइसियवेमाणि(ए)या
जहा नेरइए । अचरिमे णं भंते ! नेरइए नाणावरणिज्जं कम्मं किं बंधी० पुच्छा,
गोयमा ! एवं जहेव पावं नवरं मणुस्सेसु सकसाईसु लोभकसाईसु य पढमविइया
भंगा, सेसा अट्टारस चरिमविट्ठणा सेसं तहेव जाव वेमाणियाणं, दरिसणावरणिज्जंफि
एवं चेव निरवसेसं, वेयणिज्जे सव्वत्थवि पढमविइया भंगा जाव वेमाणियाणं नवरं
मणुस्सेसु अल्लेस्से केवली अजोगी य नत्थि । अचरिमे णं भंते ! नेरइए मोहणिज्जं
कम्मं किं बंधी० पुच्छा, गोयमा ! जहेव पावं तहेव निरवसेसं जाव वेमाणिए ॥
अचरिमे णं भंते ! नेरइए आउयं कम्मं किं बंधी० पुच्छा, गोयमा ! पढमवि(त)-
इया भंगा, एवं सव्वपदेसुवि, नेरइयाणं पढमतइया भंगा नवरं सम्मामिच्छते तइओ
भंगो, एवं जाव थणियकुमारानं, पुढविकाइयआउक्काइयवणस्सइकाइयाणं तेउल्लेस्साए
तइओ भंगो सेसेसु पदेसु सव्वत्थ पढमतइया भंगा, तेउक्काइयवाउक्काइयाणं सव्वत्थ

पढमतइया भंगा, बेईदियतेईदियचउरिंदियाणं एवं चेव नवरं सम्मत्ते ओहिनाणे
आभिणिबोहियनाणे सुयनाणे एएसु चउसुवि ठाणेसु तइओ भंगो, पंविंदियतिरिक्ख-
जोणियाणं सम्माभिच्छत्ते तइओ भंगो, सेसेसु पदेसु सव्वत्थ पढमतइया भंगा,
मणुस्साणं सम्माभिच्छत्ते अवैदए अकसाइम्मि य तइओ भंगो, अलेस्स केवलनाण
अजोगी य न पुच्छिजंति, सेसपदेसु सव्वत्थ पढमतइया भंगा, वाणमंतरजोइसिय-
वेमाणिया जहा नेरइया । नामं गोयं अंतराइयं च जहेव नाणावरणिजं तहेव
निरवसेसं । सेवं भंते ! २ ति जाव विहरइ ॥ ८१६ ॥ छव्वीसइमे वंधिसए
एयारहमो उहेसो समत्तो ॥ छव्वीसइमे वंधिसयं समत्तं ॥

जीवा णं भंते ! पावं कम्मं किं करिंसु करेन्ति करिस्संति १, करिंसु करेन्ति न
करिस्संति २, करिंसु न करेन्ति करिस्संति ३, करिंसु न करेन्ति न करिस्संति ४ ?
गोयमा ! अत्थेगइए करिंसु करेन्ति करिस्संति १, अत्थेगइए करिंसु करेन्ति न करि-
स्संति २, अत्थेगइए करिंसु न करेन्ति करिस्संति ३, अत्थेगइए करिंसु न करेन्ति न
करिस्संति ४ । सलेस्से णं भंते ! जीवे पावं कम्मं एवं एएणं अभिलावेणं जचेव
बंधिसए वत्तव्वया सचेव निरवसेसा भाणियव्वा, तहेव नवदंडगसंगहिया एक्कारस्स
उहेसगा भाणियव्वा ॥ ८१७ ॥ सत्तावीसइमे करिंसुगसयं समत्तं ॥

जीवा णं भंते ! पावं कम्मं कहिं समज्जिणिंसु कहिं समायरिंसु ? गोयमा !
सव्वेवि ताव तिरिक्खजोणिएसु होज्जा १ अहवा तिरिक्खजोणिएसु य नेरइएसु य
होज्जा २ अहवा तिरिक्खजोणिएसु य मणुस्सेसु य होज्जा ३ अहवा तिरिक्खजोणि-
एसु य देवेसु य होज्जा ४ अहवा तिरिक्खजोणिएसु य नेरइएसु य मणुस्सेसु य होज्जा
५ अहवा तिरिक्खजोणिएसु य नेरइएसु य देवेसु य होज्जा ६ अहवा तिरिक्खजो-
णिएसु य मणुस्सेसु य देवेसु य होज्जा ७ अहवा तिरिक्खजोणिएसु य नेरइएसु य
मणुस्सेसु य देवेसु य होज्जा ८ । सलेस्सा णं भंते ! जीवा पावं कम्मं कहिं समज्जिणिंसु
कहिं समायरिंसु ? एवं चेव, एवं कण्हलेस्सा जाव अलेस्सा, कण्हपक्खिया सुक्कप-
क्खिया एवं जाव अणागारोवउत्ता । नेरइया णं भंते ! पावं कम्मं कहिं समज्जिणिंसु
कहिं समायरिंसु ? गोयमा ! सव्वेवि ताव तिरिक्खजोणिएसु होज्जति एवं चेव अट्ठ
भंगा भाणियव्वा, एवं सव्वत्थ अट्ठ भंगा, एवं जाव अणागारोवउत्तावि, एवं जाव
वेमाणियाणं, एवं नाणावरणिज्जेणवि दंडओ, एवं जाव अंतराइएणं, एवं एए
जीवादीया वेमाणियपज्जवसाणा नव दंडगा भवंति । सेवं भंते ! २ ति जाव विह-
रइ ॥ ८१८ ॥ २८११ ॥ अणंतरोववन्नगा णं भंते ! नेरइया पावं कम्मं कहिं
समज्जिणिंसु कहिं समायरिंसु ? गोयमा ! सव्वेवि ताव तिरिक्खजोणिएसु होज्जा,

एवं एत्थवि अट्ठ भंगा, एवं अणंतरोववन्नगाणं नेरइयाईणं जस्स जं अत्थि लेस्सा-
दीयं अणागारोवओगपज्जवसाणं तं सव्वं एयाए भयणाए भाणियव्वं जाव वेमा-
णियाणं, नवरं अणंतरेसु जे परिहरियव्वा ते जहा बंधिसए तहा इहंपि, एवं
नाणावरणिज्जेणवि दंडओ एवं जाव अंतराइएणं निरवसेसं एसोवि नवईडगसंग-
हिओ उद्देसओ भाणियव्वो । सेवं भंते ! २ ति ॥ ८१९ ॥ २८१२ ॥ एवं एएणं
कमेणं जहेव बंधिसए उद्देसगाणं परिवाडी तहेव इहंपि अट्ठसु भंगेसु नेयव्वा नवरं
जाणियव्वं जं जस्स अत्थि तं तस्स भाणियव्वं जाव (अ)चरिमुद्देसो । सव्वेवि एए
एकारस उद्देसगा । सेवं भंते ! २ ति जाव विहरइ ॥ ८२० ॥ अट्ठावीसइमं
कम्मसमज्जणणसयं समत्तं ॥

जीवा णं भंते ! पावं कम्मं किं समायं पट्ठविंसु समायं निट्ठविंसु १, समायं
पट्ठविंसु विसमायं निट्ठविंसु २, विसमायं पट्ठविंसु समायं निट्ठविंसु ३, विसमायं
पट्ठविंसु विसमायं निट्ठविंसु ४ ? गोयमा । अत्थेगइया समायं पट्ठविंसु समायं निट्ठविंसु
जाव अत्थेगइया विसमायं पट्ठविंसु विसमायं निट्ठविंसु, से केणट्ठेणं भंते ! एवं वुच्चइ
अत्थेगइया समायं पट्ठविंसु समायं निट्ठविंसु ? तं चेव, गोयमा । जीवा चउव्विहा
पज्जता, तंजहा-अत्थेगइया समाउया समोववन्नगा १, अत्थेगइया समाउया
विसमोववन्नगा २, अत्थेगइया विसमाउया समोववन्नगा ३, अत्थेगइया विसमाउया
विसमोववन्नगा ४, तत्थ णं जे ते समाउया समोववन्नगा ते णं पावं कम्मं समायं
पट्ठविंसु समायं निट्ठविंसु, तत्थ णं जे ते समाउया विसमोववन्नगा ते णं पावं कम्मं
समायं पट्ठविंसु विसमायं निट्ठविंसु, तत्थ णं जे ते विसमाउया समोववन्नगा ते णं
पावं कम्मं विसमायं पट्ठविंसु समायं निट्ठविंसु, तत्थ णं जे ते विसमाउया विसमो-
ववन्नगा ते णं पावं कम्मं विसमायं पट्ठविंसु विसमायं निट्ठविंसु, से तेणट्ठेणं गोयमा !
तं चेव । सलेस्सा णं भंते ! जीवा पावं कम्मं एवं चेव, एवं सव्वट्ठाणेसुवि जाव
अणागारोवउत्ता, एए सव्वेवि पया एयाए वत्तव्वयाए भाणियव्वा । नेरइया णं
भंते ! पावं कम्मं किं समायं पट्ठविंसु समायं निट्ठविंसु ० पुच्छा, गोयमा ! अत्थेगइया
समायं पट्ठविंसु एवं जहेव जीवाणं तहेव भाणियव्वं जाव अणागारोवउत्ता, एवं जाव
वेमाणियाणं जस्स जं अत्थि तं एएणं चेव कमेणं भाणियव्वं जहा पावेण कम्मेण
दंडओ, एवं एएणं कमेणं अट्ठसुवि कम्मप्पगडीसु अट्ठ दंडगा भाणियव्वा जीवादीया
वेमाणियपज्जवसाणा एसो नवईडगसंगहिओ पढमो उद्देसओ भाणियव्वो । सेवं भंते !
२ ति ॥ ८२१ ॥ एगूणतीसइमे सए पढमो उद्देसो समत्तो ॥

अणंतरोववन्नगा णं भंते ! नेरइया पावं कम्मं किं समायं पट्ठविंसु समायं

निट्ठविंसु० पुच्छा, गोयमा ! अत्थेगइया समायं पट्ठविंसु समायं निट्ठविंसु अत्थेग-
इया समायं पट्ठविंसु विसमायं निट्ठविंसु, से केणट्ठेणं भंते ! एवं वुच्चइ अत्थेगइया
समायं पट्ठविंसु तं चेव, गोयमा ! अणंतरोववन्नगा नेरइया दुविहा प०, तं०—
अत्थेगइया समाउया समोववन्नगा अत्थेगइया समाउया विसमोववन्नगा, तत्थ णं
जे ते समाउया समोववन्नगा ते णं पावं कम्मं समायं पट्ठविंसु समायं निट्ठविंसु, तत्थ
णं जे ते समाउया विसमोववन्नगा ते णं पावं कम्मं समायं पट्ठविंसु विसमायं निट्ठ-
विंसु, से तेणट्ठेणं तं चेव । सलेस्सा णं भंते ! अणंतरोववन्नगा नेरइया पावं कम्मं
एवं चेव, एवं जाव अणागारोवउत्ता, एवं असुरकुमारावि एवं जाव वेमाणिया नवरं
जं जस्स अत्थि तं तस्स भाणियव्वं, एवं नाणावरणिज्जेणवि दंडओ, एवं निरवसेसं
जाव अंतराइएणं । सेवं भंते ! २ त्ति जाव विहरइ ॥ २९।२ ॥ एवं एएणं गमएणं
जचेव बंधिसए उइसगपरिवाडी सच्चेव इहवि भाणियव्वा जाव अचरिमोत्ति, अणं-
तरउइसगाणं चउण्हवि एक्का वत्तव्वया सेसाणं सत्तण्हं एक्का वत्तव्वया ॥ ८२२ ॥

एगूणतीसइमं कम्मपट्ठवणसयं समत्तं ॥

कइ णं भंते ! समोसरणा प० ? गोयमा ! चत्तारि (चउव्विहा) समोसरणा प०,
तंजहा—किरियावाई अकिरियावाई अन्नाणियवाई वेणइयवाई, जीवा णं भंते । किं
किरियावाई अकिरियावाई अन्नाणियवाई वेणइयवाई ? गोयमा ! जीवा किरियावाईवि
अकिरियावाईवि अन्नाणियवाईवि वेणइयवाईवि, सलेस्सा णं भंते ! जीवा किं
किरियावाई० पुच्छा, गोयमा ! किरियावाईवि अकिरियावाईवि अन्नाणियवाईवि
वेणइयवाईवि, एवं जाव सुक्कलेस्सा, अलेस्सा णं भंते ! जीवा पुच्छा, गोयमा !
किरियावाई नो अकिरियावाई नो अन्नाणियवाई नो वेणइयवाई । कण्हपक्खिया
णं भंते ! जीवा किं किरियावाई० पुच्छा, गोयमा ! नो किरियावाई अकिरियावाई
अन्नाणियवाईवि वेणइयवाईवि, सुक्कपक्खिया जहा सलेस्सा, सम्मादिट्ठी जहा
अलेस्सा, मिच्छादिट्ठी जहा कण्हपक्खिया, सम्मामिच्छादिट्ठीणं पुच्छा, गोयमा !
नो किरियावाई नो अकिरियावाई अन्नाणियवाईवि वेणइयवाईवि, णाणी जाव
केवलनाणी जहा अलेस्सा, अन्नाणी जाव विभंगनाणी जहा कण्हपक्खिया, आहा-
रसन्नोवउत्ता जाव परिग्गहसन्नोवउत्ता जहा सलेस्सा, नोसन्नोवउत्ता जहा अलेस्सा,
सवेदगा जाव नपुंसगवेदगा जहा सलेस्सा, अवेदगा जहा अलेस्सा, सक्काई
जाव लोभकसाई जहा सलेस्सा, अकसाई जहा अलेस्सा, सजोगी जाव कायजोगी
जहा सलेस्सा, अजोगी जहा अलेस्सा, सागारोवउत्ता अणागारोवउत्ता जहा
सलेस्सा । नेरइया णं भंते ! किं किरियावाई० पुच्छा, गोयमा ! किरियावाईवि

जाव वेणइयवाईवि, सलेस्सा णं भंते ! नेरइया किं किरियावाई० ? एवं चेव, एवं जाव काउलेस्सा, कण्हपक्खया किरियाविवज्जिया, एवं एएणं कमेणं जचेव जीवाणं वत्तव्वया सचेव नेरइयाणवि वत्तव्वया जाव अणागारोवउत्ता नवरं जं अत्थि तं भाणियव्वं सेसं न भण्णइ, जहा नेरइया एवं जाव थणियकुमारा ॥ पुढविकाइया णं भंते ! किं किरियावाई० पुच्छा, गोयमा ! नो किरियावाई अकिरियावाईवि अन्नाणियवाईवि नो वेणइयवाई, एवं पुढविकाइयाणं जं अत्थि तत्थि सव्वत्थवि एयाइं दो मज्झिज्झाईं समोसरणाईं जाव अणागारोवउत्तावि, एवं जाव चउरिंदियाणं सव्वट्ठणेषु एयाइं चेव मज्झिज्झागाईं दो समोसरणाईं, सम्मतनाणेहिंवि एयाणि चेव मज्झिज्झागाईं दो समोसरणाईं, पंचिंदियतिरिक्खजोणिया जहा जीवा नवरं जं अत्थि तं भाणियव्वं, मणुस्सा जहा जीवा तहेव निरवसेसं, वाणमंतरजोइसिय-वेमाणिया जहा असुरकुमारा ॥ किरियावाई णं भंते ! जीवा किं नेरइयाउयं पकरेन्ति तिरिक्खजोणियाउयं पकरेन्ति मणुस्साउयं पकरेन्ति देवाउयं पकरेन्ति ? गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयं पकरेन्ति देवा-उयं पकरेन्ति, जइ देवाउयं पकरेन्ति किं भवणवासिदेवाउयं पकरेन्ति जाव वेमाणि-यदेवाउयं पकरेन्ति ? गोयमा ! नो भवणवासिदेवाउयं पकरेन्ति नो वाणमंतरदेवाउयं पकरेन्ति नो जोइसियदेवाउयं पकरेन्ति वेमाणियदेवाउयं पकरेन्ति । अकिरियावाई णं भंते ! जीवा किं नेरइयाउयं पकरेन्ति तिरिक्ख० पुच्छा, गोयमा ! नेरइयाउयं पकरेन्ति जाव देवाउयं पकरेन्ति, एवं अन्नाणियवाईवि वेणइयवाईवि । सलेस्सा णं भंते ! जीवा किरियावाई किं नेरइयाउयं पकरेन्ति० पुच्छा, गोयमा ! नो नेरइयाउयं एवं जहेव जीवा तहेव सलेस्सावि चउहिंवि समोसरणेहिं भाणियव्वा, कण्हलेस्सा णं भंते ! जीवा किरियावाई किं नेरइयाउयं पकरेन्ति० पुच्छा, गोयमा ! नो नेरइया-उयं पकरेन्ति नो तिरिक्खजोणियाउयं पकरेन्ति मणुस्साउयं पकरेन्ति नो देवाउयं पकरेन्ति, अकिरियावाई अन्नाणियवाई वेणइयवाई य चत्तारिवि आउयाइं पकरेन्ति, एवं नीललेस्सावि काउलेस्सावि, तेउलेस्सा णं भंते ! जीवा किरियावाई किं नेरइयाउयं पकरेन्ति० पुच्छा, गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयं पकरेन्ति देवाउयं पकरेन्ति, जइ देवाउयं पकरेन्ति तहेव, तेउलेस्सा णं भंते ! जीवा अकिरियावाई किं नेरइयाउयं० पुच्छा, गोयमा ! नो नेरइयाउयं पकरेन्ति तिरिक्खजोणियाउयं पकरेन्ति मणुस्साउयं पकरेन्ति देवाउयं पकरेन्ति, एवं अन्नाणियवाईवि वेणइयवाईवि, जहा तेउलेस्सा एवं पण्हलेस्सावि सुक्खलेस्सावि नेयव्वा ॥ अलेस्सा णं भंते ! जीवा किरियावाई किं

णेरइयाउयं पकरेंति० पुच्छा, गोयमा ! नो नेरइयाउयं पकरेंति नो तिरिक्ख० नो मणुस्स० नो देवाउयं पकरेंति, कण्हपक्खिया णं भंते ! जीवा अकिरियावाइ किं नेरइयाउयं० पुच्छा, गोयमा ! नेरइयाउयंपि पकरेन्ति एवं चउव्विहंपि, एवं अन्नाणियवाइवि वेणइयवाइवि, सुक्कपक्खिया जहा सलेस्सा, सम्महिट्ठी णं भंते ! जीवा किरियावाइ किं नेरइयाउयं० पुच्छा, गोयमा ! नो नेरइयाउयं पकरेन्ति नो तिरिक्खजोणियाउयं पकरेन्ति मणुस्साउयंपि पकरेन्ति देवाउयंपि पकरेन्ति, मिच्छादिट्ठी जहा कण्हपक्खिया, सम्मामिच्छादिट्ठी णं भंते ! जीवा अन्नाणियवाइ किं नेरइयाउयं० जहा अलेस्सा, एवं वेणइयवाइवि, णाणी आभिणिबोहियनाणी य सुयनाणी य ओहिनाणी य जहा सम्महिट्ठी, मणपजवणाणी णं भंते ! किं० पुच्छा, गोयमा ! नो नेरइयाउयं पकरेन्ति नो तिरिक्ख० नो मणुस्साउयं पकरेंति देवाउयं पकरेन्ति, जइ देवाउयं पकरेन्ति किं भवणवासि० पुच्छा, गोयमा ! नो भवणवासिदेवाउयं पकरेन्ति नो वाणमंतर० नो जोइसिय० वेमाणियदेवाउयं पकरेन्ति, केवलनाणी जहा अलेस्सा, अन्नाणी जाव विभंगनाणी जहा कण्हपक्खिया, सन्नासु चउसुवि जहा सलेस्सा, नोसन्नोवउत्ता जहा मणपजवनाणी, सवेदगा जाव नपुंसगवेदगा जहा सलेस्सा, अवेदगा जहा अलेस्सा, सकसाइ जाव लोभकसाइ जहा सलेस्सा, अकसाइ जहा अलेस्सा, सजोगी जाव कायजोगी जहा सलेस्सा, अजोगी जहा अलेस्सा, सागारोवउत्ता य अणागारोवउत्ता य जहा सलेस्सा ॥ ८२३ ॥ किरियावाइ णं भंते ! नेरइया किं नेरइयाउयं० पुच्छा, गोयमा ! नो नेरइयाउयं पकरे(इ)न्ति नो तिरिक्खजोणियाउयं पकरेंति मणुस्साउयं पकरेन्ति नो देवाउयं पकरेन्ति, अकिरियावाइ णं भंते ! नेरइया पुच्छा, गोयमा ! नो नेरइयाउयं पकरे(इ)न्ति तिरिक्खजोणियाउयंपि पकरेन्ति मणुस्साउयंपि पकरेन्ति नो देवाउयं पकरेन्ति, एवं अन्नाणियवाइवि वेणइयवाइवि । सलेस्सा णं भंते ! नेरइया किरियावाइ किं नेरइयाउयं० एवं सव्वेवि नेरइया जे किरियावाइ ते मणुस्साउयं एणं पकरेन्ति, जे अकिरियावाइ अन्नाणियवाइ वेणइयवाइ ते सव्वट्ठाणेषुवि नो नेरइयाउयं पकरेन्ति तिरिक्खजोणियाउयंपि पकरेन्ति मणुस्साउयंपि पकरेन्ति नो देवाउयं पकरेन्ति, नवरं सम्मामिच्छत्ते उवरिल्लेहिं दोहिवि समोसरणेहिं न किंचिवि पकरेन्ति जहेव जीवपए, एवं जाव थणियकुमारा जहेव नेरइया । अकिरियावाइ णं भंते ! पुढविकाइया पुच्छा, गोयमा ! नो नेरइयाउयं पकरे(इ)न्ति तिरिक्खजोणियाउयं पकरेन्ति मणुस्साउयं पकरेन्ति नो देवाउयं पकरेन्ति, एवं अन्नाणियवाइवि । सलेस्सा णं भंते ! एवं जं जं पदं अत्थि पुढविकाइयाणं तहिं २ मज्झिमेसु दोसु समोसरणेषु एवं चेव दुविहं आउयं पकरेन्ति नवरं तेउलेस्साए न किंपि पकरेन्ति,

एवं आउक्काइयाणवि, एवं वणस्सइकाइयाणवि, तेउकाइया वाउकाइया सव्वट्ठणेसु मज्झिमेसु दोसु समोसरणेसु नो नेरइयाउयं पकरे(इ)न्ति तिरिक्खजोणियाउयं पकरेन्ति नो मणुस्साउयं पकरेन्ति नो देवाउयं पकरेन्ति, बेइदियतेइंदियचउरिंदियाणं जहा पुठविक्काइयाणं नवरं सम्मत्तनाणेसु न एकंपि आउयं पकरेन्ति ॥ किरियावाई णं भंते ! पंचिंदियतिरिक्खजोणिया किं नेरइयाउयं पकरेन्ति० पुच्छा, गोयमा ! जहा मणपज्जवनाणी, अकिरियावाई अन्नाणियवाई वेणइयवाई य चउव्विहंपि पकरेन्ति, जहा ओहिया तहा सलेस्सावि । कण्हलेस्सा णं भंते ! किरियावाई पंचिंदियतिरिक्खजोणिया किं नेरइयाउयं० पुच्छा, गोयमा ! नो नेरइयाउयं पकरेन्ति णो तिरिक्ख० नो मणुस्साउयं पकरेन्ति नो देवाउयं पकरेन्ति, अकिरियावाई अन्नाणियवाई वेणइयवाई चउव्विहंपि पकरेन्ति, जहा कण्हलेस्सा एवं नीललेस्सावि काउलेस्सावि, तेउलेस्सा जहा सलेस्सा, नवरं अकिरियावाई अन्नाणियवाई वेणइयवाई य णो नेरइयाउयं पकरेन्ति तिरिक्खजोणियाउयंपि पकरेन्ति मणुस्साउयंपि पकरेन्ति देवाउयंपि पकरेन्ति, एवं पम्हलेस्सावि, एवं सुक्कलेस्सावि भाणियव्वा, कण्हपक्खिया तिहिं समोसरणेहिं चउव्विहंपि आउयं पकरेन्ति, सुक्कपक्खिया जहा सलेस्सा, सम्मदिट्ठी जहा मणपज्जवनाणी तहेव वेमाणियाउयं पकरेन्ति, मिच्छादिट्ठी जहा कण्हपक्खिया, सम्मामिच्छादिट्ठी ण य एकंपि आउयं पकरेन्ति जहेव नेरइया, णाणी जाव ओहिनाणी जहा सम्मदिट्ठी, अन्नाणी जाव विभंगनाणी जहा कण्हपक्खिया, सेसा जाव अणागारोवउत्ता सव्वे जहा सलेस्सा तहा चेव भाणियव्वा, जहा पंचिंदियतिरिक्खजोणियाणं वत्तव्वया भणिया एवं मणुस्साणवि वत्तव्वया भाणियव्वा, नवरं मणपज्जवनाणी नोसन्नोवउत्ता य जहा सम्मदिट्ठी तिरिक्खजोणिया तहेव भाणियव्वा, अलेस्सा केवलनाणी अवेदगा अकसाई अजोगी य एए एकंपि आउयं न पकरेन्ति जहा ओहिया जीवा सेसं तं चेव, वाणमंतरजोइसियवेमाणिया जहा अउरकुमारा ॥ किरियावाई णं भंते ! जीवा किं भवसिद्धिया अभवसिद्धिया ? गोयमा ! भवसिद्धिया नो अभवसिद्धिया । अकिरियावाई णं भंते ! जीवा किं भवसिद्धिया पुच्छा, गोयमा ! भवसिद्धियावि अभवसिद्धियावि, एवं अन्नाणियवाईवि, वेणइयवाईवि । सलेस्सा णं भंते ! जीवा किरियावाई किं भवसिद्धिया पुच्छा, गोयमा ! भवसिद्धिया नो अभवसिद्धिया । सलेस्सा णं भंते ! जीवा अकिरियावाई किं भवसिद्धिया पुच्छा, गोयमा ! भवसिद्धियावि अभवसिद्धियावि, एवं अन्नाणियवाईवि वेणइयवाईवि जहा सलेस्सा, एवं जाव सुक्कलेस्सा, अलेस्सा णं भंते ! जीवा किरियावाई किं भवसिद्धिया पुच्छा, गोयमा ! भवसिद्धिया नो अभवसिद्धिया, एवं एएणं अभिलावेणं कण्हपक्खिया

तिसुवि समोसरणेषु भयणाए, सुक्कपक्खिया चउसुवि समोसरणेषु भवसिद्धिया नो
अभवसिद्धिया, सम्महिट्ठी जहा अलेस्सा, मिच्छादिट्ठी जहा कण्हपक्खिया, सम्मा-
मिच्छादिट्ठी दोसुवि समोसरणेषु जहा अलेस्सा, नाणी जाव केवलनाणी भवसि-
द्धिया नो अभवसिद्धिया, अन्नाणी जाव विभंगनाणी जहा कण्हपक्खिया, सन्नासु
चउसुवि जहा सलेस्सा, नोसन्नोवउत्ता जहा सम्महिट्ठी, सवेदगा जाव नपुंसग-
वेदगा जहा सलेस्सा, अवेदगा जहा सम्महिट्ठी, सकसाई जाव लोभकसाई जहा
सलेस्सा, अकसाई जहा सम्महिट्ठी, सजोगी जाव कायजोगी जहा सलेस्सा,
अजोगी जहा सम्महिट्ठी, सागारोवउत्ता अणागारोवउत्ता जहा सलेस्सा, एवं नेरइ-
यावि भाणियव्वा नवरं नायव्वं जं अत्थि, एवं असुरकुमारावि जाव थणियकुमारा,
पुढविकाइया सव्वट्ठाणेषुवि मज्झिंल्लेसु दोसुवि समोसरणेषु भवसिद्धियावि अभव-
सिद्धियावि एवं जाव वणस्सइकाइया, बेईदियतेईदियचउरिंदिया एवं चेव नवरं
सम्मत्ते ओहिनाणे आभिणिबोहियनाणे सुयनाणे एएसु चेव दोसु मज्झिमेसु समोस-
रणेषु भवसिद्धिया नो अभवसिद्धिया, सेसं तं चेव, पंचिंदियतिरिक्खजोणिया जहा
नेरइया नवरं नायव्वं जं अत्थि, मणुस्सा जहा ओहिंया जीवा, वाणमंतरजोइसिय-
वेमाणिया जहा असुरकुमारा । सेवं भंते ! २ त्ति ॥ ८२४ ॥ तीसइमस्स
सयस्स पढसो उहेसो समत्तो ॥

अणंतरोववन्नगा णं भंते ! नेरइया किं किरियावाई० पुच्छा, गोयमा ! किरि-
यावाईवि जाव वेणइयवाईवि, सलेस्सा णं भंते ! अणंतरोववन्नगा नेरइया किं
किरियावाई० एवं चेव, एवं जहेव पढसुहेसे नेरइयाणं वत्तव्वया तहेव इहवि भाणि-
यव्वा, नवरं जं जस्स अत्थि अणंतरोववन्नगाणं नेरइयाणं तं तस्स भाणियव्वं,
एवं सव्वजीवाणं जाव वेमाणियाणं, नवरं अणंतरोववन्नगाणं जं जहिं अत्थि तं
तहिं भाणियव्वं । किरियावाई णं भंते ! अणंतरोववन्नगा नेरइया किं नेरइयाउयं
पकरेन्ति० पुच्छा, गोयमा ! नो नेरइयाउयं पकरेन्ति नो तिरि० नो मणु० नो देवा-
उयं पकरेन्ति, एवं अकिरियावाईवि अन्नाणियवाईवि वेणइयवाईवि । सलेस्सा णं
भंते ! किरियावाई अणंतरोववन्नगा नेरइया किं नेरइयाउयं० पुच्छा, गोयमा ! नो
नेरइयाउयं पकरेन्ति जाव नो देवाउयं पकरेन्ति, एवं जाव वेमाणिया, एवं सव्वट्ठाणे-
सुवि अणंतरोववन्नगा नेरइया न किंचिवि आउयं पकरेन्ति जाव अणागारोवउत्तत्ति,
एवं जाव वेमाणिया नवरं जं जस्स अत्थि तं तस्स भाणियव्वं । किरियावाई णं
भंते ! अणंतरोववन्नगा नेरइया किं भवसिद्धिया अभवसिद्धिया ? गोयमा ! भव-
सिद्धिया नो अभवसिद्धिया । अकिरियावाईणं पुच्छा, गोयमा ! भवसिद्धियाकि

अभवसिद्धियावि, एवं अन्नाणियवाईवि वेणइयवाईवि । सलेस्सा णं भंते ! किरिया-
वाई अणंतरोववन्नगा नेरइया किं भवसिद्धिया अभवसिद्धिया ? गोयमा ! भव-
सिद्धिया नो अभवसिद्धिया, एवं एएणं अभिलावेणं जहेव ओहिए उद्देसए नेरइयाणं
वत्तव्वया भाणिया तहेव इहवि भाणियव्वा जाव अणागारोवउत्तत्ति, एवं जाव
वेमाणियाणं नवरं जं जस्स अत्थि तं तस्स भाणियव्वं, इमं से लक्खणं-जे
किरियावाई सुक्कपक्खिया सम्मामिच्छादिट्ठिया एए सव्वे भवसिद्धिया नो अभव-
सिद्धिया, सेसा सव्वे भवसिद्धियावि अभवसिद्धियावि । सेवं भंते ! २ त्ति ॥ ८२५ ॥
॥ ३०१२ ॥ परंपरोववन्नगा णं भंते ! नेरइया किं किरियावाई० एवं जहेव ओहियो
उद्देसओ तहेव परंपरोववन्नएखुवि नेरइयाईओ तहेव निरवसेसं भाणियव्वं तहेव
तियदंढगसंगहिओ । सेवं भंते ! २ त्ति जाव विहरइ ॥ ८२६ ॥ ३०१३ ॥ एवं
एएणं कमेणं जचेव बंधिसए उद्देसगाणं परिवाडी सचेव इहंपि जाव अचरिमो
उद्देसओ, नवरं अणंतरो चत्तारिवि एक्कगमगा, परंपरा चत्तारिवि एक्कगमएणं, एवं
चरिमावि, अचरिमावि एवं चेव नवरं अलेस्सो केवली अजोगी न भन्नइ, सेसं
तहेव । सेवं भंते ! २ त्ति । एए एक्कारसवि उद्देसगा ॥ ८२७ ॥ तीसइमं समो-
सरणसयं समत्तं ॥

रायणिहे जाव एवं वयासी-कइ णं भंते ! खुड्डा(ग) जुम्मा प० ? गोयमा !
चत्तारि खुड्डा(ग) जुम्मा प०, तं०-कडजुम्मे १, तेओगे २, दावरजुम्मे ३, कलिओगे
४, से केणट्ठेणं भंते ! एवं वुच्चइ चत्तारि खुड्डा(ग) जुम्मा प० तं०-कडजुम्मे जाव
कलिओगे ? गोयमा ! जे णं रासी चउक्कएणं अवहारेणं अवहीरमाणे चउपज्जवसिए
सेत्तं खुड्डागकडजुम्मे, जे णं रासी चउक्कएणं अवहारेणं अवहीरमाणे तिपज्जवसिए सेत्तं
खुड्डागतेओगे, जे णं रासी चउक्कएणं अवहारेणं अवहीरमाणे दुपज्जवसिए सेत्तं खुड्डाग-
दावरजुम्मे, जे णं रासी चउक्कएणं अवहारेणं अवहीरमाणे एगपज्जवसिए सेत्तं
खुड्डागकलिओगे, से तेणट्ठेणं जाव कलिओगे । खुड्डागकडजुम्मेनेरइया णं भंते !
कओ उववज्जंति किं नेरइएहिंतो उववज्जंति तिरिक्ख० पुच्छा, गोयमा ! नो नेरइए-
हिंतो उववज्जंति एवं नेरइयाणं उववाओ जहा वक्कंतीए तहा भाणियव्वो । ते णं
भंते ! जीवा एगसमएणं केवइया उववज्जंति ? गोयमा ! चत्तारि वा अट्ठ वा बारस
वा सोलस वा संखेज्जा वा असंखेज्जा वा उववज्जंति । ते णं भंते ! जीवा कइ
उववज्जंति ? गोयमा ! से जहानामए पवए पवमाणे अज्झवसाण० एवं जहा पंच-
वीसइमे सए अट्ठउद्देसए नेरइयाणं वत्तव्वया तहेव इहवि भाणियव्वा जाव आय-
प्पओगेणं उववज्जंति नो परप्पओगेणं उववज्जंति । रयणप्पमापुढविखुड्डागकडजुम्मे-

नेरइया णं भंते ! कओ उववज्जंति० ? एवं जहा ओहियनेरइयाणं वत्तव्वया सचेव
 रयणप्पभाएवि भाणियव्वा जाव नो परप्पओगेणं उववज्जंति, एवं सकरप्पभाएवि,
 एवं जाव अहेसत्तमाए, एवं उववाओ जहा वक्कंतीए, असच्ची खलु पढमं दोवं व
 सरीसवा तइय पक्खी । गाहाए उववाएयव्वा, सेसं तहेव । खुड्ढागतेओग-
 नेरइया णं भंते ! कओ उववज्जंति किं नेरइएहिंतो० ? उववाओ जहा वक्कंतीए,
 ते णं भंते ! जीवा एगसमएणं केवइया उववज्जंति ? गोयमा ! तिञ्चि वा सत्त
 वा एक्कारस वा पन्नरस वा संखेज्जा वा असंखेज्जा वा उववज्जंति, सेसं जहा
 कडजुम्मस्स, एवं जाव अहेसत्तमाए । खुड्ढागदावरजुम्मनेरइया णं भंते ! कओ
 उववज्जंति० ? एवं जहेव खुड्ढागकडजुम्मे नवरं परिमाणं दो वा छ वा दस वा चउइस
 वा संखेज्जा वा असंखेज्जा वा सेसं तं चेव, एवं जाव अहेसत्तमाए । खुड्ढागकलिओग-
 नेरइया णं भंते ! कओ उववज्जंति० ? एवं जहेव खुड्ढागकडजुम्मे नवरं परिमाणं
 एक्को वा पंच वा नव वा तेरस वा संखेज्जा वा असंखेज्जा वा उववज्जंति, सेसं तं
 चेव, एवं जाव अहेसत्तमाए । सेवं भंते ! २ ति जाव विहरइ ॥ ८२८ ॥ ३१११ ॥
 कण्हलेस्सखुड्ढागकडजुम्मनेरइया णं भंते ! कओ उववज्जंति० ? एवं चेव जहा ओहि-
 यगमो जाव नो परप्पओगेणं उववज्जंति, नवरं उववाओ जहा वक्कंतीए, धूमप्पभा-
 पुढविनेरइया णं सेसं तहेव, धूमप्पभापुढविकण्हलेस्सखुड्ढागकडजुम्मनेरइया णं
 भंते ! कओ उववज्जंति० ? एवं चेव निरवसेसं, एवं तमाएवि एवं अहेसत्तमाएवि,
 नवरं उववाओ सव्वत्थ जहा वक्कंतीए । कण्हलेस्सखुड्ढागतेओगनेरइया णं भंते ! कओ
 उववज्जंति० ? एवं चेव नवरं तिञ्चि वा सत्त वा एक्कारस वा पन्नरस वा संखेज्जा वा
 असंखेज्जा वा सेसं तहेव एवं जाव अहेसत्तमाएवि । कण्हलेस्सखुड्ढागदावरजुम्म-
 नेरइया णं भंते ! कओ उववज्जंति० ? एवं चेव नवरं दो वा छ वा दस वा चउइस
 वा सेसं तं चेव, एवं धूमप्पभाएवि जाव अहेसत्तमाएवि । कण्हलेस्सखुड्ढागकलिओग-
 नेरइया णं भंते ! कओ उववज्जंति० ? एवं चेव नवरं एक्को वा पंच वा नव वा तेरस
 वा संखेज्जा वा असंखेज्जा वा सेसं तं चेव, एवं धूमप्पभाएवि तमाएवि अहेसत्त-
 माएवि । सेवं भंते ! २ ति ॥ ८२९ ॥ ३११२ ॥ नीललेस्सखुड्ढागकडजुम्मनेरइया
 णं भंते ! कओ उववज्जंति० एवं जहेव कण्हलेस्सखुड्ढागकडजुम्मा नवरं उववाओ
 जो वालुयप्पभाए सेसं तं चेव, वालुयप्पभापुढविनीललेस्सखुड्ढागकडजुम्मनेरइया
 एवं चेव, एवं पंकप्पभाएवि, एवं धूमप्पभाएवि, एवं चउसुवि जुम्मेसु नवरं परिमाणं
 जाणियव्वं, परिमाणं जहा कण्हलेस्सउद्देसए । सेसं तहेव । सेवं भंते । सेवं भंते । ति
 ॥ ८३० ॥ ३११३ ॥ काउलेस्सखुड्ढागकडजुम्मनेरइया णं भंते ! कओ उववज्जंति० ?

एवं जहेव कण्हलेस्सखुङ्गागकडजुम्मनेरइया नवरं उववाओ जो रयणप्पभाए सेसं तहेव । रयणप्पभापुढविकाउलेस्सखुङ्गागकडजुम्मनेरइया णं भंते ! कओ उववज्जंति० ? एवं चेव, एवं सककरप्पभाएवि, एवं वालुयप्पभाएवि, एवं चउसुवि जुम्मेसु, नवरं परिमाणं जाणियव्वं, परिमाणं जहा कण्हलेस्सउद्देसए सेसं तं चेव, सेवं भंते ! २ ति ॥ ८३१ ॥ ३१।४ ॥ भवसिद्धियखुङ्गागकडजुम्मनेरइया णं भंते ! कओ उववज्जंति किं नेरइए० ? एवं जहेव ओहिओ गमओ तहेव निरवसेसं जाव नो परप्पओगेणं उववज्जंति । रयणप्पभापुढविभवसिद्धियखुङ्गागकडजुम्मनेरइया णं भंते ! एवं चेव निरवसेसं, एवं जाव अहेसत्तमाए, एवं भवसिद्धियखुङ्गागतेओगेनेरइयावि एवं जाव कलिओगति, नवरं परिमाणं जाणियव्वं, परिमाणं पुव्वभणियं जहा पढमुद्देसए । सेवं भंते ! २ ति ॥ ८३२ ॥ ३१।५ ॥ कण्हलेस्सभवसिद्धियखुङ्गागकडजुम्मनेरइया णं भंते ! कओ उववज्जंति० ? एवं जहेव ओहिओ कण्हलेस्सउद्देसओ तहेव निरवसेसं चउसुवि जुम्मेसु भाणियव्वो जाव अहेसत्तमापुढविकण्हलेस्सभवसिद्धियखुङ्गागकलिओगेनेरइया णं भंते ! कओ उववज्जंति० ? तहेव । सेवं भंते ! २ ति ॥ ८३३ ॥ ३१।६ ॥ नीलेस्सभवसिद्धिया चउसुवि जुम्मेसु तहेव भाणियव्वा जहा ओहिए नीलेस्सउद्देसए । सेवं भंते ! सेवं भंते ! ति जाव विहरइ ॥ ८३४ ॥ ३१।७ ॥ काउलेस्सभवसिद्धिया चउसुवि जुम्मेसु तहेव उववाएयव्वा जहेव ओहिए काउलेस्सउद्देसए । सेवं भंते ! २ ति जाव विहरइ ॥ ८३५ ॥ ३१।८ ॥ जहा भवसिद्धिएहिं चत्तारि उद्देसगा भणिया एवं अभवसिद्धिएहिवि चत्तारि उद्देसगा भाणियव्वा जाव काउलेस्साउद्देसओति । सेवं भंते ! २ ति ॥ ८३६ ॥ ३१।१२ ॥ एवं सम्महिट्ठीहिवि लेस्सासंजुतेहिं चत्तारि उद्देसगा कायव्वा, नवरं सम्महिट्ठी पढमविइएसु दोसुवि उद्देसएसु अहेसत्तमापुढवीए न उववाएयव्वो, सेसं तं चेव । सेवं भंते ! सेवं भंते ! ति ॥ ८३७ ॥ ३१।१६ ॥ मिच्छादिट्ठीहिवि चत्तारि उद्देसगा कायव्वा जहा भवसिद्धियाणं । सेवं भंते ! २ ति ॥ ८३८ ॥ ३१।२० ॥ एवं कण्हपक्खिएहिवि लेस्सासंजुतेहिं चत्तारि उद्देसगा कायव्वा जहेव भवसिद्धिएहिं । सेवं भंते ! सेवं भंते ! ति ॥ ८३९ ॥ ३१।२४ ॥ सुक्कपक्खिएहिं एवं चेव चत्तारि उद्देसगा भाणियव्वा जाव वालुयप्पभापुढविकाउलेस्ससुक्कपक्खियखुङ्गागकलिओगेनेरइया णं भंते ! कओ उववज्जंति० ? तहेव जाव नो परप्पओगेणं उववज्जंति । सेवं भंते ! २ ति ॥ ८४० ॥ ३१ ॥ २८ ॥ सव्वेवि एए अट्ठावीसं उद्देसगा ॥ एकतीसइमं उववायसयं समत्तं ॥

खुङ्गागकडजुम्मनेरइया णं भंते ! अणंतरं उव्वट्ठिता कहिं गच्छंति कहिं उवव-

ज्जंति किं नेरइएसु उववज्जंति तिरिक्खजोणिएसु उववज्जंति० उव्वट्टणा जहा वक्कं-
तीए । ते णं भंते ! जीवा एगसमएणं केवइया उव्वट्टंति ? गोयमा ! चत्तारि वा
अट्ठ वा बारस वा सोलस वा संखेज्जा वा असंखेज्जा वा उव्वट्टंति, ते णं भंते !
जीवा क्हं उव्वट्टंति ? गोयमा ! से जहानामए पवए एवं तहेव, एवं सो चेव
गमओ जाव आयप्पओगेणं उव्वट्टंति नो परप्पओगेणं उव्वट्टंति, रयणप्पभापुढवि-
(नेरइए) खुड्ढागकडजुम्म० एवं रयणप्पभाएवि एवं जाव अहेसत्तमाएवि, एवं खुड्ढाग-
तेओगखुड्ढागदावरजुम्मखुड्ढागकलिओगा नवरं परिमाणं जाणियव्वं, सेसं तं चेव ।
सेवं भंते ! २ त्ति ॥ ८४१ ॥ ३२।१ ॥ कण्हलेस्सकडजुम्मनेरइया एवं एएणं कमेणं
जहेव उववायसए अट्ठावीसं उद्देसगा भणिया तहेव उव्वट्टणासएवि अट्ठावीसं उद्देसगा
भाणियव्वा निरवसेसा नवरं उव्वट्टंति त्ति अभिलावो भाणियव्वो, सेसं तं चेव ।
सेवं भंते ! २ त्ति जाव विहरइ ॥ ८४२ ॥ **वत्तीसइमं उववट्टणासयं समत्तं ॥**

कइविहा णं भंते ! एगिंदिया प० ? गोयमा ! पंचविहा एगिंदिया प०, तं०-
पुढविकाइया जाव वणस्सइकाइया, पुढविकाइया णं भंते ! कइविहा प० ? गोयमा !
दुविहा प०, तं०-सुहुमपुढविकाइया य बायरपुढविकाइया य, सुहुमपुढविकाइया णं
भंते ! कइविहा प० ? गोयमा ! दुविहा प०, तंजहा-पज्जत्तसुहुमपुढविकाइया
य अपज्जत्तसुहुमपुढविकाइया य, बायरपुढविकाइया णं भंते ! कइविहा प० ?
गोयमा ! एवं चेव, एवं आउक्काइयावि चउक्कएणं भेदेणं भाणियव्वा एवं जाव
वणस्सइकाइया(णं) । अपज्जत्तसुहुमपुढविकाइयाणं भंते ! कइ कम्मप्पगडीओ प० ?
गोयमा ! अट्ठ कम्मप्पगडीओ प०, तं०-नाणावरणिज्जं जाव अंतराइयं, पज्जत्त-
सुहुमपुढविकाइयाणं भंते ! कइ कम्मप्पगडीओ प० ? गोयमा ! अट्ठ कम्मप्पगडीओ
प०, तंजहा-नाणावरणिज्जं जाव अंतराइयं । अपज्जत्तबायरपुढविकाइयाणं भंते !
कइ कम्मप्पगडीओ प० ? गोयमा ! एवं चेव ८, पज्जत्तबायरपुढविकाइयाणं भंते !
कइ कम्मप्पगडीओ प० ? एवं चेव ८, एवं एएणं कमेणं जाव बायरवणस्सइकाइयाणं
पज्जत्तगाणंति । अपज्जत्तसुहुमपुढविकाइया णं भंते ! कइ कम्मप्पगडीओ बंधंति ?
गोयमा ! सत्तविहबंधगावि अट्ठविहबंधगावि सत्त बंधमाणा आउयवज्जाओ सत्त
कम्मप्पगडीओ बंधंति अट्ठ बंधमाणा पडिपुज्जाओ अट्ठ कम्मप्पगडीओ बंधंति,
पज्जत्तसुहुमपुढविकाइया णं भंते ! कइ कम्मप्पगडीओ बंधंति ? एवं चेव, एवं सव्वे
जाव पज्जत्तबायरवणस्सइकाइया णं भंते ! कइ कम्मप्पगडीओ बंधंति ? एवं चेव ।
अपज्जत्तसुहुमपुढविकाइया णं भंते ! कइ कम्मप्पगडीओ वेदंति ? गोयमा ! चउद्दस
कम्मप्पगडीओ वेदंति, तं०-नाणावरणिज्जं जाव अंतराइयं, सोइंदियवज्जं चक्खि-

दियवज्जं घाणिंदियवज्जं जिम्भिंदियवज्जं इत्थिवेयवज्जं पुरिसवेयवज्जं, एवं चउक्कएणं भेदेणं जाव पज्जतबायरवणस्सइकाइया णं भंते ! कइ कम्मप्पगडीओ वेदंति ? गोयमा ! एवं चेव चउइस्स कम्मप्पगडीओ वेदंति । सेवं भंते ! २ ति ॥ ८४३॥ ३३-१-१॥ कइविहा णं भंते ! अणंतरोववन्नगा एणिंदिया प० ? गोयमा ! पंचविहा अणंतरोववन्नगा एणिंदिया प०, तं०-पुढविकाइया जाव वणस्सइकाइया, अणंतरोववन्नगा णं भंते ! पुढविकाइया कइविहा प० ? गोयमा ! दुविहा पञ्चत्ता, तंजहा-सुहुमपुढविकाइया य बायरपुढविकाइया य, एवं दुपएणं भेदेणं जाव वणस्सइकाइया । अणंतरोववन्नगसुहुमपुढविकाइयाणं भंते ! कइ कम्मप्पगडीओ प० ? गोयमा ! अट्ठ कम्मप्पगडीओ प०, तं०-नाणावरणिज्जं जाव अंतराइयं, अणंतरोववन्नगबायरपुढविकाइयाणं भंते ! कइ कम्मप्पगडीओ प० ? गोयमा ! अट्ठ कम्मप्पगडीओ प०, तं०-नाणावरणिज्जं जाव अंतराइयं, एवं(चेव) जाव अणंतरोववन्नगबायरवणस्सइकाइयाणंति, अणंतरोववन्नगसुहुमपुढविकाइया णं भंते ! कइ कम्मप्पगडीओ वंधंति ? गोयमा ! आउयवजाओ सत्त कम्मप्पगडीओ वंधंति, एवं जाव अणंतरोववन्नगबायरवणस्सइकाइयत्ति । अणंतरोववन्नगसुहुमपुढविकाइया णं भंते ! कइ कम्मप्पगडीओ वेदंति ? गोयमा ! चउइस्स कम्मप्पगडीओ वेदंति, तं०-नाणावरणिज्जं तहेव जाव पुरिसवेयवज्जं, एवं जाव अणंतरोववन्नगबायरवणस्सइकाइयत्ति । सेवं भंते ! सेवं भंते ! ति ॥ ८४४॥ ३३-१-२॥ कइविहा णं भंते ! परंपरोववन्नगा एणिंदिया प० ? गोयमा ! पंचविहा परंपरोववन्नगा एणिंदिया प०, तं०-पुढविकाइया एवं चउक्कओ भेदो जहा ओहि(य)उइस्सए । परंपरोववन्नगअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं एएणं अभिलावेणं जहा ओहि(य)उइस्सए तहेव निरवसेसं भाणियव्वं जाव चउइस्स वेदंति । सेवं भंते ! २ ति ॥ ८४५ ॥ ३३-१-३ ॥ अणंतरोगाढा जहा अणंतरोववन्नगा ४ ॥ परंपरोगाढा जहा परंपरोववन्नगा ५ ॥ अणंतरोहारगा जहा अणंतरोववन्नगा ६ ॥ परंपरोहारगा जहा परंपरोववन्नगा ७ ॥ अणंतरपज्जत्तगा जहा अणंतरोववन्नगा ८ ॥ परंपरपज्जत्तगा जहा परंपरोववन्नगा ९ ॥ चरिमावि जहा परंपरोववन्नगा तहेव १० ॥ एवं अचरिमावि ११ ॥ एवं एएएक्कारस्स उइस्सगा । सेवं भंते ! २ ति जाव विहरइ ॥ ८४६ ॥ पढमं एणिंदियसयं समत्तं ॥ १ ॥ कइविहा णं भंते ! कण्हलेस्सा एणिंदिया प० ? गोयमा ! पंचविहा कण्हलेस्सा एणिंदिया प०, तं०-पुढविकाइया जाव वणस्सइकाइया । कण्हलेस्सा णं भंते ! पुढविकाइया कइविहा प० ? गोयमा ! दुविहा प०, तं०-सुहुमपुढविकाइया य बायरपुढविकाइया य, कण्हलेस्सा णं भंते ! सुहुमपुढविकाइया कइविहा

प० ? गोयमा ! एवं एएणं अभिलावेणं चउक्कभेदो जहेव ओहि ए उहेस ए जाव वण-
स्सइकाइयत्ति, (अणंतरोववन्नग) कण्हलेस्सअपज्जत्तसुहुमपुढविकाइयाणं भंते ! कइ
कम्मप्पगडीओ प० ? एवं चेव एएणं अभिलावेणं जहेव ओहि (ओ अणंतरोववण्णग)
उहेस (ओ) ए तहेव पन्नत्ताओ तहेव बंधंति तहेव वेदंति । सेवं भंते ! २ ति ॥ कइविहा
णं भंते ! अणंतरोववन्नग कण्हलेस्सा एगिंदिया पन्नत्ता ? गोयमा ! पंचविहा अणंतरो-
ववन्नगा कण्हलेस्सा एगिंदिया एवं एएणं अभिलावेणं तहेव दुपओ भेदो जाव
वणस्सइकाइयत्ति, अणंतरोववन्नग कण्हलेस्ससुहुमपुढविकाइयाणं भंते ! कइ कम्मप्प-
गडीओ प० ? एवं एएणं अभिलावेणं जहा ओहिओ अणंतरोववन्नगाणं उहेसओ
तहेव जाव वेदंति । सेवं भंते ! सेवं भंते ! ति ॥ कइविहा णं भंते ! परंपरोवव-
न्नगा कण्हलेस्सा एगिंदिया प० ? गोयमा ! पंचविहा परंपरोववन्नगा कण्हलेस्सा
एगिंदिया पन्नत्ता, तंजहा-पुढविकाइया एवं एएणं अभिलावेणं तहेव चउक्कओ
भेदो जाव वणस्सइकाइयत्ति, परंपरोववन्नग कण्हलेस्सअपज्जत्तसुहुमपुढविकाइयाणं
भंते ! कइ कम्मप्पगडीओ प० ? एवं एएणं अभिलावेणं जहेव ओहिओ परंपरो-
ववन्नगउहेसओ तहेव जाव वेदंति, एवं एएणं अभिलावेणं जहेव ओहि एगिंदियस ए
एकारस उहेसगा भाणिया तहेव कण्हलेस्सस एवि भाणियव्वा जाव अचरिमचरिम-
कण्हलेस्सा एगिंदिया ॥ ८४७ ॥ बिइयं एगिंदियसयं समत्तं ॥ २ ॥ जहा कण्हले-
स्सेहिं भाणियं एवं नीललेस्सेहिवि सयं भाणियव्वं । सेवं भंते ! २ ति ॥ तइयं एगिं-
दियसयं समत्तं ॥ ३ ॥ एवं काउलेस्सेहिवि सयं भाणियव्वं नवरं काउलेस्सेत्ति
अभिलावो भाणियव्वो ॥ चउत्थं एगिंदियसयं समत्तं ॥ ४ ॥ कइविहा णं भंते !
भवसिद्धिया एगिंदिया प० ? गोयमा ! पंचविहा भवसिद्धिया एगिंदिया प०, तं०-
पुढविकाइया जाव वणस्सइकाइया भेदो चउक्कओ जाव वणस्सइकाइयत्ति ।
भवसिद्धियअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं एएणं
अभिलावेणं जहेव पढमिळ्ळं एगिंदियसयं तहेव भवसिद्धियसयंपि भाणियव्वं,
उहेसगपरिवाडी तहेव जाव अचरिमोत्ति । सेवं भंते ! २ ति ॥ पंचमं एगिंदियसयं
समत्तं ॥ ५ ॥ कइविहा णं भंते ! कण्हलेस्सा भवसिद्धिया एगिंदिया प० ? गोयमा !
पंचविहा कण्हलेस्सा भवसिद्धिया एगिंदिया प०, तं०-पुढविकाइया जाव वणस्सइ-
काइया, कण्हलेस्सभवसिद्धियपुढविकाइया णं भंते ! कइविहा प० ? गोयमा !
दुविहा प०, तं०-सुहुमपुढविकाइया य बायरपुढविकाइया य, कण्हलेस्सभवसिद्धिय-
सुहुमपुढविकाइया णं भंते ! कइविहा प० ? गोयमा ! दुविहा प०, तंजहा-पज्जत्तगा
य अपज्जत्तगा य, एवं बायरावि, एवं एएणं अभिलावेणं तहेव चउक्कओ भेदो भाणि-

यव्वो, कण्हलेस्सभवसिद्धियअपज्जत्तसुहुमपुढविकाइयाणं भंते ! कइ कम्मप्पगडीओ प० ? एवं एएणं अभिलावेणं जहेव ओहिउद्देसए तहेव जाव वेदेंति । कइविहा णं भंते ! अणंतरोववन्नगा कण्हलेस्सा भवसिद्धिया एगिंदिया प० ? गोयमा ! पंचविहा अणंतरोववन्नगा जाव वणस्सइकाइया, अणंतरोववन्नगकण्हलेस्सभवसिद्धियपुढविकाइया णं भंते ! कइविहा प० ? गोयमा ! दुविहा प०, तं०—सुहुमपुढविकाइया (य बायरपुढविकाइया य) एवं दुपओ भेदो । अणंतरोववन्नगकण्हलेस्सभवसिद्धियसुहुमपुढविकाइयाणं भंते ! कइ कम्मपगडीओ प० ? एवं एएणं अभिलावेणं जहेव ओहिओ अणंतरोववन्नगउद्देसओ तहेव जाव वेदेंति, एवं एएणं अभिलावेणं एक्कारसवि उद्देसगा तहेव भाणियव्वा जहा ओहियसए जाव अचरिमोत्ति । छट्ठं एगिंदियसयं समत्तं ॥ ६ ॥ जहा कण्हलेस्सभवसिद्धिएहिं सयं भणियं एवं नीललेस्सभवसिद्धिएहिवि सयं भाणियव्वं ॥ सत्तमं एगिंदियसयं समत्तं ॥ ७ ॥ एवं काउलेस्सभवसिद्धिएहिवि सयं ॥ अट्ठमं एगिंदियसयं समत्तं ॥ ८ ॥ कइविहा णं भंते ! अभवसिद्धिया एगिंदिया प० ? गोयमा ! पंचविहा अभवसिद्धिया एगिंदिया प०, तं०—पुढविकाइया जाव वणस्सइकाइया एवं जहेव भवसिद्धियसयं भणियं नवरं नव उद्देसगा चरिमअचरिमउद्देसगवज्जा सेसं तहेव ॥ नवमं एगिंदियसयं समत्तं ॥ ९ ॥ एवं कण्हलेस्सअभवसिद्धियएगिंदियसयंपि ॥ दसमं एगिंदियसयं समत्तं ॥ १० ॥ नीललेस्सअभवसिद्धियएगिंदिएहिवि सयं ॥ ११ ॥ काउलेस्सअभवसिद्धियसयं, एवं चत्तारिवि अभवसिद्धियसयाणि णव २ उद्देसगा भवंति, एवं एयाणि बारस एगिंदियसयाणि भवंति ॥ ८४८ ॥ तेत्तीसइमं सयं समत्तं ॥

कइविहा णं भंते ! एगिंदिया प० ? गोयमा ! पंचविहा एगिंदिया प०, तं०—पुढविकाइया जाव वणस्सइकाइया, एवं एएणं चेव चउक्कएणं भेदेणं भाणियव्वा जाव वणस्सइकाइया, अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरच्छिमिल्ले चरिमंते समोहए समोहइत्ता जे भविए इमीसे रयणप्पभाए पुढवीए पच्छिमिल्ले चरिमंते अपज्जत्तसुहुमपुढविकाइयत्ताए उववज्जितए से णं भंते ! कइसमइएणं विग्गहेणं उववज्जेजा ? गोयमा ! एगसमइएण वा दुसमइएण वा तिसमइएण वा विग्गहेणं उववज्जेजा, से केण्डेणं भंते ! एवं बुच्चइ एगसमइएण वा दुसमइएण वा जाव उववज्जेजा ? एवं खलु गोयमा ! मए सत्त सेढीओ प०, तं०—उज्जुआयया सेढी एगओवंका दुहओवंका एगओखहा दुहओखहा चक्कवाला अद्धचक्कवाला ७, उज्जुआययाए सेढीए उववज्जमाणे एगसमइएणं विग्गहेणं उववज्जेजा, एगओवंकाए सेढीए उववज्जमाणे दुसमइएणं विग्गहेणं उववज्जेजा, दुहओवंकाए

सेदीए उववज्जमाणे तिसमइएणं विग्गहेणं उववज्जेज्जा, से तेणट्ठेणं गोयमा ! जाव उववज्जेज्जा । अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरच्छिमिल्ले चरिमंते समोहए २ ता जे भविए इमीसे रयणप्पभाए पुढवीए पच्चच्छिमिल्ले चरिमंते पज्जत्तसुहुमपुढविकाइयत्ताए उववज्जितए से णं भंते ! कइसमइएणं विग्गहेणं उववज्जेज्जा ? गोयमा ! एगसमइएण वा दुसमइएण वा सेसं तं चेव जाव से तेणट्ठेणं जाव विग्गहेणं उववज्जेज्जा, एवं अपज्जत्तसुहुमपुढविकाइओ पुर(त्थि)च्छिमिल्ले चरिमंते समोहणावेत्ता पच्चच्छिमिल्ले चरिमंते बायरपुढविकाइएसु अपज्जत्तएसु उववाएयव्वो, ताहे तेसु चेव पज्जत्तएसु ४, एवं आउक्काइएसुवि चत्तारि आलावगा सुहुमेहिं अपज्जत्तएहिं ताहे पज्जत्तएहिं बायरेहिं अपज्जत्तएहिं ताहे पज्जत्तएहिं उववाएयव्वो ४, एवं चेव सुहुमतेउकाइएहिवि अपज्जत्तएहिं १ ताहे पज्जत्तएहिं उववाएयव्वो २, अपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरच्छिमिल्ले चरिमंते समोहए समोहइत्ता जे भविए मणुस्सखेत्ते अपज्जत्तबायरतेउकाइयत्ताए उववज्जितए से णं भंते ! कइसमइएणं विग्गहेणं उववज्जेज्जा ? सेसं तं चेव, एवं पज्जत्तबायरतेउकाइयत्ताए उववाएयव्वो ४, वाउक्काइए(सु) सुहुमबायरेसु जहा आउक्काइएसु उववाइओ तहा उववाएयव्वो ४, एवं वणस्सइकाइएसुवि २०, पज्जत्तसुहुमपुढविकाइए णं भंते ! इमीसे रयणप्पभाए पुढवीए एवं पज्जत्तसुहुमपुढविकाइओवि पुरच्छिमिल्ले चरिमंते समोहणावेत्ता एएणं चेव कमेणं एएसु चेव वी(साए)ससु ठाणेसु उववाएयव्वो जाव बायरवणस्सइकाइएसु पज्जत्तएसुवि ४०, एवं अपज्जत्तबायरपुढविकाइओवि ६०, एवं पज्जत्तबायरपुढविकाइओवि ८०, एवं आउक्काइओवि चउसुवि गमएसु पुरच्छिमिल्ले चरिमंते समोहए एयाए चेव वत्तव्वयाए एएसु चेव वीसइठाणेसु उववाएयव्वो १६०, सुहुमतेउकाइओवि अपज्जत्तओ पज्जत्तओ य एएसु चेव वीससु ठाणेसु उववाएयव्वो, अपज्जत्तबायरतेउकाइए णं भंते ! मणुस्सखेत्ते समोहए २ ता जे भविए इमीसे रयणप्पभाए पुढवीए पच्चच्छिमिल्ले चरिमंते अपज्जत्तसुहुमपुढविकाइयत्ताए उववज्जितए से णं भंते ! कइसमइएणं विग्गहेणं उववज्जेज्जा सेसं तहेव जाव से तेणट्ठेणं० एवं पुढविकाइएसु चउव्विहेसुवि उववाएयव्वो, एवं आउक्काइएसु चउव्विहेसुवि, तेउकाइएसु सुहुमेसु अपज्जत्तएसु पज्जत्तएसु य एवं चेव उववाएयव्वो, अपज्जत्तबायरतेउकाइए णं भंते ! मणुस्सखेत्ते समोहए २ ता जे भविए मणुस्सखेत्ते अपज्जत्तबायरतेउकाइयत्ताए उववज्जितए से णं भंते ! कइसमइएणं० सेसं तं चेव, एवं पज्जत्तबायरतेउकाइयत्ताएवि उववाएयव्वो, वाउकाइयत्ताए य वणस्सइकाइयत्ताए य जहा पुढविकाइएसु तहेव चउक्कएणं भेदेणं

उववाएयव्वो, एवं पज्जत्तवायरतेउकाइओवि समयखेत्ते समोहणावेत्ता एएसु चेव वीसाए ठाणेषु उववाएयव्वो जहेव अपज्जत्तओ उववाइओ, एवं सव्वत्थवि बायर-
तेउकाइया अपज्जत्तगा य पज्जत्तगा य समयखेत्ते उववाएयव्वो समोहणावेयव्वोवि
२४०, वाउक्काइया वणस्सइकाइया य जहा पुढविकाइया तहेव चउक्कएणं भेदेणं
उववाएयव्वो जाव पज्जत्ता ४०० ॥ बायरवणस्सइकाइए णं भंते ! इमीसे रयण-
प्पभाए पुढवीए पुरच्छिमिह्ले चरिमंते समोहए समोहएत्ता जे भविए इमीसे रय-
णप्पभाए पुढवीए पच्चच्छिमिह्ले चरिमंते पज्जत्तवायरवणस्सइकाइयत्ताए उववज्जितए
से णं भंते ! कइसमइएणं० सेसं तहेव जाव से तेणट्टेणं०, अपज्जत्तसुहुमपुढविका-
इए णं भंते ! इमीसे रयणप्पभाए पुढवीए पच्चच्छिमिह्ले चरिमंते समोहए २ ता
जे भविए इमीसे रयणप्पभाए पुढवीए पुरच्छिमिह्ले चरिमंते अपज्जत्तसुहुमपुढविकाइ-
यत्ताए उववज्जितए से णं भंते ! कइसम(इ)एणं० सेसं तहेव निरवसेसं, एवं जहेव
पुरच्छिमिह्ले चरिमंते सव्वपएसुवि समोहया पच्चच्छिमिह्ले चरिमंते समयखेत्ते य
उववाइया जे य समयखेत्ते समोहया पच्चच्छिमिह्ले चरिमंते समयखेत्ते य उववाइया
एवं एएणं चेव कमेणं पच्चच्छिमिह्ले चरिमंते समयखेत्ते य समोहया पुरच्छिमिह्ले
चरिमंते समयखेत्ते य उववाएयव्वो तेणेव गमएणं, एवं एएणं गमएणं दाहिणिह्ले
चरिमंते (समयखेत्ते य) समोहयाणं उत्तरिह्ले चरिमंते समयखेत्ते य उववाओ एवं चेव
उत्तरिह्ले चरिमंते समयखेत्ते य समोहया दाहिणिह्ले चरिमंते समयखेत्ते य उववाएयव्वो
तेणेव गमएणं, अपज्जत्तसुहुमपुढविकाइए णं भंते ! सक्करप्पभाए पुढवीए पुरच्छि-
मिह्ले चरिमंते समोहए २ ता जे भविए सक्करप्पभाए पुढवीए पच्चच्छिमिह्ले
चरिमंते अपज्जत्तसुहुमपुढविकाइयत्ताए उववज्जितए एवं जहेव रयणप्पभाए जाव से
तेणट्टेणं० एवं एएणं कमेणं जाव पज्जत्तएसु सुहुमतेउकाइएसु, अपज्जत्तसुहुमपुढवि-
काइए णं भंते ! सक्करप्पभाए पुढवीए पुरच्छिमिह्ले चरिमंते समोहए समोहइत्ता जे
भविए समयखेत्ते अपज्जत्तवायरतेउकाइयत्ताए उववज्जितए से णं भंते ! कइसम-
इएणं पुच्छां, गोयमा ! दुसमइएण वा तिसमइएण वा विग्गहेणं उववज्जेज्जा, से केण-
ट्टेणं भंते ! ०पुच्छा, एवं खलु गोयमा ! मए सत्तं सेढीओ प०, तं०—उज्जुआयया जाव
अद्वचक्कवाला, एगओवंकाए सेढीए उववज्जमाणे दुसमइएणं विग्गहेणं उववज्जेज्जा
दुहओवंकाए सेढीए उववज्जमाणे तिसमइएणं विग्गहेणं उववज्जेज्जा से तेणट्टेणं०,
एवं पज्जत्तएसुवि बायरतेउकाइएसु, सेसं जहा रयणप्पभाए, जेऽवि बायरतेउकाइया
अपज्जत्तगा य पज्जत्तगा य समयखेत्ते समोहणित्ता दोच्चाए पुढवीए पच्चच्छिमिह्ले
चरिमंते पुढविकाइएसु चउव्विहेसु आउक्काइएसु चउव्विहेसु तेउकाइएसु दुविहेसु

वाउकाइएसु चउव्विहेसु वणस्सइकाइएसु चउव्विहेसु उववज्जंति तेऽवि एवं चेव
दुसमइएण वा तिसमइएण वा विग्गहेणं उववाएयव्वा, बायरतेउक्काइया अपज्जत्ता
य पज्जत्ता य जाहे तेसु चेव उववज्जंति ताहे जहेव रयणप्पभाए तहेव एगसमइय-
दुसमइयतिसमइयविग्गहा भाणियव्वा सेसं जहा रयणप्पभाए तहेव निरवसेसं, जहा
सक्करप्पभाए वत्तव्वया भणिया एवं जाव अहेसत्तमाए भाणियव्वा ॥ ८४९ ॥
अपज्जत्तसुहुमपुढविकाइए णं भंते ! अहोलोयखेतनालीए बाहिरिल्ले खेत्ते समोहए २
त्ता जे भविए उद्धूलोयखेतनालीए बाहिरिल्ले खेत्ते अपज्जत्तसुहुमपुढविकाइयत्ताए
उववज्जितए से णं भंते ! कइसमइएणं विग्गहेणं उववज्जेजा ? गोयमा ! तिसमइएण
वा चउसमइएण वा विग्गहेणं उववज्जेजा, से केणट्ठेणं भंते ! एवं वुच्चइ तिसमइएण
वा चउसमइएण वा विग्गहेणं उववज्जेजा ? गोयमा ! अपज्जत्तसुहुमपुढविकाइए णं
अहोलोयखेतनालीए बाहिरिल्ले खेत्ते समोहए २ ता जे भविए उद्धूलोयखेतनालीए
बाहिरिल्ले खेत्ते अपज्जत्तसुहुमपुढविकाइयत्ताए एगपयरंसि अणुसेदीए उववज्जितए
से णं तिसमइएणं विग्गहेणं उववज्जेजा जे भविए विसेदीए उववज्जितए से णं
चउसमइएणं विग्गहेणं उववज्जेजा, से तेणट्ठेणं जाव उववज्जेजा, एवं पज्जत्तसुहुम-
पुढविकाइयत्ताएवि, एवं जाव पज्जत्तसुहुमतेउकाइयत्ताए, अपज्जत्तसुहुमपुढविकाइए
णं भंते ! अहोलोग जाव समोहणित्ता जे भविए समयखेत्ते अपज्जत्तबायरतेउकाइय-
त्ताए उववज्जितए से णं भंते ! कइसमइएणं विग्गहेणं उववज्जेजा ? गोयमा !
दुसमइएण वा तिसमइएण वा विग्गहेणं उववज्जेजा, से केणट्ठेणं० ? एवं खलु
गोयमा ! मए सत्त सेदीओ प०, तं०-उज्जुआयया जाव अदचक्कवाला, एगओवं-
काए सेदीए उववज्जमाणे दुसमइएणं विग्गहेणं उववज्जेजा दुहओवंकाए सेदीए
उववज्जमाणे तिसमइएणं विग्गहेणं उववज्जेजा से तेणट्ठेणं०, एवं पज्जत्तएसुवि
बायरतेउकाइएसुवि उववाएयव्वो, वाउक्काइयवणस्सइकाइयत्ताए चउक्कएणं भेदेणं
जहा आउक्काइयत्ताए तहेव उववाएयव्वो २०, एवं जहा अपज्जत्तसुहुमपुढविकाइयस्स
गमओ भणियो एवं पज्जत्तसुहुमपुढविकाइयस्सवि भाणियव्वो तहेव वीसाए ठाणेसु
उववाएयव्वो ४०, अहोलोयखेतनालीए बाहिरिल्ले खेत्ते समोहए समोहएत्ता एवं
बायरपुढविकाइयस्सवि अपज्जत्तगस्स पज्जत्तगस्स य भाणियव्वं ८०, एवं आउ-
क्काइयस्स चउव्विहस्सवि भाणियव्वं १६०, सुहुमतेउकाइयस्स दुविहस्सवि एवं
चेव २००, अपज्जत्तबायरतेउकाइए णं भंते ! समयखेत्ते समोहए २ ता जे भविए
उद्धूलोयखेतनालीए बाहिरिल्ले खेत्ते अपज्जत्तसुहुमपुढविकाइयत्ताए उववज्जितए से णं
भंते ! कइसमइएणं विग्गहेणं उववज्जेजा ? गोयमा ! दुसमइएण वा तिसमइएण

वा चउसमइएण वा विग्गहेणं उववज्जेजा, से केणट्ठेणं० अट्ठो जहेव रयणप्पभाए
 तहेव सत्त सेदीओ एवं जाव अपज्जत्तबायरतेउकाइए णं भंते ! समयखेत्ते समोहए
 २ ता जे भविए उड्डलोगखेत्तनालीए बाहिरिल्ले खेत्ते (अ)-पज्जत्तसुहुमतेउकाइयत्ताए
 उववज्जितए से णं भंते ! सेसं तं चेव, अपज्जत्तबायरतेउकाइए णं भंते ! समयखेत्ते
 समोहए २ ता जे भविए समयखेत्ते अपज्जत्तबायरतेउकाइयत्ताए उववज्जितए से
 णं भंते ! कइसमइएणं विग्गहेणं उववज्जेजा ? गोयमा ! एगसमइएण वा दुसमइएण
 वा तिसमइएण वा विग्गहेणं उववज्जेजा, से केणट्ठेणं० अट्ठो जहेव रयणप्पभाए
 तहेव सत्त सेदीओ, एत्रं पज्जत्तबायरतेउकाइयत्ताएवि, वाउकाइएए वणस्सइकाइएसु
 य जहा पुढविकाइएसु उववाइओ तहेव चउक्कएणं भेदेणं उववाएयव्वो, एवं
 पज्जत्तबायरतेउकाइओवि एएसु चेव ठाणेषु उववाएयव्वो, वाउकाइयवणस्सइकाइयाणं
 जहेव पुढविकाइ(ओ)यत्ते उववा(इ)ओ तहेव भाणियव्वो । अपज्जत्तसुहुमपुढविकाइए
 णं भंते ! उड्डलोगखेत्तनालीए बाहिरिल्ले खेत्ते समोहए समोहणित्ता जे भविए अहे-
 लोगखेत्तनालीए बाहिरिल्ले खेत्ते अपज्जत्तसुहुमपुढविकाइयत्ताए उववज्जितए से णं
 भंते ! कइसमइएणं० ? एवं उड्डलोगखेत्तनालीए बाहिरिल्ले खेत्ते समोहयाणं अहेलोग-
 खेत्तनालीए बाहिरिल्ले खेत्ते उववज्जयाणं सो चेव गमओ निरवसेसो भाणियव्वो जाव
 बायरवणस्सइकाइओ पज्जत्तओ बायरवणस्सइकाइएसु पज्जत्तएसु उववाइओ । अप-
 ज्जत्तसुहुमपुढविकाइए णं भंते ! लोगस्स पुरच्छिमिल्ले चरिमंते समोहए २ ता जे
 भविए लोगस्स पुरच्छिमिल्ले चेव चरिमंते अपज्जत्तसुहुमपुढविकाइयत्ताए उववज्जि-
 तए से णं भंते ! कइसमइएणं विग्गहेणं उववज्जेजा ? गोयमा ! एगसमइएण वा
 दुसमइएण वा तिसमइएण वा चउसमइएण वा विग्गहेणं उववज्जेजा, से केणट्ठेणं
 भंते ! एवं वुच्चइ एगसमइएण वा जाव उववज्जेजा ? एवं खल्ल गोयमा ! मए सत्त
 सेदीओ प०, तंजहा—उज्जुआयया जाव अद्धचक्कवाला, उज्जुआययाए सेदीए
 उववज्जमाणे एगसमइएणं विग्गहेणं उववज्जेजा, एगओर्वकाए सेदीए उववज्जमाणे
 दुसमइएणं विग्गहेणं उववज्जेजा, दुहुओर्वकाए सेदीए उववज्जमाणे जे भविए एग-
 पयरंसि अणुसेदी(ए) उववज्जितए से णं तिसमइएणं विग्गहेणं उववज्जेजा जे भविए
 विसे(दीए)ढिं उववज्जितए से णं चउसमइएणं विग्गहेणं उववज्जेजा, से तेगट्ठेणं जाव
 उववज्जेजा, एवं अपज्जत्तसुहुमपुढविकाइओ लोगस्स पुरच्छिमिल्ले चरिमंते समोहए
 २ ता लोगस्स पुरच्छिमिल्ले चेव चरिमंते अपज्जत्तएसु पज्जत्तएसु य सुहुमपुढविका-
 इएसु सुहुमआउकाइएसु अपज्जत्तएसु पज्जत्तएसु य सुहुमतेउकाइएसु अपज्जत्तएसु पज्ज-
 तएसु य सुहुमवाउकाइएसु अपज्जत्तएसु पज्जत्तएसु य बायरवाउकाइएसु अपज्जत्तएसु

पज्जतएसु य सुहुमवणस्सइकाइएसु अपज्जतएसु पज्जतएसु य बारससुवि ठाणेसु एएणं
 चेव कमेणं भाणियव्वो, सुहुमपुढविकाइओ (अ)पज्जतओ एवं चेव निरवसेसो बारस-
 सुवि ठाणेसु उववाएयव्वो २४, एवं एएणं गमएणं जाव सुहुमवणस्सइकाइओ पज्ज-
 तओ सुहुमवणस्सइकाइएसु पज्जतएसु चेव भाणियव्वो ॥ अपज्जतसुहुमपुढविकाइए
 णं भंते ! लोगस्स पुरच्छिमिल्ले चरिमंते समोहए २ ता जे भविए लोगस्स दाहिणिल्ले
 चरिमंते अपज्जतसुहुमपुढविकाइएसु उववज्जितए से णं भंते ! कइसमइएणं विग्गहेणं
 उववज्जेज्जा ? गोयमा ! दुसमइएण वा तिसमइएण वा चउसमइएण वा विग्गहेणं
 उववज्जेज्जा, से केणट्ठेणं भंते ! एवं चुच्चइ० ? एवं खलु गोयमा ! मए सत्त सेढीओ
 पञ्चत्ताओ, तंजहा—उज्जुआयया जाव अद्धचक्कवाला, एगओवकाए सेढीए उववज्ज-
 माणे दुसमइएणं विग्गहेणं उववज्जेज्जा दुहओवकाए सेढीए उववज्जमाणे जे भविए
 एगपयरंसि अणुसेढी(ए)ओ उववज्जितए से णं तिसमइएणं विग्गहेणं उववज्जेज्जा जे
 भविए विसे(ढीओ)ढिं उववज्जितए से णं चउसमइएणं विग्गहेणं उववज्जेज्जा से तेणट्ठेणं
 गोयमा !, एवं एएणं गमएणं पुरच्छिमिल्ले चरिमंते समोहए दाहिणिल्ले चरिमंते
 उववाएयव्वो जाव सुहुमवणस्सइकाइओ पज्जतओ सुहुमवणस्सइकाइएसु पज्जतएसु
 चेव, सव्वेसिं दुसमइओ तिसमइओ चउसमइओ विग्गहो भाणियव्वो । अपज्जत-
 सुहुमपुढविकाइए णं भंते ! लोगस्स पुरच्छिमिल्ले चरिमंते समोहए २ ता जे भविए
 लोगस्स पञ्चच्छिमिल्ले चरिमंते अपज्जतसुहुमपुढविकाइयत्ताए उववज्जितए से णं
 भंते ! कइसमइएणं विग्गहेणं उववज्जेज्जा ? गोयमा ! एगसमइएण वा दुसमइएण
 वा तिसमइएण वा चउसमइएण वा विग्गहेणं उववज्जेज्जा, से केणट्ठेणं ? एवं
 जहेव पुरच्छिमिल्ले चरिमंते समोहया पुरच्छिमिल्ले चेव चरिमंते उववाइया तहेव
 पुरच्छिमिल्ले चरिमंते समोहया पञ्चच्छिमिल्ले चरिमंते उववाएयव्वा सव्वे, अपज्जत-
 सुहुमपुढविकाइए णं भंते ! लोगस्स पुरच्छिमिल्ले चरिमंते समोहए २ ता जे भविए
 लोगस्स उत्तरिल्ले चरिमंते अपज्जतसुहुमपुढविकाइयत्ताए उववज्जितए से णं भंते !
 एवं जहा पुरच्छिमिल्ले चरिमंते समोहओ दाहिणिल्ले चरिमंते उववाइओ तहा
 पुरच्छिमिल्ले चरिमंते समोहओ उत्तरिल्ले चरिमंते उववाएयव्वो, अपज्जतसुहुमपुढ-
 विकाइए णं भंते ! लोगस्स दाहिणिल्ले चरिमंते समोहए समोहणित्ता जे भविए
 लोगस्स दाहिणिल्ले चेव चरिमंते अपज्जतसुहुमपुढविकाइयत्ताए उववज्जितए एवं
 जहा पुरच्छिमिल्ले समोहओ पुरच्छिमिल्ले चेव उववाइओ तहेव दाहिणिल्ले समोहओ
 दाहिणिल्ले चेव उववाएयव्वो, तहेव निरवसेसं जाव सुहुमवणस्सइकाइओ पज्जतओ
 सुहुमवणस्सइकाइएसु चेव पज्जतएसु दाहिणिल्ले चरिमंते उववाइओ एवं दाहिणिल्ले

समोहओ पच्चच्छिमिल्ले चरिमंते उववाएयव्वो नवरं दुसमइयतिसमइयचउसमइय-
विग्गहो सेसं तहेव, दाहिणिल्ले समोहओ उत्तरिल्ले चरिमंते उववाएयव्वो जहेव
सट्ठाणे तहेव एगसमइयदुसमइयतिसमइयचउसमइयविग्गहो, पुरच्छिमिल्ले जहा
पच्चच्छिमिल्ले तहेव दुसमइयतिसमइयचउसमइयविग्गहो, पच्चच्छिमिल्ले चरिमंते
समोहयाणं पच्चच्छिमिल्ले चेव उववज्जमाणाणं जहा सट्ठाणे, उत्तरिल्ले उववज्जमाणाणं
एगसमइओ विग्गहो नत्थि, सेसं तहेव, पुरच्छिमिल्ले जहा सट्ठाणे, दाहिणिल्ले
एगसमइओ विग्गहो नत्थि, सेसं तहेव, उत्तरिल्ले समोहयाणं उत्तरिल्ले चेव उवव-
ज्जमाणाणं जहेव सट्ठाणे, उत्तरिल्ले समोहयाणं पुरच्छिमिल्ले उववज्जमाणाणं एवं
चेव, नवरं एगसमइओ विग्गहो नत्थि, उत्तरिल्ले समोहयाणं दाहिणिल्ले उववज्जमा-
णाणं जहा सट्ठाणे, उत्तरिल्ले समोहयाणं पच्चच्छिमिल्ले उववज्जमाणाणं एगसमइओ
विग्गहो नत्थि, सेसं तहेव जाव सुहुमवणस्सइकाइओ पज्जत्तओ सुहुमवणस्सइकाइ-
एसु पज्जत्तएसु चेव ॥ कहिअं भंते ! बायरपुढविकाइयाणं पज्जत्तगाणं ठाणा प० ?
गोयमा ! सट्ठाणेणं अट्ठसु पुढवीसु जहा ठाणपए जाव सुहुमवणस्सइकाइया जे य
पज्जत्तगा जे य अपज्जत्तगा ते सव्वे एगविहा अविसेसमगाणत्ता सव्वलोगपरिया-
वञ्चा प० समगाउसो ! । अपज्जत्तसुहुमपुढविकाइयाणं भंते ! कइ कम्मप्पगडीओ
पन्नत्ताओ ? गोयमा ! अट्ठ कम्मप्पगडीओ प०, तं०-नाणावरणिज्जं जाव अंतराइयं,
एवं चउक्कएणं भेदेणं जहेव एगिंदियसएसु जाव बायरवणस्सइकाइयाणं पज्जत्त-
गाणं, अपज्जत्तसुहुमपुढविकाइया णं भंते ! कइ कम्मप्पगडीओ बंधंति ? गोयमा !
सत्तविहबंधगावि अट्ठविहबंधगावि जहा एगिंदियसएसु जाव पज्जत्ता बायरवणस्स-
इकाइया । अपज्जत्तसुहुमपुढविकाइया णं भंते ! कइ कम्मप्पगडीओ वेदंति ?
गोयमा ! चउइस कम्मप्पगडीओ वेदंति, तंजहा—नाणावरणिज्जं जहा एगिंदियसएसु
जाव पुरिसवेयवज्जं एवं जाव बायरवणस्सइकाइयाणं पज्जत्तगाणं, एगिंदिया णं
भंते ! कओ उववज्जंति किं नेरइएहिंतो उववज्जंति० ? जहा वक्कंतीए पुढविकाइयाणं
उववाओ, एगिंदियाणं भंते ! कइ समुग्घाया प० ? गोयमा ! चत्तारि समुग्घाया
प०, तंजहा—वेयणासमुग्घाए जाव वेउब्बियसमुग्घाए ॥ एगिंदिया णं भंते ! किं
तुल्लट्ठिइया तुल्लविसेसाहियं कम्मं पकरेंति तुल्लट्ठिइया वेमायविसेसाहियं कम्मं
पकरेंति वेमायट्ठिइया तुल्लविसेसाहियं कम्मं पकरेंति वेमायट्ठिइया वेमायविसेसाहियं
कम्मं पकरेंति ? गोयमा ! अत्थेगइया तुल्लट्ठिइया तुल्लविसेसाहियं कम्मं पकरेंति
अत्थेगइया तुल्लट्ठिइया वेमायविसेसाहियं कम्मं पकरेंति अत्थेगइया वेमायट्ठिइया
तुल्लविसेसाहियं कम्मं पकरेंति अत्थेगइया वेमायट्ठिइया वेमायविसेसाहियं कम्मं

पकरेंति, से केणट्टेणं भंते ! एवं वुच्चइ अत्थेगइया तुल्लट्ठिइया जाव वेमायविसेसा-
हियं कम्मं पकरेंति ? गोयमा ! एगिदिया चउव्विहा पन्नत्ता, तंजहा-अत्थेगइया
समाउया समोववन्नगा १, अत्थेगइया समाउया विसमोववन्नगा २, अत्थेगइया
विसमाउया समोववन्नगा ३, अत्थेगइया विसमाउया विसमोववन्नगा ४ । तत्थ णं
जे ते समाउया समोववन्नगा ते णं तुल्लट्ठिइया तुल्लविसेसाहियं कम्मं पकरेंति १,
तत्थ णं जे ते समाउया विसमोववन्नगा ते णं तुल्लट्ठिइया वेमायविसेसाहियं कम्मं
पकरेंति २, तत्थ णं जे ते विसमाउया समोववन्नगा ते णं वेमायट्ठिइया तुल्लविसे-
साहियं कम्मं पकरेंति ३, तत्थ णं जे ते विसमाउया विसमोववन्नगा ते णं वेमाय-
ट्ठिइया वेमायविसेसाहियं कम्मं पकरेंति ४ । से तेणट्टेणं गोयमा ! जाव वेमायवि-
सेसाहियं कम्मं पकरेंति ॥ सेवं भंते ! २ त्ति जाव विहरइ ॥ ८५० ॥ ३४-१-१ ॥
कइविहा णं भंते ! अणंतरोववन्नगा एगिदिया प० ? गोयमा ! पंचविहा अणं-
तरोववन्नगा एगिदिया प०, तंजहा-पुढविकाइया दुयाभेदो जहा एगिदियसएसु
जाव बायरवणस्सइकाइया य, कहिच्चं भंते ! अणंतरोववन्नगाणं बायरपुढविकाइ-
याणं ठाणा प० ? गोयमा ! सट्ठाणेणं अट्ठसु पुढवीसु, तं-रणप्पभाए जहा
ठाणपए जाव दीवेषु समुद्देशु एत्थ णं अणंतरोववन्नगाणं बायरपुढविकाइयाणं ठाणा
प०, उववाएणं सव्वलोए समुग्घाएणं सव्वलोए सट्ठाणेणं लोगस्स असंखेज्जइभागे,
अणंतरोववन्नगसुहुमपुढविकाइया णं एगविहा अविसेसमणणत्ता सव्वलोए परियावच्चा
प० समणाउसो !, एवं एएणं कमेणं सव्वे एगिदिया भाणियव्वा, सट्ठा(णेणं)णाई
सव्वेसिं जहा ठाणपए तेसिं पज्जत्ताणं बायराणं उववायसमुग्घायसट्ठाणाणि जहा
तेसिं चेव अपज्जत्ताणं, बायराणं सुहुमाणं सव्वेसिं जहा पुढविकाइयाणं भणिया तहेव
भाणियव्वा जाव वणस्सइकाइयत्ति । अणंतरोववन्नगसुहुमपुढविकाइयाणं भंते !
कइ कम्मप्पगडीओ प० ? गोयमा ! अट्ठ कम्मप्पगडीओ पन्नत्ताओ एवं जहा एगि-
दियसएसु अणंतरोववन्नगउद्देशए तहेव पन्नत्ताओ तहेव बंधंति तहेव वेदेंति जाव
अणंतरोववन्नगा बायरवणस्सइकाइया । अणंतरोववन्नगएगिदिया णं भंते ! कओ
उववज्जंति० ? जहेव ओहिए उद्देशओ भणिओ तहेव । अणंतरोववन्नगएगिदियाणं
भंते ! कइ समुग्घाया प० ? गोयमा ! दोच्चि समुग्घाया प०, तं-वेयणासमुग्घाए
य कसायसमुग्घाए य । अणंतरोववन्नगएगिदिया णं भंते ! किं तुल्लट्ठिइया तुल्लविसे-
साहियं कम्मं पकरेंति पुच्छा तहेव, गोयमा ! अत्थेगइया तुल्लट्ठिइया तुल्लविसेसा-
हियं कम्मं पकरेंति अत्थेगइया तुल्लट्ठिइया वेमायविसेसाहियं कम्मं पकरेंति, से केण-
ट्टेणं भंते ! जाव वेमायविसेसाहियं कम्मं पकरेंति ? गोयमा ! अणंतरोववन्नगा एगि-

दिया दुविहा प०, तं०-अत्येगइया समाउया समोववन्नगा अत्येगइया समाउया
 विसमोववन्नगा, तत्थ णं जे ते समाउया समोववन्नगा ते णं तुल्लुट्ठिइया तुल्लुविसे-
 साहियं कम्मं पकरेंति, तत्थ णं जे ते समाउया विसमोववन्नगा ते णं तुल्लुट्ठिइया
 वेमायविसेसाहियं कम्मं पकरेंति, से तेणट्ठेणं जाव वेमायविसेसाहियं कम्मं पकरेंति ।
 सेवं भंते ! २ ति ॥ ८५१ ॥ ३४-१-२ ॥ कइविहा णं भंते ! परंपरोववन्नगा एगि-
 दिया प० ? गोयमा ! पंचविहा परंपरोववन्नगा एगिदिया प०, तं०-पुढविकाइया
 भेदो चउक्कओ जाव वणस्सइकाइयति । परंपरोववन्नगाअपज्जत्तसुहुमपुढविकाइए णं
 भंते ! इमीसे रयणप्पभाए पुढवीए पुरच्छिमिल्ले चरिमंते समोहए २ ता जे भविए
 इमीसे रयणप्पभाए पुढवीए जाव पच्चच्छिमिल्ले चरिमंते अपज्जत्तसुहुमपुढविकाइय-
 ताए उववज्जितए एवं एएणं अभिलावेणं जहेव पढमो उद्देसओ जाव लोगचरिमं-
 तोत्ति । कहिन्नं भंते ! परंपरोववन्नगापज्जत्तगवायरपुढविकाइयाणं ठाणा प० ? गोयमा !
 सट्ठाणेणं अट्ठसु पुढवीसु एवं एएणं अभिलावेणं जहा पढमे उद्देसए जाव तुल्लुट्ठिइ
 यति । सेवं भंते ! २ ति ॥ ३४-१-३ ॥ एवं सेसावि अट्ठ उद्देसगा जाव अचरिमोत्ति,
 नवरं अणंतरा अणंतरसरिसा परंपरा परंपरसरिसा चरिमा य अचरिमा य एवं चेव,
 एवं एए एकारस उद्देसगा ॥ ८५२ ॥ ३४-१-११ ॥ पढमं एगिदियसेडिसयं समत्तं ॥
 कइविहा णं भंते ! कण्हलेस्सा एगिदिया प० ? गोयमा ! पंचविहा कण्हलेस्सा
 एगिदिया प० भेदो चउक्कओ जहा कण्हलेस्सएगिदियसए जाव वणस्सइकाइयति ।
 कण्हलेस्सअपज्जत्तसुहुमपुढविकाइए णं भंते ! इमीसे रयणप्पभाए पुढवीए पुरच्छि-
 मिल्ले एवं एएणं अभिलावेणं जहेव ओहिउद्देसओ जाव लोगचरिमंतेत्ति सव्वत्थ कण्हले-
 स्सेसु चेव उववाएयव्वो । कहिन्नं भंते ! कण्हलेस्सअपज्जत्तगवायरपुढविकाइयाणं ठाणा
 प० ? गोयमा ! एवं एएणं अभिलावेणं जहा ओहि(य)उद्देसओ जाव तुल्लुट्ठिइयति ।
 सेवं भंते ! २ ति ॥ एवं एएणं अभिलावेणं जहेव पढमं सेडिसयं तहेव एकारस उद्दे-
 सगा भाणियव्वा ॥ ३४-२-११ ॥ विडयं एगिदियसेडिसयं समत्तं ॥ एवं नीललेस्सेहिवि
 तइयं सयं । काउलेस्सेहिवि सयं, एवं चेव चउत्थं सयं । भविसिद्धिएगिदिएहि वि
 सयं पंचमं समत्तं ॥ कइविहा णं भंते ! कण्हलेस्सभवसिद्धिएगिदिया प० ? एवं
 जहेव ओहियउद्देसओ, कइविहा णं भंते ! अणंतरोववन्नगा कण्हलेस्सा भवसिद्धिया
 एगिदिया प० जहेव अणंतरोववन्नगाउद्देसओ ओहिओ तहेव ॥ कइविहा णं भंते ! परं-
 परोववन्नगाकण्हलेस्सभवसिद्धिया एगिदिया प० ? गोयमा ! पंचविहा परंपरोववन्नगा-
 कण्हलेस्सभवसिद्धिएगिदिया प० ओहिओ भेदो चउक्कओ जाव वणस्सइकाइयति ।
 परंपरोववन्नगाकण्हलेस्सभवसिद्धिएअपज्जत्तसुहुमपुढविकाइए णं भंते ! इमीसे रयणप्प-

भाए पुढवीए एवं एएणं अभिलावेणं जहेव ओहिओ उद्देसओ जाव लोयचरिमंतेत्ति,
सव्वत्थ कण्हलेस्सेसु भवसिद्धिएसु उववाएयव्वो । कहिच्चं भंते ! परंपरोववन्नकण्ह-
लेस्सभवसिद्धियपज्जत्तबायरपुढविकाइयाणं ठाणा प० एवं एएणं अभिलावेणं जहेव
ओहिओ उद्देसओ जाव तुल्लट्ठिईयत्ति, एवं एएणं अभिलावेणं कण्हलेस्सभवसिद्धिय-
एगिंदिएहिवि तहेव एक्कारसउद्देसगसंजुत्तं सयं, छट्ठं सयं समत्तं ॥ नीललेस्सभव-
सिद्धियएगिंदिएसु सत्तमं सयं समत्तं । एवं काउलेस्सभवसिद्धियएगिंदिएहिवि सयं
अट्ठमं सयं । जहा भवसिद्धिएहिं चत्तारि सयाणि भाणियाणि एवं अभवसिद्धिएहिवि
चत्तारि सयाणि भाणियव्वाणि, नवरं चरिमअचरिमवज्जा नव उद्देसगा भाणियव्वा,
सेसं तं चेव, एवं एयाइं बारस एगिंदियसेढीसयाइं भाणियव्वाइं । सेवं भंते ! २
त्ति जाव विहरइ ॥ ८५३ ॥ **एगिंदियसेढीसयाइं समत्ताइं ॥ एगिंदिय-
सेढिसयं चउत्तीसइमं समत्तं ॥**

कइ णं भंते ! महाजुम्मा पञ्चत्ता ? गोयमा ! सोलस महाजुम्मा प०, तं०-
कडजुम्मकडजुम्मे १, कडजुम्मतेओगे २, कडजुम्मदावरजुम्मे ३, कडजुम्मकलिओगे
४, तेओगकडजुम्मे ५, तेओगतेओगे ६, तेओगदावरजुम्मे ७, तेओगकलिओगे
८, दावरजुम्मकडजुम्मे ९, दावरजुम्मतेओगे १०, दावरजुम्मदावरजुम्मे ११, दावर-
जुम्मकलिओगे १२, कलिओगकडजुम्मे १३, कलिओगतेओगे १४, कलिओगदावर-
जुम्मे १५, कलिओगकलिओगे १६ । से केणट्ठेणं भंते ! एवं वुच्चइ सोलस महाजुम्मा
प० तं०-कडजुम्मकडजुम्मे जाव कलिओगकलिओगे ? गोयमा ! जे णं रासी
चउक्कएणं अवहारेणं अवहीरमाणे चउपज्जवसिए जे णं तस्स रासिस्स अवहार-
समया तेऽवि कडजुम्मा सेत्तं कडजुम्मकडजुम्मे १, जे णं रासी चउक्कएणं अवहारेणं
अवहीरमाणे तिपज्जवसिए जे णं तस्स रासिस्स अवहारसमया कडजुम्मा सेत्तं
कडजुम्मतेओगे २, जे णं रासी चउक्कएणं अवहारेणं अवहीरमाणे दुपज्जवसिए जे
णं तस्स रासिस्स अवहारसमया कडजुम्मा सेत्तं कडजुम्मदावरजुम्मे ३, जे णं
रासी चउक्कएणं अवहारेणं अवहीरमाणे एगपज्जवसिए जे णं तस्स रासिस्स अव-
हारसमया कडजुम्मा सेत्तं कडजुम्मकलिओगे ४, जे णं रासी चउक्कएणं अवहारेणं
अवहीरमाणे चउपज्जवसिए जे णं तस्स रासिस्स अवहारसमया तेओगा सेत्तं
तेओगकडजुम्मे ५, जे णं रासी चउक्कएणं अवहारेणं अवहीरमाणे तिपज्जवसिए जे
णं तस्स रासिस्स अवहारसमया तेओगा सेत्तं तेओगतेओगे ६, जे णं रासी
चउक्कएणं अवहारेणं अवहीरमाणे दुपज्जवसिए जे णं तस्स रासिस्स अवहारसमया
तेओगा सेत्तं तेओगदावरजुम्मे ७, जे णं रासी चउक्कएणं अवहारेणं अवहीरमाणे

एगपज्वसिए जे णं तस्स रासिस्स अवहारसमया तेओगा सेत्तं तेओगकलिओगे ८, जे णं रासी चउक्कएणं अवहारेणं अवहीरमाणे चउपज्वसिए जे णं तस्स रासिस्स अवहारसमया दावरजुम्मा सेत्तं दावरजुम्मकडजुम्मे ९, जे णं रासी चउक्कएणं अवहारेणं अवहीरमाणे तिपज्वसिए जे णं तस्स रासिस्स अवहारसमया दावरजुम्मा सेत्तं दावरजुम्मेतेओगे १०, जे णं रासी चउक्कएणं अवहारेणं अवहीरमाणे दुपज्वसिए जे णं तस्स रासिस्स अवहारसमया दावरजुम्मा सेत्तं दावरजुम्मदावरजुम्मे ११, जे णं रासी चउक्कएणं अवहारेणं अवहीरमाणे एगपज्वसिए जे णं तस्स रासिस्स अवहारसमया दावरजुम्मा सेत्तं दावरजुम्मकलिओगे १२, जे णं रासी चउक्कएणं अवहारेणं अवहीरमाणे चउपज्वसिए जे णं तस्स रासिस्स अवहारसमया कलिओगा सेत्तं कलिओगकडजुम्मे १३, जे णं रासी चउक्कएणं अवहारेणं अवहीरमाणे तिपज्वसिए जे णं तस्स रासिस्स अवहारसमया कलिओगा सेत्तं कलिओगतेओगे १४, जे णं रासी चउक्कएणं अवहारेणं अवहीरमाणे दुपज्वसिए जे णं तस्स रासिस्स अवहारसमया कलिओगा सेत्तं कलिओगदावरजुम्मे १५, जे णं रासी चउक्कएणं अवहारेणं अवहीरमाणे एगपज्वसिए जे णं तस्स रासिस्स अवहारसमया कलिओगा सेत्तं कलिओगकलिओगे १६ । से तेणट्ठेणं जाव कलिओगकलिओगे ॥८५४॥ कडजुम्मकडजुम्मएणिंदिया णं भंते ! कओ उववज्जंति किं नेरइएहिंतो जहा उप्पल्लेसए तहा उववाओ । ते णं भंते ! जीवा एगसमएणं केवइया उववज्जंति ? गोयमा ! सोलस वा संखेज्जा वा असंखेज्जा वा अणंता वा उववज्जंति, ते णं भंते ! जीवा समए समए० पुच्छा, गोयमा ! ते णं अणंता समए समए अवहीरमाणा २ अणंताहिं ओसप्पिणीउरसप्पिणीहिं अवहीरंति णो चेव णं अवहिरिया सिया, उच्चत्तं जहा उप्पल्लेसए, ते णं भंते ! जीवा नाणावरणिजस्स कम्मस्स किं बंधगा अबंधगा ? गोयमा ! बंधगा नो अबंधगा, एवं सव्वेसिं आउयवज्जाणं, आउयस्स बंधगा वा अबंधगा वा, ते णं भंते ! जीवा नाणावरणिजस्स कम्मस्स वेदगा पुच्छा, गोयमा ! वेदगा नो अवेदगा, एवं सव्वेसिं, ते णं भंते ! जीवा किं सायावेदगा असायावेदगा पुच्छा, गोयमा ! सायावेदगा वा असायावेदगा वा, एवं (खलु) उप्पल्लेसगपरिवाडी, सव्वेसिं कम्माणं उदई नो अणुदई, छण्हं कम्माणं उदीरगा नो अणुदीरगा, वेयणिज्जाउयाणं उदीरगा वा अणुदीरगा वा, ते णं भंते ! जीवा किं कण्हलेस्सा पुच्छा, गोयमा ! कण्हलेस्सा वा नीललेस्सा वा काउलेस्सा वा तेउलेस्सा वा, नो सम्मदिट्ठी नो सम्मामिच्छादिट्ठी मिच्छादिट्ठी, नो नाणी अन्नाणी नित्य(मा)मं दुअन्नाणी तं०-मइअन्नाणी य सुयअन्नाणी य, नो मणजोगी नो वइजोगी

कायजोगी, सागारोवउत्ता वा अणागारोवउत्ता वा, तेसि णं भंते ! जीवाणं सरीरा कइवण्णा जहा उप्पलुहेसए सव्वत्थ पुच्छा, गोयमा ! जहा उप्पलुहेसए ऊसासगा वा नीसासगा वा नो उस्सासनीसासगा वा, आहारगा वा अणाहारगा वा, नो विरया अविरया नो विरयाविरया, सकिरिया नो अकिरिया, सत्तविहबंधगा वा अट्ठविहबंधगा वा, आहारसन्नोवउत्ता वा जाव परिग्गहसन्नोवउत्ता वा, कोहकसाई वा जाव लोभकसाई वा, नो इत्थिवेदगा नो पुरिसवेदगा नपुंसगवेदगा, इत्थिवेद-
बंधगा वा पुरिसवेदबंधगा वा नपुंसगवेदबन्धगा वा, नो सन्नी असन्नी, सईदिया नो अणिदिया, ते णं भंते ! कडजुम्मकडजुम्मएणिदियत्ति कालओ केवच्चिरं होइ ? गोयमा ! जह्वेणं एक्कं समयं उक्कोसेणं अणंतं कालं अणंताओ ओसप्पिणिउस्सप्पिणीओ वणस्सइकाइयकालो, संवेहो न भवइ, आहारो जहा उप्पलुहेसए नवरं निव्वाधाएणं छदिसिं वाघायं पडुच्च सिय तिदिसिं सिय चउदिसिं सिय पंचदिसिं सेसं तहेव, ठिई जह्वेणं (एक्कं समयं) अंतोमुहुत्तं उक्कोसेणं बावीसं वाससहस्साई, समुग्घाया आइल्ला चत्तारि, मारणंतियसमुग्घाएणं समोहयावि मरंति असमोहयावि मरंति, उव्वट्ठणा जहा उप्पलुहेसए, अहं भंते ! सव्वपाणा जाव सव्वसत्ता कडजुम्म २-
एणिदियत्ताए उव्वन्नपुव्वा ? हंता गोयमा ! असइं अदुवा अणंतखुत्तो, कडजुम्मते-
ओगएणिदिया णं भंते ! कओ उव्वज्जंति० ? उव्वाओ तहेव, ते णं भंते ! जीवा एगसमए० पुच्छा, गोयमा ! एगूणवीसा वा संखेज्जा वा असंखेज्जा वा अणंता वा उव्वज्जंति, सेसं जहा कडजुम्मकडजुम्माणं जाव अणंतखुत्तो, कडजुम्मदावरजुम्म-
एणिदिया णं भंते ! कओ उव्वज्जंति० ? उव्वाओ तहेव, ते णं भंते ! जीवा एगसमएणं पुच्छा, गोयमा ! अट्ठारस वा संखेज्जा वा असंखेज्जा वा अणंता वा उव्वज्जंति सेसं तहेव जाव अणंतखुत्तो, कडजुम्मकलिओगएणिदिया णं भंते !
कओ उव्वज्जंति० ? उव्वाओ तहेव परिमाणं सत्तरस वा संखेज्जा वा असंखेज्जा वा अणंता वा सेसं तहेव जाव अणंतखुत्तो, तेओगकडजुम्मएणिदिया णं भंते ! कओ उव्वज्जंति० ? उव्वाओ तहेव परिमाणं बारस वा संखेज्जा वा असंखेज्जा वा अणंता वा उव्वज्जंति सेसं तहेव जाव अणंतखुत्तो, तेओगतेओगएणिदिया णं भंते ! कओ उव्वज्जंति० ? उव्वाओ तहेव परिमाणं पन्नरस वा संखेज्जा वा असंखेज्जा वा अणंता वा सेसं तहेव जाव अणंतखुत्तो, एवं एएसु सोलससु महाजुम्मेसु एक्को गमओ नवरं परिमाणे नाणत्तं तेओगदावरजुम्मेसु परिमाणं चउइस वा संखेज्जा वा असंखेज्जा वा अणंता वा उव्वज्जंति, तेओगकलिओगेसु तेरस वा संखेज्जा वा असंखेज्जा वा अणंता वा उव्वज्जंति, दावरजुम्मकडजुम्मेसु अट्ठ वा संखेज्जा वा असंखेज्जा वा

अणंता वा उववज्जंति, दावरजुम्मतेओगेसु एक्कारस वा संखेज्जा वा असंखेज्जा वा
 अणंता वा उववज्जंति, दावरजुम्मदावरजुम्मेसु दस वा संखेज्जा वा असंखेज्जा वा
 अणंता वा उववज्जंति, दावरजुम्मकलिओगेसु नव वा संखेज्जा वा असंखेज्जा वा
 अणंता वा उववज्जंति, कलिओगकडजुम्मेसु चत्तारि वा संखेज्जा वा असंखेज्जा वा
 अणंता वा उववज्जंति, कलिओगतेओगेसु सत्त वा संखेज्जा वा असंखेज्जा वा अणंता
 वा उववज्जंति, कलिओगदावरजुम्मेसु छ वा संखेज्जा वा असंखेज्जा वा अणंता
 वा उववज्जंति, कलिओगकलिओगएगिंदिया णं भंते ! कओ उववज्जंति० ? उववाओ
 तहेव परिमाणं पंच वा संखेज्जा वा असंखेज्जा वा अणंता वा उववज्जंति सेसं
 तहेव जाव अणंतखुतो । सेवं भंते ! सेवं भंते ! ति ॥ ८५५ ॥ ३५-१-१ ॥
 पढमसमयकडजुम्म २ एगिंदिया णं भंते ! कओ उववज्जंति० ? गोयमा !
 तहेव एवं जहेव पढमो उद्देसओ तहेव सोलसखुतो विइओवि भाणियव्वो, तहेव
 सव्वं, नवरं इमाणि दस नाणत्ताणि-ओगाहणा जहन्नेणं अंगुलस्स असंखेज्जइ
 भागं उक्कोसेणवि अंगुलस्स असंखेज्जइभागं, आउयकम्मस्स नो बंधगा अबंधगा
 आउयस्स नो उदीरगा अणुदीरगा, नो उस्सासगा नो निस्सासगा नो उस्सास-
 निस्सासगा, सत्तविहवंधगा नो अट्टविहवंधगा । ते णं भंते ! पढमसमयकडजुम्म २-
 एगिंदियत्ति कालओ केवच्चिरं होइ ? गोयमा ! एक्कं समयं, एवं ठिईएवि,
 समुग्धाया आइल्ला दोल्लि, समोहया न पुच्छिज्जंति उव्वट्टणा न पुच्छिज्जइ, सेसं
 तहेव सव्वं निरवसेसं, सोलससुवि गमएसु जाव अणंतखुतो । सेवं भंते ! २ ति
 ॥ ८५६ ॥ ३५-१-२ ॥ अपढमसमयकडजुम्म २ एगिंदिया णं भंते ! कओ
 उववज्जंति० ? एसो जहा पढमुद्देसो सोलसहिंवि जुम्मेसु तहेव नेयव्वो जाव कलिओ-
 गकलिओगत्ताए जाव अणंतखुतो । सेवं भंते ! २ ति ॥ ३५-१-३ ॥ चरिमसमयकड-
 जुम्म २ एगिंदिया णं भंते ! कओ उववज्जंति० ? एवं जहेव पढमसम-
 यउद्देसओ नवरं देवा न उववज्जंति तेउलेस्सा न पुच्छिज्जंति, सेसं तहेव । सेवं
 भंते ! सेवं भंते ! ति ॥ ३५-१-४ ॥ अचरिमसमयकडजुम्म २ एगिंदिया णं
 भंते ! कओ उववज्जंति० ? जहा (अ) पढमसमयउद्देसो तहेव निरवसेसो भाणियव्वो ।
 सेवं भंते ! २ ति ॥ ३५-१-५ ॥ पढमपढमसमयकडजुम्म २ एगिंदिया णं भंते !
 कओ उववज्जंति० ? जहा पढमसमयउद्देसओ तहेव निरवसेसं । सेवं भंते ! २
 ति जाव विहरइ ॥ ३५-१-६ ॥ पढमअपढमसमयकडजुम्म २ एगिंदिया णं
 भंते ! कओ उववज्जंति० ? जहा पढमसमयउद्देसओ तहेव भाणियव्वो । सेवं भंते !
 २ ति ॥ ३५-१-७ ॥ पढमचरिमसमयकडजुम्म २ एगिंदिया णं भंते ! कओ

उववज्जंति०? जहा चरिमुद्देसओ तहेव निरवसेसं । सेवं भंते ! २ ति ॥ ३५-१-८॥
पढमअचरिमसमयकडजुम्म २ एगिंदिया णं भंते ! कओ उववज्जंति० ? जहा
(पढमुद्देसओ) बीओ उद्देसओ तहेव निरवसेसं । सेवं भंते ! २ ति जाव विहरइ
॥ ३५-१-९॥ चरिम२समयकडजुम्म २ एगिंदिया णं भंते ! कओ उववज्जंति० ? जहा
चउत्थो उद्देसओ तहेव । सेवं भंते ! सेवं भंते ! ति ॥ ३५-१-१०॥ चरिमअचरिम-
समयकडजुम्म२एगिंदिया णं भंते ! कओ उववज्जंति० ? जहा पढमसमयउद्देसओ
तहेव निरवसेसं । सेवं भंते ! २ ति जाव विहरइ ॥ ३५-१-११॥ एवं एएणं
कमेणं एक्कारस उद्देसगा, पढमो तइओ पंचमओ य सरिसगमगा सेसा अट्ठ
सरिसगमगा, नवरं चउत्थे छट्ठे अट्ठमे दसमे य देवा न उववज्जंति तेउलेस्सा नत्थि
॥ ८५७ ॥ पणतीसइमे सए पढमं एगिंदियमहाजुम्मसयं समत्तं ॥ १ ॥

कण्हलेस्सकडजुम्म २ एगिंदिया णं भंते ! कओ उववज्जंति०? गोयमा ! उववाओ
तहेव एवं जहा ओहियउद्देसए नवरं इमं नाणत्तं ते णं भंते ! जीवा कण्हलेस्सा ?
हंता कण्हलेस्सा, ते णं भंते ! कण्हलेस्सकडजुम्म २ एगिंदियत्ति कालओ केवच्चिरं
होइ ? गोयमा ! जह्वणं एक्कं समयं उक्कोसेणं अंतोमुहुत्तं, एवं ठिईएवि, सेसं तहेव
जाव अणंतखुत्तो, एवं सोलसवि जुम्मा भाणियव्वा । सेवं भंते ! २ ति ॥ ३५-२-१॥
पढमसमयकण्हलेस्सकडजुम्म २ एगिंदिया णं भंते ! कओ उववज्जंति०? जहा पढम-
समयउद्देसओ नवरं ते णं भंते ! जीवा कण्हलेस्सा ? हंता कण्हलेस्सा, सेसं तहेव ।
सेवं भंते ! सेवं भंते ! ति ॥ ३५-२-२ ॥ एवं जहा ओहियसए एक्कारस उद्देसगा
भाणिया तहा कण्हलेस्ससएवि एक्कारस उद्देसगा भाणियव्वा, पढमो तइओ पंचमो
य सरिसगमगा सेसा अट्ठवि सरिसगमगा नवरं चउत्थछट्ठअट्ठमदसमेसु उववाओ
नत्थि देवस्स । सेवं भंते ! २ ति ॥ ३५ इमे सए बिइयं एगिंदियमहाजुम्मसयं
समत्तं ॥२॥ एवं नीललेस्सेहिवि सयं कण्हलेस्ससयसरिसं एक्कारस उद्देसगा तहेव ।
सेवं भंते ! २ ति ॥ तइयं एगिंदियमहाजुम्मसयं समत्तं ॥३॥ एवं काउलेस्सेहिवि सयं
कण्हलेस्ससयसरिसं । सेवं भंते ! २ ति ॥ चउत्थं एगिंदियमहाजुम्मसयं ॥४॥ भवसि-
द्धियकडजुम्म २ एगिंदिया णं भंते ! कओ उववज्जंति० ? जहा ओहियसयं तहेव नवरं
एक्कारससुवि उद्देसएसु, अह भंते ! सव्वपाणा जाव सव्वसत्ता भवसिद्धियकडजुम्म२-
एगिंदियत्ताए उववन्नपुव्वा ? गोयमा ! णो इण्णट्ठे समट्ठे, सेसं तहेव । सेवं भंते !
२ ति ॥ पंचमं एगिंदियमहाजुम्मसयं समत्तं ॥ ५ ॥ कण्हलेस्सभवसिद्धियकडजुम्म२-
एगिंदिया णं भंते ! कओ उववज्जंति० ? एवं कण्हलेस्सभवसिद्धियएगिंदिएहिवि
सयं बिइयसयकण्हलेस्ससरिसं भाणियव्वं । सेवं भंते ! सेवं भंते ! ति ॥ छट्ठं

एगिंदियमहाजुम्मसयं समत्तं ॥ ६ ॥ एवं नीललेस्सभवसिद्धियएगिंदिएहिवि सयं ।
 सेवं भंते ! सेवं भंते ! ति ॥ सत्तमं एगिंदियमहाजुम्मसयं समत्तं ॥ ७ ॥ एवं
 काउलेस्सभवसिद्धियएगिंदिएहिवि तहेव एक्कारसउद्देसगसंजुत्तं सयं, एवं एयाणि
 चत्तारि भवसिद्धियसयाणि, चउत्तुवि सएसु सव्वपाणा जाव उववन्नपुव्वा ? नो
 इणट्ठे समट्ठे । सेवं भंते ! सेवं भंते ! ति ॥ अट्ठमं एगिंदियमहाजुम्मसयं समत्तं
 ॥ ८ ॥ जहा भवसिद्धिएहि चत्तारि सयाई भणियाई एवं भवसिद्धिएहिवि
 चत्तारि सयाणि लेस्सासंजुत्ताणि भाणियव्वाणि, सव्वपाणा तहेव नो इणट्ठे समट्ठे,
 एवं एयाई बारस एगिंदियमहाजुम्मसयाई भवंति । सेवं भंते ! सेवं भंते ! ति
 ॥ ८५८ ॥ पणतीसइमं सयं समत्तं ॥

कडजुम्म२बेईदिया णं भंते ! कओ उववज्जंति० ? उववाओ जहा वक्कंतीए, परिमाणं
 सोलस वा संखेज्जा वा असंखेज्जा वा उववज्जंति, अवहारो जहा उप्प-
 लुद्देसए, ओगाहणा जह्वेणं अंगुलस्स असंखेज्जइभागं उक्कोसेणं बारस जोयणाई,
 एवं जहा एगिंदियमहाजुम्माणं पढमुद्देसए तहेव नवरं तिन्नि लेस्साओ देवा न
 उववज्जंति सम्मदिट्ठी वा मिच्छादिट्ठी वा नो सम्मामिच्छादिट्ठी नाणी वा अच्चाणी
 वा नो मणजोगी वइजोगी वा कायजोगी वा, ते णं भंते ! कडजुम्म२बेईदिया
 कालओ केवच्चिरं होइ ? गोयमा ! जह्वेणं एकं समयं उक्कोसेणं संखेज्जं कालं, ठिई
 जह्वेणं एकं समयं उक्कोसेणं बारस संवच्छराई, आहारो नियमं छहिसिं, तिन्नि
 समुग्वाया सेसं तहेव जाव अणंतखुत्तो, एवं सोलसउवि जुम्मेसु । सेवं भंते ! २
 ति ॥ बेईदियमहाजुम्मसए पढमो उद्देसो समत्तो ॥ ३६-१-१ ॥ पढमसमयकडजुम्म२-
 बेईदिया णं भंते ! कओ उववज्जंति० ? एवं जहा एगिंदियमहाजुम्माणं पढमसमय-
 उद्देसए दस नाणत्ताई ताई चेव दस इहवि, एक्कारसमं इमं नाणत्तं-नो मणजोगी नो
 वइजोगी कायजोगी सेसं जहा बेईदियाणं चेव पढमुद्देसए । सेवं भंते ! २ ति ॥ एवं
 एएवि जहा एगिंदियमहाजुम्मेसु एक्कारस उद्देसगा तहेव भाणियव्वा नवरं चउत्थल्लट्ठ-
 अट्ठमदसमेसु सम्मत्तनाणाणि न भण्णंति, जहेव एगिंदिएसु पढमो तइओ पंचमो य
 एकगमा सेसा अट्ठ एकगमा ॥ ३६ इमे सए पढमं बेईदियमहाजुम्मसयं समत्तं ॥ ११ ॥
 कण्हलेस्सकडजुम्म२बेईदिया णं भंते ! कओ उववज्जंति० ? एवं चेव कण्हलेस्सेसुवि
 एक्कारसउद्देसगसंजुत्तं सयं, नवरं लेस्सा संचिट्ठणा ठिई जहा एगिंदियकण्हलेस्साणं ॥
 विइयं बेईदियसयं समत्तं ॥ २ ॥ एवं नीललेस्सेहिवि सयं ॥ तइयं सयं समत्तं ॥ ३ ॥
 एवं काउलेस्सेहिवि, सयं चउत्थं समत्तं ॥ ४ ॥ भवसिद्धियकडजुम्म२बेईदिया णं भंते !
 एवं भवसिद्धियसयावि चत्तारि तेणेव पुव्वगमएणं नेयव्वा नवरं सव्वे पाणा० णो

इण्डे समेट्ठे, सेसं तहेव ओहियसयाणि चत्तारि । सेवं भंते ! सेवं भंते ! त्ति ॥
छत्तीसइमे सए अट्ठमं सयं समत्तं ॥ ८ ॥ जहा भवसिद्धियसयाणि चत्तारि एवं
अभवसिद्धियसयाणि चत्तारि भाणियव्वाणि नवरं सम्मत्तानाणाणि (सव्वहा)
नत्थि, सेसं तं चेव, एवं एयाणि बारस बेइदियमहाजुम्मसयाणि भवंति । सेवं
भंते ! सेवं भंते ! त्ति ॥ ८५९ ॥ बेइदियमहाजुम्मसया समत्ता ॥ १२ ॥
छत्तीसइमं सयं समत्तं ॥

कडजुम्म२तेइंदिया णं भंते ! कओ उव्वज्जंति० ? एवं तेइंदिएसुवि बारस सया
कायव्वा बेइदियसयसरिसा नवरं ओगाहणा जह्वेणं अंगुलस्स असंखेज्जइभागं
उक्कोसेणं तिन्नि गाउयाई, ठिई जह्वेणं एक्कं समयं उक्कोसेणं एगूणपन्नं राइंदियाई
सेसं तहेव । सेवं भंते ! सेवं भंते ! त्ति ॥ ८६० ॥ तेइंदियमहाजुम्मसया समत्ता
॥ १२ ॥ **सत्ततीसइमं सयं समत्तं ॥**

चउरिंदिएहिवि एवं चेव बारस सया कायव्वा नवरं ओगाहणा जह्वेणं अंगु-
लस्स असंखेज्जइभागं उक्कोसेणं चत्तारि गाउयाई, ठिई जह्वेणं एक्कं समयं उक्कोसेणं
छम्मासा सेसं जहा बेइदियाणं । सेवं भंते ! २ त्ति ॥ ८६१ ॥ चउरिंदियमहा-
जुम्मसया समत्ता ॥ १२ ॥ **अट्ठतीसइमं सयं समत्तं ॥**

कडजुम्म२असन्निपंचिंदिया णं भंते ! कओ उव्वज्जंति० ? जहा बेइन्दियाणं तहेव
असण्णिसुवि बारस सया कायव्वा नवरं ओगाहणा जह्वेणं अंगुलस्स असंखेज्जइ-
भागं उक्कोसेणं जोयणसहस्सं संचिट्ठगा जह्वेणं एक्कं समयं उक्कोसेणं पुव्वकोडिपुहुत्तं
ठिई जह्वेणं एक्कं समयं उक्कोसेणं पुव्वकोडी सेसं जहा बेइंदियाणं । सेवं भंते ! २
त्ति ॥ ८६२ ॥ असण्णिपंचिंदियमहाजुम्मसया समत्ता ॥ १२ ॥ **एगूणयालीस-**
इमं सयं समत्तं ॥ कडजुम्म२सन्निपंचिंदिया णं भंते ! कओ उव्वज्जन्ति० ? उव-
वाओ चउसुवि गईसु, संखेज्जवासाउयअसंखेज्जवासाउयपज्जतअपज्जतएसु य न
कओवि पडिसेहो जाव अणुत्तरविमाणत्ति, परिमाणं अवहारो ओगाहणा य जहा
असन्निपंचिंदियाणं, वेयणिज्जवज्जाणं सत्तण्हं कम्मपगडीं बंधगा वा अबंधगा वा, वेय-
णिज्जस्स बंधगा नो अबंधगा, मोहणिज्जस्स वेदगा वा अवेदगा वा सेसाणं सत्त-
ण्हवि वेदगा नो अवेदगा, सायावेदगा वा असायावेदगा वा, मोहणिज्जस्स उदई
वा अणुदई वा सेसाणं सत्तण्हवि उदई नो अणुदई, नामस्स गोयस्स य उदीरगा
नो अणुदीरगा सेसाणं छण्हवि उदीरगा वा अणुदीरगा वा, कण्हलेस्सा वा जाव
सुक्कलेस्सा वा, सम्महिट्ठी वा मिच्छादिट्ठी वा सम्मामिच्छादिट्ठी वा, णाणी वा
अन्नाणी वा, मणजोगी(वा) वइजोगी कायजोगी, उवओमो वन्नमाई उस्सासगा

(वा नीसासगा वा) आहारगा य जहा एणिदियाण, विरया य अविरया य विरयाविरया य, सकिरिया नो अकिरिया । ते णं भंते । जीवा किं सत्तविहबंघगा अट्ठविहबंघगा(वा) छविहबंघगा एगविहबंघगा ? गोयमा ! सत्तविहबंघगा वा जाव एगविहबंघगा वा, ते णं भंते ! जीवा किं आहारसन्नोवउत्ता जाव परिगगहसन्नोवउत्ता नोसन्नोवउत्ता ? गोयमा ! आहारसन्नोवउत्ता वा जाव नोसन्नोवउत्ता वा, सव्वत्थ पुच्छा भाणियव्वा कोट्ठकसाई वा जाव लोभकसाई वा अकसाई वा, इत्थीवेदगा वा पुरिसवेदगा वा नपुंसगवेदगा वा अवेदगा वा, इत्थीवेदबंघगा वा पुरिसवेदबंघगा वा नपुंसगवेदबंघगा वा अवंघगा वा, सन्नी नो असन्नी, सईदिया नो अणिदिया, संच्छिट्ठगा जह्जेणं एक्कं समयं उक्कोसेणं सागरोवमसयपुहुत्तं साइरेणं, आहारो तहेव जाव नियमं छद्दिसिं, ठिई जह्जेणं एक्कं समयं उक्कोसेणं तेत्तीसं सागरोवमाई, छ समुग्घाया आइल्लगा मारणंतियसमुग्घाएणं समोहयावि मरंति असमोहयावि मरंति, उव्वट्ठगा जहेव उववाओ न कत्थइ पडिसेहो जाव अणुत्तरविमाणत्ति, अह भंते ! सव्वपाणा जाव अणंतखुत्तो, एवं सोलससुवि जुम्मेसु भाणियव्वं जाव अणंतखुत्तो, नवरं परिमाणं जहा बेइदियाणं सेसं तहेव । सेवं भंते । २ ति ॥ ४०-१-१ ॥ पढमसमयकडजुम्म २ सन्निपंचिदिया णं भंते ! कओ उववज्जन्ति० ? उववाओ परिमाणं आहारो जहा एएसिं चेव पढमोइसए ओगाट्ठणा बंधो वेदो वेयणा उदई उदीरगा य जहा बेइन्दियाणं पढमसमइयाणं तहेव कण्हलेस्सा वा जाव सुकलेस्सा वा, सेसं जहा बेइन्दियाणं पढमसमइयाणं जाव अणंतखुत्तो नवरं इत्थिवेदगा वा पुरिसवेदगा वा नपुंसगवेदगा वा सन्निणो असन्निणो सेसं तहेव एवं सोलसुवि जुम्मेसु परिमाणं तहेव सव्वं । सेवं भंते । २ ति ॥ ४०-१-२ ॥ एवं एत्थवि एक्कारस उइसगा तहेव, पढमो तइओ पंचमो य सरिसगमगा सेसा अट्ठवि सरिसगमगा, चउत्थल्लट्ठअट्ठमदसमेसु नत्थि विसेसो (कोइवि) कायव्वो । सेवं भंते । २ ति ॥ ८६३ ॥ चत्तालीसइमे सए पढमं सन्निपंचिदियमहाजुम्मसयं समत्तं ॥ १ ॥

कण्हलेस्सकडजुम्म २ सन्निपंचिदिया णं भंते ! कओ उववज्जन्ति० ? तहेव जहा पढमुइसओ सन्नीणं, नवरं बन्धो वेओ उदई उदीरणा लेस्सा बन्धगसन्ना कसाय-वेयबंघगा य एयाणि जहा बेइन्दियाणं, कण्हलेस्साणं वेदो तिबिहो अवेदगा नत्थि संच्छिट्ठगा जह्जेणं एक्कं समयं उक्कोसेणं तेत्तीसं सागरोवमाई अंतोमुहुत्तमब्भहियाई एवं ठिईएवि नवरं ठिईए अंतोमुहुत्तमब्भहियाई न भन्ति सेसं जहा एएसिं चेव पढमे उइसए जाव अणंतखुत्तो । एवं सोलससुवि जुम्मेसु । सेवं भंते । २ ति ॥ पढमसमयकण्हलेस्सकडजुम्म २ सन्निपंचिदिया णं भंते ! कओ उववज्जन्ति० ? जहा

सन्निर्पंचिदियपठमसमयउद्देसए तहेव निरवसेसं नवरं ते णं भंते ! जीवा कण्ह-
 लेस्सा ? हांता कण्हलेस्सा सेसं तहेव, एवं सोलससुवि जुम्मेसु । सेवं भंते ! सेवं
 भंते ! ति ॥ एवं एएवि एकारस उद्देसगा कण्हलेस्सासए, पठमतइयपंचमा
 सरिसगमगा सेसा अट्ठवि एक(सरिस)गमगा । सेवं भंते ! २ ति ॥ बिइयं सयं समत्तं
 ॥ २ ॥ एवं नीललेस्सेसुवि सयं, नवरं संचिट्ठणा जहजेणं एकं समयं उक्कोसेणं
 दस सागरोवमाईं पलिओवमस्स असंखेज्जइभागमब्भहियाईं, एवं ठिईएवि, एवं तिसु
 उद्देसएसु, सेसं तहेव । सेवं भंते ! सेवं भंते ! ति ॥ तइयं सयं समत्तं ॥ ३ ॥
 एवं काउलेस्ससयंपि, नवरं संचिट्ठणा जहणेणं एकं समयं उक्कोसेणं तिज्जि साग-
 रोवमाईं पलिओवमस्स असंखेज्जइभागमब्भहियाईं, एवं ठिईएवि, एवं तिसुवि
 उद्देसएसु, सेसं तहेव । सेवं भंते ! २ ति ॥ चउत्थं सयं ॥ ४ ॥ एवं तेउलेस्सेसुवि
 सयं, नवरं संचिट्ठणा जहणेणं एकं समयं उक्कोसेणं दो सागरोवमाईं पलिओवमस्स
 असंखेज्जइभागमब्भहियाईं एवं ठिईएवि नवरं नोसच्चोवउत्ता वा, एवं तिसुवि(गमएसु)
 उद्देसएसु सेसं तं चेव । सेवं भंते ! २ ति ॥ पंचमं सयं ॥ ५ ॥ जहा तेउलेस्सा-
 सयं तहा पम्हलेस्सासयंपि नवरं संचिट्ठणा जहजेणं एकं समयं उक्कोसेणं दस
 सागरोवमाईं अंतोमुहुत्तमब्भहियाईं, एवं ठिईएवि, नवरं अंतोमुहुत्तं न भन्नइ सेसं
 तहेव, एवं एएसु पंचसु सएसु जहा कण्हलेस्सासए गमओ तहा नेयव्वो जाव
 अणंतखुत्तो । सेवं भंते ! २ ति ॥ छट्ठं सयं समत्तं ॥ ६ ॥ सुक्खेस्ससयं जहा
 ओहियसयं नवरं संचिट्ठणा ठिई य जहा कण्हलेस्ससए सेसं तहेव जाव अणंतखुत्तो ।
 सेवं भंते ! २ ति ॥ सत्तमं सयं समत्तं ॥ ७ ॥ भवसिद्धियकडजुम्म २ सन्निर्प-
 चिदिया णं भंते ! कओ उववज्जन्ति० ? जहा पठमं सन्निसयं तहा णेयव्वं भवसिद्धि-
 याभिलावेणं नवरं सव्वपाणा० ? णो इणट्ठे समट्ठे, सेसं तं चेव, सेवं भंते ! २ ति ॥
 अट्ठमं सयं समत्तं ॥ ८ ॥ कण्हलेस्सभवसिद्धियकडजुम्म २ सन्निर्पंचिदिया णं भंते !
 कओ उववज्जन्ति० ? एवं एएणं अभिलावेणं जहा ओहियकण्हलेस्ससयं । सेवं भंते !
 २ ति ॥ नवमं सयं ॥ ९ ॥ एवं नीललेस्सभवसिद्धिएवि सयं । सेवं भंते ! २ ति ॥
 दसमं सयं ॥ १० ॥ एवं जहा ओहियाणि सन्निर्पंचिदियाणं सत्त सयाणि भणियाणि एवं
 भवसिद्धिएहि वि सत्त सयाणि कायव्वाणि, नवरं सत्तसुवि सएसु सव्वपाणा जाव
 णो इणट्ठे समट्ठे, सेसं तं चेव । सेवं भंते ! २ ति ॥ भवसिद्धिसया समत्ता ॥
 चउद्दसमं सयं समत्तं ॥ १४ ॥ अभवसिद्धियकडजुम्म २ सन्निर्पंचिदिया णं भंते !
 कओ उववज्जन्ति० ? उववाओ तहेव अणुत्तरविमाणवज्जो परिमाणं अव(आ)हारो
 उच्चत्तं बंधो वेदो वेदणं उदओ उदीरणा य जहा कण्हलेस्ससए कण्हलेस्सा वा जाव

सुक्कलेस्सा वा नो सम्मदिट्ठी मिच्छादिट्ठी नो सम्मामिच्छादिट्ठी नो नाणी अत्राणी
 एवं जहा कण्डलेस्ससए नवरं नो विरया अविरया नो विरयाविरया संचिट्ठणा ठिई
 य जहा ओहियउदेसए समुग्घाया आइल्ला पंच उव्वट्ठणा तहेव अणुत्तरविमाणवज्जं
 सव्वपाणा० णो इणट्ठे समट्ठे सेसं जहा कण्डलेस्ससए जाव अणंतखुत्तो, एवं सोलस-
 सुवि जुम्मेसु । सेवं भंते ! २ ति ॥ पढमसमयअभवसिद्धियकडजुम्म २ सन्निपंचि-
 दिया णं भंते ! कओ उववज्जन्ति० ? जहा सन्नीणं पढमसमयउदेसए तहेव नवरं
 सम्मतं सम्मामिच्छत्तं नाणं च सव्वत्थ नत्थि सेसं तहेव । सेवं भंते ! २ ति ॥
 एवं एत्थवि एक्कारस उदेसगा कायवा पढमनइयपंचमा एक्कगमा सेसा अट्ठवि
 एक्कगमा । सेवं भंते ! २ ति ॥ पढमं अभवसिद्धियमहाजुम्मसयं समत्तं ॥ चत्ता-
 लीसइमे सए पन्नरसमं सयं समत्तं ॥ १५ ॥ कण्डलेस्सअभवसिद्धियकडजुम्म २-
 सन्निपंचिदिया णं भंते ! कओ उववज्जन्ति० ? जहा एसिं चेव ओहियसयं तहा
 कण्डलेस्ससयंपि नवरं ते णं भंते ! जीवा कण्डलेस्सा ? हंता कण्डलेस्सा, ठिई
 संचिट्ठणा य जहा कण्डलेस्ससए सेसं तं चेव । सेवं भंते ! २ ति ॥ विइयं अभव-
 सिद्धियमहाजुम्मसयं ॥ चत्तालीसइमे सए सोलसमं सयं समत्तं ॥ १६ ॥ एवं छहि-
 वि लेस्साहिं छ सया कायवा जहा कण्डलेस्ससयं नवरं संचिट्ठणा ठिई य जहेव
 ओहियए तहेव भाणियवा, नवरं सुक्कलेस्साए उक्कोसेणं एकतीसं सागरोवमाई
 अंतोमुहुत्तमब्भहियाई, ठिई एवं चेव नवरं अंतोमुहुत्तं नत्थि जहन्नगं तहेव सव्वत्थ
 सम्मतनाणाणि नत्थि विरई विरयाविरई अणुत्तरविमाणोववत्ति एयाणि नत्थि,
 सव्वपाणा० णो इणट्ठे समट्ठ । सेत्तं भंते ! सेवं भंते ! ति ॥ एवं एयाणि सत्त अभ-
 वसिद्धियमहाजुम्मसयाणि भवन्ति । सेवं भंते ! २ ति ॥ एवं एयाणि एकवीसं
 सन्निमहाजुम्मसयाणि । सव्वाणिवि एक्कासीइमहाजुम्मसया समत्ता ॥ ८६४ ॥
चत्तालीसइमं सयं समत्तं ॥

कइ णं भंते ! रासीजुम्मा पन्नता ? गोयमा ! चत्तारि रासीजुम्मा पन्नता,
 तंजहा—कडजुम्मे जाव कलिओगे, से केणट्ठेणं भंते ! एवं वुच्चइ चत्तारि
 रासीजुम्मा पन्नता तंजहा—कडजुम्मे जाव कलिओगे ? गोयमा ! जे णं रासी
 चउक्कएणं अवहारेणं अवहीरमाणे चउपज्जवसिए सेत्तं रासीजुम्मकडजुम्मे,
 एवं जाव जे णं रासी चउक्कएणं अवहारेणं अवहीरमाणे एगपज्जवसिए
 सेत्तं रासीजुम्मकलिओगे, से तेणट्ठेणं जाव कलिओगे । रासीजुम्मकड-
 जुम्मनेरइया णं भंते ! कओ उववज्जन्ति० ? उववाओ जहा वक्कंतीए, ते णं
 भंते ! जीवा एगसमएणं केवइया उववज्जन्ति ? गोयमा ! चत्तारि वा अट्ठ वा


वारस वा सोलस वा संखेज्जा वा असंखेज्जा वा उववज्जन्ति, ते णं भंते ! जीवा किं संतरं उववज्जन्ति निरंतरं उववज्जन्ति ? गोयमा ! संतरंपि उववज्जन्ति निरंतरंपि उववज्जन्ति, संतरं उववज्जमाणा जहन्नेणं एकं समयं उक्कोसेणं असंखेज्जा समया अंतरं कट्ठु उववज्जन्ति, निरंतरं उववज्जमाणा जहन्नेणं दो समया उक्कोसेणं असंखेज्जा समया अणुसमयं अविरहियं निरंतरं उववज्जन्ति, ते णं भंते ! जीवा जंसमयं कडजुम्मा तंसमयं तेओगा जंसमयं तेओगा तंसमयं कडजुम्मा ? गोयमा ! णो इणट्ठे समट्ठे, जंसमयं कडजुम्मा तंसमयं दावरजुम्मा जंसमयं दावरजुम्मा तंसमयं कडजुम्मा ? नो इणट्ठे समट्ठे, जंसमयं कडजुम्मा तंसमयं कलिओगा जंसमयं कलिओगा तंसमयं कडजुम्मा ? णो इणट्ठे समट्ठे । ते णं भंते ! जीवा क्हं उववज्जन्ति ? गोयमा ! से जहानामए पवए पवमाणे एवं जहा उववायसए जाव नो परप्पओगेणं उववज्जन्ति । ते णं भंते ! जीवा किं आयजसेणं उववज्जन्ति आयजसेणं उववज्जन्ति ? गोयमा ! नो आयजसेणं उववज्जन्ति आयजसेणं उववज्जन्ति, जइ आयजसेणं उववज्जन्ति किं आयजसं उवजीवंति आयजसं उवजीवंति ? गोयमा ! नो आयजसं उवजीवंति आयजसं उवजीवंति, जइ आयजसं उवजीवंति किं सलेस्सा अलेस्सा ? गोयमा ! सलेस्सा नो अलेस्सा, जइ सलेस्सा किं सकिरिया अकिरिया ? गोयमा ! सकिरिया नो अकिरिया, जइ सकिरिया तेणेव भवग्गहणेणं सिज्झन्ति जाव अंतं करेति ? णो इणट्ठे समट्ठे । रासीजुम्मकडजुम्मअसुरकुमारा णं भंते ! कओ उववज्जन्ति ? जहेव नेरइया तहेव निरवसेसं एवं जाव पंचिदियतिरिक्खजोणिया नवरं वगस्सइकाइया जाव असंखेज्जा वा अणंता वा उववज्जन्ति सेसं तं चेव, मणुस्सावि एवं चेव जाव नो आयजसेणं उववज्जन्ति आयजसेणं उववज्जन्ति, जइ आयजसेणं उववज्जन्ति किं आयजसं उवजीवंति आयजसं उवजीवंति ? गोयमा ! आयजसंपि उवजीवंति आयजसंपि उवजीवंति, जइ आयजसं उवजीवंति किं सलेस्सा अलेस्सा ? गोयमा ! सलेस्सावि अलेस्सावि, जइ अलेस्सा किं सकिरिया अकिरिया ? गोयमा ! नो सकिरिया अकिरिया, जइ अकिरिया तेणेव भवग्गहणेणं सिज्झन्ति जाव अंतं करेति ? हंता सिज्झन्ति जाव अंतं करेन्ति, जइ सलेस्सा किं सकिरिया अकिरिया ? गोयमा ! सकिरिया नो अकिरिया, जइ सकिरिया तेणेव भवग्गहणेणं सिज्झन्ति जाव अंतं करेन्ति ? गोयमा ! अत्थेगइया तेणेव भवग्गहणेणं सिज्झन्ति जाव अंतं करेन्ति अत्थेगइया नो तेणेव भवग्गहणेणं सिज्झन्ति जाव अंतं करेन्ति, जइ आयजसं उवजीवंति किं सलेस्सा अलेस्सा ? गोयमा ! सलेस्सा नो अलेस्सा, जइ सलेस्सा


किं सकिरिया अकिरिया ? गोयमा । सकिरिया नो अकिरिया, जइ सकिरिया तेणेव भवगहणेणं सिज्जंति जाव अंतं करेंति ? गोयमा ! नो इणट्ठे समट्ठे । वाणमंतरजोइसिय-वेमाणिया जहा नेरइया । सेवं भंते ! सेवं भंते ! ति ॥ इक्कच्चालीसइमे रासीजुम्मसए पढमो उद्देसो ॥ ४१११ ॥ रासीजुम्मतेओगनेरइया णं भंते ! कओ उववज्जंति० ? एवं चेव उद्देसओ भाणियव्वो नवरं परिमाणं तिभि वा सत्त वा एक्कारस वा पन्नरस वा संखेज्जा वा असंखेज्जा वा उववज्जंति संतरं तहेव, ते णं भंते ! जीवा जंसमयं तेओगा तंसमयं कडजुम्मा जंसमयं कडजुम्मा तंसमयं तेओगा ? गोयमा ! णो इणट्ठे समट्ठे, जंसमयं तेओगा तंसमयं दावरजुम्मा जंसमयं दावरजुम्मा तंसमयं तेओगा ? गोयमा ! णो इणट्ठे समट्ठे, एवं कलिओगेणवि समं, सेसं तं चेव जाव वेमाणिया नवरं उववाओ सव्वेसिं जहा वक्कंतीए । सेवं भंते ! सेवं भंते ! ति ॥ ४११२ ॥ रासीजुम्मदावर-जुम्मनेरइया णं भंते ! कओ उववज्जंति० ? एवं चेव उद्देसओ नवरं परिमाणं दो वा छ वा दस वा संखेज्जा वा असंखेज्जा वा उववज्जंति संवेहो, ते णं भंते ! जीवा जंसमयं दावरजुम्मा तंसमयं कडजुम्मा जंसमयं कडजुम्मा तंसमयं दावरजुम्मा ? णो इणट्ठे समट्ठे, एवं तेओएणवि समं, एवं कलिओगेणवि समं, सेसं जहा पढमुद्देसए जाव वेमाणिया । सेवं भंते ! २ ति ॥ ४११३ ॥ रासीजुम्मकलिओगनेरइया णं भंते ! कओ उववज्जंति० ? एवं चेव नवरं परिमाणं एक्को वा पंच वा नव वा तेरस वा संखेज्जा वा असंखेज्जा वा उववज्जंति संवेहो, ते णं भंते ! जीवा जंसमयं कलिओगा तंसमयं कडजुम्मा जंसमयं कडजुम्मा तंसमयं कलिओगा ? नो इणट्ठे समट्ठे, एवं तेओगेणवि समं, एवं दावरजुम्मेणवि समं, सेसं जहा पढमुद्देसए एवं जाव वेमाणिया । सेवं भंते ! २ ति ॥ ४११४ ॥ कण्हलेस्सरासीजुम्मकडजुम्मनेरइया णं भंते ! कओ उववज्जंति० ? उववाओ जहा धूमप्पभाए सेसं जहा पढमुद्देसए, अशुरकुमाराणं तहेव एवं जाव वाणमंतराणं मणुस्साणवि जहेव नेरइयाणं आय-अजसं उवजीवंति अलेस्सा अकिरिया तेणेव भवगहणेणं सिज्जंति एवं (न) भाणि-यव्वं सेसं जहा पढमुद्देसए । सेवं भंते ! सेवं भंते ! ति ॥ ४११५ ॥ कण्हलेस्सतेओ-गेहिवि एवं चेव उद्देसओ, सेवं भंते ! २ ति ॥ ४११६ ॥ कण्हलेस्सदावरजुम्मेहिवि एवं चेव उद्देसओ । सेवं भंते ! २ ति ॥ ४११७ ॥ कण्हलेस्सकलिओगेहिवि एवं चेव उद्देसओ परिमाणं संवेहो य जहा ओहिएसु उद्देसएसु । सेवं भंते ! २ ति ॥ ४११८ ॥ जहा कण्हलेस्सेहिं एवं नीललेस्सेहिवि चत्तारि उद्देसगा भाणियव्वा निरवसेसा, नवरं नेरइयाणं उववाओ जहा बाल्लयप्पभाए सेसं तं चेव । सेवं भंते !

सेवं भंते ! ति ॥ ४१।१२ ॥ काउलेस्सेहिवि एवं चेव चत्तारि उद्देसगा कायव्वा
नवरं नेरइयाणं उववाओ जहा रयणप्पभाए, सेसं तं चेव । सेवं भंते ! सेवं भंते !
ति ॥ ४१।१६ ॥ तेउलेस्सरसीजुम्मकडजुम्मअसुरकुमारा णं भंते ! कओ उव-
वज्जन्ति० ? एवं चेव नवरं जेसु तेउलेस्सा अत्थि तेसु भाणियव्वं, एवं एएवि
कण्हलेस्सरिसा चत्तारि उद्देसगा कायव्वा । सेवं भंते ! २ ति ॥ ४१।२० ॥ एवं
पम्हलेस्साएवि चत्तारि उद्देसगा कायव्वा पंचिदियतिरिक्खजोणियाणं मणुस्साणं
वेमाणियणं य एएसिं पम्हलेस्सा सेसाणं नत्थि । सेवं भंते ! २ ति ॥ ४१।२४ ॥
जहा पम्हलेस्साए एवं सुक्कलेस्साएवि चत्तारि उद्देसगा कायव्वा नवरं मणुस्साणं
गमओ जहा ओहियउद्देसएसु सेसं तं चेव, एवं एए छसु लेस्सासु चउव्वीसं उद्देसगा
ओहिया चत्तारि, सव्वेते अट्ठावीसं उद्देसगा भवंति । सेवं भंते ! २ ति ॥ ४१।२८ ॥
भवसिद्धियरासीजुम्मकडजुम्मनेरइया णं भंते ! कओ उववज्जंति० ? जहा ओहिया
पढमगा चत्तारि उद्देसगा तहेव निरवसेसं एए चत्तारि उद्देसगा । सेवं भंते ! २
ति ॥ ४१।३२ ॥ कण्हलेस्सभवसिद्धियरासीजुम्मकडजुम्मनेरइया णं भंते ! कओ
उववज्जंति० ? जहा कण्हलेस्साए चत्तारि उद्देसगा भवंति तहा डमेवि भवसिद्धियकण्ह-
लेस्सेहिं चत्तारि उद्देसगा कायव्वा ॥ ४१।३६ ॥ एवं नीललेस्सभवसिद्धिएहिवि
चत्तारि उद्देसगा कायव्वा ॥ ४१।४० ॥ एवं काउलेस्सेहिवि चत्तारि उद्देसगा ॥ ४१।४४ ॥
तेउलेस्सेहिवि चत्तारि उद्देसगा ओहियसरिसा ॥ ४१।४८ ॥ पम्हलेस्सेहिवि चत्तारि
उद्देसगा ॥ ४१।५२ ॥ सुक्कलेस्सेहिवि चत्तारि उद्देसगा ओहियसरिसा, एवं एएवि
भवसिद्धिएहिवि अट्ठावीसं उद्देसगा भवंति । सेवं भंते ! सेवं भंते ! ति ॥ ४१।५६ ॥
अभवसिद्धियरासीजुम्मकडजुम्मनेरइया णं भंते ! कओ उववज्जन्ति० ? जहा पढमो
उद्देसओ नवरं मणुस्सा नेरइया य सरिसा भाणियव्वा, सेसं तहेव । सेवं भंते ! २ ति ।
एवं चउसुवि जुम्मेसु चत्तारि उद्देसगा । कण्हलेस्सअभवसिद्धियरासीजुम्मकडजुम्म-
नेरइया णं भंते ! कओ उववज्जंति० ? एवं चेव चत्तारि उद्देसगा, एवं नीललेस्सअभव-
सिद्धिएहिवि चत्तारि उद्देसगा एवं काउलेस्सेहिवि चत्तारि उद्देसगा एवं तेउलेस्से-
हिवि चत्तारि उद्देसगा पम्हलेस्सेहिवि चत्तारि उद्देसगा सुक्कलेस्सअभवसिद्धिएहिवि
चत्तारि उद्देसगा, एवं एएसु अट्ठावीसाएवि अभवसिद्धियउद्देसएसु मणुस्सा नेरइय-
गमेणं नेयव्वा । सेवं भंते ! २ ति । एवं एएवि अट्ठावीसं उद्देसगा ॥ ४१।८४ ॥
सम्महिट्ठीरासीजुम्मकडजुम्मनेरइया णं भंते ! कओ उववज्जंति० ? एवं जहा पढमो
उद्देसओ एवं चउसुवि जुम्मेसु चत्तारि उद्देसगा भवसिद्धियसरिसा कायव्वा । सेवं
भंते ! २ ति ॥ कण्हलेस्ससम्महिट्ठीरासीजुम्मकडजुम्मनेरइया णं भंते ! कओ

उववज्जंति० ? एएवि कण्हलेस्ममरिसा चत्तारिवि उद्देसगा कायव्वा, एवं सम्मदिट्ठी-
 सुवि भवसिद्धियसरिसा अट्ठावीसं उद्देसगा कायव्वा । सेवं भंते ! सेवं भंते ! त्ति जाव
 विहरइ ॥ ४१।११२ ॥ मिच्छादिट्ठीरासीजुम्मकडजुम्मनेरइया णं भंते ! कओ
 उववज्जंति० ? एवं एत्थवि मिच्छादिट्ठिअभिलावेणं अभवसिद्धियसरिसा अट्ठावीसं
 उद्देसगा कायव्वा । सेवं भंते ! सेव भंते ! त्ति ॥ ४१।१४० ॥ कण्हपक्खियरासीजुम्म-
 कडजुम्मनेरइया णं भंते ! कओ उववज्जंति० ? एवं एत्थवि अभवसिद्धियसरिसा
 अट्ठावीसं उद्देसगा कायव्वा । सेवं भंते ! २ त्ति ॥ ४१।१६८ ॥ सुक्कपक्खियरासी-
 जुम्मकडजुम्मनेरइया णं भंते ! कओ उववज्जंति० ? एवं एत्थवि भवसिद्धियसरिसा
 अट्ठावीसं उद्देसगा भवंति, एवं एए सव्वेवि छवउयं उद्देसगसयं भवन्ति रासीजुम्म-
 सयं ॥ ४१।१९६ ॥ जाव सुक्कलेस्सा सुक्कपक्खियरासीजुम्मकल्लोगवेमाणिया
 जाव जइ सकिरिया तेणेव भवग्गहणेणं सिज्झंति जाव अंतं करंति ? णो इणट्ठे
 समट्ठे, सेवं भंते ! २ त्ति ॥ ८६५ ॥ भगवं गोयमे समणं भगवं महावीरं तिकुत्तो
 आयाहिणं पयाहिणं करेइ २ ता वंदइ नमंसइ वंदिता नमंसिता एयं वयासी-एवमेयं
 भंते ! तहमेयं भंते ! अवितहमेयं भंते ! असंदिद्धमेयं भंते ! इच्छियमेयं भंते !
 पडिच्छियमेयं भंते ! इच्छियपडिच्छियमेयं भंते ! सब्बे णं एसमट्ठे जे णं तुब्भे
 वदहत्तिक्कहु अपूइवयणा खलु अरिहंता भगवंतो, समणं भगवं महावीरं वंदइ नमंसइ
 वंदिता नमंसिता संजमेणं तवसा अप्पाणं भावेमाणे विहरइ ॥ ८६६ ॥ इक्कच्चत्ता-
 लीसइमं रासीजुम्मसयं समत्तं ॥ सव्वाए भगवईए अट्ठतीसं सयं सयाणं
 १३८ उद्देसगाणं १९२५ ॥ चुलसीयसयसहस्सा पयाण पवरवरणाणदंसीहिं । भावा-
 भावमणंता पज्जता एत्थमंगंमि ॥ १ ॥ तव नियमविणयवेलो जयइ सया नाणविमल-
 विउलजलो । हेउसयविउलवेगो संघसमुदो गुणविसालो ॥ २ ॥ णमो गोयमाईणं
 गणहराणं, णमो भगवईए विबाहपत्तीए, णमो दुवालसंगस्स गणिपिडगस्स ॥ गाहा-
 [कुल्लुम] कुम्मसुसंठियचलणा, अमलियकोरंटवेंटसंकासा । सुयदेवया भगवई मम
 मइतिमिरं पणासेउ ॥ १ ॥ पत्ततीए आइमाणं अट्ठण्हं सयाणं दो दो उद्देसगा उद्दि-
 सिज्जन्ति णवरं चउत्थे सए पढमदिवसे अट्ठ विइयदिवसे दो उद्देसगा उद्दिसिज्जंति,
 (नवरं) नवमाओ सयाओ आरखं जावइयं जावइयं एइ तावइयं तावइयं एगदिवसेणं
 उद्दिसिज्जइ उक्कोसेणं सयंपि एगदिवसेणं मज्झिमेणं दोहिं दिवसेहिं सयं जहजेणं
 तिहिं दिवसेहिं सयं एवं जाव वीसइमं सयं, णवरं गोसालो एगदिवसेणं उद्दिसिज्जइ जइ
 ठिओ एगेण चैव आयंबिलेण अणुज्ज(विज्जइ)ज्झिहीइ अह ण ठिओ आयंबिलेणं छट्ठेणं
 अणुण्णवइ, एकवीसबावीसतेवीसइमाई सयाई एक्केकदिवसेणं उद्दिसिज्जन्ति, चउ-

वीसइमं सयं दोहिं दिवसेहिं छ छ उद्देसगा, पंचवीसइमं दोहिं दिवसेहिं छ छ उद्दे-
सगा, बंधिसयाइ अट्टसयाइ एगेणं दिवसेणं सेटिसयाइ बारस एगेणं एगिदियमहा-
जुम्मसयाइ बारस एगेणं एवं वेईदियाणं बारस तेईदियाणं बारस चउरिंदियाणं
बारस एगेण असन्निपंचिंदियाणं बारस सन्निपंचिंदियमहाजुम्मसयाइ एकवीसं एग-
दिवसेणं उद्दिसिज्जन्ति रासीजुम्मसयं एगदिवसेणं उद्दिसिज्जइ ॥ गाहाओ-वियसि-
यअरविंदकरा नासियतिमिरा सुयाहि(वा)या देवी । मज्झंमि देउ मेहं बुहविबुहण-
मंसिया णिच्चं ॥ १ ॥ सुयदेवयाए पणमिमो जीए पसाएण सिक्खियं नाणं । अण्णं
पवयणदे(विं)वी संतिक(रिं)री तं (इं)नमंसामि ॥ २ ॥ सुयदेवया य जक्खो कुंभधरो
बंभसंति वेरोट्ठा । विज्जा य अंतहुंडी देउ अविग्घं लिहंतस्स ॥ ३ ॥ ८६७ ॥
सिरिविवाहपन्नत्ती समत्ता, पंचमं अंगं समत्तं ॥





णमोऽत्थु णं समणस्स भगवओ णायपुत्त-महावीरस्स

सुत्तागमे

तत्थ णं

॥ नायाधम्मकहाओ ॥

तेणं कालेणं तेणं समएणं चंपा नामं नयरी होत्था । वण्णओ ॥ १ ॥ तीसे णं चंपाए नयरीए बहिया उत्तरपुरच्छिमे दिसीभाए (एत्थ णं) पुण्णभेदे नामं उज्जाणे होत्था । वण्णओ ॥ २ ॥ तत्थ णं चंपाए नयरीए कोणिए नामं राया होत्था । वण्णओ ॥ ३ ॥ तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मस्से नामं थेरे जाइसंपन्ने कुलसंपन्ने बलरूवविणयनाणदंसणचरित्तलाघवसंपन्ने ओयंसी तेयंसी वच्चंसी जसंसी जियकोहे जियमाणे जियमाए जियलोहे जिईदिए जियनिई जियपरीसहे जीवियासामरणभयविप्पमुक्के तवप्पहाणे गुणप्पहाणे एवं करणचरण-निग्गहनिच्छयअज्जवमद्द्वलाघवखंतिगुत्तिमुत्तिविज्जामंतवंबं (चेर) वयनयनियमसच्च-सोयनाणदंसणचारित्तप्पहाणे उ(ओ)राले घोरे घोरव्वए घोरतव्वसी घोरबंभचेरवासी उच्छूडसरीरे संखित्तविउलते(य)उल्लेसे चोइसपुव्वी चउनाणोवगए पंचहिं अणगारस-एहिं सद्धिं संपरिवुड्डे पुव्व्वाणपुव्वि चरमाणे गामाणुगामं वूइजमाणे सुहंसुहेणं विहरमाणे जेणेव चंपा नयरी जेणेव पुण्णभेदे उज्जाणे तेणामेव उवागच्छइ २ ता अहापडि-रूवं उग्गहं ओगिण्हइ ओगिण्हत्ता संजमेणं तवसा अप्पाणं भावेमाणे विहरइ ॥ ४ ॥ तए णं चंपाए नयरीए परिसा निग्गया । कोणिओ निग्गओ । धम्मो कहिओ । परिसा जामेव दिसिं पाउब्भूया तामेव दिसिं पडिगया । तेणं कालेणं तेणं समएणं अज्ज-सुहम्मस्स अणगारस्स जेट्ठे अंतेवासी अज्जजंबू नामं अणगारे कासवगोतेणं सत्तु-स्सेहे जाव अज्जसुहम्मस्स थेरस्स अदूरसामंते उड्डंजाणू अहोसिरे झाणकोट्टोवगए संजमेणं तवसा अप्पाणं भावेमाणे विहरइ । तए णं से अज्जजंबूनामे जायसद्धे जाय-संसए जायकोउहल्ले संजायसद्धे संजायसंसए संजायकोउहल्ले उप्पन्नसद्धे उप्पन्नसंसए उप्पन्नकोउहल्ले समुप्पन्नसद्धे समुप्पन्नसंसए समुप्पन्नकोउहल्ले उट्ठाए उट्ठेइ उट्ठाए उट्ठिता जेणामेव अज्जसुहम्मस्से थेरे तेणामेव उवागच्छइ २ ता अज्जसुहम्मस्से थेरे तिकखुत्तो आयाहिणं पयाहिणं करेइ २ ता वंदइ नमंसइ वंदिता नमंसिता अज्जसुहम्मस्स थेरस्स

नचासन्ने नाइदूरे सुस्सूममाणे नमंसमाणे अभिमुहे पंजलिउडे विणएणं पज्जुवासमाणे एवं
 वयासी-जइ णं भंते ! समणेणं भगवया महावीरेणं आइगरेणं तित्थगरेणं सयंसंबुद्धेणं
 पुरिबुत्तमेणं पुरिससीहिणं पुरिस(वरपुंडरीएणं)वग्घेणं पुरिसवरगंधहत्थिणा लोगुत्तमेणं
 लोगनाहेणं लोगहिएणं लोगपईवेणं लोगपज्जोयगरेणं अभयदएणं सरणदएणं चक्खुद-
 एणं सगगदएणं बोहिदएणं धम्मदएणं धम्मदेसएणं धम्मनायगेणं धम्मसारहिणा धम्म-
 वरचाउरंतचक्कवट्ठिणा अप्पडिह्वयवरनागदंसणधरेणं वियट्ठउमेणं जिणेणं जा(व)ण-
 एणं तिण्णेणं तारएणं बुद्धेणं वोहएणं मुत्तेणं मोयगेणं सव्वण्णेणं सव्वदरिसिणा सिवमय-
 लमहयमगतमक्खयमव्वावाहमपुणरावित्थियं सासयं ठाणमुवगएणं पंचमस्स अंगस्स
 अयमट्ठे पन्नते, छट्ठस्स णं अंगस्स भंते ! नायाधम्मकहाणं के अट्ठे पन्नते ? जंबु-
 त्ति अज्जसुहम्मे थेरे अज्जजंबूनामं अणगारं एवं वयासी-एवं खलु जंबू ! समणेणं
 भगवया महावीरेणं जाव संपत्तेणं छट्ठस्स अंगस्स दो सुयक्खंधा पन्नत्ता, तंजहा-
 नायाणि य धम्मकहाओ य । जइ णं भंते ! समणेणं भगवया महावीरेणं जाव
 संपत्तेणं छट्ठस्स अंगस्स दो सुयक्खंधा पन्नत्ता तंजहा-नायाणि य धम्मकहाओ
 य, पढमस्स णं भंते ! सुयक्खंधस्स समणेणं जाव संपत्तेणं नायाणं कइ अज्झ-
 यणा पन्नत्ता ? एवं खलु जंबू ! समणेणं जाव संपत्तेणं नायाणं एगूणवीसं अज्झयणा
 पन्नत्ता, तंजहा-उक्खित्तणाए संघाडे अडे कुम्मे य सेलगे । तुंवे य रोहिणी मल्ली
 मार्यदी चंदिमाइय ॥ १ ॥ दावद्वे उदगणाए मंडुक्के तेयली वि य । नंदीकळे
 अवरकंका आइन्ने सुसुमाइय ॥ २ ॥ अवरे य पुंडरीए नायए एगूणवीसइमे ॥ ५ ॥
 जइ णं भंते ! समणेणं जाव संपत्तेणं नायाणं एगूणवीसं अज्झयणा पन्नत्ता तंजहा-
 उक्खित्तणाए जाव पुंडरीए (त्ति) य, पढमस्स णं भंते ! अज्झयणस्स के अट्ठे पन्नते ?
 एवं खलु जंबू ! तेणं कालेणं तेणं समएणं इहेव जंबुहीवे दीवे भारहे वासे दाहिणद्धुमरहे
 रायग्निहे नामं नयरे होत्था । वण्णओ । गुगसिलए उज्जाणे । वण्णओ । तत्थ णं रायग्निहे
 नयरे सेणिए नामं राया होत्था । महया हिमवंतं वण्णओ । तस्स णं सेणियस्स रत्तो
 नंदा नामं देवी होत्था सुकुमालपाणिपाया वण्णओ ॥ ६ ॥ तस्स णं सेणियस्स पुत्ते
 नंदाए देवीए अत्तए अभए नामं कुमारे होत्था अहीणपंचिंदियसरीरे जाव सुरूवे
 सामदंडभेयउवप्पयाणनीइसुप्पउत्तनयविहिञ्चू इहापोहमग्गगवेंसणअत्यसत्थमइवि-
 सारए उप्पत्तियाए वेणइयाए कम्मियाए पारिणामियाए चउव्विहाए बुद्धीए उववेए
 सेणियस्स रत्तो बहुसु कजेसु य कुडुंबेसु य मंतेसु य गुज्झेसु य रहस्सेसु य निच्छ-
 एसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खु मेढीभूए
 पमाणभूए आहारभूए आलंबणभूए चक्खुभूए सव्वकजेसु सव्वभूमियासु लद्धपव्वए

विदुष्णवियारे रज्जुधुरचित्ताय यावि होत्था । सेणियस्स रज्जो रज्जं च रट्ठं च कोसं
च कोट्ठागारं च बलं च वाहणं च पुरं च अंतेउरं च सयमेव समु(वे)पेक्खमाणे २
विहरइ ॥ ७ ॥ तस्स णं सेणियस्स रज्जो धारिणी नामं देवी होत्था जाव सेणियस्स रज्जो
इट्ठा जाव विहरइ ॥ ८ ॥ तए णं सा धारिणी देवी अज्जया कयाइ तंसि तारिसगंसि
लक्कट्ठगलट्ठमट्ठसंठियखंसुग्गयपवरवरसालभंजियउज्जलमणिकणगरयणथूमियविडं-
क-
जालद्धचंदनिज्जूहकंतरकणयालिचंदसालियाविभत्तिकलिए सरसच्छवाऊवलवण्णरइए
बाहिरओ दूमियधट्ठमट्ठे अब्भितरओ पसत्तसुविलिहियचित्तकम्मे नाणाविह-
पंचवण्णमणिरयणकोट्टिमतले पउमलयाफुल्लवल्लिवरपुप्फजाइउल्लोयचित्तियतले चं(वं)-
दणवरकणगकलससु(वि)णिम्मियपडिपुज्जियसरसपउमसोहंतदारभाए पयरगलं-
वंतमणिमुत्तदामसुविरइयदारसोहे सुगंधवरकुसुममउयपम्हलसयणोवयारमणहिययनि-
व्वुइयरे कप्पूरलवंगमलयचंदणकालागुरुपवरकुंदुरुक्कतुरुक्कधूवडज्जंतसुरभिमवमघंतगं-
धुद्धुभाभिरामे सुगंधवरगंधिए गंधवट्ठिभाए मणिकिरणपणासियंधयारे किं बहुणा ? सुइ-
गुणेहिं सुरवरविमाणवेलं(विय)ववरघरए तंसि तारिसगंसि सयणिज्जंसि सालिगणवट्टिए
उभओ विब्बोयणे दुहुओ उज्जए मज्झै णयगंभीरे गंगापुलिगवल्लयाउडालसालिसए
उयचियखोमदुगुल्लपट्ठपडि(च्छण्णे)च्छायणे अत्थरयमलयनवतयकुसत्तलिंबसीहके-
सरपच्चुत्थए सुविरइयरयत्ताणे रत्तंसुयसंतुए सुरम्मे आइणगरूयबूरनवणीयतुल्लाकासे
पुव्वरत्तावरत्तकालसमयंसि सुत्तजागरा ओहीरमाणी ओहीरमाणी एगं महं सत्तुस्सेहं
रययकूडसज्जिहं नहयलंसि सोमं सोमागारं लीलायंतं जंभा(यंतं)यमाणं मुहमइययं
गयं पासित्ता णं पडिबुद्धा । तए णं सा धारिणी देवी अयमेयाख्वं उरालं कल्लाणं सिवं
धञ्जं मंगलं सरिसरीयं महासुमिणं पासित्ता णं पडिबुद्धा समाणी हट्ठनुट्ठा चित्तमाणंदिया
पीडमणा परमसोमणस्सिया हरिसवसविसप्पमाणहियया धाराहयकलंबपुप्फगं पिव
समूससियरोमकूवा तं सुमिणं ओणिण्हइ २ ता सयणिज्जाओ उट्ठेइ २ ता पायपीडाओ
पच्चोसहइ २ ता अतुरियमच्चवल्लमसंभंताए अविलंबियाए रायहंससरिसीए गइए
जेणामेव से सेणिए राया तेणामेव उवागच्छइ २ ता सेणियं रायं ताहिं इट्ठाहिं
कंताहिं पियाहिं मणुत्ताहिं मणामाहिं उरालाहिं कल्लाणाहिं सिवाहिं धञ्जाहिं मंगल्लाहिं
सांसरीयाहिं हिययगमणिज्जाहिं हिययपल्हायणिज्जाहिं मियमहुररिभियगंभीरसरिस-
रीयाहिं गिराहिं संलवमाणी २ पडिबोहेइ २ ता सेणिएणं रज्जा अब्भणुज्जाया
समाणी नाणामणिकणगरयणभत्तिचित्तंसि भद्दासणंसि निसीयइ २ ता आसत्था
वीसत्था सुहासणवरगया करयलपरिगहियं सिरसावत्तं मत्थए अंजलिं कट्ठु सेणियं
रायं एवं वयासी-एवं खलु अहं देवाणुप्पिया । अज्ज नंसि तारिसगंसि सयणिज्जंसि

सालिंगणवट्टिए जाव नियगवयणमइवयंतं गयं सुमिणे पासित्ता णं पडिबुद्धा । तं एयस्स णं देवाणुप्पिया ! उरालस्स जाव सुमिणस्स के मत्ते कल्लणे फलवित्तिविसेसे भविस्सइ ? ॥ ९ ॥ तए णं से सेणिए राया धारिणीए देवीए अंतिए एयमट्ठं सोच्चा निसम्म हट्ठतुट्ठा जाव हियए धाराहयनी सुसुरभिकुसुमचंचुमालइयतणू ऊस(सि)वियरो-मकूवे तं सुमिणं उगिण्हइ २ ता ईहं पविसइ २ ता अप्पणो साभाविणं मइपु-वएणं बुद्धिविज्ञाणेणं तस्स सुमिणस्स अत्थोगगहं करेइ २ ता धारिणिं देविं ताहिं जाव हिययपलहायणिज्जाहिं मि(उ)यमहुररिभियगंभीरसस्सिरीयाहिं वग्गूहिं अणुबूहेमाणे २ एवं वयासी-उराले णं तुमे देवाणुप्पिए ! सुमिणे दिट्ठे, कल्लणे णं तुमे देवाणु-प्पिए ! सुमिणे दिट्ठे, सिवे धत्ते मंगल्ले सस्सिरीए णं तुमे देवाणुप्पिए ! सुमिणे दिट्ठे, आरोग्गतुट्ठिरीहाउयकल्लणमंगल्लकारए णं तुमे देवी ! सुमिणे दिट्ठे, अत्थलाभो ते देवाणुप्पिए ! पुत्तलाभो ते देवाणुप्पिए ! रज्जलाभो भोगलाभो सोक्खलाभो ते देवाणुप्पिए ! एवं खलु तुमं देवाणुप्पिए ! नवण्हं मासाणं बहुपडिपुण्णाणं अद्धमाण य राइदियाणं वीइक्कताणं अम्हं कुलकेउं कुलवीवं कुलपव्वयं कुलवडिसयं कुलति-लयं कुलकित्तिकरं कुलवित्तिकरं कुलनंदिकरं कुलजसकरं कुलाधारं कुलपायवं कुल-विवद्धणकरं सुकुमालपाणिपायं जाव दारयं पयाहिंसि । से वि य णं दारए उम्मुक्क-बालभावे विज्ञायपरिणयमेत्ते जोव्वगगमणुप्पत्ते सूरे वीरे विक्कंते वित्थिणगविमुल-बलवाहणे रज्जवई राया भविस्सइ । तं उराले णं तुमे देवी ! सुमिणे दिट्ठे जाव आरोग्गतुट्ठिरीहाउकल्लणकारए णं तुमे देवी ! सुमिणे दिट्ठे त्ति कट्ठ मुज्जो २ अणुबूहेइ ॥ १० ॥ तए णं सा धारिणी देवी सेणिएणं रत्ता एवं वुत्ता समाणी हट्ठतुट्ठा जाव हियया करयलपरिगगहियं जाव अंजलिं कट्ठु एवं वयासी-एवमेयं देवाणुप्पिया ! तहमेयं देवाणुप्पिया ! अवितहमेयं असंदिद्धमेयं इच्छियमेयं (देवाणुप्पिया !) पडिच्छियमेयं इच्छियपडिच्छियमेयं सत्ते णं एसमट्ठे जं णं तुम्हे वयह त्ति कट्ठ तं सुमिणं सम्मं पडिच्छइ २ ता सेणिएणं रत्ता अब्भणुज्जाया समाणी नाणामणिक्कणगरयणभत्ति-चित्ताओ भद्दासणाओ अब्भुट्ठेइ २ ता जेणेव सए सयणिज्जे तेणेव उवागच्छइ २ ता सयंसि सयणिज्जसि निसीयइ २ ता एवं वयासी-मा मे से उत्तमे पहाणे मंगल्ले सुमिणे अज्जेहिं पावसुमिणेहिं पडिहम्मिहिं कट्ठु देवयगुरुजणसंबद्धाहिं पसत्थाहिं धम्मि-याहिं कहाहिं सुमिणजागरियं पडिजागरमाणी (२)विहरइ ॥ ११ ॥ तए णं से सेणिए राया पच्चसकालसमयंसि कोडुवियपुरिसे सद्दावेइ २ ता एवं वयासी-खिप्पामेव भो देवाणुप्पिया ! बाहिरियं उवट्ठाणसालं अज्ज सविसंसं परमरम्मं गंधोदगसित्तुइय-सम्मज्जिओवलित्तं पंचवण्णसरससुरभिमुक्कपुप्फपुंजोववारकलियं कालागरुपवरकुंदुक्क-

तुक्कध्वडज्जेतमघमघंतगंधुद्धयाभिरामं सुगंधवरगंधियं गंधवट्टिभूयं करेह य कारवेह
 य करिता य कारवित्ता य ए(व)यमाणत्तियं पच्चप्पिणह । तए णं ते कोडुंबियपुरिसा
 सेणिएणं रत्ता एवं वुत्ता समाणा हट्टतुट्ठा जाव पच्चप्पिणंति । तए णं से सेणिए
 राया कल्लं पाउप्पभायाए रयणीए फुल्लुप्पलकमलकोमलुम्मिलियंमि अहापंडुरे पभाए
 रत्तासोगप्पगासकिंसुयसुयमुहगुंजद्ध(राग)बंधुजीवगपारावयचलणनयणपरहुयसुरतलो-
 यणजासुमणकुसुमजलियजलणतवणिज्जकलसहिं गुलयनिगररूवाइरेगरेहन्तसस्सिरीए
 दिवा(ग)यरे अहकमेण उदिए तस्स दिण(कर)करपरंपरावयारपारद्धंमि अंधयारे
 बालायवकुंकुमेण खइयव्व जीवलोए लोयणविसयाणुयासविगसंतविसददंसियंमि लोए
 कमलागरसंडबोहए उट्टियंमि सूरे सहस्सरस्सिमि दिणयरे तेयसा जलंते सयणिजाओ
 उट्टेइ २ ता जेणेव अट्टणसाला तेणेव उवागच्छइ २ ता अट्टणसालं अणुपविसइ २
 ता अणेगवायामजोगवग्गणवामट्ठणमल्लजुद्धकरणेहिं संते परिससेते सयपागसहस्सपा-
 गेहिं सुगंधवरतेल्लमाइएहिं पीणणिजेहिं दीवणिजेहिं दप्पणिजेहिं मयणिजेहिं विहणि-
 जेहिं सव्विदियगायपल्हायणिजेहिं अब्भंगएहिं अब्भंगिए समाणे तेल्लचम्मंसि पडि-
 पुण्णपाणिपायसुकुमालकोमलतलेहिं पुरिसेहिं छेएहिं दक्खेहिं पट्टेहिं कुसलेहिं मेहावीहिं
 निउणेहिं निउणसिप्पोवगएहिं जियपरिस्समेहिं अब्भंगणपरिमहुणुव्वलणकरणगुणनि-
 म्माएहिं अट्टिसुहाए मंससुहाए तयासुहाए रोमसुहाए चउव्विहाए सं(वा)वाहणाए
 संवाहिए समाणे अवगयपरिस्समे नरिंदे अट्टणसालाओ पडिनिक्खमइ २ ता जेणेव
 मज्जणघरे तेणेव उवागच्छइ २ ता मज्जणघरं अणुपविसइ २ ता स(सु)म(न्त)त्तजाला-
 भिरामे विचित्तमणिरयणकोट्टिमतले रमणिजे ण्हाणमंडवंसि नाणामणिरयणभत्तिच्चित्तंसि
 ण्हाणपीढंसि सुहानिसणो सुहोदगेहिं पुप्फोदएहिं गंधोदएहिं सुद्धोदएहि य पुणो पुणो
 कल्लाणगपवरमज्जणविहीए मज्जिए तत्थ कोउयसएहिं बहुविहेहिं कल्लाणगपवरमज्जणा-
 वसाणे पम्हलसुकुमालगंधकासा(ई)यल्लहियंगे अहयसुमहग्गवूसरयणसुसंवुए सरससु-
 रभिगोसीसचंदणाणुलित्तगत्ते सुइमालावण्णगविलेवणे आविद्धमणिशुवण्णे कप्पियहार-
 द्धहारतिसरयपालंबपलंबमाणकडिसुत्तसुकयसोहे पि(ण)णिद्धगेविजे अंगुलेज्जगललियं-
 ग(य)ललियकयाभरणे नाणामणिकडगतुडियथंभियभुए अहियरूवसस्सिरीए कुंडलुजो-
 इयाणणे मउडदित्तिए हारोत्थयसुकयइयवच्छे पालंबपलंबमाणसुकयपडउत्तरिजे
 सुदियार्पिगल्लुलीए नाणामणिकणगरयणविमलमहरिहु निउणोवियमिसिमि संतविरइय-
 सुसिलिद्धविसिद्धलट्ठसंठियपसत्थआविद्धवीरवलए, किं बहुणा ? कप्परक्खए चेव सुअ-
 लंकियविभूसिए नरिंदे सकोरंटमल्लदामेणं छत्तेणं धरिज्जमाणेणं (उभओ)चउचासर-
 वालवीइयंगे मंगलजयसद्कयालोए अणेगगणनायगदंडनायगराईसरतलवरमाडंबिय-

कोडुंबियमंतिमहामंतिगणगदोवारियअमच्चचेडपीढमहनगरनिगमसेट्टिसेणावइसत्थवा-
हदूयसंधिवालसद्धिं संपरिवुडे धवलमहामेहनिग्गए विव गहगणदिपंतरिकखताराग-
णाण मज्झे ससि व्व पियदंसणे नरवई मज्जणघराओ पडिनिक्खमइ २ ता जेणेव
बाहिरिया उवट्ठाणसाला तेणेव उवागच्छइ २ ता सीहासणवरगए पुरत्थाभिमुहे
सन्निसण्णे । तए णं से सेणिए राया अप्पणो अदूरसामंते उत्तरपुरच्छिमे दिसीभाए
अट्ठ भद्दासणाइं सेयवत्थपच्चत्थुयाइं सिद्धत्थमंगलोवयारकयसंतिकम्मआईं रयावेइ २ ता
(अप्पणो अदूरसामंते) नाणामणिरयणमंडियं अहियपेच्छणिज्जरूवं महग्गवरपट्ठुण्णगयं
सण्हवहुभत्तिसयचित्त(ट्ठा)ठाणं ईहामियउसभतुरयनरमगरविहगवालगकिन्नरुस्स-
रभचमरकुंजवरणलयपउमलयभत्तित्तं सुखचियवरकणगपवरपेरंतदेसभागं अट्ठिभ-
तरियं जवणियं अंछावेइ २ ता अं(च्छ)त्थरगमउअमसूरगउच्छइयं धवलवत्थप-
च्चत्थुयं विसिट्ठं अंगसुहफासयं सुमउयं धारिणीए देवीए भद्दासणं रयावेइ २ ता
कोडुंबियपुरिसे सद्दावेइ २ ता एवं वयासी-खिप्पामेव भो देवाणुप्पिया ! अट्ठंगम-
हानिमित्तसुत्तत्थपाडए विविहसत्थकुसले सुमिणपाडए सद्दावेइ २ ता एयमाणत्तियं
खिप्पामेव पच्चप्पिणह । तए णं ते कोडुंबियपुरिसा सेणिएणं रत्ता एवं वुत्ता समाणा
हट्ठुट्ठ जाव हियया करयलपरिग्गहियं दसनहं सिरसावत्तं मत्थए अंजलिं कट्ठु एवं
देवो तहत्ति आणाए विणएणं वयणं पडिसुणेंति २ ता सेणियस्स रत्तो अंतियाओ
पडिनिक्खमंति २ ता रायगिहस्स नयरस्स मज्झमज्झेणं जेणेव सुमिणपाडगगिहाणि
तेणेव उवागच्छंति २ ता सुमिणपाडए सद्दावेंति । तए णं ते सुमिणपाडगा सेणि-
यस्स रत्तो कोडुंबियपुरिसेहिं सद्दाविया समाणा हट्ठुट्ठ जाव हियया ण्हाया अप्पमह-
ग्गाभरणालंक्रियसरीरा हरियाल्लियसिद्धत्थयकयमुद्धाणा सएहिं सएहिं गिहेहिंतो पडि-
निक्खमंति २ ता रायगिहस्स नयरस्स मज्झमज्झेणं जेणेव सेणियस्स रण्णो भवण-
व(डें)डिंसगदुवारे तेणेव उवागच्छंति २ ता एगयओ मि(ल)लायंति २ ता सेणियस्स
रत्तो भवणवडिंसगदुवारेणं अणुपविसंति २ ता जेणेव बाहिरिया उवट्ठाणसाला
जेणेव सेणिए राया तेणेव उवागच्छंति २ ता सेणियं रायं जएणं विजएणं वद्धावेंति,
सेणिएणं रत्ता अच्चियवंदियपूइयमाणियसक्कारियसम्माणिआ समाणा पत्तेयं २ पुव्वन्न-
त्थेसु भद्दासणेसु निसीयंति । तए णं सेणिए राया जवणियंतरियं धारिणिं देवि ठवेइ
२ ता पुक्कफलपडिपुण्हत्थे परेणं विणएणं ते सुमिणपाडए एवं वयासी-एवं खलु
देवाणुप्पिया ! धारिणी देवी अज्ज तंसि तारिसगंसि सयणिज्जंसि जाव महासुमिणं
पासित्ता णं पडिवुद्धा, तं एयस्स णं देवाणुप्पिया ! उरालस्स जाव सस्सिरीयस्स
महासुमिणस्स के मजे कळाणे फलवित्तिविसेसे भविस्सइ ? । तए णं ते सुमिणपाडगा

सेणियस्स रत्तो अंतिए एयमट्ठं सोच्चा निसम्म हट्ठतुट्ठ जाव हियया तं सुमिणं सम्मं ओगिण्हंति २ ता ईहं अणुपविसंति २ ता अन्नमन्नेण सद्धिं संचालेति २ ता तस्स सुमिणस्स लद्धट्ठा गहियट्ठा पुच्छियट्ठा विणिच्छियट्ठा अभिगयट्ठा सेणियस्स रत्तो पुरओ सुमिणसत्थाइं उच्चारमाण (२) एवं वयासी-एवं खलु अम्हं सामी ! सुमिणसत्थंसि बायालीसं सुमिणा तीसं महासुमिणा बावत्तरिं सव्वसुमिणा दिट्ठा । तत्थ णं सामी ! अरहंतमायरो वा चक्कवट्ठिमायरो वा अरहंतंसि वा चक्कवट्ठिसि वा गब्भं वक्कममाणंसि एएसिं तीसाए महासुमिणाणं इमे चउद्दस महासुमिणे पासित्ता णं पडिबुज्झंति तंजहा-गयवसहसीहअभिसेयदामससिदिणयरं झयं कुंभं । पउमसरसागरविमाणभवणरयणुच्चय-सिहिं च ॥ १ ॥ वासुदेवमायरो वा वासुदेवंसि गब्भं वक्कममाणंसि एएसिं चउद्दसण्हं महासुमिणाणं अन्नयरे सत्त महासुमिणे पासित्ता णं पडिबुज्झंति । बलदेवमायरो वा बलदेवंसि गब्भं वक्कममाणंसि एएसिं चउद्दसण्हं महासुमिणाणं अन्नयरे चत्तारि महासुमिणे पासित्ता णं पडिबुज्झंति । मंडलियमायरो वा मंडलियंसि गब्भं वक्कममाणंसि एएसिं चोद्दसण्हं महासुमिणाणं अन्नयरं एगं महासुमिणं पासित्ता णं पडिबुज्झंति । इमे य(णं) सामी ! धारिणीए देवीए एगे महासुमिणे दिट्ठे । तं उराले णं सामी ! धारिणीए देवीए सुमिणे दिट्ठे जाव आरोग्गुट्ठिचीहा-उकल्लाणमंगल्लकारए णं सामी ! धारिणीए देवीए सुमिणे दिट्ठे । अत्थलाभो सामी ! सोक्खलाभो सामी ! भोगलाभो सामी ! पुत्तलाभो रज्जलाभो, एवं खलु सामी ! धारिणी देवी नवण्हं मासाणं बहुपडिपुण्णाणं जाव दारगं पयाहि(सि)इ । से वि य णं दारए उम्मुक्कवालभावे विन्नायपरिणयमित्ते जोव्वणगमणुप्पत्ते सूरे वीरे विक्कंते वित्थिण्णविउलबलवाहणे रज्जवई राया भविस्सइ अणगारे वा भावियप्पा । तं उराले णं सामी ! धारिणीए देवीए सुमिणे दिट्ठे जाव आरोग्गुट्ठि जाव दिट्ठे-त्तिकट्ठु भुज्जो २ अणु(बू)वूहेति । तए णं सेणिए राया तेसिं सुमिणपाढगाणं अंतिए एयमट्ठं सोच्चा निसम्म हट्ठ जाव हियए करयल जाव एवं वयासी-एवमेयं देवाणुप्पिया । जाव जं णं तुब्भे वयह-त्तिकट्ठु तं सुमिणं सम्मं पडिच्छइ २ ता ते सुमिणपाढए विउलेणं असणपाणखाइमसाइमेणं वत्थगंधमल्लालंकारेण य सक्कारेइ सम्माणेइ सक्कारित्ता सम्माणित्ता विउलं जीवियारिहं पीइदाणं दलयइ २ ता पडिविसजेइ । तए णं से सेणिए राया सीहासणाओ अब्भुट्ठेइ २ ता जेणेव धारिणी देवी तेणेव उवागच्छइ २ ता धारि(णीदेवी)णि देविं एवं वयासी-एवं खलु देवाणुप्पिए ! सुमिणसत्थंसि बायालीसं सुमिणा तीसं महासुमिणा जाव एगं महासुमिणं जाव भुज्जो २ अणुवूहेइ । तए णं सा धारिणी देवी सेणियस्स रत्तो अंतिए एयमट्ठं सोच्चा निसम्म हट्ठ जाव हियया

तं सुमिणं सम्मं पडिच्छइ २ ता जेणेव सए वासघरे तेणेव उवागच्छइ २ ता ण्हाया
 अप्पमहग्घाभरणालंकियसरीरा विपुलाइं जाव विहरइ ॥ १२ ॥ ताए णं तीसे धारि-
 णीए देवीए दोस मासेसु वीइक्कंतेसु तइए मासे वट्ठमाणे तस्स गब्भस्स दोहलकाल-
 समयंसि अयमेयारूवे अकालमेहेसु दोहले पाउब्भविट्था-धन्नाओ णं ताओ अम्म-
 याओ सपुण्णाओ णं ताओ अम्मयाओ कयत्थाओ (णं ताओ०) कयपुण्णाओ कय-
 लक्खणाओ कयविहवाओ सुलद्धे णं तासिं माणुस्सए जम्मजीवियफले जाओ णं मेहेसु
 अब्भुगएसु अब्भुजएसु अब्भुजएसु अब्भुट्टिएसु सगज्जिएसु सविज्जिएसु सफुसिएसु
 सथणिएसु धंतथोयरूपपट्टअंकसंखचंदकुंदसालिपिट्ठरासिसमप्पमेसु चिउरहरियालभे-
 यचंपगसणकोरंटसरिस(य)वपउमरयसमप्पमेसु लक्खारससरसरत्तकिंसुयजासुमणरत्त-
 वंधुजीवगजाइहिंगुलयसरसकुंमउरब्भससरुहिरइंदगोवगसमप्पमेसु बरहिणनीलगु-
 लियासुगचासपिच्छभिंमपत्तसासगनीलुप्पलनियरनवसिरीसकुसुमनवसद्वलसमप्पमेसु
 जच्चंजणभिंममेयरिट्ठगभमरावलिगवलगुलियकजलसमप्पमेसु फुरंतविज्जुयसगज्जिएसु
 वायवसविपुलगगणचवलपरिसकिरेसु निम्मलवरवारिधाराप(ग)यलियपयंडमारुयस-
 माह्यसमोत्थरंतउवरिउवरितुरियवासं पवासिएसु धारापहकरनिवायनिव्वावि(य)यं
 मेइणितले हरिय(ग)गणकंचुए पल्लविय पायवगणेसु वल्लिवियाणेसु पसरिएसु उच्चएसु
 सोहग्गमुवागएसु (नगेसु नएसु वा) वेभारगिरिप्पवायतडकडगविमुक्केसु उज्झरेसु
 तुरियपहावियपल्लोइफेणाउलं सकलुसं जलं वहंतीसु गिरिनईसु सज्जज्जुणनीवकुडय-
 कंदलसिलिंधकलिएसु उववणेसु मेहरसियहट्टतुट्टचिट्टियहरिसवसपमुक्ककंठकेकारवं
 सुयंतेसु बरहिणेसु उउवसमयजणियतरुणसहयरिपणच्चिएसु नवसुरभिसिलिंधकुडय-
 कंदलकलंबगंधद्धणिं सुयंतेसु उववणेसु परहुयरुयरिभियसंकुलेसु उद्दा(यं)इंतरत्त-
 इंदगोवयथोवयकासुण्णविलविएसु उच्च(ओग)यतणमंडिएसु दहुरपयंपिएसु संपिडिय-
 दरियभमरमहुयरिपहकरपरिलित्तमतल्लप्पयकुसुमासवलोलमहुरजंतदेसभाएसु उवव-
 णेसु परिसामियचंदसूरगहृगणपणद्वनक्खत्ततारगपहे इंदउहवद्धचिंधपटंसि अंबरतले
 उड्डीणवलागपंतिसोहंतमेहविन्दे कारंडगचक्कवायकलहंसउस्सुयकरे संपत्ते पाउसंमि
 काले ण्हायाओ किं ते वरपायपत्तनेउरमणिमेहलहारइयउ(व)चियकडगखुडुय-
 विचित्तवरवलयथंभियभुयाओ कुंडलउज्जोविधाणणाओ रयणभूसियं(गा)गीओ
 नासानीसासवायवोउच्चं चक्खुहरं वण्णफरिससंजुतं हयलालपेलवाइरेयं धवलकण-
 यखचियंतकम्मं आगासफलिहसरिसप्पभं अंडुर्यं पवरपरिहियाओ दुगुल्लसुकुमाल-
 उत्तरिजाओ सव्वोउयसुरभिकुसुमपवरमल्लसोहियसिराओ कालागरु(पवर)ध्रुवध्रुवियाओ
 सिरीसमाणवेसाओ सेयणयगंधहत्थिरयणं दुल्लाओ समाणीओ सकोरंटमल्लदामेणं

छत्तेण धरिज्जमाणेणं चंदप्पभवइरवेसलियविमलदंडसंखलुंददगरयअमयमहियफेण-
 पुंजसन्निगासच्चउचामरवालवीजियंगीओ सेणिएणं रत्ता सद्धिं हत्थिखंधवरगएणं
 पिट्ठओ (२) समणुगच्छमाणीओ चाउरंगिणीए सेणाए महया हयाणीएणं गयाणीएणं
 रहाणीएणं पायत्ताणीएणं सव्विद्धीए सव्वज्जुईए जाव निग्घोसनाइयरवेणं रायगिहं
 नयरं सिंघाडगति(य)गच्चउक्कच्चरचउम्मुहमहापहपहेसु आसित्तसित्तसु(चि)इयसंम-
 जिओवलित्तं जाव सुगंधवरगंधियं गंधवट्ठिभूयं अवलोएमाणीओ नागरज्जेणं अभिन्नं-
 दिज्जमाणीओ गुच्छलयासक्खगुम्मवल्लिगुच्छओच्छाइयं सुरम्मं वेभारगिरिकडगपाय-
 मूलं सव्वओ समंता आहिंडेमाणीओ २ दोहलं वि(णि)णयंति । तं जइ णं अहमवि
 मेहेसु अब्भु(व)ग्गएसु जाव दोहलं विणिज्जामि ॥१३॥ तए णं सा धारिणी देवी तंसि
 डोहलंसि अविणिज्जमाणंसि असंप(ण्ण)त्तदोहला असंपुण्णदोहला असंमाणियदोहला
 सुक्का भुक्खा निम्मंसा ओलुग्गा ओलुग्गसरीरा पमइलदुब्बला किलंता ओमंथियवयण-
 नयणकमला पंडुइयसुद्धी करयलमलियव्व चंपगमाला नित्तेया दीणविवणवयणा जहो-
 चियपुप्फगंधमल्लालंकारहारं अणभिलसमाणी कीडारमणकिरियं च परिहावेमाणी दीणा
 दुम्मणा निराणंदा भूमिगयदिट्ठीया ओहयमणसंकप्पा जाव झिया(य)इ । तए णं तीसे
 धारिणीए देवीए अंगपडियारियाओ अब्भितरियाओ दासचेडियाओ धारिणिं देविं
 ओलुग्गं जाव झियायमाणिं पासंति २ ता एवं वयासी-किन्नं तुमे देवाणुप्पिए ! ओलुग्गा
 ओलुग्गसरीरा जाव झियायसि ?, तए णं सा धारिणी देवी ताहिं अंगपडियारियाहिं
 अब्भितरियाहिं दासचेडियाहिं(य) एवं वुत्ता समाणी ताओ (दास)-चेडियाओ नो
 आढाइ नो(य) परियाणाइ अणाढायमाणी अपरियाणमाणी तुसिणीया संचिट्ठइ । तए णं
 ताओ अंगपडियारियाओ अब्भितरियाओ दासचे(डी)डियाओ धारिणिं देविं दोच्चंपि
 तच्चंपि एवं वयासी-किन्नं तुमे देवाणुप्पिए ! ओलुग्गा ओलुग्गसरीरा जाव झियायसि ?,
 तए णं सा धारिणी देवी ताहिं अंगपडियारियाहिं अब्भितरियाहिं (य) दासचे(डी)-
 डियाहिं दोच्चंपि तच्चंपि एवं वुत्ता समाणी नो आढाइ नो परियाणाइ अणाढायमाणी
 अपरियाणमाणी तुसिणीया संचिट्ठइ । तए णं ताओ अंगपडियारियाओ अब्भित-
 रियाओ दासचेडियाओ (य)धारिणीए देवीए अणाढाइज्जमाणीओ अपरि(याण)जा-
 णिज्जमाणीओ तहेव संभंताओ समाणीओ धारिणीए देवीए अंतियाओ पडिनिक्खमंति
 २ ता जेणेव सेणिए राया तेणेव उवागच्छंति २ ता करयलपरिग्गहियं जाव कट्ठु
 जएणं विजएणं वद्धावेंति २ ता एवं वयासी-एवं खलु सामी ! किंपि अज्ज धारिणी देवी
 ओलुग्गा ओलुग्गसरीरा जाव अट्ठज्झाणोवगया झियायइ । तए णं से सेणिए राया तासिं
 अंगपडियारियाणं अंतिए एयमट्ठं सोच्चा निसम्म तहेव संभंते समाणे सिग्घं तुरियं

चवलं वेइयं जेणेव धारिणी देवी तेणेव उवागच्छइ २ ता धारिणिं देविं ओलुग्गं ओलु-
ग्गसरिरीं जाव अट्टज्झाणोवगयं झियायमाणं पासइ २ ता एवं वयासी-किञ्च तु(मे)मं
देवाणुप्पिए ! ओलुग्गा ओलुग्गसरिरीं जाव अट्टज्झाणोवगया झियायसि ?, तए णं सा
धारिणी देवी सेणिएणं रत्ता एवं वुत्ता समाणी नो आढाइ जाव तुसिणीया संचिट्ठइ ।
तए णं से सेणिए राया धारि(णीं)णिं दे(वीं)विं दोच्चंपि तच्चंपि एवं वयासी-किञ्च तुमं
देवाणुप्पिए ! ओलुग्गा जाव झियायसि ?, तए णं सा धारिणी देवी सेणिएणं रत्ता
दोच्चंपि तच्चंपि एवं वुत्ता समाणी नो आढाइ नो परिजाणाइ तुसिणीया संचिट्ठइ । तए
णं से सेणिए राया धारिणिं देविं सवहसावियं करेइ २ ता एवं वयासी-किं णं तुमं
देवाणुप्पिए ! अहमेयस्स अट्टस्स अणरिहे सवणयाए ता णं तुमं ममं अयमेयारुवं
मणोमाणसियं दुक्खं रहस्सीकरेसि ? । तए णं सा धारिणी देवी सेणिएणं रत्ता
सवहसाविया समाणी सेणियं रायं एवं वयासी-एवं खलु सामी ! मम तस्स उरा-
लस्स जाव महासुमिणस्स तिण्हं मासाणं बहुपडिपुण्णाणं अयमेयारुवे अकालमेहेसु
डोहले पाउब्भूए—धन्नाओ णं ताओ अम्मयाओ कयत्थाओ णं ताओ अम्मयाओ
जाव वेभारगिरिपायमूलं आहिंढमाणीओ दोहलं विणिंति, तं जइ णं अहमवि जाव
दोहलं विणिज्जामि । तए णं हं सामी ! अयमेयारुवंसि अकालदोहलंसि अविणिज्जमाणंसि
ओलुग्गा जाव अट्टज्झाणोवगया झियायामि । एएणं अहं कारणेणं सामी ! ओलुग्गा
जाव अट्टज्झाणोवगया झियायामि । तए णं से सेणिए राया धारिणीए देवीए अंतिए
एयमट्ठं सोच्चा निसम्म धारिणिं देविं एवं वयासी-मा णं तुमं देवाणुप्पिए ! ओलुग्गा
जाव झियाहि, अहं णं तहा करिस्सामि जहा णं तुब्भं अयमेयारुवस्स अकाल-
दोहलस्स मणोरहसंपत्ती भविस्सइ-त्तिकट्ठु धारिणिं देविं इट्ठाहिं कंताहिं पियाहिं
मणुच्चाहिं मणामाहिं वग्गूहिं समासासेइ २ ता जेणेव बाहिरिया उवट्ठाणसाला तेणामेव
उवागच्छइ २ ता सीहासणवरगए पुरत्थाभिमुहे सच्चिसण्णे धारिणीए देवीए एयं
अकालदोहलं वट्ठहिं आएहि य उवाएहि य उप्पत्तियाहि य वेणइयाहि य कम्मि-
याहि य पा(प)रिणामियाहि य चउव्विहाहिं बुद्धीहिं अणुत्तिंतेमाणे २ तस्स दोहलस्स
आयं वा उवायं वा ठिडं वा उप्पत्तिं वा अविंदमाणे ओहयमणसंकप्पे जाव झियायइ
॥ १४ ॥ तयाणंतरं च णं अभए कुमारे ण्हाए सव्वालंकारविभूसिए पायवंदए पहारेत्थ
गमणाए । तए णं से अभयकुमारे जेणेव सेणिए राया तेणेव उवागच्छइ २ ता सेणियं
रायं ओहयमणसंकप्पं जाव झियायमाणं पासइ २ ता अयमेयारुवे अ(ब्भ)ज्झत्थिए
चित्तिए पत्थिए मणोगए संकप्पे समुप्पज्जित्था-अन्नया(य)ममं सेणिए राया एज्जमाणं
पासइ पासित्ता आढाइ परिजाणाइ सक्कारेइ सम्माणेइ आलवइ संलवइ अट्ठासणेणं

उवनिमंतेइ मत्थयंसि अग्घाइ । इयाणिं ममं सेणिए राया नो आढाइ नो परियाणइ
नो सक्कारेइ नो सम्माणेइ नो इट्ठाहिं कंताहिं पियाहिं मणुत्ताहिं ओरालाहिं वग्गूहिं
आलवइ संलवइ नो अद्दासणेणं उवनिमंतेइ नो मत्थयंसि अग्घा(य)इ(य) किंपि
ओहयमणसंकप्पे झियायइ । तं भवियव्वं णं एत्थ कारणेणं । तं सेयं खलु(मे) ममं
सेणियं रायं एयमट्ठं पुच्छित्तए । एवं संपेहेइ २ ता जेणामेव सेणिए राया तेणामेव
उवागच्छइ २ ता करयलपरिग्गहियं सिरसावत्तं मत्थए अंजलिं कट्ठु जएणं विजएणं
वद्धावेइ २ ता एवं वयासी-तुब्भे णं ताओ ! अन्नया ममं एज्जमाणं पासित्ता आढाह
परिजाणह जाव मत्थयंसि अग्घायह आसणेणं उवनिमंतेह, इयाणिं ताओ ! तुब्भे
ममं नो आढाह जाव नो आसणेणं उवनिमंतेह किंपि ओहयमणसंकप्पा जाव
झियायह, तं भवियव्वं ताओ ! एत्थ कारणेणं, तओ तुब्भे म(म)मं ताओ ! एयं कारणं
अग्गूहेमाणा असंकेमाणा अनिण्हवेमाणा अपच्छाएमाणा जहाभूयमवितहमसंदिद्धं
एयमट्ठं आइक्खह । तए णं हं तस्स कारणस्स अंतगमणं गमिस्सामि । तए णं
से सेणिए राया अभएणं कुमारेणं एवं वुत्ते समाणे अभयकुमारं एवं वयासी-एवं
खलु पुत्ता ! तव चुल्लमाउयाए धारिणीए देवीए तस्स गब्भस्स दोसु मासेसु अइकंतेसु
तइयमासे वट्ठमाणे दोहलकालसमयंसि अयमेयारूवे दोहले पाउब्भवित्था-वन्नाओ
णं ताओ अम्मयाओ तहेव निरवसेसं भाणियव्वं जाव विणिति । तए णं अहं पुत्ता !
धारिणीए देवीए तस्स अकालदोहलस्स बट्ठहिं आएहि य उवाएहिं जाव उप्पत्तिं
अविंदमाणे ओहयमणसंकप्पे जाव झियायामि तुमं आगयंपि न याणामि, तं एएणं
कारणेणं अहं पुत्ता ! ओहयमणसंकप्पे जाव झियामि । तए णं से अभए कुमारे
सेणियस्स रण्णो अंतिए एयमट्ठं सोच्चा निसम्म हट्ठ जाव हियए सेणियं रायं एवं
वयासी-मा णं तुब्भे ताओ ! ओहयमणसंकप्पा जाव झियायह । अहं णं तहा
करिस्सामि जहा णं मम चुल्लमाउयाए धारिणीए देवीए अयमेयारूवस्स अकालडो-
हलस्स मणोरहसंपत्ती भविस्सइ-त्तिकट्ठु सेणियं रायं ताहिं इट्ठाहिं कंताहिं जाव
समासासेइ । तए णं सेणिए राया अभएणं कुमारेणं एवं वुत्ते समाणे हट्ठतुट्ठे
जाव अभयं कुमारं सक्कारेइ सम्माणेइ सक्कारित्ता सम्माणित्ता पडिविसज्जेइ ॥ १५ ॥
तए णं से अभए कुमारे सक्कारिए सम्माणिए पडिविसज्जिए समाणे सेणियस्स रण्णो
अंतियाओ पडिनिक्खमइ २ ता जेणामेव सए भवणे तेणामेव उवागच्छइ २ ता
सीहासणे निसण्णे । तए णं तस्स अभयकुमारस्स अयमेयारूवे अज्झत्थिए जाव
समुप्पज्जित्था-नो खलु सक्का माणुस्सएणं उवाएणं मम चुल्लमाउयाए धारिणीए
देवीए अकालडोहलमणोरहसंपत्तिं करित्तए नन्नत्थ दिव्वेणं उवाएणं । अत्थि णं

मज्झ सोहम्मकप्पवासी पुव्वसंगइए देवे महिण्हिए जाव महासोकखे । तं सेयं खलु मम पोसहसालाए पोसहियस्स बंभयारिस्स उम्मुक्कमणिसुवण्णस्स ववगय-
मालावण्णगविळेवण्णस्स निक्खित्तसत्थमुसलस्स एगस्स अवीयस्स दब्भसंथारोवग-
यस्स अट्टमभत्तं प(रि)णिण्हिता पुव्वसंगइयं देवं मण(सि)सीकरेमाणस्स विहरितए ।
तए णं पुव्वसंगइए देवे मम चुल्लमाउयाए धारिणीए देवीए अयमेयारू(वे)वं अकाल-
मेहेसु डोहलं विणेहिइ । एवं संपेहेइ २ ता जेणेव पोसहसाला तेणामेव उवागच्छइ
२ ता पोसहसालं पमज्जइ २ ता उच्चारपासवणभूमिं पडिलेहेइ २ ता दब्भसंथारं
पडिलेहेइ २ ता दब्भसंथारं दुरुहइ २ ता अट्टमभत्तं पणिण्हइ २ ता
पोसहसालाए पोसहिए बंभयारी जाव पुव्वसंगइयं देवं मणसीकरेमाणे २ चिट्ठइ ।
तए णं तस्स अभयकुमारस्स अट्टमभत्ते परिणममाणे पुव्वसंगइयस्स देवस्स आसणं
चलइ । तए णं पुव्वसंगइए सोहम्मकप्पवासी देवे आसणं चलिंयं पासइ २ ता
ओहिं पजंजइ । तए णं तस्स पुव्वसंगइयस्स देवस्स अयमेयारूवे अज्झत्थिए जाव
समुप्पजित्था-एवं खलु मम पुव्वसंगइए जंबुद्वीवे २ भारहे वासे दाहिणद्धमरहे
रायणिहे नयरे पोसहसालाए पोसहिए अभए नामं कुमारे अट्टमभत्तं पणिण्हिता
णं मम मणसीकरेमाणे २ चिट्ठइ । तं सेयं खलु मम अभयस्स कुमारस्स अंतिए
पाउब्भवित्तए । एवं संपेहेइ २ ता उत्तरपुरच्छिमं दिसीभागं अवक्कमइ २ ता
वेउव्वियसमुग्धाएणं समोहणइ २ ता संखेजाइं जौयणाइं दंडं निसिरइ । तंजहा-
रयणाणं वयराणं वेहलियाणं लोहियक्खाणं मसारगळाणं हंसगन्धाणं पुलगाणं
सोमंधियाणं जोइरसाणं अंकाणं अंजणाणं रयणाणं जायरूवाणं अंजणपुलगाणं फलि-
हाणं रिट्ठाणं अहाबायरे पोगगले परिसाडेइ २ ता अहासुहुमे पोगगले परिणिण्हइ २
ता अभयकुमारमणुकंपमाणे देवे पुव्वभवजणियनेहुपीइबहुमाणजायसोणे तओ विमा-
णवरपुंडरीयाओ रयणुत्तमाओ धरणियलगमणतुरियसंजणियगमणपया(रो)रे वावुणि-
यविमलकणगपयरगवडिंसगमउडउक्कडाडोवदंसणि(जो)जे अणेगमणिक्कणगरयणपह-
करपरिमंडियमत्तिचित्तविणि उत्त(मणुगुण)गमणगजणियहरिसे पेंखोलमाणवरललियकुं-
डलुजलियवयणगुणजणियसोमरूवे उदिओ विव कोमुदीनिसाए सणिच्छरंगारकुज्ज-
लियमज्झभागत्थे नयणाणं(दो)दे सरयचंदे दिव्वोसहिपज्जलुजलियदंसणाभिरा(मो)मे
उउलच्छिसमतजायसोहे पडट्ठगंधुल्लुयाभिरामे मेरुरिव नगव(रो)रे विउव्वियवित्त-
वेसे दीवसमुदाणं असंखपरिमाणनामधेज्जाणं मज्झयारेणं वीइवयमा(णो)णे उज्जोयंतो
पभाए विमलाए जीवलोयं रायणिहं पुरवरं च अभयस्स (य तस्स) पासं ओवयइ
दिव्वरूवधारी ॥ १६ ॥ तए णं से देवे अंतलिवक्खपडिवक्खे दसद्धवणाइं सखि-

खिणियाईं पवरवत्थाईं परिहिए । एक्को ताव एसो गमो । अन्नोऽवि गमो-ताए उक्किट्ठाए तुरियाए चवलाए चंडाए सीहाए उड्डयाए ज(इ)यणाए छेयाए दिव्वाए देवगईए जेणामेव जंबुद्दीवे २ भारहे वासे जेणामेव दाहिणद्धभरहे रायगिहे नयरे पोसहसालाए अभए कुमारे तेणामेव उवागच्छइ २ ता अंत(रि)लिकखपडिवन्ने दसद्धवण्णाईं सखिखिणियाईं पवरवत्थाईं परिहिए अभयं कुमारं एवं वयासी-अहं णं देवाणुप्पिया ! पुव्वसंगइए सोहम्मकप्पवासी देवे महहििए जं णं तुमं पोसहसालाए अट्टमभत्तं पणिहिंत्ता णं ममं मणसीकरेमाणे चिट्ठसि, तं एस णं देवाणुप्पिया ! अहं इहं हव्वमागए । संदिसाहि णं देवाणुप्पिया ! किं करेमि किं दलामि किं पयच्छामि किं वा ते हियइच्छियं ? । तए णं से अभए कुमारे तं पुव्व-संगइयं देवं अंतलिकखपडिवन्ने पासइ २ ता हट्ठतुट्ठे पोसहं पारेइ २ ता करयल जाव अंजलिं कट्ठु एवं वयासी-एवं खलु देवाणुप्पिया ! मम चुल्लमाउयाए धारिणीए देवीए अयमेयारूवे अकालडोहले पाउब्भूए-धन्नाओ णं ताओ अम्मयाओ तहेव पुव्वगमेणं जाव विणिज्जामि । तं णं तुमं देवाणुप्पिया ! मम चुल्लमाउयाए धारिणीए देवीए अयमेयारूवं अकालडोहलं विणेहि । तए णं से देवे अभएणं कुमारेणं एवं वुत्ते समाणे हट्ठतुट्ठे अभयं कुमारं एवं वयासी-तुमं णं देवाणुप्पिया ! सुनिव्वुयवीसत्थे अच्छाहि, अहं णं तव चुल्लमाउयाए धारिणीए देवीए अयमेयारूवं डोहलं विणेमि-त्तिकट्ठु अभयस्स कुमारस्स अंतियाओ पडिनिक्खमइ २ ता उत्तरपुरच्छिमे णं वेभारप-व्वए वेउव्वियसमुग्घाएणं समोहणइ २ ता संखेज्जाईं जोयणाईं दंडं निस्सरइ जाव दोच्चपि वेउव्वियसमुग्घाएणं समोहणइ २ ता खिप्पामेव सगज्जइयं सविज्जुयं सफुसियं (तं) पंचवण्णमेहणिणाओवसोहियं दिव्वं पाउससिरिं विउव्वइ २ ता जेणेव अभए कुमारे तेणेव उवागच्छइ २ ता अभयं कुमारं एवं वयासी-एवं खलु देवाणुप्पिया ! मए तव पियट्ठयाए सगज्जिया सफुसिया सविज्जुया दिव्वा पाउससिरी विउव्विया, तं विणेउ णं देवाणुप्पिया ! तव चुल्लमाउया धारिणी देवी अयमेयारूवं अकाल(मेह)डोहलं । तए णं से अभए कुमारे तस्स पुव्वसंगइयस्स सोहम्मकप्पवासिस्स देवस्स अंतिए एयमट्ठं सोच्चा निसम्म हट्ठतुट्ठे सयाओ भवणाओ पडिनिक्खमइ २ ता जेणामेव सेणिए राया तेणामेव उवागच्छइ २ ता करयल जाव अंजलिं कट्ठु एवं वयासी-एवं खलु ताओ ! मम पुव्वसंगइएण सोहम्मकप्पवासिणा देवेणं खिप्पामेव सगज्जियसविज्जुय- (सफुसियं) पंचवण्णमेहणिणाओवसोभिया दिव्वा पाउससिरी विउव्विया । तं विणेउ णं मम चुल्लमाउया धारिणी देवी अकालडोहलं । तए णं से सेणिए राया अभयस्स कुमारस्स अंतिए एयमट्ठं सोच्चा निसम्म हट्ठतुट्ठ जाव कोडुंबियपुरिसे सदावेइ

२ ता एवं वयासी-खिप्पामेव भो देवाणुप्पिया ! रायगिहं नयरे सिंघाडगति-
गचउक्कचच्चर०आसित्तसित्त जाव सुगंधवरगंधियं गंधवट्ठिभूयं करेह य कारवेह य
करित्ता य करावित्ता य मम एयमाणत्तियं पच्चप्पिणह । तए णं ते कोडुंबियपुरिसा
जाव पच्चप्पिणंति । तए णं से सेणिए राया दोच्चं पि कोडुंबियपुरिसे सदावेइ २ ता
एवं वयासी-खिप्पामेव भो देवाणुप्पिया ! हयगयरहजोहपवरकलियं चाउरंगिणि
से(ण्णं)णं सच्चाहेह सेयणयं च गंधहत्थि परिकप्पेह । तेवि तहेव जाव पच्चप्पिणंति ।
तए णं से सेणिए राया जेणेव धारिणी देवी तेणामेव उवागच्छइ २ ता
धारिणिं देवि एवं वयासी-एवं खलु देवाणुप्पिए ! सगज्जिया जाव पाउससिरी
पाउब्भूया, तं णं तुमं देवाणुप्पिए ! एयं अकालदोहलं विणेहि । तए णं
सा धारिणी देवी सेणिएणं रत्ता एवं वुत्ता समाणी हट्ठवुट्ठा जेणामेव
मज्जणधरे तेणेव उवागच्छइ २ ता मज्जणधरं अणुप्पविसइ २ ता अंतो अंतेउ-
रंसि प्हाया किं ते वरपायपत्तनेउर जाव आगासफालियसमप्पभं अंशुयं नियत्था
सेयणयं गंधहत्थि दुरूढा समाणी अमयमहियफेणुपुंजसन्निगासाहिं सेयचामरवाल-
वीयणीहिं वीइज्जमाणी २ संपत्थिया । तए णं से सेणिए राया प्हाए सस्सिरीए
हत्थिखंधवरगए सकोरंटेमल्लदामेणं छत्तेणं धरिज्जमाणेणं चउचामराहिं वीइज्जमाणे
धारिणीदेवीं पिट्ठओ अणुगच्छइ । तए णं सा धारिणी देवी सेणिएणं रत्ता हत्थिखं-
धवरगएणं पिट्ठओ २ समणुगम्ममाणमग्गा हयगयरहजोहकलियाए चाउरंगिणीए
सेणाए सद्धिं संपरिवु(ए)डा महया भडचंडगरवंदपरिक्खित्ता सच्चिद्धीए सव्वज्जुइए
जाव हुंदुभिनिग्घोसनाइयरवेणं रायगिहे नयरे सिंघाडगतिगचउक्कचच्चर जाव महा-
पहेसु नागरजणेणं अभिनंदिज्जमा(णा)णी २ जेणामेव वेभारगिरिपव्वए तेणामेव
उवागच्छइ २ ता वेभारगिरिकडगतडपायमूले आरामेसु य उज्जाणेषु य काणणेषु य
वणेषु य वणसंडेषु य रुक्खेषु य गुच्छेषु य गुम्मेसु य लयासु य वल्लीसु य कंदरासु
य दरीसु य चुण्डीसु य दहेसु य कच्छेषु य नईसु य संगमेसु य विवरएसु य
अच्छमाणी य पेच्छमाणी य मज्जमाणी य पत्ताणि य पुप्फाणि य फलाणि य
पल्लवाणि य गिण्हमाणी य माणेमाणी य अग्घायमाणी य परिभुंजमाणी य परि-
भाएमाणी य वेभारगिरिपायमूले दोहलं विणेमाणी सव्वओ समंता आहिंडइ ।
तए णं सा धारिणी देवी (तंसि अकालदोहलंसि विणीयंसि सम्माणियदोहला) विणी-
यदोहला संपुण्णदोहला संपन्नदोहला जाया यावि होत्था । तए णं सा धारिणी देवी
सेयणयंगंधहत्थि दुरूढा समाणी सेणिएणं हत्थिखंधवरगएणं पिट्ठओ २ समणुग-
म्ममाणमग्गा हयगय जाव र(हे)वेणं जेणेव रायगिहे नयरे तेणेव उवागच्छइ २ ता

रायगिहं नयरं मज्झमज्जेणं जेणामेव सए भवणे तेणामेव उवागच्छइ २ ता
 विउलाइं माणुस्सगाइं भोगभोगाइं जाव विहरइ ॥ १७ ॥ तए णं से अभए
 कुमारे जेणामेव पोसहसाला तेणामेव उवागच्छइ २ ता पुव्वसंगइयं देवं सक्कारेइ
 सम्माणेइ स० २ ता पडिविसजेइ । तए णं से देवे सगज्जियं पंचवण्णमेहोवसोहियं
 दिव्वं पाउससिरिं पडिसाहरइ २ ता जामेव दिसिं पाउब्भूए तामेव दिसिं
 पडिगए ॥ १८ ॥ तए णं सा धारिणी देवी तंसि अकालदोहलंसि विणीयंसि
 सम्माणियडोहला तस्स गब्भस्स अणुकंपणट्ठाए जयं चिट्ठइ जयं आस(य)इ जयं सुवइ
 आहारं पि य णं आहारेमाणी नाइतितं नाइकडुयं नाइकसायं नाइअंबिलं नाइमहुरं
 जं तस्स गब्भस्स हियं मियं पत्थयं देसे य काले य आहारं आहारेमाणी नाइचितं
 नाइसोगं (णाइदेण्णं) नाइमोहं नाइभयं नाइपरित्तासं ववगयचित्तासोयमोहभयपरित्तासा
 उउभयमाणसुहेहिं भोयणच्छायणगंधमल्लालंकारेहिं तं गब्भं सुहंसुहेणं परिवहइ
 ॥ १९ ॥ तए णं सा धारिणी देवी नवण्हं मासाणं बहुपडिपुण्णानं अद्धट्ठमाण य
 राइदियाणं वीइकंताणं अद्धरत्तकालसमयंसि सुकुमालपाणिपायं जाव सव्वंगसुंदरं(गं)
 दारगं पयाया । तए णं ताओ अंगपडियारियाओ धारिणिं देविं नवण्हं मासाणं
 जाव दारगं पयायं पासंति २ ता सिरयं तुरियं चवलं वेइयं जेणेव सेणिए राया तेणेव
 उवागच्छंति २ ता सेणियं रायं जएणं विजएणं वद्धवैति २ ता करयलपरिगहियं
 सिरसावत्तं मत्थए अंजलिं कट्टु एवं वयासी-एवं खलु देवाणुप्पिया । धारिणी देवी
 नवण्हं मासाणं जाव दारगं पयाया, तं णं अग्गे देवाणुप्पियाणं पियं निवेएमो पियं
 भे भवउ । तए णं से सेणिए राया तासिं अंगपडियारियाणं अंतिए एयमट्ठं सोच्चा
 निसम्म हट्ठुट्ठ० ताओ अंगपडियारियाओ महुरेहिं वयणेहिं विउलेण य पुप्फगंधम-
 ल्लालंकारेणं सक्कारेइ सम्माणेइ स० २ ता मत्थयधोयाओ करेइ पुत्ताणुपुत्तियं विंतिं
 कप्पेइ २ ता पडिविसजेइ । तए णं से सेणिए राया (पच्चसकालसमयंसि) कोडुंविउपुरिसे
 सदावेइ २ ता एवं वयासी-खिप्पामेव भो देवाणुप्पिया । रायगिहं नयरं आसिय जाव
 परिगीयं करेह २ ता चारगपरिसोहणं करेह २ ता माणुग्माणवद्धणं करेह २ ता एयमा-
 णत्तियं पच्चप्पिणह जाव पच्चप्पिणंति । तए णं से सेणिए राया अट्टारससेणिएप्पसेणीओ
 सदावेइ २ ता एवं वयासी-गच्छह णं तुब्भे देवाणुप्पिया ! रायगिहे नयरं अब्भितर-
 बाहिरिए उस्सुकं उक्करं अभडप्पवेसं अ(डं)दंडिमकुदंडिमं अधरिमं आधारिणजं अणु-
 द्धुयमुइंगं अमिलायमल्लदामं गणियावरनाडइज्जकलियं अणेगतालायराणुचरियं पमु-
 इयपक्कीलियाभिरामं जहारिहं ठिइवडियं दसदिवसियं करेह २ ता एयमाणत्तियं पच्च-
 प्पिणह तेवि करेति (२) तहेव पच्चप्पिणंति । तए णं से सेणिए राया बाहिरियाए

उवट्ठाणसालाए सीहासणवरगए पुरत्याभिमुहे सन्निसण्णे स(य)इएहि य साहस्सिएहि
य सयसाहस्सिएहि य जाए(हिं)हि य दाएहि य भाएहि य दलयमाणे २ पडिच्छेमाणे
२ एवं च णं विहरइ । तए णं तस्स अम्मापियरो पढमे दिवसे जायकम्मं करेति २ ता
विइयदिवसे जागरियं करेति २ ता तइए दिवसे चंदसूरदंसणियं करेति २ ता एवामेव
निव्वत्ते असुइजायकम्मकरणे संपत्ते बारसाहदिवसे विपुलं असणं पाणं खाइमं साइमं
उवक्खडावैति २ ता मित्तनाइनियगसयणसंबंधिपरिजणं बलं च बहवे गणनायगदंड-
नायग जाव आमंतैति तओ पच्छा ण्हाया सव्वालंकारविभूसिया महइमहालयंसि
भोयणमंडवंसि तं विपुलं असणं पाणं खाइमं साइमं मित्तनाइ० गणनायग जाव सद्धिं
आसाएमाणा विसाएमाणा परिभाएमाणा परिभुंजेमाणा एवं च णं विहरंति जिमिय-
भुत्तुरागयावि य णं समाणा आर्यता चोक्खा परमसुइभूया तं मित्तनाइनियगसयण-
संबंधिपरियणं बलं च बहवे गणनायग जाव विपुलेणं पुप्फवत्थगंधमल्लालंकारेणं सका-
रेति सम्माणेति स० २ ता एवं वयासी-जम्हा णं अम्हं इमस्स दारगस्स गब्भत्थस्स
चेव समाणस्स अकालमेहेसु डोहले पाउभूए तं होउ णं अम्हं दारए मेहे नामेणं
मे(हुकुमारे)हे । तस्स दारगस्स अम्मापियरो अयमेयारुवं गोणं गुणनिष्कणं नामधेज्जं
करेति मेहेइ । तए णं से मेहे कुमारे पंचधाईपरिगगहिए तंजहा-खीरधाईए मंडण-
धाईए मज्जणधाईए कीलावणधाईए अंकधाईए अन्नाहि य बहूहिं खुज्जाहिं चिलाइयाहिं
वामणिवडभिवब्बरिवउसिजोणि(याहिं)यपल्हवियईसिणि(य)धोरु(णि)गिणिलासियल-
उसियदमिलिसिंहलिआरविपुलिदिपक्कणिबहलिपुंढिसबरिपारसीहिं नानादेसीहिं विदे-
सपरिमंडियाहिं इंगियच्चितियपत्थियवियाणियाहिं सदेसनेवत्थगहियवेसाहिं निउण-
कुसलाहिं विणीयाहिं चेडियाचक्कवालवरिसधरकंचुइज्जमहयरगवंदपरिक्खिते हत्थाओ
हत्थं सा(सं)हरिज्जमाणे अंकाओ अंकं परिभुज्जमाणे परिगिज्जमाणे उवला(चा)लिज्जमाणे
रम्मंसि मणिक्कोट्टिमतलंसि परिमिज्जमाणे २ निव्वायनिव्वाधायंसि गिरिकंदरमल्लीणव
चंपगपायवे सुहंसुहेणं वड्डइ । तए णं तस्स मेहस्स कुमारस्स अम्मापियरो
अणुपुव्वेणं नामकरणं च पजेमणगं च एवं चंकमणगं च चोलेवणयं च महया २
इद्धीसकारसमुदएणं करिंसु । तए णं तं मेहं कुमारं अम्मापियरो साइरेगट्ठावासजायगं
चेव गब्भट्ठमे वासे सोहणंसि तिहिकरणमुहुत्तंसि कलायरियस्स उव्वेणंति । तए णं
से कलायरिए मेहं कुमारं लेहाइयाओ गणियप्पहाणाओ सउणरुयपज्जवसाणाओ
बावत्तरिं कलाओ सुत्ताओ य अत्थओ य करणओ य सेहावेइ सिक्खावेइ तंजहा-लेहं
गणियं रुवं नट्टं गीयं वाइयं सरगयं पोक्खरगयं समतालं जूयं जणवायं पासयं
अट्ठावयं पोरेकच्चं दगमट्ठियं अन्नविहिं पाणविहिं वत्थविहिं विळेवणविहिं सयणविहिं

अजं पहेलियं मागहियं गाहं गीइयं सिलोयं हिरण्णजुत्तिं सुवण्णजुत्तिं चुण्णजुत्तिं आभर-
णविहिं तरुणीपडिकम्मं इत्थिलक्खणं पुरिसलक्खणं हयलक्खणं गयलक्खणं गोणल-
क्खणं कुकुडलक्खणं छत्तलक्खणं दंडलक्खणं असिलक्खणं मणिलक्खणं का(ग)गि-
णिलक्खणं वत्थुविज्जं खंधारमाणं नगरमाणं वूहं पडिवूहं चारं पडिचारं चक्कवूहं गरुलवूहं
सगडवूहं जुद्धं निजुद्धं जुद्धाइजुद्धं लट्ठिजुद्धं मुट्ठिजुद्धं बाहुजुद्धं लयाजुद्धं ईसत्थं
छरुप्पवायं धणुव्वेयं हिरण्णपागं सुवण्णपागं सुत्तखेडं वट्टखेडं नालियाखेडं पत्तच्छेज्जं
कड(ग)च्छेज्जं सज्जीवं निज्जीवं सउणरुयं ति ॥ २० ॥ तए णं से कलायरिए मेहं
कुमारं लेहाइयाओ गणियप्पहाणाओ सउणरुयपज्जवसाणाओ बावत्तरि कलाओ सुत्तओ
य अत्थओ य करणओ य सेहावेइ सिक्खावेइ सेहावित्ता सिक्खावित्ता अम्मापिउणं
उवणेइ। तए णं मेहस्स कुमारस्स अम्मापियरो तं कलायरियं महुरेहिं वयणेहिं
विउलेणं वत्थगंधमल्लालंकारेणं सक्कारेंति सम्माणेति स० २ ता विउलं जीवियारिहं
पीइदाणं दलयंति २ ता पडिविसज्जेति ॥ २१ ॥ तए णं से मेहे कुमारं बावत्तरिकला-
पंडिए नवंगसुत्तपडिबोहिए अट्टारसविहिप्पगारदेसीभासाविसारए गी(इरई)यरइय-
गंधव्वनट्टकुसले हयजोही गयजोही रहजोही बाहुजोही बाहुप्पमदी अलंभोगसमत्थे
साहसिए वियालचारी जाए यावि होत्था ॥ २२ ॥ तए णं तस्स मेहकुमारस्स अम्मापियरो
मेहं कुमारं बावत्तरिकलापंडियं जाव वियालचारिं जायं पासंति २ ता अट्ठ पासाय-
वडिंसए का(क)रेंति अब्भुग्गयमूसियपहसिए विव मणिकणगरयणभत्तिचित्ते वाउडुय-
विजयवेजयंती पडागाछताइच्छत्तकलिए तुंगे गगणतलमभिलंघमाणसिहरे जालंतर-
रयणपंजरुम्मिद्धि(य)एव्व मणिकणगथूभियाए वियसियसयपत्तपुंडरीए तिलयरयण-
द्ध(य)चंदच्चिए नानामणिमयदामालंकिए अंतो बहिं च सण्हे तवणिज्जसइलवालयपत्थरे
सुहफासे सत्तिरीयरूवे पासाईए जाव पडिरूवे । एगं च णं महं भवणं कारेंति अणेग-
खंभसयसच्चिविट्ठं लीलट्ठियसालभंजियागं अब्भुग्गयसुकयवइरवेइयातोरणवरइयसा-
लभंजियासुसिलिट्ठविसिट्ठलट्ठसंठियपसत्थवेरुलियखंभनाणामणिकणगरयणखचियउ-
ज्जलं बहुसमसुविभत्तनिचियरमणिज्जभूमिभागं ईहामिय जाव भत्तिचित्तं खंभुग्गयवय-
रवेइयापरिगयाभिरामं विजाहरजमलजुयलजंतजुत्तंपिव अच्चीसहस्समालणीयं रुवग-
सहस्सकलियं भिसमाणं भिब्भिसमाणं चक्खल्लोयणलेसं सुहफासं सत्तिरीयरूवं कंच-
णमणिरयणथूभियागं नाणाविहपंचवण्णघंटापडागपरिमंडियग्गसिहरं धवलमि(म)-
रीचिकवयं विणिम्मुयंतं लाउल्लोइयमहियं जाव गंधवट्ठिभूयं पासाईयं दरिसणिज्जं अभि-
रूवं पडिरूवं ॥ २३ ॥ तए णं तस्स मेहस्स कुमारस्स अम्मापियरो मेहं कुमारं सोह-
णंसि तिहिकरणनक्खत्तमुहुत्तंसि सरिसियाणं सरि(स)व्वयाणं सरि(स)त्तयाणं सरिस-

लावण्णरूवजोव्वण्णगुणोववेयाणं सरिसएहिंतो रायकुलेहिंतो आणि(अ)ल्लियाणं पसाह-
णङ्गअविहववहुओवयणमंगलसुजंपिएहिं अट्ठहिं रायवरकक्काहिं सद्धि एगदिवसेणं
पाणिं गिण्हविस्सु । तए णं तस्स मेहस्स अस्मापियरो इमं एयारूवं पीइदाणं दलयंति-
अट्ठ हिरण्णकोडीओ अट्ठ सुवण्णकोडीओ गाहाणुसारेण भा(वि)णियव्वं जाव पेसणकारि-
याओ अन्नं च विपुलं धणकणगरयणमणिमोत्तियसंखसिलप्पवालरत्तरयणसंतसारसाव-
एज्जं अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परि-
भाएउं । तए णं से मेहे कुमारे एगमेगाए भारियाए एगमेगं हिरण्णकोडिं दलयइ
एगमेगं सुवण्णकोडिं दलयइ जाव एगमेगं पेसणकारिं दलयइ अन्नं च विउलं धण-
कणग जाव परिभाएउं दलयइ । तए णं से मेहे कुमारे उप्पि पासायवरगए फुट्टमा-
णेहिं मुइंगमत्थएहिं वरतरुणिसंपउत्तेहिं बत्तीसइवडएहिं नाडएहिं उवगिज्जमाणे २
उवलालिज्जमाणे २ सट्ठंफरिसरसरूवगंधविउले माणुस्सए कामभोगे पच्चणुभवमाणे
विहरइ ॥ २४ ॥ तेणं कालेणं तेणं समएणं समणे भगवं महावीरे पुच्चाणुपुत्तिं
चरमाणे गामाणुगामं दूइज्जमाणे सुहंसुहेणं विहरमाणे जेणामेव रायगिहे नयरे
गुणसिलए उज्जाणे जाव विहरइ । तए णं (से)रायगिहे नयरे सिंवाडगतिगचउक्कचच्चर०
महया बहुजणसदेइ वा जाव बहवे उग्गा भोगा जाव रायगिहस्स नयरस्स
मज्झमज्झेणं एगदिसिं एगाभिमुहा निग्गच्छंति, इमं च णं मेहे कुमारे उप्पि
पासायवरगए फुट्टमाणेहिं सुयंगमत्थएहिं जाव माणुस्सए कामभोगे मुंजमाणे
रायमगं च आलोएमाणे २ एवं च णं विहरइ । तए णं (से)मेहे कुमारे ते बहवे उग्गे
भोगे जाव एगदिसाभिमुहे निग्गच्छमाणे पासइ २ ता कंचुइज्जपुरिसं सद्दावेइ २
ता एवं वयासी-किं भो देवाणुप्पिया ! अज्ज रायगिहे नयरे इंदमहेइ वा
खंदमहेइ वा एवं रुद्धसिववेसमणनागजक्खभूयनईतलायरुक्खपव्वयउज्जाणगिरिजत्ताइ
वा जओ णं बहवे उग्गा भोगा जाव एगदिसिं एगाभिमुहा निग्गच्छंति । तए णं
से कंचुइज्जपुरिसे समणस्स भगवओ महावीरस्स गहियागमणपवित्तीए मेहं कुमारे
एवं वयासी-नो खलु देवाणुप्पिया ! अज्ज रायगिहे नयरे इंदमहेइ वा जाव
गिरिजत्ताइ वा जं णं एए उग्गा जाव एगदिसिं एगाभिमुहा निग्गच्छंति, एवं
खलु देवाणुप्पिया ! समणे भगवं महावीरे आइगरे तित्थगरे इहमागए इह
संपत्ते इह समोसठे इह चेव रायगिहे नयरे गुणसिलए उज्जाणे अट्ठापडिरूवं जावं
विहरइ ॥ २५ ॥ तए णं से मेहे कुमारे कंचुइज्जपुरिस्स अंतिए एयमट्ठं सोच्चा
निसम्म हट्ठुट्ठे कोडुंबियपुरिसे सद्दावेइ २ ता एवं वयासी-खिप्पामेव भो देवाणु-
प्पिया ! चाउग्घटं आसरहं जुत्तामेव उवट्ठवेह (तट्ठत्ति) जाव उवणेंति । तए णं से

मेहे ण्हाए सव्वालंकारविभूसिए चाउग्घंटं आसरहं दुरुढे समाणे सकोरंटमल्लदामेणं
छत्तेणं धरिज्जमाणेणं महया भडचडगरविंदपरियालसंपरिवुडे रायगिहस्स नयरस्स
मज्झमज्झेणं निगगच्छइ २ ता जेणामेव गुणसिलए उज्जाणे तेणामेव उवागच्छइ
२ ता समणस्स भगवओ महावीरस्स छत्ताइच्छत्तं पडागाइपडागं विज्जाहरचारणे
जंभए य देवे ओवयमाणे उप्पयमाणे पासइ २ ता चाउग्घंटाओ आसरहाओ
पंचोसुहइ २ ता समणं भगवं महावीरं पंचविहेणं अभिगमेणं अभिगच्छइ
तंजहा—सच्चित्ताणं दव्वाणं विउसरणयाए, अच्चित्ताणं दव्वाणं अविउसरणयाए,
एगसाडियं उत्तरासंगकरणेणं, चक्खुप्फासे अंजलिपग्गहेणं, मणसो एगत्तीकरणेणं ।
जेणामेव समणे भगवं महावीरे तेणामेव उवागच्छइ २ ता समणं भगवं
महावीरं तिव्खुत्तो आयाहिणं पयाहिणं करेइ २ ता वंदइ नमंसइ वं० २ ता
समणस्स भगवओ महावीरस्स नच्चासञ्जे नाइदूरे सुस्सूसमाणे नमंसमाणे पं(अं)-
जलि(य)उडे अभिमुहे विणएणं पज्जुवासइ । तए णं समणे भगवं महावीरे मेहस्स
कुमारस्स तीसे य महइमहालियाए (महच्च)परिसाए मज्झगए विचित्तं धम्ममाइ-
क्खइ जहा जीवा बज्झंति मुच्चंति जह य संकिलिस्संति, धम्मकहा भाणियव्वा
जाव परिसा पडिगया ॥ २६ ॥ तए णं से मेहे कुमारे समणस्स भगवओ महा-
वीरस्स अंतिए धम्मं सोच्चा निसम्म दट्ठतुट्ठे समणं भगवं महावीरं तिव्खुत्तो आया-
हिणं पयाहिणं करेइ २ ता वंदइ नमंसइ वं० २ ता एवं वयासी—सद्धासि णं
भंते ! निगगंथं पावयणं एवं पत्तियामि णं रोएमि णं अब्भुट्ठेमि णं भंते ! निगगंथं
पावयणं, एवमेयं भंते ! तहमेयं अवितहमेयं इच्छियमेयं पडिच्छियमेयं भंते !
इच्छियपडिच्छियमेयं भंते ! से जहेव तं तुब्भे वयह जं नवरं देवाणुप्पिया ! अम्मा-
पियरो आपुच्छामि तओ पच्छा मुंडे भवित्ता णं पव्वइस्सामि । अह्हासुहं देवाणुप्पिया !
मा पडिबंधं करेह । तए णं से मेहे कुमारे समणं भगवं महावीरं वंदइ नमंसइ वं० २
ता जेणामेव चाउग्घंटे आसरहे तेणामेव उवागच्छइ २ ता चाउग्घंटं आसरहं दुरुहइ
२ ता महया भडचडगरपहकरेणं रायगिहस्स नगरस्स मज्झमज्झेणं जेणामेव सए
भवणे तेणामेव उवागच्छइ २ ता चाउग्घंटाओ आसरहाओ पंचोसुहइ २ ता जेणामेव
अम्मापियरो तेणामेव उवागच्छइ २ ता अम्मापिऊणं पायवडणं करेइ २ ता एवं
वयासी—एवं खलु अम्मयाओ ! मए समणस्स भगवओ महावीरस्स अंतिए धम्मे
निसंते से वि य मे धम्मे इच्छिए पडिच्छिए अभिरुहए । तए णं तस्स मेहस्स अम्मा-
पियरो एवं वयासी—धच्चोसि तुमं जाया ! संपुण्णोसि० कयत्थोसि० कयलक्खणोसि
तुमं जाया ! जच्च तुमे समणस्स भगवओ महावीरस्स अंतिए धम्मे निसंते, से वि

य ते धम्मे इच्छिए पडिच्छिए अभिरुइए । तए णं से मेहे कुमारे अम्मापियरो दोब्बं पित्तं एवं वयासी-एवं खलु अम्मयाओ । मए समणस्स भगवओ महावीरस्स अंतिए धम्मे निसंते, से वि य मे धम्मे इच्छिए पडिच्छिए अभिरुइए, तं इच्छामि णं अम्मयाओ । तुम्हेहिं अब्भणुजाए समाणे समणस्स भगवओ महावीरस्स अंतिए मुंढे भविता णं अगाराओ अणगारियं पव्वइत्तए । तए णं सा धारिणी देवी तं अणिट्ठं अकंतं अप्पियं अमणुजं अमणां असुयपुव्वं फरुसं गिरं सोब्बा निसम्म इमेणं एयारुवेणं मणोमाणसिएणं महया पुत्तदुक्खेणं अभिभूया समाणी सेयागयरोमकूवपगलंतविलीणगाया सोयभरपवेवियंगी नित्तेया दीणविमणवयणा करयलमलियव्व कमलमाला तक्खणओलुगगदुब्बलसरीरा लावणालुजनिच्छायगयसिरीया पसिडिलभूसणपडंतलुम्मियसंतुण्णियधवलवलयपब्भट्टउत्तरिजा सूमालविकिण्णकेसहत्था सुच्छावसनट्टवेयगरुई परसुनियत्तव्व चंपगलया निव्वत्तम(हिमव्व)हेव ईदलट्ठी विमुक्कसंधिबंवणा कोट्टिमतलंसि सव्वंगेहिं धसत्ति पडिया । तए णं सा धारिणी देवी ससंभमोवतियाए तुरियं कंचगभिं गारमुहविणिग्गयसीयलजलविमलधाराए परिसिंचमाणा निव्वावियगायलट्ठी उक्खेवणतालविटवीयणगजणियवाएणं सफुसिएणं अंतोउरपरियणेणं आसासिया समाणी मुत्तावलित्तजिगासपवडंतअंधुधाराहिं सिंचमाणी पओहरे कलुणविमणदीणा रोयमाणी कंदमाणी तिप्पमाणी सोयमाणी विलवमाणी मेहं कुमारं एवं वयासी-तुमं सि णं जाया ! अम्हं एगे पुत्ते इट्ठे कंते पिए मणुजे मणामे थेजे वेसासिए सम्मए बहुमए अणुमए भंडकरंडगसमाणे रयणे रयणभूए जीवियउत्सासए हिययाणंदजणणे उंवरपुप्फं पिव दुल्लहे सवणयाए किमंग पुण पासणयाए, नो खलु जाया ! अम्हे इच्छामो खणमवि विप्पओगं सहित्तए, तं भुंजाहि ताव जाया । विपुळे माणुस्सए कामभोगे जाव ताव वयं जीवामो, तओ पच्छा अम्हेहिं कालगएहिं परिणयवए वड्डियकुलवंसतंतुक्कंमि निरावयक्खे समणस्स भगवओ महावीरस्स अंतिए मुंढे भविता अगाराओ अणगारियं पव्वइस्ससि ॥ २७ ॥ तए णं से मेहे कुमारं अम्मापिऊहिं एवं पुत्ते समाणे अम्मापियरो एवं वयासी-तहेव णं तं अ(म्मो!)म्मताओ । जहेव णं तुम्हे ममं एवं वयह-तुमं सि णं जाया ! अम्हं एगे पुत्ते तं चेव जाव निरावयक्खे समणस्स भगवओ महावीरस्स जाव पव्वइस्ससि, एवं खलु अम्मयाओ । माणुस्सए भवे अधुवे अणियए असासए वसणसउवद्वाभिभूए विजुलयाचंचले अणिच्चे जलबुब्बुयसमाणे कुसग्गजलविंदुसन्निमे संझब्भरागसरिसे सुविणदंसणोवमे सडणपडणविइंसणधम्मं पच्छा पुरं च णं अवस्सविप्पजहणिजे, से के णं जाणइ अम्मयाओ । के पुर्वि गमणाए के पच्छा गमणाए ?

तं इच्छामि णं अम्मयाओ ! तुब्भेहिं अब्भणुत्ताए समाणे समणस्स भगवओ महा-
वीरस्स जाव पव्वइत्तए । तए णं तं मेहं कुमारं अम्मापियरो एवं वयासी-इमाओ ते
जाया ! सरिसियाओ सरि(स)त्तयाओ सरि(स)व्वयाओ सरिसलावण्णह्वजोव्वणगु-
णोववेयाओ सरिसेहिंतो रायकुलेहिंतो आणियल्लियाओ भारियाओ, तं भुंजाहिं णं
जाया ! एयाहिं सद्धिं विउळे माणुस्सए कामभोगे, तओ पच्छा भुत्तभोगे समणस्स
भगवओ महावीरस्स जाव पव्वइस्ससि । तए णं से मेहे कुमारं अम्मापियरं एवं
वयासी-तहेव णं अम्मयाओ ! जं णं तुब्भे ममं एवं वयह-इमाओ ते जाया !
सरिसियाओ जाव पव्वइस्ससि, एवं खलु अम्मयाओ ! माणुस्सगा कामभोगा असुइ
असासया वंतासवा पित्तासवा खेलासवा सुक्कासवा सोणियासवा दुरुस्सासनीसा(स-
वा)सा दुरु(य)वमुत्तपुरीसपूयबहुपडिपुण्णा उच्चारपासवगखेलजल्लसिंघाणगवंतपित्तसु-
क्कसोणियसंभवा अथुवा अणि(इ)यया असासया सडणपडणविद्धंसणधम्मा पच्छा पुरं
च णं अवस्सविप्पजहणिज्जा, से के णं अम्मयाओ ! जाण(न्ति)इ के पुव्वि गमणाए के
पच्छा गमणाए ? तं इच्छामि णं अम्मयाओ ! जाव पव्वइत्तए । तए णं तं मेहं कुमारं
अम्मापियरो एवं वयासी-इमे(य) ते जाया ! अज्जयपज्जयपिउपज्जयागए सुबहु हिरण्णे
य सुवण्णे य कंसे य दूसे य मणिमोत्ति(ए य)यसंखसिलप्पवालरत्तरयणसंतसारसाव-
एज्जे य अलाहि जाव आसत्तमाओ कुलवंसाओ पगामं दाउं पगामं भोत्तुं पगामं परि-
भाएउं, तं अणुहोहि ताव (जाव) जाया ! विपुलं माणुस्सगं इद्धिस्सकारसमुदयं, तओ
पच्छा अणुभूयकल्लणे समणस्स भगवओ महावीरस्स अंतिए जाव पव्वइस्ससि । तए
णं से मेहे कुमारं अम्मापियरं एवं वयासी-तहेव णं अम्मयाओ ! जं णं तं वयह-
इमे ते जाया ! अज्जगपज्जगपिउपज्जयागए जाव तओ पच्छा अणुभूयकल्लणे जाव
पव्वइस्ससि, एवं खलु अम्मयाओ ! हिरण्णे य सुवण्णे य जाव सावएज्जे अग्गिसा-
हिए चोरसाहिए रायसाहिए दाइयसाहिए मच्चुसाहिए अग्गिसामन्ने जाव मच्चुसामन्ने
सडणपडणविद्धंसणधम्मे पच्छा पुरं च णं अवस्सविप्पजहणिज्जे, से के णं
जाणइ अम्मयाओ ! के पुव्वि जाव गमणाए ? तं इच्छामि णं जाव पव्वइत्तए ।
तए णं तस्स मेहस्स कुमारस्स अम्मापियरो जाहे नो संचाईति मेहं कुमारं
बह्वहिं विसयाणुलोमाहिं आघवणाहि य पन्नवणाहि य सन्नवणाहि य विन्नवणाहि य
आघवित्तए वा पन्नवित्तए वा सन्नवित्तए वा विन्नवित्तए वा ताहे विसयपडिकूलाहिं
संजमभउव्वेयकारियाहिं पन्नवणाहिं पन्नवेमाणा एवं वयासी-एस णं जाया !
निग्गंथे पावयणे सत्त्वे अणुत्तरे केवळिए पडिपुण्णे नेयाउए संसुद्धे सल्लगतणे सिद्धि-
मग्गे मुत्तिमग्गे निज्जाणमग्गे निव्वानमग्गे सव्वदुक्खप्पहीणमग्गे अहीव एगंतदि-

डीए खुरो इव एगंतधाराए लोहमया इव जवा चावेयव्वा वालुयाकवले इव निर-
 स्साए गंगा इव महानई पडिसोयगमणाए महासमुद्रो इव भुयाहिं दुत्तरे तिव्खं चंक्र-
 मियव्वं गरुअं लंबेयव्वं असिधारव्वयं (सं)चरियव्वं । नो (य)खलु कप्पइ जाया !
 समणां निगंथाणं आहाकम्मिए वा उद्देसिए वा कीयगडे वा ठवियए वा रइयए
 वा दुब्बिमक्खभत्ते वा कंतारभत्ते वा वहलियाभत्ते वा गिलाणभत्ते वा मूलभोयणे
 वा कंदभोयणे वा फलभोयणे वा बीयभोयणे वा हरियभोयणे वा भोत्तए वा पायए
 वा । तुमं च णं जाया ! सुहसमुच्चिए नो चेव णं दुहसमुच्चिए नालं सीयं नालं उण्हं
 नालं खुहं नालं पिधासं नालं वाइयपित्तिथिसिंभियसच्चिवाइयविविहे रोगायकं उच्चावए
 गामकंटए बावीसं परीसहोवसग्गे उदिण्णे सम्मं अहियासित्तए । भुंजाहि ताव जाया !
 माणुस्सए काममोगे, तओ पच्छा भुत्तभोगी समणस्स भगवओ महावीरस्स जाव
 पव्वइस्ससि । तए णं से मेहे कुमारं अम्मापिऊहिं एवं तुत्ते समाणे अम्मापियरं एवं
 वयासी-तहेव णं तं अम्मयाओ ! जं णं तुब्भे ममं एवं वयह-एस णं जाया ! निगंथे
 पावयणे सच्चे अणुत्तरे पुणरवि तं चेव जाव तओ पच्छा भुत्तभोगी समणस्स भगवओ
 महावीरस्स जाव पव्वइस्ससि, एवं खलु अम्मयाओ ! निगंथे पावयणे की(वा)बाणं
 कायराणं कापुरिसाणं इहलोगपडिबद्धाणं परलोगनिप्पिवासाणं दुरणुचरे पाययजणस्स
 नो चेव णं धीरस्स निच्छियस्स ववसियस्स एत्थ किं दुक्करं करणयाए ? तं इच्छामि णं
 अम्मयाओ ! तुब्भेहिं अब्भणुजाए समाणे समणस्स भगवओ महावीरस्स जाव पव्व-
 इत्तए ॥ २८ ॥ तए णं तं मेहं कुमारं अम्मापियरो जाहे नो संचाईति बहूहिं विसया-
 णुलोमाहि य विसयपडिकूलाहि य आघवणाहि य पन्नवणाहि य सन्नवणाहि य विन्नव-
 णाहि य आघवित्तए वा पन्नवित्तए वा सन्नवित्तए वा विन्नवित्तए वा ताहे अका(मए)-
 माइं चेव मेहं कुमारं एवं वयासी-इच्छामो ताव जाया ! एगदिवसमवि ते रायसिरिं
 पासित्तए । तए णं से मेहे कुमारं अम्मापियरमणुवत्तमाणे तुसिणीए संचिट्ठइ । तए
 णं से सेणिए राया कोडुंवियपुरिसे सहावेइ २ ता एवं वयासी-खिप्पामेव भो देवा-
 णुप्पिया ! मेहस्स कुमारस्स महत्थं महग्गं महरिहं विउलं रायाभिसेयं उवट्ठवेह ।
 तए णं ते कोडुंवियपुरिसा जाव तेवि तहेव उवट्ठवैति । तए णं से सेणिए राया
 बहूहिं गणनायगदंडनायगेहि य जाव संपरिवुडे मेहं कुमारं अट्ठसएणं सोवणियाणं
 कलसाणं एवं रूपमयाणं कलसाणं सुवण्णरूपमयाणं कलसाणं मणिमयाणं कलसाणं
 सुवण्णमणिमयाणं कलसाणं रूपमणिमयाणं कलसाणं सुवण्णरूपमणिमयाणं कलसाणं
 भोमेजाणं कलसाणं सव्वोदएहिं सव्वमट्ठियाहिं सव्वपुप्फेहिं सव्वगंधेहिं सव्वमलेहिं
 सव्वोसहीहिं य सिद्धत्थएहिं य सच्चिद्धीए सव्वजुइए सव्वबलेणं जाव दुंदुभिनिग्घो-

सणाइयरवेणं महया २ रायाभिसेएणं अभिसिचइ २ ता करयल जाव कट्टु एवं वयासी-जय २ नंदा ! जय २ भदा ! जय-नंदा ! भदं ते अजियं जि(णे)णाहि जियं पालयाहि जियमच्छे वसाहि अजियं जिणेहि सत्तुपक्खं जियं च पालेहि मित्तपक्खं जाव भरहो इव मणुयाणं रायगिहस्स नगरस्स अन्नसि च बहुणं गामागरनगर जाव सन्निवेसाणं आहेवच्चं जाव विहराहि त्तिक्कट्टु जयजयसदं पउंजंति । तए णं से मेहे राया जाए महया जाव विहरइ । तए णं तस्स मेहस्स रत्तो अम्मापियरो एवं वयासी-भण जाया ! किं दलयामो किं पयच्छामो किं वा ते हियइच्छिए सामत्थे(मंते) ? तए णं से मेहे राया अम्मापियरो एवं वयासी-इच्छामि णं अम्मयाओ ! कुत्तियावणाओ रयहरणं पडिग्ग(हगं)हं च (आणियं) उवणेह कासवयं च सदा(विउं)वेह । तए णं से सेणिए राया कोडुंबियपुरिसे सदावेइ २ ता एवं वयासी-गच्छह णं तुब्भे देवाणुप्पिया ! सिरिघराओ तिन्नि सयसहस्साइं गहाय दोहिं सयसहस्सेहिं कुत्तियावणाओ रयहरणं पडिग्गहं च उवणेह सयसहस्सेणं कासवयं सदावेह । तए णं ते कोडुंबियपुरिसा सेणिएणं रत्ता एवं वुत्ता समाणा हट्टुट्टा सिरिघराओ तिन्नि सयसहस्साइं गहाय कुत्तियावणाओ दोहिं सयसहस्सेहिं रयहरणं पडिग्गहं च उवणेति सयसहस्सेणं कासवयं सदावेति । तए णं से कासवए तेहिं कोडुंबियपुरिसेहिं सदाविए समाणे हट्टुट्ट जाव (हय)हियए ण्हाए सुद्धप्पावेसाइं (मंगलाइं) वत्थाइं पवरपरिहिए अप्पमहग्घाभरणाळंकियसरीरे जेणेव सेणिए राया तेणेव उवागच्छइ २ ता सेणियं रायं करयलमंजलि कट्टु एवं वयासी-संदिसह णं देवाणुप्पिया ! जं मए करणिजं । तए णं से सेणिए राया कासवयं एवं वयासी-गच्छाहि णं तुमं देवाणुप्पिया ! सुरभिणा गंधोदएणं निक्के हत्थपाए पक्खालेहि सेयाए चउप्फालाए पोत्तीए मुहं बंधित्ता मेहस्स कुमारस्स चउरंगुलवज्जे निक्खमणपाउग्गे अगगकेसे कप्पेहि । तए णं से कासवए सेणिएणं रत्ता एवं वुत्ते समाणे हट्टुट्ट जाव हियए जाव पडिडुणेइ २ ता सुरभिणा गंधोदएणं हत्थपाए पक्खालेइ २ ता सुद्धवत्थेणं मुहं बंधइ २ ता परेणं जत्तेणं मेहस्स कुमारस्स चउरंगुलवज्जे निक्खमणपाउग्गे अगगकेसे कप्पइ । तए णं तस्स मेहस्स कुमारस्स माया महुरिहेणं हंसलक्खणेणं पडसाडएणं अगगकेसे पडिच्छइ २ ता सुरभिणा गंधोदएणं पक्खालेइ २ ता सरसेणं गोसीसचंदणेणं चच्चाओ दलयइ २ ता सेयाए पोत्तीए बंधइ २ ता रयणसमुग्गयंसि पक्खिवइ २ ता मंजूसाए पक्खिवइ २ ता हारवारिधारसिंदुवारिछिन्नमुत्तावलप्पगासाइं अंसुइं विणिम्मयमाणी २ रोयमाणी २ कंदमाणी २ विलवमाणी २ एवं वयासी-एस णं अम्हं मेहस्स कुमारस्स अब्भुद-एसु य उस्सवेसु य पसवेसु य तिहीसु य छणेसु य जजेसु य पव्वणीसु य अपच्छिमे

दरिसणे भविस्सइ-तिकट्ट उस्सीसामूले ठवेइ । तए णं तस्स मेहस्स कुमारस्स अम्मा-
 पियरो उत्तरावक्कमणं सीहासणं रयावैति मेहं कुमारं दोच्चपि तच्चपि सेयापीयाएहिं
 कलसेहिं ण्हावैति २ ता पम्हलसुकुमालाए गंधकासाइयाए गायार्इ ल्हँति २ ता
 सरसेणं गोसीसचंदणेणं गायार्इ अणुलिंपेति २ ता नासानीसासवायवोज्झं जाव
 हंसलक्खणं पड(ग)साडगं नियसैति २ ता हारं पिणद्धेति २ ता अद्धहारं पिणद्धेति
 २ ता (एवं) एगावल्लिं (२) सुत्तावल्लिं (२) कणगावल्लिं (२) रयणावल्लिं (२) पालंबं (२)
 पायपलंबं कडगाइं (२) तुडिगाइं (२) केऊराइं (२) अंगयाइं (२) दसमुहियाणंतयं
 कडिसुनयं (२) कुंडलाइ चूडामणिं रयणुक्कडं मउडं पिणद्धेति २ ता दिव्वं सुमणदामं
 पिणद्धेति २ ता दहरमलयसुगंधिए गंधे पिणद्धेति । तए णं तं मेहं कुमारं
 गंठिमवेडिमपूरिमसंघादमेण चउव्विहेणं मल्लेणं कप्पस्सक्खगं पिव अलंकिरियिभूसियं
 करेति । तए णं से सेणिए राया कोडुंवियपुरिसे सद्दवेइ २ ता एवं वयासी-
 खिप्पामेव भो देवाणुप्पिया ! अणेगखंसयसच्चिविट्ठं लीलट्टियसालभंजियागं
 ईहामियउसभतुरयनरमगरविहगवालगाकिन्नरुरुसरभचमरकुंजरवणलयपउमलयभ-
 त्तिचित्तं घंटावल्लिमहुरमणहरसरं सुभकंतदरिसणिज्जं निउणो(चि)वियमिसिमिसित्तम-
 णिरयणवंटियाजालपरिक्खित्तं खं (अब)भुग्गयवइरवेइयापरिगयाभिरामं विज्जाहर-
 जमलजंतजुतं पिव अच्चसिहस्समालणीयं रुवगसहस्सकलियं भिसमाणं भिब्भिसमाणं
 चक्खुल्लोयणलेस्सं सुहकासं सस्सिरीयरुवं सिगवं तुरियं चवलं वेइयं पुरिससहस्स-
 दाहि(णीयं)णीं सीयं उवट्टवेह । तए णं ते कोडुंवियपुरिसा हट्टुट्ट जाव उवट्टवैति ।
 तए णं से मेहे कुमारे सीयं दुरुहइ २ ता सीहासणवरगए पुरतयाभिमुहे
 सच्चिसण्णे । तए णं तस्स मेहस्स कुमारस्स माया ण्हाया अप्पमहग्गघाभरणालं-
 कियसरिरी सीयं दुरुहइ २ ता मेहस्स कुमारस्स दाहिणे पासे भद्दासणंसि निसीयइ ।
 तए णं तस्स मेहस्स कुमारस्स अंबधाई रयहरणं च पडिग्गहणं च गहाय सीयं
 दु(रु)हइ २ ता मेहस्स कुमारस्स वामे पासे भद्दासणंसि निसीयइ । तए णं तस्स
 मेहस्स कुमारस्स पिट्ठोए एगा वरतरुणी सिंगारागारचाखेसा संयगयगहसिय-
 भणियचेट्टियविलाससंलावुल्लावनिउणजुत्तोदयारकुसला आमेलगजमलजुयलवट्टिय-
 अब्भुत्तयपीणरइयसंठियपओहरा हिमरययकुंदैदुपगासं सकोरेंटमल्लदामधवलं
 आयवतं गहाय सलीलं ओहारेमाणी २ चिट्ठइ । तए णं तस्स मेहस्स कुमारस्स
 दुवे वरतरुणीओ सिंगारागारचाखेसाओ जाव कुसलाओ सीयं दुरुहंति २ ता मेहस्स
 कुमारस्स उभओ पा(सि)सं नानामणिकणगरयणमहरिहतवणिज्जउज्जलवित्तिचत्तंदाओ
 चिल्लियाओ सुहुमवरवीहवालाओ संखकुंदगरयअमयमहियफेणुंजसन्निगासाओ

चामराओ गहाय सलीलं ओहारेमाणीओ २ चिद्वंति । तए णं तस्स मेहकुमारस्स एगा वरतरुणी सिंगारा जाव कुसला सीयं जाव दुरुहइ २ ता मेहस्स कुमारस्स पुरओ पुरत्थिमेणं चंदप्पभवइरवेरुलियविमलदंडं ता(लवि)लियंटं गहाय चिद्वइ । तए णं तस्स मेहस्स कुमारस्स एगा वरतरुणी जाव सुरूवा सीयं दुरुहइ २ ता मेहस्स कुमारस्स पुव्वदक्खिणेण सेयं रययामयं विमलसलिलपुणं मत्तगयमहामुहाकिइसमाणं भिंगारं गहाय चिद्वइ । तए णं तस्स मेहस्स कुमारस्स पिया कोडुंबियपुरिसे सदावेइ २ ता एवं वयासी-खिप्पामेव भो देवाणुप्पिया । सरिसयाणं सरि(स)त्तयाणं सरि(स)-व्वयाणं एगाभरणगहियनिज्जोयाणं कोडुंबियवरतरुणाणं सहस्सं सदावेह जाव सदा-वेति । तए णं (ते) कोडुंबियवरतरुणपुरिसा सेणियस्स रत्तो कोडुंबियपुरिसेहिं सदा-विया समाणा हट्ठा ण्हाया एगाभरणगहियणिज्जोया जेगामेव सेणिए राया तेणामेव उवागच्छंति २ ता सेणियं रायं एवं वयासी-संदिसह णं देवाणुप्पिया ! जं णं अम्हेहिं करणिज्जं । तए णं से सेणिए राया तं कोडुंबियवरतरुणसहस्सं एवं वयासी-गच्छह णं (तुब्भं)देवाणुप्पिया ! मेहस्स कुमारस्स पुरिससहस्सवाहिणिं सीयं परिव(हे)-हइ । तए णं तं कोडुंबियवरतरुणसहस्सं सेणिएणं रत्ता एवं वुत्तं संतं हट्ठं तुट्ठं तस्स मेहस्स कुमारस्स पुरिससहस्सवाहिणिं सीयं परिवहइ । तए णं तस्स मेहस्स कुमारस्स पुरिससहस्सवाहिणिं सीयं दुरुहस्स समाणस्स इमे अट्ठमंगलया तप्पढमयाए पुरओ अहाणुपुव्वीए संपट्टिया, तंजहा-सोत्थिय सिरिवच्छ नंदियावत्त वट्ठमाणग भदासण कलस मच्छ दप्पण जाव बहवे अत्थत्थिया जाव ताहिं इट्ठाहिं जाव अण-वरयं अभिनंदंता य अभियुणंता य एवं ब्रयासी-जय २ नंदा ! जय २ भदा ! जयनंदा ! भइं ते अजि(यं)याइं जिणाहिं इंदियाइं जियं च पाळेहिं समणधम्मं जियविग्घोऽविय वसाहिं तं देव ! सिद्धिमज्जे निहणाहिं रागदोसमल्ले तवेणं विइ-धणियवद्धकच्छे महाहिं य अट्ठक्रमसत्तु ज्ञाणेणं उत्तमेणं सुक्खेणं अप्पमत्तो पावय वित्तिमिरमाणुत्तरं केवलं नाणं गच्छ य मोक्खं परमं पयं सासयं च अयलं हंता परीसहच(सुं)मूणं अभीओ परीसहोवसरगाणं धम्मे ते अविग्घं भवउ-त्तिकहु पुणो २ मंगलजय२सहं पडंजंति । तए णं से मेहे कुमारे रायगिहस्स नयरस्स मज्झंसज्जेणं निग्गच्छइ २ ता जेणेव गुणसिलए उज्जाणे तेणेव उवागच्छइ २ ता पुरिससहस्सवाहिणीओ सीयाओ पच्चोरुहइ ॥ २९ ॥ तए णं तस्स मेहस्स कुमारस्स अम्मापियरो मेहं कुमारं पुरओ कट्ठु जेगामेव समणे भगवं महावीरे तेणामेव उवागच्छंति २ ता समणं भगवं महावीरं तिक्खुत्तो आयाहिणं पयाहिणं करंति २ ता वंदंति नमंसंति वं० २ ता एवं वयासी-एस णं देवाणुप्पिया ! मेहे कुमारो अम्हं एगे

पुत्ते इट्ठे कंते जाव जीवियऊसासए हिययनंदिजणए उंवरपुफं पिब दुल्लहे सवणयाए किमंग पुण दरिसणयाए ? से जहानामए उप्पलेइ वा पउमेइ वा कुमुदेइ वा पंके जाए जले संबद्धिए नोवलिप्पइ पंकरएणं नोवलिप्पइ जलरएणं एवामेव मेहे कुमारे कामेस जाए भोगेसु संउड्ढे नोवलिप्पइ कामरएणं नोवलिप्पइ भोगरएणं, एस णं देवाणुप्पिया । संसारभउव्विग्गे मीए जम्मण(जर)मरणाणं इच्छइ देवाणुप्पियाणं अंतिए मुंडे भविता अगाराओ अणगारियं पव्वइत्तए । अम्हे णं देवाणुप्पियाणं सिस्सभिकखं दलयामो । पडिच्छंतु णं देवाणुप्पिया ! सिस्सभिकखं । तए णं से समणे भगवं महावीरे मेहस्स कुमारस्स अम्मापिऊहिं एवं वुत्ते समणे एयमट्ठं सम्मं पडिबुणेइ । तए णं से मेहे कुमारे समणस्स भगवओ महावीरस्स अंतियाओ उत्तरपुरच्छिमं दिसीभागं अवक्कमइ २ ता सयमेव आभरणमल्लालंकारं ओमुयइ । तए णं (से) तस्स मेहकुमारस्स माया हंसलक्खणेणं पडसाडएणं आभरणमल्लालंकारं पडिच्छइ २ ता हारवारिभारसिंदुवारलिन्नमुत्तावलिप्पगासाईं अंसूणि विणिम्सु-यमाणी २ रोयमाणी २ कंदमाणी २ विलवमाणी २ एवं वयासी-जइयव्वं जाया ! घडियव्वं जाया ! परक्कमियव्वं जाया ! अस्सि च णं अट्ठे नो पमाएयव्वं, अम्हंपि णं ए(मे)सेव मग्गे भवउ-त्तिकड्ढु मेहस्स कुमारस्स अम्मापियरो समणं भगवं महावीरं वंदंति नमंसंति वं० २ ता जामेव दिसिं पाउब्भूया तामेव दिसिं पडिगया ॥ ३० ॥ तए णं से मेहे कुमारे सयमेव पंचमुट्ठियं लोयं करेइ २ ता जेणामेव समणे भगवं महावीरे तेगामेव उवागच्छइ २ ता समणं भगवं महावीरं तिक्खुत्तो आयाहिणं पयाहिणं करेइ २ ता वंदइ ज्जमंसइ वं० २ ता एवं वयासी-आलित्ते णं भंते ! लोए, पलित्ते णं भंते ! लोए, आलित्तपलित्ते णं भंते ! लोए जराए मरणेण य । से जहानामए केइ गाहावई अगारंसि झियायमाणंसि जे तत्थ भडे भवइ अप्पभारे मोल्लगुरुए तं गहाय आयाए एगंतं अवक्कमइ-एस मे नित्यारिए समाणे पच्छा पुरा (लोए)हियाए सुहाए खे(ख)माए निस्सेसाए आणुगामियत्ताए भविस्सइ-एवामेव समवि एगे आयाभंडे इट्ठे कंते पिए मणुजे मणामे एस मे नित्यारिए समाणे संसारवोच्छेयकरे भविस्सइ, तं इच्छामि णं देवाणुप्पि(या)एहिं सयमेव पव्वावियं सयमेव मुंडावियं सेहावियं सिकखावियं सयमेव आयारगोयरविणयवेणइय-चरणकरणजायामायावत्तिं धम्ममाइक्खियं । तए णं समणे भगवं महावीरे मेहं कुमारं सयमेव पव्वावेइ सयमेव आयार जाव धम्ममाइक्खइ-एवं देवाणुप्पिया ! गंतव्वं चिट्ठियव्वं निसीयव्वं तुयट्ठियव्वं मुंजियव्वं भासियव्वं एवं उट्ठाए उट्ठाय पाणेहिं भूएहिं जीवेहिं सत्तेहिं संजमेणं संजमियव्वं अस्सि च णं अट्ठे नो

पमाएयव्वं । तए णं से मेहे कुमारे समणस्स भगवओ महावीरस्स अंतिए इमं
 एयारूवं धम्मियं उवएसं निसम्म सम्मं पडिवज्जइ तमाणाए तह गच्छइ तह चिट्ठइ
 जाव उट्ठाए उट्ठाय पाणेहिं भूएहिं जीवेहिं सत्तेहिं संजमइ ॥ ३१ ॥ जं दिवसं च णं
 मेहे कुमारे मुडे भविता अ(आ)गाराओ अणगारियं पव्वइए तस्स णं दिवसस्स
 पच्चावरण्हकालसमयंसि समणाणं निग्गंथाणं अहाराइणियाए सेज्जासंथारएसु
 विभज्जमाणेसु मेहकुमारस्स दारमूले सेज्जासंथारए जाए यावि होत्था । तए
 णं समणा निग्गंथा पुव्वरत्तावरत्तकालसमयंसि वायणाए पुच्छणाए परियट्ठणाए
 धम्माणुजोगचिंताए य उच्चारस्स य पासवणस्स य अइगच्छमाणा य निग्गच्छमाणा
 य अप्पेगइया मेहं कुमारं हत्थेहिं संघट्ठेति एवं पाएहिं सीसे पोटे कायंसि अप्पेगइया
 ओलंडेति अप्पेगइया पोलंडेति अप्पेगइया पायरयेणुण्डियं करेति । एवं
 महालियं च णं रयणिं मेहे कुमारे नो संचाएइ खणमवि अ(च्छि)च्छी निमीलितए ।
 तए णं तस्स मेहस्स कुमारस्स अयमेयारूवे अज्झत्थिए जाव समुप्पज्जित्था-एवं
 खलु अहं सेणियस्स रत्तो पुत्ते धारिणीए देवीए अत्तए मेहे जाव सवणयाए, तं
 जया णं अहं अगारमज्जे वसामि तया णं मम समणा निग्गंथा आढायंति परिजार्णंति
 सक्कारेति सम्माणेति अट्ठाई हेऊइं पसिणाई कारणाई वागरणाई आइक्खंति इट्ठाहिं
 कंताहिं वग्गूहिं आलवेंति संलवेंति, जप्पभिइं च णं अहं मुडे भविता अगाराओ
 अणगारियं पव्वइए तप्पभिइं च णं म(म)मं समणा नो आढायंति जाव नो संलवेंति,
 अदुत्तरं च णं ममं समणा निग्गंथा राओ पुव्वरत्तावरत्तकालसमयंसि वायणाए पुच्छ-
 णाए जाव महालियं च णं रत्तिं नो संचाएमि अच्छि निमि(ला)ल्लावेत्तए, तं सेयं खलु
 मज्झं कळं पाउप्पभायाए रयणीए जाव तेयसा जलंते समणं भगवं महावीरं
 आपुच्छित्ता पुणरवि अगारमज्जे वसित्तए-त्तिकट्ठु एवं संपेहेइ २ ता अट्ठुहइवसट्ठ-
 माणसगए निरयपडिरुवियं च णं तं रयणिं खवेइ २ ता कळं पाउप्पभायाए
 सुविमलाए रयणीए जाव तेयसा जलंते जेणामेव समणे भगवं महावीरे तेणामेव
 उवागच्छइ २ ता तिकखुत्तो आयाहिणं पयाहिणं करेइ २ ता वंदइ नमंसइ वं०
 २ ता जाव पज्जुवासइ ॥ ३२ ॥ तए णं मेहाइ समणे भगवं महावीरे मेहं
 कुमारं एवं वयासी-से नूणं तुमं मेहा ! राओ पुव्वरत्तावरत्तकालसमयंसि समणेहिं
 निग्गंथेहिं वायणाए पुच्छणाए जाव महालियं च णं राइं नो संचाए(मि)सि मुहुत्तमवि
 अच्छि निमिल्लावेत्तए, तए णं तु(ब्भं)ब्भे मेहा ! इमे एयारूवे अज्झत्थिए जाव समुप्प-
 ज्जित्था-जया णं अहं अगारमज्जे वसामि तया णं मम समणा निग्गंथा आढायंति
 जाव संलवेंति, जप्पभिइं च णं मुडे भविता अगाराओ अणगारियं पव्वयामि

तप्पभिं च णं मम समणा नो आढायंति जाव नो (परियाणंति) संलवेंति अदुत्तरं
 च णं मम समणा निग्गंथा राओ अप्पेगइया वायणाए जाव पायरयरेणुगुडियं
 करेंति, तं सेयं खलु मम कल्लं पाउप्पभायाए समणं भगवं महावीरं आपुच्छिता
 पुणरवि अगारमज्जे आवसितए-तिकुट्टु एवं संपेहेसि २ ता अट्ठुहट्ठवसट्ठमाणसे
 जाव रयणिं खवेसि २ ता जेगामेव अहं तेणामेव हव्वमागए, से नूणं मेहा ! एस
 अट्ठे समट्ठे ? हंता अट्ठे समट्ठे । एवं खलु मेहा ! तुमं इओ तच्चे अईए भवग्गहणे
 वेयङ्कुगिरिपायमूले वणयरेहिं निव्वत्तियनामधेजे सेए संखदलउज्जलविमल-
 निम्मलदहिघणगोखीरफेगरयणियर(दगरयययनियर)प्पयासे सत्तुस्सेहे नवायए
 दसपरिणाहे सत्तंगपउट्ठिए सोमे समिए सुरुवे पुरओ उदग्गे समूसियसिरे सुहासणे
 पिट्ठओ वराहे अइयाकुच्छी अच्छिदकुच्छी अलंबकुच्छी पलंबलंबोदराहरकरे
 धणुपट्ठागिइविसिट्ठपुट्ठे अलीणपमाणजुत्तवट्ठियपीवरगत्तावरे अलीणपमाणजुत्तपुच्छे
 पडिपुग्गमुचास्कुम्मचलणे पंडुरसुविसुद्धनिद्धनिरुवहयविंसतिनहे छहंते सुमेरुप्पभे नामं
 हत्थिराया होत्था । तत्थ णं तुमं मेहा ! बह्वहिं हत्थीहि य हत्थिणियाहि य कोट्टएहि य
 कोट्ठियाहि य कलभेहि य कलभियाहि य सद्धिं संपरिवुडे हत्थिसहस्सनायए देसए
 पागट्ठी पट्ठवए जूहवई वंदपरियट्ठए अत्तेसिं च बहूणं एकल्लाणं हत्थिकलभाणं आहेवच्चं
 जाव विहरसि । तए णं तुमं मेहा ! निच्चप्पमतै सई पललिए कंदप्परई मोहण-
 सीले अवितण्हे कामभोगतिसिए बह्वहिं हत्थीहि य जाव संपरिवुडे वेयङ्कुगिरिपायमूले
 गिरीसु य दरीसु य कुहरेसु य कंदरासु य उज्जरेसु य निज्जरेसु य वियरएसु य गद्दासु
 य पल्लेसु य चिल्लेसु य कडगेसु य कडयपल्लेसु य तडीसु य विग्रहीसु य टंकेसु य
 कूडेसु य सिहरेसु य पब्भारेसु य मंचेसु य मालेसु य काणणेसु य वणेसु य वणसेडेसु
 य वणराईसु य नईसु य नईकच्छेसु य जूहेसु य संगमेसु य वावीसु य पोम्ब्वरिणीसु
 य वीहियासु य गुंजालियासु य सरेसु य सरपंतियासु य सरसरपंतियासु य वणयरेहिं
 दिन्नवियारे बह्वहिं हत्थीहि य जाव सद्धिं संपरिवुडे बहुविहत्तरुपल्लवपउरपाणियतणे
 निब्भए निहव्वगे सुहंसुहेणं विहरसि । तए णं तुमं मेहा ! अन्नया कयाइ पाउस-
 वरिसारत्तसरयहेमंतवसंतैसु कमेण पंचसु उज्जसु समइक्कंतैसु गिम्हकालसमयंसि जेट्ठामू-
 लमासे पायवधंससमुट्ठिएणं सुक्कतणपत्तकयवरमारुयसंजोगदीविएणं महाभयंकरेणं
 हुयवहेणं वणदवजालासंपलित्तेसु वणंतैसु धूमाउलासु दिसासु महावायवेगेणं संवाट्टिएसु
 छिबजालेसु आवयमाणेसु पोळरुक्खेसु अंतो अंतो झियायमाणेसु मयकुहियवि(णिवि)-
 णट्ठकिमियकह्मनईवियरग(जिण्ण)ज्झीणपाणीयंतैसु वणंतैसु भिंगारकदीगकंदियर-
 वेसु खरफरुसअणिट्ठरिट्ठवाहि(त)त्तविहुमग्गेसु दुमेसु तण्हावसमुक्कपक्खपयडियजिब्भ-

तालुयअसंपुडियतुंडपक्खिसंघेसु ससंतेसु गिम्हउम्हउण्णवायखरफरुसचंडमारुय-
सुक्कतणपत्तकयवरवाउलिभमंतदि(त्त)न्नसंभंतसावयाउलमिगतण्णहबद्धचिधपेट्सु गिरि-
वरेसु संवट्टिएसु तत्थमियपस(व)यमरीसिवेसु अवदालियवयगविवरनिळालिधगजीहे
महंततुंबइयपुण्णकण्णे संकुचियथोरपीवरकरे ऊसियनं(लं)गूले पीणाइयविरसरडिय-
सहेगं फोडयंतेव अंबरतलं पायदहरएणं कंपयंतेव मेइणितलं विणिम्मुयमाणे य सीयारं
सव्वओ समंता वल्लिवियाणाईं छिंदमाणे रुक्खसहस्साईं तत्थ सुवहूणि नो(ह्म)ल्लयंते
विणट्टरट्टेव्व नरवरिंदे वायाइहेव्व पोए मंडलवाएव्व परिब्भमंते अभिक्खण २
लिंडनियरं पमुंचमाणे २ बहूहिं हत्थीहिं य जाव सद्धिं दिसोदिसिं विप्पलाइत्था ।
तत्थ णं तुमं मेहा ! जुण्णे जराजजरियदेहे आउरे झंझिए पिवासिए दुब्बले
किलंते नट्टुइए मूढदिसाए सयाओ जूहाओ विप्पहूणे वणदवजालापारद्धे उण्णेण
य तण्हाए य छुहाए य परब्भमाहए समाणे भीए तत्थे तसिए उव्विग्गे संजायभए
सव्वओ समंता आधावमाणे परिधावमाणे एगं च णं महं सरं अप्पोदयं पंकबहुलं
अति(त्थि)त्थेणं पाणियपाए (उड्ढणो) ओइण्णे । तत्थ णं तुमं मेहा ! तीरमइगए पाणियं
असंपत्ते अंतरा चेव सेयंसि विसण्णे । तत्थ णं तुमं मेहा ! पाणियं पाइस्सामि-त्तिकडु
हत्थं पसारसि, से वि य ते हत्थे उदगं न पावइ । तए णं तुमं मेहा ! पुणरवि
कायं पच्चुद्धरिस्सामि-त्तिकडु बलियतरायं पंकंसि खुत्ते । तए णं तुमं मेहा ! अजया
कयाइ एगे चिरनिज्जडे गयवरजुवाणए सगाओ जूहाओ करचरणदंतमुसलप्पहारेहिं
विप्परद्धे समाणे तं चेव महद्दं पाणी(यं पाएउं)यपाए समोयरइ । तए णं से कलभए
तुमं पासइ २ ता तं पुव्ववेरं समरइ २ ता आसुरुत्ते रुट्टे कुविए चंडिक्किए मिसिमिसेमाणे
जेणेव तुमं तेणेव उवागच्छइ २ ता तुमं तिकखेहिं दंतमुसलेहिं तिकखुत्तो पिट्ठओ
उच्छुभइ २ ता पुव्ववेरं निज्जाएइ २ ता हट्टुट्टे पाणियं पियइ २ ता ज.मेव
दिसिं पाउब्भूए तामेव दिसिं पडिगए । तए णं तव मेहा ! सरीरगंसि वेयणा
पाउब्भवित्था उज्जला विउला (तिउला) कक्खडा जाव दुरहियासा पित्तजरपरिगय-
सरीरे दाहवक्कंतीए यावि विहरित्था । तए णं तुमं मेहा ! तं उज्जलं जाव
दुरहियासं सत्तराईदियं वेयगं वेदेसिं सवीसं वाससयं परमाउं पालइत्ता
अट्टवसट्टुहट्टे कालमासे कालं किच्चा इहेव जंबुदीवे २ भारहे वासे दाहिणद्धभरहे
गंगाए महानईए दाहिणे कूले त्रिंशगिरिपायमूले एगेणं मत्तवरगंधहत्थिणा एगाए
गयवरकरेणूए कुच्छिसिं गयकलभए जणिए । तए णं सा गयकलभिया नवण्हं
मासाणं वसंतमासम्मि तुमं पयाया । तए णं तुमं मेहा ! गम्भवासाओ विप्पमुक्के
समाणे गयकलभए यावि होत्था रत्तुप्पलरत्तसूमालए जासुमणारत्तपारिजत्तय-

लक्खारससरसकुंकुमसंज्ञभरागवण्णे इद्वे नियगस्स जूहवइणो गणि(या)यारक्कोरु-
कोत्थहत्थी अणेगहत्थिसयसंपरिवुडे रम्मेसु गिरिकाणणेषु सुहंसुहेणं विहरसि ।
तए णं तुमं मेहा ! उम्मुक्कबालभावे जोव्वणगमणुप्पत्ते जूहवइणा कालधम्मणा
संजुत्तेणं तं जूहं सयमेव पडिवज्जसि । तए णं तुमं मेहा ! वणयरेहिं
निव्वत्तियनामधेजे जाव चउदंते मेरुप्पमे हत्थिरयणे होत्था । तत्थ णं तुमं मेहा !
सत्तंगपइट्टिए तहेव जाव पडिरुवे । तत्थ णं तुमं मेहा ! सत्तसइयस्स जूहस्स
आहेवच्चं जाव अभिरमेत्था । तए णं तुमं अन्नया कयाइ गिम्हकालसमयंसि जेट्टामूले
वणदवजालापलित्तिसु वणंतेसु(सु)धूमाउलासु दिसासु जाव मंडलवाएव परिब्भ-
मंते भीए तत्थे जाव संजायमए बहूहिं हत्थीहि य जाव कलभियाहि य सद्धिं
संपरिवुडे सव्वओ समंता दिसोदिसिं विप्पलाइत्था । तए णं तव मेहा ! तं वणदवं
पासित्ता अयमेयारुवे अज्झत्थिए जाव समुप्पज्जित्था-कहिं णं मजे मए अयमेयारुवे
अग्गिसंभवे अणुभूयपुव्वे ?, तए णं तव मेहा ! लेस्साहिं विजुज्झमाणीहिं अज्झ-
वसाणेणं सोहणेणं सुभेणं परिणामेणं तयावरणिज्जाणं कम्माणं खओवसमेणं ईहा-
पोहमग्गणगवेसणं करेमाणस्स सच्चिपुव्वे जा(इं)इसरणे समुप्पज्जित्था । तए णं तुमं
मेहा ! एयमट्ठं सम्मं अभिसमेसि-एवं खलु मया अईए दोच्चे भवग्गहणे इहेव
जंबुदीवे २ भारहे वासे वेयङ्गुगिरिपायमूले जाव (सुहंसुहेणं विहरइ)तत्थ णं
महया अयमेयारुवे अग्गिसंभवे समणुभूए । तए णं तुमं मेहा ! तस्सेव दिवसस्स
पच्चावरण्हकालसमयंसि नियएणं जूहेणं सद्धिं समन्नागए यावि होत्था । तए णं
तुमं मेहा ! सत्तुस्सेहे जाव सच्चिजाइस्सरणे चउदंते मेरुप्पमे नामं हत्थी (राया)
होत्था । तए णं तुज्झं मेहा ! अयमेयारुवे अज्झत्थिए जाव समुप्पज्जित्था-(तं)सेयं
खलु मम इयाणिं गंगाए महानईए दाहिणिळंसि कूलंसि विंझगिरिपायमूले
दवग्गिसं(ताणं)जायकारणट्ठा सएणं जूहेणं (महइ)महालयं मंडलं घाइत्तए-तिकट्टु
एवं संपेहेसि २ ता सुहंसुहेणं विहरसि । तए णं तुमं मेहा ! अन्नया कयाइ
पडमपाउसंसि महावुट्ठिकायंसि सच्चिवइयंसि गंगाए महानईए अदूरसामंते बहूहिं
हत्थीहिं जाव कलभियाहि य सत्तहि य हत्थिसएहिं संपरिवुडे एणं महं
जोयणपरिमंडलं महइमहालयं मंडलं घाएसि जं तत्थ तणं वा पत्तं वा कट्ठं वा
कंटए वा लया वा वल्ली वा खाणुं वा रुक्खे वा खु वे)वं वा तं सव्वं तिकखुत्तो आहु-
णिय २ पाएणं उ(ट्टवे)द्वरेसि हत्थेणं गेण्हसि एणंते ए(पा)डेसि । तए णं तुमं मेहा !
तस्सेव मंडलस्स अदूरसामंते गंगाए महानईए दाहिणिळे कूले विंझगिरिपायमूले
गिसीसु य जाव विहरसि । तए णं तुमं मेहा ! अन्नया कयाइ मज्झिमए वरिसारत्तंसि

महाबुद्धिकायंसि सन्निवड्यंसि जेणेव से मंडले तेणेव उवागच्छसि २ ता दोच्चंपि मंडलं
घाएसि, एवं चरिमवासारत्तंसि महाबुद्धिकायंसि सन्निव(इ)यमाणंसि जेणेव से मंडले
तेणेव उवागच्छसि २ ता तच्चंपि मंडलघायं करेसि जं तत्थ तणं वा जाव सुहंसुहेणं विह-
रसि । अह मेहा ! तुमं गइंदभावम्मि वट्टमा(णे)णो कमेणं नलिणिवणवि(वह)हवणगरे
हेमंते कुंदलोदुद्धुयुसारपउरम्मि अइकंते अहिगवे गिम्हसमयंसि पत्ते वियट्टमा(णे)-
णो वणेसु वगकरेणुविविहदिशकयपसवधाओ तुमं उउयकुसुमकयचामरकण्णपूरपरिमंडि-
याभिरामो मयवसविगसंतकडतडकिलिन्नगंधमदवारिणा सुरभिज्जणियगंधो करेणुपरि-
चारिओ उउसमतजणियसोहो काले दिणयरकरपयंडे परिसोसियतरवरसि(रि)हरभीम-
तरदंसणिजे भिंगारवंतभेरवरवे नागाविहपत्तकट्टतणकयवसु(द्धु)द्धुयपडमाख्याइदनह-
यलदुमगणे वाउलि(या)दारुणतरे तण्हावसदोसदूसियभमंतविहिसावयसमाउले भी-
मदरिसणिजे वट्टंते दारुणम्मि गिम्हे मारुयवसपसरपसरियवियंभिएणं अब्भहियभीम-
भेरवरवप्पगारेणं 'महुधारापडियसित्तउद्दायमाण(धग)धगधगेंतसद्धु(द्धु)द्धएणं दित्त-
तरसफुल्लिगेणं धूममालाउलेगं सावयसयंतकरणेणं (अब्भहिय)वणदवेणं जालालो-
वियनिरुद्धधूमंधकारभीओ आयवालोयमहंततुंबड्यपुण्णकण्णो आकुंचियथोरपीवरकरो
भयवसभयंतदित्तनयणो वेगेणं महामेहोव्व वाय(पव)णोल्लियमहल्लूवो जे(णेव)ण
कओ ते(ण) पुरा दवग्गिभयभीयहियएणं अवगयतणप्पएसरुक्खो रुक्खोहेसो दवग्गि-
संताणकारणट्ठा (ए) जेणेव मंडले तेणेव पहारेत्थ गमणाए । एक्को ताव एस गमो ।
तए णं तुमं मेहा ! अन्नया कयाइं कमेणं पंचसु उऊसु समइकंतेसु गिम्हकालस-
मयंसि जेट्टामूले मासे पायवसंवससमुट्ठिएणं जाव संवट्टिएसु मियपसुपक्खिसरीसिवे(सु)
दिसोदिसि विप्पलायमाणेसु तेहिं बहूहिं हत्थीहि य सद्धिं जेणेव (से) मंडले तेणेव
पहारेत्थ गमणाए । तत्थ णं अच्चे बहवे सीहा य वग्घा य विगा य दीविया अच्छा
य तरच्छा य पारासरा य सरभा य सियाला विराला सुणहा कोला ससा कोकंतिया
चित्ता चिल्ला पुव्वपविट्ठा अग्गिभयभिद्दुया एगयओ विलधम्ममेणं चिट्ठंति । तए
णं तुमं मेहा ! जेणेव से मंडले तेणेव उवागच्छसि २ ता तेहिं बहूहिं सीहेहिं जाव
चिल्लेहि य एगयओ विलधम्ममेणं चिट्ठसि । तए णं तुमं मेहा ! पाएणं गत्तं
कंडुइस्सामीतिकट्टु पाए उम्बिखत्ते, तंसि च णं अंतरंसि अच्चेहिं बलवंतेहिं सत्तेहिं
पणो(लि)ल्लिज्जमाणे २ ससए अणुप्पविट्ठे । तए णं तुमं मेहा ! गायं कंडुइत्ता पुणरवि
पायं पडिनि(क्खमि)क्खेविस्सामि-त्तिकट्टु तं ससयं अणुपविट्ठं पाससि २ ता पाणाणु-
कंपयाए भूयाणुकंपयाए जीवाणुकंपयाए सत्ताणुकंपयाए से पाए अंतरा चेव संधारिए
नो चेव णं निम्बिखत्ते । तए णं तुमं मेहा ! ताए पाणाणुकंपयाए जाव सत्ताणुकंपयाए

संसारं परिच्छिन्नं माणुस्साउए निबद्धं । तए णं से वणदवे अङ्गाइजाई राईदियाईं
 तं वणं ज्ञामेइ २ ता निट्टिए उवरए उवसंते विज्झाए यावि होत्था । तए णं ते
 बह्वे सीहा य जाव चिल्ला य तं वणदवं निट्टियं जाव विज्झायं पासंति २ ता
 अग्निभयविप्पमुक्का तण्हाए य छुहाए य परब्भाहया समाणा तओ)मंडलाओ
 पडिनिक्खमंति २ ता सव्वओ समंता विप्पसरित्था । तए णं ते बह्वे हत्थी जाव
 छुहाए य परब्भाहया समाणा तओ मंडलाओ पडिनिक्खमंति २ ता दिसोदिसिं
 विप्पसरित्था । तए णं तुमं मेहा ! जुण्णे जराजजरियदेहे सिद्धिलवलितयापिणिद्ध-
 गत्ते दुब्बले किलंते जुंजिए पिवासिए अत्थामे अवले अपरक्कमे अचंक्रमणो वा
 ठाणुखडे वेगेण विप्पसरिस्सामि-त्तिकद्धु पाए पसारमाणे विज्जुहए विव रययगिरि-
 पब्भारं धरणितलंस्ति सव्वगेहिं सच्चिवइए । तए णं तव मेहा ! सरीरगसि वेयणा
 पाउब्भूया उज्जला जाव दाहवक्कंतिए यावि विहरसि । तए णं तुमं मेहा ! तं उज्जलं
 जाव दुरहियासं तिच्छि राईदियाईं वेयणं वेएमाणे विहरित्ता एगं वाससयं परमाउं
 पालइत्ता इहेव जंबुद्वीवे २ भारहे वासे रायगिहे नयरे सेणियस्स रज्जो धारिणीए
 देवीए कुच्छिसि कुमारत्ताए पच्चायाए ॥ ३३ ॥ तए णं तुमं मेहा ! आ(अ)णुपुव्वेणं
 गब्भवासाओ निक्खंते समाणे उम्मुक्कबालभावे जोव्वणगमणुप्पत्ते मम अंतिए मुंडे
 भविता अगाराओ अणगारियं पव्वइए । तं जइ ता(जा)व तुमे मेहा ! तिरिक्ख-
 जोणियभावमुवगएणं अपडिलद्धसम्मत्तरयणलंभेणं से पाए पाणाणुकंपयाए जाव
 अंतरा चेव संधारिए नो चेव णं निक्खित्ते किमंग पुण तुमं मेहा ! इयाणि विपुल-
 कुलसमुब्भवेणं निरुवहयसरीर(दंत)पत्तलद्धपंचिदिएणं एव उट्ठाणबलवीरियपुरिस-
 (क्का)गारपरक्कमसंजुत्तेणं म(म)मं अंतिए मुंडे भविता अगाराओ अणगारियं पव्वइए
 समाणे समणानं निग्गथाणं राओ पुव्वरत्तावरत्तकालसमयंसि वायणाए जाव धम्माणु-
 ओगचित्ताए य उचारस्स वा पासवणस्स वा अइगच्छमाणाण य निग्गच्छमाणाण
 य हत्थसंघट्टणाणि य पायसंघट्टणाणि य जाव रयरेणुण्डणाणि य नो सम्मं सहसि
 खमसि तितिकखसि अहियासेसि ?, तए णं तस्स मेहस्स अणगारस्स समणस्स
 भगवओ महावीरस्स अंतिए एयमट्ठं सोच्चा निसम्म सुभेहिं परिणामेहिं पसत्थेहिं
 अज्जवमाणेहिं लेस्साहिं विमुज्जमाणीहिं तयावरणिज्जाणं कम्माणं खओवसमेणं
 ईहापोहमगगणगवेसणं करेमाणस्स सच्चिपुव्वे जाईसरणे समुप्पन्ने एयमट्ठं सम्मं
 अभिसमेइ । तए णं से मेहे कुमारं समणेणं भगवया महावीरेणं संभारियपुव्वजाई-
 सरणे दुण्णाणीयसंवेगे आगंदयंसुपुण्णमुहे हरिसवसेणं धाराहयकयंबकं पिव
 समूससियरोमकूवे समणं भगवं महावीरं वंदइ नमंसइ वं० २ ता एवं वयासी-

अज्जप्पमिहं णं भंते ! मम दो अच्छीणि मोत्तूणं अवसेसे काए समणांणं निगंथाणं
 निसट्ठे-त्तिकट्ठु पुणरवि समणं भगवं महावीरं वंदइ नमंसइ वं० २ ता एवं
 वयासी-इच्छामि णं भंते ! इयाणि दोच्चं पि सयमेव पव्वावियं सयमेव मुंडावियं जाव
 सयमेव आयारगोयरं जायामायावत्तिं धम्ममाइक्ख(ह)न्तु । तए णं समणे भगवं
 महावीरे मेहं कुमारं सयमेव पव्वावेइ जाव जायामायावत्तिं धम्ममाइक्खइ-एवं
 देवाणुप्पिया ! गंतव्वं एवं चिट्ठियव्वं एवं णिसीयव्वं एवं तुयट्ठियव्वं एवं भुंजियव्वं
 एवं भासियव्वं उट्ठाय २ पाणाणं भूयाणं जीवाणं सत्ताणं संजमेणं संजमियव्वं । तए
 णं से मेहे समणस्स भगवओ महावीरस्स अयमेयारूवं धम्मियं उवएसं सम्मं पडि-
 (च्छइ)वज्जइ २ ता तह (चिट्ठइ) गच्छइ जाव संजमेणं संजमइ । तए णं से मेहे
 अणगारे जाए इरियासमिए अणगारवण्णओ भाणियव्वो । तए णं से मेहे अणगारे
 समणस्स भगवओ महावीरस्स अंतिए तहा(एया)रूवाणं थेराणं सामाइयमाइयाणि
 एक्कारस अंगाइ अहिज्जइ २ ता बहूहिं चउत्थल्लट्ठमदसमडुवालेहिं मासद्धमासख-
 मणेहिं अप्पाणं भावेमाणे विहरइ । तए णं समणे भगवं महावीरे रायणिहाओ नय-
 राओ गुणसिलयाओ उज्जाणाओ पडिनिक्खमइ २ ता बहिया जणवयविहारं विहरइ
 ॥ ३४ ॥ तए णं से मेहे अणगारे अज्जया कयाइ समणं भगवं महावीरं वंदइ नम-
 सइ वं० २ ता एवं वयासी-इच्छामि णं भंते ! तुब्भेहिं अब्भणुत्ताए समाणे मासियं
 भिक्खुपडिमं उवसंपज्जिताणं विहरितए । अहासुहं देवाणुप्पिया ! मा पडिबंधं करेह ।
 तए णं से मेहे अणगारे समणेणं भगवया महावीरेणं अब्भणुत्ताए समाणे मासियं
 भिक्खुपडिमं उवसंपज्जिताणं विहरइ, मासियं भिक्खुपडिमं अहासुत्तं अहाकप्पं अहा-
 मगं सम्मं काएणं फासेइ पालेइ सोभेइ तीरेइ किट्ठेइ सम्मं काएणं फासेत्ता पालित्ता
 सोभेत्ता तीरेत्ता किट्ठेत्ता पुणरवि समणं भगवं महावीरं वंदइ नमंसइ वं० २ ता एवं
 वयासी-इच्छामि णं भंते ! तुब्भेहिं अब्भणुत्ताए समाणे दोमासियं भिक्खुपडिमं उव-
 संपज्जिताणं विहरितए । अहासुहं देवाणुप्पिया ! मा पडिबंधं करेह । जहा पढमाए
 अभिलावो तहा दोच्चाए तच्चाए चउत्थाए पंचमाए छम्मासियाए सत्तमासियाए पढ-
 मसत्तरा(य)इंदियाए दोच्चं सत्तराइदियाए तइयं सत्तराइंदियाए अहोराइंदियाएवि एग-
 राइंदियाएवि । तए णं से मेहे अणगारे बारस भिक्खुपडिमाओ सम्मं काएणं फासेत्ता
 पालेत्ता सोभेत्ता तीरेत्ता किट्ठेत्ता पुणरवि वंदइ नमंसइ वं० २ ता एवं वयासी-इच्छामि
 णं भंते ! तुब्भेहिं अब्भणुत्ताए समाणे गुणरयणसंवच्छरं तवोक्कम्मं उवसंपज्जिताणं
 विहरितए । अहासुहं देवाणुप्पिया ! मा पडिबंधं करेह । तए णं से मेहे अणगारे
 पढमं मासं चउत्थं चउत्थेणं अणिक्खित्तेणं तवोक्कमेणं दिया ठाणुक्कडुए स्राभिमुहे

आयावणभूमीए आयावेमाणे रत्ति वीरासणेणं अवाउडेणं । दोच्चं मासं छट्ठंछट्ठेणं ० । तच्चं मासं अट्ठमंअट्ठमेणं ० । चउत्थं मासं दसमंदसमेणं अणिकिखत्तेणं तवोकम्ममेणं दिया ठाणुकुडुए सूरामिमुहे आयावणभूमीए आयावेमाणे रत्ति वीरासणेणं अवाउडेणं । पंचमं मासं दुवालसमंदुवालसमेणं अणिकिखत्तेणं तवोकम्ममेणं दिया ठाणुकुडुए सूरामिमुहे आयावणभूमीए आयावेमाणे रत्ति वीरासणेणं अवाउडेणं । एवं खलु एएणं अभिलावेणं छट्ठे चोद्दसमं २ सत्तमे सोलसमं २ अट्ठमे अट्ठारसमं २ नवमे वीसइमं २ दसमे बावीसइमं २ एक्कारसमे चउव्वीसइमं २ बारसमे छव्वीसइमं २ तेरसमे अट्ठावीसइमं २ चोद्दसमे तीसइमं २ पच्चर(पंचद)समे बत्तीसइमं २ सोलसमे(मासे) चउत्तीसइमं २ अणिकिखत्तेणं तवोकम्ममेणं दिया ठाणुकुडुए (णं) सूरामिमुहे आयावणभूमीए आयावेमाणे रत्ति वीरासणेणं य अवाउडएणं य । तए णं से मेहे अणगारे गुणरयणसंवच्छरं तवोकम्मं अहासुत्तं जाव सम्मं काएणं फासेइ पालेइ सोभेइ तीरेइ किट्ठेइ अहासुत्तं अहाकर्णं जाव किट्ठेता समणं भगवं महावीरं वंदइ नमंसइ वं ० २ ता बहूहिं छट्ठट्ठमदसमदुवालसेहिं मासइमासखमणेहिं विचिन्तेहिं तवोकम्ममेहिं अप्पाणं भावेमाणे विहरइ ॥ ३५ ॥ तए णं से मेहे अणगारे तेणं उरालेणं विपुलेणं सस्सिरीएणं पयत्तेणं पग्गहिएणं कल्लणेणं सिवेणं धन्नं मंगल्लेणं उदग्गेणं उदारएणं उत्तमेणं महाणुभावेणं तवोकम्ममेणं सुक्कं भुक्खे लुक्खे निम्मंसे निस्सोणिए किडिकिडियाभूए अट्ठिचम्मावणद्धे किसे धमणिसंतए जाए यावि होत्था, जीवंजीवेणं गच्छइ जीवंजीवेणं चिट्ठइ भासं भासित्ता गिला(य)इ भासं भासमाणे गिलायइ भासं भासिस्सामित्ति गिलायइ । से जहानामए इंगालसगडियाइ वा कट्टसगडियाइ वा पत्तसगडियाइ वा तिलसगडियाइ वा एरंडकट्टसगडियाइ वा उण्हे दिवा सुक्का समाणी ससइं गच्छइ ससइं चिट्ठइ एवामेव मेहे अणगारे ससइं गच्छइ ससइं चिट्ठइ उवचिए तवेणं अवचिए मंससोणिएणं हुयासणे इव भासरासिपरिच्छे तवेणं तेएणं तवतेयसिरीए अईव २ उवसोभमाणे २ चिट्ठइ । तेणं कालेणं तेणं समएणं समणे भगवं महावीरे आइगरे तित्थगरे जाव पुव्वाणुपुव्वि चरमाणे गामाणुगामं दूइज्जमाणे सुहंसुहेणं विहरमाणे जेणामेव रायगिहे नयरे जेणामेव गुणसिलए उज्जाणे तेणामेव उवागच्छइ २ ता अट्ठापडिखवं उग्गहं ओणिणिहत्ता संजमेणं तवसा अप्पाणं भावेमाणे विहरइ । तए णं तरस्स मेहस्स अणगारस्स राओ पुव्वरत्तावर्त्तकालसमयंसि धम्मजागरियं जागरमाणस्स अयमेयारुवे अज्झत्थिए जाव समुप्पजित्था-एवं खलु अहं इमेणं उरालेणं तहेव जाव भासं भासिस्सामित्ति गिलामि, तं अत्थि ता मे उट्ठाणे कम्मे बळे वीरिए पुरिसक्कारपरक्कमे सद्धा धिई संवेगे तं जाव

ता मे अत्थि उट्ठाणे कम्मे बले वीरिए पुरिसक्कारपरक्कमे सद्धा धिई संवेगे जाव य मे धम्मायरिए धम्मोवएसए समणे भगवं महावीरे जिणे सुहत्थी विहरइ ताव(ताव)मे सेयं कळं पाउप्पभायाए रयणीए जाव तेयसा जलंते (सूरे)समणं भगवं महावीरं वंदित्ता नमंसित्ता समणेणं भगवया महावीरेणं अब्भणुच्चायस्स समाणस्स सयमेव पंच महव्वयाई आ(रु)राहिता गोयमाइए समणे निग्गंथे निग्गंथीओ य खामेत्ता तहारूवेहिं कडाईहिं थेरेहिं सद्धिं विउलं पव्वयं सणियं २ दुरुहिता सयमेव मेहघ-
णसन्निगासं पुढाविसिलापट्ठयं पडिलेहिता संलेहणाइसणा(ए)इसियस्स भत्तपाणप-
डियाइक्खियस्स पाओवगयस्स कालं अणवकंखमाणस्स विहरित्तए । एवं संपेहेइ २
त्ता कळं पाउप्पभायाए रयणीए जाव जलंते जेणेव समणे भगवं महावीरे तेणेव
उवागच्छइ २ ता समणं भगवं महावीरं तिकखुत्तो आयाहिणं पयाहिणं करेइ २ ता
वंदइ नमंसइ वं० २ ता नच्चासन्ने नाइदूरे सुस्सूसमाणे नमंसमाणे अभिसुहे विणएणं
पंजलिउडे पज्जुवामइ । मे(हेत्ति)हाइ समणे भगवं महावीरे मेहं अणगारं एवं
वयासी-से नूणं तव मेहा ! राओ पुव्वरत्तावरत्तकालसमयंसि धम्मजागरियं जागर-
माणस्स अयमेवारूवे अज्झत्थिए जाव समुप्पज्जित्था-एवं खलु अहं इमेणं उरालेणं
जाव जेणेव अ(इ)हं तेणेव हव्वमागए । से नूणं मेहा ! अट्ठे समट्ठे ? हंता अत्थि ।
अहासुहं देवाणुप्पिया । मा पडिबधं करेह । तए णं से मेहे अणगारे समणेणं भग-
वया महावीरेणं अब्भणुच्चाए समाणे हट्ठ जाव हियए उट्ठाए उट्ठेइ २ ता समणं
भगवं महावीरं तिकखुत्तो आयाहिणं पयाहिणं करेइ २ ता वंदइ नमंसइ वं० २ ता
सयमेव पंच महव्वयाई आरुहेइ २ ता गोयमाइ समणे निग्गंथे निग्गंथीओ य
खामेइ २ ता तहारूवेहिं कडाईहिं थेरेहिं सद्धिं विपुलं पव्वयं सणियं २ दुरुहइ २
ता सयमेव मेहघणसन्निगासं पुढाविसिलापट्ठयं पडिलेहेइ २ ता उच्चारपासवणभूमिं
पडिलेहेइ २ ता दब्भसंथारगं संथरइ २ ता दब्भसंथारगं दुरुहइ २ ता पुरत्थाभि-
सुहे संपलियं कनिसणे करयलपरिग्गहियं सिरसावत्तं मत्थए अंजलिं कट्ठु एवं वयासी-
नमोत्थु णं अरिहंताणं भगवंताणं जाव संपत्ताणं, नमोत्थु णं समणस्स भगवओ
महावीरस्स जाव संपाविउकामस्स मम धम्मायरियस्स । वंदामि णं भगवंतं तत्थ-
गयं इहगए पासउ मे भगवं तत्थगए इहगयं-तिकट्ठु वंदइ नमंसइ वं० २ ता एवं
वयासी-पुव्वि पि(य) णं मए समणस्स भगवओ महावीरस्स अंतिए सव्वे पाणाइ-
वाए पच्चक्खाए मुसावाए अदिच्चादाणे मेहुणे परिग्गहे कोहे माणे माया लोहे पेजे दोसे
कलहे अब्भक्खाणे पेसुजे परपरिवाए अरइरइ मायामोसे सिच्छादंसणसल्ले पच्चक्खाए ।
इयाणिं पि णं अहं तस्सेव अंतिए सव्वं पाणाइवायं पच्चक्खामि जाव सिच्छा-

दंसणसल्लं पच्चक्खामि सव्वं असणपाणखाइमसाइमं चउव्विहं पि आहारं पच्चक्खामि
 जावज्जीवाए । जं पि य इमं सरीरं इड्ढं कंतं पियं जाव विविहा रोगायंका परीसहो-
 वसग्गा फुसंतीति रुड्ढु एयं पि य णं चरमेहिं ऊसासनीमासेहिं वोसिरामि-त्ति रुड्ढु-
 संलेहणाइसणाइसिए भत्तपाणपडियाइक्खिए पाओवगए कालं अणवकंखमाणे विह-
 रइ । तए णं ते थेरा भगवंतो मेहस्स अणगारस्स अगिलाए वेयावडियं करेंति ।
 तए णं से मेहे अणगारे समणस्स भगवओ महावीरस्स तहारूवाणं थेराणं अंतिए
 सामाइयमाइयाइं एक्कारस अंगाईं अहिज्जित्ता बहुपडिपुण्णाइं दुवालसवरिसाईं साम-
 ण्णपरियागं पाउणित्ता मासियाए संलेहणाए अप्पाणं झोसेत्ता सट्ठिं भत्ताइं अणसणाए
 छेएत्ता आलोइयपडिक्कंते उड्डियसल्ले समाहिपत्ते आणुपुव्वेणं कालगए । तए णं(ते)
 थेरा भगवंतो मेहं अणगारं आणुपुव्वेणं कालगयं पासंति २ ता परिनिव्वाणवतियं
 काउस्सग्गं करेंति २ ता मेहस्स आयारभंडगं गेहंति २ ता विउलाओ पव्वयाओ
 सणियं २ पच्चोहंति २ ता जेणामेव गुणसिलए उज्जाणे जेणामेव समणे भगवं महा-
 वीरे तेणामेव उवागच्छंति २ ता समणं भगवं महावीरं वंदंति नमंसंति वं० २ ता
 एवं वयासी-एवं खलु देवाणुप्पियाणं अंतेवासी मेहे नामं अणगारे पगइभए जाव
 विणीए । से णं देवाणुप्पिएहिं अब्भणुज्जाए समाणे गोयमाइए समणे निगंथे निगं-
 थीओ य खामेत्ता अम्हेहिं सद्धिं विपुलं पव्वयं सणियं २ दुरुहइ २ ता सयमेव मेव-
 घणसज्जिगासं पुढविसिलं (पट्टयं) पडिलेहेइ २ ता भत्तपाणपडियाइक्खिए अणुपुव्वेणं
 कालगए । एस णं देवाणुप्पिया ! मेहस्स अणगारस्स आयारभंडए ॥ ३६ ॥ भंते !
 त्ति भगवं गोयमे समणं भगवं महावीरं वंदइ नमंसइ वं० २ ता एवं वयासी-एवं
 खलु देवाणुप्पियाणं अंतेवासी मेहे नामं अणगारे, से णं भंते ! मेहे अणगारे
 कालमासे कालं किच्चा कहिं गए कहिं उववन्ने ? गोयमाइ समणे भगवं महावीरे
 भगवं गोयमं एवं वयासी-एवं खलु गोयमा ! मम अंतेवासी मेहे नामं अणगारे
 पगइभए जाव विणीए, से णं तहारूवाणं थेराणं अंतिए सामाइयमाइयाइं एक्का-
 रस अंगाईं अहिज्जइ २ ता बारस भिक्खुपडिमाओ गुणरयणसंवच्छरं तवोक्कम्मं
 काएणं फासेत्ता जाव किट्ठित्ता मए अब्भणुज्जाए समाणे गोयमाइ थेरे खामेइ २
 ता तहारूवेहिं जाव विउलं पव्वयं दुरुहइ २ ता दब्भसंथारगं संथरइ २ ता
 दब्भसंथारोवगए सयमेव पंचमहव्वए उच्चारइ बारस वासाईं सामण्णपरियागं
 पाउणित्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेदेत्ता
 आलोइयपडिक्कंते उड्डियसल्ले समाहिपत्ते कालमासे कालं किच्चा उद्धं चंदिमस्सग्ग-
 हगणनक्खत्ततारारूवाणं बहुइं जोयणाइं बहुइं जोयणसयाइं बहुइं जोयणसहस्साइं

बहूइं ज्योयसयसहस्साइं बहू(ई)इ ज्योयकोबीओ बहूइ ज्योयकोडाकोबीओ उहूँ
 दूरं उप्पइत्ता सोहम्मीसाणसणंकुमारमाहिंदबंभलंतगमहासुक्कसहस्साराणयपाणयार-
 णञ्चुए तिण्णि य अट्टारसुत्तरे गेवेज्जविमा(ण)णावाससए वीइवइत्ता विजए महाविमाणे
 देवत्ताए उववन्ने । तत्थ णं अत्थेगइयाणं देवाणं ते(व)त्तीसं सागरोवमाइं ठिई
 पन्नत्ता । तत्थ णं मेहस्सवि देवस्स तेत्तीसं सागरोवमाइं ठिई पन्नत्ता । एस णं
 भंते ! मेहे देवे ताओ देवलोयाओ आउक्खएणं ठिइक्खएणं भवक्खएणं अणंतं
 चयं चइत्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्झि-
 हिइ बुज्झिहिइ मुच्चिहिइ परिनिव्वाहिइ सव्वदुक्खाणमंतं काहिइ । एवं खलु जंबू !
 समणेणं भगवया महावीरेणं आइगरेणं तित्थगरेणं जाव संपत्तेणं अप्पोपालंभ-
 निमित्तं पढमस्स नायज्झयणस्स अयमट्ठे पन्नत्ते त्तिबेमि ॥ ३७ ॥ गाहा-महुरेहिं
 निउणेहिं वयणेहिं चोययंति आयरिया । सीसे कहिंप्पि खलिए जह मेहमुणिं महावीरो
 ॥ १ ॥ पढमं अज्झयणं समत्तं ॥

जइ णं भंते ! समणेणं भगवया महावीरेणं जाव संपत्तेणं पढमस्स नायज्झयणस्स
 अयमट्ठे पन्नत्ते बिइयस्स णं भंते ! नायज्झयणस्स के अट्ठे पन्नत्ते ? एवं खलु जंबू !
 तेणं कालेणं तेणं समएणं रायगिहे नामं नयरे होत्था वण्णओ । [तत्थ णं रायगिहे
 नयरे सेणिए नामं राया होत्था महया वण्णओ] त(त्थ)स्स णं रायगिहस्स नयरस्स
 बहिया उत्तरपुरच्छिमे दिसीभाए गुणसिलए नामं उज्जाणे होत्था वण्णओ । तस्स
 णं गुणसिलयस्स उज्जाणस्स अदूरसामंते एत्थ णं महं एगे (पडिय) जिणुज्जाणे यावि
 होत्था विणट्ठदेवउले परिसडियतोरणघरे नाणाविहगुच्छगुम्मलयावल्लिवच्छच्छाइए
 अणेगवालसयसंकणिजे यावि होत्था । तस्स णं जिणुज्जाणस्स बहुमज्झदेसभाए
 एत्थ णं महं एगे भगगकूवए यावि होत्था । तस्स णं भगगकूवस्स अदूरसामंते एत्थ णं
 महं एगे सालुयाकच्छए यावि होत्था किण्हे किण्होभासे जाव रम्मे महामेहनिरंभभूए
 बहूहिं रुक्खेहि य गुच्छेहि य गुम्मेहि य लयाहि य वल्लीहि य (तणेहि य) कुसेहि
 य खाणएहि य संछन्ने पलिच्छन्ने अंतो झुसिरे बाहिं गंभीरे अणेगवालसयसंकणिजे
 यावि होत्था ॥ ३८ ॥ तत्थ णं रायगिहे नयरे ध(णे)ण्णे नामं सत्थवाहे अट्ठे दित्ते
 जाव विउलभत्तपाणे । तस्स णं धण्णस्स सत्थवाहस्स भद्दा नामं भारिया होत्था
 सुकुमालपाणिपाया अहीणपडिपुण्णपंचिदियसरीरा लक्खणवज्जणगुणोववेया माणु-
 म्माणप्पमाणपडिपुण्णसुजायसव्वंगसुंदरंगी ससिसोमानारा कंता पियदंसणा सुखा
 करयलपरिमियतिविलियमज्झा कुंडल्लिहियगंडळेहा कोमुइ(य)रयणियरपडिपुण्ण-
 सोमवयणा सिंगारागारच्चास्वेसा जाव पडिख्वा वंशा अवियाउरी जाणुकोप्परमाया

यावि होत्था ॥३९॥ तस्स णं धण्णस्स सत्थवाहस्स पंथए ना(म)मं दासचेडे होत्था
 सव्वंगसुंदरंगे मंसोवच्चिए बालकीलावणकुसळे यावि होत्थां । तए णं से धण्णे सत्थ-
 वाहे रायगिहे नयरे बहूणं नगरनिगमसेट्टिसत्थवाहाणं अट्टारसण्ह य सेणिप्पसेणीणं
 व(हु)हुसु कज्जेसु य कुडुबेसु य (मंतेसु य) जाव चक्खुभूए यावि होत्था नियगस्स
 वि य णं कुडुबस्स बहूसु(य) कज्जेसु जाव चक्खुभूए यावि होत्था ॥४०॥ तत्थ णं
 रायगिहे नयरे विजए नामं तक्करे होत्था पावे चंडालरूवे भीमतररुद्धकम्मे आरुसिय-
 दित्तरत्तनयणे खरफस्समहल्लविगयवीभ(त्थ)च्छदादिए असंपुडियउट्ठे उडुयपइण्णलं-
 बंतमुद्धए भमरराहुवण्णे निरणुक्कोसे निरणुतावे दाहणे पइभए निसंसइए निरणुकंपे
 अ(हिंव)हीव एगंतदि(ट्टि)ट्टीए खुरेव एगंतधाराए गिद्धेव आमिसतल्लिच्छे अगिमिव
 सव्वभ(क्खे)क्खी जलमिव सव्व(गा)ग्गाही उक्कं चगवंचणमायानियडिकूडकवडसाइ-
 संपओगबहुले चिरनगरविणट्टुडुसीलायारचरिते जूय(प)प्पसंगी मज्जप्पसंगी भोजप्प-
 संगी मंसप्पसंगी दाहणे हिययदारए साहसिए संधिच्छेयए उवहिए विस्सं भवाई आली-
 यगतित्थमेयलहुहत्थसंपउत्ते परस्स दव्वहरणंमि निब्बं अणुबदे तिक्खवेरे रायगिहस्स
 नगरस्स बहूणि अइगमणाणि य निग्गमणाणि य बा(दा)राणि य अववाराणि य
 छिं(डि)डीओ य खंडीओ य नगरनिद्धमणाणि य संवट्टणाणि य निव्वट्टणाणि य जू(व)
 यखलयाणि य पाणागाराणि य वेसागाराणि य (तद्धारट्टाणाणि य) तक्करट्टाणाणि य
 तक्करधराणि य सिं(गा)वाडगाणि य ति(या)गाणि य चउक्काणि य चच्चराणि य नागघ-
 राणि य भूयघराणि य जक्खदेउलाणि य सभाणि य पवाणि य पणियसालाणि य सुज-
 धराणि य आभोएमाणे (२) मग्गमाणे गवेसमाणे बहुजणस्स छिंदेसु य विसमेसु य विहु-
 रेसु य वसणेसु य अब्भुदएसु य उरस्सवेसु य पसवेसु य तिहीसु य छणेसु य जनेसु य
 पव्वणीसु य मत्तपमतस्स य वक्खित्तस्स य वाउलस्स य सुहियस्स य दु(क्खि)हियस्स
 य विदेसत्थस्स य विप्पवसियस्स य मग्गं च छिंदं च विरहं च अंतरं च मग्गमाणे
 गवेसमाणे एवं च णं विहरइ, बहिया वि य णं रायगिहस्स नगरस्स आरामेसु य उज्जा-
 नेसु य वावियोकखरणीदीहियागुंजालिया(सरेसु य)सरपंति(सु य)यसरसरपंतियासु य
 जिण्णुज्जाणेसु य भग्गकूवएसु य मालुयाकच्छएसु य सुसाणेसु य गिरिकंदरेलेणउवट्टा-
 नेसु य बहुजणस्स छिंदेसु य जाव एवं च णं विहरइ ॥ ४१ ॥ तए णं तीसे भद्दाए
 भारियाए अज्जाया कयाइं पुव्वरत्तावरत्तकालसमयंसि कुडुबजागरियं जागरमाणीए
 अयमेयारूवे अज्जत्थिए जाव समुप्पज्जित्था-अहं धण्णेणं सत्थवाहेणं सद्धिं बहूणि
 वासाणि सद्धफरिसरस(गंव)रूवाणि माणुस्सगाइं कामभोगाइं पन्नणुब्भवमाणी
 विहरामि नो चेव णं अहं दारगं वा दारि(गं)यं वा प(या)यामि । तं धज्जाओ णं ताओ

अम्मयाओ जाव सुलद्धे णं माणुस्सए जम्मजीवियफले तासिं अम्मयाणं जासिं मञ्जे
नियगकुच्छिसंभूयाई थणदुद्धलुद्धयाई महुरसमुल्लावगाई मम्मणपर्यपियाई थणमू(ल)ला
कक्खदेसभाणं अभिसरमाणाई सुद्धयाई थणयं पि(व)यंति तओ य कोमलकमलोव-
मेहिं हत्थेहिं गिण्हिरुणं उच्छंगे निवेसियाई देंति समुल्लावए पिए सुमहुरे पुणो २
मंजुलप्पमणिए । (तं) अहं णं अधच्चा अपुण्णा अ[कय]लक्खणा (अकयपुण्णा) एत्तो
एगमवि न पत्ता । तं सेयं मम कल्लं पाउप्पभायाए जाव जलंते धण्णं सत्थवाहं
आपुच्छिता धण्णेणं सत्थवाहेणं अब्भणुच्चाया समाणी सुबहुं विपुलं असणं ४
उवक्खडावेत्ता सुबहुं पुप्फ(वत्थ)गंधमल्लालंकारं गहाय बहूहिं मित्तनाइनियगसयण-
संबधिपरिजगमहिलाहिं सद्धिं संपरिवुडा जाई इमाई रायगिहस्स नयरस्स बहिया
नागाणि य भूयाणि य जक्खाणि य ईदाणि य खंदाणि य रूदाणि य सि(से)वाणि
य वेसमणाणि य तत्थ णं बहूणं नागपडिमाणं य जाव वेसमणपडिमाणं य महुरिहं
पुप्फचणियं करेत्ता जल्लु(जाणु)पायपडियाए एवं वइत्तए-जइ णं अहं देवाणुप्पिया ।
दारगं वा दारिगं वा पयायामि तो णं अहं तुब्भं जायं च दायं च भायं च अक्ख-
यणिहिं च अणुवड्ढेमि त्तिकट्टु उवाइयं उवाइत्तए । एवं संपेहेइ २ ता कल्लं जाव
जलंते जेणामेव धण्णे सत्थवाहे तेणामेव उवागच्छइ २ ता एवं वयासी-एवं खल्ल
अहं देवाणुप्पिया । तुब्भेहिं सद्धिं बहूई वासाई जाव देंति समुल्लावए सुमहुरे पुणो
२ मंजुलप्पमणिए, तं णं अहं अहच्चा अपुण्णा अकयलक्खणा एत्तो एगमवि न पत्ता,
तं इच्छामि णं देवाणुप्पिया । तुब्भेहिं अब्भणुच्चाया समाणी विपुलं असणं ४ जाव
अणुवड्ढेमि उवाइयं क(रे)रित्तए । तए णं धण्णे सत्थवाहे भइं भारियं एवं वयासी-
ममं पि य णं (खल्ल)देवाणुप्पिए ! एस चेव मणोरहे-कहं णं तुमं दारगं वा दारियं वा
पयाए(ज्ज)जासि (?) भद्दाए सत्थवाहीए एयमट्ठं अणुजाणइ । तए णं सा भद्दा
सत्थवाही धण्णेणं सत्थवाहेणं अब्भणुच्चाया समाणी हट्ठतुट्ठ जाव ह्यहियया विपुलं
असणं ४ उवक्खडावेइ २ ता सुबहुं पुप्फगंध(वत्थ)मल्लालंकारं गेण्हइ २ ता सयाओ
गिहाओ निगगच्छइ २ ता रायगिहं नयरं मज्झमज्झेणं निगगच्छइ २ ता जेणेव
पोक्खरिणी तेणेव उवागच्छइ २ ता पुक्खरिणीए तीरे सुबहुं पुप्फ जाव मल्लालंकारं
ठवेइ २ ता पुक्खरिणि ओगाहेइ २ ता जलमज्जणं करेइ जल(कीडं)किइं करेइ
२ ता ण्हाया उल्लपडसाडिगा जाई तत्थ उप्पलाई जाव सहस्सपत्ताई ताई गिण्हइ
२ ता पुक्खरिणीओ पच्चोरुहइ २ ता तं सुबहुं पुप्फ[वत्थ]गंधमल्लं गेण्हइ २ ता
जेणामेव नागघरए (य) जाव वेसमणघरए य तेणामेव उवागच्छइ २ ता तत्थ णं
नागपडिमाणं य जाव वेसमणपडिमाणं य आलोए पणामं करेइ ईसि पच्चुबमइ

२ ता लोमहृत्थणं परामुसइ २ ता नागपडिमाओ य जाव वेसमणपडिमाओ य लोमहृत्थेणं पमजइ उदगधाराए अब्भुक्खेइ २ ता पम्हलसुकुमालाए गंधकासा(ई)इए गायार्हं छहेइ २ ता महरिहं वत्थारुहणं च मल्लारुहणं च गंधारुहणं च वुण्णारुहणं च वण्णारुहणं च करेइ २ ता (जाव) धूवं डहइ २ ता जञ्जुपायपडिया पंजलिउडा एवं वयासी-जइ णं अहं दारगं वा दारियं वा प(या)यामि तो णं अहं जायं च जाव अणु-वट्ठेमि तिकट्टु उवाइयं करेइ २ ता जेणेव पोक्खरिणी तेणेव उवागच्छइ २ ता विपुलं असणं ४ आसाएमाणी जाव विहरइ जिमि(या)य जाव सुइभूया जेणेव सए गिहे तेणेव उवागया । अदुत्तरं च णं भद्दा सत्थवाही चाउइसट्टमुट्ठिपुणमासिणीसु विपुलं असणं ४ उवक्खडेइ २ ता बहवे नागा (यणे) य जाव वेसमणा य उवायमाणी नमंसमाणी जाव एवं च णं विहरइ ॥ ४२ ॥ तए णं सा भद्दा सत्थवाही अत्रया कयाइ केणइ कालंत्तरेणं आवन्नसत्ता जाया यावि होत्था । तए णं तीसे भद्दाए सत्थवाहीए दोसु मासेसु चीइकंतेसु त(इ)ईए मासे वट्टमाणे इमेयारुवे दोहळे पाउब्भूए-धन्नाओ णं ताओ अम्म-याओ जाव कयलक्खणाओ (णं) ताओ अम्मयाओ जाओ णं विउलं असणं ४ सुबहुयं पुप्फ(वत्थ)गंधमल्लालंकारं गहाय मित्तनाइनियगसयणसंबंधिपरियणमहिलियाहि य सद्धिं संपरिवुडाओ रायगिहं नयरं मज्झंमज्झेणं निगच्छंति २ ता जेणेव पुक्खरिणी तेणेव उवागच्छंति २ ता पोक्खरिणीं ओगाहेति २ ता ण्हायाओ सव्वालंकार-विभूसियाओ विपुलं असणं ४ आसाएमाणीओ जाव पडिभुंजेमाणीओ दोहलं विणेति । एवं संपैहेइ २ ता कल्लं जाव जलंते जेणेव धण्णे सत्थवाहे तेणेव उवागच्छइ २ ता धण्णं सत्थवाहं एवं वयासी-एवं खलु देवाणुप्पिया ! मम तस्स गब्भस्स जाव विणेति, तं इच्छामि णं देवाणुप्पिया ! तुब्भेहिं अब्भणुत्ताया समाणी जाव विहरितए । अहासुहं देवाणुप्पि(ए)या ! मा पडिबधं करेह । तए णं सा भद्दा सत्थवाही धण्णेणं सत्थवाहेणं अब्भणुत्ताया समाणी ह(ट्टु)ट्टा जाव विपुलं असणं ४ जाव ण्हाया उल्लपडसाडगा जेणेव नागघरए जाव धूवं ड(द)हइ २ ता पणामं करेइ २ ता जेणेव पोक्खरिणी तेणेव उवागच्छइ । तए णं ताओ मित्तनाइ जाव नगरमहिलाओ भइं सत्थवाहिं सव्वालंकारविभूसियं करंति । तए णं सा भद्दा सत्थवाही ताहिं मित्तनाइनियगसयणसंबंधिपरिजणनगरमहिलियाहिं सद्धिं तं विपुलं असणं ४ जाव परिमुं(ज)जेमाणी (य) दोहलं विणेइ २ ता जामेव दिसिं पाउब्भूया तामेव दिसिं पडिगया । तए णं सा भद्दा सत्थवाही संपुण्ण(डो)दोहला जाव तं गब्भं सुइसुहेणं परिवहइ । तए णं सा भद्दा सत्थवाही नवण्हं मासाणं बहुपडिपुण्णाणं अदट्टमाणं य राइदियाणं सुकुमालपाणिपायं जाव दारगं पयाया । तए णं तस्स

दारगस्स अम्मापियरो पढमे दिवसे जायकम्मं करेति २ ता तहेव जाव विपुलं
 असणं ४ उवक्खडावेति २ ता तहेव मित्तनाइनियग० भोयावेत्ता अयमेयाख्वं गोणं
 गुणनिष्फञ्जं नामधेज्जं करेति-जम्हा णं अम्हं इमे दारए बहुणं नागपडिमाण य
 जाव वैसमणपडिमाण य उवाइयलद्धे (णं) तं होउ णं अम्हं इमे दारए देवदिञ्जे
 नामेणं । तए णं तस्स दारगस्स अम्मापियरो नामधेज्जं करेति देवदिञ्जेति । तए
 णं तस्स दारगस्स अम्मापियरो जायं च दायं च भायं च अक्खयनिहिं च
 अणुवद्धेति ॥ ४३ ॥ तए णं से पंथए दासचेडए देवदिञ्जस्स दारगस्स बालग्गाही
 जाए, देवदिञ्जं दार(यं)गं कडीए गेण्हइ २ ता बहूहिं डिंभएहि य डिंभियाहि य
 दारएहि य दारियाहि य कुमारएहि य कुमारियाहि य सद्धिं संपरिवुडे (अभिरममाणे)
 अभिरमइ । तए णं सा भद्दा सत्थवाही अन्नया कयाइं देवदिञ्जं दारयं ण्हायं
 सव्वालंकारविभूसियं करेइ २ ता पंथयस्स दासचेडयस्स हत्थयंसि दलयइ । तए
 णं से पंथए दासचेडए भद्दाए सत्थवाहीए हत्थाओ देवदिञ्जं दारगं कडीए गेण्हइ
 २ ता सयाओ गिहाओ पडिनिक्खमइ २ ता बहूहिं डिंभएहि य डिंभियाहि य जाव
 कुमारियाहि य सद्धिं संपरिवुडे जेणेव रायमग्गे तेणेव उवागच्छइ २ ता देवदिञ्जं
 दारगं एगंते ठावेइ २ ता बहूहिं डिंभएहि य जाव कुमारियाहि य सद्धिं संपरिवुडे
 पमत्ते यावि (होत्था) विहरइ । इमं च णं विजए तक्करे रायगिहस्स नयरस्स
 बहूणि बाराणि य अवबाराणि य तहेव जाव आभोएमाणे मग्गेमाणे गवेसमाणे
 जेणेव देवदिञ्जे दारए तेणेव उवागच्छइ २ ता देवदिञ्जं दारगं सव्वालंकारविभूसियं
 पासइ २ ता देवदिञ्जस्स दारगस्स आभरणालंकारेसु मुच्छिए गढिए गिद्धे अज्झोववजे
 पंथ(यं)गं दासचेडं पमत्तं पासइ २ ता दिसालोयं करेइ २ ता देवदिञ्जं दारगं गेण्हइ २
 ता कक्खंसि अल्लियावेइ २ ता उत्तरिजेणं पिहेइ २ ता सिग्घं तुरियं चवलं वेइयं रायगि-
 हस्स नगरस्स अवदारेणं निग्गच्छइ २ ता जेणेव जिण्णुज्जाणे जेणेव भग्गकूवए तेणेव
 उवागच्छइ २ ता देवदिञ्जं दारयं जीवियाओ ववरोवेइ २ ता आभरणालंकारं गेण्हइ
 २ ता देवदिञ्जस्स दारगस्स सरी(रगं)रं निप्पाणं निच्चेट्ठं जी(विय)वविप्पजडं भग्गकूवए
 पक्खिवइ २ ता जेणेव मालुयाकच्छए तेणेव उवागच्छइ २ ता मालुयाकच्छयं अणुप्प-
 विसइ २ ता निक्खले निष्फंदे तुसिणीए दिवसं ख(खि)वेमाणे चिट्ठइ ॥ ४४ ॥ तए णं से
 पंथए दासचेडे तओ मुहुत्तंतरस्स जेणेव देवदिञ्जे दारए ठावि तेणेव उवागच्छइ २ ता
 देवदिञ्जं दारगं तंसि ठाणंसि अपासमाणे रोयमाणे कंदमाणे विल्लवमाणे देवदिञ्जस्स
 दारगस्स सव्वओ समंता मग्गणगवेसणं करेइ २ ता देवदिञ्जस्स दारगस्स कत्थइ सुइं
 ५१ खुइं वा पउत्तिं वा अलभमाणे जेणेव सए गिहे जेणेव धण्णे सत्थवाहे तेणेव

उवागच्छइ २ ता धण्णं सत्थवाहं एवं वयासी-एवं खलु सामी ! भद्दा सत्थवाही देवदिन्नं दारयं ण्हायं स० मम ह (त्थं)सि)त्थे दलयइ । तए णं अहं देवदिन्नं दारयं कडीए गिण्हामि जाव मग्गणगवेसणं करेमि । तं न नज्जइ णं सा(मि)मी ! देवदिन्ने दारए केणइ ह(णी)ए वा अवहिए वा अ(वखि)क्खित्ते वा पायवडिए धण्णस्स सत्थवाहस्स एयमट्ठं निवेदेइ । तए णं से धण्णे सत्थवाहे पंथयस्स दासचेडयस्स एयमट्ठं सोच्चा निसम्म तेण य महया पुत्तसोएणाभिभूए समाणे फ(प)रसुणियत्ते व चंपगपायवे धसत्ति धरणीयलंसि सव्वंगेहिं सन्निवइए । तए णं से धण्णे सत्थवाहे तओ मुहुत्तंतरस्स आसत्थे प(च्छा)च्चागयपाणे देवदिन्नस्स दारगस्स सव्वओ समंता मग्गणगवेसणं करेइ देवदिन्नस्स दारगस्स कत्थइ सुइं वा खुइं वा प(उ)वत्तिं वा अलभमाणे जेणेव सए गिहे तेणेव उवागच्छइ २ ता महत्थं पाहुडं गेण्हइ २ ता जेणेव नगरगुत्तिया तेणेव उवागच्छइ २ ता, तं महत्थं पाहुडं उवणेइ २ ता एवं वयासी-एवं खलु देवाणुप्पिया ! मम पुत्ते भद्दाए भारियाए अत्तए देवदिन्ने नामं दारए इट्ठे जाव उंबरपुष्पं पिव दुल्लहे सवणयाए किमंग पुण पासणयाए (?) । तए णं सा भद्दा [भारिया] देवदिन्नं [दारगं] ण्हायं सव्वालंकारविभूतियं पंथयस्स हत्थे दलाइ जाव पायवडिए तं मम निवेदेइ । तं इच्छामि णं देवाणुप्पिया ! देवदिन्नस्स दारगस्स सव्वओ समंता मग्गणगवेसणं कयं । तए णं ते नगरगोत्तिया धण्णेणं सत्थवाहेणं एवं वुत्ता समाणा सन्नद्धबद्ध(वम्मिय)कवया उप्पीलियसरासण(व)पट्टिया जाव गहियाउहपहरणा धण्णेणं सत्थवाहेणं सद्धिं रायगिहस्स नगरस्स बहूणि अइगमणाणि य जाव पवासु य मग्गणगवेसणं करेमाणा रायगिहाओ नगराओ पडिनिक्खमंति २ ता जेणेव जिण्णुज्जाणे जेणेव भग्गकूवए तेणेव उवागच्छंति २ ता देवदिन्नस्स दारगस्स सरीरगं निप्पाणं निचेट्ठं जीवविप्पजडं पासंति २ ता हा हा अहो अकज्जमिति कट्ठु देवदिन्नं दारगं भग्गकूवाओ उत्तारंति २ ता धण्णस्स सत्थवाहस्स हत्थे(णं) दलयंति ॥४५॥ तए णं ते नगरगुत्तिया विजयस्स तक्करस्स पयमग्गमणुगच्छमाणा (२) जेणेव मालुयाकच्छए तेणेव उवागच्छंति २ ता मालुयाकच्छ(यं)गं अणुप्पविसंति २ ता विजयं तक्करं ससक्खं सहोदं सगेवेज्जं जीवग्गाहं गेण्हंति २ ता अट्ठिमुट्ठिजाणु-कोप्परपहारसंभग्गमहियगतं करंति २ ता अव(उडा)ओडगबंधणं करंति २ ता देवदिन्न(ग)स्स दारगस्स [सव्वं] आभरणं गेण्हंति २ ता विजयस्स तक्करस्स गीवाए बंधंति २ ता मालुयाकच्छगाओ पडिनिक्खमंति २ ता जेणेव रायगिहे नयरे तेणेव उवागच्छंति २ ता रायगिहं नयरं अणुप्पविसंति २ ता रायगिहे नयरे सिंघाडगतिगन्वउक्कचरमहापहपहेसु कसप्पहारे य लयापहारे य छिवापहारे य

निवा(ए)यमाणा २ छारं च धूलिं च कयवरं च उवरिं पकिरमाणा २ महया २ सद्देणं उग्घोसेमाणा एवं वयंति-एस णं देवाणुप्पिया ! विजए नामं तक्करे जाव गिद्धे विव आमिसभक्खी बालघायए बालमारए, तं नो खलु देवाणुप्पिया ! एयस्स केइ राया वा (रायपुत्ते वा) रायमच्चे वा अवरज्झइ (एत्थहे) नञ्जत्थ अप्पणो सयाइं कम्माइं अवरज्झंति-त्तिकु जेणामेव चारगसाला तेणामेव उवागच्छंति २ ता हडिबंघणं करंति २ ता भत्तपाणनिरोहं करंति २ ता तिसंझे कसप्पहारे य जाव निवाएमाणा २ विहरंति । तए णं से धण्णे सत्थवाहे भित्तनाइनियगसयणसंबंधिपरियणेणं सद्धिं रोयमाणे जाव विलवमाणे देवदिन्नस्स दारगस्स सरीरस्स महया इड्डीसक्कार-समुदएणं नी(नि)हरणं करे(न्ति)इ २ ता बहूइं लोइयाइं मय(ग)किच्चाइं करेइ २ ता केणइ कालंतरेणं अवगयसोए जाए यावि होत्था ॥ ४६ ॥ तए णं से धण्णे सत्थवाहे अन्नया कयाइं ल(ह्)हुसर्यसि रायावराहंसि संपलत्ते जाए यावि होत्था । तए णं ते नगरगुत्तिया धण्णं सत्थवाहं गेण्हंति २ ता जेणेव चार(गे)ए तेणेव उवागच्छंति २ ता चारगं अणुपवेसंति २ ता विजएणं तक्करेणं सद्धिं एगयओ हडिबंघणं करंति । तए णं सा भद्दा भारिया कल्लं जाव जलंते विपुलं असणं ४ उवक्खडैइ २ ता भोयणपिंडए करेइ २ ता भो(भा)यणाइं पक्खिवइ २ ता लंछिय-मुद्धियं करेइ २ ता एगं च सुरभिवारिपडिपुण्णं दगवारयं करेइ २ ता पंथयं दासचेडं सद्दावेइ २ ता एवं वयासी-गच्छ(ह) णं तुमं देवाणुप्पिया ! इमं विपुलं असणं ४ गहाय चारगसालाए धण्णस्स सत्थवाहस्स उवणेहि । तए णं से पंथए भद्दाए सत्थवाहीए एवं वुत्ते समाणे हट्ठुट्ठे तं भोयणपिंड(यं)गं तं च सुरभिवरवारिपडिपुण्णं दगवारयं गेण्हइ २ ता सयाओ गिहाओ पडिनिक्खमइ २ ता रायगिहं नगरं मज्झमज्झेणं जेणेव चारगसाला जेणेव धण्णे सत्थवाहे तेणेव उवागच्छइ २ ता भोयणपि(डि)डयं ठावेइ २ ता उल्लंछेइ २ ता (भायणाइं) भोयणं गेण्हइ २ ता भायणाइं धोवेइ २ ता हत्थसोयं दलयइ २ ता धण्णं सत्थवाहं तेणं विपुलेणं असणेणं ४ परिवेसेइ । तए णं से विजए तक्करे धण्णं सत्थवाहं एवं वयासी-तु(मं)ब्भे णं देवाणुप्पिया ! म(म)मं एयाओ विपुलाओ असणाओ ४ संविभागं करेहि । तए णं से धण्णे सत्थवाहे विजयं तक्करं एवं वयासी-अवियाइं अहं विजया । एयं विपुलं असणं ४ का(या)माणं वा सुणगाणं वा दलएजा उकुसडियाए वा णं छेज्जा नो चैव णं तव पुत्तघायगस्स पुत्तमारगस्स अरिस्स वेरियस्स पडिणीयस्स प्रच्चामित्तस्स एत्तो विपुलाओ असणाओ ४ संविभागं करेज्जामि । तए णं से धण्णे सत्थवाहे तं विपुलं असणं ४ आहारेइ २ ता तं पंथगं पडिविसजेइ । तए णं से पंथए दासचे-

डे तं भोयणपिडगं गिण्हइ २ ता जामेव दिसिं पाउब्भूए तामेव दिसिं पडिगए ।
तए णं तस्स धण्णस्स सत्थवाहस्स तं विपुलं असणं ४ आहारियस्स समाणस्स
उच्चारपासवणे णं उब्वाहित्था । तए णं से धण्णे सत्थवाहे विजयं तक्करं एवं
वयासी-एहि ताव विजया ! एगंतमवक्कमामो जेणं अहं उच्चारपासवणं परिट्टवेमि ।
तए णं से विजए तक्करे धण्णं सत्थवाहं एवं वयासी-तुब्भं देवाणुप्पिया ! विपुलं
असणं ४ आहारियस्स अत्थि उच्चारे वा पासवणे वा, ममं णं देवाणुप्पिया ! इमेहिं
बहूहिं कसप्पहारेहि य जाव लयापहारेहि य तण्हाए य छुहाए य परब्भवमाणस्स
नत्थि केइ उच्चारे वा पासवणे वा, तं छंदेणं तुमं देवाणुप्पिया । एगंते अवक्कमिता
उच्चारपासवणं परिट्टवेहि । तए णं से धण्णे सत्थवाहे विजएणं तक्करेणं एवं वुत्ते
समाणे तुसिणीए संचिट्ठइ । तए णं से धण्णे सत्थवाहे मुहुत्तंतरस्स बलियतराणं
उच्चारपासवणेणं उब्वाहिज्जमाणे विजयं तक्करं एवं वयासी-एहि ताव विजया !
जाव अवक्कमामो । तए णं से विजए धण्णं सत्थवाहं एवं वयासी-जइ णं तुमं
देवाणुप्पिया । ता(त)ओ विपुलाओ असणाओ ४ संविभागं करेहि तओ हं तु(मे)ब्भेहिं
सद्धिं एगंतं अवक्कमामि । तए णं से धण्णे सत्थवाहे विजयं एवं वयासी-अहं णं
तुब्भं ताओ विपुलाओ असणाओ ४ संविभागं करिस्सामि । तए णं से विजए
धण्णस्स सत्थवाहस्स एयमट्ठं पडिडुणेइ । तए णं से विजए धण्णेणं सद्धिं एगंते
अवक्क(मे)मइ उच्चारपासवणं परिट्टवेइ आर्यंते चोक्खे परमइड्ढूए तमेव ठाणं उव-
संकमिताणं विहरइ । तए णं सा भद्दा कल्लं जाव जलंते विपुलं असणं ४ जाव
परिवेसेइ । तए णं से धण्णे सत्थवाहे विजयस्स तक्करस्स ताओ विपुलाओ
असणाओ ४ संविभागं करेइ । तए णं से धण्णे सत्थवाहे पंथगं दासचेडं विसजेइ ।
तए णं से पंथए भोयणपिडयं गहाय चार(गा)गसालाओ पडिनिक्खमइ २ ता राय-
गिहं नयरं मज्झमज्झेणं जेणेव सए गि(गे)हे जेणेव भद्दा (भारिया) सत्थवाही तेणेव
उवागच्छइ २ ता भद्दं सत्थवाहिणिं एवं वयासी-एवं खलु देवाणुप्पिए ! धण्णे सत्थवाहे
तव पुत्तघायगस्स जाव पच्चामित्तस्स ताओ विपुलाओ असणाओ ४ संविभागं
करेइ ॥ ४७ ॥ तए णं सा भद्दा सत्थवाही पंथगस्स दासचेडगस्स अंतिए
एयमट्ठं सोच्चा आसुरत्ता रुद्धा जाव मिसिमिसेमा(णा)णी धण्णस्स सत्थवाहस्स
पओसमावज्जइ । तए णं से धण्णे सत्थवाहे अन्नया कयाइं मित्तनाइनियगसयण-
संबंधिपरियणेणं सएण य अत्थसारेणं रायकज्जाओ अप्पाणं मोयावेइ २ ता
चारगसालाओ पडिनिक्खमइ २ ता जेणेव अलंकारियसभा तेणेव उवागच्छइ
२ ता अलंकारियकम्मं क(रे)रावेइ २ ता जेणेव पुक्खरिणी तेणेव उवागच्छइ २ ता

अह धोयमट्टियं गेण्हइ २ ता पोक्खरिणीं ओगाहइ २ ता जलमज्जणं करेइ २ ता
 ण्हाए रायगिहं नगरं अणुप्पविसइ २ ता रायगिहस्स नगरस्स मज्झमज्झेणं
 जेणेव सए गिहे तेणेव पहारेत्थ गमणाए । तए णं (तं) धण्णं सत्थवाहं एज्जमाणं
 पासित्ता रायगिहे नयरे बहवे नियगसेट्ठिसत्थवाहपभि(त)इओ आढंति परिजाणंति
 सक्कारेति सम्माणेति अब्भुट्ठेति सरीरकुस(लं)लोदंतं सं-पुच्छंति । तए णं से धण्णे
 [सत्थवाहे] जेणेव सए गिहे तेणेव उवागच्छइ । जावि य से तत्थ बाहिरिया
 परिसा भवइ तंजहा-दासाइ वा पेस्साइ वा भियगाइ वा भाइल्लागाइ वा (से) सा
 वि य णं धण्णं सत्थवाहं एज्ज(न्तं)माणं पासइ २ ता पायवड्डिया(ए) खेमकुसलं
 पुच्छ(न्ति)इ । जावि य से तत्थ अब्भितरिया परिसा भवइ तंजहा-मायाइ वा पियाइ
 वा मायाइ वा भइणीइ वा सावि य णं धण्णं सत्थवाहं एज्जमाणं पासइ २ ता
 आसणाओ अब्भुट्ठेइ २ ता कंठाकंठियं अवयासिय बाहप्पमोक्खणं करेइ । तए णं
 से धण्णे सत्थवाहे जेणेव भद्दा भारिया तेणेव उवागच्छइ । तए णं सा भद्दा धण्णं
 सत्थवाहं एज्जमाणं पासइ २ ता नो आढाइ नो परियाणाइ अणाढायमाणी अपरि-
 याणमाणी तुत्तिणीया परम्मुही संचिट्ठइ । तए णं से धण्णे सत्थवाहे भद्दं भारियं
 एवं वयासी-किं णं तुब्भं देवाणुप्पिए ! न तुट्ठी वा न हरिसे वा नानंदे वा जं मए
 सएणं अत्थसारंणं रायकज्जाओ अप्पाणं विमोइए । तए णं सा भद्दा धण्णं सत्थवाहं
 एवं वयासी-कहं णं देवाणुप्पिया ! मम तुट्ठी वा जाव आणंदे वा भविस्सइ जेणं
 तुमं मम पुत्तघायगस्स जाव पच्चामित्तस्स ताओ विपुलाओ असणाओ ४ संविभागं
 करेसि । तए णं से धण्णे भद्दं [भारियं] एवं वयासी-नो खलु देवाणुप्पिए ! धम्मोत्ति
 वा तवोत्ति वा कयपड्डिकइयाइ वा लोगजत्ताइ वा नायएइ वा [सं]घाडिएइ वा सद्दा-
 एइ वा सुहिति वा ताओ विपुलाओ असणाओ ४ संविभागे कए नत्तत्थ सरीरचित्ताए ।
 तए णं सा भद्दा धण्णेणं सत्थवाहेणं एवं वुत्ता समाणी ह(ड्डु)ट्ठा जाव आस-
 णाओ अब्भुट्ठेइ २ ता कंठाकंठि अवयासेइ खेमकुसलं पुच्छइ २ ता ण्हाया विपु-
 लाइ भोगभोगाई भुंजमाणी विहरइ । तए णं से विजए तक्करे चारगसालाए तेहिं
 बंधेहिं वहेहिं कसप्पहारेहि य जाव तण्हाए य लुहाए य परब्भवमाणे कालमासे
 कालं किच्चा नरएसु नेरइयत्ताए उववन्ने । से णं तत्थ नेरइए जाए काले कालोभासे
 जाव वेयणं पच्चणुब्भवमाणे विहरइ । से णं तओ उव्वट्ठित्ता अणादीयं अणवदग्गं
 बीहमद्धं चाउरंतंसारकंतारं अणुपरियट्ठिस्सइ । एवामेव जंबू । जे णं अम्हं निग्गंथो
 वा निग्गंथी वा आयरियउवज्जायाणं अंतिए मुंडे भवित्ता अगाराओ अणमासियं
 पव्वइए समाणे विपुलमणि(मु)मोत्तियधणकणगरयणसारंणं लुब्भइ से वि(य) एवं चेव

॥ ४८ ॥ तेणं कालेणं तेणं समएणं धम्मघोसा नामं थेरा भगवंतो जाइसंपन्ना कुल-
संपन्ना जाव पुव्वाणपुत्विं चरमाणा जाव जेणेव रायगिहे नयरे जेणेव गुणसिलए
उज्जाणे जाव अहापडिरुवं उग्गहं उग्गिणिहत्ता संजमेणं तवसा अप्पाणं भावेमाणां
विहरंति । परिसा निग्गया धम्मो कहिओ । तए णं तस्स धण्णस्स सत्थवाहस्स
बहुजणस्स अंतिए एयमट्ठं सोच्चा निसम्म इमेयारुवे अज्झत्थिए जाव समुप्पज्जित्था-
एवं खलु थेरा भगवंतो जाइसंपन्ना इहमागया इह-संपत्ता, तं इच्छामि णं थेरे भगवंते
वंदामि नमंसामि ण्हाए सुद्धप्पावेसाइं मज्झाइं वत्थाइं पवरपरिहिए पायविहार-
चारेणं जेणेव गुणसिलए उज्जाणे जेणेव थेरा भगवंतो तेणेव उवागच्छइ २ ता वंदइ
नमंसइ । तए णं थेरा धण्णस्स विचित्तं धम्ममाइक्खंति । तए णं से धण्णे सत्थ-
वाहे धम्मं सोच्चा एवं वयासी-सइहामि णं भंते ! निग्गंथे पावयणे जाव पव्वइए
जाव बहूणि वासाणि सामण्णपरियागं पाउणित्ता भत्तं पच्चक्खाइत्ता मासियाए संले-
हणाए सट्ठिं भत्ताइं अणसणाए छेदेइ २ ता कालमासे कालं किच्चा सोहम्मसे कप्पे
देवत्ताए उववन्ने । तत्थ णं अत्थेगइयाणं देवाणं चत्तारि पल्लोवमाइं ठिई प० ।
तत्थ णं धण्णस्सवि देवस्स चत्तारि पल्लोवमाइं ठिई प० । से णं धण्णे देवे ताओ
देवलोगाओ आउक्खएणं ठिइक्खएणं भवक्खएणं अणंतरं चयं चइत्ता महाविदेहे
वासे सिज्झिहिइ जाव सव्वदुक्खाणमंतं करेहिइ ॥ ४९ ॥ जहा णं जंबू ! धण्णेणं
सत्थवाहेणं नो धम्मोत्ति वा जाव विजयस्स तक्करस्स ताओ विपुलाओ असणाओ
४ संविभागे कए नच्चत्थ सरीरसारक्खणट्ठाए एवामेव जंबू ! जे णं अम्हं निग्गंथे
वा २ जाव पव्वइए समाणे ववगयण्हाण(उम्म)इणपुप्फगंधमल्लालंकारविभूसे इमस्स
ओरालियसरीरस्स नो वण्णहेउं वा रुवहेउं वा (बल)विसयहेउं वा [तं विपुलं] असणं
४ आहारमाहारेइ नच्चत्थ नाणदंसणचरित्ताणं वह्ण(ट्ठ)याए से णं इहलोए चेव
बहूणं सप्पाणं (बहूणं) समणीणं (बहूणं) सावगाण य सावियाण य अच्चणिजे जाव
पज्जुवासणिजे भवइ । परलोए वि य णं नो (आगच्छइ) बहूणि हत्थच्छेयणाणि य
क्कण्णच्छेयणाणि य नासाछेयणाणि य एवं हिय(य)उप्पायणाणि य वसणुप्पा(ड)यणाणि
य उल्लंघणाणि य पाविहिइ अणारियं च णं अणवदग्गं दीहमदं जाव वीईवइस्सइ
जहा व से धण्णे सत्थवाहे । एवं खलु जंबू ! समणेणं जाव संपत्तेणं दोच्चस्स नाय-
ज्झयणस्स अयमट्ठे पच्चत्ते तिबेमि ॥ ५० ॥ गाहा-सिवसाहणेसु आहारविरहिओ
जं न वट्टए देहो । तम्हा धण्णोव्व विजयं साट्ठ तं तेण पोसेज्जा ॥ १ ॥ वीयं
अज्झयणं समत्तं ॥

॥ जइ णं भंते ! समणेणं ३ जाव संपत्तेणं दोच्चस्स अज्झयणस्स नायाधम्मकहाणं

अयमद्वे पञ्चते तइअस्स अज्झयणस्स के अद्वे पञ्चते ? एवं खलु जंबू ! तेणं कालेणं
 तेणं समएणं चंपा नामं नयरी होत्था वण्णओ । तीसे णं चंपाए नयरीए बहिया
 उत्तरपुरच्छिमे दिसीभाए सुभूमिभाए नामं उज्जाणे होत्था स (व्वो) व्वउयपुप्फफलसमिद्धे
 सुरम्मे नंदणवणे इव सहसुरभिसीयलच्छायाए समणुवदे । तस्स णं सुभूमिभागस्स
 उज्जाणस्स उत्तर(ओ)पुरत्थिमे एगदेसंमि मालुयाकच्छए होत्था वण्णओ । तत्थ णं
 एगा व(र)णम(यू)ऊरी दो पुट्टे परियागए पिड्डुं डीपंडुरे निव्वणे निस्वहए भिन्नमुट्ठिप्प-
 माणे मऊरी-अंडए पसवइ २ ता सएणं पक्खवाएणं सारक्खमाणी संगोवेमाणी
 सं(वि)च्छेदिमाणी विहरइ । तत्थ णं चंपाए नयरीए दुवे सत्थवाहदारगा परिवसंति
 तंजहा-जिणदत्तपुत्ते य सागरदत्तपुत्ते य सहजायया सहवड्ढियया सहपंसुकीलियया
 सहदारदरिसी अन्नमन्नमणुर(त्तया)ता अन्नमन्नमणुव्व(य)या अन्नमन्नच्छंदाणुव्वतया
 अन्नमन्नहियइच्छियकारया अन्नमन्नेसु गिहेसु(किचाई) कम्माई करणिजाई पच्चणुब्भ-
 वमाणा विहरंति ॥ ५१ ॥ तए णं तेसिं सत्थवाहदारगाणं अन्नया कयाई एगयओ
 सहियाणं समुवागयाणं सन्निसण्णाणं सन्निविट्ठाणं इमेयारूवे मिहोकहासमुल्लवे समु-
 प्पजित्था-जन्नं देवाणुप्पिया ! अम्हं सुहं वा दु(क्खं)हं वा पक्खजा वा विदेसगमणं
 वा समुप्पजइ तं णं अम्हेहिं एगयओ समेच्चा नित्थरियव्वं-तिकट्टु अन्नमन्नमेयारूवं
 संगारं पड्डिसुणेंति २ ता सकम्मसंपउत्ता जाया यावि होत्था ॥ ५२ ॥ तत्थ णं चंपाए
 नयरीए देवदत्ता नामं गणिया परिवसइ अड्ढा जाव भत्तपाणा चउसट्ठिकलापंडिया
 चउसट्ठिगणियागुणोववेया अउणत्ती(सं)सविसेसे रममाणी एकवीसरइगुणप्पहाणा
 वत्तीसपुरिसोवयारकुसला नवंगसुत्तपडिबोहिया अट्टारसदेसीभासाविसारया सिंगारा-
 गारचारवेसा संगयगयहसिय जाव ऊसिय(झ)ज्झया संहस्सलंभा विदिन्नछत्तामर-
 बाल(वि)वीयणिया कण्णीरहप्पयाया(या) वि होत्था बहूणं गणियासहस्साणं आहेवच्चं
 जाव विहरइ । तए णं तेसिं सत्थवाहदारगाणं अन्नया कयाई पु(व्वरत्तावरत्ता)व्वारवण्ह-
 कालसमयंसि जिमियभुत्तुत्तरागयाणं समाणाणं आयन्तानां चोक्खाणं परमसुइभूयाणं
 सुहासणवरगयाणं इमेयारूवे मिहोकहासमुल्लवे समुप्पजित्था-(तं) सेयं खलु अम्हं
 देवाणुप्पिया ! कल्लं जाव जलंते विपुलं असणं ४ उवक्खडावेत्ता तं विपुलं असणं ४
 धूवपुप्फगंधवत्थं गहाय देवदत्ताए गणियाए सद्धिं सुभूमिभागस्स (उज्जाणस्स) उज्जा-
 णसिरिं पच्चणुब्भवमाणाणं विहरित्तए-तिकट्टु अन्नमन्नस्स एयमद्वं पड्डिसुणेंति २ ता
 कल्लं पाउ(ब्भूए)प्पभायाए कोडुंबियपुरिसे सदावेंति २ ता एवं वयासी-गच्छहणं देवा-
 णुप्पिया ! विपुलं असणं ४ उवक्ख(डे)डावेह २ ता तं विपुलं असणं ४ धूवपुप्फं गहाय
 जेणैव सुभूमिभागे उज्जाणे जेणैव नंदापुक्खरिणी तेणामेव उवागच्छह २ ता नंदाए

पोक्खरिणीए अदूरसमंते थूणामंडवं आहणह २ ता आसियसम्मज्जिओवलितं सुगंध
जाव कलियं करेह २ ता अ(म्हे)म्हं पडिवाल्लेमाणा २ चिट्ठह जाव चिट्ठंति । तए णं
[ते] सत्थवाहदारगा दोचंपि क्रोडुंविद्यपुरिसे सद्धान्तेति २ ता एवं वयासी-खिप्पामेव
ल्लुहकरणजुत्तजोइयं समखुरवालिहाणं समल्लिहियतिकखग्गसिंगएहिं रययामयघंटसुत्तर-
ज्जुपवरकंचणखचियनत्थपग्गहोवग्गएहिं नीलुप्पलकयामेलएहिं पवरगोणजुवाणएहिं
नानामाणिरयणकंचणघट्टियाजालपरिक्खितं पवरलक्खणोववेयं जु(त्त)तामेव पवहणं
उवणेह । ते वि तहेव उवणेति । तए णं ते सत्थवाहदारगा ण्हाया अप्पमहग्गभर-
णालंकिय सरीरा पवहणं दुरुहंति २ ता जेणेव देवदत्ताए गणियाए गिहे तेणेव
उवागच्छंति २ ता पवहणाओ पच्चोरुहंति २ ता देवदत्ताए गणियाए गिहं अणुप्प-
विसंति । तए णं सा देवदत्ता गणिया [ते] सत्थवाहदारए एजमाणे पासइ २ ता
हट्ठतुट्ठा आसणाओ अब्भुट्ठेइ २ ता सत्तट्ठ पयाइं अणुगच्छइ २ ता ते सत्थवाहदारए
एवं वयासी-संदिसंतु णं देवाणुप्पिया ! किमिहागमणप्पओयणं । तए णं ते सत्थवाह-
दारगा देवदत्तं गणियं एवं वयासी-इच्छामो णं देवाणुप्पिए । तु(म्हे)ब्भेहिं सद्धिं
सुभूमिभागस्स (उज्जाणस्स) उज्जाणसिरिं पच्चणुब्भवमाणा विहरितए । तए णं सा
देवदत्ता तेसिं सत्थवाहदारगाणं एयमट्ठं पडिसुणेइ २ ता ण्हाया किं ते पवर जाव
सिरिसमाणवेसा जेणेव सत्थवाहदारगा तेणेव उवा(समा)गया । तए णं ते सत्थ-
वाहदारगा देवदत्ताए गणियाए सद्धिं जाणं दुरुहंति २ ता चंपाए नयरीए मज्झ-
मज्जेणं जेणेव सुभूमिभागे उज्जाणे जेणेव नंदापोक्खरिणी तेणेव उवागच्छंति २ ता
पवहणाओ पच्चोरुहंति २ ता नंदापोक्खरिणीं ओगाहंति २ ता जलमज्जणं करंति जल-
किडुं करंति ण्हाया देवदत्ताए सद्धिं पच्चुत्तरंति जेणेव थूणामंडवे तेणेव उवागच्छंति
२ ता थूणामंडवं अणुप्पविसंति २ ता सव्वालंकार(वि)भूसिया आसत्था वीसत्था
सुहासणवरगया देवदत्ताए सद्धिं तं विपुलं असणं ४ धूवपुप्फगंधवत्थं आसाएमाणा
वि(वी)साएमाणा (परिभाएमाणा) परिभुंजेमाणा एवं च णं विहरंति जिम्मियभुत्ततरा-
गया वि य णं समाणा (आयंता) देवदत्ताए सद्धिं विपुलाइं माणुस्सगाइं कामभोगाइं
भुंजमाणा विहरंति ॥५३॥ तए णं ते सत्थवाहदारगा पुव्वावरण्हकालसमयसिं देव-
दत्ताए गणियाए सद्धिं थूणामंडवाओ पडिनिक्खमंति २ ता हत्थसंगेछीए सुभूमिभागे
चहूसु आलिघरएसु य कयलीघरएसु य लयाघरएसु य अच्छणघरएसु य पेच्छणघर-
एसु य पसाहणघरएसु य मोहणघरएसु य सालघरएसु य जालघरएसु य कुसुमघरएसु
य उज्जाणसिरिं पच्चणुब्भवमाणा विहरंति ॥५४॥ तए णं ते सत्थवाहदारया जेणेव
से मालुयाकच्छए तेणेव पहारेत्थ गमणाए । तए णं सा वणमळरी ते सत्थवाहदारए

एजमाणे पासइ २ ता भीया तत्था० महया २ सहेण केकारवं विणिम्मुयमाणी २
 मालुयाकच्छओ पडिनिक्खमइ २ ता एणंसि ख्खडालयंसि ठिच्चा ते सत्थवाहदारए
 मालुयाकच्छं च अणिसिसाए दिट्ठीए पेहमाणी २ चिट्ठइ । तए णं ते सत्थवाहदारणां
 अन्नमन्नं सहावेंति २ ता एवं वयासी-जहा णं देवाणुप्पिया ! एसा वणमऊरी अम्हे
 एजमा(णा)णे पासित्ता भीया तत्था तसिया उव्विग्गा पलाया महया २ सहेणं जाव
 अ(म्हे)म्हं मालुयाकच्छयं च पेच्छमाणी २ चिट्ठइ तं भवियव्वमेत्थ कारणेणं-तिकट्ठु
 मालुयाकच्छयं अंतो अणुप्पविसंति २ ता तत्थ णं दो पुट्ठे परियागए जाव पासित्ता
 अन्नमन्नं सहावेंति २ ता एवं वयासी-सेयं खलु देवाणुप्पिया ! अम्हं इमे वणमऊरी-
 अंडए साणं जाइमंताणं कुकुडियाणं अंडएसु (अ)पक्खिवावित्तए । तए णं ताओ जाइमं-
 ताओ कुकुडियाओ ए(ता)ए अंडए सएय अंडए सएणं पक्खवाएणं सारक्खमाणीओ
 संगोवैमाणीओ विहरिस्संति । तए णं अम्हं ए(त्थं)त्थ दो कीलावणगा मऊरपोयगा
 भविस्संति-तिकट्ठु अन्नमन्नस्स एयमट्ठं पडिसुणेंति २ ता सए सए दासचेडए सहावेंति
 २ ता एवं वयासी-गच्छह णं तुब्भे देवाणुप्पिया ! इमे अंडए गहाय सगाणं जाइमंताणं
 कुकुडीणं अंडएसु पक्खिवह जाव ते (वि) पक्खिवेंति । तए णं ते सत्थवाहदारगा देवद-
 ताए गणियाए सद्धिं सुभूमिभागस्स (उज्जाणस्स) उज्जाणसि रिं पच्चणुब्भवमाणा विहरित्ता
 तमेव जाणं दुरुढा समाणा जेणेव चंपा नयरी जेणेव देवदत्ताए गणियाए गिहे तेणेव
 उवागच्छंति २ ता देवदत्ताए गिहं अणुप्पविसंति २ ता देवदत्ताए गणियाए विउलं
 जीवियारिहं पीइदाणं दलयंति २ ता सक्कारेंति सम्माणेंति स० २ ता देवदत्ताए गिहाओ
 पडिनिक्खमंति २ ता जेणेव सयाई २ गिहाई तेणेव उवागच्छंति २ ता सक्कम्मसंपउत्ता
 जाया यावि होत्था ॥५५॥ त(ए)त्थ णं जे से सागरदत्तपुत्ते सत्थवाहदारए से णं कल्लं
 जाव जलंते जेणेव से वणमऊरीअंडए तेणेव उवागच्छइ २ ता तंसि मऊरीअंडयंसि
 संकिए कंखिए विइगिच्छसमावन्ने भेयसमावन्ने कल्लसमावन्ने किन्नं ममं एत्थ
 कीलावणए मऊ(री)रपोयए भविस्सइ उदाहु नो भविस्सइ-तिकट्ठु तं मऊरीअंडयं
 अभिक्खणं २ उव्वत्तेइ परियत्तेइ आसारेइ संसारेइ चालेइ फंदेइ घट्टेइ खोभेइ
 अभिक्खणं २ कण्णमूलंसि टिट्ठियावेइ । तए णं से वण-मऊरीअंडए अभिक्खणं २
 उव्वत्तिजमाणे जाव टिट्ठियावेजमाणे पोच्चडे जाए यावि होत्था । तए णं से सागर-
 दत्तपुत्ते सत्थवाहदारए अन्नया कयाई जेणेव से वणमऊरीअंडए तेणेव उवागच्छइ
 २ ता तं मऊरीअंडयं पोच्चडेमेव पासइ २ ता अहो णं ममं (एस) एत्थ कीलावणए
 मऊ(री)रपोयए न जाए-तिकट्ठु ओहयमण जाव झियायइ । एवामेव समणाऊसी ! जे
 अम्हं निगंथो वा २ आयरियउव्वज्झायाणं अंतिए पव्वइए समाणे पंचमहव्वएसु जाव

छज्जीवनिकाएसु निग्गंथे पावयणे संकिए जाव कल्लससमावसे से णं इह-भवे चेव
 बहूणं समणाणं बहूणं समणीणं बहूणं सावगाणं साविगाणं हीलणिज्जे निंदणिज्जे
 खिसणिज्जे गरहणिज्जे परिभवणिज्जे परलोए विय णं आगच्छइ बहूणि दंडणाणि य
 जाव अणुपरियट्ट(ए)इ ॥५६॥ तए णं से जिणदत्तपुत्ते जेणेव से मऊरीअंडए तेणेव
 उवागच्छइ २ ता तंसि मऊरीअंडयंसि निस्संकिए सुव्वत्तए णं मम एत्थ कीलावणए
 मऊ(री)रपोयए भविस्सइ-तिकट्टु तं मऊरीअंडयं अभिक्खणं २ नो उव्वत्तेइ जाव
 नो टिट्ठियावेइ । तए णं से मऊरीअंडए अणुव्वत्तिज्जमाणे जाव अटिट्ठियाविज्जमाणे
 (तेणं) कालेणं (तेणं) समएणं उब्भिण्णे मऊ(री)रपोयए एत्थ जाए । तए णं से
 जिणदत्तपुत्ते(तं) मऊरपोययं पासइ २ ता हट्टवुट्ठे मऊरपोसए सहावेइ २ ता एवं
 बयासी-तुब्भे णं देवाणुप्पिया ! इमं मऊरपोययं बहूहिं मऊरपोसणपा(उ)ओगेहिं
 दव्वेहिं अणुपुव्वेणं सारक्खमाणा संगोवेमाणा संवट्ठेइ नहुल्लं च सिक्खावेइ । तए णं
 ते मऊरपोसगा जिणदत्तस्स पुत्तस्स एयमट्ठं पडिस्सेति २ ता तं मऊरपोययं गेण्हंति
 २ ता जेणेव सए गिहे तेणेव उवागच्छंति २ ता तं मऊरपोययं जाव नहुल्लं सिक्खा-
 वेति । तए णं से (वण)मऊरपोयए उम्मुक्कबालभावे विन्नायपरिणयमेत्ते जोव्वणगमणु-
 पत्ते लक्खणवज्जणगुणोववेए माणुम्माणप्पमाणपडिपुण्णपक्खपेहुणकलावे विचित्तिपि-
 च्छस(त्त)तचंदए नीलकंठए नच्चणसीलए एगाए चप्पुडियाए कयाए समाणीए अणेगाइं
 नट्टुल्लगसयाइं केकारवसयाणि य करेमाणे विहरइ । तए णं ते मऊरपोसगा तं मऊर-
 पोययं उम्मुक्क जाव करेमाणं पासित्ता (२) णं तं मऊरपोययं गेण्हंति २ ता जिणदत्तस्स
 पुत्तस्स उव्वणंति । तए णं से जिणदत्तपुत्ते सत्यवाहदारए मऊरपोययं उम्मुक्क जाव
 करेमाणं पासित्ता हट्टवुट्ठे तेसिं विमुलं जीवियारिहं पीइदाणं जाव पडिविसजेइ । तए णं
 से मऊरपोयगे जिणदत्तपुत्तेणं एगाए चप्पुडियाए कयाए समाणीए मंगोलाभंगसिरोधरे
 सेयावंगे ओरालि(अवयारि)यपइण्णपक्खे उक्खित्तचंदकाइयकलावे केकाइयसयाणि
 विमु(च्च)च्चमाणे नच्चइ । तए णं से जिणदत्तपुत्ते तेणं मऊरपोयएणं चंपाए नयरीए
 सिंघाडग जाव पहेसु स(इ)एहि य साहस्सिएहि य सयसाहस्सिएहि य पणिएहि य
 जयं करेमाणे विहरइ । एवामेव समणाउसो ! जो अरुहं निग्गंथो वा २ पव्वइए
 समाणे पंच(स)महव्वएसु छज्जीवनिकाएसु निग्गंथे पावयणे निस्संकिए निक्कंखिए
 निव्विइगिच्छे से णं इहभवे चेव बहूणं समणाणं जाव वीइवइस्सइ । एवं खल्ल जंबु !
 समणेणं ३ जाव संपत्तेणं नायाणं तच्चस्स अज्झयणस्स अयमट्ठे पत्तेति बेमि ॥५७॥
 गाहाओ-जिणवरभासियभावेसु भावसच्चेसु भावओ मइमं । नो कुज्जा संदेहं
 संदेहोऽणत्थहेउत्ति ॥ १ ॥ निस्संदेहतं पुण गुणहेउं जं तओ तयं कज्जं । एत्थं दो

सिद्धिसुया अंड्यगाही उदाहरणं ॥ २ ॥ कथं मदुब्बल्लेण तव्विहायरियविरहओ
वा वि । नेयगहणत्तेणं नाणावरणोदणं च ॥ ३ ॥ हेऊदाहरणासंभवे य सह
सुद्धं जं न बुज्झिजा । सव्वणुमयमवितहं तहावि इइ चित्तं ए महं ॥ ४ ॥
अणुवकयपराणुग्गहपरायणा जं जिणा जगप्पवरा । जियरागदोसमोहा य णण-
हावाइणो तेण ॥ ५ ॥ तच्चं नायज्झयणं समत्तं ॥

जइ णं भंते ! समणेणं ३ नायाणं तच्चस्स नायज्झयणस्स अयमट्ठे पन्नत्ते चउत्थस्स
णं नायाणं के अट्ठे पन्नत्ते ? एवं खलु जंबू ! तेणं कालेणं तेणं समएणं वाणारसी नामं
नयरी होत्था वण्णओ । तीसे णं वाणारसीए नयरीए (बहिया) उत्तरपुरच्छिमे दिसीभाए
गंगाए महानइए मयंगतीरइहे नामं दहे होत्था अणुपुव्वसुजायवप्पगंभीरसीयलज्जे
अच्छविमलसलिलपल्लिच्छन्ने संछन्नपत्तपुप्फपलासे बहुउप्पलपउमकुमुयनल्लिणसुभ-
गसोणं धियपुंडरीयमहापुंडरीयसयपत्तसहस्सपत्तकेसरपुप्फोवचिए पासाइए ४ । तत्थ
णं बहूणं मच्छाण य कच्छभाण य गाहाण य मगराण य सुंसुमाराण य स(इ)या(ण)णि
य (साहस्सियाण) सहस्साणि य सय(साहस्सियाण) सहस्साणि य जूहाइं निब्भयाइं
निरुत्तिग्गगाइं सुहंसुहेणं अभिरममाणाइं २ विहरंति । तस्स णं मयंगतीरइहस्स
अदूरसामंते एत्थ णं महं एगे मालुयाकच्छए होत्था वण्णओ । तत्थ णं दुवे
पावसियालगा परिवसंति पावा चंडा रु(रो)इ तल्लिच्छा साहसिया लोहियपाणी
आमिसत्थी आमिसाहारा आमिसप्पिया आमिसल्लो आमिसं गवेसमाणा रत्ति
वियालचारिणे दिया पच्छन्नं(चा) वि चिद्धंति । तए णं ताओ मयंगतीरइहाओ
अन्नया कयाइं सूरियंसि चिरत्थमियंसि लुलियाए संझाए पविरलमाणुसंसि
निसंतपडिनिसंतंसि समणंसि दुवे कुम्मगा आहारत्थी आहारं गवेसमाणा सणियं
२ उत्तरंति तस्सेव मयंगतीरइहस्स परिपेरंतेणं सव्वओ समंता परिघोळेमाणा २
वित्तिं कप्पेमाणा विहरंति । त(य)याणंतरे च णं ते पावसियालगा आहारत्थी
जाव आहारं गवेसमाणा मालुयाकच्छ(या)गाओ पडिनिक्खमंति २ ता जेणेव
मयंगतीरइहे तेणेव उवागच्छंति २ ता तस्सेव मयंगतीरइहस्स परिपेरंतेणं
परिघोळेमाणा २ वित्तिं कप्पेमाणा विहरंति । तए णं ते पावसियालगा ते कुम्मए
पासंति २ ता जेणेव ते कुम्मए तेणेव पहारेत्थ गमणाए । तए णं ते कुम्मगा(ते) पावसि-
यालए एज्जमाणे पासंति २ ता भीया तत्था तसिया उव्विग्गा संजायभया इत्थे य
पाए य गीवाए य सएहिं २ काएहिं साहरंति २ ता निबला निर्फंदा तुसिणीया
संचिद्धंति । तए णं ते पावसियाल(या)गा जेणेव ते कुम्मगा तेणेव उवागच्छंति २ ता
ते कुम्मगा सव्वओ समंता उव्वत्तेति परियत्तेति आसारंति संसारंति चालंति षट्ठंति

फंदेति खोभेति नहेहिं आलुंपंति दंतेहिं य अक्खोडंति नो चेव णं संचाएंति तेसिं कुम्मगाणं सरीरस्स आवाहं वा पवाहं वा वावाहं वा उप्पा(ए)इत्तए छविच्छेयं वा क(रे)रित्तए । तए णं ते पावसियालगा (एए) ते कुम्मए दोच्चंपि तच्चंपि सव्वओ समंता उव्वत्तेति जाव नो चेव णं संचाएंति करित्तए ताहे संता तंता परितंता निव्विण्णा समाणा सणियं २ पच्चोस(क्के)कंति एगंतमवक्कमंति २ ता निच्चला निष्फंदा तुसिणीया संविट्ठंति । तत्थ णं एगे कुम्म(गे)ए ते पावसियालए चि(रं)रगए दूरंगए जाणित्ता सणियं २ एगं पायं निच्छुभइ । तए णं ते पावसियालगा तेणं कुम्मएणं सणियं २ एगं पायं नीणियं पासंति २ ता (ताए उक्किट्ठाए गइए) सिग्घं चवलं तुरियं चंडं जइणं वेगियं जेणेव से कुम्मए तेणेव उवागच्छंति २ ता तस्स णं कुम्मगस्स तं पायं नखेहिं आलुंपंति दंतेहिं अक्खोडंति तओ पच्छा मंसं च सोणियं च आहारंति २ ता तं कुम्मगं सव्वओ समंता उव्वत्तेति जाव नो चेव णं संचा(इं)एंति करेतए ताहे दोच्चंपि अवक्कमंति एवं चत्तारि वि पाया जाव सणियं २ गीवं नीणेइ । तए णं ते पावसियालगा तेणं कुम्मएणं गीवं नीणियं पासंति २ ता सिग्घं चवलं ४ नहेहिं दंतेहिं (य) क्वालं विहाडंति २ ता तं कुम्मगं जीवियाओ ववरोवेति २ ता मंसं च सोणियं च आहारंति । एवामेव समणाउसो ! जो अम्हं निगंथो वा २ आयरियउवज्झायाणं अंतिए पव्वइए समाणे पंच य से इंदिया (इं) अगुत्ता भवंति से णं इहभवे चेव बहूणं समणाणं ४ हीलणजे परलो(गे)ए वि य णं आगच्छइ बहूणं दंडणाणं जाव अणुपरियट्ठइ जहा (व) से कुम्मए अगुत्तिदिए । तए णं ते पावसियालगा जेणेव से दोचे कुम्मए तेणेव उवागच्छंति २ ता तं कुम्मगं सव्वओ समंता उव्वत्तेति जाव दंतेहिं अक्खोडंति जाव करित्तए । तए णं ते पावसियालगा दोच्चंपि तच्चंपि जाव नो संचाएंति तस्स कुम्मगस्स किंचि आवाहं वा विवाहं वा जाव छविच्छेयं वा करेतए ताहे संता तंता परितंता निव्विण्णा समाणा जामेव दिसिं पाउब्भूया तामेव दिसिं पडिगया । तए णं से कुम्मए ते पावसियालए चिरगए दूरंगए जाणित्ता सणियं २ गीवं नेणेइ २ ता दिसावलोयं करेइ २ ता जमगसमगं चत्तारि वि पाए नीणेइ २ ता ताए उक्किट्ठाए कुम्मगइए वीईचयमाणे २ जेणेव मयंगतीरइहे तेणेव उवागच्छइ २ ता सित्तनाइ-नियगसयणसंबंधिपरियणेणं सद्धि अभिसमवागए यावि होत्था । एवामेव समणाउसो ! जो अम्हं समणो वा समणी वा पंच (य) से (महव्वयाइं) इंदियाइं गुत्ताइं भवंति जाव जहा(उ) व से कुम्मए गुत्तिदिए । एवं खलु जंबू ! समणेणं भगवया महावीरेण चउत्थस्स नायज्झयणस्स अयमट्ठे पन्नत्तेति वेमि ॥ ५८ ॥ गाहाउ-विसएख

इदिआइं संभता रागदोसनिम्मुक्का । पावति निव्वुइसुहं कुम्मुव्व मयंगदहसोक्खं
॥ १ ॥ अवरे उ अणत्थपरंपरा उ पावेति पावकम्मवसा । संसारसागरगया
गोमाउग्गसियकुम्भोव्व ॥ २ ॥ चउत्थं नायज्झयणं समत्तं ॥

जइ णं भंते ! समणेणं ३ जाव संपत्तेणं चउत्थस्स नायज्झयणस्स अयमट्ठे पन्नत्ते
पंचमस्स णं भंते ! नायज्झयणस्स के अट्ठे पन्नत्ते ? एवं खलु जंबू ! तेणं कालेणं तेणं
समएणं बारवई नामं नयरी होत्था पाईणपडीगायया उदीणदाहिणवित्थिण्णा नवजो-
यणवित्थिण्णा दुवालसजोयणायामा धणवइमइनि(म्म)म्माया चामीयरपवरपागारा
नाणामणिपंचवण्णकविसीसगसोहिया अलयापुरिसंकासा पमुइयपक्कीलिया पच्चक्खं
देवलो(य)गभूया । तीसे णं बारवईए नयरीए बहिया उत्तरपुरच्छिमे दिसीभाए रेवयगे
ना(म)मं पव्वए होत्था तुंगे गगणतलमणुलिहंतसिहरे नाणाविहुच्छुग्म्मलयावलि-
परिगए हंसमि(ग)यमयूरकौचसारसचक्कवायमयणसालकोइलकुलोववेए अणेगतडक-
डगवियरउज्झर(य)पवायपब्भारसिहरपउरे अच्छरगणदेवसंचचारणविज्जाहरमिहुण-
संविचिण्णे निच्चच्छणए दसारवरवीरपुरिसतेलोकबलवगाणं सोमे सुभगे पियदंसणे
सुरुवे पासाईए ४ । तस्स णं रेवयगस्स अदूरसामंते एत्थ णं नंदणवणे नाभं
उज्जाणे होत्था सव्वउयपुप्फफलसमिद्धे रम्मे नंदगवणप्पगासे पासाईए ४ ।
तस्स णं उज्जाणस्स बहुमज्झदेसभाए सुरप्पिए नामं जक्खाययणे होत्था वण्णओ ।
तत्थ णं बारवईए नयरीए कग्हे नामं वासुदेवे राया परिवसइ । से णं तत्थ
समुद्विजयपामोक्खाणं दसण्हं दसारणं बलदेवपामोक्खाणं पंचण्हं महावीराणं
उग्गसेणपामोक्खाणं सोलसण्हं राईसहस्साणं पज्जुवपामोक्खाणं अज्जुट्ठाणं
कुमारकोडीणं संवपामोक्खाणं सट्ठीए दुइंतसाहस्सीणं वीरसेणपामोक्खाणं एकवीसाए
वीरसाहस्सीणं महासेणपामोक्खाणं छप्पन्नाए बलवगसाहस्सीणं रुपि(णी)णिप्पा-
मोक्खाणं बत्तीसाए महिलासाहस्सीणं अन्नसि च बहूणं [रा]ईतरतलवर जाव
सत्थवाहपभिईणं चैयद्धुगिरिसा(य)गरपेरंतस्स य दाहिणद्धुमहरस्स य बारवईए
नयरीए आहेवच्चं जाव पालेमाणे विहरइ ॥ ५९ ॥ त(स्स)एत्थ णं बारवईए नयरीए
थावच्चा नामं गाहावइणी परिवसइ अट्ठा जाव अपरिभूया । तीसे णं थावच्चाए
गाहावइणीए पुत्ते थावच्चापुत्ते नामं सत्थवाहदारए होत्था सुकुमालपाणिपाए
जाव सुरुवे । तए णं सा थावच्चा गाहावइणी तं दार(य)गं साइरेगअट्ठवासजा(य)यं
जाणिता सोहणंसि तिहिकरणनक्खत्तमुहुत्तंसि कलायरियस्स उवणेइ जाव भोगसमत्थं
जाणिता बत्तीसाए इब्भकुलबालियाणं एगदिवसेणं पाणिं गेण्हावेइ बत्तीसओ दाओ
जाव बत्तीसाए इब्भकुलबालियाहिं सद्धिं विपुळे सइकरिसरसरुववण्णगंधे जाव
६३ सुत्ता०

भुंजमाणे विहरइ । तेणं कालेणं तेणं समएणं अरहा अरिद्विनेमी सो चेव
वण्णओ दसधणुस्सेहे नीलुप्पलगवल्लुगुलियअयस्सिकुसुमप्पगासे अट्ठारसहिं समणसा-
हस्सीहिं चत्तालीमाए अज्जियासाहस्सीहिं सद्धिं संपरिवुडे पुव्वाणुपुविं चरमाणे जाव
जेणेव बारवई नगरी जेणेव रेवयगपव्वए जेणेव नंदणवणे उज्जाणे जेणेव
सुरप्पियस्स जक्खस्स जक्खाययणे जेणेव असोगवरपायवे तेणेव उवागच्छइ
२ ता अहापडिह्वं उग्गहं ओगिण्हित्ता संजमेणं तवसा अप्पाणं भावेमाणे विहरइ ।
परिसा निग्गया धम्मो कहिओ । तए णं से कण्हे वासुदेवे इमीसे कहाए लद्धे
समाणे कोडुंबियपुरिसे सहावेइ २ ता एवं वयासी-खिप्पामेव भो देवाणुप्पिया !
सभाए सुहम्माए मेघोधरसियं गंभी(रं)रमहुरसइं कोमुइयं मेरिं तालेह । तए णं ते
कोडुंबियपुरिसा कण्हेणं वासुदेवेणं एवं वुत्ता समाणा हट्ठुट्ठ जाव मत्थए अंजलिं कहु
एवं सामी ! तह त्ति जाव पडिसुणेंति २ ता कण्हस्स वासुदेवस्स अंतियाओ पडिनि-
क्खमंति २ ता जेणेव स(हा)भा सुहम्मा जेणेव कोमुइया मेरी तेणेव उवागच्छंति
२ ता तं मेघोधरसि(यं)यगंभीरमहुरसइं कोमुइयं मेरिं तालेंति । तओ निद्धमहुर-
गंभीरपडिसुएणं पिव सारइएणं बलाहएणं (पिव) अणुरसियं मेरीए । तए णं तीसे
कोमुइयाए मे(रिया)रीए तालियाए समाणीए बारवईए नयरीए नवजोयणवित्थिण्णाए
दुवालसजोयणायामाए सिंघाडगतियच्चउक्कच्चरकंदरदरी (य) विवरकुहरगिरिसिहरन-
गरगोउरपासायदुवारभवणदेउलपडि(सु)स्सुयासयसहस्ससंजुलं(सइं) करेमाणे बारव-
(इं)ईए नय(रं)रीए सत्थिभतरबाहिरियं सव्वओ समंता(से)सइे विप्पसरित्था । तए
णं बारवईए नयरीए नवजोयणवित्थिण्णाए बारसजोयणायामाए समुइविजयपा-
मोक्खा दस दसारा जाव कोमुइयाए मेरीए सइं सोच्चा निसम्म हट्ठुट्ठ जाव ण्हाया
आविद्धवग्गारियमल्लदामकलावा अहयवत्थचंदणो(क्कि)क्खिन्नगगयसीररा अप्पेगइया
हयगया एवं गयगया रहसीयासंदमाणीगया अप्पेगइया पायविहारचारेणं पुरिस-
वग्गुरापरिक्खित्ता कण्हस्स वासुदेवस्स अंति(यं)ए पाउब्भवित्था । तए णं से कण्हे
वासुदेवे समुइविजयपामोक्खे दस दसारे जाव अंतियं पाउब्भवमाणे (पासइं)
पासित्ता हट्ठुट्ठ जाव कोडुंबियपुरिसे सहावेइ २ ता एवं वयासी-खिप्पामेव भो
देवाणुप्पिया ! चाउरंगिणिं सेणं सज्जेह विजयं च गंधहत्थि उवट्ठवेह । तेवि (तहत्ति)
तहेव उवट्ठवेंति जाव पज्जुवासंति ॥६०॥ थावच्चापुत्ते वि निग्गए जहा मेहे तहेव
धम्मं सोच्चा निसम्म जेणेव थावच्चा गाहावइणी तेणेव उवागच्छइ २ ता पायग्गहणं
करेइ जहा मेहस्स तहा चेव निवेयणा जाहे नो संचाएइ विसयाणुलोमाहि य विसय-
पडिकूलाहि य ब्रह्महिं आधवणाहि य पन्नवणाहि य सन्नवणाहि य विन्नवणाहि य

आघवित्तए वा ४ ताहे अकामिया चेव थावच्चापुत्त(दारग)स्स निक्खमणमणु-
मञ्जित्था (णवरं निक्खमणाभिसेयं पासासो, तए णं से थावच्चापुत्ते तुसिणीए
संचिद्धइ) । तए णं सा थावच्चा आसणाओ अब्भुट्ठेइ २ ता महत्थं महघं महरिहं
रा(य)यारिहं पाहुडं गेण्हइ २ ता मित्त जाव संपरिवुडा जेणेव कण्हस्स वासुदेवस्स
भवणवरपडिदुवारदेसभाए तेणेव उवागच्छइ २ ता पडिहारदेसिएणं मग्गेणं जेणेव
कण्हे वासुदेवे तेणेव उवागच्छइ २ ता करयल जाव वद्धावेइ २ ता तं महत्थं ४ पाहुडं
उवणेइ २ ता एवं वयासी-एवं खलु देवाणुप्पिया ! मम एगे पुत्ते थावच्चापुत्ते नामं
दारए इट्ठे जाव (से णं)संसारभउव्विग्गे (भीए) इच्छइ अरहओ अरिद्धनेमिस्स जाव
पव्वइत्तए । अहं णं निक्खमणसक्कारं करेमि । इच्छामि णं देवाणुप्पिया ! थावच्चा-
पुत्तस्स निक्खममाणस्स छत्तमउडच्चासराओ य विदिन्नाओ । तए णं कण्हे वासुदेवे
थावच्चागाहावइणि एवं वयासी-अच्छाहि णं तुमं देवाणुप्पिए ! सुनिव्वु(या)यवी-
सत्था । अहं णं सयमेव थावच्चापुत्तस्स दारगस्स निक्खमणसक्कारं करिस्सामि । तए
णं से कण्हे वासुदेवे चाउरंगिणीए सेणाए विजयं हत्थिरयणं दुरुढे समाणे जेणेव
थावच्चाए गाहावइणीए भवणे तेणेव उवागच्छइ २ ता थावच्चापुत्तं एवं वयासी-मा
णं तु(मे)मं देवाणुप्पिया । सुंढे भवित्ता पव्वयाहि, भुंजाहि णं देवाणुप्पिया ! विउळे
माणुस्सए कामसो(ए)गे मम बाहुच्छायापरिग्गहिए, केवलं देवाणुप्पियस्स (अहं)
नो संचाएमि वाउकायं उवरिमेणं गच्छमाणं निवारित्तए, अन्ने णं देवाणुप्पियस्स जं
किंचि(वि) आबाहं वा वि(वा)बाहं वा उप्पाएइ तं सव्वं निवारिमि । तए णं से थावच्चा-
पुत्ते कण्हेणं वासुदेवेणं एवं वुत्ते समाणे कण्हं वासुदेवं एवं वयासी-जइ णं (तुमं)देवाणु-
प्पिया ! मम जीवियंतकरणं मच्चुं एजमाणं निवारिसि जरं वा सरीररूवविणा(सि)सणिं
सरीरं अइवयमाणिं निवारिसि तए णं अहं तव बाहुच्छायापरिग्गहिए विउळे माणुस्सए
कामभोगे भुंजमाणे विहरामि । तए णं से कण्हे वासुदेवे थावच्चापुत्तेणं एवं वुत्ते
समाणे थावच्चापुत्तं एवं वयासी-एए णं देवाणुप्पिया ! दुरइक्कमणिज्जा, नो खलु
सक्का सुबलिण्णावि देवेण वा दाणवेण वा निवारित्तए नञ्जत्थ अप्पणो कम्मक्ख-
एणं । तए णं से थावच्चापुत्ते कण्हं वासुदेवं एवं वयासी-जइ णं एए दुरइक्कमणिज्जा
नो खलु सक्का सुबलिण्णावि देवेण वा दाणवेण वा निवारित्तए नञ्जत्थ अप्पणो
कम्मक्खएणं तं इच्छामि णं देवाणुप्पिया ! अन्नाणमिच्छतअविरइकसायसंचियस्स
अत्तणो कम्मक्खयं करित्तए । तए णं से कण्हे वासुदेवे थावच्चापुत्तेणं एवं वुत्ते समाणे
कोडुंबियपुरिसे सद्दावेइ २ ता एवं वयासी-गच्छह णं देवाणुप्पिया ! बारवईए नयरीए
सिंघाडगति(य)ग जाव पहेसु(य) हत्थिखंघवरगया महया २ सहेणं उग्घोसेमाणा

२ उगघोसणं करेह-एवं खलु देवाणुप्पिया ! थावच्चापुत्ते संसारभउव्विग्गे भीए जम्मणमरणणं इच्छइ अरहओ अरिद्धनेमिस्स अंतिए मुंडे भविता पव्वइतए, तं जो खलु देवाणुप्पिया ! राया वा जुवराया वा देवी वा कुमारे वा ईसरे वा तलवरे वा कोडुंबियमाडंबियइब्भसेट्टिसेणावइसत्थवाहे वा थावच्चापुत्ते पव्वयतमणुपव्वयइ तस्स णं कण्हे वासुदेवे अणुजाणइ पच्छाउरस्स वि य से मित्तनाइनियगसंबंधि-परिजणस्स जोग(खे) क्वेमं वट्टमाणं पडिवहइ-त्तिकट्ठु घोसणं घोसेह जाव घोसंति । तए णं थावच्चापुत्तस्स अणुराएणं पुरिससहस्सं निक्खमणाभिमुहं ण्हायं सव्वा-लंकारविभूसियं पत्तेयं २ पुरिससहस्सवाहिणीसु सिवियासु दुरुळं समारणं मित्तनाइ-परिवुडं थावच्चापुत्तस्स अंतियं पांडब्भूयं । तए णं से कण्हे वासुदेवे पुरिससहस्सं अंतियं पांडब्भवमाणं पासइ २ ता कोडुंबियपुरिसे सद्दावेइ २ ता एवं वयासी-जहा मेहस्स निक्खमणाभिसेओ तहेव सेयापीएहिं कलसेहिं ण्हावेइ जाव अरहओ अरिद्ध-नेमिस्स छत्ताइच्छत्तं पडागाइपडागं पास(न्ति)इ २ ता विजाहरचारणे जाव पासित्ता सी(सिवि)याओ पच्चोरुहइ । तए णं से कण्हे वासुदेवे थावच्चापुत्ते पुरओ कांडं जेणेव अ(रि)रहा अरिद्धनेमी सव्वं तं चेव जाव आभर(णमल्लालंकारं)णं ओमुयइ । तए णं सा थावच्चा गाहावइणी हंसलक्खणेणं पड(ग)साडएणं आभरणमल्लालंका(रे)रं पडिच्छइ हारवारिधा(र)राच्छिन्नमुत्तावलिप्पगासाई अंसूणि विणि(म्)मुंचमाणी २ एवं वयासी-जइयव्वं जाया । घडियव्वं जाया । प(रि)रक्कमियव्वं जाया । अहिंस च णं अट्ठे नो पमाएयव्वं । जामेव दिस्सि पांडब्भूया तामेव दिस्सि पडिगया । तए णं से थावच्चापुत्ते पुरिससहस्से(हिं)णं सद्धिं सयमेव पंचमुट्ठियं लोयं करेइ जाव पव्वइए । तए णं से थावच्चापुत्ते अणगारे जाए इरियासमिए भासासमिए जाव विहरइ । तए णं से थावच्चापुत्ते अरहओ अरिद्धनेमिस्स तहारुवाणं थेराणं अंतिए सामाइयमाइयाई (इक्कारस अंगाई) चोइसपुव्वाइं अहिजइ २ ता बट्ठहिं जाव चउत्थेणं विहरइ । तए णं अ(रि)रहा अरिद्धनेमी थावच्चापुत्तस्स अणगारस्स तं इब्भाइयं अणगार-सहस्सं सीसत्ताए दलयइ । तए णं से थावच्चापुत्ते अन्नया कयाई अरहं अरिद्धनेमिं वंदइ नमंसइ वं० २ ता एवं वयासी-इच्छामि णं भंते ! तुब्भेहिं अब्भणुच्चाए समाणे अणगारसहस्सेणं सद्धिं बहिया जणवयविहारं विहरितए । अहासुहं देवाणु-प्पिया ॥ तए णं से थावच्चापुत्ते अणगारसहस्सेणं सद्धिं तेणं उरालेणं उ(द)ग्गेणं पयत्तेणं पग्गहिएणं बहिया जणवयविहारं विहरइ ॥ ६१ ॥ तेणं कालेणं तेणं समएणं सेलगपुरे नामं नग(रं)रे होत्था । सुभूमिभागे उज्जाणे । सेलए राया पउमावई देवी मंडुए कुमारे जुवराया । तस्स णं सेलगस्स पंथगपामोक्खा (णं) पंच मंतिसया

होत्था उप्पत्तियाए ४ (चउव्विहाए बुद्धीए) उववेया (रज्जधुरचित्तयावि होत्था) रज्जधुरं चित्तयंति । (तए णं) थावच्चापुत्ते (णामं अणगारे सहस्सेणं अणगारेणं सद्धि जेणेव) सेलगपुरे (जेणेव सुभूमिभागे नामं उज्जाणे तेणेव) समोसडे । राया निग्गए (धम्मो कहिओ) धम्मकहा । धम्मं सोच्चा जहा णं देवानुप्पियाणं अंतिए बहवे उग्गा भोगा जाव चइत्ता हिरण्णं जाव पव्वइया तहा णं अहं नो संचाएमि पव्वइत्तए । अहं णं देवानुप्पियाणं अंतिए पंचाणुव्वइयं जाव समणोवासए जा(व)ए अहिगयजीवाजीवे जाव अप्पाणं भावेमाणे विहरइ । पंयगपामोक्खा पंच मंतिसया य समणोवासया जाया । थावच्चापुत्ते बहिया जणवयविहारं विहरइ । तेणं कालेणं तेणं समएणं सोगंधिया नामं नयरी होत्था वण्णओ । नीलासोए उज्जाणे वण्णओ । तत्थ णं सोगंधियाए नयरीए सुदंसणे नामं नयरसेट्ठी परिवसइ अट्ठे जाव अपरिभूए । तेणं कालेणं तेणं समएणं सुए नामं परिव्वायए होत्था रिउव्वेयज(उ)जुव्वेयसामवे-यअथव्वणवेयसद्धितंतकुसले संखसमए लद्धे पंच(जा)जमपंचनियमजुत्तं सोयमू- (लयं)लं दसप्पयारं परिव्वायगधम्मं दाणधम्मं च सोयधम्मं च तित्थाभिसेयं च आववेमाणे पन्नवेमाणे (परुवेमाणे) धाउरत्तवत्थपवरपरिहिए तिदंडुंडियिछत्तच्छा- (लि)लयअंकुसपवित्तयकेसरिहत्थगए परिव्वायगसहस्सेणं सद्धि संपरिवुडे जेणेव सोगंधिया नयरी जेणेव परिव्वायगावसहे तेणेव उवागच्छइ २ ता परिव्वायगाव-सहंसि भंडगानिकखेवं करेइ २ ता संखसमएणं अप्पाणं भावेमाणे विहरइ । तए णं सोगंधियाए नगरीए सिंघाडग जाव बहुजणे अन्नमन्नस्स एवमाइक्खइ-एवं खलु सुए परिव्वायए इह(हव्व)मागए जाव विहरइ । परिसा निग्गया । सुदंसणो वि निग्गए । तए णं से सुए परिव्वायए तीसे परिसाए सुदंसणस्स(य)अज्जेसि च बहूणं संखाणं (धम्मं) परिकहेइ-एवं खलु सुदंसणा ! अम्हं सोयमूलए धम्मे पन्नते । से वि य सोए (धम्मे) दुविहे पन्नते तं जहा-दव्वसोए य भावसोए य । दव्वसोए य उदएणं मट्ठियाए य । भावसोए दव्वमेहि य मंतेहि य । जं णं अम्हं देवानुप्पिया ! किंचि असुई भवइ तं सव्वं स(जो)ज्जपुढवीए आलि(प्पइ)म्पइ तओ पच्छा सुद्वेण वारिणा पक्खाळिजइ तओ तं असुई सुई भवइ । एवं खलु जीवा जलाभिसेयपूयप्पाणो अविविधेणं सगं गच्छंति । तए णं से सुदंसणे सुयस्स अंतिए धम्मं सोच्चा हट्ठे सुयस्स अंतियं सोयमूलयं धम्मं गेण्हइ २ ता परिव्वायए विउलेणं असणेणं ४ वत्थ० पडिलाभेमाणे जाव विहरइ । तए णं से सुए परिव्वाय(गावसहाओ)गे सोगंधियाओ नयरीओ निग्गच्छइ २ ता बहिया जणवयविहारं विहरइ । तेणं कालेणं तेणं समएणं (थावच्चापुत्ते णामं अणगारे सहस्सेणं अणगारेणं सद्धि पुव्वाणुपुर्व्वि चरमाणे गामाणु-

गामं दूइज्जमाणे सुहंसुहेणं विहरमाणे जेणेव सोगंधिया गयरी जेणेव णीलासोए उज्जाणे तेणेव समोसढे) थावच्चापुत्तस्स समोसरणं। परिसा निग्गया। सुदंसणे वि निग्ग(ए)ओ थावच्चापुत्तं (नामं अणगारं आ०) वंदइ नमंसइ वं० २ ता एवं वयासी-तुम्हाणं किमूलए धम्मं पन्नते ?। तए णं [से] थावच्चापुत्ते सुदंसणेणं एवं वुत्ते समाणे सुदंसणं एवं वयासी-सुदंसणा ! विणयमूले धम्मं पन्नते । से विय विणए दुविहे पन्नते तंजहा-अगारविणए(य) अणगारविणए य । तत्थ णं जे से अगारविणए से णं पंच अणुव्वयाई सत्त सिक्खावयाई एक्कारस उवासगपडिमाओ । तत्थ णं जे से अणगारविणए से णं पंच महव्वयाई तंजहा-सव्वाओ पाणाइवायाओ वेरमणं सव्वाओ मुसावायाओ वेरमणं सव्वाओ अदिन्नादाणाओ वेरमणं सव्वाओ मेहुणाओ वेरमणं सव्वाओ परिग्गहाओ वेरमणं सव्वाओ राइभोयणाओ वेरमणं जाव मिच्छादंसणसद्धाओ वेरमणं दसविहे पच्चक्खाणे बारस भिक्खुपडिमाओ इच्चेएणं दुविहेणं विणयमूलएणं धम्मं आणुपुव्वेणं अट्टकम्मपगडीओ खवेत्ता लोयग्गपइट्ठा(णे)णा भवंति । तए णं थावच्चापुत्ते सुदंसणं एवं वयासी-तु(ब्भे)ब्भं णं सुदंसणा ! किमूलए धम्मं पन्नते ? अम्हाणं देवाणुप्पिया ! सोयमू(ले)लए धम्मं पन्नते जाव सग्गं गच्छंति । तए णं थावच्चापुत्ते सुदंसणं एवं वयासी-सुदंसणा ! से जहानामए केइ पुरिसे एणं महं रुहिरकयं वत्थं रुहिरेण चेव धोवेज्जा तए णं सुदंसणा ! तस्स रुहिरकयस्स वत्थस्स रुहिरेण (चेव) पक्खालिज्जमाणस्स अत्थि काइ सोही ? नो इण्ठे समट्ठे । एवामेव सुदंसणा ! तुब्भंपि पाणाइवाएणं जाव मिच्छादंसणसल्लेणं नत्थि सोही जहा तस्स रुहिरकयस्स वत्थस्स रुहिरेण चेव पक्खालिज्जमाणस्स नत्थि सोही । सुदंसणा ! से जहानामए केइ पुरिसे एणं महं रुहिरकयं वत्थं सज्जियाखारेणं अणुलिपइ २ ता पयणं आ(रु)रोहेइ २ ता उण्हं गाहेइ २ ता तओ पच्छा सुद्धेण वारिणा धोवेज्जा से नूणं सुदंसणा ! तस्स रुहिरकयस्स वत्थस्स सज्जियाखारेणं अणुलित्तस्स पयणं आरोहियस्स उण्हं गाहियस्स सुद्धेण वारिणा पक्खालिज्जमाणस्स सोही भवइ ? हंता भवइ । एवामेव सुदंसणा ! अम्हं पि पाणाइवायवेरमणेणं जाव मिच्छादंसणसल्लवेरमणेणं अत्थि सोही जहा(वि) वा तस्स रुहिरकयस्स वत्थस्स जाव सुद्धेण वारिणा पक्खालिज्जमाणस्स अत्थि सोही । तत्थ णं (से) सुदंसणे संबुद्धे थावच्चापुत्तं वंदइ नमंसइ वं० २ ता एवं वयासी-इच्छामि णं भंते ! धम्मं सोच्चा जाणित्तए जाव समणोवासए जाए अभिगयजीवाजीवे जाव पडिलाभेमाणे विहरइ । तए णं तस्स सुयस्स परिव्वायगस्स इमीसे कहाए लद्धस्स समागस्स अयमेयारुवे जाव समुप्पज्जित्था-एवं खलु सुदंसणेणं सोयधम्मं विप्पज्जहाय विणयमूले धम्मं पडिव्वेजे । तं सेयं खलु मम

सुदंसणस्स दिट्ठिं वामेत्तए पुणरवि सोयमूलए धम्मे आघवित्तए-तिकट्ठु एवं संपेहेइ
 २ ता परिव्वायगसहस्सेणं सद्धिं जेणेव सोगंधिया नयरी जेणेव परिव्वायगावसहे
 तेणेव उवागच्छइ २ ता परिव्वायगावसहंसि भंडनिकखेवं करेइ २ ता धाउरत्तव-
 स्थ[पवर]परिहिए परिवरपरिव्वायगेणं सद्धिं संपरिवुडे परिव्वायगावसहाओ पडिनि-
 कखमइ २ ता सोगंधियाए नयरीए मज्झमज्झेणं जेणेव सुदंसणस्स गिहे जेणेव
 सुदंसणे तेणेव उवागच्छइ । तए णं से सुदंसणे तं सुयं एज्जमाणं पासइ २ ता नो
 अब्भुट्ठेइ नो पक्खग्गच्छइ नो आढाइ नो परियाणाइ नो वंदइ तुसिणीए संचिट्ठइ ।
 तए णं से सुए परिव्वायए सुदंसणं अ(ण)णुब्भुट्ठियं पासित्ता एवं वयासी-तु(मं)ब्भे
 णं सुदंसणा । अन्नया ममं एज्जमाणं पासित्ता अब्भुट्ठेसि जाव वंदसि, इयाणि सुदंसणा !
 तुमं ममं एज्जमाणं पासित्ता जाव नो वंदसि, तं कस्स णं तुमे सुदंसणा । इमेयारूवे
 विणयमू(ल)ले धम्मे पडिवच्चे ? । तए णं से सुदंसणे सुएणं परिव्वाय(ए)गेणं एवं वुत्ते
 समाणे आसणाओ अब्भुट्ठेइ २ ता करयल जाव सुयं परिव्वायगं एवं वयासी-एवं
 खलु देवाणुप्पिया ! अरहओ अरिद्धनेमिस्स अंतेवासी थावच्चापुत्ते नामं अणगारे जाव
 इहमागए इह चेव नीलासोए उज्जाणे विहरइ, तस्स णं अंतिए विणयमूले धम्मे पडिवच्चे ।
 तए णं से सुए (परिव्वायए) सुदंसणं एवं वयासी-तं गच्छामो णं सुदंसणा ! तव
 धम्मायरियस्स थावच्चापुत्तस्स अंतियं पाउब्भवामो इमाइं च णं एयारूवाइं अट्ठाइं
 हेऊइं पसिणाइं कारणाइं वागरणाइं पुच्छामो । तं जइ(णं) मे से इमाइं अट्ठाइं जाव
 वागरइ त(ए)ओ णं (अहं) वंदामि नमंसामि । अह मे से इमाइं अट्ठाइं जाव नो से
 वागरइ तओ णं अहं एएहिं चेव अट्ठेहिं हेऊहिं निप्पट्ठपसिणवागरणं करिस्सामि । तए
 णं से सुए परिव्वायगसहस्सेणं सुदंसणेण य सेट्ठिणा सद्धिं जेणेव नीलासोए उज्जाणे
 जेणेव थावच्चापुत्ते अणगारे तेणेव उवागच्छइ २ ता थावच्चापुत्तं एवं वयासी-जत्ता ते
 भंते ! जवणिज्जं ते अव्वाबाहं(पि ते) फासु(यं)यविहारं(ते)? । तए णं से थावच्चापुत्ते
 सुएणं (परिव्वायगेणं) एवं वुत्ते समाणे सुयं परिव्वायगं एवं वयासी-सुया ! जत्तावि मे
 जवणिज्जंपि मे अव्वाबाहंपि मे फासु(य)विहारंपि मे । तए णं (से) सुए थावच्चापुत्तं एवं
 वयासी-किं भंते ! जत्ता ? सुया ! जं णं मम नाणदंसणचरित्तवसंजममाइएहिं जोएहिं
 जो(ज)यणा से तं जत्ता । से किं तं भंते ! जवणिज्जं ? सुया ! जवणिजे दुविहे पन्नते
 तंजहा-इंदियजवणिजे य नोइंदियजवणिजे य । से किं तं इंदियजवणिज्जं ? सुया !
 जं णं म(म)मं सोइंदियचर्खिखदियथाणिदियजिब्भदियफासिदियाइं निरुवहयाइं वसे
 वडंति से तं इंदियजवणि(ज्जं)जे । से किं तं नोइंदियजवणिजे ? सुया ! जं णं कोहमाण-
 मायालोभा खीणा उवसंता नो उदयंति से तं नोइंदियजवणिजे । से किं तं भंते !

अव्वाबाहं ? सुया ! जं णं मम वाइयपित्तियसिंभियसज्जिवाइया विविहा रोगायंका नो उदीरंति से तं अव्वाबाहं । से किं तं भंते ! फासुयविहारं ? सुया ! जं णं आरामेसु उज्जाणेषु दे(व)उल्लेसु सभासु प(व्वा)वासु इत्थीपसुपंडगविवज्जियासु वसहीसु पाडिहारियं पीढफलगसेज्जासंथारयं ओगिण्हित्ताणं विहरामि से तं फासुयविहारं । सरिसवया(ते) भंते ! किं भक्खेया अभक्खेया ? सुया ! सरिसवया भक्खेयावि अभक्खेयावि । से केणट्ठेणं भंते ! एवं बुच्चइ सरिसवया भक्खेयावि अभक्खेयावि ? सुया ! सरिसवया दुविहा पन्नत्ता तंजहा-मित्तसरिसवया य धन्नसरिसवया य । तत्थ णं जे ते मित्तसरिसवया ते तिविहा पन्नत्ता तंजहा-सहजायया सहवड्ढियया सहपंसुकीलि(य)या य, ते णं समणाणं निगंथाणं अभक्खेया । तत्थ णं जे ते धन्नसरिसवया ते दुविहा पन्नत्ता तंजहा-सत्थपरिणया य असत्थपरिणया य । तत्थ णं जे ते असत्थपरिणया ते समणाणं निगंथाणं अभक्खेया । तत्थ णं जे ते सत्थपरिणया ते दुविहा पन्नत्ता तंजहा-फासु(गा)या य अफासुया य । अफासुया णं सुया ! नो भक्खेया । तत्थ णं जे ते फासुया ते दुविहा पन्नत्ता तंजहा-जाइया य अजाइया य । तत्थ णं जे ते अजाइया ते अभक्खेया । तत्थ णं जे ते जाइया ते दुविहा पन्नत्ता तंजहा-एसणिज्जा य अणेसणिज्जा य । तत्थ णं जे ते अणेसणिज्जा ते (णं) अभक्खेया । तत्थ णं जे ते एसणिज्जा ते दुविहा पन्नत्ता तंजहा-लद्धा य अलद्धा य । तत्थ णं जे ते अलद्धा ते अभक्खेया । तत्थ णं जे ते लद्धा ते निगंथाणं भक्खेया । एएणं अट्ठेणं सुया ! एवं बुच्चइ सरिसवया भक्खेयावि अभक्खेयावि । एवं कुलत्थावि भाणियव्वा नव(रि)रं इमं नाणत्तं-इत्थिकुलत्था य धन्नकुलत्था य । इत्थिकुलत्था तिविहा पन्नत्ता तंजहा-कुलव(हु)ट्ठया य कुलमाउया इ य कुलधूया इ य । धन्नकुलत्था तहेव । एवं मासा वि नवरं इमं नाणत्तं-मासा तिविहा पन्नत्ता तंजहा-कालमासा य अत्थमासा य धन्नमासा य । तत्थ णं जे ते कालमासा ते णं दुवालसविहा पन्नत्ता तंजहा-सावणे जाव आसाढे, ते णं [समणाणं २] अभक्खेया । अत्थमासा दुविहा प० तं०-रुप्प(हिरण्ण)मासा य सुवण्णमासा य, ते णं अभक्खेया । धन्नमासा तहेव । एगे भवं दुवे भवं अणेगे भवं अक्खए भवं अव्वए भवं अवट्ठिए भवं अणेगभूयभावभविएवि भवं ? सुया ! एगेवि अहं दुवेवि अहं जाव अणेगभूयभावभविएवि अहं । से केणट्ठेणं भंते ! एगेवि अहं जाव सुया ! दव्वट्ठयाए एगे[वि] अहं नाणदंसणट्ठयाए दुवेवि अहं पएसट्ठयाए अक्खएवि अहं अव्वएवि अहं अवट्ठिएवि अहं उवओगट्ठयाए अणेगभूयभावभविएवि अहं । एत्थ णं से सुए संबुद्धे थावच्चापुत्तं वंदइ नमंसइ वं० २ ता एवं वयासी-इच्छामि णं भंते ! तु(ब्भे)ब्भं अंतिए केवल्लिपन्नत्तं

धम्मं निसामित्ताए । धम्मकहा भाणियव्वा । तए णं से सुए परिव्वायए थावच्चा-
 पुत्तस्स अंतिए धम्मं सोच्चा निसम्म एवं वयासी-इच्छामि णं भंते ! परिव्वाय-
 गसहस्सेणं सद्धिं संपरिवुडे देवाणुप्पियाणं अंतिए मुंडे भवित्ता पव्वइत्ताए । अहासुहं
 देवाणुप्पिया ! जाव उत्तरपुरच्छिमे दिसीभाए ति(डं)दंडयं जाव धाउरत्ताओ य एगंते
 एडेइ २ ता सयमेव सिहं उप्पाडेइ २ ता जेणेव थावच्चापुत्ते २ तेणेव उवागच्छइ
 जाव मुंडे भवित्ता जाव पव्वइए सामाइयमाइयाइं (इक्कारस अंगाइं) चोइसपुव्वाइं
 अहिज्जइ । तए णं थावच्चापुत्ते सुयस्स अणगार (स्म) सहस्सं सीसत्ताए दियरइ ।
 तए णं थावच्चापुत्ते सोगंधियाओ (नयरीओ) नीलासोयाओ पडिनिक्खमइ २ ता बहिया
 जणवयविहारं विहरइ । तए णं से थावच्चापुत्ते अणगारसहस्सेणं सद्धिं संपरिवुडे जेणेव
 पुंडरी(ए)यपव्वए तेणेव उवागच्छइ २ ता पुंडरीयं पव्वयं सणियं २ दुरुहइ २ ता
 मेघघणसन्निगासं देवसन्निवायं पुढविसिलापट्टयं जाव पाओवगमणं (कए)णुवण्णे ।
 तए णं से थावच्चापुत्ते बहूणि वासाणि सामण्णपरियाणं पाउणिता मासियाए संलेहणाए
 सट्ठि भत्ताइं अणसगाए जाव केवलवरनाणदंसणं समुप्पाडेत्ता तओ पच्छा सिद्धे जाव
 प्पहीणे ॥६२॥ तए णं से सुए अन्नया कयाइं जेणेव सेलगपुरं नगरे जेणेव सुभूमिभागे
 उज्जाणे (समोसरणं) तेणेव समोसरिए परिसा निग्गया सेलओ निग्गच्छइ धम्मं
 सोच्चा जं नवरं देवाणुप्पिया ! पंथगपामोक्खाइं पंच मंतिसयाइं आपुच्छामि मंडुयं
 च कुमारं रजे ठावेमि तओ पच्छा देवाणुप्पियाणं अन्तिए मुंडे भवित्ता अगाराओ
 अणगारियं पव्वयामि । अहासुहं । तए णं से सेलए राया सेलगपुरं नगरं अणुप्पविसइ
 २ ता जेणेव सए गिहे जेणेव बाहिरिया उवट्ठाणसाला तेणेव उवागच्छइ २ ता सीहा-
 स(णं)णे सज्जिस्सणे । तए णं से सेलए राया पंथ(य)गपामोक्खे पंच मंतिसए सहावेइ
 २ ता एवं वयासी-एवं खलु देवाणुप्पिया ! मए सुयस्स अंतिए धम्मं निसंते से वि
 य मे धम्मं इच्छिए पडिच्छिए अभिरइए, अहं णं देवाणुप्पिया ! संसारभ(य)उव्विग्गे
 जाव पव्वयामि, तुब्भे णं देवाणुप्पिया ! किं करेह किं व(से)वसह किं वा (ते) मे
 हियइच्छिए सामत्थे ? । तए णं ते पंथगपामोक्खा सेलगं रायं एवं वयासी-जइ णं
 तुब्भे देवाणुप्पिया ! संसार जाव पव्वयह अम्हाणं देवाणुप्पिया ! (किमणे)को अन्ने
 आधारे वा आलंवे वा अम्हे वि य णं देवाणुप्पिया ! संसारभउव्विग्गा
 जाव पव्वयामो, जहा णं देवाणुप्पिया ! अम्हं बहुसु कजेसु य कारणेसु य
 जाव तहा णं पव्वइयाण वि समाणाणं बहुसु जाव चक्खुभूए । तए णं से सेलगे
 पंथगपामोक्खे पंच मंतिसए एवं वयासी-जइ णं तुब्भे देवाणुप्पिया ! संसार जाव
 पव्वयह तं गच्छइ णं देवाणुप्पिया ! सएसु २ कुडुंबेसु जे(ट्टे)ट्टपुत्ते कुडुंबमज्जे ठावेता

पुरिससहस्सवाहिणी[या]ओ सीयाओ दुरुडा समाणा मम अंतियं पाउब्भवह(त्ति)। तेवि तहेव पाउब्भवन्ति । तए णं से सेलए राया पंच मंतिसयाई पाउब्भवमाणाई पासइ २ ता हट्टुट्टे कोडुंबियपुरिसे सहावेइ २ ता एवं वयासी-खिप्पामेव भो देवाणुप्पिया ! मंडुयस्स कुमारास्स महत्थं जाव रायाभिसेयं उवट्टवेह जाव अभिंसिंचइ जाव राया जाए (जाव) विहरइ । तए णं से सेलए मंडुयं रायं आपुच्छइ । तए णं (से) मंडुए राया कोडुंबियपुरिसे सहावेइ २ ता एवं वयासी-खिप्पामेव सेलगपुरं नयरं आसिय जाव गंध-वट्ठिभूयं करेह(य) कारवेह य क० २ ता ए(य)वमाणत्तियं पच्चप्पिणह । तए णं से मंडुए दोब्बपि कोडुंबियपुरिसे सहावेइ २ ता एवं वयासी-खिप्पामेव सेलगस्स रज्जो महत्थं जाव निक्खमणाभिसेयं जहेव मेहस्स तहेव नवरं पउमावई-देवी अगगकेसे पडिच्छइ सच्चेवि पडिग्गहं गहाय सीयं दुरुहंति अवसेसं तहेव जाव सामाइयमाइयाई एका-रस्स अंगाई अहिज्जइ २ ता बहूहिं चउत्थ जाव विहरइ । तए णं से सुए सेल(य)गस्स अणगारस्स ताई पंथगपामोक्खाई पंच अणगारसयाई सीसत्ताए वियरइ । तए णं से सुए अन्नया कयाई सेलगपुराओ नगराओ सुभूमिभागाओ उज्जाणाओ पडिनिक्खमइ २ ता बहिया जणवयविहारं विहरइ । तए णं से सुए अणगारे अन्नया कयाई तेणं अणगारसहस्सेणं सद्धिं संपरिवुड्ढे पुच्चाणुपुव्वि चरमाणे गामाणुगामं विहरमाणे जेणेव पुं(पौं)डरीयपव्वए तेणेव उवागच्छइ जाव सिद्धे ॥ ६३ ॥ तए णं तस्स सेलगस्स रायरिसिस्स तेहिं अंतेहिं य पंतेहिं य तुच्छेहिं य लहेहिं य अरसेहिं य विरसेहिं य सीएहिं य उण्हेहिं य कालाइक्कंतेहिं य पमाणाइक्कंतेहिं य निच्चं पाणभोगेहिं य पयइ-सुकुमाल(य)स्स य सुहोचियस्स सरीरगंसि वेयणा पाउब्भूया उज्जला जाव दुरहियासा कंडु(य)दाहपित्तज्जरपरिगयसरीरे यावि विहरइ । तए णं से सेलए तेणं रो(गा)यायं-केणं सु(क्के)क्खे जाए यावि होत्था । तए णं [से] सेलए अन्नया कयाई पुच्चाणुपुव्वि चरमाणे जाव जेणेव सुभूमिभागे जाव विहरइ । परिसा निग्गया मंडुओऽवि निग्गओ सेल(यै)गं अणगारं (जाव) वंदइ जाव पज्जुवासइ । तए णं से मंडुए राया सेलगस्स अणगारस्स सरीर(यै)गं सुक्कं जाव सव्वावाहं सरोगं पासइ २ ता एवं वयासी-अहं णं भंते ! तुब्भं अहाप(वि)वत्तेहिं तिगिच्छिएहिं अहापवत्तेणं ओसहमेस(ज्जेणं)ज्जभ-त्तपाणेणं तिगिच्छं आउंटावेमि । तुब्भे णं भंते ! मम जाणसालासु समोसरह फासु-(अं)एसणिज्जं पीढकलगसेज्जासंथारणं ओगिण्हित्ताणं विहरइ । तए णं से सेलए अणगारे मंडुयस्स रज्जो एयमट्ठं तहत्ति पडिसुणेइ । तए णं से मंडुए सेलगं वंदइ नमंसइ वं० २ ता जामेव दिसिं पाउब्भूए तामेव दिसिं पडिगए । तए णं से सेलए कल्लं जाव जलंते सभंडमतोवगरणमायाए पंथगपामोक्खेहिं पंचहिं अणगारसएहिं

सद्धि सेलगपुरमणुप्पविसइ २ ता जेणेव मंडुयस्स जाणसाला तेणेव उवागच्छइ
 २ ता फाडुयं पीठ जाव विहरइ । तए णं से मंडुए (राया) ति(चि)गिच्छिए सहावेइ
 २ ता एवं वयासी-तुब्भे णं देवाणुप्पिया ! सेलगस्स फाडुएसणिज्जेणं जाव
 ति(ते)गिच्छं आ(उट्ठे)उंटेह । तए णं तिगिच्छया मंडुएणं रचा एवं वुत्ता समाणा
 हट्टुट्ठा सेलगस्स (रायरिसिस्स) अहापवत्तेहिं ओसहमेसज्जभत्तपाणेहिं तिगिच्छं
 आउट्ठेति । तए णं तस्स सेलगस्स अहापवत्तेहिं ओसहमेसज्जभत्तपाणेहिं से रोगायंके
 उवसंते जाए यावि होत्था हट्ठे (जाव) बलियसरीरे जाए ववगयरोगायंके । तए णं से
 सेलए तंसि रोयातंकंसि उवसंतंसि समाणंसि तंसि विपुलंसि असणंसि ४ मुच्छिए
 गडिए गिद्धे अज्झोववन्ने ओसन्ने ओसन्नविहारी एवं पासत्थे २ कुसीले २ पमत्ते २
 संसत्ते २ उउबद्धपीठफलगसेज्जासंथारए पमत्ते यावि विहरइ नो संचाएइ फाडुए-
 सणिज्जं पीठं पच्चप्पिणिता मंडुयं च रायं आपुच्छित्ता बहिया जाव विहरित्तए ॥६४॥
 तए णं तेसिं पंथगवज्जाणं पंचण्हं अणगारसयाणं अन्नया कयाइ एगयओ सहियाणं
 जाव पुव्वरत्तावरत्तकालसमयंसि धम्मजागरियं जागरमाणं अयमेयारूवे अज्झ
 त्थिए जाव समुप्पज्जित्था-एवं खलु सेलए रायरिसी चइत्ता रज्जं जाव पव्वइए विउले
 (णं) असणे ४ मुच्छिए ४ नो संचाएइ चइउं जाव विहरित्तए । नो खलु कप्पइ
 देवाणुप्पिया ! समाणं जाव पमत्ताणं विहरित्तए । तं सेयं खलु देवाणुप्पिया ! अम्हं
 कल्लं सेलगं रायरिसिं आपुच्छित्ता पाडिहारियं पीठफलगसेज्जासंथार(णं)यं पच्चप्पिणिता
 सेलगस्स अणगारस्स पंथयं अणगारं वेयावच्चकरं ठा(ठ)वेत्ता बहिया अब्भुज्जएणं जाव
 विहरित्तए । एवं संपेहेति २ ता कल्लं जेणेव सेल(ए)गरायरिसी० आपुच्छित्ता पाडि-
 हारियं पीठफलग जाव पच्चप्पिणंति २ ता पंथयं अणगारं वेयावच्चकरं ठावेति २ ता
 बहिया जाव विहरंति ॥६५॥ तए णं से पंथए सेलगस्स सेज्जासंथारउच्चारपासवणखेल्ह-
 सिघाणमलाओ ओसहमेसज्जभत्तपाणएणं अगिलाए विणएणं वेयावडियं करेइ । तए
 णं से सेलए अन्नया कयाइ कत्तियचाउम्मासियंसि विउलं असणं ४ आहारमाहारिए
 पुव्वावरण्हकालसमयंसि सुहप्पसुत्ते । तए णं से पंथए कत्तियचाउम्मासियंसि कय-
 काउस्सग्गे देवसियं पडिक्कमणं पडिक्कंते चाउम्मासियं पडिक्कमि(उं)उकामे सेलगं
 रायरिसिं खामणट्ठयाए सीसेणं पाएसु संघट्टेइ । तए णं से सेलए पंथएणं सीसेणं पाएसु
 संघट्टिए समाणे आसुत्ते जाव मिसिमिसेमाणे उट्ठेइ २ ता एवं वयासी-से केस णं भो
 एस अपत्थियपत्थिए जाव वज्जिए जे णं ममं सुहप्पसुत्तं पाएसु संघट्टेइ ?, तए णं से
 पंथए सेलएणं एवं वुत्ते समाणे भीए तत्थे तसिए करयल जाव कहु एवं वयासी-
 अहं णं भंते ! पंथए कयकाउस्सग्गे देवसियं पडिक्कमणं पडिक्कंते (चाउम्मासियं

पडिक्कंते) चाउम्मासियं खामेमाणे देवाणुप्पियं वंदमाणे सीसेणं पाएसु संघट्टेमि । तं खामेमि णं तुब्भे देवाणुप्पिया ! खमन्तु मे अवराहं तुमं णं देवाणुप्पिया ! नाइभुज्जो एवं करणयाए—तिकट्ठुं सेलयं अणगारं एयमट्ठं सम्मं विणएणं भुज्जो २ खामेइ । तए णं तरस्स सेलगस्स रायरिसिस्स पंथएणं एवं वुत्तस्स अयमेयाह्वे जाव समुप्पज्जित्था—एवं खलु अहं रज्जं च जाव ओसन्नो जाव उउवद्धपीडं विहरामि । तं नो खलु कप्पइ समणाणं २ पासत्थाणं जाव विहरित्तए । तं सेयं खलु मे कल्लं मंडुयं रायं आपुच्छित्ता पाडिहारियं पीडकलगसेज्जासंथारणं पच्चप्पिणित्ता पंथएणं अणगारेणं सद्धिं बहिया अब्भुज्जएणं जाव जगवयविहारेणं विहरित्तए । एवं संपेहेइ २ ता कल्लं जाव विहरइ ॥ ६६ ॥ एवामेव समगाउसो ! जाव निग्गंथो वा २ ओसन्ने जाव संथारए पमत्ते विहरइ से णं इहलोए चेव बहूणं समणाणं ४ हीलणिज्जे संसारो भाणियव्वो । तए णं ते पंथगवज्जा पंच अणगारसया इमांसे कहाए लद्धट्ठा समाणा अन्नमन्नं सहावेंति २ ता एवं वयासी—[एवं खलु] सेलए रायरिसी पंथएणं बहिया जाव विहरइ । तं सेयं खलु देवाणुप्पिया ! अमहं सेलं [रायरिसिं] उवसंपज्जित्ताणं विहरित्तए । एवं संपेहेति २ ता सेलं रायरिसिं उवसंपज्जित्ताणं विहरंति ॥ ६७ ॥ तए णं (ते सेलयपामोक्खा) से सेलए रायरिसी पंथगपामोक्खा पंच अणगारसया बहूणि वासाणि सामण्णपरियायं पाउणित्ता जेणेव पुंडरीयपच्चए तेणेव उवागच्छंति २ ता जहेव थावच्चापुत्ते तहेव सिद्धा ४ । एवामेव समगाउसो ! जो निग्गंथो वा २ जाव विहरिस्सइ । एवं खलु जंबू ! समणेणं भगवया महावीरेणं जाव संपत्तेणं पंचमस्स नायज्झयणस्स अयमट्ठे पन्नत्ते तिवेमि ॥ ६८ ॥ **गाहा**—सिद्धिलियसंजमकज्जावि होइउं उज्जमंति जइ पच्छा । संवेगाजो तो सेलउव्व आराहया होति ॥ १ ॥ **पंचमं नायज्झयणं समत्तं ॥**

जइ णं भंते ! समणेणं ३ जाव संपत्तेणं पंचमस्स नायज्झयणस्स अयमट्ठे पन्नत्ते छट्ठस्स णं भंते ! नायज्झयणस्स समणेणं जाव संपत्तेणं के अट्ठे पन्नत्ते ? एवं खलु जंबू ! तेणं कालेणं तेणं समएणं रायगिहे (णामं णयरे होत्था, तत्थ णं रायगिहे णयरे सेणिए नामं राया होत्था, तरस्स णं रायगिहस्स बहिया उत्तरपुरच्छिमे दिसी-भाए एत्थ णं गुणसिलए णामं उज्जाणे होत्था, तेणं कालेणं तेणं समएणं समणे भगवं महावीरे पुव्वाणुपुव्वि चरमाणे जाव जेणेव रायगिहे णयरे जेणेव गुणसिलए उज्जाणे तेणेव समोसडे अहापडिह्वं उगहं उग्गिण्हित्ता संजमेणं तवसा अप्पाणं भावेमाणे विहरइ) समोसरणं परिसा निग्गया (सेणिओ वि णिग्गज्जो धम्मो कहुओ परिसा पडिगया) । तेणं कालेणं तेणं समएणं समणस्स भगवओ महावीरस्स

जेठ्ठे अंतेवासी इंदभूई नामं अणगारे अदूरसामंते जाव सुक्कज्झाणोवगए विहरइ । तए णं से इंदभूई जायसङ्गे जाव एवं वयासी-कहं णं भंते ! जीवा ग(गु)रुयत्तं वा लहुयत्तं वा हव्वमागच्छंति ? गोयमा ! से जहानामए केइ पुरिसे एणं महं सुक्कं तुवं निच्छि(ड्ढ)इं निरुवहयं दब्भे(हिं)हि य कुसेहि य वेढेइ २ ता मट्ठियालेवेणं लिपइ २ ता उण्हे दलयइ २ ता सुक्कं समाणं दोच्चंमि दब्भेहि य कुसेहि य वेढेइ २ ता मट्ठियालेवेणं लिपइ २ ता उण्हे दलयइ २ ता सु(क्कं)क्के समा(णं)णे तच्चंमि दब्भेहि य कुसेहि य वेढेइ २ ता मट्ठियालेवेणं लिपइ । एवं खलु एएणं उवाएणं (सत्तरत्तं) अंतरा वेढेमाणे अंतरा लिप्प(लिप्पे)माणे अंतरा सु(क्कं)क्कावेमाणे जाव अट्ठहिं मट्ठियालेवेहिं आलिपइ २ ता अत्थाहमतारमपोरिसियंसि उदगंसि पक्खिवेज्जा । से नूणं गोयमा ! से तुंबे तेसिं अट्ठहं मट्ठियालेवेणं गुरुययाए भारि(य)याए गुरुयभारिययाए उप्पि सलिलमइवइत्ता अहे धरणियलपइट्ठाणे भवइ । एवामेव गोयमा ! जीवावि पाणाइवाएणं जाव मिच्छादंसणसङ्गणं अणुपुब्बेणं अट्ठकम्मपगडीओ समज्जि-(णंति)णिता तासि गुरुययाए भारिययाए गुरुयभारिययाए (एवामेव) कालमासे कालं किच्चा धरणियलमइवइत्ता अहे नरगतलपइट्ठाणा भवंति । एवं खलु गोयमा ! जीवा गुरुयत्तं हव्वमागच्छंति । अहे णं गोयमा ! से तुंबे तंसि पढमिङ्गुंसि मट्ठियालेवंसि तिच्चेसि कुहियंसि परिसडियंसि ईसिं धरणियलाओ उप्पइत्ताणं चिट्ठइ । तयाणंतरं (च णं) दोच्चंमि मट्ठियालेवे जाव उप्पइत्ताणं चिट्ठइ । एवं खलु एएणं उवाएणं तेसु अट्ठसु मट्ठियालेवेसु तिच्चेसु जाव विमुक्कबंधणे अहे-धरणियलमइवइत्ता उप्पि सलिलतलपइट्ठाणे भवइ । एवामेव गोयमा ! जीवा पाणाइवायवेरमणेणं जाव मिच्छादंसणसङ्गवेरमणेणं अणुपुब्बेणं अट्ठकम्मपगडीओ खवेत्ता गगणतलमुप्पइत्ता उप्पि लोयगपइट्ठाणा भवंति । एवं खलु गोयमा ! जीवा लहुयत्तं हव्वमागच्छंति । एवं खलु जंबू ! समणेणं जाव संपत्तेणं छट्ठस्स नायज्झयणस्स अयमट्ठे पन्नते तिबेसि ॥ ६९ ॥ गाहाउ-जह मिउलेवालितं गरुयं तुवं अहो वयइ एवं । आसव-कयकम्मगुरु जीवा वच्चंति अहरगइं ॥ १ ॥ तं चेव तव्विमुक्कं जलोवरिं ठाइ जायलहुभावं । जह तह कम्मविमुक्का लोयगपइट्ठिया होति ॥ २ ॥ छट्ठं नाय-ज्झयणं समत्तं ॥

जइ णं भंते ! समणेणं जाव संपत्तेणं छट्ठस्स नायज्झयणस्स अयमट्ठे पन्नते सत्तमस्स णं भंते ! नायज्झयणस्स के अट्ठे पन्नते ? एवं खलु जंबू ! तेणं कालेणं तेणं समएणं रायगिहे नामं नयरे होत्था । (तत्थणं रायगिहे नयरे सेणिए नामं राया हात्था, तस्स णं रायगिहस्स नयरस्स बहिया उत्तरपुरिच्छमे दिसीभाए)

सुभूमिभागे उज्जाणे (होत्था) । तत्थ णं रायगिहे नयरे ध(णे)ण्णे नामं सत्थवाहे
 परिवसइ अट्ठे जाव अपरिभूए । (तस्स णं धण्णस्स सत्थवाहस्स) भद्दा (नामं)
 भारिया (होत्था) अहीणपंचिदियसरीरा जाव सुरूवा । तस्स णं धण्णस्स सत्थवा-
 हस्स पुत्ता भद्दाए भारियाए अत्ताया चत्तारि सत्थवाहदारगा होत्था तंजहा-धणपाले
 धणदेवे धणगोवे धणरक्खिए । तस्स णं धण्णस्स सत्थवाहस्स चउण्हं पुत्ताणं
 भारियाओ चत्तारि सुण्हाओ होत्था तंजहा-उज्झिया भोगवइया रक्खइया
 रोहिणिया । तए णं तस्स धण्णस्स सत्थवाहस्स अज्जाया कयाइं पुव्वरत्तावरत्ताकाल-
 समयंसि इमेयारूवे अज्झत्थिए जाव समुप्पज्जित्था-एवं खलु अहं रायगिहे नयरे
 बहूणं राईसरतलवर जाव पभिईणं सयस्स कुडुंबस्स बहूसु कज्जेसु य कारणे(करणि-
 ज्जे)सु य कोडुंबेसु य मंतणेसु य गुज्जेसु रहस्सेसु निच्छएसु ववहारेसु य आपुच्छ-
 णिज्जे पडिपुच्छणिज्जे मेढी पमा(णे)णं आहारे आलंबणे चक्खु मेढी-पमाणभूए
 सव्वकज्जव(ट्ठा)ट्ठावए । तं न नज्जइ(जं) णं मए गयंसि वा चुयंसि वा मयंसि वा
 भगंसि वा लुगंसि वा सडियंसि वा पडियंसि वा विदेस(त्थंसि)गयंसि व विप्प-
 वसियंसि वा इमस्स कुडुंबस्स(किं) के मज्जे आहारे वा आलंबे वा पडिबंधे वा
 भविस्सइ । तं सेयं खलु मम कल्लं जाव जलंते विपुलं असणं ४ उवक्खडावेत्ता
 मित्तनाइ० चउण्ह य सुण्हाणं कुलघरवग्गं आमंतेत्ता तं मित्तनाइनियगसयण०
 चउण्ह य सुण्हाणं कुलघरवग्गं विपुलेणं असणेणं ४ धूवपुप्फवत्थगंध जाव सक्कारेत्ता
 सम्माणेत्ता तस्सेव मित्तनाइ चउण्ह य सुण्हाणं कुलघरवग्गस्स (य) पुरओ चउण्हं
 सुण्हाणं परिकखणट्ठयाए पंच २ सालिअक्खए दलइत्ता जाणामि ताव का कि(हं)ह
 वा सारक्खेइ वा संगोवेइ वा संबहेइ वा । एवं संपेहेइ २ ता कल्लं जाव मित्तनाइ०
 चउण्हं सुण्हाणं कुलघरवग्गं आमंतेइ २ ता विपुलं असणं ४ उवक्खडावेइ तओ
 पच्छा ण्हाए भोगयमंडवंसि सुहासणवरगए (तं) मित्तनाइ० चउण्ह य सुण्हाणं कुल-
 घरवग्गेणं सद्धि तं विपुलं असणं ४ जाव सक्कारेइ सम्माणेइ स० २ ता तस्सेव
 मित्तनाइ० चउण्ह य सुण्हाणं कुलघरवग्गस्स (य) पुरओ पंच सालिअक्खए गेण्हइ
 २ ता जे(ट्ठा)ट्ठं सु(ण्हा)ण्हं उज्झइ(या)यं (तं) सद्दावेइ २ ता एवं वयासी-तुमं णं
 पुत्ता ! मम हत्थाओ इमे पंच सालिअक्खए गेण्हाहि २ ता अणुपुव्वेणं सारक्ख-
 माणी संगोवेमाणी विहराहि । जया णं अहं पुत्ता । तुमं इमे पंच सालिअक्खए
 जाएज्जा तथा णं तुमं मम इमे पंच सालिअक्खए पडि(दि)नि जाएज्जासि-त्तिकट्ठु
 सुण्हाए हत्थे.दलयइ २ ता पडिविसज्जइ । तए णं सा उज्झिया धण्णस्स तह ति
 एयमट्ठं पडिसुणेइ २ ता धण्णस्स सत्थवाहस्स हत्थाओ ते पंच सालिअक्खए

गेण्हइ २ ता एगंतमवक्कमइ एगंतमवक्कमियाए इमेयारूवे अज्झत्थिए जाव समुप्प-
ज्जित्था-एवं खलु तायाणं कोट्ठागारंसि बहवे पल्लो सालीणं पडिपुण्णा चिट्ठंति, तं
जया णं म(मं)म ताओ इमे पंच सालिअक्खए जाए(र)सइ तथा णं अहं पल्लंतराओ
अन्ने पंच सालिअक्खए गहाय दाहामि-तिकट्ठु एवं संपेहेइ २ ता ते पंच सालिअ-
क्खए एगंते एडेइ २ ता सकम्मसंजुत्ता जाया यावि होत्था । एवं भोगवइयाए वि-
नवरं सा छो(छे)ल्लइ २ ता अणुगिलइ २ ता सकम्मसंजुत्ता जाया यावि होत्था ।
एवं रक्खिया वि नवरं गेण्हइ २ ता इमेयारूवे अज्झत्थिए०-एवं खलु ममं ताओ
इमस्स मित्तनाइ० चउण्ह य सुण्हाणं कुलघरवग्गस्स य पुरओ सद्दावेत्ता एवं वयासी-
तुमं णं पुत्ता । मम हत्थाओ जाव पडिनिज्जाएज्जासि-तिकट्ठु मम हत्थंसि पंच
सालिअक्खए दलयइ, तं भवियव्वं एत्थ कारणेणं-तिकट्ठु एवं संपेहेइ २ ता ते पंच
सालिअक्खए सुद्धे वत्थे बंधइ २ ता रयणकरंढियाए पक्खि(वे)वइ २ ता उ(ऊ)-
सीसामूले ठावेइ २ ता तिसंशं पडिजागरमाणी २ विहरइ । तए णं से धण्णे
सत्थवाहे त(स्से)हेव मित्त जाव चउत्थि रोहिणीयं सुण्हं सद्दावेइ २ ता जाव तं
भवियव्वं एत्थ कारणेणं (तं) तिकट्ठु सेयं खलु मम एए पंच सालिअक्खए सारक्ख-
माणीए संगोवेमाणीए संवट्ठेमाणीए-तिकट्ठु एवं संपेहेइ २ ता कुलघरपुरिसे सद्दावेइ
२ ता एवं वयासी-तुम्मे णं देवाणुप्पिया ! एए पंच सालिअक्खए गेण्हइ २ ता
पढमपाउसंसि महावुट्ठिकायंसि निवइयंसि समाणंसि खुट्ठागं केयारं सुपरिकम्मियं करेह
२ ता इमे पंच सालिअक्खए वावेह २ ता दोच्चंपि तच्चंपि उक्खयनि(क्ख)हए करेह
२ ता वाडिपक्खेवं करेह २ ता सारक्खमाणा संगोवेमाणा आणुपुव्वेणं संवट्ठेह ।
तए णं ते कोट्ठुबिया रोहिणीए एयमट्ठं पडिसुणेंति (२ ता) ते पंच सालिअक्खए
गेण्हंति २ ता अणुपुव्वेणं सारक्खंति संगोविंति (विहरंति) । तए णं ते कोट्ठुबिया
पढमपाउसंसि महावुट्ठिकायंसि निवइयंसि समाणंसि खुट्ठागं केयारं सुपरिकम्मियं
करेंति २ ता ते पंच सालिअक्खए ववंति २ ता दोच्चंपि तच्चंपि उक्खयनिहए
करेंति २ ता वाडिपरिक्खेवं करेंति २ ता अणुपुव्वेणं सारक्खेमाणा संगोवेमाणा
संवट्ठेमाणा विहरंति । तए णं ते साली (अक्खए) अणुपुव्वेणं सारक्खिज्जमाणा
संगोविज्जमाणा संवट्ठिज्जमाणा साला जाया किण्हा किण्होभासा जाव निउरंबभूया
पासाइया ४ । तए णं ते साली पत्तिया वत्तिया गब्भिया पस्स[इ]या आगयंगंधा
खीराइया बद्धफला पक्का परियागया सल्लइया पत्तइया हरियपव्वकंडा जाया यावि
होत्था । तए णं ते कोट्ठुबिया ते साली(ए) पत्तिए जाव सल्लइ(ए)यपत्तइए जाणित्ता
तिक्खेहिं नवपज्जणएहिं असि(य)एहिं लुणंति २ ता करयलमलिए करेंति २ ता

पुणंति । तत्थ णं चोक्खाणं सू[इ]याणं अखंडाणं अ(फो)कुडियाणं छ(डु)डछडा-
 पूयाणं सालीणं मागहए पत्थए जाए । तए णं ते कोडुंबिया ते साली नवएसु घडएसु
 पक्खिवंति २ ता उ(पल्लि)ल्लिपंति २ ता लंछियमुद्दिए करेति २ ता कोट्टागारस्स
 एगदेसंसि ठावेति २ ता सारक्खमाणा संगोवेमाणा विहरंति । तए णं ते कोडुंबिया
 दोच्चंसि वासारत्तंसि पढमपाउसंसि महावुट्ठिकायंसि निवइयंसि खुड्ढागं केयारं सुपरि-
 कम्मियं करेति २ ता ते साली ववंति दोच्चं (तच्चं)पि उक्खायणिहए जाव लुणंति
 जाव चलणतलमलिए करेति २ ता पुणंति । तत्थ णं सालीणं बहवे कुडवा जाव
 एगदेसंसि ठावेति २ ता सारक्खमाणा संगोवेमाणा विहरंति । तए णं ते कोडुंबिया
 तच्चंसि वासारत्तंसि महावुट्ठिकायंसि निवइयंसि बहवे केयारे सुपरिकम्मिए जाव
 लुणंति २ ता संवहंति २ ता खलयं करेति २ ता मल्लेति जाव बहवे कुंभा जाया ।
 तए णं ते कोडुंबिया साली कोट्टागारंसि प(क्खि)ल्लेवंति जाव विहरंति । चउत्थे
 वासारत्ते बहवे कुंभसया जाया । तए णं तस्स धण्णस्स पंचमयंसि संवच्छरंसि
 परिणममाणंसि पुव्वरत्तावरत्तकालसमयंसि इमेयारूवे अज्झत्थिए जाव समुप्प-
 ज्जित्था-एवं खलु म(म)ए इओ अईए पंचमे संवच्छरे चउण्हं सुण्हाणं परिक्ख-
 णट्ठयाए ते पंच २ सालिअक्खया हत्थे दिन्ना, तं सेयं खलु मम कल्लं जाव जलंते
 पंच सालिअक्खए परिजाइतए जाव जाणामि(ताव)काए किहसारक्खिया वा संगोविया
 वा संवड्ढिया (जाव तिकट्टु) वा एवं संपेहेइ २ ता कल्लं जाव जलंते विपुलं असणं
 ४ मित्तनाइनियगं चउण्ह य सुण्हाणं कुलघरवग्गं जाव सम्माणित्ता तस्सेव मित्तं
 चउण्ह य सुण्हाणं कुलघरवग्गस्स पुरओ जेट्ठं उज्झि(य)यं सहावेइ २ ता एवं
 वयासी-एवं खलु अहं पुत्ता ! इओ अईए पंचमंसि संवच्छरंसि इमस्स मित्तं
 चउण्ह य सुण्हाणं कुलघरवग्गस्स य पुरओ तव हत्थंसि पंच सालिअक्खए दलयामि
 जया णं अहं पुत्ता ! एए पंच सालिअक्खए जाएज्जा तथा णं तुमं मम इमे पंच
 सालिअक्खए पडिनिज्जाएसि-तिकट्टु (तं हत्थंसि दलयामि) । से नूणं पुत्ता ! अट्ठे
 समट्ठे ? हंता अत्थि । तं णं [तुमं] पुत्ता ! मम ते सालिअक्खए पडिनिज्जाए(हि)सि ।
 तए णं सा उज्झि (इ) या एयमट्ठं धण्णस्स पडिसुणेइ २ ता जेणेव कोट्टागारं तेणेव
 उवागच्छइ २ ता पल्लाओ पंच सालिअक्खए गेण्हइ २ ता जेणेव धण्णे सत्थवाहे
 तेणेव उवागच्छइ २ ता (धण्णं सत्थवाहं) एवं वयासी-एए णं ते पंच सालिअ-
 क्खए-तिकट्टु धण्णस्स हत्थंसि ते पंच सालिअक्खए दलयइ । तए णं धण्णे उज्झियं
 सवहसावियं करेइ २ ता एवं वयासी-किं णं पुत्ता ! (एए) ते चेव पंच सालिअ-
 क्खए उदाहु अग्गे ? तए णं उज्झिया धण्णं सत्थवाहं एवं वयासी-एवं खलु तुब्भे

ताओ ! इओ अईए पंचमे संवच्छरे इमस्स मित्तनाइ० चउण्ह य जाव विहराहि । तए णं अहं तुब्भं एयमट्ठं पडिस्सुणेमि २ ता ते पंच सालिअक्खए गेण्हामि एगंतमवक्कमामि । तए णं मम इमेयारूवे अज्झत्थिए जाव समुप्पजित्था-एवं खलु तायाणं कोट्टागारंसि जाव सकम्मसंजुता, तं नो खलु ता(ओ)या ! ते चेव पंच सालिअक्खए एए णं अञ्जे । तए णं से धण्णे उज्झि[इ]याए अंतिए एयमट्ठं सोच्चा निसम्म आसुरुत्ते जाव मिसिमिसेमाणे उज्झिइयं तस्स मित्तनाइ० चउण्हं सुण्हाणं कुलघरवग्गस्स य पुरओ तस्स कुलघरस्स छासुज्झियं च छाणुज्झियं च कयवरुज्झियं च संपु(समु)च्छियं च सम्मज्झिअं च पाउवदा(ई)इयं च ण्हाणोवदा(ई)इयं च बाहि-रपेसणका(रि)रियं [च] ठावेइ । एवामेव समणाउसो ! जो अम्हं निग्गंथो वा २ जाव पव्वइए पंच य से महव्वयाईं उज्झियाईं भवंति से णं इहभवे चेव बहूणं समणाणं ४ हीलणिज्जे जाव अणुपरियट्ठइस्सइ जहा सा उज्झिया । एवं भोगवइयावि नवरं तस्स कुलघरस्स कंडितियं च कोट्टितियं च पीसंतियं च एवं रुच्चंतियं (च) रंधंतियं(च) परिवेसंतियं च परिभायंतियं च अट्ठिभतरियं च पेसणकारिं महाणसिणिं ठावेइ । एवामेव समणाउसो ! जो अम्हं समणो वा २ पंच य से महव्वयाईं फोडियाईं भवंति से णं इहभवे चेव बहूणं समणाणं ४ हीलणिज्जे ४ जाव जहा व सा भोगवइया । एवं रक्खिइयावि नवरं जेणेव वासघरे तेणेव उवागच्छइ २ ता मंजूसं विहाडेइ २ ता रयणकरंडगाओ ते पंच सालिअक्खए गेण्हइ २ ता जेणेव धण्णे सत्थवाहे तेणेव उवागच्छइ २ ता पंच सालिअक्खए धण्णस्स हत्थे दलयइ । तए णं से धण्णे (स०) रक्खिइयं एवं वयासी-किं णं पुत्ता ! ते चेव एए पंच सालिअक्खए उदाहु अञ्जे (त्ति)? तए णं रक्खिइया धण्णं (सत्थवाहं) एवं वयासी-ते चेव ताया ! एए पंच सालिअक्खया नो अञ्जे । कहं णं पुत्ता ! ? एवं खलु ताओ ! तुब्भे इओ पंचमंमि (संवच्छरे) जाव भवियव्वं एत्थ कारणेणं-तिकट्ठु ते पंच सालिअक्खए सुद्धे चत्थे जाव तिसंज्जं पडिजागरमाणी यावि विहरामि । तओ एएणं कारणेणं ताओ ! ते चेव (ते) पंच सालिअक्खए नो अञ्जे । तए णं से धण्णे रक्खिइयाए अंति(ए)यं एयमट्ठं सोच्चा हट्ठतुट्ठे तस्स कुलघरस्स हिरण्णस्स य कंसदूसविपुलधण जाव सावएजस्स य भंडागारिणिं ठावेइ । एवामेव समणाउसो ! जाव पंच य से महव्वयाईं रक्खियाईं भवंति से णं इहभवे चेव बहूणं समणाणं ४ अच्चणिज्जे जाव जहा सा रक्खि[इ]या । रोहि(णि)णीयावि एवं चेव नवरं तुब्भे ताओ ! मम सुव-हुयं सगढीसागढं दला(हि)ह जा(जे)णं अहं तु(ब्भं)ब्भे ते पंच सालिअक्खए पडिनिजाएमि । तए णं से धण्णे (सत्थवाहे) रोहिणि एवं वयासी-कहं णं तुभं मम

पुत्ता । ते पंच सालिअक्खए सगडसागडेणं निज्जा(इ)एस्ससि ? । तए णं सा रोहिणी धण्णं (सत्थवाहे) एवं वयासी-एवं खलु ताओ । इओ तुब्भे पंचमे संवच्छरे इमस्स मित्त जाव बहवे कुंभसया जाया तेणेव कमेणं, एवं खलु ताओ ! तुब्भे ते पंच सालिअक्खए सग(ड)डीसागडेणं निज्जाएमि । तए णं से धण्णे सत्थवाहे रोहिणीयाए सुबहुयं सगडीसागडं दलयइ । तए णं रोहिणी सुबहुं सगडीसागडं गहाय जेणेव सए कुलधरे तेणेव उवागच्छइ (२ ता) कोट्ठागा(रे)रं विहाडेइ २ ता पल्ले उर्म्मिदइ २ ता सगडीसागडं भरेइ २ ता रायगिहं नगरं मज्झमज्जेणं जेणेव सए गिहे जेणेव धण्णे सत्थवाहे तेणेव उवागच्छइ । तए णं रायगिहे नयरे सिंघाडग जाव बहुजणो अन्नमच्चं एवमाइक्खइ ४-धन्ने णं देवाणुप्पिया ! धण्णे सत्थवाहे जस्स णं रोहिणीया सुण्हा (जीए ण) पंच सालिअक्खए सगडसागडिणं निज्जाएइ । तए णं से धण्णे सत्थवाहे ते पंच सालिअक्खए सगडसागडेणं निज्जा(ए)इए पासइ २ ता हट्ठ जाव पडिच्छइ २ ता तस्सेव मित्तनाइ० चउण्ह य सुण्हाणं कुलधर(वग्गस्स)पुरओ रोहिणीयं सुण्हं तस्स कुलधरस्स बहूसु कज्जेसु य जाव रहस्सेसु य आपुच्छणिज्जं जाव वट्ठावियं पमाणभूयं ठावेइ । एवामेव समणाउसो ! जाव पंच [से] महव्वयाइं संवट्ठियाइं भवंति से णं इहभवे चेव बहूणं समणाणं जाव वीईवइस्सइ जहा व सा रोहिणीया । एवं खलु जंबू ! समणेणं भगवया महावीरेणं जाव संपत्तेणं सत्तमस्स नायज्झयणस्स अयमट्ठे पन्नते त्तिबेमि ॥ ७० ॥

गाहाओ-जह सेट्ठी तह गुरुणो जह णाइजणो तहा समणसंधो । जह वहुया तह भव्वा जह सालिकणा तह वयाइं ॥ १ ॥ जह सा उज्झियनामा उज्झियसाली जहत्थमभिहाणा । पेसणगारितेणं असंखदुक्खक्खणी जाया ॥ २ ॥ तह भव्वो जो कोई संघसमक्खं गुरुविदिण्णाइं । पडिवज्जिउं समुज्झइ महव्वयाइं महामोहा ॥ ३ ॥ सो इह चेव भव्वंजी जणाण धिक्कारभायणं होइ । परलोए उ दुहत्तो णाणाजोणीसु संचरइ ॥ ४ ॥ जह वा सा भोगवइ जहत्थनामोवभुत्तसालिकणा । पेसणविसेसकारितणेण पत्ता दुहं चेव ॥ ५ ॥ तह जो महव्वयाइं उवभुंजइ जीवियत्ति पालितो । आहाराइसु सत्तो चत्तो सिव-साहणिच्छाए ॥ ६ ॥ सो एत्थ जहिच्छाए पावइ आहारमाइ लिंगित्ति । विउसाण नाइपुज्जो परलोयम्मी दुही चेव ॥ ७ ॥ जह वा रक्खियवहुया रक्खियसालीकणा जहत्थक्खा । परिजणमण्णा जाया भोगसुहाइं च संपत्ता ॥ ८ ॥ तह जो जीवो सम्मं पडिवज्जित्ता महव्वए पंच । पालेइ निरइयारे पमायलेसंमि वज्जेतो ॥ ९ ॥ सो अप्पहिएक्करइ इहलोयंसिंवि विऊहिं पणयपओ । एगंतसुही जायइ परम्मि मोक्खेपि पावेइ ॥ १० ॥ जह रोहिणी उ सुण्हा रोवियसाली जहत्थमभिहाणा ।

वद्धिता सालिकणे पत्ता सव्वस्स सामितं ॥ ११ ॥ तह जो भव्वो पाविय वयाई
पालेइ अप्पणा सम्मं । अण्णेसिवि भव्वाणं देइ अणेगेसिं हियहेउं ॥ १२ ॥ सो
इह संघपहाणे जुगप्पहाणेत्ति लहइ संसइ । अप्पपरेसिं कल्लणकारओ गोयमपहुव्व
॥ १३ ॥ तित्थस्स वुद्धिकारी अक्खेवणओ कुतित्थियाईणं । विउसनरसेवियकमो
कमेण सिद्धिपि पावेइ ॥ १४ ॥ **सत्तमं नायज्झयणं समत्तं ॥**

जइ णं भंते ! समणेणं जाव संपत्तेणं सत्तमस्स नायज्झयणस्स अयमट्ठे पन्नते
अट्ठमस्स णं भंते ! के अट्ठे पन्नते ? एवं खलु जंबू ! तेणं कालेणं तेणं समएणं
इहेव जंबुदीवे २ महाविदेहे वासे मंदरस्स पव्वयस्स पच्चत्थिमेणं निसदस्स वास-
हरपव्वयस्स उत्तरेणं सीओयाए महानदीए दाहिणेणं सुहावहस्स वक्खारपव्वयस्स
पच्चत्थिमेणं पच्चत्थिमलवणसमुदस्स पुर(च्छि)त्थिमेणं एत्थ णं सलिलावई नामं
विजए पन्नते । तत्थ णं सलिलावईविजए वीयसोगा नामं रायहाणी पन्नत्ता नवजोयण-
वित्थिण्णा जाव पच्चक्खं देवलोगभूया । तीसे णं वीयसोगाए रायहाणीए उत्तरपुरच्छिमे
दिसीमाए (एत्थ णं) इंदकुंभे नामं उज्जाणे (होत्था) । तत्थ णं वीयसोगाए रायहा-
णीए बले नामं राया (होत्था) । त(स्सेव)स्स धारिणीपामोक्खं दे(वि)वीसहस्सं
ओ(उत्र)रोहे होत्था । तए णं सा धारिणी देवी अन्नया कयाइ सीहं सुमिणे पासित्ताणं
पडिबुद्धा जाव महब्बले (नामं) दारए जाए उम्मुक्क जाव भोगसमत्थे । तए णं तं
महब्बलं अम्मापियरो सरिसियाणं कमलसि(री)रिपामोक्खाणं पंचण्हं रायवरकन्ना-
सयाणं एगदिवसेणं पाणिं गेण्हावेत्ति । पंच पासायसया पंचसओ दाओ जाव विह-
रइ । (तेणं कालेणं तेणं समएणं धम्मबोसा नामं थेरा पंचहिं अणगारसएहिं सद्धिं
संपरिबुद्धा पुव्वाणपुव्वि चरमाणा गामाणुगामं दइज्जमाणा सुहंसुहेणं विहरमाणा
जेणेव इंदकुंभे नामं उज्जाणे तेणेव समोसडा संजमेणं तवसा अप्पाणं भावेमाणा
विहरंति) थेरागमणं इंदकुंभे उज्जाणे समोसडे परिसा निग्गया बलो वि (राया)
निग्गओ धम्मं सोच्चा निसम्म जं नवरं महब्बलं कुमारं रजे ठावेइ जाव एकारसंगवी
बहूणि वासाणि सामण्णपरियागं पाउणिता जेणेव चारुपव्वए मासिएणं भत्तेणं
(अपाणेणं केवलं पाउणिता जाव) सिद्धे । तए णं सा कमलसिरी अन्नया कयाइ
(जाव) सीहं सुमिणे (पासित्ताणं पडिबुद्धा) जाव बलभहो कुमारो जाओ जुवराया
यावि होत्था । तस्स णं महब्बलस्स रत्तो इमे छप्पियबालवयंसगा रायाणो होत्था
तंजहा-अयले धरणे पूरणे वसू वेसमणे अभिचंदे सहजा[य]या जाव सं(वद्धिया
ते)हिच्चाए नित्थरियव्वे-त्तिकट्ठु अन्नमन्नस्स एयमट्ठं पडिबुण्णेति (सुहंसुहेणं विह-
रंति) । तेणं कालेणं तेणं समएणं (ध० थे० जे० ई० उ० ते० स०) इंदकुंभे

उज्जाणे थेरा समोसडा । परिसा निग्गया । (महब्बलोवि राया निग्गओ धम्मो कहिओ) महब्बले णं धम्मं सोच्चा जं नवरं (देवाणुप्पिया !) छप्पियबालवयंसए आपुच्छामि बलभई च कुमारं रज्जे ठावेमि जाव छप्पियबालवयंसए आपुच्छइ । तए णं ते छप्पिय० महब्बलं रायं एवं वयासी-जइ णं देवाणुप्पिया ! तुब्भे पव्व-यह अम्हं के अन्ने आहारे वा जाव पव्वयामो । तए णं से महब्बले राया ते छप्पिय० एवं वयासी-जइ णं (देवाणुप्पिया !) तुब्भे मए सद्धिं जाव पव्वयह तो णं गच्छह जेट्ठे पुत्ते सएहिं २ रज्जेहिं ठावेह पुरिससहस्सवाहिणीओ सीयाओ दुरुद्धा जाव पाउब्भवति । तए णं से महब्बले राया छप्पियबालवयंसए पाउब्भूए पासइ २ ता हट्ठ जाव कोट्टुबियपुरिसे (सद्दावेइ २ ता एवं वयासी-गच्छह णं तुब्भे देवा-णुप्पिया ! बलभइस्स कुमारस्स जाव तेवि तहेव जाव अभिसिंचइ०, तए णं से महब्बले बलभई० आपुच्छइ० बलभइस्स रायाभिसेओ जाव आपुच्छइ । तए णं से महब्बले जाव महया इह्वीए (छ० स०) पव्वइए एक्कारसअं(गाई०) गवी बह्वहिं चउत्थ जाव भावेमाणे विहरइ । तए णं तेसिं महब्बलपामोक्खाणं सत्तण्हं अणगा-राणं अन्नया कयाइ एगयओ सहियाणं इमेयाह्वे मिहो-कहासमुद्धावे समुप्पज्जित्था-जं णं अम्हं देवाणुप्पिया । ए(गं)गे तवोकम्मं उवसंपज्जित्ताणं विहरइ तं णं अम्हेहिं सव्वेहिं (सद्धिं) तवोकम्मं उवसंपज्जित्ताणं विहरित्तए-त्तिकट्ठु अन्नमज्जस्स एयमट्ठं पड्डिसुणेंति २ ता बह्वहिं चउत्थ जाव विहरंति । तए णं से महब्बले अणगारे इमेणं कारणेणं इत्थिनामगोयं कम्मं निव्वत्तंसु-जइ णं ते महब्बलवजा छ अणगारा चउत्थं उवसंपज्जित्ताणं विहरंति तओ से महब्बले अणगारे छट्ठं उवसंपज्जित्ताणं विहरइ । जइ णं ते महब्बलवजा [छ] अणगारा छट्ठं उवसंपज्जित्ताणं विहरंति तओ से मह-ब्बले अणगारे अट्ठमं उवसंपज्जित्ताणं विहरइ । एवं [अह] अट्ठमं तो दसमं अह दसमं तो दुवाल(सं)समं । इमेहि य णं वीसाएहि य कारणेहिं आसेवियबहुलीक-एहिं तित्थयरनामगोयं कम्मं निव्वत्तंसु तंजहा-अरहंतसिद्धपव्वयणगुरुस्थेरबहुस्सए तवस्सीसुं । वच्छल्लया य तेसिं अभिक्ख नाणोवज्जो(गे)गा य ॥ १ ॥ दंसणविणए आवसए य सीलव्वए निरइया(रं)रो । खणलवतव(च्चि)चियाए वेयावच्चे समाही य ॥ २ ॥ अ(ए)पुव्वनाणगहणे सुयभत्ती पव्वयणे प(भा)हावणया । एएहिं कारणेहिं तित्थयरतं लहइ (जीओ) सो उ ॥ ३ ॥ तए णं ते महब्बलपामोक्खा सत्त अण-गारा मासियं भिक्खुपडिमं उवसंपज्जित्ताणं विहरंति जाव एगराइयं (मि० उव०) । तए णं ते महब्बलपामोक्खा सत्त अणगारा खुट्ठागं सीहनिक्कीलियं तवोकम्मं उव-संपज्जित्ताणं विहरंति तंजहा-चउत्थं करेंति २ ता सव्वकामगुणियं पारेंति २ ता

छट्ठं करेति २ ता चउत्थं करेति २ ता अट्ठमं करेति २ ता छट्ठं करेति २ ता दसमं करेति २ ता अट्ठमं करेति २ ता दुवालसमं करेति २ ता दसमं करेति २ ता चो(चाउ)इसमं करेति २ ता दुवालसमं करेति २ ता सोलसमं करेति २ ता चोइसमं करेति २ ता अट्ठारसमं करेति २ ता सोलसमं करेति २ ता वीसइमं करेति २ ता अट्ठारसमं करेति २ ता वीसइमं करेति २ ता सोलसमं करेति २ ता अट्ठारसमं करेति २ ता चोइसमं करेति २ ता सोलसमं करेति २ ता दुवालसमं करेति २ ता चोइसमं करेति २ ता दसमं करेति २ ता दुवालसमं करेति २ ता अट्ठमं करेति २ ता दसमं करेति २ ता छट्ठं करेति २ ता अट्ठमं करेति २ ता चउत्थं करेति २ ता छट्ठं करेति २ ता चउत्थं करेति सव्वत्थ सव्वकामगुणिएणं पारंति । एवं खलु एसा खुड्ढागसीहनिक्कीलियस्स तवोकम्मस्स पढमा परिवाडी छहिं मासेहिं सत्ताहि य अहोरत्तेहि य अहासु(त्ता)तं जाव आराहिया भवइ । तयाणंतरं दोच्चाए परिवाडीए चउत्थं करेति नवरं विग(इ)यवज्जं पारंति । एवं तच्चा-[ए]वि परिवाडी[ए] नवरं पारणए अलेवाडं पारंति । एवं चउत्थावि परिवाडी नवरं पारणए आयंबिलेण पारंति । तए णं ते महब्बलपामोक्खा सत्त अणगारा खुड्ढागं सीहनिक्कीलियं तवोकम्मं दोहिं संवच्छरेहिं अट्ठावीसाए अहोरत्तेहिं अहासुतं जाव आणाए आराहेत्ता जेणेव थेरे भगवंते तेणेव उवागच्छंति २ ता थेरे भगवंते वंदंति नमंसंति वं० २ ता एवं वयासी-इच्छामो णं भंते । महालयं सीहनिक्कीलियं (तवोकम्मं) तहेव जहा खुड्ढागं नवरं चोत्तीसइमाओ नियत्त(ए)इ एगाए परिवाडीए कालो एगेणं संवच्छरेणं छहिं मासेहिं अट्ठार(से)सहि य अहोरत्तेहिं समप्पेइ । सव्वंपि सीहनिक्कीलियं छहिं वासेहिं दो(हि य)हिं मासेहिं बारसहि य अहोरत्तेहिं समप्पेइ । तए णं ते महब्बलपामोक्खा सत्त अणगारा महालयं सीहनिक्कीलियं अहासुतं जाव आरा(हे)हिता जेणेव थेरे भगवंते तेणेव उवागच्छंति २ ता थेरे भगवंते वंदंति नमंसंति वं० २ ता बहुणि चउत्थ जाव विहरंति । तए णं ते महब्बलपामोक्खा सत्त अणगारा तेणं उ(ओ)रालेणं सुक्का भुक्खा जहा खंदओ नवरं थेरे आपुच्छिता चास(वक्खार)पव्वयं [सणियं] दुरुहंति जाव दोमासियाए संलेहणाए सवीसं भत्तसयं (अणसणं) चउरासीई वाससयसइस्साई सामण्णपरियागं पाउणंति २ ता चुलसीई पुव्वसयसइस्साई सव्वाउयं पालइत्ता जयंते विमाणे देवताए उव्वन्ना ॥ ७१ ॥ तत्थ णं अत्थेगइयाणं देवाणं बत्तीसं सागरोवमाई ठिई पत्ता । तत्थ णं महब्बलवज्जाणं छण्हं देवाणं देसूणाई बत्तीसं सागरोवमाई ठिई । महब्बलस्स देवस्स पडिपुण्णाई बत्तीसं सागरोवमाई ठिई(५०) । तए णं ते

महब्बल(देव)वज्जा छप्पि(य) देवा (जयं)ताओ देवलोगाओ आउक्खएणं जाव
अणंतरं चयं चइता इहेव जंबुद्वीवे २ भारहे वासे विसुद्धपिदमाइवसेसु रायकुलेसु
पत्तेयं २ कुमारत्ताए पच्चायाया(सी) तंजहा-पडिबुद्धी इक्खागराया, चंदच्छाए अंग-
राया, संखे कासिराया, रुप्पी कुणालाहिवई, अदीणसत्त कुरराया, जियसत्त पंचाला-
हिवई । तए णं से महब्बले देवे तिहिं नाणेहिं समग्गे उच्चट्ठाण(ट्टि)गएसु गहेसु
सोमासु दिसासु वितिमिरासु विसुद्धासु जइएसु सउणेसु पयाहिणाणुकूलंसि भूमिसर्पिसि
मारुयंसि पवायंसि निप्फन्नसस्समेइणीयंसि कालंसि पमुइयपक्कीलिएसु जणवएसु
अद्धरत्तकालसमयंसि अस्सिणीनक्खत्तेणं जोगमुवागएणं जे से हेमंताणं चउत्थे
मासे अट्ठमे पक्खे फग्गुणसुद्धे तस्स णं फग्गुणसुद्धस्स चउत्थिपक्खेणं जयंताओ
विमाणाओ बत्तीसं सागरोवमट्ठि(ई)इयाओ अणंतरं चयं चइता इहेव जंबुद्वीवे २
भारहे वासे मिहिलाए रायहाणीए कुंभगस्स रत्तो पभावईए देवीए कुच्छिसि आहा-
रवक्कंतीए भववक्कंतीए सरीरवक्कंतीए गम्भत्ताए वक्कंते । तं रयणिं च णं चोइस
महासुमिणा वण्णओ । भत्तारकहणं सुमिणपाठगपुच्छा जाव विहरइ । तए णं तीसे
पभावईए देवीए तिण्हं मासाणं बहुपडिपुण्णाणं इमेयारूवे डोहले पाउब्भूए-
धन्नाओ णं ताओ अम्मयाओ जाओ णं जलथलयभासुरप्पभूएणं दसद्धवण्णेणं मल्लेणं
अत्थुयपच्चत्थुयंसि सयणिजंसि सन्निसण्णाओ संनिवन्नाओ य विहरंति एणं च महं
सि(री)रिदामगंडं पाडलमल्लियचंप(य)गअसोगपुन्नागनागमरुयगदमणगअणोज्जो-
य(कोरंटपत्तवर)पउरं परमसुह(फास)दरिसणिजं महया गंधदणिं मुयंतं अग्घायमा-
णीओ डोहलं विणेंति । तए णं ती(से)ए पभावईए देवीए इमं ए(इमे)यारूवं डोहलं
पाउब्भूयं पासित्ता अहासन्नहििया वाणमंतरा देवा खिप्पामेव जलथलय जाव दस-
द्धवण्णमल्लं कुंभगसो य भारगसो य कुंभगस्स रत्तो भवणंसि साहरंति एणं च णं महं
सिरिदामगंडं जाव (गंधदणिं) मुयंतं उवणेंति । तए णं सा पभावई देवी जलथलय
जाव मल्लेणं दोहलं विणेइ । तए णं सा पभावई देवी पसत्थदोहला जाव विहरइ । तए
णं सा पभावई देवी नवण्हं मासाणं अद्धट्ठमाण य रायं(रत्तिं)दियाणं जे से हेमंता-
णं पढमे मासे दोच्चे पक्खे मग्गसिरसुद्धे तस्स णं (मग्गसिरसुद्धस्स) एक्कारसीए पुव्व
रत्तावरत्तकालसमयंसि अस्सिणीनक्खत्तेणं (जोगमुवागएणं) उच्चट्ठाण जाव पमुइयप-
क्कीलिएसु जणवएसु आरोगारोगं एग्गूवसीइमं तिथयरं पयाया ॥ ७२ ॥ तेणं कालेणं
तेणं समएणं अ(हो)हेलोगवत्थव्वाओ अट्ठ दिप्पाकुमारी(ओ)मयह(री)रियाओ जहा
जंबुद्वीवपन्नतीए जम्भणं सव्वं (भाणियव्वं) नवरं मिहिलाए (नयरीए) कुंभ(राय)-
गस्स (भवणंसि) पभावईए (देवीए) अभिलावो संजोएयव्वो जाव नंदीसरव(रे)र-

दीवे महिमा । तथा णं कुंभए राया बहूहिं भवणवईहिं ४ तिथयर(जम्मणाभिसेयं)-
जायकम्मं जाव नामकरणं-जम्हा णं अ(म्हे)म्हं इसीए दारियाए (माउगम्भंसि
वक्कममाणंसि) माऊए मल्लसयणीयंसि डोहले विणीए तं होउ णं नामेणं मल्ली (नामं
ठवेइ) जहा महब्बले (नाम) जाव परिवड्डिया-सा व(द्ध)हुई भगवई दियलोयचुया
अणोवमसिरीया । दासीदासपरिवुडा परिकिण्णा पीढमदेहिं ॥१॥ असियसिरया सुन-
यणा विबोड्डी धवलदंतपतीया । वरकमलकोमलंगी फुल्लुप्पलगंधनीसासा ॥ २ ॥ ७३ ॥
तए णं सा मल्ली विदेहरायवरकन्ना उम्मुक्कवालभावा जाव रुवेण [य] जोव्वणेण य
लावण्णेण य अईव २ उक्किट्ठा उक्किट्ठसररीरा जाया(या)वि होत्था । तए णं सा मल्ली
(वि०) देसूणवाससयजाया ते छप्पि(य) रायाणो विउलेणं ओहिणा आभोएमाणी
२ विहरइ तंजहा-पडिबुद्धिं जाव जियसत्तुं पंचालाहिवई । तए णं सा मल्ली(वि०)
कोडुंबियपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! असो-
वणियाए एगं महं मोहणघरं करेह अणेगखंभसयसन्निविट्ठं । तस्स णं मोहणघरस्स
बहुमज्झदेसभाए छ गम्भघरए करेह । तेसि णं गम्भघरगाणं बहुमज्झदेसभाए
जालघरयं करेह । तस्स णं जालघरयस्स बहुमज्झदेसभाए मणिपेडियं करेह
(तेवि तहेव) जाव पच्चप्पिणंति । तए णं [सा] मल्ली मणिपेडियाए उवरिं अप्पणो
सरिसियं सरित्तयं सरिव्वयं सरिसलावण्णजोव्वणगुणोव्वेयं कणगम(ई)यं मत्थय-
च्छिड्डं पउमप्पलपिहाणं पडिमं करेइ २ ता जं विउलं असणं ४ आहारेइ तओ
मणुआओ असणाओ ४ कल्लाकल्लि एगमेगं पिंडं गहाय तीसे कण(ग)गामईए मत्थ-
यच्छिड्डाए जाव पडिमाए मत्थयंसि पक्खिवमाणी २ विहरइ । तए णं तीसे कणगा-
मईए जाव मत्थयच्छिड्डाए पडिमाए एगमेगंसि पिंडे पक्खिप्पमाणे २ (पउमुप्पल-
पिहाणं पिहेइ) तओ गंधे पाउब्भवइ से जहानामए अहिमडेइ वा जाव एत्तो
अणिट्ठतराए अमणामतराए [चेव] ॥ ७४ ॥ तेणं कालेणं तेणं समएणं कोसला
नामं जणवए (होत्था) । तत्थ णं सागेए नामं नयरे । तस्स णं उत्तरपुरच्छिमे
दिसीभाए एत्थ णं (महं एगे) महेगे नागघरए होत्था । तत्थ णं सागेए नयरे पडि-
बुद्धी नामं इक्खा(गु)गराया परिवसइ पउमावई देवी सुबुद्धी अमचे सामदंड० ।
तए णं पउमावईए देवीए अन्नया कयाई नागजन्नए यावि होत्था । तए णं सा पउ-
मावई नागजन्नमुवट्ठियं जाणित्ता जेणेव पडिबुद्धी० करयल जाव एवं वयासी-एवं
खल्लु सामी ! मम कल्लं नागजन्नए (यावि) भविस्सइ, तं इच्छामि णं सामी !
तुब्भेहिं अब्भणुआया समाणी नागजन्नयं गमित्तए, तुब्भेवि णं सामी ! मम नाग-
जन्नयंसि समोसरह । तए णं पडिबुद्धी पउमावईए (देवीए) एयमट्ठं पडिबुणेइ ।

तए णं पउमावई पडिबुद्धिणा रत्ता अब्भणुत्ताया समाणी ह(द्धु)त्ता जाव कोडुं-
 वियपुरिसे सद्दावेइ २ ता एवं वयासी-एवं खलु देवाणुप्पिया ! मम कल्लं नागजज्ञए
 भविस्सइ । तं तुब्भे मालागारे सद्दावेइ २ ता एवं वयह-एवं खलु पउमावईए
 देवीए कल्लं नागजज्ञए भविस्सइ । तं तुब्भे णं देवाणुप्पिया ! जलथलय(०)दसद्धवण्णं
 मल्लं नागधरयंसि साहरह एगं च णं महं सिरिदामगंडं उवणेह । तए णं जलथल-
 यदसद्धवण्णेणं मल्लेणं नाणाविहभत्तिउविरइयं (करेह तंसि भत्तिंसि) हंसमियमयूर-
 कोंचसारसचक्कायमयणसालकोइलकुलोववेयं ईहामिय जाव भत्तिचित्तं महग्घं मह-
 रिहं विउलं पुप्फमंडवं विरएह । तस्स णं बहुमज्झदेसभाए एगं महं सिरिदामगंडं
 जाव गंधद्वणिं मुयंतं उल्लोयंसि आ(ओ)लंबेह २ ता पउमावईं देविं पडिवाल्लेमाणा
 २ चिट्ठह । तए णं ते कोडुंबिया जाव चिट्ठंति । तए णं सा पउमावईं देवी कल्लं
 कोडुंबि(यपुरिसे)ए (सद्दावेइ २ ता) एवं वयासी-खिप्पामेव भो देवाणुप्पिया !
 सागेयं नयरं सद्धिभतरवाहिरियं आसियसम्मज्जिओवल्लितं जाव पच्चप्पिणंति । तए
 णं सा पउमावईं (देवी) दोच्चं पि कोडुंबिय जाव खिप्पामेव लहुकरणजुतं जाव
 जुत्तामेव (उवट्टवेइ, तए णं तेवि तहेव) उव(ट्टा)ट्टवेति । तए णं सा पउमावईं
 अंतो अंतेउरंसि ण्हाया सव्वालंकारविभूसिया धम्मियं जाणं दुरुढा । तए णं सा
 पउमावईं नियगपरि(वा)यालसंपरिवुडा सागेयं नयरं मज्झमज्झेणं नि(ज)जाइ २
 ता जेणेव पुक्खरणी तेणेव उवागच्छइ २ ता पो(पु)क्खरणिं ओगा(ह)हेइ २ ता
 जलमज्जणं जाव परमसुइभूया उल्लपडसाडया जाइं तत्थ उप्पलाइं जाव गेण्हइ २
 ता जेणेव नागघरए तेणेव पहारेत्थ गमणाए । तए णं पउमावईए दासचेडीओ
 बहूओ पुप्फपडलगहत्थगयाओ धूवक(डु)डच्छु(ग)यहत्थगयाओ पिट्ठिओ समणुग-
 च्छंति । तए णं पउमावईं सब्बिद्धीए जेणेव नागघ(रे)रए तेणेव उवागच्छइ २
 ता नागघ(रयं)रं अणुप्पविसइ २ ता लोमहत्थगं जाव धूवं डहइ २ ता पडिबुद्धिं
 (रायं) पडिवाल्लेमाणी २ चिट्ठइ । तए णं पडिबुद्धी(राया) ण्हाए हत्थिखंधवरगए
 सकोरंट जाव सेयवरचामरा(हिं)हि य (महया)हयगयरह(जोह)महयाभडचडगर-
 पहकरेहिं सागेयं नगरं मज्झमज्झेणं निग्गच्छइ २ ता जेणेव नागघरए तेणेव
 उवागच्छइ २ ता हत्थिखंधाओ पच्चोरुहइ २ ता आलोए पणामं करेइ २ ता
 पुप्फमंडवं अणुप्पविसइ २ ता पासइ तं एगं महं सिरिदामगंडं । तए णं पडिबुद्धी
 तं सिरिदामगंडं सु(इ)चिरं कालं निरिक्खइ २ ता तंसि सिरिदामगंडंसि जायविम्हए
 सुबुद्धिं अमच्चं एवं वयासी-तुमं(णं) देवाणुप्पिया ! मम दोच्चं बहूणि गामागर
 जाव सच्चिवेसाइं आहिंइसि बहू(णि)ण य रा(य)ईसर जाव गिहाइं अणुप्पविसि,

तं अत्थि णं तुमे कर्हिचि एरिसए सिरिदामगंडे दिट्ठपुव्वे जारिसए णं इमे पउमा-
वई(ए)देवीए सिरिदामगंडे ? । तए णं सुबुद्धी पडिबुद्धि रायं एवं वयासी-एवं खलु
सामी ! अहं अन्नया कयाइं तुळं दोचेणं मिहिलं रायहाणिं गए । तत्थ णं मए
कुंभगस्स रत्तो धूयाए पभावईए देवीए अत्तयाए मल्लीए (विदेहरायवरकन्नाए)संव-
च्छरपडिलेहणंसि दिव्वे सिरिदामगंडे दिट्ठपुव्वे । तस्स णं सिरिदामगंडस्स इमे
पउमावईए [देवीए] सिरिदामगंडे सयसहस्सइमंपि कलं न अग्घइ । तए णं पडि-
बुद्धी(राया) सुबुद्धि अमच्चं एवं वयासी-केरिसिया णं देवाणुप्पिया ! मल्ली २ जस्स
णं संवच्छरपडिलेहणंसि सिरिदामगंडस्स पउमावईए देवीए सिरिदामगंडे सयस-
हस्सइमंपि कलं न अग्घइ ? । तए णं सुबुद्धी (अमच्चे) पडिबुद्धि इक्खागरायं एवं
वयासी-(एवं खलु सामी !) मल्ली विदेहरायवरकन्नगा सुपइट्ठियकुम्मुन्नयचारुचरणा
वण्णओ । तए णं पडिबुद्धी (राया) सुबुद्धिस्स अमच्चस्स अंतिए एयमट्ठं सोच्चा
निसम्म सिरिदामगंडजणियहासे दूयं सहावेइ २ ता एवं वयासी-गच्छाहि णं तुमं
देवाणुप्पिया । मिहिलं रायहाणिं, तत्थ णं कुंभगस्स रत्तो धूयं पभावईए (देवीए)
अ(त्त)त्तियं मल्लि २ मम भारियत्ताए वरेहि जइ वि य णं सा सयं रज्जुत्तंका । तए
णं से दूए पडिबुद्धिणा रत्ता एवं बुत्ते समाणे हट्ठ जाव पडिसुणेइ २ ता जेणेव सए
मिहे जेणेव चाउग्घंटे आसरहे तेणेव उवागच्छइ २ ता चाउग्घंटे आसरहं पडि-
कप्पावेइ २ ता दुरुढे जाव हयगयमहयाभडचडगरेणं साएयाओ निग्गच्छइ २ ता
जेणेव विदेहजणवए जेणेव मिहिला रायहाणी तेणेव पहारेत्थ गमणाए (१)
॥ ७५ ॥ तेणं कालेणं तेणं समएणं अंग नाम जणवए होत्था । तत्थ णं चंपा नामं
नयरी होत्था । तत्थ णं चंपाए नयरीए चंदच्छाए अंगराया होत्था । तत्थ णं चंपाए
नयरीए अरहन्नगपामोक्खा बहवे संजत्तानावावाणियगा परिवसंति अट्ठा जाव
अपरिभूया । तए णं से अरहन्नगे समणोवासए यावि होत्था अहिगयजीवाजीवे
वण्णओ । तए णं तेसिं अरहन्नगपामोक्खानं संजत्तानावावाणियगानं अन्नया कयाइ
एगयओ सहियाणं इमे(ए)थारुवे मिहोक्कासमुल्ला(संला)वे समुप्पजित्था-सेयं खलु
अम्हं गणिमं(च) धरिमं च मेज्जं च प(पा)रिच्छेज्जं च भंडगं गहाय लवणसमुद्धं
पोयवहणेणं ओगाहितए-त्तिकट्ठु अन्नम(न्न)जस्स एयमट्ठं पडिसुणेंति २ ता गणिमं
च ४ गेण्हंति २ ता सग(डि)डीसाग(डि)डयं (च) सज्जेति २ ता गणिमस्स ४
भंडगस्स सगडसागडियं भरेंति २ ता सोहणंसि तिहिकरणनक्खत्तमुहुत्तंसि विउलं
असणं ४ उवक्खडावेंति मित्तनाइ भोयणवेलाए भुंजावेंति जाव आपुच्छंति २ ता
सगडीसागडियं जोर्यंति २ ता चंपाए नयरीए मज्झमज्झेणं निग्गच्छंति २ ता जेणेव

गंभीरए पोयपट्टणे तेणेव उवागच्छंति २ ता सगडीसागडियं मोर्यंति २ ता पोयवहणं सज्जेति २ ता गणिमस्स(य) जाव चउविह(स्स)भंडगस्स भरेंति तंडुलाण य समियस्स य तेळस्स य घयस्स य गुलस्स य गोरसस्स य उदगस्स य उदयभायणाण य ओस-
हाण य भेसजाण य तणस्स य कट्टस्स य आवरणाण य पहरणाण य अच्चेरिं च बहूणं पोयवहणपाउग्गाणं दव्वाणं पोयवहणं भरेंति (२ ता) सोहणंसि तिहिकरण-
नक्खत्तमुहुत्तंसि विउलं असणं ४ उवक्खडावेंति २ ता मित्ताइ० आपुच्छंति २ ता जेणेव पोयट्टाणे तेणेव उवागच्छंति । तए णं तेसिं अरहन्नग जाव वाणियगाणं परियणो जाव ता(रिसे)हिं इट्ठाहिं जाव वग्गूहिं अभिनंदंता य अभिसंयुणमाणा य एवं वयासी-अज्ज ! ताया ! भाय ! माउल ! भाइणेज्ज ! भगवया समुद्दंणं अभिर-
क्खिज्जमाणा २ विरं जीवह भदं च भे पुणरवि लद्धे कयकजे अणहसमग्गे नियगं घरं हव्वमागए पासामो-त्तिकडु ताहिं सोमाहिं निद्धाहिं वीहाहिं सप्पिवासाहिं पप्पु-
याहिं दिट्ठीहिं नि(री)रिक्खमाणा मुहुत्तमेतं संचिद्धंति । तओ समाणिएसु पुप्फबलि-
कम्मेषु दिवेषु सरसरत्तचंदणदहरपंचगुलितलेसु अणुक्खित्तंसि धूवंसि पूइएसु समुद्-
वाएसु संसारियासु वलयबाहासु ऊसिएसु सिएसु झयग्गेसु पड्डप्पवाइएसु तूरेसु जइएसु
सव्वसउणेसु गहिएसु रायवरसासणेसु महया उक्किट्टसीहनाय जाव रवेणं पक्खुभिय-
महासमुदरवभूयंपिव मेइणं करेमाणा एगदिसिं जाव वाणियगा ना(वं)वाए दुरुढा ।
तओ पुस्समाणो वक्कमुदाहु-हं भो ! सव्वेसिमवि अत्यसिद्धी उवट्ठियाइं कल्लाणाइं
पडिहयाइं सव्वपावाइं जुत्तो पूसो विजओ मुहुत्तो अयं देसकालो । तओ पुस्समा-
णएणं व(क्के)कमुदा(हि)हरिए हट्टुट्टे कुच्छिधारकणधारगब्भि(ज)जसंजत्तानावा-
वाणियगा वावारिंसु तं नावं पुण्णच्छंगं पुण्णमुहिं बंधणेहिंतो मुंचंति । तए णं सा
नावा विसुक्कबंधणा पवणबलसमाहया ऊसि(उस्सि)यसिया विततपं(पक्)खा इव गरु-
(ड)लज्जुवइ गंगासलिलतिक्खसोयवेगेहिं संखुब्भमाणी २ उम्मीतरंगमालासहस्साइं
समइच्छमाणी २ कइवएहिं अहोरेतैहिं लवणसमुद्दं अणेगाइं जोयणसयाइं ओगाढा ।
तए णं तेसिं अरहन्नगपामोक्खाणं संजत्तानावावाणियगाणं लवणसमुद्दं अणेगाइं
जोयणसयाइं ओगाढाणं समाणाणं बहूइं उप्पाइयसयाइं पाउब्भूयाइं तंजहा-अकाले
गजिए अकाले विज्जुए अकाले थणियसंहं अभिक्खणं २ आगासे देवयाओ नच्चंति
एगं च णं महं पिसायरूवं पासंति तालजंधं दिवं-गयाहिं बाहाहिं मसिमूसगमहिस-
कालगं भरियमेहवणं लंबोइं निग्गयगदंतं निल्लालियजमलजुयलजीहं आऊसियव-
यणगंडदेसं चीणच्चि(पिट)मिढनासियं विगयभुगभग्गभुमयं खजोयगदित्तचक्खुराणं
उत्तासणगं विसालवच्छं विसालकुच्छिं पलंबकुच्छिं पइसियपयलियपयडियगत्तं पण-

चमाणं अप्फोडंतं अभिवयंतं अभिगज्जंतं बहुसो २ अट्टट्हासे विणिम्मुयंतं नीलुप्प-
 लगवल्लुगुलियअयसिकुसुमपपासं खुरधारं असिं गहाय अभिमुहमावयमाणं पासंति ।
 तए णं ते अरहन्नगवज्जा संजत्तानावावाणियगा एणं च णं महं तालपिसायं (पासंति)
 पासित्तां तालजंघं दिवंगयाहिं बाहाहिं फुट्टसिरं भमरनिगरवरमासरासिमहिसकालं
 भरियमेहवणं सुप्पणहं फालसरिसजीहं लंबोद्वं धवलवट्टअसिलिट्टतिकखथिरपीणकु-
 ङिलदाढोवगूढवयणं विकोसियधारासिजुयलसमसरिसतणुयचंचलगलंतरसलोलच-
 वलफुरफुरेतनिळालियग्गजीहं अवयच्छियमहल्लविगयवीभच्छलालपगलंतरत्तताल्लयं
 हिंगु(ल)लयसगम्भकंदरविलं व अंजणगिरिस्स अग्गिजाल्लुग्गिलंतवयणं आऊसिय-
 अक्खचम्मउड्डुगंडदेसं चीणचि(पिड)मिडवंकभग्गनासं रोसागयधमधमेंतमारुय-
 निट्ठुरखरफरुसञ्चुसिरं ओमुग्गनासियपुडं घ(घा)डउब्भडरइयभीसणमुहं उडमुहक-
 ण्सकुलियमहंतविगयलोमसंखालगलंबंतचलियकणं पिंगलदिप्पंतलोयणं भिउडित-
 ट्ठि(य)निडालं नरसिरमालपरिणद्धचिंधं विचित्तगोणससुबद्धपरिकरं अवहोलेत्तपु(प्फु)-
 प्फयायंतसप्पविच्छयगोधुंदरनउलसरडविरइयविचित्तवेयच्छमालियागं भोगकूरकह-
 सप्पधमधमेंतलंबंतकण्णपूरं मज्जारसियाललइयखंधं दित्त(धुधु)धूधूयंतधूयकयकुंतल-
 सिरं घंटावेण भीमं भयंकरं कायरजणहिययफोडणं दित्तमट्टट्हासं विणिम्मुयंतं वसा-
 रुहिरपुयमंसमलमलिणपोच्चडतणुं उत्तासणयं विसालवच्छं पेच्छंताभिन्नहमुहनयण-
 कण्णवरवण्वचित्तकत्तीणि(व)यंसणं सरसरुहिरगयचम्मविययऊसवियबाहुजुयलं ताहिं
 य खरफरुसअसिणिद्धअणिट्टदित्तअसुभअप्पिय(अमणुच)अकंतवग्गूहि य तज्जयंतं
 पासंति तं तालपिसायरूवं एज्जमाणं पासंति २ ता भीया संजायभया अन्नमन्नस्स
 कायं समतुरंगेमाणा २ बहूणं इंदाण य खंदाण य रुहसिववेसमणनागाणं भूयाण य
 जक्खणाण य अज्जकोट्टकिरियाण य बहूणि उवाइयसयाणि ओवाइयमाणा २ चिट्ठंति ।
 तए णं से अरहन्नए समणोवासए तं दिव्वं पिसायरूवं एज्जमाणं पासइ २ ता अभीए
 अतत्थे अचलिए असंभंते अणाउले अणुव्विग्गे अभिन्नमुहरागनयणवण्णे अवीणवि-
 मणमाणसे पोयवहणस्स एगदेसंसि वत्थंतेणं भूमिं पमजइ २ ता ठाणं ठाइ २ ता
 करयल(ओ) जाव एवं वयासी-नमोत्थु णं अरहंतार्णं जाव संपत्ताणं, जइ णं अहं
 एत्तो उवसग्गाओ मुंचामि तो मे कप्पइ पारितए, अहं णं एत्तो उवसग्गाओ न
 मुंचामि तो मे तहा पच्चक्खाएयव्वे-(त्ति)तिकट्ठु सागारं भत्तं पच्चक्खाइ । तए णं
 से पिसायरूवे जेणेव अरहन्न(ए)गे समणोवासए तेणेव उवागच्छइ २ ता अरहन्नं
 एवं वयासी-हं भो ! अरहन्नगा अपत्थियपत्थिया जाव परिवज्जिया [!] नो खल्ल
 कप्पइ तव सीलव्वयगुणवेरमणपच्चक्खा(णे)णपोसहोववासाइं चालितए वा एवं

खो(भे)मित्तए वा खंडित्तए वा भंजित्तए वा उज्झित्तए वा परिचइत्तए वा । तं जइ णं तुमं सीलव्वयं जाव न परिचयसि तो ते अहं एयं पोयवहणं दोहिं अंगुलियाहिं गेण्हामि २ ता सत्तट्ठतलप्पमाणमेत्ताइं उड्डं वेहासं उव्विहामि (२ ता) अंतो-जलंसि निच्छोलेमि जा(जे)णं तुमं अट्टदुहट्टवसट्ठे असमाहिपत्ते अकाले चेव जीवि-याओ ववरोविज्जसि । तए णं से अरहन्नगे समणोवासए तं देवं मणसा चेव एवं वयासी-अहं णं देवाणुप्पिया ! अरहन्नए नामं समणोवासए अहिगयजीवाजीवे, नो खलु अहं सक्का केणइ देवेण वा जाव निग्गंथाओ पावयणाओ चालित्तए वा खोभि-त्तए वा विपरिणां(मे)मित्तए वा, तुमं णं जा सद्धा तं करेहि-त्तिकट्ठु अभीए जाव अभिन्नमुहरागनयणववणे अवीणविमणमाणसे निच्चले निष्फंदे तुसिणीए धम्मज्झाणो-वगए विहरइ । तए णं से दिव्वे पिसायरूवे अरहन्नगं समणोवासगं दोच्चं पि तच्चं पि एवं वयासी-हं भो अरहन्नगा ! जाव (अवीणविमणमाणसे निच्चले निष्फंदे तुसिणीए) धम्मज्झाणोवगए विहरइ । तए णं से दिव्वे पिसायरूवे अरहन्नगं धम्मज्झाणोवगयं पासइ २ ता बलियतरागं आसुरत्ते तं पोयवहणं दोहिं अंगुलियाहिं गिण्हइ २ ता सत्तट्ठतलाइं जाव अरहन्नगं एवं वयासी-हं भो अरहन्नगा ! अपत्थियपत्थिया ! नो खलु कप्पइ तव सीलव्वय तद्देव जाव धम्मज्झाणोवगए विहरइ । तए णं से पिसा-यरूवे अरहन्नगं जाहे नो संचाएइ निग्गंथाओ० चालित्तए वा (०ताहे)तद्देव (उव)-संते जाव निव्विण्णे तं पोयवहणं सणियं २ उवरिं जलस्स ठवेइ २ ता तं दिव्वं पिसायरूवं पडिसाह(र)रेइ २ ता दिव्वं देवरूवं विउव्वइ २ ता अंतलिकखपडिच्चे सखिखि(णि)णीयाइं जाव परिहिए अरहन्नगं समणोवासगं एवं वयासी-हं भो अर-हन्नगा ! धन्नोसि णं तुमं देवाणुप्पिया ! जाव जीवियफले जस्स णं तव निग्गंथे पावयणे इमेयारूवा पडिवत्ती लद्धा पत्ता अभिसमन्नागया, एवं खलु देवाणुप्पिया ! सक्के देविंदे देवराया सोहम्मसे कप्पे सोहम्मवडिसए विमाणे सभाए सुहम्माए बहूणं देवाणं मज्झगए महया [२] सदेणं [एवं] आइक्खइ ४-एवं खलु जंबुद्वीवे २ भारहे वासे चंपाए नयरीए अरहन्नए समणोवासए अभिगयजीवाजीवे नो खलु सक्का केणइ देवेण वा (दाणवेण वा) ६ निग्गंथाओ पावयणाओ चालित्तए वा जाव विपरिणामित्तए वा । तए णं अहं देवाणुप्पिया ! सक्कस्स (देविंदस्स) नो एयमट्ठं सद्धामि(०) । तए णं मम इमेयारूवे अज्झत्थिए०-गच्छामि णं [अहं] अरहन्न(य)गस्स अंतियं पाउब्भवामि जाणामि ताव अहं अरहन्नगं किं पियधम्मसे नो पियधम्मसे, दढधम्मसे नो दढधम्मसे, सीलव्वयगुणे किं चालेइ जाव परिचयइ नो परिचयइ-त्तिकट्ठु एवं संपेहेमि २ ता ओहिं पउंजामि २ ता देवाणुप्पियं ओहिणा आभोएमि २ ता उत्तरपुरच्छिमं २

उत्तरवेउव्वियं० ताए उक्किट्ठाए(जाव)जेणेव लवणसमुद्दे जेणेव देवाणुप्पिया तेणेव उवागच्छामि २, ता देवाणुप्पि(याणं)यं उवसग्गं करेमि नो चेव णं देवाणुप्पिया मीया वा(०), तं जं णं सक्के ३ [एवं] वयइ सच्चे णं एसमट्ठे, तं दिट्ठे णं देवाणुप्पियाणं इड्ढी जाव परक्कमे लद्धे पत्ते अभिसमन्नागए । तं खामेमि णं देवाणुप्पिया ! खमंतु मरहंतु णं देवाणुप्पिया ! नाइभुज्जो (२) एवंकरण्याए-त्तिकट्ठु पंजलिउडे पायवडिए एयमट्ठं विणएणं भुज्जो २ खामेइ (२ ता) अरहन्नगस्स [य] दुवे कुंडलजुयले दलयइ २ ता जामेव दिसिं पाउब्भूए तामेव(दिसिं)पडिगए ॥ ७६ ॥ ताए णं से अरहन्नए निहवसग्गमितिकट्ठु पडिमं पारेइ । ताए णं ते अरहन्नगपामोक्खा जाव वाणियगा दक्खिणाणुकुलेणं वाएणं जेणेव गंभीरए पोय(पट्टणे)ट्ठाणे तेणेव उवागच्छंति २ ता पोयं लंबेति २ ता सगडिसागडं सज्जेति (२ ता) तं गणिमं [च] ४ सगडि० संकामेति २ ता सगडी० जो(ए)विति २ ता जेणेव मिहिला(०) तेणेव उवागच्छंति २ ता मिहिलाए रायहाणीए बहिया अग्गुजाणंसि सगडीसागडं मोएति २ ता (मिहिलाए रायहाणीए तं)महत्थं (महग्गं महरिहं) विउलं रायारिहं पाहुडं कुंडलजुयलं च गेण्हंति २ ता (मिहिलाए रायहाणीए) अणुप्पविसंति २ ता जेणेव कुंभए(राया) तेणेव उवागच्छंति २ ता करयल जाव महत्थं दिव्वं कुंडलजुयलं उवणेति । ताए णं कुंभए(राया) तेसिं संजत्तगाणं जाव पडिच्छइ २ ता मल्लिं २ सद्दावेइ २ ता तं दिव्वं कुंडलजुयलं मल्लीए २ पिणद्धेइ २ ता पडिविसज्जेइ । ताए णं से कुंभए राया ते अरहन्नगपामोक्खे जाव वाणियगे विपुलेणं (अस०) वत्थगंधमल्लालंकारेणं जाव उस्सुक्कं वियरइ २ ता रायमग्गमोगाढे(इ)य आवासे वियरइ [२ ता] पडिविसज्जेइ । ताए णं अरहन्नगसंजत्तगा जेणेव रायमग्गमोगाढे आवासे तेणेव उवागच्छंति २ ता भंडववहरणं करेति (२ ता) पडिमं(भंड)डे गेण्हंति २ ता सगडी० भरेति जेणेव गंभीरए पोयपट्टणे तेणेव उवागच्छंति २ ता पोयवहरणं सज्जेति २ ता भंडं संकामेति दक्खिणाणु० जेणेव चंपा पोयट्ठाणे तेणेव पोयं लंबेति २ ता सगडी० सज्जेति २ ता तं गणिमं ४ सगडी० संकामेति जाव महत्थं [महग्गं] पाहुडं दिव्वं च कुंडलजुयलं गेण्हंति २ ता जेणेव चंदच्छाए अंगराया तेणेव उवागच्छंति २ ता तं महत्थं जाव उवणेति । ताए णं चंदच्छाए अंगराया तं दिव्वं महत्थं(च) कुंडलजुयलं पडिच्छइ २ ता ते अरहन्नगपामोक्खे एवं वयासी-तुब्भे णं देवाणुप्पिया । बहूणि गामागर जाव आहिंडह लवणसमुद्दं च अभिक्खणं २ पोयवहणेहि ओगाहेह, तं अत्थियाइं भे केइ कहिंवि अच्छेए दिट्ठपुव्वे ? । ताए णं ते अरहन्नगपामोक्खा चंदच्छायं अंगरायं एवं

वयासी-एवं खलु सामी ! अम्हे इहेव चंपाए नयरीए अरहन्नगपामोक्खा बहवे संजत्तगानावावाणियगा परिवसामी । तए णं अम्हे अन्नया कयाइ गणिमं च ४ तहेव अहीण(म)अइरित्तं जाव कुंभगस्स रत्तो उवणेमो । तए णं से कुंभए मल्लीए २ तं दिव्वं कुंडलजुयलं पिणद्धेइ २ ता पडिविसज्जेइ । तं एस णं सामी ! अम्हेहिं कुंभ[ग]रायभवणंसि मल्ली २ अच्छेरए दिट्ठे । तं नो खलु अन्ना कावि तारिसिया देवकन्ना वा जाव जारिसिया णं मल्ली २ । तए णं चंदच्छाए(ते)अरहन्नगपामोक्खे सक्कारेइ सम्माणेइ स० २ ता [उस्सुंके वियरइ] पडिविसज्जेइ । तए णं चंदच्छाए वाणियगजणियहासे दूयं सहावेइ जाव जइ वि य णं सा सयं रज्जसुक्का । तए णं से दूए हट्ठ जाव पहारेत्य गमणाए (२) ॥ ७७ ॥ तेणं कालेणं तेणं समएणं कुणाला नामं जणवए होत्था । तत्थ णं सावत्थी नामं नयरी होत्था । तत्थ णं रुप्पी कुणालाहिवई नामं राया होत्था । तस्स णं रुप्पिस्स धूया धारिणीए देवीए अत्तया सुबा(हु)हु नामं दारिया होत्था सुकुमाल जाव रुवेण य जोव्वणे(णं)ण य लावण्णेण य उक्किट्ठा उक्किट्ठसरीरा जाया यावि होत्था । तीसे णं सुबाहुए दारियाए अन्नया चाउम्मासियमज्जणए जाए यावि होत्था । तए णं से रुप्पी कुणालाहिवई सुबाहुए दारियाए चाउम्मासियमज्जणयं उवट्ठियं जाणइ २ ता कोडुंभियपुरिसे सहावेइ २ ता एवं वयासी-एवं खलु देवाणुप्पिया ! सुबाहु(ए)दारियाए कल्लं चाउम्मासियमज्जणए भविस्सइ । तं(कल्लं)तुच्चे णं रायमग्गमोगाढंसि(चउक्कंसि)मंडवंसि जलथलयदस-द्धवणमल्लं साह(रे)रह जाव सिरिदाम्मं(डे)डं ओलइंति । तए णं से रुप्पी कुणालाहिवई सुवण्णगरसेणिं सहावेइ २ ता एवं वयासी-खिप्पामेव भो देवाणुप्पिया ! रायमग्गमोगाढंसि पुप्फमंडवंसि नाणाविहपंचवण्णेहिं तंदुलेहिं नयरं आलिहह तस्स बहुमज्जदेसभाए पट्ठयं एएह जाव पच्चप्पिणंति । तए णं से रुप्पी कुणालाहिवई हत्थि-खंधवरगए चाउरंणिणीए सेणाए महया भडच्चडगर जाव अंतेउरपरियालसंपरिखुडे सुबाहुं दारियं पुरओ कट्ठु जेणेव रायमग्गे जेणेव पुप्फमंडवे तेणेव उवागच्छइ २ ता हत्थिखंधाओ पच्चोरुहइ २ ता पुप्फमंड(वं)वे अणुप्पविसइ २ ता सीहासणवरगए पुरत्थाभिसुहे सन्निसण्णे । तए णं ताओ अंतेउरियाओ सुबाहुं दारियं पट्ठयंसि दुरूहंति २ ता से(य)यापीयएहिं कलसेहिं ण्हाणंति २ ता सव्वालंकारविभूसियं करंति २ ता पिउणो पा(यं)यवंदि(उं)यं उवणंति । तए णं सुबाहु दारिया जेणेव रुप्पी राया तेणेव उवागच्छइ २ ता पायग्गहणं करेइ । तए णं से रुप्पी राया सुबाहुं दारियं अंके निवेसेइ २ ता सुबाहु(ए)दारियाए रुवेण य जोव्वणेण य लावण्णेण य (जाव विम्हए) जायविम्हए वरिसधरं सहावेइ २ ता एवं वयासी-तुमं

णं देवाणुप्पिया ! मम दोच्चेणं बह्वणि गामागरनगरगिहाणि अणुप्पविससि, तं अत्थियाइं ते कस्सइ रत्तो वा ईसरस्स वा कहिंत्वि एयारिसए मज्जणए दिट्ठपुब्बे जारिसए णं इमीसे सुवाहुदारियाए मज्जणए ? । तए णं से वरिसधरे रुप्पि करयल जाव वद्धावेत्ता एवं वयासी-एवं खलु सामी ! अहं अन्नया तु(ब्भेणं)ब्भं दोच्चेणं मिहिलं गए, तत्थ णं मए कुंभगस्स रत्तो धूयाए पभावईए देवीए अत्तयाए मल्लीए २ मज्जणए दिट्ठे, तस्स णं मज्जणगस्स इ(मे)मीए सुवाहु(ए)दारियाए मज्जणए सयसहस्सइमं पि कलं न अ(ग्घे)ग्घइ । तए णं से रुप्पी राया वरिसधरस्स अंति-(ए)यं एयमट्ठं सोच्चा निसम्म(सेसं तहेव) मज्जणगजणियाहासे दूयं सद्दावेइ जाव जेणेव मिहिला नयरी तेणेव पहारेत्थ गमणाए (३) ॥ ७८ ॥ तेणं कालेणं तेणं समएणं कासी नामं जणवए होत्था । तत्थ णं वाणारसी नामं नयरी होत्था । तत्थ णं संखे नामं कासीराया होत्था । तए णं तीसे मल्लीए २ अन्नया कयाइ तस्स दिव्वस्स कुंडलजुयलस्स संधी विसंघडिए यावि होत्था । तए णं से कुंभए राया सुवण्णगारसेणिं सद्दावेइ २ ता एवं वयासी-तुब्भे णं देवाणुप्पिया ! इमस्स दिव्वस्स कुंडलजुयलस्स संधिं संघाडेह । तए णं सा सुवण्णगारसेणी एयमट्ठं तहत्ति पडिसुणेइ २ ता तं दिव्वं कुंडलजुयलं गेण्हइ २ ता जेणेव सुवण्णगारभिसियाओ तेणेव उवा-गच्छइ २ ता सुवण्णगारभिसियासु निवेसेइ २ ता बह्वहिं आएहि य जाव परिणामे-माणा इच्छ(न्ति)इ तस्स दिव्वस्स कुंडलजुयलस्स संधिं घडित्तए नो चेव णं संचा-एइ (सं)घडित्तए । तए णं सा सुवण्णगारसेणी जेणेव कुंभए तेणेव उवागच्छइ २ ता करयल जाव वद्धावेत्ता एवं वयासी-एवं खलु सामी ! अज्ज तु(ब्भे)म्हे अम्हे सद्दावेह जाव संधिं संघाडेत्ता ए(य)वमा(णं)णत्तिथं पच्चप्पिणह । तए णं अम्हे तं दिव्वं कुंड-लजुयलं गेण्हामो जेणेव सुवण्णगारभिसियाओ जाव नो संचाएमो संघाडित्तए । तए णं अम्हे सामी ! एयस्स दिव्वस्स कुंडलस्स अन्नं सरिसयं कुंडलजुयलं घडेमो । तए णं से कुंभए राया तीसे सुवण्णगारसेणीए अंतिए एयमट्ठं सोच्चा निसम्म आसुरत्ते ४ तिवलियं भिउडिं निडाळे साहट्ठु एवं वयासी-(से के)केस णं तुब्भे कलायाणं भवह (?) जे णं तुब्भे इमस्स [दिव्वस्स] कुंडलजुयलस्स नो संचाएह संधिं संघाडित्तए ? ते सुवण्णगारे निव्विसए आणवेइ । तए णं ते सुवण्णगारा कुं(भे)भगेणं रत्ता निव्विसया आणत्ता समाणा जेणेव साइं २ गिहाइं तेणेव उवागच्छंति २ ता समंडमतोवगर-णमाया(ओ)ए मिहिलाए रायहाणीए मज्झंमज्जेणं निक्खमंति २ ता विदेहस्स जणवयस्स मज्झंमज्जेणं जेणेव कासी जणवए जेणेव वाणारसी नयरी तेणेव उवा-गच्छंति २ ता अग्गुजाणंसि सगडीसागडं मोएंति २ ता महत्थं जाव पाहुडं गेण्हंति

२ ता वाणारसीए नयरीए मज्झमज्जेणं जेणेव संखे कासीराया तेणेव उवागच्छंति
 २ ता करयल जाव वद्धावेति २ ता (पाहुडं पुरओ ठावेति २ ता संखरायं) एवं
 वयासी-अम्हे णं सामी ! मिहिलाओ (नयरीओ) कुंभएणं रत्ना निव्विसया आणत्ता
 समाणा इ(हं)ह हव्वमागया, तं इच्छामो णं सामी ! तुब्भं बाहुच्छायापरिग्गहिया
 निब्भया निरुव्विग्गा सुहंसुहेणं परिवसिउं । तए णं संखे कासीराया ते सुवण्णगारे
 एवं वयासी-किं णं तुब्भे देवाणुप्पिया ! कुंभएणं रत्ना निव्विसया आणत्ता ? । तए
 णं ते सुवण्णगारा संखं एवं वयासी-एवं खलु सामी ! कुंभगस्स रत्नो धूयाए पभा-
 वईए देवीए अत्तयाए मल्लीए कुंडलजुयलस्स संधी विसंघडिए । तए णं से कुंभए
 सुवण्णगरसेणिं सद्दावेइ जाव निव्विसया आणत्ता । तं एएणं कारणेणं सामी ! अम्हे
 कुंभएणं निव्विसया आणत्ता । तए णं से संखे सुवण्णगारे एवं वयासी-केरिसिया
 णं देवाणुप्पिया ! कुंभ(ग)स्स [रत्नो] धूया पभावईदेवीए अत्तया मल्ली विदेहराय-
 वरकत्ता ? । तए णं ते सुवण्णगारा सं(ख)खं रायं एवं वयासी-नो खलु सासी ! अन्ना
 का(ई)वि तारिसिया देवकत्ता वा गंधव्वकत्ता वा जाव जारिसिया णं मल्ली २ । तए णं
 से संखे कुंडल(जुअल)जणियहासे दूर्यं सद्दावेइ जाव तहेव पहारेत्थ गमणाए (४)
 ॥ ७९ ॥ तेणं कालेणं तेणं समएणं कुरुजणवए होत्था । हत्थिणाउरे नयरे । अदी-
 णसत्तू नामं राया होत्था जाव विहरइ । तत्थ णं मिहिलाए [तस्स णं] कुंभगस्स पुत्ते
 पभावईए अत्तए मल्लीए अणु[मग्ग]जायए मल्लदि(णए)न्ने नामं कुमारे जाव जुवराया
 यावि होत्था । तए णं मल्लदिन्ने कुमारे अन्नया कोडुंबियपुरिसे सद्दावेइ २ ता एवं
 वयासी-गच्छह णं तुब्भे मम पमदवणंसि एगं महं चित्तसभं करेह अणेग जाव
 पच्चप्पिणंति । तए णं से मल्लदिन्ने चित्तगरसेणिं सद्दावेइ २ ता एवं वयासी-तुब्भे णं
 देवाणुप्पिया ! चित्तसभं हावभावविलासविब्बोयकलिएहिं रुवेहिं चित्तेह जाव पच्च-
 प्पिणह । तए णं सा चित्तगरसेणी तहत्ति पड्डिसुणेइ २ ता जेणेव सयाइं गिहाइं
 तेणेव उवागच्छइ २ ता तूलियाओ वण्णए य गेण्हइ २ ता जेणेव चित्तसभा तेणेव
 (उवागच्छइ २ ता) अणुप्पविसइ २ ता भूमिभागे विरयइ २ ता भूमिं सज्जेइ २
 ता चित्तसभं हावभाव जाव चित्तेउं पयत्ता यावि होत्था । तए णं एगस्स चित्तग-
 रस्स इमेयारूवा चित्तगरलद्धी लद्धा पत्ता अभिसमन्नागया-जस्स णं दुपयस्स वा
 चउ(प)पयस्स वा अपयस्स वा एगदेसमवि पासइ तस्स णं देसाणुसारेणं तयाणु-
 रूवं [रूवं] नि(व्व)वत्तेइ । तए णं से चित्तगर(दार)ए मल्लीए जवणियंतरियाए जालं-
 तरेण पायंगुडं पासइ । तए णं तस्स(णं) चित्तगरस्स इमेयारूवे अज्झत्थिए जाव
 समुप्पजित्था-सेयं खलु ममं मल्लीए २ पायंगुड्ढाणुसारेणं सरिसगं जाव गुणोवदेयं

रुवं निव्वत्तिए । एवं संपेहेइ २ ता भूमिभागं सज्जेइ (२ ता) मल्लीए २ पायंगुट्टा-
णुसारेणं जाव निव्वत्तेइ । तए णं सा चित्तगरसेणी चित्तसभं जाव हावभा(वे)वं
चित्तेइ २ ता जेणेव मल्लदिन्ने कुमारे तेणेव उवागच्छइ जाव ए(य)वमाणत्तियं पच्च-
प्पिणइ । तए णं मल्लदिन्ने चित्तगरसेणिं सक्कारेइ २(०) विपुलं जीवियारिहं पीइदाणं
द(ले)लयइ २ ता पडिविसज्जेइ । तए णं मल्लदिन्न (कुमारे) अन्नया प्हाए अंतेउ-
रपरियालसंपरिवुडे अम्मधाईए सद्धिं जेणेव चित्तसभा तेणेव उवागच्छइ २ ता
चित्तसभं अणुप्पविसइ २ ता हावभावविलास(वि)विब्बोयकलियाइं रुवाइं पासमाणे
(२) जेणेव मल्लीए २ तयाणुरु(वे)वं निव्वत्तिए तेणेव पहारेत्थ गमणाए । तए णं
से मल्लदिन्ने (कुमारे) मल्लीए २ तयाणुरुवं निव्वत्तियं पासइ २ ता इमेयारुवे अज्झत्थिए
जाव समुप्पजित्था-एस णं मल्ली २ तिकहु लज्जिए वीडिए वि(अडे)डु सणियं २
पच्चोसक्कइ । तए णं [तं] मल्लदिन्नं अम्मधाई [सणियं २] पच्चोसक्कतं पासित्ता एवं
वयासी-किन्नं तुमं पुत्ता ! लज्जिए वीडिए विडु सणियं २ पच्चोसक्कसि ? । तए णं से
मल्लदिन्ने अम्मधाई एवं वयासी-जुत्तं णं अम्मो ! मम जेट्ठाए भगिणीए गुरुदेवय-
भूयाए लज्जणिज्जाए मम चित्तगरणिव्वत्तियं सभं अणुपविसित्तए ? । तए णं अम्म-
धाई मल्लदिन्ने कुमारे एवं वयासी-नो खलु पुत्ता ! एस मल्ली, एस णं मल्लीए २
चित्तगरएणं तयाणुरुवे निव्वत्तिए । तए णं [से] मल्लदिन्ने अम्मधाईए एयमट्ठं सोच्चा
निसम्म आसुत्ते [४] एवं वयासी-कैस णं भो (!) [से] चित्त(य)गरए अपत्थियपत्थिए
जाव परिवज्जिए जे णं मम जेट्ठाए भगिणीए गुरुदेवयभूयाए जाव निव्वत्तिए-त्तिकहु
तं चित्तगरं वज्झं आणवेइ । तए णं सा चित्तगर(रु)सेणी इसीसे कहाए लद्धट्ठा समाणा
जेणेव मल्लदिन्ने कुमारे तेणेव उवागच्छइ २ ता करयलपरिगहियं जाव वद्धावेत्ता
एवं वयासी-एवं खलु सामी ! तस्स चित्तगरस्स इमेयारुवा चित्त(क)गरलद्धी लद्धा
पत्ता अभिसमन्नागया-जस्स णं दुपयस्स वा जाव निव्वत्तेइ, तं मा णं सामी ! तुब्भे तं
चित्तगरं वज्झं आणवेइ, तं तुब्भे णं सामी ! तस्स चित्तगरस्स अन्नं तयाणुरुवं दंडं
निव्वत्तह । तए णं से मल्लदिन्ने तस्स चित्तगरस्स संडासगं छिंदावेइ २ ता निव्वि-
सयं आणवेइ । तए णं से चित्तगरए मल्लदिन्नेणं निव्विसए आणत्ते (समाणे) सभंड-
मत्तोवगरणमायाए सिहिलाओ नयरीओ निक्खमइ २ ता विदेहं जगवयं मज्झेम-
ज्झेणं जेगेव कुरुजणवए जेगेव हत्थिगाउरे नयरे (जेगेव अदीणसत्तू राया) तेणेव
उवागच्छइ २ ता भंडनिक्खेवं करेइ २ ता चित्तफलगं सज्जेइ २ ता मल्लीए २
पायंगुट्टाणुसारेणं रुवं निव्वत्तेइ २ ता कक्खंतरंसि कुब्भइ २ ता महत्थं जाव पाहुडं
मेण्हइ २ ता हत्थिगाउरं नयरं मज्झेमज्झेणं जेगेव अदीणसत्तू राया तेणेव उवा-

गच्छइ २ ता तं करयल जाव वढावेइ २ ता पाहुडं उवणेइ २ ता एवं वयासी-
 एवं खलु अहं सामी ! मिहिलाओ रायहाणीओ कुंभगस्स रत्तो पुत्तेणं भभावईए
 देवीए अत्तएणं मल्लदिन्नेणं कुमारेणं निव्विसए आणत्ते समाणे इ(ह)हं हव्वमागए,
 तं इच्छामि णं सामी ! तुब्भं बाहुच्छायापरिगगहिए जाव परिवसित्तए । तए णं
 से अवीणसत्तू राया तं चित्तगरदारयं एवं वयासी-किन्नं तुमं देवाणुप्पिया !
 मल्लदिन्नेणं निव्विसए आणत्ते ? । तए णं से चित्त(य)गरदारए अवीणस(त्तु)त्तुं रायं
 एवं वयासी-एवं खलु सामी ! मल्लदिन्ने कुमारे अन्नया कया(ई)इ चित्तगरसेणिं सदावेइ
 २ ता एवं वयासी-तुब्भे णं देवाणुप्पिया ! मम चित्तसभं तं चेव सव्वं भाणियव्वं
 जाव मम संडासणं छिंदावेइ २ ता निव्विसयं आणवेइ, तं एवं खलु [अहं] सामी !
 मल्लदिन्नेणं कुमारेणं निव्विसए आणत्ते । तए णं अवीणसत्तू राया तं चित्तगरं एवं
 वयासी-से केरिसए णं देवाणुप्पिया ! तुमे मल्लीए त(दा)हाणुरुवे (रुवे) निव्व-
 त्तिए ? । तए णं से चित्तगरे कक्खंताराओ चित्तफल(यं)गं नीणेइ २ ता अवीणसत्तुस्स
 उवणेइ २ ता एवं वयासी-एस णं सामी ! मल्लीए २ तयाणुरुवस्स रुवस्स केइ
 आगारभावपडोयारे निव्वत्तिए, नो खलु सक्का केणइ देवेण वा जाव मल्लीए २
 तयाणुरुवे रुवे निव्वत्तित्तए । तए णं [से] अवीणसत्तू (राया) पडिरुवजणियहासे दूयं
 सदावेइ २ ता एवं वयासी तहेव जाव पहारेत्थ गम(णया)णाए (५) ॥८०॥ तेणं
 कालेणं तेणं समएणं पंचाले जणवए कं पि(ल्ले)ळपुरे (नामं) नयरे (होत्था) । जिय-
 सत्तू नामं राया पंचालाहिबई । तस्स णं जियसत्तुस्स धारिणीपामोकखं दे(वि)वीस-
 हस्सं ओरोहे होत्था । तत्थ णं मिहिलाए चोक्खा नामं परिव्वाइया रिउव्वेय जाव [सु]प-
 रिणिट्टिया यावि होत्था । तए णं सा चोक्खा परिव्वाइया मिहिलाए बहूणं राईसर
 जाव सत्थवाहपभिईणं पुरओ दाणधम्मं च सोयधम्मं च तित्थाभिसेयं च आववे-
 माणी पन्नवेमाणी पल्लवेमाणी उवदंसेमाणी विहरइ । तए णं सा चोक्खा (परिव्वा-
 इया) अन्नया कयाई तिट्ठं च कुंडियं च जाव धाउरत्ताओ (य) ४ गेण्हइ २ ता
 परिव्वाइगावसद्दाओ पडिनिक्खमइ २ ता पविरलपरिव्वाइयासद्धिं संपरिखुडा
 मिहिलं रायहाणिं मज्झमज्झेणं जेणेव कुंभगस्स रत्तो भवणे जेणेव कन्नंतेउरे जेणेव
 मल्ली २ तेणेव उवागच्छइ २ ता उदयपरि(फा)फोसियाए दब्बोवरि पच्चत्थुयाए
 भिसियाए नि(सि)सीयइ २ ता मल्लीए २ पुरओ दाणधम्मं च जाव विहरइ । तए
 णं मल्ली २ चोक्खं परिव्वाइयं एवं वयासी-तुब्भे णं चोक्खे ! किंमूलए धम्मं
 पन्नत्ते ? । तए णं सा चोक्खा परिव्वाइया मल्लि २ एवं वयासी-अम्हं णं देवाण-
 ण्णिए ! सोयमूलए धम्मं पन्न(वेमि)त्ते, जं णं अम्हं किंचि असुई भवइ तं णं उद-

एण य मट्ठियाए जाव अविग्घेणं सग्गं गच्छामो । तए णं मल्ली २ चोक्खं परिव्वा-
इयं एवं वयासी-चोक्खा । से जहानामए के(ई)इ पुरिसे रहिरकयस्स वत्थस्स रहिरे(ण)णं
चेव धोव्वजा अत्थि णं चोक्खा । तस्स रहिरकयस्स वत्थस्स रहिरेणं धोव्वमाणस्स
का(ई)इ सोही ? नो इण्ठे समट्ठे । एवामेव चोक्खा ! तुब्भे णं पाणाइवाएणं जाव
मिच्छादंसणसल्लेणं नत्थि काइ सोही जहा (व) वा तस्स रहिरकयस्स वत्थस्स रहि-
रेणं चेव धोव्वमाणस्स । तए णं सा चोक्खा परिव्वाइया मल्लीए २ एवं वुत्ता समा-
(णा)णी संकिया कंखिया विइगिच्छिया भेयसमावत्ता जाया(या)वि होत्ता मल्लीए
नो संचाएइ किंचिवि पामोक्खमाइक्खित्तए तुसिणीया संचिद्धइ । तए णं तं चोक्खं
मल्लीए २] ब(हु)हुओ दासचेडीओ हीलेंति निंदंति खिसंति ग(र)रिहंति अप्पेगइया
[ओ] हेरुया(ल)लेंति अप्पेगइया मुहमक्कडियाओ करेंति अप्पेगइया वग्गडीओ करेंति
अप्पेगइया त(ज)जेमाणीओ (क० अ०) तालेमा(णि)णीओ (क० अ०) निच्छु(मं)
हंति । तए णं सा चोक्खा मल्लीए २ दासचेडियाहिं हीलिज्जमाणी जाव गरहिज्जमाणी
आसुत्ता जाव मिसिमिसेमाणी मल्लीए २ पओसमावज्जइ [२] भिसियं गेण्हइ २ ता
कन्नं तेउराओ पडिनिक्खमइ २ ता मिहिलाओ निग्गच्छइ २ ता परिव्वाइयासंपरिवुडा
जेणेव पंचालजणवए जेणेव कं पिळपुरे तेणेव उवागच्छइ २ ता बहूणं राईसर जाव
परुवेमाणी विहरइ । तए णं से जियसत्तू अन्नया कयाइ अंतेउरपरियालसद्धिं संप-
रिवुडे एवं जाव विहरइ । तए णं सा चोक्खा परिव्वाइयासंपरिवुडा जेणेव जिय-
सत्तुस्स रन्नो भवणे जेणेव जियसत्तू तेणेव (उवागच्छइ २ ता) अणुपविसइ २ ता
जियसत्तुं जएणं विजएणं वद्धावेइ । तए णं से जियसत्तू चोक्खं परिव्वाइयं एज्जमाणं
पासइ २ ता सीहासणाओ अब्भुट्ठेइ २ ता चोक्खं (परिव्वाइयं) सक्कारेइ २ (०) आस-
णेणं उवनिमंतेइ । तए णं सा चोक्खा उदगपरिफोसियाए जाव भिसियाए निविसइ
जियसत्तुं रायं रज्जे य जाव अंतेउरे य कुसलोदंतं पुच्छइ । तए णं सा चोक्खा
जियसत्तुस्स रन्नो दाणधम्मं च जाव विहरइ । तए णं से जियसत्तू अप्पणो ओरो-
हंसि (जाव विम्हए) जायविम्हए चोक्खं (परिव्वाइयं) एवं वयासी-तुमं णं देवा-
णुप्पिया ! बहूणि गामागर जाव (अडह) आहिंडसि बहूण य राईसरगिहाइं अणु-
प्पविस(सि)हि, तं अत्थियाइं ते कस्स(वि)इ रन्नो वा जाव एरिसए ओरोहे दिट्ठ-
पुव्वे जारिसए णं इमे म(ह)म ओ(उव)रोहे ? । तए णं सा चोक्खा परिव्वाइया
जियसत्तुं (रायं) एवं (वयासी-)ईसिं अवहसियं करेइ २ ता एवं वयासी-(एवं च)
सरिसए णं तुमं देवाणुप्पिया । तस्स अगडदहुस्स । केस णं देवाणुप्पिए । से अग-
डदहुरे ? जियसत्तू ! से जहानामए अगडदहुरे सिया, से णं तत्थ जाए तत्थेव वु(त्ते)

ङ्खिए अन्नं अगडं वा तलागं वा दहं वा सरं वा सागरं वा अपासमाणे (चेवं) मज्झ-
 अयं चेव अगडे वा जाव सागरे वा । तए णं तं कूवं अन्ने सामुद्दए दहुरे हव्वमागए । तए
 णं से कूवदहुरे तं स(सा)मुद्ददहुरे एवं वयासी-से केस णं तुमं देवाणुप्पिया ! कत्तो
 वा इह हव्वमागए ? तए णं से सामुद्दए दहुरे तं कूवदहुरे एवं वयासी-एवं खलु
 देवाणुप्पिया ! अहं सामुद्दए दहुरे । तए णं से कूवदहुरे तं सामुद्दयं दहुरं एवं
 वयासी-केमहालए ण देवाणुप्पिया ! से समुदे ? । तए णं से सामुद्दए दहुरे तं कूव-
 दहुरं एवं वयासी-महालए णं देवाणुप्पिया ! समुदे । तए णं से कूवदहुरे पाएणं लीहं
 कङ्खेइ २ ता एवं वयासी-एमहालए णं देवाणुप्पिया ! से समुदे ? नो इण्ठे समुदे,
 महालए णं से समुदे । तए णं से कूवदहुरे पुर(च्छि)त्यमिन्नाओ तीराओ उप्पिडि-
 ताणं [पच्चत्थिमिहं तीरं] गच्छइ २ ता एवं वयासी-एमहालए णं देवाणुप्पिया ! से
 समुदे ? नो इण्ठे (ममं) तहेव । एवमेव तुमं पि जियसत्तु अन्नसिं बहूणं राईसर जाव
 सत्थवाह(प)प्पभिईणं भजं वा भगिणि वा धूयं वा सुणं वा अपासमाणे जा(णे)णसि
 जारिसए मम चेव णं ओरोहे तारिसए नो अन्नस्स । तं एवं खलु जियसत्तु ! मिहि-
 लाए नयरीए कुंभगस्स धूया पभावईए अत्तिया मल्लीनामं (ति) २ रुवेण य(जुव्वणेग)
 जाव नो खलु अन्ना काइ देवकन्ना वा जारिसिया मल्ली । विदेहवररायकन्नाए छिन्नस्स
 वि पायंगुट्टगस्स इमे तव ओरोहे सयसहस्सइमं पि कलं न अगवइ-तिकट्टु जामेव
 दिंसं पाउब्भूया तामेव दिंसं पडिगया । तए णं से जियसत्तु परिव्वाइयाजणियहासे
 दूयं सहावेइ जाव पहारेत्थ गमणाए (६) ॥ ८१ ॥ तए णं तेसिं जियस(त्तु)त्तूपामो-
 क्खाणं छहं राईणं दूया जेणेव मिहिला तेणेव पहारेत्थ गमणाए । तए णं छप्पि
 (य) दू(तका)यगा जेणेव मिहिला तेणेव उवागच्छंति २ ता मिहिलाए अगुज्जाणंसि
 पत्तयं २ खंधावारनिवेसं करेति २ ता मिहिलं रायहाणिं अणुप्पविसंति २ ता
 जेणेव कुंभए तेणेव उवागच्छंति २ ता पत्तयं (२) करयल जाव साणं २ राईणं वय-
 णाई निवेदंति । तए णं से कुंभए (राया) तेसिं दूयाणं (अंति) एयमट्ठं सोच्चा आसुत्ते.
 जाव तिवल्लियं मिउडिं (णिडाले साहट्टु) एवं वयासी-न देमि णं अहं तुच्चमं मल्लिं २
 तिकट्टु ते छप्पि दूए असक्कारिय असम्माणिय अवदारेणं निच्छुभावेइ । तए णं
 जियसत्तु पामोक्खाणं छहं राईणं दूया कुंभएणं रत्ता असक्कारिया असम्माणिया
 अवदारेणं निच्छुभाविया समाणा जेणेव सगा २ ज(जा)णवया जेणेव सयाई २
 नगराई जेणेव स(गा)या २ रायाणो तेणेव उवागच्छंति २ ता करयल जाव एवं
 वयासी-एवं खलु सामी ! अम्हे जियस(त्तु)त्तूपामोक्खाणं छहं रा(ई)याणं दूया
 जमगसमगं चेव जेणेव मिहिला जाव अवदारेणं निच्छुभावेइ । तं न देइ णं

सामी ! कुंभए मल्लिं २ । साणं २ राईणं एयमट्ठं निवेदिंति । तए णं ते जियसत्तु-
 पामोक्खा छप्पि रायाणो तेसिं दूयाणं अंतिए एयमट्ठं सोचा(निसम्म)आलुत्ता
 अन्नमन्नस्स दूयसंपेसणं करेति (०) एवं वयासी-एवं खलु देवाणुप्पिया ! अम्हं छण्हं
 राईणं दूया जमगसमगं चेव जाव निच्छुडा । तं सेयं खलु देवाणुप्पिया ! (अम्हं)
 कुंभगस्स जतं गेण्हितए-तिरुद्ध अन्नमन्नस्स एयमट्ठं पडिसुणेति २ ता ण्हाया
 सन्नद्धा हत्थिखंधवरगया सको(रं)रिटमल्लदामा जाव सेयवरचामराहिं(०)महया-
 हयगयरहपवरजोहकलियाए चाउरंणिणीए सेणाए सद्धिं संपरिवुडा सव्विद्धीए जाव
 रवेणं सएहिं[नो]२ नगरेहिंनो जाव निग्गच्छंति २ ता एगयओ मिलयंति(२त्ता)
 जेणेव मिहिला तेणेव पहारेत्थ गमगाए । तए णं कुंभए राया इमीसे कहाए
 लद्धे समणे बलवाउयं सदावेइ २ ता एवं वयासी-खिप्पामेव(भो देवाणुप्पिया !)
 हय जाव सेचं सन्नाहेह जाव पच्चप्पिणंति । तए णं कुंभए(राया)ण्हाए सन्नद्धे हत्थि-
 खंधवरगए जाव सेयवरचाम(राहिं)ए महया (०) मिहिलं(रायहाणि)मज्झंमज्झेणं
 नि(ग्गच्छइ)जाइ २ ता विदे(हं)हजणवयं मज्झंमज्झेणं जेणेव देसअंतं तेणेव
 (उवागच्छइ २ ता)खंधावारनिवेसं करेइ २ ता जियसत्तुपामोक्खा छप्पि य रायाणो
 पडिवाल्लेमाणे जुज्झसजे पडिचिद्धइ । तए णं ते जियसत्तुपामोक्खा छप्पि(य)
 रायाणो जेणेव कुंभए तेणेव उवागच्छंति २ ता कुंभए रत्ता सद्धिं संपलग्गा
 यावि होत्था । तए णं (ने) जियसत्तुपामोक्खा छप्पि रायाणो कुंभयं रायं हयमहिय-
 पवरवीरघाइय(नि)विबडियचिध(द्ध)धय(छत्त) पडागं किच्छप्पागोवगयं दिसोदि(सिं)-
 सं पडिसे(हिं)हंति । तए णं से कुंभए (राया)जियसत्तुपामोक्खेहिं छहिं राईहिं हय-
 महिय जाव पडिसेहिए समाणे अन्थामे अबले अवीरेए जाव अधारणिजमितिकट्ठु
 सिग्घं तुरियं जाव वेइयं जेणेव मिहिला तेणेव उवागच्छइ २ ता मिहिलं अणुपवि-
 सइ २ ता मिहिलाए दुवाराई पिहेइ २ ता रोहसजे चिद्धइ । तए णं ते जिय-
 सत्तुपामोक्खा छप्पि रायाणो जेणेव मिहिला तेणेव उवागच्छंति २ ता मिहिलं
 रायहाणिं निस्संचारं निरुत्तारं सव्वओ समंता ओहंभिताणं चिट्ठंति । तए ण से
 कुंभए(राया)मिहिलं रायहाणिं रुद्धं जाणिता अ(ब्भं)ब्भितरियाए उवट्ठाणसालाए
 सीहासणवरगए तेसिं जियसत्तुपामोक्खाणं छण्हं राईणं छिद्दाणि य विवराणि य
 मम्माणि य अलभमाणे बहूहिं आए हे य उवाएहि य उप्पत्तियाहि य ४ बुद्धीहिं
 परिणामेमाणे २ किंचि आयं वा उवायं वा अलभमाणे ओहयमणसंकपे जाव
 झियायइ । इमं च णं मल्ली २ ण्हाया सव्वालंकारविभूतिया बहूहिं खुजाहिं परि-
 वुडा जेणेव कुंभए तेणेव उवागच्छइ २ ता कुंभगस्स पायग्गहणं करेइ । तए णं

कुंभए(राया)मल्लिं २ नो आढाइ नो परियाणाइ तुसिणीए संचिद्धइ । तए णं मल्ली
 २ कुंभगं(रायं)एवं वयासी-तुब्भे णं ताओ ! अन्नया ममं एज्जमाणं जाव निवेसेह,
 किञ्च तुब्भं अज्ज ओहय जाव झियायह ? । तए णं कुंभए मल्लिं २ एवं वयासी-
 एवं खलु पुत्ता ! तव कजे जियसत्तुपामोक्खेहिं छहिं राईहिं दूया संपेसिया । ते
 णं मए असक्कारिया जाव निच्छुढा । तए णं(ते)जियसत्तूपा(मु)मोक्खा तेसिं दूयाणं
 अंतिए एयमट्ठं सोच्चा परिकुविया समाणा मिहिलं रायहाणि निस्संचारं जाव
 चिट्ठंति । तए णं अहं पुत्ता(!)तेसिं जियसत्तुपामोक्खाणं छण्हं राईणं अंतराणि
 अलभमाणे जाव झियामि । तए णं सा मल्ली २ कुंभ(यं)गं रायं एवं वयासी-सा
 णं तुब्भे ताओ ! ओहयमणसंकप्पा जाव झियायह, तुब्भे णं ताओ ! तेसिं
 जियसत्तुपामोक्खाणं छण्हं राईणं पत्तेयं २ रह(सियं)रिसए दूयसंपेसे करेह एगमेगं
 एवं वयह-तव देमि मल्लिं २ तिकट्टु संझाकालसमयंसि पविरलमणुस्संसि निसंत-
 पडिनिस्तंतसि पत्तेयं २ मिहिलं रायहाणि अणुप्प(वे)विसेह २ ता गम्भवरएसु
 अणुप्पविसेह मिहिलाए रायहाणीए दुवाराई पिहेह २ ता रोहसजे चिट्ठह । तए
 णं कुंभए(राया)एवं तं चेव जाव पवेसेइ रोहसजे चिट्ठह । तए णं ते जियसत्तु-
 पामोक्खा छप्पि(य)रायाणो कल्लं(पाउब्भूया)जाव [जलंते] जालंतरेहिं कणगमयं
 मत्थयछिइ पउमुप्पलपिहाणं पडिमं पासंति एस णं मल्ली २ तिकट्टु मल्लीए २ रुवे
 य जोव्वणे य लावण्णे य मुच्छिया गिद्धा जाव अज्झोववन्ना अणिमिसाए दिट्ठीए
 पेहमाणा २ चिट्ठंति । तए णं सा मल्ली २ ण्हाया सव्वालंकारविभूसिया बद्धहिं
 खुज्जाहिं जाव परिक्खित्ता जेणेव जालघरए जेणेव कण(य)गपडिमा तेणेव उवागच्छइ
 २ ता तीसे कण पडिमाए मत्थयाओ तं पउमं अवणेइ । तए णं गंधे निद्धा(व)वेइ
 से जहानामए अहिमडेइ वा जाव असुभतराए चेव । तए णं ते जियसत्तुपामोक्खा
 तेणं असुभेणं गंधेणं अभिभूया समाणा सएहिं २ उत्तरि(जए)जेहिं आसाइं पिहंति
 २ ता परम्मुहा चिट्ठंति । तए णं सा मल्ली २ ते जियसत्तुपामोक्खे एवं वयासी-
 किं णं तु(ब्भं)ब्भे देवाणुप्पिया ! सएहिं २ उत्तरिजेहिं जाव परम्मुहा चिट्ठह ? ।
 तए णं ते जियसत्तुपामोक्खा मल्लिं २ एवं वयंति-एवं खलु देवाणुप्पिए ! अम्हे
 इमेणं असुभेणं गंधेणं अभिभूया समाणा सएहिं २ जाव चिट्ठाओ । तए णं मल्ली
 २ ते जियसत्तुपामोक्खे एवं वयासी-जइ ताव देवाणुप्पिया ! इमीसे कणग जाव
 पडिमाए कल्लाकल्लिं ताओ मणुत्ताओ असणाओ ४ एगमेगे पिडे पक्खिप्पमाणे २
 इमेयारुवे असुभे पोग्ग(ल)ले परिणामे इमस्स पुण ओरालियससीरस्स खेलासवस्स
 वंतासवस्स पितासवस्स सु(क्क)कासवस्स सोणियपूयासवस्स दु(रुव)रुयऊसासनीसा-

सस्स दुइयमुत्त(पु)पूइयपुरीसपुण्णस्स सडण जाव धम्मस्स केरिसए[य]परिणामे भवि-
 स्सइ ? तं मा णं तुब्भे देवाणुप्पिया ! माणुस्सएस कामभोगेसु सज्जह रज्जह गिज्जह
 मुज्जह अज्जोववज्जह । एवं खलु देवाणुप्पिया ! (तुम्हे)अम्हे इ(माओ)मे तच्चे
 भवग्गहणे अवरविदेहवासे सल्लिलावईविजए वीयसोगाए रायहाणीए महब्बल-
 पामोकखा सत्त(वि)पियबालवयंसया रायाणो होत्था सहजाया जाव पव्वइया । तए
 णं अहं देवाणुप्पिया ! इमेणं कारणेणं इत्थीनामगोयं कम्मं निव्वत्तेमि-जह णं
 तु(ब्भे)ब्भे चउ(चो)त्थं उवसंपज्जित्ताणं विहरह त(ए)ओ णं अहं छट्ठं उवसंपज्जि-
 त्ताणं विहरामि सेसं तहेव सव्वं । तए णं तुब्भे देवाणुप्पिया । कालमासे कालं किच्चा
 जयंते विमाणे उववन्ना । तत्थ णं तु(ब्भे)ब्भं देसूणाइं बत्तीसाइं सागरोवमाइं
 ठिइं । तए णं तुब्भे ताओ देवलो(या)गाओ अणंतरं चयं चइत्ता इहेव जंबुदीवे
 २ (जाव)साइं २ रज्जाइं उवसंपज्जित्ताणं विहरह । तए णं अहं(देवाणुप्पिया !)ताओ
 देवलोगाओ आउक्खएणं जाव दारियत्ताए पच्चायाया । किं(थ)च तयं पम्हुट्ठं जं
 थ तया भो जयंतपवरंमि । वुत्था समयनिबद्धं देवा तं संभरह जाइं ॥ १ ॥ तए
 णं तेसिं जियसत्तुपामोकखाणं छण्हं रा(या)ईणं मल्लीए २ अंतिए एयमट्ठं सोच्चा २
 सुभेणं परिणामेणं पसत्थेणं अज्जवसाणेणं लेसाहिं विमुज्जमाणीहिं तयावरणिज्जाणं
 कम्माणं खओवसमेणं ईहा(वू)पूह जाव सञ्चिजाईसरणे समुप्पन्ने एयमट्ठं सम्मं
 अभिसमागच्छंति । तए णं मल्ली अरहा जियसत्तुपामोकखे छप्पि रायाणो समु-
 प्पज्जा(इ)ईसरणे जाणित्ता गब्भघराणं दाराइं विहा(डावे)डेइ । तए णं(ते)
 जियसत्तुपामोकखा जेणेव मल्ली अरहा तेणेव उवागच्छंति । तए णं महब्बल-
 पामोकखा सत्त पियबालवयंसा एगयओ अभिसमन्नागया(या)वि होत्था । तए णं
 मल्ली अरहा ते जियसत्तुपामोकखे छप्पि(य)रायाणो एवं वयासी-एवं खलु अहं
 देवाणुप्पिया ! संसारभ(य)उव्विग्गा जाव पव्वयामि, तं तुब्भे णं किं करेह किं
 ववसह(जाव)किं भे हियसामत्थे ? । तए णं जियसत्तुपामोकखा(छ० रा०)मल्लिं
 अरहं एवं वयासी-जइ णं तुब्भे देवाणुप्पिया ! संसार जाव पव्वयह अम्हाणं
 देवाणुप्पिया ! के अन्ने आलंबणे वा आहारे वा पडिबन्धे वा ? जह चेव णं देवाणु-
 प्पिया ! तुब्भे अ(म्हे)म्हं इओ तच्चे भवग्गहणे बहूसु कज्जेसु य मेढी पमाणे जाव
 धम्मधुरा होत्था त(हा)ह चेव णं देवाणुप्पिया ! इण्हिपि जाव भविस्सह । अम्हे
 वि(य)णं देवाणुप्पिया ! संसारभउव्विग्गा जाव भीया जम्ममरणेणं देवाणुप्पिया-
 (णं)सद्धिं मुंडा भवित्ता जाव पव्वयामो । तए णं मल्ली अरहा ते जियसत्तुपामोकखे
 एवं वयासी-(जं)जइ णं तुब्भे संसार जाव मए सद्धिं पव्वयह तं गच्छह णं तुब्भे

देवाणुप्पिया ! सएहिं २ रज्जेहिं जे(ठे)ट्टुपुत्ते रज्जे ठावेह २ ता पुरिससहस्स-
वाहिणीओ सीयाओ दुरुहह(दुरुडा समाणा) २ ता मम अंतियं पाउब्भवह ।
तए णं ते जियसत्तुपामोक्खा मल्लिस्स अरहओ एयमट्ठं पडिमुणेंति । तए णं
मल्ली अरहा ते जियसत्तुपामो(क्खे)क्खा गहाय जेणेव कुंभए (राया) तेणेव
उवागच्छइ २ ता कुंभगस्स पाएसु पाडेइ । तए ण कुंभए (राया) ते जियसत्तु-
पामोक्खा विउलेणं असणेणं ४ पुप्फवत्थगंधमल्लालंकारेणं सक्कारेइ जाव पडिवि-
सज्जेइ । तए णं ते जियसत्तुपामोक्खा कुंभएणं रत्ता विसज्जिया समाणा जेणेव
साइं २ रज्जाइं जेणेव नगराइ तेणेव उवागच्छंति २ ता सगाइं [२] रज्जाइं
उवसंपज्जिता[णं] विहरंति । तए णं मल्ली अरहा संवच्छरावसाणे निक्खमिस्सामिति
मणं प्हारेइ ॥ ८२ ॥ तेणं कालेणं तेण समएणं सक्कस्स आसणं चलइ । तए णं
सक्के देविंदे देवराया आसणं चलियं पासइ २ ता ओहिं पउंजइ २ ता मल्लिं अरहं
ओहिणा आभोएइ २ ता इमेयारूवे अज्झत्थिए जाव समुप्पज्जित्था-एवं खलु
जंबुदीवे २ भारहे वासे मिहिलाए कुंभगस्स रत्तो मल्ली अरहा निक्खमिस्सामिति
मणं प्हारेइ । तं जीयमेयं तीयपच्चुप्पन्नमगागयाणं सक्काणं (३) अरहताणं भगवं-
ताणं निक्खममाणाणं इमेयारूवं अत्थसंपयाणं द(लि)लइतए तंजहा-तिणेव य
कोडिसया अट्टासीइ च हुं(हों)ति कोडीओ । असिइ च सयसहस्सा इंदा दलयति
अरहाणं ॥ ९ ॥ एवं संपेहेइ २ ता वेसमणं देवं सद्दावेइ २ ता एवं वयासी-एवं
खलु देवाणुप्पिया ! जंबुदीवे २ भारहे वासे जाव असीइ च सयसहस्साइं दलइतए,
तं गच्छह णं देवाणुप्पिया ! जंबुदीवे (वीवे) भारहे वासे मिहिलाए कुंभगभवणंसि
इमेयारूव अत्थसंपयाणं साहराहि २ ता खिप्पामेव मम एयमाणत्तियं पच्चप्पिणाहि । तए
णं से वेसमणे देवे सक्केणं देविदेणं (०) एवं वुत्ते (समाणे) ह (०) ठे करयल जाव पडि-
मुणेइ २ ता जंभए देवे सद्दावेइ २ ता एवं वयासी-गच्छह णं तुब्भे देवाणुप्पिया ! जंबु-
दीवं २ भारहं वासे मिहिलं रायहाणि कुंभगस्स रत्तो भवणंसि तिन्नेव य कोडिसया
अट्टासीयं च कोडीओ अ(सि)सीयं च सयसहस्साइं अयमेयारूवं अत्थसंपयाणं साहरह
२ ता मम एयमाणत्तियं पच्चप्पिणह । तए णं ते जंभगा देवा वेसमणेण जाव मुणेत्ता
उत्तरपुरच्छिमं दिसीभागं अवक्कमति जाव उत्तरवेउव्वियाइं रूवाइं वि(इ)उव्वंति २ ता
ताए उक्किट्ठाए जाव वीइवयमाणा जेणेव जंबुदीवे २ भारहे वासे जेणेव मिहिला
रायहाणी जेणेव कुंभगस्स रत्तो भवणे तेणेव उवागच्छंति २ ता कुंभगस्स रत्तो
भवणंसि तिन्नि कोडिसया जाव साहरंति २ ता जेणेव वेसमणे देवे तेणेव उवागच्छंति
२ ता करयल जाव पच्चप्पिणंति । तए णं से वेसमणे देवे जेणेव सक्के ३ तेणेव

उवागच्छइ २ ता करयल जाव पच्चप्पिणइ । तए णं मल्ली अरहा कल्लाकल्लि जाव मागहओ पायरासो त्ति बहूणं सणाहाण य अणाहाण य पहियाण य पंथियाण य करोडियाण य कप्पडियाण य एगमेणं हिरण्णकोडि अट्ठ य अणूणाईं सयसहस्साईं इमेयारूवं अत्थसंपयाणं दलयइ । तए णं (से)कुंभए (राया) मिहिलाए रायहाणीए तत्थ २ तहिं २ देसे २ बहूओ महाणससालाओ करेइ । तत्थ णं बहवे मणुया दिच्चभइ-भत्तवेयणा विउलं असणं ४ उवक्खडेंति (०) जे जहा आगच्छंति तजहा-पंथिया वा पहिया वा करोडिया वा कप्पडिया वा पासंडत्था वा गिहत्था वा तस्स य तहा आसत्थस्स वीसत्थस्स सुहासणवरगयस्स तं विउलं असणं ४ परिभाएमाणा परिवे-सेमाणा विहरंति । तए णं मिहिलाए सिंघाडग जाव बहुजणो अन्नमन्नस्स एवमाइ-क्खइ-एवं खलु देवाणुप्पिया । कुंभगस्स रत्तो भवणंसि सव्वकामगुणियं किमिच्छियं विपुलं असणं ४ बहूणं समणाण य जाव परिवेसिजइ । वरवरिया घोसिजइ किमि-च्छियं दिजए बहुविहीयं । सुरअसुरदेवदाणवनरिंदमहियाण निक्खमणे ॥ १ ॥ तए णं मल्ली अरहा संवच्छरेणं तिज्जि कोडिसया अट्ठासी(त्ति)यं च होति कोवीओ अ(सिति)सीयं च सयसहस्साईं इमेयारूवं अत्थसंपयाणं दलइत्ता निक्खमामिति मणं पहारेइ ॥ ८३ ॥ तेणं कालेणं तेणं समएणं लोगंतिया देवा बंभलोए कप्पे रिट्ठे विमाणपत्थडे सएहिं २ विमाणेहिं सएहिं २ पासायवडिसएहिं पत्तेयं २ चउहिं सामाणियसाहस्सीहिं तिहिं परिसाहिं सत्तहिं अणिएहिं सत्तहिं अणियाहिवईहिं सोलसहिं आयरक्खदेवसाहस्सीहिं अच्चाहि य बहूहिं लोगंतिएहिं देवेहिं सद्धिं संपरि-वुडा महायाहयनङ्गीयवाइय जाव रवेणं भुंजमाणा विहरंति तंजहा—सारस्सयमाइच्चा वण्णी वरुणा य गदतोया य । तुसिया अवावाहा अग्गिच्चा चेव रिट्ठा य ॥ १ ॥ तए णं तेसिं लो(यं)गंतियाणं देवाणं पत्तेयं २ आसणाइ चलंति तहेव जाव अरहंताणं निक्खममाणानं संबोहणं क(रे)रितए—त्ति तं गच्छामो णं अम्हे मल्लिस्स अरहओ संबोहणं करे(मि)मो—त्तिकट्ठु एवं संपेहेंति २ ता उत्तरपुरच्छिमं दिसीभा(यं०)गं वेउव्वियसमुग्धाएणं समोहणंति(०) सं(खि)खेज्जाईं जोयणाईं एवं जहा जंभगा जाव जेणेव मिहिला रायहाणी जेणेव कुंभगस्स रत्तो भवणे जेणेव मल्ली अरहा तेणेव उवागच्छंति २ ता अंतल्लिक्खपडिवच्चा सखिखिणियाईं जाव वत्थाईं पवरपरिहिया करयल जाव ताहिं इट्ठाहिं (जाव) एवं वयासी-बुज्झाहि भगवं(॥) लोग ।हा । पवत्तेहि घम्मतित्थं जीवाणं हियसुहनिस्सेयसकरं भविस्सइ—त्तिकट्ठु दोक्खपि तच्चपि एवं वयंति (०) मल्लि अरहं वंदंति नमंसंति वं० २ ता जामेव दिसिं पाउब्भू(आ)या तामेव दिसिं पडिगया । तए णं मल्ली अरहा तेहिं लोगंतिएहिं देवेहिं संबोहिए समाने जेणेव

अम्मापियरो तेणेव उवागच्छइ २ ता करयल जाव एवं वयासी-इच्छामि णं अम्म-
याओ ! तुब्भेहिं अब्भणुत्ताए मुंडे भविता जाव पव्वइत्तए । अहासुहं देवाणुप्पिया !
मा पडिबंथं करे(हि)ह । तए णं कुंभए राया कोडुंबियपुरिसे सद्दावेइ २ ता एवं
वयासी-खिप्पामेव अट्टसहस्सं सोवणियाणं [कलसाणं] जाव भोमेजाणं (ति) अन्नं
च महत्थं जाव तित्थयराभिसेयं उवट्टवेह जाव उवट्टवेंति । तेणं काळेणं तेणं
समएणं चमरे असुरिंदे जाव अच्चुयपज्जवसाणा आगया । तए णं सक्के (३)
आभिओगिए देवे सद्दावेइ २ ता एवं वयासी-खिप्पामेव अट्टसहस्सं सोवणियाणं
(कलसाणं) जाव अन्नं च तं विपुलं उवट्टवेह जाव उवट्टवेंति । तेवि कलसा ते
चेव कलसे अणुपविट्ठा । तए णं से सक्के देविंदे देवराया कुंभए य राया मल्लिं
अरहं सीहासणंसि पुरत्थाभिमुहं निवेसेइ अट्टसहस्सेणं सोवणियाणं जाव अभि-
सिंचंति । तए णं मल्लिस्स भगवओ अभिसेए वट्टमाणे अप्पेगइया देवा मिहिलं च
सद्धिंभत(रं)रबा(हिं)हिरं जाव सव्वओ समंता [सं]परिधावंति । तए णं कुंभए राया
दोच्चंपि उत्तरावक्कमणं जाव सव्वालंकारविभूसियं करेइ २ ता कोडुंबियपुरिसे सद्दावेइ
२ ता एवं वयासी-खिप्पामेव मणोरमं सीयं उवट्टवेह ते उवट्टवेंति । तए णं सक्के
(३) आभिओगिए देवे सद्दावेइ २ ता एवं वयासी-खिप्पामेव अणेगखंभ जाव
(मणोरमं) सीयं उवट्टवेह जाव सावि सीया तं चेव सीयं अणुपविट्ठा । तए णं मल्लीं
अरहा सीहासणाओ अब्भुट्ठेइ २ ता जेणेव मणोरमा सीया तेणेव उवागच्छइ २ ता
मणोरमं सीयं अणुपयाहिणीकरेमाणा मणोरमं सीयं दुरुहइ २ ता सीहासणवरगए
पुरत्थाभिमुहे सन्निसण्णे । तए णं कुंभए (राया) अट्टारस सेणिप्पुसेणीओ सद्दावेइ
२ ता एवं वयासी-तुब्भे णं देवाणुप्पिया ! ण्हाया सव्वालंकारविभूसिया मल्लिस्स सीयं
परिवहइ जाव परिवहंति । तए णं सक्के ३ मणोरमाए [सीयाए] दक्खिणिळं उवरिल्लं
बाहं गेण्हइ । ईसाणे उत्तरिल्लं उवरिल्लं बाहं गेण्हइ । चमरे दाहिणिळं हेट्ठिल्लं बली
उत्तरिल्लं हेट्ठिल्लं अवसेसा देवा जहारिहं मणोरमं सीयं परिवहंति-पुव्वि उक्खिता
माण(रु)सेहिं (तो)सा हट्ठोमकूवेहिं । पच्छा वहंति सीयं अल्लुरिंदसुरिंदना(गें)गिंदा
॥१॥ चलचवलकुंडलधरा सच्छंदविउव्वियाभरणधारी । देविंददाणविंदा वहंति सीयं
जिणिंदस्स ॥२॥ तए णं मल्लिस्स अरहओ मणोरमं सीयं दुरुहस्स इमे अट्टमंगलगा
पुरओ अहाणु(व्वीए)व्वेणं एवं निग्गमो जहा जमालिस्स । तए णं मल्लिस्स अरहओ
निक्खममाणस्स अप्पेगइया देवा मिहिलं आसिय जाव अद्धिंभतरवासविहिगाहा जाव
परिधावंति । तए णं मल्लीं अरहा जेणेव सहस्संभवणे उज्जाणे जेणेव असोगवरपायवे
तेणेव उवागच्छइ २ ता सीयाओ पच्चोद(भ)हइ० आभरणाळंकारं पभावई पडिच्छइ ।

तए णं मल्ली अरहा सयमेव पंचमुट्ठियं लोयं करेइ । तए णं सक्के ३ मल्लिस्स केसे पडिच्छइ
 (२त्ता) खीरोदगसमुदे साहर(पक्खिव)इ । तए णं मल्ली अरहा नमो(ऽ)त्थु णं सिद्धाणं-
 तिकट्ठु सामाइय(च)चारितं पडिवज्जइ । जं समयं च णं मल्ली अरहा चारितं पडिवज्जइ
 तं समयं च णं देवाणं [य] माणुसाण य निग्घोसे तु(रि)डिय(नि)णा(य)ए गीयवाइय-
 निग्घोसे य सक्क(स्स)वयणसंदेसेणं निलुक्के यावि होत्था । जं समयं च णं मल्ली अरहा
 सामाइ(यं)यचारितं पडिवज्जे तं समयं च णं मल्लिस्स अरहओ माणुसधम्मओ उत्तरिए
 मणपज्जवनाणे समुप्पजे । मल्ली णं अरहा जे से हेमंताणं दोच्चे मासे चउत्थे पक्खे
 पोससुद्धे तस्स णं पोससुद्धस्स एक्कारसीपक्खेणं पुव्वण्हकालसमयंसि अट्टमेणं भत्तेणं
 अपाणएणं अस्सिणीहिं नक्खत्तेणं जोगमुवागएणं तिहिं इत्थीसएहिं अत्थिमतियाए
 परिसाए तिहिं पुरिससएहिं बाहिरियाए परिसाए साद्धि मुंडे भवित्ता पव्वइए । मल्लि
 अरहं इमे अट्ट ना(रा)यकुमारा अणुपव्वइंसु तंजहा-नंदे य नंदिमित्ते सुमित्तबलमित्त-
 भाणमित्ते य । अमरवइ अमरसेणे महसेणे चेव अट्टमए ॥ १ ॥ तए णं (से) ते भव-
 णवइ ४ मल्लिस्स अरहओ निक्खमणमहिमं करेति २ ता जेणेव नंदीस(रव)रे(०)
 अट्ठाहियं करेति जाव पडिगया । तए णं मल्ली अरहा जं चेव दिवसं पव्वइए तस्सेव
 दिवसस्स पुव्वा(प०)वरण्हकालसमयंसि असोगवरपायवस्स अहे पुढविसिलापट्टयंसि
 सुहासणवरगयस्स सुहेणं परिणामेणं(पसत्थेहिं अज्झवसाणेहिं) पसत्थाहिं लेसाहिं
 (विमुज्झमाणीहिं) तयावरणकम्मरयविकरणकरं अपुव्वकरणं अणुपविट्ठस्स अणंते
 जाव केवल[वर]नाणदंसणे समुप्पजे ॥ ८४ ॥ तेणं कालेणं तेणं समएणं सव्वदेवाणं आ-
 सणाइं च(लं)लेति समोसडा सुणेति अट्ठाहि(य)यं म(हिमा)हा० नंदीस(रे)रं [जाव]
 जामेव दिसिं पाउब्भूया तामेव (दिसिं) पडिगया । कुंभए वि निग्गच्छइ । तए णं
 ते जियसत्तुपामोक्खा छप्पि य रायाणो जेट्ठुपुत्ते रज्जे ठावेत्ता पुरिससहस्सवाहिणी-
 याओ दुरुढा सव्विड्डीए जेणेव मल्ली अरहा जाव पज्जवासंति । तए णं मल्ली अरहा
 तीसे महइमहालियाए कुंभगस्स (रण्णो) तेसिं च जियसत्तुपामोक्खाणं धम्मं
 [परि]कहेइ । परिसा जामेव दिसिं पाउब्भूया तामेव दिसिं पडिगया । कुंभए
 समणोवासए जाए पडिगए पभावईं(य समणोवासिया जाया पडिगया) पि । तए
 णं जियसत्तुपामोक्खा छप्पि रायाणो धम्मं सोच्चा आलितए णं भंते ! जाव पव्वइया
 [जाव] चोइसपुव्विणो अणंते केव(ले)ली सिद्धा । तए णं मल्ली अरहा सहसंबवणाओ
 [पडि]निक्खमइ २ ता बहिया जणवयविहारं विहरइ । मल्लिस्स णं (अरहओ) भिसग-
 (किंसुय)पामोक्खा अट्ठावीसं गणा अट्ठावीसं गणहरा होत्था । मल्लिस्स णं अरहओ
 [अट्ठ]चत्तालीसं समणसाहस्सीओ उक्को० । बंधुम(ई)इपामोक्खाओ पणपजं अजिया-

साहस्सीओ उक्को ० । सुव्वयपामोक्खा(मल्लिस्स णं अरह)ओ सावयाणं एगा सयसा-
हस्सी चुलसीई (च) सहस्सा (०) सुगंदापामोक्खा(मल्लिस्स णं अरह)ओ सावियाणं
तिण्णि सयसाहस्सीओ पण्णट्ठि च सहस्सा (०) छ(र)वसया चोइसपुव्वीणं [संपया ।]
वी(स)सं सया ओहिनाणीणं बत्तीसं सया केवलनाणीणं पणतीसं सया वेउव्वियाणं
अट्ठसया मणपज्जनाणीणं चोइससया वाईणं वीसं सया अणुत्तरोववाइयाणं ।
मल्लिस्स [णं] अरहओ दुविद्वा अंतगडभूमी होत्था तंजहा-जु(य)गंतकरभूमी परिया-
यंतकरभूमी य जाव वीसइमाओ पुरिसजुगाओ जुगंतकरभूमी दुवा[ल]सपरियाए
अंतमकासी । मल्ली णं अरहा पणवीसं धणू (०) उट्ठं उच्चत्तेगं वण्णेणं पियगु(स)वामे
समचउरंसंठाणे वज्जिरिसहनारायसंवयणे मज्झदेसे सुहंसुहेणं विहरिता जेणेव
सम्मए पव्वए तेणेव उवागच्छइ २ ता संमेयसेलसिहरे पाओवगमणुववजे । मल्ली
णं अरहा एणं वाससयं अगारवासमज्जे पणपन्नं वाससहस्साई वाससयऊगाई
केवलपरियायं पाउणिता पणपन्नं वाससहस्साई सव्वाउयं पालइता जे से गिम्हाणं
पढमे मासे शेवे पक्खे चे(चि)तुद्धे तस्स णं चेतसुद्धस्स चउत्थीए भरणीए नक्खत्तेणं
अद्धरत्तकालसमयंसि पंचहिं अज्जियासएहिं अविमतरियाए परिसाए पंचहिं अणगार-
सएहिं बाहिरियाए परिसाए मासिएणं भत्तेणं अपाणएणं वग्घारियपाणी खीणे वेयणिजे
आउए ना(मे)मगोए सिद्धे । एणं परिनिव्वाणमहिमा भाणियव्वा जहा जंबुद्वीवपण्णतीए
नवीसरे अट्ठाहियाओ पडिगयाओ । एवं खलु जंबू ! समणेणं ३ जाव संपत्तेणं
अट्ठमस्स नायज्झयणस्स अयमट्ठे पञ्चत्ते-तिवेमि ॥ ८५ ॥ गाहाउ-उगगतव-
संजमवओ पणिट्ठकलसाहगस्सवि जियस्स । धम्मविसएवि सुहुमावि होइ माया
अणत्थाय ॥ १ ॥ जह मल्लिस्स महाबलमवमि तित्थयरनामबंधेऽवि । तवविसय-
थेवमाया जाया जुवइत्तहेउत्ति ॥ २ ॥ अट्ठमं नायज्झयणं समत्तं ॥

जइ णं भंते ! समणेणं भगवया महावीरेणं जाव संपत्तेणं अट्ठमस्स नायज्झय-
णस्स अयमट्ठे पञ्चत्ते नवमस्स णं भंते ! नायज्झयणस्स समणेणं जाव संपत्तेणं के
अट्ठे पञ्चत्ते ? एणं खलु जंबू ! तेणं कालेणं तेणं समएणं चेवा नामं नयरी होत्था ।
(तीसे णं चेपाए नयरीए कोणिए नामं राया होत्था तत्थ णं चेपाए नयरीए बहिया
उत्तरपुरच्छिमे दीसीभाए) पुण्णभेइ(नामं) उज्जाणे(होत्था) । तत्थ णं माकंदी नामं
सत्थवाहे परिवसइ अट्ठे जाव अपरिभूए । तस्स णं भद्दा नामं भारिया होत्था ।
तीसे णं भद्दाए अत्तया दुवे सत्थवाहदारया होत्था तंजहा-जिणपालिए य जिगर-
क्खिए य । तए णं तेसिं मागदियदारगाणं अबया कयाइ एगयओ इमेयारूवे
सिद्धोक्कासमुल्लावे समुप्पजित्था-एवं खलु अम्हे लवणसमुई पोयवहणेणं एकारस

वारा ओगाढा सव्वत्थ वि य णं लद्धुद्धा कयकज्जा अणहसमग्गा पुणरवि निय(य)-
 गघरं हव्वमागया । तं सेयं खलु अम्हं देवाणुप्पिया ! दुवालसमंपि लवणसमुद्दं
 पोयवहणेण ओगाहितए-त्तिकहु अन्नमन्नस्स एयमट्ठं पडिसुणेति २ ता जेणेव अम्मा-
 पियरो तेणेव उवागच्छंति २ ता एवं वयासी-एवं खलु अम्हे अम्मयाओ ! एक्कारस
 वारा तं चेव जाव निय(यं)गघरं हव्वमागया, तं इच्छामो णं अम्मयाओ !
 तुब्भेहिं अब्भणुत्ताया समाणा दुवालम(मं)लवणसमुद्दं पोयवहणेण ओगाहितए ।
 तए णं ते मार्गदियदारए अम्मापियरो एवं वयासी-इमे (ते) मे जाया ! अज्जग
 जाव परिभाएत्तए, तं अणुहोह ताव जाया ! विपुळे माणुस्सए इड्डीसक्कार-
 समुदए, किं मे सपच्चवाएणं निरालंबणेणं लवणसमुद्दं तारेणं ? एवं खलु पुत्ता !
 दुवालसमी जत्ता सोवसग्गा यावि भवइ, तं मा णं तुब्भे दुवे पुत्ता ! दुवालसमंपि
 लवण जाव ओगाहेइ, मा हु तुब्भं सरीरस्स वावत्ती भविस्सइ । तए णं [ते]
 मा(गं)कंदियदारगा अम्मापियरो दोच्चं पि तच्चं पि एवं वयासी-एवं खलु अम्हे अम्म-
 याओ ! एक्कारस वारा लवण जाव ओगाहितए । तए णं ते मा(गंदी)कंदियदारए
 अम्मापियरो जाहे नो संचाएति बहूहिं आघवणाहि य पणवणाहि य (आघवित्तए
 वा पववित्तए वा) ताहे अकामा चेव एयमट्ठं अणु(जाणि)मन्नित्था । तए णं ते
 मार्कंदियदारगा अम्मापिउहिं अब्भणुत्ताया समाणा गणिमं च धरिमं च मेज्जं च
 पारिच्छेज्जं च जहा अरहन्नगस्स जाव लवणसमुद्दं बहूइ जो(अ)यणसयाइ ओगाढा
 ॥ ८६ ॥ तए णं तेसिं मार्कंदियदारगाणं अणेगाइं जोयगसयाइं ओगाढाणं समा-
 णाणं अणेगाइं उप्पाइयसयाइं पाउब्भूयाइं तंजहा-अकाले गज्जियं जाव थणियसइ
 कालियवाए तत्थ समुट्ठिए । तए णं सा नावा तेणं कालियवाएणं आहुणिजमाणी
 २ संचालिजमाणी २ संखोभिजमाणी २ सलिलतिक्खवेगेहिं अइव(आय)ट्ठिज-
 माणी २ कोटिमंसि करतलाहए विव ति(तें)दुसए तत्थेव २ ओवयमाणी य उप्पयमाणी
 य उप्पयमाणी-विव धरणीयलाओ सिद्धविज्जा विज्जाहरकन्नगा ओवयमाणी विव
 गगणतलाओ भट्टविज्जा विज्जाहरकन्नगा विपलायमाणी विव महागरुलवेगवित्तासिया
 भुयगवरकन्नगा धावमाणी विव महाजणरसियसइवित्तथा ठाणभट्टा आसकिसोरी
 निगुंजमाणी विव गुरुजणदिट्ठावराहा सु(य)जणकुलकन्नगा सुम्ममाणी विव वी(ची)-
 विपहारसयतालिया गलियलंबगा विव गगणतलाओ रोयमाणी विव सलिल[भिज]-
 गंठिविप्पइरण(घो)थोरं सुवाएहिं नववहू उवरयभत्तुया विलवमाणी विव परचक्कराया-
 भिरोहिया परममहब्भयाभिहुया महापुरवरी ज्ञायमाणी विव कवडच्छोम[ण]पओग-
 जुत्ता जोगपरिवाइया नीस(निसा)समाणी विव महाकंतारविणिग्गयपरिस्संता

परिणयवया अम्मया सोयमाणी विव तवचरणखीणपरिभोगा च(य)वणकाले देवच-
 रवहू संचुण्णिकट्टकूवरा भग्गमेढिमोडियसहस्समाला सुलाइयवंकपरिमासा फलहं-
 तरतडतडेंतफुट्टंतसंधिवियलंतलोह(की)खीलिया सव्वंगवियंभिया परिसडियरज्जुवि-
 सरंतसव्वगत्ता आमगमल्लगभूया अकयपुण्णजगमणोरहो विव चित्तिजमागगुरुई
 हाहाकयकण्णधारनावियवाणियगजगम्म(गा)करविलविया नाणाविहरयणपणियसं-
 पुण्णा बहूहिं पुरिससएहिं रोयमाणेहिं कंदमाणेहिं सोयमाणेहिं तिप्पमाणेहिं विलव-
 माणेहिं एगं महं अंतोजलगयं गिरिसिहरमासा(य)इत्ता संभग्गकूवतोरणा मोडिय(झ)-
 ज्जसयईडा वलयसयखंडिया क(र)डकडस्स तत्थेव विद्वं उवगया । तए णं तीए
 नावाए भिज्जमाणीए [ते] बहवे पुरिसा विपुलप(डि)णियभंडमायाए अंतोजलंमि निम-
 ज्जावि यावि होत्था । तए णं ते मार्कदियदारगा छेया दक्खा पत्तट्ठा कुसला मेहावी
 निउणसिप्पोवगया बहुसु पोयवहणसंपराएसु कयकर(ण)णा लद्धविजया अमूढा
 अमूढहत्था एगं महं फलगखंडं आसादेंति । जं(सिं)सि च णं पएसंसि से पोयवहणे
 विवचे तंसि च णं पएसंसि एगे महं रयण(दी)दीवे नामं दीवे होत्था अणेगाई
 जोयणाई आयामविकखंभेगं अणेगाई जोयणाई परिवखेवेणं नाणादुमसंडमंडिउइसे
 सस्सिरीए पासाईए दरि(दं)सणिजे अभिरूवे पडिरूवे । तस्स णं बहुमज्जदेमभाए
 ए(त)त्थणं महं एगे पासायवडेंसए होत्था अब्भुगयमूसि(य)ए जाव ससिरी(भू)यरूवे
 पासाईए ४ । तत्थ णं पासायवडेंसए रयणदीवदेवया नामं देवया परिवसइ पावा
 चंडा रुहा खुदा साहसिया । तस्स णं पासायव(डि)डेंसयस्स चउ(दि)दिसिं चत्तारि
 वणसंडा [पत्तत्ता] किण्हा किण्होभासा । तए णं ते मार्कदियदारगा तेणं फलय-
 खंडेणं उवुज्जमाणा २ रयणदीवतेणं संवुढा यावि होत्था । तए णं ते मार्कदियदा-
 रगा थहं लभंति २ ता मुहुत्ततरं आ(स)सासंति २ ता फलगखंडं विसजंति २ ता
 रयणदीवं उत(रं)रेंति २ ता फलाणं मग्गणगवेसणं करेंति २ ता फलाई (गि(गे)ण्हंति
 २ ता) आहारेंति २ ता नालि(ए)यरारणं मग्गणगवेसणं करेंति २ ता नालियराई
 फोडेंति २ ता नालियरतेल्लेणं अन्नमन्नस्स गाया(गत्ता)ई अ(ब्भं)ब्भिभंति २ ता
 पोक्खरणीओ ओगा(हिं)हेंति २ ता जलमज्जणं करेंति २ ता जाव पञ्चुत्तरंति २ ता पुड-
 विसिलापट्ठयंसि निसीयंति २ ता आसत्था वीसत्था सुहासणवरगया चं(पा)पं नयरिं
 अम्मापिउआपुच्छं च लवणसमुदोत्ता(रं)रणं च कालियवायसं(स)सु(त्थ)च्छणं च
 पोयवहणविवत्तिं च फलयखंड[य]स्स आसायणं च रयणदी(वु)वोत्तारं च अणुचिते-
 माणा २ ओहयमणसंकप्पा जाव झिया(यें)यंति । तए णं सा रयणदीवदेवया ते मार्क-
 दियदारए ओहिणा आभोएइ २ ता असिफलगवग्गहत्था सत्त[अ]इ(ता)तलप्पमाणं

उद्धं वेहासं उप्पयइ २ ता ताए उक्किट्ठाए जाव देवगईए वी(इ)ईवयमाणी २ जेणेव
 मार्कंदियदारए तेणेव उवागच्छइ २ ता आसुत्ता [ते] मार्कंदियदारए खरफरसनिट्ठर-
 वयणेहिं एवं वयासी-हं भो मार्कंदियदारया ! (अपत्थियपत्थिया !) जइ णं तुब्भे
 मए सद्धिं विउलाइं भोगभोगाईं भुंजमाणा विहरह तो मे अत्थि जीवि(अं)यं,
 अह(णं)णं तुब्भे मए सद्धिं विउलाइं नो विहरह तो मे इमेणं नीलुप्पलगवलगुलिय
 जाव खुरधारेणं असिणा रत्तगंडमसुयाईं माउ(या)आहिं उवसोहियाईं तालफला-
 (णी)णिव सीसाईं एंगंते एडेमि । तए णं ते मार्कंदियदारगा रयणदीवदेवयाए अंतिए
 एयमट्ठं सोच्चा निसम्म भीया करयल जाव वद्धावेत्ता एवं वयासी—जन्नं देवाणु-
 प्पिया (१) वइस्सइ तस्स आणाउववायवयणनिहेसे चिट्ठिसासो । तए णं सा रयणदीव-
 देवया ते मार्कंदियदारए गेणहइ २ ता जेणेव पासायवडेंसए तेणेव उवागच्छइ
 २ ता अमुभपोग्गलावहारं करेइ २ ता सुभपोग्गलपक्खेवं करेइ २ ता [तओ] पच्छा
 तेहिं सद्धिं विउलाइं भोगभोगाईं भुंजमाणी विहरइ कल्लकल्लि च अमयफलाइं
 उवणेइ ॥ ८७ ॥ तए णं सा रयणदीवदेवया सक्कवयणसंदेसेणं सुट्ठिएणं लवणाहि-
 वइणा लवणसमुदे तिसत्तखुत्तो अणुपरिय(ट्ठि)ट्ठ्यव्वे ति जं किंचि तत्थ तणं वा पत्तं
 वा कट्ठं वा कयवरं वा अद्ध(ई)इ पू(ति)यं दुरभिगंधमचोक्खं तं सव्वं आहुणिय २
 तिसत्तखुत्तो एंगंते एडेयव्वं—तिकट्ठु निउत्ता । तए णं सा रयणदीवदेवया ते मार्क-
 दियदारए एवं वयासी—एवं खलु अहं देवाणुप्पिया ! सक्कवयणसंदेसेणं सुट्ठिए(णं)
 लवणाहिवइणा तं चेव जाव निउत्ता । तं जाव [ताव] अहं देवाणुप्पिया ! लवण-
 समुदे जाव एडेमि ताव तुब्भे इहेव पासायवडेंसए सुहंसुहेणं अभिरममाणा विट्ठह ।
 जइ णं तुब्भे एयंसि अंतरंसि उव्विग्गा वा उस्सुया वा उप्पुया वा भवेज्जाह तो णं
 तुब्भे पुर(च्छि)त्थिमिल्लं वणसंदं गच्छेज्जाह । तत्थ णं दो उ(ऊ)ऊ सया साहीणा
 तंजहा—पाउसे य वासारत्ते य । तत्थ उ कंदलसिल्लिधदंतो निउरवरपुप्फपीवरकरो ।
 कुडयज्जुणनीवसुरभिदाणो पाउसउऊ—गयवरो साहीणो ॥ १ ॥ तत्थ य—सुरगोवमणि-
 विवित्तो दट्ठुरकुलरसियउज्झररवो । वरहिण(वि)वंदपरिणद्धसिहरो वासार(तो)तउ-
 ऊपव्वओ साहीणो ॥ २ ॥ तत्थ णं तुब्भे देवाणुप्पिया । बहुसु वावीसु य जाव
 सरसरपंतियासु [य] ब(ट्ठ)हुसु आलीघरएसु य मालीघरएसु य जाव कुसुमघरएसु य
 सुहंसुहेणं अभिरममाणा [२] विह(रे)रिज्जाह । जइ णं तुब्भे त(ए)त्थ वि उव्विग्गा वा
 उस्सुया वा उप्पुया वा भवेज्जाह तो णं तुब्भे उत्तरिल्लं वणसंदं गच्छेज्जाह । तत्थ णं
 दो उऊ सया साहीणा तंजहा—सरदो य हेमंतो य । तत्थ उ सणस(त्त)त्तिवण्णकउ-
 (ओ)हो नीलुप्पलपउमनल्लिगसिगो । सारसच्च(क्कवा)कायरवियधोसो सरयउऊ—गोवई

साहीणो ॥ १ ॥ तत्थ य सियकुंदधवलजोण्हो कुसुमियलोद्धवगसंडमंडलतो ।
 तुसारदग्धारपीवरकरो हेमंतउऊससी सया साहीणो ॥ २ ॥ तत्थ णं तुब्भे
 देवाणुप्पिया ! वावीसु य जाव विहरंजाह । जइ णं तुब्भे तत्थ वि उव्विग्गा वा जाव
 उस्सुया वा भवेज्जाह तो णं तुब्भे अवरेल्लं वणसंडं गच्छेज्जाह । तत्थ णं दो उऊ
 सया साहीणा तं जहा—वसंते य गिम्हे य । तत्थ उ सहकारचारुहारो किंसुयकण्णि-
 यारासोगमउडो । ऊसियतिलगव(उ)कुलायवत्तो वसंतउऊ—नरवई साहीणो ॥ १ ॥
 तत्थ य पाडलसिरीससलिलो म(लि)द्धियावासंतिथधवलवेळो सीयलसुरभिअनि-
 लमगरचरिओ गिम्हउऊसागरो साहीणो ॥ २ ॥ तत्थ णं बहुसु जाव विहरंजाह ।
 जइ णं तुब्भे देवाणुप्पिया ! तत्थ वि उव्विग्गा [वा] उस्सुया [वा उप्पुया वा] भवेज्जाह
 तओ तुब्भे जेणेव पासायवडेंसए तेणेव उवागच्छेज्जाह ममं पडिवाळेमाणा २ चिट्ठे-
 ज्जाह । मा णं तुब्भे दक्खिणिल्लं वणसंडं गच्छेज्जाह । तत्थ णं महं एगे उग्गविसे
 चंडविसे थोरविसे महाविसे अइका(य)र महाकाए जहा तेथनिसग्गे मसिमहि(सा)-
 समूसाकालए नयणविसरोसपुण्णे अंजगपुंजनियरप्पगासे रत्तच्छे जमलजुयलचंचल-
 चलंतजीहे धरणिगलवेणिभूए उक्कडफुडकुडिलजडिलकक्खडवियडफडाडोवकरण-
 दच्छे लो(गाहा)द्धारधम्ममाणधमधमेंतथोसे अगागलियचंडतिव्वरोसे समु(हिं)हं
 तुरि(यं)यचवलं धमध(मं)मेंतदिट्ठीविसे सप्पे (य) परिवसइ । मा णं तुब्भं
 सरीर(ग)स्स वावत्ती भविस्सइ । ते माकंदियदारए रोचंपि तचंपि एवं वयइ २ ता
 वेउव्वियसमुग्घाएणं समोह[ण]गइ २ ता ताए उक्किट्ठाए लवगसमुद्धं तिसत्तखुत्तो
 अणुपरियट्ठेयं पयत्ता यावि होत्था ॥ ८८ ॥ तए णं ते माकंदियदारया तओ मुहुत्तं-
 तरस्स पासायवडेंसए सइ वा रइ वा थिइ वा अलभमाणा अन्नमज्जं एवं वयासी-
 एवं खलु देवाणुप्पिया ! रयगवीवदेवया अम्हे एवं वयासी—एवं खलु अहं सक्कवय-
 णसंदेसेणं सुट्ठिएणं लवगाहिवइणा जाव वावत्ती भविस्सइ । तं सेयं खलु अम्हं
 देवाणुप्पिया ! पुरत्थिमि(ल्ले)ल्लं वगसंडं गमितए । अन्नमज्जस्स (एयमट्ठं) पडिमुणेंति
 २ ता जेणेव पुरत्थिमिल्ले वगसंडे तेणेव उवागच्छंति २ ता तत्थ णं वावीसु य जाव
 आलीघरएसु य जाव विहरंति । तए णं ते माकंदियदारगा तत्थ वि सइ वा जाव
 अलभमाणा जेणेव उत्तरिल्ले वगसंडे तेणेव उवागच्छंति (२ ता) तत्थ णं वावीसु
 य जाव आलीघरएसु य विहरंति । तए णं ते माकंदियदार(या)गा तत्थ वि सइ वा
 जाव अलभमाणा जेणेव पच्चत्थिमिल्ले वगसंडे तेणेव उवागच्छंति २ ता जाव विहरंति ।
 तए णं ते माकंदियदारगा तत्थवि सइ वा जाव अलभमाणा अन्नमज्जं एवं वयासी-
 एवं खलु देवाणुप्पिया ! अम्हे रयगवीवदेवया एवं वयासी—एवं खलु अहं देवाणु-

पिप्या । सक्र(स्स)वयणसंदेसेण सुट्टिए(ण)णं लवणाहिवङ्गा जाव मा णं तुब्भं सरी-
 रस्स वावत्ती भविस्सइ । तं भवियव्वं एत्थ कारणेण । तं सेयं खलु अम्हं दक्खिणिहं
 वणसंडं गमितए-त्तिकट्ठु अन्नमन्नस्स एयमट्ठं पड्डिसुणेंति २ ता जेणेव दक्खिणिहं
 वणसंडे तेणेव पहारेत्थ गमणाए । त(ए)ओ णं गंधे निद्धाइ से जहानामए
 अहिमडेइ वा जाव अणिट्ठतराए(चेव) । तए णं ते मार्कंदियदार(या)गा तेणं असु-
 भेणं गंधेणं अभिभूया समाणा सएहिं २ उत्तरिज्जेहिं आसाइं पिहेंति २ ता जेणेव
 दक्खिणिहं वणसंडे तेणेव उवागया । तत्थ णं महं एगं आ(घा)घयणं पासंति(०)
 अट्ठियरासिसयसंकुलं भीमदरिसणिज्जं एगं च तत्थ सूलाइ(त)यं पुरिसं कलुणाइं
 कट्ठाइं विस्सराइं कुव्वमाणं पासंति(२ ता)भीया जाव संजायभया जेणेव से सूलाइ(य)-
 ए पुरिसे तेणेव उवागच्छंति २ ता तं सूलाइयं पुरिसं एवं वयासी-एस णं देवाणुप्पिया ।
 कस्स आघयणे तुमं च णं के कओ वा इहं हव्वमागए केण वा इमेयारुवं आव(ति)यं
 याविए ? । तए णं से सूलाइए पुरिसे[ते]मार्कंदियदार(ए)गे एवं वयासी-एस णं
 देवाणुप्पिया । रयणदीवदेवयाए आघयणे । अहं णं देवाणुप्पिया । जंबुदीवाओ
 दीवाओ भारहाओ वासाओ का(गंदी)कंदिए आसवाणियए विपुलं पणियभंडमायाए
 पोयवहणेणं लवणसमुदं ओयाए । तए णं अहं पोयवहणविबतीए निब्बुड्डुभंडसारे
 एगं फलगखंडं आसाएमि । तए णं अहं उवुज्जमाणे २ रयणदीवंतेणं संवूढे ।
 तए णं सा रयणदीवदेवया ममं (ओहिं)गा पासइ २ ता ममं गेण्हइ २ ता मए सद्धिं
 विउलाइं भोगभोगां भुंजमाणी विहरइ । तए णं सा रयणदीवदेवया अन्नया
 कयाइ अहालहुसगंसि अवरहंसि परिकुविया समाणी ममं एयारुवं आवयं पावेइ ।
 तं न नज्जइ णं देवाणुप्पिया ! तु(म्हं)ब्भं पि इमेसिं सरीरगाणं का मन्ने आवई भवि-
 स्सइ (?) । तए णं ते मार्कंदियदारगा तस्स सूलाइ(य)गस्स अंतिए एयमट्ठं सोच्चा
 निसम्म बलियतरं भीया जाव संजायभया सूलाइयं पुरिसं एवं वयासी-कहं णं
 देवाणुप्पिया ! अम्हे रयणदीवदेवयाए हत्थाओ साहत्थि नित्थरिजामो ? । तए
 णं से सूलाइए पुरिसे ते मार्कंदियदारगे एवं वयासी-एस णं देवाणुप्पिया । पुरत्थि-
 मिहं वणसंडे सेलगस्स जक्खस्स जक्खा(य)यणे सेलए नामं आसरुवधारी जक्खे
 परिवसइ । तए णं से सेलए जक्खे चाउ(चो)इसट्ठसुद्धिपुण्णमासिणीसु आगयसमए
 पत्तसमए महया २ सदेणं एवं वदइ-कं तारयामि ? कं पालयामि ? तं गच्छह णं तुब्भे
 देवाणुप्पिया । पुरत्थिमिहं वणसंडं सेलगस्स जक्खस्स महारेहं पुण्णवर्णियं करेह
 २ ता जल्लुपायवडिया पंजलिउडा विणएणं पज्जवासमाणा विहर(चिट्ठ)ह । जाहे णं से
 सेलए जक्खे आगयसमए पत्तसमए एवं वएज्जा-कं तारयामि ? कं पालयामि ? ताहे

तुब्भे [एवं] वयह-अम्हे तारयाहि अम्हे पालयाहि । सेलए (भे) भो जक्खे परं
 रयणदीवदेवयाए हत्थाओ साहत्थि नित्यारेजा । अज्जहा भो न याणामि इमेसिं
 सरीरगाणं का मज्जे आवई भविस्सइ ॥ ८९ ॥ तए णं ते मार्कंदियदारगा तस्स सूल-
 इयस्स अंतिए एयमट्ठं सोच्चा निसम्म सिग्घं चंडं चवलं तुरियं वेइयं जेणेव पुरत्थिमिन्हे
 वणसंडे जेणेव पोक्खरिणी तेणेव उवागच्छंति २ ता पोक्खरिणिं ओगाहं (गाहं) ति
 २ ता जलमज्जणं करंति २ ता जाई तत्थ उप्पलाई जाव गेण्हांति २ ता जेणेव सेलगस्स
 जक्खस्स जक्खाययणे तेणेव उवागच्छंति २ ता आलोए पणामं करंति २ ता महरिहं
 पुप्फच्चणियं करंति २ ता जलुपायवड्डिया सुस्समाणा नमंसमाणा पज्जुवासंति । तए णं
 से सेलए जक्खे आगयसमए पत्तसमए एवं वयासी-कं तारयामि ? कं पालयामि ? ।
 तए णं ते मार्कंदियदारगा उट्ठाए उट्ठंति करयल जाव वद्धावेत्ता एवं वयासी-अम्हे
 तारयाहि अम्हे पालयाहि । तए णं से सेलए जक्खे ते मार्कंदियदारए एवं वयासी-एवं
 खलु देवाणुप्पिया । तुब्भं मए सद्धिं लवणसमु (हेणं) हं मज्झमज्झेणं वीइवयमा (णे) णाणे
 सा रयणदीवदेवया पावा चंडा रुहा खुदा साहसिया बहूहिं खरएहि य मउएहि य
 अणुलोमेहि य पडिलोमेहि य सिंगारेहि य कलुणेहि य उवसग्गेहि य उवसग्गं
 करेहिइ । तं जइ णं तुब्भे देवाणुप्पिया । रयणदीवदेवयाए एयमट्ठं आढाह वा
 परियाणह वा अव (ए) यक्खह वा तो भे अहं पिट्ठाओ वि (धु) ह्णामि । अह णं तुब्भे
 रयणदीवदेवयाए एयमट्ठं नो आढाह नो परियाणह नो अवयक्खह तो भे रयण-
 दीवदेवया [ए] हत्थाओ साहत्थि नित्यारेमि । तए णं ते मार्कंदियदारगा सेलगं जक्खं
 एवं वयासी-जं णं देवाणुप्पिया (१) वइस्संति तस्स णं उववायवयणनिहेसे विट्ठिस्सामो ।
 तए णं से सेलए जक्खे उत्तरपुर (च्छि) त्थिमं दिसीभाणं अवक्कमइ २ ता वेउव्वियसमु-
 ग्घाएणं समोहणइ २ ता संखेज्जाई जोयणाई दंडं निस्सरइ दोच्चं पि (तच्चं पि) वेउव्विय-
 ससुग्घाएणं समोहणइ २ ता एणं महां आसरूवं वे (वि) उव्वइ २ ता ते मार्कंदियदारए
 एवं वयासी-हं भो मार्कंदियदारया । आरुह णं देवाणुप्पिया । मम पिट्ठंति । तए णं ते
 मार्कंदियदारया हट्ठो सेलगस्स जक्खस्स पणामं करंति २ ता सेलगस्स पि (ट्ठि) ट्ठं
 दुरुढा । तए णं से सेलए ते मार्कंदियदारए दुरुढं जाणिता सत्त [अ] ट्ठताल्पमाणमेत्ताई
 उट्ठं वेहासं उप्पयइ २ ता (य) ताए उक्किट्ठाए तुरियाए [चवलाए चंडाए दिव्वाए]
 देवयाए दे (दि०) वगईए लवणसमुहं मज्झमज्झेणं जेणेव जंबुदीवे दीवे जेणेव भारहे
 वासे जेणेव चंपा नयरी तेणेव पहारेत्थ गमणाए ॥ ९० ॥ तए णं सा रयणदीवदेवया
 लवणसमुहं तिसत्तखुतो अणुपरियट्ठइ जं तत्थ तणं वा जाव एडेइ (२ ता) जेणेव पासा-
 यवड्डेसए तेणेव उवागच्छइ २ ता ते मार्कंदियदारया पासायवड्डेसए अपासमाणी

जेणेव पुरत्थिमिल्ले वणसंडे जाव सव्वओ समंता मग्गणगवैसणं करेइ २ ता तेसिं
 मार्कंदियदारगाणं कत्थइ सुइं वा ३ अलभमाणी जेणेव उत्तरिल्ले (वणसंडे) एवं च्वेव
 पच्चत्थिमिल्ले वि जाव अपासमाणी ओहिं पउंजइ (०) ते मार्कंदियदारए सेलएणं सद्धिं
 लवणसमुदं मज्झंमज्झेणं वीईवयमाणे २ पासइ २ ता आसुरुता असिखेडणं गेण्हइ
 २ ता सत्तट्ठ जाव उप्पयइ २ ता ताए उक्किट्ठाए जेणेव मार्कंदियदार(गा)या तेणेव उवा-
 गच्छइ २ ता एवं वयासी-हं भो मार्कंदियदारगा अपत्थियपत्थिया । किण्णं तुब्भे
 जाणह विप्पजहाय सेलएणं जक्खेणं सद्धिं लवणसमुदं मज्झंमज्झेणं वीईवयमाणा ? तं
 ममं एवमवि गए जइ णं तुब्भे ममं अवयक्खह तो भे अत्थि जीवियं, अह णं नावय-
 क्खह तो भे इमेणं नीलुप्पलगवल जाव एडेमि । तए णं ते मार्कंदियदारगा रयण-
 दीवदेवयाए अंतिए एयमट्ठं सोच्चा निसम्म अभीया अतत्था अणुव्विग्गा अक्खुभिया
 असंमंता रयणदीवदेवयाए एयमट्ठं नो आढंति नो परियाणंति ना(णो अ)वयक्खंति
 अणाढायमाणा अपरियाणमाणा अणवयक्खमाणा[य]सेलए(ण)णं जक्खेणं सद्धिं
 लवणसमुदं मज्झंमज्झेणं वीईवयंति । तए णं सा रयणदीवदेवया ते मार्कंदि[य]दार[या]
 जाहे नो संचाएइ बहूहिं पडिलोमेहि य उवसग्गेहि य चालित्तए वा खोभित्तए वा
 विपरिणामित्तए वा (लोभित्तए वा) ताहे महुरे(हि)हिं[य]सिंगारेहि य कल्लुणेहि य उव-
 सग्गेहि य उवसग्गेउं पयत्ता यावि होत्था-हं भो मार्कंदियदारगा ! जइ णं तुब्भेहिं
 देवानुप्पिया ! मए सद्धिं हसियाणि य रमियाणि य ललियाणि य कीलियाणि य
 हिंडियाणि य मोहियाणि य ताहे णं तुब्भे सव्वाइं अगणेमाणा ममं विप्पजहाय
 सेलएणं सद्धिं लवणसमुदं मज्झंमज्झेणं वीईवयह । तए णं सा रयणदीवदेवया
 जिणरक्खियस्स मणं ओहिणा आभोएइ २ ता एवं वयासी-निच्चं पि य णं अहं जिण-
 पालियस्स अणिट्ठा ५ । निच्चं ममं जिणपालिए अणिट्ठे ५ । निच्चं पि य णं अहं
 जिणरक्खियस्स इट्ठा ५ । निच्चं पि य णं ममं जिणरक्खिए इट्ठे ५ । जइ णं ममं
 जिणपालिए रोयमा(णीं)णिं कंदमाणिं सोयमाणिं तिप्पमाणिं विलवमाणिं नावयक्खइ
 किण्णं तुमं[पि]जिणरक्खिया ! ममं रोयमाणिं जाव नावयक्खसि ? तए णं—सा
 पवररयणदीवस्स देवया ओहिणा (उ) जिणरक्खियस्स मणं । नाऊ(ण)णं वधनि-
 मित्तं उव(रि)रिं मार्कंदियदारगा(णं)ण दोण्हंपि ॥ १ ॥ दोसकलिया स(ललि)लिलयं
 नाणाविहचुण्णवासमीसियं दिव्वं । घाणमणनिव्वुइकरं सव्वोउयसुरभिकुसुमवुट्ठिं
 पसुंचमाणी ॥ २ ॥ नाणामणिकणगरयणघंटियखिखिणिने(ऊ)उरमेहलभूसणरवेणं ।
 दिसाओ विदिसाओ पूरयंती वयणमिणं बेइ सा (स)कलुसा ॥ ३ ॥ होल वसुल
 गोल नाह दइय पिय रमण कंत सामिय निग्घिण नित्थक्क । थि(छि)ण्ण निक्किव

अकय(लु)बुय सिद्धिभाव निरुज्ज लुक्ख अकलुण जिणरक्खिय मज्झं हिययर-
 क्ख(गा)ग ॥ ४ ॥ न हु जुजसि एक्किय अणाहं अवंधवं तुज्ज चलणओवायकारियं
 उज्झिम(ह)धत्तं । गुणसंकर (। अ)हं तुमे विहूणा न समत्था (वि) जीविउं खणपि
 ॥ ५ ॥ इमस्स उ अणेगद्धसमगरविविधसावयसया(उ)कुलघरस्स । रयणागरस्स
 मज्झे अप्पाणं वहेमि तुज्ज पुरओ एहि नियत्ताहि जइ सि कुविओ खमाहि
 ए(क्का)कावराहं मे ॥ ६ ॥ तुज्ज य विगयघणविमलससिमंड(ल)लागारसस्सिरीयं
 सारयनवकमलकुसुदकुवलयविमलदलनिकरसरिसनि(भं)भनयणं । वयणं पिवासा-
 गयाए सद्धो मे पेच्छिउं जे अवलोएहि ता इओ ममं नाह जा ते पेच्छामि वयण-
 कमलं ॥ ७ ॥ एवं सप्पणयसरलमहुराई पुणो २ कलुणाई वयणाई जंपमाणी सा
 पावा मग्गओ समण्णेइ पावहियया ॥ ८ ॥ तए णं से जिणरक्खिए चलमणे तेणेव
 भूसणरवेणं कण्णसुहमणोहरेणं तेहि य सप्पणयसरलमहुरभणिएहि संजायविउण-
 [अणु]राए रयणदीवस्स देवयाए तीसे सुंदरथणजहणवयणकरचरणनयणलावणरूव-
 जोवणसिंरिं च दिव्वं सरभसउवगूहियाई (जातिं)विब्बोयविलसियाणि य विहसियस-
 कडक्खविट्ठिनिस्ससियमलियउवललिय(ठि)थियगमणपणयखिजिय(पा)पसाइयाणि य
 सरमाणे रागमोहियमई अवसे कम्मवसगए अवयक्खइ मग्गओ सविलियं । तए णं
 जिणरक्खियं समुप्पन्नकलुणभावं मच्चगलत्थल्लणोल्लियमई अवयक्खंतं तहेव जक्खे (य)
 उ सेलए जाणिऊण सणियं २ उव्विहइ नियगपिट्ठा(हि)हिं विगयस(त्थं)द्धे । तए णं
 सा रयणदीवदेवया निस्संसा कलुणं जिणरक्खियं सकलुसा सेलगपिट्ठाहिं ओ(उ)व-
 यंतं-दास । मओसि त्ति जंपमाणी अ(ए)पत्तं सागरसलिलं गेण्हिय बाहाहिं आरसंतं
 उद्धं उव्विहइ अंबरतले ओवयमाणं च मंडलग्गेण पडिच्छित्ता नीलुप्पलगवल-
 अयसिप्पगासे(ण)णं असिबरेणं खंडाखंडिं करेइ २ ता तत्थ विलवमाणं तस्स य
 सरसवहियस्स घेतूण अंगमंगाई सरहिराई उक्खित्तवलिं चउडिसिं करेइ सा पंजली
 प(हि)हट्ठा ॥ ९१ ॥ एवामेव समणाउसो ! जो अम्हं निग्गथाण वा निग्गथीण वा
 अंतिए पव्वइए समाणे पुणरवि माणुस्सए कामभोगे आसायइ पत्थयइ पीहेइ
 अभिलसइ से णं इहभवे चेव बहूणं समणाणं बहूणं समणीणं बहूणं सावयाणं बहूणं
 सावियाणं जाव संसारं अणुपरियट्ठिस्सइ जहा (वा) व से जिणरक्खिए । छलिओ अवय-
 क्खंतो निरावयक्खो गओ अविग्घेणं । तम्हा पवयणसारे निरावयक्खेण भवियव्वं
 ॥ १ ॥ भोगे अवयक्खंता पडंति संसारसा(य)गरे घोरे । भोगेहिं [य] निरवयक्खा
 तरंति संसारकंतारं ॥ २ ॥ ९२ ॥ तए णं सा रयणदीवदेवया जेणेव जिणपालिए तेणेव
 उवागच्छइ २ ता बहूहिं अणुलोमेहि य पडिलोमेहि य खरम(हुर)उयसिगारे(हिं)हि

य कलुणेहि य उवसग्गेहि य जाहे नो संचाए चालितए वा खोभितए वा वि(८)परि-
णामितए वा ताहे संता तंता परितंता निव्विण्णा समा(णा)णी जामेव दिसिं पाउब्भूया
तामेव दि(सं)सिं पडिगया । तए णं से सेलए जक्खे जिणपालिएण सद्धिं लवणसमुद्दं
मज्झमज्जेण वीईवयइ २ ता जेणेव चंपा नयरी तेणेव उवागच्छइ २ ता चंपाए नयरीए
अग्गुजाणंसि जिणपालियं प(पि)ट्ठाओ ओयारेइ २ ता एवं वयासी-एस णं देवाणु-
प्पिया ! चंपा-नयरी वीसइ-त्तिकट्टु जिणपालियं आपुच्छइ २ ता जामेव दिसिं
पाउब्भूए तामेव दिसिं पडिगए ॥ ९३ ॥ तए णं जिणपालिए चंपं अणुपविसइ
२ ता जेणेव सए गिहे जेणेव अम्मापियरो तेणेव उवागच्छइ २ ता अम्मापिऊणं
रोयमाणे जाव विलवमाणे जिणरक्खियवावत्ति निवेदेइ । तए णं जिणपालिए
अम्मापियरो मित्तनाइ जाव परियणेणं सद्धिं रोयमाणाइं बहूइं लोइयाइं मयकिचाइं
करंति २ ता कालेणं विगयसोया जाया । तए णं जिणपालियं अन्नया कया(इ)इं
सुहासणवरगयं अम्मापियरो एवं वयासी-कहणं पुत्ता ! जिणरक्खिए कालगए ? ।
तए णं से जिणपालिए अम्मापिऊणं लवणसमुद्दोत्तारणं च कालियवायसमुच्छणं[च]
पोयवहणविवत्तिं च फलहखंडआसायणं च रयणदीवुत्तारं च रयणदीवदेवया(गिहं)-
गेण्हि च भोगविभूइं च रयणदीवदेवयाअप्पाहणं च सूलोइयपुरिसदरिसणं च
सेलगजक्खआरुहणं च रयणदीवदेवयाउवसगं च जिणरक्खियविवत्तिं च लवण-
समुद्दउत्तरणं च चंपागमणं च सेलगजक्खआपुच्छणं च जहाभूमयवितहमसंदिद्धं
परिकहेइ । तए णं जिणपालिए जाव अप्पसोगे जाव विउलाइं भोगभोगाइं भुंजमाणे
विहरइ ॥ ९४ ॥ तेणं कालेणं तेणं समएणं समणे भगवं महावीरे (जाव जेणेव
चंपा न(ग)यरी जेणेव पुण्णभेइ उज्जाणे तेणेव) समोसठे (परिसा णिरगया कूणिओ
वि राया निग्गओ जिणपालिए) जाव धम्मं सोच्चा पव्वइए ए(क्का)गारसंग(विऊ)वी
मासिएणं भत्तेणं जाव अत्ताणं झुसेत्ता सोहम्मे कप्पे दो सागरोवमाइं ठिई प० । ताओ
आउक्खएणं ठिइक्खएणं भवक्खएणं अणंतरं चयं चइत्ता जेणेव महाविदेहे वासे
सिज्झिहिइ जाव अंतं काहिइ । एवामेव समणाउसो ! जाव माणुस्सए कामभोगे
नो पुणरवि आसाइ से णं जाव वीईवइस्सइ जहा व से जिणपालिए । एवं खलु
जंबू ! समणेणं भगवया महावीरेणं जाव संपत्तेणं नवमस्स नायज्जयणस्स अयमट्ठे
पन्नते त्तिवेमि ॥ ९५ ॥ गाहाओ-जह रयणदीवदेवी तह एत्थं अविरइ महापावा ।
जह लाहत्थी वणिगया तह सुहकामा इहं जीवा ॥ १ ॥ जह तेहिं भीएहिं दिट्ठो
आघायमंडले पुरिसो । संसारदुक्खमीया पासंति तहेव धम्मकहं ॥ २ ॥ जह
तेण तेसि कहिया देवी दुक्खाण कारणं घोरं । तत्तो विय नित्थारो सेलगजक्खाओ

नण्णतो ॥ ३ ॥ तह धम्मकही भव्वाण साहए दिट्ठअविरइसहावो । सयल्लदुहहेउभूओ विसया विरयंति जीवाणं ॥ ४ ॥ सत्ताणं दुहत्ताणं सरणं चरणं जिणिदपण्णत्तं । आणंदरूवनिव्वाणसाहणं तह य देसेइ ॥ ५ ॥ जह तेसिं तरियव्वो रुइसमुद्दो तहेव संसारो । जह तेसिं सणिहगमणं निव्वाणगमो तहा एत्थं ॥ ६ ॥ जह सेलग-पिट्ठाओ भट्ठो देवीइ मोहियमईओ । सावयसहस्सपउरम्मि सायरे पाविओ निहणं ॥ ७ ॥ तह अविरइइ नडिओ चरणत्तुओ दुक्खसावयाइण्णे । निवडइ अपारसंसार-सायरे दारुणसरूवे ॥ ८ ॥ जह देवीए अक्खोहो पत्तो सट्ठाण जीवियसुहाइं । तह चरणट्ठिओ साहू अक्खोहो जाइ निव्वाणं ॥ ९ ॥ **नवमं नायज्झयणं समत्तं ॥**

जइ णं भंते ! समणेणं० नवमस्स नायज्झयणस्स अयमट्ठे पन्नत्ते दसमस्स(०) के अट्ठे पन्नत्ते ? एवं खलु जंवू ! तेणं कालेणं तेणं समएणं रायगिहे (नामं) नयरे (हो) तत्थ णं रा० न० से० णा० रा० हो० तस्स णं रा० न० ब० उ० दि० एत्थ णं गु० णा० उ० हो० ते० का० ते० स० स० भ० म० पु० च० जाव जे० गु० उ० ते० स०) सामी समोसढे (प० नि० सेणिओ वि रा० नि० धम्मं सोच्चा प० प० तए णं) गोय(मसामी)मो (समणं ३) एवं वयासी-कहणं भंते ! जीवा वड्ढंति वा हायंति वा ? गोयमा ! से जहानामए बहुलपक्खस्स पाडिवयाचंदे पुणिण-माचंदं पणिहाय ही(णो)णे वण्णेणं हीणे सो(म)मयाए हीणे निदयाए हीणे कंतीए एवं दितीए जुतीए छायाए पभाए ओयाए ले(र)साए मंडलेणं । तयाणंतरे च णं बीया-चंदे प(पा)डिव(यं)याचंदं पणिहाय हीणतराए वण्णेणं जाव मंडलेणं । तयाणंतरे च णं तइयाचंदे बी(बिति)याचंदं पणिहाय हीणतराए वण्णेणं जाव मंडलेणं । एवं खलु एएणं कमेणं परिहायमाणे २ जाव अमाव(र)साचंदे चाउट्ठसिचंदं पणिहाय नट्ठे वण्णेणं जाव नट्ठे मंडलेणं । एवामेव समणाउसो ! जो अम्हं निग्गंथो वा निग्गंथी वा जाव पव्वइए समाणे हीणे खंतीए एवं मुत्तीए गुत्तीए अज्जवेणं मद्देवेणं लाघवेणं सच्चेणं तवेणं चियाए अकिंचणयाए बंभचेरवासेणं । तयाणंतरे च णं हीणे हीणतराए खंतीए जाव हीणतराए बंभचेरवासेणं । एवं खलु एएणं कमेणं परिहायमाणे २ नट्ठे खंतीए जाव नट्ठे बंभचेरवासेणं । से जहा वा सुक्कपक्खस्स पडिवयाचंदे अमावसा(ए)चंदं पणिहाय अहिए वण्णेणं जाव अहिए मंडलेणं । तयाणंतरे च णं बीयाचंदे पडिव-याचंदं पणिहाय अहिययराए वण्णेणं जाव अहिययराए मंडलेणं । एवं खलु एएणं कमेणं परि(वु)वड्ढेमाणे २ जाव पुणिणमाचंदे चाउट्ठसि चंदं पणिहाय पडिपुण्णे वण्णेणं जाव पडिपुण्णे मंडलेणं । एवामेव समणाउसो ! जाव पव्वइए समाणे अहिए खंतीए जाव बंभचेरवासेणं । तयाणंतरे च णं अहिययराए खंतीए जाव

चंभचेरवासेणं । एवं खलु एएणं कमेणं परिवड्ढमाणे २ जाव पडिपुण्णे वंभचेरवा-
सेणं । एवं खलु जीवा वड्ढंति वा हायंति वा । एवं खलु जंबू । समणेणं भगवया
महावीरेणं० दसमस्स नायज्झयणस्स अयमट्ठे पन्नत्ते त्ति बेमि ॥९६॥ गाहाओ-
जह चंदो तह साहू राहुवरोहो जहा तह पमाओ । वण्णाई गुणगणो जह तहा खमाई
समणधम्मो ॥ १ ॥ पुण्णो वि पइदिणं जह हायंतो सव्वहा ससी नस्से । तह
पुण्णचरित्तोऽवि हु कुसीलसंसग्गिमाईहिं ॥ २ ॥ जणियपमाओ साहू हायंतो
पइदिणं खमाईहिं । जायइ नट्ठचरित्तो तत्तो दुक्खाई पावेइ ॥ ३ ॥ हीणगुणो
वि हु होअं सुहगुरुजोगाइजणियसंवैगो । पुण्णसरूवो जायइ विवड्ढमाणो सस-
हरोव्व ॥ ४ ॥ **दसमं नायज्झयणं समत्तं ॥**

जइ णं भंते । समणेणं० दसमस्स नायज्झयणस्स अयमट्ठे पन्नत्ते एकारसमस्स(०)
के अट्ठे पन्नत्ते ? एवं खलु जंबू । तेणं काळेणं तेणं समएणं रायगिहे जाव गोयमे
(समणं ३) एवं वयासी-कहं णं भंते । जीवा आराहगा वा विराहगा वा भवंति ?
गोयमा । से जहानामए एगंसि समुद्धूलंसि दावद्वा नामं रुक्खा पन्नत्ता किण्ह-
जाव निउ(रं)रंबभूया पत्तिया पुप्फिया फलिया हरियगरेरिजमाणा सिरीए अईव
उवसोभेमाणा २ चिट्ठंति । जया णं दीविच्चगा ईसिं पुरेवाया पच्छावाया मंदावाया
महावाया वार्यंति तया णं बहवे दावद्वा रुक्खा पत्तिया जाव चिट्ठंति । अप्पेगइया
दावद्वा रुक्खा जुण्णा झोडा परिसडियपंडुपत्तपुप्फफला सुक्खरुक्खओ विव मिला-
यमाणा २ चिट्ठंति । एवामेव समणाउसो । (जे) जो अम्मं निग्गंथो वा २ जाव
पव्वइए समाणे बहूणं समणाणं ४ सम्मं सहइ जाव अहियासेइ बहूणं अन्नउत्थि-
याणं बहूणं गिहत्थाणं नो सम्मं सहइ जाव नो अहियासेइ एस णं मए पुरिसे
देसविराहए पन्नत्ते समणाउसो । जया णं सामुद्गा ईसिं पुरेवाया पच्छावाया मंदा-
वाया महावाया वार्यंति तया णं बहवे दावद्वा रुक्खा जुण्णा झोडा जाव मिलाय-
माणा २ चिट्ठंति । अप्पेगइया दावद्वा रुक्खा पत्तिया पुप्फिया जाव उवसोभेमाणा
२ चिट्ठंति । एवामेव समणाउसो । जो अम्मं निग्गंथो वा २ जाव पव्वइए समाणे
बहूणं अन्नउत्थि(याणं ब०)यगिहत्थाणं सम्मं सहइ बहूणं समणाणं ४ नो सम्मं सहइ
एस णं मए पुरिसे देसाराहए पन्नत्ते समणाउसो । जया णं नो दीविच्चगा नो सामु-
द्गा ईसिं (पुरेवाया) पच्छावाया जाव महावाया वार्यंति त(ए)या णं सव्वे दावद्वा
रुक्खा जुण्णा झोडा(०) । एवामेव समणाउसो । जाव पव्वइए समाणे बहूणं समणाणं
४ बहूणं अन्नउत्थियगिहत्थाणं नो सम्मं सहइ एस णं मए पुरिसे सव्वविराहए पन्नत्ते
समणाउसो । जया णं दीविच्चगा वि सामुद्गा वि ईसिं (पुरेवाया पच्छावाया) जाव

वायंति तथा णं सव्वे दावद्वा (रुक्खा) पत्तिया जाव चिट्ठंति । एवामेव समणाउसो ! जो अम्हं पव्वइए समाणे बहूणं समणाणं ४ बहूणं अन्नउत्थियगिहत्थाणं सम्मं सहइ एस णं मए पुरिसे सव्वआराहए पन्नत्ते (समणाउसो !) । एवं खलु गोयमा ! जीवा आराहगा वा विराहगा वा भवंति । एवं खलु जंबू ! समणेणं भगवया महावीरेण जाव संपत्तेणं एक्कारसमस्स अयमट्ठे पन्नत्ते तिबेमि ॥ ९७ ॥ गाहाओ-जह दावद्वातरुवगमेवं साहू जहेव दीविच्चा । वाया तह समगाइयसपक्खवयगाई दुसहाई ॥ १ ॥ जह सामुद्दवाया तहऽग्गतित्थाइकडुयवयगाई । कुसुमाइसंपया जह सिवमगाराहगा तह उ ॥ २ ॥ जह कुसुमाइविणासो सिवमगगविराहणा तहा नेया । जह दीववाउजोगे बहु इड्डी ईसि य अणिड्डी ॥ ३ ॥ तह साहम्मियवयणाण सहमाणाहणा भवे बहुया । इयराणमसहणे पुण सिवमगगविराहणा थोवा ॥ ४ ॥ जह जलहिवा-उजोगे थेविड्डी बहुयरा यऽणिड्डी य । तह परपक्खक्खमगे आराहणमीसि बहु य यरं ॥ ५ ॥ जह उभयवाउविरहे सव्वा तरुसंपया विणट्ठ ति । अनिमित्तोभयमच्छ-रुव्वे विराहणा तह य ॥ ६ ॥ जह उभयवाउजोगे सव्वसमिड्डी वणस्स संजाया । तह उभयवयणसहणे सिवमगगाराहणा वुत्ता ॥ ७ ॥ ता पुण्णसमणधम्माराहण-चित्तो सया महासत्तो । सव्वेण वि कीरंतं सहेज्ज सव्वं पि पडिक्कलं ॥ ८ ॥

एक्कारसमं नायज्झयणं समत्तं ॥

जइ णं भंते ! समणेणं जाव संपत्तेणं एक्कारसमस्स नायज्झयणस्स अयमट्ठे पन्नत्ते बारसमस्स णं (०) के अट्ठे पन्नत्ते ? एवं खलु जंबू ! तेणं कालेणं तेणं समएणं चंपा ना(मं)म नयरी । पुण्णभेइ उज्जाणे । जियसत्तू [नामं] राया (होत्था) । (तस्स णं जिय-सत्तुस्स रण्णो) धारिणी (नामं) देवी (होत्था अही० जाव सुह्वा) । (तस्स णं जि० र० पुत्ते धारिणीए अत्तए) अदीगसत्तू नामं कुमारो जुवराया वि होत्था । सुवुद्धी [नामं] अमच्चे जाव रज्जुगार्चितए [यावि होत्था जाव] समणोवासए (अ०) । तीसे णं चंपाए नयरीए बहिया उत्तरपुरत्थिमेणं एगे फरिहोदए यावि होत्था मेयवसारुहिरमं-सपूय-पडलपो बडे मयगकलेवरसंछन्ने अमणुच्चे [णं] वण्णेणं जाव फासेणं से जहानामए अहिमडेइ वा गोमडेइ वा जाव मयकुहियविणट्ठकिमिणवावण्णदुरभिगंधे किमिजा-लाउले संसत्ते असुइविगयवीभच्छदरिसणिज्जे । भवेयारुवे सिया ? नो इणट्ठे समट्ठे । एत्तो अणिट्ठतराए चेव जाव गंधेणं पन्नत्ते ॥ ९८ ॥ तए णं से जियसत्तू राया अन्नया कयाइ ण्हाए अप्पमहग्वाभरणालंकियसरीरे बहूहिं(रा)ईसर जाव सत्थ-वाहपभि(ति)ईहिं सडि[भोयणमंडवंसि]भोयणवेलाए सुहासणवरगए विउलं असणं ४ जाव विहरइ जिमियभुत्तुतरागए जाव सुइभूए तंसि विपुलंसि अस(ण)णंसि ४ जाव

जायविम्हए ते बहवे ईसर जाव पभिइए एवं वयासी-अहो णं देवाणुप्पिया ! इमे मणुञ्जे असणं ४ वण्णेणं उववेए जाव फासेणं उववेए अस्सायणिज्जे वि(स्)सायणिज्जे पीणणिज्जे दीवणिज्जे दप्पणिज्जे मयणिज्जे विंहणिज्जे सव्विदियगायपल्हायणिज्जे । तए णं ते बहवे ईसर जाव पभियओ जियसत्तुं एवं वयासी-तहेव णं सामी ! जणं तुब्भे वयह-अहो णं इमे मणुञ्जे अस(णं)णे ४ वण्णेणं उववेए जाव पल्हायणिज्जे । तए णं जियसत्तु सुबुद्धिं अमच्चं एवं वयासी-अहो णं सुबुद्धी ! इमे मणुञ्जे असणे ४ जाव पल्हायणिज्जे । तए णं सुबुद्धी जियसत्तुस्स [रज्जो] एयमट्ठं नो आढाइ जाव तुस्सिणीए संचिट्ठइ । [तए णं जियसत्तु सुबुद्धिं दोच्चंपि तच्चंपि एवं वयासी-अहो णं सुबुद्धी ! इमे मणुञ्जे तं चेव जाव पल्हायणिज्जे ।] तए णं (जियसत्तुणा) से सुबुद्धी [अमच्चे] दोच्चंपि तच्चंपि एवं वुत्ते समाणे जियसत्तुं रायं एवं वयासी-नो खलु सामी ! अ(हं)म्हं एयंति मणुञ्जंस्सि असणंस्सि ४ केइ विम्हए । एवं खलु सामी ! सु(ब्भि)रभिसद्दा वि पो(पु)ग्गला दुरभिसद्दाए परिणमंति दुरभिसद्दा वि पोग्गला सुरभिसद्दाए परिणमंति । सुरुवा वि पोग्गला दुरुवत्ताए परिणमंति दुरुवा वि पोग्गला सुरुवत्ताए परिणमंति । सुरभिगंधा वि पोग्गला दुरभिगंधत्ताए परिणमंति दुरभिगंधा वि पोग्गला सुरभिगंधत्ताए परिणमंति । सुरसा वि पोग्गला दुरसत्ताए परिणमंति दुरसा वि पोग्गला सुरसत्ताए परिणमंति । सुहफासा वि पोग्गला दुहफासत्ताए परिणमंति दुहफासा वि पोग्गला सुहफासत्ताए परिणमंति । पओगवीससा-परिणया वि य णं सामी । पोग्गला पन्नत्ता । तए णं(से)जियसत्तु सुबुद्धिस्स अमच्चस्स एवमाइक्खमाणस्स ४ एयमट्ठं नो आढाइ नो परियाणइ तुस्सिणीए संचिट्ठइ । तए णं से जियसत्तु अन्नया कयाइ ण्हाए आसखंधवरगए महया-भडचडगर(ह)आसवाहणियाए निजायमाणे तस्स फरिहोद(ग)यस्स अदूरसामंतेणं वीईवयइ । तए णं जियसत्तु (राया) तस्स फरिहोदगस्स असुभेणं गंधेणं अभिभूए समाणे सएणं उत्तरिज्ज(गे)एणं आसगं पिहेइ एगंतं अवक्कमइ (ते) २ ता बहवे ईसर जाव पभिइओ एवं वयासी-अहो णं देवाणुप्पिया ! इमे फरिहोदए अमणुञ्जे वण्णेणं ४ से जहानामए अहिमडेइ वा जाव अमणा-मतराए चेव । तए णं ते बहवे राईसर जाव पभियओ एवं वयासी-तहेव णं तं सामी । जं णं तुब्भे एवं वयह-अहो णं इमे फरिहोदए अमणुञ्जे वण्णेणं ४ से जहानामए अहिमडेइ वा जाव अमणामतराए चेव । तए णं से जियसत्तु सुबुद्धिं अमच्चं एवं वयासी-अहो णं सुबुद्धी ! इमे फरिहोदए अमणुञ्जे वण्णेणं ४ से जहानामए अहिमडेइ वा जाव अमणामतराए चेव । तए णं(से)सुबुद्धी अमच्चे जाव तुस्सिणीए संचिट्ठइ । तए णं से जियसत्तु राया सुबुद्धिं अमच्चं दोच्चंपि तच्चंपि एवं वयासी-

अहो णं तं चेव । तए णं से सुबुद्धी अमच्चे जियसत्तुणा रत्ता दोच्चंपि तच्चंपि एवं
 वुत्ते समाणे एवं वयासी-नो खलु सामी ! अम्हं एयंसि फरिहोदगंसि केइ विम्हए ।
 एवं खलु सामी ! सुरभिसद्दा वि पोगगला दुब्भिसद्दाए परिणमंति तं चेव जाव
 पभोगवीससापरिणया वि य णं सामी ! पोगगला पन्नत्ता । तए णं जियसत्तू(राया)
 सुबुद्धिं (अमच्चे) एवं वयासी-मा णं तुमं देवाणुप्पिया ! अप्पाणं च परं च तदुभयं
 च बहूहि य असब्भावुच्चावणाहिं मिच्छताभिनिवेसेण य वुग्गाहेमाणे वुप्पाएमाणे
 विहराहि । तए णं सुबुद्धिस्स इमेयारुवे अज्झत्थिए० समुप्पजित्था-अहो णं
 जियसत्तू संते तच्चे तहिए अवित्ते सच्चूए जिणपन्नत्ते भावे नो उवल्लभइ । तं
 सेयं खलु मम जियसत्तुस्स रत्तो संताणं तच्चाणं तहियाणं अवितहाणं सच्चूयाणं
 जिणपन्नत्ताणं भावाणं अभिगमणट्टयाए एयमट्ठं उवा(इ)यणावेत्तए । एवं संपेहेइ २
 ता पच्चइएहिं पुरिसेहिं सद्धिं अंतरावणाओ नवए घड(य)ए य पडए य(प)गेण्हइ
 २ ता संज्ञाकालसमयंसि पविरलमणुस्संसि निसंतपडिनिसंतंसि जेणेव फरिहोदए
 तेणेव उवाग(ए)च्छइ २ ता तं फरिहोदगं गेण्हावेइ २ ता नवएसु घडएसु गालावेइ
 २ ता नवएसु घडएसु पक्खिवावेइ २ ता [सज्जखारं पक्खिवावेइ] लल्लियमुद्धिए
 का(क)रावेइ २ ता सत्तरत्तं परिवसावेइ २ ता दोच्चंपि नवएसु घडएसु गालावेइ २
 ता नवएसु घडएसु पक्खिवावेइ २ ता सज्ज(क)खारं पक्खिवावेइ २ ता लल्लियमुद्धिए
 का(र)रावेइ २ ता सत्तरत्तं परिवसावेइ २ ता तच्चंपि नवएसु घडएसु जाव संवसा-
 वेइ । एवं खलु एएणं उवाएणं अंतरा गा(ग)लावेमाणे अंतरा पक्खिवावेमाणे
 अंतरा य (विपरि)वसावेमाणे (२) सत्तसत्त[य]राइंदिया[इं](वि)परिवसावेइ । तए
 णं से फरिहोदए सत्त(म)मंसि सत्तयंसि परिणममाणंसि उदगरयणे जाए यावि होत्था
 अच्छे पत्थे जच्चे तणुए फालिय(फलिह)वण्णाभे वण्णेणं उव्वेए ४ आसायणिजे जाव
 सव्विदियगायपल्हायणिजे । तए णं सुबुद्धी(अमच्चे)जेणेव से उदगरयणे तेणेव उवा-
 गच्छइ २ ता करयलंसि आसादेइ २ ता तं उदगरयणं वण्णेणं उव्वेयं ४ आसा-
 यणि(जे)जं जाव सव्विदियगायपल्हायणिजं जाणित्ता हट्टुट्ठे बहूहि उदगसंभा-
 रणिजेहिं दव्वेहिं संभारेइ २ ता जियसत्तुस्स रत्तो पाणियघरियं सद्दावेइ २ ता
 एवं वयासी-तुमं (च) णं देवाणुप्पिया ! इमं उदगरयणं गेण्हाहि २ ता जियसत्तुस्स
 रत्तो भोयणवेलाए उव्वेज्जासि । तए णं से पाणियघरिए सुबुद्धि(य)स्स एयमट्ठं
 पडिउणेइ २ ता तं उदगरयणं गेण्ह(गिण्हा)इ २ ता जियसत्तुस्स रत्तो भोयणवेलाए
 उव्वट्ठवेइ । तए णं से जियसत्त राया तं विपुलं असणं ४ आसाएमाणे जाव विहइ
 जिमियभुत्तुत्तरा(यया)गए वि य णं जाव परमसुडभूए तंसि उदगरय(णे)णंसि जाय-

विम्हए ते बहवे राईसर जाव एवं वयासी-अहो णं देवाणुप्पिया ! इमे उदगरयणे
अच्छे जाव सर्व्वदियगायपल्हायणिजे । तए णं [ते] बहवे राईसर जाव एवं वयासी-
तहेव णं सामी ! जणं तुब्भे वयह जाव एवं चेव पल्हायणिजे । तए णं जियसत्तू राया
पाणियघरियं सद्दवेइ २ ता एवं वयासी-एस णं तु(ब्भे)मे देवाणुप्पिया ! उदगरयणे
कओ आसाइए ? । तए णं से पाणियघरिए जियसत्तुं एवं वयासी-एस णं सामी !
मए उदगरयणे सुबुद्धिस्स अंतियाओ आसाइए । तए णं जियसत्तू (राया) सुबुद्धि
अमच्चं सद्दवेइ २ ता एवं वयासी-अहो णं सुबुद्धी ! केणं कारणेणं अहं तव अणिट्ठे
५ जेणं तुमं मम कल्लकल्लिं भोयणवेलाए इमं उदगरयणं न उवट्ठवेसि ? तं एस(तए)
णं तुमे देवाणुप्पिया ! उदगरयणे कओ उवलद्धे ? । तए णं सुबुद्धी जियसत्तुं एवं
वयासी-एस णं सामी ! से फरिहोदए । तए णं से जियसत्तू सुबुद्धि एवं वयासी-
केणं कारणेणं सुबुद्धी ! एस से फरिहोदए ? तए णं सुबुद्धी जियसत्तुं एवं वयासी-
एवं खलु सामी ! तु(म्हे)ब्भे तया मम एवमाइक्खमाणस्स ४ एयमट्ठं नो सद्दहह ।
ताए णं मम इमेयारूवे अज्झत्थिए०-अहो णं जियसत्त संते जाव भावे नो सद्दहइ नो
पत्तियइ नो रोएइ । तं सेयं खलु म(मं)म जियसत्तुस्स रत्तो संताणं जाव सम्भूयाणं
जिणपन्नत्ताणं भावाणं अभिगमणट्ठयाए एयमट्ठं उवायणावेत्तए । एवं संपेहेमि २
ता तं चेव जाव पाणियघरियं सद्दवेमि २ ता एवं वदामि-तुमं णं देवाणुप्पिया !
उदगरयणं जियसत्तुस्स रत्तो भोयणवेलाए उवणेहि । तं एएणं कारणेणं सामी !
एस से फरिहोदए । तए णं जियसत्तू राया सुबुद्धिस्स(अमच्चस्स)एवमाइक्खमाणस्स
४ एयमट्ठं नो सद्दहइ ३ असद्दहमाणे अपत्तियमाणे अरो(य)एमाणे अब्भितर(ट्ठा)-
ठाणिजे पुरिसे सद्दवेइ २ ता एवं वयासी-गच्छह णं तुब्भे देवाणुप्पिया ! अंतराव-
णाओ नव[ए]घडए पडए य गेण्हह जाव उदगसं(हा)भारणिजेहिं दव्वेहिं संभारेह ।
तेवि तहेव संभारेंति २ ता जियसत्तुस्स उवणेंति । तए णं से जियसत्तू राया
तं उदगरयणं करयलंसि आसाइए आसायणिजं जाव सर्व्वदियगायपल्हायणिजं
जाणिता सुबुद्धिं अमच्चं सद्दवेइ २ ता एवं वयासी-सुबुद्धी ! एए णं तुमे संता तच्चा
जाव सम्भूया भावा कओ उवलद्धा ? । तए णं सुबुद्धी जियसत्तुं एवं वयासी-एए
णं सामी ! मए संता जाव भावा जिणवयणाओ उवलद्धा । तए णं जियसत्त सुबुद्धि
एवं वयासी-तं इच्छामि णं देवाणुप्पिया । तव अंतिए जिणवयणं निसा(मे)मित्तए ।
ताए णं सुबुद्धी जियसत्तुस्स विचित्तं केवलपन्नत्तं चाउज्जामं धम्मं परिकहेइ तमाइ-
क्खइ जहा जीवा बज्झंति जाव पंचाणुव्वयाइ । तए णं जियसत्तू सुबुद्धिस्स अंतिए
धम्मं सोच्चा निसम्म हट्ठं सुबुद्धिं अमच्चं एवं वयासी-सद्दहामि णं देवाणुप्पिया !

निगमं पावयणं ३ जाव से जहेयं तुब्भे वयह । तं इच्छामि णं तव अंतिए पंचा-
 णुव्वइयं सत्तसिक्खावइयं जाव उवसेपजित्ताणं विहरित्तए । अहासुहं देवाणुप्पिया ।
 मा पडिबधं (करेह) । तए णं से जियसत्तु सुबुद्धिस्स (अमच्चस्स) अंतिए पंचाणु-
 व्वइयं जाव दुवालसविहं सावयधम्मं पडिबजइ । तए णं जियसत्तु समणोवासए जाए
 अ(मि)हिगयजीवाजीवे जाव पडिलामेमाणे विहरइ । तेणं कालेणं तेणं समएणं
 (थेरा जेणेव चंपा नयरी जेणेव पुण्णमंदं उज्जाणे तेणेव स०) थेरागमणं । जियसत्त
 राया सुबुद्धी य निगमच्छइ । सुबुद्धी धम्मं सोचा जं नवरं जियसत्तुं आपुच्छामि
 जाव पव्वयामि । अहासुहं देवाणुप्पिया । तए णं [से] सुबुद्धी जेणेव जियसत्त तेणेव
 उवागच्छइ २ ता एवं वयासी-एवं खलु सामी । मए थेराणं अंतिए धम्मं निसेते ।
 से(ऽ)वि य धम्मं इच्छि(य)ए पडिच्छिए ३ । तए णं अहं सामी । संसारभउव्विगगे
 भीए जाव इच्छामि णं तुब्भेहिं अवमणुच्चाए (स०) जाव पव्वइत्तए । तए णं
 जियसत्तु सुबुद्धिं एवं वयासी-अ(च्छ)-च्छसु ताव देवाणुप्पिया । कइवयाइं वासाइं
 उरालाई जाव भुंजमाणा । तओ पच्छा एगयओ थेराणं अंतिए मुंडे भविता जाव
 पव्वइस्सामी । तए णं सुबुद्धी जियसत्तुस्स रत्तो एयमट्ठं पडिसुणेइ । तए णं तस्स
 जियसत्तुस्स रत्तो सुबुद्धिणा सद्धिं विपुळाई माणुस्सगाई जाव पच्चणुव्वभवमाणस्स
 दुवालस वासाइं वीःकंताइं । तेणं कालेणं तेणं समएणं थेरागमणं । (तए णं) जिय-
 सत्त धम्मं सोचा एवं जं नवरं देवाणुप्पिया । सुबुद्धिं आमतेमि जेट्टपुत्तं रजे ठा(ठ)-
 वेमि तए णं तुब्भं [अंतिए] जाव पव्वयामि । अहासुहं देवाणुप्पिया । तए णं
 जियसत्तु राया जेणेव सए गिहे तेणेव उवागच्छइ २ ता सुबुद्धिं सदावेइ २ ता
 एवं वयासी-एवं खलु मए थेराणं जाव पव्व(जा)यामि, तुमं णं किं करेसि ? । तए
 णं सुबुद्धी जियसत्तुं एवं वयासी जाव के अत्ते आ(हा)वारे वा जाव प(व्वया)व्वामि ।
 तं जइ णं देवाणुप्पिया । जाव प(व्वयह)व्वहि । गच्छह णं देवाणुप्पिया । जेट्टपुत्तं च
 कुडुंवे ठावेहि २ ता सीयं दुहहिताणं ममं अंतिए सीया जाव पाउव्व(वेति)वइ ।
 (त० सु० जाव पाउव्ववइ) तए णं जियसत्तु कोडुंविग्रपुरिसे सदावेइ २ ता एवं
 वयासी-गच्छह णं तुब्भे देवाणुप्पिया । अरीणसत्तुस्स कुमारस्स रायाभिसेयं उव-
 ट्ठवेह जाव अभिसिंयंति जाव पव्वइए । तए णं जियसत्तु एक्कारस अंगाई अहिज्जइ
 बहूणि वासाणि परियाओ(पाउणिता)मासियाए संलेहणाए जाव सिद्धे । तए णं सुबुद्धी
 एक्कारस अंगाई अहिजित्ता बहूणि वासाणि जाव सिद्धे । एवं खलु जंबू ! समणेणं
 भगवया महावीरेणं जाव संपत्तेणं वारसमस्स नायज्झयणस्स अयमट्ठे पज्जेत्ते त्ति
 वेमि ॥ ९९ ॥ गाहा-भिच्छत्तमोहियमणा पावपसत्तावि पाणिणो विगुणा । फरिहो-
 दगं व गुणिणो हवंति वरगुरुपसायाओ ॥ १ ॥ वारसमं नायज्झयणं समत्तं ॥

जइ णं भंते ! समणेणं जाव संपत्तेणं बारसमस्स (णा०) अयमट्ठे पन्नते तेरस-
मस्स (णं भंते ! नाय०) के अट्ठे पन्नते ? एवं खलु जंबू ! तेणं कालेणं तेणं समएणं
रायगिहे नयरे(०) गुणसिलए उज्जाणे (ते० का० ते० स० समणे ३ चउ(इ)दसहिं
समणसाहस्सीहिं जाव सद्धिं पु० च० जाव जे० गु० उ० ते० स० अ० उ० सं०
त० अ० भा० विहरइ) समोसरणं परिसा निगगया । तेणं कालेणं तेणं समएणं
सोहम्मं कप्पे दहुरवडिंसए विमाणे सभाए सुहम्माए दहुरंसि सीहासणंसि दहुरे देवे
चउहिं सामाणियसाहस्सीहिं चउहिं अगमहिंसीहिं सपरिसाहिं एवं जहा सु(स)रिया-
(भो)भे जाव दिव्वाइं भोगभोगाइं भुंजमा(णो)णे विहरइ इमं च णं केवलकप्पं जंबु-
द्दीवं दीवं विउलेणं ओहिणा आभोएमाणे २ जाव नट्ठविहिं उवदंसित्ता पडिगए जहा
सूरियाभे । भंते(ति) ! त्ति भगवं गोयमै समणं ३ वंदइ नमंसइ वं० २ ता एवं वयासी-
अहो णं भंते ! दहुरे देवे महिद्धिए ६ । दहुरस्स णं भंते ! देवस्स सा दिव्वा
देविद्धी ३ कहिं गया ? कहिं (अणु)पविट्ठा ? गोयमा ! सरीरं गया सरीरं अणु-
पविट्ठा कूडागारदिट्ठंतो । दहुरेणं भंते ! देवेणं सा दिव्वा देविद्धी ३ किंश लद्धा
जाव अभिसमन्नागया ? एवं खलु गोयमा ! इहेव जंबुद्दीवे २ भारहे वासे रायगिहे
गुणसिलए उज्जाणे सेणिए राया । तत्थ णं रायगिहे नंदे नामं मणियारसेट्ठी परिव-
सइ अट्ठे दित्ते० । तेणं कालेणं तेणं समएणं अहं गोयमा ! समोस(ढे)ट्ठे परिसा
निगगया सेणिए वि(राया) निगगए । तए णं से नंदे मणियारसेट्ठी इमीसे कहाए लद्धट्ठे
समाणे ण्हाए पायचारेणं जाव पज्जुवासइ । नंदे धम्मं सोच्चा समणोवासए जाए ।
तए णं अहं रायगिहाओ पडिनिक्खंते बहिया जणवयविहारं विहरामि । तए णं से
नं(दे)दमणियारसेट्ठी अन्नया कयाइ असाहुदंसणेण य अपज्जुवासणाए य अणुणुसा-
सणाए य असुस्सुसणाए य सम्मतपज्जवेहिं परिहायमाणेहिं २ मिच्छतपज्जवेहिं परि-
वट्ठमाणेहिं २ मिच्छतं विप्पडिबन्ने जाए यावि होत्था । तए णं नंदे मणियारसेट्ठी
अन्नया [कयाइ] गिम्हकालसमयंसि जेट्ठामूलंसि मासंसि अट्ठमभत्तं परिगेण्हइ २ ता
पोसहसालाए जाव विहरइ । तए णं नंदस्स अट्ठमभत्तंसि परिणममाणंसि तण्हाए
छुहाए य अभिभयस्स समाणस्स इमेयारुवे अज्झत्थिए०-धज्जा णं ते जाव ईसर-
पभियओ जेसिं णं रायगिहस्स बहिया बट्ठओ वावीओ पोक्ख(र)णिणीओ जाव सर-
सरपंतियाओ जत्थ णं बहुजणो ण्हाइ य पियइ य पाणियं च संवहइ । तं सेयं खलु
म(मं)म कळं (पाउ०) सेणियं रायं आपुच्छित्ता रायगिहस्स बहिया उत्तरपुरत्थिमे
दिसीभा(ए)गे वे [ब]भारपव्वयस्स अदूरसामंते वत्थुपाङ्गरोइयंसि भूमिभागंसि(जाव)
नंदं पोक्खरिणि खणावेत्तए-तिकट्ठु एवं संपेहेइ २ ता कळं जाव पोसहं पारेइ २ ता

ण्हाए मित्तनाइ जाव संपरिवुडे महत्थं जाव पाहुडं रायारिहं गेण्हइ २ ता जेणेव
 सेणिए राया तेणेव उवागच्छइ जाव पाहुडं उवट्ठवेइ २ ता एवं वयासी-इच्छामि
 णं सामी । तुब्भेहिं अब्भणुजाए समाणे रायगिहस्स बहिया जाव खणावेत्तए ।
 अहासुहं देवाणुप्पिया (!) । तए णं[से]नंदे सेणिएणं रत्ता अब्भणुजाए समाणे हट्ठउट्ठे
 रायगिहं [नगरं] मज्झिमज्जेणं निगच्छइ २ ता वत्थुपाठयरोइयंसि भूमिभागंसि नंदं
 पोक्खरणिं खणा(वि)वेउं पयत्ते यावि होत्था । तए णं सा नंदा पोक्खरणी अणुपु-
 व्वेणं ख(ण)म्ममाणा २ पोक्खरणी जाया यावि होत्था चाउक्कोणा समतीरा अणु-
 पु(व्व)व्वं सुजायवप्पसीयलज्जला संछन्नपत्त(वि)भिससुणाला बहु[उ]प्पलपउमकुमुद-
 नलि(णि)णसुभगसोगंधियपुंडरीयमहापुंडरीयसयपत्तसहस्सपत्त(पफुल्ल)पुप्फफलकेस-
 रोववेया परिहत्थभमंतमतत्तप्पयअणेगसउणगणमिहुणवियरियस(हुच्च)दनइयमहुरस-
 रनाइया पासाइया ४ । तए णं से नंदे मणियारसेट्ठी नंदाए पोक्खरिणीए चउदिसिं
 चत्तारि वणसंडे रोवावेइ । तए णं ते वणसंडा अणुपुव्वेणं सारक्खिज्जमाणा संगो-
 विज्जमाणा (य) संवट्ठि(य)ज्जमाणा य (से) वणसंडा जाया किण्हा जाव नि(कु)उरंब-
 भूया पत्तिया पुप्फिया जाव उवसोभेमाणा २ चिट्ठंति । तए णं नंदे पुरत्थिमिल्ले
 वणसंडे एगं महं चित्तसभं करावेइ [२] अणेगखंभसयसंनिविट्ठं पासाइयं ४ । तत्थ
 णं बहूणि किण्हाणि य जाव सुक्किलाणि य कट्ठकम्माणि य पोत्थकम्माणि य चित्त(०)-
 ले(लि)प्प(०)गंधिमवेदिमपूरिमसंघाइ(म०)माइं उवदंसिज्जमाणाइं २ चिट्ठंति । तत्थ
 णं बहूणि आसणाणि य सयणाणि य अत्थुयपच्चत्थुयाइं चिट्ठंति । तत्थ णं बहवे नडा
 य नट्ठा य जाव दिन्नभइभत्तवेयणा तालायरकम्मं करेमाणा विहरंति । रायगिहवि-
 णिग्गओ(य) त(ज)त्थ [णं] ब(हू)हुजणो तेसु पुव्वन्नत्थेसु आसणसयणेषु संनिसण्णो
 य संतुयट्ठो य सुणमाणो य पेच्छमाणो य सा(सो)हेमाणो य सुहंसुहेणं विहरइ । तए
 णं नंदे दाहिणिल्ले वणसंडे एगं महं महाणससालं कारावेइ अणेगखंभ जाव रूवं । तत्थ
 णं बहवे पुरिसा दिन्नभइभत्तवेयणा विउलं असणं ४ उवक्खंडेति बहूणं समणमाहण-
 अति(ही)हिकिण्वणवणीमगाणं परिभाएमाणा २ विहरंति । तए णं नंदे मणियारसेट्ठी
 पच्चत्थिमिल्ले वणसंडे एगं महं ति(ते)गिच्छियसालं क(रे)रावेइ अणेगखंभसय जाव
 पडिरूवं । तत्थ णं बहवे वेजा य वेज्जपुत्ता य जाणया य जाणयपुत्ता य कुसला य
 कुसलपुत्ता य दिन्नभइभत्तवेयणा बहूणं वाहिया(णं)ण य गिलाणाण य रोगियाण य
 दुब्बलाण य तेइ(च्छं)च्छकम्मं करेमाणा विहरंति । अने य त(ए)त्थ बहवे पुरिसा
 दिन्नभइ० तेसिं बहूणं वाहियाण य रोगि(०)यगिला(०)णदुब्बलाण य ओसहभेस-
 ज्जभत्तपाणेणं पडियारकम्मं करेमाणा विहरंति । तए णं नंदे उत्तरिल्ले वणसंडे एगं

महं अलंकारियसभं कारेइ अणेगखंभसय जाव पडिरुवं । तत्थ णं बहवे अलंकारि-
य(पुरिसा)मणुस्सा दिन्नभइभत्त(वेय)पाणा बहूणं समणाण य [माहाणाण य सनाहाण
य] अणाहाण य गिलाणाण य रोगियाण य दुब्बलाण य अलंकारियकम्मं करेमाणा
२ विहरंति । तए णं तीए नंदाए पोक्खरिणीए बहवे सणाहा य अणाहा य पंथिया
य पहिया य करोडिया य (कारिया०) त(णा)णहारा पत्तहारा कट्टहारा अप्पेगइया
ण्हायंति अप्पेगइया पाणियं पियंति अप्पेगइया पाणियं संवहंति अप्पेगइया विस-
जियसेयजल्लमलपरिस्समनिद्वुप्पिवासा सुहंसुहेणं विहरंति । रायगिह(वि)निग्गओ
वि ए(ज)त्थ बहुजणो किं ते जलरमणविविहमज्जणकयलिलया(घ)हरयकुसुमसत्थर-
यअणेगसउणगण(रु)कयरिभियसंकुलेसु सुहंसुहेणं अभिरममाणो २ विहरइ । तए णं
नंदाए पोक्खरिणीए बहुजणो ण्हायमाणो य पीयमाणो य पाणियं च संवहमाणो य
अन्नमन्नं एवं वयासी-धन्ने णं देवाणुप्पिया ! नंदे मणियारसेट्ठी कयत्थे जाव जम्म-
जीवियफले जस्स णं इमेयारूवा नंदा पोक्खरिणी चाउक्कोणा जाव पडिरूवा जस्स
णं पुरत्थिमिल्ले तं चेव सव्वं चउसु वि वणसंडेसु जाव रायगिहविणिग्गओ जत्थ बहु-
जणो आसणेसु य सयणेसु य सन्निसण्णो य संतुयट्ठे य पेच्छमाणो य साहेमाणो य
सुहंसुहेणं विहरइ । तं धन्ने कयत्थे [कयलक्खणे] कयपुण्णे कया णं लोया(!) सुलद्धे
माणुस्सए जम्मजीवियफले नंदस्स मणियारस्स । तए णं रायगिहे सिं(सं)घाडग जाव
बहुजणो अन्नमन्नस्स एवमाइक्खइ ४-धन्ने णं देवाणुप्पिया ! नंदे मणियारे सो चेव
गमओ जाव सुहंसुहेणं विहरइ । तए णं से नंदे मणियारे बहुजणस्स अंतिए एय-
मट्ठं सोच्चा निसम्म हट्ठुट्ठे धाराहयक(लं)यंब(गं)कं पिव समूस(सि)वियरोमकूवे
परं सायासोक्खमणुभ(व)वेमाणे विहरइ ॥ १०० ॥ तए णं तस्स नंदस्स मणिया-
रसेट्ठिस्स अज्या कयाइ सरीरगंसि सोलस रोयायंका पाउब्भूया तंजहा-सासे कासे
जरे दाहे कुच्छिसूले भगंदरे । अरिसा अजीरए दि(ट्ठि)ट्ठीमुद्धसूले अ(गा)कारए
॥ १ ॥ अच्छवेयणा कण्णवेयणा कंहु दउदरे कोडे ॥ तए णं से नंदे मणियारसेट्ठी
सोलसहिं रोयायंकेहिं अभिभूए समाणे कोडुंबियपुरिसे सहावेइ २ ता एवं वयासी-
गच्छह णं तुब्भे देवाणुप्पिया ! रायगिहे नयरे सिंघाडग जाव(म०)पहेसु महया [२]
सहेणं उग्घोसेमाणा २ एवं वयह-एवं खलु देवाणुप्पिया ! नंदस्स मणियार(सेट्ठि)स्स
सरीरगंसि सोलस रोयायंका पाउब्भूया तंजहा-सासे जाव कोडे । तं जो णं इच्छइ
देवाणुप्पिया ! वि(वे)जो वा विज्जपुत्तो वा जाणुओ वा २ कुसलो वा २ नंदस्स
मणियारस्स तेसिं च णं सोलसण्हं रोयायंकाणं एगमवि रोयायंके उवसा(मे)मिताए
तस्स णं (दे०)नंदे मणियारे विउलं अत्थसंपयाणं दलयइ-तिकट्ठु दोच्चंपि तच्चंपि

ओसणं घोसेह २ ता एयमाणत्तियं पच्चप्पिणह तेवि तहेव पच्चप्पिणंति । तए णं रायगिहे इमेयारूवं घोसणं सोच्चा निसम्म बहवे वेज्जा य वेज्जपुत्ता य जाव कुसल-
पुत्ता य सत्थकोसहत्थगया य (कोसगपायहत्थगया य) सिलियाहत्थगया य गुलि-
याहत्थगया य ओसहभेसज्जहत्थगया य सएहिं २ गिहेहिंतो निक्खमंति २ ता रायगिहं मज्झमज्जेणं जेणेव नंदस्स मणियारसेट्ठिस्स गिहे तेणेव उवागच्छंति २ ता नंदस्स मणियारस्स सरी(रं)रगं पासंति [२] तेसिं रोयायंकाणं नियाणं पुच्छंति [२ ता] नंदस्स मणियारस्स बहूहिं उव्वलणेहि य उव्वट्टणेहि य सिणेहपाणेहि य वमणेहि य विरेयणेहि य सेयणेहि य अवदहणेहि य अवणहा[व]णेहि य अणुवास(णे)-
णाहि य ब(व)त्थिकम्ममेहि य निरुहेहि य सिरावेहेहि य तच्छणाहि य पच्छणाहि य सिरा(वेढे)वत्थीहि य तप्पणाहि य पु(ढ)डवाएहि य छल्लीहि य वल्लीहि य मूलेहि य कंदेहि य पत्तेहि य पुप्फेहि य फलेहि य बीएहि य सिलियाहि य गुलियाहि य ओसहेहि य भेसज्जेहि य इच्छंति तेसिं सोलसण्हं रोयायंकाणं एगमवि रोयायंके उव्वसामित्तए नो चेव णं संचाएंति उव्वसामेतए । तए णं ते बहवे विज्जा य ६ जाहे नो संचाएंति तेसिं सोलसण्हं रो(गा)यायंकाणं एगमवि रोयायंके उव्वसामित्तए ताहे संता तंता जाव पडिगया । तए णं नंदे [मणियारे] तेहिं सोलसेहिं रोयायंकेहिं अभि-
भूए समाणे नंदा[ए] पु(पो)क्खरिणीए मुच्छिए ४ तिरिक्खजोणिएहिं निबद्धाउए बद्धपएसिए अट्टदुहट्टवसट्ठे कालमासे कालं किच्चा नंदाए पोक्खरिणीए दडुरीए कुच्छिसि दडुरत्ताए उव्वचे । तए णं नंदे दडुरे गब्भाओ वि(णिम्मु)प्पमुक्के समाणे उ(म्)मु-
क्कबालभावे विज्ञायपरिणयमित्ते जोव्वणगमण[त्त]पत्ते नंदाए पोक्खरिणीए अभिरममाणे २ विहरइ । तए णं नंदाए पोक्खरिणीए बहुज(णे)णो ण्हायमाणो य पिय(माणो)इ य पाणियं च संवहमाणो(य)अन्नम(जस्स)जं एवमाइक्खइ ४-धत्ते णं देवाणुप्पिया ! नंदे मणियारे जस्स णं इमेयारूवा नंदा पुक्खरिणी चाउक्कोणा जाव पडिरूवा जस्स णं पुरत्थिमिट्ठे वणसंडे चित्तसभा अणेगखंम(०)तहेव चत्तारि स(हा)भाओ जाव जम्मजीवियफले । तए णं तस्स दडुरस्स तं अभिक्खणं २ बहुजणस्स अंतिए एयमट्ठं सोच्चा निसम्म इमेयारूवे अज्झत्थिए० समुप्पज्जित्था-से कहिं मच्चे मए इमेयारूवे सहे निसंतपुव्वे-त्तिकट्टु सुभेणं परिणामेणं जाव जाईसरणे समुप्पजे पुव्वजाई सम्मं समागच्छइ । तए णं तस्स दडुरस्स इमेयारूवे अज्झत्थिए०-एवं खलु अहं इहेव रायगिहे नयरे नंदे नामं मणियारे अट्ठे० । तेणं कालेणं तेणं समएणं समणे भगवं महावीरे [इह]समोसट्ठे । तए णं [मए]समणस्स ३ अंतिए पंचाणुव्वइए सत्तसिक्खा-
वइए जाव पडिवजे । तए णं अहं अन्नया कयाइ असाहुदंसणेण य जाव मिच्छंतं

विप्वडिवन्ने । तए णं अहं अन्नया कया(इं)इं नि(म्हे)म्हकालसमयंसि जाव उवसंप-
ज्जित्ताणं विहरामि-एवं जहेव चिंता आपुच्छणा नंदापुक्खरिणी वणसंडा सहाओ तं
चेव सव्वं जाव नंदाए (पु(पो)क्ख०) दहुरत्ताए उववन्ने । तं अहो णं अहं अहन्ने
अपुण्णे अकयपुण्णे निगंथाओ पावयणाओ नट्ठे भट्ठे परिब्भट्ठे । तं सेयं खलु ममं
सयमेव पुव्वपडिवन्नाइं पंचाणुव्वयाइं (०) उवसंपज्जित्ताणं विहरित्ताए । एवं संपेहेइ
२ ता पुव्वपडिवन्नाइं पंचाणुव्वयाइं जाव आरु(हे)हइ २ ता इमेयारूवं अभिग्गहं
अभिगिण्हइ-कप्पइ मे जाव(जी)जीवं छट्ठंछट्ठेणं अणिक्खित्तेणं अप्पाणं भावेमाणस्स
विहरित्ताए । छट्ठस्स वि य णं पारणगंसि कप्पइ मे नंदाए पोक्खरिणीए परिपेरेत्तेसु
फासुएणं ण्हाणोदएणं उम्मइ(णो)णाळोलियाहि य वित्तिं कप्पेमाणस्स विहरित्ताए ।
इमेयारूवं अभिग्गहं अभिगेण्हइ जावजीवाए छट्ठंछट्ठेणं जाव विहरइ । तेणं कालेणं
तेणं समएणं अहं गोयमा ! गुणसिलए समोसङ्के परिसा निग्गया । तए णं नंदाए
पो(पु)क्खरिणीए बहुजणो ण्हा(य०)इ ३ अन्नमज्जं (०) जाव समणे ३ इहेव गुणसि-
लए उज्जाणे समोसङ्के । तं गच्छामो णं देवाणुप्पिया । समणं ३ वंदामो जाव पज्जुवा-
सामो । एयं (मे) णे इहभवे परभवे य हियाए जाव आ(अ)णुगामियत्ताए भविस्सइ ।
तए णं तस्स दहुरस्स बहुजणस्स अंतिए एयमट्ठं सोच्चा निसम्म अयमेयारूवे अज्झ-
त्थिए० ससुप्पज्जित्था-एवं खलु समणे ३ (०) समोसडे । तं गच्छामि णं वंदा-
मि (०) । एवं संपेहेइ २ ता नंदाओ पुक्खरिणीओ सणियं २ उत्त(र)रेइ (२ ता)
जेणेव रायमग्गे तेणेव उवागच्छइ २ ता ताए उक्किट्ठाए ५ दहुरगईए वीईवयमाणे
जेणेव ममं अंतिए तेणेव पहारेत्थ गमणाए । इमं च णं सेणिए राया मि(भं)भसारे
ण्हाए सव्वालंकारविभूसिए हत्थिखंधवरगए सको(रं)रेंटमल्लदामेणं छत्तेणं धरिज्जमा-
णेणं सेयवरचाम(रा)रे० हयगयरह० महया भडचडगर(०)चाउरंणिणीए सेणाए
सद्धिं संपरिवुडे मम पायवंदए हव्वमागच्छइ । तए णं से दहुरे सेणियस्स रओ
एणेणं आसकिसोरएणं वामपाएणं अक्कंते समाणे अंतनिग्गाइए कए यावि होत्था ।
तए णं से दहुरे अ(र)थांमे अबले अवीरिए अपुरिस(का)क्कारपरक्कमे अधारणिज्जमि-
तिकट्ठु एणंतमवक्कमइ (०) करयल(परिग्गहियं तिखुत्तो सिरसावत्तं म० अं० कट्ठु)
जाव एवं वयासी-नमोत्थु णं अ(रु)रहंताणं (भगवंताणं) जाव संपत्ताणं । नमोत्थु णं
(समणस्स ३) मम धम्मायरियस्स जाव संपाविउकामस्स । पुब्बिपि य णं मए
समणस्स ३ अंतिए थूलए पाणाइवाए पच्चक्खाए जाव थूलए परिग्गहे पच्चक्खाए ।
तं इयाणिपि तस्सेव अंतिए सव्वं पाणाइवायं पच्चक्खामि जाव सव्वं परिग्गहं पच्च-
क्खामि जावजीवं सव्वं असणं ४ पच्चक्खामि जावजीवं जपि य इमं सरीरं इट्ठं

कंतं जाव मा फुसंतु एयंपि [य] णं चरिमेहिं ऊसासेहिं वोसिरामि-त्तिकट्टु । तए णं से दहुरे कालमासे कालं किच्चा जाव सोहम्मे कप्पे दहुरवडिसए (विमाणे) उववा-यसभाए दहुरदेवत्ताए उववज्जे । एवं खलु गोयमा ! दहुरेणं सा दिव्वा देविद्धी लद्धा ३ । दहुरस्स णं भंते ! देवस्स केव(ति)इयं कालं ठिई पज्जता ? गोयमा ! चत्तारि पलिओवमाई ठिई पज्जता । [दहुरे णं भंते ! देवे ताओ देवलोगाओ आउ-क्खएणं ठिइक्खएणं कहिं गच्छिहिइ कहिं उववज्जिहिइ ? गोयमा !] से णं दहुरे देवे (०) महाविदेहे वासे सिज्झिहिइ बुज्झिहिइ [मुच्चिहिइ] जाव अंतं करेहिइ । एवं खलु [जंबू !] समणेणं भगवया महावीरेणं जाव संपत्तेणं तेरसमस्स नायज्झ-यणस्स अयमट्ठे पज्जते त्ति वेमि ॥ १०१ ॥ गाहाउ-संपन्नगुणे वि जओ सुसा-हुसंसग्गिवज्जिओ पायं । पावइ गुणपरिहाणिं दहुरजीवोव्व मणियारो ॥ १ ॥ तित्थ-यरवंदणत्थं चलिओ भावेण पावए सगं । जह दहुरदेवेणं पतं वेमाणियसुरत्तं ॥ २ ॥ तेरसमं नायज्झयणं समत्तं ॥

जइ णं भंते ! समणेणं जाव संपत्तेणं तेरसमस्स नायज्झयणस्स अयमट्ठे पज्जते चोइसमस्स (०) के अट्ठे पज्जते ? एवं खलु जंबू ! तेणं कालेणं तेणं समएणं तेय-लिपु(रे)रं ना(मं)म नय(रे)रं (होत्था) । (त० णं ते० ब० उ० दि० एत्थ णं) पमयवणे (णामं) उज्जाणे (होत्था) । (तत्थ णं ते० णयरे) कणगरहे (णामं) राया (होत्था) । तस्स णं कणगरहस्स (रण्णो) पउमावई (णामं) देवी (होत्था) । तस्स णं कणगरहस्स रज्जो तेयलिपुत्ते नामं अमच्चे (होत्था) साम(दाम)दंडभेय(दंडे)-निउणे । तत्थ णं तेयलिपुरे कलादे नामं मूसियारदारए होत्था अट्ठे जाव अपरि-भूए । तस्स णं भद्दा नामं भारिया (होत्था) । तस्स णं कलायस्स मूसियारदार-(य)गस्स धूया भद्दाए अत्तया पोड्डिला नामं दारिया होत्था रुवेण य (जोव्वणेण य ला०) जाव उक्किट्ठा उक्किट्ठसरीरा । तए णं [सा] पोड्डिला दारिया अन्नया कयाइ ण्हाया सव्वालंकारविभूसिया चेड्डियाचक्कवालसंपरिवुडा उप्पि पासायवरगया आगा-सतलंगंसि कणग(मएणं)तिंदूसएणं कीलमाणी २ विहरइ । इमं च णं तेयलिपुत्ते अमच्चे ण्हाए आसखंधवरगए महया भडचडगर[०] आसवाहणियाए निज्जायमाणे कलायस्स मूसियारदारगस्स गिहस्स अदूरसामंतेणं वीईवयइ । तए णं से तेयलि-पुत्ते [अमच्चे] मूसियारदारगगिहस्स अदूरसामंतेणं वीईवयमाणे २ पोड्डिलं दारियं उप्पि (पासायवरगयं) आगासतलंगंसि कणगतिंदूसएणं कीलमाणीं पासइ २ ता पोड्डिलाए दारियाए रुवे य (३) जाव अज्झोववच्चे कोड्डंबियपुरिसे सहावेइ २ ता एवं वयासी-एस णं देवाणुप्पिया ! कस्स दारिया किं नामधेज्जा [वा] ? । तए णं

कोडुंबियपुरि(से)सा तेयलिपुत्तं एवं वयासी-एस णं सामी ! कलायस्स मूसियारदा-
 रयस्स धूया भद्दाए अत्तया पोड्डिला नामं दारिया रुवेण य जाव [उक्किट्ट]सरीरा ।
 तए णं से तेयलिपुत्ते आसवाहणियाओ पडिनियत्ते समाणे अब्भितर(ट्ठा)ठाणिज्जे
 पुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! कला(द)यस्स २
 धूर्यं भद्दाए अत्तयं पोड्डिलं दारियं मम भारियत्ताए वरेह । तए णं ते अब्भितरठा-
 णिज्जा पुरिसा तेयलिणा एवं वुत्ता (समाणा) हट्ठ० करयल० तहत्ति जेणेव कलायस्स
 २ गिहे तेणेव उवागया । तए णं से कलाए मूसियारदार[ए]ते पुरिसे एज्जमाणे
 पासइ २ ता हट्ठतुट्ठे आसणाओ अब्भुट्ठेइ २ ता सत्तट्ठपयाइ अणुगच्छइ २ ता आस-
 णेणं उवणिमंतेइ २ ता आसत्थे वीसत्थे सुहासणवरगए एवं वयासी-संदिसंतु णं
 देवाणुप्पिया ! किमागमणपओयणं (?) । तए णं ते अब्भितरठाणिज्जा (पुरिसा)
 कलायं २ एवं वयासी-अम्हे णं देवाणुप्पिया ! तव धूर्यं भद्दाए अत्तयं पोड्डिलं दारियं
 तेयलिपुत्तस्स भारियत्ताए वरेमो, तं जइ णं जाणसि देवाणुप्पिया ! जुत्तं वा पत्तं वा
 सलाहणिज्जं वा सरिसो वा संजोगो ता दिज्जउ णं पोड्डिला दारिया तेयलिपुत्तस्स,
 (ता) तो भण देवाणुप्पिया ! किं दलामो सुक्कं (?) । तए णं कलाए २ ते अब्भितर-
 ठाणिज्जे पुरिसे एवं वयासी-एस चेव णं देवाणुप्पिया ! मम सु(क्के)क्कं जज्जं तेयलिपुत्ते
 मम दारियानिमित्तेणं अणुग्गहं करेइ । ते ठाणिज्जे पुरिसे विपुलेणं अस(ण)णेणं ४
 पुप्फवत्थ जाव मलालंकारेणं सक्कारेइ सम्माणेइ (०) पडिविसजेइ । तए णं [ते
 पुरिसा] कलायस्स २ गिहाओ पडिनि(क्खमं)यत्तंति २ ता जेणेव तेयलिपुत्ते अमचे
 तेणेव उवागच्छंति २ ता तेयलिपुत्तं एयमट्ठं निवे(यं)इत्ति । तए णं कलाए २
 अन्नया कयाइं सोहणंसि तिहि[करण]नक्खत्तमुहुत्तंसि पोड्डिलं दारियं प्हायं सव्वालं-
 कारविभूसियं सीयं (दुरुहइ) दुरु(हि)हेत्ता मित्तणाइसंपरिकुडे सया(सा)ओ गिहाओ
 पडिनिक्खमइ २ ता सव्विच्चीए [४] तेयलिपुरं [नयरं] मज्झमज्जेणं जेणेव तेय-
 लिस्स गिहे तेणेव उवागच्छइ (०) पोड्डिलं दारियं तेयलिपुत्तस्स सयमेव भारियत्ताए
 दलयइ । तए णं तेयलिपुत्ते पोड्डिलं दारियं भारियत्ताए उवणीयं पासइ २ ता पोड्डिलाए
 सद्धिं पट्ठयं दुरुहइ २ ता सेयापी(त)एहिं कलसेहिं अप्पाणं मज्जावेइ २ ता अग्गि-
 होमं करेइ २ ता पाणिग्गहणं करेइ २ ता पोड्डिलाए भारियाए मित्तनाइ जाव परि-
 (ज)यणं विउलेणं असणपाणखाइमसाइमेणं पुप्फ[वत्थ] जाव पडिविसजेइ । तए णं
 से तेयलिपुत्ते पोड्डिलाए भारियाए अणुरत्ते अविरत्ते उरालां जाव विहरइ ॥ १०२ ॥
 तए णं से कणगरहे (राया) रज्जे य रट्ठे य बळे य वाहणे य कोसे य कौट्ठागारे य
 अंतेउरे य सुच्छिए ४ जाए २ पुत्ते विर्यंगेइ । अप्पेगइयाणं हत्थंगुलियाओ छिंदइ

अप्पेगइयाणं हत्थं गुट्टए छिंदइ । एवं पायंगुलियाओ पायंगुट्टए वि कण्ण(सक्कु)संकुली-
 (ए)याओ वि नासापुडाई फालेइ अं(गमं)गोवंगाई विर्यंगेइ । तए णं तीसे पडमाव-
 ईए देवीए अन्नया [कयाइ] पुव्वरत्तावरत्तकालसमयसि अयमेयारूवे अज्झत्थिए ४
 समुप्पजित्था-एवं खलु कणगरहे राया रजे य जाव पुते विर्यंगेइ जाव अंगमंगाई
 विर्यंगेइ । तं जइ [णं] अहं दारयं प(या)यामि सेयं खलु म(मं)म तं दारगं कणगर-
 हस्स रहस्सि[य]यं चेव सारक्खमाणीए संगोवेमाणीए विहरित्तए-त्तिकट्ठु एवं संपेहेइ
 २ ता तेयलिपुत्तं अमच्चं सद्दावेइ २ ता एवं वयासी-एवं खलु देवाणुप्पिया । कण-
 गरहे राया रजे य जाव विर्यंगेइ । तं जइ णं अहं देवाणुप्पिया ! दारगं पयायामि
 तए णं तुमं कणगरहस्स रहस्सिययं चेव अणुपुव्वेणं सारक्खमाणे संगोवेमाणे संव-
 ह्वेहि । तए णं से दारए उमुक्कबालभावे [जाव] जोव्वणगमणुप्पत्ते तव य मम य
 भिक्खाभायणे भविस्सइ । तए णं से तेयलिपुत्ते पडमावईए एयमट्ठं पड्डिसुणेइ २
 ता पड्डिगए । तए णं पडमावई (य) देवी पोड्डिला य अमच्ची सममेव गब्भं गेण्ह-
 (न्ति)इ सममेव (गब्भं) परिवहंति (सममेव गब्भं परिवहंति) । तए णं सा पड-
 मावई नवण्हं मासाणं जाव पियदंसणं सुरूवं दारगं पयाया । जं रयणिं च णं पड-
 मावई (देवी) दारयं पयाया तं रयणिं च णं पोड्डिला वि अमच्ची नवण्हं मासाणं
 विणि(हा)घायमावन्नं दारियं पयाया । तए णं सा पडमावई देवी अम्मधाई सद्दा-
 वेइ २ ता एवं वयासी-गच्छह णं तु(मे)मं अम्मो ! (तेयलि(पुत्त)गिहे) तेयलि-
 पुत्तं रहस्सिययं चेव सद्दावे(ह)हि । तए णं सा अम्मधाई तहत्ति पड्डिसुणेइ २ ता
 अंतेउरस्स अव(हा)दारेणं निग्गच्छइ २ ता जेणेव तेयलिस्स गिहे जेणेव तेयलि-
 पुत्ते तेणेव उवागच्छइ २ ता करयल जाव एवं वयासी-एवं खलु देवाणुप्पिया !
 पडमावई देवी सद्दावेइ । तए णं तेयलिपुत्ते अम्मधाईए अंतिए एयमट्ठं सोच्चा
 (णिसम्म) हट्ठु(ट्ठ)ट्ठे अम्मधाईए सद्धिं सयाओ गिहाओ निग्गच्छइ २ ता अंतेउ-
 रस्स अवदारेणं रहस्सिययं चेव अणु[प]पविसइ २ ता जेणेव पडमावई (देवी) तेणेव
 उवागच्छइ (२ ता) करयल जाव एवं वयासी-संदिसंतु णं देवाणुप्पिया । जं मए
 कायव्वं । तए णं पडमावई तेयलिपुत्तं एवं वयासी-एवं खलु कणगरहे राया जाव
 विर्यंगेइ । अहं च णं देवाणुप्पिया ! दारगं पयाया । तं तु(मं)ब्भे णं देवाणुप्पिया !
 (तं) एयं दारगं गेण्हहि जाव तव मम य भिक्खाभायणे भविस्सइ-त्तिकट्ठु तेय-
 लिपुत्तस्स हत्थे दलयइ । तए णं तेयलिपुत्ते पडमावईए हत्थाओ दारगं गेण्हइ उत्त-
 रिज्जेणं पिहेइ २ ता अंतेउरस्स रहस्सिययं अवदारेणं निग्गच्छइ २ ता जेणेव
 सए गिहे जेणेव पोड्डिला भारिया तेणेव उवागच्छइ २ ता पोड्डिलं एवं वयासी-एवं

खलु देवानुप्पि(या)ए ! कणगरहे राया रज्जे य जाव वियंगेह । अयं च णं दारए
 कणगरहस्स पुत्ते पउमावईए अत्तए । (तेणं) तन्नं तुमं देवानुप्पिए ! इमं दारगं
 कणगरहस्स रहस्सिययं चेव अणुपुब्बेणं सारक्खाहि य संगोवेहि य संवहेहि य ।
 तए णं एस दारए उमुक्कबालभावे तव य मम य पउमावईए य आहारं भविस्सइ-
 त्तिकट्ठु पोड्डिलाए पासे निक्खिवइ [२] पोड्डिला(ओ)ए पासाओ तं विणिहायमाव-
 ज्जियं दारियं गेण्हइ २ ता उत्तरिजेणं पिहेइ २ ता अंतोउरस्स अवदारेणं अणुप्प-
 विसइ २ ता जेणेव पउमावई देवी तेणेव उवागच्छइ २ ता पउमावईए देवीए पासे
 ठावेइ (०) जाव पडिनिगए । तए णं तीसे पउमावईए अंगपडियारियाओ पउ-
 मावई देविं विणिहायमावज्जियं (च) दारियं पयायं पासंति २ ता जेणेव कणगरहे
 राया तेणेव उवागच्छंति २ ता करयल जाव एवं वयासी-एवं खलु सामी ! पउ-
 मावई देवी म(इ)एल्लियं दारियं पयाया । तए णं कणगरहे राया तीसे मएल्लियाए
 दारियाए [महया] नीहरणं करेइ बहू(णि)ई लो(इ)गियाई मयक्किचाई करेइ [२]
 काळेणं विगयसोए जाए । तए णं से तेयलिपुत्ते क(ल्ले)ल्लं कोडुंबियपुरिसे सदावैइ २
 ता एवं वयासी-खिप्पामेव चारगसोहणं जाव ठिइपडियं जम्हा णं अम्हं एस दारए
 कणगरहस्स रज्जे जाए तं होउ णं दारए नामेणं कणगज्झए जाव अलंभोगसमत्थे
 जाए ॥ १०३ ॥ तए णं सा पोड्डिला अजया कयाइ तेयलिपुत्तस्स अणिट्ठा ५
 जाया यावि होत्था नेच्छइ (य) णं तेयलिपुत्ते पोड्डिलाए नामगो(त्त)यमवि सवणयाए
 किंपुण दं(दरि)सणं वा परिभोगं वा (?) । तए णं तीसे पोड्डिलाए अजया कयाई पुव्व-
 रत्तावरत्तकालसमयसि इमेयारूवे अज्झत्थिए ४ जाव समुप्पजित्था-एवं खलु अहं
 तेयलिस्स पुव्वि इट्ठा ५ आसि इयाणिं अणिट्ठा ५ जाया । नेच्छइ णं तेयलिपुत्ते
 मम नामं जाव परिभोगं वा ओहयमणसंकप्पा जाव झियायइ । तए णं तेयलिपुत्ते
 पोड्डिलं ओहयमणसंकप्पं जाव झियायमाणं पासइ २ ता एवं वयासी-मा णं तुमं
 देवानुप्पिए ! ओहयमणसंकप्पा जाव झियाहि, तुमं णं मम महाणसंसि विपुलं
 असणं ४ उवक्खडावेहि २ ता बहूणं समणमाहणं जाव वणीमगाणं देयमाणी य
 द(दे)वावेमाणी य विहराहि । तए णं सा पोड्डिला तेयलिपुत्तेणं [असत्तेणं] एवं वृत्ता
 समा(णा)णी इट्ठ० तेयलिपुत्तस्स एयमट्ठं पडिसुणेइ २ ता कल्लाक(ल्ले)ल्लिं महाणसंसि
 विपुलं असणं ४ जाव दवावेमाणी विहरइ ॥ १०४ ॥ तेणं काळेणं तेणं समएणं
 सुव्वयाओ नामं अज्जाओ इ(ई)रियासमियाओ जाव गुत्तंब(या)चारिणीओ बहु-
 स्सयाओ बंधुपरिवाराओ पुव्वानुपुव्वि [चरमाणीओ] जेणामेव तेयलिपुरे नयरे तेणेव
 उवागच्छंति २ ता अद्दापडिरूवं उरगहं ओगिण्हंति २ ता संजमे(ण)णं तवसा

अप्पाणं भावेमाणीओ विहरंति । तए णं तासिं सुव्वयाणं अज्जाणं एगे संचाडए पढमाए पोरिसीए सज्झायं करेइ जाव अडमाणीओ तेयलिस्स गिहं अणुपविट्ठाओ । तए णं सा पोट्टिला ताओ अज्जाओ एज्जमाणीओ पासइ २ ता हट्ठं आसणाओ अब्बुट्ठेइ (०) वंदइ नमंसइ वं० २ ता विपु(लं)लेणं अस(णं)णेणं ४ पडिलभेइ २ ता एवं वयासी-एवं खलु अहं अज्जाओ ! तेयलिपुत्तस्स पुर्व्वि इट्ठा ५ आसि इयाणि अणिट्ठा ५ जाव दंसणं वा परिभोगं वा, तं तुब्भे णं अज्जाओ बहुनायाओ [बहु]सि-विखयाओ बहुपडियाओ बहूणि गामागर जाव आहिंउह बहूणं राईसर जाव गिहाइं अणुपविसइ, तं अत्थि-याइं भे अज्जाओ ! केइ क(हं)हिंवि चुण्णजोए वा मंतजोगे वा कम्मणजोए वा हियउडावणे वा काउडावणे वा आभियोगिए वा वसीकरणे वा कोउयकम्मे वा भूइकम्मे वा मूले [वा] कंदे [वा] छली वल्ली सिलिया वा गुलिया वा ओसहे वा भेसजे वा उवलद्धपुव्वे जेणाहं तेयलिपुत्तस्स पुणरवि इट्ठा ५ भवे-ज्जामि [?] । तए णं ताओ अज्जाओ पोट्टिलाए एवं वुत्ताओ समाणीओ दोवि कण्णे [अणुलियं] ठवें(ठाई)ति २ ता पोट्टिलं एवं वयासी-अम्हे णं देवाणुप्पिए । सम-णीओ निगंथीओ जाव गुत्तवंभचारिणीओ । नो खलु कप्पइ अम्हं एयप्प(या)गारं कण्णे(हिं)हिं वि निसा(मे)मित्तए किमंग पुण उव(दि)दंसित्तए वा आयरित्तए वा (?) । अम्हे णं तव देवाणुप्पिया । विवित्तं केवलपन्नत्तं धम्मं प(डि)रिकहिज्जामो । तए णं सा पोट्टिला ताओ अज्जाओ एवं वयासी-इच्छामि णं अज्जाओ ! तु(म्हं)ब्भं अंतिए केवलपन्नत्तं धम्मं निसामित्तए । तए णं ताओ अज्जाओ पोट्टिलाए विवित्तं धम्मं परिकहेति । तए णं सा पोट्टिला धम्मं सोच्चा निसम्म हट्ठं एवं वयासी-सद्धामि णं अज्जाओ ! निगंथं पावयणं जाव से जहेयं तुब्भे वयह, इच्छामि णं अहं तुब्भं अंतिए पंचाणुव्व(याइं)इयं जाव धम्मं पडिवज्जित्तए । अहाउहं [देवाणुप्पिया] । तए णं सा पोट्टिला तासिं अज्जाणं अंतिए पंचाणुव्वइयं जाव धम्मं पडिवज्जइ ताओ अज्जाओ वंदइ नमंसइ वं० २ ता पडिविसजेइ । तए णं सा पोट्टिला समणोवासिया जाया जाव पडिलाभेमाणी विहरइ ॥ १०५ ॥ तए णं तीसे पोट्टिलाए अन्नया कयाइ पुव्वरत्तावरत्तकालसमयसि कुडुंबजागरियं जागरमाणीए अयमेयारुवे अज्ज-त्थिए०-एवं खलु अहं तेयलिपुत्तस्स पुर्व्वि इट्ठा ५ आसि इयाणि अणिट्ठा ५ जाव परिभोगं वा, तं सेयं खलु म(म)मं सुव्वयाणं अज्जाणं अंतिए पव्वइत्तए । एवं संपे-हेइ २ ता कल्लं (पाउ०) जेणेव तेयलिपुत्ते तेणेव उवागच्छइ २ ता करयल जाव एवं वयासी-एवं खलु देवाणुप्पिया ! मए सुव्वयाणं अज्जाणं अंतिए धम्मे निसंते जाव अब्भणुत्ताया पव्वइत्तए । तए णं तेयलिपुत्ते पोट्टिलं एवं वयासी-एवं खलु

तुमं देवाणुप्पिए ! सुंढा पव्वइया समाणी कालमासे कालं किच्चा अ(ज)णंतरेसु देवलोएसु देवत्ताए उववज्जिहिसि, तं जइ णं तुमं देवाणुप्पिए ! ममं ताओ देव-
लो(या)गाओ आगम्म केवलपज्जते धम्मं बो(हि)हेहि तो हं विसज्जेमि, अहं णं तुमं
ममं न संबोहेसि तो ते न विसज्जेमि । तए णं सा पोढिला तेयलिपुत्तस्स एयमट्ठं
पड्डिसुणेइ । तए णं तेयलिपुत्ते विजलं असणं ४ उववस्खडावेइ २ ता मित्तनाइ जाव
आमंतेइ (०) जाव सम्माणेइ २ पोढिलं ण्हायं स० पुरिससहस्सवा(ह)हिणीयं सीयं
दुरुहिता मित्तनाइ जाव [सं]परिवुडे सव्वि(द्धि)द्धीए जाव रवेणं तेयलिपु(रस्स)रं
मज्झमज्जेणं जेणेव सुव्वयाणं उवस्सए तेणेव उवागच्छइ २ ता सीयाओ पच्चोरुहइ
२ ता पोढिलं पुरओ-कट्ठु जेणेव सुव्वया अज्जा तेणेव उवागच्छइ २ ता वंदइ नमंसइ
व० २ ता एवं वयासी-एवं खलु देवाणुप्पि(ए)या ! मम पोढिला भारिया इट्ठा ५,
एसं णं संसारभउव्विग्गा जाव पव्वइत्ताए, पड्डिच्छंतु णं देवाणुप्पिया ! सिस्सिणि-
भिकखं (दलयामि) । अहासुहं मा पड्डिबंधं (करेह) । तए णं सा पोढिला सुव्वयाहिं
अज्जाहिं एवं वुत्ता समाणी हट्ठ० उत्तरपुर(च्छिमे)त्थिमं दिशीभा(ए)णं [अवक्कमइ २]
सयमेव आभरणमल्लालंकारं ओसुयइ २ ता सयमेव पंचमुट्ठियं लोयं करेइ २
ता जेणेव सुव्वयाओ अज्जाओ तेणेव उवागच्छइ २ ता वंदइ नमंसइ व० २ ता
एवं वयासी-आलित्ते णं भंते । लोए एवं जहा देवाणंदा जाव एक्कारस अंगाई बहूणि
चासाणि सामण्णपरियागं पाउणइ २ ता मासियाए संलेहणाए अत्ताणं श्लोसेत्ता सट्ठि
भत्ताई अणस(णाई)णेणं [छेएत्ता] आलोइयपड्डिकंता समाहिपत्ता कालमासे कालं
किच्चा अज्जयरेसु देवलोएसु देवत्ताए उववजा ॥ १०६ ॥ तए णं से कणगरहे राया
अज्जया कयाइ कालधम्मणा संजुत्ते यावि होत्था । तए णं [ते] राईसर जाव नीहरणं
करंति २ ता अज्जमच्चं एवं वयासी-एवं खलु देवाणुप्पिया ! कणगरहे राया रज्जे य
जाव पुत्ते वियंगित्था । अम्हे णं देवाणुप्पिया ! रायाहीणा रायाहिट्ठिया रायाहीण-
कज्जा । अयं च णं तेयली अमच्चे कणगरहस्स रत्तो सव्वट्ठाणेसु सव्वभूमियासु
लद्धपच्चए दिज्जवियारे सव्वकज्जव(ट्ठा)ट्ठावए यावि होत्था । तं सेयं खलु अम्हं तेस-
लिपुत्तं अमच्चं कुमारं जाइत्ताए-तिकट्ठु अज्जमच्चस्स एयमट्ठं पड्डिसुणेंति २ ता जेणेव
तेयलिपुत्ते अमच्चे तेणेव उवागच्छंति २ ता तेयलिपुत्तं एवं वयासी-एवं खलु देवा-
णुप्पिया । कणगरहे राया रज्जे य रट्ठे य जाव वियंगेइ, अम्हे (य) णं देवाणुप्पिया !
रायाहीणा जाव रायाहीणकज्जा, तुमं च णं देवाणुप्पिया । कणगरहस्स रत्तो सव्व-
(ट्ठा)ट्ठाणेसु जाव रज्जपुरावित्तए [होत्था] । तं जइ णं देवाणुप्पिया ! अत्थि केइ
कुमारं रायलक्खणासंपजे अभिसेयारिहे तणं तुमं अम्हं दलाहि जण(जा)णं अम्हे

महया २ रायाभिसेएणं अभिसिंचामो । तए णं तेयलिपुत्ते तेसिं ईसर जाव एयमट्ठं पड्डिसुणेइ २ ता कणगज्झयं कुमारं ण्हायं सव्वालंकारविभूसियं सस्तिरीयं करेइ २ ता तेसिं ईसर जाव उवणेइ २ ता एवं वयासी-एस णं देवाणुप्पिया । कणगरहस्स रत्तो पुत्ते पडमावईए देवीए अत्तए कणगज्झए नामं कुमारं अभिसेयारिहे रायल-क्खणसंपवे मए कणगरहस्स रत्तो रहस्सिययं संवट्ठिए, एयं णं तुम्हे महया २ रायाभिसेएणं अभिसिंचह । सव्वं च तेसिं उट्ठाणपरियावणियं परिकहेइ । तए णं ते ईसर जाव कणगज्झयं कुमारं महया (२) रायाभिसेएणं अभिसिंचंति । तए णं से कणगज्झए कुमारं राया जाए महयाहिमवंत(मलय) वण्णओ जाव रज्जं पसा- (से)हेमाणे विहरइ । तए णं सा पडमावई देवी कणगज्झयं रायं सदावेइ २ ता एवं वयासी-एस णं पुत्ता । तव रजे जाव अंतेउरे य तुमं च तेयलिपुत्तस्स [अम- च्चस्स] प(हा)भावेणं, तं तुमं णं तेयलिपुत्तं अमच्चं आढाहि परिजाणाहि सक्कारेहि सम्माणेहि इंतं अब्भुट्ठेहि ठियं पज्जुवासाहि वच्चंतं पड्डिसंसाहेहि अट्ठासणेणं उव- णिमंतेहि भोगं च से अणुवट्ठेहि । तए णं से कणगज्झए पडमावईए (देवीए) तहत्ति [वयणं] पड्डिसुणेइ जाव भोगं च से [सं]वट्ठेइ ॥ १०७ ॥ तए णं से पोडिल्ले देवे तेयलिपुत्तं अभिक्खणं २ केवलपन्नते धम्मे संबोहेइ नो चेव णं से तेयलि- पुत्ते संबुज्झइ । तए णं तस्स पोडिल्लदेवस्स इमेयारूवे अज्झत्थिए०-एवं खलु कण- गज्झए राया तेयलिपुत्तं आढाइ जाव भोगं च संवट्ठेइ । तए णं से तेय(ली)लि- पुत्ते अभिक्खणं २ संबोहिज्जमाणे वि धम्मे नो संबुज्झइ । तं सेयं खलु कणगज्झयं तेयलिपुत्ताओ विप्परिणा(मे)मित्तए-त्तिकडु एवं संपेहेइ २ ता कणगज्झयं तेयलिपु- त्ताओ विप्परिणामेइ । तए णं तेयलिपुत्ते कलं ण्हाए आसखंधवरगए बट्ठहिं पुरिसेहिं [सद्धिं] संपरिवुडे सयाओ गिहाओ निग्गच्छइ २ ता जेणेव कणगज्झए राया तेणेव पहरेत्य गमणाए । तए णं तेयलिपुत्तं अमच्चं जे जहा बहवे राईसरतलवर जाव पभियओ पासंति ते तहेव आढायंति परि(जा)याणंति अब्भुट्ठेति २ ता अंजलि- परिग्गहं करेति इट्ठाहिं कंताहिं जाव वग्गूहिं आल(वे)वमाणा य संलवमाणा य पुरओ य पिट्ठओ य पासओ य मग्गओ य समणुगच्छंति । तए णं से तेयलिपुत्ते जेणेव कणगज्झए तेणेव उवागच्छइ । तए णं [से] कणगज्झए तेयलिपुत्तं एज- माणं पासइ २ ता नो आढाइ नो परियाणाइ नो अब्भुट्ठेइ अणाढायमाणे ३ पर- म्मुहे संविट्ठइ । तए णं [से] तेयलिपुत्ते कणगज्झयस्स रत्तो अंजलिं करेइ । तए णं से कणगज्झए राया अणाढायमाणे तुसिणीए परम्मुहे संविट्ठइ । तए णं तेयलि- पुत्ते कणगज्झयं [रायं] विप्परिणयं ज्ञाणिता भीए जाव संजायभए एवं वयासी-वट्ठे

णं मम कणगज्झए राया । हीणे णं मम कणगज्झए राया । अवज्झाए णं कणग-
ज्झए (राया) । तं न नज्जइ णं मम केणइ कुमारेण मारेहिइ-त्तिकट्ठु भीए तत्थे
(य) जाव सणियं २ पच्चोस(क्के)कइ २ ता तमेव आसखंधं दुरु(हे)हइ २ ता तेय-
लिपुर् मज्झमज्झेणं जेणेव सए गिहे तेणेव पहारेत्थ गमणाए । तए णं तेयलिपुत्तं
जे जहा ईसर जाव पासंति ते तहा नो आढायंति नो परियाणंति नो अब्भुट्ठेति
नो अंज(लि)लि० इट्ठा(हिं)इं जाव नो संलवंति नो पुरओ य पिट्ठओ य पासओ
(य मग्गओ य)समणुगच्छंति । तए णं तेयलिपुत्ते जेणेव सए गिहे तेणेव उवाग-
(च्छइ)ए । जा वि य से तत्थ बाहिरिया परिसा भवइ तंजहा-दासेइ वा पेसेइ वा
भाइल्लएइ वा सा वि य णं नो आढाइ ३ । जा वि य से अब्भितरिया परिसा भवइ
तंजहा-पियाइ वा मायाइ वा जाव सुण्हाइ वा सा वि य णं नो आढाइ ३ । तए
णं से तेयलिपुत्ते जेणेव वासघरे जेणेव (सए) सयणिजे तेणेव उवागच्छइ २ ता
सयणिजंसि निसीयइ २ ता एवं वयासी-एवं खलु अहं सयाओ गिहाओ निग्गच्छामि
तं चेव जाव अब्भितरिया परिसा नो आढाइ नो परियाणाइ नो अब्भुट्ठेइ । तं
सेयं खलु मम अप्पाणं जीवियाओ ववरोवित्तए-त्तिकट्ठु एवं संपेहेइ २ ता तालुउडं
विसं आसगंसि पक्खिवइ, से (य विसे) नो संकमइ । तए णं से तेयलिपुत्ते [अमच्चे]
नीलुप्पल जाव असि खं(धे)धंसि ओहरइ, तत्थ वि य से धारा ओपल्ला । तए णं से
तेयलिपुत्ते जेणेव असोगवणिया तेणेव उवागच्छइ २ ता पासगं गीवाए बंधइ २ ता
स्वखं दुरुहइ २ ता पा(सं)सगं स्वखे बंधइ २ ता अप्पाणं मुयइ, तत्थ वि य से
रज्जू छिन्ना । तए णं से तेयलिपुत्ते महइमहा(ल)लियं सिलं गीवाए बंधइ २ ता
अत्थाहमतारमपोरि(सि)सीयंसि उदगंसि अप्पाणं मुयइ, तत्थ वि से थाहे जाए ।
तए णं से तेयलिपुत्ते सुक्कंसि तणकूडंसि अगणिकायं पक्खिवइ २ ता अप्पाणं मुयइ,
तत्थ वि य से अगणिकाए विज्झाए । तए णं से तेयलिपुत्ते एवं वयासी-सद्धेयं
खलु भो समणा वयंति, सद्धेयं खलु भो माहणा वयंति, सद्धेयं खलु भो समणा
माहणा वयंति, अहं एगो असद्धेयं वयामि, एवं खलु अहं सह पुत्तेहिं अपुत्ते, को
मेदं सहहिस्सइ ? सह मित्तेहिं अमित्ते, को मेदं सहहिस्सइ ? एवं अत्थेणं दारेणं
दासेहिं [पेसेहिं] परिजणेणं । एवं खलु तेयलिपुत्तेणं अमच्चेणं कणगज्झएणं रत्ता अव-
ज्झाएणं समाणेणं तालपुडगे विसे आसगंसि पक्खित्ते, से वि य नो (सं)कमइ,
को मेयं सहहिस्सइ ? तेयलिपुत्ते नीलुप्पल जाव खंधंसि ओहरिए, तत्थ वि य से
धारा ओपल्ला, को मेदं सहहिस्सइ ? तेयलिपु(त्तस्स)ते पासगं गीवाए बंधि(धे)धित्ता
जाव रज्जू छिन्ना, को मे(दं)यं सहहिस्सइ ? तेयलिपुत्ते महा(सिल)लियं जाव बंधित्ता

अत्थाह जाव उदगंसि अप्पा[णं] मुक्के, तत्थ वि य णं थाहे जाए, को मेयं सह-
हिस्सइ ? तेयलिपुत्ते सुक्कंसि तणकूडे अग्गी विज्जाए, को मेयं सहहिस्सइ ?-ओह-
यमणसंकप्पे जाव झिया[य]इ । तए णं से पोट्टिले देवे पोट्टिलारुवं विउव्वइ २ ता
तेयलिपुत्तस्स अदूरसामंते ठिच्चा एवं वयासी-हं भो तेयलिपुत्ता ! पुरओ पवाए
पिट्ठओ हत्थिभयं दुहओ अचक्खुफासे मज्झे सराणि पत्तं(वरिसयं)ति, गामे पलित्ते
रच्चे झियाइ रच्चे पलित्ते गामे झियाइ, आउसो (1) तेयलिपुत्ता ! कओ वयामो ? । तए
णं से तेयलिपुत्ते पोट्टिलं एवं वयासी-भीयस्स खलु भो ! पव्वज्जा सरणं, उक्कं(ठि)-
ट्टियस्स सदेसगमणं ब्रुहियस्स अन्नं तिसियस्स पाणं आउरस्स मेसज्जं माइयस्स
रहस्सं अभिजुत्तस्स पच्चयकरणं अद्वाणपरिसंतस्स वाहणगमणं तरिउकामस्स पव-
ह(णं)णकिच्चं परं अभिओजिउकामस्स सहायकिच्चं, खंतस्स दंतस्स जिइंदियस्स
एत्तो एगमवि न भवइ । तए णं से पोट्टिले देवे तेयलिपुत्तं अमच्चं एवं वयासी-
सुट्ठु णं तुमं तेयलिपुत्ता ! एयमट्ठं आया(णि)णहि-त्तिकट्ठु दोच्चपि [तच्चपि] एवं वयइ
२ ता जामेव दि(सं)सिं पाउब्भूए तामेव दिसिं पडिगए ॥ १०८ ॥ तए णं तस्स
तेयलिपुत्तस्स सुमेणं परिणामेणं जाईसरणे समुप्पन्ने । तए णं (तस्स) तेयलिपुत्तस्स
अयमेयारुवे अज्जत्थिए ० समुप्पन्ने-एवं खलु अहं इहेव जंबुदीवे २ महाविदेहे
वासे पोक्खलावईविजए पौड(री)रिणिणीए रायहाणीए महापउमे नामं राया
होत्था । तए णं (अ)हं थेराणं अंतिए सुंढे भवित्ता जाव चोहस-पुव्वाइ (०) बट्ठणि
वासाणि सामण्णपरिया(ए)णं पाउणिता मासियाए संलेहणाए महासुक्के कप्पे देवे
(उव्वच्चे) । तए णं हं ताओ देवलोगाओ आउक्खएणं [भवक्खएणं ठिइक्खएणं
अणंतरे चयं चइत्ता] इहेव तेयलिपुरे तेयलिस्स अमच्चस्स भद्दाए भारियाए दार-
गत्ताए पच्चायाए । तं सेयं खलु मम पुव्वदिट्ठाइं महव्वयाइं सयमेव उवसंपजित्ताणं
विहरितए । एवं संपेहेइ २ ता सयमेव महव्वयाइं आरुहेइ २ ता जेणेव पमय-
वणे उज्जाणे तेणेव उवागच्छइ २ ता असोगवरपायवस्स अहे पुढाविसिलापट्टयंसि
सुहनिस्सणस्स अणुचितेमाणस्स पुव्वाहीयाइं सामाइयमाइयाइं चोहसपुव्वाइं सय-
मेव अभिसमन्नागयाइं । तए णं तस्स तेयलिपुत्तस्स अणगारस्स सुमेणं परिणा-
मेणं जाव तयावरणिज्जाणं कम्ममाणं खओवसमेणं कम्मरयविकरणकरं अपुव्वकरणं
पविट्ठस्स केवलवरनानादंसणे समुप्पन्ने ॥ १०९ ॥ तए णं तेयलिपुरे नयरे अहास-
न्निहिएहिं वाणमंतरेहिं देवेहिं देवीहि य देवदुंदु(भी)हीओ समाहयाओ दसद्ववणी
कुसुमे निवाइए दिव्वे गीयगंधव्वनिनाए कए यावि होत्था । तए णं से कण्णज्जाए
राया इमीसे कहाए लड्ढे समणे एवं वयासी-एवं खलु तेय(लि)लिपुत्ते मए अव-

उज्जाए मुंडे भविता पव्वइए तं गच्छामि णं तेयलिपुत्तं अणगारं वंदामि नमंसासि
 वं० २ ता एयमट्ठं विणएणं भुज्जो २ खामेसि । एवं संपेहेइ २ ता ण्हाए चाउरंगि-
 णीए सेणाए जेणेव पमयवणे उज्जाणे जेणेव तेयलिपुत्ते अणगारे तेणेव उवागच्छइ
 २ ता तेयलिपुत्तं (अणगारं) वंदइ नमंसइ वं० २ ता एयमट्ठं च [णं] विणएणं भुज्जो
 २ खामेइ [२] नच्चासन्ने जाव पज्जुवासइ । तए णं से तेयलिपुत्ते अणगारे कणगज्झ-
 यस्स रत्तो तीसे य महइमहालियाए परिसाए धम्मं परिकहेइ । तए णं से कणग-
 उज्जाए राया तेयलिपुत्तस्स केवलस्स अंतिए धम्मं सोच्चा निसम्म पंचाणव्वइयं
 सत्तसिक्खावइयं सावगधम्मं पडिवज्जइ २ ता समणोवासए जाए जाव अ(हि)भि-
 गयजीवाजीवे । तए णं तेयलिपुत्ते केवली बहूणि वासाणि केवलिपरियागं पाउणित्ता
 जाव सिद्धे । एवं खलु जंबू ! समणेणं भगवथा महावीरेणं जाव संपत्तेणं चोइस-
 मस्स नायज्झयणस्स अयमट्ठे पन्नत्ते त्तिवेसि ॥ ११० ॥ गाहा-जाव न दुक्खं
 पत्ता माणब्भंसं च पाणिणो पायं । ताव न धम्मं गेण्हंति भावओ तेयलिउव्व
 ॥ १ ॥ चोइ(चउद)समं नाय(अ)ज्झयणं समत्तं ॥

जइ णं भंते ! समणेणं० चोइसमस्स नायज्झयणस्स अयमट्ठे पन्नत्ते पन्नरसमस्स
 णं (०) के अट्ठे पन्नत्ते ? एवं खलु जंबू ! तेणं कालेणं तेणं समएणं चंपा ना(मं)म
 नयरी होत्था पुण्णभेइ उज्जाणे जियसत्त राया । तत्थ णं चंपाए नयरीए ध(ण)मे
 नामं सत्थवाहे होत्था अट्ठे जाव अपरिभूए । तीसे णं चंपाए नयरीए उत्तरपुरत्थिमे
 दि(सि)सीभाए अहिच्छत्ता ना(मं)मं नयरी होत्था रिद्धत्थिमियसमिद्धा वण्णओ ।
 तत्थ णं अहिच्छत्ताए नयरीए कणगकेळु नामं राया होत्था (महया) वण्णओ ।
 [तए णं] तस्स ध(ण)णस्स सत्थवाहस्स अन्नया कयाइ पुव्वरत्तावरत्तकालंसमयंसि
 इमेयारूवे अज्झत्थिए चित्तिए पत्थिए मणोगए संकप्पे समुप्पज्जित्था-सेयं खलु
 मम विपुलं पणियमंडमायाए अहिच्छत्तं न(गरं)यरिं वाणिज्जाए गमित्तए । एवं संपे-
 हेइ २ ता गणिमं च ४ चउव्विहं भंडं गेण्हइ (०) सगढीसागडं सज्जेइ २ ता
 सगढीसागडं भरेइ २ ता कोडुंबियपुरिसे सद्दावेइ २ ता एवं वयासी-गच्छइ णं
 तुब्भे देवाणुप्पिया । चंपाए नयरीए सिंघाडय जाव पहे(सुं)उ [एवं वयह-] एवं
 खलु देवाणुप्पिया । धणे सत्थवाहे विपु(ले)लं पणि(य०)यं [आदाय] इच्छइ अहि-
 च्छत्तं नयरिं वाणिज्जाए गमित्तए । तं जो णं देवाणुप्पिया । चरए वा नीरिए वा चम्म-
 खंडिए वा मिच्छुंढे वा पं(डु)डरगे वा गोयमे वा गोव(ती)त्तिए वा (गिहिधम्ममे वा)
 गिहिधम्मचित्तए वा अविरुद्धविरुद्धुसावगरत्तपडत्तिग्गंयप्पभिइपासंढत्थे वा मिहत्थे
 वा (तस्स णं) ध(ण)णेणं सद्धिं अहिच्छत्तं नयरिं गच्छइ तस्स णं धणे अच्छत्तागस्स

छत्तां दलाइ अणुवाहणस्स ओ(उ)वाहणा(उ)ओ दलयइ अकुंडियस्स कुंडियं दल-
 यइ अपत्थयणस्स पत्थयणं दलयइ अपक्खेवगस्स पक्खेवं दलयइ अंतरा वि य से
 पडियस्स वा भग्गलुग्ग[स्स] साहेज्जं दलयइ सुहंसहेण य (णं) अहिच्छत्तं संपावेइ-
 त्तिकट्ठु दोच्चंपि तच्चंपि [घोसणं] घोसेह २ ता मम एयमाणत्तिं पच्चप्पिणह । तए णं
 ते कोडुंबियपुरिसा जाव एवं वयासी-हंदि सुणंतु भगवंतो चंपानयरीवत्थव्वा बहवे
 चरगा (य) जाव पच्चप्पिणंति । तए णं (से) तेसिं कोडुंबिय(घोस)पुरिसाणं [अंतिए
 एयमट्ठं] सो(सु)च्चा चंपाए नयरीए बहवे चरगा य जाव गिहत्था य जेणेव धणे सत्थ-
 वाहे तेणेव उवागच्छंति । तए णं धणे [सत्थवाहे] तेसिं चरगाण य जाव गिहत्थाण
 य अच्छत्तगस्स छत्तं दलयइ जाव पत्थयणं दलाइ-गच्छह णं तुब्भे देवाणुप्पिया !
 चंपाए नयरीए बहिया अग्गुज्जाणंसि ममं पडिवालमाण्णा चिट्ठह । तए णं [ते] चरगा
 य० धणेणं सत्थवाहेणं एवं वुत्ता समाणा जाव चिट्ठंति । तए णं धणे सत्थवाहे
 सोहणंसि तिहिकरणनक्खत्तंसि विउलं असणं ४ उवक्खडावेइ २ ता मित्ता(ई)इ
 आमंतेइ २ ता भोयणं भोयवेइ २ ता आपुच्छइ २ ता सगढीसागडं जोयावेइ २
 ता चंपा[ओ] नयरीओ निगच्छइ (०) नाइविप्पमिट्ठेहिं अद्धाणेहिं वसमाणे २ सुहेहिं
 वसहिपायरासेहिं अंगं जणवयं मज्झमज्जेणं जेणेव देसगं तेणेव उवागच्छइ २
 ता सगढीसागडं मोयावेइ (०) सत्थनिवेसं करेइ २ ता कोडुंबियपुरिसे सदावेइ २
 ता एवं वयासी-तुब्भे णं देवाणुप्पिया ! मम सत्थनिवेसंसि महया २ सहेणं उग्घो-
 सेमाण २ एवं वयह-एवं खलु देवाणुप्पिया ! इमीसे आगामियाए छिन्नावायाए
 वीहमद्धाए अडवीए बहुमज्झदेसभाए [एत्थ णं] बहवे नंदिफला नामं रक्खा पञ्चत्ता
 किण्हा जाव पत्तिया पुफिया फलिया हरिया रेरिजमाण्णा सिरीए अईव २ उवसो-
 भेमाण्णा चिट्ठंति मणुत्ता वण्णेणं [४] जाव मणुत्ता फासेणं मणुत्ता छायाए । तं जो णं
 देवाणुप्पिया ! तेसिं नंदिफलाणं रक्खाणं मूलाणि वा कंद(०)तयपत्तपुप्फफलव्री-
 याणि वा हरियाणि वा आहारेइ छायाए वा वीसमइ तस्स णं आवाए भइए भवइ
 तओ पच्छा परिणममाण २ अकाले चेव जीवियाओ ववरोवे(न्ति)इ । तं मा णं
 देवाणुप्पिया ! केइ तेसिं नंदिफलाणं मूलाणि वा जाव छायाए वा वीसमइ मा णं
 से(S)वि अकाले चेव जीवियाओ ववरोविजिस्सइ । तुब्भे णं देवाणुप्पिया । अन्नेसिं
 रक्खाणं मूलाणि य जाव हरियाणि य आहारे(थ)ह छायासु वीसमइ ति घोसणं
 घोसेह जाव पच्चप्पिणंति । तए णं धणे सत्थवाहे सगढीसागडं जोएइ २ ता जेणेव
 नंदिफला रक्खा तेणेव उवागच्छइ २ ता तेसिं नंदिफलाणं अदूरसामंते सत्थनिवेसं
 करेइ २ ता दोच्चंपि तच्चंपि कोडुंबियपुरिसे सदावेइ २ ता एवं वयासी-तुब्भे णं

देवाणुप्पिया ! मम सत्थनिवेसंति महया [२] सद्देणं उच्चोसेमाणा २ एवं वयह-एए
 णं देवाणुप्पिया ! ते नंदिफला [स्वखा] किण्हा जाव मणुच्चा छायाए । तं जो णं
 देवाणुप्पिया ! एएसिं नंदिफलाणं स्वखाणं मूलाणि वा कंद(०) पुप्फतयापत्तफलाणि
 जाव अकाले चेव जीवियाओ ववरोवेइ । तं मा णं तुब्भे जाव (दूरं दूरेणं परिहर-
 माणा) वीसमह मा णं अकाले [चेव] जीवियाओ ववरोविस्संति अच्चेसिं स्वखाणं
 मूलाणि य जाव वीसमह-त्तिकट्टु घोसणं [जाव] पच्चप्पिणंति । तत्थ णं अत्थेगइया
 पुरिसा धणस्स सत्थवाहस्स एयमट्ठं सद्देहंति जाव रोयंति एयमट्ठं सद्देहमाणा तेसिं
 नंदिफलाणं दूरंदूरेणं परिहरमाणा २ अच्चेसिं स्वखाणं मूलाणि य जाव वीसमंति ।
 तेसिं णं आवाए नो भद्दए भवइ तओ पच्छा परिणममाणा २ सु(ह)भरूवत्ताए ५
 भुज्जो २ परिणमंति । एवामेव समणाउसो ! जो अम्हं निगंथो वा २ जाव पंचसु
 कामगुणेषु नो स(ज्जे)जइ (नो रज्जेइ) से णं इहभवे चेव बह्वणं समणाणं ४ अच-
 णिज्जे परलोए नो आगच्छइ जाव वीइवइस्सइ । तत्थ णं (जे से) अप्पेगइया
 पुरिसा धणस्स एयमट्ठं नो सद्देहंति ३ धणस्स एयमट्ठं असद्देहमाणा ३ जेणेव ते
 नंदिफला तेणेव उवागच्छंति २ ता तेसिं नंदिफलाणं मूलाणि य जाव वीसमंति
 तेसिं णं आवाए भद्दए भवइ तओ पच्छा परिणममाणा जाव ववरोवेति । एवामेव
 समणाउसो ! जो अम्हं निगंथो वा २ पव्वइए पंचसु कामगुणेषु सज्जइ जाव अणु-
 परियट्ठिस्सइ जहा व ते पुरिसा । तए णं से धणे सगळीसागळं जोयावेइ २ ता
 जेणेव अहिच्छत्ता नयरी तेणेव उवागच्छइ २ ता अहिच्छत्ताए नयरीए बहिया
 अणुज्जाणे सत्थनिवेसं करेइ २ ता सगळीसागळं मोयावेइ । तए णं से धणे सत्थ-
 वाहे महत्थं ३ रायारिहं पाहुडं गेण्हइ २ ता बहुपुरिसेहिं सद्धिं संपरिवुडे अहि-
 च्छत्तं नय(रं)रिं मज्झमज्झेणं अणुप्पविसइ २ ता जेणेव कणगकेऊ राया तेणेव
 उवागच्छइ २ ता करयल जाव वद्धावेइ २ ता तं महत्थं ३ पाहुडं उवणेइ । तए णं
 से कणगकेऊ राया हट्ठतु(ट्ठ०)ट्ठे धणस्स सत्थवाहस्स तं महत्थं (३) जाव पडिच्छइ
 २ ता ध(०)णं सत्थवाहं सक्कारेइ सम्माणेइ स० २ ता उरुसुक्कं वियरइ २ ता पडि-
 विसज्जेइ [२] भंडविणिमयं करेइ २ ता पडिभंडं गेण्हइ २ ता सुहंसुहेणं जेयेव चंपा
 नयरी तेणेव उवागच्छइ २ ता मित्तनाइअभिसमन्नागए विपुलाई माणुस्सगाई जाव
 विहरइ । तेणं कालेणं तेणं समएणं थेरागमणं ध० धम्मं सोच्चा जेद्वपुत्तं कुडंवे
 ठावेत्ता [जाव] पव्वइए सामा[इयमा]इयाई एकारस अंगाई बह्वणि वासाणि जाव
 मासियाए (सं०) जाव अन्नयरेसु देवलोएसु देवताए उववक्खे (से णं देवे ताओ देव-
 खोगाओ आउक्ख० नयं चइत्ता) महाविदेहे वासे सिज्झाहिइ जाव अंतं करेहिइ ।

एवं खलु जंबू ! समणेणं जाव संपत्तेणं पन्नरस[म]स्स नायज्झयणस्स अयमट्ठे पन्नते
त्तिबेमि ॥ १११ ॥ गाहाओ-चंपा इव मणुयगई धणो व्व भयवं जिणो दएक्करसो ।
अहिछत्तानयरिसमं इह निव्वाणं मुणेयव्वं ॥ १ ॥ घोसणया इव तित्थंकरस्स सिव-
मगदेसणमहग्गं । चरगाइणोव्व इत्थं सिवसुहकामा जिया बहवे ॥ २ ॥ नंदिफलाइ
व्व इहं सिवपहपडिवणगाण विसया उ । तव्वमक्खणाओ मरणं जह तह विसएहिं
संसारो ॥ ३ ॥ तव्वज्जणेण जह इट्ठपुरगमो विसयवज्जणेण तहा । परमानंदनिबंघ-
णसिवपुरगमणं मुणेयव्वं ॥ ४ ॥ पन्नरसमं नायज्झयणं समत्तं ॥

जइ णं भंते ! समणेणं ३ जाव संपत्तेणं पन्नरसमस्स नायज्झयणस्स अयमट्ठे
पन्नते सोलसमस्स णं भंते । नायज्झयणस्स (०) के अट्ठे पन्नते ? एवं खलु जंबू !
तेणं कालेणं तेणं समएणं चंपा नामं नयरी होत्था । तीसे णं चंपाए नयरीए बहिया
उत्तरपुरत्थिमे दिसीमाए सुभूमिभागे नामं उज्जाणे होत्था । तत्थ णं चंपाए नयरीए
तओ माहणा भायरो परिवसंति तंजहा-सोमे सोमदत्ते सोमभूई अट्ठा जाव [अपरि-
भूया] रिउव्वेयजउव्वेयसामवेयअथव्वणवेय जाव सुपरिनिट्ठिया । ते(सि णं)सिं
माहणाणं तओ भारियाओ होत्था तंजहा-नागसिरी भूयसिरी जक्खसिरी सुकुमा-
(ल)ला जाव तेसि णं माहणाणं इट्ठाओ वि(पु)उळे माणुस्सए जाव विहरंति । तए णं
तेसि माहणाणं अन्नया कयाइ एगयओ समुवागयाणं जाव इमेयारुवे मिहोक्कासमु-
ल्लावे समुप्पज्जित्था-एवं खलु देवाणुप्पिया ! अम्हं इमे विउळे धणे जाव सावएजे
अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं ।
तं सेयं खलु अम्हं देवाणुप्पिया ! अन्नमन्नस्स गिहेसु कल्लाकल्लिं विपुलं अस(णं)गपा-
(णं)णखाइ(मं)मसाइमं उवक्खडेउं (२) परिभुं(ज)जेमाणाणं विहरितए । अन्नम-
न्नस्स एयमट्ठं पडिसुणेंति कल्लाकल्लिं अन्नमन्नस्स गिहेसु विपुलं असणं ४ उवक्खडा-
वेंति २ ता परिभुंजेमाणा विहरंति । तए णं तीसे नागसिरीए माहणीए अन्नया
[कयाइ] भोयणवारए जाए यावि होत्था । तए णं सा नागसिरी [माहणी] विपुलं
असणं ४ उवक्ख(डे)डावेइ २ ता एगं महं सालइयं ति(ता)तलाउ(अं)यं बहुसंभार-
संजुत्तं नेहावगाढं उवक्खडावेइ एगं बिदुयं करयलंसि आसाएइ [२] तं खारं कडुयं
अखज्जं (अभोज्जं) विस(व)भूयं जाणित्ता एवं वयासी-विरत्थु णं मम नागसिरीए
अ(ह)धन्नाए अपुण्णाए दूभगाए दूभगसत्ताए दूभगनिंबोलियाए जा(जी)ए णं मए
सालइए बहुसंभारसंभिए नेहावगाढे उवक्खडिए सुबहुदव्वक्खए(णं) नेहक्खए य
कए । तं जइ णं ममं जाउयाओ जाणिस्संति तो णं मम खिसिस्संति । तं जाव-ताव
ममं जाउयाओ न जाणंति ताव मम सेयं एयं सालइयं ति(ता)तलाउ[यं] बहुसंभार-

नेहकयं एगंते गो(वे)वित्तए अन्नं सालइयं महु(रा)रलाउयं जाव नेहावगाढं उव-
 क्ख(डे)डित्तए । एवं संपेहेइ २ ता तं सालइयं जाव गोवेइ [२] अन्नं सालइयं महु-
 लाउयं उवक्खडेइ [२] तेसिं माहणाणं ण्हायाणं सुहासणवरगयाणं तं विपुलं असणं
 ४ परिवेसेइ । तए णं ते माहणा जिमियभुत्तुत्तरागया समाणा आयंता चोक्खा परम-
 सुइभूया सकम्मसंपउत्ता जाया यावि होत्था । तए णं ताओ माहणीओ ण्हायाओ
 सव्वालंकारविभूसियाओ तं विपुलं असणं ४ आहारेंति २ ता जेणेव सयाइं २ गि(गे)-
 हाइं तेणेव उवागच्छंति २ ता सकम्मसंपउत्ताओ जायाओ ॥ ११२ ॥ तेणं कालेणं
 तेणं समएणं धम्मघोसां ना(म)मं थेरा जाव बहुपरिवारा जेणेव चंपा (नामं) नयरी
 जेणेव सुभूमिभागे उज्जाणे तेणेव उवागच्छंति २ ता अहापडिरुवं जाव विहरंति ।
 परिसा निग्गया धम्मो कहिओ परिसा पडिगया । तए णं तेसिं धम्मघोसाणं थेराणं
 अंतेवासी धम्मरुई नामं अणगारे उ(ओ)राले जाव ते(उ)यलेस्से मासंमासेणं खम-
 माणे विहरइ । तए णं से धम्मरुई अणगारे मासखमणपारणंसि पढमाए पोरिसीए
 सज्जायं करेइ २ ता बीयाए पोरिसीए एवं जहा गोयमसामी तहेव उग्गाहेइ २ ता
 तहेव धम्मघोसं थेरं आपुच्छइ जाव चंपाए नयरीए उच्चनीयमज्झिमकुलाई जाव
 अढमाणे जेणेव नागसिरीए माहणीए गिहे तेणेव अणुपविट्ठे । तए णं सा नाग-
 सिरी माहणी धम्मरुई एजमाणं पासइ २ ता तस्स सालइयस्स तित्तकडुयस्स बहु-
 (०)नेहावगाढस्स एड(निसिर)णट्टयाए हट्टुट्ठा [उट्ठाए] उट्ठेइ २ ता जेणेव भत्तघरे
 तेणेव उवागच्छइ २ ता तं सालइयं तित्तकडुयं च बहुने(हं)हावगाढं धम्मरुइस्स
 अणगारस्स पडिग्गहंसि सव्वमेव नि(सि)स्सिरइ । तए णं से धम्मरुई अणगारे अहा-
 पज्जत्तमित्तकट्टु नागसिरीए माहणीए गिहाओ पडिनिक्खमइ २ ता चंपाए नयरीए
 मज्झंसज्जेणं पडिनिक्खमइ २ ता जेणेव सुभूमिभागे उज्जाणे तेणेव उवागच्छइ २
 ता [जेणेव धम्मघोसा थेरा तेणेव उवागच्छइ २] धम्मघोसस्स अदूरसामंते अन्न-
 पाणं पडि(दंसे)लेहेइ २ ता अन्नपाणं करयलंसि पडिदंसेइ । तए णं (ते) धम्मघोसा
 थेरा तस्स सालइयस्स नेहावगाढस्स गंधेणं अभिभूया समाणा तओ सालइयाओ
 नेहावगाढाओ एगं बिंदु(गं)यं गहाय करयलंसि आसा(दे)दिति ति(तगं)तं खारं
 कडुयं अखजं अभोजं विसभूयं जाणित्ता धम्मरुई अणगारे एवं वयासी-जइ णं तुमं
 देवाणुप्पिया । एयं सालइयं जाव नेहावगाढं आहारेसि तो णं तुमं अकाले चेव जीवि-
 याओ ववरोविज्जसि । तं मा णं तुमं देवाणुप्पिया ! इमं सालइयं जाव आहारेसि मा णं
 तुमं अकाले चेव जीवियाओ ववरोविज्जसि । तं गच्छ[ह] णं तुमं देवाणुप्पिया ! इमं
 सालइयं एगंतमणात्राए अ(च्चि)चित्ते थंडि(ले)ळे परिट्ठवेहि २ ता अन्नं फाडुयं एस-

णिज्जं असणं ४ पडिगाहेत्ता आहारं आहारेहि । तए णं से धम्मरुई अणगारे धम्म-
 चोसेणं थेरेणं एवं वुत्ते समाणे धम्मघोसस्स थेरस्स अंतियाओ पडिनिक्खमइ २ ता
 झुभूमिमा(ग)गाओ उज्जाणाओ अदूरसामंते थंडिल्लं पडिलेहेइ २ ता ता(त)ओ साल-
 इयाओ एगं विदुगं ग(हेइ)हाय २ थंडि(लं)ल्लं निसिरइ । तए णं तस्स सालइयस्स
 तित्तकडुयस्स बहुनेहावगाढस्स गंधेणं बहूणि पिपीलिगासहस्साणि पाउब्भू० जा
 जहा य णं पिपीलिगा आहारेइ सा [णं] तहा अकाले चेव जीवियाओ ववरोविजइ ।
 तए णं तस्स धम्मरुइस्स अणगारस्स इमेयारुवे अज्झत्थिए०-जइ ताव इमस्स
 सालइयस्स जाव एगंमि बिंदु(गं)यंमि पक्खित्तंमि अणेगाइं पिपीलि(का)गासहस्साइं
 ववरोविजंति तं जइ णं अहं एयं सालइयं थंडिल्लं सव्वं निसिरामि (तए) तो णं
 बहूणं पाणाणं ४ वहकरणं भविस्सइ । तं सेयं खलु मम एयं सालइयं जाव [नेहाव]-
 गाढं सयमेव आहा(रे)रित्तए मम चेव एएणं सरी(रे)रएणं निजाउ-त्तिकट्टु एवं
 संपेहेइ २ ता मुहपोत्तिंयं [२] पडिलेहेइ २ ता ससीसोवरियं कायं पमज्जेइ २ ता तं
 सालइयं तित्तकडुयं बहुनेहावगाढं बिलमिव पजगभूएणं अप्पा(णे)णएणं सव्वं सरी-
 रको(ट्ठं)ट्ठंमि पक्खिवइ । तए णं तस्स धम्मरुइ[य]स्स तं सालइयं जाव नेहावगाढं
 आहारियस्स समाणस्स मुहुत्तंतरेणं परिणममाणंसि सरीरगंसि वेयणा पाउब्भूया
 उज्जला जाव दुरहियासा । तए णं से धम्मरु(ची)ई अणगारे अधामे अबले अवीरिए
 अपुरिसक्कारपरक्कमे अधारणिज्जमित्तिकट्टु आयारभंडगं एगंते ठा(ठ)वेइ २ ता थंडिल्लं
 पडिलेहेइ २ ता दब्भसंधारगं संधारेइ २ ता दब्भसंधारगं दुरुहइ २ ता पुरत्था-
 भिमुहे संपलियंकनिसण्णे करयलपरिगगहिंयं एवं वयासी-नमोत्थु णं अरहंताणं जाव
 संपत्ताणं नमोत्थु णं धम्मघोसाणं थेराणं मम धम्मायरियाणं [मम] धम्मोवएसगाणं
 पुत्वि पि णं मए धम्मघोसाणं थेराणं अंतिए सव्वे पाणाइवाए पच्चखाए जावजी-
 वाए जाव परिगगहे इयाणि पि णं अहं तेसिं चेव भगवंताणं अंति(यं)ए सव्वं
 पाणाइवायं पच्चखामि जाव परिगगहं पच्चखामि जाव(जी)जीवाए जहा खंदओ
 जाव चरिमेहिं उस्सासेहिं वोसिरामि-त्तिकट्टु आलोइयपडिक्कंते समाहिपत्ते कालगए ।
 तए णं ते धम्मघोसा थेरा धम्मरुई अणगारं च्चि(रं)रगयं जाणित्ता समणे निगंथे
 सदावेंति २ ता एवं वयासी-एवं खलु देवाणुप्पिया ! धम्मरुइस्स अणगारस्स मास-
 [क्खमणपारणंमि सालइयस्स जाव [नेहाव]गाढस्स निसिरणट्टयाए बहिया
 निगगए चिरा[वि]इ, तं गच्छह णं तुब्भे देवाणुप्पिया ! धम्मरुइस्स अणगारस्स
 सव्वओ ससंता मग्गणगवैसणं करेह । तए णं ते समणा निगंथा जाव पडिसुणेंति २
 ता धम्मघोसाणं थेराणं अंतियाओ पडिनिक्खमंति २ ता धम्मरुइस्स अणगारस्स

सव्वओ समंता मग्गणगवेसणं करेमाणा जेणेव थंडिल्लं तेणेव उवागच्छंति २ ता धम्म-
 रुइयस्स अणगारस्स सरीरगं निप्पाणं निच्चेट्ठं जीवविप्पज्जडं पासंति २ ता हा हा [१]
 अहो ! अकज्जमतिकट्ठं धम्मरुइयस्स अणगारस्स परिनिव्वाणवत्तिं काउस्सगं करंति
 (०) धम्मरुइयस्स आचारभंडगं गेण्हंति २ ता जेणेव धम्मघोसा थेरा तेणेव उवागच्छंति
 २ ता गमणागमणं पडिक्कमंति २ ता एवं वयासी-एवं खलु अम्हे तुब्भं अंतियाओ
 पडिनिक्खमामो २ ता सुभूमिभागस्स उज्जाणस्स परिपेरंतेणं धम्मरुइयस्स अणगा-
 रस्स सव्वं जाव करेमा(णे)णा जेणेव थंडिल्लं तेणेव उवागच्छामो (०) जाव इहं
 हव्वमागया, तं कालगए णं भंते ! धम्मरुइ अणगारे इमे से आचारभंडए । तए णं
 (ते) धम्मघोसा थेरा पुव्वगए उवओगं गच्छंति २ ता समणे निग्गंथे निग्गंथीओ य
 सहावंति २ ता एवं वयासी-एवं खलु अज्जो ! मम अंतेवासी धम्मरुइ ना(म)मं अण-
 गारे पगइभइए जाव विणीए मासंमासेणं अणिक्खित्तेणं तवोक्कमेणं जाव नाग-
 सिरीए माहणीए जि(हे)हं अणुपवि(ट्ठे)सइ । तए णं सा नागसिरी माहणी जाव
 निसिरइ । तए णं से धम्मरुइ अणगारे अहापज्जत्तमि(ति)त्तिकट्ठु जाव कालं अणव-
 कंखमाणे विहरइ । से णं धम्मरुइ अणगारे बहूणि वासाणि सामण्यपरियागं पाउणित्ता
 आलोइयपडिक्कंते समाहिपत्ते कालमासे कालं किच्चा उट्ठं सोह(म्म)म्मे जाव सव्वइ-
 सिद्धे महाविमाणे देवताए उववत्ते । तत्थ णं [अत्थेगइयाणं] (अ)जहुन्नमणुक्कोसेणं
 तेत्तीसं सागरोवमाइं ठिई पन्नत्ता । तत्थ [णं] धम्मरुइयस्स वि देवस्स तेत्तीसं सागरो-
 वमाइं ठिई पन्नत्ता । से णं धम्मरुइ देवे ताओ देवलोगाओ जाव महाविदेहे वासे
 सिज्झिहइ ॥११३॥ तं धिरत्थु णं अज्जो ! नागसिरीए माहणीए अधच्चाए अपुण्णाए
 जाव निंबोलियाए जाए णं तहारुवे साहू [साहुरुवे] धम्मरुइ अणगारे मासक्खमण-
 प्रारणगंसि सालइएणं जाव गाढेणं अकाले चेव जीवियाओ ववरोविए । तए णं ते
 समणं निग्गंथा धम्मघोसाणं थेराणं अंतिए एयमट्ठं सोच्चा निसम्म चंपाए सिचाडय
 (तिग) जाव [पहेसु] बहुजणस्स एवमाइक्खंति [४]-धिरत्थु णं देवाणुप्पिया ! नाग-
 सिरीए (माहणीए) जाव निंबोलियाए जाए णं तहारुवे साहू साहुरुवे सालइएणं
 जीवियाओ ववरो(वेइ)विए । तए णं तेसिं समणाणं अंतिए एयमट्ठं सोच्चा निसम्म
 बहुजणो अन्नमन्नस्स एवमाइक्खइ एवं भासइ-धिरत्थु णं नागसिरीए माहणीए जाव
 जीवियाओ ववरोविए । तए णं ते माहणा चंपाए नयरीए बहुजणस्स अंतिए एयमट्ठं
 सोच्चा निसम्म आसुरत्ता जाव मिसिमिसेमाणा जेणेव नागसिरी माहणी तेणेव उवा-
 गच्छंति २ ता नागसि(री)रिं माह(णीं)णि एवं वयासी-हं भो नागसिरी ! अपत्तिरयप-
 स्थिए [१] दुरंतपंतलक्खणे [१] हीणपुण्णचाउइसे [१] धिरत्थु णं तव अधच्चाए अपु-

ष्णाए (जाव) निबोलियाए जाए णं तुमे तहारुवे साहू साहुरुवे मासखमणपारणगंसि
 सालइणं जाव ववरोविए उच्चाव(ए)याहिं अक्कोसणाहिं अक्कोसंति उच्चावयाहिं उद्धंस-
 णाहिं उद्धंसंति उच्चावयाहिं निब्भ(त्थ)च्छणाहिं निब्भ(त्थं)च्छंति उच्चावयाहिं
 निच्छोडणाहिं निच्छोडंति तज्जेति तालेंति त(ज्जे)जित्ता ता(ले)लित्ता सयाओ गिहाओ
 निच्छुभंति । तए णं सा नागसिरी सयाओ गिहाओ निच्छूडा समाणी चंपाए नयरीए
 सिंघाडगति यचउक्कचचरचउम्मुहमहापहपहेसु बहुजणेणं हीलिज्जमाणी खिसिज्जमाणी
 निदिज्जमाणी गरहिज्जमाणी तज्जिज्जमाणी पव्वहिज्जमाणी धिक्कारिज्जमाणी शुक्कारिज्ज-
 माणी कत्थइ ठाणं वा निलयं वा अलभमाणी २ दंडीखंडनिवसणा खंडमल्लयखंडघड-
 गहत्थगया फुट्टहडाहडसीसा मच्छियाचडगरेणं अज्जिज्जमाणमग्गा नि(गे)ह(गे)नि-
 हेणं देहंबलियाए वित्तिं कप्पेमा(णी)णा विहरइ । तए णं तीसे नागसिरीए माहणीए
 तन्मवंसि चैव सोलस रोयायंका पाउब्भया तंजहा-सासे कासे जोणिसूले जाव कोढे ।
 तए णं सा नागसिरी माहणी सोलसहिं रो(या)गायंकेहिं अभिभूया समाणी अट्टु-
 हट्टवसट्ठा कालमासे कालं किच्चा छट्ठीए पुढवीए उक्को(सेणं)सं बावीससागरोवम(ठि-
 ती)ट्टिइएसु नेरइ(नर)एसु नेरइयत्ताए उववच्चा । सा णं तओ(S)अणंतरं(सि) उव्व-
 ट्ठित्ता मच्छेसु उववच्चा । तत्थ णं सत्थवज्झा दाहवक्कंतीए कालमासे कालं किच्चा
 अहेसत्त(मी)माए पुढवीए उक्को(साए)स(तिती०)सागरोवमट्टिइएसु [नरएसु] नेरइ-
 एसु उववच्चा । सा णं तओ(S)णंतरं उव्वट्ठित्ता दोच्चंपि मच्छेसु उववज्जइ । तत्थ वि य
 णं सत्थवज्झा दाहवक्कंतीए दोच्चंपि अहे सत्तमाए पुढवीए उक्को(सं)स(तेतीस)साग-
 रोवमट्टिइएसु नेरइएसु उववज्जइ । सा णं तओहिंतो जाव उव्वट्ठित्ता तच्चंपि मच्छेसु
 उववच्चा । तत्थ वि य णं सत्थवज्झा जाव [कालमासे] कालं किच्चा दोच्चंपि छट्ठीए
 पुढवीए उक्कोसेणं (०) । तओणंतरं उव्वट्ठित्ता उरएसु एवं जहा गोसाले तहा नेयव्वं
 जाव रयणप्पभा(ए)ओ [पुढवीओ उव्वट्ठित्ता] स(त)नीसु उववच्चा । तओ उव्वट्ठित्ता
 जा(व)इं इमाइं खहयरविहाणाइं जाव अदुत्तरं च णं खरवायरपुढविकाइयत्ताए तेसु
 अणेगसयसहस्सखुत्तो ॥ ११४ ॥ सा णं तओणंतरं उव्वट्ठित्ता इहेव जंबुदीवे दीवे
 भारहे वासे चंपाए नयरीए सागरदत्तस्स सत्थवाहस्स भद्दाए भारियाए कुच्छिस्सि
 दारियत्ताए पच्चायाया । तए णं सा भद्दा सत्थवाही नवव्हं मासाणं दारियं पयाया
 सुकुमालकोमलियं गयतालुयसमाणं । तीसे [णं] दारियाए निव्व(ते)तवारसाहियाए
 अम्मापियरो इमं एयारुवं गोणं गुणनिप्फन्नं नामधेज्जं करंति-जम्हा णं अम्हं एसा
 दारिया सुकुमाला गयतालुयसमाणा तं होउ णं अम्हं इमीसे दारियाए नामधे(ज्जे)ज्जं
 सुकुमालिया [२] । तए णं तीसे दारियाए अम्मापियरो नामधेज्जं करंति सुमालि-

यत्ति । तए णं सा सूमालिया दारिया पंचधाईपरिगहिया तंजहा-खीरधाईए जाव
गिरिकंदरमल्लीणा इव चंप(क)गल्या नि(व)वा(ए)यनिव्वाचायंसि जाव परिवहुइ ।
तए णं सा सूमालिया दारिया उम्मुक्कबालभावा जाव रुवेण य जोव्वणेण य लाव-
ण्णेण य उक्किट्ठा उक्किट्ठसरीरा जाया यावि होत्था ॥ ११५ ॥ तत्थ णं चंपाए नयरीए
जिणदत्ते ना(म)मं सत्थवाहे अट्ठे(०) । तस्स णं जिणदत्तस्स भद्दा भारिया सूमाला
इट्ठा (जाव) माणुस्सए कामभो(ए)गे पच्चणुब्भवमाणा विहरइ । तस्स णं जिणदत्तस्स
पुत्ते भद्दाए भारियाए अत्तए सागरए नामं दारए सुकुमाले जाव सुरुवे । तए णं से जिण-
दत्ते सत्थवाहे अजया कयाइ सयाओ गिह्वाओ पडिनिक्खमइ २ ता सागरदत्तस्स
सत्थवाह(गिह)स्स अदूरसामंतेणं वीईवयइ । इमं च णं सूमालिया दारिया ण्हाया
चेद्धियासंघपरिवुट्ठा अपि आगासतलगंसि कणग(त्ते)तिंदूसएणं कीलमाणी (२)
विहरइ । तए णं से जिणदत्ते सत्थवाहे सूमालियं दारियं पासइ २ ता सूमालियाए
दारियाए रुवे य ३ जायविम्हए कोडुंबियपुरिसे सद्दावेइ २ ता एवं वयासी-एस णं
देवाणुप्पिया ! कस्स दारिया किं वा नामधेज्जं से ? । तए णं ते कोडुंबियपुरिसा जिण-
दत्तेणं सत्थवाहेणं एवं वुत्ता समाणा ह० करयल जाव एवं वयासी-एस णं (देवा-
णुप्पिया !) सागरदत्तस्स २ धूया भद्दाए अत्तया सूमालिया ना(म)मं दारिया सुकुमा-
लपाणिपाया जाव उक्किट्ठा । तए णं (से) जिणदत्ते सत्थवाहे तेसिं कोडुंबियाणं अंतिए
एयमट्ठं सोचा जेणेव सए गिहे तेणेव उवागच्छइ २ ता ण्हाए स० भित्तानाइपरिवुट्ठे चंपाए
नयरीए मज्झमज्झेणं जेणेव सागरदत्तस्स गिहे तेणेव उवाग(च्छइ)ए । तए णं [से]
सागरदत्ते २ जिणदत्तं २ एज्जमाणं पासइ २ ता आसणाओ अब्भुट्ठेइ २ ता आस-
णेणं उवनिमंतेइ २ ता आसत्थं वीसत्थं सुहासणवरगयं एवं वयासी-भण देवाणु-
प्पिया ! किमागमणपओयणं (?) । तए णं से जिणदत्ते (सत्थवाहे) सागरदत्तं (सत्थ-
वाहं) एवं वयासी-एवं खलु अहं देवाणुप्पिया ! तव धूर्यं भद्दाए अतियं सूमालियं
सागरस्स भारियत्ताए वरेमि । जइ णं जाणह देवाणुप्पिया । जुत्तं वा पत्तं वा सला-
हणिज्जं वा सरिसो वा संजोगो ता दिज्जउ णं सूमालिया सागर[दारग]स्स । तए णं
देवाणुप्पिया ! किं दलयामो सुकं [च] सूमालियाए ? । तए णं से सागरदत्ते (तं) २
जिणदत्तं [२] एवं वयासी-एवं खलु देवाणुप्पिया ! सूमालिया दारिया (मम) एणा
एगजाया इट्ठा [५] जाव किमग पुण पासणयाए । तं नो खलु अहं इच्छामि सूसा-
लियाए दारियाए खणमवि विप्पओगं । तं जइ णं देवाणुप्पिया । सागर[ए] दारए
मम घरजामाउए भवइ तो णं अहं सागर(स्स)दारगस्स सूमालियं दलयामि । तए
णं से जिणदत्ते २ सागरदत्तेणं २ एवं वुत्ते समाणे जेणेव सए गिहे तेणेव उवाग-

च्छइ २ ता सागरदारगं सदावेइ २ ता एवं वयासी-एवं खलु पुत्ता ! सागरदत्ते २ म(म)मं एवं वयासी-एवं खलु देवाणुप्पिया ! सूमा लिया दारिया इट्ठा तं चेव, तं जइ णं सागरदारए मम घरज्जामाउए भवइ ता[व] दलयामि । तए णं से सागरए दारए जिणदत्तेणं २ एवं वुत्ते समणे तुसिणीए । तए णं जिणदत्ते २ अज्जया कयाइ सोहणंसि तिहिकरणे वि(उ)पुलं असणं ४ उवक्खडावेइ २ ता मित्तना(हिं)इ आमंतेइ जाव [सक्कारेता] सम्मा(णि)णैत्ता सागरं दारगं ण्हायं सन्वालंकारविभूसियं करेइ २ ता पुरिससहस्सवाहि(णि)णीयं सीयं दुरुहावेइ २ ता मित्तनाइ जाव संपरिकुट्ठे सत्थिद्धीए सयाओ गिहाओ निग्गच्छइ २ ता चं(पा)पं नयरिं मज्झंमज्झेणं जेणेव सागरदत्तस्स गिट्ठे तेणेव उवागच्छइ २ ता सीयाओ पच्चोरुहइ २ ता साग(रगं)रं दारगं सागरदत्तस्स २ उवणेइ । तए णं [से] सागरदत्ते २ विपुलं असणं ४ उवक्खडावेइ २ ता जाव सम्माणेत्ता सागरं दारगं सूमा लियाए दारियाए सद्धि पट्ठ-यं[सि] दुरुहावेइ २ ता सेयापी(त)एहिं कलसेहिं मज्जावेइ २ ता [अग्गि]होमं करावेइ २ ता सागरं दारयं सूमा लियाए दारियाए पाणिं गेण्हा(वित्ति)वेइ ॥ ११६ ॥ तए णं सागर(दार)ए सूमा लियाए दारियाए इमं एयाखुवं पाणिफासं (पडि)संवेदेइ से जहानामए असिपत्तेइ वा जाव मुम्मुरेइ वा (इतो) एत्तो अणिट्ठतराए चेव पाणिफासं संवेदेइ । तए णं से सागरए अकामए अवस(व)वसे (तं) मुहुत्त(मि)मेतं संचिट्ठइ । तए णं (से) सागरदत्ते २ सागरस्स (दारगस्स) अम्मापियरो मित्तनाइ विपुलं असणं ४ पुप्फवत्थ जाव सम्माणेत्ता पडिविसज्जेइ । तए णं सागरए (दारए) सूमा लियाए सद्धि जेणेव वासवरे तेणेव उवागच्छइ २ ता सूमा लियाए दारियाए सद्धि तलि(मं)मंसि निवज्जइ । तए णं से सागरए दारए सूमा लियाए दारियाए इमं एयाखुवं अंगफासं पडिसंवेदेइ से जहानामए असिपत्तेइ वा जाव अमणाम(य)तरागं चेव अंगफासं पच्चणुब्भवमाणे विहरइ । तए णं से सागरए दारए [सूमा लियाए दारियाए] अंगफासं असइमाणे अवसवसे मुहुत्तमेतं संचिट्ठइ । तए णं से सागरदारए सूमा-लियं (दारियं) सुहपसुत्तं जाणित्ता सूमा लियाए दारियाए पासाओ उट्ठेइ २ ता जेणेव सए सयणिज्जे तेणेव उवागच्छइ २ ता सयणीयंसि निवज्जइ । तए णं सूमा लिया दारिया तवो मुहुत्तंतरस्स पडिबुद्धा समाणी पइंवया पइमणुरत्ता पइं पासे अपस्स-माणी तलिमा(उ)ओ उट्ठेइ २ ता जेणेव से सयणिज्जे तेणेव उवागच्छइ २ ता सागरस्स पासे णवज्जइ । तए णं से सागरदारए सूमा लियाए दारियाए सो(डु)च्चं पि इमं एयाखुवं अंगफासं पडिसंवेदेइ जाव अकामए अवसवसे मुहुत्तमेतं संचिट्ठइ । तए णं (से) सागरदारए सूमा लियं दारियं सुहपसुत्तं जाणित्ता सयणिज्जाओ उट्ठेइ २

ता वासघरस्स दारं विहाडेइ २ ता मारामुक्के विव काए जामेव दिसिं पाउन्भूए तामेव
दिसिं पडिगए ॥ ११७ ॥ तए णं सूमालिया दारिया तओ मुहुत्तंतरस्स पडिबुद्धा
पतिवया जाव अपासमाणी सयणिज्जाओ उट्टेइ सागरस्स दारगस्स सन्वओ समंता
मगगणवेसणं करेमाणी २ वासघरस्स दारं विहाडियं पासइ २ ता एवं वयासी-
गए [णं] से साग(रे)रए-त्तिकट्ठ ओहयमणसंकप्पा जाव झियायइ । तए णं सा भद्दा
सत्थवाही कळं पाउप्पभा[या]ए दासचे(डियं)डिं सहावेइ २ ता एवं वयासी-गच्छह
णं तुमं देवाणुप्पिए ! व(हु)ह्वरस्स मुह(सोह)धोवणियं उवणेहि । तए णं सा दास-
चेडी भद्दाए एवं वुत्ता समाणी एयमट्ठं तहत्ति पडिउणेइ [२] मुहधोवणियं गेण्हइ
२ ता जेणेव वासघरे तेणेव उवागच्छइ (०) सूमालियं दारियं जाव झियायमाणि
पासइ २ ता एवं वयासी-किञ्चं तु(मं)ब्भे देवाणुप्पिए)या । ओहयमणसंकप्पा जाव
झियाहि(सि) ? । तए णं सा सूमालिया दारिया तं दासचे(डी)डियं एवं वयासी-एवं
खलु देवाणुप्पिया । सागरए दारए म(म)मं सुहपसुत्तं जाणित्ता मम पासाओ उट्टेइ २ ता
वासघरदुवारं अवगु(ण्ड)णेइ जाव पडिगए । तए णं [हं] तओ (अहं)मुहुत्तंतरस्स जाव
विहाडियं पासामि [२] गए णं से सागरए-त्तिकट्ठ ओहयमणसंकप्पा जाव झिया-
यामि । तए णं सा दासचेडी सूमालियाए दारियाए एयमट्ठं सोच्चा जेणेव सागरदत्ते
[२] तेणेव उवागच्छइ २ ता सागरदत्तस्स एयमट्ठं निवे(ए)देइ । तए णं से साग-
रदत्ते दासचेडीए अंतिए एयमट्ठं सोच्चा निसम्म आसुत्ते [४ जाव मिसिमिसेमाणे]
जेणेव जिणदत्त[स्स] २ गिहे तेणेव उवागच्छइ २ ता जिणदत्तं २ एवं वयासी-किञ्चं
देवाणुप्पिया । ए(व)यं जुत्तं वा पत्तं वा कुलाणुख्वं वा कुलसरिसं वा जण्णं सागर[ए]
दारए सूमालियं दारियं अदिट्ठदो(सं)सवडियं पइवयं विप्पजहाय इहमाग(ओ)ए [१]
बद्धहिं खिज्जणियाहि य रूटणियाहि य उवा(ल)लंभइ । तए णं जिणदत्ते सागरदत्तस्स
[२] एयमट्ठं सोच्चा जेणेव सागरए (दारए) तेणेव उवागच्छइ २ ता साग(रयं)रं दारयं
एवं वयासी-दुट्ठु णं पुत्ता ! तुमे कयं सागरदत्तस्स गिहाओ इहं हव्वमाग(ते)च्छं-
तेणं, तं गच्छह णं तुमं पुत्ता ! एवमवि गए सागरदत्तस्स गिहे । तए णं से साग-
रए जिणदत्तं एवं वयासी-अवि-याइं अहं ताओ ! गिरिपडणं वा तरुपडणं वा मरु-
प्पवायं वा जलप्प(वेसं)वायं वा जलणप्पवेसं वा विसभक्खणं वा सत्थोवाडणं वा
वि(वे)हाणसं वा गिद्ध(पि)पट्ठं वा पव्वज्जं वा विदेसगमणं वा अब्भुवग(च्छि)च्छे-
ज्जा(मि) नो खलु अहं सागरदत्तस्स गिहं ग(च्छि)च्छेज्जा । तए णं से सागरदत्ते २
कुइतरि[या]ए सागरस्स एयमट्ठं निसामेइ २ ता लज्जिए वि(लेपविट्ठे)लीए विहे जिण-
दत्तस्स [२] गिहाओ पडिनिक्खमइ २ ता जेणेव सए गिहे तेणेव उवागच्छइ २ ता

सुकुमालियं दारियं सहावेइ २ ता अंके निवेसेइ २ ता एवं वयासी-किञ्च तव पुत्ता ! सागरएणं दारएणं (मुक्का) ? अहं णं तुमं तस्स दाहामि जस्स णं तुमं इद्धा (जाव) मणामा भविस्ससि-त्ति सूमालियं दारियं ताहिं इद्धाहिं [जाव] वग्गूहिं समासासेइ २ ता पड्विसज्जेइ । तए णं से सागरदत्ते २ अन्नया उप्पि आगासतलगंसि सुहनि-सण्णे रायमग्गं ओलोएमाणे २ चिट्ठइ । तए णं से सागरदत्ते एगं महं दमगपुरिसं पासइ दंडिखंडनिवसणं खंड(ग)मल्लगखंडघडगहत्थगयं मच्छियासहस्सेहिं जाव अज्जिजमाणमग्गं । तए णं से सागरदत्ते [सत्थवाहे] कोडुंबियपुरिसे सहावेइ २ ता एवं वयासी-तुब्भे णं देवाणुप्पिया ! एयं दमगपुरिसं विपुल्लेणं अस(ण)णेणं ४ प(लो)डि-लाभेइ (०) गिहं अणुप्प(वि)विसेइ २ ता खंड(ग)मल्लगं खंडघडगं च से एगंते एडेह २ ता अलंकारियकम्मं कारेइ २ ता ण्हायं सव्वालंकारविभूसियं करेइ २ ता मणुजं असणं ४ भोयावेइ (०) मम अंतियं उवणेह । तए णं [ते] कोडुंबियपुरिसा जाव पड्विपुल्लेति २ ता जेणेव से दमगपुरिसे तेणेव उवागच्छंति २ ता तं दम(ग)गपुरिसं अस(णं)णेणं ४ उवप्पलो(भं)भंति २ ता सयं गिहं अणुप्पवेसिंति २ ता तं खंड(ग)-मल्लगं खंड(ग)घडगं च तस्स दमगपुरिसस्स एगंते एडेंति । तए णं से दम(ग)गपुरिसे तं[सि] खंडमल्लगंसि खंडघडगंसि य (एगंते) एडिजमाणंसि महया २ सहेणं आरसइ । तए णं से सागरदत्ते तस्स दमगपुरिसस्स तं महया २ आरसियसइ सोच्चा निसम्म कोडुंबियपुरिसे एवं वयासी-किञ्च देवाणुप्पिया ! एस दमगपुरिसे महया २ सहेणं आरसइ ? । तए णं ते कोडुंबियपुरिसा एवं वयासी-एस णं सामी ! तंसि खंडमल्ल-गंसि खंडघडगंसि (एगंते) य एडिजमाणंसि महया २ सहेणं आरसइ । तए णं से सागरदत्ते २ ते कोडुंबियपुरिसे एवं वयासी-मा णं तुब्भे देवाणुप्पिया ! एयस्स दमगस्स तं खंड जाव एडेह पासे [से] ठवेइ जहा णं पत्तियं भवइ । ते(वि) तहेव ठावें(ठविं)ति (तए णं ते कोडुंबियपुरिसा) २ तस्स दमगस्स अलंकारियकम्मं करेंति २ ता सयपागसहस्सपागेहिं ते(ति)ल्लेहिं अ(ब्भं)ब्भिगेंति अब्भिगिए समाणे सुर-भि[णा] गं(धुव्)धवट्ठ(णे)एणं गायं उ(व्वट्ठिं)वट्ठेंति २ ता उस्सिणेद(ग)गेणं गंधोद-एणं [ण्हाणेति] सीओदगेणं ण्हाणेंति (०) पम्हलसुकुमालगंधकासा(इं)इए गायाइं ल(हं)हेंति २ ता हंसलक्खणं प(ट्ठ)डगसाडगं परि(हं)हेंति २ ता सव्वालंकारविभूसियं करेंति २ ता विपुलं असणं ४ भोयावेंति २ ता सागरदत्तस्स [समीवे] उवणेंति । तए णं [से] सागरदत्ते [२] सूमालियं दारियं ण्हायं सव्वालंकारविभूसियं क(रि)रेता तं दमगपुरिसं एवं वयासी-एस णं देवाणुप्पिया ! मम धूया इद्धा, एयं णं अहं तव भारियत्ताए द(ला)लयामि भद्वियाए भद्वो भ(वि)वेज्जासि । तए णं से दमगपुरिसे

सागरदत्तस्स एयमट्ठं पड्डिसुणेइ २ ता सूमालियाए दारियाए सद्धिं वासघरं अणुपवि-
 सइ सूमालियाए दारियाए सद्धिं तल्लिमंसि निवज्जइ । तए णं से दमगपुरिसे सूमालि-
 याए इमं एयारूवं अंगकासं पड्डिसंवेदेइ सेसं जहा सागरस्स जाव सयणिज्जाओ अब्भु-
 ट्ठेइ २ ता वासघराओ निग्गच्छइ २ ता खंडमल्लगं खंडघ(डं)डगं च गहाय मारामुक्के
 विव काए जामेव दि(सं)सि पाउब्भूए तामेव दिसिं पडिगए । तए णं सा सूमालिया
 जाव गए णं से दमगपुरिसे-त्तिकहु ओहयमणसंकप्पा जाव झियायइ ॥ ११८ ॥ तए
 णं सा भद्दा कल्लं पाउप्पभायाए दासचेडिं सद्दावेइ (२ एवं वयासी) जाव सागरद-
 त्तस्स एयमट्ठं निवेदेइ । तए णं से सागरदत्ते तहेव संभंते समाणे जेणेव वास(ह)घरे
 तेणेव उवागच्छइ २ ता सूमालियं दारियं अंके निवेसेइ २ ता एवं वयासी-अहो
 णं तुमं पुत्ता ! पुरापोराणाणं [कम्मार्णं] जाव पच्चणुब्भवमाणी विहरसि, तं मा णं
 तुमं पुत्ता ! ओहयमणसंकप्पा जाव झियाहि, तुमं णं पुत्ता ! मम महाणसंसि विपुलं
 असणं ४ जहा पो(पु)ट्टिला जाव परिभाएमाणी विहराहि । तए णं सा सूमालिया
 दारिया एयमट्ठं पड्डिसुणेइ २ ता महाणसंसि विपुलं असणं ४ जाव दलमाणी विह-
 रइ । तेणं कालेणं तेणं समएणं गोवालियाओ अज्जाओ बहुस्सुयाओ एवं जहेव तेय-
 लिणाए सुव्वयाओ तहेव समोस(ड्वा)ढाओ तहेव संघाडओ जाव अणुपविट्ठे तहेव
 जाव सूमालिया पड्डिला(भि)मेत्ता एवं वयासी-एवं खलु अज्जाओ ! अहं सागरस्स
 अणिट्ठा जाव अमणामा, नेच्छइ णं सागरए [दारए] मम नामं वा जाव परिभोगं
 वा, जस्स जस्स वि य णं दे(दि)ज्जामि तस्स तस्स वि य णं अणिट्ठा जाव अम-
 णामा भवामि, तुब्भे य णं अज्जाओ ! बहुत्तायाओ एवं जहा पोट्टिला जाव उवल्ले
 [णं] जेणं अहं सागरस्स दारगस्स इट्ठा कंता जाव भवेज्जामि । अज्जाओ तहेव
 भणंति तहेव साविथा जाया तहेव चिता तहेव सागरद(त्तं स०)त्तस्स आपुच्छइ
 जाव गोवालियाणं अंति(ए)यं पव्वइया । तए णं सा सूमालिया अज्जा जाया इ(ई)-
 रियासमिया जाव [गुत्त]वंभयारिणी बहूहिं चउत्थच्छट्ठम जाव विहरइ । तए णं सा
 सूमालिया अज्जा अन्नया कयाइ जेणेव गोवालियाओ अज्जाओ तेणेव उवागच्छइ २
 ता वंदइ नमंसइ वं० २ ता एवं वयासी-इच्छामि णं अज्जाओ ! तुब्भेहिं अब्भणु-
 चाया समाणी चंपा(ओ)ए बाहिं सुभूमिभागस्स उज्जाणस्स अदूरसामंते छट्ठंछट्ठेणं
 अणिविक्खितेणं तवोकम्मणेणं सूराभिमुही आयावेमाणी विहरित्तए । तए णं ताओ
 गोवालियाओ अज्जाओ सूमालियं एवं वयासी-अम्हे णं अ(जे)ज्जो ! समणीओ
 निग्गंथीओ इ(ई)रियासमियाओ जाव गुत्तवंभचारिणीओ, नो खलु अम्हं कप्पइ बहिया
 गामस्स [वा] जाव सज्जिवेस्स वा छट्ठंछट्ठेणं जाव विहरित्तए, कप्पइ णं अम्हं अंतो-

उवस्सयस्स वइपरिक्खित्तस्स संघाडिबद्धियाए णं समतलपइयाए आया(वि)वेत्ताए । तए णं सा सूमालिया गोवालियाए (अज्जाए) एयमट्ठं नो सहइह नो पत्तियइ नो रोएइ एयमट्ठं असइहमा(णि)णी ३ सुभूमिभागस्स उज्जाणस्स अदूरसामंते छट्ठंछट्ठेणं जाव विहरइ ॥ ११९ ॥ तत्थ णं चंपाए (न०) ललिया नाम गोट्टी परिवसइ नरवइदिज्ज- (वि)पयारा अम्मापिइनिययनिप्पिवासा वेसविहारकयनिकेया नाणाविहअविणयण्य- हाणा अड्ढा जाव अपरिभूया । तत्थ णं चंपाए (०) देवदत्ता नामं गणिया होत्था सू(सुक्क)माला जहा अंडनाए । तए णं तीसे ललियाए गोट्टीए अज्जा [कयाइ] पंच गोट्टिज्जगपुरिसा देवदत्ताए गणियाए सद्धि सुभूमिभागस्स उज्जाणस्स उज्जाणसिंरि पच्चणुन्भवमाणा विहरंति । तत्थ णं एगे गोट्टिज्जगपुरिसे देवदत्तं गणियं उच्चङ्गे ध(र)रेइ एगे पिट्ठओ आयवत्तं धरेइ एगे पुप्फपूर(यं)णं रएइ एगे पाए रएइ एगे चामस्सखेवं करेइ । तए णं सा सूमालिया अज्जा देवदत्तं गणियं तेहिं पंचहिं गोट्टि- ज्जपुरिसेहिं सद्धि उरालाई माणुस्सगाई भोगभोगाई भुंजमा(णि)णीं पासइ २ ता इमेयारूवे संकप्पे समुप्पज्जित्था-अहो णं इमा इत्थिया पुरापोराणां कम्माणं जाव विहरइ । तं जइ णं केइ इमस्स सुचरियस्स तवनियमवंधचेरवासस्स कल्लाणे फलवित्तिविसेसे अत्थि तो णं अहमवि आगमिस्सेणं भवग्गहणेणं इमेयारूवाइ उरा- लाई जाव विहरिज्जामि-त्तिकट्ठु नियणं करेइ २ ता आयावणभू(मिओ)मीए पच्चो- रु(ह)भइ ॥ १२० ॥ तए णं सा सूमालिया अज्जा सरीर(व)बाउसा जाया यावि होत्था अभिक्खणं २ हत्थे धोवेइ [अभिक्खणं २] पाए धोवेइ सीसं धोवेइ मुहं धोवेइ थणंतराई धोवेइ कक्खंतराई धोवेइ गु(गो)ज्जंतराई धोवेइ जत्थ [२] णं ठाणं वा सेज्जं वा निसीहियं वा चेएइ तत्थ वि य णं पुव्वामेव उदएणं अब्भु(क्ख- इ)क्खेत्ता तओ पच्छा ठाणं वा ३ चेएइ । तए णं ताओ गोवालियाओ अज्जाओ सूमालियं अज्जं एवं वयासी-एवं खलु (देवा० !) अज्जे ! अम्हे समणीओ निग्गंथीओ इरियासमियाओ जाव वंधचेरधारिणीओ, नो खलु कप्पइ अम्हं सरीरबाउसियाए होत्ताए, तुमं च णं अज्जे ! सरीरबाउसिया अभिक्खणं २ हत्थे धो(व)वेसि जाव चे(दे)एसि, तं तुमं णं देवाणुप्पिए ! एय(त)स्स ठाणस्स आलोएहि जाव पडिबज्जाहि । तए णं सूमालिया गोवालियाणं अज्जाणं एयमट्ठं नो आढाइ नो परि(जाण)याणाइ अणाढायमाणी अपरि(जा)याणमाणी विहरइ । तए णं ताओ अज्जाओ सूमालियं अज्जं अभिक्खणं २ (अभि)ही(लं)लंति जाव परिभवन्ति अभिक्खणं २ एयमट्ठं निवा- रंति । तए णं तीसे सूमालियाए समणीहिं निग्गंथीहिं हीलिज्जमाणीए जाव वारि- ज्जमाणीए इमेयारूवे अज्जत्थिए जाव समुप्पज्जित्था-जया णं अहं अगारवासमज्जे

वसामि तया णं अहं अप्पवसा । जया णं अहं सुं(डे)डा भविता पव्वइया तया णं
 अहं परवसा । पुत्तिं च णं ममं समणीओ आढायंति इयाणि नो आ(ढं)ढायंति ।
 तं सेयं खलु मम कल्लं पाउप्पभायाए गोवालियाणं अंतियाओ पडिनिक्खमिता पाडि-
 एक्कं उवस्स(गं)यं उवसंपज्जित्तणं विहरितए-त्तिकट्ठु एवं संपेहेइ २ ता कल्लं(पा०)
 गोवालियाणं (अज्जाणं) अंतियाओ पडिनिक्खमइ २ ता पाडिएक्कं उवस्सयं उवसं-
 पज्जित्तणं विहरइ । तए णं सा सूमालिया अज्जा अणोहट्ठिया अनिवारिया सच्छंद-
 मइ अभिक्खणं २ हत्थे धोवेइ जाव चेएइ तत्थ वि य णं पासत्था पासत्थविहा-
 (री)रिणी ओसत्ता २ कुसीला २ संसत्ता २ बहूणि वासाणि सामण्णपरियाणं पाउ-
 णइ [२] अद्धमासियाए संलेहणाए तस्स ठाणस्स अणालोइय(अ)पडिक्कंता काल-
 मासे कालं किच्चा ईसाणे कप्पे अन्नयरंति विमाणंति देवगणियत्ताए उववत्ता । तत्थे-
 गइयाणं देवीणं नव-पलिओवमाइं ठिई पत्तत्ता । तत्थ णं सूमालियाए देवीए नवप-
 लिओवमाइं ठिई पत्तत्ता ॥ १२१ ॥ तेणं कालेणं तेणं समएणं इहेव जंबुद्दीवे २
 भारहे वासे पंचालेसु जणवएसु कंपिल्लपुरे नामं नयरे होत्था वण्णओ । तत्थ णं
 दुवए नामं राया होत्था वण्णओ । तस्स णं चुलणी देवी धट्टज्जेणु क्कुमारं जुवराया ।
 तए णं सा सूमालिया देवी ताओ देवलोगाओ आउक्खएणं जाव चइत्ता इहेव जंबु-
 द्वीवे २ भारहे वासे पंचालेसु जणवएसु कंपिल्लपुरे नयरे दु(प)वयस्स रत्तो चुलणीए
 देवीए कुच्छिंति दारियत्ताए पच्चायाया । तए णं सा चुलणी देवी नवण्हं मासाणं
 जाव दारियं पयाया । तए णं तीसे दारियाए निव्वत्तवारसाहियाए इमं एयारुवं (०)
 नामं(०)-जम्हा णं एसा दारिया दु(व)पयस्स रत्तो धूया चुलणीए देवीए अत्तया
 तं हो(उ)ऊ णं अम्हं इमीसे दारियाए नामं(धिज्जे)धेज्जं दोवई । तए णं तीसे अम्मा-
 पियरो इमं एयारुवं गो(गु)ण्णं गुणनिप्फज्जं नामधेज्जं क(रिं)रेंति दोवई । तए णं
 सा दोवई दारिया पंचधा(इ)ईपरिग्गहिया जाव गिरिकंदरमल्ली(ण)णा इव चंपगलया
 निवायनिव्वाघायंति सुहंसुहेणं परिवट्ठइ । तए णं सा दोवई [देवी] रायवरकत्ता
 उम्मुक्कबालभावा जाव उक्किट्ठसरीरा जाया यावि होत्था । तए णं तं दोवई राय-
 वरकत्तं अच्चया कयाइ अंतोउरियाओ ण्हायं सव्वालंकारविभूसियं करेति २ ता
 दुवयस्स रत्तो पायवंदि(उं)यं पे(सं)सेति । तए णं सा दोवई २ जेणेव दुवए राया
 तेणेव उवागच्छइ २ ता दुवयस्स रत्तो पायग्गहणं करेइ । तए णं से दुवए राया
 दोवई दारियं अंके निवेसेइ २ ता दोवईए २ रुवे(ण) य ३ जायविम्हए दोवई
 २ एवं वयासी-जस्स णं अहं [तुमं] पुत्ता । रायस्स वा जुवरायस्स वा भारि-
 यत्ताए सयमेव दल्लइस्सामि तत्थ णं तुमं सुहिया वा दु(क्खि)हिया वा भ(वि)वे-

जासि । तए णं म(मं)म जावजीवाए हियय(डा)दाहे भविस्सइ । तं णं अहं तव पुत्ता ! अज्जयाए सयंवरं वि(रया)यरामि । अज्जयाए णं तुमं दिजं सयंवरा । (जे) जं णं तुमं सयमेव रायं वा जुवरायं वा वरेहिसि से णं तव भत्तारे भविस्सइ-
 त्तिकट्टु ताहिं इट्ठाहिं जाव आसासेइ २ ता पडिविसजेइ ॥ १२२ ॥ तए णं से दुवए राया दूयं सद्दावेइ २ ता एवं वयासी-गच्छह णं तुमं देवाणुप्पिया । बारवई नयरिं ।
 तत्थ णं तुमं कण्हं वासुदेवं समुद्दविजयपामोक्खे दस दसारे बलदेवपा(मु)मोक्खे पंच महावीरे उग्गसेणपामोक्खे सोलस रायसहस्से पज्जुवपा(सु)मोक्खाओ अज्जुट्ठाओ कुमारकोडीओ संवपामोक्खाओ सट्ठिं दुहंतसाहस्सीओ वीरसेणपा(सु)मोक्खाओ ए-
 (इ)क्कीवसं [राय]वीरपुरिससाहस्सीओ म(ह)हासेणपामोक्खाओ छप्पन्नं बलवगसाह-
 स्सीओ अन्ने य बहवे राईसरतलवरमाडं वियकोडुंबियइब्भ(सि)सेट्ठिसेणावइसत्थवा-
 हपभिइओ करयलपरिग्गहियं दसनहं सिरसावत्तं मत्थए अंजलिं कट्टु जएणं विजएणं
 यद्दावेहि २ ता एवं वयाहि-एवं खलु देवाणुप्पिया ! कंपिळपुरे नयरे दुवयस्स रत्तो
 धूयाए चुलणीए (देवीए) अत्तयाए धट्टज्जुणकुमारस्स भ(गि)इणीए दोवईए २ सयं-
 वरे भविस्सइ । (तं) तए णं तुम्मे (देवा० !) दुवयं रायं अणुगिण्हेमाणा अकालपरि-
 हीणं चेव कंपिळपुरे नयरे समोसरह । तए णं से दूए करयल जाव कट्टु दुवयस्स
 रत्तो एयमट्ठं (विणएणं) पडिसुणेइ २ ता जेणेव सए गिहे तेणेव उवागच्छइ २ ता
 कोडुंबियपुरिसे सद्दावेइ २ ता एवं वयासी-खिप्पामेव भो देवाणुप्पिया । चाउगघंटं
 आसरहं जुत्तामेव उवट्ठवेह जाव उवट्ठवेंति । तए णं से दूए प्हाए अलंकार० सरीरे
 चाउगघंटं आसरहं दु(रु)रुहइ २ ता बहूहिं पुरिसेहिं सन्नद्ध जाव गहिया(२२) उहपहरणेहिं
 सद्धिं संपरिवुडे कंपिळपुरं नयरं मज्झंमज्झेणं निग्गच्छइ (०) पंचालजणवयस्स मज्झं-
 मज्झेणं जेणेव देसप्पंते तेणेव उवागच्छइ २ ता सुट्ठाजणवयस्स मज्झंमज्झेणं जेणेव
 बारवई नयरी तेणेव उवागच्छइ २ ता बारवई नयरिं मज्झंमज्झेणं अणुप्पविसइ
 २ ता जेणेव कण्हस्स वासुदेवस्स बाहिरिया उवट्ठाणसाला तेणेव उवागच्छइ २
 ता चाउगघंटं आसरहं ठा(ठ)वेइ २ ता रहाओ पच्चोरुहइ २ ता मणुस्सवग्गुराप-
 विखत्ते पायचारविहा(रच्चा)रेणं जेणेव कण्हं वासुदेवे तेणेव उवागच्छइ २ ता कण्हं
 वासुदेवं समुद्दविजयपा(सु)मोक्खे य दस दसारे जाव बलवगसाहस्सीओ करयल तं
 चेव जाव समोसरह । तए णं से कण्हं वासुदेवे तस्स दूयस्स अंतिए एयमट्ठं सोच्चा
 निसम्म हट्ठ[तुट्ठे] जाव हियए तं दूयं सक्कारेइ सम्माणेइ स० २ ता पडिविसजेइ । तए
 णं से कण्हं वासुदेवे कोडुंबियपुरि(सं)से सद्दावेइ २ ता एवं वयासी-गच्छह णं तुमं
 देवाणुप्पिया ! सभाए सुहम्माए सामुदाइयं भेरिं तालेहि । तए णं से कोडुंबियपु-

रिसे करयल जाव कण्हस्स वासुदेवस्स एयमट्ठं पडिसुणेइ २ ता जेणेव सभाए सुह-
म्माए सामुदाइया भेरी तेणेव उवागच्छइ २ ता सामुदाइयं भेरिं महया २ सहेणं
तालेइ । तए णं ताए सामुदाइयाए भेरीए तालियाए समाणीए समुहविजयपामोक्खा
दस दसारा जाव महासेणपामोक्खाओ छप्पन्नं वलवगसाहस्सीओ ण्हाया सव्वालंकार-
विभूसिया जहाविभवइद्धिसक्कारसमुदएणं अप्पेगइया [हयगया] जाव [अप्पेगइया]
पाय(विहारचा) चारविहारेणं जेणेव कण्हे वासुदेवे तेणेव उवागच्छंति २ ता करयल
जाव कण्हे वासुदेवं जएणं विजएणं वद्धावेंति । तए णं से कण्हे वासुदेवे कोडुंविजपुरिसे
सहावेइ २ ता एवं वयासी-खिप्पामेव भो देवाणप्पिया ! अभिसेकं हत्थिरयणं पडि-
कप्पेह हयगय जाव पच्चपिणंति । तए णं से कण्हे वासुदेवे जेणेव मज्जणघरे तेणेव
उवागच्छइ २ ता समुत्तजालाकुलाभिरामे जाव अंजणगिरिकूडसन्निभं गयवई नरवई
दुरुढे । तए णं से कण्हे वासुदेवे समुहविजयपा(मु)मोक्खेहिं दसहिं दसारेहिं जाव म०
छ० ब० सद्धिं संपरिवुडे सत्विट्ठीए जाव रवेणं बारव(इ)इं नयरिं मज्झमज्झेणं निग्ग-
च्छइ २ ता सुरट्ठाजणवयस्स मज्झमज्झेणं जेणेव देसप्पंते तेणेव उवागच्छइ २ ता
पंचालजणवयस्स मज्झमज्झेणं जेणेव कं पिळपुरे नयरे तेणेव पहारेत्थ गमणाए । तए
णं से दुवए राया दोच्चं [पि] दूयं सहावेइ २ ता एवं वयासी-गच्छ[ह] णं तुमं देवाण-
प्पिया ! हत्थिणाजरं नयरं, तत्थ णं तुमं पंडुरायं सपुत्तयं जुहिद्धिं भीमसेणं अज्जुणं
नउलं सहदेवं दुजोहणं भाइसयसमग्गं गंगेयं विदुरं दोणं जयदहं सउ(णीं)णिं कीवं
आसत्थामं करयल जाव कट्ठु तहेव [जाव] समोसरह । तए णं से दूए एवं (व०-)
जहा वासुदेवे नवरं भेरी नत्थि जाव जेणेव कं पिळपुरे नयरे तेणेव पहारेत्थ गम-
णाए । एएणेव कमेणं तच्चं दूयं चं(पा)पं नयरिं, तत्थ णं तुमं कण्हे अंगरायं स(से)ल्लं
नंदिरायं करयल तहेव जाव समोसरह । चउत्थं दूयं सुत्तिमइं नयरिं, तत्थ णं तुमं
सिसुपालं दमघोससुयं पंचभाइसयसंपरिवुडं करयल तहेव जाव समोसरह । पंचमगं
दूयं हत्थिसी(स)सं नय(रं)रिं, तत्थ णं तुमं दमदंतं रायं करयल (तहेव) जाव
समोसरह । छट्ठं दूयं महुरं नयरिं, तत्थ णं तुमं धरं रायं करयल जाव समोसरह ।
सत्तमं दूयं रायणिहं नयरं, तत्थ णं तुमं सहदेवं जरा(सिंघु)संघसुयं करयल जाव
समोसरह । अट्ठमं दूयं कोडिणं नयरं । तत्थ णं तुमं रुप्पि मे(मे)सगसुयं करयल
तहेव जाव समोसरह । नवमं दूयं विरा(ड)टं नय(रं)रिं, तत्थ णं तुमं की(कि)यगं
भाउसयसमग्गं करयल जाव समोसरह । दसमं दूयं अवसेसेसु (य) गामागरनगरेसु
अणेगाई रायसहस्साई जाव समोसरह । तए णं से दूए तहेव निग्गच्छइ जेणेव
गामागर [तहेव] जाव समोसरह । तए णं ताई अणेगाई रायसहस्साई तस्स दूयस्स

अंति ए एयमट्ठं सोच्चा निसम्म हट्ठं तं दूयं सक्कारेति सम्माणेति स० २ ता पडिविस-
 (जि)जेंति । त ए णं ते वासुदेवपामोक्खा बहवे रायसहस्सा पत्तेयं २ ण्हाया सन्नद्ध-
 त्थिखंधवरगया महया ह्यगयरह(०)भट्ठचडगरपहकर (०) सएहिं २ नगरेहिं तो
 अभिनिगच्छंति २ ता जेणेव पंचाले जणवए तेणेव पहरेत्य गमणाए ॥१२३॥ त ए
 णं से दुवए राया कोडुं वियपुरिसे सद्दावेइ २ ता एवं वयासी-गच्छह णं तुमं देवाणु-
 पिपया ! कंपिल्लपुरे नयरे बहिया गंगाए महानईए अदूरसामंते एगं महं सयंवरमंडवं
 करेह अणेगखंभसयसच्चिविट्ठं लीलद्वियसा(ल)लिभंजि(आ)यागं जाव पच्चप्पिणंति ।
 त ए णं से दुवए राया [दोचंभि] कोडुं वियपुरिसे सद्दावेइ २ ता एवं वयासी-खिप्पामेव
 भो देवाणुपिपया ! वासुदेवपा(मु)मोक्खाणं बहूणं रायसहस्साणं आवासे करेह । ते वि-
 करेत्ता पच्चप्पिणंति । त ए णं [से] दुवए राया वासुदेवपा(०)मोक्खाणं बहूणं रायसह-
 स्साणं आग(मं)मणं जाणेत्ता पत्तेयं २ हत्थिखंध जाव परिवुडै अग्घं च पज्जं च
 गहाय सच्चिवट्ठैए कंपिल्लपुराओ निगच्छइ २ ता जेणेव ते वासुदेवपा(मु)मोक्खा बहवे
 रायसहस्सा तेणेव उवागच्छइ २ ता ताई वासुदेवपा(मु)मोक्खाई अग्घेण य पजेण य
 सक्कारेइ सम्माणेइ स० २ ता तेसिं वासुदेवपा(०)मोक्खाणं पत्तेयं २ आवासे वियरइ ।
 त ए णं ते वासुदेवपामोक्खा जेणेव सया २ आवासा तेणेव उवागच्छंति २ ता हत्थि-
 खंध(धा)धेहिं तो पचोखंहंति २ ता पत्तेयं [२] खंधावारनिवेसं करेति २ ता सए[सु] २
 आवासे[सु] अणु[प]विंसंति २ ता सएसु (२) आवासेसु [य] आसणेसु य सयणेसु य
 सच्चिसण्णा य संतुयडा य बहूहिं गंधव्वेहिं य नाडएहिं य उवगिज्जमाणा य उवनचि-
 ज्जमाणा य विहरंति । त ए णं से दुवए राया कंपिल्लपुरं नयरे अणुप्पविसइ २ ता
 विपुलं असणं ४ उवक्खडावेइ २ ता कोडुं वियपुरिसे सद्दावेइ २ ता एवं वयासी-
 गच्छह णं तुब्भे देवाणुपिपया ! विपुलं असणं ४ सुवहुपुप्फवत्थगंधमल्लालंकारं च
 वासुदेवपामोक्खाणं रायसहस्साणं आवासेसु साहरह । ते वि साहरंति । त ए णं ते
 वासुदेवपा(०)मोक्खा तं विपुलं अस(णं)णपा(णं)णखाइ(मं)मसाइमं आसाएमाणा ४
 विहरंति जिमियमुत्तरागया वि य णं समाणा आर्यता [चोक्खा] जाव सुहासणवर-
 गया बहूहिं गंधव्वेहिं जाव विहरंति । त ए णं से दुवए राया पुव्वावरण्हकालसमयंसि
 कोडुं वियपुरिसे सद्दावेइ २ ता एवं वयासी-गच्छह णं तु(मे)ब्भे देवाणुपिपया !
 कंपिल्लपुरे सिं(सं)वाडग जाव पहे[सु]वासुदेवपा(मु)मोक्खाणं य रायसहस्साणं आवा-
 सेसु हत्थिखंधवरगया महया २ सद्देणं जाव उग्घोसेमाणा २ एवं वयह-एवं खलु
 देवाणुपिपया ! कट्ठं पाउप्पभायाए दुवयस्स रत्तो धूयाए सुलणीए देवीए अं(त)ति-
 याए धट्ठजु(ण)णस्स भगिणीए दोवईए २ सयंवरे भविस्सइ । तं तुब्भे णं देवाणु-

पिया । दुवयं रायाणं अणुगिण्हेमाणा ण्हाया सव्वालंकारविभूसिया हत्थिखंधव-
 रगया सको(रं)रेंट० सेयवरचामर० हयगयरह० महया भडच(र)डगरेणं जाव
 परिक्खित्ता जेणेव सयंवरामंडवे तेणेव उवागच्छइ २ ता पत्तेयं नामंकेसु आसणेसु
 निसीयइ २ ता दोवई २ पडिवाल्लेमाणा २ चिट्ठइ घोसणं घोसेह [२] मम
 एयमाणत्तियं पच्चप्पिणह । तए णं ते कोडुंबिया तहेव जाव पच्चप्पिणंति । तए णं
 से दुवए राया कोडुंबियपुरिसे सहावेइ २ ता एवं वयासी-गच्छइ णं तुब्भे देवाणु-
 पिया । सयंवरमंड(पं)वं आसियसंमज्जिओवलित्तं सुगंधवरगंधियं पंचवण्णपु(फ-
 पुंजो)फोवयारकलियं कालागरुपवरकुंदुरुक्तुसुक्क जाव गंधवट्ठिभूयं मंचाडमंचकलियं
 करेह कारवेह करेता कारवेता वासुदेवपा(०)मोक्खाणं बहूणं रायसहस्साणं पत्तेयं २
 नामंकाई आसणाई अत्थुय(सेयव०)पच्चत्थुयाई रएह २ ता एयमाणत्तियं पच्चप्पिणह
 (तेवि) जाव पच्चप्पिणंति । तए णं ते वासुदेवपा(०)मोक्खा बहवे रायसहस्सा कळं
 (पाड०) ण्हाया सव्वालंकारविभूसिया हत्थिखंधवरगया सकोरेंट० सेयवरचामराहिं
 [महया] हयगय जाव परिवुडा सच्चिद्धीए जाव रवेणं जेणेव सयं(रं)रामंडवे
 तेणेव उवागच्छंति २ ता अणुप्पविसंति २ ता पत्तेयं २ नामं(के)कएसु निसीयंति
 दोवई २ पडिवाल्लेमाणा चिट्ठंति । तए णं से दुवए राया कळं ण्हाए सव्वालंकार-
 विभूसिए हत्थिखंधवरगए सकोरेंट० हयगय० कंप्पिल्लपुरं मज्झमज्जेणं निग्गच्छइ
 (०) जेणेव सयंवरामंडवे जेणेव वासुदेवपा(०)मोक्खा बहवे रायसहस्सा तेणेव
 उवागच्छइ २ ता तेसिं वासुदेवपा(०)मोक्खाणं करयल जाव वद्धावेता कण्हस्स
 वासुदेवस्स सेयवरचामरं गहाय उववीयमाणे चिट्ठइ ॥ १२४ ॥ तए णं सा दोवई
 २ [कळं जाव] जेणेव मज्जणघरे तेणेव उवागच्छइ २ ता [मज्जणघरं अणुपवि-
 सइ २ ता] ण्हाया सुद्धप्पावेसाई मंगल्लाई वत्थाई पवरपरिहिया मज्जणघराओ
 पडिनिक्खमइ २ ता जेणेव अंतेउरे तेणेव उवागच्छइ । तए णं तं दोवई २
 अंतेउरियाओ सव्वालंकारविभूसियं करंति, किं ते ? वरपायपत्तेउरा जाव
 चेडियाचक्कवालम(यह)हयरगविंदपरिक्खित्ता अंतेउराओ पडिनिक्खमइ २ ता
 जेणेव बाहिरिया उवट्ठाणसाला जेणेव चाउघंटं आसरहे तेणेव उवागच्छइ २ ता
 किट्ठविद्याए लेहियाए सद्धिं चाउघंटं आसरहं दुरुहइ । तए णं से धट्ठजुणे कुमारं
 दोवईए कखाए सारत्थं करेइ । तए णं सा दोवई २ कंप्पिल्लपुरं (नयरं) मज्झमज्जेणं
 जेणेव सयं(रं)रामंडवे तेणेव उवागच्छइ २ ता रहं ठावेइ रहाओ पच्चोस(ह)मइ २
 ता किट्ठविद्याए लेहियाए (य) सद्धिं सयंवरमंडवं अणुपविसइ करयल [जाव] तेसिं
 वासुदेवपा(०)मोक्खाणं बहूणं रायवरसहस्साणं पणामं करेइ । तए णं सा दोवई २

एणं मंहं सिरिदामगंडं[०] किं ते ? पाडलमल्लियवंपय जाव सत्तच्छयाईहिं गंधद्वणिं
 सुयंतं परमसुहफासं दरिसणिज्जं ने(मि)ण्हइ । तए णं सा किंवाविया (जाव) सुहवा
 जाव वामहत्थेणं चिल्लगं दप्पणं गहेऊण सललियं दप्पणसंकंतविबसंदंसिए य से
 दाहिणेणं हत्थेणं दरि(सि)सए पवररायसीहे फुडविसयविसुद्धरीभियगंभीरमहुरभ-
 णिया सा तेसिं सव्वेसिं पत्थिवाणं अम्मापि(ऊणं)उवंससत्तसामत्थगोतविक्कितिकं-
 तिबहुविहआगममाहप्पस्वजोव्वणगुणलावणकुलसीलजाणिया कित्तणं करेइ । पढमं
 ताव वण्हिपुंगवाणं दसंदसार[वर]नीरपुरि(साणं)स(ते)तिलोक्कबलवगाणं सत्तुसयस-
 हस्समाणावमद्दगाणं भवसिद्धिपवरपुंडरीयणं चिल्लगाणं बलवीरियस्वजोव्वणगुणला-
 वण्णकित्तिया कित्तणं करेइ । तओ पु(णो)ण उग्गसेणमईणं जायवाणं भणइ(य)-
 सोहग्गरुवकलिए वरेहि वरपुरिसंगंधहत्थीणं जो हु ते [लोए] होइ हिययदइओ ॥
 तए णं सा दोवई रायवरकज्जगा बहूणं रायवरसहस्साणं मज्झमज्जेणं समइच्छ-
 माणी २ पुव्वकयनियाणेणं चोइज्जमाणी २ जेणेव पंच पंडवा तेणेव उवागच्छइ
 २ ता ते पंच पंडवे तेणं दसद्ववण्णेणं कुमुदामेणं आवेढियपरिवेढि(यं)ए करेइ
 २ ता एवं वयासी-एए णं मए पंच पंडवा वरिया । तए णं (तेसिं) ताई वासुदेव-
 पामोक्खा(णं)ई बहूणं रायसहस्साणि महया २ सहेणं उग्गसेमाणा[ई]२ एवं वयंति-
 सुवरियं खलु भो ! दोव(इ)ईए रायवरकज्जाए (२) तिकडु सयंवरमंडवाओ पडिनिक्ख-
 मंति २ ता जेणेव सया २ आवासा तेणेव उवागच्छंति । तए णं धट्टजु(णो)णकुमारो
 पंच पंडवे दोवई[च] रायवरक(णं)जगं चाउग्घंटं आसरहं दुरु(इ)हेइ २ ता कंपिल्ल-
 पुरं मज्झमज्जेणं जाव सयं भवणं अणुपविसइ । तए णं दुवए राया पंच-पंडवे दोवई
 २ पट्ठयं दुरुहेइ २ ता सेयापी[य]एहिं कलसेहिं मजावेइ २ ता अग्गिहोमं
 करा(कार)वेइ पंचण्हं पंडवाणं दोवईए य पाणिग्गहणं करावेइ । तए णं से दुवए
 राया दोवईए २ इमं एयास्व पीइदाणं दलय(ती)इ तंजहा-अट्ठ हिरण्णकोडीओ जाव
 (अट्ठ) पेसणकारीओ दासचेडीओ अन्नं च विपुलं धणकणग जाव दलयइ । तए
 णं से दुवए राया ताई वासुदेवपामोक्खाई विपुलेणं असणपाणखाइमसाइमेणं
 वत्थगंध जाव पडिविसजेइ ॥ १२५ ॥ तए णं से पंडू राया तेसिं वासुदेवपा-
 मोक्खाणं बहूणं रायसहस्साणं करयल जाव एवं वयासी-एवं खलु देवाणुप्पिया !
 हत्थिणाउरे नयरे पंचण्हं पंडवाणं दोवईए य देवीए कल्लणकरे भविस्सइ, तं
 तुब्भे णं देवाणुप्पिया ! ममं अणुणिहमाणा अकालपरिहीणं समोसरइ । तए णं
 [ते] वासुदेवपामोक्खा पत्तयं २ जाव पहारेत्थ गमणाए । तए णं से पंड(इ)इ राया
 कोईबियपुरिसे सहावेइ २ ता एवं वयासी-गच्छह णं तुब्भे देवाणुप्पिया ! हत्थिणा-

उरे पंचहं पंडवाणं पंच पासायवडिसए कारे(ह)हि अब्भुगयमूसिय वण्णओ जाव
 पडिखवे । तए णं ते कोडुंबियपुरिसा पडिखुणेंति जाव कार(करा)वेंति । तए णं से
 वं(डुए)इ राया पंचहिं पंडवेहिं दोवईए देवीए सद्धि हयगयसंपरिवुडे कंपिळपुराओ
 बडिनिक्खमइ २ ता जेणेव हत्थिणाउरें तेणेव उवागए । तए णं से पंडुराया तेसिं
 वासुदेवपामोक्खाणं आगमणं जाणित्ता कोडुंबियपुरिसे सद्दवेइ २ ता एवं वयासी-
 गच्छह णं तुब्भे देवाणुप्पिया ! हत्थिणाउरस्स नयरस्स बहिया वासुदेवपामोक्खाणं
 बहूणं रायसहस्साणं आवासे कारेह अणेग(खं)थंभसय तहेव जाव पच्चप्पिणंति ।
 तए णं ते वासुदेवपामोक्खा बहवे रायसहस्सा जेणेव हत्थिणाउरें तेणेव उवाग-
 च्छंति । तए णं (से) पंडुराया ते(सिं) वासुदेवपामो(क्खाणं)क्खे [जाव] आग(म-
 णं)ए जाणित्ता हट्टुट्टे ष्हाए जहा दु(प)वए जाव जहारिहं आवासे दलयइ । तए णं ते
 वासुदेवपा(०)मोक्खा बहवे रायसहस्सा जेणेव सया(ई) २ आवासा(ई) तेणेव उवा-
 गच्छंति (०) तहेव जाव विहरंति । तए णं से पंडुराया हत्थिणाउरं नयरं अणुपविसइ
 २ ता कोडुंबियपुरिसे सद्दवेइ २ ता एवं वयासी-तुब्भे णं देवाणुप्पिया । विपुलं असणं
 ४ तहेव जाव उवणेंति । तए णं ते वासुदेवपामोक्खा बहवे रा(था)यसहस्सा ष्हाय
 तं विपुलं असणं ४ तहेव जाव विहरंति । तए णं से पंडुराया [ते] पंचपंडवे दोवई च
 देविं पट्ठयं दुरुहेइ २ ता सीयापीएहिं कलसेहिं ष्हावे(न्ति)इ २ ता कल्लण(का)कं करेइ
 २ ता ते वासुदेवपामोक्खे बहवे रायसहस्से विपुलेणं अस(ण)णेणं ४ पुप्फवत्थेणं
 सक्कारेइ सम्माणेइ (०) जाव पडिविसजेइ । तए णं ताई वासुदेवपामोक्खाई बहू(हिं)ई
 जाव पडिगयाई ॥ १२६ ॥ तए णं ते पंच पंडवा दोवईए देवीए (सद्धि अंतो अंते-
 उरपरियाल) सद्धि कल्लकल्लि वारंवारेणं उ(ओ)रालाई भोगभोगाई जाव विहरंति ।
 तए णं से पंडुराया अन्नया कया(ई)ई पंचहिं पंडवेहिं कौंतीए देवीए दोवईए (देवीए)
 य सद्धि अंतोअंतेउरपरियालसद्धि संपरिवुडे सीहासणवरगए यावि विहरइ । इमं च णं
 कच्छुल्लनारए दंसणेणं अइमहए विणीए अंतो(२)य कल्लसहियए मज्झ(त्थो)त्थउवत्थिए
 य अल्लीणसोमपियदंसणे सुरुवे अमइलसगलपरिहिए कालमियचम्मउत्तरासंगरइयव-
 (त्थे)च्छे दण्डकमण्डलुहत्थे जडामउडदित्तसिरए जज्जोवइयगणेतियसुंजमेह(ल)लावा-
 गलधरे हत्थकयकच्छभीए पियगंधव्वे धरणिगोयरप्पहाणे संवरणावरणओवय(णउ)-
 पुप्पयणिलेसणीसु य संकामणि(अ)आभिवोगपन्नत्तिगमणीयं(भ)भिणीसु य ब(हु)हूख
 विजाहरीसु विज्जासु विस्सुयजसे इट्ठे रामस्स य केसवस्स य पज्जुक्कपईवसंबअनिल्लनि-
 सडउम्मुयसारणगयसुमुहदुम्मुहाई(ण)णं जायवाणं अद्धुट्ठाण[य]कुमारकोडीणं हियय-
 दइए संथवए कलहजुद्धकोलाहलप्पिए भंडणाभिलासी बहूसु य सम(रेसु)रसयसंपराएसु

दंसणरए समंतओ कलहं सदक्खिणं अणुगवेसमाणे असमाहिकरे दसारवरवीरपुरि-
 स(ति)तेलोक्कबलवगाणं आमंतोऊण तं भगव(ती)इं प(ए)कमणिं गगणगमणदच्छं
 उप्पइओ गगणमभिलंधयंतो गामागरनगरखेडकब्बडमडंबदोणमुहपट्टणसं(वा)वाह-
 सहस्समंडियं थिमियमेइणीतलं वसुहं ओलोइं(तो)ते रम्मं हत्थिणाउरं उवागए पंडु-
 रायभवणंसि अइवेणेण समोवइए । तए णं से पंडू राया कच्छुल्लनारयं एजमाणं पासइ
 २ ता पंचहिं पंडवेहिं कुंतीए य देवीए सद्धिं आसणाओ अब्भुट्ठेइ २ ता कच्छुल्लना-
 रयं सत्तट्टपयाइं पच्चुग्गच्छइ २ ता त्तिक्खुतो आयाहिणपयाहिणं करेइ २ ता वंदइ
 नर्मसइ वं० २ ता महरिहेणं आसणेणं उवनिर्मतेइ । तए णं से कच्छुल्लनारए उद-
 यपरिफोसियाए दब्भोवरिप(च्च)च्चुत्थुयाए भिसियाए निसीयइ २ ता पंडुरायं रजे
 [य] जाव अंतोउरे य कुसलोदंतं पुच्छइ । तए णं से पंडूराया कौंती [य] देवी पंच
 य पंडवा कच्छुल्लनारयं आठंति जाव पज्जुवासंति । तए णं सा दोवई देवी कच्छुल्ल-
 नारयं अस्संज(यं)यअविर(यं)यअप्पडिहय[अ]पच्चक्खायपावकम्मं-तिकट्टु नो
 आढाइ नो परियाणइ नो अब्भुट्ठेइ नो पज्जुवासइ ॥ १२७ ॥ तए णं तस्स कच्छु-
 ल्लनारयस्स इमेयारुवे अज्झत्थिए चित्तिए पत्थिए मणोगए संकप्पे समुप्पज्जित्था-
 अहो णं दोवई देवी रुवे(णं)ण य जाव लावणेण य पंचहिं पंडवेहिं अ(णुव)वत्थद्धा
 समाणी ममं नो आढाइ जाव नो पज्जुवासइ । तं सेयं खलु मम दोवईए देवीए
 विप्पियं क(सि)रैतए-तिकट्टु एवं संपेहेइ २ ता पंडु(य)रायं आपुच्छइ २ ता उप्प-
 यणिं विज्जं आवाहेइ २ ता ताए उक्किट्ठाए जाव विज्जाहरगईए लवणसमुदं मज्झं-
 मज्जेणं पुरत्थाभिमुहे वी(इ)ईवइउं पयत्ते यावि होत्था । तेणं कालेणं तेणं समएणं
 धायइसंडे दीवे पुरत्थिमद्धदाहिणद्धभरहवासे अ(म)वरकंका ना(म)मं रायहाणी
 होत्था । त(ए)त्थ णं अ(म)वरकंकाए रायहाणीए पउमनाभे नामं राया होत्था महया
 हिमवंत वण्णओ । तस्स णं पउमनाभस्स रत्तो सत्त देवीसयाइं ओरोहे होत्था ।
 तस्स णं पउमनाभस्स रत्तो सुनाभे नामं पुत्ते जुवराया(या)वि होत्था । तए णं से
 पउमनाभे राया अंतोअंतोउरंसि ओरोहसंपरिवुडे सी(सिं)हासणवरगए विहरइ ।
 तए णं से कच्छुल्लनारए जेणेव अवरकंका रायहाणी जेणेव पउमना(ह)भस्स भंवणे
 तेणेव उवागच्छइ २ ता पउमनाभस्स रत्तो भवणंसि झ(त्तिं)त्ति वेगे(णं)ण समो-
 वइए । तए णं से पउमनाभे(राया) कच्छु(ल्ल)ल्लनारयं एजमाणं पासइ २ ता आस-
 णाओ अब्भुट्ठेइ २ ता अग्गेणं जाव आसणेणं उवनिर्मतेइ । तए णं से कच्छुल्लनारए
 उदयपरिफोसियाए दब्भोवरिपच्चत्थुयाए भिसियाए निसीयइ जाव कुसलोदंतं आपु-
 च्छइ । तए णं से पउमनाभे राया नियगओरोहे जायविम्हए कच्छुल्लनारयं एवं

वयासी-तु(म्भं)मं देवाणुप्पिया ! बहूणि गामाणि जाव मि(गे)हाइं अणुपविससि,
तं अत्थि-याइं ते कर्हिचि देवाणुप्पिया ! एरिसए ओरोहे दिट्ठपुव्वे जारिसए णं मम
ओरोहे ? । तए णं से कच्छुल्लनारए पउमनाभेणं (रत्ता) एवं तुत्ते समाणे ईसिं विह-
सियं करेइ २ ता एवं वयासी-सरिसे णं तुमं पउम-नाभा ! तस्स अगडदहुरस्स ।
के णं देवाणुप्पिया ! से अगडदहुरे ? एवं जहा मल्लिणाए । एवं खलु देवाणुप्पिया !
जंबुद्दीवे २ भारहे वासे हत्थिणाउरे [नयरे] दुपयस्स रत्तो धूया चुलणीए देवीए
अत्ताया पंडुस्स सुण्हा पंचण्हं पंडवाणं भारिया दोवई देवी रुवेण य जाव उक्किट्ठ-
सरीरा । दोवईए णं देवीए छिन्नस्सवि पायंगुट्ठ(य)स्स अयं तव ओरोहे स(तिमं)यंपि
कलं न अग्वइ-त्तिकट्ठ पउम-नाभं आपुच्छइ (०) जाव पडिगए । तए णं से
पउमनाभे राया कच्छुल्लनारयस्स अंतिए एयमट्ठं सोच्चा निसम्म दोवईए देवीए
रुवे य ३ मुच्छिए ४ (०) जेणेव पोसहसाला तेणेव उवागच्छइ २ ता पोसहसालं
जाव पुव्वसंगइयं देवं एवं वयासी-एवं खलु देवाणुप्पिया ! जंबुद्दीवे २ भारहे
वासे हत्थिणाउरे जाव [उक्किट्ठ]सरीरा, तं इच्छामि णं देवाणुप्पिया ! दोव(तीं)इं
देवीं इहमा(णि)णीयं । तए णं पुव्वसंगइए देवे पउमनाभं एवं वयासी-नो
खलु देवाणुप्पिया ! ए(यं)वं भूयं वा भव्वं वा भविसं वा ज-न्नं दोवई देवी
पंच-पंडवे मोतू(णं) अन्नं पुरिसेणं सद्धिं उ(ओ)रालाईं जाव विहरिस्सइ । तहावि
य णं अहं तव पियट्ठ(त)याए दोवईं देविं इहं हव्वमाणेसि-त्तिकट्ठ पउम-नाभं
आपुच्छइ २ ता ताए उक्किट्ठाए जाव लवणसमुहं मज्झमज्झेणं जेणेव हत्थिणाउरे
नयरे तेणेव पहारेत्थ गमणाए । तेणं कालेणं तेणं समएणं हत्थिणाउरे [नयरे]
जुहिट्ठिल्ले राया दोवईए देवीए सद्धिं उप्पि आगासत(लं)लगंसि सुह[८]पसुत्ते यावि
होत्था । तए णं से पुव्वसंगइए देवे जेणेव जुहिट्ठिल्ले राया जेणेव दोवई देवी तेणेव
उवागच्छइ २ ता दोवईए देवीए ओसोवणियं दलयइ २ ता दोवईं देविं गिण्हइ २
ता ताए उक्किट्ठाए जाव जेणेव अ-वरकंका जेणेव पउम-नाभस्स भवणे तेणेव उवा-
गच्छइ २ ता पउम-नाभस्स भवणंसि असोगवणियाए दोवईं देविं ठावेइ २ ता
ओसोवणिं अवहरइ २ ता जेणेव पउमनाभे तेणेव उवागच्छइ २ ता एवं वयासी-
एस णं देवाणुप्पिया । मए हत्थिणाउराओ दोवई देवी इ(ह)हं हव्वमाणीया तव
असोगवणियाए चिट्ठइ । अओ परं तुमं जाणसि-त्तिकट्ठ जामेव दिसिं पाउम्भूए
तामेव दिसिं पडिगए । तए णं सा दोवई देवी तओ मुहुत्तंतरस्स पडिबुद्धा
समाणी तं भवणं असोगवणियं च अपच्चभिजाणमाणी एवं वयासी-नो खलु अम्हं
एसे सए भवणे नो खलु एसा अम्हं स(गा)या असोगवणिया । तं न नज्जइ णं अहं,

केण(ई)इ देवेण वा दाणवेण वा किंपुरिसेण वा किन्नरेण वा महोरगेण वा गंधव्वेण वा अन्नस्स र-न्नो असोगवणियं साहरिय-त्तिकट्ठु ओहयमणसंकप्पा जाव झियायइ । तए णं से पउम-नामे राया ण्हाए सव्वालंकारविभूसिए अंतेउपरियालसंपरिखुडे जेणेव असोगवणिया जेणेव दोवई देवी तेणेव उवागच्छइ २ ता दोव(तीं)ई दे(वीं)विं ओहय(०) जाव झियायमा(णीं)णिं पासइ २ ता एवं वयासी-कि-न्नं तुमं देवाणुप्पि- (ए)या । ओहय जाव झियाहि ? एवं खलु तुमं देवाणुप्पिए ! मम पुव्वसंगइएणं देवेणं जंबुद्दीवाओ २ भारद्वाओ वासाओ हत्थिणा(पु)उराओ नयराओ जुहिद्धिळस्स र-न्नो भवणाओ साहरिया, तं मा णं तुमं देवाणुप्पि-या ! ओहय-जाव झियाहि, तुमं [णं] मए सद्धिं विपुलाई भोगभोगाई जाव विहराहि । तए णं सा दोवई (देवी) पउम-नामं एवं वयासी-एवं खलु देवाणुप्पिया ! जंबुद्दीवे २ भारद्वासे बारव(ति)ईए नयरीए कण्हे नामं वासुदेवे मम(प्पि)पियभाउए परिवसइ, तं जइ णं से छण्हं मासाणं म(मं)म कूवं नो हव्वमागच्छइ तए णं अहं देवाणुप्पिया ! जं तुमं वदसि तस्स आणाओवायवयणनिहेसे चिट्ठिस्सामि । तए णं से पउ(मे)मनामे दोवईए एयमट्ठं पडिमुणेइ २ ता दोवई देविं क-न्नंतेउरे ठवेइ । तए णं सा दोवई देवी छट्ठंछट्ठेणं अणिविक्खत्तेणं आर्यबिलपरिग्गहिएणं तवोक्कमेणं अप्पाणं भावेमाणी विहरइ ॥ १२८ ॥ तए णं से जु(हु)हिद्धिळे राया तओ मुहुत्तंतरस्स पडिबुद्धे समाने दोवई देविं पासे अपासमा(णो)णे सयणिजाओ उट्टेइ २ ता दोवईए देवीए सव्वओ समंता मग्गणगवेसणं करेइ २ ता दोवईए देवीए कत्थइ सुई वा खुई वा पवत्तिं वा अलभ-माणे जेणेव पं-डूराया तेणेव उवागच्छइ २ ता पं-डूरायं एवं वयासी-एवं खलु ताओ ! म-म आगासतलंगंसि [सुह]पसुत्तस्स पासाओ दोवई देवी न नजइ केणइ देवेण वा दाणवेण वा [किंपुरिसेण वा] किन्नरेण वा महोरगेण वा गंधव्वेण वा हिया वा नि(णी)या वा अ(व)क्खित्ता वा (?), [तं] इच्छामि णं ताओ ! दोवईए देवीए सव्वओ समंता मग्गणगवेसणं क(र्यं)रित्तए । तए णं से पं-डूराया कोडुंविजयपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! हत्थिणाउरे नयरे सिंघा-डगति(य)गचउक्कच्चरमहापहपहेसु महया २ सद्देणं उग्घोसेमाणा २ एवं वयह-एवं खलु देवाणुप्पिया ! जुहिद्धिळस्स र-न्नो आगासतलंगंसि सुहपसुत्तस्स पासाओ दोवई देवी न नजइ केणइ देवेण वा दाणवेण वा किंपुरिसेण वा किन्नरेण वा महोरगेण वा गंधव्वेण वा हिया वा नि(नी)या वा अ-क्खित्ता वा, तं जो णं देवाणुप्पिया ! दोवईए देवीए सुई वा खुई वा पवत्तिं वा परिकहेइ तस्स णं पंडूराया विउलं अत्थसंपयाणं (दाणं)दल्लयइ-त्तिकट्ठु घोसणं घोसावेह २ ता एयमाणत्तियं पच्चप्पिणह । तए णं ते

कोडुंबियपुरिसा जाव पच्चप्पिणंति । तए णं से पंडुराया दोवईए देवीए कत्थइ सुइं
वा जाव अलभमाणे कौंतीं देवीं सहावेइ २ ता एवं वयासी-गच्छह णं तुमं देवाणु-
प्पिया । बारवई नयरिं कण्हस्स वासुदेवस्स एयमट्ठं निवेदेहि । कण्हे णं परं वासुदेवे
दोवईए (देवीए) मग्गणगवेसणं करेज्जा अन्नहा न नज्जइ दोवईए देवीए सु(तीं)इं वा
खु(तीं)इं वा पव(तीं)तिं वा उवलभेज्जा । तए णं सा कौंती देवी पंडु(र)णा एवं
वुत्ता समाणी जाव पडिसुणेइ २ ता ण्हाया हत्थिखंधवरगया हत्थिणा(उ)पुरं नयरं
मज्झंमज्झेणं निग्गच्छइ २ ता कुरुजणवर्यं मज्झंमज्झेणं जेणेव सुर(ट्ठ)ट्ठाजणवए
जेणेव बारवई नयरी जेणेव अग्गुज्जाणे तेणेव उवागच्छइ २ ता हत्थिखंधाओ
पच्चोरुहइ २ ता कोडुंबियपुरिसे सहावेइ २ ता एवं वयासी-गच्छह णं तुमं देवा-
णुप्पिया । जेणेव (बारवई ण०) बारवईं नयरिं अणुपविसह २ ता कण्हं वासुदेवं
करयल[०] एवं वयह-एवं खलु सामी ! तुमं पिउच्छा कौंती देवी हत्थिणाउराओ
नयराओ इहं हव्वमागया तुमं दंसणं कंखइ । तए णं ते कोडुंबियपुरिसा जाव
कहंति । तए णं कण्हे वासुदेवे कोडुंबियपुरिसाणं अंतिए [एयमट्ठं] सोच्चा निसम्म
[हट्ठतुट्ठे] हत्थिखंधवरगए हयगय[०] बारवईए (य) नयरीए मज्झंमज्झेणं जेणेव कौंती
देवी तेणेव उवागच्छइ २ ता हत्थिखंधाओ पच्चोरुहइ २ ता कौंतीए देवीए पायग्ग-
हणं करेइ २ ता कौंतीए देवीए सद्धिं हत्थिखंधं दुरुहइ २ ता बारव(तीए)इं नय-
(रीए)रिं मज्झंमज्झेणं जेणेव सए गिहे तेणेव उवागच्छइ २ ता सयं गिहं अणु-
पविसइ । तए णं से कण्हे वासुदेवे कौं(तीं)तिं देविं ण्हायं जिमियमुत्ततरागयं जाव
सुहासणवरगयं एवं वयासी-संदिसउ णं पिउच्छा । किमागमणपओयेणं (?) । तए
णं सा कौंती देवी कण्हं वासुदेवं एवं वयासी-एवं खलु पुत्ता ! हत्थिणाउरे नयरे
जुहिट्ठिस्स [रत्तो] आगासत(ले)लए सुह[८]पसुत्तस्स पासाओ दोवई देवी न नज्जइ
केणइ अवहिया जाव अवक्खित्ता वा, तं इच्छामि णं पुत्ता ! दोवईए देवीए मग्ग-
णगवेसणं कयं । तए णं से कण्हे वासुदेवे कौं(तीं)तीपिउच्छि एवं वयासी-जं नवरं
पिउच्छा (!) दोवईए देवीए कत्थइ सुइं वा जाव लभामि तो णं अहं पायालाओ
वा भवणाओ वा अद्धभरहाओ वा समंतओ दोवईं [देविं] साहत्थि उवणेमि-त्तिकट्ठु
कौं(तीं)तीपिउ(त्थि)च्छि सकारेइ सम्माणेइ जाव पडिविसजेइ । तए णं सा कौंती देवी
कण्हेणं वासुदेवेणं पडिविसज्जिया समाणी जामेव दिसिं पाउन्नूया तामेव दिसिं
पडिगया । तए णं से कण्हे वासुदेवे कोडुंबियपुरिसे सहावेइ २ ता एवं वयासी-
गच्छह णं तुमं देवाणुप्पिया ! बारवई नयरिं एवं जहा पंडु तहा घोसणं घोसा-
वेइ जाव पच्चप्पिणंति पंडुस्स जहा । तए णं से कण्हे वासुदेवे अन्नया अंतोअंते-

उरगए ओरोहे जाव विहरइ । इमं च णं कच्छुल्लए [नारए] जाव समोवइए जाव
 निसीइत्ता कण्हं वासुदेवं कुसलोदंतं पुच्छइ । तए णं से कण्हे वासुदेवे कच्छुल्लं
 नारयं एवं वयासी-तुमं णं देवाणुप्पिया । बह्वणि गामागर जाव अणुपविससि,
 तं अत्थि-याईं ते कहिं(वि)च्चि दोवईए देवीए सुई वा जाव उवलद्धा ? । तए णं से
 कच्छु(ळे)ल्लए (णारए) कण्हं वासुदेवं एवं वयासी-एवं खलु देवाणुप्पिया । अन्नया
 [क्याईं] धायईसंडे दीवे पुरत्थिमद्धं दाहिणद्धभरहवासं अवरकंकारायहाणि गए,
 तत्थ णं मए पउमनाभस्स रत्तो भवणंसि दोवईं देवी जारिसिया दिट्ठपुब्बा यावि
 होत्था । तए णं कण्हे वासुदेवे कच्छुल्लं एवं वयासी-तुम्भं चैव णं देवाणुप्पिया ।
 ए(वै)यं पुव्वकम्मं । तए णं से कच्छुल्लनारए कण्हेणं वासुदेवेणं एवं सुत्ते समाणे उप्प-
 यणिं विज्जं आवाहेइ २ ता जामेव दिसिं पाउब्भूए तामेव दिसिं पडिगए । तए णं से
 कण्हे वासुदेवे दूयं सद्दावेइ २ ता एवं वयासी-गच्छह णं तुमं देवाणुप्पिया । हत्थिणाउरं
 पंडुस्स रत्तो एयमट्ठं निवे(दे)एहि-एवं खलु देवाणुप्पिया । [दोवईं देवी] धाय(इ)ई-
 संडे)डदीवे पुर(च्छि)त्थिमद्धे अवरकंकाए रायहाणीए पउम-नाभभवणंसि [साहिया]
 दोवईए देवीए पउत्ती उवलद्धा । तं गच्छंतु पंच पंडवा चाउरंगिणीए सेणाए सद्धिं
 संपरिवुडा पुर-त्थिमवेयालीए ममं पडिवालेमाणा चिट्ठंतु । तए णं से दूए जाव भणइ
 [जाव] पडिवालेमाणा चिट्ठह । तेवि जाव चिट्ठंति । तए णं से कण्हे वासुदेवे कोडुं-
 बियपुरिसे सद्दावेइ २ ता एवं वयासी-गच्छह णं तुम्भे देवाणुप्पिया । सन्नाहियं भेरिं
 ता(डे)लेह । तेवि तालेंति । तए णं ती(से)ए स-न्नाहियाए भेरीए सहं सोच्चा समुद्विज-
 यपामोक्खा दस दसारा जाव छप्प-न्नं बलव(य)गसाहस्सीओ सन्नद्धवद्ध जाव गहि-
 याउहपहरणा अप्पेगइया हयगया [अप्पेगइया] गयगया जाव [मणुस्स]वग्गुरापरि-
 व्विक्खत्ता जेणेव सभा सु(ध)हम्मा जेणेव कण्हे वासुदेवे तेणेव उवागच्छंति २ ता
 करयल जाव वद्धावेंति । तए णं [से] कण्हे वासुदेवे हत्थिखंधवरगए सकोरंटेमल्लदा-
 मेणं छत्तेणं ध(धा)रिज्जमाणेणं सेयवर० हयगय(०) महया भडचडगरपहकरेणं
 बारवईए नयरीए मज्झमज्झेणं निगगच्छइ (०) जेणेव पुर-त्थिमवेयाली तेणेव उवा-
 गच्छइ २ ता पंचहिं पंडवेहिं सद्धिं एगयओ सि(ल)लाइ २ ता खंधावार-निवेसं करेइ
 २ ता [पोसहसालं करेइ २ ता] पोसहसालं अणु-प्पविसइ २ ता सुट्ठियं देवं मण(सि)-
 सीकरेमाणे २ चिट्ठइ । तए णं कण्हस्स वासुदेवस्स अट्ठमभत्तंसि परिणममाणंसि
 सुट्ठिओ जाव आगओ (,) [एवं वयइ-] भण देवाणुप्पिया । जं मए कायव्वं । तए णं से
 कण्हे वासुदेवे सुट्ठियं (देवं) एवं वयासी-एवं खलु देवाणुप्पिया । दोवईं देवी जाव
 पउमनाभस्स भवणंसि सा(द्धरि)हिया, तण्णं तुमं देवाणुप्पिया । मम पंचहिं पंड-

वेहिं सद्धिं अप्पच्छस्स छहं रहणं लवणसमुद्दे मग्गं विय(रे)राहि जा(जण)णं अहं-
 अ-वरकंकारायहाणिं दोवईए कूवं गच्छामि । तए णं से सुट्टिए देवे कण्हं वासुदेवं
 एवं वयासी-किण(हं)णं देवाणुप्पिया ! जहा चेव पउम-नाभस्स रत्तो पुव्वसंगइएणं
 देवेणं दोवई जाव साहि(संहरि)या तहा चेव दोवई देवि धायईसंडाओ दीवाओ
 भारहाओ जाव हत्थिणाउरं साहरामि उदाहु पउम-नाभं रायं सपुरवल्वाहणं
 लवणसमुद्दे पक्खिवामि ? । तए णं [से] कण्हे वासुदेवे सुट्ठियं देवं एवं वयासी-
 मा णं तुमं देवाणुप्पिया ! जाव साहराहि, तुमं णं देवाणुप्पिया ! [मम] लवण-
 समुद्दे [पंचहिं पंडवेहिं सद्धिं] अप्पच्छस्स छहं रहणं मग्गं वियराहि, सयमेव
 णं अहं दोवईए कूवं गच्छामि । तए णं से सुट्टिए देवे कण्हं वासुदेवं एवं वयासी-
 एवं होउ [णं] । पंचहिं पंडवेहिं सद्धिं अप्पच्छस्स छहं रहणं लवणसमुद्दे मग्गं
 वियरइ । तए णं से कण्हे वासुदेवे चाउरंगि(णी)णिं सेणं पडिविसजेइ २ ता
 पंचहिं पंडवेहिं सद्धिं अप्पच्छे छहिं रहेहिं लवणसमुद्दं मज्झंमज्जेणं वीइवयइ २
 ता जेणेव अ-वरकंका रायहाणी जेणेव अ-वरकंकाए [रायहाणीए] अग्गुजाणे तेणेव
 उवागच्छइ २ ता रहं ठा(ठ)वेइ २ ता दारुयं सारहिं सहावेइ २ ता एवं
 वयासी-गच्छह णं तुमं देवाणुप्पिया ! अ-वरकंकारायहाणिं अणु-पविसाहि २ ता
 पउम-नाभस्स र-त्तो वामेणं पाएणं पायपीठं अ[व]क्कमिता कुंतगणेणं लेहं पणामेहि
 तिवलियं भिउडिं निडाले साहडु आसुस्ते रुट्ठे कुट्ठे कुविए चंडिक्किए एवं व०-
 हं भो पउम-ना(हा)भा ! अपत्थियपत्थिया दुरंतपंतलक्खणा हीणपु-ण्णचाउइसा
 सि(सी)रिहिरि(धी)धिइपरिवज्जिया [!] अज्ज न भवसि किन्नं तुमं न याणासि
 कण्हस्स वासुदेवस्स भगिणिं दोवई देविं इहं हव्वमा(ण)णेमा(णे)णं ? तं एयमवि गए
 पच्चप्पिणाहि णं तुमं दोवई देविं कण्हस्स वासुदेवस्स अहव णं जुद्धसज्जे निग्ग-
 च्छाहि, एस णं कण्हे वासुदेवे पंचहिं पंडवेहिं [सद्धिं] अप्पच्छे दोवई[ए] देवीए
 कूवं हव्वमागए । तए णं से दारुए सारही कण्हेणं वासुदेवेणं एवं वुत्ते समाणे
 हट्ठउट्ठे (जाव) पडिसुणेइ २ ता अ-वरकं(का)कं रायहाणिं अणुपविसइ २ ता
 जेणेव पउमना(हि)भे तेणेव उवागच्छइ २ ता करयल जाव वद्धावेत्ता एवं
 वयासी-एस णं सामी ! मम विणयपडिवत्ती इमा अन्ना मम सामिस्स समुहाणत्ति-
 तिकडु आसुस्ते वामपाएणं पायपीठं अ(णु)क्कमइ २ ता कुं(कों)तगणेणं लेहं पणा-
 (म)मेइ (०) जाव कूवं हव्वमागए । तए णं से पउम-नाभे दारुएणं सारहिणा एवं वुत्ते
 समाणे आसुस्ते तिवलिं भिउडिं निडाले साहडु एवं वयासी-(णो) न अप्पिणामि णं
 अहं देवाणुप्पिया ! कण्हस्स वासुदेवस्स दोवई । एस णं अहं सयमेव जुज्झस(जो)-

ज्ञे निग्गच्छामि-त्तिकट्टु दाख्यं सारहिं एवं वयासी-केवलं भो ! रायसत्थेसु दू(ये)ए
 अवज्जे-त्तिकट्टु असक्कारि(य)यं असम्माणि(य)यं अव-दारेणं निच्छुभावेइ । तए
 णं से दाए सारही पउम-नाभेणं असक्कारि-यं जाव निच(छू)छुडे समाणे जेणेव कण्हे
 वासुदेवे तेणेव उवागच्छइ २ ता करयल जाव कण्हं (जाव) एवं वयासी-एवं
 खलु अहं सामी ! तुब्भं वयणेणं जाव निच्छुभावेइ । तए णं से पउम-नाभे बल-
 वाउयं सहावेइ २ ता एवं वयासी-खिप्पामेव भो देवाणुप्पिया ! आभिसेक्कं हत्थिर-
 यणं पडिकप्पेह । तयानंतरं च णं छेयायरियउव(दे)एसमइविकप्पणा(विगप्पेहिं)हि
 जाव उव(णे)णेति । तए णं से पउमनाहे सन्नद्धं अभिसेयं दुरुहइ २ ता हयगय
 जेणेव कण्हे वासुदेवे तेणेव पहारेत्थ गमणाए । तए णं से कण्हे वासुदेवे पउम-
 नाभं रायाणं एज्जमाणं पासइ २ ता ते पंच पंडवे एवं वयासी-हं भो दारगा !
 किन्नं तुब्भे पउम-नाभेणं सद्धिं जुज्झि(हि)हह उयाहु पिच्छह(पेच्छहिं)ह ? ।
 तए णं ते पंच-पंडवा कण्हं वासुदेवं एवं वयासी-अम्हे णं सामी ! जुज्झामो तुब्भे
 पेच्छह । तए णं पंच-पंड(वे)वा स-न्नद्ध जाव पहरणा रहे दुरुहंति २ ता जेणेव
 पउम-नाभे राया तेणेव उवागच्छंति २ ता एवं वयासी-अम्हे [वा] पउम-नाभे वा
 राय-त्तिकु पउमनाभेणं सद्धिं संपलग्गा यावि होत्था । तए णं से पउमनाभे
 राया ते पंच-पंडवे खिप्पामेव हयमहियपवरविवडियिच्चि(द्ध)धयपडा(गा)गे जाव
 दिसोदिं सि पडिसेहेइ । तए णं ते पंच-पंडवा पउम-नाभेणं र-न्ना हयमहियपवरविव-
 डिय जाव पडिसेहिया समाणा अत्थामा जाव अधारणिज[मि]त्तिकट्टु जेणेव कण्हे
 वासुदेवे तेणेव उवागच्छंति । तए णं से कण्हे वासुदेवे ते पंच-पंडवे एवं वयासी-
 कहणं तुब्भे देवाणुप्पिया ! पउम-नाभे(ण)णं रन्ना सद्धिं संपलग्गा ! । तए णं ते
 पंच-पंडवा कण्हं वासुदेवं एवं वयासी-एवं खलु देवाणुप्पिया ! अम्हे तुब्भेहिं
 अब्भणुत्ताया समाणा सन्नद्धं रहे दुरुहामो २ ता जेणेव पउम-नाभे जाव पडि-
 सेहेइ । तए णं से कण्हे वासुदेवे ते पंच-पंडवे एवं वयासी-जइ णं तुब्भे देवाणु-
 प्पिया ! एवं वयंता-अम्हे नो पउम-नाभे रायत्तिकट्टु पउम-नाभेणं सद्धिं संपलग्गंता
 तो णं तुब्भे नो पउम-ना-भे हयमहियपवर जाव पडिसे(हंते)हित्था तं पेच्छह णं
 तुब्भे देवाणुप्पिया ! अहं नो पउम-नाभे रायत्तिकट्टु पउमनाभेणं रन्ना सद्धिं जुज्झामि
 रहं दुरुहइ २ ता जेणेव पउमनाभे राया तेणेव उवागच्छइ २ ता सेयं गोखी-
 रहारधवलं तणसोल्लियसिंदुवारकुंदैदुसच्चिगासं नियय[स्स] बलस्स हरिसज्जणं
 रिउसे-न्नविणासकरं पंचज-न्नं संखं परासुसइ २ ता मुहवायपूरियं करेइ । तए णं तरस्स
 पउम-ना(ह)भस्स तेणं संखसद्देणं बलतिभाए हए जाव पडिसेहिए । तए णं से कण्हे

वासुदेवे धणुं परामुसइ वेढो धणुं पूरेइ २ ता धणुसइं करेइ । तए णं तस्स पउम-नाभस्स दोब्बे बलतिभाए तेणं धणुसइणं हयमहिय जाव पडिसेहिए । तए णं से पउम-नाभे राया तिभागबलावसेसे अत्थामे अवळे अवीरिए अपुरि-
 सक्कारपरक्क(म्)मे अधारणिज्ज-मि-त्तिकट्ठु सिग्घं तुरियं जेणेव अ-वरकंका तेणेव उवा-
 गच्छइ २ ता अ-वरकं(कं)कारायहाणिं अणुपविसइ २ ता बा(दा)राइं मिहेइ २ ता रोहसजे चिट्ठइ । तए णं से कण्हे वासुदेवे जेणेव अ-वरकंका तेणेव उवा-
 गच्छइ २ ता रहं ठा-वेइ २ ता रहाओ पच्चोखइ २ ता वेउव्वियसमुग्घाएणं समोह[ण]णइ (०) एगं महं नरसीहरूवं विउव्वइ २ ता महया २ सदेणं पा(द)यदह-
 रियं करेइ । तए णं (से) कण्हेणं वासुदेवेणं महया २ सदेणं पा-यदहरणं कएणं समाणेणं अ-वरकंका रायहाणीं संभग्गपागारगो(पु)उराट्ठालयचरियतोरणपल्हत्थिय-
 पवरभवणसिरिवरा सर(स्)सरस्स धरणियळे सच्चिवइया । तए णं से पउम-नाभे राया अ-वरकंका रायहाणिं संभग्ग(ग)गं जाव पासित्ता भीए दोवइं देविं सरणं उवेइ । तए णं सा दोवइं देवी पउमनाभं रायं एवं वयासी-कि-ञ्चं तुमं देवाणु-
 प्पिया ! (न) जाणसि कण्हस्स वासुदेवस्स उत्तमपुरिसस्स विप्पियं करेमाणे (ममं इह हव्वमाणेसि) ? तं एवमवि गए गच्छइ णं तुमं देवाणुप्पिया ! ण्हाए उल्लपडसाडए ओ(अव)चूलगवत्थ-नियत्थे अंतोउरपरियालसंपरिवुडे अग्गाइं वराइं रयणाइं गहाय ममं पुरओ-काउं कण्हं वासुदेवं करयल [जाव] पाय(प)वडिए सरणं उवेहि, पणिवइयवच्छला णं देवाणुप्पिया ! उत्तमपुरिसा । तए णं से पउमनाभे दोवइए देवीए एयमट्ठं पडिसुणेइ २ ता ण्हाए जाव सरणं उवेइ २ ता करयल जाव एवं वयासी-दिट्ठा णं देवाणुप्पियाणं इड्डी जाव परक्कमे । तं खामेमि णं देवा-
 णुप्पिया ! जाव खमंतु णं जाव नाहं भुज्जो २ एवं करणयाए-त्तिकट्ठु पंजलि(वु)उडे पायवडिए कण्हस्स वासुदेवस्स दोवइं देविं साहत्थि उवणेइ । तए णं से कण्हे वासुदेवे पउम-नाभं एवं वयासी-हं भो पउम-नाभा ! अ(ए)पत्थियपत्थिया ४ कि-ञ्चं तुमं (ण) जाणसि मम भगिणिं दोवइं देविं इह हव्वमाणमाणे ? तं एवमवि गए नत्थि ते ममाहिंतो इयाणिं भयमत्थि-त्तिकट्ठु पउम-नाभं पडिविसजेइ (०) दोवइं देविं गे(गि)ण्हइ २ ता रहं दुरुहेइ २ ता जेणेव पंच पंड-वा तेणेव उवागच्छइ २ ता पंचण्हं पंडवाणं दोवइं देविं साहत्थि उवणेइ । तए णं से कण्हे पंचहिं पंडवेहिं सद्धिं अप्पछट्ठे छहिं रहेहिं लवणसमुहं मज्झमज्झेणं जेणेव जंबुदीवे २ जेणेव भारहे वासे तेणेव पहारेत्थ गमणाए ॥ १२९ ॥ तेणं कालेणं तेणं समएणं धायइ-
 *संढे दीवे पुर-त्थिमडे भारहे वासे चंपा नामं नयरी होत्था । पुण्णभदे उज्जाणे ।

तस्य णं चंपाए नयरीए कविले नामं वासुदेवे राया होत्था (महया हिमव०)
वण्णओ । तेणं कालेणं तेणं समएणं मुणिसुव्वए अरहा चंपाए पुण्णभंदे समोसडे ।
क(मि)विले वासुदेवे धम्मं सुणेइ । तए णं से कविले वासुदेवे मुणिसुव्वयस्स
अरहओ [अंतिए] धम्मं सुणेमाणे कण्हस्स वासुदेवस्स संखसदं सुणेइ । तए णं
तस्स कविलस्स वासुदेवस्स इमेयारूवे अ(ब्भ)ज्झत्थिए [४] समुप्पज्जित्था-किं मण्णे
घायइसंडे दीवे भारहे वासे दोच्चे वासुदेवे समुप्पन्ने (?) जस्स णं अयं संखसदे ममं
पिव मुहवायपूरिए वियंभइ [१] कविले वासुदे(वे)वा भ(स)द्वा(ति)इ (सुणेइ) मुणिसु-
व्वए अरहा कविलं वासुदेवं एवं वयासी-से नूणं (ते) कविला वासुदेवा ! म(म)मं
अंतिए धम्मं निसामेमाणस्स संखसदं आकण्णिता इमेयारूवे अ-ज्झत्थिए-किं मन्ने
जाव वियंभइ । से नूणं कविला वासुदेवा ! अ(यम)द्वे समद्वे ? हंता [१] अत्थि ।
[तं] नो खलु कविला ! एवं भूयं वा भ(वइ)व्वं वा भविस(सइ)सं वा जज्ञं ए(गे)-
गखेत्ते ए-गसुगे ए-गसमए [णं] दुवे अरहंता वा चक्कवट्ठी वा बलदेवा वा वासुदेवा
वा उप्पज्जिंसु वा उप्पज्जिति वा उप्पज्जिस्संति वा । एवं खलु वासुदेवा ! जंबुद्दी-
वाओ २ भारहाओ वासाओ हत्थिणाउ(र)राओ नयराओ पंडुस्स र-न्नो सुण्हा
पंचवहं पंडवाणं भारिया दोवई देवी तव पउम-नाभस्स र-न्नो पुव्वसंगइएणं देवेणं
अ-वरकं-कं-नयरिं साहरिया । तए णं से कण्हे वासुदेवे पंचहिं पंडवेहिं सद्धिं
अप्पछट्ठे छाहिं रहेहिं अ-वरकं-कं रायहाणिं दोवईए देवीए कूवं हव्वमागए । तए णं
तस्स कण्हस्स वासुदेवस्स पउम-नाभेणं र-न्ना सद्धिं संगामं संगामेमाणस्स अयं संख-
सदे तव मुहवाया० (इव) इद्वे (कंते) इ(हे)व वियंभइ । तए णं से कविले वासुदेवे
मुणिसुव्वयं वंदइ नमंसइ वं० २ ता एवं वयासी-गच्छामि णं अहं भंते ! कण्हं
वासुदेवं उत्तमपुरिसं [मम] सरिसपुरिसं पासामि । तए णं मुणिसुव्वए अरहा
कविलं वासुदेवं एवं वयासी-नो खलु देवाणुप्पिया ! एवं भूयं वा ३ जण्णं अरहंता
वा अरहंतं पासंति चक्कवट्ठी वा चक्कवट्ठिं पासंति बलदेवा वा बलदेवं पासंति वासु-
देवा वा वासुदेवं पासंति । तहवि य णं तुमं कण्हस्स वासुदेवस्स लवणसमुदं
मज्झंमज्जेणं वी(ति)ईवयमाणस्स सेयापीयाइं धयग्गाइं पासिहिसि । तए णं से कविले
वासुदेवे मुणिसुव्वयं वंदइ नमंसइ वं० २ ता हत्थिखंथं दुरुहइ २ ता सिग्घं २
जेणेव वेला(उ)कूले तेणेव उवागच्छइ २ ता कण्हस्स वासुदेवस्स लवणसमुदं
मज्झंमज्जेणं वी ईवयमाणस्स सेयापीया(हिं)इं धयग्गाइं पासइ २ ता एवं वयइ-एस
णं मम सरिसपुरिसे उत्तमपुरिसे कण्हे वासुदेवे लवणसमुदं मज्झंमज्जेणं वीईवयइ-
त्तिकट्ठु पंचयज्जं संखं परामुसइ [२] मुहवायपूरियं करेइ । तए णं से कण्हे वासु

देवे कविलस्स वासुदेवस्स संखसइं आय-ण्णेइ २ ता पंचयच्चं जाव पूरियं करेइ । तए णं दोवि वासुदेवा संखसइ(सा)समायारिं करेति । तए णं से कविले वासुदेवे जेणेव अ-वरकंका तेणेव उवागच्छइ २ ता अ-वरकंका रायहाणिं संभग्गतोरणं जाव पासइ २ ता पउम-नाभं एवं वयासी-किन्नं देवाणुप्पिया ! एसा अ-वरकंका संभग्ग जाव सन्निवइया ? । तए णं से पउम-ना-भे कविलं वासुदेवं एवं वयासी-एवं खल्लु सामी ! जंबुदीवाओ २ भारहाओ वासाओ इहं हव्वमागम्म कण्हेणं वासुदेवेणं तुब्भे परिभूय अ-वरकंका जाव सन्नि(वा)वडिया । तए णं से कविले वासुदेवे पउम-ना-भस्स अंतिए एयमट्ठं सोच्चा पउम-ना(हं)भं एवं वयासी-हं भो पउम-नाभा ! अप-थियपथिया [५.] किन्नं तुमं (न) जाणसि मम सरिसपुरिसस्स कण्हस्स वासुदेवस्स विप्पियं करेमाणे ? आसुस्ते जाव पउम-ना-भं निव्विसयं आणवेइ पउम-ना-भस्स पुत्तं अ-वरकंका[ए] रायहाणीए महया २ रायाभिसेएणं अभिसिंचइ जाव पडिगए ॥ १३० ॥ तए णं से कण्हे वासुदेवे लवणसमुदं मज्झंमज्जेणं वी-ईवयइ (गंगं उवागए) ते पंच-पंडवे एवं वयासी-गच्छह णं तुब्भे देवाणुप्पिया ! गं(गा)गं महा-न(दि)इं उत्तरह जाव ताव अहं सुट्ठियं लवणाहिवइं पासामि । तए णं ते पंच पंडवा कण्हेणं २ एवं वुत्ता समाणा जेणेव गंगा महानदी तेणेव उवागच्छंति २ ता एगट्ठियाए नावाए मग्गणगवेसणं करेति २ ता एगट्ठियाए नावाए गं-गं महान-इं उत्तरंति २ ता अ-न्नम-न्नं एवं वयंति-पट्ठु णं देवाणुप्पिया । कण्हे वासुदेवे गं-गं महान-इं बाहाहिं उत्तरितए उदाहु नो प(भू)हू उत्तरितए-त्तिकहु एगट्ठियाओ (नावाओ) णूमेति २ ता कण्हं वासुदेवं पडिवालेमाणा २ चिट्ठंति । तए णं से कण्हे वासुदेवे सुट्ठियं लवणाहिवइं पासइ २ ता जेणेव गंगा महान(दी)इं तेणेव उवागच्छइ २ ता एगट्ठियाए सब्बओ समंता मग्गणगवेसणं करेइ २ ता एगट्ठियं अपासमाणे एगाए बाहाए रहं सतुरगं ससारहिं गेण्हइ एगाए बाहाए गंगं महान-इं वासट्ठिं जोयणाइं अद्धजोयणं च वि(च्छि)त्थिण्णं उत्तरिउं पयत्ते यावि होत्था । तए णं से कण्हे वासुदेवे गंगा[ए] महान-ईए बहुमज्झदेसभा(गं)ए संपत्ते समाणे संते तंते परितंतंते बद्धसेए जाए यावि होत्था । तए णं [तस्स] कण्हस्स वासुदेवस्स इमे(ए)यारूवे अ-ज्झत्थिए (जाव समुप्पज्जित्था)-अहो णं पंच पंडवा महाबलवगा जेहिं गंगा-महा-न-ई वा(स)वट्ठिं जोयणाइं अद्धजोयणं च वि-त्थिण्णा बाहाहिं उत्तिण्णा, इच्छंतएहिं णं पंचहिं पंडवेहिं पउम-नाभे (राया) हयमहिय जाव नो पडिसेहिए । तए णं गंगा-देवी कण्हस्स वासुदेवस्स इमं एयारूवं अ-ज्झत्थियं जाव जाणित्ता थहं वियरइ । तए णं से कण्हे वासुदेवे मुहुत्ततरं समासा(स)सेइ २ ता गं-गं महान-दिं बावट्ठिं जाव

उत्तरइ २ ता जेणेव पंच-पंडवा तेणेव उवागच्छइ (०) पंच पंडवे एवं वयासी-अहो
 णं तुब्भे देवाणुप्पिया ! महाबलवमा जे[हिं] णं तुब्भेहिं गंगामहा-न-ई वा-वट्ठि जाव
 उत्तिण्णा, इच्छंतएहिं [णं] तुब्भेहिं पउम[नाहे] जाव नो पडिसेहिए । तए णं
 ते पंच पंडवा कण्हणं वासुदेवेणं एवं वुत्ता समाणा कण्हं वासुदेवं एवं वयासी-
 एवं खलु देवाणुप्पिया ! अम्हे तुब्भेहिं विसज्जिया समाणा जेणेव गंगा
 महा-न-ई तेणेव उवागच्छामो २ ता एगट्ठियाए मग्गणगवेसणं तं चेव जाव णूमेमो
 तुब्भे पडिवाल्लेमाणा चिट्ठामो । तए णं से कण्हे वासुदेवे तेसिं पंच(ण्हं)पंडवाणं
 [अंतिए] एयमट्ठं सोच्चा निसम्म आसुत्ते जाव तिचलियं एवं वयासी-अहो णं
 जया मए लवणसमुदं दुवे जोयणसयसह(स्सा)स्सवि-त्थिणं वीईवइत्ता पउम-नामं
 हयमहि(य)र्यं जाव पडिसेहिता अ-वरकंका संभग(ग०)गा दोवई साहत्थि उवणीमा
 तया णं तुब्भेहिं मम माहप्पं न वि-न्नायं इयाणिं जाणिस्सह-त्तिकट्ठु लोहदंढं परा-
 मुसइ पंचण्हं पंडवाणं रहे सुसू(चू)रेइ २ ता निव्विसए आणवेइ २ ता तत्थ णं रह-
 मइणे नामं कोट्ठे निविट्ठे । तए णं से कण्हे वासुदेवे जेणेव सए खंधावारे तेणेव
 उवागच्छइ २ ता सएणं खंधावारेणं सद्धि अभिसमन्नागए यावि होत्था । तए णं से
 कण्हे वासुदेवे जेणेव बारवई नयरी तेणेव उवागच्छइ २ ता अणु-प्पविसइ ॥१३१॥
 तए णं ते पंच-पंडवा जेणेव हत्थिणाउरे (णयरे) तेणेव उवागच्छंति २ ता जेणेव
 पंडू [राया] तेणेव उवागच्छंति २ ता करयल जाव एवं वयासी-एवं खलु ताओ !
 अम्हे कण्हणं निव्विसया आणत्ता । तए णं पंडूराया ते पंच-पंडवे एवं वयासी-कण्हणं
 पुत्ता । तुब्भे कण्हणं वासुदेवेणं निव्विसया आणत्ता ? । तए णं ते पंच-पंडवा पं(डु)डं
 रायं एवं वयासी-एवं खलु ताओ ! अम्हे अ-वरकंकाओ पडि-नियत्ता लवणसमुदं दोस्सि
 जोयणसयसहस्साई वीईवइ(त्ता)त्था । तए णं से कण्हे वासुदेवे अम्हे एवं व(या०)-
 यइ-गच्छह णं तुब्भे देवाणुप्पिया ! गंगं महा-न-ई उत्तरह जाव (चिट्ठह) ताव अहं
 एवं तहेव जाव चिट्ठामो । तए णं से कण्हे वासुदेवे बुट्ठियं लवणाहिंवई दइणं तं चेव
 सव्वं नवरं कण्हस्स चिंता न बुज्झ(जुज्झ(वुच्च)इ जाव (अम्हे) निव्विसए आणवेइ । तए
 णं से पंडूराया ते पंच-पंडवे एवं वयासी-दुट्ठु णं [तुमं] पुत्ता ! कयं कण्हस्स वासुदे-
 वस्स विपियं करेमाणेहिं । तए णं से पंडू-राया कौंतिं देविं सद्दवेइ २ ता एवं
 वयासी-गच्छ[ह] णं तुमं देवाणुप्पिया । बारवई कण्हस्स वासुदेवस्स निवे-एहि-एवं
 खलु देवाणुप्पिया ! तु(म्हे)मे पंच-पंडवा निव्विसया आणत्ता, तुमं च णं देवाणुप्पिया ।
 दाहिणद्धुभरहस्स सामी, तं संदिसंतु णं देवाणुप्पिया ! ते पंच-पंडवा कयरं(दिसिं)
 देसं वा (वि)दिसिं वा गच्छंतु ? । तए णं सा कौंती पंडुणा एवं वुत्ता समाणी हत्थिखं

दुरुहइ (०) जहा हेड्डा जाव संदिसंतु णं पिउ(त्था)च्छा ! किमागमणपओयणं-। तए णं सा कौंती कण्हं वासुदेवं एवं वयासी-एवं खलु तुमे पुत्ता । पंच-पंडवा निव्विसया आणत्ता तुमं च णं दाहिणङ्गभरह[स्स] जाव (वि)दि(सि)सं वा गच्छंतु (?) । तए णं से कहे वासुदेवे कौंतिं देवि एवं वयासी-अप्(हे)यवयणा णं पिउ-च्छा ! उत्तमपुरिसा वासुदेवा बलदेवा चक्रवट्टी । तं गच्छंतु णं (देवाणु०!) पंच-पंडवा दाहिणि(ल्ले)ल्लवेयालिं तत्थ पंडुमहुरं निवेसंतु म-म अदिट्ठसेवगा भवंतु-त्तिकडु कौंतिं देवि सक्कारेइ सम्माणेइ जाव पडिविसजेइ । तए णं सा कौंती (देवी) जाव पंडुस्स एयमट्ठं निवे-एइ । तए णं पंडू राया पंच पंडवे सहावेइ २ ता एवं वयासी-गच्छह णं तुब्भे पुत्ता । दाहिणिंल्ल वेयालिं, तत्थ णं तुब्भे पंडुमहुरं निवेसेह । तए णं [ते] पंच-पंडवा पंडुस्स र-न्नो जाव तहत्ति पडिमुणंति २ ता सबलवाहणा हयग० हत्थिणाउराओ पडि-नि-क्खमंति २ ता जेणव दक्खिणिंल्ले वेयाली तेणव उवागच्छंति २ ता पंडुमहुरं [नाम] नग(रिं)रं निवे(से)संति (०) । तत्थ[वि] णं ते विपुलभोगसमिइसम-न्नागया यावि होत्था ॥१३२॥ तए णं सा दोवई देवी अन्नया कया(ई)इ आव-न्नसत्ता जाया(या)वि होत्था । तए णं सा दोवई देवी नवण्हं मासाणं जाव सुखवं दारगं पयाया सूमालं निव्वत्तबारसाहस्स इमं एयाखवं-जम्हा णं अम्हं एस दारए पंचण्हं पंडवाणं पुत्ते दोवईए देवीए अत्तए तं हो(उ)ऊ(अम्हं) णं इमस्स दारगस्स नामधेज्जं पंडुसेणे[ति] । तए णं तस्स दारगस्स अम्मापियरो नामधेज्जं क(रेइ)रंति पंडुसेणत्ति । बावत्तरिं कलाओ जाव [अलं]भोगसमत्थे जाए जुवराया जाव विहरइ । (तेणं कालेणं तेणं सम-एणं धम्मघोसा) थेरा समोसठा परिसा निग्गया । पंडवा निग्गया धम्मं सोच्चा एवं वयासी-जं नवरं देवाणुप्पिया ! दोवई देवि आपुच्छामो पंडुसेणं च कुमारं रजे ठावेमो तओ पच्छा देवाणुप्पियाणं अंतिए मुंडे भवित्ता जाव पव्वयामो । अहाइहं देवाणुप्पिया ! । तए णं ते पंच-पंडवा जेणव सए गिहे तेणव उवागच्छंति २ ता दोवई देवि सहावेति २ ता एवं वयासी-एवं खलु देवाणुप्पिए ! अमहेहिं थेराणं अंतिए धम्मे निसंते जाव पव्वयामो, तुमं [णं] देवाणुप्पिए ! किं करेसि ? । तए णं सा दोवई (देवी) ते पंच-पंडवे एवं वयासी-जइ णं तुब्भे देवाणुप्पिया ! संसार-भउव्विग्गा [जाव] पव्वयह म-म के अ-न्ने आलंवे वा जाव भविस्सइ ? अहं पि य णं संसारभउव्विग्गा देवाणुप्पिएहिं सद्धिं पव्वइस्सामि । तए णं ते पंच-पंडवा पंडुसेणस्स अभिसेओ जाव राया जाए जाव रज्जं पसाहेमाणे विहरइ । तए णं ते पंच-पंडवा दोवई य देवी अन्नया कया-इ पंडुसेणं रायाणं आपुच्छंति । तए णं से पंडु-सेणे राया कोडुंभियपुरिसे सहावेइ २ ता एवं वयासी-खिप्पाभेव भो [!] देवाणुप्पिया !

निक्खमणाभिसेयं जाव उवट्टवेह पुरिससहस्सवा-हिणीओ सिवियाओ उवट्टवेह जाव
 पच्चोहंति जेणेव थेरा [भगवंतो] तेणेव उवागच्छंति जाव आलित्ते णं जाव समणा
 जाया चोह[र]स पुव्वाइं अहिज्जंति २ ता बहूणि वासाणि छट्ठमदसमदुवालसेहिं
 मासदमासखमणेहिं अप्पाणं भावेमाणा विहरंति ॥ १३३ ॥ तए णं सा दोवईं देवी
 सीयाओ पच्चोहइ जाव पव्वइया सुव्वयाए अज्जाए सिस्सि(णी)णियत्ताए दलयइ
 ए(इ)क्कारस अंगाईं अहिज्जइ (०) बहूणि वासाणि छट्ठमदसमदुवालसेहिं जाव विह-
 रइ ॥ १३४ ॥ तए णं थेरा भगवंतो अन्नया कया(ईं)इ पंडुमहुराओ नयरीओ सहसंबव-
 णाओ उज्जाणाओ पडि-निक्खमंति २ ता बहिया जणवयविहारं विहरंति । तेणं कालेणं
 तेणं समएणं अ(रि)रहा अरिट्टनेमी जेणेव सुरट्ठाजणवए तेणेव उवागच्छइ २ ता
 सुरट्ठाजणवयंसि संजमेणं तवसा अप्पाणं भावेमाणे विहरइ । तए णं बहुजणो अन्नम-
 चस्स एवमाइक्खइ ४-एवं खलु देवाणुप्पिया । अ-रहा अरिट्टनेमी सुरट्ठाजणवए जाव
 विहरइ । तए णं (से) ते जुहिट्ठिल्लपामोक्खा पंच अणगारा बहुजणस्स अंतिए एय-
 मट्ठं सोच्चा अन्नमन्नं सदावेंति २ ता एवं वयासी-एवं खलु देवाणुप्पिया । अरहा
 अरिट्टनेमी पुव्वाणुपुर्व्वि जाव विहरइ, तं सेयं खलु अम्हं थेरा आपुच्छित्ता अरहं
 अरिट्टनेमिं वंदणाए गमित्तए । अन्नमचस्स एयमट्ठं पडिउणेंति २ ता जेणेव थेरा भग-
 वंतो तेणेव उवागच्छंति २ ता थेरे भगवंते वंदंति नमंसंति वं० २ ता एवं वयासी-
 इच्छामो णं तुब्भेहिं अब्भणुजाया समाणा अरहं अरिट्टनेमिं जाव गमित्तए । अहासुहं
 देवाणुप्पिया ! । तए णं ते जुहिट्ठिल्लपामोक्खा पंच अणगारा थेरेहिं अब्भणुजाया
 समाणा थेरे भगवंते वंदंति नमंसंति वं० २ ता थेराणं अंतियाओ पडि-निक्खमंति
 (०) मासंमासेणं अणिक्खित्तेणं तवोक्कमेणं गामाणुगामं दू(ईं)इज्जमाणा जाव जेणेव
 ह(त्थि)त्थकप्पे (नयरे) तेणेव उवागच्छंति (०) ह-त्थकप्पस्स बहिया सहसंबवणे
 उज्जाणे जाव विहरंति । तए णं ते जुहिट्ठिल्लवज्जा चत्तारि अणगारा मास-क्ख-
 मणपारणए पढमाए पो(र)रिसीए सज्झायं करंति वीयाए एवं जहा गोयमसामी
 नवरं जुहिट्ठिं आपुच्छंति जाव अडमाणा बहुजणसइं निसामेंति । एवं खलु
 देवाणुप्पिया ! अरहा अरिट्टनेमी उ(ज्जि)जंतसेलसिहरे मासिएणं भत्तेणं अपाणएणं
 पंचहिं छत्तीसेहिं अणगारसएहिं सद्धिं कालगए जाव पहीणे । तए णं ते जुहि-
 ट्ठिल्लवज्जा चत्तारि अणगारा बहुजणस्स अंतिए (एयमट्ठं) सोच्चा ह-त्थकप्पाओ
 पडि-निक्खमंति २ ता जेणेव सहसंबवणे उज्जाणे जेणेव जुहिट्ठिल्ले अणगारे तेणेव
 उवागच्छंति २ ता भत्तपाणं प(क्खुवे)क्खंति २ ता गमणागमणस्स पडिक्कमंति २
 ता एसणमणेसणं आलोएति २ ता भत्तपाणं पडिदंसंति २ ता एवं वयासी-एवं खलु

देवाणुप्पिया (१) जाव कालगए । तं सेयं खलु अम्हं देवाणुप्पिया । इमं पुव्वगहियं भत्तपाणं परिट्टवेत्ता सेत्तुजं पव्वयं सणियं २ दु(रु)रुहितए संलेहण्ण(ए)इसणा[ज्ञो]-
 सियाणं कालं अण(वकंख)वेक्खमाणाणं विहरितए-त्तिकट्टु अ-न्नम-न्नस्स एयमट्ठं पडि-
 सुणेंति २ ता तं पुव्वगहियं भत्तपाणं एगंते परिट्टवेंति २ ता जेणेव सेत्तुजे पव्वए
 तेणेव उवागच्छंति २ ता सेत्तुजं पव्वयं [सणियं २] दुरुहंति (०) जाव कालं अणवकं-
 खमाणा विहरंति । तए णं ते जुहिद्धिल्लपामोक्खा पंव अगगारा सामाइयमाइयाई
 चोइस-पुव्वाई अहि(जित्ता)जंति बहूणि वासाणि (सामणपरियागं पाउणिता)
 दोमासियाए संलेहणाए अत्ताणं झो(सि)सेत्ता जस्सट्ठाए की(कि)रइ थेरकप्पभावे
 जिणकप्पभावे जाव तमट्टमाराहेंति २ ता अणंते जाव केवलवर-नाणदंसणे समुप्प-ञ्जे
 जाव सिद्धा ॥ १३५ ॥ तए णं सा दोवई अज्जा सुव्वयाणं अज्जियाणं अंतिए
 सामाइयमाइयाई एक्कारस अंगाई अहिज्जइ २ ता बहूणि वासाणि (सा०) मासि-
 याए संलेहणाए आलोइयपडिक्कंता कालमासे कालं किच्चा बंभलोए उववन्ना । तत्थ
 णं अत्थेगइयाणं देवाणं दस सागरोवमाई ठिई पन्नता । तत्थ णं दुव(ति)यस्स
 [वि] देवस्स दस-सागरोवमाई ठिई पन्नता । से णं भंते ! दुवए देवे ता(त)ओ जाव
 महाविदेहे वासे जाव अंतं काहिइ । एवं खलु जंबू ! समणेणं भगवया महावीरेणं
 जाव संपत्तेणं सोलसमस्स नायज्झयणस्स अयमट्ठे पन्नते त्तिबेमि ॥ १३६ ॥
गाहाउ—सुबहुं पि तवकिलेसो नियाणदोसेण दसिओ संतो । न सिवाय दोवईए
 जह किल सुकुमालियाजम्मे ॥ १ ॥ अमणुन्नमभत्तीए पत्ते दाणं भवे अणत्थाय । जह
 कडुयतुंबदाणं नागसिरिभवमि दोवइए ॥ २ ॥ **सोलसमं नायज्झयणं समत्तं ॥**

जइ णं भंते ! समणेणं० सोलसमस्स नायज्झयणस्स अयमट्ठे पन्नते सत्तर-
 समस्स (०) नायज्झयणस्स के अट्ठे पन्नते ? एवं खलु जंबू ! तेणं कालेणं तेणं सम-
 एणं हत्थिसीसे नामं नयरे होत्था वण्णओ । तत्थ णं कणगकेळु नामं राया होत्था
 वण्णओ । तत्थ णं हत्थिसीसे नयरे बहवे संजुत्ता-नावावाणियगा परिवसंति अट्ठा जाव
 ब(ट्ठ)हुजणस्स अपरिभूया यावि होत्था । तए णं तेसिं संजुत्तानावावाणियगाणं अन्नया
 कयाइ एगयओ (सहियाणं) जहा अरह-न्नओए जाव लवणसमुई अणेगाई जोयणस-
 याई ओगाढा यावि होत्था । तए णं तेसिं जाव बहूणि उप्पा(ति)यसयाई जहा मा-कं-
 दियदारगाणं जाव कालियवाए य तत्थ सं(स)मु(त्थि)च्छिइ । तए णं सा नावा तेणं
 कालियवाएणं आ(घोळि)घुणिज्जमाणी २ संवालिज्जमाणी २ संखोहिज्जमाणी २
 तत्थेव परिभमइ । तए णं से निजामए नट्टमईए नट्टउईए नट्टस-जे मूढदिसाभाए
 जाए यावि होत्था न जाणइ कयरं (देसं वा) दिसं वा विदिसं वा पोयवहणे [अ]व-

हिए-तिकट्टु ओहयमणसंकप्पे जाव झियायइ । तए णं ते बहवे कुच्छिधारा य कण्णधारा य ग(ब्भि)ब्भेल्हगा य संजुत्ता-नावावाणियगा य जेणेव से निजामए तेणेव उवागच्छंति २ ता एवं वयासी-किंवं तुमं देवाणुप्पिया । ओहयमणसंक-
 (प्पा)प्पे (जाव) झियायसि ? । तए णं से निजामए ते बहवे कुच्छिधारा य ४ एवं वयासी-एवं खलु [अहं] देवाणुप्पिया । नट्टमईए जाव अवहिएत्तिकट्टु तओ ओहय-
 मणसंकप्पे (जाव) झियामि । तए णं ते कण्णधारा [य ४] तस्स निजामयस्संतिए एयमट्ठं सोच्चा निसम्म भीया० ण्हाया करयल [जाव] बहूणं ईदाण य खं(दा)वाण य जहा मल्लिनाए जाव उवायमाणा २ चिट्ठंति । तए णं से निजामए तओ मुहुत्तंतरस्स लद्धमईए ३ अमूढदिसाभाए जाए यावि होत्था । तए णं से निजामए ते बहवे कुच्छिधारा य ४ एवं वयासी-एवं खलु अहं देवाणुप्पिया । लद्धमईए जाव अमूढ-
 दिसाभाए जाए । अम्हे णं देवाणुप्पिया । कालियदीवतेणं सं(वू)ळ्ढा । एस णं कालियदीवे आलोकइ । तए णं ते कुच्छिधारा य ४ तस्स निजामगस्स अंतिए एय-
 मट्ठं सोच्चा हट्ठुट्ठा पयक्खिणाणुकूलेणं वाएणं जेणेव का(ली)लियदीवे तेणेव उवाग-
 च्छंति २ ता पोयवहणं लंबंति २ ता एगट्ठियाहिं कालियदीवं उत्तरंति । तत्थ णं बहवे हिरण्णागरे य सुवण्णागरे य रयणागरे य वइरागरे य बहवे तत्थ आसे पासंति किं ते ? हुरिरेणुसोणिसुत्ता(गा)ग आ(ई)इणवेढो । तए णं ते आसा(ते)ओ वाणियए पासंति (०) तेसिं गंधं आ(अग)वायंति (०) भीया तत्था उब्बिग्गा उब्बि-
 गमणा तओ अणेगाइं जोयणाइं उब्भमंति । ते णं तत्थ पउरगोयरा पउरतण-
 पाणिया निब्भया निसुब्बिग्गा सुहंसुहेणं विहरंति । तए णं [ते] संजुत्ता-नावावा-
 णियगा अ-न्नम-न्नं एवं वयासी-कि(ण्हं)न्नं अ(म्हे)म्हं देवाणुप्पिया । आसेहिं ? इमे णं बहवे हिरण्णागरा य सुवण्णागरा य रयणागरा य व(इ)यरागरा य । तं सेयं खलु अम्हं हिरण्णस्स य सुवण्णस्स य रयणस्स य व-यरस्स य पोयवहणं भरित्तए-
 त्तिकट्टु अन्नमन्नस्स एयमट्ठं पडिसुणेंति २ ता हिरण्णस्स य सुवण्णस्स य रयणस्स य व-यरस्स य तणस्स य कट्टस्स य अ-न्नस्स य पाणियस्स य पोयवहणं भरेंति २ ता द(पय)क्खिणाणुकूलेणं वाएणं जेणेव गंभीरपोय(वहण)पट्ठे तेणेव उवाग-
 च्छंति २ ता पोयवहणं लंबंति २ ता सगडीसागडं सज्जेति २ ता तं हिरण्णं जाव वइरं च एगट्ठियाहिं पोयवहणाओ संचारेंति २ ता सगडीसागडं संजो(ई)एंति (०) जेणेव हत्थिसी(सए)से नयरे तेणेव उवागच्छंति २ ता हत्थिसीसयस्स नयरस्स बहिया अग्गुजाणे सत्थ-निवेसं करेंति २ ता सगडीसागडं मोएंति २ ता महत्थं जाव पाहुडं गेण्हंति २ ता हत्थिसीसं च न(ग)यरं अणु-प्पविसंति २ ता जेणेव [से] कण-

गकेऊ (राया) तेणेव उवागच्छंति २ ता जाव उवणेंति । तए णं से कणगकेऊ तेसिं संजुत्ता(णावा)वाणियगाणं तं महत्थं जाव पडिच्छइ [२] ते संजुत्ता-वाणियगा एवं वयासी-तुब्भे णं देवाणुप्पिया ! गामागर जाव आहिंडह लवणसमुद्धं च अभिक्खणं २ पोयवहणेणं ओगा(ह)हेह, तं अत्थि-या(इं)इ [त्य] केइ भे कहिंवि अच्छेरए दिट्ठपुव्वे ? । तए णं ते संजुत्ता-वाणियगा कणगकेऊं (रायं) एवं वयासी-एवं खल्ल अम्हे देवाणुप्पिया ! इहेव हत्थिसीसे नयरे परिवसामो तं चेव जाव कालि(य)यं दीवतेणं सं-लूढा । तत्थ णं बहवे हिरण्णागरा य जाव बहवे तत्थ आसे, किं ते ? हरिरेणु जाव अणेगाइं जोयणाइं उब्भमंति । तए णं सामी ! अम्हेहिं कालियदीवे ते आसा अच्छेरए दिट्ठपुव्वे । तए णं से कणगकेऊ तेसिं संजु(त्ता)त्ताणं अंतिए एयमट्ठं सोच्चा ते संजुत्तए एवं वयासी-गच्छह णं तुब्भे देवाणुप्पिया । मम कोडुं-बियपुरिसेहिं सद्धिं कालियदीवाओ ते आसे आणेह । तए णं ते संजुत्तावाणियगा कणगकेऊं-एवं वयासी-एवं सामि-त्ति(कट्ठुं) आणाए विणएणं वयणं पडिखणेंति । तए णं [से] कणगकेऊ-कोडुंबियपुरिसे सदावेइ २ ता एवं वयासी-गच्छह णं तुब्भे देवाणुप्पिया ! संजुत्तएहिं [नावावाणियएहिं] सद्धिं कालियदीवाओ मम आसे आणेह । तेवि पडिखणेंति । तए णं ते कोडुंबि(य०)या सगडीसागडं सज्जेति २ ता तत्थ णं बहूणं वीणाण य वल्लकीण य भामरीण य कच्छभीण य भंभाण य छब्भा-मरीण य विचित्तवीणाण य अन्नेसिं च बहूणं सो(त्तिं)यंदियपाउग्गाणं दव्वाणं सग-डीसागडं भरेंति २ ता बहूणं किण्हाण य जाव सुक्किलाण य कट्ठकम्माण य ४ गंथिमाण य ४ जाव संघाइमाण य अन्नेसिं च बहूणं चर्खिंदियपाउग्गाणं दव्वाणं सगडीसागडं भरेंति २ ता बहूणं कोट्टपुडाण य केयइपुडाण य जाव अन्नेसिं च बहूणं घाणिंदियपाउग्गाणं दव्वाणं सगडीसागडं भरेंति २ ता बहुस्स खंडस्स य गुलस्स य सक्कराए य मच्छंडियाए य पुप्फुत्तरपउमुत्तर० अन्नेसिं च जिब्भिंदिय-पाउग्गाणं दव्वाणं सगडीसागडं भरेंति २ ता [अन्नेसिं च] बहूणं कोय(वया)वाण य कंबलाण य पा(वरणा)वाराण य नवतयाण य मलयाण य मसूराण य सिल्लाव-ट्ठाण [य] जाव हंसगम्भाण य अन्नेसिं च फासिंदियपाउग्गाणं दव्वाणं जाव भरेंति २ ता सगडीसागडं जो(ए)यंति २ ता जेणेव गंभीरए पोयट्ठाणे तेणेव उवागच्छंति (०) सगडीसागडं मो(ए)यंति २ ता पोयवहणं सज्जेति २ ता तेसिं उक्किट्ठाणं सद्धिं-रिसरसरुवगंधाणं कट्ठस्स य तणस्स य पाणियस्स य तंदुलाण य समियस्स य गोरसस्स य जाव अन्नेसिं च बहूणं पोयवहणपाउग्गाणं पोयवहणं भरेंति २ ता दक्खिणाणुकूलेणं वाणुणं जेणेव कालियदीवे तेणेव उवागच्छंति २ ता पोयवहणं

लंबेति २ ता ताई उक्किट्ठाई सद्दफरिसरसरुवगंधाई एगट्टियाहिं कालियदीवं उत्ता-
 रेंति २ ता जहिं जहिं च णं ते आसा आसयंति वा सयंति वा चिट्ठंति वा तुयट्ठंति
 वा तहिं तहिं च णं ते कोडुंबियपुरिसा ताओ वीणाओ य जाव (वि)चित्तवीणाओ य
 अन्नाणि बहूणि सो(ई)यंदियपाउग्गाणि य दव्वाणि समु(दी)दीरेमाणा ठवें(चिट्ठं)ति
 तेसिं [च] परिपेरंतेणं पा(सए)से ठवेंति (०) निच्चला निष्फंदा तुसिणीया चिट्ठंति ।
 जत्थ जत्थ ते आसा आसयंति वा जाव तुयट्ठंति वा तत्थ तत्थ णं ते कोडुंबि-या
 बहूणि किण्हाणि य (५) कट्टकम्माणि य जाव संवाइमाणि य अन्नाणि य बहूणि
 चक्खिदियपाउग्गाणि य दव्वाणि ठवेंति तेसिं परिपेरंतेणं पासए ठवेंति २ ता
 निच्चला निष्फंदा तुसिणीया चिट्ठंति । जत्थ जत्थ ते आसा आसयंति (४) तत्थ तत्थ
 [ते] णं (ते कोडुंबियपुरिसा) तेसिं बहूणं कोट्टपुडाण य अन्नोसिं च घाणिदियपाउग्गाणं
 दव्वाणं पुंजे य नियरे य करेंति २ ता तेसिं परिपेरंते जाव चिट्ठंति । जत्थ जत्थ णं ते
 आसा आसयंति ४ तत्थ तत्थ गुलस्स जाव अन्नोसिं च बहूणं जिन्मिदियपाउग्गाणं
 दव्वाणं पुंजे य नि(क)यरे य करेंति २ ता वियरए खणंति २ ता गुलपाणगस्स
 खंडपाणगस्स पा(पो)रपाणगस्स अन्नोसिं च बहूणं पाणगाणं विय(रे)रए भरेंति २
 ता तेसिं परिपेरंतेणं पासए ठवेंति जाव चिट्ठंति । जहिं जहिं च णं ते आसा
 (आस०) तहिं तहिं च ते बहवे कोयवया (य) जाव सिल्लावट्टया अन्नाणि य फासिदि-
 यपाउग्गाई अत्थयपच्चत्थुयाई ठवेंति २ ता तेसिं परिपेरंतेणं जाव चिट्ठंति । तए णं ते
 आसा जेणेव (ए)ते उक्किट्ठा सद्दफरिसरसरुवगंधा तेणेव उवागच्छंति (०) । तत्थ णं
 अत्थेगइया आसा अपुव्वा णं इमे सद्दफरिसरसरुवगंधा (इ)तिकट्ठ तेसु उक्किट्ठेसु सद्द-
 फरिसरसरुवगंधेसु अमुच्छिया ४ तेसिं उक्किट्ठाणं सद्द जाव गंधाणं दूरंदूरेणं अव-
 क्खंमंति [२] ते णं तत्थ पउरगोयरा पउरतणपाणिआ निब्भया निरुव्विग्गा सुहंसु-
 हेणं विहरंति । एवामेव समणाउसो । जो अम्हं निग्गंथो वा निग्गंथी वा सद्दफरिस
 (सरुवगंधा) जाव नो सज्ज से णं इहलोए चेव बहूणं समणाणं ४ अन्नणिजे जाव
 वी-ईव(य)इस्सइ ॥ १२७ ॥ तत्थ णं अत्थेगइया आसा जेणेव उक्किट्ठे(ट्ट)ट्ठा सद्दफरि-
 सरसरुवगंधा तेणेव उवागच्छंति २ ता तेसु उक्किट्ठेसु स(इ०)इसु ५ मुच्छिया जाव
 अज्झोववन्ना आसेविउं पय(त्ते)ता यावि होत्था । तए णं ते आसा (एए) ते उक्किट्ठे
 स(इ)इ ५ आसेवमाणा तेहिं बहूहिं कूडेहिं य पासेहिं य गलएसु य पाएसु य
 बज्झंति । तए णं ते कोडुंबिया (एए) ते आसे गिण्हंति २ ता एगट्टियाहिं पोयबहणे
 संचारंति २ ता तणस्स [य] कट्ठस्स [य] जाव भरेंति । तए णं ते संजुत्ता(णावा-
 नाणियगा) दक्खिणाणुकूलेणं वाएणं जेणेव गंभीर[ए] पोयपट्टे तेणेव उवागच्छंति

२ ता पोयवहणं लंबेति २ ता ते आसे उत्तारेंति २ ता जेणेव हत्थिसीसे नयरे जेणेव कणगकेऊ राया तेणेव उवागच्छंति २ ता करयल जाव वद्धावेंति (०) ते आसे उवणेंति । तए णं से कणगकेऊ (राया) तेसिं संजुतावाणियमाणं उस्सुक्कं विय-
रइ २ ता सक्कारेइ संमाणेइ स० २ ता पडिविसजेइ । तए णं से कणगकेऊ-कोडुंबिय-
पुरिसे सद्दावेइ २ ता सक्कारेइ संमाणेइ स० २ ता पडिविसजेइ । तए णं से कणगकेऊ
राया आसमइए सद्दावेइ २ ता एवं वयासी-तुब्भे णं देवाणुप्पिया ! मम आसे
विणएह । तए णं ते आसमइगा तहत्ति पडिबुणेंति २ ता ते आसे बहूहिं मुह-
बंधेहि य कण्णबंधेहि य नासाबंधेहि य बालबंधेहि य खुरबंधेहि य कडगबंधेहि य
खल्लिगबंधेहि य अहिला(णे)णबंधेहि य पडियाणेहि य अंकणाहि य (वेलप्पहारेहि
य) वि(च्चि)त्तप्पहारेहि य लयप्पहारेहि य कसप्पहारेहि य छिवप्पहारेहि य विण-
यति (०) कणगकेउस्स रत्तो उवणेंति । तए णं से कणगकेऊ ते आसमइए सक्कारेइ
२ (०) पडिविसजेइ । तए णं ते आसा बहूहिं मुहबंधेहि य जाव छि(वप्)वापहारेहि
य बहूणि सारीरमाणसा(णि)इं दुक्खाइं पावेंति । एवामेव समणाउसो ! जो अम्हं
निगंथो वा निगंथी वा पव्वइए समाणे इट्ठेसु सद्धफरिसरसरुवगंधेषु सज्ज(न्ति)इ
रज्ज-इ गिज्झ-इ मुज्झ-इ अज्झोववज्ज-इ से णं इहलोए चेव बहूणं समणा(ण य)णं
[बहूणं समणीणं] जाव साविया(ण य)णं हीलणिजे जाव अणुपरिय(ट्ठिस्स)इइ ।
[गाहा]—कलरिभियमहुरतंतीतलतालवंसकउहाभिरामेसु । सद्देसु रज्जमाणा रमं-
(ती)ति सोइदियवसट्ठा ॥ १ ॥ सोइदियदुइंतत्तणस्स अह एत्तिओ हवइ दोसो ।
वीविगस्यमसहंतो वहबंधं तित्तिरो पत्तो ॥ २ ॥ थणजहणवयणकरचरण-नयणगव्वि-
यविलासियग(ती)एसु । रुवेसु रज्जमाणा रमंति चक्खिदियवसट्ठा ॥ ३ ॥ चक्खिदिय-
दुइंतत्तणस्स अह एत्तिओ ह(भ)वइ दोसो । जं जलणंमि जलंते पडइ पयंगो अबुद्धीओ
॥ ४ ॥ अ(गु)गसुवरपवरधूवणउउयमल्लणुलेवणविहीसु । गंधेसु रज्जमाणा रमंति
घाणिदियवसट्ठा ॥ ५ ॥ घाणिदियदुइंतत्तणस्स अह एत्तिओ हवइ दोसो । जं ओस-
हिगंधेणं विलाओ निद्धावई उरगो ॥ ६ ॥ तित्तकडुयं कसायं(व) [अंबिरं] महरुं बहु-
खजपेज्जेज्जेसु । आसायंमि उ गिद्धा रमंति जिब्भिमदियवसट्ठा ॥ ७ ॥ जिब्भिमि-
यदुइंतत्तणस्स अह एत्तिओ हवइ दोसो । जं गललगुक्खित्तो फुरइ थलवि(र)रेल्लिओ
मच्छो ॥ ८ ॥ उउभयमाणसुहे(सु)हि य सविभवहियमणनिव्वुडकरे(सु)हिं । फासेसु
रज्जमाणा रमंति फासिंदियवसट्ठा ॥ ९ ॥ फासिंदियदुइंतत्तणस्स अह एत्तिओ हवइ
दोसो । जं खणइ मत्थयं कुंजरस्स लोहंकुसो तिक्खो ॥ १० ॥ कलरिभियमहुरतं-
तीतलतालवंसकउहाभिरामेसु । सद्देसु जे न गिद्धा वसट्ठमरणं न ते मरए ॥ ११ ॥

थणजहणवयणकरचरणनयणगविवयविलासियगईसु । रुवेसु जे न रत्ता वसट्टमरणं न ते मरए ॥ १२ ॥ अगस्वरपवरधूवणउउयमल्लणुलेवणविहीसु । गंधेसु जे न गिद्धा वसट्टमरणं न ते मरए ॥ १३ ॥ तित्तकडुयं कसायं-महुरं [ब] बहुखज्जपेज्जलेज्जेसु । आसा(ए जे)यंमि न गिद्धा वसट्टमरणं न ते मरए ॥ १४ ॥ उउभयमाणसुहेसु य सविभवहिययमण-निव्वुडकरेसु । फासेसु जे न गिद्धा वसट्टमरणं न ते मरए ॥ १५ ॥ सहेसु य भद्दयपावएसु सोयविसयं उ(व)वागएसु । तुट्ठेण व रुट्ठेण व समणेण सया न होयव्वं ॥ १६ ॥ रुवेसु य भद्द(ग)यपावएसु चक्खुविसयं उवगएसु । तुट्ठेण व रुट्ठेण व समणेण सया न होयव्वं ॥ १७ ॥ गंधेसु य भद्दयपावएसु घाणविस(यं उ)यसु-वगएसु । तुट्ठेण व रुट्ठेण व समणेण सया न होयव्वं ॥ १८ ॥ रसेसु य भद्दयपाव-एसु जिब्भविस-यसुवगएसु । तुट्ठेण व रुट्ठेण व समणेण सया न होयव्वं ॥ १९ ॥ फासेसु य भद्दयपावएसु कायविस-यसुवगएसु । तुट्ठेण व रुट्ठेण व समणेण सया न होयव्वं ॥ २० ॥ एवं खलु जंबू ! समणेणं भगवया महावीरेणं जाव संपत्तेणं सत्तरसमस्स नायज्झयणस्स अयमट्ठे पन्नते त्तिवेमि ॥ १३८ ॥ **गाहाओ**—जह सो कालियदीवो अणुवमसोकखो तहेव जइधम्मो । जह आसा तह साहू वणियव्व-उणुकूलकारिजणा ॥ १ ॥ जह सद्दाइअगिद्धा पत्ता नो पासबंधणं आसा । तह विस-एसु अगिद्धा बज्झंति न कम्मणा साहू ॥ २ ॥ जह सच्छंदविहारो आसाणं तह य इह वरमुणीणं । जरमरणाइं विवज्जिय संपत्ताणंदनिव्वाणं ॥ ३ ॥ जह सद्दाइसु गिद्धा बद्धा आसा तहेव विसयरया । पावेंति कम्मबंधं परमासुहकारणं घोरं ॥ ४ ॥ जह ते कालियदीवा णीया अन्नत्थ दुहगणं पत्ता । तह धम्मपरिब्भट्ठा अधम्म-पत्ता इहं जीवा ॥ ५ ॥ पावेंति कम्मनरवइवसया संसारवाहयालीए । आसप्पमह-एहि व नेरइयाइहिं दुक्खाइं ॥ ६ ॥ **सत्तरसमं नायज्झयणं समत्तं ॥**

जइ णं भंते ! समणेणं० सत्तरसमस्स (णायज्झयणस्स) अयमट्ठे प-न्नते अट्ठार-समस्स के अट्ठे पन्नते ? एवं खलु जंबू ! तेणं कालेणं तेणं समएणं रायगिहे नामं नयरे होत्था वण्णओ । तत्थ णं ध(ण)णे नामं सत्थवाहे (परिवसइ) होत्था भद्दा भारिया । तस्स णं ध(ण)णस्स सत्थवाहस्स पुत्ता भद्दाए अत्तया पंच सत्थवाह-दारगा होत्था तंजहा-धणे धणपाले धणदेवे धणगोवे धणरक्खिए । तस्स णं धणस्स सत्थवाहस्स धूया भद्दाए अत्तया पंचणहं पुत्ताणं अणुमग्गजा(ती)इया सुंसुमा नामं दारिया होत्था सूमालपाणिपाया । तस्स णं धणस्स सत्थवाहस्स च्छिए नामं दासचेडे होत्था अहीणपंचिदियसरीरे मंसोवच्चिए बालकीलावणकुसले यावि होत्था । तए णं से दासचेडे सुंसुमाए दारियाए बालग्गाहे जाए यावि होत्था सुंसुमं दारियं

कडीए गिण्हइ २ ता बहूहिं दारएहि य दारियाहि य डिंभएहि य डिंभियाहि य
 कुमारएहि य कुमारियाहि य सद्धिं अभिरममाणे २ विहरइ । तए णं से चिलाए
 दासचेडे तेसिं बहूणं दारयाण य ६ अप्पेगइयाणं खुल्लए अवहरइ एवं वट्टए आडो-
 लियाओ तिंक्कु(तेंडु)सए पोत्तुल्लए साडोल्लए, अप्पेगइयाणं आभरणमल्लालंकारं अव-
 हरइ अप्पेगइ(या)ए आउ(र)सइ एवं अवहसइ निच्छोडेइ निब्भच्छेइ तजेइ अप्पे-
 गइ-ए तालेइ । तए णं ते बहवे दारगा य ६ रोयमाणा य ५ साणं साणं अम्मापि-
 ऊणं निवेदंति । तए णं तेसिं बहूणं दारगाण य ६ अम्मापियरो जेणेव धणे सत्थ-
 वाहे तेणेव उवागच्छंति २ ता ध(ण)णं २ बहूहिं खि(खे)ज्ज(णा)णियाहि य रुं-
 णाहि य उ(व)पालंभणाहि य खिज्जमाणा य रुंढमाणा य उ(व)वालं(भे)ममाणा य
 धणस्स [२] एयमट्ठं निवेदंति । तए णं [से] धणे २ चिलायं दासचेडं एयमट्ठं भुज्जो
 भुज्जो निवारं(न्ति)इ नो चेव णं चिलाए दासचेडे उवरमइ । तए णं से चिलाए दास-
 चेडे तेसिं बहूणं दारगाण य ६ अप्पेगइयाणं खुल्लए अवहरइ जाव तालेइ । तए णं ते
 बहवे दारगा य ६ रोयमाणा य जाव अम्मापिऊणं निवेदंति । तए णं ते आसुरता ५
 जेणेव धणे २ तेणेव उवागच्छंति २ ता बहूहिं खिज्जणाहि (य) जाव एयमट्ठं निवे-
 (दिं)दंति । तए णं से धणे २ बहूणं दारगाणं ६ अम्मापिऊणं अंतिए एयमट्ठं सोच्चा
 आसुरते चिलायं दासचेडं उच्चावयाहिं आउसणाहिं आउसइ उद्धंसइ नि(ब्भच्छे)-
 ळिंभइ निच्छोडेइ तजेइ उच्चावयाहिं तालणाहिं तालेइ साओ गिहाओ निच्छुभइ
 ॥ १३५ ॥ तए णं से चिलाए दासचेडे साओ गिहाओ निच्छुडे समणे रायगिहे
 नयरे सिंवाड(ए)ग जाव पहेसु देवकुल्लेसु य सभासु य पवासु य जूयखलएसु य
 वेसाघ(रे)रएसु य पाणघरएसु य सुहंसुहेणं परिवट्ठइ । तए णं से चिलाए दास-
 चेडे अणोहट्टिए अणिवारिए सच्छंदमई सइरप्पयारी मज्ज-प्पसंगी चोज्ज-प्पसंगी
 (मंस०) जूयप्पसंगी वे(सा)सप्पसंगी परदारप्पसंगी जाए यावि होत्था । तए णं
 रायगिहस्स न-यरस्स अदूरसामंते दाहिणपुरत्थिमे दि-सीभाए सीहगुहा नामं चोर-
 पल्ली होत्था विसमगिरिकडगको(डं)लंबसन्निविट्ठा वंसीकलंकपागारपरिक्खिता छि-ज-
 सेलविसमप्पवायफरिहोवगूढा एगदुवारा अणेगखंडी विदितजण-निग्गम[ए]पवेसा
 अद्धिंभतरपाणिया सुदुल्लभजलपेरंता सुबहुस्सवि कूवियबलस्स आगयस्स दुप्पहंसा
 यावि होत्था । तत्थ णं सीहगुहाए चोरपल्लीए विजए नामं चोरसेणावई परिवसइ
 अहम्मिए जाव अ(ध)हम्मकेऊ समुट्टिए बहु-नगर-निग्गयजसे मूरे [२] दडप्पहारी
 साह(सी)सिए सइवेही । से णं तत्थ सीहगुहाए चोरपल्लीए पंचहं चोरसयाणं आहं-
 वच्चं जाव विहरइ । तए णं से विजए तक्करे (चोर)सेणावई बहूणं चोराण य पार-

दारियाण य गंठिभेयगाण य संधिच्छेयगाण य खत्तखणगाण य रायावगारीण य अणधारगाण य बालघायगाण य वीसंभघायगाण य जूयकाराण य खंडरक्खाण य अन्नोसिं च बहूणं छिन्नभिन्न(ब)बाहिराहयाणं कुडंगे यावि होत्था । तए णं से विजए (तक्करे) चोरसेणावई रायगिहस्स दाहिणपुर-त्थिमं जणवयं बहूहिं गामघाएहि य नगरघाएहि य गो(ग)गहणेहि य बंदिग्गहणेहि य पंथकुट्टणेहि य खत्तखणणेहि य उवीळेमाणे २ विद्धंसेमाणे २ नित्थाणं निद्धणं करेमाणे विहरइ । तए णं से चिलाए दासचे(डे)डए रायगिहे (णयरे) बहूहिं अत्थाभिसंकीहि य चो(रा)ज्जाभिसंकीहि य दाराभिसंकीहि य ध(णि)णएहि य जू(इ)यकरेहि य परब्भवमाणे २ रायगिहाओ नग(री)राओ निग्गच्छइ २ ता जेणेव सीहगु(फा)हा चोरपल्ली तेणेव उवागच्छइ २ ता विजयं चोरसेणावई उवसंपज्जित्तणं विहरइ । तए णं से चिलाए दासचेडे विजयस्स चोरसेणावइस्स अग्गे असिल(ड्ड)ड्डिग्गाहे जाए यावि होत्था । जाहे वि य णं से विजए चोरसेणावई गामघायं वा जाव पंथकोट्ठिं वा काउं वच्चइ ताहे वि य णं से चिलाए दासचेडे सुबहुंपि (हु) कूवियबलं हयमहिय जाव पडिसेहेइ [२] पुण-रवि लद्धे कयकज्जे अणहसमग्गे सीहगुहं चोरपल्लिं हव्वमागच्छइ । तए णं से विजए चोरसेणावई चिलायं तक्करं बहू(इ)ओ चोरविज्जाओ य चोरमंते य चोरमा-याओ य चोरनिगडीओ य सिक्खावेइ । तए णं से विजए चोरसेणावई अन्नया कया(ई)इ कालधम्मणा संजुत्ते यावि होत्था । तए णं ताई पंच-चोरसयाई विजयस्स चोरसेणावइस्स महया २ इह्वीसक्कारसमुदएणं नीहरणं करेंति २ ता बहूई लोइयाई मयकिचाई करे(इ)न्ति २ ता जाव विगयसोया जाया यावि होत्था । तए णं ताई पंच-चोरसयाई अन्नमन्नं सहावेंति २ ता एवं वयासी-एवं खलु अम्मं देवाणुप्पिया ! विजए चोरसेणावई कालधम्मणा संजुत्ते । अयं च णं चिलाए तक्करे विजएणं चोरसेणाव-इणा बहू-ओ चोरविज्जाओ य जाव सिक्खाविए । तं सेयं खलु अम्मं देवाणुप्पिया ! चिलायं तक्करं सीहगुहाए चोरपल्लीए चोरसेणावइत्ताए अभिसिंचित्तए-त्तिकहु अन्न-मन्नस्स एयमट्ठं पडिपुणेंति २ ता चिलायं (तीए) सीहगुहाए [चोरपल्लीए] चोरसेणा-वइत्ताए अभिसिंचति । तए णं से चिलाए चोरसेणावई जाए अहम्मिणं जाव विह-रइ । तए णं से चिलाए चोरसेणावई चोर-नायगे जाव कुडंगे यावि होत्था । से णं तत्थ सीहगुहाए चोरपल्लीए पंचण्हं चोरसयाण य एवं जहा विजओ तहेव सव्वं जाव रायगिहस्स [नयरस्स] दाहिणपुर-त्थिमिहं जणवयं जाव नित्थाणं निद्धणं करेमाणे विहरइ ॥ १४० ॥ तए णं से चिलाए चोरसेणावई अन्नया कयाइ विपुलं असणं ४ [उवक्खडावेइ] उवक्खडावेत्ता ते पंच चोरसए आमंतेइ तओ पच्छा ण्हाए भोयण-

मंडवंसि तेहिं पंचहिं चोरसएहिं सद्धिं विपुलं असणं ४ सुरं च मज्जं च मंसं च सीधुं च पस-न्नं च आसाएमाणे ४ विहरइ जिमियभुत्तुरागए ते पंच चोरसए विपुलेणं धूवपु-
 प्फगंधमल्लालंकारेणं सक्कारेइ सम्माणेइ स० २ ता एवं वयासी-एवं खलु देवाणुप्पिया !
 रायगिहे नयरे धणे नामं सत्थवाहे अद्धे[०], तस्स णं धूया भद्दाए अत्तया पंचण्हं
 पुत्ताणं अणुमग्गाजाइया सुंसुमा नामं दारिया (यावि) होत्था अहीणा जाव सुरूवा, तं
 गच्छामो णं देवाणुप्पिया ! धणस्स सत्थवाहस्स गिहं विलुंपामो, तुच्चं विपुले धण-
 कणग जाव सिलप्पवाळे ममं सुंसुमा दारिया । तए णं ते पंच चोरसया चिलायस्स
 (०) पडिस्सेति । तए णं से चिलाए चोरसेणावई तेहिं पंचहिं चोरसएहिं सद्धिं अल्ल-
 चम्मं दुरूहइ [२] पच्चावरण्हकालसमयंसि पंचहिं चोरसएहिं सद्धिं स-चद्ध जाव गहि-
 याउहपहरणा माइयगोमुहि(एहिं)फलएहिं नि(क)किट्ठाहिं असिलट्ठीहिं अंसगएहिं
 तोणेहिं स(जी)जीवेहिं धणूहिं समुक्खित्तेहिं सरेहिं समुल्लालियाहिं वीहाहिं ओसारियाहिं
 उरुधंठियाहिं छिप्पतूरेहिं वज्जमाणेहिं महया २ उक्किट्ठसीह-नाय(चोरकलकलरवं) जाव
 समुद्धरवभूयं [पिव] करेमाणा सीहगुहाओ चोरपल्लीओ पडिनिक्खमंति २ ता जेणेव
 रायगिहे न-यरे तेणेव उवागच्छंति २ ता रायगिहस्स अदूरसामंते एगं महं गहणं
 अणु-प्पविसंति २ ता दिवसं खवेमाणा चिट्ठंति । तए णं से चिलाए चोरसेणावई अद्ध-
 रत्तकालसमयंसि निसंतपडिनिसंतंसि पंचहिं चोरसएहिं सद्धिं माइयगोमुहिएहिं फल-
 एहिं जाव मूइ(आ)याहिं उरुधंठियाहिं जेणेव रायगिहे [नयरे] पुर-त्थिमिल्ले दुवारे
 तेणेव उवागच्छइ (०) उदग(व)बत्थि परामुसइ (०) आयंते चोक्खे परमसुइभूए
 तालुग्घाडणिविज्जं आवाहेइ २ ता रायगिहस्स दुवारकवाडे उदएणं अच्छोडेइ २
 ता कवाडं विहाडेइ २ ता रायगिहं अणु-प्पविसइ २ ता महया २ सहेणं उग्घोसे-
 माणे २ एवं वयासी-एवं खलु अहं देवाणुप्पिया ! चिलाए नामं चोरसेणावई पंचहिं
 चोरसएहिं सद्धिं सीहगुहाओ चोरपल्लीओ इ(०)हं हव्वमागए धणस्स सत्थवाहस्स
 गिहं घाउकामे । तं (जो) जे णं नवियाए माउयाए दुद्धं पाउकामे से णं नि(२)गच्छउ-
 त्तिकट्ठ जेणेव धणस्स सत्थवाहस्स गिहे तेणेव उवागच्छइ २ ता धणस्स गिहं
 विहाडेइ । तए णं से धणे चिलाएणं चोरसेणावइणा पंचहिं चोरसएहिं सद्धिं
 गिहं घाइज्जमाणं पासइ २ ता भीए तत्थे ४ पंचहिं पुत्तेहिं सद्धिं एगंतं अवक्कमइ ।
 तए णं से चिलाए चोरसेणावई धणस्स सत्थवाहस्स गिहं घाएइ २ ता सुबहुं
 धणकण(ग)गं जाव सावएज्जं सुंसुमं च दारियं गेण्हइ २ ता रायगिहाओ पडि-नि-
 क्खमइ २ ता जेणेव सीहगुहा तेणेव पहारेत्थ गमणाए ॥ १४१ ॥ तए णं से धणे
 सत्थवाहे जेणेव सए गिहे तेणेव उवागच्छइ २ ता सुबहुं धणकणं सुंसुमं च दारियं

अव(ह)हारियं जाणित्ता महत्थं २ पाहुडं गहाय जेणेव नगरगुत्तिया तेणेव उवाग-
 च्छइ २ ता तं महत्थं पाहुडं (जाव) उवणे(न्ति)इ २ ता एवं वयासी-एवं खल्ल
 देवाणुप्पिया ! चिलाए चोरसेणावइं सीहगुहाओ चोरपल्लीओ इहं हव्वमागम्म पंचहिं
 चोरसएहिं सद्धिं मम गिहं घाएत्ता सुबहुं धणकणगं सुंसुमं च दारियं गहाय जाव
 पडिगए, तं इच्छा(मो)मि णं देवाणुप्पिया ! सुंसुमा[ए] दारियाए कूवं गमित्तए,
 तु(ब्भे)ब्भं णं देवाणुप्पिया ! से विपुल्ले धणकणगे ममं सुंसुमा दारिया । तए णं ते
 न(य)गरगुत्तिया धणस्स एयमद्धं पडिसुणेंति २ ता सन्नद्ध जाव गहियाउहपहरणा
 महया २ उक्किट्ठ जाव समुहरवभूयं पिव करेमाणा रायगिहाओ निग्गच्छंति २ ता
 जेणेव चिलाए चोरे तेणेव उवागच्छंति २ ता चिलाएणं चोरसेणावइणा सद्धिं संप-
 लग्गा यावि होत्था । तए णं [ते] नगरगुत्तिया चिलायं चोरसेणावइं हयमहि(या)य
 जाव पडिसेहेंति । तए णं ते पंच-चोरसया नगर(गो)गुत्तिएहिं हयमहिय जाव पडिसे-
 हिया समाणा तं विपुलं धणकणगं विच्छ(ड्डे)ड्डमाणा य विप्पकि(रे)रमाणा य सव्वओ
 समंता विप्पलाइत्था । तए णं ते न-गरगुत्तिया तं विपुलं धणकणगं गेण्हंति २ ता
 जेणेव रायगिहे तेणेव उवागच्छंति । तए णं से चिलाए तं चोरसे-ब्भं तेहिं न-गर-
 गुत्तिएहिं हयमहिय (जाव) [० पवर]भीए [जाव] तत्थे सुंसुमं दारियं गहाय एगं महं
 आ(अ)गामियं वीहमद्धं अडविं अणु-प्पविट्ठे । तए णं धणे सत्थवाहे सुंसुमं दारियं
 चिलाएणं अडवीमु(हिं)हं अवहीरमाणिं पासित्ताणं पंचहिं पुत्तेहिं सद्धिं अप्पछट्ठे
 सन्नद्धबद्ध[०] चिलायस्स प(द)यमग्गविहिं (अभिगच्छात) अणुगच्छमाणे अभिग-
 (ज्जेमाणे)जंतं हक्कारेमाणे पुक्कारेमाणे अभितज्जेमाणे अभितासेमाणे पिट्ठओ अणुग-
 च्छइ । तए णं से चिलाए तं धणं सत्थवाहं पंचहिं पुत्तेहिं [सद्धिं] अप्पछट्ठं सन्नद्धबद्धं
 समणुगच्छमाणं पासइ २ ता अत्थामे ४ जाहे नो संचाएइ सुंसुमं दारियं निव्वाहितए
 ताहे संते तंते परि(सं)तंते नीलुप्प[लगव]लं असिं परामुसइ २ ता सुंसुमाए दारि-
 याए उत्तमंगं छिंदइ २ ता तं गहाय तं आ-गामियं अडविं अणु-प्पविट्ठे । तए णं [से]
 चिलाए तीसे अगामियाए अडवीए तण्हाए [छुहाए] अभिभूए समाणे पम्(हु)हट्ठदि-
 साभाए सीहगुहं चोरपल्लिं असंपत्ते अंतरा चेव कालगए । एवामेव समणाउसो ! जाव
 पव्वइए समाणे इमस्स ओरालियसरीरस्स वंतासवस्स जाव विद्धंसणधम्मस्स वण्ण-
 हेउं [वा] जाव आहारं आहारेइ से णं इहलोए चेव बहूणं समणाणं ४ हीलणिज्जे
 जाव अणुपरियट्ठिस्सइ जहा व से चिलाए तक्करे । तए णं से धणे सत्थवाहे पंचहिं
 पुत्तेहिं अप्पछट्ठे चिलायं [तीसे अगामियाए सव्वओ समंता] परिघाडेमाणे २
 (तण्हाए छुहाए य) संते तंते परितंतंते नो संचाएइ चिलायं चोरसेणावइं साहत्थि

गिण्हितए । से णं तओ पडिनियत्तइ २ ता जेणेव सा सुंसुमा बालि(दारि)या चिलाएणं जीवियाओव वरोवि(ल्लि)या (तेणं)तेणेव उवागच्छइ २ ता सुंसुमं दारियं चिलाएणं जीवियाओ वरोवियं पासइ २ ता परसुनिय(न्तेव)तेव्व चंपगपायवे[०] । तए णं से धणे सत्थवाहे (पंचहिं पु०) अप्पछट्टे आसत्थे कूवमाणे कंदमाणे विलवमाणे महया २ सहेणं कु(ह)हुकु-हु(सु)स्स परुचे सुचि(रं)रकालं वा(वा)ह[प्प]मोक्खं करेइ । तए णं से धणे [सत्थवाहे] पंचहिं पुत्तेहिं अप्पछट्टे चिलायं तीसे आ-गामियाए सव्वओ समंता परिधाडेमा(णा)णे तण्हाए छुहाए य प(रि)रब्भं(रद्धं)ते समाणे तीसे आगामियाए अडवीए सव्वओ समंता उदगस्स मग्गणगवेसणं करे(न्ति)इ २ ता संते तंते परितंते निव्वि-ण्णे [समाणे] तीसे आगामियाए (अडवीए उदगस्स मग्गणगवेसणं करेमाणे नो चेव णं उदगं आसादेति तए णं) उदगं अणासाएमाणे जेणेव सुंसुमा जीवियाओ वरो(एल्लि)विया तेणेव उवागच्छइ २ ता जेढुं पुत्तं धणे (स०) सद्दावेइ २ ता एवं वयासी-एवं खलु पुत्ता । सुंसुमाए दारियाए अट्ठाए चिलायं तकरं सव्वओ समंता परिधाडेमाणा तण्हाए छुहाए य अभिभूया समाणा इमीसे आगामि-याए अडवीए उदगस्स मग्गणगवेसणं करेमाणा नो चेव णं उदगं आसादेमो । तए णं उदगं अणासाएमाणा नो संचाएमो रायगिहं संपावित्तए । तण्णं तुब्भे ममं देवा-णुप्पिया । जीवियाओ वरोवेह [ममं] मंसं च सोणियं च आहारेह (०) तेणं आहा-रेणं अव(हिट्ठा)थद्धा समाणा तओ पच्छा इमं आगामियं अडविं नित्थरिहिह राय-गिहं च संपावि(हि)हह मित्त-नाइ(य)० अभिसमागच्छि-हह अत्थस्स य धम्मस्स य पुण्णस्स य आभागी भविस्सह । तए णं से जे(ट्ठ)ट्टे पुत्ते धणेणं सत्थवाहेणं एवं पुत्ते समाणे धणं २ एवं वयासी-तुब्भे णं ताओ ! अम्हं पिया गु(रु)रुज्जण(या)य-देवयभूया ठावका पइ(ट्ठा)ट्ठवका संरक्खगा संगोवगा । तं कहण्णं अम्हे ताओ ! तुब्भे जीवियाओ वरोवेमो तुब्भं णं मंसं च सोणियं च आहारेमो ? तं तुब्भे णं ताओ ! ममं जीवियाओ वरोवेह मंसं च सोणियं च आहारेह आगामियं अडविं नित्थर[ह]ह तं चेव सव्वं भणइ जाव अत्थस्स जाव (पुण्णस्स) आभागी भवि-स्सह । तए णं धणं सत्थवाहं दोच्चे पुत्ते एवं वयासी-मा णं ताओ ! अम्हे जेढुं भायरं गु(रु)रुदेवयं जीवियाओ वरोवेमो, तुब्भे णं ताओ ! ममं जीवियाओ वरोवेह जाव आभागी भविस्सह । एवं जाव पंचमे पुत्ते । तए णं से धणे सत्थवाहे पंचपुत्ताणं हियइच्छियं जाणित्ता ते पंच पुत्ते एवं वयासी-मा णं अम्हे पुत्ता । एग-मवि जीवियाओ वरोवेमो । एस णं सुंसुमाए दारियाए सरी(रए)रे निप्पाणे जाव जीवविप्पज्जडे । तं सेयं खलु पुत्ता ! अम्हं सुंसुमाए दारियाए मंसं च सोणियं च

आहारेत्तए । तए णं अम्हे तेणं आहारेणं अव(र)थद्धा समाणा रायगिहं संपाउणि-
स्सामो । तए णं ते पंच-पुत्ता धणेणं सत्थवाहेणं एवं वुत्ता समाणा एयमट्ठं पडि-
णेंति । तए णं धणे सत्थवाहे पंचहिं पुत्तेहिं सद्धिं अरणिं करेइ २ ता सरणं (च)
करेइ २ ता सरणं अरणिं महेइ २ ता अग्गिं पाडेइ २ ता अग्गिं संधुक्खेइ २ ता
दारुया(ति)इ प(रि)क्खेवे)क्खिवइ २ ता अग्गिं पज्जालेइ २ ता सुंमुमाए दारियाए
मंसं च (पइत्ता) सोणियं च आहारे(न्ति)इ । तेणं आहारेणं अव(र)थद्धा समाणा राय-
गिहं नय(रिं)रं संपत्ता मित्त-ना(इं)इनियग० अभिसम-न्नागया तस्स य विउलस्स
धणकणगरयण जाव आभागी जाया(वि)होत्था । तए णं से धणे सत्थवाहे सुंमुमाए
दारियाए बहूइं लोइयाइं [मयकिच्चाइं] जाव विगयसोए जाए यावि होत्था ॥ १४२ ॥
तेणं कालेणं तेणं समएणं समणे भगवं महावीरे गुणसिलए उज्जाणे समोसढे । (सं-
तए णं धणे सत्थवाहे सपु(संप)त्ते धम्मं सोच्चा पव्वइए एक्कारसंगवी मासियाए
संलेहणाए सोहम्ममे उवव(ण्णो)न्ने महाविदेहे वासे सिज्झिहिइ । जहा वि य णं जंबू !
धणेणं सत्थवाहेणं नो वण्णहेउं वा नो रुवहेउं वा नो बलहेउं वा नो विसयहेउं
वा सुंमुमाए दारियाए मंससोणिए आहारिए नन्नत्थ एगाए रायगिहं संपावणट्ठयाए
एवामेव समणाउसो ! जो अम्हं निग्गंथो वा निग्गंथी वा इमस्स ओरालियसरी-
रस्स वंतासवस्स पित्तासवस्स सुक्कासवस्स सोणियासवस्स जाव अवस्(सं)सविप्प-
ज्जहियव्वस्स नो वण्णहेउं वा नो रुवहेउं वा नो बलहेउं वा नो विसयहेउं वा
आहारं आहारेइ नन्नत्थ एगाए सिद्धिगमणसंपावणट्ठयाए से णं इह-भवे चेव बहूणं
समणाणं बहूणं समणीणं बहूणं सावयाणं बहूणं सावियाणं अच्चणिज्जे जाव वीईव-
इस्सइ । एवं खलु जंबू ! समणेणं भगवया महावीरेणं जाव संपत्तेणं अट्टारसमस्स
(णायज्झयणस्स) अयमट्ठे प-न्नत्ते ति बेमि ॥ १४३ ॥ **गाहाओ**—जह सो चिला-
इपुत्तो सुंमुमगिद्धो अकज्जपडिबद्धो । धणपारद्धो पत्तो महाडविं वसणसयकलियं
॥ १ ॥ तह जीवो विसयसुहे लुद्धो काळण पावकिरियाओ । कम्मवसेणं पावइ भवा-
डवीए महाडुक्खं ॥ २ ॥ धणसेट्ठी—विब गुरुणो पुत्ता इव साहवो भवो अडवी ।
सुयमंसमिवाहारो रायगिहं इह सिवं नेयं ॥ ३ ॥ जह अडविनयरणित्थरणपावणत्थं
तएहिं सुयमंसं । भुत्तं तहेह साहू गुरुण आणाए आहारं ॥ ४ ॥ भवलंघणसिवपाव-
णहेउं भुंजं(भुज्जं)ति ण उण गेहीए । वण्णबलरुवहेउं च भावियप्पा महासत्ता ॥ ५ ॥
अट्टारसमं नायज्झयणं समत्तं ॥

जइ णं भंते ! समणेणं० अट्टारसमस्स नायज्झयणस्स अयमट्ठे प-न्नत्ते एणवीस-
इमस्स (०) के अट्ठे पन्नत्ते ? एवं खलु जंबू ! तेणं कालेणं तेणं समएणं इहेव जंबुद्दीवे

बीवे पुव्वविदेहे सीयाए महान-ईए उत्तरिह्ले कूले नीलवंतस्स दाहिणेणं उत्तरिह्लस्स सीयामुहवणसंडस्स प(च्छि)च्चत्थिमेणं एगसेलगस्स वक्खारपव्वयस्स पुर-त्थिमेणं एत्थ णं पुक्खलावई नामं विजए प-न्नते । तत्थ णं पुंडरिगिणी नामं रायहाणी पन्नता नवजोयणवि-त्थिण्णा दुवाल्सजोयणायामा जाव पच्चक्खं देवलो(य)गभूया पासाईया दरिसणीया अभिरूवा पडिरूवा । तीसे णं पुंडरिगिणीए नयरीए उत्तरपुर-त्थिमे दि-सीमाए नलिणिवणे नामं उज्जाणे होत्था (वण्णओ) । तत्थ णं पुंडरिगिणीए राय-हाणीए महापउमे नामं राया होत्था । तस्स णं पउमावई नामं देवी होत्था । तस्स णं महापउमस्स रत्तो पुत्ता पउमावईए देवीए अत्तया दुवे कुमार होत्था तं जहा-पुंडरीए य कंडरीए य सुकुमालपाणिपाया[०] । पुंडरीए जुवराया । तेणं कालेणं तेणं समएणं (धम्मघोसा थेरा पंचहिं अणगारसएहिं सद्धिं सं० पुव्वानुपुव्वि चरमाणा जाव ण० उज्जाणे तेणेव स०) थेरागमणं महापउमे राया निग्गए धम्मं सोच्चा पुं(पों)डरीयं रजे ठवेत्ता पव्वइए पुंडरीए राया जाए कंडरीए जुवराया । महापउमे अणगारे चोहस-पुव्वाइं अहिजइ । तए णं थेरा बहिया जणवयविहारं विहरंति । तए णं से महापउमे बहूणि वासाणि जाव सिद्धे ॥ १४४ ॥ तए णं थेरा अन्नया कया-इ पुणरवि पुंडरिगिणीए रायहाणीए नलिणिवणे उज्जाणे समोसढा । पुं-डरीए राया निग्गए । कंडरीए महाजणसहं सोच्चा जहा म(हब्)हाबलो जाव पज्जुवासइ । थेरा धम्मं परिकहेति पुंडरीए समणोवासए जाए जाव पडिगए । तए णं कंडरीए उट्ठाए उट्ठेइ २ ता जाव से जहेयं तुब्भे वयह जं नवरं पुंडरीयं रायं आपुच्छामि तए णं जाव पव्वयामि । अहासुहं देवाणुप्पिया ! । तए णं से कंडरीए जाव थेरे वंदइ नमंसइ वं० २ ता [थेराणं] अंतियाओ पडिनिक्खमइ २ ता तमेव चाउ[र]घंटं आसरहं दुरू-हइ जाव पच्चोरुहइ जेणेव पुंडरीए राया तेणेव उवागच्छइ (०) करयल जाव पुंड-रीयं [रायं] एवं वयासी-एवं खलु (देवा० !) मए थेराणं अंतिए (जाव) धम्मे निसंते से धम्मे अभिरुइए । तए णं (देवा० !) जाव पव्वइतए । तए णं से पुंडरीए कंडरीयं एवं वयासी—मा णं तुमं भाउ(देवाणुप्पि)या ! इ(दा)याणि मुंडे जाव पव्वयाहि, अहं णं तुमं म(हया २)हारायाभिसेएणं अभिसिं(चया)चामि । तए णं से कंडरीए पुंडरीयस्स र-त्तो एयमट्ठं नो आढाइ जाव तुसिणीए संचिट्ठइ । तए णं पुंडरीए राया कंडरीयं दोच्चंपि तच्चंपि एवं वयासी जाव तुसिणीए संचिट्ठइ । तए णं पुंडरीए कंडरीयं कुमारं जाहे नो संचाएइ बहूहिं आघवणा(हिं)हि य प-न्नवणाहि य ४ ताहे अकामए चेव एयमट्ठं अणुमच्चित्था जाव निक्खमणाभिसेएणं अभिसिंचइ जाव थेराणं सीसभिक्खं दलयइ पव्वइए अणगारे जाए एक्कारसंग-वी । तए णं थेराः

भगवंतो अन्नया कया-इ पुंड(री)रिगिणीओ नयरीओ नलि(णी)णिवणाओ उज्जाणाओ पडि-निक्खमंति २ ता बहिया जणवयविहारं विहरंति ॥ १४५ ॥ तए णं तस्स कंडरीयस्स अणगारस्स तेहिं अंतेहि य पंतेहि य जहा सेलगस्स जाव दाहवक्क-तीए यावि विहरइ । तए णं थेरा अन्नया कया(इ)इ जेणेव पोंडरिगिणी तेणेव उवागच्छ(इ)न्ति २ ता नलि(णि)णीवणे समोसडा । पुंडरीए निग्गए धम्मं सुणेइ । तए णं पुंडरीए राया धम्मं सोच्चा जेणेव कंडरीए अणगारे तेणेव उवागच्छइ २ ता कंडरीयं वंदइ नमंसइ वं० २ ता कंडरीयस्स अणगारस्स सरीरं सच्चाबाहं सरो(यं)णं पासइ २ ता जेणेव थेरा भगवंतो तेणेव उवागच्छइ २ ता थेरे भगवंते वंदइ नमंसइ वं० २ ता एवं वयासी-अहणं भंते ! कंडरीयस्स अणगारस्स अहापवतेहिं ओसह-भेसजेहिं जाव तिगि(तेइ)च्छं आ(उट्ठा)उंटामि, तं तुब्भे णं भंते ! मम जाणसालासु समोसरह । तए णं थेरा भगवंतो पुंडरीयस्स पडिसुणेंति (०) जाव उवसंपजित्ताणं विहरंति । तए णं पुंडरीए (राया) जहा मंडुए सेलगस्स जाव बलियसरीरे जाए । तए णं थेरा भगवंतो पुंडरीयं रायं [आ]पुच्छंति २ ता बहिया जणवयविहारं विहरंति । तए णं से कंडरीए ताओ रोयायंकाओ विप्पमुक्के समाणे तंसि मणु-ञ्चंसि असण-पाणखाइमसाइमंसि मुच्छिए गिद्धे गडिए अज्झोवव-ञ्चे नो संचाएइ पुंडरीयं आपु-च्छित्ता बहिया अब्भुज्जएणं (जणवयविहारं) जाव विहरित्तए तत्थेव ओस-ञ्चे जाए । तए णं से पुंडरीए इमीसे क्हाए लद्धे समाणे ण्हाए अंतेउरपरियालसंपरिवुडे जेणेव कंडरीए अणगारे तेणेव उवागच्छइ २ ता कंडरीयं तिक्खुतो आयाहि(णं)ण-पयाहिणं करेइ २ ता वंदइ नमंसइ वं० २ ता एवं वयासी-धञ्चेसि णं तुमं देवाणुप्पिया ! कयत्थे कयपु-ण्णे कयलक्खणे, सुलद्धे णं देवाणुप्पिया ! तव माणु-स्सए जम्मजीवियफले जे णं तुमं रज्जं च जाव अंतेउरं च [वि]छ(इइ)ड्डेता विगो-वइत्ता जाव पव्वइए, अहणं अह-ञ्चे [अपुण्णे] अकयपु-ण्णे रज्जे [य] जाव अंतेउरे य माणुस्सएसु य कामभोगेसु मुच्छिए जाव अज्झोवव-ञ्चे नो संचाएमि जाव पव्वइत्तए, तं धञ्चेसि णं तुमं देवाणुप्पिया ! जाव जीवियफले । तए णं से कंडरीए अणगारे पुंडरीयस्स एयमट्ठं नो आडाइ जाव संचिट्ठइ । तए णं से कंडरीए पोंडरीएणं दोच्चंपि तच्चंपि एवं वुत्ते समाणे अकामए अव(स)सवसे लज्जाए गारवेण य पुंडरीयं (रायं) आपुच्छइ २ ता थेरेहिं सद्धिं बहिया जणवयविहारं विहरइ । तए णं से कंडरीए थेरेहिं सद्धिं कं(किं)चि कालं उग्गउग्गेणं विह(रति)रित्ता तओ पच्छा समणत्तणपरितंतं समणत्तण-निव्वि(प)णे समणत्तण-निब्भ(त्थि)च्छिए समणगुणमुक्कजोगी थेराणं अंतियाओ सणियं २ पच्चोसक्कइ २ ता जेणेव पुंडरिगिणी

नयरी जेणेव पुंडरीयस्स भवणे तेणेव उवागच्छइ २ ता असोगवणियाए असोगव-
 पायवस्स अहे पुढविसिलापट्टगंसि निसीयइ २ ता ओहयमणसंकप्पे जाव झियाय-
 माणे संचिट्टइ । तए णं तस्स पौंडरीयस्स अंब(अम्म)धाई जेणेव असोगवणिया
 तेणेव उवागच्छइ २ ता कंडरीयं अणगारं असोगवरपायवस्स अहे पुढविसिला(व)-
 पट्ट-गंसि ओहयमणसंकप्पं जाव झियायमाणं पासइ २ ता जेणेव पुंडरीए राया तेणेव
 उवागच्छइ २ ता पुंडरीयं रायं एवं वयासी-एवं खलु देवाणुप्पिया ! तव पि(उ)य-
 भाउए कंडरीए अणगारं असोगवणियाए असोगवरपायवस्स अहे पुढविसिला-पट्टे
 ओहयमणसंकप्पे जाव झियायइ । तए णं [से] पुंडरीए अम्मधा(इ)ईए एयमट्ठं सोच्चा
 निसम्म तहेव संभंते समाणे उट्ठाए उट्ठेइ २ ता अंतेउरपरियालसंपरिवुडे जेणेव
 असोगवणिया जाव कंडरीयं तिक्खुत्तो (०) एवं वयासी-ध-न्नेसि णं तुमं देवाणुप्पिया !
 जाव पव्वइए, अहं णं अध-न्ने [३] जाव [अ]पव्वइत्तए, तं धन्नेसि णं तुमं देवाणु-
 प्पिया ! जाव जीवियफले । तए णं कंडरीए पुंडरीएणं एवं वुत्ते समाणे तुसिणीए
 संचिट्टइ दोच्चं पि तच्चं पि जाव चिट्ठइ । तए णं पुंडरीए कंडरीयं एवं वयासी-अट्ठो
 भंते । भोगेहिं ? हंता [१] अट्ठो । तए णं से पुंडरीए राया कोडुंङ्गियपुरिसे सहावेइ २
 ता एवं वयासी-खिप्पामेव भो देवाणुप्पिया ! कंडरीयस्स महत्थं जाव रायाभिसे-
 (अं)यं उवट्ठवेह जाव रायाभिसेएणं अभिसिंचइ ॥ १४६ ॥ तए णं [से] पुंडरीए
 सयमेव पंचमुट्ठियं लोयं करेइ सयमेव चाउज्जामं धम्मं पडिवज्जइ २ ता कंडरी-
 यस्स संतियं आयारभंड(यं)गं गेण्हइ २ ता इमं एयारुवं अभिग्गहं अभिगिण्हइ-
 कप्पइ मे थेरे वंदिता नमंसित्ता थेराणं अंतिए चाउज्जामं धम्मं उवसंपज्जित्ताणं
 तओ पच्छा आहारं आहारित्तए-त्तिकट्ठु इमं (च) एयारुवं अभिग्गहं अभिगि(ण्हे)-
 ण्हित्ताणं पुंड-रिगिणी(ए)ओ पडिनिक्खमइ २ ता पुव्वाणुपुर्व्वि चरमाणे गामाणुगामं
 दूइज्जमाणे [जेणेव] थेरा भगवंतो तेणेव प्हारेत्थ गमणाए ॥ १४७ ॥ तए णं
 तस्स कंडरीयस्स र-त्तो तं पणीयं पाणभोयणं आहारियस्स समाणस्स अइजाग(रि)-
 रणुण य अइभोयणप्पसंगेण य से आहारे नो सम्मं परिण(मइ)ए । तए णं तस्स
 कंडरीयस्स र-त्तो तंसि आहारंसि अपरिणममाणंसि पुव्वरतावरत्तकालसमयंसि
 सरी(रं)रांसि वेयणा पाउब्भूया उज्जला विउला पगाढा जाव दुरहियासा पित्तज्ज-
 रपरिणयसरीरे दाहवकंतीए यावि विहरइ । तए णं से कंडरीए राया रजे य रट्ठे
 य अंतेउरे य जाव अज्झोववन्ने अट्ठुहुट्ठवसट्ठे अकामए अव-सवसे कालमासे कालं
 किच्चा अहे सत्तमाए पुढवीए उक्कोसकालट्ठिइयंसि नरयंसि नेरइयत्ताए उवव-न्ने ।
 एवामेव समणाउसो ! जाव पव्वइए समाणे पुणरवि माणुस्सए कामभो(गे)ए आसा-

(इए)एइ जाव अणुपरियट्टिस्सइ जहा व से कंडरीए राया ॥१४८॥ तए णं से पुंडरीए अणगारे जेणेव थेरा भगवंतो तेणेव उवागच्छइ २ ता थेरे भगवंते वंदइ नमंसइ वं० २ ता थेराणं अंतिए दोच्चं पि चाउज्जामं धम्मं पडिवज्जइ छट्ठ[क]खमणपारण-गंसि पढमाए पोरीसीए सज्झायं करेइ २ ता जाव अडमाणे सीयलुक्खं पाणभोग्यं पडिगाहेइ २ ता अहापज्जत्तमितिकट्ठु पडि-निय(त्त)तेइ जेणेव थेरा भगवंतो तेणेव उवागच्छइ २ ता भत्तपाणं पडिदंसेइ २ ता थेरेहिं भगवंतेहिं अबभणुत्ताए समाणे अमुच्छिए ४ विलमिव पन्नगभूएणं अप्पाणेणं तं फासुएसणिज्जं असणं ४ सरीरको-ट्ठगंसि पक्खिवइ । तए णं तस्स पुंडरीयस्स अणगारस्स तं कालाङ्कतं अरसं विरसं सीयलुक्खं पाणभोग्यं आहारियस्स समाणस्स पुव्वरत्तावरत्तकालसमयंसि धम्म-जागरियं जागरमाणस्स से आहारे नो सम्मं परिणमइ । तए णं तस्स पुंडरीयस्स अणगारस्स सरीरगंसि वेयणा पाउब्भया उज्जला जाव दुरहियासा पित्तज्जरपरिगय-सरीरे दाहवक्कंतीए विहरइ । तए णं से पुंडरीए अणगारे अत्थामे अबले अवीरिए अपुरिसक्कारपरक्कमे करयल जाव एवं वयासी-नमो-त्थु णं अ(रि)रहंताणं [भगवंताणं] जाव संपत्ताणं । नमो-त्थु णं थेराणं भगवंताणं मम धम्मायरियाणं धम्मोवएसयाणं । पुव्वि पि य णं मए थेराणं अंतिए सव्वे पाणाइवाए पच्चक्खाए जाव सिच्छादंसण-सल्ले (णं) पच्चक्खाए जाव आलोइयपडिक्कंते कालमासे कालं किच्चा सव्वट्ठसिद्धे उव-वन्ने । तओ अणंतरं उव्वट्ठिता महाविदेहे वासे सिज्झिइइ जाव सव्वदुक्खाणमंतं काहिइ । एवामेव समणाउसो ! जाव पव्वइए समाणे माणुस्सएहिं कामभोगेहिं नो सज्जइ नो रज्जइ जाव नो विप्पडिघायमावज्जइ से णं इहभवे चेव बहूणं समणाणं बहूणं समणीणं बहूणं साव(या)गाणं बहूणं सावियाणं अचणिज्जे वंदणिज्जे पूयणिज्जे सक्कारणिज्जे सम्माणणिज्जे कल्लाणं मंगलं देवयं चेइयं पज्जुवासणिज्जे-तिकट्ठु परलोए वि य णं नो आगच्छइ बहूणि दंडणाणि य मुंडणाणि य तज्जणाणि य ता(ड)ल-णाणि य जाव चाउरंतं संसारकंतां जाव वीइवइस्सइ जहा व से पुंडरीए अणगारे । एवं खलु जंबू ! समणेणं भगवया महावीरेणं आ(दि)इगरेणं तित्थगरेणं [सयंसंबुद्धेणं] जाव सिद्धिगइ-नामधेज्जं ठाणं संपत्तेणं एगूणवीसइमस्स नायज्झयणस्स अयमट्ठे पज्जते । एवं खलु जंबू ! समणेणं भगवया महावीरेणं जाव सिद्धिगइ-नामधेज्जं ठाणं संपत्तेणं छट्ठस्स अंगस्स पढमस्स सुयक्खंधस्स अयमट्ठे प-न्नते ति वेमि । तस्स णं सुयक्खंधस्स एगूणवीसं अज्झयणाणि ए(क्क)गासरगाणि एगूणवीसाए दिवसेसु सम-प्यंति ॥ १४९ ॥ गाहाउ—वाससहस्सं पि जई काऊणं संजमं सुविउलं पि । अंतं किलिट्ठभावो न विमुज्जइ कंडरीउव्व ॥ १ ॥ अप्पेण वि कालेणं केइ जहा-

गहियसीलसामण्णा । साहिति निययकजं पुंडरीयमहारिसिन्व जहा ॥ २ ॥
 एगूणवीसइमं अज्झयणं समत्तं ॥ नायाधम्मकहाणं पढमो सुय-
 क्खंधो समत्तो ॥

तेणं कालेणं तेणं समएणं रायगिहे नामं नयरे होत्था वण्णओ । तस्स णं
 रायगिहस्स [नयरस्स] बहिया उत्तरपुर-त्थिमे दि-सीभाए तत्थ णं गुण(सी)सिलए
 नामं उज्जाणे होत्था वण्णओ । तेणं कालेणं तेणं समएणं समणस्स भगवओ महा-
 वीरस्स अंतेवासी अज्जसुहम्मा नामं थेरा भगवंतो जाइसंपन्ना कुलसंपन्ना जाव
 चो(चउ)इसपुव्वी चउ-नाणोवगया पंचहिं अणगारसएहिं सद्धिं संपरिवुडा पुव्वानु-
 पुव्वि चरमाणा गामाणुगामं दू(दु)इज्जमाणा सुहंसुहेणं विहरमाणा जेणेव रायगिहे
 नयरे जेणेव गुण-सिलए उज्जाणे जाव संजमेणं तवसा अप्पाणं भावेमाणा विहरंति ।
 परिसा निग्गया धम्मो कहिओ परिसा जामेव दि(सं)सिं पाउब्भूया तामेव दिसिं
 पडिगया । तेणं कालेणं तेणं समएणं अज्जसुहम्मस्स (अणगारस्स) अंतेवासी
 अज्जजंबू नामं अणगारे जाव पज्जुवासमाणे एवं वयासी-जइ णं भंते । समणेणं (३)
 जाव संपत्तेणं छट्ठस्स अंगस्स पढम[स्स] सुयक्खंधस्स ना(यसु)याणं अयमट्ठे पन्नत्ते
 दोचस्स णं भंते ! सुयक्खंधस्स धम्मकहाणं समणेणं० के अट्ठे पन्नत्ते ? एवं खलु
 जंबू ! समणेणं० धम्मकहाणं दस वग्गा पन्नत्ता तंजहा-चमरस्स अग्गमहिसीणं
 पढमे वग्गे, बलिस्स वइरोयणिंदस्स वइरोयणरत्तो अग्गमहिसीणं वीए वग्गे, असु-
 रिंदवज्जियाणं दाहिणिळाणं ईदाणं अग्गमहिसीणं त(इ)ईए वग्गे, उत्तरिळाणं असु-
 रिंदवज्जियाणं भवणवासिइदाणं अग्गमहिसीणं चउत्थे वग्गे, दाहिणिळाणं वाणमं-
 तराणं ईदाणं अग्गमहिसीणं पंचमे वग्गे, उत्तरिळाणं वाणमंतराणं ईदाणं अग्ग-
 महिसीणं छट्ठे वग्गे, चंदस्स अग्गमहिसीणं सत्तमे वग्गे, सूरस्स अग्गमहिसीणं
 अट्ठमे वग्गे, सक्कस्स अग्गमहिसीणं नवमे वग्गे, ईसाणस्स [य] अग्गमहिसीणं
 दसमे वग्गे । जइ णं भंते ! समणेणं० धम्मकहाणं दस वग्गा पन्नत्ता पढमस्स णं
 भंते ! वग्गस्स समणेणं० के अट्ठे पन्नत्ते ? एवं खलु जंबू ! समणेणं० पढमस्स
 वग्गस्स पंच अज्झयणा पन्नत्ता तंजहा-काली राई रयणी विज्जू मेहा । जइ णं
 भंते ! समणेणं० पढमस्स वग्गस्स पंच अज्झयणा पन्नत्ता पढमस्स णं भंते !
 अज्झयणस्स समणेणं० के अट्ठे पन्नत्ते ? एवं खलु जंबू ! तेणं कालेणं तेणं समएणं
 रायगिहे नयरे गुण-सिलए उज्जाणे सेणिए राया चे(ल)ळ्णा देवी सामी समोस-
 (रिए)ढे परिसा निग्गया जाव परिसा पज्जुवासइ । तेणं कालेणं तेणं समएणं काली
 (नामं) देवी चमरचंचाए रायहाणीए कालव-डेंसगभवणे कालंसि सीहासणंसि चउहिं

सामाणियसाहस्सीहिं चउहिं मयहरियाहिं सपरिवाराहिं तिहिं परिसाहिं सत्तहिं
 अणिएहिं सत्तहिं अणियाहिंवईहिं सोलसहिं आयरक्खदेवसाहस्सीहिं अब्बे(हिं)हि य
 व(हुएहि य)ह्वहिं कालवड्डिसयभवणवासीहिं असुरकुमारेहिं देवेहिं देवीहि य सद्धि
 संपरिवुडा महायाहय जाव विहरइ इमं च णं केवलकप्पं जंबुद्वीवं २ विउल्लेण ओहिणा
 आभोएमाणी २ पासइ ए(त)त्थ समणं भगवं महावीरं जंबुद्वीवे दौवे भारहे वासे
 रायगिहे न-यरे गुणसिलए उज्जाणे अहापडिरूवं उगगहं ओगि(उगिग)ण्हित्ता संजमेणं
 तवसा अप्पाणं भावेमाणं पासइ २ ता हट्ठुट्ठचित्तमाणंदिया पीइमणा जाव (हय)-
 हियया सीहासणाओ अब्भुट्ठेइ २ ता पायपीठाओ पच्चोरुहइ २ ता पाउया ओमुयइ
 २ ता तित्थगराभिसुही सत्तट्ठ पयाइं अणुगच्छइ २ ता वामं जाणुं अंचेइ २ ता
 दाहिणं जाणुं धरणियलंसि निहट्ठु तिक्खुत्तो मुद्धाणं धरणियलंसि निवेसेइ (०) ईसिं
 पञ्च-जमइ २ ता कड(य)गनुडियथंभियाओ भुयाओ साहरइ २ ता करयल जाव कहु
 एवं वयासी-नमो-त्थु णं अरहंताणं (भगवंताणं) जाव संपत्ताणं । नमो-त्थु णं समणस्स
 भगवओ महावीरस्स जाव संपावेउकामस्स । वंदामि णं भगवंतं तत्थगयं इहग(ए)-
 या पासउ मे समणे ३ तत्थ-गए इह-गयं-तिकहुं वंदइ नमंसइ वं० २ ता सीहा-
 सणवरंसि धुरत्थाभिमुहा निसण्णा । तए णं तीसे कालीए देवीए इमेयारूवे जाव
 समुप्पज्जित्था [तंजहा]-सेयं खलु मे समणं ३ वंदित्ता जाव पज्जुवासित्तए-तिकहुं
 एवं संपेहेइ २ ता आभिओगि(ए)या दे(वे)वा सहावेइ २ ता एवं वयासी-एवं खलु
 देवाणुप्पिया । समणे ३ एवं जहा सूरियाभो तहेव आणत्तिर्यं देइ जाव दिव्वं सुर-
 वराभिगमणजोगं करेह २ ता जाव पच्चप्पिणह । तेवि तहेव करेत्ता जाव पच्चप्पि-
 णंति । नवरं जोयणसहस्सवि-त्थिण्णं जाणं सेसं तहेव । तहेव नामगोयं साहेइ तहेव
 नट्ठविहिं उवदंसेइ जाव पडिगया । भंते ति भगवं गोयमे समणं ३ वंदइ नमंसइ
 वं० २ ता एवं वयासी-का(लि)लीए णं भंते ! देवीए सा दिव्वा देविद्धी ३ कहिं
 गया ? कूडागारसालाविट्ठतो । अहो णं भंते ! काली देवी महिद्धिया [३] । का-लीए
 णं भंते ! देवीए सा दिव्वा देविद्धी ३ किन्ना लद्धा किन्ना पत्ता किन्ना अभिसमन्ना-
 गया ? एवं जहा सूरियाभस्स जाव एवं खलु गोयमा । तेणं कालेणं तेणं समएणं
 इहेव जंबुद्वीवे २ भारहे वासे आमलकप्पा नामं नयरी होत्था वण्णओ । अंबसा-
 लवणे उज्जाणे । जियसत्तू राया । तत्थ णं आमलकप्पाए नयरीए काले नामं गाहा-
 वई होत्था अट्ठे जाव अपरिभूए । तस्स णं कालस्स गाहावइस्स कालसिरी नामं
 भारिया होत्था सुकुमाल(पाणिपाया) जाव सुरुवा । तस्स णं काल(ग)स्स गाहाव-
 इस्स धूया कालसिरीए भारियाए अत्तया काली नामं दारिया होत्था वट्ठा वट्ठुकुमारी

जुण्णा जुण्णकुमारी पडियपुयत्थणी निव्विण्णवरा वरपरिवज्जिया वि होत्था । तेणं कालेणं तेणं समएणं पासे अरहा पुरिसादाणीए आइगरे जहा वद्धमाणसामी नवरं नवहत्थुस्सेहे सोलसहिं समणसाहस्सीहिं अट्ठतीसाए अज्जियासाहस्सीहिं सद्धि संप-
 रिबुडे जाव अंबसालवणे समोसडे । परिसा निग्गया जाव पज्जुवासइ । तए णं सा काली दारिया इमीसे कहाए लद्धट्ठा समाणा हट्ठ जाव हियया जेणेव अम्मापियरो तेणेव उवागच्छइ २ ता करयल जाव एवं वयासी-एवं खलु अम्मयाओ ! पासे अरहा पुरिसादाणीए आइगरे जाव विहरइ, तं इच्छामि णं अम्मयाओ ! तुब्भेहिं अब्भणुच्चाया समाणी पासस्स [णं] अरहओ पुरिसादाणीयस्स पायवंदिया गमित्तए ।
 अट्ठासुहं देवाणुप्पिया ! मा पडिबंघं करेहि । तए णं सा का(लिया)ली दारिया अम्मापिहिंहिं अब्भणुच्चाया समाणी हट्ठ जाव हियया ण्हाया सुद्ध(प)पावेसाइं मंगल्लाईं वत्थाईं पवर-परिहिया अप्पमहग्घाभरणालंक्रियसरीरा चेडियाचक्कवालपरिकिण्णा साओ गिहाओ पडि-निक्खमइ २ ता जेणेव बाहिरिया उवट्ठाणसाला जेणेव धम्मिए जाणप्पवरे तेणेव उवागच्छइ २ ता धम्मियं जाणपवरं दुरुढा । तए णं सा काली दारिया धम्मियं जाण[प]पवरं एवं जहा दोवई (जाव) तहा पज्जुवासइ । तए णं पासे अरहा पुरिसादाणीए कालीए दारियाए तीसे य महइमहा(ल)लियाए परिसाए धम्मं कहेइ । तए णं सा काली दारिया पासस्स अरहओ पुरिसादाणीयस्स अंतिए धम्मं सोच्चा निसम्म हट्ठ जाव हियया पासं अरहं पुरिसादाणीयं तिव्खुतो वंदइ नमंसइ वं० २ ता एवं वयासी-सद्धमि णं भंते ! निग्गंथं पावयणं जाव से जहेयं तुब्भे वयह जं नवरं देवाणुप्पिया ! अम्मापियरो आपुच्छामि तए णं अहं देवाणु-
 प्पियाणं अंतिए जाव पव्वयामि । अट्ठासुहं देवाणुप्पिए । तए णं सा काली दारिया पासेणं अरहया पुरिसादाणीएणं एवं वुत्ता समाणी हट्ठ जाव हियया पासं अरहं वंदइ नमंसइ वं० २ ता तमेव धम्मियं जाणपवरं दुरुहइ २ ता पासस्स अरहओ पुरिसादाणीयस्स अंतियाओ अंबसालवणाओ उज्जाणाओ पडि-निक्खमइ २ ता जेणेव आमलकप्पा नयरी तेणेव उवागच्छइ २ ता आमलकप्पं नयरीं मज्झमज्झेणं जेणेव बाहिरिया उवट्ठाणसाला तेणेव उवागच्छइ २ ता धम्मियं जाण-पवरं ठवेइ २ ता धम्मियाओ जाणप्पवराओ पच्चोरुहइ २ ता जेणेव अम्मापियरो तेणेव उवा-
 गच्छइ २ ता करयल[परिग्गहियं] जाव एवं वयासी-एवं खलु अम्मयाओ ! मए पासस्स अरहओ अंतिए धम्मि निसंते, से वि य धम्मे इच्छिए पडिच्छिए अभि-
 रुहए, तए णं अहं अम्मयाओ ! संसारभउव्विग्गा भीया जम्मणमरणाणं इच्छामि णं तुब्भेहिं अब्भणुच्चाया समाणी पासस्स अरहओ अंतिए मुंडा भवित्ता आ-गा-

राओ अणगारियं पव्वइत्तए । अहासुहं देवाणुप्पि-ए ! मा पडिबंथं करे-हि । तए णं
 से काले गाहावई वि-उलं असणं ४ उवक्खडावेइ २ ता मित्त-नाइ-नियगसयणसंबंधि-
 परियणं आमंतेइ २ ता तओ पच्छा ण्हाए विपुलेणं पुप्फवत्थयं धम्मल्लालंकारेणं
 सक्कारे(ता)इ सम्माणे-इ [२] तस्सेव मित्त-नाइ-नियगसयणसंबंधिपरियणस्स पुरओ
 कालियं दारियं सेयापीएहिं कलसेहिं ण्हावेइ २ ता सव्वालंकारविभूसियं करेइ २
 ता पुरिससहस्सवाहि(णीयं)णि सीयं दु-रुहेइ २ ता मित्त-नाइ-नियगसयणसंबंधिपरि-
 यणेणं सद्धिं संपरिवु(डा)डे सव्विद्धीए जाव रवेणं आमलकपं नयरिं मज्झमज्झेणं
 निग्गच्छइ २ ता जेणेव अंबसालवणे उज्जाणे तेणेव उवागच्छइ २ ता छत्ताइए
 तित्थगराइ(स)ए पासइ २ ता सीयं ठा-वेइ २ ता [कालियं दारियं सीयाओ पबोरुहइ ।
 तए णं तं] कालियं दारियं अम्मापियरो पुरओ काउं जेणेव पासे अरहा पुरिसादा-
 णीए तेणेव उवागच्छ(इ)न्ति २ ता वंद-न्तित्ति नमंस-न्तित्ति वं० २ ता एवं वयासी-
 एवं खलु देवाणुप्पिया ! काली दारिया अम्हं धूया इट्ठा कंता जाव किमंग पुण पासण-
 याए ? एस णं देवाणुप्पिया ! संसारभउव्विग्गा इच्छइ देवाणुप्पियाणं अंतिए मुंडा
 भवित्ता (णं) जाव पव्वइत्तए, तं एयं णं देवाणुप्पियाणं सिस्सिणिभिकखं दलयामो,
 पडिच्छंतु णं देवाणुप्पिया ! सिस्सिणिभिकखं । अहासुहं देवाणुप्पिया ! मा पडिबंथं
 (करेह) । तए णं [सा] काली कुमारी पासं अरहं वंदइ नमंसइ वं० २ ता उत्तरपुर-
 त्थिमं दि-सीभागं अवक्कमइ २ ता सयमेव आभरणमल्लालंकारं ओमुयइ २ ता सयमेव
 लोयं करेइ २ ता जेणेव पासे अरहा पुरिसादाणीए तेणेव उवागच्छइ २ ता पासं
 अरहं तिक्खुत्तो वंदइ नमंसइ वं० २ ता एवं वयासी-आलित्ते णं भंते ! लोए एवं
 जहा देवाणंदा जाव सयमेव पव्वा(वि)वेउं । तए णं पासे अरहा पुरिसादाणीए
 का(लिं)लियं सयमेव पुप्फचूलाए अज्जाए सिस्सिणियत्ताए दलयइ । तए णं सा पुप्फ-
 चूला अज्जा कालिं कुमारिं सयमेव पव्वावेइ जाव उवसंपज्जित्ताणं विहरइ । तए णं सा
 काली अज्जा जाया इ-रियासमिया जाव गुत्तवंभयारिणी । तए णं (सा) काली अज्जा
 पुप्फचूला[ए] अज्जाए अंतिए सामाइयमाइयाई एकारस अंगाई अहिज्जइ बहूहिं
 चउत्थ जाव विहरइ । तए णं सा काली अज्जा अन्नया कया(तिं)इ सरीरबाउसिया
 जाया(या)वि होत्था, अभिक्खणं २ हत्थे धो(व)वेइ पाए धो-वेइ सीसं धो-वेइ मुहं
 धो-वेइ थणंतरा(ई)णि धो-वेइ कक्खंतराणि धो-वेइ गुज्झंतरा(ई)णि धो-वेइ जत्थ जत्थ
 वि य णं ठाणं वा सेज्जं वा निसीहियं वा चेएइ तं पुव्वामेव अब्भु(क्खे)क्खित्ता
 तओ पच्छा आसयइ वा सयइ वा । तए णं सा पुप्फचूला अज्जा का-लियं अज्जं एवं
 वयासी-नो खलु कप्पइ देवाणुप्पिए ! समणीणं निग्गंथीणं सरीरबाउसियाणं होत्तए,

तुमं च णं देवाणुप्पिए ! सरीरवाउसिया जाया अभिक्खणं २ हत्थे धोवसि जाव
 आसयाहि वा सयाहि वा, तं तुमं देवाणुप्पिए ! एयस्स ठाणस्स आलोएहि जाव
 पायच्छित्तं पड्विज्जाहि । तए णं सा काली अज्जा पुप्फचूलाए अज्जाए एयमट्ठं नो
 आढाइ जाव तुसिणीया संचिद्धइ । तए णं ताओ पुप्फचूलाओ अज्जाओ कालिं अज्जं
 अभिक्खणं २ हीलेंति निंदंति खिं(सं)सेंति गरहंति अवम-न्नंति अभिक्खणं २
 एयमट्ठं निवारेंति । तए णं तीसे कालीए अज्जाए समणीहिं निगंशीहिं अभिक्खणं २
 हीलिज्जमाणीए जाव वारिज्जमाणीए इमेयारूवे अ-ज्झत्थिए जाव समुप्पज्जित्था-जया
 णं अहं अ(आ)गारवासमज्जे वसित्था तया णं अहं सर्यवसा । जप्पभिइं च णं अहं
 सुं(डे)डा भवित्ता अ-गाराओ अणगारियं पव्वइया तप्पभिइं च णं अहं परवसा
 जाया । तं सेयं खलु मम कल्लं पाउप्पभायाए रयणीए जाव जलंते पाडि(कि)क्कयं
 उवस्सयं उवसंपज्जित्ताणं विहरितए-त्तिकट्ठु एवं संपेहेइ २ ता कल्लं जाव जलंते
 पाडि(ए)क्कं उवस्सयं गे(गि)ण्हइ तत्थ णं अणिवारिया अणोहट्ठिया सच्छंदमई
 अभिक्खणं २ हत्थे धोवेइ जाव आसयइ वा सयइ वा । तए णं सा काली
 अज्जा पासत्था पासत्थविहा० ओस-न्ना ओस-न्नविहा० कुसीला कुसीलविहा०
 अहाछंदा अहाछंदविहा० संसत्ता संसत्तविहा० बहूणि वासाणि साम-ण्णपरियागं
 पाउणइ २ ता अद्धमासियाए संलेहणाए अ(त्ता)प्पाणं झसेइ २ ता तीसं
 भत्ताइं अणसणाए छेएइ २ ता तस्स ठाणस्स अणालोइयअपडिक्कंता कालमासे
 कालं किच्चा चमरचंचाए रायहाणीए कालवडिसए भवणे उववायसभाए देवसय-
 णिजंसि देवदूसंतारिया अंगुलस्स असंखे(जाइ)जभागमेत्ताए ओगाहणाए कालीदे-
 (वी)वित्ताए उवव-न्ना । तए णं सा काली देवी अहुणोवव-न्ना समाणी पंचविहाए
 पज्जतीए जहा सूरियाभो जाव भासामणपज्जतीए । तए णं सा काली देवी चउण्हं
 सामाणियसाहस्सीणं जाव अ-न्नेसिं च बहूणं कालवडेंसगमवणवासीणं असुरकुमा-
 राणं देवाण य देवीण य आहेवच्चं जाव विहरइ । एवं खलु गोयमा ! कालीए
 देवीए सा दिव्वा देविट्ठी ३ लद्धा पत्ता अभिसम-न्नागया । कालीए णं भंते !
 देवीए केवइयं कालं ठिईं पज्जत्ता ? गोयमा ! अट्ठाइज्जाइं पलिओवमईं ठिईं
 पज्जत्ता । काली णं भंते ! देवी ताओ देवलोगाओ अणंतरं उ(व)वट्ठिता कहिं गच्छि-
 हिइ कहिं उववज्जिहिइ ? गोयमा ! महाविदेहे वासे सिज्जिहिइ [जाव अंतं काहिइ] ।
 एवं खलु जंबू । समणेणं जाव संपत्तेणं पढम[स्स] वग्गस्स पढमज्झयणस्स अयमट्ठे
 प-ज्जते त्तिवेसि ॥ १५० ॥ (धम्मकहाणं पढमज्झयणं समत्तं) ॥

जइ णं भंते ! समणेणं० धम्मकहाणं पढमस्स वग्गस्स पढमज्झयणस्स

अयमद्वे प-न्नते बिइयस्स णं भंते ! अज्झयणस्स समणेणं (३) जाव संपत्तेणं के
 अद्वे प-न्नते ? एवं खलु जंबू ! तेणं कालेणं तेणं समएणं रायगिहे न-यरे गुण-
 सिलए उज्जाणे सामी समोसढे परिसा निगगया जाव पज्जुवासइ । तेणं कालेणं
 तेणं समएणं राई देवी चमरचंचाए रायहाणीए एवं जहा काली तहेव आगया नट्ट-
 विहिं उवदं(से)सित्ता पडिगया । भंतेत्ति भगवं गोयमे पुव्वभवपुच्छा । एवं खलु
 गोयमा ! तेणं कालेणं तेणं समएणं आमलकप्पा नयरी अंबसालवणे उज्जाणे जिय-
 सतू राया राई गाहावई रा(ई)इसिरी भारिया राई दारिया पासस्स समोसरणं राई
 दारिया जहेव काली तहेव निक्खंता तहेव सरीरबाउसिया तं चेव सव्वं जाव अंतं
 काहिइ । एवं खलु जंबू ! बि(इ)इयज्झयणस्स निक्खेवओ ॥ जइ णं भंते ! तइय-
 ज्झयणस्स उक्खेवओ । एवं खलु जंबू ! रायगिहे नयरे गुणसिलए उज्जाणे एवं जहेव
 राई तहेव रयणी वि नवरं आमलकप्पा नयरी रय(णी)णे गाहावई रयणसिरी
 भारिया रयणी दारिया सेसं तहेव जाव अंतं काहिइ । एवं विज्जू वि आमलकप्पा
 नयरी वि(ज्जु)ज्जू गाहावई विज्जुसिरी भारिया वि-ज्जू दारिया सेसं तहेव । एवं मेहा
 वि आमलकप्पाए नयरीए मेहे गाहावई मेहसिरी भारिया मेहा दारिया सेसं तहेव ।
 एवं खलु जंबू ! समणेणं जाव संपत्तेणं धम्मकहाणं पढमस्स वग्गस्स अयमद्वे पन्नते
 ॥ १५१ ॥ जइ णं भंते ! समणेणं० दोच्चस्स वग्गस्स उक्खेवओ । एवं खलु जंबू !
 समणेणं० दोच्चस्स वग्गस्स पंच अज्झयणा पन्नत्ता तंजहा-सुंभा निंसुंभा रंभा
 निरंभा म(द)यणा । जइ णं भंते ! समणेणं० धम्मकहाणं दोच्चस्स वग्गस्स पंच
 अज्झयणा पन्नत्ता दोच्चस्स णं भंते ! वग्गस्स पढमज्झयणस्स के अद्वे प-न्नते ? एवं
 खलु जंबू ! तेणं कालेणं तेणं समएणं रायगिहे नयरे गुण-सिलए उज्जाणे सामी
 समोस(ढो)ढे परिसा निगगया जाव पज्जुवासइ । तेणं कालेणं तेणं समएणं सुंभा देवी
 बल्लिचंचाए रायहाणीए सुंभवडेंसए भवणे सुंभंसि सीहासणंसि कालीगमएणं जाव
 नट्टविहिं उवदंसेत्ता जाव पडिगया । पुव्वभवपुच्छा । सावत्थी नयरी कोट्टए
 उज्जाणे जियसतू राया सुंभे गाहावई सुंभसिरी भारिया सुंभा दारिया सेसं जहा
 का(लिया)लीए नवरं अट्ठुट्ठाई पलिओवमाई ठिई । एवं खलु जंबू ! निक्खेवओ
 अज्झयणस्स । एवं सेसावि चत्तारि अज्झयणा सावत्थीए नवरं माया पिया सरिस-
 नामया । एवं खलु जंबू ! निक्खेवओ बि(ती)इयवग्गस्स ॥ १५२ ॥ उक्खे(वओ)वो
 तइयवग्गस्स । एवं खलु जंबू ! समणेणं० तइय(स्स)वग्गस्स चउप-न्नं अज्झयणा
 प-न्नत्ता तंजहा-पढमे अज्झयणे जाव चउपन्नतिमे अज्झयणे । जइ णं भंते ! सम्-
 णेणं० धम्मकहाणं तइय-वग्गस्स चउप्प(न्न)न्नं [अ]ज्झयणा पन्नत्ता पढमस्स णं

भंते ! अज्झयणस्स समणेणं० के अट्ठे प-ज्जते ? एवं खलु जंबू । तेणं कालेणं तेणं समएणं रायगिहे नयरे गुण-सिलए उज्जाणे सामी समोसढे परिसा निगगया जाव पज्जुवासइ । तेणं कालेणं तेणं समएणं अ(इ)ला देवी धर(णी)णाए रायहाणीए अ-लाव(ढे)डेंसए भवणे अ-लंसि सीहासणंसि एवं कालीगमएणं जाव नट्टविहिं उवदंसेत्ता पडिगया । पुव्वभवपुच्छा । वाणारसीए नयरीए काममहावणे उज्जाणे अ-ळे गाहावई अ-लसिरी भारिया इला दारिया सेसं जहा कालीए नवरं धरण(स्स)अग्ग-महिसित्ताए उववाओ साइरे(ग)गं अद्धपलिओव(म)मं ठिई सेसं तहेव । एवं खलु निक्खेवओ पढमज्झयणस्स । एवं क(मा सते)मसोतरा सोयामणी ईदा घ(णा)णया विज्जुया-वि । सव्वाओ एयाओ धरणस्स अग्गमहिसीओ (एव) । एए छ अज्झयणा वेणुदेवस्स वि अविसेसिया भाणियव्वा, एवं जाव घोसस्स वि एए चेव छ अज्झ-यणा । एवमेते दाहिणिळ्ळणं ईदाणं चउप्प-नं अज्झयणा भवंति सव्वाओ वि वाणा-रसीए काममहावणे उज्जाणे । तइयवग्गस्स निक्खेव(ओ)गो ॥ १५३ ॥ चउत्थस्स उक्खेव-गो । एवं खलु जंबू । समणेणं० धम्मकहाणं चउत्थवग्गस्स चउप्प-नं अज्झ-यणा प-ज्जता तंजहा-पढमे अज्झयणे जाव चउप्प-नंइमे अज्झयणे । पढमस्स अज्झ-यणस्स उक्खेव-गो । एवं खलु जंबू । तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं कालेणं तेणं समएणं रुया देवी रु(भू)याणंदा राय-हाणी रुयगव(डि)डेंसए भवणे रुयगंसि सीहासणंसि जहा कालीए तहा नवरं पुव्वभवे चंपाए पुण्णभदे उज्जाणे रुयगगाहावई रुयगसिरी भारिया रुया दारिया सेसं तहेव नवरं भूयाणं(व)दा अग्गमहिसित्ताए उववाओ देसूणं पलिओवमं ठिई । निक्खेवओ । एवं खलु सुरूया वि रुयंसा वि रुयगावई वि रुयकंता वि रुयप्पभा वि । एयाओ चेव उत्तरिळ्ळणं ईदाणं भाणियव्वाओ जाव महाघोसस्स । निक्खेवओ चउत्थवग्गस्स ॥ १५४ ॥ पंचमवग्गस्स उक्खेवओ । एवं खलु जंबू । जाव बत्तीसं अज्झयणा प-ज्जता तंजहा-कमला कमलप्पभा चेव, उप्पला य सुदंसणा । रुववई बहुरुवा, सुरूवा सुभगा वि य ॥ १ ॥ पुण्णा बहुपुत्तिया चेव, उत्तमा भारिया वि य । पउभा वसुमई चेव, कणगा कणगप्पभा ॥ २ ॥ वडेंसा के(ठ)ऊमई चेव, वइस्तेणा रइप्पिया । रोहिणी नवमिया चेव, हिरी पुप्फवई(ति) वि य ॥ ३ ॥ भुयगा भुयगवई चेव, महाकच्छा(S)परा(फुडा)इ(य)या । सुवोसा विमला चेव, सुस्सरा य सरस्सई ॥ ४ ॥ उक्खेवओ पढमज्झयणस्स । एवं खलु जंबू । तेणं कालेणं तेणं समएणं राय-गिहे समोसरणं जाव परिसा पज्जुवासइ । तेणं कालेणं तेणं समएणं कमला देवी कम-लाए रायहाणीए कमलवडेंसए भवणे कमलंसि सीहासणंसि सेसं जहा कालीए तहेव

नवरं पुव्वभवे नागपुरे नयरे सहसंबवणे उज्जाणे कमलस्स गाहावइस्स कमल-
 सिरीए भारियाए कमला दारिया पासस्स(०) अंतिए निक्खंता कालस्स पिंसायकु-
 मारिदस्स अगमहिंसी अद्धपलिओवमं ठिई । एवं सेसा वि अज्झयणा दाहिणिह्णानं
 वाणमंतरिंदाणं भ(भा)णियव्वाओ (सव्वाओ) नागपुरे सहसंबवणे उज्जाणे मायापि-
 (या)यरो धूया सरिसनामया ठिई अद्धपलिओवमं । पंचमो वग्गो समत्तो ॥ १५५ ॥
 छट्ठो वि वग्गो पंचमवग्गसरिस्सो नवरं महाका(लिंदा)याईणं उत्तरिह्णानं इंदाणं अग-
 महिंसीओ । पुव्वभवे सागे(य)ए नयरे उत्तरकुरुउज्जाणे मायापि-यरो धूया सरिस-
 नामया । सेसं तं चेव । छट्ठो वग्गो समत्तो ॥ १५६ ॥ सत्तमस्स वग्गस्स उक्खे-
 वओ । एवं खलु जंबू ! जाव चत्तारि अज्झयणा प-जत्ता तंजहा-सूरप्पभा आयवा
 अच्चिमाली पमंकरा । पढमज्झयणस्स उक्खेवओ । एवं खलु जंबू ! तेणं कालेणं
 तेणं समएणं रायणिहे समोसरणं जाव परिसा पज्जुवासइ । तेणं कालेणं तेणं समएणं
 सूरप्पभा देवी सूरसि विमाणंसि सूरप्पमंसि सीहासणंसि सेसं जहा कालीए तहा
 नवरं पुव्वभवो अरक्खुरीए नयरीए सूरप्पभस्स गाहावइस्स सूरसिरीए भारियाए
 सूरप्पभा दारिया सूरस्स अगमहिंसी ठिई अद्धपलिओवमं पंचहिं वाससएहिं अब्भ-
 हियं सेसं जहा कालीए । एवं सेसाओ वि सव्वाओ अरक्खुरीए नयरीए । सत्तमो
 वग्गो समत्तो ॥ १५७ ॥ अट्ठमस्स उक्खेवओ । एवं खलु जंबू ! जाव चत्तारि
 अज्झयणा प-जत्ता तंजहा-चंदप्पभा दोसि-नाभा अच्चिमाली पमंकरा । पढम-
 (स्स अ)ज्झयणस्स उक्खेवओ । एवं खलु जंबू ! तेणं कालेणं तेणं समएणं रायणिहे
 समोसरणं जाव परिसा पज्जुवासइ । तेणं कालेणं तेणं समएणं चंदप्पभा देवी चंद-
 प्पमंसि विमाणंसि चंदप्पमंसि सीहासणंसि सेसं जहा कालीए नवरं पुव्वभ(वे)वो
 महुराए नयरीए भंडि(चंद)वडेंसए उज्जाणे चंदप्पमे गाहावइ चंदसिरी भारिया
 चंदप्पभा दारिया चंदस्स अगमहिंसी ठिई अद्धपलिओवमं प-ज्जा(साए)सवाससह-
 स्सेहिं अब्भहियं, सेसं जहा कालीए । एवं सेसाओ वि महुराए नयरीए मायापि-
 यरो(वि) धूया सरिस-नामा । अट्ठमो वग्गो समत्तो ॥ १५८ ॥ नवमस्स उक्खेवओ ।
 एवं खलु जंबू ! जाव अट्ठ अज्झयणा पजत्ता तंजहा-पउमा सिवा सई अंजू रोहिणी
 न(व)मिया [इ य] अ(च)यला अच्छरा ॥ पढमज्झयणस्स उक्खेवओ । एवं खलु
 जंबू ! तेणं कालेणं तेणं समएणं रायणिहे समोसरणं जाव परिसा पज्जुवासइ । तेणं
 कालेणं तेणं समएणं पउमावई देवी सोहम्मे कप्पे पउमवडेंसए विमाणे सभाए
 सुहम्माए पउमंसि सीहासणंसि जहा कालीए एवं अट्ठ वि अज्झयणा कालीगमएणं
 नागव्वा नवरं सावत्थीए दो-जणीओ हत्थिणाउरे दो-जणीओ कपिल्लपुरे दो-जणीओ

सा(गियनयरे)एए दो-जणीओ पउमे पियरो विजया मायराओ सव्वाओ वि पासस्स अंति(ए)यं पव्वइयाओ सक्कस्स अग्गमहिंसीओ ठिई सत्त पलिओवमाई महाविदेहे वासे अंतं काहिंति । नवमो वग्गो समत्तो ॥ १५९ ॥ दसमस्स उक्खेवओ । एवं खलु जंबू ! जाव अट्ठ अज्झयणा पन्नता तंजहा-कण्हा य कण्हराई रामा तह राम-रविखया वसू-या । वसुगुत्ता वसुमिता वसुंधरा चेव ईसाणे ॥ १ ॥ पढमज्झयणस्स उक्खेवओ । एवं खलु जंबू ! तेणं कालेणं तेणं समएणं रायगिहे समोसरणं जाव परिसा पज्जुवासइ । तेणं कालेणं तेणं समएणं कण्हा देवी ईसाणे कप्पे कण्हवडैसए विमाणे सभाए सुहम्माए कण्हंसि सीहासणंसि सेसं जहा कालीए एवं अट्ठवि अज्झ-यणा कालीगमएणं ना(णे)यव्वा नवरं पुव्वभ-वो वाणारसीए नयरीए दो-जणीओ राय-गिहे नयरे दो-जणीओ सावत्थी(ए)नयरीए दो-जणीओ कोसंबीए नयरीए दो-जणीओ रामे पिया धम्मा माया सव्वाओ वि पासस्स अरहओ अंतिए पव्वइयाओ पुप्फ-चूलाए अज्जाए सिस्सि(णी)णियत्ताए ईसाणस्स अग्गमहिंसीओ ठिई नवपलिओवमाई महाविदेहे वासे सिज्झिहिंति बुज्झिहिंति मुच्चिहिंति सव्वदुक्खाणं अंतं काहिंति । एवं खलु जंबू ! निक्खेव-गो दसमवग्गस्स । दसमो वग्गो समत्तो ॥ १६० ॥ एवं खलु जंबू ! समणेणं भगवया महावीरेणं आइगरेणं तित्थगरेणं सयंसंबुद्धेणं पुरिसो-त्तमेणं [पुरिससीद्देणं] जाव संपत्तेणं धम्मकहाणं अयमट्ठे पन्नते । धम्मकहा सुय-क्खंधो समत्तो । दसहिं वग्गेहिं नायाधम्मकहाओ समत्ताओ ॥ १६१ ॥ बीओ सुयक्खंधो समत्तो ॥ नायाधम्मकहाओ समत्ताओ ॥



Over a long period of time, the people of the world have been struggling to find a way to live together in peace and harmony. The world is a vast and complex place, and it is often difficult to find common ground between different cultures and nations. However, it is not impossible. There are many examples of people from different backgrounds who have found ways to live together in peace and harmony. These examples show that it is possible to find common ground and to live together in peace and harmony. The world is a vast and complex place, and it is often difficult to find common ground between different cultures and nations. However, it is not impossible. There are many examples of people from different backgrounds who have found ways to live together in peace and harmony. These examples show that it is possible to find common ground and to live together in peace and harmony.

णमोऽस्थु णं समणस्स भगवओ णायपुत्तमहावीरस्स

सुत्तागमे

तत्थ णं

उवासगदसाओ

तेणं कालेणं तेणं समएणं चम्पा नामं नयरी होत्था । वण्णओ । पुण्णभेदे उज्जाणे । वण्णओ ॥ १ ॥ तेणं कालेणं तेणं समएणं अज्जसुहम्मे समोसरिए जाव जम्बू पज्जुवासमाणे एवं वयासी-जइ णं भन्ते ! समणेणं भगवया महावीरेणं जाव सम्पत्तेणं छट्ठस्स अङ्गस्स नायाधम्मकहाणं अयमट्ठे पण्णत्ते, सत्तमस्स णं भन्ते ! अंगस्स उवासगदसाणं समणेणं जाव सम्पत्तेणं के अट्ठे पण्णत्ते ? एवं खलु जम्बू ! समणेणं जाव सम्पत्तेणं सत्तमस्स अंगस्स उवासगदसाणं दस अज्झयणा पण्णत्ता, तंजहा-आणन्दे १, कामदेवे य २, गाहावइचुलणीपिया ३, सुरादेवे ४, चुल्लसयए ५, गाहावइकुण्डकोलिए ६, सद्दालपुत्ते ७, महासयए ८, नन्दिणीपिया ९, सालिहीपिया १० ॥ २ ॥ जइ णं भन्ते ! समणेणं जाव सम्पत्तेणं सत्तमस्स अंगस्स उवासगदसाणं दस अज्झयणा पण्णत्ता पढमस्स णं भंते ! समणेणं जाव सम्पत्तेणं के अट्ठे पण्णत्ते ? एवं खलु जम्बू ! तेणं कालेणं तेणं समएणं वाणियगामे नामं नयरे होत्था । वण्णओ । तस्स [णं] वाणियगामस्स नयरस्स बहिया उत्तरपुर(त्थि)च्छिमे दिसीभाए वूइपलासए नामं उज्जाणे [होत्था] । तत्थ णं वाणियगामे नयरे जियसत्तू राया (होत्था) । वण्णओ । तत्थ णं वाणियगामे आणन्दे नामं गाहावई परिवसइ, अट्ठे जाव अपरिभूए । तस्स णं आणन्दस्स गाहावइस्स चत्तारि हिरण्णकोडीओ निहाणपउत्ताओ, चत्तारि हिरण्णकोडीओ वु(व)द्धिपउत्ताओ, चत्तारि हिरण्णकोडीओ पवित्थरपउत्ताओ, चत्तारि वया दस-गोसाहस्सिएणं वएणं होत्था । से णं आणन्दे गाहावई बहूणं राईसर जाव सत्थ-वाहाणं बहूणं कज्जेणं य कारणेणं य मन्तेणं य कुडुम्बेणं य गुज्जेणं य रहस्सेणं य निच्छएणं य ववहारेणं य आपुच्छणिज्जे (य) पडिपुच्छणिज्जे, सयस्सवि य णं कुडुम्बस्स मेढी पमाणं आहारे आलम्बणं चक्खू, मे(ढी)दिभूए जाव सक्कज्ज-व(द्वा)द्वावए यावि होत्था । तस्स णं आणन्दस्स गाहावइस्स सि(वा)वनन्दा नामं भारिया होत्था, अहीण जाव सुल्ला आणन्दस्स गाहावइस्स इद्वा आणन्देणं गाहा-

वङ्गा सद्धिं अणुरत्ता अविरत्ता इ(डा)ट्टे सद् जाव पच्चविहे माणुस्सए कामभोए पच्चणुभवमाणी विहरइ । तस्स णं वाणियगामस्स बहिया उत्तरपुरच्छिमे दिसीभाए एत्थ णं कोल्लाए नामं सच्चिवेसे होत्था, रिद्धत्थिमिय जाव पासादीए (४) । तत्थ णं कोल्लाए सच्चिवेसे आणन्दस्स गाहावइस्स बहुए भित्तनाइनियगसयणसम्बन्धि-परिजणे परिवसइ, अट्ठे जाव अपरिभूए । तेणं काळेणं तेणं समएणं समणे भगवं महावीरे जाव समोसरिए । परिसा निग्गया, कूणिए राया जहा तहा जियसत्तू निग्गच्छइ (२ ता) जाव पज्जुवासइ । तए णं से आणन्दे गाहावई इमीसे कहाए लद्धट्ठे समाणे 'एवं खलु समणे जाव विइरइ, तं महाफलं [जाव] गच्छामि णं जाव पज्जुवासामि' एवं सम्पेहेइ, सम्पेहिता ण्हाए सुद्धप्पावेसाइं जाव अप्पमहग्घाभरणालङ्कियसरीरे सयाओ गिहाओ पडिणिक्खमइ, पडिनिक्खमिता सको(रे)रण्टमल्लदामेणं छतेणं धरिजमाणेणं मणुस्सवग्गुरापरिक्खिते पायविहारचा-रेणं वाणियगामं नयरं मज्झमज्जेणं निग्गच्छइ, निग्गच्छित्ता जेणामेव दू(ड)इपलासे उज्जाणे जेणेव समणे भगवं महावीरे तेणेव उवागच्छइ, उवागच्छित्ता तिक्खुतो आयाहिणं पयाहिणं करेइ, करेत्ता वन्दइ नमंसइ जाव पज्जुवासइ । तए णं समणे भगवं महावीरे आणन्दस्स गाहावइस्स तीसे य महइमहालियाए परिसाए जाव धम्मकहा, परिसा पडिगया, राया य ग(ए)ओ ॥ ३ ॥ तए णं से आणन्दे गाहावई समणस्स भगवओ महावीरस्स अन्तिए धम्मं सोच्चा निसम्म हट्ठतुट्ठ जाव एवं वयासी-सइहामि णं भन्ते । निग्गन्थं पावयणं, पत्तियामि णं भन्ते । निग्गन्थं पावयणं, रोएमि णं भन्ते । निग्गन्थं पावयणं, एवमेयं भन्ते !, तहमेयं भन्ते !, अवितहमेयं भन्ते !, इच्छियमेयं भन्ते !, पडिच्छियमेयं भन्ते !, इच्छियपडिच्छियमेयं भन्ते !, से जहेयं तुच्चे वयह'तिकट्ठु जहा णं देवाणुप्पियाणं अन्तिए बहवे राई-सरतलवरमाडम्बियकोडुम्बियसेट्ठि[सिणावइ]सत्थवाहप्पभि(इया)ईओ मुण(डे)डा भवित्ता अ-गाराओ अणगारियं पव्वइया नो खलु अहं तहा संच्चाएमि मुण्डे जाव पव्वइत्तए, अहं णं देवाणुप्पियाणं अन्तिए पच्चाणुव्वइयं सत्तसिक्खावइयं दुवालसविहं गिहिधम्मं पडिवजिस्सामि । अहासुहं देवाणुप्पिया । मा पडिबंधं करे(हि)ह ॥ ४ ॥ तए णं से आणन्दे गाहावई समणस्स भगवओ महावीरस्स अन्तिए तप्पडमयाए थूलगं पाणाइवायं पच्चक्खाइ, 'जावजीवाए दुविहं तिविहेणं न करे(इ)मि न कारवे- (इ)मि मणसा वयसा कायसा' १ । तयाणन्तरं च णं थूलगं मुसावायं पच्चक्खाइ, 'जावजीवाए दुविहं तिविहेणं न करेमि न कारवेमि मणसा वयसा कायसा' २ । तयाणन्तरं च णं थूलगं अ(दत्ता)दिण्णादाणं पच्चक्खाइ, 'जावजीवाए दुविहं

तिविहेणं न करेमि न कारवेमि मणसा वयसा कायसा' ३ । तयाणन्तरं च णं सदारसन्तो(सी)सिए परिमाणं करेइ, 'नञ्जत्थ एक्काए सिवन्नन्दाए भारियाए, अवसेसं सव्वं मेहुणविहिं पच्चक्खामि ३' । तयाणन्तरं च णं इच्छाविहिपरिमाणं करमाणे हिरण्णसुवण्णविहिपरिमाणं करेइ, 'नञ्जत्थ चउहिं हिरण्णकोडीहिं निहाणपउत्ताहिं, चउहिं सु-द्धिपउत्ताहिं, चउहिं पवित्थर-पउत्ताहिं, अवसेसं सव्वं हिरण्णसुवण्णविहिं पच्चक्खामि ३' । तयाणन्तरं च णं चउप्पयविहिपरिमाणं करेइ, 'नञ्जत्थ चउहिं वएहिं दसगोसाहस्सिएणं वएणं, अवसेसं सव्वं चउप्पयविहिं पच्चक्खामि ३' । तयाणन्तरं च णं खेतवत्थु-विहिपरिमाणं करेइ, 'नञ्जत्थ पच्चहिं हलसएहिं नियत्तणसइएणं हल्लेणं, अवसेसं सव्वं खेतवत्थुविहिं पच्चक्खामि ३' । तयाणन्तरं च णं सगडविहिपरिमाणं करेइ, 'नञ्जत्थ पच्चहिं सगडसएहिं दिसायत्तिएहिं, पच्चहिं सगडसएहिं संवाहणिएहिं, अवसेसं सव्वं सगडविहिं पच्चक्खामि ३' । तयाणन्तरं च णं वाहणविहिपरिमाणं करेइ, 'नञ्जत्थ चउहिं वाहणेहिं दिसायत्तिएहिं, चउहिं वाहणेहिं संवाहणिएहिं, अव-सेसं सव्वं वाहणविहिं पच्चक्खामि ३' ५ । तयाणन्तरं च णं उवभोगपरिभोगविहिं पच्चक्खाएमाणे उल्लणियाविहिपरिमाणं करेइ, 'नञ्जत्थ एगाए गन्धकासाइए, अवसेसं सव्वं उल्लणियाविहिं पच्चक्खामि ३' । तयाणन्तरं च णं दन्तवणविहि-परिमाणं करेइ, 'नञ्जत्थ एगेणं अल्लट्ठीमहुएणं, अवसेसं दन्तवणविहिं पच्चक्खामि ३' । तयाणन्तरं च णं फलविहिपरिमाणं करेइ, 'नञ्जत्थ एगेणं खीरामलएणं, अवसेसं फलविहिं पच्चक्खामि ३' । तयाणन्तरं च णं अब्भङ्गणविहिपरिमाणं करेइ, 'नञ्जत्थ सयपागसहस्सपागेहिं तेल्लेहिं, अवसेसं अब्भङ्गणविहिं पच्चक्खामि ३' । तयाणन्तरं च णं उव्वट्ठ(ण)णाविहिपरिमाणं करेइ, 'नञ्जत्थ एगेणं सुरहिणा गन्धट्ठएणं, अवसेसं उव्वट्ठ-णाविहिं पच्चक्खामि ३' । तयाणन्तरं च णं मज्जणविहि-परिमाणं करेइ, 'नञ्जत्थ अट्ठहिं उ(ट्ठि)ट्ठिएहिं उदगस्स घडएहिं, अवसेसं मज्जणविहिं पच्चक्खामि ३' । तयाणन्तरं च णं वत्थविहिपरिमाणं करेइ, 'नञ्जत्थ एगेणं खोमसुयल्लेणं, अवसेसं वत्थविहिं पच्चक्खामि ३' । तयाणन्तरं च णं विलेवणविहि-परिमाणं करेइ, 'नञ्जत्थ अ(ग)गुरुकुंकुमचन्दणमादिएहिं, अवसेसं विलेवणविहिं पच्च-क्खामि ३' । तयाणन्तरं च णं पुप्फविहिपरिमाणं करेइ, 'नञ्जत्थ एगेणं सुद्धपउमेणं मालङ्कुसुमदामेणं वा, अवसेसं पुप्फविहिं पच्चक्खामि ३' । तयाणन्तरं च णं आभ-रणविहिपरिमाणं करेइ, 'नञ्जत्थ मट्ठक[ण]जेजएहिं नाममुद्दाए य, अवसेसं आभरण-विहिं पच्चक्खामि ३' । तयाणन्तरं च णं धूवणविहिपरिमाणं करेइ, 'नञ्जत्थ अगस्तु-

रुक्धूवमादिएहिं, अवसेसं धूवणविहिं पच्चक्खामि ३' । तयाणन्तरं च णं भोयणविहि-
परिमाणं करेमाणे पेज्जविहिपरिमाणं करेइ, 'नन्नत्थ एगाए कट्टपेज्जाए, अवसेसं
पेज्जविहिं पच्चक्खामि ३' । तयाणन्तरं च णं भक्खविहिपरिमाणं करेइ, 'नन्नत्थ
एगेहिं घयपुण्णेहिं खण्डखज्जएहिं वा, अवसेसं भक्खविहिं पच्चक्खामि ३' । तयाण-
न्तरं च णं ओदणविहिपरिमाणं करेइ, 'नन्नत्थ कलमसालिओदणें, अवसेसं ओदण-
विहिं पच्चक्खामि ३' । तयाणन्तरं च णं सूवविहिपरिमाणं करेइ, 'नन्नत्थ कलायस्स-
वेण वा सुग्गमाससूवेण वा, अवसेसं सूवविहिं पच्चक्खामि ३' । तयाणन्तरं च णं
घयविहिपरिमाणं करेइ, 'नन्नत्थ सारइए(ण)णं गोघयमण्डेणं, अवसेसं घयविहिं
पच्चक्खामि ३' । तयाणन्तरं च णं सागविहिपरिमाणं करेइ, 'नन्नत्थ वत्थुसाएण
वा सुत्थियसाएण वा, अवसेसं सागविहिं पच्चक्खामि ३' । तयाणन्तरं च णं
माहुरयविहिपरिमाणं करेइ, 'नन्नत्थ एगेणं पालङ्गामाहुरएणं, अवसेसं माहुरयविहिं
पच्चक्खामि ३' । तयाणन्तरं च णं जेमणविहिपरिमाणं करेइ, 'नन्नत्थ सेहं(व)-
वदालियं(वे)वेहिं, अवसेसं जेमणविहिं पच्चक्खामि ३' । तयाणन्तरं च णं पाणिय-
विहिपरिमाणं करेइ, 'नन्नत्थ एगेणं अन्तल्लिक्खोदएणं, अवसेसं पाणियविहिं पच्च-
क्खामि ३' । तयाणन्तरं च णं मुहवासविहिपरिमाणं करेइ, 'नन्नत्थ पच्चसोगन्धिएणं
तम्बोलेणं अवसेसं मुहवासविहिं पच्चक्खामि ३' ६ । तयाणन्तरं च णं चउच्चिवहं
अणद्धादण्डं पच्चक्खाइ, तंजहा-अवज्झाणायरियं पमायायरियं हिंसप्पयाणं पावक-
म्मोवएसे ३, ७ ॥ ५ ॥ इह खलु 'आणन्दा'(इ)ई समणे भगवं महावीरे आणन्दं
समणोवासगं एवं वयासी-“एवं खलु आणन्दा! समणोवासएणं अभिगयजीवा-
जीवेणं जाव अणइक्कमणिजेणं सम्मत्तस्स पच्च अइयारा पेयाला जाणियव्वा न समा-
यरियव्वा, तंजहा-संका, कङ्गा, विइगिच्छा, परपासण्डपसंसा, परपासण्डसंथ-
(वो)वे । तयाणन्तरं च णं थूलगस्स पाणाइवायवेरमणस्स समणोवासएणं पच्च अइ-
यारा पेयाला जाणियव्वा न समायरियव्वा, तंजहा-बन्धे, वहे, छविच्छेए, अइभारे,
भत्तपाणवोच्छेए १ । तयाणन्तरं च णं थूलगस्स मुसावायवेरमणस्स पच्च अइयारा
जाणियव्वा न समायरियव्वा, तंजहा-सहसा[८]भक्खाणे, रहसा[८]भक्खाणे,
सदारमन्तमेए, मोसोवएसे, कूडलेहकरणे २ । तयाणन्तरं च णं थूलगस्स अदिण्णा-
दाणवेरमणस्स पच्च अइयारा जाणियव्वा न समायरियव्वा, तंजहा-तेणाहडे,
तक्करप्पओगे, विरुद्धरजाइक्कमे, कूलतु(ल्ल)लकूडमाणे, तप्पडिरुवगववहारे ३ । तया-
णन्तरं च णं सदारसन्तो-सिए पच्च अइयारा जाणियव्वा न समायरियव्वा, तंजहा-
इत्तरियपरिगहिंयागमणे, अपरिगहिंयागमणे, अणङ्ग(किङ्का)कीडा, परविवाहकरणे,

कामभोगतिष्वाभिलासे ४ । तयाणन्तरं च णं इच्छापरिमाणस्स समणोवासएणं पञ्च अइयारा जाणियव्वा न समायरियव्वा, तंजहा-खेतवत्थुपमाणाइक्कमे, हिरण्ण-सुवण्णपमाणाइक्कमे, दुपयचउप्पयपमाणाइक्कमे, धणधन्नपमाणाइक्कमे, कुवियपमाणाइक्कमे ५ । तयाणन्तरं च णं दिसि(६)वयस्स पञ्च अइयारा जाणियव्वा न समायरियव्वा, तंजहा-उड्ढदिसिपमाणाइक्कमे, अहोदिसिपमाणाइक्कमे, तिरियदिसिपमाणाइक्कमे, खेत्तवुड्ढी, सइअन्तरद्धा ६ । तयाणन्तरं च णं उवभोगपरिभोगे दुविहे पण्णत्ते, तंजहा-भोयणओ य कम्मओ य । तत्थ णं भोयणओ [य] समणोवासएणं पञ्च अइयारा जाणियव्वा न समायरियव्वा, तंजहा-सच्चित्ताहारे, सच्चित्तपडिबद्धाहारे, अप्पउलिओसहिभक्खणया, दुप्पउलिओसहिभक्खणया, तुच्छोसहिभक्खणया । कम्मओ णं समणोवासएणं पण्णरस कम्मादाणाइं जाणियव्वाइं न समायरियव्वाइं, तंजहा-इत्तालकम्ममे, वणकम्ममे, साढीकम्ममे, भाढीकम्ममे, फोढीकम्ममे, दन्तवाणिजे, लक्(खा)खवाणिजे, रसवाणिजे, विसवाणिजे, केसवाणिजे, जन्तपीलणकम्ममे, निहंछणकम्ममे, दवग्गिदावणया, सरदहतलावरोसणया, असइजणपोसणया ७ । तयाणन्तरं च णं अणद्वादण्डवेरमणस्स समणोवासएणं पञ्च अइयारा जाणियव्वा न समायरियव्वा, तंजहा-कन्दप्पे, कुक्कु[इ]ए, मोहरिए, संजुत्ताहिगरणे, उवभोगपरिभोगाइरित्ते ८ । तयाणन्तरं च णं सामाइयस्स समणोवासएणं पञ्च अइयारा जाणियव्वा न समायरियव्वा, तंजहा-मणदुप्पणिहाणे, वयदुप्पणिहाणे, कायदुप्पणिहाणे, सामाइयस्स सइअकरणया, सामाइयस्स अणवट्ठियस्स करणया ९ । तयाणन्तरं च णं देसावगासियस्स समणोवासएणं पञ्च अइयारा जाणियव्वा न समायरियव्वा, तंजहा-आणवणप्पओगे, पेसवणप्पओगे, सहाणुवाए, रुवाणुवाए, बहिया पोगलपक्खेवे १० । तयाणन्तरं च णं पोसहोववासस्स समणोवासएणं पञ्च अइयारा जाणियव्वा न समायरियव्वा, तंजहा-अप्पडिलेहियदुप्पडिलेहियसिज्जासंथारे, अप्पमज्जियदुप्पमज्जियसिज्जासंथारे, अप्पडिलेहियदुप्पडिलेहियउच्चारपासवणभूमी, अप्पमज्जियदुप्पमज्जियउच्चारपासवणभूमी, पोसहोववासस्स सम्मं अणणुपालणया ११ । तयाणन्तरं च णं अहासंविभागस्स समणोवासएणं पञ्च अइयारा जाणियव्वा न समायरियव्वा, तंजहा-सच्चित्तनिकखेवणया, सच्चित्त(पे)पिहणया, कालाइक्कमे, प(रो)रववदेसे, मच्छरिया १२ । तयाणन्तरं च णं अपच्छिममारणन्तियसंलेहणाइस्सणाराइणाए पंच अइयारा जाणियव्वा न समायरियव्वा, तंजहा-इहलोगासंसप्पओगे, परलोगासंसप्पओगे, जीवियासंसप्पओगे, मरणासंसप्पओगे, कामभोगा-

संसप्पओगे १३ ॥ ६ ॥ तए णं से आणन्दे गाहावई समणस्स भगवओ महावीरस्स अन्तिए पञ्चाणुव्वइयं सत्तसिक्खावइयं दुवालसविहं सावयधम्मं पडिवज्जइ, पडिवज्जिता समणं भगवं महावीरं वन्दइ नमंसइ, वंदित्ता नमंसित्ता एवं वयासी-
 'नो खलु मे भन्ते । कप्पइ अज्जप्पभिई अन्नउत्थिए वा अन्नउत्थियदेवयाणि वा वन्दित्तए वा नमंसित्तए वा, पुब्बि अणालत्तेणं आलवित्तए वा संलवित्तए वा, तेसिं असणं वा पाणं वा खाइमं वा साइमं वा दाउं वा अणुप्पदाउं वा, नन्नत्थ रायाभि-
 ओगेणं गणाभिओगेणं बलाभिओगेणं देवयाभिओगेणं गु(रु)रुनिगहेणं वित्तिकन्ता-
 रेणं । कप्पइ मे समणे निगन्थे फासुएणं एसणिज्जेणं असणपाणखाइमसाइमेणं वत्थपडिग्गहकम्बलपायपुंछणेणं पीढफल(ग)यसिज्जासंथारएणं ओसहमेसजेण य पडिल्लभेसाणस्स विहरित्तए'त्तिकहु इमं एयाह्वं अभिग्गहं अभिगिण्हइ, अभिगि-
 ण्हित्ता पसिणाइं पुच्छइ, पुच्छित्ता अट्ठाइं आदियइ, आदिइत्ता समणं भगवं महावीरं तिक्खुतो वन्दइ, वंदित्ता समणस्स भगवओ महावीरस्स अन्तियाओ दूइपलासाओ उज्जाणाओ पडिणिक्खमइ, पडिनिक्खमित्ता जेणेव वाणियगामे नयरं जेणेव सए गिहे तेणेव उवागच्छइ, उवागच्छित्ता सिवनन्दं भारियं एवं वयासी-'एवं खलु देवाणुप्पिए । मए समणस्स भगवओ महावीरस्स अन्तिए धम्मं निसन्ते, सेऽवि य धम्मं मे इच्छिए पडिच्छिए अभिरुइए, तं गच्छ णं तुमं देवाणुप्पिए ।
 समणं भगवं महावीरं वन्दाहि जाव पज्जुवासाहि, समणस्स भगवओ महा-
 वीरस्स अन्तिए पञ्चाणुव्वइयं सत्तसिक्खावइयं दुवालसविहं गिहिधम्मं पडि-
 वज्जाहि' ॥ ७ ॥ तए णं सा सिवनन्दा भारिया आणन्देणं समणोवासएणं एवं वुत्ता समाणा हट्ठतुट्ठा कोडुम्बियपुरिसे सदावेइ, सदावेत्ता एवं वयासी-'खिप्पा-
 मेव लहुकरण जाव पज्जुवासइ । तए णं समणे भगवं महावीरे सिवनन्दाए तीसे य महइ जाव धम्मं कहेइ । तए णं सा सिवनन्दा समणस्स भगवओ महावीरस्स अन्तिए धम्मं सोच्चा निसम्म हट्ठ जाव गिहिधम्मं पडिवज्जइ २ ता तमेव धम्मियं जाणप्पवरं दु-रुइइ, दुरुहित्ता जामेव दि(सं)सिं पाउच्चभूया तामेव दि-सिं पडिगया ॥ ८ ॥ 'भन्ते'त्ति भगवं गोयमे समणं भगवं महावीरं वन्दइ नमंसइ, वंदित्ता नमं-
 सित्ता एवं वयासी-'पहू णं भन्ते । आणन्दे समणोवासए देवाणुप्पियाणं अन्तिए मुण्डे जाव पव्वइत्ताए ?' नो इणट्ठे समट्ठे, गोयमा ! आणन्दे णं समणोवासए बहूई वासाइं समणोवासगपरियाणं पाउणिहिइ, पाउणित्ता जाव सोहम्मं कप्पे अरणे विमाणे देवत्ताए उववज्जिहिइ । तत्थ णं अत्थेगइयाणं देवाणं चत्तारि पल्लिओवमाइं ठिई पण्णत्ता । तत्थ णं आणन्दस्स[ऽ]वि समणोवासगस्स चत्तारि पल्लिओवमाइं ठिई

पण्णाता । तए णं समणे भगवं महावीरे अन्नया कयाइ बहिया जाव विहरइ । तए णं से आणन्दे समणोवासए जाए अभिगयजीवाजीवे जाव पडिलाभेमाणे विहरइ । तए णं सा सिवनन्दा भारिया समणोवासिया जाया जाव पडिलाभेमाणी विहरइ ॥ ९ ॥ तए णं तस्स आणन्दस्स समणोवासगरस्स उच्चावएहिं सीलव्वय-
 गुणवेरमणपच्चक्खणपोसहोववासेहिं अप्पाणं भावेमाणस्स चउ(वो)इस्स संवच्छराइं वइक्कन्ताइं, पण्णरसमस्स संवच्छरस्स अन्तरा वट्टमाणस्स अन्नया कयाइ पुन्वरत्ता-
 वरत्तकालसमयंसि धम्मजागरियं जागरमाणस्स इमेयारूवे अज्झत्थिए चिन्तिए पत्थिए मणोगए सङ्कप्पे समुप्पज्जित्था—‘एवं खलु अहं वाणियगामे नयरे बहूणं राईसर जाव सयस्सवि य णं कुडुम्बस्स जाव आधारे, तं एएणं वि(व)क्खेवेणं अहं नो संचाएमि समणस्स भगवओ महावीरस्स अन्तियं धम्मपण्णत्ति उवसम्पज्जिताणं विहरित्तए, तं सेयं खलु ममं कळं जाव जलन्ते विउलं असणं० जहा पूरणो जाव जेट्टपुत्तं कुडुम्बे ठवेत्ता तं मित्त जाव जेट्टपुत्तं च आपुच्छित्ता कोल्लाए सन्निवेसे नायकुलंसि पोसहसालं पडिलेहिता समणस्स भगवओ महावीरस्स अन्तियं धम्मपण्णत्ति उवसम्पज्जित्ता णं विहरित्तए’ एवं सम्पेहेइ, संपेहिता कळं विउलं[०] तहेव जिमित्तभुत्तुत्तरागए तं मित्त जाव विउलेणं पुप्फ[०] ५ सक्कारेइ सम्माणेइ, सक्कारित्ता संमाणित्ता तस्सेव मित्त जाव पुरओ जेट्टपुत्तं सहावेइ, सहावेत्ता एवं वयासी—‘एवं खलु पुत्ता ! अहं वाणियगामे बहूणं राईसर[०] जहा चिन्तियं जाव विहरित्तए, तं सेयं खलु मम इदाणि तुमं सयस्स कुडुम्बस्स आलम्बणं ४ ठवेत्ता जाव विहरित्तए’ । तए णं जेट्टपुत्ते आणन्दस्स समणोवास(ग)-
 यस्स तहत्ति एयमट्ठं विणएणं पडिउणेइ । तए णं से आणन्दे समणोवासए तस्सेव मित्त जाव पुरओ जेट्टपुत्तं कुडुम्बे ठवेइ, ठवेत्ता एवं वयासी—‘मा णं देवाणु-
 प्पिया ! तुक्के अजप्पभिइ केइ मम बहूसु कजेसु जाव आपुच्छउ वा पडिपुच्छउ वा, ममं अट्ठाए असणं वा ४ उवक्खडेउ [वा] उवकरेउ वा । तए णं से आणन्दे समणोवासए जेट्टपुत्तं मित्तनाइं आपुच्छइ, आपुच्छित्ता सयाओ गिहाओ पडिणि-
 क्खमइ, पडिनिक्खमिता वाणियगामं तयरं मज्झमज्जेणं निगगच्छइ, निगग-
 च्छित्ता जेणेव कोल्लाए सन्निवेसे जेणेव नायकुले जेणेव पोसहसाला तेणेव उवा-
 गच्छइ, उवागच्छित्ता पोसहसालं पमज्जइ, पमज्जित्ता उच्चारपासवणभूमिं पडिलेहेइ, पडिलेहिता दब्भसंथारयं संथरइ, दब्भसंथारयं दु-रुहइ, दु-रुहिता पोसहसालाए पोसहिए दब्भसंथारोवगए समणस्स भगवओ महावीरस्स अन्तियं धम्मपण्णत्ति उवसम्पज्जित्ता णं विहरइ ॥ १० ॥ तए णं से आणन्दे समणोवासए उवासगपडि-

माओ उवसम्पजित्ता णं विहरइ । पढमं उवासगपडिमं अहांसुत्तं अहाकप्पं अहा-
मगं अहातत्थं सम्मं काएणं फासेइ पाळेइ सोहेइ तीरेइ कित्तेइ आराहेइ । तए णं
से आणन्दे समणोवासए दोच्चं उवासगपडिमं, एवं तच्चं चउत्थं पच्चमं छट्ठं
सत्तमं अट्ठमं नवमं दसमं एक्कारसमं जाव आराहेइ ॥ ११ ॥ तए णं से आणन्दे
समणोवासए इमेणं एयारूवेणं उरालेणं विउलेणं पयत्तेणं पग्गहिणं तवोकम्मेणं
सुक्के जाव किसे धमणिसन्तए जाए । तए णं तस्स आणन्दस्स समणोवासगस्स
अन्नया कयाइ पुव्वरत्ता जाव धम्मजागरियं जागरमाणस्स अयं अज्झत्थिए ५-
एवं खलु अहं इमेणं जाव धमणिसन्तए जाए, तं अत्थि ता मे उट्ठाणे कम्मे बले
वीरिए पुरिसक्कारपरक्कमे सद्धाधिइसंवेगे, तं जाव ता मे अत्थि उट्ठाणे सद्धाधिइ-
संवेगे जाव य मे धम्मायरिए धम्मोवएसए समणे भगवं महावीरे जिणे सुहत्थी
विहरइ ताव ता मे सेयं कलं जाव जलन्ते अपच्छिममारणन्तियसंलेहणाद्वासणा-
द्वासियस्स भत्तपाणपडियाइक्खियस्स कालं अणवकङ्कमाणस्स विहरित्तए' एवं
सम्पेहेइ, संपेहित्ता कलं पाउ जाव अपच्छिममारणन्तिय जाव कालं अणवकङ्कमाणे
विहरइ । तए णं तस्स आणन्दस्स समणोवासगस्स अन्नया कयाइ सुमेणं अज्झव-
साणेणं सुमेणं परिणामेणं लेसाहिं विमुज्झमाणीहिं तदावरणिज्जाणं कम्माणं खओ-
वसमेणं ओहिनाणे समुप्पजे । पुरत्थिमेणं लवणसमुदे पच्चजोयणस(याइ)इयं खेतं
जाणइ पासइ, एवं दक्खिणेणं पच्चत्थिमेणं य, उत्तरेणं जाव सुल्लहिमवन्तं वासधर-
पव्वयं जाणइ पासइ, उच्चं जाव सोहम्मं कप्पं जाणइ पासइ, अहे जाव इमीसे
रयणप्पभाए पुढवीए लोलुयच्चुयं नरयं चउरासीइवाससहस्सट्ठिइयं जाणइ पासइ
॥ १२ ॥ तेणं कालेणं तेणं समएणं समणे भगवं महावीरे समोसरिए, परिसा
निग्गया जाव पडिग्गया । तेणं कालेणं तेणं समएणं समणस्स भगवओ महावीरस्स
जेट्ठे अन्तेवासी इन्दभूई नामं अणगारे गोयमगोत्तेणं सत्तुस्सेहे समचउरंसंठाण-
संठिए वज्जरिसहनारायसङ्खयणे कणगपुलगनिघसपम्हगोरे उग्गतवे दित्ततवे तत्त-
तवे घोरतवे महातवे उराले घोरगुणे घोरतवस्सी घोरवम्भचेरवासी उच्छृङ्खलसरीरे
संखित्तविउलतेउलेसे छट्ठंछट्ठेणं अणिकिखत्तेणं तवोकम्मेणं संजमेणं तवसा अप्पाणं
भावेमाणे विहरइ । तए णं से भगवं गोयमे छट्ठक्खमणपारणगंसि पढमाए पोरिसीए
सज्झार्थं करेइ, बिइयाए पोरिसीए ज्ञाणं झियाइ, तइयाए पोरिसीए अतुरियं अचवलं
असम्भन्ते मुहपत्तिं पडिलेहेइ, २ ता भायणवत्थाइ पडिलेहेइ, २ ता भायणवत्थाइ
पमज्जइ, २ ता भायणाइ उग्गाहेइ, उग्गाहेत्ता जेणेव समणे भगवं महावीरे तेणेव
उवागच्छइ, उवागच्छित्ता समणं भगवं महावीरं वन्दइ नमंसइ, वंदित्ता नमस्सित्ता

एवं वयासी-‘इच्छामि णं भन्ते । तुब्भेहिं अब्भणुण्णाए छट्ठक्खमण(स्स)पारणंगंति वाणियगामे नयरे उच्चनीयमज्झिमाई कुलाई घरसमु(द्वा)दाणस्स भिक्खायरियाए अड्ढिए’ । अहाछहं देवाणुप्पिया । मा पडिबन्धं करेह । तए णं भगवं गोयमे समणेणं भगवया महावीरेणं अब्भणुण्णाए समाणे समणस्स भगवओ महावीरस्स अन्ति-याओ दूडुपलासाओ उज्जाणाओ पडिणिक्खमइ, पडिनिक्खमिता अतुरियमचवलम-सम्भन्ते जुगन्तरपरिलोयणाए दिट्ठीए पुरओ ई(इ)रियं सोहेमाणे जेणेव वाणियगामे नयरे तेणेव उवागच्छइ, उवागच्छिता वाणियगामे नयरे उच्चनीयमज्झिमाई कुलाई घरसमु-दाणस्स भिक्खायरियाए अड्ढइ । तए णं से भगवं गोयमे वाणियगामे नयरे जहा पण्णनीए तहा जाव भिक्खायरियाए अड्ढमाणे अहापज्जतं भत्तपाणं सम्मं पडिग्गा-हेइ, पडिग्गाहिता वाणियगामाओ पडिणिग्गच्छइ पडिणिग्गच्छिता कोल्लायस्स सन्नि-वेसस्स अदूरसामन्तेणं व(वी)ईवयमाणे बहुजणसइ निसामेइ । बहुजणो अन्नमज्जस्स एवमाइक्खइ ४-‘एवं खलु देवाणुप्पिया ! समणस्स भगवओ महावीरस्स अन्तेवासी आणन्दे नामं समणोवासए पोसहसालाए अपच्छिम जाव अणवकंखमाणे विहरइ’ । तए णं तस्स गोयमस्स बहुजणस्स अन्तिए ए(यं)यमट्ठं सोचा निसम्म अयमेयारूवे अज्झत्थिए ४-‘तं गच्छामि णं आणन्दं समणोवासयं पासामि’ एवं सम्पेहेइ, संपेहिता जेणेव कोलाए सन्निवेसे जेणेव आणन्दे समणोवासए जेणेव पोसहसाला तेणेव उवागच्छइ । तए णं से आणन्दे समणोवासए भगवं गोयमं एज्जमाणं पासइ, पासिता हट्ठ[उट्ठ] जाव हियए भ(ग)यवं गोयमं वन्दइ नमंसइ, वंदिता नमंसित्ता एवं वयासी-‘एवं खलु भन्ते ! अहं इमेणं उरालेणं जाव धमणिसन्तए जाए, (नो) न संचाएमि देवाणुप्पियस्स अन्तियं पाउब्भवित्ता णं तिक्खुत्तो मुद्धाणेणं पाए अभिवन्दिताए, तुब्भे णं भन्ते ! इच्छाकारेणं अणभिओएणं इओ चेव एह, जा णं देवाणुप्पियाणं तिक्खुत्तो मुद्धाणेणं पाएसु वन्दामि नमंसामि’ । तए णं से भगवं गोयमे जेणेव आणन्दे समणोवासए तेणेव उवागच्छइ ॥ १३ ॥ तए णं से आणन्दे समणोवासए भगवओ गोयमस्स तिक्खुत्तो मुद्धाणेणं पाएसु वन्दइ नमंसइ, वंदिता नमंसित्ता एवं वयासी-‘अत्थि णं भन्ते ! गिहिणो गि(हि)हमज्झावसन्तस्स ओहिनाणे (णं) समुप्पज्जइ?’ हन्ता अत्थि । जइ णं भन्ते ! गिहिणो जाव समुप्पज्जइ, एवं खलु भन्ते ! ममवि गिहिणो गिहिमज्झावसन्तस्स ओहिनाणे समुप्पज्जे-पुरत्थिमेणं ख्वणसमुदे पञ्च जोयणसयाई जाव लोळुयच्चुयं नरयं जाणामि पासामि । तए णं से भगवं गोयमे आणन्दं समणोवासयं एवं वयासी-‘अत्थि णं आणन्दा ! गिहिणो जाव समुप्पज्जइ, नो चेव णं एमहालए, तं णं तुमं आणन्दा ! एयस्स अणस्स

आलोएहि जाव तवोकम्मं पडिवज्जाहि' । तए णं से आणन्दे समणोवासए भगवं गोयमं एवं वयासी-‘अत्थि णं भन्ते ! जिणवयणे सन्ताणं तच्चाणं तहियाणं सम्भूयाणं भावाणं आलोइज्जइ जाव पडिवज्जिजइ ?’ नो इण्ठे समट्ठे । ‘जइ णं भन्ते ! जिणवयणे सन्ताणं जाव भावाणं नो आलोइज्जइ जाव तवोकम्मं नो पडिवज्जिजइ तं णं भन्ते ! तुब्भे चेव एयस्स ठाणस्स आलोएह जाव पडिवज्जइ’ । तए णं से भगवं गोयमे आणन्देणं समणोवासएणं एवं वुत्ते समाणे संकिए कंखिए विइगिच्छासमावन्ने आणन्दस्स अन्तियाओ पडिणिक्खमइ, पडिनिक्खमिता जेणेव दूइपलासे उज्जाणे जेणेव समणे भगवं महावीरे तेणेव उवागच्छइ, उवागच्छिता समणस्स भगवओ महावीरस्स अदूर-सामन्ते गमणागमणाए पडिक्कमइ, पडिक्कमिता एसणमणेसणं आलोएइ, आलोएत्ता भत्तापाणं पडिदंसेइ, पडिदंसित्ता समणं भगवं महावीरं वन्दइ नमंसइ, वंदित्ता नमंसित्ता एवं वयासी-‘एवं खलु भन्ते ! अहं तुब्भेहिं अब्भणुण्णाए तं चेव सव्वं कहेइ जाव तए णं अहं संकिए ३ आणन्दस्स समणोवासगस्स अन्तियाओ पडिणिक्खमामि, पडिनिक्खमिता जेणेव इहं तेणेव हव्वमागए, तं णं भन्ते ! किं आणन्देणं समणोवासएणं तस्स ठाणस्स आलोएयव्वं जाव पडिवज्जेयव्वं उदाहु मए ?’ ‘गोयमा’ इ समणे भगवं महावीरे भगवं गोयमं एवं वयासी-‘गोयमा ! तुमं चेव णं तस्स ठाणस्स आलोएहि जाव पडिवज्जाहि, आणन्दं च समणोवासयं एयमट्ठं खामेहि’ । तए णं से भगवं गोयमे समणस्स भगवओ महावीरस्स ‘तह’ति एयमट्ठं विणएणं पडिसुणेइ, पडिसुणेत्ता तस्स ठाणस्स आलोएइ जाव पडिवज्जइ, आणन्दं च समणोवासयं एयमट्ठं खामेइ । तए णं समणे भगवं महावीरे अज्झया कयाइ वहिया जणवयविहारं विहरइ ॥ १४ ॥ तए णं से आणन्दे समणोवासए बट्ठहिं सीलव्वएहिं जाव अप्पाणं भावेत्ता वीसं वासाई समणोवासगपरियार्गं पाउणित्ता एक्कारस य उवासगपडिमाओ सम्मं काएणं फासित्ता मासियाए संलेहणाए अत्ताणं झसित्ता सट्ठिं भत्ताई अणसणाए छेदेत्ता आलोइयपडिक्कन्ते समाहिपत्ते कालमासे कालं किच्चा सोहम्मं कप्पे सोह-म्मवडिंसगस्स महाविमाणस्स उत्तरपुर-च्छिमेणं अरुणे विमाणे देवत्ताए उववन्ने । तत्थ णं अत्थेगइयाणं देवाणं चत्तारि पल्लिओवमाई ठिई पण्णत्ता, तत्थ णं आण-न्दस्सवि देवस्स चत्तारि पल्लिओवमाई ठिई पण्णत्ता । आणन्दे णं भन्ते ! देवे ताओ देवलोगाओ आउक्खएणं ३ अणन्तरं चयं चइत्ता कहिं गच्छिहिइ कहिं उववज्जिहिइ ? गोयमा ! महाविदेहे वासे सिज्झिहिइ ॥ १५ ॥ निकखेवो ॥ सत्त-मस्स अङ्गस्स उवासगदसाणं पढमं अज्झयणं समत्तं ॥

जइ णं भन्ते ! समणेणं भगवया महावीरेणं जाव संपत्तेणं सत्तमस्स अङ्गस्स उवासगदसाणं पढमस्स अज्झयणस्स अयमट्ठे पण्णत्ते, दोच्चस्स णं भन्ते ! अज्झयणस्स के अट्ठे पण्णत्ते ? एवं खलु जम्बू ! तेणं कालेणं तेणं समएणं चम्पा नामं नयरी होत्था । पुण्णभेइ उज्जाणे । जियस(त्तु)त्तू राया । कामदेवे गाहाव(इ)इ । भद्दा भारिया । छ हिरण्णकोडीओ निहाणपउत्ताओ, छ(हिं)उ-द्धिपउत्ताओ, छ-पवित्थरपउत्ताओ । छ वया दसगोसाहस्सिएणं वएणं । (तेणं का० तेणं स० भगवं म०) समोस(हुँ)रणं । जहा आणन्दो तहा निग्गओ, तहेव सावयधम्मं पडिव-ज्जइ । सा चेव वत्तव्वया जाव जेद्धपुत्तं भित्तनाई (आपुच्छइ) आपुच्छिता जेणेव पोसहसाला तेणेव उवागच्छइ, उवागच्छिता जहा आणन्दो जाव समणस्स भग-वओ महावीरस्स अन्तियं धम्मपण्णत्तिं उवसंपज्जित्ता-णं विहरइ ॥ १६ ॥ तए णं तस्स कामदेवस्स समणोवासगस्स पुव्वरत्तावरत्तकालसमयंसि एगे देवे मायी सिच्छ-हिट्ठी अन्तियं पाउब्भूए । तए णं से देवे एगं महं पिसायरूवं विउव्वइ । तस्स णं देवस्स पिसायरूवस्स इमे एयारूवे वण्णावासे पण्णत्ते-सीसं से गोक्किलजसंठाण-संठियं, साल्लिभसेल्लसरिसा से केसा कविलत्तेएणं दिप्पमाणा, महल्लउट्ठियाकभल्लसंठा-णसंठियं निडालं, मुगुंसपुंछं व तस्स भुमगाओ फुग्गफुग्गाओ विगय(वी)बीभ(त्थ)-च्छदंसणाओ, सीसघड्डिविणिग्गयाई अच्छीणि विगय-बीभच्छदंसणाई, कण्णा जह सुप्पकत्तरं चेव विगयबीभच्छदंसणिज्जा, उरब्भपुडसन्निभा से नासा, झुसिरा जम-ल्लुल्लीसंठाणसंठिया दो[S]वि तस्स नासापुडया, घोडयपुंछं व तस्स मंसूई कविलक-विलाई विगयबीभच्छदंसणाई, उट्ठा उ(ट्ठ)ट्ठस्स चेव लम्भा, फालसरिसा से दन्ता, जिब्भा ज(ह)हा सुप्पकत्तरं चेव विगयबीभच्छदंसणिज्जा, हल्लकु(डा)हालसंठिया से हणुया, गल्लकडिल्लं च तस्स खड्डुं फुट्टं कविलं फरुसं महल्लं, मुइङ्गाकारोवमे से खन्धे, पुरवरकवाडोवमे से वच्छे, कोट्टियासंठाणसंठिया दो-वि तस्स बाहा, निसापाहाणसं-ठाणसंठिया दो-वि तस्स अग्गहत्था, निसालोढसंठाणसंठियाओ हत्थेसु अंगुलीओ, सिप्पिपुडग(संठाण)संठिया से नक्खा, प(ह)हावियपसेवओ व्व उरंसि लम्बन्ति दो-S-वि तस्स थणया, पोट्टं अयकोट्ठओ व्व वट्टं, पाणकलन्दसरिसा से नाही, सिक्कगसंठाणसंठि(या)ए से नेत्ते, किण्णपुड(संडवसण)संठाणसंठिया दो-S-वि तस्स वसणा, जमलकोट्टियासंठाणसंठिया दो-S-वि तस्स ऊरु, अज्जुगुट्टं व तस्स जाणूई कुडिलकुडिलाई विगयबीभच्छदंसणाई, जंघाओ क(रक)क्खडीओ लोमेहिं उवचि-याओ, अहरीसंठाणसंठिया दो-S-वि तस्स पाया, अहरीलोढसंठाणसंठियाओ पाएसु अंगुलीओ, सिप्पिपुड(सं०)संठिया से नक्खा, लडहमडहजाणए विगयभग्गभुग्ग-७२ सुत्ता०

(भमुहे)भुमए अवदालियवयणविव(रे)रनिळालियगजीहे सरडकयमालियाए उन्दुर-
मालापरिणद्धसुकयचिधे नउलकयकणपूरे सप्पकयवैगच्छे अप्फोडन्ते अभिगजन्ते
भीमसुक्कट्टहासे नाणाविहपञ्चवण्णेहिं लोमेहिं उवचिए एगं महं नीलुप्पलगवल्लुगुलिय-
अयसिकुसुमप्पगासं असिं खुरधारं गहाय जेणेव पोसहसाला जेणेव कामदेवे समणो-
वासए तेणेव उवागच्छइ, उवागच्छिता आसु(र)रते रुंते कुविए चण्डिकिए मिसिमि-
सीयमाणे कामदेवं समणोवासयं एवं वयासी-‘हं भो कामदेवा ! समणोवासया ! अप्प-
त्थियपत्थिया दुरन्तपन्तलक्खणा हीणपुण्णचाउइसिया हिरिसिरिधिइकित्तिपरिवज्जिया
धम्मकामया पुण्णकामया सग्गकामया मोक्खकामया धम्मकंखिया पुण्णकंखिया
सग्गकंखिया मोक्खकंखिया धम्मपिवासिया पुण्णपिवासिया सग्गपिवासिया मोक्ख-
पिवासिया नो खलु कप्पइ तव देवाणुप्पिया ! जं सीलाई वयाइं वेरमाणां पच्चक्खा-
णां पोसहोववासाइं चालित्तए वा खोभित्तए वा खण्डित्तए वा भजित्तए वा उज्झित्तए
वा परि(ट्ठि)च्चइत्तए वा, तं जइ णं तुमं अज्ज सीलाई जाव पोसहोववासाइं न छ(ड्ड)-
ड्डेसि न भज्जेसि तो ते अहं अज्ज इमेणं नीलुप्पल[०] जाव असिणा खण्डाखण्डिं करेमि,
ज-हा णं तुमं देवाणुप्पिया ! अट्टदुहट्टवसट्ठे अकाळे चैव जीवियाओ ववरोविज्जसि’ ।
तए णं से कामदेवे समणोवासए तेणं देवेणं पिसायरूवेणं एवं वुत्ते समाणे अभीए
अतथे अणुव्विगगे अक्खुभिए अचल्लिए असम्भन्ते तुसिणीए धम्मज्झाणोवगए
विहरइ ॥ १७ ॥ तए णं से देवे पिसायरूवे कामदेवं समणोवासयं अभीयं जाव
धम्मज्झाणोवगयं विहरमाणं पासइ, पासित्ता दोच्चं-पि तच्चं-पि कामदेवं (समणोवासयं)
एवं वयासी-‘हं भो कामदेवा ! समणोवासया ! अपत्थियपत्थि० जइ णं तुमं अज्ज
जाव ववरोविज्जसि’ । तए णं से कामदेवे समणोवासए तेणं देवेणं दोच्चं-पि तच्चं-पि
एवं वुत्ते समाणे अभीए जाव धम्मज्झाणोवगए विहरइ । तए णं से देवे पिसायरूवे
कामदेवं समणोवासयं अभीयं जाव विहरमाणं पासइ, पासित्ता आसुरत्ते (५) तिव-
लियं भिउडिं निडाळे साहड्डुकामदेवं समणोवासयं नीलुप्पल-जाव असिणा खण्डा-
खण्डिं करेइ । तए णं से कामदेवे समणोवासए तं उज्जलं जाव दुरहियासं वेयणं सम्मं
सहइ जाव अहियासेइ ॥ १८ ॥ तए णं से देवे पिसायरूवे कामदेवं समणोवासयं
अभीयं जाव विहरमाणं पासइ, पासित्ता जाहे नो संचाएइ कामदेवं समणोवासयं
निग्गन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते
तन्ते परितन्ते सणियं सणियं पच्चोसक्कइ, पच्चोसक्कित्ता पोसहसालाओ पडिणिकख-
मइ, पडिणिकखमित्ता दिव्वं पिसायरूवं विप्पजहइ, विप्पजहित्ता एगं महं दिव्वं हत्थि-
रूवं विउव्वइ, सत्तङ्गपइट्ठियं सम्मं संठियं सुजायं पुरओ उदग्गं पिट्ठओ वाराहं अथा-

कुच्छि अलम्बकुच्छि पलम्बलम्बोदराधरकरं अब्भुगयमउलमल्लियाविमलधवलदन्तं
 कञ्चणकोसीपविट्टदन्तं आणामियचावललियसंविस्त्रियगसोण्डं कु(म्मिच)म्मपडिपुण्ण-
 चलणं वीसइनक्खं अल्लीणपमाणजुत्तपुच्छं मत्तं मेहमिव गुलगुलेन्तं मणपवणजइणवेणं
 दिव्वं हत्थिरूवं विउव्वइ, विउव्वित्ता जेणेव पोसहसाला जेणेव कामदेवं समणोवा-
 सए तेणेव उवागच्छइ, उवागच्छित्ता कामदेवं समणोवासयं एवं वयासी-‘हं भो
 कामदेवा ! समणोवासया ! तहेव भणइ जाव न भजेसि, तो ते अज्ज अहं
 सोण्डाए गिण्हामि, गिण्हित्ता पोसहसालाओ नीणेमि, नीणित्ता उड्डं वेहासं उव्वि-
 हामि, उव्विहित्ता तिक्खेहिं दन्तमुसलेहिं पडिच्छामि, पडिच्छित्ता अहे धरणितलंसि
 तिक्खुत्तो पाएसु लोलेमि, जहा णं तुमं अट्टदुहट्टवसटे अकाले चेव जीवियाओ
 ववरोविजसि’ । तए णं से कामदेवे समणोवासए तेणं देवेणं हत्थिरूवेणं एवं वुत्ते
 समाणे अभीए जाव विहरइ । तए णं से देवे हत्थिरूवे कामदेवं समणोवासयं
 अभीयं जाव विहरमाणं पासइ, पासित्ता दोच्चं-पि तच्चं-पि कामदेवं समणोवासयं
 एवं वयासी-‘हं भो कामदेवा ! तहेव जाव सो-ऽवि विहरइ । तए णं से देवे हत्थि-
 रूवे कामदेवं समणोवासयं अभीयं जाव विहरमाणं पासइ, पासित्ता आडु(र)हत्ते ४
 कामदेवं समणोवासयं सोण्डाए गिण(ह)हेइ, गिण्हित्ता उड्डं वेहासं उव्विहइ, उव्वि-
 हित्ता तिक्खेहिं दन्तमुसलेहिं पडिच्छइ, पडिच्छित्ता अहे धरणितलंसि तिक्खुत्तो पाए-
 (पदे)सु लोलेइ । तए णं से कामदेवे समणोवासए तं उज्जलं जाव अहियासेइ ॥१९॥
 तए णं से देवे हत्थिरूवे कामदेवं समणोवासयं जाहे नो संचाएइ जाव सणियं
 सणियं पच्चोसकइ, पच्चोसकित्ता पोसहसालाओ पडिणिक्खमइ, पडिणिक्खमित्ता दिव्वं
 हत्थिरूवं विप्पजइइ, विप्पजहित्ता एणं महं दिव्वं सप्परूवं विउव्वइ, (तं) उगविसं
 चण्डविसं घोरविसं (दिट्ठिविसं) महाकायं म(सि)सीमूसाकालगं नयणविसरोसपुण्णं
 अंजणपुंजनिगरप्पगासं रत्तच्छं लोहियलोयणं जमलजुयलचञ्चलजीहं धरणीयलवे-
 (णी)णिभूयं उक्कडफुडकुडिलजडिलकक्कसवियड(फु)फडाडोवकरणदच्छं लोहानरध-
 म्ममाणधमधमेन्तघोसं अणागलियतिव्वचण्डरोसं सप्परूवं वि(वे)उव(वे)वइ, २ ता
 जेणेव पोसहसाला जेणेव कामदेवे समणोवासए तेणेव उवागच्छइ, उवागच्छित्ता
 कामदेवं समणोवासयं एवं वयासी-‘हं भो कामदेवा ! समणोवासया ! जाव न भ(ज्ज)-
 जेसि तो ते अ(ज्ज)जेव अहं सरसरस्स कायं दु(रु)रुहामि, २ ता पच्छिमेणं भाएणं
 तिक्खुत्तो गीवं वेढेमि, वेढेत्ता तिक्खाहिं विसपरिगयाहिं दाढाहिं उरंसि चेव निकुट्टेमि,
 ज-हा णं तुमं अट्टदुहट्टवसटे अकाले चेव जीवियाओ ववरोविजसि’ । तए णं से कामदेवे
 समणोवासए तेणं देवेणं सप्परूवेणं एवं वुत्ते समाणे अभीए जाव विहरइ, सो-ऽवि

दोच्चं-पि तच्चं-पि भणइ, कामदेवो-ऽ-वि जाव विहरइ । तए णं से देवे सप्परुवे कामदेवं
समणोवासयं अभीयं जाव पासइ, पासित्ता आसु-सत्ते ४ कामदेवस्स समणोवास(ग)-
यस्स सरसरस्स कायं दुरुहइ, दुरुहिता पच्छिमभाएणं तिवखुत्तो गीवं वेढे(ई)इ, वेदेत्ता
तिवखाहिं विसपरिगयाहिं दाढाहिं उरंसि चेव निकुट्टेइ । तए णं से कामदेवे सम-
णोवासए तं उज्जलं जाव अहियासेइ ॥ २० ॥ तए णं से देवे सप्परुवे कामदेवं
समणोवासयं अभीयं जाव पासइ, पासित्ता जाहे नो संचाएइ कामदेवं समणोवासयं
निग्गन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते
३ सणियं सणियं पच्चोसकइ, पच्चोसकित्ता पोसहसालाओ पडिणिक्खमइ, पडिनिक्ख-
मित्ता दिव्वं सप्परुवं विप्पजहइ, विप्पजहिता एगं महं दिव्वं देवरुवं वि-उव्वइ,
हारविराइयवच्छं जाव दस-दिसाओ उज्जोवेमाणं पमासेमाणं पासाईयं दरिसणिज्जं
अभिरुवं पडिरुवं दिव्वं देवरुवं विउव्वइ, विउव्वित्ता कामदेवस्स समणोवासयस्स
पोसहसालं अणुप्पविसइ, अणुप्पविसित्ता अन्तलिक्खपडिव्वे सखिखिणियाई पच्च-
वण्णाई वत्थाई पवरपरिहिए कामदेवं समणोवासयं एवं वयासी-‘हं भो कामदेवा !
समणोवासया ! धत्ते सि णं तुमं देवाणुप्पिया । स(म)पुण्णे कयत्थे कयलक्खणे, सुलद्धे
णं तव देवाणुप्पिया ! माणुस्सए जम्मजीवियफले, जस्स णं तव निग्गन्थे पावयणे
इमेयारुवा पडिवत्ती लद्धा पत्ता अभिसमन्नागया । एवं खलु देवाणुप्पिया ! सक्के
देविन्दे देवराया जाव सक्कंसि सीहासणंसि चउरासीईए सामाणियसाहसीणं जाव
अञ्जेसिं च बहूणं देवाण य देवीण य मज्झगए एवमाइक्खइ ४-एवं खलु देवा(०) !
जम्मुइवीवे वीवे भारहे वासे चम्पाए नयरीए कामदेवे समणोवासए पोसहसालाए
पोसहि(ए)यवम्भ(चेरवासी)चारी जाव दब्भसं(थ)थारोवगए समणस्स भगवओ
महावीरस्स अन्ति(ए)यं धम्मपण्णत्तिं उवसम्पज्जित्ता-णं विहरइ, नो खलु से
स(क्का)क्को केणइ देवेण वा दाणवेण वा जाव गन्धव्वेण वा निग्गन्थाओ पावय-
णाओ चालित्तए वा खोभित्तए वा विपरिणामित्तए वा । तए णं अहं सक्कस्स देवि-
न्दस्स देवरण्णो एयमद्धं असइहमाणे ३ इहं हव्वमागए, तं अहो णं देवाणुप्पिया !
इह्मी ६ लद्धा ३, तं दिट्ठा णं देवाणुप्पिया ! इह्मी जाव अभिसमन्नागया, तं खामेमि
णं देवाणुप्पिया ! खमन्तु मज्झ देवाणुप्पिया ! खन्तुम(र)रहन्ति णं देवाणुप्पिया !
नाई भुज्जो करणयाए’त्ति-कट्ठ पायवडिए पज्जलिउडे एयमद्धं भुज्जो भुज्जो खामेइ,
खामेत्ता जामेव दि(सि)सं पाउब्भूए तामेव दिसं पडिगए । तए णं से कामदेवे
समणोवासए निरुवसग्गं (इइ) तिरुट्ठ पडिमं पारेइ ॥ २१ ॥ तेणं कालेणं तेणं
समएणं समणे भगवं महावीरे जाव विहरइ । तए णं से कामदेवे समणो-

वासए इमीसे कहाए लद्धे समणे 'एवं खलु समणे भगवं महावीरे जाव विहरइ, तं सेयं खलु मम समणं भगवं महावीरं वन्दित्ता नमंसित्ता तओ पडिणिण्यत्तस्स पोसहं पारित्तए'ति कहु एवं सम्पेहेइ, संपेहिता सुद्धपावेसाइं वत्थाइं जाव मणुस्स-वग्गुरापरिक्खित्ते सयाओ गिहाओ पडिणिक्खमइ, पडिनिक्खमिता चम्मं नगरिं मज्झमज्जेणं निग्गच्छइ, निग्गच्छित्ता जेणेव पुण्णभेइ उजाणे जहा संखो जाव पज्जुवासइ । तए णं समणे भगवं महावीरे कामदेवस्स समणोवासयस्स तीसे य जाव धम्मकहा समत्ता ॥ २२ ॥ कामदेवा ! इ समणे भगवं महावीरे कामदेवं समणोवासयं एवं वयासी-से नूणं कामदेवा ! तुब्भं पुव्वरत्तावरत्तकालसमयंसि एगे देवे अन्तिए पाउब्भूए, तए णं से देवे एगं महं दिव्वं पिसायरूवं विउव्वइ, विउ-व्वित्ता आसु-रुते ४ एगं महं नीलुप्पल-जाव असिं गहाय तुमं एवं वयासी-हं भो कामदेवा ! जाव जीवियाओ ववरोविज्जसि, तं तुमं तेणं देवेणं एवं बुत्ते समणे अभीए जाव विहरसि, एवं वण्णगरहिया तिण्णि-वि उवसग्गा तहेव पडिउच्चारयेक्का जाव देवो पडिगओ । से नूणं कामदेवा ! अट्ठे समट्ठे ? हन्ता, अत्थि । 'अज्जो ! इ समणे भगवं महावीरे बह्वे समणे निग्गन्थे य निग्गन्थीओ य आमन्तेत्ता एवं वयासी-जइ ताव अज्जो ! समणोवासगा गिहिणो गि(हि)हमज्झावसन्ता दिव्वमा-णु(र)सतिरिक्खजोणिए उवसग्गे सम्मं सहन्ति जाव अहियासेन्ति, सक्का-पुणा(इ)इं अज्जो ! समणेहिं निग्गन्थेहिं दुबालसङ्गं गणिपिडगं अहिज्जमाणेहिं दिव्वमाणुसति-रिक्खजोणिए सम्मं सहितए जाव अहियासित्तए । तओ ते बह्वे समणा निग्गन्था य निग्गन्थीओ य समणस्स भगवओ महावीरस्स त(हि)हत्ति एयमट्ठं विणएणं पडिसु-णन्ति । तए णं से कामदेवे समणोवासए ह० जाव समणं भगवं महावीरं पसिणाइं पुच्छइ, अट्ठमादियइ, समणं भगवं महावीरं तिक्खुत्तो वन्दइ नमंसइ, वंदित्ता नमं-सित्ता जामेव दि-सिं पाउब्भूए तामेव दि-सिं पडिगए । तए णं समणे भगवं महावीरे अन्नया कयाइ चम्पाओ पडिणिक्खमइ, पडिनिक्खमिता बहिया जणवय-विहारं विहरइ ॥ २३ ॥ तए णं से कामदेवे समणोवासए पढमं उवासगपडिमं उव-सम्पज्जित्ताणं विहरइ, तए णं से कामदेवे समणोवासए बहूहिं [सीलवएहिं] जाव भावेत्ता वीसं वासाइं समणोवासगपरियागं पाउणित्ता एक्कारस उवासगपडिमाओ सम्मं काएणं फासेत्ता मासियाए संलेहणाए अप्पाणं झुसित्ता सट्ठिं भत्ताइं अणसणाए छेदेत्ता आलोइयपडिक्कन्ते समाहिपत्ते कालमासे कालं किच्चा सोहम्मं कप्पे सोहम्म-वडिसयस्स महाविमाणस्स उत्तरपुरत्थिमेणं अरुणामे विमाणे देवत्ताए उववञ्चे । तत्थ णं अत्थेगइयाणं देवाणं चत्तारि पलिओवसाइं ठिई पणत्ता, (तत्थणं) काम-

देवस्स-ऽवि देवस्स चत्तारि पलिओवमाई ठिई पण्णत्ता । से णं भन्ते ! कामदेवे (देवे) ताओ देवलोगाओ आउक्खएणं भवक्खएणं ठिइक्खएणं अणन्तरं चयं चइत्ता कहिं गमिहिइ, कहिं उववज्जिहिइ ? गोयमा ! महाविदेहे वासे सिज्जिहिइ (जाव सव्वदुक्खा०) ॥ २४ ॥ निक्खेवो ॥ सत्तमस्स अङ्गस्स उव्वसगद-साणं वीयं अज्जयणं समत्तं ॥

उक्खेवो तइयस्स अज्जयणस्स । एवं खलु जम्बू ! तेणं कालेणं तेणं समएणं वाणारसी नामं नयरी(होत्था), कोट्ट(गनाम)ए उज्जाणे, जियसत्तू राया । तत्थ णं वाणारसीए न(य)गरीए चुलणीपिया नामं गाहावई परिवसइ, अट्ठे जाव अपरिभूए । सामा भारिया । अट्ठ हिरण्णकोडीओ निहाणपउत्ताओ, अट्ठ-वु-ट्ठिपउत्ताओ, अट्ठ-पवित्थरपउत्ताओ, अट्ठ वया दसगोसाहस्सिएणं वएणं, जहा आणं(दो)दे राईसर[०] जाव सव्वकज्जवट्ठावए यावि होत्था । सामी समोस(ट्ठे)दे, परिसा निग्गया, चुलणी-पिया-वि जहा आणन्दो तहा निग्गओ, तहेव गिहिधम्मं पडिवज्जइ । गोयमपुच्छा तहेव सेसं जहा कामदेवस्स जाव पोसहसालाए पोसहिए बम्मचारी समणस्स भग-वओ महावीरस्स अन्तियं धम्मपण्णत्तिं उव्वसम्पज्जिता-णं विहरइ ॥ २५ ॥ तए णं तस्स चुलणीपियस्स समणोवासयस्स पुव्वरत्तावरत्तकालसमयंसि एगे देवे अन्तियं पाउभूए । तए णं से देवे एगं(महं) नीलुप्पल-जाव असिं गहाय चुलणीपियं समणोवासयं एवं वयासी-हं भो चुलणीपिया ! समणोवासया ! जहा कामदे(वे)वो जाव न भज्जसि तो ते अहं अज्ज जेट्ठं पुत्तं साओ गिहाओ नीणेमि, नीणेत्ता तव अग्गओ घाएमि, घाएत्ता तओ मंससोल्ले करेमि, करेत्ता आदाणभरियंसि कडाहयंसि अइहेमि, अइहेत्ता तव गायं मंसेण य सोणिण्ण य आ(इं)यन्नामि, जहा णं तुमं अट्ठदु-हट्ठवसट्ठे अकाले चेव जीवियाओ ववरोवि(जा)जसि ॥ २६ ॥ तए णं से चुलणीपिया समणोवासए तेणं देवेणं एवं वुत्ते समाणे अभीए जाव विहरइ । तए णं से देवे चुलणीपियं समणोवासयं अभीयं जाव पासइ, पासित्ता दोच्चं-पि तच्चं-पि चुलणीपियं समणोवासयं एवं वयासी-हं भो चुलणीपिया ! समणोवासया ! तं चेव भणइ, सो जाव विहरइ । तए णं से देवे चुलणीपियं समणोवासयं अभीयं जाव पासित्ता आइ-रुत्ते ४ चुलणीपियस्स समणोवास-यस्स जेट्ठं पुत्तं गिहाओ नीणेइ, नीणेत्ता अग्गओ घाएइ, घाएत्ता तओ मंससोल्ले करेइ, करेत्ता आदाणभरियंसि कडाहयंसि अइहेइ, अइहेत्ता चुलणीपियस्स समणोवासयस्स गायं मंसेण य सो(णी)णिण्ण य आयच्चइ । तए णं से चुलणीपिया समणोवासए तं उज्जलं जाव अहियासेइ । तए णं से देवे चुलणीपियं समणोवासयं अभीयं जाव पासइ, पासित्ता दोच्चं-पि चुलणी-

पियं समणोवासयं एवं वयासी-हं भो चुलणीपिया ! समणोवासया ! अपत्थिय-
 प(त्थि)त्थया [!] जाव न भजसि तो ते अहं अज्ज मज्झिमं पुत्तं साओ गिहाओ
 नीणेमि, नीणेत्ता तव अग्गओ घाएमि, जहा जेढुं पुत्तं तहेव भणइ, तहेव करेइ ।
 एवं तच्चं-पि कणीयसं जाव अहियासेइ ॥ २७ ॥ तए णं से देवे चुलणीपियं
 समणोवासयं अभीयं जाव पासइ, पासित्ता चउत्थं-पि चुलणीपियं समणोवासयं एवं
 वयासी-“हं भो चुलणीपिया ! समणोवासया ! अपत्थियप-त्थ० ४ जइ णं तुमं
 जाव न भजसि तओ अहं अज्ज जा इमा तव माया भद्दा सत्थवा(हिणी)ही देवय-
 गुरुजणणी दुक्करदुक्करकारिया तं ते साओ गिहाओ नीणेमि, नीणेत्ता तव अग्गओ
 घाएमि, घाएत्ता तओ मंससोल्लए करेमि, करेत्ता आदाणभरियंसि कडाहयंसि अह-
 हेमि, अहहेत्ता तव गायं मंसेण य सोणिण्ण य आयच्चामि जहा णं तुमं अट्टुहट्टव-
 सेंडे अकाले चेव जीवियाओ ववरोविजसि” । तए णं से चुलणीपिया समणोवासए
 तेणं देवेणं एवं वुत्ते समाणे अभीए जाव विहरइ । तए णं से देवे चुलणीपियं
 समणोवासयं अभीयं जाव विहरमाणं पासइ, पासित्ता चुलणीपियं समणोवासयं
 दोच्चं-पि तच्चं-पि एवं वयासी-हं भो चुलणीपिया ! समणोवासया ! तहेव जाव
 ववरोविजसि । तए णं तस्स चुलणीपियस्स समणोवासयस्स तेणं देवेणं दोच्चं-पि
 तच्चं-पि एवं वुत्तस्स समाणस्स इमेयारूवे अज्झत्थिए ५-अहो णं इमे पुरिसे अणा-
 रिए (अणारियवुद्धी) अणारि(याइं पावाइं)यकम्माइं समायरइ, जेणं म(म)मं जेढुं
 पुत्तं साओ गिहाओ नीणेइ, नीणेत्ता मम अग्गओ घाएइ, घाएत्ता जहा कयं तथा
 चिन्तेइ जाव गायं आयच्चइ, जेणं म-मं मज्झिमं पुत्तं साओ गिहाओ जाव
 सोणिण्ण य आयच्चइ, जेणं ममं कणीयसं पुत्तं साओ गिहाओ तहेव जाव आयच्चइ,
 जा-ऽ-वि य णं इमा ममं माया भद्दा सत्थवाही देवयगुरुजणणी दुक्करदुक्करकारिया
 तं-पि य णं इच्छइ सा(सया)ओ गिहाओ नीणेत्ता मम अग्गओ घा(इ)एत्तए, तं
 सेयं खलु ममं एयं पुरिसं गिण्हित्तए त्तिकट्ट उ(ट्टा)द्वाइए, से-ऽ-वि य आगासे उप्प-
 इए, तेणं च खम्मे आसाइए, महया महया सदेणं कोलाहले कए, तए णं सा भद्दा
 सत्थवा-ही तं कोलाहलसइं सोच्चा निसम्म जेणेव चुलणीपिया समणोवासए तेणेव
 उवागच्छइ, उवागच्छित्ता चुलणीपियं समणोवासयं एवं वयासी-किण्णं पुत्ता ! तुमं
 महया महया सदेणं कोलाहले कए ? तए णं से चुलणीपिया समणोवासए अम्मयं
 भइं सत्थवाहिं एवं वयासी-एवं खलु अम्मो ! न जा(या)णामि, केवि पुरिसे आस-
 रुते ५ एणं महं नीलुप्पल-जाव असि गहाय ममं एवं वयासी-हं भो चुलणी-
 पि० समणोवासया ! अपत्थियप-त्थया ४ वज्जिया जइ णं तुमं जाव ववरोविजसि ।

(त०णं) अहं तेणं पुरिसेणं एवं वुत्ते समाणे अभीए जाव विहरामि । तए णं से पुरिसे ममं अभीयं जाव विहरमाणं पासइ, पासित्ता ममं दोच्चं-पि तच्चं-पि एवं वयासी-हं भो चुलणीपि० समणोवासया ! तहेव जाव गायं आयच्चइ । तए णं अहं तं उज्जलं जाव अहियासेमि । एवं तहेव उच्चारयव्वं सव्वं जाव कणीयसं जाव आयच्चइ, अहं तं उज्जलं जाव अहियासेमि । तए णं से पुरिसे ममं अभीयं जाव पासइ, पासित्ता ममं चउत्थं-पि एवं वयासी-हं भो चुलणीपि० समणोवासया ! अपत्थिय-प-त्थया जाव न भज्जसि तो ते अज्ज जा इमा (तव) माया (भ०) गुरु[०] जाव वव-रोविज्जसि । तए णं अहं तेणं पुरिसेणं एवं वुत्ते समाणे अभीए जाव विहरामि । तए णं से पुरिसे दोच्चं-पि तच्चं-पि ममं एवं वयासी-हं भो चुलणीपि० समणोवासया ! अज्ज जाव ववरोविज्जसि । तए णं तेणं पुरिसेणं दोच्चं-पि तच्चं-पि ममं एवं वुत्तस्स समा-णस्स इ(अय)मेयारुवे अज्झत्थिए ५-अहो णं इमे पुरिसे अणारिए जाव समायरइ, जेणं म-मं जेढ्ढं पुत्तं साओ गिहाओ तहेव जाव कणीयसं जाव आयच्चइ, तु(ज्जे)ब्भे-
 S-वि य णं इच्छइ साओ गिहाओ नीणेत्ता मम अग्गओ घाएत्तए, तं सेयं खलु ममं एयं पुरिसं गिण्हितए त्तिकट्ठ उ-द्धाइए, से-S-वि य आगासे उप्पइए, मए-S-वि य खम्ममे आसाइए, महया महया सहेणं कोलाहले कए ॥ २८ ॥ तए णं सा भद्दा सत्थवाही चुलणीपियं समणोवासयं एवं वयासी-नो खलु के(इ)ई पुरिसे तव जाव कणीयसं पुत्तं साओ गिहाओ नीणेइ, नीणेत्ता तव अग्गओ घाएइ, एस(न) णं केइ पुरिसे तव उवसग्गं करेइ, एस णं तुमे विदरिसणे दिट्ठे, तं णं तुमं इ(दा)याणिं भग्गव्वए भग्गनियमे भग्गपोस(होववासे)हे विहरसि, तं णं तुमं पुत्ता ! एयस्स ठाणस्स आलोएहि जाव पडिवज्जाहि । तए णं से चुलणीपिया समणोवासए अम्मगाए भद्दाए सत्थवाहीए तहत्ति एयमट्ठं विणएणं पडिसुणेइ, पडिसुणेत्ता तस्स ठाणस्स आलोएइ जाव पडिवज्जइ ॥ २९ ॥ तए णं से चुलणीपिया समणोवासए पढमं उवासग-पडिमं उवसम्पज्जित्ता-णं विहरइ, पढमं उवासगपडिमं अहासुत्तं जहा आणन्दो जाव ए(इ)क्कारस-वि । तए णं से चुलणीपिया समणोवासए तेणं उरालेणं जहा कामदेवो जाव सोहम्ममे कप्पे सोहम्मवडिसगस्स महाविमाणस्स उत्तरपुरत्थिमेणं अत्तणप्पमे विमाणे देवत्ताए उवव(न्नो)न्ने । चत्तारि पल्लिओवसाईं ठिई (जाव) पण्णत्ता । महाविदेहे वासे सिज्झिहिइ ५ ॥ ३० ॥ निक्खेवो (तहेव) ॥ सत्तमस्स अङ्गस्स उवासगदसाणं तइयं अज्झयणं समत्तं ॥

उक्खेवओ चउत्थस्स अज्झयणस्स । एवं खलु जम्बू ! तेणं कालेणं तेणं सम-एणं वाणारसी नामं नयरी । कोट्टए उज्जाणे । जियस-तू राया । सुरादेवे गाहाव-ई,

अङ्के (जाव अपरिभूए) । छ हिरण्णकोडीओ जाव छ वया दसगोसाहस्सिएणं वएणं ।
 धन्ना भारिया । सामी समोसडे । जहा आणन्दो तहेव पडिवज्जइ गिहिधम्मं । जहा
 कामदेवो जाव समणस्स भगवओ महावीरस्स धम्मपण्णात्तिं उवसम्पज्जिता-णं विहरइ
 ॥ ३१ ॥ तए णं तस्स सुरादेवस्स समणोवासयस्स पुव्वरत्तावरत्तकालसमयंसि एगे
 देवे अन्तित्यं पाउब्भवित्था । से देवे एगं महं नीलुप्पल-जाव असिं गहाय सुरादेवं
 समणोवासयं एवं वयासी-हं भो सुरादे० समणोवासया ! अपत्थियप-त्थया ४ जइ
 णं तुमं सी(लव्वया)लाई जाव न भज्जसि तो ते जेट्ठं पुत्तं साओ गिहाओ नीणेमि,
 नीणेत्ता तव अगगओ घाएमि, घाएत्ता पच्च (मंस)सोल्लए करेमि, (२ ता) आ(या)-
 द्वाणभरियंसि कडाहयंसि अह्वेमि, अह्वेत्ता तव गायं मंसेण य सोणिणय य आ(-च)-
 यच्चामि, जहा णं तुमं अकाले चेव जीवियाओ ववरोविज्जसि । एवं मज्झि(मं)मयं,
 कणीयसं, एकेके पच्च सोल्लया, तहेव करेइ, जहा चुलणीपियस्स, नवरं एकेके पच्च
 सोल्लया । तए णं से देवे सुरादेवं समणोवासयं चउत्थं-पि एवं वयासी-हं भो सुरा-
 देवा ! समणोवासया ! अपत्थियप-त्थया ४ जाव न परिच्चय(भंज)सि (त)तो (अहं)
 ते अज्ज (तव) सरीरंसि जमगसमगमेव सोलस रोगायङ्के पक्खि(वे)वामि, तं-जहा-
 सासे, कासे जाव को(डए)ढे, ज-हा णं तुमं अट्ठदुहट्ठ[०] जाव ववरोविज्जसि । तए
 णं से सुरादेवे समणोवासए जाव विहरइ । एवं देवो दोब्बं-पि तच्चं-पि भणइ जाव
 ववरोविज्जसि ॥ ३२ ॥ तए णं तस्स सुरादेवस्स समणोवासयस्स तेणं देवेणं दोब्बं-पि
 तच्चं-पि एवं वुत्तस्स समाणस्स इमेयारूवे अज्झत्थिए ४ (समु०)-अहो णं इमे पुरिसे
 अणारिए जाव समायरइ, जेणं ममं जेट्ठं पुत्तं जाव कणीयसं जाव आयच्चइ, जे-ऽ-वि
 य इमे सोलस रोगायङ्का ते-ऽ-वि य इच्छइ मम सरीरगंसि पक्खिवित्तए, तं सेयं खलु
 ममं एयं पुरिसं गिण्हित्तए तिकट्ठ उ-द्धाइए । से-ऽ-वि य आगासे उप्पइए, तेण य
 खम्मे आसाइए, महया महया सहेणं कोलाहले कए ॥ ३३ ॥ तए णं सा धन्ना भारिया
 कोलाह(लसइं)लं सोच्चा निसम्म जेणेव सुरादेवे समणोवासए तेणेव उवागच्छइ,
 उवागच्छित्ता एवं वयासी-किण्णं देवाणुप्पिया ! तुब्भेहिं महया महया सहे(ण)णं
 कोलाहले कए ? तए णं से सुरादेवे समणोवासए धज्जं भारियं एवं वयासी-एवं खलु
 देवाणुप्पिए ! के(इ)-ऽ-वि पुरिसे तहेव कहेइ जहा चुलणीपिया । धन्ना-ऽ-वि पडि-
 भणइ-जाव कणीयसं, नो खलु देवाणुप्पिया ! तुब्भं के-ऽ-वि पुरिसे सरीरंसि जमग-
 समगं सोलस रोगायङ्के पक्खिवइ, एस-णं के-वि पुरिसे तुब्भं उवसगं करेइ, सेसं
 जहा चुलणीपियस्स तहा भणइ । एवं सेसं जहा चुलणीपियस्स निरवसेसं जाव
 सोहम्(म)मे कप्पे अरुणकन्ते विमाणे उववजे । चत्तारि पल्लिओवमाइं ठिई, महा-

विदेहे वासे सिञ्जिहिइ ५ ॥ ३४ ॥ निक्खेवो ॥ सत्तमस्स अङ्गस्स उवास-
गदसाणं चउत्थं अज्झयणं समत्तं ॥

उक्खेवो पञ्चमस्स । एवं खलु जम्बू । तेणं कालेणं तेणं समएणं आ(लं)लभिया
नामं नयरी-। सङ्खवणे उज्जाणे । जियसत्तू राया । चुल्लसयए गाहावई(परिवसइ),
अट्टे जाव छ हिरण्णकोडीओ जाव छ वया दसगोसाहस्सिएणं वएणं । बहुला भारिया ।
सामी समोस-ढे । जहा आणंदो तहा (धम्मं सोच्चा) गिहिधम्मं पडिवज्जइ, सेसं जहा
कामदे-वो जाव धम्मपण्णातिं उवसम्पज्जित्ताणं विहरइ ॥ ३५ ॥ तए णं तस्स चुल्लसय-
गस्स समणोवासयस्स पुव्वरत्तावरत्तकालसमयंसि एगे देवे अन्तियं जाव असिं गहाय
एवं वयासी-हं भो चुल्लसय० समणोवासया ! जाव न भज्जसि तो ते अज्ज जेहं पुत्तं साओ
गिहाओ नीणेमि, एवं जहा चुलणीपियं, नवरं एक्केक्के सत्त मंससोल्लया जाव कणीयसं
जाव आयञ्चामि । तए णं से चुल्लसयए समणोवासए जाव विहरइ । तए णं से देवे
चुल्लसयगं समणोवासयं चउत्थं-पि एवं वयासी-हं भो चुल्लसयगा ! समणोवासया !
जाव न भज्जसि तो ते अज्ज जाओ इमाओ छ हिरण्णकोडीओ निहाणपउत्ताओ, छ
बु-द्धिपउत्ताओ, छ पवित्थरपउत्ताओ (सव्वाओ) ताओ साओ गिहाओ नीणेमि, नीणेत्ता
आ-लभियाए नयरीए सिङ्गाडग[०]जाव पहेसु सव्वओ समन्ता विप्पइरामि, ज-हा
णं तुमं अट्टदुहइवसट्ठे अकाले चेव जीवियाओ ववरोविज्जसि ॥ ३६ ॥ तए णं
से चुल्लसयए समणोवासए तेणं देवेणं एवं वुत्ते समाणे अभीए जाव विहरइ । तए णं
से देवे चुल्लसयगं समणोवासयं अभीयं जाव पासित्ता दोच्चं-पि तच्चं-पि तहेव भणइ
जाव ववरोविज्जसि । तए णं तस्स चुल्लसयगस्स समणोवासयस्स तेणं देवेणं दोच्चं-पि
तच्चं-पि एवं वुत्तस्स समाणस्स अयमेयारुवे अज्झत्थिए ४-‘अहो णं इमे पुरिसे
अणारिए जहा चुलणीपिया तहा चिन्तेइ जाव कणीयसं जाव आयञ्चइ, जाओ-ऽ-वि
य णं इमाओ म-मं छ हिरण्णकोडीओ निहाणपउत्ताओ छ बु-द्धिपउत्ताओ छ
पवित्थरपउत्ताओ ताओ-ऽ-वि य णं इच्छइ ममं साओ गिहाओ नीणेत्ता आ-लभियाए
नयरीए सिङ्गाडग-जाव विप्पइरित्तए, तं सेयं खलु ममं एयं पुरिसं गिहिहत्तए”
ति-कट्ठु उ-द्धाइए जहा खुरादे-वो तहेव भारिया पुच्छइ तहेव कहे० । सेसं जहा
चुलणीपियस्स जाव सोहम्मे कप्पे अरुणसिट्ठे विमाणे उववन्ने, चत्तारि पलिओवमाई
ठिई । सेसं तहे(तं चे)व जाव महाविदेहे वासे सिञ्जिहिइ[५] ॥ ३७ ॥ निक्खेवो ॥
सत्तमस्स अङ्गस्स उवासगदसाणं पञ्चमं अज्झयणं समत्तं ॥

छट्ठस्स उक्खेवओ । एवं खलु जम्बू । तेणं कालेणं तेणं समएणं कम्पिहपुरे
नयरे । सह(स्)सम्भवणे उज्जाणे । जियसत्तू राया । कुण्डकोलिए गाहावई । पूसा

भारिया । छ हिरण्णकोडीओ निहाणपउत्ताओ, छ बुद्धिपउत्ताओ, छ पवित्थरपउ-
 ताओ, छ वया दसगोसाहस्सिएणं वएणं । सामी समोसडे । जहा कामदेवो तहा साव-
 यधम्मं पडिवज्जइ । (से) स(वे)चेव वत्तव्वया जाव पडिलाभेमाणे विहरइ ॥ ३८ ॥
 तए णं से कुण्डकोलिए समणोवासए अज्जया कयाइ पुव्वावरण्हकालसमयंसि जेणेव
 असोगवणिया जेणेव पुढविसिलापट्टए तेणेव उवागच्छइ, उवागच्छिता नाममुद्गं
 च उत्तरिज्जगं च पुढ(वी)विसिलापट्टए ठवेइ, ठवेत्ता समणस्स भगवओ महावीरस्स
 अन्तिर्यं धम्मपण्णत्तिं उवसम्पज्जिता-णं विहरइ ॥ ३९ ॥ तए णं तस्स कुण्डकोलि-
 यस्स समणोवासयस्स एगे देवे अन्तिर्यं पाउब्भवित्था । तए णं से देवे नामसु(इगं)दं
 च उत्तरि(र्यं)ज्जं च पुढ-विसिलापट्टयाओ गे(गि)ण्हइ, २ ता सखिखिणिं[०] अन्तलि-
 क्खपडिववे कुण्डकोलियं समणोवासयं एवं वयासी-हं भो कुण्डकोलि-समणोवासया ।
 सुन्दरी णं देवाणुप्पिया ! गोसालस्स मङ्गलिपुत्तस्स धम्मपण्णत्ती, नत्थि उट्ठाणे
 इ वा कम्मे इ वा बळे इ वा वी(वि)रिए इ वा पुरिसक्कारपरक्कमे इ वा, नियया सव्व-
 भावा, मंगुली णं समणस्स भगवओ महावीरस्स धम्मपण्णत्ती, अत्थि उट्ठाणे इ
 वा कम्मे इ वा बळे इ वा वीरिए इ वा पुरिसक्कारपरक्कमे इ वा, अणियया
 सव्वभावा ॥ ४० ॥ तए णं से कुण्डकोलिए समणोवासए तं देवं एवं वयासी-
 जइ णं देवा-! सुन्दरी गोसालस्स मङ्गलिपुत्तस्स धम्मपण्णत्ती-नत्थि उट्ठाणे इ वा
 जाव नियया सव्वभावा, मंगुली णं समणस्स भगवओ महावीरस्स धम्मपण्णत्ती-
 अत्थि उट्ठाणे इ वा जाव अणियया सव्वभावा, तुमे णं देवा-! इमा एयारूवा दिव्वा
 देविट्ठी दिव्वा देवजुई दिव्वे देवाणुभावे किणा लद्धे, किणा पत्ते, किणा अभि-
 समन्नागए, किं उट्ठाणेणं जाव पुरिसक्कारपरक्कमेणं, उदाहु अणुट्ठाणेणं अकम्मेणं
 जाव अपुरिसक्कारपरक्कमेणं ? तए णं से देवे कुण्डकोलियं समणोवासयं एवं वयासी-
 एवं खलु देवाणुप्पिया । मए इमेयारूवा दिव्वा देविट्ठी ३ अणुट्ठाणेणं जाव अपुरि-
 सक्कारपरक्कमेणं लद्धा पत्ता अभिसमन्नागया । तए णं से कुण्डकोलिए समणोवासए
 तं देवं एवं वयासी-जइ णं देवा-! तुमे इमा एयारूवा दिव्वा देविट्ठी ३ अणुट्ठाणेणं
 जाव अपुरिसक्कारपरक्कमेणं लद्धा पत्ता अभिसमन्नागया, जेसि णं जीवाणं नत्थि
 उट्ठाणे इ वा जाव परक्कमे इ वा, ते किं न देवा ? अहं णं देवा-! तुमे इमा एयारूवा
 दिव्वा देविट्ठी ३ उट्ठाणेणं जाव परक्कमेणं लद्धा पत्ता अभिसमन्नागया, तो जं
 वदसि-सुन्दरी णं गोसालस्स मङ्गलिपुत्तस्स धम्मपण्णत्ती, नत्थि उट्ठाणे इ वा जाव
 नियया सव्वभावा, मंगुली णं समणस्स भगवओ महावीरस्स धम्मपण्णत्ती-अत्थि
 उट्ठाणे इ वा जाव अणियया सव्वभावा, तं ते मिच्छा । तए णं से देवे कुण्ड-

कोलिएणं समणोवासएणं एवं तुते समाणे संकिए जाव कळु(स)सं समावन्ने नो संचाएइ कुण्डकोलियस्स समणोवासयस्स किंचि पा(मु)मोक्खमाइक्खित्तए, नाममुद्दयं च उत्तरिज्जयं च पुढविसिलापट्टए ठवेइ, ठवेत्ता जामेव दि-सिं पाउब्भूए तामेव दि-सिं पडिगए । तेणं कालेणं तेणं समएणं सामी समोसडे । तए णं से कुण्ड-कोलिए समणोवासए इमीसे कहाए लद्धट्ठे हट्ट(तुट्ठे) जहा कामदेवो तहा निग्गच्छइ जाव पज्जुवासइ । धम्मकहा ॥ ४१ ॥ 'कुण्डकोलिया' इ समणे भगवं महावीरे कुण्डकोलियं समणोवासयं एवं वयासी-से नूणं कुण्डकोलिया ! कलं तुब्(भं)भ पुव्वा-वरण्हकालसमयंसि असोगवणियाए एगे देवे अन्तियं पाउब्भवित्था । तए णं से देवे नाममुद्दं च तहेव जाव पडिगए । से नूणं कुण्डकोलिया ! अट्ठे समट्ठे ? हन्ता अत्थि । तं धन्ने सि णं तुमं कुण्डकोलिया ! जहा कामदेवो । 'अज्जो' इ समणे भगवं महावीरे समणे निग्गन्थे य निग्गन्थीओ य आमन्तिता एवं वयासी-जइ ताव अज्जो ! गिहिणो गि-हमज(झे)ज्ञावसन्ता णं अन्नउत्थिए अट्ठेहि य हेऊहि य पसि-णेहि य कारणेहि य वागरणेहि य निप्पट्टपसिणवागरणे करेन्ति, सक्का पुणाई अज्जो ! समणेहिं निग्गन्थेहिं दुवालसङ्गं गणिपिडगं अहिज्जमाणेहिं अन्नउत्थिया अट्ठेहि य जाव निप्पट्टपसि(णा)णवागरणा करित्तए । तए णं समणा निग्गन्था य निग्गन्थीओ य समणस्स भगवओ महावीरस्स तहत्ति एयमट्ठं विणएणं पडि-सुणेन्ति । तए णं से कुण्डकोलिए समणोवासए समणं भगवं महावीरं वंदइ नमं-सइ, वंदित्ता नमंसित्ता पसिणाई पुच्छइ, पुच्छित्ता अट्ठमादियइ, २ ता जामेव दि-सं पाउब्भूए तामेव दि-सं पडिगए । सामी बहिया जगवयविहारं विहरइ ॥ ४२ ॥ तए णं तस्स कुण्डकोलियस्स समणोवासयस्स बहूहिं सील[०]जाव भावेमाणस्स चोइ[र]स संवच्छराई व(वि)इक्कन्ताई, पण्णरसमस्स संवच्छरस्स अन्तरा वट्टमाणस्स अन्नया कयाइ जहा कामदेवो तहा जेट्टपुत्तं (कुटुंबे) ठवेत्ता तहा पोसहसालाए जाव धम्मपण्णत्ति उवसम्पज्जित्ता-णं विहरइ । एवं एक्कारस उवासगपडिमाओ, तहेव जाव सोहम्मो कप्पे अरणज्जए विमाणे जाव अन्तं काहिइ ॥ ४३ ॥ निक्खेवो ॥ सत्त-मस्स अङ्गस्स उवासगदसाणं छट्ठं अज्जयणं समत्तं ॥

सत्तमस्स उक्खेवो । पोलासपु(र)रे नामं नयरे । सहस्सम्बव(णं)णे उज्जा-णे । जिय-सत्तू राया । तत्थ णं पोलासपुरे नयरे सद्दालपुत्ते नामं कुम्भकारे आजीविओवासए परिवसइ, आजीवियसमयंसि लद्धट्ठे गहियट्ठे पुच्छियट्ठे विणिच्छियट्ठे अभिगयट्ठे अट्ठिमिजपेमाणरागरत्ते य, अयमाउसो ! आजीवियसमए अट्ठे अयं परमट्ठे सेसे अणट्ठेत्ति (एवं) आजीवियसमएणं अप्पाणं भावेमाणे विहरइ । तस्स णं सद्दालपुत्तस्स

आजीविओवासगस्स एक्का हिरण्णकोडी निहाणपउत्ता, एक्का वुद्धिपउत्ता, एक्का पवित्थरपउत्ता, ए(गे)क्के वए दसगोसाहस्सिएणं वएणं । तस्स णं सद्दालपुत्तस्स आजीविओवास(य)गस्स अविगमिता नामं भारिया होत्था । तस्स णं सद्दालपुत्तस्स आजीविओवासगस्स पोलासपुरस्स नगरस्स बहिया पच्च कुम्भकारावणसया होत्था । तत्थ णं बहवे पुरिसा दिण्णभइभत्तवेयणा कल्लकल्लिं बहवे करए य वारए य पिहडए य वडए य अद्धघडए य कलसए य अलिञ्जरए य जम्बूलए य उट्टियाओ य करेन्ति । अन्ने य से बहवे पुरिसा दिण्णभइभत्तवेयणा कल्लकल्लिं तेहिं बहूहिं करएहि य जाव उट्टिया(हिं)हि य रायमगंगंसि वित्तिं कप्पेमाणा विहरन्ति ॥ ४४ ॥ तए णं से सद्दालपुत्ते आजीविओवासए अन्नया कयाइ पुब्बा-वरण्हकालसमयंसि जेणेव असोगवणिया तेणेव उवागच्छइ, उवागच्छिता गोसालस्स मङ्गलिपुत्तस्स अन्तियं धम्मपण्णत्तिं उवसम्पज्जिता-णं विहरइ । तए णं तस्स सद्दाल-पुत्तस्स आजीविओवासगस्स एगे देवे अन्तियं पाउब्भवित्था । तए णं से देवे अन्तलिक्खपडिवत्ते सखिंखिणियाइं जाव परिहिए सद्दालपुत्तं आजीविओवासयं एवं वयासी-एहिइ णं देवाणुप्पिया ! कल्लं इ(ह)हं महामाहणे उप्पन्नणाणदंसणधरे तीयप-डुप्पन्नमणागयजाणए अरहा जिणे केवली सव्वण्णू सव्वदरिसी तेलोक्कवहियमहिय-पूइए सदेवमणुयासुरस्स लो-गस्स अच्चणिजे वन्दणिजे (पूयणिजे) सक्कारणिजे संमाण-णिजे कल्लाणं मङ्गलं देवयं चेइयं जाव पज्जुवासणिजे त(वो)क्कम्मसम्पयासम्पउत्ते, तं णं तुमं वन्देज्जाहि जाव पज्जुवासेज्जाहि, पाडिहारिए-णं पीढफलगसिज्जासंथारएणं उवनिमन्तेज्जाहि, दोच्चं-पि तच्चं-पि एवं वयइ वडत्ता जामेव दि-सं पाउब्भूए तामेव दि-सं पडिगए ॥ ४५ ॥ तए णं तस्स सद्दालपुत्तस्स आजीविओवासगस्स तेणं देवेणं एवं वुत्तस्स समाणस्स इमेयारूवे अज्झत्थिए ४ समुप्पन्ने-‘एवं खलु म-मं धम्मायरिए धम्मोवएसए गोसाले मङ्गलिपुत्ते, से णं महामाहणे उप्पन्नणाणदंसणधरे जाव त-च्चक्कम्मसम्पयासम्पउत्ते, से णं कल्लं इहं हव्वमागच्छिस्सइ । तए णं तं अहं वन्दिस्सामि जाव पज्जुवासिस्सामि, पाडिहारिएणं जाव उवनिमन्तिस्सामि’ ॥ ४६ ॥ तए णं कल्लं जाव जलन्ते समणे भगवं महावीरे जाव समोस(ङ्के)रिए । परिसा निग्गया जाव पज्जुवासइ । तए णं से सद्दालपुत्ते आजीविओवासए इमीसे कहाए लद्धे समणे ‘एवं खलु समणे भगवं महावीरे जाव विहरइ, तं गच्छामि णं समणं भगवं महावीरं, वन्दामि जाव पज्जुवासामि’ एवं सम्पेहेइ, संपेहिता ण्हाए सुद्धप्पावेसाइं जाव अप्पमहग्घाभरणालंक्रियसरीरे मणुस्सवग्गुसपरिगए साओ गिहाओ पडिणि-(ग्गच्छ)क्खमइ, २ ता पोलासपुरं नयरं मज्झंमज्झेणं निग्गच्छइ, निग्गच्छिता

जेणेव सहस्सम्बवणे उज्जाणे जेणेव समणे भगवं महावीरे तेणेव उवागच्छइ,
 उवागच्छिता तिकखुत्तो आयाहिणं पयाहिणं करेइ, करेता वन्दइ नमंसइ, वंदित्ता
 नमंसित्ता जाव पज्जुवासइ ॥ ४७ ॥ तए णं समणे भगवं महावीरे सद्दालपुत्तस्स
 आजीविओवासगस्स तीसे य महइ जाव धम्मकहा समत्ता । 'सद्दालपुत्ता' इ समणे
 भगवं महावीरे सद्दालपुत्तं आजीविओवासयं एवं वयासी-‘से नूनं सद्दालपुत्ता ।
 कल्लं तुमं पुव्वावरण्हकालसमयंसि जेणेव असोगवणिया जाव विहरसि । तए णं
 तुब्भं एगे देवे [अन्तिर्यं] पाउब्भवित्था । तए णं से देवे अन्तलिक्खपडिव्वे एवं
 वयासी-हं भो सद्दालपुत्ता ! तं चेव सव्वं जाव पज्जुवासिस्सामि’ । से नूनं सद्दाल-
 पुत्ता ! अट्ठे समट्ठे ? हंता अत्थि । (तं) नो खलु सद्दालपुत्ता ! तेणं देवेणं गोसालं
 मङ्गल्लिपुत्तं पणिहाय एवं वुत्ते । तए णं तस्स सद्दालपुत्तस्स आजीविओवासयस्स
 समणेणं भगवया महावीरेणं एवं वुत्तस्स समाणस्स इमेयाह्वे अज्झत्थिए ४-‘एस
 णं समणे भगवं महावीरे महामाहणे उप्पन्नणाणदंसणधरे जाव तच्चकम्मसम्पया-
 सम्पउत्ते, तं सेयं खलु ममं समणं भगवं महावीरं वन्दित्ता नमंसित्ता पाडिहारिएणं
 पीढफलग[०]जाव उवनिमन्तिताए’ एवं सम्पेहेइ, संपेहिता उट्ठाए उट्ठेइ, उट्ठेत्ता
 समणं भगवं महावीरं वन्दइ नमंसइ, वन्दित्ता नमंसित्ता एवं वयासी-‘एवं खलु
 भन्ते ! ममं पोलासपुरस्स नयरस्स बहिया पच्च कुम्भकारावणसया । तत्थ णं
 तुब्भे पाडिहारियं पीढ[०]जाव संथारयं ओगिण्हित्ता-णं विहरइ’ । तए णं समणे
 भगवं महावीरे सद्दालपुत्तस्स आजीविओवासगस्स एयमट्ठं पडिसुणेइ, पडिसुणेत्ता
 सद्दालपुत्तस्स आजीविओवासगस्स पच्चकुम्भकारावणसएसु फासुएसणिज्जं पाडिहारियं
 पीढफलग-जाव संथारयं ओगिण्हि(या)त्ता-णं विहरइ ॥ ४८ ॥ तए णं से सद्दालपुत्ते
 आजीविओवासए अन्नाया कया(ई)इ वायाहययं कोलालभण्डं अन्तो सालाहितो
 बहिया नीणेइ, नीणेत्ता आयवंसि दलयइ । तए णं समणे भगवं महावीरे सद्दालपुत्तं
 आजीविओवासयं एवं वयासी-‘सद्दालपुत्ता ! एस णं कोलालभण्डे कओ ?’ तए णं
 से सद्दालपुत्ते आजीविओवासए समणं भगवं महावीरं एवं वयासी-एस णं
 भन्ते ! पुत्विं मट्ठिया आसी, तओ पच्छा उदएणं निमिज्जइ, २ ता छारेण य
 करिसेण य एगयओ मीसिज्जइ, २ ता चक्के आ(रु)रोहिज्जइ, त(तो)ओ बहवे करगा
 य जाव उट्ठियाओ य कज्जंति । तए णं समणे भगवं महावीरे सद्दालपुत्तं आजीवि-
 ओवासयं एवं वयासी-‘सद्दालपुत्ता ! एस णं कोलालभण्डे किं उट्ठाणेणं जाव पुरि-
 सक्कारपरक्कमेणं कज्ज(न्ति)ति, उदाहु अणट्ठाणेणं जाव अपुरिसक्कारपरक्कमेणं कज्ज-ति ?’
 तए णं से सद्दालपु(त्तो)त्ते आजीविओवासए समणं भगवं महावीरं एवं वयासी-

‘भन्ते ! अणुट्टाणेणं जाव अपुरिसक्कारपरक्कमेणं(कज्जति), नत्थि उट्टाणे इ वा जाव परक्कमे इ वा, नियया सव्वभावा’ ॥ ४९ ॥ तए णं समणे भगवं महावीरे सद्दाल-
 पुत्तं आजीविओवासयं एवं वयासी-‘सद्दालपुत्ता ! जइ णं तुब्भं केइ पुरिसे वायाहयं वा
 पक्केल्लयं वा कोलालभण्डं अवहरे(ज)जा वा वि(क्खरि-)क्खरेजा वा भिन्दे-जा वा
 अच्छिदे-जा वा परि(ठ)ट्ठवे-जा वा, अग्गिमित्ताए वा भारियाए सद्धिं विउ(उरा)लाई
 भोगभोगाईं भुज्जमाणे विहरे(-वा)जा, तस्स णं तुमं पुरिसस्स किं दण्डं [नि]वत्तेजासि ?’
 भन्ते ! अहं णं तं पुरिसं आओसे-जा वा हणे-जा वा वं(वंधि)धेजा वा महे-जा वा
 तज्जे-जा वा ताले-जा वा निच्छोडे-जा वा निव(भं)भच्छे-जा वा अकाले चेव जीवि-
 याओ ववरो(वि)वे(-वा)जा । सद्दालपुत्ता ! नो खलु तुब्भं(भं)केइ पुरिसे वा(त)याहयं वा
 पक्केल्लयं वा कोलालभण्डं अवह(रे)रइ वा जाव परिट्ठवेइ वा, अग्गिमित्ताए वा भारियाए
 सद्धिं विउलाई भोगभोगाईं भुज्जमाणे विहरइ, नो वा तुमं तं पुरिसं आओसेजसि वा
 ह(णे)णिज्जसि वा जाव अकाले चेव जीवियाओ ववरो-वेजसि, जइ(णं)नत्थि उट्टाणे
 इ वा जाव परक्कमे इ वा नि(ति)यया सव्वभावा । अ(हं)ह णं तुब्भं के(इं)इ पुरिसे
 वायाहयं जाव परिट्ठवेइ वा, अग्गिमित्ताए वा जाव विहरइ, तुमं वा तं पुरिसं
 आओसेसि वा जाव ववरो(-ज्ज)वेसि, तो जं वदसि नत्थि उट्टाणे इ वा जाव नियया
 सव्वभावा तं ते मिच्छा । एत्थ णं से सद्दालपुत्ते आजीविओवासए सम्बुद्धे ॥ ५० ॥
 तए णं से सद्दालपुत्ते आजीविओवासए समणं भगवं महावीरं वन्दइ नमंसइ,
 वन्दिता नमंसित्ता एवं वयासी-‘इच्छामि णं भन्ते ! तुब्भं अन्ति(यं)ए धम्मं निसा-
 मेत्तए’ । तए णं समणे भगवं महावीरे सद्दालपुत्तस्स आजीविओवासगस्स तीसे
 य जाव धम्मं परिकहेइ । तए णं से सद्दालपुत्ते आजीविओवासए समणस्स भग-
 वओ महावीरस्स अन्तिए धम्मं सोच्चा निसम्म हट्ठुट्ठ जाव हियए जहा आणंदो
 तहा गिहिधम्मं पडिवज्जइ । नवरं एगा हिरण्णकोडी निहाणपउत्ता, एगा हिरण्ण-
 कोडी खुट्ठिपउत्ता, एगा हिरण्णकोडी पवित्थरपउत्ता, ए(ग)गे वए दसगोसाहस्सिएणं
 वएणं, जाव समणं भगवं महावीरं वन्दइ नमंसइ, वन्दिता नमंसित्ता जेणेव
 पोलासपुरे नयरं तेणेव उवागच्छइ, उवागच्छित्ता पोलासपुरं नयरं मज्झमज्झेणं
 जेणेव सए गिहे जेणेव अग्गिमित्ता भारिया तेणेव उवागच्छइ, उवागच्छित्ता
 अग्गिमित्तं भारियं एवं वयासी-‘एवं खलु देवाणुप्पिए ! समणे भगवं महावीरे
 जाव समोस-ढे, तं गच्छाहि णं तुमं समणं भगवं महावीरं, वन(द)दाहि जाव पज्जु-
 वा(स)साहि, समणस्स भगवओ महावीरस्स अन्तिए पच्चाणुव्वइयं सत्तसिक्खावइयं
 सुवालसविहं गिहिधम्मं पडिव-जाहि’ ॥ ५१ ॥ तए णं सा अग्गिमित्ता भारिया

सद्दालपुत्तस्स समणोवासगस्स 'त-ह'ति एयमट्ठं विणए-णं पडिखुण्हेइ । तए णं से सद्दालपुत्ते समणोवासए कोडुम्बियपुरिसे सद्दवेइ, सद्दविता एवं वयासी- 'खिप्पामेव भो देवाणुप्पिया ! लहुकरणजुत्तजोइयं समखुरवालिहाणसमलिहियसिअए(हि)हिं जम्बू-
 णयामयकलावजोत्तपइविसिअएहिं रययामयवण्टसुत्तरजुगवरकच्चणखइयनत्थापग्गहोग्ग-
 हि(य)एहिं नीलुप्पलकयामे(ल्ल)लएहिं पवरगोणजुवाणएहिं नाणामणिकगगघण्टिया-
 जालपरिगयं सुजायजुगजुत्तउज्जुगपसत्थसुविरइयनिम्मियं पवरलक्खणोववेयं जुत्तामेव
 धम्मियं जाणप्पवरं उवट्ठवेह, उवट्ठवेत्ता मम एयमाणतियं पच्चप्पिणह' । तए
 णं ते कोडुम्बियपुरिसा जाव पच्चप्पिणन्ति ॥ ५२ ॥ तए णं सा अग्गिमित्ता
 भारिया ण्हाया सुद्धप्पावेसाइं जाव अप्पमहग्गवाभरणाळंकियसरीरा (जाव) चेडिया-
 चक्कवालपरिकिण्णा धम्मियं जाणप्पवरं दुरुहइ, दुरुहिता पोलासपुरं नग(णय)रं मज्झं-
 मज्झेणं निग्गच्छइ, निग्गच्छित्ता जेणेव सहस्सम्बवणे उज्जाणे तेणेव उवागच्छइ,
 उवागच्छित्ता धम्मियाओ जाणाओ पच्चोरुहइ, पच्चोरुहिता चेडियाचक्कवालपरिवुडा
 जेणेव समणे भगवं महावीरे तेणेव उवागच्छइ, उवागच्छित्ता तिक्खुतो जाव
 वन्दइ नमंसइ, वंदित्ता नमंसित्ता नच्चासन्ने नाइदूरे जाव पञ्जलिउडा ठिइया चेव
 पज्जुवासइ ॥ ५३ ॥ तए णं समणे भगवं महावीरे अग्गिमित्ताए तीसे य जाव
 धम्मं कहेइ । तए णं सा अग्गिमित्ता भारिया समणस्स भगवओ महावीरस्स
 अन्तिए धम्मं सोच्चा निसम्म दट्ठतुट्ठा समणं भगवं महावीरं वन्दइ नमंसइ,
 वंदित्ता नमंसित्ता एवं वयासी- 'सद्दहामि णं भन्ते ! निग्गन्थं पावयणं जाव से
 जहेयं तुब्भे व(द)यह, जहा णं देवाणुप्पियाणं अन्तिए बहवे उग्गा भोगा जाव
 पव्वइया नो खलु अहं तहा संचाएमि देवाणुप्पियाणं अन्तिए मुण्डा भवित्ता जाव
 अ(ह)हं णं देवाणुप्पियाणं अन्तिए पञ्चाणुव्वइयं सत्तसिक्खावइयं दुवालसविहं गिहि-
 धम्मं पडिवजिस्सामि' । अहासुहं देवाणुप्पिया ! (म)मा पडिवन्धं करेह । तए णं सा
 अग्गिमित्ता भारिया समणस्स भगवओ महावीरस्स अन्तिए पञ्चाणुव्वइयं सत्त-
 सिक्खावइयं दुवालसविहं गिहि(सावग)धम्मं पडिवजइ, पडिवजित्ता समणं भगवं
 महावीरं वन्दइ नमंसइ, वंदित्ता नमंसित्ता त(ता)मेव धम्मियं जा(णं)णप्पवरं दुरुहइ,
 दुरुहिता जामेव दि-सं पाउब्भूया तामेव दि-सं पडिगया । तए णं समणे भगवं महावीरे
 अन्नया कयाइ पोलासपुराओ [नयराओ] सहस्सम्बव(ण)गाओ (उज्जा-णाओ) पडि-
 निग्गच्छइ, पडिनिग्गच्छित्ता बहिया जणवयविहारं विहरइ ॥ ५४ ॥ तए णं से
 सद्दालपुत्ते समणोवासए जाए अभिगयजीवाजीवे जाव विहरइ । तए णं से गोसाले
 मङ्गलिपुत्ते इमीसे कहाए लद्धे समाने- 'एवं खलु सद्दालपुत्ते आजीवियसमयं वमि-

(चइ)त्ता समणाणं निग्गन्थाणं दिट्ठिं पडिवन्ने, तं गच्छामि णं सद्दालपुत्तं आजीविओ-
 वासयं समणाणं निग्गन्थाणं दिट्ठिं वामेत्ता पुणरवि आजीवियदिट्ठिं गे-ण्हावित्तए'
 त्ति-कट्टु एवं सम्पेहेइ, संपेहिता आजीवियसङ्खसम्परिवुडे जेणेव पोलासपुरे नयरे
 जेणेव आजीवियसभा तेणेव उवागच्छइ, उवागच्छिता आजीवियसभाए भण्ड-
 (ग)निक्खेवं करेइ, करेत्ता कइवएहिं आजीविएहिं सद्धिं जेणेव सद्दालपुत्तं समणोवासए
 तेणेव उवागच्छइ । तए णं से सद्दालपुत्तं समणोवासए गोसालं मङ्गलिपुत्तं एजमाणं
 पासइ, पासित्ता नो आढाइ, नो परिजा(ण)णइ, अणाढा[य]माणे अपरिजाण-
 माणे तुसिणीए संविट्ठइ ॥ ५५ ॥ तए णं से गोसाले मङ्गलिपुत्तं सद्दालपुत्तं समणो-
 वासएणं अणाढाइजमाणे अपरिजाणिजमाणे पीढकलगसिज्जासंथारट्ठयाए समणस्स
 भगवओ महावीरस्स गुणकित्तणं करे(ति)माणे सद्दालपुत्तं समणोवासयं एवं वयासी-
 'आगए णं देवाणुप्पिया ! इहं महामाहणे ?' तए णं से सद्दालपुत्तं समणोवासए गोसालं
 मङ्गलिपुत्तं एवं वयासी- 'के णं देवाणुप्पिया ! महामाहणे ?' तए णं से गोसाले मङ्गलि-
 पुत्तं सद्दालपुत्तं समणोवासयं एवं वयासी- 'समणे भगवं महावीरे महामाहणे' 'से
 केणट्ठेणं देवाणुप्पिया ! एवं बु(उ)च्चइ-समणे भगवं महावीरे महामाहणे ?' 'एवं खलु
 सद्दालपुत्ता । समणे भगवं महावीरे महामाहणे उप्पन्नगणदंसणधरे जाव महिय-
 पुइए जाव तच्चक्रमसम्पयासंपउत्ते, से तेणट्ठेणं देवाणुप्पिया ! एवं बु-च्चइ-समणे
 भगवं महावीरे महामाहणे' 'आगए णं देवाणुप्पिया ! इहं महागोवे ?' 'के णं
 देवाणुप्पिया ! महागोवे ?' 'समणे भगवं महावीरे महागोवे' 'से केणट्ठेणं देवाणुप्पिया !
 जाव महागोवे ?' 'एवं खलु देवाणुप्पिया ! समणे भगवं महावीरे संसाराडवीए बहवे
 जीवे न(त)स्समाणे विणस्समाणे खजमाणे छिजमाणे भिजमाणे लुप्पमाणे विलुप्प-
 माणे धम्ममएणं दण्डेणं सा(सं)रक्खमाणे संगोवेमाणे निव्वानमहावा(डे)ढं साहत्थि
 सम्पावेइ, से तेणट्ठेणं सद्दालपुत्ता ! एवं बुच्चइ-समणे भगवं महावीरे महागोवे'
 'आगए णं देवाणुप्पिया ! इहं महासत्थवाहे ?' 'के णं देवाणुप्पिया ! महासत्थवाहे ?'
 सद्दालपुत्ता । समणे भगवं महावीरे महासत्थवाहे' 'से केणट्ठेणं (देवाणु० महासत्थ-
 वाहे) ?' 'एवं खलु देवाणुप्पिया ! समणे भगवं महावीरे संसाराडवीए बहवे जीवे
 न-स्समाणे विणस्समाणे जाव विलुप्पमाणे (उम्मग्गपडिवण्णे) धम्ममएणं पन्थेणं
 सा-रक्खमाणे निव्वानमहापट्ठ(णं)सि)णाभिमुहे साहत्थि सम्पावेइ, से तेणट्ठेणं सद्दा-
 लपुत्ता ! एवं बुच्चइ-समणे भगवं महावीरे महासत्थवाहे' 'आगए णं देवाणु-
 प्पिया ! इहं म(ह)हाधम्मकही ?' 'के णं देवाणुप्पिया ! महाधम्मकही ?' 'समणे भगवं
 महावीरे महाधम्मकही' 'से केणट्ठेणं समणे भगवं महावीरे महाधम्मकही ?' 'एवं

खलु देवाणुप्पिया ! समणे भगवं महावीरे महइमहालयंसि संसारं(मि)सि बहवे जीवे न-स्समाणे विणस्समाणे [खजमाणे छिजमाणे भिजमाणे लुप्पमाणे विलुप्पमाणे] उम्मगगपडिव्वे सप्पहविप्पणट्ठे मिच्छत्तबलाभिभूए अट्ठविहकम्मतमपडलप(डि)डो-
 च्छेजे बहूहि अट्ठेहि य जाव वागरणेहि य चाउरन्ताओ संसारकन्ताराओ साहत्थि नित्थारेइ, से तेणट्ठेणं देवाणुप्पिया ! एवं वुच्चइ-समणे भगवं महावीरे महाधम्म-
 कही' 'आगए णं देवाणुप्पिया ! इहं महानिज्जामए ?' '(से) के णं देवाणुप्पिया ! महानिज्जामए ?' 'समणे भगवं महावीरे महानिज्जामए' 'से केणट्ठेणं (समणे०) ?' 'एवं खलु देवाणुप्पिया ! समणे भगवं महावीरे संसारमहासमुद्रे बहवे जीवे न-स्समाणे विणस्समाणे [जाव विलुप्पमाणे] बु(वु)ड्ढमाणे नि(वु)बुड्ढमाणे उप्पियमाणे धम्ममईए नावाए निव्वानतीराभिमुहे साहत्थि सम्पावेइ, से तेणट्ठेणं देवाणुप्पिया ! एवं वुच्चइ-
 समणे भगवं महावीरे महानिज्जामए' ॥ ५६ ॥ तए णं से सहालपुत्ते समणोवासए गोसालं मङ्गलिपुत्तं एवं वयासी-'तुब्भे णं देवाणुप्पिया ! इयच्छेया जाव इयनिउणा इयनयवादी इयउवएसलद्धा इयविण्णाणपत्ता, पभू णं तुब्भे मम धम्मायरिएणं धम्मोवएसएणं (समणेणं) भगवया महावीरेणं सद्धि विवादं क(रि)रेत्तए ?' 'नो ति(इ)-
 णट्ठे समट्ठे' 'से केणट्ठेणं देवाणुप्पिया ! एवं वुच्चइ-नो खलु पभू तुब्भे मम धम्माय-
 रिएणं जाव महावीरेणं सद्धि विवादं क-रेत्तए ?' 'सहालपुत्ता ! से जहानामए केइ पुरिसे तरुणे जुगवं जाव निउणसिप्पोवगए एणं महं अयं वा एलयं वा सूरं वा कुक्कुडं वा तित्तिरं वा वड्ढं वा लावयं वा कवोयं वा कविज्जलं वा वायसं वा सेणयं वा हत्थंसि वा पायंसि वा खुरंसि वा पुच्छंसि वा पिच्छंसि वा सिङ्गंसि वा विसाणंसि वा रोमंसि वा जहिं जहिं गिण्हइ तहिं तहिं निच्चलं निप्फन्दं धरेइ, एवामेव समणे भगवं महावीरे ममं बहूहि अट्ठेहि य हेऊहि य जाव वागरणेहि य जहिं जहिं गिण्हइ तहिं तहिं निप्पट्ठपसिणवागरणं करेइ, से तेणट्ठेणं सहालपुत्ता ! एवं वुच्चइ-नो खलु पभू अहं तव धम्मायरिएणं जाव महावीरेणं सद्धि विवादं क-रेत्तए' ॥ ५७ ॥ तए णं से सहालपुत्ते समणोवासए गोसालं मङ्गलिपुत्तं एवं वयासी-'जम्हा णं देवाणुप्पिया ! तुब्भे मम धम्मायरियस्स जाव महावीरस्स संतेहिं तच्चेहिं तहिएहिं (सव्वेहिं) सब्भूए-हिं भावेहिं गुणकित्ठणं करेह तम्हा णं अहं तुब्भे पाडिहारिएणं पीढ-जाव संथारएणं उवनिमन्तेमि, नो चेव णं धम्मो-त्ति वा तवो-त्ति वा, तं गच्छह णं तुब्भे मम कुम्भारावणेसु पाडिहारियं पीढफल-जाव ओगिणिह(उव-संपज्जि)त्ताणं विहरह' । तए णं से गोसाले मङ्गलिपुत्ते सहालपुत्तस्स समणोवासयस्स एयमट्ठं पडिसुणेइ, पडिसुणेत्ता कुम्भ(भका)भारावणेसु पाडिहारियं पीढ जाव ओगि-

गिह-ता-णं विहरइ । तए णं से गोसाले मङ्गलिपुत्ते सद्दालपुत्तं समणोवासयं जाहे नो
 संचाएइ बहूहिं आघवणाहिं य पण्णवणाहिं य सण्णवणाहिं य विण्णवणाहिं य
 (परुवणेहिं य) निग्गन्थाओ पावयणाओ (सं)चालितए वा खोमितए वा विपरिणामितए
 वा ताहे सन्ते तन्ते परितन्ते पोलासपुराओ नगराओ पडिणिक्खमइ, पडिनिक्ख-
 मित्ता बहिया जणवयविहारं विहरइ ॥ ५८ ॥ तए णं तस्स सद्दालपुत्तस्स समणो-
 वासयस्स बहूहिं सील-जाव भावेमाणस्स चोइस संवच्छरा व(वी)इक्कन्ता, पण्ण-
 रसमस्स संवच्छरस्स अन्तरा वट्टमाणस्स पुव्वरत्तावरत्ताकाले जाव पोसहसालाए
 समणस्स भगवओ महावीरस्स अन्तियं धम्मपण्णत्तिं उवसम्पज्जिता-णं विहरइ । तए
 णं तस्स सद्दालपुत्तस्स समणोवासयस्स (अंतिए) पुव्वरत्तावरत्ता(लसमयंसि)ले एगे
 देवे अन्तियं पाउब्भवित्था । तए णं से देवे एणं महं नीलुप्पल-जाव असिं गहाय
 सद्दालपुत्तं समणोवासयं एवं वयासी-जहा चुलणीपियस्स तहेव देवो उवसग्गं करेइ,
 नवरं एक्केके पुत्ते नव (२) मंससोल्लए करेइ जाव कणीयसं घाएइ, घाइत्ता जाव
 आयञ्चइ । तए णं से सद्दालपुत्ते समणोवासए अभीए जाव विहरइ । तए णं से देवे
 सद्दालपुत्तं समणोवासयं अभीयं जाव पा(से)सित्ता चउत्थं-पि सद्दालपुत्तं समणोवा-
 सयं एवं वयासी-‘हं भो सद्दालपुत्ता ! समणोवासया ! अपत्थियप-त्थया जाव न
 भजसि तओ ते जा इमा अग्गिमित्ता भारिया धम्मसहाइया धम्म(वि)बिइज्जिया धम्मा-
 पुरारगत्ता समसुहदु(ह)क्खसहाइया तं ते साओ गिहाओ नीणेमि, नीणेत्ता तव अग्गओ
 घाएमि, घाएत्ता नव मंससोल्लए करेमि, करेत्ता आदाणभरियंसि कडाहयंसि अइहेमि,
 अइहेत्ता तव गायं मंसेण य सोणिण्ण य आयञ्चामि, जहा णं तुमं अट्टुहइ[०]
 जाव ववरोविज्जसि’ । तए णं से सद्दालपुत्ते समणोवासए तेणं देवेणं एवं वुत्ते समाणे
 अभीए जाव विहरइ । तए णं से देवे सद्दालपुत्तं समणोवासयं दोच्चं-पि तच्चं-पि एवं
 वयासी-‘हं भो सद्दालपुत्ता ! समणोवासया ! तं चेव भणइ । तए णं तस्स सद्दालपु-
 त्तस्स समणोवासयस्स तेणं देवेणं दोच्चं-पि तच्चं-पि एवं वुत्तस्स समाणस्स अर्थं
 अज्झत्थिए ४ समुप्प(जित्था)जे । एवं जहा चुलणीपिया तहेव चिन्तेइ-‘जेणं ममं
 जेट्ठं पुत्तं, जेणं ममं मज्झिमयं पुत्तं, जेणं म-मं कणीयसं पुत्तं जाव आयञ्चइ,
 जा-इवि य णं म-मं इमा अग्गिमित्ता भारिया समसुहदु-क्खसहाइया तं-पि य
 इच्छइ साओ गिहाओ नीणेत्ता मम अग्गओ घाएत्ता, तं सेयं खलु ममं एयं पुरिसं
 गिण्हितए’ ति-कट्टु उ-द्धाइए जहा चुलणीपिया तहेव सब्बं भाणियव्वं, नवरं
 अग्गिमित्ता भारिया कोलाहलं सु(णि)णित्ता भणइ, सेसं जहा चुलणिपियावत्त-
 व्वया, नवरं अरुणभूए विमाणे उव(वाओ)वजे, जाव महाविदे(ह)हे वासे सिज्झि-

हिइ (५) ॥ ५९ ॥ निकले(वो)वओ ॥ सत्तमस्स अङ्गस्स उवासगदसाणं
सत्तमं अङ्गयणं समत्तं ॥

अट्ठमस्स उक्खेवओ । एवं खलु जम्बू ! तेणं कालेणं तेणं समएणं रायगिहे
नयरे । गुणसि(लए)ळे उज्जाणे । सेणि(य)ए राया । तत्थ णं रायगिहे महासयए नामं
गाहावई परिवसइ, अङ्गे-जहा आणन्दो । नवरं अट्ठ हिरण्णकोडीओ सकंसाओ
निहाणपउत्ताओ, अट्ठ हिरण्णकोडीओ सकंसाओ तु(-द्धी)डिपउत्ताओ, अट्ठ हिरण्ण-
कोडीओ सकंसाओ पवित्थरपउत्ताओ, अट्ठ वया दसगोसाहस्सिएणं वएणं । तस्स
णं महासयगस्स रेव(इ)ईपामोक्खाओ तेरस भारियाओ होत्था, अहीण[०] जाव
सुरूवाओ । तस्स णं महासयगस्स रेवईए भारियाए कोल(ह)घरियाओ अट्ठ हिर-
ण्णकोडीओ, अट्ठ-वया दसगोसाहस्सिएणं वएणं होत्था । अवसेसाणं दुवालसण्हं
भारियाणं कोल-घरिया एगमेगा हिरण्णकोडी, एगमेगे य वए दसगोसाहस्सिएणं
वएणं होत्था ॥ ६० ॥ तेणं कालेणं तेणं समएणं सामी समोस-ढे । परिसा
निग्गया । जहा आणन्दो तहा निग्गच्छइ, तहेव साव(ग)यधम्मं पडिवज्जइ । नवरं
अट्ठ हिरण्णकोडीओ सकंसाओ उच्चारैइ, अट्ठ वया, रेवईपामोक्खाहिं तेर(से)सहिं
भारियाहिं अवसेसं मेहुणविहिं पच्चक्खाइ, सेसं सव्वं तहेव । इमं च णं एयारूवं
अभिग्गहं अभिग्गिण्हइ-कल्लाकल्लिं [च णं] कप्पइ मे वे(वे-दो)रोणियाए कंसपाईए
हिरण्णभरियाए संववहरित्तए । तए णं से महासयए समणोवासए जाए अभिगय-
जीवाजीवे जाव विहरइ, तए णं समणे भगवं महावीरे बहिया जणवयविहारं विहरइ
॥ ६१ ॥ तए णं तीसे रेव-ईए गाहावइणीए अन्नया कया-इ पुव्वरत्तावरत्तकालसम-
यंसि कु(ट्ठ)डुम्ब[०] जाव इमेयारूवे अज्झत्थिए ४-‘एवं खलु अहं इमांसि दुवाल-
सण्हं सवत्तीणं विघाएणं नो संचाएमि महासयएणं समणोवासएणं सद्धिं उ(ओ)रा-
लाई माणुस्सयाई भोगभोगाई भुज्जमाणी विहरित्तए, तं सेयं खलु म-मं एयाओ दुवा-
लस-वि सवत्तियाओ अग्गिप्पओगेणं वा सत्थप्पओगेणं वा विसप्पओगेणं वा जीवि-
याओ ववरोविता, एयांसि एगमेगं हिरण्णको(डीं)डि एगमेगं वयं सयमेव उवसम्प-
ज्जिता-णं महासयएणं समणोवासएणं सद्धिं उरालाई जाव विहरित्तए’ एवं सम्पेहेइ,
संपेहिता तासिं दुवालसण्हं सवत्तीणं अन्तराणि य छिद्वाणि य वि(रहा)वराणि य
पडिजागरमाणी विहरइ । तए णं सा रेवई गाहावइणी अन्नया कया-इ तासिं
दुवालसण्हं सवत्तीणं अन्तरं जाणित्ता छ सवत्तीओ सत्थप्पओगेणं उइवेइ, उइवेत्ता
छ सवत्तीओ विसप्पओगेणं उइवेइ, उइवेत्ता तासिं दुवालसण्हं सवत्तीणं कोलघरियं
एगमेगं हिरण्णकोडिं एगमेगं वयं सयमेव पडिवज्जइ, पडिवज्जिता महासयएणं

समणोवासएणं सद्धिं उरालाई भोगभोगाईं भुज्जमाणी विहरइ । तए णं सा रेवई गाहावइणी मंसलोळुया मंसेसु सुच्छिया जाव अज्जोववन्ना बहुविहेहिं मंसेहि य सोल्लेहि य तल्लिएहि य भज्जिएहि य सुरं च महुं च मेरगं च मज्जं च सीधुं च पसन्नं च आसाएमाणी ४ विहरइ ॥ ६२ ॥ तए णं रायगिहे नयरे अन्नया कयाइ अमा(रि)वाए धुट्ठे यावि होत्था । तए णं सा रेवई गाहावइणी मंसलोळुया मंसेसु सुच्छिया ४ कोलवरिए पुरिसे सहावेइ, सहावेत्ता एवं वयासी-‘तुब्भे (णं) देवाणुप्पिया । म(मं)म कोलवरिएहिंतो (गो)वएहिंतो कल्लकल्लिं दुवे दुवे गोणपोयए उद्वेह, उद्वेत्ता म-मं उवणेह । तए णं (ते) कोल-वरिया पुरिसा रेव-ईए गाहावइणीए ‘तह’त्ति एयमट्ठं विणएणं पडिसु(णे)णन्ति, पडिसुणेत्ता रेवईए गाहावइणीए कोलवरिएहिंतो वएहिंतो कल्लकल्लिं दुवे दुवे गोणपोयए वहेन्ति, वहेत्ता (तं) रेवईए गाहावइणीए उवणेन्ति । तए णं सा रेवई गाहावइणी तेहिं गोणमंसेहिं सोल्लेहि य ४ सुरं च ६ आसाएमाणी ४ विहरइ ॥ ६३ ॥ तए णं तस्स महासयगस्स समणोवासगस्स बहूहिं सील-जाव भावेमाणस्स चो(चउ)इस संवच्छरा वइक्कन्ता । एवं तहेव जे(इ)ट्ठं पुत्तं ठवेइ जाव पोसहसालाए धम्मपण्णत्तिं उवसम्पज्जित्ता-णं विहरइ । तए णं सा रेवई गाहावइणी मत्ता लुलिया विइण्णकेसी उत्तरिज्जयं विकट्ठमाणी २ जेणेव पोसहसाला जेणेव महासयए समणोवासए तेणेव उवागच्छइ, उवागच्छित्ता मोहुम्मायजणणाईं सिञ्जारियाईं इत्थिभावाईं उवदंसेमाणी २ महासययं समणोवासयं एवं वयासी-‘हं भो महासय(गा)या ! समणोवासया ! धम्मकामया पुण्णकामया सग्गकामया मोक्खकामया धम्मकल्लिया ४ धम्मपिवासिया ४ किण(कि)णं तुब्भं देवाणुप्पिया ! धम्मणे वा पुण्णेण वा सग्गेण वा मोक्खेण वा [?] जणं तुमं मए सद्धिं उ-रालाईं जाव भुज्जमाणे नो विहरसि(?)’ । तए णं से महासयए समणोवासए रेवईए गाहावइणीए एयमट्ठं नो आढाइ, नो परियाणाइ, अणाढायमाणे अपरियाणमाणे तुसिणीए धम्मज्जाणोवगए विहरइ । तए णं सा रेवई गाहावइणी महासययं समणोवासयं दोच्चं-पि तच्चं-पि एवं वयासी-‘हं भो ! (म० स०) तं चेव भणइ, सो-ऽ-वि तहेव जाव अणाढायमाणे अपरियाणमाणे विहरइ । तए णं सा रेवई गाहावइणी महासयएणं समणोवासएणं अणाढाइज्जमाणी अपरियाणिज्जमाणी जामेव दि-सिं पाउब्भूया तामेव दि-सिं पडिगया ॥ ६४ ॥ तए णं से महासयए समणोवासए पढमं उवासगपडिभं उवसंपज्जित्ता-णं विहरइ । पढमं अहासुत्तं जाव एक्का-रस-ऽ-वि । तए णं से महासयए समणोवासए तेणं उरालेणं जाव किसे धम-णिसन्तए जाए । तए णं तस्स महासययस्स समणोवासयस्स अन्नया कया(इ)ई

पुव्वरत्तावरत्तकाले धम्मजागरियं जागरमाणस्स (इमेयारुवे) अयं अज्झत्थिए ४-
 'एवं खलु अहं इमेणं उरालेणं जहा आणन्दो तहेव अपच्छिममारणन्तियसंलेहणा-
 (ए णो) झसियसरीरे भत्तपाणपडियाइक्खिए कालं अणवकङ्कमाणे विहरइ । तए णं
 तस्स महासयगस्स समणोवासगस्स सुभेणं अज्झवसाणे(परिणामे)णं जाव खओवस-
 मेणं ओहिणाणे समुप्पन्ने । पुरत्थिमेणं लवणसमुद्दे जोयण(स)साह(स्स)स्सियं खे(त्तं)त्ते
 जाणइ पासइ, एवं दक्खिणेणं पच्चत्थिमेणं, उत्तरेणं जाव चुल्लहिमवन्तं वासहरपव्वयं
 जाणइ पासइ, अहे इमीसे रयणप्पभाए पुढवीए लोलुयच्चुयं नरयं चउ(चो)रासी[इ]वा-
 ससहस्सट्ठिइयं जाणइ पासइ ॥ ६५ ॥ तए णं सा रेवई गाहावइणी अन्नया कया-इ
 मत्ता जाव उत्तरिज्जयं विकङ्कमाणी २ जेणेव पोसहसाला जेणेव महासयए समणो-
 वासए तेणेव उवागच्छइ, उवागच्छित्ता महासययं तहेव भणइ, जाव दोच्चं-पि
 तच्चं-पि एवं वयासी-'हं भो तहेव । तए णं से महासयए समणोवासए रेवईए
 गाहावइणीए दोच्चं-पि तच्चं-पि एवं वुत्ते समाणे आउ-रुत्ते ४ ओहिं पउंजइ, पउंजित्ता
 ओहिणा आभोएइ, आभोएत्ता रेवई गाहावइणिं एवं वयासी-'हं भो रेव(ई)इ !
 अपत्थियपत्थिए-!-४ एवं खलु तुमं अन्तो सत्तरत्तस्स अलसएणं वाहिणा अभि-
 भूया समाणी अट्टदुहट्टवसट्ठा असमाहिपत्ता कालमासे कालं किच्चा अहे इमीसे रयण-
 प्पभाए पुढवीए लोलुयच्चुए नरए चउरासी(ई)इवाससहस्सट्ठिइएसु नेरइएसु नेरइयत्ताए
 उववज्जिहिसि' । तए णं सा रेवई गाहावइणी महासयएणं समणोवासएणं एवं
 वुत्ता समाणी (भीया) एवं वयासी-'रुत्ते णं म-मं महासयए समणोवासए, हीणे णं
 म-मं महासयए समणोवासए, अवज्झाया णं अहं महासयएणं समणोवासएणं, न
 नज्जइ णं अहं केणवि कुमारेणं मारिजिस्सामि'त्ति-कट्ठु भीया तत्था तसिया उव्विग्गा
 सज्जायभया सणियं २ पच्चोसक्कइ, पच्चोसक्किता जेणेव सए गिहे तेणेव उवागच्छइ,
 उवागच्छित्ता ओहय[०] जाव झियाइ । तए णं सा रेवई गाहावइणी अन्तो सत्तरत्तस्स
 अलसएणं वाहिणा अभिभूया अट्टदुहट्टवसट्ठा कालमासे कालं किच्चा इमीसे रयणप्प-
 भाए पुढवीए लोलुयच्चुए नरए चउरासीइवाससहस्सट्ठिइएसु नेरइएसु नेरइयत्ताए
 उववच्चा ॥ ६६ ॥ तेणं कालेणं तेणं समएणं समणे भगवं महावीरे, समोस-रणं,
 जाव परिसा पडिगया । 'गोयसा'-!-इ समणे भगवं महावीरे एवं वयासी-'एवं
 खलु गोयसा ! इहेव रायगिहे नयरे म-मं अन्तेवासी महासयए नामं समणोवासए
 पोसहसालाए अपच्छिममारणन्तियसंलेहणाए झसियसरीरे भत्तपाणपडियाइक्खिए
 कालं अणवकङ्कमाणे विहरइ । तए णं तस्स महासयगस्स रेवई गाहावइणी मत्ता
 जाव विक(ङ्क)ट्ठमाणी २ जेणेव पोसहसाला जेणेव महासयए तेणेव उवागच्छइ, उवा-
 गच्छित्ता मोहुम्माय[०] जाव एवं वयासी-तहेव जाव दोच्चं-पि तच्चं-पि एवं वयासी

तए णं से महासयए समणोवासए रेवईए गाहावइणीए दोच्चं-पि तच्चं-पि एवं वुत्ते
समाणे आसु-रुत्ते ४ ओहिं पडंजइ, पडंजिता ओहिणा आभोएइ, आभोएत्ता रेवई
गाहावइणि एवं वयासी-जाव 'उववज्जिहिसि' । नो खलु कप्पइ गोयमा ! समणो-
वासगस्स अपच्छिम[०] जाव झूसियसरीरस्स भत्तपाणपडियाइक्खियस्स परो सन्तेहिं
तच्चेहिं तहिएहिं सम्भूएहिं अणिट्ठेहिं अकन्ते-हिं अप्पिएहिं अमणुण्णेहिं अमणामेहिं
वागरणेहिं वागरित्तए, तं गच्छ(ह)णं देवाणुप्पिया ! तुमं महासययं समणोवासयं
एवं वयाहि-नो खलु देवाणुप्पिया ! कप्पइ समणोवासगस्स अपच्छिम-जाव
भत्तपाणपडियाइक्खियस्स परो सन्ते-हिं जाव वागरित्तए । तुमे य णं देवाणुप्पिया !
रेवई गाहावइणी संतेहिं ४ अणिट्ठेहिं ५ वागरणेहिं वागरिया, तं णं तुमं एयस्स
ठाणस्स आलोएहि जाव जहारिहं च पायच्छित्तं पडिव-ज्जाहि' । तए णं से भगवं
गोयमे समणस्स भगवओ महावीरस्स 'तह'त्ति एयमट्ठं विणएणं पडिसुणेइ,
पडिसुणेत्ता तओ पडिणिक्खमइ, पडिनिक्खमिता रायगिहं न(ग)यरं मज्झंमज्जेणं
अणुप्पविसइ, अणुपविसित्ता जेणेव महासयगस्स समणोवासयस्स गिहे जेणेव
महासयए समणोवासए तेणेव उवागच्छइ । तए णं से महासयए (समणोवासए)
भगवं गोयमं एज्जमाणं पासइ, पासित्ता ह(ट्ठे)इ जाव हियए भगवं गोयमं वन्दइ
नमंसइ । तए णं से भगवं गोयमे महासययं समणोवासयं एवं वयासी-एवं खलु
देवाणुप्पिया ! समणे भगवं महावीरे एवमाइक्खइ भासइ पणवेइ परूवेइ-नो
खलु कप्पइ देवाणुप्पिया ! समणोवासगस्स अपच्छिम जाव वागरित्तए, तुमे णं
देवाणुप्पिया ! रेवई गाहावइणी सन्तेहिं जाव वागरि(या)आ, तं णं तुमं देवाणु-
प्पिया ! एयस्स ठाणस्स आलोएहि जाव पडिव-ज्जाहि' । तए णं से महासयए
समणोवासए भग(वं)वओ गोयमस्स 'तह'त्ति एयमट्ठं विणएणं पडिसुणेइ, पडिसुणेत्ता
तस्स ठाणस्स आलोएइ जाव अहारिहं च पायच्छित्तं पडिवज्जइ । तए णं से
भगवं गोयमे महासयगस्स समणोवासयस्स अन्तियाओ पडिणिक्खमइ, पडि-
निक्खमिता रायगिहं नगरं मज्झंमज्जेणं निग्गच्छइ, निग्गच्छित्ता जेणेव समणे
भगवं महावीरे तेणेव उवागच्छइ, उवागच्छित्ता समणं भगवं महावीरं वंदइ
नमंसइ, वंदित्ता नमंसित्ता संजमे(णं)ण तवसा अप्पाणं भावेमाणे विहरइ । तए णं
समणे भगवं महावीरे अन्नया कया-इ रायगिहाओ नयराओ पडिणिक्खमइ, पडि-
निक्खमिता बहिया जणवयविहारं विहरइ ॥ ६७ ॥ तए णं से महासयए समणो-
वासए बहूहिं सील-जाव भावेत्ता वीसं वासाई समणोवास-यपरिया(गं)यं पाउणित्ता
ए-क्कारस उवासगपडिमाओ सम्मं काए-ण फासित्ता मासियाए सळेहणाए अप्पाणं
झ-सित्ता सट्ठिं भत्ताई अणसणाए छेदेत्ता आलोइयपडिक्कन्ते समाहिपत्ते कालमासे

कालं किञ्चा सोहम्मे कप्पे अरुणवडिसए विमाणे देवताए उववन्ने । चत्तारि पलिओवमाई ठिई । महाविदे-हे वासे सिज्झिहिइ ॥ ६८ ॥ निक्खेवो ॥ सत्तमस्स अंगस्स उवासगदसाणं अट्ठमं अज्झयणं समत्तं ॥

नवमस्स उक्खेवो । एवं खलु जम्(बु)बू ! तेणं कालेणं तेणं समएणं सावत्थी नयरी । कोट्ठ(ग)ए उज्जाणे । जियस-त्तू राया । तत्थ णं सावत्थीए नयरीए नन्दिणी-पिया नामं गाहावई परिवसइ, अट्ठे । चत्तारि हिरण्णकोडीओ निहाणपउत्ताओ, चत्तारि हिरण्णकोडीओ बु-द्धिपउत्ताओ, चत्तारि हिरण्णकोडीओ पवित्थरपउत्ताओ, चत्तारि वया दसगोसाहस्सिएणं वएणं । अस्सिणी भारिया । सामी समोसडे । जहा आणन्दो तहेव गिहिधम्मं पडिवज्जइ । सामी बहिया (विहारं) विहरइ । तए णं से नन्दिणीपिया समणोवासए जाए जाव विहरइ । तए णं तस्स नन्दिणीपियस्स समणोवासयस्स बह्वहिं सीलव्वयगुण[०] जाव भावेमाणस्स चोदस संवच्छराइं वइक्कन्ताइं । तहेव जेट्ठं पुत्तं ठवेइ, धम्मपण्णत्तिं, वीसं वासाइं परियागं, नाणत्तं अरुणगवे विमाणे उववाओ । महाविदे-हे वासे सिज्झिहिइ ॥ ६९ ॥ निक्खेवो ॥ सत्तमस्स अंगस्स उवासगदसाणं नवमं अज्झयणं समत्तं ॥

दसमस्स उक्खेवो । एवं खलु जम्बू ! तेणं कालेणं तेणं समएणं सावत्थी न-यरी । कोट्ठए उज्जाणे । जियस-त्तू राया । तत्थ णं सावत्थीए नयरीए सालिही-पिया नामं गाहावई परिवसइ । अट्ठे दित्ते । चत्तारि हिरण्णकोडीओ निहाणपउ-त्ताओ, चत्तारि हिरण्णकोडीओ बु-द्धिपउत्ताओ, चत्तारि हिरण्णकोडीओ पवित्थर-पउत्ताओ । चत्तारि वया दसगोसाहस्सिएणं वएणं । फग्गुणी भारिया । सामी समोस-डे । जहा आणन्दो त(ह)हेव गिहिधम्मं पडिवज्जइ, जहा कामदेवो तहा जेट्ठं पुत्तं ठवे(इ)ता पोसहसालाए समणस्स भगवओ महावीरस्स धम्मपण्णत्तिं उवसम्प-ज्जिताणं विहरइ । नवरं निरुवसग्गाओ एक्कारस-वि उवासगपडिमाओ तहेव भाणिय-व्वाओ । एवं कामदेवगमेणं नेयव्वं जाव सोहम्मे कप्पे अरुणकीले विमाणे देवताए उववन्ने । चत्तारि पलिओवमाई ठिई, महाविदे-हे वासे सिज्झिहिइ ॥ ७० ॥ (०) ॥

सत्तमस्स अंगस्स उवासगदसाणं दसमं अज्झयणं समत्तं ॥

दसण्ह-वि पणरसमे संवच्छरे वट्ठमाणं चिन्ता । दसण्ह-वि वीसं वासाइं समणो-वासयपरियाओ । एवं खलु जम्बू ! समणेणं जाव सम्पत्तेणं सत्तमस्स अङ्गस्स उवासगदसाणं अयमट्ठे पण्णत्ते ॥ ७१ ॥ उवासगदसाओ समत्ताओ । उवासगदसाणं सत्तमस्स अङ्गस्स एगो सुयखन्वो दस अज्झयणा एक्सरगा दससु चेव दिवसेसु उद्दिस्सिज्जंति तओ सुयखन्वो समुद्दिस्सिज्जइ अणुणविज्जइ दोसु दिवसेसु, अङ्गं तहेव ॥

णमोऽस्तु णं समणस्स भगवओ णायपुत्तमहावीरस्स

सुत्तागमे

तत्थ णं

अंतगडदसाओ

[पढमो वग्गो]

तेणं कालेणं तेणं समएणं चंपा-नामं न(ग)यरी (हो० व० तत्थ णं चं० न० उ० दि० ए०) पुण्णभेइ (णा०) उज्जाणे (हो०) वण्णओ, (ती० चं० न० को० ना० ए० हो० म० हि० व०) तेणं कालेणं तेणं समएणं अज्जसुहम्मि (ये० जाव पं० अ० स० सं० पु० च० गा० सु० वि० जे० चं० न० जे० पु० उ० ते०) समोसरि(ते)ए परिसा निग्ग(ता)या जाव पडिग-या, तेणं कालेणं तेणं समएणं अज्जसुहम्मस्स अंतेवासी अज्जजंबू जाव पज्जुवास(माणे)इ, एवं व(दासि)यासी-ज-
(ति)इ णं भंते ! समणेणं (भ० म०) आ(इग)दिकरेणं जाव संपत्तेणं सत्तमस्स अंगस्स उवासगदसाणं अयमट्ठे पण्णत्ते अट्ठमस्स णं भंते ! अंगस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! समणेणं जाव संपत्तेणं अट्ठमस्स अंगस्स अंतगडदसाणं अट्ठ वग्गा पण्णत्ता, जइ णं भंते ! समणेणं जाव संपत्तेणं अट्ठमस्स अंगस्स अंतगडदसाणं अट्ठ वग्गा पण्णत्ता पढमस्स णं भंते ! वग्गस्स अंतगडदसाणं समणेणं जाव संपत्तेणं कइ अज्झयणा पण्णत्ता ? एवं खलु जंबू ! समणेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स दस अज्झयणा पण्णत्ता, तं०—‘गोयम-समुद्द-सागर-गंभीरे चेव होइ थिमिए य । अयले कं पिळे खलु अवक्खोभ-पसेण(ती)इ(वण्णी)विण्हू ॥ १ ॥’ जइ णं भंते ! सम-
णेणं जाव संपत्तेणं अट्ठमस्स अंगस्स अंतगडदसाणं पढमस्स वग्गस्स दस अज्झ-
यणा पण्णत्ता (तं० गो० जाव वि०) पढमस्स णं भंते ! अज्झयणस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं बारवई-नामं नयरी होत्था, दुवालसजोयणायामा नवजो(अ)यणवित्थिणा धणवइम-
इग्गिमाया चामीकरपागारा नाणामणिपंचवण्णकविसीसग(परि)मंडिया सुरम्मा अल-
कापुरिसंकासा पमुदियपक्कीलिया पच्चक्खं देवलोगभूया पासा(वी)दिया ४, तीसे णं

बारवईनयरीए बहिया उत्तरपुरच्छिमे दिसीभाए एत्थ णं रेवयए नामं पव्वए होत्था
 तत्थ णं रेवयए पव्वए नंदणवणे नामं उज्जाणे होत्था वण्णओ, सुरप्पिए नामं जक्खा-
 यतणे होत्था, असोगवरपायवे[०], तत्थ णं बारवई(ए)ण-यरीए कण्हे नामं वासुदेवे
 राया परिवसइ महया[०] रायवण्णओ, से णं तत्थ समुद्दविजयपा(मु)मोक्खाणं दसण्हं
 दसाराणं बलदेवपा-मोक्खाणं पंचण्हं महावीराणं पज्जुण्णपामोक्खाणं अद्धुट्ठाणं कुमार-
 कोडीणं संबपामोक्खाणं सट्ठीए दुइंतसाहस्सीणं महसेणपामोक्खाणं छप्पण्णाए बल-
 व(ग्ग)यसाहस्सीणं वीरसेणपामोक्खाणं एगवीसाए वीरसाहस्सीणं उग्गसेणपामो-
 क्खाणं सोलसण्हं रायसाहस्सीणं रुप्पिणीपामोक्खाणं सोलसण्हं दे(वि)वीसाहस्सीणं
 अन्नेसिं च बहूणं ईसर जाव सत्थवाहाणं बारवईए नयरीए अद्धभरहस्स य सम-
 (न्त-त्त)त्थस्स आहेवच्चं जाव विहरइ, तत्थ णं वा(वा)रवईए नयरीए अंधग(वि-
 ण्हू)वण्ण(णी)ही-नामं राया परिवसइ, महया० रायवण्णओ, तस्स णं अंधगवण्हिस्स
 रण्णो धारिणी नामं देवी होत्था वण्णओ, तए णं सा धारिणी देवी अण्णया कयाई
 तंसि तारिसगंसि सयणिजंसि (एवं) जहा महब्बले 'सुमिणइंसणकहणा जम्मं बाल-
 त्तणं कलाओ य । जोव्वणपाणिग्गहणं (कंता) कण्णा पासायभोगा य ॥ १ ॥' नवरं
 गोयमो नामेणं अट्ठण्हं रायवरकण्णाणं एगदिवसेणं पाणिं गेण्हावेंति अट्ठुओ दाओ,
 तेणं कालेणं तेणं समएणं अरहा अरिट्ठणेमी आ-दिकरे जाव विहरइ चउव्विहा देवा
 आगया कण्हे-वि निग्गए, तए णं तस्स गोयमस्स कुमारस्स[०] जहा मेहे तहा णिग्गए
 धम्मं सोच्चा (णि०) जं नवरं देवाणुप्पिया ! अम्मापियरो आपुच्छामि देवाणुप्पि-
 याणं० एवं जहा मेहे जाव अणगारे जाए [इरिया समि-ए] जाव इणमेव निग्गंथं
 पावयणं पुरओ काउं विहरइ, तए णं से गोयमे (अ०) अण्णया कया(इ)इं अरहओ
 अरिट्ठणेमिस्स तहारुवाणं थेराणं अंतिए सामाइयमाइयाई एकारस अंगाई अहि(ज)-
 जेइ २ ता बहूहिं चउत्थ जाव भावेमाणे विहरइ, (तएणं) ते अरिहा अरिट्ठणेमी
 अण्णया कया-ई बारवईओ [नयरीओ] नंदणवणाओ (उ०) पडिणिकखमइ (२
 ता) बहिया जणवयविहारं विहरइ, तए णं से गोयमे अणगारे अण्णया कया-ई
 जेणेव अरहा अरिट्ठणेमी तेणेव उवागच्छइ २ ता अरहं अरिट्ठणेमिं तिकखुत्तो आया-
 हिणपयाहिणं करेइ २ ता वंदइ नमंसइ वं० २ ता एवं वयासी-इच्छामि णं भंते !
 तुब्भेहिं अब्भणुणाए समणे मासियं भिक्खुपडिमं उवसंपज्जित्तारणं विहरेत्तए, एवं
 जहा खंदओ तहा बारस भिक्खुपडिमाओ फासेइ (०) गुणरयणं-पि तवोक्कम्मं तहेव
 फासेइ निरवसेसं जहा खंदओ तहा चित्तेइ तहा आपुच्छइ तहा थेरेहिं सद्धिं सेत्तुजं
 दुरुहइ मासियाए संलेहणाए बारस वरिसाई परियाए जाव सिद्धे (५) ॥ १ ॥ एवं

खलु जंबू ! समणेणं जाव संपत्तेणं अट्टमस्स अंगस्स अंतगडदसाणं पढम[स्स]व-
ग्ग[स्स]पढम[स्स]अज्झयणस्स अयमट्ठे पण्णत्ते, एवं जहा गोयमो तहा सेसा वण्ही
पिया धारिणी माया समुद्दे सागरे गंभीरे धिमिए अयले कंपिल्ले अक्खोभे पसेणइ
विण(हुए)हु एए एगगमा, पढमो वग्गो दस अज्झयणा पण्णत्ता ॥ २ ॥

[दोच्चो वग्गो]

जइ दोच्चस्स वग्गस्स[०] उक्खेवओ, तेणं कालेणं तेणं समएणं बा-रवइए नय-
सीए वण्ही पिया धारिणी माया-अक्खोभसागरे खलु समुद्दहिमवंत-अ(य)चलनामे
य । धरणे य पूरणे-वि य अभिचंदे चेव अट्टमए ॥ १ ॥ जहा पढ(मो)मे व(गो)गे
तहा सव्वे अट्ट अज्झयणा, गुणरय(ण)णं तवोक्कम्म, सोलस-वासाइं परियाओ,
सेत्तुजे मासियाए संलेहणाए (जाव) सि(द्धे)द्धी (०) ॥ ३ ॥

[तच्चो वग्गो]

जइ तच्चस्स[०] उक्खेवओ एवं खलु जंबू ! (स० जाव सं० अ० अं०) तच्चस्स
वग्गस्स अंतगडदसाणं तेरस अज्झयणा पण्णत्ता, तं०-अणीयसे(ण) अणंतसेणे
[अजियसे-णे] अणिहय(वि)रि(उ)ळ देव(जसे)सेणे सत्तुसेणे सारणे गए समुद्दे दुम्महे
कूवए दारुए अणादिट्ठी । जइ णं भंते ! समणेणं जाव संपत्तेणं (०) तच्चस्स वग्गस्स
अंतगडदसाणं तेरस अज्झयणा प० (तं० अ० जाव अ०) तच्चस्स णं भंते ! वग्गस्स
पढम-अज्झयणस्स अंतगडदसाणं (०) के अट्ठे प० ? एवं खलु जंबू ! तेणं
कालेणं तेणं समएणं भद्दिलपुरे नामं न(य)गरे होत्था (रि०) वण्णओ, तस्स णं भद्दि-
लपुरस्स (न०) उत्तरपुर(त्थि)च्छिमे दिसीभाए सिरिवणे नामं उज्जाणे होत्था
वण्णओ, जियसत्तू राया, तत्थ णं भद्दिलपुरे न-यरे नागे नामं गाहावई होत्था अट्ठे
जाव अपरिभूए, तस्स णं नागस्स गाहावइस्स सुलसा नामं भारिया होत्था सू(सु-
कु)माला जाव सुरूवा, तस्स णं नागस्स गाहावइस्स पुत्ते सुलसाए भारियाए अत्तए
अणीय(ज)से-नामं कुमारं होत्था सू-माले जाव सुरूवे पंचधाइपरिक्खिते तं०-खीर-
थाई[०] जहा दढपइण्णे जाव गिरि० सुहंसुहेणं परिवव्हुइ, तए णं तं अ(णि)णीयसं
कुमारं सा(इ)तिरैगअट्ठवासजायं अम्मापियरो कलायरिय[०] जाव[०] भोगसमत्थे
जाए यावि होत्था, तए णं तं अ-णीयसं कुमारं उम्मुक्कबालभावं जा(णि)णित्ता अम्मा-
पियरो सरि[सियाणं] जाव बत्तीसाए इब्भवरकण्णगाणं एगदिवसे पाणिं गेण्हावेंति,
तए णं से नागे गाहावई अणीयसस्स कुमारस्स इमं एयारुवं पीइदाणं दलयइ
तं०-बत्तीसं हिरण्णकोडीओ[०] जहा म(ह्व)हाबलस्स जाव उप्पि पासायवरगए
फुट्ठं विहरइ, तेणं कालेणं तेणं समएणं अरहा अरिड्ड[णिमी] जाव समोसढे सिरि-

वणे उज्जाणे ज(अ)हा जाव विहरइ परिसा निगया, तए णं तस्स अणीयस्स
 (कु०) तं (म०) जहा गोयमे तहा नवरं सामाइयमाइयाइं चोइस-पुव्वाइं अहिजइ
 वीसं वासाइं परियाओ सेसं तहेव जाव सेत्तुजे पव्वए मासियाए सल्लेहणाए जाव
 सिद्धे (५) । एवं खलु जंवू ! समणेणं [०] अट्टमस्स अंगस्स अंतगडदसाणं तच्चस्स
 वग्गस्स पढम-अज्झयणस्स अयमट्ठे पण्णत्ते, एवं जहा अणीयसे एवं सेसा-वि अणं-
 तसे(णो)णे जाव सत्तुसेणे छ-अज्झयणा ए(ग)क्कगमा बत्तीसओ दाओ वीसं वासा
 परियाओ चोइस [पु०] सेत्तुजे (जाव) सिद्धा ॥ छट्ठमज्झयणं समत्तं ॥ ४ ॥ (ज०
 णं० भं० उ० स०) तेणं कालेणं तेणं समएणं बारवईए नयरीए जहा पढ(मे नव-
 रं)मं वसुदेवे राया धारिणी देवी सीहो सुमिणे सारणे कुमारे पण्णासओ दाओ चोइस
 पुव्वा वीसं वासा परियाओ सेसं जहा गोयमस्स जाव सेत्तुजे सिद्धे ॥ ५ ॥ जइ[०]
 उक्खे[व]ओ अट्टमस्स एवं खलु जंवू ! तेणं कालेणं तेणं समएणं बारवईए नयरीए
 जहा पढमे जाव अरहा अरिट्ठणेमी सामी समोसढे । तेणं कालेणं तेणं समएणं
 अरहओ अरिट्ठणेमिस्स अंतेवासी छ अणगारा भायरो सहोदरा होत्था सरिसया
 सरित्थया सरिव्वया नीलुप्पलुलियअयसिक्कुसुमप्पगासा सिखिच्छं कियवच्छा कुसुम-
 कुंडलभइलया नलकु(व्व)ब्बरसमाणा, तए णं ते छ अणगारा जं चेव दिवसं मुंडा
 भवेत्ता अ(आ)गाराओ अणगारियं पव्वइया तं चेव दिवसं (अरहं) अरिट्ठणेमिं
 वंदंति णमंसंति वं० २ ता एवं वयासी-इच्छामो णं भंते । तुब्भेहिं अब्भणुण्णाया
 समाणा जावजीवाए छट्ठंछट्ठेणं अणिक्खित्तेणं तवकम्मसंजमेणं तवसा अप्पाणं भावे-
 माणे विहरित्तए, अहासुहं देवाणुप्पिया ! मा पडिबंथं करेह, तए णं (ते) छ अण-
 गारा अरहया अरिट्ठणेमिणा अब्भणुण्णाया समाणा जावजीवाए छट्ठंछट्ठेणं जाव
 विह(रें)रंति, तए णं-छ अणगारा अण्णया कयाइं छट्ठक्खमणपार(णं)णयंसि पढ-
 माए पोरिसीए सज्जायं करंति ज(ह)हा गोय(मसा०)मो जाव इच्छामो णं (भं०)
 छट्ठक्खमणस्स पार(णा)णए तुब्भेहिं अब्भणुण्णाया समाणा तिहिं संघाडएहिं बार-
 वईए नयरीए जाव अडित्तए, अहासुहं देवाणुप्पिया ! मा पडिबंथं करेह, तए णं-
 छ अणगारा अरहया अरिट्ठणेमिणा अब्भणुण्णाया समाणा अरहं अरिट्ठणेमिं वंदंति
 नमंसंति वं० २ ता अरहओ अरिट्ठणेमिस्स अंतियाओ सह(रु)संबवणाओ (०) पडिणि
 क्खमंति २ ता तिहिं संघाडएहिं अतुरियं जाव अडंति, तत्थ णं एगे संघाडए बार-
 वईए नयरीए उच्चणीयमज्झिमाइं कुलाइं घरसमुदाणस्स भिक्खायरियाए अडमा-
 णे (२) वसुदेवस्स रण्णो देवईए देवीए गेहे अणुपविट्ठे, तए णं सा देवई देवी ते
 अणगारे एज्जमाणे पासइ पा(सइ)सेत्ता हट्ठ जाव हियया आसणाओ अब्भुट्ठेइ २

ता सत्तट्ट-पयाई (अ० २ ता) तिक्खुत्तो आयाहिणपयाहिणं करेइ २ ता वंदइ नमं-
सइ वं० २ ता जेणेव भत्तघ(रे)रए तेणेव उवाग(च्छइ २ ता)या सीहकेसरारणं
मोयगारणं थालं भरेइ (०) ते अणगारे पडिलाभेइ (०) वंदइ नमंसइ वं० २ ता
पडिविसजेइ, त(दा)यारणंतरं च णं दोच्चे संघाडए वारवईए (न०) उच्च[०] जाव
विसजेइ, तयारणंतरं च णं तच्चे संघाडए वारवईए न-गरीए उच्च-जाव पडिलाभेइ
२ ता एवं वयासी-किण्णं देवाणुप्पिया ! कण्हस्स वासुदेवस्स इमीसे वारवईए नय-
रीए (हु०) नवजोयण० पच्चक्खदेवलोगभूयाए समणा निग्गंथा उच्च-जाव अडमाणा
भत्तपाणं नो लभंति (?) जणं ताई चेव कुलाई भत्तपाणाए भुज्जो २ अणुप्पविसंति ?,
तए णं ते अणगारा देवईं देवि एवं वयासी-नो खलु देवा० ! कण्हस्स वासुदेवस्स
इमीसे वारवईए नयरीए जाव देवलोगभूयाए समणा निग्गंथा उच्च-जाव अडमाणा
भत्तपाणं णो लभंति नो [जं] चेव णं ताई ताई कुलाई दोच्चं-पि तच्चं-पि भत्तपाणाए
अणुप्पविसंति, एवं खलु देवाणुप्पि० ! अम्हे भहिलपुरे न-गरे नागस्स गाहावइस्स
पुत्ता सुलसाए भारियाए अत्तया छ भायरो सहोदरा सरिसया[०] जाव नलकुब्बर-
समाणा अरहओ अरिट्ठणेमिस्स अंतिए धम्मं सोच्चा-संसारभजव्विगा भीया जम्म-
(ण)मरणाणं मुंडा जाव पव्वइया, तए णं अम्हे जं चेव दिवसं पव्वइया तं चेव
दिवसं अरहं अरिट्ठणेमि वंदामो नमंसामो वं० २ ता इमं एयारुवं अभिग्गहं अभि-
गेण्हामो-इच्छामो णं भंते ! तुब्भेहिं अब्भणुण्णाया समाणा जाव अहासुहं०, तए
णं अम्हे अरहओ (अ०) अब्भणुण्णाया समाणा जावज्जीवाए छट्ठंछट्ठेणं जाव विह-
रामो, तं अम्हे अज्ज छट्ठक्खमणपारणयंसि पढमाए पोरिसिए जाव अडमाणा तव गेहं
अणुप्पविट्ठा, तं नो खलु देवाणुप्पिए ! ते चेव णं अम्हे, अम्हे णं अण्णे-देवईं देवि एवं
चदंति २ ता जामेव दिसं पाउब्भूया तामेव दिसं पडिगया, (तए णं) तीसे देवईए
(देवीए) अयमेयारुवे अ(ब्भ)ज्जत्थिए ४ ससुप्पण्णे, एवं खलु अहं पोलासपुरे नयरे
अइमुत्तेणं कुमारसमणेणं बालत्तणे वागरिया तुमण्णं देवाणुप्पिए ! अट्ठ पुत्ते पयाइ-
स्ससि सरिसए जाव नलकुब्बरसमाणे नो चेव णं भरहे वासे अण्णाओ अम्मयाओ
तारिसए पुत्ते पयाइस्संति तं णं मिच्छा, इमं णं पच्चक्खमेव दिस्सइ भरहे वासे
अण्णाओ-वि अम्मयाओ (खलु) एरिस जाव पुत्ते पयायाओ, तं गच्छामि णं अरहं
अरिट्ठणेमि वंदामि (न० वं०) २ ता इमं च णं एयारुवं वागरणं पुच्छिस्सामी-
तिकट्ठ एवं संपेहेइ २ ता कोडंबियपुरिसा सहावेइ २ ता एवं वयासी लहुकरण-
प्पवरं[०] जाव उवट्ठवेंति, जहा देवाणंदा जाव पज्जुवासइ-ते अरहा अरिट्ठणेमी
देवईं देवि एवं वयासी-से नूणं तव देवई ! इमे छ अणगारे पासेत्ता अवमेयारुवे

अ(ज्झ)ब्भत्थिए० एवं खलु अहं पोलासपुरे नयरे अइमुत्तेणं तं चेव जाव निग्ग-
च्छसि २ ता जेणेव ममं अंतियं हव्वमागया से नूणं देवई ! अ(त्थे)ट्ठे समट्ठे ?
हंता अत्थि, एवं खलु देवाणुप्पिए ! तेणं कालेणं तेणं समएणं भद्विलपुरे नयरे नागे
नामं गाहावई परिवसइ अट्ठे०, तस्स णं नागस्स गाहावइस्स सुलसा-नामं भारिया
होत्था, सा सुलसा गाहावइणी बालत्तणे चेव ने(नि)मित्तएणं वागरिया-एस णं
दारिया णिंदू भविस्स०, तए णं तीसे सुलसाए गाहावइणीए भत्तिबहुमाणस्सुसाए
हरिणेगमेसी-देवे आराहिए यावि होत्था, तए णं से हरिणेगमेसी देवे सुलसाए
गाहावइणीए अणुकंपण(ट्ठया)ट्ठाए सुलसं गाहावइणिं तुमं च (णं) दो-वि समउ-
उयाओ करेइ, तए णं तुब्भे दो-वि सममेव गब्भे णिण्हह सममेव गब्भे परिवहह
सममेव दारए पयायइ, तए णं सा सुलसा गाहावइणी विणिहायमावण्णे दारए
पया(इ)यइ, तए णं से हरिणेगमेसी देवे सुलसाए अणुकंपणट्ठाए विणिहायमावण्णए
दारए करयलसंपुडेणं गेण्हइ २ ता तव अंतियं साहरइ (२) तं-समयं च णं तुयं-पि
नवण्हं मासाणं० सुकुमालदारए पसवसि, जे-वि (अ) य णं देवाणुप्पिए ! तव पुत्ता
ते-वि य तव अंतियाओ करयलसंपुडेणं गेण्हइ २ ता सुलसाए गाहावइणीए अंतिए
साहरइ, तं तव चेव णं देव(इ)ई ! एए पुत्ता णो चेव सुलसाए गाहावइणीए, तए
णं सा देवई देवी अरहओ अरिट्ठणेमिस्स अंतिए एयमट्ठं सोच्चा निसम्म हट्ठुट्ठ
जाव हियया अरहं अरिट्ठणेमिं वंदइ नमंसइ वं० २ ता जेणेव ते छ अणगारा तेणेव
उवागच्छइ [२ ता] ते छप्पि अणगारा वंदइ नमंसइ वं० २ ता आगयपण(हु)हया
पप्फुयलोयणा कंचुयपडिक्खित्तया दरियवलयबाहा धाराहयकलंबपुप्फगंपिव समू-
सियरोमकूवा ते छप्पि अणगारे अणिमिसाए दिट्ठीए पेहमाणी २ सुचिरं निरिक्खइ
२ ता वंदइ नमंसइ वं० २ ता जेणेव अ(रि)रहा अरिट्ठणेमी तेणेव उवागच्छइ २
ता अरहं अरिट्ठणेमिं तिक्खुत्तो आयाहि(णं)णपयाहिणं करेइ २ ता वंदइ नमंसइ
वं० २ ता तमेव धम्मियं जाणं दु(रु)रुहइ २ ता जेणेव बारवई-नयरी तेणेव उवा-
गच्छइ २ ता बारवई नयरिं अणुप्पविसइ २ ता जेणेव सए गिहे जेणेव बाहिरिया
उवट्ठाणसाला तेणेव उवागच्छइ २ ता धम्मियाओ जाणप्पवराओ पच्चोरुहइ २ ता
जेणेव सए वासधरे जेणेव सए सयणिजे तेणेव उवागच्छइ २ ता सयंसि सयणि-
ज्जंसि निसीयइ, तए णं तीसे देवईए देवीए अयं अब्भत्थिए ४ समुप्पण्णे-एवं खलु
अहं सरिसए जाव नलकुब्बरसमाणे सत्त पुत्ते पयाया, नो चेव णं मए एगस्स-वि
बालत्तणए समुब्भूए, एस-वि-य णं कण्हे वासुदेवे छण्हं छण्हं मासाणं ममं अंतियं
पायवंदए हव्वमागच्छइ, तं धण्णाओ णं ताओ अम्माओ जासिं मण्णे णियगकुच्छि-

संभूययाईं थणदुद्धल्लयाईं महुरसमुल्लावयाईं मंमण(प)जंपियाईं थणमूलकक्खदेस-
भाणं अभिसरमाणायं मुद्धयाईं पुणो य कोमलकमलोवमेहिं हत्थेहिं (गेण्हंति) गिण्हि-
ऊण उच्छङ्गि णिवेसियाईं देति समुल्लावए सुमहुरे पुणो २ मंजुलप्पमणिए अहं णं
अधण्णा अपुण्णा अकयपुण्णा एतो ए(क)कतरमपि न पत्ता, ओहय० जाव झिया-
यइ । इमं च णं कण्हे वासुदेवे ण्हाए सव्वालंकारविभूसिए देवईए देवीए पायवंदए
हव्वमागच्छइ, तए णं से कण्हे वासुदेवे देवईं देविं० पासइ २ ता देवईए देवीए
पायग्गहणं करेइ २ ता देवईं देवीं एवं वयासी-अण्णया णं अम्मो ! तुब्भे ममं
पासेत्ता हट्ठ जाव भवह, किण्णं अम्मो ! अज्ज तुब्भे ओहय[०] जाव झियायह १,
तए णं सा देवईं देवी कण्हं वासुदेवं एवं वयासी-एवं खलु अहं पुत्ता । सरिसए जाव
समाणे सत्त-पुत्ते पयाया नो चेव णं मए एगस्स-वि बालत्तणे अणुब्भूए तुमं-पि(य)णं
पुत्ता ! ममं छण्हं २ मासाणं ममं अंतियं पादवंदए हव्वमागच्छसि तं धण्णाओ णं
ताओ अम्मयाओ जाव झियामि, तए णं से कण्हे वासुदेवे देवईं देविं एवं वयासी-
मा णं तुब्भे अम्मो ! ओहय-जाव झियायह अहण्णं तद्वा घ(त्ति)इस्सामि जहा णं
ममं सहोदरे कणीयसे भाउए भविस्सतीतिकट्ठु देवईं देविं ताहिं इट्ठाहिं (कं० जाव)
वग्गूहिं समासासेइ (२) तओ पडिणिक्खमइ २ ता जेणेव पोसहसाला तेणेव उवाग-
च्छइ २ ता जहा अभओ नवरं हरिणेगमेसिस्स अट्ठमभत्तं पणेण्हइ जाव अंजलिं कट्ठु
एवं वयासी-इच्छामि णं देवाणुप्पिया ! सहोदरं कणीयसं भाउयं विदिण्णं, तए णं
से हरिणेगमेसी (देवे) कण्हं वासुदेवं एवं वयासी-होहिइ णं देवाणुप्पिया ! तव देव-
लोयत्तए सहोदरे कणीयसे भाउए से णं उम्मुक्क[०] जाव अणुप्पत्ते अरहओ अरिद्ध-
णेमिस्स अंतियं मुंडे जाव पव्वइस्सइ, कण्हं वासुदेवं दोच्चं-पि तच्चं-पि एवं वदइ २
ता जामेव दिसं पाउब्भूए तामेव दिसं पडिगए, तए णं से कण्हे वासुदेवे पोसह-
सालाओ पडिणि० जेणेव देवईं देवी तेणेव उवागच्छइ २ ता देवईए देवीए
पायग्गहणं करेइ २ ता एवं वयासी-होहिइ णं अम्मो ! म(मं) सहोदरे कणीयसे
(भाउ-ए)तिकट्ठु देवईं देविं ताहिं इट्ठाहिं जाव आसासेइ २ ता जामेव दिसं पाउ-
ब्भूए तामेव दिसं पडिगए । तए णं सा देवईं देवी अण्णया कयाईं तंसि तारिस-
गंसि जाव सीहं सुमिणे पासेत्ता पडिबुद्धा जाव पाढया हट्ठ(तु०)हियया (तं ग० सु०)
परिवहइ, तए णं सा देवईं देवी नवण्हं मासाणं जासु(म)मिणारतबंभुजीवयलक्खार-
ससरसपारिजातकतरुणदिवायरसमप्पभं सव्वणयणकंतं सुकुमालं जाव सुल्लं गयता-
ल्लयसमाणं दारयं पयाया जम्मणं जहा मेहकुमारं जाव जम्हा णं अम्हं इमे दारए
गयताल्लसमाणे तं होउ णं अम्हं एयस्स दारगस्स नामधेजे गयसुकुमाले (२), तए

णं तस्स दारगस्स अम्मापियरे नामं करेति गयसुकुमा(ले)लो-त्ति सेसं जहा मेहे जाव
 (अलं) भोगसमत्थे जाए यावि होत्था । तत्थ णं बा-रवईए नयरीए सोमिले नामं
 माहणे परिवसइ अरिउ०वे० जाव सुपरिणिट्टिए यावि होत्था, तस्स सोमिलमाहणस्स
 सोमसिरी नामं माहणी होत्था सू-माल०, तस्स णं सोमिलस्स (मा०) धूया सोमसिरीए
 माहणीए अत्तया सोमा-नामं दारिया होत्था सो(सुकु)माला जाव सुरुवा रुवेणं जाव
 लावण्णेणं उक्किट्ठा उक्किट्ठसरीरा यावि होत्था, तए णं सा सोमा दारिया अण्णया
 कयाइ ण्हाया सव्वालंकारविभूसिया बहूहिं खुज्जाहिं जाव परिक्खिता सयाओ
 गिहाओ पडिणिक्खमइ २ ता जेणेव रायमग्गे तेणेव उवागच्छइ २ ता राय-
 मग्गंसि कणगतिंदूसएणं कीलमाणी (२) चिद्धइ । तेणं कालेणं तेणं समएणं अरहा
 अरिट्ठणेमी समोसदे परिसा निग्गया, तए णं से कण्हे वासुदेवे इमीसे कहाए लद्धे
 समाणे ण्हाए सव्वालंकारविभूसिए गयसुकुमालेणं कुमारेणं सद्धिं हत्थिखंधवरगए
 सकोरंटमल्लदामेणं छत्तेणं धरेज्जमाणेणं से(य)अवरचामराहिं उद्धुवमाणीहिं बारवईए
 नयरीए मज्झमज्झेणं अरहओ अरिट्ठणेमिस्स पायवंदए निग्गच्छमाणे सोमं दारियं
 पासइ २ ता सोमाए दारियाए रुवेण य जोव्वणेण य लावण्णेण य जाव विम्हिए, तए
 णं (से) कण्हे[०] कोडुंबियपुरिसे सहावेइ २ ता एवं वयासी-गच्छह णं तुम्हे-देवाणु-
 प्पिया ! सोमिलं माहणं जायित्ता सोमं दारियं गेण्हइ २ ता कण्णंतेउरंसि पक्खि-
 बह, तए णं एसा गयसुकुमालस्स कुमारस्स भारिया भविसइ, तए णं कोडुंबिय
 जाव पक्खिवन्ति, तए णं से कण्हे वासुदेवे बारवईए नयरीए मज्झमज्झेणं निग्ग-
 च्छइ २ ता जेणेव सह-संववणे उज्जाणे जाव पज्जुवासइ, तए णं अरहा अरिट्ठणेमी
 कण्हस्स वासुदेवस्स गयसुकुमालस्स (कुमारस्स) तीसे य धम्मकहाए कण्हे पडि-
 गाए, तए णं से गयसुकुमाले (कु०) अरहओ अरिट्ठणेमिस्स अंति(य)ए धम्मं सोच्चा जं
 नवरं अम्मापियरं आपुच्छामि जहा मेहो (णवरं) महेलियावज्जं जाव वड्ढियकुले, तए
 णं से कण्हे वासुदेवे इमीसे कहाए लद्धे समाणे जेणेव गयसुकुमाले-तेणेव उवा-
 गच्छइ २ ता गयसुकुमालं (०) आलिंइ २ ता उच्छंणे निवेसेइ २ ता एवं वयासी-तुमं
 ममं सहोदरे कणीयसे भाया तं मा णं तुमं देवाणुप्पिया ! इयाणिं अरहओ (अ०अं०)
 मुंडे जाव पव्वयाहि, अहणं बारवईए नयरीए महया (२) रायाभिसेएणं अभि-
 सिचिस्सामि, तए णं से गयसुकुमाले-कण्हेणं वासुदेवेणं एवं वुत्ते समाणे तुसिणीए
 संचिद्धइ, तए णं से गयसुकुमाले-कण्हं वासुदेवं अम्मापियरो य दोच्चं-पि तच्चं-पि एवं
 वयासी-एवं खलु देवाणुप्पिया ! माणुस्सया कामा खेलासवा जाव विप्पजहियव्वा
 भविस्संति, तं इच्छामि णं देवाणुप्पिया ! तुम्हेहिं अब्भणुच्चाए (स०) अरहओ अरिट्ठणे-

मिस्स अंति ए जाव पव्वइत्तए, तए णं तं गयसुकुमालं कण्हे वासुदेवे अम्मापियरो
य जाहे नो संचाए० बहुयाहिं अणुलोमाहिं जाव आघवित्तए ताहे अकामाई चेव एवं
वयासी-तं इच्छामि णं ते जाया ! एगदिवसमवि रजसिरिं पासित्तए निक्खमणं जह्वा
महाबलस्स जाव तमाणाए तहा[०] तहा जाव संजमइ, से गयसुकुमाले अणगारे
जाए ई(इ)रिया(०) जाव[०] गुत्तवंभयारी, तए णं से गयसुकुमा(रे)ले (अ०) जं चेव
दिवसं पव्वइए तस्सेव दिवसस्स पुव्वावरण्हकालसमयंसि जेणेव अरहा अरिट्टणेमी
तेणेव उवागच्छइ २ ता अरहं अरिट्टणेमिं तिक्खुतो आयाहिणपयाहिणं० वंदइ
नमंसइ वं० २ ता एवं वयासी-इच्छामि णं भंते ! तुब्भेहिं अब्भणुण्णाए समाणे
महाकालंसि सुसाणंसि एगराइयं महापडिमं उवसंपज्जिता-णं विह(रे)रित्तए,
अहासुहं देवाणुप्पिया ! मा पडिवंधं करेह, तए णं से गयसुकुमाले अणगारे अरहया
अरिट्टणेमिणा अब्भणुण्णाए समाणे अरहं अरिट्टणेमिं वंदइ नमंसइ वं० २ ता
अरहओ अरिट्टणेमिस्स अंति० सह-संबवणाओ उज्जाणाओ पडिणिक्खमइ २ ता
जेणेव महाकाले सुसाणे तेणेव उवागए २ ता थंडिहं पडिलेहेइ २ ता (उच्चार-
पासवणभूमि पडिलेहेइ २ ता) ई(सिं)सिपब्भारगएणं काएणं जाव दो-वि पाए साहट्ठुं
एगराइं महापडिमं उवसंपज्जित्ताणं विहरइ, इमं च णं सोमिले माहणे सामिधेयस्स
अट्ठाए वा-रवईओ नयरीओ बहिया पुव्वणिग्गए समिहाओ य दब्भे य कुसे य
पत्तामोडं च गेण्हइ २ ता तओ पडिणियत्तइ २ ता महाकालस्स सुसाणस्स अदूर-
सामंतेणं वीईवयमाणे (२) संज्ञाकालसमयंसि पविरलमणुस्संसि गयसुकुमालं अणगारं
पासइ २ ता तं वेरं सरइ २ ता आसुरुत्ते ५ एवं वयासी-एस णं भो ! से
गय(सू)सुकुमाले कुमारे अ(ए)पत्थिय जाव परिवजिए, जे णं मम धूरं सोमसिरीए
भारियाए अत्तयं सोमं दारियं अदिट्ठदोसपइयं कालवत्तिणि विप्पजहेत्ता मुंडे जाव
पव्वइए, तं सेयं खलु ममं गयसुकुमालस्स कुमारस्स वेरनिजायणं करेत्तए, एवं
संपेहेइ २ ता दिसापडिलेहणं करेइ २ ता सरसं मट्ठियं गेण्हइ २ ता जेणेव गयसुकुमाले
अणगारे तेणेव उवागच्छइ २ ता ग(ज)य-सुकुमालस्स कुमा(अणगा)रस्स मत्थए
मट्ठियाए पालिं बंधइ २ ता जलंतीओ चिययाओ फुल्लियकिंसुयसमाणे ख(य)इरंगारे
कहल्लेणं गेण्हइ २ ता गय-सुकुमालस्स अणगारस्स मत्थए पक्खिवइ २ ता भीए
५ तओ खिप्पामेव अवक्कमइ २ ता जामेव दिसं पाउब्भूए तामेव दिसं पडिगए, तए
णं (से) तस्स ग-य-सुकुमालस्स अणगारस्स सरीरयंसि वेयणा पाउब्भूया उज्जला
जाव दुरहियासा, तए णं से गय-सुकुमाले अणगारे सोमिलस्स माहणस्स मणसा-वि
अप्पदुस्समाणे तं उज्जलं जाव अहियासेइ, तए णं तस्स गय-सुकुमालस्स अणगा-

रस्स तं उज्जलं जाव अहियासेमाणस्स सुभेणं परिणामेणं पसत्थज्झवसाणेणं त(या)दा-
 वरणिज्जाणं कम्माणं खएणं कम्मरयविकिरणकरं अपुव्वकरणं अणु[८]पविट्ठस्स
 अणंते अणुत्तरे जाव केवलवरणाणदंसणे ससुप्पण्णे, तओ पच्छा सिद्धे जाव-
 प्पहीणे, तत्थ णं अहासंनिहिंएहिं देवेहिं सम्मं आराहियंतिकट्ठ दिव्वे सुरभिगंधोदए
 चुट्ठे दसद्धवण्णे कुसुमे निवाडिए चेलुक्खेवे कए दिव्वे य गीयगंधव्वणिणाए कए
 यावि होत्था। तए णं से कण्हे वासुदेवे कल्लं पाउप्पभायाए जाव जलंते ण्हाए
 सव्वालंकारविभूसिए हत्थिखंधवरगए सको(रं)रेंटमल्लदामेणं छत्तेणं धरेज्जमाणेणं
 सेयवरचामराहिं उड्डु(प्प)व्वमाणीहिं महया भडचडगरपहकरवंदपरिक्खित्ते वा-रवई
 नयरिं मज्झंसज्जेणं जेणेव अरहा अरिट्ठणेमी तेणेव पहारेत्थ गमणाए, तए णं से
 कण्हे वासुदेवे बारवईए नयरीए मज्झंसज्जेणं निग्गच्छमाणे ए(गं)कल्लं पुरिसं पासइ
 जुण्णं जराजज्जरियदेहं जाव (किलंतं) महइमहालयाओ इट्ठगरासीओ एगमेगं इट्ठं
 गहाय बहियारत्थापहाओ अंतोगिहं अणुप्पविसमाणं पासइ, तए णं से कण्हे
 वासुदेवे तस्स पुरिसस्स अणुकंपणट्ठाए हत्थिखंधवरगए चेव एणं इट्ठं गेण्हइ
 २ ता बहिया रत्थापहाओ अंतोगिहं अणुप्पवेसेइ, तए णं कण्हेणं वासुदेवेणं एगाए
 इट्ठगाए गहियाए समाणीए अणेगेहिं पुरिससएहिं से महालए इट्ठगस्स रासी
 बहिया रत्थापहाओ अंतोघरंसि अणुप्पवेसिए, तए णं से कण्हे वासुदेवे बारवईए
 न-गरीए मज्झंसज्जेणं निग्गच्छइ २ ता जेणेव अरहा अरिट्ठणेमी तेणेव उवागए
 २ ता जाव वंदइ नमंसइ वं० २ ता गयसुकुमालं अणगारं अपासमाणे अरहं अरिट्ठ-
 णेमिं वंदइ नमंसइ वं० २ ता एवं वयासी-कहि णं भंते ! से म-मं सहोदरे कणीयसे
 भाया गयसुकुमाले अणगारे (?) जा(जण)णं अहं वंदामि नमंसामि [?], तए णं अरहा
 अरिट्ठणेमी कण्हं वासुदेवं एवं वयासी-साहिए णं कण्हा ! गयसुकुमालेणं अणगारेणं
 अप्पणो अट्ठे, तए णं से कण्हे वासुदेवे अरहं अरिट्ठणेमिं एवं वयासी-कहण्णं
 (भंते !) गयसुकुमालेणं अणगारेणं साहिए अप्पणो अट्ठे ?, तए णं अरहा अरिट्ठ-
 णेमी कण्हं वासुदेवं एवं वयासी-एवं खलु कण्हा ! गयसुकुमाले णं (अणगारे णं)
 ममं कल्लं पुव्वावरण्हकालसमयंसि वंदइ नमंसइ वं० २ ता एवं वयासी-इच्छामि
 णं जाव उवसंपज्जिताणं विहरइ, तए णं तं गयसुकुमालं अणगारं एगे पुरिसे पासइ
 २ ता आसुरत्ते ५ जाव सिद्धे, तं एवं खलु कण्हा ! गयसुकुमालेणं अणगारेणं
 साहिए अप्पणो अट्ठे, तए णं से कण्हे वासुदेवे अरहं अरिट्ठणेमिं एवं वयासी-
 (केस) से के णं भंते ! से पुरिसे अ-पत्थियपत्थिए जाव परिवजिए (?) जे-णं ममं
 सहोद(रं)रे कणीय(सं)से भाय(रं)रे गयसुकुमा(लं)ले अणगा(रं)रे अकाले चेव

जीवियाओ ववरोविए [?], तए णं अरहा अरिट्ठणेमी कण्हं वासुदेवं एवं वयासी-
मा (णं) कण्हा ! तुमं तस्स पुरिसस्स पदोसमावज्जाहि, एवं खलु कण्हा ! तेणं
पुरिसेणं गयसुकुमालस्स अणगारस्स साहिजे दिण्णे, कण्णं भंते ! तेणं पुरिसेणं
गयसुकुमालस्स णं सा(हे)हिजे दिण्णे ?, तए णं अरहा अरिट्ठणेमी कण्हं वासुदेवं
एवं वयासी-से नूणं कण्हा ! ममं तुमं पायवंदए हव्वमागच्छमाणे बारवईए नय-
रीए (एगं) पुरिसं पाससि जाव अणु-पविसिए, जहा णं कण्हा ! तुमं तस्स पुरिसस्स
साहिजे दिण्णे एवमेव कण्हा ! तेणं पुरिसेणं गयसुकुमालस्स अणगारस्स अणेग-
भवसयसहस्ससंचियं कम्मं उदीरेमाणेणं बहुकम्मणिज्जरत्थं साहिजे दिण्णे, तए णं
से कण्हे वासुदेवे अरहं अरिट्ठणेमि एवं वयासी-से णं भंते ! पुरिसे मए कण्हं
जाणियव्वे ?, तए णं अरहा अरिट्ठणेमी कण्हं वासुदेवं एवं वयासी-जे णं कण्हा !
तुमं बारवईए नयरीए अणु-पविसिमाणं पासेत्ता ठियए चेव ठिइमेएणं कालं करिस्सइ
तण्णं तुमं जा(णे)णिज्जासि एस णं से पुरिसे, तए णं से कण्हे वासुदेवे अरहं अरिट्ठ-
णेमि वंदइ नमंसइ वं० २ ता जेणेव आभिसे(ये)यं हत्थिरय(णे)णं तेणेव उवागच्छइ
२ ता हत्थि दु-रूहइ २ ता जेणेव बारवई नयरी जेणेव सए गिहे तेणेव प्हारैत्थ
गमणाए, (तए णं) तस्स सोमिलमाहणस्स कलं जाव जलंते अयमेयारूवे अ-ब्भत्थिए
४ समुप्पण्णे-एवं खलु कण्हे वासुदेवे अरहं अरिट्ठणेमि पायवंदए निग्गए तं
नायमेयं अरहया विण्णायमेयं अरहया सुयमेयं अरहया सि(द्ध)द्वमेयं अरहया
भविस्सइ कण्हस्स वासुदेवस्स, तं न नज्जइ णं कण्हे वासुदेवे ममं केणवि कुमारेणं
मारिस्सइत्तिकट्ठु भीए ४ सयाओ गिहाओ पडिणिकखमइ, कण्हस्स वासुदेवस्स
बारवइं नयरीं अणु-पविसिमाणस्स पुरओ सपक्खिं सपडिदिसिं हव्वमागए, तए णं
से सोमिले माहणे कण्हं वासुदेवं सहसा पासेत्ता भीए ४ ठि(ए य)यए चेव ठिइमेयं
कालं करेइ धरणि(त्त)तलंसि सव्वंगेहिं धसत्ति संणिवडिए, तए णं से कण्हे
वासुदेवे सोमिलं माहणं पासइ २ ता एवं वयासी-एस णं (भो) देवाणुप्पिया ! से
सोमिले माहणे अपत्थियपत्थिए जाव परिवज्जिए जे(णं) ममं सहोयरे कणीयसे
भायरे गयसुकुमाले अणगारे अकाले चेव जीवियाओ ववरोविए[ति]त्तिकट्ठु सोमिलं
माहणं पाणेहिं कट्ठुवेइ २ ता तं भूमिं पाणिएणं अब्भोकखावेइ २ ता जेणेव सए
गिहे तेणेव उवागए सयं गिहं अणु-पविट्ठे, एवं खलु जंबू ! जाव अट्ठमस्स अंगस्स
अंतगडदसाणं तच्चस्स वगस्स अट्ठमज्झयणस्स अयमट्ठे पण्णत्ते ॥ ६ ॥ नवमस्स
(उ) उक्खेवओ, एवं खलु जंबू ! तेणं कालेणं तेणं समएणं बारवईए नयरीए जहा
पढमए जाव विहरइ, तत्थ णं बारवईए-बलदेवे नामं राथा होत्था वण्णओ, तस्स

णं बलदेवस्स रण्णो धारिणी-नामं देवी होत्था वण्णओ, तए णं सा धारिणी सीहं सुमिणे जहा गोयमे नवरं सुमुहे नामं कुमारे पण्णासं कण्णाओ पण्णासओ दाओ चोइस-पुव्वाइं अहिज्जइ वीसं वासाइं परियाओ सेसं तं चेव (जाव) सेत्तुजे सिद्धे निक्खेवओ । एवं दुम्मुहे-वि कूव(दार)ए-वि, तिण्णिवि बलदेवधारिणीसुया, दारुए-वि एवं चेव, नवरं वा(व)सुदेवधारिणीसुए । एवं अणा(धि)दिट्ठी-वि वा-सुदेवधारिणीसुए, एवं खलु जंबू ! समणेणं जाव संपत्तेणं अट्ठमस्स अंगस्स अंतगडदसाणं तच्चस्स वग्गस्स तेरसमस्स अज्झयणस्स अयमट्ठे पण्णत्ते ॥ ७ ॥

[चउत्थो वग्गो]

जइ णं भंते ! समणेणं जाव संपत्तेणं (‘‘अं०) तच्चस्स वग्गस्स अयमट्ठे पण्णत्ते चउत्थस्स (णं भं० व० अं० स० जाव सं०) के अट्ठे पण्णत्ते ? एवं खलु जंबू ! समणेणं जाव संपत्तेणं चउत्थस्स वग्गस्स (अं०) दस अज्झयणा पण्णत्ता, तं०-जालिमयालिउवया(लि)ली पुरिससेणे य वारिसेणे य । पज्जुणसंबअणिरुद्धे सच्चणेमी य दढणेमी (य) ॥ १ ॥ जइ णं भंते ! समणेणं जाव संपत्तेणं चउत्थस्स वग्गस्स दस अज्झयणा पण्णत्ता पढमस्स णं (भं०) अज्झयणस्स (स०जाव सं०) के अट्ठे पण्णत्ते ? एवं खलु जंबू ! तेणं कालेणं तेणं समएणं बा-रवई (णा०) नयरी (हो०), तीसे जहा पढमे कण्हे वासुदेवे आहेवच्चं जाव विहरइ, तत्थ णं बारवईए नगरीए वसुदेवे राया, [तस्स णं वसुदेवस्स रण्णो] धारिणी [नामं देवी होत्था] वण्णओ जहा गोयमो नवरं जालिकुमारे पण्णासओ दाओ बारसंगी सोलस-वासा परियाओ सेसं जहा गोयमस्स जाव सेत्तुजे सिद्धे । एवं मया-ली उवया-ली पुरिससेणे य वारिसेणे य । एवं पज्जुणे-वि-त्ति, नवरं कण्हे पिया रुप्पिणी माया । एवं संबे-वि, नवरं जंबवई माया । एवं अणिरुद्धे-वि, नवरं पज्जुणे पिया वेदब्बी माया । एवं सच्चणेमी, नवरं समुद्दविजए पिया सिवा माया, (एवं) दढणेमी-वि, सव्वे एगगमा, चउत्थ[स्स] वग्गस्स निक्खेवओ ॥ ८ ॥

[पंचमो वग्गो]

जइ णं भंते ! समणेणं जाव संपत्तेणं चउत्थस्स वग्गस्स अयमट्ठे पण्णत्ते पंचमस्स (णं भं०) वग्गस्स अंतगडदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! समणेणं जाव संपत्तेणं पंचमस्स वग्गस्स दस अज्झयणा पण्णत्ता, तं०-‘पडमावई य गोरी गंधारी लक्खणा सुसीमा य । जंबव(ई)इसच्चभामा रुप्पिणिमूलसि(सी)रिमूलदत्ता-वि ॥ १ ॥’ जइ णं भंते ! [समणेणं जाव संपत्तेणं] पंचमस्स वग्गस्स दस अज्झयणा प० पढमस्स णं भंते ! अज्झयणस्स-के

अद्वे प० ? एवं खलु जंबू ! तेणं कालेणं तेणं समएणं बारवई-नगरी-जहा पढमे जाव कण्हे वासुदेवे आहिवच्चं जाव विहरइ, तस्स णं कण्हस्स वासुदेवस्स पउमावई ना(मं)म देवी हो(हु)त्था वण्णओ, तेणं कालेणं तेणं समएणं अरहा अरिट्ठणेमी समोसढे जाव विहरइ, कण्हे वासुदेवे निग्गए जाव पज्जुवासइ, तए णं सा पउमाव(इ)ई देवी इमीसे कहाए लद्धट्ठा (समाणी) हट्ठ० जहा देवई जाव पज्जुवासइ, तए णं अ-रहा अरिट्ठणेमी कण्हस्स वासुदेवस्स पउमावईए (दे०) य धम्मकहा परिसा पडिगया, तए णं कण्हे वासुदेवे अरहं अरिट्ठणेमि वंदइ नमंसइ वं० २ ता एवं वयासी-इमीसे णं भंते ! बारवईए न-गरीए-नवजोयण[०] जाव देवलोगभूयाए किंमूलाए विणासे भविस्सइ ? कण्हाइ ! अरहा अरिट्ठणेमी कण्हं वासुदेवं एवं वयासी-एवं खलु कण्हा ! इमीसे बारवईए नयरीए-नवजोयण-जाव[०] भूयाए सुरग्गिदीवायणमूलाए विणासे भविस्सइ, (तए णं) कण्हस्स वासुदेवस्स अरहओ अरिट्ठणेमिस्स अंतिए ए(यमद्वे)यं सोच्चा निसम्म (अ०) एयं अब्भत्थिए ४-धण्णा णं ते जालिमयालि(उ०)पुरिससेण-वारिसेणपज्जुणसंबअणिरुद्धदढणेमिसच्चणेमिप्पभियओ कुमार जे णं (चिच्चा) चइत्ता हिरण्णं जाव परिभा(ए)इत्ता अरहओ अरिट्ठणेमिस्स अंतियं मुंडा जाव पव्वइया, अहण्णं अधण्णे अकयपुण्णे रज्जे य जाव अंतेउरे य माणुस्सएसु य कामभोगेसु मुच्छिए ४ नो संचाएमि अरहओ अरिट्ठणेमिस्स जाव पव्वइत्तए, कण्हाइ ! अरहा अरिट्ठ-णेमी कण्हं वासुदेवं एवं वयासी-से नूणं कण्हा ! तव अयम-ब्भत्थिए ४-धण्णा णं ते जाव पव्वइत्तए, से नूणं कण्हा ! अ(यम)द्वे समद्वे ? हंता अत्थि, तं नो खलु कण्हा ! तं एवं भू(यं)तं वा भव्वं वा भविस्सइ वा जण्णं वासुदेवा चइत्ता हिरण्णं जाव पव्व-इस्संति, से के-णं [अ]द्विणं भंते ! एवं वुच्चइ-न ए(वं)यं भूयं वा जाव पव्व-इस्संति ? कण्हाइ ! अरहा अरिट्ठणेमी कण्हं वासुदेवं एवं वयासी-एवं खलु कण्हा ! सव्वे-वि य णं वासुदेवा पुव्वभवे नि-दाणगडा, से ए(ए)तेणद्वेणं कण्हा ! एवं वुच्चइ-न एयं भूयं० पव्वइस्संति, तए णं से कण्हे वासुदेवे अरहं अरिट्ठणेमि एवं वयासी-अहं णं भंते ! इ(ओ)तो कालमासे कालं किच्चा कहिं गमिस्सामि (?) कहिं उव्वजिस्सामि ?, तए णं अ-रहा अरिट्ठणेमी कण्हं वासुदेवं एवं वयासी-एवं खलु कण्हा ! बारवईए नयरीए सुरग्गिदीवायण(कुमार)कोवनि(इ)दद्धाए अम्मापिइनियगविप्पहूणे रामे(ण)णं बल-देवे-णं सद्धिं दाहिणवेयालिं अभिमुहे जो(जु)हिद्विह्लपामोक्खाणं पंचण्हं पंडवाणं पंडुरायपुत्ताणं पासं पंडुमहुरं संपत्थिए कोसंबवणकाणणे नग्गोहवरपायवस्स अ(वे)हे पुढविसिलापट्टए पीयवत्थपच्छाइयसरीरे ज(र)राकुमारेणं तिक्खेणं कोदंडविप्पमुक्केणं इसुणा वामे पा(वे)दे विद्धे समाणे कालमासे कालं किच्चा तच्चाए वालुयप्पभाए

पुढवीए उज्जलिए नरए नेरइयत्ताए उव्वज्जिहिसि, तए णं कण्हे वासुदेवे अरहओ
 अरिट्ठणेमिस्स अंतिए एयमट्ठं सोच्चा निसम्म ओहय-जाव झियाइ, कण्हाइ !
 अरहा अरिट्ठणेसी कण्हं वासुदेवं एवं वयासी-मा णं तुमं देवाणुप्पिया ! ओहय-जाव
 झियाहि, एवं खलु तुमं देवाणुप्पिया ! तच्चाओ पुढवीओ उज्जलियाओ अणंतरं
 उव्वट्ठिता इहेव जं(वूदी)बुद्धीवे भारहे वासे आगमेसाए उस्सप्पिणीए पुंडे(पुणे)सु
 जणवएसु सयदुवारे बारसमे अममे नामं अरहा भविस्ससि, तत्थ तुमं बहूइं
 वासाइं केवलपरियागं पाउणेत्ता सिज्झिहिसि ५, तए णं से कण्हे वासुदेवे अरहओ
 अरिट्ठणेमिस्स अंतिए एयमट्ठं सोच्चा निसम्म हट्ठतुट्ठं ० अप्फोडेइ २ ता वग्गइ
 २ ता तिवइं छिंदइ २ ता सीहणायं करेइ २ ता अरहं अरिट्ठणेमि वंदइ नमंसइ
 वं० २ ता तमेव आ(अ)भिसेक्कं ह(त्थिर०)त्थि दु-रुहइ २ ता जेणेव बारव-ई
 नयरी जेणेव सए गिहे तेणेव उवागए अभिसेयहत्थिरयणाओ पच्चोरुहइ (०)
 जेणेव बाहिरिया उव्वट्ठाणसाला जेणेव सए सीहासणे तेणेव उवागच्छइ २ ता
 सीहासणवरंसि पुरत्थाभिमुहे निसीयइ २ ता कोडुंबियपुरिसे सहावेइ २ ता
 एवं वयासी-गच्छह णं तुब्भे देवाणुप्पिया ! बारवईए नयरीए सिंघाडग[०]
 जाव उव्वघोसेमाणा एवं वयह-एवं खलु देवाणुप्पिया ! बारवईए नयरीए-नव-
 जोयण-जाव-भूयाए सुरगिगदीवायणमूलाए विणासे भविस्सइ, तं जो णं देवाणु-
 प्पिया ! इच्छइ बा-रवईए नयरीए राया वा जुवराया वा ईसरे तलवरे माडं-
 बियकोडुंबियइब्भसेट्ठी वा देवी वा कुमारो वा कुमारी वा अरहओ अरिट्ठ-
 णेमिस्स अंतिए मुंडे जाव पव्वइत्तए तं णं कण्हे वासुदेवे विसजेइ, पच्छातुर-
 स्स-वि य से अहापवित्तं वित्तिं अणुजाणइ महया इ[त्थि]त्थीसक्कारसमुदएण य से
 निक्खमणं करेइ, दोच्चं-पि तच्चं-पि घोसणयं घोसेह २ ता मम ए(यमाणात्ति)यं
 पच्चप्पिणह, तए णं ते कोडुंबिय जाव पच्चप्पिणंति, तए णं सा पउमावई-देवी
 अरहओ०अंतिए धम्मं सोच्चा निसम्म हट्ठतुट्ठ[०] जाव हियया अरहं अरिट्ठणेमि
 वंदइ नमंसइ वं० २ ता एवं वयासी-सइहामि णं भंते ! निग्गंथं पा(प)वयणं०
 से जहेयं तुब्भे वदह जं नवरं देवाणुप्पिया ! कण्हं वासुदेवं आपुच्छामि, तए
 णं अहं देवा० अंतिए मुंडा जाव पव्वयामि, अहासुहं देवाणुप्पि० ! मा पडि-
 वंथं करे(हि)ह, तए णं सा पउमावई देवी धम्मियं जाणप्पवरं दुरुहइ २ ता जेणेव
 बा-रवई-नयरी जेणेव सए गिहे तेणेव उवागच्छइ २ ता धम्मियाओ जाणाओ
 पच्चोरु(भ)हइ २ ता जेणेव कण्हे वासुदेवे तेणेव उवागच्छइ २ ता करयल० अंजलिं
 कट्ठु (कण्हं वा०) एवं वयासी-इच्छामि णं देवाणुप्पिया ! तुब्भेहिं अब्भणुणया

समाणी अरहओ अरिट्ठणेमिस्स अंतिए मुंडा जाव पव्व०, अहासुहं०, तए णं से कण्हे वासुदेवे कोडुंबिए (पु०) सदावेइ २ ता एवं वयासी-खिप्पामेव (भो दे०) पउमावईए (०) महत्थं निक्खमणाभिसेयं उवट्ठवेह २ ता एयमाणत्तियं पच्चप्पिणह, तए णं ते जाव पच्चप्पिणंति, तए णं से कण्हे वासुदेवे पउमावईं देविं पट्ठयं[सि] दु-रुहेइ (०) अट्ठसएणं सोवण्णकलस जाव महाणिक्खमणाभिसेएणं अभिसिचइ २ ता सव्वालंकारविभूसियं करेइ २ ता पुरिससहस्सवाहिणिं सि(वि)वियं दुह(हावे)हेइ २ ता बारवईए नयरीए मज्झंसज्जेणं निगगच्छइ २ ता जेणेव रेवयए पव्वए जेणेव सहसंबवणे उज्जाणे तेणेव उवागच्छइ २ ता सीयं ठवेइ (०) पउमावईं देवी सीयाओ पच्चोरु-हइ २ ता जेणेव अरहा अरिट्ठणेमी तेणेव उवागच्छइ २ ता अरहं अरिट्ठणेमिं तिक्खुत्तो आयाहिणपयाहिणं करेइ २ ता वंदइ नमंसइ वं० २ ता एवं वयासी-एस णं भंते ! मम अगमहिंसी पउमावई-नामं देवी इट्ठा कंता पिया मणुण्णा मणा(मा अ)भिरामा जाव किमंग पुण पासणयाए ? तण्णं अहं देवाणुप्पिया ! सिस्सि(णी)णिभिव्खं दलयामि पडिच्छंतु णं देवाणुप्पिया ! सिस्सिणिभिव्खं, अहासुहं०, तए णं सा पउमावई (०) उत्तरपुर-च्छि(मे)मं दिसीभा(गे)गं अक्कमइ २ ता सयमेव आभरणाळंकारं ओमुयइ २ ता सयमेव पंचमुट्ठियं लोयं करेइ २ ता जेणेव अरहा अरिट्ठणेमी तेणेव उवागच्छइ २ ता अरहं अरिट्ठणेमिं वंदइ नमंसइ वं० २ ता एवं वयासी-आलिते जाव धम्ममाइक्खि(तं)उं, तए णं अरहा अरिट्ठणेमी पउमावईं देविं सयमेव पव्वा-वेइ २ ता सयमेव मुंडावेइ सयमेव जक्खिणीए अज्जाए सिस्सिणि दलयइ, तए णं सा जक्खिणी अज्जा पउमावईं देविं स(यं)यमेव पव्वा० जाव संजमियव्वं, तए णं सा पउमावईं जाव संजमइ, तए णं सा पउमावईं अज्जा जाया ईरियासमिया जाव गुत्तवंभयारिणी, तए णं सा पउमावईं अज्जा जक्खिणीए अज्जाए अंतिए सामाइयमाइयाईं एक्कारस अंगाईं अहिजइ, बह्वहिं चउत्थछट्ठमदसमदुवाल्सेहिं मासखमासखमणेहिं० अप्पाणं भावेमा(णी)णा विहरइ, तए णं सा पउमावईं अज्जा बहुपडिपुण्णाईं वीसं वासाईं सामण्णपरियागं [पाउणइ] पाउणिता मासियाए संलेह-णाए अप्पाणं झ(झो)सेइ २ ता सट्ठिं भत्ताईं अणस(णेणं)णा-ए छेदेइ २ ता जस्सट्ठाए कीरइ जिणकप्पभावे थेरकप्पभावे जाव तमट्ठं आराहेइ चरिमुस्सासेहिं सिद्धा ५ ॥ ९ ॥ (उ० य अ०) तेणं कालेणं तेणं समएणं बारवई (ण०) रेवयए उज्जाणे नंदणवणे तत्थ णं बारवईए नयरीए कण्हे वासुदेवे० तस्स णं कण्हं[स्स]वासुदेवस्स गोरी देवी वण्णओ अरहा (अ०) समोसडे कण्हे णिगए गोरी

जहा पउमावई तहा निग्गया धम्मकहा परिसा पडिगया, कण्हे-वि, तए णं सा गोरी जहा पउमावई तहा निक्खंता जाव सिद्धा ५ । एवं गं(गां)वारी । लक्खणा । सुसीमा । जंबवई । सच्चभामा । सप्पिणी । अट्ट-वि पउमावई[इ]सिरिसाओ अट्ट अज्झयणा ॥ १० ॥ ('न०) तेणं कालेणं तेणं समएणं बारवई[ए]नयरीए रेवयए (प०) नंदणवणे (उ०) कण्हे०, तत्थ णं बारवईए नयरीए कण्हस्स वासुदेवस्स पु(त्त)ए ते जंबवईए देवीए अत्तए संबे नामं कुमारे होत्था अहीण०, तस्स णं संबस्स कुमारस्स मूलसिरी-नामं भारिया होत्था वण्णओ, अरहा-समोसडे कण्हे निग्गए मूलसिरी-वि निग्गया जहा पउमावई जं नवरं देवाणुप्पिया ! कण्हं वासुदेवं आपुच्छामि जाव सिद्धा । एवं मूलदत्ता-वि । पंचमो वग्गो ॥ ११ ॥

[छट्ठो वग्गो]

जइ (णं भं०) छट्ठ(म)स्स उक्खेवओ नवरं सोलस अज्झयणा प०, तं०- 'म(मं)काई किंक(म्)मे चेव मोगगरपाणी य कासवे । खेमए धिइ(ध)हरे चेव केलासे हुरिचंदणे ॥ १ ॥ वारत्तसुदंसणपुण्णभद्दुमणभद्दुपइट्ठे मेहे । अइमुत्ते अ[ह] अलक्खे अज्झयणाणं [उ] तु सोलसयं ॥ २ ॥' जइ सोलस अज्झयणा प०[०] पढमस्स अज्झयणस्स के अट्ठे पण्णत्ते ? एवं खलु जंबू ! तेणं कालेणं तेणं समएणं रायगिहे नगरे गुणसिलए उज्जाणे सेणिए राया (तत्थ णं) म-काई-नामं गाहावई परिवसइ अट्ठे जाव अपरिभूए, तेणं कालेणं तेणं समएणं समणे भगवं महावीरे आदिकरे गुणसिलए जाव विहरइ परिसा निग्गया, तए णं से म-काई गाहावई इमीसे कहाए लद्धट्ठे जहा पण्णत्तीए गंगदत्ते तहेव इमो(S)वि जेट्ठपुत्तं कुडुबे ठवेत्ता पुरिससहस्सवाहिणीए सीयाए निक्खंते जाव अणगारे जाए ईरियासमिए०, तए णं से म-काई अणगारे समणस्स भगवओ महावीरस्स तहारूवारणं थेराणं अंतिए सामाइयमाइयाई एक्कारस अंगाई अहिज्जइ सेसं जहा खंदगस्स, गुणरयणं तवोक्कम्मं सोलसवासाई परियाओ तहेव वि(पु)उल्ले सिद्धे । (दो० उ०) किंकमे-वि एवं चेव जाव वि-उल्ले सिद्धे ॥ १२ ॥ (त० उ० ए० ख० जं०) तेणं कालेणं तेणं समएणं रायगिहे (ण०) गुणसिलए उज्जाणे सेणिए राया चेळणा-देवी[वण्णओ], तत्थ णं रायगिहे-अज्जुणए नामं मालागारे परिवसइ, अट्ठे[०] जाव अपरिभूए, तस्स णं अज्जुणयस्स मालायारस्स बंधुमई-नामं भारिया होत्था सूमा०, तस्स णं अज्जुणयस्स मालायारस्स रायगिहस्स नयरस्स बहिया एत्थ णं मई एगे पुप्फारामे होत्था कि(क)ण्हे जाव नि(कु-गु)उरंबभूए दसद्धवण्णकुसुमकुसुमिए पासाईए ४, तस्स णं पुप्फारामस्स अदूरसामंते तत्थ णं अज्जुणयस्स माला(गा)यारस्स अज्जय-

पज्जयपिइपजयागए अणेगकुलपुरिसपरंपरागए मोग्गरपाणिस्स जक्खस्स जक्खा-
ययणे होत्था, तत्थ णं मोग्गरपाणिस्स पडिमा एणं महं पलसहस्सणिप्फणं
अयोमयं मोग्गरं गहाय चिट्ठइ, तए णं से अज्जुणए मालागारे बालप्पमिइं चेव
मोग्गरपाणिजक्ख(स्स)भत्ते यावि होत्था, कल्लकल्लिप(च्छि)त्थि(या)यपिडगाइं गेण्हइ
२ ता रायगिहाओ न-यराओ पडिणिक्खमइ २ ता जेणेव पुप्फारामे तेणेव उवा-
गच्छइ २ ता पुप्फुच्चयं करेइ २ ता अग्गाइं वराइं पुप्फाइं गहाइ २ ता
जेणेव मोग्गरपाणिस्स जक्खाययणे तेणेव उवागच्छइ २ ता मो(सु)ग्गरपाणिस्स
जक्खस्स महुरिहं पुप्फच्चयं करेइ २ ता जणुपाय(व)पडिए पणामं करेइ, तओ
पच्छा रायमग्गंसि वित्तिं कप्पेमाणे विहरइ, तत्थ णं रायगिहे नयरे ललिया
नामं गोट्ठी परिवसइ अङ्गु[०] जाव अपरिभू(या)ता जंकयसुकया यावि होत्था, तए
णं रायगिहे न-यरे अण्णया कयाइ पमो(ए)दे छुट्टे यावि होत्था, तए णं से अज्जणए
मालागारे कल्लं पभूयत(राए)रेहिं पुप्फेहिं कज्जमितिकट्टु पच्चूसकालसमयंसि बंधु-
मईए भारियाए सद्धिं प-त्थियपिडयाइं गेण्हइ २ ता सयाओ गिहाओ पडि-
णिक्खमइ २ ता रायगिहं न-गरं मज्झमज्झेणं निग्गच्छइ २ ता जेणेव पुप्फा-
रामे तेणेव उवागच्छइ २ ता बंधुमईए भारियाए सद्धिं पुप्फुच्चयं करेइ, तए
णं तीसे ललियाए गोट्ठीए छ गोट्ठिळा पुरिसा जेणेव मोग्गरपाणिस्स जक्खस्स
जक्खाययणे तेणेव उवागया अभिरममाणा चिट्ठंति, तए णं से अज्जुणए माला-
गारे बंधुमईए भारियाए सद्धिं पुप्फुच्चयं करेइ (०) अग्गाइं वराइं पुप्फाइं गहाय
जेणेव मोग्गरपाणिस्स जक्खस्स जक्खाययणे तेणेव उवागच्छइ, तए णं-छ
गोट्ठिळा पुरिसा अज्जुणयं मालागारं बंधुमईए भारियाए सद्धिं एज्जमाणं पासंति
२ ता अण्णमण्णं एवं वयासी-एस णं देवाणुप्पिया ! अज्जुणए मालागारे बंधु-
मईए भारियाए सद्धिं इहं हव्वमागच्छइ तं सेयं खलु देवाणुप्पिया ! अम्हं
अज्जुणयं मालागारं अव(उ)ओडयबंधणयं करेत्ता बंधुमईए भारियाए सद्धिं
विउलाइं भोगभोगाइं भुंजमाणाणं विहरित्तए-त्तिकट्टु एयमट्ठं अण्णमण्णस्स पडि-
सुणेंति २ ता कवाडंतरेसु निळुक्कंति निच्चला निर्फदा तुसिणीया पच्छण्णा
चिट्ठंति, तए णं से अज्जणए मालागारे बंधुम(ईए)इभारियाए सद्धिं जेणेव मोग्गर-
पाणिजक्खाययणे तेणेव उवागच्छइ (०) आलोए पणामं करेइ (०) सहुरिहं पुप्फ-
च्चणं करेइ (०) जणुपायपडिए पणामं करेइ, तए णं-छ गो(ट्टे)ट्ठिळा पुरिसा दव-
दवस्स कवाडंतरेहिंते निग्गच्छंति २ ता अज्जणयं मालागारं गेण्हंति २ ता
अवओड(ग)यबंधणं करेंति (०) बंधुमईए मालागारीए सद्धिं वि-उलाइं भोगभोगाइं

भुंजमाणा विहरंति, तए णं तस्स अज्जुणयस्स मालागारस्स अयमज्झत्थिए ४ (स०), एवं खलु अहं बालप्पभिइं चेव भोग्गरपाणिस्स भगवओ कल्लकल्लिं जाव कप्पेमाणे विहरामि, तं जइ णं भोग्गरपा(णि)णी जक्खे इह संणिहिए होंते से णं किं ममं एयारूवं आवइं पावेज्जमाणं पासंते ? तं नत्थि णं भोग्गरपा-णी जक्खे इह संणि-हिए, सुव्वत्तं तं एस कट्ठे, तए णं से भोग्गरपा-णी जक्खे अज्जुणयस्स मालागारस्स अयमेयारूवं अ-ब्भत्थियं जाव विया(णि)णेत्ता अज्जुणयस्स मालागारस्स सरीरयं अणु-पविसइ २ ता तडतडतडस्स बंधाईं छिंदइ, [छिंदित्ता] तं पलसहस्सणिप्फणं अयोमयं भोग्गरं गेण्हइ २ ता ते इत्थिसत्तमे पुरिसे घाएइ, तए णं से अज्जुणए मालागारे भोग्गरपाणिणा जक्खेणं अण्णाइट्ठे समाणे रायगिहस्स न-गरस्स परिपेरंतेणं कल्लकल्लिं छ इत्थिसत्तमे पुरिसे घाएमाणे विहरइ, (तए णं) रायगिहे नयरे सिंघाडग-जाव महापहपहेसु बहुजणो अण्णमण्णस्स एवमाइक्खइ ४-एवं खलु देवाणुप्पिया ! अज्जुणए मालागारे भोग्गरपाणिणा अण्णाइट्ठे समाणे राय-गिहे नयरे बहिया छ इत्थिसत्तमे पुरिसे घा(य)एमाणे विहरइ, तए णं से सेणिए राया इमीसे कहाए लद्धट्ठे समाणे कोडुंबिय० सहावेइ २ ता एवं वयासी-एवं खलु देवाणुप्पिया ! अज्जुणए मालागारे जाव घाएमाणे जाव विह-रइ तं मा णं तुब्भे कै-इ कट्ठस्स वा तणस्स वा पाणियस्स वा पुप्फफलाणं वा अट्ठाए सइरं निग्गच्छउ मा णं तस्स सरीरस्स वावत्ती भविस्सइत्तिकट्ठु दोच्चं-पि तच्चं-पि घोसणयं घोसेह २ ता खिप्पामेव ममेयं पच्चप्पिणह, तए णं ते कोडुं-विय[०] जाव पच्चप्पिणंति, तत्थ णं रायगिहे न-गरे सुदंसणे नामं सेट्ठी परि-वसइ अट्ठे०, तए णं से सुदंसणे समणोवासए यावि होत्था अभि(म)गय-जीवाजीवे जाव विहरइ, तेणं कालेणं तेणं समएणं समणे भगवं जाव समो-सडे [०] विहरइ, तए णं रायगिहे न-गरे सिंघाडग० बहुजणो अण्णमण्णस्स एवमाइक्खइ जाव किमंग पुण विपुलस्स अट्ठस्स गहणयाए [०] एवं तस्स सुदंसणस्स बहुजणस्स अंतिए ए-यं सोच्चा निसम्म अयं अ-ब्भत्थिए ४-एवं खलु समणे जाव विहरइ तं गच्छामि णं [०] वंदामि०, एवं संपेहेइ २ ता जेणेव अम्मापियरो तेणेव उवागच्छइ २ ता करयल० अज्जलिं कट्ठु एवं वयासी-एवं खलु अम्मयाओ ! समणे जाव विहरइ तं गच्छामि णं समणं भगवं महावीरं वंदामि नमंसामि जाव पज्जुवासामि, तए णं (तं) सुदंसणं सेट्ठि अम्मापियरो एवं वयासी-एवं खलु पुत्ता ! अज्जु(णे)णए मालागारे जाव घाएमाणे विहरइ, तं मा णं (तुमं) पुत्ता ! समणं भगवं महावीरं वंदए निग्गच्छाहि, मा णं

तव सरीरयस्स वावत्ती भविस्सइ, तुमणं इहगए चेव समणं भगवं महावीरं
 वंदाहि नमंसाहि, तए णं सुदंसणे सेट्ठी अम्मापि(तरो)यरं एवं वयासी-किण्णं(तुमं)
 अहं अम्मयाओ ! समणं भगवं महावीरं इहमागयं इह-पत्तं इह समोसठं इहगए चेव
 वंदिस्सामि(न०)?, तं गच्छामि णं अहं अम्मयाओ ! तुब्भेहिं अब्भणुणाए
 समाणे (स०) भगवं महावीरं वं(दा० जाव प०)दए, तए णं-सुदंस(णं)णं
 सेट्ठिं अम्मापियरो जाहे नो संचा(यं)एति बहूहिं आघवणाहिं ४ जाव पह-
 वेत्तए ताहे एवं वयासी-अहासुहं०, तए णं से सुदंसणे अम्मापिईहिं अब्भणु-
 ण्णाए समाणे ण्हाए सुदप्पावेसाइं जाव सरीरे सयाओ गिहाओ पडिणिक्ख-
 मइ २ ता पायविहारचारेणं रायगिहं नगरं मज्झमज्जेणं निग्गच्छइ २ ता
 मोग्गरपाणिस्स जक्खस्स जक्खाययणस्स अदूरसामंतेणं जेणेव गुणसिलए
 उज्जाणे जेणेव समणे भगवं महावीरे तेणेव प(पा)हारेत्थ गमणाए, तए णं
 से मोग्गरपाणी जक्खे सुदंसणं समणोवासयं अदूरसामंतेणं वीईवयमाणं (२)
 पासइ २ ता आसुस्ते ५ तं पलसहस्सणिप्फणं अयोमयं मोग्गरं उल्लेमाणे
 २ जेणेव सुदंसणे समणोवासए तेणेव पहारेत्थ गमणाए, तए णं से सुदंसणे
 समणोवासए मोग्गरपाणिं जक्खं एजमाणं पासइ २ ता अभीए अतत्थे
 अणुविवगे अक्खुमिए अचल्लिए असंभंते वत्(थए)थंतेणं भूमि पमजइ २ ता कर-
 यल० एवं वयासी-नमोऽत्थु णं अरहंताणं जाव संपत्ताणं नमोऽत्थु णं सम-
 णस्स जाव संपाविउकामस्स, पुव्वि (च) पि णं मए समणस्स भगवओ महा-
 वीरस्स अंतिए थूलए पाणाइवाए पच्चक्खाए जावजीवाए थूलए मुसावाए थूलए
 अदिण्णादाणे सदारसंतोसे कए जावजीवाए इच्छापरिमाणे कए जावजीवाए, तं
 इदाणिं-पि णं तस्सेव अंतियं सव्वं पाणाइवायं पच्चक्खामि जावजीवाए (०)
 मुसावायं (०) अदत्तादाणं (०) मेहुणं (०) परिग्गहं पच्चक्खामि जावजीवाए सव्वं
 कोहं जाव मिच्छादंसणसल्लं पच्चक्खामि जावजीवाए सव्वं असणं पाणं खाइमं साइमं
 चउव्विहं-पि आहारं पच्चक्खामि जावजीवाए, जइ णं एत्तो उवसग्गाओ सुच्चि-
 स्सामि तो मे कपेइ पारेत्तए अहं णो एत्तो उवसग्गाओ (न) मुच्चिस्सामि तओ
 मे तहा पच्चक्खाए चेवत्तिकइ सागारं पडिमं पडिवजइ । तए णं से मोग्गर-
 पा-णी जक्खे तं पलसहस्सणिप्फणं अयोमयं मोग्गरं उल्लेमाणे २ जेणेव
 सुदंसणे समणोवासए तेणेव उवाग(च्छ०)ए नो चेव णं संचाएइ सुदंसणं समणो-
 वासयं तेयसा समभिपडित्तए, तए णं से मोग्गरपाणी-जक्खे सुदंसणं समणो-
 वासयं सव्वओ समंताओ परिवोलेमाणे २ जाहे नो [चेव णं] संचाएइ सुदं-

सणं समणोवासयं तेयसा समभिपडित्ताए ताहे सुदंसणस्स समणोवासयस्स
 पुरओ सपक्खि सपडिदिसिं ठिच्चा सुदंसणं समणोवासयं अणिमिसाए दिट्ठीए
 सुच्चिरं निरिक्खइ २ ता अज्जुणयस्स मालागारस्स सरीरं विप्पज(हा)हइ २ ता
 तं पलसहस्सणिप्फणं अयोमयं मोग्गरं गहाय जामेव दिसं पाउब्भूए तामेव
 दिसं पडिगए, तए णं से अज्जुणए मालागारे मोग्गरपाणिणा जक्खेणं विप्प(ज०)-
 मुक्के समाणे धसत्ति धरणियलंसि सव्वंगेहिं (सं)निवडिए, तए णं से सुदंसणे
 समणोवासए निस्सवग्गमितिकट्ठु पडिमं पारेइ, तए णं से अज्जुणए मालागारे
 त(ओ)त्तो मुहुत्तंतरेणं आसत्थे समाणे उट्ठेइ २ ता सुदंसणं समणोवासयं एवं
 वयासी-तुब्भे णं देवाणुप्पिया ! के कहिं वा संपत्थिया ?, तए णं से सुदंसणे
 समणोवासए अज्जुणयं मालागारं एवं वयासी-एवं खलु देवाणुप्पिया ! अहं
 सुदंसणे नामं समणोवासए अभिगयजीवाजीवे गुणसिलए उज्जाणे समणं भगवं
 महावीरं वंदए संपत्थिए, तए णं से अज्जुणए मालागारे सुदंसणं समणो-
 वासयं एवं वयासी-तं इच्छामि णं देवाणुप्पिया ! अहमवि तुमए सद्धिं समणं
 भगवं महावीरं वं(दे)दित्ताए जाव पज्जुवा(से)सित्तए, अहासुहं देवाणुप्पिया !
 मा पडिवंधं करेइ, तए णं से सुदंसणे समणोवासए अज्जुणएणं मालागारेणं
 सद्धिं जेणेव गुणसिलए उज्जाणे जेणेव समणे भगवं महावीरे तेणेव उवा-
 गच्छइ २ ता अज्जुणएणं मालागारेणं सद्धिं समणं भगवं महावीरं तिक्खुत्तो
 जाव पज्जुवासइ, तए णं [से] समणे भगवं महावीरे सुदंसणस्स समणोवास-
 गस्स अज्जुणयस्स मालागारस्स तीसे य० धम्मकहा०, सुदंसणे पडिगए ।
 तए णं से अज्जुणए [मालागारे] समणस्स भगवओ महावीरस्स अंति(ए)यं धम्मं
 सोच्चा [निसम्म] हट्ठ० सहामि णं भंते ! निग्गंथं पावयणं जाव अब्भुट्ठेमि,
 अहासुहं०, तए णं से अज्जुणए मालागारे उत्तर० सयमेव पंचमुट्ठियं लोयं
 करेइ [करित्ता] जाव अणगारे जाए जाव विहरइ, तए णं से अज्जुणए अण-
 गारे जं चेव दिवसं मुंडे जाव पव्वइए तं चेव दिवसं समणं भगवं महावीरं
 वंदइ नमंसइ वं० २ ता इमं एयारुवं अभिग्गहं उ(ग्गे-ओग्गे)ग्गिण्हइ-कप्पइ मे
 जावजीवाए छट्ठंछट्ठेणं अणिविखत्तेणं तवोक्कम्मेणं अप्पाणं भावेमाणस्स विहरित्तए-
 तिकट्ठु अयमेयारुवं अभिग्गहं ओग्गेण्हइ २ ता जावजीवाए जाव विहरइ,
 तए णं से अज्जुणए अणगारे छट्ठंखमणपारणयंसि पढ(म)माए पोरिसीए सज्जायं
 करेइ जहा गोयमसामी जाव अड(विहर)इ, तए णं तं अज्जुणयं अणगारं
 रायगिहे नयरे उच्च[०] जाव अडमाणं बहवे इ(त्थिया)त्थीओ य पुरिसा य

डहरा य महल्ला य जुवाणा य एवं वयासी-इमे-णं मे पिता-मा(र)रिए [माता
 मारि-या] भाया० भगिणी० भजा० पु(त्त)त्ते० धूया० सुण्हा० इमेण मे अण्ण-
 यरे सयणसंबंधिपरियणे मारिएत्तिकट्ठु अप्पेगइया अक्कोसंति अप्पेगइया हीलंति
 निंदंति खिंसंति गरिहंति तज्जेति तालेंति, तए णं से अज्जुणए अणगारे तेहिं
 बहूहिं इत्थीहि य पुरिसेहि य डहरेहि य महल्लेहि य जुवाणाएहि य आ-तो-
 -सिज्जमाणे जाव ताळेज्जमाणे तेसिं मणसा-वि अपउस्समाणे सम्मं सहइ
 सम्मं खमइ तितिकखइ अहियासेइ सम्मं सहमाणे० रायगिहे नयरे उच्चणीय-
 मज्झिमकुलाई अडमाणे जइ भत्तं ल-हइ तो पाणं न लभइ जइ पाणं तो भत्तं न
 लभइ, तए णं से अज्जुणए (अ०) अदीणे अविमणे अकलुसे अणाइले अविसा(ई)दी
 अपरितंतजोगी अडइ २ ता रायगिहाओ न-गराओ पडिणिक्खमइ २ ता
 जेणेव गुणसिलए उज्जाणे जेणेव समणे भगवं महावीरे जहा गोयमसामी जाव
 पडिदंसेइ २ ता समणेणं भगवया महावीरेणं अब्भणुणाए अमुच्छिए ४
 विलमिव पण्णगभूएणं अप्पाणेणं तमाहारं आहारेइ, तए णं समणे भगवं
 महावीरे अन्नया (क०) राय० पडिणिक्खमइ २ ता बहिं जण० विहरइ, तए णं से
 अज्जुणए अणगारे तेणं ओ(उ)रालेणं (वि०) पयत्तेणं पग्गहिएणं महाणुभागेणं तवो-
 कम्मेणं अप्पाणं भावेमाणे बहुपुण्णे छम्मासे सामण्णपरियागं पाउणइ, [पाउ-
 णित्ता] अद्धमासियाए संलेहणाए अप्पाणं झु[छु]सेइ [२ ता] तीसं भत्ताई अणसणाए
 छेदेइ २ ता जस्सट्ठाए कीरइ जाव सिद्धे ३ ॥ १३ ॥ (उ० च० अ० ए० ख० जं०)
 तेणं कालेणं तेणं समएणं रायगिहे न-गरे गुणसिलए उज्जाणे (तत्थ णं) सेणिए
 राया कासवे नामं गाहावई परिवसइ जहा म-काई, सोलस वासा परियाओ
 विपुले सिद्धे ४ । एवं खेमए-ड-वि गाहावई, नवरं का(गं)यंदी नयरी सोलस
 वासा परियाओ विपुले पव्वए सिद्धे ५ । एवं धिइहरे-वि गाहावई का(मं)यंदीए
 नयरीए सोलस वासा परियाओ (जाव) विपुले सिद्धे ६ । एवं केलासे-वि गाहा-
 वई नवरं सागेए नयरे बारस-वासाई परियाओ विपुले सिद्धे ७, एवं हरि-
 चंदणे-वि गाहावई साएए बारस-वासा परियाओ विपुले सिद्धे ८ । एवं वारत्तए-वि
 गाहावई नवरं रायगिहे न-गरे बारस-वासा परियाओ विपुले सिद्धे ९ । एवं
 सुदंसणे-वि गाहावई नवरं वाणिय[र]गामे नयरे दूइपलासए उज्जाणे पंच-वासा
 परियाओ विपुले सिद्धे १० । एवं पुण्णभदे-वि गाहावई वाणिय-गामे नयरे पंच-
 वासा परियाओ विपुले सिद्धे ११ । एवं सुमणभदे-वि गाहावई सावत्थीए नयरीए
 बहुवा(स-सा)साई परि० सिद्धे १२ । एवं सुपइठ्ठे-वि गाहावई सावत्थीए नयरीए

सत्तावीसं वासा परियाओ विपुले सिद्धे १३ । एवं मेहे वि गाहावई रायगिहे नयरे
 बहूई वासाईं परियाओ विपुले सिद्धे १४ ॥ १४ ॥ (उ० प० अ० ए० व० ए०
 ख० जं०) तेणं कालेणं तेणं समएणं पोलासपुरे न-गरे सि-रिवणे उज्जाणे, तत्थ णं
 पोलासपुरे नयरे विजये नामं राया होत्था, तस्स णं विजयस्स रण्णो सिरी-
 नामं देवी होत्था वण्णओ, तस्स णं विजयस्स रण्णो पुत्ते सिरीए देवीए
 अत्तए अइमुत्ते नामं कुमारे होत्था सू-माले[०], तेणं कालेणं तेणं समएणं
 समणे भगवं महावीरे जाव सि-रिवणे विहरइ, तेणं कालेणं तेणं समएणं
 समणस्स भगवओ महावीरस्स जेठ्ठे अंतेवासी इंदभू(ई)ती जहा पण्णत्तीए जाव
 पोलासपुरे नयरे उच्च-जाव अडइ, इमं च णं अइमुत्ते कुमारे ण्हाए सव्वा-
 लंकारविभूसिए बहूहिं दारए[हिं]हि य दारिया-हि य डिंभएहि य डिंभियाहि
 य कुमारएहि य कुमारियाहि य सद्धिं संपरिवुडे स(या)ओ गिहाओ पडिणिक्ख-
 मइ २ ता जेणेव इंदट्ठाणे तेणेव उवागए तेहिं बहूहिं दारएहि य ६ संपरि-
 वुडे अभिरममाणे २ विहरइ, तए णं भगवं गोयमे पोलासपुरे न-यरे उच्च
 जाव अडमाणे इंदट्ठाणस्स अदूरसामंतेणं वीईवयइ, तए णं से अइमुत्ते कुमारे
 भगवं गोयमं अदूरसामंतेणं वीईवयमाणं पासइ २ ता जेणेव भगवं गोयमे
 तेणेव उवागए २ ता भगवं गोयमं एवं वयासी-के णं भंते ! तुब्भे ? किं
 वा अडइ ?, तए णं भगवं गोयमे अइमुत्तं कुमारं एवं वयासी-अम्हे णं
 देवाणुप्पिया ! समणा निग्गंथा ईरियासमिया जाव वंसयारी उच्च-जाव अडामो,
 तए णं अइमुत्ते कुमारे भगवं गोयमं एवं वयासी-एह णं भंते ! तुब्भे
 (जेणेव) जा णं अहं तु(हं)ब्भं भिक्खं दवावेमीतिकहुं भगवं गोयमं अंगु-
 लीए गेण्हइ २ ता जेणेव सए गिहे तेणेव उवागए, तए णं सा सि-रिदेवी
 भगवं गोयमं एजमाणं पासइ २ ता हट्ठ० आसणाओ अब्भुट्ठेइ २ ता
 जेणेव भगवं गोयमे तेणेव उवागया भगवं गोयमं तिकखुत्तो आयाहि-णपयाहि०
 बंदइ० विउल्लेणं असण० जाव पडिविसजेइ, तए णं से अइमुत्ते कुमारे
 भगवं गोयमं एवं वयासी-कहि णं भंते ! तुब्भे परिवसह ?, तए णं
 [से] भगवं गौयमे अइमुत्तं कुमारं एवं वयासी-एवं खलु देवाणुप्पिया ! मम
 धम्मयायिए धम्मोवएसए भगवं महावीरे आइगरे जाव संपाविउकामे इहेव
 पोलासपुरस्स न-गरस्स बहिया सिरिवणे उज्जाणे अहापडिह्वं उग्गहं उग्गि-
 ण्हिता संजमेणं जाव भावेमाणे विहरइ, तत्थ णं अम्हे परिवसामो, तए णं
 से अइमुत्ते कुमारे भगवं गोयमं एवं वयासी-गच्छामि णं भंते ! अहं

तुब्भेहिं सद्धिं समणं भगवं महावीरं पायवंदए, अहासुहं०, तए णं से
 अइमुत्ते कुमारे भग(वं)वया गोयमेणं सद्धि जेणेव समणे (भ०) महावीरे तेणेव
 उवागच्छइ २ ता समणं भगवं महावीरं तिव्खुत्तो आयाहिणपयाहिणं करेइ
 २ ता वंदइ जाव पज्जुवासइ, तए णं भगवं गोयमे जेणेव समणे भगवं
 महावीरे तेणेव उवागए जाव पडिदंसेइ २ ता संजमेणं तव० विहरइ, तए
 णं समणे भगवं महावीरे अइमुत्तस्स कुमारस्स तीसे य धम्मकहा, तए णं से
 अइमुत्ते (कु०) समणस्स भगवओ महावीरस्स अंतिए धम्मं सोच्चा निसम्म हट्ठ०
 जं नवरं देवाणुप्पिया ! अम्मापियरो आपुच्छामि, तए णं अहं देवाणुप्पियाणं
 अंतिए जाव पव्वयामि, अहासुहं देवाणुप्पिया ! मा पडिबंधं [करेह], तए
 णं से अइमुत्ते [कुमारे] जेणेव अम्मापियरो तेणेव उवागए जाव पव्वइत्तए,
 अइमुत्तं कुमारं अम्मापियरो एवं वयासी-बाले-सि जा(ता)व तुमं पुत्ता !
 असंबुद्धे-सि० किं णं तुमं जा(णा)णसि धम्मं ?, तए णं से अइमुत्ते कुमारे
 अम्मापियरो एवं वयासी-एवं खलु (अहं) अम्मयाओ ! जं चेव जाणामि तं चेव
 न जा(या)णामि जं चेव न जा-णामि तं चेव जाणामि, तए णं तं अइमुत्तं
 कुमारं अम्मापियरो एवं वयासी-कहं णं तुमं पुत्ता ! जं चेव जा-णसि जाव
 तं चेव जा-णसि ?, तए णं से अइमुत्ते कुमारे अम्मापियरो एवं वयासी-
 जाणामि अहं अम्मयाओ ! जहा जाएणं अवस्समरियव्वं न जाणामि अहं
 अम्मयाओ ! काहे वा कहिं वा कहं वा केचिरेण वा ?, न जाणामि-अम्म-
 याओ ! केहिं कम्माययणेहिं जीवा नेरइयतिरिक्खजोणिमणुस्सदेवेसु उववज्जंति,
 जाणामि णं अम्मयाओ ! जहा सएहिं कम्माययणेहिं जीवा नेरइय[०] जाव
 उववज्जंति, एवं खलु अहं अम्मयाओ ! जं चेव जाणामि तं चेव न जा-णामि
 जं चेव न जा-णामि तं चेव जाणामि, इच्छामि णं अम्मयाओ ! तुब्भेहिं
 अब्भणुण्णाए जाव पव्वइत्तए, तए णं तं अइमुत्तं कुमारं अम्मापियरो जाहे नो
 संचाएंति बहूहिं आघव० तं इच्छामो ते जाया ! एगदिवसमवि रा(ज)यसिंरिं पासिंतए,
 तए णं से अइमुत्ते कुमारे अम्मापिउवयणमणुयत्तमाणे तुसिणीए संबिद्धइ अभिसेओ
 जहा महाबलस्स निक्खमणं जाव सामाइयमाइयाइं अहिजइ बहूइं वासाइं सामण-
 परियागं गुणरयणं जाव विपुले सिद्धे १५ । (उ० सो० अ० ए० ख० जं०)
 तेणं कालेणं तेणं समएणं वा(बा)णारसीए नयरीए काममहावणे उज्जाणे, तत्थ
 णं वाणारसी(इ)ए अलक्खे नामं राया होत्था, तेणं कालेणं तेणं समएणं
 समणे जाव विहरइ परिंसा निग्गया, तए णं [से] अलक्खे राया डमीसे कहाए

लद्धे (स०) हट्टुड्ड० जहा कूणिए जाव पज्जुवासइ धम्मकहा०, तए णं से अलक्खे राया समणस्स भगवओ महावीरस्स अंतिए जहा उदायणे तहा निक्खंते नवरं जेट्टपुत्तं रज्जे अहिसिंचइ एक्कारस अंगाईं बहू वासा परियाओ जाव विपुले सिद्धे १६ । एवं जंबू ! समणेणं जाव छट्ट-स्स वगस्स अयमट्ठे पण्णत्ते ॥ १५ ॥

[सत्तमो वग्गो]

जइ णं भंते ! सत्तमस्स वगस्स उक्खेवओ[०] जाव तेरस अज्झयणा पण्णत्ता तं०—‘नंदा तह नंद(मती)वई नं(दो)दुत्तर नं(द)दिसेणिया चेव । म(हया)स्य सुमरु-य महमरु-य मरु(हे)देवा य अट्ठमा ॥ १ ॥ भद्दा य सुभद्दा य सुजाया सुमणा(तिया)वि य । भूयदि(त्ता)ण्णा य बो(द्ध)धव्वा सेणिय-अज्जा(ण)णं नामाई ॥ २ ॥’ जइ णं भंते ! तेरस अज्झयणा पण्णत्ता पढमस्स णं भंते ! अज्झयणस्स समणेणं० के अट्ठे पण्णत्ते ? एवं खलु जंबू ! तेणं कालेणं तेणं समएणं रायगिहे नयरे गुणसिलिए उज्जाणे सेणिए राया (व०) तस्स णं सेणियस्स रण्णो नंदा नामं देवी होत्था वण्णओ, सामी समोसडे परिसा निग्गया, तए णं सा नंदा-देवी इमीसे कहाए लद्धट्ठा (स० जाव हट्टु०) कोडुंविउपुरिसे सद्दावेइ २ ता जाणं जहा पउमावई जाव एक्कारस अंगाईं अहिजित्ता वीसं वासाईं परियाओ जाव सिद्धा । एवं तेरस-वि देवीओ नंदागमेण नेयव्वाओ (णि०) ॥ सत्तमो वग्गो समत्तो ॥ १६ ॥

[अट्ठमो वग्गो]

जइ णं भंते ! अट्ठमस्स वगस्स उक्खेवओ-जाव दस अज्झयणा पण्णत्ता, तं०—काली सुकाली महाकाली कण्हा सुकण्हा महाकण्हा । वीरकण्हा य बो-धव्वा रामकण्हा तहेव य ॥ १ ॥ पिउसेणकण्हा नवमी दसमी महासेणकण्हा य । जइ० दस अज्झयणा[०] पढमस्स (णं भं०) अज्झयणस्स (स० जाव सं०) के अट्ठे पण्णत्ते ? एवं खलु जंबू ! तेणं कालेणं तेणं समएणं चंपा नामं न-गरी होत्था पुण्णभदे उज्जाणे, तत्थ णं चंपाए नयरीए कोणिए राया वण्णओ, तत्थ णं चंपाए नयरीए सेणियस्स रण्णो भज्जा कोणियस्स रण्णो चुल्लमाउया काली नामं देवी होत्था वण्णओ जहा नंदा जाव सामाइयमाइयाईं एक्कारस अंगाईं अहिजइ, बहूहिं चउत्थ० जाव अप्पाणं भावेमाणी विहरइ, तए णं सा काली (अज्जा) अण्णया कयाइ जेणेव अज्जचंदणा अज्जा तेणेव उवागया २ ता एवं वयासी-इच्छामि णं अज्जाओ ! तुब्भेहिं अब्भणुण्णाया समा-णा रयणावलिं तवं उवसंपजेत्ताणं विहरेतए, अहासुहं०, तए णं सा काली अज्जा अज्जचंदणाए अब्भणुण्णाया

समा-णा रयणावलि (त०) उवसंपज्जिता-णं विहरइ तं०-चउत्थं करेइ चउत्थं करेत्ता
 सव्वकामगुणियं पारेइ सव्वकामगुणियं पारेत्ता छट्ठं करेइ छट्ठं करेत्ता सव्व-
 कामगुणियं पारेइ २ अट्ठमं करेइ २ सव्वकाम० २ अट्ठ छट्ठाईं करेइ २
 सव्वकाम० २ चउत्थं करेइ २ सव्वकाम० २ छट्ठं करेइ २ सव्वकाम० २
 अट्ठमं करेइ २ सव्वकाम० २ दसमं करेइ २ सव्वकाम० २ दुवाल्समं
 करेइ २ सव्वकाम० २ चोद्दसमं० २ सव्व० २ सोलसमं० २ सव्व० २
 अट्ठारसमं० २ सव्व० २ वीसइमं० २ सव्व० २ बावीसइमं० २ सव्व० २
 चउवीसइमं० २ सव्व० २ छव्वीसइमं० २ सव्व० २ अट्ठावीसइमं० २
 सव्व० २ तीसइमं० २ सव्व० २ बत्तीसइमं० २ सव्व० २ चोत्तीसइमं०
 २ सव्व० २ चोत्तीसं छट्ठाईं करेइ २ सव्व० २ चोत्ती(सइमं)सं करेइ २ सव्व० २
 बत्ती-सं० २ सव्व० २ तीसं० २ सव्व० २ अट्ठावी-सं० २ सव्व० २ छव्वी-सं०
 २ सव्व० २ चउवी-सं० २ सव्व० २ बावी-सं० २ सव्व० २ वी-सं० २
 सव्व० २ अट्ठार(समं)सं० २ सव्व० २ सोलसमं० २ सव्व० २ चोद्दसमं० २
 सव्व० २ बारसमं० २ सव्व० २ दसमं० २ सव्व० २ अट्ठमं० २ सव्व०
 २ छट्ठं० २ सव्व० २ चउत्थं० २ सव्व० २ अट्ठ छट्ठाईं करेइ २ सव्व०
 २ अट्ठमं करेइ २ सव्व० २ छट्ठं करेइ २ सव्व० २ चउत्थं० २ सव्व०
 एवं खलु एसा रयणावलीए तवोकम्मस्स पढमा परिवाडी एगेणं संवच्छरेणं
 तिहिं मासेहिं बावीसाए य अहोरेत्तेहिं अहासुत्ता जाव आराहिया भवइ,
 तयाणंतरं च णं दोच्चाए परिवाडीए चउत्थं करेइ २ विगइवज्जं पारेइ २
 छट्ठं करेइ २ विगइवज्जं पारेइ (०) एवं जहा पढमाए-वि नवरं सव्वपारणए विगइ-
 वज्जं पारेइ जाव आराहिया भवइ, तयाणंतरं च णं तच्चाए परिवाडीए चउत्थं
 करेइ चउत्थं करेत्ता अलेवाडं पारेइ सेसं तहेव, एवं चउत्था परिवाडी नवरं
 सव्वपारणए आर्यबिलं पारेइ सेसं [तहेव] तं चेंव, -'पढमंमि सव्वकामं पार-
 णयं विइयए विगइवज्जं । तइयंमि अलेवाडं आर्यबि(लमो)लं चउत्थंमि ॥ १ ॥'
 तए णं सा काली अज्जा रयणावली-तवोकम्मं पंचहिं संवच्छरेहिं दोहि य
 मासेहिं अट्ठावीसाए य दिवसेहिं अहासुत्तं जाव आराहेत्ता जेणेव अज्जचंदणा
 अज्जा तेणेव उवा० २ ता अज्जचंदणं अज्जं वंदइ नमंसइ वं० २ ता बहूहिं
 चउत्थ[०] जाव अप्पाणं भावेमाणी विहरइ, तए णं सा काली अज्जा तेणं
 उ(ओ)रालेणं जाव धमणिसंतया जाया यावि होत्था से जहा इंगाल० जाव
 सुहुयहुयासणे इव भासरासिपल्लिच्छणा तवेणं तेणं तवतेयसिरीए अ-तीव

उवसो-हेमाणी चिड्डइ, तए णं तीसे कालीए अजाए अण्णया कयाइ पुव्वरत्ता-
 वरत्तकाले अयम-ब्भत्थिए जहा खंदयस्स चिंता जहा जाव अत्थि उट्ठा० ताव
 ता(व) मे सेयं कलं जाव जलंते अज्जचंदणं अज्जं आपुच्छिता अज्जचंदणाए
 अजाए अब्भणुण्णायाए समाणीए संलेहणाइसणाइसियाए भत्तपाणपडियाइखियाए
 पायोवगयाए कालं अणवकंखमाणीए विहरेत्तएत्तिकट्ठु एवं संपेहेइ २ ता कलं
 जेणेव अज्जचंदणा अजा तेणेव उवागच्छइ २ ता अज्जचंदणं (अज्जं) वंदइ नमंसइ
 वं० २ ता एवं वयासी-इच्छामि णं अज्जो ! तुब्भेहिं अब्भणुण्णाया समाणी
 संलेहणा० जाव विहरेत्तए, अहासुहं०, (तओ) काली अजा अज्जचंदणाए अब्भणु-
 ण्णाया समाणी संलेहणा० जाव विहरइ, सा काली अजा अज्जचंदणाए अंतिए
 सामाइयमाइयाइं एकारस अंगाई अहिज्जिता बहुपडिपुण्णाइं अट्ठ संवच्छराइं
 सामण्णपरियागं पाउणित्ता मासियाए संलेहणाए अ(प्पा)तार्णं इस्सेत्ता सट्ठि भत्ताइं
 अणसणाए छे(दे)दित्ता जस्सट्ठाए कीरइ जाव चरिमुस्सासनीसासेहिं सिद्धा ५ ॥
 निक्खे(वो)वओ ॥ [पढं] अज्जयणं [समत्तं] ॥ १७ ॥ (उ० वि० अ० ए० ख० जं०)
 तेणं कालेणं तेणं समएणं चंपा-ना(म)मं नयरी पुण्णभेइ उज्जाणे कोणिए राया, तत्थ
 णं सेणियस्स रण्णो भज्जा कोणियस्स रण्णो चुल्लमाउया सुकाली-ना-मं देवी होत्था
 जहा काली तहा सुकाली-वि निक्खंता जाव बहूहिं चउत्थ-जाव भावेमाणी
 विहरइ, तए णं सा सुकाली अजा अण्णया कयाइ जेणेव अज्जचंदणा अजा
 जाव इच्छामि णं अज्जो ! तुब्भेहिं अब्भणुण्णाया समाणी कणगावली-तवोकम्मं
 उवसंपज्जित्ताणं विहरेत्तए, एवं जहा रयणावली तहा कणगावली-वि, नवरं तिष्ठ
 ठाणेषु अट्ठमाइं करेइ जहा रयणावलीए छट्ठाइं एकाए परिवाडीए संवच्छरो पंच
 मासा बारस य अहोरत्ता चउण्हं पंच वरिसा नव मासा अट्ठारस दिवसा
 सेसं तहेव, नव वासा परियाओ जाव सिद्धा ॥ १८ ॥ एवं महाकाली-वि,
 नवरं खुट्ठाणं सीहनिक्कीलियं तवोकम्मं उवसंपज्जित्ताणं विहरइ, तं०-चउत्थं
 करेइ २ सव्वकामगुणियं पारेइ २ छट्ठं करेइ २ सव्वकामगुणियं पारेइ
 २ चउत्थं करेइ २ सव्वका० २ अट्ठमं करेइ २ सव्वका० २ छट्ठं०
 २ सव्व० २ दसमं० २ सव्व० २ अट्ठमं० २ सव्व० २ दुवाल-सं० २ सव्व०
 २ दसमं० २ सव्व० २ चोइ-सं० २ सव्व० २ (बारसमं) दुवाल-सं० २ सव्व०
 २ सोलसमं० २ सव्व० २ चोइ-सं० २ सव्व० २ अट्ठार-सं० २ सव्व०
 २ सोलसमं० २ सव्व० २ वीस० २ सव्व० २ अट्ठार० २ सव्व० २
 वीस० २ सव्व० २ सोलसमं० २ सव्व० २ अट्ठार० २ सव्व० २ चोइ-सं०

२ सव्व० २ सोलसमं० २ सव्व० २-दुवालसं० २ सव्व० २ चोद-सं०
 २ सव्व० २ दसमं० २ सव्व० २-दुवालसं० २ सव्व० २ अट्ठमं० २
 सव्व० २ दसमं० २ सव्व० २ छट्ठं० २ सव्व० २ अट्ठमं० २ सव्व०
 २ चउत्थं० २ सव्व० २ छट्ठं० २ सव्व० २ चउत्थं० २ सव्वकामगुणियं
 पारेइ-तहेव चत्तारि परिवाडीओ, एक्काए परिवाडीए छम्मासा सत्त य दिवसा,
 चउण्हं दो वरिसा अट्ठावीसा य दिवसा जाव सिद्धा ॥ १९ ॥ एवं कण्हा-वि
 नवरं महालयं सीहणिक्कीलियं तवोकम्मं जहेव खुड्डाणं नवरं चोत्तीसइमं जाव
 नेयव्वं तहेव ऊसारेयव्वं, एक्काए वरिसं छम्मासा अट्ठारस य दिवसा, चउण्हं
 छव्वरिसा दो मासा बारस य अहोरत्ता, सेसं जहा कालीए जाव सिद्धा ॥ २० ॥
 एवं सुकण्हा-वि नवरं सत्तसत्तमियं भिक्खुपडिमं उवसंपज्जित्ताणं विहरइ, पढमे
 सत्तए एक्केकं भोयणस्स दत्तिं पडिगाहेइ एक्केकं पाणयस्स, दोचे सत्तए दो
 दो भोयणस्स दो दो पाणयस्स पडिगाहेइ, तच्चे सत्तए तिण्णि० चउत्थे०
 पंचमे० छ० सत्तमे सत्तए सत्त दत्तीओ भोयणस्स पडि(ग)गाहेइ सत्त पाण-
 यस्स, एवं खलु एयं सत्तसत्तमियं भिक्खुपडिमं एगूणपण्णाए रा(ई)तिदिएहिं एगेण
 य छण्णउएणं भिक्खासएणं अहासुत्ता जाव आराहेत्ता जेणेव अज्जचंदणा
 अज्जा तेणेव उवागया [२ ता] अज्जचंदणं अज्जं वंदइ नमंसइ वं० २ ता
 एवं वयासी-इच्छामि णं अज्जाओ ! तुब्भेहिं अब्भणुण्णाया समाणी अट्ठट्ठमियं
 भिक्खुपडिमं उवसंपज्जित्ताणं विहरेत्तए, अहासुत्तं०, तए णं सा सुकण्हा अज्जा
 अज्जचंदणाए अब्भणुण्णाया समाणी अट्ठट्ठमियं भिक्खुपडिमं उवसंपज्जित्ताणं
 विहरइ, पढमे अट्ठए एक्केकं भोयणस्स दत्तिं पडिगाहेइ एक्केकं पाण(ग)यस्स
 जाव अट्ठमे अट्ठए अट्ठट्ठ भोयणस्स (दत्तिं) पडिगाहेइ अट्ठ पाण-यस्स, एवं खलु
 एयं अट्ठट्ठमियं भिक्खुपडिमं चउसट्ठीए रा-तिदिएहिं दोहि य अट्ठासीएहिं
 भिक्खासएहिं अहासु(त्तं)त्ता जाव नवनवमियं भिक्खुपडिमं उवसंपज्जित्ता-णं विह-
 रइ, पढमे नवए एक्केकं भोयणस्स दत्तिं पडिगाहेइ (य) एक्केकं पाणयस्स जाव
 नवमे नवए नव नव द० भो० पडि०-नव २ पाणयस्स, एवं खलु नवनव-
 मियं भिक्खुपडिमं एकासी-ईराईदिएहिं चउहिं पंचोत्तरेहिं भिक्खासएहिं अहा-
 सुत्ता जाव दसदसमियं भिक्खुपडिमं उवसंपज्जित्ताणं विहरइ, पढमे दसए एक्केकं
 भोयणस्स दत्तिं पडिगाहेइ-एक्केकं पाणयस्स जाव दसमे दसए दस २ भोयणस्स
 द(त्तिं)ती[ओ] पडि-गाहेइ दस २ पाण[य]स्स०, एवं खलु एयं दसदसमियं
 भिक्खुपडिमं एकेणं राईदियसएणं अद्वल्लेहिं भिक्खासएहिं अहासुत्तं जाव

आराहेइ २ ता बट्टहिं चउत्थ जाव मासद्धमासविविहतवोक्कमेहिं अप्पाणं भावेमाणी
 विहरइ, तए णं सा सुकण्हा अज्जा तेणं उ-रालेणं जाव सिद्धा ॥ निक्खे-वओ ॥
 पंचम(अ)ज्झय(णा)णं ॥ २१ ॥ एवं महाकण्हा-वि नवरं खुड्ढागं सव्वओभइं
 पडिमं उवसंपज्जिताणं विहरइ, (तं०-) चउत्थं करेइ २ सव्वकामगुणियां
 पारेइ २ छट्ठं करेइ २ सव्व० २ अट्ठमं० २ सव्व० २ दसमं० २ सव्व०
 २ दुवालसमं० २ सव्व० २ अट्ठमं० २ सव्व० २ दसमं० २ सव्व० २
 दुवालसमं० २ सव्व० २ चउत्थं० २ सव्व० २ छट्ठं० २ सव्व० २ दुवाल-सं०
 २ सव्व० २ चउत्थं० २ सव्व० २ छट्ठं० २ सव्व० २ अट्ठमं० २ सव्व०
 २ दसमं० २ सव्व० २ छट्ठं० २ सव्व० २ अट्ठमं० २ सव्व० २ दसमं० २
 सव्व० २ दुवाल-सं० २ सव्व० २ चउत्थं० २ सव्व० २ दसमं० २ सव्व० २
 दुवालसमं० २ सव्व० २ चउत्थं० २ सव्व० २ छट्ठं० २ सव्व० २ अट्ठमं०
 २ सव्व० एवं खलु एवं खुड्ढागसव्वओभइस्स तवोक्कम्मस्स पढमं परिवाडिं
 तिहिं मासेहिं दसहिं दिवसेहिं अहासुत्तं जाव आरा(हे)हिता दोच्चाए परिवाडीए
 चउत्थं करेइ २ विगइवज्जं पारेइ २ जहा रयणावलीए तहा एत्थ-वि चत्ताए
 परिवाडीओ पारणा तहेव, चउण्हं कालो संवच्छरो मासो दस य दिवसा सेसं तहेव
 जाव सिद्धा ॥ निक्खे-वओ ॥ [छट्ठं] अज्झयणं ॥ २२ ॥ एवं वीरकण्हा-वि नवरं
 महालर्यं सव्वओभइं तवोक्कम्मं उवसंपज्जिता-णं विहरइ, तं०-चउत्थं करेइ
 २ सव्व० २ छट्ठं० २ सव्व० २ अट्ठमं० २ सव्व० २ दसमं० २ सव्व०
 २ दुवालसमं० २ सव्व० २ चोइ(चउद)सं० २ सव्व० २ सोल(सं)समं० २
 सव्व० २ (प० लया) दसमं० २ सव्व० २ दुवालसमं० २ सव्व० २ चोइ-सं०
 २ सव्व० २ सोल-समं० २ सव्व० २ चउत्थं० २ सव्व० २ छट्ठं० २
 सव्व० २ अट्ठमं० २ सव्व० २ (वि० ल०) सोल-समं० २ सव्व० २ चउत्थं० २
 सव्व० २ छट्ठं० २ सव्व० २ अट्ठमं० २ सव्व० २ दसमं० २ सव्व० २ दुवाल०
 २ सव्व० २ चोइ-सं० २ सव्व० २ (ति० ल०) अट्ठमं० २ सव्व० २ दसमं०
 २ सव्व० २ दुवाल-सं० २ सव्व० २ चोइसमं० २ सव्व० २ सोलसमं० २
 सव्व० २ चउत्थं० २ सव्व० २ छट्ठं० २ सव्व० २ (च० ल०) चोइ-सं० २ सव्व०
 २ सोलसमं० २ सव्व० २ चउत्थं० २ सव्व० २ छट्ठं० २ सव्व० २
 अट्ठमं० २ सव्व० २ दसमं० २ सव्व० २ दुवाल० २ सव्व० २ (पं० ल०) छट्ठं०
 २ सव्व० २ अट्ठमं० २ सव्व० २ दसमं० २ सव्व० २ दुवाल० २ सव्व०
 २ चोइ-सं० २ सव्व० २ सोलसमं० २ सव्व० २ चउत्थं० २ सव्व० २ (छ० ल०)

दुवाल० २ सव्व० २ चोह्-सं० २ सव्व० २ सोलसमं० २ सव्व० २
 चउत्थं० २ सव्व० २ छट्ठं० २ सव्व० २ अट्ठमं० २ सव्व० २ दसमं०
 २ सव्व० (स० ल०) एक्काए लयाए अट्ठ मासा पंच य दिवसा चउण्हं दो वासा
 अट्ठ मासा वीसं दिवसा सेसं तहेव जाव सिद्धा ॥ २३ ॥ एवं रामकण्हा-वि नवरं
 भद्रोत्तरपडिमं उवसंपज्जिताणं विहरइ तं-दुवालसमं करेइ २ सव्व० २ चोह्समं०
 २ सव्व० २ सोलसमं० २ सव्व० २ अट्ठारसमं० २ सव्व० २ वीसइमं० २
 सव्व० २ सोलसमं० २ सव्व० २ अट्ठारसमं० २ सव्व० २ वीसइमं० २ सव्व०
 २ दुवालसमं० २ सव्व० २ चोह्समं० २ सव्व० २ वीसइमं० २ सव्व० २
 दुवाल-सं० २ सव्व० २ चोह्समं० २ सव्व० २ सोलसमं० २ सव्व० २
 अट्ठार-समं० २ सव्व० २ चोह्समं० २ सव्व० २ सोलसमं० २ सव्व० २
 अट्ठारसमं० २ सव्व० २ वीसइमं० २ सव्व० २ दुवालसमं० २ सव्व० २
 अट्ठारसमं० २ सव्व० २ वीसइमं० २ सव्व० २ दुवालसमं० २ सव्व० २
 चोह्समं० २ सव्व० २ सोलसमं० २ सव्व० एक्काए कालो छम्मासा वीस
 य दिवसा, चउण्हं कालो दो वरिसा दो मासा वीस य दिवसा, सेसं तहेव
 जहा काली जाव सिद्धा ॥ २४ ॥ एवं पिउसेणकण्हा-वि नवरं मुक्तावलीतवोकम्मं
 उवसंपज्जिताणं विहरइ, तं-चउत्थं करेइ २ सव्व० २ छट्ठं० २ सव्व० २
 चउत्थं० २ सव्व० २ अट्ठमं० २ सव्व० २ चउत्थं० २ सव्व० २ दसमं० २
 सव्व० २ चउत्थं० २ सव्व० २ दुवाल० २ सव्व० २ चउत्थं० २ सव्व०
 २ चोह्समं० २ सव्व० २ चउत्थं० २ सव्व० २ सोलसमं० २ सव्व० २
 चउत्थं० २ सव्व० २ अट्ठार-समं० २ सव्व० २ चउत्थं० २ सव्व० २
 वीसइमं० २ सव्व० २ चउत्थं० २ सव्व० २ बावीसइमं० २ सव्व० २
 चउत्थं० २ सव्व० २ चउवीसइमं० २ सव्व० २ चउत्थं० २ सव्व० २
 छव्वीसइमं० २ सव्व० २ चउत्थं० २ सव्व० २ अट्ठावीसं० २ सव्व० २
 चउत्थं० २ सव्व० २ तीसइमं० २ सव्व० २ चउत्थं० २ सव्व० २ बत्तीसइमं०
 २ सव्व० २ चउत्थं० २ सव्व० २ चोत्तीसइमं० [सव्व०] (२ ता च० २ ता
 स० २ ता ब० २ ता) एवं तहेव ओसारेइ जाव (चउत्थं करेइ) चउत्थं
 क(रे-इ)रित्ता सव्वकामगुणियं पारेइ, एक्काए कालो एक्कारस मासा पणरस
 य दिवसा चउण्हं तिण्णि वरिसा दस य मासा सेसं जाव सिद्धा ॥ २५ ॥ एवं
 महासेणकण्हा-वि, नवरं आर्यबिलवड्डमाणं तवोकम्मं उवसंपज्जिताणं विहरइ,
 तं-आर्यबिलं करेइ २ चउत्थं करेइ २ बे आर्यबिलाई करेइ २ चउत्थं

करेइ २ तिणिण आर्यबिलाई करेइ २ चउत्थं० २ चत्तारि० २ चउत्थं० २ पंच०
 २ चउत्थं० २ छ० २ चउत्थं० २ एवं एकोत्तरियाए वड्ढीए आर्यबिलाई वड्ढति
 चउत्थंतरियाई जाव आर्यबिलसयं करेइ २ चउत्थं करेइ, तए णं सा
 महासेणकण्हा अज्जा आर्यबिलवड्ढमाणं तवोकम्मं चोइसहिं वासेहिं तिहि य मासेहिं
 वीसहि य अहोरत्तेहिं अहासुत्तं जाव सम्मं काएणं फासेइ जाव आरा-हिता
 जेणेव अज्जचंदणा अज्जा तेणेव उवा० २ ता (अ० अ०) वंदइ नमंसइ वंदित्ता
 नमंसित्ता बहूहिं चउ(त्थेहिं)त्थ जाव भावेमाणी विहरइ, तए णं सा महा-
 सेणकण्हा अज्जा तेणं उ-रालेणं जाव उवसोभेमाणी चिड्डइ, तए णं तीसे
 म(ह)हासेणकण्हाए अज्जाए अण्णया कयाई पुव्वरत्तावरत्तकाले चित्ता जहा खंद-
 यस्स जाव अज्जचंदणं(-आ)पुच्छइ जाव संलेहणा[०] कालं अणवकंखमाणी
 विहरइ, तए णं सा महासेणकण्हा अज्जा अज्जचंदणाए अज्जाए अंतिए सामाइयाई
 एकारस अंगाई अहिजित्ता बहुपडिपुण्णाई सत्तरस वासाई परियायं पालइत्ता
 मासियाए संलेहणाए अप्पाणं झू-सित्ता सट्ठि भत्ताई अणसणाए छे-दित्ता
 जस्सट्ठाए कीरइ जाव तमट्ठं आराहेइ [आराहिता] चरिमउस्सासणीसासेहिं
 सिद्धा बुद्धा [०] । अट्ठ य वासा आ(दी)ई एक्कोत्त(रि)रयाए जाव सत्तरस । एसो
 खलु परियाओ सेणियभज्जा-णं नायव्वो ॥ १ ॥ एवं खलु जं(बु)वू ! समणेणं
 (भगवया महावीरेणं आ-दिगरेणं) जाव संपत्तेणं अट्ठमस्स अंगस्स अंतगड-
 दसाणं अयमट्ठे पण्णत्ते (०) ॥ अंगं स(सं)मत्तं ॥ २६ ॥ अंतगडदसाणं अंगस्स
 एगो सुयखंधो अट्ठ-वग्गा अट्ठसु चेव दिवसेसु उद्दि[स्सि]सिज्जंति, तत्थ पढमविइय-
 वग्गे दस दस उद्देसगा तइयवग्गे तेरस उद्देसगा चउत्थपंचमवग्गे दस दस
 उद्देस(या)गा छट्ठवग्गे सोलस उद्देसगा सत्तमवग्गे तेरस उद्देसगा अट्ठमवग्गे दस
 उद्देसगा सेसं जहा नायाधम्मकहाणं ॥ २७ ॥



णमोऽत्यु णं समणस्स भगवओ णायपुत्तमहावीरस्स

सुत्तागमे

तत्थ णं

अणुत्तरोववाइयदसाओ

[पढमो वग्गो]

तेणं कालेणं तेणं समएणं रायगिहे (णा०) [नयरे] (हो० से० ना० रा० हो०
चे० दे० गु० उ० व० ते० का० ते० स० रा० न०) अज्जसुहम्म(णा० ये०)स्स
समोस(रिए)रणं परिसा निग्गया जाव जंबू (जाव) पज्जुवासइ० एवं वयासी-जइ
णं भंते ! समणेणं जाव संपत्तेणं अट्टमस्स अंगस्स अंतगडदसाणं अयमट्ठे पण्णते
नवमस्स णं भंते ! अंगस्स अणुत्तरोववाइयदसाणं समणेणं जाव संपत्तेणं के अट्ठे
पण्णत्ते ?, (तेणं०) तए णं से सुहम्मे अणगारे जं(बू)हुं अणगारं एवं वयासी-एवं
खलु जम्बू ! समणेणं जाव संपत्तेणं नवमस्स अंगस्स अणुत्तरोववाइयदसाणं तिण्णि
वग्गा पण्णत्ता, जइ णं भंते ! समणेणं जाव संपत्तेणं नवमस्स अंगस्स अणुत्तरो-
ववाइयदसाणं (ति०) तओ वग्गा पण्णत्ता पढमस्स णं भंते ! वग्गस्स अणुत्तरोववा-
इयदसाणं समणेणं जाव संपत्तेणं (के) कइ अज्झयणा पण्णत्ता ? एवं खलु जंबू ! सम-
णेणं जाव संपत्तेणं अणुत्तरोववाइयदसाणं पढमस्स वग्गस्स दस अज्झयणा पण्णत्ता,
तं०-(गा०-)-जालिमयालिउव(सा-जा-लि)याली पुरिससेणे य वारिसेणे य वीहदंते
य लट्ठदंते य वे(वि)हल्ले वेहा[य]से अभए इ य कुमारे ॥ जइ णं भंते ! समणेणं जाव
संपत्तेणं पढमस्स वग्गस्स दस अज्झयणा पण्णत्ता पढमस्स णं भंते ! अज्झयणस्स
अणुत्तरोववाइयदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! तेणं
कालेणं तेणं समएणं रायगिहे नयरे रिद्धत्थिमियसमिद्धे गुणसिलए उज्जाणे सेणिए
राया धा(र)रिणी-देवी सी(ह)हो सुमि(णं)णे (पा० प० जाव) जाली-कुमा(रिजाए)रो
जहा मेहो (जाव) अट्ठओ दाओ जाव उप्पि पासाय०, विहरइ, (ते० का० ते० स०
स० भ० म० जाव) सामी समोसढे सेणिओ निग्गओ जहा मेहो तहा जाली-वि
निग्गओ तहेव निक्खंतो जहा मेहो, एक्कारस अंगाई अहिजइ, गुणरयणं तवोकम्मं
[जहा खंदयस्स] एवं जा चेव खंद(य)ग[स्स] वत्तव्वया सा चेव चित्ताया आपुच्छणा
थेरेहिं सद्धिं वि(पु)उलं तहेव हु(रु)रुइइ, नवरं सोलस वासाई सामण्णपरियाणं

पाउणिता कालमासे कालं किच्चा उहुं चंदिम० सोहम्मीसाण जाव आरण्णुए कप्पे नव-य-गेवे(जे)ज(य)विमाणपत्थडे उहुं दूरं वी(इ)ईवइता विजयविमाणे देवत्ताए उववण्णे, त(था)ए णं (ते) थेरा भगवन्तो जालिं अणगारं कालगयं जा(णे)णिता परिणिव्वाणवत्तियं काउस्सगं करेति २ ता पत्तचीवराई गेण्हंति तहेव उत्त(ओय)रंति जाव इमे से आयाारभंडए, भंते ! ति भगवं गोयमे जाव एवं वयासी-एवं खलु देवाणुप्पियाणं अंतेवासी जा(लि)ली नामं अणगारे पगइभइए से णं जाली अणगारे कालगए कहिं गए कहिं उववण्णे ? एवं खलु गोयमा ! ममं अंतेवासी तहेव जहा खंदयस्स जाव काल० उहुं चंदिम जाव विज(य)ए विमाणे देवत्ताए उववण्णे । जालिस्स णं भंते ! देवस्स केवइयं कालं ठिई पण्णत्ता ? गोयमा ! वत्तीसं सागरोवमाई ठिई पण्णत्ता । से णं भंते ! ताओ देवलो(गा)याओ आउक्खएणं ३ कहिं गच्छिहिइ २ ? गोयमा ! महाविदेहे वासे सिज्झिहिइ (जाव स० अं० क०), (ता) एवं [खलु] जंबू ! समणेणं जाव संपत्तेणं अणुत्तरोववाइयदसाणं पढम[स्स]-वग्गस्स पढम[स्स अ]ज्झयणस्स अयमट्ठे पण्णत्ते । (इति प० प० स०) एवं सेसाण-वि अट्ठ(नव)ण्हं भाणियव्वं, नवरं (सत्त) छ धा-रि(णी)णिसुआ वे-हल्लवेहा-[य]सा चेळ्णाए (अ० णं०), आइल्लाणं पंचण्हं सोलस वासाईं सामण्णपरियाओ तिण्हं बारस वासाईं दोण(ह)हं पंच वासाईं, आइल्लाणं पंचण्हं आ(अ)णुपुव्वीए उववा(ओ)यो विजए वेजयंते जयंते अपराजिए सव्वट्ठसिद्धे, दीहदंते सव्वट्ठसिद्धे, उ(अणु)क्कमेणं सेसा, अभओ विजए, सेसं जहा पढमे, अभयस्स नाणत्तं, रायणिहे नयरे सेणिए राया नंदा देवी (माया) सेसं तहेव, एवं खलु जंबू ! समणेणं जाव संपत्तेणं अणुत्तरोववाइयदसाणं पढमस्स वग्गस्स अयमट्ठे पण्णत्ते ॥ १ ॥ [(इति) पढमो वग्गो समत्तो ॥]

[दोच्चो वग्गो]

जइ णं भंते ! समणेणं जाव संपत्तेणं अणुत्तरोववाइयदसाणं पढमस्स वग्गस्स अयमट्ठे पण्णत्ते दोच्चस्स णं भंते ! वग्गस्स अणुत्तरोववाइयदसाणं समणेणं जाव संपत्तेणं के अट्ठे पण्णत्ते ? एवं खलु जंबू ! समणेणं जाव संपत्तेणं अणुत्तरोववाइयदसाणं दोच्चस्स वग्गस्स तेरस अज्झयणा पण्णत्ता, तं०--दीह-सेणे महासेणे लट्ठदंते य गूढदंते य सुद्धदंते [य] हल्ले दुमे दुमसेणे महादुमसेणे य आहिं ॥ सीहे य सीहसेणे य महासीहसेणे य आहिं पुण्णसेणे य बो(द्ध)धव्वे तेरसमे होइ अज्झयणे ॥ जइ णं भंते ! समणेणं जाव संपत्तेणं अणुत्तरोववाइयदसाणं दोच्चस्स वग्गस्स तेरस अज्झयणा प० दोच्चस्स णं भंते ! वग्गस्स

पढम-उज्झयणस्स समणेणं (३) जाव संपत्तेणं के अट्ठे प० ? एवं खलु जंबू ! तेणं कालेणं तेणं समएणं रायगिहे नयरे गुणसिलए उज्जाणे सेणिए राया धा-रिणी देवी सी(हे)हो सुमिणे जहा जाली तहा जम्(मर्णं)मं बालत्तणं कलाओ नवरं वीहसे(णे)णो कुमा(रे)रो स(जे)व्वेव वत्तव्वया जहा जालिस्स जाव अंतं काहिइ, एवं तेरस-वि रायगिहे (न०) सेणि(ए)ओ(प्पि)पिया धारिणी माया तेरसण्ह-वि सोलस-वासा परियाओ, आणुपुव्वीए (उ०) विजए दोणिण वेजयंते दोणिण जयंते दोणिण अपराजिए दोणिण, सेसा महादुमसेणमाई पंच सव्वट्ठसिद्धे, एवं खलु जंबू ! समणेणं० अणुत्तरोववाइयदसाणं दोच्चस्स वग्गस्स अयमट्ठे पण्णत्ते, मासियाए संखेहणाए दोछु-वि वग्गेसु ॥ २ ॥ [ति(०वीओ) दोच्चो वग्गो समत्तो ।]

[तच्चो वग्गो]

जइ णं भंते ! समणेणं जाव संपत्तेणं अणुत्तरोववाइयदसाणं दोच्चस्स वग्गस्स अयमट्ठे पण्णत्ते तच्चस्स णं भंते ! वग्गस्स अणुत्तरोववाइयदसाणं समणेणं जाव संपत्तेणं के अट्ठे प० ? एवं खलु जंबू ! समणेणं जाव संपत्तेणं अणुत्तरो-ववाइयदसाणं तच्चस्स वग्गस्स दस अज्झयणा पण्णत्ता, तं०-धण्णे य सुण-क्खत्ते [य], इसिदासे (अ) य आहिए । पेळए रामपुत्ते य, चंदिमा पि(पु)ट्ठिमा-इ(या)य ॥ १ ॥ पेढालपुत्ते अणगारे, नवमे पो(पु)ट्ठिले (इ) वि य । वे-हल्ले दसमे चुत्ते, इमे(ते)य दस (ए० अ०) आहि(ते)या ॥ २ ॥ जइ णं भंते ! समणेणं जाव संपत्तेणं अणुत्तरोववाइयदसाणं तच्चस्स वग्गस्स दस अज्झयणा प० पढमस्स णं भंते ! अज्झयणस्स समणेणं जाव संपत्तेणं के अट्ठे पण्णत्ते ? एवं खलु जंबू ! तेणं कालेणं तेणं समएणं का(गं-कं)यंवी ना(म)मं नयरी होत्था रिद्धत्थिमियसमिद्धा सह(र)संबवणे उज्जाणे सव(वोदुए)वउउ० जि(अ)यस(त्तु)तू राया, तत्थ णं का-यंवीए नयरीए भहा-नामं सत्थवाही परिवसइ अट्ठा जाव अपरिभू(आ)या, तीसे णं भद्दाए सत्थवाहीए पुत्ते धण्णे ना(मए)मं दारए होत्था अहीण जाव सुरुवे पंचधा[इ]ई-परिगहिए तं०-खीरधाई[ए] जहा म(हाब)हब्बले जाव बावत्त(रि)रिं कलाओ अ(हि०)हीए जाव अलं-भोगसमत्थे जाए यावि होत्था, तए णं सा भद्दा सत्थवाही धण(ण)णं दारयं उम्मुक्कबालभावं जाव भोगसमत्थं या(वा)वि(या)जा-णि(या)त्ता बत्तीसं पासायवडिसए कारेइ अब्भुग्गयमूसिए जाव तेसिं मज्झे भवणं अणेग-खंभसयसंणिविट्ठं जाव बत्तीसाए इब्भवरक्कणगाणं एगदिवसेणं पाणिं मेण्हावेइ (२) बत्तीसओ दाओ जाव उप्पि पासाय० फु(ट्ठं)ट्ठंतेहिं जाव विहरइ, तेणं कालेणं तेणं समएणं समणे० समोसडे परिसा निग्गया राया जहा कोणिओ तहा जियसत्तू

निग्गओ, तए णं तस्स धण्णस्स तं महया (ज०) जहा जमाली तहा निग्ग-ओ,
नवरं पाय(विहा)चारेणं जाव जं नवरं अम्मयं भइं सत्थवाहिं आपुच्छामि, तए णं
अहं देवाणुप्पियाणं अंतिए जाव पव्वयामि जाव जहा जमाली तहा आपुच्छइ
मु(पु)च्छिया वुत्तपडिवुत्तया जहा म-हब्बले जाव जाहे नो संचाएइ जहा थावच्चा-
पुत्तो जियसत्तुं आपुच्छइ छत्तचामराओ० सयमेव जियसत्तू निक्खमणं करेइ
जहा थावच्चापुत्तस्स कप्प-हो जाव पव्वइए (०) अणगारे जाए ई(इ)रियासमिए
जाव [युत्त]वंभयारी, तए णं से धण्णे अणगारे जं चेव दिवसं मुंडे भवित्ता
जाव पव्वइए तं चेव दिवसं समणं भगवं महावीरं वंदइ नमंसइ वं० २ ता
एवं वयासी-[एवं खल्ल] इच्छामि णं भंते ! तुब्भे(णं)हिं अब्भणुणाए समाणे
जावजीवाए छट्ठंछट्ठेणं अणिविखत्तेणं आर्यविलपरिग्गहिएणं तवोकम्मणेणं अप्पाणं
भावेमाणे विह(रे)रित्तए छट्ठस्स-वि-य णं पारण(गं)र्यंसि कप्प(प)पेइ [मे] आर्यविलं
पडि(ग्गहि)गाहेत्तए नो चेव णं अणायं विलं तं-पि-य संसट्ठं नो चेव णं असं-
सट्ठं तं-पि-य णं उज्झियधम्मियं नो चेव णं अणुज्झियधम्मियं तं-पि-य (णं) जं
अण्णे बहवे समणमाहणअतिहिकिवणवणीमगा नावकंखंति, अहासुहं देवाणुप्पिया !
मा पडिबंभं करेइ, तए णं से धण्णे अणगारे समणेणं भगवया महावीरेणं
अब्भणुणाए समाणे हट्ठ० जावजीवाए छट्ठंछट्ठेणं अणिविखत्तेणं तवोकम्मणेणं
अप्पाणं भावेमाणे विहरइ, तए णं से धण्णे अणगारे पढमछट्ठ(व)खमणपारण-
र्यंसि पढमाए पो(र)रिसीए सज्झार्यं करेइ जहा गोयमसामी तहेव आपु-
च्छइ जाव जेणेव का(कं)र्यंदी नयरी तेणेव उवागच्छइ २ ता का-र्यंदीए नयरीए
उच्च० जाव अडमाणे आर्यविलं [नो अणायं विलं] जाव नावकंखंति, तए णं
से धण्णे अणगारे ताए अब्भुज्जयाए (पयययाए) पयत्ताए परगहियाए एसणाए
[एसमाणे] जइ भत्तं लभइ तो पाणं न लभइ अह पाणं (ल०णो) तो भत्तं न लभइ,
तए णं से धण्णे अणगारे अदीणे अविमणे अकल्लसे अविसा(यी)वी अपरितंतजोगी-
जयणघडणजोगचरित्ते अहापज(त्त)त्तं समु(दा)द्वाणं पडिगाहेइ २ ता का-र्यंदीओ
नयरीओ पडिणिक्खमइ [पडिणिक्खमिता] जहा गोयमे जाव पडिंदसेइ, तए
णं से धण्णे अणगारे समणेणं भगवया महावीरेणं अब्भणुणाए समाणे अमु-
च्छिए जाव अणज्झोववणे बिलमिव पण्णगभूएणं अप्पाणेणं आहारं आहा-
रेइ २ ता संजमेणं तवसा० विहरइ, [तए णं] समणे भगवं महावीरे अण्णया-
कया(ई)इ का-र्यंदी(ए)ओ नयरीओ सहसंबवणाओ उज्जाणाओ पडिणिक्खमइ २
ता बहिया जणवयविहारं विहरइ, तए णं से धण्णे अणगारे समणस्स भग-

वओ महावीरस्स तहारुवाणं थेराणं अंतिए सामाइयमाइयाइं एकारस्स अंगाईं
 अहिज्जइ [अहिज्जिता] संजमेणं तवसा अम्पाणं भावेमाणे विहरइ, तए णं से
 धण्णे अणगारे तेणं उ(ओ)रालेणं (त०) जहा खंदओ जाव० चिट्ठइ, धणस्स
 णं अणगारस्स पायाणं अय(इ)मेयारुवे तवरुवलावणे होत्था, से जहा-नामए
 सुक्कल्लई-इ वा कट्ठपाउया-इ वा जरग्ग(उ)ओवाहणा-इ वा, एवामेव धणस्स अण-
 गारस्स पाया सुक्का (लुक्खा) निम्मंसा अट्ठिचम्मल्लिरत्ताए पण्णायंति नो चेव
 णं मंससोणियत्ताए, धणस्स णं अणगारस्स पायंगुलियाणं अयमेयारुवे० से
 जहा-नामए कलसंगलिया-इ वा मुग्ग(सं०)माससंगलिया-इ वा तरुणिया छिण्णा उण्हे
 दिण्णा सुक्का समाणी मिलायमाणी २ चिट्ठंति, एवामेव धणस्स (अ०) पायंगुलि-
 याओ सुक्काओ जाव सोणियत्ताए, धणस्स (णं अ०) जंघाणं अयमेयारुवे० से जहा०
 काकजंघा-इ वा कंकजंघा-इ वा ठेणियालि(य)याजंघा-इ वा जाव सोणियत्ताए, धणस्स
 (णं) जाण्णं अयमेयारुवे० से जहा० का(ली)लिपोरे-इ वा मयूरपोरे-इ वा ठेणियालि-
 यापोरे-इ वा एवं जाव सोणियत्ताए, धणस्स उरुस्स० जहा नामए सामक(रे)रिल्ले-इ
 वा बो(रि)रीकरिल्ले-इ वा सल्लइकरिल्ले-इ वा साम-लिकरिल्ले-इ वा तरुणिए (छि०)
 उण्हे जाव चिट्ठइ एवामेव धणस्स उरु जाव सोणियत्ताए, धणस्स कडिप(ट्ट)तस्स
 इमेयारुवे० से जहा० उट्ठपा(ए)दे-इ वा जरग्गपाए-इ वा [महिसपाए-इ वा] जाव
 सोणियत्ताए, धणस्स उदरभायणस्स इ(अय)मेयारुवे० से जहा० सुक्कदिए-इ वा भज्ज-
 (णय)यणकभल्ले-इ वा कट्ठकोलंबए-इ वा, एवामेव उदरं सुक्कं[०], धणस्स पा(पां)सु-
 लि(या)यक(रं)डयाणं इमेयारुवे० से जहा० थासयावली-इ वा पाणावली-इ वा मुंडा-
 वली-इ वा[०], धणस्स पि(ट्ट)ट्टिकरंड-याणं अयमेयारुवे० से जहा० कणावली-इ
 वा गोलावली-इ वा वट्टयावली-इ वा, एवामेव०, धणस्स उ(रु)रक-डयस्स अय-
 मेयारुवे० से जहा० चित्त(य)कट्टरे-इ वा वियणपत्ते-इ वा तालियंटपत्ते-इ वा एवा-
 मेव०, धणस्स बाहाणं० से जहा-नामए समिसंगलिया-इ वा प(वा)हा(य)या-
 संगलिया-इ वा अगतथिय-संगलिया-इ वा एवामेव०, धणस्स हत्थाणं० से जहा०
 सुक्कल्लगणिया-इ वा वडपत्ते-इ वा पलासपत्ते-इ वा, ए(व)वामेव०, धणस्स हत्थं-
 गुलियाणं० से जहा० क(लाय)लसंगलिया-इ वा मुग्ग(०)माससंगलिया-इ वा तरुणिया
 छिण्णा आयवे दिण्णा सुक्का समाणी एवामेव०, धणस्स गीवाए० से जहा० करग-
 गीवा-इ वा कुंडियागीवा-इ वा उच्च(त्थ)ट्ठवणए-इ वा एवामेव०, धणस्स णं हण्ण(आ)-
 याए० से जहा० लाउ(य)फले-इ वा हकुवफले-इ वा अंबगट्टिया-इ वा एवामेव०,
 धणस्स-उट्ठाणं० से जहा० सुक्कजलोया-इ वा सिलेसगुलिया-इ वा अलत्त(ग)-

गुलिया-इ वा एवामेव०, धणस्स जिन्माए० से जहा० वडपत्ते-इ वा पलासपत्ते-इ वा (उंबर०) सागपत्ते-इ वा एवामेव०, धणस्स ना(सिया)साए० से जहा० अंबगपेसिया-इ वा अंबाडगपेसिया-इ वा माउ(लि)लुंगपेसिया-इ वा तरुणिया एवामेव०, धणस्स अच्छीणं० से जहा० वीगाछि(दे)हे-इ वा व(ची)द्री(पन्वी)सगछि-हे-इ वा पा(प)भाइयता(रि)रगा-इ वा एवामेव०, धणस्स कण्णणं० से जहा० मू(लि)-लाछल्लिया-इ वा वालुंक० कारेळय(च)छ(ल्ली)ल्लिया-इ वा एवामेव०, धणस्स (अ०)सीसस्स० से जहा० तरुणगलाउए-इ वा तरुणगएलाळु(यत्ति)ए-इ वा सिण्हा(लु)लए-इ वा तरुणए जाव चिट्ठइ, एवामेव धणस्स अणगारस्स सीसं सुक्कं लुक्खं निम्मंसं अट्ठिचम्म(च्छि)छिरत्ताए पण्णायइ नो चेव णं मंससोणियत्ताए, एवं सव्वत्थ(मेव), नवरं उ(द)यरभाय(ण)णं क(ण्ण)ण्णा जीहा उट्ठा एएसिं अट्ठी न भण्णइ चम्म छिरत्ताए पण्णायइ-त्ति भण्णइ, धण्णे णं अणगारे णं सुक्केणं लु(भु)क्खेणं पायजंवोरुणा विगयतडिकरालेणं कडिकडाहेणं पि-ट्ठिम(व)स्सिएणं उदरभायणेणं जोइज्जमाणेहिं पा(-पं)सुलि[य]क-डएहिं अक्खसुत्तमाला(ति वा)विव (गणिज्जमालाति वा) ग(णि)-णेज्जमा(णा)णेहिं पि-ट्ठिकरंडगसंधीहिं गंगातरंगभूएणं उरकडगदेसभाएणं सुक्कसप्प-समाणाहिं बाहाहिं सि(स)टिलकडाली-विव लंबं(चलं)तेहि य अगहत्थेहिं कपणवा-इ(ओ)एविव वेवमाणीए सीसघडीए पव्वायवयणकमले उब्भडव(डा)डमुहे उब्बुड-णयणकोसे जीवं-जीवेणं गच्छइ जीवं-जीवेणं चिट्ठइ भासं भासिस्सा(मीति)मि ति गिला(य)इ ३ से जहा नामए इंगालसगडिया-इ वा जहा खंदओ तहा जाव हुयासणे इव भासरा(सी)सिपलिच्छण्णे तवेणं तेएणं तवतेयसिरीए (अ०) उवसोभेमाणे २ चिट्ठइ ॥ ३ ॥ तेणं कालेणं तेणं समएणं रायगिहे नयरे गुणसिलए उज्जाणे सेणिए राया, तेणं कालेणं तेणं समएणं समणे भगवं महावीरे समोसठे परिसा निग्गया सेणि(ओ)ए निग्ग-ए धम्मकहा परिसा पडिगया, तए णं से सेणिए राया समणस्स भगवओ महावीरस्स अंतिए धम्मं सोच्चा निसम्म समणं भगवं महावीरं वंदइ नमं-सइ वं० २ ता एवं वयासी-इमासि णं भंते ! इंदभू-इपामोक्खाणं चो(चउ)इसण्हं समणसाहस्सीणं क(य)इरे अणगारे महादुक्करकारए चेव महाणिज्जरयराए चेव ? एवं खलु सेणिया ! इमासिं इंदभूइपामोक्खाणं चो-इसण्हं समणसाहस्सीणं धण्णे अण-गारे महादुक्करकारए चेव महाणिज्ज(रा)रयराए चेव, से केणट्ठेणं भंते ! एवं चुच्चइ इमासिं जाव साहस्सीणं धण्णे अणगारे महादुक्करकारए चेव महाणिज्ज(-कार)रय-राए चेव ? एवं खलु सेणिया ! तेणं कालेणं तेणं समएणं कायंदी ना-मं नयरी होत्था [०] उप्पिं पासायवडिसए विहरइ, तए णं अहं अण्णया कयाइ पुव्वाणुपु-

(वि)व्वीए चरमाणे गामाणुगामं दूहज्जमाणे जेणेव का-यंवी नयरी जेणेव सहसंब-
वणे उज्जाणे तेणेव उवागए [उवागमिता] अहापडिरुव उग्गहं उग्गिगहामि २ ता
संजमेणं जाव विहरामि, परिसा निग्गया, तहे(तं चे)व जाव पव्वइए जाव बिलमिव
जाव आहारैइ, धणस्स णं अणगारस्स पादाणं सरिरवण्णओ सव्वो जाव
उवसोभमाणे २ चिट्ठइ, से तेणट्ठेणं सेणिया ! (इमं) एवं वुच्चइ-इमासिं चउदसण्हं
(समण)साहस्सीणं धण्णे अणगारे महाडुक्करकारए महानिज्जरयाए चेव, तए णं से
सेणि(य)ए राया समणस्स भगवओ महावीरस्स अंति(यं)ए एयमट्ठं सोच्चा निसम्म
हट्ठ० समणं भगवं महावीरं तिकखुतो आयाहि(णं)णपयाहिणं करैइ २ ता वंदइ
नमंसइ वं० २ ता जेणेव धण्णे अणगारे तेणेव उवागच्छइ २ ता धण्णं अण-
गारं तिकखुतो आयाहि-णपयाहिणं करैइ २ ता वं(दे)दइ नमंसइ वं० २ ता एवं
वयासी-धण्णे(S)सि णं तुमं देवाणुप्पिया ! सुपुण्णे(०) सुकयत्थे कयलक्खणे सुल्लहे
णं देवाणुप्पिया ! तव मा(म)णुस्सए जम्मजीवियफलेत्तिकहुं वंदइ नमंसइ वं० २ ता
जेणेव समणे भगवं महावीरे तेणेव उवागच्छइ २ ता समणं भगवं महावीरं
तिकखुतो (जाव) वंदइ नमंसइ वं० २ ता जामेव वि(सि)सं पाउब्भूए तामेव
दि-सं पडिगए ॥ ४ ॥ तए णं तस्स धण्णस्स अणगारस्स अण्णया कया(ई)इ पुव्व-
रत्तावरत्ताक(ले)लसमयंसि धम्मजागरियं० इमेयारूवे अ(ज्ज)ब्भत्थिए० एवं खलु
अहं इमेणं उ-राळेणं [०] जहा खंदओ तहेव चिंता आपुच्छ(णा)णं थेरेहिं सद्धिं
वि(-लप०)उलं दुरु(हंति)हइ मासिया संलेहणा नव-मा(सं)सा परियाओ जाव काल-
मासे कालं किच्चा उड्ढुं चंदिम जाव नव-य-गे(वि)वेज्ज(वि०)विमाणपत्थडे उड्ढुं दूरं
वीईवइत्ता सव्वट्ठसिद्धे विमाणे देवत्ताए उववण्णे, थेरा तहेव उ(त)यरंति जाव इमे
से आयारभंडए, भंतेत्ति भगवं गोयमे तहेव पुच्छइ जहा खंदयस्स भगवं वागरेइ
जाव सव्वट्ठसिद्धे विमाणे उववण्णे । धण्णस्स णं भंते ! देवस्स केवइयं कालं ठिई
वण्णत्ता ? गोयमा ! तेत्तीसं सागरोवमाई ठिई पण्णत्ता । से णं भंते ! ता(त)ओ
देवलोगाओ (आ० ३) कहिं गच्छिहिइ कहिं उववज्जिहिइ ? गोयमा ! महाविवे(ह)हे
वासे सिज्झिहिइ ५ । तं एवं खलु जंबू ! समणेणं जाव संपत्तेणं पढमस्स अज्झय-
णस्स अयमट्ठे पण्णत्ते ॥ ५ ॥ (इ० ति० व०) पढ(म)मं अज्झयणं समत्ते ॥ जइ
णं भंते ! [०] उक्खेवओ एवं खलु जंबू ! तेणं कालेणं तेणं समएणं [का-यंवी
(ना०) नयरी (हो०) जियस० राया तत्थ णं] का-यंवीए नयरीए भद्दा-नामं सत्थ-
वाही परिवसइ अट्ठा०, तीसे णं भद्दाए सत्थवाहीए पुते सुणक्खत्ते नामं दारए
होत्था अहीण० जाव सुरुवे पंचधाइपरिक्खत्ते जहा ध(जे)ण्णो त(हेव)हा वत्तीसओ
दाओ जाव उप्पि पासायव(डें)डिंसए विहरइ, तेणं कालेणं तेणं समएणं (सामी)

समोस(द्धे)रणं जहा ध-ण्णो तहा सुणक्ख(ते-S)तो-वि निग्ग(ते)ओ जहा थावच्चापु-
त्तस्स तहा निक्खमणं जाव अणगारे जाए ई-रियासमिए जाव बंभयारी, तए णं से
सुणक्खते (अणगारे) जं चेव दिवसं समणस्स भगवओ महावीरस्स अंतिए मुंडे
जाव पव्वइए तं चेव दिवसं अभिग्गहं तहेव जाव बिलमिव [०] आहारेइ संजमेणं
जाव विहरइ [०] बहिया जणवयविहारं विहरइ एकारस अंगाई अहिजइ [०] संजमेणं
तवसा अप्पाणं भावेमाणे विहरइ, तए णं से सुणक्खते (अ०) तेणं ओ-रालेणं [०]
जहा खंदओ तेणं कालेणं तेणं समएणं रायगिहे नयरे गुणसिलए उज्जाणे सेणिए
राया सानी समोसडे परिसा निग्गया राया निग्गओ धम्मकहा राया पडिगओ परिसा
पडिगया, तए णं तस्स सुणक्खत्तस्स अण्णया कया-इ पुव्वरत्तावरत्तकालसमयंसि
धम्मजा० जहा खंदयस्स ब(हु)द्ध वासा परियाओ गोयमपुच्छा तहेव कहेइ जाव
सव्वडुसिद्धे विमाणे दे(वे)वत्ताए उववण्णे तेत्तीसं सागरोवमाईं ठिई पण्णत्ता, से णं
भंते ।० महाविदे(-वासे)हे सिज्झहिइ ॥ [(इ०) बी(वी)यं अज्झयणं समत्तं ॥]
एवं (ख० जं०) सुणक्खत्तगमेणं सेसा-वि अट्ठ भाणियव्वा, नवरं आ-णुपुव्वीए
दोणिण रायगिहे दोणिण साएए दोणिण वाणियग्गामे नवमो हत्थि(ण)णापुरे दसमो
रायगिहे नवण्हं भद्दाओ जणणीओ नवण्ह-वि बत्तीसओ दाओ नवण्हं निक्खमणं
थावच्चापुत्तस्स सरिसं वेहल्लस्स-पिया करेइ छम्मासा वेहल्लए नव धण्णे सेसाणं ब-द्ध
वासा(ई) मासं संलेहणा सव(वे)वडुसिद्धे महाविदे-हे सि(ज्झणा)ज्झि(हिं)स्संति [एवं
दस अज्झयणाणि] । एवं खलु जंबू ! समणेणं भगवया महावीरेणं आइगरेणं तित्थ-
गरेणं सयंसंबुद्धेणं लोगणाहेणं लोगप्पदीवेणं लोगप्पजोयगरेणं अभयदएणं सरण-
दएणं चक्खुदएणं मग्गदएणं धम्मदएणं धम्मदेसएणं धम्मवरच्चाउरंतचक्कवाट्टिणा
अप्पड्हियवरणाणदंसणधरेणं जिणेणं जाणएणं बुद्धेणं बोहएणं मोक्खेणं मोयएणं
तिणेणं तारएणं सिवमयलमरुयमणंतमक्खयमव्वावाहमपुणरावत्तयं सिद्धिगइणाम-
धेर्यं ठाणं संपत्तेणं अणुत्तरोववाइयदसाणं तच्चस्स वग्गस्स अयमट्ठे पण्णत्ते ॥ ६ ॥
अणुत्तरोववाइयदसाओ समत्ताओ ॥ (अणुत्तरोववाइयदसाणामं सुत्तं) नवममंगं समत्तं ॥
[अणुत्तरोववाइयदसाणं एगो सुयखं० तिणिण व० तिसु चेव दिवसेसु उ० तत्थ
ण्डमे वग्गे दस उद्देस० बिइ(वी)ए वग्गे तेरस उद्देस० तइए वग्गे दस उद्देस०
सेसं जहा धम्मकहा ने(ना)यव(वं)वा ॥ ७ ॥]



नमोऽस्तु णं समणस्स भगवओ णायपुत्तमहावीरस्स

सुत्तागमे

तत्थ णं

पण्हावागरणं

नमो अरिहंताणं नमो सिद्धाणं नमो आयरियाणं नमो उवज्झायाणं नमो लोए
सव्वसाहूणं । (तेणं कालेणं तेणं समएणं चंपा-नाम नगरी होत्था, पुण्णभेह् उज्जाणे
असोगवरपायवे पुढविसिलापट्टए, तत्थ णं चंपाए नयरीए कोणिए नाम राया
होत्था, धारिणी देवी, तेणं कालेणं तेणं समएणं समणस्स भगवओ महावीरस्स
अंतेवासी अज्जसुहम्ममे नाम थेरे जाइसंपन्ने कुलसंपन्ने बलसंपन्ने हवसंपन्ने विणय-
संपन्ने नाणसंपन्ने दंसणसंपन्ने चरित्तसंपन्ने लज्जासंपन्ने लाघवसंपन्ने ओयंसी
तेयंसी वच्चंसी जसंसी जियकोहे जियमाणे जियमाए जियलोभे जियनिहे जिय-
इदिए जियपरीसहे जीवियासमरणभयविप्पमुक्के तवप्पहाणे गुणप्पहाणे सुत्तिप्प-
हाणे विज्जापहाणे मंतप्पहाणे बंभप्पहाणे वयप्पहाणे नयप्पहाणे नियमप्पहाणे
सच्चप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे चोइसपुव्वी
अउनाणोवगए पंचहिं अणगारसएहिं सद्धिं संपरिवुडे पुव्वानुपुर्व्वि चरमाणे
गामाणुगामं दूइज्जमाणे जेणेव चंपा न(ग)यरी तेणेव उवागच्छइ जाव अहापडिरूवं
उग्गहं उग्गणिहत्ता संजमेणं तवसा अप्पाणं भावेमाणे विहरति । तेणं कालेणं
तेणं समएणं अज्जसुहम्मस्स अंतेवासी अज्जजंबू नामं अणगारे कासवगोत्तेणं
सत्तुस्सेहे जाव संखित्तविपुलतेयलेस्से अज्जसुहम्मस्स थेरस्स अदूरसामन्ते उहं-
जाणू जाव संजमेणं तवसा अप्पाणं भावेमाणे विहरइ । तए णं से अज्जजंबू
जायसहे जायसंसए जायकोउहले उप्पन्नस(द्धे)हे ३ संजायसहे ३ समुप्पन्नसहे
३ उट्ठाए उट्ठेइ २ ता जेणेव अज्जसुहम्ममे थेरे तेणेव उवागच्छइ २ ता अज्जसुह-
म्म(मे)मं थे(रे)रं तिक्खुत्तो आयाहिणपयाहिणं करेइ २ ता वंदइ नमंसइ वं० २ ता
नच्चासन्ने नाइदूरे विणएणं पंजलिपुडे पज्जुवासमाणे एवं वयासी-जइ णं मंते ! सम-
णेणं भगवया महावीरेणं जाव संपत्तेणं णवमस्स अंगस्स अणुत्तरोववाइयदसाणं अय-
मट्ठे प० दसमस्स णं (अं०) अंगस्स पण्हावागरणाणं समणेणं जाव संपत्तेणं के अट्ठे
प० ? जंबू ! दसमस्स अंगस्स समणेणं जाव संपत्तेणं दो सुयक्खंवा पण्णता-

आसवदारा य संवरदारा य, पढमस्स णं भंते ! सुयक्खंधस्स समणेणं जाव संपत्तेणं
 कइ अज्झयणा पण्णत्ता ? जम्बू ! पढमस्स णं सुयक्खंधस्स समणेणं जाव संपत्तेणं
 पंच अज्झयणा पण्णत्ता, दोच्चस्स णं भंते ! ० एवं चेव, एएसि णं भंते ! अण्हय-
 संवरणं समणेणं जाव संपत्तेणं के अट्ठे पण्णत्ते ?, तत्ते णं अज्जसुहम्मे थेरे जंबूनामेणं
 अणगारेणं एवं वुत्ते समाणे जं० अणगारं एवं वयासी-) जंबू ! इणमो अण्हयसंवर-
 विणिच्छयं पवयणस्स निस्संदं । वोच्छामि णिच्छयत्थं सुहासियत्थं महेसीहिं ॥ १ ॥
 पंचविहो पण्णत्तो जिणे[हिं]हिं इह अण्हओ अणावीओ । हिंसामोसमदत्तं अब्बंभ-
 परिग्गहं चेव ॥ २ ॥ जारिसओ जंनामा जह य कओ जारिसं फलं देति । जेविय
 करेति पावा पा(णि)णवहं तं निसामेह ॥ ३ ॥ पाणवहो नाम एस निचं जिणेहिं
 भणिओ-पावो चंडो खुदो साहसिओ अणारिओ णिग्घिणो णिस्संसो महब्भओ
 पइभओ १० अतिभओ वीहणओ तासणओ अणज्जो उब्बेयणओ य णिरवयक्खो
 णिद्धम्मो णिप्पिवासो णिक्कल्लणो णि-रयवासगमणनिधणो २० मोहमहब्भयपयट्ठओ
 मरणावेमणस्सो २२ ॥ पढमं अधम्मदारं ॥ १ ॥ तस्स य नामाणि इमाणि
 गोष्णाणि होंति तीसं, तंजहा-पाणवहो १ उम्मूलणा सरीराओ २ अवीसंभो ३
 हिंसविहिंसा ४ तहा अक्किचं च ५ धायणा ६ मारणा य ७ वहणा ८ उट्ठवणा ९
 तिवायणा य १० आरंभसमारंभो ११ आउयक्कम्मस्सुवद्दो भेयणिट्ठवणगालणा य
 संवट्ठगसंखेवो १२ मच्चू १३ असंजमो १४ कडगमट्ठणं १५ वोरमणं १६ परभव-
 संकामकारओ १७ दुग्गतिप्पवाओ १८ पावकोवो य १९ पावलोभो २० छविच्छेओ
 २१ जीवियंतकरणो २२ भयंकरो २३ अणकरो य २४ वज्जो २५ परितावणअण्हओ
 २६ विणासो २७ निज्जवणा २८ लुंपणा २९ गुणाणं विराहणत्ति ३० विय तस्स
 एवमादीणि णामधेजाणि होंति तीसं पाणवहस्स कल्लसस्स कडुयफलदेसगाइं ॥ २ ॥
 तं च पुण करेति केई पावा अ(रु)संजया अविरया अणिहुयपरिणामदुप्पयोगी पाणवहं
 भयंकं बहुविहं बहुप्पगारं परदुक्खुप्पायणप्पसत्ता इमेहिं तसथावरेहिं जीवेहिं पडिणि-
 विट्ठा, किं ते ?, पाठीणत्तिमितिर्मिगिलअणेगझसविविहजातिमंदुक्कदुविहकच्छभणक-
 मगरदुविहगाहादिलिवेढयमंदुयसीमागारपुल्लयसुंछुमारबहुप्पगारजलयरविहाणाकते य
 एवमादी, कुरंगरुस्सरभच्चमरसंवर(हु)उरब्भससयपसयगोणरोहियहयगयखरकरभ-
 खग्गवानरगवयविगसियालकोलमज्जारकोलसुण(का)कसिरियंदलगावत्तकोकंति यगोक्क-
 णमियमहिसविग्घल्लगलीवी(य)यासाणतरच्छअच्छ(ब)मल्लसहूलसीहन्विहल्लचउप्प-
 यविहाणाकए य एवमा(यी)वी, अयगरगोणसवराहिमउल्लिका(ओ)उदरदब्भपुप्फ-
 यासालियमहोरगोरगविहाणककए य एवमादी, छीरलसरंबसेहसेल्लगगोथुं(हु)दरणउ-

लसरडजाहगमुगुं(सी-सा)सखाडहि(ला)लवाउ(प्पि)प्पइय[घी]घरोलियसिरीसिवगणे
 य एवमादी, कादंब(कं)कबकवलकासारसआडासेतीयकुललवंजुलपारिप्पवचकी-
 वसउण-[पि]पीपीलिय[वीविय]हंसधत्तरिट्ठगभासकुलीकोसकुंचदरातुंडडेणियालगसू-
 (यी)ईमुहकविलपिगलक्खगकारंडगचक्खवागउक्कोसगरुलपिंगुलसुयबरहिणमयणसाल-
 नंदीमुहन्दमाणगकोरंगभिगारगकोणालगजी(वं)वजीव(ग)कतित्तिरवट्टकलावककपि-
 जलककवोतक[काग]पारेवयग(च)चिडिगढिककुडवेसरमयूरगचउरगहयपोंडरीय-
 सालग[करक]वीरल्लसेणवायसयविहंग(भे)भिणासि(य)चासवग्गुलिचम्मट्टिलविततप-
 विखलखयरविहाणाकते य एवमादी, जलथलखगचारिणे उ पंचिंदिए पसुगणे
 बियतियचउरिंदिए विविहे जीवे पियजीविए मरणदुक्खपडिक्खे वराए हणंति
 बहुसंकिलिट्ठकम्मा । इमेहिं विविहेहिं कारणेहिं, किं ते ?, चम्मवसांसंसेयसोणिय-
 जगफिप्पिसमत्थ[लि]डुंगहितयंतपित्तफोफसदंत(ट्ठी)ट्ठा अट्ठिमिंजनहनयणकण्णहा-
 रुणिनक्खमणिसिंणदाडिपिच्छविसविसाणवालहेउं, हिंसंति य भमरमधुकरिगणे रसेसु
 गिद्धा तहेव तेंदिए सरीरोवकरणट्टयाए किवणे बेंदिए बहवे वत्थोहरपरिमंडणट्टा,
 अण्णेहि य एवमाइएहिं बहूहिं कारणसतेहिं अबुहा इह हिंसंति तसे पाणे इमे य एग्गि-
 दिए बहवे वराए तसे य अण्णे तदस्सिए चेव तणुसरीरे समारंभंति अत्ताणे असरणे
 अणाहे अबंधवे कम्मनिगलबद्धे अकुसलपरिणाममंदबुद्धिजणदुविजजाणए पुढ(वी)-
 विम[ये]ए पुढ-विंसंति(ये)ए जलमए जलगए अणलाणिलतणवणस्सतिगणनिस्सिए य
 तम्मयतज्जिते चेव तदाहारे तप्परिणतवण्णगंधरसफासबौदिरुवे अचक्खुसे चक्खुसे
 य तसकाइए असंखे थावरकाए य सुहुमबायरपत्तेयसरीरनामसाधारणे अणंते
 हणंति अविजाणओ य परिजाणओ य जीवे इमेहिं विविहेहिं कारणेहिं, किं ते ?,
 करिसणपोक्खरणीवाविबप्पिणिकूवसरतलागचित्तिवे(दि)तियखातियआरामविहारथू-
 भपागारदारगोउरअट्टालगचरियासेतुसंकमपासायविकप्पभवणघरसरणलेणआवणचे-
 तियदेवकुलचित्तसमापवाआयतणावसहभूमिघरमंडवाण य कए भायणमंडोवगरणस्स
 विविहस्स य अट्टाए पुढविं हिंसंति मंदबुद्धिया जलं च मज्जणयपाणभोगयवत्थोवण-
 सोयमादिएहिं पयणपयावणजलावणविदंसणेहिं अगणिं सुप्पवियणतालयंतपेहुणमुह-
 करयलसागपतवत्थमादिएहिं अणिंलं अगारपरिवा(डि-या)रभक्खभोगयसयणासण-
 फल(क)गमुसलउखलततविततातोज्जवहणवाहणमंडवविविहभवणतोरणाविडंगदेव-
 कुलजालयद्धचंदनिज्जगचंदसालियवेतियणिस्सेणिदोणिचंगेरिखीलमेढकसभापवावस-
 हगंधमल्लाणुलेवणंबरजुयनंगलमइयकुलियसंदणसीयारहसगडजाणजोग्गअट्टालगचरि-
 अदारगोपुरफलिहाजंतसूलियलउडमुसंडिसतगिघबहुपहरणावरणुवक्खराण कते,

अण्णेहि य एवमादिएहिं बहुहिं कारणसतेहिं हिंसन्ति ते तरुणे भणिता एवमादी
सत्ते सत्तपरिवज्जिमा उवहणन्ति दढमूढा दारुणमती कोहा माणा माया लोभा
हस्सरती अरती सोय-वेदत्थी जीयकामत्थधम्महेवं सवसा अवसा अट्ठा अणट्ठाए
य तसपाणे थावरे य हिंसंति (हिंसंति) मंदबुद्धी सवसा हणंति अवसा हणंति
सवसा अवसा दुहओ हणंति अट्ठा हणंति अणट्ठा हणंति अट्ठा अणट्ठा दुहओ
हणंति हस्सा हणंति वेरा हणंति रती-य हणंति हस्सवेरारती य हणंति कुट्ठा हणंति
लुट्ठा हणंति मुट्ठा हणंति कुट्ठा लुट्ठा मुट्ठा हणंति अत्था हणंति धम्मा हणंति कामा
हणंति अत्था धम्मा कामा हणंति ॥ ३ ॥ कयरे ते ?, जे ते सोयरिया मच्छबंधा
साउणिया वाहा कूरकम्मा वाउरिया दीवितबंधणप्पओगतप्पगलजालवीरल्लगायसी-
दब्भवगुराकूडछेल्लिहत्था (दीविया) हरिएसा[सा]उणिया य वीदंसगपासहत्था वण-
चरगा लुट्ठयमहुघातपोतघाया एणीयारा पण्णियारा सरदहदीहिअतलागपल्लपरि-
गालणमलणसोत्तबंधणसलिलासयसोसगा विसगरस्स य दायगा उत्तणवल्लरदवगिग-
णिद्वयपलीवका कूरकम्मकारी इमे य बहवे मिलक्खुजाती, के ते ?, सकजवणस[व]-
बरबल्लरगायमुट्ठोदभडगतित्थियपक्कणियकुलक्खगोडसीहलपारसकोंचंधदविल(वि)-
विल्ललुल्लिंदअरोसडोवपोक्कणगंधारगबहलीयजल्लरोममासबउसमलया चुंचुया य
चूलिया कोंकणगा मेतपण्हवमालवमहुरआभासियाअणक्कचीणल्लासियखसखासिया
नेहुरमरहट्ठमुट्ठि(अ)यआरबडोबिलगकुहणकेकयहूणरोमगरुस्मरुगा चिलायविसय-
वासी य पावमतिणो जलयरथलयरसणप्फतोरगखहचरसंडासतोंडजीवोव(ग)घाय-
जीवी सण्णी य असण्णिणो य पज्जता असुभळेस्सपरिणामा एते अण्णे य
एवमादी करंति पाणातिवायकरणं पावा पावाभिगमा पावरुई पाणवहकयरती
पाणवहरुवाणुट्ठाणा पाणवहकहासु अभिरमंता तुट्ठा पावं करेत्तु हों(हो)ति य बहु-
प्पगारं । तस्स य पावस्स फलविवागं अयाणमाणा वड्ढंति महब्भयं अविस्साम-
वेयणं दीहकालबहुदुक्खसंकडं नरयतिरिक्खजोणि, इओ आउक्खए तुया असुभक्क-
म्मबहुला उववज्जंति नरएसु हुलितं महालएसु वयरामयकुट्ठरुहनिस्संधिदारविरहिय-
निम्मद्वभूमितलखरामरिसविसमणिरयधरचारएसुं महोसिणसया[व]पतत्तदुग्गंधवि-
स्सउव्वेयजणगेसु बीभच्छदरिसणिज्जेसु निच्चं हिमपडलसीयलेसु कालोभासेसु य
भीमगंभीरलोमहरिसणेसु णिरभिरामेसु निप्पडियारवाहिरोगजरापीलिएसु अतीव-
निच्चंधकारतिमिस्सेसु पतिभएसु ववगयगहचंदसूरणक्खत्तजोइसेसु मेयवसामंसपडल-
पोच्चडपूयरुहिरुक्किणविलीणचिक्कणरसियावावण्णकुहियचिक्खल्लकहमेसु कुकूलानल-
पलित्तजालमुम्मुरअसिक्खुरकरवत्तधारासुनिसितविच्छुयडंकनिवातोवम्मफरिसअति-

दुस्सहेसु य अत्ताणासरणकड्डयदुक्खपरितावणेसु अणुबद्धनिरंतरवेयणेसु जमपुरिस-
 संकुलेसु, तत्थ य अन्तोमुहुत्तलद्धिभवपन्नएणं निव्वत्तेति उ ते सरीरं हुंढं
 बीभच्छदरिसिणं बीहणं अट्टिणहारुणहरोमवज्जियं असुभ-गंध-दुक्खविसहं, ततो
 य पज्जतिमुवगया इंदिएहिं पंचहिं वेदंति असुभाए वेयणाए उज्जलबलविउलउकड-
 वखरफस्सपयंडघोरबीहणगदारुणाए, किं ते ?, कंदुमहाकुंभियपयणपउलणतवम-
 त्तलणभट्टभज्जणाणि य लोहकडाहुकड्डणाणि य कोट्टबलिकरणकोट्टणाणि य सामलि-
 त्तिकखगलोहकंटकअभिसरणपसारणाणि फालणविदालणाणि य अवकोडकवंचणाणि
 लट्टिसयतालणाणि य गलगबलुल्लंबणाणि सूलगमेयणाणि य आएसपवंचणाणि
 खिसणविमाणणाणि विधुट्टपणिज्जणाणि वज्झसयमातिकाति य एवं ते । पुव्वकम्म-
 कयसंचयोवतत्ता निरयग्गिमहग्गिसंपलिता गाढदुक्खं महब्भयं ककसं असयं
 सारीरं मानसं च तिव्वं दुविहं वेदंति वेयणं पावकम्मकारी बहूणि पलिओवम-
 सागरोवमाणि कलुणं पालेन्ति ते अहाउयं जमकातियतासिता य सहं करंति
 भीया, किं ते ?, अविभायसामि(माम)भायबप्पतायजितवं मुय मे मरामि दुब्बलो
 चाहिपीलिओहं किं दाणिऽसि ? एवंदारुणो णिइय मा देहि मे पहारे उस्सासेतं
 (एयं) मुहुत्तयं मे देहि पस्सायं करेहि मा रुस वीसमामि गेविजं मु(ब)य[ह] मे
 मरामि, गाढं तण्हातिओ अहं देह पाणीयं हंता पिय इमं जलं विमलं सीयलंति वेत्तूण
 य नरयपाला तवियं तउयं से दंति कलसेण अंजलीसु दड्डूण य तं पवे[पि]वियंगोवंगा
 अंसुपगलंतपप्पुयच्छा छिण्णा तण्हाइयम्ह कलुणाणि जंपमाणा विप्पेक्खन्ता दिसो-
 दिसि अत्ताणा असरणा अणाहा अवंधवा बंधुविप्पहूणा विपलारंति य सिगा इव
 वेणेण भयुव्विग्गा, वेत्तूण बला पलायमाणाणं निरणुकंपा मुहं विहाडेतुं लोहडं-
 डेहिं कलकलं ण्हं वयणंसि लुभंति केइ जमकाइया हसंता, तेण दड्डा संतो रसंति
 य भीमाइं विस्सराइं स्वति य कलुणगाइं पारेवतगाव एवं पलवितविलावकलुणा-
 कंदियबहुरुक्खरदियसहो परि[वे]देवितरुद्धबद्धयनारकारवसंकुलो णीसट्ठो रसियभणिय-
 कुविउक्खइयनिरयपालतज्जिय गेण्ह-कम पहर छिंद भिंद उप्पाडेदुक्खणाहि कत्ताहि
 विकत्ताहि य भुज्जो हण विहण विच्छुभोच्छुब्भ आकड्ड विकड्ड किं ण जंपसि ?
 सराहि पावकम्माइं दुक्कयाइं एवं वयणमहप्पगब्भो पड्डियुयासइसंकुलो तासओ
 सया निरयगोयराण महाणगरडज्झमाणसरिसो निग्घोसो सु[व]व्वए अणिट्ठो तहियं
 नेरइयाणं जाइज्जंताणं जायणाहिं, किं ते ?, असिवणदब्भवणजंतपत्थरसूइतलक्खा-
 रवाविकलकलन्तवेयर णिकलंबवालुया जलियगुहनिर्गमणउसिणोसिणकंटइल्लुगमरह-
 ज्जोयणतत्तलोहमग्गगमणवाहणाणि, इमेहिं विविहेहिं, आयुहेहिं किं ते ? मोगगरसुं-

दिकरकयसत्तिहलगयमुसलचक्ककौततोमरसूललउलभिडिमालस[इ]डलपडिसचम्मेट्ट-
दुहुणमुट्टियअसिखेडगखंगचावनारा(यं)यकणककप्पणिवासिपरसुदकतिक्खनिम्मल-
अण्णेहि य ए(यं)वमादिएहिं असुभेहिं वेउव्विएहिं पहरणसतेहिं अणुबद्धतिव्ववेरा परो-
प्परवेयणं उवीरंति अभिहणंता, तत्थ य मोगगरपहारचुणियमुसुंदिंसंभगमहितदेहा
जंतोवपीलणपुरंतकप्पिया केइत्थ सचम्मका विगत्ता गिम्मूल(दु)लूणकणोदुणासिका
छिण्हत्थपादा असिकरकयतिक्खकौतपरसुप्पहारफालियवासीसंतच्छित्तंगमंगा कल-
कलमाणखारपरिसित्तगाडडज्झंतगतकुंतगभिण्णजजरियसव्वदेहा विलोलंति मही-
तले (निगयगगीहा) विसूणियंगमंगा, तत्थ य विगसुणगसियालकाकमजारसरभ-
वीवियवियवधगसदूलसीहदप्पियखुहाभिभूतेहिं णिच्चकालमणसिएहिं घोरा-SS-रसमाण-
भीमरूवेहिं अक्कमिता दढदाढागाडडक्ककट्टियसुतिक्खनहफालियउद्धदेहा विच्छिप्पंते
समंतओ विमुक्कसंधिवंधणावियंगमंगा कंकुररगिद्धघोरकट्टवायसगणेहि य पुणो खर-
थिरदढणक्खलोहतुंवेहिं ओवत्तिता पक्खाहयतिक्खणक्खविकिन्नजिबंछियनयणनि-
(द)इओलुगविगतवयणा, उक्कोसंता य उप्पयंता निपतंता भमंता पुव्वक्कम्मोदयो-
वगता पच्छाणुस[ये]एण डज्झमाणा णिंदंता पुरेकडाई कम्माई पावगाई तहिं २ तारि-
साणि ओसन्नचिक्कणाई दुक्खातिं अणुभविता ततो य आउक्खएणं उव्वट्टिया समाणा
बहवे गच्छंति तिरियवसहिं दुक्खुत्तरं सुदाहणं जम्मणमरणजरावाहिपरियट्टणारहट्टं
जलथल्लवहचरपरोप्परविहिंसणपवंचं इमं च जगपागडं वरा[का]गा दुक्खं पावेन्ति
दीहकालं, किं ते ?, सीउण्हतण्हाखुहवैयणअप्पईकारअडविजम्मणणिच्चभउव्वि-
ग्गवासजगगणवहबंधणताडणंकणनिवायणअट्टिभंजणनासाभेयप्पहारदुसणलविच्छेय-
णअभिओगपावणकसंकुसारनिवायदमणाणि वाहणाणि य मायापिति विप्पयोगसोयप-
रिपीलणाणि य सत्थमिगविसाभिघायगलगवलआवलणमारणाणि य गलजालुच्छि-
पणाणि प(ओ)उलण-विकप्पणाणि य जावज्जीवि[क]गबंधणाणि पंजरनिरोहणाणि
य सयूहनिद्धाडणाणि धमणाणि य दोहणाणि य कुंदंडगलबंधणाणि वाडगपरिवार-
णाणि य पंकजलनिमज्जणाणि (य) वारिप्पवेसणाणि य ओवायणिभंगविसमणिवडणद-
वगिगजालदहणाई य, एवं ते दुक्खसयसंपलित्ता नरगाउ आगया इहं सावसेस-
क्कम्मा तिरिक्खपंचेदिएसु पाविति पावकारी कम्माणि पमायरागदोसबहुसंचियाई
अतीव अस्सायक्कसाई भमरमसगमच्छिमाइएसु य जाइकुलकोडिसयसहस्सेहिं
नवहिं चउरिंदियाण तहिं तहिं चेव जम्मणमरणाणि अणुभवता कालं संखेजकं
भमंति नेरइ[अ]यसमाणतिव्वदुक्खा फरिसरसणघाणचक्खुसहिया तहेव तेइदिएसु
कुंथुपिप्पिलिकाअवधिकादिकेसु य जातिकुलकोडिसयसहस्सेहिं अट्टहिं अणूणएहिं

तेईदियाण तहिं २ चेव जम्मणमरणाणि अणुहवन्ता कालं संखेज्जकं भमंति नेरइय-
समाणतिव्वदुक्खा फरिसरसणघाणसंपउत्ता (तहेव बेइ(बें)दि(ये)एसु) गंळल्यजल्लय-
किसियचंदणगमादिएसु य जा(ती)तिकुलकोडिसयसहस्सेहिं सत्ताहिं अणूणएहिं बेईदि-
याण तहिं २ चेव जम्मणमरणाणि अणुहवन्ता कालं संखिज्जकं भमंति नेरइयसमाणति-
व्वदुक्खा फरिसरसणसंपउत्ता पत्ता एगिदियत्तणंपि-य पुढविजलजलणमास्यवणफक्ति
सुहुमबायरं च पज्जत्तमपज्जत्तं पत्तेयसरीरणाम-साहारणं च पत्तेयसरीरजीविएसु य
तत्थवि कालमसंखेज्जगं भमंति अणंतकालं च अणंतकाए फासिंदियभावसंपउत्ता
दुक्खसमुदयं इमं अणिट्ठं पावित्ति पुणो २ तहिं २ चेव परभवतरुणग(ह)णे
कोट्ठालकुलियदालणसलिलमलणखुंभणसंभणअणलाणिलविविहसत्थवट्ठणपरोप्पराभिह-
णमारणविराहणाणि य अकामकाई परप्पओगोदीरणाहि य कज्जपओयणेहि य पेस्स-
पसुनिमि[त्तं]त्तओसहाहारमाइएहिं उक्खणणउक्कत्थणपयणकोट्ठणपीसणपिट्ठणभज्जण-
गालणआमोडणसडणफुडणभज्जणछेयणतच्छणविलुं चणपत्तज्जोडणअग्गिदहणाइया-
(ति)त्ति एवं ते भवपरंपरादुक्खसमणुबद्धा अडंति संसारबीहणकरे जीवा पाणाइ-
त्रायनिरया अणंतकालं जेविय इह माणुसत्तणं आगया क(हिं वि)हं चि नरगा
उव्वट्ठिया अधन्ना तेविय दीसंति पायसो विकयविगलरूवा खुज्जा वडभा य वामणा
य बहिरा काणा कुंटा पंगुला विउला य (अविय जल)मू(या)का य मंमणा य अं(धि-
ल्ल)धयगा एगचक्खू विणिहयस(पिस-वे)चिल्लिया वाहिरोगपीलियअप्पाउयसत्थवज्ज-
वाला कुलक्खणुक्किचदेहा दुब्बलकुसंधयणकुप्पमाणकुसंठिया कुरुवा किविणा य
हीणा हीणसत्ता निचं-सोक्खपरिवज्जिया असुहदुक्खभा[ग]गी णरगाओ [उव्वट्ठिया]
इहं सावसेसकम्मा, एवं णरगं तिरिक्खजोणिं कुमाणुसत्तं च हिंडमाणा पावंति
अणंताई दुक्खाई पावकारी एसो सो पाणवहस्स फलविवागो इहलोइओ पा(प)-
रलोइओ अप्पसुहो बहुदुक्खो महब्भयो बहुरयप्पगाढो दारुणो कक्कसो असाओ
वाससहस्सेहिं मुचती, न य अवेदयित्ता अत्थि हु मोक्खोति एवमाहुं, नायकुल-
नंदणो महप्पा जिणो उ वीरवरत्तामधेज्जो क(हइ सीह)हेसी य पाणवह(ण)स्स
फलविवागं, एसो सो पाणवहो चंडो रूहो खुहो अणारिओ निग्गिणो निसंसो मह-
ब्भओ बीहणओ तासणओ अणज्जो उव्वेयणओ य णिरवयक्खो निद्धम्मो
निप्पिवासो निकल्लणो निरयवासगमणनिधणो मोहमहब्भयपवहुओ मरणवेमणस्सो
पढमं अहम्मदारं समत्तंतिवेमि ॥ ४ ॥ जंबू! बितियं च अलियवयणं लहुसगलहु-
चवलभणियं भयंकरं दुहकरं अयसकरं वेरकरं अरतिरतिरागदोसमणसंकिसेसवि-
रणं अलियनियडिसातिजोयबहुलं नीयजणनिसेवियं निससंसं अप्पच्चयकारकं परम-

साहुगरहणिजं परपीलाकारकं परमकिण्हलेस्ससहिंयं दुग्गइविणिवायवद्धुणं भवपुण-
 ंभवकरं चिरपरिचियमणुगतं दुरन्तं किंति(यं)तं वितितं अधम्मदारं ॥ ५ ॥ तस्स
 यं णामाणि गोण्णाणि होति तीसं, तंजहा-अलियं १ सठं २ अणजं ३ मायामोसो
 ४ असंतकं ५ कूडकवडमवत्थुगं च ६ निरत्थयमवत्थयं च ७ विहेसगरहणिजं
 ८ अणुजुक्कं ९ कक्कणा य १० वंचणा य ११ मिच्छापच्छाकडं च १२ साती उ
 १३ उच्छन्नं १४ उकूलं च १५ अट्टं १६ अब्भक्खाणं च १७ किब्बसं १८ वलयं
 १९ गहणं च २० मम्मणं च २१ नूमं २२ निय(डी)यी २३ अप्पच्चओ २४ अस-
 मओ २५ असच्चसंघत्तणं २६ विवक्खो २७ अवही(आणाइ)यं २८ उवहिअसुद्धं
 २९ अवलोवोत्ति ३०, अविय तस्स एयाणि एवमादीणि नामधेज्जाणि होति तीसं
 सावज्जस्स अलियस्स वडजोगस्स अणेगाई ॥ ६ ॥ तं च पुण वदंति के[ई]इ अलियं
 पावा असंजया अविरया कवडकुडिलकडुयचटुलभावा कुद्धा लुद्धा भया य हस्स-
 ट्ठिया य सक्खी चोरचारभडा खंडरक्खा जियजुईकरा य गहियगहणा कक्कुरुग-
 कारगा कुलिगी उवहिया वाणियगा य कूडतुलकूडमाणी कुडकाहावणोवजीवी
 षडगारकलायकारुहजा वंचणपरा चारियचाटुयारनगरगोत्तिथपरिचारगा दुडुवायि-
 सूयकअणबलभणिया य पुव्वकालियवयणदच्छा साहसिका लहुस्सगा असच्चा गार-
 विया असच्चट्ठावणाहिचित्ता उच्चच्छंदा अणिग्गहा अणियता छंदेण मुक्कवाता
 भवंति अलियाहिं जे अविरया, अवरे नत्थिकवादिणो वामलोक्कादी भणंति नत्थि
 जीवो न जाइ इह परे वा लोए न य किंचिवि फुसति पुत्रपावं नत्थि फलं सुकय-
 दुक्कयाणं पंचमहाभूतियं सरीरं भासंति हे ! वातजोगजुत्तं, पंच य खंधे भणंति केई,
 मणं च मणजीविका वदंति, वाउजीवोत्ति एवमाहंसु, सरीरं सादियं सनिधणं इह-
 भवे एगे भवे तस्स विप्पणासंमि सव्वनासोत्ति, एवं जंपंति मुसावादी, तम्हा
 दाणवयपोसहाणं तवसंजमवंभचेरकल्लणमाइयाणं नत्थि फलं नवि य पाणव[हे]ह-
 अलियवयणं न चेव चोरिक्ककरणपरदारसेवणं वा सपरिग्गहपावकम्मकरणं-पि नत्थि
 किंचि न नेरइयतिरियमणुयाण जोणी न देवलोको वा अत्थि न य अत्थि सिद्धि-
 गमणं अम्मापियरो नत्थि नवि अत्थि पुरिसकारो पच्चक्खाणमवि नत्थि नवि अत्थि
 कालमच्चू य अरिहंता चक्कवट्ठी बलदेवा वासुदेवा नत्थि नेवत्थि के[वि]इ रिसओ
 धम्माधम्मफलं च नवि अत्थि किंचि बहुयं च थोवकं वा, तम्हा एवं विजाणिऊण
 जहा सुबहु इंदियाणुकूलेसु सव्वविसएसु वट्ठह णत्थि काइ किरिया वा अकिरिया
 वा एवं भणंति नत्थिकवादिणो वामलोगवादी, इमंपि बितीयं कुदंसणं असब्भाववा-
 इणो पण्णवेंति मूढा-संभूतो अंडकाओ लोको सयंभुणा सयं च निम्मिओ, एवं एय

अलियं-पयावइणा इस्सरेण य कयंति केति, एवं विण्हुमयं कसिणमेव य जगंति केई,
 एवमेके वदंति मोसं एको आया अकारको वेदको य सुकयस्स दुक्कयस्स य करणाणि
 कारणाणि सव्वहा सव्वहिं च निच्चो य निक्किओ निग्गुणो य अ(न्नो अ)णुवलेव-
 ओत्ति-विय एवमाहुंस असब्भावं, जंपि इहं किंचि जीवलोके दीसइ सुकयं वा दुक्कयं
 वा एयं जदिच्छाए वा सहावेण वावि दइवतप्पभावओ वावि भवति, नत्थेत्य किंचि
 कयकं [तत्तं]कयं च लक्खणविहाणनियती[ए]य कारि[यं]या एवं केइ जंपंति इड्ढि-
 रससातगारवपरा बहवे करणालसा परुवेंति धम्मवीमंसएण मोसं, अवरे अहम्मओ
 रायदुद्धं अब्भक्खाणं भणेंति-अलियं चोरोत्ति अचोरयं करेंतं डामरिउत्तिवि-य एमेव
 उदासीणं दुस्सीलोत्ति य परदारं गच्छति मइलिति सीलकलियं अयंपि गुरुतप्पओ,
 अण्णे एमेव भणंति उवाहणंता मित्तकलत्ताइं सेवंति अयंपि लुत्तधम्मो इमोवि विस्सं-
 भ[वाइ]घायओ पावकम्मकारी अकम्मकारी अगम्मगामी अयं दुरप्पा बहुएसु य
 पा(प)वगेसु जुत्तोत्ति एवं जंपंति मच्छरी, भइके वा गुणकित्तिनेहपरलोगनिप्पिवासा,
 एवं ते अलियवयणदच्छा परदोसुप्पायणप्पसत्ता वेदेन्ति अक्खातियवीएण अप्पाणं
 कम्मबंधणेण सुहरी असमिक्खियप्पलावा निक्खेवे अवहरंति परस्स अत्थंमि गढि-
 यगिद्धा अभिजुंजंति य परं असंतएहिं लुद्धा य करेंति कूडसक्खित्तणं असच्चा
 अत्थालियं च कच्चालियं च भोमालियं च तह गवालियं च गरुयं भणंति अहरगति-
 गमणं(कारणं), अच्चंपि य जातिरुवकुलसीलपच्चयं मायाणिगुणं चवल पिसुणं पर-
 मट्ठभेदकम[स]संतकं विद्देसमणत्थकारकं पावकम्ममूलं दुड्ढिं दुस्सुयं अमुणियं निळ्ळं
 लोकगरहणिज्जं वड्ढबंधपरिकिलेसबहुलं जरामरणदुक्खसोयनिम्मं असुद्धपरिणामसंकि-
 लिद्धं भणंति अलिया(हिं)हिंसं(ति)धिसंनिविद्धा असंतगुणवीरका य संतगुणनासका य
 हिंसाभूतोवघातितं अलियसंपउत्ता वयणं सावज्जमकुसलं साहुगरहणिज्जं अघम्म जणणं
 भणंति अणभिगयपुच्चपावा, पुणोवि अधिकरणकिरियापवत्तका बहुविहं अणत्थं अवमइं
 अप्पोपो परस्स य करेंति, एमेव जंपमाणा महिससकरे य साहिंति घायगारणं सस-
 यपसयरोहिए य साहिंति वायुराणं तित्तिरवड्ढकलावके य कविजलकवोयके य साहिंति
 साउणीणं झसमगरकच्छमे य साहिंति मच्छियाणं संखंके खुल्लए य साहिंति म(ग्गि)-
 गरारणं अयगरगोणसमंडलिदव्वीकरे मउली य साहिंति वा(यलिया)लवीणं गोहा
 सेहग सल्लगसरड[गे]के य साहिंति लुद्धगारणं गयकुलवानरकुले य साहिंति पासियाणं
 सुकबरहिणमयणसालकोइलहंसकुले सारसे य साहिंति पोसगारणं वधबंधजायणं च
 साहिंति गोम्मियाणं धणधन्नगवेलेए य साहिंति तक्कराणं गामागरनगरपट्टणे य
 साहिंति चारियाणं पारवाइयपंथघातियाओ सा(ह)हिंति य गंठिमेयाणं कयं च चोरियं

नगरगोत्तियाणं लंछणनिर्लंछणधमणदुहणपोसणवणणदवणवाहणादियाइं साहिंति
 बहूणि गोमियाणं धातुमणिसिलप्पवालरयणागरे य साहिंति आगरीणं पुप्फविहिं
 फलविहिं च साहिंति मालियाणं अग्घमहुकोसए य साहिंति वणचराणं जंताइं
 विसाईं मूलकम्मं आ(हिंव्)हेवण[आविधण]आभिओगमंतोसहिप्पओगे चोरियपर-
 दारगमणबहुपावकम्मकरणं उक्खंधे गामघातियाओ वणदहणतलागभेयणाणि बुद्धि-
 विसविणासणाणि वसीकरणमादियाइं भयमरणकिलेसदोसजणणाणि भावबहुसंकि-
 लिट्टमलिणाणि भूतघातोवघातियाइं सच्चाईपि ताइं हिंसकाइं वयणाइं उदाहरंति
 पुट्टा वा अपुट्टा वा परतत्तियवावडा य अससिक्खियभासिणो उवदिसंति सहसा
 उट्टा गोणा गवया दंमंतु परिणयवया अस्सा हत्थी गवेलगकुकुडा य किजंतु
 किणावेध य विक्केह पयह य सयणस्स देह पियय दासिदासभयकभाइल्ला य सिस्सा
 य पेसकजणो कम्मकरा य किंकरा य एए सयणपरिजणो य कीस अच्छंति [?] भारिया
 भे क(रिंतु)रित्तु कम्मं गहणाइं वणाइं खेत्तखिलभूमिवल्लराइं उत्तणवणसंकडाइं डज्जंतु
 सुडिज्जंतु य रुक्खा भिजंतु जंतमंडाइयस्स उवहिस्स कारणाए बहुविहस्स य
 अट्टाए उच्छू दुज्जंतु पीलिज्जंतु य तिला पयावेह य इट्टकाउ मम घरट्टयाए खेत्ताइं
 कसह कसावेह य लहुं गामआगरनगरखेडकब्बडे निवेसेह अडवीदेसेसु विपुल-
 सीमे पुप्फाणि य फलाणि य कंदमूलाइं कालपत्ताइं गेण्हेह करेह संचयं परिजणट्ट-
 याए साली वीही जवा य लुच्चंतु मलिज्जंतु उ(फ)पणिज्जंतु य लहुं च पविसंतु य
 कोट्टागारं अप्पमहउक्कोसगा य हंमंतु पोयसत्था सेणा णिज्जाउ जाउ डमरं धोरा
 वटंतु य संगामा पवहंतु य सगडवाहणाइं उवणयणं चोलगं विवाहो जन्नो अमु-
 गम्मि उ होउ दिवसे सुकरणे सुसुहुत्ते सुनक्खत्ते सुतिहिसु य अज्ज होउ ण्हवणं
 सुदितं बहुखज्जपिज्जकलियं कोतुकं विण्हावणकं संतिकम्माणि कुणह ससिरविगहोव-
 रागविसमेसु सज्जणपरियणस्स य नियकस्स य जीवियस्स परिरक्खणट्टयाए पडि-
 सीसकाइं च देह देह य सीसोवहारे विविहोसहिमज्जमंसभक्खन्नपाणमल्लानुलेवणपई-
 वजलिउज्जलसुंधिधूवावकारपुप्फफलसमिद्धे पायच्छित्ते करेह पाणाइवायकरणेणं
 बहुविहेणं विवरीउप्पायदुस्समिणपावसउणअसोमग्गहचरियअमंगलनिमित्तपडिघाय-
 हेउं वित्तिच्छेयं करेह मा देह किंचि दाणं सुट्ठु हओ सुट्ठु हओ सुट्ठु छिन्नो भिन्नत्ति
 उवदिसंता एवविहं करेंति अलियं मणेण वायाए कम्मुणा य अकुसला अणज्जा अलि-
 याणा अलियधम्मणिरया अलियासु कहासु अस्मिरमंता तुट्टा अलियं करेत्तु हो-ति
 य बहुप्पयारं ॥ ७ ॥ तस्स य अलियस्स फलविवागं अयाणमाणा वट्ठेति महब्भयं
 अविस्सामवेयणं दीहकालं बहुदुक्खसंकडं नरयतिरियजोणिं तेण य अलिएण समणुबद्धा

आइद्धा पुणब्भवंधकारे भमंति भीमे दुग्गतिवसहिमुवगया, ते य वीसंतिह
 दुग्गया दुरंता परवसा अत्थभोगपरिवज्जिया असुहिता फुडियच्छविबीभच्छविवन्ना
 खरफहसविरत्तज्जामज्जुसिरा निच्छाया लल्लविफलवाया असकतमसक्या अगंधा
 अचेयणा दुब्भगा अकंता काकस्सरा हीणभिन्नघोसा विहिंसा जडवहिरन्व(म्)या य
 मम्मणा अ(क)कंतविकयकरणा णीया णीयजणनिसेविणो लोगगरहणिज्जा भिच्चा अस-
 रिसजणस्स पेस्सा दुम्मेहा लोकवेदअज्जप्पसमयसुतिवज्जिया नरा धम्मवुद्धिवियला
 अलिण्ण य तेणं पडज्जमाणा असंतएण य अवमाणणपट्टिमंसाहिवखेवपिसुणभेयण-
 गुरुबंधवसयणमितवक्खारणादियाई अब्भक्खाणाई बहुविदाई पावेंति अ(मणोर)-
 णुवमा[णि]ई हिययमणदूमकाई जावज्जीवं दुरुद्धराई अणिट्ठ(स)खरफत्सवयण-
 तज्जणनिब्भच्छणदीणवदणविमणा कुभोगणा कुवाससा कुवसहीसु किलिस्संता नेव
 सुहं नेव निव्वुई उवलमंति अच्चंतविपुलदुक्खसयसंपलिता । एसो सो अलियवयणस्स
 फलविवाओ इहलोइओ परलोइओ अप्पसुहो बहुदुक्खो महब्भओ बहुरयप्पगाढो
 दारुणो कक्खो असाओ वाससहस्सेहिं मुच्चइ, न य अवेदयिता अत्थि हु मोक्खोत्ति,
 एवमाहंसु नायकुलनंदणो महप्पा जिणो उ वीरवरनामधेज्जो कहेसी य अलियवयणस्स
 फलविवागं एयं तं वित्तीयंपि अलियवयणं लहुसगलहुचवलभणियं भयंकरं दुहकरं
 असकरं वेरकरं अरतिरतिरागदोसमणसंकिलेसविरयणं अलियणियडिंसादि-
 जोगबहुलं नी-यजणनिसेवियं निस्संसं अप्पच्चयकारकं परमसाहुगरहणिज्जं परपीला-
 कारकं परमकहलेससहिंयं दुग्गतिविनिवायवच्चूणं (भव)पुणब्भवकरं चिरपरिचिय-
 मणुगयं दु(रुत्तं)रंतं वित्तिं अधम्मदारं समत्तं ॥ ८ ॥ जंवू ! तइयं च अदत्तादाणं
 हरदहमरणभयकल्लसतासणपरसंतिगऽभेजलोभमूलं कालविसमसंसियं अहोऽच्छिन्न-
 तण्हपत्थाणपत्थोइमइयं अकित्तिकरणं अणजं छिद्मंतरविधुरवसणमगणउस्सव-
 मत्तप्पमतपसुत्तवंचणक्खिखणघायणपराणिहुयपरिणामतत्करजणबहुमयं अकल्लुणं राय-
 पुंरिसरक्खियं सया साहुगरहणिज्जं पियजणमित्तजणभेदविप्पीतिकारकं रागदोसबहुलं
 पुणो य उप्परसमरसंगामडमरकलिकलहवेहकरणं दुग्ग[ति]इविणिवायवच्चूणं भवपुण-
 ञ्भवकरं चिरपरिचित्तमणुगयं दुरंतं तइयं अधम्मदारं ॥ ९ ॥ तस्स य णामाणि गोत्राणि
 होंति तीसं, तंजहा-चोरिक्कं १ परहडं २ अदत्तं ३ कूरि(कुट्टय)क(र्यं)डं ४ परलाभो ५
 असंजमो ६ परधणंमि गेही ७ लोलिक्कं ८ तक्करत्तणंति-य ९ अवहारो १० हत्थल(हु)त्तणं
 ११ पावकम्मकरणं १२ तेणिक्कं १३ हरणविप्पणासो १४ आदियणा १५ छेपणा
 धणाणं १६ अप्पच्चजो १७ ओ(अ)वीलो १८ अक्खेवो १९ खेवो २० विक्खेवो
 २१ कूडया २२ कुलमसी य २३ कंखा २४ लालप्पणपत्थणा य २५ (आससणाय)

वसणं २६ इच्छामुच्छा य २७ तण्हागेहि २८ नियडिकम्मं २९ अपरच्छंति ३०
 विय तस्स एयाणि एवमादीणि नामधेज्जाणि होंति तीसं अदिज्ञादाणस्स पावकलिकलु-
 सकम्मबहुलस्स अणेगाइं ॥ १० ॥ तं पुण करेंति चोरियं तक्करा परदव्वहरा छेया
 कयकरणलद्धलक्खा साहसिया लहुस्सगा अतिमहिच्छलोभग(च्छा)त्था द्दरओवी-
 लका य गेहिया अहिमरा अणभंजकभग्गसंधिया रायदुट्टकारी य विसयनिच्छल्लोको-
 बज्झा उद्दोहकगामघाययपुरघायगपंथघायगआलीवगतित्थमेया लहुहत्थसंपउत्ता
 ज्जूकरा खंडरक्खत्थीचोरपुरिसचोरसंधिच्छेया य गंधिभेदगपरधणहरणलोमावहार-
 अक्खेवी हडकारका निम्महगूढचोरकगोचोरगअस्सचोरगदासिचोरा य एकचोरा
 ओकड्ढकसंपदायकउच्छिपकसत्थवायकविल(चोरी)कोलीकारका य निग्गाहविप्लुंपगा
 बहुविहतेणिकहरणबुद्धी, एते अन्ने य एवमादी परस्स दव्वा हि जे अविरया । विपुल-
 बलपरिग्गहा य बहवे रायाणो परधणंमि गिद्धा सए व दव्वे असंतुट्ठा परविसए अहिह-
 णंति ते लुद्धा परधणस्स कजे चउरंग(सम)विभत्तबलसमग्गा निच्छियवरजोहजुदस-
 द्वियअहमहमितिदप्पिण्हिं [सेन्नेहिं] संपरिवुडा पउमसगडसूच्चक्कासागरगल्लवृहाति-
 एहिं अणिएहिं उत्थरंता अभिभूय हरंति परधणाइं अवरे रणसीसलद्धलक्खा संगामं-
 [मि] अतिवयंति सचद्धबद्धपरियरउप्पीलियचिंधपट्टगहियाउहपहरणा माडि(गुड)वर-
 वम्मगुंडिया आविद्धजालिका कवयकंकडइया उरसिरमुहबद्धकंठतोणमाइतवरफलहर-
 चितपहकरसरहसखरचावकरकरंछियसुनिसितसरवरिसचडकरक(भंते)मुयंतघणचंड-
 वेगधारानिवायमग्गे अणेगधणुमंडलगसंधिताउच्छलियसत्तिकणगवामकरगहिय-
 खेडगनिम्मलनिकिद्धखग्गपहरंतकौंततोमरचक्कगयापरसुमुसललंगलसूललउलभिड-
 मालासब्बलपट्टिसचम्मेट्टुधणमोट्टियमोगगरवरफलहजंतपत्थरदुहणतौणकुवेणीपीढ-
 कलियईलीपहरणमिलिमिलिमिलंतखिप्पंतविज्जुजलविरचितसमप्पहणभतले फुडप-
 हरणे महारणसंखभेरिवरतूरपउरपडुप(हडा)डहाहयणिणायगंभीरणंदितपक्खुभिय-
 विपुलवोसे ह्यगयरहजोहतुरितपसरितउद्धततमंधकारबहुले कातरनरणयणहिययवा-
 उलकरे विल्लियउक्कडवरमउडतिरीडकुंडलोडुदामाडोविय[म्मि]पागडपडागउसिय-
 ज्झयवेजयंतिचामरचलंतछतंधकारगम्भीरे ह्यहेसियहत्थिगुल्लुगुलाइयरहधणघणाइ-
 यपाइक्करहराडयअप(फा)फोडियसीहना[या]यछेलियविधुट्टुकुट्टकंठगयसद्भीमगजिए
 सयराहहसंतसुसंतकलकलरवे आसूणियवयणसुद्धे[द्भीमदसणाधरोट्टगाढद[ट्टे](द)-
 डसप्प[ह]हार(कर)णुजयकरे अमरिसवसतिव्वरत्तनिहारितच्छे वेरदिट्टिकुद्धचिद्धिय-
 तिवलीकुडिलिभिउडिकयनिलाडे वहपरिणयनरसहस्सविक्रमवियंभियबले वग्गंततुर-
 गरहपहावियसमरभडा आवडियछेयलाघवपहारसाधिता समूसवियबाहुजुय(लं)ले

मुकट्टहासपुक्रंतबोलबहुले फुर(फल)फलगावरणगहियगयवरपथितद(प्पि)रियभट्ट-
 खलपरोप्परपलगगजुद्धगन्वितविउसितवरासिरोसतुरियअभिमुहपहरितञ्चिन्नकरिकरवि-
 भंगितकरे अवइ[ट्ट]द्वनिसुद्धभिन्नफालियपगलियरुहिरकतभूमिकदमचिलिचिन्नपट्टे
 कुच्छि(वि)दालियगलित[रुलित]निमेळंततफुरुफुरंतविगलमम्माहयविकयगाडदिन्न-
 पहारमुच्छितरुलंतवैभलविलावकलुणे हयजोहभमंततुरगउद्दाममतकुंजरपरिसंकित-
 जणनिब्बुक्कच्छिन्नधयभग्गरहवरनट्टसिरकरिकलेवराकिन्नपतितपहरणविकिञ्चाभरण-
 भूमिभागे नच्चंतकबंधपउरभयंकरवायसपरिलेंतगिद्धमंडलभमंतच्छायंधकारगंभीरे
 वसुवसुहविकंपितव्व पक्कखपिउवणं परमरुद्धीहणं दुप्पवेसतरगं अभिवयंति संगाम-
 संकडं परधणं महंता अवरे पाइक्कचोरसंघा सेणावतिचोरवंदपागङ्गिका य अडवीदेस-
 दुग्गवासी कालहरितरत्तपीतसुक्किअणेगसयचिंधपट्टबद्धा परविसए अभिहणंति लुद्धा
 धणस्स 'कज्जे रयणागरसागरं उम्मीसहस्समालाउलाकुलवितोयपोतकलकलेंतकलियं
 पा(ता)याल(कलस)सहस्सवायवसवेगसलिलउद्धम्ममाणदगरयरंधकारं वरफेणप-
 उरधवलपुलंपुलसमुट्टियट्टहासं मारुयविच्छुभमाणपाणियजलमाहूपीलहुलियं अविय-
 समंतओ खुभियल्लुलियखोखुब्भमाणपक्खलियचलियविपुलजलचक्कवालमहानईवेग-
 तुरियआपूरमाणगंभीरविपुलआवत्तचवलभममाणगुप्पमाणुच्छलंतपच्चोणियत्तपाणिय-
 पधावियखरफरुसपयंडवाउलियसलिलफुट्टंतवीतिकल्लोलसंकुलं महामगरमच्छकच्छ-
 भोहारगाहतिमिंसुमारसावयसमाहयसमुद्धायमाणकपूरघोरपउरं कायरजणहिययकं-
 पणं घोरमारसंतं महब्भयं भयंकरं पतिभयं उत्तासणगं अणोरपारं आगासं चेक्क
 निरवलंबं उप्पाइयपवणधणितनोल्लियउवरवरितरंगदरियअतिवेगवेगचक्खुपहमुच्छ-
 रंतकच्छइगंभीरविपुलगज्जियगुंजियनिग्घायगरुयनिवतितसुद्धीहनीहारिदूरसु[च्च]व्वंत-
 गंभीरधु(ग)गधुगंतसद्धं पडिपहरुंभंतजक्खरक्खसकुहंडपिसायरुसियतजायउवसग्ग-
 सहस्ससंकुलं बहूप्पाइयभूयं विरचितबलिहोमधूवउवचारदिन्नरधिरच्चणारणपयतजो-
 गपययचरियं परियन्तजुगंतकालकप्पोवमं दुरंतमहानईनईव[इ]ईमहाभीमदरिसणिजं
 दुरणुच्चरं विसमप्पवेसं दुक्खुत्तारं दुरासयं लवणसलिलपुण्णं असियसियसमूसियगे(हि)-
 हिं दच्छ(हत्थे)तरके-हिं वाहणेहिं अइवइत्ता समुद्धमज्जे हणंति गंतूण जणस्स पोते
 परदव्वहरा नरा निरणुकंपा नि(रा)रवयक्खा गामागरनगरखेडकब्बडमडंबदोण-
 मुहपट्टणासमणिगमजणवते य धणसमिद्धे हणंति थिरहिययछिन्नलज्जा बंदिग्गह-
 गोग्गहे य गेण्हंति दारुणमती णिक्किवा णियं हणंति छिंदंति गेहसंधि निक्खित्ताणि
 य हरंति धणधन्नदव्वजायाणि जणवयकुलाणं णिग्घिणमती परस्स दव्वाहिं ज्ञे
 अविरया, तहेव केई अदिच्चादाणं गवेसमाणा कालाकालेसु संचरंता चियकापज-

लियसरसदरदङ्गकङ्कियकलेवरे रुहिरलित्तवयणअखतखातियपीतडाइणिभमंतभ(य)यं-
करं जंयुयक्खिक्खियंतं घूयकयघोरसहे वेयालुट्टियनिसुद्धकहकहितपहसितवीहण-
कनिरभिरामे अतिदुब्बिमंगंधवीभच्छदरिसणिजे सुसाणवणसुन्नघरलेणअंतरावणगिरि-
कंदरविसमसावयसमाकुलासु वसहीसु किलिस्संता सीतातवसोसियसरीरा दङ्गच्छवी
निरयतिरियभवसंकडदुक्खसंभारवेयणिजाणि पावकम्माणि संचिणंता दुल्लहभक्खन्न-
पाणभोयणा पिवासिया झुंझिया किलंता मंसकुणिमकंदमूलजंकिंचिकयाहारा उव्विग्गा
उप्पुया असरणा अडवीवासं उव्वेति वालसतसंकणिजं अयसकरा तकरा भयंकरा
क्का(कस्)स हरासोत्ति अज्ज दव्वं इति सामत्थं करेंति गुज्झं बहुयस्स जणस्स
क्कज्जकरणेसु विग्घकरा मत्तपमतपसुत्तवीसत्थछिद्घाती वसणब्भुदएसु हरणबुद्धी
विगव्व रुहिरमहिया परेंति नरवतिमजायमतिकंता सज्जणजणदुगुळिया सकम्मेहिं
पावकम्मकारी असुभपरिणया य दुक्खभागी निच्चाइलदुहमनिव्वुइमणा इह-लोके
चेव किलिस्संता परदव्वहरा नरा वसणसयसमावण्णा ॥ ११ ॥ तहेव केइ परस्स
दव्वं गवेसमाणा गहिता य हया य बद्धरुद्धा य तुरियं अतिधाडिया पुरवरं समप्पिया
चोरग्गहचारभडचाडुकराण तेहि य कप्पडप्पहारनिदयआरक्खियखरफस्सवयण-
तज्जणगलच्छल्लुच्छल्लणाहिं विमणा चारगवसहिं पवेसिया निरयवसहिसरिसं तत्थवि
गोम्मियप्पहारदूसणनिबभच्छणकडुयवयणभेसण(गभया)गाभिभूया अक्खित्तनियं-
सणा मलिणदंडिखंडनिवसणा उक्कोडालंचपासमग्गणपरायणेहिं (दुक्खसमुदीरणेहिं)
गोम्मियभडेहिं विविहेहिं बंधणेहिं, किं ते ?, हडिनिगड[बा]वालरज्जुयकुदंड-
गवरत्तलोहसंकलहत्यंदुयबज्जपट्टदामकणिक्कोडणेहिं अन्नेहि य एवमादिएहिं गोम्मिक-
भंडोवकरणेहिं दुक्खसमुदीरणेहिं संकोड[ण]मोडणाहिं बज्झंति मंदपु-ण्णा संपुड-
कवाडलोहपंजरभूमिघरनिरोहकूवचारगकीलगज्जचक्कविततबंधणखंभालणउद्धचलण-
बंधणविहम्मणाहि य विहेडयन्ता अवकोडकगाढउरसिरबद्धउद्धपूरितफुरंतउरकडग-
मोडणामेडणाहिं बद्धा य नीससंता सीसावेढ[उ]ऊरया[व]लचप्पडगसंधिबंधणतत्त-
सलागसूइयाकोडणाणि तच्छणविमाणणाणि य खारकडुयतित्तनावणजायणाकारण-
सयाणि बहुयाणि पाविंयंता उरक्खोडीदिन्नगाढपेळणअट्टिकसंभग्गसुपंजलीगा गलका-
लकलोहदंडउरउदरवत्थि-पिट्ठि-परिपीलिता म[त्थं]च्छंतहिययसंचुणियं(गुपं)गमंगा
आणत्तीकिंकरेहिं केति अविराहियवेरिएहिं जमपुरिससच्चिहेहिं पढया ते तत्थ
मंदपुण्णा चडवेलावज्जपट्टपाराइंछिवकसलतवरत्त[ने]वेत्तप्पहारसयतालियंगमंगा
क्विणा लंबंतचम्मवणवेयणविमुहियमणा घणकोट्टिमनियलजुयलसंकोडियमोडिया य
कीरंति निरुच्चार एया अन्ना य एवमादीओ वेयणाओ पावा पावेंति अदन्तिदिया

वसद्वा बहुमोहमोहिया परधर्णमि लुद्धा फासिदियविसयतिव्वगिद्धा इत्थिगयरूवसह-
 रसगंधइडुरतिमहितभोगतण्हाइया य धणतोसगा गहिया य जे नरगणा पुणरवि ते
 कम्मदुव्वियद्धा उवणीया रायकिंकराण तेसिं वहसत्थगपाढयाणं विलउलीकारकाणं
 लंचसयगेण्हणं कूडकवडमायानियडिआयरणपणिहिवंचणविसारयाणं बहुविहअलि-
 यसतजंपकाणं परलोकपरम्मुहाणं निरयगतिगामियाणं तेहि य आणत्तजीयदंडा
 तुरि(य)यं उग्घाडिया पुरवरे सिंघाडगतियचउक्कचचरचउम्मुहमहापहपहेसु वेत्तदंड-
 लउडकट्टेलेहुपत्थरपणालिपणोल्लिमुट्टिलयापादपण्हिजाणुकोप्परपहारसंभग्गमहियगत्ता
 अट्टारसकम्मकारणा जाइयंगमंगा कलुणा सुक्कोट्टकंठगलकतालुजीहा जायंता पाणीयं
 विगयजीवियासा तण्हादिता वरागा तंपिय ण लभंति वज्झपुरिसेहिं धाडियंता तत्थ
 य खरफरुसपडहवट्ठितकूडग्गहगाढरुद्धनिसट्टपरासुट्टा वज्झकरकुडिजुयनियत्था सुरत्त-
 कणवीरगहियविमुकुलकंठेगुणवज्झदूतआविद्धमल्लदामा मरणभयुप्पणसेदअयतणे-
 हुत्तुपियकिलिन्नगत्ता चुण्णगुंडियसरीररयरेणुभरियकेसा कुसुंभगोक्किन्नमुद्रया छिन्नजी-
 वियासा धुन्नंता वज्झ[या]पाण[भीता]पीया तिलं तिलं चेव छिज्जमाणा सरीर-
 विक्किन्तलोहिओलि[ता]त्तकागणिमंसाणि खावियंता पावा खर[फरु]करसएहिं
 तालिज्जमाणदेहा वातिकनरनारिसंपरिचुडा पेच्छिज्जंता य नागरजणेण वज्झनेवत्थिया
 पणेज्जति नयरमज्झेण किंवणकलुणा अत्ताणा असरणा अणाहा अवंधवा बंधुविप्पहीणा
 विपिक्खिता दिसोदिसिं मरणभयुव्विग्गमा आघायणपडिदुवारसंपाविया अधन्ना
 सूलग्गविलग्गभिन्नदेहा, ते य तत्थ कीरंति परिकप्पियंगमंगा उल्लंविज्जंति स्वखसालासु
 के-इ कलुणाइं विलवमाणा अवरे चउरंगधणियवद्धा पव्वयकडगा पमुच्चंते दूरपात-
 बहुविसमपत्थरसहा अन्ने य गयचलणमलणयनिम्महिया कीरंति पावकारी अट्टारस-
 खंडिया य कीरंति मुंडपरसूहिं के-इ उक्कत्तकन्नोड्डनासा उप्पाडियनयणदसणवसणा
 जि[ब्भिंदियं]ब्भंछि[या]यछिन्नकन्नसिरा पणिज्जंते छिज्जन्ते य असिणा निव्विसया
 छिन्नहत्थपाया पमुच्चंते जावजीवबंधणा य कीरंति केइ परदव्वहरणलुद्धा कारगल-
 नियलजुयलरुद्धा चारगा[व]ए हत्तसारा सयणविप्पमुक्का मित्तजणानि[रिक्खि]र[क्कि]-
 क्कया निरासा बहुजणधिकारसद्वलजायिता (अलजाविया) अलज्जा अणुबद्धखहापार-
 द्दसीउण्हतण्हेयणदुग्घट्टघट्टिया विवन्नमुहविच्छविया विहलमतिलदुब्बला किलंता
 कासंता वाहिया य आमाभिभूयगत्ता परूढनहकेसमंसुरोमा छगमुत्तंमि णियगंमि
 खुत्ता तत्थेव मया अकासका बंधिऊण पादेसु कट्ठिया खाइयाए छूढा तत्थ
 य व(व)गणुणगसियालकोलमज्जारवंदसंदंसगतुंडपक्खिगणविविहमुहसय[ल]विहत्त-
 गत्ता कयविहंगा केइ किसिणो य कुहियदेहा अणिट्टवयणेहिं सप्पमाणा सुट्टु कयं जं

मउत्ति पावो तुट्ठेणं जणेण हम्ममाणा लज्जावणका य होंति सयणस्सवि-य दीहकालं
 मया संता, पुणो परलोगसमावन्ना नरए गच्छंति निरभिरामे अंगारपलितककप्प-
 अच्चत्थसीतवेदनअस्साउदिन्नसयतदुक्खसयसमभि(भू)हुते ततोवि उव्वट्टिया
 समाणा पुणोवि प(डि)वज्जंति तिरियजोणिं तर्हिपि निरयोवमं अणुहवंति वेयणं, ते
 अणंतकालेण जति नाम कहिं(वि-वि)पि मणुयभावं लभंति णेगेहिं णिरयगतिगमणति-
 रियभवसयसहस्सपरियट्ठेहिं तत्थवि-य भवं[त]तिऽणारिया नीचकुलसमुप्पण्णा
 आरियजणेवि लोगवज्जा तिरिक्खभूता य अकुसला कामभोगतिसिया जहिं निबंथंति
 निरयवत्तणिभवप्पवंचकरणपणोळि पुणोवि संसा(र)रावत्तणेममूले धम्मसुतिविबज्जिया
 अणज्जा कूरा सिच्छतसुतिपवन्ना य होंति एगंतदंडइणो वेदेंता कोसिकारकीडोव्व
 अप्पगं अट्ठकम्मतंतुघणबंधणेणं एवं नरगतिरियनरअमरगमणपेरंतचक्कवालं जम्म-
 जरामरणकरणगम्भीरदुक्खपखुभियपउरसलिलं संजोगवि[यो]ओगवीचीचिंतापसंग-
 पसरियवहबंधमहल्लविपुलकल्लोलकल्लुणविलवितलोभकलकलितबोलबहुलं अवमाण-
 णेणं तिक्खसिणपुलं पुलप्पभूयरोगवेयणपराभवविणिवातफरुसधरिसणसमावडियक-
 ठिणकम्मपत्थरतरंगंतनिच्चमच्चुभयतोयपट्ठं कसायपायालसंकुलं भवसयसहस्सजल-
 संचयं अणंतं उव्वे(व)यणयं अणोरपारं महब्भयं भयंकरं पड्भयं अपरिमियमहिच्छ-
 कल्लुसमतिवाउवेगउद्धम्ममाणआसापिवासपायालकामरतिरागदोसबंधणबहुविहसंक-
 प्पविपुलदगरयरयंधकारं मोहमहावत्तभोगभममाणगुप्पमाणुच्छलंतबहुगम्भवासपच्चो-
 णियत्तपाणि[यं]यप(बाहिय)धावितवसणसमावन्नरुचवंडमारुयसमाहयामणुञ्चवीची-
 वाकुलितभग्गफुट्ठंतनिट्ठकल्लोलसंकुलजलं पमातवहुचंडदुडुसावयसमाहयउद्धायमाणग-
 पूरघोरविहंसणत्थबहुलं अण्णाणभमंतमच्छपरिहत्[थं]थअनिहुतिंदियसहामगरतुरिय-
 चरियखोखुब्भमाणसंतावनि[च]च्चयचलंतचवलचंचलअत्ता(ण)णाऽसरणपुव्वकयक-
 म्मसंचयोदिन्नवज्जवेइज्जमाणदुहसयविपाकवुञ्जंतजलसमूहं इट्ठिरससायगारवोहारग-
 हियकम्मपडिबद्धसत्तकट्ठिजमाणनिरयतल्लुत्तसत्तविस्सन्नबहु[ला]लअरइरइभयविसा-
 यसोगमिच्छत्तसेलसंक[डं]डअणातिसंताणकम्मबंधणकिलेसच्चिक्खल्लुमुत्तारं अमर-
 नरतिरियनिरयगतिगमणकुडिलपरियत्तविपुलवेलं हिंसालियअदत्तादाणमेहुणपरिग्ग-
 हारंभकरणकारावणाणुमोदनअट्ठविहअणिट्ठकम्मपिडितगुरुभारकंतदुग्गजलोघदूरप-
 णोळिजमाणउम्(सु)भग्गनि-भग्गदुल्लभतलं सारीरमणोमयाणि दुक्खाणि उप्पियंता
 सातस्सायपरित्तावणमयं उव्वुडुनिबुडुयं करेंता चउरंतमहंतमणवयगं (रुंदं) रुई संसार-
 सागरं अट्ठि[यं]यअणालंबणमपतिठाणमप्पमेयं चुलसीतिजोणिसयसहस्सगुविलं अणा-
 ल्लोकमंधकारं अणंतकालं निच्चं उतत्थसुण्णभयसण्णसंपउत्ता (संसारसागरं) वसंति

उत्विगावासवसहिं जहिं आउयं निबंधंति पावक्म्मकारी बंधवजणसयणमितपरि-
 चजिया अणिट्ठा भवंति अणादेज्जदुव्विणीया कुठाणासणकुसेज्जकुभोयणा असुइणो
 कुसंधयणकुप्पमाणाकुसंठिया कुरूवा बहुकोहमाणमायालोभा बहुमोहा धम्मसन्नसम्मत्त-
 पब्भट्ठा दारिद्रोवद्वाभिभूया निच्चं परक्म्मकारिणो जीवणत्थरहिया किविणा पर-
 पिडतक्का दुक्खलद्धाहारा अरसविरसतुच्छकयकुच्छिपूरा परस्स पेच्छंता रिद्धि-
 सक्कारभोयणविसेससमुदयविहिं निंदता अप्पकं कयंतं च परिवयंता इह य पुरेकडाई
 कम्माई पावगाई विमणसो सोएण डज्जमाणा परिभूया होंति सत्तपरिचजिया य
 छोभासिप्पकलासमयसत्थपरिचजिया जहाजायपसुभूया अवियत्ता णिच्चनीयक्म्मो-
 वजीविणो लोयकुच्छणिज्जा मोघमणोर[हा]हनिरासबहुला आसापासपडिबद्धपाणा
 अत्थोपायाणकामसोक्खे य लोयसारे होंति अफलवंतका य सुट्ठुविय उज्जमंता
 तद्विज्जुज्जकम्मकयदुक्खसंठवियसित्थपिडसंचयप[क्]राखीणदव्वसारा निच्चं अयुव-
 धणधण्णकोसपरिभोगविवजिया रहियकामभोगपरिभोगसव्वसोक्खा परसिरिभोगोव-
 भोगनिस्साणमग्गणपरायणा वरागा अकामिकाए विणेंति दुक्खं णेव सुहं णेव
 निव्वुत्ति उवलमंति अचंतविपुलदुक्खसयसंपलिता परस्स दव्वेहिं जे अविरया,
 एसो सो अदिण्णादाणस्स फलविवागो इहलोइओ पारलोइओ अप्पसुहो बहुदुक्खो
 महब्भओ बहुरयप्पगाढो दारुणो कक्खसो असाओ वाससहस्सेहिं मुच्चति, न य
 अवेयइत्ता अत्थि उ मोक्खोत्ति, एवमाहंसु णायकुल-गंदणो महुपा जिणो उ
 वीरवरनामधेज्जो कहेसी य अदिण्णादाणस्स फलविवागं एयं तं ततियं पि अदि-
 ण्णा दाणं हरदहमरणभयकल्लसतासणपरसंतिकमेज्जलोभमूलं एवं जाव चिरपरिगतमणु-
 गतं दुरंतं ततियं अहम्मदारं समत्तं तिबेसि ॥ १२ ॥ जंबू ! अबंभं च चउत्थं
 सदेवमणुयासुरस्स लोयस्स पत्थणिज्जं पंकपणयपासजालभूयं थीपुरिसनपुंसवेदविधं
 तवसंजमबंभचेरविग्घं भेदायतणबहुपमादमूलं कायरकापुरिससेवियं सुयणजणवज्ज-
 णिज्जं उट्ठनरयतिरियतिलोक्कपइट्ठाणं जरामरणरोगसोगबहुलं वधबंधविघातदुव्विघायं
 दंसणचरित्तमोहस्स हेउभूयं चिरपरि[गय]चित्तमणुगयं दुरंतं चउत्थं अधम्मदारं
 ॥ १३ ॥ तस्स य णामाणि गोत्राणि इमाणि होंति तीसं, तं०-अबंभं १ मेहुणं
 २ चरंतं ३ संसग्गि ४ सेवणाधिकारो ५ संकप्पो ६ बाहणा पदार्णं ७ दप्पो
 ८ मोहो ९ मणसं[खेवो]खोभो १० अणिग्गहो ११ वुग्गहो १२ विघाओ १३
 विभंगो १४ विब्भमो १५ अधम्मो १६ असीलया १७ गामधम्म[ति]तती १८ रती
 १९ राग[चिंता]कामभोगमारो २१ वेरं २२ रहस्सं २३ गुज्झं २४ बहुमाणो २५
 बंभचेरविग्घो २६ वावत्ति २७ विराहणा २८ पसंगो २९ कामगुणोत्ति ३० विय

तस्स एयाणि एवमादीणि नामधेजाणि ह्येति तीसं ॥ १४ ॥ तं च पुण निसेवंति
सुरगणा सअच्छरा मोहमोहियमती असुरभुयंगगलविज्जुजलणदीवउदहिदिसिपवण-
अणिया १० अणवन्निपणवन्निइसिवादियभूयवादियकंदियमहाकंदियकूहंडपयंगदेवा
८ पिसायभूयजक्खरक्खसकिंनरकिंपुरिसमहोरगगंधव्वा ८ तिरियजोइसविमाणवासि-
मणुयगणा जलयरथलयरखहयरा य मोहपडिबद्धचित्ता अवितण्हा कामभोगतिसिया
तण्हाए बलवईए महईए समभिभूया गढिया य अतिमुच्छिया य अवंमे उस्सण्णा
तामसेण भावेण अणुमुक्का दंसणचरित्तमोहस्स पंजरं पिव करंति अ(णमणं)ओऽजं
सेवमाणा, भुज्जो असुरसुरतिरियमणुअभोगरतिविहारसंपउत्ता य चक्कवट्ठी सुरनरवति-
सक्कया सुरवरुव देवलोए भरहणगणगरणि[य]गमजणवयपुरवरदोणमुहखेडकब्बड-
मंडबसंवाहपट्ठणसहस्समंडियं थिमियमेयणियं एगच्छतं ससागरं भुंजिऊण वसुहं नर-
सीहा नरवई नरिंदा नरवसभा मरुयवसभकप्पा अब्भहियं रायतेयलच्छीए दिप्पमाणा
सोमा रायवंसतिलगा रविससिंसखवरचक्कसोत्थियपडागजवमच्छकुम्मरहवरभगभ-
वणविमाणतु(रंग)रयतोरणगोपुरमणिरयणनंदियावत्तमुसलणंगलसुरइयवरकप्परुक्ख-
मिगवतिभद्दासणसुरुविथूभवमउडसरियकुंडलकुंजरवरवसभदीवमंदिरगरुलद्वयइंद-
केउदप्पणअट्ठावयचाववाणनक्खत्तमेहमेहलवीणाजुगलत्तामदामिणिकमंडलुकमल-
घंटावरपोतसइसागरकुमुदागरमगरहारगागरनेउरणगणगरवइरिकिन्नरमयूरवररायहं-
ससारसचकोरचक्कवागमिहुणचामरखेडगपव्वीसगविपंचिवंरतालियंटसिरियाभिसेयमे-
इणिखगंकुस विमलकलसभिगारवद्धमाणगपसत्थउत्तमविभत्तवरपुरिसलक्खणधरा ब-
त्तीसं वररायसहस्साणुजायमग्गा चउसट्टिसहस्सपवरजुवतीण णयणकंता रत्ताभा पउ-
मपम्हकोरंटगदामचंपकसुत(त्त)यवरकणकनिहसव-ण्णा सुजायसव्वंगसुंदरंगा महपधव-
रपट्ठणुगयवित्तिरागएणिपेणिणिम्मियदुगुलवरचीणपट्टकोसेज्जसोणीसुत्तकविभूसियंगा
वरसुरभिगंधवरचुण्णवासवरकुसुमभरियसिरया कप्पियछेयायरियसुकयरइ[त्त]यमाल-
(कुं)कड(लं)गंगयतुडियपवरभूसणपिणद्धदेहा एकावलिकंतसुरइयवच्छा पालंबपलंब-
माणसुकयपडउत्तरिज्जमुदियापिगलंगुलिया उज्जलनेवत्थरइयचेल्लगविरायमाणा तेएण
दिवाकरोव्व दित्ता सारयनवत्थणियमहुरंगंभीरनिद्धघोसा उप्पन्नसमत्तरयणचक्करय-
णप्पहाणा नवनिहि(य)वइणो समिद्धकोसा चाउरंता चाउराहिं सेणाहिं समणुजातिज्ज-
माणमग्गा तुरगवती गयवती रहवती नरवती विपुलकुलवीसुयजसा सारयससिसकल-
सोमवयणा सूर। तेलोक्कनिग्गयपभावलद्धसदा समत्तभरहाहिवा नरिंदा ससेलवणकाणणं
च हिमवंतसागरंतं धीरा भुतूण भरहवासं जियसतू पवररायसीहा पुव्वकडतवप्पभावा
निविट्ठसंचियसुहा अणेगवाससयमायुवंतो भज्जाहि य जणवयप्पहाणाहिं लालियंता

अतुलसदफरिसरसरूवर्गधे य अणुभवेत्ता तेवि उवणमंति मरणधम्मं अवितत्ता
 कामाणं । भुजो [भुजो] बलदेववासुदेवा य पवरपुरिसा महाबलपरक्कमा महाधणु-
 वियट्ठका महासत्तसागरा दुद्धरा धणुद्धरा नरवसभा रामकेसवा भायरो सपरिसा
 वसुदेवसमुद्विजयमादियदसाराणं पज्जुवपतिवसंबनिरुद्धनिसहउम्मुयसारणगयसु-
 मुहदुम्मुहावीण जायवाणं अद्धुट्ठाणवि कुमारकोडीणं हिययदयिया देवीए रोहिणीए
 देवीए देवकीए य आणंदहिययभावसंदणकरा सोलसरायवरसहस्साणुजातमग्गा
 सोलसदेवीसहस्सवरणयणहिययद[यि]इया णाणामणिक्कणगरयणमोत्तियपवालधण-
 धन्नसंचयरिद्धिसमिद्धकोसा हयगयरहसहस्ससामी गामागर-णगरखेडकब्बडमडंबदो-
 णमुहपट्ठणासमसं(वा)वाहसहस्सथिमियणिव्वुय-प-मुदितजणविविह[सर]सासनिप्फ-
 ज्जमाणभेइणिसरसरियतलागसेलक्काणणआरामुज्जाणमणाभिरामपरिमंडियस्स दाहिण-
 द्धुवेयद्धुगिरिविभत्तस्स लवणजलहिपरिगयस्स छव्विहकालुणकामजुतस्स अद्धमर-
 हस्स सामिका धीरकित्तिपुरिसा ओहबला अइबला अनिहया अपराजियसत्तुमहण-
 रिपुसहस्समाणमहणा सणुक्कोसा अमच्छरी अचवला अर्चडा मितमंजुलपलावा-
 हसियगंभीर-महुर(परिपुण्यसच्चवयणा)मणिया अब्भुवगयवच्छला सरण्णा लक्ख-
 णवंजणगुणोववेया माणुम्माणपमाणपडिपुन्नसुजायसव्वंगसुंदरंगा ससिसोमागारकंत-
 पियदंसणा अमरिसणा पर्यडडंढप्पयारगंभीरदरिसणिज्जा तालद्धउव्विद्धगरुलक्केऊ
 बलवगगजंतदरितदप्पितमुट्ठियचाणूर(चू)मूरगा रिद्धवसभघातिणो केसरिमुहविप्फा-
 डगा दरितनागदप्पमहणा जमलजुणमंजगा महासउणिपूतणारि[ऊ]वू कंसमउड-
 मोडगा जरासिंधमाणमहणा तेहि य (अब्भपडलपिंगलुज्जलेहिं) अविरलसमसहिय-
 चंडमंडलसमप्प(हे)मेहिं (मंगलसयभत्तिच्छेयचित्तियखिखिणिमणिहेमजालविरइयप-
 रिगयपेरंतकणयधंठियपयलियखिणिखिणित्तुमहुरसुइसहसहालसोहिएहिं सपयरगमु-
 त्तदामलंबंतभूस्सणेहिं नरिंदवामप्पमाणरुंदपरिमंडलेहिं सीयायववायवरिसविसदोसणा-
 सएहिं तमरयमलबहुलपडलघाडणपहाकरेहिं मुद्धसुहसिवच्छायसमणुबद्धेहिं वेळि-
 यदंडसजिएहिं वयरामयवत्थिणिउणजोइयअडसहस्सवरकंचणसलागनिम्मिएहिं सुवि-
 मलरययसुद्धुच्छइएहिं णिउणोवियमिसिमिसित्तमणिरयणसूरमंडलवित्तमिरकरनिगय-
 पडिहयपुणरविपच्चोवयंततंचल-सूर-(म)मिरी(इ)यकवयं निणिम्मुयंतैहिं सपतिदंडेहिं
 आयवत्तेहिं धरिजंतैहिं विरायंता ताहिं य पवरगिरिकुहरविहरणसमुट्ठियाहिं निरुवहय-
 चमरपच्छिमसरीरसंजाताहिं अमइलसियकमलविमुकुलुज्जलितरयतगिरिसिहरविमल-
 ससिकिरणसरिसकलहोयनिम्मलाहिं पवणाहयचवलचलियसललियपणच्चियवीइप्स-
 रियखीरोदगपवरसागरूपूरचंचलाहिं माणससरपसरपरिचियावासविसदवेसाहिं कण-

गगिरिसिहरसंसिताहिं उवाउप्पातचवजयिणसिग्घवेगाहिं हंसवधूयाहिं चैव कलिया
 नाणामणिकणमहरिहतवणिज्जलविचित्ठंडाहिं सललियाहिं नरवतिसिरिसमुदय-
 प्पगासणकरीहिं वरपट्टणग्गयाहिं समिद्धरायकुलसेवियाहिं कालगुरुपवर कुंडुस्कुतु-
 रुक्कध्व्व[र]सवासविसदग्गुद्धूयाभिरामाहिं चिल्लिकाहिं उभयोपासंपि चामराहिं
 उक्खिप्पमाणाहिं सुहसीतलवातवीतियंगा अजिता अजितरहा हलमुसलकणगपाणी
 संखचक्कगयसत्तिणंदगधरा पवरुज्जलसुकतविमलकोथूभतिरीडधारी कुंडलउज्जोविया-
 णणा पुंडरीयणया एगावलीकंठरतियवच्छा सिरिवच्छसुल्लंछणा वरजसा सव्वोउय-
 सुरभिकुसुमसुरइयपलंबसोहंतवियसंतचित्तवणमालरतियवच्छा अट्टसयविभत्तलक्खण-
 पसत्थसुंदरविराइयंगमंगा मत्तगयवरिंदललियविक्रमविलसियगती कडिसुत्तगनील-
 पीतकोसिज्जवाससा पवरदित्तेया सारयनवथणियमडुरगंभीरनिद्धघोसा नरसीहा सीह-
 विक्रमगई अत्थमि(य)या पवररायसीहा सोमा वा[वा]रवइपुञ्चचंदा पुव्वकयतवप्प-
 भावा निविट्ठसंचियसुहा अणेगवाससयमा(उ)युवंतो भज्जाहि य जणवयप्पहाणाहिं
 लालियंता अतुलसद्दफरिसरसरूवगंधे अणुभवेत्ता ते-वि उवणमंति मरणधम्मं अवितत्ता
 कामाणं । भुज्जो मंडलियनरवरेंदा सबला सअंतेउरा सपरिसा सपुरोहिया[उ]मच्चदंड-
 नायकसेणावतिमंतनीतिकुसला नाणामणिरयणविपुलवणधन्नसंचयनिहीसमिद्धकोसा
 रज्जसिंरि विपुलमणुभविता विक्रोसंता बल्लेण मत्ता तेवि उवणमंति मरणधम्मं अवितत्ता
 कामाणं । भुज्जो उत्तरकुरुदेवकुक्खणविवरपा[य]दचारिणो नरगणा भोगुत्तमा भोगल-
 क्खणधरा भोगसस्सिरीया पसत्थसोमपडिपुण्णरूवद(र)रिसणिज्जा सुजातसव्वंग-
 सुंदरंगा रत्तुप्पलपत्तकंतकरचरणकोमलतला सुपइट्टियकुम्मचारुवल्ला अणुपुव्वसु-
 (जायपीवर)संहयंगुलीया उच्चयतणुतंबनिद्धनखा संठि(त)यसुसिलिद्धगूढगोफा एणी-
 कुरुविंदवत्तवट्टाणपुव्विजंघा समुग्गनि(मु)सग्गगूढजाणू वरवारणमत्ततुल्लविक्रमविला-
 सितगती वरतुरगसुजायगुज्जदेसा आइज्जहयव्व निरुव्वेवा पमुइयवरतुरगसीहअति-
 रेगवट्टियकडी गंगावत्तदाहिणावत्ततरंगभंगुररविकिरणबोहियविकोसायंतपम्हगंभीर-
 विगडनाभी साहतसोणंदमुसलदप्पणनिगरियवरकणगच्छरुसरिसवरवइरवल्लियमज्झा
 उज्जुगसमसहियजच्चतणुसिणिद्धआदेज्जलडहसूमालमउयरोमराई झसविहगसुजा-
 तपीणकुच्छी झसोदरा पम्हविगडनाभा संनत्तपासा संगयपासा सुंदरपासा सुजात-
 पासा मितमाइयपीणरइयपासा अकरंदुयकणगरुयगनिम्मलसुजायनिरुव्वहयदेहधारी
 कणगसिलातलपसत्थसमतलउवइयविच्छिन्नपिहुलवच्छा जुयसंनिभपीणरइयपीवर-
 पउट्ठसंठियसुसिलिद्धविसिद्धलट्ठसुनिचित्तघणथिरसुबद्धसंधी पुरवरवरफलिहवट्टियभुया
 भुयईसरविपुलभोगआयाणफलिउच्छददीहवाहू रत्ततलोवत्तियमउयमंसलसुजायल-

कखणपसत्थअच्छिद्वजालपाणी पीवरसुजायकोमलवरंगुली तंबतलिणसुइइलनिद-
 न-क-खा निद्वपाणिलेहा चंदपाणिलेहा सूरपाणिलेहा संखपाणिलेहा चक्कपाणिलेहा
 दिसासोवत्थियपाणिलेहा रविससिसंखवरचक्कदिसासोवत्थियविभत्तसुविरइयपाणिलेहा
 वरमहिसवराह[सीह]सइल[सी](सि)रिसहनागवरपडिपुन्नविउलखंधा चउरंगुलसुप्प-
 माणकंबुवरसरिसग्गीवा अवड्डियसुविभत्तचित्तमंसू उवचियमंसलपसत्थसइलविपुलह-
 गुया ओयवियसिलप्पवालबिबफलसंनिभाधरोट्टा पंडुरससिसकलविमलसंखगोखीर-
 फेणकुंददगरयसुणालियाधवलदंतसेदी अखंडदंता अफुडियदंता अविरलदंता सुणि-
 द्ददंता सुजायदंता एगदंतसेडिव्व अणेगदंता हुयवहनिद्धंतधोयतत्ततवणिज्जरत्तत-
 [ला]लतालुजीहा गरुलायतउज्जुतुंगनासा अवदालियपोंडरीयनयणा कोकासियधवल-
 पत्तलच्छा आणामियचावरइलकिण्हभराजिसंठियसंगयाययसुजायभुमगा अल्लोणप-
 माणजुत्तसवणा सुसवणा पीणमंसलकवोलदेसभागा अचिळगयवालचंदसंठियमहा-
 निडाला उडुवतिरिव पडिपुन्नसोमवयणा छत्तागारुत्तमंगदेसा घणनिचियसुबद्धलक्ख-
 णुन्नयकूडागारनिभपिंडियग्गसिरा हुयवहनिद्धंतधोयतत्ततवणिज्जरत्तकैसंतकैसभूमी
 सामलीपोंडघणनिचियछोडियमिउविसतपसत्थसुहुमलक्खणसुंगंधिसुंदरभुयभोगभि-
 गनीलकजलपहट्टभमरगणनिद्धनिगुरुंबनिचियकुंचियपयाहिणावत्तमुद्धसिरया सुजात-
 सुविभत्तसंगयं(गमं)गा लक्खणवंजणगुणोववेया पसत्थवत्तीसलक्खणधरा इंसस्सरा
 कुंचस्सरा दुंदुभिस्सरा सीहस्सरा ओघ(उज्ज)सरा मेघसरा सुस्सरा सु[र]सरनिग्गोसा
 वजरिसहनारायसंधयणा समचउरंससंठाणसंठिया छायाउज्जोवियंगमंगा पसत्थच्छवी
 निरातंका कंकग्गहणी कवोत्तपरिणामा सगुणिपोसपिद्धंतरोरुपरिणया पउमुप्पलसं-
 सगंधुस्साससुरभिवयणा अणुलोमवाउवेगा अवदायनिद्धकाला विग्गहियउन्नयकुच्छी
 अमयरसफलाहारा तिगा[ऊ]उयसमूसिया तिपलिओवमट्ठि(ती)तिका तिच्चिय पलि-
 ओवमाइं परमाउं पालयित्ता ते-वि उवणमंति मरणधम्मं अवि[त]तिता कामाणं ।
 पमया-वि य तेसिं हींति सोम्मा सुजायसन्वंगसुंदरीओ पढाणमहिलागुणेहिं जुत्ता
 अतिकंतविसप्पमाणमउयसुकुमालकुम्मसंठियसिलिद्धच[र]लणा उज्जुमउयपीवरसुवा-
 हंतगुलीओ अब्भुन्नतरतिततलिणतंबसुइनिद्वनखा रोमरहियवट्टसंठि[अ]यअजहणप-
 सत्थलक्खणअकोप्पजंधजुयला सुणिम्मित्तसुनिगूडजाणूमंसलपसत्थसुबद्धसंधी कयली-
 खंभातिरेकसंठियनिव्वणसुकुमालमउयकोमलअविरलसमसहितसुजायवट्टपीवरनिर-
 न्तरोरु अट्ठावयवीडपट्टसंठियपसत्थविच्छिन्नपिहुलसोणी वयणायामप्पमाणदुगुणिय-
 विसालमंसलसुबद्धजहणवरधारीणीओ वज्जविराइयपसत्थलक्खणनिरोदरीओ तिवलि-
 चलियतणुनमियमज्झियाओ उज्जुयसमसहियजच्चतणुकसिणनिद्धादेजलद्धसुकुमाल-

मउयसुविभत्तरोमरातीओ गंगावत्तगपदाहिणावत्ततरंगभंगरविकिरणतरुणबोधितआ-
 कोसायंतपउमगंभीरविगडनाभा अणुब्भडपसत्थसुजातपीणकुच्छी सन्नतपासा सुजात-
 पासा संगतपासा मियमायियपीणरतितपासा अकरंडुयकणगस्यगनिम्मलसुजाय-
 निहवहयगायलट्ठी कंचणकलसपमाणसमसहियलट्ठ[चू]चु(चू)चुयआमेलगजमलजुय-
 लवट्ठियपओहराओ भुरंगअणुपुव्वतणुयगोपुच्छवट्ठसमसहियतमियआदेजलडहबाहा
 तंबनहा मंसलग्गहत्था कोमलपीवरवरंगुलीया निद्धपाणिहेहा ससिसूरसंखचक्कर-
 सोत्थियविभत्तसुविरइयपाणिहेहा पीणुणयकक्खवत्थिप्पदेसपडिपुन्नगलकवोला चउरं-
 गुलसुप्पमाणकंबुवरसरिसगीवा मंसलसंठियपसत्थहणुया दालिमपुप्फप्पगासपीवरप-
 लंबकुंचितवराधरा सुंदरोत्तरोट्ठा दधिदगरयकुंदचंदवासंतिमउलअच्छिद्विमलदसणा
 रत्तुप्पलपउमपत्तसुकुमालतालुजीहा कणवीरमुउलऽकुडिलऽभुन्नयउजुत्तुंगनासा सार-
 दनुवकमलकुमुतकुवलयदलनिगरसरिसलक्खणपसत्थअजिम्हकंतनयणा आनामिय-
 न्नावरुइलकिण्हम्भराइसंगयसुजायतणुकसिणनिद्धभुमगा अल्लीणपमाणजुत्तसवणा सुस्स-
 वणा पीणमट्ठगंडहेहा चउरंगुलविसालसमनिडाला कोमुदिरयणिकरविमलपडिपुन्न-
 सोमवदणा छत्तुन्नयउत्तमंगा अकविलसुसिणिद्धवीहसिरया छत्तज्झयजूवथूभदामिणिक-
 मंडलुकलसवाविसेत्थियपडागजवमच्छकुम्मर[ह]थवरमकरज्झयअंकथालअंकुसअट्ठा-
 वयसुपइट्ठ(मयू)असरसिरियाभिसेयतोरणमेइणिउदधिवरपवरभवणगिरिवरवरायंसस-
 ल्लियगयउत्तमसीहचामरपसत्थबत्तीसलक्खणधरीओ हंससरि(त्थ)च्छगतीओ
 कोइलमहुरगिराओ कंता सव्वस्स अणुमयाओ ववगयवलिपलितवंगदुव्वन्नवाधिदोहग्ग-
 सोयसुक्काओ उच्चत्तेण य नराण थोवूणमूसियाओ सिंगारागारचारुवेसाओ सुंदरथण-
 जहणवयणकरचरणणयणा लावन्नरुवजोव्वणगुणोववेया नंदणवणविवरचारिणीओ-व्व
 अच्छराओ उत्तरकुसुमाणुसच्छराओ अच्छेरगपेच्छणिज्जियाओ तिज्जि य पलिओवसाई
 परमाउं पालयित्ता ताओऽवि उवणमंति मरणधम्मं अवितित्ता कामाणं ॥ १५ ॥
 मेहुणसन्नासंपगिद्धा य मोहभरिया सत्थेहिं हणंति एकमेकं विसयविस उदीरएसु,
 अवरे परदारोहिं हम्मंति वि(मु)सुणिया धणनासं सयणविप्पणासं च पाउणंति, परस्स
 दाराओ जे अविरया मेहुणसन्नसंपगिद्धा य मोहभरिया अस्सा हत्थी गवा य
 महिसा मिगा य मारेंति ए[क्के]कमेकं, मणुयगणा वानरा य पक्खी य विरुज्झंति,
 मित्ताणि खिप्पं भवंति सत्तू समये धम्मे गणे य भिदंति पारदारी, धम्मगुणरया य
 बंभयारी खणेण उल्लोट्टए चरित्ताओ जसमन्तो सुव्वया य पावेंति अ[य(ज)स]किंति
 रोगत्ता वाहिया पव्हित्ति रोयवाही, डुवे य लोया दुआराहगा भवंति-इहलोए चेव
 परलोए परस्स दा(र)राओ जे अविरया, तहेव केइ परस्स दारं गवेसमाणा गहिया

हया य बद्धरुद्धा य एवं जाव गच्छंति विपुलमोहामिभूयसन्ना, मेहुणमूलं च सुव्वए
तत्थ तत्थ वत्तपुव्वा संगामा जणक्खयकरा सीयाए दोवईए कए रुपिणीए पञ-
मावईए ताराए कंचणाए रत्तसुभहाए अहिल्लियाए सुवन्नगुलियाए किन्नरीए सुल्लव-
विज्जुमतीए रोहिणीए य, अन्नसु य एवमादिएसु बहवो महिल्लाकएसु सुव्वंति अह-
र्द्धता संगामा गामधम्ममूला इहलोए ताव नट्टा परलोएवि-य नट्टा महया मोह-
तिमिसंधकारे धोरे तसथावरसुहुमवादरेसु पज्जतमपज्जतसाहारणसरीरपत्तेयसरीरेसु
य अंडजपोतजजराउयरसजसेइमसंसुच्छिमज्जिमयउववादिएसु य नरगतिरियदेव-
माणसेसु जरामरणरोगसोगबहुले पलिओवमसागरोवमाई अणावीयं अणवदगं
दीहमद्वं चाउरंतसंसारकंतारं अणुपरियट्ठंति जीवा मोहवससन्निविट्ठा । एसो सो
अवंभस्स फलविवागो इहलोइओ पारलोइओ य अप्पसुहो बहुदुक्खो महब्भओ
बहुरयप्पगाढो दारुणो कक्कसो असाओ वाससहस्सेहिं मुच्चती, न य अवेदइत्ता
अत्थि हु मोक्खोत्ति, एवमाहुंसु नायकुलनंदणो महप्पा जिणो उ वीरवरनामधेज्जो
कहेसी य अवंभस्स फलविवागं एयं तं अवंभंमि चउत्थं सदेवमणुयासुरस्स
लोगस्स पत्थणजिजं एवं चिरपरिचियमणुग[तं]यं दुरंतं चउत्थं अधम्मदारं समत्तंति
वेमि ॥ १६ ॥ जंबू ! इत्तो परिगगहो पंचमो उ नियमा णाणामणिक्कणगरयणमह-
रिहपरिमलसपुत्तदारपरिजणदासीदासभयगपेसहयगयगोमहिसउट्टखरअयगवेलगसी-
यासगडरहजाणजुगसंदणसयणासणवाहणकुवियधंणधन्नपाणभोयणाच्छायणगंधमल्ल-
भायणभवणविहिं चेव बहुविहीयं भरहं णगणगरणियमज्जणवयपुरवरदोणमुहखेड-
क्कब्बडमडंबसंवाहपट्ठणसहस्सपरिमंडियं थिमियमेइणीयं एगच्छत्तं ससागरं भुंजि-
ऊण वसुहं अपरिमियमणंततण्हमणुगयमहिच्छसारनिरयमूलो लोभकलिकसायमह-
क्खंधो चिंतासयनिचियविपुलसालो गारवपविरल्लियगगविडवो नियडितयापत्तपल्लव-
धरो पुप्फफलं जस्स कामभोगा आयासविसूरणाकलहपकंपियगगसिहरो नरवति-
संपूजितो बहुजणस्स हिययदइओ इमस्स मोक्खवरमोत्तिमगस्स फलिहभूओ
चरिमं अहम्मदारं ॥ १७ ॥ तस्स य नामाणि इमाणि गोण्णाणि होति तीसं, तंजहा-
परिगगहो १ संचयो २ चयो ३ उवचओ ४ निहाणं ५ संभारो ६ संकरो
७ (एवं) आयरो ८ पिंडो ९ दव्वसारो १० तहा महिच्छा ११ पडिबंधो १२ लोहप्पा
१३ मह[द्दी]ई १४ उवकरणं १५ संरक्खणा य १६ भारो १७ संपाउप्पायको
१८ कलिकरंढो १९ पवित्थरो २० अणत्थो २१ संथवो २२ अमुत्ती २३ आयासो
२४ अविवो २५ अमुत्ती २६ तण्हा २७ अणत्थको २८ आसत्ती २९ असंतो-
सोत्तिविय ३०, तस्स एयाणि एवमादीणि नामधेज्जाणि होति तीसं ॥ १८ ॥ तं च

पुण परिगहं ममायंति लोभघत्था भवणवरविमाणवासिणो परिगहस्ती परिगहे विविहकरणबुद्धी देवनिकाया य असुरभुयगगहलविजु[ज]जलणदीवउदहिदिसिपवण-
अणियअणवणियपणवणियइसिवातियभूतवाइयकंदियमहार्कंदियकुहंडपतंगदेवा पिसा-
यभूयजक्खरक्खसकिंनरकिंपुरिसमहोरगगंधवा य तिरियवासी पंचविहा जोइसिया
य देवा बहस्सतीचंदसूरसुक्कसनिच्छरा राहुधूसकेउबुधा य अंगारका य तत्तव-
णिज्जकणयवण्णा जे य गहा जोइसम्मि चारं चरंति केऊ य गतिरतीया अट्ठावीसति-
विहा य नक्खत्तदेवगणा नाणासंठाणसंठियाओ य तारगाओ ठियेस्सेसा चारिणो
य अविस्साममंडलगती उवरिचरा उट्ठलोगवासी दुविहा वैमाणिया य देवा सोह-
म्मीसाणसणंकुमारमाहिंदबंभलोगलंतकमहासुक्कसहस्सारआणयपाणयआरणअञ्जुया
कप्पवरविमाणवासिणो सुरगणा गेवेज्जा अणुत्तरा दुविहा कप्पातीया विमाणवासी
महिद्धिका उत्तमा सुरवरा एवं च ते चउव्विहा सपरिसावि देवा ममायंति भवण-
वाहणजाणविमाणसयणासणाणि य नाणाविहवत्थभूसणा-णि य-पवरपहरणाणि य
नाणामणिपंचवन्नदिव्वं च भायणविहिं नाणाविहकामरूवे वैउव्वितअच्छरणसंघाते
वीवसमुदे दिसाओ विदिसाओ वणसंडे पव्वते य गामनगराणि य आरामुज्जाण-
काणणाणि य कूवसरतलागवाविदीहियदेवकुलसभप्पववसहिमाइयाई बहुकाई कित्त-
णाणि य परिगेहिता परिगहं विपुलदव्वसारं देवावि सईदगा न तितिं न तुट्ठिं
उव्वलमंति अचंचतविपुललोभाभिभू[त]यास[ता]वा वासहरइक्खुगारवट्टपव्वयकुंडल-
रुचगवरमाणुसोत्तरकालोदधिलवणसलिलदहपतिरतिकरअंजणकसेलदहिमुहउवपातु-
प्पायकंचणकचित्तवित्तजमकवरसिहरकूडवासी वक्खारअकम्मभूमिसु सुविभत्त-
भागदेसासु कम्मभूमिसु, जेऽवि-य नरा चाउरंतचक्खवट्ठी वासुदेवा बलदेवा मंड-
लीया इस्सरा तलवरा सेणावती इब्भा सेट्ठी रट्ठिया पुरोहिया कुमारा दंडणायगा
माडंबिया सत्थवाहा कोडुंबिया अमच्चा एए अञ्जे य एवमाती परिगहं संचिणंति
अणंतं असरणं दुरंतं अयुवमणिच्चं असासयं पावकम्मनेम्मं अवकिरियव्वं विणास-
मूलं वहवंधपरिकिलेसबहुलं अणंतसंकिलेसकारणं, ते तं धणकणगरयणनिचयं पिडिता
चेव लोभघत्था संसारं अतिवयंति सव्वदुक्खसंनिलयणं, परिगहस्[स]सिेव य
अट्ठाए सिप्पसयं सिक्खए बहुजणो कलाओ य बावत्तरिं सुनिपुणाओ लेहाइयाओ
सउणरुयावसाणाओ-गणियप्पहाणाओ-चउसट्ठिं च महिलागुणे रतिजणणे सिप्पसेवं
असिमसिकिसिवाणिज्जं ववहारं अत्थसत्थ(इसु)ईसत्थच्छरूप(वा)गयं विविहाओ य
जोगजुंजणाओ अञ्जेसु एवमादिएसु बहूसु कारणसएसु जावज्जीवं नडिजए संचिणंति
संदब्बुद्धी परिगहस्सेव य अट्ठाए करंति पाणाण वहकरणं अलियनियडिसाइसंपओगे

परदव्वअभिजा सप[रि]रदारअभिगमणासेवणाए आयासविसूरणं कलहभंडणवे-
 राणि य अवमाणणविमाणणाओ इच्छामहिच्छप्पिवाससतततिसिया तण्हगेहि-
 लोभधत्था अत्ताणा अणिग्गहिया करेति कोहमाणमायालोमे अकित्तिणिजे परिग्गहे
 चेव होंति नियमा सल्ला दंडा य गारवा य कसाया सज्जा य कामगुण-अण्हगा य
 ईदियलेसाओ सयणसंपओगा सचित्ताचित्तमीसगाईं दव्वाईं अणंतकाईं इच्छंति
 परिघेत्तुं सदेवमणुयासुरम्मि लोए लोभपरिग्गहो जिणवरेहिं भणिओ नत्थि एरिसो
 पासो पडिबंघो अत्थि सव्वजीवारणं सव्वलोए ॥ १९ ॥ परलोगम्मि य नद्धा
 तमं पविट्ठा महयामोहमोहियमती तिमिसंधकारे तसथावरसुहुमवादरेसु पज्जत्तम-
 पज्जत्तग एवं जाव परियट्ठंति वीहमदं जीवा लोभवससंनिविट्ठा । एसो सो परिग्ग-
 हस्स फलविवाओ इहलोइओ परलोइओ अप्पसुहो बहुदुक्खो महब्भओ बहुरयप्प-
 गाढो दारुणो कक्कसो असाओ वाससहस्सेहिं मुच्चइ, न-य-अवे(त)त्तिता अत्थि हु
 मोक्खोत्ति, एवमाहंसु नायकुलनंदणो महप्पा जिणो उ वीरवरनामधेज्जो कहेसी
 य परिग्गहस्स फलविवागं । एसो सो परिग्गहो पंचमो उ नियमा नाणामणिक्कण-
 गरयणमहरिह एवं जाव इमस्स मोक्खवरमोत्तिमग्गस्स फल्लिहभूयो चरिमं अधम्म-
 दारं समत्तं । एएहिं पंचहिं असंवरेहिं रयमा[दि]प्पिणित्तु अणुसमयं । चउव्विहग[ति]-
 इ(पज्जं)पेरंतं अणुपरियट्ठंति संसारं ॥ १ ॥ सव्वगईं पक्खंदे का[हिं]हिंति अणंतए
 अकयपुण्णा । जे य ण सुणंति धम्मं सो(सुणि)ऊण य जे पमायंति ॥ २ ॥ अणुसिद्धं-
 पि बहुविहं सिच्छादिट्ठी (य जे) णरा अ(हमा)बुद्धीया । बद्धनिकाइयकम्मा सु(णं)-
 णेति धम्मं न य करेति ॥ ३ ॥ किं सक्का काउं जे जं णेच्छह ओसहं मुहा पाउं ।
 जिणवयणं गुणम[धु]हुरं विरेयणं सव्वदुक्खाणं ॥ ४ ॥ पंचेव य उज्झिऊणं पंचेव
 य रक्खिऊण भावेण । कम्मरयविप्पमुक्का सिद्धिवरमणुत्तरं जंति ॥ ५ ॥ (त्तिवेमि ॥)
 २० ॥ जंबू !-एत्तो संवरदाराईं पंच वोच्छामि आणुपुव्वीए । जह भणियाणि भगवया
 सव्वदुहविमोक्खणट्ठाए ॥ १ ॥ पढमं होइ अहिंसा बितियं सच्चवयणंति पत्तंत ।
 दत्तमणुज्जाय संवरो य बंभचेरमपरिग्गहत्तं च ॥ २ ॥ तत्थ पढमं अहिंसा तसथा-
 वरसव्वभूयखेमकरी । तीसे सभावणा(ए)ओ किंची वोच्छं गुणुइसं ॥ ३ ॥ ताणि
 उ इमाणि सुव्वय । महव्वयाईं लोक[हियस]धिइअव्वयाईं सुयसागरदेसियाईं तव-
 संजसमहव्वयाईं सीलगुणवरव्वयाईं सच्चज्जव्वयाईं नरगतिरियमणुयदेवगतिविबज्ज-
 काईं सव्वजिणसासणगाईं कम्मरयविदारगाईं भवसयविणासणकाईं दुहसयविमोयण-
 काईं सुहसयपवत्तणकाईं कापुरिसदुत्तराईं सप्पुरिस(तीरि)निसेवियाईं निव्वाणगमण-
 मग्ग-सग्ग(ए)प(याण)णाय[गा]काईं संवरदाराईं पंच कइयाणि उ भगवया ।

तत्थ पढमं अहिंसा जा सा सदेवमणुयासुरस्स लोगस्स भवति दीवो ताणं सरणं गतीं
 पइट्ठा निव्वाणं १ निव्वुई २ समांही ३ (संती) सत्ती ४ कित्ती ५ कंती ६ रती य
 ७ विरती य ८ सुयंगतित्ती ९-१० दया ११ विमुत्ती १२ खन्ती १३ सम्मत्तारा-
 हणा १४ महंती १५ बोही १६ बुद्धी १७ धिती १८ समिद्धी १९ रिद्धी
 २० विद्धी २१ ठिती २२ पुट्ठी २३ नंदा २४ भदा २५ विमुद्धी २६ लद्धी
 २७ विसिद्धिदिद्धी २८ कल्लणं २९ मंगलं ३० पमोओ ३१ विभूती ३२ रक्खा
 ३३ सिद्धावासो ३४ अणासवो ३५ केवलीण ठाणं ३६ सिवं ३७ समिई ३८ सी[ल]लं
 ३९ संजमोति य ४० सीलपरिघरो ४१ संवरो ४२ य गुत्ती ४३ ववसाओ
 ४४ उस्सओ ४५ जज्जो ४६ आयतणं ४७ जतण मप्पमातो ४८-४९ अस्सासो
 ५० वीसासो ५१ अभओ ५२ सव्वस्सवि अमाघाओ ५३ चोक्खपविता ५४-५५
 सूती ५६ पूया ५७ विमल ५८ पभासा ५९ य निम्मलतर ६० ति एव-
 मादीणि निययगुणनिम्मियाई पज्जवनामाणि होंति अहिंसाए भगवतीए ॥२१॥ एसा
 सा भगवती अहिंसा जा सा भीयाण विव सरणं पक्खीणं पिव ग(ग)मणं तिसियाणं
 पिव सलिलं खुहियाणं पिव असणं समुद्धमज्जे व पोतवहणं चउप्पयाणं व आसम-
 पयं दुहट्ठियाणं (व) च ओसहिबलं अडवीमज्जे विसत्थगमणं एत्तो विसिद्धतरिका
 अहिंसा जा सा पुढविजलअगणिमारुयवणस्सइवीजहरितजलचरथलचरखहचर-
 तसथावरसव्वभूयखेमकरी एसा भगवती अहिंसा जा सा अपरिमियनाणदंसणधरेहिं
 सीलगुणविणयतवसंयमनायकेहिं तित्थंकरेहिं सव्वजगजीववच्छलेहिं तिलोगमहिएहिं
 जिणचंदेहिं सुट्ठु दिट्ठा ओहिजिणेहिं विण्णाया उज्जुमतीहिं विदिट्ठा विपुलमतीहिं
 विविदिता पुव्वधरेहिं अधीता वेउव्वीहिं पतिन्ना आभिणिबोहियनाणीहिं सुयनाणीहिं-
 ओहिनाणीहिं-मणपज्जवनाणीहिं केवलनाणीहिं आमोसहिपत्तेहिं खेलोसहिपत्तेहिं जल्लो-
 सहिपत्तेहिं विप्पोसहिपत्तेहिं सव्वोसहिपत्तेहिं बीजबुद्धीहिं कुट्टुबुद्धीहिं पदाणुसारीहिं
 संभिजसोतेहिं सुयधरेहिं मणबलिएहिं वयबलिएहिं कायबलिएहिं नाणबलिएहिं दंसण-
 बलिएहिं चरितबलिएहिं खीरासवेहिं म(धु)हुआसवेहिं सप्पियासवेहिं अक्खीणमहाण-
 सिएहिं चारणेहिं विजाहरेहिं चउत्थभत्तिएहिं एवं जाव छम्मासभत्तिएहिं उन्निखत्त-
 चरएहिं निक्खित्तचरएहिं अंतचरएहिं पंतचरएहिं ल्हचरएहिं समुदाणचरएहिं
 अन्नइलाएहिं मोणचरएहिं संसट्टकप्पिएहिं तज्जायसंसट्टकप्पिएहिं उवनिहिएहिं
 सुद्धेसणिएहिं संखादत्तिएहिं दिट्ठलाभिएहिं अदिट्ठलाभिएहिं पुट्ठलाभिएहिं आयंबिलि-
 एहिं पुरिमट्ठिएहिं एक्कासणिएहिं निव्वितिएहिं भिन्नपिंडवाइएहिं परिमियपिंडवाइएहिं
 अंताहारेहिं पंताहारेहिं अरसाहारेहिं विरसाहारेहिं ल्हवाहारेहिं तुच्छाहारेहिं अंतजी-

[वि]वीहिं पंतजी-वीहिं लहजी-वीहिं तुच्छजी-वीहिं उवसंतजी-वीहिं पसंतजी-वीहिं
 विवित्तजी-वीहिं अखीरमहुसप्पिएहिं अमज्जमंसासिएहिं ठाणाइएहिं पडि[मंठा]मट्ठाइहिं
 ठाणुकडिएहिं वीरासणिएहिं गेसज्जिएहिं डंडाइएहिं लंगंडसाइहिं एगपासगेहिं आयाव-
 एहिं अप्पावएहिं अणिहु[व]भएहिं अकं[ड्ड]डुयएहिं धुतकेसंमल्लोमनखेहिं सव्वगाय-
 पडिकम्मविप्पमुक्केहिं समणुचिच्चा सुयधरविदितत्थकायबुद्धीहिं धीरमतिबुद्धिणो य
 जे ते आसीविसउग्गतेयकप्पा निच्छयववसाय(विणीय)पज्जत्तकयमतीया णिच्चं
 सज्झायज्झाणअणुबद्धधम्मज्झाणा पंचमहव्वयचरित्तजुत्ता समिता समितिसु समित-
 पावा छव्विहजगवच्छला निच्चमप्पमत्ता एएहिं अच्चेहि य जा सा अणुपालिया भगवती
 इमं च पुढविदगअगणिमारुयतरुगणतसथावरसव्वभूयसं(य)जमदयट्ठयाते सुद्धं
 उच्चं गवेसियव्वं अकतमकारिमणाहूयमणुदिट्ठे अकीयकडं नवहि य कोडिहिं सुपरि-
 सुद्धं दसहि य दोसेहिं विप्पमुक्कं उग्गमउप्पायणेसणासुद्धं ववगयत्तुयचावियचत्तदेहं च
 फासुयं च न नि(सि)सज्जकहापओयणकखासुओ[व]णीयंति न तिगिच्छामंतमूलभेसज-
 कज्जहेउं न लक्खणुप्पायसुमिणजोइसनिमित्तकहकप्पउत्तं नवि डंभणाए नवि रक्ख-
 णाते नवि सासणाते नवि दंभणरक्खणसासणाते भिक्खं गवेसियव्वं नवि वंदणाते
 नवि माणणाते नवि पूयणाते नवि वंदणमाणणपूयणाते भिक्खं गवेसियव्वं नवि
 हीलणाते नवि निंदणाते नवि गरहणाते नवि हीलणनिंदणगरहणाते भिक्खं
 गवेसियव्वं नवि भेसणाते नवि तज्जणाते नवि तालणाते नवि भेसणतज्जणताल-
 णाते भिक्खं गवेसियव्वं नवि गारवेणं नवि कुहणयाते नवि वणीमयाते नवि
 गारवकुहवणीमयाए भिक्खं गवेसियव्वं नवि मित्तयाए नवि पत्थणाए नवि सेव-
 णाए नवि मित्तपत्थणसेवणाते भिक्खं गवेसियव्वं अच्चाए अगट्ठिए अदुट्ठे अदीणे
 अविमणे अकल्लणे अविसाती अपरितंतजोगी जयणघडणकरणचरियविणयगुणजोग-
 संपउत्ते भिक्खू भिक्खेसणाते निरते, इमं च णं सव्वजीवरक्खणदयट्ठाते पावयणं
 भगवया सुकहियं अत्तहियं पेच्चाभाविं आगमेसिभइं सुद्धं नेयाउयं अकुडिलं अणु-
 त्तरं सव्वदुक्खपावाण विउसमणं ॥ २२ ॥ तस्स इमा पंच भावणातो पढमस्स
 वयस्स हांति पाणातिवायवेरमणपरिरक्खणट्ठयाए-पढमं ठाणगमणगुणजोगजुंजण-
 जुगंतरनिवातियाए दिट्ठीए ईरियव्वं कीडपयंगतसथावरदयावरेण निच्चं पुप्फफल-
 तयप[वा]वालकंदमूलदगमट्ठियबीजहरियपरिवज्जिएण सं[स]मं, एवं खल्ल सव्वपाणा न
 हीलियव्वा न निंदियव्वा न गरहियव्वा न हिंसियव्वा न छिंदियव्वा न भिदियव्वा
 न वहेयव्वा न भयं दुक्खं च किंचि लब्भा पावेउं एवं ईरियासमित्तजोगेण
 भावितो भवति अंतरप्पा असबलमसंकिलिट्ठनिव्वणचरित्तभावणाए अहिसए संजए

सुसाहू, वितीयं च मणेण पावएणं पाव[गं]कं अहम्मियं दारुणं निस्संसं वहंबंधपरि-
 किलेसबहुलं जरा(भय)मरणपरिकिलेससंकिलिट्ठं न कयावि मणेण पावतेणं पावगं
 किंचि-वि ज्ञायव्वं एवं मणसमितिजोगेण भावितो भवति अंतरप्पा असबलमसंकिलिट्ठ-
 निव्वणचरित्तभावणाए अहिंसए संजए सुसाहू, ततियं च वतीते पावियाते पाव-कं-
 अ० कं....वईए पाविया(ओ)ए पावगं-न किंचिवि भासियव्वं एवं वतिसमितिजोगेण
 भावितो भवति अंतरप्पा असबलमसंकिलिट्ठनिव्वणचरित्तभावणाए अहिंसओ संजओ
 सुसाहू, चउत्थं आहारएसणाए सुद्धं उंछं गवेसियव्वं अन्नाए अ[गढिते]कहिए अ[हु]-
 सिट्ठे अदीणे अकल्लणे अविसादी अपरितंतजोगी जयणघडणकरणचरियविणयगुणजोग-
 संपओगजुत्ते भिक्खू भिक्खेसणाते जुत्ते समुदाणेऊण भिक्खचरियं उंछं घेतूण आगतो
 गुरुजणस्स पासं गमणागमणातिचारे पडिक्कमणपडिक्कंते आलोयणदायणं च दाऊण
 गुरुजणस्स गुरुसंदिट्ठस्स वा जहोवएसं निरइयारं च अप्पमतो, पुणरवि अणेसणाते
 पयतो पडिक्कमिप्ता पसंते आसीणसुहणिसत्ते मुहुत्तमेत्तं च ज्ञाणसुहजोगनाणसज्झाय-
 गोवियमणे धम्ममणे अविमणे सुहमणे अविग्गहमणे समाहियमणे सद्दासंवेगनिज्जरमणे
 पवतणवच्छ(ल)लभावियमणे उट्टेऊण य पढट्टुट्टे जहारायणियं निमंतइत्ता य साहवे
 भावओ य विइण्णे य गुरुजणेणं उपविट्टे संपमज्जिऊण ससीसं कायं तहा करतलं
 अमुच्छित्ते अगिद्धे अगढिए अगरहिते अणज्झोववण्णे अणाइले अलुद्धे अणत्तट्ठिते
 असुरसुरं अचवचवं अदुत्तमविलंबियं अपरिसाडिं आलोयभायणे जयं पयत्तेण
 ववगयसंजोगमणिंगालं च विगयधूमं अक्खोवज-णव-णाणलेवणभूर्यं संजमजायामाया-
 निमित्तं संजमभारवहणद्वयाए भुंजेज्जा पाणधारणद्वयाए संजएण समियं एवं आहार-
 समितिजोगेण भाविओ भवति अंतरप्पा असबलमसंकिलिट्ठनिव्वणचरित्तभावणाए
 अहिंसए संजए सुसाहू, पंचमं आदा[न]णनिकखेव[ण]णासमिई पीढफलगसिज्जा-
 संथारगवत्थपत्तकंबलरयहरणचोलपट्टगमुहपोत्तिगपायपुंछणादी एयंपि संजमस्स
 उववूहणद्वयाए वातातवर्दसमसगसीयपरिरक्खणद्वयाए उवगरणं रागदोसरहितं
 परिहरितव्वं संजमेणं निच्चं पडिलेहणपप्फोडणपमज्जणाए अहो य राओ य अप्पमतो
 होइ सययं निक्खियव्वं च गिण्हियव्वं च भायणभंडोवहिउवगरणं एवं आयाणभंड-
 निकखेवणासमितिजोगेण भाविओ भवति अंतरप्पा असबलमसंकिलिट्ठनिव्वण-
 चरित्तभावणाए अहिंसए संजते सुसाहू, एवमिणं संवरस्स दारं सम्मं संवरियं होति
 सुप्पणिहियं इमेहिं पंचहि वि कारणेहिं मणवयणकायपरिरक्खिएहिं णिच्चं आमरणंतं च
 एस जोगो णेयव्वो धितिमया मतिमया अणासवो अकल्लसो अच्छिद्धो-अपरिस्सावी-
 असंकिलिट्ठो सुद्धो सव्वजिणमणुञ्जातो, एवं पढमं संवरदारं फासियं पालियं सोहियं

तीरियं किट्टियं आराहियं आणाते अणुपालियं भवति, ए(यं)वं नायमुणिणा
 भगवया पच्चवियं पळवियं पसिद्धं सिद्धं सिद्धवरसासणमिणं आधवितं सुदेसितं पसत्थं
 पढमं संवरदारं समत्तं तिबेमि [इति पढमं संवरदारं] ॥ २३ ॥ जंबू ! बितियं च
 सच्चवयणं सुद्धं सुच्चियं सिवं सुजायं सुभासियं सुव्वयं सुकहियं सुदिट्ठं सुपतिट्ठियं सुप-
 इट्ठियजसं सुसंजमियवयणबुड्यं सुरवरनरवसभपवरबलवगसुविहियजणबहुमयं परम-
 साहुधम्मचरणं तवनियमपरिगहियं सुगतिपहृदेस[गं]कं च लोगतमं वयमिणं
 विज्जाहरगगणगमणविज्जाणसाहकं सग्गमग्गसिद्धिपहृदेसकं अवितहं तं सच्चं उज्जुयं
 अकुडिलं भूयत्थं अत्थतो विमुद्धं उज्जोयकरं पभासकं भवति सव्वभावाण जीवलोणे
 अविस्वादि जहत्थमधुरं पच्चक्खं दयिवयंवं जं तं अच्छेरेकारकं अवत्थंतरेसु
 बहुएसु माणुसाणं सच्चेण महासमुद्दमज्जेवि चिट्ठंति न निमज्जंति मूढाणि या-वि पोया
 सच्चेण य उदगसंभमंमिवि न पुज्झइ न य मरंति थाहं ते लभंति सच्चेण य अगणि-
 संभमंमिवि न डज्जंति उज्जुगा मणूसा सच्चेण य तत्ततेल्लतउलोहसीसकाइ छिवंति
 धरंति न य उज्जंति मणूसा पव्वयकडकाहिं मुच्चंते न य मरंति सच्चेण य परिग-
 (ही)हिया असिपंजरगया समराओ-वि णिइंति अणहा य सच्चवादी वढबंधभियोग-
 चेरघोडेहिं पमुच्चंति य अमित्तमज्झाहिं निइंति अणहा य सच्चवादी सादेव्वाणि य
 देवयाओ करंति सच्चवयणे रताणं । तं सच्चं भगवं तित्थकरसुभासियं दसविहं चौइ-
 सपुव्वीहिं पाहुडत्थविदितं महरि(सि)सीण य समय(पइ)प्पदि(च्चवि)जं देविदनरि-
 दभासियत्थं वेमाणियसाहियं महत्थं मंतोसहिंविज्जासाहणत्थं चारणगणसमणसिद्ध-
 विज्जं मणुयगणाणं वंदणिज्जं अमरगणाणं अच्छणिज्जं असुरगणाणं च पूयणिज्जं अणेग-
 पासंडिपरिगहितं जं तं लोकंमि सारभूयं गंभीरतरं महासमुदाओ थिरतरगं मेरुप-
 व्वयाओ सोमतरगं चंदमंडलाओ दित्तरं सूरमंडलाओ विमलतरं सरयनहयलाओ
 सुरभितरं गंधमादणाओ जेविय लोगम्मि अपरिसेसा मंतजोगा जवा य विज्जा य
 जंभका य अत्थाणि य सत्थाणि य सिक्खाओ य आगमा य स(च्चा)व्वाणिवि ताई
 सच्चे पइट्ठियाइ, सच्चंपि-य संजमस्स उवरोहकारकं किंवि न वत्तव्वं हिंसासावज्जसंप-
 उत्तं भयविकहकारकं अणत्थवायकलहकारकं अणजं अववायविवायसंपउत्तं वेलंबं
 ओजधेज्जबहुलं निलज्जं लोयगरहणिज्जं दुदिट्ठं दुस्सुयं अमुणियं अप्पणो थवणा परेसु
 निंदा न तंसि मेहावी ण तंसि धन्नो न तंसि पियधम्मो न तं कुलीणो न तंसि दाण-
 [व]पती न तंसि सूरु न तंसि पडिख्वो न तंसि लट्ठो न पंडिओ न बहुस्सओ नवि
 य तं तवस्सी ण यावि परलोगणिच्छियमतीऽसि सव्वकालं जातिकुलरुववाहिरोगेण
 वावि जं होइ वज्जणिज्जं दु(हओ)हिलं उवयारमतिकंतं एवंविहं सच्चंपि न वत्तव्वं,

अह केरिसकं पुणाइ सच्चं तु भासियव्वं ? , जं तं दव्वेहिं पज्जवेहि य गुणेहिं कम्मेहिं
 बहुविहेहिं सिप्पेहिं आगमेहि य नामक्खायनिवाउवसग्गतद्धियसमाससंधिपदहेउजो-
 गियउणादिकिरियाविहाणधातुसरविभत्तिवन्नजुत्तं तिकल्लं दसविहं पि सच्चं जह भणियं
 तह य कम्मुणा होइ दुवालसविहा होइ भासा वयणंपि-य होइ सोलसविहं, एवं अर-
 हंतमणुत्तायं समिक्खियं संजएण कालंमि य वत्तव्वं ॥ २४ ॥ इमं च अलियपिसुण-
 फरुसकडुयचवलवयणपरिरक्खणट्टयाए पावयणं भगवया सुकहियं अत्तहियं पेच्चाभा-
 विकं आगमेसिभहं सुद्धं नेयाउयं अकुडिलं अणुत्तरं सव्वदुक्खपावाणं विओसमणं,
 तस्स इमा पंच भावणाओ वितियस्स वयस्स अलियवयणस्स वेरमणपरिरक्खणट्ट-
 याए, पढमं सोऊणं संवरट्ठं परमट्ठं सुद्धु जाणिऊण न वेगियं न तुरियं न चवलं न
 कडुयं न फरुसं न साहसं न य परस्स पीलाकरं सावज्जं सच्चं च हियं च भियं च
 गाहायं च सुद्धं संगयमकाहलं च समिक्खितं संजतेण कालंमि य वत्तव्वं एवं अणु-
 वीतिसमितिजोगेण भाविओ भवति अंतरप्पा संजयकरचरणनयणवयणो सूरुो सच्च-
 ज्जवसंपुच्चो, वितियं कोहो ण सेवियव्वो, कुद्धो चंडिक्कि[यो]ओ मणूसो अलियं भणेज्ज
 पिसुणं भणेज्ज फरुसं भणेज्ज अलियं पिसुणं फरुसं भणेज्ज कलहं करेज्जा वेरं करेज्जा
 विकहं करेज्जा कलहं वेरं विकहं करेज्जा सच्चं हणेज्ज सीलं हणेज्ज विणयं हणेज्ज सच्चं
 सीलं विणयं हणेज्ज वेसो हवेज्ज वत्थुं भवेज्ज गम्मो भवेज्ज वेसो वत्थुं गम्मो भवेज्ज
 एयं अच्चं च एवमादियं भणेज्ज कोहग्गिसंपलित्तो तम्हा कोहो न सेवियव्वो, एवं
 खंतीइ भाविओ भवति अंतरप्पा संजयकरचरणनयणवयणो सूरुो सच्चज्जवसंपुच्चो,
 ततियं लोभो न सेवियव्वो लुद्धो लोलो भणेज्ज अलियं खेतस्स व वत्थुस्स व कतेण
 १ लुद्धो लोलो भणेज्ज अलियं कितीए लोभस्स व कएण २ लुद्धो लोलो भणेज्ज
 अलियं रिद्धी(ए)य व सोक्खस्स व कएण ३ लुद्धो लोलो भणेज्ज अलियं भत्तस्स व
 माणस्स व कएण ४ लुद्धो लोलो भणेज्ज अलियं पीढस्स व फलगस्स व कएण ५
 लुद्धो लोलो भणेज्ज अलियं सेज्जाए व संथारकस्स व कएण ६ लुद्धो लोलो भणेज्ज
 अलियं वत्थस्स व पत्तस्स व कएण ७ लुद्धो लोलो भणेज्ज अलियं कंबलस्स व
 पायपुंछणस्स व कएण ८ लुद्धो लोलो भणेज्ज अलियं सीसस्स व सिस्सिणीए
 व कएण ९ लुद्धो लोलो भणेज्ज अलियं अज्जेसु य एवमादिसु बहुसु कारणसत्तेसु,
 लुद्धो लोलो भणेज्ज अलियं तम्हा लोभो न सेवियव्वो, एवं मुत्तीय भाविओ भवति
 अंतरप्पा संजयकरचरणनयणवयणो सूरुो सच्चज्जवसंपुच्चो, चउत्थं न भाइयव्वं
 भीतं खु भया इईति लहुयं भीतो अबितिज्जओ मणूसो भीतो भूतेहिं विप्पइ
 भीतो अच्चं-पिहु भेसेज्जा भीतो तवसंजमं-पि हु मुएज्जा भीतो य भरं न नित्थरेज्जा

सप्पुरिसनिसेवियं च मगं भीतो न समत्थो अणुचरिउं तम्हा न भातियव्वं भयस्स
वा वाहस्स वा रोगस्स वा जराए वा मच्चुस्स वा अन्नस्स वा ए(वमादिय)गस्स वा-
एवं धेजेण भाविओ भवति अंतरप्पा संजयकरचरणनयणवयणो स्रो सच्चज्जवसंपन्नो,
पंचमकं हासं न सेवियव्वं अलियाइ असंतकाइ जंपति हासइता परपरिभवकारणं
च हासं परपरिवायपियं च हासं परपीलाकारणं च हासं भेद्विसुत्तिकारकं च
हासं अन्नोन्नजणियं च होज्ज हासं अन्नोन्नगमणं च होज्ज मम्मं अन्नोन्नगमणं च
होज्ज कम्मं कंदप्पाभियोगगमणं च होज्ज हासं आसुरियं किव्विसत्तणं च जणेज्ज
हासं तम्हा हासं न सेवियव्वं एवं मोणेण भाविओ भवइ अंतरप्पा संजयकर-
चरणनयणवयणो स्रो सच्चज्जवसंपन्नो, एवमिणं संवरस्स दारं सम्मं संवरियं होइ
सुप्पणिहियं इमेहिं पंचहि वि कारणेहिं मणवयणकायपरिरिक्खएहिं निच्चं आमरणंतं
च एस जोगो गेयव्वो धितिमया मतिमया अणासवो अकल्लसो अत्तिहो अपरिस्सावी
असंकिट्ठो-सुद्धो-सव्वजिणमणुज्जाओ, एवं वितियं संवरदारं फासियं पालियं सोहियं
तीरियं किट्ठियं अणुपालियं आणाए आराहियं भवति, एवं नायमुणिणा भगवया पन्नवियं
पल्लवियं पसिद्धं सिद्धवरसासणमिणं आधवितं सुदेसि(यं)तं पसत्थं वितियं संवरदारं
समतं तिबेमि [इति वितियं दारं] ॥ २५ ॥ जंबू! दत्तमणुणायसंवरो नाम होति ततियं
सुव्वता ! महव्वतं गुणव्वतं परदव्वहरणपडिविरइकरणजुतं अपरिमियमणंततत्तहाणु-
गयमहिच्छलमणवयणकल्लसआयाणसुनिगगहियं सुसंजमियम[णो]गहत्थपायनिभियं
निगमंथं गेठिकं निरुतं निरासवं निब्भयं विमुत्तं उत्तमनरवसभपवरबलवगसुविहित-
जणसमतं परमसाहुधम्मचरणं जत्थ य गामागरनगरनिगमखेडकव्वडमडंबदोणमुह-
संवाहपट्टणासमगयं न किंचि दव्वं मणिमुत्तसिलप्पवालकंसदूसरययवरकणगरयणमादिं
पडियं पम्हुट्ठं विप्पणट्ठं न कप्पति कस्सति कहेउं वा गेण्हिउं वा अहिरन्नसुवन्निकेण
समलेट्ठुकंचणेण अपरिगहसंबुडेणं लोगमि विहरियव्वं, जंपिय होज्जाहि दव्वजातं
खल(थल)ग(यं)तं खेत-गतं रत्त-मंतरग(यं)तं वा किंचि तणकट्टसक्करादि अप्पं
च बहुं च अणुं च थूलगं वा न कप्प(ती)ति उगगहंमि अदिण्णमि गिण्हिउं
जे, हणि हणि उगगहं अणुन्नविय गेण्हियव्वं वज्जेयव्वो [य] सव्वकालं अचियत्त-
घरप्पवैसो अचियत्तभत्तपाणं अचियत्तपीडफलगसेज्जासंधारगवत्थपत्तकंबलयहरण-
निसेज्जचोलपट्टासुहपोत्तियपायपुंछणाइ भायणमंडोवहिउवकरणं परपरिवाओ परस्स
दोसो परववएसेणं जं च गेण्हइ परस्स नासेइ जं च सुकयं दाणस्स य अंतरातियं
दाणविप्पणासो पेसुन्नं चेव मच्छरित्तं च, जेविय पीडफलगसेज्जासंधारगवत्थ(पत्त)-
पायकंबल[रयहरणनिसेज्जचोलपट्टा]मुहपोत्तियपायपुंछणादिभायणमंडोवहिउवकरणं

असंविभागी असंगहरती तवतेणे य वइतेणे य रुवतेणे य आयारे चेव भावतेणे य
सहकरे झञ्झकरे कलहकरे वेरकरे विकहकरे असमाहिकरे सया अप्पमाणभोती
सततं अणुबद्धवेरे य निचरोसी से तारिसए नाराहए वयमिणं, अह केरिसए पुणाई
आराहए वयमिणं ?, जे से उवहिभत्तपाणसंगहणदाणकुसले अचंतवालदुब्बलणि-
लाणवुद्धुखमके पवत्तिआयरियउवज्झाए सेहे साहम्मिके तवस्सीकुलगणसंघट्टे य
निज्जरट्ठी वेयावच्चं अणिसिसयं दसविहं बहुविहं करेति, न य अचियत्तस्स गिहं पविसइ
न य अचियत्तस्स गेण्हइ भत्तपाणं न य अचियत्तस्स सेवइ पीढफलगसेजासंधारग-
वत्थपायकंबलरयररणनिसेजचोलपट्टयमुहपोत्तियपायपुंछणाइभायणभंडोवहिउवगरणं
न य परिवायं परस्स जंपति न यावि दोसे परस्स गेण्हति परववएसेणवि न किंचि
गेण्हति न य विपरिणामेति कं(किं)चि जणं न यावि णासेति दिन्नसुकयं दाऊण य
[काऊण य] न होइ पच्छाताविए सं-वि-भागसीले संगहोवग्गहकुसले से तारिसते
आराहते वयमिणं, इमं च परदव्वहरणवेरमणपरिरक्खणट्टयाए पावयणं भगवया
सकहितं अत्तहितं पेच्चाभावितं आगमेसिभइ सुद्धं नेयाउयं अकुडिलं अणुत्तरं सव्वदुक्ख-
पावाण विओ[व]समणं, तस्स इमा पंच भावणातो ततियस्स (वयस्स) होति परदव्वह-
रणवेरमणपरिरक्खणट्टयाए, पढमं देवकुलसभप्पवावसहक्खमूलआरामकंदरागर-
गिरिगुहाकम्मउज्जाणजाणसालाकुवितसालामंडवसुन्नघरसुसाणलेणआवणे अन्नंमि य
एवमादियंमि दगमट्टियवीजहरिततसपाणअसंसत्ते अहाकडे फासुए विवित्ते पसत्थे
उवस्सए होइ विहरियव्वं, आहाकम्मबहुले य जे से आसितसंमज्जिउस्सित्तसोहिय-
छायणदूमणलिंपणअणुलिंपणजलणभंडचाल[णे]ण अंतो बहिं च असंजमो जत्थ
व[ड्ढ]इती संजयाण अट्ठा वज्जेयव्वो हु उवस्सओ से तारिसए सुत्तपडिकुट्टे, एवं विवित्त-
वासवसहिसमिइजोगेण भावितो भवति अंतरप्पा निच्चं अहिकरणकरणकारावण-
पावकम्मविरतो दत्तमणुन्नायओग्गहरती । वित्तीयं आरामुज्जाणकाणवणप्पदेसभागे
जं किंचि इक्कडं व कठिणगं च जंतुगं च परामेरकुच्चकुसडब्भपलालमूयगवक्कय-
तणकट्टसक्करादी गेण्हइ सेजोवहिस्स अट्ठा न कप्पए उग्गहे अदिन्नंमि गेण्हि(गिण्हे)उं
जे हणि हणि उग्गहं अणुन्नविय गेण्हियव्वं एवं उग्गहसमितिजोगेण भावितो भवति
अंतरप्पा निच्चं अहिकरणकरणकारावणपावकम्मविरतो दत्तमणुन्नायओग्गहरती ।
ततीयं जस्सेव उवस्सते वसेज्ज सेज्जं तत्थेव गवेसेज्जा न निवायपवायउस्सुणत्तं न
डंसमसगेखु खुभियव्वं एवं, संजमबहुले संवरबहुले संवुडबहुले समाहिबहुले धीरे
काएण फासयंतो सययं अज्झप्पज्झाणजुते समिए एगे चरेज्ज धम्मं, एवं सेज्जास-
मितिजोगेण भावितो भवति अंतरप्पा निच्चं अहिकरणकरणकारावणपावकम्मविरतो

दत्तमणुजायउग्गहस्ती । चउत्थं साहारणपिंडपातलाभे भोतव्वं संजएण समियं न
 सायसूयाहिकं न खद्धं ण वेगितं न तुरियं न चवलं न साहसं न य पर[स्स]पीलाकर-
 सावज्जं तह भोतव्वं जह से ततियवयं न सीदति साहारणपिंडपा[त]यलाभे सुहुमं
 अदिन्नादाण-विरमण-वयनियम(विरम)णं, एवं साहारणपिंडवायलाभे समितिजोगेण
 भावितो भवति अंतरप्पा निच्चं अहिकरणकरणकारावणपावकम्मविरते दत्तमणुजाय-
 उग्गहस्ती । पंचमगं साहम्मिए विणओ पउंजियव्वो उव[ग]करणपारणासु विणओ
 पउंजियव्वो वायणपरियट्ठणासु विणओ पउंजियव्वो दाणगहणपुच्छणासु विणओ
 पउंजियव्वो निक्खमणपवेसणासु विणओ पउंजियव्वो अन्नेसु य एवमादिसु बहुसु
 कारणसएसु विणओ पउंजियव्वो, विणओवि तवो तवोवि धम्मो तम्हा विणओ
 पउंजियव्वो गुरुसु साहूसु तवस्सीसु य, एवं विणतेण भाविओ भव-इ अंतरप्पा
 णिच्चं अधिकरणकरणकारावणपावकम्मविरते दत्तमणुजायउग्गहस्ई । एवमिणं संव-
 रस्स दारं सम्मं संवरियं होइ सुपणिहियं एवं जाव आघवियं सुदेसितं पसत्थं
 ततियं संवरदारं समतंतिबेमि ॥ २६ ॥ जं(बु)बू ! एत्तो य बंभचेरं उत्तमतवनिय-
 मणाणदंसणचरितसम्मत्तविणयमूलं य[ज]नियमगुणप्पहाणजुत्तं हिमवंतमहंततेयमंतं
 पसत्थगंभीरथिमितमज्झं अज्जवसाहुजणाचरितं मोक्खमगं विसुद्धसिद्धिगतिनिलयं
 सासयमव्वाबाहमपुणब्भवं पसत्थं सोमं सुभं सिवमचलमक्खयकरं जतिवरसारक्खितं
 सुचरियं सु[भासि]साहियं नवरि मुणिवरेहिं महापुरिसवौरसुरधम्मियधितिमंताण
 य सया विसुद्धं भव्वं भव्वज्जणाणुचिच्चं निस्संकियं निब्भयं नित्तुसं निरायासं
 निस्खलेवं निव्वुतिघरं नियमनिप्पकंपं तवसंजममूलदलियणेम्मं पंचमहव्वयसुरक्खियं
 समितिगुत्तिगुत्तं ज्ञाणवरकवाडसुकयमज्झप्पदिज्ञफलिहं संनद्धोच्छइयदुग्गइपहं सुगति-
 पइदेसगं च लोगुत्तमं च वयमिणं पउमसरतलागपालिभूयं महासगडअरगतुंबभूयं
 महाविडिमरुक्खंक्खंधभूयं महानगरपागारकवाडफलिहभूयं रज्जुपिणिद्धो व इंदकेत्तु
 विसुद्धेगगुणसंपिणद्धं जंमि य भग्गंमि होइ सहसा सव्वं संभग्गम(हि)थियचुन्निय-
 कुसल्लियपल्लट्ठपडियखंडियपरिसडियविणासियं विणयसीलतवनियमगुणसमहं तं बंभं
 भगवंतं गहगणनक्खत्ततारगणं (व) वा जहा उडुपती मणिमुत्तसिलप्पवालरत्तरय-
 णागराणं (च) व जहा समुहो वेरुलिओ चेव जहा मणीणं जहा मउडो चेव भूसणाणं
 वत्थाणं चेव खोमजुयलं अरविंदं चेव पुप्फजेट्ठं गोसीसं चेव चंदणाणं हिमवंतो
 चेव ओसहीणं सीतोदा चेव निन्नगाणं उदहीसु जहा सयंभुरमणो रयगवरे चेव
 मंडलिकपव्वयाण पवरे एरावण इव कुंजराणं सीहोव्व जहा मिगाणं पवरे प[व]व-
 काणं चेव वेणुदेवे धरणो जह पण्णगईदराया कप्पाणं चेव बंसलोए सभासु य

जहा भवे सुहम्मा ठितिसु लवसत्तमव्व पवरा दाणाणं चेव अभयदाणं किमिरा[उ]ओ
 चेव कंवलणं संघयणे चेव वज्जरिसभे संठाणे चेव ससच्चरसे ज्ञाणेसु य परम-
 सुक्कज्जाणा णाणेसु य परमकेवलं तु सिद्धं लेसासु य परमसुक्कलेस्सा तित्थंकरे जहा
 चेव मुणीणं वासेसु जहा महाविदेहे गिरिराया चेव मंदरवरं वणेसु ज[हा]ह नंदणवणं
 पवरं दुमेसु जहा जंबू सुईसणा वीसुयजसा जीय नामेण य अयं दीवो, तुरगवती
 गयवती रहवती नरवती जह वीसुए चेव राया रहिए चेव जहा महारहगते,
 एवमणेगा गुणा अहीणा भवन्ति एकंमि बंभचेरे जंमि य आराहियंमि आराहियं
 व्रयमिणं सव्वं, सीलं तवो य विणओ य संजमो य खंती गुत्ती मुत्ती तहेव इह-
 लोइयपारलोइयजसे य कित्ती य पच्चओ य, तम्हा निहुएण बंभचेरं चरियव्वं
 सव्वओ विसुद्धं जावजीवाए जाव सेयट्ठिसंजउत्ति, एवं भणियं वयं भगवया, तं
 च इमं-पंचमहव्वयसुव्वयमूलं, समणमणाइलसाहुसुच्चिणं । वेरविरामणपज्जवसाणं,
 सव्वसमुद्धमहोदधितित्थं ॥ १ ॥ तित्थकरेहि सुदेसियमगं, नरयतिरिच्छविवज्जिय-
 मगं । सव्वपवित्तिसुनिम्मियसारं, सिद्धिविमाणअवंगुयदारं ॥ २ ॥ देवनरिद-
 नमंसियपूर्यं, सव्वजगुत्तममंगलमगं । दुद्धरिसं गुणनाय[ग]कमेकं, मोक्खपहस्स
 बड्डिस[क]गभूयं ॥ ३ ॥ जेण सुद्धचरिएण भवइ सुबंभणे सुसमणे सुसाहू सइसी समुणी
 ससंजए स एव भिक्खू जो सुद्धं चरति बंभचेरं, इमं च रतिरागदोसमोहपवड्ढणकरं
 किमज्झपमायदोसपासत्थसीलकरणं अब्भंगणाणि य तेल्लमज्जणाणि य अभिक्खणं
 कक्[खा]खसीसकरचरणवदणधोवणसंवाहणगायकम्मपरिमहणाणुलेवणचुच्चवासधूव-
 णसररीरपरिमंडणवाउत्ति(य)कहसियभणियनट्ठीगीयवाइयनडनट्टकजल्लमल्लपेच्छणवेलेव-
 क(जा)जाणि य सिंगारागाराणि य अन्नाणि य एवमादियाणि तवसंजमबंभचेर-
 धातोवधातियाइं अणुचरमाणेणं बंभचेरं वज्जेयव्वाइं सव्वकालं, भावेयव्वो भवइ
 य अंतरप्पा इमेहिं तवनियमसीलजोगेहिं निच्चकालं, किं ते ?-अण्हाणकअदंत-
 धावणसेयमलजल्लधारणं मूणवयकेसलोए य खमदमअचेलगखुप्पिवासलाधवसीतो-
 तिणकट्ठसेजाभूमिनिसेजापरघरपवेसलद्वावलद्धमाणावमाणनिंदणदंसमसगफासनिय-
 मतवगुणविणयमादिएहिं जहा से थिरतर[गं]कं होइ बंभचेरं इमं च अबंभचेरविरमण-
 परिरक्खणट्ठयाए पावयणं भगवया सुकहियं-अत्तहितं-पेच्चाभाविकं आगमेसिभइं सुद्धं
 नेयाउयं अकुडिलं अणुत्तरं सव्वदुक्खपावाण विउसवणं, तस्स इमा पंच भावणाओ
 चउत्थ(व)यस्स होंति अबंभचेरवेरमणपरिरक्खणट्ठयाए, पढमं सयणासणवरदुवार-
 अंगणआगासगवक्खसालअभिलोयणपच्छवत्थुकपसाहणकण्हाणिक्वाकासा अव-
 कासा जे य वेसियाणं अच्छंति य जत्थ इत्थिकाओ अभिक्खणं मोहदोसरतिराग-
 वड्ढणीओ कहेंति य कहाओ बहुविहाओ तेऽवि हु वज्जणिजा इत्थिसंसत्तसंक्किल्लिद्धा

अन्नेवि य एवमादी अवकासा ते हु वज्जणिज्जा जत्थ मणोविब्भमो वा भंगो वा भंस(गो)णा वा अट्ठं रुद्धं च हुज्ज ज्ञाणं तं तं वज्जेज्ज वज्जभीरु अणायतणं अंतर्पतवासी, एवमसंसत्तवासवसहीसमितिजोगेण भावितो भवति अंतरप्पा आरतमणविरयगामधम्मं जि[तं]तिदि ए बंभचेरगुत्ते । वितियं नारीजणस्स भज्जे न कहेयव्वा क्कहा विचिता वि(व्वो)व्वोयविलाससंपउत्ता हाससिंगारलोइयकहव्व मोहजणणी न आवाहविवाहवरकहाविव इत्थीणं वा सुभगदुभगकहा चउसट्ठिं च महिलागुणा न वज्जदेसजातिकुलरूवनामनेवत्थपरिजणकहा इत्थियाणं अन्नावि य एवमादियाओ क्कहाओ सिंगारकलुणाओ तवसंजमबंभचेरघातोवघातियाओ अणुचरमाणेणं बंभचेरं न कहेयव्वा न सुणेयव्वा न चित्तेयव्वा, एवं इत्थीकहविरतिसमितिजोगेण भावितो भवति अंतरप्पा आरतमणविरयगामधम्मं जि[तं]दि ए बंभचेरगुत्ते । ततीयं नारीण हसितभणि(त)तं चेद्धियविप्पेक्खितगइविलासकीलियं विव्वोतियनट्ठगीतवातियसरीर-संठाणवज्जकरचरणनयणलाव-ण्णरूवजोव्वणपयोहराधरवत्थालंकारभूसणाणि य गुण्णोवकासियाइं अन्नाणि य एवमादियाइं तवसंजमबंभचेरघातोवघातियाइं अणुचरमाणेणं बंभचेरं न चक्खुसा न मणसा न वयसा पत्थेयव्वाइं पावक्कम्माइं, एवं इत्थीरूवविरतिसमितिजोगेण भावितो भवति अंतरप्पा आरतमणविरयगामधम्मं जि[तं]दि ए बंभचेरगुत्ते । चउत्थं पुव्वरयपुव्वकीलियपुव्वसंगंथगंथसंथुया जे ते आवाह-विवाहचोल्लकेसु य तिथिसु जजेसु उरस्सवेसु य सिंगारागारचारुवेसाहिं हावभावपललिय-विवक्खेवविलाससालिणीहिं अणुकूलपेम्मिकाहिं सद्धिं अणुभूया सयणसंपओगा उदुसुह-वरकुसुमसुरभिचंदणसुगंधिवरवासधूवसुहफरिसवत्थभूसणगुणोववेया रमणिजाउज्ज-गेयपउरनडनट्ठ(ग)कजल्लमल्लमुट्टिकवेलेवगकहगपवगलासगआइक्खगलंखमंखतूणइल्ल-तुंबवीणियतालायरपकरणाणि य बहूणि महुरसरगीतसुस्सराइं अन्नाणि य एवमादि-याणि तवसंजमबंभचेरघातोवघातियाइं अणुचरमाणेणं बंभचेरं न तातिं समणेण लब्भा दट्ठुं न कहेउं नवि सुमरिउं जे, एवं पुव्वरयपुव्वकीलियविरतिसमितिजोगेण भावितो भवति अंतरप्पा आरयमणविरतगामधम्मं जि[तं]दि ए बंभचेरगुत्ते । पंचमगं आहारपणीयनिद्धमोयणविवज्जते संजते सुसाहू ववगयखीरदहिसप्पिनवनीयतेल्लगुल-खंडमच्छंडिकमहुमज्जमंसखज्जकविगतिपरिचत्तकयाहारे ण दप्पणं न बहुसो न नितिकं न सायसूपाहिकं न खद्धं तहा भोत्तव्वं जह से जायामाता-य भवति, न य भवति विब्भमो न भंसणा य धम्मस्स, एवं पणीयाहारविरतिसमितिजोगेण भावितो भवति अंतरप्पा आरयमणविरतगामधम्मं जि[तं]दि ए बंभचेरगुत्ते । एवमिणं संवरस्स दारं सम्मं संवरियं होइ सुपणिहितं इमेहिं पञ्चहिवि कारणेहिं मणवयणकायपरि-

रक्खिएहिं णिच्चं आमरणंतं च एसो जोगो णेयव्वो धितिम(या)ता मतिमात-
अणासवो अकलुसो अच्छिद्धो अपरिस्सावी असंकिलिद्धो सुद्धो सव्वजिणमणुज्जातो,
एवं चउत्थं संवरदारं फासियं पालितं सोहितं तीरितं किट्ठितं आणाए अणुपालियं
भवति, एवं नायमुणिणा भगवया पच्चवियं पळवियं पसिद्धं सिद्धवरसासणमिणं
आधवियं सुदेसितं पसत्थं चउत्थं संवरदारं समत्तंतिबेमि ॥ २७ ॥ जंबू ! अपरिग्गह-
संबुडे य समणे आरंभपरिग्गहातो विरते विरते कोहमाणमायालोभा एगे असंजमे
दो चेव रागदोसा तिच्चि य दंडगारवा य गुत्तीओ तिच्चि तिच्चि य विराहणाओ
चत्तारि कसाया ज्ञाणसत्ताविकहा तहा य हुंति चउरो पंच य किरियाओ समिति-
इदियमहव्वयाइं च छज्जीवनिकाया छच्च लेसाओ सत्त भया अट्ट य मया नव चेव
य बंभचेरवयगुत्ती दसप्पकारे य समणधम्मं एक्कारस य उवासकाणं बारस य
भिक(खणं)खुपडिमा किरियठाणा य भूयगामा परमाधम्मिया गाहासोलसया
असंजमअवंभणायअसमाहिठाणा सबला परिसहा सूयगडज्जयणदेवभावणउहेस-
गुणपक्कप्पपावसुतमोहणिजे सिद्धातिगुणा य जोगसंगहे तिच्चीसा आसातणा सुरिदा
आदिं एक्कातिर्यं करेत्ता एक्कुत्तरियाए व[ड्ढि]ड्ढीए तीसातो जाव उ भवे तिकाहिका
विरतीपणिहीसु अविरतीसु य (अ०) एवमादिसु बहूसु ठाणेसु जिणपसत्थेसु अवितहेसु
सासयभावेसु अवट्टिएसु संकं कंखं निराकरेत्ता सहहेते सासणं भगवतो अणियाणे
अगारवे अलुद्धे अमुढमणवयणकायगुत्ते ॥ २८ ॥ जो सो वीरवरवयणविरतिपवित्थर-
बहुविहप्पकारो सम्मतविमुद्धमूलो धितिकंदो विणयवेतितो निग्गततिलोक्कविपुलजस-
नि[विड]चियपीण[प]पीवरसुजातखंधो पंचमहव्वयविसालसालो भावणतयंतज्ज्ञाण-
सुभजोगानाणपल्लववरंकरधरो बहुगुणकुसुमसमिद्धो सीलसुगंधो अण्हवफलो पुणो य
मोक्खवरबीजसारो मंदरगिरिसिहरचूलिका इव इमस्स मोक्खवरमुत्तिमग्गस्स
सिहरभूओ संवरवरपादपो चरिमं संवरदारं, जत्थ न कप्पइ गामागरनगरखेडकब्ब-
डमडंबदोणसुहपट्टणासमगयं च किंचि अप्पं व बहुं व अणुं व थूलं व तसथावरकाय-
दव्वजायं मणसावि परिघेत्तुं ण हिर-ण्णसुव-ण्णखेत्तवत्थु न दासीदासभयकपेसहय-
गयवेलेगं (च) वा न जाणजुग्गसयणा-सणा-इ ण छत्तकं न कुंडिया न उवाणहा न
पेहुणवीयणतालियंटका ण यावि अयतउयतंबसीसकंसरयतजातखमणिमुत्ताधार-
पुडकसंखदंतमणिसिग(लेस)सेलकायवरचेलचम्मपत्ताइं महरिहाइं परस्स अज्झोव-
वायलोभजणणाइं परिग्गहेउं गुणवओ न यावि पुप्फफलकंदमूलादियाइं सणसत्तरसाइं
सव्वधच्चाइं तिहिवि जोगेहिं परिघेत्तुं ओसहभेसज्जभोयणट्टयाए संजएणं, किं कारणं ?,
अपरिमितणाणदंसणधरेहिं सीलगुणविणयतवसंजमनायकेहिं तित्थयरेहिं सव्वजग-


[जी]जीववच्छलेहिं तिलोयमहिएहिं जिणवरिंदेहिं एस जोणी जगा[जंगमा]णं दिट्ठा
 न कप्पइ जोणिसमुच्छेदोत्ति तेण वजंति समणसीहा, जंपिय ओदणकुम्मासगं[जं]ज-
 तप्पणमंथुभुजियतिलपुप्फपिडसूपसकुलिवेढिमवरसरकचुन्नकोसगपिंडसिहरिणिवट्ठो-
 यगखीरदहिसप्पितेळ्ळुगुलखंडमच्छंडियखज्जकवंजणविधिमादिकं पणीयं उवस्सए
 परधरे व रत्ते न कप्प-ति तंपि सज्जिहिं काउं सुविहियाणं, जंपि-य उद्दिट्ठविथयरचियग-
 पज्जवजातं पकिण्णपाउकरणपामिच्चं भीसकजायं कीयकडपाहुडं च दाणट्ठपुन्नपगडं
 समणवणीमगट्ठयाए व कयं पच्छाकम्मं पुरेकम्मं नि[च्च]तिकम्मं सक्खियं अतिरित्तं
 मोहरं चेव सयगगहमाहडं मट्ठि[उ]ओवलित्तं अच्छेज्जं चेव अणीसट्ठं जं तं तिहीसु
 जत्तेसु ऊरुवेसु य अंतो व बहिं व होज्ज समणट्ठयाए ठवियं हिंसासावजसंपउत्तं न
 कप्प-ति तंपि-य परिचेत्तुं, अह केरिसयं पुणाइ कप्पति ?, जं तं एक्कारसपिंडवायसुद्धं
 किण्णहण्णपयणकयकारियाणुमोयणनवकोडीहिं सुपरिसुद्धं दसहि य दोसेहिं विप्पमुक्कं
 उगमउप्पायणेसणाए सुद्धं ववगयचुयचवियचत्तदेहं च फासुयं ववगयसंजोगमणिगालं
 विगयधूमं छट्ठाणनिमित्तं छक्कायपरिरक्खणट्ठा ह[णि]णिं ह-णिं फासुकेण भिक्खेण
 वट्ठियव्वं, जंपि-य समणस्स सुविहियस्स उ रोगायंके बहुप्पकारंमि समुप्पजे
 वाताहिकपित्तसिंभअतिरित्तकुविय तह सज्जिवातजाते व उदयपत्ते उज्जलवलविउ-
 ल[तिउल]कक्खडपगाढदुक्खे असुभकड्डयफरुसे चंडफलविवागे महब्भ[ये]ए जीवि-
 यंतकरणे सव्वसरीरपरितावणकरे न कप्प-ति तारिसे-वि तह अप्पणो परस्स वा
 ओसहमेसज्जं भत्तपाणं च तंपि संनिहिकयं, जंपि-य समणस्स सुविहियस्स तु
 पडिग्गहधारिस्स भवति भायणभंडोवहिउवकरणं पडिग्गहो पादबंधणं पादकेस-
 रिया पादठवणं च पडलाइं तिन्नेव रयत्ताणं च गोच्छओ तिन्नेव य पच्छाका
 रयोहरणचोलपट्टकमुहणंतकमादीयं एयं-पि-य संजमस्स उववूहणट्ठयाए वायायवदंसम-
 सगसीयपरिरक्खणट्ठयाए उवगरणं रागदोसरहियं परिहरियव्वं संजएण णिच्चं
 पडिलेहणपप्फोडणपमज्जणाए अहो य राओ य अप्पमत्तेण होइ सततं निक्खि-
 यव्वं च गिण्हियव्वं च भायणभंडोवहिउव(क)गरणं, एवं से संजते विमुत्ते निस्संगे
 निप्परिग्गहइं निम्ममे निन्नेहबंधणे सव्वपावविरते वासीचंदणसमाणकप्पे सम-
 तिणमणिमुत्तालेट्ठुकंचणे समे य माणावमाणणाए समियरते समितरागदोसे समिए
 समीतीसु सम्म(दि)दिट्ठी समे य जे सव्वपाणभूतेसु से हु समणे सुयधारते उज्जु[त्ते]ते
 संजते स साहू सरणं सव्वभूयाणं सव्वजगवच्छले सच्चभासके य संसारंतट्ठिते य
 संसारसमुच्छिन्ने सततं मरणाणुपारते पारगे य सव्वेसिं संसयाणं पवयणमायाहिं
 अट्ठहिं अट्ठकम्मगंठीविमोयके अट्ठमयमहणे ससमयकुसले य भवति सुहदुक्ख-

निविसेसे अब्भितरबाहिरंमि सया तवोवहाणंमि य सुद्धुजुते खंते दंते य हिय(धिति)-
 निरते ईरियासमिते भासासमिते. एसणासमिते आयाणभंडमत्तनिकखेवणासमिते
 उच्चारपासवणखेलसिंघाणजल्ल[प]पारिट्ठावणियासमिते मणगुत्ते वयगुत्ते कायगुत्ते गुत्ति-
 दिए गुत्तबंभयारी चाई लज्जू धञ्जे तवस्सी खंतिखमे जित्तिदिए सोधिए अणियाणे
 अवहिह्से अममे अक्किचणे छिन्न(सोए)-अ-गंधे निखलेवे सुविमलवरकंसभायणं व
 मुक्कतोए संखेविव निरंजणे विगयरागदोसमोहे कुम्मो इव इंदिएसु गुत्ते जच्चकंचणगं
 व जायरूवे पोक्खरपत्तं व निखलेवे चंदो इव सोम(भाव)याए सूरु-व्व दित्तेए
 अच्छे जह् मंदरे गिरिवरे अक्खोभे सागरो व्व थिमिए पुढवी-व सव्वफाससहे
 तवसा च्चिय भासरासिह्निव्व जाततेए जलियहुयासणो विव तेयसा जलंते
 गोसीसचंदणं-पिव सीयले सुगंधे य हर(ए)यो विव समिय(ता)भावे उग्घोसियसुनिम्मलं
 व आर्यसमंडलतलं व पागडंभावेण सुद्धभावे सौंढीरे कुंजरोव्व वसमेव्व जायथामे
 सीहे वा जहा मिगाहिवे होति दुप्पधरिसे सारयसलिलं व सुद्धहिय(ये)ए भारंडे चेव
 अप्पमत्ते खग्गिविसाणं व एगजाते खाणुं चेव उड्डुकाए सुच्चागारेव्व अप्पडिकम्मे
 सुच्चागारावणस्संतो निवायसरणप्पडीपज्झाणमिव निप्पकंपे जहा खुरो चेव एगधारे
 जहा अही चेव एगदिट्ठी आगासं चेव निरालंबे विहगे विव सव्वओ विप्पमुक्के
 कयपरनिलए जहा चेव उरए अप्पडिबद्धे अनिलोव्व जीवोव्व अप्पडिहयगती
 गामे गामे ए[ग]करायं नगरे नगरे य पंचरायं दूहज्जंते य जित्तिदिए जितपरीसहे
 निब्भओ वि(सुद्धो)ऊ सच्चित्ताचित्तमीसकेहिं दव्वेहिं विरायं गते संचयातो विरए मुत्ते
 लहुके निरवकंखे जीवियमरणासविप्पमुक्के निस्संधि निव्वणं चरित्तं धीरे काएण
 फासयंते सततं अज्झप्प(ज)ज्ञाणजुत्ते निहुए एगे चरेज्ज धम्मं । इमं च परिग्गह-
 वेरमणपरिरक्खणट्टयाए पावयणं भगवया सुकहियं अत्तहियं पेच्चाभाविकं आगमेसिभइं
 सुद्धं नेयाउयं अकुडिलं अणुत्तरं सव्वदुक्खपावाण विओसमणं तस्स इमा पंच
 भावणाओ चरिमस्स वयस्स होंति परिग्गहवेरमणरक्खणट्टयाए-पढमं सोइंदिएण
 सोच्चा सद्दाइं मणुच्चभद्गाइं, किं ते ?, वरमुरयमुइंगपणवदहुकरच्छभिबीणाविपंची-
 वल्लयिवद्धीसकसुघोसनंदिसूसरपरिवादिणिवंसतूणकपव्वकतंतीतलतालुडियनिग्घोस-
 गीयवाइयाइं नडनड्ढकजल्लमल्लमुट्ठिकवेलंबककहकपव्वकलासगाइक्खकलंखमंखतूण-
 इल्लतुंबवीणियतालायरपकरणाणि य बहूणि महुरसरगीतसुस्सरातिं कंचीमेहलाकलाव-
 पत्तरकपहेरकपायजालगधंटियखिंखिणिरयणोरुजालियल्लु[हि]डियनेउरचलणमालिय-
 कणगनियलजालभूसणसद्दाणि लीलचंक्कम्ममाण-णूदीरियाइं तरुणीजणहसियभणिय-
 कलरिभित्तमंजुलाइं गुणवयणाणि व बहूणि महुरजणभासियाइं अन्नेसु य एवमादिएसु-

सहेसु मणुन्नभद्दएसु ण तेसु समणेण सज्जियव्वं न रज्जियव्वं न गिज्झियव्वं न मुज्झियव्वं न विनिग्घायं आवज्जियव्वं न लुभियव्वं न तुसियव्वं न हसियव्वं न सइं च मइं च तत्थ कुज्जा, पुणरवि सोईदिएण सोच्चा सद्दाई अमणुन्नपावकाई, किं ते ?, अक्कोसफहसखिसणअवमाणणतज्जणनिब्भंछणदित्तवयणतासणउक्कूजिय-
रुन्नरडियकंदियनिग्घुट्टरसियकलुणविलवियाई अन्नेसु य एवमादिएसु सहेसु अमणुण-
पावएसु न तेसु समणेण रुसियव्वं न हीलियव्वं न निंदियव्वं न खिसियव्वं न छिंदियव्वं न भि[भि]दियव्वं न वहेयव्वं न दुगुंछावत्तियाए लब्भा उप्पाएउं, एवं
सोत्तिदियभावणाभावितो भवति अंतरप्पा मणुन्नाऽमणुन्नसुब्बिभदुत्तिभरागदोसप्पणि-
हियप्पा साहू मणवयणकायगुत्ते संवुडे पणिहिंतिदिए चरेज्ज धम्मं । वित्तिं
चक्खिदिएण पासिय रूवाणि मणुन्नाई भद्दकाई सच्चित्ता[ऽ]चित्तमीसकाई कट्ठे पोत्थे
य चित्तकम्मे लेप्पकम्मे सेले य दंतकम्मे य पंचहिं वण्णेहिं अणेगसंठाणसं(थि)ठि-
याई गं[थि]ठिमवेडिमप्परिमसंघातिमाणि य मल्लाई बहुविहाणि य अहियं नयणमण-
सुहकराई वणसंडे पव्वते य गामागरनगराणि य खुदियपुक्खरिणिवावीदीहियगुंजा-
लियसरसर्पतियसागरचिलपंतियखादियनदीसरतलागवप्पिणीकुल्लप्पलपउमपरिमंडि-
याभिरामे अणेगसउणगणमिहुणविचरिए वरमंडवदिविहभवणतोरणसभप्पवावसह-
सुकयसयणासणसीयरहसयडजाणजुगसंदणनरनारिगणे य सोमपडिरूवदरिसणिजे
अलंकितविभूसिते पुव्वकयतवप्पभावसोहग्गसंपउत्ते नडनट्टगजल्लमल्लमुट्ठियवेलंबग-
कह[क]गपवगलासगआइक्खगलंखमंखतूणइल्लतुंबवीणियतालायरपकरणाणि य वट्ठणि
सुकरणाणि अन्नेसु य एवमादिएसु रुवेसु मणुन्नभद्दएसु न तेसु समणेण सज्जियव्वं
न रज्जियव्वं जाव न सइं च मइं च तत्थ कुज्जा, पुणरवि चक्खिदिएण
पासिय रूवाई अमणुन्नपावकाई, किं ते ?, गंडिकोठिककुणिउदरिकच्छुल्लपइल्लकुज्ज-
पंगुलवामणअंधिल्लगएगचक्खुविणिहयसप्पिसल्लगवाहिरोगपीलियं विगयाणि य मय-
ककलेवराणि सकिमिणकुहियं च दव्वरासिं अन्नेसु य एवमादिएसु अमणुन्नपावतेसु
न तेसु समणेण रुसियव्वं जाव न दुगुंछावत्तियावि लब्भा उप्पातेउं, एवं चक्खि-
दियभावणाभावितो भवति अंतरप्पा जाव चरेज्ज धम्मं । तत्तिं घाणिदिएण
अवघाइय गंधातिं मणुन्नभद्दाई, किं ते ?, जलयथलयरसपुप्फकलपाणभो-
यणकुट्टतगरपत्तचोददमणकरुयएलारसपिक्कमंसिगोसीसरसचंदणकप्पूरलवंगभगर-
कुंकुमकक्कोलउसीरसेयचंदणसुगन्धसारंगजुत्तिवरधूववासे उउयपिडिमणिहारिमगंधि-
एसु अन्नेसु य एवमादि-एसु गंधेसु मणुन्नभद्दएसु न तेसु समणेण सज्जियव्वं जाव
न सतिं च मइं च तत्थ कुज्जा, पुणरवि घाणिदिएण अवघातिय गंधाणि अमणुन्न-

पावकाई, किं ते ?, अहिमडअस्समडहत्थिमडगोमडविगसुणगसियालमणुयमज्जार-
सीहवीवियमयकुहियविणट्ठकिविणवहुदुरभिगंधेषु अन्नेसु य एवमादि-ए-सु गंधेषु
अमणुन्नपावएसु न तेसु समणेण रुसियव्वं जाव पणिहियपंचिदिए चरेज्ज
धम्मं । चउत्थं जिब्भिदिएण साइय रसाणि उ मणुन्नभइकाई, किं ते ?,
उग्गाहिमविविहपाणभोयणगुलकयखंडकयतेल्लघयकयभक्खेसु बहुविहेसु लवणरस-
संजुत्तेसु निट्ठाणगदालियंबतेहंबदुद्धदहिसायबहुप्पगारेसु भोयणेसु य मणुन्नवन्नगंधरस-
फासबहुदव्वसंभितेसु अन्नेसु य एवमादिएसु रसेसु मणुन्नभइएसु न तेसु समणेण
सज्जियव्वं जाव न सई च मतिं च तत्थ कुज्जा, पुणरवि जिब्भिदिएण सायिय
रसार्तिं अमणुन्नपावगाई, किं ते ?, अरसविरससीयलुक्खणिज्जप्पपाणभोयणाई
दोसीणअमणुन्नाई तित्तकडुयकसायअंबिलरसल्लिंडनीरसाई अन्नेसु य एवमा(ति)इएसु
रसेसु अमणुन्नपावएसु न तेसु समणेण रुसियव्वं जाव चरेज्ज धम्मं । पंचमगं
-परवेक्खाए-फासिदिएण फासिय फासाई मणुन्नभइकाई, किं ते ?, दग्गमंडवहार-
सेयचंदणसीयलविमलजलविविहकुसुमसत्थरओसीरमुत्तियमुणालदोसिणापेहुणउक्खे-
वगतालियंटवीयणगजणियसुहसीयले य पवणे गिम्हकाळे सुहफासाणि य बहूणि
सयणाणि आसणाणि य पाउरणगुणे य सिसिरकाळे अंगारपतावणा य आयबनिद्ध-
मउयसीयउसिणलहुया य जे उदुसुहफासा अंगसुहनिव्वुइकरा ते अन्नेसु य एवमादि-
तेसु फासेसु मणुन्नभइएसु न तेसु समणेण सज्जियव्वं न रज्जियव्वं न गिज्झियव्वं
न मुज्झियव्वं न विणिग्घायं आवज्जियव्वं न लुभियव्वं न अज्झोववज्जियव्वं न
तूसियव्वं न हसियव्वं न सत्तिं च मतिं च तत्थ कुज्जा, पुणरवि फासिदिएण फासिय
फासार्तिं अमणुन्नपावकाई, किं ते ?, अणेगवधबंधतालणंकणअतिभारारोवणए अंग-
भंजणसूतीनखप्पवेसगायपच्छणणलक्खारसखारतेल्लकलकलंततउअसीसककाललोह-
सिंचणहड्डिबंधणरज्जुनिगलसंकलहत्थंडुयकुंभिपाकदहणसीहपुच्छणउब्बंधणसूलभेय-
गयचलणमलणकरचरणकन्ननासोट्टसीसळेयणजिब्भंछणवसणनयणहिय[य]यंतदंतभं-
जणजोत्तलयकसप्पहारपादपण्हजाणुपत्थरनिवायपीलणकविकच्छुअगाणिविच्छुयडक्क-
वायातवदंसमसकनिवाते दुट्ठणिसज्जदुनिसीहियदुब्भिकक्खडगुस्सीयउसिणलुक्खेसु
बहुविहेसु अन्नेसु य एवमाइएसु फासेसु अमणुन्नपावकेसु न तेसु समणेण रुसियव्वं
न हीलियव्वं न निंदियव्वं न गरहियव्वं न खिसियव्वं न छिंदियव्वं न भिंदियव्वं
न वहेयव्वं न दुगुंछावत्तियं च लब्भा उप्पाएउं, एवं फासिंदियभावणाभावितो
भवति अंतरप्पा मणुन्नामणुन्नसुब्भिसुब्भिरागदोसपणिहियप्पा साहू मणवयणकायगुत्ते
सेवुडे पणिहिर्तिदिए चरिज्ज धम्मं । एवमिणं संवरस्स दारं सम्मं संवरियं होइ

सुप्पणिहियं इमेहिं पंचहि-वि कारणेहिं मणवयकायपरिरिक्खएहिं निच्चं आमरणंतं च
 एस जोगो नेयव्वो धितिमया मतिमया अणासवो अकलुसो अच्छिद्दो अपरिस्तावी
 असंकिलिट्ठो सुद्धो सव्वजिणमणुज्जातो, एवं पंचमं संवरदारं फासियं पालियं सोहियं
 तीरियं किट्ठियं अणुपालियं आणाए आराहियं भवति, एवं नायसुणिणा भगवया
 पन्नवियं परवियं पसिद्धं सिद्धं सिद्धवरसासणमिणं आघवियं सुदेसियं पसत्थं पंचमं
 संवरदारं समत्तंतिवेमि । एयातिं वयाइं पंचवि सुव्वयमहव्वयाइं हेउसयविचित्त-
 पुक्कलाइं कहियाइं अरिहंतसासणे पंच समासेण संवरा वित्थरेण उ पणवीसतिस-
 मियसहियसंवुडे सया जयणघडणसुविसुद्धदंसणे एए अणुचरियसंजते चरमसरीरधरे
 भविस्सतीति ॥ २९ ॥ पण्हावागरणे णं एगो सुयक्खंधो दस अज्झयणा एक्कसरगा
 दससु चेव दिवसेसु उद्दिस्सिज्जंति एगंतरेसु आयंविलेसु निरुद्धेसु आउत्तभत्तपाणएणं
 अंगं जहा आयास्स ॥ ३० ॥



णमोऽत्थु णं समणस्स भगवओ णायपुत्तमहावीरस्स

सुत्तागमे

तत्थ णं

विवागसुयं

तेणं कालेणं तेणं समएणं चंपा नामं नयरी होत्था वण्णओ, (० चं० ण० उ० दि० एत्थ णं) पुण्णभेद्दे (णा०) उज्जाणे (हो० व०) ॥ १ ॥ तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मन्नामं अणगारे जाइसंपन्ने वण्णओ चउ(द)हसपुव्वी चउनाणोवगए पंचहिं अणगारसएहिं सद्धिं संपरिखुडे पुव्वानुपुव्वि जाव जेणेव पुण्णभेद्दे उज्जाणे अहापडिह्वं जाव विहरइ, परिसा निग्गया धम्मं सोच्चा निसम्म जामेव दि(सं)सिं पाउव्वभूया तामेव दि-सिं पडि-गया, तेणं कालेणं तेणं समएणं अज्जसुहम्म(स्स)अंतेवासी अज्जजंबू-नामं अणगारे सत्तुस्सेहे जहा गोयमसामी तहा जाव ज्ञाणकोट्टो[वगए] विहरइ, तए णं अज्ज-जंबू-ना(मे)मं अणगारे जायसद्धे जाव जेणेव अज्जसुहम्मन्ने अणगारे तेणेव उवागए तिवखुत्तो आयाहि(णं)णपयाहिणं करेइ २ ता वंदइ नमंसइ वं० २ ता जाव पज्जुवासइ, [२] एवं वयासी-जइ णं भंते ! समणेणं भगवया महावीरेणं जाव संपत्तेणं दसमस्स अंगस्स पण्हावागरणाणं अयमट्ठे प-न्नत्ते, एक्कारसमस्स णं भंते ! अंगस्स विवागसुयस्स समणेणं जाव संपत्तेणं के अट्ठे प-न्नत्ते ?, तए णं अज्जसुहम्मन्ने अणगारे जं(वू)तुं अणगारं एवं वयासी-एवं खलु जंबू ! समणेणं जाव संपत्तेणं एक्कारसमस्स अंगस्स विवागसुयस्स दो सुयक्खंधा प-न्नत्ता, तं०-दुहविवागा य सुहविवागा य, जइ णं भंते ! समणेणं जाव संपत्तेणं एक्कारसमस्स अंगस्स विवागसुयस्स दो सुयक्खंधा प-न्नत्ता, तं०-दुहविवागा य सुहविवागा य, पढमस्स णं भंते ! सुयक्खंधस्स दुहविवागाणं समणेणं जाव संपत्तेणं (के) कइ अ(ट्ठे)उज्झयणा प-न्नत्ते(त्ते)त्ता ?, तए णं अज्जसुहम्मन्ने अणगारे जं-तुं अणगारं एवं वयासी-एवं खलु जंबू ! समणेणं० आइगरेणं तित्थगरेणं जाव संपत्तेणं दुहविवागाणं दस अज्झयणा प-न्नत्ता, तं०-‘मियापुत्ते य उज्झयए अभग्ग सगळे ब(व)हस्सई नंदी । उंवर सोरियदत्ते य देवदत्ता य अंजू य ॥ १ ॥’ जइ णं भंते ! समणेणं० आइगरेणं तित्थ(य)गरेणं जाव संपत्तेणं दुहविवागाणं दस अज्झयणा प-न्नत्ता,

तं०-मियापुत्ते य जाव अंजू य, पढमस्स णं भंते ! अज्झयणस्स दुहविवागाणं समणेणं जाव संपत्तेणं के अट्ठे प-न्नते ?, तए णं से सुहम्मं अणगारे जं-बुं अण-गारं एवं वयासी-एवं खलु जंबू ! तेणं कालेणं तेणं समएणं मिय[ग]गामे ना-मं नयरे होत्था वण्णओ, तस्स णं मिय-गामस्स नयरस्स बहिया उत्तरपुर(च्छि)-त्थिमे दिसीभाए चंदणपायवे नामं उज्जाणे होत्था सव्वोडय....वण्णओ, तत्थ णं मियगामे नयरे विजए-नामं खत्तिए राया परिवसइ वण्णओ, तस्स णं विजयस्स खत्तियस्स मिया-नामं देवी होत्था अहीण....वण्णओ, तस्स णं विजयस्स खत्तियस्स पुत्ते मियाए देवीए अत्तए मियापुत्ते-नामं दारए होत्था जाइअंधे जाइमूए जाइवहिरे जाइपंगुले (य) हुंढे य वायव्वे य, नत्थि णं तस्स दारगस्स हत्था वा पाया वा कण्णा वा अच्छी वा नासा वा, केवलं से तेसिं अंगोवंगणं आ(ग)गिइ आ-गिइ(मि)मेत्ते, तए णं सा मिया-देवी तं मियापु(त्त)तं दारगं रहस्सियंसि भूमिघरंसि रहस्सिएणं भत्तपाणेणं पडिजागरमाणी २ विहरइ ॥ २ ॥ तत्थ णं सि(या)यग्गामे नयरे एगे जाइअंधे पुरिसे परिवसइ, से णं एगेणं सचक्खुएणं पुरिसेणं पुरओ-दंडएणं पग(ठि)ट्ठिज्जमाणे २ फुट्टहडाहडसीसे मच्छियाचडगरपहकरेणं अभिज्जमाणमगे सि-यग्गामे नयरे गे(गि)हे २ कालुणवडियाए वित्तिं कप्पेमाणे विहरइ । तेणं कालेणं तेणं समएणं समणे भगवं महावीरे जाव समोसरिए जाव परिसा निग्गया । तए णं से विजए खत्तिए इमीसे कहाए लद्धे समणे जहा कू(को)णिए तहा निग्गए जाव पज्जुवासइ, तए णं से जाइअंधे पुरिसे तं म(हा)हया जणसइं जाव सुणेत्ता तं पुरिसं एवं वयासी-किं णं देवाणुप्पिया ! अज्ज मियग्गामे नयरे इंदमहे-इ वा जाव निग्गच्छइ ?, तए णं से पुरिसे तं जाइअंधपुरिसं एवं वयासी-नो खलु देवाणुप्पिया ! इंदमहे-इ वा जाव निग्गच्छइ, एवं खलु देवाणुप्पिया ! समणे जाव विहरइ, तए णं एए जाव निग्गच्छंति, तए णं से अंधपुरिसे तं पुरिसं एवं वयासी-गच्छामो णं देवाणुप्पिया ! अम्हे-वि समणं भगवं जाव पज्जुवासामो, तए णं से जाइअंधे पुरिसे [तेणं] पुरओ-दंडएणं [पुरिसेणं] पगट्ठिज्जमाणे २ जेणेव समणे भगवं महावीरे तेणेव उवागए (२ ता) तिक्खुतो आयाहि-णपयाहिणं करेइ २ ता वंदइ नमंसइ वं० २ ता जाव पज्जुवासइ, तए णं समणे भगवं महावीरे विजयस्स खत्तियस्स तीसे य० धम्ममाइक्खइ(०) जाव परिसा (जाव) पडिगया, विजए-वि गए ॥ ३ ॥ तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभू(ति)ई नामं अणगारे जाव विहरइ, तए णं से भगवं (२) गोयमे तं जाइअंधपुरिसं पासइ २ ता जायसद्धे जाव एवं वयासी-अत्थि णं भंते ! के(ई)इ

पुरिसे जाइअंधे जाइअंधारुवे ? हंता अत्थि, क[हं]हि णं भंते ! से पुरिसे जाइअंधे जाइअंधारुवे ? एवं खलु गोयमा ! इहेव मियग्गामे नयरे विजयस्स खतियस्स पुत्ते मियादेवीए अत्तए मियापुत्ते नामं दारए जाइअंधे जाइअंधारुवे, नत्थि णं तस्स दारगस्स जाव आ-गिइ-मेत्ते, तए णं सा मियादेवी जाव पडिजागरमाणी २ विहरइ, तए णं से भगवं गोयमे समणं भगवं महावीरं वंदइ नमंसइ वं० २ ता एवं वयासी-इच्छामि णं भंते ! अहं तुब्भेहिं अब्भणु-ञ्चाए समाणे मियापुत्तं दार(यं)गं पासित्तए, अहासुहं देवाणुप्पिया !, तए णं से भगवं गोयमे समणेणं भग-वया महावीरेणं अब्भणु-ञ्चाए समाणे ह(ट्ठे)ट्ठुट्ठे समणस्स भगवओ महावीरस्स अंतियाओ पडि-निक्खमइ २ ता अतुरियं जाव सोहेमाणे (२) जेणेव मि-यग्गामे नयरे तेणेव उवागच्छइ २ ता मि-यग्गामं नयरं मज्झमज्झे(ण)णं जेणेव मिया(ए)-देवीए गि(गे)हे तेणेव उवाग(च्छइ)ए, तए णं सा मियादेवी भगवं गोयमं एज्जमाणं पासइ २ ता हट्ठुट्ठु जाव एवं वयासी-संदिसंतु णं देवाणुप्पिया ! किमागमण- [प(यो)ओयणं ? , तए णं [से] भगवं गोयमे मियादेविं एवं वयासी-अहं णं देवा-णुप्पिया)ए ! तव पुत्तं पासिउं हव्वमागए, तए णं सा मियादेवी मियापुत्तस्स दार-(य)गस्स अणुमग्गजायए चत्तारि पुत्ते सव्वालंकारविभूत्तिए करेइ २ ता भग(व)वओ गोयमस्स पाएसु पाडेइ २ ता एवं वयासी-एए णं भंते ! मम पुत्ते पासइ, तए णं से भगवं गोयमे मि(यं)यादे(वीं)विं एवं वयासी-नो खलु देवा० अहं एए तव पुत्ते पासिउं हव्वमागए, तत्थ णं जे से तव जेठ्ठे (पु०) मियापुत्ते दारए जाइअंधे जाइअंधारुवे जं णं तुमं रहस्सियंति भूमिघरंति रहस्सिएणं भत्तपाणेणं पडिजागर-माणी २ विहरसि तं णं अहं पासिउं हव्वमागए, तए णं सा मियादेवी भगवं गोयमं एवं वयासी-से के णं गोयमा ! से तहाहवे नाणी वा तवस्सी वा जेणं तव एसमट्ठे मम ताव रह(स्सि)स्सीकए तुब्भं हव्वमक्खाए जओ णं तुब्भे जाणह ? , तए णं भगवं गोयमे मियादे-विं एवं वया(सि)सी-एवं खलु देवाणु-प्पिए ! मम धम्मायरिए समणे भगवं महावीरे (जाव) जओ णं अहं जाणामि, जावं च णं मियादेवी भगवया गोयमेण सद्धि एयमट्ठं संलवइ तावं च णं मियापुत्तस्स दारगस्स भत्तवेला जाया यावि होत्था, तए णं सा मियादेवी भगवं गोयमं एवं वयासी-तुब्भे णं भंते ! इ(ह)हं चेव चिट्ठह जा णं अहं तुब्भं मियापुत्तं दार-गं उव-दंसेमित्तिकट्ठु जेणेव भत्तपाणघ(रए)रे तेणेव उवागच्छइ २ ता वत्थपरिय(ट्ठे)ट्ठयं करेइ २ [ता] कट्ठसगडियं गिण्हइ २ [ता] वि(पु)उलस्स असणपाणखाइमसाइमस्स भरेइ २ [ता] तं कट्ठसगडियं अणुकट्ठमाणी २ जे(णे)णामेव भगवं गोयमे तेणेव उवागच्छइ

२ ता भगवं गोयमं एवं वयासी-एह णं तुब्भे भंते ! म(मं)म अणुगच्छह जा णं
 अहं तुब्भं मियापुत्तं दार-गं उवदंसेमि, तए णं से भगवं गोयमे मि-यादेविं
 पिट्ठओ समणुगच्छइ, तए णं सा मियादेवी तं कट्ठसगडियं अणुकट्ठमाणी २
 जेणेव भूमिघरे तेणेव उवागच्छइ २ ता चउप्पुडेणं वत्थेणं णासिगं बंधेइ णासिगं
 बंधमाणी भगवं गोयमं एवं वयासी-तुब्भे(S)वि णं भंते ! एवं करेइ तए णं
 से भगवं गोयमे मियादेवीए एवं वुत्ते समाणे तहेव करेइ, तए णं सा
 मियादेवी परंमुही भूमिघरस्स दुवारं विहाडेइ, त(ओ)ए णं गंसधे निग्गच्छइ
 से जहा-नामए अहिमडे-इ वा सप्पकडेवरे इ वा जाव तओ(S)वि[य]णं अणिट्ठ-
 तराए चेव जाव गंधे प-ज्जते, तए णं से मियापुत्ते दारए तस्स वि-उलस्स असण-
 पाणखाइमसाइमस्स गंधेणं अभिभूए समाणे तंसि वि-उलंसि असणपाणखाइम-
 साइमंसि मुच्छिए० तं वि-उलं असणं ४ आसएणं आहारेइ २ ता खिप्पामेव
 विदंसेइ २ ता तओ पच्छा पूयत्ताए य सोणियत्ताए य परिणामेइ तं-पि-य णं
 पूयं च सोणियं च आहारेइ, तए णं भगवओ गोयमस्स तं मियापुत्तं दार-गं
 पासित्ता अयमेयारूवे अज्झत्थिए [५] समुप्पज्जित्था-अहो णं इमे दारए पुरा-
 पोराणाणं दुच्चिणाणं दुप्पडिक्कंताणं अनुभाणं पावाणं कडाणं कम्माणं पावगं
 फलवित्तिवसेसं पच्चणु(७)भवमाणे विहरइ, २ पच्चक्खं खलु अयं पुरिसे नर-गपडिरुवियं
 वेयणं वे(एइति)यइत्तिकट्ठु मियं देविं आपुच्छइ २ ता मियाए देवीए गिहाओ
 पडिनिक्खमइ २ ता मियग्गामं नयरं मज्झंमज्जेणं निग्गच्छइ २ ता जेणेव
 समणे भगवं महावीरे तेणेव उवागच्छइ २ ता समणं भगवं महावीरं तिकखुत्तो
 आयाहि-णपयाहिणं करेइ २ ता वंदइ नमंसइ वं० २ ता एवं वयासी-एवं खलु (भं०)
 अहं तुब्भेहिं अब्भणु-च्चाए समाणे मियग्गामं नयरं मज्झंमज्जे-णं अणुपविसामि
 [२] जेणेव मियाए देवीए गि-हे तेणेव उवागए, तए णं सा मियादेवी ममं एज्ज-
 माणं पासइ २ ता हट्ठा तं चेव सव्वं जाव पूयं च सोणियं च आहारेइ, तए णं मम
 इमे अज्झत्थिए (०) समुप्पज्जित्था-अहो णं इमे दारए पुरा जाव विहरइ ॥ ४ ॥
 से णं भंते ! पुरिसे पुव्वभवे के आ(सि)सी [? किं-नामए वा किंगोए वा] कयरंसि
 गामंसि वा नयरंसि वा [?] किं वा दच्चा किं वा भोच्चा किं वा समायरित्ता केसिं वा
 पुरा जाव विहरइ ?, गोयमाइ समणे भगवं महावीरे भगवं गोयमं एवं वयासी-एवं
 खलु गोयमा ! तेणं कालेणं तेणं समएणं इहेव जंबुद्वीवे दीवे भारहे वासे
 सयदुवारं नामं नयरे होत्था रिद्ध(त्थ)त्थिमि(ए)य वण्णओ, तत्थ णं सयदुवारं नयरे
 धणवई नामं राया हो(हु)त्था वण्णओ, तस्स णं सयदुवारस्स नयरस्स अदूरसामंते

दाहिणपुर-त्थिमे दि(सि)सीभाए विजयवद्धमाणे नामं खेडे होत्था रिद्ध-त्थिमियसमिद्धे,
तस्स णं विजयवद्धमाणस्स खेडस्स पंच गामसयाईं आभोए यावि हो-त्था, तत्थ णं
विजयवद्धमाणे खेडे इ(ए)क्काई नामं रट्ठकूडे होत्था अहम्मिए जाव दुप्पडियाणं दे, से
णं इ-क्का(इणामं)ई रट्ठकूडे विजयवद्धमाणस्स खेडस्स पंचण्हं गामसयाणं आदेवच्चं जाव
पालेमाणे विहरइ, तए णं से इ-क्काई (२०) विजयवद्धमाणस्स खेडस्स पंच-गामसयाईं
बहूहिं करेहि य भरेहि य विद्धीहि य उक्कोडाहि य पराभवेहि य दे(दि)जेहि
य मेजेहि य कुंतेहि य लंछपोसेहि य आलीवणेहि य पंथकोट्टेहि य ओ(उ)वीले-
माणे २ विहम्ममाणे २ तज्जेमाणे २ तालेमाणे २ निद्धणे करेमाणे २ विहरइ ।
तए णं से इ-क्काई रट्ठकूडे विजयवद्धमाणस्स खेडस्स बहूणं राईसरतलवरमाईं विय-
कोडुं वियसेट्ठिसत्थवाहणं अन्नेसिं च बहूणं गामेत्थगपुरिसाणं व(हु)हूसु कज्जेसु य
कारणेसु य मंतेसु य गुज्जेसु य निच्छएसु य ववहारेसु य सुणमाणे भणइ-न सुणेमि
असुणमाणे भणइ-सुणेमि एवं पस्समाणे भासमाणे गिण्हमाणे जाणमाणे, तए णं से
इ-क्का(इ)ई रट्ठकूडे एयकम्मे एयप्पहाणे एयविज्जे एयसमायारे सुव(हु)हुं पावकम्मं
कलिकल्लुसं समज्जिणमाणे विहरइ, तए णं तस्स इ-क्का(ई)इयस्स रट्ठकूडस्स अ-जया
कया(ई-ई)इ सरीरगंसि जमगसमगमेव सोलस रोगायंका पाउब्भूया, तं०-सासे
का(खा)से जरे दाहे कुच्छिसूले भगंदरे । अरि(से)सा अजी(रे)ए दिट्ठीमुद्धसूले
अ(रोय)कारए ॥ १ ॥ अ(क्खि)च्छिवेयणा कण्णवेयणा कंडू उ(द)यरे को(ड्डे)डे ।
तए णं से इ-क्का(इ)ई रट्ठकूडे सोलसहिं रो(या)गायंकेहिं अभिभूए समाणे कोडुं वियपुरिसे
सद्दावेइ २ ता एवं वयासी-गच्छह णं तुब्भे देवाणुप्पिया ! विजयवद्धमाणे खेडे
सिं(सं)घाडगति-गचउक्कचचरमहापहपहेसु महया २ सहेणं उग्घोसेमाणा २ एवं
वयह-(एवं) इहं-खल्ल देवाणुप्पिया ! इ-क्का-ईरट्ठकूडस्स सरीरगंसि सोलस-रोगायंका
पाउब्भूया, तं०-सासे कासे जरे जाव कोडे, तं जो णं इच्छइ देवाणुप्पिया ! वे
(वि)ज्जो वा वे-ज्जपुत्तो वा जा(णु)णओ वा जा-णयपुत्तो वा तेगिच्छी वा तेगिच्छिपुत्तो
वा इ-क्का-ईरट्ठकूडस्स तेसिं सोलसण्हं रोगायंकाणं एगमवि रोगायंकं उवसासितए तस्स
णं इ-क्का-ई रट्ठकूडे वि-उलं अत्थसंपयाणं दलयइ, दोच्चं-पि तच्चं-पि उग्घोसेह २ ता
एयमाणत्तिर्यं पच्चिण्ह, तए णं ते कोडुं वियपुरिसा जाव पच्चिण्हंति, तए णं (से)
विजयवद्धमा(ण)णे खे(डं)डे इमं एयारुवं उग्घोसणं सोच्चा निसम्म बहवे वे-ज्जा य ६
सत्थकोसहत्थगया सएहिं[तो] २ गिहेहिंतो पडिनिक्खमंति २ ता विजयवद्धमाणस्स
खेडस्स मज्झमज्झेणं जेणेव इ-क्का-ईरट्ठकूडस्स गिहे तेणेव उवागच्छंति २ ता
इ-क्काईरट्ठकूडस्स सरीर-गं परामुसंति २ ता तेसिं रोगाणं नि(या)दाणं पुच्छंति २ ता

इ-क्काईरट्टकूडस्स बट्टहिं अब्भंगेहि य उव्वट्ट(णा)णेहि य सिणेहपाणेहि य वमणेहि य विरेयणेहि (सिं०) य अवव्ह(णे)णाहि य अवण्हाणेहि य अणुवासणाहि य ब(व)-
 थिकमेहि य नि(रु)रूहेहि य सिरावेहेहि य तच्छणेहि य पच्छणेहि य सि(र)रो(व)-
 बत्थीहि य तप्प-णाहि य पुडपाणेहि य छल्लीहि य मूलेहि य कंदेहि य पत्तेहि य पुप्फेहि य फलेहि य बीएहि य सिलियाहि य गुलियाहि य ओसहेहि य भेसजेहि
 य इच्छंति तेसिं सोलसण्हं रोगायंकाणं एगमवि रोगायंकं उव(सामि)समावितए,
 नो चेव णं संचाएंति उवसामितए । तए णं ते बहवे वे-ज्जा य वे-ज्जपुत्ता य जाहे
 नो संचाएंति तेसिं सोलसण्हं रोगायंकाणं एगमवि रोगायंकं उवसामितए ताहे संता
 तंता परितंता जामेव दिसिं पाउब्भूया तामेव दिसिं पडिगया, तए णं इ-क्का-ई-रट्टकूडे
 वे-ज्जेहि य ६ पडियाइक्खिए परियारगपरि(च्च)त्ते नि(वि)वि(ण्णो)टोसहभेसजे
 सोलसरोगायंकेहिं अभिभूए समाणे रज्जे य रट्ठे य जाव अंतेउरे य मुच्छिए रज्जं च
 रट्ठं च आसा(य) एमाणे पत्थेमाणे पीहेमाणे अभिलसमाणे अट्टदुहट्टवसट्टे अट्टाइज्जाइं
 वाससयाइं परमाउयं पालइत्ता कालमासे कालं किच्चा इमीसे रयणप्पभाए पुढवीए
 उक्कोसेणं सागरोवमट्ठि(ती)इएसु नेरइएसु नेरइयत्ताए उवव-जे, से णं तओ अणंतरे
 उव्वट्ठिता इहेव मियग्गामे नयरे विजयस्स खत्तियस्स मियाए देवीए कुच्छिसि
 पुत्ताए उवव-जे, तए णं तीसे मियाए देवीए सरीरे वेयणा पाउब्भूया उज्जला जाव
 (जलंता) दुरहियासा, जप्पभिइं च णं मियापु(त्त)ते दारए मियाए देवीए कुच्छिसि
 गब्भत्ताए उवव-जे तप्पभिइं च णं मियादेवी विजयस्स (ख०) अणिट्ठा अकंता
 अप्पिया अमणु-न्ना अमणामा जाया यावि होत्था, तए णं तीसे मियाए देवीए अ-ज्या
 कया(ई)इ पुव्वरत्तावरत्तकालसमयंसि कु(ट्ठे)डुंबजागरियाए जागरमाणीए इमे एयारूवे
 अज्झत्थिए जाव समुप्प(जे)जित्था-एवं खलु अहं विजयस्स खत्तियस्स पुर्व्व इट्ठा
 ६ वेज्जा वेसासिया अणुमया आसी, जप्पभिइं च णं म-म इमे गब्भे कुच्छिसि
 गब्भत्ताए उवव-जे तप्पभिइं च णं अहं विजयस्स खत्तियस्स अणिट्ठा जाव अम-
 णामा जाया यावि होत्था, नि(ने)च्छइं णं विजए खत्तिए म-म नामं वा गोयं वा
 गिण्हितए वा किमंग पुणं दंसणं वा परिभोगं वा, तं सेयं खलु म-म एयं गब्भं
 बट्टहिं गब्भसाडणाहि य पाडणाहि य गालणाहि य मारणाहि य साडितए वा
 ४, एवं संपेहेइ संपेहिता बट्टणि खाराणि य कडुयाणि य तूवराणि य गब्भसाड-
 णाणि य ४ खायमाणी य पी(पि)यमाणी य इच्छइं तं गब्भं साडितए वा ४ नो
 चेव णं से गब्भे सडइ वा ४ । तए णं सा मियादेवी जाहे नो संचाएइ तं गब्भं
 सा(डे)डितए वा ४ ताहे संता तंता परितंता अकामिगा अस[यं]वसा तं गब्भं

दुहं दुहेणं परिवहइ, तस्स णं दारगस्स गब्भगयस्स चेव अट्ठ-नालीओ अविमतर-
 प्पवहाओ अट्ठ-नालीओ बाहिर[ए]पवहाओ अट्ठ-पूयप्पवहाओ अट्ठ-सोणियप्पवहाओ
 दुवे दुवे कण्णंतरेसु दुवे दुवे अ(च्छि-क्खि)च्छिअंतरेसु दुवे दुवे नक्कंतरेसु दुवे दुवे
 धमणिअंतरेसु अभिक्खणं अभिक्खणं पूयं च सोणियं च परि(र)सवमाणीओ २ चेव
 चिट्ठंति, तस्स णं दारगस्स गब्भगयस्स चेव अग्गिए-नामं वाही पाउब्भूए जे णं
 से दारए आहारेइ से णं खिप्पामेव विद्धं(सं)समागच्छइ (०) पूयत्ताए (य) सोणिय-
 ताए य परिणमइ, तं-पि-य से पूयं च सोणियं च आहारेइ, तए णं सा मियादेवी
 अ-न्नया कया-इ नवण्हं मासाणं बहुपडिपुण्णाणं दारगं पयाया जाइअंघे जाव
 आ-गिइ-मेत्ते, तए णं सा मियादेवी तं दार-गं हुंडं अंधारुवं पासइ २ ता भीया
 ४ अम्मधाईं सद्दावेइ २ ता एवं वयासी-गच्छ[ह] णं देवाणुप्पि(ए)या । तुमं एयं
 दारगं एगंते उक्कुडियाए उज्झाहि, तए णं सा अम्मधाई मियादेवीए तहति
 एयमट्ठं पडिमुणेइ २ ता जेणेव विजए खत्तिए तेणेव उवागच्छइ २ [ता]
 करयलपरिग्गहियं....एवं वयासी-एवं खलु सा(मि)मी! मियादेवी नवण्हं मासाणं....
 जाव आ-गिइ-मेत्ते, तए णं सा मियादेवी तं हुंडं अंधारुवं पासइ २ ता भीया तत्था
 उव्विग्गा संजायभया ममं सद्दावेइ २ ता एवं वयासी-गच्छ[ह] णं तुब्भे[मं]
 देवाणुप्पि-या । एयं दार-गं एगंते उक्कुडियाए उज्झाहि, तं संदिसह णं सामी ! तं
 दारगं अहं एगंते उज्झामि उदाहु मा ?, तए णं से विजए खत्तिए तीसे अम्मधाईए
 अंतिए एयमट्ठं सोच्चा [निसम्म] तहेव संभंते उट्ठाए उट्ठेइ २ ता जेणेव मियादेवी
 तेणेव उवागच्छइ २ ता मियादे-विं एवं वयासी-देवाणुप्पि-या । तुब्भं पढमं
 गब्भे तं जइ णं तु-मं एयं (दा०) एगंते उक्कुडियाए उज्झा)झसि (तो) तओ णं
 तुब्भे)भं पया नो थिरा भविस्सइ, तो(ते)गं तुमं एयं दारगं रहस्सियगंसि भूमिघरंसि
 रहस्सिएणं भत्तपाणेणं पडिजागरमाणी (२) विहराहि तो णं तुब्भं पया थिरा
 भविस्सइ, तए णं सा मियादेवी विजयस्स खत्तियस्स तहति एयमट्ठं विणएणं पडि-
 मुणेइ २ ता तं दारगं रहस्सि(य)यंसि भूमिघरंसि रहस्सिएणं भत्तपाणेणं पडिजागर-
 माणी विहरइ, एवं खलु गोयमा । मियापु-ते दारए पुरा(पो)पुराणणं जाव पच्चणु-
 भवमाणे विहरइ ॥ ५ ॥ मियापुत्ते णं भंते ! दारए इओ कालमासे कालं
 किच्चा कहिं गमहिइ (?) कहिं उववज्जिहिइ ? गोयमा ! मियापुत्ते दारए छव्वीसं
 वासाइं परमाउयं पालइत्ता कालमासे कालं किच्चा इहेव जंबुदीवे दीवे भारहे वासे
 वेयङ्कगिरिपायमूले सीहकुलंसि सीहत्ताए पच्चायाहिइ, से णं तत्थ सीहे भविस्सइ
 अहम्मिए जाव साहसिए सुब-हुं पावं जाव समज्जिणइ २ [ता] कालमासे कालं

किच्चा इमीसे रयणप्पभाए पुढवीए उक्कोससागरोवम(ठि)-ट्टिइएसु जाव उववज्जिहिइ,
 से णं तओ अणंतरं उव्वट्ठित्ता स(सि)री(सि)सवेसु उववज्जिहिइ, तत्थ णं कालं किच्चा
 दोच्चाए पुढवीए उक्कोसेणं तिण्णि सागरोवमाइं...., से णं तओ अणंतरं उव्वट्ठित्ता
 पवस्वीसु उववज्जिहिइ, तत्थ-वि कालं किच्चा तच्चाए पुढवीए सत्त सागरोवमाइं....,
 से णं तओ सीहेसु य...., तयाणंतरं (च णं) चो(चउ)त्थीए (पु०) उरगो पंचमी०
 इत्थी० छट्ठी० मणु(आ-ओ)या० अहे-सत्त(मा)मीए, त(तोऽ)ओ अणंतरं उव्वट्ठित्ता से
 जाइं इमाइं जलयरपंचिंदियतिरिक्खजोणियाणं मच्छकच्छ(भ)वगाहमगर(सु)सुंसु-
 मारा(दी)ईणं अ(द्ध)हूतेरस जाइकुलको(डी)डिजोणिपमुहसयसहस्साइं.... तत्थ णं
 एगमेगंसि जो(णी)णिविहाणंसि अणेगसयसहस्सखुत्तो उद्वाइत्ता २ तत्(थेव)थ भुज्जो २
 पच्चायाइस्सइ, से णं तओ उव्वट्ठित्ता.... एवं चउ(प)पएसु उरपरिसप्पेसु भुयपरिसप्पेसु
 खहयरेसु चउरिंदिएसु तेईंदिएसु वेईंदिएसु वणप्फइएसु कडुयत्तवेसु कडुयदुद्धिएसु
 वा(ऊ)उ० ते-उ० आ-उ० पुढ(वि)वी० अणेगसयसहस्सखुत्तो...., से णं तओ
 अणंतरं उव्वट्ठित्ता सुपइट्ठपुरे नयरे गोणत्ताए पच्चायाहिइ, से णं तत्थ उम्मुक्क जाव
 अ-न्नया कया-इ पढमपाउसं(मि)सि गंगाए महा-नईए खली(य)णमट्ठियं खणमाणे
 तडीए पेण्णिए समाणे कालगए तत्थेव सुपइ(ट्टे)ट्ठपुरे नयरे सेट्ठिकुलंसि पु(त्त)मत्ताए
 पच्चायाइस्सइ, से णं तत्थ उम्मुक्कवालभावे जाव जोव्वणगमणु[प]पत्ते तहारूवाणं
 थेरणं अंतिए धम्मं सोच्चा निसम्ममुंढे भवित्ता अ(आ)गाराओ अणगारियं पव्वइस्सइ,
 से णं तत्थ अणगारे भविस्सइ ई(इ)रियासमिए जाव वंभयारी, से णं तत्थ बहूईं
 वासाइं सामण्णपरियागं पाउणित्तः आलोइयपडिक्कंते समाहिपत्ते कालमासे कालं
 किच्चा सोहम(म)मे कप्पे देवत्ताए उववज्जिहिइ, से णं तओ अणंतरं चयं चइत्ता
 महाविदेहे वासे जाइं कुलाइं भवन्ति अट्ठाईं.... जहा दढपइ-न्ने सा चेव वत्तव्वया
 कलाओ जाव सिज्झिहिइ [५] । एवं खलु जंबू ! समणेणं भगवया महावीरेणं
 जाव संपत्तेणं दुहविवागाणं पढमस्स अज्झयणस्स अयमट्ठे प-न्नत्तेत्तिवेमि ॥ ६ ॥
पढमं अज्झयणं समत्तं ॥

जइ णं भंते ! समणेणं जाव संपत्तेणं दुहविवागाणं पढमस्स अज्झयणस्स अय-
 मट्ठे प-न्नत्ते दोच्चस्स णं भंते ! अज्झयणस्स दुहविवागाणं समणेणं जाव संपत्तेणं के
 अट्ठे प-न्नत्ते ? तए णं से सुहम्मे अणगारे जंबुं अणगारं एवं वयासी-एवं खलु जंबू !
 तेणं कालेणं तेणं समएणं वाणियगामे नामं नयरे होत्था रि(द्धि)द्धत्थिमियसमिद्धे ।
 तस्स णं वाणियगामस्स (नग०) उत्तरपुर-त्थिमे दिसीभाए दूईपलासे नामं उज्जाणे
 होत्था, तत्थ णं वाणियगामे मित्ते नामं राया होत्था वण्णओ, तस्स णं मित्तस्स र-न्ने

सिरी-नामं देवी होत्था वण्णओ, तत्थ णं वाणियगा(मण०)मे कामज्झया-नामं गणिया होत्था अहीण जाव सुरुवा बावत्त(री)रिकलपडिया चउसट्टिगणियागुणोववेया ए(कू)-गूणतीसविसेसे रममाणी एकवीसरइगुणप्पहाणा बत्तीसपुरिसोवयारकुसला नवंग-सुत्तपडिबोहिया अट्टारसदेसीभासाविसारया सिंगारागा(रु)रचारवेसा गीयरइ(य)-गंधव्व-नट्टकुसला संगयगय० सुंदरथण० ऊसिय(ध)ज्झया सहस्सलंभा विदिण्णछत्त-चामरवालवीयणीया कण्णीरहप्पयाया यावि होत्था, बहुणं गणियाणं आहेवच्चं जाव विहरइ ॥ ७ ॥ तत्थ णं वाणियगामे विजयमित्ते नामं सत्थवाहे परिवसइ अट्ठे०, तस्स णं विजयमित्तस्स सुभद्दा-नामं भारिया होत्था अहीण०, तस्स णं विजयमित्तस्स पुत्ते सुभद्दाए भारियाए अत्तए उज्झियए नामं दारए होत्था अहीण जाव सुरुवे । तेणं कालेणं तेणं समएणं समणे भगवं महावीरे (जाव) समोस(द्धि)डे परिसा निग्गया राया(वि) जहा कू-णिओ तहा निग्गओ धम्मो कहिओ परिसा पडिगया राया य गओ, तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभू(इ)ई नामं अणगारे जाव ले[र]से छुट्ठछट्ठेणं जहा पवत्तीए पढम जाव जेणेव वाणियगामे [नयरे] तेणेव उवागच्छइ २ ता उच्चनीय""अडमाणे जेणेव रायमग्गे तेणेव (उ०) ओगाढे, तत्थ णं बहवे हत्थी पासइ संनद्धबद्धवम्मियगुडिय-उप्पीलियकच्छे उद्दामियघंटे नाणामणिरयणविविहगे(वि)वेजउत्तरकंचुइजे पडि-कपिए झयपडागवरपंचामेलआरूढहत्थारोहे गहियाउहप्पहरणे अ-ञ्जे य तत्थ बहवे आसे पासइ संनद्धबद्धवम्मियगुडिए आविद्धगु(डि)डे ओसारियपक्खरे उत्तरकंचुइय-ओचूलमुहचंडाधरचामरथासगपरिमंडियकडिए आरूढ(अर)आसारोहे गहियाउह-प्पहरणे अञ्जे य तत्थ बहवे पुरिसे पासइ संनद्धबद्धवम्मियकवए उप्पीलियसरा-सणप(ट्ठी)ट्टिए पि(णि)णद्धगेवेजे विमलवरबद्धचिंधपट्टे गहियाउहप्पहरणे, तेसिं च णं पुरिसाणं मज्झगयं (एगं) पुरिसं पासइ अव(उ)ओड(ग)यवंधणं उक्कितकण्ण-नासं नेहत्तुपियगतं बज्झक(रक)क्खडियजुय-नियत्थं कंठेगुणरत्तमल्लदामं चुण्णगुडिय-(गायं)गतं चुण्णयं व[ब]ज्झपाण(पी)पियं तिलंतिलं चैव छिजमाणं का(क-णी)-गणिमंसाइं खालियंतं पावं खक्खरगसएहिं हम्ममाणं अणेग-नर-नारीसंपरिवुडं चच्चरे चच्चरे खंडपडहएणं उग्गोसिजमाणं, इमं च णं एयारूवं उग्गोसणं पडिउणेइ-तो खलु देवा० ! उज्झियगस्स दारगस्स केइ राया वा रायपुत्तो वा अवरज्झइ अप्पणो से सयाइं कम्माइं अवरज्झन्ति ॥ ८ ॥ तए णं से भगवओ गोयमस्स तं पुरिसं पासित्ता इमे अज्झत्थिए ५-अहो णं इमे पुरिसे जाव न(णि)रयपडिरुवियं वे(द)यणं वे(दे)एइतिकडु-वाणियगामे नयरे उच्च-नीयमज्झिमकु(ले)लाइं जाव अडमाणे अहापज्जंतं ससु(या)-

दा(णं)णियं गिण्हइ २ ता वाणियगा(मं)मे नय(रं)रे मज्झमज्झेणं जाव पडिदंसेइ,
 [२] समणं भगवं महावीरं वंदइ नमंसइ वं० २ ता एवं वयासी-एवं खलु अहं
 भंते ! तु(ज्झे)ब्भे(हि)हिं अब्भणु-न्नाए समाणे वाणियगामं जाव तहेव (नि)वे-एइ,
 से णं भंते ! पुरिसे पुव्वभवे के आ-सी जाव पच्चणु-भवमाणे विहरइ ? एवं
 खलु गोयमा ! तेणं कालेणं तेणं समएणं इहेव जंबुद्वीवे २ भारहे वासे हत्थिणा-
 उरे नामं नयरे होत्था रिद्ध०, तत्थ णं हत्थिणाउरे नयरे सुनंदे नामं राया होत्था
 महया०, तत्थ णं हत्थिणाउरे (ण(य)गरे) बहुमज्झदेसभाए एत्थ णं महं एगे
 गोमंड(वे)वए होत्था अणेगखंभसयस-न्निविट्ठे पासाईए ४, तत्थ णं वहवे
 न(य)गरगोरूवाणं सणाहा य अणाहा य न-गरगा(वि)वी(उ)ओ य नगरवसभा य
 न-गरब(लि)लीवदा य न-गरपड्डया-ओ य पउरतणपाणिया निब्भया निरुवसग्गा
 सुहंसुहेणं परिवसंति, तत्थ णं हत्थिणाउरे नयरे भीमे नामं कूडग्गा(ही)हे होत्था
 अहम्मिए जाव दुप्पडियाणंदे । तस्स णं भीमस्स कूडग्गाहस्स उप्पला-नामं
 भारिया होत्था अहीण०, तए णं सा उप्पला कूडग्गाहिणी अ-न्नया कया(ई)इ
 आव-न्नसत्ता जाया यावि होत्था, तए णं तीसे उप्पलाए कूड[ग]गाहिणीए
 तिण(ह)हं मासाणं बहुपडिपुण्णाणं अयमेयारूवे दोहले पाउब्भूए-धन्ना-ओ णं
 ताओ अम्मयाओ ४ जाव सुलद्धे जम्मजीवि(ए)यफले जाओ णं बहूणं न-गरगो-
 (र)रूवाणं सणाहाण य जाव वसमाण य ऊहेहि य थणेहि य वसणेहि य छे-
 (छ-छि)प्पाहि य ककुहेहि य वहेहि य कण्णेहि य अ(च्छि)च्छीहि य नासाहि
 य जिब्भाहि य ओ(उ)ट्टेहि य कंबलेहि य सोल्लेहि य तल्लिएहि य भज्जिएहि
 य परिउल्लेहि य लावणेहि य सुरं च महं च मेरगं च जाई च सी(धुं)हुं च पस-न्नं
 च आसाएमाणीओ विसाएमाणीओ परिभाएमाणीओ परिभुं(ज)जेमाणीओ दोहलं
 वि(णयं)णेंति, तं जइ णं अहमवि बहूणं न-गर जाव विणिज्जामित्तिकहु तंसि दोह-
 लंसि अविणिज्जमाणंसि सुक्का भुक्खा निम्मंसा ओलुग्गा ओ-लुग्गसरीरा नित्तिया
 वीणविमणवयणा पंडुल्लइयमु(ही)हा ओमंथियनयणवयणकमला जहोइयं पुप्फवत्थगं-
 धमल्लालंकाराहारं अपरिभुज्जमाणी करयलमलिय-व्व कमलमाला ओहय जाव झिया-
 (य)इ । इमं च णं भीमे कूडग्गाहे जेणेव उप्पला कूडग्गा(ह)हिणी तेणेव उवा-
 गच्छइ २ ता ओहय जाव पासइ २ [ता] एवं वयासी-किं णं तु(मे)मं देवाणु-
 प्पि-ए ! ओहय जाव झियासि ?, तए णं सा उप्पला भारिया भी(म)मं कूडग्गाहं
 एवं वयासी-एवं खलु देवाणुप्पिया ! ममं तिण्हं मासाणं बहुपडिपुण्णाणं दोह(ले)ला
 पाउब्भू(ए)या-ध-न्ना णं ता० जा-ओ णं बहूणं गो० ऊ(ह०)हेहि य जाव

लाव(णए)णेहि य सुरं च ६ आसाएमाणी[ओ]० दोहलं वि(णि)मेंति, तए णं अहं देवाणुप्पिया ! तंसि दोहलंसि अविणिज्जमाणंसि जाव झियामि । तए णं से भी(म)मे कूडग्गा-हे उप्पलं भारियं एवं वयासी-मा णं तुमं देवाणुप्पिया ! ओहय० झियाहि, अहं णं (तं) तहा करिस्सामि जहा णं तव दोहलस्स संपत्ती भविस्सइ, ताहिं इट्ठाहिं ५ जाव वग्गूहिं समासासेइ, तए णं से भी-मे कूडग्गा-हे अद्धरत्तकालसमयंसि एगे अबीए संनद्ध जाव पहरणे सया(सा)ओ गिहाओ निगगच्छइ २ [ता] हत्थिणाउ(रं)रे नयरे मज्झमज्झेणं जेणेव गोमंडवे तेणेव उवाग(-२ ता)ए बट्ठणं न-गरगो-रूवाणं जाव वसभाण य अप्पेगइयाणं ऊहे छिंदइ जाव अप्पे-गइयाणं कंबले छिंदइ अप्पेगइयाणं अ-न्नम-न्नाणं अंगोवंगाणं वियंगेइ २ ता जेणेव सए गिहे तेणेव उवागच्छइ २ ता उप्पलाए कूडग्गा-हिणीए उवणेइ, तए णं सा उप्पला भारिया तेहिं बट्ठहिं गोमंसेहि य सोल्ले(सूले)हि य सुरं च [५] आसा-एमा० तं दोहलं विणेइ, तए णं सा उप्पला कूडग्गा(ही)-हिणी संपुण्णदोहला संमाणियदोहला विणीयदोहला वोच्छिन्नदोहला संप-न्नदोहला तं गम्भं सुइसुहेणं परिवहइ, तए णं सा उप्पला कूडग्गाहिणी अन्नया कया(ई-)इ नवण्हं मासाणं बहु-पडिपुणाणं दार-गं पयाया ॥ ९ ॥ तए णं तेणं दारएणं जाय-मेत्तेणं चेव महया महया सहेणं विखुट्ठे विसरे आरसिए, तए णं तस्स दारगस्स आरसियसइ सोच्चा निसम्म हत्थिणाउरे नयरे बहवे न-गरगो-रूवा जाव वसभा य भीया'...उव्विग्गा सव्वओ समंता विप्पलाइत्था, तए णं तस्स दारगस्स अम्मापियरो अयमेयाख्वं नामधेज्जं करेंति, जम्हा णं अम्(हे)हं इमेणं दारएणं जायमेत्तेणं चेव महया महया चिच्चिसहेणं विखुट्ठे विसरे आरसिए तए णं एयस्स दारगस्स आरसि(यं)यसइ सोच्चा निसम्म हत्थिणाउरे बहवे न-गरगो-रूवा जाव भीया ४ सव्वओ समंता विप्पला-इत्था तम्हा णं होउ अम्हं दारए गोत्तासए नामेणं, तए णं से गोत्ता(से)सए दारए उम्मुक्कवालभा० जाए यावि होत्था, तए णं से भी-मे कूडग्गाहे अन्नया कया-(ई-)इ कालधम्मणा संजुत्ते, तए णं से गोत्तासे दारए ब(ट्ठ)हुएणं मित्त-नाइ-नियगसयणसंबंधिपरि(ज)यणेणं सद्धिं संपरिखुडे रोयमाणे कंदमाणे विलवमाणे भीमस्स कूडग्गा(हि)हस्स नीहरणं करेइ २ [ता] बट्ठइ लोइयमय(कज्जा)किच्चाई करेइ, तए णं से सु-नंदे राया गोत्तासं दारयं अन्नया कयाइ सयमेव कूडग्गा-इत्ताए ठा(ठ)वेइ, तए णं से गोत्तासे दारए कूडग्गाहे जाए यावि होत्था अहम्मिए जाव दुप्पडियाणंदे, तए णं से गोत्तासे दारए कूडग्गा(हि)हित्ताए कल्लकल्लि अद्धर(त्त)त्ति-यकालसमयंसि एगे अबीए संनद्धबद्धकवए जाव गहि(आ)याउह[८]पहरणे सया-ओ

गिहाओ नि(जा)गच्छइ [२] जेणेव गोमंडवे तेणेव उवागच्छइ २ [ता] बहूणं न-गरगो-रुवाणं सणाहाण य जाव विर्यगेइ २ ता जेणेव सए गे(गि)हे तेणेव उवा-ग(च्छइ)ए, तए णं से गोतासे कूडग्गाहे तेहिं बहूहिं गोमंसे(हिं)हि य सोल्ले-हि य"" सुरं च ६ आसाएमाणे विसाएमाणे जाव विहरइ, तए णं से गोतासे कूडग्गाहे एय-कम्मे"" सुबहुं पावकम्मं समज्जिणित्ता पंचवाससयाइं परमाउयं पालइत्ता अट्ठुहु-ट्ठोवगए कालमासे कालं किच्चा दोच्चाए पुढवीए उक्कोसं तिसागरोवमठिइएसु नेरइएसु नेरइयत्ताए उवव-त्ते ॥ १० ॥ तए णं सा विजयमित्तस्स सत्थवाहस्स सुभद्दा नामं भारिया जाय-निंदुया यावि होत्था जाया जाया दारगा विणिहायमावज्जंति, तए णं से गोतासे कूडग्गाहे दोच्चा(ओ)ए पुढवी(ओ)ए अणंतरे उव्वट्ठित्ता इहेव वाणिय-गामे नयरे विजयमित्तस्स सत्थवाहस्स सुभद्दाए भारियाए कुच्छिसि पुत्तत्ताए उव-व-त्ते, तए णं सा सुभद्दा सत्थवाही अ-ज्जाया कया(ई)इ नवहं मासाणं बहुपडि-पुण्णाणं दार-गं पयाया, तए णं सा सुभद्दा सत्थवाही तं दारगं जायमेत्तयं चेव एगंते उ(कु)कुरुडियाए उज्झावेइ उज्झावेत्ता दोच्चं-पि गिण्हावेइ २ ता अ(आ)णुपुव्वेणं सारव(ख)खेमाणी संगोवेमाणी संवट्ठेइ, तए णं तस्स दारगस्स अम्मापियरो ठिइवडियं [च] चंदसूरदंस(णियं)णं च जागरियं [च] महया इट्ठीसक्कारसमुदएणं करंति, तए णं तस्स दारगस्स अम्मापियरो ए(इ)क्कारसमे दिवसे निव्वत्ते संपत्ते बार(साहे)समे दिवसे इममेयारुवं गोणं गुणनिप्फन्नं नामधेज्जं करंति, जम्हा णं अम्हं इमे दारए जाय-मेत्तए चेव एगंते उकुरुडियाए उज्झए तम्हा णं होउ अम्हं दारए उज्झियए नामेणं, तए णं से उज्झियए दारए पंचधाईपरिग(ही)हिए तं० खीरधाईए (१) मज्जणधाईए (२) मंडणधाईए (३) कीलावणधाईए (४) अंकधाईए (५) जहा दढपइ जे जाव निव्वाधाए गिरिकंदरमल्लीणे [वि]व चंप-गपायवे सुहंसुहेणं विहरइ, तए णं से विजयमित्ते सत्थवाहे अ-ज्जाया कया-इ गणिमं च १ धरिमं च २ मेज्जं च ३ पारिच्छेज्जं च ४ चउव्विहं भंडगं गहाय लवणसमुहं पोयवहणे(णं)ण उवागए, तए णं से विजयमित्ते तत्थ लवणसमुदे पोय-विवत्तीए नि[व]बुड्ढमंडसारं अत्ताणे असरणे कालधम्मुणा संजुत्ते, तए णं तं विजयमित्तं सत्थवाहं जे जहा बहवे ईसरतलवरमाडं बियकोडुं बियइब्भसेट्टिसत्थवाहा लवणसमुदे पोयविवत्तीए लूढं निव्वुड्ढमंडसारं कालधम्मुणा संजुत्तं सुणंति ते तद्वा हत्थ-निक्खेवं च बाहिरमंडसारं च गहाय एगं(तं)ते अवक्कमंति । तए णं सा सुभद्दा सत्थवाही विजयमित्तं सत्थवाहं लवणसमुदे पोयविवत्तीए निव्वुड्ढ० कालधम्मुणा संजुत्तं सुणेइ २ ता महया पइसोएणं अप्फु-न्ना समाणी परसु-नियत्ता-विव चंपगलया

धस-त्ति धरणीयलंसि सव्वगे(हिं)ण संनि(प)वड्डिया, तए णं सा सुभद्दा सत्थ-
वाही सुहुत्तंतरे-ण आसत्था समाणी बहूहिं मित्त जाव परिवुडा रोयमाणी कंदमाणी
विलवमाणी विजयमित्तसत्थवाहस्स लोइयाई मयकिच्चाई करेइ, तए णं सा सुभद्दा
सत्थवाही अ-न्नया कया-इ लवणसमुद्दोतरणं च लच्छिविणासं च पोयविणासं च
पइमरणं च अणुविं(त)तेमाणी २ कालधम्मणा संजुत्ता ॥ ११ ॥ तए णं ते नगर-
गुत्तिया सुभदं सत्थवा(हे)हिं कालगयं जाणिता उज्झियगं दारगं सया-ओ गिहाओ
निच्छुभंति निच्छुभिता तं गिहं अ-न्नस्स दलयंति, तए णं से उज्झियए दारए
सयाओ गिहाओ निच्छुढे समाणे वाणियगामे नयरे सिंघाडग जाव पहेसु जूय-
(ख)खेलएसु वेसियाव-रेसु पाणागारेसु य सुहंसुहेणं परिवव्हुइ, तए णं से उज्झियए
दारए अणोह[ट्टि]ए अणिवारिए सच्छंदमई सइर[प]पयारे मज्जप्पसंगी चोरजूयवेस-
दारप्पसंगी जाए यावि होत्था, तए णं से उज्झियए अ-न्नया कया-इ कामज्झयाए
गणियाए सद्धिं संपलगे जाए यावि होत्था, कामज्झयाए गणियाए सद्धिं विउलाई
उरालाई माणुस्सगाई भोगभोगाई भुंजमाणे विहरइ, तए णं तस्स विजयमित्तस्स
र-ओ अ-न्नया कया-इ सिरीए देवीए जो(णी)गिसूळे पाउब्भूए यावि होत्था, नो
संचाएइ विजयमित्ते राया सि(रि)रीए देवीए सद्धिं उरालाई माणुस्सगाई भोगभोगाई
भुंजमाणे विहरित्तए, तए णं से विजयमित्ते राया अ-न्नया कया-इ उज्झियदारयं
कामज्झयाए गणियाए गिहाओ निच्छुभावेइ २ ता कामज्झयं गणियं अट्ठिमतियं
ठावेइ २ ता कामज्झयाए गणियाए सद्धिं उरालाई भोगभोगाई भुंजमाणे विहरइ ।
तए णं से उज्झियए दारए कामज्झयाए गणियाए गिहाओ निच्छुमेमाणे कामज्झ-
याए गणियाए मुच्छिए गिदे गट्टिए अज्झोवव-न्ने अ-न्नत्थ कत्थइ सुई च रई च
धिई च अविंदमाणे तच्चित्ते तम्मणे तल्लेसे तदज्झवसाणे तदट्ठोवउत्ते तयप्पियकरणे
तब्भावणाभाविए कामज्झयाए गणियाए बहूणि अंतराणि य छि(द्दा)ङ्गाणि य
विवराणि य पड्डिजागरमाणे २ विहरइ, तए णं से उज्झियए दारए अ-न्नया कया-इ
कामज्झयं गणियं अंतरं ल(भे)ब्भेइ, [२] कामज्झयाए गणियाए गिहं रहसियं
अणुप्पविसइ २ ता कामज्झयाए गणियाए सद्धिं उरालाई माणुस्सगाई भोगभोगाई
भुंजमाणे विहरइ । इमं च णं मित्ते राया ण्हाए सव्वालंकारविभूसिए मणुस्स-
वागुरा(ए)परि[खि]क्खित्ते जेणेव कामज्झयाए गिहे तेणेव उवागच्छइ २ ता तत्थ
णं उज्झियए दारए कामज्झयाए गणियाए सद्धिं उरालाई भोगभोगाई जाव विहर-
माणं पासइ २ ता आसुत्ते [४] तिवलियभिउडि नि(लाडे)डाळे साहट्ठु उज्झिय-
णं दार-नो पुरिसेहिं गिण्हावेइ २ ता अट्ठिसुट्ठिजाणुकोप्परपहारसंमग्गमहियगत्तं करेइ

२ ता अव-ओड-यवंधणं करेइ २ ता एएणं विहाणेणं वज्झं आणावेइ, एवं खलु
 गोयमा ! उज्झयए दारए पुरापोराणाणं कम्माणं जाव पच्चणु-भवमाणे विहरइ
 ॥ १२ ॥ उज्झयए णं भंते ! दारए इओ कालमासे कालं किच्चा कहिं गच्छिहि०
 कहिं उववज्जिहिइ ? गोयमा ! उज्झयए दारए पणवीसं वासाइं परमाउयं
 पालइत्ता अज्जेव तिभागावसेसे दिवसे सूलीभि-न्ने कए समाणे कालमासे कालं किच्चा
 इमीसे रयणप्पभाए पुढवीए नेरइयत्ताए उववज्जिहिइ, से णं तओ अणंतरं उव-
 ट्ठिता इहेव जंबुद्दीवे दीवे भारहे वासे वेयङ्गुगिरिपायमूले वा-णरकुलंसि वाणरत्ताए
 उववज्जिहिइ, से णं तत्थ उम्मुक्कबालभावे तिरियभो(ए)गेसु मुच्छिए गिद्धे गडिह
 अज्झोवव-न्ने जाए जाए वा-णरपेळए वहेइ तं एयकम्मे [एयप्पहाणे एयविज्जे एय-
 ससुदायारे] कालमासे कालं किच्चा इहेव जंबुद्दीवे दीवे भार(ह)हे वासे इंदपुरे नयरे
 गणियाकुलंसि पुत्तत्ताए पच्चायाहिइ, तए णं तं दार(गं)यं अम्मापियरो जाय(सि)मेत्तकं
 वद्धेहिंति नपुंसगकम्मं सिक्खावेहिंति, तए णं तस्स दार-यस्स अम्मापियरो
 निव्वत्तबारसाहस्स इमं एयारुवं नामधेज्जं क(रेहिं)रेंति तं०-हो(ऊ)उ णं [अम्हं इमे
 दारए] पियसेणे नामं नपुंसए, तए णं से पियसेणे नपुंसए उम्मुक्कबालभावे जोव्वण-
 गमणुप्पत्ते विण(णा)णयपरिणय-मेत्ते रुद्धेण य जोव्वणेण य लावणेण य उक्किट्ठे
 उक्किट्ठसरीरे भविस्सइ, तए णं से पियसेणे नपुंसए इंदपुरे नयरे बहवे राईसर
 जाव पभि(इ-य)ईओ बह्वहि य विज्जाप[यो]ओगेहि य मंतचुण्णेहि य हियउड्ढावणाहि
 य निण्हवणेहि य पण्हवणेहि य वसीकरणेहि य आभि-ओगिहएहि य अभि-ओगिता
 उरालाई माणुस्सगाइं भोगभोगाई भुंजमाणे विहरिस्सइ, तए णं से पियसेणे नपुं-
 सए एयकम्मे० सुबहुं पावकम्मं समज्जिणिता ए-क्कवीसं वाससयं परमाउयं पालइत्ता
 कालमासे कालं किच्चा इमीसे रयणप्पभाए पुढवीए नेरइयत्ताए उववज्जिहिइ, त(ओ)-
 त्तो सरीस(सिरिसि)वेसु सुंसुमारं तहेव जहा पढमो जाव पुढवि० से णं तओ अण-
 तरं उव्वट्ठिता इहेव जंबुद्दीवे दीवे भारहे वासे चंपाए नयरीए महिसत्ताए पच्चाया-
 हिइ, से णं तत्थ अ-न्नया कया-इ गोट्ठिहएहिं जीवि(आ)याओ ववरोविए समाणे
 तत्थेव चंपाए नयरीए सेट्ठिकुलंसि पुत्तत्ताए पच्चायाहिइ, से णं तत्थ उम्मुक्कबाल-
 भावे तट्ठारुवाणं थेराणं अंति ए केवलं बोहिं.....अणगारे सोहम्मे कप्पे जहा पढमे
 जाव अंतं करेहिइ ॥ निक्खेवो ॥ १३ ॥ **विइयं अज्झयणं समत्तं ॥**

तच्चस्स उक्खेवो एवं खलु जंबू ! तेणं कालेणं तेणं समएणं पुरिमताले नामं
 नयरे होत्था रिद्ध०, तस्स णं पुरिमतालस्स नयरस्स उत्तरपुर-त्थिमे दिसीभाए
 एत्थ णं अमोहदंसणे उज्जाणे होत्था, तत्थ णं पुरिमताले (ण०) म(ह्व)हाबळे, नामं

राया होत्था, तत्थ णं पुरिमतालस्स नयरस्स उत्तरपुर-त्थिमे दिसीभाए देसप्पंते
 अडवी संठिया, एत्थ णं साला-नामं अडवी-चोरपल्ली होत्था विसमणिरिक्कंदरकोलं-
 बसं-निविट्ठा वंसीकलेकपागारपरिक्खत्ता छि-न्नसेलविसमप्पवायपरिहोवगूढा अब्भि-
 तरपाणीया सुदुल्लभजलपेरंता अणेगखंडी-विदियजणदि-न्ननिग्गम[८]पवेसा सुवहुय-
 स्स-वि कुवियस्स जणस्स दुप्पहंसा यावि होत्था, तत्थ णं सालाडवीए चोरपल्लीए
 विजए नामं चोरसेणावई परिवसइ अहम्मिए जाव (हणछिन्नभिन्नवियत्ताए) लोहिय-
 पाणी बहु-नयर-निग्गयजसे सूरे दडप्पहारे साहसिए सहवेही परिवसइ (अहम्मिए०)
 असिलट्टिपडममल्ले, से णं तत्थ सालाडवीए चोरपल्लीए पंचण्हं चोरसयाणं आहवेच्चं
 जांव विहरइ ॥ १४ ॥ तए णं से विजए चोरसेणावई बहूणं चोराण य पारदारि-
 याण य गंठिभेयाण य संधिच्छेयाण य खंडपट्टाण य अ-र्नेसि च बहूणं छि-न्नभि-न्न-
 बाहिराहियाणं कुडगे यावि होत्था, तए णं से विजए चोरसेणावई पुरिमतालस्स
 नयरस्स उत्तरपुर-त्थिमिळं जणवयं बहूहिं गामघाएहि य न-गरघाएहि य गोमगह-
 णेहि य बंदिग्गहणेहि य पंथकोट्टहि य खत्तखणणेहि य ओ-वीलेमाणे (२) विद्धंसे-
 माणे तज्जेमाणे तालेमाणे नित्थाणे निद्धणे निक्कणे कप्पायं करेमाणे विहरइ, महब्ब-
 लस्स र-न्नो अभिक्खणं २ कप्पायं गेण्हइ, तस्स णं विजयस्स चोरसेणावइस्स
 खंदसि(रि-)री नामं भारिया होत्था अहीण०, तस्स णं विजयचोरसेणावइस्स पुत्ते
 खंदसिरीए भारियाए अत्ताए अभग्गसेणे नामं दारए होत्था अहीणपुण्णपं(चं)-
 विदियसरीरे वि(ण्णा)न्नयपरिणयमेत्ते जोव्वणगमणु-पत्ते । तेणं कालेणं तेणं
 समएणं समणे भगवं महावीरे पुरिमताले नयरे (जे० अ० उ० ते०) समोसडे
 परिसा निग्गया राया निग्गओ धम्मो कहिओ परिसा राया य पडिगन्ने, तेणं
 कालेणं तेणं समएणं समणस्स भगवओ महावीरस्स जेट्ठे अंतेवासी गोयमे जाव
 रायमग्गं समोगाडे, तत्थ णं बहवे हत्थी पासइ बहवे आसे पुरिसे संनद्धवद्धकवए
 ते(सि)सिं णं पुरिसाणं मज्झगयं एगं पुरिसं पासइ अव-ओडय जाव उब्भो(से)सि-
 ज्जमाणं, तए णं तं पुरिसं रायपुरिसा पडमं(मि)सि चच्चरंसि नि(सि)सीया(वि)
 वेंति २ ता अट्ठ चुल्ल[प्पिय]पिउए अग्गओ घाएंति २ [त्ता] कसप्पहारेहिं तालेमाणा २
 कल्लणं का-गणिमंसाइं खावेंति खावेत्ता रुहिरपा(णी)णियं च पा(यं)एंति तयाणंतरे
 च णं दोचंसि चच्चरंसि अट्ठ चुल्ल(लहु)माउयाओ अग्गओ घाएंति एवं तच्चे चच्चरे
 अट्ठ महापिउए चउत्थे अट्ठ महामाउयाओ पंचमे पुत्ते छट्ठे सुण्हा सत्तमे जामा-
 उया अट्ठमे धूयाओ नवमे नत्तुया दसमे नत्तुईओ एक्कारसमे नत्तुयावई बारसमे
 नत्तुइणीओ तेरसमे पिउत्तिसयपइया चो(चउ)इसमे पिउसियाओ प-च्चरसमे माउ-

सियापइया सोलसमे माउ(स्ति)सियाओ सत्तरसमे मा(सि)मियाओ अट्टारसमे अव-
 सेसं मित्त-नाइ-नियगसयणसंबंधिपरि-यणं अगगओ घा-एंति २ ता कसप्पहारेहिं
 तालेमाणा २ कल्लुणं का-गणिमंसाइं खावेंति [२] रुहिरपा-णियं च पाएंति ॥ १५ ॥
 तए णं से भगवं गोयमे तं पुरिसं पा(स)सेइ २ ता इमे ए(अयमे)यारुवे अज्झ-
 थिए (पत्थिए) समुप्पन्ने जाव तहेव निगए एवं वया-सी-एवं खलु अहं णं भंते !
 तं चेव जाव से णं भंते ! पुरिसे पुव्वभवे के आसी जाव विहरइ ? एवं खलु
 गोयमा ! तेणं कालेणं तेणं समएणं इहेव जंबुदीवे दीवे भारहे वासे पुरिमताले-ना-
 (म)मं नयरे होत्था रिद्धं, तत्थ णं पुरिमताले नयरे उदिओदिए-नामं राया होत्था
 महया, तत्थ णं पुरिमताले निन्नए-नामं अंडयवाणियए होत्था अट्टे जाव अपरि-
 भूए अहम्मिए जाव दुप्पडियणं दे, तस्स णं नि-न्नयस्स (अंडयवाणिय-ग-स्स) बहवे
 पुरिसा दि-न्नभइ भत्तवेयणा कल्लाकल्लिं कु(को)दालियाओ य पत्थि(या)यपिडए [य]
 गि-ण्हंति, [२] पुरिमतालस्स नयरस्स परिपेरंतेसु बहवे काइअंडए य घू(घू)इअं-
 डए य पारेवइ० टिट्ठिभिअंडए य ख[गि]गि अं० मयूरि० कुकुडिअंडए य अ-ञ्जेसि
 च बहूणं जलयरथलयरखहयरमाईणं अंडाई गेण्हंति २ ता पत्थियपिडगाई भरेंति
 [२] जेणेव नि-न्नयए अंडवाणियए ते[णामे]णेव उवागच्छन्ति २ ता नि-न्नय(ग)स्स
 अंडवाणियस्स उवणेंति, तए णं (से) तस्स नि-न्नयस्स अंडवाणियस्स बहवे पुरिसा
 दि-न्नभइ० बहवे काइअंडए य जाव कुकुडिअंडए य अ-ञ्जेसि च बहूणं जलयरथल-
 यर(खेच)खहयरमाईणं अंडयए तवएसु य कवल्लीसु य कं(डु)दुएसु य भज्जणएसु य
 इंगालेसु य त(लिं)लेंति भ(जं)जेंति सो(ल्लिं)लेंति तलेंता भ(जिं)जंता सो-ल्लेंता
 रायमग्गे अंतरावणंसि अंडय(एहि य)पणि(ग)एणं वित्तिं कप्पेमाणा विहरेंति,
 अप्प(णो)णा-वि य णं से नि-न्नयए अंडवाणियए तेहिं बहूहिं काइ(य)अंडएहि य
 जाव कुकुडिअंडएहि य सोल्लेहि य तलिएहि य भ(जे)जिएहि य सुरं च""आसाएमाणे
 विसाएमाणे विहरइ, तए णं से नि-न्नए अंडवाणियए एयकम्मे ४ सुबहुं पावकम्मं
 समज्जिणित्ता एगे वाससहस्सं परमाउयं पालइत्ता कालमासे कालं किच्चा तच्चाए पुढ-
 वीए उल्लोससत्तसागरोवमठि-इएसु नेरइएसु नेरइयत्ताए उवव-न्ने ॥ १६ ॥ से णं तओ
 अणंतरे उव्वट्ठित्ता इहेव सालाडवीए चोरपल्लीए विजयस्स चोरसेणावइस्स खंदसिरीए
 भारियाए कुट्ठिंसि पुत्तत्ताए उवव-न्ने, तए णं तीसे खंदसिरीए भारियाए अ-न्नया
 कया-इ तिण्हं मासाणं बहुपडिपुण्णाणं इमे एयारुवे दोहले पाउब्भूए-ध-न्ना-ओ णं
 ताओ अम्मया० जाओ णं बहूहिं मित्त-नाइ-नियगसयणसंबंधिपरियणमहिलाहिं
 अ-न्नाहि य चोरमहिलाहिं सद्धिं संपरिवुडा ण्हाया सव्वालंकारविभूसिया वि-उल्लं

असणं पाणं खाइमं साइमं सुरं च म० च आसाएमाणी विसाएमाणी० विहरति
जिमियभुत्तुरागयाओ पुरिस-नेवत्थिया संनद्धवद्ध जाव [गहियाउहए] पहरणा (वरणा)
भरिए (हि य) हिं फ (लि) लएहिं निक्किट्टाहिं असीहिं अंसागएहिं तोणेहिं सज्जीवेहिं
धणुहिं समुक्खित्तेहिं सरेहिं समुल्लालिया-हिं दा (हा) माहिं लंबिया-हि य ओसारि-
याहिं ऊरुधंटाहिं छिप्पत्तरेणं वज्जमाणेणं २ महया उक्किट्ट जाव समुद्धरवभूर्य-पिव
करेमाणीओ सालाडवीए चोरपल्लीए सव्वओ समंता ओलोएमाणीओ २ आहिं ड-
माणीओ (२) दोहलं विणेंति, तं जइ (णं) अहं-पि जाव [दोहलं] विणिज्जामि-
त्तिकट्टु तंसि दोहलंसि अविणिज्जमाणंसि जाव झियाइ । तए णं से विजए चोर-
सेणावई खंदसि-रिभारियं ओहय जाव पासइ, २ [ता] एवं वयासी-किं णं
तुमं देवाणुप्पिया ! ओहय जाव झियासि ?, तए णं सा खंदसिरी (भा०) विजयं
एवं वयासी-एवं खलु देवाणुप्पिया ! म-म तिण्हं मासाणं जाव झियामि, तए णं से
विजए चोरसेणावई खंदसिरीए भारियाए अंति (यं) ए एयमट्ठं सोच्चा निसम्म खंद-
सिरीभारियं एवं वयासी-अहासुहं देवाणुप्पियत्ति एयमट्ठं पडिसुणेइ, तए णं सा
खंदसि (री) रिभारिया विजएणं चोरसेणावइणा अब्भणु-चाया समाणी हट्ठवट्ठ० बट्ठहिं
मित्त जाव अच्चाहि य बट्ठहिं चोरमहिलाहिं सद्धिं संपरिवुडा ण्हाया सव्वालंकार-
विभूसिया वि-उलं असणं ४ सुरं च ६ आसाएमा (णा) णी ४ विहरइ जिमिय-
भुत्तुरागया पुरिस-नेव [च्छा] त्था संनद्धवद्ध जाव आहिं डमाणी दोहलं विणेइ, तए णं
सा खंदसि-रिभारिया संपुण्णदोहला संमाणियदोहला विणीयदोहला वोच्छि-न्नदोहला
संप-न्नदोहला तं गब्भं सुहंसुहेणं परिवहइ, तए णं सा (खंदसिरी) चोरसेणावइणी
नवण्हं मासाणं बहुपडिपुण्णाणं दार-गं पयाया, तए णं से विज (य) ए चोरसेणावई
तस्स दारगस्स महया इ (द्धि) द्द्वीसकारसमुदएणं दसरत्तं ठिइवडियं करेइ, तए णं
से विजए चोरसेणावई तस्स दारगस्स एकारसमे दिवसे वि-उलं असणं ४
उवक्खडावेइ [२] मित्त-नाइ० आमंतेइ २ ता जाव तस्सेव मित्त-नाइ० पुरओ एवं
वयासी-जम्हा णं अम्हं इमंसि दारगंसि गब्भगयंसि समाणंसि इमे एयारुवे दोहले
पाउब्भूए तम्हा णं होउ अम्हं दार (गे) ए अभग्गसेणे नामेणं, तए णं से अभग्गसेणे
कुमारे पंचधाई (ए) जाव परिवट्ठइ ॥ १७ ॥ तए णं से अभग्गसेणे कुमारे
उम्मुक्कबालभावे यावि होत्था अट्ट दारियाओ जाव अट्टओ दाओ.....उरिय
पासा०.....भुंजमाणे विहरइ, तए णं से विजए चोरसेणावई अ-न्नाया कया (ई) इ
कालधम्मणा संजुत्ते, तए णं से अभग्गसे (ण) ने कुमारे पंचहिं चोरसएहिं सद्धिं संपरि-
वुडे रोयमाणे कंदमाणे विलवमाणे विजयस्स चोरसेणावइस्स महया इ-द्धीसकार-

समुद्राणं नीहरणं करेइ २ ता बहूईं लोइयाईं मयकिचाईं करेइ २ ता के(व)णइ-
 कालेणं अप्पसोए जाए यावि होत्था, तए णं ते पंच चोरसयाईं अन्नया कया(ईं)इ
 अभग्गसेणं कुमारं सालाडवीए चोरपल्लीए महया २ चोरसेणावइताए अभिसिंचंति ।
 तए णं से अभग्गसे-णे कुमारं चोरसेणावई जाए अहम्मिए जाव कप्पायं गि-ण्हइ,
 तए णं (से) ते जाणवया पुरिसा अभग्गसेणेणं चोरसेणावइणा बहुगामघायावणाहिं
 ताविया समाणा अन्नमन्नं सद्धान्तेति २ ता एवं वयासी-एवं खलु देवाणुप्पिया !
 अभग्गसेणे चोरसेणावई पुरिमतालस्स नयरस्स उत्तरिळ्ळं जणवयं बहूहिं गामघाएहिं
 जाव निद्धणं करेमाणे विहरइ, तं सेयं खलु देवाणुप्पिया ! पुरिमताले नयरे
 म-हाबलस्स र-न्नो एयमट्ठं वि-न्नवित्तए, तए णं ते जा(ज)णवया पुरिसा एयमट्ठं
 अन्नमन्नेणं पडिउणेंति २ ता महत्थं महग्गं महरिहं रा(य)यारिहं पाहुडं
 गि-ण(हें)हंति २ ता जेणेव पुरिमताले नयरे तेणेव उवाग० २ ता जेणेव म-हाबले
 राया तेणेव उवाग० २ ता म-हाबलस्स र-न्नो तं महत्थं जाव पाहुडं उवणेंति [२]
 करयल....अंजलिं कट्ठु म-हाबलं रायं एवं वयासी-एवं खलु सामी ! सालाडवीए
 चोरपल्लीए अभग्गसेणे चोरसेणावई अम्हे बहूहिं गामघाएहि य जाव निद्धणे करेमाणे
 विहरइ, तं इच्छामि णं सामी ! तु(ब्भं)ज्झं बाहुच्छायापरिग्गहिथा निब्भया निरु-
 वसग्गा सुहेणं परिवसित्तएत्तिकट्ठु पा-य-वपडिया पंजलिउडा म-हाबलं रायं एयमट्ठं
 वि-न्नवेंति, तए णं से म-हाबले राया तेसिं जा-णवयाणं पुरिसाणं अंतिए एयमट्ठं
 सोच्चा निसम्म आसुरुते जाव मिसिमिसेमाणे तिवलियं भिउडिं निडाले साहट्ठु
 दंडं सद्धान्ते २ ता एवं वयासी-गच्छह णं तु० देवाणुप्पिया ! सालाडविं चोरपल्लिं
 विळुंपाहि २ ता अभग्गसेणं चोरसेणावई जीवग्गाहं गि-ण्हाहि २ ता म-मं उव-
 णेहि, तए णं से दंडे तहत्ति एयमट्ठं पडिउणेइ, तए णं से दंडे बहूहिं पुरिसेहिं
 संनद्धबद्ध जाव पहरणेहिं सद्धिं संपरिवुडे मग्गइएहिं फलएहिं जाव छिप्पतूरेणं
 वज्जसाणेणं महया जाव उक्कि(ट्ठि)ट्ठ जाव करेमाणे पुरिमतालं नयरं मज्झंमज्झेणं
 निग्गच्छइ २ ता जेणेव सालाडवी(ए) चोरपल्ली(ए) तेणेव पहारेतथ गमणाए, तएणं
 तस्स अभग्गसेणस्स चोरसेणावइ(य)स्स चारपुरिसा इमीसे कहाए लद्धट्ठा समाणा
 जेणेव सालाडवी चोरपल्ली जेणेव अभग्गसेणे चोरसेणावई तेणेव उवाग(या)च्छंति
 २ ता करयल जाव एवं वयासी-एवं खलु देवाणुप्पिया ! पुरिमताले नयरे
 म-हाबलेणं र-न्ना म(हया)हाभडचडगरेणं दं(डं)डे आणत्ते-गच्छह णं तु(मे)ब्भे
 देवाणुप्पिया ! सालाडविं चोरपल्लिं विळुंपाहि अभग्गसेणं चोरसेणावई जीव(ग)गाहं
 येण्हाहि २ ता म-मं उवणेहि, तए णं से दंडे महया भडचडगरेणं जेणेव

सालाडवी चोरपल्ली तेणेव पहारेत्थ गमणाए, तए णं से अभग्गसेणे चोरसेणावई तेसिं चारपुरिसाणं अंतिए एयमहं सोच्चा निसम्म पंच-चोरसयाईं सद्दावेइ सद्दावेत्ता एवं वयासी-एवं खलु देवाणुप्पिया ! पुरिमताले नयरे म-हाबले जाव तेणेव पहारेत्थ गमणाए (आगए, तए णं से अभग्गसेणे ताईं पंच-चोरसयाईं एवं वयासी-) तं सेयं खलु देवाणुप्पिया ! अम्हं तं दंडं सालाडविं चोरपल्लीं असंप(त्तं)ते अंतरा चेव पडिसेहितए, तए णं ताईं पंच-चोरसयाईं अभग्गसेणस्स चोरसेणावइस्स तहत्ति जाव पडिस्सुणेंति, तए णं से अभग्गसेणे चोरसेणावई वि-उलं असणं पाणं खाइमं साइमं उवक्खडावेइ २ ता पंचहिं चोरसएहिं सद्धिं ण्हाए भोयणमंडवंसि तं वि-उलं असणं ४ सुरं च ६ आसाएमाणे ४ विहरइ, जिमियमुत्तुरागए-वि (अ) य णं समाणे आयंते चोक्खे परमसुइभूए पंचहिं चोरसएहिं सद्धिं अलं चम्मं दु(रु)रुइइ २ [ता] सं-नद्धवद्ध जाव पहरणेहिं मग्गइएहिं जाव रवेणं पुब्बा-(पच्चा)वरण्हकालसमयंसि सालाडवीओ चोरपल्लीओ निग्गच्छइ २ [ता] विसमदुग्गगहणं ठिए गहियभत्तपाणे तं दंडं पडिवालेमाणे चिद्धइ, तए णं से दंडे जेणेव अभग्गसेणे चोरसेणावई तेणेव उवागच्छइ २ [ता] अभग्गसेणेणं चोरसेणावइणा सद्धिं संपलग्गे यावि होत्था, तए णं से अभग्गसेणे चोरसेणावई तं दंडं खिप्पामेव हयमहिय जाव पडिसेहिं० तए णं से दंडे अभग्गसेणे-णं चोरसेणावइणा हय जाव पडिसेहिए समाणे अ(त्त)थामे अबले अवीरिए अपुरिसक्कारपरक्कमे आधारणिज्जमिति-कट्टु जेणेव पुरिमताले नयरे जेणेव म-हाबले राया तेणेव उवागच्छइ २ ता करयल० एवं वयासी-एवं खलु सामी ! अभग्गसेणे चोरसेणावई विसमदुग्गगहणं ठिए गहियभत्तपा(णि)णीए नो खलु से सक्का केणइ सुबहुएणावि आसबलेण वा हत्थिबलेण वा जोहबलेण वा रहबलेण वा चाउरिणिणिं-पि० उरंउरेणं गिण्हितए ताहे सामेण य मे-एण य उवप्प(दा)याणेण य वि[रु](वी)संभमाणे उ(प)वयए यावि होत्था, जे-वि (य) से अर्द्धिभतरगा सीसग(स)भमा मित-नाइ-नियगसयण-संबंधिपरियणं च वि-उलधणकणगरयणसंतसारसाव(इ)एज्जेणं सिद्धिं अभग्गसेणस्स य चोरसेणावइस्स अभिक्खणं २ महत्थाईं महग्घाईं महुरिहाईं पाहुडाईं पेसेइ [२] अ(भंग)भगासेणं चोरसेणावई वी(वि)संभमाणेइ ॥ १८ ॥ तए णं से म-हाबले राया अ-न्नया कया-इ पुरिमताले नयरे एणं महं महइमहालियं कूडागारसालं करेइ अणेगक्खंभसयसंनिविद्धं पासा(इ)इयं दरसणिज्जं०, तए णं से म-हाबले राया अ-न्नया कया-इ पुरिमताले नयरे उस्सुक्कं जाव दसरत्तं पमोयं (उग्ग)वोसावेइ २ ता कोडुंविपु(रि)से सद्दावेइ २ ता एवं वयासी-गच्छइ णं तुभं देवाणुप्पिया !

सालाडवीए चोरपल्लीए तत्थ णं तु[ब्भे]महे अभग्गसेणं चोरसेणावई करयल जाव एवं व०-एवं खलु देवाणुप्पिया ! पुरिमताले नयरे महाबलस्स र-न्नो उस्सुक्के जाव दसरत्ते पमो-ए उग्घोसिए तं किं णं देवाणुप्पिया ! वि-उलं असणं ४ पुप्फवत्थ-(गंध)मल्लालङ्का(रै य)रं ते इहं हव्वमाणिज्ज उ उदाहु सयमेव गच्छि[त्था]त्ता ? तए णं [ते] कोडुंबियपुरिसा म-हाबलस्स र-न्नो करयल जाव पडिउणेंति २ ता पुरिमतालाओ नयराओ पडि० नाइविकिट्ठेहिं अद्धाणेहिं सुहेहिं वस(हिं)हीपायरासेहिं जेणेव सालाडवी चोरपल्ली तेणेव उवागच्छंति [२] अभग्गसेणं चोरसेणावई करयल जाव एवं वयासी-एवं खलु देवाणुप्पिया ! पुरिमताले नयरे म-हाबलस्स र-न्नो उस्सुक्के जाव उदाहु सयमेव गच्छि-त्ता ? तए णं से अभग्गसेणे चोरसेणावई ते कोडुंबियपुरिसे एवं वयासी-अहं णं देवाणुप्पिया ! पुरिमता(ले)लनय(रै)रं सयमेव गच्छामि, ते कोडुंबियपुरिसे सक्कारेइ...पडिविसज्जेइ, तए णं से अभग्गसेणे चोरसेणावई बहूहिं मित्त जाव परिवुडे ण्हाए सव्वालंकारविभूसिए सालाडवीओ चोरपल्लीओ पडि-निक्खमइ २ ता जेणेव पुरिमताले नयरे जेणेव म(-ल)हाबले राया तेणेव उवागच्छइ २ ता करयल० म(हव्व)हाबलं रायं जएणं विजएणं वद्धावेइ २ ता महत्थं जाव पाहुडं उवणेइ । तए णं से म-हाबले राया अभग्गसेणस्स चोरसेणावइस्स तं महत्थं जाव पडिच्छइ, अभग्गसेणं चोरसेणावई सक्कारेइ समाणेइ पडिविसज्जेइ कूडागारसालं च से आवसहं दलयइ, तए णं [से] अभग्गसेणे चोरसेणावई म-हाबलेणं र-न्ना विसजिए समाणे जेणेव कूडागारसाला तेणेव उवागच्छइ, तए णं से म(-ल)हाबले राया कोडुंबियपुरिसे सद्दावेइ २ ता एवं वयासी-गच्छह णं तुब्भे देवाणुप्पिया ! वि-उलं असणं पाणं खाइमं साइमं उवक्खडावेह २ ता तं वि-उलं असणं ४ सुरं च ६ सुबहुं पुप्फ[वत्थ]गंधमल्लालंकारं च अभग्गसेणस्स चोरसेणावइस्स कूडागार-सा(लाए)लं उवणेह, तए णं ते कोडुंबियपुरिसा करयल जाव उवणेंति, तए णं से अभग्गसेणे चोरसेणावई बहूहिं मित्त-नाइ जाव सद्धिं संपरिवुडे ण्हाए सव्वालंकारवि-भूसिए तं वि-उलं असणं ४ सुरं च ६ आसाएमाणे ४ पमत्ते विहरइ, तए णं से म-हाबले राया कोडुंबियपुरिसे सद्दावेइ २ ता एवं वयासी-गच्छह णं तु(ब्भे)महे देवाणुप्पिया ! पुरिमतालस्स नयरस्स दुवाराई पिहे० अभग्गसेणं चोरसेणावई जीव-गाहं गिण्हह [२] ममं उवणेह, तए णं ते कोडुंबियपुरिसा करयल जाव पडिउणेंति २ ता पुरिमतालस्स नयरस्स दुवाराई पिहेंति अभग्गसेणं चोरसेणावई जीवगाहं गिण्हंति [२] म-हाबलस्स र-न्नो उवणेंति, तए णं से म-हाबले राया अभग्गसेणं चोरसेणा-वई एएणं विहाणेणं वज्झं आणवेइ, एवं खलु गोयमा ! अभग्गसेणे चोरसेणावई

पुरा(पु)पोराणं जाव विहरइ । अभग्गसेणे णं भंते ! चोरसेणावई कालमासे कालं किच्चा कहिं गच्छिहि० कहिं उववज्जिहिइ ? गोयमा ! अभग्गसेणे चोर-सेणावई सत्तत्तीसं वासाइ परमाउयं पालइत्ता अज्जेव तिभागावसेसे दिवसे मूलभिन्ने कए समणे कालमासे कालं किच्चा इमीसे रयणप्पभाए पुढवीए उक्कोसं...नेरइएसु उववज्जिहिइ, से णं तओ अणंतरं उव्वट्ठित्ता...एवं संसारो जहा पढ(मो)मे जाव पुढवीए, तओ उव्वट्ठित्ता वाणारसीए नयरीए सूयरत्ताए पच्चायाहिइ, से णं तत्थ सो[स्]यरिएहिं जीवियाओ ववरोविए समणे तत्थेव वाणारसीए नयरीए सेट्ठिकुलंसि पुत्तत्ताए पच्चायाहिइ, से णं तत्थ उम्मुक्कवाल्हाभावे...एवं जहा पढमे जाव अंतं काहिइ ॥ निकखेवो ॥ १९ ॥ तइयं अज्झयणं समत्तं ॥

जइ णं भंते !...चउत्थस्स उक्खेवो, एवं खलु जंबू ! तेणं कालेणं तेणं सम-एणं साहंजणी-नामं नयरी होत्था रिद्धत्थिमियसमिद्धा, तीसे णं साहंजणीए वहिया उत्तरपुर-त्थिमे दिसीभाए देवरमणे नामं उज्जाणे होत्था, तत्थ णं साहंजणीए नय-रीए महचंदे नामं राया होत्था महया०, तस्स णं महचंदस्स र-च्चो सुसेणे नामं अमच्चे होत्था सामभेयदंड० निग्गहकुसले, तत्थ णं साहंजणीए नयरीए सु(दं)दरि-सणा-नामं गणिया होत्था वण्णओ, तत्थ णं साहंजणीए नयरीए सुभदे नामं सत्थ-वाहे (हो०) परिवसइ अट्ठे०, तस्स णं सुभदस्स सत्थवाहस्स भद्दा-नामं भारिया होत्था अहीण०, तस्स णं सुभद(स्स)सत्थवाहस्स पुत्ते भद्दाए भारियाए अत्तए सगडे नामं दारए होत्था अहीण०, तेणं कालेणं तेणं समएणं समणे भगवं महावीरे...समोस-रणं परिसा राया य निग्गए धम्मो कहिओ परिसा (रा०) पडिग(ओ)या, तेणं कालेणं तेणं समएणं समणस्स भगवओ महावीरस्स जेठ्ठे अंतेवासी जाव रायमग्गमोगाढे तत्थ णं हत्थी आसे पुरिसे...ते-सिं च णं पुरिसाणं मज्झग[ए]यं पासइ एणं सइ-त्थीयं पुरिसं अव-ओड-यवंधणं उक्खित्त जाव घो(सेणं)सिज्जमार्णं चित्ता तहेव जाव भगवं वागरेइ, एवं खलु गोयमा ! तेणं कालेणं तेणं समएणं इहेव जंबुदीवे बीवे भारहे वासे छगलपुरे नामं नयरे होत्था, तत्थ सी(सिं)हगि(रि)री नामं राया होत्था महया०, तत्थ णं छगलपुरे नयरे छ(णिं)णिए नामं छागलि(छगली)ए परिवसइ अट्ठे० अहम्मिए जाव दुप्पडियाणंदे, तस्स णं छ-णियस्स छा(छ)गलियस्स बहवे अ(जा)याण य ए(ला)लयाण य रोज्जाण य वसभाण य ससयाण य सूयराण य पसयाण य सिंघाण य हरिणाण य मयूराण य महिसाण य सयबद्धाण य सहस्सब-द्धाण य जूहाणि वाडगसि संनिरुद्धाई चिट्ठंति, अ-न्ने य तत्थ बहवे पुरिसा दि-क्क-भइभत्तवेयणा बहवे अए य जाव महिसे य सारक्(ख)खेमाणा संगोवेमाणा चिट्ठंति,

अ-ञ्जे य से बहवे पुरिसा अयाण य जाव गिहंसि निरुद्धा चिट्ठंति, अ-ञ्जे य से बहवे पुरिसा दि-न्नभइभत्तवेयणा बहवे सय(अ)ए य (जाव) सहस्(महि)से य जीवियाओ ववरो-वेंति [२] मंसाइं कं(प्पि-णी)प्पणिकप्पियाइं करेंति [२] छ(णी)णियस्स छाग-लि-यस्स उवणेंति, अञ्जे य से बहवे पुरिसा ताइं ब(ट्ठ)हुयाइं अयमंसाइं जाव महि-समंसाइं तवएसु य कवल्लीसु य कं(दू)दुएसु य भज्जणेषु य इंगालेषु य त(लं)लेंति य भज्जेति य सो(ल्लयं)लेंति य ० तओ रायमग्गंसि वित्तिं कप्पेमाणा विहरंति, अप्पणा-वि-य णं से छ(ज्जिय-)णिए छाग(ली)लिए तेहिं बहुवि० मंसेहिं जाव महि-समंसेहिं सोल्लेहि य त(ले)लिएहि य भ(ज्जे)जिएहि य सुरं च ६ आसाएमाणे विहरइ, तए णं से छ(ज्जी)णिए (य) छगलि-ए एयकम्मं... सुबहुं पावकम्मं कलि-कल्लसं समज्जिणित्ता सत्त-वाससयाइं परमाउयं पालइत्ता कालमासे कालं किच्चा चो-त्थीए पुढवीए उक्कोसेणं दससागरोवमठिइएसु नेरइयत्ताए उवव-ञ्जे ॥ २० ॥ तए णं तस्स सुभइ-सत्थवाहस्स भइा भारिया जा(व)यनिंदुया यावि होत्था, जाया जाया दारगा विणिहायमावज्जंति, तए णं से छ-णिए छाग(ले-)लिए चो-त्थीए पुढवीए अणंतरे उव्वट्ठिता इहेव साहंजणीए नयरीए सुभइस्स सत्थवाहस्स भइाए भारियाए कुच्छिसि पुत्तत्ताए उवव-ञ्जे, तए णं सा भइा सत्थवाही अ-न्नया कया-इ नवण्हं मासाणं बहुपडिपुण्णाणं दारगं पयाया, तए णं तं दारगं अम्मापियरो जायमेत्तं चेव सगडस्स हे(ट्ठ)ट्ठा[ओ] ठावेंति (०) दोच्चं-पि गिण्हावेंति (०) अणुपुव्वेणं सारव(खं)खेंति संगोवेंति संवह्वेंति जहा उज्झियए जाव जम्हा णं अम्हं इमे दारए जायमेत्ते चेव सगडस्स हे(ट्ठ) ठाविए तम्हा णं हो-उ णं अम्हं एस दारए सगडे नामेणं, सेसं जहा उज्झियए, सुभइे लवणसमुदे कालगए माया-वि कालगया, से(ऽ)वि सयाओ गिहाओ निच्छूढे, तए णं से सगडे दारए सया-ओ गिहाओ निच्छूढे समाणे सिं(सं)घाडग... तहेव जाव सु-दरिसणाए गणियाए सद्धिं संपलग्गे यावि होत्था, तए णं से सुसेणे अमच्चे तं सगडं दारगं अ-न्नया कया-इ सुदरिसणाए गणियाए गिहाओ निच्छुभावेइ [२] सु-दरिस(णं)णियं गणियं अर्ब्भितरियं ठा-वेइ २ ता सुदरिसणाए गणियाए सद्धिं उरालाइं मणुस्सगाइं भोगभोगाइं भुंजमाणे विहरइ, तए णं से सगडे दारए सुदरिसणा(ओ)ए गिहाओ निच्छूढे समाणे अ-न्नत्थ कत्थ(इ)वि सुइं वा... अलभ० अ-न्नया कया-इ रह(स्सि)सियं सुदरिसणा-गेहं(सिं) अणुप्पविसइ २ ता सुदरि(सि)सणाए सद्धिं उरालाइं भोगभोगाइं भुंजमाणे विहरइ, इमं च णं सुसेणे अमच्चे ण्हाए सव्वालंकारविभूसिए मणुस्सवग्गुराए जेणेव सुदरिसणा[ए] गणियाए गेहे तेणेव उवागच्छइ २ [ता] सगडं दारयं सु-दरिसणाए

गणियाए सद्धिं उरालाई भोगभोगाई भुंजमाणं पासइ २ ता आसुस्ते जाव
 मि(स)सिमिसेमाणे तिवलियं भिउडिं निडाले साहडु सगडं दारयं पुरिसेहिं
 गिण्हावेइ [२] अडि जाव महियं करेइ [२] अव-ओड-यवंध(णगं)णं करेइ २ ता
 जेणेव महचंदे राया तेणेव उवागच्छइ उवागच्छिता करयल जाव एवं वयासी-एवं
 खलु सामी ! सगडे दारए म-मं अंते-उरंसि अवरडे, तए णं से महचंदे राया
 सुसेणं अमच्चं एवं वयासी-तुमं चेव णं देवाणुप्पिया ! सगडस्स दारगस्स दंडं
 (नि)वत्तेहि, तए णं से सुसेणे अमच्चे महचंदेणं र-न्ना अब्भणु-च्चाए समाणे सगडं दारयं
 सुदरिसणं च गणियं एएणं विहाणेणं वज्झं आणवेइ, तं एवं खलु गोयमा ! सगडे
 दार-ए पु(पो)रा-पोराणाणं....पच्चणुभवमाणे विहरइ ॥ २१ ॥ सगडे णं भंते !
 दारए कालगए कहिं गच्छिहि० कहिं उववज्जिहिइ ? सगडे णं दारए गोयमा !
 सत्ताव-ञं वासाइं परमाउयं पालइता अज्जेव तिभागावसेसे दिवसे एगं महं अ(ओ)-
 योमयं त(त्त)तं समजोइभूयं इ(त्थी)त्थिपडिमं अवयासाविए समाणे कालमासे कालं
 किच्चा इमीसे रयणप्पभाए पुढवीए नेरइयत्ताए उववज्जिहिइ, से णं तथो अणंतंरं
 उव्वट्ठिता रायगिहे नयरे मातंगकुलंसि जुग(जम)लत्ताए पच्चायाहिइ, तए णं तस्स
 दारगस्स अम्मापियरो नि[व]वत्तबारस(म)गस्स (दि०) इमं एयाह्वं गोणं नामधेज्जं
 करिस्संति, तं हो-उ णं दार० सगडे नामेणं हो-उ णं दारिया सुदरिसणा-नामेणं,
 तए णं से सगडे दारए उम्मुक्कबालभावे जोव्वण....भविस्सइ, तए णं सा सुदरि-
 सणा-वि दारिया उम्मुक्कबालभावा (विण(णा)णय) जोव्वणगमणुप्पत्ता रुवेण य जोव्व-
 णेण य लावण्णेण य उक्किट्ठा उक्किट्ठसरीरा यावि भविस्सइ, तए णं से सगडे दारए
 सुदरिसणाए रुवेण य जोव्वणेण य लावण्णेण य मुच्छिए ४ सुदरिसणाए (म०) सद्धिं
 उरालाईं (मा०) भोगभोगाईं भुंजमाणे विहरिस्सइ, तए णं से सगडे दारए अ-न्नाया
 (कया(इ)ईं) सयमेव कूड-गा-हितं उवसेपज्जिताणं विहरिस्सइ, तए णं से सगडे
 दारए कूड-गाहे भविस्सइ अहम्मिए जाव दुप्पडियार्णदे एयकम्म० सुबहुं पावकम्मं
 (जाव) समज्जिणित्ता कालमासे कालं किच्चा इमीसे रयणप्पभाए पुढवीए नेरइयत्ताए
 उवव-जे, संसारो तहेव जाव पुढवीए, से णं तथो अणंतंरं उव्वट्ठिता वाणारसीए
 नयरीए मच्छत्ताए उववज्जिहिइ, से णं तत्थ (णं) मच्छबंधिएहिं वहिए तत्थेव
 वाणारसीए नयरीए सेट्टिकुलंसि पुत्तत्ताए पच्चायाहिइ बोहिं बु(ज्झे)डे० पव्व०
 सोहम्मं कप्पे....महाविदेहे वासे सिज्झिहिइ ॥ निक्खेवो ॥ २२ ॥ चो-त्थं
 अज्झयणं समत्तं ॥

जइ णं भंते !....पंचमस्स (अज्झयणस्स) उक्खे(वओ)वो, एवं खलु जंबू ! तेणं

कालेणं तेणं समएणं कोसंबी-नामं नयरी होत्था रिद्धत्थिमिय० बाहिं चंदोरणे
 उज्जाणे, तत्थ णं कोसंबीए नयरीए सयाणीए नामं राया होत्था महया०, (त० णं स०
 २०) मियावई (णा०) देवी (हो० अ० जाव सु०), तस्स णं सयाणीयस्स (२०)
 पुत्ते मिया(वतीए)देवीए अत्तए उदायणे नामं कुमारे होत्था अहीण० जुवराया,
 तस्स णं उदायणस्स कुमारस्स पउमाव(इ)ई-नामं देवी होत्था, तस्स णं
 सयाणीयस्स सोमदत्ते नामं पुरोहिए होत्था रिउ[व]वेय०, तस्स णं सोमदत्तस्स
 पुरोहियस्स वसुदत्ता नामं भारिया होत्था, तस्स णं सोमदत्तस्स पुत्ते वसुदत्ताए
 अत्तए ब(व)हस्सइदत्ते नामं दारए होत्था अहीण०, तेणं कालेणं तेणं समएणं
 समणे भगवं महावीरे...समोस(रि)एरणं, तेणं कालेणं तेणं समएणं भगवं
 गोयमे तहेव जाव रायमग्गमोगाढे तहेव पासइ हत्थी आसे पुरि(से)समज्जे
 पुरिसं चिंता तहेव पुच्छइ पुव्वभवं भगवं वागरेइ-एवं खलु गोयमा ! तेणं
 कालेणं तेणं समएणं इहेव जंबुदीवे वीवे भारहे वासे सव्वओभदे नामं नयरे होत्था
 रिद्धत्थिमियसमि० तत्थ णं सव्वओभदे नयरे जियसत्तू (ना(णा)मं) राया (हो०),
 तस्स णं जियसत्तुस्स र-न्नो महेसरदत्ते नामं पुरोहिए होत्था रिउव्वेय जाव अथ-
 व्वणकुसले या(आ)वि होत्था, तए णं से महेसरदत्ते पुरोहिए जियसत्तुस्स र-न्नो
 रज्जवलविवद्धणअट्ठआए कळाकळि एगमेणं माहणदार-यं एगमेणं खत्तियदार-यं एग-
 मेणं वइस्सदार-यं एगमेणं सुददार-यं गिण्हावेइ २ ता तेसि जीवंतगाणं चेव हिय-
 उंडए गिण्हावेइ [२] जियसत्तुस्स र-न्नो संतिहोमं करेइ, तए णं से महेसरदत्ते
 पुरोहिए अट्ठमीचोइसीसु दुवे २ माहणखत्तियवइस्(वे)स सुदे चउ(चो)ण्हं मासाणं
 चत्तारि २ छण्हं मासाणं अट्ठ २ संवच्छरस्स सोलस २ जाहे जाहे(ऽ)वि-य णं
 जियसत्तू राया परवलेणं अभिजुंजइ ताहे ताहे-वि-य णं से महेसरदत्ते पुरोहिए
 अट्ठसयं माहणदारगाणं अट्ठसयं खत्तियदारगाणं अट्ठसयं वइस्सदारगाणं अट्ठसयं
 सुददारगाणं पुरिसेहिं गिण्हावेइ गिण्हावेत्ता तेसि जीवंताणं चेव हियउंडीओ
 गिण्हावेइ २ ता जियसत्तुस्स र-न्नो संतिहोमं करेइ ॥ २३ ॥ तए णं से महेसरदत्ते
 पुरोहिए एयकम्मे० सुबहुं पावकम्मं समज्जिणित्ता तीसं वाससयं परमाउयं पालइत्ता
 कालमासे कालं किच्चा पंच(मा)मीए पुढवीए उक्कोसेणं सत्तरससागरोवमट्ठिइए नर-गे
 उवव-न्ने, से णं तओ अणंतं उव्वट्ठित्ता इहेव कोसंबीए नयरीए सोमदत्तस्स पुरोहि-
 यस्स वसुदत्ताए [भारियाए] पुत्तत्ताए उवव-न्ने, तए णं तस्स दारगस्स अम्मापियरो
 निव्वत्तबारसाहस्स इ(मं)यं एयारुवं नाम(धि)धेजं करेंति, जम्हा णं अम्हं इमे दारए
 सोमदत्तस्स पुरोहियस्स पुत्ते वसुदत्ताए अत्तए तम्हा णं होउ अम्(ह)हं दारए ब-ह-

स्सइदत्ते नामेणं, तए णं से ब-हस्सइदत्ते दारए पंचवा(इ)ईपरिगर्हिए जाव परि-
 वड्ढइ, तए णं से ब-हस्सइदत्ते उम्मुक्कबालभावे जो(जु)व्वण० वि-न्नय० होत्था
 से णं उदायणस्स कुमारस्स पियबालवयस्सए यावि होत्था सहजायए सहव(व्ही)-
 ङ्घियए सहपंसुकीलियए, तए णं से सयाणीए राया अ-न्नया कया-इ कालधम्मणा
 संजुते, तए णं से उदाय(णे)णकुमारे ब(हु)ह्मिं राईसर जाव सत्थवाहपप्पि(इ)ईहिं
 सद्धिं संपरिवुडे रोयमाणे कंदमाणे विलवमाणे सयाणीयस्स र-न्नो महया इद्धीसक्कार-
 समुदएणं नीहरणं करेइ, [२] बह्मई लोइयाइं मयकिच्चाइं करेइ, तए णं ते बहवे
 राईसर जाव सत्थवाह० उदायणं कुमारं मह० रायाभिसेएणं अभिसिंचंति, तए
 णं से उदायणे कुमारे राया जाए महया०, तए णं से ब-हस्सइदत्ते दारए उदाय-
 णस्स र-न्नो पुरोहियकम्मं करेमाणे सव्वट्ठाणेसु सव्वभूमियासु अंतेउरे य विज्ज-
 वियारे जाए यावि होत्था, तए णं से ब-हस्स(ती)इदत्ते पुरोहिए उदायणस्स र-न्नो
 अंतेउ(रे)रंसि वेलासु य अवेलासु य काले य अकाले य राजो य वियाले य पवि-
 समाणे अ-न्नया कया-इ पउमाव(इ)ईए देवीए सद्धिं संपलग्गे यावि होत्था पउमावईए
 देवीए सद्धिं उरालाई भोगभोगाई भुंजमाणे विहरइ, इमं च णं उदायणे राया
 ण्हाए सव्वालंकारविभूसिए जेणेव पउमावई देवी तेणेव उवागच्छइ, [२] ब-ह-
 स्सइदत्तं पुरोहियं पउमावईदेवीए सद्धिं उरालाई भोगभोगाई भुंजमाणं पासइ [२]
 आसुस्ते... 'तिव(लिं)लियं भिउडिं [नि-डाले] साहट्टु ब-हस्सइदत्तं पुरोहियं
 पुरिसेहिं गिण्हावेइ जाव एएणं विहाणेणं वज्झं आ०, एवं खलु गोयमा ! ब-हस्सइदत्ते
 पुरोहिए पुरापोराणाणं जाव विहरइ । ब-हस्सइदत्ते णं भंते ! दारए इओ कालगए
 समाणे कहिं गच्छिहिइ कहिं उववज्जिहिइ ? गोयमा ! ब-हस्सइदत्ते णं दारए पुरोहिए
 चो-सद्धिं वासाइं परमाउयं पालइत्ता अज्जेव तिभागावसेसे दिवसे सू(ली)लियभिन्ने
 कए समाणे कालमासे कालं किच्चा इमीसे रयणप्पभाए पुढवीए०, संसारो तहेव०
 पुढवी, तओ हत्थिणाउरे नयरे मि-गताए पच्चायाइस्सइ, से णं तत्थ वाउरिएहिं
 वहिए समाणे तत्थेव हत्थिणाउरे नयरे सेट्टिकुलंसि पुत्तताए० बोहिं० सोहम्मे कप्पे०
 महाविदेहे वासे सिज्झहि० ॥ निक्खेवो ॥ २४ ॥ पंचमं अज्झयणं समत्तं ॥

जइ णं भंते ! '...छट्टस्स उक्खेवो एवं खलु जंबू ! तेणं कालेणं तेणं समएणं मधुरा
 ना(म)मं नयरी [होत्था], भंडीरे उज्जाणे, सि(री)रिदामे राया, बंधुसिरी भारिया
 पुत्ते नंदिवद्धणे (णा०) कुमारे अही० जुवराया, तस्स (णं) सि-रिदामस्स सुबन्(धु)-धू
 नामं अमच्चे होत्था सामदंड०, तस्स णं सुबन्धुस्स अमच्चस्स (ब० णा० भा० हो०
 त० णं सु० अ०) बहुमित्तपुत्ते नामं दारए होत्था अहीण०, तस्स णं सिरिदामस्स

र-ञो चित्ते नामं अलंकारिण होत्था, सिरिदामस्स र-ञो चित्तं बहुविहं अलंकारियकम्मं
 करेमाणे सव्वट्ठाणेसु य सव्वभूमियासु य अंतेउरे य दि-नवियारे यावि होत्था; तेणं
 कालेणं तेणं समएणं सामी समोस-ढे परिसा निग्गया राया(वि) निग्गओ जाव परिसा
 पडिगया, तेणं कालेणं तेणं समएणं समण० जेट्ठे....जाव रायमग्(गं ओ)गमोगाढे
 तहेव हत्थी आसे पुरिसि...., तेसिं च णं पुरिसाणं मज्झगयं एणं पुरिसं पासइ जाव
 नर-ना(रि)रीसंपरिवुडं, तए णं तं पुरिसं रायपुरिसा चच्चरंसि तत्तंसि अयोमयंसि सम-
 जो(इ)इभूय(सिं)सीहासणंसि नि(वि)वेसावेंति, तयाणंतरे च णं पुरिसाणं मज्झगयं
 बहुविहं अयकलसेहिं तत्तेहिं समजोइभूएहिं अप्पेगइया तंबभरिएहिं अप्पेगइया
 तउयभरिएहिं अप्पेगइया सीसगभरिएहिं अप्पेगइया कलकलभरिएहिं अप्पेगइया
 खारतेल्लभरिएहिं महया २ रायाभिसेएणं अभिसिं०, तयाणंतरे च णं तत्तं अयोमयं
 समजोइभूयं अयोमयसंडासएणं गहाय हारं पिणद्धंति, तयाणंतरे च णं अ(द्ध)हुहारं
 जाव पटं मउडं चिंता तहेव जाव वागरेइ-एवं खलु गोयमा ! तेणं कालेणं तेणं
 समएणं इहेव जंबुदीवे बीवे भारहे वासे सीहपुरे नामं नयरे होत्था रिद्ध०, तत्थ
 णं सीहपुरे नयरे सीहरहे नामं राया होत्था, तस्स णं सीहरहस्स र-ञो दुज्जोहणे
 ना(मे)मं चारगपालए होत्था अहम्मिए जाव दुप्पडियाणंदे, तस्स णं दुज्जोहणस्स
 चारगपालगस्स इमेयारुवे चारगमंडे होत्था-बहवे अयकुंडीओ अप्पेगइयाओ
 तंबभरियाओ अप्पेगइयाओ तउयभरियाओ अप्पेगइयाओ सीसगभरियाओ
 अप्पेगइयाओ कलकलभरियाओ अप्पेगइयाओ खारतेल्लभरियाओ अगणिकायंसि
 अह्हिया(ओ) चिट्ठंति, तस्स णं दुज्जोहणस्स चारगपालगस्स बहवे उट्ठियाओ
 अप्पेगइयाओ आसमुत्तभरियाओ अप्पेगइयाओ हत्थिसुत्तभरि(आ)याओ अप्पेग-
 इयाओ गोमुत्तभरियाओ अप्पेगइयाओ महिसमुत्तभरियाओ अप्पेगइयाओ उट्ठमुत्त-
 भरियाओ अप्पेगइयाओ अयमुत्तभरियाओ अप्पेगइयाओ एल(य)मुत्तभरियाओ
 बहुपडिपुण्णाओ चिट्ठंति । तस्स णं दुज्जोहणस्स चारगपालगस्स बहवे हट्(थुं)थं(द्ध)दु-
 याण य पायं-दुयाण य हवीण य नियलाण य संकलाण य पुंजा (य) निगरा य संनि-
 विखत्ता चिट्ठंति, तस्स णं दुज्जोहणस्स चारगपालगस्स बहवे वेणुल्याण य वेत्तल्याण
 य चिन्नाल्याण य छिया(णं)ण य कसाण य वायरासीण य पुंजा निगरा चिट्ठंति,
 तस्स णं दुज्जोहणस्स चारगपालगस्स बहवे सिलाण य लउडाण य मोग्गराण य
 कणंगराण य पुंजा निगरा चिट्ठंति, तस्स णं दुज्जोहणस्स चारगपालगस्स बहवे
 तंताण य वरत्ताण य वा(ग)गुर(जा)याण य वा(बा)लयसुत्तरज्जूण य पुंजा निगरा
 चिट्ठंति, तस्स णं दुज्जोहणस्स चारगपालगस्स बहवे असिपत्ताण य करपत्ताण य

खुरपत्ताण य कलंबचीरपत्ताण य पुंजा निगरा चिट्ठंति, तस्स णं दुज्जोहणस्स चार-
गपालगस्स बहवे लोहखीलाण य कडगसक्कराण य चम्मपट्ठाण य अल्लपट्ठाण य
पुंजा निगरा चिट्ठंति, तस्स णं दुज्जोहणस्स चारगपालगस्स बहवे सूईण य डंभणाण
य कोट्टिछाण य पुंजा निगरा चिट्ठंति, तस्स णं दुज्जोहणस्स चारगपालगस्स बहवे
पच्छा(सत्था)ण य पिप्पलाण य कुहाडाण य नहच्छेयणाण य दब्भतिणाण य पुंजा
निगरा चिट्ठंति, तए णं से दुज्जोहणे चारगपा(ले)लए सीहर(थ)हस्स र-ओ बहवे
चोरे य पारदारिए य गंठिभे-ए य रायाव(का)यारी य अण[हा]धारए य बालघांयए
य वि--संभवाए य जूयग(सुतिक)रे य सं(खं)डपेटे य पुरिसेहिं गिण्हावेइ २ ता
उत्ताणए पाडेइ [२] लोहदंडे(ण)णं मुहं विहाडेइ [२] अप्पेगइए तत्ततंबं पजेइ अप्पे-
गइ(या)ए तउयं पजेइ अप्पेगइए सीसगं पजेइ अप्पेगइए कलकलं पजेइ अप्पे-
गइए खार(ति)तेल्लं [पजेइ] अप्पेगइयाणं तेणं चेव अभिसेयगं करेइ, अप्पेगइए उत्ता-
णए पाडेइ [२] आसमुत्तं पजेइ अप्पेगइए हत्थिमुत्तं पजेइ जाव एलमुत्तं पजेइ,
अप्पेगइए हे(हि)ट्ठासुहे पाडेइ, छडछडस्स वम्मावेइ, [२] अप्पेगइयाणं तेणं चेव
ओ-वीलं दलयइ, अप्पेगइए हत्थं-दुयाइ बंधावेइ अप्पेगइए पायं-दु(डियं)ए बंधा-
वेइ, अप्पेगइए हडिबंधणं करेइ अप्पेगइए निय(ल)डबंधणं करेइ अप्पेगइए संकल-
बंधणं करेइ, अप्पेगइए संकोडियमोडिय[यं]ए करेइ अप्पेगइए हत्थ(छि)च्छि-नए
करेइ जाव सत्थोवाडि-ए करेइ, अप्पेगइ-ए वेणुलयाहि य जाव वायरासीहि य
हणावेइ, अप्पेगइए उत्ताणए कारवेइ [२] उरे सिलं दलावेइ (०) तओ लउ(लं)डं
लु(भा)हावेइ २ ता पुरिसेहिं उल्लपावेइ, अप्पेगइए तंतीहि य जाव सुत्तरज्जहिं य
हत्थेसु (य) पा-एसु य बंधावेइ अगडं-सि उच्च[ओ]चूलयालं पजेइ, अप्पेगइए
असिपत्तेहि य जाव कलंबचीरपत्तेहि य पच्छावेइ [२] खारतेल्लेणं अ(व्भं)व्भिमावेइ,
अप्पे० निलाडेसु य अवदूसु य कोप्परेसु य जा(ण)णूसु य खलएसु (अ) य लोहकीलए
य कडसक्कराओ य द(ला)वावेइ अ(ल)लिए मंजावेइ, अप्पेगइए सू(द्ध)ईओ थ
डं(दं)भणाण य हत्थंगुलियासु य पायंगुलियासु य कोट्टिछएहिं आउडावेइ २ ता भूमिं
कंडूयावेइ, अप्पेगइए सत्थेहि य जाव नहच्छे(द-णए)यणेहि य अंगं पच्छावेइ
दब्भेहि य कुसेहि य ओ-ल्ल(व)बद्धेहि य वेढावेइ [२] आयवंसि दलयइ [२] सुक्के
समाणे चडचडस्स उप्पाडेइ । तए णं से दुज्जोहणे चारगपालए एयकम्म ४ सुबहुं
पावकम्मं समज्जिण्णा एगतीसं वाससयाइ परमाउरी पालेइता कालमासे कालं किच्चा
छट्ठीए पुढवीए उक्कोसेणं बावीससागरोवमठिइएसु नेरइ(एसु)त्ताए उव्वव-ओ ॥ २५ ॥
से णं तओ अणंतरे उव्वट्ठिता इहेव महुराए नयरीए सि-रिदामस्स र-ओ बंधुसिरीए

देवीए कुच्छिसि पुत्ताए उवव-जे, तए णं बंधुसिरी नवण्हं मासाणं बंधुपडिपुण्णाणं जाव दारगं पयाया, तए णं तस्स दारगस्स अम्मापियरो निव्व(त्त)त्ते बारसाहे इमं एया(णु)ळ्वं नामधेज्जं करंति हो-उ णं अम्हं दार० नंदिसेणे नामेणं, तए णं से नंदिसेणे कुमारे पंचधाईपरिवुडे जाव परि(वु)वद्धइ, तए णं से नंदिसेणे कुमारे उम्मुक्कवालभावे जाव विहरइ जोव्व० जुवराया जाए यावि होत्था, तए णं से नंदिसेणे कुमारे रजे य जाव अंतैउरे य मुच्छिए इच्छइ सिरिदामं रायं जीवियाओ ववरोवि(त्ता)त्तए सयमेव रजसिरिं कारेमाणे पालेमाणे विहरित्तए, तए णं से नंदिसेणे कुमारे सि-रिदामस्स रज्जो बहूणि अंतराणि य छिद्दाणि य विवराणि य पडिजागरमाणे विहरइ, तए णं से नंदिसेणे कुमारे सि-रिदामस्स र-ज्जो अंतरं अल-भमाणे अ-न्नया कया-इ चित्तं अलंकारियं सद्वावेइ २ ता एवं वया[सि]सी-तुम्हे णं देवाणुप्पिया ! सि-रिदामस्स रज्जो सव्वट्ठाणेषु य सव्वभू(मिया)मीसु य अंतैउरे य दि-न्नवियारे सि-रिदामस्स रज्जो अभिक्खणं २ अलंकारियं कम्मं क(रे)रेमाणे विहर-रसि तं णं तु० देवाणुप्पिया ! सि-रिदामस्स रज्जो अलंकारियं कम्मं करेमाणे गीवाए खुरं निवेसेहि तो णं अहं तुम्हं अद्धरज्जयं क(रे)रिस्सामि तुमं अम्हेहिं सद्धिं उरालाई भोगभोगाई भुंजमाणे विहरिस्ससि, तए णं से चित्ते अलंकारिए नंदिसेणस्स कुमा-रस्स (वयणं) एयमट्ठं पडिसुणेइ, तए णं तस्स चित्तस्स अलंकारियस्स इमेयारूवे जाव समुप्पज्जित्था-जइ णं म-म सि-रिदामे राया एयमट्ठं आगमेइ तए णं म० न नजइ केणइ असुभेणं कुमरणेणं मारिस्सइत्तिकट्ठु भी० जेणेव सि-रिदामे राया तेणेव उवागच्छइ [२] सि-रिदा(म)मं रायं रहस्सियणं करयल० एवं वयासी-एवं खलु सामी ! नंदिसेणे कुमारे रजे य जाव मुच्छिए इच्छइ तुब्भे जीवियाओ ववरोवित्ता सयमेव रजसिरिं कारेमाणे पालेमाणे विहरित्तए, तए णं से सि-रिदामे राया चित्तस्स अलंकारियस्स (अंतिए) एयमट्ठं सोच्चा निसम्म आसुरुत्ते जाव साहडु नंदिसेणं कुमारं पुरिसेहिं (सद्धिं) गिण्हावेइ, [२] एएणं विहाणेणं व(व)ज्जं आण-वेइ, तं एवं खलु गोयसा ! नंदिसेणे (पुत्ते) जाव विहरइ, नन्दिसेणे कुमारे इओ चुए कालमासे कालं किच्चा कहिं गच्छिहिइ कहिं उववज्जिहिइ ? गोयसा ! नंदिसेणे कुमारे सद्धिं वासाई परमाउयं पालइत्ता कालमासे कालं किच्चा इमीसे रयणप्पमाए पुढवीए०, संसारो तहे० तओ हत्थिणा-उरे नयरे मच्छत्ताए उववज्जिहिइ, से णं तत्थ मच(ळी)छिएहिं व(धि)हिए समाणे तत्थेव सेट्ठिकुले.....बोहिं.....सोहम्मो कप्पे.....महाविदेहे वासे सिज्झिहिइ बुज्झिहिइ मुच्चिहिइ परिनि(व्वि)व्वाहिइ सव्व-दुक्खाणमंतं करेहिइ ॥ निक्खेवो ॥ २६ ॥ छट्ठमज्झयणं समत्तं ॥

जइ णं भंते ! "उक्खेवो सत्तमस्स एवं खलु जंबू ! तेणं कालेणं तेणं समएणं पाड[ल]लिसंडे नयरे, वणसंडे ना-मं उज्जाणे, तत्थ णं पाड-लिसंडे नयरे सिद्धत्थे राया, तत्थ णं पाड-लिसंडे नयरे सागरदत्ते सत्थवाहे होत्था अद्धे० गंगदत्ता भारिया, तस्स (णं) सागरदत्तस्स पुत्ते गंगदत्ताए भारियाए अत्तए उंबरदत्ते नामं दारए होत्था अहीण जाव पंचिदियसरीरे, तेणं कालेणं तेणं स० समोसरणं जाव परिसा पडिगया, तेणं कालेणं तेणं समएणं भगवं गोयमे तहेव जेणेव पाड-लिसंडे नयरे तेणेव उवागच्छइ [२] पाड-लिसंडं नयरं पुरत्थि(मे)मिल्लेणं दुवारेणं अणुप्पविसइ [२] तत्थ णं पासइ एगं पुरिसं कच्छुल्लं कोटियं दोउयरियं भगंद(लि)रियं अरिसिल्लं कासिल्लं सासिल्लं सोगिल्लं सू[सु]यसुइ[सु]सूयहत्थं सू[सु]-यपायं सडि(सु)यहत्थं गुलियं सडियपायं गुलियं सडियकण्ण-नासियं र(सी)सियाए (वा) य पू(ई)इएण य थिथिथि[विय]वितवणमुहकिमिउत्तयंतपगलंतपूयसहिरं लालापगलं-तक-ज-नासं अभिक्खणं २ पूयकवले य सहिरकवले य किमियकवले य वममाणं कट्ठाई कलुणाई वी[वि]सराई कूय(कुव)माणं मच्छियाचडगरपह(ग)करेणं अ-भिज्जमा-णमगं फुट्टहडाहडसीसं दंडिखंडवसणं खंडमल्लगखंडघडहत्थगयं गे-हे [२] दे(ह)इ-बलियाए वित्तिं कप्पेमाणं पासइ, त(दा-ए णं) या भगवं गोयमे उच्चनीय जाव अडइ [२] अहापजत्ते० गिण्ह० पाड० पडि-निक्खमइ [२] जेणेव सपणे भगवं० भत्तपाणं आलोएइ भत्तपाणं पडिदंसेइ समणेणं, अन्भणु-न्नाए समाणे जाव बिलमिव प-न्नगभूए[णं] अप्पाणेणं आहारमाहारेइ, संजमेणं तवसा अप्पाणं भावेमाणे विह-रइ । तए णं से भगवं गोयमे दोच्चं-पि छट्ठक्खमणपारणगंसि पढमाए पो(र)रिसीए सज्झायं जाव पाडलिसंडं नयरं दाहिणिळेणं दुवारेणं अणुप्पविसइ तं चेव पुरिसं पासइ कच(ल्ल)ल्लं तहेव जाव संजमेणं तवसा० विहरइ, तए णं से गोयमे त० छट्ठ० तहेव जाव पचत्थिमिल्लेणं दुवारेणं अणु(ए)पविसमाणे तं चेव पुरिसं कच्छुल्लं " पास० चो-त(थ)यं पि छट्ठ० उत्तरेणं० इ० अज्झत्थिए समुप्प-न्ने-अहो णं इमे पुरिसे पुरापोराणाणं जाव एवं वयासी-एवं खलु अहं भंते ! छट्ठ० जाव री(रि)यंते जेणेव पाड-लिसंडे नयरे तेणेव उवागच्छामि २ ता पाड० पुर-त्थिमिल्लेणं दुवारेणं (अणु)पविट्ठे, तत्थ णं एगं पुरिसं पासामि कच्छुल्लं जाव कप्पेमाणं० अहं दोबछ० पारण(ए)गंसि दाहिणिळेणं दुवारेणं " तच्चल्लक्खमणं० पचत्थिमेणं तहेव० अहं चो-त्थछट्ठ० उत्तरदुवारे-णं अणुप्पविसामि तं चेव पुरिसं पासामि कच्छुल्लं जाव वित्तिं कप्पेमा० विह० चित्ता मम पुव्वभवपुच्छा० वागरेइ-एवं खलु गोयमा ! तेणं कालेणं तेणं समएणं इहेव जंबुद्वीवे द्वीवे भारहे वासे विजयपुरे ना-मं नयरे

होत्था रिद्ध०, तत्थ णं विजयपुरे नयरे कणगरहे नामं राया होत्था, तस्स णं
 कणगरहस्स र-न्नो धन्तरी-ना(मे)मं वे(वि)जे होत्था अट्टंगाउव्वेयपाढए,
 तं०-कु(को)मारभिच्चं १ सालागे २ सल्ल(क)हत्ते ३ कायतिगिच्छा ४ जंगोले ५ भूय-
 (वे)वि(जे)जा ६ रसायणे ७ वाजीकरणे ८, तए णं से ध-न्तरी वे-जे विजयपुरे
 नयरे कणगरहस्स र-न्नो अंतोउरे य अ-न्नेसि च बहूणं राईसर जाव सत्थवाहाणं
 अ-न्नेसि च बहूणं दु(व्व)ब्बलाण य गिलाणाण य वाहियाण य रोगियाण य
 अणाहाण य सणाहाण य माहणाण य भिक्(खा)ख गाण य करोडियाण य
 कप्पडियाण य आउराण य अप्पेगइयाणं मच्छमंसाई उव(दं-दि)देसेइ अप्पेग-
 इयाणं कच्छपमंसाई (उवदि०) अप्पेगइयाणं गा(हा)हमं० अप्पेगइयाणं मगरमं०
 अप्पेगइयाणं सुसुमारमं० अप्पेगइयाणं अयमं० एवं ए(ला)लयरोज्झ(सु)सूरमिग-
 ससयगोमं(साई)समहिंसमंसाई अप्पेगइयाणं ति(त्त)त्तिरमं साई अप्पेगइयाणं
 बड्ढ(०)लावक(०)क[पो]वोय(०)कुकुड(०)मयूरमंसाई अ-न्नेसि च बहूणं जलय-
 रथलयरखहयरमा(दी)ईणं मंसाई उव-देसेइ अप्पणावि-य णं से ध-न्तरी-वेजे तेहिं
 बहूहिं मच्छमंसेहि य जाव मयूरमंसेहि य अ-न्नेहि य बहूहिं जलयरथलयरखहयर-
 मंसेहि य सोल्लेहि य त-लिएहि य (भिजेहिं) भजिएहि य सुरं च ६ आसाएमाणे
 विसाएमाणे विहरइ । तए णं से ध-न्तरी वे-जे एयकम्म० सुब-हुं पावं कम्मं
 समज्जिणित्ता वतीसं वाससयाई परमा(उं)उर्यं पालइत्ता कालमासे कालं किच्चा
 छट्ठीए पुढवीए उक्कोसेणं वावीससागरोव० उवव-न्ने । तए णं [सा] गंगदत्ता भारिया
 जाय-निदुया यावि होत्था जाया जाया दारगा विणि(वा)हायमावज्जंति, तए णं तीसे
 गंगदत्ताए सत्थवाहीए अ-न्नया कया-इ पुव्वरत्तावरत्तकालसमयंसि कुडुंबजागरियं
 जागरमा० अयं अ-ज्झात्थिए० समुप्पन्ने-एवं खलु अहं सागरदत्तेणं सत्थवाहेणं
 सद्धिं बहूईं वासाई उरालाई मणुस्सगाई भोगभोगाई भुंजमाणी विहरामि, नो चेव
 णं अहं दारगं वा दारियं वा पयामि, तं धन्नाओ णं ताओ अम्मयाओ सपुण्णाओ
 कयत्थाओ (कयपु०) कयलक्खणाओ सुलद्धे णं तासिं अम्मयाणं माणुस्सए जम्म-
 जीवियफले जासिं म-न्ने नियगकुच्छिसंभू(य-गा)याई थणदुद्धलद्ध-(गा)याई महुरस-
 मुल्लावगाई मम्म(णं)णप(यं)जंपियाई थणमूलकक्खदेसभागं अ(ति)भिसरमाण-याई
 सुद्ध-याई पुणो [पुणो] य कोमलकमलोवसे-हिं हत्थेहिं गिण(हे)हिउण उच्छं(गं)-
 निवेसियाई दें(दिं)ति समुल्लावए सुमहुरे पुणो २ मंजुलप्पभणिए, अहं णं अध-न्ना
 अपुण्णा अकयपुण्णा एत्तो एगमवि न पत्ता, तं सेयं खलु म-म कल्लं जाव जलंते
 सीगरदत्तं सत्थवाहं आपुच्छित्ता सुबहुं पुप्फवत्थगंधमल्लालंकारं गहाय बहुमित्त-नाइ-

नियगसयणसंबंधिपरि-यणमहिलाहिं सद्धि पाड-लिसंडाओ नयराओ पडि-निक्खमिता
 बहिया जेणेव उंबरदत्तस्स जक्खस्स जक्खाययणे तेणेव उवागच्छित्तए तत्थ णं
 उंबरदत्तस्स जक्खस्स म(हा)हरिहं पुप्फच्चणं क(रेइ)रित्ता जज्जु(जाणु)पायवड्डियाए
 ओ(यावि-उवाए)वायइत्तए-जइ णं अहं देवाणुप्पिया ! दारगं वा दारियं वा पयामि
 तो णं अहं तुब्भं जायं च दायं च भायं च अक्खय-निहिं च अणुव(द्धे)हुइस्सामि-
 त्तिकु ओवाइयं उ[ओ]वाइणित्तए, एवं संपेहेइ २ ता कल्लं जाव जलंते जेणेव
 सागरदत्ते सत्थवाहे तेणेव उवागच्छइ २ ता सागरदत्तं सत्थवाहं एवं वयासी-एवं
 खलु अहं देवाणुप्पिया ! तुब्भेहिं सद्धि जाव न पत्ता, तं इच्छामि णं देवाणुप्पिया !
 तुब्भेहिं अब्भणु-न्नाया जाव उ-वाइणित्तए, तए णं से सागरदत्ते (स०) गंगदत्तं
 भारियं एवं वयासी-ममं-पि णं देवाण० एस चेव मणोरहे कहं (णं) तुमं दारगं
 (वा) दारियं वा पया(ए)इज्जसि(?), गंगदत्ताए भारियाए एयमद्धं अणुजाणइ, तए
 णं सा गंगदत्ता भारिया सागरदत्तसत्थवाहेणं एयमद्धं अब्भणु-न्नाया समाणी सुवहुं
 पुप्फ जाव महिलाहिं सद्धि सयाओ गिहाओ पडि-निक्खमइ २ ता पाड-(ली)लिसंडं
 नयरं मज्झमज्जेणं निग्गच्छइ २ ता जेणेव पुक्खरिणी तेणेव उवागच्छइ २ ता
 पुक्खरिणीए तीरे सुबहुं पुप्फवत्थगंधमल्लालंकारं ठवे[उवणे]इ २ ता पुक्खरि-
 (णीं)णिं ओगाहेइ २ ता जलमज्जणं करेइ २ ता जलकीडं करे(इ २ ता)माणी ष्हाया
 उल्ल(ग)पडसाडिया पुक्खरिणीओ पञ्चुत्तरइ २ ता तं पुप्फ० गिण्हइ २ ता जेणेव
 उंबरदत्तस्स जक्खस्स जक्खाययणे तेणेव उवागच्छइ २ ता उंबरदत्तस्स जक्खस्स
 आलोए पणामं करेइ २ ता लोमहत्थं परामुसइ (०) उंबरदत्तं जक्खं लोमहत्थ(ए)थेणं
 पमज्जइ २ ता दग्धाराए अब्भो)भुक्खेइ २ ता पम्हल० गायल (०) ओल्लहेइ २ ता
 सेयाइ वत्थाइं परिहेइ [२] महरिहं पुप्फारुहणं (वत्थारुहणं) मल्लारुहणं गंधारुहणं
 चुण्णारुहणं करेइ २ ता धूवं डहइ [२] ज-पाय-वड्डिया एवं व(यासी)यइ-जइ
 णं अहं देवाणुप्पिया ! दारगं वा दारियं वा पयामि तो णं....जाव उ-वाइणइ २ ता
 जामेव दिसिं पाउब्भूया तामेव दि-सिं पडिगया । तए णं से ध-न्तरी वे-जे ताओ
 नर-याओ अणंतरं उव्वट्ठिता इहेव जंबुदीवे वीवे भारहे वासे पाड-लिसंडं नयरे
 गंगदत्ताए भारियाए कुच्छिसि पुत्तताए उवव-जे, तए णं तीसे गंगदत्ताए भारियाए
 तिहं मासाणं बहुपडिपुण्णाणं अयमेयारुवे दोहले पाउब्भूए-ध-न्नाओ णं तावो....
 जाव फले जाओ णं वि-उल्लं असणं ४ उवक्खडावेति २ ता बहूहिं जाव परिवुडावो
 तं वि-उल्लं असणं ४ सुरं च ६ पुप्फ जाव गहाय पाड-लिसंडं नयरं मज्झमज्जेणं
 पडि-निक्खमंति २ ता जेणेव पुक्खरिणी तेणेव उवागच्छति २ [ता] पुक्ख(रि)रण्णिं

ओगा(हिं)हेति [२] ण्हाया तं वि-उलं असणं बहूहिं मित्त-नाइ जाव सद्धिं आसा(दें)-
 ए० दोहलं वि(ण्ये)णेंति, एवं संपेहेइ २ ता कलं जाव जलंते जेणेव सागरदत्ते
 सत्थवाहे तेणेव उवागच्छइ २ ता सागरदत्तं सत्थवाहं एवं वयासी-धन्नाओ णं
 ता-ओ....जाव विणेंति तं इच्छामि णं जाव विणित्तए, तए णं से सागरदत्ते सत्थवाहे
 गंगदत्ताए भारियाए एयमट्ठं अणुजा(णा)णइ, तए णं सा गंगदत्ता सागरदत्तेणं
 सत्थवाहेणं अब्भणु-न्नाया समाणी वि-उलं असणं ४ उवक्खडावेइ [२] तं वि-उलं
 असणं ४ सुरं च ६ सुबहुं पुप्फ० परिगिण्हावेइ [२] बहूहिं जाव ण्हाया उ० जेणेव
 उंबरदत्त(जक्ख)स्स जक्खाययणे जाव धूवं ड(ह)हेइ (०) जेणेव पुक्ख(र)रिणी
 तेणेव उवागच्छइ, तए णं ताओ मित्त जाव महिलाओ गंगदत्तं सत्थवा(हं)हिं
 सव्वालंकारविभूसियं करेंति, तए णं सा गंगदत्ता भारिया ताहिं मित्तनाईहिं अन्नाहिं
 बहूहिं न-गरमहिलाहिं सद्धिं तं वि-उलं असणं ४ सुरं च ६....दोहलं विणेइ २ ता
 जामेव दिसिं पाउब्भूया तामेव दिसिं पडिगया, तए णं सा गंगदत्ता (भा०)
 सत्थवाही तं गम्भं सुहंसुहेणं परिवहइ, तए णं सा गंगदत्ता भारिया नवण्हं
 मासाणं बहुपडिपुण्णाणं जाव पयाया ठिइवडिया....जाव जम्हा णं अम्हं
 इमे दारए उंबरदत्तस्स जक्खस्स ओ(उव-उ)वाइयलद्धए तं हो-उ णं० दारए
 उंबरदत्ते नामेणं, तए णं से उंबरदत्ते दारए पंचधा-ईपरिगगहिए....परिवहइ,
 तए णं से सागरदत्ते सत्थवाहे जहा विजयमित्ते जाव काल०. गंगदत्ता-वि....,
 उंबरदत्ते निच्छूढे जहा उज्झियए, तए णं तस्स उंबरदत्तस्स दार-गस्स अ-न्नाया
 कया(वि)इ सरीरगंसि जमगसमगमेव सोलस-रोगायंका पाउब्भूया, तं०-सासे का-से
 जाव कोढे, तए णं से उंबरदत्ते दारए सोलसहिं रोगायंकेहिं अभिभूए समाणे०
 जाव विहरइ, एवं खलु गोयमा ! उंबरदत्ते (दा०) पुरा-पोराणाणं जाव पच्चणु-
 भवमाणे विहरइ, (तएते णं) से [णं] उंबरदत्ते-कालमासे कालं किच्चा कहिं
 गच्छिहिइ कहिं उववज्जिहिइ ? गोयमा ! उंबरदत्ते दारए बावत्त(रि)रिं वासाई
 परमाउयं पा(लि)लइत्ता कालमासे कालं किच्चा इमीसे रयणप्पभाए पुढवीए नेरइय-
 ताए उवव०, संसारो तहेव जाव पुढवी, तओ हत्थिणाउरे नयरे कुकुडत्ताए पच्चा-
 याहिइ गोट्टिवहिए त(हे)थेव हत्थिणाउरे नयरे सेट्टिकुलंसि उववज्जिहिइ बोहिं....
 सोहम्मे कप्पे....महाविदेहे वासे सिज्झहि० ॥ निक्खेवो ॥ २७ ॥ सत्तमं
 अज्झयणं समत्तं ॥

जइ णं भंते !....अट्टमस्स उक्खेवो एवं खलु जंबू ! तेणं कालेणं तेणं
 समणं सोरियपुरं नयरं सोरियव(डें)डिसगं उज्जाणं सोरियद(त्तो)त्ते राया,

तस्स णं सोरियपुरस्स नयरस्स बहिया उत्तरपुर-त्थि-मे दिस्सीभा(गे)ए एत्थ णं एगे
मच्छंध[वा]पाडए होत्था, तत्थ णं समुद्दत्तै-नामं मच्छंधे परिवसइ अहम्मिए जाव
दुप्पडियाणंदे, तस्स णं समुद्दत्तस्स समुद्दत्ता-नामं भारिया होत्था अहीण० पं-
चिदियसरीरा, तस्स णं समुद्दत्तस्स (म०) पुत्ते समुद्दत्ता[ए]भारियाए अत्तए
सोरियदत्ते नामं दारए होत्था अहीण०, तेणं कालेणं तेणं समएणं सामी समोस-ढे
जाव परिसा पडिगया, तेणं कालेणं तेणं समए० जेट्ठे (अं०) सीसे जाव सोरियपुरे
नयरे उच्च-नीयमज्झि(म)माई कुलाई० अहापज्जत्तं समुदाणं गहाय सोरियपुराओ
नयराओ पडि-निक्खमइ, [२] तस्स मच्छंध-पाडगरस्स अवूरसामंतेणं वी(ई)इवयमाणे
महइमहालियाएम [हच्च]णुस्सपरिसाए मज्झगयं पासइ एणं पुरिसं सुक्कं भुक्खं निम्मंसं
अट्टिचम्मावणद्धं किडिकि(डी)डियाभूयं नीलसाडग-निय(च्छं)त्थं मच्छकंटएणं गलए
अणुलग्गेणं कट्ठाई कलुणाई वी-सराई कूवेमाणं अभिक्खणं २ पूयक्वले य सहिरक्वले य
किमिक्वले य व(म)ममाणं पासइ, [२] इमे(यारूवे) अज्झत्तिए ५-पुरा-
पोराणाणं जाव विहरइ, एवं संपेहेइ [२] जेगेव समणे भगवं...जाव पुच्चभवपुच्छा
जाव वागरणं-एवं खलु गोयमा ! तेणं कालेणं तेणं समएणं इहेव जंबुदीवे बीवे भारहे
वासे नंदिपुरे-नामं नयरे होत्था मित्ते राया, तस्स णं मित्तस्स रज्जे सिरीए नामं
महाणसिए होत्था अहम्मिए जाव दुप्पडियाणंदे, तस्स णं सिरीयस्स महाणसियस्स
बहवे मच्छिया य वागुरिया य साउणिया य दि-न्नभइभत्तवेयणा कल्लक(ल्लं)ल्लिं
बहवे सण्हमच्छा य जाव पडागाइपडागे य अए य जाव महिसे य तित्तिरे य जाव
म(यू)ऊरे य जीवियाओ ववरोवेति [२] सिरीयस्स महाणसियस्स उवणेंति, अ-न्ने
य से बहवे तित्तिरा य जाव म-ऊरा य पंजरंति संनिरुद्धा चिट्ठंति, अ-न्ने य बहवे
पुरिसा दि-न्नभइभत्तवेयणा ते बहवे तित्तिरे य जाव म-ऊरे य जीवियाओ चेव
निप[पक्]पंखेंति [२] सिरीयस्स महाणसियस्स उवणेंति, तए णं से सिरीए महाणसिए
बहूणं जलयरथलयरखहयराणं मंसाई कप्प(-य)णिकप्पियाई करेइ, तं०-सण्हखंडि-
याणि य वट्ठखंडियाणि य दीहखंडियाणि य रहस्सखंडियाणि य हिमपक्काणि य जम्म-
[प०](वम्म)वेग० मारुयपक्काणि य कालाणि य हेरंगाणि य महिद्धाणि य आमलर-
सियाणि य मुहियारसियाणि य कविट्ठरसियाणि य दालिमरसियाणि य मच्छरसियाणि
य तल्लियाणि य भज्जियाणि य सोल्लियाणि य उवक्खडावेइ अ-न्ने य बहवे मच्छरसे
य ए(णि)णेजरसे य तित्तिरसे य जाव मयूरसे य अ-न्नं च विउलं हरियसाणं
उवक्खडावेइ २ ता मित्तस्स २-न्नो भोयणमंडवंति भोयणवेलाए उवणेइ अप्पणा-वि-
य णं से सि(रि)रीए महाणसिए ते० बहू० जलयर(०)थलयर(०)खहयरमं-

सेहिं च र(स)सिएहि य हरियसगेहि य सोल्लेहि य त-लिएहि य भजिए(भि-)हि य सुरं
 च ६ आसाएमाणे० विहरइ, तए णं (से) सि-रीए महाणसिए एयकम्मे० सुबहुं
 पावकम्मं समजिणित्ता तेतीसं वाससयाइं परमाउयं पालइत्ता कालभासे कालं किच्चा
 छट्ठीए पुठवीए उवव(ञ्चो)जे । तए णं सा समुद्दत्ता भारिया निंदूयावि होत्था जाया २
 दारगा विणि-हायमावज्जंति ज(हा)ह गंगदत्ताए चिंता आपुच्छणा ओ-वाइयं दोहला
 जाव दारगं पयाया जाव जम्हा णं अम्हं इमे दारए सोरियस्स जक्खस्स ओ-वा-
 इयलद्धे तम्हा णं होउ अम्हं दारए सोरियदत्ते नामेणं, तए णं से सोरियदत्ते दारए
 पंचवा(इ)इं जाव उम्मुक्कवालभावे वि-जयपरिणयमित्ते जोव्वण० होत्था, तए णं से
 समुद्दत्ते अ-जया कया(इं)इ कालधम्मणा संजुत्ते, तए णं से सोरियदत्ते (दा०) बह्वहिं
 मित्त-नाइ० रोयमा० समुद्दत्तस्स नीहरणं करेइ लोइ(य)याइं म(याइं)यकिच्चाइं
 करेइ, अ-जया कया-इ सयमेव मच्छंधमहत्तरगतं उवसंपजित्ताणं विहरइ; तए णं
 से सोरिय(ए)दत्ते दारए मच्छंधे जाए अहम्मिए जाव दुप्पडियाणंदे, तए णं तस्स
 सोरियदत्तमच्छंधस्स बहवे पुरिसा दि-ज्जभइ० एगट्टियाहिं जउ(णं)णामहान(दीं)इं
 ओगा-हेंति [२] बह्वहिं दहगालणाहि य दहमलणेहि य दहमहणे(हिं)हि य दहवह-
 णे-हि य दहपवहणेहि य अयंपुलेहि य पंचपुलेहि य मच्छंधलेहि य मच्छपुच्छेहि
 य जंभाहि य ति[सि]सराहि य भि-सराहि य धिसराहि य वि-सराहि य हिल्लिरीहि
 य लल्लिरीहि य झिल्लिरीहि य जालेहि य गलेहि य कूडपासेहि य वक्कबंधेहि य सुत्त-
 बंधणेहि य वा-लबंधणेहि य बहवे सण्हमच्छे य जाव पडागाइपडागे य गिण्हंति (०)
 एगट्टियाओ (नावा) भ(रं)रेंति (०) कूलं गा(हं-हिं)हेंति (०) मच्छखलए करेंति (०)
 आयवंसि दलयंति, अ-ज्जे य से बहवे पुरिसा दि-ज्जभइभत्तवेयणा आयवत्त-
 एहिं सो(ले)ल्लेहि य त-लिएहि य भ-जिएहि य रायमगंगसि वित्तिं कप्पेमाणा विह-
 रेंति, अप्पणा-वि-य णं से सोरियदत्ते बह्वहिं सण्हमच्छेहि य जाव पडा० सोल्लेहि य
 तलिएहि य भ-जिएहि य सुरं च ६ आसा(य)एमाणे० विहरइ, तए णं तस्स
 सोरियदत्तस्स मच्छंधस्स अ-जया कया-इ ते मच्छसोल्ले [य] त-लिए य भ-जिए य
 आहारिमाणस्स मच्छकंटए गलए लग्गे या-वि होत्था, तए णं से सोरियदत्तमच्छंधे
 महयाए वेयणाए अभिभूए समाणे कोडुंविउपुरिसे सहावेइ २ ता एवं वयासी-गच्छह
 णं तुम्हे देवाणुप्पिया ! सोरियपुरे नयरे सि-वाडग जाव पहेसु [य] महया २ सहेणं
 उग्घोत्तेमाणा (२) एवं व-यह-एवं खलु देवाणुप्पिया ! सोरियदत्तस्स मच्छकंटए
 ग(लए)ले लग्गे तं जो णं इच्छइ वे-जो वा ६ सोरियमच्छियस्स मच्छकंट-यं
 गळाओ नी(नि)हरितए तस्स णं सोरिय० वि-उलं अत्थसंपयाणं दलयइ, त-ए णं

ते कोडुंबियपुरिसा जाव उगो(सं)संति, त-ए णं ते बहवे वे-ज्जा य ६ इमेयास्सं उगोसणं उगोसिज्जमाणं निसामेंति २ ता जेणेव सोरिय० ने-हे जेणेव सोरियमच्छंवे तेणेव उवागच्छंति [२] बह्विहं उप्पत्तिथा० परिणममाणा वमणेहि य छट्टणेहि य ओ-वीलणेहि य कवलगाहेहि य सल्लुद्धरणेहि य विसल्लकरणेहि य इच्छंति सोरिय-मच्छं० मच्छकंट-यं गलाओ नीहरितए नो (चेव णं) संचाएंति नीहरितए वा विसो-हितए वा, तए णं ते बहवे वे-ज्जा य ६ जाहे नो संचाएंति सोरिय० मच्छकंट-यं गलाओ नीहरितए ताहे संता जाव जामेव दिसिं पाउब्भूया तामेव दि-सिं पडिगया, तए णं से सोरिय० म० विज्ज०पडियारनि(वि)व्विणे तेणं दुक्खेणं महया अभिभूए सुके जाव विहरइ, एवं खलु गोयमा ! सोरियदत्ते पुरापोराणां जाव विहरइ, सोरिए णं भंते ! मच्छंवे इओ (य) कालमासे कालं किच्चा कहिं गच्छि-हिइ (?) कहिं उववज्जिहिइ ? गोयमा ! सत्तरि-वासाइं परमाउयं पालइता कालमासे कालं किच्चा इमीसे रयणप्पभाए पुढवीए०, संसारो तहे० पुढ० हत्थिणाउरे नयरे मच्छत्ताए उवव०, से णं तओ मच्छिएहिं जीवियाओ ववरोविए तत्थेव सेट्टिकुल-सि.....वो० सोहम्मे कप्पे.....महाविदेहे वासे सिज्झिहि० ॥ निक्खेवो ॥ २८ ॥

अट्टमं अज्झयणं समत्तं ॥

जइ णं भंते !उक्खेवो नवमस्स० एवं खलु जंबू ! तेणं कालेणं तेणं समएणं रोहीडए-नामं नयरे होत्था रिद्ध०, पुढ(वी)विव-डिसए उज्जाणे, वेसमणदत्तोत्ते राया, सिरी देवी, पूस-नंदी कुमारे जुवराया, तत्थ णं रोहीडए नयरे दत्ते नामं गाहा-वई परिवसइ अट्ठे० कण्हसिरी भारिया, तस्स णं दत्तस्स धूया क(न्न)ण्हसिरीए अत्तया देवदत्ता-नामं दारिया होत्था अहीण(०) जाव उक्किट्ठा उक्किट्ठसरीरा, तेणं कालेणं तेणं समएणं सामी समोस-ढे जाव परिसा०, तेणं कालेणं तेणं समए० जेट्ठे अंतवासी छट्ठक्खमण.....तहेव जाव रायमर-गमोगाढे हत्थी आसे पुरिसे पासइ, तेसिं पुरिसाणं मज्झगयं पासइ एणं इत्थियं अव-ओड-यबंधणं उक्खित्तक-ण्ण-नासं जाव सुल्ले भिज्जमाणं पासइ, [२] इमे अ-ज्झत्थिए.....तहेव निग्गए जाव एवं वयासी-एसा णं भंते ! इत्थिया पुव्वभवे का आसी ? एवं खलु गोयमा ! तेणं कालेणं तेणं समएणं इहेव जंबुही(व)वे वीवे भारहे वासे सुपइत्ते नामं नयरे होत्था रिद्ध०, म(ह)हासेणे राया, तस्स णं महासेणस्स र-न्नो धा-रिणीपामोव(खं)खाणं देवीसहस्सं ओरोहे यावि होत्था, तस्स णं महासेणस्स र-न्नो पुत्ते धा-रिणीए देवीए अत्तए सीहसेणे नामं कुमारे होत्था अहीण० जुवराया, तए णं तस्स सीहसेणस्स कुमारस्स अम्मापियरो अ-ज्जाया कया-इ पंच पासायवडिसयसायई

कारेति अन्धुगय०, तए णं तस्स सीहसेणस्स कुमारस्स अन्नया कया(वि)इ
 सामापामोक्खाणं पंचण्हं रायवरकन्नगसयाणं एगदिवसे पाणि गिण्हा(वै)विंसु पंच-
 सयओ दाओ, तए णं से सीहसेणे कुमारे सामापामोक्खाहिं पंच(हिं)सयाहिं
 देवीहिं सद्धिं उप्पि जाव विहरइ, तए णं से म-हासेणे राया अ-न्नया कयाइ
 कालधम्मणा संजुत्ते नीहरणं....राया जाए महया०, तए णं से सीहसे-णे राया
 सामाए देवीए मुच्छिए ४ अवसेसाओ देवीओ नो आढाइ नो परिजाणाइ अणा-
 ढायमाणे अपरिजाणमाणे विहरइ, तए णं तासिं एगूणगाणं पंचण्हं देवीसयाणं
 एगूणाइं पंच(धा-इ)माइसयाइं इमीसे कहाए लद्धट्ठाइं समाणाइं एवं खलु सामी
 सीहसे-णे राया सामाए देवीए मुच्छिए ४ अम्हं धूयाओ नो आढाइ नो परिजाणइ
 अणाढायमाणे अपरिजाणमाणे विहरइ, तं सेयं खलु अम्हं सा(मा)मं दे-विं अग्गि-
 यओगेण वा विसप्पओगेण वा सत्थप्पओगेण वा जीवियाओ ववरोवितए, एवं संपे-
 हेन्ति [२] सामाए देवीए अंतराणि य छिद्वाणि य वि[वरा]रहाणि य पडिजागर-
 माणीओ (२) विहरंति, तए णं सा सामा देवी इमीसे कहाए लद्धट्ठा समाणी एवं
 वयासी-एवं ख० म-म पंचण्हं सवत्तीसयाणं पंच माइसयाइं इमीसे कहाए लद्धट्ठाइं
 समाणाइं अ-न्नम-न्नं एवं वयासी-एवं खलु सीहसेणे....जाव पडिजागरमाणीओ
 विहरंति, तं न नज्जइ णं म-म केण-इ कुमरणेण मारिस्संतित्तिकहु भीया जाव
 जेणेव कोवघरे तेणेव उवागच्छइ २ ता ओहय जाव झियाइ, तए णं से सीहसे-णे
 राया इमीसे कहाए लद्धट्ठे समाणे जेणेव कोवघ-रए जेणेव सामा देवी तेणेव उवा-
 गच्छइ २ ता सामं देविं ओह० जाव पासइ २ ता एवं वयासी-किं णं तुमं देवाणु-
 प्पि-ए ! ओह० जाव झियासि ?, तए णं सा सामा देवी सीहसेणे-णं रण्णा एवं
 वुत्ता समा-णी उप्फेण(ओ)उप्फे(णी)णियं सीहसे-णं रायं एवं वयासी-एवं
 खलु सामी ! म-म ए-गूणपंचसवत्तीसयाणं ए-गूणपंच(धा)माइसयाणं इमीसे कहाए
 लद्धट्ठाणं समाणा० अन्नमन्ने सद्दवैति २ ता एवं वयासी-एवं खलु सीहसे-णे राया
 सामाए देवीए उवरि मुच्छिए ४ अम्(हा णं)हं धू(आ)याओ नो आढाइ....जाव
 अंतराणि य छिद्वाणि० पडिजागरमाणीओ विहरंति तं न नज्जइ० भीया जाव
 झियामि, तए णं से सीहसेणे राया सा-मं देविं एवं वयासी-मा णं तुमं देवाणु-
 प्पि-ए ! ओह० जाव झिया(इसि)हि, अहं णं त(ह)हा ज(व)त्तिहामि जहा णं तव
 नत्थि कत्तो-वि सरीरस्स आ(बा)वाहे (वा) प-वाहे वा भविस्सइत्तिकहु ताहिं
 इट्ठाहिं ६ समासासेइ, [२] तओ पडि-त्तिक्खमइ २ ता कोडुंबियपुरिसे सद्दवेइ २ ता
 एवं वयासी-गच्छह णं तुम्हे देवाणुप्पिया ! सुपइट्ठस्स नयरस्स बहिया एणं

महं कूडागारसालं करेह अणेगक्खंभसयसंनिवि० पासा० ४ करेह २ ता म-मं
 एयमाणत्तियं पच्चप्पिणह, तए णं ते कोडुंबियपुरिसा करयल जाव पडिमुणेंति २ ता
 सुपइट्टनयरस्स बहिया पच्च-त्थिमे दिसीविभाए एणं महं कूडागारसालं जाव करेंति
 अणेगक्खंभ० पासा० ४ जेणेव सीहसेणे राया तेणेव उवागच्छंति २ ता तमा-
 णत्तियं पच्चप्पिणंति, तए णं से सीहसेणे राया अ-न्नया कयाइ एगूणगाणं पंचण्हं
 देवीसयाणं एगूणाइ पंचमाइसयाइ आमंतेइ, तए णं तासि एगू(णा)णपंचदेवीसयाणं
 एगूणपंचमाइसयाइ सीहसेणेणं र-न्ना आमंतियाइ समाणाइ सव्वालंकारविभूसियाइ
 जहाविभवेणं जेणेव सुपइट्टे नयरे जेणेव सीहसेणे राया तेणेव उवागच्छंति, तए णं
 से सीहसे-णे राया ए-गूणपंचदेवीसयाणं ए-गूणगाणं पंचण्हं मा(ई)इसयाणं
 कूडागारसालं आवा(से)सं दलयइ, तए णं से सीहसेणे राया कोडुंबियपुरिसे
 सद्दावेइ २ ता एवं वयासी-गच्छह णं तु-ब्भे देवाणुप्पिया ! विउलं असणं० उवणेह
 सुव-हुं पुप्फवत्थगंधमल्लालंकारं च कूडागारसालं साहरह [य], तए णं ते कोडुंबिय-
 पुरिसा तहेव जाव साहरेंति, तए णं तासि एगूणगाणं पंचण्हं देवीसयाणं एगूण-
 पंचमा[ई]इसयाइ सव्वालंकारविभूसिया० तं विउलं असणं ४ सुरं च ६ आसा-
 एमाण० गंधव्वे-हि य नाडए-हि य उवगीयमाणाइ २ विहरंति, तए णं से सीह-
 सेणे राया अद्धरत्तकालसमयंसि बह्विं पुरिसेहिं सद्धिं संपरिवुडे जेणेव कूडागा-
 रसाला तेणेव उवागच्छइ २ ता कूडागारसालाए दुवाराइ पिहेइ [२] कूडा-
 गारसालाए सव्वओ समंता अगणिकार्यं दलयइ, तए णं तासि एगूणगाणं पंचण्हं
 देवीसयाणं एगूणगाइ पंच-मा-इसयाइ सीहर-न्ना आलीवियाइ समाणाइ रोयमाणाइ ३
 अत्ताणाइ असरणाइ कालधम्मणा संजुताइ, तए णं से सीहसेणे राया एयकम्मे ४
 सुवहुं पावकम्मं समजिणिता चो-त्तीसं वाससयाइ परमाउयं पालइत्ता कालमासे
 कालं किच्चा छट्ठीए पुढवीए उक्कोसेणं बावीससागरोव(माई टि)मट्टिइएसु [निरइय-
 ताए] उवव-न्ने, से णं तओ अणंतरं उव्वट्ठिता इहेव रोहीडए नयरे दत्तस्स सत्थ-
 वाहस्स कण्हसि-रीए भारियाए कुळिळसि दारियत्ताए उवव-न्ने, तए णं सा कण्ह-
 सिरी नवण्हं मासाणं जाव दारियं पयाया सु(कु)उमाल० सुह्वं, तए णं तीसे
 दारियाए अम्मापियरो नि(व्वि)व्वत्तवारसाहियाए विउलं असणं ४ जाव मित्त-नाइ०
 नामधेजं करेंति.....तं हो-उ णं दारिया देवदत्ता नामेणं, तए णं सा देवदत्ता [दारिया]
 पंचधाईपरि[ग]गहिया जाव परिवह्णइ, तए णं सा देवदत्ता दारिया उम्मुक्कबालभावा
 जोव्वणेण य रुवेण य लावण्णेण य जाव अई० उक्किट्ठा उक्किट्ठसरीरा जाया यावि
 होत्था, तए णं सा देवदत्ता दारिया अ-न्नया कया(ई)इ ण्हाया सव्वालंकारविभूसिया

बहूहिं खुज्जाहिं जाव परिक्खित्ता उप्पि आगासतलगंसि कणगतिंदू(सए)सेणं कीलमाणी
विहरइ, इमं च णं वेसमणदत्ते राया ण्हाए सव्वालंकारविभूसिए आसं दु-रहिता
बहूहिं पुरिसेहिं सद्धिं संपरिवुडे आसवा[हि]ह(णी)णियाए निजायमाणे दत्तस्स
गाहावइस्स गिहस्स अदूरसामंतेणं वी(वि)इवयइ, तए णं से वेसमणे राया जाव
वी(वि-ई)इवयमाणे देवदत्तं दारियं उप्पि आगासतलगंसि कणगतिंदू(ण य)णं कील-
मा-णिं पासइ, देवदत्ताए दारियाए जो-व्वणेण य रूवेण य लावण्णेण य जाव
विन्दिहए कोडुंबियपुरिसे सद्दावेइ २ ता एवं वयासी-कस्स णं देवाणुप्पिया ! एसा
दारिया किं वा नामधेजेणं ?, तए णं ते कोडुंबियपुरिसा वेसमणरायं करयल० एवं
वयासी-एस णं सामी ! दत्तस्स सत्थवाहस्स धू-या क-ण्हसि(रि)रीए भारियाए
अत्तया देवदत्ता नामं दारिया जो-व्वणेण य रूवेण य लावण्णेण य, उक्किट्ठा उक्किट्ठ-
सरीरा, तए णं से वेसमणे राया आसवा-हणियाओ पडि-नियत्ते समाणे अब्भितर-
(ट्ठा)ठाणिजे पुरिसे सद्दावेइ २ [ता] एवं वयासी-गच्छह णं तुब्भे देवाणुप्पिया !
दत्तस्स धूयं क-ण्हसिरीए भारियाए अत्तयं देवदत्तं दारियं पूस(णं(दि)द)नंदिस्स
जुवर-ओ भारियत्ताए वरेह, जइ-वि सा सयंरज्जसुक्का, तए णं ते अब्भितर-ठाणिज्जा
पुरिसा वेसमणेणं रत्ता एवं वुत्ता समाणा हट्ठतुट्ठा करयल जाव पडिसुणेंति २ ता
ण्हाया सुद्धप्पावेसाइं.....संपरिवुडा जेणेव दत्तस्स-गिहे तेणेव उवागच्छित्था, तए
णं से द-त्ते सत्थवाहे ते पुरिसे एज्जमाणे पासइ २ [ता] हट्ठतुट्ठ० आसणाओ अब्भुट्ठेइ
२ [ता] सत्तट्ठ पयाइं पच्चुग्गए आसणेणं उवनिमंतेइ २ ता ते पुरिसे आसत्थे
वीसत्थे सुहासणवरगए एवं वयासी-संदिसंतु णं देवाणुप्पिया ! किं आगमणप्प-
ओयणं ?, तए णं ते रायपुरिसा द-त्तं सत्थवाहं एवं वयासी-अम्हे णं देवाणुप्पिया !
तव धूयं कण्हसिरीए अत्तयं देवदत्तं दारियं पूस-नंदिस्स जुवर-ओ भारियत्ताए वरेमो,
तं जइ णं जाणासि देवाणुप्पिया ! जुत्तं वा पत्तं वा सल्लाहणिज्जं वा सरिसो वा
संजोगो दिज्जउ णं देवदत्ता भारिया पूस-नंदिस्स जुवर-ओ, भण देवाणुप्पिया ! किं
दल्लयामो सुक्कं ?, तए णं से दत्ते ते अब्भितर-ठाणिजे पुरिसे एवं वयासी-ए(वं)-
यं चेव णं देवाणुप्पिया ! म-म सुक्कं जं णं वेसम(णदत्ते)णे राया म-म दारिया-निमित्तेणं
अणु-गिण्हइ, ते ठा(णे)णिज्जपुरिसे वि-उल्लेणं पुप्फवत्थगंधमल्लालंकारेणं सक्कारेइ०
पडिविसज्जेइ, तए णं ते ठाणिज्जपुरिसा जेणेव वेसमणे राया तेणेव उवागच्छंति २ ता
वेसमणस्स र-ओ एयमट्ठं निवेदेंति, तए णं से दत्ते गाहावई अ-न्नया कया(वि)इ
सोभणंसि तिहिकरणदिवस-नक्खत्तमुहुत्तंसि वि-उल्लं असणं ४ उवक्खडावेइ २ ता
मित्त-नाइ० आमंतेइ ण्हाए सुहासणवरगए तेणं मित्त० सद्धिं संपरिवुडे तं विउल्लं

असणं ४ आसाएमा० विहरइ जिमियभुत्तराग० आयेते ३ तं मित-नाइनियग०
 विउल्लंघपुप्फ जाव अलंकारेणं सक्कारेइ० देवदत्तं दारियं ण्हायं सव्वालंकारविभू-
 सियसरीरं पुरिससहस्सवाहिणीयं सीयं दु-रुहेइ २ ता सुवहुमित जाव सद्धिं संपरिवुडे
 स(व्वइ)व्विद्धीए जाव नाइयरवेणं रोही(डं)ड-यं नयरं मज्झमज्जेणं जेणेव वेसमण-
 र-न्नो गिहे जेणेव वेसम(णो)णे राया तेणेव उवागच्छइ २ ता करयल जाव वद्धा-
 वेइ २ ता वेसमणस्स रन्नो देवदत्तं दारियं उवणेइ, तए णं से वेसम-णे राया देवदत्तं
 दारियं उव(णि)णीयं पासइ २ [ता] हट्ठुट्ठ० विउलं असणं ४ उवक्खडावेइ २ ता
 मित्त-नाइ० आमंतेइ जाव सक्कारेइ० पूस-नंदिकुमारं देवदत्तं च दारियं पट्ठयं
 दु-रुहेइ २ ता से(सि)यापीएहिं कलसेहिं मज्जावेइ २ ता वर-नेव-त्थाइं करेइ २ ता
 अग्निहोमं करेइ [२] पूस-नं(दी)दिक्कुमारं देवदत्ताए दारियाए पाणिं गिण्हावेइ,
 तए णं से वेसम-णे राया पूस-नंदिकुमारस्स देवदत्तं दारियं स-व्विद्धीए जाव रवेणं
 महया-इद्धीसक्कारसमुदएणं पाणिगहणं कारेइ [२] देवदत्ताए दारियाए अम्मा-
 पियरो मित्त जाव परियणं च विउले-णं असण० वत्थगंधमल्लालंकारेण य
 सक्कारेइ संमाणेइ जाव पडिविसज्जेइ, तए णं से पूस-नंदी-कुमारं देवदत्ताए सद्धिं
 उप्पिं पासाय० फु(ट्टे)ट्टमाणेहिं सुइंगमत(थे)थएहिं वत्ती० उवगिज्जमाणे जाव विह-
 रइ, तए णं से वेसमणे राया अ-न्नया कया(ई)इ कालधम्मणा संजुत्ते नीहरणं जाव
 राया जाए, तए णं से पूस-नंदी राया सिरीए देवीए मा(य)याम(त्ति-त्ते)तए यावि
 होत्था, कळाकळि जेणेव सिरी देवी तेणेव उवागच्छइ २ ता सिरीए देवीए पाय-
 वडणं करेइ [२] सयपागसहस्सपाणेहिं तेळेहिं अन्भिगावेइ अट्टिसुहाए मंससुहाए
 तयासुहाए (चम्मसुहाए) रोमसुहाए चउ-व्विहाए संवाहणा(इ)ए संवाहावेइ [२]
 सुरभिणा गंधवट्टएणं उव्वट्टावेइ [२] तिहिं उदएहिं मज्जावेइ तं०-उसिणोदएणं
 सीओदएणं गंधोदएणं, [२] विउलं असणं ४ भोयावेइ [२] सिरीए देवीए ण्हायाए
 जिमियभुत्तरागयाए त-ए णं पच्छा ण्हाइ वा भुंजइ वा उरालाई मा(म)णुस्सगाई
 भोगभोगाई भुंजमाणे विहरइ । त-ए णं तीसे देवदत्ताए देवीए अ-न्नया कयाइ
 पुव्वरतावरतकालसमयंसि कु-डुंबजागरियं जागरमाणी-ए इमेयारुवे अ[ब्भ]ज्जत्थिए
 ५ ससुप्पन्ने-एवं खलु पूस-नंदी राया सिरीए देवीए माइभत्ते जाव विहरइ तं एएणं
 वक्खेवेणं नो संचाएमि अहं पूस-नंदिणा र-न्ना सद्धिं उरालाई० भुंजमाणी विहरित्तए
 तं सेयं खलु मम सि(री)रिं दे-विं अग्निपओणेण वा सत्थ० विस० मंतप्पओणेण वा
 जीवियाओ ववरो(वे)वित्तए २ ता पूसनंदि[णा]रन्ना सद्धिं उरालाई भोगभोगाई
 भुंजमाणीए विहरित्तए, एवं संपेहेइ २ ता सिरीए देवीए अंतराणि य ३ पडि-

जागरमाणी विहरइ, तए णं सा सिरी देवी अ-न्नया कया-इ मज्जाइया विरहियसय-
णिज्जंसि सुहपसुत्ता जाया यावि होत्था, इमं च णं देवदत्ता देवी जेणेव सिरी-देवी
तेणेव उवागच्छइ २ ता (सिरीदेवीं) मज्जाइयं विरहियसयणिज्जंसि सुहपसुत्तं
पासइ २ ता दिसालोयं करेइ २ ता जेणेव भत्तवरे तेणेव उवागच्छइ २ ता लोहदंडं
परासुसइ २ ता लोहदंडं तावेइ [२] तत्तं समजोइभूयं फुल्लकिंसुयसमाणं संडासएणं
गहाय जेणेव सिरी-देवी तेणेव उवागच्छइ २ ता सिरीए देवीए अ-वाणंसि पक्खि-
(वि)वइ, तए णं सा सिरी-देवी महया २ सहेणं आरसित्ता कालधम्मणा संजुत्ता,
तए णं तीसे सिरीए देवीए दासचेडीओ आरसियस(इं)इ सोच्चा निसम्म जेणेव सिरी-
देवी तेणेव उवागच्छंति [२] देवदत्तं दे-विं तओ अवक्कममाणं पासंति २ ता जेणेव
सिरी-देवी तेणेव उवागच्छंति [२] सि-रिं दे-विं निप्पाणं नि(च्चि)चेट्ठं जी(व)विय-
विप्पजडं पासंति २ ता हा हा अहो अकजमितिकडु रोयमाणीओ कंदमाणीओ
विलवमाणीओ जेणेव पूस(-दि)नंदी राया तेणेव उवागच्छंति २ ता पूसनं(दी)दिं
रायं एवं वयासी-एवं खलु सामी ! सिरी-देवी देवदत्ताए देवीए अकाले चैव
जीवियाओ ववरोविया, तए णं से पूस-नंदी राया तासिं दासचेडीणं अंतिए एयमट्ठं
सोच्चा निसम्म महया माइसोएणं अप्फु-न्ने समाणे परसु-नियत्ते-विव चंपगवरपायवे
धस-त्ति धरणीयलंसि सव्वंगेहिं संनि-वडिए, तए णं से पूस-नंदी राया सुहुत्तंतरे(णं)ण
आसत्थे वीसत्थे समाणे बहूहिं राईसर जाव सत्थवाहेहिं मित्त जाव परियणेण (य)
सद्धिं रोयमाणे ३ सिरीए देवीए महया इट्ठीए नीहरणं करेइ २ ता आसुरत्ते०
देवदत्तं देविं पुरिसेहिं गिण्हावे० ते(एए)णं विहाणेणं वज्झं आणवेइ, तं एवं खलु
गोयमा ! देवदत्ता देवी पुरापुराणाणं विहरइ । देवदत्ता णं भंते ! देवी इओ
कालमासे कालं किच्चा कहिं ग(च्छि)मिहि० कहिं उववज्झिहिइ ? गोयमा ! असीइं
वासाइं परमाउयं पालइत्ता कालमासे कालं किच्चा इमीसे रयणप्पभाए पुढवीए
नेरइयत्ताए उववन्ना संसारो वणस्सइ****, तओ अणंतरे उववट्ठित्ता गंगपुरे नयरे
हंसत्ताए पच्चायाहिइ, से णं तत्थ साउणिएहिं व-हिए समाणे तत्थैव गंगपुरे नयरे
सेट्ठिकु० बोहिं****सोहम्मे****महाविदेहे वासे सिज्झिहि० ॥ णिक्खेवो॥ २९ ॥

नवमं अज्झयणं समत्तं ॥

जइ णं भंते ! समणेणं भगवया महावीरेणं दसमस्स उक्खे-वो एवं खलु जंबू ।
तेणं कालेणं तेणं समएणं वद्धमाणपुरे ना-मं नयरे होत्था, विजयवद्धमाणे उज्जाणे,
विजयमित्ते राया, तत्थ णं धणदेवे नामं सत्थवाहे होत्था अट्ठे०, पियं(गु)गू ना-मं
भारिया, अंजू दारिया जाव सरीरा, समोसरणं परिसा जाव पडिगया, तेणं कालेणं

तेणं समएणं जेट्ठे जाव अडमाणे जाव विजयमित्तस्स र-न्नो गिहस्स असोगवणियाए
 अदूरसामंतेणं वी(वि)इवयमाणे पासइ एणं इत्थियं सुक्कं भुक्खं निम्मंसं किडिक्किडिया-
 भूयं अट्टिचम्मावणद्धं नीलसाडग-नियत्थं कट्ठाई कलुणाई वी-सराई कूवमाणं पासइ०
 चिंता तहेव जाव एवं वयासी-सा णं भंते ! इत्थिया पुव्वभवे [के] का आ-सी ?,
 वागरणं-एवं खलु गोयमा ! तेणं कालेणं तेणं समएणं इहेव जंबुदीवे दीवे भारहे
 वासे ईदपुरे नामं नयरे होत्था, तत्थ णं ईददत्ते राया पुढवीसिरी ना-मं गणिया
 होत्था वण्णओ, तए णं सा पुढ-वीसिरी गणिया ईदपुरे नयरे बहवे राईसर जाव
 प्पभि[ई]यओ बहूहिं चुण्णप्पओगेहि य जाव आभि-ओगेता उरालाई माणुस्सगाई
 भोगभोगाई भुंजमा-णी विहरइ, तए णं सा पुढवीसिरी गणिया एयकम्मा ४
 सुबहुं० समज्जिणित्ता पणतीसं वाससयाई परमाउयं पालइत्ता कालमासे कालं किच्चा
 छट्ठीए पुढवीए उक्कोसेणं० नेरइयत्ताए उवव-च्चा, सा णं तओ अणंतरं उव्वट्ठित्ता
 इहेव वद्धमाणपुरे नयरे धणदेवस्स सत्थवाहस्स पियं गुभारियाए कुच्छित्ति दारिय-
 त्ताए उववच्चा, तए णं सा पियं गुभारिया नवण्हं मासाणं....दारियं पयाया, नामं
 अं(जू)जुसिरी, सेसं जहा देवदत्ताए । तए णं से विजए राया आसवाह० जहा
 वेसमणदत्ते तहा अंजुं पासइ नवरं अप्पणो अट्ठाए वरेइ जहा तेयली जाव अंजुए
 भारियाए सद्धिं उप्पिं जाव विहरइ, तए णं तीसे अंजुए देवीए अ-ज्या कया-इ
 जो-णिस्सूले पाउब्भूए यावि होत्था, तए णं [से] विजए राया कोडुंबियपुरिसे सहा-
 वेइ २ ता एवं वयासी-गच्छह णं देवाणुप्पिया ! वद्धमा(णे)णपुरे नयरे सिंघा-
 डग जाव एवं व-यह-एवं खलु देवाणुप्पिया ! विजय० अंजुए देवीए जोणिस्सूले
 पाउब्भूए जो णं इ० वे-ज्जो वा ६....जाव उग्गोसेंति, तए णं ते बहवे वे-ज्जा०
 ६ इमं एयाह्वं सोच्चा निसम्म जेणेव विज(य)ए राया तेणेव उवागच्छंति०
 उप्पत्तियाहिं० परिणामेमाणा इच्छंति अंजुए देवीए जोणिस्सूलं उवसामित्तए
 नो संचाएंति उवसामित्तए, तए णं ते बहवे वे-ज्जा य ६ जाहे नो संचाएंति
 अंजु० जोणिस्सूलं उवसामित्तए ताहे संता तंता परितंता जामेव दिसिं पाउ-
 ँभूया तामेव दिसिं पडिगया, तए णं सा अंजु-देवी ताए वेयणाए अभिभूया
 समा-णी सुक्का भुक्खा निम्मंसा कट्ठाई कलुणाई वी-सराई विलवइ, एवं खलु गोयमा !
 अंजु-देवी पुरापोराणाणं जाव विहरइ । अंजु णं भंते ! देवी इओ कालमासे कालं
 किच्चा कहिं गच्छिहि० कहिं उववज्जिहिइ ? गोयमा ! अंजु णं देवी नउई वासाई
 परमाउयं पालइत्ता कालमासे कालं किच्चा इमीसे रयणप्पभाए पुढवीए नेरइयत्ताए
 उववज्जिहिइ, एवं संसारो जहा पढमे तहा नेयव्वं जाव वणस्सइ०, सा णं तओ

अणंतरं उव्वट्ठिता सव्वओभदे नयरे मयूरत्ताए पच्चायाहिइ, से णं तत्थ साउणिएहिं व-हिए समाणे तत्थेव सव्वओभदे नयरे सेट्ठिकुलंसि पुत्तत्ताए पच्चायाहिइ, से णं तत्थ उम्मुक्कबालभावे तहारूवाणं थेराणं० केवलं बोहिं बुज्झहिइ पव्वजा सोहम्मे०, से णं ताओ देवलोगाओ आउक्खए० कहिं गच्छहि० कहिं उव्वज्झि-हिइ ? गोयमा ! महाविदे-हे जहा पढमे जाव सिज्झहिइ जाव अंतं काहिइ । एवं खलु जंबू ! समणेणं जाव संपत्तेणं दुहविवागाणं दसमस्स अज्झयणस्स अयमट्ठे प-न्नत्ते, सेवं भंते० ॥ ३० ॥ **दसमं अज्झयणं समत्तं ॥ दुहविवागो दससु अज्झयणेषु ॥ पढमो सुयक्खंधो समत्तो ॥**

तेणं कालेणं तेणं समएणं रायगिहे नयरे गुणसि(ले)लए उज्जाणे सु(सो)हम्मे समोस-ढे जंबू जाव पज्जुवासमाणे एवं वयासी-जइ णं भंते ! समणेणं जाव संप-त्तेणं दुहविवागाणं अयमट्ठे प-न्नत्ते सुहविवागाणं भंते ! समणेणं जाव संपत्तेणं के अट्ठे प-न्नत्ते ?, तए णं से सुहम्मे अणगारे जंबुं अणगारं एवं वयासी-एवं खलु जंबू ! समणेणं जाव संपत्तेणं सुहविवागाणं दस अज्झयणा प-न्नत्ता, तं०-(गा०) सुबाहू भद-नंदी य सुजाए य सुवासवे । तहेव जिणदासे [य] धण(-ती)वई य महब्बले ॥ १ ॥ भद-नंदी महब्बंदे वरदत्ते [तहेव य] । जइ णं भंते ! समणेणं जाव संपत्तेणं सुहविवागाणं दस अज्झयणा प-न्नत्ता पढमस्स णं भंते ! अज्झय-णस्स सुहविवागाणं जाव संपत्तेणं के अट्ठे प-न्नत्ते ?, तए णं से सुहम्मे अणगारे जंबुं अणगारं एवं वयासी-एवं खलु जंबू ! तेणं कालेणं तेणं समएणं ह(त्थी)त्थि-सीसे-नामं नयरे होत्था रिद्ध०, त[त्थ]स्स णं हत्थिसीसस्स (नग(णय)रस्स) बहिया उत्तरपुर-त्थिमे विसीभाए एत्थ णं पुप्फकरंडए नामं उज्जाणे होत्था सव्वो-उय०, तत्थ णं हत्थिसीसे नयरे अदीणसत्तू-नामं राया होत्था महया०, तस्स णं अदीणसत्तुस्स र-न्नो धा-रिणीपामो० देवीसहस्सं ओरोहे यावि होत्था, तए णं सा धा-रिणी देवी अ-न्नया कयाइ तंसि तारिसगंसि वास(भवणं)घरंसि सीहं सुमिणे पासइ जहा मेहस्स जम्मणं तहा भाणियव्वं जाव सुबाहुकुमा० अलं-भोगसम० जाणंति० पंच-पासायवडिसगसयाइं कार(करा)वैति अब्भुग्गय० भवणं एवं जहा महाबलस्स र-न्नो नवरं पुप्फचूलापामोक्खाणं पंचण्हं रायवरकन्नयसयाणं एगदि-वसेणं पाणिं गिण्हावैति, तहेव पंचसइओ [दाओ] जाव उप्पि पासायवरगए फुड्ड[माणेहिं] जाव विहरइ, तेणं कालेणं तेणं समएणं समणे भगवं महावीरे समो-सढे परिसा निग्गया अदीणसत्तू जहा को[कू]णि(ए)ओ निग्ग-ओ सुबाहू-वि जहा जमाली तहा रहेणं निग्गए जाव धम्मो कहिओ रा(या)यपरिसा (पडि)गया, तए

णं से सुबाहुकुमारे समणस्स भगवओ महावीरस्स अंतिए धम्मं सोच्चा निसम्म
 हट्ठुट्ठे उट्ठाए उट्ठेइ जाव एवं वयासी-सद्दहासि णं भंते ! निग्गंथं पावय० जहा णं
 देवाणुप्पियाणं अंतिए बहवे राईसर जाव अहं णं देवाणुप्पियाणं अंतिए पं(च अ)-
 चाणुव्वइयं सत्तसिक्खावइयं, गिहिधम्मं पडि०, अहासुहं. मा पडिवंथं करेइ, तए
 णं से सुबाहु समणस्स भगवओ महावीरस्स अंतिए पंचाणुव्वइयं सत्तसिक्खावयं.
 गिहिधम्मं पडिवज्जइ २ ता तमेव० दु-रुहइ [२] जामेव०, तेणं कालेणं तेणं स०
 जेठ्ठे अंतेवासी इंदभूई जाव एवं वयासी-अहो णं भंते ! सुबाहुकुमारे इट्ठे इट्ठरुवे
 कंते कंतरुवे पिए पियरुवे मणु-चे २ मणामे २ सोमे सुभगे पियदंसणे सुरुवे,
 बहुजणस्स-वि य णं भंते ! सुबाहुकुमारे इट्ठे इट्ठरुवे ५ सोमे ४ साहुजणस्स-वि य
 णं भंते ! सुबाहुकुमारे इट्ठे इट्ठरुवे ५ जाव सुरुवे सुबाहुणा भंते ! कुमारेणं इमा
 एयारुवा उराला माणुस्सरिद्धी कि-न्ना लद्धा कि-न्ना पत्ता कि-न्ना अभिसम-न्नागया [?] (को)
 के वा एस आ-सी पुव्वभवे० एवं खलु गोयमा ! तेणं कालेणं तेणं समएणं
 इहेव जंबुदीवे दीवे भारहे वासे हत्थिणाउरे नामं नयरे होत्था रिद्ध०, तत्थ णं
 हत्थिणाउरे नयरे सुमुहे नामं गाहावई परिवसइ अट्ठे०, तेणं कालेणं तेणं समएणं
 धम्मघोसा-नामं थेरा जाइसंप-न्ना जाव पंचहिं समणसएहिं सद्धिं संपरिवुडा पुव्वा-
 णुपुव्वि चरमाणा गामाणुगामं द्दुज्जमाणा जेणेव हत्थिणाउरे नयरे जेणेव सहस्सं-
 बवणे उज्जाणे तेणेव उवागच्छंति २ ता अहापडिरुवं उग्गहं उग्गिगण्हिता (णं)
 संजमेणं तवसा अप्पाणं भावेमाणा विहरन्ति, तेणं कालेणं तेणं समएणं धम्मघो-
 साणं थेराणं अंतेवासी सुदत्ते नामं अणगारे उराले जाव लेस्से मासंमासेणं खम-
 माणे विहरइ, तए णं से सुदत्ते अणगारे मासक्खमणपारणगंसि पढमाए पोरिसीए
 सज्जायं करेइ जहा गोयमसामी तहेव धम्मघोसे थेरे आपुच्छइ जाव अडमाणे
 सुमुहस्स गाहावइस्स गे(-हं)हे अणुपविट्ठे, तए णं से सुमु(ह)हे गाहावई सुदत्तं
 अणगारं एज्जमाणं पासइ २ ता हट्ठुट्ठे आसणाओ अब्भुट्ठेइ २ ता पाय[वी]पीढाओ
 पच्चोरुहइ २ ता पाउयाओ ओमुयइ २ ता एगसाडियं उत्तरासंगं करेइ २ ता सुदत्तं
 अणगारं सत्तट्ठ-पयाई अणुगच्छइ २ ता तिक्खुत्तो आयाहि(णं) पयाहिणं करेइ २ ता
 वंदइ नमंसइ वं० २ ता जेणेव भत्तघरे तेणेव उवागच्छइ २ ता सयहत्थेणं
 विउलेणं असणपा० पडिला(भे)भिस्सामीति तुट्ठे...., तए णं तस्स सुमुहस्स
 गाहावइस्स तेणं दव्वसुद्धेणं ति विहेणं तिकरणसुद्धेणं सुदत्ते अणगारे पडिलामिए
 समाणे संसारे परितीकए मणुस्साउए निबद्धे गेहंसि य से इमाई पंच-दिव्वाई
 पाउब्भूयाई तं०-वसुहारा वुट्ठा दसद्धवणे कुसुमे निवाइए चेलुक्खेवे कए आहयाओ

देवदुंदुभीहीओ अंतरा-वि य णं आ(का)गा(संसि)से अहो दाणमहो दाणं घु०
 हत्थिणाउरे सिंघाडग जाव पहेसु बहुजणो अ-न्नम-न्नस्स एवं आइक्खइ ४-ध-जे
 णं देवाणुप्पि० । सुमुहे गाहाव० जाव तं ध-जे णं देवाणुप्पिया । सुमुहे गाहाव० ।
 तए णं से सुमुहे गाहावइ बहूइं वाससयाइं आउयं पाल[यि]इत्ता कालमासे कालं
 किच्चा इहेव हत्थिसीसे नयरे अदीणसत्तुस्स र-ज्जो धा-रिणीए देवीए कुच्छिसि
 पुत्ताए उववजे, तए णं सा धा-रिणी देवी सयणिजंसि सुत्ताजाग०
 ओहीरमाणी २ तहेव सीहं पासइ सेसं तं चेव जाव उप्पि पासा० विहरइ,
 तं ए[यं]वं खलु गोयमा । सुबाहुणा इमा एयारूवा माणुस्सरिद्धी लद्धा पत्ता
 अभिसम-न्नागया, पभू णं भंते । सुबाहुकुमारे देवाणुप्पियाणं अंतिए मुंडे भविता
 अ-गाराओ अणगारियं पव्वइत्तए ? हंता पभू, तए णं से भगवं गोयमे समणं
 भगवं० वंदइ नमंसइ वं० २ ता संजमेणं तवसा अप्पाणं भावेमाणे विहरइ, तए
 णं से समणे भगवं महावीरे अ-न्नया कयाइ हत्थिसीसाओ नयराओ पुप्फ[ग]क-
 रंडयाओ उज्जाणाओ पडि-निक्खमइ २ ता बहिया जणवयविहारं विहरइ, तए णं
 से सुबाहुकुमारे समणोवासए जाए अभिगयजीवाजीवे जाव पडिलामेमाणे विहरइ ।
 तए णं से सुबाहुकुमारे अ-न्नया कया(ई)इ चाउइसट्टमुद्धिट्टपुण्णमासिणीसु जेणेव
 पोसहसाला तेणेव उवागच्छइ २ ता पोसहसालं पमज्जइ २ ता उच्चारपासवणभूमिं
 पडिले(ह)हेइ २ ता दब्भसंथा(रं)रगं संथरइ २ ता दब्भसंथारं दु-रुहइ २ ता
 अट्ठमभत्तं पणिण्हइ २ ता पोसहसालाए पोसहिए अट्ठमभ[त्त]तिए पोसहं पडि-
 जागरमाणे विहरइ, तए णं तस्स सुबाहुस्स कुमारस्स पुव्वरत्तावरत्तकालसमयंसि
 धम्मजागरियं जागरमाणस्स इमेयारूवे अ(ब्भ)ज्झत्थिए ५-ध-न्ना णं ते गामा-
 गर-नगर जाव संनिवेसा जत्थ णं समणे भगवं महावीरे जाव विहरइ, ध-न्ना णं
 ते राईसरतलवर० जे णं समणस्स भगवओ महावीरस्स अंतिए मुंडा जाव पव्व-
 यंति, ध-न्ना णं ते राईसरतलवर० जे णं समणस्स भगवओ महावीरस्स अंतिए
 पंचाणुव्वइयं जाव गिहिधम्मं पडिवजंति, ध-न्ना णं ते राईसर जाव जे णं सम-
 णस्स भगवओ महावीरस्स अंतिए धम्मं सुणेंति, तं जइ णं समणे भगवं महावीरे
 पुव्वाणुपुव्वि चरमाणे गामाणुगामं दूइजमाणे इहमागच्छिज्जा जाव विहरिज्जा त-ए
 णं अहं समणस्स भगवओ. अंतिए मुंडे भविता जाव पव्वएज्जा, तए णं समणे
 भगवं महावीरे सुबाहुस्स कुमारस्स इमं एयारूवं अज्झत्थियं जाव वियाणिता
 पुव्वाणुपुव्वि जाव दूइजमाणे जेणेव हत्थिसीसे नयरे जेणेव पुप्फ[ग]करंडए उज्जाणे
 तेणेव उवागच्छइ २ ता अद्वापडिइवं उगगहं गिणिहत्ता संजमेणं तवसा अप्पाणं

भावेमाणे विहरइ परिसा राया निग्गया । तए णं तस्स सुबाहु(य)स्स कुमार० तं
महया जहा पढमं तहा निग्गओ धम्मो कहिओ परिसा राया पडिगया, तए णं से
सुबाहुकुमारे समणस्स भगवओ महावीरस्स अंतिए धम्मं सोच्चा निसम्म हट्ठुट्ठ०
जहा मेहे तहा अम्मापियरो आपुच्छइ निक्खमणाभिसेओ तहेव जाव अणगारे
जाए इ(ई)रियासमिए जाव बंभयारी, तए णं से सुबा(हु)हू अणगारे समणस्स
भगवओ महावीरस्स तहारूवाणं थेराणं अंतिए सामाइयमाइयाई एक्कारस अंगाई
अहिजइ २ ता बहूहिं चउत्थछट्ठुट्ठम० तवो[व]विहाणेहिं अप्पाणं भावित्ता बहूई
वासाई सामणपरियायं पाउणिता मासियाए संलेहणाए अप्पाणं झुत्तित्ता सट्ठिं
भत्ताई अणसणाए छे(दि)इत्ता आलोइयपडिक्कंते समाहिपत्ते कालमासे कालं किच्चा
सोहम्मे कप्पे देवत्ताए उवव-जे, से णं ता(त)ओ देवलोगाओ आउक्खएणं भव-
क्खएणं ठिइक्खएणं अणंतरं चयं चइत्ता माणुस्सं विग्गई ल(भि)हिहिइ २ ता
केवलं बोहिं बुज्झहिइ २ ता तहारूवाणं थेराणं अंतिए मुंडे जाव पव्वइस्सइ, से
णं तत्थ बहूई वासाई सामणं पाउणिहिइ आलोइयपडिक्कंते समाहि० काल०
सणंकुमारे कप्पे देवत्ताए उवव०, से णं ताओ देवलो(या)गाओ““माणुस्सं पव्वज्जा
बंभलोए माणुस्सं तओ महाउक्के तओ माणुस्सं आणए० देवे तओ माणुस्सं तओ
आर(ण)णे० देवे तओ माणुस्सं सव्वइसिद्धे, से णं तओ अणंत[रे]रं उव्वट्ठित्ता
महाविदेहे वासे जा[ई]व अट्ठाई““जहा दढपइ-जे० सिज्झहिइ [५], एवं
खलु जंबू ! समणेणं जाव संपत्तेणं सुहविवागाणं पढमस्स अज्झयणस्स अयमट्ठे
प० ॥ ३१ ॥ पढमं अज्झयणं समत्तं ॥

दोच्च(वित्थिय)स्स (णं) उक्खे-वो एवं खलु जंबू ! तेणं कालेणं तेणं समएणं
उसभपुरे नयरे थूमकरं(ड-ग)डे उज्जाणे धणावहो राया सरस्स(इ)ई देवी सुमिण-
दंसणं कह(णा)णं ज(म्मं)मणं बालत्तणं कला-ओ य जो(जु)व्व(णे)णं पाणिग्गहणं
दाओ पासा० भोगा य जहा सुबाहु-स्स नवरं भट्ठनंदी कुमारं सि-रिदेवीपा(सु)मो-
क्खाणं पंचस० सामीसमोसरणं सावगधम्मं““पुव्वभवपुच्छा महाविदेहे वासे
पुंडरीकिणी नयरी विजयए कुमारं जुगबाहु तित्थ(क)यरे पडिलाभिए म(मा)णु-
स्साउए निबद्धे इहं उप्प-जे सेसं जहा सुबाहु-स्स जाव महाविदेहे वासे सिज्झि-
हिइ० ॥ विइयं अज्झयणं समत्तं ॥

तच्चस्स उक्खे० वीरपुरं नयरं मणोरमं उज्जाणं वीरकम्हमित्ते राया सिरी देवी
सुजाए कुमारं बलसिरीपामो० पंचसयक० सामीसमोसरणं पुव्वभवपुच्छा उडुयारे

नयरे उसभदत्ते गाहावई पुप्फदत्ते अणगारे पडिला० मणुस्ताउए निबद्धे इह उप्प-त्ते जाव महाविदेहे वासे सिज्झिहि० ॥ तइयं अज्झयणं समत्तं ॥

चउ-त्थस्स उक्खे० विजयपुरं नयरं (मणोरमं) नंदणवणं उज्जाणं वासवदत्ते राया कण्हा देवी सुवासवे कुमारे भद्दापामोक्खणं पंचस० जाव पुव्वभवे कोसंबी नयरी धणपाळे राया वेसमणभेदे अणगारे पडिलाभिए इ(हं)ह जाव सि० ॥ चोत्थं अज्झयणं समत्तं ॥

पंचमस्स उक्खे० सोगंधिया नयरी नीलासोए उज्जाणे अप्पडिहओ राया सुकला देवी महचंदे कुमारे तस्स अरहदत्ता भारिया जिणदासो पुत्तो तित्थ(ग)य-रागमणं जिणदासपुव्वभवो म(ज्झि)ज्झमिया नयरी मेहरहो राया सु(ह)धम्मो अणगारे पडिलाभिए जाव सि० ॥ पंचमं अज्झयणं समत्तं ॥

छट्ठस्स उक्खे० कणगपुरं नयरं सेयासोयं उज्जाणं पियचंदो राया सुभदा देवी वेसमणे कुमारे जुवराया सि-रिदेवीपामो० पंचस० क० पाणिग्गहणं तित्थ-यरागमणं धणवई जुवरा(या)यपुत्ते जाव पुव्वभवो मणिवया नयरी मित्तो राया संभूति-अणगारे पडिलाभिए जाव सि० ॥ छट्ठं अज्झयणं समत्तं ॥

सत्तमस्स उक्खे० महापुरं नयरं रत्तासोगं उज्जाणं बळे राया सुभदा देवी म(हा)हब्बळे कुमारे रत्तवईपामो० पंचस० क० पाणिग्गहणं तित्थ-यरागमणं जाव पुव्वभवो मणिपुरं नयरं नागदत्ते गाहावई इंदपुरे अणगारे पडिलाभिए जाव सि० ॥ सत्तमं अज्झयणं समत्तं ॥

अट्ठमस्स उक्खे० सुघोसं नयरं देवरमणं उज्जाणं अज्जु(ण)णो राया तत्तव-ई देवी भहनंदी कुमारे सि-रिदेवीपामो० पंचस० जाव पुव्वभवे महाघोसे नयरे धम्मघोसे गाहावई धम्मसीहे अणगारे पडिलाभिए जाव सि० ॥ अट्ठमं अज्झ-यणं समत्तं ॥

नवमस्स उक्खे० चंपा नयरी पुण्णभेदे उज्जाणे दत्ते राया द(र)त्तव-ई देवी महचंदे कुमारे जुवराया सिरिकंतापामो० पंचस० क० जाव पुव्वभवो तिगिच्छी नयरी जियस(त्तु)तू राया धम्मवीरिए अणगारे पडिलाभिए जाव सि० ॥ नवमं अज्झयणं समत्तं ॥

(जति णं) दसमस्स उक्खे-वो एवं खलु जंबू! तेणं कालेणं तेणं समएणं सागेए नामं नयरे होत्था उत्तरकुरुउज्जाणे मित्त-नंदी राया सिरिकंता देवी वर-द-त्ते कुमारे वरसेणापामो० पंच देवीसया तित्थ-यरागमणं सावगधम्मं.....पुव्व-

भ(वो)वपुच्छा सयदुवारे नयरे विमलवाहणे राया धम्मर(चि)ई नामं अणगारं
 एज्जमाणं पासइ० पडिलाभिए समा० मणुस्साउए निबुद्धे इहं उप्पन्ने सेसं जहा
 सुबाहु-स्स कुमारस्स चिंता जाव पव्वजा कप्पंतरिओ जाव सव्वद्वसिद्धे तओ
 महाविदेहे जहा दढपइओ जाव सिज्झहिइ ५। एवं खलु जंबू ! समणेणं (भगवया
 महावीरेणं) जाव संपत्तेणं सुहविवागाणं दसमस्स अज्झयणस्स अयमट्ठे प-न्नत्ते,
 सेवं भंते !० ॥ ३२ ॥ दसमं अज्झयणं समत्तं ॥ सुहवि० ॥ वीओ सुय-
 क्खंधो समत्तो ॥ विवागसुयं समत्तं ॥

विवागसुयस्स दो सुयक्खंधा दुहविवागो य सुहविवागो य, तत्थ दुहविवागे
 दस अज्झयणा ए(क)कसरगा दससु चेव दिवसेसु उद्दिस्सिज्जंति, एवं सुहविवा-
 (गो)गे-वि, सेसं जहा आयास्स ॥

॥ एकारसमं अंगं समत्तं ॥

तस्समत्तीए

एकारस अंगाई समत्ताई

॥ सव्वसिलोगसंखा ३५००० ॥

